



# **The Holy Bible: Maori Translation**

by

*Anonymous*

## About The Holy Bible: Maori Translation

**Title:** The Holy Bible: Maori Translation  
**URL:** <http://www.ccel.org/ccel/bible/mi.html>  
**Author(s):** Anonymous  
**Publisher:** Grand Rapids, MI: Christian Classics Ethereal Library  
**Description:** This Bible translation was converted automatically from data files made available by the Unbound Bible project. Book names, introductions, titles, paragraphs, and the like were not available, so standard English names have been used. Therefore this file would benefit from additional work by someone who has access to a print edition.  
**Source:** The Unbound Bible  
**Language:** mi  
**Rights:** Public Domain  
**Date Created:** 2002-12-31  
**CCEL Subjects:** All; Bible

## Table of Contents

<i>About This Book.</i> . . . . .	p. ii
Title Page. . . . .	p. 1
Old Testament. . . . .	p. 2
Genesis. . . . .	p. 2
Genesis 1. . . . .	p. 2
Genesis 2. . . . .	p. 3
Genesis 3. . . . .	p. 5
Genesis 4. . . . .	p. 6
Genesis 5. . . . .	p. 8
Genesis 6. . . . .	p. 9
Genesis 7. . . . .	p. 11
Genesis 8. . . . .	p. 12
Genesis 9. . . . .	p. 13
Genesis 10. . . . .	p. 15
Genesis 11. . . . .	p. 16
Genesis 12. . . . .	p. 18
Genesis 13. . . . .	p. 19
Genesis 14. . . . .	p. 20
Genesis 15. . . . .	p. 21
Genesis 16. . . . .	p. 23
Genesis 17. . . . .	p. 24
Genesis 18. . . . .	p. 25
Genesis 19. . . . .	p. 27
Genesis 20. . . . .	p. 29
Genesis 21. . . . .	p. 30
Genesis 22. . . . .	p. 32
Genesis 23. . . . .	p. 34
Genesis 24. . . . .	p. 35
Genesis 25. . . . .	p. 38
Genesis 26. . . . .	p. 40
Genesis 27. . . . .	p. 42
Genesis 28. . . . .	p. 44
Genesis 29. . . . .	p. 46
Genesis 30. . . . .	p. 48
Genesis 31. . . . .	p. 50

Genesis 32. . . . .	p. 53
Genesis 33. . . . .	p. 55
Genesis 34. . . . .	p. 56
Genesis 35. . . . .	p. 58
Genesis 36. . . . .	p. 59
Genesis 37. . . . .	p. 61
Genesis 38. . . . .	p. 63
Genesis 39. . . . .	p. 65
Genesis 40. . . . .	p. 66
Genesis 41. . . . .	p. 67
Genesis 42. . . . .	p. 70
Genesis 43. . . . .	p. 73
Genesis 44. . . . .	p. 75
Genesis 45. . . . .	p. 77
Genesis 46. . . . .	p. 78
Genesis 47. . . . .	p. 80
Genesis 48. . . . .	p. 82
Genesis 49. . . . .	p. 83
Genesis 50. . . . .	p. 85
Exodus. . . . .	p. 87
Exodus 1. . . . .	p. 87
Exodus 2. . . . .	p. 88
Exodus 3. . . . .	p. 89
Exodus 4. . . . .	p. 91
Exodus 5. . . . .	p. 93
Exodus 6. . . . .	p. 94
Exodus 7. . . . .	p. 96
Exodus 8. . . . .	p. 97
Exodus 9. . . . .	p. 99
Exodus 10. . . . .	p. 101
Exodus 11. . . . .	p. 102
Exodus 12. . . . .	p. 103
Exodus 13. . . . .	p. 106
Exodus 14. . . . .	p. 107
Exodus 15. . . . .	p. 109
Exodus 16. . . . .	p. 111
Exodus 17. . . . .	p. 113
Exodus 18. . . . .	p. 114
Exodus 19. . . . .	p. 115
Exodus 20. . . . .	p. 117

Exodus 21. . . . .	p. 118
Exodus 22. . . . .	p. 120
Exodus 23. . . . .	p. 122
Exodus 24. . . . .	p. 123
Exodus 25. . . . .	p. 124
Exodus 26. . . . .	p. 126
Exodus 27. . . . .	p. 128
Exodus 28. . . . .	p. 130
Exodus 29. . . . .	p. 132
Exodus 30. . . . .	p. 135
Exodus 31. . . . .	p. 137
Exodus 32. . . . .	p. 138
Exodus 33. . . . .	p. 140
Exodus 34. . . . .	p. 141
Exodus 35. . . . .	p. 143
Exodus 36. . . . .	p. 145
Exodus 37. . . . .	p. 147
Exodus 38. . . . .	p. 149
Exodus 39. . . . .	p. 150
Exodus 40. . . . .	p. 153
Leviticus. . . . .	p. 155
Leviticus 1. . . . .	p. 155
Leviticus 2. . . . .	p. 156
Leviticus 3. . . . .	p. 157
Leviticus 4. . . . .	p. 158
Leviticus 5. . . . .	p. 160
Leviticus 6. . . . .	p. 161
Leviticus 7. . . . .	p. 163
Leviticus 8. . . . .	p. 165
Leviticus 9. . . . .	p. 167
Leviticus 10. . . . .	p. 168
Leviticus 11. . . . .	p. 169
Leviticus 12. . . . .	p. 172
Leviticus 13. . . . .	p. 172
Leviticus 14. . . . .	p. 176
Leviticus 15. . . . .	p. 179
Leviticus 16. . . . .	p. 181
Leviticus 17. . . . .	p. 183
Leviticus 18. . . . .	p. 184
Leviticus 19. . . . .	p. 185

Leviticus 20. . . . .	p. 187
Leviticus 21. . . . .	p. 189
Leviticus 22. . . . .	p. 190
Leviticus 23. . . . .	p. 192
Leviticus 24. . . . .	p. 195
Leviticus 25. . . . .	p. 196
Leviticus 26. . . . .	p. 199
Leviticus 27. . . . .	p. 201
Numbers. . . . .	p. 203
Numbers 1. . . . .	p. 203
Numbers 2. . . . .	p. 206
Numbers 3. . . . .	p. 208
Numbers 4. . . . .	p. 210
Numbers 5. . . . .	p. 213
Numbers 6. . . . .	p. 215
Numbers 7. . . . .	p. 216
Numbers 8. . . . .	p. 220
Numbers 9. . . . .	p. 222
Numbers 10. . . . .	p. 223
Numbers 11. . . . .	p. 225
Numbers 12. . . . .	p. 227
Numbers 13. . . . .	p. 228
Numbers 14. . . . .	p. 229
Numbers 15. . . . .	p. 232
Numbers 16. . . . .	p. 234
Numbers 17. . . . .	p. 237
Numbers 18. . . . .	p. 238
Numbers 19. . . . .	p. 240
Numbers 20. . . . .	p. 241
Numbers 21. . . . .	p. 243
Numbers 22. . . . .	p. 244
Numbers 23. . . . .	p. 247
Numbers 24. . . . .	p. 249
Numbers 25. . . . .	p. 250
Numbers 26. . . . .	p. 251
Numbers 27. . . . .	p. 254
Numbers 28. . . . .	p. 255
Numbers 29. . . . .	p. 257
Numbers 30. . . . .	p. 259
Numbers 31. . . . .	p. 260

Numbers 32. . . . .	p. 263
Numbers 33. . . . .	p. 265
Numbers 34. . . . .	p. 267
Numbers 35. . . . .	p. 268
Numbers 36. . . . .	p. 270
Deuteronomy. . . . .	p. 271
Deuteronomy 1. . . . .	p. 271
Deuteronomy 2. . . . .	p. 274
Deuteronomy 3. . . . .	p. 276
Deuteronomy 4. . . . .	p. 277
Deuteronomy 5. . . . .	p. 280
Deuteronomy 6. . . . .	p. 282
Deuteronomy 7. . . . .	p. 283
Deuteronomy 8. . . . .	p. 285
Deuteronomy 9. . . . .	p. 286
Deuteronomy 10. . . . .	p. 288
Deuteronomy 11. . . . .	p. 289
Deuteronomy 12. . . . .	p. 291
Deuteronomy 13. . . . .	p. 293
Deuteronomy 14. . . . .	p. 295
Deuteronomy 15. . . . .	p. 296
Deuteronomy 16. . . . .	p. 298
Deuteronomy 17. . . . .	p. 299
Deuteronomy 18. . . . .	p. 300
Deuteronomy 19. . . . .	p. 302
Deuteronomy 20. . . . .	p. 303
Deuteronomy 21. . . . .	p. 304
Deuteronomy 22. . . . .	p. 306
Deuteronomy 23. . . . .	p. 307
Deuteronomy 24. . . . .	p. 309
Deuteronomy 25. . . . .	p. 310
Deuteronomy 26. . . . .	p. 311
Deuteronomy 27. . . . .	p. 313
Deuteronomy 28. . . . .	p. 314
Deuteronomy 29. . . . .	p. 318
Deuteronomy 30. . . . .	p. 320
Deuteronomy 31. . . . .	p. 321
Deuteronomy 32. . . . .	p. 323
Deuteronomy 33. . . . .	p. 326
Deuteronomy 34. . . . .	p. 327

Joshua . . . . .	p. 328
Joshua 1. . . . .	p. 328
Joshua 2. . . . .	p. 329
Joshua 3. . . . .	p. 331
Joshua 4. . . . .	p. 332
Joshua 5. . . . .	p. 333
Joshua 6. . . . .	p. 334
Joshua 7. . . . .	p. 336
Joshua 8. . . . .	p. 338
Joshua 9. . . . .	p. 340
Joshua 10. . . . .	p. 342
Joshua 11. . . . .	p. 345
Joshua 12. . . . .	p. 346
Joshua 13. . . . .	p. 347
Joshua 14. . . . .	p. 349
Joshua 15. . . . .	p. 350
Joshua 16. . . . .	p. 353
Joshua 17. . . . .	p. 353
Joshua 18. . . . .	p. 355
Joshua 19. . . . .	p. 356
Joshua 20. . . . .	p. 358
Joshua 21. . . . .	p. 359
Joshua 22. . . . .	p. 362
Joshua 23. . . . .	p. 364
Joshua 24. . . . .	p. 365
Judges . . . . .	p. 367
Judges 1. . . . .	p. 367
Judges 2. . . . .	p. 369
Judges 3. . . . .	p. 371
Judges 4. . . . .	p. 373
Judges 5. . . . .	p. 374
Judges 6. . . . .	p. 376
Judges 7. . . . .	p. 379
Judges 8. . . . .	p. 380
Judges 9. . . . .	p. 383
Judges 10. . . . .	p. 386
Judges 11. . . . .	p. 387
Judges 12. . . . .	p. 389
Judges 13. . . . .	p. 390
Judges 14. . . . .	p. 392



Judges 15. . . . .	p. 393
Judges 16. . . . .	p. 395
Judges 17. . . . .	p. 397
Judges 18. . . . .	p. 398
Judges 19. . . . .	p. 400
Judges 20. . . . .	p. 402
Judges 21. . . . .	p. 404
Ruth. . . . .	p. 406
Ruth 1. . . . .	p. 406
Ruth 2. . . . .	p. 407
Ruth 3. . . . .	p. 409
Ruth 4. . . . .	p. 410
1 Samuel. . . . .	p. 411
1 Samuel 1. . . . .	p. 412
1 Samuel 2. . . . .	p. 413
1 Samuel 3. . . . .	p. 415
1 Samuel 4. . . . .	p. 417
1 Samuel 5. . . . .	p. 418
1 Samuel 6. . . . .	p. 419
1 Samuel 7. . . . .	p. 421
1 Samuel 8. . . . .	p. 422
1 Samuel 9. . . . .	p. 423
1 Samuel 10. . . . .	p. 425
1 Samuel 11. . . . .	p. 427
1 Samuel 12. . . . .	p. 428
1 Samuel 13. . . . .	p. 429
1 Samuel 14. . . . .	p. 431
1 Samuel 15. . . . .	p. 434
1 Samuel 16. . . . .	p. 436
1 Samuel 17. . . . .	p. 437
1 Samuel 18. . . . .	p. 441
1 Samuel 19. . . . .	p. 443
1 Samuel 20. . . . .	p. 444
1 Samuel 21. . . . .	p. 447
1 Samuel 22. . . . .	p. 448
1 Samuel 23. . . . .	p. 449
1 Samuel 24. . . . .	p. 451
1 Samuel 25. . . . .	p. 453
1 Samuel 26. . . . .	p. 455
1 Samuel 27. . . . .	p. 457

1 Samuel 28. . . . .	p. 458
1 Samuel 29. . . . .	p. 459
1 Samuel 30. . . . .	p. 460
1 Samuel 31. . . . .	p. 462
2 Samuel. . . . .	p. 463
2 Samuel 1. . . . .	p. 463
2 Samuel 2. . . . .	p. 465
2 Samuel 3. . . . .	p. 466
2 Samuel 4. . . . .	p. 469
2 Samuel 5. . . . .	p. 470
2 Samuel 6. . . . .	p. 471
2 Samuel 7. . . . .	p. 473
2 Samuel 8. . . . .	p. 474
2 Samuel 9. . . . .	p. 475
2 Samuel 10. . . . .	p. 476
2 Samuel 11. . . . .	p. 478
2 Samuel 12. . . . .	p. 479
2 Samuel 13. . . . .	p. 481
2 Samuel 14. . . . .	p. 483
2 Samuel 15. . . . .	p. 486
2 Samuel 16. . . . .	p. 488
2 Samuel 17. . . . .	p. 489
2 Samuel 18. . . . .	p. 491
2 Samuel 19. . . . .	p. 493
2 Samuel 20. . . . .	p. 496
2 Samuel 21. . . . .	p. 498
2 Samuel 22. . . . .	p. 499
2 Samuel 23. . . . .	p. 502
2 Samuel 24. . . . .	p. 504
1 Kings. . . . .	p. 505
1 Kings 1. . . . .	p. 505
1 Kings 2. . . . .	p. 508
1 Kings 3. . . . .	p. 511
1 Kings 4. . . . .	p. 513
1 Kings 5. . . . .	p. 514
1 Kings 6. . . . .	p. 516
1 Kings 7. . . . .	p. 518
1 Kings 8. . . . .	p. 521
1 Kings 9. . . . .	p. 525
1 Kings 10. . . . .	p. 526

1 Kings 11. . . . .	p. 528
1 Kings 12. . . . .	p. 531
1 Kings 13. . . . .	p. 533
1 Kings 14. . . . .	p. 535
1 Kings 15. . . . .	p. 537
1 Kings 16. . . . .	p. 539
1 Kings 17. . . . .	p. 541
1 Kings 18. . . . .	p. 542
1 Kings 19. . . . .	p. 545
1 Kings 20. . . . .	p. 546
1 Kings 21. . . . .	p. 549
1 Kings 22. . . . .	p. 551
2 Kings. . . . .	p. 554
2 Kings 1. . . . .	p. 554
2 Kings 2. . . . .	p. 555
2 Kings 3. . . . .	p. 557
2 Kings 4. . . . .	p. 558
2 Kings 5. . . . .	p. 561
2 Kings 6. . . . .	p. 563
2 Kings 7. . . . .	p. 565
2 Kings 8. . . . .	p. 566
2 Kings 9. . . . .	p. 568
2 Kings 10. . . . .	p. 571
2 Kings 11. . . . .	p. 573
2 Kings 12. . . . .	p. 575
2 Kings 13. . . . .	p. 576
2 Kings 14. . . . .	p. 577
2 Kings 15. . . . .	p. 579
2 Kings 16. . . . .	p. 581
2 Kings 17. . . . .	p. 583
2 Kings 18. . . . .	p. 585
2 Kings 19. . . . .	p. 588
2 Kings 20. . . . .	p. 590
2 Kings 21. . . . .	p. 591
2 Kings 22. . . . .	p. 593
2 Kings 23. . . . .	p. 594
2 Kings 24. . . . .	p. 597
2 Kings 25. . . . .	p. 598
1 Chronicles. . . . .	p. 600
1 Chronicles 1. . . . .	p. 600

1 Chronicles 2. . . . .	p. 602
1 Chronicles 3. . . . .	p. 604
1 Chronicles 4. . . . .	p. 605
1 Chronicles 5. . . . .	p. 607
1 Chronicles 6. . . . .	p. 608
1 Chronicles 7. . . . .	p. 612
1 Chronicles 8. . . . .	p. 614
1 Chronicles 9. . . . .	p. 615
1 Chronicles 10. . . . .	p. 617
1 Chronicles 11. . . . .	p. 618
1 Chronicles 12. . . . .	p. 620
1 Chronicles 13. . . . .	p. 622
1 Chronicles 14. . . . .	p. 623
1 Chronicles 15. . . . .	p. 624
1 Chronicles 16. . . . .	p. 626
1 Chronicles 17. . . . .	p. 628
1 Chronicles 18. . . . .	p. 629
1 Chronicles 19. . . . .	p. 630
1 Chronicles 20. . . . .	p. 632
1 Chronicles 21. . . . .	p. 632
1 Chronicles 22. . . . .	p. 634
1 Chronicles 23. . . . .	p. 635
1 Chronicles 24. . . . .	p. 637
1 Chronicles 25. . . . .	p. 638
1 Chronicles 26. . . . .	p. 640
1 Chronicles 27. . . . .	p. 642
1 Chronicles 28. . . . .	p. 643
1 Chronicles 29. . . . .	p. 645
2 Chronicles. . . . .	p. 647
2 Chronicles 1. . . . .	p. 647
2 Chronicles 2. . . . .	p. 648
2 Chronicles 3. . . . .	p. 649
2 Chronicles 4. . . . .	p. 650
2 Chronicles 5. . . . .	p. 652
2 Chronicles 6. . . . .	p. 653
2 Chronicles 7. . . . .	p. 655
2 Chronicles 8. . . . .	p. 657
2 Chronicles 9. . . . .	p. 658
2 Chronicles 10. . . . .	p. 660
2 Chronicles 11. . . . .	p. 661

2 Chronicles 12.	p. 662
2 Chronicles 13.	p. 663
2 Chronicles 14.	p. 665
2 Chronicles 15.	p. 666
2 Chronicles 16.	p. 667
2 Chronicles 17.	p. 668
2 Chronicles 18.	p. 669
2 Chronicles 19.	p. 671
2 Chronicles 20.	p. 672
2 Chronicles 21.	p. 674
2 Chronicles 22.	p. 675
2 Chronicles 23.	p. 676
2 Chronicles 24.	p. 678
2 Chronicles 25.	p. 680
2 Chronicles 26.	p. 682
2 Chronicles 27.	p. 683
2 Chronicles 28.	p. 684
2 Chronicles 29.	p. 685
2 Chronicles 30.	p. 688
2 Chronicles 31.	p. 690
2 Chronicles 32.	p. 691
2 Chronicles 33.	p. 693
2 Chronicles 34.	p. 695
2 Chronicles 35.	p. 697
2 Chronicles 36.	p. 699
Ezra.	p. 701
Ezra 1.	p. 701
Ezra 2.	p. 701
Ezra 3.	p. 704
Ezra 4.	p. 705
Ezra 5.	p. 707
Ezra 6.	p. 708
Ezra 7.	p. 709
Ezra 8.	p. 711
Ezra 9.	p. 713
Ezra 10.	p. 715
Nehemiah.	p. 717
Nehemiah 1.	p. 717
Nehemiah 2.	p. 718
Nehemiah 3.	p. 719

Nehemiah 4. . . . .	p. 721
Nehemiah 5. . . . .	p. 722
Nehemiah 6. . . . .	p. 724
Nehemiah 7. . . . .	p. 725
Nehemiah 8. . . . .	p. 728
Nehemiah 9. . . . .	p. 729
Nehemiah 10. . . . .	p. 732
Nehemiah 11. . . . .	p. 733
Nehemiah 12. . . . .	p. 735
Nehemiah 13. . . . .	p. 737
Esther. . . . .	p. 739
Esther 1. . . . .	p. 739
Esther 2. . . . .	p. 741
Esther 3. . . . .	p. 742
Esther 4. . . . .	p. 744
Esther 5. . . . .	p. 745
Esther 6. . . . .	p. 746
Esther 7. . . . .	p. 747
Esther 8. . . . .	p. 747
Esther 9. . . . .	p. 749
Esther 10. . . . .	p. 751
Job. . . . .	p. 751
Job 1. . . . .	p. 751
Job 2. . . . .	p. 753
Job 3. . . . .	p. 753
Job 4. . . . .	p. 755
Job 5. . . . .	p. 755
Job 6. . . . .	p. 757
Job 7. . . . .	p. 758
Job 8. . . . .	p. 759
Job 9. . . . .	p. 760
Job 10. . . . .	p. 761
Job 11. . . . .	p. 762
Job 12. . . . .	p. 763
Job 13. . . . .	p. 764
Job 14. . . . .	p. 766
Job 15. . . . .	p. 767
Job 16. . . . .	p. 768
Job 17. . . . .	p. 769
Job 18. . . . .	p. 770

Job 19. . . . .	p. 771
Job 20. . . . .	p. 772
Job 21. . . . .	p. 773
Job 22. . . . .	p. 775
Job 23. . . . .	p. 776
Job 24. . . . .	p. 777
Job 25. . . . .	p. 778
Job 26. . . . .	p. 779
Job 27. . . . .	p. 779
Job 28. . . . .	p. 780
Job 29. . . . .	p. 781
Job 30. . . . .	p. 783
Job 31. . . . .	p. 784
Job 32. . . . .	p. 786
Job 33. . . . .	p. 787
Job 34. . . . .	p. 788
Job 35. . . . .	p. 790
Job 36. . . . .	p. 791
Job 37. . . . .	p. 792
Job 38. . . . .	p. 793
Job 39. . . . .	p. 795
Job 40. . . . .	p. 796
Job 41. . . . .	p. 797
Job 42. . . . .	p. 799
Psalms. . . . .	p. 800
Psalm 1. . . . .	p. 800
Psalm 2. . . . .	p. 800
Psalm 3. . . . .	p. 801
Psalm 4. . . . .	p. 801
Psalm 5. . . . .	p. 802
Psalm 6. . . . .	p. 802
Psalm 7. . . . .	p. 803
Psalm 8. . . . .	p. 804
Psalm 9. . . . .	p. 804
Psalm 10. . . . .	p. 805
Psalm 11. . . . .	p. 806
Psalm 12. . . . .	p. 807
Psalm 13. . . . .	p. 807
Psalm 14. . . . .	p. 808
Psalm 15. . . . .	p. 808

Psalm 16. . . . .	p. 808
Psalm 17. . . . .	p. 809
Psalm 18. . . . .	p. 810
Psalm 19. . . . .	p. 812
Psalm 20. . . . .	p. 813
Psalm 21. . . . .	p. 813
Psalm 22. . . . .	p. 814
Psalm 23. . . . .	p. 815
Psalm 24. . . . .	p. 816
Psalm 25. . . . .	p. 816
Psalm 26. . . . .	p. 817
Psalm 27. . . . .	p. 818
Psalm 28. . . . .	p. 819
Psalm 29. . . . .	p. 819
Psalm 30. . . . .	p. 820
Psalm 31. . . . .	p. 820
Psalm 32. . . . .	p. 822
Psalm 33. . . . .	p. 822
Psalm 34. . . . .	p. 823
Psalm 35. . . . .	p. 824
Psalm 36. . . . .	p. 825
Psalm 37. . . . .	p. 826
Psalm 38. . . . .	p. 828
Psalm 39. . . . .	p. 829
Psalm 40. . . . .	p. 829
Psalm 41. . . . .	p. 830
Psalm 42. . . . .	p. 831
Psalm 43. . . . .	p. 832
Psalm 44. . . . .	p. 832
Psalm 45. . . . .	p. 833
Psalm 46. . . . .	p. 834
Psalm 47. . . . .	p. 835
Psalm 48. . . . .	p. 835
Psalm 49. . . . .	p. 836
Psalm 50. . . . .	p. 837
Psalm 51. . . . .	p. 838
Psalm 52. . . . .	p. 839
Psalm 53. . . . .	p. 840
Psalm 54. . . . .	p. 840
Psalm 55. . . . .	p. 841



Psalm 56. . . . .	p. 842
Psalm 57. . . . .	p. 842
Psalm 58. . . . .	p. 843
Psalm 59. . . . .	p. 844
Psalm 60. . . . .	p. 845
Psalm 61. . . . .	p. 845
Psalm 62. . . . .	p. 846
Psalm 63. . . . .	p. 846
Psalm 64. . . . .	p. 847
Psalm 65. . . . .	p. 848
Psalm 66. . . . .	p. 848
Psalm 67. . . . .	p. 849
Psalm 68. . . . .	p. 850
Psalm 69. . . . .	p. 851
Psalm 70. . . . .	p. 853
Psalm 71. . . . .	p. 853
Psalm 72. . . . .	p. 854
Psalm 73. . . . .	p. 855
Psalm 74. . . . .	p. 856
Psalm 75. . . . .	p. 857
Psalm 76. . . . .	p. 858
Psalm 77. . . . .	p. 859
Psalm 78. . . . .	p. 859
Psalm 79. . . . .	p. 862
Psalm 80. . . . .	p. 863
Psalm 81. . . . .	p. 864
Psalm 82. . . . .	p. 865
Psalm 83. . . . .	p. 865
Psalm 84. . . . .	p. 866
Psalm 85. . . . .	p. 867
Psalm 86. . . . .	p. 868
Psalm 87. . . . .	p. 868
Psalm 88. . . . .	p. 869
Psalm 89. . . . .	p. 870
Psalm 90. . . . .	p. 872
Psalm 91. . . . .	p. 873
Psalm 92. . . . .	p. 873
Psalm 93. . . . .	p. 874
Psalm 94. . . . .	p. 874
Psalm 95. . . . .	p. 875

Psalm 96. . . . .	p. 876
Psalm 97. . . . .	p. 877
Psalm 98. . . . .	p. 877
Psalm 99. . . . .	p. 878
Psalm 100. . . . .	p. 878
Psalm 101. . . . .	p. 879
Psalm 102. . . . .	p. 879
Psalm 103. . . . .	p. 880
Psalm 104. . . . .	p. 881
Psalm 105. . . . .	p. 883
Psalm 106. . . . .	p. 884
Psalm 107. . . . .	p. 886
Psalm 108. . . . .	p. 888
Psalm 109. . . . .	p. 889
Psalm 110. . . . .	p. 890
Psalm 111. . . . .	p. 890
Psalm 112. . . . .	p. 891
Psalm 113. . . . .	p. 891
Psalm 114. . . . .	p. 892
Psalm 115. . . . .	p. 892
Psalm 116. . . . .	p. 893
Psalm 117. . . . .	p. 894
Psalm 118. . . . .	p. 894
Psalm 119. . . . .	p. 895
Psalm 120. . . . .	p. 903
Psalm 121. . . . .	p. 903
Psalm 122. . . . .	p. 903
Psalm 123. . . . .	p. 904
Psalm 124. . . . .	p. 904
Psalm 125. . . . .	p. 905
Psalm 126. . . . .	p. 905
Psalm 127. . . . .	p. 905
Psalm 128. . . . .	p. 906
Psalm 129. . . . .	p. 906
Psalm 130. . . . .	p. 907
Psalm 131. . . . .	p. 907
Psalm 132. . . . .	p. 907
Psalm 133. . . . .	p. 908
Psalm 134. . . . .	p. 908
Psalm 135. . . . .	p. 909

Psalm 136. . . . .	p. 909
Psalm 137. . . . .	p. 910
Psalm 138. . . . .	p. 911
Psalm 139. . . . .	p. 912
Psalm 140. . . . .	p. 913
Psalm 141. . . . .	p. 913
Psalm 142. . . . .	p. 914
Psalm 143. . . . .	p. 914
Psalm 144. . . . .	p. 915
Psalm 145. . . . .	p. 916
Psalm 146. . . . .	p. 917
Psalm 147. . . . .	p. 917
Psalm 148. . . . .	p. 918
Psalm 149. . . . .	p. 919
Psalm 150. . . . .	p. 919
Proverbs. . . . .	p. 920
Proverbs 1. . . . .	p. 920
Proverbs 2. . . . .	p. 921
Proverbs 3. . . . .	p. 922
Proverbs 4. . . . .	p. 924
Proverbs 5. . . . .	p. 925
Proverbs 6. . . . .	p. 926
Proverbs 7. . . . .	p. 927
Proverbs 8. . . . .	p. 929
Proverbs 9. . . . .	p. 930
Proverbs 10. . . . .	p. 931
Proverbs 11. . . . .	p. 933
Proverbs 12. . . . .	p. 935
Proverbs 13. . . . .	p. 936
Proverbs 14. . . . .	p. 938
Proverbs 15. . . . .	p. 940
Proverbs 16. . . . .	p. 942
Proverbs 17. . . . .	p. 943
Proverbs 18. . . . .	p. 945
Proverbs 19. . . . .	p. 947
Proverbs 20. . . . .	p. 948
Proverbs 21. . . . .	p. 950
Proverbs 22. . . . .	p. 952
Proverbs 23. . . . .	p. 953
Proverbs 24. . . . .	p. 955

Proverbs 25. . . . .	p. 957
Proverbs 26. . . . .	p. 958
Proverbs 27. . . . .	p. 959
Proverbs 28. . . . .	p. 961
Proverbs 29. . . . .	p. 963
Proverbs 30. . . . .	p. 964
Proverbs 31. . . . .	p. 966
Ecclesiastes. . . . .	p. 967
Ecclesiastes 1. . . . .	p. 967
Ecclesiastes 2. . . . .	p. 968
Ecclesiastes 3. . . . .	p. 970
Ecclesiastes 4. . . . .	p. 971
Ecclesiastes 5. . . . .	p. 972
Ecclesiastes 6. . . . .	p. 974
Ecclesiastes 7. . . . .	p. 974
Ecclesiastes 8. . . . .	p. 976
Ecclesiastes 9. . . . .	p. 977
Ecclesiastes 10. . . . .	p. 978
Ecclesiastes 11. . . . .	p. 979
Ecclesiastes 12. . . . .	p. 980
Song of Solomon. . . . .	p. 981
Song of Solomon 1. . . . .	p. 981
Song of Solomon 2. . . . .	p. 982
Song of Solomon 3. . . . .	p. 983
Song of Solomon 4. . . . .	p. 984
Song of Solomon 5. . . . .	p. 984
Song of Solomon 6. . . . .	p. 985
Song of Solomon 7. . . . .	p. 986
Song of Solomon 8. . . . .	p. 987
Isaiah. . . . .	p. 988
Isaiah 1. . . . .	p. 988
Isaiah 2. . . . .	p. 990
Isaiah 3. . . . .	p. 991
Isaiah 4. . . . .	p. 992
Isaiah 5. . . . .	p. 993
Isaiah 6. . . . .	p. 995
Isaiah 7. . . . .	p. 995
Isaiah 8. . . . .	p. 997
Isaiah 9. . . . .	p. 998
Isaiah 10. . . . .	p. 999

Isaiah 11. . . . .	p. 1001
Isaiah 12. . . . .	p. 1002
Isaiah 13. . . . .	p. 1003
Isaiah 14. . . . .	p. 1004
Isaiah 15. . . . .	p. 1006
Isaiah 16. . . . .	p. 1006
Isaiah 17. . . . .	p. 1007
Isaiah 18. . . . .	p. 1008
Isaiah 19. . . . .	p. 1009
Isaiah 20. . . . .	p. 1010
Isaiah 21. . . . .	p. 1011
Isaiah 22. . . . .	p. 1012
Isaiah 23. . . . .	p. 1013
Isaiah 24. . . . .	p. 1014
Isaiah 25. . . . .	p. 1016
Isaiah 26. . . . .	p. 1016
Isaiah 27. . . . .	p. 1018
Isaiah 28. . . . .	p. 1019
Isaiah 29. . . . .	p. 1020
Isaiah 30. . . . .	p. 1022
Isaiah 31. . . . .	p. 1024
Isaiah 32. . . . .	p. 1025
Isaiah 33. . . . .	p. 1026
Isaiah 34. . . . .	p. 1027
Isaiah 35. . . . .	p. 1028
Isaiah 36. . . . .	p. 1029
Isaiah 37. . . . .	p. 1030
Isaiah 38. . . . .	p. 1032
Isaiah 39. . . . .	p. 1034
Isaiah 40. . . . .	p. 1034
Isaiah 41. . . . .	p. 1036
Isaiah 42. . . . .	p. 1038
Isaiah 43. . . . .	p. 1039
Isaiah 44. . . . .	p. 1041
Isaiah 45. . . . .	p. 1043
Isaiah 46. . . . .	p. 1044
Isaiah 47. . . . .	p. 1045
Isaiah 48. . . . .	p. 1046
Isaiah 49. . . . .	p. 1047
Isaiah 50. . . . .	p. 1049

Isaiah 51. . . . .	p. 1050
Isaiah 52. . . . .	p. 1052
Isaiah 53. . . . .	p. 1053
Isaiah 54. . . . .	p. 1053
Isaiah 55. . . . .	p. 1055
Isaiah 56. . . . .	p. 1055
Isaiah 57. . . . .	p. 1056
Isaiah 58. . . . .	p. 1058
Isaiah 59. . . . .	p. 1059
Isaiah 60. . . . .	p. 1060
Isaiah 61. . . . .	p. 1061
Isaiah 62. . . . .	p. 1062
Isaiah 63. . . . .	p. 1063
Isaiah 64. . . . .	p. 1064
Isaiah 65. . . . .	p. 1065
Isaiah 66. . . . .	p. 1067
Jeremiah. . . . .	p. 1068
Jeremiah 1. . . . .	p. 1068
Jeremiah 2. . . . .	p. 1070
Jeremiah 3. . . . .	p. 1072
Jeremiah 4. . . . .	p. 1074
Jeremiah 5. . . . .	p. 1075
Jeremiah 6. . . . .	p. 1077
Jeremiah 7. . . . .	p. 1079
Jeremiah 8. . . . .	p. 1081
Jeremiah 9. . . . .	p. 1083
Jeremiah 10. . . . .	p. 1084
Jeremiah 11. . . . .	p. 1086
Jeremiah 12. . . . .	p. 1087
Jeremiah 13. . . . .	p. 1088
Jeremiah 14. . . . .	p. 1090
Jeremiah 15. . . . .	p. 1091
Jeremiah 16. . . . .	p. 1093
Jeremiah 17. . . . .	p. 1094
Jeremiah 18. . . . .	p. 1096
Jeremiah 19. . . . .	p. 1097
Jeremiah 20. . . . .	p. 1099
Jeremiah 21. . . . .	p. 1100
Jeremiah 22. . . . .	p. 1101
Jeremiah 23. . . . .	p. 1103

Jeremiah 24. . . . .	p. 1105
Jeremiah 25. . . . .	p. 1106
Jeremiah 26. . . . .	p. 1108
Jeremiah 27. . . . .	p. 1110
Jeremiah 28. . . . .	p. 1111
Jeremiah 29. . . . .	p. 1112
Jeremiah 30. . . . .	p. 1115
Jeremiah 31. . . . .	p. 1116
Jeremiah 32. . . . .	p. 1119
Jeremiah 33. . . . .	p. 1121
Jeremiah 34. . . . .	p. 1123
Jeremiah 35. . . . .	p. 1125
Jeremiah 36. . . . .	p. 1126
Jeremiah 37. . . . .	p. 1128
Jeremiah 38. . . . .	p. 1129
Jeremiah 39. . . . .	p. 1131
Jeremiah 40. . . . .	p. 1132
Jeremiah 41. . . . .	p. 1134
Jeremiah 42. . . . .	p. 1135
Jeremiah 43. . . . .	p. 1136
Jeremiah 44. . . . .	p. 1137
Jeremiah 45. . . . .	p. 1140
Jeremiah 46. . . . .	p. 1140
Jeremiah 47. . . . .	p. 1142
Jeremiah 48. . . . .	p. 1142
Jeremiah 49. . . . .	p. 1145
Jeremiah 50. . . . .	p. 1147
Jeremiah 51. . . . .	p. 1150
Jeremiah 52. . . . .	p. 1154
Lamentations. . . . .	p. 1156
Lamentations 1. . . . .	p. 1156
Lamentations 2. . . . .	p. 1158
Lamentations 3. . . . .	p. 1159
Lamentations 4. . . . .	p. 1162
Lamentations 5. . . . .	p. 1163
Ezekiel. . . . .	p. 1164
Ezekiel 1. . . . .	p. 1164
Ezekiel 2. . . . .	p. 1166
Ezekiel 3. . . . .	p. 1167
Ezekiel 4. . . . .	p. 1168

Ezekiel 5. . . . .	p. 1169
Ezekiel 6. . . . .	p. 1171
Ezekiel 7. . . . .	p. 1172
Ezekiel 8. . . . .	p. 1173
Ezekiel 9. . . . .	p. 1175
Ezekiel 10. . . . .	p. 1175
Ezekiel 11. . . . .	p. 1177
Ezekiel 12. . . . .	p. 1178
Ezekiel 13. . . . .	p. 1180
Ezekiel 14. . . . .	p. 1181
Ezekiel 15. . . . .	p. 1183
Ezekiel 16. . . . .	p. 1183
Ezekiel 17. . . . .	p. 1187
Ezekiel 18. . . . .	p. 1189
Ezekiel 19. . . . .	p. 1191
Ezekiel 20. . . . .	p. 1191
Ezekiel 21. . . . .	p. 1194
Ezekiel 22. . . . .	p. 1196
Ezekiel 23. . . . .	p. 1198
Ezekiel 24. . . . .	p. 1201
Ezekiel 25. . . . .	p. 1203
Ezekiel 26. . . . .	p. 1204
Ezekiel 27. . . . .	p. 1205
Ezekiel 28. . . . .	p. 1207
Ezekiel 29. . . . .	p. 1209
Ezekiel 30. . . . .	p. 1210
Ezekiel 31. . . . .	p. 1211
Ezekiel 32. . . . .	p. 1213
Ezekiel 33. . . . .	p. 1215
Ezekiel 34. . . . .	p. 1217
Ezekiel 35. . . . .	p. 1219
Ezekiel 36. . . . .	p. 1220
Ezekiel 37. . . . .	p. 1222
Ezekiel 38. . . . .	p. 1224
Ezekiel 39. . . . .	p. 1225
Ezekiel 40. . . . .	p. 1227
Ezekiel 41. . . . .	p. 1230
Ezekiel 42. . . . .	p. 1232
Ezekiel 43. . . . .	p. 1233
Ezekiel 44. . . . .	p. 1235



Ezekiel 45. . . . .	p. 1237
Ezekiel 46. . . . .	p. 1239
Ezekiel 47. . . . .	p. 1240
Ezekiel 48. . . . .	p. 1242
Daniel. . . . .	p. 1244
Daniel 1. . . . .	p. 1244
Daniel 2. . . . .	p. 1245
Daniel 3. . . . .	p. 1248
Daniel 4. . . . .	p. 1251
Daniel 5. . . . .	p. 1253
Daniel 6. . . . .	p. 1255
Daniel 7. . . . .	p. 1257
Daniel 8. . . . .	p. 1259
Daniel 9. . . . .	p. 1261
Daniel 10. . . . .	p. 1263
Daniel 11. . . . .	p. 1264
Daniel 12. . . . .	p. 1267
Hosea. . . . .	p. 1268
Hosea 1. . . . .	p. 1268
Hosea 2. . . . .	p. 1269
Hosea 3. . . . .	p. 1270
Hosea 4. . . . .	p. 1270
Hosea 5. . . . .	p. 1272
Hosea 6. . . . .	p. 1273
Hosea 7. . . . .	p. 1273
Hosea 8. . . . .	p. 1274
Hosea 9. . . . .	p. 1275
Hosea 10. . . . .	p. 1276
Hosea 11. . . . .	p. 1277
Hosea 12. . . . .	p. 1278
Hosea 13. . . . .	p. 1279
Hosea 14. . . . .	p. 1280
Joel. . . . .	p. 1280
Joel 1. . . . .	p. 1280
Joel 2. . . . .	p. 1281
Joel 3. . . . .	p. 1283
Amos. . . . .	p. 1285
Amos 1. . . . .	p. 1285
Amos 2. . . . .	p. 1286
Amos 3. . . . .	p. 1287

Amos 4. . . . .	p. 1288
Amos 5. . . . .	p. 1289
Amos 6. . . . .	p. 1290
Amos 7. . . . .	p. 1291
Amos 8. . . . .	p. 1292
Amos 9. . . . .	p. 1293
Obadiah. . . . .	p. 1294
Obadiah 1. . . . .	p. 1294
Jonah. . . . .	p. 1296
Jonah 1. . . . .	p. 1296
Jonah 2. . . . .	p. 1297
Jonah 3. . . . .	p. 1297
Jonah 4. . . . .	p. 1298
Micah. . . . .	p. 1299
Micah 1. . . . .	p. 1299
Micah 2. . . . .	p. 1300
Micah 3. . . . .	p. 1301
Micah 4. . . . .	p. 1301
Micah 5. . . . .	p. 1302
Micah 6. . . . .	p. 1303
Micah 7. . . . .	p. 1304
Nahum. . . . .	p. 1306
Nahum 1. . . . .	p. 1306
Nahum 2. . . . .	p. 1307
Nahum 3. . . . .	p. 1307
Habakkuk. . . . .	p. 1309
Habakkuk 1. . . . .	p. 1309
Habakkuk 2. . . . .	p. 1310
Habakkuk 3. . . . .	p. 1311
Zephaniah. . . . .	p. 1312
Zephaniah 1. . . . .	p. 1312
Zephaniah 2. . . . .	p. 1313
Zephaniah 3. . . . .	p. 1314
Haggai. . . . .	p. 1316
Haggai 1. . . . .	p. 1316
Haggai 2. . . . .	p. 1317
Zechariah. . . . .	p. 1318
Zechariah 1. . . . .	p. 1318
Zechariah 2. . . . .	p. 1319
Zechariah 3. . . . .	p. 1320

Zechariah 4. . . . .	p. 1321
Zechariah 5. . . . .	p. 1322
Zechariah 6. . . . .	p. 1322
Zechariah 7. . . . .	p. 1323
Zechariah 8. . . . .	p. 1324
Zechariah 9. . . . .	p. 1325
Zechariah 10. . . . .	p. 1327
Zechariah 11. . . . .	p. 1327
Zechariah 12. . . . .	p. 1328
Zechariah 13. . . . .	p. 1329
Zechariah 14. . . . .	p. 1330
Malachi. . . . .	p. 1331
Malachi 1. . . . .	p. 1332
Malachi 2. . . . .	p. 1333
Malachi 3. . . . .	p. 1334
Malachi 4. . . . .	p. 1335
New Testament. . . . .	p. 1336
Matthew. . . . .	p. 1336
Matthew 1. . . . .	p. 1336
Matthew 2. . . . .	p. 1337
Matthew 3. . . . .	p. 1338
Matthew 4. . . . .	p. 1339
Matthew 5. . . . .	p. 1340
Matthew 6. . . . .	p. 1343
Matthew 7. . . . .	p. 1345
Matthew 8. . . . .	p. 1346
Matthew 9. . . . .	p. 1348
Matthew 10. . . . .	p. 1350
Matthew 11. . . . .	p. 1352
Matthew 12. . . . .	p. 1353
Matthew 13. . . . .	p. 1356
Matthew 14. . . . .	p. 1359
Matthew 15. . . . .	p. 1360
Matthew 16. . . . .	p. 1362
Matthew 17. . . . .	p. 1364
Matthew 18. . . . .	p. 1365
Matthew 19. . . . .	p. 1367
Matthew 20. . . . .	p. 1369
Matthew 21. . . . .	p. 1371
Matthew 22. . . . .	p. 1373

Matthew 23. . . . .	p. 1375
Matthew 24. . . . .	p. 1377
Matthew 25. . . . .	p. 1379
Matthew 26. . . . .	p. 1382
Matthew 27. . . . .	p. 1385
Matthew 28. . . . .	p. 1388
Mark. . . . .	p. 1389
Mark 1. . . . .	p. 1389
Mark 2. . . . .	p. 1391
Mark 3. . . . .	p. 1393
Mark 4. . . . .	p. 1395
Mark 5. . . . .	p. 1396
Mark 6. . . . .	p. 1398
Mark 7. . . . .	p. 1401
Mark 8. . . . .	p. 1403
Mark 9. . . . .	p. 1405
Mark 10. . . . .	p. 1407
Mark 11. . . . .	p. 1410
Mark 12. . . . .	p. 1412
Mark 13. . . . .	p. 1414
Mark 14. . . . .	p. 1416
Mark 15. . . . .	p. 1419
Mark 16. . . . .	p. 1422
Luke. . . . .	p. 1423
Luke 1. . . . .	p. 1423
Luke 2. . . . .	p. 1426
Luke 3. . . . .	p. 1429
Luke 4. . . . .	p. 1431
Luke 5. . . . .	p. 1433
Luke 6. . . . .	p. 1435
Luke 7. . . . .	p. 1437
Luke 8. . . . .	p. 1440
Luke 9. . . . .	p. 1443
Luke 10. . . . .	p. 1446
Luke 11. . . . .	p. 1448
Luke 12. . . . .	p. 1451
Luke 13. . . . .	p. 1454
Luke 14. . . . .	p. 1456
Luke 15. . . . .	p. 1458
Luke 16. . . . .	p. 1460

Luke 17. . . . .	p. 1461
Luke 18. . . . .	p. 1463
Luke 19. . . . .	p. 1465
Luke 20. . . . .	p. 1467
Luke 21. . . . .	p. 1470
Luke 22. . . . .	p. 1472
Luke 23. . . . .	p. 1475
Luke 24. . . . .	p. 1477
John. . . . .	p. 1480
John 1. . . . .	p. 1480
John 2. . . . .	p. 1482
John 3. . . . .	p. 1483
John 4. . . . .	p. 1485
John 5. . . . .	p. 1488
John 6. . . . .	p. 1490
John 7. . . . .	p. 1493
John 8. . . . .	p. 1496
John 9. . . . .	p. 1499
John 10. . . . .	p. 1501
John 11. . . . .	p. 1503
John 12. . . . .	p. 1505
John 13. . . . .	p. 1508
John 14. . . . .	p. 1510
John 15. . . . .	p. 1512
John 16. . . . .	p. 1513
John 17. . . . .	p. 1515
John 18. . . . .	p. 1516
John 19. . . . .	p. 1518
John 20. . . . .	p. 1521
John 21. . . . .	p. 1522
Acts. . . . .	p. 1524
Acts 1. . . . .	p. 1524
Acts 2. . . . .	p. 1525
Acts 3. . . . .	p. 1528
Acts 4. . . . .	p. 1529
Acts 5. . . . .	p. 1531
Acts 6. . . . .	p. 1533
Acts 7. . . . .	p. 1534
Acts 8. . . . .	p. 1537
Acts 9. . . . .	p. 1539

Acts 10. . . . .	p. 1542
Acts 11. . . . .	p. 1544
Acts 12. . . . .	p. 1546
Acts 13. . . . .	p. 1547
Acts 14. . . . .	p. 1550
Acts 15. . . . .	p. 1551
Acts 16. . . . .	p. 1553
Acts 17. . . . .	p. 1556
Acts 18. . . . .	p. 1557
Acts 19. . . . .	p. 1559
Acts 20. . . . .	p. 1561
Acts 21. . . . .	p. 1563
Acts 22. . . . .	p. 1565
Acts 23. . . . .	p. 1567
Acts 24. . . . .	p. 1569
Acts 25. . . . .	p. 1571
Acts 26. . . . .	p. 1572
Acts 27. . . . .	p. 1574
Acts 28. . . . .	p. 1576
Romans. . . . .	p. 1578
Romans 1. . . . .	p. 1578
Romans 2. . . . .	p. 1580
Romans 3. . . . .	p. 1581
Romans 4. . . . .	p. 1583
Romans 5. . . . .	p. 1584
Romans 6. . . . .	p. 1585
Romans 7. . . . .	p. 1587
Romans 8. . . . .	p. 1588
Romans 9. . . . .	p. 1590
Romans 10. . . . .	p. 1592
Romans 11. . . . .	p. 1593
Romans 12. . . . .	p. 1595
Romans 13. . . . .	p. 1596
Romans 14. . . . .	p. 1597
Romans 15. . . . .	p. 1598
Romans 16. . . . .	p. 1600
1 Corinthians. . . . .	p. 1601
1 Corinthians 1. . . . .	p. 1601
1 Corinthians 2. . . . .	p. 1603
1 Corinthians 3. . . . .	p. 1604

1 Corinthians 4.	p. 1605
1 Corinthians 5.	p. 1607
1 Corinthians 6.	p. 1607
1 Corinthians 7.	p. 1609
1 Corinthians 8.	p. 1611
1 Corinthians 9.	p. 1612
1 Corinthians 10.	p. 1613
1 Corinthians 11.	p. 1615
1 Corinthians 12.	p. 1616
1 Corinthians 13.	p. 1618
1 Corinthians 14.	p. 1619
1 Corinthians 15.	p. 1621
1 Corinthians 16.	p. 1624
2 Corinthians.	p. 1625
2 Corinthians 1.	p. 1625
2 Corinthians 2.	p. 1626
2 Corinthians 3.	p. 1627
2 Corinthians 4.	p. 1628
2 Corinthians 5.	p. 1629
2 Corinthians 6.	p. 1631
2 Corinthians 7.	p. 1632
2 Corinthians 8.	p. 1633
2 Corinthians 9.	p. 1634
2 Corinthians 10.	p. 1635
2 Corinthians 11.	p. 1636
2 Corinthians 12.	p. 1638
2 Corinthians 13.	p. 1640
Galatians.	p. 1640
Galatians 1.	p. 1640
Galatians 2.	p. 1642
Galatians 3.	p. 1643
Galatians 4.	p. 1645
Galatians 5.	p. 1646
Galatians 6.	p. 1647
Ephesians.	p. 1648
Ephesians 1.	p. 1648
Ephesians 2.	p. 1650
Ephesians 3.	p. 1651
Ephesians 4.	p. 1652
Ephesians 5.	p. 1654

Ephesians 6. . . . .	p. 1655
Philippians. . . . .	p. 1656
Philippians 1. . . . .	p. 1656
Philippians 2. . . . .	p. 1658
Philippians 3. . . . .	p. 1660
Philippians 4. . . . .	p. 1661
Colossians. . . . .	p. 1662
Colossians 1. . . . .	p. 1662
Colossians 2. . . . .	p. 1664
Colossians 3. . . . .	p. 1665
Colossians 4. . . . .	p. 1666
1 Thessalonians. . . . .	p. 1667
1 Thessalonians 1. . . . .	p. 1667
1 Thessalonians 2. . . . .	p. 1668
1 Thessalonians 3. . . . .	p. 1669
1 Thessalonians 4. . . . .	p. 1670
1 Thessalonians 5. . . . .	p. 1671
2 Thessalonians. . . . .	p. 1673
2 Thessalonians 1. . . . .	p. 1673
2 Thessalonians 2. . . . .	p. 1673
2 Thessalonians 3. . . . .	p. 1675
1 Timothy. . . . .	p. 1675
1 Timothy 1. . . . .	p. 1676
1 Timothy 2. . . . .	p. 1677
1 Timothy 3. . . . .	p. 1677
1 Timothy 4. . . . .	p. 1678
1 Timothy 5. . . . .	p. 1679
1 Timothy 6. . . . .	p. 1681
2 Timothy. . . . .	p. 1682
2 Timothy 1. . . . .	p. 1682
2 Timothy 2. . . . .	p. 1683
2 Timothy 3. . . . .	p. 1684
2 Timothy 4. . . . .	p. 1685
Titus. . . . .	p. 1686
Titus 1. . . . .	p. 1686
Titus 2. . . . .	p. 1687
Titus 3. . . . .	p. 1688
Philemon. . . . .	p. 1689
Philemon 1. . . . .	p. 1689
Hebrews. . . . .	p. 1690



Hebrews 1. . . . .	p. 1690
Hebrews 2. . . . .	p. 1691
Hebrews 3. . . . .	p. 1692
Hebrews 4. . . . .	p. 1693
Hebrews 5. . . . .	p. 1694
Hebrews 6. . . . .	p. 1695
Hebrews 7. . . . .	p. 1696
Hebrews 8. . . . .	p. 1698
Hebrews 9. . . . .	p. 1699
Hebrews 10. . . . .	p. 1700
Hebrews 11. . . . .	p. 1702
Hebrews 12. . . . .	p. 1705
Hebrews 13. . . . .	p. 1706
James. . . . .	p. 1708
James 1. . . . .	p. 1708
James 2. . . . .	p. 1709
James 3. . . . .	p. 1710
James 4. . . . .	p. 1711
James 5. . . . .	p. 1712
1 Peter. . . . .	p. 1714
1 Peter 1. . . . .	p. 1714
1 Peter 2. . . . .	p. 1715
1 Peter 3. . . . .	p. 1717
1 Peter 4. . . . .	p. 1718
1 Peter 5. . . . .	p. 1719
2 Peter. . . . .	p. 1720
2 Peter 1. . . . .	p. 1720
2 Peter 2. . . . .	p. 1721
2 Peter 3. . . . .	p. 1723
1 John. . . . .	p. 1724
1 John 1. . . . .	p. 1724
1 John 2. . . . .	p. 1725
1 John 3. . . . .	p. 1726
1 John 4. . . . .	p. 1728
1 John 5. . . . .	p. 1729
2 John. . . . .	p. 1730
2 John 1. . . . .	p. 1730
3 John. . . . .	p. 1731
3 John 1. . . . .	p. 1731
Jude. . . . .	p. 1732

Jude 1. . . . .	p. 1732
Revelation. . . . .	p. 1734
Revelation 1. . . . .	p. 1734
Revelation 2. . . . .	p. 1735
Revelation 3. . . . .	p. 1737
Revelation 4. . . . .	p. 1738
Revelation 5. . . . .	p. 1739
Revelation 6. . . . .	p. 1740
Revelation 7. . . . .	p. 1741
Revelation 8. . . . .	p. 1742
Revelation 9. . . . .	p. 1743
Revelation 10. . . . .	p. 1744
Revelation 11. . . . .	p. 1745
Revelation 12. . . . .	p. 1746
Revelation 13. . . . .	p. 1748
Revelation 14. . . . .	p. 1749
Revelation 15. . . . .	p. 1750
Revelation 16. . . . .	p. 1751
Revelation 17. . . . .	p. 1752
Revelation 18. . . . .	p. 1753
Revelation 19. . . . .	p. 1755
Revelation 20. . . . .	p. 1756
Revelation 21. . . . .	p. 1757
Revelation 22. . . . .	p. 1759

**Holy Bible**

**Maori Translation**

## Old Testament

### Genesis

#### Chapter 1

<sup>1</sup> He mea hanga na te atua i te timatanga te rangi me te whenua. <sup>2</sup> A kahore he ahua o te whenua, i takoto kau; he pouri ano a runga i te mata o te hohonu. Na ka whakapaho te Wairua o te Atua i runga i te kare o nga wai.

<sup>3</sup> A ka ki te Atua, Kia marama: na ka marama. <sup>4</sup> A ka kite te Atua i te marama, he pai: a ka wehea e te Atua te marama i te pouri. <sup>5</sup> Na ka huaina e te Atua te marama ko te Awatea, a ko te pouri i huaina e ia ko te Po. A ko te ahiahi, ko te ata, he ra kotahi.

<sup>6</sup> Na ka mea te Atua, Kia whai kikorangi a waenganui o nga wai, hei wehe i waenganui o nga wai. <sup>7</sup> Na ka hanga e te Atua te kikorangi, ka wehea e ia nga wai i raro o te kikorangi i nga wai o runga o te kikorangi: a ka oti. <sup>8</sup> Na ka huaina te kikorangi e te Atua ko te Rangi. A ko te ahiahi, ko te ata, he ra tuarua.

<sup>9</sup> Na ka mea te Atua, Kia huihuia nga wai i raro i te rangi kia kotahi te wahi, a kia puta te tuawhenua: a ka oti. <sup>10</sup> Na ka huaina e te Atua te tuawhenua ko te Whenua; a ko te huihuinga o nga wai i huaina e ia ko nga Moana: a ka kite te Atua, he pai. <sup>11</sup> Na ka mea te Atua, Kia pihi ake te tarutaru i te whenua, te otaota whai purapura, me te rakau hua, ki runga ki te whenua, e hua ana ona hua, he mea rite tonu ki a ia, kei roto nei i a ia ona purapura: a ka oti. <sup>12</sup> Na ka whakaputaina e te whenua te tarutaru, te otaota hoki e hua ana ona hua he mea rite tonu ki a ia, me te rakau whai hua, kei roto nei i a ia ona purapura he mea rite tonu ki a ia: a ka kite te Atua, he pai. <sup>13</sup> A ko te ahiahi, ko te ata, he ra tuatoru.

<sup>14</sup> Na ka mea te Atua, Kia whai mea whakamarama te kiko o te rangi, hei wehe i te awatea, i te po; hei tohu ano aua mea, hei taima, hei ra, hei tau: <sup>15</sup> Hei whakamarama aua mea i te kiko o te rangi, hei whakamarama i te whenua: a ka oti. <sup>16</sup> Na ka hanga e te Atua nga mea whakamarama nui e rua; ko te whakamarama nui hei tohutohu mo te awatea, ko te whakamarama tuaiti hei tohutohu mo te po: i hanga ano hoki e ia nga whetu. <sup>17</sup> A whakanohoia ana aua mea e te Atua ki te kiko o

18  
te rangi, hei whakamarama mo te whenua, Hei tohutohu i te awatea, i te po, hei wehe hoki i te  
marama, i te pouri: a ka kite te Atua, he pai. 19 A ko te ahiahi, ko te ata, he ra tuawha.

20 Na ka mea te Atua, Kia ngahue ake i roto i nga wai te mea ora e ngoki ana, kia rere ano hoki  
te manu i runga ake i te whenua i te mata o te kiko o te rangi. 21 Na ka hanga e te Atua nga tohora  
nunui, me nga mea ora katoa, nga mea ngokingoki i ngahue ake nei i roto i nga wai, o ia ahua, o

ia ahua, me nga manu whai parirau katoa, o ia ahau, o ia ahua: a ka kite te Atua, he pai. 22 Na ka  
manaaki te Atua i a ratou, ka mea, Kia hua koutou, kia tini, kia kapi hoki nga wai o nga moana i a  
koutou, kia tini ano hoki nga manu ki runga ki te whenua. 23 A ko te ahiahi, ko te ata, he ra tuarima.

24 Na ka mea te Atua, Kia whakaputaina e te whenua te mea ora o ia ahua, o ia ahua, te kararehe  
me te mea ngokingoki me te kirehe o te whenua o ia ahua, o ia ahua: a ka oti. 25 Na ka hanga e te  
Atua te kirehe o te whenua o ia ahua, o ia ahua, me te kararehe o ia ahua, o ia ahua, me nga mea  
ngokingoki katoa o te whenua o ia ahua, o ia ahua: a ka kite te Atua he pai.

26 Na ka mea te Atua, Kia hanga tatou i te tangata kia rite ki a tatou, hei to tatou ano te ahua:  
a kia waiho ko ratou hei rangatira mo nga ika o te moana, mo te manu o te rangi, mo nga kararehe  
hoki, mo te whenua katoa, mo nga mea ngokingoki katoa ano hoki e ngokingoki ana i runga i te  
whenua. 27 Na ka hanga e te Atua te tangata rite tonu ki a ia; i hanga ia e ia kia rite ki te Atua; i

hanga raua he tane, he wahine. 28 Na ka manaakitia raua e te Atua, a ka mea te Atua ki a raua, Kia  
hua, kia tini, kia kapi hoki te whenua i a korua, kia mate hoki ona tara i a korua: ko korua hei  
rangatira mo te ika o te moana, mo te manu hoki o te rangi, mo nga mea ora katoa an o hoki e  
ngokingoki ana i runga i te whenua.

29 A ka mea te Atua, Na, kua oti te hoatu e ahau ki a korua nga otaota katoa e whai purapura  
ana i runga i te mata o te whenua katoa, me te rakau katoa, he hua rakau tona e whai purapura ana;

30 hei kai ena ma korua: A kua hoatu ano e ahau nga otaota matomato katoa hei kai ma nga kararehe  
katoa o te whenua, ma nga manu katoa o te rangi, ma nga mea katoa hoki e ngokingoki ana i runga  
i te whenua kei roto nei i a ratou he wairua ora: a ka oti.

31 A ka kite te Atua i nga mea katoa kua hanga nei e ia, na, pai whakaharahara. A ko te ahiahi,  
ko te ata, ko te ra tuaono.

## Chapter 2

1 Na ka oti te rangi me te whenua me o reira mano katoa. 2 A no te whitu o nga ra i oti ai i te  
 Atua tana mahi i mahi ai; na ka okioki ia i te ra whitu i ana mahi katoa i mahia e ia. 3 Na ka  
 whakapaingia e te Atua te ra whitu, whakatapua ana hoki e ia: mona i okioki i taua ra i ana mahi  
 katoa i oti i te Atua te hanga.

4 Ko nga whakatupuranga enei o te rangi, o te whenua, i te hanganga ai, i te ra i hanga ai e  
 Ihowa, e te Atua, te whenua me te rangi. 5 Kahore ano hoki tetahi rakau riki o te parae i te whenua,  
 kahore ano tetahi otaota o te parae kia pihi noa: kahore hoki a Ihowa, te Atua, i mea kia ua ki te  
 whenua, a kahore rawa he tangata hei mahi i te oneone; 6 Engari i pupu ake he kohu i te whenua,  
 na reira i whakamakuku te mata katoa o te oneone. 7 Na ka whakaahuatia te tangata e Ihowa, e te  
 Atua, he puehu no te oneone, a whakahangia ana e ia ki roto ki ona pongaihu te manawa ora; a ka  
 wairua ora te tangata.

8 Na ka whakatokia e Ihowa, e te Atua, tetahi kari ki te taha ki te rawhiti, ki Erene; a  
 whakanohoia iho e ia ki reira te tangata i hanga e ia. 9 A i whakatupuria e Ihowa, e te Atua, i roto  
 i te oneone nga rakau katoa he mea ahuaireka ki te titiro, he pai hoki hei kai; ko te rakau hoki o te  
 ora ki waenganui o te kari, me te rakau o te matauranga ki te pai, ki te kino. 10 I rere mai ano he  
 awa i Erene hei whakamakuku i te kari; a i reira ka manganga e wha nga tino awa. 11 Ko te ingoa  
 o te tuatahi ko Pihona; ko ia tera e taiawhio ra i te whenua katoa o Hawira, he koura kei reira; 12 He  
 pai hoki te koura o taua whenua: kei reira te teriuma me te kohatu onika. 13 Ko te ingoa o te rua o  
 nga awa ko Kihona: ko ia tera e taiawhio ra i te whenua katoa o Etiopia. 14 Ko te ingoa o te toru  
 o nga awa ko Hirekere; ko te mea tera e rere ra i mua o Ahiria. Ko Uparati te wha o nga awa. 15 Na  
 ka tango a Ihowa, te Atua, i te tangata, a whakanohoia ana e ia ki te kari o Erene, hei ngaki, hei  
 tiaki hoki reira.

16 Na ka ako a Ihowa, te Atua, ki te tangata, ka mea, E pai ana kia kai noa atu koe i nga hua o  
 nga rakau katoa o te kari: 17 Ko te rakau ia o te matauranga ki te pai, ki te kino, kaua e kainga  
 tetahi o ona hua; ko te ra e kai ai koe i tetahi o ona hua, ka mate koe, mate rawa.

18 Na ka mea a Ihowa, te Atua, E kore e pai kia noho te tangata ko ia anake; me hanga e ahau  
 tetahi hoa pai mona. 19 Na he mea whakaahua mai na Ihowa, na te Atua, i roto i te oneone nga  
 kirehe katoa o te parae, me nga manu katoa o te rangi; a kawea mai ana e ia ki a Arama, kia kitea  
 ai te ingoa e huaina e ia ki a ratou: a ko a Arama i hua ai ki nga mea ora kat oa, hei ingoa era mo

20  
ratou. Na ka huaina e Arama he ingoa mo nga kararehe katoa, mo nga manu o te rangi, mo nga kirehe katoa hoki o te parae; ko Arama ia kahore i kitea tetahi hoa pai mona.

21  
Na ka mea a Ihowa, te Atua, kia parangia a Arama e te moe, a moe ana ia: na tangohia ana e ia tetahi o ona rara, a whakatutakina atu ana te kikokiko hei whakakapi mo reira; 22 Na ka hanga a Ihowa, te Atua, i te rara i tangohia mai ra e ia i roto i a Arama hei wahine, a kawea ana e ia ki a

Arama. 23 A ka mea a Arama, Katahi ano ki tenei te wheua o roto o oku wheua, me te kikokiko o roto o oku kikokiko: me hua ia ko te Wahine, nona hoki i tangohia mai i roto i te Tangata. 24 No konei te tangata ka whakarere i tona papa me tona whaea, a ka piri ki tana wahine: a hei kikokiko

25 kotahi raua. A e tu tahanga ana raua tokorua, te tangata me tana wahine, kihai hoki i whakama.

### Chapter 3

1  
Na ko te nakahi he mohio rawa i nga kirehe katoa o te parae i hanga nei e Ihowa, e te Atua. Na ko tana meatanga ki te wahine, Koia, i mea ano te Atua, Kaua e kainga e korua nga hua o tetahi

2  
rakau o te kari? A ka mea te wahine ki te nakahi, E kai ano maua i nga hua o nga rakau o te kari:

3  
Ko nga hua ia o te rakau i waenganui o te kari, kua mea mai te Atua, Kaua korua e kai i tetahi o ona hua, kaua ano hoki e pa ki reira, kei mate korua. 4 Na ko te meatanga a te nakahi ki te wahine,

5  
E kore korua e mate rawa: Erangi e mohio ana te Atua ko te ra e kai ai korua i tetahi o ona hua, katahi ka marama o korua kanohi, a ka rite korua ki te Atua, ka mohio ki te pai, ki te kino.

6  
A, i te kitenga o te wahine he pai te rakau ra hei kai, he ahua eka ki te titiro atu, he rakau hoki e minaminatia hei whakamohio, na ka tango ia i etahi o ona hua, ka kai, ka hoatu hoki ki tana tahu i tona taha; a kai ana ia. 7 Na ka marama o raua kanohi tahi, ka mohio raua kei te tu tahanga raua;

8  
na ka tuia e raua etahi rau piki, meatia ana hei rapaki mo raua. A ka rongu raua i te reo o Ihowa, o te Atua, e haereere ana i te kari i te hauhautanga o te ra: a ka piri a Arama raua ko tana wahine i te aroaro o Ihowa, o te Atua, ki roto ki nga rakau o te kari.

9  
Na ka karanga a Ihowa, te Atua, ki a Arama, ka mea ki a ia, Kei hea koe? 10 A ka mea ia, I rongu ahau ki tou reo i te kari, a wehi ana ahau, noku i tu tahanga; na piri ana ahau.

11  
Na ka mea ia, Na wai i mea ki a koe e tu tahanga ana koe? Kua kainga ranei e koe etahi o nga hua o te rakau i kiia atu ra e ahau ki a koe, Kaua ona hua e kainga? 12 Na ka mea te tangata

ra, Na te wahine i homai nei e koe hei hoa moku, nana i homai etahi o nga hua o te rakau ki ahau,  
<sup>13</sup>  
 a kainga ana e ahau. Na ka mea a Ihowa, te Atua, ki te wahine, He aha tenei kua meatia nei e koe? Ka mea te wahine, Na te nakahi ahau i maminga, a kai ana ahau.

<sup>14</sup>  
 Na ka mea a Ihowa, te Atua, ki te nakahi, Mo tenei mahi au nui atu te kanga mou i o nga kararehe katoa, i o nga kirehe katoa o te parae; ko tou kopu hei haere mou, ko te puehu hei kai mau  
<sup>15</sup>  
 i nga ra katoa e ora ai koe: Ka whakatupuria hoki e ahau he pakanga ma korua ko te wahine, ma tou uri ratou ko tona uri; ka maru tou matenga i a ia, ka maru i a koe tona rekereke.

<sup>16</sup>  
 Ka mea ia ki te wahine, Ka whakanuia rawatia e ahau tou mamae, me tou haputanga; ka mamae koe ina whanau tamariki; ka hiahia koe ki to tahu, ko ia ano hoki hei rangatira mou.

<sup>17</sup>  
 A ka mea ia ki a Arama, Mo tou rongonga ki te reo o tau wahine, mo tau kainga hoki i te hua o te rakau i kii atu e ahau ki a koe, i meatia atu ra, Kaua e kainga etahi o ona hua: ka oti te oneone te kanga mo tau mahi; ka kainga e koe ona hua i r unga i te mamae i nga ra katoa e ora ai

<sup>18</sup>  
 koe; He tataramoa ano hoki, he tumatakuru ana e whakatupu ake ai mau; a ka kai koe i te otaota

<sup>19</sup>  
 o te parae; Ma te werawera o tou mata e kai ai koe i te taro, a hoki noa koe ki te oneone; i tangohia mai nei hoki koe i reira: he puehu hoki koe, a ka hoki ano ki te puehu.

<sup>20</sup>  
 A i huaina e Arama te ingoa o tana wahine ko Iwi; no te mea ko te whaea ia o nga mea ora katoa.

<sup>21</sup>  
 Na ka hanga e Ihowa, e te atua, etahi kakahu hiako mo Arama raua ko tana wahine, a whakakakahuria ana raua.

<sup>22</sup>  
 Na ka mea a Ihowa, te Atua, Nana, kua rite nei te tangata ki tetahi o tatou, te mohio ki te pai, ki te kino: na kei totoro atu tona ringa aiane, kei tango i tetahi o nga hua o te rakau o te ora,

<sup>23</sup>  
 kei kai, a ka ora tonu: Koia i tonoa atu ai ia e Ihowa, e te Atua, i te kari o Erene hei ngaki i te

<sup>24</sup>  
 oneone i tangohia mai nei ia i reira. Heoi peia ana e ia te tangata; a whakanohoia ana ki te taha ki te rawhiti o te kari o Erene tetahi Kerupima, me tetahi hoari mura, he mea piupiu tonu ki tetahi taha, ki tetahi taha, hei tiaki i te huarahi ki te rakau o te ora.

## Chapter 4

<sup>1</sup>  
 Na ka mohio a Arama ki a Iwi, ki tana wahine; a ka hapu ia, a ka whanau a Kaina; na ka mea  
<sup>2</sup>  
 ia, Kua whakawhiwhia mai ahau e Ihowa ki tetahi tangata. Na ka whanau ano tona teina, a Apera. Na he kaiwhangai hipi a Apera, ko Kaina ia he kaingaki whenua.



<sup>3</sup> A, i te mutunga o etahi rangi, ka kawea e Kaina etahi o nga hua o te whenua hei whakahere  
 ki a Ihowa. <sup>4</sup> Me Apera hoki, i kawea e ia etahi o nga whanau matamua o tana kahui, o o ratou  
 ngako hoki. A ka aro a Ihowa ki a Apera, ki tana whakahere: <sup>5</sup> Kihai ia i aro ki a Kaina, ki tana  
 whakahere. A he nui rawa te riri o Kaina, a whakapoururu ana tona mata.

<sup>6</sup> Na ka mea a Ihowa ki a Kaina, He aha koe i riri ai? a he aha i whakapoururu ai tou mata?  
<sup>7</sup> E kore ianei koe e kake, ki te mahi koe i te pai? ki te kahore koe e mahi i te pai, kei te kuwaha te  
 hara e takoto ana. Na ko koe tana e hiahia ai, ko koe ia hei rangatira mona.

<sup>8</sup> Na ka korero a Kaina kia Apera, ki tona teina: a, i a raua i te parae, ka whakatika a Kaina ki  
 a Apera, ki tona teina, a patua iho.

<sup>9</sup> Katahi a Ihowa ka mea ki a Kaina, Kei hea a Apera, tou teina? Ka mea ia, Kahore ahau e  
 mohio. Ko ahau ianei te kaitiaki o toku teina? <sup>10</sup> Na ka mea ia, He mahi aha tenei au? e tangi mai  
 ana te reo o te toto o tou teina ki ahau i roto i te whenua. <sup>11</sup> Na ka kanga koe i runga i te whenua,

i hamama nei tona waha hei rerenga atu mo te toto o tou teina i whakaheke nei e tou ringa; <sup>12</sup> Ka  
 ngaki koe i te oneone, e kore e tukua tona kaha a muri ake nei ki a koe; ka waiho koe hei tangata  
 haereere noa, hei manene i runga i te whenua.

<sup>13</sup> Na ka mea a Kaina ki a Ihowa, He nui rawa te whiu mo toku kino, e kore e taea e ahau.

<sup>14</sup> Titiro hoki, ka peia ahau e koe inaianei i te mata o te whenua; a ka ngaro i tou kanohi; ka waiho  
 hoki ahau hei tangata haereere noa, hei manene i runga i te whenua; a tenei ake, ki te tutaki tetahi  
 tangata ki ahau, na ka patua ahau e ia. <sup>15</sup> Na ka mea a Ihowa ki a ia, Na reira ki te patu tetahi i a  
 Kaina, e whitu nga utu e rapua i a ia. Na ka homai e Ihowa he tohu ki a Kaina, kei patua ia e tetahi  
 tangata ina tutaki ki a ia.

<sup>16</sup> Na ka haere atu a Kaina i te aroaro o Ihowa, a noho ana i te whenua o Noro, i te taha ki te  
 rawhiti o Erene. <sup>17</sup> Na ka mohio a Kaina ki tana wahine; a ka hapu ia, ka whanau a Enoka: na ka  
 hanga ia i tetahi pa, a huaina iho te ingoa o te pa ko Enoka, ko te ingoa o tana tama. <sup>18</sup> A whanau  
 ake ta Enoka tama ko Irara: na Irara ko Mehutaere: ta Mehutaere ko Metuhare: ta Metuhaere ko  
 Rameka.

<sup>19</sup> Na ka tangohia e Rameka etahi wahine tokorua mana: ko Araha te ingoa o tetahi, ko Tira  
 to tetahi. <sup>20</sup> Na ka whanau ta Araha tama ko Iapara: ko ia te matua o te hunga noho teneti, ratou

ko nga tangata whangai kararehe. <sup>21</sup> A ko te ingoa o tona teina ko Iupara: ko ia te matua o nga mea

<sup>22</sup>  
 rahurahu ki te hapa, ki te okana. Me Tira ano hoki, whanau ake tana ko Tuparakaina, he kaihanganga  
 ia i nga mea tapahi katoa i te mea parahi, i te mea rino: a ko Naama te tuahine o Tuparakaina.

<sup>23</sup>  
 Na ka mea a Rameka ki ana wahine; e Araha raua ko Tira, Whakarongo mai ki toku reo; e  
 nga wahine a Rameka, kia whai taringa mai ki taku kupu: kua patua hoki he tangata e ahau moku  
 i motu, he taitamariki hoki moku i maru: <sup>24</sup> Na mo Kaina e whitu nga utu, ina, kia whitu tekau ma  
 whitu mo Rameka.

<sup>25</sup>  
 A i mohio ano a Arama ki tana wahine; ka whanau tana tama, a huaina iho tona ingoa ko  
 Heta; i mea hoki ia, Ka rite mai nei i te Atua tetahi atu uri moku hei whakakapi mo Apera i patua

<sup>26</sup>  
 nei e Kaina. Me Heta ano hoki, i whanau tana tama; a huaina ana tona ingoa ko Enoha: no reira  
 i timata ai te tangata te karanga ki te ingoa o Ihowa.

## Chapter 5

<sup>1</sup>  
 Ko te pukapuka tenei o nga whakatupuranga o Arama. I te ra i hanga ai te tangata e te Atua,  
 i hanga ia e ia kia rite ki te Atua; <sup>2</sup> I hanga raua he tane, he wahine; a i manaakitia raua e ia, i huaina  
 hoki to raua ingoa ko Arama, i te ra i hanga ai raua. <sup>3</sup> A ka kotahi rau ka toru tekau nga tau i ora  
 ai a Arama, na ka whanau tana tama, nona te ahua, rite tonu ki a ia; a huaina ana tona ingoa ko  
 Heta: <sup>4</sup> A ko nga ra o Arama i muri i te whanautanga o Heta e waru rau tau: a ka whanau he tama,  
 he tamahine mana: <sup>5</sup> Na ko nga ra katoa i ora ai a Arama e iwa rau e toru tekau tau: a ka mate ia.  
<sup>6</sup> A kotahi rau e rima nga tau i ora ai a Heta, ka whanau tana tama, a Enoha: <sup>7</sup> A e waru rau e  
 whitu nga tau i ora ai a Heta i muri iho i te whanautanga o tana tama, o Enoha, a ka whanau he  
 tama, he tamahine mana: <sup>8</sup> Na ko nga ra katoa o Heta e iwa rau kotahi tekau ma rua tau: a ka mate  
 ia. <sup>9</sup> A ka iwa tekau nga tau i ora ai a Enoha, na ka whanau tana tama a Kenana: <sup>10</sup> A e waru rau  
 kotahi tekau ma rima nga tau i ora ai a Enoha i muri iho i te whanautanga o tana tama, o Kenana,  
 a ka whanau he tama, he tamahine mana: <sup>11</sup> Na ko nga ra katoa o Enoha e iwa rau ma rima tau: a  
 ka mate. <sup>12</sup> A ka whitu tekau nga tau i ora ai a Kenana, ka whanau tana tama, a Maharareere: <sup>13</sup> A  
 e waru rau e wha tekau nga tau i ora ai a Kenana i muri iho i te whanautanga o tana tama, o  
 Maharareere, a ka whanau he tama, he tamahine mana: <sup>14</sup> Na ko nga ra katoa o Kenana e iwa rau  
 kotahi tekau tau: a ka mate ia. <sup>15</sup> A ka ono tekau ma rima nga tau i ora ai a Maharareere, na ka

<sup>16</sup>  
 whanau tana tama, a Iarere: A e waru rau e toru tekau nga tau i ora ai a Maharareere i muri i te  
 whanautanga o tana tama, o Iarere, a ka whanau he tama, he tamahine mana: <sup>17</sup> A e waru rau e  
 iwa tekau ma rima tau nga ra katoa o Maharareere: a ka mate. <sup>18</sup> A kotahi rau e ono tekau ma rua  
 nga tau i ora ai a Iarere, a ka whanau tana tama, a Enoka: <sup>19</sup> A e waru rau nga tau i ora ai a Iarere  
 i muri iho i te whanautanga o tana tama, o Enoka, a ka whanau he tama, he tamahine mana: <sup>20</sup> A  
 e iwa rau e ono tekau ma rua tau nga ra katoa o Iarere: a ka mate.  
<sup>21</sup> A e ono tekau ma rima nga tau i ora ai a Enoka, na ka whanau tana tama, a Matuhara: <sup>22</sup> A  
 e toru rau nga tau i haereere tahi ai a Enoka i te Atua i muri iho i te whanautanga o tana tama, o  
 Matuhara, a ka whanau he tama, he tamahine mana: <sup>23</sup> A e toru rau e ono tekau ma rima tau nga  
 ra katoa o Enoka. <sup>24</sup> A i haereere tahi a Enoka i te Atua: a kua kahore ia: na te Atua hoki ia i tango.  
<sup>25</sup> A kotahi rau e waru tekau ma whitu nga tau i ora ai a Matuhara, na ka whanau tana tama, a  
 Rameka: <sup>26</sup> A e whitu rau e waru tekau ma rua nga tau i ora ai a Matuhara i muri iho i te  
 whanautanga o tana tama, o Rameka, a ka whanau he tama, he tamahine mana: <sup>27</sup> A e iwa rau e  
 ono tekau ma iwa tau nga ra katoa o Matuhara: a ka mate.  
<sup>28</sup> A kotahi rau e waru tekau ma rua nga tau i ora ai a Rameka, na ka whanau tana tama. <sup>29</sup> A  
 huaina ana e ia tona ingoa ko Noa; i mea hoki ia, Ma tenei e whakahauora o tatou ngakau i a tatou  
 mahi, i te ruha hoki o o tatou ringa, i te oneone kua oti nei te kanga e Ihowa. <sup>30</sup> A e rima rau e iwa  
 tekau ma rima nga tau i ora ai a Rameka i muri i te whanautanga o tana tama, o Noa, a ka whanau  
 he tama, he tamahine mana: <sup>31</sup> A ko nga ra katoa o Rameka e whitu rau e whitu tekau ma whitu:  
 a ka mate ia. <sup>32</sup> A ka rima rau nga tau o Noa, na ka whanau nga tama a Noa, ko Hema, ko Hama,  
 ko Iapeta.

## Chapter 6

<sup>1</sup> Na ka timata te tangata te tini haere ki runga ki te mata o te whenua, a ka whanau a ratou  
 tamahine, <sup>2</sup> Ka kite nga tama a te Atua i nga tamahine a te tangata, he ataahua; na ka tango ratou  
 i a ratou i pai ai o ratou katoa, hei wahine ma ratou.

3

Na ka mea a Ihowa, E kore toku wairua e whakawa tonu i te tangata, he kikokiko nei ano hoki ia: na kia kotahi rau kia rua tekau tau ona ra.

4

He roroa nga tangata o te whenua i aua ra, a i muri iho, i te haerenga o nga tama a te Atua ki nga tamahine a te tangata, a ka whanau a ratou tamariki, ko ratou nga marohirohi o mua, he tangata

5

whai ingoa. A ka kite te Atua he nui te kino o te tangata i runga i te whenua, he kino hoki nga tokonga ake o nga whakaaro katoa o tona ngakau i nga wa katoa.

6

Na ka puta ke te whakaaro o Ihowa i hanga ai e ia te tangata ki runga ki te whenua, a ka pouiri

7

tona ngakau. Na ka mea a Ihowa, Ka whakangaromia atu e ahau i te mata o te whenua te tangata i hanga nei e ahau; te tangata, te kirehe, te mea ngokingoki, me nga manu o te rangi; kua puta ke hoki toku whakaaro i hanga ai ratou e ahau.

8

Ko Noa ia i manakohia e Ihowa. Ko nga whakatupuranga enei o Noa: ko Noa he tangata

9

tika, he ngakau tapatahi i ona whakatupuranga: i haereere tahi a Noa i te Atua. A whanau ake nga tama a Noa tokotoru, ko Hema, ko Hama, ko Iapeta.

10

11

Na kua kino te whenua i te aroaro o Ihowa, kua ki katoa hoki te whenua i te tutu. Na ka titiro te Atua ki te whenua, kua kino; kua he hoki te ara o nga kikokiko katoa o runga o te whenua.

12

13

Na ka mea te Atua ki a Noa, Kua tae mai ki toku aroaro te mutunga o nga kikokiko katoa; no te mea kua ki i a ratou te whenua i te tutu; na, ka whakangaromia ratou tahi ko te whenua e ahau.

14

Hanga e koe tetahi aaka mou ki te rakau kopera; me hanga e koe etahi ruma ki roto i te aaka, ka

15

pani ai i roto, i waho, ki te ware. Na kia penei tau hanga i taua mea: Kia toru rau whatianga te

16

roa o te aaka, kia rima tekau whatianga te whanui, ko te teitei kia toru tekau whatianga. Me hanga e koe he matapihi mo te aaka, kia kotahi te whatianga ki raro iho i te tuanui, e whakaotia ai e koe; a ko te tatau o te aaka me whakanoho e koe ki tona taha; ka mea ai koe he papanga ruma, to

17

raro, te tuarua, me te tuatoru. Na ko ahau, tenei ahau te tuku atu nei i te waipuke ki runga ki te whenua, hei whakangaro i nga kikokiko katoa e whai manawa ora ana i raro i te rangi; a ka mate

18

nga mea katoa i runga i te whenua. Otiia ka whakamana e ahau taku kawenata ki a koe; me haere koe ki roto ki te aaka, koutou tahi ko au tama, ko tau wahine, ko nga wahine ano hoki a au tama.

19

Me mau e koe ki roto ki te aaka etahi o nga mea ora katoa o nga kikokiko katoa, kia rua o ia

20

ahua, o ia ahua, kia ora tahi ai me koe; he te toa, hei te uha. Ko etahi o nga manu o ia ahua, o ia ahua, o nga kararehe hoki o ia ahua, o ia ahua, o nga mea ngokingoki katoa o te whenua o ia ahua,

21

o ia ahua kia tatakirua o te katoa e haere ki a koe, kia ora ai. Tangohia mai hoki mau etahi o nga kai katoa e kainga ana, me amene mai ki a koe; a hei ka tena mau, ma ratou hoki.

<sup>22</sup> Na ka meatia e Noa; rite tonu ki nga mea katoa i whakahaua mai e te Atua ki a ia tana i mea ai.

## Chapter 7

<sup>1</sup> Na ka mea a Ihowa ki a Noa, haere mai koutou ko tou whare katoa ki roto ki te aaka; kua kite hoki ahau i a koe he tika ki toku aroaro i tenei whakatupuranga. <sup>2</sup> Tangohia e koe etahi o nga kirehe pokekore, kia takiwhitu, te toa me tana uha: o nga kararehe poke hoki, kia takirua, te toa me tana uha: <sup>3</sup> Me nga manu ano hoki o te rangi, kia takiwhitu, te toa me te uha; kia ora ai he uri ki runga ki te mata o te whenua katoa. <sup>4</sup> Kia whitu ake hoki nga ra ka meatia e ahau kia ua te ua ki runga ki te whenua, kia wha tekau nga ra, kia wha tekau nga po; a ka whakangaromia atu e ahau i runga i te mata o te whenua nga mea ora katoa i hanga e ahau.

<sup>5</sup> A rite tonu ta Noa i mea ai ki a Ihowa katoa i whakahau ai ki a ia. <sup>6</sup> Na e ono rau nga tau o Noa i te putanga mai o te waipuke ki runga ki te whenua. <sup>7</sup> Na ka tomo a Noa ratou tahi ko ana tama, ko tana wahine, ko nga wahine hoki a ana tama, ki roto ki te aaka, i te wehi i nga wai o te waipuke. <sup>8</sup> Me etahi o nga kirehe pokekore, o nga kirehe poke hoki, o nga manu, o nga mea katoa ano hoki e ngokingoki ana i runga i te whenua; <sup>9</sup> I haere tatakirua ratou ki roto ki te aaka ki a Noa, te toa me te uha, i pera tonu me ta te Atua i whakahau ai ki a Noa. <sup>10</sup> Na i muri iho i nga ra e whitu ka puta mai nga wai o te waipuke ki runga ki te whenua.

<sup>11</sup> No te ono rau o nga tau o te oranga o Noa, no te rua o nga marama, no te tekau ma whitu o nga ra o te marama, no taua rangi ano i pakaru mai ai nga matapuna katoa o te rire nui, a ka whakatuwheratia nga matapihi o te rangi. <sup>12</sup> A e wha tekau nga ra, e wha tekau nga po, i ua ai te ua ki runga ki te whenua.

<sup>13</sup> No taua rangi pu ano i tomo ai a Noa, ratou ko Hema, ko Hama, ko Iapeta, nga tama a Noa, ratou tahi ko te wahine a Noa, ko nga wahine tokotoru ano hoki a ana tama, ki roto ki te aaka; <sup>14</sup>

Ratou ko nga kirehe mohoa katoa o ia ahua, o ia ahua, ko nga kararehe katoa o ia ahua, o ia ahua, ko nga mea ngoki katoa e ngokingoki nei i runga i te whenua, o ia ahua, o ia ahua, me nga manu katoa, o ia ahua, o ia ahua, me nga mea whai parira u katoa, o ia ahua, o ia ahua. <sup>15</sup> Na ka

haere ki roto ki te aaka ki a Noa, tatakirua o nga kikokiko katoa, o nga mea whai wairua ora. <sup>16</sup> Ko

nga mea i haere, i haere he toa he uha o nga kikokiko katoa, he pera tonu me ta te Atua i whakahau ai ki a ai: a tutakina ana ia e Ihowa ki roto.

17

A e wha tekau nga ra o te waipuke ki runga ki te whenua; a ka nui haere nga wai, ka whakamanutia ake te aaka, a ka maiangi ake ki runga i te whenua. <sup>18</sup> Na ka kaha nga wai, a ka tino

nui haere ki runga ki te whenua; a ka tere te aaka i runga i te kare o nga wai. <sup>19</sup> Na kua tino kaha rawa nga wai ki runga ki te whenua; a ka taupokina nga maunga teitei katoa i raro i te rangi, a puta

noa. <sup>20</sup> Kotahi tekau ma rima nga whatianga i pari ake ai nga wai; a taupokina ana nga maunga.

21

Na ka mate nga kikokiko katoa i korikori i runga i te whenua; te manu, te kararehe, te kirehe, nga mea ngoki katoa hoki i ngokingoki i runga i te whenua, me nga tangata katoa: <sup>22</sup> Ko nga mea

katoa kei roto nei i o ratou pongaihu te manawa ora, o nga mea katoa i te tuawhenua, i mate. <sup>23</sup> A ngaro iho nga mea ora katoa i runga i te mata o te whenua, te tangata, te kararehe, nga mea ngokingoki, me te manu o te rangi; i whakangaromia atu ratou i runga i te whenua: a toe ake ko te

kotahi o Noa, me nga mea i a ia, i roto i te aaka. <sup>24</sup> A kotahi rau e rima tekau nga ra i huri ai nga wai ki runga ki te whenua.

## Chapter 8

1

Na ka mahara te atua ki a Noa, ki nga mea ora katoa me nga kararehe katoa ano hoki i a ia i roto i te aaka: na ka mea te Atua kia tika atu tetahi hau i runga i te whenua, a ka mariri nga wai.

2

A ka tutakina atu nga matapuna o te rire me nga matapihi o te rangi, ka whakamutua ano hoki te ua o te rangi. <sup>3</sup> Na ka hoki haere nga wai i runga i te whenua: a i te paunga o nga ra kotahi rau e rima tekau kua iti iho nga wai.

4

A i tau iho te aaka i te whitu o nga marama, i te kotahi tekau ma whitu o nga ra o te marama, ki runga ki nga maunga o Ararata. <sup>5</sup> Me te heke haere tonu o nga wai, a taea noatia te tekau o nga marama: no te tekau o nga marama, no te ra tuatahi o te marama, ka kitea nga tihi o nga maunga.

6

A, i te mutunga o nga ra e wha tekau, na ka uakina e Noa te matapihi o te aaka i hanga e ia:

7

A ka tukua atu e ia he raweni, a, ko tona rerenga atu, ka kopiko atu, ka kopiko mai, a maroke noa nga wai i runga i te whenua. <sup>8</sup> Na ka tukua atu ano e ia he kukupa, kia kitea ai kua iti iho ranei nga

wai i runga i te mata o te whenua; <sup>9</sup> A kihai i kitea e te kukupa tetahi taunga iho mo te takahanga

o tona waewae, a ka hoki mai ki a ia, ki roto ki te aaka: i runga hoki nga wai i te mata o te whenua katoa: na ka totoro atu tona ringa, a hopukia ana ia, tangohia ana mai ki a ia ki roto ki te aaka.

10 Na ka tatari ano ia, e whitu atu nga ra; a ka tukua atu ano e ia te kukupa i roto i te aaka: 11 A i te ahiahi ka rere mai te kukupa ki a ia; na i roto i tona waha he rau oriwa, he mea korari mai; a ka

mohio a Noa kua iti iho nga wai i runga i te whenua. 12 A ka tatari ano ia, e whitu atu ano nga ra; a tukua atu ana e ia te kukupa; a kihai tena i hoki mai ano ki a ia i muri iho.

13 A no te ono rau ma tahi o nga tau, no te marama tuatahi, no te ra tuatahi o te marama, i maroke atu ai nga wai i runga i te whenua: na ka hurahia atu e Noa te hipoki o te aaka, a ka kite,

na, kua maroke te mata o te whenua. 14 A no te rua o nga marama, no te rua tekau ma whitu o nga ra o te marama, i maroke ai te whenua.

15 Na ka korero te Atua ki a Noa, ka mea, 16 Puta mai koe i te aaka, koutou tahi ko tau wahine,

ko au tama, me nga wahine a au tama. 17 Kia puta tahi mai me koe nga mea ora katoa i a koe na, nga kikokiko katoa, nga manu, nga kararehe, me nga mea ngoki katoa e ngokingoki ana i runga i te whenua; a kia whakatuputupu ratou ki runga ki te whenua, kia hua, kia ngahue ki runga ki te w

henua. 18 Na ka puta a Noa, ratou tahi ko ana tama, ko tana wahine, me nga wahine a ana tama:

19 Ka puta hoki i roto i te aaka nga kirehe katoa, nga mea ngokingoki katoa, nga manu katoa, me nga mea ngoki katoa i runga i te whenua o ia ahua, o ia ahua.

20 Na ka hanga e Noa tetahi aata ma Ihowa, a ka tango ia i etahi o nga kararehe pokekore katoa,

o nga manu pokekore katoa hoki, a whakaekea tinanatia ana e ia ki runga ki te aata. 21 Na ka hongiri a Ihowa i roto i tona ngakau, E kore ahau e kanga ano i te oneone a muri ake nei mo nga mahi a te tangata; otiia he kino nga tokonga ake o te ngakau o te tangata, o tona taitamarikitanga ake ano; e

kore ano hoki ahau e patu i nga mea ora katoa a muri ake nei, e penei me tenei meatanga aku. 22 E mau ana te whenua, e kore e mutu te po rui me te po kokoti, te maeke me te mahana, te raumati me te hotoke, te ao me te po.

## Chapter 9

1 Na ka manaakitia a Noa ratou ko ana tama e te Atua. I mea ia ki a ratou, Kia hua, kia tini

koutou, kia kapi ano hoki te whenua i a koutou. 2 A ko to koutou wehi, ko to koutou whakamataku, ka tau ki runga ki nga kirehe katoa o te whenua, ki nga manu katoa o te rangi, ki nga mea katoa e ngahue ana i runga i te whenua, ki nga ika katoa ano hoki o te moana; kua hoatu ena mea ki to

<sup>3</sup> koutou ringa. Hei kai ma koutou nga mea korikori katoa, nga mea ora; rite tonu ki taku hoatutanga  
i nga otaota matomato taku hoatutanga i nga mea katoa ki a koutou. <sup>4</sup> Otiia kua e kainga e koutou  
te kikokiko me tona ora, ara ko ona toto. <sup>5</sup> Na ko o koutou toto, ko te toto e ora nei koutou, he pono  
ka rapua e ahau he utu; ka rapua e ahau he utu i nga kirehe katoa; i te tangata ano hoki, ka rapua e  
ahau he utu mo te matenga o te tangata i te teina o ia tangata, o ia tangata. <sup>6</sup> Ko ia e whakaheke i  
nga toto o te tangata, ma te tangata ano ona toto e whakaheke: no te Atua hoki te ahua i hanga ai  
e ia te tangata. <sup>7</sup> A ko koutou, kia hua, kia tini; kia nui to koutou uri ki runga kite whenua, kia tini  
hoki ki reira.  
<sup>8</sup> A i korero te Atua ki a Noa ratou ko ana tama, i mea, <sup>9</sup> Ko ahau nei, nana, ka whakapumau  
ahau i taku kawenata ki a koutou, ki to koutou uri i muri i a koutou; <sup>10</sup> Ki nga mea ora katoa hoki  
i a koutou, ki te manu, ki te kararehe, ki nga kirehe katoa hoki o te whenua e noho ana i a koutou;  
<sup>11</sup> ki nga mea katoa i puta mai i roto i te aaka, puta noa ki nga kirehe katoa o te whenua. A ka  
whakapumautia e ahau taku kawenata ki a koutou; e kore e hatepea atu nga kikokiko katoa a muri  
ake nei e nga wai o te waipuke; e kore ano e puta mai he waipuke a muri ake nei hei whakangaro  
mo te whenua.  
<sup>12</sup> Ka mea te Atua, Ko te tohu tenei o te kawenata, e whakatakotoria nei e ahau ki waenganui  
oku, o koutou tae atu ki nga mea ora katoa i a koutou, mo nga whakatupuranga mutungakore: <sup>13</sup> Ka  
whakatakotoria e ahau taku kopere ki te kapua, a ka waiho hei tohu mo te kawenata i waenganui  
oku, o te whenua. <sup>14</sup> Tenei ake ano, i te wa e whakaputa ai ahau i te kapua ki runga ki te whenua,  
<sup>15</sup> ka kitea te kopere i te kapua: A ka mahara ahau ki taku kawenata i waenganui oku, o koutou  
me nga mea ora katoa, ara nga kikokiko katoa; e kore nga wai e pupuke a muri ake nei hei  
whakangaro i nga kikokiko katoa. <sup>16</sup> A ka piri te kopere ki te kapua; a ka titiro atu ahau ki taua  
mea, kia mahara ai ahau ki te kawenata mau tonu i waenganui o te Atua, o nga wairua ora katoa o  
nga kikokiko katoa i runga i te whenua. <sup>17</sup> Na ka mea te Atua ki a Noa, Ko te tohu tenei o te  
kawenata e whakapumautia nei e ahau ki waenganui oku, o nga kikokiko katoa i runga i te whenua.  
<sup>18</sup> Na ko nga tama a Noa, i puta mai nei i roto i te aaka, ko Hema, ko Hama, ko Iapeta: a ko  
Hama te matua o Kanaana. <sup>19</sup> Ko nga tama tokotoru enei a Noa: a na enei i kapi ai te whenua katoa.  
<sup>20</sup> Na ka timata a Noa te ngaki whenua, a whakatokia ana e ia he mara waina: <sup>21</sup> A ka inumia e ia  
te waina, ka haurangi; na ka takoto tahanga i roto i tona teneti. <sup>22</sup> A, i te kitenga o Hama, o te matua  
o Kanaana, i tona matua e takoto tahanga ana, ka korerotia e ia ki ona tuakana tokorua i waho.



23

Na ka tango a Hema raua ko Iapeta i tetahi kakahu, maka iho e raua ki runga ki o raua pokohiwi, na ka haere whakatuara atu raua, a hipokina ana te wahi takoto kau o to raua papa; me te ahu ano o raua kanohi ki muri, a kihai raua i kite i te wahi takoto kau o to raua papa.

24

Na ka maranga ake a Noa i tana waina, ka mohio ki ta tana potiki i mea ai ki a ia. Na ka mea ia, Ka kanga a Kanaana, ka waiho ia hei tino pononga ma ona tuakana. I mea ano ia, Kia

26

whakapaingia a Ihowa, te Atua o Hema; a ka waiho a Kanaana hei pononga mana. Ka meinga a Iapeta e te Atua kia tohatoha noa atu, kia noho hoki ia ki nga teneti o Hema; a hei pononga a Kanaana mana.

27

28

A e toru rau e rima tekau nga tau i ora ai a Noa i muri i te waipuke. A ko nga ra katoa o Noa e iwa rau e rima tekau tau: a ka mate ia.

29

## Chapter 10

1

Na ko nga whakatupuranga enei o nga tama a Noa, o Hema, o Hama, o Iapeta: i whanau hoki he tama ma ratou i muri i te waipuke. Ko nga tama a Iapeta; ko Komere, ko Makoka, ko Marai,

2

ko Iawana, ko Tupara, ko Meheke, ko Tiraha. A ko nga tama a Komere; ko Ahekenata, ko Ripata,

3

ko Tokarama. A ko nga tama a Iawana; ko Erihaha, ko Tarahihi, ko Kitimi, ko Totanimi. Na enei nga motu o nga tau iwi i wehe puta noa i o ratou whenua, tena iwi i tona reo; tera toronga, tera toronga o ratou, i o ratou iwi hoki.

4

5

6

A ko nga tama a Hama; ko Kuhu, ko Mitiraima, ko Putu, ko Kanaana. Ko nga tama a Kuhu; ko Tepa, ko Hawira, ko Hapata, ko Raama, ko Hapateka: a ko nga tama a Raama; ko Hepa, ko

7

8

Rerana. A whanau ake ta Kuhu ko Nimirota; i timata ia hei tangata nui ki runga ki te whenua.

9

He maia ia i te aroaro o Ihowa ki te wahi kirehe mohoa: no reira te kupu nei, He pera me Nimirota te maia i te aroaro o Ihowa ki te whai kirehe mohoa. A i Papera te timatanga o tona kingitanga,

10

i Ereke, i Akara, i Karane, i te whenua o Hinara. I haere atu ia i taua whenua ki Ahiria, a hanga

11

ana e ia a Ninewe, me te pa, me Rehopoto, me Kara, Me Rehena hoki, i waenganui o Ninewe,

12

o Kara: he pa nui ia. A whanau ake a Mitiraima, ko nga Rurimi, ko nga Anamime, ko nga

13

Rehapimi, ko nga Napatuhimi, Ko nga Pataruhimi, ko nga Kaheruhimi, i puta mai hoki i ena nga Pirihitini, a ko nga Kapatorimi.

14

<sup>15</sup> A whanau ake ta Kanaana ko Hairona, ko tana matamua, raua ko Hete, <sup>16</sup> Me te Iepuhi, me  
 te Amori, me te Kirikahi, <sup>17</sup> Me te Hiwi, me te Araki, me te Hini, <sup>18</sup> Me te Aarawari, me te Temari,  
 me te Hamati: a muri iho ka marara noa atu nga hapu o nga Kanaani. <sup>19</sup> I Hairona hoki te rohe ki  
 nga Kanaani, kei tou haerenga atu ki Kerara, ki Kaha; kei tou haerenga ki Horoma, ki Komora, ki  
 Arema, ki Tepoimi, a tae noa ki Raha. <sup>20</sup> Ko nga tama enei a Hama, tera toronga, tera toronga o  
 ratou, tera reo, tera reo o ratou, me o ratou whenua, me o ratou iwi.  
<sup>21</sup> Me Hema ano hoki, me te papa o nga tamariki katoa a Epere, te tuakana o Iapeta, i whanau  
 ano hoki he tamariki <sup>22</sup> Ko nga tama a Hema; ko Erama, ko Ahura, ko Arapahata, ko Ruru,  
 ko Arame. <sup>23</sup> A ko nga tamariki a Arame; ko Uhu, ko Huru, ko Ketera, ko Maha. <sup>24</sup> Na Arahapata  
 ko Haraha, ta Haraha ko Epere. <sup>25</sup> Tokorua nga tama a Epere: ko Pereke te ingoa o tetahi: no tona  
 ra hoki i wehea ai te whenua; a ko Ioketana te ingoa o tona teina. <sup>26</sup> A whanau ake a Ioketana ko  
 Aramotata, ko Herepe, ko Hataramaweta, ko Ieraha, <sup>27</sup> Ko Hatorama, ko Utara, ko Tikera, <sup>28</sup> Ko  
 Opara, ko Apimaera, ko Hepa, <sup>29</sup> Ko Opira, ko Hawira, ko Iopapa: he tama katoa enei na Ioketana.  
<sup>30</sup> Kei Meha hoki to ratou nohoanga, a tae noa koe ki Heparā; he maunga ia kei te rawhiti. <sup>31</sup> Ko  
 nga tama enei a Hema, tona hapu, tona hapu, tona reo, tona reo, o ratou kainga, me o ratou iwi.  
<sup>32</sup> Ko nga toronga enei o nga tama a Noa, i o ratou whakatupuranga, me o ratou iwi: a i wehea mai  
 i enei nga iwi o te whenua i muri iho i te waipuke.

## Chapter 11

<sup>1</sup> Na kotahi tonu te reo o te whenua katoa, rite tonu ano korero. <sup>2</sup> A, i a ratou e haere ana  
 whaka te rawhiti, na ka kite ratou i tetahi mania i te whenua o Hinara; a noho ana ratou i reira. <sup>3</sup> Na  
 ka mea ratou ki tona hoa, ki tona hoa, Tena, tatou ka hanga pereki, me ata tahu marire ano hoki.  
 Na ka meinga e ratou he pereki hei kohatu, he uku hoki ta ratou moata. <sup>4</sup> Na ka mea ratou, Tena,  
 tatou ka hanga i tetahi pa me tetahi pourewa, a kia tutuki a runga ki te rangi, kia whai ingoa ai tatou;  
 kei marara noa atu tatou ki te mata o te whenua katoa.  
<sup>5</sup> Na ka heke iho a Ihowa kia kite i te pa me te pourewa, i hanga nei e nga tama a te tangata.  
<sup>6</sup> A ka mea a Ihowa, Nana, kotahi tonu te iwi nei, kotahi ano hoki to ratou reo; a ka timataia nei

tenei mahi e ratou: e kore ano ratou e taea te pupuri mai i tetahi mea, e whakaaro ana ratou kia mahia. <sup>7</sup> Tena, tatou ka heke atu, ka whakapoauau i o ratou reo i reira, kia kore ai ratou e matau, ia tangata, ia tangata ki te reo o tona hoa. <sup>8</sup> Na whakamararatia atu ana ratou i reira e Ihowa ki runga ki te mata o te whenua katoa: a mahue ake i a ratou te hanga i te pa. <sup>9</sup> Na kona i huaina ai to reira ingoa ko Papera; no te mea i whakapoauautia e Ihowa i reira te reo o te whenua katoa: no reira ano hoki te whakamararatanga a Ihowa i a ratou ki te mata o te whenua katoa.

<sup>10</sup> Ko nga whakatupuranga enei o Hema: ka kotahi rau nga tau o Hema, na ka whanau a Arapahata i te rua o nga tau i muri i te waipuke: <sup>11</sup> A e rima rau nga tau i ora ai a Hema i muri i te whanautanga o Arapahata, a ka whanau ana tama me ana tamahine. <sup>12</sup> A ka toru tekau ma rima nga tau i ora ai a Arapahata, na ka whanau a Haraha: <sup>13</sup> A e wha rau e toru nga tau i ora ai a Arapahata i muri i te whanautanga o Haraha, ka whanau ana tama me ana tamahine. <sup>14</sup> A ka toru tekau nga tau i ora ai a Haraha, na ka whanau a Epere: <sup>15</sup> A e wha rau e toru nga tau o Haraha i muri i te whanautanga o Epere, ka whanau ana tama me ana tamahine. <sup>16</sup> A e toru tekau ma wha nga tau i ora ai a Epere, ka whanau a Pereke: <sup>17</sup> E wha rau e toru tekau nga tau i ora ai a Epere i muri i te whanautanga o Pereke, a ka whanau ana tama me ana tamahine. <sup>18</sup> A ka toru tekau nga tau o Pereke, ka whanau a Reu: <sup>19</sup> A e rua rau e iwa nga tau i ora ai a Pereke i muri i te whanautanga o Reu, ka whanau ana tama me ana tamahine. <sup>20</sup> A ka toru tekau ma rua nga tau o Reu, na ka whanau a Heruka: <sup>21</sup> A e rua rau ma whitu nga tau i ora ai a Reu i muri i te whanautanga o Heruka, ka whanau ana tama me ana tamahine. <sup>22</sup> A ka toru tekau nga tau o Heruka, na ka whanau a Nahora: <sup>23</sup> A e rua rau nga tau i ora ai a Heruka i muri i te whanautanga o Nahora, ka whanau ana tama me ana tamahine. <sup>24</sup> A e rua tekau ma iwa nga tau i ora ai a Nahora, na ka whanau a Teraha: <sup>25</sup> A kotahi rau kotahi tekau ma iwa nga tau i ora ai a Nahora i muri i te whanautanga o Teraha, a ka whanau ana tama me ana tamahine. <sup>26</sup> A ka whitu tekau nga tau i ora ai a Teraha, na ka whanau a Aperama, a Nahora, ratou ko Harana.

<sup>27</sup> Na, ko nga whakatupuranga enei o Teraha: na Teraha ko Aperama, ko Nahora, ratou ko Harana; na Harana ko Rota. <sup>28</sup> A i mate a Harana i te oranga ano o tona papa o Teraha i te whenua i whanau ai ia, i Uru o nga Karari. <sup>29</sup> Na ka tango a Aperama raua ko Nahora i etahi wahine ma

raua: ko te ingoa o te wahine a Aperama ko Harai, ko te ingoa o te wahine a Nahora ko Mireka  
 tamahine a Harana, papa o Mireka, papa ano hoki o Iheka. <sup>30</sup> A he pakoko a Harai; kahore ana  
<sup>31</sup> tamariki. Na ka tango a Teraha i a Aperama i tana tama, raua ko Rota tama a Harana, ko te tama  
 a tana tama, ratou ko tana hunaonga, ko Harai wahine a tana tama a Aperama; a whakatika tahi ana  
 ratou i Uru o nga Karari, haere ana ki te whenua o Kanaana; na ka tae ki Harana, a noho ana i reira.  
<sup>32</sup> A ko nga ra o Teraha e rua rau ma rima tau: na ka mate a Teraha ki Harana.

## Chapter 12

<sup>1</sup> Na ka mea atu a Ihowa ki a Aperama, Haere atu i tou whenua, i roto i ou whanaunga, i te  
 whare ano hoki o tou papa, ki te whenua e whakaaturia e ahau ki a koe: <sup>2</sup> A ka meinga koe e ahau  
 hei iwi nui, ka manaakitia ano koe e ahau, ka whakanuia ano hoki tou ingoa; a ka waiho koe hei  
 manaakitanga: <sup>3</sup> A ka manaaki ahau i te hunga e manaaki ana i a koe, ka kanga hoki i te tangata e  
 kanga ano i a koe: a mau ka manaakitia ai nga hapu katoa o te whenua.  
<sup>4</sup> Na haere ana a Aperama, pera ana me ta Ihowa i korero ai ki a ia; i haere tahi ano a Rota i a  
 ia; a e whitu tekau ma rima nga tau o Aperama i tona hekenga mai i Harana. <sup>5</sup> Na ka tango a  
 Aperama i a Harai, i tana wahine raua ko Rota tama a tona teina, i o ratou rawa katoa i whakaemi  
 ai, i nga mea ora katoa i whiwhi ai ratou ki Harana; a whakatika ana ratou, haere ana ki te whenua  
 o Kanaana; na, ka tae ratou ki te whenua o Kanaana.  
<sup>6</sup> Na ka tika a Aperama na waenganui o te whenua ki te wahi o Hekeme, ki te oki i More. I taua  
 whenua ano te Kanaani i taua wa. <sup>7</sup> Na ka puta a Ihowa ki a Aperama, ka mea, Ka hoatu e ahau  
 tenei whenua ki tou uri. Na ka hanga e ia tetahi aata ki reira ma Ihowa i puta mai nei ki a ia. <sup>8</sup> Na  
 ka neke atu ia i reira ki te maunga i te rawhiti o Peteere, a ka whakatu i tona teneti; ko Peteere ki  
 te hauauru, ko Hai ki te rawhiti: i hanga ano e ia tetahi aata ma Ihowa ki reira, a karanga ana ki te  
 ingoa o Ihowa. <sup>9</sup> Na ka turia atu e Aperama, me te neke haere whaka te tonga.  
<sup>10</sup> A he matekai to te whenua: a ka haere a Aperama ki raro, ki Ihipa, ki reira noho ai; he nui  
 hoki te matekai o te whenua. <sup>11</sup> A, i a ia ka tata te tae ki Ihipa, ka mea ia ki a Harai, ki tana wahine,  
 Nana, e mohio ana ahau he wahine ataahua koe ki te titiro atu; <sup>12</sup> Na, akuanei, kei te kitenga o nga  
 Ihipiana i a koe, ka mea ratou, Ko tana wahine tenei: a ka patua ahau e ratou, ka whakaora hoki i

13  
a koe. Me ki koe, ne, he tuahine koe noku? kia whiwhi ai ahau ki te pai i a koe; a kia ora ai toku wairua i a koe.

14 A, i te taenga o Aperama ki Ihipa, ka titiro nga Ihipiana ki te wahine, he tino ataahua. 15 Ka kite hoki nga rangatira a Parao i a ia, ka korero whakamihi mona ki a Parao: a ka kawea te wahine

16 ra ki te whare o Parao. Na ka atawhai ia i a Aperama, he mea hoki mo te wahine: a ka riro i ia

17 he hipi, he kau, he kaihe toa, he pononga tane, he pononga wahine, he kaihe uha, he kamera. Na ka whiua e Ihowa a Parao ratou ko tona whare, he nui nga pakinga, mo Harai wahine a Aperama.

18 Na ka karanga a Parao ki a Aperama, ka mea, He aha tenei mahi au ki ahau? he aha koe te korero

19 mai ai ki ahau ko tau wahine ia? Na te aha koe i mea ai, Ko taku tuahine ia? i tango ai ahau i a

20 ia hei wahine maku: na, tau wahine, tangohia, haere. Na ka whakatupato a Parao ki nga tangata, kei aha atu ki a ia: a tukua atu ana ia e ratou, me tana wahine, me ana mea katoa.

### Chapter 13

1 Na ka haere mai a Aperama i Ihipa, ki te tonga, raua ko tana wahine, me ana mea katoa, me

2 Rota hoki. He nui rawa hoki nga kararehe, te hiriwa me te koura ki a Aperama. 3 Na ka turia mai e ia, a ka haere i te tonga a tae noa ki Peteere, ki te wahi i oroko tu ai tona teneti, i waenganui o

4 Peteere, o Hai, Ki te wahi i te aata i hanga e ia ki reira i te timatanga: na ka karanga a Aperama i reira ki te ingoa o Ihowa.

5 Na ko Rota, i haere tahi nei i a Aperama, he hipi ano ana, he kau, he teneti. 6 A kihai i nui te whenua mo raua, hei nohoanga tahitanga mo raua: he nui hoki o raua rawa, te ahei raua te mohu

7 tahi. Na ka tautohe ki a ratou nga hepara a Aperama me nga hepara a Rota; na i taua whenua e noho ana te Kanaani me te Perihi i taua wa. 8 Na ka mea a Aperama ki a Rota, Kaua ra taua e whakatete ki a taua, kaua hoki a taua hepara e whakatete ki a ratou; he teina nei hoki, he tuakana

9 taua. Kahore ianei te whenua katoa i tou aroaro? tena, wehe atu koe i ahau: ki te anga koe ki maui, ka ahau ahau ki matau, a ki te haere koe ki matau, na ka ahau ahau ki maui.

10 Na ka anga ake nga kanohi o Rota, ka titiro ki te mania katoa o Horano, he makuku katoa, i te mea kahore ano kia whakangaromia noatia a Horoma, a Komora e Ihowa, he pera ano me te

11 kari a Ihowa, me te whenua hoki o Ihipa, i tou haerenga ki Toara. Na ka whiriwhiria e Rota ko

te mania katoa o Horano mana; na ka haere a Rota whaka te rawhiti: a ka wehe raua i a raua. <sup>12</sup> Ko Aperama i noho kite whenua o Kanaana, ko Rota i noho ki nga pa o te mania, a whakaturia ana e ia tona teneti ki Horoma. <sup>13</sup> Na he kino nga tangata o Horoma, he hunga hara rawa ki te aroaro o Ihowa.

<sup>14</sup> Na ka mea a Ihowa ki a Aperama, i muri i te wehenga atu o Rota i a ia, Anga ake ou kanohi, titiro atu hoki i te wahi e tu na koe, ki te raki, ki te tonga, ki te rawhiti, ki te hauauru: <sup>15</sup> Ko te whenua katoa hoki e kite atu na koe, ka hoatu e ahau ki a koe, ki tou uri hoki ake tonu atu. <sup>16</sup> Ka meinga hoki e ahau ou uri kia rite ki te puehu o te whenua: a ki te ahei i tetahi tangata te tatau i te puehu o te whenua, e taua ano hoki ou uri. <sup>17</sup> Whakatika, haereerea te whenua, tona roa, tona whanui; no te mea ka hoatu e ahau ki a koe. <sup>18</sup> Na nekehia ana tona teneti e Aperama, a haere ana, noho ana ki nga oki i Mamere, ki era i Heperona, a hanga ana e ia tetahi aata ma Ihowa ki reira.

## Chapter 14

<sup>1</sup> Na, i nga ra o Amarapera, Kingi o Hinara, o Arioka, kingi o Eratarā, o Keroraoma, kingi o Erama, o Tirara hoki, kingi o Korimi; <sup>2</sup> Ka whawhai enei ki a Pera, kingi o Horoma, ratou ko Pireta, kingi o Komora, ko Hinapa, kingi o Arema, ko Hemepera, kingi o Tepoimi, ko te kingi hoki o Pera, ara o Toara. <sup>3</sup> I huihui katoa enei ki te raorao i Hirimi, ara ki te Moana Tote. <sup>4</sup> Kotahi tekau ma rua nga tau i mahi ai ratou ki a Keroraoma, a i te kotahi tekau ma toru o nga tau ka whakakeke ratou. <sup>5</sup> Na i te tekau ma wha o nga tau ka haere mai a Keroraoma, ratou ko nga kingi i whakauru ki a ia, a patua iho e ratou nga Repaima i Ahateroto Karanaima, ratou ko nga Tutimi i Hama me nga Emime i Hawe Kiriataima, <sup>6</sup> Me nga Hori i to ratou maunga, i Heira, a tae noa ki Ereparana, ki te taha o te koraha. <sup>7</sup> Na ka hoki ratou, a ka tae ki Enimihipata, ara ki Karehe, a patua katoatia ana e ratou te whenua o nga Amareki, ratou ko nga Amori i noho ra i Hatetonatamara. <sup>8</sup> Na ka puta atu te kingi o Horoma, ratou ko te kingi o Komora, ko te kingi o Arema, ko te kingi o Tepoimi, me te kingi o Pera, ara o Toara; a ka turia e ratou he pakanga ki a ratou ki te raorao i Hirimi; <sup>9</sup> Ki a Keroraoma, kingi o Erama, ki a Tirara, kingi o Koimi, ki a Amarapera, kingi o Hinara, ratou ko Arioka, kingi o Eratarā, tokowha enei kingi, tokorima hoki era. <sup>10</sup> Na, ki tonu te raorao i Hirimi i te poka uku; na ka whati nga kingi o Horoma raua ko Komora, a ka hinga ki reira; a rere ana nga

11  
morehu ki te maunga. Na murua ana e ratou nga taonga katoa o Horoma, o Komora, me a ratou

12  
kai katoa, a haere ana. I mauria ano e ratou a Rota, te tama a te teina o Aperama, me ona taonga,  
a haere ana; i Horoma hoki ia e noho ana.

13  
Na ka tae he morehu, ka korero ki a Aperama Hiperu; i te noho hoki ia i nga oki o Mamere  
14  
Amori, teina o Ehehora, he teina ia no Anera: kotahi ano to ratou whakaaro ko Aperama. A, i  
te rongonga o Aperama, kua hereherea atu tona iramutu, takiritia ana e ia ana tangata mohio, nga

15  
mea i whanau ki tona whare, e toru rau kotahi tekau ma waru, a whaia ana ratou ki Rana. Na  
whaia ana ratou ko ana tangata kia rua nga matua, hei whakaeke mo ratou i te po, a patua ana ratou

16  
e ia, whaia ana, a tae noa ki Hopaha, ki te taha ki maui o Ramahiku. A whakahokia mai ana e  
ia nga taonga katoa, whakahokia mai ana ano hoki tona iramutu, a Rota, me ona taonga, me nga  
wahine ano hoki, me nga tangata.

17  
Na ka puta mai te kingi o Horoma ki te whakatau i a ia i tona hokinga mai i te patu i a  
18  
Keroraoma ratou ko ona hoa, ko nga kingi ki te raorao o Hawe, ara ki te Raorao o te Kingi. A  
i maua mai e Merekihereke, e te kingi o Harema, he taro, he waina: he tohunga ano hoki ia no te

19  
Atua, no te Runga Rawa. Na ka manaaki ia i a ia, ka mea, Kia manaakitia a Aperama e te Atua,  
20  
e te Runga Rawa, nona nei te rangi me te whenua: Kia manaakitia ano te Atua, te Runga Rawa,  
nana nei i tuku mai ou hoariri ki tou ringa. A ka hoatu e ia ki a ia nga whakatekau o nga mea katoa.

21  
Na ka mea te kingi o Horoma ki a Aperama, Homai nga tangata ki ahau, ko nga taonga ia  
22  
tangohia mou. Ano ra ko Aperama ki te kingi o Horoma, Kua totoro atu toku ringa ki a Ihowa,

23  
ki te Atua, ki te Runga Rawa, nona nei te rangi me te whenua; E kore ahau e tango ahakoa he  
miro, ahakoa he here no te hu, i tetahi mea ranei au, kei mea koe, naku a Aperama i whai taonga

24  
ai: Kati ano i a nga taitama i kai ai, me te wahi a nga tangata i haere tahi nei matou, a Anera,  
ratou ko Ehehora, ko Mamere; ma ratou e tango te wahi i a ratou.

## Chapter 15

1  
Muri iho i enei mea ka puta moemoea mai te kupu a Ihowa ki a Aperama, ka mea, Kaua e  
wehi, e Aperama: ko ahau tou whakangungu rakau, tou utu nui whakaharahara.

2 Na ka mea a Aperama, E te Ariki, e Ihowa, ko te aha e homai e koe ki ahau, e haere urikore  
 nei ahau, a ko te taunga o toku whare hei tenei Erietera o Ramahiku? 3 I mea ano a Aperama, Titiro  
 hoki, kahore nei i homai e koe he uri ki ahau: a akuanei, kei tetahi tamaiti i whanau ki toku whare  
 te mahuetanga iho o oku taonga. 4 Na, kua puta mai te kupu a Ihowa ki a ia, i mea ia, E kore e  
 mahue iho ou taonga mo tena; engari ka mahue iho mo tetahi e puta mai i roto i ou whekau. 5 Na  
 ka kawea ia e ia ki waho, a ka mea mai, Tena tirohia atu te rangi, taua hoki nga whetu, ki te taea  
 ena e koe te tatau: a ka mea ia ki a ia, Ka pera tou uri. 6 I whakapono hoki ia ki a Ihowa, a ka  
 whakairia ki a ia hei tika.

7 I mea ano ia ki a ia, Ko Ihowa ahau, nana nei koe i kawea mai i Uru o nga Karari, kia hoatu  
 ai ki a koe tenei whenua hei kainga pumau. 8 Ano ra ko ia, E te Ariki, e Ihowa, ma te aha ka mohio  
 ai ahau ka riro mai tenei i ahau? 9 Na ka mea ia ki a ia, Tikina tetahi kau maku, hei te tau toru, me  
 tetahi koati uha, hei te tau toru, me tetahi hipi toa, hei te tau toru, me tetahi kukupa, me tetahi pi  
 kukupa. 10 Na tikina ana e ia aua mea katoa, a tapahia ana i waenganui, whakatakotoria ana nga  
 wahi kia rite mai ki a raua whakawahi: ko nga manu ia kihai i tapahia e ia. 11 A ka rere iho nga  
 manu ki nga tinana, ka aia atu e Aperama.

12 Na, i te rerenga o te ra, ka parangia a Aperama e te moe; na ko te whakawehi o te pouri  
 kerekere e tau iho ana ki a ia. 13 A ka mea ia ki a Aperama, Kia tino mohio koe, ka noho manene  
 tou uri ki tetahi whenua ehara nei i a ratou, a ka mahi ki a ratou; a e wha rau nga tau e whakatupuria  
 kinotia ai ratou; 14 Ka whakawakia ano e ahau te iwi e whakamahia ai ratou: a muri iho ka puta  
 mai ratou me nga taonga maha. 15 Ko koe ia ka haere marie ki ou matua; ka pai tou koroheketanga,  
 a tanumia noatia koe. 16 Kei te wha ia a nga whakatupuranga ka hoki mai ratou ki konei no te mea  
 kahore ano kia tutuki noa te hara o nga Amori.

17 Na i te tonga o te ra, no ka pouri, na, ko te oumu paowa, me te rama e ka ana, e tika ana i  
 waenganui o aua porohanga. 18 I taua rangi ano ka whakaritea e Ihowa he kawenata ki a Aperama,  
 ka mea ia, Ka hoatu e ahau tenei whenua ki tou uri, mai ra ano o te awa o Ihipa, a tae noa ki te awa  
 nui, ki te awa, ki Uparati: 19 Nga Keni, nga Keniti, nga Karamoni, 20 Nga Hiti, nga Perihi, nga  
 Repaima, 21 Nga Amori, nga Kanaani, nga Kirikahi, me nga Iepuhi.



## Chapter 16

<sup>1</sup> Na kahore a Harai, te wahine a Aperama, i whai tamariki mana; na he pononga wahine tana,  
<sup>2</sup> no Ihipa, ko Hakara tona ingoa. Na ka mea a Harai ki a Aperama, Nana, kua tutakina nei ahau e  
 Ihowa kei whanau tamariki: mau e haere ki roto, ki taku pononga; mana pea ahau e tu ai. A ka  
<sup>3</sup> whakarongo a Aperama ki te reo o Harai. Na ka tango a Harai, wahine a Aperama i a Hakara, i  
 te wahine o Ihipa, i tana pononga, i te takanga o nga tau kotahi tekau o te nohoanga o Aperama i  
 te whenua o Kanaana, a homai ana e ia ki a Aperama, ki tana tane, hei wahine mana.  
<sup>4</sup> Na ka haere ia ki roto, ki a Hakara, a ka hapu ia: a, no tona kitenga kua hapu ia, ka iti tona  
<sup>5</sup> rangatira wahine ki tana titiro. Na ka mea a Harai ki a Aperama, Hei runga i a koe tenei tutu ki  
 ahau: i hoatu e ahau taku pononga wahine ki tou uma; a, no tona kitenga kua hapu ia, ka iti ahau  
<sup>6</sup> ki tana titiro iho: ma Ihowa e whakariterite taku korero me tau hoki. Na ka mea a Aperama ki a  
 Harai, Ha, kei tou ringa ano tau pononga; mau e mea ki a ia te mea e pai ana ki tau titiro iho. Na  
 ka whakatupu kino a Harai i a ia, a rere ana ia i tona aroaro.  
<sup>7</sup> A ka kitea ia e te anahera a te Atua i tetahi puna wai i te koraha, i te puna i te huarahi ki Huru,  
<sup>8</sup> Ka mea, E Hakara, e te pononga a Harai, i haere mai koe i hea? e anga ana hoki koe ko hea? a ka  
<sup>9</sup> mea ia, E rere ana ahau i a Harai, i toku rangatira. Na ka mea te anahera a Ihowa ki a ia, Hoki atu  
 ki tou rangatira, kia whakaririka hoki koe i raro i ona ringa.  
<sup>10</sup> Ka mea ano te anahera a Ihowa ki a ia, Ka whakanuia rawatia e ahau tou uri, a e kore e taea  
<sup>11</sup> te tatau, i te tini hoki. I mea ano te anahera a Ihowa ki a ia, Nana, e hapu ana koe, a ka whanau  
<sup>12</sup> he tama, me hua e koe tona ingoa ko Ihimaera; mo Ihowa i whakarongo ki tau tangi. A ka rite  
 ia ki te kaihe mohoa o te tangata; ka ara tona ringa ki te katoa, me te ringa o te katoa  
<sup>13</sup> ki a ia; a ka noho ia i te aroaro o ona teina katoa. Na ka huaina e ia te ingoa o Ihowa i korero  
 nei ki a ia, He Atua koe e kite ana: i mea hoki ia, I titiro ranei ahau i koeni ki muri i toku kaititiro  
<sup>14</sup> mai? Koia i huaina ai taua puna ko Peererahairoi; na, kei waenganui i Karehe, i Perere.  
<sup>15</sup> Na ka whanau te tama a Hakara raua ko Aperama: a huaina ana e Aperama te ingoa o tana  
<sup>16</sup> tama, i whanau nei i a Hakara, ko Ihimaera. Na e waru tekau ma ono nga tau o Aperama i te  
 whanautanga o Ihimaera tama a Hakara raua ko Aperama.

## Chapter 17

<sup>1</sup> A, i te mea ka iwa tekau ma iwa nga tau o Aperama, ka puta mai a Ihowa ki a Aperama, ka mea ki a ia, Ko ahau te Atua Kaha Rawa; haereere i mua i toku aroaro, kia tapatahi hoki te whakaaro.

<sup>2</sup> A ka waiho e ahau taku kawenata ki waenganui i a taua, ka tino whakanui rawa ano ahau i a koe.

<sup>3</sup> Na ka kupapa te kanohi o Aperama: a ka korero te Atua ki a ia, ka mea,

<sup>4</sup> Na ko ahau, kei a koe taku kawenata, a ka matua koe mo nga iwi maha. <sup>5</sup> E kore hoki tou ingoa e huaina a muri ake nei ko Aperama, engari ko Aperahama te ingoa mou; ka meinga hoki koe e ahau hei matua mo nga iwi maha. <sup>6</sup> Ka meinga ano koe e ahau kia tino hua rawa, ka meinga koe e ahau hei take mo nga iwi, a ka puta mai nga kingi i roto i a koe.

<sup>7</sup> A ka whakapumautia e ahau taku kawenata ki waenganui oku, o koutou hoki ko ou uri i muri i a koe, o tera whakatupuranga, o tera whakatupuranga o ratou, hei kawenata mau tonu, a hei Atua ahau mou, mo ou uri hoki i muri i a koe. <sup>8</sup> A ka hoatu e ahau ki a koe, ki ou uri hoki i muri i a koe, te whenua e noho manene na koe, te whenua katoa o Kanaana, hei kainga pumau; a hei Atua ahau mo ratou. <sup>9</sup> I mea ano te Atua ki a Aperahama, Ina, ko koe, me whakarite e koe taku kawenata, e koutou ko ou uri i muri i a koe, e tera whakatupuranga, e tera whakatupuranga o ratou. <sup>10</sup> Ko taku kawenata tenei hei whakaritenga ma koutou i waenganui oku, o koutou ko ou uri i muri i a koe; Me kokoti a koutou tane katoa. <sup>11</sup> Me kokoti e koutou to koutou kiri matamata: a ka waiho tena hei tohu mo te kawenata i waenganui oku, o koutou. <sup>12</sup> Me kokoti e koutou nga tamariki ina waru nga ra, nga tane katoa o tena whakatupuranga, o tena whakatupuranga o koutou, nga mea i whanau i roto i te whare, i hokona ranei ki te moni i tetahi tangata ke, ehara nei i te uri nou. <sup>13</sup> Me kokoti tonu te tangata i whanau i roto i tou whare, i hokona ranei ki tau moni, a ka mau taku kawenata ki o koutou kikokiko, hei kawenata mau tonu. <sup>14</sup> A, ko te tane kihai i kotia, kihai nei i kotia tona kiri matamata, ka hatepea atu tena wairua i roto i tona iwi; kua whakataka e ia taku kawenata.

<sup>15</sup> A ka mea te Atua ki a Aperahama, Ko Harai, ko tau wahine, kaua e huaina tona ingoa ko Harai, engari ko Hara he ingoa mona. <sup>16</sup> A ko manaaki ahau i a ia, ka hoatu ano hoki i tetahi tama ki a koe i roto i a ia: ina, ka manaaki ahau i a ia, a hei whaea ia mo nga iwi; ka puta mai nga kingi mo nga iwi i roto i a ia. <sup>17</sup> Na ka kupapa te kanohi o Aperahama ki raro, a ka kata ia, ka mea hoki i roto i tona ngakau, Tera ranei e whanau he tama ma te tangata kua kotahi rau nei ona tau? e whanau tamariki ranei a Hara, te wahine kua iwa tekau nei ona tau? <sup>18</sup> Na ka mea ake a Aperahama ki te

19

Atua, Kia ora noa oti a Ihimaera ki tou aroaro! Na ka mea te Atua, Ehara, ka whanau ta korua tama ko Hara; a me hua e koe tona ingoa ko Ihaka: ka whakapumau ano ahau i taku kawenata ki a

20

ia, ki ona uri hoki i muri i a ia, hei kawenata mau tonu. Ko Ihimaera ia, na, kua whakarongo ahau ki a koe; nana, kua oti ia te manaaki e ahau, a ka meinga ia e ahau kia hua, kia tino nui rawa

21

hoki; ka whanau ana tamariki kotahi tekau ma rua he ariki, a ka meinga ia e ahau hei iwi nui. Ka whakapumautia ia e ahau taku kawenata ki a Ihaka, ka whanau nei i a korua ko Hara a te taima e

22

rite ana ki tenei o te tau e haere ake nei. A ka mutu tana korero ki a ia, a mawehe atu ana te Atua i a Aperahama ki runga.

23

Katahi ka tongo a Aperahama i a Ihimaera i tana tama, ratou ko nga mea katoa i whanau i roto i tona whare, me nga mea katoa i hokona ki tana moni, nga tane katoa i roto i nga tangata o te whare o Aperahama; a kotia ana e ia to ratou kiri matamat a i taua ra pu ano, i pera me ta te Atua

24

i korero ai ki a ia. Na e iwa tekau ma iwa nga tau o Aperahama i te kotinga o tona kiri matamata.

25

Kotahi tekau ma toru hoki nga tau o tana tama o Ihimaera i te kotinga o tona kiri matamata.

26

No taua rangi pu ano i kotia ai a Aperahama, raua ko tana tama, ko Ihimaera. A i kotia ngatahitia me ia nga tangata katoa o tona whare, nga mea i whanau i roto i te whare, me nga mea i hokona ki te moni i te tangata iwi ke.

27

## Chapter 18

1

A ka puta ano a Ihowa ki a ia i nga oki o Mamere, i a ia e noho ana i te kuwaha o te teneti i

2

te tikakatanga o te ra; A ka anga ake ona kanohi, ka titiro, na ko nga tangata tokotoru e tu ana i tona taha: a, no tona kitenga atu, ka rere atu ia i te kuwaha o te teneti ki te whakatau i a ratou, a ka

3

piko ki te whenua, Ka mea, E toku Ariki, ki te mea he pai toku ki tau titiro, kua ra e kapea tau

4

pononga: Kia tikina koa tetahi wai, ka horoi i o koutou waewae, a ka okioki koutou i raro i te

5

rakau: A maku e tiki tetahi wahi taro hei oranga mo o koutou ngakau; hei muri ra ka haere ai koutou: he mea hoki kua tae mai nei koutou ki ta koutou pononga. A ka mea ratou, Penatia me tau

6

i ki na. Na ka hohoro a Aperahama ki te teneti ki a Hara, a ka mea, Kia hohoro te pokepoke i

7

tetahi paraoa pai, kia toru nga mehua, ka hanga i etahi keke. Na ka rere a Aperahama ki te kahui, a hopukia ana e ia tetahi kua kau, he kiri ngawari, he mea pai, a hoatu ana e ia ki tetahi taitamariki;

8

a hohoro ana ia te taka i taua mea. Na ka tikina e ia he pata, he waiu, me te kua o i raweketia e ia,

a whakatakotoria ana ki to ratou aroaro; me te tu ano ia i to ratou taha i raro i te rakau, a ka kai ratou.

9

Na ka mea ratou ki a ia, Kei hea a Hara, tau wahine? A ka mea ia, Ara, kei te teneti. Na ka mea ia, He pono ka hoki mai ano ahau ki a koe a te huringa mai ano o te wa; a ka whai tama tau

10

wahine, a Hara. Na ka rongoa atu a Hara i te kuwaha o te teneti, i muri i a ia. Na, kua koroheke rawa a Aperahama raua ko Hara, kua maha o raua ra; kua mutu a Hara te pera me etahi wahine.

11

12 Na ka kata a Hara i roto i a ia, ka mea, Ka ruruhitia nei ahau, a tera ranei ahau e whai koa, he

koroheke nei ano hoki toku ariki? Na ka mea a Ihowa ki a Aperahama, He aha a Hara i kata ai,

13

i mea ai, He pono, ka whanau tamariki ranei ahau, he ruruhi nei hoki ahau? He pakeke rawa ranei tetahi mea ki a Ihowa? Kei te taima i whakaritea, kei te hurihanga mai o te wa, ka hoki mai

14

ahau ki a koe, a ka whai tamaiti a Hara. Na ka whakawareware a Hara, ka mea, Kihai ahau i kata: i wehi hoki ia. A ka mea ia, Kahore; i kata tonu koe.

15

16

Na ka whakatika atu nga tangata ra i reira, a ka titiro ki te ritenga mai o Horoma: i haere ano a Aperahama i a ratou, ki te tuku i a ratou kia haere. A ka mea a Ihowa, Me huna ranei e ahau

17

i a Aperahama taku e mea ai; Ka meinga nei hoki a Aperahama hei iwi nui, hei iwi kaha, a mana ka manaakitia ai nga iwi katoa o te ao? E mohio ana hoki ahau ki a ia, hei mea kia whakahaua

18

iho ai e ia ana tama, me tona whare, i muri i a ia, a kia whakaritea e ratou te ara o Ihowa, ka mahi hoki i te tika, i te whakawa; a kia kawea mai ai e Ihowa ki runga ki a Aperahama nga mea ka toa

19

i korerotia e ia mona. Na ka mea a Ihowa, i te mea he nui te karanga o Horoma, o Komora, he

20

taimaha rawa hoki o raua kino; Me haere tenei ahau kia kite he mea rite ranei ta raua mahi ki

21

tona karanga kua tae ake nei ki ahau; a ki te kahore, ka mohio ahau. Na ka tahuri nga tangata ra i reira, a ka ahu ki Horoma: ko Aperahama ia i tu tonu i te aroaro o te Atua.

22

23

Na ka whakatata a Aperahama, ka mea, Ka whakangaromia ano hoki e koe te tangata tika raua ko te tangata kino? Akuanei pea e rima tekau nga tangata tika i roto i te pa: ka whakangaromia ranei e koe, e kore ranei koe e tohu i taua wahi mo nga tangata tika e rima tekau i

24

roto? Kua ra tena e waiho hei tikanga mo tau mahi, te whakamate ngatahi i te tangata tika raua ko te tangata kino; penei ka rite te tangata tika ki te tangata kino; kua ra koe e pera: e kore ranei

25

e tika te mahi a te Kaiwhakawa o te whenua katoa? Na ka mea a Ihowa, Ki te kitea e ahau i Horoma e rima tekau nga tangata tika i roto i te pa, ka tohungia e ahau tena wahi katoa, ka whakaaro

26

hoki ki a ratou. Na ka whakahoki a Aperahama, ka mea, Na, kua timata nei ahau te korero ki te

27

28

Ariki; he puehu nei ahau, he pungarehu: Tera pea e kore te tokorima o te rima tekau o nga tangata tika ka kore te tokorima, e whakangaro ranei koe i te pa katoa? Ka mea ia, E kore e whakangaromia

29

e ahau ki te mea ka kitea e ahau i reira nga tangata e wha tekau ma rima. Na ka korero atu ano ia ki a ia, ka mea, Tera pea e kitea e wha tekau kei reira. Ka mea ia, Ka whakaaro ahau ki te wha

30

tekau, a e kore e meatia e ahau. Ano ra ko ia, Kaua ra e riri te Ariki, a ka korero ahau: Tera pea e kitea e toru tekau kei reira. Ka mea ia, E kore e meatia e ahau, ki te kitea e ahau e toru tekau kei

31

reira. A ka mea ia, Na, kua whakapakari nei ahau ki te korero ki te Ariki: Tera pea e kitea e rua tekau kei reira. Ka mea ia, Ka whakaaro ahau ki nga tekau e rua, a e kore e whakangaromia e ahau.

32

Na ka mea ia, Kaua e riri te Ariki ki te korero ahau, heoi ano ko tenei korerotanga: Tera pea e kitea kotahi tekau kei reira. Ka mea ia, Ka whakaaro ahau ki te tekau kotahi, a e kore e

33

whakangaromia e ahau. Na ka haere a Ihowa i te mutunga o tana korero ki a Aperahama: a hoki ana a Aperahama ki tona wahi.

## Chapter 19

1

Na ka haere mai nga anahera tokorua ki Horoma i te ahiahi; a ko Rota i te kuwaha o Horoma e noho ana: a ka kite a Rota i a raua, ka whakatika ki te whakatau i a raua, a ka tuohu tona kanohi

2

ki te whenua; Ka mea ia, Nana, e oku ariki, peka mai ki te whare o ta korua pononga, ne? ki konei moe ai, horoi ai hoki i o korua waewae, a ka moata ai te maranga, ka haere i ta korua haere. Ka

3

mea raua, Kahore; engari ki te huarahi noa maua moe ai. Na ka kaha tana tohe ki a raua, a peka atu ana raua ki a ia, haere ana ki tona whare; na ka taka ia i tetahi hakari ma raua, ka tunu hoki i etahi keke rewenakore, a ka kai raua.

4

Kiano raua i takoto noa, ka karapotia te whare e nga tangata o te pa, e nga tangata o Horoma,

5

e te koroheke, e te taitamariki, e nga tangata katoa o nga wahi katoa: A ka karanga ratou ki a Rota, ka mea ki a ia, Kei hea aua tangata i haere mai nei ki a koe i te po nei? whakaputaina mai ki

6

a matou, kia mohio ai matou ki a raua. Na ka puta atu a Rota ki a ratou ki te kuwaha, me tana

7

tutaki ano i te tatau i muri i a ia. Ka mea, Kaua ra e kino, e oku tuakana. Nana, tokorua aku tamahine, kahore nei i mohio noa ki te tane, me whakaputa atu raua e ahau ki a koutou, a ma koutou e mea ki enei tangata; he mea hoki ka tae mai nei raua ki te taumarumarutanga iho o toku tuanui.

8

9

Ano ra ko ratou, Tu atu. A ka mea ano ratou, I haere mai tenei koroke kotahi ki konei noho ia, a e whai ana kia mana e whakarite tikanga: akuanei tou mate i a matou nui atu i to raua. Na ka aki

10  
 rawa ratou ki te tangata ra, ki a Rota, a ka whakata ta ki te wahi i te tatau. Otira ka totoro atu te ringa o aua tangata, a kumea ana a Rota ki a raua ki roto ki te whare, a tutakina ana e raua te tatau.

11  
 Na ka whiua e raua nga tangata i te kuwaha o te whare, te iti, te rahi, ki te matapotanga: a ngenge noa ratou i te rapunga i te tatau.

12  
 Na ka mea aua tangata ki a Rota, Kahore atu ranei ou tangata i konei? me he hunaonga, he tama ranei au, he tamahine ranei au, tetahi atu mea ranei au i roto i te pa, mauria atu i tenei wahi:

13  
 Ka whakangaromia hoki tenei wahi e maua, no te mea kua nui to ratou karanga ki te aroaro o

14  
 Ihowa; kua tonoa mai hoki maua e Ihowa ki te whakangaro. Na ka haere a Rota, ka korero ki ana hunaonga: marenatia nei ki ana tamahine, ka mea, Whakatika, haere atu i konei; ka whakangaromia hoki e Ihowa tenei pa. Otiia ki te whakaaro o ana hunaonga i rite ia ki tetahi tangata e hangareka ana.

15  
 A, i te huakanga ake o te ata, ka akiaki nga anahera i a Rota, ka mea, Whakatika, haria tau

16  
 wahine, me enei tamahine tokorua au, kei huna koe i roto i te kino o tenei pa. Otira i whakaroa ia; na ka hopu aua tangata ki tona ringa, ki te ringa o tana wahine, ki nga ringa o ana tamahine tokorua; he tohu hoki na Ihowa i a ia: a kawea atu ana ia e raua ki waho, ka waiho i waho o te pa.

17  
 A ka oti ratou te kawea atu e raua ki waho, ka mea ia, Rere atu kia ora ai koe; kua e titiro ki muri

18  
 i a koe, kua hoki e tu ki tetahi wahi o te mania; rere atu ki te maunga, kei ngaro koe. Na ka

19  
 mea a Rota ki a raua, Kua ra e pena, e toku Ariki. Nana, kua manakohia nei tau pononga e koe, kua whakanuia ano e koe tou aroha i whakaputaina nei e koe ki ahau, i a koe i whakaora nei i toku

20  
 wairua; na e kore e taea e ahau te rere ki te maunga, kei mau ahau i tetahi kino, a ka mate. Titiro hoki, e tata ana tenei pa hei rerenga atu, he mea nohinohi noa nei: Kia rere ahau ki reira ne? ehara

21  
 ianei i te mea nohinohi? a ka ora toku wairua. Ano ra ko ia ki a ia, Na, kua whakaae ano hoki

22  
 ahau ki tenei meatanga au, kia kua e huna e ahau tenei pa i korero mai na koe. Kia hohoro, rere atu ki reira; e kore hoki e taea e ahau tetahi mea, kia tae ra ano koe ki reira. Na reira i huaina ai te

23  
 ingoa o taua pa ko Toara. Kua rewa te ra ki runga ki te whenua, ka tae a Rota ki Toara.

24  
 Katahi ka uaina e Ihowa ki Horoma, ki Komora, he whanariki, he ahi na Ihowa, no te rangi;

25  
 A hurihia iho e ia aua pa, me te mania katoa, me nga tangata katoa o nga pa, me nga mea e tupu ana i te whenua.

26  
 Na i titiro tana wahine ki muri i a ia, a meinga ana hei pou tote.

<sup>27</sup> A i maranga wawe a Aperahama i te ata ki te wahi i tu ai ia i te aroaro o Ihowa: Na ko  
 tona tirohanga atu ki te ritenga o Horoma, o Komora, ki te whenua katoa hoki o te mania, ka kite,  
<sup>28</sup> na, e kake ana te paowa o te whenua, me te mea he paowa oumu. Na, i te whakangaromanga a  
<sup>29</sup> Ihowa i nga pa o te mania, ka mahara te Atua ki a Aperahama, a tonoa ana e ia a Rota i roto i te  
 hurihanga i tana hurihanga i nga pa i noho ai a Rota.  
<sup>30</sup> Na ka piki atu a Rota i Toara, ka noho ki te maunga, ratou tahi ko ana tamahine tokorua; i  
<sup>31</sup> wehi hoki ia ki te noho i Toara: a ka noho i roto i tetahi ana, a ia me ana tamahine tokorua. Na  
 ka mea te tuakana ki to muri, Kua koroheke to taua papa, a kohore he tangata o te whenua hei haere  
<sup>32</sup> mai ki a taua, hei pera me to te whenua katoa tikanga: Tena, taua ka whakainu i to taua papa ki  
<sup>33</sup> te waina, ka takoto ai taua ki a ia, kia tupu ai i a taua tetahi uri mo to taua papa. Na ka whakainu  
 raua i to raua papa ki te waina i taua po; a ka haere atu te tuakana, ka takoto ki tona papa, kihai  
<sup>34</sup> hoki tera i mohio ki tona takotoranga iho, ki tona whakatikanga ake. A i te aonga ake ka mea  
 te tuakana ki to muri, Nana, i takoto ahau inapo ki toku papa: taua ano ka whakainu i a ia ki te  
 waina i tenei po; a mau e haere atu, e takoto ki a ia, kia tupu ai i a taua tetahi uri mo to taua papa.  
<sup>35</sup> Na ka whakainu ano raua i to raua papa ki te waina i taua po; a ka whakatika to muri, ka takoto  
 hoki ki a ia: a kihai ia i mohio ki tona takotoranga iho, ki tona whakatikanga ake. Koia ka hapu  
<sup>36</sup> nga tamahine tokorua a Rota i to raua papa. A ka whanau ta te tuakana, he tama, a huaina ana  
<sup>37</sup> e ia tona ingoa ko Moapa: ko ia te papa o nga Moapi, a tae noa ki tenei ra. Me to muri, whanau  
<sup>38</sup> ake ano tana, he tama, a huaina iho e ia tona ingoa ko Penami: ko ia te papa o nga tama a Amona,  
 a tae noa ki tenei ra.

## Chapter 20

<sup>1</sup> Na ka turia atu e Aperahama i reira ki te whenua i te tonga, a ka noho ki waenganui o Karehe,  
<sup>2</sup> o Huru, a ka noho ia ki Kerara, he noho manene. Na ko Hara, ko tana wahine, ka kiia e Aperahama,  
 Ko toku tuahine ia: a ka tonoa mai e Apimereke kingi o Kerara, tangohia atu ana a Hara.  
<sup>3</sup> Na ka puta moemoea mai te Atua ki a Apimereke i te po, ka mea ki a ia, Nana, ka mate koe  
<sup>4</sup> mo te wahine i tangohia nei i koe; he wahine hoki ia na te tane. Kahore ano ia a Apimereke kia  
<sup>5</sup> tata noa ki a ia; a ka mea ia, E te Ariki, ka whakamate ano ranei koe i te iwi tika? Kahore ranei  
 ia i mea mai ki ahau, Ko toku tuahine ia? me te wahine hoki, i mea mai ano ia, Ko toku tungane

ia: he tapatahi toku ngakau, he harakore hoki oku ringa i mea ai ahau i tenei mea. <sup>6</sup> A ka korero moemoea mai te Atua ki a ia, Ae ra, i mohio tonu ahau he tapatahi tou ngakau i a koe i mea ai i tenei mea; i pupuri hoki ahau i a koe kei hara koe ki ahau; na reira koe te tukua ai e ahau kia pa ki

a ia. <sup>7</sup> Na, whakahokia akuanei te wahine a tena tangata; no te mea hoki he poropiti ia, a mana e inoi mou, a ka ora koe: ki te kore e whakahokia e koe, kia mohio koe, ka tino mate koe, koutou ko nga mea katoa i a koe.

<sup>8</sup> Na i te ata tu ka maranga a Apimereke, karangatia ana ana tangata katoa, a korerotia ana enei mea katoa ki o ratou taringa: a nui atu te wehi o aua tangata. <sup>9</sup> Na ka karanga a Apimereke ki a Aperahama, ka mea ki a ia, He mahi aha tenei au ki a matou? a he aha toku hara ki a koe, i takina mai ai e koe he hara nui ki ahau, ki toku kingitanga ano hoki? kua meinga e koe etahi mea ki ahau

kahore nei i tika k ia mahia. <sup>10</sup> A ka mea ano a Apimereke ki a Aperahama, I kite koe i te aha i meatia ai tenei mea e koe? <sup>11</sup> Na ka mea a Aperahama, I mahara hoki ahau, He pono, kahore te wehi o te Atua i tenei wahi; a ka patua ahau e ratou mo taku wahine. <sup>12</sup> He pono ano ia he tuahine ia noku, ko te tamahine a toku papa, otiia ehara i te tamahine na toku whaea; a ka noho hei wahine

maku: <sup>13</sup> A, i ta te Atua meatanga i ahau kia kopiko haere ake i te whare o toku papa, ka mea ahau ki a ia, Ko tou aroha tenei, hei whakaputa mau ki ahau: hei nga wahi katoa e tae ai taua, korero moku, Ko toku tungane ia.

<sup>14</sup> Na ka tikina e Apimereke he hipi, he kau, he pononga tane, he pononga wahine, a hoatu ana e ia ki a Aperahama, a whakahokia ana e ia a Hara, tana wahine, ki a ia. <sup>15</sup> A ka mea a Apimereke, Nana, kei tou aroaro toku whenua: nohoia e koe te wahi e pai ana ki tau titiro. <sup>16</sup> A ki a Hara i mea ia, Nana, kua hoatu e ahua ki tou tungane kotahi mano nga hiriwa: na, hei uhi tena mo ou kanohi

ki nga tangata katoa i a koe; hei tohu hoki mo tou tika i katoa. <sup>17</sup> Katahi ka inoi a Aperahama ki te Atua: na kua ora i te Atua a Apimereke, ratou ko tana wahine, ko ana pononga wahine; a ka whanau tamariki ratou. <sup>18</sup> Kua tutakina rawatia hoki e Ihowa nga kopu katoa o te whare o Apimereke, mo Hara, mo te wahine a Aperahama.

<sup>17</sup> Katahi ka inoi a Aperahama ki te Atua: na kua ora i te Atua a Apimereke, ratou ko tana wahine, ko ana pononga wahine; a ka whanau tamariki ratou. <sup>18</sup> Kua tutakina rawatia hoki e Ihowa nga kopu katoa o te whare o Apimereke, mo Hara, mo te wahine a Aperahama.

<sup>18</sup> Kua tutakina rawatia hoki e Ihowa nga kopu katoa o te whare o Apimereke, mo Hara, mo te wahine a Aperahama.

## Chapter 21

<sup>1</sup> Na ka tirohia mai a Hara e Ihowa, ka peratia me tana i korero ai, a rite tonu ki tana kupu ta Ihowa i mea ai ki a Hara. <sup>2</sup> Na ka hapu a Hara, a ka whanau he tama ma Aperahama i tona



<sup>3</sup> koroheketanga i te wa ano i whakaritea e te Atua ki a ia. Na ka huaina e Aperahama te ingoa o  
 tana tama i whanau nei mana, i whanau mai nei i a Hara, ko Ihaka. <sup>4</sup> A, ka waru ona ra, ka kotia e  
 Aperahama a Ihaka, tana tama, ka peratia me ta te Atua i whakahau ai ki a ia. <sup>5</sup> A kotahi rua nga  
 tau o Aperahama i te whanautanga o tana tama, o Ihaka. <sup>6</sup> Na ka mea a Hara, Kua meinga ahau e  
 te Atua kia kata; a ka kata tahi matou ko nga tangata e rongu mai ana. <sup>7</sup> A i mea ano ia, Ko wai o  
 mua hei mea ki a Aperahama, tera e whakangote tamariki a Hara? kua whanau nei i ahau he tama  
<sup>8</sup> mana, i a ia kua koroheketia. Na ka tupu te tamaiti ra, a ka whakamutua tana kai u: na ka tukua  
 e Aperahama tetahi hakari nui i te ra i whakamutua ai te ngote u a Ihaka.

<sup>9</sup> A ka kite a Hara i te tama a Hakara, a te wahine o Ihipa, i whanau nei i a raua ko Aperahama,  
 e kata whakahaweana. <sup>10</sup> Na ka mea ia ki a Aperahama, Peia atu tenei pononga me tana tama: e  
 kore rawa te tama a tenei wahine pononga e tu tahi me taku tama, me Ihaka, i nga whakarereanga  
<sup>11</sup> iho. A ko taua mea he he rawa ki te titiro a Aperahama, ko tana tama hoki ia. <sup>12</sup> Ka mea te Atua  
 ki a Aperahama, Kei kino tena ki tau titiro, kua e whakaaro ki te tamaiti raua ko tau pononga  
 wahine; engari i nga mea katoa i korero ai a Hara ki a koe, whakarongo atu ki tona reo; kei a Ihaka  
<sup>13</sup> hoki te karangatanga mo tou uri. Na, ko te tama a te pononga wahine, ka meinga ia e ahau hei  
 iwi, no te mea he uri ia nou.

<sup>14</sup> Na ka maranga wawe a Aperahama i te ata, ka mau ki tetahi taro, ki tetahi taha wai, a hoatu  
 ana e ia ki a Hakara, whakawaha ana ki tona pokohiwi, me te tamaiti hoki, a tonoa atu ana: na ka  
<sup>15</sup> haere ia, ka kopikopiko i te koraha o Peerehepa. A kau pau te wai i roto i te taha, na whakarerea  
<sup>16</sup> iho e ia te tamaiti i raro i tetahi rakau iti. Na ka haere ia, a ka noho mai i tawhiti, me te anga nui  
 mai ano ki a ia, he pera te matara me te taunga pere: i mea hoki ia, Kei kite ahau i te matenga o te  
<sup>17</sup> tamaiti. Na ka noho ia me te aronui mai ki a ia, a ka puaki tona reo, ka tangi. A i rongu te Atua  
 ki te reo o te tamaiti: a ka karanga mai te anahera a te Atua ki a Hakara i runga i te rangi, ka mea  
 ki a ia, He aha kei a koe, e Hakara? kua e wehi; kua rongu hoki te Atua ki te reo o te tamaiti i a  
<sup>18</sup> ia e takoto na. Whakatika, hapainga ake te tamaiti, puritia hoki ki tou ringa; no te mea ka meinga  
<sup>19</sup> ia e ahau hei iwi nui. Na ka whakatirohia e te Atua ona kanohi, a ka kite ia i tetahi puna wai: na  
<sup>20</sup> ka haere ia, ka whakaki i te taha ki te wai, a whakainumia ana te tamaiti. A i noho te Atua ki te  
<sup>21</sup> tamaiti, a ka tupu ia; i noho ia i te koraha, a ka mohio ki te kopere. Na ka noho ia ki te koraha  
 o Parana: a ka tikina atu e tona whaea he wahine mana i te whenua o Ihipa.

22

A i taua wa ano ka korero a Apimereke raua ko Pikora, ko te rangatira o tana ope, ki a Aperahama, ka mea, Na kei a koe te Atua i nga mea katoa e mea ai koe: <sup>23</sup> Tena oatitia mai te Atua

ki ahau, e kore koe e teka ki ahau, ki taku tama, ki te tama ranei a taku tama; engari ka rite ki te aroha i whakaputaina e ahau ki a koe tau mahi ki ahau, ki te whenua ano hoki i noho nei koe. <sup>24</sup> Na

ka mea a Aperahama, Ka oati ahau. <sup>25</sup> Na ka whakawa a Aperahama i a Apimereke mo tetahi puna

wai i murua e nga tangata a Apimereke. <sup>26</sup> Na ka mea a Apimereke, Kahore ahau e mohio na wai

ranei tenei mahi: kihai hoki koe i korero mai ki ahau, a kihai ahau i rongu, no tenei ra tonu. <sup>27</sup> Na ka tikina e Aperahama he hipi, he kau, ka hoatu ki a Apimereke; na ka whakarite kawenata raua.

<sup>28</sup> Na ka wehea e Aperahama ki tahaki e whitu nga reme uha o nga hipi. <sup>29</sup> A ka mea a Apimereke

ki a Aperahama, He aha te tikanga o enei reme uha e whitu i wehea nei e koe ki tahaki? <sup>30</sup> Ka mea ia, Ko enei reme uha e whitu me tango e koe i toku ringa, kia ai enei mea hei whakaatu maku, naku

i keru tenei poka. <sup>31</sup> Na reira i huaina ai e ia taua wahi ko Peerehepa; no raua hoki oati ki reira.

<sup>32</sup> Heoi whakaritea ana e raua te kawenata i Peerehepa: a ka whakatika a Apimereke raua ko Pikora, ko te rangatira o tana ope, a hoki ana ki te whenua o nga Pirihitini.

33

Na ka whakatokia e Aperahama he rakau, he tamarihi, ki Peerehepa, a ka karanga i reira ki te ingoa o Ihowa, o te Atua ora tonu. <sup>34</sup> A ka noho a Aperahama ki te whenua o nga Pirihitini mo nga ra maha.

## Chapter 22

1

Na i muri i enei mea ka whakamatau te Atua i a Aperahama, ka mea ki a ia, E Aperahama: ka mea ia, Tenei ahau. <sup>2</sup> Na ka mea ia, Kawea atu tau tamaiti, tau huatahi, tau e aroha nei, a Ihaka, a haere ki te whenua o Moria; ka whakaeke i a ia ki reira hei tahunga tinana ki runga ki tetahi o nga maunga e korero ai ahau ki a koe.

3

Na ka maranga wawe a Aperahama i te ata, a whakanohoia ana e ia tana kaihe, a mauria ana e ia etahi o ana taitamariki hei hoa mona, me Ihaka hoki, me tana tama, a tatangia ana e ia nga wahie mo te tahunga tinana, a whakatika ana, haere ana ki te wahi i korero ai te Atua ki a ia. <sup>4</sup> I te

ra tuatoru ka maranga nga kanohi o Aperahama, a ka kite ia i taua wahi i tawhiti. <sup>5</sup> Na ka mea a Aperahama ki ana taitamariki, E noho korua i konei ki te kaihe; ka haere maua ko te tamaiti nei ki

6  
 ko, ki te koropiko, ka hoki mai ai ki a korua. Na ka tango a Aperahama i te wahie mo te tahunga tinana, a whakawaha ana e ia ki a Ihaka, ki tana tama; a ka mauria e ia he ahi i tona ringa me tetahi maripi; a haere tahi ana raua. 7  
 Na ka korero a Ihaka ki a Aperahama, ki tona papa, ka mea, E toku matua: ka mea ia, Tenei ahau, e taku tama. A ka mea ia, Nana, ko te ahi me nga wahie: kei hea ia te reme hei tahunga tinana? 8  
 Ka mea a Aperahama, Kei te Atua te whakaaro, e taku tamaiti, ki tetahi reme mana hei tahunga tinana: na ka haere tahi raua. 9  
 A ka tae raua ki te wahi i korero ai te Atua ki a ia; a ka hanga e Aperahama tetahi aata ki reira, a whakapapatia ana e ia nga wahie, na ka herea e ia a Ihaka, tana tama, whakatakotoria iho ki te aata, ki runga ki nga wahie. 10  
 Na ka totoro atu te ringa o Aperahama, ka mau ki te maripi hei patu mo tana tama.

11  
 Na ko te karangatanga mai a te anahera a Ihowa ki a ia i runga i te rangi, ka mea, E Aperahama, e Aperahama: ka mea ia, Tenei ahau. 12  
 Na ka mea ia, Kaua e totoro tou ringa ki te tamaiti, kaua ano hoki tetahi mea e meatia ki a ia: katahi hoki ahau ka matau e wehi ana koe i te Atua, i a koe kihai nei i kaiponu i tau tamaiti, i tau huatahi, i ahau. 13  
 A ka maranga ake nga kanohi o Aperahama, na ka kite ia ko tetahi hipi toa i muri i a ia, e mau ana ona haona i roto i te puia rakau: na ka haere a Aperahama, ka hopu i te hipi ra, a whakaekea ana e ia hei tahunga tinana, hei whakarite mo tana ta ma. 14  
 Na ka huaina e Aperahama te ingoa o taua wahi ko Ihowatire: e korerotia nei inaianei, Kei te maunga o Ihowa te kitea ia.

15  
 Na ka karanga ano te anahera a Ihowa ki a Aperahama i te rangi, 16  
 Ka mea, Kua waiho e ahau ko ahau ano hei oati, e ai ta Ihowa, mou i mea i tenei mea, mou ano hoki kihai i kaiponu i tau tama, i tau huatahi: 17  
 Na, ka manaakitia rawatia koe e ahau, a ka whakanuia rawatia e ahau ou uri kia pera me nga whetu o te rangi, me te onepu hoki i te tahatika o te moana; a ka riro i ou uri te kuwaha o ona hoariri; 18  
 Ma tou uri ano hoki ka manaakitia ai nga iwi katoa o te whenua; mou i whakarongo ki toku reo. 19  
 Na ka hoki a Aperahama ki ana taitamariki, a whakatika ana ratou, haere tahi ana ki Peerehepa; a ka noho a Aperahama ki Peerehepa.

20  
 Na i muri i enei mea ka korerotia ki a Aperahama, ka meatia, Nana, kua whanau tamariki ano a Mireka raua ko Nahora, ko tou teina; 21  
 Ko Hutu, ko tana matamua, raua ko Putu, ko tona teina, me Kemuera hoki, matua o Arame, 22  
 Ratou ko Kehere, ko Hato, ko Piretata, ko Irirapa, ko Petuere. 23  
 A whanau ake ta Petuere ko Ripeka: ko enei tokowaru te whanau a Mireka raua ko Nahora, teina o Aperahama. 24  
 A ko tana wahine iti, tona ingoa nei ko Reuma, i whanau ano ana, ko Tepa ratou ko Kahama, ko Tahaha, ko Maaka.

## Chapter 23

<sup>1</sup> A kotahi rau e rua tekau ma whitu nga tau i ora ai a Hara: ko nga tau enei i ora ai a Hara.  
<sup>2</sup> Na ka mate a Hara ki Kiriata Arapa, ara ki Heperona, i te whenua o Kanaana: a ka haere a Aperahama ki te uhunga ki a Hara, ki te tangi hoki ki a ia.  
<sup>3</sup> A ka whakatika a Aperahama i te ritenga atu o tona tupapaku, ka korero ki nga tama a Hete,  
<sup>4</sup> ka mea, He manene ahau, he noho noa iho i roto i a koutou: homai tetahi wahi ki ahau hei tanumanga i roto i a koutou, kia tanumia ai e ahau toku tupapaku, kia ngaro ai i taku tirohanga.  
<sup>5</sup> Na ka whakahoki nga tama a Hete ki a Aperahama, ka mea ki a ia, <sup>6</sup> Whakarongo ki a matou, e toku ariki: he rangatira nui koe i roto i a matou: whiriwhiria e koe tetahi o o matou urupa, ka tanu ai i tou tupapaku; e kore e kaiponuhia e tetahi o matou tana urupa i a koe, hei tanumanga mo tou  
<sup>7</sup> tupapaku. Na ka whakatika a Aperahama, ka piko ki te tangata whenua, ki nga tama a Hete. <sup>8</sup> A ka korero ia ki a ratou, ka mea, Ki te whai ngakau koutou kia tanumia e ahau toku tupapaku kia ngaro atu i taku tirohanga, whakarongo mai ki ahau, ka tohe atu ki a Eperona, tama a Tohara, moku,  
<sup>9</sup> Kia homai e ia ki ahau tana ana, a Makapera, i te pito o tona wahi oneone; kia homai e ia ki ahau  
<sup>10</sup> i waenganui i a koutou mo nga moni e rite ana hei utu, kia puritia e ahau hei urupa. Na ko Eperona i roto i nga tama a Hete e noho ana: na ka whakahoki a Eperona Hiti ki a Aperahama, me te whakarongo ano nga tama a Hete, me nga tangata katoa hoki i tomo i te kuwaha o tona pa, ka  
<sup>11</sup> mea, Kahore, e toku ariki, whakarongo ki ahau: ka hoatu e ahau tena wahi ki a koe, me te ana i reira, ka hoatu e ahau ki a koe; ka hoatu e ahau i te aroaro o nga tama o toku iwi: tanumia tou  
<sup>12</sup> tupapaku. Na ka tuohu a Aperahama i te aroaro o nga tangata whenua, <sup>13</sup> Ka korero ki a Eperona, me te whakarongo ano nga tangata whenua, ka mea, Erangi ki te homai e koe, whakarongo ki ahau: ka hoatu e ahau he hiriwa ki a koe mo taua wahi; tangohia, a ka tanumia e ahau toku tupapaku ki  
<sup>14</sup> reira. Na ko te whakahokinga a Eperona ki a Aperahama, ka mea ki a ia, <sup>15</sup> E toku ariki, whakarongo mai ki ahau: he wahi whenua e wha rau nga hekere hiriwa tona utu, he aha tena i waenganui oku, ou? tanumia tou tupapaku.  
<sup>16</sup> Na ka whakarongo a Aperahama ki a Eperona; a paunatia ana e Aperahama ki a Eperona te hiriwa i korerotia e ia i te aroaro o nga tama a Hete, e wha rau nga hekere hiriwa, no nga moni e  
<sup>17</sup> tangohia ana e nga kaihekohoko. Na whakapumautia ana te wahi oneone o Eperona, i Makapera, i te ritenga o Mamere, te oneone, me te ana i reira, me nga rakau katoa i runga i te oneone, i roto i  
<sup>18</sup> ona rohe katoa, a tawhio noa, Hei wahi mo Aperahama, i te tirohanga a nga tama a Hete, i te  
<sup>19</sup> aroaro o nga tangata katoa i tomo i te kuwaha o tona pa. A muri iho i tenei ka tanumia e

Aperahama a Hara, tana wahine, ki roto ki te ana, i te wahi i Makapera i te ritenga o Mamere, ara  
<sup>20</sup>  
 o Heperona i te whenua o Kanaana. Heoi whakapumautia ana e nga tama a Hete taua wahi me  
 te ana i reira mo Aperahama, kia puritia hei tanumanga.

## Chapter 24

<sup>1</sup>  
 Na kua koroheketia a Aperahama, A kua maha rawa ona ra: a i manaaki a Ihowa i a Aperahama  
 i nga mea katoa. <sup>2</sup> Na ka mea a Aperahama ki te kaumatua o ana pononga i roto i tona whare, ki  
 te kaiwhakahaere o ana mea katoa, Tena, whakapakia mai tou ringa ki raro ki toku huhu: <sup>3</sup> A me  
 whakaoati koe e ahau ki a Ihowa, ki te Atua o te rangi, ki te Atua hoki o te whenua, kia kaua e  
 tangohia e koe he wahine ma taku tama i roto i nga tamahine a nga Kanaani, a te iwi e noho nei  
 ahau i roto i a ratou: <sup>4</sup> Engari me haere koe ki toku whenua, ki oku whanaunga, ka tango mai ai i  
 tetahi wahine ma taku tama, ma Ihaka. <sup>5</sup> Na ka mea te pononga ki a ia, Akuanei pea ka kore e pai  
 te wahine ki te whai mai i ahau ki tenei whenua: me whakahoki ranei e ahau tau tama ki te whenua  
 i haere mai nei koe i reira? <sup>6</sup> Ka mea a Aperahama ki a ia, Kia tino mohio koe, kaua rawa taku  
 tama e whakahokia ki reira. <sup>7</sup> Ko Ihowa, ko te Atua o te rangi, nana nei ahau i tango mai i te whare  
 o toku papa, i te whenua hoki i whanau ai ahau, i korero ki ahau, i oati hoki ki ahau, Ka hoatu e  
 ahau tenei whenua ki ou uri; mana e tonono mai tana anahera ki mua i a koe, a ka riro mai i a koe  
 tetahi wahine ma taku tama i reira. <sup>8</sup> A, ki te kahore te wahine e pai ki te whai mai i a koe, katahi  
 koe ka watea i tenei oati aku: otiia kaua e whakahokia e koe taku tama ki reira. <sup>9</sup> Na ka whakapakia  
 e te pononga tona ringa ki raro i te huha o Aperahama, o tona ariki, a ka oati ki a ia mo taua mea.  
<sup>10</sup>  
 Na ka tangohia e te pononga etahi kamera kotahi tekau i roto i nga kamera a tona ariki, a  
 haere ana: i tona ringa hoki nga mea papai katoa a tona ariki: a whakatika ana ia, haere ana ki  
 Mehopotamia, ki te pa o Nahora. <sup>11</sup> Na ka mea ia i nga kamera kia tuturi ki te taha o te puna wai  
 i waho o te pa i te ahiahi, i te wa e puta mai ai nga wahine ki te utu wai. <sup>12</sup> A ka mea ia, E Ihowa,  
 e te Atua o toku ariki, o Aperahama, kia whai wahi ahau akuanei, whakaputaina hoki he aroha ki  
 toku ariki, ki a Aperahama. <sup>13</sup> Tenei ahau te tu nei i te taha o te puna wai; a e haere mai ana nga  
 tamahine a nga tangata o te pa ki te utu wai: <sup>14</sup> A, ko te kotiro e mea ai ahau ki a ia, Tukua iho tau  
 oko kia inu ai ahau; a ka mea ia, E inu, me whakainu ano e ahau au kamera: kia rite ia i a koe ma  
 tau pononga, ma Ihaka; ma reira ka mohio ai ahau e whakaputa aroha ana koe ki toku ariki. <sup>15</sup> Heoi

kiano i mutu noa tana korero, na, kua puta mai a Ripeka, tamahine a Petuere, tama a Mireka, a te  
 wahine a Nahora, teina o Aperahama, me tana oko i runga i tona pokohiwi. <sup>16</sup> Na ko te kotiro ra  
 he tino ataahua ki te titiro atu, he wahina, kahore ano tetahi tane kia mohio noa ki a ia: na ka heke  
 atu ia ki te puna, ka whakaki i tana oko, a ka haere ake. <sup>17</sup> Na ka rere te pononga ra ki te whakatutaki  
 i a ia, ka mea, Homai he wai moku, ne, o tau oko kia iti nei? <sup>18</sup> A ka mea ia, E inu, e toku ariki:  
 na hohoro tonu tana tuku iho i tana oko ki runga ki tona ringa, a whakainumia ana ia. <sup>19</sup> A, ka mutu  
 tana whakainu i a ia, ka mea ia, Me utu ano hoki e ahau mo au kamera, kia poto ra ano ratou te  
 whakainu. <sup>20</sup> Na hohoro tonu tana riringi atu i te wai o tana oko ki roto ki te waka, a rere ana ano  
 ki te puna ki te utu, a utuhia mai ana e ia mo ana kamera katoa. <sup>21</sup> Ko taua tangata ia matatau tonu  
 tana titiro ki a ia, kihai hoki i hamumu, kia mohio ia ka whakatikaia ranei e Ihowa tona ara, kahore  
 ranei. <sup>22</sup> A ka mutu te inu o nga kamera, na ka tikina e taua tangata tetahi whakakai koura, he  
 hawhe hekere tona taimaha, me nga poroporo e rua mo ona ringa, kotahi tekau nga hekere koura  
 te taimaha; <sup>23</sup> A ka mea, Na wai koe tamahine? tena, korero mai ki ahau: he wahi ranei kei te whare  
 o tou papa hei moenga mo matou? <sup>24</sup> Na ka mea ia ki a ia, He tamahine ahau na Petuere, tama a  
 Mireka, i whanau nei i a raua ko Nahora. <sup>25</sup> A ka mea ano ia ki a ia, He nui a matou kakau witi,  
 me a matou otaota hei kai, me tetahi wahi hoki hei moenga. <sup>26</sup> Na tuohu ana taua tangata, koropiko  
 ana ki a Ihowa. <sup>27</sup> A ka mea, Kia whakapaingia a Ihowa, te Atua o toku rangatira, o Aperahama,  
 kihai nei i wareware ki tona aroha, ki tona pono ki toku rangatira: tena ko ahau, na Ihowa ano ahau  
 i arataki mai i te ara ki te whare o nga teina o toku rangatira. <sup>28</sup> Na ka oma te kotiro ra, ka korero  
 i enei mea ki te whare o tona whaea.  
<sup>29</sup> Na, he tungane to Ripeka, ko Rapana tona ingoa; na ka rere a Rapana ki taua tangata, ki  
 waho, ki te puna. <sup>30</sup> Na, i tona kitenga i te whakakai me nga poroporo i nga ringa o tona tuahine,  
 a ka rongohoki ki nga kupu a Ripeka, a tona tuahine, i mea ra, I penei nga korero a taua tangata  
 ki ahau; ka haere ia ki taua tangata; na, i te taha ia o nga kamera, i te puna wai e tu ana; <sup>31</sup> A ka  
 mea, Tomo mai, e te manaakitanga a Ihowa; he aha koe i tu ai i waho? kua oti hoki i ahau te whare  
 te whakapai, me tetahi wahi mo nga kamera. <sup>32</sup> Na ka haere taua tangata ki te whare, a wetekina  
 ana e ia nga mea o nga kamera; i homai ano e ia he kakau witi me tetahi otaota hei kai ma nga  
 kararehe, me te wai hei horoi mo ona waewae, mo nga waewae hoki o ona hoa. <sup>33</sup> Na ka  
 whakatakotoria he kai ki tona aroaro; otia ka mea ia, E kore ahau e kai, kia korerotia ra ano e ahau  
 taku haere. Ka mea tera, Korero. <sup>34</sup> Na ka mea ia, He pononga ahau na Aperahama. <sup>35</sup> A kua

manaakitia rawatia toku ariki e Ihowa; kua nui ia; a kua homai hoki ki a ia he hipi, he kau, he hiriwa,  
<sup>36</sup> he koura, he pononga tane, he pononga wahine, he kamera, he kaihe. A kua whanau he tama  
ma toku ariki i a Hara, i te wahine a toku ariki, i a ia kua ruruhitia: a kua hoatu e ia ana mea katoa  
<sup>37</sup> ki a ia. Na i whakaoati toku ariki i ahau, i mea mai, Kei tangohia e koe he wahine ma taku tama  
i roto i nga tamahine a nga Kanaani, e noho nei ahau i to ratou whenua: <sup>38</sup> Engari me haere koe ki  
<sup>39</sup> te whare o toku papa, ki oku whanaunga ka tango ai i tetahi wahine ma taku tama. Ano ra ko  
<sup>40</sup> ahau ki toku ariki, E kore pea te wahine e whai mai i ahau. A ka mea mai ia ki ahau, Ma Ihowa,  
kei tona aroaro nei toku haereerenga, mana e tono tana anahera hei hoa mou, mana hoki e whakatika  
<sup>41</sup> tou ara; a ka tango mai koe i tetahi wahine ma taku tama i roto i oku whanaunga, i roto hoki i te  
whare o toku p apa: <sup>42</sup> Katahi koe ka watea i taku oati, ki te haere koe ki oku whanaunga; a ki te  
kahore e homai e ratou ki a koe, na, ka watea koe i taku oati. I haere mai ahau i tenei ra ki te  
<sup>43</sup> puna, a ka mea ahau, E Ihowa, e te Atua o toku ariki, o Aperahama, ki te mea e whakatika ana koe  
i toku ara e haere nei ahau: <sup>44</sup> Na, tenei ahau te tu nei i te taha o te puna wai; a ko te kotiro e puta  
<sup>45</sup> mai ki te utu, a ka mea ahau ki a ia, Homai he wahi wai moku i tau oko kia inu ahau; A ka mea  
mai ia ki ahau, E inu, a me utu ano e ahau mo au kamera: kia rite ia i a Ihowa hei wahine ma te  
<sup>46</sup> tama a toku ariki. Kiano i mutu noa taku korero i roto i toku ngakau, na, ko te putanga ake o  
Ripeka me tana oko i runga i tona pokohiwi: kua heke ki te poka ki te tu: na ka mea ahau ki a ia,  
<sup>47</sup> Kia inu ahau, ne? Na ka hohoro ia, ka tuku i tana oko i tona pokohiwi, a ka mea mai, E inu, me  
whakainu ano e ahau au kamera: na inu ana ahau, a i whakainumia ano hoki e ia nga kamera. Na  
<sup>48</sup> ka ui ahau ki a ia, He tamahine koe na wai? A ka mea mai ia, He tamahine na Petuere, tama a  
Nahora, i whanau nei ma raua ko Mireka: na kuhua ana e ahau te whakakai ki tona ihu, me nga  
<sup>49</sup> poroporo ki ona ringa. Na ka tuohu ahau, ka koropiko ki a Ihowa, ka whakapai hoki i a Ihowa,  
i te Atua o toku ariki, o Aperahama, mona i raahi i ahau i te huarahi tika ki te tiki mai i te tamahine  
<sup>50</sup> a te teina o toku ariki ma tana tama. Na, ki te mea he aroha to koutou, he mahi pono ki toku  
ariki, korero mai ki ahau: ki te kahore, korero mai; kia tahuri ake ai ahau ki matau ranei, ki mau  
<sup>51</sup> ranei. Na ka whakahoki a Rapana raua ko Petuere, ka mea, I puta mai tenei mea i a Ihowa; e  
kore e taea e maua te korero ki a koe te pai, te kino ranei. Nana, kei tou aroaro a Ripeka, tangohia,  
<sup>52</sup> haere, a kia meinga ia hei wahine ma te tama a tou ariki, hei pera me ta Ihowa i korero ai. A ka  
<sup>53</sup> rongo te pononga a Aperahama i a raua korero, na piko ana ia ki te whenua, ki a Ihowa. Na ka

tangohia ake e te pononga he mea hiriwa, he mea koura, he kakahu hoki, a hoatu ana e ia ki a Ripeka: a i hoatu e ia etahi mea tino papai ki tona tungane raua ko tona whaea.

54

Na ka kai ratou, ka inu, ratou tahi ko ona hoa haere, a moe iho i te po; a i te ata ka oho ratou,

55

ka mea atu ia, Tukua ahau kia haere ki toku ariki. Na ka mea tona tungane raua ko tona whaea,

56

Waiho te kotiro i a matou mo etahi ra torutoru, kia kotahi tekau pea; muri iho ka haere. Na ka mea ia ki a raua, Kua ahau e whakawarea, kua whakatikaia nei hoki toku ara e Ihowa; tukua ahau

57

kia haere ki toku ariki. Na ka mea raua, Me karanga e maua te kotiro, ka ui ai ki tona mangai.

58

Na ka karangatia e raua a Ripeka, ka mea ki a ia, Ka haere ranei koe i te tangata nei? Ka mea ia,

59

Ka haere. Na tukua ana e ratou a Ripeka, to ratou tuahine, ratou ko tona kaiwhakangote, ko te

60

pononga hoki a Aperahama, me ana tangata. Na ka manaaki ratou i a Ripeka, ka mea ki a ia, E to matou tuahine, kia meinga koe hei whaea mo nga mano tini, a kia riro i ou uri te kuwaha o o

61

ratou hoariri. Na ka whakatika a Ripeka, ratou ko ana kotiro, a eke ana ki runga ki nga kamera, aru ana i taua tangata: na, ka mauria e taua pononga a Ripeka, a haere ana.

62

Na ka hoki mai a Ihaka i te haere i Peererahirai; i te wahi hoki ki te tonga ia e noho ana.

63

A ka puta atu a Ihaka ki te parae i te tuahiahi ki te whakaaroaro: na ka maranga ake ona kanohi,

64

ka titiro, na ko nga kamera e haere mai ana. A ka whakaara ake a Ripeka i ona kanohi, a, no

65

tona kitenga i a Ihaka, ka marere ia ki raro i te kamera. A ka mea atu ia ki te pononga, Ko wai tenei tangata e haere mai nei i te parae ki te whakatau i a tatou? Ano ra ko te pononga, Ko toku

66

ariki tena: na ka mau ia ki tetahi arai kanohi, ka hipoki i a ia. Na ka korerotia e te pononga ki a

67

Ihaka nga mea katoa i mea ai ia. Na ka kawea ia e Ihaka ki te teneti o tona whaea, o Hara, a tangohia ana e ia a Ripeka, a ka noho ia hei wahine mana; a ka aroha ia ki a ia: a ka whai tanga manawa a Ihaka i muri i te matenga o tona whaea.

## Chapter 25

1

Na ka tangohia e Aperahama tetahi wahine ano, ko Ketura tona ingoa. A whanau ake a raua

2

tama ko Timirana, ko Iokohana, ko Merana, ko Miriana, ko Ihipaka, ratou ko Huaha. A whanau ake a Iokohana ko Hepa, ko Rerana. A ko nga tama a Rerana ko Ahurimi, ko Retuhimi, ko Reumime.

3

4

A ko nga tama a Miriana ko Epa, ko Epere, ko Hanoka, ko Apira, ko Ereraaha. He tama katoa



<sup>5</sup> enei na Ketura. A i hoatu e Aperahama ana mea katoa ki a Ihaka. <sup>6</sup> Ki nga tama ia a nga wahine  
 iti a Aperahama i hoatu e ia etahi taonga, a tonoa atu ana e ia i a ia ano e ora ana kia matara atu i  
 a Ihaka, i tana tama, whaka te rawhiti, ki te whenua i te rawhiti. <sup>7</sup> Ko nga ra enei o nga tau o te  
 oranga o Aperahama i ora ai ia, kotahi rau e whitu tekau ma rima nga tau. <sup>8</sup> Na ka hemo a  
 Aperahama, a ka mate, he pai hoki tona koroheketanga, he kaumatua, kua ata tutuki ona tau; a  
 kohia ana ia ki tona iwi. <sup>9</sup> A ka tanumia ia e ana tama e Ihaka raua ko Ihimaera ki te ana o Makapera,  
 ki te wahi o Eperona tama a Tohara Hiti, i te ritenga o Mamere; <sup>10</sup> Ki te wahi i hokona ra e  
 Aperahama i nga tama a Hete: i tanumia ki reira a Aperahama, raua ko Hara, ko tana wahine.  
<sup>11</sup> A muri iho i te matenga o Aperahama ka manaakitia e te Atua a Ihaka, tana tama; a ka noho  
 a Ihaka ki te taha o Peererahairoi. <sup>12</sup> Na ko nga whakatupuranga enei o Ihimaera tama a Aperahama,  
 i whanau nei ma Aperahama i a Hakara, i te Ihipiana, pononga wahine a Hara: <sup>13</sup> A ko nga ingoa  
 enei o nga tama a Ihimaera, o ratou ingoa i o ratou whakatupuranga: ta Ihimaera matamua ko  
 Nepaioto; na, ko Kerara, ko Arapeere, ko Mipihama, <sup>14</sup> Ko Mihima, ko Ruma, ko Maha, <sup>15</sup> Ko  
 Hatara, ko Tema, ko Ieturu, ko Napihi, ko Kerema: <sup>16</sup> Ko nga tama enei a Ihimaera, ko o ratou  
 ingoa hoki enei i o ratou pa, i o ratou puni; kotahi tekau ma rua nga rangatira o o ratou iwi. <sup>17</sup> A  
 ko nga tau enei o te oranga o Ihimaera, kotahi rau e toru tekau ma whitu nga tau: na ka hemo ia, a  
 ka mate; ka kohia ki tona iwi. <sup>18</sup> A ko o ratou nohoanga i Hawira a tae noa ki Huru, i te ritenga o  
 Ihipa ina haere koe ki Ahiria: a i noho ia ki te aroaro o ona teina katoa.  
<sup>19</sup> Na ko nga whakatupuranga enei o Ihaka tama a Aperahama: na Aperahama ko Ihaka: <sup>20</sup> Na  
 e wha tekau nga tau o Ihaka i tana tangohanga i a Ripeka, tamahine a Petuere Hiriani o Paranaarama,  
 tuahine o Rapana Hiriani, hei wahine mana. <sup>21</sup> Na ka inoi a Ihaka ki a Ihowa mo tana wahine, no  
 te mea he pakoko ia: a ka whakaae a Ihowa ki a ia, a ka hapu a Ripeka, tana wahine. <sup>22</sup> A ka  
 takatakahi nga tamariki i a raua i roto i a ia; a ka mea ia, Ki te mea ko tenei, he aha ahau i penei  
 ai? Na haere ana ia ki a Ihowa ki te ui. <sup>23</sup> A ka mea a Ihowa ki a ia, e rua nga iwi kei roto i tou  
 kopu, a e rua nga iwi e wehea mai i roto i ou whekau; a ka kaha tetahi iwi i tetahi iwi; ka waiho  
 hoki te tuakana hei papa mo te teina. <sup>24</sup> A ka rite ona ra e whanau ai ia, na, he mahanga kei roto i  
 tona kopu. <sup>25</sup> Na ka puta mai te tuatahi, he whero, rite katoa ia ki te kakahu huruhuru; a huaina  
 ana e ratou tona ingoa ko Ehau. <sup>26</sup> A muri iho ka puta mai tona teina, me te pupuri ano tona ringa  
 i te rekereke o Ehau; a huaina iho tona ingoa ko Hakopa; a e ono tekau nga tau o Ihaka i to raua

<sup>27</sup> whanautanga. Na ka tupu nga tamariki ra: ko Ehau he tangata mohio ki te hopu kirehe mohoa,  
 he tangata noho koraha; ko Hakopa ia he tangata ata noho, he tangata noho teneti. <sup>28</sup> Na i aroha a  
 Ihaka ki a Ehau, he kai nona i ana i hopu ai: ko Ripeka i aroha ki a Hakopa.  
<sup>29</sup> Na ka kohuatia he kai e Hakopa, a ka haere mai a Ehau i te koraha, a e hemo ana ia: <sup>30</sup> A  
 ka mea a Ehau ki a Hakopa, E, homai he kai maku i taua mea whero e whero na, ne? e hemo ana  
 hoki ahau: koia i huaina ai tona ingoa ko Eroma. <sup>31</sup> Na ko te meatanga mai a Hakopa, Hokona mai  
 ki ahau i tenei ra tou matamuatanga. <sup>32</sup> Na ka mea a Ehau, Na, kua tata ahau te mate: a he aha te  
 hua o te matamuatanga ki ahau? <sup>33</sup> A ka mea a Hakopa, Oati mai ki ahau aiane; na ka oati ia ki a  
 ia: a ka hokona atu e ia tona matamuatanga ki a Hakopa. <sup>34</sup> Katahi ka hoatu e Hakopa he taro ki a  
 Ehau me nga pi i kohuatia ra: na ka kai ia, ka inu, ka whakatika hoki, haere ana: na whakahaweatia  
 ana e Ehau tona matamuatanga.

## Chapter 26

<sup>1</sup> Na ka matekai te whenua, haunga te matekai tuatahi i puta mai i nga ra o Aperahama. A ka  
 haere a Ihaka ki a Apimereke, kingi o nga Pirihitini, ki Kerara. <sup>2</sup> Na ka puta mai a Ihowa ki a ia,  
 ka mea, Kaua e haere ki raro, ki Ihipa; e noho ki te whenua e korero ai ahau ki a koe: <sup>3</sup> E noho i  
 tenei whenua, a ka tata ahau ki a koe, ka manaaki hoki i a koe; ka hoatu nei hoki e ahau enei whenua  
 katoa ki a koutou ko ou uri, a ka whakapumautia te oati i oati ai ahau ki a Aperahama, ki tou papa;  
<sup>4</sup> A ka whakanuia e ahau ou uri kia pera me nga whetu o te rangi, ka hoatu hoki e ahau enei whenua  
 katoa ki ou uri; a ma tou uri ka manaakitia ai nga iwi katoa o te whenua; <sup>5</sup> No te mea i rongu a  
 Aperahama ki toku reo, i mau ki aku ako, ki aku whakahau, ki aku tikanga, ki aku ture.  
<sup>6</sup> Na ka noho a Ihaka i Kerara: <sup>7</sup> A ka ui nga tangata o taua wahi ki tana wahine; a ka mea ia,  
 Ko toku tuahine ia: i wehi hoki ia, te mea ai, Ko taku wahine; i mea hoki, Kei patua ahau e nga  
 tangata o tenei wahi mo Ripeka; he ataahua hoki ia ki te titiro atu. <sup>8</sup> A ka maha ona ra ki reira, ka  
 titiro atu a Apimereke, kingi o nga Pirihitini, i te matapihi, a ka kite, na, ko Ihaka e takaro ana ki a  
 Ripeka, ki tana wahine. <sup>9</sup> Na ka karangatia e Apimereke a Ihaka, ka mea atu, Koia ano, ko tau  
 wahine tonu ia: na te aha koe i mea ia, Ko taku tuahine ia? Ka mea a Ihaka ki a ia, I mea hoki ahau,  
<sup>10</sup> Kei mate ahau mona. Na ka mea a Apimereke, He aha tenei mahi au ki a matou? wahi iti kua

11  
takoto tetahi o te iwi nei ki tau wahine, a kua takina mai e koe he hara ki runga ki a matou. Na  
ka whakatupato a Apimereke ki tona iwi katoa, ka mea, Ko te tangata e pa ki tenei tangata, ki tana  
wahine ranei, he pono ka mate ia.

12 A i rui a Ihaka ki taua whenua, a maea ake i taua tau ano kotahi rau: i manaakitia hoki ia e  
13 Ihowa: Na ka kake taua tangata, ka tino nui haere, no ka nui noa ake ia: 14 A ka whiwhi ia i nga

15 kahui hipi, i nga kahui kau, i te tini o te pononga: a ka hae nga Pirihitini ki a ia. Na ko nga poka  
katoa i keria e nga pononga a tona papa i nga ra o Aperahama, o tona papa, i tanumia era e nga

16 Pirihitini, i whakakiiia hoki ki te oneone. Na ka mea a Apimereke ki a Ihaka, Haere atu i roto i  
17 a matou; he kaha rawa hoki koe i a matou. Na haere atu ana a Ihaka i reira, a whakaturia ana

18 tona puni ki te awaawa o Kerara, a noho ana i reira. Na ka keria ano e Ihaka nga poka wai i keria  
ra i nga ra o Aperahama, o tona papa; i tanumia hoki e nga Pirihitini i muri i te matenga o Aperahama:

19 a huaina ana e ia hei ingoa mo aua poka ko nga ingoa i huaina iho e tona papa. Na ka keria nga

20 pononga a Ihaka ki te awaawa, a ka kitea e ratou i reira he puna manawa whenua. Na ka tautohe  
nga hepara o Kerara ki nga hepara a Ihaka, ka mea, Na matou tenei wai: a huaina ana e ia te ingoa

21 o te poka ko Eheke; mo ratou hoki i whakatetete ki a ia. Na ka keria ratou i tetahi atu poka, ka

22 tautohetia ano tera e ratou: a huaina iho e ia tona ingoa ko Hitina. Na ka neke atu ia i reira, a ka  
keria i tetahi atu poka; kihai tera i tautohetia e ratou: na ka huaina e ia tona ingoa ko Rehopoto; i  
mea hoki ia, Katahi nei hoki a Ihowa ka whakawatea i tetahi nohoanga mo tatou, a ka hua tatou ki

23 runga ki te whe nua. Na ka haere atu ia i reira ki runga, ki Peerehepa. 24 A ka puta mai a Ihowa  
ki a ia i taua po ano, ka mea, Ko ahau te Atua o Aperahama, o tou papa: kaua e wehi, kei a koe nei  
hoki ahau, a ka manaaki ahau i a koe, ka whakanui hoki i ou uri, he whakaaro ki a Aperahama, ki

25 taku pononga. Na ka hanga e ia he aata ki reira, a ka karanga ki te ingoa o Ihowa, a whakaturia  
ana hoki e ia tona teneti ki reira: a ka keria tetahi poka ki reira e nga pononga a Ihaka.

26 Na ka haere mai a Apimereke i Kerara ki a ia, ratou ko Ahutata ko tetahi o ona hoa, ko Pikora  
27 hoki, ko te rangatira o tana ope. A ka mea a Ihaka ki a ratou, I haere mai koutou ki ahau ki te

28 aha, ina hoki kua kino koutou ki ahau, kua pei hoki i ahau i roto i a koutou? A ka mea ratou, I  
kite marama matou, kei a koe a Ihowa: koia matou i mea ai, Kia takoto aiane he oati ki waenganui

29 i a tatou, ki waenganui o matou, ou, kia whakarite kawenata hoki matou ki a koe; Kia kaua koe  
e tukino i a matou, kia penei me matou kihai nei i pa ki a koe, kihai hoki i aha ki a koe, heoi ko te

30 pai anake, i ata tuku ano i a koe: inaianei ko koe te manaakitanga a Ihowa. Na ka tukua e ia he

<sup>31</sup> hakari ma ratou, a ka kai ratou, ka inu. Na ka maranga wawe ratou i te ata, ka oati ratou tetahi  
 ki tetahi: a tukua ana ratou e Ihaka kia haere, a hoki marie atu ana ratou i a ia. <sup>32</sup> A i taua rangi ano  
 ka haere mai nga pononga a Ihaka, ka korero ki a ia i te poka i keria e ratou, a ka mea ki a ia, Kua  
<sup>33</sup> kitea e matou he wai. A huaina iho e ia taua poka ko Hepaha: no kona te ingoa o tena pa, o  
 Peerehepa, a mohoa noa nei.  
<sup>34</sup> A, ka wha tekau nga tau o Ehau, ka tango ia i a Iuriti tamahine a Peeri Hiti, hei wahine mana,  
 rauako Pahemata tamahine a Erona Hiti: <sup>35</sup> A ka waiho raua hei mea pouri ki nga ngakau o Ihaka  
 raua ko Ripeka.

## Chapter 27

<sup>1</sup> Na, i a Ihaka kua koroheketia, kua atarua hoki nga kanohi, i kore ai ia e kite, ka karangatia e  
 ia a Ehau, tana tama matamua, ka mea ki a ia, E taku tama: a ka mea ia ki a ia, Tenei ahau. <sup>2</sup> Na  
 ka mea ia, Nana, kua koroheke ahau, kahore hoki ahau e mohio ki te ra e mate ai ahau: <sup>3</sup> Na reira  
 mauria e koe au rakau, tau papa pere me tau kopere, ka haere ki te koraha ki te hopu kai maku;  
<sup>4</sup> Ka taka ai i tetahi kai reka maku, hei taku i pai ai, ka mau mai ai ki ahau kia kai ahau; kia manaaki  
 ai toku wairua i a koe i mua o toku matenga. <sup>5</sup> A i rongu a Ripeka i te korerotanga a Ihaka ki a  
 Ehau, ki tana tama. Na ko te haerenga o Ehau ki te koraha ki te hopu kai hei maunga mai mana.  
<sup>6</sup> Na ka korero a Ripeka ki a Hakopa, ki tana tama, ka mea, Nana, kua rongu ahau i tou papa  
 e korero ana ki a Ehau, ki tou tuakana, e mea ana, <sup>7</sup> Mauria mai tetahi kai maku, ka taka ai i tetahi  
 kai reka maku, kia kai ahau, kia manaaki ai ahau i a koe i te aroaro o Ihowa, kei mate ahau. <sup>8</sup> Na,  
 whakarongo ki toku reo, e taku tama, kia rite ki taku e whakahau nei ki a koe. <sup>9</sup> Haere inaianei ki  
 te kahui, ka mau mai ki ahau i reira kia rua nga kua papai o nga koati; a maku ena e taka hei kai  
 reka ma tou papa, hei pera me tana e pai ai: <sup>10</sup> A mau e kawe ki tou papa, kia kai ia, kia manaaki  
 ai ia i a koe kei wha mate ia. <sup>11</sup> Na ka mea a Hakopa ki a Ripeka, ki tona whaea, Na ko Ehau, ko  
 toku tuakana, he tangata puhuruhuru, ko ahau ia he kiri maheni: <sup>12</sup> Tera pea toku papa e whawha  
 i ahau, a ki tana ka rite ahau ki te tangata tinihanga: a he kanga te mea e riro mai i ahau, kahore he  
<sup>13</sup> manaaki. Na ko te meatanga a tona whaea ki a ia, Hei runga i ahau tou kanga, e taku tama:

whakarongo mai ia ki toku reo, haere, tikina aua mea ki ahau. <sup>14</sup> Na ka haere ia, ka tikina, ka mauria  
 mai ki tona whaea: a ka taka e tona whaea he kai reka, he pera me ta tona papa i pai ai. <sup>15</sup> Na ka  
 tikina e Ripeka nga kakahu papai o Ehau, o tana tama o mua, i a ia hoki aua mea i roto i te whare;  
 a whakakakahuria ana e ia ki a Hakopa, ki tana tama o muri: <sup>16</sup> A ka whakapiritia e ia nga hiako  
 o nga kua koati ki ona ringa, ki te wahi maeneene hoki o tona ka kai: <sup>17</sup> Na ka hoatu e ia te kai  
 reka me te taro i hanga e ia ki te ringa o Hakopa, o tana tama.  
<sup>18</sup> Na ka tae ia ki tona papa, ka mea, E toku matua: a ka mea a, Tenei ahau; ko wai koe, e taku  
<sup>19</sup> ama? Na ka mea a Hakopa ki tona papa, Ko Ehau ahau, ko tau matamua: kua oti i ahau tau i ki  
 mai ai ki ahau: na maranga ake, e noho ki te kai i te kai i hopukia nei e ahau, kia manaaki ai tou  
<sup>20</sup> wairua i ahau. A ka mea a Ihaka ki tana tama, Na te aha i hohoro ai te kitea e koe, e taku tama?  
<sup>21</sup> Ka mea ia, Na Ihowa hoki, na tou Atua, i homai kia hohoro. A ka mea a Ihaka ki a Hakopa,  
 Nuku mai nei na, kia whawha ahau ki a koe, e taku tama, ko taku tama tonu ranei koe, ko Ehau,  
<sup>22</sup> kahore ranei. Na ka neke atu a Hakopa ki a Ihaka, ki tona papa, a ka whawha tera i a ia, ka mea,  
<sup>23</sup> Ko te reo, no Hakopa te reo, ko nga ringa ia, no Ehau nga ringaringa. A kihai ia i mohio ki a ia,  
 no te mea he huruhuru ona ringa, i rite ki nga ringa o Ehau, o tona tuakana: na ka manaaki ia i a  
<sup>24</sup> ia. A ka mea, Ko taku tama pu ranei koe, ko Ehau? A ka mea ia, Ko ahau tenei. <sup>25</sup> Na ka mea  
 ia, Kawea mai kia tata ki ahau, kia kai ahau i te kai i hopukia e taku tama, kia manaaki ai toku  
 wairua i a koe. Na kawea atu ana e ia ki a ia, a ka kai ia: i mauria atu ano e ia he waina ki a ia, a  
<sup>26</sup> inu ana ia. Katahi ka mea a Ihaka, tona papa, ki a ia, Nuku mai nei, ka kihi i ahau, e taku tama.  
<sup>27</sup> Na ka neke atu ia, a ka kihi ia i a ia: a ka hongia ia i te haunga o ona kakahu, ka manaaki i a ia,  
 ka mea, Titiro hoki, rite tahi te haunga o taku tama ki te haunga o te parae i manaakitia e Ihowa:  
<sup>28</sup> Kia homai ano e te Atua ki a koe te tomairangi o te rangi, me te momonatanga o te whenua, kia  
<sup>29</sup> nui ano hoki te witi me te waina: Kia mahi nga iwi ki a koe, kia piko iho hoki nga tauwiwi ki a  
 koe: kia waiho koe hei rangatira mo ou teina, a kia piko iho ki a koe nga tama a tou whaea: kia  
 kanga te tangata e kanga ana i a koe, a kia manaakitia te tangata e manaaki ana i a koe.  
<sup>30</sup> A, mutu ana te manaaki a Ihaka i a Hakopa, puta kau atu ano a Hakopa i te aroaro o Ihaka,  
<sup>31</sup> o tona papa, na ka tae mai a Ehau, tona tuakana, i tana hopu kirehe mohoa. Kua oti ano hoki i  
 a ia tetahi kai reka te taka, a kawea ana ki tona papa, na ka mea ki tona papa, Kia ara ake toku papa  
<sup>32</sup> ki te kai i te mea i hopukia mai e tana tama, kia manaaki ai tou wairua i ahau. Na ka mea a Ihaka,  
<sup>33</sup> tona papa, ki a ia, Ko wai koe? A ka mea ia, ko tau tama ahau, ko Ehau, ko tau matamua. Na

tino wiri rawa ana a Ihaka, a ka mea, Ha, ko wai ra tenei i hopukia nei e ia he kai, a kawea ana mai ki ahau, a kainga katoatia ana e ahau i te mea kahore ano koe i tae mai, a manaakitia ana ia e ahau?

<sup>34</sup>  
ae ra, ka manaakitia ano ia. A, i te rongonga o Ehau i nga kupu a tona papa, ka tangi ia, he tangi nui, he tangi tiwerawera, a ka mea ki tona papa, Manaakitia ahau, ae ra, ahau ano hoki, e toku papa.

<sup>35</sup> A ka mea ia, I haere tinihanga mai tou teina, a riro ana tou manaaki i a ia. <sup>36</sup> Na ka mea ia, Ka tika ha te tapanga i a ia ko Hakopa? kua rua nei hoki oku mamingatanga e ia: ko toku matamuatanga kua riro i a ia; a inaianei kua riro toku manaaki i a ia. Ka mea ano ia, Kahore ranei i mahue atu ki

<sup>37</sup>  
a koe tetahi manaaki moku? Na ka whakahoki a Ihaka, ka mea ki a Ehau, Na, kua waiho ia e ahau hei rangatira mou, kua hoatu hoki ona tuakana katoa ki a ia hei apa; kua whakaukia hoki ia e

<sup>38</sup>  
ahau ki te witi, ki te waina: a he aha ra mau hei meatanga maku, e taku tama? Na ka mea a Ehau ki tona papa, Kotahi tonu ia tau manaaki, e toku papa? manaakitia ahau, ae ra, ahau ano hoki, e

<sup>39</sup>  
toku papa. Na nui atu te reo o Ehau ki te tangi. Na ka whakahoki a Ihaka, tona papa, ka mea ki a ia, Na, no te momonatanga o te whenua te nohoanga mou, no te tomairangi hoki o te rangi i runga;

<sup>40</sup>  
Ma tau hoari hoki e ora ai koe, me mahi ano koe ki tou teina; a tenei ake, kei tou kakenga hei rangatira, na ka wahia atu e koe tana ioka i tou kaki.

<sup>41</sup>  
Na ka mauahara a Ehau ki a Hakopa mo te manaaki i manaakitia ai ia e tona papa; a ka mea a Ehau i roto i tona ngakau, E tata ana nga ra e uhungatia ai toku papa; ko reira ahau patu ai i toku

<sup>42</sup>  
teina, i a Hakopa. Na ka korerotia ki a Ripeka nga kupu a Ehau, a tana tama o mua: a ka tono tangata ia ki te karanga i a Hakopa, i tana tama o muri, ka mea ki a ia, Na, tenei tou tuakana, a

<sup>43</sup>  
Ehau, mo te wahi ki a koe, te whakamarie nei i a ia, te mea nei ki te patu i a koe. No konei, e taku tama, whakarongo ki toku reo; whakatika, e rere ki a Rapana, ki toku tungane, ki Harana;

<sup>44</sup>  
Hei a ia koe noho ai mo etahi rangi, kia tahuri atu ra ano te aritarita o tou tuakana; <sup>45</sup> Kia tahuri ke atu ra ano i a koe te riri a tou tuakana, kia wareware hoki i a ia tau i mea ai ki a ia: katahi ahau ka tono tangata ki te tiki atu i a koe i reira: he aha kia tangohia atu ai korua tokorua i ahau i te rangi

<sup>46</sup>  
kotahi? Na ka mea a Ripeka ki a Ihaka, Kei te hoha ahau ki te ora i nga tamahine a Hete: ki te tango a Hakopa i tetahi wahine mana i roto i nga tamahine a Hete, i tetahi e penei ana me enei tamahine o te whenua nei, hei aha ake moku te ora?

## Chapter 28

<sup>1</sup> Na ka karanga a Ihaka i a Hakopa, ka manaaki i a ia, ka tohutohu ki a ia, a ka mea ki a ia, Kua koe e tango wahine o nga tamahine o Kanaana. <sup>2</sup> Whakatika, haere ki Paranaarama ki te

whare o Petuere, papa o tou whaea; ka tango mai i reira i tetahi wahine mau o nga tamahine a Rapana, tungane o tou whaea. <sup>3</sup> A ma te Atua Kaha Rawa koe e manaaki, mana koe e mea kia hua,

kia nui, kia meinga hoki hei huihuinga iwi; <sup>4</sup> Mana e homai ki a koe te manaaki o Aperahama, ki a koutou tahi ko ou uri; kia riro ai i a koe te whenua e noho manene nei koe, i homai nei hoki e te

Atua ki a Aperahama. <sup>5</sup> Na tonoa atu ana a Hakopa e Ihaka: a haere ana ia ki Paranaarama ki a Rapana, ki te tama a Petuere Hiriani, ki te tungane o Ripeka, whaea o Hakopa raua ko Ehau.

<sup>6</sup> A ka kite a Ehau kua manaaki a Ihaka i a Hakopa, kua tonu hoki i a ia ki Paranaarama ki te tiki wahine mana i reira; kua tohutohu hoki ki a ia, i a ia e manaaki ana i a ia, kua mea, Kei tangohia

e koe he wahine i nga tamahine o Kanaana; <sup>7</sup> A kua rongu a Hakopa ki tona papa raua ko tona

whaea, kua riro hoki ki Paranaarama; <sup>8</sup> A ka kite a Ehau e kino ana nga tamahine o Kanaana ki te

titiro a Ihaka, a tona papa; <sup>9</sup> Na haere ana a Ehau ki a Ihimaera, a tangohia ana mai e ia ki roto ki ana wahine a Maharata, te tamahine a Ihimaera, tama a Aperahama, te tuahine o Nepaioto, hei wahine mana.

<sup>10</sup> Na ka turia atu e Hakopa i Peerehepa, a haere ana ki Harana. <sup>11</sup> A ka pono atu ia ki tetahi wahi, ka moe i reira, kua to hoki te ra; na ka tikina atu e ia tetahi o nga kohatu o taua wahi, a meatia

ana e ia hei urunga mona, ka takoto ia i taua wahi, ka moe. <sup>12</sup> Na moe iho ia, ko tetahi arawhata e tu ana i runga i te whenua, ko tona pito i tutuki ki te rangi: na, ko nga anahera a te Atua e piki ana,

e heke ana i runga i taua mea. <sup>13</sup> Na, ko Ihowa e tu ana i runga atu i taua mea, e mea ana, Ko Ihowa ahau, ko te Atua o Aperahama, o tou papa, ko te Atua hoki o Ihaka: ko te whenua e takoto na koe

ka hoatu e ahau ki a koe, ki ou uri ano hoki; <sup>14</sup> A ka rite ou uri ki te puehu o te oneone, ka tohatoha atu koe ki te hauauru, ki te rawhiti, ki te raki, ki te tonga: a mau, ma tou uri hoki e manaakitia ai

nga hapu katoa o te whenua. <sup>15</sup> Na, kei a koe tenei ahau, ka tiaki ahau i a koe i nga wahi katoa e haere ai koe, ka whakahoki mai ano ahau i a koe ki tenei whenua; e kore hoki ahau e whakarere i a koe, kia oti ra ano taku i ki atu ai ki a koe.

<sup>16</sup> Na ka oho ake a Hakopa i tana moe, ka mea, He pono kei tenei wahi a Ihowa; a kihai ahau

i mohio. <sup>17</sup> Na ka wehi ia, kamea, Ano te wehi o tenei wahi! ehara tenei i te mea ke atu i te whare

o te Atua, a ko te kuwaha tenei ki te rangi. <sup>18</sup> Na ka ara wawe a Hakopa i te ata, a ka mau ki te kohatu i waiho ra hei urunga mona, whakaturia ana e ia hei pou, ringihia iho e ia he hinu ki runga.

<sup>19</sup> A huaina iho e ia te ingoa o taua wahi ko Peteere: ko Rutu ia te ingoa o taua pa i mua. <sup>20</sup> Na ka puaki ta Hakopa kupu taurangi, ka mea ia, Ki te mea ka tata mai ki ahau te Atua, a ka tiakina ahau e ia i tenei ara e haere nei ahau, a ka homai e ia ki ahau he taro hei kai, me tetahi kakahu hei kakahu,

21

A ka hoki mai ahau i runga i te rangimarie ki te whare o toku papa; na, ko Ihowa hei Atua ki ahau: <sup>22</sup> A, ko tenei kohatu i whakaturia nei e ahau hei pou, ka waiho hei whare mo te Atua; a, o nga mea katoa e homai e koe ki ahau, ka hoatu e ahau ki a koe nga whakatekau.

## Chapter 29

<sup>1</sup> Na ka turia atu e Hakopa, ka haere ki te whenua o nga tangata o te rawhiti. <sup>2</sup> Na ka titiro atu ia, a ka kite i tetahi poka i te parae, na, ko etahi kahui hipi e toru e takoto ana i te taha; i whakainumia hoki e ratou nga kahui ki te wai o taua poka: he nui hoki te kohatu i te waha o te poka. <sup>3</sup> I huihuia hoki ki reira nga kahui katoa: a whakataka atu ana e ratou te kohatu i te waha o te poka, kia whakainumia ai nga hipi, na ka whakahokia ano e ratou te kohatu ki te waha o te poka, ki tona wahi. <sup>4</sup> Na ka mea a Hakopa ki a ratou, E oku tuakana, no hea koutou? A ka mea ratou, No Harana matou. <sup>5</sup> Na ka mea ia ki a ratou, E mohio ana ianei koutou ki a Rapana, tama a Nahora? Ka mea ratou, E mohio ana ano matou. <sup>6</sup> A ka mea ia ki a ratou, E ora ana ranei ia? Ka mea ratou, E ora ana ano: ko Rahera ano tenei, ko tana tamahine te haere mai nei me nga hipi. <sup>7</sup> Na ka mea ia, Nana, he nui ano te ra, ehara tenei i te wa hei huihuinga mai mo nga kararehe: whakainumia nga hipi, haere hoki ki te whangai. <sup>8</sup> Na ka mea ratou, E kore e taea e matou, kia huihuia mai ra ano nga kahui katoa, kia whakataka hoki e ratou te kohatu i te waha o te poka; katahi ka whakainu matou i nga hipi. <sup>9</sup> I a ia ano e korero ana ki a ratou, ka puta mai a Rahera me nga hipi a tona papa: ko ia hoki te kaiwhangai. <sup>10</sup> A, no te kitenga o Hakopa i a Rahera tamahine a Rapana, tungane o tona whaea, me nga hipi hoki a Rapana, tungane o tona whaea, na ka haere a Hakopa, a whakataka atu ana e ia te kohatu i te waha o te poka, whakainumia ana e ia nga hipi a Rapana, tungane o tona whaea. <sup>11</sup> Na ka kihi a Hakopa i a Rahera, a nui atu tona reo ki te tangi. <sup>12</sup> Na ka whakaaturia e Hakopa ki a Rahera ko ia te iramutu o tona papa, he tama hoki na Ripeka: a ka rere ia ki te korero ki tona papa. <sup>13</sup> Na, i te taenga atu ki a Rapana o te rongo o Hakopa, tama a tona tuahine, ka rere ia ki te whakatau i a ia, ka awhi i a ia, ka kihi hoki i a ia, a kawea ana ki tona whare. A ka korerotia e ia enei mea katoa ki a Rapana. <sup>14</sup> Na ka mea a Rapana ki a ia, He pono ko toku whenua, ko toku kikokiko koe. A kotahi te marama i noho ai ia ki a ia.



15 Na ka mea a Rapana ki a Hakopa, No te mea ko taku iramutu koe, me mahi noa ano koe ki  
 ahau? korero mai ki ahau, me aha he utu mou? 16 Na tokorua nga tamahine a Rapana: ko te ingoa  
 o te tuakana ko Rea, ko te ingoa hoki o te teina ko Rahera. 17 He papahewa nga kanohi o Rea; he  
 mea ahuaireka ia a Rahera, he ataahua hoki ki te titiro atu. 18 Na i aroha a Hakopa ki a Rahera; a  
 ka mea ia, Kia whitu nga tau e mahi ai ahau ki a koe mo Rahera, mo tau tamahine o muri. 19 Na  
 ka mea a Rapana, Engari te hoatu e ahau ki a koe, kei hoatu ki te tangata ke: e noho ki ahau. 20 Na  
 e whitu nga tau i mahi ai a Hakopa mo Rahera; a he rangi torutoru noa ake te rite o aua tau ki tona  
 whakaaro, i tona aroha ki a ia. 21 Na ka mea a Hakopa ki a Rapana, Homai taku wahine, kua rite  
 nei hoki oku ra, kia haere ahau ki roto, ki a ia. 22 Na ka huihuia mai e Rapana nga tangata katoa o  
 taua wahi, a tukua ana e ia he hakari. 23 A, i te ahiahi ka mau ia ki a Rea ki tana tamahine, a kawea  
 ana ia ki a ia; a ka haere ia ki roto, ki a ia. 24 A i hoatu e Rapana a Tiripa, tana pononga wahine,  
 hei pononga ma Rea, ma tana tamahine. 25 A, i te ata, na, ko Rea ia: a ka mea ia ki a Rapana, He  
 aha tenei mahi au ki ahau? ehara ianei a Rahera i taku i mahi ai ahau ki a koe? he aha ra koe i  
 tinihanga ai ki ahau? 26 Na ko te meatanga a Rapana, Ehara tenei i te tikanga o to matou whenua,  
 kia hoatu te teina ki mua o te tuakana. 27 Whakatutukitia te wiki mo tenei, a ka hoatu ano hoki tera  
 e matou ki a koe mo te mahi e mahi ai koe ki ahau i etahi atu tau e whitu. 28 A pera ana a Hakopa,  
 a whakatutukitia ana e ia te wiki mo tenei: a ka homai e ia a Rahera, tana tamahine, ki a ia hei  
 wahine mana. 29 I homai ano e Rapana a Piriha, tana pononga wahine, ki a Rahera, ki tana tamahine,  
 hei pononga mana. 30 Na ka haere ano hoki ia ki roto, ki a Rahera, a nui atu tona aroha ki a Rahera  
 i tona ki a Rea; e whitu atu ano nga tau i mahi ai ia ki a ia.  
 31 A ka kite a Ihowa e kinongia ana a Rea, ka whakatuwheratia e ia tona kopu: he pakoko ia a  
 Rahera. 32 Na ka hapu a Rea, a ka whanau he tama, a huaina ana e ia tona ingoa ko Reupena: i  
 mea hoki ia, Mo Ihowa hoki i titiro mai ki toku tangihanga; ta te mea hoki akuanei taku tahu aroha  
 ai ki ahau. 33 Na ka hapu ano ia, a ka whanau he tama; a ka mea ia, I rongu hoki a Ihowa e kinongia  
 ana ahau, koia i homai ai hoki e ia tenei ki ahau: a huaina ana e ia tona ingoa ko Himiona. 34 Na  
 ka hapu ano ia, a ka whanau he tama; a ka mea ia, Katahi ano taku tahu ka piri mai ki ahau, no te  
 mea hoki ka tokotoru a maua tama ka whanau; na reira i huaina ai e ia tona ingoa ko Riwai. 35 Na

ka hapu ano ia, a ka whanau he tama; a ka mea ia, Katahi ahau ka whakamoemiti ki a Ihowa: koia i huaina ai e ia tona ingoa ko Hura: a ka mutu tana whanau.

### Chapter 30

<sup>1</sup> A, no te kitenga o Rahera kahore i whanau tetahi tama ma raua ko Hakopa, ka hae a Rahera  
<sup>2</sup> ki tona tuakana; a ka mea ia ki a Hakopa, Kia whai tamariki ahau, ki te kahore, ka mate ahau. Na  
ka mura ake te riri a Hakopa ki a Rahera: ka mea ia, Ko te atua ranei ahau e kaiponu atu nei i te  
<sup>3</sup> hua mo tou kopu? Na ka mea tera, Na taku pononga wahine, a Piriha, haere ki roto, ki a ia; kia  
whanau ai ia ki runga ki oku turi, a mana ka whai tamariki ai ahau. <sup>4</sup> Na ka homai e ia a Piriha,  
<sup>5</sup> tana pononga wahine, ki a ia hei wahine, a ka haere atu a Hakopa ki roto, ki a ia. Na ka hapu a  
<sup>6</sup> Piriha, a ka whanau ta raua tama ko Hakopa. Na ka mea a Rahera, Kua whakarite te Atua i taku  
whakawakanga, kua rongono ano ki toku reo, kua homai hoki e ia tetahi tama ki ahau: na reira i huaina  
<sup>7</sup> ai e ia tona ingoa ko Rana. Na ka hapu ano a Piriha, te pononga wahine a Rahera, a ka whanau  
<sup>8</sup> te rua o a raua tama, ko Hakopa. Na ka mea a Rahera, Nui whakaharahara nga nonoketanga i  
nonoke ai maua ko toku tuakana, a taea ana ia e ahau: na huaina iho e ia tona ingoa ko Napatari.  
<sup>9</sup> I te kitenga o Rea ka mutu ia te whanau ka tango ia i a Tiripa, i tana pononga wahine, a hoatu ana  
<sup>10</sup> e ia ki a Hakopa hei wahine. Na ka whanau te tama a Hakopa raua ko Tiripa, pononga a Rea.  
<sup>11</sup> A ka mea a Rea, He waimarie! Na huaina ana e ia tona ingoa ko Kara. <sup>12</sup> Na ka whanau te rua  
<sup>13</sup> o nga tama a Hakopa raua ko Tiripa, pononga a Rea. A ka mea a Rea, E hari ana ahau, ka kiia  
nei hoki ahau e nga tamahine he mea hari: a huaina ana e ia tona ingoa ko Ahera.  
<sup>14</sup> Na ka haere a Reupena i nga ra o te kotinga witi, a ka kite i etahi manitareki i te koraha, a  
kaweana e ia ki a Rea, ki tona whaea. A ka mea atu a Rahera ki a Rea, Tena koa maku etahi o  
<sup>15</sup> nga manitareki a tau tama. Na ko te meatanga a tera ki a ia, He mea nohinohi ianei tau tangohanga  
i taku tahu? a me tango ano koe i nga manitareki a taku tama? A ka mea atu a Rahera, Na, me takoto  
<sup>16</sup> ia ki a koe i tenei po hei utu mo nga manitareki a tau tama. A i te ahiahi ka, haere mai a Hakopa  
i te mara, na ka puta atu a Rea ki te whakatau i a ia, ka mea, Me haere mai koe ki ahau; kua oti hoki  
<sup>17</sup> koe te hoko e ahau ki nga manitareki a taku tama. Na ka takoto ia ki a ia i taua po. I whakarongo  
<sup>18</sup> hoki te Atua ki a Rea, a ka hapu ia, a ka whanau te tokorima o a raua tama ko Hakopa. Na ka

mea a Rea, Kua homai e te Atua toku utu, moku i hoatu i taku pononga ki taku tahu: a huaina ana

19 e ia tona ingoa ko Ihakara. Na ka hapu ano a Rea, a ka whanau te tokoono o a raua tama ko

20 Hakopa. Na ka mea a Rea, He pai te hakari i homai nei e te Atua ki ahau; katahi taku tahu ka noho ki ahau, mo te whanautanga o a maua tama tokoono: a huaina ana e ia tona ingoa ko Hepurona.

21 A muri iho ka whanau he kotiro, a huaina ana e ia tona ingoa ko Rina. 22 A i mahara te Atua ki

a Rahera, i whakarongo hoki te Atua ki a ia, a whakatuwheratia ana e ia tona kopu. 23 Na ka hapu

24 ia, a ka whanau he tama; a ka mea ia, Kua whakamutua e te Atua toku tawainga: Na huaina ana e ia tona ingoa ko Hohepa: a ka mea, Ka tapiritia mai e Ihowa tetahi atu tama maku.

25 Na, ka whanau ra a Hohepa i a Rahera, ka mea a Hakopa ki a Rapana, Tukua ahau, kia haere

26 ai ahau ki toku ake wahi, ki toku whenua. Homai aku wahine me aku tamariki i mahi ai ahau ki

27 a koe, a ka haere ahau: e mohio ana hoki koe ki taku mahi i mahi ai ahau ki a koe. Na ka mea a Rapana ki a ia, Ki te mea e manakohia ana anau e koe, e noho: kua kite hoki ahau nau i manaakitia

28 ai ahau e Ihowa. I mea ano ia, Whakaritea ki ahau te utu mou, a ka hoatu e ahau. 29 A ka mea ia ki a ia, E mohio ana koe ki taku mahinga ki a koe, ki au kararehe hoki i ahau, to ratou peheatanga.

30 I mua atu hoki i ahau he iti au mea, na kua nui noa atu tenei; a kua manaakitia koe e Ihowa ahakoa tahuri ahau ki hea, ki hea: na inaianei ahea ranei ahau mea ai hoki i tetahi mea mo toku ake whare?

31 A ka mea tera, Ko te aha taku e hoatu ai ki a koe? A ka mea a Hakopa, Kaua e homai tetahi mea

32 ki ahau: ki te meatia mai e koe tenei mea aku, ka whangai ano ahau, ka tiaki i au hipi. Ka tika ahau na waenganui i tau kahui katoa akuanei, a ka wehea i reira nga mea whai tongitongi katoa, nga mea purepure, me nga mea pakaka katoa i roto i nga hipi, me nga purepure, me nga mea whai

33 tongitongi i roto i nga koati: a ko era hei utu moku. Penei ka whakatikaia ahau e toku tika apopo ake nei, ina tae atu ki tou aroaro ki te utu moku: ko nga mea i roto i nga koati kahore nei he tongitongi, kahore he purepure, me nga mea kahore e pakaka i roto i nga hipi, he mea tahae tena

34 naku. Na ka mea a Rapana, Ae, pai tonu kia pena me tau i ki mai na. 35 Na ka wehea e ia i taua rangi nga koati toa, nga mea whakahekeheke, me nga mea purepure, me nga koati uha e whai tongitongi ana, me nga mea purepure, nga mea he ma tetahi wahi, me nga mea pakaka o nga hipi,

36 a hoatu ana ki nga ringa o ana tama; Na ka whakatakiwatia e ia he takiwa i waenganui i a ia, i a Hakopa, kia toru nga ra e haerea ai; a ka whangai a Hakopa i nga hipi a Rapana i mahue iho.

37 Katahi ka tikina e Hakopa etahi rakau mana, he papara mata, he aramona, he pereni; a tihorea

38 ana e ia etahi tihorenga ma i aua mea, a ka meinga kia ata kitea te wahi ma o nga rakau. A i whakaturia e ia aua rakau i tihorea ra ki roto ki nga hake, ki roto ki nga waka wai, kia taurite mai

ki nga hipi, ina haere nga hipi ki te inu; i whakahaputia hoki i te haerenga ki te inu. <sup>39</sup> Na ka  
 whakahaputia nga kahui ki mau i nga rakau, a he whakahekeheke, he mea tongitongi, he purepure  
<sup>40</sup>  
 nga kuao i whanau. Na ka wehea atu nga reme e Hakopa, a whakaangahia ana e ia nga kanohi  
 o nga kahui ki nga mea whakahekeheke, ki nga mea pakaka katoa i roto i te kahui a Rapana; na ko  
<sup>41</sup>  
 ana ake kahui i wehea e ia ki te whanga, kihai hoki i tukua ki roto ki te kahui a Rapana. Na, i  
 nga wa katoa e whakahaputia ai nga mea kaha o te kahui ka whakaturia e Hakopa nga rakau ki te  
<sup>42</sup>  
 tirohanga a te kahui, ki roto ki nga hake, kia whakahaputia ai ratou ki waenga i nga rakau; A ki  
 te mea he ngoikore te kahui, kihai i whakaturia e ia: na i a Rapana nga mea ngoikore, a i a Hakopa  
<sup>43</sup>  
 nga mea kaha. Na ka tino nui haere rawa taua tangata, a ka whai kahui nunui ano ia, me nga  
 pononga wahine, me nga pononga tane, me nga kamera, me nga kaihe.

### Chapter 31

<sup>1</sup>  
 A i rongoa ia i nga kupu a nga tama a Rapana, e ki ana, Kua riro i a Hakopa nga mea katoa a  
<sup>2</sup>  
 to tatou papa; na nga mea hoki a to tatou papa i whiwhi ai ia ki tenei kororia katoa. A ka titiro a  
<sup>3</sup>  
 Hakopa ki te mata o Rapanga, na, kihai i pera ki a ia me to era rangi ake. A ka mea a Ihowa ki a  
<sup>4</sup>  
 Hakopa, E hoki ki te whenua o ou matua, ki ou whanaunga hoki; a ka tata ahau ki a koe. Na ka  
<sup>5</sup>  
 tonono tangata a Hakopa hei karanga i a Rahera raua ko Rea ki tana kahui, ki te parae, A ka mea ia  
 ki a raua, E kite ana ahau i te mata o to korua papa, kahore e pera mai ki ahau me to era rangi ake;  
<sup>6</sup>  
 otia i tata mai ki ahau te Atua o toku papa. E mohio ana ano korua, i poto katoa atu toku kaha  
<sup>7</sup>  
 ki taku mahi ki to korua papa. Ko to korua papa ia i tinihanga ki ahau, ka tekau rawa ana  
<sup>8</sup>  
 whakaputanga ketanga i oku utu; otia kihai ia i tukua e te Atua kia tukino i ahau. Mehemea i  
 korero penei ia, Hei nga mea whai tongitongi te utu mou; na, he mea tongitongi katoa nga whanau  
 o nga kahui: a, mehemea ia i ki penei, Hei nga mea whakahekeheke he utu mou, na, he  
<sup>9</sup>  
 whakahekeheke katoa nga whanau o nga kahui. Koia i tangohia ai e Ihowa nga hipi a to korua  
<sup>10</sup>  
 papa, a homai ana ki ahau. Na, i te wa i whakahaputia ai te kahui, ka maranga ake oku kanohi,  
 a ka kite moemoea ahau, ko nga toa i ekengia ai nga kahui, he whakahekeheke, he mea whai  
<sup>11</sup>  
 tongitongi, he mea kotingotingo. I korero moemoea mai ano te anahera a te Atua ki ahau, E  
<sup>12</sup>  
 Hakopa: a ka mea atu ahau, Tenei ahau. Na ka mea mai ia, Tena, whakaarahia ake ou kanohi,

ka titiro ki nga toa katoa e ekeke ana i nga kahui, he whakahekeheke, he whai tongitongi, he kotingotingo hoki: kua kite hoki ahau i nga mea katoa i mea nei a Rapana ki a koe. <sup>13</sup> Ko ahau te Atua o Peteere, o te wahi i whakawahi na koe i te pou, i puaki ai hoki tau kupu taurangi ki ahau:

kati, whakatika, haere atu i tenei whenua, hoki atu ki te whenua i whanau ai koe. <sup>14</sup> Na ka whakahoki a Rahera raua ko Rea, ka mea ki a ia, Tera atu ano ianei tetahi wahi, tetahi taonga tupu ranei mo maua i roto i te whare o to maua papa? <sup>15</sup> Kahore ianei maua i te kiia e ia he wahine ke noa atu?

kua hokona nei hoki maua e ia, kua pau rawa ano i a ia a maua moni. <sup>16</sup> Mo tatou nei hoki, mo a tatou tamariki nga taonga katoa i tangohia nei e te atua i to maua papa: na, tena, meatia nga mea katoa i kiia e te Atua ki a koe.

<sup>17</sup> Na ka whakatika a Hakopa, a whakaekea ana e ia ana tamariki me ana wahine ki runga ki nga kamera; <sup>18</sup> A kawhakina atu ana e ia ana kararehe katoa, me ona taonga katoa i whiwhi ai ia, nga kararehe i whiwhi ai ia, i riro hoki i a ia i Paranaarama, a haere ana ki a Ihaka, ki tona papa, ki

te whenua o Kanaana. <sup>19</sup> Na ko Rapana kua riro ki te kutikuti i ana hipi: katahi ka tahaetia e Rahera nga whakapakoko a tona papa. <sup>20</sup> Na tahuti ana a Hakopa i a Rapana Hiriani, kihai hoki i whakaaturia

tona omanga ki a ia. <sup>21</sup> Na ka oma ia, me ana mea katoa; i whakatika ia, ka whiti i te awa, i ahu hoki tona mata ki te maunga, ki Kireara. <sup>22</sup> A i te toru o nga ra ka korerotia ki a Rapana, kua oma

a Hakopa. <sup>23</sup> Na ka tango ia i ona teina hei hoa mona, a ka wahi i a ia, e whitu nga ra ki te ara; a mau atu ia i a ia ki Maunga Kirera. <sup>24</sup> Na ka puta moemoea te Atua ki a Rapana Hiriani i te po, ka mea ki a ia, Kia tupato kei korero koe ki a Hakopa, ahakoa pai, ahakoa kino.

<sup>25</sup> Na ka mau a Hakopa i a Rapana, Na tera kua whakaturia e Hakopa tona teneti ki te maunga: heoi whakaturia ana hoki e Rapana ratou ko ona teina ki Maunga Kirera. <sup>26</sup> Na ka mea a Rapana ki a Hakopa, He mahi aha tau, i tahuti mai nei koe i ahau, i kahaki mai nei hoki i aku tamahine,

ano he parau na te hoari? <sup>27</sup> He aha i huna ai e koe tou omanga, i tahuti mai ai i ahau; a kihai i korero mai ki ahau, kia tukua ai koe e ahau i runga i te hari, i nga waiata, i te timipera, i te hapa; <sup>28</sup>

Kihai ano ahau i tukua e koe kia kihi i aku tama, i aku tamahine? he mahi poauau tenei mahi au. <sup>29</sup>

He kaha kei toku ringa hei whakatupu kino i a koutou: otiia kua korero mai te Atua o to koutou papa ki ahau inapo, kua mea mai, Kia tupato kei korero atu koe, ahakoa pai, ahakoa kino, ki a Hakopa. <sup>30</sup> Na, ahakoa i whakamatea e koe tou haere, no te mea i koroa e koe te whare o tou papa,

he aha ra koe i tahae ai i oku atua? <sup>31</sup> Na ka whakahoki a Hakopa, ka mea ki a Rapana, No te mea

32  
hoki i wehi ahau: i mea hoki ahau, Kei tangohia e koe au tamahine i ahau. Ko te tangata e kitea e koe ou atua i a ia, kua ia e whakaorangia: tirohia iho e koe i te aroaro o o taua teina ko ehea mea au kei ahau, ka tango atu ai mau. Kihai hoki a Hakopa i mohio, kua tahaetia aua mea e Rahera.

33  
Na ka haere a Rapana ki te teneti o Hakopa, ki te teneti hoki o Rea, ki te teneti ano hoki o nga pononga wahine tokorua; a kihai i kitea. A ka puta atu ia i te teneti o Rea, a ka tomo atu ki te teneti

34  
o Rahera. Na tera kua tikina nga whakapakoko e Rahera, kua whaongia ki roto ki te nohoanga kamera, a nohoia iho e ia. Na poto katoa te teneti te whawha e Rapana, a kihai i kitea. Na ka mea ia ki tona papa, Kei riri mai toku ariki moku e kore e ahei te whakatika ake ki tou aroaro; no te mea ko to te wahine mate tenei kei ahau. Na rapu noa ia, kihai i kitea nga whakapakoko.

36  
Na ka riri a Hakopa, ka ngangare ki a Rapana: a ka oho a Hakopa, ka mea ki a Rapana, He aha toku hara? he aha toku he, i takare ai koe ki te whai mai i ahau? Kua whawhakea nei e koe aku mea katoa, he aha te mea i kitea e koe o nga mea katoa o tou whare? Homai ki konei ki te

37  
aroaro o oku teina, o ou teina, ma ratou e whakariterite ta taua whakawa. Ka rua tekau enei tau oku ki a koe; kihai i whanau whakatahe au hipi, au koati, kihai ano i kainga e ahau nga hipi toa o

38  
tau kahui. Ko te mea i haea e nga kirehe mohoaio kihai i kawea e ahau ki a koe; naku ano tena i whakautu; i rapu utu ano koe mo tena i toku ringa, ahakoa mo te mea i tahaetia i te awatea, mo

39  
te mea ranei i tahaetia i te po. Ko taku hanga tena; i te awatea i pau ahau i te matewai, i te po i

40  
te huka; a turere ana te moe i oku kanohi. Ka rua tekau enei tau oku ki tou whare; kotahi tekau ma wha nga tau i mahi ai ahau ki a koe mo au tamahine tokorua, e ono tau hoki mo au hipi: a ka

41  
tekau au whakaputanga ketanga i nga utu moku. Me i kahore i tata mai ki ahau te Atua o toku papa, te Atua o Aperahama, te Wehi hoki o Ihaka, ina kua tonoa kautia mai ahau e koe. I kite mai te Atua i toku tukinotanga, i te mahi hoki a oku ringa, i riria ai koe e ia inapo.

42  
43  
Na ko te whakahokinga a Rapana, ko te meatanga ki a Hakopa, He tamahine naku enei tamahine, he tamariki ano naku enei tamariki, he kahui ano hoki naku enei kahui, a ko nga mea katoa e kite nei koe, naku: a he aha taku e mea ai akuanei ki enei ta mahine aku, ki a raua tamariki

44  
ranei i whanau nei i a raua? Na, tena, haere mai, kia whakarite kawenata taua, a koe me ahau;

45  
a ka waiho hei kaiwhakaatu ki a taua. Na ka tikina tetahi kohatu e Hakopa, a whakaarahia ake

46  
e ia hei pou. A ka mea a Hakopa ki ona teina, Kohia mai he kohatu; na ka tikina atu e ratou etahi

47  
kohatu, ka hanga he puranga: a kai ana ratou ki reira ki runga ki te puranga. A huaina iho taua

48  
mea e Rapana ko Iekarahaharuta: na Hakopa ia i hua ko Kareere. Na ka mea a Rapana, Hei

<sup>49</sup> kaiwhakaatu tenei puranga i tenei ra ki a taua. Na reira i huaina ai tona ingoa ko Kareere; Ko  
<sup>50</sup> Mihipa hoki; i mea hoki ia, Ma Ihowa e titiro mai ki a taua, ina matara atu taua i a taua. Ki te  
 tukino koe i aku tamahine, ki te tango ranei i etahi wahine ke atu i aku tamahine, kahore he tangata  
<sup>51</sup> i a taua; kia mahara, hei kaititiro te Atua ki ahau, ki a koe. I mea ano a Rapana ki a Hakopa,  
<sup>52</sup> Titiro ki tenei puranga, a titiro hoki ki tenei pou i waiho iho nei e ahau i waenganui i a taua; Hei  
 kaiwhakaatu tenei puranga, hei kaiwhakaatu ano hoki tenei pou, moku kei haere ki tua atu o tenei  
 puranga ki a koe, mou hoki kei haere ake ki ahau ki tua o tenei puranga, o tenei pou hoki, mo te  
<sup>53</sup> kino. Ma te Atua o Aperahama, ma te Atua hoki o Nahora, ma te Atua o to raua papa, e whakarite  
<sup>54</sup> ta taua whakawa. Na ka oatitia e Hakopa te Wehi o tona papa, o Ihaka. Na patua ana e Hakopa  
 he patunga tapu ki runga ki te maunga, a karangatia ana e ia ona teina ki te kai taro: na ka kai taro  
<sup>55</sup> ratou, a ka moe ki te maunga. A ka maranga wawe a Rapana i te ata, ka kihi i ana tama, i ana  
 tamahine, ka manaaki hoki i a ratou: na haere ana a Rapana, hoki ana ki tona wahi.

## Chapter 32

<sup>1</sup> Na haere ana a Hakopa i tona huarahi, a ka tutaki ki a ia nga anahera a te Atua. <sup>2</sup> A ka mea  
 a Hakopa i tona kitenga i a ratou, Ko te ope tenei a te Atua: na huaina iho e ia te ingoa o tena wahi  
 ko Mahanaima.  
<sup>3</sup> Na ka tono tangata atu a Hakopa ki mua i a ia ki a Ehau, ki tona tuakana, ki te whenua o Heira,  
<sup>4</sup> ki te whenua o Eroma. Ka ako hoki ia ki a ratou, ka mea, Kia penei he korero atu ma koutou ki  
 toku ariki, ki a Ehau; E penei ana te kupu a tau pononga, a Hakopa, I a Rapana ahau e noho ana a  
<sup>5</sup> tae mai ki tenei wa; He kau ano aku, he kaihe, he hipi, he pononga tane, he pononga wahine: a  
<sup>6</sup> kua tono tangata nei ahau ki te korero ki toku ariki, kia manakohia ai ahau e koe. Na ka hoki mai  
 nga karere ki a Hakopa, ka mea, I tae atu matou ki tou tuakana, ki a Ehau, a tenei ano ia te haere  
<sup>7</sup> mai nei ki te whakatau i a koe, ratou tahi ko nga tangata e wha rau. Na he nui te wehi o Hakopa,  
 ka manukanuka; na ka wehea e ia ona tangata, me nga hipi, me nga kau, me nga kamera, kia rua  
<sup>8</sup> nga ropu; I mea hoki ia, Ki te tae mai a Ehau ki te ropu tuatahi, a ka patua e ia, na, ka mawhiti te  
 ropu i mahue.  
<sup>9</sup> Na ka mea a Hakopa, E te Atua o toku papa, o Aperahama, e te Atua o toku papa, o Ihaka, e  
 Ihowa, nau nei te kupu ki ahau, Hoki atu ki tou whenua, ki ou whanaunga hoki, a ka pai taku mahi

10  
ki a koe: He iti rawa ahau, he nui au arohatanga katoa, me te pono katoa hoki i whakaputaina mai e koe ki tau pononga; i whiti mai hoki ahau me toku tokotoko i tenei Horano; a ka rua nei oku

11  
ropu. Tena ra, whakaorangia ahau i te ringa o toku tuakana, i te ringa o Ehau; e wehi ana hoki  
12  
ahau i a ia, kei haere mai ia ki te patu i ahau, i te whaea ratou tahi ko nga tamariki. I mea mai nei hoki koe, Ina, ka pai taku mahi ki a koe, a ka meinga e ahau ou uri kia rite ki te onepu o te moana, e kore nei e taea te tatau i te tini.

13  
A i moe ia ki reira i taua po; a i tangohia e ia i roto i nga mea i pono ki tona ringa he hakari  
14  
ma Ehau, ma tona tuakana; E rua rau nga koati hua, e rua tekau hoki nga koati toa, e rua rau nga

15  
hipi uha, e rua tekau nga hipi toa, E toru tekau nga kamera whai waiu, me a ratou kua, e wha tekau nga kau, kotahi tekau hoki nga puru, e rua tekau nga kaihe uha, me nga kua hoki kotahi

16  
tekau. A ka hoatu e ia ki nga ringa o ana pononga tenei kahui, tenei kahui, motumotu rawa; ka  
17  
mea ia ki ana pononga, Haere i mua i ahau, kia whai takiwa tetahi kahui, tetahi kahui. I ako ano ia i te tuatahi, i mea, E tutaki a Ehau, toku tuakana, i a koe, e mea, Na wai koe? a e haere ana koe

18  
ki hea? a na wai enei mea i tou aroaro? Na ka mea atu koe, Na tau pononga, na Hakopa; i homai  
19  
e ia hei hakari ma toku ariki, ma Ehau; a tenei ano hoki ia kei muri i a matou. He pera ano tana ako ki te tuarua, ki te tuatoru hoki, ki nga tangata katoa ano hoki i haere i muri i nga kahui, i mea

20  
ia, Ko te tikanga tenei mo nga kupu e korero ai koutou ki a Ehau, ina tutaki ki a ia; A me ki atu e koutou, Na, tenei ano hoki tau pononga, a Hakopa, kei muri i a matou. I mea hoki ia, Me whakamarie ia e ahau ki te hakari e haere ana i mua i ahau, a, muri iho ka kite ahau i tona kanohi;

21  
tera pea ia e manako ki ahau. Na ka haere atu te hakari i mua i a ia: a ko ia i moe i taua po i te

22  
puni. A i whakatika ia i taua po, i tango hoki i ana wahine tokorua, me ana wahine pononga  
23  
tokorua, me ana tamariki tekau ma tahi, a ka whiti i te whitinga i Iapoko. A i tango ia i a ratou, i mea hoki kia whiti i te awa, a i tukuna atu e ia kia whiti nga mea i a ia.

24  
A i mahue iho a Hakopa ko ia anake; a nonoke ana raua ko tetahi tangata, a takiri noa te ata.

25  
A, no te kitenga o tera kihai ia i taea e ia, ka pa ia ki te ateatenga o tona huhu; a ka takoki te  
26  
ateatenga o te huhu o Hakopa i a raua e nonoke ana. Na ka mea ia, Tukua ahau, kua takiri hoki

27  
te ata. A ka mea ia, E kore koe e tukua e ahau, kia manaakitia ra ano ahau e koe. A ka mea ia,

28  
Ko wai tou ingoa? A ka mea ia, Ko Hakopa. A ka mea ia, Heoi ano kianga ko Hakopa tou ingoa, engari ko Iharaira: no te mea kua tohe koe ki te Atua, ki te tangata hoki, a i a koe ano te mutunga.



29

Na ka ui a Hakopa, ka mea, Tena koa, korerotia mai tou ingoa. Ano ra ko ia, He aha toku ingoa i uia ai e koe? a ka manaaki ia i a ia i reira. <sup>30</sup> Na huaina ana e Hakopa te ingoa o taua wahi ko

Peniere: i mea hoki ia, Moku i titiro ki te Atua, he kanohi, he kanohi, a kei te ora nei ahau. <sup>31</sup> A i

tara mai te ra ki a ia i a ia ka whiti i Penuere, kei te toitoti ano tona huha. <sup>32</sup> Koia nga tama a Ihairaira te kai ai i te uaua i memenge, ara i tera i te ateatenga o te huha, a tae noa ki tenei ra: no te mea hoki i pa ia ki te ateatenga o te huha o Hakopa, ki te uaua i memenge.

### Chapter 33

<sup>1</sup> A ka maranga ake nga kanohi o Hakopa, na ka titiro atu ia, a ko Ehau e haere mai ana, ratou ko nga tangata e wha rau. Na ka wehea e ia nga tamariki ki a Rea, ki a Rahera, ki nga pononga

wahine hoki tokorua. <sup>2</sup> I maka ano e ia nga pononga wahine me a raua tamariki ki mua, ko Rea

ratou ko ana tamariki ki muri mai, a ko Rahera raua ko Hohepa ki muri rawa. <sup>3</sup> Na ko ia i haere ki

mua i a ratou, a e whitu ona pikonga ki te whenua, a whakatata noa ia ki tona tuakana. <sup>4</sup> Na ka rere a Ehau ki te whakatau i a ia, a ka awhi i a ia, ka hinga hoki ki runga ki tona kaki, ka kihi i a ia: na ka tangi raua.

<sup>5</sup> Na ka maranga ona kanohi, ka kite ia i nga wahine, ratou ko nga tamariki; a ka mea, Ko wai enei i a koe nei? A ka mea ia, Ko nga tamariki, ko nga ohaohatanga a te Atua ki tau pononga. <sup>6</sup> Na

ka whakatata nga pononga wahine, raua ko a raua tamariki, a ka piko iho. <sup>7</sup> Na ka whakatata hoki a Rea, ratou ko ana tamariki, a ka piko iho: a muri iho ka whakatata a Hohepa raua ko Rahera, a

ka piko iho raua. <sup>8</sup> A ka mea ia, hei aha mau tenei ropu katoa i tutaki nei ki ahau? Ano ra ko ia,

Kia manakohia mai ai ahau e toku ariki. <sup>9</sup> A ka mea a Ehau, He nui kei ahau; waiho ano i a koe

tau, e toku teina. <sup>10</sup> Ano ra ko Hakopa, Kaua ra; mehemea kua manakohia mai ahau e koe, na, me tango e koe te hakari a toku ringa: ka kite atu nei hoki ahau i tou kanohi, me te mea e titiro atu ana

ki te kanohi o te Atua, a ka pai mai ano koe ki ahau. <sup>11</sup> Tangohia ra taku manaaki i kawea atu na ki a koe; kua atawhai mai nei hoki te Atua ki ahau, a e hua ana aku mea. Na ka tohe ia ki a ia, a ka

tangohia e ia. <sup>12</sup> Na ka mea ia, Hapainga, tatou ka haere, me haere ano ahau i mua i a koe. <sup>13</sup> A ka mea ia ki a ia, E mohio ana toku ariki he kahakore nga tamariki, a kei ahau hoki nga kahui me

nga kau whai kuao: kia kotahi noa rangi e akiakina ana ratou, na ka mate katoa nga kahui. <sup>14</sup> Ko

koe, ko toku ariki, e haere i mua i tana pononga: a ka rite taku ata arataki ki te haere a nga mea i  
 15  
 toku aroaro nei, ki te haere hoki a nga tamariki, a kia tae ra ano ahau ki toku ariki, ki Heira. Na  
 ka mea a Ehau, Kati, me waiho e ahau ki a koe etahi o nga tangata i ahau nei. A ka mea ia, Hei aha  
 koa? kia manakohia mai ahau e toku ariki.

16 Na ka hoki a Ehau i taua rangi ano, ka haere ki Heira. 17 A ka turia atu e Hakopa ki Hukota,  
 ka hanga e ia tetahi whare mona, i hanga ano hoki e ia etahi tihokahoka mo ana kararehe: na reira

18  
 i huaina ai te ingoa o taua wahi ko Hukota. A ka tae a Hakopa ki Hareme, ki tetahi pa o Hekeme,  
 ki te whenua o Kanaana, i tona haerenga mai i Paranaarama; a ka noho ki te ritenga atu o te pa.

19 Na ka hokona e ia te wahi whenua i tu ai tona teneti i te ringa o nga tama a Hamora, papa o

20  
 Hekeme, ki nga moni kotahi rau. Na ka whakaturia e ia tetahi aata ki reira, a huaina iho e ia ko  
 Ereerohe Iharaira.

### Chapter 34

1 Na ka haere atu a Rina, tamahine a Rea, i whanau nei i a raua ko Hakopa, kia kite i nga  
 2  
 tamahine o te whenua. A ka kite a Hekeme, tama a Hamora Hiwi, rangatira o taua whenua, i a  
 ia; a ka hopukia ia e ia, a ka takoto ki a ia, ka whakaiti hoki i a ia. 3 Na ka piri tona wairua ki a  
 Rina, tamahine a Hakopa, a ka aroha ia ki te kotiro ra, ka whakamarie hoki i te ngakau o taua kotiro.

4 Na ka korero a Hekeme ki a Hamora, ki tona papa, ka mea, Tikina te kotiro nei hei wahine maku.

5 Na i rongo a Hakopa kua pokea a Rina, tana tamahine, e ia; a i te parae ana tama, i ana kararehe:  
 na ka whakarongo puku a Hakopa, kia tae mai ra ano ratou.

6 Na ka haere a Hamora papa o Hekeme ki a Hakopa ki te korero ki a ia. 7 Na ka haere mai  
 nga tama a Hakopa i te parae, i to ratou rongonga; a ka matangerengere aua tangata, ka tino riri  
 hoki, mo tana mahi wairangi i roto i a Iharaira, i a ia i takoto ra ki te tamahine a Hakopa; he mahi

8  
 hoki kihai i tika. Na ka korero a Hamora ki a ratou, ka mea, Ko Hekeme, ko taku tama, piri tonu  
 9  
 tona wairua ki ta koutou tamahine: homai ia ki a ia, ne? hei wahine. A kia marenatia tatou ki a

10  
 tatou; homai a koutou tamahine ki a matou, a me tango hoki a matou tamahine ma koutou. A  
 me noho koutou ki a matou: a ka takoto atu te whenua i mua i a koutou: e noho i reira, ka hokohoko

11  
 i reira, ka whakatupu rawa ma koutou i reira. A ka mea a Hekeme ki tona papa ratou ko ona  
 tungane, Kia manakohia mai ahau e koutou, a ko ta koutou e ki mai ai ki ahau ka hoatu e ahau.

12

Ahakoia pehea te nui o te tapakuha me te hakari e meatia mai e koutou ki ahau, ka hoatu e ahau ta koutou e ki mai ai ki ahau: otira homai te kotiro hei wahine maku. Na ka whakahoki tinihanga nga tama a Hakopa ki a Hekeme raua ko Hamora, ko tona papa, i mea hoki ratou mo Rina, mo to

13

ratou tuahine, i whakapokea e ia; Ka mea ratou ki a raua, E kore tenei mea e taea e matou te mea, te hoatu i to matou tuahine ki te tangata kahore i kotia; he tawainga hoki tena mo matou:

14

15 Tenei ia te mea e whakaae ai matou ki a koutou: ki te peneitia koutou me matou, ki te kotia o

16

koutou tane katoa; Katahi ka hoatu e matou a matou tamahine ki a koutou, ka tangohia mai hoki a koutou tamahine ma matou, a ka noho matou i roto i a koutou, a ka meinga tatou hei iwi kotahi.

17

Ki te kahore ia koutou e rongu ki ta matou, kia kotia koutou; na ka tango matou i ta matou tamahine, ka haere.

18

Na i pai a ratou kupu ki a Hamora, ki a Hekeme hoki, ki te tama a Hamora. A kihai i whakaroa taua tamaiti ki te mea i taua mea, he matenui hoki nona ki te tamahine a Hakopa: he nui

19

atu ano ia i nga tangata katoa o te whare o tona papa. Na ka haere a Hamora raua ko Hekeme,

20

ko tana tama, ki te kuwaha o to raua pa, a ka korero ki nga tangata o to raua pa, ka mea, He hunga ata noho tenei ki a tatou; no reira tukua ratou kia noho ki tenei whenua, kia hokohoko ki konei; na ko te whenua nei, nana, he nui noa atu mo ratou; me tango mai e tatou a ratou tamahine

21

hei wahine ma tatou, ka hoatu hoki i a tatou tama hine ki a ratou. Kotahi ano ia te mea e whakaae mai ai aua tangata ki a tatou, kia noho ki a tatou, kia waiho hei iwi kotahi, ki te kotia o tatou tane

22

katoa, ki te peratia me ratou kua kotia nei. Ko a ratou kararehe, ko a ratou taonga, me a ratou kirehe katoa, e kore ianei ena e riro mai i a tatou? erangi me whakaae atu tatou ki a ratou, a ka noho

23

ratou ki a tatou. A i whakarongo ki a Hamora raua ko Hekeme, ko tana tama, nga tangata katoa i haere atu i te kuwaha o tona pa; a i kotia katoatia nga tane, nga tangata katoa i haere atu i te kuwaha o tona pa.

24

25 A i te toru o nga ra, i a ratou e mamae ana, na ka tango nga tama tokorua a Hakopa, a Himiona raua ko Riwai, nga tungane o Rina, i tana hoari, i tana hoari, a haere ohorere ana ki te pa, a patua

26

iho e raua nga tane katoa. I patua ano hoki e raua a Hamora raua ko Hekeme, ko tana tama ki te mata o te hoari, a tangohia ana e raua a Rina i roto i te whare o Hekeme, a haere ana. Na ka

27

haere nga tama a Hakopa ki te hunga i patua, a pahuatia ana e ratou te pa, mo to ratou tuahine i whakapokea e ratou. I tangohia e ratou a ratou hipi, a ratou kau, a ratou kaihe, me nga mea hoki

28

i te pa, me nga mea ano hoki i te mara; Me a ratou taonga katoa, a whakaraua ana a ratou tamariki

29

30  
 katoa, me a ratou wahine, i pahuatia ano hoki nga mea katoa i roto i te whare. Na ka mea a Hakopa ki a Himiona raua ko Riwai, Ka raru ahau i a korua, ka meinga kia piro i roto i nga tangata whenua, i roto i nga Kanaani ratou ko nga Perihi: a ka huihui mai ratou ki ahau, ki te hunga tokoiti, a ka patua ahau; a ka ngaro ahau, ahau me toku whare. 31 A ka mea raua, Kia peratia koia e ia to matou tuahine me te wahine kairau?

## Chapter 35

1 Na ka mea te atua ki a Hakopa, Whakatika, haere ake ki Peteere, ki reira noho ai; ka hanga hoki ki reira i tetahi aata ma te Atua i puta mai nei ki a koe, i tou rerenga mai i te aroaro o Ehau, o tou tuakana. 2 Katahi ka mea a Hakopa ki tona whare, ki ona tangata katoa hoki, Whakarerea atu nga atua ke i roto i a koutou, e pure i a koutou, a kakahuria etahi kakahu ke mo koutou: 3 A whakatika tatou, ka haere ake ki Peteere; a ka hanga e ahau ki reira tetahi aata ma te Atua i whakarongo mai nei ki ahau i te ra i pouri ai ahau, i tata ano hoki ki ahau i te huarahi i haere ai ahau. 4 Na ka homai e ratou ki a Hakopa nga atua ke katoa i roto i to ratou ringa, me nga whakakai i o ratou taringa; a ka huna e Hakopa ki raro i te oki i Hekeme. 5 Na ka turia atu e ratou: i runga ano te wehi o te Atua i nga pa i tetahi taha i tetahi taha o ratou, a kihai ratou i whai i nga tama a Hakopa. 6 Heoi ka tae a Hakopa ki Rutu, ki tera hoki i te whenua o Kanaana, ara ki Peteere, a ia me tona nuinga katoa. 7 A ka hanga e ia he aata ki reira, a huaina iho e ia taua wahi ko Erepeteere: no te mea hoki i puta mai te Atua ki a ia i reira, i tona rerenga i te aroaro o tona tuakana. 8 Na ka mate a Tepora kaiwhakangote o Ripeka, a ka tanumia ki raro i Peteere, ki raro i te oki; a ka huaina to reira ingoa ko Aronipakuta. 9 I puta mai ano te Atua ki a Hakopa i tona haerenga mai i Paranaarama, i manaaki hoki a ia. 10 A ka mea te Atua ki a ia, Ko Hakopa tou ingoa: e kore tou ingoa e huaina ko Hakopa a muri ake nei, engari ko Ihairaira hei ingoa mou. Na huaina ana e ia tona ingoa ko Ihairaira. 11 I mea ano te Atua ki a ia, Ko ahau te Atua Kaha Rawa: kia hua koe, kia tini; kia puta he iwi, he huinga iwi ano hoki i roto i a koe, kia puta ano hoki nga kingi i roto i tou hope; 12 Ko te whenua hoki i hoatu e ahau ki a Aperahama raua ko Ihaka, ka hoatu ano e ahau ki a koe, ka hoatu ano hoki e ahau tena whenua ki ou uri i muri i a koe. 13 Na ka mawehe atu te Atua i a ia ki runga, i te wahi i korero ai ia ki a ia. 14 Na ka whakaturia e Hakopa he pou ki te wahi i korero ai ia ki a

ia, he pou kohatu: a ka ringihia e ia he ringihanga ki runga, a i ringihia hoki e ia he hinu ki runga.

15

A huaina iho e Hakopa te ingoa o te wahi i korero ai te Atua ki a ia, ko Peteere.

16

Na ka hapainga atu e ratou i Peteere; a ka whano ka tae ratou ki Eparata: na ka whakawhanau

a Rahera, ka whakauaua hoki tona whanautanga. 17 A, i te mea ka whakauaua tona whanautanga,

ka mea te kaiwhakawhanau ki a ia, Kaua e wehi; ta te mea he tama ano tenei au. 18 Na, i te mea ka haere tona wairua, i mate hoki ia, ka huaina e ia tona ingoa ko Penoni: na tona papa ia i hua ko

Pineamine. 19 Na ka mate a Rahera, ka tanumia ki te ara ki Eparata, koia nei a Peterehema. 20 A ka whakaturia e Hakopa he pou ki runga ki tona rua: ko te pou ia o te rua o Rahera a tae noa ki tenei ra.

21

Na ka turia atu e Iharaira, a ka whakaarahia e ia tona teneti ki tua atu i te pourewa i Erara.

22

A, i a Iharaira e noho ana i taua whenua, na ka haere a Reupena ka takoto ki a Piriha wahine iti

a tona papa: a ka rongoa a Iharaira. Na kotahi tekau ma rua nga tama a Hakopa: 23 Ko nga tama a Rea; ko Reupena, ko te matamua a Hakopa, ko Himiona, ko Riwai, ko Hura, ko Ihakara, ko

Hepurona: 24 Ko nga tama a Rahera; ko Hohepa raua ko Pineamine: 25 Ko nga tama a Piriha,

pononga wahine a Rahera; ko Rana raua ko Napatari: 26 Ko nga tama a Tiripa, pononga wahine a

Rea; ko Kara raua ko Ahera: ko nga tama enei a Hakopa i whanau nei mana ki Paranaarama. 27 Na kua tae a Hakopa ki a Ihaka, ki tona papa, ki Mamere, ki te pa o Arapa, ara ki Heperona, ki te wahi

hoki i noho ai a Aperahama raua ko Ihaka. 28 A kotahi rau e waru tekau tau nga ra o Ihaka. 29 Na ka hemo a Ihaka, ka mate, ka kohia atu ki tona iwi, he koroheke, kua maha hoki ona ra: a na ana tama, na Ehau raua ko Hakopa ia i tanu.

## Chapter 36

1 Na ko nga whakatupuranga enei o Ehau, ara o Eroma. 2 I tangohia ana wahine e Ehau i roto i nga tamahine o Kanaana; a Araha, tamahine a Erona Hiti, a Ahoripama, tamahine a Anaha,

tamahine a Tipeona Hiwi; 3 Ratou ko Pahemata, tamahine a Ihimaera, tuahine o Neparoto. 4 A

whanau ake ta Araha raua ko Ehau ko Eripata; whanau ake ta Pahemata ko Reuere; 5 A whanau ake a Ahoripama, ko Ieuhu, ko Iaarama, ko Koraha: ko nga tama enei e Ehau i whanau nei mana

ki te whenua o Kanaana. 6 Na ka tangohia e Ehau ana wahine, ana tama, ana tamahine, nga tangata katoa o tona whare, ana kararehe, ana kirehe katoa, ana taonga katoa i whiwhi ai ia ki te whenua

o Kanaana, a haere atu ana ki tetahi whenua ke atu i tona teina i a Hakopa. <sup>7</sup> He nui rawa hoki no a raua taonga, te noho tahi ai raua; kihai hoki te whenua i noho manene nei raua i nui hei nohoanga mo raua, i a raua kararehe hoki. <sup>8</sup> Na ka noho a Ehau ki Maunga Heira: ko Eroma a Ehau.

<sup>9</sup> A ko nga whakatupuranga enei a Ehau papa o nga Eromi i Maunga Heira: <sup>10</sup> Ko nga ingoa enei o nga tama a Ehau; ko Eripata tama a Araha wahine a Ehau, ko Reuere tama a Pahemata wahine a Ehau. <sup>11</sup> A ko nga tama a Eripata, ko Temana, ko Omara, ko Tepo, ko Katama, ko Kenaha. <sup>12</sup> Na ko Timina he wahine iti na Eripata tama a Ehau; a whanau ake ta raua ko Eripata, ko Amareke: ko nga tama enei a Araha wahine a Ehau. <sup>13</sup> Ko nga tama hoki enei a Reuere; ko Nahata, ko Heraha, ko Hamaha, ko Miha; ko nga tama enei a Pahemata wahine a Ehau. <sup>14</sup> Na ko nga tama enei a Ahoripama tamahine a Anaha, tamahine a Tipeona, a te wahine a Ehau: a whanau ake a raua ko Ehau ko Ieuhu, ko Iaarama, ko Koraha. <sup>15</sup> Ko enei o nga tama a Ehau i waiho hei ariki: ko nga tama a Eripata matamua a Ehau; ko Temana ariki, ko Omara ariki, ko Tepo ariki, ko Kenaha ariki, <sup>16</sup> ko Koraha ariki, ko Katama ariki, ko Amareke ariki: na Eripata enei ariki i te whenua o Eroma; ko nga tama enei a Araha. <sup>17</sup> A ko nga tama enei a Reuere tama a Ehau; ko Nahata ariki, ko Heraha ariki, ko Hamaha ariki, ko Miha ariki: na Reuere enei ariki i te whenua o Eroma; ko nga tama enei a Pahemata wahine a Ehau. <sup>18</sup> Ko nga tama hoki enei a Ahoripama, wahine a Ehau; ko Ieuhu ariki, ko Iaarama ariki, ko Koraha ariki: na Ahoripama enei ariki, na te tamahine a Anaha, na te wahine a Ehau. <sup>19</sup> Ko nga tama enei a Ehau, ara a Eroma, a ko enei ano o ratou ariki.

<sup>20</sup> Ko nga tama enei a Heira Hori, ko nga tangata whenua hoki; ko Rotana, ko Hopara, ko Tipeona, ko Anaha, <sup>21</sup> ko Rihona, ko Etere, ko Rihana: ko nga ariki enei o nga Hori, ko nga tama hoki a Heira i te whenua o Eroma. <sup>22</sup> Ko nga tama a Rotana, ko Hori, ko Hemama; a ko Timina te tuahine o Rotana. <sup>23</sup> Ko nga tama hoki enei a Hopara; ko Arawana, ko Manahata, ko Epara, ko Hepo, ko Onama. <sup>24</sup> Ko nga tama hoki enei a Tipeona; ko Aiaha raua ko Anaha: na tenei Anaha i kite nga puia i te koraha, i a ia e whangai ana i nga kaihe a Tipeona, a tona papa. <sup>25</sup> Ko nga tama hoki enei a Anaha; ko Rihona, ko Ahoripama tamahine a Anaha. <sup>26</sup> A ko nga tama enei a Eihona; ko Hemerana, ko Ehepana, ko Itirana, ko Kerana. <sup>27</sup> Ko nga tama enei a Etere; ko Pirihana, ko Taawana, ko Akana. <sup>28</sup> Ko nga tama enei a Rihana; ko Uhu raua ko Arana. <sup>29</sup> No nga Hori enei

ariki; ko Rotana ariki, ko Hopara ariki, ko Tipeona ariki, ko Anaha ariki, <sup>30</sup> Ko Rihona ariki, ko Etere ariki, ko Rihana ariki: no nga Hori enei ariki, no roto i o ratou ariki i te whenua o Heira.

<sup>31</sup> Ko nga kingi enei i kingi i te whenua o Eroma, i te mea kahore ano he kingi o nga tama a Iharaira. <sup>32</sup> A he kingi no Eroma a Pera tama a Peoro: a ko Rinihapa te ingoa o tona pa. <sup>33</sup> Na ka mate a Pera, a ko Iopapa tama a Heraha o Potorā te kingi i muri i a ia. <sup>34</sup> Na ka mate a Iopapa, a ko Huhama o te whenua o Temani te kingi i muri i a ia. <sup>35</sup> Na ka mate a Huhama, a ko Harara tama a Perara, a te tangata nana nei i patu a Miriana ki te parae o Moapa, te kingi i muri i a ia: a ko Awiti te ingoa o tona pa. <sup>36</sup> Na ka mate a Harara, a ko Hamara o Mahareka te kingi i muri i a ia. <sup>37</sup> Na ka mate a Hamara, a ko Haora o Rehopoto i te taha o te awa te kingi i muri i a ia. <sup>38</sup> Na ka mate a Haora, a ko Paarahanana, ko te tama a Akaporo, te kingi i muri i a ia. <sup>39</sup> Na ka mate a Paarahanana tama a Akaporo, a ko Harara te kingi i muri i a ia: a ko Pau te ingoa o tona pa; ko Mehetapere hoki te ingoa o tana wahine, he tamahine ia na Matarere tamahine a Metahapa. <sup>40</sup> Na ko nga ingoa enei o nga ariki, ara o nga whanau a Ehau, o tona hapu, o tona hapu, o tona kainga, o tona kainga, tona ingoa, tona ingoa; ko Timina ariki, ko Arawa ariki, ko Ietete ariki, <sup>41</sup> Ko Ahoripama ariki, ko Eraha ariki, ko Pinona ariki, <sup>42</sup> Ko Kenaha ariki, ko Temana ariki, ko Mipitara ariki, <sup>43</sup> Ko Makatiere ariki, ko Irama ariki: no Eroma enei ariki, me o ratou nohoanga i te whenua i nohoia e ratou: ko Ehau ia ko te papa o nga Eromi.

## Chapter 37

<sup>1</sup> A i noho a Hakopa i te whenua i noho manene ai tona papa, i te whenua o Kanaana. <sup>2</sup> Ko nga whakatupuranga enei o Hakopa. Kotahi tekau ma whitu nga tau o Hohepa, a i te whangai hipi ia, ratou ko ona tuakana; he taitama hoki ia i te taha o nga tama a Piriha, o nga tama a Tiripa, a nga wahine a tona papa: a ka kawea e Hohepa te korero kino mo ratou ki to ratou papa. <sup>3</sup> Na i arohaina nuitia a Hohepa e Iharaira i ana tama katoa, no te mea ko te tama ia o tona koroheketanga: a ka hanga e ia tetahi koti purepure mona. <sup>4</sup> A ka kite ona tuakana e arohatia nuitia ana ia e to ratou papa i ona tuakana katoa, na ka kino ratou ki a ia, kihai ano hoki i ahei te ata korero ki a ia.

<sup>5</sup> Na ka moe a Hohepa i tetahi moe, a ka korerotia e ia ki ona tuakana; ka nui haere ano to ratou kino ki a ia. <sup>6</sup> A i mea ia ki a ratou, Tena, whakarongo ki tenei moe i moe nei ahau: <sup>7</sup> Nana, i te paihere witi tatou i waenga mara, na ka whakatika ake taku paihere, a ka tu; ko te tino karapotinga

8  
mai o a koutou paihere, kei te piko iho ki taku paihere. Na ka mea ona tuakana ki a ia, Koia ranei ko koe hei kingi mo matou? hei rangatira ano ranei koe mo matou? Na ka nui haere ano to ratou

9  
kino ki a ia mo ana moe, mo ana kupu. A i moe ano ia i tetahi atu moe, a ka korerotia e ia ki ona tuakana, ka mea ia, Nana, tenei ano hoki tetahi moe i moe ai ahau; na, ko te ra me te marama, me

10  
nga whetu kotahi tekau ma tahi, e piko mai ana ki ahau. A ka korerotia e ia ki tona papa ratou ko ona tuakana: na ka whakatupehupehu tona papa ki a ia, ka mea ki a ia, He aha tenei moe i moe nei koe? Tera ranei matou, ko tou whaea, ko ou tuakana, e haere mai ki te piko ki a koe, ki te

11  
whenua? Na ka hae ona tuakana ki a ia; ko tona papa ia i mahara ki te kupu.

12  
Na ka haere ona tuakana ki te whangai i nga hipi a to ratou papa i Hekeme. A ka mea a 13  
Iharaira ki a Hohepa, Kahore ianei ou tuakana i te whangai hipi i Hekeme? haere mai, me tonu koe

14  
e ahau ki a ratou. Ka mea ia, Tenei ahau. Na ka mea ia ki a ia, Tena, haere, tirohia, kei te ora ranei ou tuakana, kei te ora ano ranei nga hipi; ka whakahoki mai ia i te korero ki ahau. Na ka tonoa

15  
atu ia e ia i te raora o Heperona, a ka haere ia ki Hekeme. A ka tutaki tetahi tangata ki a ia, e

16  
pohehe ana hoki ia i te parae, a ka ui taua tangata ki a ia, He aha tau e rapu na? Na ka mea ia, E rapu ana ahau i oku tuakana: tena koa, whakaaturia mai ki ahau, kei hea ratou e whangai ana i

17  
te kahui. Ka mea taua tangata, Kua riro atu ratou i konei; i rongu hoki ahau i a ratou e ki ana, Kia haere tatou ki Rotana. Na ka haere a Hohepa ki te whai i ona tuakana, a ka kitea ratou e ia ki

18  
Rotana. Na ka kite mai ratou i a ia i tawhiti, a, i te mea kahore ano ia i tata noa ki a ratou, ka

19  
whakatakoto whakaaro ratou mona kia whakamatea. A ka mea ratou tetahi ki tetahi, Nana, ko

20  
te moemoea tenei te haere mai nai. Tena, tatou ka haere, ka patu i a ia, ka maka hoki i a ia ki tetahi o nga poka, a ka mea tatou, Na tetahi mohoa nanakia ia i kai: a ka kite tatou i te tukunga

21  
iho o ana moe. Na i rongu a Reupena, a ka whakaorangia ia e ia i roto i o ratou ringa; ka mea

22  
ia, Kaua ia e patua e tatou. Ka mea ano a Reupena ki a ratou, Kaua e whakahekeka he toto; maka atu ia ki roto ki tenei poka i te koraha nei, kaua hoki tetahi ringa e pa ki a ia; he mea hoki kia whakaora ai ia i a ia i roto i o ratou ringa, kia whakahoki ai ia i a ia ki tona papa.

23  
A, i te taenga o Hohepa ki ona tuakana, ka huia e ratou te koti o Hohepa, te koti purepure e

24  
mau ana i a ia; A mauria ana ia, maka ana e ratou ki te poka: he tuwhera kau ano te poka, kahore

25  
he wai o roto. Na ka noho ratou ki te kai taro: a ka anga ake o ratou kanohi, na, ko tetahi tira Ihimaeri e haere mai ana i Kireara me a ratou kamera, he waha i nga mea kakara, i te pama, i te

26  
maira, e haere ana ki te kawhe ki raro, ki Ihipa. Na ka mea a Hura ki ona tuakana ratou ko ona



teina, He aha te pai o ta tatou patu i to tatou teina, o te huna hoki i ona toto? <sup>27</sup> Tatou ka haere, ka hoko i a ia ki nga Ihimaeri, a kaua o tatou ringa e pa ki a ia; ko to tatou teina nei hoki ia, ko to tatou kikokiko. A i whakaae ona tuakana ratou ko ona teina. <sup>28</sup> Na ka haere mai nga Miriani, he hunga hokohoko: ka hutia ake e ratou a Hohepa i roto i te poka, a ka hokona atu a Hohepa e ratou ki nga Ihimaeri, ki nga hiriwa e rua tekau: a ka kawea a Hohepa e ratou ki Ihipa. <sup>29</sup> A ka hoki mai a Reupena ki te poka; na, kohore a Hohepa i roto i te poka; a ka haea e ia ona kakahu. <sup>30</sup> Na ka hoki ia ki ona teina, ka mea, Kahore nei te tamaiti; a ko ahau, me haere ahau ki hea?

<sup>31</sup> Na ka tango ratou i te koti o Hohepa, a ka patua he koati toa, ka tukua hoki te koti ki te toto;

<sup>32</sup> Na ka hoatu te koti purepure kia kawea ki to ratou papa; ka mea ratou, I kitea tenei e matou; tena, tirohia ko te koti ranei o tau tama, ehara ranei? <sup>33</sup> A ka mohiotia e ia, a ka mea ia, Ko te koti tenei o taku tama; kua kainga ia e te kirehe nanakia; kua tino haea rawatia a Hohepa. <sup>34</sup> Na ka haea e Hakopa ona kakahu, ka kakahuria e ia tona hope ki te kakahu taratara, a he maha nga ra i uhungatia ai e ia tana tama. <sup>35</sup> Ka whakatika hoki ana tama katoa me ana tamahine katoa ki te whakamarie i a ia; a kihai ia i pai kia whakamarietia; ka mea ia, Engari ka heke tangi atu ahau ki taku tama ki te po. Na ka uhungatia ia e tona papa. <sup>36</sup> Na ka hokona atu ia e nga Miriani ki Ihipa ki a Potiwhara, ki tetahi o nga tangata nui a Parao, ki te rangatira o nga kaitiaki.

### Chapter 38

<sup>1</sup> I taua wa ka maunu atu a Hura i roto i ona tuakana, a peka ana ki tetahi Aturami, ko Hira tona ingoa. <sup>2</sup> A kitea ana e Hura i reira te tamahine a tetahi Kanaani, ko Huaha tona ingoa: na ka tango ia i a ia, a haere ana ki roto, ki a ia. <sup>3</sup> Na ka hapu ia, a ka whanau he tama; a huaina iho tona ingoa ko Ere: <sup>4</sup> Na ka hapu ano ia, a ka whanau he tama; a huaina iho tona ingoa ko Onana. <sup>5</sup> A ka hapu ano ia, a ka whanau he tama; a huaina iho tona ingoa ko Heraha: i Ketipi hoki te tane i tona whanautanga. <sup>6</sup> Na ka tangohia e Hura he wahine ma Ere, ma tana matamua, ko tona ingoa ko Tamara. <sup>7</sup> He tangata kino a Ere matamua a Hura ki ta Ihowa titiro; a whakamatea ana ia e Ihowa. <sup>8</sup> Na ka mea a Hura ki a Onana, Haere ki roto, ki te wahine a tou tuakana, hei whakakapi mo te whawharua, kia whai uri ai tou tuakana. <sup>9</sup> I mohio ano a Onana e kore e waiho te uri mona; a, i

tona haerenga ki te wahine a tona tuakana, na ka tukua e ia kia heke atu ki te whenua, kei hoatu e

10  
ia he uri ki tona tuakana. He kino hoki tana mahi ki ta Ihowa titiro: na ka whakamatea hoki ia.

11  
Katahi ka mea a Hura ki a Tamara, ki tana hunaonga, Me noho pouaru koe ki te whare o tou papa, kia kaumatua ra ano a Heraha, taku tama; i mea hoki ia, Kei mate ano hoki tenei, kei pera me ona tuakana. Na ka haere a Tamara, a noho ana i te whare o tona papa.

12  
A, ka maha nga ra, ka mate te tamahine a Huaha, te wahine a Hura; a ka marie a Hura, a ka  
13  
haere raua ko tona hoa ko Hira Aturami ki runga ki Timinata, ki ana kaikutikuti hipi. A ka

korerotia ki a Tamara, ka meatia, Ko tou hungawai tenei te haere ake nei ki Timinata, ki te kutikuti

14  
i ana hipi. Na ka whakarerea atu e ia ona kakahu pouaru, ka hipoki i a ia ki tona arai, roropi tonu ki a ia, a ka noho i te tomokanga ki Enaima, i te huarahi ki Timinata; i kite hoki ia kua kaumatua

15  
a Heraha, a kahore ano ia i hoatu hei wahine mana. Na, ka kite a Hura i a ia, hua noa ia he wahine

16  
kairau; no te mea i hipokina tona mata. Na ka peka ia ki te ara ki a ia, ka mea, Tukua atu ahau, ne? kia haere atu ki a koe; kihai hoki ia i mohio ko tana hunaonga ia. A ka mea ia, He aha tau e

17  
homai ai ki ahau, ki te haere mai koe ki ahau? A ka mea ia, Ka tukua atu e ahau tetahi kuaokoati o te kahui. A ka mea ia, Ka homai ranei e koe tetahi taunaha ki ahau, kia tukua mai ra ano

18  
taua mea e koe? A ka mea ia, He aha te taunaha e hoatu e ahau ki a koe? Ka mea ia, Ko tou hiri, me au tau, me tau tokotoko i tou ringa. Na ka hoatu e ia ki a ia, a ka haere atu ia ki a ia, a ka hapu

19  
ia i a ia. Na ka whakatika ia, a haere ana, whakarerea ana e ia tona arai, a kakahuria iho ona

20  
kakahu pouaru. Na ka hoatu te kuaokoati e Hura kia kawea e tona hoa e te Aturami, ki te tiki i

21  
te taunaha i te ringa o te wahine; a kihai ia i kitea. A ka ui ia ki nga tangata o taua wahi, ka mea, Kei hea te wahine kairau i Enaima nei i te taha o te ara? A ka mea ratou, Kahore he wahine kairau

22  
i konei. Na ka hoki ia ki a Hura, ka mea, Kahore ia i kitea e ahau; e mea ana hoki nga tangata

23  
o tera wahi, kahore he wahine kairau i reira. Na ka mea a Hura, Tukua kia tangohia e ia, kei tawaia taua: titiro hoki, kua tukua atu nei e ahau te kuaokoati nei, a kihai ia i kitea e koe.

24  
A ka toru nga marama, na ka korerotia ki a Hura, ka meatia, Kua kairau a Tamara, tau hunaonga; kua hapu ano hoki ia i ona kairautanga. A ka mea a Hura, Kawea ki waho, kia tahuna.

25  
A, ka kawea ia ki waho, ka tono tangata ia ki tona hungawai, ka mea, Na te tangata nana enei mea toku hapu: i mea ano ia, Tena, tirohia, na wai enei, te hiri nei, me nga tau, me te tokotoko.

26  
Na ka mohiotia e Hura, a ka mea ia, Nui atu tona tika i toku; kihai hoki ia i hoatu e ahau ki a

27  
Heraha, ki taku tama. A kihai ia i mohio ki a ia i muri iho. A ka taka ki te wa e whanau ai ia,

28  
na, he mahanga kei roto i tona kopu. A, i tona whanautanga, na ka torona te ringa o tetahi: na ka mau te kaiwhakawhanau ki te miro whero, a herea ana ki tona ringa, ka mea, Ko tenei i puta  
29  
mai i mua. A, i tana whakahokinga atu i tona ringa, na ka puta mai tona tuakana; a ka mea ia,  
30  
Ka tae tou pakaru mai! nau te pakaru mai: koia i huaina ai tona ingoa ko Parete. A muri iho ka puta tona teina, i herea nei tona ringa ki te miro whero: a ka huaina tona ingoa ko Teraha.

### Chapter 39

1  
A i kawea iho a Hohepa ki Ihipa; na ka hokona ia e Potiwhara, he tangata nui na Parao, he rangatira no nga kaitiaki, he Ihipiana, i roto i nga ringa o nga Ihimaeri, nana nei ia i kawea ki reira.  
2  
Na i a Hohepa a Ihowa, a he tangata whai rawa ia; i noho ano ia i roto i te whare o tona ariki, o  
3  
te Ihipiana. A i kite tona ariki kei a ia a Ihowa, pono tonu hoki i a Ihowa nga mahi katoa a tona  
4  
ringa. Na ka manakohia a Hohepa e ia, ka mahi ia ki a ia: a ka waiho ia hei kaitirotiro mo tona  
5  
whare, a ka homai e ia ana mea katoa ki tona ringa. A, i a ia ka waiho nei hei kaitirotiro mo tona  
whare, mo ana mea katoa, na ka manaakitia e Ihowa te whare o te Ihipiana he whakaaro ki a Hohepa;  
6  
i runga ano i ana mea katoa te manaaki a Ihowa, i te whare, i te mara. I waiho hoki e ia i te ringa  
a Hohepa ana mea katoa; kihai hoki i mohiotia e ia tetahi o ana mea, heoi ano ko te taro i kai ai ia.  
A he tangata ataahua a Hohepa, he pai hoki ia ki te titiro atu.  
7  
A, i muri i enei mea, ka anga nga kanohi o te wahine a tona ariki ki a Hohepa; a ka mea ia,  
8  
Takoto taua. A ka whakakahore ia, ka mea hoki ki te wahine a tona ariki, Na, e kore toku ariki e  
mohio ko te aha kei ahau i roto i te whare, kua homai nei hoki e ia ana mea katoa ki toku ringa;  
9  
Kahore tetahi i roto i tenei whare e nui ake i ahau; kahore ano hoki i kaiponuhia e ia tetahi mea  
ki ahau, ko koe anake, no te mea ko tana wahine koe: na, me pehea e mahi ai ahau i tenei kino nui,  
10  
e hara ai ki te Atua? Heoi korero noa ia ki a Hohepa i tenei ra, i tenei ra, a kihai ia rongu ki a  
11  
ia, kia takoto tahi raua, kia noho tahi raua. Na i taua wa ka haere a Hohepa ki te whare ki te mahi  
12  
i tana mahi; a kahore tetahi o nga tangata o te whare i reira i roto i te whare. Na ka hopukia ia  
e ia, ara tona kakahu, ka mea, Takoto taua: na ka whakarerea e ia tona kakahu ki tona ringa, a rere  
ana, puta ana ki waho.

<sup>13</sup> A, no tona kitenga kua whakarerea e ia tona kakahu i roto i tona ringa, a kua rere ki waho,  
<sup>14</sup> Na ka karanga ia ki nga tangata o tona whare, ka korero ki a ratou, ka mea, Titiro, kua kawea  
 mai e ia tetahi Hiperu hei hangarau i a tatou; i haere mai ia ki ahau kia takoto maua, a he rahi toku  
 reo ki te hamama: <sup>15</sup> A, ka rongu ia he rahi toku reo ki te hamama, na ka whakarerea e ia tona  
 kakahu ki ahau, a rere ana, puta ana ki waho. <sup>16</sup> Na ka waiho e ia tona kakahu ki tona taha, kia  
 hoki mai ra ano tona ariki ki tona whare. <sup>17</sup> A ka korero ia ki a ia, ko aua kupu ano, ka mea, I haere  
 mai ki ahau taua pononga Hiperu, i kawea mai nei e koe ki a matou, ki te hangarau i ahau: <sup>18</sup> A,  
 ka rahi toku reo ki te hamama, na ka whakarerea e ia tona kakahu ki ahau, a rere ana ki waho.  
<sup>19</sup> A, ka rongu tona ariki i nga kupu a tana wahine i korero ai ia ki a ia, i mea ai, Ko nga mea  
 enei i mea ai tau pononga ki ahau; na ka mura tona riri. <sup>20</sup> A ka mau te ariki o Hohepa ki a ia, a  
 maka ana ia ki te whare herehere, ki te wahi i herea ai nga herehere a te kingi: a noho ana ia i reira,  
 i te whare herehere. <sup>21</sup> Otiia i a Hohepa a Ihowa, ka puta ano tona aroha ki a ia, a ka hoatu ki a ia  
 kia manakohia ia e te rangatira o te whare herehere. <sup>22</sup> A i tukua e te rangatira o te whare herehere  
 ki te ringaringa o Hohepa nga herehere katoa i roto i te whare herehere: ko ia ano te kaimahi o nga  
 mea katoa i meatia e ratou i reira. <sup>23</sup> Kihai te rangatira o te whare herehere i titiro ki tetahi o nga  
 mea i tona ringa; no te mea i a ia a Ihowa, i mea ano a Ihowa kia pono tana i mea ai.

## Chapter 40

<sup>1</sup> Na, i muri i enei mea ka hara te kaiwhakainu a te kingi o Ihipa, raua ko tana kaihanganga taro,  
 ki to raua ariki, ki te kingi o Ihipa. <sup>2</sup> A ka riri a Parao ki ana kaitohutohu tokorua, ki te tino  
 kaiwhakainu raua ko te tino kaihanganga taro. <sup>3</sup> Na ka homai raua e ia kia puritia ki te whare o te  
 rangatira o nga kaitiaki, ki te whare herehere, ki te wahi i herea ai a Hohepa. <sup>4</sup> A ka meinga a  
 Hohepa e te rangatira o nga kaitiaki hei kaititiro mo raua, a ka mahi ia ki a raua; a ka puritia raua  
 i etahi ra.  
<sup>5</sup> Na ka moe raua i a raua moe, kotahi ano te po i moemoea ai raua, tetahi, tetahi, me te tikanga  
 ano o tana moe, te kaiwhakainu rau ko te kaihanganga taro a te kingi o Ihipa, i herea nei raua i roto i  
 te whare herehere. <sup>6</sup> A, i te taenga o hohepa ki a raua i te ata, ka titiro ia ki a raua, na e pouri ana

<sup>7</sup> raua. Na ka ui ia ki aua kaitohutohu a Parao, i puritia tahitia nei me ia i te whare o tona ariki, ka  
<sup>8</sup> mea, He aha i whakapoururu ai o korua kanohi inaianei? A ka mea raua ki a ia, I moe maua i  
tetahi moe, a kahore he kaiwhakaatu i tona tikanga. Na ka mea a Hohepa ki a raua, Ehara ianei te  
<sup>9</sup> Atua i te kaiwhakaatu? tena, korerotia mai ki ahau. Na ka korerotia e te tino kaiwhakainu tana  
<sup>10</sup> moe ki a Hohepa, a ka mea ki a ia, Moe iho ahau, na, ko tetahi waina i toku aroaro: Na e toru  
nga peka o te waina; a e ahua pihi ana, a ka kohera ona puawai; a e hua ana nga tautau, maoa tonu  
<sup>11</sup> nga karepe: Na ko te kapu a Parao i toku ringa: a ka mau ahau ki nga karepe, a tauia ana e ahau  
<sup>12</sup> ki te kapu a Parao, a hoatu ana e ahau te kapu ki te ringa o Parao. Na ko te meatanga a Hohepa  
<sup>13</sup> ki a ia, Ko tona tikanga tenei: ko aua peka e toru, e toru nga ra: Kia toru ake ra ka whakaara ake  
ai a Parao i tou matenga, ka whakahoki ano i a koe ki tau mahi, a ka hoatu ano e koe te kapu a  
<sup>14</sup> Parao ki tona ringa, ka pera hoki me mua, i te mea ko koe tana kairiringi waina. Otira kia mahara  
ki ahau ina pono te pai ki a koe, kia puta ano tou aroha ki ahau, korerotia hoki ahau ki a Parao, kia  
<sup>15</sup> puta atu ai ahau i tenei whare: I tahaetia putia mai hoki ahau i te whenua o nga Hiperu; a kahore  
<sup>16</sup> aku mahi i konei i maka ai ahau e ratou ki tenei whare herehere. A, ka kite te tino kaihanga taro  
he pai te tikanga, ka mea ia ki a Hohepa, Moe iho hoki ahau, na, e toru nga kete taro ma i runga i  
<sup>17</sup> toku upoko: A i to runga kete ko nga tu ahua kai katoa ma Parao na ko nga manu e kai ana i aua  
<sup>18</sup> mea i roto i te kete i runga i toku upoko. Na ka whakahoki a Hohepa, ka mea, Ko tona tikanga  
<sup>19</sup> tenei: Ko aua kete e toru, e toru nga ra: Kia toru ake nga ra, ka tangohia ake e Parao tou upoko  
i runga i a koe, a ka whakairihia koe ki runga ki te rakau; a ka kainga e nga manu ou kikokiko e  
<sup>20</sup> piri na ki a koe.  
<sup>20</sup> A, i te toru o nga ra, i te ra whanau o Parao, na ka tukua e ia he hakari ma ana tangata katoa:  
a whakaarahia ake ana e ia te matenga o te tino kaiwhakainu, me te matenga o te tino kaihanga  
<sup>21</sup> taro, i waenganui i ana pononga. A whakahokia ana e ia te tino kaiwhakainu ki tana mahi  
<sup>22</sup> whakainu, hei hoatu i te kapu ki te ringa o Parao: Ko te tino kaihanga taro ia i whakairihia ake  
<sup>23</sup> e ia: i peratia me ta Hohepa i whakaatu ai ki a raua. Otiia kihai te tino kaiwhakainu i mahara ki  
a Hohepa; i wareware hoki ki a ia.

## Chapter 41

<sup>1</sup> A, ka taka nga tau e rua, ka moe a Parao: na, i te taha ia o te awa e tu ana. <sup>2</sup> Na, ko te putanga ake o nga kau e whitu i roto i te awa, he ahua pai, e whai kiko ana; a ka kai ratou i roto i nga wiwi.

<sup>3</sup> Na, ko te putanga ake ano o etahi kau e whitu i muri i a ratou i roto i te awa, he ahua kino, he kikokore: a tu ana ratou i te taha o era kau i te pareparenga o te awa. <sup>4</sup> Na ka kainga e nga kau ahua kino, kikokore, nga kau ahua pai e whitu, nga mea momona. A ka ara ake a Parao. <sup>5</sup> A ka parangia ano ia, na, ko te rua o ana moe: na, ko te putanga ake o nga puku witi e whitu, kotahi ano hoki te kakau, he mea whai kiko, he pai. <sup>6</sup> Na, ko nga puku e whitu e tupu ake ana i muri i era, he mea kikokore, he mea ngingio i te marangai. <sup>7</sup> A horomia ake nga puku whai kiko e whitu, nga mea whai kai, e nga puku kikokore e whitu. Ko te aranga ake o Parao, na, he moe! <sup>8</sup> A, i te ata, na, ka pororaru tona wairua; a ka tono tangata ia ki te karanga i nga tohunga maori katoa o Ihipa, me nga mea mohio katoa o reira: a korerotia atu ana tana moe e Parao ki a ratou: otiia kihai i taea e tetahi te whakaatu i te tikanga o aua moe ki a Parao.

<sup>9</sup> Na ka korero te tino kaiwhakainu ki a Parao, ka mea, Katahi ahau ka mahara ki oku he. <sup>10</sup> I riri mai a Parao ki ana pononga, a i tuku i ahau kia puritia ki roto ki te whare o te rangatira o nga kaitiaki, ahau me te tino kaihanga taro. <sup>11</sup> A ka moe maua i tetahi moe i te po kotahi, ahau, a ia hoki; i moe maua, ahau, a ia, me te tikanga ano o a maua moe. <sup>12</sup> Na i reira i a maua tetahi taitama Hiperu, he pononga na te rangatira o nga kaitiaki; a ka korerotia e maua ki a ia, a whakaaturia mai ana e ia te tikanga o a maua moe ki a maua; rite tonu tana whakaaturanga ki ta tera moe, ki taku.

<sup>13</sup> A tika tonu tana i whakaatu ai ki a maua: ko ahau i whakahokia e ia ki taku mahi, ko tera i taronatia. <sup>14</sup> Na ka tono tangata a Parao, hei karanga i a Hohepa, a ka hohoro ratou te mau mai i a ia i roto i te whare herehere: na ka heu ia i a ia, ka tango i etahi kakahu ke mona, a haere ana ki a Parao. <sup>15</sup> A ka mea a Parao ki a Hohepa, I moe ahau i tetahi moe, a kahore he tangata hei whakaatu i tona tikanga: na kua tae mai tou rongo ki ahau, e korerotia ana ki te rongo koe i te moe ka taea e koe te whakaatu tona tikanga. <sup>16</sup> Na ka whakahoki a Hohepa ki a Parao, ka mea, Ehara i ahau: ma te Atua e whakahoki te kupu pai ki a Parao.

<sup>17</sup> Na ka mea a Parao ki a Hohepa, I ahau e moe ana, na, e tu ana ahau i te pareparenga o te awa: <sup>18</sup> Na, ka puta ake i te awa nga kau e whitu, he mea whai kiko, he ahua pai; a ka kai ratou i roto i nga wiwi: <sup>19</sup> Na, ko te putanga ake o etahi atu kau e whitu i muri i era, he hiroki, he ahua kino noa iho, he kikokore, kahore ahau i kite i to ratou rite te kino i te whenua katoa o Ihipa; <sup>20</sup> Na ka kainga nga kau e whitu o mua, nga mea momona, e nga kau kiroki, e nga mea kino: <sup>21</sup> A, i to

ratou toremitanga ki roto i a ratou, e kore e mohiotia kua toremi ratou ki roto i a ratou; he mau tonu  
 hoki to ratou ahua kino, he pera me to te timatanga. Na ka ara ahau. <sup>22</sup> Na i kite ano ahau i ahau e  
 moe ana, ko nga puku witi e whitu e tupu ake ana i te kakau kotahi, he mea whai kai, he mea pai:  
<sup>23</sup> Na ko nga puku e whitu, he mea taramore, he mea kikokore, i ngingio nei i te marangai, e tupu  
 ake ana i muri i aua puku; <sup>24</sup> A horomia ake nga puku papai e whitu e nga puku kikokore: na ka  
 korerotia e ahau ki nga tohunga maori; a kahore tetahi hei whakaatu ki ahau. <sup>25</sup> Na ko te meatanga  
 a Hohepa ki a Parao, Ko te moe a Parao kotahi tonu: e whakaaturia ana e te Atua ki a Parao nga  
 mea e meatia ana e ia. <sup>26</sup> Ko nga kau pai e whitu, e whitu nga tau; ko nga puku pai ano e whitu, e  
 whitu nga tau: kotahi ano te moe. <sup>27</sup> A ko nga kau hiroki e whitu, ko nga mea kino i puta ake ra i  
 muri i a ratou, e whitu ena nga tau; a ko nga puku witi e whitu, ko nga mea i ngingio i te marangai,  
 e whitu ena nga tau matekai. <sup>28</sup> Ko te mea tena i korerotia e ahau ki a Parao: ko ta te Atua e mea  
 ai e whakakitea ana e ia ki a Parao. <sup>29</sup> Nana, e whitu nga tau e haere mai nei e nui ai te hua o te  
 whenua katoa o Ihipa: <sup>30</sup> A e whitu nga tau matekai e ara ake i muri i era; a ka wareware katoa te  
 hua i te whenua o Ihipa; a ka ngaro te whenua i te matekai; <sup>31</sup> A e kore taua hua e mohiotia e te  
 whenua, i taua matekai hoki o muri; no te mea he tino nanakia. <sup>32</sup> A, i tuaruatia ai te moe a Parao,  
 he mea pumau na te Atua, ka hohoro ano te meatia e te Atua.  
<sup>33</sup> Na reira, me titiro e Parao tetahi tangata mihio, whai whakaaro, kia tukua e ia nga tikanga  
 o te whenua o Ihipa ki a ia. <sup>34</sup> Kia meatia tenei e Parao, kia whakaritea hoki e ia etahi kaitirotiro  
 mo te whenua, a kia tangohia e ia te rima o nga wahi o te whenua o Ihipa i nga tau hua e whitu.  
<sup>35</sup> Kia kohia hoki nga kai katoa o enei tau pai e haere ake nei, kia amitia mai hoki he witi ki raro i  
 te ringa o Parao, kia tohungia ano hoki he kai i roto i nga pa. <sup>36</sup> Na ka pae taua kai ma te whenua  
 mo nga tau matekai e whitu e puta mai ana ki te whenua o Ihipa; e kore ai e ngaro te whenua i te  
 matekai. <sup>37</sup> A he pai taua mea ki te titiro a Parao ki te titiro hoki a ana tangata katoa. <sup>38</sup> Na ka mea  
 a Parao ki ana tangata, E kitea ranei e tatou he penei, he tangata kei a ia nei te wairua o te Atua?  
<sup>39</sup> A ka mea a Parao ki a Hohepa, Na, kua whakakitea nei e te Atua enei mea katoa ki a koe, kahore  
 hoki he tangata hei rite mou, te mohio, te whai whakaaro: <sup>40</sup> Ko koe hei rangatira mo toku whare,  
 a ma tau kupu toku iwi katoa e tohutohu; ko te torona anake te mea e nui ake ai ahau i a koe. <sup>41</sup> A  
 ka mea a Parao ki a Hohepa, Titiro, kua waiho nei koe e ahau hei rangatira mo te whenua katoa o  
 Ihipa. <sup>42</sup> Na ka tangohia e Parao tona mowhiti i tona ringa, a kuhua ana e ia ki te ringa o Hohepa,

i whakakakahuria hoki ia e ia ki nga kakahu rinena pai, a whakaheia ana he hei koura ki tona kaki:  
43

I whakaekea ano ia e ia ki runga ki te tuarua o ona hariata; a ka karangatia e ratou i mua i a ia,  
44

Kia piko te turi: ka waiho ia e ia hei rangatira mo te whenua katoa o Ihipa. I mea ano a Parao  
ki a Hohepa, Ko Parao ahau, a ki te kahore koe, e kore e ara ake te ringa, te waewae ranei o tetahi

i te whenua katoa o Ihipa. Na ka huaina e Parao te ingoa o Hohepa ko Tawhanatapaneaha; a i  
45 homai ano e ia hei wahine mana, a Ahenata, tamahine a Potiwhera, tohunga o Ono. Na ka haere a  
Hohepa a puta noa i te whenua katoa o Ihipa.

46 E toru tekau nga tau o Hohepa i tona turanga i te aroaro o Parao, o te kingi o Ihipa. Na ka

puta atu a Hohepa i te aroaro o Parao, a ka haere a puta noa i te whenua katoa o Ihipa. A, i nga  
47

tau hua e whitu, me te mea he aohanga na te ringa te hua o te whenua. Na ka kohia e ia nga kai  
48 katoa o nga tau e whitu i puta ki te whenua o Ihipa, a rongoatia ana te kai ki nga pa: ko te kai o te

mara i tetahi taha, i tetahi taha o te pa, i rongoatia e ia ki taua pa ano. Heoi amitia ana e Hohepa  
49 he witi, me te mea ko te onepu o te moana, he hira whakaharahara; a whakarerea noatia iho e ia te

tatau: kahore hoki i taea te tatau. Na ka whanau nga tama tokorua a Hohepa, i te mea kahore  
50 ano kia puta noa nga tau matekai, i whanau hoki i a raua ko Ahenata tamahine a Potiwhera tohunga

o Ono. A i huaina e Hohepa te ingoa o te matamua ko Manahi: No te mea, e ki ana ia, kua meinga  
51

ahau e te Atua kia wareware ki taku mahi nui katoa, ki te whare katoa ano hoki o toku papa. A  
52 i huaina e ia te ingoa o te tuarua ko Eparaima: Moku hoki i meinga e te Atua kia hua ki te whenua

o toku tangihanga. Na ka taka nga tau hua e whitu i puta mai ra ki te whenua o Ihipa. A ka  
53 timata nga tau matekai e whitu te puta ake, ka pera hoki me ta Hohepa i korero ai: a i nga whenua  
54

katoa te matekai; ko te whenua katoa ia o Ihipa i whai taro. Na, i te matenga o te whenua katoa  
55 o Ihipa i te kai, ka tangi te iwi ki a Parao ki te taro ma ratou: a ka mea a Parao ki nga Ihipiana katoa,

Haere ki a Hohepa; me mea e koutou tana e mea ai ki a koutou. Na i runga i te mata katoa o te  
56 whenua te matekai: a ka wahia e Hohepa nga toa katoa, a hokona ana e ia ki nga Ihipiana; he nanakia

hoki te matekai i te whenua o Ihipa. A ka haere nga whenua katoa ki Ihipa, ki a Hohepa, ki te  
57 hoko witi; no te mea he nui rawa te matekai o nga whenua katoa.

## Chapter 42



<sup>1</sup> Na ka kite a Hakopa he witi kei Ihipa, ka mea a Hakopa ki ana tama, He aha koutou i tiroiro ai ki a koutou ano? <sup>2</sup> I mea ano ia, Nana, kua rongohau he witi kei Ihipa: haere iho ki reira, ki te hoko i tetahi ma tatou i reira; kia ora ai tatou, kei mate. <sup>3</sup> Na ka haere nga tuakana kotahi tekau o Hohepa ki raro, ki Ihipa, ki te hoko witi. <sup>4</sup> Ko Pineamine ia, teina o Hohepa, kihai i tonoa e Hakopa i roto i ona tuakana; i mea hoki ia, Kei pono tetahi aitua ki a ia. <sup>5</sup> A ka haere nga tama a Iharaira ki te hoko i roto i te hunga i haere: he matekai hoki to te whenua o Kanaana. <sup>6</sup> Na ko Hohepa te kawana o te whenua, ko ia te kai hoko ki nga tangata katoa o te whenua: na ka haere mai nga tuakana o Hohepa, a ka piko o ratou kanohi ki te whenua i tona aroaro.

<sup>7</sup> A, i te kitenga o Hohepa i ona tuakana, ka mohio ia ki a ratou, otiia ka whakatangata ke ia ki a ratou, ka korero whakatumata ki a ratou; ka mea hoki ki a ratou, I haere mai koutou i hea? A ka mea ratou, I te whenua o Kanaana, ki te hoko kai. <sup>8</sup> A i mohio a Hohepa ki ona tuakana, ko ratou ia kihai i mohio ki a ia. <sup>9</sup> Na ka mahara a Hohepa ki nga moe i moe ai ia mo ratou, a ka mea ki a ratou, He tutei koutou; he whakataki i te wateatanga o te whenua i haere mai ai koutou. <sup>10</sup> A ka mea ratou ki a ia, Kahore, e toku ariki, engari i haere mai au pononga ki te hoko kai. <sup>11</sup> He tama katoa matou na te tangata kotahi; he hunga pono matou, ehara au pononga i te tutei. <sup>12</sup> A ka mea ia ki a ratou, Kahore, engari he whakataki i te wateatanga o te whenua i haere mai ai koutou. <sup>13</sup> A ka mea ratou, Kotahi tekau ma rua au pononga, he teina, he tuakana matou, he tama na te tangata kotahi, no te whenua o Kanaana; ko te whakaotinga kei to matou papa inaianei, ko tetahi kua kahore.

<sup>14</sup> Na ko te meatanga a Hohepa ki a ratou, Ko ia taku i korero ai ki a koutou, i mea ai, He tutei koutou: <sup>15</sup> Ma konei ka mohiotia ai koutou: e ora ana a Parao e kore koutou e haere atu i konei, ki te kahore to koutou whakaotinga e haere mai ki konei. <sup>16</sup> Tukua atu tetahi o koutou ki te tiki i to koutou teina, ko koutou hoki, ka herea koutou, kia mohiotia ai a koutou korero, he pono ranei ta koutou: a ki te kahore, e ora ana a Parao, ina, he tutei koutou. <sup>17</sup> Na ka huihuia ratou e ia kia tiakina, e toru nga ra. <sup>18</sup> A i te toru o nga ra ka mea a Hohepa ki a ratou, Ko tenei ta koutou e mea ai kia ora ai koutou; he tangata wehi hoki ahau i te Atua: <sup>19</sup> Ki te mea he hunga pono koutou, me here tetahi o o koutou tuakana i roto i te whare i tiakina ai koutou: otiia me haere koutou ki te kawewiti mo te matekai o o koutou whare: <sup>20</sup> A me kawewiti to koutou teina, te whakaotinga, ki ahau; kia whakatikaia ai a koutou kupu; a e kore koutou e mate. A pena ana ratou.

21

A ka mea ratou tetahi ki tetahi, He pono kua whai hara tatou i to tatou teina; i kite hoki tatou i te mamae o tona wairua, i a ia i inoi ai ki a tatou, a kihai tatou i whakarongo atu; na reira hoki i

puta mai ai tenei he ki a tatou. <sup>22</sup> Na ka whakahoki a Reupena ki a ratou, ka mea, Kahore ianei ahau i ki atu ki a koutou, i mea, Kaua e hara ki te tamaiti; a kihai koutou i rongorongo? na, ko ona toto

ano hoki tenei te whakatakina nei. <sup>23</sup> A kihai ratou i mohio e rongorongo ana a Hohepa; no te mea he

kaiwhakamaori hoki i waenganui i a ratou. <sup>24</sup> Na ka tahuri ke atu ia i a ratou, a ka tangi: ka hoki ano ia ki a ratou, ka korero ki a ratou, ka tango hoki i a Himiona i roto i a ratou, a herea ana e ia ki

to ratou aroaro. <sup>25</sup> Na ka whakahaua e Hohepa kia whakakiiia a ratou peke ki te witi, kia whakahokia atu nga moni a tenei, a tenei, ki a ratou peke, kia hoatu ano hoki ki a ratou he o ki te ara; na pera

ana ia ki a ratou. <sup>26</sup> Na ka utaina e ratou a ratou witi ki a ratou kaihe, a haere atu ana i reira. <sup>27</sup> A, i te whakatuwheratanga a tetahi o ratou i tana peke kia hoatu he kai ma tana kaihe i te whare tira,

ka kitea e ia tana moni; na, kei te waha tonu o tana peke. <sup>28</sup> A ka mea ia ki ona tuakana, Kua whakahokia mai taku moni; a tenei ano kei roto i taku peke; na kore ake o ratou ngakau, a ka tahuri ratou me te wiri, ka mea tetahi ki tetahi, He mahi aha tenei a te Atua ki a tatou?

29

Na ka tae ratou ki a Hakopa, ki to ratou papa, ki te whenua o Kanaana, a ka korerotia ki a ia nga mea katoa i pono ki a ratou; ka mea, <sup>30</sup> I korero whakatuma mai te rangatira o te whenua ki

a matou; i kiiia ano matou e ia he tutei mo te whenua. <sup>31</sup> A ka mea matou ki a ia, He tangata pono

matou; ehara matou i te tutei. <sup>32</sup> Kotahi tekau ma rua matou, he tuakana, he teina, he tama na to matou papa; kotahi kua kore, kei to matou papa hoki te whakaotinga inaianei, kei te whenua o

Kanaana. <sup>33</sup> Na ko te meatanga mai a taua tangata, a te rangatira o te whenua, ki a matou, Ma tenei e mohio ai ahau he hunga pono koutou; me waiho e koutou tetahi o o koutou tuakana ki ahau, a

me mau atu e koutou he kai mo te matekai o o koutou whare, a ka h aere: <sup>34</sup> A me kawea mai to koutou teina, te whakaotinga, ki ahau: kia mohio ai ahau ehara koutou i te tutei, engari he hunga pono koutou: penei ka hoatu e ahau to koutou tuakana ki a koutou, a ka hokohoko koutou ki tenei

whenua. <sup>35</sup> A, i a ratou e ringiringi ana i a ratou peke, na, ko te moni a tenei, a tenei e takai ana i

roto i a ratou peke: a, ka kite ratou ko to ratou papa i nga moni e takai ana, na ka wehi ratou. <sup>36</sup> Na ka mea a Hakopa, to ratou papa, ki a ratou, Ka whakapania ahau e koutou: ko Hohepa kua kahore, ko Himiona hoki kua kahore, a ka tangohia nei e koutou a Pineamine: he pehi moku enei mea katoa.

37

Na ka korero a Reupena ki tona papa, ka mea, Whakamatea aku tama tokorua, ki te kahore ia e

kawea mai e ahau ki a koe: homai ia ki toku ringa, a maku ia e whakahoki mai ki a koe. <sup>38</sup> A ka mea ia, E kore taku tama e haere tahi i a koutou ki raro: kua mate hoki tona tuakana, a ko ia anake

ka mahue nei; a ki te pono he aitua ki a ia i te ara e haere nei koutou, katahi ka meinga toku koroheketanga e koutou kia heke tangi atu ki te po.

### Chapter 43

<sup>1</sup> A, he tino nui te matekai o te whenua. <sup>2</sup> A, ka pau te witi i maua mai e ratou i Ihipa, na ka mea to ratou papa ki a ratou, Hoki atu ki te hoko i tetahi wahi kai ma tatou. <sup>3</sup> A ka korero a Hura ki a ia, ka mea, I tino whakatupato taua tangata i a matou, i mea, E kore koutou e kite i toku mata ki te kahore to koutou teina i a koutou. <sup>4</sup> Ki te tukua e koe to matou teina hei hoa mo matou, ka haere matou ki raro ki te hoko kai mau: <sup>5</sup> Ki te kahore ia e tukua e koe, e kore matou e haere ki raro: no te mea i ki mai taua tangata ki a matou, E kore koutou e kite i toku mata ki te kahore to koutou teina i a koutou. <sup>6</sup> Na ka mea a Iharaira, He aha koutou i ngarahu kino ai ki ahau, i whakaatu ai ki taua tangata he teina ano to koutou? <sup>7</sup> A ka mea ratou, I tino ui taua tangata ki o matou ahua, ki o matou whanaunga hoki, i mea mai, E ora ana ano ranei to koutou papa? tena ano ranei tetahi atu teina o koutou? a rite tonu ki enei kupu ta matou i korero ai ki a ia: tera ranei matou e ata mohio ka ki mai ia, Kawea mai to koutou teina ki raro nei? <sup>8</sup> Na ka mea a Hura ki tona papa, ki a Iharaira, Tukua te tamaiti ki ahau, a ka whakatika matou, ka haere; kia ora ai tatou, kei mate tahi hoki matou me koe, me a matou potiki. <sup>9</sup> Ko ahau hei utu mona; me rapu ia e koe i toku ringa: ki te kahore ahau e kawea mai i a ia ki a koe, e whakatu hoki i a ia ki tou aroaro, na, hei whakahenga ahau mau i nga ra katoa: <sup>10</sup> Me i kahore hoki matou i roa nei, kua rua enei hokinga mai o matou inaianei.

<sup>11</sup> Katahi ka mea a Iharaira, to ratou papa ki a ratou, Ki te mea ra he penei te hanga, ko tenei ta koutou e mea ai; maua atu etahi o nga hua papai o te whenua i roto i a koutou oko, kawea atu hoki he hakari ki raro, ki taua tangata, tetahi wahi pam a, me tetahi wahi honi, etahi aramona:

<sup>12</sup> Kia takirua hoki nga hiriwa e maua atu i roto i o koutou ringa; ko te moni hoki i whakahokia mai i te waha o a koutou peke, me whakahoki atu ano tena i roto i o koutou ringa; he pohehe noa pea tena: <sup>13</sup> Kawea atu ano hoki to koutou teina, a whakatika, hoki atu ano ki taua tangata: <sup>14</sup> A ma te Atua Kaha Rawa e tuku mai ki a koutou kia arohaina mai e taua tangata, kia tonoa mai ano e ia tera tuakana o koutou, raua ko Pineamine. Ko ahau hoki, ki te whakapania ahau, ka whakapania ahau.

<sup>15</sup> Na ka mau aua tangata ki taua hakari, e rua hoki nga moni i maua atu e ratou i roto i o ratou ringa, me Pineamine hoki: a whakatika ana ratou, haere ana ki raro, ki Ihipa, a ka tu ki te aroaro o

<sup>16</sup>  
Hohepa. A, ka kitea a Pineamine e Hohepa i roto i a ratou, na ka mea ia ki te kaitohutohu o tona whare, Kawea ena tangata ki te whare, patua he kai, taka hoki; ka kai tahi hoki matou ko ena tangata

<sup>17</sup>  
ina tu te ra. Na ka meatia e taua tangata ta Hohepa i ki ai; a ka kawea aua tangata e taua tangata

<sup>18</sup>  
ki te whare o Hohepa. Na ka wehi aua tangata, mo ratou i kawea ki te whare o Hohepa; a ka mea ratou, Mo te moni i whakahokia i roto i a tatou peke i te haerenga tuatahi i kawea mai ai tatou; kia whai take mai ai ia ki a tatou, mo tana rere mai ki a tatou ki te tango i a tatou hei pononga, me

<sup>19</sup>  
a tatou kaihe hoki. Na ka whakatata ratou ki te kaitohutohu o te whare o Hohepa, ka korero ki

<sup>20</sup>  
a ia i te kuwaha o te whare, Ka mea, E te ariki, i haere mai ano matou i mua ki te hoko kai:

<sup>21</sup>  
A, no to matou taenga ki te whare tira, i ta matou whakatuwheratanga i a matou peke, na, ko te moni a tenei, a tenei, i te waha o tana peke, ta matou moni, rite tonu te taimaha: a kua whakahokia

<sup>22</sup>  
mai taua mea e matou i roto i o matou ringa. Kua kawea mai ano e matou i roto i o matou ringa tetahi atu moni hei hoko kai: kahore matou e mohio na wai ranei i maka a matou moni ki a matou

<sup>23</sup>  
peke. A ka mea ia, Kia tau te rangimarie ki a koutou, kua e wehi: na to koutou Atua, na te Atua hoki o to koutou papa i homai he taonga ki a koutou ki roto ki a koutou peke: i tae mai ano ta koutou

<sup>24</sup>  
moni ki ahau. A ka kawea e ia a Himiona ki a ratou. Na ka kawea taua tangata i aua tangata ki te whare o Hohepa, ka hoatu e ia he wai hei horoi mo o ratou waewae; i hoatu ano e ia he kai ma

<sup>25</sup>  
a ratou kaihe. Na ka taka e ratou te hakari mo te taenga mai o Hohepa i te awatea: i rongo hoki ratou me kai taro ratou ki reira.

<sup>26</sup>  
A, i te taenga mai o Hohepa ki te whare, ka kawea e ratou ki a ia te hakari a o ratou ringa ki

<sup>27</sup>  
te whare, a ka piko ki a ia ki te whenua. Na ka ui ia ki a ratou ki te pai, ka mea, Kei te pai ranei

<sup>28</sup>  
to koutou papa, te koroheke i korerotia mai ra e koutou? E ora ana ano ranei ia? A ka mea ratou ki a ia, Kei te pai tau pononga, to matou papa, e ora ana ano ia. Na ka tuohu ratou, ka piko iho.

<sup>29</sup>  
Ka maranga tona kanohi, ka kite ia i a Pineamine, i tona teina, i te tama a tona whaea, a ka mea, Ko to koutou teina tenei, ko te whakaotinga i korerotia ra e koutou ki ahau? I mea ano ia, Kia aroha

<sup>30</sup>  
te Atua ki a koe, e taku tama. Na ka hohoro a Hohepa; he tokonga ake hoki no tona ngakau aroha ki tona teina: a ka rapua e ia tetahi wahi hei tangihanga; a haere ano ia ki te ruma i roto, ki

<sup>31</sup>  
reira tangi ai. Na ka horoia e ia tona mata, ka puta ki waho, ka whakamanawanui, ka mea,

<sup>32</sup>  
Whakatakotoria he taro. Na ka whakatakotoria e ratou, mana ki a ia anake, ma ratou ki a ratou anake, ma nga Ihipiana, i kai tahi me ia, ki a ratou anake: e kore hoki e ahei i nga Ihipiana te kai

<sup>33</sup>  
taro tahi me nga Hiperu; he mea whakarihariha hoki tena ki nga Ihipiana. Na ka noho ratou ki

tona aroaro, to mua rite tonu ano ki tona muanga, to muri rite tonu ano ki tona muringa; a miharo  
 ana aua tangata tetahi ki tetahi. <sup>34</sup> Na ka tuwhaina atu e ia etahi o nga wahi i tona aroaro ma ratou:  
 he nui rawa ia te wahi i a Pineamine; me i takirimatia te wahi a tetahi o ratou kua rite ki tana. Na  
 ka inu ratou, ka koa tahi me ia.

## Chapter 44

<sup>1</sup> Na ka whakahau ia ki te kaitohutohu o tona whare, ka mea, Whakakiiia nga peke a aua tangata  
 ki nga kai e taea te whawhao ki roto, me maka ano te moni a tenei, a tenei, ki te waha o tana peke.  
<sup>2</sup> Whaowhina hoki taku kapu, te kapu hiriwa, ki te waha o te peke a te whakaotinga, me te moni  
 ano mo tana witi. Na rite tonu tana i mea ai ki ta Hohepa kupu i ki ai. <sup>3</sup> A, ka marama te ata, ka  
 tonoa atu aua tangata, ratou me a ratou kaihe. <sup>4</sup> A, no to ratou haerenga atu i te pa, kihai i matara,  
 ka mea a Hohepa ki te kaitohutohu o tona whare, Whakatika, whaia aua tangata; a, ka mau ratou i  
 a koe, ka mea ki a ratou, He aha i utua ai e koutou te pai ki te kino? <sup>5</sup> Ehara ianei tenei i te mea e  
 inu ai toku ariki, i tana hoki e kite tohu ai ia? ka kino ta koutou mahi. <sup>6</sup> Na ka mau ratou i a ia, a  
 korerotia ana e ia aua kupu ki a ratou. <sup>7</sup> A ka mea ratou ki a ia, He aha enei kupu i korerotia ai e  
 toku ariki? Aue, kia meatia tenei mea e au pononga. <sup>8</sup> Nana, ko te moni i kitea e matou i te waha  
 o a matou peke, i whakahokia mai e matou ki a koe i te whenua o Kanaana: a kia tahae matou hei  
 aha i te hiriwa, i te koura ranei, i roto i te whare o tou ariki? <sup>9</sup> Ki te mea ka kitea taua mea ki tetahi  
 o au pononga, kia mate ia, kia waiho ano matou hei pononga ma toku ariki. <sup>10</sup> A ka mea ia, Kia  
 rite ano hoki aiane ki ta koutou i mea ai: e kitea taua mea ki tetahi, hei pononga ia maku; a kahore  
 he whakahe mo koutou. <sup>11</sup> Na hohoro tonu ta ratou tuku iho i tana peke, i tana peke, ki te whenua,  
 a whakatuwheratia ana e ratou tana peke, tana peke. <sup>12</sup> Na ka rapu ia, timata i te matamua a  
 whakamutu ki te whakaotinga: a ka kitea te kapu i roto i te peke a Pineamine. <sup>13</sup> Na ka haehae  
 ratou i o ratou kakahu, a whakawaha ana e ratou tana kaihe, tana kaihe, hoki ana ki te pa. <sup>14</sup> Na ka  
 haere a Hura ratou ko ona tuakana, ko ona teina, ki te whare o Hohepa; a i reira tonu ia: a tapapa  
 ana ki te whenua i tona aroaro. <sup>15</sup> Na ka mea a Hohepa ki a ratou, He aha tenei mea i meatia nei e  
 koutou? kihai ranei koutou i mahara he tangata matakite te penei me ahau nei? <sup>16</sup> Na ka mea a  
 Hura, He aha ta matou e mea ai ki toku ariki? he aha ta matou e korero ai? me aha ranei hei whakatika

i a matou? kua kitea e te Atua te hara o au pononga; na, tenei matou hei pononga ma toku ariki,  
<sup>17</sup>  
 matou tahi hoki ko te tangata i kit ea nei te kapu ki a ia. Ano ra ko ia, Engari, kia meatia tenei  
 e ahau! Ko te tangata i kitea nei te kapu ki a ia, ko ia hei pononga maku; ko koutou ia, haere marie  
 koutou ki runga, ki to koutou papa.

<sup>18</sup>

Katahi ka whakatata a Hura ki a ia, ka mea, Tukua tau pononga, e toku ariki, kia korero i  
 tetahi kupu ki nga taringa o toku ariki, kei mura hoki tou riri ki tau pononga: ko korua hoki ko

<sup>19</sup>

Parao rite tahi. I ui mai toku ariki ki ana pononga, i mea, He papa ranei to koutou, he teina ranei?  
<sup>20</sup>

A ka mea matou ki toku ariki, He papa ano to matou, he koroheke, me tetahi tama o tona  
 koroheketanga, he mea iti; kua mate hoki tona tuakana, a ko ia anake i mahue o nga tamariki a tona

<sup>21</sup>

whaea, e aroha ana hoki tona papa ki a ia. Na ka mea mai koe ki au pononga, Kawea mai ia ki

<sup>22</sup>

raro nei, ki ahau, kia tau atu ai oku kanohi ki a ia. Katahi matou ka mea ki toku ariki, E kore e

<sup>23</sup>

ahei kia whakarerea tona papa e taua tamaiti: no te mea ka mate tona papa ki te mahue i a ia. Na  
 ka mea koe ki au pononga, Ki te kahore to koutou teina, te whakaotinga, e haere tahi mai i a koutou

<sup>24</sup>

ki raro nei, e kore koutou e kite i toku kanohi a muri ake nei. A, i to matou haerenga ki runga,

<sup>25</sup>

ki tau pononga, ki toku papa, na, ka korerotia e matou nga kupu a toku ariki ki a ia. A ka mea

<sup>26</sup>

mai to matou papa, Hoki atu ki te hoko i tetahi wahi kai ma tatou. Na ka mea matou, E kore e  
 ahei ki a matou te haere ki raro: ki te mea kei a matou to matou teina, te whakaotinga, na, ka haere  
 matou ki raro: no te mea hoki e kore e taea e matou te titiro ki te kanohi o taua tangata, ki te kahore

<sup>27</sup>

to matou teina, te whakaotinga, i a matou. Na ka mea tau pononga, toku papa, ki a matou, E

<sup>28</sup>

mohio ana koutou, tokorua nga tama a maua ko taku wahine: A i haere atu tetahi i toku taha, i

<sup>29</sup>

mea hoki ahau, He pono kua haea putia ia; a kahore ahau i kite i a ia a mohoa noa nei: Ki te  
 tangohia ano hoki tenei e koutou i toku aroaro, a ka pono he aitua ki a ia, katahi ka meinga e koutou

<sup>30</sup>

kia heke tangi atu toku koroheketanga ki te po. Heoi, ki te haere atu ahau ki tau pononga, ki  
 toku papa, a kahore taua tamaiti i a matou; kei roto nei hoki i tona wairua tona wairua e paihere

<sup>31</sup>

ana; Na, kei tona kitenga kua kore tenei tama, ka mate ia: a ka meinga e matou, e au pononga,

<sup>32</sup>

te koroheketanga o tau pononga, o to matou papa, kia heke tangi atu ki te po. I waiho hoki tau  
 pononga hei utu mo tenei tama ki toku papa, i mea ahau, Ki te kahore ia e kawea mai e ahau ki a

<sup>33</sup>

koe, na, hei whakahenga ahau ma toku papa i nga ra katoa. Heoi kia noho ra tau pononga aianei  
 hei utu mo tenei tama, hei pononga ma toku ariki; a kia haere tahi te tama i ona tuakana ki runga.

34

Me pehea hoki ahau e haere ai ki runga, ki toku papa, ki te kahore te tama i ahau? kei kite ahau i te kino e pa ana ki toku papa.

## Chapter 45

<sup>1</sup> Na kihai i taea e Hohepa te whakamanawanui i te aroaro o te hunga katoa e tu ana i tona taha; a ka karanga ia, Haere katoa atu nga tangata i toku taha. A kihai i tu tetahi tangata i tona taha, i a Hohepa e whakaatu ana i a ia ki ona tuakana. <sup>2</sup> Na he nui tona reo ki te tangi: a ka rongongia nga Ihipiana, ka rongongia ano hoki te whare o Parao. <sup>3</sup> Na ka mea a Hohepa ki ona tuakana, Ko Hohepa ahau; e ora ana ano ranei toku papa? A kihai ona tuakana i ahehi te whakahoki kupu ki a ia; i pororaru hoki ratou i tona aroaro. <sup>4</sup> A ka mea a Hohepa ki ona tuakana, Whakatata mai ra ki ahau. A ka whakatata ratou. A ka mea ia, Ko Hohepa ahau, ko to koutou teina i hokona nei e koutou ki Ihipa. <sup>5</sup> Na, kua ra e pouri, kua hoki e mumura o koutou kanohi, mo koutou i hoko i ahau ki konei: no te mea he mea tono mai ahau e te Atua ki mua i a koutou hei whakaora tangata. <sup>6</sup> Ka rua hoki enei tau o te matekai ki te whenua: kei muri ano etahi atu tau e rima, e kore ai e parau, e kore ai e kokoti. <sup>7</sup> Kua tonoa mai nei hoki ahau e te Atua ki mua i a koutou kia whai putanga ai koutou ki te ao, kia ora ai hoki koutou i runga i te whakaoranga nui. <sup>8</sup> Ina, ehara i a koutou nana ahau i tono mai ki konei, engari na te Atua; kua waiho hoki ahau e ia hei matua ki a Parao, hei ariki ano mo tona whare katoa, hei kawana hoki mo te whenua katoa o Ihipa. <sup>9</sup> Hohoro, haere ki runga, ki toku papa, mea atu ki a ia, He penei te kupu a tau tama a Hohepa, Kua meinga ahau e te Atua hei ariki mo Ihipa katoa; haere mai ki ahau, kua e whakaroa. <sup>10</sup> A me noho koe ki te whenua o Kohena, a ka tata koe ki ahau, koutou ko au tama, ko nga tama hoki a au tama, me au kahui, me au kau, me au mea katoa: <sup>11</sup> A ka atawhai ahau i a koe ki reira; e rima hoki enei tau matekai kei muri nei; kei rawakoretia koutou ko tou whare me au mea katoa. <sup>12</sup> Na, ka kite nei o koutou kanohi, me nga kanohi o toku teina, o Pineamine, ko toku waha tenei te korero nei ki a koutou. <sup>13</sup> A ma koutou e korero ki toku papa toku kororia katoa i Ihipa, me nga mea katoa i kite nei koutou; kia hohoro ano ta koutou kawehia mai i toku papa ki konei. <sup>14</sup> Na ka hinga ia ki runga ki te kaki o Pineamine, o tona teina, a ka tangi, ka tangi ano a Pineamine i runga i tona kaki. <sup>15</sup> A ka kihi ia i ona tuakana katoa, ka tangi hoki ki a ratou: a muri iho ka korero ona tuakana ki a ia.

<sup>16</sup> Na ka tae te rongu ki te whare o Parao, ka korerotia, Kua tae mai nga tuakana o Hohepa: he  
 mea pai ano tena ki te whakaaro o Parao, o ana tangata hoki. <sup>17</sup> Na ka mea a Parao ki a Hohepa,  
 Korero ki ou tuakana, Ko tenei ta koutou e mea ai; whakawaha a koutou kararehe, a whakatika,  
<sup>18</sup> haere ki te whenua o Kanaana; Tikina hoki to koutou papa, me nga tangata o o koutou whare,  
 a haere mai ki ahau: a ka hoatu e ahau ki a koutou nga mea papai o te whenua o Ihipa, a ka kai  
<sup>19</sup> koutou i te momonatanga o te whenua. Na, kua whakahaua nei koe, meatia tenei e koutou;  
 mauria atu etahi kaata ma koutou i te whenua o Ihipa mo a koutou tamariki, mo a koutou wahine,  
<sup>20</sup> a kawea mai to koutou papa, haere mai hoki. A kaua e whakaaro ki a koutou mea; ma koutou  
<sup>21</sup> hoki nga mea pai o te whenua katoa o Ihipa. Na ka pera nga tama a Iharaira: a ka homai he kaata  
<sup>22</sup> e Hohepa ki a ratou, ka pera me ta Parao i ki ai, i homai ano e ia he o mo ratou ki te ara. I homai  
 ano hoki e ia ki a ratou katoa he whakatakirua mo nga kakahu o tetahi, o tetahi; ki a Pineamine ia  
<sup>23</sup> i homai e ia e toru rau hiriwa, takirima ano hoki nga kakahu. A ko nga mea tenei i homai e ia  
 kia kawea ki tona papa; kotahi tekau nga kaihe e waha ana i nga mea papai o Ihipa, me nga kaihe  
<sup>24</sup> uha kotahi tekau, ko ta ratou kawenga he witi, he taro, hei kai ma tona papa ki te ara. Na ka  
 tonoa atu e ia ona tuakana, a haere ano ratou: ka mea hoki ia ki a ratou, Kei ngangau koutou ki te  
 ara.  
<sup>25</sup> Na haere ana ratou i Ihipa ki runga, a ka tae ki te whenua o Kanaana, ki a Hakopa, ki to ratou  
<sup>26</sup> papa, A ka korero ki a ia, ka mea, E ora ana ano a Hohepa, ko ia hoki te kawana o te whenua  
<sup>27</sup> katoa o Ihipa. Na ka whakapau te manawa o Hakopa, kihai hoki ia i whakapono ki a ratou. Na  
 ka korerotia e ratou ki a ia nga kupu katoa a Hohepa i korero ai ia ki a ratou: a ka kite ia i nga kaata  
<sup>28</sup> i tukua mai e Hohepa hei tiki mai mona, na, ka ora ake te wairua o Hakopa, o to ratou papa: A  
 katahi a Iharaira ka mea, Heoi ano; e ora ana ano taku tama, a Hohepa: ka haere ahau kia kite i a  
 ia kei mate ahau.

## Chapter 46

<sup>1</sup> Na ka turia e Iharaira me ana mea katoa, a ka tae ki Peerehepa, a ka patua e ia etahi patunga  
 tapu ma te Atua o tona papa, o Ihaka. <sup>2</sup> Na ka korero moemoea te Atua ki a Iharaira i te po, ka mea,  
<sup>3</sup> E Hakopa, e Hakopa. A ka mea ia, Tenei ahau. A ka mea ia, Ko te Atua ahau, ko te Atua o tou



4  
papa: kaua e wehi ki te haere ki raro, ki Ihipa; ka meinga hoki koe e ahau hei iwi nui ki reira: Ka haere tahi ahau i a koe ki raro, ki Ihipa; maku ano koe e whakahoki mai ki runga nei: a ma te ringa o Hohepa e pehi ou kanohi.

5 Na ka whakatika atu a Hakopa i Peerehepa, a ka kawea a Hakopa, to ratou papa, e nga tama a Iharaira, me a ratou tamariki, me a ratou wahine, i runga i nga kaata i tukua mai e Parao hei tiki atu i a ia. 6 I kawea ano e ratou a ratou kararehe, me a ratou taonga i whiwhi ai ki te whenua o

7 Kanaana, a haere ana ki Ihipa a Hakopa ratou tahi ko ona uri katoa: Ko ana tama, ko nga tama hoki a ana tana: ko ana tamahine, me nga tamahine a ana tama, me ona uri katoa i kawea e ia ki

8 Ihipa. Na ko nga ingoa enei o nga tama a Iharaira, i haere nei ki Ihipa, ko Hakopa ratou ko ana tama: ko Reupena, matamua a Hakopa. 9 Ko nga tama a Reupena; ko Hanoka, ko Paru, ko Heterono,

10 ko Karami. Ko nga tama a Himiona; ko Iemuere, ko Iamini, ko Ohara, ko Iakini, ko Tohara, ratou ko Hauru, ko te tama a tetahi wahine Kanaani. 11 Ko nga tama a Riwai ko Kerehona, ko

12 Kohata, ko Merari. Ko nga tama a hura; ko Ere, ko Onana, ko Heraha, ko Parete, ko Taraha: ko Ere ia raua ko Onana i mate ki te whenua o Kanaana. Ko nga tama a Parete, ko Heterono raua ko

13 Hamuru. Ko nga tama a Ihakara; ko Tora, ko Puwa, ko Hopa, ko Himirono. 14 Ko nga tama a

15 Hepurona; ko Herete, ko Erono, ko Iahateere. Ko nga tama enei a Rea, i whanau nei i a raua ko Hakopa ki Paranaarama, ratou ko tana tamahine, ko Rina: e toru tekau ma toru nga wairua katoa o ana tama, o ana tamahine. 16 Ko nga tama a Kara; ko Hipiona, ko Haki, ko Huni, ko Etepono, ko

17 Eri, ko Arori, ko Areri. Ko nga tama a Ahera; ko Imina, ko Ihua, ko Ihui, ko Peria, ratou ko Hera, ko to ratou tuahine; ko nga tama a Peria, ko Hepere raua ko Marakiere. 18 Ko nga tama enei

a Tiripa, a tera i homai nei e Rapana ki a Rea, ki tana tamahine, i whanau nei i a raua ko Hakopa; kotahi tekau ma ono wairua. 19 Ko nga tama a Rahera, wahine a Hakopa; ko Hohepa raua ko

20 Pineamine. A whanau ake a Hohepa i te whenua o Ihipa, ko Manahi raua ko Eparaima, he whanau enei na raua ko Ahenata, tamahine a Potiwhera tohunga o Ono. 21 Ko nga tama a Pineamine;

ko Peraha, ko Pekere, ko Ahapere, ko Kera, ko Naamana, ko Ehi, ko Roho, ko Mupimi, ko Hupimi, ko Arare. 22 Ko nga tama enei a Rahera, i whanau nei ma Hakopa: ko nga wairua katoa kotahi

23 tekau ma wha. Ko nga tama a Rana; ko Huhimi. 24 Ko nga tama a Napatari; ko Iahateere, ko

25 Kuni, ko Ietere, ko Hireme. Ko nga tama enei a Piriha, a tera i homai nei e Rapana ki tana

<sup>26</sup> tamahine, ki a Rahera, a whanau ake enei i a raua ko Hakopa: e whitu aua wairua katoa. Ko nga  
 wairua katoa i haere tahi nei i a Hakopa ki Ihipa, i puta mai nei i roto i tona hope, e ono tekau ma  
<sup>27</sup> ono nga wairua katoa; haunga nga wahine a nga tama a Hakopa. Ko nga tama a Hohepa, i whanau  
 nei mana ki Ihipa, e rua nga wairua: e whitu tekau nga wairua katoa o te whare o Hakopa i haere  
 nei ki Ihipa.  
<sup>28</sup> Na ka tonoa e ia a Hura ki mua i a ia, ki a Hohepa, hei arahi i a ia ki Kohena; a ka tae ratou  
<sup>29</sup> ki te whenua o Kohena. Na ka whakanohoia e Hohepa tona hariata, a haere ana ki te whakataui  
 i tona papa, i a Iharaira, ki Kohena, a ka tae atu ki tona aroaro; na ka hinga ia ki runga ki tona kaki,  
<sup>30</sup> a he roa tana tangihanga i runga i tona kaki. Na ka mea a Iharaira ki a Hohepa, He pai ki te mate  
<sup>31</sup> ahau aianei, noku hoki ka kite i tou mata, no te mea e ora ana ano koe. Na ka mea a Hohepa ki  
 ona tuakana, ki te whare ano hoki o tona papa, Ka haere ahau ki runga, ki te korero ki a Parao, ki  
 te mea ki a ia, Kua tae mai ki ahau oku tuakana, me te whare o toku papa, i noho ra i te whenua o  
<sup>32</sup> Kanaana; Na he hepara aua tangata, he hunga whangai kararehe ratou; kua kawea mai ano e  
<sup>33</sup> ratou a ratou kahui, a ratou kau, me a ratou mea katoa. A, ka karanga a Parao i a koutou, ka mea,  
<sup>34</sup> He aha ta koutou mahi? Me ki atu e koutou, He hunga whangai kararehe au pononga, o to matou  
 taitamarikitanga ake a mohoa noa nei, matou, me o matou matua: kia noho ai koutou ki te whenua  
 o Kohena; no te mea hoki he mea whakarihariha ki nga Ihipiana nga hepara katoa.

## Chapter 47

<sup>1</sup> Na ka haere a Hohepa, ka korero ki a Parao, ka mea, Kua tae mai toku papa me oku tuakana,  
 me a ratou kahui, a ratou kau, a ratou mea katoa, i te whenua o Kanaana; na, kei te whenua ratou  
<sup>2</sup> o Kohena. Na ka tango ia i etahi o ona tuakana, tokorima, a whakaturia ana ratou e ia ki te aroaro  
<sup>3</sup> o Parao. A ka mea a Parao ki ona tuakana, He aha ta koutou na mahi? A ka mea ratou ki a Parao,  
<sup>4</sup> He hepara au pononga, matou me o matou matua. I mea ano ratou ki a Parao, He noho ki tenei  
 whenua i haere mai ai matou; no te mea kahore he kai ma nga hipi a au pononga; he nui hoki te  
<sup>5</sup> matekai o te whenua o Kanaana: koia ra kia noho au pononga ki te whenua o Kohena. Na ka  
<sup>6</sup> korero a Parao ki a Hohepa, ka mea, Kua tae mai nei tou papa me ou tuakana ki a koe: Kei tou  
 aroaro te whenua o Ihipa; whakanohoia e koe tou papa me ou tuakana ki te wahi pai o te whenua;  
 kia noho ratou ki te whenua o Kohena: ki te mea hoki e mohiotia ana e koe etahi tangata pakari i

roto i a ratou, meinga ratou hei rangatira mo aku kararehe. <sup>7</sup> Na ka kawea mai a Hakopa, tona papa,  
 e Hohepa, ka whakaturia ki te aroaro o Parao; a ka manaaki a Hakopa i a Parao. <sup>8</sup> A ka mea a Parao  
 ki a Hakopa, Ka hia ou tau? <sup>9</sup> Ka mea a Hakopa ki a Parao, Ka kotahi rau e toru tekau tau nga ra  
 o nga tau o toku noho manene: he torutoru, a he kino nga ra o nga tau o toku ora, kihai ano hoki i  
 rite ki nga ra o nga tau o te ora o oku matua, i nga ra i noho manene ai ratou. <sup>10</sup> Na ka manaaki a  
 Hakopa i a Parao, a puta atu ana i te aroaro o Parao. <sup>11</sup> Na ka whakanohoia e Hohepa tona papa  
 me ona tuakana, a hoatu ana e ia ki a ratou he kainga i te whenua o Ihipa, i te wahi pai rawa o te  
 whenua, i te whenua o Ramehehe, pera me ta Parao i whakahau ai. <sup>12</sup> Na ka atawhai a Hohepa i  
 tona papa, ratou ko ona tuakana, ko te whare katoa ano hoki o tona papa ki te taro, he mea whakarite  
 tonu ki o ratou hapu.  
<sup>13</sup> A kahore he taro o te whenua katoa; he nui rawa hoki te matekai; a hemo noa iho te whenua  
 o Ihipa i te matekai, me te whenua hoki o Kanaana. <sup>14</sup> A kohia ana e Hohepa te moni katoa i kitea  
 ki te whenua o Ihipa, ki te whenua hoki o Kanaana, mo te witi i hokona e ratou: a kawea ana e  
 Hohepa te moni ki te whare o Parao. <sup>15</sup> A, no te potonga o te moni o te whenua o Ihipa, o te whenua  
 hoki o Kanaana, na ka haere nga Ihipiana katoa ki a Hohepa, ka mea, Homai he taro ki a matou:  
 kia mate hoki matou ki tou aroaro hei aha? kua poto nei hoki te moni. <sup>16</sup> Na ka mea a Hohepa,  
 Homai a koutou kararehe; a ka hoatu e ahau hei utu mo a koutou kararehe, i te mea kua poto te  
 moni. <sup>17</sup> Na ka kawea mai e ratou a ratou kararehe ki a Hohepa: a hoatu ana e Hohepa he taro ki  
 a ratou hei utu mo nga hoiho, mo nga kahui hipi, mo nga kahui kau, mo nga kaihe: a whangaia ana  
 ratou e ia ki te taro i taua tau, hei utu mo a ratou kararehe k atoa. <sup>18</sup> A, no te takanga o taua tau, ka  
 haere mai ratou ki a ia i te rua o nga tau, ka mea ki a ia, E kore e huna e matou i toku ariki, kua  
 poto te moni; kei toku ariki hoki a matou kahui kararehe; kahore he mea e toe ana hei tirohanga  
 ma toku ariki, ko o matou tinana anake, me o matou oneone: <sup>19</sup> Kia mate matou ki tou aroaro hei  
 aha? matou tahi hoki me to matou oneone? hokona matou me to matou oneone ki te taro, a ka riro  
 matou me to matou oneone hei pononga ma Parao: homai ano hoki he purapura, a ka ora matou, a  
 e kore e mate, e kore an o hoki e uruatu te whenua. <sup>20</sup> Na ka hokona e Hohepa te oneone katoa  
 o Ihipa mo Parao: i hokona hoki e nga Ihipiana tana mara, tana mara; he pehi rawa hoki na te  
 matekai i a ratou: a riro ana te whenua i a Parao. <sup>21</sup> Tena ko nga tangata, i whakawhitiwhitia e ia  
 ki nga pa, i tetahi pito o nga rohe o Ihipa a puta noa ki tetahi pito o reira. <sup>22</sup> Ko te oneone anake  
 ia o nga tohunga kihai i hokona e ia; i whakaritea hoki tetahi wahi e Parao ma nga tohunga, a i kai  
 ratou i ta ratou wahi i homai e Parao ma ratou: koia te hokona ai e ratou o ratou oneone. <sup>23</sup> A ka

mea a Hohepa ki te iwi, Nana, kua hokona nei koutou e ahau inaianei, me to koutou oneone, ma  
<sup>24</sup>  
 Parao: na, he purapura ma koutou, ruia te whenua. A, ka whai hua a mua, me homai e koutou  
 te rima o nga wahi ki a Parao, a ma koutou nga wahi e wha, hei purapura mo te mara, hei kai hoki  
<sup>25</sup>  
 ma koutou, ma te hunga hoki i roto i o koutou whare, hei kai ano hoki ma a koutou tamariki. A  
 ka mea ratou, Ka ora matou i a koe: kia manakohia matou e toku ariki, hei pononga matou ma  
<sup>26</sup>  
 Parao. Na ka whakatakotoria te tikanga e Hohepa mo te oneone o Ihipa a tae noa mai ki tenei  
 ra, ma Parao te rima o nga wahi; haunga ia te oneone o nga tohunga, kihai hoki tena i roto i a Parao.  
<sup>27</sup>  
 Na ka noho a Iharaira ki te whenua o Ihipa, ki te whenua o Kohena; ka whai kainga ratou  
<sup>28</sup>  
 ki reira, ka hua, ka nui whakaharahara. A kotahi tekau ma whitu nga tau i ora ai a Hakopa ki te  
<sup>29</sup>  
 whenua o Ihipa: a kotahi rau e wha tekau ma whitu nga tau o te oranga o Hakopa. Na ka whakatata  
 nga ra o Iharaira e mate ai ia: a ka karanga i tana tama, i a Hohepa, ka mea ki a ia, Na, ki te mea  
 ka manakohia ahau e koe, tena, whakapakia mai tou ringa ki raro i toku huha, a whakaputaina mai  
<sup>30</sup>  
 he aroha, he pono ki ahau; kau r a ahau e tanumia ki Ihipa: Engari kia takoto ahau ki oku matua,  
 me kawe atu ahau e koe i Ihipa, me tanu hoki ki to ratou urupa. A ka mea ia, Ka rite i ahau tau  
<sup>31</sup>  
 kupu. A ka mea ia ki a ia, Oati mai ki ahau. A oati ana ia ki a ia. A ka pike a Iharaira ki runga  
 ki te urunga o te moenga.

## Chapter 48

<sup>1</sup>  
 Na, i muri i enei mea, ka korerotia ki a Hohepa, Nana, e mate ana tou papa: a ka tango ia i  
<sup>2</sup>  
 ana tamariki tokorua, i a Manahi raua ko Eparaima, hei hoa mona. A ka korerotia ki a Hakopa,  
 ka meatia, Na, ko Hohepa, ko tau tama, tenei te haere mai nei ki a koe: na ka whakakaha ake a  
<sup>3</sup>  
 Iharaira i a ia, a ka noho ki runga i te moenga. Na ka mea a Hakopa ki a Hohepa, I puta mai te  
<sup>4</sup>  
 Atua Kaha Rawa ki ahau i Rutu, i te whenua o Kanaana, i manaaki i ahau, I mea ano ki ahau, Na,  
 ka meinga koe e ahau kia hua, ka whakanui ahau i a koe, ka meinga hoki koe e ahau hei huinga  
<sup>5</sup>  
 iwi; a ka hoatu e ahau tenei whenua ki ou uri i muri i a koe hei kainga pumau. Na, ko au tama  
 tokorua, ko Eparaima raua ko Manahi, i whanau nei mau ki te whenua o Ihipa i mua ake o toku  
 taenga mai ki a koe, ki Ihipa, maku ena; ka riro mai raua i ahau, ka pera ano me Reupena raua ko  
<sup>6</sup>  
 Himiona. A, ko tau whanau e whanau mau i muri i a raua, mau ena; ka huaina ki a ratou te ingoa  
<sup>7</sup>  
 o o ratou tuakana i to ratou kainga pumau. Ko ahau hoki, i toku haerenga mai i Parana, ka mate

a Raheara ki toku taha, ki te whenua o Kanaana, ki te ara, e takoto mai ana he wahi e haere atu ai ki Eparata: a tanumia ana e ahau ki reira ki te ara ki Eparata, ara ki Peterehema.

<sup>8</sup> A ka kite a Iharaira i nga tama a Hohepa, ka mea, Ko wai enei? <sup>9</sup> A ka mea a Hohepa ki tona papa, Ko aku tama enei i homai e te Atua ki ahau i konei. Ka mea ia, Nekehia mai nei ki ahau, kia

<sup>10</sup> manaaki ai ahau i a raua. Na he atarua nga kanohi o Iharaira, na te koroheke hoki, kihai ia i ahei

te kite atu. Na ka whakatata ia i a raua ki a ia; a ka kihi ia i a raua, ka wahi hoki i a raua. <sup>11</sup> Na ka mea a Iharaira ki a Hohepa, Kihai ahau i mea ka kite ahau i tou mata: kua whakakitea mai nei ano

<sup>12</sup> hoki e te Atua ou uri ki ahau. Na ka nekehia atu raua e Hohepa i roto i ona turi, a ka piko tona

<sup>13</sup> mata ki te whenua. Na ka puritia raua e Hohepa, a Eparaima e tona ringa matau ki te maui o

Iharaira, a Manahi e tona maui ki te matau o Iharaira, a ka whakatata atu ia i a raua ki a ia. <sup>14</sup> Na

ka torona e Iharaira tona ringa matau, a whakatakotoria ana e ia ki runga ki te matenga o Eparaima, ko ia ano hoki te teina, me tona ringa maui hoki ki runga ki te matenga o Manahi, he ata whakatakoto

<sup>15</sup> hoki nana i ona ringa, ko Manahi hoki te matamua. Na ka manaaki ai i a Hohepa, ka mea, Ma te Atua i haereere nei oku matua, a Aperahama raua ko Ihaka i tona aroaro, ma te Atua mana nei

<sup>16</sup> ahau i whangai i ahau i ora nei a taea moatia tenei ra, Ma te anahera nana nei ahau i whakaora i roto i nga he katoa, e manaaki enei tamariki; a kia huaina toku ingoa ki a raua, me te ingoa hoki

<sup>17</sup> o oku matua, o Aperahama raua ko Ihaka; a kia tino nui haere raua i waenganui i te whenua. A,

no te kitenga o Hohepa kua whakatakotoria e tona papa tona matau ki runga ki te matenga o Eparaima, ka kino ki tana titiro: a ka whakarewaina ake e ia te ringa o tona papa, kia nekehia atu

<sup>18</sup> e ia i te matenga o Eparaima ki runga ki te matenga o Manahi. A ka mea a Hohepa ki tona papa, Kaua e pena, e toku papa; ko te tuakana hoki tenei; whakatakotoria tou matau ki runga ki tona

<sup>19</sup> matenga. Na ka whakakahore tona papa, ka mea, E mohio ana ahau, e taku tama, e mohio ana ahau: ka whakatupu iwi ano tenei, ka nui ano hoki ia: otiia ka nui atu tona teina i a ia, a ka waiho

<sup>20</sup> ona uri hei iwi maha. Na ka manaaki ia i a raua i taua rangi, ka mea, Ko koe ta Iharaira manaakitanga, a ka korerotia, Kia meinga koe e te Atua kia rite ki a Eparaima, kia rite hoki ki a

<sup>21</sup> Manahi: na ka maka e ia a Eparaima ki mua i a Manahi. Na ka mea a Iharaira ki a Hohepa, Ka mate tenei ahau: hei a koutou ia te Atua, mana hoki koutou e whakahoki ki te whenua o o koutou

<sup>22</sup> matua. Na kotahi te wahi ka hoatu nei e ahau mou, e hira ake ai tou i to ou tuakana, ko taku hoki i tango ai i nga Amori ki taku hoari, ki taku kopere.

## Chapter 49

<sup>1</sup> Na ka karanga a Hakopa ki ana tamariki, ka mea, Huihui mai, a ka korerotia e ahau ki a koutou  
 nga mea e pono ki a koutou i nga ra o muri. <sup>2</sup> Huihui mai, whakarongo hoki, e nga tama a Hakopa;  
 whakarongo hoki ki a Iharaira, ki to koutou papa. <sup>3</sup> E Reupena, ko koe taku matamua, toku  
 pakaritanga, me te timatanga o toku kaha; te hiranga ake o te kororia, te hiranga ake hoki o te kaha:  
<sup>4</sup> He mea pokarekare, ano he wai, e kore koe e kaka; mo tou pikitanga i te moenga o tou papa; pokea  
 iho e koe a reira: i pikitia e ia toku takatoranga.  
<sup>5</sup> He tuakana, he teina, a Himiona raua ko Riwai; he rakau riri kino a raua hoari. <sup>6</sup> Kaua e tomo,  
 e toku wairua, ki to raua runanga; kaua e huihuia, e toku kororia, ki to raua whakaminenga: i patu  
 tangata hoki raua i a raua e riri ana, a he hikaka no raua i kopa ai te kau. <sup>7</sup> Kia kanga to raua riri, i  
 kaha nei; me to raua aritarita, no te mea he nanakia: ka wehea atu raua e ahau ki roto ki a Hakopa,  
 ka whakamararatia hoki raua ki roto ki a Iharaira.  
<sup>8</sup> E Hura, ko koe e whakamoemititia e ou tuakana, e ou teina: ka u tou ringa ki te kaki o ou  
 hoariri: ka piko ki a koe nga tama a tou papa. <sup>9</sup> He kua o raiona a Hura: i kake atu koe, e taku tama,  
 i te haenga: i piko, i tapapa ia, i pera me te raiona, i pera hoki me te raiona katua; ma wai ia e  
 whakaoho? <sup>10</sup> E kore e riro ke te hepeta i a Hura, me te tokotoko o te kawana i waenganui o ona  
 waewae, kia tae mai ra ano a Hiro; a ka rongongia nga iwi katoa ki a ia. <sup>11</sup> Ka herea e ia tana kua o ki  
 te waina, te tama hoki a tana kaihe ki te waina pai rawa; ka horoia e ia ona kakahu ki te waina, ona  
 weruweru hoki ki te toto o te karepe: <sup>12</sup> Ka mumura hoki ona kanohi i te waina, ka ma ona niho i  
 te waiu.  
<sup>13</sup> Ka noho a Hepurona ki te wahapu o te moana; hei wahapu ano ia mo nga kaipuke; ka tutuki  
 atu hoki tona rohe ki Hairona. <sup>14</sup> He kaihe kaha a Ihakara, e tapapa ana i waenga o nga moenga  
 hipi e rua: <sup>15</sup> A, i tona kitenga i te okiokinga he pai, i te whenua hoki he ahua reka; na ka tukua iho  
 e ia tona pokohiwi ki te pikaunga, a meinga ana ia hei pononga homai takoha. <sup>16</sup> Ka whakawa a  
 Rana i tona iwi, ka pera ano me tetahi o nga iwi o Iharaira. <sup>17</sup> Hei nakahi a Rana ki te ara, hei neke  
 hoki ki te huarahi, e ngau ai i te rekereke o te hoiho, a ka taka whakamuri tona kaieke. <sup>18</sup> Kua tatari  
 atu ahau ki tau whakaoranga, e Ihowa. <sup>19</sup> Ko Kara, ka aki te ope ki runga ki a ia: otiia ka aki ia ki  
 to ratou rekereke. <sup>20</sup> Ko ta Ahera, ka momona tana taro, a he kai kingi ona hua. <sup>21</sup> Ko Napatari,  
 he hata kua tukua kia haere: e homai ana e ia nga kupu papai.

<sup>22</sup> Ko Hohepa he peka hua, he peka hua i te taha o te puna; e toro atu ana ona manga ki tua o  
<sup>23</sup> te taiepa: I whakatupu kino nga kaikopere i a ia, i pere mai hoki, i kino hoki ki a ia: <sup>24</sup> Otiia i  
 mau tana kopere i runga i te kaha, a i whakapakaritia nga takakau o ona ringa e nga ringa o te Mea  
<sup>25</sup> Kaha o Hakopa, no reira nei te hepara, te kamaka o Iharaira, Ara e te Atua o tou papa, mana  
 ano koe e awhina; e te Kaha Rawa hoki, mana e tuku mai ki a koe nga manaaki o te rangi i runga,  
<sup>26</sup> nga manaaki hoki o te rire e takoto ana i raro, nga manaaki o nga u, o te kopu hoki: Hira ake  
 nga manaaki a tou papa i nga manaaki a oku tupuna, tae atu ana ki tera taha rawa o nga pupepuke  
 tu tonu: ka tau iho ena mea ki runga ki te matenga o Hohepa, ki te tumuaki hoki ona i motuhia atu  
<sup>27</sup> nei i ona tuakana. Ka haehae a Pineamine ano he wuruhi: ka kainga e ia te tupapaku i te ata, a  
 i te ahiahi ka tuwhaina e ia nga taonga parakete.  
<sup>28</sup> Ko enei katoa nga iwi kotahi tekau ma rua o Iharaira: ko te korero hoki tenei a to ratou papa  
 ki a ratou, ko tana manaaki i a ratou: i manaakitia ratou e ia, tenei, tenei, me tona manaaki ano.  
<sup>29</sup> A i whakahau ia ki a ratou, i mea ki a ratou, Ka kohia atu ahau ki toku iwi: tanumia ahau ki oku  
<sup>30</sup> matua, ki te ana i te parae o Eperona Hiti, Ki te ana i te parae o Makapera, i te ritenga o Mamere,  
 i te whenua o Kanaana, i hokona, me te parae ano, e Aperahama i a Eperona Hiti, kia puritia hei  
<sup>31</sup> tanumanga. I tanumia a Aperahama raua ko Hara, ko tana wahine, ki reira; i tanumia a Ihaka  
 raua ko Ripeka, ko tana wahine, ki reira; i tanumia hoki a Rea e ahau ki reira. <sup>32</sup> I hokona te parae  
<sup>33</sup> me te ana i reira i nga tama a Hete. A, ka mutu te whakahau a Hakopa ki ana tama, ka pepeke  
 ake ona waewae ki roto ki te moenga, a ka hemo, ka kohia atu ki tona iwi.

## Chapter 50

<sup>1</sup> Na ka hinga a Hohepa ki runga ki te mata o tona papa, a ka tangi i runga i a ia, ka kihi hoki  
<sup>2</sup> i a ia. Na ka whakahau a Hohepa i ana tangata, i nga kairongoa, kia whakapakokotia tona papa;  
<sup>3</sup> na whakapakokotia ana a Iharaira e nga kairongoa. Na ka tutuki ona ra e wha tekau; ko nga ra  
 hoki ena e whakatutukitia ana mo te hunga e whakapakokotia ana: a e whitu tekau nga ra i uhungatia  
<sup>4</sup> ai ia e nga Ihipiana. A, ka taka nga ra e uhungatia ia ia, ka korero a Hohepa ki te whare o Parao,  
 ka mea, Na, ki te mea kua manakohia ahau e koutou, tena, korero atu ki nga taringa o Parao, mea  
<sup>5</sup> atu, I whakaoati toku papa i ahau, i mea, Ka mate tenei ahau: hei roto i taku tanumanga i keria e  
 ahau moku ki te whenua o Kanaana, hei reira ahau tanumia ai e koe. Na kia tukua ahau e koe aianeia

6  
kia haere ki runga, ki te tanu i toku papa, ka hoki mai ai. Na ka mea a Parao, Haere ki runga ki te tanu i tou papa, kia rite ki tana i whakaoati ai i a koe.

7  
Na haere ana a Hohepa ki runga ki te tanu i tona papa, i haere tahi ano i a ia nga pononga katoa a Parao, nga kaumatua o tona whare, me nga kaumatua katoa o te whenua o Ihipa, Me te whare katoa ano hoki o Hohepa, ratou ko ona tuakana, me te whare ano hoki o tona papa; ko a ratou tamariki anake, me a ratou hipi, me a ratou kau i mahue i a ratou i te whenua o Kohena. I haere tahi ano i a ia nga hariata me nga tangata hoiho: he nui whakaharahara te tira. Na ka tae ratou ki te patunga witi a Atara, i tawahi o Horano, a he tino nui whakaharahara te tangihanga i tangi ai ratou ki reira: e whitu hoki nga ra i uhungatia ai e ia tona papa. A, ka kite nga tangata whenua, nga Kanaani, i te uhunga i te patunga witi a Atara, ka mea ratou, He uhunga nui tenei na nga Ihipiana: na reira i huaina ai te ingoa o reira ko Apere Mitiraima, kei tawahi hoki o Horano.

12  
Na rite tonu ki tana i whakahau ai ki a ratou tana tama i mea ai ki a ia: I kawea hoki ia e ana tama ki te whenua o Kanaana, a tanumia ana ki te ana i te parae o Makapera, i hokona tahitia nei e Aperahama me te parae i a Eperona Hiti, kia puritia hei tanumanga, kei te ritenga atu o Mamere.

14  
Na hoki ana a Hohepa ki Ihipa, ratou tahi ko ona tuakana, ko nga tangata katoa ano hoki i haere tahi i a ia ki runga ki te tanu i tona papa, i te mutunga o tana tanu i tona papa.

15  
Na, i te kitenga o nga tuakana o Hohepa kua mate to ratou papa, ka mea ratou, Tera pea e kino mai a Hohepa ki a tatou, a ka utua mai e ia a tatou kino katoa i meatia e tatou ki a ia. Na ka tuku tangata ratou ki a Hohepa, a ka mea, I whakahau mai tou papa i mua ake i tona matenga,

17  
i mea mai, Kia penei ta koutou kupu ki a Hohepa, Tena, whakarerea te he o ou tuakana, me to ratou hara; he kino hoki ta ratou mahi ki a koe: na, tena whakarerea te he o nga pononga a te Atua o tou papa. A ka tangi a Hohepa i a ratou kupu ki a ia. Na ka haere ona tuakana, ka tapapa ki

19  
tona aroaro; ka mea, Tenei matou hei pononga mau. A ka mea a Hohepa ki a ratou, Kaua e wehi: he kaiwhakakapi oti ahau mo to te Atua wahi? Ko koutou hoki, i he o koutou whakaaro ki ahau; he pai ia to te Atua whakaaro, kia meatia ai tenei inaianei, kia whakaorangia ai hoki nga tangata

21  
tokomaha. Heoi kaua e wehi; maku koutou e atawhai, koutou ko a koutou tamariki. A ka whakamarie ia i a ratou, ka whakamama hoki i o ratou ngakau.

22  
Na ka noho a Hohepa ki Ihipa, ratou ko te whare o tona papa: a kotahi rau kotahi tekau nga tau i ora ai a Hohepa. A i kite a Hohepa i te tuatoru o nga whakatupuranga o nga tamariki a Eparaima: i whakatupuria ano hoki nga tamariki a Makiri, tama a Manahi, ki runga ki nga turi o



<sup>24</sup> Hohepa. Na ka mea a Hohepa ki ona tuakana, Ka mate ahau; otiia ka ata tirohia koutou e te Atua, a ka kawea atu koutou e ia i tenei whenua ki runga, ki te whenua i oati ai ia ki a Aperahama, ki a Ihaka, ki a Hakopa. <sup>25</sup> Na ka whakaoatitia nga tama a Iharaira e Hohepa, ka mea ia, Ka tikina <sup>26</sup> mai koutou, ka ata tirohia e te Atua, a me kawea atu e koutou oku iwi i konei ki runga. Na ka mate a Hohepa i te kotahi rau i te kotahi tekau o ona tau: a ka whakapakokotia e ratou, ka whakatakotoria hoki ki te kawhena i Ihipa.

## Exodus

### Chapter 1

<sup>1</sup> Na ko nga ingoa enei o nga tama a Iharaira i haere ki Ihipa; i haere tahi mai ratou me Hakopa, me te whare o tenei, o tenei. <sup>2</sup> Ko Reupena, ko Himiona, ko Riwai, ko Hura, <sup>3</sup> Ko Ihakara, ko Hepurona, ko Pineamine, <sup>4</sup> Ko Rana, ko Napatari, ko Kara, ko Ahera. <sup>5</sup> Na, ko nga wairua katoa i puta mai i te hope o Hakopa, e whitu tekau wairua: i Ihipa hoki a Hohepa. <sup>6</sup> Na kua mate a Hohepa, me ona tuakana katoa, me tera whakapaparanga katoa. <sup>7</sup> A ka tupu nga tama a Iharaira, ka tini haere, ka hira rawa, ka kaha noa atu; a kapi ana te whenua i a ratou.

<sup>8</sup> Na kua puta he kingi hou mo Ihipa, kihai i mohio ki a Hohepa. <sup>9</sup> A ka ki ia ki tona iwi, Nana, hira ake, kaha ake i a tatou te iwi o nga tama a Iharaira. <sup>10</sup> Tena, kia ata ngarahu tatou ki a ratou; kei tini haere, a tenei ake, ki te ara he pakanga, na, ka uru hoki ratou ki o tatou hoariri, ka whawhai ki a tatou, a ka maunu atu i te whenua. <sup>11</sup> Na ka whakaritea he rangatira akiaki mo ratou, hei whakawhui mo ratou ki a ratou kawenga. A hanga ana e ratou nga pa takotoranga taonga mo Parao, a Pitoma, a Raamahehe. <sup>12</sup> Engari whakawhiu noa ratou i a ratou, e hua tonu mai ana, e tupu ana. A pawera ana ratou i nga tama a Iharaira. <sup>13</sup> A nanakia noa iho te whakamahinga a nga Ihipiana i nga tama a Iharaira: <sup>14</sup> A meatia ana e ratou kia kawa ake ratou ki te ora, i te nui o te mahi, i te paru pokepoke, i te pereki, i nga mahi katoa o te mara, a ratou mahi katoa, i whakawhiua ai ratou ki te mahi.

<sup>15</sup> Na ka mea te kingi o Ihipa ki nga wahine whakawhanau i nga wahine a nga Hiperu; ko te ingoa o tetahi ko hipera, ko te ingoa hoki o tetahi ko Pua: <sup>16</sup> I ki ia, E whakawhanau korua i nga

wahine a nga Hiperu, a ka kite i a ratou i runga i nga kumete, ki te mea he tamaiti tane, whakamatea; he kotiro ia, kia ora tena. <sup>17</sup> Otira i wehi nga kaiwhakawhanau ki te Atua, kihai hoki i mea i ta te kingi o Ihipa i mea ai ki a raua, a whakaorangia ana e raua nga tamariki tane. <sup>18</sup> Na ka karangatia nga kaiwhakawhanau e te kingi o Ihipa, a ka mea ki a raua, Na te aha tenei mahi a korua, i whakaora ai korua i nga tamariki tane? <sup>19</sup> A ka mea nga kaiwhakawhanau ki a Parao, No te mea ra, ehara nga wahine a nga Hiperu i te pena me nga wahine a nga Ihipiana; e maia ana hoki ratou, kahore ano kia tae atu te kaiwhakawhanau ki a ratou kua whanau. <sup>20</sup> Na ka atawhai te Atua ki nga kaiwhakawhanau; a ka nui haere te iwi, a kaha rawa ana. <sup>21</sup> A, no te mea i wehi nga kaiwhakawhanau ki te Atua, ka hanga e ia he whare mo raua. <sup>22</sup> Na ka ako a Parao ki tona iwi katoa, ka mea, Ko nga tamariki tane katoa e whanau mai, maka atu e koutou ki te awa, ko nga kotiro katoa ia, me whakaora.

## Chapter 2

<sup>1</sup> Na ka haere tetahi tangata o te whare o Riwai, ka tango i tetahi tamahine a Riwai hei wahine. <sup>2</sup> A ka hapu te wahine, ka whanau he tane: a, ka kitea he tamaiti pai, e toru nga marama i huna ai ia e ia. <sup>3</sup> A, te ahei ia te huna tonu i a ia, ka tango ia i tetahi aaka kakaho mona, pani rawa ki te uku, ki te ware, a whaowhina ana te tamaiti ki roto; whakatakotoria iho ki roto ki nga wiwi i te pareparenga o te awa. <sup>4</sup> A tu ana i tawhiti tona tuahine, kia kite e ahatia ranei ia. <sup>5</sup> Na ko te haerenga iho o te tamahine a Parao ki te horoi; ko ana kotiro hoki e haere ana i te taha o te awa; a, ka kite ia i te aaka i roto i nga wiwi, ka ngare i tana kotiro ki te tiki. <sup>6</sup> A, no tana hurahanga ake, ka kite i te tamaiti; na, ka tangi te tamaiti. A ka aroha ia ki a ia, ka mea, No nga tamariki a nga Hiperu tenei. <sup>7</sup> Katahi ka mea tona tuahine ki te tamahine a Parao, Kia haere ahau ki te karanga i tetahi wahine whakangote o nga Hiperu ki a koe hei whakangote mau i te tamaiti? <sup>8</sup> A ka ki te tamahine a Parao ki a ia, Haere: a haere ana te kotiro, karanga ana i te whaea o te tamaiti. <sup>9</sup> A ka mea te tamahine a Parao ki a ia, Tangohia te tamaiti nei, whakangotea maku, a maku e hoatu he utu ki a koe. Na tango ana te wahine i te tamaiti, a whakangotea ana e ia. <sup>10</sup> A, ka nui te tamaiti, ka kawea e ia ki te tamahine a Parao, a ka waiho ia hei tama mana. A huaina iho e ia tona ingoa ko Mohi: i mea hoki, No te mea i toia ake ia e ahau i roto i te wai.

11 A i aua ra, ka kaumatuatia a Mohi, na ka haere ki ona tuakana, ka titiro hoki ki a ratou  
 kawenga: a ka kite ia i tetahi Ihipiana e patu ana i tetahi Hiperu, no ona tuakana. <sup>12</sup> Na ka tahurihuri  
 ia, a ka kite kahore he tangata, patua iho te Ihipiana, a huna iho ki te onepu. <sup>13</sup> A ka haere ia i te  
 rua o nga ra, na, tokorua nga tangata o nga Hiperu e whawhai ana ki a raua: a ka mea atu ia ki te  
 tangata nana te kino, He aha koe i patu ai i tou hoa? <sup>14</sup> Na ka mea tera, Na wai koe i ki hei rangatira,  
 hei kaiwhakawa mo matou? E mea ana koe ki te patu i ahau me koe i patu ra i te Ihipiana? A ka  
 wehi a Mohi, ka mea, Koia hoki, kua rangona tenei mea. <sup>15</sup> A ka rongoa Parao i taua mea, na ka  
 whai kia patua a Mohi. Otiia i rere a Mohi i te aroaro o Parao, a noho ana i te whenua o Miriana:  
 na kua noho ia ki te puna.  
 16 Na, tokowhitu nga tamahine a te tohunga o Miriana: a ka haere ratou, ka utuutu wai, ka  
 whakaki i nga waka, hei whakainu i nga hipi a to ratou papa. <sup>17</sup> A ko te haerenga o nga hepara,  
 kei te atiati i a ratou: a ka whakatika a Mohi ka araarai i a ratou, ka whakainu i a ratou hipi. <sup>18</sup> A  
 ka tae ratou ki a Reuere, ki to ratou papa, ka mea ia, Na te aha koutou i hohoro mai ai inaianei?  
 19 A ka mea ratou, Na tetahi Ihipiana i ora ai matou i te ringa o nga hepara, nana ano i utuutu he  
 wai ma matou, i whakainu hoki nga hipi. <sup>20</sup> Na ka mea ia ki ana tamahine, A kei hea ia? He aha  
 taua tangata i whakarerea ai e koutou? karangatia ki te kai taro. <sup>21</sup> A i pai a Mohi ki te noho ki taua  
 tangata; a ka homai e ia a Hipora, tana tamahine, ki a Mohi. <sup>22</sup> A ka whanau ia, he tane, a huaina  
 iho e ia tona ingoa ko Kerehoma. I mea hoki ia, He manene ahau i te whenua ke.  
 23 Na i muri i nga ra e maha ka mate te kingi o Ihipa; a ka hotu te manawa o nga tama a Iharaira  
 i te whakamahinga, a aue ana ratou; a ka puta ake ta ratou aue ki te Atua, no ratou hoki e whakamahia  
 ana. <sup>24</sup> A ka rongoa te Atua ki ta ratou tangi, ka mahara te Atua ki tana kawenata ki a Aperahama,  
 ki a Hakopa, ki a Ihaka. <sup>25</sup> Na ka titiro te Atua ki nga tama a Iharaira, a ka mohio te Atua ki a ratou.

### Chapter 3

1 Na, i te tiaki a Mohi i nga hipi a tona hungawai, a Ietoro, tohunga o Miriana; a ka arahi ia i  
 nga hipi ki te taha ki muri o te koraha, ka tae ki te maunga o te Atua, ki Horepa. <sup>2</sup> A ka puta ki a  
 ia te anahera a Ihowa i roto i te mura ahi, i waenganui o tetahi rakau; a ka titiro ia, na, e toro ana

te rakau i te ahi, a kihai i pau te rakau. <sup>3</sup> Na ka mea a Mohi, Ka tahuri ahau, ka matakītaki atu ki tenei mea nui kua puta nei, he aha te rakau te pau ai. <sup>4</sup> A ka kite a Ihowa e tahuri ana ia ki te matakītaki, ka karanga te Atua ki a ia i waenganui o te rakau, ka mea, E Mohi, e Mohi! A ka mea ia, Tenei ahau. <sup>5</sup> Na ka mea ia, Kaua e whakatata mai ki konei; wetekina ou hu i ou waewae, ko te wahi hoki e tu na koe, he wahi tapu. <sup>6</sup> Ka mea ano ia, Ko ahau te Atua o tou papa, te Atua o Aperahama, te Atua o Ihaka, te Atua o Hakopa. A huna ana a Mohi i tona kanohi; i wehi hoki ia ki te titiro atu ki te Atua.

<sup>7</sup> A ka mea a Ihowa, Kua kite pu ahau i te tukino o taku iwi i Ihipa, kua rongu hoki ki ta ratou aue i o ratou kaiakiaki; e mohio ana hoki ahau ki o ratou mamae; <sup>8</sup> A kua heke iho nei ahau ki te whakaora i a ratou i te ringa o nga Ihipiana, ki te kawē atu i a ratou i tera whenua ki tetahi whenua pai, whenua nui, ki tetahi whenua e rerengia ana e te waiu, e te honi, ki te wahi o nga Kanaani, o nga Hiti, o nga Amori, o nga Perihi, o nga Hiwi, o nga Iepuhi. <sup>9</sup> Na, kua tae ake te karanga a nga tama a Iharaira ki ahau: kua kite hoki ahau i te tukino e tukinotia nei ratou e nga Ihipiana. <sup>10</sup> Na reira, haere mai, maku koe e unga ki a Parao, a mau e whakaputa mai taku iwi, nga tama a Iharaira, i Ihipa.

<sup>11</sup> Na ka mea a Mohi ki te Atua, He aha ahau, kia haere ahau ki a Parao, kia whakaputa mai hoki i nga tama a Iharaira i Ihipa? <sup>12</sup> A ka mea ia, Kei a koe tonu ra ahau: ko te tohu ano tenei mou ka unga nei e ahau: ka whakaputaina mai e koe te iwi i Ihipa, ka mahi koutou ki te Atua ki runga i tenei maunga. <sup>13</sup> Na ka mea a Mohi ki te Atua, Na ka tae ahau ki nga tama a Iharaira, ka mea ki a ratou, Na te Atua o o koutou matua ahau i ngare mai ki a koutou; a ka mea mai ratou ki ahau, Ko wai tona ingoa? Me pehea atu ahau ki a ratou? <sup>14</sup> Na ka mea te Atua ki a Mohi, Ko AHAU ANO AHAU NEI: i mea ano ia, Kia penei atu koe ki nga tama a Iharaira, Na te AHAU NEI ahau i ngare mai ki a koutou. <sup>15</sup> A ka mea ano te Atua ki a Mohi, Kia penei atu koe ki nga tama a Iharaira, Na Ihowa, na te Atua o o koutou matua, na te Atua o Aperahama, na te Atua o Ihaka, na te Atua hoki o Hakopa, i tonu mai ahau ki a koutou; ko toku ingoa tenei ake ake, ko t oku whakamaharatanga hoki tenei ki nga whakapaparanga katoa.

<sup>16</sup> Haere, whakaminea nga kaumatua o Iharaira, mea atu ki a ratou, Kua puta mai ki ahau a Ihowa, te Atua o o koutou matua, te Atua o Aperahama, o Ihaka, o Hakopa: e ai tana, Kua tikina mai, kua tirohia marietia koutou e ahau, me nga mea e meatia ana ki a koutou i Ihipa: <sup>17</sup> Kua mea nei ano ahau, ka whakaputaina mai koutou e ahau i te whakawhiu a Ihipa ki te whenua o nga Kanaani, o nga Hiti, o nga Amori, o nga Perihi, o nga Hiwi, o nga Iepuhi, ki te whenua e rerengia ana e te waiu, e te honi. <sup>18</sup> A e rongu ratou ki tou reo; a ka haere koe, koutou tahi ko nga kaumatua

o Iharaira, ki te kingi o Ihipa, ka mea ki a ia, Kua tutaki a Ihowa, te Atua o nga Hiperu ki a matou: tukua matou kia haere, kia toru nga ra e haere ana i te koraha, kia pat u ai matou he whakahere ma Ihowa, ma to matou Atua. <sup>19</sup> A e mohio ana ahau e kore te kingi o Ihipa e tuku i a koutou, kahore, <sup>20</sup> ki te kahore he ringa kaha. A ka takiritia toku ringa, ka patua hoki a Ihipa ki aku merekara katoa, e mea ai ahau i waenganui ona; a, muri iho, ka tukua mai koutou e ia. <sup>21</sup> A maku e mea kia paingia tenei iwi i te aroaro o nga Ihipiana: a ka haere koutou, e kore e haere kau; <sup>22</sup> Engari me tonono e ia wahine, e ia wahine, ki tona hoa tata, ki te wahine hoki e noho ana i tona whare, he mea hiriwa, he mea korua, he kakahu; a ka hoatu ki a koutou tama, ki a koutou tamahine; a ka pahuatia e koutou nga Ihipiana.

#### Chapter 4

<sup>1</sup> A Ka whakahoki a Mohi, ka mea, Na, e kore ratou e whakapono ki ahau, e kore hoki e whakarongo ki toku reo; e mea hoki ratou, Kahore a Ihowa i puta mai ki a koe. <sup>2</sup> A ka mea a Ihowa ki a ia, He aha tena i tou ringa? A ka mea ia, He tokotoko. <sup>3</sup> Na ka mea ia, Maka atu ki te whenua. Na maka ana e ia ki te whenua, na, he nakahi! ko te tino rerenga o Mohi i tona aroaro. <sup>4</sup> Ka mea ano a Ihowa ki a Mohi, Totoro atu tou ringa, hopukia i te hiku: ko te toronga atu o tona ringaringa, hopukina iho, na, kua tokotoko ano ki tona ringa. <sup>5</sup> Kia whakapono ai ratou kua puta ki a koe a Ihowa, te Atua o o ratou matua, te Atua o Aperahama, te Atua o Ihaka, te Atua o Hakopa. <sup>6</sup> I mea ano a Ihowa ki a ia, Tena, kuhua tou ringa ki tou uma: a kuhua ana e ia tona ringa ki tona uma; te unuhanga ano, na, kua repera tona ringa, kua rite ki te hukarere. <sup>7</sup> I mea ano ia, Whakahokia ano tou ringa ki tou uma: a whakahokia ana ano e ia tona ringa ki tona uma; a, no te unuhanga i tona uma, na, kua hoki, kua rite ki tona kiri ano. <sup>8</sup> A, ki te kore ratou e whakapono ki a koe, ki te kore e whakarongo ki te reo o te tohu tuatahi, na, ka whakapono ki te reo o to muri tohu. <sup>9</sup> A, ki te kore ano ratou e whakapono ki enei tohu e rua, ki te kore e whakarongo ki tou reo, utuhia e koe ki te wai o te awa, ka riringi ki te oneone maroke; a, ko te wai e utuhia e koe i te awa, hei toto ki runga ki te whenua maroke. <sup>10</sup> Na ka ki a Mohi ki a Ihowa, E toku Ariki, ehara ahau i te pukorero, i mua, i muri ranei i tau korerotanga ki tau pononga; he reo ngoikore hoki toku he arero paremo. <sup>11</sup> Na ka mea a Ihowa ki a ia, Na wai i hunga te mangai o te tangata? Na wai hoki i mea kia wahangu, kia turi, kia titiro

ranei, kia matapo ranei? Ehara koia i ahau, i a Ihowa? <sup>12</sup> Na, haere, a hei tou waha ahau, ako ai i  
 a koe ki tau e korero ai. <sup>13</sup> Na ka mea ia, E toku Ariki, mau ra e nga tau e unga ai. <sup>14</sup> Na ka mura  
 te riri a Ihowa ki a Mohi; ka mea ia, Ehara ianei a Arona Riwaiti i te tuakana nou? E matau ana  
 ahau he pukorero ia. Ina hoki, na, e haere mai nei ia ki te whakataui i a koe; a, ka kite i a koe, ka  
 koa tona ngakau. <sup>15</sup> A mau e korero ki a ia, e hoatu nga kupu ki tona waha: a hei tou mangai ahau,  
 hei tona mangai hoki, whakaako ai i a korua ki ta korua e mea ai. <sup>16</sup> A ko ia hei kaikorero mau ki  
 te iwi; a, ko ia, ina, ka ai ia hei mangai mou, ko koe hoki hei atua ki a ia. <sup>17</sup> Maua atu ano tenei  
 tokotoko i tou ringa, e mea ai koe i nga tohu.  
<sup>18</sup> Na haere ana a Mohi, hoki ana ki a Ietoro, ki tona hungawai, a ka mea ki a ia, Tukua ahau  
 kia haere, kia hoki ki oku tuakana i Ihipa, kia kite kei te ora ano ranei ratou. A ka mea a Ietoro ki  
 a Mohi, Haere i runga i te pai. <sup>19</sup> I mea ano a Ihowa ki a Mohi i Miriana, Haere, e hoki ki Ihipa:  
 kua mate katoa hoki nga tangata i whai i a koe kia patua. <sup>20</sup> Na ka mau a Mohi ki tana wahine ratou  
 ko ana tama, a whakanohoa ana ki runga ki te kaihe, a hoki ana ki te whenua o Ihipa: i tango ano  
 a Mohi i te tokotoko a te Atua ki tona ringa. <sup>21</sup> I mea ano a Ihowa ki a Mohi, E haere koe, e hoki  
 ki Ihipa, kia mahara kia meatia ki te aroaro o Parao ena merekara katoa kua hoatu na e ahau ki tou  
 ringa: otiia maku e whakapakeke tona ngakau, kia kore ai ia e tuku i te iwi. <sup>22</sup> A ka mea koe ki a  
 Parao, Ko te kupu tenei a Ihowa, Ko Iharaira taku tama, taku matamua: <sup>23</sup> Ko taku kupu ano tenei  
 ki a koe, Tukua taku tama kia mahi ki ahau: a ki te kore koe e rongu ki te tuku i a ia, na, ka patua  
 e ahau tau tama, tau matamua.  
<sup>24</sup> A i a ratou i te whare tira i te ara, na pono pu a Ihowa ki a ia, a ka whai i a ia kia whakamatea.  
<sup>25</sup> A ka tango a Hipora i tetahi kohatu koi, a kotia iho te kiri matamata o tana tama, na whakapakia  
 ana e ia ki ona waewae, ka mea, He tane toto koe ki ahau. <sup>26</sup> Heoi ka tuku atu ia i a ia: i reira ano  
 ka mea te wahine, He tane toto koe; mo te kotinga hoki. <sup>27</sup> Na ka mea a Ihowa ki a Arona, Haere  
 ki te koraha, ki te whakataui i a Mohi, A haere ana ia, a ka tutaki ki a ia ki te maunga o te Atua, ka  
 kihi i a ia. <sup>28</sup> A korerotia ana e Mohi ki a Arona nga kupu katoa a Ihowa i unga nei i a ia, me nga  
 tohu katoa i ako ai ia ki a ia. <sup>29</sup> Na haere ana a Mohi raua ko Arona, a whakaminea ana nga kaumatua  
 katoa o nga tama a Iharaira: <sup>30</sup> Na korerotia ana e Arona nga kupu katoa i korero ai a Ihowa ki a  
 Mohi, mahia ana hoki e ia nga tohu i te tirohanga a te iwi. <sup>31</sup> A whakapono tonu te iwi: a, ka rongu  
 ratou kua tae mai a Ihowa ki nga tama a Iharaira, kua titiro ki to ratou whakawhiunga, ka tuohu  
 ratou, ka koropiko.

## Chapter 5

<sup>1</sup> A muri iho, ka haere a Mohi raua ko Arona, ka korero ki a Parao, Ko te kupu tenei a Ihowa, a te Atua o Iharaira, Tukua taku iwi kia haere ki te taka hakari ki ahau i te koraha. <sup>2</sup> Na ka mea a Parao, Ko wai a Ihowa, kia rongohia ahau ki tona reo, kia tukua a Iharaira? Kahore ahau e mohio ki a Ihowa, e kore hoki e tukua atu e ahau a Iharaira.

<sup>3</sup> A ka mea raua, Kua tutaki te Atua o nga Hiperu ki a matou: kia haere ra matou, kia toru nga ra ki te ara i te koraha, ka mea patunga tapu ai matou ki a Ihowa, ki to matou Atua; kei torere mai ia ki a matou i te mate uruta ranei, i te hoari ranei. <sup>4</sup> Na ka mea te kingi o Ihipa ki a raua, He aha korua, e Mohi korua ko Arona, i whakaware ai i te iwi ki a ratou mahi? haere ki a koutou kawenga.

<sup>5</sup> I mea ano a Parao, Nana, ka tini nei nga tangata o te whenua, na korua hoki ratou i noho ai i a ratou kawenga. <sup>6</sup> Na ka ako a Parao i taua ra ki nga kaiakiaki o te iwi, ki o ratou rangatira, ka mea,

<sup>7</sup> Kua e hoatu he takakau ki te iwi a muri ake nei, hei hanga pereki, pera i o mua ra: me haere ratou ki te kohikohi takakau ma ratou. <sup>8</sup> Otiia, whakaritea ki a ratou kia rite tonu nga pereki te maha ki era i hanga e ratou i mua; kua e whakahokia iho te maha; he mangere hoki ratou; koia ratou i karanga ai, i mea ai, Kia haere matou ki te mea patunga tapu ki to matou Atua. <sup>9</sup> Whakanuia te mahi ma nga tangata ra, a ko tena hei mahi ma ratou; kua hoki ratou e whakarongo ki nga kupu horihori.

<sup>10</sup> Na ka haere nga kaiakiaki o te iwi, me o ratou rangatira, ka korero ki te iwi, ka mea, Ko te kupu tenei a Parao, e kore e hoatu e ahau he takakau ki a koutou. <sup>11</sup> Haere ki te kohikohi takakau ma koutou i te wahi e kitea ai e koutou: otiia, kua e whakahokia iho tetahi wahi o ta koutou e mahi

<sup>12</sup> ai. Na ka marara noa atu te iwi ki te whenua katoa o Ihipa, ki te kohikohi putake witi hei takakau.

<sup>13</sup> A ka whakatatutatu nga kaiakiaki, ka mea, Whakaotia a koutou mahi, to tenei rangi, to tenei rangi, kia rite ki o te wa i whai takakau ai. <sup>14</sup> Na ka whiua nga rangatira o nga tama a Iharaira i whakaritea mo ratou e nga kaiakiaki a Parao, ka mea ratou, He aha te whakaotia ai inanahi, inaianei, a koutou pereki i whakaritea ki a koutou, te pera ai me o mua ra?

<sup>15</sup> Na ka haere nga rangatira o nga tama a Iharaira, me te tangi ano, ki a Parao, ka mea, He aha koe i penei ai ki au pononga? <sup>16</sup> Kahore he takakau i homai ki au pononga, a e mea ana ratou ki a

<sup>17</sup> matou, Hanga he pereki: na ka whiua au pononga; no au tangata ia te he. Na ka mea ia, He mangere koutou, he mangere; na reira koutou ka mea ai, Tukua matou kia haere ki te mea patunga

18  
 tapu ki a Ihowa. Na, haere, e mahi; e kore hoki e hoatu he takakau ki a koutou; otiia me homai  
 19  
 ano nga pereki i whakaritea ra. Na, ka kite nga rangatira o nga tama a Iharaira i te kino mo ratou,  
 i te kianga ra, Kaua e whakaokuokutia iho a koutou pereki, hei mahinga ma koutou i tenei ra, i  
 20  
 tenei ra. A ka tutaki ratou ki a Mohi raua ko Arona, e tu mai ana i mua i a ratou, i to ratou  
 21  
 haerenga mai i a Parao: A ka mea ki a raua, Ma Ihowa e titiro ki a korua, e whakawa; na korua  
 hoki matou i piro whakarihariha ai ki te aroaro o Parao, ki te aroaro hoki o ana pononga, na korua  
 22  
 i hoatu he hoari ki o ratou ringa hei patu i a matou. Na ka hoki a Mohi ki a Ihowa, a ka mea, E  
 23  
 te Ariki, he aha koe i mahi he ai ki tenei iwi? he aha koe i unga ai i ahau? No toku haerenga atu  
 hoki ki a Parao ki te korero i runga i tou ingoa, i kino ai ia ki tenei iwi; kahore ano hoki koe kia  
 whakaora noa i tau iwi, kahore rawa.

## Chapter 6

1  
 NA ka mea a Ihowa ki a Mohi, Akuanei koe kite ai i taku e mea ai ki a Parao; he kaha hoki  
 2  
 te ringa e tuku ai ia i a ratou, he kaha hoki te ringaringa e pei ai ia i a ratou i tona whenua. A ka  
 3  
 korero te Atua ki a Mohi, ka mea ki a ia, Ko Ihowa ahau: I oku putanga ia ki a Aperahama, ki a  
 Ihaka, ki a Hakopa, ko te Atua Kaha Rawa ahau, otiia kihai ratou i mohio ki ahau, ko IHOWA toku  
 4  
 ingoa. Ka whakamana ano e ahau taku kawenata ki a ratou, kia hoatu te whenua o Kanaana ki a  
 5  
 ratou, te whenua o to ratou nohoanga manenetanga, i noho manene ai ratou. Kua rongo ano ahau  
 ki te aue a nga tama a Iharaira, e whakamahia nei e nga Ihipiana, kua mahara hoki ki taku kawenata.  
 6  
 Mo konei me ki e koe ki nga tama a Iharaira, Ko Ihowa ahau, a maku koutou e whakaputa i raro  
 i nga kawenga a nga Ihipiana, maku hoki koutou e tango i ta ratou whakamahinga, he maro hoki  
 7  
 te ringa, he nui nga whakawa, e whakaora ai ahau i a koutou: A ka tongo ahau i a koutou hei iwi  
 maku, ko ahau ano hei Atua mo koutou: a e mohio koutou ko Ihowa ahau, ko to koutou Atua, e  
 8  
 whakaputa ana i a koutou i raro i nga kawenga a nga Ihipiana. Maku ano hoki koutou e kawea atu  
 ki te whenua i whakamaro ai ahau i toku ringaringa mo reira kia hoatu ki a Aperahama, ki a Ihaka,  
 9  
 ki a Hakopa: a ka hoatu a reira e ahau ki a koutou hei kainga tuturu: ko Ihowa ahau. A he pena  
 ta Mohi korero ki nga tama a Iharaira: otiia kihai ratou i whakarongo ki a Mohi i te mamae o te  
 ngakau, i te kino o te mahi.



<sup>10</sup> I korero ano a Ihowa ki a Mohi, i mea, <sup>11</sup> Haere, korero ki a Parao kingi o Ihipa kia tukua  
 e ia nga tama a Iharaira i tona whenua. <sup>12</sup> Na ka korero a Mohi i te aroaro o Ihowa, ka mea, Nana,  
 kahore nga tama a Iharaira i whakarongo ki ahau; me pehea e rongoi ai a Parao ki ahau, he ngutu  
<sup>13</sup> kokotikore nei hoki ahau? Na ka korero a Ihowa ki a Mohi raua ko Arona, homai ana e ia ki a  
 raua he ako ki nga tama a Iharaira, ki a Parao hoki kingi o Ihipa, mo nga tama a Iharaira kia  
 whakaputaina i te whenua o Ihipa.  
<sup>14</sup> Ko nga upoko enei o nga whare o o ratou matua: ko nga tama a Reupena matamua a Iharaira;  
<sup>15</sup> ko Hanoka, ko Paru, ko Heterono, ko Karami: ko nga hapu enei o Reupena. Na ko nga tama a  
 Himiona, ko Iemuere, ko Iamini, ko Ohara, ko Iakini, ko Tohara, ko Hauru, he tama na tetahi wahine  
<sup>16</sup> o nga Kanaani: ko nga hapu enei o Himiona. Na ko nga ingoa enei o nga tama a Riwai i o ratou  
 whakatupuranga; ko Kerehona, ko Kohata, ko Merari: ko nga tau hoki i ora ai a Riwai, kotahi rau  
<sup>17</sup> e toru tekau ma whitu tau. Ko nga tama a Kerehona; ko Ripini, ko Himeia, i o raua hapu. <sup>18</sup> Ko  
 nga tama a Kohata; ko Amarama, ko Itihara, ko Hepurona, ko Utiere: a, ko nga tau i ora ai a Kohata,  
<sup>19</sup> kotahi rau e toru tekau ma toru nga tau. Ko nga tama a Merari; ko Mahari, ko Muhi. Ko nga  
<sup>20</sup> hapu enei o Riwai i o ratou whakatupuranga. A i tango a Amarama i a Iokepete, tuahine o tona  
 papa, hei wahine mana; a whanau ake ana ko Arona raua ko Mohi. Ko nga tau hoki i ora ai a  
<sup>21</sup> Amarama, kotahi rau e toru tekau ma whitu tau. Ko nga tama a Itihara; ko Koraha, ko Nepeke,  
<sup>22</sup> ko Tikiri. Ko nga tama a Utiere; ko Mihaera, ko Eritapana, ko Hitiri. <sup>23</sup> A ka tango a Arona i  
 a Erihepa tamahine a Aminarapa, i te tuahine o Nahona, hei wahine mana; a whanau ake ana ko  
<sup>24</sup> Natapa, ko Apihu, ko Ereatara, ko Itamara. Ko nga tama a Koraha: ko Ahira, ko Erekena, ko  
<sup>25</sup> Apihapa: ko nga hapu enei o nga Korahi. A i tango a Ereatara tama a Arona i tetahi o nga  
 tamahine a Putiera hei wahine mana; a whanau ake tana ko Pinehaha: ko nga upoko enei o nga  
<sup>26</sup> matua o nga Riwaiti puta noa i o ratou hapu. Ko taua Arona raua ko Mohi tenei i korero nei a  
 Ihowa ki a raua, kia whakaputaina mai nga tama a Iharaira i te whenua o Ihipa, tenei ropu, tenei  
<sup>27</sup> ropu o ratou. Ko raua enei nana i korero ki a Parao kingi o Ihipa, kia whakaputaina mai nga  
<sup>28</sup> tama a Iharaira i Ihipa: ko taua Mohi raua ko Arona tenei. A i te ra ano i korero ra a Ihowa ki a  
<sup>29</sup> Mohi i te whenua o Ihipa, Ka korero a Ihowa ki a Mohi, ka mea, Ko Ihowa ahau: korerotia ki  
<sup>30</sup> a Parao kingi o Ihipa nga mea katoa e korero nei ahau ki a koe. A ka mea a Mohi i te aroaro o  
 Ihowa, Nana, he ngutu kokotikore ahau, a me pehea e rongoi ai a Parao ki ahau?

## Chapter 7

<sup>1</sup> A ka mea a Ihowa ki a Mohi, Na, kua oti koe te mea e ahau hei atua ki a Parao; ko Arona hoki, ko tou tuakana, hei poropiti mau. <sup>2</sup> Korerotia nga mea katoa e ki ai ahau ki a koe; a ma Arona, ma tou tuakana, e korero ki a Parao, kia tukua e ia nga tama a Iharaira i tona whenua. <sup>3</sup> A maku e whakapakeke te ngakau o Parao, e whakamaha hoki aku tohu me aku merekara ki te whenua o Ihipa. <sup>4</sup> Otiia e kore a Parao e rongu ki a korua, a ka pa toku ringa ki Ihipa, he nui ano hoki nga whakawa e whakaputaina ai e ahau aku mano tini, taku iwi, nga tama a Iharaira, i te whenua o Ihipa. <sup>5</sup> A e mohio nga Ihipiana ko Ihowa ahau, ina totoro toku ringa ki Ihipa, a ka whakaputaina mai e ahau nga tama a Iharaira i roto i a ratou. <sup>6</sup> I mea ano a Mohi raua ko Arona i ta Ihowa i whakahau ai ki a raua, pera ana raua. <sup>7</sup> A e waru tekau nga tau o Mohi, e waru tekau ma toru nga tau o Arona, i ta raua korerotanga ki a Parao. <sup>8</sup> A i korero a Ihowa ki a Mohi raua ko Arona, i mea, <sup>9</sup> Ki te puta ki a korua ta Parao kupu, Tena koa, tetahi merekara i a korua; ko reira koe mea ai ki a Arona, E mau ki tau tokotoko, maka iho ki te aroaro o Parao, a ka nakahi. <sup>10</sup> Na ka haere a Mohi raua ko Arona ki a Parao, a peratia ana e raua me ta Ihowa i mea ai: maka iho ana e Arona tona tokotoko ki te aroaro o Parao, ki te aroaro hoki o ana tangata, na, kua nakahi. <sup>11</sup> Na ka karanga hoki a Parao i nga tangata mohio, i nga tohunga maori: na, ko ratou, ko nga tohunga o Ihipa, i pera ano ratou ki a ratou nei karakia maori. <sup>12</sup> Maka iho ana hoki e tenei, e tenei, a ratou tokotoko, a nakahi ana: otiia i horomia a ratou tokotoko e te tokotoko a Arona. <sup>13</sup> Na ka whakapakeketia e ia te ngakau o Parao, a kihai ia i rongu ki a raua, ko ta Ihowa hoki i ki ai. <sup>14</sup> I mea ano a Ihowa ki a Mohi, E pakeke ana te ngakau o Parao, kahore ia e whakaae ana ki te tuku i te iwi. <sup>15</sup> Haere ki a Parao i te ata, na, e haere ana ia ki te wai; a hei te pareparenga o te awa tu atu ai koe ki a ia; ko te tokotoko hoki i nakahi ra, maua i tou ringa. <sup>16</sup> A ka mea koe ki a ia, Na Ihowa, na te Atua o nga Hiperu ahau i unga mai ki a koe; e mea ana ia, Tukua taku iwi kia mahi ki ahau i te koraha: titiro, kahore koe kia rongu a mohoa noa nei. <sup>17</sup> Ko te kupu tenei a Ihowa, ma konei e mohio ai koe ko Ihowa ahau: nana, maku e patu nga wai i te awa ki te tokotoko i toku ringa, a ka riro ke hei toto. <sup>18</sup> E mate hoki nga ika i roto i te awa, a e piro te awa; a e anuanu nga Ihipiana ki te inu i te wai o te awa. <sup>19</sup> A i korero a Ihowa ki a Mohi, Mea atu ki a Arona, E mau ki tau tokotoko, totoro hoki tou ringa ki nga wai o Ihipa, ki o ratou wai e rere ana, ki o ratou awa, ki

o ratou roto, ki o ratou huihuinga wai katoa, kia meinga ai hei toto; a ka whai toto nga oko rakau,  
<sup>20</sup>  
kohatu hoki, i te whenua katoa o Ihipa. A peratia ana e Mohi raua ko Arona me ta Ihowa i ako  
ai; hapainga ana e ia te tokotoko, patua ana ki nga wai o te awa, i te tirohanga a Parao, i te tirohanga  
<sup>21</sup>  
ano hoki a ana tangata; a riro ke ana hei toto nga wai katoa o te awa. A mate ana nga ika i te  
awa; a piro ana te awa, kihai hoki i ahei i nga Ihipiana te inu i te wai o te awa: na he toto tera i te  
<sup>22</sup>  
whenua katoa o Ihipa. A, peratia ana e nga tohunga o Ihipa ki a ratou na mahi maori: a ka  
whakapakeketia te ngakau o Parao, kahore hoki ia i whakarongo ki a raua; i rite tonu ki ta Ihowa  
<sup>23</sup>  
i korero ai. Na tahuri ana a Parao, haere ana ki roto ki tona whare, kihai ano hoki i whakaanga  
<sup>24</sup>  
i tona ngakau ki tenei. Na ka keru nga Ihipiana katoa ki nga taha o te awa i te wai hei inu; kihai  
<sup>25</sup>  
hoki i ahei te inu i te wai o te awa. Na kua rite nga ra e whitu i muri i ta Ihowa patunga i te awa.

## Chapter 8

<sup>1</sup>  
Na ka korero a Ihowa ki a Mohi, Haere ki a Parao, mea atu ki a ia, Ko te kupu tenei a Ihowa,  
<sup>2</sup>  
Tukua taku iwi kia haere, kia mahi ratou ki ahau. A ki te kore koe e rongu ki te tuku i a ratou,  
<sup>3</sup>  
na, ka patua e ahau ou rohe katoa ki te poroka. A ka ngahuehue ake te poroka i te awa, ka tae  
ratou ki tou whare, ki tou whare moenga, ki runga hoki ki tou moenga, ki roto hoki ki te whare o  
ou tangata, ki runga hoki ki tou iwi, ki roto ki au oumu, ki roto hoki ki au pokepokenga paraoa:  
<sup>4</sup>  
A e haere ake te poroka ki runga ki a koe, ki runga ki tou iwi, ki runga hoki ki ou tangata katoa.  
<sup>5</sup>  
I korero ano a Ihowa ki a Mohi, Mea atu ki a Arona, Totoro tou ringa, me tau tokotoko, ki nga  
<sup>6</sup>  
wai e rere ana, ki nga awa, ki nga roto, kia haere ake ai nga poroka ki te whenua o Ihipa. A ka  
totoro atu te ringa o Arona ki nga wai o Ihipa; na kua puta ake te poroka, a kapi ana te whenua o  
<sup>7</sup>  
Ihipa. A i peratia ano e nga tohunga ki a ratou karakia maori, a whakaputaina ake ana e ratou te  
<sup>8</sup>  
poroka ki te whenua o Ihipa. Na ka karanga a Parao ki a Mohi raua ko Arona, ka mea, Inoi atu  
ki a Ihowa, kia tangohia e ia nga poroka i ahau, i toku iwi hoki; a ka tuku ahau i te iwi ki te mea  
<sup>9</sup>  
patunga tapu ki a Ihowa. Na ka mea a Mohi ki a Parao, Kia whakanuia ake koe i ahau; ahea inoi  
ai ahau mou, mo ou tangata, mo tou iwi hoki, kia whakakahoretia atu nga poroka i a koe, i ou whare  
<sup>10</sup>  
ano hoki, kia toe ki te awa anake? A ka mea ia, Hei apopo. Na ka mea ia, Kia rite ki tau na, kia  
<sup>11</sup>  
mohio ai koe kahore tetahi e rite ana ki a Ihowa, ki to matou Atua. A ka mawehe atu i a koe nga

poroka, i ou whare hoki, i ou tangata, i tou iwi ano hoki; a e toe ki te awa anake. <sup>12</sup> Na ka haere atu a Mohi raua ko Arona i a Parao: a ka karanga a Mohi ki a Ihowa, mo nga poroka i whakamuia

ake e ia ki a Parao. <sup>13</sup> A peratia ana e Ihowa me ta Mohi i mea ai; na ka mate atu nga poroka i nga

whare, i nga kainga, i nga mara ano hoki. <sup>14</sup> A apoapohia ana e ratou, puranga atu, puranga atu:

a, piro ana te whenua. <sup>15</sup> Otira i te kitenga o Parao ka whai taanga manawa, ka whakapakeke ano i tona ngakau, kahore hoki i rongu ki a raua; ko ta Ihowa hoki i ki ai.

<sup>16</sup> Na ka mea a Ihowa ki a Mohi, Mea atu ki a Arona, Totoro tau tokotoko, patua te puehu o

te whenua, kia kutu ai ki te whenua katoa o Ihipa. <sup>17</sup> A pera ana raua; ko te toronga atu o te ringa o Arona me tana tokotoko, patua ana te puehu o te whenua, a ka meinga hei kutu ki te tangata, ki

te kararehe; he kutu kau te puehu katoa o te oneone, i te whenua katoa o Ihipa. <sup>18</sup> A pera ana ano nga tohunga ki a ratou mahi maori, kia puta ai te kutu; kihai ia i taea e ratou; a muia ana te tangata

me te kararehe e te kutu. <sup>19</sup> Na ka mea nga tohunga ki a Parao, Na te matikara o te Atua tenei: a ka whakapakeketia te ngakau o Parao, kihai hoki ia i rongu ki a raua: ko ta Ihowa hoki i ki ai.

<sup>20</sup> Na ka mea a Ihowa ki a Mohi, Maranga wawe i te ata, e tu ki te aroaro o Parao; na, e haere

ana ia ki te wai; mea atu ki a ia, Ko te kupu tenei a Ihowa, Tukua taku iwi ki te mahi ki ahau. <sup>21</sup> A ki te kahore koe e tuku i taku iwi, na, ka tukua atu e ahau nga pokai namu ki a koe, ki ou tangata, ki tou iwi, ki ou whare; e ki hoki nga whare o nga Ihipiana i nga pokai namu, me te whenua e noho

nei ratou. <sup>22</sup> A ka wehea atu e ahau i taua ra te whenua o Kohena, e noho nei taku iwi, kei whai

pokai namu a reira; kia mohio ai koe ko Ihowa ahau i waenganui o te whenua. <sup>23</sup> Ka whakatakoto

arai ano ahau ki waenganui o taku iwi, o tou iwi: ko apopo tenei tohu meatia ai. <sup>24</sup> A pera ana a Ihowa; na kua tae mai nga pokai namu, tona nanakia ra, ki te whare o Parao, ki nga whare o ana

tangata, ki te whenua katoa ano hoki o Ihipa; a ngaro ana te whenua i te huihuinga namu. <sup>25</sup> Na ka karanga a Parao ki a Mohi raua ko Arona, ka mea, Haere, meatia he patunga tapu ki to koutou

Atua, ki te whenua nei. <sup>26</sup> Na ka mea a Mohi, E kore e pai kia pena; ka patua hoki e matou ma Ihowa, ma to matou Atua, ta nga Ihipiana e morikarika ai: na, ki te patua e matou ki to ratou aroaro

nga mea e morikarika ai nga Ihipiana, e kore ranei ratou e aki i a matou ki te kohatu? <sup>27</sup> Ka haere matou ki te koraha, kia toru nga ra ki te ara, ka mea patunga tapu ai ki a Ihowa, ki to matou Atua,

ka pera ai me tana e ako ai ki a matou. <sup>28</sup> Na ka mea a Parao, Ka tukua koutou ki te mea patunga tapu ma Ihowa, ma to koutou Atua, ki te koraha; otiia aua e haere rawa ki tawhiti: inoi korua moku.

<sup>29</sup> A ka mea a Mohi, Nana, ka mawehe atu ahau i a koe, ka inoi ahau ki a Ihowa kia turere atu nga

pokai namu i a Parao, i ona tangata, i tona iwi apopo; otiia kaua a Parao e tinihanga ano, a kore ake  
 e tuku i te iwi ki te mea patunga tapu ki a Ihowa. <sup>30</sup> Na, ka mawehe a Mohi i a Parao, a ka inoi ki  
 a Ihowa. <sup>31</sup> A peratia ana e Ihowa me ta Mohi i mea ai; i mea ia i nga pokai namu kia rere atu i a  
 Parao, i ona tangata, i tona iwi: kihai i toe tetahi. <sup>32</sup> Na ka whakapakeke ano a Parao i tona ngakau  
 i taua taima hoki, a kihai i tuku i te iwi.

## Chapter 9

<sup>1</sup> Na ka mea a Ihowa ki a Mohi, Haere ki a Parao, mea atu ki a ia, Ko te kupu tenei a Ihowa, a  
 te Atua o nga Hiperu, Tukua taku iwi kia haere ki te mahi ki ahau. <sup>2</sup> Ki te kore hoki koe e rongu  
 ki te tuku, ki te pupuri tonu i a ratou; <sup>3</sup> Nana, ka pa te ringa o Ihowa ki au kararehe i te parae, ki  
 nga hoiho ki nga kaihe, ki nga kamera, ki nga kau, ki nga hipi: ka pa he mate kino rawa. <sup>4</sup> A e  
 wehewehe a Ihowa i nga kararehe a Iharaira, i nga kararehe a Ihipa: e kore e mate tetahi o nga mea  
 katoa a nga tama a Iharaira. <sup>5</sup> I whakaritea ano e Ihowa he taima, i mea ia, Ko apopo a Ihowa mea  
 ai i tenei mea ki te whenua. <sup>6</sup> I te aonga ake ka meatia taua mea e Ihowa, a mate iho nga kararehe  
 katoa o Ihipa; ko nga kararehe ia a nga tama a Iharaira, kihai i mate tetahi. <sup>7</sup> Na ka tonoa he kaititiro  
 e Parao, na, kahore i mate kia kotahi o nga kararehe a nga tama a Iharaira. A ka whakapakeketia  
 te ngakau o Parao, kihai hoki ia i tuku i te iwi.  
<sup>8</sup> Na ka mea a Ihowa ki a Mohi raua ko Arona, Aohia mai etahi pungarehu ma korua i te oumu,  
 kia ki nga ringa, a ma Mohi e ruke whaka te rangi i te tirohanga a Parao. <sup>9</sup> A ka whakapuehu ririki  
 ki te whenua katoa o Ihipa, a ka meinga hei whewhe pukupuku e tupu ana ki te tangata, ki te kararehe  
 i te whenua katoa o Ihipa. <sup>10</sup> Na ka aohia e raua he pungarehu i te oumu, a tu ana ki te aroaro o  
 Parao; a ka rukea e Mohi whaka te rangi, na he whewhe pukupuku e tupu ana ki te tangata, ki te  
 kararehe. <sup>11</sup> A kihai nga tohunga i ahei te tu ki te aroaro o Mohi i nga whewhe; kei nga tohunga  
 hoki te whewhe, kei nga Ihipiana katoa ano hoki. <sup>12</sup> Na ka whakapakeke a Ihowa i te ngakau o  
 Parao, a kihai ia i rongu ki a raua; ko ta Ihowa hoki i ki ai ki a Mohi.  
<sup>13</sup> Na ka mea a Ihowa ki a Mohi, Maranga wawe i te ata, ka tu ki te aroaro o Parao, ka mea ki  
 a ia, E penei mai ana a Ihowa, te Atua o nga Hiperu, Tukua taku iwi kia haere ki te mahi ki ahau.  
<sup>14</sup> Ko a tenei taima hoki ka tukua atu e ahau aku whiu katoa ki tou ngakau, ki ou tangata hoki, ratou

ko tou iwi; kia mohio ai koe kahore tetahi e rite ana ki ahau i te whenua katoa. <sup>15</sup> Ko akuanei hoki takiritia ai toku ringa, a ka patu ahau i a koe, i tou iwi hoki, ki te mate uruta; a ka ngaro atu koe i te whenua. <sup>16</sup> Otiia mo konei pu ahau i whakaara ai i a koe, kia ai koe hei whakakitenga mo toku kaha; kia korerotia ai hoki toku ingoa ki te ao katoa. <sup>17</sup> E whakakake tonu ana ano koe ki taku iwi, te tuku ai i a ratou? <sup>18</sup> Nana, kia penei apopo, ka uaina e ahau he whatu, he mea nanakia rawa, kahore he pena i Ihipa o te pito nohoanga iho ano a mohoa noa nei. <sup>19</sup> Na, unga atu, huihuia au kararehe, me au mea katoa i te parae; ko nga tangata katoa me nga kararehe e rokohanga ki te parae, a kihai i huihuia ki te whare, ina, ka rere iho te whatu ki runga ki a ratou, a ka mate. <sup>20</sup> Ko te tangata a Parao i wehi i te kupu a Ihowa, i meatia e ia ona tangata me ana kararehe kia rere ki nga whare: <sup>21</sup> Ko te tangata ia kihai i anga tona ngakau ki te kupu a Ihowa, i waiho atu e ia ana tangata me ana kararehe i te parae. <sup>22</sup> Na ka mea a Ihowa ki a Mohi, Totoro atu tou ringa ki te rangi, kia puta ai he whatu ki te whenua katoa o Ihipa, ki te tangata, ki te kararehe, ki nga mea tupu katoa o te mara, i te whenua katoa o Ihipa. <sup>23</sup> Na ka toro atu te tokotoko a Mohi whaka te rangi: ko te tino tukunga mai a Ihowa i nga whatitiri, i te whatu; a rere ana te ahi ki runga i te whenua; a uaina iho ana e Ihowa te whatu ki te whenua o Ihipa. <sup>24</sup> Na he whatu tena, he ahi hoki e whakauru ana ki roto ki te whatu, he nanakia rawa, kahore ona rite i te whenua katoa o Ihipa, o te timatanga iho ano o taua iwi. <sup>25</sup> Na i patua iho e te whatu, i te whenua katoa o Ihipa, nga mea katoa i te parae, te tangata, te kararehe; i patu ano te whatu i nga otaota katoa o te mara, i whatiwhati hoki i nga rakau katoa o te mara. <sup>26</sup> Ko te whenua ia o Kohena, i nga tama a Iharaira, kahore he whatu. <sup>27</sup> Na ka tono tangata a Parao hei karanga i a Mohi raua ko Arona, a ka mea ia ki a raua, Kua hara ahau i tenei wa: he tika a Ihowa, tena ko ahau, matou tahi ko toku iwi, he kino. <sup>28</sup> Inoi ki a Ihowa; kua iro na hoki i enei whatitiri nunui me nga whatu; a ka tuku ahau i a koutou, a heoi ano to koutou nohoanga. <sup>29</sup> Na ka mea a Mohi ki a ia, Kia puta atu ahau ki waho i te pa, ka whakatuwhera atu ahau i oku ringa ki a Ihowa: a e mutu nga whatitiri, a ka kore noa iho te whatu; kia mohio ai koe no Ihowa te whenua. <sup>30</sup> Ko koe ia, me au tangata, e mohio ana ahau kahore ano koutou i wehi noa i a Ihowa, i te Atua. <sup>31</sup> I patua te korari me te parei; kua pupuku hoki te parei, kua pua hoki te korari. <sup>32</sup> Ko te witi ia me te rai kihai i patua; kahore hoki ena i tupu noa. <sup>33</sup> Na ka mawehe atu a Mohi i a Parao ki waho i te pa, a ka whakatuwhera i ona ringa ki a Ihowa; a mutu iho nga whatitiri me te whatu, kihai hoki te ua i ringihia ki te whenua. <sup>34</sup> A, no te kitenga a Parao kua mutu te ua, te whatu, me nga whatitiri,

35  
 ka hara ano ia, ka whakapakeke i tona ngakau, ratou tahi ko ona tangata. Heoi, whakapakeketia ana te ngakau o Parao, kihai hoki ia i tuku i nga tama a Iharaira; ko ta Ihowa hoki i korero ai ki a Mohi.

## Chapter 10

1 Na ka mea a Ihowa ki a Mohi, Haere ki a Parao; kua whakapakeke hoki ahau i tona ngakau, i te ngakau hoki o ona tangata, kia whakakite ai ahau i enei tohu aku ki tona aroaro; 2 Kia korero ai hoki koe ki nga taringa o tau tama, o te tama hoki a tau tama, i taku i mahi ai ki Ihipa, i aku tohu hoki i meatia e ahau i roto i a ratou; kia mohio ai koutou ko Ihowa ahau. 3 A haere ana a Mohi raua ko Arona ki a Parao, mea ana ki a ia, Ko te kupu tenei a Ihowa, a te Atua o nga Hiperu, Kia pehea te roa ou kahore nei e ngohengohe ki toku aroaro? Tukua taku iwi kia haere, kia mahi ki ahau. 4 Ko tenei, ka kore koe e rongu ki te tuku i taku iwi, nana, apopo ahau kawe mai ai i te mawhitiwhiti ki tou rohe: 5 A e kapi i a ratou te mata o te whenua, e kore ano e ahei te kite i te whenua; a e kai ratou i nga toenga i mahue, i toe ma koutou i te whatu, e kai hoki ratou i nga rakau katoa e tupu ana ma koutou i te mara: 6 A e ki i a ratou ou whare, me nga whare o ou tangata katoa, me nga whare o nga Ihipiana katoa; he mea kihai nei i kitea e ou matua, e nga matua ranei o ou matua, o te ra iho ano i noho ai ratou ki te whenua a moroki noa nei. A tahuri ana ia, haer e atu ana i a Parao. 7 A ka mea nga tangata a Parao ki a ia, Kia pehea te roa o tenei tangata ka waiho nei hei rore ki a tatou? tukua nga tangata ki te mahi ki a Ihowa, ki to ratou Atua: kiano koe i mohio noa kua ngaro a Ihipa? 8 Na ka whakahokia a Mohi raua ko Arona ki a Parao; a ka mea ia ki a raua, Haere, e mahi ki a Ihowa, ki to koutou Atua: ko wai ma oti e haere? 9 A ka mea a Mohi, E haere ra matou me a matou taitamariki, me o matou koroheke, me a matou tama, me a matou tamahine, e haere me a matou hipi, me a matou kau; he hakari hoki ta matou ki a Ihowa. 10 Na ka mea ia ki a raua, Kia pena te noho o Ihowa ki a koutou, me ahau ka tuku nei i a koutou me a koutou potiki: ma koutou e titiro; he kino hoki kei mua i a koutou. 11 Kahore ra hoki: haere e nga tane, e mahi ki a Ihowa; ko ta koutou hoki tena i whai na. A peia ana raua i te aroaro o Parao. 12 Na ka mea a Ihowa ki a Mohi, Totoro atu tou ringaringa ki te whenua o Ihipa mo te mawhitiwhiti kia puta ki te whenua o Ihipa, ki te kai i nga otaota katoa o te whenua, i nga mea katoa i toe i te whatu. 13 Na ka toro atu te tokotoko a Mohi ki runga i te whenua o Ihipa, a kua puta he hau i a Ihowa, he marangai, ki te whenua, a pau katoa taua rangi, pau katoa taua po; a huaki ake

te ata, na, kua kawea mai nga mawhitiwhiti e te marangai: <sup>14</sup> A puta ake ana te mawhitiwhiti ki te  
 whenua katoa o Ihipa, a tau iho ki nga rohe katoa o Ihipa: he nanakia rawa; kahore he mawhitiwhiti  
 o mua atu hei rite mo enei, e kore ano hoki e rite a muri ake nei. <sup>15</sup> Ngaro ana hoki i a ratou te mata  
 o te whenua katoa, pouri ana te whenua; a kainga ake e ratou nga otaota katoa o te whenua, me nga  
 hua katoa o nga rakau i toe i te whatu: kihai i mahue tetahi tupu o nga rakau, o nga otaota ranei o  
 te mara, i te whenua katoa o Ihipa. <sup>16</sup> Na ka hohoro a Parao te karanga ki a Mohi raua ko Arona  
 ka mea, Kua hara ahau ki a Ihowa, ki to koutou Atua, ki a korua hoki. <sup>17</sup> Na, whakarerea toku hara,  
 heoi rawa ano ko to tenei taima, a inoi ki a Ihowa, ki to koutou Atua, kia tangohia atu e ia ko tenei  
 mate anake i ahau. <sup>18</sup> A mawehe ana ia i a Parao, inoi ana ki a Ihowa. <sup>19</sup> Na whakataka ana e  
 Ihowa he hauauru nui rawa nana i kahaki atu nga mawhitiwhiti, i whiu ki te Moana Whero; kihai  
 i toe tetahi mawhitiwhiti i nga rohe katoa o Ihipa. <sup>20</sup> Otiia whakapakeke ana a Ihowa i te ngakau  
 o Parao, a kihai ia i tuku i nga tama a Iharaira.  
<sup>21</sup> A ka mea a Ihowa ki a Mohi, Totoro ake tou ringaringa ki te rangi, kia whai pouri ai ki te  
 whenua o Ihipa, he pouri e hakiri mai ana ki te ringa. <sup>22</sup> Na ka toro atu te ringa o Mohi ki te rangi,  
 a kua pouri kerekere i te whenua katoa o Ihipa, e toru nga ra: <sup>23</sup> Kahore tetahi i kite i tetahi, kihai  
 ano hoki i whakatika atu tetahi i tona wahi i nga ra e toru: tena ko nga tama a Iharaira, marama ana  
 o ratou na nohoanga. <sup>24</sup> Na ka karanga a Parao ki a Mohi, ka mea, Haere, e mahi ki a Ihowa; otiia  
 me waiho a koutou hipi me a koutou kau: ko a koutou tamariki nonohi hoki me haere tahi i a koutou.  
<sup>25</sup> A ka mea a Mohi, Me homai ano e koe ki a matou he patunga tapu, he tahunga tinana, hei mahinga  
 ma matou ki a Ihowa, ki to matou Atua. <sup>26</sup> Me haere ano a matou kararehe i a matou; e kore tetahi  
 maikuku e mahue; ka tangohia hoki e matou etahi o ena hei mahinga ki a Ihowa, ki to matou Atua;  
 e kore hoki matou e mohio ki ta matou e mahi ai ki a Ihowa, kia tae ra ano ki reira. <sup>27</sup> Otiia  
 whakapakeketia ana e Ihowa te ngakau o Parao, a kihai ia i pai ki te tuku i a ratou. <sup>28</sup> Na ka mea  
 a Parao ki a ia, Mawehe atu i ahau, kia tupato kei kite koe i toku kanohi a muri ake nei; ko te ra  
 hoki e kite ai koe i toku kanohi, ka mate koe. <sup>29</sup> Ano ra ko Mohi, Ka tika tau korero, heoi ano taku  
 kitenga i tou kanohi ki muri ake nei.

## Chapter 11



<sup>1</sup> Na ka mea a Ihowa ki a Mohi, Kia kotahi atu whiu e whakapangia e ahau ki a Parao, ki Ihipa; muri iho ka tukua koutou e ia i konei: ka tukua koutou, ina, ka tino peia katoatia koutou e ia i konei.

<sup>2</sup> Korero inaianei ki nga taringa o te iwi, a ma te tane, ma te wahine, e tono he mea hiriwa, he mea koura i tona hoa, i tona hoa.

<sup>3</sup> A i meinga ano e Ihowa kia paingia te iwi e nga Ihipiana. Ko te tangata nei hoki ko Mohi, i nui rawa ki te whenua o Ihipa, ki te aroaro o nga tangata a Parao, ki te aroaro ano hoki o te iwi.

<sup>4</sup> Na ka mea a Mohi, Ko te kupu tenei a Ihowa, Hei waenganui po ahau ka tika na waenganui o Ihipa:

<sup>5</sup> A ka mate nga matamua katoa o te whenua o Ihipa, te matamua a Parao e noho ana i runga i tona torona, a tae iho ana ki te matamua a te pononga wahine i tua i te mira; me nga matamua katoa a nga kararehe:

<sup>6</sup> A ka nui te tangi i te whenua katoa o Ihipa, kahore he pera i mua, e kore ano hoki e pera e takoto ake nei.

<sup>7</sup> Otira e kore e oraora te arero o tetahi kuri ki tetahi o nga tama a Iharaira, ki te tangata, ki te kararehe; kia mohio ai koutou e titore ana a Ihowa i waenga o nga Ihipiana, o Iharaira.

<sup>8</sup> A e haere ake enei tangata katoa au ki ahau, e piko ki ahau, e mea, Haere koe me te iwi katoa e haere ana i raro i ou waewae; a, muri iho ka haere ahau. A puta ana ia i a Parao, he nui hoki tona riri.

<sup>9</sup> A ka mea a Ihowa ki a Mohi, E kore a Parao e rongu ki a korua, kia maha ai aku merekara ki te whenua o Ihipa.

<sup>10</sup> A meatia ana e Mohi raua ko Arona enei merekara katoa ki te aroaro o Parao: a, i whakapakeke ano a Ihowa i te ngakau o Parao, a kihai ia i tuku i nga tama a Iharaira i tona whenua.

## Chapter 12

<sup>1</sup> A i korero a Ihowa ki a Mohi raua ko Arona i te whenua o Ihipa, i mea,

<sup>2</sup> Ko tenei marama hei marama timatanga ki a koutou: hei timatanga tenei mo nga marama o to koutou tau.

<sup>3</sup> Korero ki te huihuinga katoa o Iharaira, mea atu, Hei te tekau o nga ra o tenei marama, me tango he reme ma ratou e tenei, e tenei, kia rite ki nga whare o nga matua, he whare, he reme:

<sup>4</sup> A, ki te tokoouou te whare mo te reme, ma raua ko tona hoa noho tata ki tona whare e tango, kia rite ki te tokomaha o nga tangata; whakaritea te tokomaha o nga tangata mo te reme ki te kai a tenei, a tenei.

<sup>5</sup> Kei whai koha ta koutou reme, hei te toa, hei te tautahi; tangohia mai i nga hipi, i nga koati ranei:

<sup>6</sup> A me tiaki e koutou taea noatia te tekau ma wha o nga ra o tenei marama: a ma te huihui katoa o to Iharaira whakaminenga e patu i te ahiahi.

<sup>7</sup> A me tango e ratou tetahi wahi o nga toto, ka ta atu ai

ki nga pou e rua, ki te korupe hoki o te tatau o nga whare e kainga ai tena mea e ratou. <sup>8</sup> A me kai te kikokiko i taua po ano, he mea tunu ki te ahi, he taro rewenakore hoki; he puwaha kawa hoki ta ratou e kinaki ai ki taua mea. <sup>9</sup> Kauga tetahi wahi e kainga matatia, he mea kohua ranei ki te wai, engari kia tunua ki te ahi; ko tona pane, ko ona waewae, me ona whekau. <sup>10</sup> Kauga hoki e whakatoea tetahi wahi ona ki te ata; a, ko te wahi ona e toe ki te ata, tahuna ki te ahi. <sup>11</sup> A me penei ta koutou kai i taua mea; kia whitikiria o koutou hope, hei o koutou waewae o koutou hu, ko a koutou tokotoko hoki ki o koutou ringaringa; kia hohoro hoki te kai: ko te kapenga hoki a Ihowa tena. <sup>12</sup> Ta te mea ka tika ahau ra waenganui o te whenua o Ihipa i taua po, ka patu hoki i nga matamua katoa i te whenua o Ihipa, i te tangata a tae iho ana ki te kararehe; a ka puta aku whakawa ki nga atua katoa o Ihipa: ko Ihowa ahau. <sup>13</sup> A hei tohu mo koutou te toto i nga whare e noho ai koutou; a, ka kite ahau i te toto, ka kape ahau i a koutou, e kore ano hoki te whiu e pa ki a koutou hei whakamate, ina patu ahau i te whenua o Ihipa. <sup>14</sup> A, hei whakamaharatanga mo koutou tenei ra; hei konei koutou tuku ai i te hakari ki a Ihowa, tuku iho ki o koutou whakatupuranga; ko te ture tenei ake nei, ake nei, kia hakaritia e koutou tenei ra. <sup>15</sup> E whitu nga ra e kai ai koutou i te taro rewenakore; hei te ra tuatahi ano ka whakakorea ai te rewena o o koutou whare; ta te mea ki te kai tetahi i te taro rewena i te ra tuatahi, a taea noatia te whitu o nga ra, ka hatepea atu taua wairua i ro to i a Iharaira. <sup>16</sup> Hei te ra tuatahi hoki he huihuinga tapu, hei te ra tuawhitu hoki he huihuinga tapu mo koutou; kauga tetahi mahi e mahia i aua ra; heoi ano ko te kai ma tenei, ma tenei, ta koutou e raweke ai. <sup>17</sup> Kia mau hoki ki te hakari o te taro rewenakore; no te mea, no tenei rangi pu ano i whakaputaina ai e ahau o koutou ropu i te whenua o Ihipa: mo konei, kia mau ki tenei ra, i o koutou whakatupuranga; hei tikanga tenei ake ake. <sup>18</sup> Hei te marama tuatahi, hei te kotahi tekau ma wha o nga ra, i te ahiahi, ka kai koutou i te taro rewenakore, a tae noa ki te rua tekau ma tahi o nga ra o te marama, i te ahiahi. <sup>19</sup> Kauga he rewena e kitea ki o koutou whare i nga ra e whitu; ta te mea ki te kai tetahi i te mea kua rewenatia, ina, ka hatepea atu taua wairua i roto i te huihui o Iharaira, ahakoa tangata ke, ahakoa tangata whenua ranei. <sup>20</sup> Kauga e kainga tetahi mea kua rewenatia; hei te taro rewenakore he kai ma koutou i o koutou nohoanga katoa. <sup>21</sup> Na ka karanga a Mohi ki nga kaumatua katoa o Iharaira, ka mea ki a ratou, Tikina, tangohia mai ma koutou he reme, kia rite ki o koutou whanau, patua hoki te kapenga. <sup>22</sup> A tangohia he paihere hihopa, ka tuku ki te toto i te peihana, na ka tata atu i te korupe me nga pou e rua ki te toto i te peihana; kauga hoki tetahi o koutou e puta ki waho o te kuwaha o tona whare, a taea noatia te ata. <sup>23</sup> He mea hoki, ka haere atu a Ihowa ki te patu i nga Ihipiana; a, ka kite ia i te toto i te korupe, i nga pou e rua hoki, ka kapea e Ihowa te kuwaha, e kore hoki e tukua e ia te kaiwhakamate kia

haere ki roto ki o koutou whare patu ai. <sup>24</sup> Kia mau hoki ki tenei mea, hei ture mou, mo au tamariki,  
<sup>25</sup> ake ake. A, tenei ake, a te wa e tae ai koutou ki te whenua e homai e Ihowa ki a koutou, ki tana  
 i korero ai, na kia mau ki tenei mahi. <sup>26</sup> A, tenei ake, ki te mea a koutou tamariki ki a koutou, He  
 aha tenei e mahia nei e koutou? <sup>27</sup> Na ka mea atu, Ko te patunga ra i ta Ihowa kapenga, nana ra i  
 kape nga whare o nga tama a Iharaira i Ihipa, i a ia i patu ai i nga Ihipiana, a whakaorangia ake o  
<sup>28</sup> matou whare. Na tuohu ana te iwi, koropiko ana. Na ka haere nga tama a Iharaira, a mea ana i  
 ta Ihowa i whakahau ai ki a Mohi raua ko Arona, pera ana ratou.  
<sup>29</sup> Nawai a, ka waenganui po, na, patu ana e Ihowa nga matamua katoa i te whenua o Ihipa, te  
 matamua a Parao e noho ana i runga i tona torona, a tae iho ana ki te matamua a te herehere i roto  
<sup>30</sup> i te whare herehere; me nga matamua katoa a te kararehe. Na ka maranga ake a Parao i te po,  
 ratou ko ana tangata katoa, ko nga Ihipiana katoa; na, he nui te tangi i Ihipa; kahore hoki he whare  
<sup>31</sup> i kore te tupapaku. Na ka karanga ia ki a Mohi raua ko Arona i te po, a ka mea, Whakatika,  
 haere atu i roto i toku iwi, koutou ko nga tama a Iharaira; haere ki te mahi ki a Ihowa, ki te pera  
<sup>32</sup> me ta koutou i ki ai. Tangohia hoki a koutou hipi, a koutou kau hoki, a koutou i ki ai, a haere  
<sup>33</sup> atu; me manaaki ano hoki i ahau. A akiaki ana nga Ihipiana ki te iwi, kia tonoa wawetia atu ai  
<sup>34</sup> ratou i te whenua; i mea hoki ratou, Ka mate katoa tatou. A maua atu ana e te iwi ta ratou paraoa  
 pokepoke, i te mea kahore ano i rewenatia noatia, he mea takai a ratou pokepokenga paraoa ki o  
<sup>35</sup> ratou kakahu, na kei o ratou pokohiwi. Na ka pera nga tama a Iharaira me ta Mohi i ki ai; na,  
<sup>36</sup> kei te tono mea hiriwa, mea koura, kakahu, i nga Ihipiana: A na Ihowa i mea kia paingia te iwi  
 e nga Ihipiana, a homai ana e ratou: a pahuatia ana e ratou nga Ihipiana.  
<sup>37</sup> Na ka turia mai e nga tama a Iharaira i Ramehehe ki Hukota, tata tonu nga tane ki nga mano  
<sup>38</sup> e ono rau, he mea haere i raro, haunga nga tamariki. He nui te whakauru i haere i a ratou; me te  
<sup>39</sup> hipi, me te kau, he tini ke te kararehe. A tunua iho e ratou etahi taro rewenakore i te paraoa  
 pokepoke i maua atu e ratou i Ihipa, kahore hoki i rewenatia; no te mea hoki i peia ratou i Ihipa,  
<sup>40</sup> kihai hoki i ahei te noho iho, kihai hoki ratou i taka i te o mo ratou. Na, ko te nohoanga o nga  
<sup>41</sup> tama a Iharaira, i noho ra ki Ihipa, e wha rau e toru tekau nga tau. A i te mutunga o nga tau e  
 wha rau e toru tekau, i taua ra pu ano, na, ka puta nga mano katoa o Ihowa i te whenua o Ihipa.  
<sup>42</sup> Ka maharatia taua po nei, hei mea ki a Ihowa, mo to ratou whakaputanga i te whenua o Ihipa:  
 ko taua po tenei o Ihowa hei maharatanga ma nga tama katoa a Iharaira, i o ratou whakatupuranga.

<sup>43</sup> I mea ano a Ihowa ki a Mohi raua ko Arona, Ko te tikanga tenei mo te kapenga: Kaua tetahi  
<sup>44</sup> tangata ke e kai i tena mea; Engari nga pononga katoa a te tangata i utua ki te moni, kia oti te  
<sup>45</sup> kokoti e koe, ka kai ai i tena mea. Kaua te manene, te kaimahi ranei, e kai i tena mea. <sup>46</sup> Kia  
kotahi te whare e kainga ai; kaua e mauria tetahi wahi o te kikokiko ki waho i te whare; kaua hoki  
<sup>47</sup> e whatiia tetahi wheua ona. Ma te huihuinga katoa o Iharaira tena mahi. <sup>48</sup> Na, he tangata ke e  
noho ana i a koe, a ka mahi i te kapenga a Ihowa, kotia ana tane katoa, katahi ka whakatata ai ia ki  
<sup>49</sup> tena mahi; a ka rite ki te tangata whenua: kei kainga e te kokotikore. Kia kotahi ano te ture mo  
<sup>50</sup> te tangata whenua raua ko te tangata ke e noho ana i roto i a koutou. Na ka pera nga tama katoa  
<sup>51</sup> a Iharaira me ta Ihowa i ako ai ki a Mohi raua ko Arona; pera ana ratou. Na, no taua ra pu ano  
i whakaputaina mai ai e Ihowa nga tama a Iharaira i te whenua o Ihipa, tenei ropu, tenei ropu o  
ratou.

### Chapter 13

<sup>1</sup> A i korero a Ihowa ki a Mohi, i mea, <sup>2</sup> Whakatapua maku nga mea matamua katoa; nga mea  
<sup>3</sup> katoa a nga tama a Iharaira e oroko puta mai ana i te kopu, a te tangata, a te kararehe, maku. A i  
mea a Mohi ki te iwi, Kia mahara ki tenei ra i haere atu ai koutou i Ihipa, i te whare pononga; he  
kaha hoki te ringa i whakaputaina ai koutou e Ihowa i konei: kaua hoki te taro rewena e kainga.  
<sup>4</sup> Ko te ra tenei i haere atu ai koutou, ko Apipi te marama. <sup>5</sup> Na ka kawea koe a mua e Ihowa ki te  
whenua o nga Kanaani, o nga Hiti, o nga Amori, o nga Hiwi, o nga Iepuhi, i oati ai ia ki ou matua  
ka hoatu ki a koe, he whenua e rerengia ana e te waiu, e te honi, ko reira koe mahi ai i tenei mea,  
<sup>6</sup> i tenei mara ma ano. E whitu nga ra e kai ai koe i te taro rewenakore, a hei te ra whitu te hakari  
a Ihowa. <sup>7</sup> E whitu nga ra e kainga ai te taro rewenakore: aua hoki te taro rewena e kitea ki a koe;  
aua ano e kitea ki a koe he rewena i ou rohe katoa. <sup>8</sup> A mau e korero ki tau tama i taua ra, e mea,  
<sup>9</sup> Mo ta Ihowa i mea ai ki ahau tenei, i toku haerenga mai i Ihipa. Hei tohu ano tena ki a koe i tou  
ringa, hei whakamahara hoki ki waenganui i ou kanohi; kia mau ai te ture a Ihowa i roto i tou waha:  
<sup>10</sup> he kaha hoki te ringa i whakaputaina ai koe e Ihowa i Ihipa. Na kia mau ki tenei tikanga i tona  
wa ano, i tenei tau, i tenei tau.

<sup>11</sup> Na ka kawea koe e Ihowa ki te whenua o nga Kanaani, ki tana i oati ai ki a koutou ko ou  
 matua, a ka homai a reira e ia ki a koe, <sup>12</sup> Ko reira wehea ai e koe ma Ihowa nga mea katoa e puta  
 tuatahi mai ana i te kopu, me nga matamua katoa o au kararehe; ko nga tane ma Ihowa. <sup>13</sup> Otiia,  
 me utu e koe ki te reme nga matamua katoa a te kaihe; a ki te kahore e utua e koe, whatiia tona  
 kaki: ko nga matamua katoa hoki a te tangata, i roto i au tamariki, me utu e koe. <sup>14</sup> A, tenei ake,  
 ki te ui tau tama ki a koe a mua, ki te mea, He aha tenei? Na ka mea ki a ia, He kaha te ringa i  
 whakaputaina mai ai matou e Ihowa i Ihipa, i te whare pononga: <sup>15</sup> A, i te mea ka pakeke a Parao  
 ki te tuku i a matou, na patua iho e Ihowa nga matamua katoa o te whenua o Ihipa, te matamua a  
 te tangata, te matamua ano hoki a te kararehe: na reira i patua ai e ahau ma Ihowa nga mea katoa  
 e puta tuatahi mai ana i te kopu, nga toa; ko nga matamua katoa ia o aku tama e utua ana e ahau.  
<sup>16</sup> A, hei tohu tena ki tou ringa hei pare ki waenganui i ou kanohi: he kaha hoki te ringa i  
 whakaputaina mai ai matou e Ihowa i Ihipa.  
<sup>17</sup> A, i te tukunga o te iwi e Parao, kihai a Ihowa i arahi i a ratou na te huarahi i te whenua o  
 nga Pirihitini, ahakoa tata tera: i mea hoki te Atua, Kei awangawanga te iwi, ua kite ratou i te  
 pakanga, a ka hoki ki Ihipa: <sup>18</sup> Engari i arahina awhiotia te iwi e te Atua na te huarahi i te koraha  
 o te Moana Whero: a haere topuni ana nga tama a Iharaira i te whenua o Ihipa. <sup>19</sup> I maua atu ano  
 e Mohi nga wheua o Hohepa; nana hoki i whakaoati marie nga tama a Iharaira, i mea, Ka tikina  
 mai koutou, ka ata tirohia e te Atua; a ma koutou e mau atu oku wheua i konei. <sup>20</sup> A ka turia mai  
 e ratou i Hukota, a noho rawa ki Etama, ki te pito o te koraha. <sup>21</sup> A haere ana a Ihowa i mua i a  
 ratou, i te pou kapua i te awatea, hei arahi i a ratou i te huarahi; i te pou kapura ano i te po, hei  
 whakamarama i a ratou; kia haere ai ratou i te ao, i te po. <sup>22</sup> Kihai i tangohia e ia te pou kapua i te  
 aroaro o te iwi i te awatea, me te pou kapura hoki i te po.

## Chapter 14

<sup>1</sup> Na ka korero a Ihowa ki a Mohi, ka mea, <sup>2</sup> Korero ki nga tama a Iharaira, kia tahuri, kia noho  
 ki te ritenga atu o Pihahirota, i waenganui o Mikitoro, o te moana, ki te ritenga o Paarahepona: hei  
 te wahi e hangai tonu ana ki reira, hei te taha o te moana koutou noho ai. <sup>3</sup> A e kiia nga tama a  
 Iharaira e Parao, E pohehe ana ratou i te whenua, kua tutakina mai ratou e te koraha. <sup>4</sup> A maku e  
 whakapakeke te ngakau o Parao, kia wahi ai ia i a ratou: a ka whai kororia ahau i a Parao ratou ko

5  
 tona nuinga katoa; a ka mohio nga Ihipiana ko Ihowa ahau; a pera ana ratou. A ka korerotia ki te  
 kingi o Ihipa, kua whati te iwi: na ka puta ke te ngakau o Parao ratou ko ana tangata, ki te iwi, a  
 ka mea ratou, He aha tenei mahi a tatou, i tukua atu ai a Iharaira i a tatou mahi? 6  
 Na ka here ia i  
 tana hariata, i mauria ano hoki e ia tona iwi: 7  
 A takiritia ake e ia e ono rau hariata, whiriwhiri  
 rawa, me nga hariata katoa o Ihipa, rite katoa i te rangatira. 8  
 Na whakapakeke ana a Ihowa i te  
 ngakau o Parao kingi o Ihipa, ko te tino whaingā i muri i nga tama a Iharaira: tena ko nga tama a  
 Iharaira, kei runga tonu te ringaringa i haere atu ai ratou. 9  
 Na whai ana nga Ihipiana i a ratou, nga  
 hoiho katoa, nga hariata a Parao, me ana hoia eke hoiho, me ana mano, a mau rawa ratou, i a ratou  
 e noho ana i te tahatai, i Pihahirota, e titiro atu nei ki Paarahepona.

10  
 A, i te whakatatanga mai o Parao, na ka anga ake nga kanohi o nga tama a Iharaira, na, ko  
 nga Ihipiana e whai ana i muri i a ratou; a tino wehi ana ratou: na ka karanga nga tama a Iharaira  
 ki a Ihowa. 11  
 A ka mea ratou ki a Mohi, He onge koia no te urupa o Ihipa i kahaki mai ai koe i a  
 matou ki te koraha mate ai? He aha ra tenei mahi au ki a matou, i arahina mai ai matou e koe i  
 Ihipa? 12  
 Ehara koia tenei i ta matou kupu i ki ra ki a koe i Ihipa, i mea ra, Waiho ra matou kia  
 whakamahia ana e nga Ihipiana? Pai ke kia whakamahia matou e nga Ihipiana i to matou mate ki  
 te koraha. 13  
 Na ka mea a Mohi ki te iwi, Kaua e wehi; tu marie, ka titiro atu ki te whakaoranga a  
 Ihowa e whakaputaina mai e ia ki a koutou i tenei ra: no ko nga Ihipiana e kitea atu ra e koutou i  
 tenei ra, e kore e kitea ano e koutou a muri ake nei. 14  
 Ma Ihowa ta koutou pakanga; ko koutou ia  
 e kore e hamumu.

15  
 Na ka mea a Ihowa ki a Mohi, He aha koe i karanga ai ki ahau? Ki atu ki nga tama a Iharaira  
 kia maro te haere: 16  
 Na hapainga e koe tau tokotoko, ka whakamaro atu ai i tou ringa ki runga  
 ake i te moana, kia wehea ai; na ka haere atu nga tama a Iharaira ma waenga moana, i te wahi  
 maroke. 17  
 A ko ahau, ina, maku e whakapakeke nga ngakau o nga Ihipiana, a ka whai ratou i muri  
 i a ratou: a ka whai kororia ahau i a Parao, i ana mano, i ana hariata, i ana hoia eke hoiho. 18  
 A ka  
 mohio nga Ihipiana ko Ihowa ahau, ina whai kororia ahau i a Parao, i ana hariata, i ana hoia eke  
 hoiho. 19  
 Na ka whakatika te anahera a te Atua, i haere ra i mua i te ope o Iharaira, a haere ana ki  
 muri i a ratou; i neke atu ano te pou kapua i to ratou aroaro, a tu ana i muri i a ratou: 20  
 I haere  
 hoki ki waenganui o te nohoanga o nga Ihipiana, o te nohoanga hoki o Iharaira; a tera te kapua me  
 te pouri, otiia e whakamarama ana ia i te po: a kihai tetahi i whakatata ki tetahi a pau katoa te po.

21  
 Na torona atu ana e Mohi tona ringa ki runga i te moana; a panaia ana ki muri e Ihowa te  
 moana ki tetahi hau nui, ki te marangai, a pau noa taua po, na kua maroke te moana, kua tuwhera

<sup>22</sup>  
 nga wai. A haere ana nga tama a Iharaira i waenga moana ra te wahi maroke: hei taiepa ano nga  
<sup>23</sup>  
 wai ki a ratou i te taha ki matau, ki maui. Na ka whai nga Ihipiana, a haere ana i muri i a ratou,  
<sup>24</sup>  
 nga hoiho katoa a Parao, ana hariata, me ana hoia eke hoiho, ki waenga moana. A, i to te ata  
 whakaaraara, na, ka titiro a Ihowa ki te ope o nga Ihipiana, i roto i te pou ahi, i te pou kapua, ka  
<sup>25</sup>  
 whakararu hoki i te ope o nga Ihipiana, A whakamareretia ana e ia nga wira o nga hariata, kia  
 puhoi ai te haere: a ka mea nga Ihipiana, Kia oma atu tatou i te aroaro o Iharaira: kei a ratou hoki  
<sup>26</sup>  
 a Ihowa e whawhai mai ana ki nga Ihipiana. Na ka mea a Ihowa ki a Mohi, Whakamarokia tou  
 ringa ki runga i te moana, kia hoki ai nga wai ki runga ki nga Ihipiana, ki a ratou hariata, ki a ratou  
<sup>27</sup>  
 hoia eke hoiho. A, ko te whakamarokanga o te ringa o Mohi ki runga i te moana, na takiri rawa  
 ake te ata, kua hoki te moana ki tona tuturutanga; tutataki pu ki nga Ihipiana e rere ana; a taia iho  
<sup>28</sup>  
 nga Ihipiana e Ihowa ki waenga moana. A hoki ana nga wai, taupokina iho nga hariata, me nga  
 hoia eke hoiho, me te ope katoa o Parao, i haere i muri i a ratou ki te moana: kihai rawa tetahi o  
<sup>29</sup>  
 ratou i toe. Tena ko nga tama a Iharaira, i haere ratou ra te wahi maroke i waenganui o te moana;  
<sup>30</sup>  
 ko nga wai hoki hei taiepa ki a ratou, ki te taha matau, ki te taha maui. A, whakaorangia ana e  
 Ihowa a Iharaira i taua ra i nga ringa o nga Ihipiana; a ka kite a Iharaira i nga Ihipiana i te tahatai,  
<sup>31</sup>  
 he tupapaku katoa. A i kite a Iharaira i te mahi nui i mahia e Ihowa ki nga Ihipiana: a ka wehi  
 te iwi a Ihowa, whakapono ana ki a Ihowa, ki tana pononga hoki, ki a Mohi.

## Chapter 15

<sup>1</sup>  
 Katahi ka waiata a Mohi ratou ko nga tama a Iharaira i tenei waiata ki a Ihowa, a ka whakahua,  
 ka mea, Ka waiata ahau ki a Ihowa, he hira noa atu hoki tona kororia: ko te hoiho raua ko tona  
<sup>2</sup>  
 kaieke, kua panga e ia ki te moana. Ko Ihowa toku kaha, taku waiata, ko ia ano hoki hei whakaora  
 moku: ko toku Atua tenei, a maku ia e whakakororia; ko te Atua o toku papa, a maku ia e whakanui.  
<sup>3</sup> <sup>4</sup>  
 He tangata whawhai a ihowa: ko Ihowa tona ingoa. Ko nga hariata a Parao, me tana ope, kua  
<sup>5</sup>  
 maka e ia ki te moana: ko ana rangatira whiriwhiri toremi iho ki te Moana Whero. Taupokina iho  
<sup>6</sup>  
 ratou e nga wai hohonu; totohu ana ratou ki te rire, ano he kamaka. Ka whai kororia tou ringa  
<sup>7</sup>  
 matau, e Ihowa, mo te kaha: na tou ringa, e Ihowa i mongamonga ai te hoa whawhai. Na te nui  
 o tou kaha ka turakina e koe te hunga i whakatika mai ra ki a koe: te whakaputanga o tou riri, pau

8  
 katoa ratou, me he tumutumu otaota. Na te hau hoki o tou ihu i haupu ai nga wai; i tu ake nga  
 roma, ano he puranga, a whakatotoka ana te rire i te takere o te moana. I mea te hoariri, Ka whai  
 9  
 atu ahau, ka hopu, ka tuwha i nga taonga; ka na toku ngakau i a ratou; ka unuhia taku hoari, ma  
 10  
 toku ringa ratou e huna. I pupuhi atu koe ki tau hau, taupokina iho ratou e te moana; totohu iho  
 11  
 ratou, ano he mata, i nga wai nui. Ko wai o nga atua hei rite mou, e Ihowa? ko wai hei rite mou,  
 e whakamoemititia nei mo te tapu, e wehingia nei, e whakapaingia nei, e mahi nei i nga mea  
 12  
 whakamiharo? I totoro atu tou ringa matau, horomia ana ratou e te whenua. Na tou atawhai  
 13  
 i arahina mai ai e koe te iwi kua hokona nei e koe; na tou kaha i aratakina ai ratou e koe ki tou  
 14  
 nohoanga tapu. Ka rongo nga iwi, ka tuiri: mau tonu te matapouri ki nga tangata o Pirihitia.  
 15  
 No reira i ohore ai nga rangatira o Eroma: ko nga tangata nunui o Moapa, mau tonu te wiri ki  
 16  
 a ratou; memeha noa nga tangata katoa o Kanaana. Tau ana ki a ratou te tuiri me te wehi: ma te  
 nui o tou ringa e tu tonu ai ratou, ano he kohatu, kia pahemo ra ano tou iwi, e Ihowa, kia pahemo  
 17  
 ra ano tenei iwi kua hokona nei e koe. Mau ratou e kawe atu, e whakatupu ki te maunga, ki tou  
 kainga o mua iho, ki te wahi, e Ihowa, i hanga e koe hei nohoanga mou, ki te wahi tapu, e te Ariki,  
 18  
 i whakapumautia e ou ringa. Hei kingi a Ihowa ake ake. I haere hoki nga hoiho a Parao, me  
 19  
 ana hariata, me ana hoia eke hoiho ki te moana, a na Ihowa i whakahoki nga wai o te moana ki  
 20  
 runga ki a ratou: tena ko nga tama a Iharaira, i haere ra te wahi maroke, i waenga moana. A ka  
 tango a Miriama poropiti, tuahine o Arona, i te timipera ki tona ringa; a haere atu ana nga wahine  
 21  
 katoa i muri i a ia me nga timipera, me te kanikani ano ratou. A i whakahokia e Miriama ta  
 ratou, Waiata ki a Ihowa, he hira noa atu hoki tona kororia; nana hoki te hoiho raua ko tona kaieke  
 i whiu ki te moana.  
 22  
 A arahina atu ana e Mohi a Iharaira i te Moana Whero, a ka haere ratou ki te koraha o Huri:  
 23  
 a e toru nga ra i haere ai ratou i te koraha, a kihai i kitea he wai. Na ka tae ratou ki Mara, kihai  
 24  
 hoki i ahei te inu i nga wai o Mara; he kawa hoki: na reira i huaina ai tona ingoa ko Mara. Na  
 25  
 ka amuamu te iwi ki a Mohi, ka mea, Ko te aha hei inu ma matou? Na ka karanga ia ki a Ihowa;  
 a ka whakakitea mai he rakau e Ihowa ki a ia, a panga ana e ia ki nga wai, na, ka reka nga wai: i  
 26  
 homai e ia he ture ki a ratou i reira, me tetahi ritenga; i whakamatauria ratou e ia ki reira. I mea  
 hoki ia, Ki te rongo marie koe ki te reo o Ihowa, o tou Atua, a ka mahi i te mea tika ki tana titiro,  
 a ka whai taringa ki ana whakahau, ka pupuri hoki i ana tikanga katoa, e kore rawa tetahi o aua  
 mate i whakapangia ki nga Ihipiana e ahau, e whakapangia atu e ahau ki a koe; ko Ihowa hoki ahau



<sup>27</sup>  
 e whakaora nei i a koe. Na ka tae ratou ki Erimi, kotahi tekau ma rua nei nga puna wai i reira, me nga nikau e whitu tekau; a ka noho ratou ki reira, ki te taha o nga wai.

## Chapter 16

<sup>1</sup>  
 Na ka turia e ratou i Erimi, a ka tae te huihuinga katoa o nga tama a Iharaira ki te koraha o Hini, ki waenganui o Erimi o Hinai, i te tekau ma rima o nga ra o te rua o nga marama o to ratou haerenga mai i te whenua o Ihipa. <sup>2</sup>  
 Na ka amuamu te huihui katoa o nga tama a Iharaira ki a Mohi raua ko Arona i te koraha: <sup>3</sup>  
 A ka mea nga tama a Iharaira ki a raua, E, te mate atu ra matou i te ringa o Ihowa i te whenua o Ihipa, i a matou e noho ana i te taha o nga kohua kikokiko, e kai taro ana, a makona noa! na korua nei hoki matou i kawe mai ki tenei koraha kia kohu rutia ai tenei whakaminenga katoa ki te matekai. <sup>4</sup>  
 Na ka mea a Ihowa ki a Mohi, Nana, ka uaina iho e ahau he taro i te rangi ma koutou; a ma te iwi e haere, e kohikohi i to tenei rangi, i to tenei rangi, kia whakamatau ai ahau i a ratou, e haere ranei ratou i taku ture, kahore ranei. <sup>5</sup>  
 A, a te ono o nga ra, ka taka e ratou ta ratou e mau mai ai; kia takiruatia ta ratou i kohikohi ai i etahi rangi ake ka rite ki to tenei. <sup>6</sup>  
 Na ka mea a Mohi raua ko Arona ki nga tama katoa a Iharaira, Ka ahiahi, na, ka mohio koutou na Ihowa koutou i arahi mai i te whenua o Ihipa; <sup>7</sup>  
 A i te ata, na, ka kite koutou i te kororia o ihowa; e whakarongo mai ana hoki ia ki a koutou amuamu ki a Ihowa: tena ko maua, he aha maua, i amuamu ai koutou ki a maua? <sup>8</sup>  
 I mea ano a Mohi, Ka mohio koutou, ua homai e Ihowa ki a koutou he kikokiko hei kai i te ahiahi, a i te ata he taro, a makona noa, no te mea kua rongu a Ihowa ki a koutou amuamu e amuamu na koutou ki a ia: ko maua ia, hei aha? kihai koutou i amua mu ki a maua, engari ki a Ihowa. <sup>9</sup>  
 Na ka mea a Mohi ki a Arona, Mea atu ki te huihui katoa o nga tama a Iharaira, Whakatata mai ki te aroaro o Ihowa kua rongu hoki ia ki a koutou amuamu. <sup>10</sup>  
 A, i a Arona e korero ana ki te huihui katoa o nga tama a Iharaira, na ka tahuri ratou whaka te koraha, na, ko te kororia o Ihowa e puta mai ana i roto i te kapua. <sup>11</sup>  
 Na ka korero a Ihowa ki a Mohi, ka mea, <sup>12</sup>  
 Kua rongu ahau ki nga amuamu a nga tama a Iharaira: korero atu ki a ratou, mea atu, Kia ahiahi ka kai koutou i te kikokiko, a i te ata ka makona i te taro; a ka mohio koutou ko Ihowa ahau, ko to koutou Atua. <sup>13</sup>  
 A i te ahiahi, na, ka puta mai te koitareke, a kapi ana te puni: a i te ata kua takoto te tomairangi i te nohoanga, tawhio noa, tawhio noa. <sup>14</sup>  
 A ka mimiti ake te papanga tomairangi, na, he mea ririki,

15  
potakataka nei, kei te mata o te koraha, ririki, me te haupapa, i runga i te whenua. A, i te kitenga o nga tama a Iharaira, ka mea ratou tetahi ki tetahi, He aha tena? kihai hoki ratou i mohio he aha ranei. Na ka mea a Mohi ki a ratou, Ko te taro ra tena ka homai nei e Ihowa ki a koutou hei kai.

16  
Ko te mea tena i akona mai ra e Ihowa, Kohikohia mai i reira e tera, e tera, kia rite ki tana e kai ai: he omere ma te tangata, kia rite ki to koutou tokomaha: kohikohia e tera, e tera, ma te hunga i

17  
tona teneti. A pera ana nga tama a Iharaira, na kohikohia ana, ta tetahi he nui, ta tetahi he iti.

18  
A ka mehuatia e ratou ki te omere, kihai i hira ta te tangata i te wahi nui, kihai hoki he hapa o tana i te wahi nohinohi: rite tonu ki te kai a tera, a tera, ta ratou i kohikohi ai. Na ka mea a Mohi

19  
ki a ratou, Kaua e whakatoea tetahi wahi o tena ki te ata. Engari kihai ratou i whakarongo ki a Mohi; a whakatoea ana e etahi tetahi wahi o taua mea mo te ata, a muia ana e te kutukutu, a piro

20  
ake: a riri ana a Mohi ki a ratou. 21 A kohikohia ana taua mea e ratou i tenei ata, i tenei ata, rite tonu ki ta tenei tangata, ki ta tenei tangata, e kai ai; a ka mahana te ra, na, kua rewa.

22  
A i te ono o nga ra ka takiruatia te taro i kohikohia e ratou e rua hoki nga omere ma te tangata kotahi; a ka haere mai nga rangatira katoa o te huihui, ka korero ki a Mohi. Na ka mea ia ki a ratou, Ko ia tenei ta Ihowa i korero ra, Ko apopo te okiokinga o te hapati tapu o Ihowa: tunua ta koutou e tunu ai, kohuatia hoki ta koutou e kohua ai; a, ko te toenga, waiho ma koutou, rongoatia

23  
mo te ata. 24 A rongoatia atu ana e ratou mo te ata, i pera ano me ta Mohi i ki ai; kihai hoki i piro,

25  
kahore hoki i whai kutukutu. Na ka mea a Mohi, Kainga tena i tenei ra; he hapati hoki tenei ra na Ihowa: e kore tena mea e kite e koutou ki te parae i tenei ra. 26 E ono nga ra e kohikohi ai koutou

27  
i tena mea; a i te whitu o nga ra ko te hapati, ko reira kore ai. A i te whitu o nga ra ka haere atu

28  
etahi o te iwi ki te kohikohi, a kihai i kitea. Na ka mea a Ihowa ki a Mohi, Kia pehea te roa o

29  
koutou e kore nei e pupuri i aku whakahau, i aku ture? Titiro, no te mea kua hoatu e Ihowa te hapati ki a koutou, koia i hoatu ai e ia i te ra ono he taro mo nga rangi e rua; e noho koutou e tera,

30  
e tera, ki tona wahi ano; kaua tetahi e haere atu i tona nohoanga i te ra whitu. Na ka noho te iwi

31  
i te ra whitu. A huaina iho e te whare o Iharaira te ingoa o taua mea, he Mana: tona rite kei te purapura korianara, ma tonu; tona reka kei te papa honi.

32  
I mea ano a Mohi, Ko te mea tenei i akona mai nei e Ihowa, Whakakiia tetahi omere ki taua mea, ka rongoa ai ma o koutou whakapaparanga; kia kite ai ratou i te taro i whangaia ai koutou e

33  
ahau i te koraha i taku whakaputanga mai i a koutou i te w henua o Ihipa. A ka mea a Mohi ki a Arona, Tangohia tetahi oko, whaowhina hoki he mana ki roto, kia kotahi whakakiinga o te omere,

ka whakatakoto ki te aroaro o Ihowa, rongoa ai ma o koutou whakatupuranga. <sup>34</sup> A whakatakotoria ana taua mea e Arona ki mua i te Whakaaturanga rongoa ai, pera tonu ia me ta Ihowa i ako ai ki a Mohi. <sup>35</sup> A e wha tekau nga tau i kai ai nga tama a Iharaira i te mana, a tae noa ki te whenua tangata; he mana ta ratou i kai ai, a tae noa ki nga rohe o te whenua o Kanaana. <sup>36</sup> Na, ko te moere, ko te wahi whakatekau o te epa.

## Chapter 17

<sup>1</sup> Na ka haere te huihui katoa o nga tama a Iharaira i te koraha o Hini i o ratou haerenga, i pera tonu me ta Ihowa i ako ai, a noho rawa atu ki Repirimi: otiia kahore he wai hei inu ma te iwi. <sup>2</sup> Na ka ngangau te iwi ki a Mohi, ka mea, Homai ra he wai mo matou, kia inu ai matou. A ka mea a Mohi ki a ratou, He aha koutou i ngangau ai ki ahau? he aha koutou i whakamatautau ai i a Ihowa? <sup>3</sup> Na ka mate te iwi i te wai i reira; a amuamu ana te iwi ki a Mohi, a ka mea, He aha matou i kawea mai ai e koe i Ihipa kia kohurutia ai matou, me a matou tamariki, me a matou kararehe ki te matewai? <sup>4</sup> Na ka karanga a Mohi ki a Ihowa, ka mea, Me pehea ahau ki te iwi nei? whano ratou aki i ahau ki te kohatu. <sup>5</sup> Na ka mea a Ihowa ki a Mohi, Haere i mua i te iwi, ka tango hoki i etahi o nga kaumatua o Iharaira hei hoa mou; ko tau tokotoko hoki i patua e koe ki te awa, me mau atu i tou ringa, ka haere. <sup>6</sup> Nana, tena ahau te tu atu na i tou aroaro i reira, i runga i te kamaka i Horepa, a mau e patu te kamaka, a ka puta he wai i reira, hei inu ma te iwi. A peratia ana e Mohi i te tirohanga a nga kaumatua o Iharaira. <sup>7</sup> A huaina ana e ia te ingoa o taua wahi ko Maha, ko Meripa; mo te ngangautanga a nga tama a Iharaira, mo ta ratou whakamatau hoki i a Ihowa, i a ratou i mea ra, Kei roto ranei a Ihowa i a tatou, kahore ranei? <sup>8</sup> Na ka haere mai a Amareke, kei te whawhai ki a Iharaira ki Repirimi. <sup>9</sup> Na ka mea a Mohi ki a Hohua, Whiriwhiria mai etahi tangata ma taua, ka haere ki te whawhai ki a Amareke: ka tu ahau apopo ki runga i te tihi o te pukepuke, me te rakau ano hoki a te Atua ki toku ringa. <sup>10</sup> Na peratia ana e Hohua me ta Mohi i korero ai ki a ia; ko te tino whawhaitanga ki a Amareke: ko Mohi ia, ratou ko Arona, ko Huru, i piki ki te tihi o te pukepuke. <sup>11</sup> A ka maiangi ake te ringa o Mohi, na, ka kaha a Iharaira; a ka tukua iho tona ringa, na, ka kaha a Amareke. <sup>12</sup> Otiia ka taimaha nga ringa o Mohi; a ka mau raua ki tetahi kohatu, a whakatakotoria ana ki raro i a ia, a noho ana ia i runga; a puritia ake ana ona ringa e Arona raua ko Huru, kotahi i tetahi taha, kotahi i tetahi taha: <sup>13</sup> katahi ka tuturu tonu on a ringa, a to noa te ra. Na patua ana a Amareke, ratou ko tona iwi, e

<sup>14</sup>  
 Hohua ki te mata o te hoari. Na ka mea a Ihowa ki a Mohi, Tuhituhia tenei ki te pukapuka, hei whakamaharatanga; korerotia hoki ki nga taringa o Hohua: ka tino horoia atu hoki e ahau te maharatanga o Amareke i raro i te rangi. <sup>15</sup>  
 A hanga ana e Mohi he aata, a huaina iho tona ingoa <sup>16</sup>  
 ko Ihowanihi. I mea hoki ia, Kua ara nei te ringa ki te torona o Ihowa, na he pakanga ta Ihowa ki a Amareke i tenei whakapaparanga, i tenei whakapaparanga.

## Chapter 18

<sup>1</sup>  
 A ka rongu a Ietoro, te tohunga o Miriana, te hungawai o Mohi, ki nga mea katoa i meatia e te Atua ki a Mohi, ki a Iharaira hoki, ki tana iwi; ki a Ihowa ano hoki kua whakaputa mai i a Iharaira i Ihipa; <sup>2</sup>  
 Katahi a Ietoro, hungawai o Mohi, ka tango i a Hipora, wahine a Mohi, i muri nei i tana tononga i a ia kia hoki, <sup>3</sup>  
 Me ana tamariki tokorua, ko te ingoa o tetahi ko Kerehoma, i mea hoki ia, He manene ahau i te whenua ke: <sup>4</sup>  
 Ko te ingoa hoki o tetahi ko Erietera; moku hoki a wahinetia mai e te Atua o toku papa, nana hoki ahau i whakaora i te hoari a Parao; <sup>5</sup>  
 Na ka haere mai a Ietoro, te hungawai o Mohi, ratou ko ana tamariki, ko tana wahine, ki a Mohi, ki te koraha i noho ai ia, ki te maunga o te Atua: <sup>6</sup>  
 A ka mea ki a Mohi, Ko ahau, ko Ietoro, ko tou hungawai, kua tae mai ki a koe, me tau wahine, ratou ko ana tama tokorua. <sup>7</sup>  
 Na ka haere a Mohi ki te whakatau i tona hungawai, a ka tuohu, ka kihi hoki i a ia; a ka ui raua ki a raua ki te pai i tetahi, i tetahi; a haere ana raua ki te teneti. <sup>8</sup>  
 Na ka korerotia e Mohi ki tona hungawai nga mea katoa i meatia e Ihowa ki a Parao ratou ko nga Ihipiana, mo Iharaira, me nga mate katoa hoki i pono ki a ratou i te ara, me ratou hoki kua whakaorangia nei e Ihowa. <sup>9</sup>  
 Na ka hari a Ietoro mo nga mea pai katoa i meatia e Ihowa ki a Iharaira, mo ratou hoki i whakaorangia e ia i te ringa o nga Ihipiana. <sup>10</sup>  
 A ka mea a Ietoro, Kia whakapaingia a Ihowa nana nei koutou i whakaora i te ringa o nga Ihipiana, i te ringa hoki o Parao; nana hoki te iwi nei i whakaora i raro i te ringa o nga Ihipiana. <sup>11</sup>  
 Katahi ahau ka mohio he nui ake a Ihowa i nga atua katoa; ae ra, i te mea hoki ka whakapehapeha ratou, hira ake ana ano ia i a ratou. <sup>12</sup>  
 Na ka tangohia e Ietoro, e te hungawai o Mohi tetahi tahunga tinana me etahi patunga tapu ma te Atua: a haere mai ana a Arona, me nga kaumatua katoa o Iharaira, ki te hungawai o Mohi, ki te kai taro ki te aroaro o te Atua.

13 A i te aonga ake o te ra ka noho a Mohi ki te whakawa i te iwi: a ka tu te iwi i te taha o Mohi  
 no te ata a ahiahi noa. <sup>14</sup> A, no te kitenga o te hungawai o Mohi i nga mea katoa i mea ai ia ki te  
 iwi, ka mea ia, He aha tenei mea e mea nei koe ki te iwi? he aha koe i noho ai ko koe anake, i tu ai  
 hoki te iwi katoa i tou taha no te ata a tae noa ki te ahiahi? <sup>15</sup> A ka mea a Mohi ki tona hungawai,  
 E haere mai ana hoki te iwi ki ahau, ki te rapu tikanga i te Atua: <sup>16</sup> Ka ai he mea ki a ratou, na ka  
 haere mai ki ahau; a maku e whakarite te whakawa a tetahi ki tetahi; e whakaatu hoki nga tikanga  
 a te Atua me ana ture. <sup>17</sup> Na ka mea te hungawai o Mohi ki a ia, Ehara tenei i te pai e mea nei koe.  
 18 Ka honia noatia iho koe, koutou tahi ko tenei iwi i a koe nei; he pehi rawa hoki tenei mea i a  
 koe: e kore e taea e koe anake. <sup>19</sup> Na, whakarongo mai ki toku reo, maku koe e tohutohu: hei a koe  
 te Atua, hei te aroaro o te Atua koe mo te iwi, a mau e kawe nga korero ki te Atua: <sup>20</sup> Mau ano  
 ratou e whakaako ki nga tikanga, ki nga ture, e whakaatu hoki ki a ratou te huarahi e haere ai ratou,  
 me nga mahi e mahi ai ratou. <sup>21</sup> Mau ano hoki e titiro i roto i te iwi katoa etahi tangata maia, e  
 wehi ana i te Atua; hei te hunga pono, e kino ana ki te apo; ka waiho ai hei rangatira mo ratou, hei  
 rangatira mo nga mano, hei rangatira mo nga rau, hei rangatira mo nga rima tek au, hei rangatira  
 mo nga tekau: <sup>22</sup> A ma ratou te iwi e whakawa i nga wa katoa: a ko nga mea nunui katoa, me kawe  
 mai ki a koe; ko nga mea nohinohi katoa ia, ma ratou e whakarite: penei ka mama koe, a ma koutou  
 tahi te pikaunga. <sup>23</sup> Ki te mea koe i tenei mea, a ka ki mai te Atua ki a koe, katahi koe ka matatu  
 ake, a ka haere marie tenei iwi katoa ki o ratou kainga. <sup>24</sup> A rongu tonu a Mohi ki te kupu a tona  
 hungawai, a meatia katoatia iho e ia nga mea i korero ai ia. <sup>25</sup> A whiriwhiria ana e Mohi etahi  
 tangata maia i roto i a Iharaira katoa, a waiho iho ratou e ia hei upoko mo te iwi, hei rangatira mo  
 nga mano, hei rangatira mo nga rau, hei rangatira mo nga rima tekau, hei rangatira hoki mo nga  
 tekau. <sup>26</sup> A na ratou te iwi i whakawa i nga wa katoa: ko te mea pakeke i kawea e ratou ki a Mohi;  
 ko nga mea nohinohi katoa ia na ratou ano i whakarite. <sup>27</sup> Na ka tukua atu e Mohi tona hungawai;  
 a haere ana ia ki tona whenua.

## Chapter 19

1 No te toru o nga marama o te haerenga mai o nga tama a Iharaira i te whenua o Ihipa, no taua  
 rangi ano, ka tae ratou ki te koraha o Hinai. <sup>2</sup> A, i to ratou haerenga atu i Repirimi, ka tae ki te

koraha o Hinai, ka noho iho ratou i te koraha; a noho ana a Iharaira ki reira, ki te ritenga atu o te maunga. <sup>3</sup> Na ka piki a Mohi ki te Atua, a ka karanga a Ihowa ki a ia i te maunga, ka mea, Kia penei tau korero ki te whare o Hakopa, tau kauwhau hoki ki nga tama a Iharaira; <sup>4</sup> Kua kite koutou i nga mea i mea ai ahau ki nga Ihipiana, i taku whakawahanga hoki i a koutou i runga i nga parirau ekara, me te kawenga mai i a koutou ki ahau. <sup>5</sup> Heoi ki te ata whakarongo koutou ki toku reo, ki te pupuri hoki i taku kawenata, ka waiho koutou hei taonga moku, motu ke i nga iwi katoa: i ahau hoki te whenua katoa: <sup>6</sup> A ka waiho koutou e ahau hei kingi, hei tohunga, hei iwi tapu hoki. Ko nga kupu enei e korero ai koe ki nga tama a Iharaira. <sup>7</sup> Na ka haere iho a Mohi, ka karanga ia ki nga kaumatua o te iwi, a hoatu ana e ia ki to ratou aroaro enei kupu katoa i akona nei e Ihowa ki a ia. <sup>8</sup> Na ka pa katoa te iwi ki te whakahoki, ka mea, Ka mahia e matou nga mea katoa i korerotia mai na e Ihowa. A kawea ana e Mohi nga kupu a te iwi ki a Ihowa. <sup>9</sup> Na ka mea a Ihowa ki a Mohi, Nana, ka haere atu ahau ki a koe i roto i tetahi kapua matotoru, kia rongo ai te iwi, ua korero ahau ki a koe, kia whakapono ai hoki ratou ki a koe a mua tonu atu. <sup>10</sup> A korerotia ana e Mohi nga kupu a te iwi ki a Ihowa. Na ka mea a Ihowa ki a Mohi, Haere ki te iwi, ka whakatapu hoki i a ratou akuanei, apopo hoki, kia horoi hoki ratou i o ratou kakahu, <sup>11</sup> Kia takatu hoki mo te ra tuatoru; ta te mea hei te ra tuatoru a Ihowa haere iho ai ki te aroaro o te iwi katoa, ki runga ki Maunga Hinai. <sup>12</sup> A whakatakotoria e koe he rohe mo te iwi, tawhio noa, tawhio noa, ka mea atu, Kia mohio koutou kei piki ki te maunga, kei pa ranei ki tona taha: ko nga tangata katoa e pa ana ki te maunga, ina, me whakamate. <sup>13</sup> Kua te ringa e pa ki a ia, engari me aki ki te kohatu, me wero ranei ki te tao; ahakoa kararehe, ahakoa tangata, e kore e ora: ka kukume roa te tangi o te tetere, ka haere mai ai ratou ki te maunga. <sup>14</sup> Na ka haere iho a Mohi i te maunga ki te iwi, ka whakatapu ia i te iwi, a horoia ana e ratou o ratou kakahu. <sup>15</sup> A i te mea ia ki te iwi, Kia takatu koutou i te toru o nga ra: kua e whakatata atu ki te wahine. <sup>16</sup> A ka taka ki te toru o nga ra, i te ata, na, ka puta mai nga whatitiri, me nga uira, me te kapua matotoru i runga i te maunga, me te tangi o te tetere, tona nui na! a wiri katoa ana te hunga i te puni. <sup>17</sup> Na ka arahina atu te iwi e Mohi i te puni ki te whakatau i te Atua; a tu ana ratou ki raro i te maunga. <sup>18</sup> A he paowa kau Maunga Hinai, no te mea kua heke iho a Ihowa ki runga, i roto i te ahi; a kake ana tona paowa, ano he paowa oumu, a wiri pu te maunga katoa. <sup>19</sup> A i te mea ka nui haere rawa te tangi o te tetere, ka korero atu a Mohi, a ka korero a reo tangata mai te Atua ki a ia. <sup>20</sup> Na ka heke iho a Ihowa ki Maunga Hinai, ki te tihi o te maunga: a karangatia iho ana a Mohi e

Ihowa ki te tihi o te maunga; a piki atu ana a Mohi. <sup>21</sup> Na ka mea a Ihowa ki a Mohi, Heke atu, kauwhautia te iwi ra, kei wahi ake ratou ki a Ihowa ki te matakitaki, a he tokomaha o ratou e hinga.

<sup>22</sup> Ko nga tohunga hoki e whakatata ana ki a Ihowa, kia tapu ratou, kei auta atu a Ihowa ki a ratou.

<sup>23</sup> A ka mea a Mohi ki a Ihowa, E kore e ahei i te iwi te piki ake ki Maunga Hinai; nau hoki i kauwhau iho ki a matou, i mea, Taiepatia te maunga, whakatapua hoki. <sup>24</sup> Na ka mea a Ihowa ki a ia, Haere, heke atu; ka piki mai ano koe, korua ko Arona: ko nga tohunga ia, me te iwi, kei wahi mai ratou, kei piki ki a Ihowa; kei auta atu ia ki a ratou. <sup>25</sup> A heke atu ana a Mohi ki te iwi, korero ana ki a ratou.

## Chapter 20

<sup>1</sup> Na ka korerotia e te Atua enei kupu katoa, ka mea, <sup>2</sup> Ko Ihowa ahau, ko tou Atua, naku koe i whakaputa mai i te whenua o Ihipa, i te whare pononga. <sup>3</sup> Aua etahi atua ke atu mou ki mua i ahau. <sup>4</sup> Kei hanga koe i te whakapakoko mou, i tetahi ritenga ranei o nga mea o te rangi i runga, o te whenua ranei i raro, o te wai ranei i raro i te whenua: <sup>5</sup> Kei koropiko koe ki ena mea, kei mahi ranei ki ena mea; ko Ihowa hoki ahau, ko tou Atua, he Atua hae, e mea ana i nga hara o nga matua kia tau iho ki nga tamariki a te toru, te wha ra ano o nga whakatupuranga o te hunga e kino ana ki ahau; <sup>6</sup> E whakaputa aroha ana hoki ki nga mano, ki te hunga e aroha ana ki ahau, e whakarite ana i aku ture. <sup>7</sup> Kei whakahuatia noatia e koe te ingoa o Ihowa, o tou Atua; e kore hoki a Ihowa e mea, he harakore te tangata e whakahua noa ana i tona ingoa. <sup>8</sup> Kia mahara ki te ra hapati, kia whakatapua. <sup>9</sup> E ono nga ra e mahi ai koe, e mea ai hoki i au mea katoa; <sup>10</sup> Tena ko te ra whitu, he hapati no Ihowa, no tou Atua: kua e mahia tetahi mahi i reira e koe, e tau tama, e tau tamahine, e tau pononga tane, e tau pononga wahine, e au kararehe hoki, me tou tangata ke i roto i ou tatau; <sup>11</sup> E ono hoki nga ra i hanga ai e Ihowa te rangi, me te whenua, te moana, me nga mea katoa i roto, a okioki ana i te ra whitu: na reira i whakapaingia ai te ra hapati e Ihowa, a whakatapua ana.

<sup>12</sup> Whakahonoretia tou papa me tou whaea; kia roa ai ou ra ki te whenua e homai nei e Ihowa, e tou Atua, ki a koe. <sup>13</sup> Kua e patu. <sup>14</sup> Kua e puremu. <sup>15</sup> Kua e tahae. <sup>16</sup> Kua e whakapae teka ki tou hoa. <sup>17</sup> Kua e hiahia ki te whare o tou hoa, kua e hiahia ki te wahine a tou hoa, ki

tana pononga tane ranei, ki tana pononga wahine ranei, ki tana kau ranei, ki tana kaihe ranei, ki tetahi mea ranei a tou hoa.

18

A i kite te iwi katoa i nga whatitiri, i nga uira, i te tangi o te tetere, i te maunga hoki e paowa

19

ana: a, i te kitenga o te iwi, ka wiri ratou, a tu rawa i tawhiti. A ka mea ratou ki a Mohi, Mau e korero mai ki a matou, a ka whakarongo atu matou; engari kua te Atua e korero ki a matou, kei

20

mate matou. Na ka mea a Mohi ki te iwi, Kaua e wehi: he whakamatau hoki i a koutou i haere

21

mai ai te Atua, kia mau ai hoki tona wehi i o koutou kanohi, kei hara koutou. A tu ana te iwi i tawhiti; ko Mohi ia, i whakatata ki te pouri kerekere i noho ai te Atua.

22

A ka mea a Ihowa ki a Mohi, Kia penei tau kupu ki nga tama a Iharaira, Ka kite koutou kua

23

korero ahau i te rangi ki a koutou. Kei hanga koutou he atua ke atu ki toku taha; kei hanga koutou

24

he atua hiriwa, he atua koura ranei, mo koutou. Hanga he aata oneone maku, ki runga patu ai koe i au tahunga tinana, i au whakahere mo te pai, i au hipi, i au kau: i nga wahi katoa e

25

whakamaharatia ai e ahau toku ingoa ka haere atu ahau ki a koe, ka manaaki i a koe. A ki te hanga koe i te aata kohatu maku, kei hanga e koe ki te kohatu hahau; ki te hapai hoki koe i tau toki

26

ki taua mea, kua whakanoatia e koe. Kaua ano e piki na te arawhata ki toku aata, kei kitea koe i reira e tu tahanga ana.

## Chapter 21

1

A ko nga whakariteritenga enei e whakatakotoria e koe ki to ratou aroaro. Ki te hoki koe i

2

tetahi pononga Hiperu, e ono nga tau e mahi i a ia: a i te whitu ka haere noa atu, kua he utu. Ki te mea he takakau ia i tona haerenga mai, me haere atu ano he takakau: ki te mea he wahine tana,

3

ko raua ko tana wahine e haere. Ki te mea na tona ariki te wahine i hoatu ki a ia, a ka whanau a

4

raua tama, tamahine ranei; ma tona ariki te wahine ratou ko ana tamariki, ko ia anake e haere. A ki te mea matanui te pononga, E aroha ana ahau ki toku ariki, ki taku wahine, ki aku tamariki; e

5

kore ahau e haere noa atu: Na, me kawe ia e tona ariki ki te Atua; me kawe hoki ia e ia ki te tatau, ki te pou ranei o te tatau: a ka pokaia tona taringa e tona ariki ki te oka; a ka oti iho ia hei kaimahi

6

mana. Ki te hokona atu hoki e tetahi tangata tana tamahine hei pononga, e kore e rite tona haerenga

7

ki waho ki te haerenga o nga pononga tane. Ki te kino ia ki te titiro a tona ariki, i taumau nei i a ia mana, na, me whakahoki ia mo tetahi utu: e kore e ahei te hoko i a ia ki tetahi iwi ke; mona hoki

8



9  
 i tinihanga ki a ia. A ki te taumautia ia e ia ma tana tama, kia rite ki te tikanga ki nga tamahine  
 10  
 tupu tana e mea ai ki a ia. Ki te tango ia i tetahi atu wahine mana kua e whakaititia e ia te kai  
 11  
 ma tera, te kakahu mona, me ta raua moe tahi. A ki te kahore enei mea e toru e meatia e ia ki a  
 ia, na, me haere noa atu ia, kua he moni.  
 12  
 Ki te patu tetahi i te tangata kia mate, me tino whakamate ano ia. 13 A ki te kahore tetahi e  
 whanga atu, a ka mea te Atua kia tupono ki tona ringa; na, maku e whakarite ki a koe te wahi e rere  
 ai ia. 14 Tena ko tenei i poka noa te tangata ki tona hoa, ki te kohuru tinihanga i a ia; me tango ia  
 e koe i taku aata, kia mate ai ia. 15 Me tino whakamate ano hoki te tangata e patu ana i tona papa,  
 16  
 i tona whaea ranei. Ko te tangata hoki e tahae ana i tetahi tangata, a hokona ana e ia, e kitea ana  
 ranei ki tona ringa, me tino whakamate ano ia. 17 Me tino whakamate ano hoki te tangata e kanga  
 ana i tona papa, i tona whaea ranei. 18 Ki te whawhai hoki etahi tangata ki a raua a ka akina tona  
 hoa e tetahi ki te kohatu, ka motokia ranei, a kahore ia e mate, engari ka takoto i runga i te moenga;  
 19  
 Ki te ara ake ia, a ka haereere ki waho me te toko i tana tokotoko, katahi ka kore te hara o te  
 tangata i patua ai ia; otiia me utu e ia tona whakamangeretanga ki te mahi, me mea hoki kia ata  
 rongoatia kia ora ai. 20 Ki te patu hoki te tangata i tana pononga tane, i tana pononga wahine ranei,  
 ki te rakau, a ka mate i raro iho i tona ringa; me ata takitaki tona matenga. 21 Otiia ki te ora ia,  
 kotahi, e rua ranei, nga ra, e kore e takitakina: no te mea ko tana moni ia.  
 22  
 Ki te whawhai etahi tangata ki a ratou, a ka whara tetahi wahine e hapu ana, a ka materoto  
 tana tamaiti, otiia kahore atu he he, me tango he utu i a ia, ara ta te tahu o te wahine e whakarite ai  
 ki a ia; hei ta nga kaiwhakawa e mea ai tana e hom ai ai. 23 Engari ki te mate, na, me homai e koe  
 he mate hei utu mo te mate, 24 He kanohi mo te kanohi, he niho mo te niho, he ringa mo te ringa,  
 he waewae mo te waewae, 25 He wera mo te wera, he motu mo te motu, he karawarawa mo te  
 karawarawa. 26 Ki te patua e te tangata te kanohi o tana pononga tane, te kanohi ranei o tana  
 pononga wahine, a ka matapotia; me tuku kia haere noa atu, hei utu mo tona kanohi. 27 A ki te  
 patua e ia kia marere te niho o tana pononga tane, te niho ranei o tana pononga wahine; me tuku  
 kia haere noa atu, hei utu mo tona niho. 28 Ki te werohia tetahi tangata, tetahi wahine ranei, e te  
 kau, a ka mate; me tino aki te kau ki te kohatu, kua ano hoki ona kikokiko e kainga; a ka tukua  
 29  
 noatia atu te rangatira o te kau. Otiia ki te mea he kau wero ia no mua, a kua whakaaturia ki  
 tona rangatira, a kahore ia e tiaki i a ia, a ka mate i a ia tetahi tangata, tetahi wahine ranei; me aki

te kau ki te kohatu, me whakamate ano hoki tona rangatira. <sup>30</sup> Ki te whakaritea kia homai e ia he  
 moni, me homai e ia hei utu mo tona ora te mea i whakaritea ki a ia. <sup>31</sup> Ki te mea he tama, he kotiro  
 ranei i werohia e ia, kia rite ano ki tenei tikanga te meatanga ki a ia. <sup>32</sup> Ki te wero te kau i tetahi  
 pononga tane, i tetahi pononga wahine ranei; kia toru tekau nga hekere hiriwa e homai ki to raua  
 ariki, me aki hoki te kau ki te kohatu. <sup>33</sup> Ki te whakatuwhera hoki te tangata i tetahi poka, ki te  
 keria ranei e te tangata tetahi poka, a e kore e hipokina e ia, a ka taka he kau, he kaihe ranei ki roto;  
<sup>34</sup>  
 Me utu e te tangata nana te poka, me homai he moni e ia ki to raua ariki; a mana te mea mate.  
<sup>35</sup>  
 Ki te tukia te kau a tetahi tangata e te kau e tetahi, a ka mate; na, me hoko e raua te kau ora, ka  
<sup>36</sup>  
 wehe ai i ona tutu; me wehe ano hoki e raua te mea kua mate. Otiia ki te mea i mohiotia he kau  
 wero ia no mua, a kahore i tiakina e tona ariki, me utu e ia te kau ki te kau; a mana te mea mate.

## Chapter 22

<sup>1</sup>  
 Ki te tahae te tangata i te kau, i te hipi ranei, a ka patua, ka hokona ranei e ia; kia rima nga  
 kau e homai e ia hei utu mo te kau kotahi, kia wha hoki nga hipi mo te hipi kotahi. <sup>2</sup> Ki te mau te  
 tahae e poka ara ana, a ka patua, ka mate, kahore he toto e heke mona. <sup>3</sup> Ki te mea kua whiti te ra  
 ki a ia, ka heke he toto mona; me homai hoki e ia he utu; ki te kahore ana mea, na, me hoko ia mo  
 tana tahae. <sup>4</sup> Ki te mau pu ki tona ringa te mea i tahaetia, he kau, he kaihe ranei, he hipi ranei, a e  
 ora ana; kia rua nga utu e homai e ia. <sup>5</sup> Ki te mea tetahi tangata kia kainga tetahi mara, tetahi kari  
 waina ranei, a ka tukua atu e ia tana kararehe hei kai i te mara a tetahi; me utu e ia ki nga hua papai  
 rawa o tana mara, ki nga hua papai rawa hoki o tana kari waina. <sup>6</sup> Ki te toro atu te ahi, a ka pono  
 ki nga tataramoa, a ka pau nga whakapu witi, te witi ranei e tu ana, te mara ranei; me ata whakautu  
 e te tangata nana i tahu te ahi.  
<sup>7</sup>  
 Ki te homai e te tangata tetahi moni, etahi mea ranei, ki tona hoa kia tiakina, a ka tahaetia i  
 roto i te whare o taua tangata; ki te kitea te tahae, kia rua nga utu e homai e ia. <sup>8</sup> Ki te kahore i kitea  
 te tahae, na, me kawe te rangatira o te whare ki te Atua, kia kitea me kahore i totoro tona ringaringa  
 ki nga taonga a tona hoa. <sup>9</sup> I nga whakawakanga hara katoa mo te kau, kaihe, hipi, kakahu, mo te  
 ngaromanga o tetahi mea e kiia ana e tetahi nona, me haere te korero a te tokorua ki te Atua; ko te  
 tangata kua whakataua te he ki a ia e te Atua, kia rua nga utu e homai e ia ki tona hoa. <sup>10</sup> Ki te

homai e tetahi he kaihe ki tona hoa, he kau ranei, he hipi ranei, tetahi ranei o nga tini kararehe, kia  
 tiakina; a ka mate, ka whara ranei, ka pahuatia ranei, kihai ano hoki i kitea: <sup>11</sup> Ka waiho i waenganui  
 i a raua te oati a Ihowa, mo tona ringa kihai i totoro atu ki te taonga o tona hoa: a me whakaae mai  
 e te rangatira o taua mea, e kore ano hoki e utua. <sup>12</sup> Otiia ki te mea kua tahaetia atu i a ia, me hoatu  
 he utu ki tona rangatira. <sup>13</sup> Ki te mea kua haehaea, me kawe mai e ia hei whakaatu, a e kore e utua  
 e ia te mea i haea. <sup>14</sup> Ki te tikina ano hoki e te tangata tetahi mea a tona hoa, a ka whara, ka mate  
 ranei, me te ngaro ano te rangatira o taua mea, me ata whakautu ano e ia. <sup>15</sup> Kei reira te rangatira,  
 e kore e utua: ki te mea e utua ana tona tukunga, i haere mai hoki mo tona utu.  
<sup>16</sup> Ki te whakawai te tangata i te kotiro kihai i taumautia, a ka moe raua, me whakarite he  
 tapakuha, a me marena e ia hei wahine mana. <sup>17</sup> Ki te tino whakakahore rawa tona papa, a e kore  
 e tukua ki a ia, me homai e ia nga moni e rite ana ki te kaireperepe mo nga kotiro. <sup>18</sup> Kei tukua e  
 koe te wahine makutu kia ora. <sup>19</sup> Ko te tangata i takotoria e ia he kararehe, me whakamate rawa.  
<sup>20</sup> Me whakangaro rawa te tangata e patu whakahere ana ma tetahi atua ke; engari ma Ihowa anake.  
<sup>21</sup> Kaua hoki e whakatoia te manene, kaua ano hoki ia e tukinotia: he manene hoki koutou i mua,  
 i te whenua o Ihipa. <sup>22</sup> Kaua e whakatupuria kinotia te pouaru, te pani ranei. <sup>23</sup> Ki te anga koe ki  
 te whakatupukino i a raua, a ka tangi raua ki ahau, ina, ka whakarongo ahau ki ta raua karanga;  
<sup>24</sup> A ka mura toku riri, ka patua ano hoki koutou ki te hoari; a ka pouarutia a koutou wahine, ka  
 pania ano hoki a koutou tamariki.  
<sup>25</sup> Ki te whakatarewa koe i te moni ki tetahi o taku iwi, ki tetahi o ou rawakore, kei rite tau ki  
 a ia ki ta te kaiwhakatuputupu moni, kei tangohia i a ia te moni whakatuputupu. <sup>26</sup> Ki te tangohia  
 e koe te kakahu o tou hoa hei taunaha, kaua e tukua kia rere te ra ka whakahoki ai ki a ia: <sup>27</sup> Ko  
 tena anake na hoki hei uhi mona, hei kakahu mona, mo tona kiri: a ko te aha hei moenga iho mona?  
 ki te karanga mai hoki ia ki ahau, na ka whakarongo atu ahau; no te mea he mahi tohu tangata taku.  
<sup>28</sup> Kaua e kohukohu ki te Atua, kaua ano hoki e kanga ki te ariki o tou iwi. <sup>29</sup> Kei whakaroa koe  
 ki te homai i nga matamua o ou hua, o ou wai: me homai e koe te matamua o au tamariki ki ahau.  
<sup>30</sup> Kia pera ano tau e mea ai ki au kau, ki au hipi: e whitu nga ra e noho ai ia ki tona whaea; i te  
 waru o nga ra me homai ki ahau. <sup>31</sup> Hei tangata tapu hoki koutou maku: kaua ano e kai i te kikokiko  
 i haea ki te parae; me maka ma te kuri.

## Chapter 23

<sup>1</sup> Kei puaki i a koe te korero tito noa: kei totoro tahi tou ringa me te tangata kino, kei meinga  
 hei kaiwhakaatu teka. <sup>2</sup> Kei whai tahi me te tokomaha ki te kino; kua ano hoki e hamumu i te  
 totohenga, hei mea kia riro ai i ta te tokomaha, hei whakapeau ke i te tika: <sup>3</sup> Kua ano e whakanuia  
 te rawakore, ina tohe ia. <sup>4</sup> Ki te tutaki koe ki te kau a tou hoariri, ki tana kaihe ranei, e atiti noa  
 ana, me ata whakahoki e koe ki a ia. <sup>5</sup> Ki te kite koe i te kaihe a tou hoariri e takoto ana i raro i  
 tana pikaunga, a ka ngakaukore koe ki te whakaara, me ata whakaara tahi e korua. <sup>6</sup> Kei whakapeaua  
 ketia e koe te whakawa mo tou tangata rawakore, ina tohe ia. <sup>7</sup> Kia matara koe i te teka; kua ano  
 e whakamatea te tangata harakore raua ko te tangata tika: e kore hoki ahau e whakatika i ta te  
 tangata hara. <sup>8</sup> Kua ano e tango i te utu whakapati: he mea whakamatapo hoki te utu whakapati i  
 te kanohi kite, he mea whakaparori ke hoki i nga kupu a te hunga tika. <sup>9</sup> Kua ano e tukinotia te  
 manene; e mohio ana hoki koutou ki te ngakau o te manene; he manene hoki koutou i mua, i te  
 whenua o Ihipa.

<sup>10</sup> Kia ono hoki nga tau e rui ai koe i tou oneone, e kohikohi ai hoki i ona hua: <sup>11</sup> I te whitu ia  
 me waiho kia takoto kau ana, kia pariri, a ka kai nga tangata rawakore o tou iwi; a ma nga kirehe  
 o te parae a ratou toenga e kai. Kia pena ano koe ki tau mara waina, ki tau mara oriwa. <sup>12</sup> E ono  
 nga ra e mahi ai koe i au mahi, a i te whitu ka okioki: kia okioki ai tau kau, me tau kaihe, kia whai  
 taanga manawa ai hoki te tama a tau pononga wahine me te manene. <sup>13</sup> Kia tupato ano ki nga mea  
 katoa kua korerotia nei e ahau ki a koutou: kua hoki e whakahuatia te ingoa o nga atua ke, kei  
 rangona hoki ki tou mangai. <sup>14</sup> E toru nga wa o te tau e tuku hakari ai koe ki ahau. <sup>15</sup> Kia mau ki  
 te hakari o te taro rewenakore: e whitu nga ra e kai ai koe i te taro rewenakore, e pera ai me taku i  
 whakahau ai ki a koe, i te wa ano i whakaritea o te marama, o Apipi; no reira hoki koe i haere mai  
 ai i Ihipa: kua ano hoki tetahi e puta kau mai ki toku aroaro; <sup>16</sup> Ki te hakari o te kotinga, o te  
 matamua o au mahi, i ruia e koe ki te mara: ki te hakari o te kohikohinga i te mutunga o te tau, ina  
 oti te kohikohi mai e koe au mahi i te mara. <sup>17</sup> E toru nga wa o te tau e kitea ai ou tane katoa ki te  
 aroaro o te Ariki, o Ihowa. <sup>18</sup> Kua e whakaherea tahitia me te taro rewenata te toto o taku patunga  
 tapu; kei toe ano hoki ki te ata te ngako o taku hakari. <sup>19</sup> Me kawe e koe ki te whare o Ihowa, o  
 tou Atua nga mea mataati o nga matamua o tou oneone. Kua e kohuatia te kua koati ki te waiu  
 o tona whaea.

20 Nana, ka tonoa nei e ahau he anahera ki mua i a koe, hei tiaki i a koe i te ara, hei kawē hoki  
i a koe ki te wahi i whakaritea e ahau. 21 Kia tupato ki a ia, whakarongo hoki ki tona reo, kua e  
whakapataritari ki a ia; no te mea e kore ia e whakarere noa iho i to koutou hara: kei a ia nei hoki  
22 toku ingoa. Ki te ata whakarongo i a koe ki tona reo, ki te mea hoki i nga mea katoa e korero ai  
ahau; na, ko ahau hei hoariri mo ou hoariri, hei hoa whawhai hoki ki ou hoa whawhai. 23 Ka haere  
hoki taku anahera ki mua i a koe, hei kawē i a koe ki nga Amori, ki nga Hiti, ki nga Perihi, ki nga  
24 Kanaani, ki nga Hiwi, ki nga Iepuhi: a ka huna ratou e ahau. Kei koropiko koe ki o ratou atua,  
kei mahi hoki ki a ratou, kei rite hoki au mahi ki a ratou mahi: engari me turaki rawa e koe, me  
25 wawahi rawa ano hoki a ratou whakapakoko. A me mahi koutou ki a Ihowa, ki to koutou Atua,  
a ka manaakitia e ia tau taro, me tou wai; ka whakakorea atu ano hoki e ahau te mate i roto i a koe.  
26 E kore tetahi mea e whanau whakatahe, e pakoko ranei, i tou whenua: ka ata tutuki ano i ahau  
27 te maha o ou ra. Ka tukua atu e ahau taku wehi ki mua i a koe, a ka whakamatea nga iwi katoa  
e haere atu nei koe ki a ratou, ka meinga ano hoki e ahau kia tahuri nga tuara o ou hoariri katoa ki  
28 a koe. Ka unga ano e ahau te horonete ki mua i a koe, mana e pei nga Hiwi, nga Kanaani, me  
29 nga Hiti i tou aroaro. E kore ratou e peia e ahau i tou aroaro i te tau kotahi; kei ururutia te  
whenua, a ka nui rawa i a koe te kirehe o te parae. 30 Ka peia rikirikitia atu ratou e ahau i tou aroaro,  
31 kia hua ra ano koe, kia riro ra ano hoki te whenua i a koe. A ka whakatakotoria e ahau tou rohe  
ki te Moana Whero a tae noa ki te Moana o nga Pirihitini, ki te koraha hoki a tae noa ki te awa: ka  
tukua atu nei hoki e ahau ki o koutou ringa nga tangata o te whenua, a ka peia ratou e koe i tou  
32 aroaro. Kua e whakarite kawenata ki a ratou, ki o ratou atua ranei. 33 Kua ratou e noho ki tou  
whenua, kei mea ratou i a koe kia hara ki ahau: ta te mea, ki te mahi koe ki o ratou atua, ka ai tena  
hei rore mou.

## Chapter 24

1 Na ka mea ia ki a Mohi, Piki ake ki a Ihowa koutou ko Arona, ko Natapa, ko Apihu, kia whitu  
tekau ano hoki o nga kaumatua o Iharaira; a me koropiko mai koutou i tawhiti. 2 Ko Mohi anake  
hoki e whakatata mai ki a Ihowa: ko ratou ia, kua ratou e whakatata mai; me te iwi hoki, kua  
3 ratou e piki tahi ake me ia. Na ka haere a Mohi, ka korerotia e ia ki te iwi nga kupu katoa a Ihowa,  
me nga whakariteritenga katoa: a kotahi ano te reo o te iwi katoa ki te whakahoki, ka ki ratou, Ka

meatia e matou nga mea katoa i korerotia mai e Ihowa. <sup>4</sup> Na ka tuhituhia e Mohi nga kupu katoa a Ihowa; a ka maranga wawe ia i te ata, a hanga ana e ia tetahi aata ki raro iho i te maunga, me nga pou kotahi tekau ma rua mo nga iwi kotahi tekau ma rua o Iharaira. <sup>5</sup> I unga ano e ia etahi taitama o nga tama a Iharaira, hei whakaeke i nga tahunga tinana, hei patu hoki i nga puru hei patunga mo te pai ki a Ihowa. <sup>6</sup> Na, ka tango a Mohi i tetahi wahi o te toto, a maka ana e ia ki roto ki nga peihana; ko tetahi wahi hoki o te toto i taia atu ki te aata. <sup>7</sup> Na ka mau ia ki te pukapuka o te kawenata, a korerotia ana ki nga taringa o te iwi: a ka mea ratou, Ko nga mea katoa i kiia mai na e Ihowa ka meatia e matou, ka rongono ano matou. <sup>8</sup> Na ka mau a Mohi ki te toto, a taia atu ana e ia ki te iwi, me te ki ano ia, Nana, te toto nei o te kawenata e whakaritea nei e Ihowa ki a koutou mo enei mea katoa.

<sup>9</sup> Na ka piki ake a Mohi ratou ko Arona, ko Natapa, ko Apihu, me nga kaumatua e whitu tekau o Iharaira; <sup>10</sup> Na ka kite i te Atua o Iharaira: kei raro ano i ona waewae me te mea ko te hapira i hanga hei whariki, he rite tonu ano ki te tino rangi te marama. <sup>11</sup> A kihai i totoro tona ringa ki tetahi o nga rangatira o nga tama a Iharaira: heoi, ka titiro atu ratou ki te Atua, ka kai hoki, ka inu.

<sup>12</sup> Na ka mea a Ihowa ki a Mohi, Piki ake ki ahau ki te maunga, a hei reira koe noho ai: a ka hoatu e ahau ki a koe nga papa kohatu, me te ture, me te whakahau kua oti nei i ahau te tuhituhi, hei whakaako mau ki a ratou. <sup>13</sup> Na ko te whakatikanga ake o Mohi, raua ko tana tangata, ko Hohua: ka piki atu a Mohi ki te maunga o te Atua. <sup>14</sup> I mea ano ia ki nga kaumatua, Taria ake maua i konei, kia hoki mai ra ano maua ki a koutou: na, ko Arona raua ko Huru tena hei hoa mo koutou: ki te whai take tetahi tangata, me haere ia ki a raua. <sup>15</sup> Na piki ana a Mohi ki te maunga, e taupokina ana hoki te maunga e te kapua: <sup>16</sup> A i tau te kororia o Ihowa ki runga ki Maunga Hinai; a e ono nga ra i taupokina ai a reira e te kapua; a i te whitu o nga ra ka karanga ia ki a Mohi i waenganui o te kapua. <sup>17</sup> A i rite te ahua o te kororia o Ihowa ki te ahi e kai ana i runga i te tihi o te maunga, i te tirohanga a nga tama a Iharaira. <sup>18</sup> Na ka haere a Mohi ki waenganui o te kapua, a pikitia ana e ia te maunga: a e wha tekau nga ra o Mohi ki runga ki te maunga, e wha tekau hoki nga po.

## Chapter 25

<sup>1</sup> Na ka korero a Ihowa ki a Mohi, ka mea, <sup>2</sup> Korero atu ki nga tama a Iharaira, kia maua mai e ratou he whakahere maku: me tango e koutou te whakahere maku i nga tangata katoa e hihiko

noa mai ana o ratou ngakau. <sup>3</sup> Ko te whakahere ano tenei e tangohia e koutou i a ratou; he koura,  
 he hiriwa, he parahi, <sup>4</sup> Me te kakahu puru, me te papaura, me te ngangana, me te rinena pai, me te  
 huruhuru koati, <sup>5</sup> Me nga hiako hipi kua oti te whakawhero, me nga hiako pateri, me etahi rakau,  
 he hitimi; <sup>6</sup> Te hinu mo te whakamarama, nga mea kakara mo te hinu whakawahi, mo te whakakakara  
 reka hoki, <sup>7</sup> Nga kohatu onika, me nga kohatu hei whakanoho ki te epora, ki te kouma. <sup>8</sup> A kia  
 hanga e ratou he wahi tapu moku; kia noho ai ahau i waenganui i a ratou. <sup>9</sup> Kia rite a koutou e  
 hanga ai ki nga mea katoa e whakakitea nei e ahau ki a koe, ki te taurira o te tapenakara, ki te taurira  
 hoki o ona mea katoa.

<sup>10</sup> Me hanga ano hoki e ratou he aaka, ki te hitimi te rakau: kia rua nga whatianga me te hawhe  
 te roa, kia kotahi whatianga me te hawhe te whanui, a kia kotahi whatianga me te hawhe te teitei.

<sup>11</sup> A me whakakikorua e koe ki te koura parakore; me whakakikorua e koe taua mea, a roto, a waho,

me hanga ano hoki e koe he niao koura a tawhio noa. <sup>12</sup> Kia wha ano nga mowhiti koura e  
 whakarewaia mo taua aaka, ka whakanoho ai ki nga poti e wha; kia rua mowhiti ki tetahi taha ona,

kia rua mowhiti ki tetahi taha ona. <sup>13</sup> Me hanga ano e koe etahi rakau amo, ki te hitimi te rakau,

ka whakakikorua hoki ki te koura; <sup>14</sup> Ka kuhu ai i nga rakau amo ki roto ki nga mowhiti i nga taha

o te aaka, kia ai aua mea hei maunga mo te aaka. <sup>15</sup> Hei nga mowhiti o te aaka nga amo mau ai;

kaua e unuhia ki waho. <sup>16</sup> A me hoatu e koe ki roto ki te aaka te whakaaturanga e hoatu e ahau ki

a koe. <sup>17</sup> Me hanga ano e koe te taupoki ki te koura parakore: kia rua nga whatianga me te hawhe

tona roa, kia kotahi hoki whatianga me te hawhe tona whanui. <sup>18</sup> Me hanga ano etahi kerupima,

kia rua, he mea patu te koura e hanga ai aua mea a puta noa, mo nga pito e rua o te taupoki. <sup>19</sup> Me

hanga hoki tetahi kerupi ki tetahi pito, me tetahi kerupi ki tetahi pito: me hono nga kerupima ki te

taupoki, ki ona pito e rua. <sup>20</sup> A ka roha whakarunga nga parirau o nga kerupima, me te uhi ano i

te taupoki ki o raua parirau, ka anga ano o raua mata ki a raua; ka anga ki te taupoki nga mata o

nga kerupima. <sup>21</sup> A me whakanoho e koe te taupoki ki runga ki te aaka; me hoatu ano ki roto ki te

aaka te whakaaturanga e hoatu e ahau ki a koe. <sup>22</sup> A ka tutaki ahau ki a koe ki reira, ka korerotia  
 ano ki a koe i runga i te taupoki i waenganui i nga kerupima e rua, i era i runga i te aaka o te  
 whakaaturanga, nga mea katoa e whakahau ai ahau ki a koe mo nga tama a Iharaira.

<sup>23</sup> Me hanga ano e koe tetahi tepu, ki te hitimi te rakau: kia rua nga whatianga te roa, kia kotahi whatianga te whanui, kia kotahi whatianga me te hawhe te teitei. <sup>24</sup> Me whakakikorua taua mea ki te koura parakore, ka hanga ai i tetahi niao koura mona a tawhio noa. <sup>25</sup> Me hanga ano he awhi mo taua mea, hei te whanui ringa a tawhio noa; me hanga ano he niao koura mo tona awhi a tawhio noa. <sup>26</sup> Me hanga ano etahi mowhiti koura, kia wha, mo taua mea, ka whakanoho ai i nga mowhiti ki nga poti e wha i ona waewae e wha. <sup>27</sup> Hei te taha tonu ake o te awhi nga mowhiti, hei kuhunga atu mo nga amo hei maunga mo te tepu. <sup>28</sup> He hitimi te rakau e hanga ai e koe nga amo; me whakakikorua ano ki te koura; a ka ai aua mea hei maunga mo te tepu. <sup>29</sup> Me hanga ano ona rihi, ona koko, ona kapu, me nga peihana mo nga ringihanga: me hanga ki te koura parakore. <sup>30</sup> Me whakatakoto tonu te taro aroaro ki te tepu, ki toku aroaro. <sup>31</sup> Me hanga ano te turanga rama ki te koura parakore: me patu te mahina o te turanga rama tae noa ki tona take, ki ona peka; ko ona kapu, ko ona puku, me ona puawai he kotahi me ia. <sup>32</sup> A kia ono nga peka e puta ake i ona taha; e toru nga peka o te turanga rama i tetahi taha, e toru hoki nga peka o te turanga rama i tetahi taha: <sup>33</sup> Kia toru nga kapu, he mea rite ki te puawai aramona, te puku, me te puawai, ki te peka kotahi; me nga kapu e toru, he mea rite ki te puawai aramona ki tetahi atu peka, te puku, me te puawai: me pera tonu i nga peka e ono e puta ake ana i te tura nga rama. <sup>34</sup> Kia wha ia nga kapu o te turanga rama, kia rite ki te puawai aramona, te puku, me te puawai, o tetahi, o tetahi. <sup>35</sup> A e rua ona peka, kia kotahi puku o raro ake, he mea kotahi; e rua ona peka, kia kotahi puku o raro ake, he mea kotahi; e rua ona peka, kia kotahi puku o raro ake, he mea kotahi ano, o nga peka e ono e puta mai ana i te turanga rama. <sup>36</sup> No te mea kotahi nga puku, nga peka: ko taua mea katoa, he mea patu, kotahi tonu, he korua parakore. <sup>37</sup> Me hanga ona rama e whitu: a me tahu ona rama, hei whakamarama i tona hangaitanga atu. <sup>38</sup> Me koura parakore ano ona kuku me ona oko ngarahu. <sup>39</sup> Kia kotahi taranata koura parakore e hanga ai taua mea, me ena oko katoa. <sup>40</sup> Kia tupato ano kia hanga aua mea kia rite ki te tauira i whakakitea ki a koe i te maunga.

## Chapter 26



<sup>1</sup> Me hanga ano e koe te tapenakara, kia tekau pihi rinena miro pai; he puru hoki, he papura,  
 he ngangana: me whatu ki roto etahi kerupima; kia tohunga rawa te mahi. <sup>2</sup> Kia rua tekau ma waru  
 whatianga te roa o te pihi kotahi, kia wha whatianga te whanui o te pihi kotahi: kia rite te nui o nga  
 pihi katoa. <sup>3</sup> Me hono nga pihi e rima tetahi ki tetahi; me era atu pihi e rima hoki, me hono tetahi  
 ki tetahi. <sup>4</sup> Me hanga ano etahi koropiko puru ki te taha o tetahi pihi, ki te taha e honoa ana: me  
 pena ano e koe ki te taha ki waho o tetahi pihi, ki te taha e honoa mai ai te rua. <sup>5</sup> Kia rima tekau  
 nga koropiko e hanga e koe ki tetahi pihi, kia rima tekau hoki nga koropiko e hanga ki te taha o te  
 pihi e honoa mai ai te rua, kia hangai ai nga koropiko tetahi ki tetahi. <sup>6</sup> Me hanga ano etahi toromoka  
 koura, kia rima tekau, ka hono ai i nga pihi ki nga toromoka: a ka kotahi te tapenakara.  
<sup>7</sup> Me hanga ano hoki etahi pihi ki te huruhuru koati, hei teneti mo runga i te tapenakara: kia  
 kotahi tekau ma tahi nga pihi e hanga e koe. <sup>8</sup> Kia toru tekau whatianga te roa o tetahi pihi, kia  
 wha hoki whatianga te whanui o tetahi pihi, kia rite tonu te nui o nga pihi kotahi tekau ma tahi.  
<sup>9</sup> A me hono nga pihi e rima ki a ratou ano, me nga pihi e ono ki a ratou ano; a me whawhati te  
 tuaono o nga pihi ki te wahi ki mua o te tapenakara. <sup>10</sup> Me hanga ano kia rima tekau nga koropiko  
 mo te tapa o to waho pihi, i te hononga, me nga koropiko e rima tekau ki te tapa o te pihi o waho  
 rawa, e honoa mai ai te rua. <sup>11</sup> Me hanga ano etahi toromoka parahi, kia rima tekau, a ka kuhu i  
 nga totomoka ki nga koropiko, ka hono hoki i te teneti kia kotahi. <sup>12</sup> A ko te wahi i kohirahira atu  
 o nga pihi o te teneti, te taha o te pihi i mahue atu ra, me whakapahika ki waho atu o te tuarongo o  
 te tapenakara. <sup>13</sup> A, ko te wahi e roa iho ana o nga pihi o te teneti, kia kotahi whatianga o tetahi  
 pito, kia kotahi whatianga o tetahi pito, e purero iho i nga taha o te tapenakara, i tetahi taha, i tetahi  
 taha, hei uhi. <sup>14</sup> Me hanga ano e koe etahi hiako hipi, he mea kua oti te whakawhero, hei uhi mo  
 te teneti, me etahi hiako pateri, hei uhi mo waho atu.  
<sup>15</sup> Me hanga ano etahi papa mo te tapenakara, ki te hitimi te rakau, he mea whakatu. <sup>16</sup> Kia  
 kotahi tekau whatianga te roa o te papa, kia kotahi hoki whatianga me te hawhe te whanui o te papa  
 kotahi. <sup>17</sup> Kia rua nga arero o te papa kotahi, kia ririte ki a raua: kia pena tonu tau e mea ai ki nga  
 papa katoa o te tapenakara. <sup>18</sup> Na me hanga nga papa mo te tapenakara, kia rua tekau nga papa mo  
 te taha ki te tonga whaka te tonga. <sup>19</sup> Me hanga ano nga turanga hiriwa e wha tekau mo raro iho i  
 nga papa e rua tekau; kia rua nga turanga ki raro i tetahi papa mo ona arero e rua, kia rua hoki  
 turanga ki raro i tetahi papa mo ona arero e rua. <sup>20</sup> Kia rua tekau hoki nga papa mo te rua o nga

taha o te tapenakara, mo te taha ki te raki: <sup>21</sup> Me nga turanga hiriwa e wha tekau o aua mea, nga  
 turanga e rua mo raro i tetahi papa, me nga turanga e rua mo raro i tetahi atu papa. <sup>22</sup> A mo te  
 tuarongo o te tapenakara whaka te hauauru me hanga e koe kia ono nga papa. <sup>23</sup> Kia rua nga papa  
 e hanga e koe mo nga koki o te tapenakara i te tuarongo. <sup>24</sup> A me hono aua papa i raro, me hono  
 ano hoki i runga rawa ki te mowhiti kotahi: me pena aua papa e rua; me waiho mo nga koki e rua.  
<sup>25</sup> Na ka waru ena papa me nga turanga hiriwa; kotahi tekau ma ono nga turanga; e rua nga turanga  
 mo raro i tetahi papa, e rua hoki nga turanga mo raro i tetahi atu papa. <sup>26</sup> Me hanga ano hoki e koe  
 etahi kaho, ki te hitimi te rakau; kia rima mo nga papa o tetahi taha o te tapenakara, <sup>27</sup> Kia rima  
 hoki nga kaho mo nga papa o tetahi atu taha o te tapenakara, kia rima hoki nga kaho mo nga papa  
 o tetahi pito o te tapenakara, ara o te tuarongo whaka te hauauru. <sup>28</sup> A ko to waenga kaho, i  
 waenganui o nga papa, ka rere atu i tetahi pito, ki tetahi pito. <sup>29</sup> A me whakakikorua e koe nga  
 papa ki te koura, me hanga ano hoki nga mowhiti ki te koura hei kuhunga mo nga kaho: me  
 whakakikorua ano hoki nga kaho ki te koura. <sup>30</sup> Na me whakaara e koe te tapenakara; kia rite hoki  
 ki tona taurira i whakakitea ki a koe i te maunga.  
<sup>31</sup> Me hanga ano e koe he arai ki te mea puru, ki te papura, ki te ngangana, ki te rinena miro  
 pai; kia whatua ano hoki he kerupima ki roto: kia tohunga rawa te mahi: <sup>32</sup> Ka whakairi ai ki runga  
 ki nga pou hitimi e wha, he mea whakakikorua ki te koura: me koura nga matau, ki runga ano i nga  
 turanga hiriwa e wha. <sup>33</sup> A me whakairi e koe te arai ki raro i nga toromoka, ka kawe ai i te aaka  
 o te whakaaturanga ki reira, ki roto i te arai; a ko te arai hei wehe ma koutou i te wahi tapu, i te  
 wahi tino tapu. <sup>34</sup> Me whakatakoto ano e koe te taupoki ki runga ki te aaka o te whakaaturanga,  
 ki te wahi tino tapu. <sup>35</sup> Me whakatu ano te tepu ki waho mai o te arai, me te turanga rama ki te  
 ritenga atu o te tepu, ki te taha o te tapenakara whaka te tonga: me whakatu hoki e koe te tepu ki  
 te taha ki te raki. <sup>36</sup> Me hanga ano he pa mo te whatitoka o te teneti, ki te mea puru, ki te papura,  
 ki te ngangana, ki te rinena miro pai, he mea whakairo ki te ngira. <sup>37</sup> Me hanga ano mo te pa kia  
 rima nga pou hitimi, ka whakakikorua ki te koura, me koura nga matau o aua mea; me whakarewa  
 ano hoki e koe etahi turanga parahi e rima mo aua mea.

## Chapter 27

<sup>1</sup> Me hanga ano e koe tetahi aata, ki te hitimi te rakau, kia rima nga whatianga te roa, kia rima  
 whatianga te whanui; kia tapawha te aata: kia toru hoki nga whatianga te teitei. <sup>2</sup> Me hanga ona  
 haona ki nga koki e wha: kia kotahi te rakau o taua mea, o ona haona: me whakakikorua ano ki te  
 parahi. <sup>3</sup> Me hanga ano ona takotoranga mo ona pungarehu, me ona koko pungarehu, me ona  
 peihana, me ona matau, me ona oko ngarahu: me hanga ona mea katoa ki te parahi. <sup>4</sup> Me hanga  
 ano tona pae kupenga ki te parahi, he mea ripekapeka; a me hanga ki runga i taua mea ripekapeka  
 nga mowhiti parahi e wha ki ona pito e wha. <sup>5</sup> A me whakanoho taua mea ki raro i te awahi o te  
 aata, ki raro iho, kia takapu ai taua mea ripekapeka ki waenganui o te aata. <sup>6</sup> Me hanga etahi amo  
 mo te aata, he amo hitimi, ka whakakikorua hoki ki te parahi. <sup>7</sup> A ka kuhua nga amo ki nga mowhiti,  
 hei nga taha e rua o te aata nga amo, hei amo. <sup>8</sup> Kia tuwhera kau a roto, me hanga e koe ki te papa:  
 kia rite tau e hanga ai ki tera i whakakitea ki a koe ki te maunga.

<sup>9</sup> Me hanga ano te marae o te tapenakara: hei te rinena miro pai he pa mo te taha ki te tonga  
 whaka te tonga; kia kotahi rau whatianga te roa mo tetahi taha: <sup>10</sup> Ko nga pou kia rua tekau, ko  
 nga turanga o aua mea kia rua tekau, me parahi; me hiriwa ia nga matau o nga pou, me nga awahi.

<sup>11</sup> Me nga pa mo te taha ki te raki kia kotahi rau whatianga te roa, me nga pou e rua tekau, me nga  
 turanga e rua tekau, he parahi: me nga matau hiriwa o nga pou, me nga awahi hiriwa. <sup>12</sup> Me nga pa  
 mo te whanui o te marae ki te taha ki te hauauru kia rima tekau whatianga: kia kotahi tekau nga  
 pou, me nga turanga kotahi tekau. <sup>13</sup> Kia rima tekau hoki whatianga te whanui o te marae ki te  
 taha ki te rawhiti whaka te rawhiti. <sup>14</sup> Kia tekau ma rima whatianga nga pa o tetahi taha o te kuwaha,  
 kia toru nga pou, kia toru hoki nga turanga. <sup>15</sup> Kia tekau ma rima hoki whatianga o nga pa o tera  
 taha: kia toru nga pou, kia toru hoki nga turanga. <sup>16</sup> Kia rua tekau hoki whatianga o te pa mo te  
 kuwaha o te marae, he puru, he papura, he ngangana, he rinena miro pai, he mea whakairo ki te  
 ngira: kia wha hoki nga pou, kia wha hoki nga turanga. <sup>17</sup> Me whakawhaiawahi nga pou katoa o te  
 marae a taka noa ki te hiriwa; me hiriwa nga matau, me parahi nga turanga. <sup>18</sup> Kia kotahi rau  
 whatianga te roa o te marae, kia rima tekau hoki te whanui i nga wahi katoa, kia rima hoki whatianga  
 te teitei, ki te rinena miro pai, me parahi hoki nga turanga. <sup>19</sup> Me parahi nga oko katoa o te  
 tapenakara mo nga mahi katoa o reira, nga titi katoa o reira, me nga titi katoa o te marae.

20

Me whakahau ano e koe nga tama a Iharaira kia kawea mai ki a koe he hinu oriwa, he mea parakore, he mea tuki, mo te whakamarama, kia ka tonu ai te rama. <sup>21</sup> Me whakapai e Arona ratou ko ana tama taua mea i roto i te tapenakara o te whakaminenga, i waho o te arai e iri ana i mua mai o te whakaaturanga, i te ahiahi a tae noa ki te ata, ki te aroaro o Ihowa; hei tikanga tenei mo ake tonu atu, ma o rato u whakatupuranga, mo nga tama a Iharaira.

## Chapter 28

1

Tangohia mai ano ki a koe a Arona, tou tuakana, ratou ko ana tama i roto i nga tama a Iharaira, hei tohunga maku, a Arona ratou ko Natapa, ko Apihu, ko Ereatara, ko Itamara, nga tama a Arona.

2

Me hanga ano e koe etahi kakahu tapu mo Arona, mo tou tuakana, hei kororia, hei ataahua. <sup>3</sup> Me korero ano e koe ki nga ngakau mohio katoa, ki aku i whakaki ai ki te wairua mohio, kia hanga e

4

ratou nga kakahu mo Arona, mo tona whakatapunga, mo tana mahi tohunga ki ahau. <sup>4</sup> A ko nga kakahu enei e hanga e ratou; he kouma, he epora, he koroka, he koti whakairo, he potae tohunga, he whitiki: na me hanga etahi kakahu tapu mo Arona, mo tou tuakana, ratou ko ana tama, mo tana

5

mahi tohunga ki ahau. <sup>5</sup> Me tango hoki he koura, he puru, he papura, he ngangana, he rinea pai.

6

A ka hanga te epora ki te koura, ki te puru, ki te papura, ki te ngangana, ki te rinena miro pai;

7

kia tohunga rawa te mahi. <sup>7</sup> Kia rua nga wahi i nga pokohiwi, he mea hono ki a raua i nga pito e

8

rua; kia kotahi ai. <sup>8</sup> A, ko te whitiki whakairo o te epora, kia kotahi ano te mea e hanga ai raua, kia

9

rite hoki to raua hanganga; he mea koura, puru, papura, ngangana, rinena miro pai. <sup>9</sup> Me tango ano

10

e koe nga kohatu onika e rua, ka tuhi ai i nga ingoa o nga tama a Iharaira ki aua mea: <sup>10</sup> Kia ono nga ingoa o ratou ki tetahi kohatu, me era ingoa atu hoki e ono ki tetahi atu kohatu; kia rite ki o

11

ratou whanautanga. <sup>11</sup> Hei te mahi a te kaituhi kohatu tau tuhi i nga ingoa o nga tama a Iharaira ki nga kohatu e rua, kia rite ki te tuinga o te hiri: me mea e koe kia whakanohoia aua mea ki nga

12

nohoanga koura. <sup>12</sup> A me whakanoho e koe nga kohatu e rua ki nga pokohiwi o te epora, hei kohatu whakamahara mo nga tama a Iharaira: a ka mau o ratou ingoa ki runga ki nga pokohiwi e rua o

13

Arona i te aroaro o Ihowa, hei whakamahara. <sup>13</sup> Me hanga ano e koe nga nohoanga kohatu ki te

14

koura; <sup>14</sup> Me nga mekameka koura parakore e rua; me whiri tau mahinga i aua mea, ka whakau ai i nga mekameka whiri ki nga nohoanga.

<sup>15</sup> Kia tohunga rawa te hanga o te kouma whakawa, kia rite tau mahinga ki te mahinga o te epora; me hanga e koe taua mea ki te koura, ki te puru, ki te papura, ki te ngangana, ki te rinena  
<sup>16</sup> miro pai. Kia wha ona taha, me rererua; kia kotahi whanganga a te ringa tona roa, kia kotahi  
<sup>17</sup> whanganga hoki a te ringa tona whanui. Me whakanoho ano ki taua mea etahi nohoanga kohatu; kia wha nga rarangi kohatu: mo te rarangi tuatahi he harariu, he topaha, he kapakara: ko te rarangi  
<sup>18</sup> tuatahi tenei. Mo te rarangi tuarua he emerara, he hapaira, he taimana. <sup>19</sup> Mo te rarangi tuatoru  
<sup>20</sup> he rikuri, he akete, he ametihita. Mo te rarangi tuawha he perira, he onika, he hahapa: me  
<sup>21</sup> whakanoho ki te koura ki te wahi e mau ai. Na ka tekau ma rua nga kohatu me nga ingoa o nga tama a Iharaira; ko te maha kei o ratou ingoa; ko te tuhi hei o te hiri, tenei tangata me tona ingoa,  
<sup>22</sup> tenei tangata me tona ingoa, rite tonu ki nga iwi kotahi tekau ma rua. Me hanga ano e koe ki te  
<sup>23</sup> koura parakore etahi mekameka, he mahi whiri, mo te kouma, mo nga pito. Me hanga ano e koe etahi mowhiti koura kia rua mo te kouma, ka whakanoho ai i nga mowhiti e rua ki nga pito e rua  
<sup>24</sup> o te kouma. Me whakau ano nga mekameka koura, nga mea whiri, ki nga mowhiti e rua i nga  
<sup>25</sup> pito o te kouma. Ko era pito e rua hoki o nga mekameka whiri e rua, me whakau e koe ki nga  
<sup>26</sup> nohoanga kohatu e rua, ka whakanoho ai ki nga pokohiwi o te epora, ki te taha ki mua. Me hanga ano etahi mowhiti koura kia rua, ka whakanoho ai ki nga pito e rua o te kouma ki tona remu, ki te  
<sup>27</sup> taha ki roto whaka te epora. Me hanga ano hoki e koe etahi atu mowhiti koura kia rua, ka whakanoho ai ki nga pokohiwi e rua o te epora ki te taha ki raro, ki te taha ki mua, ki te ritenga mai  
<sup>28</sup> ano o tona hononga, ki runga ake o te whitiki whakairo o te epora. Me here ano e ratou te kouma, ko ona mowhiti ki nga mowhiti o te epora, ki etahi miro puru, kia mau ai ki runga ake o te whitiki  
<sup>29</sup> whakairo o te epora, kei takoto ke hoki te kouma i te epora. A ka mau nga ingoa o nga tama a Iharaira ki te ngakau o Arona, ara ki te kouma o te whakawa, ina haere ia ki te wahi tapu, hei  
<sup>30</sup> whakamahara ki te aroaro o Ihowa i nga ra katoa. Me whakanoho ano hoki e koe nga Urimi me nga Tumime ki te kouma whakawa; a hei te ngakau o Arona aua mea, ina haere ki te aroaro o Ihowa: a ka mau tonu ki te ngakau o Arona te whakawa o nga tama a Iharaira i te aroaro o Ihowa.  
<sup>31</sup> Me hanga ano e koe te koroka o te epora, hei te puru anake. <sup>32</sup> Me whakakohao a runga, i waenganui: me whakawhaiwhiri ano ki te mea whatu tona kohao a huri noa, kia rite ki te kohao o  
<sup>33</sup> te pukupuku, kei pakaru. A i te remu i raro me hanga e koe etahi pamekaranete ki te mea puru, papura, ngangana, hei te remu a huri noa; me etahi pere koura ki nga takiwa o aua mea a huri noa:  
<sup>34</sup> He pere koura he pamekaranete, he pere koura he pamekaranete, ki te remu o te koroka a huri

<sup>35</sup>  
 noa. A me kakahu taua mea e Arona ina minita: a ka rangona tona tangi ina haere ki roto, ki te  
 wahi tapu, ki te aroaro o Ihowa, ina puta mai hoki ki waho kei mate ia. <sup>36</sup> Me hanga ano e koe  
 tetahi paraharaha ki te koura parakore, tuhia iho, he tuhi hiri ano, HE TAPU KI A IHOWA. <sup>37</sup> A  
 me whakanoho e koe ki te tau puru, kia mau ai ki te potae tohunga; hei te taha ki mua o te potae.  
<sup>38</sup>  
 A ka mau tena ki te rae o Arona, kia mauria ai e Arona te kino o nga mea tapu e whakatapua e  
 nga tama a Iharaira i a ratou hoatutanga tapu katoa; a ka mau tonu tena ki tona rae, kia manakohia  
<sup>39</sup>  
 ai ratou i te aroaro o Ihowa. A me whakairo e koe ki te mumu te koti rinena pai, me hanga ano  
 te potae tohunga ki te rinena pai: hei te mea i hanga ki te ngira te mea e hanga ai e koe te whitiki.  
<sup>40</sup>  
 Me hanga ano etahi koti mo nga tama a Arona, me hanga ano etahi whitiki mo ratou, me  
<sup>41</sup>  
 hanga hoki etahi potae mo ratou, hei kororia, hei ataahua. Ka whakakakahu atu ai ki a Arona,  
 ki tou tuakana, ratou ko ana tama; na ka whakawahi koe i a ratou, ka whakatohunga hoki i a ratou,  
<sup>42</sup>  
 ka whakatapu hoki i a ratou, kia mahi, tohunga ai ki ahau. Me hanga ano etahi tarau rinena mo  
<sup>43</sup>  
 ratou, hei kakahu mo nga wahi takoto tahanga o ratou; mo te hope a tae noa ki nga huha: A hei  
 kakahu ena mo Arona, mo ana tama, ina haere ki roto ki te tapenakara o te whakaminenga, ina  
 whakatata ranei ki te aata, ki te minita i roto i te wahi tapu; kei whai hara, a ka mate: hei tikanga  
 pumau tenei mona, mo ona uri hoki i muri i a ia.

## Chapter 29

<sup>1</sup>  
 A ko tenei tau e mea ai ki a ratou. ina whakatapu i a ratou hei tohunga maku: Tikina he puru,  
 hei te kuao, me nga hipi toa e rua, hei te mea kohakore, <sup>2</sup> He taro rewenakore, he keke rewenakore,  
 i konatunatua ki te hinu, he mea angiangi ano hoki, he rewenakore, i pania ki te hinu: he mea hanga  
<sup>3</sup>  
 e koe ki te paraoa witi. Na, ka maka ki te kete kotahi, a ka kawea i roto i te kete, me te puru me  
<sup>4</sup>  
 nga hipi toa e rua. Na ka kawea i a Arona ratou ko ana tama, ki te whatitoka o te tapenakara o te  
 whakaminenga, ka horoi i a ratou ki te wai. <sup>5</sup> Na ka mau koe ki nga kakahu, a ka whakakakahu i  
 a Arona ki te koti, ki te koroka o te epora, ki te epora, ki te kouma, ka whitiki hoki i a ia ki te whitiki  
<sup>6</sup>  
 whakairo o te epora: A ka potae i tona matenga ki te potae tohunga, ka whakanoho ano i te karauna  
<sup>7</sup>  
 tapu ki runga ki te potae. Na ka mau ki te hinu whakawahi, ka riringi ki runga ki tona matenga,  
<sup>8</sup>  
 ka whakawahi i a ia. A ka kawea koe i ana tama, ka whakakakahu hoki i a ratou ki nga koti. <sup>9</sup> Me

whitiki ano ratou e koe, a Arona ratou ko ana tama, ka potae ano hoki i nga potae ki a ratou: a ma ratou te mahi tohunga; kia pumau tonu ano hoki tenei tikanga: na ka whakatohunga koe i a Arona

10 ratou ko ana tama. Na ka mea kia kawea tetahi puru ki mua o te tapenakara o te whakaminenga: a ka popoki iho nga ringa o Arona ratou ko ana tama ki runga ki te pane o te puru. 11 Na ka patu koe i te puru ki te aroaro o Ihowa, ki te whatitoka o te tapenakara o te whakaminenga. 12 Na me tango tetahi wahi o te toto o te puru, me pani e tou ringa ki nga haona o te aata, ka riringi katoa ai i nga toto ki te turanga o te aata. 13 Na ka tango koe i te ngako katoa e whiwhiwhiwhi ana ki nga whekau, me te pa i runga ake i te ate, me nga whatukuhu e rua, me te pai i aua mea, ka tahu ai ki runga ki te aata. 14 Ko te kikokiko ia o te puru, me tona hiako, me ona paru, me tahu e koe ki te ahi ki waho o te puni: he whakahere hara hoki tena. 15 Na ka mau koe ki tetahi o nga hipi toa; a ka popoki iho nga ringaringa o Arona ratou ko ana tama ki runga ki te matenga o te hipi. 16 Na ka patu koe i te hipi, a ka tango i ona toto, ka tauhi ai ki te aata a tawhio noa. 17 Na ka tapatapahi koe i te hipi, a ka horoi i ona whekau, me ona waewae, ka maka ai ki runga ki nga wahi ona i tapahia, ki runga hoki i tona matenga. 18 Katahi koe ka tahu i te hipi katoa ki runga ki te aata: he tahunga tinana tena ki a Ihowa, he kakara reka, he whakahere ahi ki a Ihowa. 19 Na ka mau koe ki te rua o nga hipi, a ka popoki iho nga ringaringa o Arona ratou ko ana tama ki runga ki te matenga o te hipi. 20 Na ka patu koe i te hipi, a ka tango i tetahi wahi o ona toto, ka pani atu ki te matamata o te taringa matau a Arona, ki te matamata ano hoki o nga taringa matau o ana tama, ki te koromatua ano hoki o o ratou ringa matau, ki te koromatua ano hoki o o ratou waewae matau, me tauhiuhi atu ano hoki te toto ki te aata a tawhio noa. 21 Me tango ano e koe tetahi wahi o nga toto i runga i te aata, o te hinu whakawahi ano hoki, a ka tauhiuhi atu ki a Arona, ki ona kakahu, ki a ratou tahi ano ko ana tama, ki nga kakahu hoki o ana tama: na ka tapu ia, me ona kakahu, me ana tama, me nga kakahu ano hoki o ana tama. 22 Me tango ano hoki e koe te ngako o te hipi toa, me te hiawero, me te ngako e whiwhiwhiwhi ana ki nga whekau, me te pa i te ate, i nga whatukuhu e rua; me te ngako i aua mea, me te peke matau; he hipi whakatohungatanga hoki: 23 Me te rohi taro kotahi, me tetahi keke taro hinu, me tetahi keke angiangi i roto i te kete taro rewenakore i te aroaro o Ihowa: 24 Na ka hoatu katoa e koe ki nga ringa o Arona, ki nga ringa ano o ana tama; a me poipoi hei whakahere poipoi ki te aroaro o Ihowa. 25 Na ka tango koe i aua mea i o ratou ringa, ka tahu ai ki runga ki to aata, hei tahunga tinana, hei kakara reka ki te aroaro o Ihowa, hei whakahere ahi ki a Ihowa. 26 Na ka tango koe i te uma o te hipi toa o te whakatohungatanga o Arona, a ka poipoi hei whakahere

27 poipoi i te aroaro o Ihowa: ko te wahi hoki tena mau. Me whakatapu ano e koe te uma o te  
 whakahere poipoi, me te peke o te whakahere hapahapai, era e poipoia ana, e hapahapainga ana, o  
 28 te hipi o te whakatohungatanga, o ta Arona, o ta ana tama: A ka waiho ma Arona ratou ko ana  
 tama, e nga tama a Iharaira; kia pumau tonu tenei tikanga: he whakahere hapahapai hoki: a ka waiho  
 e nga tama a Iharaira hei whakahere hapahapai, he mea no a ratou patunga mo te pai, ara he  
 29 whakahere hapahapai na ratou ki a Ihowa. A ka riro nga kakahu tapu o Arona i ana tama i muri  
 30 i a ia, hei kakahu e whakawahia ai, e whakatohungatia ai ratou. A e whitu nga ra e kakahuria ai  
 aua mea e te tama e meinga hei tohunga i muri i a ia, ina haere ia ki roto ki te tapenakara o te  
 31 whakaminenga ki te minita i roto i te wahi tapu. Me tango ano e koe te hipi toa o te  
 32 whakatohungatanga, a ka kohua i ona kikokiko ki te wahi tapu. A ma Arona ratou ko ana tama  
 e kai te kikokiko o te hipi, me te taro i roto i te kete, ki te whatitoka o te tapenakara o te  
 33 whakaminenga. Me kai ano e ratou aua mea o te whakamarie, hei whakatohunga, hei whakatapu  
 34 mo ratou: kauaka ia te tangata ke e kai; he mea tapu hoki ena. A, ki te toe tetahi wahi o te  
 kikokiko o nga whakatohungatanga, o te taro ranei, ki te ata, me tahu e koe taua toenga ki te ahi:  
 35 kei kainga; he mea tapu hoki. Kia penei tau e mea ai ki a Arona ratou ko ana tama; kia rite ki  
 nga mea katoa i whakahaua atu nei e ahau ki a koe: e whitu nga ra e whakatohunga ai koe i a ratou.  
 36 A me tuku e koe i tenei ra, i tenei ra, tetahi kau hei whakahere hara, hei whakamarie: me pure  
 37 ano e koe te aata, ina oti i a koe te whakamarie mo taua mea; me whakawahi ano kia tapu ai. E  
 whitu nga ra e whakamarie ai koe mo te aata, hei whakatapu; a ka meinga hei aata tino tapu; ko  
 nga mea katoa e pa ana ki te aata, ka tapu.  
 38 A ko tenei tau e tuku ai ki runga ki te aata; e rua reme, he tautahi me mea tonu tenei i nga  
 39 ra katoa. Ko tetahi reme me tuku i te ata, ko te rua o nga reme me tuku i te ahiahi. Ko te reme  
 40 me te whakatekau o te paraoa, he mea konatunatu ki te hinu tuki, he whakawha no te hine, me te  
 41 whakawha o te hine waina, hei ringihanga. A me tuku e koe tetahi reme i te ahiahi; kia rite tau  
 tukunga ki to te whakahere totokore o te ata, me tona ringihanga hoki, hei kakara reka, hei whakahere  
 42 ahi ki a Ihowa. Hei tahunga tinana tenei e mau tonu ana i o koutou whakatapuranga, i te whatitoka  
 o te tapenakara o te whakaminenga, i te aroaro o Ihowa, i te wahi e tutaki ai ahau ki a koutou, korero  
 43 ai ki a koe. A ka tutaki ahau ki reira ki nga tama a Iharaira, ka tapu ano a reira i toku kororia.  
 44 Ka whakatapua ano e ahau te tapenakara o te whakaminenga me te aata: ka whakatapua ano a  
 45 Arona ratou ko ana tama, hei tohunga maku. A ka noho ahau ki waenganui i nga tama a Iharaira,



<sup>46</sup>  
 a hei Atua ahau mo ratou. A ka mohio ratou ko Ihowa ahau, ko to ratou Atua, i whakaputaia mai ai ratou i te whenua o Ihipa, kia noho ai ahau i waenganui i a ratou: ko Ihowa ahau, ko to ratou Atua.

### Chapter 30

<sup>1</sup> A me hanga e koe he aata hei tahunga mea kakara: ko te rakau e hanga ai he hitimi. <sup>2</sup> Kia kotahi whatianga te roa, kia kotahi hoki whatianga te whanui; kia tapawha: kia rua whatianga te teitei: no taua mea ra ano nga haona. <sup>3</sup> Me whakakikorua ki te koura parakore a runga me ona taha a taka noa, me ona haona hoki; me hanga ano te niao koura a tawhio noa. <sup>4</sup> Me hanga ano etahi mowhiti koura mona kia rua, mo raro i tona niao, ki ona koki e rua, me hanga ki ona taha e rua, hei kuhunga mo nga amo, hei amohanga. <sup>5</sup> He hitimi ano hoki te rakau e hanga ai e koe nga amo, me whakakikorua ki te koura. <sup>6</sup> Ka whakatu ai ki mua o te arai, o tera i te aaka o te whakaaturanga, ki mua o te taupoki i runga o te whakaaturanga, o te wahi e tutaki ai ahau ki a koe. <sup>7</sup> A me tahu e Arona he whakakakara reka ki runga, i tenei ata, i tenei ata: me tahu e ia te whakakakara ki runga, ina whakapaia e ia nga rama. <sup>8</sup> A ka tahuna e Arona nga rama i te ahiahi, me tahu he whakakakara ki runga i taua aata, he whakakakara e mau tonu ana ki te aroaro o Ihowa i o koutou whakatupuranga. <sup>9</sup> Kei whakaekea he whakakakara ke ki runga, he tahunga tinana ranei, he whakahere totokore ranei; kua ano e ringihia he ringihanga ki runga. <sup>10</sup> Na, ka whakamarie a Arona ki runga ki ona haona, kia kotahi te meatanga i te tau: ka whakamarie ia ki te toto o te whakahere hara o te whakamarie ki runga ki taua mea, kia kotahi te meatanga i te tau, puta noa i o koutou whakatupuranga: he mea t apu rawa tena ki a Ihowa. <sup>11</sup> I korero ano a Ihowa ki a Mohi, i mea, <sup>12</sup> E taua e koe nga tangata o nga tama a Iharaira, ara nga mea o ratou e taua ana, me homai e tera, e tera, he utu mo tona wairua ki a Ihowa, ina taua ratou; kia kore ai he whiu i roto i a ratou ina taua. <sup>13</sup> Ko tenei ta ratou e homai ai, ko nga tangata katoa e haere ana ki roto ki te hunga kua taua, hei te hawhe o te hekere, o te hekere o te wahi hekere kotahi: hei te hawhe hekere te whakahere ki a Ihowa. <sup>14</sup> Ko nga tangata katoa e haere ana ki roto ki te hunga kua taua, ko nga mea e rua tekau o ratou tau, me nga mea i maha atu, me homai e ratou he whakahere ki a Ihowa. <sup>15</sup> E kore e maha ake a te tangata taonga, e kore ano hoki e torutoru iho i te hawhe hekere a te rawakore, ina homai he whakahere ki a Ihowa, hei whakamarie mo o koutou wairua. <sup>16</sup> Na me tango e koe te moni whakamarie a nga tama a Iharaira, a ka waiho mo nga mahi

o te tapenakara o te whakaminenga; a hei whakamahara tena ki nga tama a Iharaira ki te aroaro o Ihowa, hei whakamarie mo o koutou wairua.

17 I korero ano a Ihowa ki a Mohi, i mea, 18 Me hanga ano e koe he takotoranga wai ki te parahi, ki te parahi ano hoki tona turanga, hei horoinga: ka whakatu ai ki te takiwa o te aata o te tapenakara o te whakaminenga, me riringi ano he wai ki roto. 19 A me horoi o ratou ringa me o ratou waewae e Arona ratou ko ana tama ki reira. 20 Ka haere ratou ki roto ki te tapenakara o te whakaminenga, me horoi ratou ki te wai, kei mate; ki te whakatata ranei ratou ki te aata ki te minita, ki te tahu i te whakahere ahi ki a Ihowa: 21 Na ka horoi i o ratou ringa, i o ratou waewae, kei mate; a ka waiho hei tikanga pumau ma ratou, mana, ma ona uri, i o ratou whakatupuranga.

22 I korero ano a Ihowa ki a Mohi, i mea, 23 Tikina mau he tino mea kakara, he maira pai, kia rima rau hekere, he hinamona reka, me hawhe tera, ara kia rua rau kia rima tekau hekere, me te karamuha reka, kia rua rau kia rima tekau hekere, 24 He kahia hoki, kia rima rau hekere, ki nga hekere o te wahi tapu, me te hinu oriwa, kia kotahi hine: 25 A me hanga e koe hei hinu mo te whakawahinga tapu, he hinu whakaranu, he mea kakara, ko ta te kaiwhakaranu e hanga ai: ka waiho hei hinu mo te whakawahinga tapu: 26 Ka whakawahia ai te tapenakara o te whakaminenga, me te aaka hoki o te whakaaturanga, 27 Me te tepu, me nga oko katoa i runga, me te turanga rama, me ona oko, me te aata whakakakara, 28 Me te aata tahunga tinana, me ona oko katoa, me te takotoranga wai, me tona turanga. 29 A me whakatapu kia tino tapu: ka tapu nga mea katoa e pa ana ki aua mea. 30 Me whakawahi ano e koe a Arona ratou ko ana tama, me whakatapu hoki ratou hei tohunga maku. 31 Me korero ano e koe ki nga tama a Iharaira, me ki atu, Hei hinu tenei maku, mo te whakawahinga tapu i o koutou whakatupuranga. 32 Kei ringihia ki te kikokiko tangata, kei hanga ano tetahi mea pena, e rite ana ki tona hanganga: he tapu tena, a ka tapu ki a koutou. 33 Ki te whakaranua e te tangata tetahi mea pena; ki te maka ranei e ia ki runga ki te tangata ke, ina, ka hatepea atu ia i roto i tona iwi. 34 I mea ano a Ihowa ki a Mohi, Tikina mau he mea kakara, he takete, he oneka, he karapanuma; enei mea kakara me te parakihe parakore; kia rite te taimaha o tetahi, o tetahi: 35 Ka whakaranu ai hei mea kakara, ko ta te kaiwhakaranu e hanga ai, he mea rongoa ki te tote, he mea parakore, he mea tapu: 36 Na ka tukia tetahi wahi kia ririki rawa, ka whakatakoto ai i tetahi wahi ki mua mai o te whakaaturanga i roto i te tapenakara o te whakaminenga, ki te wahi e tutaki ai ahau ki a koe: hei mea tino tapu tena ki a koutou. 37 A ko taua mea kakara ka hanga nei e koe, kei hanga tetahi ma koutou he rite te hanganga ki to tera: hei mea tapu tena ki a

38  
 koe ma Ihowa. Ki te hanga e te tangata he mea pena, hei honginga mana, ka hatepea atu ia i roto i tona iwi.

### Chapter 31

1 I korero ano a Ihowa ki a Mohi, i mea, 2 Titiro, kua whakahuatia nei e ahau te ingoa o Petareere, tama a Uri, ko ia nei he tama na Huru, no te iwi o Hura: 3 Kua whakakiiia ano ia e ahau ki te wairua o te Atua, ki te ngakau tupato, ki te whakaaro, ki te mohio, ki nga mahi katoa hoki, 4 Hei whakaaro ki nga mahi a te tohunga, hei mahi i te koura, i te hiriwa, i te parahi, 5 Mo te whakairo kohatu hoki, mo te whakanoho hoki, mo te whakairo rakau, mo te mahi ano hoki i nga mahi katoa. 6 Na, tenei ano te hoatu nei e ahau hei hoa mona a Ahoriapa tama a Ahihamaka, no te iwi o Rana: kua whakanohoia ano e ahau he mahara ki nga ngakau o te hunga ngakau mahara katoa, hei hanga i nga mea katoa i whakahaua atu nei e ahau ki a koe; 7 I te tapenakara o te whakaminenga, i te aaka o te whakaaturanga, i tona taupoki, i nga mea katoa o te tapenakara, 8 I te tepu, i ona mea, i te turanga parakore o nga rama, i ona mea katoa, i te aata mo te whakakakara, 9 I te aata mo te tahunga tinana, i ona mea katoa, i te takotoranga wai raua ko tona turanga. 10 I nga kakahu mo te mahi minita, i nga kakahu tapu mo Arona, mo te tohunga, i nga kakahu mo ana tama, mo te mahi tohunga, 11 I te hinu whakawahi, i te whakakakara reka mo te wahi tapu: kia rite ta ratou e mea ai ki nga mea katoa i whakahaua atu e ahau ki a koe.

12 I korero ano a Ihowa ki a Mohi, i mea, 13 Korero ano ki nga tama a Iharaira, mea atu, Me whakarite ano e koutou aku hapati: hei tohu hoki ki waenganui oku, o koutou, i o koutou whakatupuranga: kia mohio ai ko ahau, ko Ihowa, te whakatapu nei i a koutou. 14 Na me whakarite te hapati; he tapu hoki tena ki a koutou: he mate kau mo te tangata e whakanoa ana i taua ra: ko te tangata hoki e mahi ana i tetahi mahi i reira, ina, ka hatepea atu taua wairua i roto i tona iwi. 15 E ono nga ra e mahia ai te mahi; kei te whitu ia o nga ra te hapati okiokinga, he tapu ki a Ihowa: ko te tangata e mahi ana i tetahi mahi i te ra hapati he mate kau mona. 16 Mo reira me mahara nga tama a Iharaira ki te hapati, kia whakaritea te hapati i o ratou whakatupuranga: kia mau tonu tenei kawenata. 17 He tohu tena ra ki waenganui oku, o nga tama a Iharaira, ake ake: e ono hoki nga ra i hanga ai e Ihowa te rangi me te whenua, a i te whitu o nga ra ka okioki, a ta ana tona manawa.

18

I homai ano e ia ki a Mohi, i te mutunga o tana korero ki a ia i runga i Maunga Hinai, e rua nga papa whakaaturanga, he papa kohatu, he mea tuhituhi na te ringa o te Atua.

## Chapter 32

<sup>1</sup> A, no te kitenga o te iwi i roa te hekenga iho o Mohi i runga i te maunga, ka huihui te iwi ki a Arona, ka mea ki a ia, Whakatika, hanga etahi atua mo tatou, hei haere i mua i a tatou; ko tenei Mohi hoki, ko te tangata nana tatou i kawea mai ki ru nga nei i te whenua o Ihipa, kahore tatou e

mohio kua ahatia ranei ia. <sup>2</sup> Na ka mea a Arona ki a ratou, Whakiiia mai nga whakakai koura i nga taringa o a koutou wahine, o a koutou tama, o a koutou tamahine, ka kawea mai ki ahau. <sup>3</sup> Na whakiiia

ana e te iwi katoa nga whakakai koura i o ratou taringa, a kawea ana mai ki a Arona. <sup>4</sup> Na ka tangohia e ia i o ratou ringa, a whakaahuatia ana e ia ki te purupuru tana kua kau i whakarewa ai: na ka mea ratou, Ko ou atua enei, e Ihairaira, nana nei koe i kawea mai ki runga nei i te whenua o

<sup>5</sup> Ihipa. A, no te kitenga o Arona, hanga ana e ia tetahi aata ki mua i taua mea; a ka karanga a Arona, ka mea, Ko apopo he hakari ki a Ihowa. <sup>6</sup> Na ka maranga wawe ratou i te aonga ake, a whakaekea ana he tahunga tinana, i kawea ano he whakahere mo te pai; na ka noho te iwi ki te kai, ki te inu, a ka whakatika ki te takaro.

<sup>7</sup> Na ka mea a Ihowa ki a Mohi, Haere, heke atu, kua he hoki tou iwi i kawea mai nei e koe i te whenua o Ihipa: <sup>8</sup> Kua hohoro ratou te peka ke i te huarahi i kiia e ahau ki a ratou: kua hanga ma ratou he kua kau, he mea whakarewa, kua koropiko ki taua mea, kua patu whakahere mana,

a e mea ana, Ko ou atua enei, e Ihairaira, i kawea mai ai koe i te whenua o Ihipa. <sup>9</sup> I mea ano a Ihowa ki a Mohi, Kua kite ahau i tenei iwi, na, he iwi kaki maro ratou: <sup>10</sup> Na, tukua atu ahau, a ka

mura toku riri ki a ratou, a ka pau ratou i ahau: ka hanga ano koe hei iwi nui. <sup>11</sup> Na ka inoi a Mohi ki a Ihowa, ki tona Atua, ka mea, He aha tou riri i mura ai, e Ihowa, ki tau iwi i kawea mai nei e

koe i te whenua o ihipa i runga i te kaha nui, i te ringa maro? <sup>12</sup> Ha, kia korero nga Ihipiana, kia mea, He whakaputanga atu ki te he tana i a ratou, kia whakamatea ai ratou ki nga maunga, kia whakangaromia atu ai i te mata o te whenua? Tahuri i tou riri nui e mura nei, kia puta ke hoki tou

<sup>13</sup> whakaaro ki tenei ki no mo tau iwi. Kia mahara ki au pononga, ki a Aperahama, ki a Ihaka, ki a Ihairaira, ki tau oatitanga hoki i a koe ki a ratou, ki tau meatanga ki a ratou, Ka whakanuia e ahau o koutou uri kia rite ki nga whetu o te rangi; ko tenei whenua katoa hoki i korerotia atu nei e ahau,

14  
ka hoatu e ahau ki o koutou uri, a ka nohoia e ratou ake ake. Na ka puta ke ta Ihowa i whakaaro ai mo te kino i kiia e ia kia meatia ki tana iwi.

15  
Na ka tahuri a Mohi, ka heke iho i te maunga, me nga papa e rua o te whakaaturanga i tona ringa: he mea tuhi nga taha e rua o nga papa; i tetahi taha, i tetahi taha te tuhi. 16 He mea mahi hoki na te Atua aua papa, me te tuihituhi hoki, na te Atua te tuihituhi, he mea whaowhao ki nga

17  
papa. A ka rongu a Hohua i te reo o te iwi e hamama ana, ka mea ki a Mohi, He nge whawhai

18  
kei te puni ra. Na ka mea ia, Ehara tera reo i te hamama mo te hinganga o te taua, ehara hoki tera reo i te hamama o te hunga e hinga ana: he reo waiata taku e rongu nei. 19 A ka tata ia ki te puni, na, ka kite ia i te kuaokau, i te kanikani: na ka mura te riri o Mohi, a ka maka atu e ia nga

20  
papa i roto i ona ringa, a pakarua ana aua mea e ia i raro i te maunga. Na ka tango ia i te kuaokau i hanga e ratou, a tahuna ana e ia ki te ahi, a hurihia ana a ngotangota noa, a ruiruia ana e ia ki te wai, whakainumia atu ana ma nga tama a Iharaira.

21  
Na ka mea a Mohi ki a Arona, I aha tenei iwi ki a koe, i takina ai e koe tenei hara nui ki a ratou? 22 A ka mea a Arona, Kei mura mai te riri o toku ariki: e mohio ana koe ki tenei iwi, mo te

23  
kino tonu ratou. I mea hoki ratou ki ahau, Hanga etahi atua mo tatou hei haere i mua i a tatou: ko tenei Mohi hoki, ko te tangata nana nei tatou i kawe mai i te whenua o Ihipa, kahore tatou e

24  
mohio kua ahatia ranei ia. Na ka mea ahau ki a ratou, Ki te mea he koura to tetahi, whakiiia mai.

25  
Na ka homai e ratou ki ahau: a maka ana e ahau ki te ahi; a puta ake ko te kuaokau nei. A, i te kitenga o Mohi i te iwi e korara noa ana, na Arona hoki ratou i tuku kia korara, hei taunu ma o

26  
ratou hoariri: Na, ka tu a Mohi ki te kuwaha o te puni, ka mea, Ko wai to Ihowa? haere mai ki ahau. Na ka huihui nga tama katoa a Riwai ki a ia. 27 Na ka mea ia ki a ratou, Ko te kupu tenei a

Ihowa, a te Atua o Iharaira, Whakanohoia e tera, e tera, tana hoari ki tona huha, a haere atu, hoki mai, i tetahi kuwaha ki tetahi kuwaha, i waenga puni, a patua e tera tona teina, e tera tona hoa, e t

28  
era tona hoa e noho tata ana. Na rite tonu ki te kupu a Mohi ta nga tama a Riwai i mea ai: a tata

29  
tonu ki te toru mano nga tangata i hinga i taua rangi. Na Mohi hoki i mea, Hei runga i tana tama, i tona teina, te whakatohungatanga ki a Ihowa o tera, o tera, o koutou aiane; kia homai ai e ia he manaaki ki a koutou aiane.

30  
Na, i te aonga ake, ka mea a Mohi ki te iwi, Kua hara koutou, he nui te hara: na, me haere

31  
ahau aiane ki runga, ki a Ihowa; tera pea e taea e ahau te whakamarie mo to koutou hara. Na ka hoki a Mohi ki a Ihowa, ka mea, Aue! kua hara tenei iwi, he nui te hara, kua hanga hoki e ratou

<sup>32</sup> etahi atua koura mo ratou. Na, mau e horoi to ratou hara; a ki te kahore, tena ra, horoia atu ahau  
 i roto i tau pukapuka i tuhituhia e koe. <sup>33</sup> Na ka mea a Ihowa ki a Mohi, Ko te tangata e hara ana  
 ki ahau, ka horoia atu ia e ahau i roto i taku pukapuka. <sup>34</sup> Na haere ra, arahina atu te iwi ki te wahi  
 i korerotia atu e ahau ki a koe: tena taku anahera te haere atu na i mua i a koe; ahakoa ra, ko a te  
 ra e mea ai ahau, ina, ka meinga e ahau to ratou hara kia tau ki runga ki a ratou. <sup>35</sup> Na ka whiua e  
 Ihowa te iwi mo ta ratou hanganga i te kuao kau, i hanga nei e Arona.

### Chapter 33

<sup>1</sup> Na ka mea a Ihowa ki a Mohi, Haere, turia atu ki runga, koutou ko te iwi i kawea mai nei e  
 koe i te whenua o Ihipa, ki te whenua i oati ai ahau ki a Aperahama, ki a Ihaka, ki a Hakopa, i mea  
 ia, Ka hoatu e ahau ki ou uri: <sup>2</sup> A ka unga he anahera e ahau ki mua i a koe, maku ano hoki e pei  
 nga Kanaani, nga Amori, nga Hiti, nga Perihi, nga Hiwi, me nga Iepuhi: <sup>3</sup> Ki te whenua e rerengia  
 ana e te waiu, e te honi: e kore hoki ahau e haere atu i roto i a koe; he iwi kaki maro hoki koe: kei  
 pau koe i ahau ki te ara. <sup>4</sup> A, i te rongonga o te iwi i tenei rongongano kino, ka pouiri, kihai ano i  
 whakanohoia e tetahi ona whakapaipai. <sup>5</sup> A i ki atu a Ihowa ki a Mohi, Mea atu ki nga tama a  
 Iharaira, He iwi kaki maro koutou: kia mea kau ka puta atu ahau ki waenganui i a koe, a ka ngaro  
 koe i ahau: na, whakarerea atu ou whakapaipai, a ka mohio ahau ki taku e mea ai ki a koe. <sup>6</sup> Na i  
 aurutia e nga tama a Iharaira o ratou whakapaipai i Maunga Horepa ahu atu.  
<sup>7</sup> Na tango ai a Mohi i te tapenakara ka whakatu ki waho o te puni ki tetahi wahi mamao atu i  
 te puni, a huaina ana e ia, Ko te tapenakara o te whakaminenga. A i haere nga tangata katoa e rapu  
 ana i a Ihowa, ki te tapenakara o te whakaminenga, ki wa ho o te puni. <sup>8</sup> A, i a Mohi e haere ana  
 ki te tapenakara ka whakatika te iwi katoa, a ka tu tera, tera, i te kuwaha o tona teneti, a ka titiro ki  
 muri i a Mohi, a haere noa ia ki roto ki te tapenakara. <sup>9</sup> A, i a Mohi e haere ana ki roto ki te  
 tapenakara, ka heke iho te pou kapuna, a tu ana i te whatitoka o te tapenakara, a ka korero a Ihowa  
 ki a Mohi. <sup>10</sup> A ko te kitenga o te iwi katoa i te pou kapua e tu ana i te whatitoka o te tapenakara,  
 na ka whakatika te iwi katoa, ka koropiko hoki ia tangata, ia tangata, i te whatitoka o tona teneti.  
<sup>11</sup> Na ka korero a Ihowa ki a Mohi, he kanohi, he kanohi, pera hoki me te tangata e korero nei ki  
 tona hoa. A hoki ana ia ki te puni: ko tana tangata ia, ko Hohua, tama a Nunu, kihai taua taitamariki  
 i neke atu i roto i te tapenakara.

<sup>12</sup> A i mea a Mohi ki a Ihowa, Titiro, kua mea mai nei koe ki ahau, Kawea tenei iwi ki runga: a kahore i whakaaturia mai e koe ki ahau tau e unga ai hei hoa moku. Kua mea mai ano koe ki ahau,

<sup>13</sup> E mohio ana ahau ki a koe, ki tou ingoa hoki, kua manakoh ia ano koe e ahau. Na, ki te mea kua manakohia ahau e koe, tena, whakaaturia mai ki ahau ou ara, kia mohio ai ahau ki a koe, kia

<sup>14</sup> manakohia ai ahau e koe; kia mahara hoki he iwi nau tenei iwi. Na ka mea ia, Ka haere atu toku

<sup>15</sup> aroaro, a ka mea ahau i a koe kia okioki. Na ka mea ia ki a ia, Ki te kahore tou aroaro e haere,

<sup>16</sup> kua matou e kawea ki runga i konei. Ma te aha hoki e mohiotia ai kua manakohia matou ko tau iwi e koe? he teka ianei mau kia haere tahi i a matou? penei ka motuhia matou ko tau iwi i nga

<sup>17</sup> iwi katoa i te mata o te whenua. Na ka mea a Ihowa ki a Mohi, Ko tenei mea ano i korerotia mai na e koe, ka rite i ahau: no te mea e manakohia ana koe e ahau, a e mohio ana ahau ki a koe, ki tou

<sup>18</sup> ingoa hoki. Na ka mea ia, Tena ra, whakakitea mai ki ahau tou kororia. Na ka mea ia, Ka

<sup>19</sup> meatia e ahau toku pai katoa kia haere atu i tou aroaro, a ka karangatia e ahau te ingoa o Ihowa i

<sup>20</sup> tou aroaro, ka atawhai hoki ahau i taku e atawhai ai, ka tohu hoki i taku e tohu ai. I mea ano ia,

<sup>21</sup> E kore e taea e koe te titiro ki toku mata: e kore hoki tetahi tangata e titiro ki ahau, a e ora. I

<sup>22</sup> mea ano a Ihowa, Nana, he wahi tenei kei ahau, a me tu koe ki runga ki te kamaka: A, ka haere

<sup>23</sup> atu toku kororia, na, ka kawea koe e ahau ki roto ki te kapiti kohatu, a ka taupokina koe e ahau ki

toku ringa, i ahau e haere atu ana: A ka tangohia e ahau toku ringa, a ka kite koe i muri oku: ko toku mata ia e kore e kitea.

### Chapter 34

<sup>1</sup> Na ka mea a Ihowa ki a Mohi, Taraia mau etahi papa kohatu, kia rua, kia rite ki o mua: a ka

<sup>2</sup> tuhituhia e ahau ki aua papa nga kupu i mau ki o mua papa, i wahia na e koe. A kia takatu i te

<sup>3</sup> ata, ka haere ake i te ata ki Maunga Hinai, a me tu koe i toku aroaro, ki reira, ki te tihi o te maunga.

<sup>4</sup> Kua hoki tetahi e haere ake i a koe, kei kitea hoki tetahi i te maunga katoa: ko nga hipi hoki, me

nga kau, kua e kai ki te ritenga o taua maunga. Na taraia ana e ia etahi papa kohatu e rua, rite

tonu ki o mua; a ka maranga wawe a Mohi i te ata, ka piki atu ki Maunga Hinai, ka pera ano me ta

Ihowa i whakahau ai ki a ia, me te mau ano i nga papa kohatu e rua ki tona ringa.

<sup>5</sup> Na ka heke iho a Ihowa i roto i te kapua, ka tu tahi me ia ki reira, a ka karangatia te ingoa o  
<sup>6</sup> Ihowa. Na ka haere atu a Ihowa i tona aroaro, a ka karangatia, Ko Ihowa, ko Ihowa, ko te Atua  
<sup>7</sup> tohu, atawhai, he tukuroa nei i te riri, he nui nei te aroha, te pono, E rongoa nei i te aroha mo nga  
 mano, e muru nei i te kino, i te tutu, i te hara, e kore rawa ano hoki e tuku noa i te he; e mea nei i  
 te hara o nga matua kia tau iho ki nga tamariki, ki nga tamariki a nga tamariki a te toru, te wha ra  
<sup>8</sup> ano o nga w hakatupuranga. Na ka hohoro a Mohi, ka tuohu iho ki te whenua, koropiko ana: <sup>9</sup> A  
 ka mea, Ki te mea kua manakohia mai ahau e koe, e te Ariki, kia haere ra toku Ariki i waenganui  
 i a matou; he iwi kaki maro hoki tenei; murua atu hoki to matou kino, me to matou hara, waiho  
 hoki matou hei taonga tupu mou.  
<sup>10</sup> Na ka mea ia, Nana, ka whakarite kawenata ahau; ka meatia e ahau he mea whakamiharo  
 ki te aroaro o tou iwi katoa, he mea kihai i meatia i te whenua katoa, i nga iwi katoa ano hoki: a ka  
 kitea te mahi a Ihowa e te iwi katoa kei roto nei koe i a r atou: he mea whakamataku hoki taku e  
<sup>11</sup> mahi tahi ai ahau me koe. Kia mau ki taku e whakahau atu nei ki a koe inaianei: nana, ka peia  
<sup>12</sup> atu e ahau nga Amori, nga Kanaani, nga Hiti, nga Perihi, nga Hiwi, nga Iepuhi. Kia tupato kei  
 whakarite kawenata koe ki nga tangata o te whenua e haere nei koe ki reira; kei waiho hei rore i  
 waenganui i a koe: <sup>13</sup> Engari me wawahi a ratou aata, me pakarukaru a ratou whakapakoko, me  
<sup>14</sup> tua hoki a ratou Aherimi. Kahore atu hoki he atua hei koropikotanga mau: ko Ihowa hoki, ko  
<sup>15</sup> Hae nei tona ingoa, he Atua hae ia: Kei whakarite kawenata koe ki nga tangata o te whenua, a  
 ka whai atu ratou, ka puremu atu ki o ratou atua, a ka patu whakahere ma o ratou atua, a ka karangatia  
<sup>16</sup> koe e tetahi, na ka kai koe i tana patunga tapu; A ka tango koe i a ratou tamahine ma au tama,  
 a ka whai atu, ka puremu atu a ratou tamahine ki o ratou atua, a ka meinga au tamariki kia whai  
<sup>17</sup> atu, kia puremu atu ki o ratou atua. Kauga e whakarewaina he atua mou.  
<sup>18</sup> Kia mau ki te hakari taro rewenakore. E whitu nga ra e kai ai koe i te taro rewenakore, e  
 pera ai me taku i whakahau ai ki a koe, i te wa ano i whakaritea o te marama, o Apipi: ko Apipi  
<sup>19</sup> hoki te marama i haere mai ai koe i Ihipa. Ko nga mea katoa e puta tuatahi mai ana i te kopu,  
<sup>20</sup> naku; me nga matamua a au kararehe, a nga kau, a nga hipi. A me utu e koe ki te reme te matamua  
 a te kaihe; a ki te kahore e utua e koe, whatiia tona kaki. Me utu e koe nga matamua o au tama. E  
<sup>21</sup> kore ano hoki tetahi e puta kau mai ki toku aroaro. E ono nga ra e mahi ai koe, i te whitu ia o  
<sup>22</sup> nga ra me okioki: me okioki ano koe i te ruinga, i te kotinga. Me mahi ano te hakari o nga wiki,  
<sup>23</sup> ara o nga matamua o te kotinga witi, me te hakari o te kohikohinga i te takanga o te tau. E toru



<sup>24</sup> nga wa o te tau e kitea ai ou tane katoa ki te aroaro o te Ariki, o Ihowa, o te Atua o Iharaira. Ka peia hoki e ahau nga tauwi i tou aroaro, ka whakanuia ano ou rohe: a e kore tetahi e minamina ki tou whenua, ina haere koe ki runga kia kitea ki te aroaro o Ihowa, o tou Atua, i nga wa e toru o te tau.

<sup>25</sup> Kaua he rewena ina whakahekea te toto o taku patunga tapu; kei toe ano hoki ki te ata te patunga tapu o te hakari o te kapenga.

<sup>26</sup> Me kawe ki te whare o Ihowa, o tou Atua, nga mea mataati o nga matamua o tou oneone. Kaua e kohuatia te kua koati ki te waiu o tona whaea.

<sup>27</sup> Na ka mea a Ihowa ki a Mohi, Tuhituhia enei kupu: kei enei kupu hoki te tikanga o te kawenata e whakaritea nei e ahau ki a koe, ki a Iharaira.

<sup>28</sup> Na i reira ia i a Ihowa e wha tekau nga ra, e wha tekau nga po; kihai i kai taro, kihai ano i inu wai. Na tuhituhia ana e ia ki nga papa nga kupu o te kawenata, nga ture kotahi tekau.

<sup>29</sup> A, i te hekenga iho o Mohi i runga i Maunga Hinai me nga papa e rua o te whakaaturanga i te ringa o Mohi, i tona hekenga iho i runga i te maunga, na, kihai a Mohi i mohio e tiaho ana te kiri o tona mata, nona i korero ki a ia.

<sup>30</sup> A, i te tirohanga a Arona ratou ko nga tama katoa a Iharaira ki a Mohi, na, e tiaho ana te kiri o tona mata; na ka wehi ratou ki te whakatata ki a ia.

<sup>31</sup> Na ka karanga a Mohi ki a ratou; a ka hoki ki a ia a Arona ratou ko nga rangatira katoa o te whakaminenga; a ka korero a Mohi ki a ratou.

<sup>32</sup> A muri iho ka whakatata nga tama katoa a Iharaira; a ka whakahaua iho e ia ki a ratou nga mea katoa i korerotia e Ihowa ki a ia i Maunga Hinai.

<sup>33</sup> A ka mutu ta Mohi korero ki a ratou, ka maka ki tona mata he arai.

<sup>34</sup> Otiia, ka haere a Mohi ki te aroaro o Ihowa, ki te korero ki a ia, ka tangohia e ia te arai a puta noa mai ki waho. A, ko tona putanga mai ki waho, ka korerotia e ia ki nga tama a Iharaira nga mea i whakahaua ki a ia.

<sup>35</sup> A i kite nga tama a Iharaira i te mata o Mohi, e tiaho ana te kiri o te mata o Mohi: na ka whakahokia e Mohi te arai ki tona mata a haere noa ia ki te korero ki a ia.

### Chapter 35

<sup>1</sup> NA ka huihuia e Mohi te whakaminenga katoa o nga tama a Iharaira, a ka mea ia ki a ratou, Ko nga kupu enei i whakahaua mai e Ihowa kia mahia.

<sup>2</sup> E ono nga ra e mahia ai te mahi; ko te ra whitu ia me waiho hei ra tapu, hei hapati okiokinga ki a Ihowa: ki te mahia he mahi e tetahi tangata i taua ra, me whakamate.

<sup>3</sup> Kei tahuna he ahi, puta noa i o koutou nohoanga, i te ra hapati.

<sup>4</sup> I korero ano a Mohi ki te whakaminenga katoa o nga tama a Iharaira, i mea, Ko te mea tenei i whakahau

mai ai a Ihowa, i mea ai, <sup>5</sup> Tangohia i roto i a koutou he whakahere ma Ihowa: ko nga tangata katoa  
 he ngakau hihiko o ratou, me kawea mai e ratou taua mea hei whakahere ki a Ihowa; he koura, he  
 hiriwa, he parahi, <sup>6</sup> He puru, he papura, he ngangana, he rinena pai, he huruhuru koati, <sup>7</sup> Me nga  
 hiako hipi kua oti te whakawhero, me nga hiako pateri, me etahi rakau, hei te hitimi, <sup>8</sup> Me te hinu  
 mo te whakamarama, me nga mea kakara mo te hinu whakawahi, mo te whakakakara reka hoki,  
<sup>9</sup> Me nga kohatu onika, me nga kohatu hei whakanoho ki te epora, ki te kouma. <sup>10</sup> Me haere mai  
 ano nga tangata ngakau mohio katoa i roto i a koutou, ki te hanga i nga mea katoa i whakahaua mai  
 e Ihowa; <sup>11</sup> I te tapenakara, i tona teneti, i tona uhi hoki, i ona toromoka, i ona papa, i ona kaho, i  
 ona pou, i ona turanga pou, <sup>12</sup> I te aaka, me ona amo, i te taupoki, me te arai hipoki, <sup>13</sup> I te tepu,  
 me ona amo, me ona oko katoa, me te taro aroaro, <sup>14</sup> I te turanga rama hoki mo te whakamarama  
 me ona mea, me ona rama, me te hinu hoki mo te whakamarama, <sup>15</sup> Me te aata whakakakara, me  
 ona amo, me te hinu whakawahi, me te whakakakara reka, me te pa mo te whatitoka i te tomokanga  
 atu o te tapenakara, <sup>16</sup> I te aata mo te tahunga tinana, me tona pae kupenga parahi, i ona amo me  
 ona mea katoa, i te takotoranga wai me tona turanga, <sup>17</sup> I nga pa o te marae, i ona pou, me nga  
 turanga pou, me te pa mo te whatitoka o te marae, <sup>18</sup> I nga titi o te tapenakara, me nga titi o te  
 marae, me nga aho, <sup>19</sup> I nga kakahu mo te mahi minita ina minita ki te wahi tapu, i nga kakahu  
 tapu mo Arona, mo te tohunga, me nga kakahu mo ana tama, mo te mahi tohunga.  
<sup>20</sup> Katahi ka haere atu te whakaminenga katoa o nga tama a Iharaira i te aroaro o Mohi. <sup>21</sup> Na  
 ka haere ratou, nga tangata i toko ake o ratou ngakau me nga tangata i hihiko noa ake o ratou wairua,  
 me te kawea ano i te whakahere ma Ihowa, mo te mahi o te tapenakara o te whakaminenga, mo ona  
 mahi katoa, mo nga kakahu tapu. <sup>22</sup> I haere hoki ratou, nga tane, nga wahine, nga mea i hihiko noa  
 te ngakau, a kawea ana e ratou nga poroporo, nga whakakai, nga mowhiti, nga heitiki, he mea koura  
 katoa: i tukua ano hoki e tera, e tera, he whakahere koura ki a Ihowa. <sup>23</sup> A, ko nga tangata katoa i  
 kitea nei he puru ki a ratou, he papura, he ngangana, he rinena pai, he huruhuru koati, he hiako hipi  
 kua oti te whakawhero, he hiako pateri, i kawea mai e ratou. <sup>24</sup> Ko nga tangata katoa i whakahere  
 nei i te hiriwa, i te parahi, i kawea mai e ratou te whakahere ki a Ihowa: me nga tangata katoa i  
 kitea nei he rakau hitimi ki a ratou mo tetahi meatanga o te mahi, i kawea mai ano e ratou. <sup>25</sup> Me  
 nga wahine ngakau mohio katoa, i whatu o ratou ringa, a kawea mai ana ta ratou i whatu ai, te puru,  
 te papura, te ngangana, te rinena pai. <sup>26</sup> A i whatu ano nga wahine katoa, i toko ake nei o ratou  
 ngakau ki te mohio, i te huruhuru koati. <sup>27</sup> I kawea mai ano e nga rangatira nga kohatu onika, me

nga kohatu hei whakanoho, mo te epora, mo te kouma; <sup>28</sup> Me te mea kakara, me te hinu mo te  
 whakamarama, mo te hinu whakawahi, mo te whakakakara reka. <sup>29</sup> I kawea mai he whakahere  
 tuku noa ki a Ihowa e nga tama a Iharaira, e nga tane, e nga wahine katoa, i toko ake nei o ratou  
 ngakau ki te kawea mai, mo nga tini mahi i whakahaua e Ihowa kia mahia, a i korerotia e Mohi.  
<sup>30</sup> Na ka mea a Mohi ki nga tama a Iharaira, Titiro, kua karangatia e Ihowa te ingoa o Petareere  
 tama a Uri, tama a Huru, o te iwi o Hura; <sup>31</sup> Kua whakakiiia ano hoki e ia ki te wairua o te Atua,  
 ki te ngakau tupato, ki te whakaaro, ki te mohio, ki nga mahi katoa ano hoki: <sup>32</sup> Hei whakaaro ki  
 nga mahi a te tohunga, mo te mahi i te koura, i te hiriwa, i te parahi, <sup>33</sup> Mo te tuhi kohatu, mo te  
 whakanoho, mo te whakairo rakau, mo te mahi i nga mahi katoa a te tohunga. <sup>34</sup> Kua homai ano  
 te ako ki tona ngakau, ki a raua ko Ahuriapa, tama a Ahihamaka, o te iwi o Rana. <sup>35</sup> Kua whakakiiia  
 raua e ia ki te ngakau mahara, hei mahi i nga tini mahi, a te kaituhi, a te mea mohio, a te kaiwhakairo  
 puru, papura, ngangana, rinena pai, a te kaiwhatu hoki, a nga kaimahi i nga tini mahi, a nga tohunga  
 ki te mahi.

## Chapter 36

<sup>1</sup> Na ka mahi a Petareere raua ko Ahuriapa, ratou ko nga tangata ngakau mohio katoa, i homai  
 nei e Ihowa he ngakau tupato ki a ratou, me te whakaaro e mohiotia ai te mahi i nga tini mahi, o  
 nga mea o te wahi tapu, o te pera me nga mea katoa i whakahaua e Ihowa. <sup>2</sup> A i karangatia e Mohi  
 a Petareere raua ko Ahuriapa, me nga tangata ngakau mohio katoa; i homai nei e Ihowa he mahara  
 ki o ratou ngakau, nga tangata katoa i toko ake o ratou ngakau kia haere ki te mahi mahi ai: <sup>3</sup> Na  
 ka tangohia e ratou i te aroaro o Mohi nga whakahere katoa i kawea e nga tama a Iharaira hei hanga  
 i nga mea mo te wahi tapu, kia oti. I kawea ano e ratou he whakahere homai noa ki a ia i tenei ata,  
 i tenei ata. <sup>4</sup> Na ka haere mai nga tangata mohio katoa, nga kaimahi o nga mea katoa o te wahi  
 tapu, tera, tera, i tana mahi i mahi ai; <sup>5</sup> A ka korero ki a Mohi, ka mea, He nui noa atu ta te iwi e  
 kawea mai nei mo te mahinga o nga mea i whakahaua e Ihowa kia meatia. <sup>6</sup> Na ka whakahau a  
 Mohi, a ka pa te karanga i te puni, ka mea, Kaua tetahi tane, wahine ranei e mahi i tetahi atu mahi  
 hei whakahere mo te wahi tapu. Na ka whakamutua te kawea mai a te iwi. <sup>7</sup> He nui hoki, a toe ake,  
 nga mea i a ratou mo te mahinga o nga mea katoa.

8 Na nga tangata ngakau mohio katoa o nga kaimahi i hanga te tapenakara ki nga pihi kotahi tekau, ki te rinena miro pai, ki te puru, ki te papura, ki te ngangana: he tohunga rawa te mahinga o nga kerupima i whatua ki roto.

9 E rua tekau ma waru whatianga te roa o te pihi kotahi, e wha whatianga te whanui o te pihi kotahi: rite tonu te nui o nga pihi katoa.

10 I honoa e ia nga pihi e rima tetahi ki tetahi: me era atu pihi e rima hoki, i honoa e ia tetahi ki tetahi.

11 A i hanga ano e ia etahi koropiko puru ki te taha o tetahi pihi, ki te taha e honoa ana: i pera ano tana mahi ki te taha ki waho o tetahi pihi, ki te hononga mai o te rua.

12 E rima tekau nga koropiko i hanga e ia ki tetahi pihi, e rima tekau hoki nga koropiko i hanga e ia ki te taha o te pihi i te hononga mai o te rua: a i mau nga koropiko tetahi ki tetahi.

13 I hanga ano hoki e ia etahi toromoka koura e rima tekau, a honoa ana nga pihi tetahi ki tetahi ki nga toromoka: a ka kotahi ano te tapenakara.

14 I hanga ano e ia etahi pihi ki te huruhuru koati, hei teneti mo runga i te tapenakara: kotahi tekau ma tahi nga pihi i hanga e ia.

15 E toru tekau whatianga te roa o te pihi kotahi, e wha hoki nga whatianga te whanui o te pihi kotahi, rite tonu te nui o nga pihi kotahi tekau ma tahi.

16 A i honoa e ia nga pihi e rima ki a ratou ano, me nga pihi e ono ki a ratou ano.

17 I hanga ano e ia nga koropiko e rima tekau ki te tapa ki waho o te pihi i te hononga, i hanga ano e ia nga koropiko e rima tekau ki te tapa o te pihi e honoa mai ai te rua.

18 I hanga ano e ia nga toromoka parahi e rima tekau, hei hono i te teneti kia kotahi.

19 I hanga ano hoki e ia etahi hiako hipi he mea whakawhero, hei uhi mo te teneti, me etahi hiako pateri hei uhi mo waho atu.

20 I hanga ano hoki e ia etahi papa mo te tapenakara, he hitimi te rakau, he mea tu ki runga.

21 Kotahi tekau whatianga te roa o te papa kotahi, kotahi whatianga me te hawhe te whanui o te papa kotahi.

22 E rua nga arero o te papa kotahi, he mea hono ki a raua: he pera tonu tana i mea ai ki nga papa katoa o te tapenakara.

23 I hanga ano e ia nga papa mo te tapenakara: e rua tekau nga papa mo te taha ki te tonga whaka te tonga:

24 E wha tekau hoki nga turanga hiriwa i hanga e ia mo nga papa e rua tekau; e rua nga turanga i raro i tetahi papa mo ona arero e rua, e rua hoki nga turanga i raro i tetahi atu papa mo ona arero e rua.

25 A e rua tekau nga papa i hanga e ia mo tera taha o te tapenakara, mo te taha ki te raki.

26 Me nga turanga hiriwa e wha tekau; nga turanga e rua mo raro iho i tetahi papa, me nga turanga e rua mo raro i tetahi atu papa.

27 A mo te tuarongo o te tapenakara whaka te hauauru, e ono nga papa i hanga e ia.

28 E rua hoki nga papa i hanga e ia mo nga koki o te tapenakara i te

<sup>29</sup> tuarongo. A i honoa aua papa i raro, i honoa ano i runga ki te mowhiti kotahi: i peratia e ia aua  
<sup>30</sup> papa e rua i nga koki e rua. Na ka waru aua papa; me nga turanga hiriwa, kotahi tekau ma ono  
<sup>31</sup> nga turanga; e rua nga turanga i raro i tetahi papa, i tetahi papa. I hanga ano e ia etahi kaho, he  
<sup>32</sup> hitimi te rakau: e rima mo nga papa o tetahi taha o te tapenakara, E rima hoki nga kaho mo nga  
<sup>33</sup> papa o tetahi taha o te tapenakara, a e rima nga kaho mo nga papa o te tapenakara, mo te tuarongo  
<sup>34</sup> ki te hauauru. A ko to waenga kaho i meinga e ia kia rere na waenganui o nga papa i tetahi pito  
<sup>35</sup> ki tetahi pito. I whakakikoruatia ano e ia nga papa ki te koura, a ka hanga nga mowhiti o aua  
<sup>36</sup> papa ki te koura hei kuhunga mo nga kaho; i whakakikoruatia ano e ia nga kaho ki te koura.  
<sup>37</sup> I hanga ano e ia he arai ki te puru, ki te papura, ki te ngangana, ki te rinena miro pai; he  
<sup>38</sup> tohunga rawa te mahinga o nga kerupima i whatua e ia ki roto. I hanga ano e ia ona pou e wha  
<sup>39</sup> ki te hitimi, a whakakikoruatia iho e ia ki te koura; he koura nga matau: i whakarewaina ano e ia  
<sup>40</sup> nga turanga hiriwa e wha mo aua mea. I hanga ano he pa mo te whatitoka o te teneti ki te puru,  
<sup>41</sup> ki te papura, ki te ngangana, ki te rinena miro pai hoki, he mea mahi ki te ngira; Me ona pou e  
<sup>42</sup> rima, me nga matau a aua pou: a i whakakikoruatia e ia nga pito ki runga o aua pou me nga awhi  
<sup>43</sup> ki te koura: ko nga turanga e rima ia he parahi.

## Chapter 37

<sup>1</sup> I hanga ano e Petareere te aaka, he hitimi te rakau: e rua whatianga me te hawhe te roa, kotahi  
<sup>2</sup> whatianga me he hawhe te whanui, kotahi whatianga me te hawhe te teitei: A i whakakikoruatia  
<sup>3</sup> e ia ki te koura parakore a roto, a waho; i hanga ano e ia he niao koura a tawhio noa. I  
<sup>4</sup> whakarewaina ano nga mowhiti koura e wha mo ona koki e wha; e rua nga mowhiti mo tetahi taha,  
<sup>5</sup> e rua hoki nga mowhiti mo tetahi taha. I hanga ano e ia he amo, he hitimi te rakau, a  
<sup>6</sup> whakakikoruatia iho ki te koura. A i kuhua e ia nga amo ki nga mowhiti i nga taha o te aaka, hei  
<sup>7</sup> amo mo te aaka. I hanga ano e ia te taupoki ki te koura parakore: e rua whatianga me te hawhe  
<sup>8</sup> te roa, kotahi whatianga me te hawhe te whanui. I hanga ano nga kerupima e rua ki te koura, he  
<sup>9</sup> mea patu tana mahina, ki nga pito e rua o te taupoki; Kotahi te kerupi ki tenei pito, kotahi kerupi  
<sup>10</sup> ki tera pito; i honoa nga kerupima ki te taupoki ki ona pito e rua. A i roha atu whakarunga nga

parirau o nga kerupima, i uhi i te taupoki ki o raua parirau, me te anga ano o raua mata ki a raua; i anga whaka te taupoki nga mata o nga kerupima.

10

I hanga ano te tepu, he hitimi te rakau; e rua whatianga te roa, kotahi whatianga te whanui,

11

kotahi whatianga me te hawhe te teitei: A i whakakikoruatia ki te koura parakore, i hanga ano

12

hoki he niao koura mo taua mea a tawhio noa. I hanga ano e ia he awhi mo taua mea, he whanui

13

ringa te nui a tawhio noa; i hanga ano he niao koura mo te awhi a tawhio noa. A i whakarewaina nga mowhiti koura e wha, a whakanohoia iho nga mowhiti ki nga koki e wha i ona waewae e wha.

14

15

I te ritenga ake o te awhi nga mowhiti, hei kuhunga mo nga amo, hei maunga mo te tepu. A i hanga e ia nga amo, he hitimi te rakau, a whakakikoruatia iho ki te koura, hei amo mo te tepu.

16

I hanga ano nga oko mo runga i te tepu ki te koura parakore, ona rihi, ona koko, ona peihana me

17

ona kapu mo nga ringihanga. I hanga ano te turanga rama ki te koura parakore: ko tana hanganga i te turanga rama he mea patu; no reira ano tona take, tona peka, ona kapu, ona puku, me ona puawai.

18

A e ono nga peka i puta ake i ona taha; e toru nga peka o te turanga rama i tetahi taha, e toru

19

hoki nga peka o te turanga rama i tetahi taha; E toru nga kapu, he mea rite ki te puawai aramona, te puku, me te puawai, ki tetahi peka; e toru hoki nga kapu, he mea rite ki te puawai aramona ki tetahi atu peka, te puku, me te puawai: he pera tonu i nga peka e ono e puta ake ana i te turanga

20

rama. A e wha nga kapu o te turanga rama, he mea rite ki te puawai aramona, me te puku, me

21

te puawai o tetahi, o tetahi: A e rua nga peka, kotahi puku, o raro ake, no taua koura ra ano, e rua hoki nga peka, kotahi puku, o raro ake no taua koura ra ano, e rua hoki nga peka, kotahi puku,

22

o raro ake, no taua koura ra ano, rite tonu ki nga peka e ono e puta mai ana i roto i taua mea. No

23

te mea kotahi nga puku, nga peka: he koura parakore katoa; kotahi tonu, he mea patu. I hanga ano hoki e ia ki te koura parakore nga rama e whitu o taua mea, me ona kuku, me ona oko ngarahu.

24

Kotahi ano te taranata koura parakore i hanga ai taua mea, me ona oko katoa.

25

I hanga ano e ia te aata hei tahunga mea kakara, he hitimi te rakau: kotahi whatianga te roa, kotahi whatianga te whanui; he tapawha; e rua whatianga te teitei; no taua mea ra ano ona haona.

26

A whakakikoruatia iho e ia taua mea ki te koura parakore, a runga, me ona taha, a potae katoa,

27

me ona haona: i hanga ano e ia he niao koura mo taua mea a tawhio noa. I hanga ano nga mowhiti koura e rua mo taua mea, mo raro iho i tona niao, ki ona koki e rua, ki ona taha e rua, hei kuhunga

28

mo nga amo, hei amohanga. I hanga ano nga amo, he hitimi te rakau, a whakakikoruatia iho ki

29  
te koura. I hanga ano e ia te hinu tapu hei whakawahi, me te whakakakara parakore ki nga mea kakara, ta te kaiwhakaranu hoki e hanga ai.

### Chapter 38

1 I hanga ano e ia he aata mo nga tahunga tinana, he hitimi te rakau: e rima nga whatianga te roa, e rima whatianga te whanui, he tapawha; e toru nga whatianga te teitei. 2 I hanga ano ona haona ki ona koki e wha; kotahi te rakau o taua mea, o ona haona: a whakakikoruatia iho e ia ki te parahi. 3 I hanga ano nga oko katoa o te aata, nga pata, me nga koko pungarehu, me nga peihana, me nga marau, me nga oko ngarahu: i hanga e ia ona mea katoa ki te parahi. 4 I hanga ano ki te parahi he pae kupenga mo te aata, he mea ripekapeka, mo raro i tona awhi, ki raro iho, i waenganui. 5 A e wha nga mowhiti parahi i whakarewaina e ia mo nga koki e wha o te pae kupenga parahi, hei kuhunga mo nga amo. 6 I hanga ano nga amo, he hitimi te rakau, a whakakikoruatia iho ki te parahi. 7 Na kuhua ana e ia nga amo ki nga mowhiti i nga taha o te aata, hei amo; i hanga e ia te aata ki te papa, he mea tuwhera kau a roto. 8 I hanga ano te takotoranga wai ki te parahi, me tona turanga hoki ki te parahi, ki nga whakaata o nga wahine i huihui mai, i huihui mai nei ki te whatitoka o te tapenakara o te whakaminenga. 9 I hanga ano te marae: he rinena miro pai nga pa o te marae, o te taha ki te tonga whaka te tonga, kotahi rau whatianga: 10 E rua tekau nga pou o aua mea, e rua tekau ano hoki nga turanga parahi; he hiriwa nga matau o nga pou me nga awhi. 11 Me nga pa mo te taha ki te raki, kotahi rau whatianga, e rua tekau nga pou, e rua tekau hoki nga turanga parahi: he hiriwa nga matau o nga pou me nga awhi. 12 He pa ano hoki mo te taha ki te hauauru, e rima tekau whatianga, kotahi tekau nga pou, kotahi tekau ano hoki nga turanga; he hiriwa nga matau o nga pou me nga awhi. 13 E rima tekau hoki whatianga o te taha ki te rawhiti whaka te rawhiti. 14 Kotahi tekau ma rima whatianga o nga pa o tetahi taha o te kuwaha; e toru nga pou, e toru hoki nga turanga. 15 A kotahi tekau ma rima whatianga o nga pa o tera taha o te kuwaha o te marae, o tenei, o tera; e toru nga pou, e toru hoki nga turanga. 16 He rinena miro pai nga pa katoa o te marae a tawhio noa. 17 He parahi nga turanga mo nga pou, he hiriwa nga matau o nga pou me nga awhi; i whakakikoruatia ano hoki ki te hiriwa nga pito ki runga: i whakawhaiawhitia ano hoki nga pou katoa o te marae ki

18  
te hiriwa. He mea hanga hoki ki te ngira te pa mo te kuwaha o te marae, he puru, he papura, he ngangana, he rinena miro pai: e rua tekau whatianga te roa, e rima whatianga te teitei, ara te whanui,

19  
rite tonu ano ki nga pa o te marae. A e wha nga pou o aua pa, e wha ano hoki nga turanga parahi; he hiriwa nga matau; i whakakikoruatia ano hoki nga pito o aua pou me nga awahi ki te hiriwa.

20  
He parahi ano nga titi katoa o te tapenakara, o te marae a tawhio noa.

21  
Ko nga mea tenei o te tapenakara, ara o te tapenakara o te whakaaturanga, ko nga mea i whakaritea e Mohi i tana korero hei mahi ma nga Riwaiti i raro i te ringa o Itamara, tama a Arona

22  
tohunga. Na hanga ana e Petareere tama a Uri, tama a Huru, o te iwi o Hura, nga mea katoa i

23  
whakahaua e Ihowa ki a Mohi. Ko tona hoa ko Ahoriapa, tama a Ahiamaka no te iwi o Rana, he kaimahi, he mea mohio, he kaiwhakairo hoki i te puru, i te papura, i te ngangana, i te rinena pai.

24  
A, ko te koura katoa i mahia mo nga mea, mo nga mea katoa o te wahi tapu, te koura o te

25  
whakahere, e rua tekau ma iwa taranata, e whitu rau e toru tekau hekere, he hekere wahi tapu. A, ko te hiriwa o te hunga i taua o te whakaminenga, kotahi rau taranata, kotahi mano e whitu rau e

26  
whitu tekau ma rima hekere, he hekere wahi tapu. Kotahi te pekaha a te tangata, ara kotahi te hawhe hekere, ko te hekere hoki o te wahi tapu, na te hunga hoki i haere kia taua, na nga mea e rua tekau, maha atu ranei, o ratou tau; e ono rau hoki o ratou mano e toru mano e rima rau e rima tekau.

27  
A i whakarewaina nga taranata hiriwa kotahi rau hei turanga pou mo te wahi tapu, hei turanga pou hoki mo te arai; kotahi rau taranata, kotahi rau nga turanga, kotahi te taranata, kotahi te turanga.

28  
A i hanga e ia nga hekere kotahi mano e whitu rau e whitu tekau ma rima hei matau mo nga pou,

29  
a whakakikoruatia iho e ia nga pito ki runga, whakawhaiawhitia hoki. A e whitu tekau nga

30  
taranata o te parahi o te whakahere, e rua hoki mano e wha rau hekere. Hanga ake e ia nga turanga pou mo te whatitoka o te tapenakara o te whakaminenga, te aata parahi; me tona pae

31  
kupenga, te mea parahi; me nga mea katoa o te aata; Me nga turanga pou o te marae a tawhio noa, me nga turanga pou mo te kuwaha o te marae, me nga titi katoa o te tapenakara, me nga titi katoa o te marae a tawhio noa.

## Chapter 39

1  
I hanga ano hoki e ratou te puru, te papura, me te ngangana, hei kakahu minita mo te minitatanga i te wahi tapu, i hanga ano nga kakahu tapu mo Arona; ko ta Ihowa i whakahau ai ki



<sup>2</sup>  
 a Mohi. I hanga ano e ia te epora ki te koura, ki te puru, ki te papura, ki te ngangana, ki te rinena  
<sup>3</sup>  
 miro pai. I patua ano hoki te koura hei paraharaha, a ripiripia ana hei mangemange, a mahia ana  
<sup>4</sup>  
 ki roto ki te puru, ki te papura, ki te ngangana, ki te rinena pai, he tohunga rawa te mahi. I hanga  
<sup>5</sup>  
 ano nga pokohiwi o te epora hei hononga: he mea hono ki nga taha e rua. Me te whitiki whakairo  
 e mau ana ki tona epora, kotahi ano te mea i hanga ai raua, me te hanganga ano; he koura, he puru,  
<sup>6</sup>  
 he papura, he ngangana, he rinena miro pai; ko ta Ihowa i whakahau ai ki a Mohi. I mahia ano  
 nga kohatu onika, he mea whakanoho ki te nohoanga koura, tuhituhi rawa ki nga ingoa o nga tama  
<sup>7</sup>  
 a Iharaira, he tuhi hiri te tuhi. A whakanohoia iho e ia ki nga pokohiwi o te epora hei kohatu  
<sup>8</sup>  
 whakamahara mo nga tama a Iharaira; hei pera me ta Ihowa i whakahau ai ki a Mohi. He tohunga  
 rawa te mahi i hanga ai e ia te kouma, he pera ano me te mahinga o te epora; he koura, he puru, he  
<sup>9</sup>  
 papura, he ngangana, he rinena miro pai. He tapawha, he rererua te kouma i hanga e ratou: kotahi  
<sup>10</sup>  
 whanganga a te ringa te roa, kotahi hoki whanganga te whanui, he mea rererua. E wha hoki nga  
 rarangi kohatu i whakanohoia e ratou ki taua mea: ko te rarangi tuatahi, he harariu, he topaha, he  
<sup>11</sup>  
 kapakara: ko te rarangi tuatahi tenei. Ko te rarangi tuarua, he emerara, he hapaira, he taimona.  
<sup>12</sup>  
 Ko te rarangi tuatoru, he rikuri, he akete, he ametihita. <sup>13</sup>  
 Ko te rarangi tuawha, he perira, he  
<sup>14</sup>  
 onika, he hahapa; he mea whakapiri ki te nohoanga koura i nga wahi i mau ai. A rite tonu nga  
 kohatu ki nga ingoa o nga tama a Iharaira kotahi tekau ma rua, rite tonu ki o ratou ingoa, i rite te  
 tuhi ki to te hiri, tenei tangata me tona ingoa, tenei tangata me tona ingoa; rite tonu ki nga iwi kotahi  
<sup>15</sup>  
 tekau ma rua. I hanga ano e ratou ki te koura parakore nga mekameka, he mea whiri, mo te  
<sup>16</sup>  
 kouma, mo nga pito. I hanga ano etahi nohoanga koura e rua, me etahi mowhiti koura e rua; a  
<sup>17</sup>  
 whakanohoia iho etahi mowhiti e rua ki nga pito e rua o te kouma. I whakanohoia ano nga  
<sup>18</sup>  
 mekameka koura e rua, nga mea whiri, ki nga mowhiti e rua i nga pito o te kouma. I whakaukia  
 ano nga pito e rua o nga mekameka whiri e rua ki nga nohoanga e rua, a whakanohoia ana ki nga  
<sup>19</sup>  
 pokohiwi e rua o te epora, ki te taha ki mua. I hanga ano nga mowhiti koura e rua, a whakanohoia  
<sup>20</sup>  
 ana ki nga pito e rua o te kouma, ki tona remu, ki te taha ki roto whaka te epora. I hanga ano  
 etahi atu mowhiti koura e rua, a whakanohoia ana ki nga pokohiwi e rua o te epora, ki te taha ki  
 raro, ki te taha ki mua, ki te ritenga o tona hononga ake, ki runga ake o te whitiki whakapaipai o  
<sup>21</sup>  
 te epora. A herea iho e ratou te kouma, ona mowhiti ki nga mowhiti o te epora, ki te miro puru,  
 kia mau ai ki runga ake o te whitiki whakapaipai o te epora, kei takoto ke te kouma i te epora; ko

ta Ihowa hoki i whakahau ai ki a Mohi. <sup>22</sup> I hanga ano e ia te koroka o te epora, he mea whatu, he  
 puru katoa. <sup>23</sup> Ko te kohao i waenganui o te koroka, he pera me te kohao o te pukupuku, me te  
 whiri ano i te kohao a huri noa, kei pakaru. <sup>24</sup> I hanga ano etahi pamekaranete mo te remu o te  
 koroka ki te puru, ki te papura, ki te ngangana, ki te rihena miro. <sup>25</sup> I hanga ano e ratou etahi pere  
 ki te koura parakore, a whakanohoia ana nga pere ki te takiwa o nga pamekaranete, ki te remu o te  
 koroka a huri roa, ki te takiwa o nga pamekaranete; <sup>26</sup> He pere he pamekaranete, he pere he  
 pamekaranete, ki te remu o te koroka a huri noa, hei mea minita; ko ta Ihowa hoki i whakahau ai  
 ki a Mohi. <sup>27</sup> I hanga ano etahi koti ki te rinena pai, ki te mea whatu, mo Arona ratou ko ana tama;  
<sup>28</sup> Me te potae tohunga ki te rinena pai, me etahi potae pai ki te rinena pai me nga tarautete rinema  
 ki te rinena miro pai. <sup>29</sup> Me te whitiki ki te rinena miro pai, ki te puru, ki te papura, ki te ngangana,  
 ki nga mea i hanga ki te ngira; ko ta Ihowa hoki i whakahau ai ki a Mohi. <sup>30</sup> I hanga ano te  
 paraharaha o te karauna tapu ki te koura parakore, a ko te tuhi i tuhia, he tuhi hiri, HE TAPU KI  
 A IHOWA. <sup>31</sup> Na ko tetahi miro puru, kia mau ai ki te potae tohunga, ki te taha ki runga; ko ta  
 Ihowa i whakahau ai ki a Mohi.  
<sup>32</sup> Na ka oti katoa te mahi o te tapenakara o te teneti o te whakaminenga: rite tonu ta nga tama  
 a Iharaira i mea ai ki nga mea katoa i whakahaua e Ihowa ki a Mohi; i pera ano ratou. <sup>33</sup> Na ka  
 kawea e ratou te tapenakara ki a Miho, te teneti me ona mea katoa, ona toromoka, ona papa, ona  
 kaho, ona pou, me ona turanga pou, <sup>34</sup> Me te uhi iho, nga hiako hipi kua oti te whakawhero, me  
 tetahi uhi, ara nga hiako pateri, me te arai hipoki, <sup>35</sup> Me te aaka o te whakaaturanga, me ona amo,  
 me te taupoki, <sup>36</sup> Te tepu me ona oko katoa, me te taro aroaro, <sup>37</sup> Te turanga rama parakore me  
 ona rama, nga rama rarangi, me ona oko katoa, me te hinu mo te whakamarama, <sup>38</sup> Te aata koura,  
 te hinu whakawahi, te whakakakara reka, te pa mo te whatitoka o te tapenakara, <sup>39</sup> Te aata parahi,  
 me tona pae kupenga parahi, ona amo me ona oko katoa, te takotoranga wai me tona turanga,  
<sup>40</sup> Nga pa o te marae, ona pou, me ona turanga pou, me te pa mo te kuwaha o te marae, ona aho,  
 me ona titi, me nga oko katoa mo nga mahi o te tapenakara, mo te teneti o te whakaminenga, <sup>41</sup> Nga  
 kakahu minita mo nga minitatanga ki te wahi tapu, me nga kakahu tapu mo Arona tohunga, me  
 nga kakahu mo ana tama, ina minita. <sup>42</sup> Rite tonu ki nga mea katoa i whakahaua e Ihowa ki a Mohi

43  
ta nga tama a Ihairaira mahinga i nga mahi katoa. Na ka tirohia iho e Mohi te mahi katoa, na, rite tonu ta ratou mahi ki ta Ihowa i whakahau ai, i pera ano ratou: a manaakitia ana ratou e Mohi.

## Chapter 40

1 A i korero a Ihowa ki a Mohi, i mea, 2 Hei te ra tuatahi o te marama tuatahi koe whakaara ai i te tapenakara o te teneti o te whakaminenga. 3 A me hoatu ki roto te aaka o te whakaaturanga, ka hipoki ai i te aaka ki te arai. 4 Me kawe ano te tepu ki roto, ka ata whakatakoto ai i nga mea e whakatakotoria ana ki runga; me kawe ano e koe te turanga rama ki roto, ka tahu ai i ona rama. 5 Me whakatu ano e koe te aata koura mo te whakakakara ki mua o te aaka o te whakaaturanga, ka whakairi ai i te pa o te whatitoka ki te tapenakara. 6 Me whakatu ano e koe te aata mo te tahunga tinana ki mua o te whatitoka o te tapenakara o te teneti o te whakaminenga. 7 Me whakatu ano te takotoranga wai ki te takiwa o te aata, o te teneti o te whakaminenga, ka riringi wai ai ki roto. 8 Me whakatu ano te marae a tawhio noa, ka whakairi ai i te pa ki te kuwaha o te marae. 9 Na ka tango i te hinu whakawahi, ka whakawahi ai i te tapenakara me nga mea katoa i roto, ka whakatapu ai i taua mea, i ona mea katoa: a ka tapu. 10 Me whakawahi ano te aata mo te tahunga tinana me ona oko katoa, me whakatapu ano te aata: a ka meinga hei aata tino tapu. 11 Me whakawahi ano te takotoranga wai me tona turanga, me whakatapu. 12 Me kawe ano e koe a Arona ratou ko ana tama ki te whatitoka o te tapenakara o te whakaminenga, ka horoi ai i a ratou ki te wai, 13 Ka whakakakahu ai i nga kakahu tapu ki a Arona, ka whakawahi ai i a ia, ka whakatapu ai i a ia: a ka waiho ia hei tohunga maku. 14 Na, me kawe mai ana tama, me whakakakahu nga koti ki a ratou: 15 Me whakawahi, kia rite ki tau whakawahinga i to ratou papa, a ka meinga ratou hei tohunga maku: a ka ai to ratou whakawahinga hei whakatohunga i a ratou mo ake tonu atu, puta noa i o ratou whakatapuranga. 16 I pera ano a Mohi: rite tonu tana i mea ai ki nga mea katoa i whakahaua e Ihowa ki a ia. 17 Na, i te marama tuatahi o te rua o nga tau, i te ra tuatahi o te marama ka whakaarahi te tapenakara. 18 I whakaarahia hoki e Mohi te tapenakara, i whakatakotoria ona turanga, i whakaarahia ona papa, i kuhua ona kaho, a whakaarahia ana ona pou. 19 I hipokina ano e ia te teneti ki runga i te tapenakara,

a maka iho ana te hipoki o te teneti ki runga ake, ko ta Ihowa hoki i whakahau ai ki a Mohi. <sup>20</sup> Na  
 ka mau ia ki te whakaaturanga, a hoatu ana ki roto ki te aaka, a kuhua ana nga amo ki te taha o te  
 aaka, na ka maka iho te taupoki ki runga ki te aaka: <sup>21</sup> Na ka mau e ia te aaka ki roto ki te  
 tapenakara, a whakairihia ake ana te arai hipoki, hei hipoki mo te aaka o te whakaaturanga; ko ta  
 Ihowa hoki i whakahau ai ki a Mohi. <sup>22</sup> I whakaturia ano e ia te tepu ki te teneti o te whakaminenga,  
 ki te taha whaka te raki o te tapenakara, ki waho mai o te arai. <sup>23</sup> I whakararangitia hoki te taro ki  
 runga, ki te aroaro o Ihowa; ko ta Ihowa hoki i whakahau ai ki a Mohi. <sup>24</sup> I whakaturia ano e ia te  
 turanga rama ki te teneti o te whakaminenga, ki te ritenga atu o te tepu, ki te taha whaka te tonga  
 o te tapenakara. <sup>25</sup> A tahuna ana e ia nga rama ki te aroaro o Ihowa; ko ta Ihowa i whakahau ai ki  
 a Mohi. <sup>26</sup> I whakaturia hoki e ia te aata koura ki te teneti o te whakaminenga ki mua mai o te arai:  
<sup>27</sup> A tahuna ana e ia te whakakakara reka ki runga; ko ta Ihowa i whakahau ai ki a Mohi. <sup>28</sup> I  
 whakairihia ano te pa mo te whatitoka o te tapenakara. <sup>29</sup> A i whakaturia e ia te aata mo te tahunga  
 tinana ki te whatitoka o te tapenakara o te teneti o te whakaminenga, a whakaekea ana ki runga te  
 tahunga tinana me te whakahere totokore; ko ta Ihowa i whakahau ai ki a Mohi. <sup>30</sup> A i whakaturia  
 e ia te takotoranga wai ki te takiwa o te aata, o te teneti o te whakaminenga, a ringihia ana he wai  
 ki roto hei horoi. <sup>31</sup> A i horoia e Mohi, e Arona hoki ratou ko ana tama, o ratou ringa me o ratou  
 waewae ki reira: <sup>32</sup> I to ratou haerenga ki roto ki te teneti o te whakaminenga, i te mea ranei ka  
 whakatata ki te aata, ka horoi ratou; ko ta Ihowa i whakahau ai ki a Mohi. <sup>33</sup> I whakaturia ano te  
 marae o te tapenakara, o te aata a tawhio noa, a whakairihia ana te pa o te kuwaha o te marae. Na  
 ka oti te mahi i a Mohi.  
<sup>34</sup> Katahi ka taupokina iho te teneti o te whakaminenga e te kapua, a ka ki te tapenakara i te  
 kororia o Ihowa. <sup>35</sup> A kihai i taea e Mohi te tomo ki te teneti o te whakaminenga no te mea e taungia  
 iho ana e te kapua, e ki ana hoki te tapenakara i te kororia o Ihowa. <sup>36</sup> A, ka riro ake te kapua i te  
 tapenakara, ka haere nga tama a Iharaira i o ratou haerenga katoa: <sup>37</sup> Ki te mea ia kihai i riro te  
 kapua, kihai i haere, a taea noatia te ra i riro ake ai. <sup>38</sup> I runga hoki i te tapenakara te kapua o Ihowa  
 i te awatea, a he ahi kei runga i te po, i te tirohanga a te whare katoa o Iharaira, i o ratou haerenga  
 katoa.

## Leviticus

### Chapter 1

<sup>1</sup> Na ka karanga a Ihowa ki a Mohi, ka korero ki a ia i roto i te tapenakara o te whakaminenga,  
<sup>2</sup> ka mea, Korero ki nga tama a Iharaira, mea atu ki a ratou, Ki te kawea e tetahi tangata o koutou  
 he whakahere ki a Ihowa, me kawea ta koutou whakahere i roto i nga kararehe, ara i roto i nga kau,  
 i roto ranei i nga hipi.  
<sup>3</sup> Ki te mea he tahunga tinana tana whakahere no nga kau, me tapae e ia he toa, he kohakore:  
 ka tuku ai ki te whatitoka o te tapenakara o te whakaminenga, hei mea e manakohia ai ia i te aroaro  
 o Ihowa. <sup>4</sup> A me popoki tona ringa ki te pane o te tahunga tinana; a ka manakohia tana, hei  
 whakamarie mona. <sup>5</sup> Na me patu te kau ki te aroaro o Ihowa: a me kawea te toto e nga tohunga, e  
 nga tama a Arona, me tauhiuhi te toto ki te aata a tawhio noa, ki tera i te whatitoka o te tapenakara  
 o te whakaminenga. <sup>6</sup> Na me tihore e ia te tahunga tinana, a me tapatapahi tenei wahi ona, tenei  
 wahi ona. <sup>7</sup> Na me maka he ahi e nga tama a Arona tohunga ki runga ki te aata, me whakapai hoki  
 nga wahie ki runga ki te ahi: <sup>8</sup> Na ka whakararangi ai nga tohunga, nga tama a Arona, i nga pihi,  
 te pane me te ngako, ki nga wahie o te ahi i te aata. <sup>9</sup> Ko ona whekau ia, me ona waewae, me horoi  
 ki te wai, ka tahu katoa ai te tohunga ki runga ki te aata hei tahunga tinana, hei whakahere ahi, hei  
 kakara reka ki a Ihowa.  
<sup>10</sup> Na, no te kahui tana whakahere no nga hipi, no nga koati ranei, hei tahunga tinana; me kawea  
 e ia he toa, he mea kohakore, <sup>11</sup> Ka patu ai ki te taha ki te raki o te aata, ki te aroaro o Ihowa: a ma  
 nga tohunga, ma nga tama a Arona, e tauhiuhi ona toto ki te aata a tawhio noa. <sup>12</sup> Na ka tapatapahi  
 ai ia he wahi, he wahi, tona pane, tona ngako; a ma te tohunga e whakararangi ki nga wahie o te  
 ahi i runga i te aata: <sup>13</sup> Ko nga whekau ia, me nga waewae, me horoi ki te wai: a ka kawea katoa ai  
 te tohunga, ka tahu ai ki te aata: he tahunga tinana hoki, he whakahere ahi, he kakara reka ki a  
 Ihowa. <sup>14</sup> Na, mehemea he tahunga tinana no nga manu tana whakahere ki a Ihowa, na me kawea  
 e ia tana whakahere i roto i nga kukupa, i roto ranei i nga pi kukupa. <sup>15</sup> A ma te tohunga e kawea  
 ki te aata, e whakawiri atu tona pane, ka tahu ai ki runga ki te aata; a ko ona toto me tuku kia heke  
 ki te taha o te aata: <sup>16</sup> A ko tona puku me tona paru me tango, a ka maka ki te taha ki te rawhiti o  
 te aata, ki te wahi o nga pungarehu: <sup>17</sup> Na me hahae e ia ma ona parirau, otia kua e motuhia

rawatia; a ma te tohunga e tahu ki runga ki te aata, ki nga wahie o te ahi: he tahunga tinana tena, he whakahere ahi, he kakara reka ki a Ihowa.

## Chapter 2

<sup>1</sup> A, ki te kawea e tetahi he whakahere totokore ki a Ihowa, hei te paraoa pai he whakahere mana; a me riringi e ia he hinu ki runga ki taua mea, ka maka hoki i te parakihe ki runga: <sup>2</sup> A ka kawea ai ia ki nga tohunga, ki nga tama a Arona: na me ao e ia i roto i taua mea, kia ki tona ringa i te paraoa pai, i te hinu, me te parakihe katoa hoki; na ka tahu te tohunga i te whakamahara o taua mea ki te aata, hei whakahere ahi, hei ka kara reka ki a Ihowa. <sup>3</sup> A, ko te toenga o te whakahere totokore, ma Arona ratou ko ana tama: he mea tino tapu tena i roto i nga whakahere ahi a Ihowa.

<sup>4</sup> A, ki te kawea e koe hei whakahere he whakahere totokore i tunua ki te oumu, hei nga keke paraoa, hei nga mea rewenakore, me konatunatu ki te hinu, hei nga keke angiangi ranei kahore nei he rewena, he mea pani ki te hinu. <sup>5</sup> A, ki te mea he whakahere totokore te whakahere, he mea i tunua ki te paraharaha, hei te mea paraoa pai, kihai nei i rewenatia, kua oti nei te konatu ki te hinu. <sup>6</sup> Me whatiwhati e koe, ka riringi ai ki te hinu: he whakahere totokore tena. <sup>7</sup> Na, mehemea he whakahere totokore tau whakahere, he mea i paraipanatia, me hanga ki te paraoa, ki te hinu. <sup>8</sup> A me kawea e koe te whakahere totokore, i hanga ki enei mea, ki a Ihowa: a ka tukua atu ki te tohunga, na mana e mau atu ki te aata. <sup>9</sup> Na ka tangohia e te tohunga i roto i te whakahere totokore te whakamahara o taua mea, ka tahu ai ki te aata: hei whakahere ahi, hei kakara reka ki a Ihowa. <sup>10</sup> A ma Arona ratou ko ana tama te toenga o te whakahere totokore: he mea tino tapu tena i roto i nga whakahere ahi a Ihowa.

<sup>11</sup> Kei hanga ki te rewena tetahi whakahere totokore e kawea ana e koutou ma Ihowa: kei tahuna hoki e koutou he rewena, he honi ranei, i roto i tetahi o nga whakahere ahi a Ihowa. <sup>12</sup> Na, hei whakahere tuapora, me whakahere ena ma Ihowa: otiia e kore e tahuna ki te aata hei kakara reka. <sup>13</sup> Me kinaki ano ki te tote au whakahere totokore katoa ina whakaherea: kei whakamutua hoki te tote o te kawenata a tou Atua mo tau whakahere totokore: me whakahere he tote e koe ki runga i au whakahere katoa. <sup>14</sup> Na, mehemea he whakahere tuapora tau whakahere totokore ki a Ihowa, hei te witi hou, i whakamaroketia ki te ahi, hei te witi i patua i roto i nga puku hou, tau whakahere totokore o au tuapora. <sup>15</sup> Me riringi ano he hinu ki taua mea, me whakatakoto hoki he

parakihe ki runga: he whakahere totokore tena. <sup>16</sup> Na me tahu e te tohunga te whakamahara o taua mea, ara tetahi wahi o te witi i patua, o te hinu, me te parakihe katoa: hei whakahere ahi taua mea ki a Ihowa.

### Chapter 3

<sup>1</sup> Na, mehemea he patunga mo te pai tana e tapae ai; ki te mea no nga kau tana whakahere, ahakoa toa, ahakoa uha, kia kohakore tana e tuku ai ki te aroaro o Ihowa. <sup>2</sup> Na ka popoki tona ringa ki te matenga o tana whakahere, ka patu ai ki te whatitoka o te tapenakara o te whakaminenga: na ka tauhiuhia te toto e nga tohunga, e nga tama a Arona, ki te aata a tawhio noa. <sup>3</sup> Na me tapae e ia he whakahere ahi ki a Ihowa i roto i te patunga mo te pai; ko te ngako e whiwhiwhiwhi ana ki nga whekau, me te ngako katoa o nga whekau, <sup>4</sup> Me nga whatukuhu e rua, me to reira ngako, tera i te hope, me te taupa i te ate, me nga whatukuhu, me tango tera e ia. <sup>5</sup> A me tahu e nga tama a Arona ki te aata, ki runga i te tahunga tinana i runga i nga wahie o te ahi: he whakahere ahi tena, he kakara reka ki a Ihowa.

<sup>6</sup> A, ki te mea no nga hipi tana e tapae ai ki a Ihowa hei patunga mo te pai; he toa, he uha ranei, kei whai koha tana e tuku ai. <sup>7</sup> Ki te tapaea e ia he reme hei whakahere mana, me tapae ki te aroaro o Ihowa: <sup>8</sup> Me popoki hoki tona ringa ki te pane o tana whakahere, ka patu ai ki mua i te tapenakara o te whakaminenga: a ka tauhiuhia ona toto e nga tama a Arona ki te aata a tawhio noa. <sup>9</sup> Me tapae ano e ia tetahi wahi o te patunga mo te pai hei whakahere ahi ki a Ihowa; ko tona ngako me te hiawero katoa, kia tino tata ki te tiki tana tapahanga; a ko te ngako e whiwhiwhiwhi ana ki nga whekau, me te ngako katoa o nga whekau, <sup>10</sup> Me nga whatakuhu e rua, me to reira taupa, tera i te hope, me te taupa o te ate, me nga whatukuhu, me tango tera e ia. <sup>11</sup> A ma te tohunga e tahu ki runga ki te aata: he kai hoki no ta Ihowa whakahere ahi. <sup>12</sup> A ki te mea he koati tana whakahere, me tapae ki te aroaro o Ihowa: <sup>13</sup> A ka popoki tona ringa ki tona pane, ka patu ai ki mua o te tapenakara o te whakaminenga: a ma nga tama a Arona e tauhiuhi ona toto ki te aata a tawhio noa.

<sup>14</sup> A me tapae atu e ia tetahi wahi ona hei whakahere ahi mana ki a Ihowa; ko te ngako e whiwhiwhiwhi ana ki nga whekau, me te ngako katoa o nga whekau, <sup>15</sup> Me nga whatukuhu e rua, me to reira ngako, tera i te hope, me te taupa i te ate, me nga whatukuhu, me tango tera e ia. <sup>16</sup> A

me tahu e te tohunga ki te aata: he kai tena no te whakahere ahi, hei kakara reka: ko te ngako katoa  
<sup>17</sup>  
 ma Ihowa. Hei tikanga mau tonu tenei mo o koutou whakatupuranga, i o koutou nohoanga katoa,  
 kia kaua e kainga tetahi ngako, toto ranei, e koutou.

### Chapter 4

<sup>1</sup> I korero ano a Ihowa ki a Mohi, i mea, <sup>2</sup> Korero ki nga tama a Iharaira, mea atu, Ki te pohehe  
 tetahi tangata, a ka hara ki tetahi o nga mea i whakahaua e Ihowa kia kaua e meatia, a ka mea i  
 tetahi o aua mea: <sup>3</sup> Ki te hara te tohunga i whakawahia, e tau ai he he ki runga ki te iwi; na me  
 whakahere e ia ki a Ihowa mo tona hara i hara ai ia tetahi puru, hei te kua o kohakore, hei whakahere  
 hara. <sup>4</sup> Na me kawe e ia te puru ki te whatitoka o te tapenakara o te whakaminenga, ki te aroaro o  
 Ihowa; a ka popoki i tona ringa ki te matenga o te puru, ka patu ai te puru ki te aroaro o Ihowa.  
<sup>5</sup> Na me tango e te tohunga i whakawahia tetahi wahi o nga toto o te puru, a ka kawe ki te tapenakara  
 o te whakaminenga: <sup>6</sup> A ka tou te tohunga i tona maihao ki te toto, a kia whitu ana tauhiuhinga i  
 te toto ki te aroaro o Ihowa, ki mua o te arai o te wahi tapu. <sup>7</sup> Me pani ano e te tohunga tetahi wahi  
 o nga toto ki nga haona o te aata whakakakara reka, ki te aroaro o Ihowa, ki tera i te tapenakara o  
 te whakaminenga; ka riringi ai i nga toto katoa o te puru ki te turanga o te aata mo te tahunga tinana,  
 ki te ra i te whatitoka o te tapenakara o te whakaminenga. <sup>8</sup> A me tango e ia nga ngako katoa o te  
 puru whakahere hara; te ngako e whiwhiwhiwhi ana ki nga whekau, me nga ngako katoa o nga  
 whekau, <sup>9</sup> Me nga whatukuhu e rua, me to reira ngako, tera i te hope, me te taupa o te ate, me nga  
 whatukuhu, me tango tera e ia, <sup>10</sup> Kia rite ki te tangohanga o to te puru o te patunga mo te pai: a  
 me tahu e te tohunga ki runga ki te aata mo te tahunga tinana. <sup>11</sup> Ko te hiako ia o te puru, ko ona  
 kikokiko katoa, ko tona pane, ko ona waewae, ko ona whekau, me tona paru, <sup>12</sup> Ara, ko te puru  
 katoa hoki, me kawe e ia ki waho o te puni, ki tetahi wahi pokekore, ki te wahi e ringihia ai nga  
 pungarehu, ka tahu ai ki te rakau ki te ahi: hei te ringihanga pungarehu tahu ai.  
<sup>13</sup> A ki te pohehe te whakaminenga katoa o Iharaira, a ka hara, a ka ngaro taua mea i nga kanohi  
 o te whakaminenga, a ka tika ke i tetahi o a ratou mahi, he mea e kore e tika kia meatia, a ka whai  
 hara ratou; <sup>14</sup> A ka kitea te hara i hara ai ratou, katahi ka whakaherea e te whakaminenga tetahi  
 puru kua o mo te hara, me kawe hoki ki mua o te tapenakara o te whakaminenga. <sup>15</sup> Ka popoki ai  
 nga ringa o nga kaumatua o te whakaminenga ki te pane o te puru ki te aroaro o Ihowa: a hei te



<sup>16</sup>  
 aroaro o Ihowa patu ai i te puru. A ma te tohunga i whakawahia e kawe tetahi wahi o nga toto  
<sup>17</sup>  
 o te puru ki te tapenakara o te whakaminenga: Ka tou ai te tohunga i tona maihao ki te toto, a  
<sup>18</sup>  
 kia whitu ana tauhiuhinga ki te aroaro o Ihowa ki mua o te arai. Me pani ano e ia tetahi wahi o  
 te toto ki nga haona o te aata i te aroaro o Ihowa, ki tera i te tapenakara o te whakaminenga, ka  
 riringi ai i nga toto katoa ki te turanga o te aata tahunga tinana, ki tera i te whatitoka o te tapenakara  
<sup>19</sup>  
 o te whakaminenga. Me tango ano i ia ona ngako katoa, ka tahu ai ki runga ki te aata. <sup>20</sup> Ko  
 tana tena e mea ai ki te puru; kia rite ki tana i mea ai ki te puru whakahere hara, kia pera tana  
<sup>21</sup>  
 meatanga ki tenei: a me mea e te tohunga he whakamarie mo ratou, a ka murua to ratou hara. A  
 me kawe e ia te puru ki waho o te puni, ka tahu, ka pera ano me ia i tahu i te puru tuatahi: ko te  
 whakahere hara tena mo te whakaminenga.  
<sup>22</sup>  
 Ki te hara tetahi rangatira, a ka mahi i runga i te pohehe i tetahi o nga mea i whakahaua e  
<sup>23</sup>  
 Ihowa, e tona Atua, kia kaua e mahia, a ka whai hara, Ki te mohiotia e ia tona hara i hara ai, me  
<sup>24</sup>  
 kawe tana whakahere, he koati, hei te toa, hei te mea kohakore: A ka popoki tona ringa ki runga  
 ki te matenga o te koati, ka patu ai ki te wahi e patua nei te tahunga tinana ki te aroaro o Ihowa: he  
<sup>25</sup>  
 whakahere hara tena. A me tango e te tohunga tetahi wahi o te toto o te whakahere hara ki tona  
 maihao, ka pani ai ki nga haona o te aata tahunga tinana, me riringi ano ona toto ki te turanga o te  
<sup>26</sup>  
 aata tahunga tinana. Na me tahu e ia ona ngako katoa ki te aata, me pera me te ngako o nga  
 patunga mo te pai: a ka whakamarie te tohunga mona, mo tona hara, a ka murua.  
<sup>27</sup>  
 A ki te pohehe tetahi tangata noa atu, a ka hara, nona i mea i tetahi mea e tika ke ana i tetahi  
<sup>28</sup>  
 o nga whakahau a Ihowa, he mea e kore e tika kia meatia, a ka whai hara; Ki te mohiotia e ia  
 tona hara i hara ai, me kawe e ia tana whakahere, he koati, he uha, he kohakore, mo tona hara i  
<sup>29</sup>  
 hara ai. A ka popoki tona ringa ki te matenga o te whakahere hara, ka patu ai i te whakahere  
<sup>30</sup>  
 hara ki te wahi mo te tahunga tinana. Na ka tango te tohunga i tetahi wahi o ona toto ki tona  
 maihao, ka pani ai ki nga haona o te aata tahunga tinana, ka riringi ai i ona toto katoa ki te turanga  
<sup>31</sup>  
 o te aata. Me tango ano e ia ona ngako katoa, me pera me te ngako e tangohia ana i nga patunga  
 mo te pai: a me tahu e te tohunga ki runga ki te aata hei kakara reka ki a Ihowa; na ka whakamarie  
<sup>32</sup>  
 te tohunga mona, a ka murua tona. A ki te mea he reme tana whakahere e kawea ana e ia mo te  
<sup>33</sup>  
 hara, me kawe e ia hei te uha, hei te mea kohakore. Na ka popoki tona ringa ki te matenga o te  
 whakahere hara, a ka patua hei whakahere hara ki te wahi e patua nei e ratou te tahunga tinana.  
<sup>34</sup>  
 Na me tango e te tohunga tetahi wahi o te toto o te whakahere hara ki tona maihao, ka pani ai ki

35

nga haona o te aata tahunga tinana, me riringi ano ona toto katoa ki te turanga o te aata: Me tango ano e ia ona ngako katoa, kia rite ki te tangohanga o te ngako o te reme o nga patunga mo te pai; ka tahu ai e te tohunga ki runga ki te aata, ki runga ki nga whakahere ahi ki a Ihowa; na ka whakamarie te tohunga mo tona hara i hara ai, a ka murua.

## Chapter 5

<sup>1</sup> Ki te hara tetahi, mona i rongu ki te reo whakaoati, he kaiwhakaatu nei ia mo tana i kite ai, i mohio ai ranei, ki te kahore e whakaaturia e ia, na me waha e ia tona hara: <sup>2</sup> Ki te pa tetahi ki te mea poki, ki te tinana ranei o te kirehe poke, ki te tinana ranei o te kararehe poki, ki te tinana ranei o nga mea ngoki, ara o nga mea poki, a e huna ana i a ia, a ka poki ia, na ka whai hara ia. <sup>3</sup> Ki te pa ranei ia ki te poki tangata, ki nga tini poke e poke ai te tangata, a ka huna i a ia; ina mohiotia e ia, ka whai hara ia: <sup>4</sup> Ki te oati ranei tetahi, he mea puta ohore i ona ngutu, kia mahi i te kino, i te pai ranei, i nga tini mea ranei e puaki ohore mai i te tangata ina oati, a e huna ana i a ia; ina mohiotia e ia, na, ka whai hara ia i tetahi o enei mea: <sup>5</sup> A ki te mea kua whai hara ia i tetahi o enei mea, na me whaki tona hara i taua mea; <sup>6</sup> A me kawe e ia tana whakahere mo te he ki a Ihowa, mo tona hara i hara ai, he uha no te kahui, he reme, he kuao koati ranei, hei whakahere hara; a ma te tohunga e whakamarie mona, mo tona hara.

<sup>7</sup> A, ki te kahore e taea e ia i ona rawa he reme, me kawe e ia ki a Ihowa mo tona he i he ai, kia rua nga kukupa, kia rua ranei nga pi kukupa; ko tetahi hei whakahere hara, ko tetahi hei tahunga tinana. <sup>8</sup> Me kawe raua e ia ki te tohunga, ka whakahere ai e ia, ko te mea mo te whakahere hara ki mua, ka kikini ai i tona pane i te ritenga o tona kaki, otiia kaua e motuhia rawatia. <sup>9</sup> Na ka tauhiuhi ai ia i tetahi wahi o nga toto o te whakahere hara ki te taha o te aata; ka whakate ai i te toenga o te toto ki te turanga o te aata: he whakahere hara tena. <sup>10</sup> A ko te rua me tuku hei tahunga tinana, kia rite ki te tikanga: a ka whakamarie to tohunga mona, mo tona hara i hara ai, a ka murua. <sup>11</sup> A, ki te kahore e taea e ia i ona rawa te kawe nga kukupa e rua, nga pi kukupa ranei e rua, na me kawe tana whakahere e te tangata i hara, te whakatekau epa paraoa, hei whakahere hara; kaua e meatia ki te hinu, kaua ano e meatia he parakihe ki r unga: he whakahere hara hoki. <sup>12</sup> Na me kawe e ia ki te tohunga, a ka aohia ake e te tohunga, kia ki tona ringa, he whakamahara no taua mea, ka tahu ai ki runga ki te aata, ki runga ki nga whakahere ahi ki a Ihowa: he whakahere hara tena. <sup>13</sup> A ka

whakamarie te tohunga mona, mo tona hara i hara ai ki tetahi o enei mea, a ka murua: a ma te tohunga te toenga, ano he whakahere totokore.

<sup>14</sup> I korero ano a Ihowa ki a Mohi, i mea, <sup>15</sup> Ki te kino te mahi a tetahi, he hara pohehe, ki nga mea tapu a Ihowa; na, me kawe e ia tana whakahere mo te he ki a Ihowa, kia kotahi hipi toa, hei te mea kohakore, no te kahui hipi, me whakarite ano e koe ona utu ki te hekere hiriwa, hekere o t e wahi tapu, hei whakahere mo te he: <sup>16</sup> Ka utu ai i tona hara ki te mea tapu, me tapiri ano ki te wahi whakarima, ka homai ki te tohunga: a ka whakamarie te tohunga mona ki te hipi toa e whakaherea ana mo te he, a ka murua tona. <sup>17</sup> A ki te hara tetahi, ki te poka ke i tetahi o nga whakahau a Ihowa, he mahi poka noa; ahakoa e kore e mohiotia e ia, kua hara ia, a ka waha ia i tona kino. <sup>18</sup> A me kawe e ia he hipi toa ki te tohunga, he kohakore, no te kahui, kei tau te utu, hei whakahere mo te he: a ka whakamarie te tohunga mona, mo tona pohehe i pohehe ai ia, a kihai nei i matau, a ka murua tona he. <sup>19</sup> He whakahere tena mo te he: he pono tona he ki a Ihowa.

## Chapter 6

<sup>1</sup> I korero ano a Ihowa ki a Mohi, i mea, <sup>2</sup> Ki te hara tetahi, a ka he tana ki a Ihowa, a ka teka hoki ki tona hoa, he mea i tukua ki a ia kia tiakina, he whakaaetanga ranei, he mea ranei i pahuatia, he whakahaere he ranei ki tona hoa; <sup>3</sup> I kitea ranei e ia te mea i ngaro, a ka korero teka ki taua mea, ka oati teka; i tetahi ranei o enei tini mea e mea ai te tangata, e whai hara ai: <sup>4</sup> Na, kua hara nei ia, kua he, me whakahoki e ia te mea i pahuatia, te mea ranei i murua e ia, te mea ranei i waiho ki a ia kia tiakina, te mea ngaro ranei i kitea e ia, <sup>5</sup> Nga mea katoa ranei i oati teka ai ia; me utu e ia taua mea kia tino rite, ka tapiri ano ki te wahi whakarima: me homai e ia ki te tangata nona, i te ra e kitea ai kua hara ia. <sup>6</sup> A me kawe e ia tana whakahere mo te he ki a Ihowa, he hipi toa, he kohakore no te kahui, kei tau te utu, hei whakahere mo te he, ki te tohunga: <sup>7</sup> A ma te tohunga e whakamarie mona ki te aroaro o Ihowa: a ka murua te he o tana i nga mea katoa i mea ai ia, i hara ai. <sup>8</sup> I korero ano a Ihowa ki a Mohi, i mea, <sup>9</sup> Whakahaua a Arona ratou ko ana tama, mea atu, Ko te ture tenei mo te tahunga tinana: me uta te tahunga tinana ki runga ki te takuahi o te aata a pau noa te po, taea noatia te ata; kia ka tonu hoki te ahi o te aata ki runga ki a ia. <sup>10</sup> A me kakahu e te tohunga tona kakahu rinena, me mau ano ona tarau rinena ki tona kiri, ka kahi ai i nga pungarehu i pau tahi me te tahunga tinana i te ahi i runga i te aata, a ka waiho i te tahi o te aata. <sup>11</sup> Na ka whakarere atu ia i ona kakahu, ka kakahu i etahi atu kakahu, a ka mau i nga pungarehu ki waho i

12  
te puni, ki te wahi pokekore. Kia ka tonu ano te ahi o te aata, kei pirau: me whakau ano e te tohunga nga wahie ki runga, i tenei ata, i tenei ata; me ata whakatakoto ano e ia te tahunga tinana

13  
ki runga, a me tahu e ia te ngako o nga whakahere mo te pai ki runga. Kia ka tonu te ahi i runga i te aata; kei pirau.

14  
Na ko te ture tenei mo te whakahere totokore: ma nga tama a Arona e tapae ki te aroaro o

15  
Ihowa, ki mua i te aata. Me ao e ia, kia ki tona ringa, i te paraoa pai o te whakahere totokore, i te hinu hoki, me te parakihe katoa ano hoki i runga i te whakahere totokore, ka tahu ai ki runga ki

16  
te aata hei kakara reka, hei whakamahara mo taua mea ki a Ihowa. A ma Arona ratou ko ana tama e kai te toenga o taua mea: me kai kore rewena ki te wahi tapu; hei te marae o te tapenakara

17  
o te whakaminenga ratou kai ai. E kore e tunua rewenatia. Kua hoatu e ahau taua mea hei wahi ma ratou i roto i aku whakahere ahi. He tino tapu tena, rite tonu ano ki te whakahere hara, ki te

18  
whakahere mo te he. Hei kai tena ma nga tane katoa o nga tama a Arona, hei wahi pumau ma ratou puta noa i o koutou whakatupuranga o nga whakahere ahi a Ihowa: ka tapu nga tangata katoa

19  
e pa ana ki ena. I korero ano a Ihowa ki a Mohi, i mea, Ko te whakahere tenei ma Arona ratou ko ana tama, ko ta ratou e whakahere ai ki a Ihowa i te ra e whakawahia ai ia; ko te whakatekau epa paraoa hei whakahere totokore, hei mea mau tonu, ko tetahi wahi ona i te ata, ko tetahi wahi i

21  
te ahiahi. Me hanga ki te hinu ki runga i te paraharaha; a ka oti te tunu, ka kawea ki roto; a ka

22  
whakahere i nga wahi i tunua o te whakahere totokore, hei kakara reka ki a Ihowa. Ma te tohunga i whakawahia i roto i ana tama hei whakakapi mona e mahi: he tikanga pumau, me tahu katoa ki a

23  
Ihowa. Me tahu katoa nga whakahere totokore katoa a te tohunga: kua hei kainga.

24  
I korero ano a Ihowa ki a Mohi, i mea, Korero ki a Arona ratou ko ana tama, mea atu, Ko te ture tenei mo te whakahere hara: Ko te wahi e patua ai te tahunga tinana, ko reira patu ai i te

26  
whakahere hara, ki te aroaro o Ihowa: he tino tapu tena. Ko te tohunga nana i whakahere taua mea mo te hara, mana e kai: me kai ki te wahi tapu, ki te marae o te tapenakara o te whakaminenga.

27  
Ki te pa tetahi mea ki tona kikokiko, ka tapu: a ki te maringi tetahi wahi o ona toto ki tetahi

28  
kakahu, me horoi ki te wahi tapu te mea i maringi nei taua toto ki runga. Ko te oko oneone ia i kohuatia ai me wahi: a ki te mea i kohuatia ki te oko parahi, na me mukumuku, ka horoi ai ki te

29  
wai. Ma nga tane katoa i roto i nga tohunga e kai; he mea tino tapu. Kua hei kainga te whakahere hara, e kawea nei tetahi wahi o ona toto ki roto ki te tapenakara o te whakaminenga hei whakamarie ki te wahi tapu: me tahu ki te ahi.

## Chapter 7

<sup>1</sup> Na ko te ture tenei mo te whakahere mo te he: he tino tapu tena. <sup>2</sup> Hei te wahi e patua ai te tahunga tinana patua ai e ratou te whakahere mo te he: me tauhiuhi ano e ia ona toto ki te aata a tawhio noa. <sup>3</sup> Me whakahere ano e ia ona ngako katoa; ko te hiawero momona me te ngako e whiwhiwhiwhi ana ki nga whekau, <sup>4</sup> Me nga whatukuhu e rua, me to reira ngako, tera i te hope, me te taupa i te ate, me nga whatukuhu, me tango tera e ia: <sup>5</sup> A ma te tohunga e tahu ki runga ki te aata, hei whakahere ahi ki a Ihowa: he whakahere mo te he tena. <sup>6</sup> Ma nga tane katoa i roto i nga tohunga e kai tena: me kai ki te wahi tapu: he mea tapu rawa tena. <sup>7</sup> Ko te whakahere hara, ko te whakahere mo te he, rite tonu raua: kotahi ano te ture mo ena; ka riro ma te tohunga nana tena i mea hei whakamarie. <sup>8</sup> A, ko te tohunga nana i whakahere te tahunga tinana a tetahi tangata, ma taua tohunga ano te hiako o te tahunga tinana i whakaherea e ia. <sup>9</sup> Me te whakahere totokore katoa, nga mea e tunua ana ki te oumu, me nga mea katoa e paraipanatia ana, e meatia ana ranei ki te paraharaha, ma te tohunga ena nana i whakahere. <sup>10</sup> Ko nga whakahere totokore katoa ia i konatunatua ki te hinu, nga mea maroke ranei, ma nga tama katoa a Arona; kia rite te wahi ma tetahi, ma tetahi.

<sup>11</sup> A ko te ture tenei mo te patunga mo te pai e tapaea ana ki a Ihowa. <sup>12</sup> Ki te whakaherea hei whakawhetai, na, me tapae tahi me te patunga whakawhetai nga keke rewenakore i konatunatua ki te hinu, me etahi mea angiangi ano hoki, hei nga mea rewenakore i pania ki te hinu, me etahi keke paraoa pai i konatunatua ki te hinu, a tunua iho. <sup>13</sup> Me tapae ano e ia, hei tapiri mo nga keke, etahi taro rewena hei whakahere mana, i runga ano i te patunga whakawhetai o ana whakahere mo te pai. <sup>14</sup> A me tapae tetahi o tena, ara o te whakahere katoa, hei whakahere hapahapai ki a Ihowa, a ma te tohunga tena, ma te kaitauhiuhi o te toto o nga whakahere mo te pai. <sup>15</sup> Na ko te kikokiko o ana whakahere mo te pai, ara whakawhetai, me kai i te ra ano i tapaea ai; kei whakatoea tetahi wahi mo te ata. <sup>16</sup> Ki te mea ia he kupu taurangi te patunga o tana whakahere, he whakahere noa ake ranei, me kai i te ra ano i whakaherea ai e ia tana patunga: a i te aonga ake me kai te toenga: <sup>17</sup> Ko te wahi ia o te kokokiko o te patunga i toe ki te ra tuatoru, me tahu ki te ahi. <sup>18</sup> Na, ki te kainga he kikokiko o te patunga o ana whakahere mo te pai i te toru o nga ra, e kore e manakohia, e kore ano e kiia na te kaiwhakahere: ka waiho hei me whakarihariha, a ka waha tona kino e te tangata nana i kai. <sup>19</sup> E kore ano hoki e kainga te kikokiko i pa ki te mea poke; me tahu ki te ahi: ko te kokokiko

ia me kai e nga tangata pokekore katoa: <sup>20</sup> Ki te kainga ia e tetahi te kikokiko o te patunga mo te  
 pai a Ihowa, me te mau ano tona poke, ka hatepea atu tena wairua i roto i tona iwi. <sup>21</sup> Me te tangata  
 ano i pa ki te mea poke, ki te poke tangata, ki te kararehe poke ranei, ki tetahi poke whakarihariha  
 ranei, a ka kai i te kiko o te patunga mo te pai a Ihowa, ka hatepea atu taua wairua i roto i tona iwi.  
<sup>22</sup> I korero ano a Ihowa ki a Mohi, i mea, <sup>23</sup> Korero ki nga tama a Iharaira, mea atu, Kei kainga  
 tetahi ngako, o te kau, o te hipi, o te koati. <sup>24</sup> Me te ngako o te mea mate maori, me te ngako o te  
 mea i haea e te kirehe, ka waiho mo nga tini meatanga ke atu: e kore rawa ia e kainga. <sup>25</sup> A ko te  
 tangata e kai ana i te ngako o nga kararehe, e meinga nei hei whakahere ahi ma Ihowa, ina, ka  
 hatepea atu i roto i tona iwi taua wairua nana nei i kai. <sup>26</sup> Kua ano te toto e kainga, o te manu, o  
 te kararehe ranei, i o koutou nohoanga katoa. <sup>27</sup> Ki te kai tetahi i te toto, ka hatepea atu taua wairua  
 i roto i tona iwi. <sup>28</sup> I korero ano a Ihowa ki a Mohi, i mea, <sup>29</sup> Ki atu ki nga tama a Iharaira, mea,  
 atu, Ki te tapae tetahi i tana patunga mo te pai ki a Ihowa, me kawe tana whakahere ki a Ihowa, he  
 wahi no tana patunga mo te pai: <sup>30</sup> Ma ona ringa ake e kawe nga whakahere ahi ma Ihowa; ko te  
 ngako me te uma, me kawe tena e ia kia poipoia ai te uma hei whakahere poipoi ki te aroaro o  
 Ihowa. <sup>31</sup> A me tahu te ngako e te tohunga ki runga ki te aata; ko te uma ia ma Arona ratou ko ana  
 tama. <sup>32</sup> Ko te huha matau o a koutou patunga mo te pai me hoatu ki te tohunga, hei whakahere  
 hapahapai. <sup>33</sup> Me waiho te huha matau hei wahi ma te tama a Arona, mana nei e tapae te toto me  
 te ngako o nga whakahere mo te pai. <sup>34</sup> Kua tongohia nei hoki e ahau i nga tama a Iharaira te uma  
 poipoi me te peke hapahapai, i roto i a ratou patunga mo te pai, a kua hoatu ki te tohunga ki a Arona  
 ratou ko ana tama, i roto i te wahi a nga tama a Iharaira; he tikanga tuturu tenei.  
<sup>35</sup> No te whakawahinga tenei o Arona, no te whakawahinga hoki o ana tama, no nga whakahere  
 ahi a Ihowa, o te ra i meinga ai ratou e ia kia whakatata ki a Ihowa, ki te mahi tohunga; <sup>36</sup> Ko nga  
 mea i whakahaua mai e Ihowa kia homai ki a ratou e nga tama a Iharaira i te ra i whakawahia ai  
 ratou e ia. Hei tikanga mau tonu tenei i o ratou whakatupuranga. <sup>37</sup> Ko te ture tenei mo te tahunga  
 tinana, mo te whakahere totokore, mo te whakahere hara, mo te whakahere mo te he, mo nga  
 whakatohungatanga, mo nga patunga mo te pai; <sup>38</sup> Ko ta Ihowa hoki i whakahau nei i Maunga  
 Hinai ki a Mohi, i te ra i whakahaua ai e ia nga tama a Iharaira kia tapaea a ratou whakahere ki a  
 Ihowa, i te koraha o Hinai.

## Chapter 8

<sup>1</sup> I korero ano a Ihowa ki a Mohi, i mea, <sup>2</sup> Tikina atu a Arona ratou tahi ko ana tama, me nga kakahu, me te hinu whakawahi, me te puru mo te whakahere hara, me nga hipi toa e rua, me te kete taro rewenakore; <sup>3</sup> Huihuia ano hoki e koe te whakaminenga katoa ki te whatitoka o te tapenakara o te whakaminenga. <sup>4</sup> A rite tahi ki ta Ihowa i whakahau ai ta Mohi i mea ia; a huihuia ana te whakaminenga ki te whatitoka o te tapenakara o te whakaminenga. <sup>5</sup> Na ka mea a Mohi ki te whakaminenga, Ko te mea tenei i whakahaua e Ihowa kia meatia. <sup>6</sup> Na ka kawea mai a Arona ratou ko ana tama e Mohi, a horoia ana ratou e ia ki te wai. <sup>7</sup> A i whakakakahuria e ia te koti ki a ia, i whitikiria hoki te whitiki, i whakakakahuria atu hoki te koroka, i meatia atu ano hoki te epora ki a ia, a whitikiria ana ki a ia te whitiki whakairo o te epora, kia mau ai te epora ki a ia. <sup>8</sup> I whakamaua ano te kouma ki a ia: a whakanohoia ana e ia nga Urimi me nga Tumime ki te kouma. <sup>9</sup> A i potaea e ia te potae tohunga ki tona patenga; i maka iho ano te paraharaha koura, te karauna tapu, ki te potae tohunga, ki te wahi ki mau; ko ta Ihowa hoki i whakahau ai ki a Mohi. <sup>10</sup> Na ka mau a Mohi ki te hinu whakawahi, a whakawahia ana e ia te tapenakara, me nga mea katoa i roto, hei whakatapu. <sup>11</sup> A e whitu ana tauhiuhinga atu i te hinu ki te aata, na whakawahia ana e ia te aata me ona oko katoa, te takotoranga wai ano me tona turanga, kia tapu ai. <sup>12</sup> I ringihia ano e ia tetahi wahi o te hinu whakawahi ki runga ki te matenga a Arona, a whakawahia ana ia kia tapu. <sup>13</sup> A i arahina mai e Mohi nga tama a Arona, a whakakakahuria ana nga koti ki a ratou, whitikiria ana hoki nga whitiki ki a ratou, potaea ana hoki nga potae ki a ratou; ko ta Ihowa hoki i whakahau ai ki a Mohi. <sup>14</sup> A i kawea ano e ia te puru mo te whakahere hara: na ka popoki nga ringa a Arona ratou ko ana tama ki te matenga o te puru mo te whakaherehara. <sup>15</sup> A patua iho e ia; a ka tango a Mohi i te toto a pania atu ana ki tona maihao ki nga haona o te aata a tawhio noa, a horohoroa ana e ia te aata, ringihia ana hoki e ia te toto ki te turanga o te aata, a whakatapua ana, hei whakamarie mona. <sup>16</sup> Na ka tango ia i nga ngako katoa o nga whekau, me te taupa o te ate, me nga whatukuhu e rua, me to reira ngako, a tahuna ana e Mohi ki te aata. <sup>17</sup> Ko te puru ia me tona hiako, ona kikokiko, me tona paru, i tahuna e ia ki te ahi i waho o te puni; i peratia ano me ta Ihowa i whakahau ai ki a Mohi. <sup>18</sup> I kawea ano e ia te hipi toa mo te tahunga tinana, a ka popoki nga ringa a Arona ratou ko ana tama ki te matenga o te hipi. <sup>19</sup> A patua iho e ia; a tauhiuhia atu ana te toto e Mohi ki te aata

<sup>20</sup>  
 a tawhio noa. Na ka tapatapahia te hipi; a tahunga ana te pane e Mohi, me nga tapahanga, me  
<sup>21</sup>  
 te ngako. Na ka horoia e ia nga whekau, me nga waewae ki te wai; a tahuna katoatia ana e Mohi  
 te hipi ki runga ki te aata: he tahunga tinana tera, he kakara reka, he whakahere ahi ki a Ihowa; ko  
<sup>22</sup>  
 ta Ihowa hoki i whakahau ai ki a Mohi. Na ka kawea e ia te rua o nga hipi toa, te hipi mo te  
<sup>23</sup>  
 whakatohungatanga: a ka popoki nga ringa a Arona ratou ko ana tama ki te matenga o te hipi. A  
 patua iho e ia: na ka tangohia e Mohi tetahi wahi o ona toto, a pania ana e ia ki te matamata o te  
 taringa matau o Arona, ki te koromatua ano o tona ringa matau, ki te koromatua ano hoki o tona  
<sup>24</sup>  
 waewae matau. Na ka arahina e ia nga tama a Arona, a pania ana e Mohi tetahi wahi o nga toto  
 ki te matamata o o ratou taringa matau, ki nga koromatua hoki o o ratou ringa matau, ki nga  
 koromatua ano hoki o o ratou waewae matau: a ka tauhiuhia e Mohi te toto ki te aata a tawhio noa.  
<sup>25</sup>  
 Na ka tangohia e ia te ngako me te hiawero, me nga ngako katoa o nga whekau, me te taupa o  
<sup>26</sup>  
 te ate, me nga whatukuhu e rua, me to reira ngako, me te huha matau: I tangohia ano e ia i roto  
 i te kete taro rewenakore i te aroaro o Ihowa, kotahi keke rewenakore, kotahi keke taro hinu me  
 tetahi o nga mea angiangi, a maka iho e ia ki runga ki te ngako, ki runga hoki ki te huha matau:  
<sup>27</sup>  
 A hoatutia katoatia ana e ia ki nga ringa a Arona, ki nga ringa ano o ana tama, a poipoia ana hei  
<sup>28</sup>  
 whakahere poipoi ki te aroaro o Ihowa. Na ka tangohia e Mohi i o ratou ringa, a tahuna ana ki  
 runga ki te aata, ki runga ki te tahunga tinana: hei whakatohunga; hei kakara reka, hei whakahere  
<sup>29</sup>  
 ahi ki a Ihowa. Na ka tangohia e Mohi te uma, a poipoia ana e ia hei whakahere poipoi ki te  
 aroaro o Ihowa: i a Mohi tena wahi o te hipi toa o te whakatohungatanga; ko ta Ihowa hoki i  
<sup>30</sup>  
 whakakahau ai ki a Mohi. Na ka tango a Mohi i tetahi wahi o te hinu whakawahi, o te toto ano  
 i runga i te aata, a tauhiuhia ana e ia ki a Arona, ki ona kakahu, ki a ratou tahi ano ko ana tama, ki  
 nga kakahu ano o ana tama; a whakatapua ana e ia a Arona, ona kakahu, ana tama, me nga kakahu  
 o ana tama.  
<sup>31</sup>  
 Na ka mea a Mohi ki a Arona ratou ko ana tama, Kohuatia te kikokiko ki te whatitoka o te  
 tapenakara o te whakaminenga; kainga hoki ki reira me te taro i te kete o te whakatohungatanga;  
<sup>32</sup>  
 kia rite ki taku i whakahau ai, i mea ai, Me kai e Arona ratou ko ana tama. A, ko te toenga o te  
<sup>33</sup>  
 kikokiko, o te taro, me tahu ki te ahi. Na kua koutou e puta i te whatitoka o te tapenakara o te  
 whakaminenga kia whitu ra ano nga ra, kia taka ra ano nga ra o to koutou whakatohungatanga: e  
<sup>34</sup>  
 whitu hoki nga ra e whakatohunga ai ia i a koutou. Ko nga mea i meatia inaianei, he mea  
<sup>35</sup>  
 whakahau mai na Ihowa kia meatia, hei whakamarie mo koutou. A me noho koutou ki te  
 whatitoka o te tapenakara o te whakaminenga i te ao, i te po, kia whitu ra ano nga ra, ki te tiaki i



nga mea a Ihowa, kei mate koutou: ko te mea hoki tenei i whakahaua ki ahau. <sup>36</sup> Na ka meatia e Arona, ratou ko ana tama, nga whakahau katoa a Ihowa, i korerotia e Mohi.

## Chapter 9

<sup>1</sup> A i te waru o nga ra ka karangatia e Mohi a Arona ratou ko ana tama, ko nga kaumatua o Iharaira; <sup>2</sup> A ka mea ia ki a Arona, Tikina tetahi kuaou kau mau, hei whakahere hara, me tetahi hipi toa hei tahunga tinana, hei te mea kohakore, ka whakahere ai ki te aroaro o Ihowa. <sup>3</sup> A me korero koe ki nga tama a Iharaira, me ki atu, Tikina he koati toa ma koutou hei whakahere hara; me tetahi kuaou kau, me tetahi reme, hei te tautahi, hei te mea kohakore, hei tahunga tinana; <sup>4</sup> Me tetahi puru, me tetahi hipi toa hei whakahere mo te pai, hei patunga tapu ki te aroaro o Ihowa; me tetahi whakahere totokore, hei te mea konatu ki te hinu: ko aiane hoki a Ihowa puta mai ai ki a koutou.

<sup>5</sup> Na ka kawea e ratou ta Mohi i whakahau ai ki te roro o te tapenakara o te whakaminenga; a ka whakatata katoa te whakaminenga, ka tu hoki ki te aroaro o Ihowa. <sup>6</sup> Na ka mea a Mohi, Ko te mea tenei i whakahaua mai nei e Ihowa kia meatia e koutou: a ka puta mai te kororia o Ihowa ki a koutou.

<sup>7</sup> A ka mea a Mohi ki a Arona, Whakatata ki te aata, mahia tau whakahere hara, me tau tahunga tinana, ka whakamarie ai mou, mo te iwi hoki: ka whakahere atu ai hoki i te whakahere a te iwi, ka whakamarie ai mo ratou, ko ta Ihowa hoki i whakahau ai.

<sup>8</sup> Na ka hae a Arona ki te aata, a patua ana e ia te kuaou kau, te whakahere hara, te mea hoki mona. <sup>9</sup> A ka kawea e nga tama a Arona te toto ki a ia: a ka toua e ia tona maihao ki te toto, a pania ana ki nga haona o te aata, ringihia ana hoki te toto e ia ki te turanga o te aata: <sup>10</sup> Ko te ngako ia, me nga whatukuhu, me te taupa i te ate o te whakahere hara, i tahuna e ia ki runga ki te aata; ko ta Ihowa i whakahau ai ki a Mohi. <sup>11</sup> A ko te kikokiko hoki, me te hiako, I tahuna e ia ki te ahi i waho o te puni. <sup>12</sup> A patua ana e ia te tahunga tinana; a ka homai e nga tama a Arona te toto ki a ia, a, tauhiuhia ana e ia ki te aata a tawhio noa. <sup>13</sup> Na ka homai e ratou te tahunga tinana ki a ia, tena tapahanga, tena tapahanga, me te pane; a tahuna ana e ia ki runga ki te aata. <sup>14</sup> A i horoia ano e ia nga whekau me nga waewae, a tahuna ana ki runga ki te tahunga tinana ki runga ki te aata. <sup>15</sup> I kawea ano e ia te whakahere a te iwi, a ka mau ki te koati, ki te whakahere hara mo te iwi, a patua ana e ia, whakaherea ana hoki mo te hara; i peratia ano me te tuatahi. <sup>16</sup> I kawea ano e ia te tahunga

17  
 tinana, a mahia ana e ia, peratia ana i to te tikanga. I kawea ano e ia te whakahere totokore, a aohia ana tetahi wahi e ia, ki tonu te ringa, a tahuna ana ki runga ki te aata, hei tapiri mo te tahunga  
 18  
 tinana o te ata. I patua ano hoki e ia te puru, me te hipi toa, hei patunga mo te pai mo te iwi: a  
 19  
 ka homai e nga tama a Arona te toto ki a ia, a tauhiuhia ana e ia ki te aata a tawhio noa, Me te ngako o te puru; a o te hipi toa, ko te hiawero momona, me te whiwhiwhiwhi o nga whekau, me  
 20  
 nga whatukuhu, me te taupa i te ate: A i maka iho e ratou nga ngako ki runga ki nga uma, a  
 21  
 tahuna ana e ia nga ngako ki runga ki te aata: I poipoia ano e Arona nga uma me te huhu matau  
 22  
 hei whakahere poipoi ki te aroaro o Ihowa; i peratia ano me ta Mohi i whakahau ai. Katahi ka whakarewaina atu e Arona ona ringa ki te iwi, a manaakitia iho ratou e ia; na ka heke iho ia i te meatanga i te whakahere hara, i te tahunga tinana, i nga whakahere mo te pai.  
 23  
 Na ka haere a Mohi raua ko Arona ki roto ki te tapenakara o te whakaminenga, a ka puta  
 24  
 mai ano, ka manaaki hoki i te iwi: na, ka puta mai te kororia o Ihowa ki te iwi katoa. I puta mai ano he ahi i te aroaro o Ihowa, a pau ake te tahunga tinana, me nga ngako, i runga i te aata: a, no te kitenga o te iwi katoa, ka hamama ratou, a kupapa ana ki raro.

## Chapter 10

1  
 Na ka mau a Natapa raua ko Apihu, nga tama a Arona, ki a raua tahu kakara, a maka ana he ahi ki roto, a whakatakotoria iho e raua he whakakakara ki runga, na whakaherea ana e raua he ahi  
 2  
 ke ki te aroaro o Ihowa, he mea kihai i whakahaua e ia ki a raua. Na ko te putanga mai o te ahi i te aroaro o Ihowa, a pau ake raua, a mate iho raua i te aroaro o Ihowa.  
 3  
 Na ka mea a Mohi ki a Arona, Ko te mea tenei i korero ra a Ihowa, i mea ra, Me whakatapu ahau e te hunga katoa e whakatata mai ana ki ahau, me whakakororia ano hoki ahau ki te aroaro o  
 4  
 te iwi katoa. A whakarongo puku ana a Arona. Na ka karanga a Mohi ki a Mihaera raua ko Eritapana, nga tama a Utiere matua keke o Arona, ka mea ki a raua, Haere mai, maua atu o korua  
 5  
 tuakana i mua i te wahi tapu, ki waho o te puni. Na ka haere raua, ka mau i a raua i roto i o raua  
 6  
 koti ki waho o te puni; i pera ano raua me ta Mohi i ki ai. Na ka mea a Mohi ki a Arona, ratou ko ana tama ko Ereatara, ko Itamara, Kaua nga makawe o o koutou matenga e waiho kia mahora noa, kaua ano hoki e haea o koutou kakahu; kei mate koutou, kei riria hoki te iwi katoa: engari kia  
 7  
 tangihia e o koutou teina, e te whare katoa o Iharaira, te tahunga i tahuna nei e Ihowa. Kaua hoki

koutou e puta i te whatitoka o te tapenakara o te whakaminenga, kei mate koutou: kei runga hoki i a koutou te hinu whakawahi a Ihowa. Na ka meatia e ratou ta Mohi i korero ai.

<sup>8</sup> Na ka korero a Ihowa ki a Arona, ka mea, <sup>9</sup> Kaua e inumia he waina, tetahi wai whakahaurangi ranei, e koutou tahi ko au tama, ina haere ki te tapenakara o te whakaminenga, kei mate koutou: hei tikanga pumau tenei ki o koutou whakatupuranga: <sup>10</sup> Kia taea ai hoki te wehe, te tapu me te noa, te poke me to pokekore; <sup>11</sup> Kia taea ai hoki te whakaako i nga tama a Iharaira ki nga tikanga katoa i korerotia e Ihowa ki a ratou, ara e Mohi.

<sup>12</sup> I korero ano a Mohi ki a Arona, ki ana tama ano i ora, ki a Ereatara, ki a Itamara, Tikina te whakahere totokore e toe ana o nga whakahere ahi a Ihowa, ka kai rewenakore ai ki te taha o te

aata: he tino tapu hoki: <sup>13</sup> A me kai ki te wahi tapu, ko taua wahi hoki o nga whakahere ahi a Ihowa mau, ma au tama hoki: ko te mea tena i whakahaua ki ahau. <sup>14</sup> Ko te uma poipoi me te huha hapahapai me kai ki te wahi pokekore, e koe, e koutou tahi ko au tama, ko au tamahine: i whakaritea hoki ena hei wahi mau, hei wahi hoki ma au tama, he mea homai no roto i nga patunga mo te pai

a nga tama a Iharaira. <sup>15</sup> Me kawe tahi mai e ratou te huha hapahapai, te uma poipoi, me te ngako mo nga whakahere ahi, a ka poipoia hei whakahere poipoi ki te aroaro o Ihowa; a ka waiho ma

koutou tahi ko au tama; hei tikanga pumau tenei; ko ta Ihowa hoki i whakahau ai. <sup>16</sup> Na ka ata rapu a Mohi i te koati o te whakahere hara, na kua tahuna: na ka riri ia ki a Ereatara raua ko Itamara,

ki nga tama a Arona i ora, ka mea, <sup>17</sup> He aha te kainga ai e koutou te whakahere hara ki te wahi tapu, he tino tapu nei hoki, a kua homai ano ma koutou, ma koutou hoki e waha te kino o te

whakaminenga, e whakamarie hoki mo ratou ki te aroaro o Ihowa? <sup>18</sup> Titiro hoki, kahore ano ona toto i kawea ki roto ki te wahi tapu: ko te tikanga kia kainga tena e koutou ki te wahi tapu, ko taku

hoki i whakahau ai. <sup>19</sup> Na ka mea atu a Arona ki a Mohi, Nana, nonaianei i whakaherea ai e ratou ta ratou whakahere hara, me ta ratou tahunga tinana, ki te aroaro o Ihowa; a kua pa mai enei mea ki ahau: a me i kainga te whakahere hara e ahau inaianei, tera ranei e mana kohia mai e Ihowa?

<sup>20</sup> A ka rongoa a Mohi, na ka whakaae.

## Chapter 11

<sup>1</sup> A i korero a Ihowa ki a Mohi raua ko Arona, i mea ki a raua, <sup>2</sup> Korero ki nga tama a Iharaira, mea atu, Ko nga kirehe enei e kainga e koutou o nga kararehe katoa i runga i te whenua. <sup>3</sup> Ko nga mea katoa i roto i nga kararehe e tararua ana te matimati, e tino mawehe ana hoki te titorehanga, e

whakahoki ake ana hoki i te kai, ko tena ta koutou e kai ai. <sup>4</sup> Otiia kaua e kainga enei o nga mea e whakahoki ake ana i te kai, o nga mea hoki e tararua ana te matimati: ko te kamera, no te mea e whakahoki ake ana ano ia i te kai, otiia kahore i tararua te matimati; hei mea poke tena ki a koutou.

<sup>5</sup> Me te koni, no te mea e whakahoki ake ana ano ia i te kai, otiia kahore i tararua te matimati; hei

mea poke ia ki a koutou. <sup>6</sup> Me te hea, no te mea e whakahoki ake ana ano ia i te kai, otiia kahore

i tararua te matimati; hei mea poke ia ki a koutou. <sup>7</sup> Me te poaka, ahakoa e tararua ana te matimati, e tino mawehe ana hoki te titorehang, kahore e whakahokia ake te kai; hei mea poke ia ki a koutou.

<sup>8</sup> Kaua e kainga tetahi wahi o o ratou kikokiko, kaua ano e pa ki o ratou tinana mate; hei poke ena ki a koutou.

<sup>9</sup> Ko enei a koutou e kai ai o nga mea katoa o roto o nga wai: ko nga mea katoa o nga wai, o

nga moana, o nga awa, he tara o ratou, he unahi, ko ena a koutou e kai ai. <sup>10</sup> A, ko nga mea katoa kahore he tara, kahore he unahi, o nga moana, o nga awa, o roto o nga mea katoa e tere ana i nga

wai, o nga mea ora katoa o nga wai; hei mea whakarihariha ena ki a koutou: <sup>11</sup> Ina, hei mea whakarihariha ano ena ki a koutou: kei kainga tetahi wahi o o ratou kikokiko e koutou, a me

whakarihariha atu ki o ratou tinana mate. <sup>12</sup> Ko nga mea katoa o nga wai kahore he tara, kahore he unahi, hei mea whakarihariha ena ki a koutou. <sup>13</sup> Ko enei ano o nga manu a koutou e whakarihariha ai; e kore e kainga, he whakarihariha hoki: ko te ekara, ko te wawahi iwi, ko te

ahipare, <sup>14</sup> Ko te whatura, ko te kaiaia, me nga mea pera; <sup>15</sup> Ko nga raweni katoa, me nga mea

pera: <sup>16</sup> Me te otereti, me te kahu po, me te koekoea, me te kahu, me nga mea pera, <sup>17</sup> Me te ruru

nohinohi, me te kawau, me te ruru nui, <sup>18</sup> Me te wani, me te perikana, me te kia ekara, <sup>19</sup> Me te taaka, me te heroni, me nga mea pera, me te hupou, me te pekapeka.

<sup>20</sup> Ko nga mea ngokingoki katoa e rere a manu ana, e wha nga waewae hei haere, me

whakarihariha atu e koutou. <sup>21</sup> Otiia me kai ano enei e koutou o nga mea ngokingoki katoa e rere a manu ana, e wha nei nga waewae hei haere, a he waewae ano o ratou kei runga ake i nga raparapa,

hei mokowhiti i runga i te whenua; <sup>22</sup> Ko enei o ratou e kainga e koutou; ko te mawhitiwhiti, me nga mea e rite ana ki a ia, me te tatarakihi, me nga mea e rite ana ki a ia, me te pakauroharoha, me

nga mea e rite ana ki a ia, me te koeke, me nga mea e rite ana ki a ia. <sup>23</sup> Ko nga mea ngokingoki ke atu ia, ko nga mea rere a manu, e wha nei o ratou waewae, me whakarihariha atu e koutou.

<sup>24</sup> He mea hoki enei e poke ai koutou: ki te pa tetahi ki o ratou tinana mate, ka poke a ahiahi noa.

<sup>25</sup> A ki te mauria e te tangata tetahi wahi o o ratou tinana mate, me horoi e ia ona kakahu, ka poke

<sup>26</sup>  
 hoki ia a ahiahi noa. Ko nga kararehe katoa e tararua ana te matimati, a kahore ano i tino mawehe te titorehanga, kahore ranei e whakahoki ake i te kai, hei mea poke ki a koutou: ka poke nga tangata

<sup>27</sup>  
 katoa e pa ana ki a ratou. Na ko nga mea katoa he tu a ringaringa nei nga waewae e haere ai ratou, o roto o nga kirehe katoa e wha nei nga waewae hei haere, hei mea poke ena ki a koutou: ki

<sup>28</sup>  
 te pa tetahi ki o ratou tinana mate, ka poke ia a ahiahi noa. A ki te mauria e tetahi te tinana mate o tetahi o ratou, me horoi e ia ona kakahu, ka poke hoki ia a ahiahi noa: kia poke ena ki a koutou.

<sup>29</sup>  
 Ka poke ano hoki enei ki a koutou o nga mea ngokingoki katoa e ngokingoki ana i runga i te

<sup>30</sup>  
 whenua; ko te wihara, ko te kiore, me te tuatara, me nga mea e rite ana ki a ia, Me te koka, me

<sup>31</sup>  
 te korokotaera, me te mokomoko, me te moeone, me te kamiriona. Kia poke enei ki a koutou o

<sup>32</sup>  
 nga mea ngokingoki katoa: ki te pa atu tetahi ki a ratou, ina mate, ka poke ia a ahiahi noa. A ki te taka tetahi o ratou, ina mate, ki runga ki tetahi mea, ka poke taua mea; ahakoa he oko rakau, he mea kakahu, hiako ranei, peke ranei; ahakoa he oko aha ranei, aha ranei, e meatia ai tetahi mea,

<sup>33</sup>  
 me maka ki te wai, a ka poke a ahiahi noa; katahi ka kore te poke. A ki te taka tetahi o ratou ki

<sup>34</sup>  
 roto ki tetahi oko oneone, ahakoa he aha ranei, he aha ranei, kei roto, kua poke; a me wahi. Ki te maringi taua wai ki runga ki tetahi o nga kai e kainga ana, ka poke: ka poke ano hoki nga wai

<sup>35</sup>  
 katoa e inumia ana i roto i aua oko katoa. Ka poke ano hoki nga mea katoa kua taka nei tetahi wahi o o ratou tinana mate ki runga: ahakoa oumu, turanga kohua ranei, me wahi kia ngotangota:

<sup>36</sup>  
 he mea poke hoki, a ka poke ano ki a koutou. Otiia ki te mea he puna, he poka ranei, he nui nei

<sup>37</sup>  
 te wai, kahore ona poke: ki te pa ia tetahi ki o ratou tinana mate, ka poke. Ki te taka ano hoki

<sup>38</sup>  
 tetahi wahi o o ratou tinana mate ki nga purapura e whakatokia ana, e kore e poke. Otiia ki te mea kua oti te purapura te mea ki te wai, a ka taka tetahi wahi o o ratou tinana mate ki runga, ka

<sup>39</sup>  
 poke ena ki a koutou. A ki te mate maori tetahi o nga kararehe e kainga ana e koutou; ki te pa

<sup>40</sup>  
 tetahi ki tona tinana mate, ka poke ia a ahiahi noa. A ki te kai tetahi i tetahi wahi o tona tinana, me horoi e ia ona kakahu, ka poke hoki ia a ahiahi noa; ki te mauria hoki e tetahi tona tinana, me

<sup>41</sup>  
 horoi e ia ona kakahu, ka poke hoki ia a ahiahi noa. Hei mea whakarihariha nga mea ngokingoki

<sup>42</sup>  
 katoa e ngokingoki ana i runga i te whenua; e kore e kainga. Ko nga mea katoa ko te kopu hei haere, me nga mea katoa ko taua tu haere o nga wae e wha, ara ko nga mea katoa he maha nga waewae, i roto i nga mea ngoki katoa e ngoki nei i runga i te whenua, kaua ena e kainga; he mea whakarihariha hoki.

<sup>43</sup> Kei waiho tetahi mea ngokingoki, hei take e whakarihahangia ai koutou, hei mea ranei e  
<sup>44</sup> poke ai, e noa ai. No te mea hoki ko Ihowa ahau, ko to koutou Atua; mo reira me whakatapu  
 koutou e koutou, a ka tapu; he tapu hoki ahau: kua ano hoki e whakapokea koutou ki tetahi mea  
<sup>45</sup> ngokingoki e ngokingoki ana i runga i te whenua. Ko Ihowa hoki ahau, i kawē mai nei i a koutou  
 i te whenua o Ihipa, kia waiho ai ahau hei Atua mo koutou: mo reira kia tapu koutou, he tapu hoki  
<sup>46</sup> ahau. Ko te ture tenei mo te kararehe, mo te manu, mo nga mea ora katoa e tere ana i nga wai,  
<sup>47</sup> mo nga mea katoa hoki e ngoki ana i runga i te whenua: Kia wehea ai te poke me te pokekore,  
 te kararehe e kainga me te kararehe e kore e kainga.

## Chapter 12

<sup>1</sup> I Korero ano a Ihowa ki a Mohi, i mea, <sup>2</sup> Korero ki nga tama a Ihairaira, mea atu, Ki te hapu  
 tetahi wahine, a ka whanau he tane, na kia whitu nga ra e poke ai ia; kia rite tona pokenga ki nga  
<sup>3</sup> ra o tona mate paheke. A i te waru o nga ra ka kotia te kiri matamata o te tamaiti. <sup>4</sup> A me noho  
 te wahine ki te toto o tona purenga, kia toru tekau ma toru nga ra: kua ia e pa ki tetahi mea tapu,  
<sup>5</sup> e haere ranei ki te wahi tapu, kia taka ra ano nga ra mo tona purenga. Ki te mea ia ka whanau he  
 kotiro, kia rua nga wiki e poke ai, kia rite ki o tona paheketanga: a kia ono tekau ma ono nga ra e  
 noho ai ia ki te toto o tona purenga.  
<sup>6</sup> A ka rite nga ra mo tona purenga mo te tama, mo te kotiro ranei, me kawē mai e ia he reme,  
 hei te tau tahi, hei tahunga tinana, me te pi kukupa, me te kukupa ranei, hei whakahere hara ki te  
<sup>7</sup> whatitoka o te tapenakara o te whakaminenga, ki te tohunga: A mana e whakahere ki te aroaro  
 o Ihowa, a ka meinga he whakamarie mona; a ka kore ona poke i te rerenga o ona toto. Ko te ture  
<sup>8</sup> tenei mo te wahine kua whanau nei tana tama, kotiro ranei. A ki te kahore e taea e ia i ona rawa  
 te kawē mai he reme, me kawē mai nga kukupa e rua, nga pi kukupa ranei e rua; ko tetahi hei  
 tahunga tinana, ko tetahi hei whakahere hara: a ma te tohunga e whakamarie mona, a ka kore ona  
 poke.

## Chapter 13

<sup>1</sup> A i korero a Ihowa ki a Mohi raua ko Arona, i mea, <sup>2</sup> Ki te mea he puku to te kiri o te kikokiko  
 o tetahi tangata, he paku ranei, he wahi tu a kanapa ranei, a ka rite, i te kiri o tona kikokiko, ki te

panga mai o te repera; na me kawe ia ki a Arona tohunga, ki tetahi ranei o ana tama, o nga tohunga:

<sup>3</sup>

Na ka tirohia e te tohunga te mea i pa ki te kiri o te kikokiko: a ki te mea kua puta ke, kua ma te huruhuru o te wahi i pangia, a ki te titiro atu, kua hohonu iho te mea i pa mai i te kiri o tona kikokiko,

<sup>4</sup>

he panga mai tena no te repera: a ka ti tiro te tohunga ki a ia, a ka mea he poke ia. A ki te mea e ma ana te wahi tu a kanapa o te kiri o tona kikokiko, a ki te titiro atu kihai i hohonu iho i te kiri, a kihai i puta ke, kihai i ma te huruhuru o reira; na ka tutakina atu e te tohunga te tangata i pangia,

<sup>5</sup>

kia whitu nga ra: A ka tirohia ia e te tohunga i te whitu o nga ra: na kua tuturu te mea i pa mai ra, ki tana titiro iho, a kihai i horapa atu te mate ki te kiri; katahi ka tutakina atu ano ia e te tohunga,

<sup>6</sup>

kia whitu atu ano ra: A ka tirohia ano ia e te tohunga i te whitu o nga ra: a ki te mea kua ahua mangu te mea i pa mai ra, a kihai i horapa atu te mate ki te kiri, na ka mea te tohunga, kahore ona

<sup>7</sup>

poke: he paku kau: a ka horoia e ia ona kakahu, a ka kore ona poke. Mehemea ia kua nui te horapatanga atu o te paku ki te kiri, i muri i te tirohanga a te tohunga i a ia kia purea ai ia, me titiro

<sup>8</sup>

ano te tohunga ki a ia: A ki te mea ka kite iho te tohunga, na kua horapa atu te paku ki te kiri,

<sup>9</sup>

katahi ka mea te tohunga, he poke ia: he repera tena. Ki te pangia te tangata e te repera, na me

<sup>10</sup>

kawe ia ki te tohunga: A ka tirohia e te tohunga: a ki te mea kua ma te puku o te kiri; a kua puta

<sup>11</sup>

ke te huruhuru, kua ma, he wahi ora ano no te kikokiko ora kei te puku; He repera tawhito tena i te kiri o tona kikokiko, me mea te tohunga he poke ia; e kore ano hoki ia e tutakina atu: e poke

<sup>12</sup>

ana hoki. A ki te horapa noa atu te repera ki te kiri, a ka ngaro i te repera te kiri katoa o te tangata i pangia, o tona mahunga iho, a tae noa ki tona waewae, o nga wahi katoa e titiro ai te tohunga;

<sup>13</sup>

Na ka titiro iho te tohunga: a ki te mea kua kapi katoa ona kikokiko i te repera, na ka mea ia,

<sup>14</sup>

kahore he poke o te tangata i pangia; kua puta ke, kua ma katoa: kahore ona poke. Otiia ka poke

<sup>15</sup>

ia i te ra e kitea ai e ora ana tetahi wahi o ona kikokiko. A me titiro iho ano te tohunga ki te kiko

<sup>16</sup>

ora, a ka mea, he poke ia: he mea poke hoki te kikokiko ora: he repera hoki. Otiia ki te hoki ano

<sup>17</sup>

ki te ma te kikokiko ora, me haere ia ki te tohunga; A ka titiro te tohunga ki a ia, a ki te mea kua puta ke te wahi i pangia, kua ma, na ka mea te tohunga, he pokekore te tangata i pangia: kahore ona poke.

<sup>18</sup>

Me te kikokiko hoki, he whewhe nei to tona kiri i mua, a kua ora, A ka puta ake i te wahi o te whewhe he puku ma, he wahi tu a kanapa ranei, he mea ma, ahua puwhero, a ka whakakitea

<sup>20</sup>

ki te tohunga; A ki te mea, i te tirohanga a te tohunga, na kei raro iho i te kiri, ki te titiro atu, a kua puta ke, kua ma te huruhuru o reira; katahi ka mea te tohunga, he poke ia, he panga mai tena

no te repera: e tupu ana i runga i te whewhe. <sup>21</sup> Ki te tirohia ia e te tohunga, na, kahore he huruhuru ma o reira, a kahore i raro i te kiri, engari e ahua mangu ana, na, me tutaki atu ia e te tohunga, kia

whitu nga ra: <sup>22</sup> A ki te mea kua horapa nui atu ki te kiri, na ka mea te tohunga, he poke ia: he

panga mate tena. <sup>23</sup> Ki te tuturu ia te wahi tu a kanapa ki taua wahi, a kahore e horapa atu, he nawe

whewhe tena; a ka mea te tohunga, kahore ona poke. <sup>24</sup> Ki te mea ranei he wera ano na te ahi kei te kiri o tetahi kikokiko, a he wahi ma kanapa, he mea ahua whero, he mea ma ranei kei te kikokiko

ora i wera nei; <sup>25</sup> Na me titiro e te tohunga: na, ki te mea kua puta ke, kua ma te huruhuru o te wahi kanapa, a ka hohonu iho i te kiri ki te titiro atu; he repera tena e tupu ake ana i runga i te wera: a

me mea te tohunga, he poke ia: he panga tena no te repera. <sup>26</sup> Otiia ki te tirohia e te tohunga, na, kahore he huruhuru ma o te wahi kanapa, a kahore i raro i te kiri, otiia e ahua pouri ana; na me

tutaki ia e te tohunga kia whitu nga ra: <sup>27</sup> A i te whitu o nga ra me titiro te tohunga ki a ia: a ki te mea kua horapa nui atu ki te kiri, katahi ka kiia ia e te tohunga ki a ia: a ki te mea kua horapa nui

atu ki te kiri, katahi ka kiia ia e te tohunga, he poke: he panga tena no te repera. <sup>28</sup> A ki te tuturu te wahi tu a kanapa ki tena wahi, a kahore e horapa atu ki te kiri, otiia he ahua pouri; he puku tena

no te weranga, a ka kiia ia e te tohunga he pokeore: he nawe wera hoki. <sup>29</sup> Na he tane, he wahine

i pangia te matenga, te pahau ranei; <sup>30</sup> Me titiro te tohunga ki te mea i pa mai: a ki te mea he hohonu iho i te kiri ki tana titiro; a he ahua ma kowahi nei, he ririki te huruhuru; katahi ka kiia ia e te

tohunga, he poke: he patito tena, he repera no te matenga, no te pahau. <sup>31</sup> A ki te titiro te tohunga ki te patito i pa nei, a kihai i hohonu iho i te kiri ki te titiro, a kahore o reira huruhuru mangu; na

ka tutakina atu e te tohunga te tangata i pangia nei e te patito, kia whitu nga ra: <sup>32</sup> A i te whitu o nga ra ka titiro te tohunga ki te mate: a ki te kahore i horapa atu te patito, a kahore ona huruhuru

ma kowhai nei, a ki te titiro kahore te patito i hohonu iho i te kiri: <sup>33</sup> Na ka heua ia, ko te patito ia

e kore e heua; a ka tutakinga atu e te tohunga te tangata i te patito, kia whitu atu nga ra: <sup>34</sup> A i te whitu o nga ra, me titiro te tohunga ki te patito, a ki te kahore i horapa te patito ki te kiri, a kahore ano e hohonu iho i te kiri ki te titiro; katahi ka kiia ia e te tohunga, he pokekore: a ka horoia e ia

ona kakahu, a ka kore te poke. <sup>35</sup> Otiia ki te horapa nui te patito ki te kiri i muri i te whakakorenga

o tona poke; <sup>36</sup> Na me titiro ano te tohunga ki a ia: a ki te mea kua horapa tena te patito ki te kiri,

e kore e rapua e te tohunga te huruhuru ma kowhai; he poke ia. <sup>37</sup> Ki te tuturu ia te patito ki tana titiro, a kua tupu te huruhuru mangu ki reira; kua mahu te patito, kahore ona poke: a ka kiia e te tohunga he pokekore.



38 Ki te mea he wahi kanapa to te kiri o te kikokiko o tetahi tangata, o tetahi wahine ranei, ara  
 he wahi kanapa mea nei; <sup>39</sup> Na me titiro e te tohunga: a ki te mea he ma mangu nei nga wahi kanapa  
 o te kiri o to ratou kikokiko; he papaka tena e tupu ana i te kiri; kahore ona poke. <sup>40</sup> Me te tangata  
 hoki kua horo nga huruhuru o tona matenga, he pakira ia, kahore ona poke. <sup>41</sup> Me te tangata hoki  
 kua horo nga huruhuru o te wahi o tona matenga whaka tona mata, he rae pakira ia; kahore ona  
 poke. <sup>42</sup> A ki te mea kua pangia tetahi wahi o te matenga pakira, o te rae pakira ranei, he mea ma  
 ahua whero nei, he repera tena e tupu ana i tona matenga pakira, i tona rae pakira ranei. <sup>43</sup> Na me  
 titiro ia e te tohunga: na, ki te ma ahua whero te puku i pa ki tona matenga pakira, ki tona rae pakira  
 ranei, ki te rite ki te putanga o te repera ki te kiri o te kikokiko; <sup>44</sup> He repera ia, he poke: me tino  
 mea te tohunga, he poke ia; ko tona matenga i pangia. <sup>45</sup> A ko te repera i pangia nei, me haehae  
 ona kakahu, kia roha noa atu nga makawe o tona mahunga, ka arai i tona ngutu o runga, a ka  
 karanga, He poke, he poke. <sup>46</sup> Ka poke ia i nga ra katoa e pangia ai; he poke ia; me noho ko ia  
 anake; ko waho o te puni te nohoanga mona.  
<sup>47</sup> Me te kakahu ano hoki i pangia e te repera, ahakoa he kakahu huruhuru, he kakahu rinena  
<sup>48</sup> ranei; Ahakoa i te whenu, i te aho ranei; i nga mea rinena, huruhuru ranei; ahakoa i te hiako, i  
<sup>49</sup> tetahi mea hiako ranei; Ki te mea ha ma kakariki, he puwhero ranei te wahi i pangia o te kakahu,  
 o te hiako ranei, o te whenu ranei, o te aho ranei, o tetahi mea hiako ranei, he panga tena no te  
<sup>50</sup> repera, a me whakakite ki te tohunga: Na ka tirohia e te tohunga te wahi i pangia, a ka tutakina  
<sup>51</sup> atu e ia te mea i pangia, kia whitu nga ra: A i te whitu o nga ra ka tirohia e ia te wahi pangia: ki  
 te mea kua horapa te mea i pa ki te kakahu, ki te whenu ranei, ki te aho ranei, ki tetahi hiako, ki  
<sup>52</sup> tetahi mea ranei i hanga ki te hiako: he repara ngau kino te mea i pa; he mea poke tena. Na ka  
 tahuna e ia taua kakahu, ahakoa he whenu, he aho ranei, ahakoa he huruhuru, he rinena ranei,  
<sup>53</sup> ahakoa he mea hiako te mea i pangia; he repara ngau kino tena; me tahu ki te ahi. A ki te titiro  
 te tohunga, na, kihai te mea i pa i horapa atu ki te kakahu, ki te whenua, ki te aho, ki tetahi mea  
<sup>54</sup> hiako ranei; Katahi ka whakahau te tohunga kia horoia te mea i pangia, a ka tutakina atu e ia,  
<sup>55</sup> kia whitu atu ano nga ra: A me titiro e te tohunga te mea i pa mai, i muri i te horoinga: a ki te  
 mea kihai i rere ke te kara o te wahi i pangia, a kihai i horapa atu te mea i pa mai; he poke tena; me  
<sup>56</sup> tahu e koe ki te ahi; kua ngaua a roto, ahakoa i tiwha te taha ki roto, te taha ranei ki waho. A ki  
 te mea ka kite te tohunga, na kau tapouri te wahi i pangia i muri i te horoinga; katahi ka haea atu

e ia i roto i te kakahu, i te hiako ranei, i te whenu ranei, i te aho ranei: <sup>57</sup> A ki te kitea ano i te kakahu, i te whenu ranei, i te aho ranei, i tetahi mea hiako ranei; he mea tupu tena; me tahu e koe ki te ahi taua mea i pangia. <sup>58</sup> Ko te kakahu hoki, ko te whenu ranei, ko te aho ranei, ko te mea hiako ranei i horoia e koe, a kua riro te mate, na ka horoia ano, a ka kore ona poke. <sup>59</sup> Ko te ture tenei mo te panga mai o te repera ki te kakahu huruhuru, ki te kakahu rinena ranei, ki te whenu, ki te aho ranei, ki tetahi mea hiako ranei, mo te ki he pokekore, mo te ki ranei he poke.

## Chapter 14

<sup>1</sup> A i korero a Ihowa ki a Mohi, i mea, <sup>2</sup> Ko te ture tenei mo te repera, i te ra e purea ai; me kawe ki te tohunga; <sup>3</sup> A ka haere te tohunga ki waho o te puni, a ka titiro te tohunga, a ki te mea kua ora te repera i pa ki taua tangata i reperatia; <sup>4</sup> Katahi ka whakahau te tohunga kia tikina ma te tangata e purea ana kia rua nga manu, hei nga mea ora, hei nga mea pokekore, me te rakau hita, me te ngangana, me te hihopa: <sup>5</sup> A ka whakahau te tohunga kia patua tetahi o nga manu ki roto ki tetahi oko oneone, ki runga i te wai rere: <sup>6</sup> Na ko te manu ora me mau e ia, me te rakau hita, me te ngangana, me te hihopa, a ka toua tahitia me te manu ora ki te toto o te manu i patua ki runga i te wai rere: <sup>7</sup> A kia whitu ana tauhiuhinga ki te tangata e purea ana i te repera, a ka kiia he pokekore, a ka tukua atu te manu ora ki te mata o te parae. <sup>8</sup> A me horoi ona kakahu e te tangata e purea ana, me heu katoa hoki ona huruhuru; ka horoi ano i a ia ki te wai, a ka kore ona poke: a, muri iho, ka haere mai ki te puni; otiiia kia whitu nga ra e noho ai i waho i tona teneti. <sup>9</sup> Na, i te whitu o nga ra, me heu katoa ona makawe o tona matenga, tona pahau, ona tukemata, ara ona huruhuru katoa, me heu; me horoi hoki ona kakahu, me horoi ano hoki ona kikokiko ki te wai, a ka kore ona poke. <sup>10</sup> A i te waru o nga ra me tiki e ia etahi reme toa, kia rua, hei nga mea kohakore, me tetahi reme uha tau tahi, hei te mea kohakore, kia toru hoki nga whakatekau paraoa hei whakahere totokore, hei te mea konatu ki te hinu, kia kotahi hoki te roko hinu. <sup>11</sup> A ma te tohunga, ma te kaupure, e whakatu te tangata e purea ana, me aua mea hoki, ki te aroaro o Ihowa, ki te whatitoka o te tapenakara o te whakaminenga: <sup>12</sup> Na ka mau te tohunga ki tetahi o nga reme toa, a ka whakaherea hei whakahere mo te he, me te roko hinu hoki, a ka poipoia hei whakahere poipoi ki te aroaro o Ihowa: <sup>13</sup> Me patu ano e ia te reme toa ki te wahi e patua ai e ia te whakahere hara me te tahunga tinana, ki te wahi tapu: i te mea ma te tohunga te whakahere hara, mana ano hoki te whakahere mo te he:

14  
 he mea tino tapu tena: Na ka mau te tohunga ki tetahi wahi o te toto o te whakahere mo te he,  
 a ka pania e te tohunga ki te matamata o te taringa matau o te tangata e purea ana, ki te koromatua  
 hoki o tona ringa matau, ki te koromatua ano hoki o tona waewae matau: 15  
 Na ka mau te tohunga  
 ki tetahi wahi o te roko hinu, ka riringi ki te kapu o tona ake ringa maui: 16  
 A ka toua e te tohunga  
 tona maihao matau ki te hinu i tona ringa maui, a kia whitu nga tauhiuhinga i te hinu e tona maihao,  
 ki te aroaro o Ihowa: 17  
 A me pani e te tohunga tetahi wahi o te toenga o te hinu i tona ringa ki te  
 matamata o te taringa matau o te tangata e purea ana, ki te koromatua hoki o tona ringa matau, ki  
 te koromatua ano hoki o tona waewae matau, ki runga i te toto o te whak ahere mo te he: 18  
 A, ko  
 te toenga o te hinu i te ringa o te tohunga, me riringi ki te matenga o te tangata e purea ana: a ka  
 whakamarie te tohunga mona ki te aroaro o Ihowa. 19  
 A ka whakaherea e te tohunga te whakahere  
 hara, ka whakamarie hoki mo te tangata e purea ana, ara mo tona poke; a, muri iho, ka patua e ia  
 te tahunga tinana: 20  
 A ka whakaekea te tahunga tinana me te whakahere totokore e te tohunga ki  
 te aata: a ka whakamarie te tohunga mona, a ka kore ona poke.  
 21  
 A, ki te mea he rawakore ia, a e kore ena mea e taea, na me tiki e ia kia kotahi reme toa hei  
 whakahere mo te he, hei mea poipoi, hei whakamarie mona, kia kotahi ano hoki te whakatekau  
 paraoa, hei te mea i konatunatua ki te hinu, hei whakahere t otokore, me tetahi roko hinu: 22  
 Me  
 etahi kukupa kia rua, etahi pi kukupa ranei kia rua, nga mea e taea e tona ringa; ko tetahi hei  
 whakahere hara, ko tetahi hei tahunga tinana; 23  
 A hei te waru o nga ra ka kawe ai ki te tohunga  
 hei purenga mona, ki te whatitoka o te tapenakara o te whakaminenga, ki te aroaro o Ihowa. 24  
 Na  
 ka mau te tohunga ki te reme mo te whakahere mo te he, me te roko hinu, a ka poipoia e te tohunga  
 hei whakahere poipoi ki te aroaro o Ihowa. 25  
 A ka patua e ia te reme e whakaherea ana mo te he,  
 a ka tango te tohunga i tetahi wahi o te toto o te whakahere mo te he, ka pani ai ki te matamata o  
 te taringa matau o te tangata e purea ana, ki te koromatua hoki o tona ringa matau, ki te korom atua  
 ano hoki o tona waewae matau: 26  
 A me riringi e te tohunga tetahi wahi o te hinu ki te kapu o tona  
 ake ringa maui: 27  
 A ka tauhiuhia e te tohunga ki tona maihao matau tetahi wahi o te hinu i tona  
 ringa maui, kia whitu nga meatanga ki te aroaro o Ihowa: 28  
 A ka pania e te tohunga tetahi wahi  
 o te hinu i tona ringa ki te matamata o te taringa matau o te tangata e purea ana, ki te koromatua  
 hoki o tona ringa matau, ki te koromatua ano hoki o tona waewae matau, ki te wahi i te toto o te  
 whakahere mo te he: 29  
 A, ko te toenga o te hinu i te ringa o te tohunga, me riringi ki te matenga  
 o te tangata e purea ana, hei whakamarie mona ki te aroaro o Ihowa. 30  
 A me whakahere tetahi o

31  
 nga kukupa, o nga pi kukupa ranei, o nga mea hoki i taea e tona ringa; Ae ra, o nga mea i taea  
 e tona ringa, ko tetahi hei whakahere hara, ko tetahi hei tahunga tinana, me te whakahere totokore  
 32  
 hoki: a ka whakamarie te tohunga mo te tangata e purea ana, ki te aroaro o Ihowa. Ko te ture  
 tenei mo te tangata i pangia e te repera, e kore nei e taea e tona ringa nga mea mo tona purenga.  
 33 I korero ano a Ihowa ki a Mohi raua ko Arona, i mea, 34 E tae koutou ki te whenua o Kanaana  
 e hoatu nei e ahau hei kainga tupu mo koutou, a ka whakapangia atu e ahau te repera ki tetahi whare  
 35  
 o te whenua e nohoia e koutou; A ka haere te tangata nona te whare, ka korero ki te tohunga,  
 36  
 ka mea, Ki taku titiro, me te mea kua pangia te whare: Na ka whakahau te tohunga kia  
 whakawateatia te whare, i te mea kahore ano te tohunga i haere noa kia kite i te mea i pa mai; kei  
 37  
 poke nga mea katoa o roto o te whare; a ka oti, ka haere te tohunga kia kite i te whare: Na ka  
 titiro ia ki te mea i pa mai, a ki te mea kua pangia nga tara o te whare, a kua whai koputaputa he  
 38  
 mea ma kakariki, puwhero ranei, a ki te titiro atu kua ngoto ki roto ki te tara; Na ka puta te  
 39  
 tohunga ki waho o te whare ki te kuwaha o te whare, a ka tutakina te whare, kia whitu nga ra: A  
 ka haere mai ano te tohunga i te whitu o nga ra, a ka titiro; a ki te mea kua horapa ki nga pakitara  
 40  
 o te whare te mea i pa mai: Na, ka whakahau te tohunga kia tangohia nga kohatu i pangia, kia  
 41  
 maka ki te wahi poke ki waho o te pa: A ka mea ia kia waruhia a roto o te whare a taka noa, a  
 42  
 me riringi e ratou te puehu i wariuhia e ratou ki waho o te pa, ki te wahi poke: A ka tikina e  
 ratou etahi atu kohatu, ka whakanoho atu ai ki te wahi o aua kohatu; me tiki ano e ia he moata ke,  
 43  
 ka pani ai ki te whare. A ki te hoki mai te mea i pa mai, a ka tupu ki te whare i muri i tana  
 44  
 tangohanga i nga kohatu, i tana waruhanga i te whare, i te paninga hoki; Katahi ka haere te  
 tohunga, a ka titiro; a ki te mea kua horapa ki te whare te mea i pa mai, he repera ngau kino to te  
 45  
 whare; he poke. Na ka wawahi i te whare, i ona kohatu, i ona rakau, i te moata katoa o te whare:  
 46  
 a ka kawea atu ki waho o te pa, ki te wahi poke. Ki te haere hoki tetahi ki roto ki te whare, i te  
 47  
 mea e tutaki ana, ka poke ia a ahiahi noa. Ki te takoto hoki tetahi ki roto i te whare, me horoi e  
 48  
 ia ona kakahu: ki te kai ano hoki tetahi ki roto i te whare, me horoi ano e ia ona kakahu. A ki te  
 haere te tohunga ki roto, a ka titiro, a kihai i horapa ki te whare te mea i pa mai, i muri iho i te  
 paninga o te whare: na ka kiia e te tohunga he pokekore te whare, no te mea kua kore taua mea i  
 49  
 pa ra. A ka tikina e ia etahi manu, kia rua, hei horohoro mo te whare, he rakau hita, he ngangana,  
 50  
 he hihopa: A ka patua e ia tetahi o nga manu ki roto ki te oko oneone, ki runga i te wai rere.

51

Na ka mau ki te rakau hita, ki te hihopa, ki te ngangana, me te manu ora, ka tou ai ki te toto o te manu i patua, ki te wai rere hoki, na kia whitu ana tauhiuhinga ki te whare: <sup>52</sup> A ka horohoroa e ia te whare ki te toto o te manu, ki te wai rere hoki, ki te manu ora, ki te rakau hita, ki te hihopa, ki

<sup>53</sup> te ngangana: Engari me tuku e ia te manu ora ki waho o te pa, ki te mata o te parae; na ka whakamarie mo te whare: a ka kore ona poke.

54

Ko te ture tenei mo nga panga katoa o te repera, mo te patito hoki; <sup>55</sup> Mo te repera hoki o

te kakahu, o te whare; <sup>56</sup> Mo te puku, mo te paku, mo te wahi tu a kanapa nei: <sup>57</sup> Hei whakaatu ko ahea poke ai, ko ahea pokekore ai: ko te ture tenei mo te repera.

## Chapter 15

1

I korero ano a Ihowa ki a Mohi raua ko Arona, i mea, <sup>2</sup> Korero ki nga tama a Iharaira, mea atu ki a ratou, Ki te mea he rere to tetahi tangata, no roto i tona kikokiko, e poke ana ia i tona rere.

3

A ko tona poke tenei i a ia e rere mai: ahakoa rere te rere o tona kikokiko, ahakoa kua mimiti te rere o tona kikokiko, he mea whakapoke tena i a ia. <sup>4</sup> He poke nga moenga katoa e takoto ai te tangata i te rere: ka poke ano hoki nga mea katoa e noho ai ia. <sup>5</sup> Ki te pa hoki tetahi ki tona moenga,

me horoi e ia ona kakahu, me ia ano hoki me horoi ki te wai, ka poke hoki ia a ahiahi noa. <sup>6</sup> Ki te noho hoki tetahi ki runga ki tetahi mea i nohoia e te tangata i te rere, me horoi e ia ona kakahu, me

ia ano hoki me horoi ki te wai, ka poke hoki ia a ahiahi noa. <sup>7</sup> A ki te pa tetahi ki te kikokiko o te tangata i te rere, me horoi e ia ona kakahu, me ia ano hoki me horoi ki te wai, ka poke hoki ia a

ahiahi noa. <sup>8</sup> A ki te tuwha atu te tangata i te rere ki tetahi tangata pokekore, na me horoi e ia ona kakahu, me ia ano hoki me horoi ki te wai, ka poke hoki ia a ahiahi noa. <sup>9</sup> Me te nohoanga hoiho

i nohoia e te tangata he rere tona, kua poke. <sup>10</sup> Na he mea no raro i a ia, ko te tangata i pa atu, kua poke a ahiahi noa: ki te mauria hoki e tetahi tetahi o aua mea, me horoi ona kakahu, me ia ano hoki

me horoi ki te wai, ka poke hoki a ahiahi noa. <sup>11</sup> Na, ko te tangata i pa tera i te rere ki a ia, a kihai i horoia ona ringa ki te wai, me horoi ona kahu, me ia ano hoki me horoi ki te wai, ka poke hoki ia

a ahiahi noa. <sup>12</sup> Me wawahi ano hoki te oko oneone i pangia e te tangata he rere tona: ko nga oko

rakau katoa ia me horoi ki te wai. <sup>13</sup> A e purea i tona rere te tangata he rere tona, na me tatau e ia nga rangi e whitu mo tona purenga, na ka horoia e ia ona kakahu, me horoi ano hoki tona kikokiko

<sup>14</sup>  
 ki te wai rere, a ka kore ona poke. A i te waru o nga ra me tiki e ia, kia rua nga kukupa, kia rua ranei nga pi kukupa, a ka haere ki te aroaro o Ihowa ki te whatitoka o te tapenakara o te

<sup>15</sup>  
 whakaminenga, ka hoatu ai ki te tohunga: Katahi ka whakaherea aua mea e te tohunga, tetahi hei whakahere hara, tetahi hoki hei tahunga tinana; a ka whakamarie te tohunga mona ki te aroaro

<sup>16</sup>  
 o Ihowa mo tona rere. Ki te paheke mai hoki te purapura moenga o tetahi tangata, na, me horoi

<sup>17</sup>  
 e ia tona tinana katoa ki te wai, ka poke hoki ia a ahiahi noa. Me horoi ano hoki ki te wai nga kakahu katoa, me nga hiako kei aua mea nei te purapura moenga, ka poke hoki aua mea a ahiahi

<sup>18</sup>  
 noa. Ki te moe maori hoki tetahi tangata ki tetahi wahine, me horoi raua ki te wai, ka poke hoki raua a ahiahi noa.

<sup>19</sup>  
 A ki te mea he rere to tetahi wahine, a he toto te rere o tona kikokiko, me whakamotuhake

<sup>20</sup>  
 kia whitu nga ra: ka poke ano hoki nga tangata katoa e pa ana ki a ia a ahiahi noa. Ka poke ano nga mea katoa e takotoria ana e ia i tona whakamotuhaketanga; ka poke ano nga mea katoa e noho

<sup>21</sup>  
 ai ia. Ki te pa hoki tetahi ki tona moenga, me horoi e ia ona kakahu, a ia ake ano hoki me horoi

<sup>22</sup>  
 ki te wai, ka poke hoki ia a ahiahi noa. Ki te pa atu hoki tetahi ki tetahi mea i noho ai ia, me

<sup>23</sup>  
 horoi e ia ona kakahu, a ia ake ano hoki me horoi ki te wai, ka poke hoki ia a ahiahi noa. Ahakoa i runga taua mea i te moenga, i runga ranei i tetahi mea e nohoia ana e ia, ki te pa atu tetahi, ka

<sup>24</sup>  
 poke ia a ahiahi noa. Ki te takoto hoki tetahi tangata ki a ia, a ka mau ki a ia ona whakapoke,

<sup>25</sup>  
 ka poke, e whitu nga ra: ka poke katoa ano nga moenga katoa e takoto ai ia. A ki te maha nga ra o te rerenga toto o tetahi wahine, a ehara i te wa e paheke ai, ki te roa atu ranei te rerenga i to te wa e paheke ai; ka pera ano me nga ra o tona paheketanga nga ra katoa e rere ai tona whakapoke;

<sup>26</sup>  
 ka poke ia. Ka pera ano ki a ia me te moenga o tona paheketanga nga moenga katoa e takoto ai ia i nga ra katoa e rere ai: ka poke ano hoki nga mea katoa e noho ai ia, ka rite ki te whakapoke o

<sup>27</sup>  
 tona paheketanga. Ka poke ano hoki te tangata e pa ana ki aua mea, me horoi ano hoki e ia ona

<sup>28</sup>  
 kakahu, a ia ake ano hoki me horoi ki te wai, ka poke hoki ia a ahiahi noa. Otiia ki te mea kua whakapokekoretia taua wahine i te rere, katahi ka taua e ia nga rangi e whitu, a muri iho ka kore

<sup>29</sup>  
 ona poke. A i te waru o nga ra me tiki e ia kia rua nga kukupa, kia rua ranei pi kukupa mana, a

<sup>30</sup>  
 ka kawea ki te tohunga, ki te whatitoka o te tapenakara o te whakaminenga. A me whakahere tetahi e te tohunga hei whakahere hara, me tetahi hoki hei tahunga tinana, a ka whakamarie te

<sup>31</sup>  
 tohunga mona ki te aroaro o Ihowa mo te rere o tona whakapoke. Na me pena ta koutou wehe i nga tama a Iharaira i o ratou whakapoke; kei mate ratou i o ratou poke, ina whakapokea e ratou

32  
 toku tapenakara e tu na i roto i a ratou. Ko te ture tenei mo te tangata he rere tona, mo te tangata  
 hoki kua paheke atu tona purapura moenga, a poke iho; 33  
 Mo te wahine hoki e paheke ana, mo te tangata hoki he rere tona, mo te tane raua ko te wahine, mo te tangata hoki i takoto ki te wahine  
 poke.

## Chapter 16

1  
 A i korero a Ihowa ki a Mohi i muri i te matenga o nga tama tokorua a Arona, i te mea i  
 whakahere nei raua ki te aroaro o Ihowa, a mate iho; 2  
 I korero ano a Ihowa ki a Mohi, Korero ki  
 a Arona, ki tou tuakana, kei haere i nga wa katoa ki te wahi tapu, ki roto i te arai, i tera i mua mai  
 o te taupoki o te aaka; kei mate: ka puta atu hoki ahau i roto i te kapua ki runga ki te taupoki. 3  
 Ko  
 nga mea tenei hei haerenga mo Arona ki roto ki te wahi tapu: ko te kuaopuru hei whakahere hara,  
 me te hipi toa hei tahunga tinana. 4  
 Me kakahu e ia te koti rinena tapu; hei tona kikokiko nga tarau  
 rinena, me whitiki ano ki a ia te whitiki rinena, me potae ano te potae rinena: ko nga kakahu tapu  
 enei; mo reira me horoi e ia tona kikokiko ki te wai, ka kakahu ai.  
 5  
 Na ka mau ia ki etahi koati kia rua a te whakaminenga o nga tama a Iharaira hei whakahere  
 hara, kia kotahi hoki te hipi toa hei tahunga tinana. 6  
 A ka whakaherea e Arona tana puru mo te  
 whakahere hara, te mea hoki mona, a ka whakamarie mona, mo tona whare hoki. 7  
 Na ka mau ia  
 ki nga koati e rua, ka tapae ki te aroaro o Ihowa ki te whatitoka o te tapenakara o te whakaminenga.  
 8  
 Na ka maka he rota e Arona mo nga koati e rua, tetahi rota mo ta Ihowa, tetahi rota mo te koati  
 haere noa. 9  
 A ka kawea mai e Arona te koati i puta nei ta Ihowa rota ki a ia, a ka whakaherea hei  
 whakahere hara. 10  
 Ko te koati ia i puta nei te rota ki a ia hei koati haere noa, katapaea oratia ki te  
 aroaro o Ihowa, ki te whakamarie mona, kia tukua ai ki te koraha hei koati haere noa. 11  
 A ka  
 kawea e Arona te puru mo te whakahere hara, te mea mona ake, a ka whakamarie mona, mo tona  
 whare hoki, a ka patua te puru mo te whakahere hara, te mea hoki mona ake: 12  
 Na ka mau ki te  
 tahu kakara, ki tonu i nga waro ahi no runga i te aata, i te aroaro o Ihowa; kia ki hoki ona ringa i  
 te whakakakara reka, tuki rawa kia ririki, ka kawea ai ki roto i te arai: 13  
 Na ka maka i te whakakakara  
 ki te ahi ki te aroaro o Ihowa, kia ngaro ai i te kapua whakakakara te taupoki i runga i te  
 whakaaturanga, kei mate hoki ia: 14  
 Na ka tango i tetahi wahi o te toto o te puru, a ka tauhiuhia e

tona maihao ki te taupoki ki te taha ki te rawhiti: kia whitu nga tauhiuhinga a tona maihao i te toto ki te taha ki mua o te taupoki:

15

Katahi ka patua e ia te koati o te whakahere hara, te mea mo te iwi, a ka kawea ona toto ki roto i te arai, a ka pera tana meatanga ki taua toto, me tana ki te toto o te puru, a ka tauhiuhia e ia

16

ki te taupoki, ki mua hoki o te taupoki. A ka whakamarie mo te wahi tapu, mo te poke o nga tama a Iharaira, mo a ratou mahi tutu i o ratou haranga katoa: kia pera hoki tana meatanga mo te

17

tapenakara o te whakaminenga e tu ana i roto i a ratou i waenganui o to ratou poke. Kaua ano hoki he tangata mo roto i te tapenakara o te whakaminenga, ina haere ia ki te whakamarie i roto i te wahi tapu, a puta noa mai ki waho, kia oti ra ano te whakamarie mona, mo tona whare, mo te

18

whakaminenga katoa ano hoki o Iharaira. Na ka puta ia ki te aata, ki tera i te aroaro o Ihowa, mea ai i to reira whakamarie; ka tongo hoki i tetahi wahi o te toto o te puru, o te toto hoki o te koati,

19

ka pani ai ki nga haona o te aata a tawhio noa. Kia whitu hoki nga tauhiuhinga a tona maihao i te toto, a ka purea, ka whakatapua, kia ma ai i te poke o nga tama a Iharaira.

20

A ka oti tana whakamarie mo te wahi tapu, mo te tapenakara o te whakaminenga, mo te aata,

21

na, me kawea mai e ia te koati ora: Na ka pokipoki nga ringa e rua o Arona ki te matenga o te koati ora, ka whaki ai i nga kino katoa o nga tama a Iharaira ki runga i a ia, i a ratou mahi tutu katoa, me o ratou hara katoa; me uta hoki ki runga ki te matenga o te koati, ka tuku ai kia kawea

22

ki te koraha e tetahi tangata e noho rite ana: Na ka mauria e te koati o ratou kino katoa i runga

23

i a ia ki tetahi whenua mokemoke: a ka tukua atu te koati ki te koraha. Na ka haere a Arona ki roto ki te tapenakara o te whakaminenga, a ka unuhia atu nga kakahu rinena i kakahuria e ia i tona

24

haerenga ki roto ki te wahi tapu, ka waiho hoki ki reira: Me horoi ano e ia tona kikokiko ki te wai ki te wahi tapu, ka kakahu ai i ona kakahu, a ka puta mai ia ki waho, ka mea hoki i tana tahunga

25

tinana, i te tahunga tinana hoki a te iwi, hei whakamarie mona, mo te iwi. Me tahu ano e ia te

26

ngako o te whakahere hara ki runga ki te aata. Ko te kaituku hoki o te koati hei koati haere noa, me horoi e ia ona kakahu, me horoi ano tona kikokiko ki te wai, a muri iho, ka haere mai ki te puni.

27

A ko te puru mo te whakahere hara, me te koati mo te whakahere hara, no raua nei nga toto i kawea ki roto ki te wahi tapu hei whakamarie, me mau ki waho o te puni; a ka tahuna ki te ahi o

28

raua hiako, o raua kikokiko, me to raua paru. Na, ko te kaitahu, me horoi ona kakahu, me horoi ano tona kikokiko ki te wai, a muri iho, ka haere mai ki te puni.

29

Hei tikanga pumau ano tenei ma koutou: i te whitu o nga marama, i te tekau o nga ra o te marama, me whakapouri o koutou wairua, kaua rawa tetahi mahi e mahia, e te tangata whenua, e

30

te manene ranei i roto i a koutou: Ko a taua rangi hoki te tohunga whakamarie ai mo koutou,



hei pure i a koutou i o koutou hara katoa, kia ma ai koutou i te aroaro o Ihowa. <sup>31</sup> Hei hapati  
 okiokinga taua ra ki a koutou, me whakapouri o koutou wairua: hei tikanga pumau. <sup>32</sup> Me  
 whakamarie ano te tohunga e whakawahia nei ia, e whakatohungatia hoki hei tohunga i muri i tona  
 papa, me kakahu ano nga kakahu rinena, nga kakahu tapu: <sup>33</sup> Me whakamarie ia mo te wahi tapu,  
 me whakamarie ano mo te tapenakara o te whakaminenga, mo te aata hoki; me whakamarie ano  
 mo nga tohunga, mo nga tangata katoa hoki o te whakaminenga. <sup>34</sup> Hei tikanga pumau tenei ki a  
 koutou, kia whakamarie mo nga tama a Iharaira, mo o ratou hara katoa: kia kotahi meatanga i te  
 tau. Na ka meinga e ia ta Ihowa i whakahau ai ki a Mohi.

### Chapter 17

<sup>1</sup> I korero ano a Ihowa ki a Mohi, i mea, <sup>2</sup> Korero ki a Arona, ki ana tama, ki nga tama katoa  
 a Iharaira, mea atu ki a ratou, Ko te mea tenei i whakahau ai a Ihowa, i mea ai, <sup>3</sup> Ki te patua e tetahi  
 tangata o te whare o Iharaira he kau, he reme, he koati ranei, i roto i te puni, ki te patua ranei e ia  
 ki waho o te puni, <sup>4</sup> A e kore e kawea ki te whatitoka o te tapenakara o te whakaminenga, kia  
 whakaherea he whakahere ki a Ihowa ki mua i te tapenakara o Ihowa; ka whakairia he toto ki taua  
 tangata; kua whakaheke toto ia; a ka hatepea atu taua tangata i roto i tona iw i: <sup>5</sup> He mea kia kawea  
 ai e nga tama a Iharaira a ratou patunga e whakaherea ana e ratou i te mata o te parae, kia kawea  
 ai hoki ki a Ihowa, ki te whatitoka o te tapenakara o te whakatoka o te tapenakara o te whakaminenga,  
 ki te tohunga, ka patu ai hei whakahere mo te pai ki a Ihowa. <sup>6</sup> A ka tauhiuhia te toto e te tohunga  
 ki te aata a Ihowa i te whatitoka o te tapenakara o te whakaminenga, me tahu ano e ia te ngako hei  
 kakara reka ki a Ihowa. <sup>7</sup> A ka mutu a ratou patunga tapu ki nga rewera i whaia nei e ratou, puremu  
 atu ai. Hei tikanga pumau tenei ki a ratou i o ratou whakatupuranga. <sup>8</sup> Me ki atu ano ki a ratou, Ki  
 te whakaherea e tetahi tangata o te whare o Iharaira, o nga manene ranei i roto i a koutou, tetahi  
 tahunga tinana, patunga tapu ranei, <sup>9</sup> A e kore e kawea ki te whatitoka o te tapenakara o te  
 whakaminenga, whakahere ai ki a Ihowa; ina, ka hatepea atu taua tangata i roto i tona iwi.  
<sup>10</sup> Ki te kainga hoki tetahi toto e tetahi tangata o te whare o Iharaira, o nga manene ranei i roto  
 i a koutou; ka u atu toku mata ki taua wairua i kainga ai te toto, a ka hatepea atu e ahau i roto i tona  
<sup>11</sup> iwi. Kei roto hoki i te toto te oranga o te kikokiko; kua hoatu ano e ahau ki a koutou mo runga  
 i te aata, hei whakamarie mo o koutou wairua: ko te toto hoki, na tona ora, te mea hei whakamarie.  
<sup>12</sup> Koia ahau i mea ai ki nga tama a Iharaira, Kaua tetahi o koutou e kai toto, kaua ano hoki te

manene i roto i a koutou e kai toto. <sup>13</sup> Ki te whai hoki tetahi o nga tama a Iharaira, o nga manene ranei i roto i a koutou, a ka mau tetahi kirehe, tetahi manu ranei e tika ana kia kainga: me riringi ona toto, ka tanu ai ki te puehu. <sup>14</sup> No te mea ko te toto o te kikokiko e kotahi katoa ana me te ora o te kikokiko: koia ahau i mea ai ki nga tama a Iharaira, Kaua rawa e kainga te toto o tetahi kikokiko: ko te toto hoki te ora o nga kikokiko katoa: ki te kainga e tetahi, ka hatepe a atu. <sup>15</sup> Ki te kainga hoki e tetahi te mea i mate maori, te mea ranei i haea e te kirehe, ahakoa tangata whenua, iwi ke ranei, me horoi ona kakahu, me ia ano me horoi ki te wai, ka poke hoki a ahiahi noa: katahi ka kore te poke. <sup>16</sup> A ki te kahore e horoia e ia, ki te kahore hoki e horoia tona tinana, na ka waha e ia tona kino.

## Chapter 18

<sup>1</sup> I korero ano a Ihowa ki a Mohi, i mea, <sup>2</sup> Korero ki nga tama a Iharaira, mea atu ki a ratou, Ko Ihowa ahau, ko to koutou Atua. <sup>3</sup> Kei rite a koutou mahi ki nga mahi a te whenua o Ihipa, i noho na koutou: kei rite hoki a koutou mahi ki nga mahi a te whenua o Kanaana, e kawea nei koutou e ahau ki reira: kei haere i runga i a ratou tikanga. <sup>4</sup> Me mahi aku whakaritenga, kia mau ki aku tikanga, me haere hoki i reira; ko Ihowa ahau, ko to koutou Atua. <sup>5</sup> Ina, kia mau ki aku tikanga, ki aku whakaritenga: ki te mahia hoki ena e te tangata, me reira e ora ai: ko Ihowa ahau. <sup>6</sup> Kaua tetahi o koutou e whakatata ki tetahi o ona whanaunga tupu, hura ai i to ratou kiri tahanga: ko Ihowa ahau. <sup>7</sup> Kei hurahia e koe tou papa, tou whaea ranei, kia takoto tahanga: ko tou whaea ia; kei hurahia e koe kia takoto tahanga. <sup>8</sup> Kei hurahia e koe kia takoto tahanga te wahine a tou papa: ko te wahi takoto tahanga ia o tou papa. <sup>9</sup> Kei hurahia e koe kia takoto tahanga tou tuahine, te tamahine a tou papa, te tamahine ranei a tou whaea, ahakoa i whanau ki te kainga, i whanau ranei ki tetahi atu wahi; kei hurahia raua e koe kia takoto tahanga. <sup>10</sup> Kei hurahia e koe kia takoto tahanga te tamahine a tau tama, te tamahine ranei a tau tamahine, kei hurahia raua e koe kia takoto tahanga: nou hoki te wahi o raua i takoto tahanga na. <sup>11</sup> Kei takoto tahanga i a koe te tamahine a te wahine a tou papa, te whanau a tou papa, he tuahine ia nou, kei hurahia ia e koe kia takoto tahanga. <sup>12</sup> Kei hurahia te tuahine o tou papa kia takoto tahanga: he whanaunga tupu ia no tou papa. <sup>13</sup> Kei hurahia e koe te tuakana, teina ranei, o tou whaea kia takoto tahanga: he whanaunga

<sup>14</sup> tupu hoki ia no tou whaea. Kei hurahia e koe kia takoto tahanga te teina, tuakana ranei, o tou  
<sup>15</sup> papa, kei whakatata koe ki tana wahine; ko tou whaea keke ia. Kei hurahia e koe tau hunaonga  
<sup>16</sup> kia takoto tahanga: ko te wahine ia a tau tama, kei hurahia ia e koe kia takoto tahanga. Kei  
<sup>17</sup> hurahia e koe kia takoto tahanga te wahine a tou tuakana, teina ranei; no tou tuakana, teina ranei,  
<sup>17</sup> taua wahi i takoto tahanga na. Kei hurahia e koe kia takoto tahanga te wahine raua ko tana  
<sup>18</sup> tamahine, kua ano e tangohia te tamahine a tana tama, te tamahine ranei a tana tamahine, hura ai  
<sup>18</sup> i a ia kia takoto tahanga; he whanaunga pu hoki ratou ki a ia: he mea kino tena. Kua ano hoki  
 e tangohia he wahine ki te taha o tona tuakana, teina ranei, hei whakatetete ki a ia; kua ia e  
 hurahia kia takoto tahanga, me te ora ano hoki tera.  
<sup>19</sup> Kua ano hoki e whakatata ki te wahine ki te hura i a ia kia takoto tahanga, i a ia e poke ana  
<sup>20</sup> i te paheketanga. Kua ano hoki e takoto puremu ki te wahine a tou hoa, whakapoke ai i a koe  
<sup>21</sup> ki a ia. Kua ano e tukua tetahi o ou uri kia haere na waenga ahi hei mea ki a Moreke, kua ano  
<sup>22</sup> e whakanoatia te ingoa o tou Atua: ko Ihowa ahau. Kei takotoria wahinetia te tane: he mea  
<sup>23</sup> whakarihariha tena. Kua ano hoki e takoto ki tetahi kararehe, whakapoke ai i a koe ki taua mea:  
 kua hoki tetahi wahine e tu ki te aroaro o tetahi kararehe, takoto tahi ai raua: he mea anuanu tena.  
<sup>24</sup> Kei poke koutou i tetahi o enei mea: e poke ana hoki i enei mea katoa nga iwi ka peia nei e ahau  
<sup>25</sup> i to koutou aroaro: Kua poke ano hoki te whenua: koia ahau i mea ai kia tau iho tona kino ki  
<sup>26</sup> runga ki a ia; a e whakaruaki ana te whenua i ona tangata. Mo reira kia mau ki aku tikanga, ki  
 aku whakaritenga whakawa; kua ano e mahia tetahi o enei mea whakarihariha e te tangata whenua,  
<sup>27</sup> e te manene ranei i roto i a koutou: No te mea kua mahia enei mea whakarihariha katoa e nga  
<sup>28</sup> tangata whenua o mua i a koutou, a poke iho te whenua; Kei whakaruakina ano hoki koutou e  
<sup>29</sup> te whenua, ina poke i a koutou, pera me nga iwi e whakaruakina nei i to koutou aroaro. Ki te  
 mahia hoki tetahi o enei mea whakarihariha e tetahi tangata, ina, ka hatepea atu nga wairua e pena  
<sup>30</sup> i roto i to ratou iwi. No reira kia mau ki aku i whakahau atu ai, kei mahia e koutou tetahi o enei  
 ritenga whakarihariha i mahia nei i mua i a koutou, kei poke hoki koutou i aua mea: ko Ihowa ahau,  
 ko to koutou Atua.

## Chapter 19

<sup>1</sup> I korero ano a Ihowa ki a Mohi, i mea, <sup>2</sup> Korero ki te whakaminenga katoa o nga tama a  
Iharaira, mea atu ki a ratou, Kia tapu koutou: he tapu hoki ahau, a Ihowa, to koutou Atua. <sup>3</sup> Me  
wehi tera, tera, ki tona whaea, ki tona papa, kia mau hoki ki aku hapati: ko Ihowa ahau, ko to koutou  
<sup>4</sup> Atua. Kei tahuri ki te whakapakoko, kei whakarewaina he atua ma koutou: ko Ihowa ahau, ko to  
<sup>5</sup> koutou Atua. Ki te whakaherea ano he patunga mo te pai ki a Ihowa, hei te patunga e manakohia  
<sup>6</sup> ai koutou. Me kai i te rangi ano i whakaherea ai, i te aonga ake ano hoki: a ki te toe tetahi wahi  
<sup>7</sup> ki te toru o nga ra, me tahu ki te ahi. Ki te kainga hoki tetahi wahi i te toru o nga ra, ka  
<sup>8</sup> whakariharihanga; e kore e manakohia: A ka waha o ratou hara e nga tangata katoa i kainga ai,  
no te mea kua whakanoatia te mea tapu a Ihowa; a ka hatepea atu tauta tangata i roto i tona iwi.  
<sup>9</sup> Ina kotia e koutou nga hua o to koutou whenua, kua e kotia rawatia nga kokonga o tau mara,  
<sup>10</sup> kua ano hoki e hamua nga toenga o au hua. Kua hoki e hamua tau mara waina, kua ano e  
kohia nga karepe taka o tau mara waina; me waiho ma te rawakore, ma te tangata iwi ke: ko Ihowa  
ahau, ko to koutou Atua.  
<sup>11</sup> Kua e tahae; kua hoki e teka, kua ano e tinihanga tetahi ki tetahi. <sup>12</sup> Kei oatitia tekatia  
<sup>13</sup> hoki toku ingoa, kua ano hoki e whakanoatia te ingoa o tou Atua: ko Ihowa ahau. Kua e  
tukinotia tou hoa, kua hoki e pahuatia: kua nga utu o te kaimahi e takoto tonu ki a koe i te po, a  
<sup>14</sup> tae noa ki te ata. Kua e kanga te turi, kua ano e maka he whakatutuki ki te aroaro o te matapo;  
<sup>15</sup> engari me wehi ki tou Atua: ko Ihowa ahau. Kei whakahaere he ina whakawa; kua e whakaaro  
ki te kanohi o te rawakore, kua hoki e whakahonoretia te kanohi o te nui: me whakawa koe mo  
<sup>16</sup> tou hoa i runga i te tika. Kua e kopikopiko i roto i tou iwi kawekawe korero ai: kua ano hoki  
<sup>17</sup> e tu kia whakahekea te toto o tou hoa: ko Ihowa ahau. Kei kino koe ki tou teina i roto i tou  
<sup>18</sup> ngakau: riria marietia tou hoa, kua e waiho he hara i runga i a ia. Kua e rapu utu, kua hoki  
e mauahara ki nga tamariki a tou iwi; engari arohaina tou hoa ano ko koe: ko Ihowa ahau.  
<sup>19</sup> Kia mau ki aku tikanga. Kua e whakatupuria he uri mo au kararehe ki tera atu tu karerehe:  
kua e whakauruuruua nga purapura e whakatongia e koe ki tau mara: kua ano hoki e meatia ki a  
<sup>20</sup> koe he kakahu ko tetahi wahi he rinena, ko tetahi he huruhuru. Ki te takoto puremu hoki tetahi  
ki te wahine pononga kua oti te taumau ma te tane, ki te mea kihai i utua, i whakahokia, kihai ano  
hoki i tukua kia haere noa atu; ka whiua raua; e kore raua e whakamatea, no te mea kihai ia i tukua  
<sup>21</sup> kia haere noa atu. A me kawe e te tane tana whakahere mo te he ki a Ihowa, ki te whatitoka o

te tapenakara o te whakaminenga, he hipi toa hei whakahere mo te he. <sup>22</sup> A ka whakamarie te tohunga mona ki te hipi toa, ki te whakahere mo te he ki te aroaro o Ihowa, mo tona hara i hara ai; a ku murua tona hara i hara ai. <sup>23</sup> E tae hoki koutou ki te whenua, a ka whakatongia e koutou nga rakau kai katoa; me waiho nga hua hei mea kokotikore, kia toru nga tau e waiho ai e koutou hei mea kokotikore: e kore e kainga. <sup>24</sup> I te wha ia o nga tau ka tapu nga hua katoa o reira, hei whakamoemiti ki a Ihowa. <sup>25</sup> Engari i te rima o nga tau me kai e koutou nga hua o reira, a ka maha ake ona hua ma koutou: ko Ihowa ahau, ko to koutou Atua. <sup>26</sup> Kauga e kainga tototia tetahi mea: kauga ano hoki e rapu tikanga i nga tohu, i nga kapua. <sup>27</sup> Kauga e whakaporotakatia nga taha o o koutou mahunga, kauga ano hoki e whakaahuatia kinotia nga taha o tou pahau. <sup>28</sup> Kauga e haea o koutou kikokiko mo te tapapaku, kauga ano hoki e taia he tohu ki a koutou: ko Ihowa ahau. <sup>29</sup> Kauga e whakanoatia tau tamahine, e meinga hei wahine kairau; kei riro te whenua i te kairau, a ka ki te whenua i te kino.

<sup>30</sup> Kia mau ki aku hapati, kia hopohopo hoki ki toku wahi tapu: ko Ihowa ahau. <sup>31</sup> Kauga e whakaaro atu ki nga waka atua, kauga ano hoki e whai atu ki nga mata maori, whakapokea ai e ratou: ko Ihowa ahau, ko to koutou Atua. <sup>32</sup> Me whakatika ake koe i te aroaro o te matenga hina, me whakahonore hoki te mata o te koroheke, me wehi ano hoki ki tou Atua: ko Ihowa ahau. <sup>33</sup> Ki te noho hoki te tangata iwi ki ki a koe, ki tou whenua, kauga koutou e mahi i te kino ki a ia. <sup>34</sup> Ki ta koutou kia rite ki tetahi o o koutou tangata whenua te manene e noho ana i a koutou, arohaina ia ano ko koe; he manene hoki koutou i mua, i te whenua o Ihipa: ko Ihowa ahau, ko to koutou Atua.

<sup>35</sup> Kei he ta koutou whakahaere ina whakawa, i te ruri ranei, i te pauna taimaha ranei, i te mehua ranei. <sup>36</sup> Kia tika a koutou pauna, kia tika nga whakataimaha, kia tika te epa, kia tika hoki te hine: ko Ihowa ahau, ko to koutou Atua, i kawe mai nei i a koutou i te whenua o Ihipa. <sup>37</sup> Mo reira kia mau ki aku tikanga katoa, me aku whakaritenga katoa, mahia ano hoki: ko Ihowa ahau.

## Chapter 20

<sup>1</sup> Korero ano a Ihowa ki a Mohi, i mea, <sup>2</sup> Me korero ano koe ki nga tama a Iharaira, Ahakoa no nga tama a Iharaira, no te manene ranei e noho ana i a Iharaira, te tangata i hoatu e ia tona uri ki a Moreke, ina, me whakamate ia: me aki e nga tangata whenua ki te kohatu. <sup>3</sup> Ka u atu ano hoki

toku mata ki taua tangata, a ka hatepea atu e ahau i roto i tona iwi; mona i hoatu i tona uri ki a  
 Moreke, whakapoke ai i toku wahi tapu, whakanoa ai hoki i toku ingoa tapu. <sup>4</sup> A ki te huna e nga  
 tangata whenua o ratou kanohi, kei kite i taua tangata, ina hoatu e ia tona uri ki a Moreke, a e kore  
 e whakamate i a ia; <sup>5</sup> Ko reira u atu ai toku mata ki taua tangata, ki ona whanaunga hoki, a ka  
 hatepea atu e ahau i roto i to ratou iwi, a ia, me nga tangata katoa e whai ana i a ia, puremu atu ai,  
 puremu ai ki a Moreke. <sup>6</sup> Ki te tahuri ano tetahi wairua ki nga waka atua, ki nga mata maori, whai  
 atu ai, puremu atu ai ki a ratou, ka u atu ano toku mata ki taua wairua, a ka hatepea atu i roto i tona  
 iwi. <sup>7</sup> Engari whakatapua koutou, kia tapu ano hoki: ko Ihowa hoki ahau, ko to koutou Atua. <sup>8</sup> A  
 kia mau ki aku tikanga, me mahi ano hoki: ko Ihowa ahau e whakatapu nei i a koutou. <sup>9</sup> Ki te kanga  
 hoki e tetahi tona papa, tona whaea ranei, me whakamate rawa: kua kanga e ia a tona papa, whaea  
 ranei; ko runga ano i a ia ona toto.  
<sup>10</sup> A ki te puremu tetahi ki te wahine a te tangata, me whakamate rawa te kaipuremu ki te  
 wahine a tona hoa, te kaipuremu raua ko te wahine i puremutia. <sup>11</sup> Me te tangata hoki i takoto ki  
 te wahine a tona papa, kua hurahia e ia tona papa kia takoto tahanga: me whakamate raua tokorua;  
 ko runga i a raua o raua toto. <sup>12</sup> Ki te takoto hoki te tangata ki tana hunaonga wahine, me whakamate  
 rawa raua tokorua: he mahi anuanu ta raua; ko runga i a raua o raua toto. <sup>13</sup> Ki te takoto hoki he  
 tangata ki a raua whakatane ki te pera me te takoto ki te wahine, he mahi whakarihariha ta raua,  
 me whakamate rawa raua; ko runga i a raua o raua toto. <sup>14</sup> Ki te tango hoki te tangata i te wahine  
 raua ko tona whaea, he mea kino tena: me taha ratou ki te ahi, te tane me nga wahine: kei whai  
 kino koutou i roto i a koutou. <sup>15</sup> Ki te takoto hoki te tangata ki te kararehe, me whakamate rawa  
 ia: me whakamate ano hoki te kararehe. <sup>16</sup> Ki te whakatata hoki te wahine ki tetahi kararehe, a ka  
 takoto ki a ia, me whakamate e koe te wahine raua ko te kararehe: me whakamate rawa raua; ko  
 runga i a raua o raua toto. <sup>17</sup> Ki te tango hoki te tangata i tona tuahine i te tamahine a tona papa, i  
 te tamahine ranei a tona whaea, a ka kite i a ia e takoto tahanga ana, a ka kite ano te wahine i a ia  
 e takoto tahanga ana: he mea kino tena; a ka hatepea atu raua i te tiro hanga a nga tamariki o to  
 raua iwi: nana hoki i hura tona tuahine kia takoto tahanga; ka waha e ia tona kino. <sup>18</sup> Ki te takoto  
 hoki te tangata ki te wahine i a ia e paheke ana, a ka hura i a ia kia takoto tahanga; kua takoto kau  
 i a ia tona puna, kua whakaaturia ano e te wahine te puna o ona toto: a ka hatepea atu raua i roto i  
 to raua iwi. <sup>19</sup> Kua ano e hurahia kia takoto tahanga te teina, tuakana ranei, o tou whaea, te tuahine  
 ranei o tou papa: e hurahia ana hoki e ia tona whanaunga tupu: ka waha e raua to raua kino. <sup>20</sup> Ki  
 te takoto hoki he tangata ki te wahine a tona matua keke, kua hurahia e ia kia takoto tahanga tona

matua keke: ka waha e raua to raua hara: ka mate urikore raua. <sup>21</sup> Ki te tango hoki te tangata i te wahine a tona tuakana, teina ranei, he mea poke tena: kua hurahia e ia tona tuakana, teina ranei, kia takoto tahanga; e kore raua e whai tamariki.

<sup>22</sup> Engari kia mau ki aku tikanga katoa me aku whakaritenga katoa, me mahi ano hoki: kei whakaruakina koutou e te whenua ka kawea nei koutou e ahau ki reira noho ai. <sup>23</sup> Kua ano e haere i runga i nga ritenga o te iwi ka peia nei e ahau i to koutou aroaro: na ratou hoki enei mahi katoa,

koia i whakarihariha ai ahau ki a ratou, <sup>24</sup> I mea ai hoki ki a koutou, Ka riro to ratou whenua i a koutou, ka hoatu hoki e ahau ki a koutou hei kainga pumau, he whenua e rerengia ana e te waiu, e

te honi: ko Ihowa ahau, ko to koutou Atua, i wehe mai nei i a koutou i roto i nga iwi. <sup>25</sup> Mo reira me wehe ke e koutou nga kararehe pokekore me nga mea poke, nga manu hoki, nga mea poke me nga mea pokekore? kei ai hei take whakarihariha mo o koutou wairua tetahi kararehe, manu ranei, tetahi mea ranei e ngahue ana i te whenua, o nga mea i wehea atu e ahau i a koutou hei mea poke.

<sup>26</sup> A ka tapu koutou ki ahau: no te mea te tapu ahau, a Ihowa, a kua wehea mai koutou e ahau i roto

i nga iwi, kia waiho maku. <sup>27</sup> Me whakamate rawa ano hoki te tangata, te wahine ranei, he atua maori tona; me te mata maori hoki: me aki raua ki te kohatu: ko runga i a raua o raua toto.

## Chapter 21

<sup>1</sup> Mea ano a Ihowa ki a Mohi, Korero ki nga tohunga, ki nga tama a Arona, mea atu ki a ratou,

Kaua tetahi e whakapoke i a ia mo te tupapaku o tona iwi: <sup>2</sup> Engari mo tona whanaunga, mo te mea e tata ana ki a ia, mo tona whaea, mo tona papa, mo tana tama, mo tana tamahine, mo tona

tuakana, teina ranei, <sup>3</sup> Mo tona tuahine hoki, ki te mea he wahine, he mea e tata ana ki a ia, a kahore

ana tane: e ahei ana kia poke ia mona. <sup>4</sup> Kaua ia, he ariki nei no tona iwi, e whakapoke i a ia kia

noa. <sup>5</sup> Kaua e whakatiwhaia o ratou matenga, kaua hoki e heua nga taha o o ratou pahau, kaua ano

hoki e haea to ratou kikokiko. <sup>6</sup> Kia tapu ratou ki to ratou Atua, kaua hoki e whakanoatia te ingoa o to ratou Atua: no te mea ko ratou hei whakahere i nga whakahere ahi a Ihowa, i te kai a to ratou

Atua: mo reira kia tapu ratou. <sup>7</sup> Kaua ratou e tango i te wahine kairau, i te mea noa ranei, hei wahine; kaua ano hoki ratou e tango i te wahine i whakarerea e tana tane: he tangata tapu hoki ia na tona

Atua. <sup>8</sup> Mo reira me whakatapu ia e koe, mana hoki e whakahere te kai a tou Atua: kia tapu ia ki

9  
a koe: he tapu hoki ahau, a Ihowa, tou kaiwhakatapu. Me te tamahine hoki a tetahi tohunga, ki te whakanoa ia i a ia, ki te kairau, kua whakanoatia e ia tona papa: me tahu ki te ahi.

10  
Me te tino tohunga hoki i roto i ona teina, te tangata i ringihia nei tona matenga ki te hinu whakawahi, a i whakatohungatia hei kakahu i nga kakahu, kua e tukua e ia ona makawe kia mahora

11  
noa, kua ano hoki e haea ona kakahu; Kua hoki ia e haere atu ki tetahi tupapaku mate, kua

12  
ano hoki ia e whakapoke i a ia mo tona papa, mo tona whaea ranei; Kua hoki ia e haere ki waho o te wahi tapu, kei noa i a ia te wahi tapu o tona Atua; kei runga hoki i a ia te karauna o te hinu

13  
whakawahi o tona Atua: ko Ihowa ahau. Me tango ano hoki e ia he wahine i tona wahinetanga.

14  
He pouaru, he wahine ranei i whakarerea, he wahine noa ranei, he wahine kairau ranei, kua enei

15  
e tangohia e ia: engari me tango e ia he wahine i roto i tona iwi ake hei wahine. Kua hoki e whakanoatia e ia ona uri roto i tona iwi: ko Ihowa hoki ahau te whakatapu nei i a ia.

16  
I korero ano a Ihowa ki a Mohi, i mea, 17 Korero ki a Arona, mea atu, Ki te mea he koha to tetahi o ou uri i o ratou whakatupuranga, kua ia e whakatata mai ki te whakahere i te kai a tona

18  
Atua. Kua hoki e whakatata mai tetahi tangata he koha tona: te matapo, te kopa, te tangata he

19  
ihu parehe tona, i hira ake ranei tetahi wahi ona, Te tangata ranei i whati te waewae, i whati

20  
ranei te ringa, Te tuara piko ranei, te mea i puwhenua te tupu, ki te papahewa ranei tona kanohi, ki te mea ranei he papaka, he hakimaki ranei tona, ki te mea ranei kua komurumurua ona mea;

21  
Kua tetahi o nga uri o te tohunga, o Arona, ki te mea he koha tona, e whakatata mai ki te whakahere i nga whakahere ahi a Ihowa: he koha tona, kua ia e whakatata ki te whakahere i te kai

22  
a tona Atua. Me kai e ia te kai a tona Atua, te mea tapu rawa, me te mea tapu. 23 Otiia kua ia e haere ki te arai, e whakatata ranei ki te aata; he koha hoki tona; kei noa i a ia oku wahi tapu: ko

24  
Ihowa hoki ahau te whakatapu nei i a ratou. Ko nga korero enei a Mohi ki a Arona ratou ko ana

tama, ki nga tama katoa ano hoki a Iharaira.

## Chapter 22

1  
Korero ano a Ihowa ki a Mohi, i mea, 2 Korero ki a Arona ratou ko ana tama kia wehea ratou i nga mea tapu a nga tama a Iharaira, e whakatapua ana e ratou maku kei noa toku ingoa tapu: ko

3  
Ihowa ahau. Mea atu ki a ratou, Ki te whakatata tetahi o o koutou uri katoa, puta noa i o koutou whakatupuranga, ki nga mea tapu e whakatapua ana e nga tama a Iharaira ma Ihowa, me te mau



ano tona poke, ka hatepea atu taua wairua i toku aroaro: ko Ihowa ahau. <sup>4</sup> Ki te mea he repera tetahi o nga uri o Arona, ki te mea ranei he rere tona; kei kainga e ia nga mea tapu; kia kore ra ano ona poke. Ki te pa hoki tetahi ki te mea i poke i te tupapaku, ki te tangata ranei kua paheke atu tona purapura moenga; <sup>5</sup> Ki te pa ranei tetahi ki te mea ngoki, e poke ai ia, ki te tangata ranei e poke ai ia, ahakoa he aha ranei, he aha ranei, tona poke: <sup>6</sup> Ka poke a ahiahi noa te tangata i pa ki taua mea, kua ano hoki ia e kai i nga mea tapu, ki te kahore i horoia e ia tona kikokiko ki te wai. <sup>7</sup> A, ka to te ra, ka kore ona poke; a muri iho, ka kai i nga mea tapu, no te mea ko tana kai tena: <sup>8</sup> He mea mate maori, i haea ranei e te kirehe, kua tena e kainga e ia, kei poke: ko Ihowa ahau. <sup>9</sup> Ina, kia mau ratou ki taku i whakarite ai, kei whai hara, a ka mate ki te whakanoatia e ratou: ko Ihowa ahau te whakatapu nei i a ratou.

<sup>10</sup> Kua tetahi manene e kai i te mea tapu: kua te tangata e noho ana ki te tohunga, te kaimahi ranei, e kai i te mea tapu. <sup>11</sup> Otiia ki te hokona tetahi tangata e te tohunga ki tana moni, e kai ano ia; me nga tangata ano i whanau ki tona whare, e kai ano ratou i tana kai. <sup>12</sup> He tamahine hoki na te tohunga kua riro i te tangata iwi ke, kua ia e kai i te whakahere poipoi o nga mea tapu. <sup>13</sup> Otiia ki te mea he pouaru te tamahine a te tohunga, i whakarerea atu ranei, a kahore ana tamariki, kua hoki mai ano ki te whare o tona papa, kua pera me ia i tona taitamahinetanga, e kai ano ia i te kai a tona papa; kua ia te tangata ke e kai. <sup>14</sup> A ki te kai pohehe te tangata i te mea tapu, me tapiri e ia te whakarima o taua mea, a ka homai tahi me te mea tapu ki te tohunga. <sup>15</sup> Kei whakanoatia e ratou nga mea tapu a nga tama a Iharaira, e whakaherea ana ma Ihowa; <sup>16</sup> Kei meinga ratou kia whakawaha i te kino o te he, ina kai i a ratou mea tapu: ko Ihowa hoki ahau te whakatapu nei i a ratou.

<sup>17</sup> I korero ano a Ihowa ki a Mohi, i mea, <sup>18</sup> Korero ki a Arona, ki ana tama, ki nga tama katoa ano a Iharaira, mea atu ki a ratou, Ko te tangata o te whare o Iharaira, o nga manene ranei i roto i a Iharaira, e mea ana ki te tapae i tana whakahere, he ki taurangi, he mea tuku noa ranei nana, ta ratou e tapae ai ki a Ihowa hei tahunga tinana; <sup>19</sup> Kia manakohia ai koutou, ko ta koutou e tapae ai hei te toa kohakore, no roto i nga kau, i nga hipi ranei, i nga koati ranei. <sup>20</sup> Kua rawa ia e whakaherea tetahi mea he koha tona: no te mea e kore e manakohia hei mea ma koutou. <sup>21</sup> Ki te whakaherea ano hoki e tetahi he patunga mo te pai ki a Ihowa, hei whakamana mo te ki taurangi, hei whakahere tuku noa ake ranei, he kau, he hipi ranei, hei te mea kohakore, kia manakohia ai: <sup>22</sup> kei whai koha. He matapo, he whati, he kopa, kua whai puku, he papaka, he mea hakihaki ranei,

kaua ena e whakaherea ma Ihowa, kaua ano e homai hei whakahere ahi ki runga ki te aata ma  
<sup>23</sup> Ihowa. He puru, he reme ranei, e hira ake ana, kua kore ranei tetahi wahi ona, e whakaherea ano  
<sup>24</sup> tena e koe hei whakahere noa ake; otiia e kore e manakohia mo te ki taurangi. Kaua e whakaherea  
ma Ihowa te mea i romia, te mea ranei i kurua, i unuhia ranei, i pokaia ranei; kaua ano hoki e pena  
<sup>25</sup> i to koutou whenua. Kaua ano hoki tetahi o enei e tapaea hei kai ma to koutou Atua, ina homai  
e te tangata iwi ke; he whakahe hoki kei roto, he koha kei roto: e kore enei e manakohia hei mea  
<sup>26</sup> ma koutou. I korero ano a Ihowa ki a Mohi, i mea, <sup>27</sup> Ka whanau he kau, he hipi, he koati ranei,  
kia whitu nga ra e waiho, ai ki tona whaea; a i te waru o nga ra, i o muri iho hoki, ka manakohia  
<sup>28</sup> hei whakahere ahi ma Ihowa. Otiia ahakoa he kau, he hipi ranei, kaua raua ko tana kua e patua  
<sup>29</sup> i te rangi kotahi. Ka patua ano e koutou he patunga whakawhetai ki a Ihowa, hei te patunga e  
<sup>30</sup> manakohia ai koutou. Me kai i taua rangi ano; kaua e waiho tetahi wahi ki te ata: ko Ihowa ahau.  
<sup>31</sup> Na, kia mau ki aku whakahau, mahia hoki; ko Ihowa ahau. <sup>32</sup> Kaua ano e whakanoatia toku  
ingoa tapu; engari me whakatapu ahau i roto i nga tama a Iharaira: ko Ihowa ahau te whakatapu  
<sup>33</sup> nei i a koutou, I whakaputa mai nei hoki i a koutou i te whenua o Ihipa, kia waiho ai hei Atua  
mo koutou: ko Ihowa ahau.

### Chapter 23

<sup>1</sup> I korero ano a Ihowa ki a Mohi, i mea, <sup>2</sup> Korero ki nga tama a Iharaira, mea atu ki a ratou,  
Ko nga hakari nunui a Ihowa, e karangatia e koutou hei huihuinga tapu, ko enei aku hakari. <sup>3</sup> E  
ono nga ra e mahia ai te mahi; ko te whitu ia o nga ra he hapati okiokinga, he huihuinga tapu: kaua  
tetahi mahi e mahia: he hapati tena no Ihowa, i o koutou nohoanga katoa.  
<sup>4</sup> Ko nga hakari nunui enei a Ihowa, ko nga huihuinga tapu e karangatia e koutou i nga wa e  
<sup>5</sup> rite ai. Kei te marama tuatahi, kei te tekau ma wha o te marama, i te ahiahi, ko te kapenga a Ihowa.  
<sup>6</sup> A i te tekau ma rima o nga ra o taua marama ano ko te hakari taro rewenakore a Ihowa: e whitu  
nga ra e kai ai koutou i te taro rewenakore. <sup>7</sup> Hei te ra tuatahi he huihuinga tapu ma koutou: kaua  
tetahi mahi a te kaimahi e mahia. <sup>8</sup> Engari kia whitu nga ra e whakahere ai koutou i te whakahere  
<sup>9</sup> ahi ma Ihowa; a i te whitu o nga ra he huihuinga tapu: kaua e mahia tetahi mahi a te kaimahi. I

10  
korero ano a Ihowa ki a Mohi, i mea, Korero ki nga tama a Iharaira, mea atu ki a ratou, E tae  
koutou ki te whenua e hoatu e ahau ki a koutou, a ka kotia ona hua, me kawe mai tetahi paihere o

11  
nga hua mataati o ta koutou kotinga ki te tohunga: A mana e poipoi te paihere ki te aroaro o

12  
Ihowa, kia manakohia ai mo koutou: me poipoi e te tohunga i te aonga ake o te hapati. Me  
whakahere ano hoki i te ra e poipoia ai e koutou te paihere, he reme toa, hei te mea kohakore, hei

13  
te tau tahi, hei tahunga tinana ki a Ihowa. A, ko te whakahere totokore, kia rua nga whakatekau  
o te epa paraoa, he mea konatu ki te hinu, hei whakahere ahi ma Ihowa, hei kakara reka: me waina

14  
hoki tona ringihanga, ko te whakawha o te hine. Kaua ano hoki e kai i te taro, i te mea pahuhu,  
i nga puku hou ranei, kia taea ra ano te tino ra e kawea ai te whakahere ki to koutou Atua: he tikanga  
pumau ma o koutou whakatupuranga i o koutou nohoanga katoa.

15  
Me tatau ano e koutou i te aonga ake o te hapati, i te ra i kawea ai te paihere mo te whakahere

16  
poipoi; kia tino rite nga hapati e whitu: Kia tae ra ano ki te aonga ake o te whitu o nga hapati ta  
koutou tatau i nga ra e rima tekau; ka whakahere ai koutou i te whakahere totokore, i te mea hou

17  
ki a Ihowa. Me kawe mai e koutou i roto i o koutou nohoanga, kia rua nga taro poipoi e rua nei  
o raua whakatekau o te epa: he mea paraoa, he mea i tunua rewenatia, a ko nga tuapora ena ma

18  
Ihowa. Me whakahere tahi ano me te taro kia whitu nga reme, hei te mea kohakore, hei te tau  
tahi, me tatahi puru kua, me nga hipi toa e rua: hei tahunga tinana ena ki a Ihowa, te whakahere

19  
totokore ano hoki, me nga ringihanga, hei whakahere ahi, hei k akara reka ki a Ihowa. Na ka  
whakaherea tetahi koati toa hei whakahere hara, kia rua ano hoki nga reme toa, hei te tau tahi, hei

20  
patunga mo te pai. Me poipoi ngatahi e te tohunga me te taro o nga tuapora, hei whakahere

21  
poipoi, ki te aroaro o Ihowa, me nga reme e rua: ka tapu ena ki a Ihowa ma te tohunga. Me  
karanga ano i taua tino ra he huihuinga tapu ma koutou: kaua e mahia tetahi mahi a te kaimahi: he

22  
tikanga pumau i o koutou nohoanga katoa, ma o koutou whakatupuranga. A ka kotia nga hua o  
to koutou whenua, kaua e tino whakapotoa nga kokonga o tau mara ina kotia e koe, kaua ano hoki  
e hamua nga toenga o au hua: me waiho ma te rawakore, ma te manene: ko Ihowa ahau, ko to  
koutou Atua.

23  
I korero ano a Ihowa ki a Mohi, i mea, 24  
Korero ki nga tama a Iharaira, mea atu, Hei te  
whitu o nga marama, hei te tuatahi o te marama, he hapati ma koutou, he whakamaharatanga, he

25  
whakatangihanga tetere, he huihuinga tapu. Kaua e mahia tetahi mahi a te kaimahi; engari me

26  
whakahere he whakahere ahi ma Ihowa. I korero ano a Ihowa ki a Mohi, i mea, 27  
Ko te tekau  
ano hoki o tenei marama, o te whitu, hei ra whakamarietanga; hei huihuinga tapu tena ma koutou;

me whakapouri hoki o koutou wairua; me whakahere ano hoki he whakahere ahi ki a Ihowa. <sup>28</sup> A kua rawa e mahia he mahi i taua rangi; he ra whakamarie hoki tena, e mainga ai he whakamarie mo koutou ki te aroaro o Ihowa, o to koutou Atua. <sup>29</sup> Na, ko te wairua e kore e whakapouritia i taua ra, ka hatepea atu i roto i tona iwi. <sup>30</sup> Ki te mahia hoki e tetahi wairua tetahi mahi i taua ra, ka whakangaromia e ahau taua wairua i roto i tona iwi. <sup>31</sup> Kei mahia tetahi mahi: he tikanga pumau tena ma o koutou whakatupuranga i o koutou nohoanga katoa. <sup>32</sup> Hei hapati okiokinga tena mo koutou, me whakapouri o koutou wairau; me whakahapati ta koutou hapati i te iwa o te marama i te ahiahi; i te ahiahi a tae noa ki tetahi ahiahi.

<sup>33</sup> I korero ano a Ihowa ki a Mohi, i mea, <sup>34</sup> Korero ki nga tama a Iharaira, mea atu, Ko te kotahi tekau ma rima o nga ra o tenei marama, o te whitu, te hakari whare wharau ki a Ihowa, kia whitu nga ra. <sup>35</sup> Hei te ra tuatahi he huihuinga tapu: kua e mahia tetahi mahi a te kaimahi. <sup>36</sup> E whitu nga ra e whakahere ai koutou i te whakahere ahi ki a Ihowa: hei te ra waru he huihui tapu mo koutou; a ka whakahere he whakahere ahi ki a Ihowa: he huihui nui tena, kua te mahi a te kaimahi e mahia. <sup>37</sup> Ko nga hakari enei a Ihowa e karangatia e koutou hei huihui tapu, hei whakaherenga mo te whakahere ahi ki a Ihowa, mo te tahunga tinana, mo te whakahere totokore, mo te patunga tapu, mo nga ringihanga, tenei mea i tona rangi, tenei mea i tona ra ngi: <sup>38</sup> Haunga nga hapati a Ihowa, haunga a koutou mea homai noa, haunga a koutou ki taurangi katoa, haunga a koutou whakahere tuku noa katoa e homai ana ki a Ihowa. <sup>39</sup> I te tekau ma rima hoki o nga ra o te whitu o nga marama, ina poto i a koutou te kohikohi nga hua o te whenua, me whakarite e koutou he hakari ki a Ihowa, kia whitu nga ra: ko te ra tuatahi hei hapati, ko te ra tuawaru hoki hei hapati.

<sup>40</sup> Na i te ra tuatahi ka mau ki nga peka rakau papai, ki nga peka nikau, ki nga peka hoki o nga rakau pururu, ki nga wirou o te awa; a ka koa koutou ki te aroaro o Ihowa, o to koutou Atua, kia whitu nga ra. <sup>41</sup> Kia whitu hoki nga ra o te tau e whakarite ai koutou i te hakari ki a Ihowa. Hei tikanga pumau tenei, puta noa i o koutou whakatupuranga: ko a te whitu o nga marama whakaritea ai e koutou. <sup>42</sup> Kia whitu nga ra e noho ai koutou i roto i nga wharau; ko nga tangata whenua katoa o Iharaira me noho i roto i nga wharau: <sup>43</sup> Kia mohio ai o koutou whakatupuranga i meinga e ahau nga tama a Iharaira kia noho i roto i nga wharau, i taku whakaputanga mai i a ratou i te whenua o Ihipa: ko Ihowa ahau, ko to koutou Atua. <sup>44</sup> Na ka korerotia atu e Mohi nga hakari a Ihowa ki nga tama a Iharaira.

## Chapter 24

<sup>1</sup> I korero ano a Ihowa ki a Mohi, i mea, <sup>2</sup> Whakahaua nga tama a Iharaira kia kawea e ratou ki a koe, he hinu oriwa, hei te mea parakore, hei te mea tuki, mo te whakamarama, kia ka tonu ai nga rama. <sup>3</sup> Me whakapai tonu tena e Arona ki waho o te arai o te whakaaturanga, i roto i te tapenakara o te whakaminenga, ki te aroaro o Ihowa, i te ahiahi a tae noa ki te ata: he tikanga pumau, ma o koutou whakatupuranga. <sup>4</sup> Me whakapai tonu e ia nga rama i runga i te turanga parakore o nga rama ki te aroaro o Ihowa. <sup>5</sup> Me tiki ano e koe he paraoa pai, ka tunu ai kia tekau ma rua nga keke: kia rua nga whakatekau o te epa ki te keke kotahi. <sup>6</sup> Ka whakatakoto ai e koe, kia rua nga rarangi, kia ono ki te rarangi kotahi, ki runga ki te tepu parakore i te aroaro o Ihowa. <sup>7</sup> Me maka ano hoki e koe he parakihe parakore ki runga i tetahi rarangi, i tetahi rarangi, kia ai taua mea i runga i te taro hei whakamahara, hei whakahere ahi ki a Ihowa. <sup>8</sup> Me whakararangi tonu e ia, i tenei hapati, i tenei hapati, ki te aroaro o Ihowa, he mea mo nga tama a Iharaira; hei kawenata pumau. <sup>9</sup> A ma Arona ratou ko ana tama tena; me kai e ratou ki te wahi tapu; he tino tapu hoki tena mana i roto i nga whakahere ahi a Ihowa; hei tikanga pumau. <sup>10</sup> A i haere atu i roto i nga tama a Iharaira tetahi tama a tetahi wahine o Iharaira, ko tona papa no Ihipa: na ka whawhai tenei tama a te wahine o Iharaira ki tetahi tangata o Iharaira i roto i te puni; <sup>11</sup> Na ka kohukohu te tama a te wahine o Iharaira i te ingoa o Ihowa, ka kanga hoki: a kawea ana ia e ratou ki a Mohi. A ko te ingoa o tona whaea ko Heromiti, he tamahine na Tipiri, no te iwi o Rana. <sup>12</sup> Na ka hoatu ia e ratou kia tiakina, ma te kupu hoki a Ihowa te tikanga ki a ratou. <sup>13</sup> Na ka korero a Ihowa ki a Mohi, ka mea, <sup>14</sup> Kawea te tangata i kanga ra ki waho o te puni; a, ko nga tangata katoa i rongonui i a ia, me popoki o ratou ringa ki tona matenga, ka aki ai te whakaminenga katoa i a ia ki te kohatu. <sup>15</sup> Me korero ano e koe ki nga tama a Iharaira, me ki atu, Ki te kanga tetahi tangata i tona Atua, ka waha e ia tona hara. <sup>16</sup> A, ko te tangata e kohukohu i te ingoa o Ihowa, me tino whakamate ia; me tino aki ia e te whakaminenga ki te kohatu: ko te manene raua tahi ko te tangata whenua ka whakamatea, ina kohukohua e ia te ingoa o Ihowa. <sup>17</sup> Ki te whakamate hoki tetahi i tetahi tangata me tino whakamate ano ia; <sup>18</sup> Ki te whakamate hoki tetahi i te kararehe, me utu e ia; he kararehe mo te kararehe. <sup>19</sup> Ki te mate hoki i te tangata tetahi wahi o tona hoa; me mea ki a ia tana i mea ai: <sup>20</sup> He whati mo te whati, he kanohi mo te kanohi, he niho mo te niho: ko te

mate i meatia e ia ki te tangata, me mea ano ki a ia. <sup>21</sup> Ki te whakamate hoki tetahi i te kararehe,  
 me utu e ia: ki te whakamate hoki tetahi i te tangata, me whakamate ano ia. <sup>22</sup> Kia kotahi ano ta  
 koutou whakawa mo te manene, mo te tangata whenua: ko Ihowa hoki ahau, ko to koutou Atua.  
<sup>23</sup> Na ka korero a Mohi ki nga tama a Iharaira, a kawea ana e ratou ki waho o te puni te tangata  
 nana te kanga, a akina ana hoki ki te kamaka. A meatia ana e nga tama a Iharaira ta Ihowa i whakahau  
 ai ki a Mohi.

## Chapter 25

<sup>1</sup> Korero ano a Ihowa ki a Mohi i Maunga Hinai, i mea, <sup>2</sup> Korero ki nga tama a Iharaira, mea  
 atu ki a ratou, E tae koutou ki te whenua e hoatu e ahau ki a koutou, na ka whakahapati te whenua  
 i tetahi hapati ki a Ihowa. <sup>3</sup> E ono nga tau e whakatongia ai e koe tau mara, e ono hoki nga tau e  
 tapatapahia ai e koe tau mara waina, e kohia ai hoki ona hua; <sup>4</sup> Ko te whitu ia o nga tau hei hapati  
 okiokinga mo te whenua, hei hapati ki a Ihowa: kua e whakatongia tau mara, e tapatapahia ranei  
 tau mara waina. <sup>5</sup> Kua e kotia te mea i tupu noa ake i tera kotinga au, kua ano e whakiiia nga  
 karepe o tau waina kihai nei i mahia: he tau okiokinga hoki tena mo te whenua. <sup>6</sup> A hei kai ma  
 koutou te hapati o te whenua; mau, ma tau pononga tane, ma tau pononga wahine, ma tau kaimahi,  
 ma tou manene hoki e noho ana i a koe; <sup>7</sup> Ma au kararehe hoki, ma te kirehe hoki o tou whenua,  
 ona hua katoa, hei kai.  
<sup>8</sup> A me tatau e koe kia whitu nga tau hapati, kia whitu nga whitu o nga tau; a ko taua takiwa,  
 ko nga tau hapati e whitu, ka kiia e koe e wha tekau ma iwa tau. <sup>9</sup> Katahi ka whakatangihia e koe  
 te tetere tangi nui i te tekau o nga ra o te whitu o nga marama; ko a te ra whakamarietanga mea ai  
 koutou kia paku atu te tangi o te tetere puta noa i to koutou whenua. <sup>10</sup> A me whakatapu te rima  
 tekau o nga tau, ka karanga ai i te haere noa puta noa i te whenua ma nga tangata katoa o te whenua:  
 hei tiupiri nui tena ma koutou; a me hoki koutou ki tona kainga, ki tona kainga, me hoki ano ki ona  
 whanaunga, ki ona wha naunga. <sup>11</sup> Ko tena tau, ko te rima tekau, hei tiupiri ma koutou: kua e rui,  
 kua e kokoti i te mea tupu noa ake o tena tau, kua hoki e whakiiia nga waina kihai i mahia. <sup>12</sup> Ko  
 te tiupiri hoki ia; kia tapu ki a koutou; ko ona hua o te mara hei kai ma koutou. <sup>13</sup> Me hoki koutou  
 i tenei tau tiupiri, ki tona kainga, ki tona kainga, <sup>14</sup> Ki te hokona atu ano e koe tetahi mea ki tou

15  
 hoa, ki te hokona mai ranei tetahi mea e te ringa o tou hoa, kua e tukinotia tetahi e tetahi: Kia  
 rite au utu ki tou hoa ki te maha o nga tau i muri i te tiupiri; kia rite ano ki te maha o nga tau hua  
 16  
 tana hoko ki a koe. Kia rite tau whakanui i te utu o taua mea ki te maha o nga tau, kia rite hoki  
 taua whakaiti i ona utu ki te torutoru o nga tau: e rite ana hoki ki te maha o nga tau hua tana hoko  
 17  
 ki a koe: A kua e tukino tetahi ki tetahi, engari me wehi koe ki tou Atua: ko Ihowa hoki ahau,  
 18  
 ko to koutou Atua. Mo reira me mahi e koutou aku tikanga, me pupuru aku whakaritenga, me  
 19  
 mahi hoki; a ka noho humarie koutou i runga i te whenua, A ka tukua ona hua e te whenua, a  
 20  
 ka kai koutou ka makona, ka noho humarie hoki ki reira. A ki te mea koutou, He aha he kai ma  
 21  
 tatou i te whitu o nga tau? titiro hoki, e kore tatou e rua, e kore hoki e kohi i a tatou hua: Maku  
 ra e whakahau iho taku manaaki ki a koutou i te ono o nga tau, a ka whai hua mo nga tau e toru.  
 22  
 A ka rui koutou i te waru o nga tau, ka kai ano i nga hua pakoko; a tae noa ki te iwa o nga tau,  
 me kai nga mea pakoko, kia riro ra ano nga hua o tena tau.  
 23  
 Kua e hokona te whenua, he mea oti tonu atu; noku hoki te whenua; he manene hoki koutou,  
 24  
 he noho noa ki ahau. Me whakaae hoki ki te utu e hoki ai te whenua, i to koutou whenua katoa.  
 25  
 Ki te rawakoretia tou teina, a ka hokona e ia tetahi wahi o tona kainga, me haere mai tona  
 26  
 whanaunga e tata rawa ana ki a ia, ka utu i te mea i hokona atu e tona teina kia hoki ai. A ki te  
 27  
 kahore he kaiutu a tetahi tangata, a ka whiwhi taonga ia a ka taea ano e ia te utu; Na me tata e  
 ia nga tau i hokona ai, a ka whakahoki i te tuhene ki te tangata i hokona atu ai; a ka hoki ai ia ki  
 28  
 tona kainga. Otiia ki te kahore e taea e ia te whakahoki mai ki a ia ano, na me waiho tana i hoko  
 ai ki te ringa o te tangata nana i hoko, a tae noa ki te tau tiupiri: a i te tiupiri ka riro, a ka hoki ia ki  
 29  
 tona kainga. Ki te hokona e te tangata he whare nohoanga i te pa taiepa, e ahei ia te utu kia hoki  
 30  
 mai ano i roto i te tau kotahi i muri i te rironga: kotahi tino tau hei whakahokinga mana. A ki te  
 kahore e utua, a tino taka noa te tau, katahi ka whakapumautia mo ake tonu atu te whare i te pa  
 31  
 taiepa mo te tangata nana i hoki, puta noa i ona whakatapuranga: e kore e riro i te tiupiri. Ko  
 nga whare ia o nga kainga, kahore nei he taiepa a tawhio noa, ka kiia e rite ana ki nga parae o te  
 32  
 whenua: ka hoki ano ena ina utua, ka riro ano i te tuipiri. Ko nga pa ia o nga Riwaiti, me nga  
 33  
 whare o nga pa e nohoia ana e ratou, e hoki ki nga Riwaiti, ahakoa utua i tehea wa. A, mehemea  
 na tetahi o nga Riwaiti i utu, na ka riro te whare i hokona ra me tona pa i te tiupiri; ko nga whare  
 34  
 hoki o nga pa o nga Riwaiti to ratou kainga pumau i roto i nga tama a Iharaira. Ko te mara ia i

te taha o o ratou pa kaua e hokona; no te mea he wahi pumau tena no ratou. <sup>35</sup> A ki te rawakoretia tou teina, a ka wiri tona ringa i roto i a koe; me atawhai e koe; me noho manene ia, me noho noa ranei i a koe. <sup>36</sup> Kaua e tangohia i a ia he moni whakatuputupu, he whakanuinga ranei; engari me wehi koe ki tou Atua; kia noho ai tou teina i a koe. <sup>37</sup> Kaua tau moni e hoatu ki a ia hei mea whakatuputupu, kaua ano hoki au kai e hoatu ki a ia, me te whakaaro ano ki tetahi whakanuinga ake. <sup>38</sup> Ko Ihowa ahau, ko to koutou Atua, i kawe mai nei i a koutou i te whenua o Ihipa, e mea nei kia hoatu te whenua o Kanaana ki a koutou kia waiho ano ahau hei Atua mo koutou. <sup>39</sup> A ki te rawakoretia tou teina e noho ana i roto i a koe, a ka hokona ki a koe; kaua ia e whakamahia e koe ki te mahi pononga; <sup>40</sup> Kia rite ia i roto i a koe ki te kaimahi, ki te noho noa; ka mahi ano ia ki a koe, a tae noa ki te tau tiupiri: <sup>41</sup> Ko reira ia mawehe ai i a koe, ratou ko ana tamariki, a ka hoki ki ona whanaunga, ka hoki ano ki te kainga o ona matua. <sup>42</sup> Ko ratou hoki aku pononga, i whakaputaina mai ai e ahau i te whenua o Ihipa; kaua ratou e hokona hei pononga. <sup>43</sup> Kaua e taikaha tau whakarangatira ki a ia; engari me wehi ki tou Atua. <sup>44</sup> Tena ko nga pononga tane me nga pononga wahine mau; me hoko e koe i nga iwi i tetahi taha ou, i tetahi taha, he pononga tane, he pononga wahine mau. <sup>45</sup> Ma koutou ano hoki e hoko etahi o nga tamariki a nga manene e noho ana i roto i a koutou, etahi hoki o roto o o ratou hapu i roto i a koutou, o nga mea i whanau i a ratou ki to koutou whenua: a puritia iho ma koutou. <sup>46</sup> Me waiho hoki ena e koutou hei taonga tupu e tukua iho kia puritia e a koutou tama i muri i a koutou; hei pononga ratou ma koutou ake ake: kaua ia e taikaha ta koutou whakarangatira ki a koutou ano, ki o koutou teina, ki nga tama a Iharaira. <sup>47</sup> Ki te whai rawa hoki te manene, noho noa ranei, i roto i a koe, a ka rawakoretia tou teina i tona taha, a ka hoko i a ia ki te manene, ki te noho noa ranei i roto i a koe, ki te toronga ranei o te hapu o te manene: <sup>48</sup> E whakahokia ano ia mo te utu i muri i tona hokonga; ma tetahi o ona teina ia e whakahoki. <sup>49</sup> Ma tona matua keke, ma te tamaiti ranei a tona matua keke ia e whakahoki, ma tetahi ranei o ona whanaunga tupu o tona hapu ia e whakahoki; mana ano ranei ia e whakahoki, ki te taea e ia. <sup>50</sup> Na ka tatau ia, raua ko te tangata nana ia i hoko, ka timata i te tau i hokona ai ia ki a ia, tae noa ki te tau tiupiri: a ka rite te utu e hokona ai ia ki te maha o nga tau; kia rite ki o te kaimahi ona ra ki a ia. <sup>51</sup> Ki te maha ake nga tau, kia rite ki ena te utu mo tona hokinga e whakahokia atu e ia i roto i te moni i hokona ai ia. <sup>52</sup> A ki te torutoru nga tau e toe ana ki te tau tiupiri, na ka tatau raua; a kia rite ki ona tau te utu e whakahokia e ia ki a ia. <sup>53</sup> Ko tona noho ki a ia kia rite ki ta te kaimahi e utua ana i te tau: kaua hoki tera e whakatupu rangatira nanakia ki a ia i tau tirohanga.



54

A ki te kahore ia e hokona i enei tikanga, na me haere atu ia i te tau tiupiri, ratou tahi ko ana tamariki. <sup>55</sup> He pononga hoki ki ahau nga tama a Iharaira; ko aku pononga ratou i whakaputaina mai e ahau i te whenua o Ihipa; ko Ihowa ahau, ko to koutou Atua.

## Chapter 26

<sup>1</sup> Kei hanga koutou he whakapakoko ma koutou, kei whakaara ranei he whakapakoko, he mea whaowhao, he pou ranei, kaua ano hoki he kohatu ahua ki to koutou whenua hei koropikotanga atu: ko Ihowa hoki ahau, ko to koutou Atua. <sup>2</sup> Kia mau ki aku hapati, kia hopohopo ano ki toku wahi tapu: ko Ihowa ahau. <sup>3</sup> Ki te haere koutou i runga i aku tikanga, a ka pupuri i aku whakahua, ka mahi hoki; <sup>4</sup> Na ka hoatu e ahau he ua ki a koutou i tona po ano, a ka tukua ona hua e te whenua, a ka hua nga hua o nga rakau o te parae: <sup>5</sup> A ka tutuki atu ta koutou patunga witi ki te whakiinga waina, me te whakiinga waina ki te wa ruinga; a ka kai koutou i ta koutou taro, ka makona, ka u ano te noho ki to koutou whenua. <sup>6</sup> A ka tukua iho e ahau te ata noho ki te whenua, a ka takoto iho koutou, kahore ano hoki he tangata hei mea i a koutou kia wehi: ka whakakahoretia atu ano hoki e ahau nga kirehe kino i te whenua, e kore ano hoki te hoari e tika na waenga o to koutou whenua. <sup>7</sup> A ka whaia e koutou o koutou hoariri, a ka hinga ratou i te hoari ki to koutou aroaro. <sup>8</sup> Ka whaia hoki te rau kotahi e te tokorima o koutou, a ka whati nga mano kotahi tekau i te rau kotahi o koutou: na ka hinga o koutou hoariri i te hoari ki to koutou aroaro. <sup>9</sup> Ka whai whakaaro hoki ahau ki a koutou, a ka meinga koutou kia hua, kia tini; a ka pumau taku kawenata ki a koutou. <sup>10</sup> A ka kai koutou i te kai kua roa e pakoko ana, a ka whakaputa i te pakoko ki waho mo te hua hou. <sup>11</sup> A ka whakaturia e ahau taku tapenakara ki waenganui i a koutou, e kore ano toku wairua e whakarihariha ki a koutou. <sup>12</sup> Ka haereere ano hoki ahau i roto i a koutou, a hei Atua ahau mo koutou, ko koutou hoki hei iwi maku. <sup>13</sup> Ko Ihowa ahau, ko to koutou Atua i kawhe mai nei i a koutou i te whenua o Ihipa, kei waiho hei pononga ma ratou; motu pu hoki ahau nga here o to koutou ioka, a meinga ana koutou kia haere tu. <sup>14</sup> Tena ko tenei, ka kore koutou e whakarongo ki ahau, ka kore e mahi i enei whakahau katoa; <sup>15</sup> A ka whakahaweia ki aku tikanga, ka whakarihariha ranei o koutou wairua ki aku whakaritenga, a kahore e mahia aku whakahau katoa, engari ka whakataka taku kawenata: <sup>16</sup> Na ka meinga ano

hoki tenei e ahau ki a koutou; ka meinga e ahau hei rangatira mo koutou te pawera, te kohi, me te kirika, hei ngau i nga kanohi, hei whakapouri i te ngakau: a ka maumau ta koutou rui i a koutou

17 purapura; no te mea ka kainga e o koutou hoariri. A ka u atu toku mata ki a koutou, a ka patua koutou i te aroaro o o koutou hoariri, ka meinga hei kingi mo koutou te hunga e kino ana ki a

18 koutou; a ka rere koutou, ahakoa kahore he kaiwhai. A ki te kahore tonu koutou e rongu ki ahau

19 i enei meatanga, na, e whitu atu aku pakinga i a koutou mo o koutou hara. Ka whati ano i ahau te whakapehapeha o to koutou kaha; a ka meinga to koutou rangi kia whakarino, to koutou whenua

20 hoki kia whakaparahi: A ka poto kau o koutou uaua: no te mea e kore to koutou whenua e tuku

21 ake i ona hua, e kore ano hoki e hua nga hua o nga rakau o te whenua. A, ki te anga ke atu ta koutou haere i ahau, ki te kore e rongu ki ahau; na ka hoatu e ahau kia whitu atu ano nga whiu ki

22 a koutou, kia rite ki o koutou hara. Ka tukua ano e ahau te kirehe koraha ki a koutou, hei kawhaki i a koutou tama, hei whakamoti i a koutou kararehe, hei mea i a koutou kia torutoru; a ka ururuatia

23 o koutou huanui. A ki te kahore koutou e hoki ake ki te pai i enei meatanga aku, a ka anga ke

24 atu koutou i ahau; Heoi ka anga ke atu hoki ahau i a koutou; a ka whiua koutou e ahau, e ahau

25 ano nei, kia whitu atu ano, mo o koutou hara. A ka kawea e ahau he hoari ki a koutou, hei tohe i te utu mo taku kawenata: a ka huihui koutou ki roto ki o koutou pa; a ka tukua e ahau te mate

26 uruta ki a koutou; a ka hoatu koutou ki te ringa o te hoariri. Ki te whati i ahau ta koutou tokotoko, ara te taro, ka tunua ta koutou taro e nga wahine kotahi tekau ki te oumu kotahi, a ka whakahokia

27 e ratou ta koutou taro, he mea pauna: a ka kai koutou a e kore e makona. A ki te kahore koutou

28 e rongu ki ahau i enei meatanga katoa, a ka anga ke atu ano koutou i ahau; Katahi ahau ka tahuri

29 kino atu i a koutou; a maku nei ano koutou e papaki, e whitu atu pakinga, mo o koutou hara. A e kai koutou i te kikokiko o a koutou tama, ka kainga hoki e koutou te kikokiko o a koutou tamahine.

30 A ka ngaro i ahau a koutou wahi teitei, ka tapahia ano hoki a koutou, whakapakoko, ka maka o koutou tinana ki runga ki nga tinana o a koutou whakapakoko; a ka whakarihariha ano hoki toku

31 wairua ki a koutou. Ka ururua ano i ahau o koutou pa, ka tuheatia hoki o koutou wahi tapu, e

32 kore ano hoki ahau e hongu ki a koutou kakara reka. A ka tuhea i ahau te whenua; e miharotia

33 ai e o koutou hoariri e noho ana i reira. A ka whakamararatia koutou ki roto ki nga tauwiwi, ka maunu hoki i ahau te hoari hei whai i a koutou: a ka tuheatia to koutou whenua, ka ururuatia hoki

34 o koutou pa. Ko reira koa ai te whenua i ona hapati, i nga ra katoa ona e takoto tuhea ana, i a koutou hoki i te whenua o o koutou hoariri; ko reira hoki te whenua okioki ai, koa ai hoki i ona

<sup>35</sup> hapati. Ka okioki i nga ra katoa o tona tuheatanga; ko te okioki kihai i a ia i o koutou hapati, i  
<sup>36</sup> a koutou e noho ana i reira. Tena ko nga morehu o koutou ka unga e ahau he whakangohe ki o  
 ratou ngakau i nga whenua o o ratou hoariri; a ka whati ratou i te ngaehere rau rakau e aia ana; a ka  
<sup>37</sup> rere ratou, ano e rere ana i te hoari; a ka hinga ahakoa kahore he kaiwhai. A ka tutetute ratou  
 tetahi ki tetahi, ano e whaia ana e te hoari, i te mea kahore he kaiwhai: a ka kore he turanga ake  
<sup>38</sup> mo koutou ki te aroaro o o koutou hoariri. A ka ngaro koutou i nga tauwiwi, ka pau ano i te whenua  
<sup>39</sup> o o koutou hoariri. A, ko nga toenga o koutou, ka memeha haere i roto i to ratou kino i nga  
 whenua o o koutou hoariri; ka memeha haere ratou i roto i nga kino o ratou ko o ratou matua.  
<sup>40</sup> A ka whakina e ratou to ratou kino, me te kino o o ratou matua, i to ratou haranga i hara ai  
<sup>41</sup> ki ahau, me to ratou haerenga ketanga atu i taku, I anga ke atu ai ahau i a ratou, i kawea ai ratou  
 ki te whenua o o ratou hoariri; ki te iro i reira o ratou ngakau kokotikore, a ka whakaae ki te pakinga  
<sup>42</sup> mo to ratou kino: Katahi ahau ka mahara ki taku kawenata ki a Hakopa; ki taku kawenata hoki  
 ki a Ihaka; ka mahara tonu ki taku kawenata ki a Aperahama; ka mahara ki te whenua. <sup>43</sup> Ka mahue  
 ano te whenua i a ratou, a ka koa ki ona hapati, i a ia e takoto tuhea ana, i te mea kahore nei ratou:  
 me ratou hoki, ka whakaae ki te whiu mo to ratou kino: mo tenei hoki, ae ra mo tenei, i whakahawea  
<sup>44</sup> ratou ki aku whakaritenga, a i wha karihariha to ratou wairua ki aku tikanga. Na ahakoa he pena,  
 e kore ahau e whakakahore ki a ratou, i a ratou i te whenua o o ratou hoariri, e kore ano e  
 whakarihariha ki a ratou, e huna rawa i a ratou, e whakataka ranei i taku kawenata ki a ratou: ko  
<sup>45</sup> Ihowa hoki ahau, ko to ratou Atua: Engari, he mea mo ratou, ka mahara ahau ki te kawenata o  
 o ratou tupuna, i kawea mai nei e ahau i te whenua o Ihipa i te tirohanga a nga tauwiwi, ki ahau hei  
<sup>46</sup> Atua mo ratou: ko ahau a Ihowa. Ko nga tikanga enei, me nga whakaritenga, me nga ture i  
 whakatakotoria e Ihowa ki waenganui ona, o nga tama a Iharaira, ki Maunga Hinai, he mea na te  
 ringa o Mohi.

## Chapter 27

<sup>1</sup> I korero ano a Ihowa ki a Mohi, i mea, <sup>2</sup> Korero ki nga tama a Iharaira, mea atu ki a ratou,  
 Ki te motuhia e te tangata, he mea ki taurangi, ma Ihowa nga tangata, me whakarite e koe nga moni.  
<sup>3</sup> A kia penei tau whakarite mo te tane e rua tekau ona tau, he maha ake ranei, a ono tekau noa nga  
 tau, ara kia rima tekau nga hekere hiriwa e whakaritea e koe, hei te hekere o te wahi tapu. <sup>4</sup> A ki

te mea he wahine, kia toru tekau nga hekere e whakaritea e koe. <sup>5</sup> A ki te mea e rima ona tau, tae noa atu ranei ki te rua tekau tau, na kia rua tekau nga hekere e whakaritea e koe mo te tane, kia

tekau hoki nga hekere mo te wahine. <sup>6</sup> A, ki te mea kotahi tona marama a tae noa atu ranei ki te rima ona tau, na kia rima nga hekere hiriwa e whakaritea e koe mo te tane, kia toru nga hekere

hiriwa e whakaritea e koe mo te wahine. <sup>7</sup> A ki te mea e ono tekau ona tau, he maha atu ranei; ki te mea he tane, kia kotahi tekau ma rima nga hekere e whakaritea e koe, kia kotahi tekau hoki nga

hekere mo te wahine. <sup>8</sup> A ki te iti iho ona rawa i au i whakarite ai, na, me tu ia ki te aroaro o te tohunga, a me whakarite ona utu e te tohunga: kei nga mea e taea atu e te ringa o te tangata nana

te ki taurangi te tikanga mo ta te tohunga e whakarite ai hei utu mona. <sup>9</sup> A, mehemea he kararehe no reira nei te whakahere a te tangata ki a Ihowa, ka tapu katoa nga mea o tena i homai e ia ma

Ihowa. <sup>10</sup> Kaua e whakareretia ketia e ia, e whakawhitia ranei, he pai mo te kino, he kino ranei mo te pai: a ki te tupono ka whakawhitia e ia he kararehe ki tetahi kararehe, na ka tapu taua mea me

te mea i whakawhitia ai. <sup>11</sup> A ki te mea he poke te kararehe, he mea e kore e whakaherea tetahi

pera ma Ihowa, na ka whakaturia e ia te kararehe ki te aroaro o te tohunga: <sup>12</sup> A me whakarite ona

utu e te tohunga, ahakoa pai, ahakoa kino: me waiho i tau i whakarite ai, e te tohunga. <sup>13</sup> Otiia ki te mea ia kia utua kia hoki ai, na me tapiri tona wahi whakarima ki tau i whakarite ai.

<sup>14</sup> Ki te whakatapua ano e te tangata tona whare kia tapu ki a Ihowa, na me whakarite ona utu

e te tohunga, ahakoa pai, ahakoa kino: ko ta te tohunga e whakarite ai, ka tuturu ki reira. <sup>15</sup> A ki te mea te kaiwhakatapu kia utua kia hoki ai tona whare, na me tapiri tona whakarima o te moni i

whakaritea e koe, a ka riro i a ia. <sup>16</sup> A ki te whakatapua e te tangata mo Ihowa tetahi wahi mara o tona kainga, na kia rite ki nga purapura mo reira tau whakaritenga utu: kotahi te homa parei hei

purapura, kia rima tekau hekere hiriwa. <sup>17</sup> Ki te mea no te tau tiupiri tana whakatapunga i tana

mara, ka tuturu ano ki tau utu i whakarite ai. <sup>18</sup> Mehemea ia no muri i te tiupiri tana whakatapunga i tana mara, na ma te tohunga e tatau nga moni ki a ia, kia rite ki nga tau e toe ana ki te tau tiupiri,

ka tango ai i roto i tau i whakarite ai. <sup>19</sup> A ki te mea te kaiwhakatapu o te mara kia utua kia hoki

atu ai, na me tapiri tona whakarima o te moni i whakaritea e koe, a ka whakatuturutia mana. <sup>20</sup> A ki te kahore ia e utu kia hoki ai te mara, ki te mea ranei i hokona e ia te mara ki te tangata ke, e

kore e utua kia hoki atu i muri iho: <sup>21</sup> Engari ka tapu te mara ki a Ihowa, ina riro atu i te tiupiri, he

mara hoki i oti rawa; hei kainga tena mo te tohunga. <sup>22</sup> Ki te whakatapua ia e tetahi ki a Ihowa he

mara i hokona mai e ia, ehara nei i te mara tupu nana: <sup>23</sup> Katahi ka taua e te tohunga ki a ia nga

utu i whakaritea e koe mo te takiwa atu ki te tau tiupiri: a ka homai e ia tau i whakarite ai i taua rangi, he mea tapu hoki na Ihowa. <sup>24</sup> Ko a te tau tiupiri hoki ai te mara ki te tangata i hokona mai nei i a ia, ara ki te tangata nona te tuturutanga o te whenua. <sup>25</sup> Hei te hekere o te wahi tapu te tikanga mo au whakaritenga katoa: e rua tekau nga kera o te hekere kotahi.

<sup>26</sup> Ko te matamua ia o nga kararehe, i meinga nei hei matamua ki a Ihowa, kua ena e whakatapua e te tangata; ahakoa kau, hipi ranei: na Ihowa ena. <sup>27</sup> A ki te mea no nga kararehe poke, na kia rite ki tau whakaritenga tana utu mo te whakahokinga atu, me tapiri ano e ia tona whakarima; a ki te kahore e utua, e whakahokia, na me hoko; kia rite nga utu ki au i whakarite ai.

<sup>28</sup> Kua ia e hokona, e utua ranei kia hoki atu te mea i oti rawa, i tukua putia mai e te tangata ki a Ihowa i roto i ona taonga katoa, te tangata ranei, te kararehe ranei, te mara ranei o tona kainga tupu: he tino tapu ki a Ihowa nga mea katoa i ot i. <sup>29</sup> Ki te tukua putia mai tetahi tangata, he mea oti rawa, e kore e utua, e whakahokia; me whakamate rawa. <sup>30</sup> Me nga whakatekau katoa o te whenua, o te purapura ranei o te whenua, o nga hua ranei o te rakau, na Ihowa ena: he tapu ki a Ihowa. <sup>31</sup> A ki te mea te tangata kia utua, kia hoki ai etahi o ana whakatekau; me tapiri mai tetahi o ona wahi whakarima. <sup>32</sup> A ko nga whakatekau katoa o nga kau, o nga hipi, o nga mea katoa e haere mai ana i raro i te tokotoko, ka tapu tena whakatekau ki a Ihowa. <sup>33</sup> Kua e tirohia iho e ia, wehe ai i te pai, i te kino, kua ano hoki e whakawhitia: a ki te whakawhitia e ia, na ka tapu taua mea me tona utu ano; e kore e utua kia hoki. <sup>34</sup> Ko nga whakahau enei ki nga tama a Iharaira i whakahaua e Ihowa ki a Mohi ki Maunga Hinai.

## Numbers

### Chapter 1

<sup>1</sup> A i korero a Ihowa ki a Mohi i te koraha o Hinai i roto i te tapenakara o te whakaminenga, i te ra tuatahi o te rua o nga marama, i te rua o nga tau o to ratou haerenga mai i te whenua o Ihipa, i mea, <sup>2</sup> Tirohia te tokomaha o te whakaminenga katoa o nga tama a Iharaira, i o ratou hapu, i nga whare o o ratou matua, tatau rawa i nga ingoa o nga tane katoa, tenei pane, tenei pane o ratou; <sup>3</sup> Ko nga mea e rua tekau, he maha atu ranei nga tau, ko nga mea hoki e kaha ana i roto i a Iharaira ki te haere ki te whawhai, ma korua ko Arona ratou e tatau, tenei ope, tenei ope. <sup>4</sup> Kia kotahi hoki te

tangata o tenei iwi, o tenei iwi, hei hoa mo korua; ara ko nga upoko o tenei whare, o tenei whare  
 o o ratou matua. <sup>5</sup> Ko nga ingoa hoki enei o nga tangata e tu tahi me korua: no Reupena; ko Erituru,  
 tama a Hereuru. <sup>6</sup> No Himiona; ko Herumiere, tama a Turiharai. <sup>7</sup> No Hura; ko Nahahona, tama  
 a Aminarapa. <sup>8</sup> No Ihakara; ko Netaneere, tama a Tuara. <sup>9</sup> No Hepurona; ko Eriapa, tama a Herona.  
<sup>10</sup> No nga tama a Hohepa: no Eparaima; ko Erihama, tama a Amihuru: no Manahi; ko Kamariere,  
 tama a Peraturu. <sup>11</sup> No Pineamine; ko Apirana, tama a Kirioni. <sup>12</sup> No Rana; ko Ahietere, tama a  
 Amiharai. <sup>13</sup> No Ahera; ko Pakiere, tama a Okorana. <sup>14</sup> No Kara; ko Eriahapa, tama a Teuere.  
<sup>15</sup> No Napatari; ko Ahira, tama a Enana. <sup>16</sup> Ko nga mea whai ingoa enei o te whakaminenga, ko  
 nga ariki o nga iwi o o ratou matua; ko ratou nga upoko o nga mano i roto i a Iharaira.  
<sup>17</sup> Na ka tikina e Mohi raua ko Arona enei tangata no ratou nga ingoa kua whakahuatia nei:  
<sup>18</sup> A huihuia ana e ratou te whakaminenga katoa i te ra tuatahi o te rua o nga marama: a ka  
 whakaaturia e ratou o ratou whakapapa, tenei hapu, tenei hapu, me nga whare o o ratou matua,  
 tatau rawa nga ingoa, he pane, he pane, nga mea e rua tekau, he maha atu ranei o ratou tau. <sup>19</sup> Rite  
 tonu ki ta Ihowa i whakahau ai ki a Mohi tana tauanga i a ratou i te koraha o Hinai. <sup>20</sup> A ko nga  
 tama a Reupena, matamua a Iharaira, i o ratou toronga, i o ratou hapu, i nga whare o o ratou matua,  
 tatau rawa nga ingoa, he pane, he pane, o nga tane katoa e rua tekau, he maha atu ranei nga tau, o  
 nga mea katoa i kaha ki te haere ki te whawhai; <sup>21</sup> Ko nga mea o ratou, o te iwi o Reupena, i taua,  
 e wha tekau ma ono mano e rima rau. <sup>22</sup> No nga tama a Himiona, i o ratou toronga, i o ratou hapu,  
 i nga whare o o ratou matua, ko nga mea o ratou i taua, tatau rawa nga ingoa, he pane, he pane, o  
 nga tane katoa e rua tekau, he maha atu ranei nga tau, o nga mea katoa i kaha ki te haere ki te  
 whawhai; <sup>23</sup> Ko nga mea i taua o ratou, o te iwi o Himiona, e rima tekau ma iwa mano e toru rau.  
<sup>24</sup> No nga tama a Kara, i o ratou toronga, i o ratou hapu, i nga whare o o ratou matua, tatau rawa  
 nga ingoa o nga mea e rua tekau, he maha atu ranei nga tau, o nga mea katoa i kaha ki te haere ki  
 te whawhai; <sup>25</sup> Ko nga mea i taua o ratou, o te iwi o Kara, e wha tekau ma rima mano e ono rau e  
 rima tekau. <sup>26</sup> No nga tama a Hura, i o ratou toronga, i o ratou hapu, i nga whare o o ratou matua,  
 tatau rawa nga ingoa o nga mea e rua tekau, he maha atu ranei o ratou tau, o nga mea katoa i kaha  
 ki te haere ki te whawhai; <sup>27</sup> Ko nga mea i taua o ratou, o te iwi o Hura, e whitu tekau ma wha  
 mano e ono rau. <sup>28</sup> No nga tama a Ihakara, i o ratou toronga, i o ratou hapu, i nga whare o o ratou  
 matua, tatau rawa nga ingoa o nga mea e rua tekau, he maha atu ranei o ratou tau, o nga mea katoa

<sup>29</sup>  
 i kaha ki te haere ki te whawhai; Ko nga mea i taua o ratou, o te iwi o Ihakara, e rima tekau ma  
<sup>30</sup>  
 wha mano e wha rau. No nga tama a Hepurona, i o ratou toronga, i o ratou hapu, i nga whare o  
 o ratou matua, tatau rawa nga ingoa o nga mea e rua tekau, he maha atu ranei o ratou tau, o nga  
<sup>31</sup>  
 mea katoa i kaha ki te haere ki te whawhai; Ko nga mea i taua o ratou, o te iwi o Hepurona, e  
<sup>32</sup>  
 rima tekau ma whitu mano e wha rau. No nga tama a Hohepa, ara no nga tama a Eparaima, i o  
 ratou toronga, i o ratou hapu, i nga whare o o ratou matua, tatau rawa nga ingoa o nga mea e rua  
<sup>33</sup>  
 tekau, he maha atu ranei o ratou tau, o nga mea katoa i kaha ki te haere ki te whawhai; Ko nga  
<sup>34</sup>  
 mea i taua o ratou, o te iwi o Eparaima, e wha tekau mano e rima rau. No nga tama a Manahi,  
 i o ratou toronga, i o ratou hapu, i nga whare o o ratou matua, tatau rawa nga ingoa o nga mea e  
<sup>35</sup>  
 rua tekau, he maha atu ranei o ratou tau, o nga mea katoa i kaha ki te haere ki te whawhai; Ko  
<sup>36</sup>  
 nga mea i taua o ratou, o te iwi o Manahi, e toru tekau ma rua mano e rua rau. No nga tama a  
 Pineamine, i o ratou toronga, i o ratou hapu, i nga whare o o ratou matua, tatau rawa nga ingoa o  
 nga mea e rua tekau, he maha atu ranei o ratou tau, o nga mea katoa i kaha ki te haere ki te whawhai;  
<sup>37</sup>  
<sup>38</sup>  
 Ko nga mea i taua o ratou, o te iwi o Pineamine, e toru tekau ma rima mano e wha rau. No  
 nga tama a Rana, i o ratou toronga, i o ratou hapu, i nga whare o o ratou matua, tatau rawa nga  
 ingoa o nga mea e rua tekau, he maha atu ranei o ratou tau, o nga mea katoa i kaha ki te haere ki  
<sup>39</sup>  
 te whawhai; Ko nga mea i taua o ratou, o te iwi o Rana, e ono tekau ma rua mano e whitu rau.  
<sup>40</sup>  
 No nga tama a Ahera, i o ratou toronga, i o ratou hapu, i nga whare o o ratou matua, tatau rawa  
 nga ingoa o nga mea e rua tekau, he maha atu ranei o ratou tau, o nga mea katoa i kaha ki te haere  
<sup>41</sup>  
 ki te whawhai; Ko nga mea i taua o ratou, o te iwi o Ahera, e wha tekau ma tahi mano e rima  
<sup>42</sup>  
 rau. No nga tama a Napatari, i o ratou toronga, i o ratou hapu, i nga whare o o ratou matua, tatau  
 rawa nga ingoa o nga mea e rua tekau, he maha atu ranei o ratou tau, o nga mea katoa i kaha ki te  
<sup>43</sup>  
 haere ki te whawhai; Ko nga mea i taua o ratou, o te iwi o Napatari, e rima tekau ma toru mano  
 e wha rau.  
<sup>44</sup>  
 Ko nga mea enei i taua nei e Mohi, e Arona ratou ko nga ariki kotahi tekau ma rua o Iharaira;  
<sup>45</sup>  
 takikotahi te tangata o ratou ki te whare o ona matua. A, ko aua tangata i taua o nga tama a  
 Iharaira, i nga whare o o ratou matua, nga mea e rua tekau, he maha atu ranei o ratou tau i roto i a  
<sup>46</sup>  
 Iharaira i kaha ki te haere ki te whawhai; Ko aua tangata katoa i taua e ono rau e toru mano e  
 rima rau e rima tekau.

<sup>47</sup> Ko nga Riwaiti ia, i te iwi o o ratou matua, kihai i taua i roto i a ratou. <sup>48</sup> Na Ihowa hoki i  
 korero ki a Mohi, i mea, <sup>49</sup> Otiia kaua e taua te iwi o Riwai, kaua ano e tirohia to ratou tokomaha  
 i roto i nga tama a Iharaira: <sup>50</sup> Engari me whakarite nga Riwaiti mo te tapenakara o te  
 whakaaturanga, mo ona oko katoa, mo ona mea katoa hoki: ma ratou te tapenakara e amo, me ona  
 oko katoa; a me mahi ki reira, me noho hoki ki tetahi taha, ki tetahi taha o te tapenakara. <sup>51</sup> A, ka  
 maunu atu te tapenakara, ma nga Riwaiti e wahi iho; ka whakaturia ano hoki te tapenakara, ma nga  
 Riwaiti e whakatu: a, ko te tangata ke e whakatata atu, ka whakamatea. <sup>52</sup> Me whakatu ano o ratou  
 teneti e nga tama a Iharaira ki tona puni, ki tona puni, ki tona kara, ki tona kara, puta noa i o ratou  
<sup>53</sup> ope. Ko nga Riwaiti ia, me whakatu o ratou ki tetahi taha, ki tetahi taha o te tapenakara o te  
 whakaaturanga, kei puta he riri ki te whakaminenga o nga tama a Iharaira: a ma nga Riwaiti e tiaki  
 te tapenakara o te whakaaturanga. <sup>54</sup> Na i pera nga tama a Iharaira; rite tonu ki ta Ihowa katoa i  
 whakahau ai ki a Mohi ta ratou mahi.

## Chapter 2

<sup>1</sup> I korero ano a Ihowa ki a Mohi raua ko Arona, i mea, <sup>2</sup> Me whakatu tona teneti e nga tama  
 a Iharaira, ki te taha o tona kara, o tona kara, ki nga tohu o nga whare o o ratou matua: he te takiwa  
 atu ki te tapenakara o te whakaminenga te turanga o o ratou teneti a tawhio noa.

<sup>3</sup> Ki te taha ki te rawhiti, ara ki te putanga mai o te ra, whakatu ai nga tangata o te kara o te  
 puni o Hura, me o ratou ope: ko Nahahona tama a Aminarapa hei rangatira mo nga tama a Hura.

<sup>4</sup> A, ko tona ope, ko nga mea o ratou i taua, e whitu tekau ma wha mano e ono rau. <sup>5</sup> Na ko nga  
 mea e whakatu teneti ki tua atu i a ia ko te iwi o Ihakara: a ko Netaneere tama a Tuara hei rangatira

<sup>6</sup> mo nga tama a Ihakara: Ko tona ope, ko nga mea o ratou i taua, e rima tekau ma wha mano e wha

<sup>7</sup> rau: A ko te iwi o Hepurona: a ko Eriapa tama a Herona, hei rangatira mo nga tama a Hepurona:

<sup>8</sup> A, ko tona ope, ko nga mea o ratou i taua, e rima tekau ma whitu mano e wha rau. <sup>9</sup> Ko nga tangata  
 katoa i taua o te puni o Hura kotahi rau e waru tekau ma ono mano e wha rau, i o ratou ope. Ko

<sup>10</sup> enei e haere wawe. Hei te taha ki te tonga te kara o te puni o Reupena, me o ratou ope: a ko

<sup>11</sup> Erituru tama a Hereuru, hei rangatira mo nga tama a Reupena. A, ko tona ope, ko nga mea o

<sup>12</sup> ratou i taua, e wha tekau ma ono mano e rima rau. A, me whakatu ki tona taha ko te iwi o



Himiona: a ko Herumiere tama a Turiharai, hei rangatira mo nga tama a Himiona. <sup>13</sup> Ko tona ope,  
 ko nga mea o ratou i taua, e rima tekau ma iwa mano e toru rau. <sup>14</sup> Ko reira te iwi o Kara: a ko  
 Eriahapa tama a Reuere, hei rangatira mo nga tama a Kara. <sup>15</sup> A, ko tona ope, ko nga mea o ratou  
 i taua, e wha tekau ma rima mano e ono rau e rima tekau. <sup>16</sup> Ko nga tangata katoa i taua o te puni  
 o Reupena kotahi rau e rima tekau ma tahi mano e wha rau e rima tekau, i o ratou ope. Me haere  
 ratou hei tuarua mo nga matua. <sup>17</sup> Ko reira manunu atu ai te tapenakara o te whakaminenga, ko te  
 puni o nga Riwaiti ki waenganui o nga puni: kia rite to ratou haerenga ki to ratou nohoanga iho, ia  
 tangata ki tona wahi, i te taha ano o o ratou kara. <sup>18</sup> Hei te taha ki te hauauru te kara o te puni o  
 Eparaima, me o ratou ope: a ko te rangatira mo nga tama a Eparaima, ko Erihama tama a Amihuru.  
<sup>19</sup> A, ko tona ope, ko nga mea o ratou i taua, e wha tekau mano e rima rau. <sup>20</sup> A ki tona taha ko te  
 iwi o Manahi: a, ko te rangatira mo nga tama a Manahi ko Kamariere, tama a Peraturu. <sup>21</sup> A, ko  
 tona ope, ko nga mea o ratou i taua, e toru tekau ma rua mano e rua rau. <sup>22</sup> Ko reira te iwi o  
 Pineamine: a ko te rangatira mo nga tama a Pineamine ko Apirana tama a Kirioni. <sup>23</sup> A, ko tona  
 ope, ko nga mea o ratou i taua, e toru tekau ma rima mano e wha rau. <sup>24</sup> Ko nga tangata katoa i  
 taua o te puni o Eparaima kotahi rau e waru mano, kotahi rau, i o ratou ope. A ka hapainga ratou  
 hei tuatoru mo nga matua. <sup>25</sup> Hei te taha ki te raki te kara o te puni o Rana, me o ratou ope: a ko  
 te rangatira mo nga tama a Rana ko Ahietere tama a Amiharai. <sup>26</sup> A, ko tona ope, ko nga mea o  
 ratou i taua, e ono tekau ma rua mano e whitu rau. <sup>27</sup> Na me whakatu ki tona taha ko te iwi o Ahera:  
 a, ko te rangatira mo nga tama a Ahera ko Pakiere tama a Okorana. <sup>28</sup> A, ko tona ope, ko nga mea  
 o ratou i taua, e wha tekau ma tahi mano e rima rau. <sup>29</sup> Ko reira te iwi o Napatari: a, ko te rangatira  
 mo nga tama a Napatari ko Ahira tama a Enana. <sup>30</sup> A, ko tona ope, ko nga mea o ratou i taua, e  
 rima tekau ma toru mano e wha rau. <sup>31</sup> Ko nga mea katoa i taua o te puni o Rana kotahi rau e rima  
 tekau ma whitu mano e ono rau. Hei muri rawa ratou haere ai, me o ratou kara. <sup>32</sup> Ko enei o nga  
 tama a Iharaira i taua, i nga whare o o ratou matua: taua ake o nga puni, i o ratou ope, e ono rau e  
 toru mano e rima rau e rima tekau. <sup>33</sup> Ko nga Riwaiti ia, kihai i taua i roto i nga tama a Iharaira;  
 ko ta Ihowa hoki tena i whakahau ai ki a Mohi. <sup>34</sup> Na ka peratia e nga tama a Iharaira; ka peratia  
 katoatia i ta Ihowa i whakahau ai ki a Mohi, ta ratou whakanoho ki te taha o a ratou kara, to ratou  
 hapainga atu, tenei, tenei, i roto i tona hapu ano, rite tonu ki nga whare o o ratou matua.

## Chapter 3

<sup>1</sup> Na ko nga whakatupuranga ano hoki enei a Arona raua ko Mohi i te ra i korero ai a Ihowa ki  
a Mohi i Maunga Hinai. <sup>2</sup> Ko nga ingoa hoki enei o nga tama a Arona: ko Natapa, ko te matamua,  
ratou ko Apihu, ko Ereatara, ko Itamara. <sup>3</sup> Ko nga ingoa enei o nga tama a Arona, o nga tohunga  
i whakawahia, i whakatohungatia nei e ia hei tohunga, <sup>4</sup> I mate hoki a Natapa raua ko Apihu ki te  
aroaro o Ihowa, i ta raua whakaherenga i te ahi ke ki te aroaro o Ihowa, ki te koraha o Hinai, kahore  
ano hoki a raua tamariki: a i mahi a Ereatara raua ko Itamara i nga mahi a te tohunga i te tirohanga  
ma i a to raua papa, a Arona. <sup>5</sup> A i korero a Ihowa ki a Mohi, i mea, <sup>6</sup> Whakatataia mai te iwi o  
Riwai, whakaturia hoki ki te aroaro o Arona tohunga, kia mahi aia ratou ki a ia. <sup>7</sup> A ma ratou e  
tiaki nga mea hei tiakanga mana, hei tiakanga hoki ma te whakaminenga katoa, ki mua i te tapenakara  
o te whakaminenga, e mahi hoki nga mahi o te tapenakara. <sup>8</sup> Ma ratou ano e tiaki nga mea katoa  
o te tapenakara o te whakaminenga, me nga mea hei tiakanga ma nga tama a Iharaira, kia mahi ai  
hoki nga mahi o te tapenakara. <sup>9</sup> A me hoatu e koe nga Riwaiti ki a Arona ratou ko ana tama: e  
hoatutia katoatia ana ratou ki a ia mo nga tama a Iharaira. <sup>10</sup> Me whakarite ano e koe a Arona ratou  
ko ana tama, a ka u ratou ki ta ratou mahi tohunga: ko te tangata ke e whakatata mai ka whakamatea.  
<sup>11</sup> I korero ano a Ihowa ki a Mohi, i mea, <sup>12</sup> Ko ahau nei, nana, kua tango ahau i nga Riwaiti i roto  
i nga tama a Iharaira hei utu mo nga matamua katoa e oroko puta mai ana i te kopu i roto i nga tama  
a Iharaira: maku hoki nga Riwaiti; <sup>13</sup> No te mea, naku nga matamua katoa; no te ra ano i patu ai  
ahau i nga matamua katoa o te whenua o Ihipa taku whakatapunga i nga matamua katoa a Iharaira  
maku, i a te tangata, i a te kararehe: maku era: ko Ihowa ahau.  
<sup>14</sup> I korero ano a Ihowa ki a Mohi, i te koraha o Hinai, i mea, <sup>15</sup> Taua nga tama a Riwai, tenei  
whare, tenei whare o o ratou matua, tenei hapu, tenei hapu o ratou: me tatau ratou e koe, nga tane  
katoa kotahi nei te marama, ahu atu. <sup>16</sup> Na ka taua ratou e Mohi ka peratia me ta Ihowa i ki ai, i  
whakahau ai. <sup>17</sup> A ko nga tama enei a Riwai me o ratou ingoa; ko Kerehona, ko Kohata, ko Merari.  
<sup>18</sup> A ko nga ingoa enei o nga tama a Kerehona, o tenei hapu, o tenei hapu o ratou; ko Ripini raua  
ko Hime. <sup>19</sup> Me nga tama a Kohata, o tenei hapu, o tenei hapu o ratou; ko Amarama, ko Itihara,  
ko Heperona, ko Utiere. <sup>20</sup> Me nga tama a Merari, o tenei hapu, o tenei hapu o ratou: ko Mahari,  
<sup>21</sup> ko Muhi. Ko nga hapu enei o nga Riwaiti, o tenei whare, o tenei whare o o ratou matua. Na

Kerehona te hapu o nga Ripini, me te hapu o nga Himei: ko nga hapu enei o nga Kerehoni. <sup>22</sup> Ko  
 nga mea o ratou i taua, ko te tokomaha o nga tane katoa, kotahi nei te marama ahu atu, ko nga mea  
 o ratou i taua e whitu mano e rima rau. <sup>23</sup> Hei muri i te tapenakara, hei te taha ki te hauauru, te  
 puni o nga Kerehoni. <sup>24</sup> Ko Eriahapa hoki, ko te tama a Raere, hei ariki mo te whare o te matua o  
 nga Kerehoni. <sup>25</sup> A, ko ta nga tama a Kerehona e tiaki ai i roto i te tapenakara o te whakaminenga,  
 ko te tapenakara, ko te teneti, me tona hipoki, ko te pa o te whatitoka o te tapenakara o te  
 whakaminenga, <sup>26</sup> Me nga pa o te marae, me te pa o te whatitoka o te marae, o tera i te tapenakara,  
 i te aata hoki a tawhio noa, me ona aho hoki mo ona meatanga katoa. <sup>27</sup> Na Kohata hoki te hapu  
 o nga Amarami, me te hapu o nga Itihari, me te hapu o nga Heperoni, me te hapu o nga Utieri: ko  
 ng hapu enei o nga Kohati. <sup>28</sup> Ko te tokomaha o nga tana katoa, kotahi nei te marama, ahu atu, e  
 waru mano e ono rau, ko ratou nga kaitiaki o te wahi tapu. <sup>29</sup> Hei te taha whaka te tonga o te  
 tapenakara he puni mo nga hapu o nga tama a Kohata. <sup>30</sup> A ko Eritapana, tama a Utiere, hei ariki  
 mo te whare o te matua o nga hapu o nga Kohati. <sup>31</sup> A, ko ta ratou e tiaki ai ko te aaka, ko te tepu,  
 ko te turanga rama, ko nga aata, ko nga oko o te whai tapu, ara ko nga mea e minita ai ratou, me  
 te pa arai, me nga mea katoa o ena mahinga. <sup>32</sup> A ko Ereatara tama a Arona tohunga hei ariki mo  
 nga ariki o nga Riwaiti, mana hoki e tiro tiro nga kaitiaki e tiaki ana i te wahi tapu. <sup>33</sup> Na Merari  
 te hapu o nga Mahari, me te hapu o nga Muhi: ko nga hapu enei o Merari. <sup>34</sup> A, ko nga mea o ratou  
 i taua, ko te tokomaha o nga tane katoa, kotahi nei te marama ahu atu, e ono mano e rua rau. <sup>35</sup> A  
 ko Turiere, ko te tama a Apihaira hei ariki mo te whare o te matua o nga hapu o Merari: hei te taha  
 ki te raki o te tapenakara he puni mo enei. <sup>36</sup> Ko ta nga tama hoki a Merari e tupato ai, e tiaki ai,  
 ko nga papa o te tapenakara, me ona kaho, me ona pou, me nga turanga pou, me nga mea katoa o  
 aua mea, me nga mea katoa o ena mahinga; <sup>37</sup> Me nga pou o te marae a tawhio noa, me nga turanga,  
 me nga titi, me nga aho. <sup>38</sup> A ko enei e noho ki mua i te tapenakara, ki te rawhiti, ki mua i te  
 tapenakara o te whakaminenga, ki te putanga mai o te ra, ko Mohi ratou ko Arona, ko ana tama,  
 hei tiaki i te wahi tapu, i nga mea hei tiakanga ma nga tama a Iharaira; a, ko te tangata ke e whakatata  
 mai, ka whakamatea. <sup>39</sup> Ko nga Riwaiti katoa i taua, ko era i taua ra e Mohi raua ko Arona, i ta  
 Ihowa whakahau, i o ratou hapu, ko nga tane katoa kotahi nei te marama ahu atu, e rua tekau ma  
 rua mano.

<sup>40</sup> A i mea a Ihowa ki a Mohi, Taua nga tane matamua katoa o nga tama a Iharaira, nga mea  
<sup>41</sup> kotahi nei te marama, me nga mea i maha atu, tuhituhia hoki te maha o o ratou ingoa. A me  
 tango nga Riwaiti maku; ko Ihowa ahau; hei utu mo nga matamua katoa o nga tama a Iharaira; me  
 nga kararehe a nga Riwaiti hei utu mo nga matamua katoa i roto i nga kararehe o nga tama a Iharaira.  
<sup>42</sup> Na ka taua e Mohi, ka peratia me ta Ihowa i whakahau ai ki a ia, nga matamua katoa i roto i nga  
<sup>43</sup> tama a Iharaira. A, ko nga tane matamua katoa, ko te maha o nga ingoa, kotahi nei te marama  
<sup>44</sup> a ahau atu, ko nga mea o ratou i taua, e rua tekau ma rua mano e rua rau e whitu tekau ma toru. A  
<sup>45</sup> i korero a Ihowa ki a Mohi, i mea, Tangohia nga Riwaiti hei utu mo nga tane matamua katoa i  
 roto i nga tama a Iharaira, me nga kararehe a nga Riwaiti hei utu mo a ratou kararehe; a maku nga  
<sup>46</sup> Riwaiti: ko Ihowa ahau. Na, hei whakahoki atu, hei utu mo te rua rau e whitu tekau ma toru,  
<sup>47</sup> mo nga matamua o nga tama a Iharaira i hira ake i te tokomaha o nga Riwaiti; Me tango e koe  
 kia rima hekere mo tenei pane, mo tenei pane; kia rite ki te hekere o te wahi tapu au e tango ai: e  
<sup>48</sup> rua tekau nga kera o te hekere kotahi: Me hoatu te moni e utua ai nga tuhene o ratou ki a Arona  
<sup>49</sup> ratou ko ana tama. Na ka tango a Mohi i te moni whakahoki i nga tangata i hira ake i era i utua  
<sup>50</sup> ki nga Riwaiti: I tangohia e ia te moni i nga matamua a nga tama a Iharaira; kotahi mano e toru  
<sup>51</sup> rau e ono tekau ma rima hekere; he pera me te hekere o te wahi tapu: A i hoatu e Mohi te moni  
 a te hunga i utua ki a Arona ratou ko ana tama, i pera me ta Ihowa i ki ai, me ta Ihowa i whakahau  
 ai ki a Mohi.

#### Chapter 4

<sup>1</sup> I korero ano a Ihowa ki a Mohi raua ko Arona, i mea, <sup>2</sup> Taua nga tama a Kohata, i roto i nga  
<sup>3</sup> tama a Riwai, tenei hapu, tenei hapu o ratou, i nga whare o o ratou matua, Nga mea e toru tekau,  
 he maha atu ranei o ratou tau, a tae noa ki nga mea e rima tekau o ratou tau, nga mea katoa e uru  
<sup>4</sup> ana ki te mahi, ki te mea i nga mea o te tapenakara o te whakaminenga. Ko te mahi tenei ma nga  
<sup>5</sup> tama a Kohata i roto i te tapenakara o te whakaminenga, ko nga mea tino tapu: A ka maunu te  
 puni, me haere a Arona ki roto, ratou ko ana tama, ka tuku i te arai hipoki ki raro, a ka hipoki iho  
<sup>6</sup> ki te aaka o te whakaaturanga: Na ka maka iho te hipoki ki runga, ara nga hiako pateri, a ka uhi

iho i tetahi kakahu ki runga, he mea puru katoa, ka kuhu i nga amo. <sup>7</sup> Me uhi ano ki te kakahu puru  
 te tepu taro aroaro, ka whakatakoto ai i nga rihi ki runga, me nga koko, me nga peihana, me nga  
 kapu hei ringihanga: hei runga ano hoki te taro pumau takoto ai: <sup>8</sup> Ka uhi ki te kakahu ngangana,  
 ka hipoki ai ki te hiako pateri hei hipoki mo runga, ka kuhu i ona amo. <sup>9</sup> Na ka mau ratou ki tetahi  
 kakahu puru, ka hipoki ai i te turanga whakamarama, i ona rama hoki, i ona kuku, i ona oko ngarahu,  
 i ona oko hinu katoa, i nga mea e minita ai ratou ki reira: <sup>10</sup> Ka hoatu ai me ona mea katoa ki roto  
 ki te takai, hei te mea hiako pateri, ka whakaeke ai ki runga ki te amo. <sup>11</sup> A me uhi iho e ratou he  
 kakahu puru ki runga ki te aata koura, ka hipoki ai ki tetahi hipoki hiako pateri, ka kuhu ai i ona  
 amo: <sup>12</sup> Na ka mau ki nga mea e minita ai ratou i te wahi tapu, ka hoatu ki roto ki te kakahu puru,  
 ka hipoki ki tetahi hipoki hiako pateri, ka whakaeke ki te amo: <sup>13</sup> Na ka tahi atu ratou i nga  
 pungarehu o te aata, ka hipoki ai ki te kakahu papaura: <sup>14</sup> Me whakatakoto ano ki runga ona oko  
 katoa e minita ai ratou ki reira, nga tahu kakara, nga marau kikokiko, nga koko pungarehu, nga  
 peihana, nga mea katoa o te aata; ka hipoki ai ki te hipoki hiako pateri, ka kuhu ai i ona amo. <sup>15</sup> A  
 ka oti i a Arona ratou ko ana tama te hipoki te wahi tapu, me nga mea katoa o te wahi tapu, ina tata  
 te puni te maunu; ka mutu, na ka haere mai nga tama a Kohata ki te kauhoa: otiia kua ratou e pa  
 ki tetahi mea tapu kei mate ratou. Ko enei ng a mea a nga tama a Kohata e mau ai o te tapenakara  
 o te whakaminenga. <sup>16</sup> A, ko ta Ereatara, ko ta te tama a te tohunga, a Arona, e whakaaro ai, ko te  
 hinu mo te whakamarama, ko te whakakakara reka, ko te whakahere totokore o tenei ra, o tenei ra,  
 ko te hinu whakawahi, me te tiroiro i te tapenakara katoa, i nga mea k atoa hoki o reira, i te wahi  
 tapu, i ona mea hoki. <sup>17</sup> I korero ano a Ihowa ki a Mohi raua ko Arona, i mea, <sup>18</sup> Kei hatepea atu  
 e koutou te iwi o nga hapu o nga Kohati i roto i nga Riwaiti: <sup>19</sup> Engari ko tenei ta koutou e mea ai  
 ki a ratou, kia ora ai ratou, kei mate, ina whakatata ki nga mea tino tapu: me haere a Arona ratou  
 ko ana tama ki roto, ka whakarite ai i a ratou ki tana mahi, ki tana mahi, ki tana amohanga, ki tana  
 amohanga: <sup>20</sup> Otiia kua ratou e haere ki roto ki te matakitaki i te wahi tapu ahakoa he wa potu,  
 kei mate ratou.  
<sup>21</sup> I korero ano a Ihowa ki a Mohi, i mea, <sup>22</sup> Taua hoki nga tama a Kerehona, i nga whare o o  
 ratou matua, i o ratou hapu: <sup>23</sup> Ko nga mea e toru tekau, he maha atu ranei nga tau, a tae noa ki  
 nga mea e rima tekau o ratou tau, au e tatau ai; ko nga mea katoa hoki e uru ana ki te mahi i nga  
 mahi o te tapenakara o te whakaminenga. <sup>24</sup> Ko te mahi tenei ma nga hapu o nga Kerehoni, ko te  
 mahi, ko te amo: <sup>25</sup> Ma ratou hoki e amo nga pa o te tapenakara, te tapenakara hoki o te  
 whakaminenga, tona hipoki, me te hipoki hiako pateri i waho ake, me te pa o te whatitoka o te

<sup>26</sup> tapenakara o te whakaminenga; Me nga pa o te marae, me te pa mo te whatitoka o te kuwaha o te marae, o tera i te tapenakara, i te aata a tawhio noa, me nga aho, me nga mea katoa mo te mahinga

<sup>27</sup> o aua mea, me nga mea katoa i hanga mo aua mea: ko ta ratou mahi tena. Kei a Arona ratou ko ana tama te tikanga mo nga mahi katoa a nga tama a nga Kerehoni, mo a ratou amohanga katoa, mo a ratou mahi katoa: ma koutou hoki e whakarite ki a ratou te tikanga mo nga mea katoa e amo

<sup>28</sup> ai ratou. Ko te mahi tenei ma nga hapu o nga tama a Kerehona i te tapenakara o te whakaminenga:

<sup>29</sup> a, ko nga tikanga ma ratou kei a Itamara tama a te tohunga, a Arona. Ko nga tama a Merari, me

<sup>30</sup> tatau ratou e koe i o ratou hapu, i nga whare o o ratou matua; Ko nga mea e toru tekau, he maha atu ranei o ratou tau, a tae noa ki nga mea e rima tekau o ratou tau, au e tatau ai, ko nga tangata

<sup>31</sup> katoa e uru ana ki te mahi, ki te mahi i te mahi o te tapenakara o te whakaminenga. A ko te tikanga ano tenei mo ta ratou e amo ai, i a ratou mahinga katoa i te tapenakara o te whakaminenga;

<sup>32</sup> ko nga papa o te tapenakara, me ona kaho, me ona pou, me ona turanga pou; Me nga pou o te marae a tawhio noa, me nga turanga pou, me nga titi, me nga aho, me nga mea katoa o aua mea, me nga mea katoa o ena mahinga: me tatau a ingoa nga mea kei a ratou nei te tikanga mo te amo.

<sup>33</sup> Ko te mahi tenei a nga hapu o nga tama a Merari, i a ratou mahinga katoa i te tapenakara o te whakaminenga, i raro i te ringa o Itamara tama a te tohunga, a Arona.

<sup>34</sup> Na ka taua e Mohi ratou ko Arona, ko nga ariki o te whakaminenga, nga tama a nga Kohati,

<sup>35</sup> i o ratou hapu, i nga whare ano o o ratou matua, Nga mea e toru tekau, he maha atu ranei o ratou tau, a tae noa ki nga mea e rima tekau o ratou tau, nga tangata katoa i uruki te mahi, ki te mahi i te

<sup>36</sup> tapenakara o te whakaminenga: A taua ake o ratou, i o ratou hapu, e rua mano e whitu rau e

<sup>37</sup> rima tekau. Ko enei i taua o nga hapu o nga Kohati, ko nga tangata hei mahi i te tapenakara o te whakaminenga, i taua nei e Mohi raua ko Arona, pera me ta Ihowai whakahau ai, na te ringa o

<sup>38</sup> Mohi. Ataua ake o nga tama a Kerehona i o ratou hapu, i nga whare o o ratou matua,

<sup>39</sup> Nga mea e toru tekau, he maha atu ranei o ratou tau, a tae noa ki nga mea e rima tekau o ratou tau, nga

<sup>40</sup> mea katoa i uru ki te mahi, ki te mahi i te tapenakara o te whakaminenga, Taua ake o ratou i o

<sup>41</sup> ratou hapu, i nga whare o o ratou matua, e rua mano e ono rau e toru tekau. Ko enei i taua o nga hapu o nga tama a Kerehona, o nga tangata katoa hei mahi i te tapenakara o te whakaminenga, i

<sup>42</sup> taua nei e Mohi raua ko Arona, pera me ta Ihowa i whakahau ai. A taua ake o nga hapu o nga

<sup>43</sup> tama a Merari, i o ratou hapu, i nga whare o o ratou matua, Nga mea hoki e toru tekau, he maha atu ranei o ratou tau, a tae noa ki nga mea e rima tekau o ratou tau, nga tangata katoa i uru ki te

mahi, hei mahi i te tapenakara o te whakaminenga, <sup>44</sup> Taua ake o ratou i o ratou hapu, e toru mano  
 e rua rau. <sup>45</sup> Ko enei i taua o nga hapu o nga tama a Merari, i taua nei e Mohi raua ko Arona, pera  
 me ta Ihowa i whakahau ai, na te ringa o Mohi. <sup>46</sup> Ko nga tangata katoa o nga Riwaiti i taua, a  
 Mohi ratou ko Arona, ko nga ariki o Iharaira i tatau ai, i o ratou hapu, i nga whare o o ratou matua,  
<sup>47</sup> Ko nga mea hoki e toru tekau, he maha atu ranei o ratou tau, a tae noa ki nga mea e rima tekau  
 o ratou tau, ko nga tangata katoa i uru ki te mahi i nga mahi e mahia ana, ki te mahi hoki, ki te  
 amoamo i roto i te tapenakara o te whakaminenga; <sup>48</sup> Taua ake o ratou e waru mano e rima rau e  
 waru tekau. <sup>49</sup> Rite tonu ki ta Ihowa i whakahau ai te tauanga o ratou e te ringa o Mohi, tenei, tenei,  
 me tana mahi, me tana amo: na poto ake ratou te tatau e ia, te pera me ta Ihowa i whakahau ai ki a  
 Mohi.

## Chapter 5

<sup>1</sup> I korero ano a Ihowa ki a Mohi, i mea, <sup>2</sup> Whakahaua nga tama a Iharaira kia motuhia ketia  
 atu nga repera katoa i roto i te puni, nga tangata katoa e rere ana te pirau, me nga tangata katoa e  
 poke ana i te tupapaku. <sup>3</sup> Ko te tane, ko te wahine, me ngare atu, me ngare e koutou ki waho o te  
 puni: kei poke i a ratou o ratou puni e nohoia nei e ahau. <sup>4</sup> Na peratia ana e nga tama a Iharaira, a  
 motuhia ketia ana ratou i roto i te puni: rite tonu ki ta Ihowa i korero ai ki a Mohi ta nga tama a  
 Iharaira i mea ai. <sup>5</sup> I korero ano a Ihowa ki a Mohi, i mea, <sup>6</sup> Mea atu ki nga tama a Iharaira, Ki te  
 mahia e te tangata, e te wahine ranei, tetahi mea e hara ai te tangata, hei mahi i te kino ki a Ihowa,  
 a ka he taua wairua; <sup>7</sup> Na me whaki to ratou hara i hara ai: me whakahoki e ia te mea i he ai ia, te  
 tino mea, me tapiri ano ki tona whakarima, ka hoatu ai ki te tangata i hara nei ia ki a ia. <sup>8</sup> Otiia ki  
 te kahore he whanaunga o taua tangata hei hoatutanga mo te utu, me hoatu te utu mo te hara ki a  
 Ihowa, ara ki te tohunga; hei tapiri mo te hipi whakamarie hei whakamarie mona. <sup>9</sup> Na, ko nga  
 whakahere hapahapai katoa o nga mea tapu katoa a nga tama a Iharaira, e kawea ana ki te tohunga,  
<sup>10</sup> mana era. Mana ake nga mea tapu a te tangata: ko ta te tangata e hoatu ai ki te tohunga, mana  
 tena.  
<sup>11</sup> I korero ano a Ihowa ki a Mohi, i mea, <sup>12</sup> Korero ki nga tama a Iharaira, mea atu ki a ratou,  
 Ki te peka ke te wahine a tetahi tangata, a ka hara ki a ia, <sup>13</sup> A ka takoto, ka puremu tetahi ki a ia,  
 a ka ngaro i nga kanohi o tana tahu, ka huna, a ka poke te wahine, kahore ano hoki he kaiwhakaatu

14  
mo tona he, kahore ano ia i mau rawa; A ka tau ki a ia te wairua hae, a ka hae ia ki tana wahine,  
a ka poke te wahine: ki te tau ranei ki a ia te wairua hae, a ka hae ia ki tana wahine kihai nei i poke;

15  
Katahi ka kawe taua tangata i tana wahine ki te tohunga, me kawe ano e ia ta te wahine whakahere  
hei mea mona, te whakatekau epa paraoa parei; kua he hinu e ringihia ki runga, kua ano he  
parakihe e hoatu ki runga; he whakahere totokore hoki mo te hae, he whakahere whakamahara, hei

16  
whakamahara ki te kino. Na ka nekehia mai ia e te tohunga, a ka whakaturia ki te aroaro o Ihowa:

17  
A ka mau te tohunga ki te wai tapu i te oko oneone; ka mau ano te tohunga ki tetahi wahi o te

18  
puehu o te papa o te tapenakara, ka maka ai ki te wai: Na ka whakaturia e te tohunga te wahine  
ki te aroaro o Ihowa, a ka tuku i nga makawe o te wahine kia mahora noa, ka hoatu ai i te whakahere  
whakamahara ki ona ringa, ara i te whakahere totokore mo te hae: hei te ringa ia o te tohunga te

19  
wai kawa e tau ai te kanga: Na ka whakaoati te tohunga i a ia, a ka mea ki te wahine, Ki te mea  
kahore ano tetahi tangata i takoto ki a koe, ki te kahore ano hoki koe i peka atu, i poke, i te mea i

20  
raro koe i tau tane, kia ora koe i tenei wai kawa e tau ai te kanga: Ki te mea ia kua peka ke koe,  
i te mea i raro koe i tau tane, a kua poke koe, a kua takoto ki a koe tetahi tangata ehara nei i te tane

21  
nau: Katahi ka whakaoati te tohunga i te wahine ki te oati kanga, a ka mea te tohunga ki te  
wahine, Ma Ihowa koe e mea hei kanga, hei oati i roto i tou iwi, ina mea a Ihowa kia pirau tou

22  
huha, kia pupuhi hoki tou puku; A ka tae ki roto ki ou whekau tenei wai e tau ai te kanga, e

23  
pupuhi ai tou puku, e pirau ai tou huha: me ki te wahine, Amine, Amine. A me tuhituhi enei

24  
kanga e te tohunga ki te pukapuka, ka horoi atu ano e ia ki roto ki te wai kawa: Na ka  
whakainumia e ia te wahine ki te wai kawa e tau ai te kanga, a ka tae te wai e tau ai te kanga ki

25  
roto ki a ia, ka kawa. Me tango hoki e te tohunga te whakahere mo te hae i te ringa o te wahine,

26  
a ka poipoia te whakahere ki te aroaro o Ihowa, ka whakaherea ki runga ki te aata: Na ka aohia  
e te tohunga tetahi wahi o te whakahere, kia ki te ringa, ko tona whakamaharatanga hoki, a ka

27  
tahuna ki runga ki te aata, a muri iho ka whakainumia te wahine ki te wai. A ka oti ia te whakainu  
ki te wai, na ki te mea kua poke ia, kua hara ki tana tahu, na ka tae ki roto ki a ia te wai e tau ai te  
kanga, ka kawa, a ka pupuhi tona puku, ka pirau hoki tona huha: a hei mea kanga tena wahine i

28  
roto i tona iwi. A ki te mea kihai i poke te wahine, a e ma ana; na ka ora, a ka whai tamariki.

29  
Ko te ture tenei mo nga hae, mehemea te wahine, kei raro nei ia i tana tane, ka peka ke, a ka

30  
poke; Ina tau iho ranei te wairua hae ki tetahi, a ka hae ia ki tana wahine; na me whakatu taua



wahine e ia ki te aroaro o Ihowa; na ka mahia e te tohunga tenei ture katoa ki a ia. <sup>31</sup> Na ka kore he he mo te tangata, a ka waha e taua wahine tona kino.

## Chapter 6

<sup>1</sup> I korero ano a Ihowa ki a Mohi, i mea, <sup>2</sup> Korero ki nga tama a Iharaira, mea atu ki a ratou, E momotu te tangata, te wahine ranei i a ia, he ki taurangi na te Natari, mona kia wehea ma Ihowa:

<sup>3</sup> Me wehe ia i a ia kei tata ki te waina, i te wai whakahaurangi ranei, kaua hoki ia e inu i te winika waina, i te winika whakahaurangi, kaua hoki e inu i te wai karepe, a kaua e kai i te karepe hou, maroke ranei. <sup>4</sup> I nga ra katoa e wehea ai ia kua ia e kai i tetahi mea no te waina te mea i hanga ai, ahakoa nganga, ahakoa peha. <sup>5</sup> I nga ra katoa o tanga ki taurangi wehe i a ia, kua te heu e pa ki tona matenga: kia tutuki ra ano nga ra e wehea ai ia ki a Ihowa, ka tapu ia, a me tuku e ia nga makawe o tona matenga kia tupu, kia roroa. <sup>6</sup> I nga ra katoa i wehe ai ia i a ia ki a Ihowa kua ia e whakatata ki te tupapaku. <sup>7</sup> Kua ia e whakapoke i a ia mo tona papa, mo tona whaea, mo tona tuakana, teina ranei, mo tona tuahine, ina mate ratou; no te mea kei runga i tona matenga te wehenga a tona Atua. <sup>8</sup> Ka tapu ia ki a Ihowa i nga ra katoa e wehe ai ia. <sup>9</sup> A ki te mate tetahi tangata ki tona taha, he mea pa whakarere, a kua poke i a ia tona matenga i wehea nei; na me heu e ia tona matenga i te ra e purea ai ia, me heu e ia i te whitu o nga ra. <sup>10</sup> A i te waru o nga ra me kawe mai e ia he kukupa kia rua, he pi kikupa ranei kia rua, ki te tohunga, ki te whatitoka o te tapenakara o te whakaminenga: <sup>11</sup> A me whakahere tetahi e te tohunga hei whakahere hara, me tetahi hei tahunga tinana, a ka whakamarie mona, nona hoki i whai hara i te tupapaku, ka whakatapua ano tona matenga i taua ra ano. <sup>12</sup> A me whakatapu e ia ki a Ihowa nga ra o tona wehenga, me kawe mai ano he reme toa, he tau tahi, hei whakahere mo te he: ko nga ra ia o mua ka whakataka, no te mea kua poke tona wehenga. <sup>13</sup> A ko te ture tenei mo te Natari, ina rite nga ra e wehea ai ia: me kawe ia ki te whatitoka o te tapenakara o te whakaminenga: <sup>14</sup> A me whakahere e ia tana whakahere ki a Ihowa, kia kotahi te reme toa tau tahi, hei te mea kohakore, hei tahunga tinana, me tetahi reme uha tau tahi, hei te mea kohakore, hei whakahere hara, me teahi hipi toa kohakore, hei whakahere mo te pai, <sup>15</sup> Me tetahi kete taro rewenakore, me nga keke paraoa pai i konatunatua ki te hinu, me etahi me angiangi ano hoki, hei nga mea rewenakore i pania ki te hinu, me te whakahere totokore, me nga ringihanga o aua mea. <sup>16</sup> A me kawe aua mea e te tohunga ki te aroaro o Ihowa, a ka whakaherea tana

17  
whakahere hara, me tana tahunga tinana: Me whakahere ano e ia te hipi toa, hei patunga mo te pai ki a Ihowa, me te kete taro rewenakore: me whakahere ano e te tohunga tana whakahere totokore,

18  
me tana ringihanga. A me heu e te Natari tona matenga, i wehea nei, ki te whatitoka o te tapenakara o te whakaminenga, ka tango ai i nga makawe o tona matenga i wehea nei, a ka maka

19  
ki te ahi, ki tera i raro i te patunga mo te pai. A me tango e te tohunga te peke o te hipi toa, ina oti te kohua, me tetahi o nga keke rewenakore i te kete, me tetahi o nga keke angiangi, o nga mea rewenakore, a ka hoatu e ia ki nga ringa o te Natari, i muri i te heunga o ona makawe i wehea ne

20  
i. Na ka poipoia e te tohunga hei whakahere poipoi ki te aroaro o Ihowa: ka tapu tenei ma te tohunga, me te uma poipoi, me te huha hapahapai: a, muri iho ka inu waina te Natari. Ko te ture tenei mo te Natari, nana te ki wehe, mo tana whakahere hoki ki a Ihowa ina wehea, hei tapiri mo ta tona ringa i whiwhi ai: kia rite ki tana ki i ki ai; kei te ture o tona wehenga te tikanga mo tana e mea ai.

22 I korero ano a Ihowa ki a Mohi, i mea, 23 Korero ki a Arona ratou ko ana tama, mea atu,

Kia penei ta koutou manaaki i nga tama a iharaira; mea atu ki a ratou, 24 Ma Ihowa koe e manaaki,

25 mana koe e tiaki: Ma Ihowa e mea kia tiaho tona mata ki a koe, mana ano hoki koe e atawhai:

26 Ma Ihowa tona kanohi e whakaara ki a koe, mana ano e tuku te rangimarie ki a koe. 27 A ka karangatia e ratou toku ingoa ki runga ki nga tama a Iharaira; a maku ratou e manaaki.

## Chapter 7

1  
A, i te ra i oti ai a Mohi te tapenakara te whakaara, i whakawahia ai, i whakatapua ai hoki te tapenakara me ona mea katoa, te aata, me ona mea katoa, a ka oti te whakawahi, te whakatapu:

2  
Na ka whakahere nga ariki o Iharaira, nga upoko o nga whare o o ratou matua; ko ratou nga ariki o nga iwi, i a ratou hoki nga tikanga mo te hunga i taua: 3 A ka kawea mai e ratou ta ratou whakahere ki te aroaro o Ihowa, e ono nga kaata whai taupoki, kotahi tekau ma rua nga kau; tokorua nga ariki kotahi ano te kaata, kotahi ano hoki te puru a tetahi, a tetahi: a whakatuturia ana e ratou ki te aronga

4 o te tapenakara. A i korero a Ihowa ki a Mohi, i mea, 5 Tangohia ta ratou, hei mea mo te mahi o te tapenakara o te whakaminenga; a me hoatu e koe ki nga Riwaiti, kia rite ki te mahi a tenei, a tenei. 6 Na tangohia ana e Mohi nga kaata me nga kau, a hoatu ana e ia ki nga Riwaiti. 7 E rua nga kaata, e wha nga kau i hoatu e ia ki nga tama a Kerehona, he mea whakarite ki ta ratou mahi: 8 E wha nga kaata, e waru nga kau i hoatu e ia ki nga tama a Merari, he mea whakarite ki ta ratou mahi,

9  
i te ringa o Itamara tama a te tohunga, a Arona. Ki nga tama ia a Kohata, kihai i hoatu e ia: no te mea ko te mahi o te wahi tapu ma ratou ko te kauhoa i runga i o ratou pokohiwi.

10 A i whakahere ano nga ariki hei tainga kawa mo te aata i te ra i whakawahia ai, i whakahere  
11 nga ariki i a ratou whakahere ki mua i te aata. Na ka mea a Ihowa ki a Mohi, Me hoatu e ratou

12 a ratou whakahere, tena ariki i tona ra, tena ariki i tona ra, hei tainga kawa mo te aata. Na, ko  
te tangata nana te whakahere i te ra tuatahi, ko Nahahona tama a Aminarapa, no te iwi o Hura:

13 A, ko tana whakahere, he rihi hiriwa, kotahi rau e toru tekau hekere te taimaha, he peihana hiriwa,  
e whitu tekau ona hekere, he hekere wahi tapu; ki tonu raua i te paraoa pai i konatunatua ki te hinu

14 hei whakahere totokore: Kotahi koko koura, tekau ona hekere, ki tonu i te whakakakara: 15 Kotahi  
16 puru, he kua, kotahi hipi toa, kotahi reme toa, he tau tahi, hei tahunga tinana: Kotahi koati toa

17 hei whakahere hara: E rua hoki nga puru hei patunga mo te pai, e rima hipi toa, e rima koati toa,  
18 e rima reme toa, he tau tahi: ko te whakahere tenei a Nahahona tama a Aminarapa. I te ra tuarua

19 na Netaneere te whakahere; he tama ia na Tuara, he ariki no Ihakara: Ko tana whakahere i  
whakahere ai, he rihi hiriwa, kotahi rau e toru tekau hekere te taimaha, he peihana hiriwa, e whitu  
tekau ona hekere, he hekere wahi tapu; ki tonu aua mea e rua i te paraoa pai i konatunatua ki te

20 hinu hei whakahere totokore: He koko koura, tekau ona hekere, ki tonu i te whakakakara:

21 Kotahi puru, he kua, kotahi hipi toa, kotahi reme toa, he tau tahi, hei tahunga tinana: 22 Kotahi

23 koati toa hei whakahere hara: E rua hoki nga puru hei patunga mo te pai, e rima hipi toa, e rima  
24 koati toa, e rima reme toa, he tau tahi: ko te whakahere tenei a Netaneere tama a Tuara. I te ra

25 tuatoru na Eriapa, na te tama a Herona, he ariki no nga tama a Hepurona: Ko tana whakahere  
he rihi hiriwa, kotahi rau e toru tekau hekere te taimaha, he peihana hiriwa, e whitu tekau ona  
hekere, he hekere wahi tapu; ki tonu raua i te paraoa pai i konatunatua ki te hinu hei whakahere

26 totokore: Kotahi koko koura, tekau ona hekere, ki tonu i te whakakakara; 27 Kotahi puru, he

28 kua, kotahi hipi toa, kotahi reme toa, he tau tahi, hei tahunga tinana: Kotahi koati toa hei

29 whakahere hara: E rua hoki nga puru hei patunga mo te pai, e rima nga hipi toa, e rima koati  
30 toa, e rima reme toa, he tau tahi: ko te whakahere tenei a Eriapa tama a Herona. I te ra tuawha

31 na Erituru, na te tama a Hereuru, he ariki no nga tama a Reupena: Ko tana whakahere he rihi  
hiriwa, kotahi rau e toru tekau hekere te taimaha, he peihana hiriwa, e whitu tekau ona hekere, he

hekere wahi tapu; ki tonu raua i te paraoa pai i konatunatua ki te hinu, hei whakahere totokore.  
<sup>32</sup> He koko koura, tekau ona hekere, ki tonu i te whakakakara. <sup>33</sup> Kotahi puru, he kuaao, kotahi hipi  
<sup>34</sup> toa, kotahi reme toa, he tau tahi, hei tahunga tinana: <sup>35</sup> Kotahi koati toa hei whakahere hara: E  
 rua nga puru hei patunga mo te pai, e rima nga hipi toa, e rima koati toa, e rima reme toa, he tau  
<sup>36</sup> tahi: ko te whakahere tenei a Erituru tama a Hereuru. I te ra tuarima, na Herumiere, na te tama  
<sup>37</sup> a Turihararai, he ariki no nga tama a Himiona: He rihi hiriwa tana whakahere, kotahi rau e toru  
 tekau hekere tona taimaha, he peihana hiriwa, e whitu tekau ona hekere, he hekere wahi tapu; ki  
<sup>38</sup> tonu raua i te paraoa pai i konatunatua ki te hinu hei whakahere totokore: Kotahi koko koura,  
<sup>39</sup> tekau ona hekere, ki tonu i te whakakakara: Kotahi puru, he kuaao, kotahi hipi toa, kotahi reme  
<sup>40</sup> toa, he tau tahi, hei tahunga tinana: <sup>41</sup> Kotahi koati toa hei whakahere hara: E rua hoki nga puru  
 hei patunga mo te pai, e rima hipi toa, e rima koati toa, e rima reme toa, he tau tahi: ko te whakahere  
<sup>42</sup> tenei a Herumiere tama a Turiharai. I te ra tuaono na Eriahapa, tama a Teuere, he ariki no nga  
<sup>43</sup> tama a Kara: He rihi hiriwa tana whakahere, kotahi rau e toru tekau hekere te taimaha, he peihana  
 hiriwa, e whitu tekau ona hekere, he hekere wahi tapu; ki tonu raua i te paraoa pai i konatunatua  
<sup>44</sup> ki te hinu hei whakahere totokore: He koko koura, tekau ona hekere, ki tonu i te whakakakara:  
<sup>45</sup> Kotahi puru, he kuaao, kotahi hipi toa, kotahi reme toa, he tau tahi, hei tahunga tinana: <sup>46</sup> Kotahi  
<sup>47</sup> koati toa hei whakahere hara: E rua hoki nga puru hei patunga mo te pai, e rima nga hipi toa, e  
<sup>48</sup> rima koati toa, e rima reme toa, he tau tahi: ko te whakahere tenei a Eriahapa tama a Teuere. I  
<sup>49</sup> te ra tuawhitu na Erihama; tama a Amihuru, he ariki no nga tama a Eparaima: He rihi hiriwa  
 tana whakahere, kotahi rau e toru tekau hekere te taimaha, he peihana hiriwa, e whitu tekau ona  
 hekere, he hekere wahi tapu; ki tonu raua i te paraoa pai i konatunatua ki te hinu hei whakahere  
<sup>50</sup> totokore: <sup>51</sup> Kotahi koko koura, tekau ona hekere, ki tonu i te whakakakara: Kotahi puru, he  
<sup>52</sup> kuaao, kotahi hipi toa, kotahi reme toa, he tau tahi, hei tahunga tinana: Kotahi koati toa hei  
<sup>53</sup> whakahere hara: E rua hoki nga puru hei patunga mo te pai, e rima nga hipi toa, e rima koati  
<sup>54</sup> toa, e rima reme toa, he tau tahi: ko te whakahere tenei a Erihama tama a Amihuru. I te ra tuawaru  
<sup>55</sup> na Kamariere, tama a Perahuru, he ariki no nga tama a Manahi: He rihi hiriwa tana whakahere,  
 kotahi rau e toru tekau hekere te taimaha, he peihana hiriwa e whitu tekau ona hekere, he hekere  
<sup>56</sup> wahi tapu; ki tonu raua i te paraoa pai i konatunatua ki te hinu hei whakahere totokore: Kotahi

koko koura, tekau ona hekere, ki tonu i te whakakakara: <sup>57</sup> Kotahi puru, he kua, kotahi hipi toa,  
 kotahi reme toa, he tau tahi, hei tahunga tinana: <sup>58</sup> Kotahi koati toa hei whakahere hara: <sup>59</sup> E rua  
 hoki nga puru hei patunga mo te pai, e rima nga hipi toa, e rima koati toa, e rima reme toa, he tau  
 tahi: ko te whakahere tenei a Kamariere tama a Perahuru. <sup>60</sup> I te ra tuaiwa na Apirana, tama a  
 Kirioni, he ariki no nga tama a Pineamine: <sup>61</sup> He rihi hiriwa tana whakahere, kotahi rau e toru  
 tekau hekere te taimaha, he peihana hiriwa, e whitu tekau ona hekere, he hekere wahi tapu; ki tonu  
 raua i te paraoa pai i konatunatua ki te hinu hei whakahere totokore: <sup>62</sup> He koko koura, tekau ona  
 hekere, ki tonu i te whakakakara: <sup>63</sup> Kotahi puru, he kua, kotahi hipi toa, kotahi reme toa, he tau  
 tahi, hei tahunga tinana: <sup>64</sup> Kotahi koati toa hei whakahere hara: <sup>65</sup> E rua hoki nga puru hei patunga  
 mo te pai, e rima nga hipi toa, e rima koati toa, e rima reme toa, he tau tahi: ko te whakahere tenei  
 a Apirana tama a Kirioni. <sup>66</sup> I te tekau o nga ra na Ahietere, tama a Amiharai, he ariki no nga tama  
 a Rana: <sup>67</sup> He rihi hiriwa tana whakahere, kotahi rau e toru tekau hekere te taimaha, he peihana  
 hiriwa, e whitu tekau ona hekere, he hekere wahi tapu: ki tonu raua i te paraoa pai i konatunatua  
 ki te hinu hei whakahere totokore: <sup>68</sup> Kotahi koko koura, tekau ona hekere, ki tonu i te whakakakara:  
<sup>69</sup> Kotahi puru, he kua, kotahi hipi toa, kotahi reme toa, he tau tahi, hei tahunga tinana: <sup>70</sup> Kotahi  
 koati toa hei whakahere hara: <sup>71</sup> E rua hoki nga puru hei patunga mo te pai, e rima nga hipi toa, e  
 rima koati toa, e rima reme toa, he tau tahi: ko te whakahere tenei a Ahietere tama a Amiharai. <sup>72</sup> I  
 te tekau ma tahi o nga ra na Pakiere, tama a Okorana, he ariki no nga tama a Ahera: <sup>73</sup> He rihi  
 hiriwa tana whakahere, kotahi rau e toru tekau hekere te taimaha, he peihana hiriwa, e whitu tekau  
 ona hekere, he hekere wahi tapu; ki tonu raua i te paraoa pai i konatunatua ki te hinu hei whakahere  
 totokore: <sup>74</sup> Kotahi koko koura, tekau ona hekere, ki tonu i te whakakakara: <sup>75</sup> Kotahi puru, he  
 kua, kotahi hipi toa, kotahi reme toa, he tau tahi, hei tahunga tinana: <sup>76</sup> Kotahi koati toa hei  
 whakahere hara: <sup>77</sup> E rua hoki nga puru hei patunga mo te pai, e rima nga hipi toa, e rima koati  
 toa, e rima reme toa, he tau tahi: ko te whakahere tenei a Pakiere tama a Okorana. <sup>78</sup> I te tekau ma  
 rua o nga ra na Ahira, tama a Enana, he ariki no nga tama a Napatari: <sup>79</sup> He rihi hiriwa tana  
 whakahere, kotahi rau e toru tekau hekere te taimaha, he peihana hiriwa, e whitu tekau ona hekere,  
 he hekere wahi tapu; ki tonu raua i te paraoa pai i konatunatua ki te hinu hei whakahere totokore:  
<sup>80</sup> Kotahi koko koura, tekau ona hekere, ki tonu i te whakakakara: <sup>81</sup> Kotahi puru, he kua, kotahi

hipi toa, kotahi reme toa, he tau tahi, hei tahunga tinana: <sup>82</sup> Kotahi koati toa he whakahere hara;  
<sup>83</sup> E rua hoki nga puru hei patunga mo te pai, e rima nga hipi toa, e rima koati toa, e rima reme toa,  
 he tau tahi: ko te whakahere tenei a Ahira tama a Enana. <sup>84</sup> Ko ta nga ariki a Iharaira tainga kawa  
 tenei mo te aata, i te ra i whakawahia ai: tekau ma rua nga rihi hiriwa, tekau ma rua nga peihana  
<sup>85</sup> hiriwa, tekau ma rua nga koko koura: Kotahi rau e toru tekau nga hekere o te rihi hiriwa kotahi,  
 e whitu tekau hoki o te peihana kotahi: e rua mano e wha rau nga hekere o nga oko hiriwa katoa,  
<sup>86</sup> he hekere wahi tapu: Tekau ma rua nga koko koura, ki tonu i te whakakakara, tekau nga hekere  
 o tetahi, o tetahi, he hekere wahi rapu: kotahi rau e rua tekau hekere te koura katoa o nga koko.  
<sup>87</sup> Ko nga kau katoa mo te tahunga tinana tekau ma rua nga puru, kotahi tekau ma rua nga hipi toa,  
 tekau ma rua nga reme toa tau tahi, me o ratou whakahere totokore: tekau ma rua ano nga kua  
<sup>88</sup> koati hei whakahere hara. Ko nga kau katoa hoki mo te patunga mo te pai, e rua tekau ma wha  
 nga puru, e ono tekau nga hipi toa, e ono tekau hoki nga koati toa, e ono tekau nga reme toa tau  
<sup>89</sup> tahi. Ko te tainga kawa tenei o te aata i muri i tona whakawahine. A, i te haerenga o Mohi ki  
 roto ki te tapenakara o te whakaminenga ki te korero ki a ia, na ka rongo ia ki te reo o tetahi e korero  
 ana ki a ia i runga i te taupoki, i tera i runga i te aaka o te whakaaturanga, i waenganui i nga kerupima  
 e rua: a ka korero ki a ia.

## Chapter 8

<sup>1</sup> I korero ano a Ihowa ki a Mohi, i mea, <sup>2</sup> Korero ki a Arona, mea atu ki a ia, Ka tahuna e koe  
 nga rama, kia marama i nga rama e whitu te wahi i mua o taua turanga rama. <sup>3</sup> I pera ano a Arona;  
 i meinga e ia kia ka nga rama ki te wahi i mua o te turanga rama; i pera ia me ta Ihowa i whakahau  
<sup>4</sup> ai ki a Mohi. A ko te mahinga tenei o te turanga rama, he mea patu te koura; ko tona take, ko ona  
 puawai, he mea patu; ko tana hanga i te turanga rama rite tonu ki te taura i whakakitea e Ihowa ki  
 a Mohi.  
<sup>5</sup> I korero ano a Ihowa ki a Mohi, i mea, <sup>6</sup> Tangohia nga Riwaiti i roto i nga tama a Iharaira,  
<sup>7</sup> ka pure i a ratou. Ko tenei tau e mea ai ki a ratou, hei pure i a ratou: tauhiuhia ki a ratou he wai  
<sup>8</sup> hei pure, kia heua o ratou tinana katoa, a me horoi e ratou o ratou kakahu, kia ma ai. Katahi ratou  
 ka mau ki tetahi puru kua, me tona whakahere totokore, ara te paraoa pai i konatunatua ki te hinu;  
<sup>9</sup> me tango ano e koe tetahi atu puru kua hei whakahere hara. Na ka kawea koe i nga Riwaiti ki

mua i te tapenakara o te whakaminenga, ka tawhiu mai ai i te huihui katoa o nga tama a Iharaira:  
10

Na ka kawe koe i nga Riwaiti ki te aroaro o Ihowa: a ka popoki nga ringa o nga tama a Iharaira  
11  
ki nga Riwaiti: A me whakahere e Arona nga Riwaiti ki te aroaro o Ihowa, hei whakahere poipoi

12  
ma nga tama a Iharaira, a ka waiho ratou hei mahi i te mahi a Ihowa. Na ka popoki nga ringa o  
nga Riwaiti ki runga ki nga matenga o nga puru: a me tuku tetahi e koe hei whakahere hara, tetahi

13  
hoki hei tahunga tinana ki a Ihowa, hei whakamarie mo nga Riwaiti. Na ka whakatu koe i nga  
Riwaiti ki te aroaro o Arona, ki te aroaro ano o ana tama, ka whakahere ai hei whakahere poipoi

14  
ki a Ihowa. Na me momotu e koe nga Riwaiti i roto i nga tama a Iharaira, a maku nga Riwaiti.

15  
A, muri iho, ka haere nga Riwaiti ki roto, ki te mahi i te mahi o te tapenakara o te whakaminenga:

16  
a me pure ratou e koe, me whakahere hoki hei whakahere poipoi. Ka tukua rawatia mai hoki  
ratou ki ahau i roto i nga tama a Iharaira: hei utu mo nga mea katoa e oroko puta mai ana i te kopu,

17  
ara mo nga matamua o nga tama katoa a Iharaira i tangohia ai ratou e ahau maku. Naku hoki  
nga matamua katoa o nga tama a Iharaira, nga tangata me nga kararehe: no te ra i patua ai e ahau

18  
nga matamua katoa o te whenua o Ihipa taku whakatapunga i a ratou maku. Na ka tangohia nei

19  
e ahau nga Riwaiti hei utu mo nga matamua katoa o nga tama a Iharaira. He mea hoatu naku  
nga Riwaiti i roto i nga tama a Iharaira ki a Arona ratou ko ana tama, hei mahi i nga mahi a nga  
tama a Iharaira, i te tapenakara o te whakaminenga, hei whakamarie mo nga tama a Iharaira: kei

20  
pa te whiu ki nga tama a Iharaira, ina whakatata nga tama a Iharaira ki te wahi tapu. Na, ko ta  
Mohi ratou ko Arona, ko te whakaminenga katoa o nga tama a Iharaira i mea ai ki nga Riwaiti,  
pera tonu me nga mea katoa i whakahau ai a Ihowa ki a Mohi mo nga Riwaiti; i pera tonu nga tama

21  
a Iharaira ki a ratou. Na ka horohoroa nga Riwaiti, a ka horoia o ratou kakahu; a whakaherea  
ana ratou e Arona hei whakahere poipoi ki te aroaro o Ihowa; a ka whakamarie a Arona mo ratou

22  
hei pure mo ratou. A ka mutu tera, ka tomo nga Riwaiti ki te mahi i a ratou mahi i te tapenakara  
o te whakaminenga, i te aroaro o Arona, i te aroaro ano hoki o ana tama: pera tonu me ta Ihowa i

23  
whakahau ai ki a Mohi mo nga Riwaiti ra ratou i mea ai ki a ratou. I korero ana a Ihowa ki a

24  
Mohi, i mea, Ko te mea tenei ma nga Riwaiti; ka rua tekau ma rima o ratou tau, ka maha ake

25  
ranei, me tomo ratou ki te mahi i nga mahi o te tapenakara o te whakaminenga: Ka maha ake o  
ratou tau i te rima tekau, me whakamutu ta ratou mahi i nga mahi o reira, kua ano hoki he mahi

26  
ma ratou i muri iho: Engari me minita tahi me o ratou tuakana i te tapenakara o te whakaminenga,  
me tiaki i nga mea e tiakina ana, kua hoki e mahi i tetahi mahi. Ko tenei tau e mea ai ki nga Riwaiti,  
ina tiaki ratou.

## Chapter 9

<sup>1</sup> I korero ano a Ihowa ki a Mohi i te koraha o Hinai, i te rua o nga tau o to ratou haerenga mai  
i te whenua o Ihipa, i te tahi o nga marama, i mea, <sup>2</sup> Me mahi ano te kapenga e nga tama a Iharaira  
i tona wa ano. <sup>3</sup> Me mahi i te tekau ma wha o nga ra o tenei marama, i te ahiahi, i tona wa ano: kia  
rite ki ona tikanga katoa, ki ona ritenga katoa, ta koutou meatanga. <sup>4</sup> Na ka korero a Mohi ki nga  
tama a Iharaira kia mahia te kapenga. <sup>5</sup> A ka mahia e ratou te kapenga i te tekau ma wha o nga ra  
o te marama tuatahi, i te ahiahi, i te koraha o Hinai: rite tonu ki nga mea katoa i whakahau ai a  
Ihowa ki a Mohi ta nga tama a Iharaira i mea ai. <sup>6</sup> Na tera etahi tangata i poke i te tupapaku, i kore  
ai e ahei te mahi i te kapenga i taua ra: na ka haere ratou ki te aroaro o Mohi raua ko Arona i taua  
<sup>7</sup> ra; A ka mea aua tangata ki a ia, Kua poke matou i te tupapaku: he aha matou te tukua ai ki te  
whakahere i te whakahere ma Ihowa i tona wa i rite ai, i roto i nga tama a Iharaira? <sup>8</sup> Na ka mea a  
Mohi ki a ratou, E tu koutou, a me whakarongo atu ahau ki to Ihowa e whakahau ai mo koutou.  
<sup>9</sup> A i korero a Ihowa ki a Mohi, i mea, <sup>10</sup> Korero ki nga tama a Iharaira, mea atu, Ki te poke i te  
tupapaku tetahi o koutou, o o koutou uri ranei, ki te mea ranei kei tawhiti e haere ana, me mahi ano  
e ia te kapenga ki a Ihowa. <sup>11</sup> Me mahi e ratou i te rua o nga marama, i te tekau ma wha o nga ra,  
i te ahiahi, me kinaki ki te taro rewenakore, ki nga puwha kawa: <sup>12</sup> Kua tetahi wahi o tena mea e  
whakatoea e ratou mo te ata, kua ano hoki e whatiia tetahi o ona wheua; kia rite ki nga tikanga  
<sup>13</sup> katoa o te kapenga ta ratou mahinga i tena mahi. Ko te tangata ia kahore ona poke, a kahore ano  
i te haere, a e mangere ana ki te mahi i te kapenga, ina, ka hatepea atu taua wairua i roto i tona iwi:  
kahore nei hoki i kawea e ia te whakahere ma Ihowa i tona wa i rite ai, ka waha e taua tangata tona  
<sup>14</sup> hara. A ki te noho he manene i roto i a koutou, a ka mea ki te mahi i te kapenga ki a Ihowa; kia  
rite ki nga tikanga o te kapenga, ki nga ritenga ano o taua mahi, tana e mea ai: kia kotahi ano ta  
koutou tikanga mo te manene raua ko te tangata whenua.  
<sup>15</sup> A i te ra i whakaarahia ai te tapenakara, ka taupokina te tapenakara e te kapua, ara te teneti  
o te whakaaturanga: a i te ahiahi i rite a runga o te tapenakara ki te ahua ahi, taea noatia te ata. <sup>16</sup> I  
pera tonu: i taupokina e te kapua i te awatea, e te ahua ahi hoki i te po. <sup>17</sup> Ka riro ake hoki te kapua  
i runga i te tapenakara, na, muri iho, ka haere nga tama a Iharaira: a i te wahi i tau ai te kapua ka  
<sup>18</sup> whakaturia e nga tama a Iharaira o ratou teneti ki reira. Na ko nga haerenga o nga tama a Iharaira  
na te whakahau a Ihowa, a ko o ratou nohoanga iho na te whakahau ano a Ihowa: i noho ano ratou



<sup>19</sup> i nga ra katoa i tau ai te kapua ki runga ki te tapenakara. A ka maha nga ra i roa ai te kapua ki  
<sup>20</sup> runga ki te tapenakara, na ka rite i nga tama a Iharaira ta Ihowa i whakarite ai, a kihai i haere. A  
 he wa ano i torutoru nga ra o te kapua ki runga ki te tapenakara; heoi na te whakahau a Ihowa ka  
<sup>21</sup> noho ratou i o ratou teneti, a na te whakahau ano a Ihowa ka haere ratou. A i etahi wa i tuturu  
 te kapua i te ahiahi taea noatia te ata; a ka riro ake te kapua i te ata, na ka haere ratou: ahakoa he  
<sup>22</sup> ao, he po ranei, i riro ake ai te kapua, i haere ano ratou. Ahakoa e rua nga ra, kotahi marama  
 ranei, kotahi tau ranei, i roa ai te kapua ki runga ki te tapenakara, i mau ai ki reira, na noho a puni  
 tonu iho nga tama a Iharaira, kahore hoki i haere: tona rironga ake ki runga, na ka haere ratou.  
<sup>23</sup> Na te whakahau a Ihowa ta ratou noho, na te whakahau hoki a Ihowa ta ratou haere: i rite i a  
 ratou ta Ihowa i whakarite ai, ta Ihowa i whakahau ai, i korerotia ai e Mohi.

## Chapter 10

<sup>1</sup> I korero ano a Ihowa ki a Mohi, i mea, <sup>2</sup> Hanga etahi tetere hiriwa mau, kia rua; me patupatu  
 to raua hanganga, ina hanga e koe; hei tawhiunga mau i te hui, mo nga maunutanga ano hoki o nga  
<sup>3</sup> puni. A ka whakatangihia aua mea, me huihui te whakaminenga katoa ki a koe, ki te whatitoka  
 o te tapenakara o te whakaminenga. <sup>4</sup> A ki te mea kotahi ano e whakatangihia, na me huihui ki a  
<sup>5</sup> koe nga ariki, nga upoko o nga mano o Iharaira. Ka whakatangihia he whakaoho e koutou, na ka  
<sup>6</sup> hapainga nga puni e noho ana ki te taha ki te rawhiti. A, i te rua o a koutou whakatangihanga o  
 te whakaoho, na ka hapainga nga puni e noho ana ki te taha ki te tonga: me whakatangi he whakaoho  
<sup>7</sup> e ratou mo o ratou maunutanga. Otiia, ka meatia kia huihuia te whakaminenga, me whakatangi  
<sup>8</sup> e koutou, engari kaua e whakatangihia he whakaoho. A ma nga tama a Arona, ma nga tohunga,  
<sup>9</sup> e whakatangi nga tetere a hei tikanga tena ki a koutou ake ake, i o koutou whakatupuranga. A ki  
 te anga koutou ki te whawhai i to koutou whenua ki te hoariri e whakatupu kino ana i a koutou, na  
 me whakatangi he whakaoho ki nga tetere; a ka maharatia koutou e Ihowa, e to koutou Atua, ka  
<sup>10</sup> whakaorangia hoki i o koutou hoariri. I te ra ano e hari ai, i o koutou ra nunui hoki, i nga timatanga  
 o o koutou marama, me whakatangi nga tetere ki a koutou tahunga tinana, ki a koutou patunga mo  
 te pai; a hei whakamahara ena ki a koutou ki te aroaro o to koutou Atua: ko Ihowa aha u, ko to  
 koutou Atua.

11 A i te rua tekau o te rua o nga marama, i te rua o nga tau, kua riro ake te kapua i runga i te  
 tapenakara o te whakaaturanga. 12 Na ka hapainga e nga tama a Iharaira i te koraha o Hinai; a ka  
 tau te kapua ki te koraha o Parana. 13 A rite tonu ta ratou hapainga mataati ki te kupu a Ihowa i  
 korerotia e Mohi. 14 Ko te tuatahi i maunu, ko te kara o te puni o nga tama a Hura, me o ratou ropu:  
 a ko te kaiwhakahaere o tana ope ko Nahahona tama a Aminarapa. 15 A ko te kaiwhakahaere o te  
 ope o te iwi o nga tama a Ihakara ko Netaneere tama a Tuara. 16 Ko te kaiwhakahaere hoki o te  
 ope o te iwi o nga tama a Hepurona ko Eriapa tama a Herona. 17 Na ka wahia te tapenakara; a ka  
 turia atu e nga tama a Kerehona, ratou ko nga tama a Merari, ko ratou ki te amo i te tapenakara.  
 18 Na ka maunu ko te kara o te puni o Reupena, me o ratou ropu: ko te kaiwhakahaere o tana ope  
 ko Erituru tama a Hereuru. 19 A ko te kaiwhakahaere o te ope o te iwi o nga tama a Himiona ko  
 Herumiere tama a Turiharai. 20 A ko te kaiwhakahaere o te ope o te iwi o nga tama a Kara ko  
 Eriahapa tama a Teuere. 21 Na ka turia atu e nga Kohati me te amo i te nohoanga tapu: a tae rawa  
 atu ratou kua tu te tapenakara i etahi. 22 Na ka maunu atu ko te kara o te puni o nga tama a Eparaima,  
 me o ratou ropu: a ko te kaiwhakahaere o tana ope ko Erihama tama a Amihuru. 23 A ko te  
 kaiwhakahaere o te ope o te iwi o nga tama a Manahi ko Kamariere tama a Peraturu. 24 A ko te  
 kaiwhakahaere o te ope o te iwi o nga tama a Pineamine ko Apirana tama a Kirioni. 25 Na ka maunu  
 ko te kara o te puni o nga tama a Rana, ko te hiku tena o nga puni katoa, puta noa i o ratou ope: a  
 ko te kaiwhakahaere o tana ope ko Ahietere tama a Amiharai. 26 A ko te kaiwhakahaere o te ope  
 o te iwi o nga tama a Ahera ko Pakiere tama a Okorana. 27 A ko te kaiwhakahaere o te ope o te  
 iwi o nga tama a Napatari ko Ahira tama a Enana. 28 Ko nga maunutanga enei o nga tama a Iharaira,  
 me o ratou ope, i o ratou whakatikanga atu.  
 29 Na ka mea a Mohi ki a Hopapa, tama a Reuere Miriani, a te hungawahi o Mohi, E haere ana  
 matou ki te wahi i mea nei a Ihowa, Ka hoatu a reira e ahau ki a koutou: haere mai tatou, a ka pai  
 ta matou mahi ki a koe: he pai hoki te korero a Ihowa mo I haraira. 30 A ka mea tera ki a ia, E kore  
 ahau e haere: engari me haere ahau ki toku whenua, ki oku whanaunga. 31 A ka mea ia, Kaua ra  
 matou e whakarerea; e mohio ana hoki koe ki nga puni mo matou i te koraha, a ka ai koe hei kanohi  
 mo matou. 32 Na, tenei ake, ki te haere koe i a matou, ina, tenei ake ko te pai e meatia mai e Ihowa

33  
 ki a matou ka meatia hoki e matou ki a koe. Na ka turia atu e ratou i te maunga o Ihowa, e toru  
 nga ra i haere ai: a i haere te aaka o te kawenata o Ihowa i mua i a ratou, i nga ra e toru i haere ai,  
 34  
 ki te titiro okiokinga mo ratou. A i runga i a ratou te kapua o Ihowa i te awatea, i to ratou  
 35  
 whakatikanga atu i te puni. A ka maunu te aaka, na, ka mea a Mohi, Whakatika, e Ihowa, a kia  
 36  
 marara ou hoariri; kia rere hoki i tou; aroaro te hunga e kino ana ki a koe. A ka tu te aaka, na  
 ka mea ia, Hoki mai, e Ihowa, ki nga mano tini o Iharaira.

## Chapter 11

1  
 A ka takiamuamu te iwi, ka korero kino ki nga taringa o Ihowa: a, no te rongonga o Ihowa,  
 ka mura tona riri; a ka ka te ahi a Ihowa i roto i a ratou, a pau ake te hunga i nga pito ki waho o te  
 2  
 puni. Na ka tangi te iwi ki a Mohi; a ka inoi a Mohi ki a Ihowa, na, ka mate te ahi. A huaina 3  
 iho te ingoa o tena wahi ko Tapera: no te kaanga hoki o te ahi a Ihowa i roto i a ratou.  
 4  
 Na ka minamina nga whakauru i roto i a ratou: me nga tama hoki a Iharaira i tangi ano, i mea,  
 5  
 Ma wai e homai he kikokiko hei kai ma tatou? E mahara ana tatou ki nga ika i kainga noatia e  
 6  
 tatou ki Ihipa; ki nga kukama, ki nga merengi, ki nga riki, ki nga aniana, me te karika: Ko tenei  
 ia, kua maroke o tatou wairua; kahore rawa nei tetahi mea: kahore he mea ke hei tirohanga ma tatou  
 7  
 ko tenei mana anake. Na ko te rite o te mana kei te pua korianara; ko tona kara kei te kara teriuma.  
 8  
 I kopikopiko te iwi ki te kohi, a hurihia ana e ratou ki nga mira, i tukia ranei ki te kumete, a tunua  
 9  
 ana e ratou ki te kohua, hanga ana hoki hei keke: ko tona reka kei to te hinu hou. A, i te taunga  
 10  
 iho o te haunui ki te puni i te po, i tau ano te mana ki runga. A i rongo a Mohi i te iwi e tangi  
 ana, puta noa i o ratou hapu, tenei, tenei, i te whatitoka o tona teneti: a he nui te muranga o te riri  
 11  
 o Ihowa; a i kino hoki ki ta Mohi. Na ka mea a Mohi ki a Ihowa, He aha koe i whakatupu kino  
 ai i tau pononga? he aha ahau te manakohia ai e koe, i whakawaha ai e koe tenei iwi katoa ki ahau?  
 12  
 He uri ianei noku tenei iwi katoa? i whanau ranei ratou i ahau, i mea ai koe ki ahau, Hikitia ki  
 tou uma, kia rite ki ta te matu atawhai, ki tana hiki i te potiki, ki te whenua i oatitia e koe ki o ratou  
 13  
 matua? No hea aku kikokiko hei hoatutanga maku ki tenei iwi katoa? e tangi mai ana hoki ratou  
 14  
 ki ahau, e mea mai ana, Homai he kikokiko ki matou hei kai ma matou. E kore tenei iwi katoa

15  
e taea e ahau anake te waha, he taimaha rawa maku. A ki te penei tau mahi ki ahau, tena, whakamatea rawatia ahau, ki te mea kua manakohia mai ahau e koe; kaua hoki ahau e kite i te he moku.

16  
Na ka mea a Ihowa ki a Mohi, Huihuia mai ki ahau kia whitu tekau o nga kaumatua o Iharaira, au i mohio ai he kaumatua no te iwi, he rangatira no ratou; me kawe mai ratou ki te tapenakara o

17  
te whakaminenga, me tu tahi koutou ki reira. A maku e haere iho, e korero ki a koe ki reira: me tongo ano e ahau tetahi wahi o te wairua i runga i a koe, ka hoatu ki runga ki a ratou; a ko ratou

18  
hei hoa mou ki te waha i te pikaunga, ara i te iwi; kei waha e koe anake. Me ki atu hoki e koe ki te iwi, Whakatapu i a koutou mo apopo a ka kai kikokiko koutou: kua tangi na hoki koutou ki nga taringa o Ihowa, kua mea, Ma wai e homai he kikokiko hei kai ma matou? he pai hoki nga mea

19  
i a matou i Ihipa: mo reira ka hom ai e Ihowa he kikokiko ki a koutou, a ka kai koutou. E kore e kotahi te ra e kai ai koutou, e kore ano hoki e rua nga ra, e kore e rima nga ra, e kore e tekau nga

20  
ra, e kore e rua tekau nga ra; Engari kia pau te marama, a puta noa i o koutou ihu, a ngaruru iho koutou: mo koutou i whakahawe ki a Ihowa e noho nei i waenganui i a koutou, i tangi hoki ki tona

21  
aroaro, i mea, He aha tatou i haere mai ai i Ihipa? Ko te iwi kei roto nei ahau i a ratou e ono rau mano, he hunga haere raro, a kua mea mai nei koe, Ka hoatu e ahau he kikokiko ki a ratou, a kia

22  
kotahi tino marama e kai ai ratou. Me patu ranei nga hipi me nga kau ma ratou, kia rato ai ratou?

23  
me kahi mai ranei nga ika katoa o te moana ma ratou, kia rato ai ratou? Ano ra ko Ihowa ki a Mohi, Kua mutua ranei te ringa o Ihowa? ka kite koe aianei he pono ranei taku kupu ki a koe, kahore ranei.

24  
Na ka puta a Mohi ki waho, a korerotia ana e ia nga kupu a Ihowa ki te iwi, a huihuia ana e ia e whitu tekau o nga kaumatua o te iwi, a whakaturia ana ki tetahi taha, ki tetahi taha o te

25  
tapenakara. Na ko te hekenga iho o Ihowa i roto i te kapua, ko te korerotanga hoki ki a ia, na ka tangohia e ia tetahi wahi o te wairua i runga i a ia, a hoatu ana ki nga kaumatua e whitu tekau: a i

26  
te taunga iho o te wairua ki a ratou, ka poropiti ratou, a kore ake i pera i muri. A tokorua i mahue ki te puni, ko Ererara te ingoa o tetahi, ko Merara te ingoa o tetahi: na ko te taunga iho o te wairua ki runga ki a raua; no te hunga hoki raua i tuhituhia, otiaa kihai i haere ki te tapenakara: na ka

27  
poropiti raua i roto i te puni. Na ka oma tetahi taitama ki te korero ki a Mohi, a ka mea, Kei te

28  
poropiti a Ererara raua ko Merara i roto i te puni. Na ko te ohonga o te tangata a Mohi, o Hohua

29  
tama a Nunu, ko tetahi hoki ia o ana taitamariki, ka mea, E toku ariki, e Mohi, riria raua. Ano ra ko Mohi ki a ia, He whakaaro ki ahau i hae ai koe? he oranga ngakau ra me i poropiti katoa te

30  
iwi o Ihowa, me i tukua iho hoki e Ihowa tona wairua ki a ratou. Na ka haere a Mohi ki roto ki te puni, a ia me nga kaumatua o Iharaira.

31  
Na ka puta he hau i a Ihowa, a kawea ana mai nga koitareke i te moana, kua maka ki te taha o te puni, kia kotahi pea te ra e haere ai i tetahi taha, kia kotahi pea hoki te ra e haere ai i tera taha, a tawhio noa te puni, me te mea ano e rua what ianga te teitei i runga i te mata o te whenua. 32  
Na ka tu te iwi a pau katoa taua ra, taua po katoa hoki, me te ra katoa hoki i te aonga ake, ki te kohikohi i nga koitareke: kotahi tekau nga homa a te tangata nana te kohinga iti: a horahorangia noatia atu

33  
ana e ratou hei kai ma ratou, a tawhio noa te puni. A, i te mea kei o ratou niho ano te kokokiko, i te mea kahore ano i ngaua noatia, na ka mura te riri o Ihowa ki te iwi, a whiua ana te iwi e Ihowa

34  
ki tetahi whiu nui rawa atu. Na huaina iho e ia te ingoa o taua wahi ko Kipiroto Hataawa; no te mea i tanumia e ratou ki reira te hunga i minamina. 35  
Na ka turia atu e te iwi i Kipiroto Hataawa ki Hateroto; a noho ana i Hateroto.

## Chapter 12

1  
Na ka whakahe a Miriama rau ko Arona ki a Mohi mo te wahine Kuhi i marenatia e ia: he wahine Kuhi hoki tana i marena ai. 2  
A ka mea raua, Koia ranei i a Mohi anake nga korero a Ihowa? kahore ranei ana korero hoki i a maua? A ka rongu a Ihowa. 3  
Na, he tangata mahaki rawa a Mohi i nga tangata katoa o te mata o te whenua.

4  
Na i ohorete tunu te korerotanga a Ihowa ki a Mohi ratou ko Arona, ko Miriama, Puta mai koutou tokotoru ki te tapenakara o te whakaminenga. A ka puta atu ratu tokotoru. 5  
Na ka heke iho a Ihowa i roto i te pou kapua, a ka tu ki te whatitoka o te tapenakara, ka karanga hoki ki a Arona

6  
raua ko Miriama: a ka puta raua. A ka mea ia, Tena, whakarongo ki aku korero: ki te mea he poropiti kei a koutou, ka whakaatu atu ahau, a Ihowa i ahau ki a ia, he mea whakakite, he korero

7  
moemoea ki a ia. Ehara taku pononga, a Mohi i te pera; he pono ia i toku whare katoa: 8  
Ka korero ahau ki a ia, he mangai, he mangai, he korero mata nui, kahore hoki he kupu ngaro; a e kite ano ia i te ahua o Ihowa: he aha ra korua te wehi ai ki te whakahe mo taku pononga, mo Mohi?

9  
Na ka mutu te riri o Ihowa ki a raua, a haere ana ia.

10  
Na ka riro atu te kapua i runga i te tapenakara: na! he repera a Miriama, kua rite ki te hukarere:

11  
a ka titiro a Arona ki a Miriama, e! he repera. Na ka mea a Arona ki a Mohi, Aue, e toku ariki,

kaua e utaina ki a maua tenei hara i pouau nei, i hara nei maua. <sup>12</sup> Kei rite ia ki te mea kua mate,  
 ki te mea kua pau tetahi wahi o ona kikokiko i te putanga mai i te kopu o tona whaea. <sup>13</sup> Na ka  
 karanga atu a Mohi ki a Ihowa, ka mea, E te Atua, tena ra, whakaorangia ia. <sup>14</sup> Na ka mea a Ihowa,  
 ki a Mohi, Me i tuwha kau tona papa ki tona mata e kore ianei ia e whakama, a whitu noa nga ra?  
 kia whitu nga ra e tutakina atu ai ia ki waho o te puni, a muri iho ka mauria mai ano. <sup>15</sup> Na tutakina  
 atu ana a Miriama ki waho o te puni, e whitu nga ra; kihai ano hoki te iwi i haere, kia whakahokia  
 mai ra ano a Miriama. <sup>16</sup> A muri iho ka turia e te iwi i Hateroto, a noho ana i te koraha o Parana.

### Chapter 13

<sup>1</sup> I korero ano a Ihowa ki a Mohi, i mea, <sup>2</sup> Me unga e koe etahi tangata hei tutei mo te whenua  
 o Kanaana, mo tera e hoatu nei e ahau ki nga tama a Iharaira: kia kotahi o tenei iwi, o tenei iwi o  
 o ratou matua e tonoa e koutou, hei te rangatira anake. <sup>3</sup> Na ka unga a Mohi i ratou i te koraha o  
 Parana, ka pera me ta Ihowa i ki ai; he upoko katoa enei tangata no nga tama a Iharaira. <sup>4</sup> Ko o  
 ratou ingoa enei; no te iwi o Reupena, ko Hamua tama a Takuru. <sup>5</sup> No te iwi o Himiona, ko Hapata  
 tama a Hori. <sup>6</sup> No te iwi o Hura, ko Karepe tama a Iepune. <sup>7</sup> No te iwi o Ikara, ko Ikara tama a  
 Hohepa. <sup>8</sup> No te iwi o Eparaima, ko Hohea tama a Nunu. <sup>9</sup> No te iwi o Pineamine, ko Parati tama  
 a Rapu. <sup>10</sup> No te iwi o Hepurona, ko Kariere tama a Hori. <sup>11</sup> No te iwi o Hohepa, ara no te iwi o  
 Manahi, ko Kari tama a Huhi. <sup>12</sup> No te iwi o Rana, ko Amiere tama a Kemari. <sup>13</sup> No te iwi o Ahera,  
 ko Heturu tama a Mikaere. <sup>14</sup> No te iwi o Napatari, ko Nahapi tama a Wopohi. <sup>15</sup> No te iwi o Kara,  
 ko Keuere tama a Maki. <sup>16</sup> Ko nga ingoa enei o nga tangata i unga nei e Mohi hei tutei mo te  
 whenua. A huaina iho e Mohi a Hohea tama a Nunu ko Hohua. <sup>17</sup> Na ka unga ratou e Mohi hei  
 tutei mo te whenua o Kanaana, ka mea ia ki a ratou, Haere atu ki runga na konei, na te tonga, ka  
 kake ki te maunga: <sup>18</sup> Ka titiro ai i te whenua, he aha ranei; i te iwi ano hoki e noho ana i reira, he  
 kaha ranei, he kahakore ranei, he tokoouou ranei, he tokomaha ranei; <sup>19</sup> He pehea te whenua e  
 nohoia ana e ratou, he pai ranei, he kino ranei; he pehea hoki nga pa e nohoia ana e ratou, he teneti  
 ranei, he mea taiepa ranei; <sup>20</sup> He pehea hoki te whenua, he momona ranei, he kikokore ranei, he

rakau ranei to reira, kahore ranei. Kia maia hoki, maua mai ano etahi o nga hua o te whenua. Na, ko taua wa ko te wa o nga karepe matamua.

<sup>21</sup>

Na ko to ratou haerenga ki runga, tuteia ana e ratou te whenua i te koraha o Hini, a tae noa

ki Rehopo, ki te haerenga atu ki Hamata. <sup>22</sup> A i haere ratou na te tonga, ka tae ki Heperona; a i reira a Ahimana, a Hehai, a Taramai, nga tama a Anaka. Na ko Heperona, ko tona hanganga, e

whitu nga tau i mua i to Toana i Ihipa. <sup>23</sup> A ka tae iho ratou ki te awaawa ki Ehekora, ka tapahia i reira he manga karepe, kotahi te tautau, ka amohia e te tokorua i runga i te tokotoko; i mauria mai

ano etahi pamekaranete, me etahi piki. <sup>24</sup> A huaina iho taua wahi ko te raorao o Ehekora, no te

tautau karepe i tapahia e nga tama a Iharaira i reira. <sup>25</sup> No te paunga o nga ra e wha tekau ka hoki mai ratou i te tutei i te whenua.

<sup>26</sup>

Na haere ana, a ka tae ki a Mohi ratou ko Arona, ko te whakaminenga katoa o nga tama a Iharaira, ki te koraha o Parana, ki Karehe; ki te whakahoki i te korero ki a ratou ko te whakaminenga

katoa, a whakakitea ana e ratou nga hua o te whenua ki a ratou. <sup>27</sup> A ka korero ki a ia, ka mea, I tae matou ki te whenua i unga nei matou e koe, na he pono e rerengia ana e te waiu, e te honi; ko

ona hua tenei. <sup>28</sup> Otiia he kaha te iwi e noho ana i taua whenua, he mea taiepa hoki nga pa, he

nunui rawa: i kite ano matou i nga tama a Anaka ki reira. <sup>29</sup> E noho ana nga Amareki i te whenua ki te tonga: ko nga Hiti, ko nga Iepuhi, ko nga Amori, e noho ana i nga maunga: kei te taha o te

moana nga Kanaani e noho ana, kei te taha ano o Horano. <sup>30</sup> Na ka whakamarietia te iwi e Karepe i te aroaro o Mohi, a ka mea ia, Kia hohoro ta tatou haere ki te tango i reira; e taea hoki e tatou.

<sup>31</sup>

Ko nga tangata ia i haere tahi me ia ki runga, i mea, E kore e ahei i a tatou te haere ki runga, ki

taua iwi; he kaha ake hoki ratou i a tatou. <sup>32</sup> Na ka kawea e ratou he korero kino mo te whenua i tuteia e ratou ki nga tama a Iharaira, i mea ratou, Ko taua whenua i haerea ra e matou, i tuteia, he whenua e ngau ana i ona tangata; he tangata nunui rawa hoki te hunga katoa i kitea e matou ki reira.

<sup>33</sup>

He nunui rawa hoki nga tangata i kitea e matou ki reira, he tama na Anaka, he uri no nga tangata roroa: a ki ta matou titiro, me he mawhitiwhiti matou: he pera ano matou ki ta ratou titiro.

## Chapter 14

<sup>1</sup> Na ka hamama te reo o te whakaminenga katoa; a ka tangi te iwi i taua po. <sup>2</sup> A amuamu ana nga tama katoa a Iharaira ki a Mohi raua ko Arona: a ka mea te whakaminenga katoa ki a raua,

Aue, me i mate tatou ki te whenua o Ihipa! aue, me i mate ranei tatou ki tenei koraha! <sup>3</sup> He aha

tatou i kawea mai ai e Ihowa ki tenei whenua, kia hinga i te hoari: ka waiho a tatou wahine, a tatou tamariki hei taonga parau: ehara ianei te hoki ki Ihipa i te mea pai mo tatou? <sup>4</sup> A ka mea ratou tetahi ki tetahi, Me whakatu he upoko mo tatou, ka hoki ki Ihipa.

<sup>5</sup> Na ka tapapa a Mohi raua ko Arona ki te aroaro o te huihui katoa o te whakaminenga o nga tama a Iharaira. <sup>6</sup> A ka haehae a Hohua, tama a Nunu, raua ko Karepe, tama a Iepune, i o raua

kakahu; ko raua hoki etahi o nga kaitutei o te whenua: <sup>7</sup> A ka korero raua ki te whakaminenga katoa o nga tama a Iharaira, ka mea, He whenua pai rawa te whenua i haerea nei, i tuteia nei e

<sup>8</sup> matou. Ki te aro mai a Ihowa ki a tatou, ka kawea tatou e ia ki taua whenua, ka homai ano e ia ki a tatou; he whenua e rerengia ana e te waiu, e te honi. <sup>9</sup> Kaua raia koutou e tutu ki a Ihowa, kaua hoki e wehi i nga tangata o taua whenua, he taro hoki ratou ma tatou: kua mahue ratou i to ratou

<sup>10</sup> whakamarumaruru, a kei a tatou a Ihowa: kaua e wehi i a ratou. Heoi ko ta te whakaminenga katoa ki, me aki raua ki te kohatu. Na ko te putanga mai o te kororia o Ihowa i runga i te tapenakara o te whakaminenga ki te aroaro o nga tama katoa a Iharaira.

<sup>11</sup> Na ka mea a Ihowa ki a Mohi, Kia pehea ake te roa o te whakahawea a tenei iwi ki ahau? ahea ranei ratou whakapono ai ki ahau, he maha nei hoki aku tohu i whakakitea i roto i a ratou?

<sup>12</sup> Ka patua ratou e ahau ki te mate uruta, ka peia atu, a ka meinga koe hei iwi nui atu, kaha atu, i

a ratou. <sup>13</sup> Ano ra ko Mohi ki a Ihowa, Akuanei ka rongo nga Ihipiana; nau hoki tenei iwi i

whakaputa mai i runga i tou kaha i roto i a ratou; <sup>14</sup> Na ka korero ratou ki nga tangata o tenei whenua: kua rongo hoki ratou kei roto koe, e Ihowa, i tenei iwi: e kitea ana ano koe e Ihowa, titiro atu, titiro mai, e tu ana hoki tou kapua i runga i a ratou, e haere ana hoki koe i mua i a ratou i rot o

i te pou kapua i te awatea, i roto hoki i te pou ahi i te po. <sup>15</sup> Na ki te whakamatea e koe tenei iwi,

ano he tangata kotahi, katahi nga iwi i rongo nei ki tou rongo ka whai kupu, ka mea, <sup>16</sup> No te mea kihai i kaha a Ihowa ki te kawea i tenei iwi ki te whenua i oati ai ia ki a ratou, koia i whakamatea ai

ratou e ia ki te koraha. <sup>17</sup> Na kia nui ra te kaha o toku Ariki, kia rite ki tau i korero ai, i mea ai,

<sup>18</sup> He puhoi a Ihowa ki te riri, he nui tona atawhai, e muru ana i te kino, i te tutu, e kore rawa ano e tuku noa i te hunga he; e mea ana i te kino o nga matua kia tau ki nga tamariki, a te toru, te wha

<sup>19</sup> ra ano, o nga whakatupuranga. Tena, murua te kino o tenei iwi, kia rite ki te nui o tou atawhai, ki tau muru hoki i nga hara o tenei iwi, o Ihipa mai ano, a taea noatia a konei.

<sup>20</sup> Na ka mea a Ihowa, Kua murua e ahau, kua peratia me tau i ki mai na: <sup>21</sup> Otiia, e ora nei

ahau, a ka kapi te whenua katoa i te kororia o Ihowa; <sup>22</sup> Na, i te mea ko enei tangata katoa, i kite



nei i toku kororia, i aku merekara hoki i meinga ki Ihipa, ki te koraha, a ka tekau nei a ratou  
<sup>23</sup>  
whakamatautauranga i ahau, kahore ano i whakarongo ki toku reo; Ina, e kore rawa ratou e kite  
i te whenua i oati ai ahau ki o ratou matua, e kore ano tetahi o te hunga i whakahawea nei ki ahau  
<sup>24</sup>  
e kite i reira: Engari taku pononga a Karepe, he wairua ke hoki tona, a kua tino whai ia i ahau;  
<sup>25</sup>  
e kawea ia e ahau ki te whenua i haere atu na ia; a ka riro a reira i ona uri. Na kei te raorao nga  
Amareki me nga Kanaani e noho ana. Tahuri atu koutou apopo, haere atu ki te koraha, na te huarahi  
<sup>26</sup> <sup>27</sup>  
ki te Moana Whero. I korero ano a Ihowa ki a Mohi raua ko Arona, i mea, Kia pehea ake te  
roa o taku whakamanawanui ki tenei whakaminenga kino, e amuamu nei ki ahau? Kua rongona e  
<sup>28</sup>  
ahau nga amuamu a nga tama a Iharaira, e amuamu nei ratou ki ahau. Mea atu ki a ratou, E ora  
ana ahau, e ai ta Ihowa, ko ta koutou i korero mai ai ki oku taringa, he pono, ko taku tena e mea ai  
<sup>29</sup>  
ki a koutou, Ka hinga o koutou tinana ki tenei koraha; a ko koutou katoa i taua, puta noa atu i  
to koutou tokomaha, nga mea e rua tekau, he maha ake hoki, o ratou tau, te hunga hoki i amuamu  
<sup>30</sup>  
nei ki ahau, E kore koutou e tae ki te whenua i oati ai ahau ka whakanohoia koutou ki reira, heoi  
<sup>31</sup>  
ano ko Karepe tama o Iepune, raua ko Hohua tama a Nunu. Otiia ko a koutou potiki, i mea na  
koutou ka waiho hei taonga parau, ka kawea e ahau ki reira, a ka mohio ratou ki te whenua i  
whakahaweatia nei e koutou. <sup>32</sup> <sup>33</sup>  
Ko koutou ia, ka hinga o koutou tinana ki tenei koraha. A ka  
kopikopiko noa a koutou tamariki i te koraha, e wha tekau nga tau, ma ratou hoki e waha a koutou  
<sup>34</sup>  
puremutanga, kia poto ra ano o koutou tinana ki te koraha. Kia rite ra ano ki te maha o nga ra,  
ki nga ra e wha tekau, i tuteia ai e koutou te whenua, he tau he ra, he tau he ra; e wha tekau nga tau  
<sup>35</sup>  
e waha ai e koutou o koutou kino, a ka mohio koutou ki te takanga o taku kupu. Naku, na Ihowa  
te kupu, ina, ka meatia tenei e ahau ki tenei whakaminenga kino katoa, kua huihui nei ki te whakahe  
ki ahau: ka poto ratou ki tenei koraha, ka mate ano hoki ki konei.

<sup>36</sup>  
Na, ko nga tangata i unga e Mohi hei tutei mo te whenua, i hoki mai nei, i mea nei kia  
amuamutia ia e te whakaminenga katoa, i ta ratou kawenga mai i te korero kino mo te whenua,  
<sup>37</sup>  
Ko aua tangata, na ratou nei i kawea mai te korero kino mo te whenua, i mate ratou i te whiu ki  
<sup>38</sup>  
te aroaro o Ihowa. Ko Hohua ia, tama a Nunu, raua ko Karepe, tama a Iepune, ko raua i ora o  
nga tangata i haere ki te tutei i te whenua. <sup>39</sup>  
Na korerotia ana e Mohi enei kupu katoa ki nga tama  
<sup>40</sup>  
katoa a Iharaira: a ka pouri rawa te iwi. Na ka maranga wawe ratou i te ata, a ka haere ki te tihi  
o te maunga, me te ki ano, Tenei matou, a ka haere matou ki runga, ki te wahi i korerotia mai e  
<sup>41</sup>  
Ihowa: kua hara hoki matou. Na ka mea a Mohi, He aha koutou i takahi ai i te kupu a Ihowa, i

te mea kahore e whai wahi? <sup>42</sup> Kua e haere, kahore na hoki a Ihowa i a koutou, kei patua koutou  
 ki te aroaro o o koutou hoariri. <sup>43</sup> Kei reira hoki nga Amareki ratou ko nga Kanaani, kei mua i a  
 koutou, a ka hinga koutou i te hoari: mo koutou kua tahuri atu i te whai i a Ihowa, koia a Ihowa te  
 piri ai ki a koutou. <sup>44</sup> Heoi ka pokanoa ratou ki te piki ki te tihi o te maunga: otiia kihai te aaka o  
 te kawenata a Ihowa, me Mohi hoki, i hiki atu i te puni. <sup>45</sup> Na ka heke iho nga Amareki ratou ko  
 nga Kanaani e noho ana i taua maunga, a patua ana ratou, tukituki rawa, a taea noatia a Horema.

### Chapter 15

<sup>1</sup> I korero ano a Ihowa, ki a Mohi, i mea, <sup>2</sup> Korero ki nga tama a Iharaira, mea atu ki a ratou,  
 E tae koutou ki te whenua e noho ai koutou, ki taku e hoatu ai ki a koutou, <sup>3</sup> A ka mea i te whakahere  
 ahi ki a Ihowa, i te tahunga tinana, i te patunga tapu ranei hei whakamana mo te ki taurangi, i te  
 whakahere tuku noa ranei, i a koutou hakari nunui ranei, hei whakakakara reka ki a Ihowa, he mea  
 no nga kau, no nga hipi ra nei: <sup>4</sup> Na me kawe mai tana whakahere e te kaiwhakahere ki a Ihowa  
 he whakahere totokore, ko te whakatekau o te epa o te paraoa pai, he mea konatunatu ki te whakawha  
 o te hine hinu: <sup>5</sup> Kia rite mai ano i a koe te whakawha o te hine waina, hei ringihanga, hei kinaki  
 mo te tahunga tinana, mo te patunga tapu ranei, mo te reme kotahi. <sup>6</sup> Ki te mea he hipi toa, kia rite  
 i a koe hei whakahere totokore nga whakatekau e rua o te epa o te paraoa pai, he mea konatunatu  
 ki te whakatoru o te hine nihi. <sup>7</sup> Me whakahere ano e koe te whakatoru o te hine waina hei  
 ringihanga, hei kakara reka ki a Ihowa. <sup>8</sup> A ka mea koe i te puru hei tahunga tinana, hei patunga  
 tapu ranei, hei whakamana i te kupu taurangi, hei whakahere ranei mo te pai ki a Ihowa: <sup>9</sup> Na me  
 kawe tahi ano e ia me te puru, hei whakahere totokore, kia toru nga whakatekau o te epa o te paraoa  
 pai, he mea konatunatu ki te hawhe o te hine hinu. <sup>10</sup> Me kawe ano e koe te hawhe o te hine waina  
 hei ringihanga, hei whakahere ahi, hei kakara reka ki a Ihowa. <sup>11</sup> Kia penei te meatanga mo te puru  
 kotahi, mo te hipi toa kotahi, mo te reme toa, mo te kua koati. <sup>12</sup> Kia rite ki te maha o a koutou  
 e tuku ai ta koutou e mea ai ki te tahi, ki tetahi, kia rite tonu ki te maha o ratou. <sup>13</sup> Kia penei te  
 meatanga a nga tangata whenua katoa i enei mea, ina whakahere i te whakahere ahi, hei kakara  
 reka ki a Ihowa. <sup>14</sup> A, ki te noho i a koe tetahi manene, tetahi noa atu ranei, i roto i a koutou i o  
 koutou whakatupuranga, a ka mea kia whakahere i te whakahere ahi, i te kakara reka ki a Ihowa;

15  
 kia rite tana e mea ai ki ta koutou e mea ai. Mo te whakaminenga kia kotahi te tikanga mo  
 koutou, mo te manene hoki e noho tahi ana me koutou, hei tikanga pumau i o koutou  
 whakatupuranga: kia pera ano me koutou te manene i te aroaro o Ihowa. 16  
 Kia kotahi ano te ture,  
 17  
 kia kotahi ano te ritenga mo koutou, mo te manene hoki e noho ana i a koutou. I korero ano a  
 Ihowa ki a Mohi, i mea, 18  
 Korero ki nga tama a Iharaira, mea atu ki a ratou, E tae koutou ki te  
 19  
 whenua e kawea nei koutou e ahau ki reira, Na e kai koutou i te taro o te whenua, me whakahere  
 20  
 he whakahere hapahapai ki a Ihowa. Me whakahere he keke no ta koutou paraoa pokepoke  
 mataati hei whakahere hapahapai: kia rite ki te whakahere hapahapai o te patunga witi ta koutou  
 21  
 hapahapai. Me hoatu tetahi wahi o ta koutou pokepokenga mataati ki a Ihowa, hei whakahere  
 hapahapai, puta noa i o koutou whakatupuranga.  
 22  
 A ki te mea kua pohehe koutou, a kihai i rite enei whakahau katoa i korerotia nei e Ihowa  
 23  
 ki a Mohi, Ara nga mea katoa i whakahau ai koutou e Ihowa, i korerotia e Mohi, o te ra ano i  
 24  
 whakahau ai a Ihowa a tuku iho ki o koutou whakatupuranga; Ko reira, ki te meatia tetahi mea,  
 he pohehe hoki, e ngaro ana i nga kanohi o te whakaminenga, na me whakahere e te whakaminenga  
 katoa tetahi puru kua hei tahunga tinana, hei kakara reka ki a Ihowa, me tona whakahere totokore,  
 25  
 me tona ringihang a; kia rite ki te tikanga, kia kotahi hoki koati toa hei whakahere hara. A ka  
 whakamarie te tohunga mo te whakaminenga katoa o nga tama a Iharaira, a ka murua to ratou he;  
 he pohehe hoki: a me kawea ta ratou whakahere, hei whakahere ahi ki a Ihowa, me ta ratou whakahere  
 26  
 hara ki te aroaro o Ihowa, mo to ratou pohehe: A ka murua taua he o te whakaminenga katoa o  
 27  
 nga tama a Iharaira, o te manene ano e noho ana i a ratou: no te mea i pohehe katoa te iwi. Ki  
 te pohehe ano tetahi wairua, a ka hara, na me kawea mai e ia he koati uha, hei te tau tahi, hei  
 28  
 whakahere hara. A me whakamarie te tohunga mo te wairua i hara pohehe, ina hara pohehe ia,  
 29  
 ki te aroaro o Ihowa, hei whakamarie mona; a ka murua tana. Kia kotahi ano ta koutou ture mo  
 te tangata i hara pohehe, mo te tangata whenua o nga tama a Iharaira raua ko te manene e noho ana  
 i a ratou.  
 30  
 Ko te wairua ia i whakakake, ahakoa tangata whenua, manene ranei, he kohukohu tana i a  
 Ihowa; a ka hatepea atu taua wairua i roto i tona iwi. 31  
 I whakahawea ia ki te kupu a Ihowa, i  
 32  
 whakataka hoki i tana whakahau; ka tino hatepea atu taua wairua; ka mau tona kino ki a ia. A,  
 33  
 i nga tama a Iharaira i te koraha, ka kitea tetahi tangata e kohikohi rakau ana i te ra hapatu. Na  
 ka kawea ia e nga tangata, i kite ra i a ia e kohikohi ana i nga rakau, ki a Mohi raua ko Arona, a ki

<sup>34</sup> te whakaminenga katoa. Na hoatu ana ia e ratou kia tiakina, no te mea kahore ano i whakaaturia  
<sup>35</sup> me aha ia. A ka mea a Ihowa ki a Mohi, me whakamate rawa tena tangata: ma te whakaminenga  
<sup>36</sup> katoa ia e aki ki te kohatu ki waho o te puni. Na kawea ana ia e te whakaminenga katoa ki waho  
 o te puni, a akina ana ki te kohatu, a ka mate: pera me ta Ihowa i whakahau ai ki a Mohi.  
<sup>37</sup> I korero ano a Ihowa ki a Mohi, i mea, <sup>38</sup> Koreroki nga tama a Iharaira, mea atu ki a ratou  
 kia hanga etahi taniko mo ratou, mo nga taha o o ratou kakahu, puta noa i o ratou whakatupuranga,  
<sup>39</sup> kia karapitia hoki te taniko o te pito ki te miro puru: A hei taniko tena mo koutou, hei titiro iho  
 ma koutou, na ka mahara ki nga whakahau katoa a Ihowa, a ka mahi; kei rapu koutou i ta o koutou  
<sup>40</sup> ngakau, i ta o koutou kanohi, ara i nga mea e whaia atu nei, e puremutia atu nei e koutou: Kia  
<sup>41</sup> mahara ai koutou ki te mahi i aku whakahau katoa, kia tapu ai hoki ki to koutou Atua. Ko Ihowa  
 ahau, ko to koutou Atua i kawea mai nei a koutou i te whenua o Ihipa, kia waiho ai ahau hei Atua  
 mo koutou: ko Ihowa ahau, ko to koutou Atua.

## Chapter 16

<sup>1</sup> Na ka tango tangata a Koraha tama a Itihara, tama a Kohata, tama a Riwai, ratou ko Ratana,  
 ko Apirama, tama a Eriapa, ko Ono hoki, tama a Perete, he tama na Reupena; <sup>2</sup> A ka whakatika  
 ratou kite aroaro o Mohi, me etahi o nga tama a Iharaira, e rua rau e rima tekau, he rangatira no te  
<sup>3</sup> whakaminenga, e rangona ana i roto i te huihui, he hunga whai ingoa: Ka whakahuihui ratou i a  
 ratou ki a Mohi raua ko Arona, ka mea ki a raua, He kaha rawa ta korua tango tikanga, he tapu kau  
 nei te whakaminenga katoa, kei waenganui ano hoki a Ihowa i a ratou: he aha ra korua i whakanui  
<sup>4</sup> aia i a korua ki runga ake i te whakaminenga a Ihowa? A, no te rongonga o Mohi, ka hinga tapapa  
<sup>5</sup> iho ia: A ka korero ki a Koraha ratou ko tana hui katoa, ka mea, A te ata ka whakaaturia mai e  
 Ihowa ko wai tana, ko wai te mea tapu; ka meinga ano e ia kia whakatata ki a ia: ko tana i whiriwhiri  
<sup>6</sup> ai, ko ia tana e mea ai kia whakatata ki a ia. Ko tenei ta koutou e mea ai, Tikina etahi tahu kakara  
<sup>7</sup> ma koutou, e Koraha ratou ko tana hui katoa; Ka maka hoki he ahi ki roto, ka mea ai i te  
 whakakakara ki runga, ki te aroaro o Ihowa apopo, a, ko te tangata e whiriwhiri ai a Ihowa, ko ia  
<sup>8</sup> te mea tapu: kati ta koutou, e nga tama a Riwai. I mea ano a Mohi ki a Koraha, Na, whakarongo  
<sup>9</sup> mai, e nga tama a Riwai: He mea iti ianei ki ta koutou kia wehea koutou e te Atua o Iharaira i  
 roto i te huihui o Iharaira, kia meinga kia whakatata ki a ia, kia mahi i te mahi o te tapenakara o

10  
Ihowa, kia tu hoki ki te aroaro o te hui, hei minita ma ratou? Kua meinga ano koe e ia kia tata, koutou tahi ko ou teina katoa, ko nga tama a Riwai: na, me whai ano hoki e koutou te tohungatanga?

11  
Koia koutou ko tau hui katoa ka huihui nei ki a Ihowa: ko Arona hoki, he ha ia, i amauamu ai koutou ki a ia?

12  
Na ka tonono tangata a Mohi hei karanga i a Ratana raua ko Apirama, i nga tama a Eriapa: a  
13  
ka mea raua, E kore maua e hare atu: He mea iti ianei tau kawe mai i a matou i te whenua e rerengia ana e te waiu, e te honi kia mate ai matou ki te koraha, a ka mea rawa hoki koe i a koe.

14  
hei rangatira ki runga i a matou? Kahore ano hoki koe i kawe i a matou i te whenua e rerengia ana e te waiu, e tona honi, i homai ranei i nga mara, i nga kari, hei kainga: ka pokaia ranei e koe

15  
nga kanohi o nga tangata nei: e kore matou e haere atu. Na ko te tino riringa o Mohi, ka mea ki a Ihowa, Kaua e tahuri ki ta ratou whakahere: kahore ano kia kotahi te kaihe i tangohia e ahau i a

16  
ratou, kahore ano ahau i kino noa ki tetahi o ratou. Na ka mea a Mohi ki a Koraha, Puta mai

17  
koutou ko tau hui katoa ki te aroaro o Ihowa apopo, a koe, me ratou ko Arona, apopo: A me mau e tenei, e tenei o koutou tana tahu kakara, ka mea he whakakakara ki runga, ka kawe ai tena i tana tahu kakara, i tana ki te aroaro o Ihowa, kia rua rau kia rima tekau nga tahu kakara: a koe me

18  
tau tahu kakara, a Arona hoki me tana. Na ka mau ratou ki tana tahu kakara, ki tana tahu kakara, a hoatu ana he ahi ki roto, meatia ana hoki he whakakakara ki runga, a ka tu tahi me Mohi raua ko

19  
Arona ki te whatitoka o te tapenakara o te whakaminenga. Na ka tawhiua e Koraha te whakaminenga katoa ki a raua ki te whatitoka o te tapenakara o te whakaminenga: a ka puta mai

20  
te kororia o Ihowa ki te whakaminenga katoa. Na ka korero a Ihowa ki a Mohi raua ko Arona,

21  
ka mea, Wehea atu korua i roto i tenei whakaminenga, e kore hoki e aha ka pau ratou i ahau.

22  
Na ka tapapa raua, ka mea, E te Atua, e te Atua o nga wairua o nga kikokiko katoa, kia hara ranei te tangata kotahi, a ka riri koe ki te whakaminenga katoa?

23  
Na ka korero a Ihowa ki a Mohi, ka mea, 24  
Korero ki te whakaminenga, mea atu, Whakatika  
25  
i te tapenakara o Koraha, o Ratana, o Apirama. Na ka whakatika a Mohi, ka haere ki a Ratana

26  
raua ko Apirama: me te whai tahi ano nga kaumatua o Iharaira i a ia. Na ka korero ia ki te whakaminenga, ka mea, Tena, mawehe mai i nga teneti o enei tangata kikino, kaua hoki e pa ki te

27  
tahi mea a ratou, kei ngaro koutou i roto i o ratou hara katoa. Na ka whakatika ratou i nga taha katoa o te tapenakara o Koraha, o Ratana, o Apirama: a ka puta a Ratana raua ko Apirama, ka tu ki nga whatitoka o o raua teneti, ratou ko a ratou wahine, ko a ratou tama, ko a ratou kohungahunga

<sup>28</sup> hoki. Na ka mea a Mohi, Ma tenei e mohio ai koutou na Ihowa ahau i unga mai ki te mahi i enei  
<sup>29</sup> mahi katoa; a ehara i te mea whakaaro noa ake naku. Ki te mea ko te mate o nga tangata katoa  
 te mate mo enei, ko te whiu ranei o nga tangata katoa te whiu mo ratou, kahore ahau i unga mai e  
<sup>30</sup> Ihowa. Tena ko tenei, ka pokaia houtia e Ihowa he mahi hou, a ka hamama te waha o te oneone,  
 a ka horomia ratou me a ratou me katoa, a ka heke ora ratou ki te rua; katahi koutou ka mohio i  
<sup>31</sup> whakahawea enei tangata ki a Ihowa. A mutu kau tana korero i enei korero katoa, ko te tino  
<sup>32</sup> kowheratanga o te oneone i raro i a ratou: Na hamama ana te waha o te whenua, horomia ake  
<sup>33</sup> hoki ratou me o ratou whare, me nga tangata katoa o Koraha, me o ratou rawa katoa. A heke  
 ora ana ratou me a ratou mea katoa ki te rua, na ka taupokina iho ratou i te whenua: a ngaro iho  
<sup>34</sup> ratou i roto i te whakaminenga. Na rere ana a Iharaira katoa i nga taha katoa o ratou i to ratou  
 aue; i mea hoki, Kei horomia hoki tatou e te whenua.  
<sup>35</sup> Na a puta mai he ahi i a Ihowa, a pau ake nga tangata e rua rau e rima tekau i whakahere nei  
<sup>36</sup> i te whakakakara. Na ka korero a Ihowa ki a Mohi, ka mea, <sup>37</sup> Mea atu ki a Eratarā tama a te  
 tohunga, a Arona, kia tangohia ake e ia nga tahu kakara i roto i te tahunga, a rukerukea atu hoki e  
<sup>38</sup> koe te ahi ki ko; he tapu hoki ena; Ko nga tahu kakara ano a taua hunga i hara ra ki o ratou  
 wairua, me hanga hei papa paraharaha, hei kopaki mo te aata: i tapaea hoki ki te aroaro o Ihowa,  
<sup>39</sup> koia i tapu ai: a ka waiho hei tohu ki nga tama a Iharaira. Na tikina atu ana e te tohunga, e  
 Ereatara, nga tahu kakara parahi i tapaea e te hunga i tahuna ra, a ka hanga hei papa paraharaha,  
<sup>40</sup> hei kopaki mo te aata: Hei whakamahara mo nga tama a Iharaira, kei whakatata he tangata ke,  
 ehara nei i te uri no Arona, ki te tahu whakakakara ki te aroaro o Ihowa: kei rite ki a Koraha ratou  
 ko tana hui: ko ta Ihowa tenei i korerotia e Mohi ki a ia.  
<sup>41</sup> Otiia i te aonga ake ka amuamu te whakaminenga katoa o nga tama a Iharaira ki a Mohi  
<sup>42</sup> raua ko Arona, ka mea, Na korua i mate ai te iwi a Ihowa. A, i te huihuinga o te whakaminenga  
 katoa ki a Mohi raua ko Arona, i to ratou tahuritanga ake ki te tapenakara o te whakaminenga, e!  
<sup>43</sup> kua taupokina e te kapua, a ka kitea te kororia o Ihowa. Na ka haere a Mohi raua ko Arona ki  
<sup>44</sup> mua i te tapenakara o te whakaminenga. A ka korero a Ihowa ki a Mohi, ka mea, <sup>45</sup> Whakatika  
 atu korua i roto i tenei whakaminenga, e kore e aha ka pau ratou i ahau. Na ka tapapa iho raua.  
<sup>46</sup> Na ka mea a Mohi ki a Arona, E mau ki te tahu kakara, meatia iho hoki he ahi i te aata, ka hoatu  
 ai i te whakakakara ki runga, a kia hohoro te haere ki te whakaminenga, te whakamarie mo ratou:  
<sup>47</sup> kua puta he riri i te aroaro o Ihowa; kua timata te whiu. Na tikina ana e Arona, peratia ana me

ta Mohi i ki ai, a rere ana ia ki waenganui o te whakaminenga; na kua timata tena te whiu i roto i te iwi: na ka maka iho e ia he whakakakara, a ka whakamarie mo te iwi. <sup>48</sup> Na tu ana ia i waenganui o te hunga mate, o te hunga ora; a ka mutu te whiu. <sup>49</sup> Na ko nga tangata i mate i te whiu, kotahi tekau ma wha mano e whitu rau, haunga era i mate i to Koraha ra. <sup>50</sup> Na hoki ana a Arona ki a Mohi, ki te whatitoka o te tapenakara o te whakaminenga, a mutu iho te whiu.

## Chapter 17

<sup>1</sup> I korero ano a Ihowa ki a Mohi, i mea, <sup>2</sup> Korero ki nga tama a Iharaira, tangohia mai ano he tokotoko i tenei, i tenei, o ratou, i nga whare o o ratou matua, i nga ariki katoa o nga whare o o ratou matua, kia kotahi tekau ma rua nga tokotoko: me tuhituhi te ingoa o tenei, o tenei, ki tan a tokotoko. <sup>3</sup> Me tuhituhi ano hoki te ingoa o Arona ki te tokotoko a Riwai: a kia kotahi te tokotoko ma ia upoko o te whare o o ratou matua. <sup>4</sup> A me whakatakoto e koe ki roto ki te tapenakara o te whakaminenga ki mua o te whakaaturanga, ki te wahi e tutaki ai ahau ki a koutou. <sup>5</sup> Na, ko te tangata e whiriwhiri ai ahau, ka pihi tana tokotoko, a ka pehia atu e ahau te amuamu a nga tama a Iharaira, e amuamu nei ki a korua. <sup>6</sup> Na ka korero a Mohi ki nga tama a Iharaira, a homai ana e o ratou ariki katoa ki a ia, he tokotoko e tenei ariki, he tokotoko e tenei ariki, e nga whare o o ratou matua, kotahi tekau ma rua nga tokotoko: i roto ano i a ratou tokotoko te tokotoko a Arona. <sup>7</sup> A whakatakotoria ana nga tokotoko e Mohi ki te aroaro o Ihowa ki te tapenakara o te whakaaturanga. <sup>8</sup> A i te aonga ake, na, ka haere a Mohi ki te tapenakara o te whakaaturanga; e! kua pihi te tokotoko a Arona, ta te whare o Riwai, kua wana, kua rapupuku, kua kohera hoki he puawai, kua hua he aramona. <sup>9</sup> Na kawea ana e Mohi nga tokotoko katoa i te aroaro o Ihowa ki nga tama katoa a Iharaira: a tirohia iho ana e ratou, tangohia ana hoki e ratou tana tokotoko, tana tokotoko. <sup>10</sup> Na ka mea a Ihowa ki a Mohi, Whakahokia mai te tokotoko a Arona ki mua i te whakaaturanga, kia tiakina, hei tohu ki te hunga tutu; a ka kore i koe a ratou amuamu e rongo nei ahau, kei mate ratou. <sup>11</sup> A peratia ana e Mohi, rite tonu ki ta Ihowa i whakahau ai ki a ia tana i mea ai. <sup>12</sup> Na ka mea nga tama a Iharaira ki a Mohi, Nana, ka mate matou, ka ngaro matou, ngaro katoa. <sup>13</sup> Ko te tangata e whakatata ana ki te tapenakara o Ihowa, ka mate: kia poto ranei matou katoa ki te mate?

## Chapter 18

<sup>1</sup> I mea ano a Ihowa ki a Arona, Mau, ma au tama, ma koutou ko te whare o tou papa e waha  
 te kino o te wahi tapu: a ma koutou ko au tama e waha te kino o ta koutou mahi tohunga. <sup>2</sup> A ko  
 ou teina hoki, o te iwi o Riwai, o te iwi o tou papa, me whakatata tahi me koe, kia tapiritia ai ratou  
 ki a koe, hei minita ki a koe: ko koutou tahi ia ko au tama hei te tapenakara o te whakaaturanga.  
<sup>3</sup> A ma ratou tau mahi e tiaki, me te mahi tiaki o te tapenakara katoa: otiia kaua e whakatata ki nga  
 oko o te wahi tapu, ki te aata ranei, kei mate ko ratou, ko koutou ranei. <sup>4</sup> A ka tapiritia ratou ki a  
 koe, hei tiaki i nga mea o te tapenakara o te whakaminenga, mo nga mahi katoa o te tapenakara:  
 kaua hoki te tangata ke e tata ki a koutou. <sup>5</sup> Ma koutou hoki e tiaki nga mea o te wahi tapu, me nga  
 mea o te aata; kei puta he riri ki nga tama a Iharaira a muri ake nei. <sup>6</sup> Me ahau hoki, nana, kua tango  
 ahau i o koutou teina, i nga Riwaiti i roto i nga tama a Iharaira: he mea hoatu ki a koutou ma Ihowa,  
 hei mahi i nga mahi o te tapenakara o te whakaminenga. <sup>7</sup> Ko koutou ia ko au tama, kia mau ki ta  
 koutou mahi tohunga ki nga mea katoa o te aata, o roto atu ano hoki i te arai, hei mahi ma koutou:  
 he mea hoatu noa atu ta koutou mahi tohunga e hoatu nei e ahau: a ka whakamatea te tangata ke e  
 whakatata ma i ana.  
<sup>8</sup> I korero ano a Ihowa ki a Arona, Na kua tukua atu nei e ahau ki a koe te tiaki o aku whakahere  
 hapahapai, o nga mea tapu katoa a nga tama a Iharaira; he mea hoatu naku ki a koutou ko au tama,  
 he whakaaro hoki ki te whakawahinga, he tikanga pumau. <sup>9</sup> Ko nga mea tenei mau o nga mea tino  
 tapu e kore nei e tukua ki te ahi: ko a ratou whakahere katoa, ko a ratou whakahere totokore katoa,  
 me a ratou whakahere hara katoa, me a ratou whakahere katoa mo te he, e tapaea ki ahau; ka tino  
 tapu ma koutou ko au tama. <sup>10</sup> Hei te wahi tino tapu kai ai, ma nga tane katoa e kai: he tapu tena  
 mau. <sup>11</sup> Mau ano tenei; ko nga whakahere hapahapai e homai ana e ratou me nga whakahere poipoi  
 katoa a nga tama a Iharaira: kua hoatu aua mea e ahau ki a koe, ki a koutou ko au tama, ko au  
 tamahine, he tikanga pumau: e kainga tena e nga mea pokekore katoa o tou whare. <sup>12</sup> Ko nga wahi  
 papai katoa o te hinu, me nga wahi papai katoa o te waina, o te witi hoki, ko nga tuapora o aua mea  
 e homai ana ki a Ihowa, kua hoatu ena e ahau ki a koe. <sup>13</sup> Mau nga hua mataati o nga mea katoa  
 o te whenua, e kawea mai ana ki a Ihowa; me kai e nga mea pokekore katoa o tou whare. <sup>14</sup> Mau  
 nga mea katoa i oti rawa i roto i a Iharaira. <sup>15</sup> Ko nga mea katoa e oroko puta mai ana i te kopu o  
 nga kikokiko katoa, ko nga mea hoki e whakaherea ana ma Ihowa, o te tangata, o te kararehe, mau  
 ena: otiia me tino whakahoki atu e koe ki te utu nga matamua a te tangata, me tango utu ano mo



16  
nga matamua a te kararehe poke. A, ko nga mea e utua ana e whakahokia ana, ka kotahi marama o tona whanautanga, me tango ona utu; kia rite ki tau e whakarite ai, kia rima hekere nga moni: hei

17  
nga hekere wahi tapu, e rua tekau nei nga kera. Ko te matamua ia a te kau, me te matamua a te hipi, me te matamua a te koati, kaua e whakahokia atu e koe; he tapu ena: me tauhi e koe o ratou

18  
toto ki te aata, me tahu ano o ratou ngako hei whakahere ahi, hei kakara reka ki a Ihowa. A mau

19  
o ratou kikokiko, ka pera me te uma poipoi, me te huha matau, nau hoki ena. Ko nga whakahere hapahapai katoa o roto o nga mea tapu e tapaea ana e nga tama a Iharaira ki a Ihowa, kua hoatu e ahau ki a koutou ko au tama, ko au tamahine; hei tikanga pumau: hei kawenata tote i te aroaro o Ihowa ake ake, ki a koutou tahi ko ou uri.

20  
A i korero a Ihowa ki a Arona, Kahore he kainga tupu mou i to ratou whenua, kahore ano hoki he wahi mou i roto i a ratou: ko ahau te wahi mou, tou kainga tupu i roto i nga tama a Iharaira.

21  
Kua hoatu nei hoki e ahau ki nga tama a Riwai nga whakatekau katoa i roto i a Iharaira hei taonga tupu, hei utu mo ta ratou mahi e mahi ai ratou, mo te mahinga i te tapenakara o te whakaminenga.

22  
Kaua ano hoki nga tama a Iharaira e whakatata a muri ake nei ki te tapenakara o te whakaminenga,

23  
kei whai hara, kei mate. Ma nga Riwaiti ia e mahi nga mahi o te tapenakara o te whakaminenga, me waha ano hoki e ratou to ratou kino; hei tikanga pumau ia ma o koutou whakatupuranga, kia

24  
kahore he kainga tupu mo ratou i roto i nga tama a Iharaira. Ko nga whakatekau hoki a nga tama a Iharaira, e tapaea nei hei whakahere hapahapai ki a Ihowa, kua hoatu e ahau hei wahi tupu ki nga Riwaiti; koia ahau i mea ai ki a ratou, e kore ratou e whai kainga tupu i roto i nga tama a Iharaira.

25  
I korero ano a Ihowa ki a Mohi, i mea, 26  
Korero ano ki nga Riwaiti, mea atu ki a ratou, Ka tangohia e koutou nga whakatekau a nga tama a Iharaira e hoatu nei e ahau ki a koutou i roto i a ratou mea hei wahi tupu mo koutou, me tapae he whakahere hapahapai ki a Ihowa i roto i taua mea,

27  
h e wahi whakatekau o aua whakatekau. A ka kiia tenei whakahere hapahapai he mea na koutou,

28  
he pera me te witi o te patunga witi, me te purenatanga hoki o te poka waina. Na me tapae ano hoki e koutou he whakahere hapahapai ki a Ihowa i roto i a koutou whakatekau katoa e tangohia ana e koutou i nga tama a Iharaira; me homai te whakahere hapahapai a Ihowa i roto i taua mea ki

29  
te tohunga, ki a Arona. Me tapae nga whakahere hapahapai katoa ma Ihowa i roto i nga mea

30  
katoa e homai ana ki a koutou, i roto i nga mea papai katoa o ena, ara te wahi tapu o roto. Me ki atu ki a ratou, Ka hapahapai koutou i te wahi tino pai o taua mea, me ki tena he mea na nga

31  
Riwaiti, he pera me te hua o te patunga witi, me te purenatanga hoki o te poka waina. A me kai tena e koutou ko o koutou whare ki nga wahi katoa: ko to koutou utu hoki ia mo ta koutou mahi i

te tapenakara o te whakaminenga. <sup>32</sup> A e kore e waha e koutou he hara i reira, ina hapahapainga tona wahi pai: kua ano e whakapokea nga mea tapu a nga tama a Iharaira, kei mate koutou.

## Chapter 19

<sup>1</sup> I korero ano a Ihowa ki a Mohi raua ko Arona, i mea, <sup>2</sup> Ko te tikanga tenei o te ture i whakahaua e Ihowa; i mea ia, Korero ki nga tama a Iharaira kia tikina he kua kau uha, he mea whero mau, hei te mea kahore he nawe, kahore he koa, a kahore ano hoki i utaina ki te ioka: <sup>3</sup> Me hoatu e koutou ki a Ereatara, tohunga, mana ia e kawe ki waho o te puni, me patu hoki e tetahi ki tona aroaro: <sup>4</sup> Na ka tango a Ereatara, tohunga, i tetahi wahi o ona toto ki tona maihao, kia whitu ana tauhiuhinga i ona toto ki te roro tonu o te tapenakara o te whakaminenga: <sup>5</sup> Na ma tetahi e tahu te kau i tana tirohanga atu: ko tona hiako, me ona kiko, me ona toto, me tahu tahi me tona paru: <sup>6</sup> Na ka mau te tohunga ki te rakau hita, ki te hihopa, ki te mea ngangana, a ka maka e ia ki waenganui o te tahunga o te kau. <sup>7</sup> Katahi ka horoi te tohunga i ona kakahu, ka horoi ano hoki i tona kiri ki te wai, a muri iho ka haere ki te puni, ka poke hoki te tohunga a ahiahi noa. <sup>8</sup> Me te kaitahu ano, me horoi ona kakahu ki te wai, me horoi ano tona kiri ki te wai, ka poke hoki ia a ahiahi noa. <sup>9</sup> A me amene nga pungarehu o te kau e tetahi tangata pokekore, a ka waiho i waho o te puni, i te wahi pokekore, ka tiaki ai mo te whakaminenga o nga tama a Iharaira hei wai wehenga; hei horohoro tena mo te hara. <sup>10</sup> Me horoi ano hoki ona kakahu e te kaiamene i nga pungarehu o te kau, ka poke hoki ia a ahiahi noa: me waiho ano tena hei tikanga tuturu ma nga tama a Iharaira, ma te manene hoki e noho manene ana i roto i a ratou. <sup>11</sup> Ki te pa tetahi ki te tinana mate o tetahi tangata, ka poke ia, e whitu nga ra. <sup>12</sup> Me pure ia e ia ki taua wai i te toru o nga ra, a i te whitu o nga ra ka kore ona poke: otiia ki te kore ia e pure i a ia i te toru o nga ra, e kore ia e pokekore i te whitu o nga ra. <sup>13</sup> Ki te pa tetahi ki te tinana mate o tetahi tangata kua mate, a kahore e pure i a ia, e whakapokea ana e ia te tapenakara o Ihowa; ka hatepea taua wairua i roto i a Iharaira; no te mea kihai i tauhiuhia ki a ia te wai wehenga, ka poke ano ia; e m au ana ano ki a ia tona poke. <sup>14</sup> Ko te ture tenei ina mate te tangata i roto i te teneti: ko nga tangata katoa e tomo ana ki te teneti, me nga tangata katoa i roto i te teneti, ka poke kia whitu nga ra. <sup>15</sup> Ko nga oko katoa ano e puare kau ana, kahore nei i herea te taupoki, ka poke. <sup>16</sup> Ki te pa hoki tetahi ki te tangata i patua ki te hoari ki waenga parae, ki te tupapaku ranei, ki te whenua tangata ranei, ki te urupa ranei, ka poke ia kia whitu nga ra. <sup>17</sup> Na, mo te tangata poke, me tiki e

ratou etahi o nga pungarehu o te kau i tahunga hei horohoronga mo nga hara, ka riringi ai ki te wai  
18

ora, ki roto ano ki te oko: Na ka mau tetahi tangata pokekore ki te hihopa, ka tuku ki te wai, na  
ka tauhiuhi i te teneti me nga oko katoa, i nga tangata ano hoki o reira, me te tangata i pa atu nei

19  
ki te whenua, ki te tangata ranei i patua, ki te tupapaku ranei, ki te uru pa ranei: Me tauhuihui  
ano hoki e te tangata pokekore te tangata poke i te toru o nga ra, i te whitu hoki o nga ra; a me pure  
ia e ia ano i te whitu o nga ra, ka horoi ai i ona kakahu, ka horoi ano hoki i a ia ki te wai, a i te

20  
ahiahi ka kore te poke. A ki te poke tetahi tangata, a kahore e pure i a ia, ka hatepea atu taua  
wairua i roto i te huihui, mona i whakapoke i te wahi tapu o Ihowa: kihai te wai o te wehenga i

21  
tauhiuhia ki a ia; he poke. A hei tikanga tuturu tenei ma ratou, me horoi ona kakahu e te  
kaitauhiuhi o te wai wehenga; ka poke ano a ahiahi noa te tangata e pa ana ki te wai wehenga.

22  
Ko poke ano nga mea katoa e pa ai te tangata poke; ka poke ano a ahiahi noa te wairua e pa ana.

## Chapter 20

1  
Na ka tae nga tama a Iharaira, ara te whakaminenga katoa, ki te koraha o Hini i te marama  
tuatahi: a ka noho te iwi ki Karehe; na ka mate a Miriama ki reira, a tanumia ana ki reira. 2 A kahore

3  
he wai mo te whakaminenga: a ka huihui ki te ngangare ki a Mohi raua ko Arona. Na ka ngangau  
te iwi ki a Mohi, ka korero, ka mea, Aue, me i mate matou i te matenga o o matou tuakana i te

4  
aroaro o Ihowa! He aha hoki i kawea mai ai e korua te whakaminenga a Ihowa ki tenei koraha,

5  
kia mate tahi matou me a matou kararehe ki konei? He aha hoki matou i meinga ai e korua kia  
haere mai i Ihipa, kia kawea mai matou ki tenei wahi kino? ehara nei i te wahi purapura, i te wahi

6  
piki, waina, pamekaranete; kahore ano hoki he wai hei inu. Na ka haere a Mohi raua ko Arona i  
te aroaro o te whakaminenga ki te whatitoka o te tapenakara o te whakaminenga, a ka kupapa iho

7  
o raua mata: na ko te putanga mai o te kororia o Ihowa ki a raua. A ka korero a Ihowa ki a Mohi,

8  
ka mea, Maua atu te tokotoko, huihuia mai ano te whakaminenga e korua ko tou tuakana, ko  
Arona, ka korero ai korua ki te kamaka i mua i o ratou kanohi, kia tukua mai tona wai; a ka  
whakaputaina mai e koe he wai mo ratou i roto i te kamaka: a ka meinga e koe te whakaminenga

9  
me a ratou kararehe kia inu. Na ka maua e Mohi te tokotoko i te aroaro o Ihowa, pera ana ia me

10  
tana i whakahau ai. I huihuia hoki te whakaminenga e Mohi raua ko Arona ki mua o te kamaka,  
a ka mea ia ki a ratou, Whakarongo mai, e te hunga tutu; me whakaputa mai ranei e maua he wai

<sup>11</sup> mo koutou i roto i tenei kamaka? Na ka ara te ringa o Mohi, a e rua ana patunga i te kamaka ki  
<sup>12</sup> tana tokotoko; ko te tino putanga mai o te wai, tona nui, a inu ana te iwi me a ratou kararehe. Na  
ka mea a Ihowa ki a Mohi raua ko Arona, Kahore nei korua i whakaponu ki ahau, kia whakatapu  
i ahau i te tirohanga a nga tama a Iharaira, mo reira e kore korua e kawe i tenei whakaminenga ki  
<sup>13</sup> te whenua e hoatu nei e ahau ki a ratou. Ko te wai tena o Meripa; i ngangau hoki nga tama a  
Iharaira ki a Ihowa ki reira, a meinga ana ratou hei whakatapu mona.  
<sup>14</sup> Na ka unga tangata a Mohi i Karehe ki te kingi o Eroma, Ko te kupu tenei a tou teina, a  
<sup>15</sup> Iharaira, E mohio ana koe ki nga he katoa i pono mai ki a matou; Ki te hekenga o o matou matua  
ki Ihipa, ki to matou nohoanga hoki i Ihipa, a maha noa nga ra; a ka tukino nga Ihipiana i a matou  
<sup>16</sup> ko o matou matua: A, i ta matou karangatanga atu ki a Ihowa, na ka rongu ia ki to matou reo, a  
unga ana e ia he anahera hei whakaputa mai i a matou i Ihipa: na, kei Karehe tenei matou, kei te  
<sup>17</sup> pa whakamutunga o tou rohe: Tena, tukua atu matou ma tou whenua: e kore matou e haere na  
nga mara, na nga mara waina ranei, e kore ano matou e inu i te wai o nga puna: ka haere matou i  
te huanui o te kingi, e kore matou e peka ki matau, ki maui, kia pahemo ra ano i a matou ou rohe.  
<sup>18</sup> Na ka mea a Eroma ki a ia, E kore koe e tika na toku wahi, kei haere ahau me te hoari ki te tu i  
<sup>19</sup> a koe. Na ka mea nga tama a Iharaira ki a ia, Ka haere matou na te huanui: a ki te inu ahau me  
aku kahui i tou wai, me utu e ahau: heoi rawa taku e mea ai, ko te haere kau o oku waewae na kona.  
<sup>20</sup> Na ka mea ia, E kore koe e haere ra konei. A ka puta a Eroma me te ope nui, me te ringa kaha,  
<sup>21</sup> ki te tu i a ia. Heoi kihai a Eroma i pai ki te tuku i a Iharaira kia haere na tona rohe: na peka ke  
ana a Iharaira i a ia.  
<sup>22</sup> Na ka turia atu e ratou i Karehe: a ka tae nga tama a Iharaira, ara te whakaminenga katoa ki  
<sup>23</sup> Maunga Horo. Na ka korero a Ihowa ki a Mohi raua ko Arona i Maunga Horo, i te rohe o te  
<sup>24</sup> whenua o Eroma, ka mea, Ka kohia atu a Arona ki tona iwi; e kore hoki ia e tae ki te whenua  
ka hoatu nei e ahau ki nga tama a Iharaira, mo korua i whakato i taku kupu i te wai o Meripa.  
<sup>25</sup> Tangohia a Arona raua ko Ereatara, ko tana tama, kawea hoki raua ki runga ki Maunga Horo:  
<sup>26</sup> Unuhia hoki nga kakahu o Arona, ka whakakakahu ai ki tana tama, ki a Ereatara: a ka kohia atu  
<sup>27</sup> a Arona ki tona iwi, ka mate hoki ki reira. Na ka pera a Mohi me ta Ihowa i whakahau ai, a haere  
<sup>28</sup> ana ratou ki runga ki Maunga Horo i te tirohanga a te whakaminenga katoa. Na ka unuhia e  
Mohi nga kakahu o Arona, a whakakakahuria ana e ia ki tana tama, ki a Ereatara; a ka mate a Arona  
<sup>29</sup> ki reira, ki te tihi o te maunga: a ka heke iho a Mohi raua ko Ereatara i runga i te maunga. A,

no te kitenga o te whakaminenga katoa kua mate a Arona, e toru tekau nga ra i tangihia ai a Arona e ratou, e te whare katoa o Iharaira.

## Chapter 21

<sup>1</sup> A ka rongoa a Kingi Arara, te Kanaani, i noho nei ki te taha ki te tonga, e haere ana a Iharaira na te ara o Atarimi; na ka tataua ia ki a Iharaira, a whakaraua ana etahi o ratou e ia. <sup>2</sup> Na ka puta te ki taurangi a Iharaira ki a Ihowa, ka mea, Ki te tukua mai e koe tenei iwi ki toku ringa ka tino whakangaromia e ahau o ratou pa. <sup>3</sup> A i whakarongo a Ihowa ki te reo o Iharaira, a homai ana e ia nga Kanaani; a tino whakangaromia ana ratou me o ratou pa e ratou: a huaina iho te ingoa o taua wahi ko Horema.

<sup>4</sup> Na, ka turia atu e ratou i Maunga Horo na te ara o te Moana Whero ki te taiawhio i te whenua o Eroma: a pouri noa iho te wairua o te iwi i te ara. <sup>5</sup> A ka whakahe te iwi i te Atua, i a Mohi hoki, He aha i kawea mai ai matou ki runga nei i Ihipa kia mate ki te koraha? kahore nei hoki he taro, kahore he wai; a e whakarihariha ana to matou wairua ki tenei taro mama. <sup>6</sup> Na ka tukua mai e Ihowa he nakahi tu a ahi ki te iwi, a ka ngaua te iwi; a he tokomaha o Iharaira i mate. <sup>7</sup> Na ka haere te iwi ki a Mohi, ka mea, Kua hara matou i a matou i whakahe i a Ihowa, i a koe hoki; inoi ki a Ihowa kia tangohia atu e ia nga nakahi i a matou. Na ka inoi a Mohi mo te iwi. <sup>8</sup> Na ka mea a Ihowa ki a Mohi, Hanga tetahi nakahi tu a ahi mau, ka whakanoho ki te pou: na, mehemea kua ngaua tetahi, a ka titiro atu ia ki reira, ka ora. <sup>9</sup> Na hanga ana e Mohi te nakahi ki te parahi, a whakanohoia ana ki te pou; na, mehemea kua ngaua tetahi e te nakahi, ka titiro ia ki te nakahi parahi, kua ora.

<sup>10</sup> Na ka turia atu e nga tama a Iharaira, a noho ana i Opopo. <sup>11</sup> A ka turia atu i Opopo, a noho ana i Iteaparimi, i te koraha i te ritenga atu o Moapa, whaka te rawhiti. <sup>12</sup> A ka haere atu ratou i reira, a noho ana i te raorao i Terete. <sup>13</sup> Na ka turia atu i reira, a noho ana i tera taha o Aronona, o tera i te koraha e puta mai ana i nga wahi o nga Amori: ko Aronona hoki te rohe ki a Moapa, kei waenganui o Moapa, o nga Amori.

<sup>14</sup> Koia i korerotia ai i te pukapuka o nga whawhai a Ihowa, Ko tana i mea ai ki te Moana Whero, ki nga awa hoki o Aronona, <sup>15</sup> Ki nga hurihanga wai ano hoki, e anga ana ki te nohoanga i Ara, e piri nei ki te rohe o Moapa. <sup>16</sup> A i haere atu ratou i reira ki Peere: ko te puna ia i korero ai a Ihowa ki a Mohi, Huihuia te iwi, a maku e hoatu he wai ki a

<sup>17</sup> ratou. Na ka waiatatia tenei waiata e Iharaira, Pupuke ake, e te puna; waiatatia: <sup>18</sup> Te puna i

keria e nga rangatira, i keria e nga ariki o te iwi, ki te hepeta, a ki a ratou tokotoko. Na ka turia atu e ratou tokotoko. Na ka turia atu e ratou i te koraha ki Matana: <sup>19</sup> I Matana hoki ki Nahariere; a ia Nahariere ki Pamoto: <sup>20</sup> A i Pamoto ki te raorao i te whenua o Moapa, ki te tihi o Pihika, e titiro iho ana ki te koraha.

<sup>21</sup> Na ka unga tangata a Iharaira ki a Hihona kingi o nga Amori, hei mea, <sup>22</sup> Tukua atu ahau na tou whenua; e kore matou e peka ki nga mara, ki nga mara waina ranei; e kore matou e inu i te wai o nga puna: ka haere matou na te huanui o te kingi, kia pahemo ra ano ou rohe i a matou.

<sup>23</sup> Otiia kihai a Hihona i tuku i a Iharaira kia tika na tona wahi; na huihuia ana e Hihona tona iwi katoa, a puta mai ana ki te tu i a Iharaira ki te koraha, na ka haere ia ki Iahata: a ka tataua ia i a Iharaira. <sup>24</sup> A patua iho ia e Iharaira ki te mata o te hoari, tangohia ana e ratou tona whenua, o Aranona atu a tae noa ki Iapoko, ki nga tama ra ano a Amona: he rohe hoki e kore e taea to nga tama a Amona. <sup>25</sup> A riro ana i a Iharaira enei pa katoa: a nohoia ana e Iharaira nga pa katoa o nga Amori, a Hehepona, me ona pa ririki. <sup>26</sup> He pa hoki a Hehepona no Hihona kingi o nga Amori; i whawhai hoki ia ki to mua kingi o Moapa, a tangohia ana e ia tona whenua katoa i tona ringa a tae noa ki Aronona. <sup>27</sup> Koia te hunga korero whakatauki ka mea ai, Haere mai ki Hehepona, kia hanga, ka whakaungia te pa o Hihoma: <sup>28</sup> Kua puta atu hoki he ahi i Hehepona, he mura i te pa o Hihona: a pau ake a Ara o Moapa, me nga ariki o nga wahi tiketike o Aranona. <sup>29</sup> Aue te mate mou, e Moapa! ka ngaro koe, e te iwi o Kemoho: kua hoatu e ia ana tama i rere morehu, me ana tamahine, hei pononga ma Hihona, ma te kingi o nga Amori. <sup>30</sup> I kopere atu matou ki a ratou; kua ngaro a Hehepona, tae noa ki Ripono, kua huna e matou tae noa ki Nopa e totoro atu nei ki Merepa. <sup>31</sup> Na ka noho a Iharaira ki te whenua o nga Amori. <sup>32</sup> A ka tono tangata a Mohi ki te tutei i Iatere, a ka riro i a ratou nga pa o reira, i pana hoki nga Amori e noho ana i reira. <sup>33</sup> Na ka tahuri ratou, a ka haere ki runga na te ara o Pahana: na ko te putanga mai o Oka kingi o Pahana, ki te whakatutaki i a ratou, a ia, me tona iwi katoa ki te whawhai ki Etere. <sup>34</sup> A ka mea a Ihowa ki a Mohi, Kei wehi i a ia; kua hoatu hoki ia e ahau ki tou ringa, me tona iwi katoa, me tona whenua; a ka rite tau e mea ai ki a ia ki tau i mea ai ki a Hihona kingi o nga Amori i noho ra i Hehepona. <sup>35</sup> Na patua iho ia e ratou, me ana tama, me tona iwi katoa, a kore noa e toe tetahi morehu ona: a tangohia ana e ratou tona whenua.

## Chapter 22

<sup>1</sup> Na ka turia atu e nga tama a Iharaira, a ka noho ki nga mania o Moapa, ki tenei taha o Horano  
 ki te ritenga atu o Heriko. <sup>2</sup> A i kite a Paraka tama a Tiporo i nga mea katoa i mea ai a Iharaira ki  
 nga Amori. <sup>3</sup> Na nui atu te wehi o Moapa ki te iwi, no te mea he tokomaha: a tuatea noa iho a  
 Moapa i nga tama a Iharaira. <sup>4</sup> Na ka mea a Moapa ki nga kaumatua o Miriana, Akuanei tenei hui  
 horomiti ai i nga tangata katoa i nga taha katoa o tatou, pera ai me te kau e horomiti nei i te tarutaru  
 o te mara. A ko Paraka tama a Tiporo te kingi o Moapa i taua wa. <sup>5</sup> Na ka tukua e ia he karere ki  
 a Paraama tama a Peoro ki Petoto, i te taha o te awa, ki te whenua o nga tama o tona iwi, ki te tiki  
 i a ia, hei mea, He iwi tenei kua puta mai i Ihipa, na, kapi ana i a ratou te mata o te whenua; e noho  
 nei ano rato u i toku aroaro: <sup>6</sup> Na, tena, haere mai hei kaikanga maku i te iwi nei; he kaha ke hoki  
 ratou i ahau: tera pea ka toa ahau, ka patua ratou e matou, a ka peia atu ratou i te whenua: e mohio  
 ana hoki ahau, ko tau e manaaki ai ka manaakitia, ko tau hoki e kanga ai ka k anga. <sup>7</sup> A ka haere  
 nga kaumatua o Moapa ratou ko nga kaumatua o Miriana me nga utu makutu i o ratou ringa; a ka  
 tae ki a Paraama, a korerotia ana e ratou nga kupu a Paraka. <sup>8</sup> Na ka mea ia ki a ratou, E noho ki  
 konei i tenei po, a maku e whakahoki he korero ki a koutou, ko ta Ihowa hoki e korero ai ki ahau.  
<sup>9</sup> Na ka noho nga rangatira o Moapa ki a Paraama. Na ka haere te Atua ki a Paraama, ka mea, Ko  
 wai ena tangata i a koe na? <sup>10</sup> A ka mea a Paraama ki te Atua, Kua unga tangata mai a Paraka tama  
 a Tiporo, kingi o Moapa, ki ahau, hei ki mai, <sup>11</sup> He iwi tenei kua puta mai i Ihipa, a kapi ana i a  
 ratou te mata o te whenua: tena, haere mai hei kaikanga maku i a ratou; tera pea e taea e ahau te  
 whawhai ki a ratou, te pei hoki i a ratou. <sup>12</sup> Na ka mea te Atua ki a Paraama, Kaua e haere i a ratou;  
 kaua e kanga tena iwi: kua oti hoki ratou te manaaki. <sup>13</sup> Na ka maranga a Paraama i te ata, ka mea  
 ki nga rangatira a Paraka, Haere ki to koutou whenua: e kore hoki a Ihowa e pai ki te tuku i ahau  
 kia haere i a koutou. <sup>14</sup> Na ka whakatika nga rangatira o Moapa, ka haere ki a Paraka, ka mea,  
 Kihai a Paraama i pai ki te haere tahi mai i a matou.  
<sup>15</sup> Na ka tonoa e Paraka etahi atu rangatira, he tokomaha atu, he nunui atu i era. <sup>16</sup> A ka tae  
 ratou ki a Paraama, ka mea ki a ia, Ko te kupu tenei a Paraka tama a Tiporo, kei puritia atu koe e  
 tetahi mea, haere mai ki ahau: <sup>17</sup> Ka whakanuia rawatia hoki koe e ahau, ka meatia ano e ahau nga  
 mea katoa e mea mai ai koe ki ahau: haere mai ra hei kaikanga maku i tenei iwi. <sup>18</sup> Na ka utu  
 Paraama, ka mea ki nga tangata a Paraka, Ahakoa i ki tona whare i te hiriwa, i te koura, e homai e  
 Paraka ki ahau, e kore e ahei i ahau te whakawhiti ki ko atu i te kupu a Ihowa, a toku Atua, te mea  
 i te mea iti iho, i te mea nui ake r anei. <sup>19</sup> Na, e noho ki konei i tenei po, kia mohio ahau ki ta Ihowa

20  
e mea mai ai ano ki ahau. A i puta mai te Atua ki a Paraama i te po, a ka mea ki a ia, Ki te haere mai aua tangata ki te karanga i a koe, whakatika, haere i a ratou: ko te kupu ia e korero ai ahau ki

21  
a koe, ko tena tau e mea ai. Na ka maranga a Paraama i te ata, a whakanohoa ana e ia tana kaihe, a haere ana i nga rangatira o Moapa.

22  
Na ka mura te riri o te Atua mona i haere, a ka tu te anahera a Ihowa ki te ara hei hoariri mona. A i runga ia i tona kaihe e noho ana, ko ana tangata tokorua hoki ona hoa. 23  
A ka kite te kaihe i te anahera a Ihowa e tu ana i te ara, me tana hoari i tona ringa, unu rawa, ka peka atu te

24  
kaihe i te ara, a ka haere ki te parae: na ka whiua e Paraama te kaihe kia anga ki te ara. Katahi ka tu te anahera a Ihowa ki tetahi huarahi whawharua o nga mara waina, he taiepa kei tenei taha,

25  
he taiepa hoki kei tera taha. A, no te kitenga o te kaihe i te anahera a Ihowa, ka whakapiri ki te taiepa, a karapitia ana te waewae o Paraama ki te taiepa: no ka whiua ano e ia. 26  
Na ka neke ano

27  
te anahera a Ihowa, a ka tu ki te wahi kuiti, kahore nei he ara hei pekanga ki matau, ki mau. A, no te kitenga o te kaihe i te anahera a Ihowa, ka takoto ki raro i a Paraama: a ka mura te riri o

28  
Paraama, ka patua e ia te kaihe ki tana rakau. Na ka whakahamumutia e Ihowa te waha o te kaihe, a ka korero ki a Paraama, I aha ahau ki a koe, i toru ai enei patunga au i ahau? 29  
A ka mea a Paraama ki te kaihe, Mo tau maminga ra ki ahau: me he hoari i toku ringa, ina, kua whakamatea

30  
koe e ahau inaianei. Na ka mea ake te kaihe ki a Paraama, Ehara ianei ahau i tau kaihe, i ekengia nei e koe o toku rironga mai ra ano i a koe, a tae noa mai ki tenei ra? he penei ranei taku hanga ki

31  
a koe i mua? A ka mea ia, Kahore. Katahi ka whakatirohia e Ihowa nga kanohi o Paraama, a ka kite ia i te anahera a Ihowa e tu ana i te ara, me tana hoari i tona ringa, unu rawa: na ka tuohu ia,

32  
ka piko iho tona mata. Na a mea te anahera a Ihowa ki a ia, Na te aha enei patunga e toru au i tau kaihe? nana, i puta atu ahau hei hoariri mou, no te mea e peau ke ana tou ara i toku aroaro: 33  
A i kite te kaihe i ahau, e toru ona pekanga ki tahaki i toku aroaro: me i kahore ia te peka atu ki

34  
tahaki i toku aroaro, ina, kua patua tenei koe e ahau, a ko ia kua whakaorangia. Na ka mea a Paraama ki te anahera a Ihowa, Kua hara ahau; noku kihai i mohio ko koe te tu mai ana i te ara ki

35  
te whakatutaki i ahau: na ki te he tenei ki tau titiro, me hoki ahau. Na ka mea te anahera a Ihowa ki a Paraama, Haere i aua tangata: ko te kupu ia e korero ai ahau ki a koe, ko tena anake tau e korero ai. Na ka haere a Paraama i nga rangatira a Paraka.

36  
A, ko rongo a Paraka e tae mai ana a Paraama, ka haere ia ki te whakatau i a ia ki tetahi pa o Moapa i te rohe o Aranona, i te rohe whakamutunga. 37  
A ka mea a Paraka ki a Paraama, Kahore



ianeī ahau i ata unga ki a koe, ki te karanga i a koe? he aha koe te haere mai ai ki ahau? he pono  
 ranei e kore e ahei i ahau te whakanui i a koe? <sup>38</sup> Na ka mea a Paraama ki a Paraka, Na, kua tae  
 mai nei ahau ki a koe: e taea ranei e ahau te korero tetahi mea, ahakoa iti? Ko te kupu e homai e te  
 Atua ki toku mangai, ko tena taku e korero ai. <sup>39</sup> Na ka haere a Paraama i a Paraka, a ka tae raua  
 ki Kiriata Hutoto. <sup>40</sup> Na ka patua he kau, he hipi, e Paraka, a ka unga tangata i a Paraama ratou ko  
 ona hoa, ko nga rangatira. <sup>41</sup> A i te ata ka mau a Paraka ki a Paraama, a kawea ana e ia ki runga  
 ki nga wahi teitei o Paara, a ka kite atu ia i reira i te hiku o te iwi.

### Chapter 23

<sup>1</sup> Na ,a mea a Paraama ki a Paraka, Hanga etahi aata maku kia whitu, kia rite mai hoki maku  
 he puru kia whitu, he hipi toa hoki kia whitu. <sup>2</sup> Na rite tonu t Paraka i mea ai ki nga mea i korerotia  
 e Paraama: a whakaekea ana e Paraka raua ko Paraama he puru, he hipi, ki tetahi aata, ki tetahi  
 aata. <sup>3</sup> Na ka mea a Paraama ki a Paraka, E tu ki te taha o tau tahunga tinana, a ka haere ahau: tera  
 pea a Ihowa e tupono mai ki ahau: a me korero atu e ahau ki a koe te kupu e whakakitea mai e ia  
 ki ahau. Na ka haere ia ki tetahi puke hamore. <sup>4</sup> Na ka tupono a Ihowa ki a Paraama: a ka mea ia  
 ki a ia, Kua oti i ahau nga aata e whitu, kua whakaekea ano hoki he puru, he hipi, ki tenei aata, ki  
 tenei aata. <sup>5</sup> Na ka homai e Ihowa he kupu ki te waha o Paraama, ka mea, Hoki atu ki a Paraka, a  
 kia penei tau ki atu. <sup>6</sup> A ka hoki atu ia ki a ia, na, i te taha ia o tana tahunga tinana e tu ana, ratou  
 ko nga rangatira katoa o Moapa. <sup>7</sup> Na ka ara tana ki pepeha, ka mea, Na Paraka kingi o Moapa  
 ahau i arahi mai i Arame, i nga maunga o te rawhiti, i mea, Haere mai hei kaikanga maku mo  
 Hakopa, haere mai hoki hei whakatara ki a Iharaira. <sup>8</sup> Me aha e kanga ai ahau i ta te Atua i kore ai  
 e kanga? me aha hoki e whakatara ai ahau ki ta Ihowa kihai i whakatara? <sup>9</sup> Tenei hoki ahau kei te  
 tihi o nga kamaka e titiro atu ana ki a ia, e kite atu ana i a ia i runga i nga pukepuke: nana, he iwi  
 noho ko ia anake, e kore ano hoki e taua i roto i nga tauwiwi. <sup>10</sup> Ma wai e tatau te puehu o Hakopa,  
 e titiro ranei te maha o te whakawha o Iharaira? Hei te mate o te hunga tika he matenga moku, kia  
 rite hoki toku whakamutunga ki tona! <sup>11</sup> Na ka mea a Paraka, ki a Paraama, He aha tau e mea nei  
 ki ahau? i tikina atu koe e ahau hei kanga i oku hoariri, na, kua manaakitia rawatia ratou e koe.  
<sup>12</sup> Na ka whakautua e ia, ka mea, Kaua ranei ahau e mahara ki te whakapuaki i te kupu e homai e  
 Ihowa ki toku waha?

13

Na ka mea a Paraka ki a ia, Tena, haere mai taua ki tetahi wahi ke atu, e kite ai koe i a ratou: ko to ratou pito tau e kite ai; e kore hoki koe e kite i a ratou katoa: a hei reira puaki ai i a koe taku

14

kanga mo ratou. Na ka kawea ia e ia ki te mara o Topimi, ki te tihi o Pihika, a hanga ana e ia e

15

whitu nga aata, whakaekea atu ana hoki e ia he puru, he hipi, ki tenei aata, ki tenei aata. Na ka mea ia ki a Paraka, E tu ki konei ki te taha o tau tahunga tinana, ka whakatau ahau ki ko, ki a Ihowa.

16

Na ka tupono a Ihowa ki a Paraama, ka homai e ia he kupu ki tona waha, ka mea, Hoki atu ki a

17

Paraka, kia penei hoki tau ki atu. A ka haere atu ia ki a ia, na, e tu ana ia e te taha o tanga tahunga tinana, ratou ko nga rangatira o Moapa. A ka mea a Paraka ki a ia, I pehea mai te kupu a Ihowa?

18

Na ka ara tana ki pepeha, ka mea, Whakatika, e Paraka, whakarongo mai; kia whai taringa mai

19

ki ahau, e te tama a Tiporo: Ehara te Atua i te tangata e teka ai; i te tama ranei a te tangata e puta ke ai ona whakaaro. Tera ranei ia e korero, a kore ake e mahi? e puaki ranei tana kupu, a kahore

20

e mana? Nana, kua riro mai i ahau te kupu manaaki; kua oti hoki i a ia te kupu manaaki; a e kore

21

e taea e ahau te whakaputa ke. Kahore i tirohia e ia he kino i a Hakopa, kahore ano hoki i kitea

22

he tutu i a Iharaira: kei a ia a Ihowa, tona Atua, kei roto hoki i a ratou te hamama a te kingi. Na

23

Ihowa ratou i whakaputa mai i Ihipa; kei te te unikanga tona kaha. He pono kahore he makutu mo Hakopa, kahore ano hoki he whaiwhaia mo Iharaira: hei tenei wa ano ka korerotia a Hakopa,

24

ae ra, a Iharaira, ano te mahi a te Atua! Nana, ka whakatika te iwi ano he raiona katua, ka ara ake ano hoki ano he raiona: e kore e takoto, kia kainga ra ano te tupapaku, kia inumia hoki nga toto

25

o te parekura. Na ka mea a Paraka ki a Paraama, Kaua rawa e kanga i a ratou, kaua rawa ranei

26

e manaaki i a ratou. Na ka whakautua e Paraama, ka mea ki a Paraka, Kahore ianei ahau i korero

27

ki a koe, i mea, Ko nga mea katoa e korero mai ai a Ihowa, ko tena taku e mea ai? Na ka mea a Paraka ki a Paraama, Tena, me kawea koe e ahau ki tetahi atu wahi; tera pea e pai te Atua kia

28

whakapuakina e koe i reira taku kanga mo ratou. Katahi ka kawea a Paraama e Paraka ki te tihi

29

o Peoro, e titiro iho ana ki te koraha. A ka mea a Paraama ki a Paraka, hanga he aata maku ki

30

konei kia whitu, kia rite hoki maku ki konei he puru kia whitu, he hipi toa kia whitu. A rite tonu ta Paraka i mea ai ki nga mea i korerotia e Paraama, a whakaekea ana e ia he puru, he hipi, ki runga ki tenei aata, ki tenei aata.

## Chapter 24

<sup>1</sup> A, no te kitenga o Paraama ko ta Ihowa i pai ai he manaaki i a Iharaira, kihai ia i haere me  
 mua ra ki te whai i te mea makutu; engari i anga tona mata ki te koraha. <sup>2</sup> Na ka maranga nga  
 kanohi o Paraama, a ka kite i a Iharaira e noho ana i o ratou iwi; nga ko te putanga mai o te wairua  
 o te Atua ki a ia. <sup>3</sup> Na ka ara tana ki pepeha, ka mea, He ki tenei na Paraama, tama a Peoro, he ki  
 hoki na te tangata i kopi ra tona kanohi: <sup>4</sup> He ki na te tangata e rongu ana i nga kupu a te Atua, e  
 kite ana i te whakakitenga a te Kaha Rawa, e taka iho ana, me te titiro ano ona kanohi: <sup>5</sup> Ano te  
 pai o ou teneti, e Hakopa, o ou nohoanga, e Iharaira! <sup>6</sup> Ano ko nga awaawa e takoto atu ana, rite  
 tahi ano ki nga kari i te taha o te awa, ki nga aroe i whakatokia e Ihowa, ki nga hita i te taha o nga  
 wai. <sup>7</sup> Ka maringi iho he wai i ana peere, a hei roto ana purapura i nga wai maha, ka nui ake hoki  
 tona kingi i a Akaka, a ka kake tona kingitanga. <sup>8</sup> Na te Atua ia i whakaputa mai i Ihipa; ko tona  
 kaha, rite pu ki to te unikanga: ka pau nga iwi, ona hoariri, i a ia, ka whatiwhatiia e ia o ratou wheua,  
 ka werohia hoki ratou ki ana pere. <sup>9</sup> I tapapa ia, i takoto, ano he raiona, ano he raiona katua: ma  
 wai ia e whakaoho? ka manaakitia te tangata e manaaki ana i a koe, ka kanga hoki te tangata e  
 kanga ana i a koe.  
<sup>10</sup> Na ka mura te riri o Paraka ki a Paraama, ka papaki ona ringa: na ka mea a paraka ki a  
 Paraama, He kanga i oku hoariri i karanga ai ahau i a koe, na, ka toru nei au manaakitanga i a ratou.  
<sup>11</sup> Na, rere atu aiane ki tou wahi: i mea ahau kia whakanuia rawatia koe; heoi, kua puritia nei koe  
 e Ihowa kei whai kororia. <sup>12</sup> Na ka mea atu a Paraama ki a Paraka, Kahore ianei ahau i korero, i  
 mea ki au karere i unga ake ra e koe ki ahau, <sup>13</sup> Ahakoa i ki tona whare i te hiriwa, i te koura, e  
 homai e Paraka ki ahau, e kore e ahei i ahau te whakawhiti ke i te kupu a Ihowa, te mea i te pai, i  
 te kino ranei, i t toku ngakau ake; ko ta Ihowa e korero ai, ko tena taku e korero ai? <sup>14</sup> Na, ka haere  
 tenei ahau ki toku iwi: haere mai, maku e whakaatu ki a koe ta tenei iwi e mea ai ki tou iwi i nga  
 ra whakamutunga.  
<sup>15</sup> Na ka ara tana ki pepeha, ka mea, He ki tenei na Paraama, na te tama a Peoro, he ki hoki  
 nga te tangata i kopi ra tona kanohi: <sup>16</sup> He ki na te tangata, e rongu ana i nga kupu a te Atua, e  
 mohio ana ki nga mea a te Runga Rawa, e kite nei i te whakakitenga mai a te Kaha Rawa, e taka  
 iho ana, me te titiro ano ona kanohi: <sup>17</sup> E kite ano ahau i a ia, otia kahore aiane: e titiro atu ahau  
 ki a ia, otia e kore e tata: tera e puta he Whetu i roto i a Hakopa, ka ara ake ano hoki he Hepeta i

roto i a Iharaira, a ka patua e ia nga pito o Moapa, ka huna ano hoki e ia nga t ama katoa a Hete.  
 18 A ka riro a Eroma, ka riro ano a Heira, ko ona hoariri nei era; a ka maia te mahi a Iharaira. 19 A  
 ka whai rangatiratanga tetahi e puta mai i roto i a Hakopa, a ka huna e ia nga morehu o te pa. 20 Na,  
 ka titiro ia ki a Amareke, a ka ara tana ki pepeha, ka mea, Ko Amareke te timatanga o nga iwi; ko  
 tona whakamutunga ia he whakangaromanga. 21 Na, ka titiro ia ki te Keni, a ka ara tana ki pepeha,  
 ka mea, He kaha tou nohoanga, kua hanga ano hoki tou ohanga ki te kamaka. 22 He ahakoa ra ka  
 pau te Keni: a, whakaraua noatia koe e Ahiria. 23 Na ka ara ano tana ki pepeha, ka mea, Aue, ko  
 wai e ora, ina meatia tenei e te Atua? 24 A ka u mai he kaipuke i te taha o Kitimi, a ka tukinotia e  
 ratou a Ahiria, ka tukinotia ano a Epere, ko ia ano hoki ka whakangaromia. 25 Katahi ka whakatika  
 a paraama, a haere ana, hoki ana ki tona wahi; me Paraka ano hoki i haere i tona ara.

## Chapter 25

1 Na ka noho a Iharaira ki Hitimi, a ka anga te iwi ka moepuku ki nga tamahine a Moapa. 2 Na  
 ratou hoki i karanga te iwi ki nga patunga tapu ma o ratou atua: na kai ana te iwi, a koropiko ana  
 ki o ratou atua. 3 Na ka whakaukia a Iharaira ki a Paarapeoro, a ka mura te riri o Ihowa ki a Iharaira.  
 4 Na ka mea a Ihowa ki a Mohi, Tangohia nga ariki katoa o te iwi, taronatia hoki ki te aroaro o  
 Ihowa, i te ritenga atu o te ra, kia tahuri atu ai i a Iharaira te riri o Ihowa e mura nei. 5 Na ka mea  
 a Mohi ki nga kaiwhakawa o Iharaira, Patua e tenei, e tenei o koutou ona tangata i whakaukia ki a  
 Paarapeoro.  
 6 Na, ka puta tetahi o nga tama a Iharaira, e mau ana mai i tetahi wahine Miriani ki ona teina i  
 te tirohanga atu a Mohi, i te tirohanga atu ano hoki a te whakaminenga katoa o nga tama a Iharaira,  
 i a ratou e tangi ana i te whatitoka o te tapenakar a o te whakaminenga. 7 A, no te kitenga o Pinehaha,  
 tama a Ereatara, tama a Arona tohunga, ka whakatika i te whakaminenga, ka hopu i te tao ki tona  
 ringa; 8 Na ka haere i muri i te tangata o Iharaira ki te teneti, a weohia ana raua tokorua, te tangata  
 o Iharaira, me te wahine hoki i tona tia. A mutu iho te whiu o nga tama a Iharaira. 9 A ko te hunga  
 i mate i te whiu e rua tekau ma wha mano. 10 Na ka korero a Ihowa ki a Mohi, ka mea, 11 Na  
 Pinehaha, tama a Ereatara, tama a Arona tohunga, toku riri i anga ke atu ai i nga tama a Iharaira, i  
 tona ngakau hae penei i toku i roto i a ratou, i kore ai nga tama a Iharaira e poto i ahau, i ahau e

<sup>12</sup>  
 hae ana. Mo reira me ki atu e koe, Nana, ka hoatu e ahau ki a ia taku kawenata mo te rangimarie:  
<sup>13</sup>  
 A ka mau ki a ia, ki ona uri hoki i muri i a ia, hei kawenata kia mau tonu te mahi tohunga; mona  
<sup>14</sup>  
 i hae, he whakaaro ki tona Atua, i mea whakamarietanga ano hoki mo nga tama a Iharaira. A  
 ko te ingoa o te tangata o Iharaira i patua, i patua tahitia ra me te wahine Miriani, ko Timiri tama  
<sup>15</sup>  
 a Haru, he rangatira no tetahi whare kaumatua i roto i nga Himioni. Ko te ingoa hoki o te wahine  
 Miriani i patua nei ko Kohopi, he tamahine na Turu; he rangatira ia no tetahi iwi, no tetahi whare  
 kaumatua o Miriana.  
<sup>16</sup>  
 Na ka korero a Ihowa ki a Mohi, ka mea, <sup>17</sup> Whakataria he pakanga ki nga Miriani, patua  
<sup>18</sup>  
 hoki: E whakatari ano hoki ratou i a koutou ki a ratou mahi tinihanga, i tinihangatia ra koutou  
 e ratou i te mea mo Peoro, i te mea hoki mo Kohipi, tamahine a te rangatira o Miriana, he tuahine  
 no ratou, i patua ra i te ra o te whiunga mo Peoro.

## Chapter 26

<sup>1</sup>  
 A i muri iho i te whiu ka korero a Ihowa ki a Mohi raua ko Ereatara, tama a Arona tohunga,  
<sup>2</sup>  
 ka mea, Taua nga tangata o te whakaminenga katoa o nga tama a Iharaira, nga mea e rau tekau,  
 he maha atu ranei o ratou tau, i nga whare o o ratou matua, nga mea katoa e kaha ana i roto i a  
<sup>3</sup>  
 Iharaira ki te haere ki te whawhai. Na ka korero a Mohi raua ko Ereatara tohunga ki a ratou i nga  
<sup>4</sup>  
 mania o Moapa, i te wahi o Horano e tata ano ki Heriko, ka mea, Taua nga tangata e rua tekau,  
 he maha atu ranei o ratou tau; kia rite ki ta Ihowa i whakahau ai ki a Mohi ratou ko nga tama a  
 Iharaira, i puta mai i te whenua o Ihipa.  
<sup>5</sup>  
 Ko Reupena matamua o Iharaira: ko nga tama a Reupena; ko Hanoka, nana te hapu o nga  
<sup>6</sup>  
 Hanoki: na Paru, ko te hapu o nga Parui: Na Heterono, ko te hapu o nga Heteroni: na Karami, ko  
<sup>7</sup>  
 te hapu o nga Karami. Ko nga hapu enei o nga Reupeni: taua ake o ratou e wha tekau ma toru  
<sup>8</sup>  
 mano e whitu rau e toru tekau. A, ko nga tama a Paru; ko Eriapa. <sup>9</sup> A, ko nga tama a Eriapa; ko  
 Neumuere, ko Ratana, ko Apirama. Ko taua Ratana raua ko Apirama tnei i whai ingoa nei i roto i  
 whakaminenga, i whawhai nei i roto i te whakaminenga, i whawhai nei ki a Mohi raua ko Arona i  
<sup>10</sup>  
 roto i te hui a Koraha, i ta ratou whawhaitanga ki a Ihowa: A koi te mananatanga o te mangai  
 o te whenua, horomia ana ratou ko Koraha, i te matenga o taua hui; i te wa i kainga ai e te ahi nga  
<sup>11</sup>  
 tangata e rua rau e rima tekau: na waiho ana ratou hei tohu. Kihai ia i mate nga tama a Koraha.

<sup>12</sup> Ko nga tama a Himiona, i o ratou hapu: na Nemuere, ko te hapu o nga Nemueri: na Iamini, ko  
 te hapu o nga Iamini: na Iakini, ko te hapu o nga Iakini: <sup>13</sup> Na Tera, ko te hapu o nga Terahi: na  
<sup>14</sup> Hauru, ko te hapu o nga Hauri. Ko nga hapu enei o nga Himioni, e rua tekau ma rua mano e rua  
<sup>15</sup> rau. Ko nga tama a Kara, i o ratou hapu: na Tepono, ko te hapu o nga Teponi: na Haki, ko te  
 hapu o nga Haki: na Huni, ko te hapu o nga Huni. <sup>16</sup> Na Otoni, ko te hapu o nga Otoni: na Eri, ko  
 te hapu o nga Eri: <sup>17</sup> Na Aroro, ko te hapu o nga Arori: na Areri, ko te hapu o nga Areri. <sup>18</sup> Ko  
<sup>19</sup> nga hapu enei o nga tama a Kara, o nga mea o ratou i taua, e wha tekau mano e rima rau. Ko  
 nga tama a Hura ko Ere raua ko Onana: i mate hoki a Ere raua ko Onana ki te whenua o Kanaana.  
<sup>20</sup> A, ko nga tama a Hura, i o ratou hapu; na Heraha, ko te hapu o nga Herani: na Parete, ko te hapu  
 o nga Pareti: na Tera, ko te hapu o nga Terahi. <sup>21</sup> A ko nga tama enei a Parete: na Heterono, ko te  
 hapu o nga Heteroni: na Hamuru, ko te hapu o nga Hamuri. <sup>22</sup> Ko nga hapu enei o Hura, ko nga  
 mea o ratou i taua; e whitu tekau ma ono mano e rima rau. <sup>23</sup> Ko nga tama a Ihakara, i o ratou  
 hapu; na Tora, ko te hapu o nga Torai: na Pua, ko te hapu o nga Puni: <sup>24</sup> Na Ihaupu, ko te hapu o  
 nga Iahupi: na Himirono, ko te hapu o nga Himironi. <sup>25</sup> Ko nga hapu enei o Ihakara, ko nga mea  
 o ratou i taua, e ono tekau ma wha mano e toru rau. <sup>26</sup> Ko nga tama a Hepurona i o ratou hapu: na  
 Herete, ko te hapu o nga Hereti: na Erono, ko te hapu o nga Eroni: na Iahareere, ko te hapu o nga  
 Iahareeri. <sup>27</sup> Ko nga hapu enei o nga Hepuroni, ko nga mea o ratou i taua; e ono tekau mano e rima  
<sup>28</sup> rau. Ko nga tama a Hohepa, i o ratou hapu, ko Manahi raua ko Eparaima. <sup>29</sup> Ko nga tama a  
 Manahi: na Makiri, ko te hapu o nga Makiri: a whanau ake ta Makiri ko Kireara: na Kireara, ko te  
 hapu o nga Kireari. <sup>30</sup> Ko nga tama enei a Kireara: na Ieetere, ko te hapu o nga Ieeteri: na Hereke,  
 ko te hapu o nga Hereki: <sup>31</sup> Na Ahariere, ko te hapu o nga Aharieri: na Hekeme hoki, ko te hapu  
 o nga Hekemi: <sup>32</sup> Na Hemira, ko te hapu o nga Hemiri: na Hewhere, ko te hapu o nga Hewheri.  
<sup>33</sup> A kahore he tama a Teropehara tama a Hewhere, engari he tamahine: a ko nga ingoa enei o nga  
 tamahine a Teropehara, ko Mahara, ko Noa, ko Hokora, ko Mirika, ko Tirita. <sup>34</sup> Ko nga hapu enei  
 o Manahi, ko nga mea hoki o ratou i taua, e rima tekau ma rua mano e whitu rau. <sup>35</sup> Ko nga tama  
 enei a Eparaima, i o ratou hapu: na Hutera, ko te hapu o nga Huteri: na Pekere, ko te hapu o nga  
 Pakeri: na Tahana, ko te hapu o nga Tahani. <sup>36</sup> Ko nga tama ano hoki enei a Hutera: na Erana, ko

<sup>37</sup> te hapu o nga Erani. Ko nga hapu enei o nga tama a Eparaima, ko nga mea o ratou i taua, e toru  
 tekau ma rua mano e rima rau. Ko nga tama enei a Hohepa i o ratou hapu. <sup>38</sup> Ko nga tama a  
 Pineamine, i o ratou hapu: na Pera, ko te hapu o nga Perai: na Ahapere, ko te hapu o nga Ahaperi:  
<sup>39</sup> na Ahirama, ko te hapu o nga Ahirami: Na Hupama, ko te hapu o nga Hupami: na Huwhama,  
<sup>40</sup> ko te hapu o nga Huwhami. A, ko nga tama a Pera ko Arare raua ko Naamana: na Arare, ko te  
 hapu o nga Arari: na Naamana, ko te hapu o nga Naami. <sup>41</sup> Ko nga tama enei a Pineamine, i o  
<sup>42</sup> ratou hapu: a ko nga mea o ratou i taua e wha tekau ma rima mano e ono rau. Ko nga tama enei  
 a Rana, i o ratou hapu: na Huhama, ko te hapu o nga Huhami. Ko nga hapu enei o Rana, tenei hapu,  
<sup>43</sup> tenei hapu, o ratou. Ko nga hapu katoa o nga Huhami, ko nga mea hoki o ratou i taua, e ono  
<sup>44</sup> tekau ma wha mano e wha rau. Ko nga tama a Ahera, i o ratou hapu: na Imina, ko te hapu o nga  
<sup>45</sup> Imini: na Ihui, ko te hapu o nga Ihui: na Peria, ko te hapu o nga Perii. Ko nga tama a Peria: na  
<sup>46</sup> Hepere, ko te hapu o nga Heperi: na Marakierai, ko te hapu o nga Marakieri. A ko te ingoa o te  
<sup>47</sup> tamahine a Ahera ko Hara. Ko nga hapu enei o nga tama a Ahera, ko nga mea o ratou i taua, e  
<sup>48</sup> rima tekau ma toru mano e wha rau. Ko nga tama a Napatari, i o ratou hapu: na Iahateere, ko te  
<sup>49</sup> hapu o nga Iahateeri: na Kuni, ko te hapu o nga Kuni: Na Ietere, ko te hapu o nga Ieteri: na  
<sup>50</sup> Hireme, ko te hapu o nga Hiremi. Ko nga hapu enei o Napatari, i o ratou hapu: a, ko nga mea  
<sup>51</sup> o ratou i taua e wha tekau ma rima mano e wha rau. Ko nga mea enei i taua o nga tama a Iharaira,  
 e ono rau kotahi mano, e whitu rau e toru tekau.  
<sup>52</sup> I korero ano a Ihowa ki a Mohi, i mea, <sup>53</sup> Me tuwha te whenua mo enei, hei kainga tupu;  
<sup>54</sup> kia rite ki te maha o nga ingoa. He tokomaha, kia nui te wahi mo ratou, he tokotorutoru, kia iti  
<sup>55</sup> hoki te wahi mo ratou: kia rite ki tona tokomaha te wahi e hoatu ki tenei, ki tenei. Otiia me rota  
<sup>56</sup> te tuwha o te whenua kia rite ki nga ingoa o nga iwi o o ratou matua to ratou nohoanga iho. Kia  
 rite ki ta te rota te tuwhanga o nga kainga o reira mo te tokomaha, mo te tokotorutoru.  
<sup>57</sup> A, o nga Riwaiti, ko enei i taua, i o ratou hapu: na Kerehona, ko te hapu o nga Kerehoni: na  
<sup>58</sup> Kohara, ko te hapu o nga Kohati: na Merari, ko te hapu o nga Merari. Ko nga hapu enei o nga  
 Riwaiti: ko te hapu o nga Ripini, ko te hapu o nga Heperoni, ko te hapu o nga Mahari, ko te hapu  
<sup>59</sup> o nga Muhi, ko te hapu o nga Korati. A whanau ake ta Kohata ko Amarama. A ko te ingoa o ta

Amarama wahine ko Iokepete, he tamahine na Riwai, i whanau nei ma Riwai ki Ihipa: a whanau  
ake a raua ko Amarama, ko Arona, ko Mohi, ko to raua tuahine hoki, ko Miriama. <sup>60</sup> A whanau  
ake a Arona, ko Natapa, ko Apihu, ko Ereatara, ko Itamara. <sup>61</sup> A i mate a Natapa raua ko Apihu i  
ta raua tapaenga i te ahi ke ki te aroaro o Ihowa. <sup>62</sup> A, taua ake o ratou, e rau tekau ma toru mano,  
nga tane katoa, kotahi nei te marama, maha ake ranei: kihai hoki ratou i taua i roto i nga tama o  
Iharaira; no te mea kihai tetahi kainga tupu i homai ki a ratou i roto i nga tama a Iharaira.  
<sup>63</sup> Ko nga mea enei i taua e Mohi raua ko Ereatara tohunga, i ta raua tauanga i nga tama a  
Iharaira ki nga mania o Moapa, ki te wahi o Horano e tata ana ki Heriko. <sup>64</sup> Kahore ano i roto i  
enei tetahi o te hunga i taua e Mohi raua ko Arona tohunga, i ta raua tauanga i nga tama a Iharaira  
ki te koraha o Hinai. <sup>65</sup> I kiia hoki ratou e Ihowa, Ka mate rawa ki te koraha. A kahore tetahi o  
ratou i toe, ko Karepe anake tama a Iepune, raua ko Hohua tama a Nunu.

## Chapter 27

<sup>1</sup> Na ka haere mai nga tamahine a Teropehara tama a Hewhere, he tama hoki ia na Kirera, tama  
a Makiri, tama a Manahi; no nga hapu o Manahi, tama a Hohepa: a ko nga ingoa enei o ana tamahine;  
ko Mahara, ko Noa, ko Hokora, ko Mirika, ko Tirita. <sup>2</sup> A ka tu ratou ki te aroaro o Mohi, ki te  
aroaro hoki o Ereatara tohunga, ki te aroaro ano o nga rangatira, o te whakaminenga katoa hoki, ki  
te whatitoka o te tapenakara o te whakaminenga, a ka mea, <sup>3</sup> I mate to matou papa ki te koraha,  
kahore hoki ia i roto i te hui o te hunga i huihui ki te whawhai ki a Ihowa i roto i te hui a Koraha:  
engari i mate ia i runga i tona hara ake, kahore ano hoki ana tama. <sup>4</sup> He aha i whakakorea ai te  
ingoa o to matou papa i roto i tona hapu, i a ia kahore nei i whai tama? Homai he wahi ki a matou  
i roto i nga teina o to matu papa. <sup>5</sup> Na ka kawea ta ratou korero e Mohi ki te aroaro o Ihowa. <sup>6</sup> A  
ka korero a Ihowa ki a Mohi, ka mea, <sup>7</sup> He tika nga korero a nga tamahine a Teropehara: me hoatu  
tetahi wahi ki a ratou hei kainga tupu i roto i nga teina o to ratou papa: me whakariro ki a ratou te  
kainga tupu o to ratou papa. <sup>8</sup> Me korero ano hoki e koe ki nga tama a Iharaira, me ki atu, Ki te  
mate te tangata, a kahore ana tama, na me whakariro tona kainga tupu ki tana tamahine. <sup>9</sup> A ki te  
kahore ana tamahine, na, me hoatu tona kainga tupu ki ona tuakana, teina ranei. <sup>10</sup> A ki te kahore  
ona tuakana, teina ranei, na, me hoatu tona kainga tupu ki te tuakana, teina ranei o tona papa. <sup>11</sup> A  
ki te kahore he tuakana, teina ranei o tona papa, na, me hoatu tona kainga tupu ki tona whanaunga



o tona hapu e tata ana ki a ia, a ka riro a reira i a ia: me waiho hoki tena hei tikanga whakaritenga ma nga tama a Ihairaira; ko ta Ihowa hoki i whakahau ai ki a Mohi.

12

I mea ano a Ihowa ki a Mohi, E piki koe ki tenei maunga, ki Aparimi, ka titiro atu ki te whenua ka hoatu nei e ahau ki nga tama a Ihairaira. 13 A ka kitea e koe, na ka kohia atu hoki koe

ki tou iwi, ka peratia me tou tuakana, me Arona i kohia atu nei: 14 Mo korua i whakato i taku kupu i te koraha o Hini, i te ngangautanga a te whakaminenga, a kihai i whakatapu i ahau i to ratou aroaro, i te wai. Ko te wai o Meripa tena i Karehe, i te koraha o Hini.

15

A i korero a Mohi ki a Ihowa, i mea, 16 Kia whakaritea e Ihowa, e te Atua o nga wairua o nga kikokiko katoa, tetahi tangata mo te whakaminenga, 17 Hei haere atu i to ratou aroaro, hei haere mai hoki i to ratou aroaro, hei arahi atu hoki i a ratou, hei arahi mai ano i a ratou; kei rite

hoki te whakaminenga a Ihowa ki nga hipi kahore nei o ratou hepara. 18 Na ka mea a Ihowa ki a Mohi, Tangohia mai ki a koe a Hohua tama a Nunu, he tangata kei a ia nei te wairua, ka popoki ai

ou ringa ki runga ki a ia: 19 Ka whakatu ai hoki i a ia ki te aroaro o Ereatara tohunga, ki te aroaro ano hoki o te whakaminenga katoa, ka whakahau ai i a ia i ta ratou tirohanga. 20 Me hoatu ano e koe tetahi wahi o tou kororia ki runga ki a ia, kia rongo ai te whakaminenga katoa o nga tama a

Ihairaira. 21 A ka tu ia ki te aroaro o Ereatara tohunga, ko tera ano hei kaitono whakaaro mana, i ta te Urimi e whakarite ai i te aroaro o Ihowa: ma tana kupu e haere atu ai, ma tana kupu e haere mai

ai ratou, i ia, me nga tama katoa a Ihairaira, ara te whaka minenga katoa. 22 Na pena ana a Mohi me ta Ihowa i whakahau ai ki a ia: a tangohia mai ana e ia a Hohua, whakaturia ana ki te aroaro o

Ereatara tohunga, ki te aroaro ano o te whakaminenga katoa: 23 A pokia iho e ia ona ringa ki runga ki a ia, me te whakahau ano ki a ia i ta Ihowa i korerotia e Mohi.

## Chapter 28

1 I korero ano a Ihowa ki a Mohi, i mea, 2 Whakahaua nga tama a Ihairaira, mea atu ki a ratou, Kia mau ki taku whakahere, ki taku taro mo aku whakahere ahi, hei kakara reka ki ahau, kia tapaea

mai ki ahau i tona wa ano. 3 Me ki atu hoki e koe ki a ratou, Ko te whakahere ahi tenei e tapaea e koutou ki a Ihowa; kia rua nga reme toa tau tahi, he mea kohakore, hei tahunga tinana tuturu mo

ia ra. 4 Ko tetahi reme me tuku i te ata, ko te rua o nga reme me tuku i te ahiahi; 5 Me te whakatekau o te epa paraoa, hei whakahere totokore, he mea konatunatu ki te whakawha o te hine hinu, o te

mea i patua. 6 Ka tuturu tenei hei tahunga tinana, he mea i whakaritea ki Maunga Hinai hei kakara

7  
reka, hei whakahere ahi ki a Ihowa. A hei te whakawha o te hine he ringihanga mo te reme kotahi:  
8  
kia ringihia te waina kaha ki te wahi tapu hei ringihanga ki a Ihowa. Me tuku tetahi o nga reme  
i te ahiahi: kia rite ki to te whakahere totokore o te ata, ki to tona ringihanga hoki, tau tukunga i  
tena hei whakahere ahi, hei kakara reka ki a Ihowa.

9  
A i te ra hapati kia rua nga reme toa tau tahi, he mea kohakore, kia rua hoki nga whakatekau  
o te epa paraoa pai, hei whakahere totokore, hei te mea i konatunatua ki te hinu, me tona ringihanga  
10  
ano: Ko te tahunga tinana tenei mo nga hapati katoa: tera ano hoki te tahunga tinana, te mea  
11  
tuturu, me tona ringihanga. A i nga timatanga ano o o koutou marama me tapae e koutou he  
tahunga tinana ki a Ihowa; kia rua nga puru, hei te kua, kia kotahi te hipi toa, ki whitu nga reme  
12  
toa tau tahi, he mea kohakore; Kia toru whakatekau o te epa paraoa pai hei whakahere totokore,  
hei te mea i konatunatua ki te hinu, mo te puru kotahi: kia rua whakatekau paraoa pai, hei whakahere  
13  
totokore, hei te mea i konatunatua ki te hinu, mo te hipi toa kotahi; Me te whakatekau paraoa  
pai mo tenei reme, mo tenei reme, he whakahere totokore, hei te mea i konatunatua ki te hinu; hei  
14  
tahunga tinana he reka nei te kakara, hei whakahere ahi ki a Ihowa. A ko nga ringihanga o aua  
mea kia kotahi hawhe hine waina mo te puru kotahi, ko te whakatoru o te hine mo te hipi toa, me  
te whakawha o te hine mo te reme: ko te tahunga tinana tenei o tenei marama, o tenei marama, o  
15  
nga marama o te tau. Kia kotahi kua koati toa ano hoki e tukua hei whakahere hara ki a Ihowa:  
terā ano hoki te tahunga tinana, te mea tuturu, me tona ringihanga ano

16  
Kei te marama tuathi, kei te kotahi tekau ma wha o nga ra o te marama, te kapenga a Ihowa,  
17  
Hei te tekau ma rima o nga ra o tenei marama tetahi hakari: e whitu nga ra e kainga i te taro  
18  
rewenakore. Hei te ra tuatahi te huihuinga tapu: kua tetahi mahi a te kaimahi e mahia: Engari  
19  
me tapae he whakahere ahi hei tahunga tinana ki a Ihowa; kia rua nga puru, hei te kua, kia kotahi  
20  
hipi toa, kia whitu hoki nga reme toa tau tahi: hei te mea kohakore nga mea ma koutou. A hei te  
paraoa pai i konatunatua ki te hinu he whakahere totokore mo ena: kia toru whakatekau e tukua  
21  
mo te puru, kia rua nga whakatekau mo te hipi toa: Me tuku e koe he whakatekau mo te reme,  
22  
mo nga reme e whitu Kia kotahi koati toa ano hoki hei whakahere hara, hei whakamarie mo  
23  
koutou. Hei tapiri enei e tukua nei e koutou mo te tahunga tinana o te ata; hei tahunga tinana  
24  
tuturu hoki tena. Kia penei tonu i te ra, i nga ra e whitu, ta koutou tukunga i te kai o te whakahere  
ahi, hei kakara reka ki a Ihowa: hei tapiri mo te tahunga tinana tuturu te tukunga o tena mea me  
25  
tona ringihanga. A kei te ra whitu he huihuinga tapu mo koutou: kua tetahi mahi a te kaimahi

<sup>26</sup>  
 e mahia. A, i te ra o te tuapora, ina tapaea he whakahere totokore hou e koutou ki a Ihowa i roto  
 i ta koutou hakari o nga wiki, me mea huihuinga tapu mo koutou; kaua tetahi mahi a te kaimahi e  
<sup>27</sup>  
 mahia: Engari me tapae te tahunga tinana hei kakara reka ki a Ihowa: kia rua nga puru, hei te  
<sup>28</sup>  
 kua, kia kotahi hipi toa, kia whitu nga reme toa tau tahi; Me to ratou whakahere totokore he  
 paraoa pai i konatunatua ki te hinu, kia toru whakatekau mo te puru kotahi, kia rua whakatekau mo  
<sup>29</sup> Hei te whakatekau mo te reme, o nga reme e whitu; <sup>30</sup> Kia kotahi koati toa  
 te hipi toa kotahi, Hei te whakatekau mo te reme, o nga reme e whitu; Kia kotahi koati toa  
<sup>31</sup>  
 hei whakamarie mo koutou. Ko enei a koutou e mahi me te tahunga tinana tuturu me tona  
 whakahere totokore, hei te mea kohakore nga mea ma koutou, me nga ringihanga ano.

## Chapter 29

<sup>1</sup>  
 Hei te whitu o nga marama, hei te ra tuatahi o te marama he huihuinga tapu mo koutou; kaua  
<sup>2</sup>  
 tetahi mahi a te kaimahi e mahia: hei ra whakatangi tetere tena ma koutou. Me tuku ano he tahunga  
 tinana hei kakara reka ki a Ihowa; kia kotahi puru, hei te kua, kia kotahi hipi toa, kia whitu nga  
<sup>3</sup>  
 reme toa tau tahi, he mea kohakore: A hei te paraoa pai i konatunatua ki te hinu te whakahere  
<sup>4</sup>  
 totokore, kia toru nga whakatekau mo te puru, kia rua hoki nga whakatekau mo te hipi toa, Me  
<sup>5</sup>  
 te whakatekau mo te reme kotahi, o nga reme e whitu; Kia kotahi koati toa ano hoki hei whakahere  
<sup>6</sup>  
 hara, hei whakamarie mo koutou: Ko te tahunga tinana ano o te marama, me tona whakahere  
 totokore, ko t tahunga tinana tuturu, me tona whakahere totokore, me nga ringihanga o era, kia rite  
<sup>7</sup>  
 ki nga ritenga o te pera, hei kakara reka, hei whakahere ahi ki a Ihowa. A i te tekau o nga ra o  
 tenei marama, o te whitu, he huihuinga tapu mo koutou: me whakapouri o koutou wairua: kaua  
<sup>8</sup>  
 tetahi mahi e mahia: Engari me tapae he tahunga tinana ki a Ihowa hei kakara reka; kia kotahi  
 puru, hei te kua, kia kotahi hipi toa, kia whitu nga reme toa tau tahi; hei nga mea kohakore nga  
<sup>9</sup>  
 mea ma koutou: Hei te paraoa pai ano hoki i konatunatua ki te hinu te whakahere totokore mo  
<sup>10</sup>  
 era, kia toru nga whakatekau mo te puru, kia rua hoki nga whakatekau mo te hipi toa kotahi, Hei  
<sup>11</sup>  
 te whakatekau mo te reme, puta noa i nga reme e whitu: Kia kotahi koati toa hei whakahere  
 hara; me te whakahere hara hei whakamarie, te tahunga tinana tuturu, me tona whakahere totokore,  
 me nga ringihanga.

12 A hei te tahi tekau ma rima o nga ra o te whitu o nga marama he huihuinga tapu mo koutou;  
 13 kaua tetahi mahi a te kaimahi e mahia, a kia whitu nga ra e mea hakari ai koutou ki a Ihowa: Me  
 tapae ano he tahunga tinana, he whakahere ahi, hei kakara reka ki a Ihowa: kia kotahi tekau ma  
 toru nga puru, hei te kuaao, kia rua nga hipi toa, kia kotahi tekau ma wha nga reme toa tau tahi, hei  
 14 nga mea kohakore: Hei te paraoa pai ano i konatunatua ki te hinu te whakahere totokore; kia  
 toru nga whakatekau ki te puru, o nga puru kotahi tekau ma toru, kia rua nga whakatekau ki te hipi  
 15 toa, ara o nga hipi toa e rua, Me te whakatekau ki te reme, o nga reme kotahi tekau ma wha:  
 16 Me tetahi koati toa, hei whakahere hara; me te tahunga tinana tuturu ano, me tona whakahere  
 17 totokore, me tona ringihanga. Me tuku hoki i te rua o nga ra nga puru kotahi tekau ma rua, hei  
 18 te kuaao, kia rua nga hipi toa, kia tekau ma wha nga reme toa tau tahi, he mea kohakore: A, ko  
 nga whakahere totokore o aua mea, me nga ringihanga, ara o nga puru, o nga hipi, o nga reme, kia  
 19 rite ki te maha, kia rite ki te ritenga: Kia kotahi koati toa ano hei whakahere hara; tera atu ano  
 20 te tahunga tinana tuturu me tona whakahere totokore, me nga ringihanga. A, hei te toru o nga  
 ra, kia kotahi tekau ma tahi nga puru, kia rua nga hipi toa, kia tekau ma wha nga reme toa tau tahi,  
 21 he mea kohakore; A, ko nga whakahere totokore, me nga ringihanga, ara o nga puru, o nga hipi  
 22 toa, o nga reme, kia rite ki to ratou maha, kia rite ki te ritenga: Kia kotahi koati toa hei whakahere  
 23 hara; me te whakahere hara tuturu ano, me tona whakahere totokore, me tona ringihanga. A i  
 te wha o nga ra kia kotahi tekau nga puru, kia rua nga hipi toa, kia tekau ma wha nga reme toa tau  
 24 tahi, he mea kohakore: Na, ko nga whakahere totokore me nga ringihanga, ara o nga puru, o  
 25 nga hipi toa, o nga reme, kia rite ki to ratou maha, kia rite ki te ritenga: Kia kotahi koati toa ano  
 hoki hei whakahere hara; me te tahunga tinana tuturu ano, me tona whakahere totokore, me tona  
 26 ringihanga. A i te rima o nga ra kia iwa nga puru, kia rua nga hipi toa, kia tekau ma wha nga  
 27 reme toa tau tahi, he mea kohakore: A, ko nga whakahere totokore, me nga ringihanga, ara o  
 28 nga puru, o nga hipi toa, o nga reme, kia rite ki to ratou maha, kia rite ki te ritenga: Kia kotahi  
 koati toa ano hoki hei whakahere hara; tera ano te tahunga tinana tuturu, me tona whakahere totokore,  
 29 me tona ringihanga. A i te ono o nga ra kia waru nga puru, kia rua nga hipi toa, kia tekau ma  
 30 wha nga reme toa tau tahi, he mea kohakore: A, ko nga whakahere totokore, me nga ringihanga,  
 31 ara o nga puru, o nga hipi toa, o nga reme, kia rite ki to ratou maha, kia rite ki te ritenga: Kia  
 kotahi koati toa ano hoki hei whakahere hara: tera ano te tahunga tinana tuturu, tona whakahere

<sup>32</sup>  
 totokore, me tona ringihanga. A, i te whitu o nga ra, kia whitu nga puru, kia rua nga hipi toa,  
 kia tekau ma wha nga reme toa tau tahi, he mea kohakore: <sup>33</sup> A, ko nga whakahere totokore, me  
 o ratou ringihanga, ara o nga puru, o nga hipi toa, o nga reme, kia rite ki to ratou maha, kia rite ki  
<sup>34</sup>  
 te ritenga: Kia kotahi koati toa ano hoki hei whakahere hara; tera ano te tahunga tinana tuturu,  
 tona whakahere totokore, me tona ringihanga. <sup>35</sup> Hei te waru o nga ra he huihuinga nui ma koutou:  
 kaua tetahi mahi a te kaimahi e mahia. <sup>36</sup> Engari me tapae he tahunga tinana, he whakahere ahi,  
 he kakara reka ki a Ihowa; kia kotahi puru, kia kotahi hipi toa, kia whitu nga reme toa tau tahi, he  
<sup>37</sup>  
 mea kohakore: A, ko nga whakahere totokore, me o ratou ringihanga, ara o te puru, o te hipi  
<sup>38</sup>  
 toa, o nga reme, kia rite ki to ratou maha, kia rite ki te ritenga: Kia kotahi koati toa ano hoki hei  
 whakahere hara; tena ano te tahunga tinana tuturu, me tona whakahere totokore, me tona ringihanga.  
<sup>39</sup>  
 Ko enei a koutou e mea ai ki a Ihowa i a koutou hakari nunui, haunga a koutou ki taurangi, me  
 a koutou tahunga tinana, me a koutou whakahere totokore, a koutou ringihanga, me a koutou  
<sup>40</sup>  
 whakahere mo te pai. Na ka korerotia e Mohi ki nga tama a Ihairaira nga mea katoa i whakahau  
 ai a Ihowa ki a Mohi.

### Chapter 30

<sup>1</sup>  
 Na ka korero a Mohi ki nga ariki o nga iwi o nga tama a Ihairaira, ka mea, Ko te mea tenei i  
 whakahaua e Ihowa. <sup>2</sup> Ki te puaki i tetahi te kupu taurangi ki a Ihowa, ki te oati ranei i te oati e  
 mau ai tona wairua te here; kei whakataka e ia tana kupu, kia rite tana e mea ai ki nga mea katoa i  
 puta mai i tona mangai.  
<sup>3</sup>  
 A, mehemea he ki taurangi ta te wahine ki a Ihowa, a ka mau tana here ki a ia, i a ia ano i te  
<sup>4</sup>  
 whare o tona papa i tona tamarikitanga; A ka rongu tona papa ki tana ki taurangi, ki tana here  
 hoki i herea ai tona wairua, a ka whakarongo kau tona papa ki a ia; na, ka mau ana ki taurangi  
<sup>5</sup>  
 katoa, ka mau ano hoki nga here katoa i herea ai e ia tona wairua. Tena ia, ki te whakakahoretia  
 e tona papa i te ra i rongu ai ia; e kore tetahi o ana ki taurangi, o ana here hoki e herea ai e ia tona  
 wairua e u: a ka whakarerea noatia e Ihowa ki a ia, no te mea kua whakakahoretia tana e tona papa.  
<sup>6</sup>  
 A ki te mea he tahu tana, a ka puaki tana ki taurangi, ka puta hohoro mai ranei i ona ngutu te mea  
<sup>7</sup>  
 e herea ai e ia tona wairua; A ka rongu tana tahu, a ka whakarongo puku ki a ia i te ra i rongu ai;

na, ka u ana ki taurangi, ka mau ano hoki nga here i herea ai e ia tona wairua. <sup>8</sup> Tena ia, ki te whakakahoretia tana e tana tahu i te ra i rongoi ia; na ka taka tana ki taurangi i puaki i a ia, me te mea i puta hohoro mai i ona ngutu, i herea ai e ia tona wairua: a ka whakarerea noatia e Ihowa ki a ia. <sup>9</sup> Ko te ki taurangi ia a te pouaru, a te wahine ranei i whakarerea, ara ko nga mea katoa i herea ai e ia tona wairua, ka u ki a ia. <sup>10</sup> Ki te mea ia no te whare mai ano o tana tahu tana ki taurangi, tana herenga ranei i te here, ara i te oati, ki tona wairua, <sup>11</sup> A i rongoi ano tana tahu, i whakarongo puku hoki ki a ia, a kihai i whakakahore i tana: na ka mau ana ki taurangi katoa, ka mau ano hoki nga here katoa i herea ai e ia tona wairua. <sup>12</sup> Tena ia, mehemea i whakataka rawatia aua mea e tana tahu i te ra i rongoi ia; e kore e u tetahi mea i puta mai i ona ngutu mo ana ki taurangi, mo te mea e herea ai tona wairua: kua whakataka e tana tahu; a ka whakarerea noatia e Ihowa ki a ia. <sup>13</sup> Ko nga ki taurangi katoa, ko nga oati here katoa hei pehi i te wairua, ma tana tahu e whakau, ma tana tahu hoki e whakataka. <sup>14</sup> Ki te whakarongo puku tonu ia tana tahu i tena ra, i tena ra; na e whakau ana ia i ana ki taurangi katoa, ara i ana here katoa i mau ai ia: kua whakaungia e ia, no te mea i whakarongo puku ia ki a ia i te ra i rongoi ai. <sup>15</sup> Ki te whakataka rawatia ia e ia aua mea i muri iho i tona rongonga; na mana e waha te kino o te wahine. <sup>16</sup> Ko nga tikanga enei i whakahaua e Ihowa ki a Mohi ma te tangata raua ko tana wahine, ma te papa raua ko tana tamahine i te mea he taitamahine ia, i te whare o tona papa.

### Chapter 31

<sup>1</sup> I korero ano a Ihowa ki a Mohi, i mea, <sup>2</sup> Rapua he utu mo nga tama a Iharaira i nga Miriani: hei muri iho ka kohia koe ki tou iwi. <sup>3</sup> Na ka korero a Mohi ki te iwi, ka mea, Whitiki etahi o koutou mo te whawhai, ka haere ai ki te tu i a Miriana ki te tohe i ta Ihowa utu i a Miriana. <sup>4</sup> Kia kotahi te mano o tenei iwi, o tenei iwi, o nga iwi katoa o iharaira, e unga ki te whawhai. <sup>5</sup> Na ka wehea e ratou i roto i nga mano o Iharaira, he mano no ia iwi, tekau ma rua mano, rite tonu i te patu mo te whawhai. <sup>6</sup> Na, ka unga ratou e Mohi ki te whawhai, he mano no tenei iwi, no tenei iwi, me Pinehaha tama a Eratarā tohunga, ki te whawhai, me nga mea tapu ano, me nga tetere i tona ringa hei whakaoho. <sup>7</sup> Na ka whawhai ratou ki a Miriana, ka pera me ta Ihowa i whakahau ai ki a Mohi: a patua iho e ratou nga tane katoa. <sup>8</sup> I patua ano e ratou nga kingi o Miriana, i roto i te parekura; a Ewi ratou

ko Rekeme, ko Turu, ko Huru, ko Repa, nga kingi tokorima o Miriana: i patua ano e ratou a Paraama,  
<sup>9</sup> te tama a Peoro ki te hoari. A whakaraua ana e nga tama a Iharaira nga wahine o Miriana, me a  
 ratou kohungahunga; i tongohia ano a ratou kararehe katoa, hei taonga parau, me a ratou kahui  
<sup>10</sup> katoa, me o ratou taonga katoa. Tahuna ake hoki e ratou ki te ahi o ratou pa katoa i noho ai ratou,  
<sup>11</sup> me o ratou whare rangatira katoa. A tangohia ana e ratou nga taonga katoa, me nga mea parau  
<sup>12</sup> katoa, te tangata me te kararehe. A kawea ana e ratou ki a Mohi raua ko Ereatara tohunga, ki te  
 whakaminenga ano hoki o nga tama a Iharaira, nga whakarau, me era mea parau, me nga taonga,  
 ki te puni ki nga mania o Moapa, ki te wahi o Horano e tata ana ki Heriko.

<sup>13</sup> A ka puta a Mohi ratou ko Ereatara tohunga, ko nga ariki katoa o te whakaminenga ki te  
 whakatau i a ratou ki waho o te puni; <sup>14</sup> Na ka riri a Mohi ki nga rangatira o te ope, ki nga rangatira  
 o nga mano, ki nga rangatira ano hoki o nga rau, i haere mai nei i te whawhai. <sup>15</sup> Na ka mea a Mohi  
<sup>16</sup> ki a ratou, Kua whakaorangia e koutou nga wahine katoa? Nana, ko nga mea enei nana i tutu ai  
 nga tama a Iharaira ki a Ihowa i to Peoro ra, he mea tohutohu na Paraama, i pa ai te whiu ki te  
<sup>17</sup> whakaminenga a Ihowa. Na reira patua aianeia nga tane katoa i roto i nga kohungahunga, patua  
<sup>18</sup> hoki nga wahine katoa kua mohio, kua takoto ki te tane. Ko nga kohungahunga wahine katoa  
<sup>19</sup> ia, kahore nei i mohio, i takoto ki te tane, whakaorangia ma koutou. Ko koutou hoki, me noho  
 ki waho o te puni, kia whitu nga ra: ko nga tangata katoa i patu i te tangata, me nga mea katoa hoki  
 i pa ki te tangata i patua, me pure koutou i a koutou, me a koutou whakarau i te toru o nga ra, i te  
<sup>20</sup> whitu hoki o nga ra. Me pure ano hoki nga kakahu katoa, me nga oko hiako, me nga mea katoa  
<sup>21</sup> i hanga ki te huruhuru koati, me nga oko rakau katoa. I mea ano a Ereatara tohunga ki nga tangata  
<sup>22</sup> whawhai, i haere ki te riri, Ko te tikanga tenei o te ture i whakahaua e Ihowa ki a Mohi; Ko te  
<sup>23</sup> koura anake, me te hiriwa, ko te parahi, ko te rino, ko te tine, me te mata, Ko nga mea katoa e  
 puta i te ahi, me tuku na roto i te ahi, a ka kore te poke: otiia me pure ano ki te wai o te wehenga:  
<sup>24</sup> a, ko nga mea katoa e kore e puta i te ahi, me tuku na roto i te wai. A me horoi o koutou kakahu  
 i te whitu o nga ra, a ka kore o koutou poke, a hei muri iho ka tomo ki te puni.

<sup>25</sup> A i korero a Ihowa ki a Mohi, i mea, <sup>26</sup> Tirohia te maha o te taonga parau i riro mai, o te  
 tangata, o te kararehe, e korua ko Ereatara tohunga, e nga matua ariki ano hoki o nga whare o te  
<sup>27</sup> whakaminenga: Wehea hoki nga taonga parau kia rua nga wahi; ma te hunga i hapai i te pakanga,  
<sup>28</sup> i haere atu ki te whawhai, ma te whakaminenga katoa ano. Tangohia ano hoki he takoha ma  
 Ihowa i nga tangata i whawhai, i haere atu na ki te riri: kia kotahi wairua i roto i nga rau e rima, o

te tangata, ratou tahi ko te kau, ko te kaihe, ko nga hipi hoki. <sup>29</sup> Me tango i roto i ta ratou hawhe,  
 ka hoatu ai ki a Ereatara, ki te tohunga, hei whakahere hapahapai ki a Ihowa. <sup>30</sup> Me tango ano e  
 koe i roto i te hawhe a nga tama a Iharaira, kia kotahi wahi i roto i te rima tekau, o te tangata, o te  
 kau, o te kaihe, o te hipi, ara o nga kararehe katoa, ka hoatu ai ma nga Riwaiti, ma nga kaitiaki o  
 nga mea o te tapenakara o Ihowa. <sup>31</sup> Na peratia ana e Mohi raua ko Ereatara tohunga me ta Ihowa  
 i whakahau ai ki a Mohi. <sup>32</sup> A ko te taonga, ko te toenga iho o nga mea i riro parau i nga tangata  
 i whawhai, e ono rau e whitu tekau ma rima mano hipi, <sup>33</sup> E whitu tekau ma rua mano hoki nga  
 kau, <sup>34</sup> E ono tekau ma tahi mano nga kaihe, <sup>35</sup> E toru tekau ma rua mano nga tangata, ara nga  
 wahine kahore ano i mohio noa, i takoto noa, ki te tane. <sup>36</sup> A, ko tera hawhe, ko te wahi a te hunga  
 i haere ki te whawhai, e toru rau e toru tekau ma whitu mano e rima rau te maha o nga hipi: <sup>37</sup> A,  
 ko te takoha ma Ihowa o nga hipi e ono rau e whitu tekau ma rima. <sup>38</sup> E toru tekau ma ono mano  
 nga kau; a, ko te takoha ma Ihowa e whitu tekau ma rua. <sup>39</sup> E toru tekau mano e rima rau nga kaihe;  
 a, ko te takoha ma Ihowa e ono tekau ma tahi. <sup>40</sup> A ko nga tangata tekau ma ono mano; a, ko te  
 takoha ma Ihowa, e toru tekau ma rua tangata. <sup>41</sup> Na ka hoatu e Mohi te takoha, te whakahere  
 hapahapai ma Ihowa, ki a Ereatara tohunga, ka peratia me ta Ihowa i whakahau ai ki a Mohi. <sup>42</sup> Na,  
 no roto i te hawhe a nga tama a Iharaira i wehea nei e Mohi i roto i ta te hunga i whawhai, <sup>43</sup> Ko  
 te hawhe hoki a te whakaminenga, e toru rau e toru tekau ma whitu mano e rima rau hipi, <sup>44</sup> E toru  
 tekau ma ono mano nga kau, <sup>45</sup> E toru tekau mano e rima rau nga kaihe, <sup>46</sup> Kotahi tekau ma ono  
 mano nga tangata; <sup>47</sup> I tangohia e Mohi i roto i te hawhe a nga tama a Iharaira, kotahi wahi i roto  
 i te rima tekau, o te tangata, o te kararehe; a hoatu ana ki nga Riwaiti i tiaki nei i nga mea o te  
 tapenakara o Ihowa; i peratia ano me ta Ihowa i whakahau ai ki a Mo hi.  
<sup>48</sup> Na ka haere mai ki a Mohi nga rangatira mano o te ope, nga rangatira mano ratou ko nga  
 rangatira rau: <sup>49</sup> A ka mea ki a Mohi, Kua tirohia e au pononga te tokomaha o nga tangata i whawhai  
 nei i raro i o matou ringa, a kahore i ngaro tetahi o matou. <sup>50</sup> Koia i kawea mai ai e matou he  
 whakahere ma Ihowa, e ia tangata, e ia tangata, tana i whiwhi ai, etahi mea koura, etahi mekameka,  
 poroporo, mowhiti, whakakai, heitiki hoki, hei whakamarie mo o matou wairua ki te aroaro o Ihowa.  
<sup>51</sup> Na ka tangohia e Mohi raua ko Ereatara tohunga te koura i a ratou, he mea mahi katoa. <sup>52</sup> A  
 kotahi tekau ma ono mano e whitu rau e rima tekau hekere o te koura katoa o te whakahere i tapaea



e ratou ki a Ihowa, o ta nga rangatira mano ratou ko nga rangatira rau. <sup>53</sup> I pahuatia hoki e nga tangata i whakawhai etahi taonga, tena mona ake, tena mona ake. <sup>54</sup> Na tangohia ana e Mohi raua ko Ereatara tohunga te koura a nga rangatira o nga mano, o nga rau, a kawea ana e raua ki roto ki te tapenakara o te whakaminenga, hei whakamahara mo nga tama a Iharaira ki te aroaro o Ihowa.

## Chapter 32

<sup>1</sup> Na he tini rawa nga kahui a nga tama a Reupena, ratou ko nga tama a Kara: a ka kite ratou i te whenua o Iatere, i te whenua hoki o Kireara, na, he wahi pai tena wahi mo nga kahui; <sup>2</sup> Na ka haere nga tama a Kara ratou ko nga tama a Reupena, ka korero ki a Mohi raua ko Ereatara tohunga, ki nga rangatira ano o te whakaminenga, ka mea, <sup>3</sup> Ko Ataroto, ko Ripono, ko Iatere, ko Nimira, ko Hehepona, ko Ereare, ko Hepama, ko Nepo, ko Peono, <sup>4</sup> Ko te whenua katoa i patua na e Ihowa i te aroaro o te whakaminenga o Iharaira, he whenua pai tena mo nga kahui, he kahui ano hoki a au pononga. <sup>5</sup> I mea ano ratou, Mehemea e manakohia ana matou i tou aroaro, me homai tenei whenua hei kainga mo au pononga; kua matou e meatia kia whiti i Horano. <sup>6</sup> Na ka mea a Miho ki nga tama a Kara ratou ko nga tama a Reupena, Ko o koutou teina koia kia haere ki te whawhai, a ko koutou kia noho ki konei? <sup>7</sup> He aha koutou i pehi ai i te ngakau o nga tama a Iharaira kia kua e whiti ki te whenua i homai e Ihowa ki a ratou? <sup>8</sup> I pena ano o koutou matua i taku tononga atu i a ratou i Kareheparenea kia kite i te whenua. <sup>9</sup> I to ratou haerenga hoki ki runga ki te awaawa o Ehekorā, a, ka kite ratou i te whenua, na pehia ana e ratou nga ngakau o nga tama a Iharaira, kia kua e haere ki te whenua i homai nei e Ihowa ki a ratou. <sup>10</sup> Na ko te muranga o to Ihowa riri i taua ra, a ka oati ia, ka mea, <sup>11</sup> E kore rawa nga tangata i haere mai nei i Ihipa, nga mea e rua tekau, he maha atu ranei o ratou tau, e kite i te whenua i oati ai ahau ki a Aperahama, ki a Ihaka, ki a Hakopa; mo ratou kihai i tino whai i ahau: <sup>12</sup> Heoi ano ko Karepe, ko te tama a Iepune Keniti, raua ko Hohua, te tama a Nunu; mo raua i tino whai i a Ihowa. <sup>13</sup> Na ko te muranga o te riri o Ihowa ki a Iharaira, a meinga ana ratou kia kopikopiko i te koraha, e wha tekau nga tau, a poto noa taua whakapaparanga i mahi na i te kino i te tirohanga a Ihowa. <sup>14</sup> Na, kua ara ake na koutou hei whakakapi mo o koutou matua, he huanga tangata hara, hei whakanui atu i te mura o to Ihowa riri

15  
ki a Iharaira. No te mea ki te tahuri ke koutou, a kahore e whai i a ia, ka waiho ano ratou e ia i te koraha; a ma koutou ka ngaro ai tenei iwi katoa.

16  
Na ka whakatata ratou ki a ia, ka mea, Ka hanga e matou he taiepa hipi ki konei mo a matou kararehe, me etahi pa mo a matou tamariki: 17 Ko matou ia ka haere me a matou patu i mua i nga tama a Iharaira, kia kawea ra ano ratou e matou ki te wahi mo ratou: a me noho a matou tamariki

ki nga pa e whai taiepa ana, he wehi hoki i nga tangata o tenei whenua. 18 E kore matou e hoki ki o matou whare, kia riro ra ano tona kainga i tenei, i tenei o nga tama a Iharaira. 19 E kore hoki matou e tu tahi me ratou i te kainga i tawahi o Horano, i tua atu ranei; no te mea ka riro mai he

kainga mo matou i tenei taha o Horano, i te taha ki te rawhiti. 20 Na ka mea a Mohi ki a ratou, Ki te meatia tenei mea e koutou, ki te haere koutou me a koutou patu i te aroaro o Ihowa ki te whawhai, 21

Ki te whiti katoa hoki koutou i Horano me a koutou patu i te aroaro o Ihowa, kia peia ra ano e ia ona hoariri i mua i a ia, 22 A ka taea te whenua i te aroaro o Ihowa: katahi koutou ka hoki, a ka harakore ki te aroaro o Ihowa, ki te aroaro ano hoki o Iharaira; a mo koutou tenei whenua hei

nohoanga i te aroaro o Ihowa. 23 Tena ia, ka kore koutou e pena, nana, kua hara koutou ki a Ihowa; a kia mohio koutou, e hopukia ano koutou e to koutou hara. 24 Hanga nga pa mo a koutou tamariki,

me nga taiepa mo a koutou hipi; meatia ano hoki te mea i puta mai i o koutou mangai. 25 Na ka korero nga tama a Kara ratou ko nga tama a Reupena ki a Mohi, ka mea, Ka pena au pononga me ta toku ariki i whakahau ai. 26 Ko reira a matou tamariki, a matou wahine, a matou kahui, me a

matou kararehe katoa, ko nga pa o Kireara: 27 Ko au pononga ia me whiti katoa atu, rite rawa i te patu mo te pakanga, whawhai ai i te aroaro o Ihowa; me pera me ta toku ariki i ki ai.

28 Na ka whakahaua te tikanga mo ratou e Mohi ki a Ereatara tohunga, ratou ko Hohua tama a Nunu, ko nga ariki hoki o nga whare o nga matua o nga iwi o nga tama a Iharaira: 29 A ka mea a Mohi ki a ratou, Ki te whiti katoa atu i roto i a koutou nga tama a Kara i Horano, ratou ko nga tama a Reupena me a ratou patu ano, whawhai ai i te aroaro o Ihowa, a ka taea te whenua i to koutou

aroaro; na me hoatu e koutou te whenua o Kireara kia puritia e ratou: 30 Ki te kahore ia ratou e whiti tahi i a koutou, me a ratou patu, na, tena he wahi hei puritanga ma ratou i roto i a koutou i te

whenua o Kanaana. 31 Na ka whakautua e nga tama a Kara ratou ko nga tama a Reupena, ka mea,

Ka rite tonu ta matou e mea ai ki ta Ihowa i korero mai ai ki au pononga. 32 Me whiti matou me a matou patu i te aroaro o Ihowa ki te whenua o Kanaana, a hei puritanga ma matou to matou kainga

i tenei taha o Horano. 33 Na ka homai e Mohi ki a ratou, ki nga tama a Kara, ki nga tama a Reupena

ratou ko tetahi taanga o te iwi o Manahi tama a Hohepa te kingitanga o Hihona kingi o nga Amori,  
 me te kingitanga o Oka kingi o Pahana, te whenua me ona pa i roto i o ratou rohe, ara nga pa o te  
 whenua a tawhio noa. <sup>34</sup> Na ka hanga e nga tama a Kara a Ripono, a Ataroto, a Aroere; <sup>35</sup> Me  
 Ateroto Hopana, me Iatere, me Iokopeta; <sup>36</sup> Me Petenimira, me Peteharana: he pa taiepa, me nga  
 taiepa mo nga hipi. <sup>37</sup> A na nga tama a Reupena i hanga a Hehepona, a Ereare, a Kiriataima; <sup>38</sup> A  
 Nepo, a Paaramoono, i whakaputaia ketia hoki nga ingoa, me Hipima: i huaina ano hoki e ratou he  
 ingoa ke ki nga pa i hanga e ratou. <sup>39</sup> A i haere atu nga tama a Makiri tama a Manahi ki Kireara,  
 a tangohia ana e ia, peia ana hoki te Amori i reira. <sup>40</sup> A i hoatu e Mohi a Kireara ki a Makiri tama  
 a Manahi; a noho ana ia i reira. <sup>41</sup> A i haere a Haira tama a Manahi, a tangohia ana e ia nga pa o  
 reira, a huaina iho e ia, ko Hawotohaira. <sup>42</sup> A i haere a Nopaha, a tangohia ana e ia a Kenata, me  
 ona pa ririki, a huaina iho ki tona ingoa, ki a Nopaha.

### Chapter 33

<sup>1</sup> Ko nga haerenga enei o nga tama a Iharaira i to ratou putanga mai i te whenua o Ihipa i o  
 ratou ropu i raro i te ringa o Mohi raua ko Arona. <sup>2</sup> I tuhituhia hoki e Mohi o ratou haerenga atu,  
 o ratou whakatikanga atu, he mea ki mai na Ihowa: a ko o ratou whakatikanga atu enei, me o ratou  
 haerenga. <sup>3</sup> I turia atu i Ramehehe i te marama tuatahi, i te kotahi tekau ma rima o nga ra o te  
 marama tuatahi; no te aonga ake o te kapenga i puta mai ai nga tama a Iharaira, i runga tonu ano  
 te ringa i te tirohanga a nga Ihipiana katoa; <sup>4</sup> I nga Ihipiana e tanu ana i a ratou matamua katoa, i  
 patua nei e Ihowa i roto i a ratou: a mahi whakawa ana a Ihowa ki o ratou atua. <sup>5</sup> Na turia ana e  
 nga tama a Iharaira i Ramehehe, a noho ana i Hukota. <sup>6</sup> I turia i Hukota, a noho ana i Etama, i te  
 pito o te koraha. <sup>7</sup> I turia i Etama, a tahuri ana whaka Pihahirota ki te ritenga atu o Paarahepona: a  
 noho ana i te ritenga atu o Mikitoro. <sup>8</sup> I turia i te ritenga atu o Pihahirota, a tika ana na waenganui  
 o te moana ki te koraha; a haere ana, e toru nga ra ki te ara, i te koraha o Etama, a noho ana i Mara.  
<sup>9</sup> I turia i Mara, a haere ana ki Erimi: kotahi tekau ma rua hoki nga puna wai i Erimi, e whitu tekau  
 hoki nga nikau; a noho ana ratou i reira. <sup>10</sup> I turia i Erimi, a noho ana i te taha o te Moana Whero.  
<sup>11</sup> I turia i te Moana Whero, a noho ana i te koraha o Hini. <sup>12</sup> I turia i te koraha o Hini, a noho ana

13 i Ropoka. I turia i Ropoka, a noho ana i Aruhu. 14 I turia i Aruhu, a noho ana i Repirimi, i te  
 wahi kahore nei he wai hei inu ma te iwi. 15 I turia i Repirimi, a noho ana i te koraha o Hinai. 16 I  
 turia i te koraha o Hinai, a noho ana i Kipirototo Hataawa. 17 I turia i Kipirototo Hataawa, a noho ana  
 i Hateroto. 18 I turia i Hateroto, a noho ana i Ritima. 19 I turia i Ritima, a noho ana i Rimono  
 Parehe. 20 I turia i Rimono Parehe a noho ana i Ripina. 21 I turia i Ripina, a noho ana i Ritaha.  
 22 I turia i Ritaha, a noho ana i Keherataha. 23 I turia i Keherataha, a noho ana i Maunga Hapere.  
 24 I turia i Maunga Hapere, a noho ana i Harataha. 25 I turia i Harataha, a noho ana i Makaheroto.  
 26 I turia i Makaheroto, a noho ana i Tahata. 27 I turia i Tahata, a noho ana Taraha. 28 I turia i  
 Taraha, a noho ana Mitikia. 29 I turia i Mitikia, a noho ana i Hahamona. 30 I turia i Hahamona, a  
 noho ana i Moheroto. 31 I turia i Moheroto, a noho ana i Peneiaakana. 32 I turia i Peneiaakana, a  
 noho ana i Horo Hakirikara. 33 I turia i Horo Hakirikara, a noho ana i Iotopata. 34 I turia i Iotopata,  
 a noho ana i Eperona. 35 I turia i Eperona, a noho ana i Ehiono Kepere. 36 I turia i Ehiono Kepere,  
 a noho ana i te koraha o Hini, ara o Karehe. 37 I turia i Karehe, a noho ana i Maunga Horo, i te pito  
 o te whenua o Eroma. 38 A i kake a Arona tohunga ki Maunga Horo, he mea ki mai na Ihowa, a  
 mate iho ki reira, i te wahi tekau o nga tau o te putanga mai o nga tama a Iharaira i te whenua o  
 Ihipa, i te ra tuatahi o te rima o nga marama. 39 A kotahi rau e rua tekau ma toru nga tau o Arona  
 i tona matenga ki Maunga Horo. 40 A i rongu te kingi o Arara, te Kanaani, i noho nei i te whenua  
 o Kanaana, i te taha ki te tonga, ki te taenga mai o nga tama a Iharaira. 41 A i turia e ratou i Maunga  
 Horo, a noho ana i Taramona. 42 I turia i Taramona, a noho ana i Punono. 43 I turia i Punono, a  
 noho ana i Opoto. 44 I turia i Opoto, a noho ana i Iteaparimi, i nga rohe o Moapa. 45 I turia i Iimi,  
 a noho ana i Riponokara. 46 I turia i Riponokara, a noho ana i Aramono Ripirataima. 47 I turia i  
 Aramono Ripirataima, a noho ana i nga maunga o Aparimi, i te ritenga atu o Nepo. 48 I turia i nga  
 maunga o Aparimi, a noho ana i nga mania o Moapa, i te wahi o Horano e tata ana ki Heriko. 49 Na  
 ka noho ratou ki te taha o Horano ki Peteietimoto, tae noa ki Aperehitimi, ki nga mania o Moapa.  
 50 I korero ano a Ihowa ki a Mohi i nga mania o Moapa, i te wahi o Horano e tata ana ki Heriko,  
 51 i mea, Korero ki nga tama a Iharaira, mea atu ki a ratou, E whiti koutou i Horano ki te whenua

<sup>52</sup>  
 o Kanaana; Na me pei nga tangata whenua katoa i to koutou aroaro, me whakamoti a ratou ahua kohatu, me whakamoti katoa ano hoki a ratou whakapakoko whakarewa, ka whakakahore ano hoki  
<sup>53</sup>  
 i a ratou wahi teitei katoa: A ka tangohia te whenua e koutou, ka nohoia hoki: kua hoatu nei  
<sup>54</sup>  
 hoki e ahau te whenua kia nohoia e koutou. Me rota ta koutou tuwha i te whenua hei kainga mo  
 o koutou hapu: he nui, kia nui tona wahi, he iti, kia iti tona wahi: hei te wahi i tika ai tona rota te  
<sup>55</sup>  
 wahi mo tenei, mo tenei; kia rite ki nga iwi o o koutou matua te tuwhanga o o koutou wahi. Ko  
 tenei, ki te kahore e peia e koutou nga tangata whenua i to koutou aroaro; na hei koikoi i roto i o  
 koutou kanohi nga mea o ratou e whakatoea e koutou, hei tumatakuru ano i o koutou kaokao, a ka  
<sup>56</sup>  
 whakatoi ratou i a koutou ki te whenua e noho a i koutou. Na, ko nga mea i whakaaro ahau hei  
 meatanga ki a ratou, ka meatia e ahau ki a koutou.

### Chapter 34

<sup>1</sup>  
 I korero ano a Ihowa ki a Mohi, i mea, <sup>2</sup> Whakahaua nga tama a Iharaira, mea atu ki a ratou,  
 E tae koutou ki te whenua o Kanaana; ko te whenua tenei e riro i a koutou hei kainga tupu, ara te  
 whenua o Kanaana, me ona rohe: <sup>3</sup> Na kei te koraha o Hini te taha ki a koutou whaka te tonga,  
 haere tonu i te rohe o Eroma; a hei rohe ki a koutou ki te tonga te pito rawa o te moana Tote, whaka  
<sup>4</sup>  
 te rawhiti: Na ka piko to koutou rohe i te tonga ki te pikitanga o Akarapimi, a whiti tonu ki Hini:  
<sup>5</sup>  
 na, ka rere i te tonga, a Kareheparenga, haere, a Hataaraara, whiti tonu atu ki Atamono: Na ka  
<sup>6</sup>  
 piko te rohe i Atamono, a te awa o Ihipa, a marere atu ki te moana. Na, ko te rohe ki te hauauru,  
<sup>7</sup>  
 ko te moana nui me tona rohe; ko to koutou rohe ki te hauauru tenei. A ko tenei to koutou rohe  
<sup>8</sup>  
 ki te raki: me whakatakoto e koutou i te moana nui ki Maunga Horo: Me whakatakoto ano hoki  
<sup>9</sup>  
 i Maunga Horo ki te haerenga atu ki Hamata; a kei Terara nga putanga atu o te rohe: A ka tae te  
 rohe ki Tipirono, a kei Hataaraenana ona putanga atu; ko te rohe tenei ki a koutou whaka te raki.  
<sup>10</sup>  
 Me whakatakoto ano to koutou rohe ki te rawhiti i Hataaraenana ki Hepama: <sup>11</sup> A ka haere te  
 rohe ki raro i Hepama ki Ripira, ki te taha ki te rawhiti o Aina; a ka haere tonu te rohe ki raro, a ka  
<sup>12</sup>  
 tae ki te taha o te moana o Kinereta whaka te rawhiti: A ka haere te rohe ki Horano, a kei te  
<sup>13</sup>  
 moana tote ona putanga: ko te whenua tenei mo koutou, me ona rohe a tawhio noa. Na ka  
 whakahau a Mohi i nga tama a Iharaira, ka mea, Ko te whenua tenei e rotarotatia hei kainga pumau

mo koutou, ko ta Ihowa i whakahau ai kia hoatu ki nga iwi e iwa, ki tetahi taanga hoki o tetahi iwi:  
14

Kua whiwhi hoki te iwi o nga tama a Reupena, nga whare o o ratou matua, me te iwi o nga tama a Kara, nga whare o o ratou matua; kua whiwhi ano tetahi taanga o te iwi o Manahi ki to ratou

15 wahi: Kua whiwhi nga iwi e rua me tetahi taanga o tetahi iwi ki to ratou wahi i tenei taha o Horano, e anga ana ki Heriko whaka te rawhiti, ki te putanga mai o te ra.

16 I korero ano a Ihowa ki a Mohi, i mea, 17 Ko nga ingoa enei o nga kaituwaha i te whenua mo koutou: ko Ereatara tohunga raua ko Hohua tama a Nunu. 18 Me tango ano tetahi rangatira o

19 tenei iwi, o tenei iwi, hei tuwha mo te whenua. A ko nga ingoa o aua tangata: ko Karepe tama a Iepune o te iwi o Hura. 20 A, ko to te iwi o nga tama a Himiona, ko Hemuere tama a Amihuru.

21 Ko to te iwi o Pineamine, ko Erirara tama a Kihirono. 22 Ko te rangatira hoki o te iwi o nga tama a Rana, ko Puki tama a Iokiri. 23 Ko te rangatira o nga tama a Hohepa, ara o te iwi o nga tama a

24 Manahi, ko Haniere tama a Epora. Ko te rangatira o te iwi o nga tama a Eparaima, ko Kemuere tama a Hipitana. 25 Ko te rangatira o te iwi o nga tama a Hepurona, ko Eritapana tama a Paranaka.

26 Ko te rangatira o te iwi o nga tama a Ihakara, ko Paratiere tama a Atana. 27 Ko te rangatira o te iwi o nga tama a Ahera, ko Ahihuru tama a Heromi. 28 Ko te rangatira o te iwi o nga tama a

29 Napatari, ko Perahere tama a Amihuru. Ko enei a Ihowa i whakahau ai hei tuwha i te kainga mo nga tama a Iharaira i te whenua o Kanaana.

## Chapter 35

1 I korero ano a Ihowa ki a Mohi i nga mania o Moapa, i te wahi o Horano, ki Heriko, i mea,

2 Whakahaua nga tama a Iharaira kia homai ki nga Riwaiti etahi pa o o ratou kainga ka riro nei i a ratou hei nohoanga; me hoatu ano ki nga Riwaiti nga wahi o waho o aua pa a tawhio noa. 3 A ko nga pa hei nohoanga mo ratou; ko nga wahi hoki o waho ake mo a ratou kararehe, mo o ratou

4 taonga, mo a ratou kirehe katoa. A, ko nga wahi o waho o nga pa, e hoatu e koutou ki nga Riwaiti, kia kotahi mano nga whatianga i te taiepa atu ano o te pa, a haere whakawaho a tawhio noa. 5 Me ruri ano e koutou i waho o te pa, i te taha ki te rawhiti kia rua mano whatianga, i te taha ki te tonga kia rua mano whatianga, i te taha ki te hauauru kia rua mano whatianga, i te taha hoki ki te raki kia

rua mano whatianga, a hei waenganui t e pa: ko nga wahi tenei mo ratou o waho i nga pa. <sup>6</sup> A kia  
 ono nga pa whakaora i roto i nga pa e hoatu e koutou ki nga Riwaiti; me hoatu hei rerenga atu mo  
 te kaiwhakamate: kia wha tekau ma rua hoki nga pa e tapiritia e koutou ki ena. <sup>7</sup> Ko nga pa katoa  
 e hoatu e koutou ki nga Riwaiti, kia wha tekau ma waru: era, me nga wahi o waho ake. <sup>8</sup> A hei roto  
 i te wahi tuturu o nga tama a Iharaira nga pa e hoatu e koutou; kia maha i roto i nga mea maha, kia  
 ouou hoki i roto i nga mea ouou, kia rite ki tona kainga e riro i a ia ona pa e hoatu e tera, e tera, ki  
 nga Riwaiti.  
<sup>9</sup> I korero ano a Ihowa ki a Mohi, i mea, <sup>10</sup> Korero ki nga tama a Iharaira, mea atu ki a ratou,  
<sup>11</sup> E whiti koutou i Horano ki te whenua o Kanaana; Na ka whakarite i etahi pa mo koutou hei pa  
 whakaora, hei rerenga atu mo te tangata whakamate, i whakamate nei i te tangata, otiia ehara i te  
 mea ata whakaaro. <sup>12</sup> A ka waiho e koutou hei pa whakaora kei mate i te kaitakitaki; kei mate te  
 tangata whakamate, kia tu ra ano ia ki te aroaro o te whakaminenga, kia whakawakia. <sup>13</sup> A kia ono  
 nga pa e waiho hei whakaora, o nga pa e hoatu nei e koutou. <sup>14</sup> Kia toru nga pa e hoatu e koutou  
 i tenei taha o Horano, kia toru hoki nga pa e hoatu e koutou i te whenua o Kanaana; me waiho hei  
 pa whakaora. <sup>15</sup> Hei whakaora enei pa e ono mo nga tama a Iharaira, mo te manene, mo te nohonoa  
 i roto i a koutou: hei rerenga atu mo nga tangata i mate ai tetahi, otiia ehara i te mea ata whakaaro.  
<sup>16</sup> Otiia ki te patu ia i a ia ki te mea rino, a ka mate, he kaikohuru ia: kia mate rawa te kaikohuru.  
<sup>17</sup> Ki te patu ano hoki ia i a ia ki te kohatu i whiua e ia kia mate rawa ai, a ka mate, he kaikohuru  
 ia: kia mate rawa te kaikohuru. <sup>18</sup> Ki te patu ranei ia i a ia ki te mea rakau a te ringa kia mate ai, a  
 ka mate, he kaikohuru ia: kia mate rawa te kaikohuru. <sup>19</sup> Ma te kaitakitaki toto ake ano e whakamate  
 te kaikohuru; e whakamate ia i a ia ina tutaki ki a ia. <sup>20</sup> Ki te mea he ngakau kino tona, a ka wero  
 ia i a ia; ki te whanga atu ranei ia, a ka epaina atu ia kia mate; <sup>21</sup> Ki te mauahara ranei ia, a ka patu  
 i a ia ki tona ringa e mate ai ia; kia mate rawa te kaipatu, he kaikohuru ia: e whakamatea te kaikohuru  
 e te kaitakitaki toto, ina tutaki ki a ia. <sup>22</sup> Tena ia, mehemea he oho noa ake tana wero i a ia, ehara  
 i te mea mauahara; ki te epaina ranei ia ki tetahi mea, a kihai i whakanga atu; <sup>23</sup> Ki te kohatu ranei,  
 ki te mea e mate ai, a kihai i kitea atu, na kua u ki a ia, a ka mate, kahore ano hoki ona mauahara  
 ki a ia, kihai ano hoki i rapu i te he mona; <sup>24</sup> Katahi ka whakarite te whakaminenga i ta te kaipatu,  
 i ta te kaitakitaki toto; kia rite ki enei ritenga: <sup>25</sup> A ka whakaorangia e te whakaminenga te  
 kaiwhakamate i roto i te ringa o te kaitakitaki toto, me whakahoki ano ia e te whakaminenga ki  
 tona pa whakaora, i rere atu ai ia: a ka noho ia ki reira a mate noa te tino tohunga i whakawahia ki

<sup>26</sup>  
 te hinu ta pu. Ki te puta kau atu te kawhakamate ki waho o te rohe o tona pa whakaora i rere atu  
<sup>27</sup>  
 nei ia; A ka pono ki a ia te kaitakitaki toto ki waho o te rohe o tona pa whakaora, a ka patua te  
<sup>28</sup>  
 kaiwhakamate e te kaitakitaki toto, e kore e whakairia he toto ki a ia: Me noho hoki ia i roto i  
 tona pa whakaora, kia mate ra ano te tino tohunga; a, muri iho i te matenga o te tino tohunga ka  
<sup>29</sup>  
 hoki te kaiwhakamate ki tona whenua tupu. Na hei tikanga whakawa enei ma koutou, i o koutou  
<sup>30</sup>  
 whakatupuranga, i o koutou nohoanga katoa. Ki te patu tetahi i te tangata, ma te mangai o nga  
 kaiwhakaatu e whakamatea ai te kaikohuru: kaua ano te kaiwhakaatu kotahi e whakatau he ki tetahi,  
<sup>31</sup>  
 e mate ai. Kaua ano hoki e tangohia he utu mo te kaikohuru kia ora, ki te mea he hara tona e  
<sup>32</sup>  
 mate ai: engari kia mate rawa ia. Kaua ano e tango utu mo te tangata i rere ki tona pa whakaora,  
<sup>33</sup>  
 kia hoki ai ia ki te whenua noho ai; kia mate ra ano te tohunga. Kia kore ai e whakapokea e  
 koutou te whenua kei reira nei koutou: ma nga toto hoki e poke ai te whenua: heoi ano hoki te mea  
<sup>34</sup>  
 hei pure i nga toto i whakaheke ki te whenua, ko nga toto o te kaiwhakaheke. Kaua e whakapokea  
 te whenua e noho ai koutou, e noho ai ahau: no te mea e noho ana ahau, a Ihowa, i waenganui i  
 nga tama a Iharaira.

## Chapter 36

<sup>1</sup>  
 Na ka whakatata nga ariki o nga whare o nga matua o nga hapu o nga tama a Kireara tama a  
 Makiri, tama a Manahi, no nga hapu o nga tama a Hohepa, ka korero ki te aroaro o Mohi, ki te  
<sup>2</sup>  
 aroaro ano o nga rangatira, o nga ariki o nga whare o nga matua o nga tama a Iharaira: Ka mea,  
 I whakahau a Ihowa i toku ariki kia hoatu te whenua hei kainga tupu mo nga tama a Iharaira, he  
 mea rota: i whakahau ano toku ariki e Ihowa kia hoatu te wahi o Teropehara, o to matou teina ki  
<sup>3</sup>  
 ana tamahine. Na ki te marenatia ratou ki etahi atu o nga tama o era iwi o nga tama a Iharaira, na  
 ka titorehia to ratou wahi i te wahi o o matou matua, a ka tapiritia ki te wahi o te iwi e riro atu ai  
<sup>4</sup>  
 ratou, a ka titorehia i te wahi i meatia hei kainga tupu mo matou. A, i te takanga hoki o te tiupiri  
 a nga tama a Iharaira, na ka tapiritia atu to ratou wahi ki te wahi o te iwi e riro atu ai ratou, a ka  
 titorehia to ratou kainga i te kainga o te iwi o o matou matua.  
<sup>5</sup>  
 Na ka whakahau a Mohi ki nga tama a Iharaira, he mea ki mai na Ihowa, a ka mea, He tika  
<sup>6</sup>  
 nga kupu a te iwi o nga tama a Hohepa. Ko ta Ihowa tenei i whakahau ai mo nga tamahine a  
 Teropehara; e mea ana, Me marena ratou ki a ratou e pai ai; otia me marena ki te hapu o te iwi o



<sup>7</sup>  
 to ratou papa. A e kore e riro ke te kainga tupu o tetahi iwi i tetahi iwi atu i roto i nga tama a  
<sup>8</sup>  
 Iharaira: ka whai hoki nga tama a Iharaira, tera, tera, ki te kainga o te iwi o o ratou matua. Me  
 marena ano nga tamahine katoa, i a ratou nei tetahi kainga o tetahi o nga iwi o nga tama a Iharaira,  
 ki tetahi o te hapu o te iwi o o ratou papa; kia mau ai te kainga tupu o ona matua i tenei, i tenei, o  
<sup>9</sup>  
 nga tama a Iharaira. Kei riro ke hoki te kainga tupu o tetahi iwi i tetahi atu iwi; engari me whai  
<sup>10</sup>  
 nga iwi o nga tama a Iharaira, ia tangata, ia tangata, ki o ratou kainga ake. Rite tonu ki ta Ihowa  
<sup>11</sup>  
 i whakahau ai ki a Mohi, i pera ta nga tamahine a Teropehara: Ka riro hoki a Mahara, a Tiritā,  
 a Hokora, a Mirika, a Noa, nga tamahine a Teropehara, hei wahine ma nga tama a nga teina o to  
<sup>12</sup>  
 ratou papa. I marenatia hoki ki nga hapu o nga tama a Manahi, tama a Hohepa, a i mau to ratou  
<sup>13</sup>  
 kainga tupu ki te iwi o te hapu o to ratou papa. Ko nga whakahau enei me nga whakaritenga a  
 Ihowa i whakahaua e Mohi ki nga tama a Iharaira i nga mania o Moapa i te wahi o Horano, ki  
 Heriko.

## Deuteronomy

### Chapter 1

<sup>1</sup>  
 Ko nga kupu enei i korero ai a Mohi ki a Iharaira katoa i tenei taha o Horano, i te koraha, i  
 te mania, i te ritenga atu o Tupu, i waenganui o Parana, o Topera, o Rapana, o Hateroto, o Rihahapa.  
<sup>2</sup>  
 Kia kotahi tekau ma tahi nga ra e haere atu ana i Horepa, ki te tika na maunga Heira, ka tae ai ki  
<sup>3</sup>  
 Kareheparena. No te wha tekau o nga tau, no te tekau ma tahi o nga marama, no te ra tuatahi o  
 te marama, ka korerotia e Mohi ki nga tama a Iharaira nga mea katoa i ako ai a Ihowa ki a ia mo  
<sup>4</sup>  
 ratou; I muri i tana patunga i a Hihona kingi o nga Amori, i noho ra i Hehepona, i a Oka hoki  
<sup>5</sup>  
 kingi o Pahana, i noho ra i Ahataroto, i Eterei. I timata a Mohi i tenei taha o Horano, i te whenua  
<sup>6</sup>  
 o Moapa, te kauwhau i tenei ture: i mea ia, I korero mai a Ihowa, to tatou Atua, ki a tatou i Horepa,  
<sup>7</sup>  
 i mea, Ka roa to koutou noho ki tenei maunga: Anga atu, hapainga atu, haere ki te maunga o nga  
 Amori, ki nga wahi katoa hoki e tata ana ki reira, o te mania, o nga pukepuke, o te raorao, o te  
 tonga, o te tahatika ano o te moana, ki te whenua o nga Kanaani, ki Repanona, ki te awa nui ano,  
<sup>8</sup>  
 ki te awa, ki Uparati. Nana, kua tukua atu nei e ahau te whenua ki to koutou aroaro: haere ki roto,

tangohia te whenua i oati ai a Ihowa ki o koutou matua, ki a Aperahama, ki a Ihaka, ki a Hakopa kia hoatu mo ratou, mo to ratou uri hoki i muri i a ratou.

9

I korero ano ahau ki a koutou i taua wa, i mea, E kore e ahei ko ahau anake hei pikau i a

10

koutou: Kua whakanui a Ihowa, to koutou Atua, i a koutou, a tenei koutou te rite nei inaianei

11

ki nga whetu o te rangi te tini. Ma Ihowa, ma te Atua o o koutou matua, e tapiri ano a muri i a koutou ki nga mano tini atu i a koutou e noho nei, mana koutou e manaaki, e pera ano me tana i

12

korero ai ki a koutou! Me pehea e taea ai e ahau anake ta koutou whakararu, to koutou

13

whakataimaha, me ta koutou ngangau? Whakaritea mai e koutou etahi tangata tupato, whai

14

whakaaro, e mohiotia ana e o koutou iwi, a maku ratou e mea hei upoko mo koutou. Na ka utu

15

koutou ki ahau, ka mea, He mea pai tau e ki mai na kia meatia. Na ka tango ahau i nga upoko o o koutou iwi, i nga mea whakaaro, e mohiotia ana, a meatia iho ratou e ahau hei upoko mo koutou, hei rangatira mo nga mano, hei rangatira mo nga rau, hei rangatira mo nga rima tekau, hei rangatira

16

mo nga tekau, hei kaiwhakahauhau hoki mo o koutou iwi. I ki ano ahau i taua wa ki o koutou kaiwhakawa, i mea, Whakarangona nga kupu a o koutou teina, a tetahi, a tetahi, kia tika te whakawa

17

mo te tangata, mo tona teina, mo te tangata ke hoki e noho ana i a ia. Kei whakaaro ki te kanohi ina whakawa, kia rite ta koutou whakarongo ki te iti, ki te rahi; kei wehi koutou i te kanohi tangata; no te mea na te Atua te whakawa; a, ko te mea e ngaro ana i a koutou, ka kawe mai ki ahau, a maku

18

e whakarongo. A whakahaua ana e ahau i reira nga mea katoa e mahi ai koutou.

19

A ka turia mai e tatou i Horepa, na haerea katoatia ana e tatou taua koraha nui, e wehingia ana, i kite ra koutou i te ara o te whenua maunga o nga Amori; i pera me ta Ihowa, me ta to tatou

20

Atua, i ako mai ai ki a tatou; na ka tae atu ki Karehep arenea. Na ka mea ahau ki a koutou, Kua tae mai nei koutou ki te whenua maunga o nga Amori, ka homai nei e Ihowa, e to tatou Atua, ki a

21

tatou. Nana, ka tukua nei te whenua e Ihowa, e tou Atua, ki tou aroaro: haere ki runga, tangohia, kia rite ai ki ta Ihowa, ki ta te Atua o ou matua, i ki ai ki a koe; kaua e wehi, kaua hoki e pawera.

22

Na ka whakatata mai koutou katoa ki ahau, ka mea, Kia tonu tatou i etahi ki mua i a tatou, a ko ratou hei titiro i to tatou whenua, hei whakahoki mai i te korero ki a tatou, mo te huarahi e haere

23

ai tatou ki runga, mo nga pa hoki ka haere atu ne i tatou ki reira. A i pai ano taua kupu ki ahau: na ka tango ahau i etahi tangata kotahi tekau ma rua i roto i a koutou, tataki kotahi o tenei iwi, o

24

tenei iwi. A ka tahuri ratou, ka piki ki te maunga, a ka tae ki te awaawa o Ehekora, ka tiroiro

25

hoki a taua wahi. A ka tango ratou i etahi o nga hua o te whenua ki o ratou ringa, a maua ana ki raro, ki a tatou, i whakahoki ake ano ratou i te kupu ki a tatou, i mea, He pai te whenua ka homai

nei e Ihowa, e to tatou Atua, ki a tatou. <sup>26</sup> Heoi kihai koutou i pai ki te haere ki runga; na ka tutu  
 ki te kupu a Ihowa, a to koutou Atua: <sup>27</sup> A amuamu ana i roto i o koutou teneti, mea ana, He kino  
 no Ihowa ki a tatou i whakaputaina mai ai tatou e ia i te whenua o Ihipa, kia hoatu ai tatou ki te  
 ringa o nga Amori, kia huna ai tatou. <sup>28</sup> Kia haere tatou ki runga ki hea? kua ngohe nei hoki o tatou  
 ngakau i ta o tatou tuakana, e mea ra, He nunui te iwi, he roroa i a tatou; ko nga pa he nui, taiepa  
 rawa a tutuki noa ki te rangi: i kite ano hoki matou i nga tama a nga Anakimi ki rei ra. <sup>29</sup> Na ka  
 mea ahau ki a koutou, Kei pawera, kei wehi i a ratou. <sup>30</sup> Ko Ihowa, ko to koutou Atua, te haere  
 nei i mua i a koutou, mana ta koutou pakanga; ka rite ki nga mea katoa i mea ai ia mo koutou ki to  
 koutou aroaro i Ihipa; <sup>31</sup> I te koraha ano, i kite ra koe i reira i ta Ihowa, i ta tou Atua wahanga i a  
 koe, ano he tangata e waha ana i tana tamaiti, i te ara katoa i haere na koutou, a tae noa mai ki tenei  
 wahi. <sup>32</sup> I tenei mea ano, kihai koutou i whakapono ki a Ihowa, ki to koutou Atua, <sup>33</sup> I haere ra i  
 mua i a koutou i te ara, hei whakataki i tetahi wahi mo koutou, e tu ai o koutou teneti, i te po i roto  
 i te ahi, hei whakaatu ki a koutou i te ara e haere ai koutou, a i roto i te kapua i te awatea. <sup>34</sup> A ka  
 rongo a Ihowa i o koutou reo e korero ana, na ka riri, ka oati, ka mea, <sup>35</sup> E kore rawa tetahi o enei  
 tangata o tenei whakatupuranga kino e kite i taua whenua pai i oati ai ahau kia hoatu ki o koutou  
 matua, <sup>36</sup> Heoi ano ko Karepe, ko te tama a Iepune, e kite ia; a ka hoatu e ahau ki a ia, ki ana tama  
 hoki, te whenua i haerea e ia, mona i tino whai a Ihowa. <sup>37</sup> A i riri ano a Ihowa ki ahau, mo koutou  
 hoki, i mea mai, E kore ano kore e tae ki reira. <sup>38</sup> Ko Hohua, ko te tama a Nunu, e tu ana i tou  
 aroaro, e tae ia ki reira: whakatenatenangia ia; ta te mea mana a Iharaira e whakawhiwhi ki tera  
 wahi. <sup>39</sup> Na, ko a koutou potiki, i mea na koutou ka waiho hei parau, me a koutou tama kihai nei  
 i mohio i taua ra ki te pai, ki te kino, e tae ratou ki reira, ka hoatu ano e ahau a reira ki a ratou, a e  
 whiwhi ratou ki tera whenua. <sup>40</sup> Ko koutou ia, tahuri atu, haere ki te koraha, na te huarahi ki te  
 Moana Whero. <sup>41</sup> Na ka utu koutou, ka mea mai ki ahau, Kua hara matou ki a Ihowa; ka haere  
 matou ki runga, ki te whawhai, kia rite ai nga mea katoa i whakahau mai ai a Ihowa, to tatou Atua,  
 ki a tatou. A whitikiria ano e koutou, e tera, e tera, ana mea mo te riri, na ka mea koutou ki te piki  
 ki te maunga. <sup>42</sup> Katahi ka mea a Ihowa ki ahau, Mea atu ki a ratou, Kaua e haere, kaua ano e tu  
 ki te riri; kahore hoki ahau i roto i a koutou; kei patua ki te aroaro o o koutou hoariri. <sup>43</sup> Na ka  
 korero ahau ki a koutou; a kihai koutou i rongo, heoi, ka tutu koutou ki te kupu a Ihowa, na hikaka  
 ana koutou, piki ana ki te maunga. <sup>44</sup> Na ka puta nga Amori, e noho ana i taua maunga, ki te tu i  
 a koutou, a whai ana i a koutou, ano he pi, patua iho koutou i Heira, a taea noatia a Horema. <sup>45</sup> Na

ka hoki koutou, ka tangi ki te aroaro o Ihowa; otiia kihai a Ihowa i whakarongo ki to koutou reo, kihai ano i anga tona taringa ki a koutou. <sup>46</sup> Na ka noho koutou ki Karehe, a maha noa nga ra, nga ra hoki i noho ai koutou.

## Chapter 2

<sup>1</sup> Na ka tahuri tatou, ka haere ki te koraha na te ara ki te Moana Whero; i pera ano me ta Ihowa i ki mai ai ki ahau: a he maha nga ra i taiawhiohia ai e tatou a Maunga Heira. <sup>2</sup> Na ka korero a Ihowa ki ahau, ka mea, <sup>3</sup> Ka roa nei ta koutou taiawhio i tenei maunga: tahuri whaka te raki. <sup>4</sup> Whakahau hoki ki te iwi, mea atu, Ka haere nei koutou na nga rohe o o koutou tuakana, o nga tama a Ehau, e noho ana i Heira; a ka wehi ratou i a koutou: na kia tupato i a koutou: <sup>5</sup> Kaua e whakapataritari i a ratou; e kore hoki e hoatu e ahau ki a koutou tetahi wahi o to ratou whenua, ahakoa takahanga mo te kapu o te waewae, no te mea kua hoatu e ahau a Maunga Heira ki a Ehau hei kainga tupu. <sup>6</sup> Hokona he kai i a ratou ki te moni, ka kai ai koutou; ko te wai hoki me hoki e koutou i a ratou ki te moni, ka inu ai. <sup>7</sup> He mea hoki kua manaaki a Ihowa, tou Atua, i a koe i nga mahi katoa a tou ringa; e mohio ana ia ki tou haerenga i tenei koraha nui: i tou taha a Ihowa, tou Atua, i enei tau e wha tekau; a kahore koe i hapa i tetahi mea. <sup>8</sup> A ka pahemo i a tatou o tatou tuakana, nga tama a Ehau, e noho ana i Heira, i te ara i te mania o Erata, o Ehiono Kepere, na ka tahuri tatou, ka haere na te huarahi i te koraha o Moapa. <sup>9</sup> A ka mea a Ihowa ki ahau, Kei whawhai koe ki nga Moapi, kaua ano e whakatari pakanga ki a ratou; ta te mea e kore e hoatu e ahau tetahi wahi o tona whenua hei kainga mou, no te mea kua hoatu a Ara e ahau hei kainga mo nga tama a Rota. <sup>10</sup> I noho nga Emime ki reira i mua, he nui, he tini, he roroa tena iwi, rite tahi ano ki nga Anakimi: <sup>11</sup> I korerotia hoki ratou he roroa, he pera me nga Anakimi; na nga Moapi ia ratou i hua he Emime. <sup>12</sup> I noho hoki nga Hori ki Heira i mua; a, muri iho i a ratou, ko nga tama a Ehau, na ratou hoki te hunanga i era i o ratou aroaro, a noho iho ana ki to ratou wahi, rite tahi ta ratou ki ta Iharaira i mea ai ki te whenua i riro mai i a ia, i homai nei e Ihowa ki a ratou. <sup>13</sup> Tena, whakatika, whiti atu i te awa, i Terete: na ka whiti mai tatou i te awa, i Terete. <sup>14</sup> A ko nga ra i haere mai ai tatou i Kareheparenea, a tae noa ki to tatou whitinga mai i te awa, i Terete, e toru tekau ma waru nga tau, no ka poto atu i roto i te ope te whakapaparanga katoa o nga tangata hapai patu; te pera me ta Ihowa i oati ai ki a ratou. <sup>15</sup> I runga ano hoki i a ratou te ringa o Ihowa e whakamate ana i a ratou i te puni a poto noa ratou. <sup>16</sup> A ka poto katoa nga tangata hapai patu te

<sup>17</sup> mate atu i roto i te iwi. Na ka korero a Ihowa ki ahau, ka mea, <sup>18</sup> Hei tenei ra koe haere ai ma  
<sup>19</sup> Ara, ma te rohe o Moapa. A, e tata atu koe ki te ritenga atu o nga tama a Amona, kaua e whawhai  
 ki a ratou, kaua ano hoki e whakatari pakanga ki a ratou: e kore hoki e hoatu e ahau tetahi wahi o  
 te whenua o nga tama a Amona hei kainga mou, no te mea kua hoatu e ahau hei kainga mo nga  
<sup>20</sup> tama a Rota. I korerotia hoki tera he whenua tangata roroa; i noho hoki nga tangata roroa ki  
<sup>21</sup> reira i mua, a huaina iho ratou e nga Amoni he Hamahumi. He nui, he maha, he roroa taua iwi,  
 rite tahi ki nga Anakimi; na Ihowa ia ratou i huna i to ratou aroaro; a riro ana to ratou kainga i a  
<sup>22</sup> ratou, a noho tonu iho i muri i a ratou; Pera me tana i mea ai ki nga tama a Ehau, e noho ra i  
 Heira, i tana hunanga i nga Hori i to ratou aroaro; na riro ana i a ratou to ratou kainga, a noho tonu  
<sup>23</sup> iho ratou i muri i a ratou a mohoa noa nei. Na, ko nga Awimi, i noho ra ki nga pa a puta noa ki  
 Kaha, na nga Kapatorimi i haere mai ra i Kapatora ratou i huna, a noho iho i muri i a ratou.  
<sup>24</sup> Whakatika, haere, whiti atu i te awa i Aranona; na kua hoatu e ahau ki tou ringa a Hihona  
<sup>25</sup> kingi o Hehepona, te Amori me tona whenua: anga atu, tangohia, e riri i ta korua riri. Kei tenei  
 ra ahau timata ai te whakapa i tou pawera, i tou wehi ki nga iwi i raro i te rangi, puta noa, puta noa,  
<sup>26</sup> ina rongu ki tou rongu, a ka wiri ratou, ka aue i a koe. Na tukua atu ana e ahau nga karere i te  
<sup>27</sup> koraha, i Keremota, ki a Hihona kingi o Hehepona; mo te ata noho nga kupu, a ka mea atu, Kia  
 haere atu ahau na tou whenua; ka haere ahau na te huanui; e kore ahau e peka ki matau, ki mau.  
<sup>28</sup> Mau e homai he kai maku hei utu mo te moni, ka kai ai ahau; e homai hoki he wai moku mo te  
<sup>29</sup> moni, ka inu ai ahau; heoi ano ko te haere kau a oku waewae; Kia rite ki ta nga tama a Ehau e  
 noho ana i Heira i mea ai ki ahau, me ta nga Moapi hoki e noho ra i Ara; kia whiti atu ra ano ahau  
<sup>30</sup> i Horano ki te whenua i homai e Ihowa, e to matou Atua, ki a matou. Heoi kihai a Hihona kingi  
 o Hehepona i pai kia haere atu tatou na tona kainga: na Ihowa hoki, na tou Atua i whakapakeke  
 tona wairua, i whakamaia hoki tona ngakau, kia homai ai ia ki tou ringa; koia ano tenei inaianei.  
<sup>31</sup> Na ka mea a Ihowa ki ahau, Titiro, kua timata ahau te tuku ki tou aroaro i a Hihona, i tona whenua:  
<sup>32</sup> anga atu, tangohia tona whenua hei kainga. Na ka puta mai a Hihona ki te tu i a tatou, ki te  
<sup>33</sup> whawhai hoki i Iahata, a ia me tona iwi katoa. A homai ana ia e Ihowa, e to tatou Atua, ki to  
<sup>34</sup> tatou aroaro; na patua ana ia e tatou, me ana tama, me tona iwi katoa. A horo ana i a tatou ona  
 pa katoa i taua wa ano, huna iho ana hoki nga tangata o nga pa katoa, me nga wahine, me nga potiki,  
<sup>35</sup> kihai tetahi morehu i mahue i a tatou. Ko nga kararehe ia i tangohia ma tatou, me nga taonga  
<sup>36</sup> hoki o nga pa i horo i a tatou. O Aroera atu ano, i te taha o te awa o Aranona, me te pa hoki i te

awa, a paku noa ki Kireara, kahore tetahi pa i maia i a tatou: homai katoa ana e Ihowa, e to tatou  
<sup>37</sup>  
 Atua, ki a tatou. Heoi ano ko te whenua o nga tama a Amona kihai i taea atu e koe, me nga wahi  
 katoa o te awa, o Iapoko, me nga pa o nga maunga, me nga wahi katoa i kiia mai e Ihowa, e to tatou  
 Atua.

### Chapter 3

<sup>1</sup> Katahi tatou ka tahuri, ka haere ki runga na te huarahi ki Pahana: na ka puta mai a Oka kingi  
 o Pahana ki te tu i a tatou, a ia me tona iwi katoa, ki Etere whawhai ai. <sup>2</sup> A ka mea a Ihowa ki  
 ahau, Kei wehi i a ia: ta te mea kua hoatu ia e ahau ki tou ringa, me tona iwi katoa, me tona oneone;  
 a ka rite tau meatanga ki a ia ki tau i mea ai ki a Hihona, ki te kingi o nga Amori, i noho ra i  
<sup>3</sup>  
 Hehepona. Na homai ana e Ihowa, e to tatou Atua, ki to tatou ringa a Oka hoki, te kingi o Pahana  
 me tona iwi katoa; a patua ana ia e tatou, a kahore tetahi morehu ona i mahue. <sup>4</sup> Na ka horo i a  
 tatou i taua wa ano ona pa katoa, kahore he pai i kore te tangohia e tatou i a ratou, e ono tekau nga  
<sup>5</sup>  
 pa, ko nga wahi katoa o Arakopa, o te rangatiratanga o Oka i Pahana. Ko enei pa katoa hanga  
<sup>6</sup>  
 rawa ki nga taiepa teitei, ki nga tatu, ki nga tutaki; haunga nga kainga noho koraha, tona tini. I  
 huna katoatia enei e tatou, i peratia me ta tatou i mea ai ki a Hihona, ki te kingi o Hehepona, huna  
<sup>7</sup>  
 iho nga tangata o nga pa katoa, me nga wahine, me nga tamariki. Ko nga kararehe ia, me nga  
<sup>8</sup>  
 taonga o nga pa, i tangohia ma tatou. Na i taua wa ano ka tangohia e tatou i te ringa o nga kingi  
 tokorua o nga Amori te whenua i tenei taha o Horano, o te awa, o Aranona atu a tae noa ki Maunga  
<sup>9</sup>  
 Heremona; Ko Heremona i huaina e nga Haironi ko Hiriona; na nga Amori ia i hua ko Heniri;  
<sup>10</sup>  
 Ko nga pa katoa o te mania, me Kireara katoa, me Pahana katoa, a tae noa ki Hareka, ki Etere,  
<sup>11</sup>  
 nga pa hoki o te rangatiratanga o Oka i Pahana. Ko Oka anake hoki, ko te kingi o Pahana, i  
 mahue, he morehu no nga tangata roroa. Na ko tona moenga he moenga rino; kahore iana i Rapata,  
 i nga tama a Amona? e iwa whatianga te roa, e wha hoki whatianga te whanui, ki to te tangata  
 whatianga.  
<sup>12</sup>  
 A ko tenei whenua i riro mai na i a tatou i taua wa, i Aroera atu, i tera i te awa, i Aranona,  
 me tetahi taha o te whenua maunga o Kireara, me ona pa, i hoatu e ahau ki nga Reupeni ratou ko  
<sup>13</sup>  
 nga Kari. A, ko te wahi o Kireara i mahue me Pahana katoa, te rangatiratanga o Oka, i hoatu e  
 ahau ki tetahi taanga o te hapu o Manahi; ko nga wahi katoa o Arakopa me Pahana katoa e kiia nei  
<sup>14</sup>  
 ko te whenua o nga tangata roroa. Na Haira tama a Manahi i tango te whenua katoa o Arakopa,

a tae noa ki nga rohe o Kehuri, o Maakati; a huaina iho te ingoa ki tona, ko Pahana Hawotohaira,  
<sup>15</sup> a tenei ano inaianei. A tukua atu ana e ahau a Kireara mo Makiri. <sup>16</sup> I tukua e ahau ki nga  
 Reupeni ratou ko nga Kari te wahi i Kireara a tae noa ki te awa, ki Aranona, ki waenganui o te awa  
<sup>17</sup> me te rohe ano, a tae noa ki te awa, ki Iapoko, ko te rohe ia ki nga tama a Amona. Me te mania  
 hoki, me Horano, me tona rohe, e takoto atu ana i Kinereta, taea noatia te moana i te mania, te  
<sup>18</sup> Moana Tote, i raro i Ahatotopihika, whaka te rawhiti. A i whakahau ahau i a koutou i taua wa,  
 i mea, Kua homai e Ihowa e to koutou Atua tenei whenua kia nohoia: haere, e nga maia katoa, me  
<sup>19</sup> a koutou patu i mua i o koutou tuakana, i nga tama a Iharaira. Ko a koutou wahine ia me a koutou  
 potiki me a koutou kararehe, e mohio ana hoki ahau he tini a koutou kararehe, me noho ki o koutou  
<sup>20</sup> pa i hoatu e ahau ki a koutou; Kia meinga ra ano e Ihowa o koutou tuakana kia okioki, kia penatia  
 me koutou na, kia whiwhi ano ratou ki te whenua ka homai nei e Ihowa, e to koutou Atua, ki a  
 ratou i tawahi o Horano: katahi koutou ka hoki, tera, tera, ki tona kainga i hoatu e ahau ki a koutou.  
<sup>21</sup> A i whakahau ano ahau i a Hohua i taua wa, i mea, Kua kite ou kanohi i nga mea katoa i  
 mea ai a Ihowa, to koutou Atua, ki enei kingi tokorua: ka penatia e Ihowa nga rangatiratanga katoa  
<sup>22</sup> ka whiti atu nei koe ki reira. Kei wehi koutou i a ratou: na te mea, ma Ihowa, ma to koutou Atua,  
<sup>23</sup> ta koutou whawhai. I inoi ano ahau i taua wa ki a Ihowa, i mea, <sup>24</sup> E te Ariki, e Ihowa, kua  
 timata nei koe te whakakite ki tau pononga i tou nui, i tou ringa kaha: ko wai hoki te Atua i te rangi,  
<sup>25</sup> i te whenua ranei, e pena ana te mahi me au mahi, he rite ranei ki a koe te kaha? Tena ra, kia  
 whiti atu ahau kia kite i tena whenua pai i tawahi o Horano, i tena maunga pai, i Repanona ano  
<sup>26</sup> hoki. Otiia i riri mai a Ihowa ki ahau, mo ta koutou hoki, kahore ano hoki i rongu ki ahau: na  
<sup>27</sup> ka mea mai a Ihowa ki ahau, Kati ra tau; kaua e korero mai ano ki ahau i tenei mea. Piki atu ki  
 te tihi o Pihika, ka anga ai ou kanohi whaka te hauauru, whaka te raki, whaka te tonga, whaka te  
<sup>28</sup> rawhiti, a ma ou kanohi e titiro atu; ta te mea e kore koe e whiti i tenei Horano. Engari whakahaua  
 a Hohua, whakatenatenangia hoki, whakamaia: ta te mea ko ia te haere atu i te aroaro o tenei  
<sup>29</sup> iwi, mana ratou e whakawhiwhi ki te whenua e kite ai koe. Na ka noho tatou ki te raorao i te  
 ritenga atu o Petepeoro.

## Chapter 4

<sup>1</sup> Na, whakarongo mai ra inaianei, e Iharaira, ki nga tikanga, ki nga whakaritenga e whakaako  
 atu nei ahau ki a koutou kia mahia; kia ora ai koutou, kia tae atu ai, kia noho ai hoki ki te whenua

e homai nei e Ihowa, e te Atua o o koutou matua, ki a koutou. <sup>2</sup> Ko te kupu, e whakahaua atu nei e ahau ki a koutou, kua e tapiritia ki etahi atu, kua ano e kinitia atu tetahi wahi ona; kia rite ai i a koutou nga whakahau a Ihowa, a to koutou Atua, e whakahaua nei e ahau ki a koutou. <sup>3</sup> Kua kite o koutou kanohi i ta Ihowa i mea ai mo Paarapeoro: ko nga tangata katoa hoki i whai i a Paarapeoro whakamatea rawatia iho ratou e Ihowa, e to koutou Atua, i roto i a koutou. <sup>4</sup> Ko koutou ia, i awhi ra ki a Ihowa, ki to koutou Atua, e ora katoa ana i tenei ra. <sup>5</sup> Titiro, kua whakaako ahau i a koutou ki nga tikanga, ki nga whakaritenga, ki a Ihowa, ki a toku Atua i ako ai ki ahau, hei mahi ma koutou i waenganui o te whenua e haere atu nei koutou ki reira ki te tango. <sup>6</sup> Na puritia, mahia: ko to koutou whakaaro nui hoki ia, me to koutou mohio ki te titiro mai a nga tauwiwi, a nga mea e rongou ana ki enei tikanga katoa, a ka mea ratou, Koia hoki, he hunga mohio, he hunga tupato tenei iwi nui. <sup>7</sup> Ko wai hoki te iwi nui, e whiwhi ana ki te atua penei te tata ki a ratou me Ihowa, me to tatou Atua, e tata mai nei i a tatou karangaranga katoa ki a ia? <sup>8</sup> Ko wai hoki te iwi nui, i a ia nei nga tikanga me nga whakaritenga tika, penei me tenei ture katoa e hoatu nei e ahau ki to koutou aroaro i tenei ra? <sup>9</sup> Mau ia koe e tiaki, me tiaki marie ano tou wairua, kei wareware ki nga mea i kite ai ou kanohi, kei riro atu hoki i roto i tou ngakau, i nga ra katoa e ora ai koe; engari me whakaako au tama, me nga tama hoki a au tama ki ena mea; <sup>10</sup> Ki te ra ano hoki i tu ai koe i te aroaro o Ihowa, o tou Atua, i Horepa, i ta Ihowa meatanga mai ki ahau, Huihuia mai te iwi ki ahau, a maku e mea kia rongou ratou i aku korero, kia whakaakona ai kia wehi i ahau i nga ra katoa e ora ai ratou i ru nga i te whenua, hei whakaako atu ma ratou ki a ratou tama. <sup>11</sup> Na ka whakatata koutou, ka tu hoki i raro iho o te maunga; ko te maunga hoki ka tonu i te ahi, a kakati noa ki waenganui o te rangi, te pouri! te kapua! na, pouri kerekere. <sup>12</sup> Na ka korero mai a Ihowa ki a koutou i waenganui o te ahi: ko te puakanga mai o nga kupu ta koutou i rongou ai, tena ko tetahi ahau kihai i kitea; heoi ano ko te reo kau. <sup>13</sup> Na ka kauwhautia e ia ki a koutou tana kawenata, i whakahaua e ia ki a koutou kia whakaritea, ara nga ture kotahi tekau, a tuhituhia iho e ia ki nga papa kohatu e rua. <sup>14</sup> I whakahau ano a Ihowa i ahau i taua wa, kia whakaakona koutou ki nga tikanga, ki nga whakaritenga, hei mahi ma koutou ki te whenua e haere atu nei koutou ki reira ki te tango. <sup>15</sup> Tiakina marietia ra o koutou wairua; kihai hoki koutou i kite i tetahi ahua, me he aha, me he aha, i te ra i korero ai a Ihowa ki a koutou i Horepa, i waenganui o te ahi; <sup>16</sup> Kei he koutou, kei hanga i te whakapakoko ma koutou, i te ritenga o tetahi tauira, i te ahua o te tane, o te wahine ranei; <sup>17</sup> I te ahua o tetahi kararehe o te whenua, i te ahua o tetahi manu whai parirau e rererere ana i te rangi, <sup>18</sup> I te ahua o tetahi mea e



ngokingoki ana i te whenua, i te ahua o tetahi ika i roto i te wai i raro iho o te whenua: <sup>19</sup> Kei anga  
 ake ranei ou kanohi ki te rangi, ka kite i te ra, i te marama ranei, i nga whetu, i te ope katoa o te  
 rangi, na ka takina atu koe ki te koropiko atu ki ena mea, ki te mahi atu hoki ki ena mea, i tuwhaina  
 mai nei e Ihowa, e tou Atua, mo nga iwi katoa i raro o te rangi, puta noa, puta noa. <sup>20</sup> Na Ihowa  
 ia koutou i tango, nana hoki koutou i whakaputa mai i roto i te oumu rino, i Ihipa, kia waiho ai hei  
 iwi tupu mana, me koutou inaianei. <sup>21</sup> I riri mai ano a Ihowa ki ahau mo ta koutou hoki, a oati mai  
 ana e kore ahau e whiti i Horano, e kore ano e tae ki te whenua pai, ka homai nei e Ihowa, e tou  
 Atua, ki a koe hei kainga tupu. <sup>22</sup> Engari ka mate ahau ki tenei whenua, e kore ahau nei e whiti i  
 Horano: ko koutou ia ka whiti, ka tango hoki i taua whenua pai. <sup>23</sup> Kia tupato, kei wareware ki te  
 kawenata a Ihowa, a to koutou Atua, i whakaritea e ia ki a koutou, kei hanga hoki he whakapakoko  
 ma koutou ki te ritenga o tetahi mea i riria mai nei koe e Ihowa, e tou Atua. <sup>24</sup> Ko Ihowa hoki, ko  
 tou Atua, he ahi e ki ana, he Atua hae ia. <sup>25</sup> E whanau au tamariki me nga tamariki a au tamariki,  
 a ka roa to koutou noho ki te whenua, a ka taka koutou, ka hanga hoki i te whakapakoko ki te ahua  
 o tetahi mea, a ka mahi i te mea e kino ana ki te titiro a Ihowa, a tou Atua, hei whakapatarita ri i a  
 ia: <sup>26</sup> Ka waiho e ahau i tenei ra te rangi me te whenua hei kaititiro mo koutou, mo te matenga hoki  
 e hohoro ai koutou te mate atu i te whenua e whiti atu nei koutou i Horano ki reira, ki te tango; e  
 kore e roa o koutou ra ki reira, engari ka tino ngar o rawa koutou. <sup>27</sup> A ka whakamarara a Ihowa  
 i a koutou ki nga tauwi, a he hunga torutoru o koutou e toe i roto i nga tauwi, e kawea atu ai koutou  
 e Ihowa ki reira. <sup>28</sup> A ka mahi koutou i reira ki nga atua i hanga e nga ringa tangata, ki te rakau,  
 ki te kohatu, e kore nei e kite, e kore e rongu, e kore e kai, e kore ano e hongu. <sup>29</sup> Otiia ki te rapu  
 koe i reira i a Ihowa, i tou Atua, na ka kitea e koe, ki te whakapaua katoatia tou ngakau me tou  
 wairua ki te rapu i a ia. <sup>30</sup> Ki te mate koe, a ka pono ki a koe enei mea katoa i nga ra a muri ake  
 nei, ka hoki koe ki a Ihowa, ki tou Atua, ka whakarongo ano hoki ki tona reo; <sup>31</sup> He atua tohu hoki  
 a Ihowa, tou Atua; e kore ia e whakarere i a koe, e kore ano hoki e whakangaro i a koe, e kore hoki  
 e wareware ki te kawenata ki ou matua, i oati ai ia ki a ratou. <sup>32</sup> Ui atu hoki ki nga rangi onamata,  
 o mua i a koe, o te ra i hanga ai e te Atua te tangata ki runga ki te whenua, i tetahi pito o te rangi  
 paku noa ki tetahi pito o te rangi, i puta mai ranei tetahi mea hei rite mo tenei mea te nui, i rangona  
 rane i he rite ki tenei? <sup>33</sup> I rongu ranei tetahi iwi i te reo o te Atua e korero mai ana i waenganui o  
 te ahi, me tau i rongu ai, a ora ake? <sup>34</sup> I whakamatau ranei te Atua te haere iho, te tango i tetahi  
 iwi mana i waenganui i tetahi iwi ke, i runga i nga whakamatau, i nga tohu, i nga merekara, i te  
 whawhai, i te ringaringa kaha, i te ringaringa maro, i nga whakawehi nui, i nga mea katoa i mea ai

a Ihowa, to koutou Atua ki a koutou, ki to koutou aroaro i Ihipa? <sup>35</sup> I whakakitea mai ai ena mea  
 ki a koe kia mohio ai koe ki a Ihowa, ko ia te Atua; kahore ke atu i a ia. <sup>36</sup> I meatia koe e ia kia  
 rongu ki tona reo i te rangi, hei whakaako i a koe: a i te whenua i whakakitea e ia tana ahi nui ki a  
 koe; ko ana kupu hoki i rangona e koe i waenganui i te ahi. <sup>37</sup> A, no te mea i aroha ia ki ou matua,  
 koia i whiriwhiria ai e ia o ratou uri i muri i a ratou, i whakaputaina mai ai hoki koe i Ihipa, me  
 tana titiro tonu iho, i runga ano i tona kaha nui; <sup>38</sup> I mea ai ki te pei i nga iwi he nui, he kaha i a  
 koe i tou aroaro, ki te kawae i a koe, ki te hoatu i to ratou oneone ki a koe hei kainga pumau; koia  
 tenei inaianei. <sup>39</sup> Na kia mohio koe i tenei ra, kia whakaaro hoki i roto i tou ngakau, ko Ihowa, ko  
 ia te Atua i te rangi i runga, i te whenua hoki i raro; kahore ke atu. <sup>40</sup> Na kia mau ki ana tikanga,  
 ki ana whakahau, e whakahaua nei e ahau i tenei ra ki a koe, hei pai hoki mou, mo au tama i muri  
 i a koe, kia roa ai ou ra ki te whenua ka hoatu nei e Ihowa, e tou Atua ki a koe a ake tonu atu.  
<sup>41</sup> Katahi a Mohi ka motuhake i nga pa e toru i tenei taha o Horano, whaka te rawhiti; <sup>42</sup> Hei  
 rerenga atu mo te tangata whakamate, i whakamate i tona hoa, otiia ehara i te mea ata whakaaro,  
 ehara hoki i te hoariri nona i mua; na ka rere ia ki tetahi o aua pa, a ka ora; <sup>43</sup> Ara i Pehere i te  
 koraha, i te whenua mania, mo nga Reupeni; i Ramoto i Kireara, mo nga Kari; i Korana i Pahana,  
 mo nga Manahi. <sup>44</sup> A, ko te ture tenei i hoatu e Mohi ki te aroaro o nga tama a Iharaira: <sup>45</sup> Ko nga  
 whakaaturanga ano enei, me nga tikanga, me nga whakaritenga i korerotia e Mohi ki nga tama a  
 Iharaira, i to ratou putanga mai i Ihipa, <sup>46</sup> I tenei taha o Horano, i te raorao i te ritenga atu o  
 Petepeoro, i te whenua o Hihona, o te kingi o nga Amori, i noho ra i Hehepona, i patua ra e Mohi  
 ratou ko nga tama a Iharaira, i to ratou putanga mai i Ihipa; <sup>47</sup> A tangohia ana tona whenua e ratou,  
 me te whenua hoki o Oka, o te kingi o Pahana, to nga kingi tokorua o nga Amori, i tenei taha o  
 Horano, whaka te rawhiti; <sup>48</sup> O Aroera i te taha o te awa o Aranona, a Maunga Hiona, ara a  
 Heremona, <sup>49</sup> Me te Arapaha katoa i tera taha o Horano, whaka te rawhiti, a tae noa ki te moana  
 o te Arapaha, i raro iho i nga titahatanga o Pihika.

## Chapter 5

<sup>1</sup> A i karanga atu a Mohi ki a Iharaira katoa, i mea ki a ratou, Whakarongo, e Iharaira, ki nga  
 tikanga, ki nga whakaritenga e korerotia nei e ahau ki o koutou taringa i tenei ra, ka ako ai, ka  
 pupuri ai, ka mahi ai. <sup>2</sup> I whakarite a Ihowa, to tatou Atua, i te kawenata ki a tatou i Horepa. <sup>3</sup> Kihai  
 a Ihowa i whakarite i tenei kawenata ki o tatou matua; engari ki a tatou, ki a tatou nei ano, e ora

<sup>4</sup>  
 katoa nei i konei inaianei. I korero a kanohi mai a Ihowa ki a koutou i te maunga i waenganui o  
<sup>5</sup>  
 te ahi; Ko ahau i tu i waenganui o Ihowa, o koutou, i taua wa, hei whakapuaki ki a koutou i te  
 korero a Ihowa: i wehi hoki koutou i te ahi, kihai hoki i piki ake ki te maunga; i mea ia,  
<sup>6</sup>  
 Ko Ihowa ahau, ko tou Atua, naku koe i whakaputa mai i te whenua o Ihipa, i te whare  
<sup>7</sup> <sup>8</sup>  
 pononga. Aua etahi atua ke atu mou ki mua i ahau. Kei hanga koe i te whakapakoko mou, i  
 tetahi ritenga ranei o nga mea o te rangi i runga, o te whenua ranei i raro, o te wai ranei i raro i te  
<sup>9</sup>  
 whenua. Kei koropiko koe ki ena mea, kei mahi ranei ki ena mea: ko Ihowa hoki ahau ko tou  
 Atua, he Atua hae, e mea ana i nga hara o nga matua kia tau iho ki nga tamariki a te toru, te wha  
<sup>10</sup>  
 ra ano o nga whakatupuranga o te hunga e kino ana ki ahau; E whakaputa aroha ana hoki ki nga  
<sup>11</sup>  
 mano, ki te hunga e aroha ana ki ahau, e whakarite ana i aku ture. Kei whakahuatia noatia e koe  
 te ingoa o Ihowa, o tou Atua: e kore hoki a Ihowa e mea he harakore te tangata e whakahua noa  
<sup>12</sup>  
 ana i tona ingoa. Kia mau ki te ra hapati, kia whakatapua, kia pera me ta Ihowa, me ta tou Atua  
<sup>13</sup> <sup>14</sup>  
 i whakahau ai ki a koe. E ono nga ra e mahi ai koe, e mea ai hoki i au mea katoa; Tena ko te  
 ra whitu, he hapati no Ihowa, no tou Atua; kua e mahia tetahi mahi i reira, e koe, e tau tama, e tau  
 tamahine, e tau pononga tane, e tau pononga wahine, e tau kau, e tau kaihe, e au kararehe katoa  
 hoki, me tou tangata ke i roto i ou tatau; kia okioki ai tau pononga tane, tau pononga wahine, kia  
<sup>15</sup>  
 pena ai me koe. Kia mahara ano he pononga koe i te whenua o Ihipa, a na Ihowa, na tou Atua  
 koe i whakaputa mai i reira, i runga i te ringa kaha, i te ringa maro: na reira i whakahau ai a Ihowa,  
<sup>16</sup>  
 tou Atua, i a koe kia whakaritea te ra hapati. Whakahonoretia tou papa me tou whaea, kia rite  
 ki ta Ihowa, ki ta tou Atua i whakahau aia ki a koe; kia roa ai ou ra, kia whiwhi ai hoki koe ki te  
<sup>17</sup> <sup>18</sup>  
 pai i runga i te whenua e homai nei e Ihowa, e tou Atua, ki a koe. Aua e patu. Aua e puremu.  
<sup>19</sup> <sup>20</sup> <sup>21</sup>  
 Aua e tahae. Aua e whakapae teka ki tou hoa. Aua hoki e hiahia ki te wahine a tou hoa,  
 aua hoki e hiahia ki te whare o tou hoa, ki tana mara, ki tana pononga tane, ki tana pononga wahine,  
<sup>22</sup>  
 ki tana kau, ki tana kaihe, ki tetahi mea ranei a tou hoa. Ko enei kupu i korerotia mai e Ihowa  
 ki to koutou huihui katoa i te maunga, i waenganui o te ahi, o te kapua, o te pouri hoki, he nui ano  
 hoki te reo; a kahore atu ano ana kupu: a tuhituhia iho e ia ki nga papa kohatu e rua, a homai ana  
 ki ahau.  
<sup>23</sup>  
 A, no to koutou rongonga i te kupu i roto i te pouri, ko te maunga hoki e ka ana i te ahi, ka  
<sup>24</sup>  
 whakatata mai ki ahau, ara nga upoko katoa o o koutou iwi, me o koutou kaumatua; A ka mea  
 mai, Na, kua whakakite mai a Ihowa, to tatou Atua, i tona kororia, i tona nui ki a tatou, kua rongo  
 hoki tatou i tona reo i roto i te ahi; kua kite tatou i tenei ra ka korero a Ihowa ki te tangata, a ka ora

<sup>25</sup> ano ia. Na kia mate matou hei aha? ka pau hoki matou i tenei ahi nui; ki te rongo ano matou i  
 te reo o Ihowa, o to tatou Atua, na ka mate matou. <sup>26</sup> Ko wai hoki o nga kikokiko katoa i rongo ki  
 te reo o te Atua ora e korero ana i roto i te ahi, me tatou nei i rongo, a ia ora ano? <sup>27</sup> Mau e whakatata  
 atu, e whakarongo ki nga mea katoa e korero ai a Ihowa, to tatou Atua; mau hoki e korero ki a  
 matou nga mea katoa e korero ai a Ihowa, to tatou Atua, ki a koe; a ma matou e whakarongo, e  
<sup>28</sup> mahi. A ka rongo mai a Ihowa i te puaki o a koutou kupu, i a koutou e korero ana ki ahau; na  
 ka mea a Ihowa ki ahau, Kua rongo ahau i te puaki mai o nga kupu a te iwi nei, i korero ra ratou  
 ki a koe: he pai nga mea katoa i korero ra ratou. <sup>29</sup> E! me i pena o ratou ngakau i roto i a ratou, te  
 wehi i ahau, te pupuri hoki i aku whakahau katoa i nga ra katoa, kia whiwhi ai ratou ki te pai me a  
 ratou tamariki hoki ake tonu atu! <sup>30</sup> Haere, mea atu ki a ratou, Hoki atu koutou ki o koutou teneti.  
<sup>31</sup> Ko koe ia, e tu ki konei taua, a maku e korero ki a koe nga whakahau katoa, me nga tikanga, me  
 nga whakaritenga e whakaako ai koe ki a ratou, hei mahi ma ratou ki te whenua e hoatu nei e ahau  
 kia nohoia e ratou. <sup>32</sup> Na, kia mahara koutou kia pera te mahi me ta Ihowa, me ta to koutou Atua,  
 i whakahau ai ki a koutou: kaua e peka ke ki matau, ki mau. <sup>33</sup> Haere i nga huarahi katoa i whakahau  
 ai a Ihowa, to koutou Atua ki a koutou, kia ora ai koutou, kia whiwhi ai ki te pai, kia roa ai hoki o  
 koutou ra ki te whenua ka riro nei i a koutou.

## Chapter 6

<sup>1</sup> Na ko te whakahau tenei, ko nga tikanga me nga whakaritenga, i whakahaua mai e Ihowa, e  
 to koutou Atua, kia whakaakona atu ki a koutou, hei mahi ma koutou ki te whenua e haere atu nei  
 koutou ki reira ki te tango: <sup>2</sup> Kia wehi ai koe i a Ihowa, i tou Atua, kia puritia ai ana tikanga katoa,  
 me ana whakahau e whakahaua nei e ahau ki a koe, e koe, e tau tama, e te tama hoki a tau tama, i  
 nga ra katoa e ora ai koe; kia roa ai hoki ou ra. <sup>3</sup> Na, whakarongo, e Iharaira, kia mahara hoki kia  
 mahia enei mea, kia whiwhi ai koe ki te pai, kia nui rawa ai hoki koutou, kia pera ai me ta Ihowa,  
 me ta te Atua o ou matua i korero ai ki a koe, ki te whenua e rerengia ana e te waiu, e te honi.  
<sup>4</sup> Whakarongo, e Iharaira: Ko Ihowa, ko to tatou Atua, he Ihowa kotahi: <sup>5</sup> A me whakapau  
 katoa tou ngakau, tou wairua, tou kaha ki te aroha ki a Ihowa, ki tou Atua. <sup>6</sup> Hei roto ano i tou  
 ngakau enei kupu e whakahau atu nei ahau ki a koe i tenei ra; <sup>7</sup> Whakaakona marietia atu hoki ki  
 au tamariki, korerotia i a koe e noho ana i tou whare, i a koe e haere ana i te huarahi, i a koe e takoto

ana, i tou aranga ake hoki. <sup>8</sup> Me here e koe hei tohu ki tou ringa, hei pare ano ena mea ki waenganui  
 o ou kanohi. <sup>9</sup> Tuhituhia ano hoki ki nga pou tatau o tou whare, ki ou tatau hoki. <sup>10</sup> A, a mua ake  
 nei, ina kawea koe e Ihowa, e tou Atua, ki te whenua i oati ai ia ki ou matua, ki a Aperahama, ki a  
 Ihaka, ki a Hakopa, a ka homai e ia ki a koe he pa nunui, papai, kihai nei i hanga e koe, <sup>11</sup> He  
 whare ki tonu i nga mea papai katoa, kihai nei i whakakiia e koe, he poka wai oti rawa te keru, kihai  
 i keria e koe, he mara waina, he oriwa, kihai nei i whakatokia e koe: a ka kai koe, ka makona;  
<sup>12</sup> Kia tupato ki a koe i reira, kei wareware ki a Ihowa, nana nei koe i whakaputa mai i te whenua  
 o Ihipa, i te whare pononga. <sup>13</sup> Ko Ihowa, ko tou Atua tau e wehi ai, me mahi ano hoki ki a ia, ko  
 tona ingoa hoki hei oatitanga mau. <sup>14</sup> Kei whai ki nga atua ke, o nga atua o nga tauwiwi i tetahi taha  
 o koutou, i tetahi taha; <sup>15</sup> He Atua hae hoki a Ihowa, tou Atua i waenganui i a koe; kei mura te riri  
 o Ihowa, o tou Atua ki a koe, a ka ngaro koe i te mata o te whenua. <sup>16</sup> Kei whakamatautau i a  
 Ihowa, i to koutou Atua, me koutou ra i whakamatautau i a ia i Meha.  
<sup>17</sup> Puritia mareitia nga whakahau a Ihowa, a to koutou Atua, me ana whakaatu, me ana tikanga,  
 i whakahaua mai nei e ia ki a koe. <sup>18</sup> Mahia hoki te mea tika, te mea pai ki te aroaro o Ihowa; kia  
 whiwhi ai koe ki te pai, kia tae atu ai, kia noho ai ki te whenua pai i oatitia e Ihowa ki ou matua,  
<sup>19</sup> Kia peia ai ou hoariri katoa i tou aroaro, kia rite ai ki ta Ihowa i ki ai. <sup>20</sup> A ki te ui tau tama ki a  
 koe a mua, ki te mea, Hei aha nga whakaatu, me nga tikanga, me nga whakaritenga, i whakahaua  
 mai nei e Ihowa, e to tatou Atua, ki a koutou? <sup>21</sup> Na ka mea atu koe ki tau tama, He pononga matou  
 na Parao i Ihipa; a he kaha te ringa i whakaputaina mai ai matou e Ihowa i Ihipa: <sup>22</sup> A whakakitea  
 mai ana e Ihowa he tohu, he merekara, he nui, he nanakia ki Ihipa, ki a Parao, ki tona whare katoa,  
<sup>23</sup> me te titiro ano matou; A whakaputaina mai ana matou e ia i reira, kia kawea mai ai matou, kia  
 homai ai e ia te whenua i oati ai ia ki o tatou matua. <sup>24</sup> A whakahaua ana tatou e Ihowa kia mahia  
 enei tikanga katoa, kia wehi i a Ihowa, i to tatou Atua, hei pai mo tatou i nga ra katoa, kia  
 whakaorangia ai tatou e ia, kia penei ai i tenei inaianei. <sup>25</sup> A hei tika mo tatou ki te mau te mahi i  
 enei whakahau katoa ki te aroaro o Ihowa, o to tatou Atua, ki te pera me tana i whakahau ai ki a  
 tatou.

## Chapter 7

<sup>1</sup> E kawe a Ihowa, tou Atua, i a koe ki te whenua e haere atu nei koe ki reira ki te tango, a ka peia nga iwi maha i tou aroaro, te Hiti, te Kirikahi, te Amori, te Kanaani, te Perihi, te Hiwi, me te Iepuhi, nga iwi e whitu, he nui ake, he kaha ake i a koe; <sup>2</sup> A ka tukua ratou e Ihowa, e tou Atua, ki tou aroaro, na me patu ratou e koe, me whakamoti rawa ratou: kua e whakaritea he kawenata ki a ratou, kua hoki ratou e tohungia. <sup>3</sup> Kua hoki koe e marenarena ki a ratou; ko tau tamahine kua e tukua atu ma tana tama, ko tana tamahine hoki kua e tangohia ma tau tama. <sup>4</sup> No te mea ka whakariroia ketia e ia tau tama, kei whai i ahau, kia mahi ai ratou ki nga atua ke: a ka mura te riri o Ihowa ki a koutou, ka huna whakarere hoki ia i a koe. <sup>5</sup> Engari me penei ta koutou ki a ratou; ko a ratou aata, wahia, ko a ratou pou, pakarua, ko a ratou Aherimi, tuaina, ko a ratou whakapakoko, tahuna ki te ahi: <sup>6</sup> No te mea he iwi tapu koe na Ihowa, na tou Atua: i whiriwhiria ai koe e e Ihowa, e tou Atua, kia waiho ai hei iwi motuhake mana i nga iwi katoa i te mata o te whenua. <sup>7</sup> Ehara i te nui no koutou i nga iwi katoa i matenui ai a Ihowa ki a koutou, i whiriwhiri ai i a koutou; he iti rawa hoki koutou i nga iwi katoa; <sup>8</sup> Engari he aroha no Ihowa ki a koutou, he whakamana hoki nana i te oati i oati ai ia ki o koutou matua, i whakaputa mai ai a Ihowa i a koutou ki te ringa kaha, i hoko ai i a koe i roto i te whare pononga, i te ringa hoki o Parao, o te kingi o Ihip a. <sup>9</sup> Na kia mohio koe ki a Ihowa, ki tou Atua, ko te Atua ia, ko te Atua pono, e pupuri ana i te kawenata, i te atawhai mo te hunga e aroha ana ki a ia, e pupuri ana i ana whakahau a mano noa nga whakatupuranga; <sup>10</sup> E hoatu ana ano e ia ki to ratou aroaro te utu mo te hunga e kino ana ki a ia, ara he whakangaro mo ratou: e kore ia e whakaroa ki te tangata e kino ana ki a ia, ka hoatu ano e ia he utu ki tona aroaro. <sup>11</sup> Ina, puritia nga whakahau, nga tikanga, me nga whakaritenga e whakahau nei ahau ki a koe i tenei ra kia mahia. <sup>12</sup> A tenei ake, ki te rongu koutou ki enei whakaritenga, ki te puritia, ki te mahia, na ka whakamana e Ihowa, e tou Atua, te kawenata ki a koe, me te atawhai i oati ai ia ki ou matua: <sup>13</sup> A ka aroha ia ki a koe, ka manaaki i a koe, ka whakanui hoki i a koe, ka manaaki ano hoki i te hua o tou kopu, i te hua o tou oneone, i tau witi, i tau waina, i tau hinu, i nga whanau a au kau, i nga kahui o au hipi, ki te whenua i oati ai ia ki ou matua kia hoatu ki a koe. <sup>14</sup> Ka manaakitia koe, nui atu i nga iwi katoa: e kore e pakoko te tane, te wahine ranei, i roto i a koe, i roto ranei i au kararehe. <sup>15</sup> Ka tangohia atu ano e Ihowa nga turotanga katoa, e kore rawa hoki ia e whakapa ki a koe i tetahi o nga mate nanakia o Ihipa, i kite ra koe; engari ka whakapakia atu e ia ki ou hoariri katoa. <sup>16</sup> A ka whakapaua e koe nga iwi katoa e hoatu nei e Ihowa, e tou Atua, ki a koe; kua tou kanohi e tohu i a ratou: aua ano koe e mahi ki o ratou atua; he rore hoki tena mou. <sup>17</sup> Ki te mea koe i roto

i tou ngakau, He nui nga iwi nei i ahau; me pehea e taea ai ratou te pei e ahau? <sup>18</sup> Kei wehi i a  
 ratou, kia ata mahara ki nga mea i meatia e Ihowa, e tou Atua, ki a Parao, ki Ihipa katoa; <sup>19</sup> Ki nga  
 whakamataau nunui i kite ra ou kanohi, ki nga tohu, ki nga merekara, ki te ringa kaha, ki te takakau  
 maro, i tangohia mai ai koe e Ihowa, e tou Atua: ka peratia e Ihowa, e tou Atua, nga iwi katoa e  
 wehi na koe. <sup>20</sup> Ka tukua atu ano e Ihowa, e tou Atua, te horonete ki a ratou, kia moti ra ano nga  
 mea i mahue, me nga mea i ngaro atu i ou kanohi. <sup>21</sup> Kauga e wehi i a ratou: ta te mea kei waenganui  
 i a koe a Ihowa, tou Atua; he Atua nui ia, e wehingia ana. <sup>22</sup> A ka whakangaromia rikirikitia enei  
 iwi e Ihowa, e tou Atua, i tou aroaro: e kore e ahei i a koe te huna wawe i a ratou, kei hira ake i a  
 koe nga kirehe mohoa o te whenua. <sup>23</sup> Otiia ka tukua atu ratou e Ihowa, e tou Atua, ki tou aroaro,  
 a he nui te hunanga e huna ai ratou e ia, kia ngaro ra ano ratou. <sup>24</sup> A ka hoatu e ia o ratou kingi ki  
 tou ringa, a ka whakangaromia e koe o ratou ingoa i raro i te rangi: e kore e tu tetahi tangata ki tou  
 aroaro, kia ngaro ra ano ratou i a koe. <sup>25</sup> Ko nga whakapakoko o o ratou Atua me tahu ki te ahi:  
 aua e minamina atu ki te hiriwa, ki te koura ranei e mau ana ki aua mea, kauga hoki e tangohia mou,  
 kei mahangatia koe e ena mea: he mea whakarihariha hoki ena ki a Ihowa, ki tou Atua. <sup>26</sup> Kauga  
 hoki e maua te mea whakarihariha ki roto ki tou whare; kei kanga koe, kei peratia me taua mea:  
 engari kia tino whakarihariha koe, kia tino anuanu; he mea hoki kua oti te kanga.

## Chapter 8

<sup>1</sup> Kia mahara kia mahia nga whakahau katoa e whakahaua nei e ahau i tenei ra, kia ora ai koutou,  
 kia tini ai, kia tae ai hoki, kia whiwhi ai ki te whenua i oati ra a Ihowa ki a koutou matua. <sup>2</sup> Kia  
 mahara hoki ki te ara katoa i arahi ai a Ihowa, tou Atua, i a koe i te koraha, i enei tau e wha tekau,  
 kia iro ai koe, hei whakamatautau hoki i a koe, kia mohiotia ai nga aha noa i roto i tou ngakau, ka  
 pupuri ranei koe i ana whakahau, kahore ranei. <sup>3</sup> A whakawhiua ana koe e ia, whakamatea ana ki  
 te kai, whangaia ana ki te mana, kihai nei i mohiotia e koe, kihai ano i mohiotia e ou matua; kia  
 whakamohio ai ia i a koe e kore te tangata e ora i te taro kau, engari ma nga kupu katoa e puta mai  
 ana i te mangai o Ihowa ka ora ai te tangata. <sup>4</sup> Kihai tou kakahu i tawhitotia ki runga ki a koe, kihai  
 ano hoki tou waewae i pupuhi, i enei tau e wha tekau. <sup>5</sup> A ka mahara koe i roto i tou ngakau, e  
 papaki ana a Ihowa, tou Atua i a koe, e pera ana me te tangata e papaki ana i tana tama. <sup>6</sup> Na kia  
 mau ki nga whakahau a Ihowa, a tou Atua, haere hoki i ana huarahi me te wehi ano ki a ia. <sup>7</sup> Na

te mea e kawe ana a Ihowa, tou Atua, i a koe ki te whenua pai, ki te whenua o nga awa wai, o nga puna, o nga wai hohonu, e pupu mai ana i nga raorao, i nga maunga; <sup>8</sup> Ki te whenua o te witi, o te parei, o te waina, o te piki, o te pamekaranete: ki te whenua o te hinu oriwa, o te honi; <sup>9</sup> Ki te whenua e kore ai e onge tau taro e kai ai koe, e kore rawa ai koe e hapa i tetahi mea; ki te whenua he rino ona kohatu, ka keru ano koe i te parahi i roto i ona maunga.

<sup>10</sup> A ka kai koe, ka makona, na kia whakapai atu koe ki a Ihowa, ki tou Atua, mo te whenua pai kua homai e ia ki a koe. <sup>11</sup> Kia tupato kei wareware ki a Ihowa, ki tou Atua, kei kore koe e pupuri i ana whakahau, i ana whakaritenga, i ana tikanga, e whakahau nei e ahau ki a koe i tenei ra: <sup>12</sup> Kei kai koe, a ka makona, kei hanga hoki i nga whare papai, a noho iho; <sup>13</sup> A ka tini haere au kau, me au hipi, ka nui hoki te hiriwa me te koura ki a koe, a ka tini haere nga mea katoa ki a koe; <sup>14</sup> Na ka kake tou ngakau, a ka wareware koe ki a Ihowa, ki tou Atua, i whakaputa mai ra i a koe i te whenua o Ihipa, i te whare pononga; <sup>15</sup> I arataki hoki i a koe i tena koraha nui, whakamataku, i reira nei nga nakahi tu a ahi me nga kopiona, me te whenua matewai, kahore o reira wai; i whakaputa mai ano i te wai mou i roto i te kohatu kiripaka; <sup>16</sup> I whangai i a koe i te koraha ki te mana, kihai nei i mohiotia e ou matua; kia iro ai koe, kia whakamatautau ai hoki ia i a koe, a kia pai ai te tukunga iho ki a koe; <sup>17</sup> A ka mea koe i roto i tou ngakau, Na toku kaha, na te uua hoki o toku ringa, i whiwhi ai ahau ki enei taonga. <sup>18</sup> Engari kia mahara ki a Ihowa, ki tou Atua, nana hoki i homai te kaha ki a koe i whiwhi ai ki te taonga; kia mana ai tana kawenata i oati ai ia ki ou matua, a ka rite nei inaianei. <sup>19</sup> Na ki te wareware koe ki a Ihowa, ki tou Atua, a ka whai ki nga atua ke, ka mahi ki a ratou, ka koropiko atu hoki ki a ratou, maku e ki atu ki a koutou i tenei ra, ka ngaro rawa koutou. <sup>20</sup> Ka rite ki nga iwi e whakangaromia nei e Ihowa i to koutou aroaro, ka pera ano koutou, ka ngaro; mo koutou kihai i rongu ki te reo o Ihowa, o to koutou Atua.

## Chapter 9

<sup>1</sup> Whakarongo, e Iharaira: ko a tenei ra koe whiti ai i Horano, a ka tae, ka riro i a koe nga iwi nunui ake, kaha ake i a koe, nga pa nunui hoki, he mea taiepa a tutuki noa ki te rangi, <sup>2</sup> He iwi nunui, he iwi roroa, ko nga tama a te Anakimi, e mohio na koe, kua rongu na koe i te pepeha mo ratou, Ko wai e tu ki te aroaro o nga tama a Anaka? <sup>3</sup> Na kia mohio koe i tenei ra, ko Ihowa, ko tou Atua, ko ia kei tou aroaro e haere ana ano he ahi e kai ana; mana ratou e huna, mana hoki e whakamate to ratou tara ki tou aroaro: a ka peia ratou e koe, ka meinga kia hohoro to ratou ngaro,



4  
 ka rite k i ta Ihowa i korero ai ki a koe. Kei korero koe i roto i tou ngakau, ua pei a Ihowa, tou Atua, i a ratou i tou raorao, kei mea, He tika noku i kawe mai ai a Ihowa i ahau ki te tango i tenei  
 5  
 whenua; kahore, no te kino o enei iwi i pei ai a Ihowa i a ratou i tou aroaro. Ehara i te tika nou, i te tapatahi ranei o tou ngakau, i haere ai koe ki te tango i to ratou whenua; engari he kino no enei iwi i pei ai a Ihowa, tou Atua, i a ratou i tou aroaro, he mea hoki kia mana ai te kupu i oati ai a  
 6  
 Ihowa ki ou matua, ki a Aperahama, ki a Ihaka, ki a Hakopa. Ina, kia mohio koe, ehara i te tika nou e hoatu nei e Ihowa, e tou Atua, tenei whenua pai ki a koe, kia tangohia e koe; no te mea he iwi kaki maro koe.

7  
 Kia mahara, kei wareware ki au whakataritari ki a Ihowa, ki tou Atua, i te koraha: no te ra iho ano i haere mai ai koe i te whenua o Ihipa, a tae noa mai koutou ki tenei wahi, e tutu ana koutou

8  
 ki a Ihowa. I Horepa ano hoki, i whakapataritari koutou ki a Ihowa kia riri, a riri ana a Ihowa ki a koutou, mea ana kia huna koutou. I toku pikinga ki te maunga, ki te tiki i nga papa kohatu, i nga papa o te kawenata i whakaritea e Ihowa ki a koutou, na ka noho ahau i te maunga, e wha tekau

9  
 nga ra, e wha tekau nga po; kahore ahau i kai taro, kahore i inu wai. A homai ana e Ihowa ki ahau nga papa kohatu e rua, he mea tuhituhi na te ringa o te Atua; a i reira e mau ana, he mea tuhituhi, nga kupu katoa i korero ai a Ihowa ki a koutou i te maunga, i waenganui o te ahi, i te ra

10  
 o te huihuinga. Na wai a ka taka nga ra e wha tekau me nga po e wha tekau, na ka homai e Ihowa

11  
 ki ahau nga papa kohatu e rua, ara nga papa o te kawenata. A ka mea a Ihowa ki ahau, Whakatika, hohoro te heke atu i konei; ko tou iwi hoki i kawea mai nei e koe i Ihipa kua taka ki te he; kua hohoro ratou te peka ke i te huarahi i kiia ai e ahau ki a ratou; kua hanga e ratou he whakapakoko,

12  
 he mea whak arewa mo ratou. I korero mai ano a Ihowa ki ahau, i mea, Kua kite ahau i tenei

13  
 iwi, nana, he iwi kaki maro ratou: Tukua ahau ki te huna i a ratou, ki te horoi atu hoki i to ratou

14  
 ingoa i raro i te rangi: a maku koe e mea hei iwi kaha ake, hei iwi nui ake i a ratou. Heoi tahuri ana ahau, heke iho ana i te maunga, ko te maunga hoki ka tonu i te ahi; a ko nga papa e rua o te

15  
 kawenata i oku ringa e rua. Na, ko taku tirohanga atu, na, kua hara koutou ki a Ihowa, ki to koutou Atua; kua hanga koutou i te kua kau ma koutou, he mea whakarewa: kua hohoro koutou

16  
 te peka ke i te huarahi i kiia e Ihowa ki a koutou. Na ka mau ahau ki nga papa e rua, panga atu

17  
 ana e ahau i roto i oku ringa e rua, a wahia iho aua mea e ahau ki to koutou aroaro. Na takoto ana ahau ki te aroaro o Ihowa, pera ano me te timatanga, e wha tekau nga ra, e wha tekau nga po; kihai ahau i kai taro, kihai i inu wai; mo o koutou hara katoa hoki i hara ai koutou, i mahi ai i te

18  
 kino ki te aroaro o Ihowa, hei whakap ataritari i a ia. I pawera hoki ahau i te riri, i te aritarita, i a Ihowa ra i whakataritari ai ki a koutou, e mea ana, kia huna koutou. Otiia whakarongo mai ana

20  
ano a Ihowa ki ahau i taua wa hoki. A tino kaha te riri o Ihowa ki a Arona, i mea kia whakamatea  
21  
ia: na ka inoi ano hoki ahau mo Arona i taua wa. Na ka tango ahau i to koutou hara, i te kuao  
kau i hanga e koutou, a tahuna ana e ahau ki te ahi, patokia iho, whakangakungakutia ana kia ririki,  
ngotangota noa ano he puehu: na panga atu ana e ahau ona ngota ki te awa e rere iho ana i te maunga.  
22  
A i Tapera, i Maha hoki, i Kipiroto Hataawa i whakapataritari ano koutou ki a Ihowa. Na, i  
23  
te tononga a Ihowa i a koutou i Kareheparenea, i tana meatanga mai, Haere ki runga, tangohia te  
whenua i hoatu e ahau ki a koutou; na ka tutu koutou ki te kupu a Ihowa, a to koutou Atua, kihai  
24  
ano i whakapono ki a ia, kihai i whakarongo ki tona reo. He tutu tonu ta koutou ki a Ihowa mai  
25  
o te ra i mohio ai ahau ki a koutou. Na takoto ana ahau i te aroaro o Ihowa i nga ra e wha tekau,  
i nga po e wha tekau, i takoto ai ahau; mo te meatanga mai a Ihowa kia whakangaromia koutou.  
26  
A ka inoi ahau ki a Ihowa, ka mea, E Ihowa, e te Atua, kaua e whakangaromia tau iwi, tau taonga  
tupu, i hokona nei e koe i runga i tou nui, i whakaputaina mai nei e koe i Ihipa ki te ringa kaha.  
27  
Kia mahara ki au pononga, ki a Aperahama, ki a Ihaka, ki a Hakopa; kaua e titiro mai ki te pakeke  
28  
o tenei iwi, ki to ratou kino, ki to ratou hara: Kei mea te whenua i whakaputaina mai nei matou  
e koe i reira, He kore kihai a Ihowa i kaha ki te kawea i a ratou ki te whenua i korero ai ia ki a ratou,  
29  
he kino hoki nona ki a ratou, i kawea ai ratou e ia kia whakamatea ki te koraha. Otira ko tau iwi  
ano ratou, ko tau taonga tupu hoki, i whakaputaina mai nei e koe i runga i tou kaha nui, i tou takakau  
maro hoki.

## Chapter 10

1  
I reira ano ka korero mai a Ihowa ki ahau, Haua e koe kia rua nga papa kohatu, kia rite ki o  
2  
te timatanga, ka haere ake ai ki ahau ki te maunga, hanga hoki e koe he aaka rakau. A maku e  
tuhituhi ki nga papa nga kupu o nga papa o mua, i wahia ra e koe, a me hoatu e koe ki roto ki te  
3  
aaka. Na hanga ana e ahau he aaka, he hitimi te rakau, taraia ana hoki e ahau nga papa kohatu e  
4  
rua, rite tonu ki o mua, na ka piki ahau ki te maunga me nga papa e rua i toku ringa. Na ka tuhituhi  
ia ki nga papa, rite tonu ki to mua tuhituhinga, i nga ture kotahi tekau i korerotia mai e Ihowa ki a  
5  
koutou i te maunga, i waenganui o te ahi, i te ra o te huihuinga; a homai ana e Ihowa ki ahau. Na  
tahuri ana ahau, heke iho ana i te maunga, a whaowhina ana nga papa ki roto ki te aaka i hanga e  
6  
ahau, a kei reira na ano, ko ta Ihowa i whakahau ai ki ahau. Na ka haere atu nga tama a Iharaira  
i Peerota Pene Iakana ki Mohera: a ka mate a Arona ki reira, a tanumai iho ki reira; na ko tana tama,

<sup>7</sup> ko Ereatara te tohunga i muri i a ia. I haere atu ratou i reira a Kurekora; i Kurekora atu ki Iotopata,  
<sup>8</sup> he whenua awa wai. I taua wa ano ka wehea e Ihowa te iwi o Riwai hei amo i te aaka o te kawenata  
 a Ihowa, hei tu ki te aroaro o Ihowa, hei minita ki a ia, hei manaaki hoki i runga i tona ingoa a  
<sup>9</sup> mohoa noa nei. No reira i kore ai tetahi wahi mo Riwai, tetahi kainga tuturu i roto i ona tuakana,  
 i ona teina: ko tona kainga tuturu ko Ihowa, rite tonu ki ta Ihowa, ki ta tou Atua, i korero ai ki a ia.  
<sup>10</sup> A i noho ahau i te maunga, ko nga ra he pera me o mua, e wha tekau nga ra, e wha tekau nga po;  
<sup>11</sup> a i rongoi mai ano a Ihowa ki ahau i reira; kihai a Ihowa i aro ki te whakamate i a koe. A ka mea  
 mai a Ihowa ki ahau, Whakatika, haere atu i tou huarahi i mua i te iwi; a me haere ratou ki te tango  
 i te whenua, i oati ai ahau ki o ratou matua kia hoatu ki a ratou.  
<sup>12</sup> Na, he aha, e Iharaira, ta Ihowa, ta tou Atua, e mea nei i a koe? Ehara oti i te wehi i a Ihowa,  
 i tou Atua, i te haere i ana haerenga katoa, i te aroha ki a ia, i te mahi hoki ki a Ihowa, ki tou Atua,  
 tou ngakau katoa, tou wairua katoa, <sup>13</sup> I te pupuri hoki i nga whakahau a Ihowa, i ana tikanga e  
 whakahaua nei e ahau i tenei ra ki a koe, hei pai mou? <sup>14</sup> Nana, no Ihowa, no tou Atua, te rangi  
 me te rangi o nga rangi, te whenua me ona mea katoa. <sup>15</sup> Ko Ihowa anake i ahuaireka ki ou matua,  
 i aroha ki a ratou, a ko o ratou uri i muri i a ratou, ara ko koutou, tana i whiriwhiri ai o nga iwi  
 katoa; koia ano tenei inaianei. <sup>16</sup> Kotia ra e koutou te kiri matamata o o koutou ngakau, kua hoki  
 e whakamarokia ano o koutou kaki. <sup>17</sup> Ko Ihowa hoki, ko tou Atua, ko ia te Atua o nga atua, te  
 Ariki o nga ariki, he Atua nui ia, he kaha, he whakamataku, e kore nei e whakapai kanohi, e kore  
 ano hoki e tango utu. <sup>18</sup> E whakahaere ana ia i te tikanga mo te pani, mo te pouaru, e aroha ana ki  
 te manene, e hoatu ana hoki he taro, he kakahu mona. <sup>19</sup> No reira kia aroha koutou ki te manene;  
 he manene hoki koutou i mua, i te whenua o Ihipa. <sup>20</sup> Ko Ihowa, ko tou Atua, tau e wehi ai, me  
 mahi ano ki a ia, me awhi ki a ia, me waiho hoki tona ingoa hei oati. <sup>21</sup> Ko ia tau e whakamoemiti  
 ai, ko ia hoki tou Atua, i mahi nei i enei mea nunui, i enei mea whakawehi, i kite ra ou kanohi.  
<sup>22</sup> Ko ou matua, i heke atu ra ki Ihipa, e whitu tekau nga tangata; na, inaianei ka oti koe te mea e  
 Ihowa, e tou Atua, kia rite ki nga whetu o te rangi te tini.

## Chapter 11

<sup>1</sup> Na reira me aroha koe ki a Ihowa, ki tou Atua, kia mau ki tana ako, ki ana tikanga, ki tana i  
 whakarite ai, me ana whakahau, i nga ra katoa. <sup>2</sup> Kia mohio hoki koutou i tenei ra: kahore ano ia  
 ahau e korero ana ki a koutou tamariki, kahore hoki ratou i mohio, kahore ano hoki i kite i te  
<sup>3</sup> whakawhiu a Ihowa, a to koutou Atua, i tona nui, i tona ringa kaha, i tona takakau i maro ra, I  
 ana merekara hoki, i ana mahi i meatia e ia i waenganui o Ihipa ki a Parao kingi o Ihipa, ki tona  
<sup>4</sup> whenua katoa hoki; I tana hoki i mea ai ki te ope o Ihipa, ki o ratou hoiho, ki a ratou hariata; i a  
 ia i mea ra i nga wai o te Moana Whero kia huri ki runga ki a ratou i to ratou whaingā mai i a koutou,  
<sup>5</sup> a huna iho ratou e Ihowa a mohoa noa nei; I nga mea hoki i mea ai ia ki a koutou i te koraha, a  
<sup>6</sup> tae noa mai koutou ki tenei wahi; I tana hoki i mea ai ki a Ratana raua ko Apirama, ki nga tama  
 a Eriapa tama a Reupena; i te kowheratanga ake o te mangai o te whenua, a horomia ana ratou, me  
 nga tangata o o ratou whare, me o ratou teneti hoki, me a ratou mea ora katoa, i waenganui i a  
<sup>7</sup> Iharaira katoa: Ko o koutou kanohi ia kua kite i nga mahi nunui katoa a Ihowa i mahi ai ia.  
<sup>8</sup> Ae ra, kia mau ki nga whakahau katoa e whakahau atu nei ahau ki a koe i tenei ra, kia kaha  
 ai koe, kia tae atu ai hoki, kia whiwhi ai ki te whenua e haere atu nei koutou ki reira ki te tango;  
<sup>9</sup> Kia roa ai hoki o koutou ra ki te whenua i oati ai a Ihowa ki ou matua kia hoatu ki a ratou, ki o  
<sup>10</sup> ratou uri, he whenua e rerengia ana e te waiu, e te honi. Ko te whenua hoki e haere atu nei koe  
 ki reira ki te tango, ehara i te pera me te whenua o Ihipa, i mahue atu ra i a koe, e whakato ai koe  
<sup>11</sup> i tau purapura, e whakamakuku ai hoki ki tou waewae, ano he kari otaota: Engari he whenua  
 pukepuke, he whenua raorao te whenua e haere atu nei koutou ki reira ki te tango, e inu ana hoki  
<sup>12</sup> i te ua o te rangi hei wai; He whenua e matapoporetia ana e Ihowa, e tou Atua: kei reira tonu  
<sup>13</sup> nga kanohi o Ihowa, o tou Atua, no te timatanga o te tau taea noatia te mutunga o te tau. A ki  
 te whakarongo marie koutou ki aku whakahau e whakahau atu nei ahau ki a koutou i tenei ra, kia  
 aroha ki a Ihowa, ki to koutou Atua, kia whakapaua o koutou ngakau, o koutou wairua ki te mahi  
<sup>14</sup> ki a ia, Na ka hoatu e ahau te ua mo to koutou whenua i tona po ano, te ua mataati me te ua o  
<sup>15</sup> muri, a ka kohikohi koe i tau witi, i tau waina, i tau hinu. A ka hoatu e ahau te tarutaru ki ou  
<sup>16</sup> parae, ma au kararehe, a ka kai koe, ka makona. Kia mahara ki a koutou, kei mamingatia o  
<sup>17</sup> koutou ngakau, kei peka ke koutou, kei mahi ki nga atua ke, kei koropiko ki a ratou; A ka mura  
 te riri o Ihowa ki a koutou, a ka tutakina e ia te rangi, e kore ake ai te ua, e kore ai hoki e tukua mai  
 e te whenua ona hua; na ka hohoro koutou te mate atu i te whenua pai ka homai nei e Ihowa ki a  
 koutou.

18 Engari rongoatia enei kupu aku ki roto ki o koutou ngakau, ki o koutou wairua; herea hoki  
 hei tohu ki o koutou ringa, hei pare ano ki waenganui i o koutou kanohi. <sup>19</sup> Whakaakona atu hoki  
 ki a koutou tamariki, korerotia ina noho i tou whare, ina haere koe i te huarahi, ina takoto, ina  
 whakatika ranei. <sup>20</sup> Tuhituhia ano hoki ki nga pou tatau o tou whare, ki ou tatau hoki; <sup>21</sup> Kia tini  
 ai ou ra, me nga ra o a koutou tamariki ki te whenua i oati ai a Ihowa ki ou matua kia hoatu ki a  
 ratou, kia rite ai ki nga ra o te rangi i runga i te whenua. <sup>22</sup> Ki te ata pupuri hoki koutou i enei  
 whakahau katoa e whakahau atu nei ahau ki a koutou kia mahia; ki te aroha ki a Ihowa, ki to koutou  
 Atua, ki te haere hoki i ana huarahi, ki te awhi ki a ia; <sup>23</sup> Na ka peia atu e Ihowa enei iwi katoa i  
 to koutou aroaro, a ka riro i a koutou nga iwi he nui ake, he kaha ake i a koutou. <sup>24</sup> Mo koutou nga  
 wahi katoa e takahia e te kapu o o koutou waewae: kei te koraha, ke Repanona hoki, kei te awa,  
 kei Uparati, a tae noa ki te moana ki te hauauru, nga rohe ki a koutou. <sup>25</sup> E kore e tu te tangata ki  
 to koutou aroaro: ka whakapangia hoki e Ihowa, e to koutou Atua, to koutou wehi, me to koutou  
 tuihi ki te mata katoa o te whenua e takahia e koutou, ka rite ki tana i korero ai ki a koutou.  
<sup>26</sup> Nana, ka hoatu e ahau ki to koutou aroaro i tenei ra te manaaki me te kanga: <sup>27</sup> Te manaaki,  
 ki te rongo koutou ki nga whakahau a Ihowa, a to koutou Atua, e whakahau atu nei ahau ki a koutou  
 i tenei ra; <sup>28</sup> Te kanga hoki, ki te kahore koutou e rongo ki nga whakahau a Ihowa, a to koutou  
 Atua, a ka peka ke i te huarahi e kiia atu nei e ahau ki a koutou i tenei ra, ki te whai ki nga atua ke,  
 kihai nei i mohiotia e koutou. <sup>29</sup> A tenei ake, a te wa e kawea ai koe e Ihowa, e tou Atua, ki te  
 whenua, ka haere atu nei koe ki reira ki te tango, na me hoatu e koe te manaaki ki runga ki Maunga  
 Keritimi me te kanga ki runga ki Maunga Epara. <sup>30</sup> Kahore ianei ena i tawahi o Horano, i te taha  
 o te huarahi e to ai te ra, i te whenua o nga Kanaani e noho ana i te Arapaha i te ritenga atu o  
 Kirikara, i te taha o nga oki i More? <sup>31</sup> Ka whiti atu hoki koutou i Horano, ka haere ki te tango i  
 te whenua e homai ana e Ihowa, e to koutou Atua, ki a koutou, a ka riro a reira i a koutou, a ka  
 noho koutou ki reira. <sup>32</sup> Na kia mahara ki te mahi i nga tikanga katoa, i nga whakaritenga e hoatu  
 nei e ahau ki to koutou aroaro i tenei ra.

## Chapter 12

<sup>1</sup> Tenei ano nga tikanga me nga whakaritenga, hei pupuri ma koutou hei mahi ki te whenua e  
 homai ana e Ihowa, e te Atua o ou matua, ki a koe kia nohoia, i nga ra katoa e ora ai i runga i te  
 whenua. <sup>2</sup> Whakamotitia rawatia e koutou nga wahi katoa i mahi ai nga iwi ka riro nei i a koutou

ki o ratou atua, i runga i nga maunga teitei, i nga pukepuke hoki, i raro hoki i nga rakau kouru nui

<sup>3</sup> katoa: Pakarua a ratou aata, wahia kia kongakonga a ratou pou, ko a ratou Aherimi tahuna e koutou ki te ahi; a tuaina ki raro nga whakapakoko o o ratou atua, a whakangaromia rawatia atu o

<sup>4</sup> ratou ingoa i taua wahi. Aua e pena ki a Ihowa, ki to koutou Atua.

<sup>5</sup> Engari me whai ki tona nohoanga, ki te wahi e whiriwhiri ai a Ihowa, to koutou Atua, i roto

i o koutou iwi katoa, kia waiho tona ingoa ki reira, me haere hoki koe ki reira: <sup>6</sup> A me kawe e koutou ki reira a koutou tahunga tinana, a koutou patunga tapu, a koutou whakatekau, nga whakahere e hapahapainga ana e o koutou ringa, a koutou ki taurangi, a koutou whakahere tuku noa, me nga

<sup>7</sup> whanau matamua o a koutou kau, o a koutou u hipi: A ko reira koutou kai ai, ko te aroaro o Ihowa, o to koutou Atua, a ka koa koutou ki nga mea katoa e whatoro atu ai o koutou ringa, koutou me o

<sup>8</sup> koutou whare, ki nga manaaki a Ihowa, a tou Atua, i a koe. Kei rite ta koutou mahi ki enei katoa

<sup>9</sup> e mahia nei e tatou i konei i tenei ra, he tika tonu ia tangata ki tana titiro ake: Kahore nei hoki koutou kia tae noa ki te okiokinga, ki te kainga tupu e homai ana e Ihowa, e tou Atua, ki a koe.

<sup>10</sup> Engari ki te whiti koutou i Horano, a ka noho ki te whenua e homai ana e Ihowa, e to koutou Atua, hei kainga tupu mo koutou, a ka meinga e ia kia okioki i o koutou hoa whawhai katoa i tetahi

<sup>11</sup> taha, i tetahi taha, a ka noho koutou i runga i te whe nua rangatira; Katahi ka ai te wahi e whiriwhiria e Ihowa, e to koutou Atua, ki reira tona ingoa noho ai, hei kawenga ma koutou i nga mea katoa e whakahaua nei e ahau ki a koutou; a koutou tahunga tinana, a koutou patunga tapu, a koutou whakatekau, me nga whak ahere hapahapai a o koutou ringa, me nga mea papai katoa o

<sup>12</sup> nga mea i kiia taurangitia e koutou ma Ihowa: A ka koa koutou ki te aroaro o Ihowa, o to koutou Atua, koutou, a koutou tama, a koutou tamahine, a koutou pononga tane, a koutou pononga wahine, me te Riwaiti i roto i o koutou tatau, kahore hoki ia i rato tahi me koutou i tetahi wahi, i tetahi

<sup>13</sup> kainga tupu ranei mona. Kia mahara kei tukua e koe au tahunga tinana ki nga wahi katoa e kite

<sup>14</sup> ai koe: Engari hei te wahi e whiriwhiria e Ihowa i roto i te tahi o ou iwi, hei reira koe tuku ai i au tahunga tinana, hei reira hoki koe mea ai i nga mea katoa e whakahau atu nei ahau ki a koe.

<sup>15</sup> Otiia ka ahei koe te patu, te kai hoki he kikokiko i roto i ou tatau katoa, ki ta te hiahia katoa a tou ngakau, kia rite ki te manaaki a Ihowa, a tou Atua, i homai ai ki a koe: me kai e te poke, e te

<sup>16</sup> pokenore, he pera me te kahera, me te hata. Engari ra ia kei kainga e koutou te toto; ringihia atu

<sup>17</sup> ki te whenua ano he wai. E kore koe e tukua kia kai i roto i ou tatau i nga whakatekau o tau witi, o tau waina ranei, o tau hinu ranei, i nga matamua ranei o au kau, o au hipi ranei, i tetahi ranei o nga mea e kiia taurangitia e koe, i au whakahere tuku noa ranei, i nga whakahere hapahapai ranei

<sup>18</sup> a tou ringa: Engari me kai ena ki te aroaro o Ihowa, o tou Atua, hei te wahi e whiriwhiri ai a

Ihowa, tou Atua, e koe, e tau tama, e tau tamahine, e tau pononga tane, e tau pononga wahine, e te Riwaiti hoki i roto i ou tatau: a ka koa koe ki te aroaro o Ihowa, o tou Atua, ki nga mea katoa e

<sup>19</sup> totoro atu ai ou ringa. Kia tupato kei mahue i a koe te Riwaiti i nga ra katoa e ora ai koe i runga

<sup>20</sup> i te whenua. E whakanui a Ihowa, tou Atua, i tou rohe, e pera me tana i korero ai ki a koe, a ka mea koe, Ka kai kikokiko ahau, he hiahia hoki no tou ngakau ki te kai kikokiko: e kai koe i te

<sup>21</sup> kikokiko, i te hiahia katoa a tou ngakau. Ki te mamao rawa atu i a koe te wahi e whiriwhiri ai a Ihowa, tou Atua, kia waiho tona ingoa i reira, na patua tetahi o au kau, o au hipi ranei, kua homai na e Ihowa ki a koe, kia rite ki taku i whakahau ai ki a koe, a ka kai i roto i ou tatau, i ta te hiahia

<sup>22</sup> katoa a tou ngakau. Kainga ena, peratia me te kahera, me te hata e kainga ana: ko te poke, ko

<sup>23</sup> te pokekore, rite tahi raua te kai. Engari ra ia kia tino u koe kia kaua e kainga te toto: ko te toto

<sup>24</sup> hoki te ora; kaua hoki e kainga ngatahitia e koe te toto me te kikokiko. Kaua tena e kainga e

<sup>25</sup> koe; me riringi e koe ki te whenua ano he wai. Kei kainga tena e koe; kia whiwhi ai koe ki te

<sup>26</sup> pai, koutou ko au tamariki i muri i a koe, ina mahi koe i te mea e tika ana ki ta Ihowa titiro. Ko au mea tapu ia, i a koe na, me au ki taurangi, me tango e koe, ka haere ki te wahi e whiriwhiri ai a

<sup>27</sup> Ihowa: Na ka tuku mai koe i au tahunga tinana, i te kikokiko me te toto, ki runga ki te aata a Ihowa, a tou Atua: na ko te toto o au patunga tapu me riringi ki runga ki te aata a Ihowa, a tou Atua,

<sup>28</sup> ko te kikokiko ia me kai e koe. Maharatia, whakarangona enei kupu katoa e whakahau nei ahau ki a koe, kia whiwhi ai koe ki te pai, koutou ko au tamariki i muri i a koe, ake tonu atu, ina mahi

<sup>29</sup> koe i te mea e pai ana, e tika ana ki te titiro a Ihowa, a tou Atua. Ina huna e Ihowa, e tou Atua, i tou aroaro nga iwi, e haere nei koe ki reira ki te pei, a ka riro ratou i a koe, a ka noho koe ki to

<sup>30</sup> ratou whenua; Kia tupato ki a koe, kei mahangatia koe kia wahi i muri i a ratou, ina whakangaromia atu ratou i tou aroaro; kei ui atu ano hoki koe ki o ratou atua, kei mea, E pehea ana

<sup>31</sup> te mahi a enei iwi ki o ratou atua? ka pena ano hoki ahau. Kei pera tau mahi ki a Ihowa, ki tou Atua: ko nga mea katoa hoki e whakarihariha ai a Ihowa, e kino ai, ko ia ta ratou i mahi ai ki o ratou atua; na, ko a ratou tama nei ano, me a ratou tamahine e tahuna ana e ratou ki te ahi ma o

<sup>32</sup> ratou atua. Ko nga mea katoa e whakahau ai ahau ki a koutou, ko ena ta koutou e mahara ai kia mahia: kaua e tapiritia ki etahi atu, kaua ano hoki e kinitia atu tetahi wahi.

## Chapter 13

<sup>1</sup> Ki te whakatika ake i roto i a koutou he poropiti, he moemoea ranei, a ka homai e ia ki a koe  
 he tohu, he merekara ranei, <sup>2</sup> A ka puta mai te tohu, te merekara ranei, i korero ai ia ki a koe, i mea  
 ai, Tatou ka whai ki nga atua ke, kihai nei i mohiotia e koe, ka mahi atu hoki ki a ratou; <sup>3</sup> Kei  
 whakarongo koe ki nga korero a taua poropiti, a taua tangata moemoea ranei: e whakamatautau  
 ana hoki a Ihowa, to koutou Atua, i a koutou, kia mohio ai e whakapaua ranei o koutou ngakau  
 katoa, o koutou wairua katoa ki te aroha ki a Ihowa, ki t o koutou Atua. <sup>4</sup> Me haere koutou i muri  
 i a Ihowa, i to koutou Atua, ko ia ta koutou e wehi ai, me pupuri ana whakahau, me whakarongo  
 hoki ki tona reo, me mahi ano ki a ia, me awhi ki a ia. <sup>5</sup> A ko taua poropiti, ko taua tangata moemoea  
 ranei, me whakamate; mona i takahi i a Ihowa, i to koutou Atua, i tangohia mai ai koutou i te  
 whenua o Ihipa, i hokona ai koe i roto i te whare pononga, kia takina koe ki wahi ke i te huarahi i  
 whakahau ai a Ihowa, tou Atua, ki a koe kia haerea. Penei ka whakakorea e koe te kino i roto i a  
 koe.  
<sup>6</sup> Ki te whakawaia pukutia koe e tou teina, e te tama ranei a tou whaea, e tau tama ranei, e tau  
 tamahine ranei, e tou hoa wahine ranei i tou uma, e tou hoa ranei e rite ana ki tou ngakau, ki te mea  
 ia, Tatou ka haere, ka mahi ki nga atua ke, kihai nei koe i mohio, a koe, ou matua ranei; <sup>7</sup> Ki etahi  
 o nga atua o nga iwi i tetahi taha ou, i tetahi taha, e tata ana ki a koe, kei tawhiti atu ranei i a koe,  
 i tetahi pito o te whenua puta noa ki tetahi pito o te whenua; <sup>8</sup> Kei whakaae koe ki a ia, kei  
 whakarongo ranei ki a ia; kua ano hoki tou kanohi e aroha ki a ia, kua e tohu i a ia, kua hoki e  
 huna i a ia: <sup>9</sup> Engari patua rawatia kia mate; ko tou ringa te pa wawe atu ki a ia hei whakamate i a  
 ia, muri iho ko te ringa o te iwi katoa. <sup>10</sup> A me aki ia e koe ki te kohatu, kia mate; mona i whai kia  
 whakapeautia koe i a Ihowa, i tou Atua, i tangohia mai ai koe i te whenua o Ihipa, i te whare  
 pononga. <sup>11</sup> A ka rongo a Iharaira katoa, ka wehi, e kore hoki e mahi i te mea kino pena i tena i  
 roto i a koutou i muri iho.  
<sup>12</sup> Ki te rongo korero koe mo tetahi o ou pa, e homai e Ihowa, e tou Atua, ki a koe hei nohoanga,  
 e korerotia ana, <sup>13</sup> Kua haere atu etahi, he tama na Periara, i roto i a koe, kua whakapeau ke hoki  
 i nga tangata o to ratou pa, kua mea, Tatou ka haere, ka mahi atu ki nga atua ke, kihai nei i mohiotia  
 e koutou; <sup>14</sup> Na me rapu e koe, me ore atu, me te ui marie ano; na, ki te mea he pono, he tuturu  
 rawa te korero, kei te mahia tena mea whakarihariha i roto i a koe; <sup>15</sup> Tukitukia rawatia nga tangata  
 o taua pa ki te mata o te hoari, whakamotitia rawatia a reira, me nga mea katoa i roto, me ana  
 kararehe, ki te mata o te hoari. <sup>16</sup> Ko nga taonga katoa hoki o reira me hoki ki waenganui o tona  
 huarahi, ka tahu ai koe i te pa, me ona taonga katoa, ki te ahi, a rupeke noa, hei mea ki a Ihowa, ki



17  
 tou Atua: me waiho hoki a reira hei puranga mo ake tonu atu; kua e hanga a muri a ke nei. Kei  
 piri hoki ki tou ringa tetahi wahi o te mea kua oti nei te kanga: kia tahuri mai ai a Ihowa i te muranga  
 o tona riri, ka whakaputa mai he atawhai ki a koe, kia atawhai ai hoki ia i a koe, kia whakanui ai i  
 18  
 a koe, kia rite ai ki tana i oati a i ki ou matua; Ina whakarongo koe ki te reo o Ihowa, o tou Atua,  
 ina pupuri i ana whakahau katoa, e whakahau atu nei ahau ki a koe i tenei ra, kia mahi i te mea e  
 tika ana ki te titiro a Ihowa, a tou Atua.

## Chapter 14

1  
 Ko koutou nga tamariki a Ihowa, a to koutou Atua: kua koutou e haehae i a koutou, kua  
 hoki e tiwhaina a waenganui o o koutou kanohi mo te tupapaku. 2  
 He iwi tapu hoki koe ki a Ihowa,  
 ki tou Atua, a kua whiriwhiri a Ihowa i a koe hei iwi mana, motuhake rawa i nga iwi katoa i te mata  
 o te whenua. 3  
 Kua e kainga tetahi mea whakarihariha. 4  
 Ko nga kararehe enei e kai ai koutou:  
 ko te kau, ko te hipi, ko te koati, 5  
 Ko te hata, ko te kahera, ko te ropaka, ko te koati mohoa, ko  
 te pikareka, ko te anaterope, ko te temera. 6  
 Ko nga kararehe katoa hoki e tararua ana te matimati,  
 e weherua ana te titorehanga, e rua nei nga matimati, a e whakahoki ake ana i te kai, i roto i nga  
 7  
 kararehe, ko ena me kai. Otiia kua e kainga enei o nga mea e whakahoki ake ana i te kai, o nga  
 mea hoki e tararua ana nga matimati, e titore pu ana; ko te kamera, ko te hea, ko te koni, no te mea  
 e whakahoki ake ana ratou i te kai, otiia kihai i tararua te matimati; hei mea poke ena ki a koutou:  
 8  
 Me te poaka hoki, no te mea e titore ana nga matimati, otiia kahore e whakahoki ake ana i te kai;  
 hei mea poke tena ki a koutou: kua e kainga o ratou kikokiko, kua hoki e pa atu ki o ratou tinana  
 9  
 mate. Ko enei a koutou e kai ai o nga mea katoa o roto i te wai: ko nga mea katoa e whai tara  
 ana, e whai unahi ana, ko ena ta koutou e kai: 10  
 A ko nga mea kahore he tara, kahore hoki he  
 unahi i a ratou, kua e kainga; hei mea poke ena ki a koutou. 11  
 Ko nga manu pokekore katoa me  
 kai e koutou. 12  
 Engari tenei ano nga mea kua e kainga e koutou: ko te ekara, ko te wawahi iwi,  
 me te ahipare, 13  
 Ko te kireti, ko te kaiaia, ko te whatura, me nga mea pera, 14  
 Ko nga raweni  
 katoa, me nga mea pera, 15  
 Ko te otereti, ko te kahu po, ko te koekoea, ko te kahu, me nga mea  
 pera, 16  
 Ko te ruru nohinohi, ko te ruru nui, ko te wani, 17  
 Ko te perikana, ko te kia ekara, ko te  
 kawau, 18  
 Ko te taaka, ko te heroni, ko nga pera, ko te hupou, ko te pekapeka. 19  
 A ko nga mea

ngoki katoa e rere a manu ana, he mea poke ena ki a koutou: kaua e kainga. <sup>20</sup> Ko nga manu  
<sup>21</sup> pokekore katoa me kai. Kei kainga te mea i mate maori noa: me hoatu ki te manene i roto i ou  
 tatau, a mana e kai; me hoki atu ranei ki te tangata iwi ke: he iwi tapu hoki koe ki a Ihowa, ki tou  
 Atua. Kaua e kohuatia he kua koati ki te waiu o tona whaea.  
<sup>22</sup> Whakatekautia nga hua katoa o au purapura, e tupu ake ana i te mara i tenei tau, i tenei tau.  
<sup>23</sup> Me kai hoki ki te aroaro o Ihowa, o tou Atua, ki te wahi e whiriwhiri ai ia kia waiho tona ingoa  
 ki reira, nga whakatekau o tau witi, o tau waina, o tau hinu hoki, me nga matamua ano o au kau, o  
 au hipi hoki; kia ako ai koe ki te wehi i a Ihowa, i tou Atua, i nga ra katoa. <sup>24</sup> A ki te roa rawa tou  
 huarahi, e kore ai e taea e koe tena mea te kawe, no te mea he mamao atu i a koe te wahi e whiriwhiri  
 ai a Ihowa, tou Atua, kia waiho tona ingoa ki reira, ina manaakitia koe e Ihowa, e tou Atua: <sup>25</sup> Na  
 me hoko e koe ki te moni, me takai hoki te moni ki roto ki tou ringa, ka haere ki te wahi e whiriwhiri  
 ai a Ihowa, tou Atua: <sup>26</sup> Na ka hoko atu koe i te moni ki nga mea katoa e hiahia ai tou ngakau, ki  
 te kau, ki te hipi ranei, ki te waina ranei, ki te wai kaha ranei, ki nga mea katoa ranei e matea nuitia  
 ana e tou ngakau: ka kai ai ki reira ki te aroaro o Ihowa, o tou Atua, ka hari hoki koe, koutou ko  
 tou whare: <sup>27</sup> A ko te Riwaiti i roto i ou tatau, kua ia e whakarerea e koe: he mea hoki kahore ona  
 wahi, kainga tupu ranei i roto i a koe. <sup>28</sup> Hei te mutunga o nga tau e toru ka mau koe ki waho i nga  
 whakatekau katoa o au hua o tena tau, ka whakatakoto ai ki ou kuwaha: <sup>29</sup> Na ka haere te Riwaiti,  
 no te mea kahore ona wahi, kainga tupu ranei i roto i a koe, me te manene, me te pani, me te pouaru,  
 kei roto nei i ou tatau, a ka kai ratou, ka makona: kia manaaki ai a Ihowa, tou Atua, i a koe i nga  
 mahi katoa a tou ringa e mahi ai koe.

## Chapter 15

<sup>1</sup> Hei te mutunga o nga tau e whitu ka mea koe he tukunga noatanga. <sup>2</sup> A ko te tikanga tenei  
 mo te tuku noa: ko nga kaiwhakatarewa moni katoa, e whakatarewa moni ana ki o ratou hoa, me  
 tuku noa atu; kua te kaiwhakatarewa e tohe ki tona hoa, ki tona teina ranei; no te mea e karangatia  
 ana ko te tukunga noatanga a Ihowa. <sup>3</sup> He tangata iwi ke, tohea atu: ko tau mea ia i tou teina, me  
 tuku noa e tou ringa. <sup>4</sup> Engari hoki me kore te rawakore i roto i a koe; ka manaaki rawa hoki a  
 Ihowa i a koe i runga i te whenua ka homai nei e Ihowa, e tou Atua, ki a koe, kia tangohia hei kainga  
 tupu: <sup>5</sup> Ki te ata whakarongo i a koe ki te reo o Ihowa, o tou Atua, kia puritia, kia mahia enei  
 whakahau katoa e whakahau nei ahau i tenei ra ki a koe. <sup>6</sup> No te mea ka manaakitia koe e Ihowa,

e tou Atua, ka peratia me tana i ki ai ki a koe: a mau e whakatarewa moni ki nga iwi maha, ko koe ia kua e tango i te moni tarewa; a ko koe hei ariki mo nga iwi maha, kahore hoki ratou e ariki ki

<sup>7</sup> a koe. Ki te mea kei roto i a koe tetahi e rawakore ana, tetahi o ou teina, i roto i tetahi o ou kuwaha o tou whenua, e homai nei e Ihowa, e tou Atua, ki a koe, kua e whakauaua tou ngakau, kua hoki

e kopia tou ringa ki tou teina rawakore: <sup>8</sup> Engari me whakatuwhera marie tou ringa ki a ia, kia

ngawari hoki ki te whakatarewa moni ki a ia kia rite ki tona mate i te mea e hapa ana i a ia. <sup>9</sup> Kia tupato kei puta ake te whakaaro kino i roto i tou ngakau, kei mea, E tata ana te tau whitu, te tau tuku noa; a ka kino tou kanohi ki tou teina rawakore, a e kore e hoatu e koe ki a ia; na ka tangi atu

ia ki a Ihowa i a koe ka kino nei, a ka w hai hara koe. <sup>10</sup> Me tino hoatu e koe ki a ia, kua hoki tou ngakau e pouri, ina hoatu e koe ki a ia: ko te mea hoki tenei e manaaki ai a Ihowa, tou Atua, i a

koe, i au mahi katoa, i nga mea katoa e totoro atu ai tou ringa. <sup>11</sup> E kore hoki e kore te rawakore i te whenua: koia taku e whakahau nei ki a koe, e mea nei, Kia tuwhera tonu tou ringa ki tou teina, ki tou hunga matekai, ki ou rawakore, i tou whenua.

<sup>12</sup> Ki te hokona atu ki a koe tou teina, he tane Hiperu, he wahine Hiperu ranei, a ka mahi ki a koe e ono nga tau; na hei te whitu o nga tau me tuku ia kia haere noa atu i a koe. <sup>13</sup> A, ki te tuku

koe i a ia kia haere noa atu i a koe, kua ia e tukua rawakoretia atu: <sup>14</sup> Engari kia mahorahora te hoatu ki a ia i etahi o au hipi, o tau patunga witi, o tau poka waina hoki: me hoatu ki a ia etahi o

nga mea i hoatu e Ihowa, e tou Atua, hei manaaki mou. <sup>15</sup> Kia mahara hoki he pononga koe i mua, i te whenua o Ihipa, a na Ihowa, na tou Atua, koe i whakaora: koia ahau i whakahau ai i tenei mea

ki a koe inaianei. <sup>16</sup> Na ki te mea ia ki a koe, E kore ahau e mawehe atu i a koe; he aroha hoki nona ki a koutou ko tou whare, he pai no tana noho ki a koe; <sup>17</sup> Katahi koe ka tango i tetahi mea poka,

ka titi ai i tona taringa ki te tatau, a ka waiho ia hei pononga mau, oti tonu atu. Me pena hoki ki tau

pononga wahine. <sup>18</sup> Kei mea he pakeke rawa ki a koe, ina tukua ia kia haere noa atu i a koe; e rite ana hoki ana mahi ki a koe i nga tau e ono ki a nga kaimahi tokorua e utua ana: a ka manaaki a Ihowa, tou Atua, i a koe i nga mea katoa e mea ai koe.

<sup>19</sup> Ko nga toa matamua e whanau ana i roto i au kau, i au hipi, me whakatapu e koe ma Ihowa, ma tou Atua: kua e whakamahia tau puru matamua, kua hoki e kutikutia tau hipi matamua:

<sup>20</sup> Kainga ki te aroaro o Ihowa, o tou Atua, i tenei tau, i tenei tau, e koe, e tou whare, ki te wahi e

whiriwhiri ai a Ihowa, tou Atua: <sup>21</sup> A ki te mea he koha tona, ina ra he totitoti, he matapo, tetahi

atu koha kino ranei, kua ia e patua ma Ihowa, ma tou Atua. <sup>22</sup> Kainga i roto i ou kuwaha: ma te

poke, ma te pokenore taua mea e kai, pera me te kahera, me te hata. <sup>23</sup> Otiia kaua e kainga ona toto; ringihia atu ki te whenua, ano he wai.

## Chapter 16

<sup>1</sup> Kia mahara ki te marama, ki a Apipi, ka mahi i te kapenga ki a Ihowa, ki tou Atua: ko Apipi hoki te marama i whakaputaina mai ai koe e Ihowa, e tou Atua, i Ihipa i te po. <sup>2</sup> Na me patu e koe te kapenga ki a Ihowa, ki tou Atua, o te kahui hipi, o te kahui kau, ki te wahi e whiriwhiri ai a Ihowa kia waiho tona ingoa ki reira. <sup>3</sup> Kaua e kainga tahitia te paraoa rewena me taua mea; kia whitu nga ra e kai ai koe i te taro rawenakore me taua mea, ara i te taro tangihanga; i haere potatutatu mai hoki koe i te whenua o Ihipa: kia mahara ai koe ki te ra i puta mai ai koe i te whenua o Ihipa i nga ra katoa e ora ai koe. <sup>4</sup> A kia whitu nga ra e kore ai e kitea he rewena ki a koe i ou rohe katoa; kaua hoki e whakatoea mo te ata tetahi wahi o te kikokiko e patua e koe i te ahiahi o te ra tuatahi. <sup>5</sup> E kore e ahei kia patua te kapenga i roto i tetahi o ou tatau, e homai ana e Ihowa, e tou Atua, ki a koe: <sup>6</sup> Engari hei te wahi e whiriwhiri ai a Ihowa, tou Atua, kia waiho tona ingoa ki reira, hei reira koe patu ai i te kapenga i te ahiahi, i te toenetanga o te ra, i te wa ano i puta mai ai koe i Ihipa. <sup>7</sup> Na me tunu e koe, me kai hoki ki te wahi e whiriwhiri ai a Ihowa, tou Atua: a i te ata ka tahuri, ka haere ki ou teneti. <sup>8</sup> E ono nga ra e kai ai koe i te taro rawenakore: a i te ra whitu ko te huihui nui ki a Ihowa, ki tou Atua: kaua tetahi mahi e mahia i taua ra. <sup>9</sup> Taua e koe, kia whitu nga wiki: kei tau tukunga mataati i te toronaihi ki te kotinga koe timata mai ai te tatau i nga wiki e whitu. <sup>10</sup> Na me mahi te hakari o nga wiki ki a Ihowa, ki tou Atua, ki tetahi tahua, he mea hoatu noa na tou ringa; kia rite tau e hoatu ai ki te manaaki a Ihowa, a tou Atua, i a koe: <sup>11</sup> Na ka koa koe ki te aroaro o Ihowa, o tou Atua, a koe, koutou tahi ko tau tama, ko tau tamahine, me tau pononga tane, me tau pononga wahine, me te Riwaiti i roto i ou tatau, me te manene, me te pani, me te pouaru i roto i a koe, ki te wahi i whiriwhiria e Ihowa, e tou Atua, kia waiho tona ingoa ki reira. <sup>12</sup> A kia mahara koe he pononga koe i Ihipa i mua: me pupuri hoki, me mahi enei tikanga. <sup>13</sup> Me mahi te hakari whare wharau, kia whitu nga ra, ua poto i a koe te kohikohi mai i tau patunga witi me tau poka waina: <sup>14</sup> A ka koa koe ki tau hakari, a koe, koutou tahi ko tau tama, ko tau tamahine, ko tau pononga tane, ko tau pononga wahine, me te Riwaiti, te manene, te pani me te pouaru i roto i ou tatau. <sup>15</sup> Kia whitu nga ra o tau hakari ki a Ihowa, ki tou Atua, i te wahi e whiriwhiri ai a Ihowa:

ka manaaki hoki a Ihowa, tou Atua, i a koe i au hua katoa, i nga mahi katoa hoki a ou ringa, a ka  
<sup>16</sup>  
tino harakoa koe. E toru nga wa o te tau e kitea ai ou tane katoa ki te aroaro o Ihowa, o tou Atua,  
ki te wahi e whiriwhiri ai ia: ko te hakari taro rewenakore, ko te hakari o nga wiki, ko te hakari  
<sup>17</sup>  
whare wharau: kua hoki e puta kau ki te aroaro o Ihowa: Me homai e ia tangata te mea e taea  
e ia, kia rite ki te manaaki i homai e Ihowa, e tou Atua, ki a koe.

<sup>18</sup>  
Whakaturia etahi kaiwhakawa, me etahi rangatira mou i ou kuwaha katoa, e homai ana e  
<sup>19</sup>  
Ihowa, e tou Atua, ki a koe, mo ou iwi: kia tika hoki ta ratou whakawa mo te iwi. Kua e  
whakapeaua ketia te whakawa; kua hoki e whakapai kanohi; kua ano e tango i te utu whakapati:  
he mea whakamatapo hoki te utu whakapati i nga kanohi o te hunga whakaaro nui, he mea whakapeau  
<sup>20</sup>  
ke i nga kupu a te hunga tika. Ko te mea tika anake tau e whai ai, kia ora ai koe, kia noho ai  
<sup>21</sup>  
hoki ki te whenua e homai nei e Ihowa, e tou Atua, ki a koe. Kua e whakatokia e koe he Ahera  
<sup>22</sup>  
o tehea momo rakau ki te taha o te aata a Ihowa, a tou Atua, e hanga e koe. Kua ano hoki e  
whakaturia ake tetahi pou whakapakoko mau: e kinongia nei e Ihowa, e tou Atua.

## Chapter 17

<sup>1</sup>  
Kua e patua ma Ihowa, ma tou Atua, tetahi kau, hipi ranei, he koha tona, tetahi atu he ranei:  
<sup>2</sup>  
he mea whakarihariha hoki tena ki a Ihowa, ki tou Atua. Ki te mea ka kitea i roto i a koe, i roto  
i tetahi o ou tatau e homai nei e Ihowa, e tou Atua, ki a koe tetahi tangata, tetahi wahine ranei, i  
<sup>3</sup>  
mahi i te kino ki te titiro a Ihowa, a tou Atua, i whakapaheke hoki i tanga kawenata, I haere hoki,  
i mahi ki nga atua ke, i koropiko ki a ratou, ki te ra ranei, ki te marama ranei, ki tetahi ranei o nga  
<sup>4</sup>  
mano o te rangi kihai nei i whakaritea atu e ahau; A ka korerotia ki a koe, a ka rongu koe, na me  
ata ui marie e koe, na, mehemea he tika, he pono te korero, kei te meatia taua mea whakarihariha  
<sup>5</sup>  
i roto i a Iharaira: Me whakaputa e koe taua tangata, taua wahine ranei, i mahi nei i taua mea  
<sup>6</sup>  
kino, ki ou tatau, taua tangata, taua wahine ranei; ka aki ai i a raua ki te kohatu, a mate noa. Ma  
te kupu a nga kaiwhakaatu tokorua, a nga kaiwhakaatu tokotoru ranei, e mate ai te tangata e tika  
<sup>7</sup>  
ana kia whakamatea; e kore ia e mate i te kupu a te kaiwhakaatu kotahi. Ko nga ringa o nga  
kaiwhakaatu te pa wawe ki a ia hei whakamate i a ia, a muri iho ko nga ringa o te iwi katoa. Penei  
ka whakakorea atu e koe te kino i roto i a koe.

<sup>8</sup>  
Ki te ara ake tetahi take pakeke rawa i a koe te whakawa, he toto ki te toto, he whakawa ki  
te whakawa, he patu ki te patu, he take tautohetohe i roto i ou tatau: na me whakatika koe, me haere

9  
 ki runga ki te wahi e whiriwhiri ai a Ihowa, tou Atua; A ka tae koe ki nga tohunga, ki nga Riwaiti,  
 ki te kaiwhakawa hoki e whakarite ana i aua ra: a ka ui koe; a ma ratou e whakapuaki ki a koe te  
 10  
 tikanga mo te whakarite: Na me mahi e koe ta ratou e whakapuaki ai ki a koe i taua wahi i  
 whiriwhiri ai a Ihowa; kia tupato hoki kia rite te meatanga ki nga mea katoa e kiia e ratou ki a koe:  
 11  
 Kia rite tau meatanga ki te tikanga o te ture e kiia e ratou ki a koe, ki te ritenga hoki e korerotia  
 e ratou ki a koe: kaua e peka ke atu, ki matau ranei, ki maui ranei, i te kupu e whakapuakina e ratou  
 12  
 ki a koe. A, ki te poka wahi tetahi tangata, kahore e whakarongo ki te tohunga e tu ana, e minita  
 ana i reira i te aroaro o Ihowa, o tou Atua, ki te kaiwhakawa ranei, me whakamate taua tangata; a  
 13  
 ka whakakorea atu i koe te kino i roto i a Iharaira. A ka rongo katoa te iwi, ka wehi, e kore e  
 poka wahi noa i muri iho.  
 14  
 Ka tae koe ki te whenua e homai ana e Ihowa, e tou Atua, ki a koe, a ka riro mai a reira i a  
 koe, a ka noho koe ki reira, ka mea hoki, Ka meinga e ahau tetahi kingi moku, ka pera me nga iwi  
 15  
 katoa i tetahi taha oku, i tetahi taha; Ko ta Ihowa, ko ta tou Atua e whiriwhiri ai, ko ia anake tau  
 e mea ai hei kingi mou: ko tetahi o ou tuakana tau e mea ai hei kingi mou: e kore e ahei kia meatia  
 16  
 e koe hei kingi mou te tangata iwi ke, ehara nei i te tuakana nou. Otiia kua ia e whakamaha i  
 te hoiho mona, kua ano hoki e whakahokia te iwi ki Ihipa, hei whakamaha i nga hoiho: kua mea  
 17  
 nei hoki a Ihowa ki a koutou, E kore koutou e hoki na taua huarahi a mua ake nei. Kua ano ia  
 e whakamaha wahine mana, kei riro ke tona ngakau: kua ano hoki e whakanuia rawatia e ia te  
 18  
 hiriwa me te koura mana. A, ka noho ia ki te torona o tona rangatiratanga, na me tuhituhi e ia  
 19  
 ki tetahi pukapua nga kupu o tenei ture, no ena i te aroaro o nga tohunga o nga Riwaiti: A hei  
 a ia takoto ai, a me korero ia ki reira i nga ra katoa e ora ai ia: kia ako ai ia ki te wehi ki a Ihowa,  
 20  
 ki tona Atua, ki te pupuri i nga kupu katoa o tenei ture, i enei tikanga, hei mahi mana: Kei  
 whakakake tona ngakau ki ona teina, kei peka ke atu hoki ia i te whakahau ki matau, ki maui: kia  
 roa ai ona ra i tona kingitanga, ona me o ana tama, i waenganui i a Iharaira.

## Chapter 18

1  
 Kua tetahi wahi, tetahi kainga tupu ranei i roto i a Iharaira mo nga tohunga, mo nga Riwaiti,  
 mo te iwi katoa ano hoki o Riwai: ko nga whakahere ahi a Ihowa, ko ona taonga ake hoki, hei kai  
 2  
 ma ratou. A kahore tetahi kainga tupu mo ratou i waenganui i o ratou tuakana: ko Ihowa, ko ia  
 3  
 to ratou taonga tupu, pera hoki me tana i korero ai ki a ratou. A ko te tikanga tenei mo nga mea

a te iwi ma nga tohunga, mo a nga tangata e patu ana i te patunga tapu, ahakoa kau, ahakoa hipi,  
 me homai e ratou ki te tohunga te peke, nga paparinga e rua, me te puku. <sup>4</sup> Ko nga hua matamua  
 o tau witi, o tau waina, o tau hinu, me te huruhuru matamua o au hipi, me hoatu ki a ia. <sup>5</sup> No te  
 mea kua whiriwhiria ia e Ihowa, e tou Atua, i roto i ou iwi katoa, kia tu hei minita i runga i te ingoa  
 o Ihowa, a ia me ana tama ake tonu atu. <sup>6</sup> A ki te haere mai tetahi Riwaiti i hea noa atu o Iharaira,  
 i tetahi o ou kuwaha i noho ai ia, a ka tae mai me te hiahia katoa o tona ngakau ki te wahi e  
 whiriwhiria e Ihowa; <sup>7</sup> Na me minita ia i runga i te ingoa o Ihowa, o tona Atua, me pera me ona  
 tuakana katoa me nga Riwaiti, e tu nei i reira i te aroaro o Ihowa. <sup>8</sup> Kia rite te wahi hei kai ma  
 ratou, haunga ano nga utu i a ia mo nga taonga a ona matua.

<sup>9</sup> E tae koe ki te whenua e homai ana e Ihowa, e tou Atua, ki a koe, kei ako koe ki te mahi i  
 nga mea whakarihariha a ena iwi. <sup>10</sup> Kei kitea i roto i a koe tetahi e mea ana i tana tama, i tana  
 tamahine ranei, kia haere i roto i te ahi, tetahi tohunga whakaaro ki nga tohu, tetahi e whakaari ana  
 i nga mea kei mua, tetahi tohunga maori, tetahi tohunga makutu ranei, <sup>11</sup> Tetahi tohunga whaiwhaia  
 ranei, tetahi kaiui i te atua maori, tetahi mata maori ranei, tetahi kaiui i te tupapaku. <sup>12</sup> No te mea  
 e whakarihariha ana a Ihowa ki nga tangata katoa e mea ana i ena mea: a na aua mea whakarihariha  
 i peia ai ratou i tou aroaro e Ihowa, e tou Atua. <sup>13</sup> Kia tino tika koe i te aroaro o Ihowa, o tou Atua.

<sup>14</sup> Ko enei iwi hoki, ka riro nei i a koe, e whakarongo ana ki nga tohunga taima, ki nga tohunga  
 maori: tena ko koe, e kore a Ihowa, tou Atua, e tuku i a koe kia pera.

<sup>15</sup> Ma Ihowa, ma tou Atua, e whakaara ake he poropiti mou i roto i a koe, no ou teina, he rite  
 mai ki ahau; ko ia ta koutou e whakarongo ai; <sup>16</sup> Hei whakarite mo nga mea katoa i inoi ai koe ki  
 a Ihowa, ki tou Atua, i Horepa i te ra o te huihuinga, i mea ai, Kaua ahau e rongu atu ano i te ro  
 o Ihowa, o toku Atua, kaua hoki ahau e titiro ano ki tenei ahi nui, kei mate ahau. <sup>17</sup> Na ka mea a  
 Ihowa ki ahau, He pai ta ratou korero i korero na. <sup>18</sup> Maku e whakaara ake he poropiti mo ratou i  
 roto i o ratou teina, rite tahi ki a koe, a ka hoatu e ahau aku kupu ki tona waha; mana e korero ki a  
 ratou nga mea katoa e korero ai ahau ki a ia. <sup>19</sup> Na ko te tangata e kore e whakarongo ki aku kupu,  
 e korero ai ia i runga i toku ingoa, maku e rapu he utu i a ia. <sup>20</sup> Tena ko te poropiti e poka noa te  
 korero i runga i toku ingoa, i tetahi kupu kihai nei i whakahaua atu e ahau kia korerotia, e korero  
 ranei i runga i te ingoa o nga atua ke, ina, ka mate taua poropiti. <sup>21</sup> A ki te mea koe i roto i tou  
 ngakau, Ma te aha e mohio ai tatou ki te kupu kihai nei i korerotia e Ihowa? <sup>22</sup> Ki te korero tetahi

poropiti i runga i te ingoa o Ihowa, a kahore e puta mai te mea, kahore hoki e tae mai, koia tena te mea kihai i korerotia e Ihowa: i korero poka noa te poropiti, kua koe e wehi i a ia.

## Chapter 19

<sup>1</sup> E whakangaromia e Ihowa, e tou Atua, nga iwi no ratou nei te whenua ka homai nei e Ihowa, e tou Atua, ki a koe, a ka riro to ratou wahi i a koe, a ka noho koe ki o ratou pa, ki o ratou whare:

<sup>2</sup> Me wehe e koe kia toru nga pa mou i waenganui o tou whenua, ka homai nei e Ihowa, e tou Atua,

ki a koe, hei kainga pumau. <sup>3</sup> Whakapaia e koe he huarahi, ka tapahi i nga rohe o tou whenua, ka whakawhiwhia nei e Ihowa, e tou Atua, ki a koe, kia toru nga wahanga, hei rerenga atu mo nga

tangata whakamate katoa. <sup>4</sup> A ko te ahua tenei mo te tangata whakamate, e rere ai ki reira, e ora ai hoki: ara ki te patua e ia tona hoa he mea urupa, kahore hoki ona kino ki a ia i mua atu; <sup>5</sup> Penei me te tangata ka haere tahi raua ko tona koa ki te ngahere ki te tapahi rakau, a ka aki atu tona ringa i te toki ki te tua i te rakau, na ka maunu te pane i te kakau, pono tonu ki tona hoa, a mate iho; na ka

rere atu ia ki tetahi o aua pa, a ka ora: <sup>6</sup> Kei whai te kaitakitaki toto i te tangata whakamate, i te mea e pawerawera ana tona ngakau, a ka hopu i a ia, he roa hoki no te huarahi, a ka patu i a ia;

kihai ia i tika te mate mona, no te mea kahore ia i kino ki a ia i mua atu. <sup>7</sup> Koia taku e whakahau atu nei ki a koe, e mea nei, Me wehe e koe kia toru nga pa mou. <sup>8</sup> A ki te whakanui a Ihowa, tou Atua, i tou rohe, ki te rite ki tana i oati ai ki ou matua, a ka homai e ia te whenua katoa i mea ai ia

kia homai ki ou matua; <sup>9</sup> Ki te puritia e koe, ki te mahia enei whakahau katoa, e whakahau atu nei ahau ki a koe i tenei ra, ara kia aroha ki a Ihowa, ki tou Atua, kia haere hoki i ona huarahi i nga ra katoa; ko reira koe tango ai kia toru atu nga pa mou, hei tapiri mo en a pa e toru: <sup>10</sup> Kei whakahekea te toto harakore ki waenganui o tou whenua, ka homai nei e Ihowa, e tou Atua, ki a koe hei kainga,

kei whakairia hoki te toto ki runga ki a koe. <sup>11</sup> Engari ia ki te kino tetahi ki tona hoa, a ka whanga ki a ia, ka whakatika hoki ki a ia, ka patu rawa i a ia, no ka mate ia; a ka rere ia ki tetahi o aua pa:

<sup>12</sup> Na me tono e nga kaumatua o tona pa, ka tiki atu hoki i a ia i reira, ka hoatu i a ia ki te ringa o te kaitakitaki toto, kia mate ai ia. <sup>13</sup> Kei tohu tou kanohi i a ia, engari me whakakahore e koe te toto harakore i roto i a Iharaira, kia whiwhi ai koe ki te pai.

<sup>14</sup> Kei nekehia ketia e koe te rohe o tou hoa, i rohea ai e nga tangata onamata, ki tou kainga e nohoia e koe i te whenua ka homai nei e Ihowa, e tou Atua, ki a koe hei kainga. <sup>15</sup> Kei whakatika ki te tangata te kaiwhakaatu kotahi mo te kino, mo tetahi hara ranei, ahakoa he aha, e hara ai ia:



ma te kupu a nga kaiwhakaatu tokorua, ma te kupu ranei a nga kaiwhakaatu tokotoru, e whakatikaia  
<sup>16</sup> ai te korero. Ki te whakatika tetahi kaiwhakaatu teka ki tetahi tangata, hei korero teka i mahi ia  
<sup>17</sup> i te he; Na me tu nga tangata tokorua, na raua nei te totohe, ki te aroaro o Ihowa, ki te aroaro  
<sup>18</sup> hoki o nga tohunga ratou ko nga kaiwhakawa e whakariterite ana i aua ra; Na me whakataki  
marie e nga kaiwhakawa; a ka kitea he kaiwhakaatu teka te kaiwhakaatu, he teka tana korero mo  
<sup>19</sup> tona teina; Na peratia ia e koutou me tana i whakaaro ai kia meatia ki tona teina: penei ka  
<sup>20</sup> whakakorea te kino i roto i a koe. A ka rongu te nuinga, a ka wehi, e kore hoki e mea i te kino  
<sup>21</sup> pera i roto i a koe a muri. Kua ano tou kanohi e tohu; ko to te ora utu he ora, to te kanohi he  
kanohi, to te niho he niho, to te ringa he ringa, to te waewae he waewae.

## Chapter 20

<sup>1</sup> E haere koe ki te whawhai ki ou hoariri, a ka kite i nga hoiho me nga hariata, i te iwi hoki he  
tokomaha ake i a koe, kei wehi i a ratou: kei a koe hoki a Ihowa, tou Atua, i kawea mai ai koe i te  
<sup>2</sup> whenua o Ihipa. A, ka whakatata koutou ki te whawhai, na me haere mai te tohunga, me korero  
<sup>3</sup> ki te iwi, Ka mea ki a ratou, Whakarongo, e Iharaira, e whakatata atu ana koutou aiane ki te  
whawhai ki o koutou hoariri: kei hopi o koutou ngakau; kua e wehi; kua e potatutatu, kua ano  
<sup>4</sup> hoki e pawera i to ratou aroaro; Ko Ihowa hoki, ko to koutou Atua, ko ia te haere tahi ana i a  
<sup>5</sup> koutou, mana ta koutou whawhai ki o koutou hoariri, mana koutou e whakaora. Me korero ano  
hoki nga kaiwhakahauhau ki te iwi, me ki atu, Tenei ranei tetahi kua hanga e ia he whare hou, a  
kahore ano i taia te kawa? me haere ia, me hoki atu ki tona whare, kei mate ki te whawhaitanga,  
<sup>6</sup> ka riro ma te tangata ke e ta te kawa. Tenei ranei tetahi kua whakatokia e ia he mara waina, a  
kahore ano i kainga nga hua? me haere ia, me hoki atu ki tona whare, kei mate ki te whawhaitanga,  
<sup>7</sup> ka riro mate tangata ke e kai. Tenei ranei tetahi kua oti tetahi wahine te taumau mana, a kahore  
ano i tangohia e ia? me haere ia, me hoki atu ki tona whare, kei mate ki te whawhaitanga, ka riro  
<sup>8</sup> ma te tangata ke e tango. A me korero ano nga kaiwhakahauhau ki te iwi, me ki atu, Tenei ranei  
tetahi e wehi ana, e hopi ana te ngakau? me haere ia, me hoki atu ki tona whare, kei ngohe nga  
<sup>9</sup> ngakau o ona teina, kei rite ki tona ngakau. Na ka mutu te korero a nga kaiwhakahauhau ki te  
iwi, me whakarite e ratou etahi rangatira ope hai upoko mo te iwi.

10

Ka whakatata atu koe ki te tatau ki tetahi pa, na me karanga atu e koe te rangimarie ki reira.

11

A, ki te mea he rangimarie tana e whakahoki mai ai ki a koe, a ka whakapuaretia ki a koe, katahi ka waiho nga tangata katoa e kitea e koe ki reira hei kaihomai takoha ki a koe, hei apa ano ratou

12

mau. A, ki te kore e mau ta reira rongu ki a koe, a ka anga ki te whawhai ki a koe, katahi ka

13

whakapaea e koe: A, ki te hoatu e Ihowa, e tou Atua, ki ou ringa, na me patu e koe nga tane

14

katoa o reira ki te mata o te hoari: Ko nga wahine ia me nga tamariki, ko nga kararehe me nga mea katoa i roto i te pa, ko nga taonga katoa o reira, me tango e koe mau; a ka pau i a koe nga mea

15

a ou hoariri, e hoatu ana e Ihowa, e tou Atua, ki a koe. Ko tenei tau e mea ai ki nga pa katoa e

16

mamao rawa atu ana i a koe, ehara nei i te pa no enei iwi. Ko nga pa ia o enei iwi, e hoatu nei e Ihowa, e tou Atua, ki a koe hei kainga tupu, kua e whakaorangia tetahi mea e whai manawa ana:

17

Engari me whakangaro rawa ratou e koe; nga Hiti, nga Amori, nga Kanaani, nga Perihi, nga

18

Hiwi, nga Iepuhi; kia rite ki ta Ihowa, ki ta tou Atua, i whakahau ai ki a koe: Kei whakaakona koutou e ratou ki te mahi i a ratou mahi whakarihariha katoa e mahia nei e ratou ki o ratou atua; a

19

ka hara koutou ki a Ihowa, ki to koutou Atua. Ki te maha nga ra e whakapaea ai e koe he pa, e tauria ai kia horo, kei whakakorea e koe nga rakau o reira, kai akina atu ki te toki; no te mea hei

20

kai ena mau, a kua e tuaina e koe; he tangata koia te rakau o te parae kia whakapaea e koe? Ko nga rakau anake e mohio ai koe ehara i te rakau kai, ko ena au e whakakore, ka tua ki raro; a ka hanga he taiepa whakapae mo te pa e whawhai ana ki a koe, a horo noa.

## Chapter 21

1

E kitea te tangata i whakamatea ki te whenua i homai e Ihowa, e tou Atua, hei kainga mou,

2

e takoto ana i te parae, a kahore e mohiotia na wai i patu: Na me puta mai ou kaumatua me ou

3

kaiwhakawa, ka whanganga atu ki nga pa i tetahi taha o te tupapaku, i tetahi taha: Na ko te pa e tata ana ki te tupapaku, me tiki e nga kaumatua o taua pa tetahi kua kau, hei te uha, hei te mea

4

kahore ano i whakamahia, kahore nei i to ioka: Me kawe ano hoki e nga kaumatua o taua pa te kua kau ki raro, ki tetahi awaawa wai, kahore nei i ngakia, i whakatokia ranei, ka whawhati ai i

5

te kaki o te kau ki reira, ki te awaawa: Na ka whakatata nga tohunga, nga tama a Riwai; ko ratou hoki ta Ihowa, ta tou Atua, i whiriwhiri ai hei minita ki a ia, hei manaaki ano hoki i runga i te ingoa

o Ihowa; a ma ratou te kupu mo nga tautohe katoa, mo nga patu katoa: <sup>6</sup> Na me horoi e nga kaumatua katoa o taua pa, e tata ana ki te tupapaku, o ratou ringa ki runga ki te kua kau i whatiia nei te kaki

ki te awaawa: <sup>7</sup> Na ka korero ratou, ka mea, Kihai i whakahekea tenei toto e o matou ringa, kihai

ano o matou kanohi i kite. <sup>8</sup> Kia maria ki tou iwi ki a Iharaira, e Ihowa, i hokona nei e koe, kua ano hoki e whakairia he toto harakore ki runga ki tau iwi, ki a Iharaira. Na ka whai whakamarie

ratou mo aua toto. <sup>9</sup> Penei ka whakakorea te toto harakore i roto i a koe, ina mea koe i te mea e tika ana ki ta Ihowa titiro.

<sup>10</sup>

Ka haere koe ki te whawhai ki ou hoariri, a ka homai ratou e Ihowa, e tou Atua, ki ou ringa,

a ka whakaraua ratou e koe hei whakarau; <sup>11</sup> A ka kite koe i tetahi wahine ataahua i roto i nga

whakarau, a ka hiahia koe ki a ia, ka mea ki te tango i a ia hei wahine mau; <sup>12</sup> Na me kawea ia e

koe ki tou whare; a me heu e ia tona matenga, ka whakapai i ona maikuku; <sup>13</sup> Na me whakarere e ia te kakahu o tona whakaraunga, a ka noho ki tou whare, ka tangi ki tona papa, ki tona whaea, kia kotahi tino marama; a muri iho ka haere atu koe ki a ia, a ka meinga hei tahu ki a ia, ko ia hoki hei

wahine mau. <sup>14</sup> A, ki te kahore koe whakaahuareka ki a ia, me tuku atu ia e koe ki tana wahi e pai ai, kua rawa e hokona ki te moni, kua hoki e waiho hei mea pononga; he mea hoki kua whakaititia nei ia e koe.

<sup>15</sup>

Ki te tokorua nga wahine a tetahi tangata, kotahi e arohaina ana, kotahi e kinongia ana, a kua whanau he tamariki mana i te mea e arohaina ana, i te mea hoki e kinongia ana; a na te mea e

kinongia ana te tama matamua: <sup>16</sup> A, ka tae ki te ra e whakarerea iho ai e ia ana mea ma ana tamariki, e kore e ahei kia meinga hei matamua te tama a te mea e arohaina ana, ara hei kauaemua

mo te tino matamua, mo te tama e te wahine e kinongia ana: <sup>17</sup> Engari me whakaae ia ki te tama a te mea e kinongia ana, ko ia te matamua, me hoatu ki a ia nga wahi e rua o ana mea katoa: no te mea ko ia te timatanga o tona kaha; mena nga tikanga o te matamua.

<sup>18</sup>

Ki te mea he whakakeke, he whakatoi, te tama a tetahi tangata, a kahore e rongu ki te reo o

tona papa, ki te reo ranei o tona whaea, a ahakoa ka whiua e raua, kahore e rongu ki a raua: <sup>19</sup> Na me mau tona papa raua ko tona whaea ki a ia, ka kawea i a ia ki nga kaumatua o tona pa, ki te kuwaha

o tona wahi; <sup>20</sup> A ka mea ki nga kaumatua o tona pa, Ko tenei tama a maua he whakakeke, he

whakatoi, a e kore e rongu ki o maua reo; he tangata haututu, he poro haurangi. <sup>21</sup> Katahi nga tangata katoa o tona pa ka aki i a ia ki te kohatu, kia mate; a ka whakakorea atu e koe te kino i roto

i a koe, a ka rongu a Iharaira katoa, ka wehi. <sup>22</sup> Ki te mea ano he hara to te tangata e tika ai te mate

mona, a ka whakamatea, a ka taronatia e koe ki runga ki te rakau: <sup>23</sup> Kua e waiho tona tinana i runga i te rakau i te po, engari me tino tanu i taua rangi ano; he mea kainga hoki na te Atua te tangata i taronatia; kei poke tou oneone, e hoatu nei e Ihowa, e tou Atua, ki a koe hei kainga tupu.

## Chapter 22

<sup>1</sup> E kite koe i te kau a tou teina, i tana hipi ranei, e atiutiu ke ana, kei ninihi atu koe i a raua: me ata whakahoki ano e koe ki tou teina. <sup>2</sup> A, ki te kahore tou teina e tata mai ana ki a koe, ki te kahore ranei kore e mohio ki a ia, na me kawe mai ki tou whare, a ki a koe noho ai, a rapu noa tou teina i a ia; katahi koe ka whakahoki atu ai ki a ia. <sup>3</sup> Me pena ano e koe ki tana kaihe; a me pena ano e koe ki tona kakahu; me pena ano hoki ki nga mea ngaro katoa a tou teina, ina ngaro i a ia, a e kitea e koe; e kore e ahei kia ninihi koe. <sup>4</sup> E kite koe i te kaihe a tou teina, i tana kau ranei, kua hinga i te ara, kei ninihi koe i a raua: me tino awhina koe i a ia ki te whakaara i a raua.

<sup>5</sup> Kei kakahuria e te wahine tetahi mea o te tane, kei kakahuria hoki e te tane te kakahu o te wahine: he mea whakarihariha hoki ki a Ihowa, ki tou Atua, te hunga katoa e pena ana. <sup>6</sup> Ki te pono koe ki te ohanga manu i te ara, i runga i te rakau, i te whenua ranei, me nga pi ano, me nga hua ranei, me te katua e pehi ana i nga pi, i nga hua ranei, kei tangohia ngatahitia e koe te katua me nga pi: <sup>7</sup> Me tuku tonu atu e koe te katua, ka tango ai i nga pi mau; kia whiwhi ai koe ki te pai, kia roa ai ou ra. <sup>8</sup> Ki te hanga koe he whare hou, me hanga ano he taiepa mo tou tuanui, kei whai toto i a koe tou whare, ina taka te tangata i runga. <sup>9</sup> Kua e whakauruuruua nga purapura e whakatokia e koe ki tau mara waina; kei poke te hua o te purapura e whakatokia e koe, me nga hua o te mara waina. <sup>10</sup> Kua e huihuia te kau ki te kaihe hei parau mau. <sup>11</sup> Kei kakahuria e koe te mea kakano whakauru, ara te huruhuru hipi i whakaurua nei ki te rinena. <sup>12</sup> Hanga etahi taniko mau mo nga tapa e wha o tou kakahu e kakahu ai koe.

<sup>13</sup> Ki te tango te tangata i te wahine, a ka haere ki roto, ki a ia, a ka kino ki a ia, <sup>14</sup> A ka hahani ki a ia, ka whakakinokino i tona ingoa, a ka mea, I tango ahau i tenei wahine, a, i toku whakatatanga ki a ia, ka kite ahau ehara ia i te wahine: <sup>15</sup> Katahi te papa raua ko te whaea o te kotiro ka tiki, ka kawe i nga tohu o te wahinetanga o te kotiro ki nga kaumatua o te pa, ki te kuwaha: <sup>16</sup> A ka korero te papa o te kotiro ki nga kaumatua, I hoatu e ahau taku tamahine nei hei wahine ma tenei tangata, a e kinongia ana e ia: <sup>17</sup> Na, tenei ia te mea nei kia korerotia kinotia ia, e mea ana, Kihai ahau i

kite tohu he wahine tau tamahine; na ko nga tohu enei o te wahinetanga o taku kotiro. Na me hora  
 e raua te kakahu ki te aroaro o nga kaumatua o te pa. <sup>18</sup> Katahi ka mau nga kaumatua o taua pa ki  
<sup>19</sup> taua tangata, ka whiu i a ia; A me tango e ratou i taua tangata kia kotahi rau nga hekere hiriwa  
 hei utu, ka hoatu ai ki te papa o te kotiro, mona hoki i whakairi i te ingoa kino ki runga ki tetahi o  
 nga wahine i Iharaira: a hei wahine ia mana; e kore e ahei kia whakarerea e ia i nga ra katoa e ora  
<sup>20</sup> ai ia. <sup>21</sup> Ki te mea ia he tika taua mea, kahore i kitea nga tohu o te wahinetanga o te kotiro: Na  
 me kawe mai e ratou te kotiro ki te kuwaha o te whare o tona papa, a me aki e nga tangata o tona  
 pa ki te kohatu, kia mate: mo tana mahi pouau i roto i a Iharaira, mo tana kairautanga i roto i te  
<sup>22</sup> whare o tona papa: a ka whakakorea e koe te kino i roto i a koe. Ki te mau tetahi tangata e takoto  
 ana ki te wahine whai tahu, na me whakamate raua tokorua, te tane i takoto ki te wahine, me te  
<sup>23</sup> wahine ano hoki; a ka whakakorea e koe te kino i roto i a Iharaira. Mehemea tera tetahi kotiro,  
 he wahine, i taumautia ma te tane, a ka tupono tetahi tangata ki a ia i te pa, a ka takotoria e ia;  
<sup>24</sup> Me kawe raua ki te kuwaha o tena pa, me aki ki te kohatu, kia mate; te kotiro, i te mea i roto ia  
 i te pa kihai ia i karanga; te tangata, mona i whakaiti i te wahine a tona hoa: a ka whakakorea atu  
<sup>25</sup> e koe te kino i roto i a koe. Otiia ki te tupono te tangata, i te pare, ki tetahi kotiro kua oti te  
 taumau, a ka hopukia atu ia e te tangata ra, ka takotoria hoki e ia: na ko taua tangata anake i takoto  
<sup>26</sup> nei ki a ia e mate: Kauaka ia e ahatia e koe te kotiro; kahore hoki o te kotiro hara e mate ai: e  
<sup>27</sup> rite ana hoki tenei mea ki te whakatikanga ake o te tangata ki tona hoa, a kohurutia iho: I tupono  
 hoki te tane ki a ia i te parae; a i karanga te kotiro i taumautia nei, a kahore tetahi hei whakaora i a  
<sup>28</sup> ia. Ki te tupono tetahi tangata ki te kotiro, ki te wahine, kahore nei i taumautia, a ka hopu i a ia,  
<sup>29</sup> ka takoto ki a ia, a ka kitea raua; Na kia rima tekau nga hekere hiriwa e homai ki te papa o te  
 kotiro e te tangata i takoto nei ki a ia, a ka waiho te wahine hei wahine mana, mona i whakaiti i a  
<sup>30</sup> ia; e kore e ahei kia whakarerea e ia i nga ra katoa e ora ai ia. E kore e ahei kia tangohia e te  
 tangata te wahine a tona papa, kia hurahia hoki te remu o tona papa.

### Chapter 23

<sup>1</sup> Ko te tangata kua unakatia, kua romiromia, kua tapahia atu ranei tona mea ngaro, e kore e  
 uru ki roto ki te whakaminenga a Ihowa. <sup>2</sup> E kore e uru te poriro ki roto ki te whakaminenga a  
 Ihowa; ahakoa tae ki te tekau o ona whakatupuranga, e kore e uru ki roto ki te whakaminenga a  
<sup>3</sup> Ihowa. E kore e uru te Amoni, te Moapi ranei, ki roto ki te whakaminenga a Ihowa; ahakoa tae

ki te tekau o o ratou whakatupuranga, e kore e uru ki roto ki te whakaminenga a Ihowa ake ake:

4

Mo ratou kihai i whakatau i a koutou, me te mau taro mai, me te mau wai mai mo koutou ki te ara, i to koutou putanga mai i Ihipa; mo ratou hoki i utu i a Paraama, i te tama a Peoro i Petoro i

5

Mehopotamia, hei kanga mou. Otiia kihai a Ihowa, tou Atua, i pai ki te whakarongo ki ta Paraama; engari whakaputaina ketia ake e Ihowa, e tou Atua te kanga hei manaaki mou; no te mea e aroha

6

ana a Ihowa, tou Atua, ki a koe. Kei whai koe kia mau te rongu ki a ratou, kia kake ranei ratou i

7

nga ra katoa e ora ai koe. Kaua e whakarihariha ki te Eromi; ko tou tuakana hoki ia; kaua e

8

whakarihariha ki te Ihipiana; he manene hoki koe i tona whenua i mua. Kei te toru o nga whakatupuranga ka uru a ratou tamariki e whanau ai ki roto ki te whakaminenga a Ihowa.

9

Ki te haere a ope atu koe ki ou hoariri, kia tupato i nga mea kino katoa. Ki te mea kei roto i a koe tetahi tangata kahore i ma i te paheketanga o te po, na me haere atu ia ki waho o te puni;

10

kaua ia e haere ki roto ki te puni: 11 Otiia ka whakaahiahi, na me koroi ia e ia ki te wai; a ka toene

11

te ra, ka haere ia ki roto ki te puni. 12 A me waiho e koe tetahi wahi i waho o te puni, hei putanga

12

atu mou ki waho: 13 Kia whai kaheru hoki koe i roto i au mea; a ka noho koe ki waho, na me keru

13

e koe ki taua mea, a ka tahuri ki te tanu i te mea i puta i roto i a koe: 14 Kei te haereere hoki a Ihowa, tou Atua, i waenganui o tou puni, hei whakaora i a koe, hei tuku hoki i ou hoariri ki tou aroaro; mo reira kia tapu tou puni: kei kite ia i tetahi mea whakarihariha i roto i a koe, a ka tahuri ke i a koe.

14

15

Kaua e tukua atu ki tona rangatira te pononga i tahuti mai i tona rangatira ki a koe: 16 Me noho ia ki a koe, ki waenga ou, ki te wahi e whiriwhiri ai ia, ki tetahi o ou kuwaha, ki tana e pai ai:

16

kaua ia e tukinotia. 17 Kaua tetahi o nga tamahine a Iharaira e waiho hei kairau, kaua ano hoki

17

tetahi o nga tama a Iharaira e whakatangata o Horoma. 18 Kei kawea e koe te utu o te wahine kairau, te utu ranei o te kuri ki roto ki te whare o Ihowa, o tou Atua, hei mea ki taurangi: he mea

18

whakarihariha hoki ena e rua ki a Ihowa, ki tou Atua. 19 Kei whakatarewa koe i tetahi mea ki tou teina hei mea whakatupu; hei moni whakatupu, hei kai whakatupu, i tetahi ranei o nga mea e

19

whakatarewaina ana hei whakatupu: 20 He tangata ke, whakatarewaina atu te moni whakatupu; ki tou teina ia kaua e whakatarewaina: kia manaakitia ai koe e Ihowa, e tou Atua, i nga mea katoa e

20

totoro atu ai tou ringa i runga i te whenua e haere atu nei koe ki reira tango ai. 21 Ki te puaki tau ki taurangi ki a Ihowa, ki tou Atua, kei whakaroa ki te whakamana; no te mea ka whaia mai e Ihowa,

21

e tou Atua, ki a koe; a ka waiho hei hara mou. 22 Ki te kahore ia e puaki tau ki taurangi, e kore e

22

23  
waiho hei hara mou. Ko te mea i puta atu i ou ngutu kai mana i a koe, mahia; kia rite hoki ki tau ki taurangi ki a Ihowa, ki tou Atua, hei whakahere tuku noa, hei pera me ta tou mangai i korero ai.

24  
E haere koe ki te mara waina a tou hoa, kainga nga karepe e pai ai koe, a makona noa koe; kua ia e kohia etahi ki tau oko.

25  
E haere koe ki te witi kahore ano kia kotia a tou hoa, na ma tou ringa e kato etahi hua; kua ia he toronaihi e akina atu ki te witi a tou hoa, kahore ano kia kotia e ia.

## Chapter 24

1  
Ki te tango te tangata i te wahine, a ka marena i a ia, na, ki te kore ia e manakohia e ia, no te mea kua kitea e ia tetahi he ona, me tuhituhi e ia he pukapuka whakarere ki a ia, ka hoatu ki tona ringa, a ka tono atu i a ia ki waho o tona whare.

2  
A, ka puta ia i tona whare, ka ahei ia te haere a ka riro hei wahine ma tetahi atu.

3  
A, ki te kino to muri tahu ki a ia, a ka tuhituhia e ia he pukapuka whakarere ki a ia, ka hoatu hoki ki tona ringa, ka tono atu ano hoki i a ia i roto i tona whare; ki te mate ranei to muri tahu i tango nei i a ia hei wahine mana;

4  
E kore e ahei i te tahu tuatahi, nana nei ia i tono atu, te tango ano i a ia hei wahine mana i muri i tona whakapokenga; he mea whakarihariha hoki tena ki te aroaro o Ihowa; kua ano hoki e mea kia whai hara te whenua i hoatu nei e Ihowa, e tou A tua, ki a koe hei kainga tupu.

5  
Ki te tango te tangata i te wahine hou, kua ia e haere ki te whawhai, kua ano hoki tetahi mahi e whakaritea mana: me noho noa ia i tona whare kia kotahi tau, whakahari ai i te ngakau o tana wahine i tango ai.

6  
Kua e tangohia e te tangata to raro kohatu, to runga kohatu ranei o te mira, hei taunaha: he tango hoki tena i te oranga o te tangata hei taunaha.

7  
Ki te mau tetahi tangata e tahae ana i tetahi o ona teina o nga tama a Iharaira, hei pononga mana, hei hoko ranei mana, me mate taua tahae: a ka whakakorea atu e koe te kino i roto i a koe.

8  
Kia mahara, i nga panga mai o te repera, kia whakaritea marietia, kia mahia nga mea katoa e ako ai nga tohunga, nga Riwaiti, ki a koutou: kia mahara kia mahia taku i whakahau ai ki a ratou.

9  
Maharatia ta Ihowa, ta tou Atua, i mea ai ki a Miriama i te ara, i to koutou haerenga mai i Ihipa.

10  
Ki te whakatarewa atu koe i tetahi mea ki tou hoa, kua e haere ki roto ki tona whare ki te tiki atu i tana taunaha.

11  
Me tu atu koe i waho, a ma te tangata i a ia nei tau mea, e kawe mai te taunaha ki a koe ki waho.

12  
Otiia mehemea he rawakore taua tangata, kei moe koe me te takoto tahi mai tana taunaha:

13  
Me tino whakahoki

atu e koe te taunaha ki a ia ina toene te ra, kia moe ai ia i roto i tona kakahu, a ka manaaki i a koe: a ka waiho hei tika mou ki te aroaro o Ihowa, o tou Atua.

14

Kei tukinotia e koe te kaimahi, he rawakore, he mate, ahakoa no ou tuakana, no ou tangata

15

iwi ke ranei i tou whenua, i roto i ou kuwaha: Me hoatu e koe tona utu i tona ra, kei to te ra me te takoto ano taua mea; he rawakore hoki ia, a e okaka ana tona ngakau ki taua nea: kei karanga ia

16

ki a Ihowa mo tou kino, a ka waiho hei hara mou. E kore e whakamatea nga matua mo te he o nga tamariki, e kore ano hoki e whakamatea nga tamariki mo te he o nga matua: mo tona ake hara

17

ano e whakamatea ai tena tangata, tena. Kei whakapeaua ketia e koe te whakawa mo te manene,

18

mo te pani ranei; kua ano hoki e tangohia te kakahu o te pouaru hei taunaha: Engari kia mahara he pononga koe i Ihipa, a na Ihowa, na tou Atua, koe i whakaora mai i reira: koia ahau i whakahau

19

ai i a koe ki te mea i tenei mea. Ka kotia e koe au hua i tau mara, a ka wareware tetahi paihere i te mara, kei hoki koe ki te tiki: waiho ma te manene, ma te pani, ma te pouaru: kia manaakitia ai

20

koe e Ihowa, e tou Atua, i nga meatanga katoa a ou ringa. E taia e koe tau oriwa, kua e hoki

21

ano ki nga manga ketu ai: waiho ma te manene, ma te pani, ma te pouaru. E whakiiia e koe nga karepe o tau mara waina, kua e hamua i muri i a koe: waiho ma te manene, ma te pani, ma te

22

pouaru. Me mahara ano hoki koe he pononga koe i te whenua o Ihipa; koia ahau i whakahau ai i a koe kia mea i tenei mea.

## Chapter 25

1

Ki te mea he tautohe ta etahi, a ka haere mai kia whakawakia, a ka whakawakia e nga

2

kaiwhakariterite; me whakatika e ratou ta te tika, me whakahe ta te he; A, ki te meinga te tangata kino kia whiua, na me mea ia e te kaiwhakariterite kia takoto, kia whiua ki mua i tona aroaro, kia

3

rite ki tona kino te maha o nga whiu. Kia wha tekau ana whakapanga ki a ia, kua e maha ake: he mea hoki, ki te tuhene, a ka maha atu i enei nga whakapanga, na ka iti tou teina ki tau titiro.

4

Kua e whakamokatia te kau ina takahia e ia te witi.

5

Ki te noho tahi te taina me te tuakana, a ka mate tetahi o raua, a kahore ana tama, kua te wahine a te tangata i mate e marenatia ki waho, ki te tangata ke; me haere tona autane ki a ia, ka

6

tango ai i a ia hei wahine mana, me mea ki a ia nga mea e tika ana ma te autane. A, ka whanau tana matamua, ko ia hei whakarerenga iho mo te ingoa o tona tuakana, teina ranei, i mate nei, a ka



<sup>7</sup>  
 kore tona ingoa e horoia atu i roto i a Iharaira. Ki te kahore taua tangata e pai ki te tango i tona auwahine, katahi ka haere tona auwahine ki te kuwaha, ki nga kaumatua, a ka mea, E kore toku autane e pai ki te whakatupu ingoa mo tona tuakana, teina ranei, i roto i a Iharaira, e kore e meatia e ia nga mea e tika ana ma toku autane.

<sup>8</sup>  
 Katahi ka karangatia ia e nga kaumatua o tona pa, a ka

<sup>9</sup>  
 korero ratou ki a ia; a, ki te u tonu tana, a ka mea ia, E kore ahau e pai ki te tango i a ia; Katahi ka whakatata tona auwahine ki a ia i te tirohanga a nga kaumatua, a ka unu i tona hu i tona waewae, ka tuwha hoki ki tona mata, a ka korero ake, ka mea, Kia peneitia te tangata e kore e hanga i te

<sup>10</sup>  
 whare o tona tuakana, teina ranei. A ka huaina tona ingoa i roto i a Iharaira, Ko te whare o te

<sup>11</sup>  
 tangata i unuhia nei tona hu. Ki te whawhai etahi tangata ki a raua, a ka whakatata te wahine a tetahi ki te whakaora i tana tahu i te tangata e patu ana i a ia, a ka totoro tona ringa, ka mau hoki

<sup>12</sup>  
 ki ona wahi ngaro; Me tapahi atu e koe tona ringa, kaua e tohu tou kanohi.

<sup>13</sup>  
 Kaua e waiho i roto i tau kete nga kohatu pauna e kore e taurite, te mea nui, te mea iti.

<sup>14</sup>  
 Kaua e waiho i roto i tou whare nga mehua e kore e taurite, te mea nui, te mea iti.

<sup>15</sup>  
 Hei te mea rite tonu, hei te mea tika, tau kohatu pauna; hei te mea rite tonu, hei te mea tika, tau mehua: kia roa

<sup>16</sup>  
 ai ou ra ki te whenua e homai nei e Ihowa, e tou Atua, ki a koe. He mea whakarihariha hoki ki

<sup>17</sup>  
 a Ihowa, ki tou Atua, te hunga katoa e pena ana, te hunga katoa e he ana te mahi. Kia mahara

<sup>18</sup>  
 ki ta Amareke i mea ai ki a koe i te ara, i to koutou putanga mai i Ihipa; Ki tona tutakitanga ki a koe ki te ara, a patua iho tou hiku e ia, nga mea ngoikore katoa i muri i a koe, i a koe e hemo ana,

<sup>19</sup>  
 e nenge ana; a kihai ia i wehi ki te Atua. Mo reira e meinga koe e Ihowa, e tou Atua, kia okioki i ou hoariri katoa a tawhio noa, ki te whenua e homai nei e Ihowa, e tou Atua, ki a koe kia nohoia hei kainga tupu, me ukui rawa atu te maharatanga ki a Amareke i raro i te rangi; kei warewar e rawa koe.

## Chapter 26

<sup>1</sup>  
 A tenei ake, a te wa e tae ai koe ki te whenua e homai e Ihowa, e tou Atua, ki a koe hei kainga

<sup>2</sup>  
 tuturu, a ka riro a reira i a koe, a ka noho koe ki reira; Na ka tango koe i etahi o nga mea matamua o nga hua katoa o te whenua, e mauria mai e koe i tou oneone, ka homai nei e Ihowa, e tou Atua, ki a koe; a me whawhao e koe ki te kete, ka haere ai ki te wahi e whiriwhiri ai a Ihowa, tou Atua,

<sup>3</sup>  
 kia waiho tona ingoa ki reira. Na ka haere koe ki te tohunga e minita ana i aua ra, ka mea ki a ia, Tenei ahau te korero nui nei i tenei ra ki a Ihowa, ki tou Atua, kua tae mai ahau ki te whenua i oati

ai a Ihowa ki o tatou matua kia homai ki a tatou. <sup>4</sup> Na ka tango te tohunga i te kete i tou ringa, ka  
 whakatakoto hoki ki mau o te aata a Ihowa, a tou Atua. <sup>5</sup> Ko reira koe oho atu ai, mea ai ki te aroaro  
 o Ihowa, o tou Atua, Ko toku matua he Hiriani, i ora noa i te mate; a haere ana ia ki raro, ki Ihipa,  
 a noho ana i reira, he hunga torutoru; na meinga ana ia hei iwi nui i reira, he kaha, he tini: <sup>6</sup> Na  
 tukinotia ana matou e nga Ihipiana, whakawhiua ana matou, a he kino ta ratou whakamahinga i a  
 matou: <sup>7</sup> A ka tangi matou ki a Ihowa, ki te Atua o o matou matua, na whakarongo mai ana a Ihowa  
 ki to matou reo, titiro mai ana ki to matou whakawhiunga, ki to matou whakamahinga, ki to matou  
 tukinotanga: <sup>8</sup> Na whakaputaina mai ana matou e Ihowa i Ihipa ki te ringa kaha, ki te takakau maro  
 tonu, me te whakamataku nui, me nga tohu, me nga merekara: <sup>9</sup> A kawea mai ana matou e ia ki  
 tenei wahi, a homai ana ki a matou tenei whenua, he whenua e rerengia ana e te waiu, e te honi.  
<sup>10</sup> Na, titiro, kau kawea mai nei e ahau nga hua matamua o te whenua i homai nei e koe, e Ihowa,  
 ki ahau. Katahi koe ka whakatakoto atu ki te aroaro o Ihowa, o tou Atua, me te koropiko ano ki te  
 aroaro o Ihowa, o tou Atua: <sup>11</sup> Ka koa hoki ki nga mea pai katoa i homai e Ihowa, e tou Atua, ki  
 a koutou ko tou whare, a koe, me te Riwaiti me te manene i roto i a koe.  
<sup>12</sup> Ka pae nga whakatekau katoa o au hua i te toru o nga tau, i te tau whakatekau, me hoatu e  
 koe ki te Riwaiti, ki te manene, ki te pani, ki te pouaru, kia kainga i roto i ou kuwaha, a ka makona;  
<sup>13</sup> A ka mea koe ki te aroaro o Ihowa, o tou Atua Kua poto mai i ahau i roto i toku whare nga mea  
 tapu, kua hoatu ano e ahau ki te Riwaiti, ki te manene, ki te pani, ki te pouaru, kua rite i ahau au  
 whakahau katoa i whakahau ai koe ki ahau; kahore a hau i whakapaheke i tetahi o au whakahau,  
 kahore ano i wareware: <sup>14</sup> Kihai i kainga e ahau tetahi wahi i ahau e noho taua ana; kihai i tangohia  
 e ahau tetahi wahi mo te poke, kihai ano hoki i hoatu hei mea tupapaku: i whakarongo ahau ki te  
 reo o Ihowa, o toku Atua, rite tonu aku mahi ki nga mea katoa i whakahaua e koe ki ahau. <sup>15</sup> Titiro  
 iho i tou nohoanga tapu, i te rangi, manaakitia hoki tau iwi, a Iharaira, me te oneone i homai nei e  
 koe ki a matou, pera me tau i oati ai ki o matou matua, he whenua e rerengia ana e te waiu e te  
 honi.  
<sup>16</sup> No tenei ra a Ihowa, tou Atua, i whakahau ai i a koe, kia mahia enei tikanga, me enei  
 whakaritenga: na puritia e koe, mahia, e tou ngakau katoa, e tou wairua katoa. <sup>17</sup> Kua whakaae  
 koe i tenei ra ki a Ihowa hei Atua mou, kia haere i ana huarahi, kia whakaritea hoki ana tikanga,  
 me ana whakahau, me ana whakaritenga, kia rongohia ano hoki ki tona reo: <sup>18</sup> A kua whakaae hoki  
 a Ihowa ki a koe i tenei ra hei iwi mana, motuhake rawa, hei pera me tana i korero ai ki a koe, hei  
 pupuri hoki i ana whakahau katoa; <sup>19</sup> Hei mea kia teitei ake koe i nga iwi katoa i hanga e ia, te

whakamoemiti, te ingoa, te kororia; kia waiho hoki koe hei iwi tapu ma Ihowa, ma tou Atua, hei pera me tana i korero ai.

## Chapter 27

<sup>1</sup> Na ka whakahau a Mohi ratou ko nga kaumatua o Iharaira i te iwi, ka mea, Puritia nga whakahau katoa e whakahau nei ahau ki a koutou i tenei ra. <sup>2</sup> A, tenei ake, a te ra e whiti atu ai koutou i Horano ki te whenua e homai ana e Ihowa, e tou Atua, ki a koe, na, ka whakaara ake koe i etahi kohatu nunui mau, ka pani hoki ki te raima: <sup>3</sup> Ka tuhituhi hoki i nga kupu katoa o tenei ture ki reira, ua whiti atu koe; kia haere atu koe ki te whenua e homai ana e Ihowa, e tou Atua, ki a koe, ki te whenua e rerengia ana e te waiu, e te honi, kia pera me ta Ihowa, me ta te Atua o ou matua, i korero ai ki a koe. <sup>4</sup> Mo reira, e whiti koutou i Horano, me whakaara enei kohatu e whakahaua nei e ahau i tenei ra ki a koutou, ki runga ki Maunga Epara ka pani hoki ki te raima. <sup>5</sup> A me hanga e koe ki reira tetahi aata ma Ihowa, ma tou Atua, hei te aata kohatu; kaua e akina iho e koe ki te rino. <sup>6</sup> Me hanga e koe te aata ma Ihowa, ma tou Atua, ki nga kohatu toitu: ka whakaeke ai i nga tahunga tinana ma Ihowa, ma tou Atua, ki runga: <sup>7</sup> Patua hoki nga whakahere mo te pai, a kainga ki reira; me te koa ano ki te aroaro o Ihowa, o tou Atua. <sup>8</sup> Ka tuhituhi hoki i nga kupu o tenei ture ki nga kohatu, kia marama tonu. <sup>9</sup> I korero ano a Mohi ratou ko nga tohunga, ko nga Riwaiti, ki a Iharaira, i mea, Noho puku mai, a whakarongo, e Iharaira; no tenei ra i meinga ai koe hei iwi mo Ihowa, mo tou Atua. <sup>10</sup> Na me whakarongo koe ki te reo o Ihowa, o tou Atua, me mahi hoki i ana whakahau, me ana tikanga e whakahaua atu nei e ahau ki a koe i tenei ra. <sup>11</sup> I whakahau hoki a Mohi i te iwi i taua rangi ano, i mea, <sup>12</sup> Ko enei e tu ki runga ki Maunga Keritimi hei manaaki i te iwi, ua whiti atu koutou i Horano; ko Himiona, ko Riwai, ko Hura, ko Ihakara, ratou ko Hohepa, ko Pineamine: <sup>13</sup> Ko enei e tu ki runga ki Maunga Epara hei kanga; ko Reupena, ko Kara, ko Ahera, ko Hepurona, ko Rana, ko Napatari. <sup>14</sup> Na ka korero nga Riwaiti, ka mea, kia nui hoki te reo, ki nga tangata katoa o Iharaira. <sup>15</sup> Kia kanga te tangata e hanga ana i te whakapakoko, i te mea whakairo, whakarewa ranei, e whakariharihangia nei e Ihowa, he mea mahi na te ringa o te kaimahi, e whakanoho ana hoki i taua mea ki te wahi ngaro. Ma te iwi katoa e whakahoki, e mea, A mine. <sup>16</sup> Kia kanga te tangata e whakahaweana ki tona papa, ki tona whaea ranei. Ma te iwi katoa e whakahoki, e mea, Amine. <sup>17</sup> Kia kanga a tangata e neke atu ana i te rohe

<sup>18</sup>  
 o tona hoa. Ma te iwi katoa e mea, Amine. Kia kanga te tangata e whakapohehe ana i te matapo  
<sup>19</sup>  
 ki te huarahi. Ma te iwi katoa e mea, Amine. Kia kanga te tangata e whakaputa ke ana i te  
<sup>20</sup>  
 whakawa mo te manene, mo te pani, mo te pouaru. Ma te iwi katoa e mea, Amine. Kia kanga  
 te tangata e moe ana ki te wahine a tona papa; mona i hura i te remu o tona papa. Ma te iwi katoa  
<sup>21</sup>  
 e mea, Amine. Kia kanga te tangata e moe ana ki tetahi kararehe. Ma te iwi katoa e mea, Amine.  
<sup>22</sup>  
 Kia kanga te tangata e moe ana ki tona tuahine, ki te tamahine a tona papa, ki te tamahine ranei  
<sup>23</sup>  
 a tona whaea. Ma te iwi katoa e mea, Amine. Kia kanga te tangata e moe ana ki tona hungawai  
<sup>24</sup>  
 wahine. Ma te iwi katoa e mea, Amine. Kia kanga te tangata e patu puku ana i tona hoa. Ma te  
<sup>25</sup>  
 iwi katoa e mea, Amine. Kia kanga te tangata e tango ana i te utu mo te patunga o te tangata  
<sup>26</sup>  
 harakore. Ma te iwi katoa e mea, Amine. Kia kanga te tangata e kore e mau i a ia nga kupu o  
 tenei ture, hei mahi mana. Ma te iwi katoa e mea, Amine.

## Chapter 28

<sup>1</sup>  
 A tenei ake, ki te ata whakarongo koe ki te reo o Ihowa, o tou Atua, ki te mau ki te mahi i  
 ana whakahau katoa e whakahau atu nei ahau i tenei ra ki a koe, na ka whakanui a Ihowa, tou Atua,  
<sup>2</sup>  
 i a koe ki runga ake i nga iwi katoa o te whenua: A ka tae mai enei manaaki katoa ki a koe, ka  
<sup>3</sup>  
 hopu i a koe, ki te whakarongo koe ki te reo o Ihowa, o tou Atua. Ka manaakitia koe i roto i te  
<sup>4</sup>  
 pa, ka manaakitia hoki koe i te mara. Ka manaakitia nga hua o tou kopu, me nga hua o tou oneone,  
<sup>5</sup>  
 me nga hua o au kararehe, nga uri o au kau, me nga kua o au hipi. Ka manaakitia tau kete me  
<sup>6</sup>  
 tau pokepokenga paraoa. Ka manaakitia koe ina haere mai, ka manaakitia hoki ina haere atu.  
<sup>7</sup>  
 Ka meinga e Ihowa ou hoariri e whakatika ana ki a koe kia tukitukia i tou aroaro: kotahi ano te  
<sup>8</sup>  
 ara e puta mai ai ratou ki a koe, a e whitu nga ara e rere atu ai ratou i tou aroaro. Ka whakahau a  
 Ihowa i te manaaki mou, mo ou whare taonga, mo nga mea katoa hoki e toro atu ai tou ringa; a ka  
<sup>9</sup>  
 manaaki ia i a koe ki te whenua ka homai nei e Ihowa, e tou Atua, ki a koe. Ka whakatuturutia  
 koe e Ihowa hei iwi tapu mana, ka peratia me tana i oati ai ki a koe; ki te mau koe ki nga whakahau  
<sup>10</sup>  
 a Ihowa, a tou Atua, ki te haere i ana huarahi. A ka kite nga iwi katoa o te whenua kua huaina

11  
 iho te ingoa o Ihowa ki a koe; a ka wehi i a koe. A ka whakanui rawa a Ihowa i te pai mou, ka whai hua hoki tou kopu, ka whai hua au kararehe, ka whai hua tou oneone, i te whenua i oati ai a

12  
 Ihowa ki ou matua kia hoatu ki a koe. Ka whakatuwheratia e Ihowa ki a koe tana taonga pai, te rangi hei homai i te ua ki tou whenua i tona po ano, hei manaaki hoki i nga mahi katoa a tou ringa:

13  
 a ka tuku moni atu koe ki nga iwi maha, e kore ano koe e tango i te moni tarewa. A ka meinga koe e Ihowa hei upoko, e kore hoki e waiho hei hiku; ki runga anake koe, a kahore ki raro; ki te whakarongo koe ki nga whakahau a Ihowa, a tou Atua, e whakahau atu nei ahau i tenei ra ki a koe,

14  
 a ka puritia e koe, ka mahia; Ki te kore e peka atu i tetahi o nga kupu e whakahau nei ahau i tenei ra ki a koe, ki matau ranei, ki maui ranei, whai ai ki nga atua ke, mahi ai ki a ratou.

15  
 Engari ki te kore koe e whakarongo ki te reo o Ihowa, o tou Atua, e mau hoki ki te mahi i ana whakahau katoa, i ana tikanga, e whakahau atu nei ahau i tenei ra ki a koe; na ka tae mai ki a

16  
 koe, ka hopu i a koe, enei kanga katoa. Ka kanga koe i te pa, ka kanga koe i te mara. Ka

17  
 kanga tau kete me tau pokepokenga paraoa. Ka kanga te hua o tou kopu, me te hua o tou oneone,

18  
 te uri o au kau, me nga kua o au hipi. Ka kanga koe i tou haerenga mai, ka kanga hoki koe i

19  
 tou haerenga atu. Ka tukua e Ihowa ki a koe te kanga, te tuatea me te whakatupehupehu, ki nga mea katoa e toro atu ai tou ringa ki te mahi, kia ngaro ra ano koe, kia hohoro ra ano te mate atu;

20  
 mo te kino o au mahi, i whakarere nei koe i ahau. Ka meinga e Ihowa te mate uruta kia piri tonu ki a koe, kia whakapotoa atu ra ano koe e ia i runga i te whenua e haere atu na koe ki reira ki te

21  
 tango. Ka whiua koe e Ihowa ki te kohi, ki te kirika, ki te mumura, ki te toronga nui, ki te hoari,

22  
 ki te tauraki, te hopurupuru; a ka whai ena i a koe a ngaro noa koe. A ka whakaparahi tou rangi

23  
 i runga i tou mahunga, ka whakarino hoki te whenua i raro i a koe. Ka homai e Ihowa hei ua mo tou whenua te puehu me te nehu: ka rere iho taua mea i te rangi ki runga ki a koe, kia ngaro ra

24  
 ano koe. Ka mea a Ihowa kia patua koe ki te aroaro o ou hoariri: kotahi ano te ara e haere atu ai koe ki a ia, a e whitu nga ara e rere ai koe i tona aroaro: a ka makamakaia haeretia koe i waenganui

25  
 o nga rangatiratanga katoa o te whenua. A ka ai tou tinana mate hei kai ma nga manu katoa o

26  
 te rangi, ma nga karaehe hoki o te whenua, a kahore he tangata hei whakawehi atu i a ratou. Ka

27  
 patu a Ihowa i a koe ki te tuwhenua o Ihipa, ki nga pukupuku, ki te papaka, ki te waihakihaki hoki,

28  
 e kore nei koe e taea te rongoa. Ka patu a Ihowa i a koe ki te porangi, ki te matapo, ki te ngakau

29  
 pohehe: A ka whawha koe i te tino awatea, ka pera me te tangata matapo e whawha nei i roto i te pouri, a e kore e whiwhi i ou huarahi: a ka waiho koe hei tukinotanga kautanga, hei murunga i

30  
 nga ra katoa, a kahore he kaiwhakaora mou. Ka taumau koe i te wahine, a he tangata ke mana  
 ia e moe: ka mahi koe i te whare, a e kore koe e noho ki roto: ka whakato koe i te mara waina, a e  
 31  
 kore koe e kai i ona hua. Ka patua tau kau i mua i ou kanohi, a e kore koe e kai i tetahi wahi  
 ona: ko tau kaihe ka pahuatia atu i tou aroaro, e kore e whakahokia ki a koe: ko au hipi ka hoatu  
 32  
 ma ou hoariri, a kahore ou tangata hei whakaora i a koe. Ko au tama me au tamahine ka hoatu  
 ki te iwi ke, a ka matawaia ou kanohi i te tirohanga ki a ratou, a pau noa te ra: kahore hoki he kaha  
 33  
 i tou ringa. Ko nga hua o tou oneone me tou uauatanga katoa, ka kainga e tetahi iwi kihai nei i  
 mohiotia e koe; a hei tukinotanga kautanga koe, hei kurunga i nga ra katoa: A ka haurangi koe  
 34  
 i te kitenga a ou kanohi e kite ai koe. Ka patu a Ihowa i a koe, i nga turi, i nga waewae, ki te  
 35  
 tuwhenua kino e kore e taea te rongoa, i te kapu o tou waewae, a tae noa ki tou tumuaki. Ka  
 36  
 whakaheke atu a Ihowa i a koe, i tou kingi hoki e meatia e koe hei kingi mou, ki te iwi kihai nei  
 koe i mohio, koutou ko ou matua; a ka mahi koe i reira ki nga atua ke, ki te rakau, ki te kohatu.  
 37  
 A ka waiho koe hei miharotanga, hei whakatauki, hei taunu i roto i nga iwi katoa e kawea atu ai  
 koe e Ihowa ki reira. He nui te purapura e kawea atu e koe ki te mara, a he iti tau e kohikohi  
 38  
 mai ai; ka pau hoki i te mawhitiwhiti. Ka whakatokia e koe, ka mahia nga mara waina, ko te  
 39  
 waina ia e kore e inumia e koe, e kore ano e whakiiia nga hua; ka kainga hoki e te huhu. Ka whai  
 40  
 oriwa koe puta noa i ou rohe katoa, ko te hinu ia e kore e whakawahia e koe; no te mea ka horo  
 41  
 nga hua o au oriwa. Ka whanau he tama mau, he tamahine, otiia e kore e waiho mau; ka riro  
 42  
 hoki ratou ki te herehere. Ko au rakau katoa me nga hua o tou oneone ka pau i te mawhitiwhiti.  
 43  
 Ko te manene i roto i a koe ka kaka ake ki runga i a koe, ki runga noa atu; ko koe ia ka heke iho  
 44  
 ki raro, a ki raro noa iho. Ko ia hei homai i te moni tarewa ki a koe, ko koe ia e kore e hoatu i  
 te mea tarewa ki a ia: ko ia hei pane, ko koe hei hiku.  
 45  
 A ka tae enei kanga ki a koe, ka whai i a koe, ka hopu ano i a koe, kia huna ra ano koe; mou  
 kihai i whakarongo ki te reo o Ihowa, o tou Atua, kihai i mau ki ana whakahau, ki ana tikanga i  
 46  
 whakahaua e ia ki a koe; A ka piri ena ki a koe hei tohu, hei miharotanga, ki ou uri ano hoki a  
 47  
 ake ake: Mou kihai i mahi ki a Ihowa, ki tou Atua, i runga i te koa, me te ngakau hari mo te  
 48  
 huanga o nga mea katoa: Koia ka mahi koe ki ou hoariri, e tukua mai e Ihowa ki a koe, i runga  
 i te matekai, i te matewai me te kakahukore, me te kore hoki o nga mea katoa: a ka hoatu e ia he  
 49  
 ioka rino ki tou kaki a ngaro noa koe i a ia. Ka hapainga mai e Ihowa ki a koe he iwi no tawhiti,

no te pito o te whenua, ano he ekara e rere ana; he iwi e kore e mohiotia e koe tona reo; <sup>50</sup> He iwi  
mata hinana, e kore e whakapai ki te kanohi o te koroheke, e kore hoki e tohu i te taitamariki: <sup>51</sup> A  
ka kainga e ia nga hua o au kararehe, te hua hoki o tou oneone, a huna noatia koe: a e kore e toe i  
a ia he witi mau, he waina, he hinu ranei, nga uri ranei o au kau, me nga kuao o au hipi, a meinga  
<sup>52</sup> ra ano koe e ia kia ngaro. A ka whakapaea koe e ia i roto i ou kuwaha katoa, e whenuku noa ou  
taiepa teitei, kaha hoki, i whakamanamana ai koe, a puta noa i tou whenua: a ka whakapae ia i a  
koe i roto i ou kuwaha katoa, puta noa i tou whenua, i homai nei e Ihowa, e tou Atua, ki a koe.  
<sup>53</sup> A ka kai koe i te hua o tou kopu, i te kikokiko o au tama, o au tamahine, e homai e Ihowa, e tou  
Atua, ki a koe; i te whakapaenga, i te kopananga hoki, e kopania ai koe e ou hoariri: <sup>54</sup> Ko te tangata  
whakatarapi i roto i a koutou, whakaahu noa iho, ka he tona kanohi ki tona teina, ki te wahine hoki  
<sup>55</sup> o tona uma, a ki te morehu o ana tamariki e toe ana ki a ia: E kore ai e hoatu e ia ki tetahi o ratou  
tetahi wahi o te kikokiko o ana tamariki, e kainga e ia, no te mea kahore he mea e toe ana ki a ia;  
<sup>56</sup> i te whakapaenga, i te kopananga, e kopania ai koe e ou hoariri i roto i ou kuwaha katoa. Ko te  
wahine whakatarapi i roto i a koutou, whakaahu noa iho, e kore nei e whakamatau atu ki te whakatu  
i te kapu o tona waewae ki te whenua, i te whakatarapi hoki, i te whakaahu, ka kino tona kanohi  
<sup>57</sup> ki te tane o tona uma, ki tana tama, ki tana tamahine hoki; Ki tana potiki hoki e puta mai i  
waenganui o ona waewae, ki ana tamariki hoki e whanau i roto i a ia; ka kainga pukutia hoki e ia  
i te kore o nga mea katoa: i te whakapaenga, i te kopananga, e kopania ai koe e ou hoariri i roto i  
<sup>58</sup> ou kuwaha. Ki te kahore koe e mahara kia mahia nga kupu katoa o tenei ture e tuhituhia nei ki  
tenei pukapuka, kia wehi koe i tenei ingoa whai kororia, ingoa whakamataku, i a IHOWA, I TOU  
<sup>59</sup> ATUA; Na ka meinga e Ihowa ou whiunga kia miharotia, me nga whiunga o ou uri, he whiunga  
nunui, kawenga roa hoki, me nga mate ngau kino, kawenga roa hoki. <sup>60</sup> A ka whakapangia ano e  
<sup>61</sup> ia ki a koe nga mate katoa o Ihipa, i wehi ra koe; a ka piri ki a koe. Me nga mate katoa me nga  
whiu katoa, kahore nei i tuhituhia ki te pukapuka o tenei ture, ka whakapangia e Ihowa ki a koe, a  
<sup>62</sup> huna noatia koe. A ka mahue iho koutou he hunga torutoru, koutou i rite nei ki nga whetu o te  
rangiri te tini; no te mea kihai koe i whakarongo ki te reo o Ihowa, o tou Atua. <sup>63</sup> Na ka rite ki te  
koa o Ihowa i tana whakawhiwhinga i a koutou ki te pai, i tana whakanuinga hoki i a koutou; ka  
pena ano hoki te koa o Ihowa ki te mea i a koutou kia ngaro, ki te huna rawa atu i a koutou; a ka  
<sup>64</sup> hutia atu koutou i te whenua e haer e atu nei koutou ki reira ki te tango. A ka whakamararatia  
koe e Ihowa ki waenga i nga iwi katoa, i tetahi pito o te whenua tae noa atu ki tetahi pito o te  
whenua; a ka mahi koe i reira ki nga atua ke, kahore nei koe i mohio, koutou tahi ko ou matua, ki  
<sup>65</sup> te rakau, ki te kohatu. A e kore e ta tou manawa i roto i ena iwi, kahore hoki he okiokinga mo

te kapu o tou waewae; engari ka homai e Ihowa ki a koe i reira he manawa hehe, he kanohi haumaruru, me te ngakau tuatea: <sup>66</sup> A ka tarewa noa tou ora i tou aroaro; ka wehi koe i te po, i te ao, a kahore he tuturutanga mo tou ora; <sup>67</sup> I te ata ka mea koe, Aue, te ahiahi noa! a i te ahiahi ka mea koe, Aue, te awatea noa! i te pawera hoki o tou ngakau e pawera ai koe, i te kitenga hoki a ou kanohi e kite ai koe. <sup>68</sup> A ka whakahoki a Ihowa i a koe ki Ihipa i runga kaipuke, na te huarahi i korero ra ahau ki a koe, E kore koe e kite i reira a muri ake nei: a ka hoko koutou i a koutou i reira ki o koutou hoariri hei pononga tane, hei pononga wahine, a kahore he tangata hei hoko.

## Chapter 29

<sup>1</sup> Ko nga kupu enei o te kawenata i akona e Ihowa ki a Mohi kia whakaritea atu ki nga tama a Iharaira i te whenua o Moapa; haunga te kawenata i whakaritea e ia ki a ratou i Horepa. <sup>2</sup> A ka karanga a Mohi ki a Iharaira katoa, ka mea ki a ratou, Kua kite koutou i nga mea katoa i mea ai a Ihowa ki to koutou aroaro i te whenua o Ihipa ki a Parao, ki ona tangata, ki tona whenua katoa; <sup>3</sup> I nga whakamatauranga nunui i kite ra ou kanohi, i nga tohu, i aua merekara nunui: <sup>4</sup> He ahakoa ra, kahore ano i homai e Ihowa ki a koutou he ngakau mohio, he kanohi hei titiro, he taringa hei whakarongo a tae noa ki tenei ra. <sup>5</sup> Na ka wha tekau nga tau i arahi ai ahau i a koutou i te koraha: kahore nei i tawhitotia o koutou kakahu ki a koutou, kahore hoki tou hu i tawhitotia ki tou waewae. <sup>6</sup> Kahore ano koutou i kai i te taro, i inu ranei i te waina, i te wai whakahaurangi ranei: kia mohio ai koutou ko Ihowa ahau, ko to koutou Atua. <sup>7</sup> A, ka tae mai koutou ki tenei whenua, na ka puta mai a Hihona kingi o Hehepona, raua ko Oka kingi o Pahana, ki te tu i a tatou ki te riri, a patua iho e tatou: <sup>8</sup> Na tangohia ana e tatou to ratou oneone, a hoatu ana hei kainga mo nga Reupeni, mo nga Kari, mo tetahi taanga hoki o te iwi o Manahi. <sup>9</sup> Na puritia ra nga kupu o tenei kawenata, mahia hoki, kia kake ai koutou i nga mea katoa e mea ai koutou. <sup>10</sup> E tu ana koutou katoa i tenei ra i te aroaro o Ihowa, o to koutou Atua; o koutou upoko, o koutou iwi, o koutou kaumatua, o koutou rangatira, ara nga tangata katoa o Iharaira, <sup>11</sup> A koutou tamariki, a koutou wahine, me tou tangata iwi ke i roto i ou puni, te kaitata i au wahie tae noa ki te kaiutuutu wai mou: <sup>12</sup> Kia uru ai koe ki te kawenata a Ihowa, a tou Atua, ki tana oati hoki e whakaritea nei e Ihowa, e tou Atua, ki a koe i tenei ra: <sup>13</sup> Kia whakapumautia ai koe i tenei ra hei iwi mana, ko ia hoki hei Atua mou, kia rite ai ki tana i korero ai ki a koe, ki tana hoki i oati ai ki



<sup>14</sup> ou matua, ki a Aperahama, ki a Ihaka, ki a Hakopa. Na kahore ki a koutou anake taku whakarite  
<sup>15</sup> i tenei kawenata, i tenei oati hoki; Engari ki tenei e tu tahi nei me tatou i konei i tenei ra i te  
<sup>16</sup> aroaro o Ihowa, o to tatou Atua, ki te mea hoki kahore i konei i a tatou i tenei ra: E mohio ana  
hoki koutou ki to tatou nohoanga ki te whenua o Ihipa, ki to tatou haerenga mai hoki na waenganui  
<sup>17</sup> o nga iwi i haere mai nei koutou; A kua kite koutou i a ratou mea whakarihariha, i a ratou  
<sup>18</sup> whakapakoko rakau, kohatu, hiriwa, koura, i waenganui i a ratou: Kei noho i roto i a koutou he  
tangata, he wahine ranei, he hapu, he iwi ranei, e tahuri ke atu ana tona ngakau i tenei ra i a Ihowa,  
i to tatou Atua, e haere ana ki te mahi ki nga atua o era iwi; kei puta ake i roto i a koutou he pakiaka  
<sup>19</sup> e tupu ake ai te taru whakamate me te taru kawa; A tenei ake, kei tona rongonga i nga kupu o  
tenei kanga, na ka manaaki ia i a ia ano i roto i tona ngakau, ka mea, Ka mau te rongu ki ahau,  
ahakoa haere ahau i te pakeketanga o toku ngakau, ki te whakangaro tahi i te mea makuku me te  
<sup>20</sup> mea maroke: E kore a Ihowa e tuku noa atu i tona he, engari ka paowa te riri o Ihowa me tona  
ngakau hae ki taua tangata, a ka tapapa iho ki runga ki a ia te kanga katoa ka tuhituhia nei ki tenei  
<sup>21</sup> pukapuka, a ka murua atu e Ihowa tona ingoa i raro i te rangi. A ka wehea ia e Ihowa mo te kino  
i roto i nga iwi katoa o Iharaira, ka rite ki nga kanga katoa o te kawenata ka tuhituhia nei ki tenei  
<sup>22</sup> pukapuka o te ture: A ka mea to muri whakatupuranga, a koutou tamariki e tupu ake i muri i a  
koutou, me te tangata iwi ke hoki e haere mai i te whenua tawhiti, ua kite ratou i nga whiunga o  
<sup>23</sup> tena whenua, i nga matenga e whakamatea ai a reira e Ihowa; I te whenua katoa hoki he whanariki,  
he tote, he ngiha, kahore e whakatokia, kahore e tupu, kahore hoki e pihi ake tetahi otaota ki reira,  
pera me te hunanga o Horoma raua ko Komora, o Arema raua ko Tepoimi, i huna e Ihowa i a ia e  
<sup>24</sup> aritarita ana, e riri ana: Na ka mea nga iwi katoa, Na te aha a Ihowa i penei ai ki tenei whenua?  
<sup>25</sup> He aha te tikanga o te mura o tenei riri nui? Katahi ka mea te tangata, Mo ratou ra i whakarere  
i te kawenata a Ihowa, a te Atua o o ratou matua, i whakaritea e ia ki a ratou, i tana whakaputanga  
<sup>26</sup> mai i a ratou i te whenua o Ihipa: A haere ana ratou, mahi ana ki nga atua ke, a koropiko ana ki  
<sup>27</sup> a ratou, a ehara nei i a ia i hoatu ki a ratou: Na mura ana te riri o Ihowa ki tenei whenua, hei  
<sup>28</sup> whakaputa ki a ratou i nga kanga katoa i tuhituhia ki tenei pukapuka: A huarangatia atu ana  
ratou e Ihowa i runga i to ratou oneone, i tona riri, i te aritarita, i te whakatakariri noa iho, a maka  
<sup>29</sup> ana ratou he whenua ke, me tenei inaianei. Kei a Ihowa, kei to tatou Atua, nga mea ngaro: ko  
nga mea ia ka oti nei te whakapuaki mai, ma tatou ena, ma a tatou tamariki, ake nei, kia mahi ai  
tatou i nga kupu katoa o tenei ture.

## Chapter 30

<sup>1</sup>  
 A tenei ake, a te wa e tae mai ai enei mea katoa ki a koe, te manaaki me te kanga, i hoatu nei e ahau ki tou aroaro, a ka mahara tou hinengaro ki aua mea i roto i nga iwi katoa e peia ai koe e

<sup>2</sup>  
 Ihowa, e tou Atua ki reira, A ka tahuri koe ki a Ihowa, ki tou Atua, ka whakarongo ki tona reo, ki nga mea katoa e whakahau nei ahau i tenei ra ki a koe, koutou ko au tamariki, i tou ngakau katoa,

<sup>3</sup>  
 i tou wairua katoa; Katahi a Ihowa, tou Atua, ka whakaputa ke i tou parautanga, ka aroha ano ki a koe, ka tahuri hoki, ka kohikohi i a koe i roto i nga iwi katoa i whakamararatia atu ai koe e Ihowa,

<sup>4</sup>  
 e tou Atua ki reira. Mehemea tera etahi o koutou i peia kei nga topito ra ano o te rangi, ka kohikohia

<sup>5</sup>  
 mai ano koe e Ihowa, e tou Atua, i reira, ka tikina ano koe e ia i reira: A ka kawea mai koe e Ihowa, e tou Atua, ki te whenua i nohoia e ou matua, ka nohoia hoki a reira e koe; a ka mahi ia i

<sup>6</sup>  
 te pai ki a koe, ka mea hoki i a koe kia maha atu i ou matua. A ka kokoti a Ihowa, tou Atua, i tou ngakau, i te ngakau ano hoki o ou uri, e aroha ai koe ki a Ihowa, ki tou Atua, i tou ngakau katoa, i

<sup>7</sup>  
 tou wairua katoa, kia ora ai koe. A ka tukua iho e Ihowa, e tou Atua, enei kanga katoa ki ou

<sup>8</sup>  
 hoariri, ki te hunga hoki e kino ana ki a koe, i whakatupu kino nei i a koe. Ko koe ia ka tahuri, ka whakarongo ki te reo o Ihowa, ka mahi i ana whakahau katoa, e whakahau nei ahau ki a koe i

<sup>9</sup>  
 tenei ra. A ka mea a Ihowa, tou Atua, kia nui nga mea mau i te mahi katoa a tou ringa, i te hua o tou kopu, i te hua hoki o au kararehe, i te hua hoki o tou oneone, mo te pai: no te mea ka tahuri mai

<sup>10</sup>  
 ano a Ihowa, ka hari ki a koe mo te pai, ka pera me ia i hari ki ou matua: Ki te whakarongo koe ki te reo o Ihowa, o tou Atua, ki te pupuri i ana whakahau, i ana tikanga, ka tuhituhia nei ki tenei pukapuka o te ture; ki te tahuri koe ki a Ihowa, ki tou Atua, i tou ngakau katoa, i tou wairua katoa.

<sup>11</sup>  
 Ko tenei ture hoki, e whakahau nei ahau i tenei ra ki a koe, ehara i te mea pakeke rawa ki a

<sup>12</sup>  
 koe, i te mea tawhiti ranei. Kahore i te rangi, e mea ai koe, Ko wai o tatou hei piki ki te rangi

<sup>13</sup>  
 ki te tiki atu i tena mea ma tatou, hei mea kia rongu atu tatou, kia mahi ai tatou? Kahore i tawahi o te moana, hei meatanga mau, Ko wai o tatou hei whakawhiti ki tawahi o te moana, ki te tiki i tena

<sup>14</sup>  
 mea ki a tatou, hei mea kia rongu atu tatou, kia mahi ai tatou? Kei te tata tonu ra te kupu ki a koe, kei roto i tou waha, kei roto hoki i tou ngakau, mo tau mahi atu.

<sup>15</sup>  
 Titiro, kua hoatu e ahau ki tou aroaro i tenei ra te ora me te pai, te mate me te kino;

<sup>16</sup>  
 I ahau e whakahau nei i a koe i tenei ra kia aroha ki a Ihowa, ki tou Atua, kia haere i ana huarahi, kia pupuri i ana whakahau, i ana tikanga, i ana whakaritenga, kia ora ai koe, kia nui ai hoki, kia manaaki

<sup>17</sup>  
 ai a Ihowa, tou Atua, i a koe ki te w henua e haere nei koe ki reira ki te tango. Otiia ki te tahuri

ke tou ngakau, ki te kore koe e rongu, a ka takina atu koe ki te koropiko ki nga atua ke, kia mahi hoki ki a ratou; <sup>18</sup> Maku e whakaatu ki a koutou i tenei ra, ka ngaro rawa atu koutou; e kore e roa <sup>19</sup> o koutou ra ki te whenua e whiti atu nei koe i Horano, e haere atu nei koe ki reira ki te tango. Ka waiho e ahau i tenei ra te rangi me te whenua hei kaititiro i a koutou, kua hoatu e ahau ki tou aroaro te ora me te mate, te manaaki me te kanga: na reira manakohia te ora, kia ora ai koutou ko ou uri: <sup>20</sup> Aroha ki a Ihowa, ki tou Atua, whakarongo ki tona reo, piri atu hoki ki a ia: ko ia hoki tou ora, te whakaroanga atu mo ou ra: kia noho ai koe ki te whenua i oati ai a Ihowa ki ou matua kia hoatu ki a ratou, ki a Aperahama, ki a Ihaka, ki a Hako pa.

### Chapter 31

<sup>1</sup> A i haere a Mohi, i korero i enei kupu ki a Iharaira katoa. <sup>2</sup> I mea ia ki a ratou, Ko toku kaumatua i tenei ra ka kotahi rau e rua tekau nga tau; e kore ahau e ahei ano te kopiko atu, te kopiko mai: kua mea mai hoki a Ihowa ki ahau, E kore koe e whiti i tenei Horano. <sup>3</sup> Ko Ihowa, ko tou Atua, ko ia e whakawhiti ki mua i a koe; mana e whakangaro atu enei iwi i mua i a koe, a ka riro ratou i a koe: a ko Hohua, ko ia e whiti atu i mua i a koe, ka rite ki ta Ihowa i korero ai. <sup>4</sup> A ka rite ta Ihowa e mea ai ki a ratou ki tana i mea ai ki a Hihona raua ko Oka, ki nga kingi o nga Amori, ki to ratou whenua hoki; i huna nei e ia. <sup>5</sup> A ka homai ratou e Ihowa ki to koutou aroaro, a ka rite ta koutou e mea ai ki a ratou ki nga whakahau katoa i whakahau ai ahau ki a koutou. <sup>6</sup> Kia maia, kia toa, kua e wehi, kua e pawera i a ratou: no te mea ko Ihowa, ko tou Atua, ko ia te haere tahi ana i a koe; e kore ia e whakarere i a koe, e kore hoki e mawehe atu i a koe. <sup>7</sup> Na ka karanga a Mohi ki a Hohua, a ka mea ki a ia i te tirohanga a Iharaira katoa, Kia maia, kia toa: ko koe hoki e haere tahi me tenei iwi ki te whenua i oati ai a Ihowa ki o ratou matua kia homai ki a ratou; mau ano ratou e whakawhiwhi ki taua wahi. <sup>8</sup> Ko Ihowa ano, ko ia te haere ana i tou aroaro, hei tou taha ia, e kore ia e whakarere i a koe, e kore hoki e mawehe atu i a koe: kua e wehi, kua hoki e pawera. <sup>9</sup> A tuhituhia iho e Mohi tenei ture, hoatu ana ki nga tohunga, ki nga tama a Riwai, ko ratou nei nga kaiamo i te aaka o te kawenata a Ihowa, ki nga kaumatua katoa ano hoki o Iharaira. <sup>10</sup> I ako ano a Mohi ki a ratou, i mea, Hei te mutunga o nga tau e whitu, hei te wa ano e rite ai i te tau tuku noa, i te hakari o nga whare wharau, <sup>11</sup> I te wa e tae ai a Iharaira katoa ki te whakakite i a ratou ki te aroaro o Ihowa, o tou Atua, ki te wahi e whiriwhiri ai ia, ka korero ai koe i tenei ture ki te aroaro o Iharaira katoa, kia rongu ai ratou. <sup>12</sup> Whakaminea te iwi, nga tane, nga wahine, nga

tamariki, me tou tangata iwi ke i roto i ou kuwaha, kia rongou ai ratou, kia whakaakona ai, kia wehi ai i a Ihowa, i to koutou Atua, kia mau ai ki te mahi i nga kupu katoa o tenei ture: <sup>13</sup> Kia rongou ai hoki a ratou tamariki, kihai nei i mohio, kia whakaakona ai kia wehi i a Ihowa, i to koutou Atua, i nga ra katoa e ora ai koutou ki te whenua e whiti atu nei koutou i Horano ki reira ki te tango.

<sup>14</sup> Na ka mea a Ihowa ki a Mohi, Nana, ka tata ou ra e mate ai koe: karangatia atu a Hohua, e tu hoki korua ki roto ki te tapenakara o te whakaminenga, a maku e ako ki a ia. Na ka haere a Mohi

<sup>15</sup> raua ko Hohua, a tu ana raua i roto i te tapenakara o te whakaminenga. Na ka puta mai a Ihowa ki te tapenakara i roto ano i te pou kapua: a tu ana te pou kapua i runga i te kuwaha o te tapenakara.

<sup>16</sup> Katahi ka mea a Ihowa ki a Mohi, Nana, ka takoto koe ki ou matua; a ka whakatika te iwi nei, ka whai atu, ka puremu ki nga atua ke o te whenua, e haere na ratou ki reira noho ai ki waenganui i a ratou; ka whakarere i ahau, ka whakataka hoki i ta ku kawenata i whakaritea atu e ahau ki a

<sup>17</sup> ratou. A ka mura toku riri ki a ratou i taua ra, a ka whakarere ahau i a ratou, ka huna hoki i toku kanohi i a ratou, a ka pau ratou, ka pa ano hoki nga kino maha me nga matenga ki a ratou; a ka mea ratou i taua ra, Kahore ianei enei kino i pa mai ki a tatou, no te mea kahore to tatou Atua i roto i a

<sup>18</sup> tatou? Ko ahau ia, ka huna rawa ahau i toku kanohi i taua ra, mo nga kino katoa i meatia e ratou,

<sup>19</sup> mo ratou i tahuri ki nga atua ke. Na tuhituhia tenei hei waiata ma korua, ka whakaako hoki ki nga tama a Iharaira: hoatu hoki ki roto ki o ratou waha, kia ai tenei waiata hei kaiwhakaatu moku

<sup>20</sup> ki nga tama a Iharaira. No te mea ka oti ratou te kawe e ahau ki te whenua i oati ai ahau ki o ratou matua, e rerengia nei e te waiu, e te honi; a ka kai ratou, ka makona, ka momona hoki; ko reira ratou tahuri ai ki nga atua ke, mahi ai ki a ratou, a ka whakahawe ratou ki ahau, ka whakataka

<sup>21</sup> hoki i taku kawenata. A, tenei ake, hei te panga o nga kino maha, o nga mate maha ki a ratou, na ma tenei waiata e whakaatu ki to ratou aroaro; no te mea e kore e mahue i nga waha o o ratou uri: e mohio ana hoki ahau ki o ratou whakaaro e tito nei ratou inaianei nei ano, i te mea kiano ahau i kawe noa i a ratou ki te whenua i oati ai ahau.

<sup>22</sup> Na tuhituhia ana e Mohi tenei waiata i taua rangi ano, a whakaakona ana ki nga tama a

<sup>23</sup> Iharaira. A i whakahau ano ia i a Hohua, i te tama a Nunu, i mea, Kia maia, kia toa: mau hoki

e kawe nga tama a Iharaira ki te whenua i oati ai ahau ki a ratou: a hei a koe ahau. <sup>24</sup> A, ka oti i a

<sup>25</sup> Mohi te tuhi nga kupu o tenei ture ki tetahi pukapuka, a poto noa, Na, ka whakahau a Mohi i

<sup>26</sup> nga Riwaiti, i nga kaiamo i te aaka o te kawenata a Ihowa, ka mea, Tangohia tenei pukapuka o te ture, hoatu ki te taha o te aaka o te kawenata a Ihowa, a to koutou atua, a hei reira takoto ai, hei

<sup>27</sup> whakaatu ki a koe. No te mea e mohio ana ahau ki tou tutu, ki tou kaki maro: nana, i ahau e ora nei ano i a koutou i tenei ra, e tutu ana ano koutou ki a Ihowa; a ka mate ahau, tera noa ake!

28

Huihuia mai ki ahau nga kaumatua katoa o o koutou iwi, me o koutou rangatira, a ka korero ahau i enei kupu ki o ratou taringa, ka waiho hoki i te rangi, i te whenua hei kaititiro mo ratou. No te mea e mohio ana ahau, ko muri i toku matenga taka rawa ai koutou, peka ke ai i te huarahi i kiia atu e ahau ki a koutou; a ka pono mai te kino ki a koutou i nga ra whakamutunga; mo koutou ka mahi i te kino i te tirohanga a Ihowa, hei whaka pataritari i a ia ki te mahi a o koutou ringa. A korerotia ana e Mohi nga kupu o tenei waiata ki nga taringa o te huihuinga katoa o Iharaira a pote noa.

### Chapter 32

1

Kia whai taringa mai, e nga rangi, a ka korero ahau; whakarongo mai hoki, e te whenua, ki nga kupu a toku mangai: Ka kopatapata iho taku whakaako, ano he ua, ka maturuturu iho taku kupu me te tomairangi; me te ua punehunehu ki runga i te tupu hou, me te ua ta ki runga i te tarutaru: No te mea ka kauwhautia e ahau te ingoa o Ihowa: waiho te nui i to tatou Atua. Ko te Kamaka, tika tonu tana mahi; he whakarite tikanga nei hoki ona huarahi katoa: he Atua pono, kahore ona he, he tika, he tapatahi ia. Kua mahi ratou i te kino ki a ia, ehara ratou i te tamariki nana, no ratou te koha; he whakatupuranga maro, parori ke ratou. Ko ta koutou utu ianei tenei ki a Ihowa, e te iwi kuware, e kore nei e mohio? Ehara ianei ia i tou matua, nana koe i hoko? Nana koe i hanga, nana hoki koe i whakau?

7

Kia mahara ki nga ra onamata, whakaarohia nga tau o nga whakatupuranga e maha: ui atu ki tou papa, a mana e whakaatu ki a koe; ki ou kaumatua, a ma ratou e korero ki a koe. I ta te Runga Rawa whakaritenga kainga mo nga iwi, i tana wehewehenga i nga tama a te tangata, i whakaturia e ia nga rohe mo nga iwi, me te whakaaro ano ki te tokomaha o nga tama a Iharaira. Ko to Ihowa wahi hoki, ko tana iwi; ko Hakopa hei wahi pumau mona. I kitea ia e ia ki te whenua koraha, ki te tahora tuhea e hamama kau ana; i taiwhiotia ia e ia, i atawhaitia, i tiakina hoki e ia, ano ko te whatupango o tona kanohi: Ano he ekara e whakakorikori ana i tana ohanga, e whakapaho ana i runga i ana pi, e roharoha ana ia i ona parirau, e tango ana i a ratou, e waha ana hoki i a ratou i runga i ona parirau: Na Ihowa anake ia i arahi, kahore hoki he atua ke i tona taha. Nana hoki ia i whakaeke ki nga wahi tiketike o te whenua, hei hoiho mona, a i kai ia i nga hua o te mara; a nana ia i ngongo ai i te honi i roto i te kamaka, i te hinu hoki i roto i te kohatu kiripaka; I te pata

o te kau, i te waiu hipi, i te ngako reme, i nga hipi toa o te momo o Pahana, i nga koati, me te taupa o nga whatukuhu o te witi; a i inu koe i te waina, i te toto o te karepe.

15

Nawai a ka whai kiko a Iehuruna, a whana mai ana: kua whai kiko koe, kua tetere, kua ki i te ngako; a whakarerea iho e ia te Atua nana ia i hanga, whakahaweana ana ki te Kamaka o tona

16

whakaoranga. Na ratou i mea kia hae ia ki nga atua ke, whakapataritari ana ratou i a ia ki nga

17

mea whakarihariha kia riri. Ko a ratou patunga tapu i tapaea e ratou ma nga rewera, ehara nei i te Atua, ma nga atua kihai nei ratou i mohio, he mea puta hou ake nonaiane, kihai nei i wehingia

18

e o koutou matua. Ko te Kamaka i whanau ai koe ka wareware i a koe, kahore hoki ou mahara ki a Atua nana koe i hanga.

19

A ka kite a Ihowa, na anuanu ana ia ki a ratou, mo te mahi whakapataritari a ana tama, a ana

20

tamahine. Na ka mea, Ka huna ahau i toku mata i a ratou, ka titiro atu ahau he aha he mutunga

21

mo ratou: he whakatupuranga parori ke hoki ratou, he tamariki kahore he pono i roto. Na ratou ahau i mea kia hae ki te mea ehara i te Atua; i whakapataritari kia riri ki a ratou mea horihori: na maku ratou e mea kia hae ki te hunga ehara i te iwi; maku ratou e whakapataritari kia riri ki te iwi

22

poauau. Ka ngiha hoki te ahi i ahau e riri ana, ka toro atu ki te takere ra ano o te reinga, pau ake

23

hoki te whenua, tahuna ana nga turanga o nga maunga. Ka opehia e ahau nga kino ki runga ki

24

a ratou; ka whakapotoa aku pere ki a ratou. Ka hemo ratou i te matekai, ka pau hoki i te hana o te wera me te hunanga nui whakaharahara; maku hoki e tuku iho te niho o nga kararehe ki a ratou,

25

me te huwhare whakamate o nga mea e ngoki ana i te puehu. Ko te hoari ki waho whakamate ai, ko te wehi ki roto i nga whare; mana e huna ngatahi te taitama me te taitamahine, te mea ngote u raua ko te tangata hina.

26

I mea ahau, ka whakamararatia ratou e ahau ki tawhiti, ka meinga e ahau kia mutu te mahara

27

ki a ratou i roto i nga tangata: Me i kahore ahau te wehi i te ngakau kino o te hoa whawhai, kei pohehe ona hoariri, kei mea ratou, Kua kake to tatou ringa, kahore ano hoki a Ihowa i mea i enei

28

mea katoa. He iwi whakaarokore hoki ratou, a kahore he mohio i roto i a ratou. E, me i tupato

29

30

ratou, me i mohio ki tenei, me i whakaaro ki to ratou mutunga iho! Me pehea e whai ai te kotahi i te mano, e whati ai nga mano kotahi tekau i te tokorua, me i kahore ratou i hokona e to ratou

31

Kamaka, i tukua atu hoki e Ihowa? No te mea ehara to ratou kamaka i te penei me to tatou

32

Kamaka, na o tatou hoariri nei ano te ki. No te mea ko a ratou waina no te waina o Horoma, no

33

nga mara hoki o Komora: ko a ratou karepe he karepe au kawa, ko a ratou tautau kakati ana: Ko

ta ratou waina ko te huwhare whakamate o nga tarakona, me te ware ngau kino o nga ahipi.  
<sup>34</sup> Kahore ianei tenei i rongoatia ki roto ki ahau, i hiritia hoki ki waenga i aku taonga? <sup>35</sup> Maku  
nga utu e rapu, maku hoki e ea ai, a te wa e paheke ai o ratou waewae: e tata ana hoki te ra e huna  
<sup>36</sup> ai ratou, a kei te kaika mai nga mea i whakaritea mo ratou. No te mea ka whakatika a Ihowa i  
ta tana iwi, ka aroha hoki ki ana pononga; ina kite ia kua riro to ratou kaha, a kahore he mea i toe,  
<sup>37</sup> i tutakina ki roto, i waiho atu ranei ki waho. A ka mea ia, Kei hea o ratou atua, te kamaka i  
<sup>38</sup> okioki atu ai ratou; I kai nei i te ngako o a ratou patunga tapu, i inu hoki i te waina o a ratou  
ringihanga? Me whakatika ratou ki te awхина i a koutou, kia ai hoki ratou hei kuhunga atu mo  
koutou.  
<sup>39</sup> Na titiro, ko ahau, ina ko ahau ia, kahore hoki he atua i toku taha: e whakamate ana ahau, a  
e whakaora ana; i tukitukia e ahau, ko ahau ano e whakamahu ana: kahore hoki he tangata e ora ai  
<sup>40</sup> tetahi i toku ringa. No te mea e totoro atu ana toku ringa ki te rangi, me taku ki ano, I ahau e ora  
<sup>41</sup> tonu nei, Ki te whakakoia e ahau taku hoari kanapanapa, a ka mau toku ringa ki te whakariterite;  
ka whakahokia atu e ahau he utu ki oku hoariri, ka ea hoki i ahau ta te hunga e kino ana ki ahau.  
<sup>42</sup> Ka whakahaurangitia e ahau aku pere ki te toto, a ka kai taku hoari i te kikokiko; ki te toto o te  
<sup>43</sup> hunga i patua, o nga herehere, no te mahunga o nga rangatira o te hoariri. Kia hari tahi, e nga  
tauiwi, me tana iwi: ka takitakina hoki e ia te toto o ana pononga, a ka whakahokia he utu ki ona  
hoariri, ka whakamarie ano ki tona whenua, ki tana iwi.  
<sup>44</sup> Na ka haere mai a Mohi, ka korero i nga kupu katoa o tenei waiata ki nga taringa o te iwi,  
<sup>45</sup> a ia, me Hohua, me te tama a Nunu. A ka mutu ta Mohi korero i enei kupu katoa ki a Iharaira  
<sup>46</sup> katoa: Na ka mea ia ki a ratou, Kia anga mai o koutou ngakau ki nga kupu katoa e kauwhautia  
atu nei e ahau ki a koutou i tenei ra; hei whakahau atu ma koutou ki a koutou tamariki kia puritia,  
<sup>47</sup> kia mahia, nga kupu katoa o tenei ture. No te mea ehara tenei i te mea noa iho ki a koutou; ko  
to koutou orange hoki ia, a ma tenei mea e roa ai o koutou ra ki te whenua ka whiti atu nei koutou  
<sup>48</sup> i Horano ki reira ki te tango. I korero ano a Ihowa ki a Mohi i taua tino rangi ano, i mea, <sup>49</sup> E  
piki koe i tenei maunga, i Aparimi, ki Maunga Nepo, i te whenua o Moapa, e anga atu ana ki Heriko;  
<sup>50</sup> ka titiro atu ki te whenua o Kanaana e hoatu nei e ahau ki nga tama a Iharaira hei kainga: A e  
mate koe ki runga ki te maunga e piki atu na koe, ka kohia hoki ki tou iwi; ka peratia me Arona,  
<sup>51</sup> me tou tuakana, i mate ra ki Maunga Horo, a kohia atu ana ki tona iwi: Mo korua hoki i hara ki  
ahau i waenganui o nga tama a Iharaira i nga wai o Meripa, i Karehe, i te koraha o Hini; mo korua

52  
 kihai i whakatapu i ahau i waenganui o nga tama a Iharaira. Heoi ka kite koe i te whenua i mua i tou aroaro; otiia e kore koe e tae ki reira, ki te whenua e hoatu ana e ahau mo nga tama a Iharaira.

### Chapter 33

1 Ko te manaaki tenei i manaaki ai a Mohi, te tangata a te Atua, i nga tama a Iharaira i mua ake o tona matenga. 2 Na ka mea ia, I haere mai a Ihowa i Hinai, i rere mai i Heira ki runga ki a ratou; i whiti mai ia i Maunga Parana, a haere mai ana ia i nga mano tini o te hunga tapu: he ture i tona ringa matau mo ratou, e mura ana. 3 Ina, e aroha ana ia ki nga iwi; kei roto i tou ringa ana tangata tapu katoa: a noho ana ratou i ou waewae; ka riro i a ratou katoa au korero. 4 Na Mohi te ture i ako ki a tatou, hei taonga tuku iho, tuku iho mo te huihui o Hakopa. 5 Ko ia ano te kingi o Iehuruna i te huihuinga o nga upoko o te iwi, ratou ko nga iwi katoa o Iharaira. 6 Kia ora a Reupena, kua hoki e mate, otiia kia tokoouou ona tangata. 7 A tenei ano te manaaki mo Hura: na ka mea ia, Whakarongo, e Ihowa, ki te reo o Hura, mau ano hoki ia e kawe ki tona iwi: i kaha hoki ona ringa ki te tohe mona ake; a mau ia e awhina ki ona hoariri. 8 A mo Riwai i mea ia, Kei tou tangata tapu ou Tumime me ou Urimi, i whakamatautauria ra ia e koe ki Maha, i ngangautia ra e koe ki nga wai o Meripa; 9 I mea nei mo tona papa raua ko tona whaea, Kahore ahau i kite i a ia; kihai ano hoki ia i mohio ki ona tuakana, kihai i matau ki ana ake tamariki; he mea hoki, e pupuri ana ratou i tau kupu, e tiaki ana i tau kawenata. 10 Ma ratou a Hakopa e whakaako ki au whakaritenga, a Iharaira hoki ki tau ture: ma ratou hoki te paowa kakara e hoatu ki tou aroaro, me te tahunga tinana ki runga ki tau aata. 11 Manaakitia ona rawa, e Ihowa, kia aro mai hoki koe ki te mahi a ona ringa: whatiia nga hope o te hunga e whakatika ana ki a ia, o nga mea hoki e kino ana ki a ia, kei whakatika mai ano ratou. 12 Ko tana kupu mo Pineamine, Ko ta Ihowa i aroha ai ka noho humarie ki tona taha; ko ia e uhi ana i a ia a pau noa te ra, e noho ana i waenganui o ona pokohiwi. 13 Ko tana kupu mo Hohepa, He manaakitanga tona whenua na Ihowa; ki nga mea papai o te rangi, ki te tomairangi, ki te wai hohonu e takoto ake ana i raro, 14 Ki nga hua papai o te ra, ki nga mea papai hoki e whakaputaina mai ana e te marama, 15 Ki nga mea nunui hoki o nga maunga onamata, ki nga mea papai o nga maunga tu tonu, 16 Ki nga mea papai hoki o te whenua me ona tini mea; ki te manakohanga hoki ana i noho i te rakau: kia tae mai te manaaki ki runga ki te mahunga o Hohepa, ki te tumuaki hoki



17  
ona i wehea i ona tuakana. He kororia kei te matamua a tana puru; ko ona haona kei nga haona o te unikanga: ka pana e ia nga iwi, ratou katoa, ki era, tae noa ki nga pito o te whenua: a ko enei nga mano tini o Eparaima, ko enei hoki nga mano o Manahi.

18  
A, ko tana kupu mo Hepurona, Kia koa, e Hepurona, i tou putanga ki waho; e Ihakara hoki, i ou teneti. 19  
Ma ratou nga iwi e karanga ki te maunga; ki reira ratou patu ai i nga patunga o te tika: no te mea ka ngongo ratou te raneatanga o nga moana, i nga taonga huna hoki o te onepu.

20  
Ko tana kupu mo Kara, Ka manaakitia te kaiwhakawhanui i a Kara: noho ana ia me he raiona katua, haea iho e ia te ringa, ae ra me te tumuaki. 21  
A tangohia ana e ia te wahi tuatahi mona; no te mea kei reira te wahi a te kaiwhakahaere tikanga e tiakina ana; a haere mai ana me nga upoko o te iwi, a oti ana i a ia, ratou tahi ko Iharaira, te tikanga a Ihowa, me ana whakaritenga.

22  
A, ko tana kupu mo Rana, Hei kua raiona a Rana: ka mokowhiti mai ia i Pahana. 23  
A, ko tana kupu mo Napatari, E Napatari, e makona nei i te manakohanga, e ki ana hoki i te manaaki a Ihowa: nohoia e koe te taha ki te hauauru me te tonga. 24  
A, ko tana kupu mo Ahera, Ko nga tamariki te manaaki mo Ahera; kia arongia mai ia e ona tuakana, kia toua hoki tona waewae ki te hinu. 25  
Ko ou tutaki he rino, he parahi; a ka rite tou kaha ki ou ra.

26  
Kahore he rite mo te Atua, e Iehuruna, e eke hoiho nei i nga rangi ki te whakauru i a koe, ki nga kapua hoki, i runga ano i tona kororia. 27  
Ko te Atua ora tonu tou nohoanga, a kei raro ko nga ringa o tua iho: a i peia e ia te hoariri i tou aroaro, i mea hoki, Whakangaromia. 28  
Na ka noho humarie a Iharaira, me te matapuna o Hakopa ko ia anake, ki te whenua witi, waina; ae ra, ka maturuturu iho te tomairangi o ona rangi. 29  
Ka hari koe, e Iharaira: ko wai hei rite mou, mo te iwi i whakaorangia nei e Ihowa, te pukupuku hei whakapuru mou, ko te hoari hoki e whai kororia ai koe! a ka tuku mai ou hoariri i a ratou ki a koe; a ka takatakahi koe i o ratou wahi teitei.

## Chapter 34

1  
Na ka piki atu a Mohi i nga mania o Moapa ki Maunga Nepo, ki te tihi o Pihika, e titiro ana ki Heriko. A whakakitea ana e Ihowa ki a ia te whenua katoa o Kireara a tae noa ki Rana; 2  
A Napatari katoa, me te whenua o Eparaima, o Manahi hoki, te whenua katoa hoki o Hura, tae noa atu ki te moana whakamutunga mai; 3  
Te tonga me te mania i te papatairitetanga o Heriko, o te pa nikau, a Toara atu ana. 4  
Na ka mea a Ihowa ki a ia, Ko te whenua tenei i oati ai ahau ki a

Aperahama, ki a Ihaka, ki a Hakopa, i mea ai, Ka hoatu e ahau a reira ki ou uri: kua meinga koe e ahau kia kite a kanohi i reira, otiia e kore koe e whiti ki reira.

<sup>5</sup> Na ka mate a Mohi, te pononga a Ihowa ki reira, ki te whenua o Moapa, ka pera me ta Ihowa  
<sup>6</sup> i korero ai. A tanumia iho ia e ia ki tetahi kokoru o te whenua o Moapa, i te ritenga o Petepeoro:  
<sup>7</sup> otiia kahore tetahi tangata e mohio ana ki tona urupa a mohoa noa nei. A kotahi rau e rua tekau  
 nga tau o Mohi i tona matenga: kahore ano i ataruatia ona kanohi, kahore ano hoki i heke noa tona  
<sup>8</sup> kaiotatanga. Na uhungatia ana a Mohi e nga tama a Iharaira i nga mania o Moapa, e toru tekau  
 nga ra: a taka noa nga ra i uhungatia ai, i tangihia ai a Mohi.

<sup>9</sup> A ki tonu a Hohua, te tama a Nunu, i te wairua o te matauranga; na Mohi hoki i whakapa ona  
 ringa ki runga ki a ia; a rongoa ana ki a ia nga tama a Iharaira, mea ana i nga mea i whakahaua e  
<sup>10</sup> Ihowa ki a Mohi. A kahore ano kia ara i roto i a Iharaira i muri nei tetahi atu poropiti hei rite  
<sup>11</sup> mo Mohi, i mohio nei a Ihowa ki a ia, titiro atu, titiro mai; Ara mo nga tohu katoa, mo nga  
 merekara i unga ai ia e Ihowa ki te mahi i te whenua o Ihipa, ki a Parao ratou ko ona tangata katoa,  
<sup>12</sup> ki tona whenua katoa hoki; Mo nga mahi katoa hoki a te ringa kaha, mo nga mea whakawehi  
 nui i meatia e Mohi ki te aroaro o Iharaira katoa.

## Joshua

### Chapter 1

<sup>1</sup> Na, i muri iho i te matenga o Mohi, o te pononga a Ihowa, ka korero a Ihowa ki a Hohua, ki  
 te tama a Nunu, ki te tangata a Mohi, ka mea, <sup>2</sup> Kua mate a Mohi, taku pononga; na whakatika,  
 whiti atu i tenei Horano, a koe me tenei iwi katoa, ki te whenua ka hoatu nei e ahau ki a ratou, ara  
<sup>3</sup> ki nga tama a Iharaira. Ko nga wahi katoa e takahia e nga kapu o o koutou waewae kua hoatu e  
<sup>4</sup> ahau a reira ki a koutou, ka rite ki taku i korero ai ki a Mohi. Ko te rohe ki a koutou kei te koraha,  
 kei Repanona nei, a te awa nui atu ana, ara te Awa Uparati, ko te whenua katoa o nga Hiti, a tae  
<sup>5</sup> noa ki te moana nui, ki te toenetanga o te ra. E kore tetahi e kaha ki te tu ki tou aroaro i nga ra  
 katoa e ora ai koe: i a Mohi ahau, ka pera ano ahau ki a koe; e kore ahau e whakarere i a koe, e  
<sup>6</sup> kore hoki e mawehe i a koe. Kia kaha, kia maia rawa: mau hoki tenei iwi e whakawhiwhi ki te  
<sup>7</sup> whenua i oati ai ahau ki o ratou matua kia hoatu ki a ratou. Heoi kia kaha, kia tino maia rawa ki

te pupuri, ki te mahi i nga ture katoa i whakahaua ki a koe e Mohi, e taku pononga: kei peka ke koe  
 i reira ki matau, ki maui ranei, kia tika ai tau i nga wahi katoa e haere ai koe. Kei whakarerea e  
 tou waha tenei pukapuka o te ture; engari kia u ou whakaaro ki reira i te ao, i te po, kia mau ai koe  
 ki te mahi i nga mea katoa kua oti te tuhi ki reira: ma reira ka whai wahi ai koe i tou huarahi, ma  
 reira hoki koe ka kake ai. Kahore ianei ahau i whakahau ki a koe? Kia kaha, kia maia; kua e  
 wehi, kua hoki e pawera: no te mea kei a koe a Ihowa, tou Atua, i nga wahi katoa e haere ai koe.  
 10 Na ka whakahau a Hohua i nga rangatira o te iwi, ka mea, 11 Haere ra waenganui o te puni,  
 ka whakahau i te iwi, ka mea, Taka he o mo koutou; no te mea kia toru ake ra ka whiti koutou i te  
 Horano nei, ka haere ki te tango i te whenua ka homai nei e Ihowa, e to koutou Atua, kia nohoia e  
 koutou. 12 I korero ano a Hohua ki nga Reupeni, ki nga Kari, ki tetahi taanga hoki o te iwi o Manahi,  
 i mea, 13 Kia mahara ki te kupu i whakahau ai a Mohi, te pononga a Ihowa ki a koutou, i mea ai,  
 E mea ana a Ihowa, to koutou Atua, i a koutou kia okioki, ka homai hoki e ia tenei whenua ki a  
 koutou. 14 Ko a koutou wahine, ko a koutou tamariki, me a koutou kararehe, me noho ki te whenua  
 i hoatu e Mohi ki a koutou i tenei taha o Horano, ko koutou ia, ko nga marohirohi katoa, me haere  
 topuni atu i te aroaro o o koutou tuakana, hei whakauru mo ratou; 15 Kia meinga ra ano e Ihowa  
 o koutou tuakana kia okioki, kia pena me koutou, a kia whiwhi ratou ki te whenua ka homai nei e  
 Ihowa, e to koutou Atua, ki a ratou; katahi koutou ka hoki ai ki te whenua i riro nei i a koutou, ka  
 noho ai hoki ki te wah i i hoatu e Mohi, e te pononga a Ihowa, ki a koutou i tenei taha o Horano, i  
 te putanga mai o te ra.  
 16 Na ka whakahoki ratou ki a Hohua, ka mea, Ko nga mea katoa e whakahaua e koe ki a matou  
 ka meatia e matou, a ka haere hoki matou ki nga wahi katoa e unga ai matou e koe. 17 Ko to matou  
 rongu ki a Mohi i nga mea katoa, ka pera ano to matou rongu ki a koe: kia noho ra ia a Ihowa, tou  
 Atua, ki a koe, me ia hoki i noho ki a Mohi. 18 Ahakoa ko wai te tangata e tutu ki tau whakahau,  
 e kore hoki e rongu ki au kupu, ki nga mea katoa e whakahau ai koe ki a ia, me whakamate: ko koe  
 ia kia kaha, kia maia.

## Chapter 2

1 Na ka tonoa atu e Hohua, e te tama a Nunu, etahi tangata tokorua i Hitimi hei tutei puku atu,  
 i mea ia, Tikina, tirohia te whenua, me Heriko hoki. Na haere ana raua, a ka tae ki te whare o tetahi  
 wahine kairau, ko Rahapa tona ingoa, a ka moe i re ira. 2 Na ka korerotia ki te kingi o Heriko, ka  
 meatia, Nana, kua tae mai etahi tangata ki konei i te po nei, no nga tama a Iharaira, he whakataki

<sup>3</sup>  
i te whenua. Na ka tonoa atu e te kingi o Heriko ki a Rahapa, ka mea, Whakaputaina mai ki waho  
nga tangata i haere mai na ki a koe, i haere atu na ki tou whare: i haere mai hoki raua he mataki i

<sup>4</sup>  
te whenua katoa. Na ka hopu te wahine ra ki nga tangata tokorua, a huna iho e ia; a ka mea atu

<sup>5</sup>  
ia, He tika i haere mai nga tangata ki ahau, heoi, kihai ahau i mohio no hea ranei raua: A, no te  
wa o te tutakitanga o te kuwaha, no te mea ka pouri nei, ka puta atu aua tangata ki waho: kahore  
ahau e mohio i haere aua tangata ki hea: kia hohoro te whai i muri i a raua; ka mau hoki raua i a

<sup>6</sup>  
koutou. Kahore ia, kua kawea raua e ia ki runga ki te tuanui, a huna ana raua ki nga kakau rinena

<sup>7</sup>  
i horahorangia e ia ki runga i te tuanui. Na ka whai nga tangata i muri i a raua na te huarahi ki  
Horano a tae noa ki nga whakawhitinga: a, no te putanga atu ano o nga kaiwhai i a raua ki waho,  
ka tutakina te kuwaha.

<sup>8</sup> A, kiano raua i takoto noa, na ka haere ake ia ki a raua ki te tuanui; <sup>9</sup> Ka mea ki aua tangata,  
E mohio ana ahau kua hoatu te whenua nei e Ihowa ki a koutou, kua tau mai hoki te wehi o koutou

<sup>10</sup>  
ki a matou, a kei te ngohe noa nga tangata katoa o te whenua nei i a koutou. I rongu hoki matou  
ki ta Ihowa whakamaroketanga i te wai o te Moana Whero i o koutou aroaro, i to koutou putanga  
mai i Ihipa; ki nga mea hoki i meatia e koutou ki nga kingi tokorua o nga Amori i tawahi o Horano,

<sup>11</sup>  
ki a Hihona raua ko Oka, i huna n ei e koutou. A, i to matou rongonga ano, ka ngohe noa o  
matou ngakau, kahore atu hoki he tokonga ake o te wairua i roto i tetahi, na koutou hoki: no te mea

<sup>12</sup>  
ko Ihowa, ko to koutou Atua, ko ia te Atua i te rangi i runga, i te whenua hoki i raro. Na, tena,  
oatitia mai a Ihowa ki ahau, i te mea kua atawhaitia nei korua e ahau, ka atawhai hoki koutou ki te

<sup>13</sup>  
whare o toku matua, a ka homai he tohu pono ki ahau: Ka whakaora hoki koutou i toku papa, i  
toku whaea, i oku tungane, i oku tuakana, me a ratou mea katoa, a ka araarai i a matou kei mate.

<sup>14</sup>  
Na ka mea aua tangata ki a ia, Ko to maua ora mo to koutou, ki te kahore koutou e whaki i ta  
maua take: a tenei ake, hei te homaitanga a Ihowa i te whenua ki a matou, ka puta hoki ta matou

<sup>15</sup>  
mahi atawhai, ta matou mahi pono ki a koe. Na tukua iho ana raua e ia ki tetahi taura na te

<sup>16</sup>  
matapihi: kei te taiepa tonu hoki o te pa tona whare, a noho ai ia i runga i te taiepa. A ka mea  
ia ki a raua, Haere ki te maunga, kei tutaki nga kaiwhai ki a korua; ka piri ai ki reira kia toru nga

<sup>17</sup>  
ra, kia hoki mai ra ano nga kaiwhai: katahi korua ka haere i to korua huarahi. Katahi ka mea

<sup>18</sup>  
aua tangata ki a ia, E kore maua e whai hara mo tenei oati au i whakaoati nei koe i a maua. Nana,  
ina tae mai matou ki tenei whenua, herea te miro nei, te aho whero nei ki te matapihi i tukua iho  
nei maua e koe na reira; a me whakahuihui mai ki a koe, ki roto ki te whare, tou papa, me tou whaea,

<sup>19</sup>  
me ou tungane, me te nohoanga katoa o to u papa. Na ahakoa ko wai te tangata e puta atu ana  
ki waho o nga tatau o tou whare, hei runga ano i tona mahunga ona toto, ko maua ia ka harakore;

tena ko nga tangata katoa i roto tahi koutou i te whare, hei o maua mahunga ona toto, ki te pa atu  
<sup>20</sup>  
tetahi ringa ki a ia. Otiia, ki te korero koe i ta maua take, ka watea maua i tau oati i whakaoati  
<sup>21</sup>  
nei koe i a maua. Ano ra ko ia, Waiho i ta korua i mea na. A tukua atu ana raua e ia, a haere ana  
raua: a herea ana e ia te aho whero ki te matapihi.  
<sup>22</sup>  
Na ka haere raua, a ka tae ki te maunga, a noho ana i reira e toru nga ra, a hoki noa nga  
<sup>23</sup>  
kaiwhai: a rapu noa nga kaiwhai i a raua i te huarahi katoa, a kahore i kitea. Katahi ka hoki aua  
tangata tokorua, ka heke iho i te maunga, a ka whiti, ka tae ki a Hohua, tama a Nunu, ka korero ki  
<sup>24</sup>  
a ia i nga mea katoa i pono ki a raua. A ka mea raua ki a Hohua, Koia ano, kua homai e Ihowa  
te whenua katoa ki o tatou ringa; a ngohe kau nga tangata katoa o te whenua i a tatou.

### Chapter 3

<sup>1</sup>  
Na ka maranga wawe a Hohua i te ata, a ka turia atu e ratou i Hitimi, ka tae ki Horano, a ia  
me nga tama katoa a Iharaira, a moe ana ki reira i te mea kiano i whiti noa. <sup>2</sup> Na, i te paunga o nga  
<sup>3</sup>  
ra e toru, ka haere nga rangatira na waenganui o te puni; A ka whakahau i te iwi, ka mea, E kite  
koutou i te aaka o te kawenata a Ihowa, a to koutou Atua, i nga tohunga hoki, i nga Riwaiti e amo  
<sup>4</sup>  
ana, hei kona ka whakatika atu i o koutou nohoanga, ka haere i muri. Otiia kia whai takiwa ki  
waenganui o koutou, o taua mea; kia rua mano whatianga, he mea whanganga marie; kua e  
whakatata ki taua mea, kia mohio ai koutou ki te huarahi e haere ai koutou: kahore nei hoki koutou  
<sup>5</sup>  
i haere i tena huarahi i mua ake ne i. A i mea ano a Hohua ki te iwi, Whakatapu i a koutou: ko  
<sup>6</sup>  
apopo hoki a Ihowa mahi ai i nga mea whakamiharo ki waenganui i a koutou. I mea ano a Hohua  
ki nga tohunga, Hapainga ake te aaka o te kawenata, haere i mua i te iwi. A hapainga ana e ratou  
te aaka o te kawenata, a haere ana i mua i te iwi.  
<sup>7</sup>  
A ka mea a Ihowa ki a Hohua, Ko aiane ai te whakanui i a koe ki te aroaro o  
<sup>8</sup>  
Iharaira katoa, kia mohio ai ratou, i a mohi ahau, ka pera ano ahau ki a koe. A mau e whakahau  
ki nga tohunga e amo ana i te aaka o te kawenata, e mea, E tae koutou ki te tapa o te wai o Horano,  
<sup>9</sup>  
me ata tu i roto i Horano. Na ka mea a Hohua ki nga tama a Iharaira, Haere mai, whakarongo ki  
<sup>10</sup>  
nga kupu a Ihowa, a to koutou Atua. Na ka mea a Hohua, Ma konei koutou ka mohio ai kei roto  
i a koutou te Atua ora, a ka peia rawatia e ia i to koutou aroaro nga Kanaani, nga Hiti, nga Hiwi,  
<sup>11</sup>  
nga Perihi, nga Kirikahi, nga Amori, me nga Iepuhi. Nana, ko te aaka o te kawenata a te Ariki

o te ao katoa te haere nei i mua i a koutou ki roto o Horano. <sup>12</sup> Na motuhia ki a koutou kia tekau  
ma rua tangata o nga iwi o Iharaira, kia takikotahi te tangata o te iwi. <sup>13</sup> A, ina tatu nga kapu o nga  
waewae o nga tohunga e amo ana i te aaka a Ihowa, a te Ariki o te ao katoa, ki nga wai o Horano,  
ka motuhia nga wai o Horano, ara nga wai e rere mai ana i runga; a ka tu ake, kotahi ano puranga.  
<sup>14</sup> A, no te haerenga atu o te iwi i o ratou teneti ki te whakawhiti i Horano, me nga tohunga  
hoki e amo ana i te aaka o te kawenata i mua i te iwi; <sup>15</sup> A, i te taenga o nga kaiamo i te aaka ki  
Horano, i te tukunga atu hoki o nga waewae o nga tohunga e amo ana i te aaka ki te taha o te wai;  
e ngawha ana hoki a Horano ki runga i ona pareparenga katoa i nga ra katoa o te kotinga; <sup>16</sup> Ko te  
tino turanga o nga wai e heke iho ana i runga, ara ake ana kotahi ano puranga, i tawhiti noa atu i  
te pa i Arama, i te taha o Haretana: a, ko nga wai e rere iho ana ki te moana o te mania, ki te Moana  
Tote, mimiti ana, motu ke atu ana: a w hiti ana te iwi i te ritenga atu o Heriko. <sup>17</sup> A tu marie ana  
nga tohunga i amo nei i te aaka o te kawenata a Ihowa i te wahi maroke i waenganui o Horano, me  
te haere ano a Iharaira katoa ki tawahi na te wahi maroke, a poto noa te iwi katoa te whiti i Horano.

#### Chapter 4

<sup>1</sup> A, ka poto katoa te iwi te whiti i Horano, na ka korero a Ihowa ki a Hohua, ka mea, <sup>2</sup> Tangohia  
mai e koutou i roto i te iwi kia kotahi tekau ma rua tangata, kia takikotahi tangata o te iwi, <sup>3</sup> A ka  
whakahau ki a ratou, ka mea, Tangohia atu i konei, i waenganui o Horano, i te wahi i ata tu ai nga  
waewae o nga tohunga, kia tekau ma rua nga kohatu, a maua atu, waiho ki te moenga e moe ai  
koutou a tenei po. <sup>4</sup> Na ka karangatia e Hohua nga tangata kotahi tekau ma rua i whakaritea e ia i  
roto i nga tama a Iharaira, takikotahi te tangata o roto o te iwi: <sup>5</sup> A ka mea a Hohua ki a ratou, Haere  
atu i mua i te aaka a Ihowa, a to koutou Atua, ki waenganui o Horano, ka hapai ake kia takikotahi  
te kohatu ma te tangata ki runga ki tona pokohiwi, kia rite ki nga iwi o nga tama a Iharaira te maha:  
<sup>6</sup> Kia waiho ai tenei mea hei tohu ki waenganui i a koutou; mo te ui a a koutou tamariki a mua, mo  
te mea, Hei aha enei kohatu ma koutou? <sup>7</sup> Katahi koutou ka mea atu ki a ratou, No te motuhanga  
i nga wai o Horano i mua i te aaka o te kawenata a Ihowa; i tona whitinga mai i Horano i motuhia  
nga wai o Horano: a ko enei kohatu hei whakamahara mo nga tama a Iharaira a ake ake. <sup>8</sup> A peratia  
ana e nga tama a Iharaira me ta Hohua i whakahau ai, hapainga ake ana e ratou nga kohatu kotahi  
tekau ma rua i waenganui o Horano, peratia ana me ta Ihowa i korero ai ki a Hohua, he mea rite ki  
nga iwi o nga tama a Iharaira te maha; a m auria ana ki to ratou puni, waiho ana i reira. <sup>9</sup> A i

whakaturia e Hohua etahi kohatu kotahi tekau ma rua ki waenganui o Horano, ki te wahi i tu ai nga waewae o nga tohunga i amo i te aaka o te kawenata: kei reira ano aua kohatu a mohoa noa nei.

10

Heoi, tu ana tera nga tohunga i amo i te aaka i waenganui o Horano a oti noa nga mea katoa i whakahau ai a Ihowa ki a Hohua kia korerotia ki te iwi, i rite tonu ki nga mea katoa i whakahau

11

ai a Mohi ki a Hohua; a i hohoro tonu te iwi te whiti. A, ka tapeke katoa te iwi te whiti, na ka

12

whiti te aaka a Ihowa, me nga tohunga i te tirohanga a te iwi. Ko nga tama a Reupena, ko nga tama a Kara, me tetahi taanga o te iwi o Manahi i whiti topuni atu i te aroaro o nga tama a Iharaira,

13

i pera me ta Mohi i korero ai ki a ratou; Kei te wha tekau nga mano, he hunga tumatohi tonu

14

mo te riri, i haere i te aroaro o Ihowa ki nga mania o Heriko ki te whawhai. No taua ra i whakanui ai a Ihowa i a Hohua i te aroaro o Iharaira katoa; a wehi ana ratou i a ia, pera ana me ratou i wehi

15

i a Mohi, i nga ra katoa i ora ai ia. I korero ano a Ihowa ki a Hohua, i mea,

16

17

tohunga e amo ana i te aaka o te whakaaturanga, kia haere ake i roto i Horano. Na ka mea atu

18

a hohua ki nga tohunga, Haere ake i roto i Horano. A, no te haerenga ake o nga tohunga i amo i te aaka o te kawenata a Ihowa i waenganui o Horano, a ka mahuta ake nga kapu o nga waewae o nga tohunga ki te wahi maroke, ko te tino hokinga o te wai o Horano ki tona wahi ano, a huri tonu

19

ake ki rung a i ona pareparenga, pera ana me to mua. No te tekau o nga ra o te marama tuatahi te iwi i haere ake ai i Horano, a noho ana i Kirikara i te taha ki te rawhiti o Heriko.

20

A, ko aua kohatu kotahi tekau ma rua i tangohia, ake e ratou i roto i Horano, na Hohua i

21

whakatu ki Kirikara. A, i korero ia ki nga tama a Iharaira, i mea, E ui a koutou tamariki a mua

22

ki o ratou matua, e mea, He aha enei kohatu? Na me whakaatu ki a koutou tama, me ki atu, I

23

whiti maroke mai a Iharaira i tenei Horano. Na Ihowa hoki, na to koutou Atua i whakamaroke nga wai o Horano i mua i a koutou, a whiti noa koutou, rite tahi ki ta Ihowa, ki ta to koutou Atua i mea ai ki te Moana Whero, i whakamaroketia ra e ia i mua hoki i a tatou, a whiti noa mai tatou:

24

Kia mohio ai nga iwi katoa o te whenua ki te ringa o Ihowa, he kaha; kia wehi ai ratou i a Ihowa, i to koutou Atua, i nga ra katoa.

## Chapter 5

1

A, no te rongonga o nga kingi katoa o nga Amori, o era ki te taha ki te hauauru o Horano, me nga kingi katoa o nga Kanaani, o era i te moana, ki te whakamaroketanga a Ihowa i nga wai o Horano i te aroaro o nga tama a Iharaira a whiti noa matou, na ka ngohe noa o ratou ngakau, kahore

atu hoki o ratou wairua, i te wehi ki nga tama a Iharaira. <sup>2</sup> Na i taua wa ka mea a Ihowa ki a Hohua,  
 Hanga etahi maripi kohatu mau, a ka tuarua i te kotinga o nga tama a Iharaira. <sup>3</sup> A hanga ana e  
 Hohua etahi maripi kohatu, a kotia iho nga tama a Iharaira ki te pukepuke o nga kiri matamata.  
<sup>4</sup>  
 A ko te take tenei i kokoti ai a Hohua: ko te hunga katoa i puta mai i Ihipa, ko nga tane, ko nga  
 tangata hapai patu, i mate ki te ara i te koraha, i muri i to ratou putanga mai i Ihipa. <sup>5</sup> Na ko te  
 hunga katoa i puta mai he mea kokoti katoa: tena ko te hunga i whanau ki te ara i te koraha i to  
 ratou putanga mai i Ihipa, kihai ena i kotia e ratou. <sup>6</sup> E wha tekau hoki nga tau i haere ai nga tama  
 a Iharaira i te koraha, a poto noa te hunga hapai puta katoa i puta mai i Ihipa, mo ratou kihai i rongo  
 ki te reo o Ihowa: ko nga tangata hoki i oati nei a Ihowa ki a ratou, e kore e whakakitea ki a ra tou  
 te whenua i oati ai a Ihowa ki o ratou matua kia homai e ia ki a tatou, te whenua hoki e rerengia  
 ana e te waiu, e te honi. <sup>7</sup> A, ko a ratou tamariki i whakaarahia ake e ia hei whakakapi mo ratou,  
 ko ratou i kotia e Hohua: no te mea kahore o ratou kotinga; kahore nei hoki ratou i kotia i te huarahi.  
<sup>8</sup>  
 A, no ka poto katoa nga tangata te kokoti e ratou, ka noho ratou ki te puni ki o ratou wahi a mahu  
<sup>9</sup>  
 noa. Na ka mea a Ihowa ki a Hohua, No tenei ra i hurihia atu ai e ahau te taunutanga o Ihipa i a  
 koutou. Na reira i huaina ai te ingoa o taua wahi ko Kirikara a tae noa mai ki tenei ra.  
<sup>10</sup>  
 A i noho nga tama a Iharaira ki Kirikara; a i mahi ratou i te kapenga i te tekau ma wha o nga  
<sup>11</sup>  
 ra o te marama i te ahiahi, i nga mania o Heriko. A, no te aonga ake i te kapenga, i kai ai ratou  
<sup>12</sup>  
 i te witi o te whenua, he keke kihai i rewenatia, me te witi pahuhu, no taua rangi pu ano. A i  
 whakamutua te mana i te aonga ake o te ra, i muri i ta ratou kainga i te witi ake o te whenua; kahore  
 atu hoki he mana ma nga tama a Iharaira; heoti, kai ana ratou i nga hua o te whenua o Kanaana i  
 taua tau.  
<sup>13</sup>  
 A, i a Hohua i Heriko, na ka anga ake ona kanohi, ka titiro, na he tangata e tu mai ana i tona  
 aroaro, ko tana hoari hoki i tona ringa, unu rawa: na ka haere atu a Hohua ki a ia, ka mea ki a ia,  
 mo matou ranei koe, mo o matou hoariri ranei? <sup>14</sup> Ka mea ia, Kahore; engari he rangatira no te  
 ope a Ihowa ahau i haere mai nei. Na ka tapapa a Hohua ki te whenua, ka koropiko, ka mea ki a  
<sup>15</sup>  
 ia, E pehea mai ana toku ariki ki tana pononga? A ka mea te rangatira o te ope a Ihowa ki a  
 Hohua, Wetekina tou hu i tou waewae; he tapu hoki te wahi e tu na koe. A pera ana a Hohua.

## Chapter 6



<sup>1</sup> Na he mea tino tutaki a Heriko i te wehi i nga tama a Iharaira; kahore he tangata i haere ki waho, kahore hoki tetahi i haere ki roto. <sup>2</sup> A ka mea a Ihowa ki a Hohua, Titiro, kua hoatu e ahau ki tou ringa a Heriko, me tona kingi, ratou ko nga marohirohi. <sup>3</sup> Na taiawhiotia te pa e koutou, e nga tangata hapai patu katoa, me haere a tawhio noa te pa, kia kotahi ano awhiotanga, Kia ono nga ra e pena ai koe. <sup>4</sup> A kia tokowhitu nga tohunga e mau i nga tetere haona hipi e whitu ki mua i te aaka; a i te whitu o nga ra me taiawhio e koutou te pa, kia whitu nga taiawhiotanga, a me whakatangi e nga tohunga nga tetere. <sup>5</sup> A, ko roa te tangi o te haona hipi, a ka rangona e koutou te tangi o te tetere, me hamama katoa te iwi, kia nui te hamama; na ka hinga te taiepa o te pa, papa rawa ki raro, a ka piki atu te iwi, tera, tera, i nga wahi e rite mai ana ki a ratou.

<sup>6</sup> Na ka karanga a Hohua, te tama a Nunu, ki nga tohunga, ka mea ki a ratou, Hapainga te aaka o te kawenata, a ma nga tohunga tokowhitu e mau nga tetere haona hipi e whitu ki mua i te aaka a Ihowa. <sup>7</sup> A i mea ratou ki te iwi, Haere, taiawhiotia te pa, a ko nga tangata hapai patu e haere i mua i te aaka a Ihowa. <sup>8</sup> Heoi, i te korerotanga a Hohua ki te iwi, na ka mau nga tohunga tokowhitu ki nga tetere haona hipi e whitu, a haere ana i mua i a Ihowa, me te whakatangi ano i nga tetere; i haere hoki te aaka o te kawenata a Ihowa i muri i a ratou. <sup>9</sup> A ko nga tangata hapai patu i haere i mua i nga tohunga e whakatangi ana i nga tetere, ko te hiku i haere i muri i te aaka, haere ana nga tohunga me te whakatangi haere i nga tetere. <sup>10</sup> A i whakaako a Hohua i te iwi, i mea, Kaua e hamama, kaua o koutou reo e rangona, kei puta hoki tetahi kupu i o koutou waha, a tae noa ki te ra e mea ai ahau ki a koutou, kia hamama; hei reira koutou ka hamama. <sup>11</sup> Na meinga ana e ia kia taiawhiotia te pa e te aaka a Ihowa, haere ana a tawhio noa, kotahi ano taiawhiotanga: na ka haere ratou ki te puni, a moe ana ki te puni. <sup>12</sup> A ka maranga wawe a Hohua i te ata, a hapainga ake ana e nga tohunga te aaka a Ihowa. <sup>13</sup> I mau ano hoki nga tohunga tokowhitu i nga tetere haona hipi e whitu i mua i te aaka a Ihowa, i haere tonu me te whakatangi haere i nga tetere: a ko nga tangata hapai patu i haere i mua i a ratou; ko te nuinga ia i haere i muri i te aaka a Ihowa: haere ana nga tohunga me te whakatangi ano i nga tetere. <sup>14</sup> A i te rua o nga ra i taiawhiotia e ratou te pa, kotahi ano taiawhiotanga, a hoki ana ki te puni: a pera tonu ratou i nga ra e ono. <sup>15</sup> Na i te whitu o nga ra ka maranga wawe ratou i te puaotanga o te ra, ka taiawhio hoki i te pa, e whitu nga taiawhiotanga, ko taua ritenga ra ano; otiia i taua ra e whitu a ratou taiawhiotanga i te pa. <sup>16</sup> Na i te whitu o nga taiawhiotanga, ka whakatanga nga tohunga i nga tetere, ka mea a Hohua ki te iwi, Hamama; kua homai hoki e Ihowa te pa ki a koutou.

17

Hei mea oti atu ano te pa ma Ihowa, a reira me nga mea katoa i roto; ko Rahapa anake, ko te wahine kairau, ko ia kia ora me nga mea katoa i a ia i roto i te whare, mona i huna i nga tangata

18

i tonoa atu e tatou. Ko koutou ia, kia hopohopo ki te mea kua oti te kanga, kei takina he kanga ki a koutou, ki te tango i tetahi wahi o te mea kua oti te kanga; a ka meinga te ope o Iharaira kia

19

kanga, a whakararua iho e koutou. Engari nga hiriwa me nga koura, me nga mea parahi, rino

20

hoki, kia tapu ena ma Ihowa; me riro ena ki roto ki te whare taonga a Ihowa. Heoi ka hamama te iwi, a ka whakatangi nga tohunga i nga tetere: na, i te rongonga o te iwi i te tangi o te tetere, ko te tino hamamatanga o te iwi, he nui te hamama, a hinga iho te taiepa, papa rawa ki raro, a piki atu

21

ana te iwi ki roto ki te pa, tera, tera, i te wahi e rite mai ana ki a ia, na horo ana i a ratou te pa. A tino huna rawatia e ratou nga mea katoa i te pa, nga tane, nga wahine, nga taitamariki, nga koroheke,

22

nga kau, nga hipi, nga kaihe, ki te mata o te hoari. A i mea a Hohua ki nga tangata tokorua i tuteia ai te whenua, Haere ki te whare o te wahine kairau, mauria mai hoki i reira te wahine me nga

23

mea katoa i a ia, whakaritea ta korua i oati ai ki a ia. Na ka haere aua taitama, nga tutei, a mauria ana mai e raua a Rahapa, tona papa, tona whaea, ona tungane, me nga mea katoa i a ia, a mauria katoatia mai ana hoki e raua ona whanaunga katoa ki waho; a waiho ana i waho o te puni o Iharaira.

24

Na tahuna ake e ratou te pa ki te ahi, me nga mea katoa i roto: ko te hiriwa anake, me te koura,

25

me nga mea parahi, rino hoki, i hoatu e ratou ki te whare taonga o te whare o Ihowa. Otiia ko Rahapa, ko te wahine kairau, ko te nohoanga o tona papa, me nga mea katoa i a ia, i whakaorangia e Hohua; a noho ana ia i waenganui o Iharaira a tae noa mai ki tenei ra, mona i huna i nga tangata

26

i tonoa e Hohua ki te tutei i Heriko. Na ka whakaoati a Hohua i a ratou i taua wa, ka mea, Ka kanga te tangata ki te aroaro o Ihowa e whakatika ana, ka hanga i tenei pa, i Heriko: ka whakaturia

27

e ia hei runga i tana matamua, ka whakanohoia ano nga tatau hei runga i tana tama o muri. Heoi i a Hohua tonu a Ihowa; a paku ana tona rongoputa noa i te whenua.

## Chapter 7

1

Otiia i taka nga tama a Iharaira ki te kino i te mea kua oti te kanga: he tangohanga na Akana tama a Karami, tama a Taperi, tama a Tera, o te iwi o Hura, i tetahi wahi o te mea kua oti te kanga;

2

a mura iho te riri o Ihowa ki nga tama a Iharaira. Na ka tonoa atu e Hohua etahi tangata i Heriko ki Hai, ki te taha o Peteawene, i te taha ki te rawhiti o Peteere, ka korero hoki ki a ratou, ka mea,

3

Haere ki runga ki te titiro i te whenua. Na ka haere aua tangata, ka titiro i Hai. A ka hoki mai

ratou ki a Hohua, ka mea ki a ia, Kaua e haere katoa te iwi ki runga; engari kia rua, kia toru ranei mano o nga tangata e haere ki runga ki te patu i Hai; kaua hei whakangenge kau atu i te iwi ki reira;

4 he tokoouou hoki ratou. Heoi haere ana ki reira etahi o te iwi, me te mea e toru mano: na rere ana

5 ratou i te aroaro o nga tangata o Hai. A tukitukia iho o ratou e nga tangata o Hai me te mea e toru tekau ma ono tangata; i whaia hoki ratou i mua i te kuwaha a tae noa ki Heparimi, na patupatua ana ratou i te heketanga: a ngohe kau te ngakau o te iwi, koia ano kei te wai.

6 Na ka haehae a Hohua i ona kakahu, ka tapapa ki te whenua, ki mua o te aaka a Ihowa a ahiahi noa, a ia me nga kaumatua o Iharaira; a opehia ana e ratou he puehu ki o ratou upoko. Na ka mea a Hohua, Aue, e te Ariki, e Ihowa, na te aha rawa ra koe i anga ai ki te whakawhiti mai i tenei iwi i Horano, i hoatu ai matou ki te ringa o nga Amori, kia huna ai matou? Aue, me i aro matou ki te

8 noho atu i tera taha o Horano! E te Ariki, me pehea ra he kupu maku, kua parea atu nei e Iharaira

9 o ratou tuara i te aroaro o o ratou hoariri? Na te mea ka rongongia nga Kanaani me nga tangata katoa o te whenua, na ka karapotia matou, ka huna hoki o matou ingoa i te whenua: a ka pehea koe ki tou ingoa nui?

10 Na ka mea a Ihowa ki a Hohua, Whakatika; he aha tau e takoto tapapa na? 11 Kua hara a Iharaira; ae, kua takahi ratou i taku kawenata i whakarite ai ahau ki a ratou: ae, kua tangohia nei e ratou tetahi wahi o te mea kua oti te kanga, me te tahae, me te teka ano ratou, a whaowhina ana e

12 ratou ki roto ki a ratou mea. Na reira nga tama a Iharaira te ahei ai te tu i te aroaro o o ratou hoariri, na hurihia ana o ratou tuara i te aroaro o o ratou hoariri, kua kanga hoki ratou: e kore ahau e haere i a koutou a muri atu, ki te kahore koutou e whakangaro i te mea k anga i roto i a koutou.

13 Whakatika, whakatapua te iwi, mea atu, whakatapu i a koutou mo apopo: ko te kupu hoki tenei a Ihowa, a te Atua o Iharaira, Kei roto i a koe, e Iharaira, te mea kanga: e kore koe e kaha ki te tu

14 ki te aroaro o ou hoariri, kia tangohia atu ra ano e koutou te mea kanga i roto i a koutou. Na i te ata me whakatata mai koutou, ara o koutou iwi; a tera ko te iwi e tango ai a Ihowa me whakatata mai a hapu; a ko te hapu e tango ai a Ihowa me whakatata a whare mai; a ko te whare e tango ai a

15 Ihowa me whakatata mai ia tangata, ia tangat a. A, ko te tangata e hopukia kei a ia te mea kanga, me tahu ki te ahi, a ia me ana mea katoa: mona i takahi i te kawenata a Ihowa, i mahi poauau hoki i roto i a Iharaira.

16 Na ka maranga wawe a Hohua i te ata, a whakatataia mai ana e ia a Iharaira, ara ona iwi; na

17 ka mau ko te iwi o Hura. Na ka arahina mai e ia te hapu o Hura: a ka mau te hapu o nga Terahi:

18 na ka arahina mai e ia te hapu o nga Terahi, tenei tangata, tenei tangata; a ka mau ko Taperi: Na ka arahi ia i tona whare, i tenei tangata, i tenei tangata; a ka mau ko Akana tama a Karami, tama a

19 Taperi, tama a Tera, no te iwi o Hura. Katahi a Hohua ka mea ki a Akana, E taku tama,

whakakororiatia a Ihowa, te Atua o Iharaira, a whakina ki a ia, whakaaturia mai hoki ki ahau, i aha  
<sup>20</sup> koe; kua e huna i ahau. Na ka whakautua e Akana ki a Hohua, ka mea, He pono i hara ahau ki  
<sup>21</sup> a Ihowa, ki te Atua o Iharaira, a tenei taku i mea ai: I taku kitenga i tetahi koroka whakapaipai  
no Papurona i roto i nga taonga, i nga hekere hiriwa e rua rau, i tetahi poro koura, e rima tekau  
hekere tona taimaha, na ka minamina ahau, ka tango; a tera kei te whenua i waenganui o toku teneti  
<sup>22</sup> e hun a ana, me te hiriwa hoki kei raro iho. Na ka tonoa atu e Hohua etahi tangata, a ko to ratou  
<sup>23</sup> rerenga atu ki te teneti; na ko taua mea e huna ana i roto i tona teneti, me te hiriwa i raro iho. Na  
tangohia ana e ratou aua mea i waenganui o te teneti, a mauria ana ki a Hohua ratou ko nga tama  
<sup>24</sup> katoa a Iharaira, a whakatakotoria ana ki te aroaro o Ihowa. Na ka tango a Hohua ratou tahi ko  
Iharaira katoa i a Akana tama a Tera, i te hiriwa, i te koroka, i te poro koura, i ana tama, i ana  
tamahine, i ana kau, i ana kaihe, i ana hipi, i tona teneti, i nga mea katoa hoki i a ia, a kawea ana  
<sup>25</sup> ratou ki te raorao o Akoro. Na ka mea a Hohua, Na te aha koe i whakararu ai i a tatou? ka  
whakararu hoki a Ihowa i a koe i tenei ra. Na akina ana ia e Iharaira katoa ki te kamaka, a tahuna  
<sup>26</sup> ana ki te ahi i muri iho i ta ratou akinga i a ratou ki te kamaka. A whakapurangatia ana e ratou  
etahi kohatu ki runga i a ia, he nui te ra. Katahi ka tahuri a Ihowa i te muranga o tona riri. Na reira  
i huaina ai te ingoa o taua wahi, Ko te raorao o Akoro a mohoa noa nei.

## Chapter 8

<sup>1</sup> Na ka mea a Ihowa ki a Hohua, Kua e maku, kua e pawera: tangohia ki a koe te hunga  
hapai patu katoa, a whakatika, haere ki runga, ki Hai: titiro hoki, kua hoatu e ahau ki tou ringa te  
<sup>2</sup> kingi o Hai, tona iwi, tona pa, me tona whenua: A kia rite tau e mea ai ki Hai, ki tona kingi hoki,  
ki tau i mea ai ki Heriko, ki tona kingi: ko ona taonga ia, me ona kararehe, me tango ma koutou:  
whakatakotoria he pehipehi mo te pa ki tera pito.  
<sup>3</sup> Na ko te whakatikanga o Hohua me te hunga hapai patu katoa ki te whakaeke i Hai: a  
whiriwhiria ana e Hohua e toru tekau mano o nga tangata, he marohirohi, a tonoa atu ana ratou e  
<sup>4</sup> ia i te po. I whakahau ano ia i a ratou, i mea, Kia mahara, me whakatakoto he pehipehi mo te pa  
<sup>5</sup> ki tera pito o te pa: kei matara rawa atu i te pa, engari kia tumatohi koutou katoa; A maku, ma te  
hunga katoa hoki i ahau, e whakatata ki te pa: a ka puta mai ratou ki te tu i a matou, ka pera me to  
<sup>6</sup> mua, na ka rere matou i to ratou aroaro; Na ka puta mai ratou ka whai i a matou, a ka  
manukawhakitia e matou i roto i te pa; tera hoki ratou e mea, E rere ana ratou i o tatou aroaro, pera

ano me to mua. A ka rere matou i to ratou aroaro; <sup>7</sup> Hei reira koutou whakatika ai i te pehipehi, a  
 ka tomo i te pa; ma Ihowa hoki, ma to koutou Atua e tuku ki o koutou ringa. <sup>8</sup> Na, ka riro te pa i a  
 koutou, tahuna te pa ki te ahi: peratia me ta Ihowa i ki ai. Kia mahara, kua whakaritea atu nei e  
<sup>9</sup>  
 ahau ki a koutou. Na tonoa ana ratou e Hohua: a haere ana ratou ki te whakatakoto pehipehi, a  
 noho ana i waenganui o Peteere, o Hai, ki te taha ki te hauauru o Hai: ko Hohua ia i moe i waenganui  
<sup>10</sup>  
 o te iwi i taua po. Na ka maranga wawe a Hohua i te ata, a whakaemia ana e ia te iwi, na haere  
<sup>11</sup>  
 ana ia me nga kaumatua o Iharaira i mua i te iwi ki Hai. A, ko te iwi katoa tae noa ki te hunga  
 hapai patu i a ia, i haere, i whakatata, a ka tae ki mua o te pa, a noho rawa atu ki te taha ki te raki  
<sup>12</sup>  
 o Hai: na he wharua i waenganui o ratou, o Hai. Na ka tango ia i etahi tangata tata tonu ki te  
 rima mano, a whakanohoia ana e ia hei pehipehi ki waenganui o Peteere, o Hai, ki te taha ki te  
<sup>13</sup>  
 hauauru o te pa. A, ka oti i a ratou te whakanoho te iwi, ara te ope katoa, tera i te raki o te pa,  
 me a ratou pehipehi ki te hauauru o te pa, na ka haere a Hohua i taua po ano ki waenganui o te  
<sup>14</sup>  
 wharua. A, no te kitenga o te kingi o Hai, na hohoro ana ratou, maranga wawe ana; ko te tino  
 putanga mai o nga tangata o te pa ki te tu i a Ihariara ki te riri, a ia me tona iwi katoa i te wa i  
<sup>15</sup>  
 whakaritea, i te ritenga mai o te mania; kihai ia i mohio h e pehipehi tera mona kei tua o te pa. A  
 whakawhati ana a Hohua ratou ko Iharaira katoa i a ratou ano i o ratou aroaro, a rere ana i te huarahi  
<sup>16</sup>  
 ki te koraha. Katahi ka karangatia te iwi katoa i roto i Hai ki te whai i a ratou: na whai ana ratou  
<sup>17</sup>  
 i muri i a Hohua, a manukawhakitia ana ratou i roto i te pa. A kahore he tangata o Hai raua ko  
 Peteere i noho i te haere ki te whai i a Iharaira: na whakarerea ana e ratou te pa kia takoto kau ana,  
<sup>18</sup>  
 a whai ana i muri i a Iharaira. Na ka mea a Ihowa ki a Hohua, Whakatotoro atu te timata i tou  
 ringa na ki Hai; no te mea ka hoatu e ahau a reira ki tou ringa. Na whakatoroa atu ana e Hohua te  
<sup>19</sup>  
 timata i tona ringa ki te pa. Na hohoro tonu te rewa o te pehipehi i to ratou wahi, a rere ana i te  
 toronga atu ano o tona ringa: a tomokia ana e ratou te pa a horo noa, na hohoro tonu ta ratou tahu  
<sup>20</sup>  
 i te pa ki te ahi. A, no te tahuritanga o nga tangata o Hai, ka titiro, na ko te paowa o te pa e kake  
 ana ki te rangi, na kahore o ratou kaha ki te rere penei ranei, pera ranei: na ka tahuri te hunga i rere  
<sup>21</sup>  
 whaka te koraha ki nga mea i whai ra. A, no te kitenga o Hohua ratou ko Iharaira katoa kua horo  
 te pa i te pehipehi, a ko te paowa o te pa e kake ana ki runga, na ka tahuri ratou, ka patu i nga tangata  
<sup>22</sup>  
 o Hai. A ka puta mai era i roto i te pa ki te whakatutaki i a ratou; na ka noho ratou ki waenganui  
 o Iharaira, ko etahi ki tenei taha, ko etahi ki tera taha: na tukitukia iho ratou e ratou, a kore rawa i  
 toe tetahi morehu, tetahi ranei i rere atu.

23 A hopukia oratia ana e ratou te kingi o Hai, a kawea ana ki a Hohua. 24 A, no ka poto i a Iharaira te patu nga tangata katoa o Hai i te pare, i te koraha i whaia nei ratou ki reira, a ka hinga katoa ratou i te mata o te hoari a poto noa ratou, katahi ka hoki katoa a Iharaira ki Hai, ka tukituki hoki i reira ki te mata o te hoari. 25 A, ko nga tangata katoa i hinga i taua ra, nga tane me nga wahine, kotahi tekau ma rua mano, ko nga tangata katoa hoki o Hai. 26 Kahore hoki a Hohua i whakahoki mai i tona ringa, i torona atu ai e ia me te timata, a ngaro noa i a ia nga tangata katoa o Hai. 27 Ko nga kararehe anake me nga taonga o taua pa i tangohia e Iharaira ma ratou, i pera ano me te kupu a Ihowa i tohutohu ai ki a Hohua. 28 A tahuna ana e Hohua a Hai, meinga iho hei puranga mo a mua tonu atu, hei ururua a tae noa mai ki tenei ra. 29 A ko te kingi o Hai i taronatia e Hohua a ahiahi noa: a, ka to te ra, ka whakahaua e Hohua kia tangohia iho tona tinana i runga i te rakau, kia maka ki te kuwaha o te tomokanga ki te pa, kia whakapurangatia he kohatu ki runga i a ia, he puranga nui e tu nei a taea noatia tenei ra. 30 Na hanga ana e Hohua tetahi aata ma Ihowa, ma te Atua o Iharaira, ki Maunga Epara, 31 Pera me ta Mohi, me ta te pononga a Ihowa i whakahau ai ki nga tama a Iharaira, he mea e rite ana ki tera i tuhituhia ki roto i te pukapuka o te ture a Mohi, he aata kamaka toitu, kihai nei i akina iho te rino ki runga; a whakaekea ana e ratou he tahunga tinana ma Ihowa, i patua hoki he whakahere mo te pai. 32 A tuhituhia ana e ia i reira ki nga kohatu nga kupu o te ture a Mohi, he mea tuhituhi i te aroaro o nga tama a Iharaira. 33 A, ko Iharaira katoa, ko ona kaumatua, ko nga rangatira, ko ona kaiwhakawa, i tu ki tetahi taha o te aaka, ki tetahi taha, ki mua o nga tohunga, o nga Riwaiti, o nga kaiamo i te kawenata a Ihowa ratou tahi ko te manene, ko te tangata tupu; ko te tahi taanga o ratou i te ritenga atu o Maunga Keritimi, a ko tetahi taanga o ratou i te ritenga atu o Maunga Epara; i rite tonu ki ta Mohi, ki ta te pononga a Ihowa i whakahau ai i mua, hei manaaki i te iwi o Iharaira. 34 A muri iho ka korerotia e ia nga kupu katoa o te ture, nga manaaki me nga kanga, rite tonu ki nga mea katoa i tuhituhia ki te pukapuka o te ture. 35 Kahore he kupu o nga mea katoa i whakahaua e Mohi i kore te korerotia e Hohua ki te aroaro o te huihui katoa o Iharaira, o nga wahine hoki me nga tamariki, me nga manene i noho tahi nei me ratou.

## Chapter 9

1 Na, i te rongonga o nga kingi katoa o tenei taha o Horano, o te whenua pukepuke, o te mania, o te tahatika katoa hoki o te moana nui i te ritenga atu o Repanona, te Hiti, te Amori, te Kanaani,

te Perihi, te hiwi, te Iepuhi; <sup>2</sup> Na huihui tahi ana ratou ki te whawhai ki a Hohua ratou ko Iharaira, kotahi tonu te whakaaro.

<sup>3</sup> No te rongonga ia o nga tangata o Kipeono ki nga mea i meatia e Hohua ki Heriko raua ko

<sup>4</sup> Hai, Ka mahi koroke ratou, ka haere me te mea he karere ratou; ka tango hoki ki nga putea tawhito

ki runga ki o ratou kaihe, i nga koki waina hoki kua tawhitotia, kua pakarukaru, putiki rawa; <sup>5</sup> Me nga hu tawhito ki o ratou waewae, papaki rawa, ko o ratou kakahu he mea tawhito; ko nga taro

katoa hoki, ko o ratou o, he maroke, he puruhekaheka. <sup>6</sup> Na haere ana ratou ki a Hohua ki te puni, ki Kirikara, a mea ana ki a ia, ki nga tangata hoki o Iharaira, I haere mai matou i te whenua mamao;

na, whakaritea he kawenata ki a matou. <sup>7</sup> Na ka mea atu nga tangata o Iharaira ki nga Hiwi, E noho

nei ano pea koe i waenganui i ahau; a me pehea e whakarite ai ahau i te kawenata ki a koe? <sup>8</sup> Na ka mea ratou ki a Hohua, He pononga matou nau; a ka mea a Hohua ki a ratou, Ko wai ma koutou?

<sup>9</sup> I haere mai koutou i hea? Na ka mea ratou ki a ia, I haere mai au pononga i tetahi whenua tawhiti noa atu, na te ingoa hoki o Ihowa, o tou Atua: i rongo hoki matou ki tona rongo, ki nga mea katoa

hoki i mea ai ia ki Ihipa, <sup>10</sup> Ki nga mea katoa ano hoki i mea ai ia ki nga kingi tokorua o nga Amori i tera taha o Horano, ki a Hihona kingi o Hehepona, raua ko Oka kingi o Pahana, i noho ra i

<sup>11</sup> Ahataroto. Na reira i ki mai ai o matou kaumatua me nga tangata katoa o to matou whenua ki a matou, i mea ai, Maua atu i o koutou ringa he o ki te huarahi, a haere ki te whakatau i a ratou, ka mea hoki ki a ratou, Ko a koutou pononga matou; na whakaritea m ai he kawenata ki a matou.

<sup>12</sup> Na ko a matou taro i maua mahanatia mai nei i o matou whare hei o mo matou i te ra i turia mai

ai e matou, i haere mai ai ki a koutou, nana, kua maroke, kua puruhekahekatia. <sup>13</sup> Ko nga koki waina nei hoki, i hou nei i ta matou whakakiinga, na kua pakarukaru; ko enei kakahu hoki o matou,

me o matou hu, kua tawhitotia i te roa whakaharahara o te huarahi. <sup>14</sup> Na ka tango nga tangata i etahi o o ratou o, a kihai i ui whakaaro i to Ihowa waha.

<sup>15</sup> A houhia iho e Hohua te rongongonga ki a ratou, whakaritea ana hoki e ia he kawenata whakaora

mo ratou; i oati ano nga rangatira o te huihui ki a ratou. <sup>16</sup> Na i te mutunga o nga ra e toru i muri iho i ta ratou whakaritenga i te kawenata ki a ratou, ka rongo ratou, e tata tonu ana ratou ki a ratou,

e noho ana hoki i waenganui i a ratou. <sup>17</sup> Na ka hapainga atu e nga tama a Iharaira, ka tae i te ra tuatoru ki o ratou pa. Ko o ratou pa hoki ko Kipeono, ko Kepira, ko Peeroto, ko Kiriata Tearimi.

<sup>18</sup> A kihai nga tama a Iharaira i patu i a ratou, no te mea kua oati nga rangatira o te huihuinga i a

Ihowa, i te Atua o Iharaira, ki a ratou. A amuamu katoa ana te huihuinga ki nga rangatira. <sup>19</sup> Na

ka mea nga rangatira katoa ki te huihui katoa, Kua oati tatou i a Ihowa i te Atua o Iharaira, ki a  
 ratou; no reira e kore tatou e ahei aiane te pa ki a ratou. <sup>20</sup> Ko tenei ta tatou e mea ai ki a ratou,

<sup>21</sup> ka waiho i a ratou kia ora; kei riria tatou mo te oati i oati ai tatou ki a ratou. A ka mea nga  
 rangatira ki a ratou, me whakaora ratou; otiia me waiho ratou hei tapatapahi rakau, hei utuutu wai  
 mo te huihui katoa; kia rite ai ki ta nga rangatira i korero ai ki a ratou.

<sup>22</sup> Katahi ka karangatia ratou e Hohua, ka korero ia ki a ratou, ka mea, He aha koutou i nuka  
 ai i a matou, i mea ai, Kei tawhiti noa atu koutou i a matou; e noho nei ano koutou i waenganui i

a matou? <sup>23</sup> No reira ka kanga koutou; a e kore e kore he kaimahi o koutou, hei tapatapahi rakau,

hei utuutu wai hoki mo te whare o toku Atua. <sup>24</sup> Na ka whakautua e ratou ki a Hohua, ka mea, I  
 tino korerotia hoki ki au pononga nga mea i whakaritea e Ihowa, e tou Atua, ki a Mohi, ki tana  
 pononga mo te whenua katoa, kia hoatu ki a koutou, kia huna atu hoki nga tangata katoa o te whenua  
 i o k outou aroaro; na reira matou i tino wehi ai i a koutou, kei mate matou, na meatia ana e matou

tenei mea. <sup>25</sup> Na, kei roto tenei matou i ou ringa: mau e mea ki a matou te mea e pai ana, e tika

ana ki tau titiro. <sup>26</sup> Na peratia ana ratou e ia, a whakaorangia ake ratou i te ringa o nga tama a

Iharaira, a kihai ratou i patua. <sup>27</sup> Na waiho iho ratou i taua ra e Hohua hei tapatapahi rakau, hei  
 utuutu wai mo te huihui, mo te aata hoki a Ihowa ki te wahi e whiriwhiri ai ia a tae noa mai ki tenei  
 ra.

## Chapter 10

<sup>1</sup> A, ka rongu a Aronitereke, te kingi o Hiruharama, kua horo a Hai i a Hohua, a kua  
 whakangaromia hoki e ia; a ko tana i mea ai ki Heriko, ki tona kingi, ko tana hoki tera i mea ai ki  
 Hai, ki tona kingi; a kua houhia e nga tangata o Kipeono te rongu o ki a Iharaira, kua noho hoki ki

waenganui i a ratou; <sup>2</sup> Na tino wehi ana ratou; no te mea he pa nui a Kipeono, pera me tetahi o nga

pa rangatira, he nui atu hoki i Hai, a ko ona tangata katoa he toa. <sup>3</sup> Na ka tono tangata a Aronitereke  
 kingi o Hiruharama ki a Hohama kingi o Heperona, ki a Pirama kingi o Iaramuta, ki a Tapia kingi

o Rakihi, ratou ko Repiri kingi o Ekerona, ka mea, <sup>4</sup> Haere mai ki ahau, hei awihina moku, kia patua

ai e tatou a Kipeono, mo ratou i hohou i te rongu ki a Hohua ratou ko nga tama a Iharaira. <sup>5</sup> Na  
 huihui ana, haere mai ana nga kingi tokorima o nga Amori, te kingi o Hiruharama, te kingi o  
 Heperona, te kingi o Iaramuta, te kingi o Rakihi, te kingi o Ekerona, ratou ko a ratou taua katoa, a

whakapae ana i Kipeono, tatau ana i reira. <sup>6</sup> Na ka tono tangata nga tangata o Kipeono ki a Hohua



ki te puni, ki Kirikara, ka mea, Kei puhoi mai tou ringa ki au pononga; hohoro te haere mai ki a matou, ki te whakaora i a matou, awhinatia mai hoki matou; no te mea kua rupeke mai nga kingi kat oa o nga Amori e noho ana i nga maunga ki a matou.

<sup>7</sup> Na haere atu ana a Hohua i Kirikara, ratou tahi ko te hunga hapai patu katoa, me nga tangata maia katoa. <sup>8</sup> Na ka mea a Ihowa ki a Hohua, Kua e wehi i a ratou: kua hoatu hoki ratou e ahau ki tou ringa, a e kore tetahi tangata o ratou e tu ki tou aroaro. <sup>9</sup> Na huakina tatatia ana ratou e Hohua;

i haere ake hoki ia i Kirikara i te po. <sup>10</sup> Na meinga ana ratou e Ihowa kia pororaru i mua i a Iharaira, a patua ana ratou e ia ki Kipeono, he nui te parekura, a whaia ana ratou e ia i te huarahi e haere ana

ki runga ki Petehorono, na tukitukia ana ratou a tae noa ki Ateka, a Makera atu a na. <sup>11</sup> A, i a ratou e rere ana i te aroaro o Iharaira, i te hekenga iho ki Petehorono, na ka maka iho e Ihowa he kohatu nunui i te rangi ki runga ki a ratou a tae noa ki Ateka, na mate ana ratou: hira ake nga tangata i

mate i nga nganga kohatu i nga me a i patua e nga tama a Iharaira ki te hoari. <sup>12</sup> Katahi ka korero a Hohua ki a Ihowa i te ra i homai ai e Ihowa nga Amori ki te aroaro o nga tama a Iharaira, ka mea hoki i te tirohanga mai o Iharaira, Kati mai koe, e te ra, i runga i Kipeono; me koe hoki, e te marama,

<sup>13</sup> ki te raora o Atarono. Na mau tonu mai te ra, tu tonu mai hoki te marama, a whiwhi noa te iwi ki te utu i o ratou hoariri. Kahore ianei tenei mea i tuhituhia ki te pukapuka a Tahera? Tu ana tera te komaru i waenganui o te rangi, kahore ano hoki i hohoro te heke a rite noa tetahi ra tuturu. <sup>14</sup> Na kahore he rite mo taua ra i mua atu, i muri mai ranei, i rongo ai a Ihowa ki te reo tangata: i whawhai hoki a Ihowa mo Iharaira.

<sup>15</sup> Na hoki ana a Hohua ratou tahi ko Iharaira katoa ki te puni, ki Kirikara. <sup>16</sup> Ko aua kingi tokorima ia i rere, a piri ana ki roto ki tetahi ana i Makera. <sup>17</sup> A ka korerotia ki a Hohua, i meatia,

Kua kitea nga kingi tokorima, kei te ana i Makera e piri ana. <sup>18</sup> Na ka mea a Hohua, Hurihia atu etahi kohatu nunui ki te kuwaha o te ana, whakanohoia hoki etahi tangata ki reira hei tiaki i a ratou.

<sup>19</sup> Ko koutou ia kua hei tu; whaia o koutou hoariri, patua te hiku o ratou; kua hoki ratou e tukua kia tapoko ki roto ki o ratou pa: he mea hoki kua homai ratou e Ihowa, e to koutou Atua, ki to

koutou ringa. <sup>20</sup> A, no ka mutu i a Hohua ratou ko nga tama a Iharaira te patu i a ratou, he nui rawa

te parekura a poto noa ratou, ko nga morehu o ratou i toe i riro ki roto ki nga pa whai taiepa, <sup>21</sup> Na hoki marie ana te iwi katoa ki a Hohua, ki te puni, ki Makera: kihai rawa hoki i oraora te arero o

tetahi tangata ki tetahi o nga tama a Iharaira. <sup>22</sup> Katahi ka mea a Hohua, Uakina te kuwaha o te

ana, whakaputaina mai hoki ki ahau i te ana nga kingi tokorima na. <sup>23</sup> Na peratia ana e ratou, whakaputaina mai ana e ratou ki a ia i te ana aua kingi tokorima, te kingi o Hiruharama, te kingi o

Heperona, te kingi o Iaramuta, te kingi o Rakihi, me te kingi o Ekerona. <sup>24</sup> A, ka oti aua kingi te whakaputa mai e ratou ki a Hohua, ka karanga a Hohua ki nga tangata katoa o Iharaira, a ka mea ki nga rangatira o nga tangata hapai patu i haere tahi me ia, Whakatata mai, e tu o koutou waewae ki runga ki nga kaki o enei k ingi. Na whakatata ana mai ratou, tu ana o ratou waewae ki runga ki

<sup>25</sup> o ratou kaki. I mea ano a Hohua ki a ratou, Kaua koutou e wehi, kaua hoki e pawera, kia kaha,

<sup>26</sup> kia toa: no te mea ka peneitia e Ihowa o koutou hoariri katoa e whawhai nei koutou ki a ratou. A muri iho ka patua ratou e Hohua, ka whakamatea, a whakairihia ake ratou ki runga ki nga rakau e

<sup>27</sup> rima: na iri ana ratou i runga i nga rakau a ahiahi noa. Na i te wa o te tonga o te ra ka whakahaua e Hohua kia tangohia ki raro o nga rakau, kia maka hoki ki roto ki te ana i piri ai ratou, kia whakatakotoria hoki etahi kohatu nunui ki te kuwaha o te ana; e takoto mai nei a taea noatia tenei ra.

<sup>28</sup> A horo ana i a Hohua a Makera i taua rangi ano, patua iho ana hoki e ia ki te mata o te hoari, me tona kingi ano; i whakangaromia rawatia ratou e ia me nga wairua katoa i roto, kahore he morehu

<sup>29</sup> i mahue i a ia: a peratia ana e ia te kingi o Maker a me tana i mea ai ki te kingi o Heriko. Na haere atu ana a Hohua ratou tahi ko Iharaira katoa i Makera ki Ripina, a tauria ana e ia a Ripina:

<sup>30</sup> A i homai ano e Ihowa a reira, me tona kingi, ki te ringa o Iharaira; na patua iho e ia a reira ki te mata o te hoari, me nga tangata katoa i roto; kihai i mahue i a ia tetahi morehu i reira; heoi peratia

<sup>31</sup> ana e ia te kingi o reira me tana i mea ai ki te kingi o Heriko. Na haere atu ana a Hohua i Ripina,

<sup>32</sup> ratou tahi ko Iharaira katoa, ki Rakihi, a whakapaea ana a reira, tauria ana e ia: A i homai e Ihowa a Rakihi ki te ringa o Iharaira, a horo ana a reira i a ia i te rua o nga ra; patua iho hoki ki te

<sup>33</sup> mata o te hoari, me nga tangata katoa i roto; i rite tonu ki nga mea katoa i mea ai ia ki Ripina. I reira ano ka haere mai a Horama kingi o Ketere hei awhina mo Rakihi; a patua iho ia me tona iwi

<sup>34</sup> e Hohua, a kahore rawa tetahi morehu ona i toe. Na ka haere atu a Hohua ratou tahi ko Iharaira

<sup>35</sup> katoa i Rakihi ki Ekerona; a whakapaea ana a reira e ratou, tauria ana: Na horo ana a reira i a ratou i taua rangi ano, patua ana hoki ki te mata o te hoari, ko nga tangata katoa i roto huna iho e

<sup>36</sup> ia i taua rangi ano, rite tonu ki nga mea katoa i mea ai ia ki Rakihi. Na haere atu ana a Hohua i

<sup>37</sup> Ekerona, me Iharaira katoa ano hoki ki Heperona, a tauria ana a reira e ia. A horo ana i a ratou a reira, patua iho hoki ki te mata o te hoari, me tona kingi, me ona pa katoa, me nga tangata katoa i roto; kahore tetahi morehu i mahue i a ia, rite tonu ki nga mea katoa i mea ai ia ki Ekerona; na

<sup>38</sup> huna iho e ia a reira, me nga tangata katoa i roto. Katahi ka hoki a Hohua ratou tahi ko Iharaira

<sup>39</sup> katoa ki Repiri; ka tatau hoki ki reira. A riro ana i a ia a reira me tona kingi, me ona pa katoa; a patua iho e ratou ki te mata o te hoari, whakangaromia katoatia ana hoki nga tangata i roto; kahore

tetahi morehu i mahue i a ia: ko tana i mea ai ki Heperona i meatia ano e ia ki Repir i, ki tona kingi;  
<sup>40</sup>  
 i pera ano me tana i mea ai ki Ripina, ki tona kingi. Na patua ana e Hohua te whenua katoa, te  
 whenua pukepuke, te tonga, te mania me nga pukenga wai, me nga kingi katoa hoki o reira; kahore  
 i waiho e ia tetahi morehu: engari i huna katoatia e ia nga mea whai manawa, i rite tonu ki ta Ihowa,  
<sup>41</sup>  
 ki ta te Atua o Iharaira, i whakahau ai. Na patua ana ratou e Hohua i Kareheparenea a tae noa  
<sup>42</sup>  
 ki Kaha, me te whenua katoa hoki o Kohena a tae noa ki Kipeono. Ko enei kingi katoa me to  
 ratou oneone i riro i a Hohua i te whakaekenga kotahi, no te mea i roto i a Iharaira a Ihowa e  
<sup>43</sup>  
 whawhai atu ana. Na hoki ana a Hohua ratou tahi ko Iharaira katoa ki te puni, ki Kirikara.

## Chapter 11

<sup>1</sup>  
 Na, i te rongonga o Ihapini kingi o Hatoro, ka tono tangata ia ki a Iopapa kingi o Marono, ki  
 te kingi o Himirono, ki te kingi hoki o Akahapa, <sup>2</sup> Ki nga kingi ano hoki i te raki, ki era i nga  
 maunga, i te mania hoki ki te tonga o Kinerota, i te whenua raorao, a i nga hiwi o Roro ki te hauauru,  
<sup>3</sup>  
 Ki te Kanaani i te rawhiti me te hauauru, ki te Amori, ki te Hiti, ki te Perihi, ki te Iepuhi i te whenua  
<sup>4</sup>  
 pukepuke, ki te Hiwi hoki i raro o Heremona i te whenua o Mihipa. Na ka haere mai, me a ratou  
 ope katoa, he tini te tangata, me te onepu i te taha o te moana te tokomaha, me nga hoiho, me nga  
<sup>5</sup>  
 hariata, tona tini. Na ka huihui enei kingi katoa; a ka haere mai ratou, ka noho huihui ki nga wai  
<sup>6</sup>  
 o Meromo, ki te whawhai ki a Iharaira. Na ko te meatanga a Ihowa ki a Hohua, Kei wehi i a ratou:  
 kia penei hoki apopo ka hoatu katoa ratou e ahau, mate rawa, ki a Iharaira: me whakangonge a  
<sup>7</sup>  
 ratou hoiho, me tahu hoki a ratou hariata ki te ahi. Na huakina tatatia ana ratou e Hohua ratou ko  
<sup>8</sup>  
 te hunga hapai pakanga katoa ki nga wai o Meromo; heoi kokiri ana ratou ki a ratou. Na homai  
 ana ratou e Ihowa ki te ringa o Iharaira, a patua iho ratou, a whaia ana e ratou a tae noa ki Hairona  
 nui, ki Mihirepoto Maimi, ki te raorao hoki o Mihipe whaka te rawhiti; a patupatua ana ratou,  
<sup>9</sup>  
 kahore rawa he morehu i waiho kia toe. A rite tonu ta Hohua i mea ai ki a ratou ki ta Ihowa i  
 korero ai ki a ia: i whakangongea e ia a ratou hoiho, i tahuna hoki a ratou hariata ki te ahi.  
<sup>10</sup>  
 A i taua wa ka tahuri a Hohua, a horo ana i a ia a Hatoro, patua iho hoki e ia tona kingi ki  
<sup>11</sup>  
 te hoari: ko Hatoro hoki te upoko o aua kingitanga katoa i mua. Na patua iho e ratou nga mea  
 ora katoa o reira ki te mata o te hoari a poto noa: kahore i mahue tetahi mea whai manawa: i tahuna  
<sup>12</sup>  
 hoki e ia a Hatoro ki te ahi. Na i riro katoa i a Hohua nga pa katoa o era kingi, me nga kingi

katoa o reira, a patua iho e ia ki te mata o te hoari a poto noa; i pera ano ia me ta Mohi, me ta te pononga a Ihowa i whakahau ai. <sup>13</sup> Ko nga pa ia i tu i runga i nga pukepuke, kihai ena i tahuna e

Iharaira, heoi ano ko Hatoro anake; i tahuna tena e Hohua. <sup>14</sup> Otiia ko nga taonga parakete katoa o aua pa, me nga kararehe, i tangohia e nga tama a Iharaira ma ratou; ko nga tangata katoa ia i patua ki te mata o te hoari a poto noa ratou, kihai i mahue tetahi mea whai manawa.

<sup>15</sup> Ko ta Ihowa i whakahau ai ki tana pononga ki a Mohi, ko ta Mohi ano tera i whakahau ai ki a Hohua; a koia ta Hohua i mea ai; kihai i kapea e ia tetahi o nga mea katoa i whakahaua e Ihowa

ki a Mohi. <sup>16</sup> Na riro ana i a Hohua taua whenua katoa, te whenua pukepuke, me nga wahi katoa o te tonga, me te whenua katoa o Kohena, me te raorao, me te mania, me te whenua pukepuke o

Iharaira, me tona raorao; <sup>17</sup> Atu i Maunga Haraka, e anga nei whakarunga ki Heira, a tae noa ki Paarakara i te raorao o Repanona, i raro iho o Maunga Heremona: a, ko o ratou kingi katoa, i mau

i a ia, a patua iho, whakamatea iho. <sup>18</sup> He maha nga ra i whawhai ai a Hohua ki aua kingi katoa.

<sup>19</sup> Na kahore he pa i hohou rongu ki nga tama a Iharaira, heoi anake ko nga Hiwi i noho i Kipeono:

i riro katoa i a ratou i runga i te whawhai. <sup>20</sup> Na Ihowa hoki i whakapakeke o ratou ngakau, kia turia ai e ratou a Iharaira ki te riri, kia tino whakangaromia ai ratou e ia, kia kore ai hoki ratou e tohungia, engari kia whakangaromia ratou e ia, kia peratia me ta Ihowa i whakahau ai ki a Mohi.

<sup>21</sup> I taua wa ano ka haere atu a Hohua, a huna iho e ia nga Anakimi o nga maunga, o Heperona, o Repiri, o Anapa, o nga maunga katoa o Hura, o nga maunga katoa ano hoki o Iharaira: i tino

whakangaromia rawatia ratou e Hohua me o ratou pa. <sup>22</sup> Kihai tetahi o nga Anakimi i mahue i te

whenua o nga tama a Iharaira: toe ake ko etahi anake i Kaha, i Kata, i Aharoro. <sup>23</sup> Na ka riro i a Hohua te whenua katoa, ka pera me nga mea katoa i korerotia e Ihowa ki a Mohi; a hoatu ana e Hohua hei kainga tupu mo Iharaira, he mea whakarite ki o ratou wehenga, ki o ratou iwi. Na ka takoto marie te whenua i te whawhai.

## Chapter 12

<sup>1</sup> Na ko nga kingi enei o te whenua i patua nei e nga tama a Iharaira, a tangohia ana to ratou whenua i tawahi o Horano whaka te rawhiti, atu i te awa o Aranona a tae noa ki Maunga Heremona,

me te mania katoa ano hoki whaka te rawhiti: <sup>2</sup> Ko Hihona kingi o nga Amori, i noho ra ki Hehepona, ko tona kingitanga kei Aroere, kei tera i te taha o te awaawa, o Aranona, kei te pa hoki i waenganui o te awaawa, kei te hawhe hoki o Kireara a tae noa ki Iapoko, ki te awa, ki te rohe ki nga ta ma a

<sup>3</sup>  
 Amona; Kei te mania hoki a tae noa ki te moana o Kinerota, whaka te rawhiti, ki te moana ano  
 o te mania, ara ki te Moana Tote, whaka te rawhiti, ki te ara ki Peteiehimoto; kei Temana ano, kei  
<sup>4</sup>  
 raro i Aharoto Pihika: Me te wahi o Oka kingi o Pahana, o te morehu o nga Repaima, i noho ra  
<sup>5</sup>  
 i Ahataroto, i Eterei, Ko tona kingitanga ano hoki kei Maunga Heremona, kei Hareka, kei Pahana  
 katoa hoki, tae noa ki te rohe ki nga Kehuri, ki nga Maakati ki te hawhe hoki o Kireara, ki te rohe  
<sup>6</sup>  
 ki a Hihona kingi o Hehepona. Na Mohi, na te pononga a Ihowa, na ratou ko nga tama a Iharaira  
 raua i patu: a hoatu ana e Mohi, e te pononga a Ihowa a reira hei kainga tupu ki nga Reupeni ratou  
 ko nga Kari, ko tetahi taanga hoki o te iwi o Manahi.  
<sup>7</sup>  
 A ko nga kingi enei o te whenua i patua e Hohua, e ratou ko nga tama a Iharaira, ki tenei taha  
 o Horano whaka te hauauru, atu i Paarakara i te raorao o Repanona tae noa ki Maunga Haraka e  
 anga nei whakarunga ki Heira; a na Hohua i hoatu ki nga iw i o Iharaira hei kainga tupu, he mea  
<sup>8</sup>  
 whakarite ki o ratou wehenga; I nga maunga, i nga raorao, i te mania, i nga matapuna, i te koraha  
<sup>9</sup>  
 i te whenua ki te tonga; te Hiti, te Amori, te Kanaani, te Perihi, te Hiwi, te Iepuhi; Ko te kingi o  
<sup>10</sup>  
 Heriko tetahi; ko te kingi o Hai, o tera i Peteere tetahi; Ko te kingi o Hiruharama tetahi; ko te  
<sup>11</sup> <sup>12</sup>  
 kingi o Heperona tetahi; Ko te kingi o Iaramuta tetahi; ko te kingi o Rakihi tetahi; Ko te kingi  
<sup>13</sup>  
 o Ekerona tetahi, ko te kingi o Ketere tetahi; Ko te kingi o Repiri tetahi; ko te kingi o Kerere  
<sup>14</sup> <sup>15</sup>  
 tetahi; Ko te kingi o Horema tetahi; ko te kingi o Arara tetahi; Ko te kingi o Ripina tetahi;  
<sup>16</sup> <sup>17</sup>  
 ko te kingi o Aturama tetahi; Ko te kingi o Makera tetahi; ko te kingi o Peteere tetahi; Ko te  
<sup>18</sup>  
 kingi o Tapua tetahi; ko te kingi o Hepere tetahi; Ko te kingi o Apeke tetahi; ko te kingi o  
<sup>19</sup> <sup>20</sup>  
 Raharano tetahi; Ko te kingi o Marono tetahi; ko te kingi o Hatoro tetahi; Ko te kingi o  
<sup>21</sup>  
 Himirono Merono tetahi; ko te kingi a Akahapa tetahi; Ko te kingi o Taanaka tetahi; ko te kingi  
<sup>22</sup> <sup>23</sup>  
 o Mekiro tetahi; Ko te kingi o Kerehe tetahi; ko te kingi o Iokoneama i Karamere tetahi; Ko  
<sup>24</sup>  
 te kingi o Roro i te pukepuke o Roro tetahi; ko te kingi o nga iwi o Kirikara tetahi; Ko te kingi  
 o Tirita tetahi; e toru tekau ma tahi ena kingi katoa.

### Chapter 13

<sup>1</sup> A ka koroheketia a Hohua, kua maha ona ra; na ka mea a Ihowa ki a ia, Kua koroheketia koe,  
 kua maha ou ra, a he nui atu te whenua e toe ana, kahore ano i tangohia. <sup>2</sup> Ko te whenua tenei e  
 toe ana: ko nga wahi o nga Pirihitini, ko nga Kehuri katoa; <sup>3</sup> O Hihoro mai ano, i te ritenga atu o  
 Ihipa a tae noa ki nga rohe o Ekerona whaka te raki, e kiia nei no nga Kanaani; e rima nga wahi  
 ariki o nga Pirihitini; ko nga Kahati, ko nga Aharori, ko nga Ahakeroni, ko nga Kiti, ko nga Ekeroni;  
 me nga Awim i, <sup>4</sup> Ki te tonga; ko te whenua katoa o nga Kanaani, me Meara i te taha o nga Hironi  
 tae noa ki Apeke, ki nga rohe o nga Amori: <sup>5</sup> Me te whenua o nga Kipiri, me Repanona katoa  
 whaka te rawhiti atu o Paarakara i raro iho o Maunga Heremona tae noa ki te haerenga atu ki  
 Hamata: <sup>6</sup> Ko nga tangata katoa o te whenua pukepuke, o Repanona tae noa ki Mihirepoto Maimi,  
 me nga Hironi katoa; ka peia ratou e ahau i te aroaro o nga tama a Iharaira: mau ia e wehe a reira  
 hei kainga tupu mo Iharaira, me pera me taku i whakahau ai ki a koe.  
<sup>7</sup> Na reira wehewehea tenei whenua hei kainga tupu mo nga iwi e iwa, ratou ko tetahi taanga  
 o te iwi o Manahi. <sup>8</sup> I whiwhi tahi ratou ko nga Reupeni, ko nga Kari ki to ratou wahi, i hoatu ra  
 ki a ratou e Mohi ki tawahi o Horano whaka te rawhiti, ara ko ta Mohi, ko ta te pononga a Ihowa  
 i hoatu ai ki a ratou; <sup>9</sup> O Aroere atu i te taha o te awaawa o Aranona, me te pa i waenganui o te  
 awaawa, me te mania katoa o Merepa tae noa ki Ripono; <sup>10</sup> Me nga pa katoa o Hihona kingi o nga  
 Amori, i kingi ra ki Hehepona, tae noa ki te rohe ki nga tama a Amona; <sup>11</sup> Me Kireara, me te rohe  
 ki nga Kehuri, ki nga Maakati, me Maunga Heremona katoa, me Pahana katoa, tae noa ki Hareka;  
<sup>12</sup> Te kingitanga katoa o Oka i Pahana; i kingi hoki ia ki Ahataroto, ki Etere, he toenga ia no nga  
 oranga o nga Repaima; i patua hoki enei e Mohi, a peia atu ana. <sup>13</sup> Ko nga Kehuri ia me nga Maakati  
 kihai i peia e nga tama a Iharaira: engari i noho nga Kehuri ratou ko nga Maakati i waenganui o  
 Iharaira a taea noatia tenei ra. <sup>14</sup> Ko te iwi anake o Riwai, kihai i hoatu e ia he kainga tupu; ko nga  
 whakahere ahi a Ihowa, a te Atua o Iharaira, te wahi tupu mo ratou, ko tana hoki i korero ai ki a  
<sup>15</sup> ia. <sup>16</sup> A rite tonu ki o ratou hapu ta Mohi i hoatu ai ki te iwi o nga tama a Reupena. <sup>16</sup> A ko te rohe  
 ki a ratou kei Aroere, kei te taha o te awaawa o Aranona, kei te pa hoki i waenganui o te awaawa  
 me te mania katoa i Merepa; <sup>17</sup> Ko Hehepona me o reira pa katoa i te mania; ko Ripono, me  
 Pamotopaara, me Petepaara Meono, <sup>18</sup> Ko Iahata hoki, me Keremoto, me Mepaata, <sup>19</sup> Me  
 Kiriataima, me Hipima, me Terete Hahara i te maunga o taua raorao, <sup>20</sup> Me Petepeoro, me Aharoto  
<sup>21</sup> Pihika, me Peteiehimoto, <sup>21</sup> Me nga pa katoa o te mania, me te kingitanga katoa o Hihona, o te  
 kingi o nga Amori, i kingi nei ki Hehepona, i patua ngatahitia nei e Mohi me nga ariki o Miriana,

me Ewi, ratou ko Rekeme, ko Turu, ko Huru, ko Repa; na Hihona ena ariki, a i noho ki taua whenua.  
22

I patua ano hoki e nga tama a Iharaira ki te hoari a Paraama tama a Peoro, te tohunga maori, i  
23  
roto i era atu o to ratou parekura. A ko te rohe ki nga tama a Reupena ko Horano, me tona rohe  
ano. Ko te wahi tuturu tenei i nga tama a Reupena, i o ratou hapu, nga pa me nga kainga o aua pa.

24  
A i hoatu ano e Mohi he wahi ki te iwi o Kara, ki nga tama a Kara, he mea whakarite ki o ratou  
25  
hapu. A ko te rohe ki a ratou ko Iatere, me nga pa katoa o Kireara, me te hawhe o te whenua o

nga tama a Amona, a tae noa ki Aroere ki te ritenga atu o Rapa: I Hehepona hoki a tae noa ki  
26  
Ramata Mihipe, ki Petonimi; i Mahanaima a tae noa ki te rohe o Repiri: 27

A i te raorao, ko  
Petearama, ko Petenimira, ko Hukota, ko Tawhono, a ko te toenga atu o te kingitanga o Hihona, o  
te kingi o Hehepona, ko Horano me tona rohe tae noa ki te pito o te moana o Kinereta, i tawahi o

28  
Horano, whaka te rawhiti. Ko te wahi tupu tenei i nga tama a Kara, i o ratou hapu, ko nga pa

29  
me nga kainga o aua pa. A i hoatu e Mohi he wahi tuturu ki tetahi taanga o te iwi o Manahi: a  
30  
ka riro i tetahi taanga o te iwi o nga tama a Manahi, he mea whakarite ki o ratou hapu. A no

Mahanaima atu te rohe ki a ratou, ko Pahana katoa, me te kingitanga katoa o Oka, o te kingi o  
31  
Pahana, me nga pa katoa o Haira, era i Pahana ra, e ono tekau nga pa: Ko tetahi hawhe o Kireara,  
me Ahataroto, me Etere, ko nga pa o te kingitanga o Oka i Pahana, i riro era i nga tama a Makiri,  
a te tama a Manahi, ara i tetahi taanga o nga tama a Makiri, he mea whakarite ki o ratou hapu.

32  
Ko enei nga wahi i hoatu ai e Mohi hei kainga tupu i nga mania o Moapa i tawahi o Horano

whaka te rawhiti, i te wahi e anga ana ki Heriko. 33  
Otiia kihai i hoatu e Mohi he wahi tupu ki te  
iwi o Riwai: ko Ihowa, ko te Atua o Iharaira, ko ia hei wahi tupu mo ratou; ko tana hoki tena i  
korero ai.

## Chapter 14

1  
A ko nga wahi enei i riro i nga tama a Iharaira i te whenua o Kanaana, i tuwhaina nei e Ereatara  
tohunga, e Hohua tama a Nunu, e nga upoko hoki o nga whare o nga matua o nga iwi o nga tama

2  
a Iharaira mo ratou, He mea rota o ratou wahi, he mea pera me ta Ihowa whakahau i whakapuakina  
e Mohi, mo nga iwi e iwa me tetahi taanga hoki o tetahi iwi. 3  
Kua hoatu hoki e Mohi he wahi mo  
nga iwi e rua, mo tetahi taanga hoki o tetahi iwi i tawahi o Horano: otiia kihai i hoatu i roto i a ratou

4  
tetahi wahi mo nga Riwaiti. E rua hoki nga iwi o nga tama a Hohepa, ko Manahi raua ko Eparaima:

a kihai i hoatu e ratou tetahi wahi o te whenua mo nga Riwaiti, heoi ano ko nga pa hei nohoanga,  
me nga wahi o waho a tawhio noa, mo a ratou kararehe, mo a ratou mea. <sup>5</sup> Rite tonu ki ta Ihowa i  
whakahau ai ki a Mohi ta nga tama a Iharaira i mea ai, a wehewehea ana e ratou te whenua.

<sup>6</sup> Katahi ka whakatata nga tama a Hura ki a Hohua i Kirikara; a ka mea a Karepe tama a Iepune  
Keniti ki a ia, E mohio ana koe ki te kupu i korerotia e Ihowa ki a Mohi, ki te tangata a te Atua,

moku, a mou hoki, i Kareheparenea. <sup>7</sup> E wha tekau oku tau i te tononga a Mohi, a te pononga a te  
Atua i ahau i Kareheparenea ki te tutei i te whenua; a i whakahokia e ahau he korero ki a ia, ko nga

mea o roto o toku ngakau. <sup>8</sup> A, ko oku teina i haere tahi nei matou ki runga, na ngohe ana i a ratou

nga ngakau o te iwi: ko ahau ia, i pau katoa atu ahau ki te whai i a Ihowa, i toku Atua. <sup>9</sup> Na ko te  
oatitanga mai a Mohi i taua ra, ko te meatanga, Ko taua whenua i takahia na e ou waewae, he pono  
mou pu hei kainga tupu, mo au tamariki hoki ake ake; mou i whakapau ki te whai i a Ihowa, i toku

Atua. <sup>10</sup> Heoi inaianei kua whakaora a Ihowa i ahau, kua pera me tana i korero ai, ka wha tekau  
ma rima enei tau, mai o te korerotanga a Ihowa i tenei kupu ki a Mohi, i a Iharaira e haereere ana

i te koraha: na, inaianei, ka waru tekau ma rima oku tau. <sup>11</sup> Kei te kaha tonu ahau i tenei ra, pera  
ano i te ra i tonoa ai ahau e Mohi: ko toku kaha i reira koia ano toku kaha inaianei mo te whawhai,

mo te haere atu, mo te haere mai. <sup>12</sup> No reira homai ki ahau tenei maunga, ko ta Ihowa hoki i korero  
ai i taua ra; i rongu ra hoki koe taua ra kei reira nga Anakimi, me nga pa nunui, taiepa rawa: tera

pea e tata mai a Ihowa ki ahau, a ka peia ratou e ahau, a ka peratia me ta Ihowa i korero ai. <sup>13</sup> Na  
ka manaakitia ia e Hohua; a hoatu ana e ia a Heperona ki a Karepe tama a Iepune hei kainga tupu.

<sup>14</sup> Koia i waiho ai a Heperona hei kainga tupu mo Karepe, mo te tama a Iepune Keniti, a mohoa

noa nei; mona i whakapau ki te whai i a Ihowa, i te Atua o Iharaira. <sup>15</sup> Na ko te ingoa o Heperona  
i mua ko Kiriata Arapa; ko taua Arapa hoki te tangata tino nui i roto i nga Anakimi. Heoi takoto  
kau ana te whenua i te whawhai.

## Chapter 15

<sup>1</sup> Na ko te rota o te iwi o nga tama a Hura, he mea whakarite ki o ratou hapu, i tae atu ki te rohe  
ki a Eroma, ki te koraha o Hini ra ano whaka te tonga, ki te pito whakamutunga ki te tonga. <sup>2</sup> Ko  
to ratou rohe ki te tonga kei te pito ra ano o te Moana Tote, kei te matamata e anga ana whaka te

tonga: <sup>3</sup> Na ka rere whaka te tonga o te pinakitanga o Akarapimi, ka haere atu ki Hini, a ka ahu  
whakarunga i te taha ki te tonga o Kareheparenea, na haere tonu, kei Heterono, ka anga ki runga,



<sup>4</sup>  
 ki Arara, na ka whawhe kei Karakaa: Na haere tonu whaka Atamono, a puta atu ki te awa o Ihipa;

<sup>5</sup>  
 na ko nga pakarutanga atu o tena rohe kei te moana: ko te rohe tenei ki a koutou ki te tonga. A

ko te rohe ki te rawhiti ko te Moana Tote tae noa ki te kongutuawa o Horano. A ko te rohe i te taha

<sup>6</sup>  
 ki te raki i te kokoru o te moana i te kongutuawa o Horano: A ka haere te rohe ki runga, ki

Petehokora, a haere tonu i te raki o Petearapa; a ka ahu te rohe ki runga, ki te kohatu o Pohana tama

<sup>7</sup>  
 a Reupena: Na haere tonu te rohe ki runga, ki Repiri, atu i te raorao o Akoro, na ka anga atu

whaka te raki ki te ritenga o Kirikara, o te wahi i mua mai o te pikitanga ki Arumine, ki tera i te

taha tonga o te awa: a i haere tonu te rohe ma nga wai o Enehem ehe, a ko ona pakarutanga atu i

<sup>8</sup>  
 Enerokere: A i rere whakarunga te rohe ra te raorao o te tama a Hinomo ma te taha o to te Iepuhi

whaka te tonga, ara o Hiruharama: a i haere tonu te rohe ki te tihi o te maunga e whakapae ana i

mua o te raorao o Hinomo, whaka te hauauru, ki tera i te pito r awa o te raorao o Repaima whaka

<sup>9</sup>  
 te raki: A i whakatakotoria atu te rohe i te tihi o te maunga ki te puna wai o Nepetoa, a i puta atu

ki nga pa o Maunga Eperona; a i whakatakotoria atu te rohe ki Paara, ara ki Kiriata Tearimi:

<sup>10</sup>  
 Katahi ka whawhe atu te rohe i Paara, whaka te hauauru, ki Maunga Heira, a haere tonu atu ki

te taha o Maunga Tearimi, ara o Keharono, ki te taha ki te raki, a ka heke ki raro ki Petehemehe, a

<sup>11</sup>  
 haere tonu atu ki Timina: A i puta tonu atu te rohe ki te taha o Ekerono, whaka te raki; a i

whakatakotoria atu te rohe ki Hikirono, a haere tonu atu ki Maunga Paara, a puta tonu atu ki

<sup>12</sup>  
 Iapaneeere: a pakaru rawa atu te rohe kei te moana. A ko te rohe ki te hauauru kei te moana nui

me tona pareparenga. Ko te rohe tenei ki nga tama a Hura a tawhio noa, ki tenei hapu, ki tenei hapu

o ratou.

<sup>13</sup>  
 A i hoatu e ia he wahi ki a Karepe, ki te tama a Iepune i roto i nga tama a Hura, he mea ki

mai hoki na Ihowa ki a Hohua, ko Kiriata Arapa, ara ko Heperona, ko taua Arapa nei te papa o

<sup>14</sup>  
 Anaka. Na ka peia e Karepe i reira nga tama tokotoru a Anaka, a Hehai, a Ahimana, a Taramai,

<sup>15</sup>  
 nga tama a Anaka. Na ka haere atu ia i reira ki runga, ki nga tangata o Repiri: na ko te ingoa o

<sup>16</sup>  
 Repiri i mua ko Kiriata Hepere. Na ka mea a Karepe, Ko te tangata e patua ai a Kiriata Hepere,

<sup>17</sup>  
 a ka horo i a ia, ka hoatu e ahau a Akaha, taku tamahine hei wahine mana. Na ka horo i a Otoniere,

i te tama a Kenaha, a te teina o Karepe; a hoatu ana e ia tana tamahine, a Akaha hei wahine mana.

<sup>18</sup>  
 A, i a ia e haere atu ana ki a ia, ka whakakikitia e ia te tane kia tonoa he mara i tona papa: a ka

<sup>19</sup>  
 marere atu ia ki raro i te kaihe; na ka mea a Karepe ki a ia, He aha tau? Na ka mea ia, Homai

he manaaki ki ahau; i te mea kua whakanohoia ahau e koe ki te whenua i te tonga, homai ano hoki

etahi puna wai ki ahau. Na hoatu ana e ia ki a ia nga puna o runga me nga puna o raro.

20 Ko te wahi tupu tenei o te iwi o nga tama a Hura, o o ratou hapu. 21 A ko nga pa  
 whakamutunga o te iwi o nga tama a Hura, ki te taha ki Eroma, whaka te tonga, ko Kapateere, ko  
 Erere, ko Iakuru, 22 Ko Kinaha, ko Rimona, ko Arara, 23 Ko Kerehe, ko Hatoro, ko Itinana, 24 Ko  
 Tiwhi, ko Tereme, ko Pearoto, 25 Ko Hatoro, ko Harata, ko Kerimoto, ko Heterono, ara ko Hatoro,  
 26 Ko Amama, ko Hema, ko Morara, 27 Ko Hatarakara, ko Hehemono, ko Peteperete, 28 Ko  
 Hatarahuara, ko Peerehepa, ko Pitiotia, 29 Ko Paara, ko Iimi, ko Eteme, 30 Ko Eretorara, ko Kehiri,  
 ko Horema, 31 Ko Tikiraka, ko Maramana, ko Hanahana, 32 Ko Repaoto, ko Hirihimi, ko Aina,  
 ko Rimono: e rua tekau ma iwa nga pa katoa me nga kainga o aua pa. 33 O te mania ko Ehetaoro,  
 ko Torea, ko Ahena, 34 Ko Tanoa, ko Enekanimi, ko Tapua, ko Enama, 35 Ko Iaramuta, ko Aturama,  
 ko Hokoho, ko Ateka, 36 Ko Haraimi, ko Aritaimi, ko Kerera, ko Kererotaimi; kotahi tekau ma  
 wha nga pa me nga kainga o aua pa. 37 Ko Tenana, ko Haraha, ko Mikirarakara, 38 Ko Rireana,  
 ko Mihipe, ko Iokoteere, 39 Ko Rakihi, ko Pohokata, ko Ekerona, 40 Ko Kapono, ko Rahamama,  
 ko Kitirihi, 41 Ko Kereroto, ko Peterakono, ko Naama, ko Makera; kotahi tekau ma wha nga pa  
 me nga kainga o aua pa. 42 Ko Ripina, ko Etere, ko Ahana, 43 Ko Ipita, ko Ahena, ko Netipi,  
 44 Ko Keira, ko Akatipi, ko Mareha: e iwa nga pa, me nga kainga o aua pa. 45 Ko Ekerono me ona  
 pa ririki, me ona kainga: 46 Ko nga pa katoa e tata ana ki Aharoro o Ekerono atu a tae noa ki te  
 moana, me nga kainga ano hoki o reira. 47 Ko Aharoro me ona pa ririki, me ona kainga, ko Kaha  
 me ona pa ririki, me ona kainga tae noa ki te awa o Ihipa, ki te moana nui ano hoki, me tona  
 pareparenga. 48 A, o nga maunga, ko Hamiri, ko Iatiri, ko Hokoho, 49 Ko Ranaha, ko Kiriatahana,  
 ara ko Repiri, 50 Ko Anapa, ko Ehetomo, ko Animi, 51 Ko Kohena, ko Horono, ko Kiroho; kotahi  
 tekau ma tahi nga pa, me nga kainga o aua pa. 52 Ko Arapa, ko Rumaha, ko Eheana, 53 Ko Ianumu,  
 ko Petetapua, ko Apeka, 54 Ko Humuta, ko Kiriata Arapa, ara ko Heperona, ko Tioro; e iwa nga  
 pa, me nga kainga o aua pa. 55 Ko Maono, ko Karamere, ko Tiwhi, ko Iutaha, 56 Ko Ietereere, ko  
 Iokoreama, ko Tanoa, 57 Ko Kaini, ko Kipea, ko Timina; kotahi tekau nga pa me nga kainga o aua  
 pa. 58 Ko Harahuru, ko Peteturu, ko Keroro, 59 Ko Maarata, ko Peteanoto, ko Eretekono; e ono  
 nga pa, me nga kainga o aua pa. 60 Ko Kiriatapaara, ara ko Kiriata Tearimi, ko Rapa; e rua nga pa,

me nga kainga o aua pa. <sup>61</sup> O te koraha, ko Petearapa, ko Mirini, ko Hekaka, <sup>62</sup> Ko Nipihana, me te Pa Tote, me Enekeri; e ono nga pa, me nga kainga o aua pa. <sup>63</sup> Ko nga Iepuhi ia, ko nga tangata o Hiruharama, kihai ratou i taea te pei e nga tama a Hura: heoi noho tahi ana nga Iepuhi me nga tama a Hura ki Hiruharama a taea noatia tenei ra.

## Chapter 16

<sup>1</sup> A, ko te rota i nga tama a Hohepa, i rere atu i Horano i Heriko, i nga wai o Heriko ki te rawhiti, a tae noa ki te koraha, e aupiki atu ra i Heriko ma te whenua pukepuke ki Peteere; <sup>2</sup> Na ka haere atu i Peteere ki Rutu, a tika tonu atu ki nga rohe o Araki ki Ataroto, <sup>3</sup> Na ka haere ki raro whaka te hauauru ki te rohe o Iapareti tae noa ki te rohe o Petehorono ki raro, ki Ketere: a ko tona putanga atu kei te moana. <sup>4</sup> Na ka riro i nga tama a Hohepa, i a Manahi raua ko Eparaima to ratou kainga tupu.

<sup>5</sup> A ko te rohe tenei ki nga tama a Eparaima, ki o ratou kainga whaka te rawhiti ko Ataroto Arara, tae noa ki Petehorono ki runga; <sup>6</sup> A i puta atu te rohe whaka te hauauru ki Mikimeta ki te raki; a i awbio haere te rohe whaka te rawhiti ki Taanata Hiro, a ka whakarerea atu a reira i te taha ki te rawhiti o Ianoha; <sup>7</sup> Na ka anga i Ianoha ki raro ki Ataroto, a ki Naarata, a ka pa ki Heriko, puta rawa atu kei Horano. <sup>8</sup> I haere atu te rohe i Tapua whaka te hauauru ki te awa ki Kanaha; a kei te moana ona putanga atu. Ko te wahi tupu tenei o te iwi o nga tama a Eparaima, o o ratou hapu: <sup>9</sup> Me nga pa i motuhia mo nga tama a Eparaima i roto i te wahi o nga tama a Manahi, nga pa katoa me nga kainga o aua pa. <sup>10</sup> A kihai i peia e ratou te Kanaani e noho ana i Ketere: heoi noho ana te Kanaani i waenganui o Eparaima a taea noatia tenei ra, a ka meinga hei pononga, hei mahi i nga mahi.

## Chapter 17

<sup>1</sup> A ko te rota tenei i te iwi o Manahi; ko ia hoki te matamua a Hohepa. I a Makiri, i te matamua a Manahi, matua o Kireara, i te mea he tangata hapai pakanga ia, i a ia a Kireara, a Pahana. <sup>2</sup> A ko te rota i era atu tama a Manahi, i o ratou hapu; i nga tama a Apietere, i nga tama a Hereke, i nga

tama a Ahariere, i nga tama a Hekeme, i nga tama a Hewhere, i nga tama hoki a Hemira: ko nga  
tama enei a Manahi tama a Hohepa, i o ratou hapu. <sup>3</sup> Otiia kahore he tama a Teropehara, tama a  
Hewhere, tama a Kireara, tama a Makiri, tama a Manahi; engari he tamahine: a ko nga ingoa enei  
o ana tamahine, ko Mahara, ko Noa, ko Hokora, ko Mireka, ko Tirita. <sup>4</sup> Na ka whakatata ratou ki  
te aroaro o Ereatara tohunga, ki te aroaro o Hohua tama a Nunu, ki te aroaro ano hoki o nga ariki,  
a ka mea, I whakahau a Ihowa i a Mohi kia homai he kainga tupu ki a matou i roto i o matou tungane.  
<sup>5</sup> Na homai ana e ia ki a ratou ta Ihowa i ki ai, he kainga tupu i roto i nga teina o to ratou papa. A  
tekau nga wahi i taka ki a Manahi, haunga te whenua o Kireara, o Pahana, i tawahi o Horano; <sup>6</sup> No  
te mea i whiwhi nga tamahine a Manahi i te wahi tupu i roto i ana tama; a i riro te whenua o Kireara  
i nga tama a Manahi i mahue.

<sup>7</sup> A ko te rohe ki a Manahi kei a Ahera a tae noa ki Mikimeta, ki tera i te ritenga atu o Hekeme;  
a i haere tonu te rohe ki matau, ki nga tangata o Enetapua. <sup>8</sup> I a Manahi te whenua o Tapua: ko  
Tapua ia i te rohe o Manahi, i nga tama a Eparaima tera. <sup>9</sup> A i puta atu te rohe ki te awa, ki Kana,  
whaka te tonga o te awa: ko enei pa no Eparaima i roto i nga pa o Manahi: a ko te rohe o Manahi  
i te taha tuaraki o te awa, a ko ona putanga kei te moana: <sup>10</sup> I a Eparaima te taha ki te tonga, a i a  
Manahi te taha ki te raki, a ko te moana te rohe ki a ia; a i tutaki raua ki a Ahera ki te raki, ki a  
Ihakara hoki ki te rawhiti. <sup>11</sup> A i riro i a Manahi i roto i to Ihakara, i to Ahera, a Peteheana me ona  
pa ririki, a Ipireama me ona pa ririki, nga tangata o Roro, o ona pa ririki, nga tangata o Eneroro, o  
ona pa ririki, nga tangata o Taanaka, o ona pa ririki, nga tangata ano hoki o Mekiro, o ona pa ririki,  
ara e toru nga taumata. <sup>12</sup> Otiia kihai i taea e nga tama a Manahi te pei nga tangata o aua pa; ko  
nga Kanaani ia i whakamate kia noho tonu i taua whenua. <sup>13</sup> Na, no ka kaha nga tama a Iharaira,  
ka meinga e ratou nga Kanaani hei kaimahi, a kahore i peia rawatia atu e ratou.

<sup>14</sup> Na ka korero nga tama a Hohepa ki a Hohua, ka mea, Na te aha i kotahi tonu ai te rota, i  
kotahi ai te wahi i homai e koe ki ahau hei kainga tupu, he iwi nui nei hoki ahau, a he manaakitanga  
hoki ahau na Ihowa a mohoa noa nei? <sup>15</sup> Na ka mea a Hohua ki a ratou, Ki te mea he iwi nui koe,  
haere ki te ngahere tua ai he wahi mau i reira, i te whenua o nga Perihi ratou ko nga Repaima; ina  
hoki he kuiti rawa te whenua pukepuke o Eparaima mou. <sup>16</sup> Na ka mea nga tama a Hohepa, He iti  
rawa te whenua pukepuke mo matou: a ko nga Kanaani katoa e noho ana i te wahi mania he hariata  
o ratou, o era e noho ra i Peteheana, i ona pa ririki, o era hoki i te mania i Ietereere. <sup>17</sup> Na ka korero  
a Hohua ki te whare o Hohepa, ki a Eparaima raua ko Manahi, ka mea, He iwi nui koe, he nui hoki  
tou kaha: e kore e kotahi tonu te rota mou: <sup>18</sup> Engari mou ano te whenua pukepuke; ahakoa hoki

he ngahere ia, mau e tua, a mou ona putanga atu; ka peia atu hoki e koe nga Kanaani, he ahakoa to ratou whai hariata rino, me to ratou kaha.

## Chapter 18

<sup>1</sup> Na ka huihui te whakaminenga katoa o nga tama a Iharaira ki Hiro, a whakaturia ana e ratou ki reira te tapenakara o te whakaminenga: a i taea hoki te whenua e ratou.

<sup>2</sup> Na ka toe e whitu nga iwi o nga tama a Iharaira, kahore nei i wehea to ratou kainga tupu ki a ratou. <sup>3</sup> Na ka mea a Hohua ki nga tama a Iharaira, Kia pehea ake te roa o to koutou nei mangere ki te haere ki te tango i te whenua kua hoatu nei ki a koutou e Ihowa, e te Atua o o koutou matua?

<sup>4</sup> Whakaritea mo koutou kia tokotoru mo ia iwi: a maku ratou e tono, a ka whakatika ratou, ka haere i te whenua, a ka tuhituhi kia rite ki o ratou wahi; a ka haere mai ai ratou ki ahau. <sup>5</sup> Me wehe hoki e ratou kia whitu nga wahi: me noho a Hura ki tona wahi ki te tonga, me noho ano hoki te whare

o Hohepa ki tona wahi ki te raki. <sup>6</sup> Na me tuhituhi e koutou te whenua kia whitu nga wahi, ka kawe mai ai i te pukapuka ki ahau ki konei, a maku e maka o koutou rota ki konei ki te aroaro o Ihowa,

o to tatou Atua. <sup>7</sup> Otira kahore he wahi mo nga Riwaiti i roto i a koutou; ko te mahi tohunga ki a Ihowa te wahi mo ratou: a ko Kara, ko Reupena, ko tetahi taanga hoki o te iwi o Manahi, kua whiwhi ratou ki to ratou wahi i tawahi o Horano whaka te rawhiti, ki ta Moh i, ki ta te pononga a

Ihowa i hoatu ai ki a ratou. <sup>8</sup> Na ka whakatika aua tangata, a ka haere: a i whakahau a Hohua i te hunga i haere ki te tuhituhi i te whenua, i mea, Turia atu, haereerea hoki te whenua, tuhituhia hoki,

ka hoki mai ai ki ahau, a maku e maka o koutou rota ki konei, ki te aroaro o Ihowa, ki Hiro. <sup>9</sup> Na ka turia atu e aua tangata, ka haere a puta noa te whenua, a tuhituhia iho e ratou ki te pukapuka, e

whitu nga wahi, he mea whakaaro ki nga pa, a haere ana ki a Hohua, ki te puni ki Hiro. <sup>10</sup> A maka ana e Hohua he rota mo ratou i Hiro, i te aroaro o Ihowa: na ka wehea e Hohua te whenua i reira mo nga tama a Iharaira, kia rite ki o ratou wehenga.

<sup>11</sup> I puta ake te rota o te iwi o nga tama a Pineamine, ara o o ratou hapu: i haere te rohe o to

ratou wahi i te takiwa o to nga tama a Hura, o to nga tama a Hohepa. <sup>12</sup> A ko to ratou rohe ki te taha ki te raki i Horano; na i haere te rohe ki runga, ki te taha o Heriko, ki te raki, a i haere whakarunga, na te whenua pukepuke whaka te hauauru, a puta tonu atu i te koraha o Peteawene.

<sup>13</sup> A i tika atu te rohe i reira ki Rutu, ki te taha o Rutu, ara ki Peteere whaka te tonga; na i anga whakararo te rohe ki Ataroto Arara, tatu tonu ki te pukepuke e tu ana i te tonga o Petehorono ki

<sup>14</sup> raro. Na ka whakatakotoria atu te rohe, a ka wahio haere ma te taha hauauru whaka te tonga, atu i te pukepuke e tu ana i te ritenga atu o Petehorono whaka te tonga; a ko ona putanga i  
<sup>15</sup> Kiriatapaara, ara i Kiriata Tearimi, he pa no nga tama a Hura: ko t e taha tenei ki te hauauru. A ko te taha ki te tonga i te pito rawa o Kiriata Tearimi, a i puta atu te rohe whaka te hauauru, a puta  
<sup>16</sup> tonu atu ki te puna wai i Nepetoa: A i anga whakararo te rohe ki te pito rawa o te maunga e tu ana i mua i te raorao o te tama a Hinomo, ki tera i te raorao o Repaima whaka te raki; na i heke ki  
<sup>17</sup> te raorao o Hinimo, ki te taha o te Iepuhi ki te tonga, a i heke ki Enerokere; Na i whakatakotoria atu te raki. a ka puta atu ki Enehemehe, a ka puta atu ki Keriroto, ki te ritenga atu o te pinakitanga  
<sup>18</sup> ki Arumine; a heke noa ki te kohatu o Pohana, o te tama o Reupena, Na i haere tonu i te tahi ki  
<sup>19</sup> te raki ki te ritenga atu o Arapa, a i heke tonu atu ki Arapa; Na i here tonu te rohe ki te taha ki te raki o Petehokora: a i pakaru rawa atu te rohe ki te kokoru whaka te raki o te Moana Toto i te  
<sup>20</sup> pito ki te tonga o Horano: ko te rohe tenei ki te tonga. A ko Horano tona rohe i te taha ki te rawhiti. Ko te kainga tupu tenei o nga tama a Pineamine, ko nga rohe hoki o reira a tawhio noa,  
<sup>21</sup> ara o o ratou hapu. Na, ko nga pa o te iwi o nga tama a Pineamine, o o ratou hapu, ko Heriko,  
<sup>22</sup> ko Petehokora, me Emekeketiti; Ko Petearapa, ko Temaraima, ko Peteere; <sup>23</sup> Ko Awimi, ko  
<sup>24</sup> Paraha, ko Opora; Ko Kepara Hamonai, ko Oponi, ko Kepa: kotahi tekau ma rua nga pa me nga  
<sup>25</sup> kainga o aua pa: Ko Kipeono, ko Rama, ko Peeroto; <sup>26</sup> Ko Mihipe, ko Kepira, ko Motaha;  
<sup>27</sup> Ko Rekeme, ko Iripeere, ko Tarara; <sup>28</sup> Ko Heraha, ko Erepe, ko Iepuhi, ara ko Hiruharama, ko Kipeata, ko Kiriata; kotahi tekau ma wha nga pa me nga kainga. Ko te kainga tupu tenei o nga tama a Pineamine, o o ratou hapu.

## Chapter 19

<sup>1</sup> A, ka puta ake te rua o nga rota, ko to Himiona, ara ko to te iwi o nga tama a Himiona, i te ritenga o o ratou hapu: a ko to ratou wahi i waenganui o te wahi o nga tama a Hura. <sup>2</sup> A no o ratou  
<sup>3</sup> kainga tupu hoki a Peerehepa, ara a Hepa, a Morara; A Hatarahuara, a Para, a Ate; <sup>4</sup> A Eretorara, a Peturu, a Horema; <sup>5</sup> A Tikiraka, a Pete Marakapoto, a Hatara Huha; <sup>6</sup> A Peterepaoto, a Haruhene;  
<sup>7</sup> kotahi tekau ma toru nga pa, me nga kainga: A Aina, a Rimono, a Etere, a Ahana; e wha nga pa

8  
me nga kainga; Me nga kainga katoa o enei pa a tawhio noa, a tae noa ki Paarata Peere, ki Ramata  
ki te tonga. Ko te wahi tupu tenei o te iwi o nga tama a Himiona, o o ratou hapu. 9  
No te wahi o  
nga tama a Hura te wahi o nga tama a Himiona: he nui rawa hoki te wahi o nga tama a Hura mo  
ratou: na reira i riro ai he kainga tupu mo nga tama a Himiona i roto i to ratou wahi.

10  
A, ko te putanga ake o te toru o nga rota, ko to nga tama a Hepurona, ki te ritenga o o ratou  
hapu: a tutuki noa te rohe o to ratou wahi ki Hariri: 11  
A i haere whakarunga to ratou rohe ki te  
hauauru, ki Marara atu ra ano, a i tae hoki ki Rapahete; i tae ano hoki ki te awa i mua i Iokoneama;

12  
Na i anga atu i Hariri whaka te rawhiti ki te putanga mai o te ra, ki te rohe o Kihiroto Taporo;  
na i puta atu ki Taperata, a i haere tonu atu ki runga, ki Iapia; 13  
Na i rere atu i reira whaka te  
rawhiti ki Katahewhere, ki Itakatini; a puta tonu atu ki Rimono, ki tera e takoto atu ra ki Neaha;

14  
Na i taiawhio te rohe i te taha ki te raki a tae noa ki Hanatono: a ko ona pakarutanga i te raorao  
o Ipitaere; 15  
Me Katata, me Naharara, me Himirono, me Irara, me Peterehema: kotahi tekau ma

16  
rua nga pa me nga kainga. Ko te wahi tupu tenei o nga tama a Hepurona, o o ratou hapu, ko enei  
pa me nga kainga o aua pa.

17  
A, ko te putanga ake o te wha o nga rota, ko to Ihakara, ko to nga tama a Ihakara i te ritenga  
o o ratou hapu. 18  
A ko te rohe ki a ratou i Ietereere, na ko Kehuroto, ko Huneme; 19  
Ko Haparaima,  
ko Hihono, ko Anaharata; 20  
Ko Rapiti, ko Kihiono, ko Apete; 21  
Ko Remete, ko Enekanimi, ko  
Eneharaha, ko Petepatere; 22  
A i puta atu te rohe ki Taporo, ki Hahatima, ki PeteHEMEHE; a i pakaru  
tonu atu to ratou rohe ki Horano: kotahi tekau ma ono nga pa me nga kainga. 23  
Ko te wahi tupu  
tenei o te iwi o nga tama a Ihakara, o o ratou hapu, ko nga pa me nga kainga.

24  
A, ko te putanga ake o te rima o nga rota, ko to te iwi o nga tama a Ahera, o o ratou hapu.  
25  
A, ko to ratou rohe, ko Herekata, ko Hari, ko Petene, ko Akahapa; 26  
Ko Aramereke, ko Amara,

27  
ko Miheara; a tutuki noa ki Karamere ki te taha ki te hauauru, ki Hihoro Ripinata ano hoki; Na  
ka anga ki te rawhiti ki Peterakono, a tutuki noa ki Hepurona, ki te raorao o Ipitaere hoki, ki te taha  
ki te raki o Peteemeke, o Neiere, a puta noa ki Kapuru ki maui; 28  
Ko Heperona hoki, ko Rehopo,

29  
ko Hamono, ko Kanaha, a tae noa ki Hairona nui; Katahi ka anga te rohe ki Rama, ki Taira hoki  
ki te pa taiepa; na ka anga te rohe ki Hoha; a ko ona putanga atu i te moana, i nga wahi o Akatipi:

30  
Ko Umaha ano hoki, ko Apeke, ko Rehopo: e rua tekau ma rua nga pa me o ratou kainga. 31  
Ko

te kainga tupu tenei o te iwi o nga tama a Ahera, o o ratou hapu, ko enei pa me nga kainga o aua pa.

32

Ko te putanga ake o te ono o nga rota, ko to nga tama a Napatari, ara ko to nga tama a

33

Napatari ki te ritenga o o ratou hapu. A i anga atu to ratou rohe i Herepe, i te oki i roto i Taananimi, ki Arami Nekepe, ki Iapaneeere, tae noa ki Rakumu; a ko ona pakarutanga atu i Horano:

34

Na i anga te rohe whaka te hauauru ki Atanoto Taporo, a i haere tonu i reira ki Hukoko; na i te taha ki te tonga i tutuki atu ki to Hepurona, a i te taha ki te hauauru i tutuki atu ki to Ahera, a, i te

35

takiwa ki te rerenga mai o te ra, ki to Hur a i Horano. A, ko nga pa taiepa, ko Tirimi, ko Tere,

ko Hamata, ko Rakata, ko Kinereta; Ko Aramaha, ko Rama, ko Hatoro; Ko Kerehe, ko Eterei,

38

ko Enehatoro; Ko Irono ko Mikitaraere, ko Horeme, ko Peteanata, ko Petehemehe; kotahi tekau

39

ma iwa nga pa me nga kainga o aua pa. Ko te kainga tupu tenei o te iwi o nga tama a Napatari, o o ratou hapu, ko nga pa me o ratou kainga.

40

A, ko te putanga ake o te whitu o nga rota, ko to te iwi o nga tama a Rana, i te ritenga ki o

41

ratou hapu. A ko te rohe o to ratou wahi i Toraha, i Ehetaoro, i Irihemehe; I Haarapini, i

42

Aitarono, i Ietera; I Erono, i Timinata, i Ekerono; I Eretekehe, i Kipetono, i Paarata; I

43

44

45

46

Iehuru, i Peneperaka, i Katarimono; I Meiarakono, i Rakono, me te rohe ano hoki i mua i Iapo.

47

A i puta atu te rohe o nga tama a Rana ki ko atu i a ratou: no te mea i haere nga tama a Rana ki runga, a i whawhai ki Reheme, a riro ana a reira i a ratou, a patua iho a reira ki te mata o te hoari, na tangohia ana a reira e ratou, a nohoia iho, a huaina iho a Reheme ko Rana, ko te ingoa o to ratou

48

papa o Rana. Ko te wahi tenei o te iwi o nga tama a Rana, o o ratou hapu, ko nga pa enei me nga kainga.

49

Na ka mutu ta ratou whakarite i te whenua hei kainga tupu, i tenei rohe, i tenei rohe; na ka

50

hoatu e nga tama a Iharaira he wahi tupu mo Hohua tama a Nunu i roto i a ratou: I hoatu e ratou ki a ia ta Ihowa i ki ai, te pa i tonoa e ia, ara a Timinata Heraha i te whenua pukepuke o Eparaima:

51

na ka hanga e ia te pa, a noho ana i reira. Ko nga kainga enei i tuwhaina e Ereatara tohunga, e Hohua tama a Nunu, e nga upoko o nga whare o nga matua o nga iwi o nga tama a Iharaira, he mea rota i Hiro i te aroaro o Ihowa, i te whatitoka o te tapenakara o te whakaminenga. Heoi ka mutu ta ratou wehewehe i te whenua.

## Chapter 20



<sup>1</sup> Na ka korero a Ihowa ki a Hohua, ka mea, <sup>2</sup> Korero ki nga tama a Iharaira, mea atu, Whakaritea  
 e koutou etahi pa whakaora, ko aku i korero ai, na Mohi i whakapuaki ki a koutou: <sup>3</sup> Hei rerenga  
 atu mo te tangata whakamate, i patu nei i tetahi tangata, he mea urupa, ehara i te mea ata whakaaro:  
 a ka waiho hei whakaora mo koutou, kei mate i te kaitakitaki toto. <sup>4</sup> A ka rere ia ki tetahi o enei  
 pa, ka tu i te kuwaha o te tomokanga o te pa, na ka korero i ana korero ki nga taringa o nga kaumatua  
 o tena pa; a me tango atu ia e ratou ki roto ki te pa, ki roto ki a ratou, ka homai he wahi ki a ia, a  
 ka noho ia ki a ratou. <sup>5</sup> A, ki te whaia atu ia e te kaitakitaki toto, kua e tukua atu te tangata  
 whakamate e ratou ki tona ringa; no te mea ehara i te mea ata whakaaro tana patunga i tona hoa,  
 kihai ano ia i kino ki a ia i mua ake. <sup>6</sup> Engari me noho ia ki taua pa, kia tu ra ano ia ki mua i te  
 whakaminenga whakawakia ai, a kia mate ra ano te tino tohunga o aua ra: ko reira hoki ai te tangata  
 whakamate, haere ai ki tona pa, ki tona whare hoki, ki te pa i rere atu nei ia i reira  
<sup>7</sup> Na ka whakatapua e ratou ko Kerehe i Kariri, i te whenua pukepuke o Napatari, ko Hekeme  
 i te whenua pukepuke o Eparaima, ko Kiriata Arapa, ara ko Heperona, i te whenua pukepuke o  
<sup>8</sup> Hura. Na i tawahi o Horano, i te wahi e anga ana ki Heriko whaka te rawhiti ka whakaritea e  
 ratou ko Petere i te koraha i te mania, no te iwi o Reupena, ko Ramoto i Kireara, no te iwi o Kara,  
 ko Korana hoki i Pahana, no te iwi o Manahi. <sup>9</sup> Ko nga pa enei i whakaritea mo nga tama katoa a  
 Iharaira, mo te manene hoki e noho ana i roto i a ratou, hei rerenga atu mo nga tangata katoa i  
 whakamatea ai tetahi tangata, he mea urupa, kei mate i te ringa o te kaitakitaki toto, kia tu ra ano  
 i mua i te whakaminenga.

## Chapter 21

<sup>1</sup> Na ka whakatata mai nga upoko o nga whare o nga matua o nga Riwaiti ki a Ereatara tohunga,  
 ki a Hohua tama a Nunu, ratou ko nga upoko o nga whare o nga matua o nga iwi o nga tama a  
 Iharaira; <sup>2</sup> A ka korero ki a ratou i Hiro, i te whenua o Kanaana, ka mea, I whakahau a Ihowa, na  
 Mohi i whakapuaki, kia homai ki a matou etahi pa hei nohoanga, me nga wahi o waho ake mo a  
 matou kararehe. <sup>3</sup> Katahi ka hoatu e nga tama a Iharaira i roto i o ratou wahi enei pa me nga wahi  
 o waho ake ki nga Riwaiti, ko ta Ihowa hoki ia i ki ai. <sup>4</sup> Na ka puta ake te rota, ko to nga hapu o  
 nga Kohati: a i riro i nga tama a Arona tohunga, i era o nga Riwaiti, tekau ma toru nga pa, he mea  
 rota, no roto i o te iwi o Hura, no roto i o te iwi o Himiona, no roto hoki i o te iwi o Peineamine.  
<sup>5</sup> Na i riro i era atu o nga tama a Kohata tekau nga pa, he mea rota, no roto i o nga hapu o te iwi o

Eparaima, no roto i o te iwi o Rana, no roto hoki i o tetahi taanga o te iwi o Manahi. <sup>6</sup> A i riro i  
 nga tama a Kerehona kotahi tekau ma toru nga pa, he mea rota, no roto i o nga hapu o te iwi o  
 Ihakara, no roto i o te iwi o Ahera, no roto i o te iwi o Napatari, no roto hoki i o tetahi taanga o te  
 iwi o Manahi i Pahana. <sup>7</sup> A i riro i nga tama a Merari, i o ratou hapu, kotahi tekau ma rua nga pa,  
 no roto i o te iwi o Reupena, no roto i o te iwi o Kara, no roto hoki i o te iwi o Hepurona. <sup>8</sup> Na  
 hoatu ana e nga tama a Iharaira ki nga Riwaiti, he mea rota, enei pa, me nga wahi o waho ake, he  
 mea pera me ta Ihowa i whakahau ai, i whakapuakina e Mohi.  
<sup>9</sup> A i hoatu e ratou i roto i o te iwi o nga tama a Hura, i o te iwi hoki o nga tama a Himiona,  
 enei pa ka whakahuatia nei nga ingoa; <sup>10</sup> A i riro i nga tama a Arona, ara i nga hapu o nga Kohati,  
 he tama nei ratou na Riwai: no ratou hoki te rota tuatahi. <sup>11</sup> I hoatu ano ki a ratou a Kiriata Arapa,  
 ko taua Arapa nei te papa o Anaka, ara o Heperona, i te whenua pukepuke o Hura, me ona wahi o  
 waho ake a tawhio noa. <sup>12</sup> Ko nga mara ia o te pa, me ona kainga, i hoatu e ratou ki a Karepe tama  
 a Iepune hei kainga tupu mona. <sup>13</sup> Na hoatu ana e ratou ki nga tama a te tohunga, a Arona, a  
 Heperona me ona wahi o waho ake, hei pa rerenga atu mo te tangata whakamate, a Ripina hoki,  
 me ona wahi o waho ake; <sup>14</sup> A Iatiri me ona wahi o waho ake, a Ehetemoa me ona wahi o waho  
 ake; <sup>15</sup> A Horono me ona wahi o waho ake, a Tepiri me ona wahi o waho ake; <sup>16</sup> A Aina hoki me  
 ona wahi o waho ake, a Iuta me ona wahi o waho ake, a PeteHEMEHE me ona wahi o waho ake; e  
 iwa nga pa i roto i o enei iwi e rua. <sup>17</sup> A, no roto i o te iwi o Pineamine, ko Kipeono me ona wahi  
 o waho ake, ko Kepa me ona wahi o waho ake; <sup>18</sup> Ko Anatoto me ona wahi o waho ake, ko Aramono  
 me ona wahi o waho ake; e wha nga pa. <sup>19</sup> Na, ko nga pa katoa o nga tama a Arona, o nga tohunga,  
 kotahi tekau ma toru me nga wahi o waho ake. <sup>20</sup> Na i riro i nga hapu o nga tama a Kohata, i nga  
 Riwaiti, ara i era atu o nga tama a Kohata, he mea rota, nga pa no roto i to te iwi o Eparaima. <sup>21</sup> A  
 i hoatu e ratou a Hekeme i te whenua pukepuke o Eparaima ki a ratou, me ona wahi o waho ake,  
 hei pa rerenga atu mo te tangata whakamate, a Ketere hoki me ona wahi o waho ake; <sup>22</sup> A Kipitaima  
 me ona wahi o waho ake, a Petehorono me ona wahi o waho ake; e wha nga pa. <sup>23</sup> A, no roto i to  
 te iwi o Rana, ko Eretekeha me ona wahi o waho ake, ko Kipetono me ona wahi o waho ake; <sup>24</sup> Ko  
 Aitarono me ona wahi o waho ake, ko Katarimono me ona wahi o waho ake; e wha nga pa. <sup>25</sup> A,  
 no roto i to tetahi taanga o te iwi o Manahi, ko Taanaka me ona wahi o waho ake, ko Katarimono  
 hoki me ona wahi o waho ake; e rua nga pa. <sup>26</sup> Ko nga pa katoa o nga hapu o era atu o nga tama

<sup>27</sup>  
 a Kohata kotahi tekau me nga wahi o waho ake. Na i hoatu e ratou, no roto i to tetahi taanga o te iwi o Manahi, ki nga tama a Kerehona, o nga hapu o nga Riwaiti, ko Korana i Pahana me ona wahi o waho ake, hei pa rerenga atu mo te tangata whakamate; a Peehetera hoki me ona wahi o waho ake; e rua nga pa. <sup>28</sup> A, no roto i to te iwi o Iharara, ko Kihiono me ona wahi o waho ake, ko Tapare me ona wahi o waho ake; <sup>29</sup> Ko Iaramuta me ona wahi o waho ake, ko Enekanimi me ona wahi o waho ake; e wha nga pa. <sup>30</sup> No roto i to te iwi o Ahera, ko Mihara me ona wahi o waho ake, ko Aparono me ona wahi o waho ake; <sup>31</sup> Ko Herekata me ona wahi o waho ake, ko Rehopo me ona wahi o waho ake; e wha nga pa. <sup>32</sup> A, no roto i to te iwi o Napatari, ko Kerehe i Kariri me ona wahi o waho ake, hei pa rerenga atu mo te tangata whakamate, ko Hamotororo me ona wahi o waho ake, ko Karatana hoki me ona wahi o waho ake; e toru nga pa. <sup>33</sup> Ko nga pa katoa o nga Kerehoni, o tenei hapu, o tenei hapu o ratou, kotahi tekau ma toru nga pa me nga wahi o waho ake. <sup>34</sup> Na, ko to nga hapu o nga tama a Merari, ara o era atu o nga Riwaiti, no roto i o te iwi o Hepurona, ko Iokoneama me ona wahi o waho ake, ko Karata me ona wahi o waho ake, <sup>35</sup> Ko Rimina me ona wahi o waho ake, ko Naharara me ona wahi o waho ake; e wha nga pa. <sup>36</sup> A, no roto i o te iwi o Reupena, ko Petere me ona wahi o waho ake, ko Iahata me ona wahi o waho ake, <sup>37</sup> Ko Keremoto me ona wahi o waho ake, ko Mewhaata me ona wahi o waho ake; e wha nga pa. <sup>38</sup> A, no roto i to te iwi o Kara, ko Ramoto i Kireara me ona wahi o waho ake, hei pa rerenga atu mo te tangata whakamate, a ko Mahanaima me ona wahi o waho ake; <sup>39</sup> Ko Hehepona me ona wahi o waho ake, ko Iatere me ona wahi o waho ake; e wha katoa nga pa. <sup>40</sup> Ko nga pa katoa enei mo nga tama a Merari, mo tenei hapu, mo tenei hapu o ratou, ara mo era atu o nga hapu o nga Riwaiti; kotahi tekau ma rua nga pa, he mea whakarite na to ratou rota. <sup>41</sup> Ko nga wahi katoa o nga Riwaiti i roto i te wahi o nga tama a Iharaira, e wha tekau ma waru nga pa me nga wahi hoki o waho ake. <sup>42</sup> I riro enei pa me nga wahi o waho ake o tenei, o tenei, a tawhio noa: na i penei enei pa katoa. <sup>43</sup> Na ka homai e Ihowa ki a Iharaira te whenua katoa i oati ai ia kia homai ki o ratou matua: a ka riro a reira i a ratou, a ka nohoia e ratou. <sup>44</sup> Na ka meinga ratou e Ihowa kia whai okiokinga a tawhio noa, i pera me ana katoa i oati ai ki o ratou matua: a kihai rawa tetahi tangata o o ratou hoariri katoa i tu ki to ratou aroaro; i homai e Ihowa o ratou hoariri katoa ki o ratou ringa. <sup>45</sup> Kihai rawa i taka tetahi kupu o nga kupu pai katoa i korerotia e Ihowa ki te whare o Iharaira; i mana katoa.

## Chapter 22

<sup>1</sup> Katahi ka karanga a Hohua ki nga Reupeni, ki nga Kari, a ki tetahi taanga o te iwi o Manahi,  
<sup>2</sup> A ka mea ki a ratou, Kua mau i a koutou nga mea katoa i whakahau ai a Mohi, te pononga a Ihowa  
ki a koutou, kua whakarongo mai hoki koutou ki toku reo i nga mea katoa i whakahau ai ahau ki  
a koutou: <sup>3</sup> Kihai koutou i whakarere i o koutou tuakana i enei rangi e maha a tae noa mai ki tenei  
ra, engari i ata pupuri marie koutou i te whakahau a Ihowa, a to koutou Atua. <sup>4</sup> Na kua mea nei a  
Ihowa, to koutou Atua i o koutou teina kia okioki, ka rite ki tana i korero ai ki a ratou: na reira,  
hoki atu, haere ki o koutou teneti, ki te whenua hoki i whiwhi na koutou, i hoatu na e Mohi, e te  
pononga a Ihowa ki a koutou i tawahi o Horano. <sup>5</sup> Otira kia mahara marie kia mahi te whakahau  
me te ture, i whakahau ai a Mohi, te pononga a Ihowa ki a koutou, kia aroha ki a Ihowa, ki to koutou  
Atua, kia haere i ana huarahi katoa, kia pupuri i ana whakahau, kia wahi hoki ki a ia, kia whakapotoa  
o koutou ngakau katoa, o koutou wairua katoa ki te mahi ki a ia. <sup>6</sup> Na ka manaaki a Hohua i a ratou,  
a tukua ana ratou kia haere: a haere ana ratou ki o ratou teneti. <sup>7</sup> Na i hoatu e Mohi he kainga i  
Pahana ki tetahi taanga o te iwi o Manahi: engari ki tetahi taanga i hoatu e Hohua he kainga i roto  
i o ratou tuakana i tenei taha o Horano, whaka te hauauru. A, i ta Hohua tukunga atu i a ratou ki o  
<sup>8</sup> ratou teneti, i manaaki ano ia i a ratou, I korero ki a ratou, i mea, Hoki atu ki o koutou teneti me  
nga taonga maha, me te tini noa iho o te kararehe, me te hiriwa, me te koura, me te parahi, me te  
rino, me te nui noa atu o te kakahu: tuwhaina atu nga taonga o o koutou hoariri ki o koutou tuakana.  
<sup>9</sup> Na hoki ana nga tama a Reupena, me nga tama a Kara, me tetahi taanga o te iwi o Manahi, mawehe  
atu ana i roto i nga tama a Iharaira i Hiro, i te whenua o Kanaana, a haere ana ki te whenua o Kireara,  
ki te whenua i whiwhi ai ratou, i whakawhiwhia ki a ratou e te kupu a Ihowa i whakapuakina e  
Mohi.  
<sup>10</sup> Na, i to ratou taanga ki te takiwa i nga taha o Horano, ki tera i te whenua o Kanaana, ka  
hanga e nga tama a Reupena, e nga tama a Kara, e tetahi taanga o te iwi o Manahi, tetahi aata ki  
<sup>11</sup> reira, ki te taha o Horano, he aata nui hei tiro hanga atu. Na ka rongu nga tama a Iharaira e  
korerotia ana, Nana, kua hanga nga tama a Reupena, me nga tama a Kara, me tetahi taanga o te iwi  
o Manahi, i tetahi aata ki te ritenga mai o te whenua o Kanaana ki nga taha o Horano, ki te wahi i  
<sup>12</sup> nga tama a Iharaira. A, no te rongonga o nga tama a Iharaira, huihui ana te whakaminenga katoa  
o nga tama a Iharaira ki Hiro, i mea kia haere ki te whawhai ki a ratou. <sup>13</sup> Na ka tonoa atu e nga  
tama a Iharaira a Pinehaha tama a Ereatara tohunga ki nga tama a Reupena, ki nga tama hoki a  
<sup>14</sup> Kara, a ki tetahi taanga o te iwi o Manahi, ki te whenua o Kireara; Me etahi rangatira kotahi  
tekau hoki hei hoa mona, tatakikotahi te rangatira o ia koromatua, o ia koromatua o nga iwi katoa

o Iharaira; he ariki hoki ratou, ia tangata, ia tangata, no nga whare o o ratou matua i roto i nga mano

<sup>15</sup> o Iharaira. Na haere ana ratou ki nga tama a Reupena, ki nga tama a Kara, ki tetahi taanga hoki

o te iwi o Manahi, ki te whenua o Kireara, a ka korero ki a ratou, ka mea, <sup>16</sup> Ko te korero tenei a te whakaminenga katoa a Ihowa, He aha tenei hara i mea nei koutou ki te Atua o Iharaira, i a koutou ka tahuri atu nei i tenei ra i te whai i a Ihowa, ka hanga nei i tetahi aata ma koutou, hei mahi tutu

ma koutou ki a Ihowa? <sup>17</sup> He nohinohi rawa ianei ki a tatou te haranga ki a Peoro, kahore ano nei i horoia atu i a tatou a tae noa mai ki tenei ra, ahakoa ra i pa he mate uruta ki te whakaminenga a

Ihowa, <sup>18</sup> E tahuri ke nei koutou i tenei ra i te whai i a Ihowa? Na ki te mea ka tutu koutou i tenei

ra ki a Ihowa, tera ia e riri apopo ki te whakaminenga katoa o Iharaira. <sup>19</sup> Otiia mehemea he poke te whenua e noho nei koutou, haere ake ki te whenua e nohoia ana e Ihowa, kei reira nei e tu ana te tapenakara o Ihowa, a ka noho i waenganui i a matou: engari kaua e tutu ki a Ihowa, kaua ano hoki e tutu ki a matou, i a ko utou ka hanga nei i tetahi aata ke atu ma koutou i te aata a Ihowa, a

to tatou Atua. <sup>20</sup> Kahore ianei a Akana, te tama a Tera i taka ki te hara i te mea kanga, a tau ana te riri ki runga ki te whakaminenga katoa o Iharaira? a kihai i mate ko taua tangata anake mo tona hara.

<sup>21</sup> Katahi ka whakahoki nga tama a Reupena, nga tama a Kara, me tetahi taanga o te iwi o

Manahi, ka mea ki nga ariki o nga mano o Iharaira, <sup>22</sup> Ko Ihowa, ko te Atua o nga atua, ko Ihowa, ko te Atua o nga atua, e mohio ana ia, ko Iharaira hoki ka mohio ano ia; mehemea na te tutu,

mehemea ranei na te hara ki a Ihowa, penei kaua matou e whakaorangia e koe i tenei ra, <sup>23</sup> I hanga ai e matou tetahi aata hei tahuritanga ketanga i muri i a Ihowa; mehemea ranei hei whakaekenga mo te tahunga tinana mo te whakahere ranei, hei meatanga ranei mo etahi patunga mo te pai, ma

Ihowa ake ano e rapu utu; <sup>24</sup> Mehemea ranei kahore i meatia e matou tenei mea i runga i te tupato, me te ata whakaaro, ka ki, Apopo ake nei ka korero mai a koutou tama ki a matou tama, ka mea,

He aha ta koutou kei a Ihowa, kei te Atua o Iharaira? <sup>25</sup> Kua whakatakotoria nei hoki e Ihowa a Horano hei rohe ki waenganui o matou, o koutou, e nga tama a Reupena, e nga tama a Kara; kahore o koutou wahi i roto i a Ihowa: pena ka meinga e a koutou tama a matou tama kia mutu te wehi i

a Ihowa. <sup>26</sup> Koia matou i mea ai, Tena, tatou ka haere, ka hanga i tetahi aata ma tatou, ehara i te

mea mo nga tahunga tinana, mo nga patunga tapu ranei: <sup>27</sup> Engari kia ai tena mea hei kaiwhakaatu ki a matou, ki a koutou, ki o tatou uri hoki i muri i a tatou, kia mahi ai tatou i nga mahi a Ihowa ki tona aroaro, i a tatou tahunga tinana, i a tatou patunga tapu, i a tatou whakahere mo te pai; kei mea

a koutou tama ki a matou tama a ko ake nei, Kahore o koutou wahi i roto i a Ihowa. <sup>28</sup> Koia matou i mea ai, Na tenei ake, kei ta ratou meatanga pera ki a tatou, ki o tatou uri ranei, na ka mea tatou, Titiro ki te mea e rite ana ki te aata a Ihowa, i hanga e o matou matua, ehara i te mea mo nga tahunga

tinana, mo nga patunga tapu r anei; engari hei kaiwhakaatu i waenganui i a matou, i a koutou.  
29

Aue, kia tutu matou ki a Ihowa! kia tahuri atu i tenei ra i muri i a Ihowa, ki te hanga i tetahi aata mo nga tahunga tinana, mo nga whakahere, mo nga patunga tapu ranei, hei mea ke atu i te aata a Ihowa, a to tatou Atua, i mua mai o tona tapenak ara!

30

Na, i te rongonga o Pinehaha tohunga, ratou ko nga rangatira o te whakaminenga, ara ko nga upoko o nga mano o Iharaira, ki nga kupu i korerotia e nga tama a Reupena, ratou ko nga tama

31

a Kara, ko nga tama a Manahi, ka pai ki a ratou. Katahi ka mea a Pinehaha tama a Ereatara tohunga ki nga tama a Reupena ratou ko nga tama a Kara, ko nga tama a Manahi, No tenei ra matou i mohio ai, kei waenganui i a tatou a Ihowa, ina hoki kihai koutou i taka ki tenei hara ki a Ihowa:

32

na kua w hakaora nei koutou i nga tama a Iharaira i te ringa o Ihowa. Katahi ka hoki a Penehaha tama a Ereatara tohunga, me nga rangatira, i nga tama a Reupena ratou ko nga tama a Kara i te whenua o Kireara, ki te whenua o Kanaana, ki nga tama a Iharaira, ki te whakahoki i te korero ki

33

a ratou. A pai tonu te korero ki nga tama a Iharaira: na whakapai atu ana nga tama a Iharaira ki te Atua, kihai hoki ratou i mea ano kia haere ki runga ki te whawhai ki a ratou, ki te huna i te whenua

34

e nohoia ana e nga tama a Reupena, ratou ko nga tama a Kara. Na huaina iho taua aata e nga tama a Reupena, ratou ko nga tama a Kara, ko Eri: i mea hoki ratou, Hei kaiwhakaatu tena mea ki waenganui i a tatou, ko Ihowa te Atua.

## Chapter 23

1

A, ka maha nga ra i muri i ta Ihowa meatanga i a Iharaira kia okioki i o ratou hoariri katoa i

2

tetahi taha, i tetahi taha, a ka maha haere nga ra o Hohua, ka koroheketia, Na ka karanga a Hohua ki a Iharaira katoa, ki o ratou kaumatua, ki o ratou ariki, ki o ratou kaiwhakariterite, ki o ratou

3

rangatira, a ka mea ki a ratou, Kua koroheketia ahau, kua maha oku ra: A kua kite koutou i nga mea katoa i mea ai a Ihowa, to koutou Atua ki enei iwi katoa, na te whakaaro hoki ki a koutou; no

4

te mea ko Ihowa, ko to koutou Atua, nana ta koutou riri. Titiro, kua oti te wehe atu e ahau mo koutou enei iwi ka mahue nei, hei wahi tupu mo o koutou iwi, o Horano atu me nga iwi katoa i

5

huna e ahau a tae noa ki te moana nui, ki te toenetanga o te ra. A ko Ihowa, ko to koutou Atua, mana ratou e pei i to koutou aroaro, mana hoki ratou e huna i to koutou aroaro; a ka riro to ratou

6

oneone i a koutou, ka pera me te kupu a Ihowa, a to koutou Atua ki a koutou. No reira kia uaua rawa ki te pupuri, ki te mahi i nga mea katoa i tuhituhia ki te pukapuka o te ture a Mohi, kei peka

7

ke i reira ki matau, ki mau; Kei haere hoki ki roto ki enei iwi, i mahue iho nei ki waenganui i a

koutou; kei whakahuatia nga ingoa o o ratou atua, kei oaitia, kei mahi ki a ratou, kei koropiko ki a ratou: <sup>8</sup> Engari me awhi ki a Ihowa, ki to koutou Atua, me pera me ta koutou i mea ai a tae noa mai ki tenei ra. <sup>9</sup> Kua peia hoki e Ihowa i mua i a koutou nga iwi nunui, kaha hoki: tena ko koutou, kahore ano tetahi tangata kia tu ki to koutou aroaro a taea noatia tenei ra. <sup>10</sup> Kia kotahi tangata o koutou hei whai i te mano: no te mea ko Ihowa, ko to koutou Atua, mana ta koutou riri, ka pera me tana i korero ai ki a koutou.

<sup>11</sup> Na reira tiakina marietia koutou, kia aroha ai koutou ki a Ihowa, ki to koutou Atua. <sup>12</sup> Ki te anga hoki koutou ki te hoki atu, ki te awhi ki nga toenga o enei iwi, o enei ka mahue nei i roto i a koutou, a ka marenatia ki a ratou, ka whakauru hoki ki a ratou, me ratou hoki ki a koutou: <sup>13</sup> Kia tino mohio, e kore a Ihowa, to koutou Atua e pei ano i enei iwi i mua i a koutou; engari ka waiho ratou hei rore, hei mahanga mo koutou, hei whiu hoki mo o koutou kaokao, hei koikoi i roto i o koutou kanohi, kia huna ra ano koutou i runga i tenei whenua pai ka homai nei e Ihowa, e to koutou Atua ki a koutou. <sup>14</sup> Nana, ko aianei ahau haere ai i te huarahi o te whenua katoa; a e mohio ana o koutou ngakau katoa, o koutou wairua katoa, kahore ano i taka tetahi mea o nga mea pai katoa i korerotia e Ihowa, e to koutou Atua mo koutou; kua pono katoa ki a koutou u, kahore ano tetahi mea o ena i taka. <sup>15</sup> Na tenei ake ka rite ki te putanga mai ki a koutou o nga mea pai katoa i korerotia e Ihowa, e to koutou Atua ki a koutou, ka pera ano te whakaputanga mai a Ihowa i nga mea kino katoa ki a koutou, kia whakangaromia ra ano koutou e ia i tenei whenua pai, kua homai nei e Ihowa, e to koutou Atua ki a koutou. <sup>16</sup> Ina whakapaheketia e koutou te kawenata a Ihowa, a to koutou Atua, i whakaritea mai nei e ia ki a koutou, a ka haere, ka mahi ki nga atua ke, ka koropiko ki a ratou; ko reira mura ai te riri o Ihowa ki a koutou, a ka ngaro whakarere atu koutou i runga i te whenua pai kua homai nei e ia ki a koutou.

## Chapter 24

<sup>1</sup> Na ka whakaemia e Hohua nga iwi katoa o Iharaira ki Hekeme, a ka karangatia e ia nga kaumatua o Iharaira, o ratou ariki, o ratou kaiwhakawa, o ratou rangatira; a tu ana ratou i te aroaro o te Atua. <sup>2</sup> Na ka mea a Hohua ki te iwi katoa, Ko te korero tenei a Ihowa, a te Atua o Iharaira, I noho o koutou matua i mua i tawahi o te awa, a Teraha matua o Aperahama, matua hoki o Nahora: <sup>3</sup> i mahi ano hoki ki nga atua ke. Na tangohia ana e ahau to koutou matua, a Aperahama i tawahi o te awa, a arahina ana a puta noa i te whenua o Kanaana, a whakanuia ana tona uri e ahau; i hoatu hoki a Ihaka ki a ia. <sup>4</sup> A hoatu ana e ahau a Hakopa raua ko Ehau ki a Ihaka: a hoatu ana e ahau a

Maunga Heira ki a Ehau, hei kainga; ko Hakopa ia ratou ko ana tama i heke ki Ihipa. <sup>5</sup> I tonoa ano e ahau a Mohi raua ko Arona, a patua iho e ahau a Ihipa, peratia ana me taku i mea ai i waenganui i a ratou: a muri iho ka whakaputaina mai koutou e ahau. <sup>6</sup> A whakaputaina mai ana e ahau o koutou matua i Ihipa: a ka tae koutou ki te moana; na ka whai mai nga Ihipiana i muri i o koutou matua ki te Moana Whero, me nga hariata, me nga hoia eke hoiho. <sup>7</sup> A, e ta ratou karangatanga ki a Ihowa, tukua iho ana e ia he pouri ki waenganui o koutou, o nga Ihipiana, a kawea mai ana e ia te moana ki runga ki a ratou, taupokina ana ratou: a i kite o koutou kanohi i nga mea i mea ai ahau ki Ihipa: a he maha nga ra i noho ai koutou i te koraha. <sup>8</sup> Na kawea ana koutou e ahau ki te whenua o nga Amori, i noho ra i tawahi o Horano; a whawhai ana ratou ki a koutou: a tukua ana ratou e ahau ki o koutou ringa, na riro ana to ratou oneone i a koutou; a huna iho ratou e ahau i to koutou aroaro. <sup>9</sup> Na ka whakatika a Paraka tama a Tipora kingi o Moapa, kei te whawhai ki a Iharaira; a tikina ana e ia a Paraama tama a Peoro, hei kanga mo koutou: <sup>10</sup> Otiia kihai ahau i pai kia rongu ki a Paraama; na, ko te manaakitanga i manaaki ai ia i a koutou: a whakaorangia ake koutou e ahau i tona ringa. <sup>11</sup> Na ka whiti mai koutou i Horano, a ka tae ki Heriko: a whawhai ana nga tangata o Heriko ki a koutou, nga Amori, nga Perihi, nga Kanaani, nga Hiti, nga Kirikahi, nga Hiwi, me nga Iepuhi; a tukua ana ratou e ahau ki to koutou ringa. <sup>12</sup> A tonoa atu ana e ahau te horonete ki mua i a koutou, a nana ratou i pei i to koutou aroaro, ara nga kingi tokorua o nga Amori; ehara i te mea na tau hoari, na tau kopere ranei. <sup>13</sup> A hoatu ana e ahau ki a koutou he whenua kihai nei koutou i mahi, he pa hoki kihai i hanga e koutou, a noho ana koutou i reira; ehara i te mea whakato na koutou nga mara waina, mara oriwa ranei, e kainga nei e koutou. <sup>14</sup> Na kona kia wehi i a Ihowa, mahi atu hoki ki a ia i runga i te tika, i runga i te pono: whakarerea atu hoki nga atua i mahi na o koutou matua ki a ratou i tawahi o te awa, i Ihipa hoki; a mahi atu ki a Ihowa. <sup>15</sup> A, ki te mea he kino ki to koutou whakaaro te mahi ki a Ihowa, ma koutou e whiriwhiri i tenei ra ko wai ta koutou e mahi ai; ki nga atua ranei i mahi ra o koutou matua ki a ratou i tawahi o te awa, ki nga atua ranei o nga Amori, e noho nei koutou u ki to ratou oneone: ko ahau ia me toku whare, ka mahi matou ki a Ihowa. <sup>16</sup> Na ka whakautua e te iwi, ka mea, Aue, kia whakarere koia matou i a Ihowa, kia mahi ki nga atua ke! <sup>17</sup> Ko Ihowa hoki, ko to tatou Atua, nana tatou me o tatou matua i whakaputa mai: te whenua o Ihipa, i te whare pononga, nana hoki aua tohu nunui i mahi ki to tatou aroaro, a nana tatou i tiaki i te huarahi katoa i haere ra tatou i roto hoki i nga iwi katoa, i haere mai ra tatou ra waenganui i a ratou: <sup>18</sup> Na Ihowa ano i pei i to tatou aroaro nga iwi katoa, ara nga Amori, i noho nei i tenei whenua: ina, ka mahi matou ki a Ihowa; ko ia hoki to tatou Atua. <sup>19</sup> Na ka mea a Hohua ki te iwi, E kore e ahei i a koutou te mahi ki a Ihowa: he Atua tapu



hoki ia; he Atua hae ia; e kore e tukua noatia e ia a koutou mahi tutu, o koutou hara. <sup>20</sup> Ki te whakarere koutou i a Ihowa, a ka mahi ki nga atua ke, na ka tahuri mai ia ka whakawhiu i a koutou, ka huna hoki i a koutou, i muri iho i tana mahi pai ki a koutou. <sup>21</sup> Na ka mea te iwi ki a Hohua, Kahore; engari ka mahi matou ki a Ihowa. <sup>22</sup> Na ka mea a Hohua ki te iwi, Hei kaiwhakaatu koutou ki a koutou ano mo ta koutou whiriwhiri a Ihowa, kia mahi ki a ia. A ka mea ratou, Ae, hei kaiwhakaatu matou. <sup>23</sup> Na reira, e ai ki tana, whakarerea atu nga atua ke i waenganui i a koutou na, ka whakatahuri i o koutou ngakau ki a Ihowa, ki te Atua o Iharaira. <sup>24</sup> Katahi ka mea te iwi ki a Hohua, Ka mahi matou ki a Ihowa, ki to tatou Atua, ko tona reo hoki ta matou e whakarongo ai. <sup>25</sup> A whakaritea iho e Hohua he kawenata ki te iwi i taua rangi ano, a hoatu ana e ia ki a ratou tetahi tikanga me tetahi ritenga i Hekeme. <sup>26</sup> A tuhituhia ana e Hohua enei kupu ki te pukapuka o te ture a te Atua; a ka tango ia i tetahi kohatu nui, whakaarahia ake ana i reira i raro i te oki, i te taha o te whare tapu o Ihowa. <sup>27</sup> A ka mea a Hohua ki te iwi katoa, Nana, ko tenei kohatu hei kaiwhakaatu ki a tatou; kua rongo hoki ia i nga kupu katoa a Ihowa i korerotia e ia ki a tatou: na hei kaiwhakaatu ia ki a koutou, kei whakakahore ki to koutou Atua. <sup>28</sup> Heoi tukua ana e Hohua te iwi kia haere, tena tangata, tena ki tona wahi ake. <sup>29</sup> A, muri iho i enei mea, na ka mate a Hohua tama a Nunu, te pononga a Ihowa, a kotahi rau kotahi tekau ona tau i ora ai. <sup>30</sup> A tanumia iho ia e ratou ki te rohe o tona kainga, ki Timenata Hera, ki te whenua pukepuke o Eparaima, ki te taha ki te raki o Maunga Kaaha. <sup>31</sup> A i mahi a Iharaira ki a Ihowa i nga ra katoa o Hohua, i nga ra katoa ano o nga kaumatua i hipa ake o ratou ra i o Hohua, i mohio hoki ki nga mahi katoa a Ihowa i mahi ai mo Iharaira. <sup>32</sup> A ko nga wheua o Hohepa, i maua mai e nga tama a Iharaira i Ihipa, i tanumia e ratou ki Hekeme, ki te wahi o te mara i hokona e Hakopa i nga tama a Hamora matua o Hekeme ki nga moni kotahi rau: na riro ana taua wahi i nga tama a Hohepa hei kaing a tupu. <sup>33</sup> Na ka mate a Ereatara tama a Arona; a tanumia ana ki te pukepuke o tana tama, o Pinehaha, i homai ki a ia i te whenua pukepuke o Eparaima.

## Judges

### Chapter 1

<sup>1</sup> A, i muri iho i te matenga o Hohua, na ka ui nga tamariki a Iharaira ki a Ihowa, ka mea, Ko wai e matua haere mo matou ki runga ki nga Kanaani ki te whawhai ki a ratou? <sup>2</sup> Na ka mea a Ihowa, Ko Hura e haere: nana, kua hoatu e ahau te whenua ki tona ringa. <sup>3</sup> Na ka mea a Hura ki a Himiona ki tona tuakana, Hoake taua ki toku wahi, kia whawhai ai taua ki nga Kanaani; a ka haere ai hoki ahau i a koe ki tou wahi. Na haere ana raua ko Himiona. <sup>4</sup> A, ko te haerenga atu o Hura, ka homai e Ihowa nga Kanaani me nga Perihi ki o ratou ringa, a patua iho o ratou ki Peheke kotahi tekau mano tangata. <sup>5</sup> I rokohanga ano a Aronipeheke ki Peheke, a whawhai ana ki a ia, a patua iho nga Kanaani me nga Perihi. <sup>6</sup> Na ka rere a Aronipeheke, a whaia ana e ratou, a ka mau, na tapahia ana nga koromatua o ona ringa, o ona waewae. <sup>7</sup> Na ka mea a Aronipeheke, E whitu tekau nga kingi, he mea tapahi nga koromatua o o ratou ringa, o o ratou waewae, i kohi kai i raro i taku tepu: ko taku i mea ai, kua whakahokia mai e te Atua ki ahau. Na ka kawea ia ki Hiruharama, a mate iho ki re ira. <sup>8</sup> I tauria hoki a Hiruharama e nga tamariki a Hura, a horo ana i a ratou, patua iho e ratou ki te mata o te hoari, tahuna ake hoki e ratou te pa ki te ahi.

<sup>9</sup> A muri iho ka haere ki raro nga tamariki a Hura ki te whawhai ki nga Kanaani i noho i te whenua pukepuke i te tonga, i te mania. <sup>10</sup> Na haere ana a Hura, whawhai ana ki nga Kanaani i noho ki Heperona: na, ko te ingoa o Heperona i mua ko Kiriata Arapa: patua iho e ratou a Hehai, a Ahimana, ratou ko Taramai. <sup>11</sup> Na ka haere atu ia i reira, ka whawhai kinga tangata o Repiri; a, ko te ingoa o Repiri i mua ko Kiriata Hepere: <sup>12</sup> Na ka mea a Karepe, Ko te tangata e patua ai a Kiriata Hepere, a e horo ai, ka hoatu e ahau taku tamahine, a Akaha hei wahine mana. <sup>13</sup> Na ka horo i a Otoniere tama a Kenaha teina o Karepe, a hoatu ana e ia tana tamahine, a Akaha hei wahine mana. <sup>14</sup> A, no taenga atu o taua wahine ki a ia, ka whakakiki i a ia kia tonoa he mara i tona papa; a ka marere iho ia ki raro i tona kaihe; na ka mea a Karepe ki a ia, He aha tau? <sup>15</sup> Na ka mea ia ki a ia, Homai he manaakitanga moku, kei te tonga hoki te whenua i homai e koe moku; homai ano hoki etahi puna wai moku. Na hoatu ana e Karepe ki a ia nga puna o runga me nga puna o raro.

<sup>16</sup> Na ka haere nga tamariki a te Keni, a te hungawai o Mohi, i te pa nikau, ratou ko nga tamariki a Hura, ki te koraha o Hura, ki te tonga o Arara, a haere ana, noho ana i roto i te iwi. <sup>17</sup> Na ka haere a Hura raua ko tona tuakana ko Himiona, a patua iho e ratou nga Kanaani i noho i Hepata, whakangaromia iho; na reira i huaina ai te ingoa o taua pa, ko Horema. <sup>18</sup> A i riro ano i a Hura a Kaha me tona rohe, a Ahakerono me tona rohe, a Ekerono me tona rohe. <sup>19</sup> A i a Hura a Ihowa, a peia atu ana e ia nga tangata o te whenua pukepuke; otiia kihai i taea e ia te pei nga tangata o te

20  
 mania; no te mea he hariata rino a ratou. I hoatu ano e ratou a Heperona ki a Karepe, i pera me ta Mohi i korero ai: a peia atu ana e ia i reira nga tama tokotoru a Anaka.

21  
 Ko nga Iepuhi ia i noho ki Hiruharama, kihai i peia atu e nga tamariki a Pineamine, na noho ana te Iepuhi i roto i nga tamariki a Pineamine ki Hiruharama a taea noatia tenei ra. 22 Me te whare

23  
 ano o Hohepa, i haere atu ki te whawhai ki Peteere, a i a ratou a Ihowa. A i tuteia a Peteere e te

24  
 whare o Hohepa. Na, ko te ingoa o taua pa i mua ko Rutu. Na ka kitea e nga kaiwhanga tetahi tangata e puta mai ana i te pa, a ka mea ki a ia, Tena, whakaaturia ki a matou te tomokanga atu ki

25  
 te pa, a ka puta ta matou koha ki a koe. Katahi ka whakaaturia e ia ki a ratou te tomokanga atu ki te pa, a patua iho e ratou te pa ki te mata o te hoari; ko taua tangata ia ratou ko tona hapu katoa

26  
 i tukua atu e ratou. Na haere ana taua tangata ki te whenua o nga Hiti, a hanga ana tetahi pa e

27  
 ia, huaina iho te ingoa ko Rutu: ko tona ingoa ano tena a taea noatia tenei ra. Otiia kihai i peia e Manahi nga tangata o Peteheana me ona pa ririki, o Taanaka me ona pa ririki, nga tangata ano hoki o Roro, o ona pa ririki, nga tangata o Ipireama, o ona pa ririki, nga tangata o Mekiro, o ona

28  
 pa ririki: heoi ka mea nga Kanaa ni kia noho ki taua whenua. A, no ka kaha haere a Iharaira, ka

29  
 meinga e ratou nga Kanaani hei kaihomai takoha, kihai hoki ratou i peia rawatia atu. Kihai ano hoki a Eparaima i pei atu i nga Kanaani i noho ki Ketere: heoi noho ana nga Kanaani ki Ketere i

30  
 waenganui i a ratou. Kihai a Hepurona i pei atu i nga tangata o Kitirono; i nga tangata ano hoki o Naharoro: heoi ka noho nga Kanaani i waenganui i a ratou, a meinga ana hei kaihomai takoha.

31  
 Kihai a Ahera i pei atu i nga tangata o Ako, i nga tangata ranei o Hairona, o Aharapa, o Akatipi,

32  
 o Herepa, o Apiki, o Rehopo; Na ka noho nga Aheri ki waenganui o nga Kanaani, o nga tangata

33  
 whenua; no te mea kihai ratou i pei atu i a ratou. Kihai a Napatari i pei atu i nga tangata o Petehemehe, i nga tangata hoki o Peteanata; heoi noho ana ia i waenganui o nga Kanaani, o nga tangata whenua: otiia i meinga nga tangata o Petehemehe, o Peteanata, hei kaihomai takoha ki a

34  
 ratou. Na i akina atu e nga Amori nga tamariki a Rana ki te whenua pukepuke: kihai hoki ratou

35  
 i tukua kia heke ki te mania. Heoi ka mea nga Amori kia noho ki Maunga Herehe, ki Aitarono, ki Haarapimi: otiia i kaha ano te ringa o te whare o Hohepa, a ka meinga ratou hei kaihomai takoha.

36  
 Na ko te rohe ki nga Amori kei te pinakitanga ki Akarapimi; kei te kamaka a ahua whakarunga.

## Chapter 2

<sup>1</sup> Na ka haere ake te anahera a Ihowa i Kirikara ki Pokimi, a ka mea, Naku koutou i haere mai ai i Ihipa, naku hoki koutou i kawe mai ki te whenua i oati ai ahau ki o koutou matua; i mea ano ahau, E kore e taka taku kawenata ki a koutou. <sup>2</sup> Kauga ano koutou e whakarite kawenata ki nga tangata o tenei whenua; me pakaru e koutou a ratou aata. Heoi kihai nei koutou i rongu ki toku reo. He aha tenei mahi a koutou? <sup>3</sup> Koia hoki ahau ka mea nei, E kore ahau e pei atu i a ratou i to koutou aroaro; a ka waiho ratou ano he tataramoa ki o koutou kaokao; ko o ratou atua hoki hei rore mo koutou. <sup>4</sup> A, no te korerotanga a te anahera a Ihowa i enei kupu ki nga tamariki katoa a Iharaira, ka ara te reo o te iwi, ka tangi. <sup>5</sup> Na huaina iho e ratou te ingoa o taua wahi ko Pokimi: i patu whakahere ano hoki ratou ma Ihowa ki reira.

<sup>6</sup> Na, i ta Hohua tukunga i te iwi kia haere, ka haere nga tamariki a Iharaira ki tona wahi, ki tona wahi, ki te tango i te whenua. <sup>7</sup> A i mahi te iwi ki a Ihowa i nga ra katoa o Hohua, i nga ra katoa ano o nga kaumatua i roa ake nei o ratou ra i o Hohua, i kite nei i nga mahi nunui katoa a Ihowa i meinga e ia mo Iharaira. <sup>8</sup> Na ka mate a Hohua tama a Nunu, te pononga a Ihowa, kotahi rau kotahi tekau ona tau. <sup>9</sup> A tanumia iho ia e ratou ki te rohe o tona wahi, ki Timinataherehe, ki te whenua pukepuke o Eparaima, ki te taha ki te raki o Maunga Kaaha. <sup>10</sup> Na ka kohia ano hoki taua whakatupuranga katoa ki o ratou matua: a ka ara ake tetahi whakatupuranga ke i muri i a ratou, kihai nei i mohio ki a Ihowa, ki nga mahi ano hoki i mahia e ia mo Iharaira. <sup>11</sup> Na ka mahi nga tamariki a Iharaira i te kino i te tirohanga a Ihowa, ka mahi hoki ki nga Paara. <sup>12</sup> A whakarerea ake e ratou a Ihowa, te Atua o o ratou matua i whakaputa mai nei i a ratou i te whenua o Ihipa, a haere ana ki te whai i nga atua ke, i nga atua o nga iwi i tetahi taha, i tetahi taha o ratou, a koropiko ana ki a ratou, na ka mea ra tou i a Ihowa kia riri. <sup>13</sup> Heoi whakarere ana ratou i a Ihowa, a mahi ana ki a Paara, ki te Ahataroto hoki. <sup>14</sup> Na ka mura te riri o Ihowa ki a Iharaira, a tukua ana ratou e ia ki nga ringa o nga kaipahua hei pahua i a ratou, a hokona ana ratou e ia ki te ringa o o ratou hoariri i tetahi taha, i tetahi taha; kihai hoki i taea e ratou i muri iho te tu ake i te aroaro o o ratou hoariri. <sup>15</sup> I o ratou haerenga katoa, i runga i a ratou te ringa o Ihowa mo te kino; i rite hoki ki ta Ihowa i korero ai, ki ta Ihowa hoki i oati ai ki a ratou; na te taea to ratou raru. <sup>16</sup> I whakaara ake ano a Ihowa i etahi kaiwhakarite hei whakaora i a ratou i te ringa o o ratou kaipahua. <sup>17</sup> Heoi kihai ano ratou i whakarongo ki o ratou kaiwhakarite; na kei te puremu, kei te whai ki nga atua ke, kei te koropiko ki a ratou: hohoro tonu to ratou peka ke i te ara i haere ai o ratou matua, ara i te whakarongo ki nga whakahau a Ihowa; kih ai ratou i pera. <sup>18</sup> A i nga wa i whakaara ake ai a Ihowa

i nga kaiwhakarite mo ratou, na i te kaiwhakarite a Ihowa, a whakaorangia ake ratou e ia i te ringa o o ratou hoariri i nga ra katoa o te kaiwhakarite: i puta ke hoki te whakaaro o Ihowa i a ratou e  
<sup>19</sup>  
 aue ana i o ratou kaitukino, i o ratou kaiwhakato. A, no te matenga o te kaiwhakarite, ka hoki ratou ki muri, nui atu to ratou takanga i to o ratou matua; i haere hoki ki te whai i nga atua ke, mahi  
<sup>20</sup>  
 ai ki a ratou, koropiko ai ki a ratou; kihai i mutu a ratou mahi, me ta ratou tikanga pakeke. Na ka mura te riri o Ihowa ki a Iharaira, a ka mea ia, Na, kua takahia e tenei iwi taku kawenata i  
<sup>21</sup>  
 whakahaua e ahau ki o ratou matua; kihai ano i rongo ki toku reo; Na, e kore ano ahau e pei atu  
<sup>22</sup>  
 i tetahi tangata i mua i a ratou o nga iwi i mahue iho i a Hohua i tona matenga. Kia ai ratou hei whakamatautau maku i a Iharaira, e mau ranei ki te ara o Ihowa haere ai; e rite ranei te mau ki ta  
<sup>23</sup>  
 o ratou matua, kahore ranei. Na ka waiho era iwi e Ihowa, kihai hoki i hohoro te peia atu; kihai ano hoki i tukua ki te ringa o Hohua.

### Chapter 3

<sup>1</sup> Na ko nga iwi enei i waiho e Ihowa ko ratou hei whakamatautau i a Iharaira, ara ko nga mea  
<sup>2</sup>  
 o Iharaira kihai i mohio ki nga pakanga katoa o Kanaana; Mo nga whakatupuranga ano ia o nga tamariki a Iharaira kia mohio, kia ako ki te whawhai, ara mo te hunga kihai i mohio ki tera i mua;  
<sup>3</sup>  
 Na, ko nga rangatira tokorima o nga Pirihitini, ko nga Kanaani katoa, ko nga Haironi ratou ko nga Hiwi i noho i Maunga Repanona, i Maunga Paaraheremona a tae noa ki te haerenga atu ki Hamata.  
<sup>4</sup>  
 Ko ratou hei whakamatautau mo Iharaira, kia mohiotia ai e rongo ranei ratou ki nga whakahau a  
<sup>5</sup>  
 Ihowa i whakahaua e ia ki o ratou matua, he mea whakapuaki na Mohi. Na ka noho nga tamariki a Iharaira ki waenganui o nga Kanaani, o nga Hiti, o nga Amori, o nga Perihi, o nga Hiwi, o nga  
<sup>6</sup>  
 Iepuhi: A ka tango i a ratou tamahine hei wahine ma ratou, ka hoatu hoki i a ratou tamahine ki a  
<sup>7</sup>  
 ratou tama, ka mahi ano hoki ki o ratou atua. Na kua mahi nga tamariki a Iharaira i te kino i te tirohanga o Ihowa, wareware ake ki a Ihowa, ki to ratou Atua, mahi ana hoki ki nga Paara, ki te Ahataroto.  
<sup>8</sup>  
 Na ka mura te riri o Ihowa ki a Iharaira, a hokona atu ana ratou e ia ki te ringa o Kuhanarihataimi kingi o Mehopotamia. Na e waru nga tau i mahi ai nga tama a Iharaira ki a  
<sup>9</sup>  
 Kuhanarihataimi. A, no te tangihanga a nga tamariki a Iharaira ki a Ihowa, ka whakaarahia ake e Ihowa he kaiwhakaora mo nga tamariki a Iharaira, nana ratou i whakaora; ara a Otoniere tama a  
<sup>10</sup>  
 Kenaha teina o Karepe. Na i tau iho ki runga i a ia te wairua o Ihowa, a i whakawa ia mo Iharaira;

i haere hoki ki te whawhai; a homai ana e Ihowa ki tona ringa a Kuhanarihataimi kingi o Mehopotamia: na kua kaha tona ringa ki te whawhai ki a Kuhanarihataimi. <sup>11</sup> A e wha tekau nga tau i okioki ai te whenua i te whawhai. Na ka mate a Otoniere, tama a Kenaha.

<sup>12</sup> Na ka mahi kino ano nga tama a Iharaira i te tirohanga a Ihowa, a ka whakakahangia e Ihowa a Ekerona kingi o Moapa ki te whawhai ki a Iharaira, mo ratou i mahi kino i te tirohanga a Ihowa.

<sup>13</sup> Na ka huihuia e ia ki a ia nga tamariki a Amona ratou ko Amareke, a haere ana, patua ana e ia a Iharaira, a tangohia ana e ia te pa nikau. <sup>14</sup> A kotahi tekau ma waru nga tau i mahi ai nga tamariki

a Iharaira ki a Ekerona, kingi o Moapa. <sup>15</sup> No te tangihanga ia a nga tama a Iharaira ki a Ihowa, ka whakaarahia ake e Ihowa he kaiwhakaora mo ratou, a Ehuru tama a Kera, he Pineamini, he tangata ringa mau; na ka hoatu e nga tama a Iharaira he takoha kia kawea e ia ki a Ekerona kingi

o Moapa. <sup>16</sup> Otiia kua oti i a Ehuru tetahi hoari te hanga mana; e rua ona mata, kotahi whatianga te roa; na ka whitikiria e ia i roto i ona kakahu ki tona huha matau. <sup>17</sup> Na ko tana tukunga i te takoha

ki a Ekerona kingi o Moapa; na he tangata tetere rawa a Ekerona. <sup>18</sup> A ka mutu ta tera tuku i te takoha ka tonoa atu e ia te hunga i mauria mai ai te takoha. <sup>19</sup> Ko ia tonu ia i hoki whakamuri atu i nga whakapakoko i Kirikara, ka mea, He kupu huna taku ki a koe, e te kingi. Na ka mea tera,

Whakarongoa! Na mawehe atu ana i a ia te hunga katoa e tu ana i tona taha. <sup>20</sup> Na ka haere atu a Ehuru ki a ia; a e noho ana ia ko ia anake i tona ruma raumati. Na ka mea a Ehuru, He kupu na te

Atua taku ki a koe. Na ka whakatika ia i tona nohoanga. <sup>21</sup> Na ka torona e Ehuru tona ringa mau, ka mau ki te hoari i tona huha matau, werohia ana ki tona kopu. <sup>22</sup> A ngoto tahi atu ana te kakau me te mata, a tutakina iho te mata e te ngako, kihai i unuhia mai te hoari i roto i tona kopu, a puta

atu ana ki muri. <sup>23</sup> Na ka haere atu a Ehuru na te whakamahau, a tutakina atu ana e ia nga tatau o te ruma ki a ia, kiia iho hoki. <sup>24</sup> A, i tona haerenga atu, ka haere mai nga pononga a tera, na, i to ratou kitenga kua kiia nga tatau o te ruma, ka mea ratou, He pono kei te uhi ia i ona waewae i te

ruma raumati. <sup>25</sup> Tatari noa ratou a ka whakama: na, kihai ia i whakapuare i nga tatau o te ruma; katahi ratou ka mau ki te ki, a whakapuaretia ana. Na, ko to ratou ariki kua hinga ki te whenua, kua

mate. <sup>26</sup> Ko Ehuru ia i mawhiti i a ratou e tatari roa ana, a kua tae ki tua i nga whakapakoko, kua mawhiti ki Heirata. <sup>27</sup> A, no tona taenga, ka whakatangihia e ia te tetere ki te whenua maunga o Eparaima, a heke ana nga tamariki a Iharaira i runga i te maunga hei hoa mona, ko ia hoki i mua i

a ratou. <sup>28</sup> Na ka mea ia ki a ratou, Haere mai i muri i ahau, kua homai hoki e Ihowa nga Moapi, o koutou hoariri ki o koutou ringa. Na heke ana ratou i muri i a ia, a ka riro mai i a ratou nga whitinga

29  
 atu o Horano i nga Moapi; kihai hoki i tukua tetahi tan gata kia whiti atu. Na patua iho e ratou  
 nga Moapi i taua wa, me te mea tekau mano nga tangata, te hunga pakari anake, nga marohirohi  
 30  
 katoa; kihai hoki tetahi i mawhiti. Na ka hinga a Moapa i taua ra i te ringa o Iharaira. A e waru  
 tekau nga tau i okioki ai te whenua i te pakanga.  
 31  
 A i muri i a ia ko Hamakara tama a Anata, a patua iho e ia nga Pirihitini, e ono rau tangata,  
 ki te wero kau: na ka ora ano a Iharaira i a ia.

### Chapter 4

1  
 A, ka mate a Ehuru, ka mahi kino ano nga tamariki a Iharaira i te tirohanga a Ihowa. Na ka  
 hokona atu ratou e Ihowa ki te ringa o Iapini kingi o Kanaana, ko te kingi hoki ia o Hatoro, ko  
 2  
 Hihera hoki te rangatira o tana ope; i Harohete ano hoki o nga tauwi tona nohoanga. Na ka tangi  
 nga tamariki a Iharaira ki a Ihowa: e iwa rau nei hoki ana hariata rino, a e rua tekau nga tau i  
 3  
 tukinotia rawatia ai e ia nga tamariki a Iharaira.  
 4  
 A ko Tepora poropiti, wahine a Rapiroto, ko ia te kaiwhakarite o Iharaira i taua wa. A ko  
 tona nohoanga kei raro i te nikau a Tepora i te takiwa o Rama, o Peteere, i te whenua pukepuke o  
 5  
 Eparaima: na ka haere nga tamariki a Iharaira ki runga, ki a ia kia whakawakia. Na ka tono tangata  
 ia hei karanga i a Paraka tama a Apionoama i Kerehe Napatari, a ka mea ki a ia, Kihai ianei a Ihowa,  
 te Atua o Iharaira i whakahau, Haere whakatata atu ki Maunga Taporo, mauria hoki hei hoa mou  
 6  
 kia tekau mano tangata o nga tama riki a Napatari, o nga tamariki hoki a Hepurona? A maku e  
 kukume atu ki a koe ki te awa, ki Kihona a Hihera rangatira o te ope a Iapini, me ana hariata, me  
 7  
 ona mano; ka hoatu ano hoki e ahau ki tou ringa. Na ka mea a Paraka ki a ia, Ki te haere tahi koe  
 8  
 i ahau, ka haere ahau; ki te kahore ia koe e haere tahi i ahau, e kore ahau e haere. A ka mea ia,  
 Ae ra, me haere tahi taua: otia e kore koe e whai kororia i te ara ka haere nei koe; ta te mea ka  
 hokona atu e Ihowa a Hihera ki roto ki te ringa o te wahine. Na ka whakatika a Tepora, a haere tahi  
 ana me Paraka ki Kerehe.  
 9  
 10  
 Katahi ka karangarangatia a Hepurona raua ko Napatari e Paraka ki Kerehe; a kotahi tekau  
 11  
 mano nga tangata i haere i raro i ona waewae: i haere tahi ano hoki a Tepora i a ia. Na kua wehe  
 atu a Hepere te Keni i roto i nga Keni, i nga tamariki ano a Hopapa hungawai o Mohi; a tae noa  
 12  
 atu tana whakaturanga teneti ki te oki i Taanaimi, ki tera i Kerehe. A ka korerotia e ratou ki a  
 13  
 Hihera, kua riro a Paraka tama a Apioama ki runga ki Maunga Taporo; Ka karangarangatia e

Hihera ana hariata katoa, e iwa rau, he hariata rino, me tona nuinga katoa, i Harohete o nga tauwi

<sup>14</sup> ki te awa, ki Kihona. Ka mea hoki a Tepora ki a Paraka, Whakatika, ko te ra hoki tenei e tukua ai e Ihowa a Hihera ki tou ringa; kahore ianei a Ihowa i haere atu i mua i a koe? Na ko te haerenga

<sup>15</sup> iho o Paraka i runga i Maunga Taporo, kotahi tekau mano hoki nga tangata ki te whai i a ia. A meinga ana e Ihowa a Hihera kia whati, me ana hariata katoa, me tana ope katoa, i te mata o te hoari i te aroaro o Paraka. Na ka marere iho a Hihera i runga i tana hariata, a rere a waewae ana.

<sup>16</sup> Na ka whaia nga hariata me te ope e Paraka a tae noa ki Harohete o nga tauwi: a hinga ana te ope katoa a Hihera i te mata o te hoari; kihai hoki tetahi i toe.

<sup>17</sup> Ko Hihera ia rere a waewae ana ki te teneti o Taere wahine a Hepere Keni: he rongu mau hoki ta Iapini kingi o Hatoro ratou ko te whare o Hepere, o te Keni. <sup>18</sup> Na ka puta a Taere ki te whakataui i a Hihera, ka mea ki a ia, Peka mai, e toku ariki, peka mai ki ahau; kua e wehi. Katahi

<sup>19</sup> ia ka peka atu ki a ia ki te teneti, a ka hipokina e ia ki te koroka. Ka mea atu ia ki te wahine, Homai koa he wai inu moku, kia iti nei; e matewai ana hoki ahau. Katahi ka wetekina e ia te koki

<sup>20</sup> waiu, a whakainumia ana ia, hipokina atu ana hoki. Na ka mea tera ki a ia, E tu ki te kuwaha o te teneti, a ki te haere mai he tangata ki te ui ki a koe, ki te mea, He tangata ranei kei konei? ka mea

<sup>21</sup> atu koe, Kahore. Katahi ka tikina e Taere wahine a Hepere tetahi titi o te teneti, a ka mau tona ringa ki te hama, na ka haere toropuku atu ki a ia, heoi patua iho e ia te titi ki tona rahirahinga, a ngoto tonu atu ki te whenua: i parangia hoki ia e te moe, i ng enge. Na, ko tona hemonga, kua mate.

<sup>22</sup> Na ko te whaingia a Paraka i a Hihera; a ka puta atu a Taere ki te whakataui i a ia, ka mea ki a ia, Haere mai, a maku e whakaatu ki a koe tau tangata e rapu na. A, i tona haerenga atu ki a ia, na ko

<sup>23</sup> Hihera e takoto ana, kua mate, me te titi i ton a rahirahinga. Heoi hinga ana a Iapini kingi o

<sup>24</sup> Kanaana i te Atua i taua ra i te aroaro o nga tamariki a Iharaira. Na ka kaha haere tonu te ringa o nga tamariki a Iharaira ki a Iapini kingi o Kanaana, a whakangaromia noatia e ratou a Iapini kingi o Kanaana.

## Chapter 5

<sup>1</sup> Na ka waiata a Tepora raua ko Paraka tama a Apinoama i taua ra, ka mea, <sup>2</sup> Whakapaingia

a Ihowa mo te takitakinga a nga kaitakitaki o Iharaira, mo te hihikotanga mai o te iwi. <sup>3</sup> Whakarongo, e nga kingi, kia whai taringa, e nga rangatira; maku, ae ra, maku e waiata ki a Ihowa; ka himene

<sup>4</sup> ahau ki a Ihowa, ki te Atua o Iharaira. E Ihowa, i tou putanga atu i Heira, i tou haerenga atu i te



parae i Eroma, i wiri te whenua, i maturuturu iho ano nga rangi; i maturuturu iho ano hoki nga wai  
<sup>5</sup>  
 o nga kapua. I rere a wai nga maunga i te aroaro o Ihowa, ko taua Hinai ano hoki, i te aroaro o  
 Ihowa, o te Atua o Iharaira.

<sup>6</sup>  
 I nga ra o Hamakara tama a Anata, i nga ra o Taere, i takoto kau nga huarahi, i haere hoki  
 nga tira haere i nga ara i tahaki. <sup>7</sup>  
 I mutu rawa nga rangatira o Iharaira, i kahore rawa, a whakatika

noa ake ahau, a Tepora, whakatika ake ahau, he whaea no Iharaira. <sup>8</sup>  
 I whiriwhiria e ratou he atua  
 hou; katahi ka puta he whawhai ki nga kuwaha: i kitea ranei he pukupuku, he tao ranei, i roto i nga

mano e wha tekau o Iharaira? <sup>9</sup>  
 Kei nga kaiwhakatakoto tikanga o Iharaira toku ngakau; i hihiko  
 ratou ki te tuku i a ratou i roto i te iwi. Whakapaingia a Ihowa. <sup>10</sup>  
 Korerotia, e nga kaieke kaihe

ma, e te hunga e noho ana i runga i nga whariki utu nui, e te hunga e haere ana i te ara. <sup>11</sup>  
 Mamao  
 noa mai i te reo o nga kaikopere, i nga wahi utuhanga wai, ka korerotia e ratou i reira nga mahi tika  
 a Ihowa, nga mahi tika o tana whakahaere tikanga i roto i a Iharaira: katahi te iwi o Ihowa ka heke  
 ki raro ki nga kuwaha.

<sup>12</sup>  
 Maranga, maranga, e Tepora: maranga, maranga, whakahuatia he waiata: whakatika, e  
 Paraka, arahina tau whakaraunga ki te whakarau, e te tama a Apinoama. <sup>13</sup>  
 Katahi ka haere mai ki  
 raro te morehu o nga rangatira, me te iwi; i haere mai hoki a Ihowa ki raro moku ki te whawhai ki

te mea nui. <sup>14</sup>  
 I puta mai i a Eparaima te hunga ko to ratou pakiaka nei kei a Amareke; kei muri i  
 a koe, e Pineamine, i roto i ou iwi; i haere mai nga kaiwhakatakoto tikanga i roto i a Makiri; no

roto i a Hepurona nga kaihapai i te tokotoko a te kaiwhakahaere. <sup>15</sup>  
 I a Tepora hoki nga rangatira  
 o Ihakara; he pera a Ihakara, he pera hoki a Paraka: huaki atu ana ratou i raro i ona waewae ki te

raorao. I nga manga wai o Reupena, tera nga whakaaroaronga nunui o te ngakau. <sup>16</sup>  
 He aha koe i  
 noho ai ki nga taiepa hipi, whakarongo ai ki nga whakatangi mo nga kahui? I nga manga wai o

Reupena, tera nga rapurapunga nunui o te ngakau. <sup>17</sup>  
 I noho a Kireara ki tera taha o Horano: na  
 ko Rana, he aha ia i noho ai i runga i nga kaipuke? Ko Ahera, whakakeke tonu mai i te takutai

moana, a noho ana ia i te taha o ona manga wai. <sup>18</sup>  
 Ko Hepurona he iwi i whakahawe o ratou

tinana ki te mate; raua ko Napatari i nga wahi teitei o te parae. <sup>19</sup>  
 I haere mai nga kingi, i whawhai,  
 na ka whawhai nga kingi o Kanaana ki Taanaka, ki te taha o nga wai o Mekiro. Kihai tetahi moni

i riro hei taonga mo ratou. <sup>20</sup>  
 I whawhai iho ratou i te rangi; i whawhai nga whetu i o ratou huarahi  
 ki a Hihera. <sup>21</sup>  
 I kahakina atu ratou e te awa, e Kihona, e taua awa tawhito, e te awa, e Kihona. E

toku wairua, haere tonu i runga i te kaha. <sup>22</sup>  
 Takatakahi ana i reira nga paua o nga hoiho, na nga

pekenga, na nga tupeketanga a o ratou marohirohi. <sup>23</sup> Kanga a Meroho, e ai ta te anahera a Ihowa; kanga kinotia nga tangata o reira; mo ratou kihai i haere mai hei awhina mo Ihowa, hei awhina mo Ihowa ki te whawhai ki te hunga nunui.

<sup>24</sup> Kia manaakitia i roto i nga wahine a Taere wahine a Hepere Keni; kia manaakitia i roto i nga wahine o te teneti. <sup>25</sup> I tonoa e tuahangata he wai mona, he waiu tana i hoatu ai, kawea ana e

ia he pata i roto i te peihana rangatira. <sup>26</sup> Totoro atu ana tona ringa ki te titi, tona matau ki te hama a nga kaimahi; hama iho e ia a Hihera, akina iho tona pane; titia iho hoki e ia tona rahirahinga a

puta rawa. <sup>27</sup> Kupapa ana ia ki ona waewae, hinga ana, takoto ana: i kupapa ia, i hinga, ki ona

waewae: ko te wahi i kupapa ai ia, hinga ana ia i reira, mate rawa. <sup>28</sup> I titiro mai te whaea o Hihera i te matapihi, i karanga hoki i te wini whakakahokaho, Na te aha i roa ai te haere mai o tana hariata?

Na te aha i puhoi ai nga wira o ana hariata? <sup>29</sup> Ka utua e nga mea mohio o ana wahine rangatira;

Ae, ko ia ano hei whakahoki ake i te kupu ki a ia ano, <sup>30</sup> Kahore ranei ratou i tupono atu, i wehewehe i nga taonga? He kotiro, tokorua nga kotiro ki tera, ki tera; he taonga kotingotingo to Hihera, he taonga kotingotingo, he mea whatu ki te ngira, he mea kotingotingo, he mea whatu ki te ngira i

tetahi taha, i tetahi taha, mo nga kaki o te hunga i te taonga parakete? <sup>31</sup> Kia pena te whakangaromanga o ou hoariri katoa, e Ihowa; kia rite ia te hunga e aroha ana ki a ia ki te ra i tona putanga kaha mai. Na e wha tekau nga tau i okioki ai te whenua.

## Chapter 6

<sup>1</sup> Na ka mahi kino nga tamariki a Iharaira i te tirohanga a Ihowa, a tukua ana ratou e Ihowa ki te ringa o Miriana e whitu nga tau. <sup>2</sup> A nui atu te kaha o te ringa o Miriana i to Iharaira: a na Miriana i hanga ai e nga tamariki a Iharaira nga rua i nga maunga mo ratou, me nga ana, me nga pa taiepa.

<sup>3</sup> Na ka oti te mahi whakato a Iharaira, ka haere ake nga Miriani ratou ko nga Amareki, me nga tangata o te rawhiti; ka haere ake ki te whakaeke i a ratou. <sup>4</sup> Whakapaea iho e ratou, a moti ake i a ratou nga hua o te whenua, a tae noa koe ki Kaha, kihai hoki i mahue tetahi oranga mo Iharaira,

kahore he hipi, he kau, he kaihe ranei. <sup>5</sup> I whakaeke mai hoki ratou me a ratou kararehe, i haere mai me o ratou teneti; koia ano kei nga mawhitiwhiti te maha; e kore hoki e taea te tatau ratou me

a ratou kamera: na haere mai ana ratou ki te whenua whakangaro ai. <sup>6</sup> Na kua rawakore noa iho a Iharaira i a Miriana; a ka tangi nga tamariki a Iharaira ki a Ihowa.

7 A, no te tangihanga o nga tamariki a Ihairaira ki a Ihowa i te mahi a Miriana, 8 Ka tonono tangata a Ihowa ki nga tamariki a Ihairaira, he poropiti, hei mea ki a ratou, Ko te kupu tenei a Ihowa, a te Atua o Ihairaira, Naku koutou i kawe mai ki runga nei i Ihipa; naku hoki koutou i whakaputa mai

9 i te whare pononga; Naku koutou i whakaora i te ringa o nga Ihipiana, i te ringa hoki o o koutou kaitukino katoa; a peia atu ana ratou e ahau i to koutou aroaro, hoatu ana hoki e ahau to ratou

10 whenua ki a koutou. I mea ano ahau ki a koutou, Ko Ihowa ahau, ko to koutou Atua; kua e wehinga nga atua o nga Amori no ratou nei te whenua e noho na koutou: heoi kahore koutou i rongu ki toku reo.

11 Na ka haere mai te anahera a Ihowa, a noho ana i raro i tetahi oki i Opora, he rakau na Ioaha Apieteri: i te patu witi hoki tana tama, a Kiriona ki te poka waina, he mea kia toe ai i nga Miriani.

12 Na ka puta te anahera a Ihowa ki a ia, ka mea ki a ia, Kei a koe a Ihowa, e te tangata marohirohi.

13 Na ka mea a Kiriona ki a ia, Aue, e toku Ariki, me i a matou a Ihowa, na te aha i pono mai ai ki a matou enei mea katoa? kei hea hoki ana merekara i korero mai ai o matou matua ki a matou, i mea ai, Kahore ianei a Ihowa i kawe mai i a tatou i Ih ipa? na kua whakarere nei a Ihowa i a matou,

14 kua tukua ano matou ki te ringa o Miriana. Na ka tahuri atu a Ihowa ki a ia, ka mea, Haere i runga i tenei kaha ou, whakaorangia hoki a Ihairaira i te ringa o Miriana: kahore ianei ahau i tonono

15 i a koe? Na ka mea tera ki a ia, Aue, e toku Ariki, ma te aha ahau e whakaora ai i a Ihairaira? titiro, noku te hapu rawakore i roto i a Manahi, ko te iti rawa hoki ahau i roto i te whare o toku

16 papa. Na ka mea a Ihowa ki a ia, Ko ahau ra hei hoa mou; a ka patua e koe nga Miriani, me te

17 mea he tangata kotahi. Ano ra ko ia ki a ia, Na ki te mea kua manakohia ahau e koe, tena ra,

18 whakaaturia mai he tohu ki ahau ko koe tenei e korero mai nei ki ahau. Kua ra e haere atu i konei, kia tae mai ra ano ahau ki a koe ki te kawe mai i taku whakahere, kia whakatakotoria ra ano

19 e ahau ki tou aroaro. Na ko tana meatanga, Ka noho ahau, kia hoki mai ra ano koe. Katahi ka haere a Kiriona ki roto, a taka ana e ia tetahi kua koati, me tetahi epa paraoa hei keke rewenakore: ko te kikokiko i whaowhina e ia ki te kete, ko te hupa i ringihia ki te pata, na kawea ana ki waho,

20 ki a ia ki raro i te oki; a tapae a atu ana ki a ia. Na ka mea te anahera a te Atua ki a ia, Tangohia te kikokiko me nga keke rewenakore, ka whakatakoto ai ki runga ki tenei kamaka, ka riringi ai hoki

21 i te hupa. Na pera ana ia. Katahi ka whatorona atu e te anahera a Ihowa te pito o te tokotoko i tona ringa, a pa ana ki te kikokiko, ki nga keke rewenakore; na ko te putanga ake o te ahi i roto i te kamaka, pau ake te kikokiko me nga keke rewenakore. Na kua riro atu te anahera a Ihowa i tana

22 tirohanga. A, no te kitenga o Kiriona ko te anahera ia a Ihowa, ka mea a Kiriona, Aue, e te Ariki,

23 e Ihowa! moku hoki i kite i te anahera a Ihowa, he kanohi, he kanohi. Na ka mea a Ihowa ki a

24  
ia, Kia tau te rangimarie ki a koe; kaua e wehi: e kore koe e mate. Na ka hanga e Kiriona tetahi aata ma Ihowa ki reira, a huaina iho e ia ko Ihowaharomo: kei Opora o nga Apieteri na ano taua mea a taea noatia tenei ra.

25  
A i taua po ano ka mea a Ihowa ki a ia, Tikina te puru a tou papa, ara te rua o nga puru, e whitu nei ona tau, ka wawahi ai i te aata a Paara, i tera a tou papa: me tua hoki te motu nehenehe

26  
i tona taha. Me hanga hoki ki tona tikanga ano he aata ma Ihowa ma tou Atua ki runga ki tenei kamaka, ka mau ai ki te tuarua o nga puru, ka whakaeke hei tahunga tinana ki runga ki nga rakau

27  
o te nehenehe e tuaina e koe. Na ka tango a Kiriona i etahi tangata kotahi tekau no ana pononga, a rite tonu tana i mea ai ki ta Ihowa i korero ai ki a ia: na i wehi ia i te whare o tona papa, i nga

28  
tangata ano hoki o te pa, i kore ai e meatia e ia i te awatea; koia i meatia ai e ia i te po. Na, i te marangatanga ake o nga tangata o te pa i te ata, rere! kua wahia iho te aata a Paara, kua oti te motu nehenehe i tona taha te tua, kua oti hoki te tuarua o nga puru te whakaeke ki te aata i hanga ra.

29  
Na ka mea tetahi ki tetahi, Na wai tenei mahi? A ka rapu ratou, ka ui, na ka korerotia, I meatia

30  
tenei e Kiriona tama a Ioaha. Na ka mea nga tangata o te pa ki a Ioaha, Whakaputaina mai tau tama ki waho, kia whakamatea; mona i wahi i te aata a Paara, i tua hoki i te nehenehe i tona taha.

31  
Na ka mea a Ioaha ki te hunga katoa e tu mai ana ki a ia, Ko koutou ranei hei tohe i ta Paara? Ko koutou ranei hei whakaora i a ia? Ki te tohe tetahi mona, me whakamate ia i te ata nei ano. Ki

32  
te mea he atua ia, mana ano ia e tohe mo tana aata kua wahia nei. Na huaina iho ia e ia taua ra, Ko Ierupaara; i mea hoki, Ma Paara ano e tohe ki a ia mo tana aata kua wahia nei.

33  
Na ka huihui tahi nga Miriani katoa ratou ko nga Amareki, ko nga tangata o te rawhiti, a ka whiti, ka noho hoki ki te raorao o Ietereere.

34  
Na kua tau te wairua o Ihowa ki runga ki a Kiriona, a whakatangihia ana e ia te tetere; a huihuia ana a Apietere ki te aru i a ia. I tono karere ano ia

35  
puta noa i a Manahi, a ka huihuia ano ratou ki a ia: i tono karere ano ia ki a Ahera, ki a Hepurona, ki a Napatari; a ka haere ake ratou ki te whakatau i a ratou.

36  
Na ka mea a Kiriona ki te Atua, Ki te mea noku te ringa e whakaorangia ai e koe a Iharaira, pera me tau i korero mai ra,

37  
Na ka waiho e ahau te huruhuru hipi ki runga ki te patunga witi; a ki te mea kei te huruhuru anake te tomairangi, a he maroke a runga katoa o te whenua, katahi ahau ka mohio noku te ringa e whakaorangia ai e koe a Iharaira, ka rite ano ki tau i korero ra.

38  
A pera tonu: i maranga wawe hoki ia i te ata, a ka romia e ia te huruhuru, a tauia ana te tomairangi i roto i te huruhuru, ki tonu te peihana i te wai.

39  
I mea ano a Kiriona ki te Atua, Kei mura tou riri ki ahau, a heoi ano he korero maku ko tenei: tena, kia kotahi ake whakamatau maku i te huruhuru, a ka kati. Kia maroke ko te

40

huruhuru anake, a kia whai tomairangi a runga i te whenua katoa. A i peratia e te Atua i taua po: ko te huruhuru anake i maroke, a he tomairangi i te whenua katoa.

## Chapter 7

<sup>1</sup> Na ka maranga wawe a Ierupaara, ara a Kiriona, ratou ko tona nuinga katoa, a noho ana i te puna o Haroro; a i te taha ki te raki o ratou te puni o Miriana, i te puke o More, i te raorao. <sup>2</sup> Na ka mea a Ihowa ki a Kiriona, He nui rawa te iwi i a koe nei hei hoatutanga maku i nga Miriani ki o ratou ringa, kei whakapehapeha a Iharaira ki ahau, kei mea, Na toku ringa ake ahau i whakaora.

<sup>3</sup> Na, tena, karanga ki nga taringa o te iwi, mea atu, Ki te wehi, ki te pawera tetahi, hoki atu, hohoro te haere atu i Maunga Kireara. Na e rua tekau ma rua mano o te iwi i hoki; a mahue iho, kotahi tekau mano. <sup>4</sup> I mea ano a Ihowa ki a Kiriona, He nui rawa ano te iwi na; kawea ratou ki raro, ki te wai, a ko ahau hei kaiwhakamatautau mau i a ratou ki reira: a ko taku e mea ai ki a koe, Me haere tahi tenei i a koe; ko ia e haere tahi i a koe; a ko taku e me a ai ki a koe, E kore tenei e haere tahi i a koe; kua tena e haere. <sup>5</sup> Na ko tana kawenga i te iwi ki raro, ki te wai, a ka mea a Ihowa ki Kiriona, Ko te hunga katoa e mitikia ai te wai ki o ratou arero, pera me te kuri e miti nei, me whakatu ratou ki tahaki me te hunga katoa ano e tuturi ana ki te inu. <sup>6</sup> A, ko te tokomaha o te hunga i mitimiti, me te pa ano o o ratou ringa ki o ratou mangai, e toru rau tangata: i tuturi ia te nuinga katoa o te iwi ki te inu i te wai. <sup>7</sup> Na ka mea a Ihowa ki a Kiriona, Ma nga rau tangata e toru i mitimiti ra e whakaora ai ahau i a koutou, e hoatu ai hoki nga Miriani ki tou ringa; a kia haere te iwi katoa, tera, <sup>8</sup> ki tona wahi. Na ka mauria e te iwi he o ki o ratou ringa, me a ratou tetere: ko te nuinga ia o Iharaira i tonoa e ia ki tona teneti, ki tona teneti, a puritia ana aua tangata e toru ra: na i raro i a ia te puni o Miriana, i te raorao.

<sup>9</sup> Na i taua po ano ka mea a Ihowa ki a ia, Whakatika, haere ki raro, ki te puni ra, kua hoatu hoki e ahau ki tou ringa. <sup>10</sup> A ki te wehi koe ki te haere ki raro, haere korua ko Pura, ko tau tangata, ki raro ki te puni. <sup>11</sup> A ka rongo koe ki a ratou korero, muri iho ka maia ou ringa, a ka haere koe ki raro, ki te puni. Na ko to raua haerenga atu ko tana tangata, ko Pura, ki te hiku o nga matua o te puni. <sup>12</sup> A e takoto haere ana i te raorao nga Miriani, ratou ko nga Amareki, me nga tamariki katoa o te rawhiti, kei te manawhitiwhiti te tokomaha; me a ratou kamera, kahore e taea te tatau; rite tahi ki te onepu i te taha o te moana te tokomaha. <sup>13</sup> A, no te taenga atu o Kiriona, na e korero ana tetahi i te moe ki tona hoa, e mea ana, Nana, moe iho ahau, he keke taro pare e takahuri mai ana ki te

puni o Miriana. Na kua tae mai ki te teneti; kua aki atu; na kua hinga, kua huri koaro, a takot o ana  
<sup>14</sup> te teneti. Na ka utu tona hoa, ka mea, Ehara tena i te mea ke atu i te hoari a Kiriona tama a Ioaha,

he tangata no Iharaira: kua hoatu e te Atua a Miriana me te ope katoa ki tona ringa. <sup>15</sup> A, i te  
 rongonga o Kiriona i te korerotanga o te moe, i tona tikanga, na ka koropiko ia, a hoki ana ki te  
 puni o Iharaira, ka mea, Whakatika, kua homai hoki e te Atua te ope o Miriana ki o koutou ringa.

<sup>16</sup> Katahi ka wehea e ia nga tangata e toru rau, kia toru nga matua, a whakawhiwhia ana e ia  
 nga ringa o ratou katoa ki te tetere, ki te oko tahanga, ki te rama i roto i te oko. <sup>17</sup> I mea ano ia ki  
 a ratou, Me titiro mai ki ahau, a kia rite ta koutou ki taku; na, e tae ahau ki te wahi i waho rawa o

te puni, ko taku e mea ai, kia pera hoki koutou. <sup>18</sup> Ka whakatangi ahau i te tetere, matou ko oku  
 hoa katoa, me whakatangi hoki koutou i nga tetere i nga taha katoa o te puni, me te karanga ano,

Ko te hoari a Ihowa, a Kiriona. <sup>19</sup> Na ka tae a Kiriona me te rau tangata i a ia ki te wahi i waho  
 rawa o te puni, i te timatanga o to waenga mataaratanga, i te mea katahi ano ka whakaturia atu nga

kaimataara: na whakatangihia ana e ratou nga tetere, a wahia iho nga oko i o ratou ringa. <sup>20</sup> A  
 whakatangihia ana hoki nga tetere e nga matua e toru, wahia iho nga oko, i puritia ano nga rama  
 ki o ratou ringa mau, me nga tetere ki o ratou ringa matau whakatangi ai; me ta ratou karanga hoki,

Ko te hoari a Ihowa, a Kiriona. <sup>21</sup> Na tu ana ratou i tona turanga, i tona turanga, taiawhio noa te

puni: a ka rere katoa te puni; a ko to ratou hamamatanga, na ko te whatinga. <sup>22</sup> I whakatangihia  
 hoki e ratou nga tetere e toru rau, a meinga ana e Ihowa kia anga te hoari a tenei tangata, a tenei  
 tangata, ki tona hoa, ki tona hoa, ki te ope katoa ano hoki: a ka whati te ope tae noa ki Petehita e  
 ahau atu ana ki Tererara, tae noa ki te rohe o Aperemehora, e tata ana ki Tapata.

<sup>23</sup> Katahi ka huihuia nga tangata o Iharaira, i roto i a Napatari, i a Ahera, i a Manahi katoa, a

whaia ana a Miriana e ratou. <sup>24</sup> A i tono karere a Kiriona puta noa i te whenua pukepuke katoa o  
 Eparaima hei mea, Haere mai ki raro ki te whawhai ki a Miriana; tangohia hoki nga wai i mua i a  
 ratou, a puta noa ki Petepara ki Horano. Na ka huihui nga tangata katoa o Eparaima, a tangohia ana

nga wai, a puta noa ki Petepara ki Horano. <sup>25</sup> A tokorua nga rangatira o Miriana i mau i a ratou,  
 ko Orepe raua ko Teepe; a patua iho e ratou a Orepe ki te kamaka a Orepe, i patua hoki a Teepe ki  
 te poka waina a Teepe, a whaia ana e ratou a Miriana, a kawea ana e ratou nga matenga o Orepe  
 ra ua ko Teepe ki a Kiriona ki tawahi o Horano.

## Chapter 8

<sup>1</sup> Na ka mea ki a ia nga tangata o Eparaima, He aha tenei mea i mea nei koe ki a matou, te karangatia matou i tou haerenga atu ki te whawhai ki a Miriana? Na nui atu ta ratou ngangau ki a ia.

<sup>2</sup> Na ka mea ia ki a ratou, Ko tehea mahi aku inaianei hei rite mo ta koutou? He teka ianei pai atu te hamunga waina a Eparaima i te whakinga katoa a Apietere?

<sup>3</sup> I homai e te Atua ki o koutou ringa nga rangatira o Miriana, a Orepe raua ko Teepe: a he aha te mea i taea e ahau hei rite mo ta koutou? Katahi ka iti haere to ratou riri ki a ia i tana korerotanga i taua kupu.

<sup>4</sup> Na kua tae a Kiriona ki Horano, kua whiti, ratou tahi ko ana tangata e toru rau; e ruha ana, otiia me te whai tonu.

<sup>5</sup> Na ka mea ia ki nga tangata o Hukota, Homai etahi rohi taro ma te hunga e haere tahi nei matou, e hemo ana hoki ratou, e whai ana hoki ahau i a Tapa raua ko Taramuna i nga kingi o Miriana.

<sup>6</sup> Na ka mea nga rangatira o Hukota, Kei roto koia i tou ringa nga ringa o Tapa raua ko Taramuna, e hoatu ai e matou he taro ma tou ope?

<sup>7</sup> Na ka mea a Kiriona, Mo reira kia homai e Ihowa a Tapa raua ko Taramuna ki toku ringa, ka haehaea e ahau o koutou kikokiko ki nga tataramoa o te koraha, ki nga tumatakuru.

<sup>8</sup> Na ka haere atu ia i reira ki Penuere, a ka korero pera ano ki a ratou; heoi, rite tonu ki ta nga tangata o Hukota i whakahoki ai ta nga tangata o Penuere i whakahoki ai ki a ia.

<sup>9</sup> Na ka korero ano hoki ia ki nga tangata o Penuere, ka mea, Ka hoki mai ahau i runga i te pai, ka wahia e ahau tenei pourewa.

<sup>10</sup> Na i Karakoro a Tapa raua ko Taramuna, me o raua ope hoki, me te mea tekau ma rima nga mano, ko te hunga katoa i mahue o te ope katoa o nga tangata o te rawhiti: i hinga hoki o te hunga mau hoari, kotahi rau e rua tekau nga mano.

<sup>11</sup> Na ka haere ki runga a Kiriona na te huarahi o te hunga noho teneti, na te rawhiti o Nopaha, o Iokopeha, a patua iho e ia te ope: kua tau hoki te ope.

<sup>12</sup> Na ka rere a Tapa raua ko Taramuna, a ka whaia e ia, ka mau i a ia nga kingi tokorua o Miriana, a Tapa raua ko Taramuna, a whati ana te ope katoa.

<sup>13</sup> A i hoki mai a Kiriona tama a Ioaha i te whawhai i te pikitanga atu o Herehe.

<sup>14</sup> A hopukia ana e ia tetahi taitama o nga tangata o Hukota, a uia ana e ia ki a ia: na ka tuhituhia e tera nga rangatira o Hukota me nga kaumatua ano o reira, e whitu tekau ma whitu nga tangata.

<sup>15</sup> Na ka tae atu ia ki nga tangata o Hukota, ka mea, Tenei a Tapa raua ko Taramuna, i whakorekore ra koutou ki ahau, i mea ra, Kei tou ringa ranei nga ringa o Tapa raua ko Taramuna e hoatu ai e matou he taro ma au tangata e hemo ra?

<sup>16</sup> Na ka mau ia ki nga kaumatua o te pa, ki nga tataramoa hoki o te koraha, ki nga tumatakuru, a whakaakona ana ki ena nga tangata o Hukota.

<sup>17</sup> I wahia iho hoki e ia te pourewa o Penuere, a patua iho nga tangata o taua pa.

<sup>18</sup> Katahi ia ka mea ki a Tapa raua ko Taramuna, He tangata pehea era i patua ra e korua ki Taporo? Ka mea raua, Ko koe, ko ratou; rite tonu ki to nga tama a te kingi te ahua o tenei, o tenei

19 o ratou. Na ka mea ia, Ko oku teina ratou, ko nga tama a toku whaea: e ora ana a Ihowa, me i  
whakaorangia era e korua, kihai ahau i patu i a korua. 20 A ka mea ia ki tana matamua, ki a Ietere,

21 Whakatika, patua raua. Heoi kihai taua tamaiti i unu i tana hoari, i te wehi; he tamariki hoki. Na  
ka mea a Tewa raua ko Taramuna, Whakatika ko koe, ka rere ki runga i a maua; he tangata tonu  
hoki, pera ano tona kaha. Katahi ka whakatika a Kiriona, a patua iho a Tewa raua ko Taramuna,  
tangohia ana hoki e ia nga heitiki i nga kaki o o raua kamera.

22 Katahi ka mea nga tangata o Iharaira ki a Kiriona, Hei kingi koe mo matou, a koe, tau tama,  
23 te tama hoki a tau tama: nau hoki matou i ora ai i te ringa o Miriana. Na ka mea a Kiriona ki a  
ratou, Kaua ahau e waiho hei kingi mo koutou, kaua ano taku tama e waiho hei kingi mo koutou.

24 Ko Ihowa hei kingi mo koutou. I mea ano a Kiriona ki a ratou, He hiahia toku ki te tono i tetahi  
mea i a koutou, kia homai ki ahau e tena, e tena o koutou, nga whakakai o tana taonga parakete.

25 He whakakai koura hoki a ratou, no nga Ihimaeri hoki ratou. Na ka whakahoki ratou, Ae, me  
hoatu noa e matou. Na ka wharikitia e ratou tetahi kakahu, a maka ana ki runga e tera, e tera, nga

26 whakakai o tana taonga parakete. A kotahi mano e whitu rau nga hekere koura te taimaha o nga  
whakakai koura i tonoa e ia; me nga heitiki, me nga poroporo, me nga kakahu papura o nga kingi

27 o Miriana, me nga mekameka hoki o nga kakai o nga kamera. Na ka hanga e Kiriona hei epora,  
a ka waiho ki tona pa ki Opora: na ka whai a Iharaira katoa ki reira puremu ai ki taua mea: a ka

28 waiho hei rore mo Kiriona ratou ko tona whare. Heoi hinga ana a Miriana i mua i nga tamariki  
a Iharaira, kihai ano i ara o ratou matenga i muri iho. Na ka okioki te whenua, e wha tekau nga tau,  
i nga ra o Kiriona.

29 Na ka haere a Ierupaara tama a Ioaha, a ka noho ki tona whare. 30 A e whitu tekau nga tama  
a Kiriona, he mea na tona tinana: he tokomaha hoki ana wahine. 31 A ko tana wahine iti i Hekeme,

32 i whanau ano hoki ta raua tama; a huaina iho e ia tona ingoa ko Apimereke. Na ka mate a Kiriona,  
tama a Ioaha, i a ia ka tino koroheke; a tanumia ana ki te rua o Ioaha, o tona papa, ki Opora o nga

33 Apieteri. A, no te matenga o Kiriona, na ka hoki nga tama a Iharaira, ka puremu ki nga Paara;

34 a ka waiho a Paaraperiti hei atua mo ratou. Kihai ano hoki nga tamariki a Iharaira i mahara ki  
a Ihowa, ki to ratou Atua, i whakaora nei i a ratou i te ringa o o ratou hoariri katoa i tetahi taha, i

35 tetahi taha. Kihai ano hoki i puta to ratou aroha ki te whare o Ierupaara, ara o Kiriona; kihai i  
rite ki ana mahi pai katoa ki a Iharaira.



## Chapter 9

<sup>1</sup> Na ka haere a Apimereke tama a Ierupaara ki Hekeme ki nga tungane o tona whaea, a ka korero ki a ratou, ki te hapu katoa ano hoki o te whare o te papa o tona whaea, ka mea, <sup>2</sup> Tena, ki atu ki nga taringa o nga tangata katoa o Hekeme, Ko tehea te mea pai ki a koutou, ko nga tangata e whitu tekau, ko nga tama katoa a Ierupaara, hei kingi mo koutou, kia kotahi ranei te tangata hei kingi mo koutou? <sup>3</sup> Kia mahara hoki he wheua ahau no koutou, he kikokiko no koutou. Na ka korerotia e nga tungane o tona whaea enei kupu katoa mona ki nga taringa o nga tangata katoa o Hekeme, a ka anga o ratou ngakau ki te aru i a Apimereke; i mea hoki ratou, Ko to tatou teina ia. <sup>4</sup> Na ka homai e ratou ki a ia etahi hiriwa, e whitu tekau, i roto i te whare o Paaraperiti, a ka utua e Apimereke ki aua mea etahi tangata wairangi, he hunga hikaka, a aru ana ratou i a ia. <sup>5</sup> Na ka haere ia ki te whare o tona papa ki Opora, a patua iho e ia ona tuakana, ona teina, nga tama a Ierupaara, e whitu tekau nga tangata, i runga i te kohatu kotahi; otiia i mahue a Iotama te tama whakaotinga a Ierupaara; i piri hoki ia. <sup>6</sup> Na ka huihui nga tangata katoa o Hekeme, ratou ko te whare katoa o Miro, a ka haere, ka mea i a Apimereke hei kingi, ki te oki i te pou i Hekeme. <sup>7</sup> A ka korerotia ki a Iotama, na ka haere ia, a tu ana i runga i te tihi o Maunga Keritimi; na ka ara tona reo, ka karanga, ka mea ki a ratou, Whakarongo mai ki ahau, e nga tangata o Hekeme, kia whakarongo ai te Atua ki a koutou. <sup>8</sup> I haere nga rakau ki te whakawahi i tetahi kingi mo ratou, a ka mea ki te oriwa, Ko koe hei kingi mo matou. <sup>9</sup> Na ka mea te oriwa ki a ratou, Kia whakarerea koia e ahau toku momonatanga, taku mea i whai kororia ai te Atua, te tangata, a kia haere ki runga i nga rakau tiwhaiwhai ai? <sup>10</sup> Na ka mea nga rakau ki te piki, Haere mai hei kingi mo matou. <sup>11</sup> Ano ra ko te piki ki a ratou, Kia whakarerea koia e ahau toku reka me oku hua pai, a kia haere ki runga i nga rakau tiwhaiwhai ai? <sup>12</sup> Katahi ka mea nga rakau ki te waina, Haere mai koe hei kingi mo matou. <sup>13</sup> Na ka mea te waina ki a ratou, Kia whakarerea koia e ahau toku waina e whakahari nei i te Atua, i te tangata, a kia haere ki runga i nga rakau tiwhaiwhai ai? <sup>14</sup> Na ka mea nga rakau katoa ki te taraheke, Haere mai hei kingi mo matou. <sup>15</sup> Na ka mea te taraheke ki nga rakau, Ki te mea he pono ta koutou whakawahi i ahau hei kingi mo koutou, haere mai ki raro ki toku taumarumarutanga iho okioki ai, a ki te kahore, kia puta atu he ahi i roto i te taraheke hei kai i nga hita o Repanon a. <sup>16</sup> Na ki te mea he pono, he tika, ta koutou mahi, i a koutou i mea nei i a Apimereke hei kingi, ki te pai hoki ta koutou mahi ki a Ierupaara ratou ko tona whare, ki te mea hoki i rite ki nga mahi a ona ringa ta koutou i mea ai ki a ia; <sup>17</sup> Na toku papa hoki i whawhai a

18  
 koutou whawhai, a taruke ana ki te mate; a ora ake koutou i te ringa o Miriana: Na kua whakatika nei koutou i tenei ra ki te whare o toku papa, a patua iho ana tama, e whitu tekau tangata, ki runga ki te kohatu kotahi, a meinga ana a Apimereke, tama a tana pononga wahine hei kingi mo nga

19  
 tangata o Hekeme, no te mea ko to ko utou teina ia; Na ki te mea he pono, he tika, ta koutou i mea ai ki a Ierupaara ratou ko tona whare i tenei ra, kia hari ki a Apimereke, kia hari hoki ia ki a

20  
 koutou. Ki te kahore ia kia puta he ahi i a Apimereke hei kai i nga tangata o Hekeme, ratou ko te whare o Miro; kia puta hoki he ahi i nga tangata o Hekeme, i te whare hoki o Miro, hei kai a

21  
 Apimereke. Na ko te rerenga i rere ai a Iotama, haere ana ki Peere, a noho ana i reira i te wehi o tona tuakana, o Apimereke.

22  
 A e toru nga tau o Apimereke e kawana ana i a Iharaira,

23  
 Na ka unga e te Atua he wairua kino hei wehe i a Apimereke ratou ko nga tangata o Hekeme; a ka mahi tinihanga nga tangata o

24  
 Hekeme ki a Apimereke. He mea mo te tukinotanga i nga tama e whitu tekau a Ierupaara kia eke mai, kia utaina o ratou toto ki runga ki to ratou teina, ki a Apimereke, nana nei ratou i patu; ki runga ano hoki i nga tangata o Hekeme nana nei i whakakaha ona ringa i patua ai ona tuakana, ona

25  
 teina. Na ka whakanohoia e nga tangata o Hekeme he kaiwhanga mona ki nga tihi o nga maunga,

26  
 a pahuatia ana e ratou te hunga katoa i puta ki a ratou i te ara; a ka korerotia ki a Apimereke. Na ka haere mai a Kaara tama a Epere ratou ko ona teina, a ka tae atu ki Hekeme; na ka whakawhirinaki

27  
 nga tangata o Hekeme ki a ia. Na ka haere ratou ki te mara, a whakiiia ana nga hua o a ratou mara waina, takahia ana; na ka tuku hakari ratou, a ka haere ki te whare o to ratou atua, ka kai, ka

28  
 inu, a kohukohua ana e ratou a Apimereke. I mea ano a Kaara tama a Epere, Ko wai a Apimereke, ko wai hoki a Hekeme e mahi ai tatou ki a ia? ehara ianei ia i te tama a Ierupaara? ko Tepuru hoki tana kaiwhakahauhau? me mahi koutou ki nga tangata a Hamora, a te papa o Hekeme: engari he

29  
 aha tatou ka mahi ai ki a ia? Na me i pai te Atua ki tenei iwi ki raro ki toku ringa! ina kua peia

30  
 e ahau a Apimereke. Katahi ia ka mea ki a Apimereke, Whakanuia tou ope, puta mai hoki. A, no te rongonga o Tepuru rangatira o te pa ki nga kupu a Kaara tama a Epere, ka mura tona riri.

31  
 Na ka tonono puku ia i etahi tangata ki a Apimereke hei me, Ko Kaara tama a Epere tenei, ratou

32  
 ko ona teina, kua tae mai ki Hekeme; a kei te whakatutehu ratou i te pa kia tu atu ki a koe. Na

33  
 reira whakatika i te po, a koe me au tangata, ka takoto tauwhanga ai i te parae. A ka whiti te ra i te ata, ka maranga wawe koe, ka huaki ki te pa: a ka puta ia, ratou ko ana tangata ki te whawhai

34  
 ki a koe, mau e mea ki a ia tau e kite ai. Na ko te whakatikanga ake o Apimereke ratou ko ana

35  
 tangata katoa i te po, a e wha o ratou matua i takoto tauwhanga ai mo Hekeme. A ka puta atu a

Kaara tama a Epere, ka tu i te tomokanga ki te kuwaha o te pa: na kua whakatika ake a Apimereke  
 ratou ko ana tangata i te pehipihi. <sup>36</sup> A, i te kitenga o Kaara i aua tangata, ka mea ia ki a Tepuru,  
 Nana, he tangata e heke mai ra i nga tihi o nga maunga. Na ka mea a Tepuru ki a ia, Ko te ata o  
 nga maunga tau e kite na, me te mea he tangata. <sup>37</sup> Na ka korero ano a Kaara, ka mea, Nana, titiro  
 ki te hunga e heke mai ra ma waenganui o te whenua! kotahi hoki tera matua e haere mai ra i te ara  
 i te oki o Meonenimi. <sup>38</sup> Na ka mea a Tepuru ki a ia, Kei hea ra tou mangai i mea ra koe, Ko wai  
 a Apimereke, e mahi ai tatou ki a ia? ehara ianei tenei i te iwi i whakahaweatia ra e koe? Na haere  
 atu inaiane ki te whawhai ki a ia. <sup>39</sup> Na ka haere a Kaara i te aroaro o nga tangata o Hekeme ki te  
 whawhai ki a Apimereke. <sup>40</sup> Na ka whaia ia e Apimereke, a rere ana ia i tona aroaro, a he tokomaha  
 i hinga, i patua, a te tomokanga ra ano o te kuwaha. <sup>41</sup> Na ka noho a Apimereke ki Aruma: a ka  
 peia a Kaara ratou ko ona teina e Tepuru, kei noho ki Hekeme. <sup>42</sup> A i te aonga ake ka puta atu nga  
 tangata ki te parae; a ka korerotia e ratou ki a Apimereke. <sup>43</sup> Na ka mau ia ki nga tangata, a wehea  
 ana e ia kia toru nga matua, a ka tauwhanga i te parae. A ka kite ia, na, kua puta mai te iwi i roto i  
 te pa, ka whakatika ia ki a ratou a patua iho. <sup>44</sup> I kokiri hoki a Apimereke ratou ko ana ngohi, a tu  
 ana i te tomokanga ki te kuwaha o te pa: a kokiri ana nga ngohi e rua ki te hunga katoa i te parae,  
 a patua iho. <sup>45</sup> A whakapaua ana e Apimereke taua ra ki te whawhai ki te pa, a horo ana te pa i a  
 ia, patua iho hoki nga tangata katoa i roto; na wahia ana e ia te pa, ruia iho ki te tote. <sup>46</sup> A, no te  
 rongonga o nga tangata katoa o te pourewa o Hekeme, ka haere ratou ki roto ki te taumaihi o te  
 whare o te atua, o Periti. <sup>47</sup> A ka korerotia ki a Apimereke kua huihui katoa nga tangata o te pourewa  
 o Hekeme. <sup>48</sup> Katahi ka piki atu a Apimereke ki Maunga Taramono, ratou ko ana tangata katoa; i  
 mauria atu ano i Apimereke he toki i tona ringa; na ka tapahia e ia he rakau, a hapainga ana, amohia  
 ana e ia i runga i ona pokohiwi, me te mea ano ki ana tangata, Ko ta koutou i kite nei e meatia ana  
 e ahau, kia hohoro ta koutou pera. <sup>49</sup> Na ka tapahia he peka e tenei, e tenei o te iwi katoa, a haere  
 ana ki te whai i a Apimereke: na ka whakatakotoria e ratou ki te taha o te taumaihi, a tahuna ana  
 te taumaihi ki te ahi ki runga ki a ratou: na ka mate ano hoki nga tangata katoa o te pourewa o  
 Hekeme; ki te whakaaro iho kotahi mano nga tane, nga wahine.  
<sup>50</sup> Katahi ka haere a Apimereke ki Tepehe, a whakapaea ana a Tepehe e ia, a horo ana i a ia.  
<sup>51</sup> Na i waenganui o te pa he pourewa kaha, a ka rere ki reira nga tane katoa, me nga wahine, nga  
 tangata katoa o te pa, a tutakina ana mai ratou ki roto, a piki ana ratou ki runga ki te tuanui o te  
 pourewa. <sup>52</sup> Na ko te haerenga atu o Apimereke ki te pourewa, tauria ana e ia, ka whakatata hoki

ki te kuwaha o te pourewa, he tahu ki te ahi. <sup>53</sup> Ko te tino makanga iho a tetahi wahine i to runga  
 kohatu mira ki runga ki te matenga o Apimereke, na ngawha iho tona angaanga. <sup>54</sup> Na hohoro tonu  
 tana karanga ki te tangata i mau i ana patu, ka mea ki a ia, Unuhia tau hoari, whakamatea hoki ahau,  
 kei korerotia ahau, He wahine nana ia i patu. Na werohia ana ia e tana tangata, a ka mate. <sup>55</sup> A, no  
 te kitenga o nga tangata o Iharaira kua mate a Apimereke, ka haere ratou ki tona wahi, ki tona wahi.  
<sup>56</sup> Na i penei te whakautu a te Atua i te kino a Apimereke i meatia e ia ki tona papa, i a ia i patu ai  
 i ona tuakana, i ona teina, e whitu tekau: <sup>57</sup> Me te kino hoki a nga tangata o Hekeme, i whakautua  
 katoatia e te Atua ki runga ki o ratou matenga; a ka tau iho ki a ratou te kanga a Iotama tama a  
 Ierupaara.

## Chapter 10

<sup>1</sup> A i muri a Apimereke, ka whakatika ake hei kaiwhakaora mo Iharaira ko Tora tama a Pua  
 tama a Roro, he tangata no Ihakara: a i noho ia ki Hamiri ki te whenua pukepuke o Eparaima. <sup>2</sup> A  
 e rua tekau ma toru nga tau i whakarite ai ia mo Iharaira, na ka mate, a tanumia ana ki Hamiri. <sup>3</sup> A  
 i muri i a ia ka whakatika ko Haira Kireari, e rua tekau ma rua nga tau i whakarite ai ia mo Iharaira.  
<sup>4</sup> Na e toru tekau ana tama, e toru tekau ano nga kua kaihe i eke ai ratou, e toru tekau hoki o ratou  
 pa, e huaina nei ko Hawotohaira, a tae noa ki tenei ra; kei te whenua o Kireara. <sup>5</sup> Na ka mate a  
 Haira, a ka tanumia ki Kamono.  
<sup>6</sup> Na ka mahi kino ano nga tamariki a Iharaira ki ta Ihowa titiro, i mahi ki nga Paara, ki te  
 Ahataroto, ki nga atua o Hiria, ki nga atua o Hairona, ki nga atua o Moapa, ki nga atua o nga tamariki  
 a Amona, ki nga atua o nga Pirihitini: whakarerea ak e e ratou a Ihowa, kihai ano hoki i mahi ki a  
<sup>7</sup> ia. Na ka mura te riri o Ihowa ki a Iharaira, a hokona atu ana ratou e ia ki te ringa o nga Pirihitini,  
 ki te ringa hoki o nga tamariki a Amona. <sup>8</sup> A i taua tau i kurua, i tukinotia e ratou nga tamariki a  
 Iharaira; a tekau ma waru nga tau i tukinotia ai nga tamariki katoa a Iharaira i tawahi o Horano, i  
<sup>9</sup> te whenua o nga Amori, i Kireara. Na ka whiti atu nga tamariki a Amona i Horano ki te whawhai  
 ano hoki ki a Hura, ki a Pineamine, ki te whare hoki o Eparaima, a taea rawatia iho te raru o Iharaira.  
<sup>10</sup> Katahi ka karanga nga tamariki a Iharaira ki a Ihowa, ka mea, Kua hara matou ki a koe, kua  
<sup>11</sup> whakarerea hoki e matou to matou atua, kua mahi hoki ki nga Paara. A ka mea a Ihowa ki nga  
 tamariki a Iharaira, Kahore ianei koutou i whakaorangia e ahau i nga Ihipiana, i nga Amori, i nga

12  
 tamariki a Amona, i nga Pirihitini? I tukino ano hoki nga Haironi, nga Amareki, ratou ko nga Maoni i a koutou, a, no ta koutou tangihanga ki ahau, ka ora koutou i ahau i roto i to ratou ringa.

13  
 Heoi whakarerea ana ahau e koutou, a mahi ana koutou ki nga atua ke: koia ahau te whakaora ai ano i a koutou. 14  
 Haere, karanga atu ki a koutou atua i whiriwhiri ai; ma ratou koutou e whakaora

15  
 i te wa o to koutou hemanawa. Na ka mea nga tamariki a Iharaira ki a Ihowa, Kua hara matou, mau e mea ki a matou nga mea katoa e pai ana ki tau titiro; otiia whakaoranga matou inaianei.

16  
 Na ka whakarerea e ratou nga atua ke i roto i a ratou, a ka mahi ki a Ihowa: na ka koingo tona ngakau ki a Iharaira i mate nei. 17  
 Na ka huihuia nga tamariki a Amona, a ka noho ki Kireara, i

18  
 huihui ano nga tamariki a Iharaira, a noho ana i Mihipa. Na ka mea te iwi ratou ko nga rangatira o Kireara tetahi ki tetahi, Ko wae te tangata hei timata i te whawhai ki nga tamariki a Amona? ka waiho ia hei upoko mo nga tangata katoa o Kireara.

## Chapter 11

1  
 Na he tangata marohirohi a Iepeta Kireari, he tama na tetahi wahine kairau: a na Kireara hoki a Iepeta. 2  
 A i whanau etahi tama ma Kireara raua ko tana wahine; a, no te kaumatuatanga ake o nga tama a tana wahine, ka peia e ratou a Iepeta: i mea ki a ia, Kahore he tukunga iho mou i te whare o to tatou papa; he tama hoki koe na te wahine ke. 3  
 Na ka rere a Iepeta i ona teina, a noho ana i te whenua o Topo: na ka huihui etahi tangata wairangi ki a Iepeta, a haere tahi ana ratou.

4  
 A roa iho, na ka whawhai nga tamariki a Amona ki a Iharaira. 5  
 A, i te whawhaitanga a nga tamariki a Amona ki a Iharaira, na ka haere nga kaumatua o Kireara ki te tiki i a Iepeta i te whenua

6  
 o Topo. A ka mea ki a Iepeta, Haere mai, a ko koe hei rangatira hoia mo matou, kia whawhai ai tatou ki nga tamariki a Amona. 7  
 Na ka mea a Iepeta ki nga kaumatua o Kireara, kahore ianei koutou i kino ki ahau, i pei i ahau i roto i te whare o toku papa? a he aha koutou i haere mai ai ki

8  
 ahau i a koutou ka hemanawa nei? Na ka mea nga kaumatua o Kireara ki a Iepeta, Koia matou ka tahuri atu nei ki a koe inaianei, kia haere ai koe i a matou ki te whawhai ki nga tamariki a Amona,

9  
 a ko koe hei upoko mo matou, mo nga tangata katoa hoki o Kireara. Na ka mea a Iepeta ki nga kaumatua o Kireara, Ki te whakahokia atu ahau e koutou ki te whawhai ki nga tamariki a Amona,

10  
 a ka homai ratou e Ihowa ki ahau, tera ranei ahau e waiho hei upoko mo koutou? Na ka mea nga kaumatua o Kireara ki a Iepeta, Ko Ihowa hei kaititiro i waenganui i a tatou; he pono e rite ki

11  
tau kupu ta matou e mea ai. Na ka haere tahi a Iepeta ratou ko nga kaumatua o Kireara, a ka meinga ia e te iwi hei upoko, hei rangatira mo ratou: a ka korerotia e Iepeta ana kupu katoa ki te aroaro o Ihowa ki Mihipa.

12  
Katahi ka tono tangata atu a Iepeta ki te kingi o nga tamariki a Amona, hei mea, He aha tau  
13  
i haere mai ai koe ki ahau, ki toku whenua whawhai ai? Na ka mea te kingi o nga tamariki a Amona ki nga tangata a Iepeta, Na Ihairaira hoki i tango toku whenua i tona haerenga ake i Ihipa,

14  
i Aronona atu a tae noa ki Iapoko, ki Horano: na ata whakahokia mai aua wahi. Na ka tono  
15  
tangata ano a Iepeta ki te kingi o nga tamariki a Amona: Hei mea ki a ia, Ko te kupu tenei a Iepeta, Kihai i tangohia e Ihairaira te whenua o Moapa, te whenua ranei o nga tamariki a Amona:

16  
Engari i to Ihairaira haerenga ake i Ihipa, a ka haereerea te koraha a tae noa ki te Moana Whero,  
17  
a ka tae ki Karehe; Na ka tono tangata a Ihairaira ki te kingi o Eroma, hei mea, Tukua ahau kia tika atu ma tou whenua; na kihai te kingi o Eroma i rongu. I tono ano ia ki te kingi o Moapa: a kihai

18  
tera i pai. Na ka noho a Ihairaira ki Karehe. Katahi ratou ka haere puta noa i te koraha; taiawhiotia ana e ratou te whenua o Eroma, me te whenua o Moapa, a ka tae mai ki te taha ki te rawhiti o te whenua o Moapa, ka noho ki tera taha o Aranona, kihai hoki i haere ki roto ki te rohe o Moapa: ko

19  
Aranona hoki te rohe o Moapa. Na ka tono tangata a Ihairaira ki a Hihona kingi o nga Amori, kingi o Hehepona; a ka mea a Ihairaira ki a ia, Tukua matou kia tika atu ma tou whenua ki toku

20  
wahi. Heoi kihai a Hihona i tuku i a Ihairaira kia tika ma tona rohe: na huihuia ana e Hihona tona  
21  
iwi katoa, a noho ana ki Iahata; na, ko tana whawhaitanga kia Ihairaira. Na ka homai e Ihowa, e te Atua o Ihairaira a Hihona me tona iwi katoa ki te ringa o Ihairaira: na patua iho ratou, a tangohia

22  
ana e Ihairaira te whenua katoa o nga Amori i noho ki taua whenua. I tangohia hoki e ratou nga

23  
rohe katoa o nga Amori; i Aranona ki Iapoko, i te koraha ki Horano. Na kua peia nei e Ihowa,

24  
e te Atua o Ihairaira nga Amori i te aroaro o tana iwi, o Ihairaira, a me riro ranei i a koe? E kore ianei koe e mau ki nga wahi i whakawhiwhia ki a koe e tou atua, e Kemoho? a ka riro mai hoki i

25  
a matou to te hunga e peia ana e Ihowa, e to matou Atua, i to matou aroaro. He nui ake ranei tou pai i to Paraka tama a Tiporo kingi o Moapa? i mea ranei ia ki te tohe ki a Ihairaira, ki te whawhai

26  
ranei ki a ratou? I a Ihairaira e noho ana i Hehepona, i ona pa ririki, i Aroere hoki, i ona pa ririki, i nga pa katoa ano i nga taha o Aranona, e toru rau nga tau; he aha hoki te tangohia ai e koutou i

27  
taua wa? Na kahore oku hara ki a koe; engari e he ana tau mahi ki ahau, tau whawhai ki ahau:

ma Ihowa, ma te kaiwhakawa e whakawa aianeia nga tamariki a Iharaira me nga tamariki a Amona.

28

Heoi kihai i rongu te kingi o nga tamariki a Amona ki nga kupu a Iepeta i tukua atu ai ki a ia.

29

Na ka tau te wairua o Ihowa ki runga ki a Iepeta, a ka haere ia puta noa i Kireara, i Manahi, i haere hoki puta noa i Mihipe o Kireara, a haere ana i Mihipe o Kireara ki nga tamariki a Amona.

30

Na ka oatitia he oati e Iepeta ki a Ihowa: i mea ia, Ki te tino homai e koe nga tama a Amona ki

31

toku ringa, Na, ko te mea e puta mai ana i nga tatau o toku whare ki te whakatau i ahau, ina hoki ora mai ahau i nga tama a Amona, ma Ihowa tena, ka whakaekea ano e ahau hei tahunga tinana.

32

Na ka haere a Iepeta ki nga tamariki a Amona ki te whawhai ki a ratou; a ka homai ratou e Ihowa

33

ki tona ringa. Na tukitukia ana ratou e ia, i Aroere atu a tae noa koe ki Miniti, e rua tekau nga pa, ki te mania ano i nga mara waina; he nui rawa te patunga. Na kua hinga nga tamariki a Amona

34

i nga tamariki a Iharaira. Na ka haere a Iepeta ki tona whare ki Mihipa, na, ko te putanga mai o tana tamahine ki te whakatau i a ia, me te timipera, me te kanikani. Ko tana huatahi ia; kahore atu

35

hoki ana tama, tamahine ranei, ko ia anake. A, no tona kitenga i a ia, na ka haea ona kakahu, ka mea, Aue, e taku tamahine, kua pehia rawatia ahau e koe ki raro, kei roto hoki koe i te hunga e raru

36

ai ahau: kua puaki hoki toku mangai ki a Ihowa, e kore ano e taea te hoki. Na ka mea tera ki a ia, E toku papa, kua puaki nei tou mangai ki a Ihowa, meatia ki ahau nga mea i puta mai i tou

37

mangai, mo ta Ihowa tohenga i te utu mou i ou hoariri, i nga tamariki a Amona. I mea ano ia ki tona papa, Kia meatia tenei mea ki ahau, waiho noa iho ahau, kia rua nga marama, a ka piki ahau,

38

ka heke i nga maunga tangi ai ki toku wahinetanga, matou ko oku hoa. Ano ra ko ia, Haere. Na ka unga atu ia e ia, kia rua nga marama: heoi haere ana ia, ratou ko ona hoa, a tangihia ana e ia tona

39

wahinetanga i runga i nga maunga. A, no te takanga o nga marama e rua, na, ka hoki ia ki tona papa, a meatia ana e ia ki a ia tana i oati ai: kihai hoki taua kotiro i mohio ki te tane. Na ka waiho

40

hei tikanga i roto i a Iharaira, Kia haere nga tamahine a Iharaira i ia tau, i ia tau, ki te tangi i te kotiro a Iepeta Kireari: e wha nga ra i roto i te tau.

## Chapter 12

1

Na ka huihuia nga tangata o Eparaima, a ka haere ki te raki, ka mea ki a Iepeta, He aha koe i haere ai ki te whawhai ki nga tamariki a Amona, a kihai i karanga i a matou kia haere tahi tatou?

2

ka tahuna e matou tou whare i runga i a koe ki te ahi. Na ka mea a Iepeta ki a ratou, He nui ta matou whawhai ko toku iwi ki nga tamariki a Amona; a i taku karangatanga atu ki a koutou, kihai

<sup>3</sup>  
 koutou i whakaora i ahau i roto i to ratou ringa. A, no toku kitenga kihai koutou i whakaora i ahau, whakamomori atu ana ahau ki te mate, a haere ana ki nga tamariki a Amona, na homai ana ratou e Ihowa ki toku ringa: a he aha ra koutou i haere mai ai ki ahau inaianei, whawhai ai? <sup>4</sup> Katahi ka huihuia e Iepeta nga tangata katoa o Kireara, a ka whawhai ki a Eparaima: a patua iho a Eparaima e nga tangata o Kireara, mo ta ratou ki, He rerenga koutou, e nga Kireari, no Eparaima, i roto i nga <sup>5</sup> Eparaimi, i roto i nga Manahi. Na ka nohoia e nga Kireari nga whitinga mo nga Eparaimi i Horano, a, i te meatanga a nga rerenga o nga Eparaimi, Kia whiti atu ahau; na ka mea nga tangata o Kireara ki a ia, No Eparaima koe? A no tana kianga, Kahore; <sup>6</sup> Katahi ratou ka mea ki a ia, Tena, whakahuatia, Hiporete: na ko tana meatanga, Iporete: kahore hoki i taea e ia te tikanga o te whakahua. Na hopukia ana ia e ratou, a patua iho ki nga whitinga o Horano: A e wha tekau ma rua mano o <sup>7</sup> nga Eparaimi i hinga i taua wa. A e ono nga tau i whakarite ai a Iepeta mo Iharaira. Na ka mate a Iepeta Kireari, a tanumia ana ki tetahi o nga pa o Kireara. <sup>8</sup> A i muri i a ia na Ipitana i whakarite a Iharaira; no Peterehema ia. <sup>9</sup> A e toru tekau ana tama, e toru tekau hoki ana tamahine; ko enei i tonoa e ia ki waho, e toru tekau ano hoki nga tamahine i tangohia mai e ia i waho ma ana tama. A e whitu nga tau i whakarite ai ia mo Iharaira. <sup>10</sup> Na ka mate a Ipitana, a ka tanu mai ki Peterehema. <sup>11</sup> A i muri i a ia na Erono Hepuroni i whakarite a Iharaira; a kotahi tekau nga tau i whakarite ai ia mo Iharaira. <sup>12</sup> Na ka mate a Erono Hepuroni, a tanumia ana ki Aitarona ki te whenua o Hepurona. <sup>13</sup> A, muri iho i a ia, na Aparono tama a Hirere o Piratono i whakarite a Iharaira. <sup>14</sup> A e wha tekau ana tama, e toru tekau hoki nga tama a ana tama; e whitu tekau nga kua kaihe i eke ai ratou: a e waru nga tau i whakarite ai ia mo Iharaira. <sup>15</sup> Na ka mate a Aparono tama a hirere o Piratono, a ka tanumia ki Piratono ki te whenua o Eparaima, ki te whenua pukepuke o nga Amareki.

### Chapter 13

<sup>1</sup>  
 Na ka mahi kino ano nga tamariki a Iharaira i te tirohanga a Ihowa, a ka hoatu ratou e Ihowa ki te ringa o nga Pirihitini, e wha tekau tau. <sup>2</sup> Na ko tetahi tangata o Toraha no te hapu o nga Rani, tona ingoa ko Manoa, he pakoko hoki tana wahine, kahore ano i whanau tamariki. <sup>3</sup> Na ka puta te anahera a Ihowa ki te wahine, ka mea ki a ia, Na, he pakoko koe, kahore hoki i whanau tamariki: otiiia ka hapu koe, a ka whanau he tama. <sup>4</sup> Na kia tupato, kaua e inumia he waina, he wai



whakahaurangi ranei; kua ano e kainga tetahi mea poke.<sup>5</sup> No te mea ka hapu koe, a ka whanau he tama; na kua he heu e pa ki tona matenga: hei Natari hoki tena tamaiti ki te Atua no te kopu

mai ano: a mana e timata te whakaora i a Iharaira i roto i te ringa o nga Pirihitini.<sup>6</sup> Na haere ana te wahine, korero ana ki tana tahu, ka mea, Ko te tangata ra a te Atua i puta mai nei ki ahau, tona ahua kei te ahua o te anahera a te Atua; nui rawa te wehi; heoi kihai ahau i ui no hea ia, kihai ano

i korerotia mai e ia tona ingoa ki ahau.<sup>7</sup> Otiia i ki mai ia ki ahau, Ka hapu koe, a ka whanau he tama; na kua koe e inu i te waina, i te wai whakahaurangi ranei, kua ano hoki e kainga tetahi mea poke; he Natari hoki tena tamaiti ki te Atua no te kopu mai ano a mate noa.

<sup>8</sup> Na ka inoi a Manoa ki a Ihowa, ka mea, Tena ra, e toku Ariki, kia haere mai ano ki a maua te tangata a te Atua i tonoa mai na e koe, hei whakaatu i tetahi tikanga ki a maua mo te tamaiti ka

whanau nei.<sup>9</sup> A i rongu te Atua ki te reo o Manoa, a ka haere mai ano te anahera a te Atua ki te

wahine i a ia e noho ana i te parae; ko Manoa ia, ko tana tahu, kahore i a ia.<sup>10</sup> Na hohoro tonu te wahine, oma ana, korero ana ki tana tahu, ka mea ki a ia, Nana, kua puta ki ahau te tangata i haere

mai ra ki ahau i tera ra.<sup>11</sup> Na ka whakatika a Manoa, a aru ana i tana wahine, a ka tae ki taua tangata, ka mea ki a ia, Ko koe ranei te tangata i korero ra ki te wahine nei? Ka mea ia, Ae, ko ahau.

<sup>12</sup> Na ka mea a Manoa, Kia mana ra tau kupu. Tena koa nga tikanga mo te tamaiti, he aha he mahi

mana?<sup>13</sup> Ka mea te anahera a Ihowa ki a Manoa, Kia tupato te wahine i nga mea katoa i korero

ai ahau ki a ia.<sup>14</sup> Kua ia e kai i tetahi mea i puta mai i te waina; kua ano e inumia e ia he waina, he wai whakahaurangi ranei, kua ano hoki ia e kai i tetahi mea poke: kia mau ia ki nga mea katoa i kiia atu e ahau ki a ia.

<sup>15</sup> Na, ka mea a Manoa ki te anahera a Ihowa, Me pupuri maua i a koe, kia taka ai e maua he

kua koati mau.<sup>16</sup> Ka mea te anahera a Ihowa ki a Manoa, Ahakoa pupuri noa koe i ahau, e kore ahau e kai i tau taro: a ki te meatia e koe he tahunga tinana, me whakaeke ma Ihowa. Kihai hoki a

Manoa i mohio he anahera ia na Ihowa.<sup>17</sup> Na ka mea a Manoa ki te anahera a Ihowa, Ko wai tou

ingoa, kia whakahonore ai maua i a koe, ina mana au korero?<sup>18</sup> Ka mea te anahera a Ihowa ki a

ia, He aha toku ingoa i uia ai e koe; he mea whakamiharo nei hoki?<sup>19</sup> Heoi ka tikina e Manoa tetahi kua koati, me tetahi whakahere totokore, a whakaekea ana e ia ki runga ki te kamaka ki a Ihowa: na he mea whakamiharo te mahi a taua anahera, me te titiro ano a Manoa raua ko tana

wahine.<sup>20</sup> I te putanga ake hoki o te mura i runga i te aata whaka te rangi, na kua kake atu te anahera a Ihowa i roto i te mura o te aata. A, i te kitenga o Manoa raua ko tana wahine, tapapa ana

raua ki te whenua.<sup>21</sup> Kihai ia i puta mai ano te anahera a Ihowa ki a Manoa raua ko tana wahine.

<sup>22</sup> Katahi a Manoa ka mohio he anahera ia na Ihowa. Na ka mea a Manoa ki tana wahine, Ka mate  
<sup>23</sup> rawa taua; kua kite hoki taua i te Atua. Ano ra ko tana wahine ki a ia, Me i pai a Ihowa ki te  
 whakamate i a taua, kihai i tangohia e ia te tahunga tinana me te whakahere totokore i o taua ringa,  
 kihai ano hoki i whakakitea mai e ia enei mea katoa ki a taua, kihai hoki i korerotia mai inaianei  
 ki a taua nga mea penei i enei.  
<sup>24</sup> Na ka whanau taua wahine, he tama, a huaina ana e ia tona ingoa ko Hamahona: na ka tupu  
<sup>25</sup> taua tamaiti, a ka manaakitia e Ihowa. Na ka timata te wairua o Ihowa te whakaohoho i a ia i  
 te puni o Rana, i te takiwa o Toraha, o Ehetaoro.

## Chapter 14

<sup>1</sup> Na ka heke a Hamahona ki Timinata, a ka kite i tetahi wahine i Timinata no nga tamahine a  
 nga Pirihitini. <sup>2</sup> Na ka haere ia, ka korero ki tona papa raua ko tona whaea, ka mea, I kite ahau i  
 tetahi wahine i Timinata, no nga tamahine a nga Pirihitini: na, ma korua ia e tiki aianehei hei wahine  
<sup>3</sup> maku. Katahi ka mea tona papa raua ko tona whaea ki a ia; He kore koia no te wahine i roto i nga  
 tamahine a ou tuakana, a toku iwi katoa hoki, i haere ai koe ki te tiki wahine i roto i nga Pirihitini  
 kokotikore? A ka mea a Hamahona ki tona papa, Tikina atu maku; he pai hoki ia ki taku titiro.  
<sup>4</sup> Kihai hoki tona papa raua ko tona whaea i mohio he mea tena na Ihowa, he take riri ki nga Pirihitini  
<sup>5</sup> te rapua ana e ia. Na i taua wa he rangatira nga Pirihitini no Iharaira. Na ka haere a Hamahona  
 ratou ko tona papa, ko tona whaea, ki Timinata, a ka tae ki nga mara waina o Timinata, na ko te  
<sup>6</sup> hamamatanga o tetahi kua o raiona; rere ana ki a ia. Na, ko te putanga iho o te wairua o Ihowa ki  
 runga ki a ia, haea ana e ia, me te mea e haehae ana ia i te kua o koati; kahore hoki he mea i tona  
<sup>7</sup> ringa: kihai hoki i korerotia e ia ki tona papa raua ko tona whaea tana i mea ai. Na ka haere ia ki  
<sup>8</sup> raro, a ka korero ki taua wahine; a pai tonu tera ki ta Hamahona titiro. A roa iho, ka hoki ia ki te  
 tiki i a ia, a, no tona pekanga atu kia kite i te tinana o te raiona, na he pokai pi kei roto i te riu o te  
<sup>9</sup> raiona, he honi ano hoki. Na ka mauria e ia i ona ringa, a ka kai haere; a, ka tae ki tona papa raua  
 ko tona whaea, ka hoatu ma raua, a kai ana raua, kihai hoki i korerotia e ia ki a raua he mea tango  
 mai nana taua honi i roto i te riu o te raiona.  
<sup>10</sup> Na ka haere tona papa ki taua wahine, a ka tukua e Hamahona he hakari ki reira; ko te tikanga  
<sup>11</sup> hoki tera ma nga taitamariki. A, no to ratou kitenga i a ia, na ka tikina atu e ratou etahi hoa e

12  
toru tekau, hei noho ki a ia. Na ka mea a Hamahona ki a ratou, Me korero e ahau he kai ki a koutou: Ki te ata whakaaturia mai tona tikanga ki ahau i nga ra e whitu o te hakari, ki te kitea e koutou, na me hoatu e ahau etahi kakahu rinena ki a koutou, kia toru tekau, kia toru tekau ano nga

13  
whakarua mo nga kakahu. A, ki te kahore e taea e koutou te whakaatu tona tikanga ki ahau, na kia toru tekau nga kakahu rinena e homai e koutou ki ahau, kia toru tekau ano hoki nga whakarua

14  
mo nga kakahu. Na ka mea ratou ki a ia, Maka mai tau kai, a ma matou e whakarong o atu. Na ka mea ia ki a ratou, Ko tana hanga he kai, puta mai ana he kai i roto i a ia; i puta mai ano hoki he reka i roto i te mea kaha. A e toru nga ra kihai i taea e ratou te whakaatu i te tikanga o tena kai.

15  
A i te whitu o nga ra ka mea ratou ki te wahine a Hamahona, Whakawaia tau tahu kia whakaaturia mai e ia te kai ki a matou, kei tahuna koe me te whare o tou papa e matou ki te ahi: he pahua koia

16  
i a matou i karangatia ai matou e korua? ne? A ka tangi te wahine a Hamahona ki a ia, ka mea, Kua kino noa iho koe ki ahau, kahore hoki ou aroha ki ahau: kua maka nei e koe he kai ki nga tama a toku iwi, a kihai i whakaaturia tona tikanga ki ahau. Na ka mea ia ki a ia, Nana, kahore i whaka

17  
aturia e ahau ki toku papa, ki toku whaea, a me whakaatu ano e ahau ki a koe? Na ka tangi ia ki a ia i aua ra e whitu o ta ratou hakari; a i te whitu o nga ra ka whakaaturia e ia ki a ia, he tohe

18  
hoki nona ki a ia: a whakaaturia ana e ia ki nga tama a tona iwi. Na ka mea nga tangata o te pa ki a ia i te whitu o nga ra, i te mea kahore ano i to noa te ra, Ko tehea te mea reka atu i to honi? ko te aha hoki te mea kaha atu i te raiona? A ka mea ia ki a ratou, Me i kahore taku kau uha hei parau

19  
ma koutou, kihai i kitea e koutou, taku kai. Na, ko te tino putanga mai o te wairua o Ihowa ki runga ki a ia, a haere ana ia ki raro, ki Ahakerono, a patua iho o ratou e toru tekau nga tangata, na huia ana e ia o ratou, a hoatu ana he whakarua mo nga kakahu o nga kaiwhakaatu o te tikanga o te

20  
kai. Na mura tonu tona riri, a haere ana ia ki runga ki te whare o tona papa. Heoi hoatu ana ta Hamahona wahine ki tona hoa i waiho hei hoa mona.

## Chapter 15

1  
Otiia i muri iho, na ka haere a Hamahona, me tetahi kua koati, i te wa o te kotinga witi, kia kite i tana wahine, a ka mea, Ka haere ahau ki taku wahine ki roto ki te whare moenga. Otiia kihai

2  
ia i tukua e te papa o te wahine kia haere ki roto. I mea hoki tona papa, i tino mea ahau e kino rawa ana koe ki a ia; na hoatu ana ia e ahau ma tou hoa; kahore ianei tona teina e pai atu i a ia?

3  
Tena kia riro tenei i a koe hei utu mo tera. Na ka mea a Hamahona ki a ratou, Engari i tenei, ka

4  
kore hara ahau ki nga Pirihitini, ina tukino ahau ki a ratou. Na haere ana a Hamahona, a hopukia

ana e ia e toru rau nga pokiha; katahi ka tikina etahi rama e ia, a whakaangahia atu ana nga hiawero  
<sup>5</sup> ki a raua whaka hiawero, a whakanohoia iho he rama ki waenganui o nga hiawero e rua. Na ka  
 tahuna e ia nga rama, a tukua atu ana ki te witi a nga Pirihitini, wera ake nga puranga witi, me nga  
<sup>6</sup> mea ano e tu ana; nga mara waina, oriwa ano hoki. A ka ki nga Pirihitini, Na wai tenei mahi? na  
 ka korerotia, Na Hamahona hunaonga a te Timini; mona i tango i tana wahine, a hoatu ana ki tona  
<sup>7</sup> hoa. Katahi ka haere nga Pirihitini, a tahuna ake e ratou te wahine raua ko tona papa ki te ahi. Na  
 ka mea a Hamahona ki a ratou, Ahakoa kua meatia tenei e koutou, he pono ka rapu utu ano ahau i  
<sup>8</sup> a koutou, a muri iho ka mutu taku. Na tukitukia ana ratou e ia, te papa, te huha, he nui te patunga,  
 a haere ana, noho ana i te kapiti o te kamaka i Etama.

<sup>9</sup> Katahi ka haere nga Pirihitini, noho ana i Hura, tohatoha noa atu i Rehi. <sup>10</sup> Na ka mea nga  
 tangata o Hura, He aha koutou i haere mai ai ki a matou? Na ka mea ratou, He here i a Hamahona  
<sup>11</sup> i haere mai ai matou, kia meatia ki a ia tana i mea ai ki a matou. Katahi ka haere etahi tangata  
 o Hura, e toru nga mano, ki te kapiti o te kohatu i Etama, ka mea ki a Hamahona, Kahore ianei koe  
 e mohio he rangatira no tatou nga Pirihitini? he mahi aha tenei nau ki a matou? Na ka mea ia ki a  
<sup>12</sup> ratou, Rite tonu ki ta ratou i mea mai ai ki ahau, taku i mea ai ki a ratou. Na ka mea ratou ki a  
 ia, He here i a koe i haere mai ai matou, kia hoatu koe ki te ringa o nga Pirihitini. Na ka mea a  
<sup>13</sup> Hamahona ki a ratou, Oati mai ki ahau e kore koutou na e rere ki runga ki ahau. Na ka korero  
 ratou ki a ia, ka mea, Kahore; erangi me ata here koe e matou, a ka hoatu koe ki to ratou ringa: ko  
 te whakamate ia, e kore matou e whakamate i a koe. Na ka herea ia e ratou ki nga taura hou e rua,  
<sup>14</sup> a kawea atu ana i te kamaka. I tona taenga ki Rehi, na ka hamama nga Pirihitini i te tutakitanga  
 ki a ia. Ko te tino putanga o te wairua o Ihowa ki runga ki a ia: na rite tonu nga taura i ona ringa ki  
<sup>15</sup> te muka kua wera i te ahi; harotu noa iho nga here o ona ringa. Na kia pono ia ki tetahi kauae  
 kaihe, he mea hou, a totoro atu ana tona ringa, tangohia ake ana; na kotahi mano tangata i patua e  
<sup>16</sup> ia ki taua mea. Na ka mea a Hamahona, Na te kauae kaihe, puranga atu, puranga atu; na te kauae  
<sup>17</sup> kaihe, patua iho e ahau kotahi mano tangata. A, i te mutunga o tana korero, na maka atu ana e  
 ia te kauae i tona ringa, a huaina iho te ingoa o tena wahi, Ko Ramatarehi.

<sup>18</sup> Na nui rawa tona matewai, a ka karanga ia ki a Ihowa, ka mea, Nau i homai tenei whakaoranga  
 nui ki te ringa o tau pononga, a ka mate nei ahau i te matewai, ka hinga hoki i te ringa o te hunga  
<sup>19</sup> kokotikore? Na ka wahia e te Atua he poka i Rehi, a ka puta mai he wai i reira. Katahi ka inu  
 ia, a hoki ana tona wairua, na kua ora ia. Na reira i huaina ai to reira ingoa, Ko Enehakore: kei Rehi  
<sup>20</sup> na ano a tae noa ki tenei ra. Na e rua tekau nga tau i whakarite ai ia mo Iharaira i nga ra o nga  
 Pirihitini.

## Chapter 16

<sup>1</sup> I haere ano a Hamahona ki Kaha, a ka kitea e ia tetahi wahine kairau i reira, a haere atu ana  
<sup>2</sup> ki a ia. A ka korerotia ki nga Kahi, ka meatia, Kua tae mai a Hamahona ki konei. Na ka karapotia  
 ia e ratou, ka whanga hoki ratou ki a ia a pau noa te po i te kuwaha o te pa. Na takoto puku ana  
 ratou a pau noa, taua po; i mea hoki, Waiho kia awatea, ka pa tu ai tatou i a ia. <sup>3</sup> Heoi takoto ana  
 a Hamahona a turuawaenga po; katahi ia ka whakatika i waenganui po, a ka mau i te tatau o te  
 kuwaha o te pa, ki nga pou hoki e rua: na unuhia ake ana, ana tutaki, ana aha; a hikitia ana ki runga  
 ki ona pokohiwi, amohia ana ki te t ihi o te maunga i te ritenga atu o Heperona.

<sup>4</sup> A, muri iho ka aroha ia ki tetahi wahine i te awaawa o Horeke, ko Terira tona ingoa. <sup>5</sup> Na ka  
 haere nga rangatira o nga Pirihitini ki taua wahine, ka mea ki a ia, Whakawaia ia kia kitea ai no  
 hea tona kaha nui, a ma te aha ia e taea ai e matou, kia herea ai ia e matou, kia whakaitia: a kotahi  
 mano kotahi rau nga hiriwa e hoatu e ten ei, e tenei o matou ki a koe. <sup>6</sup> Na ka mea a Terira ki a  
 Hamahona, Tena, whakaaturia mai ki ahau no hea tou kaha nui, ma te aha hoki e taea ai koe te  
 here, kia whakaitia ai koe? <sup>7</sup> Na ka mea a Hamahona ki a ia, Ki te herea ahau e ratou ki nga aka  
 hou e whitu, kahore nei i whakamaroketia, katahi ahau ka kahakore, ka rite ki tetahi atu tangata.

<sup>8</sup> Na ka maua e nga rangatira o nga Pirihitini etahi aka hou e whitu ki a ia, he mea kahore ano i  
 whakamaroketia; a herea ana ia e ia ki aua mea. <sup>9</sup> Na tera i taua wahine, i te ruma i roto, etahi  
 tangata e tauwhanga ana. Na ka mea ia ki a ia, E Hamahona, ko nga Pirihitini, ka eke ki a koe! Na  
 motumotuhia ana e ia nga aka: koia ano kei te miro muka e motu ana ina pa ki te ahi. Heoi kihai i  
 moh iotia tona kaha. <sup>10</sup> Na ka mea a Terira ki a Hamahona, Nana, kua tinihangatia ahau e koe, kua  
 teka koe ki ahau; tena ra, whakaaturia mai ki ahau ma te aha koe e mau ai te here? <sup>11</sup> A ka mea ia  
 ki a ia, Ki te herea iana ahau ki etahi taura hou kahore ano i meatia ki te mahi, katahi ahau ka  
 kahakore, ka rite ki tetahi atu tangata. <sup>12</sup> Na ka mau a Terira ki etahi taura hou, ka here i a ia; a ka  
 mea ki a ia, E Hamahona, ko nga Pirihitini, ka eke ki a koe! Na i te ruma i roto nga kaiwhanga e  
 noho ana. Na motuhia ana e ia i ona ringa, ano he miro. <sup>13</sup> Na ka mea a Terira ki a Hamahona, He  
 tinihanga tau ki ahau, he korero teka a tae mai nei: whakaaturia ki ahau ma te aha koe e mau ai te  
 here? Ka mea ia ki a ia, Ki te whatua e koe nga makawe e whitu o toku matenga ki roto ki te whenu.

<sup>14</sup> Na titia iho ana e ia ki te titi, a ka mea ki a ia, E Hamahona, ko nga Pirihitini ka eke ki a koe!  
<sup>15</sup> Na ko tona ohonga ake i tana moe, ka unuhia te titi o te mea whatu me te whenu ano. Na ka mea  
 te wahine ki a ia, He aha koe i mea ai, E aroha ana ahau ki a koe, kahore nei hoki tou ngakau i riro  
 mai i ahau? Ka toru enei mamingatanga au i ahau, kihai ano hoki i whakaaturia e koe ki ahau no

16  
hea tou kaha nui. Nawai a kahore he ra i kapea tana aki i a ia ki ana kupu, me te tohe ki a ia, a

17  
mate noa iho tona wairua i te hoha; Katahi ka whakaaturia e ia ki a ia tona ngakau katoa, ka mea  
ki a ia, Kahore ano i pa noa he heu ki toku mahunga; he Natari hoki ahau ki a Ihowa no te kopu  
mai ano o toku whaea: ki te heua ahau, katahi ka riro atu toku kaha i ahau, a ka kahakore ahau, ka  
rite ki te mano o te tangata.

18  
A, no te kitenga o Terira kua whakaaturia tona ngakau katoa ki a ia, ka tono tangata ia ki te  
karanga i nga rangatira o nga Pirihitini, hei mea, Haere mai ano koa aiane, kua whakaaturia hoki  
e ia tona ngakau katoa ki ahau. Na ka haere mai nga rangatira o nga Pirihitini ki a ia, me te mau

19  
mai i te moni i o ratou ringa. Na ka whakamoea ia e ia ki runga i ona turi, a ka karanga ki tetahi  
tangata, a heua ana nga makawe e whitu o tona mahunga; na ka timata tana whakaiti i a ia, a mahue

20  
ake ia i tona kaha. Na ka mea tera, E Hamahona ko nga Pirihitini ka eke ki a koe! Na maranga  
ana ia i tana moe, ka mea, Ka haere ahau ki waho, ka pera me mua ra, ruru ai i ahau. Heoi kihai ia

21  
i matau kua mawehe atu a Ihowa i a ia. Na ka hopukia ia e nga Pirihitini, a tikarohia ana ona  
kanohi; a kawea ana ia e ratou ki raro, ki Kaha; na herea ana ia ki nga mekameka parahi; a he huri  
mira tana mahi i roto i te whare herehere.

22  
Heoi kua timata ano nga makawe o tona mahunga te tupu i muri i tona heunga. 23 Na ka  
huihui nga rangatira o nga Pirihitini ki te patu i tetahi whakahere nui ki a Rakona, ki to ratou atua,  
ki te whakamanamana ano hoki: i mea hoki, Kua homai to tatou hoariri a Hamahona e to tatou atua

24  
ki to tatou ringa. A, no te kitenga o te iwi i a ia, ka whakamoemiti ki to ratou atua: i mea hoki,  
Kua homai to tatou hoariri e to tatou atua ki to tatou ringa, te tangata nana to tatou whenua i huna,

25  
he tokomaha hoki o tatou i patua e ia. A i o ratou ngakau e koa ana, ka mea ratou, Karangatia  
a Hamahona, hei mea takaro ma tatou. Katahi ka karangatia a Hamahona i roto i te whare herehere,

26  
a takaro ana ia i to ratou aroaro: na ka whakaturia ia e ratou ki waenganui o nga pou. Na ka mea  
a Hamahona ki te tamaiti i pupuri nei i a ia ki tona ringa, Tukua ahau kia whawha ki nga pou

27  
tokomanawa o te whare hei okiokinga atu moku. Na, ki tonu te whare i te tane, i te wahine; i  
reira ano hoki nga rangatira katoa o nga Pirihitini: i runga ano i te tuanui me te mea e toru mano

28  
nga tane, nga wahine, e matakita ana ki nga mahi takaro a Hamahona. Katahi ka karanga a  
Hamahona ki a Ihowa, ka mea, E te Ariki, e Ihowa, kia mahara ki ahau, whakakahangia hoki ahau,  
e te Atua, i tenei wa kotahi nei, kia ea tonu aiane ki runga i nga Pirihitini toku mate i oku kanohi

29  
e rua. Na hopukia atu ana e Hamahona nga pou tokomanawa e rua o waenga, i tu ai, i mau ai te

30  
whare, ko tetahi ki tona ringa matau, ko tetahi ki tona mau. Na ka mea a Hamahona, Kia mate  
tahi ahau me nga Pirihitini. Ko tona tino pikonga iho, me te whakapau ano i tona kaha; heoi hinga  
ana te whare ki runga ki nga rangatira, ki runga ano hoki ki te iwi katoa i roto. Heoi tini atu i ana

31

i patu ai i to na oranga te hunga i mate i whakamatea nei e ia, i tona matenga. Katahi ka haere iho ona teina ki raro, ratou ko te whare katoa o tona papa, a tangohia ana ia e ratou, kawea atu ana, tanumia ana ki waenganui o Toraha o Ehetaoro, ki te rua o Manoa, o tona papa. A e rua tekau nga tau i whakarite ai ia mo Iharai ra.

## Chapter 17

1 Na i te whenua pukepuke o Eparaima tetahi tangata, ko Mika tona ingoa. 2 Na ka mea ia ki tona whaea, Ko nga hiriwa kotahi tekau ma tahi rau i tangohia ra i a koe, te mea i kanga ra koe, i korero ai hoki koe ki oku taringa, nana, kei ahau aua hiriwa; naku i tango. Na ka mea tona whaea, Ma Ihowa koe e manaaki, e taku ta ma. 3 Na ka whakahokia e ia nga hiriwa kotahi tekau ma tahi rau ki tona whaea, a ka mea tona whaea; Ka whakatapua rawatia e ahau te hiriwa ma Ihowa, he mea na toku ringa ma taku tama, hei hanga whakapakoko, he mea whaowhao, he mea whakarewa. Na, me wha kahoki atu e ahau ki a koe inaianei. 4 Na, i tana whakahokinga i te moni ki tona whaea, ka tango tona whaea i nga pihi hiriwa e rua rau, a hoatu ana ki te kaiwhakarewa, a nana i hanga tetahi whakapakoko whaowhao me tetahi mea whakarewa; na ka takoto aua mea ki te whare o Mika. 5 Na he whare atua to taua tangata, to Mika, i hanga ano he epora e ia, me etahi terapimi, a i whakatohungatia hoki e ia tetahi o ana tama, a meinga ana hei tohunga mana. 6 I aua ra kahore o Iharaira kingi; ko ta ratou i mea ai ko nga mea i tika ki te titiro a tenei, a tenei. 7 Na tera tetahi taitama o Peterehema Hura, o te hapu o Hura, he Riwaiti, a i reira ano ia e noho ana. 8 Na ka haere atu taua tangata i te pa, i Peterehema Hura, kia noho ki tana wahi e kite ai: a, i a ia e haere ana, ka tae ia ki te whenua pukepuke o Eparaima, ki te whare o Mika. 9 Na ka mea a Mika ki a ia, I haere mai koe i hea? A ka mea ia ki a ia, He Riwaiti ahau no Peterehema Hura, a e haere ana ahau kia noho ki taku wahi e kite ai. 10 Na ka mea a Mika ki a ia, E noho ki ahau, a hei matua koe moku, hei tohunga hoki, a kia tekau nga kiriwa e hoatu e ahau ki a koe i te tau, kia kotahi ano te whakaritenga kakahu, me te kai ano mau. Na ka tomo atu te Riwaiti. 11 A pai tonu te Riwaiti kia noho ki taua tangata; a ka meinga taua taitamariki e ia kia rite ki tetahi o ana tama. 12 Na whakatohungatia ana e Mika taua Riwaiti, a ka waiho taua taitama hei tohunga mana, a noho ana i roto i te whare o Mika. 13 Na ka mea a Mika, Katahi ahau ka mohio ka atawhaitia ahau e Ihowa, ina hoki ka riro mai nei te Riwaiti hei tohunga moku.

## Chapter 18

<sup>1</sup> I aua ra kahore o Iharaira kingi: i aua ra hoki e rapu ana te iwi o nga Rani i tetahi kainga mo ratou hei nohoanga; kihai hoki tetahi kainga tupu i tau ki a ratou i roto i nga iwi o Iharaira a tae noa ki taua ra.

<sup>2</sup> Na ka tono nga tamariki a Rana i etahi tangata tokorima o to ratou hapu, he hunga maia, i roto i o ratou rohe, i Toraha, i Ehetaoro, hei tutei i te whenua, hei titiro hoki: i mea hoki ki a ratou, Tikina, tirohia te whenua. Na ka tae ratou ki te w henua pukepuke o Eparaima, ki te whare

<sup>3</sup> o Mika, noho ana i reira. I a ratou i te whare o Mika, ka mohiotia e ratou te reo o taua taitamariki, o te Riwaiti: na peka ana ki reira, a ka mea ki a ia, Na wai koe i kawe mai ki konei? e aha ana hoki

<sup>4</sup> koe i konei? a he aha tau i konei? Na ka mea ia ki a ratou, Ko nga mea tenei i meatia e Mika ki

<sup>5</sup> ahau; nana hoki ahau i utu, na hei tohunga ano ahau ki a ia. A ka mea ratou ki a ia, Tena, ui atu

<sup>6</sup> ki te Atua kia mohio ai matou ka tika ranei to matou ara e haere nei matou. Na ka mea te tohunga ki a ratou, Haere marie, kei te aroaro o Ihowa to koutou ara e haere na koutou.

<sup>7</sup> Na ka haere aua tangata tokorima, ka tae ki Raihi, a ka kite i nga tangata o reira, i te pai o ta ratou noho, rite tonu ki a nga Haironi, te ata noho, te mau; kahore hoki he tangata whai mana o te whenua hei mea kia whakama ratou ki tetahi mea, a e matara mai ana ratou i nga Haironi, kahore

<sup>8</sup> hoki a ratou aha ki tetahi tangata. Na ka tae ratou ki o ratou tuakana, ki Toraha, ki Ehetaoro; a

<sup>9</sup> ka mea o ratou tuakana ki a ratou, He aha ta koutou korero? Katahi ratou ka mea atu, Whakatika, kia whakaekea ratou e tatou; kua kite hoki matou i te whenua, na he pai rawa; a me ata noho ano

<sup>10</sup> ranei koutou? kua ra e mangere, ki te haere ki te tango i tera whenua: Ka haere koutou, ka tae atu koutou ki tetahi iwi e noho tatu ana, a he nui hoki te whenua; kua homai nei hoki e te Atua ki

<sup>11</sup> o koutou ringa; he wahi, kahore nei i hapa i tetahi mea o te whenua. Na turia atu ana i reira e te hapu o nga Rani, i roto i Toraha, i Ehetaoro, e ono rau tangata, whitiki rawa ki nga rakau o te

<sup>12</sup> whawhai. Na ka haere ratou, a ka pupahi ki Kiriata Tearimi, ki Hura; koia i huaina ai te ingoa

<sup>13</sup> o tera wahi, ko Mahanerana a mohoa noa nei: koia tena i tua atu o Kiriata Tearimi. Na, i haere atu ratou i reira ki te whenua pukepuke o Eparaima, a ka tae ki te whare o Mika.

<sup>14</sup> Na ko te ohonga o nga tangata tokorima i haere nei ki te tutei i te whenua o Raihi, ka mea ki o ratou tuakana, E mohio ana ranei koutou kei enei whare he epora, he terapimi, he whakapakoko

<sup>15</sup> whaowhao, me tetahi mea whakarewa? na ma koutou te whaka aro ki ta koutou e mea ai. Na ka peka ratou ki reira, a ka tae ki te whare o taua taitamariki, o te Riwaiti, ara ki te whare o Mika, a

<sup>16</sup> oha atu ana ki a ia. A, ko nga tangata e ono rau o nga tama a Rana me a ratou rakau whawhai,



<sup>17</sup> tu tonu i te tomokanga o te kuwaha. Na haere atu ana nga tangata tokorima i haere ra ki te tutei i te whenua, a ka tae ki reira; kei te tango i te whakapakoko whakairo, i te epora, i nga terapimi, i te whakapakoko hoki i whakarewaina: na ko te tohunga i te tomokanga ki te kuwaha e tu ana, ratou

<sup>18</sup> ko nga tangata e ono rau, me a ratou rakau whawhai, whitiki tonu. A, no te haerenga o era ki te whare o Mika, no te tangohanga i te whakapakoko whakairo, i te epora, i nga terapimi, i te mea

<sup>19</sup> hoki i whakarewaina, ka mea te tohunga ki a ratou, E aha ana koutou? Ano ra ko ratou ki a ia, Whakarongoa, kopania atu tou ringa ki tou mangai, a haere mai tatou, hei matua hoki koe mo matou, hei tohunga. Ko tehea te mea pai? kia waiho koe hei tohunga mo te whare o te tangata kotahi, kia

<sup>20</sup> waiho ranei hei tohunga m o tetahi iwi, mo tetahi hapu hoki o Iharaira? Na ka koa te ngakau o te tohunga, a ka mau ia ki te epora, ki nga terapimi, ki te whakapakoko whakairo, a haere ana i roto

<sup>21</sup> i taua hunga. Katahi ratou ka tahuri, ka haere; a maka ana e ratou nga tamariki, nga kararehe,

<sup>22</sup> me nga taonga ki mua i a ratou. Ka matara atu ratou i te whare o Mika, na ka huihuia nga tangata

<sup>23</sup> o nga whare i tata ki te whare o Mika, a ka mau atu i a ratou nga tama a Rana. Na ka karanga ratou ki nga tama a Rana. A ka tahuri mai nga aroaro o era, ka mea ki a Mika, He aha tau i huihui

<sup>24</sup> tangata mai ai koe? Na ka mea ia, Kua tangohia atu ra e koutou aku atua i hanga ai, me te tohunga, a kua haere atu; a he aha atu ano taku? he aha hoki kia ki mai koutou ki ahau, He aha tau?

<sup>25</sup> A ka mea nga tama a Rana ki a ia, Kei rangona tou reo e matou, kei torere atu ki a koe te hunga

<sup>26</sup> ngakau aritarita, a ka mate koe me tou whare katoa. Na haere ana nga tama a Rana i to ratou ara, i te kitenga hoki o Mika he kaha rawa ratou i a ia, ka tahuri ia, a hoki ana ki tona whare.

<sup>27</sup> A maua atu ana e ratou nga mea i hanga e Mika, me te tohunga i noho ki a ia, a haere ana ki Raihi, ki tetahi iwi e ata noho ana, kahore ona whakaohooho; na patua iho e ratou ki te mata o

<sup>28</sup> te hoari, tahuna ake hoki e ratou te pa ki te ahi. Kahore hoki he tangata hei whakaora; no te mea he matara a reira i Harona, kahore ano a ratou aha ki tetahi tangata: i te raorao hoki a reira, i

<sup>29</sup> Peterehopo. Na hanga ana e ratou te pa, a noho ana i reira. A huaina ana e ratou te ingoa o te pa ko Rana, ko te ingoa o to ratou matua, o Rana, i whanau nei ma Iharaira: ko Raihi ia te ingoa o te

<sup>30</sup> pa i mua. Na whakaturia ana e nga tama a Rana mo ratou te whakapakoko whaowhao, a ko Honatana hoki tama a Kerehoma, tama a Mohi, ratou ko ana tama nga tohunga o te iwi o nga Rana

<sup>31</sup> tae noa ki te ra i whakaraua ai te whenua. A tu tonu ta ratou whakapakoko whakairo, ta Mika i hanga ra, i nga ra katoa o te whare o te Atua i Hiro.

## Chapter 19

<sup>1</sup> A i aua ra, i te mea kahore he kingi o Iharaira, na ko tetahi tangata, he Riwaiti, e noho noa iho ana i te taha ki tua o te whenua pukepuke o Eparaima; na ka tango ia i tetahi wahine iti mana i roto i Peterehema Hura. <sup>2</sup> Na kua puremu tana wahine iti, a mawehe atu ana i a ia ki te whare o tona papa, ki Peterehema Hura, a e wha nga tino marama ona ki reira. <sup>3</sup> Na ka whakatika tana tahu, a haere ana ki te whai i a ia, ki te whakamarie i a ia, ki te whakahoki mai i a ia; ko tana tangata hoki tona hoa haere, me nga kaihe e rua: na ka kawea ia e te wahine ra ki te whare o tona papa, a, no te kitenga o te papa o te kotiro i a ia, koa tonu, no te mea ka tutaki ki a ia. <sup>4</sup> Na ka pupuri tona hungawai, te papa o te kotiro, i a ia; a e toru nga ra i noho ai ia ki a ia; heoi kai ana, inu ana raua, a noho ana i reira. <sup>5</sup> A i te wha o nga ra ka maranga wawe ratou i te ata, a whakatika ana ia ki te haere: na ka mea te papa o te kotiro ki tana hunaonga, Kia ora tou ngakau i tetahi wahi taro, a muri iho ka haere. <sup>6</sup> Na ka noho raua, ka kai, ka inu tahi to raua tokorua, na ka mea te papa o te kotiro ki taua tangata, Tena koa, noho iho i te po nei, kia koa hoki tou ngakau. <sup>7</sup> A, i te whakatikanga o taua tangata ki te haere, ka tohea ia e tona hungawai, na ka moe ano ia ki reira. <sup>8</sup> A i te rima o nga ra ka maranga wawe ia ki te haere, a ka mea te papa o te kotiro, Kia ora tou ngakau: e noho korua kia titaha ra te ra; a kai ana raua tokorua. <sup>9</sup> Na ka whakatika taua tangata ki te haere, a ia, tana wahine iti me tana tangata, a ka mea tona hungawai, te papa o te kotiro ki a ia, Nana, kua heke te ra, kua ahiahi, e noho ra, nana kua tawharara te ra, hei konei moe ai, kia koa ai tou ngakau; a hei te ata apopo ka maranga wawe ai koutou ki te ara, ka haere ki tou kainga. <sup>10</sup> Otiia kihai taua tangata i pai kia noho i taua po, engari whakatika ana ia, haere ana, a ka tae ki te ritenga atu o Iepuhu, ara o Hiruharama: i a ia ano hoki nga kaihe e rua, whakanoho rawa, i a ia ano hoki tana wahine iti. <sup>11</sup> Ka tata ratou ki Iepuhu, na kua aua noa atu te ra; a ka mea te tangata ki tona rangatira, Tena, kia peka tatou ki tenei pa o nga Iepuhi, ki reira moe ai. <sup>12</sup> Na ka mea tona rangatria ki a ia, E kore tatou e peka ki te pa o te iwi ke, ehara nei i nga tamariki a Iharaira; engari me haere atu tatou ki Kipea. <sup>13</sup> Na ka mea ia ki tana tangata, Haere mai, tatou ka whakatata ki tetahi o enei wahi; ka moe ai tatou ki Kipea, ki Rama ranei. <sup>14</sup> Na ka whiti atu ratou, ka haere; a kua tonene te ra i a ratou ka tata ki Kipea, ki tetahi pa o Pineamine. <sup>15</sup> Na ka peka ratou ki reira, ka haere ki Kipea moe ai: a, i tona taenga atu, ka noho ki te waharoa o te pa; kahore hoki he tangata hei mau i a ratou ki tona whare moe ai

16

Na ko tetahi tangata, he koroheke, e haere mai ana i tana mahi i te mara i te ahiahi; a ko taua tangata no te whenua pukepuke o Eparaima, i Kipea hoki e noho ana; ko nga tangata ia o te pa, he

17

Pineamini. A ka maranga ake ona kanohi, ka kite i te tangata konene i te waharoa o te pa, na ka

18

mea taua koroheke, Ko hea koe? i haere mai ano hoki koe i hea? Na ka mea ia ki a ia, I haere mai matou i Peterehema Hura, a e haere ana matou ki tera taha o te whenua pukepuke o Eparaima; no reira ahau; ai haere ahau ki Peterehema Hura; otia e haere ana tenei ahau ki te whare o Ihowa;

19

heoi kahore he tangat a hei mau i ahau ki roto ki tona whare. He kakau witi ano ia tenei, he kai ma a matou kaihe; he taro ano tenei, he waina hoki maku, a ma tau pononga wahine, ma te tahake

20

hoki a au pononga: kahore he mate ki te aha, ki te aha. Na ka mea taua koroheke, Kia tau te rangimarie ki a koe, He ahakoa ra, waiho mai i ahau nga mea katoa e matea e koe; otia kaua e moe

21

ki te waharoa. Na mauria ana e ia ki tona whare, a hoatu ana he kai ma nga kaihe: a horoia ana e ratou o ratou waewae, kai ana, inu ana.

22

E mea ake ana o ratou ngakau ki to koa, na, ko te karapotinga o te whare e nga tangata o te pa, he tama na Periara; kei te patuki ki te tatau, ka korero ki te tangata nona te whare, ki taua koroheke ra, ka mea, Whakaputaina mai ki waho tena tang ata i haere na ki tou whare, kia mohio

23

ai matou ki a ia. Na ka haere atu ki a ratou te tangata nona te whare, ka mea ki a ratou, Kaua ra, e oku tuakana, kaua e mahia te mea kino; kua tae mai nei hoki tenei tangata ki toku whare, kaua

24

tenei mea poauau e meatia. Na ko taku tamahine tenei, he wahine, me tana wahine iti hoki; maku raua e kawea atu inaianei, whakaititia raua e koutou, meatia hoki ki a raua te mea e pai ana ki ta

25

koutou titiro: ko tenei tangata ia, kaua tenei mea poauau e meatia ki a ia. A te pai nga tangata ki te whakarongo ki a ia, na ka mau taua tangata ki tana wahine iti, a kawea atu ana ki waho ki a ratou, a ka mohio ratou ki a ia, ka tukino hoki i a ia i taua po katoa a tae noa ki te ata: a ka hi te ata,

26

ka tukua ia e ratou. Na ka haere mai te wahine ra i te puatanga o te ata, takoto ana ki te kuwaha

27

o te whare o te tangata kei reira nei tona ariki, a marama noa. A ka whakatika ake tona ariki i te ata, na ka huakina e ia nga tatau o te whare, ka puta atu, he mea kia haere i tona ara: na ko te wahine ra, ko tana wahine iti, kua hinga ki te kuwaha o te whare, ko ona ringa i runga i te paepae

28

o te tatau. Na ka mea ia ki a ia, Whakatika kia haere tatou. Kahore ia tetahi i whakao mai. Na

29

ka hapainga ia e ia ki runga ki te kaihe. A ka maranga taua tangata, haere ana ki tona wahi. A, no tona taenga ki tona whare, ka tikina e ia tetahi maripi, a ka mau ki tana wahine iti, tapatapahia ana e ia ona wahi, kia tekau ma rua nga wahanga, a tukua ana ki nga rohe katoa o Ihairaira, puta

30

noa. A i mea te hunga katoa i kitea ai, Kahore tenei i mua, kahore ano hoki i kitea he rite mo tenei o te ra i haere mai ai nga tamariki a Ihairaira i te whenua o Ihipa a mohoa noa nei: maharatia iho, whakaaroa, korerotia.

## Chapter 20

<sup>1</sup> Na ka puta nga tamariki katoa a Iharaira, a huihui ana te whakaminenga me te mea he tangata kotahi, no Rana mai ano a Peerehepa atu ana, no te whenua ano hoki o Kireara, ki a Ihowa, ki Mihipa.

<sup>2</sup> I puta mai ano nga rangatira o te iwi katoa, o nga iwi katoa o Iharaira, i roto i te huihui o te iwi a te Atua, e wha rau nga mano, he hunga haere i raro, he hunga mau hoari.

<sup>3</sup> A i rongo nga tamariki a Pineamine kua tae nga tamariki a Iharaira ki Mihipa. Na ka mea nga tamariki a Iharaira,

<sup>4</sup> Korerotia mai i peheatia tenei mea kino. Na ka utua e te Riwaiti, e te tangata nana te wahine i kohurutia ra, ka mea, I haere mai ahau ki Kipea, ki tera i a Pineamine, maua ko taku wahine iti,

<sup>5</sup> moe ai. Na ko te whakatikanga mai o nga tangata o Kipea ki ahau, kei te karapoti i te whare i te po, he mea hoki moku; i mea ratou kia patua ahau: na whakaititia ana taku wahine a mate iho.

<sup>6</sup> Na ka mau ahau ki taku wahine, a tapatapahia ana e ahau, hoatu ana kia kawea puta noa i te whenua, i te kainga tupu o Iharaira, mo ratou i mahi i te mahi kino, i te mahi poauau i roto i a Iharaira.

<sup>7</sup> Na, e nga tamariki a Iharaira, koutou katoa, homai ki konei ta koutou kupu, me to koutou whakaaro.

<sup>8</sup> Na ka whakatika katoa te iwi ano he tangata kotahi, ka mea, E kore tetahi o tatou e haere ki tona teneti, e kore ano hoki tetahi o tatou e peka atu ki tona whare.

<sup>9</sup> Engari ko ta tatou tenei e mea ai ki Kipea: ma te rota te tikanga mo ta tatou whawhai ki reira.

<sup>10</sup> Me tango tangata, kia tekau i roto i te rau, i nga iwi katoa o Iharaira, he rau i roto i te mano, he mano i roto i te tekau mano, hei mau o mo te iwi; a ka tae ki Kipea o Pineamine ka rite ta ratou e mea ai ki nga mea poauau katoa i mahia e rato u i roto i a Iharaira.

<sup>11</sup> Heoi huihui ana nga tangata katoa o Iharaira hei whakaeke mo te pa, piri tonu me te mea he tangata kotahi ratou.

<sup>12</sup> Na ka tonu tangata nga iwi o Iharaira puta noa i te iwi katoa o pineamine, hei mea, He aha tenei mea kino kua meatia nei i roto i a koutou?

<sup>13</sup> Na homai aianeia aua tangata, nga tama a Periara i Kipea, kia whakamatea e matou, kia whakakorea ai te kino i roto i a Iharaira. Otiia kihai a Pineamine i pai ki te whakarongo ki te reo o o ratou tuakana, o nga tamariki a Iharaira.

<sup>14</sup> Na ka huihui nga tama a Pineamine i roto i nga pa ki Kipea, ka haere ki te whawhai ki nga tama a Iharaira.

<sup>15</sup> Na ka taua i taua ra nga tama a Pineamine o nga pa, e rua tekau ma ono mano nga tangata, he hunga mau hoari; tera atu ano nga tangata o Kipea; i taua ratou e whitu rau tangata, whiriwhiri rawa.

<sup>16</sup> Kei roto ano i tenei hunga katoa etahi, e whitu rau, he hunga whiriwhiri, he maui; ko enei katoa he hunga e pua ai te kohatu ki te huruhuru mahunga, a e kore e taha.

<sup>17</sup> I taua ano hoki nga

tangata o Iharaira, nga mea ehara i a Pineamine, e wha rau mano tangata, he hunga mau hoari: he hunga hapai pakanga enei katoa.

18

Katahi nga tama a Iharaira ka whakatika, ka haere ki Peteere, ka ui atu ki te Atua, ka mea, Ko wai o matou hei timata te haere ki te whawhai ki nga tama a Pineamine? Na ka mea a Ihowa,

19

Ma Hura e timata. Na ka maranga nga tama a Iharaira i te ata, a ka noho ki Kipea. Na ka haere nga tama a Iharaira ki te whawhai ki a Pineamine; a whakaritea ana a ratou ngohi e nga tama

21

a Iharaira mo te whawhai ki Kipea. Na ka puta nga tama a Pineamine i roto i Kipea, a pirau rawa

22

i a ratou ki te whenua i taua ra e rua tekau ma rua mano o nga tangata o Iharaira. Na ka whakatenatena te iwi, nga tangata o Iharaira, i a ratou ano, a whakaritea ana ano a ratou ngaohi kia

23

whawhai ai ki taua wahi ano i whakaritea ai i te ra tuatahi. I haere ano nga tama a Iharaira, i tangi ki te aroaro o Ihowa a ahiahi noa, i ui atu hoki ki a Ihowa, i mea, Me haere atu ano ahau ki te whawhai ki nga tama a Pineamine, a toku teina? Na ka mea a Ihowa, Haere ki te whawhai ki a

24

ia. Na ka whakatata nga tama a Iharaira ki nga tama a Pineamine i te rua o nga ra. I puta mai ano a Pineamine i roto i Kipea i te rua o nga ra ki te tu ki a ratou, a pirau rawa ano i a ratou ki te whenua tekau ma waru mano o nga tama a Iharaira; he hunga mau hoari katoa enei.

25

26

Katahi ka haere nga tama katoa a Iharaira me te iwi katoa, a ka tae ki Peteere; na ka tangi ratou, a ka noho i reira ki te aroaro o Ihowa, kahore rawa hoki i kai i taua ra a ahiahi noa; me te

27

whakaeke ano hoki i nga tahunga tinana, i nga whakahe re mo te pai ki te aroaro o Ihowa. Na

28

ka ui nga tama a Iharaira ki a Ihowa, i reira hoki te aaka o te kawenata a te Atua i aua ra, Ko Pinehaha hoki, tama a Ereatara, tama a Arona, te tu ana i tona aroaro i aua ra; ka mea ratou, Me haere atu ano ahau ki te whawhai ki nga tama a Pineamine, a toku teina, me whakamutu ranei? Na

29

ka mea a Ihowa, Haere, ko apopo hoki ratou hoatu a i e ahau ki tou ringa. Katahi ka

30

whakatakotoria he pehipehi e Iharaira mo Kipea a taka noa, taka noa. Na ka haere nga tama a Iharaira ki nga tama a Pineamine i te toru o nga ra, e whakatakotoria ana nga ngohi hei whawhai

31

ki Kipea, pera ano me mua ra. Na ko te putanga mai o nga tama a Pineamine ki te tu ki te iwi, manukawhakitia ana ratou i te pa; na ka timata ratou te patu i etahi o te iwi, te tukituki, te pera me mua ra, i nga huarahi e tika atu ra, ko tetahi ki Peteere, ko tetahi ki Kipea i te parae, me te mea e

32

toru tekau nga tangata o Iharaira. Na ka mea nga tama a Pineamine, Kua hinga ratou i a tatou, kua pera me to te timatanga. Otiia i mea nga tama a Iharaira, Kia rere atu tatou; me manukawhaki

33

mai ratou i roto i te pa ki nga huarahi. Na ka whakatika ake nga tangata katoa o Iharaira i o ratou wahi, a ka tu a matua ki Paaratamara: i puta mai ano nga pehipehi o Iharaira i to ratou wahi, ara i

34

Marehekepa. Na haere tonu atu ki Kipea nga tangata kotahi tekau mano, he hunga whiriwhiri i

roto i a Iharaira katoa, a ka nui haere te whawhai: kihai ratou i mohio ka tata te kino ki a ratou.  
35

Na patua iho e Ihowa a Pineamine i te aroaro o Iharaira, a ngaro iho o Pineamine i nga tama a  
36  
Iharaira i taua ra, e rua tekau ma rima mano kotahi rau: he hunga mau hoari enei katoa. Heoi ka  
kite nga tama a Pineamine e patua ana ratou: i tukua mai a Pineamine e nga tangata o Iharaira, i

whakamanawa atu hoki ki te pehipehi i whakatakotoria e ratou ki Kipea. 37 Na hohoro tonu te  
pehipehi, huakina ana e ratou a Kipea; te unuhanga mai hoki o te pehipehi, na patua iho e ratou te

pa katoa ki te mata o te hoari. 38 Na kua oti tetahi tohu te whakarite e nga tangata o Iharaira ki te  
39  
pehipehi, ara kia meinga e ratou kia nui te kake o te pongere o te paowa i te pa. A, i te whatinga  
o nga tangata o Iharaira i te mea e whawhai ana, ka anga a Pineamine, ka patu, ka tukituki i nga  
tangata o Iharaira, me te mea e toru tekau tangata: i mea hoki ratou, Koia rawa ano! e hinga ana

40  
ano ratou i a tatou, e pera ana an o me to te whawhaitanga tuatahi. Otiia ka timata nei te kake o  
te pongere o te pa ki runga, me te pou auahi, na ka titiro nga Pineamini ki muri i a ratou, nga kua

41  
pau te pa i te ahi, e kake ana tera he paowa ki te rangi. Ko te tahuritanga atu o nga tangata o  
Iharaira, kanakana kau ana nga tangata o Pineamine; i kite hoki ratou kua tae mai te he ki a ratou.

42  
Na reira ka whati ratou i te aroaro o nga tangata o Iharaira ki te huarahi ki te koraha; otiia i pipiri  
tonu te whai a te hoariri i a ratou; na, ko te hunga i puta mai i roto i nga pa, kei te whakangaro i a

43  
ratou, he mea karapotia na ratou. Ka karapotia e ratou nga Pineamini a taka noa, a whaia ana,  
44  
takatakahia ana i o ratou okiokinga, i te ritenga atu o Kipea whaka te rawhiti. A kotahi tekau

45  
ma waru mano o nga tangata o Pineamine i hinga: he hunga maia enei katoa. Na ka whati ratou,  
a rere ana ki te koraha, ki te kamaka o Rimono: a e rima mano tangata i hamua e ratou ki nga

46  
huarahi, na ka whaia ano ratou ki Kiromo, a patua iho o ratou e rua mano tangata. Na ko te  
hunga katoa i hinga o Pineamine i taua ra, e rua tekau ma rima mano, he hunga mau hoari: he hunga

47  
maia katoa enei. A e ono rau tangata i tahuri, i rere ki te koraha, ki te kamaka o Rimono, a e  
48

wha nga marama i noho ai ki te kamaka o Rimono. A i tahuri atu ano nga tangata o Iharaira ki  
nga tama a Pineamine, a patua iho ratou ki te mata o te hoari, ko nga tangata o nga pa, me nga  
kararehe, me nga mea katoa i tupono atu ai ratou: i tungia ano e ratou ki te ahi nga pa katoa i tae  
atu a i ratou.

## Chapter 21

<sup>1</sup> Na kua puaki noa ake to oati a nga tangata o Iharaira i Mihipa, i mea ratou, Kua tetahi tangata  
o tatou e hoatu i tana tamahine hei wahine ma Pineamine. <sup>2</sup> Na ka haere te iwi ki Peteere, a noho  
ana i reira i te aroaro o te Atua a ahiahi noa; na rahi noa atu o ratou reo, he nui te tangi. <sup>3</sup> I mea  
hoki ratou, Na te aha, e Ihowa, e te Atua o Iharaira, i puta ake ai tenei i roto i a Iharaira; i ngaro ai  
tetahi iwi i tenei ra i roto i a Iharaira? <sup>4</sup> Na i te ata ka maranga wawe te iwi, a hanga ana he aata e  
ratou, a whakaekea ana he tahunga tinana, he whakahere mo te pai. <sup>5</sup> Na ka mea nga tama a Iharaira,  
Ko wai o nga iwi katoa o Iharaira kahore i tae mai i roto i te whakaminenga ki a Ihowa? Kua takoto  
hoki he oati nui mo te tangata e kore e haere ki a Ihowa ki Mihipa: i mea ratou, Ka whakamatea  
<sup>6</sup> rawatia. A koingo tonu nga tama a Iharaira ki to ratou teina, ki a Pineamine; i mea, Kua hautopea  
atu tetahi iwi i tenei ra i roto i a Iharaira. <sup>7</sup> Me aha tatou ki etahi wahine ma nga mea o ratou i  
mahue; kua oatitia hoki a Ihowa e tatau e kore a tatou tamahine e hoatu hei wahine ma ratou? <sup>8</sup> Na  
ka mea ano ratou, Ko tehea o nga iwi o Iharaira kahore nei i tae mai ki a Ihowa ki Mihipa? Na  
kahore tetahi tangata o Iapehe Kireara i haere ki te puni ki te whakaminenga. <sup>9</sup> I taua hoki te iwi,  
<sup>10</sup> a kahore tetahi tangata i reira o nga tangata o Iapehe Kireara. Na ka tono te huihui i etahi tangata  
ki reira, kotahi tekau ma rua mano, he hunga toa, a ka whakahau i a ratou, ka mea, Tikina patua  
<sup>11</sup> nga tangata o Iapehe Kireara ki te mata o te hoari, me nga wahine me nga tamariki. A ko tenei  
<sup>12</sup> ta koutou e mea ai, Ko nga tane katoa, me nga wahine katoa i takoto ki te tane, me huna. A e  
wha rau nga kotiro i mau i a ratou i roto i nga tangata o Iapehe Kireara, he wahine kahore ano i  
mohio noa, ara i takoto ki te tane: na kawea ana e ratou ki te puni ki Hiro, ki tera i te whenua o  
<sup>13</sup> Kanaana. Katahi ka unga tangata te huihui katoa hei korero ki nga tama a Pineamine i te kamaka  
i Rimono, hei karanga ki a ratou, Kua mau te rongo. <sup>14</sup> Na ka hoki a Pineamine i taua wa; a ka  
hoatu ki a ratou nga wahine i whakaorangia e ratou i roto i nga wahine o Iapehe Kireara; otiia kihai  
<sup>15</sup> ano i rato. Na koingo tonu te iwi ki a Pineamine, no te mea kua wahia e Ihowa nga iwi o Iharaira.  
<sup>16</sup> Na ka mea nga kaumatua o te huihui, Me aha tatou ki etahi wahine ma nga mea i mahue,  
<sup>17</sup> kua huna nei hoki nga wahine a Pineamine? I mea ano ratou, Kia whai kainga tupu nga morehu  
<sup>18</sup> o Pineamine, kei moti rawa tetahi iwi i roto i a Iharaira. Otiia e kore e taea te hoatu e tatou a  
tatou tamahine hei wahine ma ratou; no te mea kua oati nga tama a Iharaira, kua mea, Kia kanga  
<sup>19</sup> te tangata e hoatu ana i te wahine ki a Pineamine. Na ka mea ratou, Nana, he hakari tera ki a  
Ihowa i Hiro, i tenei tau, i tenei tau, i te taha ki te raki o Peteere, i te taha ki te rawhiti o te huarahi

e tika atu ana i Peteere ki Hekeme, i te tonga o Repona. <sup>20</sup> Na ka whakahau atu ratou ki nga tama  
 a Pineamine, ka mea, Haere ki nga mara waina whanga ai; <sup>21</sup> A e kite koutou, na, kua puta nga  
 tamahine o Hiro ki te kanikani, na ka haere atu koutou i nga mara waina, ka hopu i tana wahine, i  
 tana wahine, i roto i nga tamahine o Hiro, a ka haere ki te whenua o Pineamine. <sup>22</sup> A ka tae mai o  
 ratou matua, o ratou tungane ranei, ki a matou whakawa ai, ko reira matou mea ai ki a ratou, Kia  
 atawhai ki a matou, ara ki a ratou: kihai hoki i riro i a matou he wahine ma tenei, ma tenei, o ratou  
 i te mea e whawhai ana: ehara a no i te mea na koutou i hoatu i tenei wa, e he ai koutou. <sup>23</sup> Na pera  
 ana nga tama a Pineamine, a tangohia ana e ratou etahi wahine i roto i te hunga i kanikani ra; rite  
 tonu ki a ratou te tokomaha, he mea hopu na ratou: a haere ana, noho ana ki to ratou kainga tupu;  
 kei te hanga i o ratou pa, nohoia iho e ratou. <sup>24</sup> Na ka turia atu i reira i taua wa e nga tama a Iharaira  
 ki tona iwi, ki tona iwi, ki tona hapu, ki tona hapu; na haere ana ratou i reira ki tona kainga, ki tona  
 kainga. <sup>25</sup> I aua ra kahore o Iharaira kingi, ko ta ratou i mea ai ko nga mea i tika ki te titiro a tenei,  
 a tenei.

## Ruth

### Chapter 1

<sup>1</sup> Na i nga ra i whakarite ai nga kaiwhakarite, kua pa te matekai ki te whenua. A ka haere tetahi  
 tangata o Peterehema Hura ki te whenua o Moapa noho ai; a ia, tana wahine, me ana tama tokorua.  
<sup>2</sup> Na, ko te ingoa o taua tangata, ko Erimereke, ko Naomi hoki te ingoa o tana wahine; ko nga ingoa  
 hoki o ana tama tokorua, ko Maharono, ko Kiriono, he Eparati ratou, no Peterehema Hura. Na haere  
 ana ki te whenua o Moapa, a noho ana i reira. <sup>3</sup> Na ka mate a Erimereke, te tahu a Naomi, a mahue  
 iho ko ia, ratou ko ana tama tokorua. <sup>4</sup> Na ka tango wahine raua ma raua i roto i nga wahine o  
 Moapa; ko Oropa te ingoa o tetahi, ko Rutu te ingoa o tetahi, a noho ana i reira, kotahi tekau nga  
 tau. <sup>5</sup> Na ka mate raua tokorua, a Maharono raua ko Kiriono, a ko te wahine anake te putanga o  
 ana tama tokorua, o tana tahu.  
<sup>6</sup> Katahi ia ka whakatika, ratou ko ana hunaonga, a hoki ana i te whenua o Moapa; i rongu hoki  
 i te whenua o Moapa kua titiro mai a Ihowa ki tana iwi, kua hoatu e ia he taro ma ratou. <sup>7</sup> Heoi  
 haere atu ana ia i te wahi i noho ai, ratou tahi ko ana hunaonga tokorua, a haere ana i te ara, hoki



<sup>8</sup>  
 ana ki te whenua o Hura. Na ka mea a Naomi ki ana hunaonga tokorua, Haere korua, e hoki ki  
 nga whare o o korua whaea: ma Ihowa korua e atawhai; kia rite tana ki ta korua mahi ki nga  
<sup>9</sup>  
 tupapaku, ki ahau hoki. Ma Ihowa e hoami ki a korua kia kite korua i te okiokinga i roto i te whare  
<sup>10</sup>  
 o tana tahu, o tana tahu. Na ka kihi ia i a raua, a rahi noa atu o ratou reo ki te tangi. Na ka mea  
<sup>11</sup>  
 raua ki a ia, Engari me hoki tahi tatou ki tou iwi. Ano ra ko Naomi, Hoki atu, e aku tamahine:  
 kia haere tahi korua i ahau hei aha? he tama ano ianei enei kei roto i toku kopu hei tane ma korua?  
<sup>12</sup>  
 Hoki atu, e aku tamahine, haere, kua ruruhitia nei hoki ahau, a e kore e whai tahu. Me i ki ahau,  
<sup>13</sup>  
 Kei te tumanako ahau, tera ano ahau e whai tane i tenei po, a ka whanau ano he tama maku; Tera  
 ranei korua e tatari ki a raua kia kaumatua ra ano? tera ranei e mau tonu korua ki a raua, a e  
 whakakahore ki te tane? Kahore, e aku tamahine, nui noa atu hoki toku pouri ina whakaaro ki a  
<sup>14</sup>  
 korua; na te ringa hoki o Ihowa kua puta mai nei ki ahau. Na ka puaki ano to ratou reo, a ka  
<sup>15</sup>  
 tangi. Na ka kihi a Oropa i tona hungawai; ko Rutu ia i piri ki a ia. Na ka mea ia, Nana, kua hoki  
<sup>16</sup>  
 tou taokete ki tona iwi, ki ona atua: hoki atu, whaia tou taokete. Na ka mea a Rutu, Kaua ra e  
 tohe ki ahau kia whakarerea koe, kia hoki atu i te whai i a koe; ta te mea ka haere ahau ki tau wahi  
 e haere ai, ka noho hoki ki tau wahi e noho ai; ko tou iwi hei iwi moku, ko tou Atua hei Atua moku;  
<sup>17</sup>  
 Ka mate ahau ki te wahi e mate ai koe, ka tanumia hoki ki reira: kia meatia tenei e Ihowa ki ahau,  
<sup>18</sup>  
 etahi atu mea ano hoki, ina, ko te mate anake hei wehe i a taua. A, i tona kitenga e u ana tona  
 ngakau kia haere tahi raua, mutu ake tana korero ki a ia.  
<sup>19</sup>  
 Heoi haere ana raua tokorua, a tae noa ki Peterehema. A, ka tae raua ki Peterehema, na ka  
<sup>20</sup>  
 oho katoa te pa ki a raua, ka mea nga wahine, Ko Naomi tenei? Na ka mea ia ki a ratou, Kaua  
 ahau e karangatia, ko Naomi; ko Mara ta koutou e karanga ai ki ahau: he kawa rawa hoki ta te Kaha  
<sup>21</sup>  
 Rawa mahi ki ahau. Ki tonu ahau i toku haerenga atu; na kua whakahokia kautia mai e Ihowa.  
 Na te aha ahau i karangatia ai ko Naomi e koutou, kua whakaaturia nei hoki toku he e Ihowa, kua  
<sup>22</sup>  
 tukinotia ahau e te Kaha Rawa? Heoi hoki mai ana a Naomi raua tahi ko tana hunaonga, ko Rutu  
 Moapi: hoki ana i te whenua o Moapa; a haere ana ki Peterehema i te timatanga o te kotinga parei.

## Chapter 2

<sup>1</sup> Na he whanaunga to Naomi, ara to tana tahu, he tangata taonga nui, no te hapu o Erimereke;  
<sup>2</sup> ko Poaha tona ingoa. Na ka mea a Rutu Moapi ki a Naomi, Kia haere ahau ki te mara ki te hamu  
 i nga puku parei i muri i te tangata e manakohia mai ai ahau. Ano ra ko tera, Haere, e taku tamahine.  
<sup>3</sup> Na haere ana ia, a, no te taenga atu, ka hamu i te mara i muri i nga kaikokoti: a tupono noa ia ko  
 te wahi o te mara i a Poaha o te hapu o Erimereke.  
<sup>4</sup> Na ko te taenga o Poaha i Peterehema, ka mea ki nga kaikokoti, Kia noho a Ihowa ki a koutou.  
 Ano ra ko ratou ki a ia, Kia manaakitia koe e Ihowa. <sup>5</sup> Katahi ka mea a Poaha ki tana tangata i  
 tohutohu nei i nga kaikokoti, Na wai tenei kotiro? <sup>6</sup> Na ka whakahoki te kaitohutohu i nga kaikokoti,  
<sup>7</sup> ka mea, Ko te kotiro Moapi tenei i hoki tahi mai nei raua ko Naomi i te whenua o Moapa; I mea  
 mai hoki ia, Tukua ahau kia hamu, kia kohikohi i roto i nga paihere, i muri i nga kaikokoti: heoi  
 haere ana ia, a i konei tonu ia o te ata iho ano a tae mai ki naiane; he iti nei tona noho i te whare.  
<sup>8</sup> Na ka mea a Poaha ki a Rutu, E kore ranei koe e rongu mai, e taku tamahine? Kua e haere ki  
 tetahi mara ke hamu ai; kua ano e haere atu i konei; engari me noho tonu ki konei, ki aku kotiro.  
<sup>9</sup> Kia matatau ou kanohi ki te mara e kotia ana e ratou, ka whai i a ratou: kahore ianei ahau i ki atu  
 ki nga taitamariki kia kua ratou e pa ki a koe? E matewai hoki koe, haere ki nga oko, inu ai i ta  
<sup>10</sup> nga taitamariki i utu mai ai. Na ka tapapa iho tera, ka piko iho ki te whenua, a ka mea ki a ia,  
<sup>11</sup> Na te aha koe i manako mai ai ki ahau, i mohio ai hoki ki ahau, he manene nei hoki ahau? Na  
 ka whakahoki a Poaha, ka mea ki a ia, Kua ata korerotia mai ki ahau nga mea katoa i mea ai koe  
 ki tou hungawai i muri i te matenga o tau tahu, tau whakarereanga hoki i tou papa, i tou whaea, i te  
<sup>12</sup> whenua ano i whanau ai koe, a haere mai ana ki te iwi kihai i mohiotia e koe i mua ake nei. Ma  
 Ihowa e utu tau mahi; kia ata rite hoki te utu e homai ki a koe e Ihowa, e te Atua o Iharaira, kua  
<sup>13</sup> tae mai nei hoki koe ki raro ki ona parirau okioki ai. Ano ra ko tera, Kia manakohia mai ahau,  
 e toku ariki; ka ora nei hoki toku ngakau i a koe, he pai hoki tau kupu ki tau pononga; ko ahau ia  
<sup>14</sup> kahore e rite ki tetahi o au pononga wahine. I mea ano a Poaha ki a ia i te wa i kai ai, Haere mai  
 ki konei, ki te kai taro mau, ka tuku hoki i tau kongakonga ki roto ki te winika. Na ka noho ia ki te  
 taha o nga kaikokoti, i homai ano e ratou he witi pahuhu mana. Na kai ana ia, a ka makona, a toe  
<sup>15</sup> ake. A, i tona whakatikanga ki te hamu, ka ako a Poaha i ana taitamariki, ka mea, Kia hamu ano  
<sup>16</sup> ia i roto i nga paihere; kua ano hoki ia e meinga kia whakama. Whakangahorotia ano etahi  
 kapunga mana, whakarerea atu kia kohia e ia, kua hoki e riria.

<sup>17</sup> Na ka hamu ia i te mara a ahiahi noa, a patupatu ana e ia ana i hamu ai: a me te mea kotahi  
<sup>18</sup> te epa parei. Na tangohia ana e ia, a haere ana ki te pa, a ka kite tona hungawai i ana i hamu ai:  
<sup>19</sup> i whakaputainga ano e ia, i homai ki a ia nga toenga i a ia kua makona. Na ka mea tona hungawai  
 ki a ia, I hamu koe ki hea inaianei? I hea hoki koe e mahi ana? kia manaakitia te tangata i mohio  
 na ki a koe. Na korerotia ana e ia ki tona hungawai te tangata i mahi nei ia ki a ia, a ka mea, Ko te  
<sup>20</sup> ingoa o te tangata i mahi nei ahau ki a ia inaianei ko Poaha. Ano ra ko Naomi ki tana hunaonga,  
 Kia manaakitia ia e Ihowa, kihai nei tona aroha i mahue ki te hunga ora, ki te hunga mate. Na ka  
<sup>21</sup> mea a Naomi ki a ia, He tata taua tangata ki a taua, no o taua whanaunga tupu. Na ka mea ano  
 a Rutu Moapi, I mea mai ano hoki ia ki ahau, Kia tata tonu koe ki aku tangata, kia poto ra ano aku  
<sup>22</sup> mea katoa te kokoti. Na ka mea a Naomi ki a Rutu, ki tana hunaonga, He pai, e taku tamahine,  
<sup>23</sup> ki te haere tahi koe me ana kotiro, kei riria koe i te mara ke. Na kei te whai tonu ia i nga kotiro  
 a Poaha, ka hamu a poto noa nga parei te kokoti, me te witi hoki te kokoti; i tona hungawai ia tona  
 nohoanga.

### Chapter 3

<sup>1</sup> Na ka mea a Naomi, tona hungawai ki a ia, Kaua ianei ahau e rapu i te okiokinga mou, e taku  
 tamahine, e puta mai ai te pai ki a koe? <sup>2</sup> Ehara ianei i te whanaunga no taua a Poaha nana nei aua  
 kotiro, ou hoa na? Nana, ko a tenei po ia whakarererere ai i te papapa o te parei i te patunga witi.  
<sup>3</sup> Na horoia koe, ka whakawahi i a koe, ka kakahu ai i ou kakahu, ka haere ki raro, ki te patunga  
 witi; kua ia koe e whakaaturia ki taua tangata, a mutu noa tana kai, tana inu. <sup>4</sup> A ka takoto ia, na  
 me titiro koe ki te wahi e takoto ai ia; a ka haere atu, ka hura i nga kakahu o ona waewae, ka takoto;  
<sup>5</sup> ko reira ia whakaatu ai ki a koe i tau e mea ai. Na ka mea tera ki a ia, Maku e mea nga mea katoa  
 i korerotia mai na e koe ki ahau.  
<sup>6</sup> Na ko tona haerenga ki raro, ki te patunga witi, meatia ana e ia nga mea katoa i whakahaua  
<sup>7</sup> e tona hungawai ki a ia. Na ka kai a Poaha, ka inu, a hari ana tona ngakau, a ka haere, ka takoto  
 ki te pito o te puranga: na ko te ata haerenga o tera, hurahia ana nga kakahu o ona waewae, na kua  
<sup>8</sup> takoto. A, i waenganui po ka oho te mauri o taua tangata, ka tahuri ia: na, he wahine e takoto ana  
<sup>9</sup> i ona waewae. Na ka mea ia, Ko wai koe? a ka mea ake tera, Ko Rutu ahau, ko tau pononga

10  
wahine: na uhia iho te pito o tou ki tau pononga; he whanaunga tupu hoki koe. Na ka mea ia, Kia manaakitia koe e Ihowa, e taku tamahine; nui atu hoki i to te timatanga tou aroha o te whakamutunga, i a koe kihai nei i aru i nga taitama, i te mea rawakore, i te mea whai taonga ranei.

11 Na kua e wehi, e taku tamahine; ka meatia e ahau ki a koe au mea katoa i ki mai ai; e mohio ana hoki te pa katoa o toku iwi he wahine koe e uaua ana ki te pai. 12 Na he tika ano, he whanaunga

13 tupu ahau noa; otiia tena ano tetahi e tata rawa ana i ahau. Takoto marie i tenei po; a i te ata ki te whakawhanaunga ia ki a koe, he tika, mana te tikanga whanaunga; ki te kahore ia e pai mana te tikanga o te whanaunga ki a koe, na maku te tikanga whanaunga ki a koe; e ora ana a Ihowa. Ata takoto, kia ta ea ra ano te ata.

14 Na takoto tonu ia ki ona waewae a taea noatia te ata; a ka maranga, i te mea e kore te tangata e kite i tona hoa. Na ka mea tera, Kei mohiotia i haere mai he wahine ki te patunga witi. 15 I mea ano ia, Tena koa te koroka i runga i a koe na, puritia mai. Na puritia ana e ia. Na ka mehuatia atu

16 etahi parei e ia, e ono nga mehua: a whakawaha atu ana ki a ia; na haere ana ia ki te pa. A, no tona taenga ki tona hungawai, ka mea tera, Kei te pehea koe, e taku tamahine? Na korerotia ana e ia ki a ia nga mea katoa i mea ai taua tangata ki a ia. 17 I mea ano ia, Ko enei mehua parei e ono i

18 homai e ia ki ahau; i mea hoki ki ahau, Kei haere kau koe ki tou hungawai. Na ka mea tera, Ata noho, e taku tamahine, kia mohiotia ra ano e koe te tukunga iho o tenei mea: e kore hoki e mutu ta taua tangata, kia oti ra ano tenei mea i a ia aiane.

## Chapter 4

1 Na ka haere a Poaha ki te kuwaha, a noho ana i reira; na ko te whanaunga tata i korerotia ra e Poaha e haere ana. Katahi tera ka mea atu, E! ko koe tonu ia! peka mai nei ki konei noho ai. Na

2 ka peka atu ia, a noho ana. Na ka tikina e ia etahi tangata o nga kaumatua o te pa, kotahi tekau,

3 a ka mea, E noho ki konei. Na noho ana ratou. Na ka mea ia ki taua whanaunga tata, E hokona ana e Naomi, i haere mai nei i te whenua o Moapa, te wahi o te mara i to tatou tuakana, i a Erimereke:

4 Na ka whakaaro ahau, me whakaatu ki a koe, me te ki atu, Mau e hoko i te aroaro o nga tangata e noho nei, i te aroaro ano hoki o nga kaumatua o toku iwi. Ki te hokona e koe, hokona: a ki te kahore e hokona, korerotia mai ki ahau, kia mohio ai aha u: kahore hoki he tangata hei hoko, ko

5 koe anake, a ko ahau to muri i a koe. Na ka mea tera, Maku e hoko. Katahi a Poaha ka mea, A te ra e hoko ai koe i te mara i te ringa o Naomi, e hoko ana hoki koe i a Rutu, i taua Moapi, i te wahine

a te tupapaku, hei whakaara ingoa ake mo te tupapaku ki tona wahi tupu. <sup>6</sup> Na ka mea taua whanaunga tata, E kore e taea te hoko e ahau maku; kei he toku kainga tupu: mau taku hokonga e

hoko; e kore hoki e taea te hoko e ahau. <sup>7</sup> Na, i mua ko te tikanga tenei i roto i a Iharaira mo nga hoko mai ano, mo nga whakawhiti, hei whakau mo nga mea katoa; unuhia ai e tetahi tona hu a ka

hoatu ki tona hoa: a hei kaiwhakaatu tena i roto i a Iharaira. <sup>8</sup> Na ka mea taua whanaunga ki a Poaha, Mau e hoko. A unuhia ake e ia tona hu.

<sup>9</sup> Na ka mea a Poaha ki nga kaumatua ratou ko te iwi katoa, He kaititiro koutou i tenei ra ki taku hokonga mai i nga mea katoa a Erimereke, i nga mea katoa ano a Kiriono, a Maharono, i roto

i te ringa o Naomi; <sup>10</sup> Me Rutu Moapi hoki me te wahine a Maharono, kua hokona mai ia e ahau hei wahine maku, hei whakaara ingoa ake mo te tupapaku ki tona kainga tupu, kei hautopea atu te ingoa o te tupapaku i roto i ona teina, i te kuwaha ano o tona wahi; ko koutou n ga kaititiro i tenei

ra. <sup>11</sup> Na ka mea nga tangata katoa i te kuwaha, ratou ko nga kaumatua, He kaititiro matou. Ma Ihowa e mea tena wahine e hare mai na ki tou whare kia rite ki a Rahera raua ko Rea, na raua nei i tu ai te whare o Iharaira: kia nui ano hoki tau mahi i Epar ata, kia whai ingoa koe i Peterehema:

<sup>12</sup> Hei te whare o Parete, whanau a Tamara raua ko Hura, te rite mo tou whare, ara mo te uri e homai e Ihowa ki a koe i roto i tenei kotiro.

<sup>13</sup> Na ka tango a Poaha i a Rutu, a waiho iho ia hei wahine mana: na ka tae atu ia ki a ia, a ka meinga e Ihowa kia hapu; na kua whanau tana tama. <sup>14</sup> Na ka mea nga wahine ki a Naomi, Kia whakapaingia a Ihowa, kihai nei i waiho i a koe i tenei ra kia hapa i tetahi whanaunga tata: kia

rangona ano tona ingoa i roto i a Iharaira. <sup>15</sup> Mana hoki tou wairua e whakahoki ake, ko ia hoki hei atawahi mo tou ruruhitanga: he whanau hoki ia na tau hunaonga e aroha nei ki a koe, he nui ke

nei tona pai ki a koe i to nga tama tokowhitu. <sup>16</sup> Na ka tango a Naomi i taua tamaiti, a whakatakotoria

ana ki tona uma, a ko ia hei kaihihiki mona. <sup>17</sup> Na huaina ana he ingoa mona e nga wahine e noho tata ana; i mea ratou, Kua whanau tetahi tamaiti ma Naomi; na huaina ana e ratou tona ingoa

ko Opere. Ko te papa tenei o Hehe, papa o Rawiri. <sup>18</sup> Na ko nga whakatupuranga enei o Parete:

na Parete ko Heterono. <sup>19</sup> Na Heterono ko Rame: na Rame ko Aminarapa, <sup>20</sup> Na Aminarapa ko

Nahahona: na Nahahona ko Haramono, <sup>21</sup> Na Haramono ko Poaha: na Poaha ko Opere, <sup>22</sup> Na Opere ko Hehe: na Hehe ko Rawiri.

## 1 Samuel

## Chapter 1

<sup>1</sup> Na tera tetahi tangata no Ramataima Topimi, no te whenua pukepuke o Eparaima, ko Erekana  
 tona ingoa, he Eparati, he tama na Iorohama, tama a Erihu, tama a Tohu, tama a Tupu: <sup>2</sup> A tokorua  
 ana wahine; ko Hana te ingoa o tetahi, ko Penina te ingoa o tetahi: na he tamariki a Penina, kahore  
 ia he tamariki a Hana. <sup>3</sup> A haere atu ai tenei tangata i ia tau, i ia tau, i tona pa ki te koropiko, ki te  
 patu whakahere ki a Ihowa o nga mano, ki Hiro. A i reira nga tama tokorua a Eri, a Hoponi raua  
 ko Pinehaha, nga tohunga a Ihowa. <sup>4</sup> A, ka tae ki te ra i patu whakahere ai a Erekana, na, hoatu  
 ana e ia etahi mea ki a Penina, ki tana wahine, ki ana tama katoa ano, ratou ko ana tamahine: <sup>5</sup> Ki  
 tana wahine ia, ki a Hana, e rua nga wahi i hoatu e ia; i aroha hoki ia ki a Hana; otiia kua oti tona  
 kopu te tutaki e Ihowa. <sup>6</sup> A nui atu te whakatoia a tona hoa tauwhainga ki a ia, a mamae noa ia, no  
 te mea kua tutakina tona kopu e Ihowa. <sup>7</sup> Pena tonu ta te tane mahi, i ia tau, i ia tau, i nga haerenga  
 o tenei ki runga, ki te whare o Ihowa, a pena tonu ta tera whakatoi i tenei; a tangi noa ia, kihai hoki  
 i kai. <sup>8</sup> Na ka mea tana tahu, e Erekana ki a ia, E Hana, he aha koe i tangi ai? he aha hoki koe te  
 kai ia? he aha ano i pouri ai tou ngakau? ki tau e kore ianei e nui atu toku pai i to nga tama kotahi  
 tekau?  
<sup>9</sup> Heoi ka whakatika a Hana i muri i a ratou i kai ai i Hiro, i inu ai hoki. Na ko Eri, ko te tohunga,  
 i runga i tona nohoanga noho ai, i te pou o te kuwaha o te temepara o Ihowa. <sup>10</sup> A i tino pouri te  
 ngakau o tera, ka inoi ki a Ihowa, a nui atu tana tangi. <sup>11</sup> Na ka puaki tana ki taurangi, i mea ia, E  
 Ihowa o nga mano, ki te ata titiro mai koe ki te pouri o tau pononga wahine, a ka mahara ki ahau,  
 a e kore e wareware ki tau pononga, engari ka homai i tetahi tama ki tau pononga, na, ka hoatu ia  
 e ahau ki a Ihowa i nga ra katoa e ora ai ia; e kore ano he heu e heua ki tona matenga. <sup>12</sup> Na, i te  
 mea e inoi tonu ana ia i te aroaro o Ihowa, ka titiro a Eri ki tona waha. <sup>13</sup> Na ko Hana, e korero  
 ana ia i roto i tona ngakau; ko ona ngutu kau e komeme ana, kihai ia tona reo i rangona: na reira i  
 mea ai a Eri e haurangi ana ia. <sup>14</sup> Na ka mea a Eri ki a ia, Ka tae te roa o tou haurangi! Whakarerea  
 atu tau waina. <sup>15</sup> Na ka utua e Hana, ka mea, Kahore, e toku ariki; he wahine ngakau pouri ahau:  
 kahore ahau i inu i te waina, i te wai whakahaurangi ranei; engari e ringihia ana e ahau toku ngakau  
 ki te aroaro o Ihowa. <sup>16</sup> Kua tau pononga e kiia he tamahine na Periara: na te nui hoki o toku  
 mamae, o toku pouri, enei korero aku. <sup>17</sup> Katahi ka utua e Eri, ka mea ia, Haere marie: a ma te

18  
Atua o Iharaira e homai tau mea i inoi ai koe ki a ia. Na ka mea tera, Kia manakohia tau pononga e koe. Katahi taua wahine ka haere, ka kai, a mutu ake te pouri o tona mata.

19  
Na ka maranga wawe ratou i te ata, a ka koropiko ki te aroaro o Ihowa, a hoki ana, haere ana ki to ratou whare i Rama. Na ka mohio a Erekana ki a Hana, ki tana wahine; i mahara ano a

20  
Ihowa ki a ia. Na, ka taka nga ra, ka hapu a Hana, a ka whanau he tama; a huaina iho e ia tona

21  
ingoa ko Hamuera, i mea hoki, No te mea i inoia ia e ahau i a Ihowa. Na ka haere taua tangata a Erekana me tona whare katoa ki runga, ki te patu i te whakahere o te tau ki a Ihowa, me tana ki

22  
taurangi hoki. Ko Hana ia kihai i haere; i mea hoki ki tana tahu, Kia whakamutua ra ano te kai u a te tamaiti, ko reira ahau kawea atu ai i a ia, kia puta ai ia ki te aroaro o Ihowa, mo tona noho tonu

23  
atu ki reira. Na ka mea a Erekana tana tahu ki a ia, Meatia ta tou whakaaro e whakapai ai; e noho, kia whakamutua ra ano tana kai u; otia kia mau te kupu a Ihowa. Heoi, noho ana taua wahine,

24  
whakangotea ana tana tama, a mutu noa tana kai u. Na, i te mutunga o tana kai u, ka mauria ia e ia, me etahi puru e toru, kotahi hoki te epa paraoa, me te pounamu waina, kawea ana ia e ia ki te

25  
whare o Ihowa, ki Hiro: he tamariki rawa hoki taua tamaiti. Na patua ana e ratou te puru, a

26  
kawea ana te tamaiti ki a Eri. A ka mea ia, E toku ariki, kia ora tou wairua; e toku ariki, ko ahau te wahine i tu i tou taha i konei nei, i inoi ra ki a Ihowa.

27  
Ko tenei tamaiti taku i inoi ai; a homai ana e Ihowa ki ahau taku mea i inoi ai ahau ki a ia: Na reira kua tukua atu nei ia e ahau ki a Ihowa; he mea tuku ia ki a Ihowa i nga ra katoa e ora ai ia. A koropiko ana te tamaiti ki a Ihowa

28  
ki reira.

## Chapter 2

1  
Na ka karakia a Hana, ka mea, E whakamanamana ana toku ngakau ki a Ihowa, kua ara toku haona i a Ihowa; ka rahi toku waha ki oku hoariri; noku ka koa ki tau whakaoranga.

2  
Kahore he mea tapu, ko Ihowa anake; kahore ke atu, ko koe anake: kahore ano hoki he kamaka hei rite mo to tatou Atua.

3  
Kati te whakanui i te korero whakahihi; kei puta te whakapehapeha i o koutou mangai: he Atua mohio hoki a Ihowa, a ka paunatia e ia nga mahi.

4  
Whati ana nga kopere a te hunga marohirohi; a ko te hunga i tutuki te waewae, ko te kaha hei whitiki mo ratou. E mahi ana hei utu taro te hunga i makona i mua; a mutu ake ta te hunga i matekai: heoi kua tokowhitu a te pakoko i

whanau ai; a iwikore noa iho te mea kua tokomaha nei ana tamariki. <sup>6</sup> Ko Ihowa e whakamate ana, a ko ia e whakaora ana: mana e riro ai ki raro ki te reinga, mana e kake ai ki runga. <sup>7</sup> Ko Ihowa hei whakarawakore, ko ia hei whakawhiwhi ki te taonga: mana e whakaiti, mana ano hoki e whakaara.

<sup>8</sup> Whakaarahia ana e ia te iti i roto i te puehu, ara ana i a ia te iti i roto i te puehu, ara ana i a ia te rawakore i roto i te puranga paru, a whakanohoia iho ki roto ki nga rangatira, meinga ana kia whiwhi ki te torona kororia: no Ihowa ra hoki nga pou turanga o te whenua; a whakanohoia iho e ia te ao

<sup>9</sup> ki runga. Mana nga waewae o tana hunga tapu e tiaki; ko te hunga kino ia ka whakanohoia ki roto ki te pouri wahangu ai; ehara hoki te kaha i te mea e riro ai te papa i te tangata. <sup>10</sup> Mongamonga noa nga hoariri o Ihowa; ka papa mai tana whatitiri i te rangi ki a ratou: ka whakarite whakawa a Ihowa mo nga pito o te whenua; mana e homai he kaha ki tana kingi, e whakaara te haona o tana i whakawahi ai.

<sup>11</sup> Na ka haere a Erekana ki Rama, ki tona whare. A minita ana taua tamaiti ki a Ihowa i te aroaro o te tohunga, o Eri. <sup>12</sup> Na he tama na Periara nga tama a Eri; kihai ratou i mohio ki a Ihowa.

<sup>13</sup> Na ko te tikanga tenei a nga tohunga i roto i te iwi; i te patunga a tetahi i te whakahere, ka haere te tangata a te tohunga, i te mea kei te kohua ano nga kiko, me te marau e toru nei nga koikoi i tona

<sup>14</sup> ringa; Na ka werohia e ia ki te peihana, ki te pata ranei, ki te hopane ranei, ki te kohua ranei; ko nga mea katoa i riro ake i te marau, i tangohia e te tohunga ki taua mea. Pena tonu ta ratou mahi i

<sup>15</sup> Hiro ki nga Iharaira katoa i haere ki reira. Ae ra, i te mea ano hoki kahore i tahuna noatia nga ngako, ka haere te tangata a te tohunga, ka mea ki te tangata nana te whakahere, Homai tetahi wahi kiko kia tunua ma te tohunga; e kore hoki ia e tango i au kiko, i te mea kohua, engari i te me a mata.

<sup>16</sup> A, ki te ki mai te tangata ki a ia, Aiane pu tahuna ai e ratou te ngako, a hei reira koe tango ai i ta tou ngakau i pai ai; katahi tera ka mea atu, Kahore; engari me homai e koe aiane; a, ki te kahore,

ka tangohia maoritia e ahau. <sup>17</sup> Na nui atu te hara o aua taitama i te aroaro o Ihowa: no te mea i

whakarihariha nga tangata ki te whakahere a Ihowa. <sup>18</sup> Ko Hamuera ia i minita ki te aroaro o Ihowa,

he tamariki nei ia, whitiki rawa tona epora rinena. <sup>19</sup> I hanga ano he koroka iti e tona whaea mona, a kawea ana ki a ia i tenei tau, i tenei tau, i o raua haerenga ko tana tahu ki te patu i te whakahere

<sup>20</sup> o te tau. Na ka whakapai a Eri i a Erekana raua ko tana wahine, ka mea, Ma Ihowa e homai he uri ki a koe i roto i tenei wahine mo tenei ka tukua nei ki a Ihowa. Na hoki ana raua ki to raua wahi.

<sup>21</sup> Na ka titiro a Ihowa ki a Hana, a ka hapu ano ia, ka whanau, tokotoru nga tama, tokorua nga

kotiro. A tupu ana te tamaiti, a Hamuera, i te aroaro o Ihowa. <sup>22</sup> Na kua koroheke rawa a Eri; kua rongong hoki ki nga mea katoa i mea ai ana tama ki a Iharaira katoa, ki to raua takotaoranga hoki ki



23  
nga wahine i mahi ki te whatitoka o te tapenakara o te whakaminenga. Na ka mea ia ki a raua, He aha korua i mahi ai i enei mea? kua rongu hoki ahau ki tenei iwi katoa ki a korua mahi kino.

24  
Kati ra, e aku tama; ehara hoki i te pai te korero e rangona nei e ahau: e mea ana korua i te iwi

25  
o Ihowa kia peka ke. Ki te hara he tangata ki tona hoa, ma te Atua te whakawa mona: tena ko tenei ka hara te tangata ki a Ihowa, ko wai hei kaiwawao mona? Heoi kihai raua i pai ki te

26  
whakarongo ki te reo o to raua papa, no te mea i pai a Ihowa kia whakamatea raua. A nui haere ana ano taua tamaiti, a Hamuera, e paingia ana e Ihowa, e nga tangata.

27  
Na ka haere mai tetahi tangata a te Atua ki a Eri, ka mea ki a ia, Ko te kupu tenei a Ihowa, Kahore ianei ahau i puta marama ki te whare o tou papa, i a ratou i Ihipa, i pononga ai i te whare

28  
o Parao? Kahore ranei ahau i whiriwhiri i a ia i roto i nga iwi katoa o Iharaira hei tohunga moku, hei whakaeke whakahere ki runga ki taku aata, hei tahu whakakakara, hei kakahu i te epora ki toku

29  
aroaro? a hoatu ana ki te whare o tou papa nga whakahere ahi katoa a nga tamariki a Iharaira? A he aha koutou i takahi ai i oku patunga tapu, i oku whakahere, i kiia e ahau mo toku nohoanga; i a koe ka whakahonore nei i au tama ki runga ake i ahau, a ka tetere nei koutou i nga mea papai o nga

30  
whakahere katoa a Iharaira, a taku iwi? Na reira tenei kupu a Ihowa, a te Atua o Iharaira, He tika i mea ahau, ko tou whare me te whare o tou matua ka haere i toku aroaro a ake ake: na ko ta Ihowa kupu tenei inaianei, Kahore ra hoki; ka whakahonore hoki ahau i te hunga e whakahonore

31  
a na i ahau, ka whakaiti ano i te hunga e whakahawe ana ki ahau. Nana, meake puta nga ra e tapahia ai e ahau tou ringa, me te ringa o te whare o tou papa, a kore iho tetahi koroheke i roto i

32  
tou whare. A ka kite koe i te tukinotanga i toku nohoanga, i nga pai katoa e hoatu e te Atua ki

33  
a Iharaira; e kore ano tou whare e whai koroheke a ake ake. Na, ko te tangata au e kore e hautopea atu i taku aata, ka ai ia hei whakapaunga mo ou kanohi, hei whakamamae mo tou ngakau:

34  
whakakaumatua kau hoki nga whanau hou o tou whare, ka mate i to ratou taiohinga. Ko te tohu hoki tenei ki a koe, ka puta ki au tama tokorua, ki a Hoponi raua ko Pinehaha, kotahi ano te ra e

35  
mate ai raua tokorua. A ka whakaarahia ake e ahau he tohunga pono maku, hei mahi i ta toku ngakau, i ta toku hinengaro i pai ai, maku ano e hanga he whare pumau mona; a ka haereere ia i

36  
nga ra katoa i te aroaro o taku e whakawahi ai. A, ko te hunga katoa e mahue iho ki tou whare, ka haere mai, ka piko iho ki a ia mo tetahi pihi hiriwa, mo tetahi wahi taro, ka mea, Tena koe, kia uru atu ahau ki tetahi o nga mahi tohunga, kia kai ai ahau i tetahi kongakonga taro.

### Chapter 3

<sup>1</sup> Na i te minita te tamaiti, a Hamuera, ki a Ihowa i te aroaro o Eri. A he taonga momohanga te  
 kupu a Ihowa i aua ra; kahore he whakakitenga nui. <sup>2</sup> Na i taua wa kei te takoto a Eri i tona wahi,  
 kua timata hoki ona kanohi te atarua, kahore hoki i ata kite: <sup>3</sup> Na kahore ano te rama a te Atua kia  
 pirau noa, a i te takoto a Hamuera, he moe, i roto i te temepara o Ihowa, i te wahi i tu ai te aaka a  
 te Atua; <sup>4</sup> Na ka karanga a Ihowa ki a Hamuera; ka mea tera, Tenei ahau. <sup>5</sup> Na ka rere ia ki a Eri,  
 ka mea, Tenei ahau; i karanga ake na hoki koe ki ahau. Na ka mea tera, Kihai ahau i karanga; hoki  
 atu ki te takoto. Na haere ana ia, takoto ana. <sup>6</sup> Na ka karanga ano hoki a Ihowa, E Hamuera. A ka  
 whakatika a Hamuera, haere ana ki a Eri, ka mea, Tenei ahau; i karanga ake na hoki koe ki ahau.  
 Na ka mea tera, Kihai ahau i karanga, e taku tamaiti: hoki atu ki te takoto. <sup>7</sup> Na kahore a Hamuera  
 i mohio noa ki a Ihowa, kahore ano hoki te kupu a Ihowa i whakapuakina noatia ki a ia. <sup>8</sup> Na ka  
 karanga ano a Ihowa i a Hamuera, ko te tuatoru o nga karangatanga. A ka whakatika ia, ka haere  
 ki a Eri, ka mea, Tenei ahau: i karanga ake na hoki koe ki ahau. Na ka mohio a Eri ko Ihowa tera  
 i karanga ra ki te tamaiti. <sup>9</sup> Na ka mea a Eri ki a Hamuera, Haere ki te takoto: a ki te karanga ia ki  
 a koe, ka mea ake koe, Korero e Ihowa; e whakarongo ana hoki tau pononga. Heoi, haere ana a  
 Hamuera, a takoto ana i tona wahi. <sup>10</sup> Na ka haere mai a Ihowa, ka tu, ka karanga, ka pera me era  
 karangatanga, E Hamuera, e Hamuera. Katahi ka mea a Hamuera, Korero; e whakarongo ana hoki  
 tau pononga.  
<sup>11</sup> Na ka mea a Ihowa ki a Hamuera, Nana, ka mahia e ahau he mahi i roto i a Iharaira, e  
 paorooro ai nga taringa e rua o te hunga katoa e rangona ai. <sup>12</sup> Ko te rangi tena e puta ake ai i ahau  
 mo Eri nga mea katoa i korerotia e ahau mo tona whare: i te timatanga a ki te mutunga. <sup>13</sup> Kua  
 mea atu na hoki ahau ki a ia, ka whakawakia tona whare e ahau a ake ake, mo te kino i mohiotia  
 na e ia; mo ta ana tama i mea ai, i tau ai he kanga ki a raua, a kihai ia i pehi i a raua. <sup>14</sup> Na reira  
 kua oati ahau mo te whare o Eri, E kore e tau te patunga tapu, te whakahere totokore ranei, hei pure  
 mo te kino o te whare o Eri a ake ake. <sup>15</sup> Na takoto tonu a Hamuera a tae noa ki te ata, na uakina  
 ana e ia nga tatau o te whare o Ihowa. A i wehi a Hamuera ki te whakaatu ki a Eri i te mea i  
 whakakitea mai ki a ia. <sup>16</sup> Na ka karanga a Eri ki a Hamuera, ka mea, E Hamuera, e taku tamaiti;  
 a ka mea tera, Tenei ahau. <sup>17</sup> Na ka mea ia, Tena koa te kupu i korerotia e Ihowa ki a koe? Kaua  
 ra e huna ki ahau: kia meatia tenei e te Atua ki a koe, etahi atu mea ano hoki, ki te huna e koe i  
 ahau tetahi o nga kupu katoa i korerotia e ia ki a koe. <sup>18</sup> Na ka korerotia nga kupu katoa e Hamuera  
 ki a ia, kihai hoki i huna tetahi mea i a ia. Na ka mea tera, Na Ihowa ra hoki: mana e mea ta tona  
 whakaaro i pai ai.

19 Nawai a ka kaumatua a Hamuera, a noho ana a Ihowa ki a ia, kihai hoki tetahi o ana kupu i  
 20 tukua e ia kia taka ki te whenua. A i mohi a Iharaira katoa, o Rana a tae noa ki Peerehepa, kua  
 21 whakapumautia a Hamuera hei poropiti ma Ihowa. A i puta mai ano a Ihowa i Hiro: i whakaatu  
 ano hoki a Ihowa i a ia ki a Hamuera i Hiro, he mea korero mai na Ihowa.

## Chapter 4

1 Na puta mai ana te kupu a Hamuera ki a Iharaira katoa. Na ka haere a Iharaira ki te whawhai  
 ki nga Pirihitini, a ka noho a puni ki Epeneetere; a i noho te puni o nga Pirihitini ki Apeke. 2 Na  
 ka whakaritea e nga Pirihitini a ratou ngohi hei whawhai ki a Iharaira: a ka horapa haere te whawhai,  
 na ka patua a Iharaira e nga Pirihitini: e wha mano tangata o te ope i patua ki te parae. 3 A, no te  
 taenga o nga tangata ki te puni, ka mea nga kaumatua o Iharaira, He aha tatou i patua ai e Ihowa  
 inaiane i te aroaro o nga Pirihitini? Me tiki atu ki a tatou te aaka o te kawenata a Ihowa i Hiro, kia  
 tae mai ki roto i a tatou, hei whaka ora i a tatou i te ringa o o tatou hoariri. 4 Heoi ka tona e te iwi  
 ki Hiro, a ka mauria mai i reira te aaka o te kawenata a Ihowa o nga mano e noho nei i runga i nga  
 kerupima: i reira ano nga tama tokorua a Eri, a Hoponi raua ko Pinehaha, i te aaka o te kawenata  
 a Ihowa. 5 A, i te taenga mai o te aaka o te kawenata a Ihowa ki te puni, ka hamama a Iharaira  
 katoa, he nui te hamama, a ngateri ana te whenua. 6 A ka rongo nga Pirihitini i te reo e hamama  
 ana, ka mea ratou, He reo aha tenei e nui nei te hamama i te puni o nga Hiperu? Na ka mohio ratou  
 kua tae mai te aaka a Ihowa ki te puni. 7 Na ka wehi nga Pirihitini; i mea hoki, Kua tae te Atua ki  
 roto i te puni. Na ka mea ratou, Aue, te mate mo tatou! kahore hoki he mea penei me tenei i mua  
 ake nei. 8 Aue, te mate mo tatou! ma wai tatou e whakaora i roto i te ringa o enei atua nui? ko nga  
 atua enei nana nga whakapanga mate katoa i patua ai nga Ihipiana i te koraha. 9 Kia maia, whakatane  
 i a koutou, e nga Pirihitini, kei whakataurerekatia koutou e nga Hiperu, kei peratia me ratou i  
 whakataurerekatia na e koutou: na, me whakatane koutou, me whawhai.  
 10 Na ka whawhai nga Pirihitini, a patua ana a Iharaira, a rere ana ki tona teneti, ki tona teneti:  
 he tino nui rawa te parekua; e toru tekau mano hoki o Iharaira i hinga, he hunga haere raro. 11 Na  
 riro ana te aaka a te Atua; i mate hoki a Hoponi raua ko Pinehaha, nga tama tokorua a Eri.  
 12 Na ka rere tetahi tangata o Pineamine i te ope, tae tonu atu ki Hiro i taua ra ano, he mea  
 haehae ona kakahu, he oneone hoki i runga i tona matenga. 13 A, no tona taenga, na e noho ana a

Eri i runga i te nohoanga i te taha o te ara, e tutei atu ana: he pawera hoki no tona ngakau mo te aaka a te Atua. A ka tae taua tangata ki te pa, ka korero, na hamama katoa ana te pa. <sup>14</sup> A ka rongoa a Eri i te reo e hamama ana, ka mea ia, He reo aha tenei e ngangau nei? Na hohoro tonu taua tangata, a kua tae, kua korero ki a Eri. <sup>15</sup> Na e iwa tekau ma waru nga tau o Eri; kua maro hoki ona kanohi, te ahei ia te kite. <sup>16</sup> Na ka mea taua tangata ki a Eri, Ko ahau tenei i puta mai i roto i te ope, i rere tonu mai inaianei i te ope. Ka mea tera, I pehea te mea ra, e taku tama? <sup>17</sup> Na ka whakaatu a ia i kawea mai nei nga korero, ka mea, I rere a Iharaira i te aroaro o nga Pirihitini, he nui hoki te parekura o te iwi; a ko au tama tokorua, ko Hoponi, raua ko Pinehaha, kua mate; kua riro ano hoki te aaka a te Atua. <sup>18</sup> A, no tana whakahuatanga i te aaka a te Atua, hinga ana tera ki muri i runga i te nohoanga, ki te taha o te kuwaha, a whati iho tona kaki, mate ake: he koroheke hoki ia, he taimaha. Na e wha tekau nga tau i whakarite ai ia mo Iharaira. <sup>19</sup> Na e hapu ana tana hunaonga, te wahine a Pinehaha, meake whanau: a, no tona rongonga i te korero o te aaka a te Atua kua riro, o te matenga ano o tona hungawai raua ko tana tahu, ka piko iho ia, ka whanau; i pa whakarere mai hoki te mamae ki a ia. <sup>20</sup> A i a ia e whakahemohemo ana, ka mea nga wahine e tu ana i tona taha, Kaua e wehi; he tane hoki tenei tamaiti au. Heoi kahore ana kupu i whakahoki ai, kihai ano hoki i anga mai tona ngakau. <sup>21</sup> Na huaina iho e ia te tama ko Ikaporo, i mea, Kua heke te kororia o Iharaira: no te mea kua riro te aaka a te Atua, mo tona hungawai hoki raua ko tana tahu. <sup>22</sup> I mea ano ia, Kua heke te kororia o Iharaira; kua riro nei hoki te aaka a te Atua.

## Chapter 5

<sup>1</sup> Na, tera kua riro te aaka a te Atua i nga Pirihitini, kua mauria atu i Epeneetere ki Aharoro. <sup>2</sup> Na ka mau nga Pirihitini ki te aaka a te Atua, a kawea ana e ratou ki te whare o Rakono, whakaturia ake ki te taha o Rakono. <sup>3</sup> A, no te marangatanga ake o nga Aharori i te aonga ake, na kua taka, kua tapapa iho a Rakono ki te whenua ki mua i te aaka a Ihowa. Na ka mau ratou ki a Rakono, whakanohoa ake ana e ratou ki tona wahi ano. <sup>4</sup> Na, i to ratou marangatanga ake i te ata tonu o tetahi ra, na kua taka a Rakono, kua tapapa ki te whenua ki mua i te aaka a Ihowa; a ko te matenga o Rakono me nga kapu e rua o ona ringa, e takoto mutu ana i runga i te paepae o te tatau; ko te tumutumu anake o Rakono i mahue ki a ia. <sup>5</sup> Koia nga tohunga o Rakono me te hunga katoa e haere ana ki te whare o Rakono te takahi ai ki runga ki te paepae o Rakono ki Aharoro, a mohoa noa nei.

<sup>6</sup> Ka pehia ia nga Aharori e te ringa o Ihowa, a huna iho ratou e ia; i patua hoki ratou e ia ki te  
<sup>7</sup> pukupuku, ara a Aharoro me ona rohe. A, no te kitenga o nga tangata o Aharoro i taua meatanga,  
 ka mea ratou, E kore te aaka a te Atua o Iharaira e noho ki a tatou; he uua mai hoki tona ringa ki  
<sup>8</sup> a tatou, ki to tatou atua hoki, ki a Rakono. Heoi ka unga tangata ratou hei huihui i nga rangatira  
 katoa o nga Pirihitini ki a ratou. Na ka mea, Me aha matou ki te aaka a te Atua o Iharaira? A ka  
 mea ratou, Me kawea te aaka a te Atua o Iharaira ki Kata. Na kawea ana e ratou te aaka a te Atua o  
<sup>9</sup> Iharaira ki reira. A, no te kawenga atu, katahi ka pa te ringa o Ihowa ki te pa, nui atu te aitua; i  
 patua hoki e ia nga tangata o te pa, te iti, te rahi, a whakaputaputa ana te pukupuku i runga i a ratou.  
<sup>10</sup> Na ka tukua e ratou te aaka a te Atua ki Ekerono. A, i te taenga atu te aaka a te Atua ki Ekerono,  
 na ka karanga nga Ekeroni, ka mea, Kua kawea mai e ratou te aaka a te Atua o Iharaira ki a tatou,  
<sup>11</sup> hei whakamate i a tatou, i to tatou iwi. Koia ratou ka unga tangata atu, ka huihui i nga rangatira  
 katoa o nga Pirihitini, a ka mea, Unga atu te aaka a te Atua o Iharaira kia whakahokia ki tona wahi,  
 kei whakamatea matou me to matou iwi: he aitua whakamate hoki kei te pa katoa; he pehi rawa te  
<sup>12</sup> ringa o te Atua ki reira. Na, ko nga tangata kihai i mate, i patua ki te pukupuku, a kake ana te  
 aue o te pa ki te rangi.

## Chapter 6

<sup>1</sup> A e whitu nga marama o te aaka a Ihowa ki te whenua o nga Pirihitini. <sup>2</sup> Na ka karanga nga  
 Pirihitini ki nga tohunga karakia ratou ko nga tohunga tuahu, ka mea, Me aha e matou te aaka a  
 Ihowa? whakaaturia mai ki a matou hei te aha he mea ma matou ina kawea atu taua mea ki tona  
<sup>3</sup> wahi. Na ka mea ratou, Ki te tukua atu e koutou te aaka a te Atua o Iharaira, kua e tukua  
 tahangatia; engari me hoatu ano he whakahere mo te he hei whakahokinga atu ki a ia: ko reira  
<sup>4</sup> koutou ora ai, a ka mohio na te aha tona ringa te neke atu ai i a ko utou. Ano ra ko era, He aha te  
 whakahere mo te he hei whakahokinga atu ki a ia? Na ka mea ratou, Kia rima nga puku koura, kia  
 rite ki te tokomaha o nga rangatira o nga Pirihitini, kia rima hoki nga kiore koura; kotahi tonu nei  
<sup>5</sup> hoki te mate o koutou kat oa, o o koutou rangatira ano hoki. Na me hanga he ahua no o koutou  
 puku, he ahua ano no a koutou kiore i ngaro ai te whenua; a ka hoatu kororia ano ki te Atua o  
<sup>6</sup> Iharaira; tera pea e mama iho tona ringa ki a koutou, ki o koutou atua, ki to koutou whenua. He  
 aha koutou i whakapakeke ai i o koutou ngakau, i pera ai me nga Ihipiana ratou ko Parao i  
 whakapakeke nei i o ratou ngakau? i tana mahinga i nga mea nunui i roto i a ratou, kihai ianei ratou  
<sup>7</sup> i tuku i te iwi, a haere ana ratou? Na reira tangohia ka hanga he kaata hou, tikina hoki kia rua nga

kau kutete kahore ano i mau ioka, ka here ai i nga kau ki te kaata, a ko a raua kua me tango mai

<sup>8</sup>  
i a raua ki te whare: Na ka tiki i te aaka a Ihowa, ka whakatakoto ki runga ki te kaata; a ka hoatu  
ki tona taha, ki roto i tetahi pouaka, nga mea koura, ta koutou whakahere mo te he hei whakahokinga

<sup>9</sup>  
ki a ia; a ka tuku ai kia haere. Ko reira tirohia atu ai e koutou; ki te haere na te aro o tona rohe ki  
runga, ki Petehemehe, nana tenei kino nui i mea ki a tatou: ki te kahore ia, katahi tatou ki mohio,  
ehara i a ia te ringa i patua ai tatou; he mea tupono noa mai taua mea i pa mai nei ki a tatou.

<sup>10</sup>  
Na pera ana aua tangata. Tikina ana e ratou nga kau kutete e rua, a herea ana ki te kaata, ko

a raua kua ia i tutakina ki te whare. <sup>11</sup> A whakanohoia ana e ratou te aaka a Ihowa ki runga ki te

kaata, me te pouaka, me nga kiore koura, me nga ahua o o ratou puku. <sup>12</sup> A tika tonu nga kau i te  
ara ki te huarahi ki Petehemehe; i haere raua ra te huanui, me te tangi haere, kihai hoki i peka ki  
matau, ki mau; a i aru nga rangatira o nga Pirihitini i a raua, a tae noa ki te rohe ki Petehemehe.

<sup>13</sup>  
Na i te kokoti witi nga tangata o Petehemehe i te raorao, a, ko te marangatanga ake o o ratou

kanohi, ka kite i te aaka, na koa ana ratou i te kitenga atu. <sup>14</sup> Na haere tonu tera te kaata ki te mara  
a Hohua, a tetahi Petehemehe, a tu ana i reira, kei reira ano tetahi kohatu nui: na tatangia ana e ratou

te rakau o te kaata, a whakaekea ana nga kau hei tahunga tinana ki a Ihowa. <sup>15</sup> I tangohia iho ano  
e nga Riwaiti te aaka a Ihowa, me te pouaka i te taha, i reira ra nga mea koura, a whakatakotoria  
ana ki runga ki te kohatu nui: i whakaeke tahunga tinana ano hoki, i patu patunga tapu nga tangata

o Petehemehe i taua ra ki a I howa. <sup>16</sup> A, no te kitenga o nga rangatira e rima o nga Pirihitini, hoki

ana ki Ekerono i taua rangi ano. <sup>17</sup> A ko nga puku koura enei i whakahokia atu nei e nga Pirihitini  
hei whakahere mo te he ki a Ihowa; mo Aharoro kotahi, mo Kaha kotahi, mo Ahakerono kotahi,

mo Kata kotahi, mo Ekerono kotahi; <sup>18</sup> Me nga kiore koura, rite tonu ki te maha o nga pa katoa o  
nga Pirihitini, no aua rangatira tokorima nei, o nga pa taiepa me nga pa koraha; tae noa atu ki te  
kohatu nui, ki Apere, i whakatakotoria ra te aaka a Ihowa ki reira; kei te mara a Hohua Petehemehe  
taua kohatu a taea noatia tenei ra.

<sup>19</sup>  
Na ka patua nga tangata o Petehemehe mo ratou i titiro ki roto ki te aaka a Ihowa; koia i  
patua ai e ia nga tangata o te iwi, e rima tekau mano e whitu tekau. Na ka tangi te iwi mo te patunga

nui i patua ai te iwi e Ihowa. <sup>20</sup> Na ka mea nga tangata o Petehemehe, Ko wai hei tu ki te aroaro

o Ihowa, o tenei Atua tapu? me haere atu ano hoki ia i roto i a tatou ki a wai? <sup>21</sup> Katahi ratou ka  
tono tangata ki nga tangata o Kiriata Tearimi, hei mea, Kua whakahokia mai te aaka a Ihowa e nga  
Pirihitini; haere mai, mauria atu ki a koutou.

## Chapter 7

<sup>1</sup> Na ka haere nga tangata o Kiriata Tearimi ki te tiki i te aaka a Ihowa, a kawea ana e ratou ki te whare o Apinarapa i te pukepuke; i whakatapua hoki e ratou a Ereatara tana tama hei tiaki i te aaka a Ihowa. <sup>2</sup> A i te nohoanga o te aaka ki Kiriata Tearimi, i te mea kua maha nga ra; e rua tekau hoki nga tau; na ka tangi te whare katoa o Iharaira ki a Ihowa.

<sup>3</sup> Na ka korero a Hamuera ki te whare katoa o Iharaira, ka mea, Ki te mea e hoki katoa ana o koutou ngakau ki a Ihowa, whakarerea nga atua ke i roto i a koutou, me Ahataroto ano hoki; whakapumautia hoki o koutou ngakau ki a Ihowa, me mahi hoki ki a ia anake, a mana koutou e whakaora i roto i te ringa o nga Pirihitini. <sup>4</sup> Katahi ka whakarerea e nga tama a Iharaira nga Paara

me Ahataroto, a mahi ana ki a Ihowa anake. <sup>5</sup> Na ka mea a Hamuera, Huihuia mai a Iharaira katoa ki Mihipa, a ka inoi ahau ki a Ihowa mo koutou. <sup>6</sup> Na ka huihui ratou ki Mihipa, a utuhia ana he wai, ringihia ana ki te aroaro o Ihowa, i nohopuku ano hoki i taua ra, a ka mea i reira, Kua hara matou ki a Ihowa. Na, ka whakawa a Hamuera mo nga tama a Iharaira ki Mihipa.

<sup>7</sup> A, no te rongonga o nga Pirihitini kua huihui nga tama a Iharaira ki Mihipa, ka haere nga rangatira o nga Pirihitini ki a Iharaira. A, i te rongonga o nga tama a Iharaira, ka wehi ratou i nga Pirihitini. <sup>8</sup> Na ka mea nga tama a Iharaira ki a Hamuera, Kei whakamutua tau karanga ki a Ihowa,

ki to tatou Atua, mo matou, kia whakaorangia matou i te ringa o nga Pirihitini. <sup>9</sup> Na tikina ana e Hamuera he reme, he mea ngote u, a whakaekea katoatia ana hei tahunga tinana ki a Ihowa. Na ka

karanga a Hamuera ki a Ihowa mo Iharaira, a ka whakarongo a Ihowa ki a ia. <sup>10</sup> A, i a Hamuera e whakaeke ana i te tahunga tinana, ka whakatata mai nga Pirihitini ki te whawhai ki a Iharaira: otira nui atu te papatanga o ta Ihowa whatiri i taua ra ki runga ki nga Pirihitini, a hinga ana ratou; patua

iho hoki i te aroaro o I haraira. <sup>11</sup> Na ka puta nga tangata o Iharaira i roto i Mihipa, a whaia ana nga Pirihitini, tukitukia ana a tae noa ki raro, ki Petekara. <sup>12</sup> Na ka mau a Hamuera ki tetahi kohatu nui, a whakatakotoria ana ki waenganui o Mihipa, o Hene, a huaina iho tona ingoa, ko Epeneetere; i mea hoki, Ko Ihowa to tatou kaiawhina a tae noa mai ki tenei wa.

<sup>13</sup> Heoi kua taea nga Pirihitini, kihai ano i haere mai i muri ki te rohe o Iharaira: i runga hoki i nga Pirihitini te ringa o Ihowa i nga ra katoa o Hamuera. <sup>14</sup> A i whakahokia atu ki a Iharaira nga pa i tongohia e nga Pirihitini i a Iharaira, a Ekerono tae noa ki Kata; i tangohia hoki nga rohe o ena

pa e Iharaira i roto i te ringa o nga Pirihitini. A ka mau ta Iharaira rongu ki nga Amori. <sup>15</sup> A i whakarite a Hamuera mo Iharaira i nga ra katoa i ora ai ia. <sup>16</sup> I taiawhio haere hoki ia i tenei tau,

17

i tenei tau, ki Peteere, ki Kirikara, ki Mihipa, i whakarite ano mo Iharaira i aua wahi katoa. A hoki ana ki Rana; i reira hoki tona whare, a whakarite ana mo Iharaira ki reira; i hanga hoki e ia tetahi aata ma Ihowa ki reira.

## Chapter 8

1 Na, ka koroheketia a Hamuera, ka meinga e ia ana tama hei kaiwhakarite mo Iharaira. 2 Na ko te ingoa o tana matamua ko Hoere; ko Apia hoki te ingoa o tana tuarua. I whakarite raua ki Peerehepa. 3 Na kihai ana tama i tika i tona ara, engari peka ke ana raua ki te apo, i tango hoki i te moni whakapati, a whakapeaua ketia ake te whakawa.

4 Katahi ka huihui nga kaumatua katoa o Iharaira, ka haere ki a Hamuera ki Rama. 5 Ka mea ki a ia, Kua koroheketia koe, kahore hoki au tama e tika i ou huarahi; heoi whakaritea he kingi mo matou hei whakarite mo matou, hei pera ano me o nga iwi katoa/ 6 Otira i kino taua kupu ki a Hamuera, mo ratou i me, Homai he kingi ki a matou hei whakarite mo matu. Na ka inoi a Hamuera

7 ki a Ihowa. Na ka mea a Ihowa ki a Hamuera, Whakarongo ki te reo o te iwi na, ki nga mea katoa i korerotia e ratou ki a koe; ehara hoki i te mea ko koe ta ratou i paopao ai, ko ahau ia ta ratou i

8 paopao mai nga hei kingi mo ratou. E rite ana ki nga mea katoa i mea ai ratou, o te ra iho ano i kawea mai ai ratou e ahau i Ihipa a tae noa ki tenei ra; i whakarere hoki ratou i ahau, i mahi atu ki

9 nga atua ke: ko ta ratou mahi hoki tena ki a koe. Heoi whakarongo aiane ki to ratou reo: otia kia kaha te kauwhau ki a ratou, whakaaturia hoki nga tikanga o te kingi e whakakingitia mo ratou.

10 Na ka korerotia e Hamuera nga kupu katoa a Ihowa ki te hunga i tono kingi nei i a ia; 11 Ka mea, Ko te tikanga tenei a te kingi e whakakingitia mo koutou: Ko a koutou tama ka tangohia e ia, ka meinga mana, mo ana hariata, hei tangata eke hoiho hoki mana, hei rere ano ki mua i ana hariata;

12 Ka meinga hoki hei rangatira mano mana, hei rangatira mo nga rima tekau, hei parau i tana mara, hei kokoti i ana witi, hei hanga hoki i ana mea mo te whawhai, i ana mea mo ana hariata; 13 Ka

14 tangohia hoki e ia a koutou tamahine hei mahi keke, hei taka kai, hei tunu taro. Me a koutou mara, a koutou kari waina, a koutou kari oriwa, ka tangohia e ia nga mea papai, a ka hoatu ki ana

15 pononga. Ka tangohia hoki e ia te whakatekau o a koutou purapura, o a koutou kari waina, a ka

16 hoatu ki ana unaka, ki ana pononga. Ka tangohia ano e ia a koutou pononga tane, a koutou pononga wahine, a koutou taitamariki papai, me a koutou kaihe, a ka whakamahia ki tana mahi.

17 Ka tangohia ano e ia nga whakatekau o a koutou hipi: ka waiho ano hoki koutou hei pononga



18  
mana. A ka tangi koutou i taua ra i ta koutou kingi i whiriwhiri ai mo koutou; e kore ano a Ihowa  
e rongu ki a koutou i taua ra. 19  
Otira kihai te iwi i pai kia whakarongo ki te reo o Hamuera. Na  
ka mea ratou, Kahore; engari me whai kingi matou; 20  
Kia rite ai hoki matou ki nga iwi katoa; a  
ka whakarite to matou kingi mo matou, ka haere atu hoki i to matou aroaro, hei whawhai i a matou  
whawhai. 21  
A ka rongu a Hamuera i nga kupu katoa a te iwi, korerotia ana e ia ki nga taringa o  
Ihowa. 22  
A ka mea a Ihowa ki a Hamuera, Whakarongo atu ki to ratou reo, whakaritea hoki he  
kingi mo ratou. A ka mea a Hamuera ki nga tangata o Iharaira, Haere atu koutou ki tona pa, ki tona  
pa.

## Chapter 9

1  
Na tera tetahi tangata o Pinemine, ko Kihi tona ingoa, he tama na Apiere, tama a Teroro, tama  
a Pekorata, tama a Apiaha, he Pineamini, he tangata marohirohi. 2  
He tama ano tana, ko tona ingoa  
ko Haora, he taitama, he ataahua, he pai, kahore he tangata o nga tama a Iharaira i ataahua atu i a  
ia; purero tonu ona pokohiwi ki runga ake i te iwi katoa.  
3  
Na kua ngaro nga kaihe a Kihi papa o Haora, a ka mea a Kihi ki a Haora, ki tana tama,  
Tangohia tetahi o nga tamariki hei hoa mou, whakatika, haere ki te rapu i nga kaihe. 4  
Na ka tika  
ia na te whenua pukepuke o Eparaima, a haere tonu na te whenua o Hariha; heoi kihai i kitea: katahi  
raua ka tika na te whenua o Harimi, heoi kahore noa iho; na ka haere ia na te whenua o nga  
Pineamini, a kahore i kitea. 5  
A, no to raua taenga ki te whenua o Tupu, ka mea a Haora ki tana  
tangata, ki tona hoa, Haere mai, taua ka hoki; kei mutu te whakaaro o toku papa ki nga kaihe, a ka  
manukanuka ke ki a taua. 6  
Na ka mea tera ki a ia, He tangata na te Atua tenei kei te pa nei, he  
tangata e whakahonoretia ana; mana pu ana kupu katoa: na kia haere taua ki reira; tera pea e korerotia  
mai e ia ki a taua te haere e haere nei taua. 7  
Ano ra ko Haora ki tana tangata, Engari, ki te haere  
taua he aha te mea hei mauranga atu ma taua ki taua tangata, kua hemo nei hoki te taro i roto i a  
taua putea, a kahore he hakari hei kawenga atu ki taua tangata a te Atua: he aha oti ta taua? 8  
Na  
ka whakahoki taua tangata ki ta Haora, ka mea, Nana, ko te whakawha tenei o te hekere hiriwa kei  
toku ringa: me hoatu e ahau ki taua tangata a te Atua, kia whakaaturia mai e ia to taua ara ki a taua.  
9  
I mua hoki i roto i a Iharaira, ina haere te tangata ki te ui tikanga i te Atua, ko tana ki tenei, Hoake,  
taua ka haere ki te matakite: he matakite hoki ta mua ingoa mo te poropiti. 10  
Na ka mea a Haora

ki tana tangata, Ka pai tau kupu; hoatu, taua ka haere. Na haere ana raua ki te pa kei reira nei taua tangata a te Atua.

11

I a raua e piki ana i te pikitanga ki te pa, ka tutaki raua ki etahi kotiro e puta mai ana ki te utu wai. Na ka mea raua ki a ratou, Tenei ranei te matakite? Na ka whakahoki ratou ki a raua, ka mea, Tenei ano; nana, kei mua atu i a koe na: hohoro atu inaianei tonu, no tenei ra hoki ia i tae

12

mai ai ki te pa; he patunga tapu hoki ta te iwi nei aianei i te wahi tiketike. Tomo kau korua ki te pa, ka tupono korua ki a ia i te mea kahore ano i piki noa ki te wahi tiketike ki te kai: e kore hoki te iwi e kai kia tae atu ra ano ia; ko ia hoki hei whakapai i te patunga tapu, muri iho ka kai te hunga

13

i karangatia. Heoi, piki atu; ko te wa hoki tenei e kitea ai ia e korua. Na piki ana raua ki te pa; a ka uru atu raua ki roto ki te pa, ko Hamuera kua puta; tutaki tonu ki a raua; e piki ana ki te wahi

14

tiketike. Na kua whakapuakina e Ihowa ki a Hamuera i te ra i mua atu i te taenga mai o Haora,

15

kua mea, Kia penei apopo ka unga atu e ahau ki a koe tetahi tangata no te whenua o Pineamine, na me whakawahi ia e koe hei rangatira mo taku iwi, mo Iharaira, a mana e whakaora taku iwi i te ringa o nga Pirihitini: kua titiro atu hoki ahau ki taku iwi, n o te mea kua tae ake ta ratou karanga

16

ki ahau. A, no te kitenga o Hamuera i a Haora, ka mea a Ihowa ki a ia, Ko te tangata tenei i korerotia ra e ahau ki a koe. Mana e whakahaere tikanga mo taku iwi.

17

18

Katahi ka whakatata a Haora ki a Hamuera, ki te kuwaha, ka mea, Tena koe, whakaaturia mai ki ahau, kei hea te whare o te matakite. Na ka whakahoki a Hamuera ki a Haora, ka mea,

19

Ko ahau te matakite: piki atu i mua i ahau ki te wahi tiketike, ka kai tahi hoki korua i ahau aianei;

20

a ka tukua atu koe e ahau i te ata, ka whakaaturia hoki ki a koe nga mea katoa i tou ngakau. A ko au kaihe, ka toru nei nga ra e ngaro ana, kua tou ngakau e whai ki era; kua kitea hoki. Kei a wai koia te hiahia katoa o Iharaira? he teka ianei kei a koe, kei te whare katoa ano hoki o tou papa?

21

Na ka whakahokia e Haora, ka mea, He teka ianei he Pineamini ahau, no te iti rawa o nga iwi o Iharaira, ko toku hapu hoki te iti rawa o nga hapu katoa o te iwi o Pineamine? he aha ra ena kupu

22

i puaki mai ai i a koe? Na ka mau a Hamuera ki a Haora raua ko tana tangata, a kawea ana ki te whare, a hoatu ana e ia he nohoanga ki a raua i runga ake o te hunga i karangatia; e toru tekau ano

23

hoki ratou. Na ka mea a Hamuera ki te tuari, Homai te wahi i hoatu e ahau ki a koe, tera i kiia

24

atu ra e ahau ki a koe, Kia takoto tena ki a koe. Na hapainga ana e te tuari te huha me ona aha noa, a whakatakotoria ana ki te aroaro o Haora. Na ka mea a Hamuera, Nana, ko te wahi i tohungia na, waiho i tou aroaro hei kai mau: he mea rongoa tonu hoki mau a tae noa ki tenei wa, no taku kianga, He hunga tenei kua karangatia e ahau. Na kai tahi ana a Haora raua ko Hamuera i taua ra.

25

A, i to ratou hekenga iho i te wahi tiketike ki te pa, ka korero ia ki a Haora i runga i te tuanui.

26

Na ka maranga wawe ratou: a i te mea ka puta ake te ra, ka karangatia a Haora e Hamuera ki runga ki te tuanui, i mea ia, Whakatika, kia unga atu koe e ahau. Na ka whakatika a Haora, a puta

27

atu ana raua tokorua, a ia, a Hamuera, ki waho. I a raua e heke ana i te pito o te pa, ka mea a Hamuera ki a Haora, Mea atu ki te tangata ra kia haere atu ki mua i a taua; katahi tera ka haere; ko koe ia, tu marie koe, kia whakapuakina atu e ahau ki a koe te kupu a te Atua.

## Chapter 10

1

Katahi ka mau a Hamuera ki te pounamu hinu, ringihia ana e ia ki runga ki tona matenga; na ka kihi ia i a ia, ka mea, Ehara ianei i te mea na Ihowa koe i whakawahi hei rangatira mo tona wahi

2

tupu? Ka mawehe atu koe i ahau aianeia, ka tupono koe ki etahi tangata tokorua i te taha o te tanumanga o Rahera, i te rohe o Pineamine, i Tereta; a tera raua e mea ki a koe, Kua kitea nga kaihe i haere na koe ki te rapu: na, ko tou papa, mahue ake nga whakaaro ki nga kaihe, kei te manukanuka

3

hoki tera ki a korua, e mea ana, Me pehea ahau ki taku tama? Katahi ka haere tonu atu koe i reira, a ka tae ki te oki o Taporo, ka tupono ki a koe etahi tangata tokotoru e haere ana ki runga, ki te Atua, ki Peteere, e toru nga kuao koati e kawea ana e tetahi, e toru nga rohi taro e kawea ana e

4

tetahi, a ko tetahi e mau ana i te pounamu waina. Na ka oha ratou ki a koe, ka homai ano hoki

5

etahi taro e rua ki a koe, a me tango e koe i o ratou ringa. Muri iho i tera ka tae ki te puke o te Atua, kei reira nei nga hoia pupuri a nga Pirihitini: a, i tou taenga ki reira, ki te pa, na ka tutaki koe ki te ropu poropiti e haere iho ana i te wahi tiketike, me te hatere, me te timipera, me te putorino,

6

me te hapa hoki ki mua i a ratou; me te poropiti ano hoki ratou; Na ka puta kaha mai te wairua o Ihowa ki runga ki a koe, a ka poropiti tahi koutou, a koe me ratou, a ka puta tou ahua hei tangata

7

ke. Me i reira, ki te puta ena tohu ki a koe, meatia e koe te mea e tupono atu ai tou ringa no te

8

mea kei a koe te Atua. Na, me haere koe i mua i ahau ki Kirikara; na, tena ahau te haere atu na ki raro, ki a koe, ki te whakaeke i nga tahunga tinana, ki te patu i nga patunga mo te pai: kia whitu nga ra e tatari ai koe kia tae atu ahau ki a koe, katahi ka whakaaturia e ahau ki a koe tau e mea ai.

9

Koia ano, kei te tahuritanga o tona tuara, he mawehe atu i a Hamuera, ka homai e te Atua he

10

ngakau ke mona! a puta katoa ana aua tohu i taua rangi ano. A, no to raua taenga ki reira, ki te puke, na ko tetahi ropu poropiti kua tutaki ki a ia: ko te tino putanga mai o te wairua o te Atua ki

11

runga ki a ia, na poropiti ana ia i roto i a ratou. A, no te kitenga o te hunga katoa i mohio ki a ia i mua ake, na kei roto ia i nga poropiti e poropiti ana; katahi ka mea te iwi tetahi ki tetahi, He aha

12 tenei kua puta nei ki te tama a Kihi? Kei roto ano koia a Haora i nga poropiti? Na ka whakahoki tetahi o taua wahi, ka mea, Ha, ko wai to ratou papa? Koia te whakatauki nei, Kei roto ano koia a

13 Haora i nga poropiti? A, i te mutunga o tana poropiti, ka haere ia ki te wahi tiketike. Na ka 14 mea te matua keke o Haora ki a raua ko tana tangata, I haere korua ki hea? A ka ki atu ia, Ki te rapu i nga kaihe; a, i to maua mohiotanga kahore ano ratou i kitea, haere ana maua ki a Hamuera.

15 Ano ra ko te matua keke o Haora, Tena ra, whakaaturia mai ki ahau, i pehea a Hamuera ki a

16 korua. Na ka mea a Haora ki tona matua keke, I ata whakaaturia mai e ia ki a maua kua kitea nga kaihe. Otiia ko te mea o te kingitanga, ko ta Hamuera i korero ra, kihai tera i whakaaturia ki a ia.

17 Katahi ka karangarangatia te iwi e Hamuera ki a Ihowa ki Mihipa; 18 Na ka mea ia ki nga tama a Iharaira, Ko te kupu tenei a Ihowa, a te Atua o Iharaira, Naku a Iharaira i kawe mai i Ihpa, naku hoki koutou i whakaora i roto i te ringa o nga Ihipiana, i te ringa ano o nga rangatiratanga

19 katoa, i whakatupu kino i a koutou. Na kua whakakahore nei koutou i tenei ra ki to koutou Atua, e whakaora nei i a koutou i roto i o koutou he katoa, i o koutou mate; a kua mea koutou ki a ia, Engari, me whakarite e koe he kingi mo matou: Na reira, me tu koutou inaianei ki te aroa ro o

20 Ihowa, o koutou iwi, o koutou mano. Katahi a Hamuera ka mea i nga iwi katoa o Iharaira kia

21 whakatata mai; na ka tangohia ko te iwi o Pineamine. Na ka mea ia i te iwi o Pineamine kia whakatata mai, tenei hapu, tenei hapu, a ka tangohia ko te hapu o Matari; na ka tangohia ko te hapu o Matari; na ka tangohia ko Haora, ko te tama a Kihi; no ta ratou rapunga ia i a ia, kahore i kitea.

22 Na reira ka ui ano ratou ki a Ihowa, Tena ano ranei he tangata kia tae mai ki konei? A ka

23 whakautua e Ihowa, Na, kei roto ia i nga mea na e piri ana. Na ko to ratou rerenga, ka tikina atu ia i reira; a, no tona tunga i waenganui i te iwi, teitei ake ia i te iwi katoa, i ona pokohiwi ahu ake.

24 Na ka mea a Hamuera ki te iwi katoa, Kia kite koutou i ta Ihowa i whiriwhiri ai; kahore hoki he

25 rite mona o te iwi katoa. Na ka hamama te iwi katoa, ka mea, Kia ora te kingi. Katahi ka korerotia e Hamuera ki te iwi te tikanga o te kingitanga, a tuhituhia ana e ia ki te pukapuka, whakatakotoria ana ki te aroaro o Ihowa. Na ka tonoa e Hamuera te iwi katoa kia haere ki tona whare, ki tona whare.

26 Me Haora ano i haere ia ki tona whare ki Kipea; i haere tahi ano i a ia tetahi ropu tangata i

27 whakapakia nei o ratou ngakau e Ihowa. Tera ano ia etahi tama a Periara, i mea, Me pewhea e ora ai tatou i tenei tangata? Na whakahaweatia ana ia e ratou, kihai ano i kawea he hakari e ratou ki a ia. Otiia whakarongo puku tonu ia.

## Chapter 11

<sup>1</sup> Na ka haere mai a Nahaha Amoni ki te whakapae i Iapehe Kireara. A ka mea nga tangata katoa o Iapehe ki a Nahaha, Whakaritea mai he kawenata ki a matou, a ka mahi matou ki a koe.

<sup>2</sup> Na ka mea a Nahaha Amoni ki a ratou, Ko te mea tenei e whakarite kawenata ai ahau ki a koutou, kia pokaia o koutou kanohi matau katoa; a ka waiho e ahau hei tawai mo Iharaira katoa. <sup>3</sup> Ano ra ko nga kaumatua o Iapehe ki a ia, Tukua mai koa ki a matou kia whitu nga ra, kia tono tangata ai matou puta noa i nga rohe o Iharaira; a, ki te kahore he kaiwhakaora mo matou, na ka puta atu

matou ki a koe. <sup>4</sup> Katahi ka haere nga karere ki Kipea o Haora, a korerotia ana enei kupu ki nga taringa o te iwi: na nui atu te reo o te iwi katoa ki te tangi.

<sup>5</sup> Na e haere mai ana tera a Haora i te mara, i muri i nga kau; na ka mea a Haora, Na te aha te iwi i tangi ai? Na ka korerotia ki a ia nga korero a nga tangata o Iapehe. <sup>6</sup> I te rongonga o Haora i enei korero, na ko te tino putanga o te wairua o te Atua ki runga ki a ia, a mura whakarere tona riri

ki taua rongo. <sup>7</sup> Na ka mau ia ki etahi kau e rua, tapatapahia ana e ia; tukua ana ki nga rohe katoa o Iharaira, he mea kawe na nga karere, a ka mea, Ki te kahore tetahi e puta mai ki te aru i a Haora, ki te aru hoki i a Hamuera, ka penetia ana kau. Na ka tau te wehi o Ihowa ki runga ki te iwi, a ka

puta ratou ano he tangata kotahi. <sup>8</sup> Na ka taua ratou e ia ki Pehek; e toru rau mano nga tama a

Iharaira, e toru tekau hoki mano nga tangata o Hura. <sup>9</sup> Na ka mea ratou ki nga karere i haere mai ra, Kia penei ta koutou ki atu ki nga tangata o Iapehe Kireara, Apopo, kia mahana te ra, ka puta he whakaoranga mo koutou. Na haere ana aua karere, a korerotia ana ki nga tangata o Iapehe; a koa

ana ratou. <sup>10</sup> Na reira ka mea nga tangata o Iapehe, Apopo ka puta atu matou ki a koutou, a ma

koutou e mea ki a matou nga mea e pai ana ki to koutou whakaaro. <sup>11</sup> Heoi i te aonga ake ka wehea e Haora te iwi kia toru nga ngohi. Na haere ana ratou ki waenganui o te puni i te whakaaraara o te ata, patua iho nga Amoni a mahana noa te ra; a, ko nga toenga, i marara noa atu, a kihai hoki i waiho kia tokorua o ratou e haere tahi ana.

<sup>12</sup> Na ka mea te iwi ki a Hamuera, Ko wai tenei i mea nei, Hei kingi koia a Haora mo tatou?

Homai aua tangata kia whakamatea e matou. <sup>13</sup> Ano ra ko Haora, E kore tetahi e whakamatea

aiane; ko te ra hoki tenei i puta ai ta Ihowa whakaora mo Iharaira. <sup>14</sup> Katahi ka mea a Hamuera

ki te iwi, Haere mai, tatou ka haere ki Kirikara, ki reira whakahou ai i te kingitanga. <sup>15</sup> Na haere ana te iwi katoa ki Kirikara, a whakakingitia ana a Haora ki reira ki te aroaro o Ihowa ki Kirikara. Na patua ana e ratou ki reira he patunga mo te pai ki te aroaro o Ihowa; a nui atu te koa o Haora, ratou ko nga tangata katoa o Iharaira i reira.

## Chapter 12

<sup>1</sup> Na ka mea a Hamuera ki a Iharaira katoa, Nana, kua rongu nei ahau ki to koutou reo, ki nga  
 mea katoa i kiia mai ki ahau, kua whakakingi hoki i tetahi kingi mo koutou. <sup>2</sup> Ina, te kingi na, e  
 haereere na i to koutou aroaro: ko ahau hoki, kua koroheketia ahau, kua hina; a ko aku tama kei a  
 koutou ena: no toku tamarikitanga hoki toku haereere i to koutou aroaro a tae noa mai ki tenei ra.  
<sup>3</sup> Tenei ahau: whakaaturia mai toku he i te aroaro o Ihowa, i te aroaro ano hoki o tana tangata i  
 whakawahi ai: i tango ranei ahau i te kau a tetahi? i tango ranei ahau i te kaihe a tetahi? i riro mai  
 ranei i ahau nga taonga o tetahi? i tukinotia ra nei e ahau tetahi? i tango ranei ahau i te utu whakapati  
 a tetahi hei mea kia huna oku kanohi? a ka whakahokia e ahau ki a koutou. <sup>4</sup> Ano ra ko ratou, Kihai  
 tetahi mea a matou i riro he i a koe, kihai hoki koe i tukino i a matou, kihai ano hoki i tangohia e  
 koe tetahi mea a te tangata. <sup>5</sup> Na ka mea ia ki a ratou, Ko Ihowa hei kaiwhakaatu mo ta koutou;  
 hei kaiwhakaatu ano hoki inaianei tana tangata i whakawahi ai, kihai i mau i a koutou tetahi mea  
 a toku ringa. A ka mea ratou, Hei kaiwhakaatu ano ia.  
<sup>6</sup> Na ka mea a Hamuera ki te iwi, Na Ihowa i whakatu a Mohi raua ko Arona, nana hoki o  
 koutou matua i kawe mai i te whenua o Ihipa. <sup>7</sup> Na, tu tonu koutou, a ka whakahaerea e ahau ki a  
 koutou ki te aroaro o Ihowa nga mahi tika katoa a Ihowa i mahia e ia ki a koutou, ki o koutou matua  
 hoki. <sup>8</sup> I te haerenga atu o Hakopa ki Ihipa, a ka tangi o koutou matua ki a Ihowa, na ka tonoa e  
 Ihowa a Mohi raua ko Arona hei whakaputa mai i o koutou matua i Ihipa, hei whakanoho hoki i a  
 ratou ki tenei wahi. <sup>9</sup> A ka wareware ratou ki a Ihowa, ki to ratou Atua, na hokona ana ratou e ia  
 ki te ringa o Hihera, rangatira o te ope a Hatoro, ki te ringa hoki o nga Pirihitini, ki te ringa hoki o  
 te kingi o Moapa, a whawhai ana ratou ki a ratou. <sup>10</sup> A ka tangi atu ratou ki a Ihowa, ka mea, Kua  
 hara matou, i a matou i whakarere nei i a Ihowa, i mahi ki nga Paara, ki a Ahataroto; otiia  
 whakaorangia matou i te ringa o o matou hoariri, a ka mahi matou ki a koe. <sup>11</sup> Na ka unga mai e  
 Ihowa a Ierupaara, a Perana, a Iepeta, a Hamuera, a whakaorangia ana koutou i roto i nga ringa o  
 o koutou hoariri i tetahi taha, i tetahi taha, a noho wehikore noa iho ana koutou. <sup>12</sup> A, no to koutou  
 kitenga e haere mai ana a Nahaha kingi o nga tama a Amona ki a koutou, ka mea koutou ki ahau,  
 Kahore, engari me whai kingi ano matou; i te mea ko Ihowa, ko to koutou Atua to koutou kingi.  
<sup>13</sup> Ina ra te kingi i whiriwhiria nei e koutou, i tonoa nei e koutou! Nana, kua hoatu e Ihowa he kingi  
 mo koutou. <sup>14</sup> Ki te wehi koutou i a Ihowa, ki te mahi ki a ia, ki te whakarongo ki tona reo, ki te  
 kore hoki e tutu ki te kupu a Ihowa, katahi koutou ko te kingi e kingi ana i a koutou ka whai tonu

15  
i a Ihowa, i to koutou Atua. Engari ki te kore koutou e rongu ki te reo o Ihowa, a ka tutu ano ki te kupu a Ihowa, katahi ka anga mai ki a koutou te ringa o Ihowa, ka rite ki tana ki o koutou matua.

16  
Tena, tu tonu koutou, kia kite koutou i tenei mea nui ka meatia nei e Ihowa ki to koutou aroaro.  
17  
Ehara ianei tenei i te kotinga witi inaianei? Ka karanga ahau ki a Ihowa, a ka homai he whatitiri, he ua, kia mohio ai koutou, kia kite ai, he nui to koutou he i meatia nei e koutou i te aroaro

18  
o Ihowa i a koutou i tonu kingi nei mo koutou. Na ka karanga a Hamuera ki a Ihowa, a homai ana e Ihowa he whatitiri, he ua, i taua rangi ano. Na nui noa atu te wehi o te iwi katoa ki a Ihowa,

19  
ki a Hamuera. Na ka mea te iwi katoa ki a Hamuera, Inoi atu mo au pononga ki a Ihowa, ki tou Atua, kei mate matou; kua tapiritia hoki o matou hara katoa ki tenei kino, ki ta matou tonu i te kingi

20  
mo matou. Ano ra ko Hamuera ki te iwi, Kaua e wehi: kua oti tenei kino katoa te mea e koutou, kua ia e peka atu i te whai a Ihowa; engari me whakapau o koutou ngakau ki te mahi ki a Ihowa.

21  
Kaua ano hoki e peka atu: ko reira hoki koutou whai ai i nga mea tekateka noa, e kore e mana,

22  
e kore ano hoki e whakaora; he mea tekateka noa hoki. E kore hoki a Ihowa e whakarere i tana iwi, ka mahara ia ki tona ingoa nui; kua pai nei hoki a Ihowa ki te mea i a koutou hei iwi mana.

23  
Ko ahau hoki! E! kia hara ahau ki a Ihowa! kia mutu taku inoi mo koutou! Tena ko tenei, me

24  
whakaako koutou e ahau ki te ara pai, ki te ara tika. Engari kia wehi i a Ihowa; whakapaua hoki o koutou ngakau ki te mahi ki a ia i runga i te pono; whakaaroa hoki nga mea nunui i mea ai ia ki

25  
a koutou. Na, ki te mahi tonu koutou i te he, ka ngaro ngatahi koutou ko to koutou kingi.

### Chapter 13

1  
E toru tekau nga tau o Haora ka kingi ia; a e rua ona tau e kingi ana mo Iharaira. 2 Na ka whiriwhiria e Haora etahi tangata o Iharaira mana, e toru mano. A o aua mano, e rua i a Haora i Mikimaha, i Maunga Peteere, kotahi mano i a Honatana i Kipea o Pineamine; ko te nuinga ia o te

3  
iwi i tonu atu e ia ki tona teneti, ki tona tene ti. Na ka patua e Honatana nga hoia pupuri a nga Pirihitini i Kepa, a rongu ana nga Pirihitini. Na ka whakatangihia te tetere e Haora puta noa i te

4  
whenua katoa, a ka mea, Kia rongu nga Hiperu. A ka rongu a Iharaira katoa i te korero kua patua e Haora nga hoia pupuri a nga Pirihitini, a kua whakahouhou hoki a Iharaira ki nga Pirihitini, na

5  
ka huihui te iwi ki te whai i a Haora ki Kirikara. Me nga Pirihitini hoki, i huihui ki te whawhai ki a Iharaira, e toru tekau mano nga hariata, e ono mano nga hoia eke hoiho, me nga tangata e rite ana ki te onepu i te taha o te moana te tini. Na ka haere ratou, ka noho ki Mikimaha, whaka te rawhi

<sup>6</sup>  
 ti o Peteawene. I te kitenga o nga tangata o Iharaira kei roto ratou i te raru, kua pawera hoki te  
 iwi, na piri ana te iwi i roto i nga ana, i nga wahi ururua, i runga i nga kamaka, i nga taumaihi, i  
<sup>7</sup>  
 roto i nga rua. Na tera etahi o nga Hiperu i whiti atu i Horano ki te whenua o Kara, o Kireara, Ko  
 Haora ia, i Kirikara ano ia; a aru wehi ana te iwi katoa i a ia.  
<sup>8</sup>  
 A e whitu nga ra i tatari ai ia; ko te wa hoki ia i whakaritea e Hamuera; kahore ia a Hamuera  
<sup>9</sup>  
 i tae ki Kirikara; a marara noa atu tona nuinga. Na ka mea a Haora, Kawea mai te tahunga tinana  
<sup>10</sup>  
 ki ahau, me nga whakahere mo te pai. Na whakaekea ana e ia te tahunga tinana. A ka oti tana  
 tahunga tinana te whakaeke, na kua puta a Hamuera; a haere ana a Haora ki te whakatau i a ia, ki  
<sup>11</sup>  
 te oha ki a ia. Na ka mea a Hamuera, He mahi aha tau? Ano ra ko Haora, I kite hoki ahau kua  
 marara noa atu toku nuinga, a kahore koe i tae mai i nga ra i whakaritea, heoi e huihui ana nga  
<sup>12</sup>  
 Pirihitini ki Mikimaha: Koia ka mea ahau, Akuanei nga Pirihitini haere mai ai ki ahau ki Kirikara,  
 a kahore ano ahau kia inoi ki a Ihowa. Na pehia ana e ahau toku ngakau, a whakaekea ana te tahunga  
<sup>13</sup>  
 tinana. Na ko te kianga a Hamuera ki a Haora, He mahi kuware tau; kihai nei i pupuri i te  
 whakahau a Ihowa, a tou Atua i whakahau ai ia ki a koe: penei kua whakapumautia e Ihowa aianei  
<sup>14</sup>  
 tou kingitanga ki a Iharaira a ake ake. Ko tenei, e kore e tu tou kingitanga: kua rapua e Ihowa  
 tetahi tangata mana, ko ta tona ngakau i pai ai, kua oti ano ia te whakahau e Ihowa hei rangatira  
 mo tana iwi; mou kihai i pupuri i ta Ihowa i whakahau ai ki a koe.  
<sup>15</sup>  
 Na whakatika ana a Hamuera, a haere atu ana i Kirikara ki Kipea o Pineamine. A taua ana  
<sup>16</sup>  
 e Haora nga tangata i piri ki a ia; tata tonu aua tangata ki te ono rau. Na i Kepa o Pineamine a  
 Haora raua ko tana tama, ko Honatana, me te hunga hoki i piri ki a raua: i Mikimaha ano nga  
<sup>17</sup>  
 Pirihitini e noho ana. Na ka puta nga kaipahua i te puni o nga Pirihitini, e toru nga ngohi: kotahi  
<sup>18</sup>  
 te ngohi i anga na te ara ki Opora, ki te whenua o Huara: Kotahi te ngohi i anga na te huarahi  
 ki Petehorono: kotahi te ngohi i anga na te ara ki te rohe e aro nui ana ki te raorao o Tepoimi whaka  
<sup>19</sup>  
 te koraha. Na kahore he parakimete i kitea puta noa i te whenua katoa o Iharaira: i mea hoki nga  
<sup>20</sup>  
 Pirihitini, Kei hanga he hoari, he tao ranei, e nga Hiperu. Haere ai a Iharaira katoa ki raro, ki  
<sup>21</sup>  
 nga Pirihitini ki te whakakoi i te hea, i te maripi o tana parau, i tana toki, i tana ko. Otiia he  
 whaiuru ano ta ratou mo nga hea, mo nga maripi o nga parau, mo nga marau, mo nga toki, hei oro  
<sup>22</sup>  
 ano hoki mo nga wero kau. Heoi i te ra o te pakanga kahore i kitea he hoari, he tao i roto i te  
 ringa o tetahi o nga tangata a Haora raua ko Honatana: otiia i kitea ano ki a Haora raua ko tana



tama, ko Honatana. <sup>23</sup> Na ka haere nga hoia pupuri a nga Pirihitini ki te whakawhitinga atu o Mikimaha.

## Chapter 14

<sup>1</sup> Na i tetahi o aua ra ka mea a Honatana, tama a Haora, ki te taitama e mau ana i ana patu, Haere mai, taua ka whiti atu ki nga hoia pupuri a nga Pirihitini i tawahi ra. Otiia kihai i korerotia e ia ki tona papa. <sup>2</sup> A i tera pito o Kipea a Haora e noho ana i raro i tetahi pamekaranete i Mikirono: tata tonu ana tangata ki te ono nga rau; <sup>3</sup> Me Ahia ano hoki, tama a Ahitupu, tuakana o Ikaporo, tama a Pinehaha, tama a Eri tohunga a Ihowa i Hiro, ko te kaikakahu ia o te epora. Na kihai te iwi i mohio kua riro a Honatana. <sup>4</sup> Na, i waenga o nga whitinga i whai ai a Honatana kia whiti atu ki nga hoia pupuri a nga Pirihitini, tera tetahi pari kohatu i tetahi taha, he pari kohatu hoki i tetahi taha: ko te ingoa o tetahi ko Potete, ko te ingoa o tetahi ko Henehe. <sup>5</sup> I te raki tetahi pari e tu ana, i te ritenga atu o Mikimaha; i te tonga tetahi, i te ritenga atu o Kipea. <sup>6</sup> Na ka mea a Honatana ki te taitama e mau ana i ana patu, Haere mai, taua ka haere ki nga hoia o enei kokotikore: tera pea a Ihowa e mahi mo taua: kahore he aha ki a Ihowa kia riro ma te tokomaha, ma te tokoiti ranei e whakaora. <sup>7</sup> Ano ra ko te kaimau o ana patu ki a ia, Meatia nga mea katoa e paingia ana e tou ngakau: anga atu, tenei ahau hei hoa mou, hei pera me ta tou ngakau e pai ai. <sup>8</sup> Ano ra ko Honatana, Nana, me haere atu taua ki nga tangata ra, me whakaputa atu hoki ki a ratou. <sup>9</sup> Ki te penei mai ta ratou ki a taua, Tu marie, kia tae atu ra ano matou ki a korua; na me tu taua i to taua turanga, e kore ano e piki ki a ratou. <sup>10</sup> Engari ki te penei ta ratou ki, Piki ake ki a matou, ko reira taua piki atu ai; no te mea kua homai ratou e Ihowa ki o taua ringa: a ko tenei hei tohu ki a taua. <sup>11</sup> Na ka puta raua tokorua ki nga hoia pupuri a nga Pirihitini: a ka mea nga Pirihitini, Nana, ko nga Hiperu e puta mai ana i roto i nga rua i piri ai ratou. <sup>12</sup> Na ka oho nga hoia pupuri ki a Honatana raua ko tana kaimau patu, ka mea, Piki ake ki a matou kia whakakitea ai tetahi mea e matou ki a korua. Na ka mea a Honatana ki te kaimau o ana patu, Piki ake i muri i ahau; kua homai hoki ratou e Ihowa ki te ringa o Iharaira. <sup>13</sup> Na ka piki atu a Honatana, he mea ngoki atu, me tana kaimau patu i muri i a ia: na hinga ana ratou i a Honatana, me te patu ano te kaimau patu i muri i a ia. <sup>14</sup> Na, ko te patunga tuatahi i patu ai a Honatana raua ko tana kaimau patu, tata tonu ki te rua tekau nga tangata: ko te nui o taua wahi, me te mea kei te hawhe eka whenua. <sup>15</sup> Na ka pa te wiri ki te puni, ki era i te parae,

ki te iwi katoa ano hoki: ko nga hoia, me nga kaipahua, i wiri ano hoki ratou; i ru ano te whenua: nui rawa te wiri.

16

A ka titiro nga tutei a Haora i Kipea o Pineamine; na, kua papahoro te ope, me te haere ano

17

ratou, kopiko atu, kopiko mai. Katahi a Haora ka mea ki te iwi i reira, i a ia, Tatauria tatou kia kitea ko wai kua riro. A, no ka tatauria e ratou, na kahore a Honatana raua ko tana kaimau patu i

18

reira. Na ka mea a Haora ki a Ahia, Kawea mai te aaka a te Atua. I nga tama hoki a Iharaira te

19

aaka a te Atua i taua wa. A, i a Haora e korero ana ki te tohunga, ka tino nui haere te ngangau

20

i te puni o nga Pirihitini: na ka ki a Haora ki te tohunga, Pepeke ake tou ringa. Na ka huihui a Haora ratou ko tona nuinga, a haere ana ki te whawhai: na e anga mai ana tera te hoari a tetahi, a

21

tetahi, ki tona hoa, ki tona hoa: nui atu te pokaikaha. Na ko nga Hiperu i roto i nga Pirihitini i mua atu, i haere tahi atu nei me ratou ki te puni i te whenua i tetahi taha, i tetahi taha; na huri ana

22

ano hoki ratou ki te taha i a Iharaira, ki nga hoa o Haora raua ko Honatana. Na pera ano nga tangata katoa o Iharaira i piri nei ki te whenua pukepuke o Eparaima, i to ratou rongonga kua whati

23

nga Pirihitini, na kei te whai haere ano hoki i a ratou i roto i te pakanga. Heoi whakaorangia ana a Iharaira, i taua ra e Ihowa: a puta ke ana te whawhai ki Peteawene.

24

A i hemanawa nga tangata o Iharaira i taua ra: i whakaoati hoki a Haora i te iwi, i mea, Ki te kai tetahi tangata i te kai a ahiahi noa, ka kanga ia, kia whai utu ra ano ahau i oku hoariri. Na

25

reira kihai tetahi o te iwi i anga ki te kai. Na ko te haerenga o nga tangata katoa o te whenua ki

26

tetahi ngahere; a he honi kei runga i te whenua. A, no te taenga o te iwi ki te ngahere, na e turuturu iho ana te honi; otiia kihai i pa te ringa o tetahi tangata ki tona waha; i wehi hoki te iwi i

27

te oati. Ko Honatana ia kihai i rongu i te whakaoati a tona papa i te iwi: na ka kokiritia e ia te pito o te tokotoko i tona ringa, a toua ana ki roto ki te honikoma, whakahokia ana e ia tona ringa

28

ki tona waha, a ka marama ona kanohi. Katahi ka oho tetahi o te iwi, a ka mea, I tino whakaoatitia te iwi e tou papa; i mea ia, Kia kanga te tangata e kai ana i tetahi kai aiane; a e hemo ana te iwi.

29

Katahi a Honatana ka mea, Raru ana te whenua nei i toku papa: titiro hoki, kua marama oku

30

kanohi, noku i kai i tetahi wahi iti o te honi nei. Tera noa ake mehemea pea i kai noa atu te iwi inaianei i nga mea i pahuatia mai i o ratou hoariri i tupono atu ai ratou? ko tenei kahore i rahi te

31

parekura o nga Pirihitini. Na patua iho e ratou nga Pirihitini i taua rangi i Mikimaha atu a tae

32

noa ki Aitarono: a e tino hemo ana te iwi. Na ko te rerenga atu o te iwi ki nga taonga; ka mau ki nga hipi, ki nga kau, ki nga kua kau, patua iho ki te whenua, kainga tahitia ana e te iwi me nga

33

toto. Katahi ka korerotia ki a Haora ka meatia, Nana, kua hara te iwi ki a Ihowa, e kainga tahitia ana ta ratou kai me nga toto. Na ka mea ia, He mahi hianga ta koutou: hurihia mai he kohatu nui

34

ki ahau aianei. Ka mea ano a Haora, Tomotomo atu koutou ki roto ki te iwi mea atu hoki ki a ratou, Kawea mai ki ahau, e tera, e tera, tana kau, tana hipi, ka patu ai ki konei hei kai ma koutou; kua hoki e hara ki a Ihowa, e kai i te toto. Katahi ka kawea mai e te iwi katoa i taua po te kau a

35

tena, a tena, a patua iho ana ki reira. Na ka hanga e Haora he aata ma Ihowa. Koia tenei ko te aata tuatahi i hanga e ia ma Ihowa.

36

Na ka mea a Haora, Tatou ka haere ki raro, ka whai i nga Pirihitini i te po, ka pahua i a ratou a marama noa te ata; kua ano e waiho tetahi tangata o ratou. Na ka mea ratou, Meatia ra nga mea

37

katoa e pai ana ki tou whakaaro. Na ka mea ake te to hunga, Kia whakatata tatou ki a Ihowa. Na ka tono whakaaro a Haora i te Atua, Me haere ranei ahau ki raro, ki te whai i nga Pirihitini? e homai

38

ranei ratou e koe ki te ringa o Iharaira? Otiia kahore he kupu i whakahokia ki a ia i taua ra. Na ka mea a Haora, Neke mai, e nga rangatira katoa o te iwi: kia mohio ai, kia kite ai koutou no hea

39

tenei hara i tenei ra. Ta te mea, e ora ana a Ihowa e whakaora nei i a Iharaira, ahakoa no taku tama, no Honatana, ka mate ia, mate rawa. Otiia kahore he tangata o te iwi katoa hei whakahoki

40

kupu ki a ia. Katahi ia ka mea ki a Iharaira katoa, Hei tetahi taha koutou, hei tetahi taha maua ko taku tama, ko Honatana. Na ka mea te iwi ki a Haora, Meatia ra te mea e pai ana ki tou whakaaro.

41

Katahi a Haora ka mea ki a Ihowa, ki te Atua o Iharaira, Kia tika te homaitanga o te rota. Na ka

42

mau ko Honatana raua ko Haora; i mawhiti hoki te iwi. Na ka mea a Haora, maka te rota mo

43

maua ko taku tama, ko Honatana. Na ka mau ko Honatana. Katahi ka mea a Haora ki a Honatana, Whakaaturia mai ki ahau, i aha koe. Katahi ka whakaaturia e Honatana ki a ia, ka mea, He tika i whakamatau kau atu ahau i tetahi wahi iti o te honi ki te pito o te tokotoko i toku ringa; na, ka mate

44

nei ahau. Ano ra ko Haora, Kia meatia tenei e te Atua, tera atu ano hoki; ka mate rawa hoki koe,

45

e Honatana. Na ka mea te iwi ki a Haora, Kia mate a Honatana nana nei tenei whakaoranga nui i roto i a Iharaira? Kahore ra hoki. E ora ana a Ihowa, e kore e taka tetahi makawe o tona matenga ki te whenua; i te mahi tahi nei hoki ia me te Atua i tenei ra. He oi whakaorangia ana a Honatana

46

e te iwi, a kihai i mate. Katahi ka hoki a Haora i te whai i nga Pirihitini; a haere ana nga Pirihitini ki to ratou na wahi.

47

A, no ka riro i a Haora te kingitanga o Iharaira, ka whawhai ia ki ona hoariri katoa i tetahi taha, i tetahi taha, ki a Moapa, ki nga tama a Amona, ki a Eroma, ki nga kingi ano o Topa, ki nga

48

Pirihitini, a he ana ratou i a ia i nga wahi katoa i tahuri ai ia. A i puta tona toa, a patua ana nga

Amareki, a ora ake i a ia a Iharaira i te ringa o ona kaipahua. <sup>49</sup> Na ko nga tama a Haora, ko Honatana, ko Ihui, ko Marikihua; a, ko nga ingoa enei o ana tamahine tokorua, ko te ingoa o te matamua ko Merapa, ko te ingoa o to muri ko Mikara. <sup>50</sup> A, ko te ingoa o te wahine a Haora ko Ahinoama, he tamahine na Ahimaata: ko te ingoa hoki o te rangatira o tana ope ko Apanere, tama a Nere matua keke o Haora. <sup>51</sup> Ko Kihi hoki te papa o Haora; a he tama na Apiere a Nere papa o Apanere. <sup>52</sup> A he nui te whawhai ki nga Pirihitini i nga ra katoa o Haora; a ka kite a Haora i tetahi marohirohi, i tetahi maia, na ka tangohia e ia mana.

## Chapter 15

<sup>1</sup> Na ka mea a Hamuera ki a Haora, I tonoa mai ahau e Ihowa ki te whakawahi i a koe hei kingi mo tana iwi, mo Iharaira: na whakarongo mai ki te reo o nga kupu a Ihowa. <sup>2</sup> Ko te kupu tenei a Ihowa o nga mano, E whakaaro ana ahau ki ta Amareke i mea ai ki a Iharaira, ki tana whanganga i a ia i te ara i tona haerenga mai i Ihipa. <sup>3</sup> Na tikina, patua a Amareke, whakangaromia rawatia a ratou mea katoa, kua hoki ratou e tohungia; engari whakamatea ngatahitia te tane me te wahine, te potiki me te mea ngote u, te kau me te hipi, te kamera me te kaihe. <sup>4</sup> Na ka huihuia te iwi e Haora, a taua ana e ia ki Teraimi, e rua rau mano, he hunga haere i raro, me nga tangata hoki o Hura, kotahi tekau mano. <sup>5</sup> Na ko te haerenga atu o Haora ki te pa o Amareke, a whakatakoto pehipehi ana i roto i te awaawa. <sup>6</sup> I mea hoki a Haora ki nga Keni, Whakatika, mawehe atu, haere ki raro i roto i nga Amareki, kei huna tahitia koe e ahau me ratou; i puta hoki ta koutou atawhai ki nga tamariki katoa a Iharaira i to ratou haerenga mai i Ihipa. Heoi ka mawehe nga Ke ni i roto i a Amareki. <sup>7</sup> Na tukitukia ana e Haora nga Amareki i Hawira atu a tae noa koe ki Huru, ki te ritenga atu o Ihipa. <sup>8</sup> Hopukia oratia ana hoki e ia a Akaka kingi o Amareke, ko te iwi katoa hoki i whakangaromia rawatia e ia ki te mata o te hoari. <sup>9</sup> Otiia i tohungia e Haora ratou ko te iwi a Akaka, me nga mea papai o nga hipi, o nga kau, o nga mea momona hoki, me nga reme, me nga mea pai katoa, kihai hoki i aro ki te whakangaro i a ratou: engari nga mea e whakaparahakotia ana, e rukea ana, k o ena a ratou i whakangaro ai. <sup>10</sup> Katahi ka puta te kupu a Ihowa ki a Hamuera, ka mea, <sup>11</sup> Kua puta ke oku whakaaro i meinga ai e ahau a Haora hei kingi; kua hoki atu hoki ia i te whai i ahau, a kihai hoki i whakamana i aku kupu. Na ka oho te riri a Hamuera; a pau katoa taua po i a ia e tangi ana ki a Ihowa. <sup>12</sup> Na ka maranga wawe a Hamuera i te ata ki te whakatau i a Haora; a ka korerotia ki a Hamuera, ka meatia,

I te mai a Haora ki Karamere, na whakaturia ana e ia he tohu mana, a haere awhio atu ana, kua pahemo atu, kua riro ki raro, ki Kirikara. <sup>13</sup> Na ka tae atu a Hamuera ki a Haora, a ka mea a Haora ki a ia, Kia manaakitia koe e Ihowa, kua whakamana e ahau te kupu a Ihowa. <sup>14</sup> Na ka mea a Hamuera, He aha koia tenei tangi o nga hipi i roto nei i oku taringa, me te tangi o nga kau e rongo nei ahau? <sup>15</sup> Ano ra ko Haora, He mea mau mai e ratou i nga Amareki: i tohungia hoki e te iwi nga mea papai o nga hipi, o nga kau, hei mea patunga tapu ki a Ihowa, ki tou Atua; a ko te toenga, whakangaromia iho e matou. <sup>16</sup> Katahi ka mea a Hamuera ki a Haora, Kati, kia korerotia e ahau ki a koe ta Ihowa i mea ai ki ahau i tenei po. Ano ra ko tera, Korero. <sup>17</sup> A ka mea a Hamuera, I a koe e iti ana ki tou whakaaro, kihai ianei koe i meinga hei upoko mo nga iwi o Iharaira, i whakawahia e Ihowa hei kingi mo Iharaira? <sup>18</sup> Na ka tono a Ihowa i a koe kia haere, ka mea, Tikina, whakangaromia te hunga hara, nga Amareki, whawhai hoki ki a ratou a poto noa ratou. <sup>19</sup> He aha koe te whakarongo ai ki te reo o Ihowa, i aurara atu ai ki nga taonga parakete, i mahi ai i te kino i te tirohanga a Ihowa? <sup>20</sup> Na ka mea a Haora ki a Hamuera, Ina, i whakarongo ano ahau ki te reo o Ihowa, i haere i te ara i tonoa ai ahau e Ihowa, kua kawea mai ano hoki e ahau a Akaka kingi o Amareke; ko nga Amareki ano hoki, whakangaromia iho e ahau. <sup>21</sup> Na te iwi hoki i tango etahi o nga taonga, o nga hipi, o nga kau, nga mea tino papai o nga mea e whakangaromia ana hei mea patunga tapu ki a Ihowa, ki tou Atua, ki Kirikara. <sup>22</sup> Ano ra ko Hamuera, Ki ta Ihowa, he pera ranei te ahua o nga tahunga tinana, o nga patunga tapu, me te whakarongo ki te reo o Ihowa? <sup>23</sup> Nana, pai atu te whakarongo i te patunga tapu, te ngakau mahara i te ngako o nga hipi toa. Rite tonu hoki te tutu ki te hara makutu; te whakatuturi ki te kino, ki te karakia whakapakoko. He whakaparahako nau ki te kupu a Ihowa, ka whakaparahako hoki ia ki a koe hei kingi. <sup>24</sup> Na ka ki a Haora ki a Hamuera, Kua hara ahau, i ahau i takahi nei i te kupu a Ihowa, i au kupu ano hoki: i wehi hoki ahau i te iwi, i whakarongo ki to ratou reo. <sup>25</sup> Tena ra, whakarerea noatia iho toku hara, kia hoki atu taua, kia koropiko ai ahau ki a Ihowa. <sup>26</sup> Ano ra ko Hamuera ki a Haora, E kore ahau e hoki tahi taua; he mea hoki kua whakaparahako koe ki te kupu a Ihowa, a kua whakaparahako a Ihowa ki a koe hei kingi mo Iharaira. <sup>27</sup> A, i te tahuritanga o Hamuera ki te haere, ka mau tera ki te pito o tona kakahu, a kua pakaru. <sup>28</sup> Na ka mea a Hamuera ki a ia, Kua haea mai e Ihowa inaianei tou kingitanga i roto i a Iharaira, kua hoatu ki tou hoa e pai atu ana i a koe. <sup>29</sup> E kore ano hoki te Kaha o Iharaira e teka; e kore ano hoki e puta ke ona whakaaro; no te mea ehara ia i te tangata e puta ke ai ona whakaaro. <sup>30</sup> Ano ra ko tera, Kua hara ahau: otiiia

whakahonoretia ahau aiane i te aroaro o nga kaumatua o toku iwi, i te aroaro o Iharaira, kia hoki  
 tahi taua, kia koropiko ai ahau ki a Ihowa, ki tou Atua. <sup>31</sup> Heoi hoki ana a Hamuera i muri i a  
 Haora, a karakia ana a Haora ki a Ihowa.

<sup>32</sup> Katahi a Hamuera ka mea, Kawea mai ki ahau a Akaka kingi o Amareke. Na ka ata hikoi a  
 Akaka ki a ia. A ka mea a Akaka, He pono kua pahemo ke te ngau kino a te mate. <sup>33</sup> Ano ra ko  
 Hamuera, Na tau hoari i kore ai nga uri o nga wahine, ka pena ano tou whaea te urikore i roto i nga

wahine. Na haua iho a Akaka e Hamuera i te aroaro o Ihowa i Kirikara. <sup>34</sup> Katahi ka haere a  
 Hamuera ki Rama; ko Haora ia i haere ki runga ki tona whare, ki Kipea o Haora. <sup>35</sup> Kihai hoki a  
 Haora i tiroirohia e Hamuera i muri iho a taea noatia te ra i mate ai ia: heoi tangihia ana a Haora  
 e Hamuera: i puta ke ano hoki nga whakaaro o Ihowa i meinga ai e ia a Haora hei kingi mo Iharaira.

## Chapter 16

<sup>1</sup> Na ka mea a Ihowa ki a Hamuera, Kia pehea ake te roa o tau tangi mo Haora, kua  
 whakakahoretia nei hoki ia e ahau hei kingi mo Iharaira? Whakakiiia tau haona ki te hinu, a haere,  
 ka tonoa koe e ahau ki a Hehe o Peterehema: kua kitea hoki e ahau he kingi maku i roto i ana tama.

<sup>2</sup> Na ka mea a Hamuera, Me pehea ahau e haere ai? ki te rongu hoki a Haora, ka patua ahau e ia.  
 Ano ra ko Ihowa, Kawea atu i tou ringa tetahi kuao kau, hei te uwaha, ka mea atu, I haere mai ahau

ki te patu whakahere ki a Ihowa. <sup>3</sup> Me karanga hoki a Hehe ki te patunga tapu, a maku e whakaatu  
 ki a koe tau e mea ai: me whakawahi ano e koe maku te tangata e korero ai ahau ki a koe. <sup>4</sup> Na

meatia ana e Hamuera ta Ihowa i korero ai, a haere ana ki Peterehema. Na ka haere mai nga kaumatua  
 o te pa ki te whakatau i a ia me te wiri ano, a ka mea, E haere mai ana ranei koe i runga i te

rangimarie? <sup>5</sup> Ano ra ko ia, I runga i te rangimarie: i haere mai ahau ki te patu whakahere ki a  
 Ihowa: whakatapua koutou, ka haere tatou ki te patunga tapu. I whakatapua ano e ia a Hehe ratou  
 ko ana tama, a karangatia ano ratou e ia ki te patunga tapu.

<sup>6</sup> A, no to ratou taenga, na ka titiro atu ia ki a Eriapa, a ka mea, He pono kei te aroaro o Ihowa

tana tangata e whakawahi ai. <sup>7</sup> Na ka mea a Ihowa ki a Hamuera, Kaua e titiro ki tona ahua, ki tona  
 roa ranei, i a ia e tu na; kua whakaparahako hoki ahau ki a ia: e kore hoki e rite ta Ihowa ki ta te

tangata titiro: he titiro hoki ta te tangata ki te kanohi; ko ta Ihowa ia he titiro ki te ngakau. <sup>8</sup> Katahi  
 ka karangatia e Hehe a Apinarapa, a ka meinga kia haere atu ma te aroaro o Hamuera. Na ka mea

ia, Ehara ano tenei i ta Ihowa i whiriwhiri ai. <sup>9</sup> Katahi ka meinga e Hehe a Hamaha kia haere atu.

Na ka mea ia, Ehara ano tenei i ta Ihowa i whiriwhiri ai. <sup>10</sup> Na meinga ana e Hehe ana tama tokowhitu kia haere atu ma te aroaro o Hamuera. A ka mea a Hamuera ki a Hehe, Kihai enei i

whiriwhiria e Ihowa. <sup>11</sup> Na ka mea a Hamuera ki a Hehe, Kei konei katoa ranei au tamariki? A ka mea ia, Tenei ano tetahi, to muri rawa; na kei te tiaki hipi ia. Ano ra ko Hamuera ki a Hehe, Tonoa atu he tangata ki te tiki i a ia: e kore hoki tatou e noho ki te kai kia tae mai ra ano ia ki konei.

<sup>12</sup> Na, ka tono tangata atu tera, a tikina ana ia. Na, he kiri puwhero ia, he kanohi ataahua, he pai ki

te titiro atu. Na ka mea a Ihowa, Whakatika, whakawahia ia, koia hoki ia. <sup>13</sup> Katahi ka mau a Hamuera ki te haona hinu, a whakawahia ana ia i roto i ona tuakana: ko te tino putanga mai o te wairua o Ihowa ki runga ki a Rawiri i taua rangi ano a ahu ake nei. Na whakatika ana a Hamuera, haere ana ki Rama.

<sup>14</sup> Na kua mawehe atu i a Haora te wairua o Ihowa, a ka takakinotia ona whakaaro e tetahi

wairua kino no Ihowa. <sup>15</sup> A ka mea nga tangata a Haora ki a ia, Nana, he wairua kino no te Atua

te whakararu nei i a koe. <sup>16</sup> Na kia ki mai koa to matou ariki ki ana pononga, e tau nei i tou aroaro, kia rapua he tangata mohio ki te whakatangi hapa: kia tau mai ai te wairua kino a te Atua ki a koe,

ka whakatangi ia ki tona ringa, a ka marie koe. <sup>17</sup> Na ka mea a Haora ki ana tangata, Tena ra, tirohia

tetahi kaiwhakatangi pai, ka kawea mai ki ahau. <sup>18</sup> Katahi ka oho tetahi o nga taitama, ka mea, Nana, kua kite ahau i tetahi o nga tama a Hehe o Peterehema, he mohio ki te whakatangi, he toa, he pakari, he tangata hapai patu, he korero tupato, he tangata ataahua, kei a ia ano hoki a Ihowa.

<sup>19</sup> Heoi ka tono tangata a Haora ki a Hehe, hei mea, Tena a Rawiri, tau tama i nga hipi na, tonoa

mai ki ahau. <sup>20</sup> Na ka mau a Hehe ki tetahi kaihe, he taro te pikaunga, me tetahi ipu waina, me

tetahi kuaokoati, a unga ana kia kawea e tana tama, e Rawiri, ki a Haora. <sup>21</sup> Na ka tae a Rawiri ki a Haora, a tu ana i tona aroaro: a nui atu te aroha o tera ki a ia; meinga ana ia e ia hei kaimau patu

mana. <sup>22</sup> Na ka tono tangata a Haora ki a Hehe hei mea atu ki a ia, Tukua a Rawiri kia tu i toku

aroaro; kua manakohia hoki ia e ahau. <sup>23</sup> A, i nga wa i puta mai ai te wairua kino i te Atua ki a Haora, ka mau a Rawiri ki te hapa, ka whakatangi ki tona ringa: heoi ka ta te manawa o Haora, a ka marie, a mahue ake ia i te wairua kino.

## Chapter 17

<sup>1</sup> Na kua huihui nga Pirihitini i a ratou ope ki te whawhai, a ka whakaminea ki Hokoho o Hura,  
 noho ana i waenganui o Hokoho, o Ateka, i Epeheramime. <sup>2</sup> I huihui ano a Haora ratou ko nga  
 tangata o Iharaira, i noho ki te raorao o Eراها; a ka whakatakoto i a ratou ngohi mo te whawhai ki  
 nga Pirihitini. <sup>3</sup> Na i runga nga Pirihitini i te maunga i tenei taha e tu ana, me Iharaira i te maunga  
 i tera taha e tu ana: he wharua hoki i waenganui o ratou. <sup>4</sup> Na ko te putanga o tetahi tangata, he  
 papatu, i roto i te puni o nga Pirihitini, ko tona ingoa, ko Koriata, no Kata, e ono whatianga kotahi  
 hoki whanganga a te ringa tona roa. <sup>5</sup> A he parahi te potae o tona matenga, he pukupuku unahi  
 hoki tona kakahu: ko te taimaha o te pukupuku e rima mano hekere parahi. <sup>6</sup> He whakapuru tao  
 parahi kei ona waewae, a i ona pokohiwi he timata parahi. <sup>7</sup> Rite tonu hoki ki te rakau a te kaiwhatu  
 te kakau o tana taora; na, ko te taimaha o te tete o tana taoroa e ono rau hekere rino: i mua ano i a  
 ia e haere ana te kaimau o tana whakangungu rakau. <sup>8</sup> Na ka tu ia, a ka karanga ki nga ngohi a  
 Iharaira, ka mea ki a ratou, He aha koutou i puta mai ai ki te whakatakoto i a koutou ngohi: ehara  
 ianei ahau i te Pirihitini, ko koutou he pononga na Haora? whiriwhiria he tangata ma koutou, a kia  
 heke ih o ia ki ahau. <sup>9</sup> Ki te kaha ia ki te whawhai ki ahau, ki te patu i ahau, na ko matou hei pononga  
 ma koutou: ki te kaha ia ko ahau i a ia, ki te patu i a ia, na hei pononga koutou ma matou, a me  
 mahi koutou ki a matou. <sup>10</sup> I mea ano taua Pirihitini, Tenei taku whakatara inaianei mo nga ngohi  
 a Iharaira; homai he tangata ki ahau kia whawhai maua. <sup>11</sup> A, i te rongonga o Haora ratou ko  
 Iharaira katoa ki enei kupu a te Pirihitini, hopi noa iho ratou, nui atu te wehi.  
<sup>12</sup> Na, he tama a Rawiri na taua Eparati o Peterehema Hura, ko Hehe nei tona ingoa, tokowaru  
 hoki ana tama: a i nga ra o Haora kua koroheketia taua tangata i roto i nga tangata. <sup>13</sup> Na, tokotoru  
 nga tama a Hehe, ko nga kaumatua, i haere, i aru i a Haora ki te pakanga: ko nga ingoa enei o ana  
 tama tokotoru i haere nei ki te pakanga, ko Eriapa te matamua, ko to muri iho i a ia ko Apinarapa,  
 a ko Hamaha te tuatoru. <sup>14</sup> Ko Rawiri hoki to muri rawa: na aru ana nga mea kaumatua tokotoru  
 i a Haora. <sup>15</sup> Na haere ai a Rawiri, a ka hoki atu i a Haora ki te tiaki i nga hipi a tona papa i  
 Peterehema. <sup>16</sup> Na i te ata, i te ahiahi, ka whakatata mai taua Pirihitini, ka whakaatu i a ia, e wha  
 tekau nga ra. <sup>17</sup> Na ka mea a Hehe ki tana tama, ki a Rawiri, Tena, maua atu tetahi wahi o tenei  
 witi pahuhu, kia kotahi epa, ma ou tuakana, me enei taro kotahi tekau, rere atu ki te puni, ki ou  
 tuakana; <sup>18</sup> Maua atu hoki enei tihi kotahi tekau ki to ratou rangatira mano, ka tirotiro atu kei te  
 pehea ou tuakana, ka tango mai ai i a ratou tohu. <sup>19</sup> Na i te raorao o Eراها a Haora me ratou, me



20  
nga tangata katoa hoki o Iharaira e whawhai ana ki nga Pirihitini. Na ka maranga wawe a Rawiri i te ata, tukua atu ana e ia nga hipi ki te kaitiaki, a mauria ana aua mea e ia, haere ana; pera ana ia me ta Hehe i whakahau ai ki a ia. A, no tona taenga ki te parepare e haere ana te ope ki te whawhai,

21  
e hamama ana, mo te whai. Kua oti hoki i a Iharaira ratou ko nga Pirihitini nga ngohi te whakatakoto, tenei ngohi hei whawhai ki tera ngohi. 22 Na tukua ana e Rawiri tana pikaunga ki te

23  
ringa o te kaitiaki o nga pikaunga, a rere ana ki te taua, ka tae, ka oha ki ona tuakana. I a ia ano e korero ana ki a ratou, na ko taua papatu, ko te Pirihitini o Kata, ko Koriata tona ingoa, e haere mai ana i roto i nga ngohi a nga Pirihitini, a ka korero ko aua korero ra ano, a ka rongo a Rawiri.

24  
A, i te kitenga o nga tangata katoa o Iharaira i taua tangata, rere ana ratou i tona aroaro, a nui atu

25  
to ratou wehi. Na ka mea nga tangata o Iharaira, I kite ranei koutou i taua tangata i haere mai nei? He pono he whakatara mo Iharaira i haere mai ai ia: na, ko te tangata e patua ai ia, nui atu nga taonga e homai e te kingi ki a ia, ka homai ano e ia tana tama hine ki a ia, ka whakarangatiratia ano

26  
te whare o tona papa i roto i a Iharaira. Na ka korero a Rawiri ki nga tangata e tu ana i tona taha, ka mea, Ka peheatia te tangata e patua ai tenei Pirihitini, e mutu ai te tawai o Iharaira? ko wai hoki

27  
tenei Pirihitini kokotikore i whakatara ai ia ki nga ngohi a te Atua ora? Na ka penei te whakahoki

28  
a te iwi ki a ia, ka mea ratou, Ka pera ano te hanga ki te tangata, e patua ai ia. A, no te rongonga o Eriapa, o tona tuakana matamua, i a ia e korero ana ki aua tangata, ko te tino muranga o te riri o Eriapa ki a Rawiri, ka mea ia He aha koe i haere mai ai? i tukua e koe ki a wai aua hipi torutoru ra i te koraha? e mohio ana ahau ki tou whakapehapeha, ki te kino ano hoki o tou ngakau, he matakitaki

29  
hoki i te whawhai i haere mai ai koe ki raro nei. Na ka mea a Rawiri, I aha koia ahau? Kahore

30  
ranei he take? Na ka tahuri atu ia i a ia ki tetahi atu, a ka korero atu ko aua kupu ano; a rite tonu ki te kupu tuatahi te kupu i whakahokia mai e te iwi ki a ia.

31  
A, no ka rangona nga kupu i korerotia e Rawiri, korerotia ana e ratou ki a Haora; a ka tono

32  
ia kia tikina ia. Na ka mea a Rawiri ki a Haora, Kei hopi te ngakau o tetahi ki a ia: ma tau pononga

33  
e haere ki te whawhai ki tenei Pirihitini. Na ka mea a Haora ki a Rawiri, E kore e taea e koe te haere ki tenei Pirihitini whawhai ai: he tamariki nei hoki koe, he tangata hapai patu ia no tona

34  
tamarikitanga ake. Na ka mea a Rawiri ki a Haora, I te tiaki tau pononga i nga hipi a tona papa;

35  
na ko te haerenga mai o tetahi raiona, o tetahi pea, kahakina atu ana he reme i roto i te kahui; Na ka puta atu ahau ki te whai i a ia, a patua ana ia e ahau: tangohia mai ana hoki te reme i roto i tona waha; a, no tona whakatikanga mai ki ahau, hopukia ana tona kumikumi e ahau, patua iho kia mate.

36  
I patua ruruatia te raiona me te pea e tau pononga; a ka rite tenei Pirihitini kokotikore ki tetahi

37  
o raua; mona i whakatara ki nga ngohi a te Atua ora. I mea ano a Rawiri, Ma Ihowa nana nei  
ahau i whakaora i te wae o te raiona, i te wae o te pea, mana ahau e whakaora i te ringa o tenei

38  
Pirihitini. Ano ra ko Haora ki a Rawiri, Haere, hei a koe ano a Ihowa. Na ka whakakakahuria a  
Rawiri e Haora ki ona kakahu, i potaea ano tona matenga e ia ki te potae parahi: i whakakakahuria

39  
ano hoki e ia he pukupuku rino ki a ia. A whitikiria ana e Rawiri tana hoari ki waho ake o ona  
kakahu; ka anga, ka haere; kihai hoki i whakamatauria e ia. Na ka mea a Rawiri ki a Haora, E kore  
e tika taku haere i enei, kahore hoki i whakamatauria e ahau. Na whakarerea atu ana e Rawiri.

40  
Na ka maua atu e ia ko tana tokotoko i tona ringa; i whiriwhiria ano etahi kohatu maeneene  
e rima mana i roto i te awa, a whaowhina ana ki roto ki tana peke hepara, ara ki te putea; i tona

41  
ringa ano tana kotaha, na ko tona whakatatanga atu ki te Pirihitini. A i haere tonu mai te Pirihitini,

42  
i whakatata mai ki a Rawiri; ko te kaimau ano o tana whakangungu rakau i haere i mua i a ia. A,  
no te tirotirohanga o te Pirihitini, ka kite i a Rawiri, whakahawe ana ki a ia; he taitamariki hoki

43  
ia, he kiri puwhero, he ataahua hoki. Na ka mea te Pirihitini ki a Rawiri, He kuri ahau i haere

44  
mai ai koe me nga tokotoko ki ahau? Na, kanga iho a Rawiri e te Pirihitini ki ona atua. I mea  
ano te Pirihitini ki a Rawiri, Haere mai ki ahau, a ka hoatu e ahau ou kikokiko ma nga manu o te

45  
rangi, ma nga kararehe o te parae. Katahi ka mea a Rawiri ki te Pirihitini, I haere mai koe ki  
ahau me te hoari, me te taoroa, me te timata: ko ahau ia ka haere atu nei ki a koe i runga i te ingoa

46  
o Ihowa o nga mano, o te Atua o nga taua a Iharaira, o tau i whakatara ake na. Ko aiane koe  
tukua mai ai e Ihowa ki toku ringa, a ka patua koe e ahau, ka tangohia tou upoko i a koe, a ka hoatu  
aiane ki tinana o te ope o nga Pirihitini ma nga manu o te rangi, ma nga kararehe mohoa o te

47  
whenua, a ka mohio te whenua katoa he Atua ano to Iharaira. A ka mohio tenei whakaminenga  
katoa, ehara te hoari, te taoroa ranei, i ta Ihowa mea hei whakaora: na Ihowa hoki te whawhai, a  
mana koutou e homai ki o matou ringa.

48  
Na ka whakatika te Pirihitini, ka haere mai, ka whakatata ki te whakatutaki i a Rawiri, na

49  
ka hohoro a Rawiri, a rere ana ki te taua kia tutaki ki te Pirihitini. Na kua totoro iho te ringa o  
Rawiri ki roto ki te peke, kei te tango i tetahi kohatu i roto, pua atu ana e ia, na kua tu te rae o te

50  
Pirihitini, toremi atu te kohatu ki roto ki tona rae. Na hinga tapapa iho ana ia ki te whenua. Heoi  
he kotaha, he kohatu ta Rawiri, a hinga ana i a ia te Pirihitini, patua ana e ia, mate rawa. Otiia kahore

51  
he hoari i te ringa o Rawiri. Katahi ka rere a Rawiri, a tu ana i runga i te Pirihitini, na ka mau ki  
tana hoari, unuhia ana e ia i roto i te takotoranga, na whakamatea ana ia, a tapahia ana tona upoko

52  
ki taua hoari. A, no te kitenga o nga Pirihitini kua mate to ratou toa, w hati ana ratou. Na ka  
whakatika nga tangata o Iharaira ratou ko Hura, hamama ana, na whaia ana e ratou nga Pirihitini

a tae noa koe ki te raorao, ki nga kuwaha o Ekerono. Na hinga ana nga mea i patua o nga Pirihitini  
 i te ara ki Haaraimi a tae noa ki Kata, ki E kerono. <sup>53</sup> Na ka hoki nga tama a Iharaira i te whai i  
 nga Pirihitini, na kei te pahua i to ratou puni. <sup>54</sup> Na ka mau a Rawiri ki te upoko o te Pirihitini, a  
 kawea ana ki Hiruharama: ko ana mea ia mo te patu i waiho e ia i tona teneti. <sup>55</sup> Na, i te kitenga o  
 Haora i a Rawiri e haere atu ana ki te tu i te Pirihitini, ka mea ia ki a Apanere, ki te rangatira ope,  
 E Apanere, he tama na wai tena tamaiti? ka mea a Apanere, E ora ana tou wairua, e te kingi, kahore  
 ahau e mohio. <sup>56</sup> Na ka mea te kingi, Ui atu he tama na wai taua tamaiti. <sup>57</sup> Na i te hokinga mai  
 o Rawiri i te patu i te Pirihitini, ka mau a Apanere ki a ia, a kawea ana ki te aroaro o Haora, me te  
 pane ano o te Pirihitini i tona ringa. <sup>58</sup> Na ka mea a Haora ki a ia, E tama, na wai koe tamaiti? Ano  
 ra ko Rawiri, He tama ahau na tau pononga, na Hehe o Peterehema.

## Chapter 18

<sup>1</sup> A ka mutu tana korero ki a Haora, na piri tonu te wairua o Honatana ki te wairua o Rawiri, a  
 aroha ana a Honatana ki a ia me te mea ko tona wairua ake. <sup>2</sup> Na ka mau a Haora ki a ia i taua ra,  
 kihai hoki ia i tukua kia hoki ki te whare o tona papa. <sup>3</sup> I whakarite kawenata ano a Honatana raua  
 ko Rawiri; i arohaina hoki ia e ia, me te mea ko tona wairua ake. <sup>4</sup> I huia ano e Honatana tona  
 koroka i runga i a ia, a hoatu ana ki a Rawiri, me ona kakahu, tae noa ki tana hoari, me tana kopere,  
 me tona whitiki. <sup>5</sup> Na ka haere a Rawiri ki nga wahi katoa i tona ai ia e Haora, ka mahi tupato; a  
 ka meinga ia e Haora hei rangatira mo nga tangata whawhai, a pai tonu ia ki te titiro a te iwi katoa,  
 ki te titiro ano hoki a nga tangata a Haora.  
<sup>6</sup> Na i to ratou haerenga mai, i te hokinga mai o Rawiri i te patu i te Pirihitini, ka puta nga  
 wahine i nga pa katoa o Iharaira, me te waiata, me te kanikani, me nga timipera, me te koa, me nga  
 mea whakatangi, ki te whakatau i a Kingi Haora. <sup>7</sup> Na ka waiata whakatene nga wahine i a ratou  
 e takaro ana, ka mea, Na Haora ana mano, na Rawiri ana tekau mano i patu. <sup>8</sup> Na nui rawa te riri  
 o Haora; he mea kino hoki taua kupu ki tona whakaaro. Na ka mea ia, Tekau a ratou mano i hoatu  
 ai ki a Rawiri, he mano kau nei a ratou i homai nei ki ahau: ko te aha ake mana ki te kahore te  
 kingitanga? <sup>9</sup> Na whakatau ana te kanohi o Haora ki a Rawiri no taua ra tonu iho. <sup>10</sup> Na i te aonga  
 ake ka puta kaha mai he wairua kino i te Atua ki a Haora, a ka poropiti ia i waenganui o te whare;  
 a ka whakatangi te ringa o Rawiri i te hapa, ko tana hanga i tena ra, i tena ra: he tao ano i te ringa

11  
o Haora: Ko te tino werohanga a Haora i te tao; i mea hoki ia, Me patu a Rawiri e ahau, kia titi rawa ki te pakitara. Na karohia ana e Rawiri: e rua nga mawhititanga i tona aroaro.

12 Na ka wehi a Haora i a Rawiri, no te mea i a ia a Ihowa, a kua mawehe i a Haora. 13 Koia i wehea atu ai ia e Haora i a ia, a meinga ana ia e ia ko tana rangatira mano: na ka haere atu ia, ka

14 haere mai i te aroaro o te iwi. Na tupato tonu te whakahaere a Rawiri i ona ara katoa: i a ia ano

15 a Ihowa. A, i te kitenga o Haora he tangata tupato rawa ia, ka wehi ia i a ia. 16 A i aroha a Iharaira katoa ratou ko Hura ki a Rawiri, no te mea i haere atu ia, i haere mai i to ratou aroaro.

17 Na ka mea a Haora ki a Rawiri, Nana, taku tamahine matamua, a Merapa, me hoatu e ahau hei wahine mau, otiia ko koe hei toa maku, hei whawhai i nga whawhai a Ihowa. I mea hoki a Haora,

18 Kaua toku ringa e pa ki a ia; engari kia pa te ringa o nga Pi rihitini ki a ia. Na ka mea a Rawiri ki a Haora, Ko wai ahau, he orange aha hoki toku, he hapu aha to toku papa i roto i a Iharaira, e

19 meinga ai ahau hei hunaonga me te kingi? I te wa ia e homai ai a Merapa, te tamahine a Haora

20 ma Rawiri, na ka hoatu ia hei wahine ma Atariere o Mehora. Na i aroha a Mikara, te tamahine

21 a Haora ki a Rawiri, a ka korerotia ki a Haora, a he mea ahuaureka tena ki tona whakaaro. Na ka mea a Haora, Me hoatu ia e ahau ki a ia a hei rore ia mona e pa ai te ringa o nga Pirihitini ki a ia.

22 Koia a Haora i mea ai ki a Rawiri, Ko aiane te rua o ou meatanga hei hunaonga maku. Na ka whakahau a Haora ki ana tangata, Korero puku ki a Rawiri, mea atu, Nana, e whakaahuareka ana te kingi ki a koe, e aroha ana hoki ana tangata katoa ki a koe: na reira ko koe hei hunaonga ma te

23 kingi. Na korerotia ana aua kupu e nga tangata a Haora ki nga taringa o Rawiri. A ka mea a Rawiri, He mea noa iho koia ki a koutou kia meinga ahau hei hunaonga ma te kingi, he rawakore

24 nei hoki ahau, he ware? Na ka korero nga tangata a Haora ki a ia, ka mea, ko nga kupu enei i

25 puaki mai i a Rawiri. Na ka mea a Haora, Kia penei ta koutou ki ki a Rawiri, Kahore o te kingi hiahia ki te kaupakuha; engari ki nga kiri matamata kotahi rau o nga Pirihitini: kia whai utu ai i nga

26 hoariri o te kingi. I whakaaro hoki a Haora kia hinga a Rawiri i te ringa o nga Pirihitini. A, no ka korerotia e ana tangata enei kupu ki a Rawiri, ahuaureka tonu ki a Rawiri kia meinga ia hei

27 hunaonga ma te kingi. A kahore ano nga ra kia rite. Na ka whakatika a Rawiri, a haere ana ratou ko ana tangata, na patua iho e ia o nga Pirihitini e rua rau nga tangata; a kawea ana e Rawiri o ratou kiri matamata; na hoatu ana e ratou ki te kingi te mea e rite ana, kia meinga ai ia hei hunaonga m

28 a te kingi. Na ka homai e Haora a Mikara, tana tamahine hei wahine mana. A i kite a Haora, i

29 mohio, kei a Rawiri a Ihowa; a i arohaina ia e Mikara tamahine a Haora. Na ka nui rawa atu te

wehi o Haora i a Rawiri; a he ito a Rawiri ki a Haora i nga ra katoa. <sup>30</sup> Katahi ka whakaputa nga rangatira o nga Pirihitini, a i nga wa katoa i whakaputa ai ratou, nui atu te tika o te ngarahu a Rawiri i ta nga tangata katoa a Haora; koia i tino matea nuitia ai tona ingoa.

## Chapter 19

<sup>1</sup> Na ka korero a Haora ki a Honatana, ki tana tama, ratou ko ana tangata katoa, kia whakamatea a Rawiri. <sup>2</sup> Otiia nui atu te whakaahuareka o Honatana, tama a Haora, ki a Rawiri. Na ka korero a Honatana ki a Rawiri, ka mea, E whai ana toku papa, a Haora kia whakamatea koe: na kia tupato ki a koe i te ata, me noho ki te wahi ngaro, ka huna ai i a koe; <sup>3</sup> A ka puta atu ahau, ka tu ki te taha o toku papa i te mara kei reira nei koe, na ka korerotia koe e ahau ki toku papa, a ko taku e kite ai ka korerotia e ahau ki a koe. <sup>4</sup> Na ka korerotia paitia a Rawiri e Honatana ki tona papa, ki a Haora; i mea ia ki a ia, Kei hara te kingi ki tana pononga, ki a Rawiri; kahore hoki ona hara ki a koe, he nui rawa hoki te pai o ana mahi ki a koe. <sup>5</sup> I whakamomori atu na hoki ia ki te mate, a patua iho te Pirihitini, na he nui te whakaoranga i whakaora ai a Ihowa i a Iharaira katoa: i kite koe, i koa hoki, a he aha ra koe ka hara ai ki nga toto harakore, ka whakamate noa iho ai i a Rawiri? <sup>6</sup> Na ka whakarongo a Haora ki te reo o Honatana; a ka oati a Haora, E ora ana a Ihowa, e kore ia e whakamatea. <sup>7</sup> Na ka karangatia a Rawiri e Honatana, a whakaaturia ana e Honatana enei mea katoa ki a ia. Na kawea ana a Rawiri e Honatana ki a Haora; a noho ana ia ki tona aroaro, pera i mua. <sup>8</sup> Na he whawhai ano tera: a haere ana a Rawiri ki te whawhai ki nga Pirihitini, a patua iho ratou e ia, he nui te parekura, a whati ana ratou i tona aroaro. <sup>9</sup> Na kua puta he wairua kino i a Ihowa ki a Haora, i a ia e noho ana i tona whare, me tana tao i tona ringa; a ko Rawiri i whakatangi i te hapa ki tona ringa. <sup>10</sup> Na ka whai a Haora kia werohia a Rawiri ki te tao, kia titi pu ki te pakitara; otiia i whakahipa ia i te aroaro o Haora, a akina kautia ana e tera te tao ki te pakitara; ko Rawiri ia i rere, i mawhiti i taua po. <sup>11</sup> Na ka tono karere a Haora ki te whare o Rawiri, ki te whanga ki a ia, kia whakamatea ia i te ata. Na ka korerotia ki a Rawiri, ki te whanga ki a ia, kia whakamatea ia i te ata. Na ka korerotia ki a Rawiri e Mikara, e tana wahine; i mea, Ki te ka hore koe e whakaora i a koe i tenei po, apopo koe whakamatea. <sup>12</sup> Heoi ka tukua iho a Rawiri e Mikara na te matapihi: a ka haere ia, ka rere, ka ora. <sup>13</sup> Na ka mau a Mikara ki tetahi whakapakoko, a whakatakotoria ana e ia ki te moenga, i

whakatakotoria iho ano e ia tetahi urunga huruhuru koati ki to tera urunga, hipokina iho ki te kakahu.

<sup>14</sup> A, no te tononga a Haora i nga tangata ki te tiki i a Rawiri, ka mea tera, E mate ana ia. <sup>15</sup> Na ka tonono ano a Haora i nga karere kia kite i a Rawiri, ka mea, Kawea mai ki ahau i runga i te moenga,

kia whakamatea ia e ahau. <sup>16</sup> A, i te taenga atu o nga karere, na ko te whakapakoko i te moenga,

me te urunga huruhuru koati i te wahi ki tona pane. <sup>17</sup> Na ka mea a Haora ki a Mikara, Na te aha koe i tinihanga nei ki ahau, i tuku nei i toku hoariri kia haere, a mawhiti atu ana ia? Ano ra ko Mikara ki a Haora, Nana ra i ki mai ki ahau, Tukua ahau kia haere; kia whakamate ahau i a koe hei aha?

<sup>18</sup> Heoi ka rere a Tawiri, a mawhiti atu ana; tae tonu atu ki a Hamuera, ki Rama, a korerotia ana ki a ia nga mea katoa i mea ai a Haora ki a ia. Na ka haere raua ko Hamuera, a noho ana raua

ki Naioto. <sup>19</sup> A i korerotia te korero ki a Haora, Ko Rawiri tera kei Naioto o Rama e noho ana.

<sup>20</sup> Na ka tonono tangata a Haora ki te hopu i a Rawiri: na, i to ratou kitenga i te ropu poropiti e poropiti ana, me Hamuera e tu ana hei tumuaki mo ratou, ka tau iho te wairua o te Atua ki nga tangata a

Haora, a poropiti ana hoki ratou. <sup>21</sup> A, no ka korerotia ki a Haora, ka tonono ia i etahi atu tangata, a ka poropiti ano ratou. Na ko te toru o nga tononga tangata ano a Haora, a poropiti ana ano hoki

ratou. <sup>22</sup> Katahi ka haere ko ia hoki ki Rama, a ka tae ki te puna nui i Heku; a ka ui ia, ka mea, Kei

hea a Hamuera raua ko Rawiri? ka mea ko tetahi, Nana, kei Naioto o Rama. <sup>23</sup> Na ka haere ia ki reira, ki Naioto o Rama; a ka tau iho te wairua o te Atua ki a ia ano hoki; na ka haere ia, me te

poropiti haere, a tae noa ki Naioto o Rama. <sup>24</sup> A i huia hoki e ia ona kakahu, a poropiti ana ano ia i te aroaro o Hamuera; a takoto tahanga ana ia i taua ra katoa, me taua po katoa. Na reira ta ratou kupu, Kei roto ano koia a Haora i nga poropiti?

## Chapter 20

<sup>1</sup> Na ka rere a Rawiri i Naioto o Rama, a ka tae, ka korero ki a Honatana, I aha ahau? he aha toku he? he aha hoki toku hara i te aroaro o tou papa, i whai ai ia kia whakamatea ahau? <sup>2</sup> Na ka

mea tera ki a ia, Kahore rapea, e kore koe e mate; nana, e kore e meatia e toku papa tetahi mea, nui, iti ranei; ki te kahore e whakakitea mai e ia ki ahau: a he aha tenei mea e huna ai e toku papa

i ahau? ehara tena. <sup>3</sup> Na ka oati ano a Rawiri, ka mea, E tino mohio ana tou papa kua manakohia ahau e koe; koia ia i mea ia, Kei mohiotia tenei e Honatana, kei pouri ia: otiia e ora ana a Ihowa,

e ora ana hoki tou wairua, he hikoinga kotahi noa ko te mate moku. <sup>4</sup> Katahi a Honatana ka mea

<sup>5</sup> ki a Rawiri, He aha nei te mea e hiahiatia ana e tou wairua, ka meatia tonutia e ahau mau. Na ka  
mea a Rawiri ki a Honatana, Nana, apopo ka kowhiti te marama, a ko te tikanga kia noho tahi ai  
ahau me te kingi ki te kai; na tukua ahau kia haere, kia piri ai ahau ki te parae a te ahiahi ra ano o  
<sup>6</sup>  
te toru o nga ra. Ki te ui ia tou papa mo toku ngaro, ko reira koe ka ki atu, I tono kaha a Rawiri  
ki ahau kia tukua ia kia rere ki tona pa, ki Peterehema: kei reira hoki te patunga tapu o te tau ma te  
<sup>7</sup>  
hapu katoa. Ki te penei mai tana ki, E pai ana; ka mau te rongo ki tau pononga: e nui rawa ia tona  
<sup>8</sup>  
riri, katahi koe ka mohio kua takoto te kino i a ia. Na reira kia pai tau mahi ki tau pononga, nau  
nei hoki i mea tau pononga kia uru taua ki ta Ihowa kawenata. Otiia ki te mea he kino toku, mau  
ahau e whakamate; kia kawea atu hoki ahau e koe ki tou papa hei aha?  
<sup>9</sup>  
Na ka mea a Honatana, Kaua tena e meatia ki a koe: engari ki te mohio kau ahau kua takoto  
<sup>10</sup>  
i toku papa kia whakapakia he kino ki a koe, e kore ianei e korerotia e ahau ki a koe? Katahi a  
Rawiri ka mea ki a Honatana, Ma wai e korero ki ahau, ki te pakeke te kupu e whakahokia e tou  
<sup>11</sup>  
papa ki a koe? Ano ra ko Honatana ki a Rawiri, Haere mai, taua ka haere ki te parae. Na haere  
<sup>12</sup>  
ana raua tokorua ki te parae. Na ka mea a Honatana ki a Rawiri, Ko Ihowa, ko te Atua o Iharaira,  
hei kaititiro; maku e rapu te whakaaro o toku papa i tenei wa pea apopo, i te toru ranei o nga ra: ki  
<sup>13</sup>  
te mea he pai mo Rawiri, e kore ianei ahau e tuku tonu atu, e whakaatu ki a koe? Kia meatia  
tenei e Ihowa ki a Honatana, me etahi atu mea: pena he kino ta toku papa e pai ai mou, a ka kore  
ahau e whakaatu ki a koe, ka tuku i a koe kia haere i runga i te rangimarie: a kia noho a Ihowa ki  
<sup>14</sup>  
a koe kia pera me ia i noho ki toku pa pa. A kaua ano e waiho i toku oranga anake tau whakaputa  
<sup>15</sup>  
i to Ihowa aroha ki ahau, kia kaua ahau e mate; Kauaka ano hoki e hautopea atu tou aroha ki  
toku whare a ake ake: kauaka rawa, ina hautopea atu e Ihowa nga hoariri katoa o Rawiri i te mata  
<sup>16</sup>  
o te whenua. Heoi ka whakarite kawenata a Honatana ki te whare o Rawiri, ka mea, Kia rapu  
<sup>17</sup>  
utu ano a Ihowa i te ringa o nga hoariri o Rawiri. A i mea a Honatana kia oati ano a Rawiri; he  
<sup>18</sup>  
aroha hoki nona ki a ia: i aroha hoki ia ki a ia, me te mea ko te aroha ki tona wairua ake. Katahi  
a Honatana ka mea ki a ia, Apopo te kowhiti ai te marama; a ka kitea tou ngaromanga, ka takoto  
<sup>19</sup>  
kau hoki tou nohoanga. A ka toru ou ra e noho ana, kia hohoro tou haere ki raro, a ka tae ki te  
<sup>20</sup>  
wahi i piri ai koe i te ra i korerotia ai, a ka noho ki te taha o Etere kohatu. A maku e kopere etahi  
<sup>21</sup>  
pere kia toru ki tona taha, ano e kopere ana ki tetahi koperenga pere. Na ka tono ahau i te tamaiti,  
Tikina, rapua nga pere. Ki te mea atu ahau ki te tamaiti, Nei na nga pere, kei tenei taha ou, tikina  
mai; katahi koe ka haere mai; e mau ana hoki te rongo ki a koe, kahore hoki he rawa, e ora ana a

<sup>22</sup> Ihowa. Ki te penei ia taku ki atu ki te tamaiti, Na, ko nga pere, kei tua atu i a koe: katahi koe ka haere atu: he mea tonu hoki koe na Ihowa. <sup>23</sup> Na, ko tenei mea i korerotia nei e taua, nana, kei waenganui i a taua a Ihowa a ake ake.

<sup>24</sup> Heoi piri ana a Rawiri ki te parae: a, i te kowhititanga o te marama ka noho te kingi ki te kai. <sup>25</sup> A i te noho te kingi ki tona nohoanga o mua iho, ki te nohoanga i te pakitara: i whakatika ano hoki a Honatana, a ka noho a Apenere ki te taha o Haora; na e takoto kau ana to Rawiri wahi.

<sup>26</sup> Ahakoa ra kihai i puaki tetahi kupu a Haora i taua ra: i mea hoki ia, Kua pa tetahi mea ki a ia, kahore ano kia kore noa tona poke; ina kahore ano kia kore noa tona poke. <sup>27</sup> Na i te aonga ake, ara i te rua o nga ra o te marama, e takoto kau ana ano to Rawiri wahi. Na ka mea a Haora ki tana

tama, ki a Honatana, Na te aha te tama a Hehe te haere mai ai ki te kai inanahi, inaianei? <sup>28</sup> Na ka utua e Honatana ki a Haora, I tonu kaha a Rawiri ki ahau kia tukua ia kia haere ki Peterehema: <sup>29</sup> I mea mai hoki ia, Tukua ahau kia haere, he patunga tapu hoki ta to matou hapu i taua pa; na toku tuakana pu ano hoki ahau i poroaki mai: na ki te mea kua manakohia ahau e koe, tukua ahau kia

rere atu kia kite i oku tuakana. Koia ia te haere mai ai ki te tepu a te kingi. <sup>30</sup> Ko te tino muranga o te riri o Haora ki a Honatana, ka mea ki a ia, E te tama a te wahine parori ke, tutu! Kahore ranei ahau i te mohio kua tango koe i te tama a Hehe, hei mea whakama ki a koe tonu, hei mea whakama

hoki ki te hahaketanga o tou w haea? <sup>31</sup> I nga ra katoa e ora ai te tama a Hehe ki runga ki te whenua, e kore koe e tu, me tou rangatiratanga. Na, tonoa kia tikina ia ki ahau, kua tino takoto hoki te mate

mona. <sup>32</sup> Na ka whakahoki a Honatana ki tona papa, ka mea ki a ia, Kia whakamatea ia mo te aha?

<sup>33</sup> i aha ia? Na ko te werohanga a Haora i te tao ki a ia, hei patu mona. Katahi a Honatana ka mohio

kua takoto i tona papa te mate mo Rawiri. <sup>34</sup> Heoi ka whakatika atu a Honatana i te tepu, mura tonu hoki tona riri, kihai ano i kai i te rua o nga ra o te marama: i pouri hoki ia mo Rawiri, mona i meinga e tona papa kia whakama.

<sup>35</sup> Na i te ata ka haere a Honatana ki te parae i te wa i whakaritea ki a Rawiri, raua ko tetahi

tamaiti nohinohi. <sup>36</sup> Na ka mea ia ki taua tamaiti, Rere atu ki te rapu i nga pere e koperea atu ana

e ahau. Ko te rerenga atu o te tamaiti, na koperea atu ana e ia he pere ki ko noa atu i a ia. <sup>37</sup> A, no te taenga atu o te tamaiti ki te wahi i te pere i koperea nei e Honatana, ka karanga a Honatana i

muri i te tamaiti, ka mea, Kahore iana te pere i ko atu i a koe na? <sup>38</sup> Na ka karanga ano a Honatana i muri i taua tamaiti, Kia kakama, kia hohoro, kaua e tu. Na kohikohia ana nga pere e te tamaiti a

Honatana, a haere mai ana ki tona rangatira. <sup>39</sup> Otiia kihai tetahi mea i mohiotia e taua tamaiti;



engari a Honatana raua ko Rawiri, i mohio raua ki tona tikanga. <sup>40</sup> Na ka hoatu e Honatana ana  
 patu ki tana tamaiti, ka mea ki a ia, Haere, kawea atu ki te pa. <sup>41</sup> A, no te haerenga o taua tamaiti,  
 na ka whakatika mai a Rawiri i te taha ki te tonga, a ka tapapa ki te whenua, e toru hoki ona pikonga  
 iho. Na ka kihi raua i a raua, ka tangi hoki tetahi ki tetahi, a rahi noa ake ta Rawiri. <sup>42</sup> Na ka mea  
 a Honatana ki a Rawiri, Haere i runga i te rangimarie. Kua oati nei hoki taua i runga i te ingoa o  
 Ihowa, kua mea taua, Hei waenganui a Ihowa i a taua hei waenganui hoki i oku uri, i ou uri mo ake  
 tonu atu. Na whakatika ana ia, a haere ana; ko Honatana hoki i haere ki te pa.

## Chapter 21

<sup>1</sup> Katahi ka tae a Rawiri ki Nopo ki te tohunga ki a Ahimereke. A wiri ana a Ahimereke i te  
 tutakitanga ki a Rawiri, a ka mea ki a ia, He aha koe i haere mai ai, tou kotahi, kahore na hoki ou  
 hoa? <sup>2</sup> Na ka mea a Rawiri ki te tohunga, ki a Ahimereke, He mea i whakahaua ai ahau e te kingi;  
 i mea mai hoki ia ki ahau, Kei mohiotia e tetahi he kupu o te take ka tonoa atu nei koe e ahau, i  
 whakahaua atu nei koe e ahau. Na, ko nga tangata, kei te wa hi i kiia e ahau mo ratou. <sup>3</sup> Na, he aha  
 kei raro i tou ringa? homai etahi taro ki toku ringa, kia rima: etahi atu mea ranei kei konei. <sup>4</sup> Na ka  
 utu te tohunga ki a Rawiri, ka mea, Kahore he taro noa i toku ringa: engari tenei te taro tapu; ki te  
 mea raia kahore i tata nga tangata ki te wahine. <sup>5</sup> Na ka whakahoki a Rawiri ki te tohunga, ka mea  
 ki a ia, He pono kihai tetahi wahine i tukua kia tata ki a matou i enei ra e toru; noku i haere mai nei  
 e tapu ana ano nga mea o nga tamariki, ahakoa ra he haere noa tenei; tera noa atu ia te tapu in aiane  
 o o ratou mea. <sup>6</sup> Na ka hoatu te mea tapu e te tohunga ki a ia: kahore hoki o reira taro, heoi ano ko  
 te taro aroaro i tangohia nei i te aroaro o Ihowa, kia whakatakotoria ai he taro mahana i te ra i  
 tangohia ai. <sup>7</sup> Na, i reira tetahi o nga tangata a Haora i taua ra, e whakawarea ana ki te aroaro o  
 Ihowa, ko tona ingoa ko Roeke Eromi, ko te mea tino nui o nga kaitiaki hipi a Haora. <sup>8</sup> Na ka mea  
 a Rawiri ki a Ahimereke, Kahore ianei i konei i raro i tou ringa tetahi tao, hoari ranei: kihai hoki i  
 maua mai e ahau taku hoari me aku patu, he mea whakapotatutatu hoki te take a te kingi. <sup>9</sup> Ano ra  
 ko te tohunga, Ko te hoari a Koriata, a te Pirihitini, i patua na e koe ki te raora o Eraha; nana, koia  
 tenei he mea takai ki te kakahu i muri o te epora. Ki te tangohia tena e koe mau, tangohia; kahore  
 atu hoki, ko tena anake. Na ka mea a Rawiri, Kahore ona rite, homai ki ahau.  
<sup>10</sup> Katahi a Rawiri ka whakatika, a rere ana i taua ra ano i te wehi i a Haora, a tae tonu atu ki  
 a Akihi kingi o Kata. <sup>11</sup> Na ka mea nga tangata a Akihi ki a ia, Ehara ianei tenei i a Rawiri, i te

kingi o te whenua? kihai ianei ratou i waiata mona, tetahi ki tetahi i roto i nga kanikani, i mea, Na  
 Haora ana mano i patu, na Rawiri ko ana tekau mano? <sup>12</sup> Na mau tonu iho enei kupu i te ngakau  
 o Rawiri, a nui atu tona wehi i a Akihi kingi a Kata. <sup>13</sup> Na ka whakaahua ke ia ki to ratou aroaro,  
 a ka whakahaurangi i a ia i roto i a ratou; ka haehae hoki i nga tatau o te kuwaha, a ka tuku i tona  
 huhare kia tarere iho ki tona kimikumi. <sup>14</sup> Katahi a Akihi ka mea ki ana tangata, Nana, kua kite  
 koutou i te tangata nei e haurangi ana; he aha i kawea mai ai ki ahau? <sup>15</sup> He onge no aku tangata  
 haurangi i kawea mai ai tenei e koutou hei mahi i nga mahi a te haurangi ki ahau? me uru mai koia  
 tenei tahake ki toku whare?

## Chapter 22

<sup>1</sup> Na ka haere atu a Rawiri i reira, a rere ana ki te ana o Aturama. A ka rongongona tuakana, me  
 te whare katoa o tona papa, na ka haere ki reira, ki a ia. <sup>2</sup> I huihui ano ki a ia nga tangata katoa e  
 pehia ana e te aha, e te aha, me nga tangata i a ratou nei etahi taonga tarewa, me nga tangata katoa  
 e mamae ana te ngakau: a ko ia hei rangatira mo ratou, tata tonu ki te wha rau nga tangata i piri ki  
 a i a. <sup>3</sup> Na ka haere atu a Rawiri i reira ki Mihipa o Moapa, ka mea ki te kingi Moapa, Tukua toku  
 papa me toku whaea kia haere mai ki a koutou, kia mohio ra ano ahau ki ta te Atua e mea ai ki  
 ahau. <sup>4</sup> Na ka kawea raua e ia ki te aroaro o te kingi o Moapa, a noho ana kaua ki a ia i nga ra katoa  
 i noho ai a Rawiri i te pourewa. <sup>5</sup> Na ka mea a Kara poropiti ki a Rawiri, Kaua e noho ki te pourewa,  
 whakatika, haere ki te whenua o hura. Na ka haere a Rawiri, a noho ana i te nehenehe i Harete  
<sup>6</sup> A, no te rongonga o Haora kua kitea a Rawiri ratou ko ona hoa, na i Kipea a Haora e noho  
 ana, i raro i tetahi rakau, i Rama, me tana tao i tona ringa, me te tu ana tangata katoa i tona taha;  
<sup>7</sup> Ka mea a Haora ki ana tangata e tu ana i tona taha, Whakarongo mai ki ahau, e nga Pinemini; e  
 homai ranei e te tama a Hehe he mara ki a koutou katoa, he kari waina, e meinga ranei koutou katoa  
 e ia hei rangatira mano, hei rangatira rau; <sup>8</sup> I whakatenetene mai ai koutou ki ahau; a kahore tetahi  
 hei whakaatu ki ahau i te whakaritenga kawenata a taku tama raua ko te tama a Hehe: kahore tetahi  
 o koutou e pouri moku, e whaki ranei ki ahau, na taku tama i whakatutehu taku tangata ki ahau,  
 kia whanga puku, penei me tenei inaianei? <sup>9</sup> Katahi ka oho mai ko Roeke Eromi, he kaitohutohu  
 no nga tangata a Haora, ka mea, I kite ahau i te tama a Hehe e haere ana ki Nopo, ki a Ahimereke  
 tama a Ahitupu. <sup>10</sup> Na uia ana e tera he tikanga mana i a Ihowa; i hoatu ano e ia he o mona; ko te  
 hoari hoki a Koriata Pirihitini i hoatu ano e ia ki a ia. <sup>11</sup> Katahi te kingi ka unga tangata atu hei

karanga i te tohunga, i a Ahimereke tama a Ahitupu ratou ko te whare katoa o tona papa, i nga  
tohunga e noho ana i Nopo, a ka haere katoa mai ratou ki te kingi. <sup>12</sup> Na ka mea a Haora,  
<sup>13</sup> Whakarongo mai, e te tama a Ahitupu. A ka mea tera, Tenei ahau, e toku ariki. Ano ra ko Haora  
ki a ia, He aha korua ko te tama a Hehe i whakatenetene mai ai ki ahau, a hoatu ana e koe he taro  
mana, he hoari, uia ana ano e koe he tikanga mana i te Atua, kia whakatika mai ai ia ki ahau whanga  
<sup>14</sup> ai; koia ano tenei inaianei? Na ka utu a Ahimereke ki te kingi, ka mea, Ha, ko wai o au tangata  
katoa hei rite mo Rawiri te pono? ko te hunaonga hoki ia a te kingi, e haere ana i tau ngare, e  
<sup>15</sup> whakahonoretia ana hoki i roto i tou whare? No tenei ra koia i timata ai ahau ki te ui mea mana  
i te Atua? kahore rapea! kaua tetahi mea e whakairia mai e te kingi ki tana pononga, ki tetahi ranei  
o te whare o toku papa: kahore hoki tau pononga i mohio ki tetahi aha o tenei, ahakoa iti, a hakoa  
<sup>16</sup> rahi. Na ka mea te kingi, Ko te mate anake mou, e Ahimereke, mou, mo te whare katoa ano o  
<sup>17</sup> tou papa. Na ka mea te kingi ki nga kaitiaki e tu ana i tona taha, Tahuri atu, whakamatea nga  
tohunga a Ihowa; he mea ko o ratou ringa ano kei a Rawiri; i mohio hoki ratou e rere ana ia, a kihai  
i whakaatu mai ki ahau. Otiia kihai i pai nga tangata a te kingi kia totoro atu o ratou ringa, kia rere  
<sup>18</sup> ki runga ki nga tohunga a Ihowa. Na ka mea te kingi ki a Roeke, Tahuri atu, e rere ki runga ki  
nga tohunga. Na tahuri ana a Roeke, Eromi, a rere ana ki runga ki nga tohunga, a e waru tekau ma  
<sup>19</sup> rima nga tangata i patua e ia i taua ra, he hunga kakahu i te epora rinena. I patua ano hoki e ia  
a Nopo, te pa o nga tohunga, ki te mata o te hoari, te tane, te wahine, nga tamariki, nga mea ngote  
u, nga kau, nga kaihe, nga hipi, ki te mata o te hoari.  
<sup>20</sup> Na i mawhiti tetahi o nga tama a Ahimereke tama a Ahitupu, tona ingoa ko Apiatara; a rere  
<sup>21</sup> ana ki te whai i a Rawiri. A na Apiatara i korero ki a Rawiri ta Haora patunga i nga tohunga a  
<sup>22</sup> Ihowa. Na ka mea a Rawiri ki a Apiatara, I mohio ano ahau i taua ra i a Roeke Eromi i kona,  
<sup>23</sup> ka whakaaturia e ia ki a Haora. Naku i mate ai nga tangata katoa o te whare o tou papa. E noho  
koe ki ahau, kua e wehi; ko te tangata hoki e whai ana i te mate moku, e whai ana i te mate mou:  
na kei ahau nei koe, ka tiakina koe.

## Chapter 23

<sup>1</sup> Na ka korerotia te korero ki a Rawiri, Nana, kei te whawhai nga Pirihitini ki Keira, a e pahua  
<sup>2</sup> ana i nga patunga witi. Na reira i ui ai a Rawiri ki a Ihowa, i mea ai, Me haere ranei ahau ki te  
patu i enei Pirihitini? Na ka mea a Ihowa ki a Rawiri, Haere, patua nga Pirihitini, whakaorangia

<sup>3</sup>  
 hoki a Keira. Na ka mea nga tangata a Rawiri ki a ia, Nana, e wehi nei tatou i konei i Hura, a tera  
 noa ake ki te haere ki Keira, ki nga taua a nga Pirihitini. <sup>4</sup> Katahi a Rawiri ka ui ano ki a Ihowa; a  
 ka whakahokia mai te korero e Ihowa ki a ia, Whakatika, haere ki raro, ki Keira; kua hoatu hoki  
 nga Pirihitini e ahau ki tou ringa. <sup>5</sup> Na haere ana a Rawiri ratou ko ana tangata ki Keira, a whawhai  
 ana ki nga Pirihitini, a aia mai ana e ia a ratou kararehe, patua iho hoki ratou, he nui te parekura.  
 Na whakaorangia ana nga tangata o Keira e Rawiri. <sup>6</sup> Na i te rerenga o Apiatara tama a Ahimerereke  
 ki a Rawiri ki Keira, i maua mai e ia tetahi epora i tona ringa.  
<sup>7</sup>  
 A ka korerotia ki a Haora, kua tae a Rawiri ki Keira, a ka mea a Haora, Kua tukua mai ia e  
 te Atua ki toku ringa; ka tutakina nei hoki ia ki roto, i a ia ka tomo nei ki te pa whai tatau, whai  
 tutaki. <sup>8</sup> Na ka karangatia te iwi katoa e Haora ki te whawhai, kia haere ki raro, ki Keira, ki te  
 whakapae i a Rawiri ratou ko ana tangata. <sup>9</sup> Na kua mohio a Rawiri e whakatakoto puku ana a  
 Haora i te kino mona; a ka mea ia ki a Apiatara tohunga, Kawea mai te epora. <sup>10</sup> Katahi a Rawiri  
 ka mea, E Ihowa, e te Atua o Iharaira, kua tino rongo tau pononga e mea ana a Haora kia haere mai  
 ki Keira ki te whakangaro i te pa, he mea moku. <sup>11</sup> Tera ranei e tukua ahau e nga tangata o Keira  
 ki tona ringa? e haere mai ranei a Haora, e pera ranei me ta tau pononga i rongo ai? E Ihowa, e te  
 Atua o Iharaira, tena ra, whakaaturia mai ki tau pononga. Na ka mea a Ihowa, Ka haere mai ano  
 ia. <sup>12</sup> Ano ra ko Rawiri, Tera ranei nga tangata o Keira e tuku i a matou ko aku tangata ki te ringa  
 o Haora? Na ka mea a Ihowa, Ka tuku ano. <sup>13</sup> Katahi a Rawiri ka whakatika, ratou ko ana tangata  
 me te mea e ono rau a haere atu ana i Keira; i haere ratou i ta ratou haere noa atu. A ka korerotia  
 ki a Haora kua rere atu a Rawiri i Keira, na kihai ia i haere atu.  
<sup>14</sup>  
 Na ka noho a Rawiri ki te koraha, ki nga pourewa, ka noho ki te whenua pukepuke i te koraha  
 o Tiwhi. A rapua ana ia e Haora i nga ra katoa; otiia kihai ia i tukua e te Atua ki tona ringa. <sup>15</sup> Na  
 kua kite a Rawiri kua puta mai a Haora, e whai ana kia whakamatea ia; i te koraha ano hoki o Tiwhi  
 a Rawiri, i roto i te ngahere. <sup>16</sup> Na ka whakatika a Honatana tama a Haora, a haere ana ki a Rawiri  
 ki te ngahere, a whakakahangia ana e ia tona ringa i roto i te Atua. <sup>17</sup> I mea hoki ia ki a ia, Kua  
 e wehi; e kore hoki te ringa o Haora, o toku papa e pono ki a koe; a ko koe ano hei kingi mo Iharaira,  
 ko ahau hoki ki muri i a koe; e mohiotia ana ano tenei e Haora, e toku papa. <sup>18</sup> Na whakarite  
 kawenata ana raua i te aroaro o Ihowa: a noho ana a Rawiri i te ngahere, ko Honatana hoki i haere  
 ki tona whare.

19 Katahi nga Tiwhi ka haere ki a Haora ki Kipea, ka mea, He teka ianei kei te piri a Rawiri i roto i a matou, i nga pourewa i te ngahere i Maunga Hakira, i te taha ki te tonga o Hehimono?

20 Na, tena ra, e te kingi, kua hiahia rawa nei hoki tou ngakau ki te haere ki raro; haere ake, a ma matou te tuku i a ia ki te ringa o te kingi.

21 Na ka mea a Haora, Kia manaakitia koutou e Ihowa; mo koutou i aroha ki ahau.

22 Na haere, whakatikaia rawatia, kia mohiotia, kia kitea, tona wahi e haereere ai, i kitea hoki ia e wai ki reira; e korerotia ana hoki ki ahau he tupato rawa ia.

23 Tirohia iho, kia mohio hoki ki nga piringa katoa e piri ai ia, ka hoki mai ai ki ahau ina tino tika, a ka haere tahi atu tatou. Na ki te mea kei te whenua nei ia, maku ia e rapu atu i roto i nga mano katoa o Hura.

24 Na whakatika ana ratou, haere ana ki Tiwhi ki mua i a Haora: i te koraha ia o Maono a Rawiri ratou ko ana tangata, i te mania i te ronga o Hehimono.

25 Na ka haere a Haora ratou ko ana tangata ki te rapu i a ia. A ka korerotia ki a Rawiri, na ka haere atu ia ki raro, ki tetahi kamaka, a noho ana i te koraha o Maono. A ka rongu a Haora, na ka whaia e ia a Rawiri i te koraha o Maono.

26 Na i tenei taha o te maunga a Haora e haere ana, i tera taha hoki o te maunga a Rawiri ratou ko ana tangata: a ka hohoro a Rawiri te haere atu i te wehi a Haora; e karapotia ana hoki a Rawiri ratou ko ana tangata e Haora ratou ko ana tangata, ki a hopukia.

27 Otiia ko te taenga mai o te karere ki a Haora hei mea, Kia hohoro te haere mai; kua huaki mai hoki nga Pirihitini ki te whenua.

28 Heoi ka hoki atu a Haora i te whai i a Rawiri, a haere ana ki te whawhai ki nga Pirihitini; na reira i huaina ai te ingoa o tera wahi, ko te Kohatu o nga wehewehenga.

29 Na haere atu ana a Rawiri i reira, a noho ana i nga pourewa i Enekeri.

## Chapter 24

1 A, no te hokinga o Haora i te whai i nga Pirihitini, na ka korerotia te korero ki a ia, Nana, kei te koraha o Enekeri a Rawiri.

2 Katahi ka takiritia e Haora etahi tangata, e toru mano, he hunga whiriwhiri roto i a Iharaira katoa, a haere ana ki te rapu i a Rawiri ratou ko ana tangata ki nga kamaka o nga koati mohoa.

3 A ka tae ki nga taiepa hipi i te ara, he ana hoki kei reira, a ka haere atu a Haora ki te uhi i ona waewae, heoi i nga wahi i roto rawa o te ana a Rawiri ratou ko ana tangata e noho ana.

4 Na ka mea nga tangata a Rawiri ki a ia, Na, ko te ra tenei i mea ai a Ihowa ki a koe, Nana, ka hoatu e ahau tou hoariri ki tou ringa, a ka meatia e koe ki a ia ta tou hinengaro e pai ai.

5 Katahi ka whakatika a Rawiri, a tapahia pukutia ana e ia te pito o te koroka o Haora. A muri iho

ka whakawiri te ngakau o Rawiri i roto i a ia, mona i tapahi i te pito o te koroka o Haora. <sup>6</sup> Na ka mea ia ki ana tangata, Ma Ihowa ahau e arai kei meatia tenei mea ki toku ariki, ki ta Ihowa i whakawahi ai, kia totoro atu toku ringa ki a ia, ko ta Ihowa hoki ia i whakawahi ai. <sup>7</sup> Ko nga kupu enei a Rawiri i haukotia ai e ia ana tangata, a kihai i tukua kia whakatika ki a Haora. Na whakatika ana a Haora i roto i te ana, a haere ana i tona ara. <sup>8</sup> Ka whakatika a Rawiri i muri, a puta ana ano i te ana, ka karanga i muri i a Haora, ka mea, E toku ariki, e te kingi. A, i te tirohanga o Haora ki muri i a ia, ka tuohu te mata o Rawiri, a piko ana ki te whenua.

<sup>9</sup> Na ka mea a Rawiri ki a Haora, He aha koe i whakarongo ai ki nga kupu a te tangata ina mea, Kei te rapu a Rawiri i te he mou? <sup>10</sup> Na kua kite nei ou kanohi i tenei ra i ta Ihowa homaitanga i a koe inaianei ki toku ringa i roto i te ana; a i ki mai etahi kia patua koe; otia i tohu toku kanohi i a koe; i mea hoki ahau, E kore toku ringa e totoro ki toku ariki; ko ta Ihowa i a i whakawahi ai.

<sup>11</sup> Titiro mai ano hoki, e toku papa, ae ra, tirohia mai te pito o tou koroka i toku ringa nei; ta te mea i ahau nei i tapahi ai i te pito o tou koroka, a kihai i patu i a koe, na ka mohio koe, ka kite, kahore he kino, he tutu ranei i toku ringa; ka hore ano oku hara ki a koe; heoi e whaia nei ahau e koe kia

whakamatea. <sup>12</sup> Ma Ihowa e whakarite ta taua whakawa, me Ihowa ano e rapu he utu moku i a koe; ko toku ringa ia e kore e pa ki a koe. <sup>13</sup> E ki nei hoki te whakatauki onamata, no te hunga kino

mai te kino; na e kore toku ringa e pa ki a koe. <sup>14</sup> He whai i a wai i puta mai ai te kingi o Iharaira? ko wai tenei te arumia nei e koe? he kuri mate, he puruhi. <sup>15</sup> Ma Ihowa e whakarongo, e whakarite ta taua whakawa, mana e titiro mai, e tohe taku tohe, e whakaora hoki ahau i roto i tou ringa.

<sup>16</sup> A, i te mutunga o ta Rawiri korero i enei kupu ki a Haora, ka mea a Haora, Ko tou reo tena, e taku tama, e Rawiri? Na ka puaki nui te reo o Haora ka tangi. <sup>17</sup> Na ka mea ia ki a Rawiri, Tika

rawa koe i ahau; he pai hoki tau utu ki ahau, ko taku utu ia ki a koe he kino. <sup>18</sup> Kua whakakitea mai nei hoki e koe inaianei te pai o tau mahi ki ahau: i ta Ihowa tukunga putanga hoki i ahau ki tou

ringa, na kihai koe i patu i ahau. <sup>19</sup> Ki te tupono hoki te tangata ki tona hoariri, tera ranei ia e tukua paitia atu e ia kia haere? Na ma Ihowa e homai te pai ki a koe hei utu mo tau mahi ki ahau i tenei

ra. <sup>20</sup> Na e mohio ana tenei ahau ko koe pu ano hei kingi, a ka pumau ki tou ringa te kingitanga o

Iharaira. <sup>21</sup> Na oatitia mai a Ihowa ki ahau e kore e hautopea atu e koe oku uri i muri i ahau, e kore

ano hoki e huna e koe toku ingoa i roto i te whare o toku papa. <sup>22</sup> Na oati ana a Rawiri ki a Haora, a haere ana a Haora ki tona whare; ko Rawiri ia ratou ko ana tangata i haere ki te pourewa.

## Chapter 25

1 Na ka mate a Hamuera, a ka huihui a Iharaira katoa ki te tangi ki a ia, a tanumia iho ia ki tona whare ki Rama. Na ka whakatika a Rawiri, a haere ana ki te koraha o Parana.

2 A i Maono tetahi tangata, kei Karamere ona taonga; he nui rawa taua tangata, e toru mano ana hipi, kotahi mano nga koati: heoi kei te kutikuti tera i ana hipi ki Karamere. 3 Na ko te ingoa o taua tangata ko Napara, ko Apikaira hoki te ingoa o tana wahine; a he pai nga whakaaro o te wahine, he mata ataahua ano hoki: he pakeke ia te tane, i kino hoki ana mahi; no te whare ano ia

o Karepe. 4 A ka rongu a Rawiri i te koraha kei te kutikuti a Napara i ana hipi. 5 Ka unga etahi taitama e Rawiri, kotahi tekau; i mea hoki a Rawiri ki nga taitama, Haere ki runga ki Karamere, a

ka tae ki a Napara, ka oha ki ai ia, me te whakahua ano i toku ingoa: 6 A kia penei ta koutou ki atu ki taua tangata e noho ora mai nei, Kia mau te rongu ki a koe, kia mau te rongu ki tou whare, kia

mau te rongu ki au mea katoa. 7 Na kua rongu nei ahau he kaikutikuti au: na, au hepara i a matou ra, kihai ratou i ahatia e matou, kihai rawa hoki tetahi o a ratou mea i ngaro i nga ra katoa o ratou

ki Karamere. 8 Mau e ui ki au taitama, a ka korerotia e ratou ki a koe. Na kia manakohia nga taitama na e koe; kua tae mai hoki matou i te ra pai. Tena, homai ta tou ringa i tupono ai ki au pononga, ki

tau tama hoki, ki a Rawiri. 9 Na, i te taenga o nga tangata a Rawiri, korerotia ana e ratou enei kupu katoa ki a Napara, me te whakahua ano i te ingoa o Rawiri, a heoi ano ta ratou. 10 Na ka utu a Napara ki ta nga tangata a Rawiri, ka mea, Ko wai a Rawiri? ko wai hoki te tama a Hehe? he tini

nga pononga i enei ra e tahuri ana i o ratou rangatira. 11 Me tango koia e ahau taku taro, toku wai, me aku mea hoki i patua nei e ahau ma aku kaikutikuti, me hoatu ma nga tangata kahore nei i mohiotia e ahau no hea ranei ratou?

12 Na ka tahuri nga tangata a Rawiri ki to ratou ara, a hoki ana, haere ana, korerotia ana e ratou ki a ia enei mea katoa. 13 Na ka mea a Rawiri ki ana tangata, Whitikiria a koutou hoari, e tenei, e tenei. Na whitikiria ana e ratou tana hoari, tana hoari; i whitiki ano a Rawiri i tana hoari. Na ka haere ki runga, ka whai i a Rawiri: tata tonu aua tangata ki te wha nga rau; e rua hoki nga rau i noho

ki nga taonga. 14 Otiia ka korero tetahi o nga taitama ki a Apikaira wahine a Napara ka mea, Nana, i tona mai etahi tangata e Rawiri i te koraha, ki te oha ki to matou rangatira; heoi whakatupehupehu

ana ia ki a ratou. 15 Otiia pai rawa aua tangata ki a matou, kihai hoki i aha ki a matou, kihai ano i ngaro tetahi mea a matou i nga ra katoa i haereere tahi ai matou me ratou, i a matou ra i te parae.

16 He taiepa ratou ki a matou i te po, i te ao, i nga ra katoa i tata ai matou ki a ratou, i a matou e

17  
tiaki ana i nga hipi. Tena ra, mau e whakaaro, e titiro ki tau e mea ai; kua takoto hoki he kino mo to matou rangatira, ratou ko tona whare katoa: koia rawa hoki kia tama ia na Periara, kahore tetahi e ahei te korero ki a ia.

18  
Na hohoro tonu a Apikaira, maua atu ana e ia he taro e rua rau, he waina e rua nga ipu, he hipi e rima, he mea kua oti te taka, he kanga pahuhu e rima nga mehua, he tautau karepe maroke

19  
kotahi rau, he papa piki e rua rau, he mea whakawaha ki te kaihe. Na ka mea ia ki ana taitama, Hoake ki mua i ahau; tena ahau te haere atu na i muri i a koutou. Kihai hoki i korerotia e ia ki tana

20  
tahu, ki a Napara. Na i a ia e haere atu ana i runga i tona kaihe, a e heke atu ana i te wahi ruru o te maunga, na ko Rawiri ratou ko ana tangata e heke mai ana, e tika mai ana ki a ia; na pono tonu

21  
atu ia ki a ratou. Heoi kua ki a Rawiri, Maumau tiaki noa ahau i nga mea katoa a tenei koroke i te koraha, kahore rawa hoki tetahi o ana mea katoa i ngaro; na utua mai ana e ia te pai ki te kino.

22  
Kia meatia tenei e te Atua ki nga hoariri o Rawiri me etahi mea ano hoki, ki te waiho e ahau o

23  
ana mea katoa i te aonga ake kia kotahi nei tamaiti tane. Na, i te kitenga o Apikaira i a Rawiri, hohoro tonu ia, marere ana ki raro i te kaihe, tapapa ana i te aroaro o Rawiri, me te piko ano ki te

24  
whenua. Na ka takoto ia ki ona waewae, a ka mea, Hei runga i ahau, e toku ariki, hei runga i ahau te kino; na kia korero tau pononga wahine ki ou taringa, whakarongo mai hoki ki nga kupu a

25  
tau pononga. Kua te ngakau o toku ariki e mea ki tenei tangata a Periara, ki a Napara: ko tona ingoa hoki, ko ia, rite tahi: ko Napara tona ingoa; kei a ia ano te wairangi. Ko ahau ia, ko tau

26  
pononga wahine, kihai i kite i nga taitama a toku ariki i tonoa a ke ra e koe. Na, e toku ariki, e ora ana a Ihowa, e ora ana hoki tou wairua, i a Ihowa kau pupuri nei i a koe i te hara o te whakaheke toto, kei pa tou ringa ake ki te rapu utu, kia rite aiane ki a Napara ou hoariri, me te hunga e rapu

27  
ana i te he mo toku a riki. Na, ko tenei manaakitanga i kawea mai nei e tau pononga ki toku

28  
ariki, tukua kia hoatu ki nga taitama i raro i nga waewae o toku ariki. Tena ra, whakarerea noatia iho te kino a tau pononga wahine; he mea kua takoto rawa ta Ihowa whakapumau i te whare o toku ariki; e whawhai ana hoki toku ariki i nga whawhai a Ihowa; a e kore e mau tetahi he ou i ou ra

29  
katoa. Ahakoa whakatika mai tetahi tangata ki te whai i a koe, ki te rapu i tou wairua, heoi ka paiherea te wairua o toku ariki ki roto ki te paihere ora ki a Ihowa, ki tou Atua; ko nga wairua ia o

30  
ou hoariri ka piua atu me te mea no waenga pu i te kot aha. A tenei ake, kei ta Ihowa meatanga ki toku ariki i nga mea katoa i korerotia e ia hei pai mou, a ka whakaturia koe e ia hei rangatira mo

31  
Iharaira; Na, e kore tenei e waiho hei whakapouri mou, hei whakararu ranei mo te ngakau o toku ariki, ara tau whakaheke noa i te toto, te rapu ranei a toku ariki i te utu mona ake: e puta raia ta Ihowa pai ki toku ariki, na kia mahara ki tau pononga wahine e.



<sup>32</sup> Na ka mea a Rawiri ki a Apikaira, Kia whakapaingia a Ihowa, te Atua o Iharaira, nana nei  
<sup>33</sup> koe i tono mai i tenei ra ki te whakatau i ahau. Kia whakapaingia ano tou whakaaro tika, kia  
 whakapaingia ano koe, mou i pupuri i ahau i tenei ra i te hara o te whakaheke toto, i te rapu utu  
<sup>34</sup> hoki a toku ringa ake. Na e ora ana a Ihowa, te Atua o Iharaira, nana nei ahau i pupuri kei kino  
 ki a koe, me i kahore koe i hohoro te haere mai ki te whakatau i ahau, ina, kihai i toe ki te awatea  
<sup>35</sup> apopo teahi mea a Napara kia kotahi nei tamaiti tane. Heoi ka tangohia e Rawiri i tona ringa  
 nga mea i kawea mai e ia ki a ia, a ka mea ki a ia, Haere i runga i te rangimarie ki tou whare: titiro,  
 kua whakarongo nei ahau ki tou reo, kua whakapai hoki ki a koe.  
<sup>36</sup> Na haere ana a Apikaira ki a Napara, a i te mea hakari tera i roto i tona whare, koia ano kei  
 te hakari a te kingi, a koa ana te ngakau o Napara i roto i a ia, he nui hoki tona haurangi. Na kihai  
<sup>37</sup> i korerotia e ia tetahi mea ki a ia, ahakoa iti, ahakoa rahi, a marama noa te ata. A, i te ata i te  
 mea ka kore atu te waina i a Napara, na korerotia ana e tana wahine ki a ia enei mea katoa; na mate  
<sup>38</sup> iho tona ngakau i roto i a ia, heoi kua rite ia ki te kohatu. A, ka tekau nga ra, ka patua a Napara  
<sup>39</sup> e Ihowa, a ka mate. A, no te rongonga o Rawiri kua mate a Napara, ka mea ia, Kia whakapaingia  
 a Ihowa i tohe nei i te tohe ki a Napara mo toku tawainga; i pupuri nei i tana pononga kei kino, a  
 whakahokia atu ana e Ihowa te kino a Napara ki runga ki tona matenga ake. Na ka tono tangata a  
<sup>40</sup> Rawiri ki te korero ki a Apikaira, ki te tiki i a ia hei wahine mana. A, i te taenga o nga tangata  
 a Rawiri ki a Apikaira ki Karamere, ka korero ki a ia, ka mea, I tonoa mai matou e Rawiri ki te tiki  
<sup>41</sup> mai i a koe hei wahine mana. Na ka whakatika tera, a piko ana tona mata ki te whenua, ka mea,  
<sup>42</sup> Tenei tau pononga hei pononga wahine, hei horoi i nga waewae o nga tangata a toku ariki. Na  
 hohoro ana a Apikaira, a whakatika ana, eke ana ki te kaihe; tokorima hoki ana kotiro i haere tahi  
<sup>43</sup> me ia; na aru ana ia i nga karere a Rawiri, a ka waiho hei wahine mana. I tangohia ano e Rawiri  
<sup>44</sup> a Ahinoama o Ietereere; a ka waiho raua tokorua hei wahine mana. Heoi kua hoatu e Haora a  
 Mikara tana tamahine, te wahine a Rawiri, ki a Parati tama a Raihi, o Karimi.

## Chapter 26

<sup>1</sup> Na ka haere nga Tiwhi ki a Haora ki Kipea, ka mea, He teka ianei kei te piri a Rawiri ki  
<sup>2</sup> Maunga Hakira, ki te wahi e anga ana ki Hehimono? Katahi a Haora ka whakatika, a haere ana  
 ki raro, ki te koraha o Tiwhi, e toru hoki mano ana tangata, he hunga whiriwhiri i roto i a Iharaira,

<sup>3</sup>  
 ki te rapu i a Rawiri i te koraha o Tiwhi. A i noho a Haora ki Maunga Hakira, ki tera e anga ana ki Hehimono, ki te huarahi: ko Rawiri ia i noho ki te koraha; a ka kite ia kua tae atu a Haora ki te

<sup>4</sup>  
 koraha ki te whai i a ia, Na tonoa ana etahi tutei e Rawiri, a ka mohio ia he tino tika te haerenga

<sup>5</sup>  
 mai o Haora. Na ka whakatika a Rawiri, a ka haere ki te wahi i puni ai a Haora: na ka titiro a Rawiri ki te takotoranga o Haora raua ko Apanere tama a Nere, ko te rangatira o tana ope; na kei te takoto a Haora i te parepare, i tetahi taha ano hoki ona, i teta hi taha, te puninga o te iwi.

<sup>6</sup>  
 Na ka oho a Rawiri ki a Ahimereke Hiti raua ko Apihai tama a Teruia, ko te teina o Ioapa, ka mea, Ko wai e haere hei hoa moku ki raro, ki a Haora, ki te puni ra? Ka mea a Apihai, Ko taua

<sup>7</sup>  
 e haere. Na ko te haerenga o Rawiri raua ko Apihai ki te iwi i te po: na kei te takoto tera a Haora i te parepare me tana tao pou rawa ki te whenua i te taha o tona urunga: i tetahi taha ona, i tetahi

<sup>8</sup>  
 taha ko Apanere hoki ratou ko te iwi e takoto ana. Katahi a Apihai ka mea ki a Rawiri, Kua tukua putia e te Atua tou hoariri inaianei ki tou ringa: na kia kotahi taku werohanga i a ia aianei ki te tao,

<sup>9</sup>  
 titi pu ki te whenua; e kore ano e tuaruatia. Ano ra ko Rawiri ki a Apihai, Kaua ia e

<sup>10</sup>  
 whakangaromia: ko wai hoki e harakore ki te totoro tona ringa ki ta Ihowa i whakawahi ai? I mea ano a Rawiri, E ora ana a Ihowa, ma Ihowa ia e patu; tera e tae mai tona ra e mate ai; ka uru

<sup>11</sup>  
 ranei ia ki te whawhai a ka ngaro. Ma Ihowa e arai kei totoro toku ringa ki ta Ihowa i whakawahi

<sup>12</sup>  
 ai. Engari tangohia te tao i tona urunga, me te ipu wai, a kia haere taua. Heoi tangohia ana e Rawiri te tao me te ipu wai i te urunga o Haora; a haere ana raua; kihai hoki tetahi i kite, kihai i mohio, kihai hoki i oho: i te moe katoa hoki ratou; na Ihowa hoki i mea kia au ta ratou moe.

<sup>13</sup>  
 Katahi a Rawiri ka haere ki tera taha, a tu ana i runga i te tihi o tetahi puke i tawhiti; he nui

<sup>14</sup>  
 te takiwa atu ki a ratou. Na ka karanga a Rawiri ki te iwi, ki a Apanere hoki tama a Nere, ka mea, E kore ranei koe e o mai e Apanere? Katahi ka whakahokia e Apanere, Ko wai koe e karanga

<sup>15</sup>  
 mai na ki te kingi? Na ka mea a Rawiri ki a Apanere, He teka ianei he toa koe, ko wai hoki hei rite mou i roto i a Iharaira? He aha koe te tiaki ai i tou ariki, i te kingi? I haere atu hoki tetahi o te

<sup>16</sup>  
 iwi ki te whakangaro i te kingi, i tou ariki. Ehara tenei i te mea pai i meatia nei e koe. E ora ana a Ihowa, ka tika te mate mo koutou, kihai hoki i tiaki i to koutou ariki, i ta Ihowa i whakawahi ai.

<sup>17</sup>  
 Na, tirohia kei hea te tao a te kingi, me te ipu wai i tona urunga? Na kua mohio a Haora ki te reo o Rawiri, a ka mea, Nou tena reo, e taku tama, e Rawiri? Ano ra ko Rawiri, Noku te reo, e toku

<sup>18</sup>  
 ariki, e te kingi. I mea ano ia, Na te aha tenei whai a toku ariki i tana pononga, i aha hoki ahau?

<sup>19</sup>  
 he aha hoki te he o toku ringa? Tena ra, kia rongo mai toku ariki te kingi ki nga kupu a tana pononga, Ki te mea na Ihowa koe i whakaoho kia tahuri mai ki ahau, kia manako mai ia ki te

whakahere: tena ko tenei, na nga tama a te tangata, kia kanga ratou i te aroaro o Ihowa; mo ratou  
<sup>20</sup>  
 i pei nei i ahau kei tata ki to Ihowa wahi tupu, mo te ki mai, Haere, e mahi ki nga atua ke. Tena  
 ra, kua oku toto e maringi ki te whenua i tawhiti atu i te aroaro o Ihowa: i haere mai hoki te kingi  
 o Iharaira ki te rapu i tetahi puruhi, me te mea ko tetahi e whai ana i te patiri i runga i nga maunga.  
<sup>21</sup>  
 Na ka mea a Haora, Kua hara ahau; hoki atu, e taku tama, e Rawiri; e kore hoki ahau e mahi  
 i te kino ki a koe a muri ake nei, no te mea he taonga nui ki tou whakaaro toku wairua inaianei.  
<sup>22</sup>  
 Nana, he mahi kuware taku, nui atu toku he. Na ka whakahoki a Rawiri, ka mea, Nana, te tao  
<sup>23</sup>  
 nei, e te kingi! tukua mai nei tetahi o nga taitamariki kia haere mai ki te tiki. A ma Ihowa e hoatu  
 ki ia tangata, ki ia tangata tona tika me tona pono: kua homai nei hoki koe e Ihowa i tenei ra ki toku  
<sup>24</sup>  
 ringa, a kihai ahau i pai kia totoro toku ringa ki ta Ihowa i whakawahi ai. Nana, kua nui nei tou  
 ora ki taku tirohanga atu i tenei ra, kia pera ano hoki te nui o toku ora ki ta Ihowa titiro, a kia  
<sup>25</sup>  
 whakaorangia ahau e ia i nga mate katoa. Katahi a Haora ka mea ki a Rawiri, Kia manaakitia  
 koe, e taku tama, e Rawiri: ka oti ra i a koe nga mahi nunui, a he pono ka puta tou mana. Heoi haere  
 ana a Rawiri i tona huarahi; a hoki ana a Haora ki tona wahi.

## Chapter 27

<sup>1</sup>  
 Na ka mea a Rawiri i roto i tona ngakau, Katahi ahau ka ngaro i te ringa o Haora a tetahi ra;  
 kahore atu he mea pai moku i te hohoro o toku mawhiti atu ki te whenua o nga Pirihitini, kia  
 ngakaukore ai a Haora ki te rapu ano i ahau i nga rohe kato a o Iharaira: penei ka mawhiti atu ahau  
<sup>2</sup>  
 i roto i tona ringa. Na whakatika ana a Rawiri, a haere ana ratou ko ona hoa e ono rau ki a Akihi  
<sup>3</sup>  
 tama a Maoko, ki te kingi o Kata. Na ka noho a Rawiri ki a Akihi ki Kata, a ia me ana tangata,  
 me te whare ano o tenei, o tenei, a Rawiri hoki ratou ko ana wahine tokorua, ko Ahinoama o  
<sup>4</sup>  
 Ietereere, ko Apikaira o Karamere, wahine a Napara. A ka korerotia ki a Haora, kua rere a Rawiri  
<sup>5</sup>  
 ki Kata, na mutu ake tana rapu i a ia. Na ka mea a Rawiri ki a Akihi, Ki te mea kua manakohia  
 nei ahau e koe, kia homai e ratou tetahi wahi ki ahau i roto i tetahi o nga pa i te koraha, hei nohoanga  
<sup>6</sup>  
 moku: he aha hoki tau pononga i noho ai ki a koe i roto i te pa kingi? Na ka homai e Akihi ki a  
<sup>7</sup>  
 ia i taua ra a Tikiraka: na reira nga kingi o Hura i whiwhi ai ki Tikiraka a mohoa noa nei. Na, ko  
 te maha o nga ra i noho ai a Rawiri ki te whenua o nga Pirihitini, kotahi tau, e wha marama.  
<sup>8</sup>  
 Katahi a Rawiri ka haere, ratou ko ana tangata, ka whakaeke i nga Kehuri, i nga Kireti, i nga  
 Amareki; ko era hoki nga iwi kua noho noa ake ki tera whenua i tou haerenga ki Huru a te whenua

9  
o Ihipa atu ana. Na patua iho e Rawiri tera whenua; kihai hoki i whakaorangia tetahi tane, wahine ranei; a tangohia ana e ia nga hipi, nga kau, nga kaihe, nga kamera, me nga kakahu, a hoki ana,  
10  
haere ana ki a Akihi. Na ka mea a Akihi, Ko hea i whakaekea e koutou i tenei ra? Ano ra ko Rawiri, Ko te tonga o Hura, ko te tonga o nga Ierameeri, ko te taha ano ki te tonga o nga Keni.  
11  
Kihai hoki i whakaorangia e Rawiri tetahi tane, wahine ranei, hei kawe i a ratou ki Kata; i mea hoki, Kei korero ratou i ta tatou, kei mea, I penei a Rawiri, a ko tana hanga ano tenei i nga ra katoa  
12  
i noho ai ia ki te whenua o nga Pirihitini. Na whakapono tonu a Akihi ki ta Rawiri, a ka mea, Kua tino mea rawa ia i a ia kia whakariharihanga e tona iwi, e Ihairaira: na reira hei tangata tuturu ia maku ake, ake.

## Chapter 28

1  
Na i aua ra kua huihuia e nga Pirihitini a ratou taua mo te pakanga, hei whawhai ki a Ihairaira. Na ka mea a Akihi ki a Rawiri, Kia tino mohio koe me haere tahi taua ki te whawhai, koutou ko  
2  
au tangata. Ano ra ko Rawiri ki a Akihi, Ma reira koe ka mohio ai ki nga mahi a tau pononga. A ka mea a Akihi ki a Rawiri, Koia ahau ka mea nei i a koe hei tiaki mo toku upoko i nga ra katoa.  
3  
Na, kua mate a Hamuera, kua uhungatia hoki e Ihairaira katoa, kua tanumia ki Rama, ki tona pa ake. Kua whakakorea atu hoki e Haora i te whenua te hunga i nga waka atua, i nga rapa maori hoki.  
4  
Na ka huihui nga Pirihitini, a haere mai ana, puni ana ki Huneme; i huihuia ano e Haora a Ihairaira  
5  
katoa, a puni ana ki Kiripoa. A, no te kitenga o Haora i te taua a nga Pirihitini, ka wehi, tuiri rawa  
6  
tona ngakau. Na, i te uinga a Haora ki a Ihowa, hore rawa he kupu a Ihowa i whakahokia mai ki a ia, e nga moe, e nga Urimi, e nga poropiti ranei.  
7  
Katahi a Haora ka mea ki ana tangata, Rapua maku tetahi wahine he atua maori tona kia haere ahau ki a ia ki te rapu tikanga i a ia. Ano ra ko ana tangata ki a ia, Tera tetahi wahine he atua maori  
8  
tona, kei Eneroro. Na ka whakaahua ke a Haora i a ia, a kakahu ana i etahi kakahu ke, haere ana ia me ana tangata tokorua; ka tae ki taua wahine i te po, ka mea atu ia, Tena koa, hirihiria te atua  
9  
maori, a whakaputaina ake ki ahau taku e ki atu ai. Na ka mea taua wahine ki a ia, Ha, kua mohio ano koe ki ta Haora i mea ai, ki tana hautopenga atu i te hunga atua maori, i nga rapa maori, o te  
10  
whenua nei; he aha ra koe i mea mahanga mai ai mo toku wairua, kia mate ai ahau? Na ka oatitia a Ihowa e Haora ki a ia, i mea ia, E ora ana a Ihowa, e kore tetahi he e pa ki a koe mo tenei mea.  
11  
Katahi te wahine ka mea, Ko wai kia whakaputaina ake e ahau ki a koe? Ano ra ko ia, Ko Hamuera

12  
tau e whakaputa ake ai ki ahau. A, no te kitenga o te wahine i a Hamuera, nui atu tona reo ki te hamama; a ka korero te wahine ki a Haora, ka mea, He aha koe i tinihanga ai ki ahau? ko Haora

13  
hoki koe. Na ka mea te kingi ki a ia, Kaua e wehi: i kite hoki koe i te aha? Na ka mea te wahine

14  
ki a Haora, Kei te kite ahau i tetahi atua e haere ake ana i te whenua. Ano ra ko tera ki a ia, He ahua aha tona? Ka mea ia, He koroheke te haere ake nei; he koroka hoki te kakahu. Na ka mohio a Haora ko Hamuera. Tuohu ana tona mata ki te whenua, piko ana ia.

15  
Na ka mea a Hamuera ki a Haora, He aha koe i whakaohoho ai i ahau, i mea ai kia haere ake ahau? Ano ra ko Haora, Nui atu toku mate; e whawhai ana hoki nga Pirihitini ki ahau, a kua mahue ahau i te Atua, kahore ake hoki he kupu ana e whakahokia mai ki ahau e nga poropiti, e nga

16  
moe ranei; koia ahau i karanga ai ki a koe, hei ako i ahau ki taku e mea ai. Katahi a Hamuera ka mea, He aha ra koe i u ai ki ahau, kua mahue nei hoki koe i a Ihowa, hei hoariri ano ia ki a koe?

17  
Na kua meatia e Ihowa mona ake tana i whakapuakina e ahau: kua haea atu hoki te kingitanga

18  
i tou ringa, kua hoatu ki tou hoa, ara ki a Rawiri. Mou kihai i rongu ki te reo o Ihowa, kihai i whakaputa i tona riri aritarita ki a Amareke; na reira a Ihowa i mea ai i tenei mea ki a koe i tenei

19  
ra. Ko tenei, ka hoatu ano a Iharaira e Ihowa me koe hoki ki te ringa o nga Pirihitini, a apopo koutou ko au tama tae ake ai ki ahau: a ka hoatu e Ihowa te taua a Iharaira ki te ringa o nga Pirihitini.

20  
Katahi ka hinga tonu iho a Haora, tona roa katoa ki te whenua, nui rawa hoki tona wehi mo nga kupu a Hamuera: kahore ano he kaha i roto i a ia; kihai hoki ia i kai taro noa pau noa taua ra,

21  
pau noa taua po. Na ka haere taua wahine ki a Haora; a ka kite e pororaru rawa ana ona whakaaro, ka mea ki a ia, Nana, kua whakarongo nei tau pononga ki tou reo, a whakamomori ana ahau ki te

22  
mate, whakarongo ana ahau ki au kupu i korerotia e koe ki ahau. Na, tena, whakarongo mai hoki aiane ki te reo o tau pononga, Kia whakatakotoria e ahau tetahi wahi taro ki tou aroaro; me kai

23  
ano koe, kia whai kaha ai koe ina haere i tou huarahi. Otiia i whakakahore ia, i mea, E kore ahau e kai. Heoi tohea ana ia e ana tangata ratou ko te wahine; na ka rongu ia ki to ratou reo, a whakatika

24  
ake ana i te whenua, noho ana ki runga ki te moenga. Na he kua kau ta taua wahine i te whare, he mea whangai; na hohoro tonu tana patu, tikina ana e ia he paraoa, pokepokea ana, tunua iho e

25  
ia etahi keke rewenakore; Kawea mai ana e ia ki te aroaro o Haora, ki te aroaro ano o ana tangata. Na kai ana ratou, a whakatika ana, haere atu ana i taua po.

## Chapter 29

<sup>1</sup> Na ka huihuia e nga Pirihitini a ratou taua katoa ki Apeke, i te noho hoki a Iharaira ki te puna  
<sup>2</sup> i Ietereere. A ka haere nga rangatira o nga Pirihitini me o ratou rau, me o ratou mano, ka haere  
<sup>3</sup> atu ano a Rawiri ratou ko ana tangata, me Akihi, i te hiku. Katahi nga rangatira o nga Pirihitini  
ka mea, He aha ta enei Hiperu i konei? Ano ra ko Akihi ki nga rangatira o nga Pirihitini, Ehara  
ianeinei tenei i a Rawiri, i te tangata a Haora kingi o Iharaira i noho nei ki ahau i enei ra, i enei tau  
ranei, a kahore ahau i kite i tetahi he ona, o te ra ano i riro mai ai ia ki ahau a mohoa noa nei?  
<sup>4</sup> Otiia ka riri nga rangatira o nga Pirihitini ki a ia, a ka mea nga rangatira o nga Pirihitini ki a ia,  
Whakahokia tenei tangata kia hoki ki te wahi i whakaritea e koe mona; a kaua ia e haere tahi tatou  
ki te whawhai; kei whawhai ia ki a tatou i te taturanga; he aha hoki tana mea hei whakamarie mo  
<sup>5</sup> tona rangatira? he teka ianeinei ko nga upoko o enei tangata? Ehara ianeinei tenei i a Rawiri i waiata  
ra ratou tetahi ki tetahi, i nga kanikani, i mea ra, Na Haora ana mano i patu, na Rawiri ko ana tekau  
mano?  
<sup>6</sup> Katahi a Akihi ka karanga ki a Rawiri, ka mea ki a ia, E ora ana a Ihowa, tika tonu tau, pai  
tonu hoki ki taku titiro tou haerenga atu me tou haerenga mai i a taua nei i te ope; kahore nei hoki  
i mau i ahau tetahi he ou, o te ra ano i haere mai a i koe ki ahau a taea noatia tenei ra: otiia ki te  
<sup>7</sup> titiro a nga rangatira kahore ou pai. Na hoki atu aianeinei, haere hoki i runga i te rangimarie; kei  
<sup>8</sup> kino tau mahi ki te titiro a nga rangatira o nga Pirihitini. Na ka mea a Rawiri ki a Akihi, I aha  
hoki ahau? ko te aha hoki a tau pononga i kitea e koe, o te ra i noho ai ahau ki tou aroaro a taea  
<sup>9</sup> noatia tenei ra, ka kore ai ahau e haere ki te whawhai ki nga hoariri o toku ariki, o te kingi? Na  
ka whakahoki a Akihi, ka mea ki a Rawiri, E mohio ana ano ahau he pai koe ki taku titiro, rite tonu  
ano ki te anahera a te Atua: otiia ko nga rangatira o nga Pirihitini hei ki mai, Kaua tenei e haere  
<sup>10</sup> tahi tatou ki te whawhai. Heoi maranga wawe i te ata, me nga tangata ano a tou ariki i haere tahi  
<sup>11</sup> mai nei koutou, a ka maranga wawe koutou i te ata, ka marama, haere. Heoi ka maranga wawe  
a Rawiri, ratou ko ana tangata, a haere ana i te ata, hoki ana ki te whenua o nga Pirihitini. Ko nga  
Pirihitini ia i haere ki runga, ki Ietereere.

## Chapter 30

<sup>1</sup> A, no ka tae a Rawiri ratou ko ana tangata ki Tikiraka i te toru o nga ra, na kua huaki nga  
Amareki ki te tonga, ki Tikiraka ano, patua ana a Tikiraka e ratou, tahuna ake ki te ahi; <sup>2</sup> Whakaraua  
ana hoki e ratou nga wahine me nga mea o reira, te iti, te rahi; kihai i whakamatea tetahi, engari i

3  
 kahakina atu, a haere ana i to ratou ara. Heoi, i te taenga o Rawiri ratou ko ana tangata ki te pa,  
 kua oti te tahu ki te ahi, a kau whakaraua atu a ratou wahine, a ratou tama, a ratou tamahine. 4  
 Katahi  
 ka puaki te reo o Rawiri ratou ko ana tangata, tangi ana ratou, a kahore noa o ratou kaha ki te tangi.

5  
 I riro whakarau ano nga wahine tokorua a Rawiri, a Ahinoama o Ietereere, raua ko Apikaira wahine  
 a Napara o Karamere. 6  
 Na mamae rawa a Rawiri, no te mea i kupukupu te nuinga kia akina ia ki  
 te kohatu; i mamae hoki te ngakau o te iwi katoa, o tera, o tera, ki a ratou tama, ki a ratou tamahine:  
 ko Rawiri ia i whakapakari i a ia i roto i a Ihowa, i tona Atua.

7  
 Na ka mea a Rawiri ki a Apiatara tohunga, tama a Ahimereke, Tena, maua mai te epora ki  
 ahau. Na maua ana te epora e Apiatara ki a Rawiri. 8  
 Na ka ui a Rawiri ki a Ihowa, ka mea, Ki te  
 whai ahau i tenei taua e mau ranei ratou i ahau? Na ka mea ia, Whaia; ka mau pu hoki ratou i a

9  
 koe, a ka riro katoa mai au i a koe. Heoi haere ana a Rawiri ratou ko ana tangata e ono rau, kua  
 tae ki te awa, ki Pehoro, ki te wahi i noho ai te hunga i mahue iho. 10  
 Otia whai tonu ana a Rawiri  
 ratou ko nga tangata e wha rau: e rua hoki nga rau i noho; i ruha rawa hoki, te whiti ai i te awa, i

11  
 Pehoro. Na ka tupono atu ratou ki tetahi tangata o Ihipa i te parae, a kawea ana ia ki a Rawiri.

12  
 Na ka hoatu he taro mana, a kai ana ia; i whakainu ano ratou i a ia ki te wai. I hoatu ano e ratou  
 tetahi wahi o te keke piki me etahi tautau karepe e rua, na ka kai ia, a ka hoki tona wairua ki a ia;

13  
 e toru hoki nga ra, e toru nga po ona kihai nei ia i kai i te kai, kihai i inu i te wai. Na ka mea a  
 Rawiri ki a ia, Na wai koe? no hea hoki koe? Ano ra ko ia, He tamaiti ahau no Ihipa, he pononga  
 na tetahi Amareki; i whakarerea hoki ahau e toku ariki, he panga noku e te mate ka toru enei ra.

14  
 I huakina e matou te tonga o nga Kereti, me te wahi i a Hura, me te tonga o Karepe; i tahuna ano

15  
 e matou a Tikiraka ki te ahi. Na ka mea a Rawiri ki a ia, E taea ranei ahau te kawea e koe ki raro,  
 ki te ope ra? Ano ra ko ia, Oati mai ki ahau ki te Atua hoki, e kore ahau e whakamatea e koe, e

16  
 kore e tukua ki nga ringa o toku rangatira, a ka kawea koe e ahau ki raro ki tau a ope. A, no tana  
 kawenga i a ia ki raro, kua wawa noa atu ratou ki te mata o te whenua katoa, e kai ana, e inu ana,  
 e kanikani ana, mo nga taonga nui katoa, taonga parakete, i riro i a ratou i te whenua o nga Pirihitini,

17  
 i te whenua hoki o Hura. Na patua iho ratou e Rawiri i te puatanga a taea noatia te ahiahi o te  
 aonga ake: kihai hoki tetahi o ratou i mawhiti, heoi ano ko etahi taitamariki e wha rau i eke ki nga

18  
 kamera, a rere ana. I riro ano hoki i a Rawiri nga mea katoa i tangohia e nga Amareki: i riro ano

19  
 i a Rawiri ana wahine tokorua. Kihai hoki i ngaro tetahi o a ratou mea; te iti, te rahi, nga tama,  
 nga tamahine, nga taonga parakete, nga mea katoa i tangohia e ratou; i hoki katoa mai a Rawiri.

20

I mau ano i a Rawiri nga hipi katoa me nga kahui; a ka arahina e ratou i mua i era atu karerehe, i mea, Ko te taonga parakete tenei a Rawiri.

21

A ka tae a Rawiri ki nga tangata e rua rau i ruha nei, kihai nei i aru i a Rawiri, i meinga ra kia noho ki te awa, ki Pehoro: ka puta ratou ki te whakatau i a Rawiri, ki te whakatau hoki i te iwi

i a ia: a ka tata a Rawiri ki aua tangata, ka oha ia ki a ratou. <sup>22</sup> Katahi ka oho ake te hunga kino katoa, nga tangata o Periara i roto i te hunga i haere tahi ratou ko Rawiri, ka mea, Kihai ratou i haere tahi tatou, na, e kore e hoatu ki a ratou etahi o nga taonga i rio mai i a tatou, heoi ano ko te

wahine me nga tamariki a tenei, a tenei, na ma ratou e arahi atu, e haere. <sup>23</sup> Katahi a Rawiri ka mea, Kaua e pena, e oku teina, ki ta Ihowa i homai ai ki a tatou; nana nei hoki tatou i tiaki, a homai

ana e ia ki a tatou ringa taua ope i haere ake ra ki a tatou. <sup>24</sup> Ko wai hoki hei whakarongo ki tenei mea a koutou? Ko te wahi hoki a te tangata i haere ki te whawhai kia rite ki te wahi a te tangata i

noho ki nga mea: kia rite tonu te wahi ma ratou. <sup>25</sup> Na waiho tonu iho e ia tena hei tikanga, hei

ritenga mo Iharaira no taua rangi a tuku iho ki tenei ra. <sup>26</sup> A, i te taenga o Rawiri ki Tikiraka, ka tonoa e ia etahi o nga taonga ki nga kaumatua o Hura, ki ona hoa, a ka mea, Tena tetahi manaaki

mo koutou no nga taonga a nga hoariri o Ihowa; <sup>27</sup> Ki nga tangata hoki o Peteere, ki o Ramoto ki

te tonga, ki era hoki i Iatiri; <sup>28</sup> Ki a Aroere, ki o Hipimoto, ki o Ehetemoa. <sup>29</sup> Ki o Rakara, ki o

nga pa o nga Ierameeri, ki o nga pa o nga Keni; <sup>30</sup> Ki o Horema, ki o Korahana, ki o Ataka; <sup>31</sup> Ki o Heperona, ki o nga wahi katoa i haereere ai a Rawiri ratou ko ana tangata.

## Chapter 31

1

Na kua whawhai nga Pirihitini ki a Iharaira, a ka whati nga tangata o Iharaira i te aroaro o nga Pirihitini, a hinga ana, mate rawa, i Maunga Kiripoa. <sup>2</sup> Na ka whaia e nga Pirihitini a Haora ratou ko ana tama, a patua iho e nga Pirihitini a Honatana ratou ko Apinarapa, ko Marikihua, nga

tama a Haora. <sup>3</sup> Na ka nui haere te whawhai ki a Haora, a ka mau ia i nga kaikopere; nui rawa tona tunga i nga kaikopere. <sup>4</sup> Katahi a Haora ka mea ki tana kaimau patu, Unuhia tau hoari, werohia hoki ahau; kei haere mai tenei hunga kokotikore, a ka wero i ahau, ka whakatupu kino i ahau. Otiia kihai i pai tana kaimau patu; he nui hoki no tona hopohopo. Na reira ka mau a Haora ki tana hoari,

hinga iho ki runga. <sup>5</sup> A, no te kitenga o tana kaimau patu, kua mate a Haora, ka hinga hoki ia ki tana hoari, a mate tahi ana raua. <sup>6</sup> Heoi kotahi tonu te matenga o Haora ratou ko ana tama tokotoru,



ko tana kaimau patu, me ana tangata katoa i taua ra ano. <sup>7</sup> A, no te kitenga o nga tangata o Iharaira i tera taha o te raorao, i tawhi ano o Horano, kua whati nga tangata o Iharaira, a kua mate a Haora ratou ko ana tama, whakarerea ake e ratou nga pa, a rere ana; na ka haere nga Pirihitini nohoia iho.

<sup>8</sup> A, i te aonga ake, i te haerenga o nga Pirihitini ki te muru i te hunga i patua, na, ka kitea e ratou a Haora ratou ko ana tama tokotoru e takoto ana i Maunga Kiripoa. <sup>9</sup> Na tapahia ana e ratou tona upoko, murua ana ana patu, unga ana e ratou kia kawea puta noa i te whenua o nga Pirihitini

a tawhio noa, kia kauwhautia i roto i te whare o a ratou whakapakoko, i roto hoki i te iwi. <sup>10</sup> A i whakatakotoria e ratou ana patu ki te whare o Ahataroto, ko tona tinana ia i titia e ratou ki te taiepa

o Petehana. <sup>11</sup> A, no ka rongo nga tangata o Iapehe Kireara ki ta nga Pirihitini i mea ai ki a Haora, <sup>12</sup>

Ka whakatika nga marohirohi katoa, a haere ana pau noa taua po katoa; na tangohia iho e ratou te tinana o Haora, me nga tinana o ana tama i te taiepa o Petehana, a haere ana ki Iapehe, tahuna

ana ki reira. <sup>13</sup> I maua hoki o ratou whenua e ratou, a tanumia ana ki raro i tetahi rakau i Iapehe, a e whitu nga ra i nohopuku ai.

## 2 Samuel

### Chapter 1

<sup>1</sup> Na i muri iho i te matenga o Haora, i te mea kua hoki mai a Rawiri i te patunga i nga Amareki,

a kua rua nga ra o Rawiri e noho ana ki Tikiraka: <sup>2</sup> I te toru o nga ra, na ko tetahi tangata e haere mai ana i te puni i a Haora, he mea haehae ona kakahu, he oneone i runga i tona matenga: a, no

tona taenga mai ki a Rawiri, ka hinga ia ki te whenua, a ka piko. <sup>3</sup> Na ka mea a Rawiri ki a ia, I

haere mai koe i hea? Ka mea tera ki a ia, I mawhiti mai ahau i te puni o Iharaira. <sup>4</sup> Ano ra ko Rawiri ki a ia, I pehea te mea ra? tena, korerotia mai ki ahau. Na ka mea ia, Kua whati te iwi i te whawhai, he tokomaha hoki o te iwi i hinga, i mate; kua mate hoki a Haora raua ko tana tama, ko Honatana.

<sup>5</sup> Ano ra ko Rawiri ki te tamaiti nana nei i korero ki a ia, I mohiotia e koe ki te aha kua mate a Haora

raua ko tana tama ko Honatana? <sup>6</sup> Na ka mea taua tamaiti nana nei i korero ki a ia, I tupono noa ahau ki runga i Maunga Kiripoa, na, ko Haora e okioki ana ki tana tao; na, e whai tata ana i a ia

nga hariata me nga kaieke hoiho. <sup>7</sup> Na, i tona tauritanga ki muri, ka kite i ahau, a ka karanga ki

ahau. Na ka mea ahau, Tenei ahau. <sup>8</sup> Ano ra ko ia ki ahau, Ko wai koe? Ano ra ko ahau ki a ia, He

9  
 Amareki ahau. Na ka mea ia ki ahau, Tena, e tu ki toku taha, whakamatea hoki ahau, kua mau  
 10  
 pu hoki ahau i te pouri; no te mea kei te toitu tonu te ora i roto i ahau. Heoi tu ana ahau ki tona  
 taha, whakamatea ana ia e ahau; i mohio hoki ahau e kore rawa ia e ora ake i te mea ka hinga nei  
 ia. Na tangohia ana e ahau te karauna i tona matenga, me te poroporo i tona ringa, a kawea mai ana  
 e ahau ki konei ki toku ariki.

11  
 Katahi a Rawiri ka mau ki ona kakahu, a haehaea ana e ia; a i pera hoki ona hoa katoa: Na  
 ka uhunga ratou, ka tangi, ka nohopuku a ahiahi noa, mo Haora, mo tana tama, mo Honatana, mo  
 12  
 te iwi ano a Ihowa, mo te whare hoki o Iharaira, i hinga nei i te hoari. Na ka mea a Rawiri ki te  
 tamaiti nana nei i korero ki a ia, No hea koe? Ano ra ko tera, He tama ahau na tetahi manene, na  
 13  
 tetahi Amareki. Ano ra ko Rawiri ki a ia, He aha koe te wehi ai? he aha i totoro ai tou ringa ki  
 14  
 te huna i ta Ihowa i whakawahi ai? Katahi a Rawiri ka karanga ki tetahi o ana taitama, ka mea,  
 15  
 Whakatata atu, e rere ki runga ki a ia. Na patua ana ia e ia, mate ake. I mea ano a Rawiri ki a  
 16  
 ia, Hei runga i tou matenga ou toto; kua whakaatu mai na hoki tou waha i tou he, kua mea, Naku  
 i whakamate ta Ihowa i whakawahi ai.

17  
 Na ka waiatatia e Rawiri tenei apakura mo Haora raua ko tana tama, ko Honatana: I mea  
 hoki ia kia whakaakona nga tama a Hura ki te waiata o te kopere: e mau na te tuhituhi ki te pukapuka  
 18  
 a Iahera. Tukitukia ana tou ataahua, e Iharaira, ki ou wahi teitei. Ano te hinganga o nga  
 19  
 marohirohi! Kaua e korerotia ki Kata; kaua e kauwhautia ki nga huarahi o Ahakerono; kei koa  
 20  
 nga tamahine a nga Pirihitini, kei whakamanamana nga tamahine a te kokotikore. E nga maunga  
 21  
 o Kiripoa, kati rawa he tomairangi mo koutou, he ua, he mara e tukua ai te whakahere; i akiritia  
 kinotia hoki ki reira te pukupuku o te marohirohi, te pukupuku o Haora, me te mea kihai i  
 22  
 whakawahia ki te hinu. He toto tena no te hunga i tu, he ngako tena no nga marohirohi, kahore  
 23  
 he whakahokinga mai o te kopere a Honatana, kihai ano te hoari a Haora i hoki kau mai. Ko  
 Haora, ko Honatana, he aroha, he whakaahuareka i to raua orange; kihai hoki i wehea i to raua  
 24  
 matenga; nui atu to raua tere i to nga ekara, to raua kaha i to nga raiona. E nga tamahine a  
 Iharaira, tangihia a Haora, nana nei o koutou kakahu ngangana i huatau ai, nana nei i piri ai nga  
 25  
 whakapaipai koura ki o koutou weruweru. Ano te hinganga o nga marohirohi i waenganui o te  
 26  
 taturanga! E Honatana, i werohia na i runga i ou wahi teitei. Mamae ana ahau, he whakaaro ki  
 a koe, e toku tuakana, e Honatana; nui atu toku whakaahuareka ki a koe: he hanga whakamiharo  
 27  
 tou aroha ki ahau, nui atu i to nga wahine aroha. Ano te hinganga o nga marohirohi: ano te  
 korenga o nga patu o te pakanga!

## Chapter 2

<sup>1</sup> Na, i muri iho i tenei, ka ui a Rawiri ki a Ihowa, ka mea, Me haere ranei ahau ki runga, ki tetahi o nga pa o Hura? A ka mea a Ihowa ki a ia, Haere. Ano ra ko Rawiri, Me haere ahau ki hea?

<sup>2</sup> A ka mea ia, Ki Heperona. Heoi haere ana a Rawiri ki reira, ratou ko ana wahine tokorua, ko Ahinoama Ietereere, raua ko Apikaira wahine a Napara Karameri.

<sup>3</sup> I mauria ano e Rawiri ona hoa, tena tangata me tona whare, tena me tona; a noho ana ratou ki nga pa o Heperona.

<sup>4</sup> Na ka haere mai nga tangata o Hura, a whakawahia ana a Rawiri e ratou ki reira hei kingi mo te whare o Hura.

<sup>5</sup> A ka korerotia ki a Rawiri te korero mo nga tangata o Iapehe Kireara, na ratou i tanu a Haora. Na ka unga karere a Rawiri ki nga tangata o Iapehe Kirera hei mea ki a ratou, Kia manaakitia koutou e Ihowa mo tenei aroha i whakaputaina e koutou ki to koutou ariki, ara ki a Haora, mo ta koutou tanumanga i a ia.

<sup>6</sup> Na kia whakaputaina mai e Ihowa he aroha, he pono, ki a koutou; ka utua ano hoki koutou e ahau mo tenei mahi pai, mo koutou i mea i tenei mea.

<sup>7</sup> Tena ra, kia kaha o koutou ringa aiane, kia maia; kua mate hoki to koutou ariki, a Haora, kua oti ano ahau te whakawahi e te whare o Hura hei kingi mo ratou.

<sup>8</sup> Na tera kua mau a Apanere tama a Nere, te rangatira o te ope a Haora, ki a Ihipohete tama a Haora, a kua kawea mai e ia ki tawahi nei, ki Mahanaima;

<sup>9</sup> A meinga ana e ia hei kingi mo Kireara, mo nga Ahuri, mo Ietereere, mo Eparaima, mo Pineamine, mo Iharaira katoa.

<sup>10</sup> E wha tekau nga tau o Ihipohete tama a Haora, i a ia i meinga ai hei kingi mo Iharaira, a e rua nga tau i kingi ai. Ko te whare ia o Hura i whai i a Rawiri.

<sup>11</sup> Na, ko te maha o nga ra i noho ai a Rawiri ki Heperona hei kingi mo te whare o Hura, e whitu tau e ono marama.

<sup>12</sup> Na ka haere atu a Apanere tama a Nere, ratou ko nga tangata a Ihipohete tama a Haora, i Mahanaima ki Kipeono.

<sup>13</sup> Na ka puta atu a Ioapa tama a Teruia me nga tangata a Rawiri, a tutaki ana ratou ki te poka wai i Kipeono: na noho ana ratou, ko enei i tenei taha o te poka, a ko era i tera taha o te poka.

<sup>14</sup> Na ka mea a Apanere ki a Ioapa, Tena, kia whakatika nga tamariki ki te takaro ki to taua aroaro. Ano ra ko Ioapa, Me whakatika ratou.

<sup>15</sup> Katahi ratou ka whakatika, ka haere a tatau atu; kotahi tekau ma rua mo Pineamine, mo Ihipohete tama a Haora, a kotahi tekau ma rua o nga tangata a Rawiri.

<sup>16</sup> Na hopukia ana e ratou te matenga o tana tangata, o tana tangata, a werohia ana a ratou hoari ki te kaokao o tana tangata, o tana tangata; na, hinga ngatahi ana ratou: koia i huaina ai te ingoa o taua wahi, ko Herekata Haturimi; koia tera i Kipe ono.

<sup>17</sup> Na nui atu te whawhai i taua ra, a patua iho a Apanere ratou ko nga tangata o Iharaira e nga tangata a Rawiri.

18 Na tokotoru nga tama a Teruia i reira, ko Ioapa, ko Apihai, ko Atahere; he wae mama hoki a Atahere, koia ano kei tetahi anaterope o te koraha.

19 Na ka whai a Atahere i a Apanere; kihai hoki i peka, kihai i haere ki matau, ki maui, i a ia e whai ana i a Apanere.

20 Katahi a Apanere ka titiro ki muri i a ia, a ka mea, Ko koe tena, e Atahere? A ka mea ia, Ko ahau tenei.

21 Na ka mea a Apanere ki a ia, Peka atu koe ki tou matau, ki tou maui ranei, ka hopu ai i tetahi o nga tamariki mau, ka tango ai i ona hei kakahu o te riri mou. Otira kihai a Atahere i pai ki te peka ke atu i te whai i a ia.

22 Na ka mea ano a Apanere ki a Atahere, Peka atu i te whai i ahau: he aha ahau i patu iho ai i a koe ki te whenua? me pehea hoki e ara ake ai toku mata ki tou tuakana, ki a Ioapa?

23 Otira kihai ia i pai ki te peka ake: heoi werohia iho ia e Apanere ki te take o te tao ki tona puku, a puta rawa te tao i tetahi taha ona; na hinga iho ia ki taua wahi, a mate tonu iho ki reira: na tu katoa te hunga i tae mai ki te wahi i hinga ai a Atahere, i mate ai.

24 Otia ka whai a Ioapa raua ko Apihai a Apanere: a kua heke te ra i to raua taenga ki te puke o Amaha, ki tera i te ritenga atu o Kia, i te huarahi ki te koraha i Kipeono.

25 Na ka huihui nga tama a Pineamine ki a Apanere, kotahi tonu to ratou ngohi, a tu ana ratou i runga i te pukepuke kotahi.

26 Katahi ka karanga a Apanere ki a Ioapa, ka mea, Me kai tonu koia te hoari? kahore ano koe kia mohio he kino te tukunga iho? ahea ra koe mea ai ki te iwi ra kia hoki atu i te whai i o ratou teina?

27 Na ka mea a Ioapa, E ora ana te Atua, me i kahore koe te ki mai na, ina ko a te ata ano te iwi hoki ai i te whai i tona teina, i tona teina.

28 Heoi whakatangihia ana e Ioapa te tetere, a tu katoa ana te iwi, kihai ano i mea ki te whai i a Iharaira, na mutu ake ta ratou whawhai.

29 Na haere ana a Apanere ratou ko ana tangata i te mania, a pau katoa taua po, a whiti ana i Horano, haere ana a puta noa i Pitirono, tae tonu atu ki Mahanaima.

30 Na hoki ana a Ioapa i te whai i a Apanere: a no ka huihuia e ia te iwi katoa, na kotahi tekau ma iwa o nga tangata a Rawiri i kore, me Atahere.

31 E toru rau e ono tekau ia nga tangata o Pineamine, ara o nga tangata a Apanere, i patua e nga tangata a Rawiri, i mate.

32 Na ka mau ratou ki a Atahere, a tanumia iho ki te tanumanga o tona papa ki Peterehema. Na haere ana a Ioapa ratou ko ana tangata a pau katoa taua po, a marama atu i a ratou i Heperona.

### Chapter 3

<sup>1</sup> Na he roa te pakanga i waenganui o te whare o Haora me te whare o Rawiri: a ko Rawiri i  
 kaha haere, ko te whare ia o Haora i ngoikore haere. <sup>2</sup> A i whanau etahi tama ma Rawiri ki Heperona:  
 ko Amanono tana matamua, na Ahinoama Ietereeri; <sup>3</sup> Ko Kireapa ano tana tuarua, na Apikaira  
 wahine a Napara Karameri; ko Apoharama te tuatoru, he tama na Maaka tamahine a Taramai kingi  
<sup>4</sup> o Kehuru; Na ko Aronia te tuawha, he tama na Hakiti; a ko Hepatia te tuarima, he tama na Apitara;  
<sup>5</sup> Ko Itireama te tuaono, na Ekerā wahine a Rawiri. I whanau enei ki a Rawiri ki Heperona. <sup>6</sup> A i  
 te mea e whawha ana te whare o Haora ki te whare o Rawiri, na ka mea a Apanere i a ia ano kia  
 kaha i roto i te whare o Haora.  
<sup>7</sup> Na he wahine iti ta Haora i mua, ko Ritipa te ingoa, he tamahine na Aia: na ka mea a Ihipohete  
 ki a Apanere, He aha koe i haere ai ki roto, ki te wahine a toku papa? <sup>8</sup> Katahi ka mura rawa te riri  
 o Apanere i nga kupu a Ihipohete, ka mea, He upoko kuri koia ahau no Hura? e atawhai nei ahau  
 i tenei ra i te whare o Haora, o tou papa, i ona teina, i ona whanaunga, kihai hoki i tuku i a koe ki  
<sup>9</sup> te ringa o Rawiri, heo i e whakahe nei koe i ahau inaianei mo tenei wahine. Kia meatia tenei e te  
 Atua ki a Apanere, me etahi atu mea ano, ki te kahore ahau e mea i tena ki a Rawiri, pera i ta Ihowa  
<sup>10</sup> i oati ai ki a ia; Hei whakawhiti atu i te kingitanga i te whare o Haora, hei whakapumau hoki i  
 te torona o Rawiri i roto i a Iharaira, i roto i a Hura, mai i Rana a Peerehepa atu ana. <sup>11</sup> A kihai i  
 taea e ia te whakahoki kupu ki a Apanere, i wehi hoki ia i a ia. <sup>12</sup> Na ka unga karere a Apanere ki  
 a Rawiri, he mea nana ake, hei ki atu, No wai te whenua? hei mea hoki, Whakaritea tau kawenata  
<sup>13</sup> ki ahau, nana, ko toku ringa hoki ki a koe hei mea i a Iharaira katoa kia anga ki a koe. Na ka  
 mea tera, E pai ana; me whakarite kawenata ahau ki a koe: kotahi ano ia taku mea e tono ai ahau i  
 a koe, ara e kore koe e kite i toku mata, ki te kahore e kawea mai e koe a Mikara tamahine a Haora,  
<sup>14</sup> ina haere mai koe kia kite i toku mata. I unga karere ano a Rawiri ki a Ihipohete tama a Haora,  
 hei mea, Homai taku wahine a Mikara i taumautia e ahau maku ki nga kiri matamata kotahi rau o  
<sup>15</sup> nga Pirihitini. Na ka unga tangata a Ihipohete ki te tango i a ia i tana tahu i a Paratiere tama a  
<sup>16</sup> Raihi. I haere tahi ano tana tahu i a ia, me te tangi haere i muri i a ia, a tae noa ki Pahurimi. Na  
<sup>17</sup> ka mea a Apanere ki a ia, Haere, e hoki. A hoki ana ia. Na ka korero a Apanere ki nga kaumatua  
<sup>18</sup> o Iharaira, ka mea, I rapu koutou i a Rawiri i mua ake nei hei kingi mo koutou. Na, tena ra; ko  
 ta Ihowa korero hoki tenei mo Rawiri, i ki ai, Ma te ringa o Rawiri o taku pononga e whakaora ai  
 ahau i taku iwi i a Iharaira i roto i te ringa o nga Pirihitini, i roto hoki i te ringa o o ratou hoariri  
<sup>19</sup> katoa. A i korero ano a Apanere ki nga taringa o Pineamine; i haere ano a Apanere, a korerotia

ana e ia ki nga taringa o Rawiri i Heperona nga mea katoa e pai ana ki te titiro a Ihairaira, ki te titiro  
<sup>20</sup>  
 ano a te whare katoa o Pineamine. Heoi ka haere a Apanere ki a Rawiri ki Heperona, e rua tekau

<sup>21</sup>  
 hoki tangata ona hoa. A tukua ana e Rawiri he hakari ma Apanere ratou ko ona hoa. Na ka mea  
 a Apanere ki a Rawiri, Ka whakatika ahau, ka haere, a ka huihui mai i a Ihairaira katoa ki toku ariki,  
 ki te kingi; a ma ratou e whakarite kawenata ki a koe, a hei kingi koe mo nga mea katoa e hiahia  
 ai tou wairua. Na tukua atu ana a Ap anere e Rawiri, a haere marie ana ia.

<sup>22</sup>  
 Na ko te haerenga mai o nga tangata a Rawiri ratou ko Ioapa i te whai taua, he nui ano nga  
 taonga i kawea mai e ratou: ko Apanere ia kahore i a Rawiri i Heperona; i tukua atu hoki ia, a haere  
 marie ana. <sup>23</sup> A, no te taenga mai o Ioapa ratou ko tana ope katoa, ka korerotia te korero ki a Ioapa,

<sup>24</sup>  
 I haere mai a Apanere tama a Nere ki te kingi; a tukua atu ana ia e ia, a haere marie ana ia. Na  
 ka haere a Ioapa ki te kingi, a ka mea, He mahi aha tenei au? Nana, i haere mai a Apanere ki a koe:

<sup>25</sup>  
 he aha ia i tukua atu ai e koe, a kua haere noa atu ia? E mohio ana koe ki a Apanere tama a Nere;  
 i haere mai ia ki te tinihanga i a koe, kia mohio ai ia ki tou haerenga atu, ki tou haerenga mai, kia

<sup>26</sup>  
 mohio ai hoki ki nga mea katoa e mea ai koe. Na ka puta a Ioapa ki waho i te aroaro o Rawiri,  
 a unga tangata ana ki te whai i a Apanere, a whakahokia mai ana ia e ratou i te puna i Hiraha; ko

<sup>27</sup>  
 Rawiri ia kihai i mohio. A, i te hokinga mai o Apanere ki Heperona, i a ia ano i te kuwaha, ka  
 kawea ia e Ioapa ki tahaki; i mea kia ata korero ki a ia. Na patua ana ia i reira i te kopu, mate rawa,

<sup>28</sup>  
 mo nga toto hoki o Atahere, o tona teina. A, no te rongonga o Rawiri i muri iho, ka mea, Kahore  
 he hara oku, o toku kingitanga, i nga toto o Apanere tama a Nere i te aroaro o Ihowa a ake ake.

<sup>29</sup>  
 Waiho kia tau iho ki runga ki te matenga o Ioapa, ki runga hoki i te whare katoa o tona papa:  
 kaua hoki e kore i roto i te whare o Ioapa, tetahi i te mate rere, i te repera, i te whakawhirinaki ki

<sup>30</sup>  
 te tokotoko, i te hinga i te hoari, i te kore ta ro ranei. Heoi patua iho a Apanere e Ioapa raua ko  
 Apihai, ko tona teina, hei utu mo to raua teina, mo Atahere, i whakamatea nei e ia ki Kipeono i te

<sup>31</sup>  
 tatauranga. Na ka mea a Rawiri ki a Ioapa ratou ko tona nuinga katoa, Haea o koutou kakahu,  
 whitikiria hoki he kakahu taratara ki a koutou, ka tangi ai ki a Apanere. I haere ano a Kingi Rawiri

<sup>32</sup>  
 i muri i te amo. Na ka tanumia a Apanere ki Heperona, a ka puaki te reo o te kingi, tangi ana i  
 te urupa o Apanere; i tangi ano te iwi katoa. <sup>33</sup> Na ka waiata apakura te kingi ki a Apanere, ka mea,

<sup>34</sup>  
 Kia rite koia ki te matenga o te wairangi, te mate o Apanere? Kihai ou ringa i herea, kihai ou  
 waewae i paiherea ki te rahiri: rite tonu tou hinganga ki te hinganga o te tangata i te aroaro o nga

<sup>35</sup>  
 tamariki o te kino. I tangi ano te iwi katoa ki a ia. Na ka haere mai te iwi katoa ki te mea i a  
 Rawiri kia kai i te mea e awatea ana ano. Na ka oati a Rawiri, ka mea, Kia meatia mai tenei e te  
 Atua ki ahau, me etahi atu mea ano, ki te pa ahau ki te taro, ki tetahi atu mea ranei, i te mea kahore

<sup>36</sup>  
 an o i to noa te ra. Na ka mohio te iwi katoa, a pai tonu ki ta ratou titiro; pera tonu me nga mea  
 katoa i meatia e te kingi, he pai kau ki te titiro a te iwi katoa. <sup>37</sup> Na ka matau te iwi katoa ratou ko  
<sup>38</sup>  
 Iharaira katoa i taua ra ehara i te kingi nana i mea kia whakamatea a Apanere tama a Nere. I  
 mea hoki te kingi ki ana tangata, Kahore ianei koutou i matau, he rangatira, he tangata nui, kua  
<sup>39</sup>  
 hinga nei inaianei i roto i a Iharaira? Ko ahau hoki, ahakoa i whakawahia hei kingi, iwikore ana  
 i tenei ra; he maro rawa moku enei tangata, nga tama a Teruia. Kia rite ki tana kino ta Ihowa utu  
 ki te kaimahi o te kino.

#### Chapter 4

<sup>1</sup>  
 A, no ka rongu a Ihipohete, te tama a Haora kua mate a Apanere ki Heperona, na ngohe noa  
 iho ona ringi, a raru ana a Iharaira katoa. <sup>2</sup> Na tokorua nga tangata a Ihipohete, te tama a Haora,  
 he rangatira ngohi, ko te ingoa o tetahi ko Paana, ko te ingoa hoki o tetahi ko Rekapa, he tama na  
 Rimono Peeroti, no nga tama a Pineamine; i kii hoki a Peeroto no Pineamine. <sup>3</sup> I rere hoki nga  
 Peeroti ki Kitaima, a noho ana i reira a taea noatia tenei ra. <sup>4</sup> Na he tama ta Honatana tama a Haora,  
 he kopa ona waewae. E rima nga tau o tona whanautanga i te taenga mai o te rongu o Haora raua  
 ko Honatana i Ietereere, na ka mau tona kaihihi ki a ia, a rere ana: a, i a ia e taika ana ki te rere, ka  
<sup>5</sup>  
 hinga ia, kopa tonu iho; ko Mepipohete tona ingoa. Na ka haere nga tama a Rimono Peeroti, a  
 Rekapa raua ko Paana, a haere ana i te mahanatanga o te ra ki te whare o Ihipohete, i a ia e okioki  
<sup>6</sup>  
 ana i te poutumarotanga. Na haere ana raua ki reira ki waenganui o te whare, me te mea he tiki  
<sup>7</sup>  
 witi mai ta raua; na patua iho ia ki te kopu, a rere ana a Rakapa raua ko tona teina, ko Paana. I to  
 raua haerenga hoki ki te whare, i te takoto tera i tona whare moenga; na patua ana ia e raua,  
 whakamatea iho, na tangohia ana tona upoko, a mauria ana tona upoko. Na pau katoa taua po i a  
<sup>8</sup>  
 raua e haere ana na te ara o te mania. Na kawea ana e raua te upoko o Ihipohete ki a Rawiri ki  
 Heperona, a ka mea ki te kingi, Nana, te matenga o Ihipohete tama a Haora, o tou hoariri i whai  
 nei kia whakamatea koe; na kua mea nei a Ihowa i toku ariki, i te kingi kia whai utu i tenei r a i a  
 Haora ratou ko ona uri.  
<sup>9</sup>  
 Na ka whakahoki a Rawiri ki ta Rekapa raua ko tona teina, ko Paana, ki ta nga tama a Rimono  
 Peeroti, ka mea ia ki a raua, E ora ana a Ihowa i whakaora nei i toku wairua i roto i nga he katoa,  
<sup>10</sup>  
 I te korerotanga mai a tetahi ki ahau, i te meatanga, Nana, kua mate a Haora, tohu noa ia he  
 kaikawe mai ia i nga korero pai, hopukia ana ia e ahau, patua iho ki Tikiraka; ko te utu tera i hoatu

11  
 e ahau mo tana korero. Tena ko tenei ka patu te hunga kino i te tangata tika i roto i tona whare,  
 i runga ano i tona moenga, e kore ianei ahau e rapu i ona toto aiane i o korua ringa, e huna hoki i  
 12  
 a korua i runga i te whenua? Na whakahau ana nga taitamariki e Rawiri, a patua ana raua e  
 ratou, tapahia ana hoki o raua ringa me o raua waewae, whakairihia ake ki runga i te poka wai i  
 Heperona. Ko te upoko ia o Ihipohete i tangohia, i tanumia ki te tanumanga o Apanere ki Heperona.

## Chapter 5

1  
 Katahi ka haere nga iwi katoa o Iharaira ki a Rawiri, ki Heperona, a ka korero, ka mea, Tenei  
 matou he wheua nou, he kikokiko nou. 2  
 A, i mua ake nei, i te mea ko Haora to matou kingi, ko  
 koe te kaikawe atu, te kaikawe mai i a Iharaira: kua korerotia ano koe e Ihowa, Ko koe hei hepara  
 mo taku iwi, mo Iharaira, ko koe ano hei rangatira mo Iharaira. 3  
 Na ka haere nga kaumatua katoa  
 o Iharaira ki te kingi, ki Heperona, a ka whakaritea he kawenata e te kingi, e Rawiri, ki a ratou ki  
 Heperona, ki te aroaro o Ihowa: a whakawahia ana e ratou a Rawiri hei kingi mo Iharaira. 4  
 E toru  
 tekau nga tau o Rawiri i tona meatanga hei kingi, a e wha tekau nga tau i kingi ai ia. 5  
 E whitu nga  
 tau e ono nga marama i kingi ai ia i roto i a Hura ki Heperona: e toru tekau ma toru nga tau i kingi  
 ai ia i roto i a Iharaira katoa raua ko Hura ki Hiruharama.  
 6  
 Na ka haere te kingi ratou ko ana tangata ki Hiruharama, ki te tu ki nga Iepuhi e noho ana i  
 taua whenua, nana ra te korero ki a Rawiri, te mea, E kore koe e tae mai ki konei ki te kahore koe  
 e pei i nga matapo, i nga kopa: hua noa e kore e taea a tu a reira e Rawiri. 7  
 He ahakoa ra riro ana  
 i a Rawiri te pourewa i Hiona; ko te pa hoki tera o Rawiri. 8  
 I mea hoki a Rawiri i taua ra, Ko te  
 tangata mana e patu nga Iepuhi, kia taea rawatia e ia te rerenga wai, ka patu ai i nga kopa me nga  
 matapo e kinongia nei e te wairua o Rawiri. No reira i mea ai ratou, Tera nga matapo me nga kopa;  
 e kore ia e tomo mai ki te whare. 9  
 Na ka noho a Rawiri ki te pourewa, a huaina ana a reira, ko te  
 pa o Rawiri. I hanga ano e Rawiri a tawhio noa, o Miro mai ano a haere whakaroto. 10  
 Na ka tino  
 nui haere a Rawiri; i a ia ano a Ihowa, te Atua o nga mano.  
 11  
 Na ka unga he karere e HIRAMA kingi o Taira ki a Rawiri, me etahi rakau, he hita, me nga  
 kaimahi rakau, me nga kaimahi o nga kohatu whare; a na ratou i hanga he whare mo Rawiri. 12  
 Na  
 ka mohio a Rawiri kua whakapumautia ia e Ihowa hei kingi mo Iharaira, a kua whakanuia e ia tona  
 kingitanga, he whakaaro hoki ki tana iwi, ki a Iharaira. 13  
 Na ka tango ano a Rawiri i etahi wahine  
 iti mana, me etahi wahine tupu i Hiruharama, i muri i tona haerenga mai i Heperona. Na ka whanau



<sup>14</sup>  
 ano he tama, he tamahine ma Rawiri. Ko nga ingoa enei o ana i whanau ki Hiruharama; ko  
<sup>15</sup>  
 Hamua, ko Hopapa, ko Natana, ko Horomona, Ko Ipihara, ko Erihua; ko Nepeke, ko Iapai;  
<sup>16</sup>  
 Ko Erihama, ko Eriara, ko Eriperete.  
<sup>17</sup>  
 A, no te rongonga o nga Pirihitini kua whakawahia a Rawiri hei kingi mo Iharaira, ka haere  
<sup>18</sup>  
 nga Pirihitini katoa ki te rapu i a Rawiri, a ka rongu a Rawiri, na haere ana ia ki te pourewa. Na  
<sup>19</sup>  
 kua tae mai nga Pirihitini, kua tohatoha i a ratou ki te raorao o Repaima. Na ka ui a Rawiri ki a  
 Ihowa, ka mea, Me haere ranei ahau ki runga ki nga Pirihitini? E homai ranei ratou e koe ki toku  
 ringa? Ka mea a Ihowa ki a Rawiri, Haere, ka tino hoatu hoki e ahau nga Pirihitini ki tou ringa.  
<sup>20</sup>  
 Na ko te haerenga o Rawiri ki Paara Peratimi, patua iho ratou i reira e Rawiri. Na ka mea ia,  
 Pakaru ana i a Ihowa oku hoariri i toku aroaro, koia ano kei te pakaruhanga wai. Na reira i huaina  
<sup>21</sup>  
 ai te ingoa o taua wahi, ko Paara Peratimi. I mahue ano i a ratou a ratou whakapakoko i reira, a  
<sup>22</sup>  
 maua atu ana e Rawiri ratou ko ana tangata. Na ka haere ake ano nga Pirihitini, a tohatoha ana  
<sup>23</sup>  
 i a ratou ki te raorao o Repaima. Na ka ui a Rawiri ki a Ihowa, a ka mea mai ia, Kaua e haere  
 ki runga; engari me haere awhio atu ki muri i a ratou, ka whakaputa ai ki a ratou i te ritenga atu o  
<sup>24</sup>  
 nga rakau maperi. A ka rangona e koe he haruru haere i nga kouru o nga maperi, ko reira koe  
 korikori ai; no te mea ko te haerenga atu tena o Ihowa i tou aroaro ki te patu i te ope o nga Pirihitini.  
<sup>25</sup>  
 Na peratia ana e Rawiri me ta Ihowa i whakahau ai ki a ia; a patua iho e ia nga Pirihitini i Kepa  
 a tae noa koe ki Katere.

## Chapter 6

<sup>1</sup> Na ka huihuia ano e Rawiri te hunga whiriwhiri katoa o Iharaira e toru tekau mano. <sup>2</sup> A ka  
 whakatika a Rawiri ratou ko tona nuinga katoa, haere ana i Paare o Hura, tikina ana i reira te aaka  
 a Ihowa, e huaina nei ki te Ingoa, ara ki te ingoa o Ihowa o nga mano, e noho nei i waenganui o  
<sup>3</sup>  
 nga kerupima. Na ka whakanohoia e ratou te aaka a te Atua ki runga ki te kata hou, a mauria ana  
 i te whare o Apinarapa i Kipea; a na Uha raua ko Ahio, na nga tama a Apinarapa, i arahi te kata  
<sup>4</sup>  
 hou. Na kawea ana i te whare o Apinarapa i Kipea, me te haere tahi ano ratou ko te aaka a te  
<sup>5</sup>  
 Atua; i haere ano a Ahio i mua i te aaka. Na ka takaro a Rawiri ratou ko te whare katoa o Iharaira  
 ki te aroaro o Ihowa, me te whakatangi ano i a ratou mea katoa he kauri nei te rakau, i nga hapa, i  
 nga hatere, i nga timipera, i nga koronete, i nga himipora.

<sup>6</sup> A ka tae ki te patunga witi a Nakono, ka totoro a Uha ki te aaka a te Atua, a puritia ana e ia; i paheke hoki nga kau. <sup>7</sup> Na ka mura te riri o Ihowa ki a Uha, a patua iho ia i reira e te Atua mo tona he, a mate ake i reira i te taha o te aaka a te Atua. <sup>8</sup> Na ka pouri a Rawiri mo ta Ihowa tukitukinga i a Uha; na huaina ana taua wahi e ia, ko Pereteuha; koia ano tena inaianei. <sup>9</sup> Na ka wehi a Rawiri i a Ihowa i taua ra, ka mea, Ma te aha e tae ake ai te aaka a Ihowa ki ahau. <sup>10</sup> Heoi kihai a Rawiri i pai ki te tango i te aaka a Ihowa ki a ia, ki te pa o Rawiri; na kawea ketia ana e Rawiri ki te whare o Opereeroma Kiti. <sup>11</sup> E toru nga marama i noho ai te aaka a Ihowa ki te whare o Opereeroma Kiti: a ka manaakitia e Ihowa a Opereeroma ratou ko tona whare katoa. <sup>12</sup> A ka korerotia te korero ki a Kingi Rawiri, Kua manaakitia e Ihowa te whare o Opereeroma me ana mea katoa, he whakaaro ki te aaka a te Atua. Na ka haere a Rawiri, a kawea ana e ia te aaka a te Atua, i te whare o Opereeroma ki runga, ki te pa o Rawiri, me te koa ano ia. <sup>13</sup> A ka ono nga hikoinga i hokoi ai nga kaiamo i te aaka a Ihowa, na ka patua e ia etahi kau me tetahi mea momona. <sup>14</sup> Na ka whakapaua katoatia tona kaha e Rawiri ki te kanikani ki te aroaro o Ihowa: i whitikiria ano he epora rinena ki a Rawiri. <sup>15</sup> Heoi ka kawea te aaka a Ihowa e Rawiri ratou ko te whare katoa o Iharaira, me te hamama ano ratou, me te tangi ano te tetere. <sup>16</sup> A, i te taenga o te aaka a Ihowa ki te pa o Rawiri, na ka titiro a Mikara, tamahine a Haora na te matapihi, a ka kite i a Kingi Rawiri e tupekepeke ana, e kanikani ana i te aroaro o Ihowa; a whakahawea ana ia ki a ia i roto i tona ngakau. <sup>17</sup> Na ka kawea e ratou te aaka a Ihowa, a whakaturia ana ki tona wahi, ki waenganui o te tapenakara i whakaarahia e Rawiri mona: na ka tapaea e Rawiri etahi tahunga tinana ki te aroaro o Ihowa, me etahi whakahere mo te pai. <sup>18</sup> A, no ka mutu ta Rawiri tapae i nga tahunga tinana, i nga whakahere mo te pai, ka manaakitia e ia te iwi i runga i te ingoa o Ihowa o nga mano. <sup>19</sup> I tuwhaina ano e ia ma te iwi katoa, ma te huihui katoa o Iharaira, ma te tane, ma te wahine, kotahi keke taro ma tenei, ma tenei, me tetahi wahi kikokiko, me tetahi keke karepe maroke. Na haere ana te iwi katoa ki tona whare, ki tona whare. <sup>20</sup> Katahi a Rawiri ka hoki ki te manaaki i tona whare. A ka puta a Mikara, tamahine a Haora ki te whakatau i a Rawiri, a ka mea, Ano te kororia o te kingi o Iharaira inaianei, i whakakite kirikau nei i a ia inakuanei ki nga kanohi o nga pononga wahine a ana tangata, pera i tetahi o te hunga wairangi e whakakite nui ana i a ia! <sup>21</sup> Na ka mea a Rawiri ki a Mikara, I te aroaro ra o Ihowa, i whiriwhiri nei i ahau, i kape nei i tou papa, me tona whare katoa, i whakarite hoki a ahau hei rangatira mo te iwi a Ihowa, mo Iharaira; koia ahau ka takaro ki te aroaro o Ihowa. <sup>22</sup> Na ka nui atu ano i tenei toku wairangi, a ka iti iho ahau ki taku titiro; ko nga pononga wahine ia i kiia mai

na e koe, ka whakahonoretia ahau e ratou. <sup>23</sup> Na kahore he tamariki a Mikara tamahine a Haora a taea noatia te ra i mate ai ia.

## Chapter 7

<sup>1</sup> A, i te kingi e noho ana i tona whare, a ka meinga ia e Ihowa kia okioki i ona hoariri katoa a tawhio noa, <sup>2</sup> Na ka mea te kingi ki a Natana poropiti, Na, titiro, kei te noho nei ahau i te whare hita, ko te aaka ia a te Atua e noho ana i roto i te kakahu. <sup>3</sup> Na ka mea a Natana ki te kingi, Haere, meatia nga mea katoa i tou ngakau; kei a koe hoki a Ihowa.

<sup>4</sup> Na i taua po ano ka puta te kupu a Ihowa ki a Natana, ka mea, <sup>5</sup> Haere, mea atu ki taku pononga, ki a Rawiri, Ko te kupu tenei a Ihowa, Mau koia e hanga he whare hei nohoanga moku?

<sup>6</sup> Kahore nei hoki ahau i noho whare no te ra ano i kawea mai ai e ahau nga tama a Iharaira i Ihipa a taea noatia tenei ra; he noho haere ia toku i roto i te teneti, i te tapenakara. <sup>7</sup> I oku haereerenga katoa i roto i nga tamariki katoa a Iharaira, i puaki ranei tetahi kupu aku ki tetahi o nga iwi o Iharaira i whakaritea e ahau hei hepara mo taku iwi, mo Iharaira, i mea ranei ahau, He aha koutou te hanga

ai i tetahi whare hita moku? <sup>8</sup> Na, tena kia penei tau ki aiane ki taku pononga ki a Rawiri, Ko te kupu tenei a Ihowa o nga mano, Naku koe i tango mai i te nohoanga hipi, i te whai hipi, hei rangatira

mo taku iwi, mo Iharaira. <sup>9</sup> I a koe ano ahau i ou haerenga katoa, hautopea atu ana e ahau ou hoariri katoa i tou aroaro, a meinga ana koe e ahau hei ingoa nui, hei pera ano me te ingoa o nga mea nunui

o te whenua. <sup>10</sup> Na maku e whakarite he wahi mo taku iwi, mo Iharaira, a ka whakatokia ratou e ahau kia noho ki to ratou ake wahi, kia kore e nekehia a muri ake nei; kia mutu ai te tukino a nga

tamariki a te kino i a ratou, kei pera me to mua, <sup>11</sup> Me to te wa i whakaritea ai e ahau he kaiwhakarite mo taku iwi, mo Iharaira, i meinga ai hoki koe kia okioki i ou hoariri katoa. Na ko ta Ihowa kupu

tenei ki a koe, Ma Ihowa e hanga he whare mou. <sup>12</sup> A ka tutuki ou ra, a ka moe ki ou matua, a ka whakaarahia e ahau i muri i a koe tou whanau e puta mai i roto i ou whekau, a ka whakapumautia

tona kingitanga. <sup>13</sup> Nana e hanga he whare mo toku ingoa, a ka whakapumautia e ahau te torona o tona kingitanga a ake ake. <sup>14</sup> Ko ahau hei matua ki a ia, ko ia hei tama ki ahau. Ki te ngau ke tana mahi, ka whiu ahau i a ia ki te whiu a te tangata, ki nga whakapanga a nga tama a te tangata.

<sup>15</sup> E kore ia e mutu toku aroha ki a ia, e kore e pera me toku ki a Haora i peia atu na e ahau i tou aroaro. <sup>16</sup> Ka tuturu tonu hoki tou whare me tou kingitanga a ake ake, ki tou aroaro: ka mau tonu

17  
 tou torona a ake ake. Rite tonu ki enei kupu katoa, ki tenei kitenga katoa, nga kupu a Natana ki a Rawiri.

18  
 Katahi a Kingi Rawiri ka haere, a noho ana ki te aroaro o Ihowa, ka mea, Ko wai ahau, e te Arika, e Ihowa? he aha hoki toku whare, i kawea mai ai ahau e koe a mohoa noa nei? He mea iti ano tenei ki tau titiro, e te Arika, e Ihowa, na kua korerotia nei e koe te whare o tau pononga mo

19  
 nga tau e maha. Ko ta te tangata tikanga ranei tenei, e te Arika, e Ihowa? Na ko te aha ake hei

20  
 korerotanga ma Rawiri ki a koe? e mohio ana hoki koe, e te Arika, e Ihowa, ki tau pononga. He whakaaro ki tau kupu, na tou ngakau ano, i mea ai koe i enei mea nunui katoa, kia mohio ai tau

21  
 pononga. Na he nui koe, e Ihowa, e te Atua: kahore hoki he rite mou, kahore atu hoki he Atua;

22  
 ko koe anake: e rite ana ki nga mea katoa i rongo ai o matou taringa. Ko tehea iwi kotahi hoki o te whenua hei rite mo tau iwi, ara mo Iharaira, i haere nei te Atua ki te hoki hei iwi mana ake, hei mea ingoa mona, ki te mahi ano i nga mea nunui mou, i nga mea whakamataku hoki mo tou whenua, i te aroaro o tau iwi i hokona nei e koe mau i Ihipa, i nga tau iwi, i o ratou atua ano hoki?

23  
 24  
 Kua whakapumautia nei hoki e koe mau tau iwi, a Iharaira, hei iwi mau a ake ake: a ko koe hoki,

25  
 e Ihowa, hei Atua mo ratou. Na whakamana hoki aiane, e Ihowa, e te Atua, te kupu i korerotia

26  
 e koe mo tau pononga ratou ko tona whare a ake ake, meatia ano tau i korero ai. Kia whakanuia ano tou ingoa a ake ake, kia korerotia, Ko Ihowa o nga mano te Atua o Iharaira. Kia tuturu tonu

27  
 ano te whare o tau pononga, o Rawiri, ki tou aroaro. Nau nei hoki, e Ihowa o nga mano, e te Atua o Iharaira, i whakapuaki mai ki tau pononga, i mea, Ka hanga e ahau he whare mou: koia te

28  
 ngakau o tau pononga i anga ai ki te inoi i tenei inoi ki a koe. Na, ko koe hoki, e te Arika, e Ihowa, taua Atua nei, he pono hoki au kupu, a kua korerotia e koe tenei mea pai ki tau pononga.

29  
 Na reira kia pai koe ki te manaaki i te whare o tau pononga, kia pumau tonu ai ki tou aroaro: nau hoki e Ihowa, e te Atua, te kupu: a hei tau manaaki te manaaki mo te whare o tau pononga a ake ake.

## Chapter 8

1  
 Na, muri iho ka patua nga Pirihitini e Rawiri, a hinga ana ratou i a ia: a tangohia ana e Rawiri

2  
 a Metekeama i te ringa o nga Pirihitini. I patua ano e ia a Moapa, a ruritia ana ratou ki te aho; a meinga ana ratou kia takoto ki te whenua: na e rua nga aho i ruritia e ia mo te whakamate, kotahi

tino aho mo te whakaora. Na ka riro nga Moapi hei pononga ma Rawiri, hei kaihomai hakari. <sup>3</sup> I patua ano e Rawiri a Hararetere tama a Rehopo kingi o Topa, i tona haerenga ki te whakahoki mai i tona rohe i te awa, i Uparati. <sup>4</sup> Na kotahi mano ana hariata i riro mai i a Rawiri, e whitu rau hoki nga hoia eke hoiho, e rua tekau mano nga tangata haere i raro. Na whakangongea ana e Rawiri nga hoiho o nga hariata katoa; i whakatoea ia etahi mo nga hariata kotahi rau. <sup>5</sup> A, no te haerenga mai o nga Hiriani o Ramahiku ki te whakauru ki a Hararetere kingi o Topa, patua iho e Rawiri o nga Hiriani e rua tekau ma rua mano tangata. <sup>6</sup> I whakanohoa ano e Rawiri etahi hoia pupuri ki Hiria o Ramahiku: a ka waiho nga Hiriani hei pononga homai hakari ma Rawiri. Na whakaorangia ana a Rawiri e Ihowa i ona haerenga katoa. <sup>7</sup> I tangohia ano e Rawiri nga pukupuku koura a nga tangata a Hararetere, a kawea ana ki Hiruharama. <sup>8</sup> A nui atu te parahi i tangohia e Kingi Rawiri i Petaha, i Perotai, i nga pa o Hararetere.

<sup>9</sup> A, i te rongonga o Toi kingi o Hamata kua patua e Rawiri te ope katoa a Hararetere, <sup>10</sup> Katahi ka tonono a Toi i a Iorama, i tana tama ki a Kingi Rawiri ki te oha ki a ia, ki te manaaki hoki i a ia; mona i whawhai ki a Hararetere, i patu hoki i a ia: he hoariri hoki a Hararetere no Toi: i te ringa ano o Iorama etahi mea hiriwa, mea koura, mea parahi. <sup>11</sup> Whakatapua ake era e Kingi Rawiri ma Ihowa hei tapiri mo te hiriwa, mo te koura i whakatapua e ia, a nga iwi katoa i hinga nei i a ia;

<sup>12</sup> A Hiria, a Moapa, a nga tamariki a Amona, a nga Pirihitini, a Amareke, me nga taonga o Hararetere tama a Rehopo, kingi o Topa. <sup>13</sup> Na ka whai ingoa a Rawiri i tona hokinga mai i te patu i nga Hiriani i te Raorao Tote, ara kotahi tekau ma waru mano tangata. <sup>14</sup> A i whakanohoa e ia etahi hoia pupuri ki Eroma; he mea whakanoho puta noa i Eroma katoa ana hoia pupuri, a ka meinga nga Eromi katoa hei pononga ma Rawiri. A whakaorangia ana a Rawiri e Ihowa i ona haerenga katoa.

<sup>15</sup> Na ko Rawiri te kingi o Iharaira katoa; a i whakarite ano a Rawiri i te whakawa, i te tika, mo tona iwi katoa. <sup>16</sup> Ko Ioapa tama a Teruia hoki te rangatira ope, ko Iehohapata tama a Ahiruru te kaiwhakamahara. <sup>17</sup> Ko Haroko tama a Ahitupu, raua ko Ahimereke tama a Apiatara, nga tohunga; ko Heraia hoki te kaituhituhi; <sup>18</sup> Ko Penaia tama a Iehoiara te rangatira mo nga Kereti, mo nga Pereti; ko nga tama ia a Rawiri nga tino rangatira.

## Chapter 9

<sup>1</sup> Na ka mea a Rawiri, Kahore ranei he morehu inaianei o te whare o Haora, kia puta ai toku aroha ki a ia, he mea hoki naku ki a Honatana? <sup>2</sup> Na he pononga tera no te whare o Haora, ko tona ingoa ko Tipa: na ka karangatia ia ki a Rawiri, a ka mea te kingi ki a ia, Ko Tipa koe? Ka mea tera, <sup>3</sup> Tenei tau pononga. Na ka mea te kingi, Kahore ianei tetahi o te whare o Haora, kia whakaputaina ai e ahau to te Atua aroha ki a ia? Na ka mea a Tipa ki te kingi, Tenei ano tetahi tama a Honatana, he kopa nga waewae. <sup>4</sup> Na ka mea te kingi ki a ia, Kei hea? Ka mea a Tipa ki te kingi, Na, kei te whare o Makiri, tama a Amiere, kei Rotepara. <sup>5</sup> Katahi a Kingi Rawiri ka unga tangata ki te tiki i a ia i te whare o Makiri, tama a Amiere, i Rotepara. <sup>6</sup> A ka tae mai a Mepipohete tama a Honatana tama a Haora ki a Rawiri, ka tapapa, ka piko. Na ka mea a Rawiri, E Mepipohete. Ano ra ko tera, <sup>7</sup> Tenei tau pononga. Na ka mea a Rawiri ki a ia, Kaua e wehi; ka puta hoki toku aroha ki a koe, he whakaaro hoki ki a Honatana ki tou papa, me whakahoki ano e ahau ki a koe te mara katoa a Haora, a tou papa; me kai taro tonu ano koe ki taku tepu. <sup>8</sup> Na ka piko iho ia, ka mea, He aha tau pononga, i titiro mai ai koe ki tenei kuri mate, i ahau nei? <sup>9</sup> Katahi ka karanga te kingi ki a Tipa, ki te tangata a Haora, ka mea ki a ia, Ko nga mea katoa a Haora i mua, a tona whare katoa hoki, kua hoatu e ahau ki te tama a tou ariki. <sup>10</sup> Ko koe hoki hei kaimahi mana i te oneone, koutou ko au tama, ko au pononga, ka kohi ai i nga hua; a ka whai taro te tama a tou ariki hei kai mana: ko Mepipohete ia ko te tama a tou ariki, me kai taro tonu ia ki taku tepu. Na, kotahi tekau ma rim a nga tama a Tipa, e rua tekau nga pononga. <sup>11</sup> Katahi ka mea a Tipa ki te kingi, Ka rite ta tau pononga e mea ai ki nga mea katoa i whakahaua mai e toku ariki, e te kingi, ki tana pononga. Ko Mepipohete ia e ai ta te kingi me kai ki taku tepu; ka rite ki tetahi o nga tama a te kingi. <sup>12</sup> Na he tama ta Mepipohete he mea nohinohi, ko tona ingoa ko Mika: he pononga ano na Mepipohete te hunga katoa e noho ana i te whare o Tipa. <sup>13</sup> Heoi noho ana a Mepipohete ki Hiruharama: i kai tonu hoki ia ki te tepu a te kingi; he kopa ano ona waewae e rua.

## Chapter 10

<sup>1</sup> Na i muri i tenei ka mate te kingi o nga tamariki a Amona, a ko Hanunu, ko tana tama te kingi i muri i a ia. <sup>2</sup> Na ka mea a Rawiri, ka puta toku aroha ki a Hanunu tama a Nahaha, ka rite ki te aroha o tona papa i puta ra ki ahau. Na tonoa ana e Rawiri ana tangata hei kawae i tana whakamarie ki a ia mo tona papa. Na ka tae nga tangata a Rawiri ki te whenua o nga tama a Amona. <sup>3</sup> Na ka

mea nga rangatira o nga tamariki a Amona ki a Hanunu, ki to ratou ariki, Ki tou whakaaro he whakahonore na Rawiri i tou papa i tonoa mai e ia nga kaiwhakamarie ki a koe? he teka ianei he

titiro i te pa, he tutei, he whakangaro te mea i tono a mai ai e Rawiri ana tangata ki a koe? Heoi ka mau a Hanunu ki nga tangata a Rawiri, a heua ana e ia tetahi taha o o ratou pahau, tapahia ana

o ratou kakahu ki waenga a tae noa ki o ratou papa, a tonoa atu ana ratou. A, no te korerotanga o taua mea ki a Rawiri, ka tono tangata ia ki te whakatau i a ratou; he nui hoki te whakama o au tangata; i mea ano te kingi, Hei Heriko noho ai, kia tupu ra ano o koutou pahau, ka hoki mai ai.

A, no te kitenga o nga tamariki a Amona e whakahouhou ana ratou ki a Rawiri, ka tono tangata nga tamariki a Amona hei utu i nga Hiriani o Peterehopo, i nga Hiriani ano o Topa, e rua tekau mano, he hunga haere i raro, i te kingi ano o Maaka, kotah i mano tangata, i to Ihitopo, kotahi tekau

ma rua mano tangata. A, no te rongonga o Rawiri, ka tonoa e ia a Ioapa me te ope katoa o nga

marohirohi. Na ka puta nga tama a Amona ki waho, a whakatakotoria ana a ratou ngohi ki te tomokanga atu o te kuwaha; a ko nga Hiriani o Topa, o Rehopo, me o Ihitopo, o Maaka, ko ratou

anake i te parae. Na, i te kitenga o Ioapa e akina ana a mua, a muri, ona e te hoariri, ka whiriwhiria

e ia etahi o nga tino tangata katoa o Iharaira, a whakaritea ana e ia hei tu ki nga Hiriani: Ko te nuinga atu hoki o te iwi i tukua e ia ki te ringa o Apihai, o tona teina, a whakatikaia ana e tera hei

tu ki nga tama a Amona. I mea ano ia, Ki te kaha atu nga Hiriani i ahau, na me haere atu ahau

ki te awhina i a koe. Kia maia, kia whakatangata hoki tatou mo to tatou iwi, mo nga pa hoki o

to tatou Atua: a ma Ihowa e mea te mea i pai ki a ia. Na ka whakatata atu a Ioapa ratou ko tona

nuinga ki te whawhai ki nga Hiriani, a rere ana ratou i tona aroaro. A, no te kitenga o nga tama a Amona kua rere nga Hiriani, ka rere ano ratou i te aroaro o Apihai, a haere ana ki te pa. Na hoki ana a Ioapa i nga tama a Amona, a haere ana ki Hiruharama.

A, i te kitenga o nga Hiriani kua patua ratou e Iharaira, ka huihui ratou. A ka tono tangata a Hararetere ki te tiki i nga Hiriani i tawahi o te awa: a haere mai ana ratou ki Herama, ko Kopaka

hoki, ko te rangatira o te ope a Hararetere ki mua i a ratou. A ka korerotia ki a Rawiri; a ka huihuia e ia a Iharaira katoa, a whiti ana ki tera taha o Horano haere ana ki Herama. Na ka

whakatikaia e nga Hiriani o ratou ngohi hei tu i a Rawiri, a ka whawhai ki a ia. Na ka rere nga Hiriani i te aroaro o Iharaira; a patua iho o nga Hiriani e Rawiri nga tangata o nga hariata e whitu rau, e wha tekau mano ano nga hoia eke hoiho; i patua ano e ia a Hopaka, te rangatira o to ratou

ope, a mate iho ia ki reira. A, no ka kite nga kingi katoa, nga apa o Hararetere, kua patua ratou e Iharaira, ka houhia e ratou te rongu ki a Iharaira, a ka meinga hei apa mo ratou. Heoi wehi ana nga Hiriani, a mutu ake ta ratou awhina i nga tama a Amona.

## Chapter 11

<sup>1</sup> A, i te takanga o te tau, i te wa ano e haere ai nga kingi ki te whawhai, na ka unga e Rawiri a Ioapa ratou ko ana tangata, ko Iharaira katoa; a huna iho e ratou nga tama a Amona, whakapaea ana a Rapa. Ko Rawiri ia i noho ki Hiruharama. <sup>2</sup> A, i te mea ka ahiahi, na ka maranga ake a Rawiri i tona moenga, a haereere ana i runga i te tuanui o te whare o te kingi: na ka kitea iho e ia i te tuanui tetahi wahine e kaukau ana; he ataahua rawa ano te wahine ki te titiro atu. <sup>3</sup> Na ka tono tangata te kingi, a ka ui mo taua wahine. Na ko te meatanga, Ehara ianei tenei i a Patehepa tamahine a Eriama, ko te wahine ia a Uria Hiti. <sup>4</sup> Na ka unga etahi karere e Rawiri ki te tiki i a ia; a ka haere mai ia ki a ia; a takoto tahi ana raua; kua oti hoki tona poke te pure, a hoki ana ki tona whare. <sup>5</sup> Na ka hapu te wahine, a ka tono tangata ki a Rawiri, ka mea, Kua hapu ahau.

<sup>6</sup> Na ka tono tangata a Rawiri ki a Ioapa, ka mea, Tena a Uria Hiti tonoa mai ki ahau. Na tonoa ana e Ioapa a Uria ki a Rawiri. <sup>7</sup> A, i te taenga mai o Uria ki a ia, ka ui a Rawiri i pehea a Ioapa, i pehea hoki te iwi, a i pehea te whawhai. <sup>8</sup> Na ka mea a Rawiri ki a Uria, Haere ki raro, ki tou whare ki te horoi i ou waewae. Na ka puta a Uria i te whare o te kingi; a i maua i muri i a ia tetahi kai a te kingi. <sup>9</sup> Otiia moe ana a Uria ki te tatau o te whare o te kingi i roto i nga tangata katoa a tona ariki, kihai hoki i haere ki raro, ki tona whare. <sup>10</sup> A ka korerotia te korero ki a Rawiri, Kihai a Uria i haere ki raro, ki tona whare; na ka mea a Rawiri ki a Uria, He teka ianei katahi ano koe ka tae mai i te haere? he aha koe te haere ai ki raro, ki tou whare? <sup>11</sup> Na ka mea a Uria ki a Rawiri, Kei roto te aaka i te tihokahoka, me Iharaira, me Hura; kei te mata ano o te parae toku ariki, a Ioapa ratou ko nga tangata a toku ariki e noho ana; kia haere koia ahau ki toku whare ki te kai, ki te inu, ki te tako to ki taku wahine? e ora ana koe, e ora ana hoki tou wairua, e kore tenei mea e meatia e ahau.

<sup>12</sup> Na ka mea a Rawiri ki a Uria, E noho ki konei i tenei ra ano, a apopo ahau unga ai i a koe. Heoi, noho ana a Uria i taua ra, i te aonga ake ano, ki Hiruharama. <sup>13</sup> Na ka karangatia ia e Rawiri, a kai ana; a meinga ana e ia kia haurangi: a i te ahiahi ka puta ki waho ki te takoto ki tona takotoranga i roto i nga tangata a tona ariki, kihai hoki i haere ki raro, ki tona whare.

<sup>14</sup> Na i te ata ka tuhituhia he pukapuka e Rawiri ki a Ioapa, o tonoa ana kia kawea e Uria. <sup>15</sup> I tuhituhi hoki ia ki te pukapuka, i mea, Me hoatu e koutou a Uria ki mua rawa, ki te wahi e nui rawa ana te whawhai, ka hoki ai i muri i a ia, kia patua ai ia, kia mate ai. <sup>16</sup> Na i a Ioapa e whakapae ana i te pa, ka hoatu e ia a Uria ki te wahi i mohio ai ia kei reira nga toa. <sup>17</sup> Na, ko te putanga atu o nga tangata o te pa ki te whawhai ki a Ioapa, ka hinga etahi o te iwi, etahi o nga tangata ake a Rawiri;



<sup>18</sup>  
 i mate ano a Uria Hiti. Katahi a Ioapa ka tono tangata hei korero ki a Rawiri i nga mea katoa o  
<sup>19</sup>  
 te whawhai. I ako ano ia te karere, i mea, E poto i a koe nga mea katoa o te whawhai te korero  
<sup>20</sup>  
 ki te kingi; Na ki te ara te riri o te kingi, a ka mea ia ki a koe, He aha koutou i whakatata rawa  
<sup>21</sup>  
 ai ki te pa tatau ai? kahore ianei koutou i mohio ka kopere mai ratou i te taiepa? Na wai a  
 Apimereke tama a Ierupehete i patu? he teka ianei na te wahine i maka te wahi o runga o te kohatu  
 huri ki runga ki a ia i te taiepa, a mate iho ai ki Tepehe? he aha koutou i whakatata atu ai ki te  
<sup>22</sup>  
 taiepa? Na mea atu, Kua mate ano tau po nonga, a Uria Hiti. Heoi haere ana te karere, a ka tae,  
<sup>23</sup>  
 korerotia ana e ia ki a Rawiri nga mea katoa i unga ai ia e Ioapa. I mea hoki te karere ki a Rawiri,  
 I kaha rawa mai aua tangata ki a matou, a puta mai ana ki a matou ki te parae. Na whakaekea atu  
<sup>24</sup>  
 ana e matou, a tae noa ki te kuwaha o te keti. Na ko te koperenga mai a nga kaikopere i te taiepa  
 ki au tangata, mate iho etahi o nga tangata a te kingi; ko tau pononga hoki, ko Uria Hiti kua mate.  
<sup>25</sup>  
 Katahi ka mea a Rawiri ki te karere, Kia penei tau ki atu ki a Ioapa, Kei he tenei mea ki tou  
 whakaaro, he kai noa iho hoki ta te hoari i tetahi, i tetahi: kia kaha tau whawhai ki te pa,  
<sup>26</sup>  
 whakangaromia. Mau ano ia e whakatenatena. A, i te rongonga o te wahine a Uria kua mate  
<sup>27</sup>  
 tana tahu a Uria, ka tangihia e ia tana tahu. A ka pahemo te tangihanga, ka tono tangata a Rawiri  
 ki te tiki i a ia ki tona whare, a ka waiho hei wahine. mana, a ka whanau ta raua tama. Otiia i kino  
 ki ta Ihowa titro taua mea i mea ai a Rawiri.

## Chapter 12

<sup>1</sup>  
 Na ka tonoa a Natana e Ihowa ki a Rawiri: a ka tae atu ia ki a ia, ka mea ki a ia, Tokorua nga  
<sup>2</sup>  
 tangata i te pa kotahi; he taonga o tetahi, he rawakore tetahi. He tini noa iho nga hipi, nga kau a  
<sup>3</sup>  
 te tangata taonga: Hore rawa ia he mea a te rawakore; heoi ano he reme uha kotahi nei, he mea  
 nohinohi nana i hoki mai i whangai haere; a i tupu tahi ake ratou me ana tamariki: i kai tana ake  
<sup>4</sup>  
 taro, i inu hoki i roto i tana ake kapu, i takoto ki tona uma; a i rite t onu he tamahine ki a ia. Na  
 ka tea he pahi ki te tangata taonga, a ka manawapa tera ki te tango i tetahi o ana hipi, o ana kau,  
 kia taka ma te manuhuri i haere mai ki a ia; heoi tangohia ana e ia te reme a te tangata rawakore,  
<sup>5</sup>  
 taka ana e ia ma te tangata i haere nei ki a ia. Ko te tino muranga o te riri o Rawiri ki taua tangata,  
<sup>6</sup>  
 ka mea ki a Natana, E ora ana a Ihowa, e tika ana kia mate te tangata nana tenei mahi. Ko te reme

hoki, kia wha ana e hoatu ai hei utu; mona i mea i tenei mea, mona hoki kihai i aroha. <sup>7</sup> Na ka mea  
 a Natana ki a Rawiri, Ko taua tangata ra, ko koe. Ko te kupu tenei a Ihowa, a te Atua o Iharaira,  
 Naku koe i whakawahi hei kingi mo Iharaira, naku hoki koe i whakaora i te ringa o Haora; <sup>8</sup> A  
 hoatu ana e ahau te whare o tou ariki ki a koe, me nga wahine a tou ariki ki tou uma: i hoatu ano e  
 ahau te whare o Iharaira raua ko Hura ki a koe; a mehemea i iti tenei, kua tapiritia atu e ahau mau  
<sup>9</sup>  
 era atu mea ano. He aha koe i whakahawea ai ki te kupu a Ihowa? i mea ai i tenei kino i tana  
 tirohanga? Ko Uria Hiti i patua e koe ki te hoari, a tangohia ana tana wahine hei wahine mau; ko  
<sup>10</sup>  
 ia hoki tukitukia ana e koe ki te hoari a nga tama a Amona. Na reira e kore te hoari e whakakorea  
 atu aiane i roto i tou whare a ake ake, mou i whakahawea ki ahau, i tango hoki i te wahine a Uria  
<sup>11</sup>  
 Hiti hei wahine mau. Ko te kupu tenei a Ihowa, Nana, ka whakaara ahau i te kino mou i roto i  
 tou whare, a ka tango i au wahine i tau tirohanga, ka hoatu ki tou hoa, na ka takotoria e ia au wahine  
<sup>12</sup>  
 i te tirohanga a te ra i runga nei. I meatia pukutia hoki tenei mea e koe: ko ahau ia ka mea i tenei  
<sup>13</sup>  
 mea ki mua i a Iharaira katoa, ki mua ano i te ra. Na ka mea a Rawiri ki a Natana, Kua hara ahau  
 ki a Ihowa. A ka mea a Natana ki a Rawiri, Kua kauparea atu ano tou hara e Ihowa; e kore koe e  
<sup>14</sup>  
 mate. Otira, i te mea na tenei mahi au i whai take nui ai nga hoariri o Ihowa ki te kohukohu, he  
 pono ka mate te tamaiti ka whanau nei ki a koe.  
<sup>15</sup>  
 Na haere ana a Natana ki tona whare. A ka pakia e Ihowa te tamaiti a Rawiri i whanau nei  
<sup>16</sup>  
 i te wahine a Uria: he nui hoki te mate. Na ka inoi a Rawiri ki te Atua mo te tamaiti; a nohopuku  
<sup>17</sup>  
 ana a Rawiri, haere ana ki roto, pau noa taua po e takoto ana i te whenua. Na ka whakatika nga  
 kaumatua o tona whare ki a ia, ki te whakaara i a ia i te whenua: heoi kihai ia i pai, kihai hoki i kai  
<sup>18</sup>  
 tahi i ta ratou taro. Na i te whitu o nga ra ka mate te tamaiti. A ka wehi nga tangata a Rawiri ki  
 te mea ki a ia kua mate te tamaiti: i mea hoki ratou, Na i te mea e ora ana te tamaiti, i korero tatou  
 ki a ia, a kihai ia i whakarongo ki to tatou reo: na, tera noa ak e te kino e mea ai ia ki a ia ano ki te  
<sup>19</sup>  
 korerotia e tatou ki a ia te matenga o te tamaiti. Otiia i kite a Rawiri i ana tangata e kowhetewhete  
 ana ki a ratou ano, a ka mohio a Rawiri ki ana tangata, Kua mate ranei te tamaiti? A ka mea ratou,  
<sup>20</sup>  
 Kua mate. Katahi a Rawiri ka whakatika i te whenua, ka horoi i a ia, ka whakawahi i a ia, ka  
 tango i etahi kakahu ke mona; a haere ana ki te whare o Ihowa ki te koropiko. Katahi ka haere ia  
<sup>21</sup>  
 ki tona whare. Na ka tona e ia, a ka whakatakotoria he taro mana, a kai ana ia. Katahi ka mea  
 ana tangata ki a ia, He aha tenei mea i mea nei koe? I nohopuku koe, i tangi ki te tamaiti i a ia e  
<sup>22</sup>  
 ora ana: no te matenga ia o te tamaiti, na whakatika ana koe ki te kai taro. Ano ra ko ia, I te  
 tamaiti e ora ana ano, i nohopuku ahau, i tangi: i mea hoki, Ko wai ka tohu, tera pea a Ihowa ka

aroha ki ahau, a ka ora te tamaiti? <sup>23</sup> Ko tenei, ka mate nei ia, kia nohopuku ahau hei aha? E taea  
 ranei ia e ahau te whakahoki mai? Ko ahau e haere ki a ia, e kore ia e hoki mai ki ahau. <sup>24</sup> Na ka  
 whakamarie a Rawiri i tana wahine, i a Patehepa, a haere ana ki roto, ki a ia, a takoto tahi ana raua;  
 a ka whanau ano ia, he tama, huaina iho tona ingoa ko Horomona; i arohaina ia e Ihowa; <sup>25</sup> I tono  
 hoki ia na te ringa o Natana poropiti, a nana i hua tona ingoa ko Teriria; he whakaaro hoki ki a  
 Ihowa.  
<sup>26</sup> A, i whawhai ano a Ioapa ki Rapa o nga tamariki a Amona; a horo ana i a ia te pa kingi.  
<sup>27</sup> Na ka tono tangata a Ioapa ki a Rawiri, ka mea, Kua tauria a Rapa e ahau, ae ra, kua horo i ahau  
 te pa o nga wai. <sup>28</sup> Na, tena, huihuia te nuinga o te iwi ki te whakapae i te pa, kia riro ai i a koe:  
 kei riro mai te pa i ahau, a noku te ingoa e huaina ki reira. <sup>29</sup> Na huihuia ana te iwi katoa e Rawiri,  
 a haere ana ki Rapa; na tauria ana a reira e ia, a riro ana i a ia. <sup>30</sup> Tangohia ana e ia te karauna o to  
 ratou kingi i tona matenga, ko tona taimaha kotahi taranata koura, a i roto nga kohatu utu nui; a  
 potaea iho ki te matenga o Rawiri. A i whakaputaina e ia nga taonga o te pa, tona tini. <sup>31</sup> Na, ko  
 nga tangata i roto, whakaputaina ana e ia ki waho, a whakamahia ana ki nga kani, ki nga harou  
 rino, ki nga toki rino; i meinga ano ratou kia tika na roto i te tahunga pereki. Ko tana hoki tenei i  
 mea ai ki nga pa katoa o nga tamariki a Am ona. Na hoki ana a Rawiri te iwi katoa ki Hiruharama.

### Chapter 13

<sup>1</sup> Muri iho i enei mea, na he tuahine to Apoharama tama a Rawiri, ko Tamara te ingoa, he  
 attahua; a i arohaina ia e Amoanono tama a Rawiri. <sup>2</sup> Na ngaua kinotia ana a Amanono, no ka mate  
 ia mo tona tuahine, mo Tamara, he wahine hoki ia, a ki te whakaaro o Amanono he he rawa ki te  
 meatia tetahi mea ki a ia. <sup>3</sup> He hoa ia to Amanono, tona ingoa ko Ionarapa, he tama na Himea, na  
 tetahi o nga tuakana o Rawiri; he tangata murere rawa ano a Ionarapa. <sup>4</sup> Na ka mea ia ki a ia, He  
 aha koe, e te tama a te kingi, i penei ai te kikokore i tenei ata, i tenei ata? e kore ianei koe e whakaatu  
 ki ahau? Ano ra ko Amanono ki a ia, E aroha ana ahau ki a Tamara, ki te tuahine o Apoharama, o  
 toku teina. <sup>5</sup> Na ka mea a Ionarapa ki a ia, Takoto i runga i tou moenga, ka whakamatemate hoki  
 i a koe, a ka tae mai tou papa kia kite i a koe, na ka mea ki a ia, Kia haere mai toku tuahine, a  
 Tamara ki te whangai i ahau ki te kai, ki te taka hoki i te kai i t aku tirohanga, kia kite atu ai ahau,  
 kia kai ai i ta tona ringa. <sup>6</sup> Heoi ka takoto a Amanono, ka whakamatemate; a, i te taenga mai o te  
 kingi kia kite i a ia, ka mea a Amanono ki te kingi, Tena kia haere mai a Tamara, toku tuahine ki

te hanga i etahi keke i taku tirohanga, kia rua, a ka kai ahau i ta tona ringa. <sup>7</sup> Katahi ka tono tangata  
 a Rawiri ki te whare ki a Tamara, ka mea, Tena, haere ki te whare o tou tungane, o Amanono, ki  
<sup>8</sup>  
 te taka kai mana. Heoi haere ana a Tamara ki te whare o tona tungane, o Amanono, a i te takoto  
 tera: na ka mau ia ki te paraoa, a pokepokea ana, hanga ana hei keke i tana tirohanga, na tunua ana  
<sup>9</sup>  
 e ia nga keke. Na kua mau ia ki te parai, ringihia ana e ia ki tona aroaro: heoi ka whakaparahako  
 tera ki te kai. Na ka mea a Amanono, Kia mawehe katoa atu nga tangata i ahau. Na ka mawehe  
<sup>10</sup>  
 katoa nga tangata i a ia. Na ka mea a Amanono ki a Tamara, Maua ake te kai na ki te whare  
 moenga, a ma tou ringa ahau e whangai. Na ka mau a Tamara ki nga keke i hanga e ia, a kawea  
<sup>11</sup>  
 ana ki a Amanono, ki tona tungane, ki te whare moenga. A, i tana kawenga ki a ia kia kainga,  
<sup>12</sup>  
 na ka hopu tera i a ia, ka mea, Haere mai, taua ka takoto tahi, e toku tuahine. Na ka mea ia ki a  
 ia, Kauaka, e toku tungane, kaua ahau e whakaititia, kahore hoki he mahi penei i roto i a Iharaira;  
<sup>13</sup>  
 kati ra tenei mahi wairangi. Ko ahau hoki, kei hea he hunanga mo toku whakama? a ka rite koe  
 ki tetahi o te hunga wairangi o Iharaira. Engari ra korero ki te kingi; e kore hoki ahau e kaiponuhia  
<sup>14</sup>  
 e ia ki a koe. Heoi kihai ia i pai ki te whakarongo ki tona reo: na he kaha rawa ia i a ia, a  
<sup>15</sup>  
 whakaititia ana ia e ia, a takotoria ana e ia. Katahi ka nui atu te kino i kino ai a Amanono ki a  
 ia; nui atu te kino i kino ai ia ki a ia i te aroha i aroha ai ia ki a ia. A ka mea a Amanono ki a ia,  
<sup>16</sup>  
 Whakatika, haere. Na ka mea tera ki a ia, Kahore he rawa; nui atu te kino o tenei tononga i ahau  
<sup>17</sup>  
 i tera i meatia e koe ki ahau. Otiia kihai ia i pai ki te whakarongo ki a ia. Katahi ka karangatia  
 e ia tana tangata i mahi nei ki a ia, a ka mea, Tonoa atu tenei wahine i toku aroaro ki waho,  
<sup>18</sup>  
 whakarawatia hoki te tatau i muri i a ia. Na he kakahu purepure to te wahine, he pera hoki nga  
 koroka i kakahuria ai nga tamahine wahine a te kingi. Katahi ka kawea ia e tana tangata ki waho,  
<sup>19</sup>  
 a whakarawatia ana te tatau i muri i a ia. Na ka opehia e Tamara he pungarehu ki runga ki tona  
 matenga, a haea ana e ia tona kakahu purepure, taupokina iho ona ringa ki runga ki tona matenga,  
<sup>20</sup>  
 a haere ana, me te aue haere. Na ka mea a Apoharama tona tungane ki a ia, I a koe tou tungane  
 a Amanono? tena, noho puku, e toku tuahine; ko tou tungane hoki ia, kaua tou ngakau e mea ki  
 tenei mea. Na noho ana a Tamara, whakapouaru ana i te whare o tona tungane, o Apoharama.  
<sup>21</sup> I te rongonga ia o Kingi Rawiri i enei mea katoa, nui rawa tona riri. <sup>22</sup> Na kahore a  
 Apoharama kupu ki a Amanono, ahakoa pai, ahakoa kino: e mauahara ana hoki a Apoharama ki a  
<sup>23</sup>  
 Amanono, mona i whakaiti i tona tuahine i a Tamara. A, e rua rawa tau i muri, na he kaikutikuti  
 hipi a Apoharama i Paara Hatoro, i te taha o Eparaima, a karangatia ana e Apoharama nga tama  
<sup>24</sup>  
 katoa a te kingi. Na ka haere a Apoharama ki te kingi, a ka mea, Nana, he kaikutikuti enei a tau

pononga, na kia haere te kingi ratou ko ana pononga hei hoa mo tau pononga. <sup>25</sup> Na ka mea te kingi ki a Apoharama, Kauaka, e taku tama, kua matou katoa e haere, kei taimaha koe i a matou.

Na tohe ana ia ki a ia: otiia kihai tera i pai ki te haere; engari i manaaki i a ia. <sup>26</sup> Katahi ka mea a Apoharama, Ki te kore, tukua toku tuakana a Amanono, kia haere tahi matou. Na ka mea te kingi,

Kia haere ia i a koe hei aha? <sup>27</sup> Ka tohe ia a Apoharama ki a ia, a ka tukua e ia a Amanono ratou

ko nga tama katoa a te kingi hei hoa mona. <sup>28</sup> Na i whakahau a Apoharama i ana tangata, i mea, E kite koutou i te ngakau o Amanono e koa ana i te waina, a ka mea ahau ki a koutou, Patua a Amanono, na me whakamate, kua e wehi; he teka ianei naku koutou i whakahau? kia maia, kia

toa. <sup>29</sup> A rite tonu ta nga tangata a Apoharama i mea ai ki a Amanono ki ta Apoharama i whakahau ai. Katahi ka whakatika katoa nga tama a te kingi, a eke ana ki tona muera, ki tona muera, a rere ana.

<sup>30</sup> I a ratou ano i te ara, ka tae te rongu ki a Rawiri, ka korerotia, Kua patua e Apoharama nga

tama katoa a te kingi, kihai hoki tetahi o ratou i mahue. <sup>31</sup> Katahi ka whakatika te kingi, a haea ana e ia ona kakahu, takoto ana ki te whenua; me te tu ano ana tangata katoa, he mea haehae nga

kakahu. <sup>32</sup> Na ka oho a Ionarapa tama a Himea, a te tuakana o Rawiri, ka ki, Kei mea toku ariki, ko nga taitama katoa, ko nga tama a te kingi kua whakamatea nei; engari ko Amanono anake i mate: ko ta Apoharama hoki tenei i karanga ai, he mea whakatakoto no te ra ano i whakaiti ai tera

i tona tuahine, i a Tamara. <sup>33</sup> Na, tena, kua te ngakau o toku ariki, o te kingi e mea ki taua mea,

e whakaaro, Ko nga tama katoa a te kingi kua mate: kahore, ko Amanono anake i mate. <sup>34</sup> Rere ana ia a Apoharama. Na, ko te marangatanga o nga kanohi o te tamaiti e tutei atu ana, ka titiro, na

he nui te hunga e haere mai ana i te ara i te taha o te puke i tona tuara. <sup>35</sup> Na ka mea a Ionarapa ki

te kingi, Nana, ko nga tama a te kingi te haere mai nei; e rite ana ki ta tau pononga i mea ai. <sup>36</sup> Mutu kau tana korero, na ko te haerenga mai o nga tama a te kingi, a nui atu to ratou reo ki te tangi: a

nui atu te tangi i tangi ai te kingi ratou ko ana tangata katoa. <sup>37</sup> Rere ana ia a Apoharama, a haere ana ki a Taramai tama a Amihuru, kingi o Kehuru. Ko Rawiri ia, tangihia ana e ia tana tama i nga

ra katoa. <sup>38</sup> Heoi rere ana a Apoharama, haere ana ki Kehuru, a e toru ona tau ki reira. <sup>39</sup> Na ka

koingo te ngakau o Kingi Rawiri kia haere ki a Apoharama: kua marie hoki ia ki a Amanono, i te mea kua mate ia.

## Chapter 14

<sup>1</sup> Na ka kite a Ioapa tama a Teruia e anga ana te ngakau o te kingi ki a Apoharama, <sup>2</sup> Ka tono tangata a Ioapa ki Tekoa ki te tiki i tetahi wahine mohio i reira, a ka mea ki a ia, Me mea koe i a koe he wahine e tangi tupapaku ana, me kakahu he kakahu taua, kua ano e whakawahi i a koe ki te hinu; engari kia rite ki te wahine kua ta ngi noa ake ki te tupapaku. <sup>3</sup> A haere ki te kingi, a ko enei nga kupu mau ki a ia. Heoi hoatu ana e Ioapa nga kupu ki tona mangai. <sup>4</sup> Na korerotia ana e te wahine o Tekoa ki te kingi, me te tapapa ano ki te whenua, me te piko ano. I mea hoki, Whakaorangia, e te kingi. <sup>5</sup> Na ka mea te kingi ki a ia, He aha tou mate? a ka ki tera, He wahine pouaru nei ahau, kua mate hoki taku tahu. <sup>6</sup> Na tokorua nga tama a tau pononga, heoi whawhai ana raua ki a raua i te parae, a kahore he kaiwawao mo raua. Na patua iho tetahi e tetahi, a mate iho. <sup>7</sup> Na ka whakatika nga whanaunga katoa ki tau pononga, e mea ana, Homai te kaipatu i tona teina kia whakamatea hei utu mo te matenga o tona teina, i patua nei e ia, a ka huna e matou te tangata mona te kainga. Na ka keto i a ratou taku ngarahu i te toe, a kahore noa iho e mahue he ingoa mo taku tahu, he toenga ranei i te mata o te whenua. <sup>8</sup> Na ka mea te kingi ki te wahine, Haere ki tou whare, a maku nga tikanga mo tau mea. <sup>9</sup> Na ka mea taua wahine o Tekoa ki te kingi, Hei runga i ahau te kino, e toku ariki, e te kingi, hei runga ano hoki i te whare o toku papa: kia harakore ia te kingi me tona torona. <sup>10</sup> Na ka mea te kingi, Ki te korero tetahi ki a koe, kawea mai ia ki ahau, a e kore ia e pa ki a koe i muri iho. <sup>11</sup> Katahi ia ka mea, Kia mahara ra te kingi ki a Ihowa, ki tou Atua, kia kua te kaitakitaki toto e whakangaro a mua ake, kei huna taku tama. Na ka ki ia, E ora ana a Ihowa e kore tetahi makawe o tau tama e taka ki te whenua. <sup>12</sup> Na ka mea taua wahine, Tena, <sup>13</sup> kia korerotia e tau pononga tetahi kupu ki toku ariki, ki te kingi. Ano ra ko ia, Korero. Na ka mea taua wahine, He aha ra koe i he ai ki te iwi a te Atua, i whakaaro ai i tenei mea? i te kingi hoki e korero ana i tenei mea, e rite ana ia ki te tangata kua he, i te kingi e kore nei e whakahoki mai i tana i peia atu ra. <sup>14</sup> Mo te mate nei hoki tatou, a ka rite ki te wai i maringi ki te whenua, kahore nei e kohikohia ake; na kahore te Atua e tango atu ana i te ora, engari e whakaaro ana i nga whakaaro e kore ai e peia rawatia atu i a ia te mea i peia. <sup>15</sup> Koia ahau i haere mai ai ki te korero i tenei mea ki te kingi, ki toku ariki, he wehi noku i ta te iwi; koia tau pononga i mea ai, Me korero ahau ki te kingi; tera pea te kingi e mea i ta tana pononga e korero ai. <sup>16</sup> Tera hoki te kingi e rongu, e whakaora i tana pononga i te ringa o te tangata e huna ai maua tahi ko taku tama i to te Atua wahi tupu. <sup>17</sup> Koia tau pononga i mea ai, Akuanei he whakamarie te kupu a toku ariki, a te kingi; e rite ana hoki toku ariki, te kingi ki te anahera a te Atua, hei whakarongo ki te pai, ki te kino; hei hoa ano mou a Ihowa, te Atua. <sup>18</sup> Na ka whakahoki te kingi, ka mea ki te wahine, Na, kua e huna ki ahau

19  
te kupu e uia e ahau ki a koe. Na ka mea te wahine, Tena, kia korero toku ariki, te kingi. Na ka mea te kingi, Kahore ianei te ringa o Ioapa i a koe i tenei mea katoa? Ano ra ko te wahine, i mea ia, E ora ana tou wairua, e toku ariki, e te kingi, ina, kahore he tahuritanga mo tetahi ki matau, ki maui, i nga kupu katoa i korero ai toku ariki, te kingi: na tau pononga hoki, na Ioapa, nana ahau i

20  
whakahau, nana hoki i homai enei kupu katoa ki te mangai o tau pononga. He whakaahua ke i te tikanga o tenei korero i mea ai tau pononga, a Ioapa i tenei mea: a he mohio toku ariki, he pera me te mohio o te anahera a te Atua, he mohio ki nga mea katoa o te whenua.

21  
Na ka mea te kingi ki a Ioapa, Na kua meatia nei tenei mea e ahau: tikina, whakahokia mai

22  
taua tamaiti, a Apoharama. Na ka tapapa a Ioapa ki te whenua, ka piko, ka whakapai i te kingi: i mea ano a Ioapa, No tenei ra tau pononga i mohio ai e manakohia ana ahau e koe, e toku ariki, e

23  
te kingi, no te kingi hoki ka whakamana i te kupu a tana pononga. Heoi whakatika ana a Ioapa,

24  
a haere ana ki Kehuru, a kawea ana e ia a Apoharama ki Hiruharama. Na ka mea te kingi, Kia tahuri atu ia ki tona whare, kua hoki ia e kite i toku kanohi. Na tahuri ana a Apoharama ki tona

25  
whare, kihai hoki i kite i te kanohi o te kingi. Na kahore he rite mo Apoharama, te korerotia tona ataahua i roto i a Iharaira katoa: kahore ona koha i te kapu o tona waewae a tae noa ki tona

26  
tumuaki. A ka kutikutia e ia tona matenga; i kutikutia hoki e ia i te takanga o te tau: he taimaha hoki nona koia i kutikutia ai: na ka paunatia e ia nga makawe o tona matenga, e rua rau nga hekere

27  
o ta te kingi pauna. A tokotoru nga tama i whanau ma Apoharama, kotahi hoki te kotiro, ko tona ingoa ko Tamara; he wahine kanohi ataahua ano ia.

28  
Na e rua tino tau i noho ai a Apoharama ki Hiruharama, a kihai i kitea e ia te kanohi o te

29  
kingi. Na ka tono tangata a Apoharama ki a Ioapa, he mea kia tonoa ia ki te kingi; heoi kihai

30  
tera i pai ki te haere mai ki a ia. Na ka tono ano ia, otia kihai tera i pai ki te haere mai. Na reira ka mea ia ki ana pononga, Nana, tata tonu ki toku to Ioapa wahi whenua, he parei ano tana kei reira;

31  
tikina tahuna ki te ahi. Na kua tahuna e nga tangata a Apoharama ki te ahi. Na ka whakatika a Ioapa, a haere ana ki a Apoharama ki te whare, a ka mea ki a ia, He aha i tahuna ai toku wahi e au

32  
tangata ki te ahi? Na ka mea a Apoharama ki a Ioapa, Nana, i tono tangata ahau ki a koe, i mea, Haere mai ki konei kia tonoa ai koe e ahau ki te kingi hei mea, Mo te aha ahau i haere mai ai i Kehuru? He pai ke moku me i noho tonu ahau ki reira; ko tenei kia kite a hau i te kanohi o te kingi;

33  
a ki te mea he kino toku, me whakamate ahau e ia. Heoi haere ana a Ioapa ki te kingi, ki te korero ki a ia. Na ka karangatia a Apoharama e ia, a Haere ana ia ki te kingi. Na piko ana ia ki a ia, ahua ana tona mata ki te whenua i te aroaro o te kingi: a kihia ana a Apoharama e te kingi.

## Chapter 15

<sup>1</sup> Na, muri iho i tenei ka mea hariata a Apoharama mona, me etahi hoiho, me nga tangata e  
<sup>2</sup> rima tekau hei rere i tona aroaro. Na ka maranga wawe a Apoharama, a ka tu ki te taha o te  
 huarahi, ki te kuwaha, na ki te mea he take ta tetahi tangata e tika ana kia tae ki te kingi kia  
 whakaritea, ka karanga a Apoharama ki a ia, ka mea, No tehea pa koe? A ka pea tera, No tetahi o  
<sup>3</sup> nga iwi o Iharaira tau pononga. Na ka mea a Apoharama ki a ia, Nana, he pai au korero, he tika;  
<sup>4</sup> heoi kahore he tangata a te kingi hei whakarongo ki a koe. I mea ano a Apoharama, Aue, me i tu  
 ahau hei kaiwhakarite mo te whenua, a ka tae mai ki ahau nga tangata katoa he take nei ta ratou,  
<sup>5</sup> he whakawa, ina ka whakarite tika ahau ki a ia! Na ka whakatata mai he tangata ka piko ki a ia,  
<sup>6</sup> na ka totoro tona ringa ka hopu i a ia, ka kihi i a ia. Penei tonu te mahi a Apoharama ki a Iharaira  
 katoa, i haere mai ki te kingi kia whakaritea he whakawa; na tahaetia ana e Apoharama nga ngakau  
 o nga tangata o Iharaira.  
<sup>7</sup> Na, ka pau nga tau e wha, ka mea a Apoharama ki te kingi, Tukua ahau kia haere ki te  
<sup>8</sup> whakamana i aku kupu taurangi, ki Heperona, i puaki ra i ahau ki a Ihowa. I puaki hoki te kupu  
 taurangi a tau pononga i ahau e noho ana i Kehuru i Hiria; i mea ahau, Ki te whakahokia ahau e  
<sup>9</sup> Ihowa ki Hiruharama, katahi ahau ka mahi ki a Ihowa. Na ka mea te kingi ki a ia, Haere marie.  
<sup>10</sup> Na whakatika ana ia, a haere ana ki Heperona. Otiia ka tono tutei a Apoharama puta noa i nga  
 iwi katoa o Iharaira, hei mea, Rongo kau koutou i te tangi o te tetere, ko reira koutou ka mea, Ko  
<sup>11</sup> Apoharama te kingi kei Heperona. E rua rau ano nga tangata i haere tahi i a Apoharama i  
 Hiruharama, he hunga i karangatia: otiia he haere noa ta ratou, kihai hoki i mohio ki tetahi mea.  
<sup>12</sup> I tikina ano e Apoharama a Ahitopere Kironi, te kaiwhakatakoto whakaaro a Rawiri i tona pa i  
 Kiroho, i a ia ano e patu ana i nga patunga tapu. Na kua kaha te whakapiko; i tini haere hoki nga  
 tangata a Apoharama.  
<sup>13</sup> Na ko te taenga o tetahi kaikorero ki a Rawiri, ko tana kupu, Kei te whai i a Apoharama nga  
<sup>14</sup> ngakau o nga tangata o Iharaira. Na ka mea a Rawiri ki ana tangata katoa i tona taha i Hiruharama,  
 Whakatika, ka rere tatou; kei kore hoki he mawhititanga atu mo tetahi o tatou i te aroaro o  
 Apoharama: hohoro te haere, kei hohoro mai ia, a ka mau tatou; na ka akina mai e ia he kino ki a  
<sup>15</sup> tatou, a ka tukitukia te pa ki te mata o te hoari. Na ka mea nga tangata a te kingi ki te kingi,  
<sup>16</sup> Tenei au pononga hei mea i nga mea katoa e whakarite ai toku ariki, te kingi. Na haere ana te  
 kingi me tona whare katoa i muri i a ia. Na i mahue i te kingi tekau nga wahine, he wahine iti nana,



17  
 hei tiaki i te whare. A haere ana te kingi ratou ko te iwi katoa i muri i a ia, a whanga ana i

18  
 Petemerehaka. I haere atu ano ana tangata katoa i tona taha; i haere atu ano hoki i mua i te kingi,  
 nga Kereti katoa, nga Pereti katoa, me nga Kiti katoa; nga rau e ono i whai mai nei i a ia i Kata.

19  
 Na ka mea te kingi ki a Itai Kiti, He aha koe i haere mai ai i a matou? hoki atu, e noho i te kingi:

20  
 he tangata ke hoki koe, he noho ke i tou whenua. Nonanahi noa nei koe i tae mai ai, a kia mea  
 ahau i a koe i tenei ra kia kopikopiko noa iho i a matou, i taku haere noa atu? Hoki atu, whakahokia

21  
 ano ou teina; kia whai tahi te pono me te aroha i a koe. Na ka whakahoki a Itai ki te kingi, ka  
 mea, E ora ana a Ihowa, e ora ana hoki toku ariki te kingi, na, ko te wahi e noho ai toku ariki, te

22  
 kingi, ahakoa i te mate, ahakoa i te ora, ko reira ano tau pononga. Ano ra ko Rawiri ki a Itai,  
 Hoatu, whiti atu. Na whiti ana a Itai Kiti, ratou ko ana tangata katoa me nga tamariki katoa i a ia.

23  
 Nui atu hoki te reo i tangi ai te whenua katoa, a ka whiti atu te iwi katoa; i whiti atu hoki te kingi  
 i te awaawa o Kitirono, a i whiti atu ano te iwi katoa i te huarahi e tika ana ki te koraha.

24  
 Ko Haroko ano tera, me nga Riwaiti katoa e amo ana i te aaka o te kawenata a te Atua: na  
 ka whakatakotoria te aaka a te Atua; na ka piki a Apiatara, a poto noa te iwi katoa te whiti atu i

25  
 roto i te pa. Na ka mea te kingi ki a Haroko, Whakahokia te aaka a te Atua ki te pa: ki te  
 manakohia ahau e Ihowa, ka whakahokia ahau, a ka whakakitea taua aaka me tona nohoanga ki

26  
 ahau. A ki te mea ia ki ahau, Kahore ahau e pai ki a koe; tenei ahau, mana e mea ki ahau te mea

27  
 e pai ana ki tana titiro. I mea ano te kingi ki a Haroko tohunga, Ehara ianei koe i te matakite?  
 hoki marie ki te pa, koutou ko a korua tama tokorua, ara tau tama a Ahimaata, me Honatana tama

28  
 a Apiatara. Nana, me tatari ahau ki nga kauanga i te koraha, kia tae ake ra ano he korero i a

29  
 korua hei whakaatu tikanga ki ahau. Na whakahokia ana te aaka a te Atua e Haroko raua ko

30  
 Apiatara ki Hiruharama, a noho ana raua i reira. Na piki atu ana a Rawiri i te pikitanga o Maunga  
 Oriwa, me te tangi, me te piki haere; hipoki rawa tona matenga, kahore hoki ona hu i a ia e haere  
 ana: na, ko nga tangata katoa i a ia, hipoki rawa te matenga o tenei, o tenei; heoi piki ana ratou, me  
 te tangi ano i a ratou e piki ana.

31  
 Na ka korero tetahi ki a Rawiri, ka mea, Kei roto a Ahitopere i nga kaiwhakatupu i te he,  
 kei a Apoharama. Na ka mea a Rawiri, Tena ra, e Ihowa, whakakuwaretia nga whakaaro o Ahitopere.

32  
 A, no te ekenga o Rawiri ki te tihi, ki te wahi e koropiko ai ki te Atua, na, ko Huhai Araki ka

33  
 whakatau i a ia, he mea haehae tona kakahu, me te oneone i runga i tona matenga. Na ka mea

34  
 a Rawiri ki a ia, Ki te haere tahi tatou, hei whakaware kau koe ki ahau: Engari ki te hoki koe ki

te pa, a ka mea ki a Apoharama, Hei pononga ahau mau, e te kingi, he pononga ahau na tou papa i mua, inaianei hei pononga ahau mau: penei mau e whakataka te whakaaro o Ahitopere moku.

35

Kahore ianei i reira hei hoa mou a Haroko raua ko Apiatara nga tohunga? na, ko nga mea katoa e rongoi ai koe ki te whare o te kingi, mau e whakaatu ki nga tohunga, ki a Haroko raua ko Apiatara.

36

Na kei reira, kei a raua tonu a raua tama tokorua, a Ahimaata, ta Haroko, a Honatana, ta Apiatara; me unga hei kawemai ki ahau i nga mea katoa e rongoi ai koutou. Na haere ana a Huhai, te hoa o Rawiri ki te pa, a ka tae hoki a Apoharama ki Hiruharama.

37

## Chapter 16

1

A, he iti nei te haerenga atu o Rawiri i te tihi o te pikitanga, na ko Tipa, tangata a Mepipohete kua tutaki ki a ia, me nga kaihe e rua, whakanoho rawa; ko te pikaunga, he taro e rua rau, he tautau

2

karepe maroke kotahi rau, he hua raumati kotahi rau, he ipu waina. Na ka mea te kingi ki a Tipa, Hei aha enei mau? A ka mea a Tipa, Hei eke mo te whare o te kingi nga kaihe; hei kai ma nga tamariki te taro me nga hua raumati; hei inu ano te waina ma te hunga e ngenge ana i te koraha.

3

Na ka mea te kingi, A kei hea te tama a tou ariki? Ano ra ko Tipa ki te kingi, Kei Hiruharama tera e noho ana; i mea hoki, Ko aianei te whare o Iharaira whakahoki mai ai i te kingitanga o toku papa

4

ki ahau. Katahi te kingi ka mea ki a Tipa, Nana, mau katoa nga mea a Mepipohete. Na ka mea a Tipa, E piko atu nei ahau; kia manakohia ahau e koe, e toku ariki, e te kingi.

5

A, no ka tae a Kingi Rawiri ki Pahurimi, na ka puta mai ki reira he tangata no te hapu o te whare o Haora, ko tona ingoa ko Himeia, ko te tama a Kera: ko tona putanga mai e kanga haere ana.

6

Epaina ana hoki e ia ki te kohatu a Rawiri me nga tangata katoa a Kingi Rawiri; na, ko te iwi katoa, ratou ko nga toa katoa kei tona matau, kei tona mauia. Ko te kupu hoki tenei a Himeia i a ia

7

e kanga ana, Puta atu, puta atu, e te tangata toto, e te tangata o Periara. Kua whakahokia e Ihowa ki a koe nga toto katoa o te whare o Haora; ko koe na hoki te kingi i muri i a ia; a kua hoatu e Ihowa te kingitanga ki te ringa o Apoharama, o tau tama. Na kei tou kino na ano koe, he tangata toto na

8

hoki koe. Katahi ka mea a Apihai tama a Teruia ki te kingi, He aha tenei kuri mate i kanga ai ki

9

toku ariki, ki te kingi? tena, kia whiti atu ahau ki te pouto i tona upoko. Na ka mea te kingi, Hei aha maku ta korua, e nga tama a Teruia? He kanganga nana, he meatanga na Ihowa ki a ia, Kanga

10

a Rawiri; ko wai tena hei mea, He aha koe i pena ai? I mea ano a Rawiri ki a Apihai ratou ko ana tangata katoa, Nana, ko taku tama i puta nei i roto i oku whekau te whai nei kia whakamatea

11

ahau; na, tera noa ake aiane i he mea ma tenei Pineamini. Waiho atu, tukua ia kia kanga; na Ihowa  
 hoki i mea k i a ia. <sup>12</sup> Tera pea a Ihowa e titiro ki toku mate, e homai i te pai ki ahau hei utu mo  
 tana kanga ki ahau i tenei ra. <sup>13</sup> Na haere ana a Rawiri ratou ko ana tangata i te huarahi; me te haere  
 ano a Hime i te taha o te maunga i tona ritenga mai: haere ana me te kanga, me te epa i te kohatu  
 ki tona ritenga mai, me te akiri ano i te puehu. <sup>14</sup> Na haere ngenge ana te kingi ratou ko tona nuinga,  
 a okioki ana ki reira.  
<sup>15</sup> Na ka tae mai a Apoharama ratou ko te iwi katoa, nga tangata o Iharaira ki Hiruharama; ko  
 Ahitopere hoki tona hoa. <sup>16</sup> Na, i te taenga o Huhai Araki, o te hoa o Rawiri, ki a Apoharama, na  
 ka mea a Huhai ki a Apoharama, Kia ora te kingi, kia ora te kingi! <sup>17</sup> Na ka mea a Apoharama ki  
 a Huhai, Ko tou aroha tena ki tou hoa? he aha koe te haere tahi ai i tou hoa? <sup>18</sup> Na ka mea a Huhai  
 ki a Apoharama, Kahore, engari ko ta Ihowa, ko ta tenei iwi, ko ta nga tangata katoa o Iharaira e  
 whiriwhiri ai, hei a ia he tikanga moku, a me noho ahau ki a ia. <sup>19</sup> Na, tetahi, kia mahi ahau ki a  
 wai? kua ianei ahau e mahi ki te aroaro o tana tama? ka rite ki taku mahi ki te aroaro o tou papa  
 taku ki tou aroaro. <sup>20</sup> Na ka mea a Apoharama ki a Ahitopere, Tena koa ou whakaaro me ahau  
 tatou? <sup>21</sup> Na ka mea a Ahitopere ki a Apoharama, Haere ki nga wahine iti a tou papa, i waiho nei  
 e ia hei tiaki i te whare, a ka rongo a Iharaira katoa kua piro whakarihariha koe ki tou papa, na ka  
 kaha nga ringa o tou nuinga katoa. <sup>22</sup> Na whakaturia ana tetahi teneti e ratou mo Apoharama ki  
 runga ki te tuanui; a haere ana a Apoharama ki roto, ki nga wahine iti a tona papa i te tirohanga a  
 Iharaira katoa. <sup>23</sup> Na, ko te whakaaro o Ahitopere i whakaaro ai ia i aua ra, me te mea e uia ana he  
 tikanga ki ta te Atua kupu. Pera tonu nga whakaaro katoa o Ahitopere ki a raua tokorua, ki a Rawiri,  
 ki a Apoharama.

## Chapter 17

<sup>1</sup> I mea ano a Ahitopere ki a Apoharama, Tena kia whiriwhiria etahi tangata e ahau, kia kotahi  
 tekau ma rua mano, kia whakatika ahau ki te whai i a Rawiri i te po nei. <sup>2</sup> A ka huakina ia e ahau  
 i a ia e ngenge ana, i nga ringa e kahakore ana; na ka whakaoho ahau i a ia, a ka rere tona nuinga  
 katoa, ko reira ahau patu ai i te kingi, i a ia anake; <sup>3</sup> A ka whakahokia mai e ahau te iwi katoa ki a  
 koe: ko te hokinga mai tenei o te katoa, ki te mau te tangata e whaia nei e koe, penei ka ata noho  
 te iwi katoa. <sup>4</sup> Na tika tonu taua kupu ki te whakaaro o Apoharama, ki te whakaaro hoki o nga

<sup>5</sup> kaumatua katoa o Iharaira. Na ka mea a Apoharama, Tena, karangatia ano hoki a Huhai Araki,  
<sup>6</sup> kia rongu ai tatou ki tana kupu. A, no te taenga o Huhai ki a Apoharama, ka korero a Apoharama  
 ki a ia, ka mea, Ko te kupu tenei i korero ai a Ahitopere: me mea ranei e tatou tana i korero ai? ki  
<sup>7</sup> te kahore, korero mai? Na ka mea a Huhai ki a Apoharama, ko te whakaaro i whakaaro ai a  
<sup>8</sup> Ahitopere i tenei wa nei, kahore i pai. I mea hoki a Huhai, E mohio ana koe ki tou papa, ratou ko  
 ana tangata, he toa ratou, e mamae ana hoki o ratou ngakau, e rite tonu ana ki te pea kua tangohia  
<sup>9</sup> nei ana kua o i te parae; he tangata whawhai hoki tou papa; e kore e moe i roto i nga tang ata. Nana,  
 kei te piri tera i roto i tetahi rua, i tetahi atu wahi ranei; na, akauanei, hei te hinganga o etahi o ratou  
 i te timatanga, a ka rongu tetahi, ka ki ia, Kua pa te patu ki te hunga e whai ana i a Apoharama.  
<sup>10</sup> Ahakoa ko wai tetahi toa, i rite tona ngakau ki to te raiona, ka ngohe noa iho: e mohio ana hoki  
<sup>11</sup> a Iharaira katoa he marohirohi tou papa, he toa hoki ana tangata. Koia ahau ka mea ai, Me ata  
 kohikohi ki a koe a Iharaira katoa, o Rana a tae noa ki Peerehepa; kia rite ki te onepu i te moana te  
<sup>12</sup> tini; me haere ano hoki koe, a koe na ano, ki te tatauranga. Na ka whakaekea ia e tatou ki tetahi  
 wahi e kitea ai ia; a ka tau iho ki runga ki a ia, ka pera ano me te tomairangi e tau ana ki runga ki  
<sup>13</sup> te oneone: a ko ia me ana tangata katoa, e kore e mahu tetai i a tatou ahakoa kia kotahi nei. A  
 ki te tomo ia ki tetahi pa, na, ka mau taura atu a Iharaira katoa ki taua pa, ka toia taua pa e tatou ki  
<sup>14</sup> roto ki te awa, kia kore ra ano e kitea tetahi kohatu, ahakoa ririki, ki reira. Na ka mea a Apoharama  
 ratou ko nga tangata katoa o Iharaira, Pai atu te whakaaro o Huhai Araki i te whakaaro o Ahitopere.  
 Na Ihowa hoki te tikanga kia whakataka te whakaaro pai o Ahitopere, kia kawea ai he kino e Ihowa  
 ki runga ki a Apoharama.  
<sup>15</sup> Katahi a Huhai ka mea ki nga tohunga, ki a Haroko raua ko Apiatara, Ko nga whakaaro  
 tenei o Ahitopere ki a Apoharama ratou ko nga kaumatua o Iharaira; ko oku whakaaro hoki enei i  
<sup>16</sup> whakatakoto atu nei. Na kia hohoro te tono tangata ki te whakaatu ki a Rawiri. Mea atu, Kua  
 e moe i tenei po ki nga kauanga i te koraha; engari kia hohoro te whiti atu, kei horomia ake te kingi  
<sup>17</sup> me tona nuinga katoa. Na i Enerokere a Honatana raua ko Ahimaata e tatari ana; kihai hoki i  
 ahei kia kitea e haere mai ana ki te pa: na ka haere tetahi pononga wahine, ka whakaatu ki a raua,  
<sup>18</sup> a haere ana raua ki te whakaatu ki a Kingi Rawiri. Otiia i kitea raua e tetahi taitamariki, a korerotia  
 atu ana e ia ki a Apoharama: heoi hohoro tonu raua, a ka tae ki te whare o tetahi tangata i Pahurimi.  
<sup>19</sup> Na he poka wai tana i tona marae, a heke iho ana raua ki reira. Na ka tikina tetahi hipoki e te  
 wahine, taupokina ana e ia ki te poka, na horahia ana e ia he witi tuki ki runga, a kihai taua mea i  
<sup>20</sup> mohiotia. Na ka tae nga tangata a Apoharama ki te wahine, ki te whare, ka mea, Kei hea a  
 Ahimaata raua ko Honatana? Na ka mea te wahine ki a ratou, Kua whiti raua i te awa wai. Na ka

21  
rapu ratou, a kihai i kitea, a hoki ana ki Hiruharama. A, i muri i to ratou haerenga, ka piki ake raua i roto i te poka, a haere ana, whakaatu ana ki a Kingi Rawiri; i mea ki a Rawiri, Whakatika, hohoro koutou te whiti atu i te wai nei; ko te whakaaro hoki tenei o Ahitopere mo koutou.

22  
Katahi ka whakatika a Rawiri ratou ko tona nuinga katoa, a whiti ana i Horano: ao rawa ake te ra, kihai tetahi i kore te whiti i Horano. 23  
A, i te kitenga o Ahitopere kihai i meatia tana i whakaaro ai, whakanohoia ana e ia tana kaihe, a whakatika ana, haere ana ki tona whare ki tona pa, na kei te whakariterite i nga mea o tona whare, tarona ana i a ia, a mate ake, tanumia iho ki te

24  
tanumanga o tona papa. Katahi ka haere a Rawiri ki Mahanaima. A i whiti ano a Apoharama i

25  
Horano me nga tangata katoa o Iharaira. A ka meatia a Amaha e Apoharama hei whakakapi mo Ioapa, hei rangatira mo te ope: na he tama a Amaha na tetahi tangata, ko Itira tona ingoa, no Iharaira,

26  
i haere nei ki roto, ki a Apikaira tamahine a Nahaha, ki te teina o Teruia whaea o Ioapa. Na noho

27  
ana a Iharaira ratou ko Apoharama ki te whenua o Kireara. A, no te taenga o Rawiri ki Mahanaima, ka kawea mai e Hopi tama a Nahaha o Rapa o nga tama a Amona, e Makiri tama a

28  
Amiere o Rotepara, ratou ko Paratirai Kireari o Rokerimi, He moenga, he peihana, he oko oneone, he witi, he parei, he paraoa, he kanga pahuhu, he pini, he pi, me etahi atu mea pahuhu, 29

He honi, he pata, he hipi, me te tihi, hei kai ma Rawiri ratou ko tona nuinga: i mea hoki ratou, E matekai ana te iwi, e ngenge ana, e matewai ana i te koraha.

## Chapter 18

1  
Na ka taua e Rawiri tona nuinga, a whakaritea ana e ia he rangatira mano mo ratou, he rangatira

2  
rau. Na, ka tonoa te iwi e Rawiri; ko tetahi kotahi toru i raro i te ringa o Ioapa, ko tetahi kotahi toru i raro i te ringa o Apihai tama a Teruia, teina o Ioapa, a ko tetahi kotahi toru hoki i raro i te ringa o Itai Kiti. I mea ano te kingi ki te iwi, He pono ka haere tahi atu ano hoki ahau i a koutou.

3  
Na ka mea te iwi, Kaua koe e puta ki waho: ki te rere hoki matou, e kore ratou e whai whakaaro ki a matou; ahakoa ko te hawhe o matou i mate, e kore ratou e whai whakaaro ki a matou: tena ko koe, e rite ana koe ki nga mano kotahi tekau o matou; n o reira he pai ke ko koe hei awhina ake mo

4  
matou i roto i te pa. Na ka mea te kingi ki a ratou, Me mea e ahau nga mea e pai ana ki ta koutou

5  
titiro. Na tu ana te kingi ki te taha o te kuwaha, me te puta atu te iwi, ona rau, ona mano. A i ako te kingi ki a Ioapa, ki a Apihai, ki a Itai, i mea, Mahara ki ahau, kia ata hanga hoki ki taua taitama, ki a Apoharama. I rongo ano te iwi katoa i te kingi e ako ana i nga rangatira katoa ki te tikanga mo

<sup>6</sup>  
 Apoharama. Na ko te putanga o te iwi ki te parae ki te tu ki a Iharaira: a i te ngahere o Eparaima  
<sup>7</sup>  
 te whawhai. Na patua iho i reira nga tangata o Iharaira e nga tangata a Rawiri, nui atu te parekura  
<sup>8</sup>  
 i reira i taua ra, e rua tekau mano tangata. A tohatoha noa i reira te whawhai ki te mata katoa o  
 te whenua: tokomaha atu o te iwi i pau i te ngahere i nga mea i pau i te hoari i taua ra.  
<sup>9</sup>  
 Na ka tupono a Apoharama ki nga tangata a Rawiri. I runga ano i te muera a Apoharama e  
 noho ana. Na ko te haerenga o te muera i raro i nga peka matotoru o tetahi oki nui. Kua mau tona  
 matenga ki te oki, a tarewa ana ia i te takiwa o te rangi, o t e whenua; haere atu ana te muera i raro  
<sup>10</sup>  
 i a ia. Na ka kite tetahi tangata, whakaaturia ana e ia ki a Ioapa; i mea hoki, Nana, i kite ahau i  
<sup>11</sup>  
 a Apoharama e iri ana i tetahi oki. Na ka mea a Ioapa ki taua tangata nana nei i whakaatu ki a  
 ia, Ha, i kite koe, a he aha ia te patua ai e koe i reira ki te whenua? penei tekau nga hekere hiriwa  
<sup>12</sup>  
 kua hoatu e ahau ki a koe, me tetahi whitiki. Na ka mea taua tangata ki a Ioapa, Ahakoa ka riro  
 mai i toku ringa nga pihi hiriwa kotahi mano, pauna rawa, e kore e totoro toku ringa ki te tama a  
 te kingi; i a tatou hoki e whakarongo ana i ako te kingi i a koe, i a Apihai, i a Itai, i mea, Ki a tupato  
<sup>13</sup>  
 kei pa tetahi ki te taitama ra, ki a Apoharama. Mehemea hoki i mahi teka ahau, i mea i te mate  
<sup>14</sup>  
 mona; e kore hoki tetahi mea e ngaro i te kingi: i reira ko koe tonu na e tu ke i ahau. Katahi a  
 Ioapa ka mea, E kore e pai kia roa ahau nei i a koe. Na ka mau tona ringa ki etahi tao e toru, werohia  
<sup>15</sup>  
 atu ana e ia ki te ngakau o Apoharama, i a ia ano e ora ana i waenganui o te oki. Na karapotia  
 ana ia e nga taitama kotahi tekau, e nga kaimau patu a Ioapa, a patua ana a Apoharama e ratou,  
<sup>16</sup>  
 whakamatea ana. Na whakatangihia ana e Ioapa te tetere, a hoki ana te iwi i te whai i a Iharaira.  
<sup>17</sup>  
 Na Ioapa hoki i pehi te iwi. Na ka mau ratou ki a Apoharama, ka maka i a ia ki tetahi poka nui  
 i te ngahere, a nui atu te puranga kohatu i haupuria ki runga ki a ia, a whati ana a Iharaira katoa ki  
<sup>18</sup>  
 tona teneti, ki tona teneti. Na i tona oranga i tikina e Apoharama, i whakaarahia te pou mona,  
 ko tera i te raorao o te kingi; i mea hoki ia, Kahore aku tama e maharatia ai toku ingoa: na huaina  
 iho e ia tona ingoa ki taua pou: e huaina nei ano a reira, ko te tohu a Apohara ma a tae noa ki tenei  
 ra.  
<sup>19</sup>  
 Katahi ka mea a Ahimaata tama a Haroko, Tukua ahau kia rere ki te korero ki te kingi i ta  
<sup>20</sup>  
 Ihowa whakatikanga i tana whakawa ki ona hoariri. Na ka mea a Ioapa, Kaua koe e kawe korero  
 i tenei ra; engari me kawe korero koe a tetahi atu ra; i tenei ra ia e kore koe e kawe korero; kua  
<sup>21</sup>  
 mate hoki te tama a te kingi. Katahi ka mea a Ioapa ki te Kuhi, Haere, korerotia ki te kingi tau  
<sup>22</sup>  
 i kite ai. Na ka piko iho te Kuhi ki a Ioapa, a rere ana. Katahi ka mea ano a Ahimaata tama a  
 Haroko ki a Ioapa, He ahakoa pehea, kia rere ano ahau i muri i te Kuhi. A ka mea a Ioapa, Kia rere

koe hei aha, e taku tama? kahore nei hoki he painga ki a koe o nga korero. <sup>23</sup> He ahakoa ra, e ai ki tana, me rere ano ahau. Na ka mea tera ki a ia, E rere. Katahi ka rere a Ahimaata i te ara o te mania,

<sup>24</sup> a ka mahue te Kuhi. Na e noho ana a Rawiri i waenganui i nga kuwaha e rua; i piki ano te kaititiro ki te tuanui i runga i te kuwaha, ki te taiepa; ko te marangatanga ake o ona kanohi, ka titiro, na ko

<sup>25</sup> tetahi tangata e rere mai ana, tona kotahi. Na ka karanga te kaititiro, ka whakaatu ki te kingi. Ano ra ko te kingi, Ki te mea ko ia anake, he korero kei tona mangai. Na haere tonu mai ana tera,

<sup>26</sup> a ka tata. I kite ano te kaititiro i tetahi atu tangata e rere mai ana, a ka karanga iho te kaititiro ki te kaitiaki o te kuwaha, ka mea, Tera he tangata e rere mai ra, ko ia anake. A ka mea te kingi, He

<sup>27</sup> korero ano ta tera. Na ka mea te kaititiro, Ki taku titiro rite tonu te rere a te tuatahi ki te rere a Ahimaata tama a Haroko. A ka mea te kingi, He tangata pai ia, e haere mai ana me nga korero pai.

<sup>28</sup> Na ka karanga a Ahimaata, ka mea ki te kingi, Kei te pai katoa. Na ka piko iho tona mata ki te whenua ki te aroaro o te kingi, a ka mea, Kia whakapaingia a Ihowa, tou Atua, nana nei i tuku mai

<sup>29</sup> nga tangata i totoro nei to ratou ringa ki toku ariki, ki te kingi. Na ka mea te kingi, Kei te pai ranei te taitama a Apoharama? Ano ra ko Ahimaata, I te tononga a Ioapa i te tangata a te kingi, i

<sup>30</sup> ahau, i tau pononga, i kite ahau i te ngangau nui, heoi kihai i mohio he aha ranei. Na ka mea te

<sup>31</sup> kingi ki a ia, Haere ake, e tu ki konei. Na haere ana ia, a tu ana. Na ko te haerenga mai o te Kuhi; a ka mea te Kuhi, He korero, e toku ariki, e te kingi; kua whakatikaia hoki e Ihowa tau whakawa i

<sup>32</sup> te hunga i whakatika mai ra ki a koe. Ano ra ko te kingi ki te Kuhi, Kei te pai ranei te taitama, a Apoharama? A ka mea te Kuhi, Kia rite ki taua taitama nga hoariri o toku ariki, o te kingi, me te

<sup>33</sup> hunga katoa e whakatika ana ki a koe hei mea i te kino mou. Na oho pu te mauri o te kingi, a piki ana ki te ruma i runga i te kuwaha, tangi ana: ko tana korero tenei i a ia e haere ana, E taku tama, e Apoharama, e taku tama, e taku tama, e Apoharama! he pai mehemea ko ahau i mate, a kua koe, e Apoharama, e taku tama, e taku tama.

## Chapter 19

<sup>1</sup> Na ka korerotia ki a Ioapa, Nana, kei te tangi te kingi, kei te uhunga mo Apoharama. <sup>2</sup> Na puta ke ana te whakaoranga i taua ra hei tangi ma te iwi katoa; i rongohoki te iwi i taua ra i te

<sup>3</sup> korero, e koingo ana te kingi ki tana tama. Na haere puku ana te iwi i taua ra ki te pa, ano he

<sup>4</sup> hunga e haere puku ana i te whakama, ina rere i te whawhai. Ko te kingi ia, taupoki tonu tona mata, nui atu te reo o te kingi ki te tangi, E Apoharama, e taku tama, e Apoharama, e taku tama, e

5  
taku tama. Na ka haere a Ioapa ki te kingi ki roto ki te whare, a ka mea, Kua whakama i a koe  
inaia nei nga mata o au tangata katoa i ora ai koe i tenei ra, i ora ai hoki au tama, me au tamahine,  
6  
i ora ai au wahine, i ora ai ano au wahine iti, I a koe ka aroha nei ki ou hoariri, ka kino nei ki te  
hunga e aroha ana ki a koe. Kua whakaatu mai na hoki koe i tenei ra, he kore noa iho ki a koe nga  
rangatira me nga tangata: e mohio ana hoki ahau i tenei ra, kia ora kau ko Apoharama, a kia ma te  
7  
ko matou katoa i tenei ra, ka pai rawa ki a koe. Na whakatika, puta atu ki waho, kia puaki tetahi  
kupu pai ki au tangata: ta te mea he oati tenei naku i a Ihowa, ki te kahore koe e puta ake, e kore  
tetahi tangata e noho ki a koe i tenei po: a nui atu tenei kino ki a koe i nga kino katoa i pa ki a koe  
8  
o tou taitamarikitanga ake a mohoa noa nei. Na ka whakatika te kingi, a noho ana i te kuwaha.  
Na ka korerotia te korero ki te iwi katoa, Nana, ko te kingi, kei te kuwaha e noho ana. Na haere  
ana te iwi katoa ki te aroaro o te kingi. Kua whati hoki tera a Iharaira ki tona teneti, ki tona te neti.  
9  
Na ka puta ake he tautohetohe i nga tangata katoa o nga iwi katoa o Iharaira. I ki ratou, Na  
te kingi tatou i whakaora i roto i te ringa o o tatou hoariri, nana hoki tatou i mawhiti ai i te ringa o  
10  
nga Pirihitini; heoi kua whati atu nei ia i te w henua i te wehi ki a Apoharama. A, ko Apoharama  
i whakawahia nei e tatou hei kingi mo tatou, kua mate i te whawhai. Na, he aha koutou te whai  
11  
kupu ai kia whakahokia mai te kingi? Na ka tono tangata a Kingi Rawiri ki a Haroko raua ko  
Apiatara, ki nga tohunga, hei ki atu, Korero atu ki nga kaumatua o Hura, mea atu, He aha koutou  
i tauhiku ai ki te whakahoki i te kingi ki tona whare? kua tae atu na hoki te korero a Iharaira katoa  
12  
ki te kingi, ki te whakahoki i a ia ki tona whare. Ko oku teina nei koutou, ko oku whenua, ko  
13  
oku kikokiko, he aha koutou i tauhikuhiku ai ki te whakahoki i te kingi? Ma korua ano e ki atu  
ki a Amaha, Ehara ianei koe i te whenua noku, i te kikokiko noku? ma te Atua e mea tenei mea ki  
ahau me tetahi atu mea, ki te kahore koe e meinga hei rangatira ope ki toku aroaro i nga ra katoa  
14  
hei whakakapi mo Ioapa. A meinga ana e ia kia piko te ngakau o nga tangata katoa o Hura ano  
15  
he tangata kotahi; a ka tono tangata ratou ki te kingi hei mea, Hoki mai, me au tangata katoa. Na  
hoki ana te kingi, a ka tae ki Horano. I haere ano a Hura ki Kirikara, he haere ki te whakatau i te  
kingi, hei whakawhiti i te kingi i Horano.  
16  
Na hohoro tonu a Hime i Pineamini tama a Kera, tera i Pahurimi ra, a haere tahi ana me nga  
17  
tangata o Hura ki raro, ki te whakatau i a kingi Rawiri. Na kotahi mano nga tangata o Pineamine  
i a ia, me Tipa ano, me te tangata o te whare o Haora, ratou ko ana tama tekau ma rima, me ana  
18  
pononga e rua tekau; a whiti ana ratou i Horano i te aroaro o te kingi. I whiti ano he perepoti  
hei whakawhiti mo te whare o te kingi, hei mea hoki i nga mea e pai ana ki tona whakaaro. Na ka  
19  
tapapa a Hime i tama a Kera ki te aroaro o te kingi, i a ia ka whiti nei i Horano. A ka mea ki te  
kingi, Kua toku ariki e whakairi hara ki ahau, kua ano e maharatia te tutu o tau pononga i te ra i



puta mai ai toku ariki, te kingi i Hiruharama; kua te ngakau o te kingi e mea ki tena. <sup>20</sup> E mohio ana hoki tau pononga i hara ahau. Koia ahau i haere mai ai inaianei, ko te tuatahi o te whare katoa

o Hohepa; i haere mai hoki ki raro, ki te whakatau i toku ariki, i te kingi. <sup>21</sup> Otiia ka oho a Apihai tama a Teruia, ka mea, E kore ianei a Hime i whakamatea mo tenei, mona i kanga i ta Ihowa i

whakawahi ai? <sup>22</sup> Ano ra ko Rawiri, Hei aha maku ta korua, e nga tama a Teruia, i mea ai korua ki te totohe ki ahau i tenei ra? kia mate koia he tangata i roto i a Iharaira i tenei ra? kahore ianei

ahau e mohio ko ahau te kingi o Iharaira i tenei ra? <sup>23</sup> Na ka mea te kingi ki a Hime i, E kore koe e mate. Na oati ana te kingi ki a ia.

<sup>24</sup> Na ka haere a Mepipohete tama a Haora ki raro, ki te whakatau i te kingi. Kihai ona waewae i whakapaia, kihai tona pahau i whakapaia, kihai ano ona kakahu i horoia, no te ra i haere ai te kingi

a taea noatia te ra i hoki marie mai ai ia. <sup>25</sup> A, i tona taenga ki Hiruharama ki te whakatau i te kingi,

ka mea te kingi ki a ia, He aha koe te haere ai tatou, e Mepipohete? <sup>26</sup> Ano ra ko ia, Na taku pononga ahau i tinihanga, e toku ariki, e te kingi; i mea hoki tau pononga, Me whakanoho e ahau tetahi kaihe

moku, hei ekenga atu moku, ka haere ai i te kingi; he kopa hoki tau pononga. <sup>27</sup> Na kua whakapae teka ia mo tau pononga ki toku ariki, ki te kingi; otiia rite tonu toku ariki, te kingi ki te anahera a

te Atua: na mau e mea te mea e pai ana ki tau titiro. <sup>28</sup> Ko te whare katoa hoki o toku papa me te mea he tupapaku i te aroaro o toku ariki, o te kingi: heoi kua whakanohoa e koe tau pononga ki te hunga i kai ki tau tepu. Na, he aha ake ra taku e tika ai kia karanga atu ai ano ahau ki te kingi?

<sup>29</sup> Na ka mea te kingi ki a ia, Hei aha ake au korero i korerotia tonutia ai? Ko taku kupu tenei, Me

wehe e korua ko Tipa te mara. <sup>30</sup> Na ka mea a Mepipohete ki te kingi, Engari me tango katoa e ia, he mea hoki kua tae marie mai toku ariki, te kingi ki tona whare.

<sup>31</sup> I haere mai ano a Paratirai Kireari i Rokerimi; a whiti ana raua ko te kingi i Horano, he kaw

i a ia ki tera taha o Horano. <sup>32</sup> Na he koroheke rawa a Paratirai, e waru tekau ona tau: nana i atawhai te kingi i tona nohoanga ki Mahanaima; he tangata nui rawa hoki ia. <sup>33</sup> Na ka mea te kingi ki a

Paratirai, Me whiti koe, taua, a maku koe e atawhai ki toku taha ki Hiruharama. <sup>34</sup> Na ka mea a Paratirai ki te kingi, E hia nga ra o nga tau hei oranga moku, e haere tahi ai ahau me te kingi ki

runga, ki Hiruharama? <sup>35</sup> Ka waru tekau oku tau i tenei ra: e mohio ranei ahau he pai tenei, he kino tera? e mohiotia ranei e tau pononga te reka o taku e kai ai, o taku ranei e inu ai? e rongo ano ranei ahau i te reo o nga tane waiata, o nga wahine waiata ranei? a kia m einga ano tau pononga hei

whakararururu mo toku ariki, mo te kingi hei aha? <sup>36</sup> Ka haere tahi atu ra tau pononga me te kingi

37  
ki tawahi iti atu o Horano: a he aha kia whakaarohia tera ki ahau e te kingi ki tenei utu nui? Na, tukua tau pononga kia hoki, kia mate ai ahau ki toku nei pa, ki te taha o te urupa o toku papa, o toku whaea. Engari ia tau pononga, a Kimihama: ko ia e whiti tahi me toku ariki, me te kingi; meatia

38  
ki a ia te mea e pai ana ki tau titiro. Na ka mea te kingi, Me whiti tahi maua ko Kimihama, a maku e mea ki a ia nga mea e pai ana ki tau titiro: a, he aha tau e tonono ai ki ahau, ka mahia e ahau

39  
mau. Na whiti ana te iwi katoa i Horano. I whiti ano te kingi, a kihia ana e te kingi a Paratirai, manaakitia ana; a hoki ana tera ki tona wahi.

40  
Heoi whiti ana te kingi ki Kirikara, a i haere tahi ano a Kimihama i a ia: a na te iwi katoa o

41  
Hura, na te hawhe o te iwi o Iharaira te kingi i kawe. Na haere ana nga tangata katoa o Iharaira ki te kingi, ka mea ki te kingi, He aha o matou teina, nga tangata o Hura i tahae ai i a koe, i

42  
whakawhiti mai ai i te kingi, i tona whare katoa, i nga tangata katoa ano a Rawiri, i Horano? Na ka whakahokia e nga tangata katoa o Hura ki nga tangata o Iharaira, No te mea he whanaunga tata te kingi ki a matou: he aha ra koutou i riri ai mo tenei mea. I kai ranei matou i tetahi mea a te kingi?

43  
i homai ranei e ia tetahi mea ki a matou? Na ka whakahoki nga tangata o Iharaira ki nga tangata o Hura, ka mea ratou, Kotahi tekau nga wahi o te kingi kei a matou, a nui atu hoki i to koutou to matou take ki a Rawiri: a he aha matou i whakahaweatia ai e koutou, te waiho ai ma matou te k upu tuatahi mo te whakahoki mai i to matou kingi? Heoi i pakari rawa ake nga kupu a nga tangata o Hura i nga kupu a nga tangata o Iharaira.

## Chapter 20

1  
Na i tupono ki reira tetahi tangata o Periara, ko tona ingoa ko Hepa, he tama na Pikiri, no Pineamine: na whakatangihia ana e ia te tetere, a ka mea, Kahore o tatou wahi i a Rawiri, kahore

2  
he wahi tuturu mo tatou i te tama a Hehe: ki o koutou ten eti, e tera, e tera o Iharaira! Na ka takiritia nga tangata katoa o Iharaira i te whai i a Rawiri, a whai ana i a Hepa tama a Pikiri: ko nga

3  
tangata ia o Hura i piri ki to ratou kingi, o Horano mai ano a Hiruharama atu ana. Na haere ana a Rawiri ki tona whare ki Hiruharama, a ka mau te kingi ki nga wahine kotahi tekau, ki nga wahine iti i waiho ra hei tiaki i te whare, a whakanohia ana ki te whare kia tiakina, atawhaitia iho ratou e ia; otiia kihai ia i haere ki ro to, ki a ratou. Na tutakina atu ana ratou, he noho pouaru a taea noatia te ra i mate ai ratou.

4  
Katahi ka mea te kingi ki a Amaha, Huihuia mai nga tangata o Hura ki ahau i roto i nga ra e

5  
toru, a me tae mai ano koe ki konei. Na haere ana a Amaha ki te huihui i nga tangata o Hura: otiia

<sup>6</sup>  
 i roa atu ia i te wa i whakaritea ki a ia. Na ka mea a Rawiri ki a Apihai, Akuanei rahi atu te kino e mahia e Hepa tama a Pikiri ki a tatou i ta Apoharama: tangohia nga tangata a tou ariki, whaia,

<sup>7</sup>  
 kei whiwhi ia ki nga pa taiepa, a ka ora atu i o tatou kanohi. Na haere ana nga tangata a Ioapa i muri i a ia, me nga Kereti, me nga Pereti, me nga marohirohi katoa: haere atu ana ratou i Hiruharama

<sup>8</sup>  
 ki te whai i a Hepa tama a Pikiri. I a ratou i te kohatu nui i Kipeono, ka tae mai a Amaha kia tutaki ki a ratou. Na, ko te kakahu i kakahuria e Ioapa, he mea whitiki, a i waho ake he whitiki ano, me tetahi hoari, he mea whakamaui ki tona hope, i roto ano i tona pukoro; a i a ia e haere ana, ka makere.

<sup>9</sup>  
 Na ka mea a Ioapa ki a Amaha, Kei te ora ranei koe, e toku teina? Na ka mau te ringa matau o

<sup>10</sup>  
 Ioapa ki te kumikumi o Amaha, kia kihi i a ia. Kihai ia a Amaha i mahara ki te hoari i te ringa o Ioapa: na werohia ana ia e ia ki te kopu ki taua mea, a ka tuakina ona whekau ki te whenua, kihai hoki i tuaruatia e tera; na ka mate ia. Na ka whai a Ioapa raua ko tona teina, ko Apihai i a Hepa

<sup>11</sup>  
 tama a Pikiri. Na tera tetahi o nga taitama a Ioapa i tona taha e tu ana, a ka mea tera, Ko te

<sup>12</sup>  
 tangata e pai ana ki a Ioapa, a ko te tangata e mea ana mo Rawiri, me whai ia i a Ioapa. Heoi takoto ana a Amaha, okeoke ana i roto i ona toto i waenganui o te huarahi. A ka kite taua tangata e tu ana te iwi katoa, na ka amohia atu e ia a Amaha i te huarahi ki te parae, a hipokina iho ana ki

<sup>13</sup>  
 te kakahu, i tona kitenga e tu ana te hun ga katoa e tika ana na reira. Ka oti ia te neke atu i te huarahi, na, haere ana te iwi katoa i muri i a Ioapa ki te whai i a Hepa tama a Pikiri.

<sup>14</sup>  
 Na haereerea ana e ia nga iwi katoa o Iharaira, ki Apere, a ki Petemaaka, ki nga Peri katoa:

<sup>15</sup>  
 na ka huihui ratou katoa a haere ana hoki i muri i a ia. Na haere ana ratou, kei te whakapae i a ia ki Apere o Petemaaka, a whakahauputia ake ana e ratou tetahi pukepuke ki te pa, na kua hangai

<sup>16</sup>  
 ki te pekerangi. Na kei te aki te nuinga katoa o Ioapa i te taiepa kia hinga. Na ka karanga tetahi wahine mohio i roto i te pa, Whakarongo mai, whakarongo mai; tena, ki atu ki a Ioapa, Whakatata

<sup>17</sup>  
 mai ki konei, kia korero ai ahau ki a koe. Na ka whakatata ia ki a ia; a ka mea te wahine, Ko koe ianei a Ioapa? Ka mea tera, Tenei ahau. Na ko te kianga a tera ki a ia, Whakarongo ki nga kupu

<sup>18</sup>  
 a tau pononga. Ka whakahokia e ia, E whakarongo ana. Na ka mea tera, Ko ta ratou na kupu

<sup>19</sup>  
 onamata, i mea, Me ui rawa ratou he kupu ki Apere: a ka mutu ta ratou i tera. No roto ahau i te hunga ata noho, pono hoki i roto i a Iharaira. E whai ana koe kia whakangaromia he pa, he whaea

<sup>20</sup>  
 no Iharaira: he aha ka horomia ai e koe te wahi tupu a Ihowa? Na ka whakahokia e Ioapa; i mea

<sup>21</sup>  
 ia, Hore rawa, hore rawa i ahau; a kore e horomia, e kore e huna e ahau. Kahore aku pera, engari he tangata tera no Maunga Eparaima, ko tona ingoa ko Hepa tama a Pikiri, kua ara tona ringa ki te kingi, ki a Rawiri: homai tona kotahi a ka haere atu ahau i te pa. Katahi taua wahine ka mea ki a

22  
Ioapa, Nana, ka akiritia atu tona upoko ki a koe ra runga i te taiepa. Na haere ana taua wahine, me tona whakaaro mohio, ki te iwi katoa. Na poutoa ana e ratou te upoko o Hepa tama a Pikiri, maka atu ana ki a Ioapa. Katahi ia ka whakatangi i te tetere, a whakarerea ana e ratou te pa, pakaru noa atu ana ki tona tene ti, ki tona teneti. A hoki ana a Ioapa ki Hiruharama ki te kingi.

23 Na ko Ioapa te rangatira o te ope katoa o Iharaira; ko Penaia hoki, tama a Iehoiara te rangatira o nga Kereti ratou ko nga Pereti: 24 Ko Arorama te rangatira takoha: ko Iehohapata tama a Ahiruru te kaiwhakamahara: 25 Ko Hewha te kaituhituhi: a ko Haroko raua ko Apiatara nga tohunga: 26 A ko Ira Hairi ano hoki he tino kaiwhakahaere na Rawiri.

## Chapter 21

1 Na ka pa he matekai i nga ra o Rawiri, e toru nga tau, ko to tetahi tau aki tonu iho ki to tetahi tau; a ka rapua te tikanga e Rawiri i te aroaro o Ihowa. Na ka mea a Ihowa, Mo ta Haora ratou ko tona whare hutoto; mona i whakamate i nga Kipeoni. 2 Katahi te kingi ka karanga ki nga Kipeoni, a ka korero ki a ratou: na ehara nga Kipeoni i nga tama a Iharaira; engari no nga morehu o nga Amori, no era i oati ra nga tama a Iharaira: na whaia ana e Haora kia patua, he hae nona, he whakaaro hoki k i nga tama a Iharaira ratou ko Hura: 3 Na ka mea a Rawiri ki nga Kipeoni, Ko te aha taku e mea ai ki a koutou? he aha hoki taku whakamarie e manaakitia ai e koutou te kainga tupu o Ihowa? 4 Na ka mea nga Kipeoni ki a ia, Ehara i te koura i te hiriwa ranei te mea kei waenganui i a matou me Haora ratou ko tona whare; kahore hoki a matou mea ki tetahi tangata o Iharaira kia mate. Ano ra ko ia, Ka meatia e ahau ta koutou e ki mai ai. 5 Katahi ratou ka mea ki te kingi, Ko te tangata i whakamoti nei i a matou, i whakatakoto whakaaro nei mo matou kia ngaro, kei waiho ki tetahi o nga rohe o Iharaira. 6 Kia tokowhitu nga tangata o ona tama e homai ki a matou, a ma matou ratou e tarona, hei mea ki a Ihowa, ki Kipea o Haora, o ta Ihowa i whiriwhiri ai. Na ka mea te kingi, Ka hoatu e ahau. 7 Otiia i tohungia e te kingi a Mepipohete tama a Honatana tama a Haorohe whakaaro ki te oati a Ihowa i takoto i a raua, i a Rawiri raua ko Honatana tama a Haora. 8 Engari i mau te kingi ki nga tama tokorua a Rhipa tamahine a Aia i whanau nei i a raua ko Haora, ara ki a Aramoni raua ko Mepipohete; ki nga tama tokorima hoki a Merapa tamahine a Haora i whanau i a raua ko Atariere tama a Paratirai Mehorati: 9 A hoatu ana e ia ki nga ringa o nga Kipeoni, a taronatia ana e ratou ki te maunga, i te aroaro o Ihowa: na hinga ngatahi ana to ratou tokowhitu katoa. No nga ra o te kotinga ratou i whakamatea ai, no nga ra tuatahi, i te timatanga o te kotinga pa rei.

10

Na ka mau a Rhipa tamahine a Aia ki te kakahu taratara, a wharikitia ana hei mea mona ki runga ki te kamaka, i te timatanga o te kotinga, heke noa he wai i te rangi ki runga ki a ratou; kihai hoki i tukua e ia he manu o te rangi kia noho ki runga i te awatea, he kirehe ranei o te parae i to

11

po. A i korerotia ki a Rawiri taua meatanga a Rhipa tamahine a Aia, wahine iti a Haora. Na ka haere a Rawiri, ka tikina nga whenua o Haora, nga wheua o Honatana, o tana tama, i nga tangata o Iapehe Kireara, na ratou nei hoki aua wheua i tango puku i te waharoa o Petehana i te wahi i

12

whakairihia ai e nga Pirihitini i te ra i patua a i a Haora e nga Pirihitini ki Kiripoa. A kaweana e ia i reira nga wheua o Haora, me nga wheua o Honatana, o tana tama: i kohia ano e ratou nga

13

wheua o te hunga i whakatarea. A tanumia ana nga wheua o Haora raua ko Honatana, ko tana tama, ki te whenua o Pineamine ki Heraha ki te urupa o Kihi, o tona papa: a ka oti i a ratou nga mea katoa i whakahaua e te kingi, na muri iho ka marie mai te Atua ki te whenua.

14

15

Na ka whawhai ano nga Pirihitini ratou ko Iharaira, a haere ana a Rawiri ki raro, ratou ko ana tangata, whawhai ana ki nga Pirihitini: na ka ruha haere a Rawiri. Na ko Ihipipenopo, no nga uri o Rapa, ko te taimaha o tana tao, e toru rau hekere parahi te taimaha, he mea hou te hoari,

16

whitiki rawa ki a ia; ka mea ia kia patua a Rawiri. Na pikitia ana ia e Apihai tama a Teruia, a patua iho e ia te Pirihitini, whakamatea iho. Na reira i oati ai nga tangata a Rawiri ki a ia, i mea ai,

17

Kati rawa tou haere tahi tatou ki te whawhai, kei keto i a koe te rama o Iharaira. A muri iho i tenei ka whawhai ano ki nga Pirihitini ki Kopo, a na Hipekai Huhati i patu a Hapa, no nga uri o

18

Rapa. Na ka whawhaitia ano nga Pirihitini ki Kopo, a na Erehanana tama a Iaareorekimi o Peterehema i patu te teina o Koriata Kiti, ko te kakau o tana taoroa rite tonu ki te kurupae a te

19

kaiwhatu. A i whawhai ano ki Kata. Na ko tetahi tangata roa e ono nei nga maihao o tetahi ringa, o tetahi ringa, e ono ano hoki nga maikara o tetahi waewae, o tetahi waewae, e rua tekau ma wha

20

katoa te maha, he uri ano no Rapa. I tana whakataranga i a Iharaira, na patua ana ia e Honatana

21

tama a Himeitauakana o Rawiri. He uri enei tokowha no Rapa i Kata, a hinga ana i te ringa o Rawiri, i te ringa hoki o ana tangata.

22

## Chapter 22

1

I korerotia e Rawiri ki a Ihowa nga kupu o tenei waiata i te ra i whakaorangia ai ia e Ihowa i te ringa o ona hoariri katoa, i te ringa ano o Haora:

<sup>2</sup> I mea ia, Ko Ihowa toku teko, toku pourewa, ko toku kaiwhakaora hoki ia, ae ra ko toku;  
<sup>3</sup> Ko te Atua toku kamaka, ka whakawhirinaki ahau ki a ia; ko toku whakangungu rakau, ko te haona o toku whakaoranga, ko toku pa tiketike, ko toku rerenga atu; e toku kaiwhakaora, whakaorangia ana ahau e koe i te tutu. <sup>4</sup> Ka karanga ahau ki a Ihowa e tika nei kia whakamoemititia: a ka whakaorangia ahau i oku hoariri. <sup>5</sup> I karapotia ahau e nga ngaru o te mate, i whakawehia ahau e nga waipuke o te kino. <sup>6</sup> I roritia ahau e nga taura a te reinga: potaea ana ahau e nga mahanga a te mate. <sup>7</sup> I karanga ahau ki a Ihowa i toku paweratanga, ae ra, i karanga ahau ki toku Atua: a i whakarongo ia ki toku reo i roto i tona temepara, i tae hoki taku hamama ki ona taringa. <sup>8</sup> Na ka ngaueue te whenua, ka ru; wiri ana nga putake o nga rangi, ngaueue ana, no te mea e riri ana ia. <sup>9</sup> I kake he paowa i ona pongaponga, a ka kai te kapura o roto o tona mangai: ngiha ana nga waro. <sup>10</sup> I whakapingoretia e ia nga rangi, a ka heke iho: a i raro te pouri kerekere i ona waewae. <sup>11</sup> Na ka eke ia ki te kerupa, a rere ana: ina, i kitea ia i runga i nga parirau o te hau. <sup>12</sup> I meinga ano e ia te pouri hei teneti a tawhio noa, nga wai pouri, nga kapua matotoru o te rangi. <sup>13</sup> Ngiha ana nga waro i te wherikotanga o tona aroaro. <sup>14</sup> Papa ana te whatitiri a Ihowa i nga rangi; puaki ana te reo o te Runga Rawa. <sup>15</sup> Kokiritia mai ana e ia nga pere, a marara ana ratou; he uira, a ka whati ratou. <sup>16</sup> Na ka kitea nga takere o te moana, ka takoto kau nga putake o te ao i te whakatupehupehunga a Ihowa, i te whenunga o te manawa o ona pongaponga. <sup>17</sup> I tono karere mai ia i runga, ka mau ki ahau; kumea ake ahau e ia i roto i nga wai maha. <sup>18</sup> Nana ahau i whakaora i toku hoariri kaha, i te hunga e kino ana ki ahau: he kaha rawa hoki ratou i ahau. <sup>19</sup> Huakina tatatia ana ahau e ratou i te ra o toku matenga: ko Ihowa ia toku whakawhirinakitanga. <sup>20</sup> A whakaputaina ana ahau e ia ki te wahi whanui: i whakaorangia ahau e ia, no te mea i whakaahuareka ia ki ahau. <sup>21</sup> Rite tonu ki taku mahi tika ta Ihowa utu ki ahau; rite tonu ki te ma o oku ringa tana i whakahoki mai ai ki ahau. <sup>22</sup> I pupuri hoki ahau i nga ara a Ihowa; a kihai i he, i whakarere i toku Atua. <sup>23</sup> Kei mua tonu hoki i ahau ana whakaritenga katoa; a, ko ana tikanga, kihai era i matara atu i ahau. <sup>24</sup> I tu tika ano ahau ki tona aroaro: i tiaki ano i ahau kei kino. <sup>25</sup> No reira i homai ai e Ihowa he utu ki ahau, rite tonu ki toku tika; rite tonu ki toku ma ki tana titiro. <sup>26</sup> He tangata atawhai, ka atawhai ano koe; he tangata

tika, ka tika ano koe. <sup>27</sup> He tangata ma, ka ma ano koe; he tangata whakakeke, he whakakeke hoki  
 tau mahi. <sup>28</sup> E whakaorangia hoki e koe te iwi e tukinotia ana: kei runga ia ou kanohi i te hunga  
 whakakake, kia whakahokia iho ratou e koe ki raro. <sup>29</sup> Ko koe hoki toku rama, e Ihowa: ma Ihowa  
 e whakamarama toku pouri. <sup>30</sup> Nau hoki ahau i rere ai ki runga ki te ropu: na toku Atua ka peke  
 ahau i te taiepa. <sup>31</sup> Tena ko te Atua, tika tonu tona ara; he parakore te kupu a Ihowa; he whakangungu  
 rakau ia ki te hunga katoa e whakawhirinaki ana ki a ia. <sup>32</sup> Ko wai oti te Atua, ki te kahore a Ihowa?  
 Ko wai hoki te kamaka, ki te kahore to tatou Atua? <sup>33</sup> Ko te Atua toku pa kaha: ko ia hei arahi i  
 te hunga tika i tona ara. <sup>34</sup> Ko ia nei hei mea i oku waewae kia rite ki o te hata: mana hoki ahau e  
 whakatu ki runga ki oku wahi tiketike. <sup>35</sup> Ko ia hei whakaako i oku ringa ki te whawhai; hei mea  
 i oku ringa kia whakapiko i te kopere parahi. <sup>36</sup> Kua homai hoki e koe ki ahau te whakangungu  
 rakau o tau whakaoranga; whakanuia ana ahau e tou whakaaro mahaki. <sup>37</sup> I whakanuia e koe oku  
 takahanga i raro i ahau, te paheke oku waewae. <sup>38</sup> Kua arumia e ahau oku hoariri, a huna iho ratou  
 e ahau: kihai ano ahau i tahuri, a moti noa ratou. <sup>39</sup> Moti iho ratou i ahau, mongamonga noa, te  
 ahei te whakatika: ina, hinga ana ratou ki raro i oku waewae. <sup>40</sup> Nau hoki ahau i whitiki ki te kaha  
 mo te whawhai: piko ana i a koe ki raro i ahau te hunga i whakatika mai ki ahau. <sup>41</sup> Kua meinga  
 hoki e koe kia hurihia mai e oku hoariri o ratou tuara ki ahau, kia huna e ahau te hunga e kino ana  
 ki ahau. <sup>42</sup> I tirotiri ratou, heoi kahore he kaiwhakaora: ki a Ihowa rawa, heoi kihai ia i whakahoki  
 kupu ki a ratou. <sup>43</sup> Na tukia ana ratou e ahau, a rite noa ki te puehu o te whenua: mohungahunga  
 noa ratou i ahau, me te mea he paru no nga huarahi; a titaritaria ana ratou e ahau. <sup>44</sup> Nau hoki ahau  
 i ora ai i nga ngangautanga a toku iwi; nau ahau i tiaki hei upoko mo nga tauwiwi: hei apa moku te  
 iwi kahore nei i matauria e ahau. <sup>45</sup> Ka tuku mai nga tangata iwi ke ki raro i ahau: kia rongu kau  
 te taringa, kakama tonu mai ratou ki ahau. <sup>46</sup> Ka memeha haere nga tangata iwi ke: ka puta wehi  
 mai hoki i roto i o ratou kuhunga. <sup>47</sup> E ora ana a Ihowa, kia whakapaingia toku kamaka: kia  
 whakanuia te Atua o te kamaka o toku whakaoranga: <sup>48</sup> Ara te Atua e rapu nei i te utu moku, e  
 pehi nei i te iwi ki raro i ahau, <sup>49</sup> E whakaputa nei i ahau i roto i oku hoariri: ae ra, e mea ana koe  
 i ahau kia teitei ake i te hunga e whakatika mai ana ki ahau: whakaorangia ana ahau e koe i te

50  
 tangata tutu. Mo konei ka whakawhetai ahau ki a koe, e Ihowa, i roto i nga tauwi, ka himene  
 51  
 ki tou ingoa. He pourewa whakaora ia ki tana kingi; e whakaputa aroha ana ki tana tangata i  
 whakawahi ai, ki a Rawiri ratou ko ona uri ake ake.

### Chapter 23

1  
 Na ko nga kupu whakamutunga enei a Rawiri. He kupu tenei na Rawiri tama a Hehe, he kupu  
 hoki na te tangata i whakarewaina ki runga, na ta te Atua o Hakopa i whakawahi ai, na te kaihimene  
 2  
 ahuareka o Iharira; He kaiwhakapuaki ahau i te kupu a te wairua o Ihowa: kei toku arero tana  
 3  
 korero. I korero te Atua o Iharaira, i mea te Kamaka o Iharaira ki ahau: Ko ia te kaiwhakatakoto  
 4  
 tikanga mo nga tangata, e whakatakoto tikanga ana i runga i te wehi ki a Ihowa, Ka rite ia ki te  
 marama o te ata ina whiti te ra, o te ata kahore nei he kapua; ki te tarutaru tupu hou e pihi ake ana  
 5  
 i te whenua i te mea ka whiti te ra i te maonga o te ua. He pono ehara toku whare i te pena i te  
 aroaro o te Atua; heoi kua takoto tana kawenata u tonu ki ahau, rite rawa nga aha katoa, mau rawa:  
 no te mea ko toku whakaoranga katoa tenei, ko taku hoki e whakaahuareka ai, ahakoa kahore e  
 6  
 meinga ana e ia kia tupu. Ko te hunga atuakore ia ka rite katoa ki te tataramoa e aia atu ana, e  
 7  
 kore nei e hopukia atu e te ringa: Engari ko te tangata e whakapa atu, kia kapi ia i te rino, kia mau  
 hoki ki te kakau o te tao; a ka tahuna rawatia ratou ki te ahi i to ratou wahi.  
 8  
 Ko nga ingoa enei o nga tangata marohirohi a Rawiri, ko Iohepepahapete Takamoni, ko ia te  
 tino rangatira; ko Arino Eteni ano ia, i ara ake tana tao ki nga rau e waru, patua iho i te whakaekenga  
 9  
 kotahi. I muri i a ia ko Ereatara tama a Roro Ahohi; ko ia tetahi o nga marohirohi, o nga hoa  
 tokotoru o Rawiri i ta ratou whakataranga ki nga Pirihitini i huihui ki reira ki te whawhai, i te mea  
 10  
 kua riro nga tangata o Iharaira: Whakatika ana ia, a patua iho nga Pirihitini a ngenge noa tona  
 ringa, piri noa tona ringa ki te hoari; a nui atu te wikitoria i meinga e Ihowa i taua ra; a hoki ana te  
 11  
 iwi i muri i a ia, he hui kau i nga parakete. A i muri i a ia ko Hamaha tama a Ake Harari. Na,  
 ko te huihuinga o nga Pirihitini ki te taua, ki tetahi wahi oneone e kapi ana i te pi; a rere ana te iwi  
 12  
 i te aroaro o nga Pirihitini. Heoi tu ana tera i waenganui o taua wahi, na ka mau i a ia, patua iho  
 13  
 e ia nga Pirihitini: na nui atu te whakaoranga i whakaora ai a Ihowa. Na ka haere e toru o nga  
 rangatira e toru tekau ki raro, a ka tae ki a Rawiri i te kotinga witi ki te ana i Aturama: a i te noho  
 14  
 tera te ope o nga Pirihitini i te raorao i Repaima. Na i roto a Rawiri i te pourewa i taua wa; i



15  
 Peterehema ano nga hoia pupuri a nga Pirihitini i taua wa. Na ka minamina a Rawiri, a ka mea,  
 16  
 Aue, te ai he tangata hei kawae wai moku hei inu i te puna i Peterehema, i tera i te kuwaha! Na  
 wahi pu ana aua toa tokotoru na waenganui o te puni o nga Pirihitini, a utuhia ana he wai i te puna  
 o Peterehema, i tera i te kuwaha, tangohia ana, mauria ana ki a Rawiri: otiia kihai ia i pai ki te inu,  
 17  
 na ringihia ana e ia hei mea ki a Ihow a. A ka mea, Aue, kia meatia tenei e ahau, e Ihowa: kia  
 inu ahau i te toto o nga tangata i haere whakamomori nei ki te mate? Na kihai ia i pai ki te inu. Ko  
 18  
 enei nga mahi a aua marohirohi tokotoru. Na ko Apihai teina o Ioapa tama a Teruia te rangatira  
 o te tokotoru. A i ara ake tana tao ki nga rau e toru, patua iho e ia; i whai ingoa hoki ia i roto i te  
 19  
 tokotoru. He teka ianei nona te kororia nui o te tokotoru? a meinga ana ia hei rangatira mo ratou:  
 20  
 otiia kihai ia i uru ki te tokotoru tuatahi. Na ko Penaia tama a Tehoiara, ko te tama a tetahi  
 tangata marohirohi no Kapateere, he nui ana mahi toa, a i patua e ia nga tama tokorua a Ariare o  
 21  
 Moapa: i haere ano hoki ia ki raro, a patua ana e ia tetahi raiona i roto i te wa o te hukarere: Nana  
 hoki tetahi Ihipiana i patu, he tangata pakari: na he tao i te ringa o te Ihipiana; otiia haere atu ana  
 ia ki raro, ki a ia, he tokotoko tana, kapohia ana e ia te tao i te ringa o te Ihipiana, a patua ana ia e  
 22  
 ia ki tana tao ano. Na Penaia tama a Iehoiara enei mahi; a i whai ingoa ia i roto i nga marohirohi  
 23  
 tokotoru. Nui ake tona kororia i to te toru tekau; otiia kihai ia i uru ki te tokotoru tuatahi. Na  
 24  
 meinga ana ia e Rawiri hei rangatira mo ana kaitiaki. Ko Atahere teina o Ioapa tetahi o te toru  
 25  
 tekau: ko Erehanana tama a Roro o Peterehema; Ko Hamaha Harori; ko Erika Harori; Ko  
 26  
 Herete Parati; ko Ira tama a Ikehe Tekoi; 27 Ko Apietere Anetoti; ko Mepunai Huhati; 28 Ko  
 29  
 Taramono Ahohi: ko Maharai Netopati; Ko Herepe tama a Paana, he Netopati; ko Itai tama a  
 30  
 Ripai, no Kipea, no nga tama a Pineamine; Ko Penaia Piratoni; ko Hirai, no nga awaawa o  
 31  
 Kaaha; Ko Apiarapono Arapati; ko Atamawete Parahumi; 32 Ko Eriahapa Haaraponi, no nga  
 33  
 tama a Iahene; ko Honatana; Ko Hamaha Harari; ko Ahiamata tama a Harara Harai; 34 Ko Eriperete  
 35  
 tama a Ahahapai tama a te Maakati, ko Eriama tama a Ahitopere Kironi; Ko Heterai Karameri;  
 36  
 ko Paarai Arapi; Ko Ikara tama a Natana o Topa; ko Pani Kari; 37 Ko Tereke Amoni, ko Nahari  
 38  
 Peeroti, ko nga kaimau patu a Ioapa tama a Teruia; Ko Ira Ititi; ko Karepa Itiri; 39 Ko Uria Hiti;  
 ki te huihuia, e toru tekau ma whitu.

## Chapter 24

<sup>1</sup> Na ka mura ano te riri o Ihowa ki a Iharaira, a ka whakatutehu ia i a Rawiri ki te he mo ratou, ki te mea, Tikina, taua a Iharaira raua ko Hura. <sup>2</sup> Na ko te kianga a te kingi ki a Ioapa ki te rangatira ope, i reira ia i a ia, Tena, haereerea nga iwi katoa o Iharaira mai o Rana a tae noa ki Peerehepa, ka tatau i te iwi, kia mohio ai ahau ki te toputanga o te iwi. <sup>3</sup> Ano ra ko Ioapa ki te kingi, Ma Ihowa, ma tou Atua e mea te iwi kia tatakirau noa atu i to ratou tokomaha i a ratou nei, a kia kite hoki nga kanohi o toku ariki, o te kingi: otiia he aha toku ariki, te kingi i ahuaireka ai ki tenei mea? <sup>4</sup> He ahakoa ra, u tonu te kupu a te kingi ki a Ioapa ratou ko nga rangatira ope. Na haere atu ana a Ioapa ratou ko nga rangatira ope i te aroaro o te kingi ki te tatau i te iwi, i a Iharaira. <sup>5</sup> Na ka whiti ratou i Horano, ka noho ki Aroere, ki te taha ki matau o te pa i waenganui o te awaawa o Kara, a tae noa ki Iatere: <sup>6</sup> Katahi ka tae ratou ki Kireara, ki te whenua o Tahatimihorohi, a ka tae ki Ranaiaana a awhio haere ana ki Hairona; <sup>7</sup> A ka tae ki te pa kaha ki Taira, ki nga pa katoa o nga Hiwi, o nga Kanaani: a puta ana ratou ki te tonga o Hura, ki Peerehepa. <sup>8</sup> Na, ka oti te whenua katoa te haereere e ratou, ka tae ratou ki Hiruharama i te paunga o nga marama e iwa, o nga ra e rua tekau. <sup>9</sup> Na ka homai e Ioapa te toputanga o te iwi i taua ki te kingi: a e waru rau mano nga marohirohi i roto i a Iharaira, he hunga mau hoari; a e rima rau mano nga tangata o Hura. <sup>10</sup> Na ka patu te ngakau o Rawiri i a ia i muri i tana tauanga i te iwi. A ka mea a Rawiri ki a Ihowa, Nui atu toku hara i taku i mea nei: na, tena, kia whakarerea noatia iho, e Ihowa, te he o tau pononga; nui atu hoki te kuware o taku i mea ai. <sup>11</sup> Na, i te marangatanga ake o Rawiri i te ata, ka puta te kupu a Ihowa ki a Kara poropiti, ki ta Rawiri matakite, i mea ia, <sup>12</sup> Haere, mea atu ki a Rawiri, ko te kupu tenei a Ihowa, E toru nga mea ka whakaaria e ahau ki a koe; whiriwhiria e koe tetahi o aua mea, a ka meatia e ahau ki a koe. <sup>13</sup> Heoi ka tae a Kara ki a Rawiri, a ka korero ki a ia, ka mea, Kia tae atu ranei ki a koe etahi tau matekai e whitu ki tou whenua? kia toru ranei nga marama e rere ai koe i te aroaro o ou hoariri, me ta ratou whai ano i a koe? kia toru ranei nga r a o te mate uruta ki tou whenua? Na whakaaroa e koe kia kitea ai taku kupu e whakahoki ai ki toku kaitono mai. <sup>14</sup> Ano ra ko Rawiri ki a Kara, he noa iho oku whakaaro: na kia taka tatou aiane ki roto ki te ringa o Ihowa, he nui hoki ana mahi tohu; a kua ahau e taka ki te ringa o te tangata. <sup>15</sup> Heoi whakapangia ana e Ihowa he mate uruta ki a Iharaira, o te ata iho ano a taea noatia te wa i whakaritea: a mate ake o te iwi, o Rana a tae noa ki Peerehepa, e whitu tekau mano tangata. <sup>16</sup> A, no te toronga atu o te ringa o te anahera ki Hiruharama whakangaro ai, ka puta ke to Ihowa whakaaro

mo te kino, a ka mea ia ki te anahera e whakangaro ana i te iwi, Kua nui tenei: kati tou ringa. A, i

te patunga witi a Arauna Iepuhi, te anahe ra a Ihowa. <sup>17</sup> I korero hoki a Rawiri ki a Ihowa i tona kitenga i te anahera i patua ai te iwi, i mea, Ina, kua hara ahau, kua mahi i te mahi he: ko enei hipi ia, i aha ratou? Tena, kia pa tou ringa ki ahau, ki te whare ano o toku papa.

<sup>18</sup> Na ka haere a Kara ki a Rawiri i taua ra, a ka mea ki a ia, Haere ki runga, whakaarahia he

aata ki a Ihowa ki te patunga witi a Arauna Iepuhi. <sup>19</sup> Na whakatika ana a Rawiri, pera ana me te

kupu a Kara, me ta Ihowa i whakahau ai. <sup>20</sup> A ka titiro atu a Arauna, ka kite i te kingi ratou ko ana tangata e haere mai ana ki a ia: na ka puta atu a Arauna, piko ana ki te kingi, ahu ana tona mata ki

te whenua. <sup>21</sup> Na ka mea a Arauna, He aha toku ariki, te kingi, i haere mai ai ki tana pononga? Na ka mea a Rawiri, Ki te hoki i tau patunga witi, kia hanga ai he aata ki a Ihowa, kia mutu ai te

whiunga o te iwi. <sup>22</sup> Na ka mea a Arauna ki a Rawiri, Me tango e toku ariki, e te kingi, me whakaeke te mea e pai ana ki tana titiro: nana, nga kau hei tahunga tinana, me nga patu witi, me nga mea o

nga kau hei wahie! <sup>23</sup> Ko enei katoa, e te kingi, e hoatu ana e Arauna ki te kingi. I mea ano a Arauna

ki te kingi, Kia manako a Ihowa, tou Atua ki a koe <sup>24</sup> Na ka mea te kingi ki a Arauna, Kahore, engari me ata hoki e ahau tou wahi ki te utu, e kore hoki e whakaherea e ahau he tahunga tinana ki a Ihowa, ki toku Atua, kahore i utua e ahau. Heoi hokona ana e Rawiri taua patunga witi me nga

kau ki te h iriwa, e rima tekau hekere. <sup>25</sup> A hanga ana e Rawiri he aata ki reira ma Ihowa, whakaekea ana e ia etahi tahunga tinana me etahi whakahere mo te pai. Heoi ka marie a Ihowa ki te whenua, a ka mutu te mate uruta ki a Iharaira.

## 1 Kings

### Chapter 1

<sup>1</sup> Na kua koroheketia a Kingi Rawiri, kua maha ona ra; a hipokina ana ia e ratou ki te kakahu;

heoi kihai i mahana. <sup>2</sup> No reira ka mea atu ana tangata ki a ia, Me rapu tetahi kotiro, he wahine, ma toku ariki, ma te kingi: a me tu ia i mua i te kingi, mana hoki ia e atawhia; a me takoto ia ki tou

uma, kia mahana ai toku ariki, te kingi. <sup>3</sup> Heoi rapua ana e ratou tetahi kotiro ataahua i nga rohe

katoa o Iharaira; a kitea ana ko Apihaka Hunami, a kawea ana mai ia ki te kingi. <sup>4</sup> Na he ataahua rawa taua kotiro; a i atawhai ia i te kingi, i mahi hoki ki a ia: otira kihai te kingi i mohio ki a ia.

<sup>5</sup> Katahi a Aronia tama a Hakiti ka whakanui i a ia, ka mea, Ko ahau hei kingi: a meatia ana e ia etahi hariata mana, me etahi tangata noho hoiho, e rima tekau hoki nga tangata hei rere i tona aroaro.

<sup>6</sup> Kihai hoki tona papa i whakapouri i tona ngakau o mua iho, kihai i mea, He aha koe i pena ai? he tangata ataahua rawa hoki ia; a i whanau ia i muri i a Apoharama.

<sup>7</sup> Na ka kororero ia ki a Ioapa tama a Teruia, ki a Apiatara tohunga; a i whai raua i a Aronia, i awhina i a ia.

<sup>8</sup> Ko Haroko tohunga ia, ko Penaia tama a Iehoiara, ko Natana matakite, ko Himeia, ko Rei, ko nga tangata nunui a Rawiri, kihai ratou i uru ki ta Aronia.

<sup>9</sup> Na ka patua e Aronia he hipi, he kau, me nga mea momona, ki te kohatu ki Toherete, ki tera i te taha o Enerokere, a karangatia ana e ia ona teina katoa, nga tama a te kingi, ratou ko nga tangata katoa o Hura, nga pononga a te kingi:

<sup>10</sup> Ko Natana matakite ia, ko Penaia, ko nga tangata nunui, me tona teina, me Horomona, kihai i karangatia e ia.

<sup>11</sup> Na ka korero a Natana ki a Patehepa whaea o Horomona, ka mea, Kahore ano koe i rongorongo ko Aronia tama a Hakiti te kingi, kahore hoki i te mohiotia e to tatou ariki, e Rawiri?

<sup>12</sup> Na haere mai, tukua maku e hoatu he whakaaro ki a koe, kia ora ai koe, kia ora ai hoki tau tama, a Horomona.

<sup>13</sup> Haere, a ka tae ki a Kingi Rawiri, ka mea ki a ia, Kihai ianei koe i oati mai, e toku ariki, e te kingi, ki tau pononga, i mea, Ko Horomona tonu ko tau tama hei kingi i muri i ahau, ko ia hoki hei noho i toku torona? Na, he aha i kingi ai a Aron ia?

<sup>14</sup> Na, e korero ana ano koe i reira ki te kingi, ka tae atu hoki ahau i muri i a koe, a maku e whakakoia ki au korero.

<sup>15</sup> Na ko te haerenga o Patehepa ki te whare moenga, ki te kingi: he koroheke rawa hoki te kingi; ko Apihaka Hunami ano ki te mahi i nga mea a te kingi.

<sup>16</sup> Na ka tuohu a Patehepa, ka piko ki te kingi, a ka mea te kingi, He aha tau?

<sup>17</sup> Na ka mea tera ki a ia, E toku ariki, i oatitia mai a Ihowa, tou Atua, e koe ki tau pononga, Ko Horomona tonu, ko tau tama hei kingi i muri i ahau, a ko ia hei noho ki toku torona.

<sup>18</sup> Na, inaianei, kua kingi a Aronia; a kahore koe, e toku ariki, e te kingi, i te mohio:

<sup>19</sup> A kua patua e ia he kau, he mea momona, he hipi, tona tini; kua karangatia hoki nga tama katoa a te kingi, me Apiatara tohunga, me Ioapa rangatira ope; ko Horomona ia, ko tau pononga, kihai i karangatia e ia.

<sup>20</sup> Na ko koe, e toku ariki, e te kingi, e anga ana nga kanohi o Iharaira katoa ki a koe, kia whakaaturia ki a ratou ko wai e noho ki te torona o toku ariki, o te kingi, i muri i a ia.

<sup>21</sup> Na tenei ake, hei te moenga o toku ariki, o te kingi, ki ona matua, ka kiia maua ko taku tama, ko Horomona, he hunga hara.

<sup>22</sup> Na, i a ia ano e korero ana ki te kingi, ka tomo mai a Natana poropiti.

<sup>23</sup> A ka korerotia e ratou ki te kingi, ka mea, Ko Natana poropiti tenei. Na haere ana tera ki te aroaro o te kingi, a piko ana, tapapa ana ki te whenua ki te aroaro o te kingi.

<sup>24</sup> Na ka mea a Natana, E toku

ariki, e te kingi, i mea ranei koe, Ko Aronia hei kingi i muri i ahau, a ko ia hei noho ki toku torona?  
25

Kua haere hoki ia ki raro i tenei ra, a kei te patu tera i te kau, i te mea momona, i te hipi, tona tini; a kua karangatia e ia nga tama katoa a te kingi ratou ko nga rangatira ope, ko Apiatara tohunga:

26  
kei te kai ratou, kei te inu i tona aroaro; e ki ana, Kia ora a Kingi Aronia. Ko ahau ia, ko tau pononga, ko matou ko Haroko tohunga, ko Penaia tama a Iehoiara, ko tau pononga, ko Horomona,

27  
kikai i karangatia e ia. Na toku ariki ranei, na te kingi tenei mea, a kikai i whakaaturia e koe ki

28  
au pononga, ko wai e noho ki te torona o toku ariki, o te kingi i muri i a ia? Na ka whakahoki a Kingi Rawiri, ka mea, Karangatia a Patehepa ki ahau. Na haere ana ia ki te aroaro o te kingi, a tu

29  
ana i te aroaro o te kingi. Na ko te oatitanga a te kingi, ka mea, E ora ana a Ihowa i whakaora

30  
nei i ahau i nga mate katoa, Ko aku oatitanga i a Ihowa, i te Atua o Iharaira ki a koe, i ahau i mea ra, He pono, ko Horomona, ko tau tama, hei kingi i muri i ahau, ko ia hoki hei noho ki toku

31  
torona i muri i ahau; he pono me pena ano e ahau i tenei ra. Katahi ka tuohu a Patehepa, anga tonu tona mata ki te whenua, piko ana ki te aroaro o te kingi, ka mea, Kia ora toku ariki, a Kingi Rawiri, a ake ake.

32  
Na ka mea a Kingi Rawiri, Karangatia a Haroko tohunga ki ahau, a Natana poropiti, a Penaia

33  
tama a Iehoiara. Na haere ana mai ratou ki te aroaro o te kingi. Na ka mea te kingi ki a ratou, Mauria nga pononga a to koutou ariki hei hoa mo koutou, ka whakanoho i a Horomona, i taku tama,

34  
ki toku muera, ki toku ake, ka kawe i a ia ki raro, ki Kihona: A ma Haroko tohunga raua ko Natana poropiti ia e whakawahi ki reira hei kingi mo Iharaira; me whakatangi hoki te tetere, me

35  
mea, Kia ora a Kingi Horomona. Na ka piki ake koutou i muri i a ia, a ka tae mai ia, ka noho ki toku torona; a hei kingi ia i muri i ahau; he mea whakarite naku hei rangatira ia mo Iharaira raua

36  
ko Hura. Na ka whakahoki a Penaia tama a Iehoiara ki ta te kingi, ka mea, Amine: kia pena mai

37  
hoki te ki a Ihowa, a te Atua o toku ariki, o te kingi. I toku ariki nei, i te kingi, a Ihowa, kia pena ano ia ki a Horomona; a kia whakanuia ake tona torona ki runga ake i te torona o toku ariki, o Kingi

38  
Rawiri. Heoi ka haere a Haroko tohunga, a Natana poropiti, a Penaia tama a Iehoiara, me nga Kereti, me nga Pereti ki raro, a whakanohoia ana e ratou a Horomona ki te muera o Kingi Rawiri,

39  
a kawea ana ki Kihona. Na tangohia ana e Haroko tohunga te haona hinu i roto i te tapenakara, a whakawahia ana e ia a Horomona. Na ka whakatangihia e ratou te tetere; a ka mea katoa te iwi,

40  
Kia ora a Kingi Horomona. Na piki ake ana te iwi katoa i muri i a ia, me te whakatangi te iwi i nga putorino; nui atu hoki te koa i koa ai ratou, ngatata ana te whenua i to ratou hamama.

41 Na ka rongō a Aronia ratou ko ana manuhiri i a ratou e whakamutu ana i ta ratou kai. A, no te rongonga o Ioapa i te tangi o te tetere, ka mea ake, He aha tenei hamama o te pa e ngangau mai nei?

42 I a ia ano e korero ana, na ko Honatana tama a Apiatara tohunga e haere mai ana; a ka mea a Aronia, Haere mai; he tangata maia hoki koe, a he korero pai au.

43 Na ka whakahoki a Honatana, ka mea atu ki a Aronia, He pono rawa, kua meinga a Horomona e to tatou ariki, e Kingi Rawiri, hei kingi.

44 A kua unga e te kingi hei hoa mona a Haroko tohunga, a Natana poropiti, a Penaia tama a Ihoiara, ratou ko nga Kereti, ko nga Pereti; a kua whakanohoia ia e ratou ki te muera o te kingi:

45 A kua whakawahia ia e Haroko tohunga, e Natana poropiti hei kingi ki Kihona: na kua piki ake ratou i reira me te koa, na ngateri ana te pa. Ko te hamama tenei i rongō na koutou.

46 A ko Horomona hoki tenei te noho mai nei i runga i te torona o te kingitanga.

47 A kua tae mai hoki nga pononga a te kingi ki te manaaki i to tatou ariki, i a Kingi Rawiri, ki te mea, Kia meinga e tou Atua te ingoa o Horomona kia pai atu i tou ingoa, kia whakanuia ake e ia tona torona i tou torona.

48 Na piko ana te kingi i runga i te moenga. A i penei hoki te kupu a te kingi, Kia whakapaingia a Ihowa, te Atua o Iharaira, mona kua homai nei i tetahi hei noho i toku torona i tenei ra, me te kite atu ano oku kanohi.

49 Na ka pawera nga manuhiri a Aronia, whakatika ana, a haere ana i tona ara, i tona ara.

50 A wehi ana a Aronia i a Horomona, a whakatika ana, ka haere, a ka hopu i nga haona o te aata.

51 Na ka korerotia te korero ki a Horomona, Ko Aronia tera e wehi anai a Kingi Horomona; kei te pupuri ano tera i nga haona o te aata; e mea ana, Kia oati a Kingi Horomona ki ahau aianei, e kore a whakamatea e ia tana pononga ki te hoari.

52 Na ka mea a Horomona, Ki te mea he tikanga pai tana, e kore e taka tetahi makawe ona ki te whenua; tena ki te kitea he he tona, ka mate.

53 Heoi ka tono tangata a Kingi Horomona ki te tiki i a ia, i runga i te aata. A haere mai ana ia, piko ana ki a Kingi Horomona; a ka mea a horomona ki a ia, Haere ki tou whare.

## Chapter 2

1 Na kua tata nga ra o Rawiri e mate ia; a ka ako ia i tana tama, i a Horomona, ka mea,

2 E haere ana tenei ahau i te ara o te whenua katoa: na kia kaha, whakatane:

3 A kia mau ki te whakahau a Ihowa, a tou Atua, kia haere i ana ara, kia mau ki ana tikanga, ki ana whakahau, ki ana whakaritenga, ki ana whakaaturanga, ki nga mea kua oti te tuhituhi ki te ture a Mohi, kia tika ai tau i nga mea katoa e mea ai koe, i nga wahi katoa e tahuri ai koe:

4 Kia mana ai i a Ihowa tana

kupu i korero ai ia moku, i mea ia, Ki te tupato au tamariki ki to ratou ara, ki te whakapaua katoatia o ratou ngakau, o ratou wairua, ki te haere i toku aroaro i runga i te pono, e kore e whakakorea, e

ai ki tana, teta hi tangata mau mo te torona o Iharaira. <sup>5</sup> Na e mohio ana hoki koe ki ta Ioapa tama a Teruia i mea ai ki ahau, ki tana i mea ai ki nga rangatira ope tokorua o Iharaira, ki a Apanere tama a Nere, ki a Amaha tama a Ietere, i patua ra e ia, a whakahekea ana nga toto o te whawhai i te wa o te rangimarie, whakahekea ana nga toto o te whawhai ki tona whitiki i tona hope, ki ona hu i ona

waewae. <sup>6</sup> Na kia rite tau e mea ai ki tau i matau ai, a kua e tukua tona upoko hina kia heke atu

ki te rua i runga i te rangimarie. <sup>7</sup> Kia puta ia tou aroha ki nga tama a Paratirai Kireari, kia uru hoki ratou ki te hunga e kai ana ki tau tepu: i pera hoki ratou, i whakatau ki ahau i toku rerenga i tou

tuakana, i a Apoharama. <sup>8</sup> Na kei a koe na a Himeia tama a Kera o Pineamine, o Pahurimi, tera i kanga ra ki ahau, kino atu te kanga, i te ra i haere ai ahau ki Mahanaima: otiia i haere mai ki ahau ki raro, ki Horano ki te whakatau i ahau, a oatitia ana a Ihowa e ahau ki a i a; i mea ahau, E kore

ahau e whakamate i a koe ki te hoari. <sup>9</sup> Na kua ia e meinga he harakore, he tangata mohio hoki koe, a e matau ana ki tau e mea ai ki a ia; engari kia heke tona upoko hina ki te rua i runga i te toto.

<sup>10</sup> Na moe ana a Rawiri ki ona matua, a tanumia ana ki te pa o Rawiri. <sup>11</sup> Ko nga ra i kingi ai a Rawiri ki a Iharaira, e wha tekau tau: e whitu nga tau i kingi ai ia ki Heperona, e toru tekau ma toru ano nga tau i kingi ai ki Hiruharama.

<sup>12</sup> Na noho ana a Horomona i runga i te torona o Rawiri, o tona papa, a u rawa tona kingitanga.

<sup>13</sup> Na ka haere a Aronia tama a Hakiti ki a Patehepa whaea o Horomona. A ka mea tera, I haere mai ranei koe i runga i te pai? A ka mea ia, I runga ano i te pai. <sup>14</sup> A i mea ano ia, He kupu taku

ki a koe. A ka mea tera, Korero. <sup>15</sup> Na ka mea ia, E mohio ana koe, i ahau te kingitanga, i anga mai ano nga kanohi o Iharaira katoa ki ahau hei kingi: heoi kua kauparea ketia nei te kingitanga, a

riro ana i toku teina: nona hoki, na Ihowa mai. <sup>16</sup> Na kotahi tenei tono aku ki a koe: kua e

whakakahoretia taku. A ka mea tera ki a ia, Korero. <sup>17</sup> Na ka mea ia, Tena, korero ki a Kingi Horomona, e kore hoki ia e whakakahore ki tau, kia homai e ia a Apihaka Hunami hei wahine

maku. <sup>18</sup> Na ka mea a Patehepa, E pai ana, me korero tau e ahau ki te kingi. <sup>19</sup> Heoi haere ana a Patehepa ki a Kingi Horomona ki te korero ki a ia i ta Aronia. A whakatika ana te kingi ki te whakatau ki a ia, piko ana ki a ia, a ka noho iho ano ki tona torona; a ka meinga e ia kia whakaturia

he torona mo te whaea o te kingi, a noho ana tera ki tona ringa matau. <sup>20</sup> Katahi ka mea ia, Kotahi tenei mea iti hei tononga maku ki a koe: kua taku e whakakahoretia. A ka mea te kingi ki a ia,

Tonoa, e toku whaea; e kore hoki ahau e whakakahore ki tau. <sup>21</sup> A ka mea tera, Kia hoatu a Apihaka

Hunami hei wahine ma tou tuakana, ma Aronia. <sup>22</sup> Na ka whakahoki a Kingi Horomona, ka mea

ki tona whaea, He aha i tonoa ai e koe a Apihaka Hunami ma Aronia? Tonoa ano hoki te kingitanga  
23

mona; ko ia hoki toku tuakana; mona, mo Apiatara tohunga, mo Ioapa tama a Teruia. Katahi ka  
oatitia a Ihowa e Kingi Horomona, ka mea, Kia meatia mai tenei e te Atua ki ahau, me tetahi atu

24  
mea ano, mehemea ehara i te kupu whakamate mona ano tenei i korerotia nei e Aronia. Tena  
ra, e ora ana a Ihowa i whakapumau nei i ahau, i whakanoho nei i ahau ki te torona o Rawiri, o  
toku papa, i mea nei hoki i tetahi whare moku, i te pera me tana i korero ai, ko aianei pu mate ai a

25  
Aronia. Na ka tonoa e Kingi Horomona a Penaia tama a Iehoiara; a rere ana tera ki runga ki a  
ia, na kua mate.

26  
Na ka mea te kingi ki te tohunga ki a Apiatara, Haere ki Anatoto, ki au mara; e tika ana hoki  
te mate mou: otiia e kore ahau e whakamate i a koe i tenei ra, no te mea nau i mau te aaka a te  
Ariki, a Ihowa, i mua i a Rawiri, i toku papa, i mate a no hoki koe i nga mate katoa o toku papa.

27  
Heoi peia ana a Apiatara e Horomona i te mahi tohunga ki a Ihowa; kia tutuki ai te kupu a Ihowa

28  
i korero ai ki Hiro mo te whare o Eri. Na ka tae te rongu ki a Ioapa: i anga hoki a Ioapa ki te  
whai i a Aronia, engari kahore i tahuri ki a Apoharama. Na rere ana a Ioapa ki te tapenakara o

29  
Ihowa, kei te pupuri i nga haona o te aata. A ka korerotia ki a Kingi Horomona, Kua rere a Ioapa  
ki te tapenakara o Ihowa, na, kei te taha o te aata. Katahi ka unga a Penaia tama a Iehoiara e

30  
Horomona, a ka mea ia, Haere, e rere ki runga i a ia. Na ka tae a Penaia ki te tapenakara o Ihowa,  
ka mea ki a ia, Ko te kupu tenei a te kingi, Puta mai ki waho. Ano ra ko tera, Kahore, engari kia  
mate ahau ki konei. Na ka whakahokia te korero e Penaia ki te kingi; i mea ia, Ko te kupu tenei a

31  
Ioap a, ko tana tenei i whakahoki ai ki ahau. Ano ra ko te kingi ki a ia, Meatia tana i korero ai;  
rere atu ki runga ki a ia, ka tanu i a ia; kia whakakahoretia atu ai e koe i ahau, i te whare hoki o

32  
toku papa, nga toto i whakahekea noatia e Ioapa. A ka whakahokia iho e Ihowa ona toto ki runga  
ano ki tona matenga, nana hoki i rere ki runga i nga tangata tokorua, ki nga tangata e tika ake ana,  
e pai ake ana i a ia, a patua iho ki te hoari, kihai ano hoki toku papa, a Rawiri i mohio, ara ki a  
Apanere tama a Nere, ki te rangatira o te ope o Iharaira, raua ko Amaha tama a Ietere, rangatira o

33  
te ope o Hura. Heoi ka hoki iho o raua toto ki runga ki te matenga o Ioapa, ki runga ano ki te  
matenga o ona uri a ake ake; ki a Rawiri ia, ratou ko ona uri, ko tona whare, ko tona torona, ka mau

34  
ta Ihowa rongu a ake ake. Na ko te haerenga o Penaia tama a Iehoiara ki runga, a rere ana ki  
runga ki a ia, whakamatea iho; a tanumia iho ia ki tona whare, ki te koraha.

35  
A meinga ana e te kingi a Penaia tama a Iehoiara hei rangatira ope i muri i a ia; i meinga e

36  
te kingi a Haroko tohunga hei whakakapi mo Apiatara. Na ka tono tangata te kingi ki te karanga  
i a Himeia, a ka mea ki a ia, Hanga he whare mou ki Hiruharama, hei reira noho ai; kua hoki e

37  
haere atu i reira ki hea, ki hea. Ko a te ra hoki e puta ai koe ki waho, e whiti ai i te awa i Kitirono,



38  
kia tino mohio koe, ko te mate kau mou; hei runga ano i tou matenga ou toto. Na ka mea a Hime i  
ki te kingi, He pai tena kupu; ka pena tau pononga me ta toku ariki, me ta te kingi i korero mai na.

39  
Na he maha nga ra i noho ai a Himeiki Hiruharama. A i te mutunga o nga tau e toru ka tahuti  
nga pononga tokorua a Hime i ki a Akihi tama a Maaka kingi o Kata. A ka korerotia ki a Hime i,

40  
Nana, ko au pononga tera, kei Kata. Na ko te whakatikanga o Hime i, whakanohoia ana tana  
kaihe, a haere ana ki Kata, ki a Akihi, ki te rapu i ana pononga: heoi haere ana a Hime i, a kawea

41  
ana mai e ia ana pononga i Kata. Na ka korerotia ki a Horomona, i haere atu a Hime i i Hiruharama

42  
ki Kata, a kua hoki mai ano. Na ka tono tangata te kingi ki te karanga i a Hime i, a ka mea ki a  
ia, Kahore ianei koe i whakaoatitia e ahau ki a Ihowa, me taku whakaatu ano ki a koe, me taku ki  
atu ano, Ko te ra e puta ai koe ki waho, e haere ai ki hea ranei, ki hea ranei, k ia tino mohio koe,

43  
ko te mate kau mou? I mea mai ano koe ki ahau, He pai te kupu i rongo ai ahau. He aha ra koe

44  
te pupuri ai i te oati a Ihowa, i te whakahau i whakahau ai koe e ahau? I mea ano te kingi ki a  
Hime i, E mohio ana koe, e mohio ana ano tou ngakau, ki te kino katoa, ki tau i mea ai ki toku papa,

45  
ki a Rawiri. Na ka whakahokia nei e Ihowa tou kino ki runga ki tou matenga: Ka manaakitia ia

46  
a Kingi Horomona, ka pumau tonu ano te torona o Rawiri i te aroaro o Ihowa a ake ake. Heoi  
ka whakahau te kingi ki a Penaia tama a Iehoiara, haere ana tera ki waho, rere ana ki runga ki a ia,  
na kua mate. Na kua pumau te kingitanga i te ringa o Horomona.

### Chapter 3

1  
Na ka meinga a Horomona hei hunaonga ki a Parao kingi o Ihipa: i tangohia hoki e ia te  
tamahine a Parao mana, a kawea ana ki te pa o Rawiri, kia oti ra ano te whare mona te hanga, me

2  
te whare mo Ihowa, me te taiepa o Hiruharama a tawhio noa. Ko te iwi ia patu whakahere ai i  
runga i nga wahi tiketike; kiano hoki i hanga noatia te whare mo te ingoa o Ihowa a tae noa ki aua

3  
ra. Na i aroha a Horomona ki a Ihowa, i haere i nga tikanga a tona papa, a Rawiri: otiia i patu

4  
whakahere, i tahu whakakakara ki nga wahi tiketike. Na ka haere te kingi ki Kipeono ki te patu  
whakahere ki reira; ko te tino wahi tiketike hoki tera. Kotahi mano nga tahunga tinana i tapaea e  
Horomona ki runga ki taua aata.

5  
I puta a Ihowa ki a Horomona ki Kipeono, he mea moemoea i te po; a ka mea te Atua, Inoi

6  
mai ko te aha kia hoatu e ahau ki a koe. Na ka mea a Horomona, Nui atu te aroha i whakaputaina  
e koe ki tau pononga, ki a Rawiri, ki toku papa, i a ia e haere ana i tou aroaro i runga i te pono, i te

tapu, i te ngakau tika ki a koe; i rongoaia ano e koe tenei aroha nui mona, i a koe i homai nei i  
 tetahi tama ki a ia hei noho ki tona torona, hei penei me tenei inaianei. <sup>7</sup> Na kua meinga nei tau  
 pononga e koe, e Ihowa, e toku Atua, hei kingi i muri i a Rawiri, i toku papa; na, he tamariki rawa  
 ahau; kahore e mohio ki te haere atu, ki te haere mai. <sup>8</sup> Na kei waenganui tenei tau pononga i tau  
 iwi i whiriwhiria e koe, he iwi nui, e kore e taea te tatau, te tuhituhi ranei, i te tini. <sup>9</sup> Heoi homai  
 ki tau pononga he ngakau e mahara ana ki te whakahaere tikanga ki tau iwi, ki te wehe i te pai, i  
 te kino: ko wai hoki e ahei te whakahaere tikanga mo tenei iwi nui au? <sup>10</sup> A pai tonu taua kupu ki  
 te whakaaro o te Ariki; no Horomona i tonono ki tenei mea. <sup>11</sup> Na ka mea te Atua ki a ia, Na, kua  
 tonono nei koe ki tenei mea mau, a kihai i tonono kia maha nga ra mou; kihai ano i tonono ki te taonga  
 mou, kihai hoki i tonono kia whakamatea ou hoariri; heoi tonono ana e koe he mohio ki te whakarongo  
 ki nga whakawa; <sup>12</sup> Nana, kua meatia e ahau tau i korero na: nana, kua hoatu e ahau he ngakau  
 mahara, he ngakau mohio ki a koe; kahore he rite mou i mua atu i a koe; e kore ano e ara ake he  
 rite mou i muri i a koe. <sup>13</sup> A kua hoatu ano e ahau ki a koe nga mea kihai na i tonono mai e koe, te  
 toanga, te kororia; a kahore he tangata i roto i nga kingi hei rite mou i ou ra katoa. <sup>14</sup> A ki te haere  
 koe i aku ara, ki te rongoa ki aku tikanga, ki aku whakahau, ki te pera me te haere a tou papa, a  
 Rawiri, na ka whakarowhaina e ahau ou ra. <sup>15</sup> Na ka oho ake a Horomona, na, he moemoea: a haere  
 ana ia ki Hiruharama, ka tu ki mua i te aaka o te kawenata a Ihowa, tapaea ana e ia he tahunga  
 tinana, a meatia ana e ia he whakahere mo te pai, i tuku hoki i te hakari ma ana tangata katoa.  
<sup>16</sup> Na ka haere mai etahi wahine tokorua ki reira, ki te kingi, he wahine kairau, a tu ana i tona  
 aroaro. <sup>17</sup> Na ka mea tetahi o nga wahine ra, E toku ariki, kotahi ano te whare i noho ai maua ko  
 te wahine nei; a whanau ana ahau, a, i roto ano ia i te whare. <sup>18</sup> A i te toru o nga ra o toku  
 whanautanga, ka whanau ano hoki tenei wahine: i reira tahi ano maua; kahore he tangata ke i a  
 maua i roto i te whare; ko maua tokorua anake i roto i te whare. <sup>19</sup> Na i te po ka mate te tamaiti a  
 te wahine nei; i tamia hoki e ia. <sup>20</sup> Na ka whakatika ia i waenganui po, ka tangohia taku tamaiti i  
 toku taha, i tau pononga e moe ana, a hikitia ana ki tona uma, ko tana tamaiti mate i whakatakotoria  
 e ia ki toku uma. <sup>21</sup> A, i toku marangatanga ake i te ata ki te whakangote i taku tamaiti, na kua  
 mate: a ka ata tirohia e ahau i te ata, na ehara i taku tamaiti i whanau nei i ahau. <sup>22</sup> Na ka mea tetahi  
 o nga wahine, Kahore; engari naku te tamaiti ora, nau te tamaiti mate. A ka mea tenei, Kahore;  
 engari nau te tamaiti mate, naku hoki te tamaiti ora. Na korero pera ana raua i te aroaro o te kingi.  
<sup>23</sup> Ano ra ko te kingi, E mea ana tenei, Naku tenei tamaiti ora, nau te tamaiti mate; e mea ana ano

tenei, Kahore; engari nau te tamaiti mate, naku hoki te tamaiti ora. <sup>24</sup> Na ka mea te kingi, Tikina  
 atu he hoari maku. A ka kawea mai e ratou he hoari ki te aroaro o te kingi. <sup>25</sup> Na ka mea atu te  
 kingi, Tapahia te tamaiti ora kia rua, ka hoatu i tetahi hawhe ki tetahi o nga wahine, i tetahi hawhe  
<sup>26</sup>  
 ki tetahi. Na ko te kianga atu a te wahine nana nei te tamaiti ora ki te kingi, he okaka hoki no  
 tona puku aroha ki tana tamaiti, ko tana meatanga atu, Aue, e toku ariki, hoatu te potiki ora ki a ia;  
 kaula rawa hoki e whakamatea. Ko tetahi ia i mea, Kauaka maku, kauaka hoki mana; tapahia.  
<sup>27</sup>  
 Katahi ka whakahoki te kingi, ka mea, Hoatu te potiki ora ki a ia, kaula rawa e whakamatea: ko  
<sup>28</sup>  
 tona whaea ia. A ka rongoa Iharaira katoa ki te whakawa i whakarite ai te kingi; heoi wehi ana  
 ratou i te kingi: i kite hoki ratou kei roto i a ia to te Atua mohio ki te whakawa.

#### Chapter 4

<sup>1</sup> Na ko Kingi Horomona te kingi o Iharaira katoa. <sup>2</sup> A ko ana rangatira enei; ko Ataria tama  
 a Haroko te tohunga; <sup>3</sup> Ko Erihorepe raua ko Ahia nga kaituhituhi, he tama na Hiha; ko Iehohapata  
 tama a Ahiruru te kaiwhakamahara; <sup>4</sup> Ko Penaia tama a Iehoiara te rangatira ope; ko Haroko raua  
 ko Apiatara nga tohunga; <sup>5</sup> Ko Ataria tama a Natana te rangatira o nga kaitohutohu; ko Tapuru  
 tama a Natana te tohunga, te takahoa o te kingi; <sup>6</sup> Ko Ahihara te rangatira o te whare; ko Aronirama  
 tama a Aparara to nga takoha. Na kotahi tekau ma rua nga kaitohutohu a Horomona mo Iharaira  
 katoa, hei mea kai ma te kingi ratou ko tona whare: kotahi ano te marama mea kai o tetahi, o tetahi,  
<sup>8</sup> i te tau. Na ko o ratou ingoa enei: ko Penehuru te whenua pukepuke o Eparaima; <sup>9</sup> Ko Penerekara  
 i Makaha, i Haarapimi, i PeteHEMEHE, i Erono Petehanana; <sup>10</sup> Ko Penehehere i Arupoto; i a ia  
 Hokoho me te whenua katoa o Hewhere; <sup>11</sup> Ko Pene Apinarapa i te taupae katoa o Roro; i a ia a  
 Tapata tamahine a Horomona hei wahine mana; <sup>12</sup> Ko Paana tama a Ahiruru i Taanaka, i Mekiro,  
 i Peteheana katoa, tera i Taretana i raro i Ietereere, o Peteheana atu a tae noa ki Aperemehora, ki  
<sup>13</sup> tua atu o Iokomeama: Ko Penekepere i Ramoto Kireara: i a ia nga pa o Haira tama a Manahi i  
 Kireara; i a ia nga wahi i Arakopa i Pahana, e ono tekau nga pa nunui, taiepa rawa, tutaki rawa ki  
<sup>14</sup> te parahi: Ko Mahanaima i a Ahinarapa tama a Iro; <sup>15</sup> I Napatari a Ahimaata; i tangohia ano  
 hoki e ia a Pahemata tamahine a Horomona hei wahine mana; <sup>16</sup> I Ahera, i Aroto a Paana tama a

17 Huhai: I Ihakara a Iehohapata tama a Parua: 18 Ko Himeia tama a Eراها i Pineamine: 19 Ko  
Kepere tama a Uri i te whenua o Kireara, i te whenua o Hihona kingi o nga Amori raua ko Oka  
kingi o Pahana; ko ia anake hoki te kaitohutohu o te whenua.

20 Na tini iho a Hura raua ko Iharaira, me te onepu i te taha o te moana te tini, kai ana ratou,  
21 inu ana, hari ana. Na ko Horomona te kingi o nga kingitanga katoa, o te awa a tae noa ki te  
whenua o nga Pirihitini, ki te rohe ra ano o Ihipa: i mau hakari mai ano ratou, a mahi ana i nga mahi

22 a Horomona i nga ra katoa i ora ai ia. Na, ko te kai a Horomona o te ra kotahi, e toru tekau  
23 mehua paraoa pai, e ono tekau mehua paraoa ke; Kotahi tekau nga kau, he mea momona, e rua  
tekau nga kau o nga haerenga kau, kotahi rau nga hipi, apititia iho ki nga hata, ki nga kakera, ki

24 nga ropaka, ki nga manu whangai. Ko ia hoki te kingi i runga i te takiwa i tenei taha katoa o te  
awa, o Tipiha, tae noa ki Kaha, i runga ano i nga kingi katoa o tenei taha o te awa: a he rongu mau

25 i ona taha katoa. A noho hu noa iho a Hura raua ko Iharaira, tera, tera, i raro i tana waina, i tana  
26 piki, no Rana mai ano a Peerehepa atu ana, i nga ra katoa o Horomona. Na e wha tekau mano  
nga turanga a Horomona mo nga hoiho o ona hariata, kotahi tekau ma rua mano nga kaieke hoiho.

27 A na aua kaitohutohu i mea he kai ma Kingi Horomona, ma te hunga katoa e haere ana ki te tepu  
a Kingi Horomona, tenei tangata i tona marama, tenei tangata i tona marama: kahore he mea i kore

28 i a ratou. I kawea mai ano e ratou he parei, he kakau witi, ma nga hoiho, ma nga muera, ki te  
wahi i reira nei nga kaitohutohu, ia tangata ki tana mahi.

29 Na homai ana e te Atua he mohio ki a Horomona, me te mahara nui rawa, me te ngakau nui,  
30 koia ano kei te onepu i te taha o te moana. Nui atu hoki te mohio o Horomona i te mohio o nga

31 tama katoa o te rawhiti, i te mohio katoa o Ihipa. Nui atu hoki tona mohio i to nga tangata katoa;  
i to Etana Eterahi, i to Hemana, i to Karakoro, i to Rarara, ara i to nga tama a Mahoro; a paku ana

32 tona ingoa ki nga iwi katoa a tawhio noa. Na e toru mano nga whakatauki i korerotia e ia; a ko  
33 ana waiata kotahi mano ma rima. I korerotia ano e ia nga rakau, te hita i Repanona, a tae iho

ana ki te hihopa e tupu nei ki te taiepa: i korerotia ano e ia nga kararehe, nga manu, nga mea ngoki,

34 me nga ika. A ka haere mai etahi i nga iwi katoa ki te whakarongo ki te mohio o Horomona, i  
nga kingi katoa o te whenua i rongu nei ki tona mohio.

## Chapter 5

<sup>1</sup> Na ka tonoa e Hirama kingi o Taira ana tangata ki a Horomona; i rongu hoki kua oti ia te  
 whakawahi hei kingi i muri i tona papa: he aroha mau tonu hoki to Hirama ki a Rawiri. <sup>2</sup> A ka tono  
 tangata a Horomona ki a Hirama hei ki atu, <sup>3</sup> E mohio ana koe kihai i taea e toku papa, e Rawiri,  
 te hanga whare mo te ingoa o Ihowa, o tona Atua, i nga whawhai hoki i tetahi taha ona, i tetahi  
 taha, a taea noatia te hoatutanga o ratou e Ihowa ki raro i nga kapu o ona waewae. <sup>4</sup> Ko tenei, kua  
 mea nei a Ihowa, toku Atua, kia okioki ahau i tetahi taha, i tetahi taha; kahore he hoari, kahore hoki  
 he kino e pa mai ana. <sup>5</sup> Na, e mea ana tenei ahau kia hanga he whare mo te ingoa o Ihowa, o toku  
 Atua, kia whakaritea te kupu a Ihowa ki toku papa, ki a Rawiri, tana i mea ai, Ko tau tama e hoatu  
 e ahau i muri i a koe ki runga ki tou torona, mana e hanga te whare mo toku ingoa. <sup>6</sup> Tena ra, mau  
 e whakahau kia tapahia mai he hita maku i Repanona; a ko aku tangata hei hoa mo au tangata; me  
 hoatu ano e ahau ki a koe he utu mo au tangata, kia rite ki nga mea katoa e ki mai ai koe; e mohio  
 ana hoki koe kahore o matou tangata hei rite mo nga Haironi te mohio ki te tapahi rakau. <sup>7</sup> A, i te  
 rongonga o Hirama i nga kupu a Horomona, nui atu tona koa, a ka mea, Kia whakapaingia a Ihowa  
 i tenei ra, nana nei i homai ki a Rawiri he tama mohio hei rangatira mo tenei iwi nui. <sup>8</sup> Na ka tono  
 tangata atu a Hirama ki a Horomona, hei mea, kua rongu atu ahau i te kupu i tukua mai nei e koe  
 ki ahau: ka mahia katoatia e ahau tau e hiahia ana, ara nga rakau, te hita me te kauri. <sup>9</sup> Ma aku  
 tangata e tari mai i Repanona ki te moana: a maku e whakatere atu i te moana ki te wahi e whakarite  
 ai koe ki ahau, maku hoki e mea kia rukea ki uta ki reira, ka tiki mai ai e koe: a ka meatia e koe  
 taku e hiahia ai, ki te homai he kai ma toku whare.

<sup>10</sup> Na ka homai e Hirama he hita, he kauri, ki a Horomona, ana rakau i hiahia ai. <sup>11</sup> A hoatu  
 ana e Horomona ki a Hirama he mehua witi e rua tekau mano hei kai ma tona whare, he mehua  
 hinu e rua tekau, he mea tuki; ko ta Horomona tenei i hoatu ai ki a Hirama i tenei tau, i tenei tau.

<sup>12</sup> A homai ana e Ihowa ki a Horomona he mohio, he pera me tana i korero ai ki a ia: a mau tonu  
 te rongu i waenganui o Hirama raua ko Horomona; a i whakarite kawenata raua tokorua. <sup>13</sup> Na ka  
 whakataka e Horomona etahi tangata i roto i a Iharaira katoa; e toru tekau mano tangata taua  
 whakataka. <sup>14</sup> A unga ana ratou e ia ki Repanona, tekau mano i te marama kotahi, he mea  
 whakawhitiwhiti: kotahi to ratou marama i Repanona, e rua nga marama i te kainga: ko Aronirama  
 hoki te rangatira o taua whakataka. <sup>15</sup> Na e whitu tekau mano nga tangata a Horomona hei mau  
 kawenga, e waru tekau mano hei tarai i runga i nga maunga; <sup>16</sup> Haunga nga rangatira o nga  
 kaitohutohu a Horomona i whakahau nei i te mahi, e toru mano e toru rau aua kaiwhakahau i nga  
 kaimahi i te mahi. <sup>17</sup> Na ka whakahau te kingi, a ka haua e ratou he kohatu nunui, he kohatu utu

18  
 nui, hei kohatu hahau mo te turanga o te whare. Na taraia ana e nga kaihanganga a Horomona, e nga kaihanganga a Hirama, e nga Kipiri, whakapaia ana e ratou nga rakau me nga kohatu hei hanga mo te whare.

## Chapter 6

1 Na i te wha rau e waru tekau o nga tau o te putanga mai o nga tama a Iharaira i te whenua o Ihipa, i te wha o nga tau o te kingitanga o Horomona ki a Iharaira, i marama Tiwhi, ara i te rua o nga marama, ka timata ia te hanga i te whare o Ihowa. 2 Na, ko te whare i hanga nei e Kingi Horomona mo Ihowa, e ono tekau whatianga te roa, e rua tekau whatianga te whanui, a ko te tiketike e toru tekau whatianga. 3 Na, ko te whakamahau i te roro o te temepara o te whare, e rua tekau whatianga te roa, rite tonu ki te whanui o te whare; kotahi tekau whatianga te whanui i mua mai i te whare. 4 Na i hanga e ia etahi matapihi mo te whare, he tu arapaki mau tonu. 5 I hanga ano e ia etahi ruma ki te taha o te whare a whawhe noa, ki nga taha o te whare a whawhe noa, ki o te temepara, a ki o te ahurewa: na hanga ana e ia nga ruma ki te taha a whawhe noa. 6 E rima whatianga te whanui o to raro ruma, e ono whatianga te whanui o to waenganui, e whitu whatianga te whanui o te tuatoru: i whakapiritia hoki etahi pokohiwi ki waho o te whare a taka noa, kei whakaukia nga kurupae ki nga taha o te whare. 7 Na, ko te whare, i tona hanganga, he mea hanga ki te kohatu kua oti noa ake te whakapai, mai te rua kohatu: kahore hoki he hama, he toki ranei, tetahi mea rino ranei i rongona ki te whare i tona hanganga. 8 Ko te tatau o te paparanga ruma o waenga i te taha ki matau o te whare: he mea awhiowhio te arawhata i piki ai ki to waenga paparanga, ma roto atu i to waenga ki te tuatoru. 9 Heoi hanga ana e ia te whare a oti ake; he hita nga kurupae me nga papa i hipokina ai e ia te whare. 10 I hanga e ia he ruma ki nga taha katoa o te whare, e rima whatianga te tiketike; he hita nga rakau i tau iho ai aua ruma ki te whare. 11 Na ko te putanga o te kupu a Ihowa ki a Horomona, i mea ia, 12 Mo te whare e hanga nei e koe, ki te haere koe i runga i aku tikanga, a ka mahi i aku whakaritenga, ka mau hoki ki aku whakahau katoa, ka haere i runga i enei; katahi ka whakapumautia e ahau taku kupu ki a koe, taku i korero ai ki tou papa, ki a Rawiri. 13 A ka noho ahau i waenganui i nga tama a Iharaira, e kore ano e whakarere i taku iwi, i a Iharaira. 14 Heoi hanga ana e Horomona te whare a oti ake. 15 A i hanga e ia nga taha o roto o te whare ki te papa hita; no raro ake a tae noa ki nga papa hipoki, i whakapiritia e ia a roto ki te rakau: a i wharikitia a raro ki te papa kauri. 16 A e rua tekau

nga whatianga o nga taha o te whare ki muri i hanga e ia ki te papa hita i raro a tae noa ki nga taha:  
 i hanga ano ki te pera a roto, hei ahurewa, ara mo te wahi tino tapu. <sup>17</sup> A, ko te whare, ara ko te  
 temepara i mua o te ahurewa, e wha tekau whatianga te roa. <sup>18</sup> A he hita i roto i te whare, he mea  
 whakairo ki te rapupuku, ki te puawai kowhera: he hita katoa; kahore he kohatu i kitea. <sup>19</sup> I  
 whakapaia ano e ia he ahurewa i te whare i roto atu, ki reira tu ai te aaka o te kawenata a Ihowa.  
<sup>20</sup> Na i roto i te ahurewa ko tetahi wahi, e rua tekau whatianga te roa, e rua tekau whatianga te  
 whanui, e rua tekau whatianga te tiketike; a i whakakikoruatia e ia ki te koura parakore; i hipokina  
<sup>21</sup> hoki te aata ki te hita. Heoi whakakikoruatia ana a roto o te whare e Horomona ki te koura  
 parakore: tataitia e ia he mekameka koura ki mua o te ahurewa, whakakikoruatia iho ki te koura.  
<sup>22</sup> I whakakikoruatia ano e ia te whare katoa ki te koura a oti noa te whare katoa: i whakakikoruatia  
 katoatia ano e ia te aata, to te ahurewa, ki te koura. <sup>23</sup> A i hanga e ia mo roto i te ahurewa e rua  
 nga kerupima, he oriwa te rakau, kotahi tekau whatianga te tiketike o tetahi, o tetahi. <sup>24</sup> A e rima  
 whatianga tetahi parirau o te kerupa kotahi, e rima hoki whatianga tetahi parirau o taua kerupa; ko  
 te pito o tetahi parirau a tae noa ki te pito o tetahi, tekau whatianga. <sup>25</sup> Kotahi tekau whatianga te  
 rua o nga kerupima: kotahi te roa, kotahi te ahua o nga kerupima e rua. <sup>26</sup> Kotahi tekau whatianga  
 te tiketike o tetahi kerupima: he pera ano te rua o nga kerupima. <sup>27</sup> A whakanohoia ana e ia nga  
 kerupima ki to roto whare; i roha nga parirau o nga kerupima, a pa ana te parirau o tetahi ki tetahi  
 taha, pa ana te parirau o tetahi ki tetahi taha; me te pa ano o raua parirau ki a raua i waenganui o  
 te whare. <sup>28</sup> I whakakikoruatia ano e ia nga kerupima ki te korua <sup>29</sup> He mea tuhi ano nana nga  
 taha katoa o te whare a tawhio noa, he kerupima nga mea i tuhia iho, he nikau, he puawai kowhera,  
 ki roto, ki waho. <sup>30</sup> I whakakikoruatia ano e ia nga papa o raro o te whare ki te koura, o roto, o  
 waho. <sup>31</sup> Na, ko nga tatau mo te kuwaha o te ahurewa, i hanga e ia ki te oriwa te rakau: i riro i te  
 korupe me nga pou tatau, kotahi o nga wahi e rima o te patu. <sup>32</sup> Heoi hanga ana e ia e rua nga tatau,  
 he oriwa te rakau; tuhia iho e ia, he kerupima nga mea i tuhia, he nikau, he puawai kowhera,  
 whakakikoruatia ana e ia ki te koura; i tohaina iho ano e ia te koura ki runga ki nga kerupima, ki  
 nga nikau. <sup>33</sup> Pera tonu tana hanga i nga pou mo te tatau o te temepara, he oriwa te rakau; ko te  
 matotoru, ko te wha o nga wahi o te patu; <sup>34</sup> A e rua nga tatau, he kauri te rakau; he mea whakakopa  
 nga taha e rua o tetahi tatau, a he mea whakakopa nga taha e rua o tetahi tatau. <sup>35</sup> I tuhia ano e ia  
 he kerupima ki aua tatau, he nikau, he puawai kowhera; a whakakikoruatia iho ki te koura, he mea  
 whakanoho iho ki runga ki te whakairo. <sup>36</sup> I hanga ano e ia to roto marae, e toru nga rarangi o te

37  
 kohatu tarai; me te rarangi kurupae, he hita. No te wha o nga tau i whakatakotoria ai te turanga  
 38  
 o te whare o Ihowa, ko Tiwhi te marama. A no te tekau ma tahi o nga tau, no marama Puru, ara  
 no te waru o nga marama i oti ai nga aha katoa o te whare, ara nga mea katoa i whakaritea mona.  
 E whitu nga tau e hanga ana ia i taua whare.

## Chapter 7

1 Na kotahi tekau ma toru nga tau o Horomona e hanga ana i tona whare ake, na kua oti i a ia  
 2 tona whare katoa. Nana hoki i hanga te whare o te ngahere o Repanona; ko te roa, kotahi rau  
 whatianga, ko te whanui e rima tekau whatianga, ko te tiketike e toru tekau whatianga; ko te turanga  
 3 e wha nga rarangi pou, he mea hita, he kurupae hita ano i runga i aua pou. He hita te hipoki i  
 runga i nga kurupae, i runga hoki era i nga pou e wha tekau ma rima, kotahi tekau ma rima ki te  
 4 rarangi. A e toru nga rarangi o nga matapihi; rite tonu tenei wini ki tenei wini; e toru nga rarangi.  
 5 Na he porowha nga tatau katoa, nga pou tatau me nga matapihi: me te anga ano tenei matapihi ki  
 6 tenei matapihi; e toru nga rarangi. I hanga ano e ia etahi pou hei whakamahau; e rima tekau  
 whatianga te roa, e toru tekau whatianga te whanui: na he whakamahau i mua i era pou: i mua hoki  
 7 i era he pou me nga kurupae matotoru. Na ka hanga e ia he whakamahau mo te torona, mo te  
 wahi e whakarite whakawa ai ia, ara te whakamahau whakawa; he mea hipoki ki te hita i tetahi  
 8 taha o te papa a tae noa ki tetahi taha. Me tona whare i noho ai ia, he marae tona i roto atu i te  
 whakamahau, rite tonu te hanga. I hanga ano e Horomona he whare mo te tamahine a Parao i  
 9 marenatia nei e ia; ko tona rite ko tenei whakamahau. He kohatu utu nui enei katoa, he mea tarai  
 ra ano, he mea ruri ano, he mea kani, a rato, a waho, o te turanga ake ano, ki nga whakapaipai i  
 10 runga; pera tonu i te taha ki waho whaka te marae nui. He kohatu utu nui ano te turanga, he  
 kohatu nunui, he kohatu kotahi tekau nei nga whatianga, he kohatu e waru nei nga whatianga.  
 11 Na a runga, he kohatu utu nui, ko te ruri, kei to nga kohatu tarai, he hita ano hoki. Na, ko te  
 12 marae nui, a taka noa, e toru nga rarangi kohatu, he mea tarai, kotahi hoki te rarangi o nga kurupae  
 hita; i rite ki to roto marae o te whare o Ihowa, me te whakamahau o te whare.  
 13 A i tono tangata a Kingi Horomona ki te tiki atu i a HIRAMA i TAIRA. He tama ia na tetahi  
 14 pouaru o te iwi o Napatari, a ko tona papa he tangata no TAIRA, he kaimahi parahi; ki tonu ia i te  
 whakaaro nui, i te mohio, i te tohunga hoki ki te mahi i nga mahi parahi katoa. Na haere ana ia ki  
 15 a Kingi Horomona ki te mahi i ana mahi katoa. Nana hoki i hanga nga pou parahi e rua, tekau



ma waru whatianga te roa o tetahi, o tetahi; tekau ma rua whatianga o te aho hei pae mo tetahi, mo  
<sup>16</sup>  
tetahi. I hanga hoki e ia etahi pane e rua ki te parahi whakarewa, hei whakanoho ki runga o nga  
<sup>17</sup>  
pou; e rima whatianga te tiketike o tetahi pane, e rima whatianga te tiketike o tetahi pane. Tera  
etahi kupenga, he mea whatu a kupenga, me nga wahiawhi, he mea mekameka, mo nga pane i runga  
<sup>18</sup>  
o nga pou: e whitu mo tetahi pane, e whitu mo tetahi pane. Heoi hanga ana e ia nga pou; e rua  
nga rarangi i tetahi kupenga a ta, a noa, no ka kapi nga pane i runga i nga pou: i pera ano ia ki te  
<sup>19</sup>  
rua o nga pane. Na ko nga pane i runga o nga pou i te whakamahau he mea mahi ki te rengarenga,  
<sup>20</sup>  
e wha nga whatianga. A tera ano he pane i runga i nga pou, a haere whakarunga, i tata tonu ano  
ki te puku i te taha o te kupenga: a e rua rau nga pamekaranete, he mea whakararangi, ki tetahi o  
<sup>21</sup>  
nga pane a taka noa. Na whakatura ana e ia nga pou ki te whakamahau o te temepara: i whakaturia  
e ia te pou ki te taha ki matau, a huaina iho tona ingoa, ko Iakini: i whakaturia ano e ia te pou ki  
<sup>22</sup>  
maui, a huaina iho tona ingoa, ko Poaha. He rengarenga ano te mahi o te pito ki runga o nga  
<sup>23</sup>  
pou: na ka oti te mahi o nga pou. I hanga ano e ia tetahi moana, he mea whakarewa, tekau  
whatianga o tetahi pareparenga ki tetahi pareparenga, he mea porotaka, e rima whatianga tona  
<sup>24</sup>  
tiketike: e toru tekau whatianga o te aho i paea ai. Na i raro iho i tona niao ko etahi puku nana  
i karapoti a taka noa, kotahi tekau ki te whatianga kotahi, i karapotia ai te moana: e rua nga rarangi  
<sup>25</sup>  
o nga puku, i whakarewaina i tona whakarewanga. I tu taua moana i runga i nga kau kotahi tekau  
ma rua, e toru e anga ana ki te raki, e toru e anga ana ki te hauauru, e toru e anga ana ki te tonga,  
e toru e anga ana ki te rawhiti: i runga ano i aua kau te moana e tu ana; na i anga whaka roto a muri  
<sup>26</sup>  
katoa o ratou. Na he whanuitanga ringaringa tona matotoru; rite tonu te hanganga o tona niao  
<sup>27</sup>  
ki to te niao o te kapu, he puawai rengarenga ona; e rua mano ona pati ina ki. I hanga ano e ia  
etahi turanga parahi kotahi tekau, e wha whatianga te roa o tetahi turanga, e wha whatianga te  
<sup>28</sup>  
whanui, e toru whatianga te tiketike. A ko te hanganga tenei o nga turanga: i whai awhi, a i nga  
<sup>29</sup>  
takiwa o nga karapiti nga awhi. A, i nga awhi i nga takiwa o nga karapiti, he raiona, he kau, he  
kerupima; a he turanga o nga karapiti i runga: i raro hoki i nga raiona, i nga kau, ko etahi tautau,  
<sup>30</sup>  
he mea angiangi. A e wha nga wira parahi o tenei turanga, o tenei turanga, me etahi kakau wira  
parahi. I whai pokohiwi ano ona koki e wha; i raro i te takotoranga wai nga pokohiwi, he mea  
<sup>31</sup>  
whakarewa, he tautau i te taha o tetahi, o tetahi. Na, ko tona waha, i roto i te pane a haere  
whakarunga, kotahi te whatianga: he porotaka ia tona waha te mahinga, kei to te turanga, kotahi te  
whatianga me te hawhe: na he tuhi kei tona waha, me nga awhi ano o aua tuhi, he porowha, ehara  
<sup>32</sup>  
i te mea porotaka. A ko nga wira e wha i raro i nga awhi; he mea hono ki te turanga nga kakau

o nga wira: na, ko te ikeike o tetahi wira, kotahi whatianga me te hawhe whatianga. <sup>33</sup> A ko te mahinga o nga wira, kei te mahinga o te wira hariata: ko nga kakau, o waenga, o waho, me nga

titoko o aua wira, he mea whakarewa katoa. <sup>34</sup> A e wha nga pokohiwi i raro i nga koki e wha o te turanga kotahi; ko nga pokohiwi me te turanga, kotahi tonu. <sup>35</sup> Na he hawhe whatianga te ikeike o te wahi porotaka i runga i te turanga: a runga o te turanga, ona karapiti, me ona awahi, kotahi tonu.

<sup>36</sup> Na, ko nga papa o ona karapiti, me ona awahi, tuhia iho e ia ki te kerupima, ki te raiona, ki te nikau, he mea whakarite ki te wahi takoto kau o tetahi, o tetahi, ki nga mea ano i tapiritia. <sup>37</sup> Penei tonu tana hanga i nga turanga kotahi tekau: kotahi tonu te whakarewanga o te katoa, kotahi te nui, kotahi te ahua. <sup>38</sup> Na ka hanga e ia ki te parahi etahi oko horoi kotahi tekau: e wha tekau nga pati o te oko kotahi, ina ki: e wha nga whatianga o tetahi oko, o tetahi oko: kotahi te oko horoi i runga i tetahi, i tetahi, o nga turanga kotahi tekau. <sup>39</sup> A i whakaturia e ia aua turanga, e rima ki te taha ki matau o te whare, e rima ki te taha ki mau i o te whare: i whakaturia ano e ia te moana ki te taha ki matau o te whare, ki te rawhiti, whaka te tonga. <sup>40</sup> Na hanga ana e HIRAMA nga oko horoi, nga koko pungarehu, me nga peihana. A mutu ake ta HIRAMA mahi i nga mahi katoa a KINGI HOROMONA i hanga e ia mo te whare o IHOWA: <sup>41</sup> I nga pou e rua, i nga peihana o nga pane i te pito ki runga o nga pou; i nga kupenga e rua hei kopaki mo nga peihana e rua o nga pane i nga pito ki runga o nga pou; <sup>42</sup> I nga pamekarenete e wha rau mo nga kupenga e rua, e rua rarangi pamekaranete mo te kupenga kotahi, hei kopaki mo nga peihana e rua o nga pane i nga pito ki runga o nga pou; <sup>43</sup> I nga turanga kotahi tekau, i nga oko horoi kotahi tekau i runga o nga turanga; <sup>44</sup> I te moana kotahi, i nga kau kotahi tekau ma rua i raro i te moana; <sup>45</sup> I nga pata, i nga koko pungarehu, i nga peihana. Na, ko enei mea katoa i hanga nei e HIRAMA ma KINGI HOROMONA, ki roto ki te whare o IHOWA, he parahi kanapa katoa. <sup>46</sup> I whakarewaina aua mea e te kingi ki te mania o HORANO ki te wahi onematua i waenganui o HUKOTA, o TARETANA. <sup>47</sup> A i waiho noa iho nga mea katoa e HOROMONA, kahore i paunatia, he tini rawa hoki; kihai hoki i kitea te taimaha o te parahi.

<sup>48</sup> A i hanga e HOROMONA nga oko katoa o te whare o IHOWA: te aata koura, me te tepu, he koura, i runga nei te taro aroaro; <sup>49</sup> Me nga turanga rama he parakore nei te koura, e rima ki te taha ki matau, e rima ki te taha ki mau i o te ahurewa; me nga puawai, me nga rama, me te kokopi koura; <sup>50</sup> Me nga kapu, me nga kuku, me nga peihana, me nga koko, me nga tahu kakara, he parakore te koura; me nga inihi koura mo nga tatau o te whare i roto, ara o te wahi tino tapu, mo nga tatau o te whare, ara o te temepara. <sup>51</sup> Heoi ka oti nga mahi katoa i mahia e KINGI HOROMONA

mo te whare o Ihowa. Na ka kawea e Horomona nga mea i whakatapua e tona papa, e Rawiri, te hiriwa, te koura, nga oko, hoatu ana e ia ki roto ki nga takotoranga taonga o te whare o Ihowa.

## Chapter 8

<sup>1</sup> Katahi ka huihuia e Horomona nga kaumatua o Iharaira ratou ko nga upoko katoa o nga iwi, ko nga rangatira o nga whare o nga matua o nga tama a Iharaira ki a Kingi Horomona, ki Hiruharama, hei mau ake mo te aaka o te kawenata a Ihowa i roto i te p a o Rawiri, ara i Hiona. <sup>2</sup> Na ka huihui nga tangata katoa o Iharaira ki a Kingi Horomona i marama Etanimi, i te hakari, ara i te whitu o nga marama. <sup>3</sup> Na ka tae mai nga kaumatua katoa o Iharaira, a ka mau nga tohunga ki te aaka, <sup>4</sup> A kawea ana te aaka a Ihowa, me te tapenakara o te whakaminenga, me nga oko tapu katoa i roto i te tapenakara, kawea ana e nga tohunga ratou ko nga Riwaiti ki runga. <sup>5</sup> Na kei te tapae a Kingi Horomona, ratou ko te huihui katoa o Iharaira, i huihui nei ki a ia ki te ritenga o te aaka, i nga hipi, i nga kau, kahore nei e taea te korero, te tatau ranei, i te tini. <sup>6</sup> Na kawea ana e nga tohunga te aaka o te kawenata a Ihowa ki tona wahi, ki te ahurewa o te whare, ki te wahi tino tapu, ki raro i nga parirau o nga kerupima. <sup>7</sup> I roha hoki nga parirau e rua o nga kerupima ki runga ki te wahi i te aaka, a taupokina iho a runga o te aaka me ona amo e nga kerupima. <sup>8</sup> I te roroa rawa o nga amo, kitea mai ai nga pito o nga amo i te wahi tapu i te ritenga atu o te ahurewa; otiia kihai i kitea ki waho; kei reira na ano aua mea a tae noa mai ki tenei ra. <sup>9</sup> Kahore he mea i roto i te aaka, ko nga papa kohatu e rua anake i whaowhina nei ki reira e Mohi i Horepa i ta Ihowa whakaritenga kawenata ki nga tama a Iharaira, i to ratou putanga mai i te whenua o Ihipa. <sup>10</sup> A, no te putanga mai o nga tohunga i roto i te wahi tapu, na kua ki te whare o Ihowa i te kapua, <sup>11</sup> A kihai i ahei i nga tohunga te tu ki te mahi, na te kapua hoki: i ki tonu ra hoki te whare o Ihowa i te kororia o Ihowa. <sup>12</sup> Katahi ka korero a Horomona, I mea a Ihowa, ka noho ia ki te pouri nui. <sup>13</sup> Kua oti nei i ahau te hanga he whare hei nohoanga mou, he kainga pumau mou mo ake tonu atu. <sup>14</sup> Na ka tahuri te aroaro o te kingi, a manaakitia ana e ia te huihui katoa o Iharaira; a tu ana te huihui katoa o Iharaira. <sup>15</sup> Na ka mea ia, Kia whakapaingia a Ihowa, te Atua o Iharaira, na tona mangai nei te kupu ki toku papa, ki a Rawiri, a kua rite nei i tona ringa; i mea ia, <sup>16</sup> Mai o te ra i whakaputaina mai ai e ahau taku iwi a Iharaira i Ihipa, kihai i whiriwhiria e ahau he pa i roto i nga iwi katoa o Iharaira e hanga ai he whare hei waihotanga mo toku ingoa; engari i whiriwhiria e ahau a Rawiri hei rangatira mo taku iwi, mo Iharaira. <sup>17</sup> Na i whai ngakau toku papa, a Rawiri ki te hanga whare

18  
mo te ingoa o Ihowa, o te Atua o Iharaira. Otira i mea a Ihowa ki a Rawiri, ki toku papa, I te mea i roto i tou ngakau kia hanga he whare mo toku ingoa, he pai tonu te whakaaro o tou ngakau:

19  
Otiia e kore koe e hanga i taua whare; engari tau tama e puta mai i tou hope, mana e hanga te

20  
whare mo toku ingoa. Na kua mana nei i a Ihowa tana kupu i korero ai ia, a kua ara tenei ahau i muri i a Rawiri, i toku papa, a e noho nei ahau i runga i te torona o Iharaira, e pera ana me ta

21  
Ihowa i korero ai, kua hanga hoki e ahau he whare mo te ingoa o Ihowa, o te Atua o Iharaira. A meinga ana e ahau ki reira he wahi mo te aaka, mo te takotoranga o te kawenata a Ihowa i whakaritea e ia ki o tatou matua i tana whakaputanga mai i a ratou i te whenua o Ihipa.

22  
Na ka tu a Horomona ki mua i te aata a Ihowa, i te aroaro o te huihui katoa o Iharaira,

23  
whewhera tonu ona ringa whaka te rangi: A ka mea, E Ihowa, e te Atua o Iharaira, kahore he Atua hei rite mou i te rangi i runga, i te whenua ranei i raro, e pupuri nei i te kawenata, i te aroha

24  
ki au pononga, ina whakapaua o ratou ngakau ki te haere i tou aroaro: Mau tonu hoki i a koe nga mea i korerotia e koe ki tau pononga, ki toku papa, ki a Rawiri, i korerotia nei e tou mangai ki

25  
a ia, a kua rite nei i tou ringa; koia ano tenei inaianei. Na kia mau, e Ihowa, e te Atua o Iharaira, aiane tau i korero ai ki tau pononga, ki toku papa, ki a Rawiri, i a koe i ki ra, E kore e whakakorea he tangata mau i toku aroaro hei noho ki te torona o Iharaira; mehemea raia ka mahara au tama ki

26  
to ratou ara, kia haere i toku aroaro. Na kia mana aiane, e te Atua o Iharaira, au kupu i korero

27  
ai koe ki tau pononga, ki toku papa, ki a Rawiri. Engari he pono ranei, tera te Atua e noho ki te whenua? nana, kahore e nui hei nohoanga mou te rangi, me te rangi o nga rangi; ka iti rawa iho te

28  
whare kua hanga nei e ahau! He ahakoa ra, kia anga mai koe ki te inoi a tau pononga, ki tana karanga, e Ihowa, e toku Atua, ka whakarongo ki te karanga, ki te inoi e inoi nei tau pononga ki

29  
tou aroaro i tenei ra. Kia titiro mai ou kanohi ki tenei whare i te po, i te ao, ki te wahi i ki ai koe, Ko reira toku ingoa; whakarongo ki te inoi e inoi ai tau pononga ki te ritenga mai o tenei wahi.

30  
Kia rongu hoki koe ki te karanga a tau pononga, a tau iwi hoki, a Iharaira, ina inoi ki te ritenga mai o tenei wahi; na kia rongu koe i te wahi e noho na koe i te rangi, a ka rongu, murua to ratou

31  
hara. Ki te hara tetahi tangata ki tona hoa, a ka meinga he oati hei oati mana, a ka tae mai ia a

32  
ka oati ki mua i tou aata i tenei whare; Tena ra, mau e whakarongo mai i te rangi, e mahi, e whakarite te whakawa a au pononga, mau e whakahe te tangata he, e mea iho tona ara ki runga ano ki tona mahunga; mau ano e whakatika ta te tika, e hoatu ki a ia nga mea e rite ana ki tona tika.

33  
Ki te patua tau iwi, a Iharaira e te hoariri, mo ratou i hara ki a koe, a ka hoki ki a koe, ka whakaae

34  
ki tou ingoa, ka inoi, ka karanga ki a koe i roto i tenei whare: Tena ra, mau e whakarongo i te

rangi, e muru te hara o tau iwi, o Iharaira, e whakahoki mai ratou ki te whenua i homai e koe ki o  
<sup>35</sup>

ratou matua. Ki te tutakina te rangi, a kahore he ua, mo ratou i hara ki a koe; a ka inoi ratou ki  
 te ritenga o tenei wahi, ka whakaae ki tou ingoa, ka tahuri i to ratou hara, no ratou ka whakawhiua

<sup>36</sup>  
 e koe: Tena ra, mau e whakarongo i te rangi, e muru te hara o au pononga, o tau iwi, o Iharaira,  
 ina whakaako koe i a ratou ki te ara pai e haere ai ratou; a homai e koe he ua ki tou whenua, i homai

<sup>37</sup>  
 nei e koe hei kainga pumau mo tau iwi. Ki te mea he matekai to te whenua, he mate uruta, ki te  
 mea he ngingio, he koriri, he mawhitiwhiti ranei, he moka ranei; ki te whakapaea ranei ratou e o

<sup>38</sup>  
 ratou hoariri ki te whenua o o ratou pa; ki te pa mai tetahi whiu, tetahi mate turoro ranei; Ki te  
 mea he inoi, he karanga ranei na tetahi tangata, na tau iwi katoa ranei, na Iharaira, ina mohio ratou  
 ki te mate o tona ngakau, o tona ngakau, a ka wherahia ona ringa ki te ritenga mai o tenei whare:

<sup>39</sup>  
 Tena ra, mau e whakarongo mai i te rangi, i tou wahi e noho na koe, e muru te he, e mahi, e  
 homai ki nga tangata nga mea e rite ana ki nga huarahi katoa o tenei, o tenei, e mohio ana hoki koe  
 ki tona ngakau; ko koe anake nei hoki te mohio ana ki nga ngakau o nga tama katoa a te tangata;

<sup>40</sup>  
 Kia wehi ai ratou i a koe i nga ra katoa e ora ai ratou i runga i te mata o te whenua i homai nei

<sup>41</sup>  
 e koe ki o matou matua. Na, ko te tangata iwi ke, ehara nei i tau iwi, i a Iharaira, a ka tae mai i

<sup>42</sup>  
 te whenua mamao, he whakaaro ki tou ingoa; E rongu hoki ratou ki tou ingoa nui, ki tou ringa  
 kaha, ki tou takakau kua oti te whakamaro; a ka haere, ka inoi ki te ritenga mai o tenei whare;

<sup>43</sup>  
 Mau e whakarongo mai i te rangi, i tou wahi e noho na koe, e mea nga mea katoa i karanga ai  
 te tangata iwi ke ki a koe: kia mohio ai nga iwi katoa o te whenua ki tou ingoa, kia wehi ai i a koe,  
 kia pera ai me tau iwi, me Iharaira; kia mohio ai hoki kua oti tou ingoa te karanga ki runga ki tenei

<sup>44</sup>  
 whare ka oti nei i ahau te hanga. Ki te haere tau iwi ki te whawhai ki tona hoariri, ki nga wahi  
 e tonoa ai ratou e koe, a ka inoi ki a Ihowa ki te ritenga mai o te pa kua whiriwhiria nei e koe, o te

<sup>45</sup>  
 whare kua hanga nei e ahau mo tou ingoa: Tena ra, mau e whakarongo mai i te rangi ki ta ratou

<sup>46</sup>  
 inoi, ki ta ratou karanga, e whakatika hoki ta ratou. Ki te hara ratou ki a koe, kahore hoki he  
 tangata i hapa i te hara, a ka riri koe ki a ratou, ka tuku i a ratou ki te hoa whawhai, a ka whakaraua  
 atu e ratou hei whakarau ki te whenua o te hoa whawhai, ki te wahi tata, ki te wahi mamao ranei;

<sup>47</sup>  
 Na ki te hoki ake to ratou mahara i te whenua i whakaraua atu ai ratou, a ka ripeneta ratou, ka  
 inoi ki a koe i te whenua o o ratou kaiherehere, ka mea, Kua hara matou, kua parori ke ta matou

<sup>48</sup>  
 mahi, kua mahi matou i te kino; A ka tahuri o ratou ngakau katoa, o ratou wairua katoa, ki a koe  
 i te whenua o o ratou hoariri i whakaraua atu ai ratou, a ka inoi ratou ki a koe ki te ritenga mai o  
 to ratou nei whenua i homai e koe ki o ratou matua, ki te pa i whiriwhiria nei e koe, ki tenei whare

<sup>49</sup>  
 kua hanga nei e ahau mo tou ingoa: Tena ra, mau e whakarongo mai i te rangi, i tou wahi e noho

na koe, ki ta ratou inoi, ki ta ratou karanga, mau hoki e whakatika ta ratou, <sup>50</sup> Mau ano e muru te he o tau iwi i hara nei ki a koe, me a ratou mahi tutu katoa i tutu ai ki a koe; meinga ano kia arohaina

ratou e o ratou kaiherehere, kia tohungia hoki e ratou: <sup>51</sup> Ko tau iwi hoki ratou, ko tou wahi tupu

i whakaputaina mai nei e koe i Ihipa, i roto i te oumu rino; <sup>52</sup> Kia titiro mai ai ano ou kanohi ki te karanga a tau pononga, ki te karanga ano a tau iwi, a Ihairaira, ka whakarongo ki a ratou i a ratou

karangatanga katoa ki a koe. <sup>53</sup> Nau hoki ratou i wehe hei taonga tupu mou i roto i nga iwi katoa o te whenua, he kupu hoki nau, na tau pononga, na Mohi i whakapuaki, i tau whakaputanga mai i o matou matua i Ihipa, e te Ariki, e Ihowa.

<sup>54</sup> A, i te mutunga o ta Horomona inoi i tenei inoi katoa, i tenei karanga ki a Ihowa, ka whakatika ake ia i mua i te aata a Ihowa i a ia i tuturi ra i runga i ona turi, me te tuwhera tonu ano ona ringa

whaka te rangi. <sup>55</sup> A ka tu ia, ka manaaki i te huihui katoa o Ihairaira, he nui te reo, a ka mea, <sup>56</sup> Kia whakapaingia a Ihowa nana nei i homai te okiokinga ki tana iwi, ki a Ihairaira, rite tonu ki nga mea katoa i korerotia e ia: hore rawa tetahi kupu i taka o ana mea pai katoa i korerotia e ia, ara e tana

pononga, e Mohi. <sup>57</sup> Hei hoa mo tatou a Ihowa, to tatou Atua, kia pera ano me ia i o tatau matua;

kaua ia e whakarere i a tatou, kaua hoki e mawehe atu i a tatou: <sup>58</sup> Mana e whakaanga o tatou ngakau ki a ia, kia haere i ana ara katoa, kia pupuri i ana whakahau, i ana tikanga, i ana whakaritenga,

i whakahau e ia ki o tatou matua. <sup>59</sup> Na kia tata ki a Ihowa, ki to tatou Atua, i te ao, i te po, enei kupu aku i karanga nei ahau ki a Ihowa, kia whakatikaia ai e ia ta tana pononga, ta tana iwi hoki,

ta Ihairaira e tohe ai, i nga meatanga o tenei ra, o tenei ra: <sup>60</sup> Kia mohio ai nga iwi katoa o te whenua

ki a Ihowa, ko ia te Atua; kahore ke atu. <sup>61</sup> Na kia tapatahi o koutou ngakau ki a Ihowa ki to tatou Atua, kia haere i runga i ana tikanga, kia puritia ana whakahau, kia rite ki to tenei ra.

<sup>62</sup> Na patua iho e te kingi ratou tahi ko Ihairaira katoa he patunga tapu ki te aroaro o Ihowa.

<sup>63</sup> I patua hoki e Horomona he patunga mo te pai, he mea patu nana ma Ihowa, e rua tekau ma rua mano nga kau, kotahi rau e rua tekau mano nga hipi. Na kua taia te kawa o te whare o Ihowa e te

kingi ratou ko nga tama katoa a Ihairaira. <sup>64</sup> I whakatapua ano e te kingi i taua ra a waenganui o te marae i mua i te whare o Ihowa; i tukua hoki e ia ki reira nga tahunga tinana, me nga whakahere totokore, me te ngako o nga whakahere mo te pai: he iti hoki no te aata parahi i te aroaro o I howa hei meatanga mo nga tahunga tinana, mo nga whakahere totokore, mo nga ngako o nga whakahere

mo te pai. <sup>65</sup> I mahia ano he hakari i taua wa e Horomona ratou ko Ihairaira katoa ki te aroaro o Ihowa, o to tatou Atua, he huihuinga nui, no te haerenga atu ki Hamata tae noa ki te awa o Ihipa,

e whitu nga ra, e whitu atu ano nga ra, kotahi tekau ma wha aua r a. <sup>66</sup> I te waru o nga ra ka tukua e ia te iwi kia haere, na ka manaaki ratou i te kingi a haere koa ana ki o ratou teneti, pai tonu hoki

te ngakau i nga mea pai katoa i meinga e Ihowa ki a Rawiri, ki tana pononga, ratou ko tana iwi, ko Iharaira.

## Chapter 9

<sup>1</sup> A, ka oti i a Horomona te whare o Ihowa, me te whare o te kingi, me nga mea katoa i hiahia ai a Horomona, i pai ai kia mahia; <sup>2</sup> Na ko te rua o nga putanga o Ihowa ki a Horomona, pera me tona putanga ki a ia ki Kipeono. <sup>3</sup> Na ka mea a Ihowa ki a ia, Kua rongu ahau i tau inoi, i tau karanga i karanga ai koe i toku aroaro; kua oti i ahau te whakatapu tenei whare kua hanga nei e koe, hei waihotanga iho mo toku ingoa a ake ake; ka tau ano oku kanohi, me toku ngakau, ki reira i nga ra katoa. <sup>4</sup> Na, ko koe, ki te rite tau haere i toku aroaro ki te haere a tou papa, a Rawiri, a ka tapatahi, ka tika te ngakau, ka mahi koe i nga mea katoa i whakahau ai ahau ki a koe, ka pupuri i aku tikanga, i aku whakaritenga; <sup>5</sup> Katahi ahau ka whakapumau i te torona o tou kingitanga ki a Iharaira a ake ake; ka pera me taku i korero ai ki tou papa, ki a Rawiri, i ahau i ki ra, E kore e whakakorea he tangata mau mo te torona o Iharaira. <sup>6</sup> Otiia ki te anga koutou ko a koutou tama, ki te tahuri ke, a kahore e whai i ahau, e pupuri i aku whakahau, i aku tikanga, i hoatu e ahau ki to koutou aroaro, a ka haere, ka mahi ki nga atua ke, ka koropiko ki a ratou, <sup>7</sup> Katahi ka hautopea atu e ahau a Iharaira i te mata o te whenua i hoatu e ahau ki a ratou; a koe tenei whare i whakatapua nei e ahau mo toku ingoa, ka akiritia atu e ahau i toku aroaro, a ka waiho a Iharaira hei whakatauki, hei taunutanga i roto i nga iwi katoa. <sup>8</sup> Na, ahakoa te tiketike o te whare nei, ka miharo ia nga tangata katoa e haere ana na konei, ka whakahi, ka mea, Na te aha tenei mahi a Ihowa ki tenei whenua, ki tenei whare? <sup>9</sup> Na ka whakahoki ratou, Mo ratou i whakarere i a Ihowa, i to ratou Atua, i whakaputa mai nei i o ratou matua i te whenua o Ihipa, a ka tango ki nga atua ke, ka koropiko ki a ratou, ka mahi ki a ratou: no reira i homai ai e Ihowa tenei kino katoa k i runga ki a ratou. <sup>10</sup> Na i te mutunga o nga tau e rua tekau, i te mea ka oti te hanga e Horomona nga whare e rua, te whare o Ihowa, me te whare o te kingi; <sup>11</sup> Na i homai e Hirama kingi o Taira he rakau hita ki a Horomona, he rakau kauri, he koura, ko ana katoa i pai ai; na hoatu ana e Kingi Horomona ki a Hirama e rua tekau nga pa i te whenua o Kariri. <sup>12</sup> A ka haere ake a Hirama i Taira kia kite i nga pa i hoatu nei e Horomona ki a ia, kihai i rite ki tana titiro. <sup>13</sup> Ka mea ia, He aha enei pa i homai nei e koe ki ahau, e toku tuakana? Na huaina iho e ia ko te whenua o Kapuru, koia tenei inaianei. <sup>14</sup> Na tukua atu ana e Hirama ki te kingi kotahi rau e rua tekau nga taranata koura.

<sup>15</sup> Na ko te putake tenei o te whakataka i whakataka ai e Horomona; hei hanga i te whare o  
<sup>16</sup> Ihowa, i tona ake whare, i Miro, i te taiepa o Hiruharama, i Hatoro, i Mekiro, i Ketere. I haere  
 mai hoki a Parao kingi o Ihipa, a horo ana a Ketere i a ia, tahuna ana e ia ki te ahi, patua iho hoki  
 nga Kanaani e noho ana i te pa, a homai ana hei kaipakuha ki tana tamahine, ki te wahine a  
<sup>17</sup> Horomona. Na hanga ana e Horomona a Ketere me Petehorono ki raro, <sup>18</sup> Me Paarata, me  
<sup>19</sup> Taramoro i te koraha, i taua whenua, Me nga pa taonga katoa o Horomona, me nga pa mo nga  
 hariata, me nga pa mo nga kaieke hoiho, me ta Horomona i hiahia ai kia hanga ki Hiruharama, ki  
<sup>20</sup> Repanona, ki te whenua katoa hoki o tona kingitanga. Ko nga morehu katoa o nga Amori, o nga  
<sup>21</sup> Hiti, o nga Perihi, o nga Hiwi, o nga Iepuhi ehara nei i nga tama a Iharaira; Ko a ratou tamariki  
 i mahue i muri i a ratou i te whenua, kihai nei i taea e nga tama a Iharaira te huna rawa, na  
<sup>22</sup> whakatakohatia ana ratou e Horomona, he mahi te takoha, a tae noa ki tenei ra. Ko nga tama ia  
 a Iharaira, kihai i meinga e Horomona hei kaimahi; ko ratou hoki hei tangata whawhai, hei tangata  
 mana, hei rangatira mana, hei kaiwhakahauhau mana, hei rangatira ano mo ana hariata, mo ana  
<sup>23</sup> kaieke hoiho. Ko nga rangatira enei o nga kaitohutohu, o nga rangatira o te mahi o Horomona,  
<sup>24</sup> e rima rau e rima tekau, he rangatira, mo nga kaimahi i te mahi. Na, kua riro atu te tamahine a  
<sup>25</sup> Parao i te pa o Rawiri ki runga, ki te whare i hanga e ia mona: katahi a Miro ka hanga e ia. Na  
 i te tau kotahi, e toru nga tapaenga a Horomona i nga tahunga tinana, i nga whakahere mo te pai ki  
 runga ki te aata i hanga e ia ma Ihowa, i tahuna ano e ia te whakakakara ki tera i te aroaro o Ihowa.  
<sup>26</sup> Heoi kua oti te whare i a ia. Na he maha nga kaipuke i hanga e Kingi Horomona ki Ehiono  
<sup>27</sup> Kepere, ki tera i Eroto i te taha o te Moana Whero, i te whenua o Eroma. A tonoa ana e Hirama  
 ana tangata ki runga ki nga kaipuke, he kaimahi kaipuke, he mohio ki te moana, hei hoa mo nga  
<sup>28</sup> tangata a Horomona. Na ka rere ratou ki Opira, a utaina ana he koura i reira, e wha rau e rua  
 tekau taranata, a kawea ana ki a Kingi Horomona.

## Chapter 10

<sup>1</sup> A, no te rongonga o te Kuini o Hepa ki te rongong o Horomona, ki tana i mea ai mo te ingoa o  
<sup>2</sup> Ihowa, ka haere mai ia ki te whakamatau i a ia ki nga kupu pakeke. Na haere mai ana ia ki  
 Hiruharama, nui atu hoki te tira, he kamera e waha ana i nga mea kakara, i tona nui o te koura, i te  
 kohatu utu nui; na, i tona haerenga ki a Horomona, ka korerotia e ia ki a ia nga mea katoa i roto i



<sup>3</sup> tona ngakau. A whakaaturia ana e Horomona ki a ia te tikanga o ana kupu katoa, kahore he kupu  
i ngaro i te kingi, i kore te whakaatu ki a ia. <sup>4</sup> A, no te kitenga o te Kuini o Hepa i te mohio katoa  
o Horomona, i te whare hoki i hanga e ia, <sup>5</sup> I te kai o tana tepu, i te nohoanga o ana tangata, i te  
turanga o ana kaimahi, i o ratou kakahu, i ana kairiringi waina, i tona pikitanga i piki atu ai ki te  
whare o Ihowa, kore ake he wairua i roto i a ia. <sup>6</sup> A ka mea ia ki te kingi, Pono tonu nga mea i  
rongo ai ahau i toku whenua mo au mahi, mo tou mohio. <sup>7</sup> Heoi kihai ahau i whakapono ki aua  
korero, a tae noa mai ahau, kite noa oku kanohi. Nana, kihai te hawhe i korerotia ki ahau; nui atu  
<sup>8</sup> tou mohio, tou pai, i te rongo i rongo ai ahau. Ano te hari o au tangata, ano te hari o enei pononga  
<sup>9</sup> au e tu tonu nei i tou aroaro, e whakarongo nei ki tou mohio! Kia whakapaingia a Ihowa, tou  
Atua i whakaahuareka nei ki a koe, i homai nei i a koe ki runga ki te torona o Iharaira; he aroha  
mau tonu hoki no Ihowa ki a Iharaira, na meinga ana koe e ia hei kingi, hei nahi i te whakawa, i te  
<sup>10</sup> tika. Na homai ana e ia ki te kingi kotahi rau e rua tekau taranata koura, tona tini o nga mea  
kakara, me nga kohatu utu nui; kahore he mea kakara i tae mai i muri nei hei rite te nui ki enei i  
<sup>11</sup> homai nei e te Kuini o Hepa ki a Kingi Horomona. A na nga kaipuke o HIRAMA nana nei i mau  
mai te koura i Opira, na reira ano i kawe mai nga raku aramuka me nga kohatu utu nui i Opira, tona  
<sup>12</sup> tini. Na ka hanga aua rakau aramuka e te kingi hei pou mo te whare o Ihowa, mo te whare ano  
o te kingi, he hapa, hei hatere, he mea ma nga kaiwaiata: kahore ano i tae noa mai he rakau aramuka  
<sup>13</sup> hei rite, kahore hoki i kitea i mua, a taea noatia tenei ra. Na ka hoatu e Kingi Horomona ki te  
Kuini o Hepa nga mea katoa i pai ai ia, ana hoki i tono ai, he tapiri ki runga ki nga mea i hoatu e  
te ringa o Kingi Horomona ki a ia. Heoi ka tahuri ia, a haere ana ratou ko ana tangata ki tona whenua.  
<sup>14</sup> Na, ko te taimaha o te koura i tae ki a Horomona i te tau kotahi, e ono rau e ono tekau ma  
<sup>15</sup> ono taranata koura; Haunga a nga kairapu taonga, i mau mai ai me nga taonga a nga kaihokohoko,  
a nga kingi katoa o Arapia, a nga kawana o te whenua. <sup>16</sup> Na ka hanga e Kingi Horomona etahi  
<sup>17</sup> pukupuku, e rua rau, he mea patu te koura: e ono rau nga hekere koura ki te pukupuku kotahi. A  
i hangaia e ia etahi pukupuku iti iho e toru rau, he mea patu te koura: e toru pauna koura ki te  
<sup>18</sup> pukupuku kotahi: a hoatu ana e te kingi ki te whare o te ngahere o Repanona. A i hanga e te  
<sup>19</sup> kingi tetahi torona nui ki te rei, whakakikoruatia iho ki te koura pai rawa. E ono nga kaupae ki  
te torona, he mea porotaka a runga o muri o te torona; he okiokinga ringa ano kei te wahi e nohoia  
<sup>20</sup> ana, i tetahi taha, i tetahi taha, e rua ano nga raiona e tu ana i te taha o nga okiokinga. Kotahi  
tekau ma rua hoki nga raiona i reira e tu ana i tetahi taha, i tetahi taha, i runga i nga kaupae e ono;

<sup>21</sup> kahore he mea pera i hanga i tetahi atu rangatiratanga. Na, ko nga oko inu katoa a kingi Horomona, he koura kau; me nga oko katoa o te whare o te ngahere o Repanona, he koura parakore;

<sup>22</sup> kahore he hiriwa: kihai tera i kiia he mea nui nga ra o Horomona. He maha hoki a te kingi kaupuke ki Tarahihi i te moana, he mea huihui ki nga kaupuke a Hirama: kotahi te unga mai i nga tau e toru o nga kaupuke o Tarahihi, hei kawē mai i te koura, i te hiriwa, i te rei, i nga makimaki,

<sup>23</sup> me nga pikake. Na nui atu a Kingi Horomona i nga kingi katoa o te whenua te whai taonga, te

<sup>24</sup> mohio. I whaia ano a Horomona e nga whenua katoa, kia rongō ai ratou i tona mohio i homai

<sup>25</sup> nei e te Atua ki tona ngakau. Me te kawē mai ano ratou i tana hakari, i tana hakari, i nga oko hiriwa, i nga oko koura, i nga kakahu, i nga mea mo te whawhai, i nga kakara reka, i nga hoiho, i

<sup>26</sup> nga muera, he mea tatau a tau tonu. Na ka amia e Horomona he hariata, he kaieke hoiho: kotahi mano e wha rau ana hariata, tekau ma rua mano nga kainoho hoiho, he mea wehe nana ki nga pa

<sup>27</sup> hariata, ki te kingi hoki, ki Hiruharama. Na meinga ana te hiriwa e te kingi ki Hiruharama kia

<sup>28</sup> rite ki te kohatu; i meinga ano e ia nga hita kia rite ki te hokamora i te raorao te tini. A, ko nga hoiho o Horomona, he mea mau mai i Ihipa; na nga kaihoko a te kingi i tango kahui mai, tena kahui

<sup>29</sup> me tona utu. Na e ono rau nga hekere hiriwa i riro ai te hariata i puta ai i Ihipa, kotahi rau e rima tekau i riro ai te hoiho: ko ratou hei kawē mo nga kingi katoa o nga Hiti, mo nga kingi o Hiria.

## Chapter 11

<sup>1</sup> Otiia he tini nga wahine ke i arohaina e Kingi Horomona, he Moapi, he Amoni, he Eromi, he Haironi, he Hiti, me te tamahine ano a Parao;

<sup>2</sup> No nga iwi i mea ra a Ihowa ki nga tama a Ihairaira, kua e haere atu ki a ratou, kua hoki ratou e haere mai ki a koutou: he pono ma ratou o koutou

<sup>3</sup> ngakau e whakaanga ke ki te whai i o ratou atua: piri tonu, aroha tonu a Horomona ki enei. Na e whitu rau ana wahine rangatira, e toru rau nga wahine iti: a whakaanga ketia ana tona ngakau e ana

<sup>4</sup> wahine. Na, koroheke rawa ake a Horomona, kua whakaanga ketia tona ngakau e ana wahine, kua whai i nga atua ke; kihai hoki tona ngakau i tapatahi ki a Ihowa, ki tona Atua, kihai i rite ki te

<sup>5</sup> ngakau o Rawiri, o tona papa. I haere hoki a Horomona i whai i a Ahatorete atua o nga Haironi,

<sup>6</sup> i a Mirikomo hoki, i te mea whakarihariha a nga Amoni. Na kua he ta Horomona mahi ki te aroaro

<sup>7</sup> o Ihowa, kihai hoki i anga nui ki te whai i a Ihowa, kihai i pera me tona papa, me Rawiri. Na ka hanga e Horomona he wahi tiketike mo ta Moapa mea whakarihariha, mo Kemoho, ki runga ki te

maunga e anga ana ki Hiruharama; mo Moreke hoki, mo te mea whakarihariha a nga tama a Amona.

8

Pera tonu tana i mea ai mo ana wahine ke katoa, i tahu whakakakara nei, i patu whakahere hoki ki o ratou atua.

9

Na ka riri a Ihowa ki a Horomona, no te mea kua anga ke tona ngakau i a Ihowa, i te Atua o

10

Iharaira, ka rua nei ona putanga ki a ia, Me te ako i tenei kupu ki a ia kia kua ia e haere ki te

11

whai i nga atua ke: otiia kihai i mau i a ia ta Ihowa i whakahau ai. Na reira ka mea a Ihowa ki a Horomona, I te mea ka penei tau mahi, kahore nei i mau i a koe taku kawenata me taku tikanga i akona e ahau ki a koe, ka haea rawatia atu e ahau te kingitanga i a koe, a ka hoatu ki tau tangata.

12

Otiia e kore tenei e meatia e ahau i ou ra, he whakaaro hoki ki tou papa, ki a Rawiri: ka haea atu

13

ia e ahau i te ringa o tau tama. Otiia e kore e haea atu e ahau te kingitanga katoa; kotahi te iwi e hoatu e ahau ki tau tama, he whakaaro ki a Rawiri, ki taku pononga, ki Hiruharama i whiriwhiria nei e ahau.

14

Na ka whakaarahia ake e Ihowa he hoariri mo Horomona, ko Harara Eromi: he uri ia no te

15

kingi i Eroma. Tera, i a Rawiri i Eroma, ka haere atu a Ioapa rangatira o te ope ki te tanu i te

16

hunga i patua, kua oti hoki nga tane katoa o Eroma te patu e ia; E ono hoki nga marama i noho

17

ai a Ioapa ratou ko Iharaira katoa ki reira, a poto noa nga tane katoa o Eroma te hautope atu; Na ka rere a Harara ratou ko etahi Eromi, he tangata na tona papa, haere ana ki Ihipa: a e nohinohi

18

tonu ana a Harara. A ka whakatika atu ratou i Miriana, a ka tae ki Parana: na ka tangohia e ratou etahi tangata o Parana hei hoa mo ratou, a haere ana ki Ihipa ki a Parao kingi o Ihipa; a na tera i

19

hoatu he whare mona, i whakarite he kai mana; i hoatu ano he whenu a ki a ia. Na ka manakohia nuitia a Harara e Parao, a hoatu ana e ia hei wahine mana te teina o tana wahine ake, te teina o te

20

Kuini, o Tahapene. Na ka whanau he tama mana i te teina o Tahapene, ko Kenupata, a na Tahapene ano i whakamutu tana kai u i roto i te whare o Parao: na noho ana a Kenupata i te whare

21

o Parao i roto i nga tama a Parao. A, i te rongonga o Harara i Ihipa, kua takoto a Rawiri ki ona matua, kua mate hoki a Ioapa rangatira ope, ka mea a Harara ki a Parao, Tukua ahau kia haere ki

22

toku whenua. Na ka mea a Parao ki a ia, I hapa koe i te aha i a koe i ahau nei, i whai ai koe kia

23

haere ki tou whenua? Na ko tana kianga, Kahore: he ahakoa ra tukua ahau kia haere. I ara ano i te Atua he hoariri mona, a Retona tama a Eriara, i rere nei i tona ariki i a Hararetere kingi o Topa.

24

Na ka huihuia e ia etahi tangata, a ka meinga ia hei rangatira ropu, i te mea e patua ana ratou e Rawiri: na haere ana ratou ki Ramahiku, a noho ana i reira, a ko ratou hei kingi mo Ramahiku.

25

A he hoariri ia ki a Iharaira i nga ra katoa o Horomona, haunga hoki ta Harara kino i mea ai: heoi whakarihariha ana ia ki a Iharaira, ko ia ano te kingi o Hiria.

26

Me Ieropoama ano tama a Nepata, he Eparati, no Terera, he tangata na Horomona, ko te ingoa o tona whaea, ko Terua, he wahine pouaru, i ara ano tona ringa ki te kingi. <sup>27</sup> A ko te take tenei i ara ai tona ringa ki te kingi: e hanga ana a Horomona i Miro, e tutaki ana i nga wahi pakaru

28

o te pa o tona papa, o Rawiri. Na he marohirohi a Ieropoama, he toa: a ka kite a Horomona i taua taitama he uaua ki te mahi, na meinga ana ia e ia hei kaitirotiro mo nga mahi katoa a te whare

29

o Hohepa. Na i taua wa ka puta a Ieropoama i Hiruharama, a ka tutaki a Ahia Hironi, te poropiti ki a ia i te ara; na kua kakahuria e Ahia he kakahu hou; a ko raua tokorua anake i te parae. <sup>30</sup> Na

31

ka hopukia e Ahia tona kakahu hou, haea ana kia tekau ma rua nga wahi: A ka mea atu ia ki a Ieropoama, kia tekau nga wahi e tangohia e koe mau: ko te kupu hoki tenei a Ihowa, a te Atua o Iharaira, Nana, ka haea e ahau te kingitanga i te ringa o Horomona, a tekau nga iwi e hoatu ki a

32

koe; Kotahi ia te iwi mana; he whakaaro ki taku pononga, ki a Rawiri, he whakaaro ki

33

Hiruharama, ki te pa i whiriwhiria e ahau i roto i nga iwi katoa o Iharaira; Mo ratou i whakarere i ahau, a koropiko ana ki a Ahatorete atua o nga Haironi, ki a Kemoho atua o nga Moapi, ki a Mirikomo atua o nga tama a Amona; kihai hoki i haere i aku ara, i mahi i te mea tika ki taku titiro,

34

i pupuri hoki i aku tikanga, i aku whakaritenga, a kihai i pera me tona papa, me Rawiri. Otiia e kore e tangohia e ahau te kingitanga katoa i tona ringa; engari ka whakarangatira ahau i a ia i nga ra katoa e ora ai ia, he whakaaro ki taku pononga, ki a Rawiri, i whiriwhiria nei e ahau, mona i

35

pupuri i aku whakahau, i aku tikanga. Engari ka tangohia e ahau te kingitanga i te ringa o tana

36

tama, a ka hoatu ki a koe, ara tekau nga iwi. Kotahi te iwi e hoatu e ahau ki tana tama, hei rama ma taku pononga, ma Rawiri ki toku aroaro i nga ra katoa ki Hiruharama, ki te pa i whiriwhiria e

37

ahau hei waihotanga iho mo toku ingoa. A ka tangohia koe e ahau, a hei kingi koe, ka rite ki

38

nga mea katoa i hiahia ai tou ngakau, a hei kingi koe mo Iharaira. Na, tenei ake, ki te rongu koe i nga mea katoa e whakahau ai ahau ki a koe, a ka haere i aku ara, ka mahi i te mea e tika ana ki taku titiro, ka pupuri i aku tikanga, i aku whakahau, ka pera me ta taku pononga, me ta Rawiri i mea ai, na hei hoa ahau mou, ka hanga hoki e ahau tou whare kia pumau, ka peratia me to Rawiri

39

i hanga ra e ahau; a ka hoatu a Iharaira ki a koe. A ka whakawhiua e ahau nga uri o Rawiri mo

40

tenei mea nei; otiia ehara i te mea mo ake tonu atu. Na ka whai a Horomona kia whakamatea a Ieropoama; otiia i whakatika a Ieropoama, a rere ana ki Ihipa, ki a Hihaka kingi o Ihipa, a i Ihipa ia a mate noa a Horomona.

<sup>41</sup> Na, ko era atu mahi a Horomona, ko nga mea katoa i mea ai ia, me ona whakaaro nui, kahore ianei i tuhituhia ki te pukapuka o nga mahi a Horomona? <sup>42</sup> Na, ko te roa o te kingitanga o Horomona ki Hiruharama ki a Iharaira katoa, e wha tekau tau. <sup>43</sup> Na ka moe a Horomona ki ona matua, a tanumia ana ki te pa o Rawiri, o tona papa; a ko Rehopoama, ko tana tama, te kingi i muri i a ia.

## Chapter 12

<sup>1</sup> Na ka haere a Rehopoama ki Hekeme: kua tae hoki a Iharaira katoa ki Hekeme ki te whakakingi i a ia. <sup>2</sup> A, no te rongonga o Ieropoama tama a Nepata, i Ihipa na hoki ia, i rere hoki ia i te aroaro o Kingi Horomona, na noho ana a Ieropoama ki Ihipa; <sup>3</sup> A ka tonono tangata ratou ki te tiki atu i a ia: na ka haere a Ieropoama ratou ko te whakaminenga katoa o Iharaira, ka korero ki a Rehopoama, ka mea, <sup>4</sup> He pakeke te ioka i meatia e tou papa ki a matou: na mau e whakamama te mahi pakeke a tou papa, me tana ioka taimaha i meatia e ia ki a matou, a ka mahi matou ki a koe. <sup>5</sup> Na ka mea ia ki a ratou, Haere, kia toru nga ra, ka hoki mai ano ki ahau. Na haere ana te iwi. <sup>6</sup> Na ka runanga a Kingi Rehopoama ki nga kaumatua i tu ra i te aroaro o tona papa, o Horomona, i a ia i te ora, ka mea, He aha ki to koutou whakaaro he kupu hei whakahokinga atu maku ki tenei iwi? <sup>7</sup> Na ka korero ratou ki a ia, ka mea, Ki te mea hei pononga koe ma tenei iwi i tenei ra, a ka mahi ki a ratou, a ka pai nga korero e korerotia e koe ki a ratou, na ko ratou hei pononga mau i nga ra katoa. <sup>8</sup> Otiia whakarerea ake e ia te whakaaro o nga kaumatua i hoatu ai ki a ia, a runanga ana ki nga taitama i kaumatua ngatahi nei me ia, i tu nei ki tona aroaro. <sup>9</sup> I mea ia ki a ratou, Ki to koutou whakaaro he aha te kupu e whakahoki ai tatou ki tenei hunga i korero nei ki ahau, i mea nei, Whakamamakia te ioka i meatia mai ra e tou papa ki a matou? <sup>10</sup> Na ka korero ki a ia nga taitama i kaumatua ngatahi me ia, ka mea, Kia penei tau ki atu ki tenei hunga i korero nei ki a koe, i mea nei, I whakataimahatia e tou papa to matou ioka, na kia mama tau ki a matou; kia penei tau ki atu ki a ratou, Ko toku maikara iti nui ke atu i te hope o toku papa. <sup>11</sup> Na i whakawaha e toku papa he ioka taimaha ki a koutou; maku ia e tapiri ki to koutou ioka; he wepu ta toku papa i whiu ai i a koutou; maku ia koutou e whiu ki te kopiona. <sup>12</sup> Na ka tae a Ieropoama ratou ko te iwi katoa ki a Rehopoama i te toru o nga ra, i ta te kingi i whakarite ai, i mea ai, Hoki mai ano ki ahau i te toru o nga ra. <sup>13</sup> A pakeke tonu ta te kingi i whakahoki ai; i whakarerea hoki e ia te whakaaro i whakaaro ai nga kaumatua;

14

A rite tonu ki to nga taitamariki whakaaro tana i korero ai ki a ratou; i mea ia, I whakataimahatia to koutou ioka e toku papa, maku ia e tapiri ki to koutou ioka: he wepu ta toku papa i whiu ai i a

15

koutou; maku ia koutou e whiu ki te kopiona. Heoi kihai te kingi i rongu ki te iwi; na Ihowa hoki te take kia mana ai tana kupu i korero ai a Ihowa, ara ta Ahia Hironi ki a Ieropoama tama a Nepata.

16

A, no te kitenga o Iharaira katoa kihai te kingi i rongu ki ta ratou, ka utua e te iwi ta te kingi; i mea ratou, Ko te aha ianei ta tatou wahi i roto i a Rawiri? kahore nei hoki o tatou wahi tupu i roto i te tama a Hehe: ki o koutou teneti, e Ih araira! na, kia whai kanohi ki tou whare, e Rawiri! Na

17

haere ana a Iharaira ki tona teneti, ki tona teneti. Ko nga tama ia a Iharaira e noho ana i nga pa

18

o Hura, ko Rehopoama hei kingi mo ratou. Na ka tono a Kingi Rehopoama i te rangatira takoha, i a Aroama; a akina ana ia e Iharaira katoa ki te kohatu, mate rawa. Na hohoro tonu te eke o Kingi

19

Rehopoama ki tona hariata, a rere ana ki Hiruharama. Na kua tahuri ke a Iharaira i te whare o

20

Rawiri a taea noatia tenei ra. A, no te rongonga o Iharaira katoa kua hoki mai a Ieropoama, na ka tono tangata ratou ki te tiki i a ia ki te huihui, a meinga ana ia hei kingi mo Iharaira katoa: kahore

21

he mea i whai i te whare o Rawiri, ko te iwi anake o Hura. Na kua tae a Rehopoama ki Hiruharama, a huihuia ana e ia te whare katoa o Hura, me te iwi o Pineamine, kotahi rau e waru tekau mano, he hunga whiriwhiri, he hunga whawhai, ki te whawhai ki te whare o Iharaira, kia

22

hoki ai te kingitanga ki a Reho poama tama a Horomona. Na ka puta te kupu a te Atua ki a

23

Hemaia, tangata a te Atua; i mea ia, Korero ki a Rehopoama tama a Horomona kingi o Hura, ki

24

te whare katoa ano o Hura rau ko Pineamine, ki era atu hoki o te iwi, mea atu, Ko te kupu tenei a Ihowa, Kei haere ki runga, kei whawhai ki o koutou tuakana, ki nga tama a Iharaira. Hoki atu ki tona whare, ki tona whare; naku hoki tenei mea. Na rongu tonu ratou ki te kupu a Ihowa, a hoki ana, haere ana, pera ana me ta Ihow a i ki ai.

25

Na ka hanga e Ieropoama a Hekeme ki te whenua pukepuke o Eparaima, a hoho ana i reira:

26

i haere atu ano ia i teira, a hanga ana e ia a Penuere. A ka mea a Ieropoama i tona ngakau,

27

Akuanei hoki ai te kingitanga ki te whare o Rawiri: Ki te haere tenei iwi ki te mea whakahere ki te whare o Ihowa ki Hiruharama, na ka hoki te ngakau o tenei iwi ki to ratou ariki, ki a Rehopoama

28

kingi o Hura: na ka patu ratou i ahau, a ka hoki ki a Rehopoama kingi o Hura. Na ka hanga whakaaro te kingi, a e rua nga kuao kau i hanga e ia ki te koura. Na ka mea ia ki a ratou, He pakeke rawa ta koutou haere ki Hiruharama: nana, ou atua na, e Iharaira, nana nei koe i kawe mai i te

29

whenua o Ihipa! Na whakaturia ana tetahi e ia ki Peteere; ko tetahi hoki i waiho ki Rana. Na

30

ka tupu te hara i taua mea; i haere hoki te iwi ki te aroaro o tetahi, ki Rana, koropiko ai. <sup>31</sup> I hanga ano e ia nga whare o nga wahi tiketike, a meinga ana hei tohunga o te iwi katoa noa iho, ehara nei i nga tama a Riwai. <sup>32</sup> I whakaritea ano e Ieropoama he hakari i te waru o nga marama i te tekau ma rima o nga ra o te marama, he pera me ta Hura hakari; i tapae whakahere ano ia ki runga ki te aata. Ko tana hanga ano tenei i Peteere, he patu whakahere ki nga kua o hanga e ia: i whakaturia ano e ia ki Peteere he tohunga mo nga wahi tiketike i hanga nei e ia. <sup>33</sup> I tapae whakahere ano ia ki runga ki te aata i hanga e ia ki Peteere i te tekau ma rima o nga ra o te waru o nga marama, ara i te marama i kitea iho e tona ngakau ano; a whakaritea ana e ia he hakari ma nga tama a Iharaira. Heoi tapae whakahere ana ia ki runga ki te aata, tahu ana i te whakakakara.

### Chapter 13

<sup>1</sup> Na ka tae mai tetahi tangata a te Atua i Hura ki Peteere, he mea ki na Ihowa: a i te tu a Ieropoama i te taha o te aata, e tahu whakakakara ana. <sup>2</sup> Na karangatia ana e ia ta Ihowa kupu ki te aata; i mea ia, E te aata na, e te aata na, ko ta Ihowa kupu tenei, Nana, tera e whanau tetahi tamaiti o te whare o Rawiri, ko Hohia tona ingoa, a ka tapaea e ia ki runga ki a koe nga tohunga o nga wahi tiketike e tahu whakakakara nei ki runga ki a koe; a ka tahuna he wheua tangata ki runga ki a koe. <sup>3</sup> I hoatu ano e ia he tohu i taua ra, i mea, Ko te tohu tenei i korerotia e Ihowa, Nana, ka koara te aata, a ka maringi nga pungarehu o runga. <sup>4</sup> A, no te rongonga o te kingi i te kupu a te tangata a te Atua i karangatia nei e ia ki te aata i Peteere, ka totoro te ringa o Ieropoama i te aata ka mea ia, Hopukia ia. Na memenge ake tona ringa i totoro nei ki a ia, kihai hoki i taea te whakaho ki mai ki a ia. <sup>5</sup> Na kua koara te aata; maringi ake nga pungarehu i runga i te aata, i rite tonu ki te tohu i homai e te tangata a te Atua, ki ta Ihowa i korero ai. <sup>6</sup> Na ka oho te kingi, ka mea ki te tangata a te Atua, Tena ra, karanga atu ki te aroaro o Ihowa, o tou Atua, ka inoi moku, kia whakahokia mai toku ringa ki ahau. Na ka karanga te tangata a te Atua ki te aroaro o Ihowa, a ka whakahokia te ringa o te kingi ki a ia, ka pera me to mua. <sup>7</sup> Na ka mea te kingi ki te tangata a te Atua, Haere mai taua ki te whare ki tetahi oranga mou, kia hoatu hoki e ahau tetahi mea ki a koe. <sup>8</sup> Na ka mea te tangata a te Atua ki te kingi, Ahakoa i homai e koe ko te hawhe o tou whare, e kore ahau e haere taua, e kore ano e kai taro, e inu wai ki tenei wahi. <sup>9</sup> Ko te ako hoki tenei ki ahau, ko ta Ihowa hoki i korero ai; i mea ai, Kei kai taro, kei inu wai; kua ano e hoki mai na te ara e haere atu ai koe. <sup>10</sup> Na haere ana ia he ara ke, kihai i hoki na te ara i haere mai nei ia ki Peteere.

11

Na i Peteere tetahi poropiti e noho ana, he koroheke; a, ka haere mai tetahi o ana tama, ka korerotia ki a ia nga mea katoa i mea ai te tangata a te Atua i taua ra ki Peteere; i korerotia ano e

ratou ki to ratou papa nga kupu i korero ai ia ki te kingi. Na ka mea to ratou papa ki a ratou, Tena koa te ara i haere ai ia? I kite hoki ana tama i te ara i haere atu ai te tangata a te Atua i haere

mai nei i Hura. Na ka mea ia ki ana tama, Whakanohoia taku kaihe. Na whakanohoia ana tana

kaihe e ratou, a eke ana ia ki runga. Na whaia ana e ia te tangata a te Atua, mau rawa atu e noho ana i raro i tetahi oki; a ka mea ki a ia, Ko koe ianei te tangata a te Atua i haere mai nei i Hura?

Ano ra ko tera, Ae, ko ahau. Katahi ka mea ia ki a ia, Haere mai taua ki te whare ki te kai taro

mau. Ano ra ko ia, E kore e ahei kia hoki taua, kia haere atua; e kore ano taua e kai taro, e inu

wai ranei ki tenei wahi. Kua korerotia mai hoki ta Ihowa kupu ki ahau, Kei kai taro, kei inu wai

ki reira, kei anga, kei haere mai na te ara ka haere atu nei koe. Na ka mea tera ki a ia, He poropiti ano ahau, he pena me koe; kua korerotia mai ano ki ahau te kupu a Ihowa e tetahi anahera: i ki mai ia, Whakahokia ia ki a koe, ki tou whare ki te kai taro mana, ki te inu wai. He teka ia nana ki a ia.

Heoi hoki ana ia i a ia, a kai taro ana i roto i tona whare, inu wai ana. Na, i a raua e noho ana

ki te tepu, ko te putanga mai o te kupu a Ihowa ki te poropiti nana nei ia i whakahoki: A ka karanga ia ki te tangata a te Atua i haere mai nei i Hura, ka mea, Ko ta Ihowa kupu tenei, Na, kua tutu nei koe ki te mangai o Ihowa, a kahore i mau i a koe te ako i ako ai a Ihowa, tou Atua ki a koe,

Heoi hoki mai ana koe, kai taro ana, inu wai ana ki te wahi i korero ai ia ki a koe, Kei kai taro, kei inu wai; e kore e tae tou tinana ki te urupa o ou matua.

A ka mutu tana kai taro, ka mutu tana inu, na ka whakanohoia e ia te kaihe mona, ara mo te

poropiti i whakahokia mai nei e ia. Na, i tona haerenga, ka tutaki tetahi raiona ki a ia, ka whakamate i a ia: a ko tona tinana i akiritia ki te ara, me te kaihe ki tona taha tu ai; ko te raiona ano

hoki i tu i te taha o te tinana. Na, ka haere mai nga tangata, ka kite i te tinana i akiritia ra ki te ara, me te raiona e tu ana i te taha o te tinana: ka haere, ka korero i taua mea i te pa i noho ai te

poropiti koroheke. A, no te rongonga o taua poropiti, nana nei ia i whakahoki mai i te ara, ka mea ia, Ko te tangata tena a te Atua kihai nei i whakarongo ki te mangai o Ihowa, a hoatu ana ia e Ihowa ki te raiona, a haea iho e ia, whakamatea iho; ko ta Ihowa kupu hoki tena i korero ai ki a ia.

Na ka korero ia ki ana tama, ka mea, Whakanohoia taku kaihe, a whakanohoia ana e ratou. Na haere ana ia, a rokohanga atu ko te tinana, he mea akiri ki te ara, me te kaihe raua ko te raiona e tu

ana i te taha o te tinana; kihai te tinana i kainga e te raiona, kihai ano te kaihe i haea. Na hapainga ana te tinana o te tangata a te Atua e te poropiti, a whakatakotoria ana ki runga ki te kaihe,



whakahokia ana; haere ana ki te pa o te poropiti koroheke ki te tangi, ki te tanu i a ia. <sup>30</sup> Na whakatakotoria ana e ia tona tinana ki roto ki tona ake urupa; a ko ta ratou tangi mona, Aue, e toku <sup>31</sup> teina. A, ka mutu tana tanu i a ia, ka korero ia ki ana tama, ka mea, Kia mate ahau, tanumia ahau ki roto ki te urupa i tanumia ai te tangata a te Atua; hei te taha o ona wheua whakatakoto ai i oku <sup>32</sup> wheua. No te mea tera e tino rite ta Ihowa korero i karangatia e ia mo tenei aata i Peteere, mo <sup>33</sup> nga whare katoa hoki o nga wahi tiketike i nga pa o Hamaria. I muri i tenei kihai a Ieropoama i tahuri i tona ara kino; engari i tahuri ano ki te mea tohunga no roto noa iho i te iwi katoa mo nga wahi tiketike: ahakoa ko wai i hiahia, kua whakatohungatia e ia, kia whai tohunga ai mo nga wahi <sup>34</sup> tiketike. Na meinga ana tenei mea hei hara mo te whare o Ieropoama, hei mea e huna ai, e whakamotitia rawatia ai i te mata o te whenua.

## Chapter 14

<sup>1</sup> I taua wa ka turorotia a Apia tama a Ieropoama. <sup>2</sup> Na ka mea a Ieropoama ki tana wahine, Tena, whakatika, whakareretia ketia tou ahua, kei mohiotia ko te wahine koe a Ieropoama; ka haere <sup>3</sup> ki Hiro, kei reira a Ahia poropiti, nana nei te ki ko ahau hei kingi mo tenei iwi. A ka mau koe i tou ringa kia tekau nga taro, me etahi keke, me tetahi pounamu honi, ka haere ki a ia: mana e korero <sup>4</sup> ki a koe, ka pehea ranei te tamaiti. Na, pera tonu te wahine a Ieropoama, whakatika ana, haere ana ki Hiro, tae tonu atu ki te whare o Ahia. Na kihai i ahei i a Ahia te titiro, kua maro hoki ona <sup>5</sup> kanohi, kua koroheketia hoki ia. Na ka mea a Ihowa ki a Ahia, Nana, ko te wahine tenei a Ieropoama te haere mai nei ki te rapu kupu i a koe mo tana tama; e mate ana hoki: kia penei tau ki <sup>6</sup> atu ki a ia; no te mea, ina tae mai ia, tera ia e whakaahua i a ia ki tetahi wahine ke. Heoi, i te rongonga o Ahia i te haruru o ona waewae, i a ia i tomo mai ai i te kuwaha, ka mea ia, Tomo mai, e te wahine a Ieropoama: he aha koe i whakaahua ke ai i a koe? he pakeke hoki nga korero i tonoa mai ai ahau ki a koe. <sup>7</sup> Haere, korero ki a Ieropoama, Ko te kupu tenei a Ihowa, a te Atua o Iharaira, Na kua whakanuia <sup>8</sup> na koe e ahau i roto i te iwi, kua meinga hei rangatira mo taku iwi, mo Iharaira, A haea ana e ahau te kingitanga i te whare o Rawiri, hoatu ana ki a koe: heoi kihai koe i rite ki taku pononga, ki a Rawiri, i pupuri nei i aku whakahau, a whakapaua ana tona ngakau ki te whai i ahau, a ko te tika <sup>9</sup> anake hei mahi mana ki toku aroa ro; Otiia hira ake te kino o au mahi i a te katoa i mua atu i a koe: i haere hoki koe, i hanga i etahi atua ke mau, me nga whakapakoko whakarewa, hei

whakapataritari i ahau, a whiua ana ahau e koe ki muri i a koe, ki tou tuara. <sup>10</sup> Na reira ka hoatu e ahau he kino ki runga i te whare o Ieropoama, a ka hautopea atu e ahau nga tamariki tane katoa i a Ieropoama, te hunga o Iharaira i tutakina ki roto, i mahue ranei ki waho, a ka tahia rawatia atu te whare o Ieropoama, ka pera tia me te paru e tahia ana e te tangata, a poto noa. <sup>11</sup> Ko te hunga o Ieropoama e mate ki te pa ma nga kuri e kai; ko nga mea hoki e mate ki te parae ma nga manu o te rangi e kai; he mea ki mai hoki tenei na Ihowa. <sup>12</sup> Na reira whakatika koe, haere ki tou whare: a kia tomo ou waewae ki te pa, ka mate te tamaiti. <sup>13</sup> A ma Iharaira katoa ia e tangi, ma ratou ia e tanu; ko ia anake hoki o Ieropoama e tae ki te urupa, no te mea nona tetahi mea pai ki a Ihowa, ki te Atua o Iharaira i kitea i roto i te whare o Ieropoama. <sup>14</sup> Ka ara ano hoki i a Ihowa he kingi mana mo Iharaira, hei hautope i te whare o Ieropoama, i taua ra: he aha ra? aiane nei ano. <sup>15</sup> Ka patua hoki a Iharaira e Ihowa, ka peratia me te kakaho e whakangaueuetia ana i roto i te wai, a ka hutia atu a Iharaira i tenei whenua pai i hoatu nei e ia ki o ratou matua; a ka titaria ki tawahi o te awa; mo ratou i hanga i a ratou Aherimi hei whakapataritari i a Ihowa. <sup>16</sup> Na ka tukua atu a Iharaira e ia mo nga hara o Ieropoama i hara nei ia, i hara ai hoki a Iharaira. <sup>17</sup> Na whakatika ana te wahine a Ieropoama, haere ana, kua tae ki Tirita: a, tae kau ia ki te paepae o te whare, ka mate te tamaiti. <sup>18</sup> Na tanumia ana ia e Iharaira katoa, a tangihia iho; ko ta Ihowa kupu tera i korero ai, ara ta tana pononga, ta Ahia poropiti. <sup>19</sup> Na, ko era meatanga a Ieropoama, ko ana whawhai, ko tona kingitanga, koia tena e mau na i te pukapuka o nga ra o nga kingi o Iharaira. <sup>20</sup> Na, ko nga ra i kingi ai a Ieropoama, e rua tekau ma rua tau, a moe ana ia ki ona matua, a ko tana tama, ko Natapa te kingi i muri i a ia. <sup>21</sup> Na ko Rehopoama tama a Horomona te kingi o Hura. E wha tekau ma tahi nga tau o Rehopoama i tona meatanga hei kingi; a kotahi tekau ma whitu ona tau i kingi ai ki Hiruharama, ki te pa i whiriwhiri e Ihowa i roto i nga iwi katoa o Iharaira hei wai hotanga iho mo tona ingoa. <sup>22</sup> Ko te ingoa hoki o tona whaea ko Naama, he Amoni. Na ka kino te mahi a Hura ki te titiro a Ihowa, a whakapataritaritia ana ia e ratou ki o ratou hara i hara ai ratou, a hae iho ia; nui atu hoki i a o ratou matua katoa i mea ai. <sup>23</sup> I hanga hoki e ratou etahi wahi tiketike ma ratou, me etahi pou, me etahi Aherimi, ki nga puke teitei katoa, ki raro hoki i nga rakau kouru nui katoa. <sup>24</sup> I taua whenua ano etahi e whakahoroma ana, e mahi ana i nga mea whakarihariha katoa a nga tauwiwi i peia nei e Ihowa i te aroaro o nga tama a Iharaira. <sup>25</sup> Na i te rima o nga tau o Kingi Rehopoama ka tae mai a Hihaka kingi o Ihipa ka whakapaea a Hiruharama: <sup>26</sup> A taria atu ana e ia nga taonga o te whare o Ihowa, me nga taonga o te whare o te kingi; i mauria katoatia atu e ia: a i mauria atu

<sup>27</sup> hoki e ia nga pukupuku koura katoa i hanga e Horomona. Na hanga ana e Kingi Rehopoama  
 etahi pukupuku parahi hei whakakapi mo era, a tukua ana e ia ki nga ringa o nga rangatira o nga  
<sup>28</sup> kaitiaki i tiaki nei i te tatau o te whare o te kingi. A i o te kingi haerenga ki te whare o Ihowa,  
<sup>29</sup> ka maua aua mea e nga kaitiaki, ka whakahokia ano e ratou ki te whare o nga kaitiaki. Na, ko  
 era atu meatanga a Rehopoama me ana mahi katoa, kahore ianei i tuhituhia ki te pukapuka o nga  
<sup>30</sup> meatanga o nga ra o nga kingi o Hura? A he whawhai tonu ta Rehopoama raua ko Ieropoama  
<sup>31</sup> ki a raua i o raua ra katoa. Na ka moe a Rehopoama ki ona matua, a tanumia iho ki ona matua  
 ki te pa o Rawiri: a ko te ingoa hoki o tona whaea ko Naama, he Amoni. A ko Apiama, ko tana  
 tama te kingi i muri i a ia.

## Chapter 15

<sup>1</sup> Na no te tekau ma waru o nga tau o Kingi Ieropoama tama a Nepata i kingi ai a Apiama ki a  
<sup>2</sup> Hura. E toru nga tau i kingi ai ia ki Hiruharama: a ko te ingoa o tona whaea ko Maaka, he tamahine  
<sup>3</sup> na Apoharama. Na i haere ia i runga i nga hara katoa i mea ai tona papa i mua atu i a ia: kihai  
 hoki tona ngakau i tapatahi ki a Ihowa, ki tona Atua, kihai i rite ki te ngakau o tona tupuna, o Rawiri.  
<sup>4</sup> Otiia he whakaaro ki a Rawiri homai ana e Ihowa, e tona Atua he rama ki a ia i Hiruharama kia  
<sup>5</sup> whakaarahia ake ai tana tama i muri i a ia, kia whakapumautia ai hoki a Hiruharama: Mo Rawiri  
 i mahi tika ki te aroaro o Ihowa, a kihai i peka ke i nga mea katoa i whakahaua ai ia i nga ra katoa  
 i ora ai ia, ko te meatanga anake ki a Uria Hiti. Na he whawhai ta Rehopoama raua ko Ieropoama  
<sup>6</sup> ki a raua i nga ra katoa i ora ai ia. Na, ko era atu meatanga a Apiama me ana mahi katoa, kahore  
<sup>7</sup> ianei i tuhituhia ki te pukapuka o nga meatanga o nga ra o nga kingi o Hura? He whawhai hoki ta  
<sup>8</sup> Apiama raua ko Ieropoama ki a raua. Na kua moe a Apiama ki ona matua, a tanumia ana e ratou  
 ki te pa o Rawiri. A ko tana tama, ko Aha te kingi i muri i a ia.  
<sup>9</sup> Na no te rua tekau o nga tau o Ieropoama kingi o Iharaira i kingi ai a Aha ki a Hura. A e  
<sup>10</sup> wha tekau ma tahi nga tau i kingi ai ia ki Hiruharama; ko te ingoa hoki o tona whaea, ko Maaka,  
<sup>11</sup> he tamahine na Apoharama. A tika tonu te mahi a Aha ki te aroaro o Ihowa, rite tonu ki ta tona  
<sup>12</sup> tupuna, ki ta Rawiri. I peia atu hoki e ia te hunga whakahoroma i te whenua, whakakorea atu  
<sup>13</sup> ana e ia nga whakapakoko katoa i hanga e ona matua. I whakamutua ano e ia te kuinitanga o

Maaka, o tona whaea, mona i hanga whakapakoko wehi hei Ahera; tapatapahia iho hoki e Aha tana  
whakapakoko, tahuna ake ki te taha o te awa, o Kitirono. <sup>14</sup> Otiia kihai i whakakorea nga wahi  
tiketike. He ahakoa ra, i tapatahi te ngakau o Aha ki a Ihowa i ona ra katoa. <sup>15</sup> I kawea hoki e ia  
nga mea i whakatapua e tona papa, me ana mea ano i whakatapu ai, ki te whare o Ihowa, te hiriwa,  
te koura, me nga oko. <sup>16</sup> He whawhai hoki ta Aha ki a Paaha kingi o Iharaira i o raua ra katoa.  
<sup>17</sup> Na ka haere a Paaha kingi o Iharaira ki Hura, a hanga ana a Rama e ia, kia kaua ai tetahi e tukua  
kia haere atu, kia haere mai ki a Aha kingi o Hura. <sup>18</sup> Katahi ka tangohia katoatia e Aha te hiriwa  
me te koura i mahue o nga taonga o te whare o Ihowa, me nga taonga o te whare o te kingi, a hoatu  
ana ki nga ringa o nga tangata: a hoatu ana e Kingi Aha kia kawea ki a Peneharara tama a  
<sup>19</sup> Taparimono, ta ma a Hetiono kingi o Hiria, i Ramahiku nei tona kainga; i mea ia, He kawenata  
ta taua, ta toku papa raua ko tou papa: tena taku hakari mau te kawea atu na, he hiriwa, he koura;  
<sup>20</sup> haere mai whakataka tau kawenata ki a Paaha kingi o Iharaira kia haere atu ai ia i toku taha. Na  
rongo tonu a Peneharara ki a Kingi Aha, a unga ana e ia nga rangatira o ana ope ki nga pa o Iharaira,  
a patua iho e ia a Ihono, a Rana, a Apere Petemaaka, me Kinerota katoa, me te whenua katoa o  
<sup>21</sup> Napatari. Na, i te rongonga o Paaha, ka mutu tana hanga i Rama, a noho ana ki Tiriti. <sup>22</sup> Katahi  
ka karanga nui a Kingi Aha puta noa i Hura; kihai tetahi i tukua noatia atu: a taria atu ana e ratou  
nga kohatu o Rama, me nga rakau o reira i hanga nei e Paaha, hei hanga ma Kingi Aha i Kepa o  
<sup>23</sup> Pineamine, i Mihipa hoki. Na, ko era atu meatanga katoa a Aha me ana mahi marohirohi, me  
nga mea katoa i mea ai ia, me nga pa i hanga e ia, kahore ianei i tuhituhia ki te pukapuka o nga  
<sup>24</sup> meatanga o nga ra o nga kingi o Hura? Otiia i tona koroheketanga i mate ona waewae. Na ka  
moe a Aha ki ona matua, a tanumia iho ki ona matua, ki te pa o tona tupuna, o Rawiri; a ko  
Iehohapata, ko tana tama te kingi i muri i a ia.  
<sup>25</sup> Na no te rua o nga tau o Aha kingi o Hura i kingi ai a Natapa tama a Ieropoama ki a Iharaira;  
<sup>26</sup> a e rua nga tau i kingi ai ia ki a Iharaira. A he kino tana mahi ki te aroaro o Ihowa; i haere hoki  
ia i te ara o tona matua, i tona hara i meinga ai e ia a Iharaira kia hara. <sup>27</sup> Na ka whakatupuria he  
he mona e Paaha tama a Ahia o te whare o Ihakara; a patua iho ia e Paaha ki Kipetono o nga  
<sup>28</sup> Pirihitini; i te whakapae hoki a Natapa ratou ko Iharaira katoa i Kipetono. Na, no te toru o nga  
<sup>29</sup> tau o Aha kingi o Hura i patua ai ia e Paaha, a ko ia te kingi i muri i a ia. A, kingi tahanga ia,  
na patua iho e ia te whare katoa o Ieropoama: kihai tetahi mea whai manawa o Ieropoama i mahue  
i a ia, poto rawa te huna; i rite tonu ki ta Ihowa kupu i korerotia e tana pononga, e Ahia Hironi:  
<sup>30</sup> Mo nga hara i hara ai a Ieropoama, i mea ai i a Iharaira kia hara; mo tana whakapataritari i

whakapataritari ai ia i a Ihowa, i te Atua o Iharaira kia riri. <sup>31</sup> Na, ko era atu meatanga a Natapa me ana mahi katoa, kahore ianei i tuhituhia ki te pukapuka o nga meatanga o nga ra o nga kingi o Iharaira? <sup>32</sup> He whawhai hoki ta Aha raua ko Paaha kingi o Iharaira i o raua ra katoa. <sup>33</sup> No te toru o nga tau o Aha kingi o Hura i kingi ai a Paaha tama a Ahia ki a Iharaira katoa ki Tirita, e rua tekau ma wha nga tau i kingi ai. <sup>34</sup> A he kino tana mahi i te aroaro o Ihowa i haere hoki ia i te ara o Ieropoama, i tona hara i meinga ai e ia a Iharaira kia hara.

## Chapter 16

<sup>1</sup> Na ka puta te kupu a Ihowa ki a Iehu, tama a Hanani mo Paaha; i mea ia, <sup>2</sup> Naku nei koe i whakaara ake i roto i te puehu, a hoatu ana koe e ahau hei rangatira mo taku iwi, mo Iharaira; na haere ana koe i te ara o Ieropoama, a nau i hara ai taku iwi, a Iharaira, hei whakapataritari i ahau, ki o ratou hara; <sup>3</sup> Nana, ka moti i ahau nga uri o Paaha, me nga uri o tona whare, a ka meinga tou whare kia rite ki te whare o Ieropoama tama a Nepata. <sup>4</sup> Ko te hunga o Paaha e mate ki te pa ma nga kuri e kai, ko nga mea hoki ona e mate ki te parae ma nga manu o te rangi e kai. <sup>5</sup> Na, ko era atu meatanga a Paaha me ana mahi, me tona toa, kahore ianei i tuhituhia ki te pukapuka o nga meatanga o nga ra o nga kingi o Iharaira? <sup>6</sup> Na ka moe a Paaha ki ona matua, a tanumia iho ki Tirita; a ko Eراها, ko tana tama te kingi i muri i a ia. <sup>7</sup> I kawea ano e Iehu poropiti tama a Hanani te kupu a Ihowa mo Paaha ratou ko tona whare, mo te kino katoa i meatia e ia ki te aroaro o Ihowa, mo tana whakapataritari i a ia ki nga mahi a ona ringa, mona i rite ki te whare o Ieropoama, mo tana patu nga hoki i a ia. <sup>8</sup> I te rua tekau ma ono o nga tau o Aha kingi o Hura ka kingi a Eراها tama a Paaha ki a Iharaira ki Tirita, e rua nga tau e kingi ana. <sup>9</sup> Na ka whakatupuria he he mona e tana tangata, e Timiri, rangatira o te hawhe o ana hariata; na i Tirita ia e inu ana a haurangi iho, i roto i te whare o Arata kaitohutohu o tona whare i Tirita. <sup>10</sup> Na haere ana a Timiri, patua iho ia, whakamatea iho i te rua tekau ma whitu o nga tau o Aha kingi o Hura, a ko ia te kingi i muri i a ia. <sup>11</sup> A, ka kingi nei ia, tona nohoanga ano ki te torona, patua iho e ia te whare katoa o Paaha: kihai tetahi tamaiti tane i mahue ki a ia, o ona whanaunga, o ona hoa aroha ranei. <sup>12</sup> Heoi huna ana e Timiri te whare katoa o Paaha; ko ta Ihowa kupu ia i korerotia e Iehu poropiti mo Paaha, <sup>13</sup> Mo nga hara katoa o Paaha, mo nga hara o Eراها, o tana tama i hara nei raua, i hara ai a Iharaira, he whakapataritari i a Ihowa, i te Atua o Iharaira ki a ratou mea horihori. <sup>14</sup> Na, ko era atu meatanga

a Eraha me ana mahi katoa, kahore ianei i tuhituhia ki te pukapuka o nga meatanga o nga ra o nga kingi o Iharaira?

15

No te rua tekau ma whitu o nga tau o Aha kingi o Hura i kingi ai a Timiri ki Tirita, e whitu

16

nga ra. Na i te whakapae te iwi i Kipetono o nga Pirihitini. A ka rongu taua iwi i whakapae ra i te korero, kua whakatakoto he a Timiri, kua patua hoki e ia te kingi; heoi meinga ana e Iharaira

17

katoa a Omori rangatira ope hei kingi mo Iharaira i taua ra, i te puni. Na haere atu ana a Omori

18

i Kipetono, ratou ko Iharaira katoa, a whakapaea ana e ratou a Tirita. A, no te kitenga o Timiri ka horo te pa, na haere ana ia ki te wahi pai rawa o te whare o te kingi, a tahuna ana e ia ki te ahi

19

te whare kingi ki runga ki a ia, a mate iho; Mo ona hara i hara ai, i tana mahinga i te kino i te aroaro o Ihowa, i tona haerenga i te ara o Ieropoama, a i tona hara i hara ai, a hara iho a Iharaira.

20

Na, ko era atu meatanga a Timiri me tana he i whakatupu ai ia, kahore ianei i tuhituhia ki te

21

pukapuka o nga meatanga o nga ra o nga kingi o Iharaira? Katahi ka wahia te iwi o Iharaira, kia rua nga wahi: ko tetahi hawhe o te iwi i whai i a Tipini tama a Kinata, ko ia hei kingi; ko tetahi

22

hawhe i whai i a Omori. Otiia i kaha ake te hunga i whai i a Omori i te hunga i whai i a Tipini

23

tama a Kinata; heoi mate ana a Tipini, a ka kingi ko Omori. No te toru tekau ma tahi o nga tau o Aha kingi o Hura i kingi ai a Omori ki a Iharaira, a kotahi tekau ma rua ona tau i kingi ai: e ono

24

nga tau i kingi ai ki Tirita. Na ka hokona e ia i a Hemere te pukepuke, a Hamaria, mo nga taranata hiriwa e rua; a hanga ana ia ki runga ki te pukepuke, a huaina iho e ia te ingoa o te pa i hanga e ia

25

ko Hamaria, ko te ingoa o Hemere, o te tangata nona te puke. Na kino ana te mahi a Omori ki

26

te aroaro o Ihowa, kino atu i a te katoa i mua atu i a ia. I haere hoki ia i nga ara katoa o Ieropoama tama a Nepata, i ona hara i mea ai ia i a Iharaira kia hara, kia whakapataritari i a Ihowa, i te Atua

27

o Iharaira ki a ratou mea horihori. Na, ko era atu meatanga a Omori i mea ai ia me ana mahi

28

toa, kahore ianei i tuhituhia ki te pukapuka o nga meatanga o nga ra o nga kingi o Iharaira? Na ka moe a Omori ki ona matua, a tanumia iho ki Hamaria: a ko tana tama, ko Ahapa te kingi i muri i a ia.

29

No te toru tekau ma waru o nga tau o Aha kingi o Hura, i kingi ai a Ahapa tama a Omori ki a Iharaira: a e rua tekau ma rua nga tau i kingi ai a Ahapa tama a Omori ki a Iharaira ki Hamaria.

30

Na i mahia e Ahapa tama a Omori te kino i te tirohanga a Ihowa, hira atu i a te katoa i mua atu

31

i a ia. Na, me te mea nei he mea mama ki a ia te haere i runga i nga hara o Ieropoama tama a Nepata, ka tango ia i a Ietepere, tamahine a Etepaara kingi o nga Haironi, hei wahine mana; a haere

ana, mahi ana ki a Paara, koropiko ana ki a ia. <sup>32</sup> I whakaarahia e ia tetahi aata mo Paara i roto i  
 te whare o Paara i hanga nei e ia ki Hamaria. <sup>33</sup> Na hanga ana e Ahapa te Ahera; a nui atu ta Ahapa  
 i mea ai hei whakapataritari mo Ihowa, mo te Atua o Iharaira i ta nga kingi katoa o Iharaira i mua  
<sup>34</sup> i a ia. No ona ra ka hanga Heriko e Hiere o Peteere: ko tana matamua, ko Apirama, te papa i te  
 timatanga o te whakaturanga, a ko tana whakaotinga, ko Hekupu, te papa i te whakanohoanga o  
 nga tatau; ko ta Ihowa kupu ia i korerotia e Hohua tama a Nunu.

## Chapter 17

<sup>1</sup> Na ka mea a Iraia Tihipi, no nga tangata o Kireara, ki a Ahapa, E ora ana a Ihowa, te Atua o  
 Iharaira, kei tona aroaro nei ahau e tu ana,, e kore enei tau e whai tomairangi, e whai ua; engari ma  
 taku kupu anake. <sup>2</sup> Na ka puta te kupu a Ihowa ki a ia, ka mea, <sup>3</sup> Haere atu i konei, anga atu whaka  
 te rawhiti, ka piri ki te awa ki Keriri, e aro nui atu na ki Horano. <sup>4</sup> A kei te awa he wai mou; kua  
 oti hoki nga raweni te whakahau e ahau hei whangai i a koe i reira. <sup>5</sup> Na haere ana ia, meatia ana  
 ta Ihowa i korero ai; i haere hoki, a noho ana ki te taha o te awa, o Keriti, e aro nui nei ki Horano.  
<sup>6</sup> A na nga raweni i kawe mai he taro, he kikokiko mana i te ata, he taro, he kikokiko mana i te  
 ahiahi; no te awa hoki tona wai. <sup>7</sup> Nawai a kei etahi ra mai, ka maroke te awa, kahore hoki he ua  
 o te whenua.  
<sup>8</sup> Na ka puta mai te kupu a Ihowa ki a ia, ka mea, <sup>9</sup> Whakatika, haere ki Harepata o Hairona,  
 ki reira noho ai; nana, kua oti tetahi wahine pouaru o reira te whakahau e ahau hei whangai i a koe  
 ki reira. <sup>10</sup> Na whakatika ana ia, haere ana ki Harepata. A, no tona taenga atu ki te kuwaha o te pa,  
 na ko tetahi wahine i reira, he pouaru, e kohikohi rakau ana. A ka karanga atu ia ki a ia, ka mea,  
 Mauria mai he wai moku i roto i te oko, hei inu maku. <sup>11</sup> Na haere ana tera ki te tiki, a ka karanga  
 ano ia ki a ia, Tena tetahi wahi taro maua mai i tou ringa maku. <sup>12</sup> Na ka mea ia, E ora ana a Ihowa,  
 tou Atua, kahore aku keke; engari he kutanga paraoa i roto i te oko, me tetahi hinu, he iti nei, i roto  
 i te ipu, e kohikohi ana ano tenei ahau i nga rakau e rua, kia haere ai ahau ki te taka i taua mea ma  
 maua k o taku tama, mo ta maua kai atu, ka mate ai. <sup>13</sup> Na ka mea a Iraia ki a ia, Kaua e wehi,  
 tikina, meatia tau i ki mai na; Otiia matua hanga mai te tahi wahi hei keke maku, kia nohinohi, ka  
 mau mai ai ki ahau; a muri iho ka hanga ma korua ko tau tama. <sup>14</sup> Ko te kupu hoki tenei a Ihowa,  
 a te Atua o Iharaira, E kore e pau te oko paraoa, e kore ano te ipu hinu e poto a taea noatia te ra e

<sup>15</sup> homai ai e Ihowa he ua ki te mata o te whenua. Na haere ana ia; meatia ana ta Iraia i ki ai, a kai  
<sup>16</sup> ana raua, me tona whare ano, i nga ra maha. Kihai te oko paraoa i hemo, kihai hoki te ipu hinu  
 i poto, rite tonu ki te kupu a Ihowa i korerotia ra e Iraia.  
<sup>17</sup> A i muri i enei mea ka takoto mate te tama a taua wahine nona nei te whare; nui atu te kaha  
<sup>18</sup> o tona mate kahore noa iho he manawa i mahue i roto i a ia. Na ka mea ia ki a Iraia, He aha taku  
 ki a koe, e te tangata a te Atua? i haere mai na koe ki ahau kia whakamaharatia mai oku he, ki te  
<sup>19</sup> whakamate hoki i taku tama! Na ka mea tera ki a ia, Homai tau tamaiti ki ahau. Na tangohia  
 ana e ia i tona uma, a kawea ana ki te ruma i runga, ki te wahi i noho ai ia, whakatakotoria ana e  
<sup>20</sup> ia ki tona moenga. Na ka karanga ia ki a Ihowa, ka mea, E Ihowa, e toku Atua, kua meatia ano  
<sup>21</sup> hoki e koe he kino ki tenei pouaru e noho nei ahau ki a ia, i tana tama ka whakamatea nei? Na  
 wharoro ana ia, e toru nga wharorotanga ki runga ki te tamaiti, a ka karanga ki a Ihowa, ka mea, E  
<sup>22</sup> Ihowa, e toku Atua, kia hoki mai te wairua o tenei tamaiti ki roto ki a ia. Na rongo tonu a Ihowa  
<sup>23</sup> ki te reo o Iraia; a hoki ana te wairua o te tamaiti ki roto ki a ia, na kua ora. Na ka mau a Iraia  
 ki te tamaiti, a kawea atu ana i taua ruma ki raro, ki te whare, a hoatu ana ki tona whaea: a ka mea  
<sup>24</sup> a Iraia, Titiro, kei te ora tau tama. Na ka mea te wahine ra ki a Iraia, Katahi rawa ahau ka mohio  
 he tangata koe na te Atua, he pono ano te kupu a Ihowa i tou mangai.

## Chapter 18

<sup>1</sup> A, ka maha nga ra, ka puta mai te kupu a Ihowa ki a Iraia i te toru o nga tau; i mea ia, Haere  
 whakakitea atu koe ki a Ahapa; a maku e hoatu he ua ki te whenua. <sup>2</sup> Na haere ana a Iraia ki te  
 whakakite i a ia ki a Ahapa. Nui atu hoki te matekai o Hamaria. <sup>3</sup> Na ka karanga a Ahapa ki a  
<sup>4</sup> Oparia, kaitohutohu o tona whare. Na he nui te wehi o Oparia ki a Ihowa; A i ta Ietepere  
 hautopenga atu i nga poropiti a Ihowa, na ka mau a Oparia ki nga poropiti kotahi rau, a huna ana  
 e ia, takirima tekau nga tangata ki te ana kotahi, a whangainga ana ratou e ia ki te taro, ki te wai.  
<sup>5</sup> Na ka mea a Ahapa ki a Oparia, Haere puta noa i te whenua ki nga puna wai katoa; ki nga awa  
 katoa; tera pea ka kitea e tatou tetahi tarutaru e ora ai nga hoiho me nga muera; kei poto katoa a  
<sup>6</sup> tatou kararehe. Heoi ka wehea e raua te whenua hei haerenga mo raua: haere ana a Ahapa, tona  
 kotahi i tetahi ara, haere ana a Oparia, tona kotahi i tetahi ara. <sup>7</sup> A, i a Oparia i te ara, na ko Iraia



kua tutaki ki a ia; a ka mohio ia ki tera, ka tapapa, ka mea, Ko koe ranei tena, e toku Ariki, e Iraia?  
8

Ano ra ko ia ki a ia, Ko ahau ra; haere, korero atu ki tou ariki, Ko Iraia tenei. Na ka mea tera,  
9

He aha ra toku hara i hoatu ai tau pononga ki te ringa o Ahapa kia whakamatea? E ora ana a  
10  
Ihowa, tou Atua, kahore he iwi, ke kingitanga, i kore nei toku ariki e tonono tangata ki reira ki te rapu  
i a koe: a, i ta ratou meatanga mai, Kahore nei; whakaoatitia iho e ia taua kingitanga, taua iwi ranei,

me kahore ratou i kite i a koe. Na kua mea na koe inaianei, Haere, korero atu ki tou ariki, Ko  
11

Iraia tenei. Na akuanei, kei toku mawehenga atu i a koe, ka kahakina atu koe e te wairua o Ihowa  
12  
ki te wahi e kore ai ahau e mohio; a, i toku taenga atu ki te whakaatu ki a Ahapa, a ka kore ia e kite  
i a koe, katahi ahau ka patua e ia: heoi e wehi ana tau pononga i a Ihowa, no toku tamarikitanga

ake. Kahore ianei i korerotia ki toku ariki taku i mea ai i ta Ietepere patunga i nga poropiti a  
13  
Ihowa, taku hunanga i nga poropiti kotahi rau a Ihowa, takirima tekau nga tangata ki roto i te ana

kotahi, a whangainga ana e ahau ki te taro, ki te wai? A ka mea mai na koe inaianei, Haere,  
14

korero atu ki tou ariki, Ko Iraia tenei: ka patua hoki ahau e ia. Ano ra ko Iraia ki a ia, E ora ana  
15

a Ihowa o nga mano e tu nei ahau i tona aroaro, ko a tenei ra pu ahau puta ai ki a ia. Heoi haere  
16  
ana a Oparia ki te whakatau i a Ahapa, a korerotia ana ki a ia. Na haere ana a Ahapa ki te whakatau  
i a Iraia.

17  
A, no te kitenga o Ahapa i a Iraia, na ka mea a Ahapa ki a ia, Ko koe tenei, e te

kaiwhakararuraru o Iharaira? Ano ra ko ia, Kahore i whakararururua e ahau a Iharaira; engari  
18  
koe me te whare o tou papa i ta koutou whakarereanga nei i nga whakahau a Ihowa, i a koe ka whai

nei i nga Paara. Na tikina aiane, huihuia mai a Iharaira katoa ki ahau ki Maunga Karamere, me  
19  
nga poropiti e wha rau e rima tekau a Paara, me nga poropiti e wha rau o te Ahera, e kai na ki te

tepu a Ietepere. Heoi tonono tangata ana a Ahapa puta noa i nga tama katoa a Iharaira, a whakaminea  
20  
ana aua poropiti ki Maunga Karamere.

21  
Na ka whakatata a Iraia ki te iwi katoa, ka mea, Kia pehea te roa o to koutou tuhurihuri ki  
nga tikanga e rua? ki te mea ko Ihowa te Atua, me whai ki a ia; ki te mea ia ko Paara, me whai ki

a ia. Na kahore he kupu i whakahokia e te iwi ki a ia. Katahi ka mea a Iraia ki te iwi, Ko ahau  
22  
anake kua mahue nei o nga poropiti a Ihowa; e wha rau ia e rima tekau tangata nga poropiti a Paara.

23  
Na me homai e ratou etahi puru ma matou, kia rua, ma ratou e whiriwhiri tetahi puru ma ratou,  
ka tapatapahi ai, ka whakaeke ai ki runga ki nga wahie, kaua hoki he ahi e meatia atu: maku hoki

e taka tetahi puru, e whakatakoto ki runga ki nga wahi e; e kore hoki e meatia atu he ahi. A ma  
24  
koutou e karanga ki te ingoa o to koutou atua; maku hoki e karanga ki te ingoa o Ihowa. Na, ko te  
Atua e utua ai te karanga ki te ahi, ko ia hei Atua. Na ka whakahoki te iwi katoa, ka mea, Ka pai

25  
tena kupu. Na ka mea a Iraia ki nga poropiti a Paara, Whiriwhiria tetahi puru ma koutou, taka; ko ta koutou ki mua, he tokomaha hoki koutou; ka karanga ai ki te ingoa o to koutou atua; kaua

26  
hoki he ahi e meatia atu. Na ka tango ratou i te puru i hoatu ki a ratou, a mahia ana e ratou. Na ka karanga ki te ingoa o Paara o te ata iho ano a taea noatia te poutumarotanga; i mea ai, E Paara, utua mai ta matou karanga. Otiia kahore he kupu, kihai hoki i utua e teta hi. A tupekepeke ana ratou

27  
i te aata i hanga nei. A, i te poutumarotanga, ka tawai a Iraia ki a ratou, ka mea, Karanga, kia nui te reo; he atua hoki ia: kei te purakau pea ia, kei tahaki ranei, kei te ara ranei, tena ranei kei te

28  
moe, a me whakaara. Na nui atu to ratou reo ki te karanga, ka haehae i a ratou ki te maripi, ki

29  
te oka, ko ta ratou tikanga hoki ia, a tarere noa nga toto ki runga ki a ratou. Heoi kua tawharara te ra, na ka poropiti ratou a tae noa ki te whakaekenga o to te ahiahi whakahere; otiia kahore he

30  
reo, kihai i utua te karanga, kahore tetahi hei whakarongo. Na ka mea a Iraia ki te iwi katoa, Neke mai ki ahau. Na neke ana te iwi katoa ki a ia, Na ka whakatikaia e ia te aata a Ihowa i turakina.

31  
I mau hoki a Iraia ki nga kohatu kotahi tekau ma rua; rite tonu te maha ki nga iwi o nga tama a

32  
Hakopa, ki a ia nei te kupu a Ihowa, i ki nei, Ko Iharaira hei ingoa mou. Na hanga ana e ia aua kohatu hei aata mo te ingoa o Ihowa; a keria ana he awa ki te taha o te aata a taka noa, kia rua nga

33  
mehua purapura ka ki. Na whakapaia ana e ia nga wahie, a tapatapahia ana te puru, whakatakotia ana ki runga ki nga wahie. A ka mea ia, Whakakiiia etahi oko, kia wha, ki te wai, ka riringi ki runga

34  
ki te tahunga tinana, ki nga wahie. I mea ano ia, Tena ano. Na ka meatia ano e ratou. I mea hoki

35  
ia, Tuatorutia. Na ka tuatorutia e ratou. Na ka rere te wai i nga taha o te aata tawhio noa: whakakiiia

36  
ana hoki e ia te waikeri ki te wai. Na i te whakaekenga o to te ahiahi whakahere, ka whakatata a Iraia poropiti, a ka mea, E Ihowa, e te Atua o Aperahama, o Ihaka, o Iharaira, kia mohiotia i tenei ra ko koe te Atua i roto i a Iharaira, ko ahau tau pononga, a nau te kupu i mea ai a hau i enei mea

37  
katoa. Whakarongo mai ki ahau, e Ihowa, whakarongo mai ki ahau, kia mohio ai tenei iwi ko

38  
te Atua koe, e Ihowa, nau ano i whakahoki o ratou ngakau ki muri nei. Na ko te tino takanga iho o te ahi a Ihowa, pau ake te tahunga tinana, me nga wahie, me nga kohatu, me te puehu, mitikia

39  
ake ana ano hoki te wai i roto i te waikeri. A, no te kitenga o te iwi katoa, tapapa ana, me te ki

40  
ake ano, Ko Ihowa, ko ia te Atua: ko Ihowa, ko ia te Atua. Katahi ka mea a Iraia ki a ratou, Hopukia nga poropiti a Paara: kei mawhiti tetahi o ratou. Na hopukia ana e ratou, a kawea ana e Iraia ki raro, ki te awa, ki Kihona, patua iho ki reira.

<sup>41</sup> Na ka mea a Iraia ki a Ahapa, Haere ki runga, ki te kai, ki te inu; he haruru ua hoki te rara  
<sup>42</sup> mai nei. Heoi haere ana a Ahapa ki te kai, ki te inu. Ko Iraia ia i piki ki te tihi o Karamere; a  
<sup>43</sup> tapapa ana ia ki te whenua, ko tona mata i roto i ona turi. Na ka mea ia ki tana tangata, Tena,  
<sup>44</sup> piki atu inaianei, tirohia te ritenga atu o te moana. Na piki ana ia, titiro ana, a ka mea, Kahore kau  
 he mea. Na ka mea ano tera, Hoki atu ano, kia whitu nga hokinga. A i te whitu ka mea ia, Nana,  
 he kapua nohinohi tera te haere ake ra i roto i te moana; kei te kapu o te ringa tangata te rite. Na  
 ka mea tera, Haere, mea atu ki a Ahapa, Whakanohoia tou hariata, ka haere ki raro; kei araia koe  
<sup>45</sup> e te ua. Na mea rawa ake kua pouri pu te rangi i te kapua, i te hau, nui atu hoki te ua. Na rere  
<sup>46</sup> ana tera a Ahapa i runga i te hariata, a haere ana ki Ietereere. A i runga i a Iraia te ringa o Ihowa;  
 na whitikiria ana e ia tona hope, a rere ana i mua i a Ahapa a tae noa ki Ietereere.

## Chapter 19

<sup>1</sup> Na ka korerotia e Ahapa ki a Ietepere nga mea katoa i mea ai a Iraia, me nga meatanga katoa  
<sup>2</sup> i tana whakamatenga i nga poropiti katoa ki te hoari. Katahi a Ietepere ka tonono tangata ki a Iraia  
 hei ki atu, Kia meatia tenei ki ahau e nga atua, me etahi atu mea, ki te kahore ahau e mea i a koe i  
<sup>3</sup> tenei takiwa apopo kia rite te mate ki tetahi o ratou i mate ra. A ka kite ia, na whakatika ana, haere  
 ana, he mea kei mate, a ka tae ki Peerehepa o Hura. Na ka whakarerea e ia tana tangata ki reira.  
<sup>4</sup> Ko ia ia i haere ki te koraha, kotahi te ra ki te ara, a ka tae, ka noho i raro i tetahi hunipa: a ka inoi  
 ia mona kia mate ia; a ka mea, Heoi ra, inaianei, e Ihowa, tangohia atu toku wairua; kahore hoki  
<sup>5</sup> ahau i pai ake i oku matua. Na ka takoto ia, ka moe i raro i tetahi hunipa; na, ko tetahi anahera e  
<sup>6</sup> papaki ana i a ia, e mea ana ki a ia, Maranga ki te kai. Na titiro rawa ake ia, ko tetahi keke, he  
 mea tunu ki te pungarehu, me tetahi ipu wai i tona urunga. Na kai ana ia, inu ana, a takoto iho ana  
<sup>7</sup> ano. Na ka hoki mai ano te anahera a Ihowa, a ka papaki i a ia, ka mea, Maranga ki te kai; he roa  
<sup>8</sup> rawa hoki te ara mou, e kore e taea e koe. Na maranga ana ia, a kai ana, inu ana, a haere ana, me  
 te mau ano te mana o taua kai, e wha tekau nga ra, e wha tekau nga po a tae noa ki Horepa, ki te  
 maunga o te Atua.  
<sup>9</sup> Na haere ana ia ki reira ki tetahi ana, a moe ana i reira. Na ka puta mai te kupu a Ihowa ki a  
<sup>10</sup> ia; i mea ia, E aha ana koe i konei, e Iraia? A ka mea tera, Nui atu toku hae mo Ihowa, mo te  
 Atua o nga mano; kua whakarerea hoki tau kawenata e nga tama a Iharaira, a ko au aata, wahia iho

e ratou, patua iho hoki e ratou au poropiti ki te hoari; a ko ahau, ko ahau rawa anake i mahue; a ke

<sup>11</sup>  
i te rapu ratou i ahau kia whakamatea. Na ka mea ia, Puta mai, ka tu ki te maunga ki te aroaro o Ihowa. Na ko te haerenga atu o Ihowa, he nui ano te hau, he kaha, e whakakoara ana i nga maunga, e wahi ana i nga kohatu i te aroaro o Ihowa; otiia kahore a Ihowa i roto i te hau: a muri iho i te hau

<sup>12</sup>  
ko te ru; otiia kahore a Ihowa i roto i te ru: A i muri o te ru ko te ahi; otiia kahore a Ihowa i roto

<sup>13</sup>  
i te ahi: a i muri i te ahi ko te reo ngawari, he mea iti. A, no te rongonga o Iraia ka hipokina e ia tona mata ki tona koroka, a haere ana, tu ana i te kuwaha o te ana. Na ko te putanga mai o tetahi

<sup>14</sup>  
reo ki a ia, ka mea, E aha ana koe i konei, e Iraia? Ano ra ko tera, Nui atu toku hae mo Ihowa, mo te Atua o nga mano; kua whakarerea hoki tau kawenata e nga tama a Iharaira, ko au aata, wahia iho e ratou, patua iho e ratou au poropiti ki te hoari; a ko ahau, ko ahau rawa anake i mahue; a kei

<sup>15</sup>  
te rapu ratou i ahau kia whakamatea. Na ka mea a Ihowa ki a ia, Haere, e hoki i tou ara ki te

<sup>16</sup>  
koraha o Ramahiku; a ka tae koe, whakawahia a Hataere hei kingi mo Hiria. A whakawahia a Iehu tama a Nimihi hei kingi mo Iharaira; me whakawahi ano a Eriha tama a Hapata o Aperemehora

<sup>17</sup>  
hei poropiti i muri i a koe. Na, ko te hunga e mawhiti i te hoari a Hataere ma Iehu e whakamate;

<sup>18</sup>  
ko te hunga e mawhiti i te hoari a Iehu ma Eriha e whakamate. Otiia ka whakatoea e ahau maku e whitu nga mano i roto i a Iharaira, ko nga turi katoa kihai ano i tuturi ki a Paara, me nga mangai katoa kihai i kihi i a ia.

<sup>19</sup>  
Heoi haere atu ana ia i reira, a ka tupono ki a Eriha tama a Hapata, e parau ana ia, me nga kau i nga ioka kotahi tekau ma rua i tona aroaro, ko ia i te tekau ma rua: na haere ana a Iraia i tona

<sup>20</sup>  
taha, a maka ana e ia tona koroka ki runga ki a ia. Na whakarerea ake e tera nga kau, a rere ana ki te whai i a Iraia, a ka mea, Tukua ahau kia kihi i toku papa, i toku whaea, ka haere ai ki te whai

<sup>21</sup>  
i a koe. Ano ra ko tera ki a ia, Haere, e hoki: i aha hoki ahau ki a koe? Na hoki ana tera i te whai i a ia, a ka mau ki nga kau o tetahi ioka, patua iho, kohuatia iho o raua kikokiko ki nga mea o nga kau, hoatu ana e ia te kikokiko ki nga tangata, a kainga ana e ratou. Na whakatika ana ia, haere ana ki te whai i a Iraia, a mahi ana ki a ia.

## Chapter 20

<sup>1</sup>  
Na ka huihuia tana ope katoa e Peneharara kingi o Hiria; e toru tekau ma rua nga kingi ona hoa, me nga hoiho, me nga hariata: na haere ana ia, a whakapaea ana a Hamaria, tauria ana e ia.

<sup>2</sup>  
Na ka tonoa etahi karere e ia ki a Ahapa kingi o Iharaira, ki te pa, a ka mea ki a ia, Ko te kupu

<sup>3</sup> tenei a Peneharara, Ko tau hiriwa, ko tau koura, naku ena: me au wahine, me au tamariki, nga  
<sup>4</sup> mea papai, naku ena. Na ka whakahoki te kingi o Iharaira, ka mea, Rite tonu ki tau i mea na, e  
<sup>5</sup> toku ariki, e te kingi: nau ahau me aku mea katoa. Na ka hoki nga karere, ka mea, Ko te kupu  
<sup>6</sup> tenei a Peneharara, e ki ana, I tono tangata ano ahau ki a koe hei mea atu, Me homai e koe tau  
<sup>7</sup> hiriwa, tau koura, au wahine, me au tamariki; Na kia penei apopo ka tonoa atu e ahau aku tangata  
<sup>8</sup> ki a koe, ki te rapu i roto i tou whare, i nga whare ano o au tangata; na, ko nga mea katoa e  
<sup>9</sup> minaminatia ana e ou kanohi, tera e tangohia mai i o ratou ringa, ka maua mai. Katahi te kingi o  
<sup>10</sup> Iharaira ka karanga ki nga kaumatua katoa o te whenua, a ka mea, Kia ata whakaaro koutou, kia  
<sup>11</sup> kite kei te rapu tenei tangata i te kino: i tono tangata mai hoki ia ki ahau mo aku wahine, mo aku  
<sup>12</sup> tamariki, mo taku hiriwa, a mo taku koura; a kihai i kaiponuhia e ahau ki a ia. Na ka mea nga  
<sup>13</sup> kaumatua katoa, ratou ko te iwi katoa ki a ia, Kaua e whakarongo, kaua e whakaae. Katahi ia ka  
<sup>14</sup> mea ki nga karere a Peneharara, Mea atu ki toku ariki, ki te kingi, Ko nga mea katoa i tono mai ai  
<sup>15</sup> koe ki tau pononga i te tuatahi, ka meatia e ahau: ko tenei mea ia e kore e taea e ahau te mea. Na  
<sup>16</sup> haere ana nga karere ki te whakahoki i te kupu. Na ka tono tangata ano a Peneharara, ka mea,  
<sup>17</sup> Kia meatia mai tenei e nga atua ki ahau, me era atu mea, ki te rato i te puehu o Hamaria nga ringa  
<sup>18</sup> o te hunga katoa e whai ana i ahau. Na ka whakahoki te kingi o Iharaira, ka mea, Ki atu ki a ia,  
 Kaua te tangata e whitiki ana i tona pukupuku, e whakamanamana, e pera me te tangata e wewete  
 ana.  
<sup>12</sup> I te rongonga o Peneharara i tenei kupu, i a ia e inu ana, ratou ko nga kingi i roto i nga teneti,  
 ka mea ia ki ana tangata, Whakatikaia a koutou ngohi. Na whakatikaia ana a ratou ngohi hei whawhai  
<sup>13</sup> ki te pa. Na, ka whakatata mai tetahi poropiti ki a Ahapa kingi o Iharaira, ka mea, Ko ta Ihowa  
 kupu tenei, Ka kite koe i tenei ope nui katoa? Nana, ka hoatu ratou e ahau aiane ki tou ringa, a ka  
<sup>14</sup> mohio koe ko Ihowa ahau. A ka mea a Ahapa, Ma wai? Ano ra ko tera, Ko ta Ihowa kupu tenei,  
 Ma nga taitama o nga rangatira o nga kawanatanga. A ka mea ia, Ma wai e timata te whawhai? A  
<sup>15</sup> ka mea tera, Mau. Na ka whakaemia e ia nga taitama a nga rangatira o nga kawanatanga, e rua  
 rau e toru tekau ma rua ratou: i muri i a ratou i whakaemia ano e ia te iwi katoa, ara nga tama katoa  
<sup>16</sup> a Iharaira, e whitu mano. Na puta ana ratou i te poutumarotanga. Ko Peneharara ia i te inu i roto  
 i nga teneti, a haurangi iho, a ia me nga kingi, ara ko nga kingi e toru tekau ma rua, ona whakauru.  
<sup>17</sup> Na ka puta tuatahi ko nga taitama a nga rangatira o nga kawanatanga: na ka tono tangata a  
<sup>18</sup> Peneharara; a ka korero ratou ki a ia, ka mea, He tangata enei kua puta mai i Hamaria. Ano ra  
 ko tera, Ki te mea he hohou rongu i puta mai ai ratou, hopukia oratia: ki te mea ano he whawhai i

19  
puta mai ai, hopukia oratia. Heoi puta ana enei ki waho o te pa, nga taitamariki o nga

20  
kawanatanga, me te ope i muri i a ratou. Na patua ana e ratou tana tangata, tana tangata; a rere  
ana nga Hiriani, whaia ana e Iharaira; ko Peneharara ia kingi o Hiria, i mawhiti i runga i te hioho,

21  
ratou ko nga kaieke hioho. Na ka puta te kingi o Iharaira, a patua iho nga hoiho me nga hariata;  
heoi patua ana nga Hiriani, nui atu te parekura.

22  
Na ka haere te poropiti ki te kingi o Iharaira, a ka mea ki a ia, Haere ki te whakakaha i a  
koe; kia mohio hoki, kia mahara ki tau e mea ai; ka taka hoki te tau, ka whakaekae koe e te kingi

23  
o Hiria. Na ka mea nga tangata a te kingi o Hiria ki a ia, He atua maunga o ratou atua; koia ratou

24  
i kaha ai i a tatou; kia whawhai ia tatou ki a ratou i te mania, ka kaha tatou i a ratou. Na ko tenei  
tau e mea ai; whakawateatia atu nga kingi, tenei, tenei i tona wahi; a whakaritea etahi rangatira hei

25  
whakakapi mo ratou. Na taua tetahi ope, kia rite ki tenei au kua hinga nei, he hoiho, he hoiho,  
he hariata, he hariata, a ka whawhai tatou ki a ratou ki te mania: tera tatou e kaha i a ratou. Na

26  
rongo tonu ia ki to ratou reo, a peratia ana e ia. Na, i te takanga o te tau, ka whakaemia e

27  
Peneharara nga Hiriani, a haere ana ki Apeke ki te whawhai ki a Iharaira. Na ka taua ano nga  
tama a Iharaira, a ka whai kai, a ka haere ki te tu i a ratou: a noho ana nga tama a Iharaira i to ratou  
ritenga atu, koia ano kei nga kahui iti e rua o nga kua koati; ko nga Hiriani ia, kapi ana te whenua

28  
i a ratou. Na ka haere te tangata a te Atua, a ka korero ki te kingi o Iharaira, ka mea, Ko te kupu  
tenei a Ihowa, Kua mea nei nga Hiriani, He atua maunga a Ihowa, ehara ia i te atua raorao, na ka

29  
hoatu e ahau tenei ope nui katoa ki tou ringa, a ka mohio k outou ko Ihowa ahau. Na noho ana  
ratou, tetahi, tetahi, anga atu, anga mai, e whitu nga ra. A i te whitu o nga ra ka pipiri ki te whawhai.

30  
Na patua iho o nga Hiriani e nga tama a Iharaira kotahi rau mano i taua ra kotahi. Ko nga morehu  
ia i rere ki Apeke, ki roto ki te pa; a horo iho ana te taiepa ku runga ki nga mano e rua tekau ma  
whitu o nga morehu; ko Peneharara ia i rere, a haere ana ki roto ki te pa ki tetahi ruma i roto rawa.

31  
Na ka mea ana tangata ki a ia, Nana, kua rongo matou he kingi tohu tangata nga kingi o te  
whare o Iharaira: tena, kia maka iho e matou he kakahu taratara ki o matou hope, me etahi taura ki

32  
o matou matenga, a kia haere atu ki te kingi o Iharaira: tera pea koe e whakaorangia e ia. Heoi  
whitikiria ana e ratou he kakahu taratara ki o ratou hope, he taura hoki ki o ratou matenga; a ka  
haere ki te kingi o Iharaira, ka mea, E mea ana tau pononga a Peneharara, Tena ra, kia ora ahau. A

33  
ka mea tera, Kei te ora ano ranei ia? ko to ku tuakana ia. Na i ata whakarongo aua tangata ki  
tana, a hohoro tonu te hopu i tona whakaaro, a ka mea, Ko tou tuakana ra, a Peneharara. Ano ra ko  
ia, Haere koutou, tikina atu ia. Heoi ka puta mai a Peneharara ki a ia, a ka mea tera kia eke ia ki te

34  
hariata. Na ka mea a Peneharara ki a ia, Ko nga pa i tangohia e toku papa i tou papa me whakahoki

atu e ahau; a mau e hanga etahi huanui mau ki Ramahiku kia rite ki a toku papa i hanga ai ki Hamaria. Ano ra ko Ahapa, Me tuku koe e ahau i runga i tenei ka wenata. Na, whakaritea ana he

<sup>35</sup> kawenata e raua, a tukua ana ia. Na ka mea tetahi tangata o nga tama a nga poropiti ki tona hoa,

<sup>36</sup> he mea ki na Ihowa, Tena, patua ahau. Heoi kihai taua tangata i pai ki te patu i a ia. Katahi ka mea tera ki a ia, i te mea kihai koe i whakarongo ki te reo o Ihowa, na, mawehe atu ana koe i konei, ka patua koe e te raiona. A, no te haerenga atu i tona taha, ka tutaki tetahi raiona ki a ia, patua iho.

<sup>37</sup> Katahi ka tutaki ia ki tetahi atu tangata, a ka mea, Tena, patua ahau. Na ka patu taua tangata i a

<sup>38</sup> ia, he patu i motu ai. Heoi haere ana taua poropiti, a tu ana i te ara, he whanga i te kingi; i

<sup>39</sup> whakaahua ke hoki i a ia, ko tona tipare ki tona mata. A, i te kingi e haere ana, ka karanga ia ki te kingi, ka mea, I haere tau pononga ki waenganui o te whawhai: na ko te pekanga mai o tetahi tangata, kawea mai ana e ia tetahi tangata ki ahau, ka mea, Tiakina tenei tangata: ki te mea ka riro ia, k o koe ka mate hei ritenga mo tona matenga: me utu ranei e koe kia kotahi taranata hiriwa.

<sup>40</sup> A, i tau pononga e mea noa ana i tenei mea, i tera mea, kua riro tera. Na ka mea te kingi o Iharaira

<sup>41</sup> ki a ia, Me pena te tikanga mou; kua tika mai na i a koe. Na hohoro tonu te tango a tera i te tipare

<sup>42</sup> i ona kanohi, a ka mohio te kingi o Iharaira ki a ia ko tetahi o nga poropiti. Na ka mea tera ki a ia, Ko te kupu tenei a Ihowa, Kua tukua atu nei i roto i tou ringa taku tangata i tukua putia atu nei e ahau ki te mate; na ko tou matenga hei ritenga mo tona matenga, me tou iwi hei utu mo tona iwi.

<sup>43</sup> Na pouri ana, riri ana, te kingi o Iharaira, a haere ana ki tona whare; tae tonu atu ki Hamaria.

## Chapter 21

<sup>1</sup> A, i muri i enei mea, he mara waina ta Napoto Ietereeri i Ietereere, i te taha tonu o te whare

<sup>2</sup> o Ahapa kingi o Hamaria. Na ka korero a Ahapa ki a Napoto, ka mea, Homai tau mara waina ki ahau, hei kari otaota maku, e tata ana hoki ki te taha o toku whare, a me hoatu e ahau tetahi mara

<sup>3</sup> waina, he pai ke atu i tenei hei utu; ki te pai ranei ki tau titiro, me utu ki te moni. Na ka mea a Napoto ki a Ahapa, E! ma Ihowa ahau e arai kei hoatu e ahau te kainga tupu o oku matua ki a koe!

<sup>4</sup> Na haere ana a Ahapa ki tona whare; pouri ana, riri ana, mo te kupu i korero ai a Napoto Ietereeri ki a ia; mo tana i mea ra, E kore e hoatu e ahau te kainga tupu o oku matua ki a koe. Na takoto ana ia ki tona moenga, me te ahu ke ano tona mata, kihai hoki i kai taro.

<sup>5</sup> Katahi tana wahine, a Ietepere, ka haere mai ki a ia, ka mea ki a ia, He aha tou wairua i pouri

<sup>6</sup> ai, te kai taro ai koe? Na ka mea tera ki a ia, I korero ahau ki a Napoto Ietereeri, i mea ki a ia,

Homai tau mara waina ki ahau, me utu ki te moni: ki te pai ranei koe, me hoatu e ahau tetahi atu mara ki a koe hei utu. Na ka mea mai ia, E kore e hoatu e ahau taku mara waina ki a koe. <sup>7</sup> Na ka ki atu a Ietepere, tana wahine, ki a ia, Ko koe ranei te kaiwhakahaere o te kingitanga o Iharaira? Whakatika ki te kai taro mau, kia koa tou ngakau. Maku e hoatu te mara waina a taua Ietereeri, a <sup>8</sup> Napoto, ki a koe. Heoi tuhituhia ana etahi pukapuka e ia, no Ahapa te ingoa, hiri rawa ki tana hiri; a tukua ana aua pukapuka ki nga kaumatua, ki nga rangatira i roto i tona pa, a e noho tahi ana <sup>9</sup> me Napoto. I tuhituhi ia ki te pukapuka, i mea, Karangatia he nohopuku, ka whakanoho i a Napoto <sup>10</sup> ki runga ake i te iwi: Ka whakanoho ano i etahi tangata, he tama na Periara, kia tokorua, ki tona aroaro, hei whakaatu i tona he, hei ki, Nau i kanga te Atua raua ko te kingi. Katahi ka kawea i a ia <sup>11</sup> ki waho, ka aki ki te kohatu, kia mate. Na ka meatia e nga tangata o tona pa, ara e nga kaumatua ratou ko nga rangatira e noho ana i tona pa, te mea i tonono tangata ai a Ietepere ki a ratou, te mea i <sup>12</sup> tuhituhia ki nga pukapuka i tukua nei e ia ki a ratou. I karangatia he nohopuku, a whakanohoia <sup>13</sup> ana a Napoto ki runga ake i te iwi. Na ka haere mai nga tangata tokorua, nga tama a Periara, ka noho i tona aroaro: a ka whakaatu aua tangata a Periara i te he mona, ara mo Napoto i te aroaro o te iwi; i mea raua, I kanga e Napoto te Atua raua ko te kingi. Na kawea ana ia e ratou ki waho o te <sup>14</sup> pa, a akina ana ki te kohatu, a mate noa ia. Katahi ratou ka tonono tangata ki a Ietepere, ka mea, <sup>15</sup> Kua oti a Napoto te aki ki te kohatu, a kua mate. A, i te rongonga o Ietepere kua oti a Napoto te aki ki te kohatu, a kua mate, na ka mea a Ietepere ki a Ahapa, Whakatika, tangohia te mara a taua Ietereeri, a Napoto, kihai na ia i pai kia homai ki a koe hei utu moni; kahore hoki a Napoto i <sup>16</sup> te o ra, kua mate. A ka rongonga a Ahapa kua mate a Napoto, na whakatika ana a Ahapa, haere ana ki raro, ki te mara waina a taua Ietereeri, a Napoto, kia tangohia e ia. <sup>17</sup> Na ka puta te kupu a Ihowa ki a Iraia Tihipi; i ki ia, <sup>18</sup> Whakatika, haere ki raro, ki te whakatauri i a Ahapa kingi o Iharaira i Hamaria: kei te mara waina ia a Napoto, kua riro hoki ki reira <sup>19</sup> ki te tango. Korero ki a ia, mea atu, Ko te kupu tenei a Ihowa, Kua patu iana koe? kua riro ano i a koe? Ki atu ano ki a ia, mea atu, Ko te kupu tenei a Ihowa, Ko te wahi i mitikia ai e nga kuri <sup>20</sup> nga toto o Napoto, ka mitikia ano e nga kuri ki reira ou toto, ae ra, ou ano. Na ka mea a Ahapa ki a Iraia, Kua mau ahau i a koe, e toku hoariri? Ano ra ko tera, Kua mau ano, no te mea kua hoko <sup>21</sup> koe i a koe ki te mahi i te kino ki te aroaro o Ihowa. Nana, tenei ahau te tari kino atu nei ki runga ki a koe, a ka tahia atu ou uri; ka hautopea atu nga tamariki tane katoa i a Ahapa, me nga mea i <sup>22</sup> tutakina ki roto, me nga mea i mahue i roto i a Iharaira. Ka meinga ano e ahau tou whare kia rite ki te whare o Ieropoama tama a Nepata, ki te whare o Paaha tama a Ahia, mo te whakapataritari <sup>23</sup> i whakapataritari ai koe i ahau, mou i hara ai a Iharaira. I korerotia ano a Ietepere e Ihowa, i mea



ia, Ka kainga a Ietepere e nga kuri ki te parepare o Ietepere. <sup>24</sup> Ko te hunga o Ahapa e mate ki te pa ma nga kuri e kai; ko nga mea hoki e mate ki te parae ma nga manu o te rangi e kai. <sup>25</sup> Heoi kahore he rite mo Ahapa, i hoko nei i a ia ki te mahi kino ki te aroaro o Ihowa; he mea akiaki na tana wahine, na Ietepere. <sup>26</sup> Whakarihariha rawa tana haere ki te whai i nga whakapakoko: rite tonu tana ki nga mea katoa i mea ai nga Amori i peia nei e Ihowa i te aroaro o nga tama a Iharaira. <sup>27</sup> A, no te rongonga o Ahapa i enei kupu, na haea ana e ia ona kakahu, meatia ana he kakahu taratara ki tona kiri, a nohopuku ana, takoto ana ko taua mea taratara nei te kakahu, a mahaki ana te haere. <sup>28</sup> Na ka puta te kupu a Ihowa ki a Iraia Tihipi, i mea ia, <sup>29</sup> Kua kite koe i ta Ahapa whakangohengohe nei i a ia ki toku aroaro, na e kore e taria e ahau tenei kino i ona ra: engari hei nga ra o tana tama ahau tari ai i te kino ki tona whare.

## Chapter 22

<sup>1</sup> Na e toru o ratou tau e noho ana, a kahore he whawhai a Hiria ki a Iharaira. <sup>2</sup> Na i te toru o nga tau ka haere iho a Iehohapata kingi o Hura ki raro, ki te kingi o Iharaira. <sup>3</sup> Na ka mea te kingi o Iharaira ki ana tangata, E mohio ana ranei koutou no tatou Ramoto Kireara, a e ata noho nei tatou, kahore e tangohia e tatou i te ringa o te kingi o Hiria? <sup>4</sup> Na ka mea ia ki a Iehohapata, ka haere ranei koe, taua ki Ramoto Kireara ki te whawhai? Ano ra ko Iehohapata ki te kingi o Iharaira, Ko ahau, ko koe, taua taua; ko toku iwi, ko tou iwi, ratou ratou; ko oku hoiho, ko ou hoiho, rite tonu. <sup>5</sup> I mea ano a Iehohapata ki te kingi o Iharaira, Tena, rapua aianeiti tetahi kupu i a Ihowa. <sup>6</sup> Katahi ka huihuia nga poropiti e te kingi o Iharaira, e wha rau aua tangata. Na ka mea ia ki a ratou, Me haere ranei ahau ki Ramoto Kireara ki te whawhai, kauaka ranei? Ano ra ko ratou; Haere; ma te Ariki hoki e homai ki te ringa o te kingi. <sup>7</sup> Na ka mea a Iehohapata, Kahore ranei tetahi atu i konei, tetahi poropiti a Ihowa, hei rapunga atu ma tatou? <sup>8</sup> Ano ra ko te kingi o Iharaira ki a Iehohapata, Tenei ano tetahi, ko Mikaia tama a Imira hei rapunga atu ma tatou i ta Ihowa: otiia e kino ana ahau ki a ia; kahore hoki ana poropiti pai moku; engari he kino. Na ka mea a Iehohapata, Kaua e pena te kupu a te kingi. <sup>9</sup> Katahi te kingi o Iharaira ka karanga ki tetahi rangatira, ka mea, Kia hohoro te tiki atu i a Mikaia tama a Imira. <sup>10</sup> Na ka noho te kingi o Iharaira raua ko Iehohapata kingi o Hura, tena i runga i tona torona, tena i runga i tona torona, rakai rawa ki o raua kakahu, i te wahi takoto kau i te tomokanga ki te kuwaha o Hamaria; me te poropiti ano nga poropiti katoa i to raua aroaro. <sup>11</sup> Na ka meatia e Terekia tama a Kenaana etahi haona rino mana, a ka mea ia, Ko te kupu

12  
tenei a Ihowa, Ka pana nga Hiriani e koe ki enei a poto noa. A pera tonu te poropiti a nga poropiti katoa, i mea ratou, Haere ki Ramoto Kireara, kia taea hoki tau; kua homai hoki e Ihowa ki te ringa

13  
o te kingi. A i korero te karere i haere ki te karanga i a Mikaia, i mea ki a ia, Nana, ko nga kupu a nga poropiti ki te kingi kotahi tonu te mangai mo te pai: na kia rite tau kupu ki ta tetahi o ratou,

14  
kia pai au korero. Na ka mea a Mikaia, E ora ana a Ihowa, ina, ko ta Ihowa e korero mai ai ki ahau, ko taku tena e korero ai.

15  
A, no tona taenga ki te kingi, ka mea te kingi ki a ia, E Mikaia, me haere ranei matou ki Ramoto Kireara ki te whawhai, kua ranei? Ano ra ko tera ki a ia, Haere, kia taea hoki tau; kua

16  
hoatu hoki e Ihowa ki te ringa o te kingi. Na ka mea te kingi ki a ia, Kia hia ianei aku whakaoati

17  
i a koe kia kati au e korero mai ai ki ahau, ko te mea pono anake, i runga i te ingoa o Ihowa? Na ka ki tera, I kite ahau i a Iharaira katoa e marara noa ana i runga i nga maunga, koia ano kei nga hipi kahore nei o ratou kaitiaki, a i mea a Ihowa, Kahore o enei ariki; kia hoki marie tera, tera, ki

18  
o ratou whare. Na ka mea te kingi o Iharaira ki a Iehohapata, Kahore ianei ahau i ki atu ki a koe,

19  
e kore e pai tana poropiti moku; engari he kino? Na ka ki tera, Mo reira whakarongo mai ki te kupu a Ihowa; i kite ahau i a Ihowa e noho ana i runga i tona torona, i te mano katoa ano o te rangi

20  
e tu ana i tona taha ki matau, i tona taha ki mau. Na ka mea a Ihowa, Ko wai hei whakapati i a Ahapa kia haere ai, kia hinga ai ki Ramoto Kireara? Na puta ke ta tenei kupu, puta ke ta tenei kupu.

21  
Na ka puta tetahi wairua, ka tu ki te aroaro o Ihowa, ka mea, Maku ia e whakapati. A ka mea a Ihowa ki a ia, Me pehea? ano ra ko tera, Me haere ahau, a hei wairua teka ahau i roto i nga mangai o ana poropiti katoa. Na ka mea ia, Mau ia e whakapati, ka taea ano e koe: haere, meatia tau na.

23  
Na kua hoatu inaianei e Ihowa he wairua teka ki te mangai o enei poropiti katoa au, a kua kino

24  
ta Ihowa korero mou. Na ka whakatata a Terekia tama a Kenaana, ka papaki i te paparinga o

25  
Mikaia, ka mea, I na hea te haerenga atu o te wairua o Ihowa i ahau ki a koe korero ai? Ano ra

26  
ko Mikaia, Tera koe e kite i te ra e haere ai koe ki tetahi ruma i roto rawa piri ai. Na ka mea te kingi o Iharaira, Kawea atu a Mikaia, whakahokia ki a Amono rangatira o te pa, ki a Ioaha tama a

27  
te kingi; Ki atu hoki, Ko te kupu tenei a te kingi, Hoatu tenei ki te whare herehere, whangaia ki te taro o te tangihanga, ki te wai o te tangihanga, kia hoki mai ra ano ahau i runga i te rangimarie.

28  
Ano ra ko Mikaia, Ki te hoki mai koe i runga i te rangimarie, ehara ahau i te kaiwhakapuaki i a Ihowa korero. I mea ano ia, Whakarongo, e nga iwi, e koutou katoa!

29 Heoi haere ana te kingi o Iharaira raua ko Iehohapata kingi o Hura ki runga, ki Ramoto  
 30 Kireara. Na ka mea te kingi o Iharaira ki a Iehohapata, Me whakaputa ke toku ahua, ka haere  
 ki te whawhai: ko koe ia kakahuria ou kakahu. Na whakaputa ke ana te kingi o Iharaira i tona ahua,  
 31 a haere ana ki te whawhai. Na kua oti i te kingi o Hiria te whakahau ana rangatira e toru tekau  
 ma rua, nga kaiwhakahaere o ana hariata, kua mea, Kaua e whawhai ki te iti, ki te rahi; engari ki  
 32 te kingi anake o Iharaira. A, no te kitenga o nga rangatira o nga hariata i a Iehohapata, ka mea  
 ratou, Koia ano tenei te kingi o Iharaira. Na peka ana ratou ki a ia ki te whawhai ki a ia. Na ko te  
 33 hamamatanga o Iehohapata. A, i te kitenga o nga rangatira o nga hariata ehara ia i te kingi o  
 Iharaira, hoki ana ratou i te whai i a ia. 34 Na ka kumea te kopere e tetahi tangata, he mea noa iho,  
 tu tonu te kingi o Iharaira i waenga pu o te hononga iho o te pukupuku. Na ka mea ia ki te kaiarataki  
 35 o tana hariata, Tahuri tou ringa; kaweia atu ahau i roto i te ope; kua tu hoki ahau, he tu kino. Na  
 ka rahi haere te whawhai i taua ra: a he mea pupuri ake te kingi i runga i te hariata kia tu tonu atu  
 36 ai ia ki nga Hiriani; a i te ahiahi ka mate: na rere ana nga toto o te tunga ki te riu o te hariata. Na  
 ka pa te karanga puta noa i te ope i te mea ka to te ra; ko te kupu tenei, Ki tona pa, ki tona whenua,  
 37 e tera tangata, e tera tangata! Heoi ka mate te kingi, a ka kaweia ki Hamaria, tanumia iho e ratou  
 38 te kingi ki Hamaria. A i horoia te hariata ki te poka wai i Hamaria; a mitikia ana ona toto e nga  
 39 kuri: na he wahi horoinga tera no nga wahine kairau; ko ta Ihowa ia korero ai. Na, ko era atu  
 mahi a Ahapa me nga mea katoa i mea ai ia, me te whare rei i hanga e ia, me nga pa katoa i hanga  
 40 e ia, kahore ianei i tuhituhia ki te pukapuka o nga meatanga o nga ra o nga kingi o Iharaira? Na  
 moe ana a Ahapa ki ona matua, a ko tana tama, ko Ahatia, te kingi i muri i a ia.  
 41 No te wha o nga tau o Ahapa kingi o Iharaira i kingi ai a Iehohapata tama a Aha ki a Hura.  
 42 E toru tekau ma rima nga tau o Iehohapata i tona kingitanga, a e rua tekau ma rima nga tau i  
 43 kingi ai ia ki Hiruharama: ko te ingoa hoki o tona whaea, ko Atupa, he tamahine na Hirihi. A i  
 haere ia i nga ara katoa o tona papa, o Aha; kihai i peka ke; i mahi ia i te mea e tika ana ki ta Ihowa  
 titiro; otia kihai nga wahi tiketike i whakakahoretia; i patu whakahere ano te iwi, i tahu whakakakara  
 44 ki nga wahi tiketike. A i houhia te rongoa e Iehohapata ki te kingi o Iharaira. 45 Na, ko era atu  
 meatanga a Iehohapata me ana mahi toa, me ana whawhaitanga, kahore ianei i tuhituhia ki te  
 46 pukapuka o nga meatanga o nga ra o nga kingi o Hura? I whakamotitia atu ano e ia i te whenua  
 47 era atu o te hunga whakahoroma i mahue nei i nga ra o tona papa, o Aha. Na i taua wa kahore  
 48 o Eroma kingi: he kawana te kingi. A i hanga etahi kaupuke o Tarahihi e Iehohapata hei tiki

49  
 koura ki Opira. Otiia kihai i rere; i pakaru hoki nga kaipuke ki Ehiono Kepere. Katahi a Ahatia  
 tama a Ahapa ka mea ki a Iehohapata, Kia eke tahi aku tangata me au tangata ki runga ki nga  
 50  
 kaipuke. Otiia kihai a Iehohapata i pai. Na ka moe a Iehohapata ki ona matua, a tanumia ana ki  
 51  
 ona matua ki te pa o tona tupuna, o Rawiri; a ko tana tama, ko Iehorama te kingi i muri i a ia. No  
 te tekau ma whitu o nga tau o Iehohapata kingi o Hura i kingi ai a Ahatia tama a Ahapa ki a Iharaira  
 52  
 i Hamaria; a e rua nga tau i kingi ai ia ki a Iharaira. A i kino tana mahi ki te aroaro o Ihowa, i  
 haere hoki i te ara o tona papa, i te ara o tona whaea, i te ara ano o Ieropoama tama a Nepata, i hara  
 53  
 ai a Iharaira: I mahi hoki ki a Paara, i koropiko ki a ia; i whakapataritari i a Ihowa, i te Atua o  
 Iharaira: rite tonu tana ki nga mea katoa i mea ai tona papa.

## 2 Kings

### Chapter 1

1 Na i muri i te matenga o Ahapa ka whakakeke a Moapa ki a Iharaira. 2 Na ka taka iho a Ahatia  
 i te taiepa ripekapeka i tona ruma i runga, i Hamaria, a ka takoto mate: na ka tonu tangata ia, ka  
 3  
 mea ki a ratou, Tikina, uia ki a Paarahepupa atua o Ekerono, e ora ranei ahau i tenei mate. Otiia  
 i mea te anahera a Ihowa ki a Iraia Tihipi, Whakatika, haere ki runga, ki te whakatau i nga tangata  
 a te kingi o Hamaria, mea atu ki a ratou, He kore Atua ianei no Iharaira i haere ai koutou ki te ui  
 4  
 ki a Paarahepupa atua o Ekerono? No reira ko te kupu tenei a Ihowa, Ko te moenga i pikitia na  
 e koe, e kore koe e heke iho i reira, engari ko te mate kau mou. Na haere ana a Iraia. 5 Na, i te  
 6  
 hokinga atu o nga tangata ki a ia, ka mea ia ki a ratou, He aha koutou i hoki mai ai? Na ka mea  
 ratou ki a ia, I haere mai tetahi tangata ki te whakatau i a matou, a ka mea ki a matou, Haere, hoki  
 atu ki te kingi i tonoa mai ai koutou, mea atu ki a ia, Ko te kupu tenei a Ihowa, He kore Atua no  
 Iharaira i tonu tangata ai koe ki te ui ki a Paarahepupa atua o Ekerono? Na, ko te moenga i pikitia  
 7  
 na e koe, e kore koe e heke iho i reira; engari ko te mate kau mou. Na ka mea ia ki a ratou, Tena  
 koa te ahua o taua tangata i haere mai na ki te whakatau i a koutou, i korero na i aua kupu ki a  
 8  
 koutou? Na ka mea ratou ki a ia, He tangata puhuruhuru, he whitiki hiako te whitiki o tona hope.  
 Na ka mea ia, Ko Iraia Tihipi tena.  
 9  
 Katahi ia ka unga i tetahi rangatira rima tekau me tana rima tekau. Na haere ana ia ki a ia; na  
 i te tihi tera o te maunga e noho ana. A ka mea ia ki a ia, E te tangata a te Atua, i mea mai te kingi,

10 Heke iho. Na ka whakahoki a Iraia, ka mea ki te rangatira rima tekau, Ki te mea he tangata ahau na te Atua, kia heke iho he ahi i te rangi hei kai i a koutou ko tau rima tekau. Na heke iho ana he ahi i te rangi, pau ake ia me tana rima tekau. 11 Na ka unga ano e ia tetahi atu rangatira rima tekau me tana rima tekau. A ka oho tera, ka mea atu ki a ia, E te tangata a te Atua, ko te kupu tenei a te kingi, Hohoro te heke iho. 12 Na ka whakahoki a Iraia, ka mea ki a ratou, Ki te mea he tangata ahau na te Atua, kia heke iho he ahi i te rangi hei kai i a koutou ko tau rima tekau. Ko te hekenga iho o te ahi a te Atua i te rangi, pau ake ia me tana rima tekau. 13 Na ka unga ano e ia, ka tuatorutia, he rangatira rima tekau me tana rima tekau. Na haere ana te tuatoru o nga rangatira rima tekau, ka tae, ka tuku i nga turi ki raro, ki te aroaro o Iraia, ka tangi ki a ia, ka mea ki a ia, E te tangata a te Atua, kia nui ki tou whakaaro toku wairua me nga wairua o enei pononga e rima tekau au. 14 Nana, i heke iho he ahi i te rangi, a pau ake nga rangatira tokorua o nga rima tekau o mua ake nei me a raua rima tekau: na kia nui toku wairua ki tou whakaaro. 15 Na ka mea te anahera a Ihowa ki a Iraia, Heke atu korua, kua e wehi i a ia. Na whakatika ana ia, heke tahi ana raua ki te kingi. 16 Na ka mea tera ki a ia, Ko te kupu tenei a Ihowa, Na kua unga tangata na koe ki te ui ki a Paarahepupa atua o Ekerono, he kore Atua ianei no Iharaira hei uinga mau i tana kupu? na reira, e kore koe e heke iho i te moenga i pikitia na e koe, enga ri ko te mate kau mou. 17 Heoi mate iho ia, i rite tonu ki te kupu a Ihowa i korerotia e Iraia. A ko Iehorama te kingi i muri i a ia, i te rua o nga tau o Iehorama tama a Iehohapata kingi o Hura; kahore hoki ana tama. 18 Na ko era atu mahi a Ahatia i mea ai ia, kahore ianei i tuhituhia ki te pukapuka o nga meatanga o nga ra o nga kingi o Iharaira?

## Chapter 2

1 Na, i te meatanga a Ihowa kia tangohia atu a Iraia ki te rangi i roto i te tukauati, ka haere atu a Iraia raua ko Eriha i Kirikara. 2 Na ka mea atu a Iraia ki a Eriha, Hei konei koe noho ai, kua unga hoki ahau e Ihowa ki Peteere. Ano ra ko Eriha, E ora ana a Ihowa, e ora ana hoki tou wairua, e kore ahau e whakarere i a koe. Heoi haere tahi ana raua ki raro, ki Peteere. 3 Na ka puta mai nga tama a nga poropiti i Peteere ki a Eriha, a ka mea ki a ia, E mohio ana ranei koe ko aiane tangohia ai e Ihowa tou ariki i runga i tou upoko? Ano ra ko ia, E mohio ana ano ahau; whakarongoa. 4 Na ka mea a Iraia ki a ia, E Eriha, heoi konei koe noho ai; kua unga hoki ahau e Ihowa ki Heriko. Ano ra ko tera, E ora ana a Ihowa, e ora ana hoki tou wairua, e kore ahau e whakarere i a koe. Heoi haere ana raua ki Heriko. 5 Na ka whakatata mai nga tama a nga poropiti i Heriko ki a Eriha, a ka

mea ki a ia, E mohio ana ranei koe ko aianei tangohia ai e Ihowa tou ariki i runga i tou upoko? Ano

ra ko ia, E mohio ana ano ahau; whakarongoa. <sup>6</sup> Na ka mea a Iraia ki a ia, Hei konei koe noho ai; kua unga hoki ahau e Ihowa ki Horano. Ano ra ko tera, E ora ana a Ihowa, e ora ana ano hoki tou

wairua, e kore ahau e whakarere i a koe. Na haere ana raua tokorua. <sup>7</sup> Na ka haere etahi tangata e rima tekau, he tama na nga poropiti, a tu atu ana i tawhiti; me te tu ano raua tokorua i te taha o

Horano. <sup>8</sup> Na ka mau a Iraia ki tona koroka, whakakopaia ana e ia, patua ana ki nga wai, a ka wehea ki tetahi taha, ki tetahi taha, a whiti ana raua i te wahi maroke.

<sup>9</sup> A, no to raua whitinga, ka mea a Iraia ki a Eriha, Tonoa mai, ko te aha e meatia e ahau mau i ahau kiano kia wehea noatia i a koe. Ano ra ko Eriha, Kia rereruatia mai ki ahau te wahi wairua

i a koe na. <sup>10</sup> Na ka mea tera, He mea pakeke tau i tonoa mai na: he ahakoa ra, ki te kite koe i ahau

e tangohia atu ana i a koe, ka rite ki tau na; ki te kahore, ka kore e pena. <sup>11</sup> Na, i a raua e haere ana, me te korero haere, ka puta mai tetahi hariata ahi me nga hoiho ahi, a wehea ana raua tokorua; a

kake ana a Iraia i roto i te tukauati ki te rangi. <sup>12</sup> A ka kite a Eriha, ka karanga ia, E toku papa, e toku papa, e nga hariata o Iharaira, e ona kaieke hoiho! A kihai ia i kite i a ia i muri. Na ka mau ia ki ona kakahu ake, a haea iho kia rua nga wahi.

<sup>13</sup> I tangohia ake hoki e ia te koroka o Iraia i marere i runga i a ia, e hoki ana, tu ana i te

pareparenga o Horano. <sup>14</sup> Na ka mau ia ki te koroka o Iraia i marere nei i runga i a ia, a patua iho ki nga wai, me te ki ano, Kei hea ra a Ihowa, te Atua o Iraia? Na, ka patua e ia nga wai, wehe ana

ki tetahi taha, ki tetahi taha: a whiti ana a Eriha. <sup>15</sup> A, no te kitenga o nga tama a nga poropiti, o era o Heriko i te ritenga mai ki a ia, ka mea ratou, Kua tau te wairua o Iraia ki runga ki a Eriha. Na

haere ana mai ratou ki te whakatau i a ia, piko ana ki tona aroaro ki te whenua. <sup>16</sup> Na ka mea ratou ki a ia, Nana, tenei etahi tangata e rima tekau kei au pononga, he marohirohi; tukua ratou kia haere ki te rapu i tou ariki; kei tupono kua kahakina atu ia e te wairua o Ihowa, kua maka ki runga ki

tetahi maunga, ki roto ranei ki tetahi awaawa. Na ka mea ia, Kaua e unga. <sup>17</sup> A, i ta ratou tohenga a whakama noa ia, ka ki atu ia, Unga. Na unga ana e ratou e rima tekau nga tangata: a e toru nga

ra i rapu ai ratou, heoi kihai i kitea. <sup>18</sup> Na hoki ana ratou ki a ia, i Heriko hoki ia e noho ana; a ka mea ia ki a ratou, Kihai ianei ahau i ki atu ki a koutou, Kaua e haere?

<sup>19</sup> Na ka mea nga tangata o te pa ki a Eriha, Nana, he pai te turanga o tenei pa, e kite nei hoki toku ariki; engari ko te wai he kino, a ko te whenua he whakatahe. <sup>20</sup> Na ka mea ia, Maua mai he

oko hou ki ahau, ka mea he tote ki roto. Na ka kawea mai e ratou ki a ia. <sup>21</sup> Na haere ana ia ki te matapuna o te wai, a maka ana te tote ki roto, me te ki ano, Ko te kupu tenei a Ihowa, Kua ora tenei

wai i ahau; heoi ano o konei mate, o konei whakatahe. <sup>22</sup> Na ora tonu ake taua wai a mohoa noa  
 nei, pera tonu me ta Eriha kupu i korero ai. <sup>23</sup> Na ka haere atu ia i reira ki Peteere; a, i a ia e haere  
 ana i te ara, ka puta mai etahi tamariki ririki i te pa, ka taunu ki a ia, ka mea, Pakira, haere ki runga;  
<sup>24</sup> pakira, haere ki runga. Na ka tahuri ake ia, ka titiro ki a ratou, a kanga iho ratou i runga i te  
 ingoa o Ihowa. Na ko te putanga mai o nga pea uha e rua i te ngahere, a haehaea ana etahi o ratou,  
<sup>25</sup> e wha tekau ma rua nga tamariki. Na haere atu ana ia i reira ki Maunga Karamere, a hoki ana i  
 reira ki Hamaria.

### Chapter 3

<sup>1</sup> Na i timata a Iehorama tama a Ahapa hei kingi mo Iharaira i Hamaria i te tekau ma waru o  
 nga tau o Iehohapata kingi o Hura, a kotahi tekau ma rua nga tau i kingi ai ia. <sup>2</sup> A i mahi kino ia i  
 te aroaro o Ihowa; otiia kihai i rite ki ta tona papa, ki ta tona whaea: i whakakahoretia hoki e ia te  
 pou o Paara i hanga e tona papa. <sup>3</sup> Heoi i piri ia ki nga hara o Ieropoama tama a Nepata i hara ai a  
 Iharaira: kihai era i whakarerea e ia. <sup>4</sup> Na he kaitiaki hipi a Meha kingi o Moapa: a, ko tana takoha  
 ki te kingi o Iharaira, ko nga huruhuru o nga reme kotahi rau mano, o nga hipi toa kotahi rau mano.  
<sup>5</sup> I te matenga ia o Ahapa, ka whakakeke te kingi o Moapa ki te kingi o Iharaira.  
<sup>6</sup> Na haere atu ana a Kingi Iehorama i taua wa i Hamaria, a taua ana e ia a Iharaira katoa. <sup>7</sup> Na  
 haere ana ia, a unga tangata ana ki a Iehohapata kingi o Hura hei ki atu, Kua whakakeke te kingi  
 o Moapa ki ahau: tera ranei koe e haere i ahau ki te whawhai ki a Moapa? Na ka mea tera, Ka haere  
 ahau; he rite tonu ahau ki a koe, toku iwi ki to u iwi, aku hoiho ki au hoiho. <sup>8</sup> I mea ano ia, Ma  
 tehea ara taua? A ka mea tera, Ma te ara i te koraha o Eroma. <sup>9</sup> Heoi haere ana te kingi o Iharaira,  
 me te kingi o Hura, me te kingi o Eroma: a i haere taiawhio ratou, e whitu nga ra: na kahore he wai  
 mo te ope, mo nga kararehe ranei e whai ana i a ratou. <sup>10</sup> Na ka mea te kingi o Iharaira, Aue, kua  
 karangatia nei e Ihowa enei kingi tokotoru kia hoatu ki te ringa o Moapa! <sup>11</sup> Na ka mea a Iehohapata,  
 Kahore ianei i konei tetahi poropiti a Ihowa hei uinga ma tatou i ta Ihowa? Na ka whakahoki tetahi  
 o nga tangata a te kingi o Iharaira, ka mea, Kei konei a Eriha tama a Hapata, nana ra i riringi te wai  
 ki nga ringa o Irai a. <sup>12</sup> Na ka mea a Iehohapata, Kei a ia te kupu a Ihowa. Na haere ana te kingi o  
 Iharaira ratou ko Iehohapata, ko te kingi o Eroma ki a ia. <sup>13</sup> Na ka mea a Eriha ki te kingi o Iharaira,  
 He aha taku ki a koe? Haere ki nga poropiti a tou papa, i nga poropiti a tou whaea. A ka mea te

kingi o Iharaira ki a ia, Kati ra: kua karangatia hoki enei kingi e toru e Ihowa kia hoatu ki te ringa  
<sup>14</sup>  
o Mo apa. Ano ra ko Eriha, E ora ana a Ihowa o nga mano e tu nei ahau ki tona aroaro, ina, me  
i kahore toku whakaaro ki te mata o Iehohapata kingi o Hura, e kore ahau e titiro ki a koe, e kore  
<sup>15</sup>  
ano e kite i a koe. Otira tikina atu ki ahau aiane i tetahi kaiwhakatangi hapa. A, i te  
<sup>16</sup>  
whakatangihanga a te kaiwhakatangi, na kua tae mai ki a ia te ringa o Ihowa. Na ka mea ia, Ko  
<sup>17</sup>  
te kupu tenei a Ihowa, Meinga tenei raorao kia kapi i te waikeri. Ko te kupu hoki tenei a Ihowa,  
E kore koutou e kite i te hau, e kore e kite i te ua, otira ka ki tenei raorao i te wai; a ka inu koutou,  
<sup>18</sup>  
a koutou kahui, me a koutou kararehe. Na he mea iti noa tenei ki ta Ihowa titiro: ka homai ano  
<sup>19</sup>  
hoki e ia nga Moapi ki to koutou ringa. A ka patua e koutou nga pa taiepa katoa, me nga pa pai  
katoa, ka tuaina hoki nga rakau pai katoa, ka tanumia nga poka wai katoa, a ko nga mara pai hoki  
ka takakinotia ki te kohatu.  
<sup>20</sup>  
Na i te ata, i te tapaenga o te whakahere totokore, he wai te puta ana i te ara o Eroma, a kapi  
<sup>21</sup>  
ana te whenua i te wai. A, no te rongonga o nga Moapi katoa kua tae ake aua kingi ki te whawhai  
ki a ratou, ka huihui ratou, nga mea e ahei te whitiki, me te hunga i kaumatua ake, a tu ana i te rohe.  
<sup>22</sup>  
A ka maranga wawe ratou i te ata, ka whiti te ra ki runga ki te wai, a ka kite nga Moapi i te wai  
<sup>23</sup>  
i te ritenga atu ki a ratou, ura tonu me he toto: A ka mea ratou, He toto tenei: koia rawa ano kua  
<sup>24</sup>  
tukitukia nga kingi, kua patua ratou e ratou ano: hoatu aiane i, e Moapa, ki te muru taonga! Na,  
i to ratou taenga ki te puni o Iharaira, ko te whakatikanga o Iharaira, patua iho nga Moapi, a rere  
ana ratou i to ratou aroaro: na haere tonu ratou ki roto ki te whenua me te patu haere i nga Moapi.  
<sup>25</sup>  
Na tukitukia ana e ratou nga pa; maka ana e ratou tana kohatu, tana kohatu, ki nga wahi pai katoa  
a kapi noa; tanumia ana nga puna wai katoa; tuaina ana hoki nga rakau pai katoa; kei Kiriharehete  
rawa anake ka waiho e ratou o reira kohatu: otiia i taiawhiohia tera e nga kaipiu kohatu, patua iho.  
<sup>26</sup>  
A, no te kitenga o te kingi o Moapa, kua pakeke rawa te whawhai mana, ka mau ia ki etahi tangata  
e whitu rau, he hunga unu hoari, hei hoa mona, hei wahi atu ki te kingi o Eroma. Otiia kihai i taea.  
<sup>27</sup>  
Katahi ia ka mau ki tana matamua, ko ia nei hei kingi i muri i a ia, a tapaea ana hei whakahere  
ki runga ki te taiepa. A nui atu te morikarika ki a Iharaira: na ka mahue ia i a ratou, a hoki ana ki  
to ratou whenua.

## Chapter 4



<sup>1</sup> Na i tangi tetahi o nga wahine a nga tama a nga poropiti ki a Eriha, i mea, Kua mate tau pononga, taku tahu; a e mohio ana koe i wehi tau pononga i a Ihowa: na kua tae mai te kaiwhakatarewa moni ki te tango i aku tama tokorua hei pononga mana. <sup>2</sup> Na ka mea a Eriha ki a ia, Ko te aha kia meatia e ahau mau? whakaaturia mai; he aha tau i roto i te whare? Ano ra ko tera, Kahore he mea a tau pononga i roto i te whare, heoti rawa he pata hinu. <sup>3</sup> Katahi ia ka mea, Haere, tonoa etahi oko mau i waho, i ou hoa tata katoa, hei nga oko tahanga; kei torutoru. <sup>4</sup> A ka haere koe ki roto, ka tutaki i te tatau ki a koutou ko au tama, a ka riringi ki aua oko katoa; a me waiho ake i rahaki te mea kua ki. <sup>5</sup> Na haere ana ia, a tutakina ana te tatau ki a ratou ko ana tama; a kawea ana mai nga oko ki a ia, a ko ia hei riringi ki roto. <sup>6</sup> A, ka ki nga oko, ka mea atu ia ki tana tama, Mauria mai ano he oko ki ahau. A ka mea tera ki a ia, Kahore atu he oko. Na mutu ake te hinu. <sup>7</sup> Katahi ia ka haere, ka korero ki te tangata a te Atua. Ano ra ko tera, Haere, hokona taua hinu, ka utu i tau moni tarewa, a ko te toenga hei oranga mo koutou ko au tama. <sup>8</sup> Na i tetahi ra ka haere a Eriha ki Huneme, i reira hoki tetahi wahine nui; a tohea ana e tera kia kai taro ia. Na reira, i ona haerenga katoa atu ma reira, peka ai ia ki reira ki te kai taro. <sup>9</sup> Na ka mea tera ki tana tahu, Nana, e mohio ana ahau he tangata tapu na te Atua tenei e kopikopiko nei ma to taua wahi. <sup>10</sup> Me hanga e tatou tetahi ruma nohinohi ki runga i te taiepa; a me whakapai he moenga mona ki reira, he tepu, he nohoanga, he turanga rama; mo tona haere mai ki a tatou, na ka peka ki reira. <sup>11</sup> Na i tetahi ra ka tae mai ia ki reira, a peka ana ki taua ruma, takoto ana ki reira. <sup>12</sup> Na ka mea ia ki tana tangata, ki a Kehati, Karangatia te Hunami nei. Na karangatia ana e ia, a tu ana tera ki tona aroaro. <sup>13</sup> Na ka mea ia ki te tangata, Mea atu ki a ia, Nana, Nau katoa enei whakaaro i whakaaro mai ki a maua; ko te aha kia meatia mau? e mea ana ranei koe kia korerotia koe ki te kingi, ki te rangatira ope ranei? Ano ra ko tera, Kei waenganui nei ahau i toku iwi e noho ana. <sup>14</sup> Na ka mea ia, Ko te aha ra kia meatia mana? Ano ra ko Kehati, Hore rawa ana tama, he koroheke ano hoki tana tahu. <sup>15</sup> Na ka mea ake ia, Karangatia ia. Na karangatia ana ia e ia, a tu ana tera i te kuwaha. <sup>16</sup> Na ka mea ia, Kei tenei wa, kia taka mai ano te wa, ka awhi koe i te tama. Ano ra ko tera, Kaua, e toku ariki, e te tangata a te Atua, kaua e teka ki tau pononga wahine. <sup>17</sup> A ka hapu te wahine ra, a ka whanau he tama i taua wa, i te takanga mai ano, i ta Eriha i korero ai ki a ia. <sup>18</sup> A, ka kaumatua te tamaiti, i tetahi ra ka haere ia ki tona papa ki nga kaikotikoti. <sup>19</sup> Na ka mea ia ki tona papa, Toku matenga! toku matenga! Na ka mea tera ki tetahi taitama, Kawea ki tona whaea. <sup>20</sup> A, no tana mauranga i a ia, a ka tae ki tona whaea, ka noho ia i runga i ona turi, a

21 poutumaro noa te ra; katahi ka mate. Na haere ana ia ki runga, whakatakotoria ana ia ki te moenga  
 o te tangata a te Atua, a tutakina ana tera e ia ki roto, puta ana ki waho. 22 Na ka karanga ia ki tana  
 tahu, ka mea, Tena, unga mai tetahi o nga taitama na ki ahau, me tetahi o nga kaihe, kia rere ai ahau  
 ki te tangata a te Atua, ka hoki mai ai. 23 Ano ra ko tera, He aha koe i haere ai ki a ia inaianei?  
 ehara nei hoki i te kowhititanga marama, i te hapati ranei. Ka mea ia, He pai. 24 Katahi ka  
 whakanohoia e ia te kaihe, a ka mea ki tana tangata, Arahina atu, haere tonu; kaua e whakangawaritia  
 tau rere moku, kia mea atu ra ano ahau ki a koe. 25 Na haere ana ia, a ka tae ki te tangata a te Atua,  
 ki Maunga Karamere. A, no te kitenga atu o te tangata a te Atua i a ia i tawhiti, ka mea ia ki tana  
 tangata ki a Kehati, Nana, ko te Hunami ra: 26 Na, rere atu ki te whakatau i a ia, ka mea ki a ia,  
 Kei te pai ranei koe? kei te pai tau tahu? kei te pai ranei te tamaiti? Ano ra ko ia, Kei te pai. 27 A,  
 no tona taenga ki te tangata a te Atua, ki te puke, hopukia ana e ia ona waewae. Na ka haere a  
 Kehati ki te pana i a ia. Otiia ka mea te tangata a te Atua, Waiho ra, e mamae ana hoki tona ngakau;  
 i huna hoki tenei e Ihowa i ahau, kihai i whak aaturia ki ahau. 28 Katahi ka mea tera, I tonoa ranei  
 e ahau tetahi tama i toku ariki? kihai ianei ahau i mea, Kaua ahau e tinihangatia? 29 Katahi ia ka  
 mea ki a Kehati, Whitikiria tou hope, maua atu hoki taku tokotoko i tou ringa, a haere: ki te tutaki  
 koe ki te tangata, kaua e owha ki a ia; ki te owha tetahi ki a koe, kaua e whakahoki kupu ki a ia; a  
 whakatakotoria taku tokotoko k i te mata o te tamaiti. 30 Na ka mea te whaea o te tamaiti, E ora  
 ana a Ihowa, e ora ana hoki tou wairua, e kore ahau e whakarere i a koe. Na whakatika ana ia, haere  
 ana i muri i te wahine. 31 Na ko Kehati kua pahemo i mua i a raua, a whakatakotoria ana e ia te  
 tokotoko ki te mata o te tamaiti; otiia kahore he reo, kahore hoki he ohonga ake. Heoi hoki ana ia  
 ki te whakatau i a ia, a ka korero ki a ia, ka mea, Kihai i korikori te tamai ti. 32 A, no te taenga o  
 Eriha ki te whare, na, kua mate te tamaiti, e takoto ana i tona moenga 33 Heoi haere ana ia ki roto,  
 tutakina ana mai te tatu ki a raua tokorua, kei te inoi i a Ihowa. 34 Na piki ana ia ki runga, a takoto  
 ana ki runga ki te tamaiti, a meatia iho ana tana mangai ki te pera, ona kanohi ki runga ki o tera  
 kanohi, ona ringa ki runga ki o tera ringa; na wharoro ana ia ki runga ki a ia; na kua mahana haere  
 nga kiko o te tamaiti. 35 Katahi ia ka hoki iho, ka haere a roto i te whare, Kotahi kopikotanga; a  
 ka piki ki runga, ka wharoro ki runga ki a ia: na kua tihe te tamaiti, e whitu nga tihetanga, kua titiro  
 nga kanohi o te tamaiti. 36 Katahi tera ka karanga ki a Kehati, ka mea, Karangatia te Hunami nei.  
 Heoi karangatia ana e ia. No te taenga mai o tera ki a ia, ka mea ia, Tangohia tau tama. 37 Katahi  
 ka haere mai tera, ka hinga ki ona waewae, piko ana ki te whenua; na hapainga ana e ia tana tama,  
 puta atu ana.

38 Na ka tae ano a Eriha ki Kirikara; a he matekai i te whenua; a i tona aroaro nga tama a nga poropiti e noho ana: a ka mea ia ki tana tangata, Whakaekea te kohua nui, kohuatia he kai ma nga  
 39 tama a nga poropiti. Na ka haere tetahi ki te parae ki te kahi puwha, ka kite i te hue maori, ka kohia e ia he hue maori, ki tonu tona kakahu; haere ana, katokatohia ana ki roto ki te kohua, ki nga  
 40 mea i kohuatia ra: kihai hoki i mohiotia e ratou. Heoi ringihia ana e ratou hei kai ma nga tangata. Heoi, i a ratou e kai ana i te mea i kohuatia ra, ka karanga ratou, ka mea, He mate kei roto i te  
 41 kohua, e te tangata a te Atua! Na kihai i taea te kai. Otiia i mea ia, Tena, kawea mai he paraoa. Na maka ana e ia ki roto ki te kohua; a ka mea ia, Ringihia ma te hunga nei, kia kai ratou. Na kua  
 42 kore he he i roto i te kohua. Na ka tae mai tetahi tangata o Paarahariha, ka mauria mai he taro matamua ma te tangata a te Atua, e rua tekau nga taro, he mea parei, me etahi hua witi i roto i tana  
 43 kopaki. A ka mea ia, Hoatu ki te hunga nei, kia kai ratou. Ano ra ko tana tuari, Ha, me hoatu ranei tenei e ahau ma nga tangata kotahi rau? Ano ra ko ia, Hoatu ma te iwi, kia kai ratou; ko ta  
 44 Ihowa kupu hoki tenei, Ka kai ratou, a toe ake. Heoi hoatu ana e ia ki to ratou aroaro, a kainga ana e ratou, a toe ake; i rite tonu ki ta Ihowa kupu.

## Chapter 5

1 Na, ko Naamana, ko te rangatira ope a te kingi o Hiria, he tangata nui i te aroaro o tona ariki, e whakanuia ana hoki, no te mea i waiho ia e Ihowa hei kaihomai i te wikitoria ki a Hiria: he tangata  
 2 marohirohi ano ia, he toa, otiia he repera. Na i haere atu nga torohe a nga Hiriani, a riro parau ana mai i a ratou tetahi kotiro iti i te whenua o Iharaira; na ka waiho ia hei mahi ki te wahine a  
 3 Naamana. Na ka mea tera ki tona rangatira, Aue! me i tata toku ariki ki te poropiti i Hamaria ra!  
 4 katahi ano he kaiwhakaora mo tona repera. Na kua haere tetahi, kua korero ki tona ariki, kua mea,  
 5 Anei nga korero a te kotiro o te whenua o Iharaira. Na ka mea te kingi o Hiria, Haere mai, haere, me tuku pukapuka ahau ki te kingi o Iharaira. Na haere ana ia, maua ana hoki i tona ringa tekau  
 6 nga taranata hiriwa, e ono mano nga hekere koura, tekau nga whakarua kakahu. Na kawea ana e ia te pukapuka ki te kingi o Iharaira; ko te korero tenei, Ka tae atu tenei pukapuka ki a koe, na, kua  
 7 unga atu e ahau taku tangata a Naamana ki a koe, kia whakaorangia e koe tona repera. A, i te korerotanga a te kingi o Iharaira i te pukapuka, ka haea e ia ona kakahu, ka mea, He atua ianei ahau hei whakamate, hei whakaora, i tonu mai ai tenei tangata ki ahau kia whakaorangia te repera o te  
 8 tangata? Na kia mohio koutou, kia kite, e rapu ana ia he take riri ki ahau. A, no te rongonga o

Eriha tangata a te Atua kua haea e te kingi o Iharaira ona kakahu, na ka unga tangata ia ki te kingi hei mea, He aha i haea ai e koe ou kakahu? me haere mai ia ki ahau inaianei, a ka mohio ia he poropiti tenei kei a Iharaira.

9

Heoi haere ana mai a Naamana, me ana hoiho, me ana hariata, a tu ana i te tatau o te whare

10

o Eriha. Na ka unga he tangata e Eriha ki a ia hei mea, Haere, kia whitu nga horoinga ki Horano,

11

a ka hoki ou kikokiko ki a koe, ka ma koe. Otira ka riri a Naamana, ka haere, ka mea, Nana, i mahara ahau, Tera ia e puta mai ki ahau, e tu, e karanga ki te ingoa o Ihowa, o tona Atua, ka

12

whakahaere hoki i tona ringa ki runga ki te wahi, a ka whakaorangia te repera. Ehara ianei a Apana, a Parapara, nga awa o Ramahiku, i te pai atu i nga wai katoa o Iharaira? kua ianei ahau e

13

horoi ki era, kia ma ai ahau? Heoi tahuri ana ia, a haere riri ana. Na ka whakatata mai ana tangata, ka korero ki a ia, ka mea, E toku papa, mehemea te poropiti i whai kupu ki a koe kia meatia tetahi mea nui, e kore ianei e meatia e koe? Na tera noa ake ranei i a ia ka ki mai ki a koe, Horoi, kia ma

14

ai? Katahi ia ka haere ki raro, a ka rukuruku i a ia, e whitu nga rukuhanga ki Horano, pera me ta te tangata a te Atua i korero ai; a hoki ana ona kikokiko, ano he kikokiko no te tamaiti nohinohi, a kua ma ia.

15

Na hoki ana ia ki te tangata a te Atua, a ia me tana huihui katoa, a ka tae, ka tu i mua i a ia: a ka mea ia, Nana, katahi ahau ka mohio, kahore he Atua i te whenua katoa, kei a Iharaira anake:

16

na, tena, kia tangohia e koe tetahi manaakitanga a tau pononga. Ano ra ko tera, E ora ana a Ihowa, kei tona aroaro nei ahau e tu ana, e kore e tangohia e ahau. Na tohe ana tera ki a ia kia

17

tangohia; otia whakakahore tonu ia. Ano ra ko Naamana, Ki te kahore, kati me homai ki tau pononga he oneone, kia rite ki te kawenga ma nga muera e rua; e kore hoki tau pononga e mea i te

18

tahunga tinana, i te patunga tapu ranei a mui ake ma teahi atau ke, engari ma Ihowa. Ma Ihowa e whakarere noa te hara o tau pononga i tenei mea; ara ina haere toku ariki ki te whare o Rimono ki te koropiko i reira, a ka whirinaki mai ia ki toku ringa, a ka koropiko ahau i roto i te whare o Rimono: ka koropiko ahau i roto i te whare o Rimono, me whakarere noa iho e Ihowa te hara o

19

tenei mea a tau pononga. Ano ra ko tera ki a ia, Haere marie. Na mawehe atu ana ia i a ia he wahi iti nei.

20

Otira ka mea a Kehati, te kaimahi a Eriha tangata a te Atua, Na, kua ata hanga toku ariki ki tenei Naamana Hiriani, kihai nei i tango i tona ringa i nga mea i mauria mai nei e ia: e ora ana a

21

Ihowa, ka oma ahau i muri i a ia, a ka tango i tetahi mea i a ia. Heoi whai ana a Kehati i a Naamana. A, no te kitenga o Naamana i tetahi e whai ana i muri i a ia, ka marere iho ia i te hariata

22

ki te whakatau i a ia, ka mea, He pai ranei. Ano ra ko tera, He pai. Na toku ariki ahau i unga mai hei mea, Na, tenei etahi taitamariki tokorua kua tae mai ki ahau inaianei no te whenua pukepuke

o Eparaima, no nga tama a nga poropiti; hoatu koa ma raua tetahi taranata hiriwa, kia rua hoki nga whakarua kakahu. <sup>23</sup> Na ka mea a Naamana, Whakaae mai, ka tango kia rua taranata. Na tohea ana ia e ia, a takaia ana e ia nga taranata hiriwa e rua ki nga peke e rua, me nga whakarua kakahu e rua, a whakawaha ana ki ana tangata tokorua; a na raua i mau ki tona aroaro. <sup>24</sup> A, no tona taenga ki te puke, ka tangohia mai e ia i o raua ringa, a whakatakotoria ana ki te whare. Na tukua atu ana e ia aua tangata, a haere ana raua. <sup>25</sup> Otiia haere ana ia ki roto, a tu ana i te aroaro o tona ariki. Na ka mea a Eriha ki a ia, I haere mai koe i hea, e Kehati? Ano ra ko ia, Kahore noa iho tau pononga i te haere. <sup>26</sup> Na ka mea ia ki a ia, Kihai ianei toku ngakau i haere tahi me koe, i te tahuritanga mai o taua tangata i runga i tona hariata ki te whakatau i a koe? He wa ianei tenei mo te tango moni, mo te tango kakahu, mara oriwa, mara waina, hipi, kau, pono nga tane, pononga wahine ranei? <sup>27</sup> Na reira ka piri ki a koe te repera o Naamana, ki tou uri hoki, a ake ake. Na haere atu ana ia i tona aroaro, he repera, ma tonu me te hukarere.

## Chapter 6

<sup>1</sup> Na ka mea nga tama a nga poropiti ki a Eriha, Nana, ko te wahi e noho nei matou i tou aroaro he kuiti rawa mo tatou. <sup>2</sup> Tena, tukua matou kia haere ki Horano, ki te tango kurupae mai i reira, tenei, tenei o matou, ka hanga ai i tetahi wahi i reira hei nohoanga mo tatou. A ka whakahokia e ia, Haere koutou. <sup>3</sup> Na ka mea tetahi, Tena, whakaae mai kia haere koe i au pononga. Ano ra ko ia, Ka haere ano ahau. <sup>4</sup> Heoi haere ana ia i a ratou. I to ratou taenga ki Horano, kei te topetope rakau. <sup>5</sup> Otiia i tetahi e tua ana i te rakau, ka marere te pane o te toki ki te wai: na ka karanga ia, ka mea, Aue, e toku ariki! he toki na te tangata. <sup>6</sup> Na ka mea te tangata a te Atua, Tena koa te wahi i marere ai? A ka whakaaturia e ia ki a ia te wahi. Na tapahia ana e ia tetahi rakau, a maka ana ki reira, na kua manu taua rino. <sup>7</sup> Na ka mea ia, Tangohia ki a koe. Na ka totoro tona ringa, a tangohia ana e ia. <sup>8</sup> Na ka whawhai te kingi o Hiria ki a Iharaira; a ka whakatakoto whakaaro ia ki ana tangata, ka mea, Ko te wahi hei puni moku, kei mea. <sup>9</sup> Na ka tono tangata te tangata a te Atua ki te kingi o Iharaira ki te ki atu, Kia tupato kei tika koe na taua wahi: kei te haere hoki nga Hirianai ki raro, ki reira. <sup>10</sup> Na ka unga tangata te kingi o Iharaira ki te wahi i kiia ra e te tangata a te Atua ki a ia, i whakatupato ai ia i a ia; a ka honea ia i reira, ehara ano i te tuatahi, i te tuarua ranei. <sup>11</sup> Na pohewa

noa iho te ngakau o te kingi o Hiria i tenei mea; a ka karangatia e ia ana tangata, ka mea ki a ratou,

E kore ianei koutou e whakaatu ki ahau, ko wai o tatou kei te kingi o Iharaira? <sup>12</sup> Ka mea tetahi o ana tangata, Kahore, e toku ariki, e te kingi; engari ko Eriha, ko te poropiti kei roto i a Iharaira, kei te whakaatu ki te kingi o Iharaira i nga kupu e korero ai koe i tou whare moenga.

<sup>13</sup>

Na ka mea ia, Tikina, tirohia, kei hea ia, kia unga ai e ahau he tangata ki te tiki i a ia. A ka

korerotia ki a ia, Nana, kei Rotana. <sup>14</sup> Na tonoa ana e ia ki reira he hoiho, he hariata, me tetahi ope

nui: a haere po ana ratou, karapotia ana te pa. <sup>15</sup> Na, i te marangatanga o te kaimahi a te tangata a te Atua i te ata tu, i te putanga ki waho, na, he taua e karapoti ana i te pa, me nga hoiho, me nga

hariata. Na ka mea tana tangata ki a ia, Aue, e toku ariki, me aha tatou? <sup>16</sup> Ano ra ko ia, Kaua e

wehi; hira ake hoki o tatou hoa i o ratou hoa. <sup>17</sup> Na ka inoi a Eriha, a ka mea, E Ihowa, kia titiro ona kanohi, kia kite ai ia. Na whakatirohia ana nga kanohi o taua taitamariki; a ka kite ia; na, kapi

tonu te maunga i te hoiho, i te hariata ahi i nga taha katoa o Eriha. <sup>18</sup> Na, i to ratou haerenga ki raro ki a ia, ka inoi a Eriha ki a Ihowa, ka mea, Tena ra, patua tenei iwi kia matapo. Na patua ana

ratou e ia kia matapo, pera tonu ia me ta Eriha i ki ai. <sup>19</sup> Na ka mea a Eriha ki a ratou, Ehara tenei i te huarahi, ehara hoki tenei i te pa: whai mai i ahau, a maku koutou e arahi ki ta koutou tangata e

rapu nei. A arahina ana ratou e ia ki Hamaria. <sup>20</sup> A, no te taenga ki Hamaria, ka mea a Eriha, E Ihowa, whakatirohia nga kanohi o enei, kia kite ai ratou. Na whakatirohia ana e Ihowa o ratou

kanohi, a ka kite ratou; na, i waenganui pu ratou o Hamaria. <sup>21</sup> Na ka mea te kingi o Iharaira ki a

Eriha, i tona kitenga i a ratou, Kia patua e ahau, e toku papa? kia patua e ahau? <sup>22</sup> Ano ra ko ia, Kaua e patua e koe. E patua ranei e koe au i hopu ai ki tau hoari, ki tau kopere? Whakatakotoria

he taro, he wai ki o ratou aroaro, kia kai ratou, kia inu, kia hoki ki to ratou ariki. <sup>23</sup> Na taka ana e ia he kai ma ratou, he nui: a, ka kai ratou, ka inu, ka tonoa atu ratou e ia, a haere ana ratou ki to ratou ariki. Na heoi ano haerenga mai o nga taua a nga Hiriani ki te whenua o Iharaira.

<sup>24</sup>

Na, muri iho i tenei, ka huihuia e Peneharara kingi o Hiria tana ope katoa, a haere ana,

whakapaea ana a Hamaria. <sup>25</sup> Na nui atu te matekai o Hamaria: na, whakapaea ana a reira e ratou, nawai a ka hokona te upoko kaihe mo nga pihi hiriwa e waru tekau, te wahi wha hoki o te kapa

paru kukupa mo nga pihi hiriwa e rima. <sup>26</sup> Na, i te kingi o Iharaira e haere ana na runga i te taiepa,

ka karanga tetahi wahine ki a ia, ka mea, Whakaorangia, e te ariki, e te kingi. <sup>27</sup> Ano ra ko ia, Ka kore nei a Ihowa e whakaora i a koe, kei hea he mea maku hei whakaora i a koe? kei te tapunga

witi ranei? kei te poka waina ranei? <sup>28</sup> A ka mea te kingi ki a ia, He aha tau? Ano ra ko ia, I mea mai te wahine nei ki ahau, Homai tau tama hei kai ma taua aiane, a hei apopo ka kai taua i taku

29 tama. Heoi kohuatia ana e maua taku tama, kainga ana e maua: na i te aonga ake ka mea atu  
 ahau ki a ia, Homai tau tama kia kainga e taua: na kua huna e ia tana tama. 30 Na, i te rongonga o  
 te kingi i nga kupu a taua wahine, ka haea e ia ona kakahu; i runga hoki ia i te taiepa e haere ana;  
 a ka titiro te iwi, na, he kakahu taratara tena kei roto, kei tona kiri. 31 Katahi ia ka mea, Kia meatia  
 mai tenei ki ahau e te Atua, me tetahi atu mea, ki te u te matenga o Eriha tama a Hapata ki runga  
 ki a ia aiane. 32 Otiia i noho a Eriha i roto i tona whare, a i noho tahi ratou ko nga kaumatua; na  
 ka unga tangata te kingi i tona aroaro: otiia kiano te karere i tae noa ki a ia, ka mea ia ki nga  
 kaumatua, Kia kite koutou kua unga tangata mai tenei tama a te ka ikohuru ki te tango i toku upoko?  
 Kia mohio, ina tae mai te karere, tutakina te tatau, kia u hoki te pupuri atu i te tatau ki a ia: he teka  
 ianei kei muri i a ia te tapuwae o nga waewae o tona ariki? 33 I a ia ano e korero ana ki a ratou, na  
 ko te karere kua tae iho ki a ia: a ka mea ia, Nana, na Ihowa tenei kino; ko te ahau taku e tatari atu  
 ai ano i a Ihowa?

## Chapter 7

1 A ka mea a Eriha, Whakarongo ki te kupu a Ihowa: ko te kupu tenei a Ihowa, Kia penei apopo  
 ka hokona he mehua paraoa mo te hekere, nga mehua parei e rua mo te hekere, i te kuwaha o  
 Hamaria. 2 Na ka whakahokia e tetahi rangatira, nona nei te ringa i okioki ai te kingi, ki te tangata  
 a te Atua; i mea ia, Nana, ki te hanga e Ihowa he matapihi ki te rangi, ka rite ranei tenei kupu? Ano  
 ra ko ia, Nana, tera ou kanohi e kite, otira e kore k oe e kai i tetahi wahi o taua mea.  
 3 Na tera etahi tangata tokowha, he repera, i te kuwaha o te keti: a ka mea ratou tetahi ki tetahi,  
 He aha tatou i noho ai i konei a kia mate raano tatou? 4 Ki te mea tatou, Tatou ka tomo ki te pa, na  
 ko te matekai kei roto i te pa, a ka mate tatou ki reira: a, ki te noho tatou i konei, ka mate ano tatou.  
 Na, kia haere tatou aiane, kia auraki atu ki te ope o nga Hiriani: ki te whakaorangia tatou e ratou,  
 ka ora tatou: ki te whakamatea, heoi ano, ka mate. 5 Na maranga ana ratou i te mea ka kakarauri,  
 haere ana ki te puni o nga Hiriani: a, no to ratou taenga ki te pito o te puni o nga Hiriani, na kahore  
 o reira tangata. 6 Na te Ariki hoki i mea kia rongu te ope o nga Hiriani i te haruru hariata, i te haruru  
 hoiho, i te haruru hoki o tetahi ope nui: a ka mea ratou tetahi ki tetahi, Nana, kua utua nga kingi o  
 nga Hiti me nga kingi o nga Ihipiana e te kingi o Iharair a hei whawhai ki a tatou, kia huaki mai ki  
 a tatou. 7 Na whakatika ana ratou, rere ana i te mea ka kakarauri, a whakarerea ake o ratou teneti,  
 a ratou hoiho, a ratou kaihe, me nga aha noa o te puni, a rere ana, he wehi kei mate. 8 Na, i te taenga  
 o aua repera ki te pito o te puni, ka tomo ki tetahi teneti, kei te kai, kei te inu, a mauria atu ana te

hiriwa i reira, me te koura, me te kakahu, a haere ana, huna ana; na ka hoki ano, ka tomo ki tetahi  
 9

atu teneti, a ka tango an o i reira, a haere ana, huna ana. Na ka mea ratou tetahi ki tetahi, Kahore  
 i te pai ta tatou e mea nei: he ra rongu pai tenei ra, a kei te noho wahangu tatou: ki te tatari tatou  
 kia marama te ata, tera tatou e rokohanga e te he: na reira hoake, ka haere tatou, ka korero ki te

10  
 wha re o te kingi. Heoi haere ana ratou, karanga ana ki te kaitiaki o te kuwaha o te pa: a ka  
 whakaatu ki a ratou, ka mea, I tae matou ki te puni o nga Hiriani, na kahore he tangata o reira,  
 kahore he reo tangata, engari ko nga hoiho anake e here ana, me nga kaihe e here ana, a ko nga

11  
 teneti e tu ana ano. Na karangatia ana e ia nga kaitiaki o te kuwaha; a na ratou i korero ki te  
 whare o te kingi i roto atu.

12  
 Na ka whakatika te kingi i te po, a ka mea ki ana tangata, Maku e whakaatu ki a koutou ta  
 nga Hiriani i mea ai ki a tatou. E mohio ana ratou e mate ana tatou i te kai; koia ratou i haere atu  
 ai i te puni ki te parae piri ai, e ki ana, Ki te puta mai ratou i te pa, ka hopukia oratia ratou e tatou,

13  
 a ka uru tatou ki te pa. Na ka whakahoki tetahi o ana tangata, ka mea, Tangohia oti e etahi kia  
 rima o nga hoiho e toe nei, i mahue nei ki te pa; nana, penei tonu ratou me te huihui katoa o Iharaira  
 kua mahue nei ki konei; nana, rite tonu ratou ki te huihui katoa o Iharaira kua moti nei: a tonoa

14  
 atu ratou e tatou kia kite. Na tangohia ana e ratou etahi hoiho hariata, e rua, a unga ana e te kingi

15  
 ki te whai i te ope o nga Hiriani, a i mea ia, Tikina, tirohia. Na haere ana ratou ki te whai i a  
 ratou a Horano ra ano. Na kapi tonu te huarahi katoa i te kakahu, i nga mea i rukea atu e nga Hiriani

16  
 i to ratou ponana. Na hoki ana aua tangata ki te korero ki te kingi. Na ka puta te iwi ki waho,  
 kei te pahua i te puni o nga Hiriani. Heoi hokona ana te mehua paraoa mo te hekere, me nga mehua

17  
 parei e rua mo te hekere, i rite tonu ki ta Ihowa kupu. A i whakaritea e te kingi ko te rangatira  
 i okioki atu nei ia ki tona ringa hei rangatira mo te kuwaha: na takahia iho ia e te iwi ki te kuwaha,  
 a mate ake, i rite tonu ki ta te tangata a te Atua i korero ai, ki tana i korero ra i te haerenga ih o o

18  
 te kingi ki raro, ki a ia. I rite tonu ano ki ta te tangata a te Atua i korero ai ki te kingi, i mea ai,  
 E rua nga mehua parei mo te hekere, kotahi ano hoki mehua paraoa mo te hekere i te kuwaha o

19  
 Hamaria i te wa penei apopo; Na ka utua e taua rangatira ki te tangata a te Atua, i mea ia, Nana,  
 ki te hanga e Ihowa he matapihi ki te rangi, ka rite ranei tenei kupu? Na ka mea tera, Nana, tera ou

20  
 kanohi na e kite; otiia e kore tetahi wahi o taua mea e kainga e koe; I pera tonu te meatanga ki  
 a ia; i takahia hoki ia e te iwi ki te kuwaha, a mate iho ia.

## Chapter 8



<sup>1</sup> Na kua korero a Eriha ki te wahine nana nei te tamaiti i whakaorangia e ia, kua mea, Whakatika, haere koutou ko tou whare, a e noho ki tau wahi e noho ai koe: kua karangatia hoki e Ihowa he matekai; a ka pa hoki ki te whenua, e whitu tau. <sup>2</sup> Na ka whakatika taua wahine, ka mea i ta te tangata a te Atua i ki ai: a haere ana ratou ko tona whare, noho ana ki te whenua o nga Pirihitini, e whitu nga tau. <sup>3</sup> Na, i te takanga o nga tau e whitu, ka hoki atu taua wahine i te whenua o nga Pirihitini: a haere ana ia ki te karanga ki te kingi mo tona whare, mo tana mara. <sup>4</sup> Na ko te kingi i te korero ki a Kehati, tangata a te tangata a te Atua; i mea hoki ia, Tena, korerotia mai ki ahau nga mahi nunui katoa i mea ai a Eriha. <sup>5</sup> A, i a ia e korero ana ki te kingi i tana whakaoranga i te tupapaku, na, ko te wahine nana nei te tamaiti i whakaorangia e ia i te mate, e karanga ana ki te kingi mo tona whare, mo tana mara. Na ka mea a Kehati, E toku ariki, e te kingi, koia ten ei te wahine, a ko tana tama tenei i whakaorangia ra e Eriha. <sup>6</sup> A, i te uinga a te kingi ki te wahine ra, ka korerotia e ia ki a ia. Heoi ka tukua e te kingi ki a ia tetahi o nga rangatira, ka mea, Whakahokia ana mea katoa, me nga hua katoa o te mara mai o te ra i mahue ai i a ia te whenua a mohoa noa nei. <sup>7</sup> A i haere a Eriha ki Ramahiku; a e mate ana a Peneharara kingi o Hiria; na ka whakaaturia ki a ia, ka korerotia, Kua tae mai te tangata a te Atua ki konei. <sup>8</sup> Na ka mea atu te kingi ki a Hataere, Maua atu tetahi hakari i tou ringa, ka haere ki te whakatau i te tangata a te Atua, ka ui ki ta Ihowa ki a ia, ka mea, E ora ranei ahau i tenei mate? <sup>9</sup> Na haere ana a Hataere ki te whakatau i a ia, me te mau ano he hakari i tona ringa, i etahi o nga mea papai katoa o Ramahiku, he kawenga na nga kamera e wha tekau, a ka tae, ka tu i tona aroaro, ka mea, Na tau tama, na Peneharara kingi o Hiria ah au i unga mai ki a koe, hei mea, E ora ranei ahau i tenei mate? <sup>10</sup> Ano ra ko Eriha ki a ia, Haere, mea atu ki a ia, E ora ano koe; otia kua oti i a Ihowa te whakakite mai ki ahau, tera ia e mate. <sup>11</sup> Na ka whakatau ia i tona mata ki runga ki a ia, u tonu, a whakama noa ia; ko te tino tangihanga o te tangata a te Atua. <sup>12</sup> Na ka mea a Hataere, Na te aha toku ariki i tangi ai? Ano ra ko ia, No te mea e mohio ana ahau ki te kino e meatia e koe ki nga tama a Iharaira; ko o ratou pa e tahuna e koe ki te ahi, ko a ratou taitamariki e patua e koe ki te hoari, ko a ratou kohungahunga e taia iho e koe, a ko a ratou wahine hapu ka ripiripia e koe. <sup>13</sup> Ano ra ko Hataere, Ha! he aha tau pononga, he kuri noa nei, kia meatia e ia tenei mea nui? Ano ra ko Eriha, Kua whakakitea mai e Ihowa ki ahau, ko koe hei kingi mo Hiria. <sup>14</sup> Heoi mawehe atu ana ia i a Eriha, a ka tae ki tona ariki; a ka mea tera ki a ia, I pehea mai te kupu a Eriha ki a koe? Ano ra ko ia, E ki ana ia, tera koe e ora. <sup>15</sup> Na, i te aonga ake, ka mau ia ki te kakahu matotoru, a tukua ana ki te wai, a uhia ana ki tona mata, na kua mate: a ko Hataere te kingi i muri i a ia.

<sup>16</sup> I te rima o nga tau o Iorama tama a Ahapa kingi o Iharaira, i a Iehohapata e kingi ana ki a Hura, ka kingi a Iehorama tama a Iehohapata kingi o Hura. <sup>17</sup> E toru tekau ma rua ona tau i a ia ka kingi nei, a e waru nga tau i kingi ai ia i Hiruharama. <sup>18</sup> Na haere ana ia i te ara o nga kingi o Iharaira, pera tonu me nga mahi a te whare o Ahapa: i a ia hoki te tamahine a Ahapa hei wahine: a i mahia e ia te mea kino ki ta Ihowa titiro. <sup>19</sup> Otia kihai a Ihowa i pai ki te whakangaro i a Hura, i whakaaro hoki ki tana pononga, ki a Rawiri, i korero hoki ia ki a ia, ka hoatu e ia ki a ia he rama ma ana tamariki mo nga ra katoa. <sup>20</sup> I ona ra ka maunu a Eroma i raro i te ringa o Hura, a whakakingitia ana he kingi mo ratou. <sup>21</sup> Katahi ka haere a Iorama ki Tairi, me ana hariata katoa i a ia: a whakatika ana ia i te po, a patua iho e ia nga Eromi i karapotia ai ia, ratou ko nga rangatira o nga hariata: e rere ana te iwi ki o ratou teneti. <sup>22</sup> Heoi i maunu a Eroma i raro i te ringa o Hura a tae noa ki tenei ra. Katahi ka maunu ano hoki a Ripina i taua wa. <sup>23</sup> Na, ko era atu meatanga a Iorama, me ana mahi katoa, kahore ianei i tuhituhia ki te pukapuka o nga meatanga o nga ra o nga kingi o Hura? <sup>24</sup> Na kua moe a Iorama ki ona matua, a tanumia iho ki ona matua ki te pa o Rawiri; a ko Ahatia, ko tana tama te kingi i muri i a ia. <sup>25</sup> Na, i te tekau ma rua o nga tau o Iorama tama a Ahapa kingi o Iharaira, ka kingi a Ahatia tama a Iehorama kingi o Hura. <sup>26</sup> E rua tekau ma rua nga tau o Ahatia i a ia ka kingi nei; a kotahi ona tau i kingi ai i Hiruharama. A ko te ingoa o tona whaea ko Ataria tamahine a Omori kingi o Iharaira. <sup>27</sup> Na haere ana ia i te ara o te whare o Ahapa, a mahia ana e ia te kino ki te titiro a Ihowa, pera tonu me ta te whare o Ahapa: ko ia hoki te hunaonga o te whare o Ahapa. <sup>28</sup> Na haere ana ia me Iorama tama a Ahapa ki te whawhai ki a Hataere kingi o Hiria ki Ramoto Kireara: na tu ana a Iorama i nga Hiriani. <sup>29</sup> Na hoki ana a Kingi Iorama ki Ietereere kia rongoatia nga tunga i tu ai ia i nga Hiriani ki Rama, i tana whawhai ki a Hataere kingi o Hiria. A haere ana a Ahatia tama a Iehorama kingi o Hura ki raro kia kite i a Iorama tama a Ahapa ki Ietereere, no te mea e mate ana ia.

## Chapter 9

<sup>1</sup> Na ka karanga a Eriha poropiti ki tetahi o nga tama a nga poropiti, a ka mea ki a ia, Whitikiria tou hope, ka mau i tenei pounamu hinu i tou ringa, ka haere ki Ramoto Kireara. <sup>2</sup> E tae koe ki reira, tirohia atu i reira a Iehu tama a Iehohapata tama a Nimihi, ka haere koe, ka mea i a ia kia whakatika

<sup>3</sup>  
 i roto i ona tuakana, a ka mau i a ia ki tetahi ruma i roto. Katahi ka mau ki te pounamu hinu, ka riringi ki runga ki tona matenga, ka mea, Ko te kupu tenei a Ihowa, Ka oti koe te whakawahi e ahau hei kingi mo Iharaira. Ko reira koe uaki ai i te tatu, ka rere, a kua e whakaroa. <sup>4</sup> Heoi haere ana taua taitama, ara te taitama, te poropiti, ki Ramoto Kireara. <sup>5</sup> A, no tona taenga atu, na ko nga rangatira o te ope e noho ana; a ka mea ia, He kupu taku ki a koe, e te rangatira. Ano ra ko Iehu, Ki a wai koia o matou katoa? Ano ra ko tera, Ki a koe, e te rangatira. <sup>6</sup> Na whakatika ana ia, a haere ana ki roto ki te whare; na ringihia ana e tera te hinu ki tona matenga, a ka mea ki a ia, Ko te kupu tenei a Ihowa, a te Atua o Iharaira, Ka oti koe te whakawahi e ahau hei kingi mo ta Ihowa iwi, mo Iharaira. <sup>7</sup> A mau e patu te whare o Ahapa, o tou ariki, kia whai utu ai ahau mo nga toto o aku pononga, o nga poropiti, mo nga toto hoki o nga pononga katoa a Ihowa, i te ringa o Ietepere. <sup>8</sup> Ka ngaro hoki te whare katoa o Ahapa: a ka hautopea atu e ahau i a Ahapa nga tamariki tane katoa, me nga mea i tutakina atu, i mahue ranei i roto i a Iharaira. <sup>9</sup> A ka meinga e ahau te whare o Ahapa kia rite ki te whare o Ieropoama tama a Nepata, ki te whare hoki o Paaha tama a Ahia. <sup>10</sup> Na ma nga kuri e kai a Ietepere ki te wahi o Ietereere, a kahore he tangata hei tanu i a ia. Na uakina ana e ia te tatau, a rere ana.

<sup>11</sup>  
 Katahi a Iehu ka puta mai ki waho, ki nga pononga a tona ariki; a ka mea tetahi ki a ia, Kei te pai ranei? he aha tenei poauau i haere mai ai ki a koe? Ano ra ko ia ki a ratou, E mohio ana koutou ki te tangata ra, ki ana korero hoki. <sup>12</sup> Ano ra ko ratou, He teka: korerotia mai ki a matou inaiane. Na ka mea ia, Koia ano tenei ana korero ki ahau, Ko ta Ihowa kupu tenei, Ka oti koe te whakawahi e ahau hei kingi mo Iharaira. <sup>13</sup> Na hohoro tonu ratou, ka mau ki tona kakahu, ki tona kakahu, wharikitia iho ki raro i a ia, i runga i te arawhata, a whakatangihia ana te tetere, me te ki ano, Ko Iehu te kingi. <sup>14</sup> Heoi whakatupuria ana e Iehu tama a Iehohapata tama a Nimihi he he mo Iorama. Na i puritia e Iorama, e ratou ko Iharaira katoa, a Ramoto Kireara, he whakaaro ki a Hataere kingi o Hiria: <sup>15</sup> Ko Kingi Iehorama ia kua hoki ki Ietereere kia rongotia ona tunga i tu ai ia i nga Hiriani i tana whawhai ki a Hataere kingi o Hiria. Na ka mea a Iehu, Mehemea ko to koutou whakaaro tenei, na kei tukua tetahi ki waho, kei puta atu i te pa, ka h aere ka korero ki Ietereere.

<sup>16</sup>  
 Heoi eke ana a Iehu ki te hariata, a haere ana ki Ietereere; i reira hoki a Iorama e takoto ana. <sup>17</sup> A ko Ahatia kingi o Hura kua riro ki raro, kia kite i a Iorama. Na ko te kaitutei i runga i te pourewa i Ietereere e tu ana, a ka kitea e ia te ropu a Iehu i a ia e haere mai ana, na ka mea, Kei te kite atu ahau i te ope tangata. Na ka mea a Iehorama, Tikina he tangata eke hoiho, ka unga ki te whakatutaki i a ratou, a mana e mea atu, He pai ranei? <sup>18</sup> Heoi haere ana tetahi i runga i te hoiho ki te whakatau i a ia a ka mea, Ko te kupu tenei a te kingi, He pai ranei? Ano ra ko Iehu, Hei aha

mau te pai? haere ake ki muri i ahau. A ka korero te kaitutei, ka mea, I tae te karere ki a ratou, otiia

<sup>19</sup> kahore ano kia hoki mai. Katahi ka unga ano e ia tetahi atu kaieke hoiho, a ka tae tera ki a ratou, ka mea, Ko te kupu tenei a te kingi, He pai ranei? Ano ra ko Iehu, Hei aha mau te pai? hui ake koe

<sup>20</sup> ki muri i ahau. Na ka korero te kaitutei, ka mea, I tae ia ki a ratou, ehoi kahore ano kia hoki mai: a ko te whui o te hariata, rite tonu ki te whiu a te hariata, rite tonu ki te whiu a Iehu tama a Nimihi;

<sup>21</sup> he porangi rawa hoki tana whiu. Na ka mea a Iehorama, Whakanohoia. Na whakanohoia ana e ratou tona hariata. A ka puta a Iehorama kingi o Iharaira raua ko Ahatia kingi o Hura i runga i tona hariata, i tona hariata, a haere ana ki te whakatutaki i a Iehu, a tutaki ana ki a ia ki te wahi o Napoto

<sup>22</sup> Ietereeri. Na, i te kitenga o Iehorama i a Iehu, ka mea ia, He pai ranei, e Iehu? Ano ra ko ia, He pai aha, i te hanga e hua tonu ana nga moepuku me nga mahi makutu a tou whaea, a Ietepere?

<sup>23</sup> Na ka huri nga ringa o Iehorama, a rere ana, me te karanga ano ki a Ahatia, He kopeka, e Ahatia!

<sup>24</sup> Na kumea ana e Iehu tana kopere ki tona kaha katoa, a perea ana a Iehorama ki waenga pu o ona

<sup>25</sup> ringa, a puta atu ana te pere i tona ngakau, a hinga iho ana ia i roto i tona hariata. Katahi ka mea a Iehu ki a Pirikara, ki tana rangatira, Hikitia ake, maka atu ia ki te wahi o te mara a Napoto Ietereeri: kia mahara hoki, i to taua haerenga i runga hoiho i muri i a Ahapa, i tona papa, ka whakapikaua e

<sup>26</sup> Ihowa tenei pikaunga ki ru nga ki a ia; I kitea putia e ahau inanahi nga toto o Napoto, me nga toto o ana tama, e ai ta Ihowa; a ka utua koe e ahau ki tenei wahi, e ai ta Ihowa. Na reira, tikina,

<sup>27</sup> maka ia ki taua wahi whenua, kia rite ki te kupu a Ihowa. Otiia, i te kitenga o Ahatia kingi o Hura i tenei, rere ana ia na te ara o te whare kari. Na whaia ana ia e Iehu, a i mea tera, Patua ano hoki ia i runga i te hariata; na patua ana ia e ratou i te pikitanga ki Kuru, ki tera i te taha o Ipereama.

<sup>28</sup> Na rere ana ia ki Mekiro, a mate iho ki reira. Na kawea ana ia e ana tangata i runga i te hariata

<sup>29</sup> ki Hiruharama, a tanumia ana ki tona urupa, ki ona matua i te pa o Rawiri. No te tekau ma tahi o nga tau o Iorama tama a Ahapa i kingi ai a Ahatia ki Hura.

<sup>30</sup> Na, i te haerenga o Iehu ki Ietereere, ka rongoa a Ietepere; na ka pania e ia ona kanohi, a ka

<sup>31</sup> tino whakapaipaitia tona mahunga, a ka titiro atu ia i te matapihi. Na, i a Iehu e tomo mai ana i

<sup>32</sup> te kuwaha, ka mea tera, He rongoa mau ranei, e koe, e te Timiri, e te kaikohuru i tou ariki? Na ka maranga ake tona mata ki te matapihi, ka mea, Ko wai toku? ko wai ra? Na ka titiro iho etahi

<sup>33</sup> unaka, tokorua, tokotoru, ki a ia. Na ka mea ia, Maka iho ia ki raro. Heoi maka iho ana e ratou; a parati ana etahi o ona toto ki te pakitara, a ki runga hoki ki nga hoiho; a takahia ana ia e ia ki raro

<sup>34</sup> ki ona waewae. Na haere ana ia ki roto, kei te kai, kei te inu; a ka mea ia, Tena tirohia te wahine

<sup>35</sup> kua kanga nei, a tanumia ia: he tamahine kingi hoki ia. Na haere ana ratou ki te tanu i a ia; otiia

kahore he wahi ona i kitea e ratou, ko te angaanga anake, ko nga waewae, ko nga kapu o ona ringa.

<sup>36</sup>

No reira hoki ana ratou, a ka korero ki a ia. A ka mea ia, Ko te kupu tenei a Ihowa, i korerotia ra e tana pononga, e Iraia Tihipi, i mea ra ia, Hei te wahi o Ietereere kainga ai e nga kuri nga kikokiko

<sup>37</sup>

o Ietepere. A ka waiho te tinana o Ietepere hei para hamiti ki runga ki te mate o te parae i te wahi o Ietereere; a kahore e kiia, Ko Ietepere tenei.

## Chapter 10

<sup>1</sup>

Na e whitu tekau nga tama a Ahapa i Hamaria. Na ka tuhituhi pukapuka a Iehu, a unga ana e ia kia kawea ki Hamaria ki nga rangatira o Ietereere, ara ki nga kaumatua, a ki nga tangata nana

<sup>2</sup>

i atawhai nga tama a Ahapa; i mea ia, Na aiane, i te taenga atu ano o tenei pukapuka ki a koutou, i te mea kei a koutou na nga tama a to tatou ariki, a kei a koutou nga hariata me nga hoiho, me te

<sup>3</sup>

pa kua oti te taiepa, me nga mea whawhai; Tirohia e koutou te tangata pai, te tangata tika rawa o nga tama a to koutou ariki, ka whakanoho i a ia ki te torona o tona papa, ka whawhai mo te whare

<sup>4</sup>

o to koutou ariki. Otiia i tino nui to ratou wehi, i mea hoki, Nana, kihai nga kingi tokorua ra i tu

<sup>5</sup>

ki tona aroaro; na me pehea tatou ka tu ai? Na ka unga tangata te rangatira o te whare, me te rangatira o te pa, nga kaumatua hoki, me te hunga nana i atawahi nga tamariki, ki a Iehu, hei mea, Ko matou nga mea katoa e whakahaua mai e koe; e kore matou e whakakingi i tetahi: mau e mea

<sup>6</sup>

ta to u kanohi i whakapai ai. Na ka tuhituhi pukapuka ano ia ki a ratou, ka mea, Ki te mea kei ahau koutou, a ka rongo koutou ki toku reo, tangohia nga upoko o aua tangata, o nga tama a to koutou ariki, ka haere mai ki ahau ki Ietereere i tenei takiwa apopo. Na, ko nga tama a te kingi, ko

<sup>7</sup>

tona whitu tekau tangata, i nga tangata nunui o te pa, nana ra ratou i whakatuputupu. Na, i te taenga o taua pukapuka ki a ratou, ka mau ratou ki nga tama a te kingi, a patua iho, ara te whitu

<sup>8</sup>

tekau tangata, whaowhina ano o ratou upoko ki te kete, a tukua ana ratou ki a ia ki Ietereere. Na ka tae mai tetahi karere, ka korero kia i ai, Kua kawea mai e ratou nga upoko o nga tama a te kingi.

<sup>9</sup>

Ano ra ko ia, Whakatakotoria kia rua nga puranga i te tomokanga o te kuwaha, a te ata ra ano. Na i te ata ka puta ia ki waho, ka tu, ka korero ki te iwi katoa, He tika koutou: nana, i whakatupu ahau

<sup>10</sup>

i te he mo toku ariki, a patua iho ia e ahau: engari na wai enei katoa i whakamate? Na kia mohio, e kore e taka ki te whenua tetahi wahi o te kupu a Ihowa, i korero ai a Ihowa mo te whare o Ahapa:

<sup>11</sup>

kua tutuki hoki i a Ihowa tana i korero ai, na tana pononga na Iraia. Heoi patua ana e Iehu nga morehu katoa o te whare o Ahapa i Ietereere, ana tangata rarahi, ona hoa i matatau ai ia, me ana

tohunga; a kore noa iho tetahi morehu ona i waiho e ia. <sup>12</sup> Na whakatika ana ia, turia atu ana, a haere ana ki Hamaria. A i a ia i te whare kutikuti o nga hepara i te ara, <sup>13</sup> Ka tutaki a Iehu ki nga teina o Ahatia kingi o Hura, a ka mea, Ko wai koutou? Ano ra ko ratou, He teina matou no Ahatia: a e haere ana matou ki raro, ki te oha ki nga tama a te kingi, ki nga tama hoki a te kuini. <sup>14</sup> Ano ra ko ia, Hopukia oratia ratou. Na hopukia oratia ana e ratou, a patua iho ki te rua i te whare kutikuti hipi, tona wha tekau ma rua tangata; kihai hoki tetahi o ratou i waiho e ia.

<sup>15</sup> Na, i tona haerenga atu i reira, ka tupono ia ki a Ionarapa, ki te tama a Rekaapa, e haere ana mai ki te whakatau i a ia: heoi ka oha ki a ia, ka mea ki a ia, Kei te tika ranei tou ngakau, kei te rite ranei ki toku ngakau e mea nei ki tou ngakau? Ano ra ko Ionarapa, Kei te pena. Ki te mea ko te tikanga tena, homai tou ringa ki ahau. Na hoatu ana e ia tona ringa; a ka meinga e tera kia eke ki a ia ki runga ki te hariata. <sup>16</sup> Na ka mea tera, Haere mai taua, kia kite ai koe i toku ngakau nui ki a Ihowa. Heoi ka meinga ia kia rere i runga i tona hariata. <sup>17</sup> A, i tona taenga ki Hamaria, patua iho e ia te hunga katoa o Ahapa i mahue ki Hamaria, a poto noa ia i a ia; peratia ana me ta Ihowa kupu i korero ai ki a Iraia. <sup>18</sup> Na ka huihuia te iwi katoa e Iehu, ka mea ia ki a ratou, He iti ta Ahapa mahi ki a Paara; ka nui atu ia ta Iehu mahi ki a ia. <sup>19</sup> Na karangatia aiane ki ahau nga poropiti katoa a Paara, ana tangata katoa, me ana tohunga katoa; kei ngaro tetahi: he whakahere nui hoki taku ki a Paara; ko te tangata e ngaro atu ana, e kore e ora. Otiia he mahi murere ta Iehu, kia whakangarom ia ai e ia nga tangata a Paara. <sup>20</sup> Na ka mea a Iehu, Whakatapua he huihui nui ki a Paara. Na karangatia ana e ratou. <sup>21</sup> Na ka unga tangata a Iehu puta noa i a Iharaira: a haere katoa mai ana nga tangata a Paara, kihai tetahi tangata i mahue, i kore te haere mai. Na haere ana ratou ki te whare o Paara, a kiki ana te whare o Paara i tetahi pito ki tetahi. <sup>22</sup> Na ka mea atu ia ki te kaitiaki kakahu, Mauria mai he kakahu mo nga tangata katoa a Paara. Na mauria ana mai e ia he kakahu mo ratou. <sup>23</sup> Na haere ana a Iehu raua ko Ionarapa tama a Rekaapa ki te whare o Paara; a ka mea atu ia ki nga tangata a Paara, Rapua, tirohia, kei noho ki konei ki a koutou tetahi o nga tangata a Ihowa, engari ko nga tangata anake a Paara. <sup>24</sup> Na haere ana ratou ki te mea i nga whakahere, i nga tahunga tinana. Na, tera kua whakaritea e Iehu ki waho etahi tangata mana, e waru tekau, a i mea ia, Ki te puta tetahi o nga tangata i kawea mai nei e ahau ki o koutou ringa, ko te tangata nana ia i tuku, ko tona matenga hei utu mo to tera matenga. <sup>25</sup> Na, i te mutunga o tana whakahere i te tahunga tinana, ka mea a Iehu ki nga kaitiaki ratou ko nga rangatira, Haere ki roto, patua ratou; kei puta tetahi ki waho. Na patu iho e ratou ki te mata o te hoari; a maka ana ratou e nga kaitiaki ratou ko nga rangatira ki waho, a haere ana ratou ki te pa o te whare o Paara. <sup>26</sup> Na whakaputaina ana e ratou nga whakapakoko o te whare o Paara, a tahuna ana ki te ahi. <sup>27</sup> I wahia

hoki e ratou te whakapakoko o Paara, i wahia ano te whare o Paara, a meinga ana hei whare paru a tae noa ki tenei ra. <sup>28</sup> Ko te whakamotitanga tenei a Iehu i a Paara i roto i a Iharaira.

<sup>29</sup> Ko nga hara ia o Ieropoama tama a Nepata i hara ai a Iharaira, kihai era i mahue i a Iehu te whai, ara nga kua kau koura i Peteere, i Rana. <sup>30</sup> Na ka mea a Ihowa ki a Iehu, Kua pai nei tau, kua mahia e koe te tika ki toku aroaro, a kua meatia e koe ki te whare o Ahapa rite tonu ki nga mea

katoa i toku ngakau, na e wha nga whakatupuranga o au tama e noho ki te torona o Iharaira. <sup>31</sup> Otiia kihai a Iehu i aro nui ki te haere i runga i te ture a Ihowa, a te Atua o Iharaira, kihai i mahue i a ia

nga hara o Ieropoama i hara ai a Iharaira. <sup>32</sup> I aua ra ka timata a Ihowa te tapahi i nga taha o Iharaira:

i patua hoki ratou e Hataere i nga rohe katoa o Iharaira; <sup>33</sup> I Horano atu whaka te rawhiti, ko te whenua katoa o Kireara, ko nga Kari, ko nga Reupeni, ko nga Manahi; i Aroere atu, i te awa o

Aranono, ara a Kireara, a Pahana. <sup>34</sup> Na, ko era atu meatanga a Iehu me ana mahi katoa, me ana mahi toa katoa, kahore ianei i tuhituhia ki te pukapuka o nga meatanga o nga ra o nga kingi o

Iharaira? <sup>35</sup> Na ka moe a Iehu ki ona matua, a tanumia iho ki Hamaria. A ko tana tama, ko Iehoahata

te kingi i muri i a ia. <sup>36</sup> A ko nga ra i kingi ai a Iehu ki a Iharaira i Hamaria e rua tekau ma waru nga tau.

## Chapter 11

<sup>1</sup> Na, i te kitenga o Ataria, whaea o Ahatia kua mate tana tama, whakatika ana ia, whakamotitia

iho nga uri kingi katoa. <sup>2</sup> Otiia i mau a Iehohepa, tamahine a Kingi Iorama, tuahine o Ahatia ki a Ioaha tama a Ahatia, kahakina atu ana e ia i roto i nga tama a te kingi i whakamatea ra, raua ko tona kaihihi, a kawea ana ki te whare moenga; a huna ana ia e ratou i a Ataria, i kore ai ia e

whakamatea. <sup>3</sup> Na i taua wahine ia i roto i te whare o Ihowa e piri ana, e ono nga tau: a ko Ataria te kuini o te whenua.

<sup>4</sup> Na, i te whitu o nga tau ka unga tangata a Iehoiara ki te tiki i nga rangatira rau, o nga Kariti, o nga kaitiaki kingi, a mauria ana mai ratou ki a ia ki roto ki te whare o Ihowa. Na ka whakarite kawenata ia ki a ratou, ka whakaoati i a ratou i roto i te whare o Ihowa, a whakakitea ana e ia te

tama a te kingi ki a ratou. <sup>5</sup> Na ka whakahau ia i a ratou, ka mea, Ko tenei ta koutou mea e mea ai: ko te toru o nga wehenga o koutou, o te hunga e haere ki roto i te hapati, hei tiaki i te whare o te

kingi; <sup>6</sup> Ko tetahi o nga wehenga e toru hei te kuwaha o Huru; a ko tetahi o nga wehenga hei te

kuwaha i muri i nga kaitiaki kingi: ma tena koutou e tiaki ai i te whare, hei arai atu. <sup>7</sup> Na kia rua nga matua o koutou, ko te hunga e haere ana ki waho i te hapati, hei tiaki i te whare o Ihowa i waho

ake o te kingi. <sup>8</sup> Na me karapoti e koutou te kingi a tawhio noa, ko nga patu a tena, a tena ki tona ringa; a, ko te tangata e haere mai ki roto i nga rarangi, me whakamate: a hei te taha tonu koutou

o te kingi i tona haerenga atu, i tona haerenga mai. <sup>9</sup> Na ka meatia e nga rangatira rau nga mea katoa i whakahaua e Iehoiara tohunga: a ka mau ratou ki ana tangata, ki ana tangata, ki nga mea e haere ana ki roto i te hapati, ki te hunga hoki e haere ana ki waho i te hapati, a haere ana ki a Iehoiara

tohunga. <sup>10</sup> A i hoatu e te tohunga ki nga rangatira rau nga tao me nga whakapuru tao a Kingi

Rawiri; i roto hoki aua mea i te whare o Ihowa. <sup>11</sup> Na tu ana nga kaitiaki kingi, me a ratou patu i te ringa o tenei, o tenei, i te koki ki matau o te whare, tae noa ki te koki ki mau i te whare, i nga

taha o te aata, o te whare, a karapoti noa i te kingi. <sup>12</sup> Katahi ka whakaputaina mai e ia te tama a te kingi, potaea iho te karauna ki a ia, a hoatu ana ki a ia te whakaaturanga; na whakakingitia ana ia e ratou, whakawahia ana; na kei te pakipaki i o ratou ringa, me te karanga ano, Kia ora te kingi.

<sup>13</sup> A, i te rongonga o Ataria i te reo o nga kaitiaki ratou ko te iwi, ka haere ia ki te iwi ki te whare o Ihowa. <sup>14</sup> Heoi ka titiro ia, na, ko te kingi e tu ana i te taha o te pou, ko te tikanga hoki tera, me nga rangatira ratou ko nga kaiwhakatangi tetere i te taha o te kingi: a, ko te iwi katoa o te whenua e koa ana, e whakatangi ana i nga tetere. Katahi a A taria ka haehae i ona kakahu, ka

karanga, He he! he he, te whakatakotoria nei! <sup>15</sup> Na ka whakahau a Iehoiara tohunga ki nga rangatira rau, ki nga kaitohutou i te ope, ka mea ki a ratou, Kawea mai ia ki waenga i nga rarangi; ko te tangata hoki e haere ana i muri i a ia me patu ki te hoari: i ki hoki te tohunga, Kaua ia e whaka

matea i roto i te whare o Ihowa. <sup>16</sup> Heoi whakawateatia ana e ratou he ara mona; a haere ana ia i te huarahi e haere ai nga hoiho ki te whare o te kingi: a whakamatea iho ki reira.

<sup>17</sup> Na ka whakaritea e Iehoiara he kawenata, he mea na Ihowa, ki te kingi ratou ko te iwi, kia

meinga ratou hei iwi ma Ihowa; he mea hoki na te kingi ki te iwi. <sup>18</sup> Na haere ana te iwi katoa o taua whenua ki te whare o Paara, wahia iho e ratou; ko ana aata, ko ona ahua i wahia e ratou, mongamonga noa, patua iho hoki e ratou a Matana tohunga o Paara ki te ritenga atu o nga aata. I

whakaritea hoki e te tohunga he kaitirotiro mo te whare o Ihowa. <sup>19</sup> I mauria hoki e ia nga rangatira rau, ratou ko nga Kariti, ko nga kaitiaki kingi, me te iwi katoa o te whenua; na kawea iho ana e ratou te kingi ki raro i te whare o Ihowa, a haere ana na te huarahi ki te kuwaha o nga kaitiaki ki

te whare o te kingi. Na noho ana ia i runga i te torona o nga kingi. <sup>20</sup> Heoi koa katoa ana te iwi o te whenua, a marie noa iho te pa: a whakamatea ana e ratou a Ataria ki te hoari i te whare o te kingi.

<sup>21</sup> E whitu nga tau o Iehoaha i a ia ka kingi nei.



## Chapter 12

<sup>1</sup> No te whitu o nga tau o Iehu i kingi ai a Iehoaha; a e wha tekau ona tau i kingi ai ia ki Hiruharama: a, ko te ingoa o tona whaea, ko Tipia o Peerehepa. <sup>2</sup> A tika tonu nga mahi a Iehoaha ki te titiro a Ihowa i ona ra katoa i akona ai ia e Iehoiara tohunga. <sup>3</sup> Ko nga wahi tiketike ia kihai i whakakahoretia; i patu whakahere tonu te iwi, i tahu whakakakara ki runga ki nga wahi tiketike.

<sup>4</sup> Na i mea a Iehoaha ki nga tohunga, Ko te moni katoa o nga mea e whakatapua ana, e kawea ana ki te whare o Ihowa, ko te moni o nga tangata e haere atu ana i te tauanga, ko te moni e whakaritea ai tera, tera, ko nga moni katoa e puta ake i roto i te ngakau o tetahi kia kawea mai ki roto ki te whare o Ihowa, <sup>5</sup> Me tango mai e nga tohunga, e tera, e tera i tana tangata i mohio ai: a ma ratou e hanga nga wahi pakaru o te whare i nga wahi katoa e kitea ai he pakaru. <sup>6</sup> I te rua tekau ma toru ia o nga tau o Kingi Iehoaha kahore ano i hanga nga wahi pakaru o te whare e nga tohunga.

<sup>7</sup> Katahi ka karanga a Kingi Iehoaha ki a Iehoiara tohunga, ki era atu tohunga hoki, a ka mea ki a ratou, He aha koutou te hanga ai i nga wahi pakaru o te whare? Na kati koutou te tango moni i a koutou tangata i mohio ai, engari me homai mo nga wahi pakaru o te whare. <sup>8</sup> Na whakaae ana nga tohunga kia kua ratou e tango moni mai ano i te iwi, kia kua hoki e hanga i nga wahi pakaru o te whare. <sup>9</sup> Otiia i mau a Iehoiara tohunga ki tetahi pouaka, a pokaia ana e ia he kohao ki tona taupoki, whakatakotoria ana ki te taha o te aata, ki te taha ki matau, i te mea ka haere tetahi ki te whare o Ihowa: a tukua iho ana ki roto e nga tohunga tiaki o te tatau nga moni katoa i kawea mai ki te whare o Ihowa. <sup>10</sup> A, ka kitea kua nui te moni i roto i te pouaka, na ka haere te kaituhituhi a te kingi raua ko te tino tohunga, ka whaowhina ki roto ki nga peeke, a taua ana te moni i kitea i roto i te whare o Ihowa. <sup>11</sup> Na hoatu ana e ratou te moni i paunatia ra ki nga ringa o nga kaimahi i te mahi, o nga kaitohutohu i te whare o Ihowa: a na ratou i utu atu ki nga kamura, ki nga kaihanganga i mahia ai te whare o Ihowa, <sup>12</sup> Ki nga kaimahi kohatu, ki nga kaitarai kohatu; hei hoko ano i nga rakau, i nga kohatu tarai, hei hanga mo nga wahi pakaru o te whare o Ihowa, hei utu hoki mo nga mea katoa i riro hei hanga mo te whare. <sup>13</sup> Otiia kihai i hanga mo te whare o Ihowa he kapu hiriwa, he kuku, he peihana, he tetere, he oko koura, he oko hiriwa, ki te moni i kawea mai ki te whare o Ihowa: <sup>14</sup> I hoatu hoki ki nga kaimahi i te mahi, hei hanga i nga wahi pakaru o te whare o Ihowa.

<sup>15</sup> Kihai hoki i uiuia nga meatanga a aua tangata i hoatu nei e ratou te moni ki o ratou ringa kia hoatu ki nga kaimahi i te mahi; he pono hoki ta ratou mahi. <sup>16</sup> Ko te moni mo te he, me te moni mo te hara, kihai i kawea mai e ratou ki te whare o Ihowa: i nga tohunga tena.

17 Katahi ka haere a Hataere kingi o Hiria, whawhai ana ki Kata, a horo ana i a ia: na ka anga  
 te kanohi o Hataere, ka mea ki te haere ki runga, ki Hiruharama. 18 Na ka mau a Iehoaha kingi o  
 Hura ki nga mea tapu katoa i whakatapua e ona matua, e Iehohapata, e Iehorama, e Ahatia, e nga  
 kingi o Hura, ki ana mea tapu ano, ki te koura katoa i kitea i roto i nga toa taonga o te whare o  
 Ihowa, o te whare hoki o te kingi, a tukua ana ki a Hataere kingi o Hiria: a haere atu ana ia i  
 Hiruharama. 19 Na, ko era atu meatanga a Ioaha me ana mahi katoa, kahore ianei i tuhituhia ki te  
 pukapuka o nga meatanga o nga ra o nga kingi o Hura? 20 Na ka whakatika ana tangata, a  
 whakatupuria ana e ratou he he mona, a patua iho a Ioaha ki te whare o Miro i te heketanga iho ki  
 Hira. 21 Na ana tangata hoki, na Iotaka tama a Himeata raua ko Iehotapara tama a Homere ia i  
 patu, a mate iho; na tanumia ana ia ki ona matua ki te pa o Rawiri: a ko Amatia, ko tana tama, te  
 kingi i muri i a ia.

### Chapter 13

1 No te rua tekau ma toru o nga tau o Ioaha tama a Ahatia kingi o Hura i kingi ai a Iehoahata  
 tama a Iehu ki a Iharaira ki Hamaria, a tekau ma whitu nga tau i kingi ai. 2 A he kino tana mahi ki  
 te titiro a Ihowa, i whai hoki ia i nga hara o Ieropoama tama a Nepata i hara ai a Iharaira. Kihai ena  
 i mahue i a ia. 3 Na ka mura te riri o Ihowa ki a Iharaira, a hoatu ana ratou e ia ki te ringa o Hataere  
 kingi o Hiria, ki te ringa ano hoki o Penehaara tama a Hataere i o raua ra katoa. 4 Na ka inoi a  
 Iehoahata ki a Ihowa, a ka whakarongo a Ihowa ki a ia: i kite hoki ia i te tukinotanga o Iharaira, i  
 tukinotia ai ratou e te kingi o Hiria. 5 Na homai ana e Ihowa he kaiwhakaora ki a Iharaira, a ka puta  
 ake ratou i raro i te ringa o nga Hiriani: a noho ana nga tama a Iharaira ki o ratou teneti, he pera  
 me mua. 6 Otiia kihai i mahue i a ratou nga hara o te whare o Ieropoama i hara ai a Iharaira, heoi  
 haere ana i reira; tu tonu ano te Ahera i Hamaria. 7 Kahore hoki i waiho e ia o te iwi ki a Iehoahata,  
 ko nga kaieke hoiho anake e rima tekau, tekau nga hariata, kotahi tekau mano nga hoia haere raro;  
 i huna hoki ratou e te kingi o Hiria, a meinga ana kia rite ki te puehu i te patunga witi. 8 Na ko era  
 atu meatanga a Iehoahata me ana mahi katoa, me ana mahi toa, kihai ianei ena i tuhituhia ki te  
 pukapuka o nga meatanga o nga ra o nga kingi o Iharaira? 9 Na ka moe a Iehoahata ki ona matua,  
 a tanumia iho ki Hamaria: a ko Ioaha, ko tana tama te kingi i muri i a ia.

10 No te toru tekau ma whitu o nga tau o Ioaha kingi o Hura i kingi ai a Iehoaha tama a Iehoahata  
 11 ki a Iharaira ki Hamaria, tekau ma ono nga tau. A he kino tana mahi ki te titiro a Ihowa; kihai  
 i mahue i a ia tetahi o nga hara o Ieropoama tama a Nepata i hara ai a Iharaira: engari i haere ia i  
 12 reira. Na, ko era atu meatanga a Ioaha me ana mahi katoa, me ana mahi toa i tana whawhai ki  
 a Amatia kingi o Hura, kihai ianei era i tuhituhia ki te pukapuka o nga meatanga o nga ra o nga  
 13 kingi o Iharaira? Na ka moe a Ioaha ki ona matua, a noho ana a Ieropoama ki tona torona; i  
 14 tanumia hoki a Ioaha ki Hamaria, ki nga kingi o Iharaira. Na i te mate a Eriha i tona mate e mate  
 rawa ai: a haere iho ana a Ioaha kingi o Iharaira ki raro, ki a ia, a tangi ana i runga i a ia, ka mea,  
 15 E toku papa, e toku papa, e nga hariata o Iharaira, e ona kaieke hoiho! Na ka mea a Eriha ki a  
 16 ia, E mau ki te kopere, ki nga pere: a ka mau ia ki te kopere, ki nga pere. Na ka mea ia ki te  
 kingi o Iharaira, Pupuri tou ringa i te kopere: na kua puritia e tona ringa. Na ka whakapa a Eriha i  
 17 ona ringa ki nga ringa o te kingi. Na ka ki tera, Uakina te matapihi whaka te rawhiti: na uakina  
 ana e ia. Katahi a Eriha ka mea, Koperea: na koperea ana e ia. A ka mea tera, Ko te pere o ta Ihowa  
 whakaoranga, ko te pere e ora ai i a Hiria: ka patua hoki e koe nga Hiriani ki Apek e, a poto noa.  
 18 A ka mea ano ia, E mau ki nga pere: a kua riro i a ia. Na ka mea tera ki te kingi o Iharaira, Patua  
 19 ki te whenua: a e toru ana patunga, ka tu. Na ka riri te tangata a te Atua ki a ia, ka mea, Kia rima  
 ke he patunga mau, kia ono ranei; penei kua patua e koe a Hiria a poto noa; ko tenei kia toru ano  
 patunga mau i a Hiria.  
 20 Na ka mate a Eriha, a tanumia ana e ratou. A ka haere mai nga taua a nga Moapi ki te whenua  
 21 i te aranga o te tau. Na, i a ratou e tanu ana i tetahi tangata, ka kite ratou i te taua; heoi maka  
 ana e ratou taua tangata ki te rua o Eriha: te panga o te tangata ra ki nga wheua o Eriha, kua ora,  
 22 tu ana ona waewae ki runga. A i tukinotia a Iharaira e Hataere kingi o Hiria i nga ra katoa o  
 23 Iehoahata. Otira i atawhai a Ihowa ki a ratou, i aroha ki a ratou, i tahuri hoki ki a ratou, he  
 whakaaro ki tana kawenata ki a Aperahama, ki a Ihaka, ki a Hakopa, kihai hoki i mea kia huna  
 24 ratou, kiano hoki ratou i maka e ia i tona aroaro. Na ka mate a Hataere kingi o Hiria; a ko  
 25 Peneharara, ko tana tama te kingi i muri i a ia. Na tangohia ana e Iehoaha tama a Iehoahata i te  
 ringa o Peneharara tama a Hataere nga pa i tangohia atu i te ringa o Iehoahata, o tona papa i te  
 whawhai. E toru nga patunga a Ioaha i a ia, a whakahokia ana e ia nga pa o Iharaira.

## Chapter 14

<sup>1</sup> No te rua o nga tau o Ioaha tama a Iehoahata kingi o Iharaira i kingi ai a Amatia tama a Ioaha  
kingi o Hura. <sup>2</sup> E rua tekau ma rima ona tau i a ia ka kingi nei, a e rua tekau ma iwa nga tau i kingi  
ai ia ki Hiruharama. Ko te ingoa hoki o tona whaea ko Iehoarana, no Hiruharama. <sup>3</sup> A he tika tana  
mahi ki te titiro a Ihowa, otiia kihai i rite ki ta tona tupuna, ki ta Rawiri. Rite tonu tana mahi ki nga  
mea katoa i mea ai tona papa a Ioaha. <sup>4</sup> Ko nga wahi tiketike ia kahore i whakakahoretia: i patu  
whakahere tonu ano te iwi, i tahu whakakakara ki nga wahi tiketike. <sup>5</sup> A, no te unga o te kingitanga  
ki tona ringa, ka patua e ia ana tangata, nana ra i patu te kingi, tona papa. <sup>6</sup> Ko nga tamariki ia a  
nga kaikohuru kihai i whakamatea e ia, kia rite ai ki te mea i tuhituhia ki te pukapuka o te ture a  
Mohi, ki ta Ihowa hoki i whakahau ai, i ki ai, Kaua e whakamatea nga matua mo ta nga tamariki,  
kaua ano hoki e whakamatea nga tamariki mo ta nga matua; engari mate iho tenei, tenei, mo tona  
hara ake. <sup>7</sup> I patua e ia o nga Eromi ki te Raorao Tote tekau nga mano, a riro ana i a ia a Hera i te  
whawhai, a huaina iho e ia te ingoa ko Iokoteere, e mau nei a taea noatia tenei ra.  
<sup>8</sup> Katahi a Amatia ka unga tangata ki a Iehoaha tama a Iehoahata tama a Iehu kingi o Iharaira,  
ka mea, Haere mai, taua ka titiro ki a taua. <sup>9</sup> Na ka unga tangata a Iehoaha kingi o Iharaira ki a  
Amatia kingi o Hura, hei mea, I unga tangata te tataramoa i Repanona ki te hita i Repanona, i mea,  
Homai tau tamahine hei wahine ma taku tama. Na, ko te haerenga atu o tetahi kararehe o te parae  
i Repanona, takahia iho e ia taua tataramoa. <sup>10</sup> He tika i patua e koe a Eroma, a hikitia ana koe e  
tou ngakau: ko tena hei whakapehapeha mau, ka noho i tou whare. He aha koe ka whakapataritari  
ai, hei kino ano mou, e hinga ai koe, a koe me Hura? <sup>11</sup> Otiia kihai a Amatia i rongu. Na haere ana  
a Iehoaha kingi o Iharaira, a titiro ana raua ko Amatia kingi o Hura ki a raua ki PeteHEMEHE o Hura.  
<sup>12</sup> Na ka patua a Hura i te aroaro o Iharaira, a rere ana ki tona teneti, ki tona teneti. <sup>13</sup> Na ka hopukia  
a Amatia kingi o Hura tama a Iehoaha, tama a Ahatia, e Iehoaha kingi o Iharaira ki PeteHEMEHE.  
Na ka haere tera ki Hiruharama, wahia ana e ia te taiepa o Hiruharama i te kuwaha o Eparaima tae  
noa ki te kuwaha o te koki, e wha rau n ga whatianga. <sup>14</sup> Tangohia ake hoki e ia te koura katoa me  
te hiriwa, me nga oko katoa i kitea ki te whare o Ihowa, ki nga taonga o te whare o te kingi, me  
etahi tangata hei taumau i te ata noho, a hoki ana ki Hamaria.  
<sup>15</sup> Na, ko era atu meatanga i mea ai a Iehoaha me ana mahi toa, me tana whawhai ki a Amatia  
kingi o Hura, kahore ianei i tuhituhia ki te pukapuka o nga meatanga o nga ra o nga kingi o Iharaira?  
<sup>16</sup> Na ka moe a Iehoaha ki ona matua, a tanumia ana ki Hamaria ki nga kingi o Iharaira; a ko tana  
tama, ko Ieropoama te kingi i muri i a ia. <sup>17</sup> A kotahi tekau ma rima nga tau i ora ai a Amatia tama  
a Ioaha kingi o Hura i muri i te matenga o Iehoaha tama a Iehoahata kingi o Iharaira. <sup>18</sup> Na, ko era

atu meatanga a Amatia, kahore ianei i tuhituhia ki te pukapuka o nga meatanga o nga ra o nga kingi  
 o Hura? <sup>19</sup> Na ka whakatupu ratou i te he mona ki Hiruharama; a rere ana ia ki Rakihi: otiia i tonoa  
 e ratou he tangata ki te whai i a ia ki Rakihi, a patua iho ia ki reira. <sup>20</sup> Na mauria ana ia i runga  
 hoiho, a tanumia ana ki Hiruharama ki ona matua ki te pa o Rawiri. <sup>21</sup> Na ka mau te iwi katoa o  
 Hura ki a Ataria, tekau ma ono ona tau, a meinga ana ia e ratou hei kingi i muri i tona papa, i a  
 Amatia. <sup>22</sup> Nana Erata i hanga, i whakahoki ano ki a Hura, i muri iho ka moe te kingi ki ona matua.  
<sup>23</sup> No te tekau ma rima o nga tau o Amatia tama a Ioaha kingi o Hura i kingi ai a Ieropoama  
 tama a Ioaha kingi o Iharaira ki Hamaria, e wha tekau ma tahi nga tau i kingi ai ia. <sup>24</sup> A he kino  
 tana mahi ki te titiro a Ihowa: kihai i mahue i a ia tetahi hara o Ieropoama tama a Nepata i hara ai  
 a Iharaira. <sup>25</sup> Nana i whakahoki te rohe o Iharaira, i te haerenga atu ki Hamata a tae noa ki te moana  
 o te Arapaha; i rite ai te kupu a Ihowa, a te Atua o Iharaira, ara ta tana pononga, ta Hona poropiti  
 tama a Amitai o Katahewhere i korero ai. <sup>26</sup> I kite hoki a Ihowa i te tukinotanga o Iharaira, he kino  
 rawa; kihai tetahi i tutakina ki roto, i mahue noa atu ranei, kahore hoki he kaiwhakaora mo Iharaira.  
<sup>27</sup> Kihai hoki a Ihowa i ki kia horoia atu te ingoa o Iharaira i raro i te rangi: engari i meinga e ia  
 kia whakaorangia ratou e te ringa o Ieropoama tama a Ioaha. <sup>28</sup> Na, ko era atu meatanga a Ieropoama  
 me ana mahi katoa, me ana mahi toa, ana whawhai, tana whakahokinga i Ramahiku, i Hamata, no  
 Hura ra i mua, ki a Iharaira, kihai ianei i tuhituhia ki te pukapuka o nga meatanga o nga ra o nga  
 kingi o Iharaira? <sup>29</sup> Na ka moe a Ieropoama ki ona matua, ki nga kingi o Iharaira; a ko tana tama,  
 ko Hakaraia te kingi i muri i a ia.

## Chapter 15

<sup>1</sup> No te rua tekau ma whitu o nga tau o Ieropoama kingi o Iharaira i kingi ai a Ataria tama a  
 Amatia, kingi o Hura. <sup>2</sup> Tekau ma ono ona tau i a ia ka kingi nei, a e rima tekau ma rua nga tau i  
 kingi ai ia ki Hiruharama. A ko te ingoa o tona whaea ko Iekoria, no Hiruharama. <sup>3</sup> A i tika tana  
 mahi ki te titiro a Ihowa, i rite ki nga mea katoa i mea ai a Amatia, tona papa. <sup>4</sup> Otiia kihai i  
 whakakahoretia nga wahi tiketike: i patu whakahere tonu ano te iwi, i tahu whakakakara ki nga  
 wahi tiketike. <sup>5</sup> Na pakia ana te kingi e Ihowa, a he repera ia a mate noa, a noho ana ia i te whare  
 wehe ke. Na ko Iotama, ko te tama a te kingi, te rangatira o te whare, hei kaiwhakarite mo te iwi o

te whenua. <sup>6</sup> Na, ko era atu meatanga a Ataria me ana mahi katoa, kihai ianei i tuhituhia ki te pukapuka o nga meatanga o nga ra o nga kingi o Hura? <sup>7</sup> Na ka moe a Ataria ki ona matua, a tanumia iho ki ona matua ki te pa o Rawiri; a ko Iotama, ko tana tama, te kingi i muri i a ia.

<sup>8</sup> No te toru tekau ma waru o nga tau o Ataria kingi o Hura i kingi ai a Hakaraia tama a Ieropoama ki a Iharaira, ki Hamaria, e ono nga marama. <sup>9</sup> A he kino tana mahi ki te titiro a Ihowa, i rite ki ta ona matua i mea ai: kihai i mahue i a ia nga hara o Ieropoama tama a Nepata i hara ai a

Iharaira. <sup>10</sup> Na ka whakatupu a Harumu tama a Iapehe i te he mona, a patua ana e ia i te aroaro o te iwi, whakamatea iho, a ko ia te kingi i muri i a ia. <sup>11</sup> Na, ko era atu meatanga a Hakaraia, nana,

kua oti te tuhituhi ki te pukapuka o nga meatanga o nga ra o nga kingi o Iharaira. <sup>12</sup> Ko te kupu hoki tena a Ihowa i korero ai ia ki a Iehu, i mea ai, E wha nga whakatupuranga o au tama e noho

ki te torona o Iharaira. Na koia rawa ano ia. <sup>13</sup> No te toru tekau ma iwa o nga tau o Utia kingi o

Hura i kingi ai a Harumu tama a Iapehe, a kotahi tino marama i kingi ai ia ki Hamaria. <sup>14</sup> Na haere ake ana a Menaheme tama a Kari i Tirita, tae tonu ki Hamaria, patua iho e ia, a Harumu tama a

Iapehe ki Hamaria, whakamatea iho; a ko ia te kingi i muri i a ia. <sup>15</sup> Na, ko era atu meatanga a Harumu me tana he i whakatupuria e ia, nana kua oti te tuhituhi ki te pukapuka o nga meatanga o

nga ra o nga kingi o Iharaira. <sup>16</sup> Na ka patua e Menaheme a Tipiha me nga mea katoa i roto, me ona rohe katoa, o Tirita mai ano; mo ratou kihai i uaki ki a ia; koia i patua ai. Ripiripia ake hoki e

ia nga wahine hapu katoa o reira. <sup>17</sup> No te toru tekau ma iwa o nga tau o Ataria kingi o Hura i kingi

ai a Menaheme tama a Kari ki a Iharaira ki Hamaria, a kotahi tekau ona tau i kingi ai. <sup>18</sup> A he kino tana mahi ki te titiro a Ihowa. Kihai i mahue i a ia i ona ra katoa nga hara o Ieropoama tama a

Nepata i mea nei i a Iharaira kia hara. <sup>19</sup> Na ka whakaekea te whenua e Puru kingi o Ahiria; a ka hoatu e Menaheme etahi taranata hiriwa kotahi mano ki a Puru, kia ai ai tona ringa hei awhina

mona, kia u ai te kingitanga ki tona ringa. <sup>20</sup> Na tangohia ana e Menaheme te hiriwa i a Iharaira, i nga tangata taonga nui katoa, hei hoatu mana ki te kingi o Ahiria: e rima tekau hekere a tenei, a

tenei. Na hoki ana te kingi o Ahiria, kihai hoki i noho ki taua whenua. <sup>21</sup> Na, ko era atu meatanga a Menaheme me ana mahi katoa, kahore ianei i tuhituhia ki te pukapuka o nga meatanga o nga ra

o nga kingi o Iharaira? <sup>22</sup> Na ka moe a Menaheme ki ona matua, a ko tana tama, ko Pekahia te

kingi i muri i a ia. <sup>23</sup> No te rima tekau o nga tau o Ataria kingi o Hura i kingi ai a Pekahia tama a

Menaheme ki a Iharaira ki Hamaria, a e rua nga tau i kingi ai. <sup>24</sup> A he kino tana mahi ki te titiro a

<sup>25</sup>  
 Ihowa: kihai hoki i mahue i a ia nga hara o Ieropoama tama a Nepata i hara ai a Iharaira. Na ka whakaturia he he mona e tetahi o ana rangatira, e Peka tama a Remaria, patua iho ia ki Hamaria ki te tino wahi o te whare o te kingi, ratou ko Arakopa, ko Arie, me ona hoa, nga Kireari, e rima

<sup>26</sup>  
 tekau tangata. Na whakamatea ana ia e ia, ko ia ano te kingi i muri i a ia. Na, ko era atu meatanga a Pekahia me ana mahi katoa, nana, kua oti te tuhituhi ki te pukapuka o nga meatanga o nga ra o

<sup>27</sup>  
 nga kingi o Iharaira. No te rima tekau ma rua o nga tau o Ataria kingi o Hura i kingi ai a Peka

<sup>28</sup>  
 tama a Remaria ki a Iharaira ki Hamaria, a e rua tekau nga tau i kingi ai. A he kino tana mahi ki te titiro a Ihowa; kihai i mahue i a ia nga hara o Ieropoama tama a Nepata i hara ai a Iharaira.

<sup>29</sup>  
 I nga ra o Peka kingi o Iharaira, ka haere mai a Tikirata Pirehere kingi o Ahiria, a riro ana i a ia a Iiono, a Apere Petemaaka, a Ianoa, a Kerehe, a Hatoro, a Kireara, a Kariri, te whenua katoa o

<sup>30</sup>  
 Napatari, whakahekea atu ana ratou e ia ki Ahiri a. Na ka whakatupu a Hohea tama a Eraha i te he mo Peka tama a Remaria, patua iho e ia, whakamatea iho; a ko ia te kingi i muri i a ia, i te rua

<sup>31</sup>  
 tekau o nga tau o Iotama tama a Utia. Na, ko era atu meatanga a Peka me ana mahi katoa, nana, kua oti te tuhituhi ki te pukapuka o nga meatanga o nga ra o nga kingi o Iharaira.

<sup>32</sup>  
 No te rua o nga tau o Peka tama a Remaria kingi o Iharaira i kingi ai a Iotama tama a Utia

<sup>33</sup>  
 kingi o Hura. E rua tekau ma rima ona tau i a ia ka kingi nei, a kotahi tekau ma ono nga tau i

<sup>34</sup>  
 kingi ai ia ki Hiruharama. A ko te ingoa o tona whaea ko Ieruha, he tamahine na Haroko. A i

<sup>35</sup>  
 tika tana mahi ki te titiro a Ihowa, i rite ana mahi ki nga mea katoa a tona papa, a Utia. Ko nga wahi tiketike ia kihai i whakakahoretia: i patu whakahere tonu te iwi, i tahu whakakakara ki nga

<sup>36</sup>  
 wahi tiketike. Nana i hanga te kuwaha o runga o te whare o Ihowa. Na, ko era atu meatanga a Iotama me ana mahi katoa, kahore ianei i tuhituhia ki te pukapuka o nga meatanga o nga ra o nga

<sup>37</sup>  
 kingi o Hura? I aua ra ka timata a Ihowa te unga i a Retini kingi o Hiria raua ko Peka tama a

<sup>38</sup>  
 Remaria ki a Hura. Na ka moe a Iotama ki ona matua, a tanumia iho ki ona matua ki te pa o tona tupuna, o Rawiri; a ko Ahata, ko tana tama, te kingi i muri i a ia.

## Chapter 16

<sup>1</sup>  
 No te tekau ma whitu o nga tau o Peka tama a Remaria i kingi ai a Ahata tama a Iotama kingi

<sup>2</sup>  
 o Hura. E rua tekau nga tau o Ahata i a ia ka kingi nei; a kotahi tekau ma ono nga tau i kingi ai ia ki Hiruharama. Na kihai i tika tana mahi ki te titiro a Ihowa, a tona Atua, kihai i rite ki ta tona

<sup>3</sup> tupuna, ki ta Rawiri. Engari i haere ia i te ara o nga kingi o Iharaira, i mea hoki i tana tama kia tika na waenganui o te ahi, kia pera me nga meatanga whakarihariha a nga tauwi i peia nei e Ihowa i te aroaro o nga tama a Iharaira. <sup>4</sup> A i patu whakahere ia, i tahu whakakakara ki nga wahi tiketike, ki nga pukepuke, ki raro i nga rakau kouru nui.

<sup>5</sup> Katahi ka haere mai a Retini kingi o Hiria raua ko Peka tama a Remaria kingi o Iharaira ki Hiruharama, whawhai ai. Na whakapaea ana a Ahata e raua, otiia kihai i hinga i a raua. <sup>6</sup> I taua wa ka whakahokia e Retini kingi o Hiria a Erata ki Hiria, a peia ana nga Hurai i Erata: na haere mai

ana nga Hiriani ki Erata, a nohoia ana a reira a taea noatia tenei ra. <sup>7</sup> Heoi tukua ana e Ahata he karere ki a Tikirata Pirehere kingi o Ahiria hei ki atu, He pononga ahau nau, he tama hoki; haere mai, whakaorangia ahau i te ringa o te kingi o Hiria, i te ringa ano o te kingi o Iharaira, kua whakatika

mai nei ki ahau. <sup>8</sup> Na ka mau a Ahata ki te hiriwa, ki te koura i kitea ki te whare o Ihowa, ki nga taonga hoki o te whare o te kingi, a tukua ana e ia kia kawea hei hakari ki te kingi o Ahiria. <sup>9</sup> Na rongo ana te kingi o Ahiria ki a ia: a haere ana te kingi o Ahiria ki Ramahiku, a riro ana i a ia, whakahekea ana e ia ona tangata ki Kiri, a patua ana a Retini.

<sup>10</sup> Na haere ana a Kingi Ahata ki Ramahiku ki te whakatau i a Tikirata Pirehere kingi o Ahiria, a ka kite i te aata i Ramahiku: na ka tukua e Kingi Ahata ki a Uria tohunga te ahua o taua aata, me

tona tauira me ona mahinga katoa. <sup>11</sup> Na ka hanga e te tohunga, e Uria, he aata: rite tonu ki nga mea katoa i tukua mai nei e Kingi Ahata i Ramahiku ta te tohunga, ta Uria i mahi ai, mo te tae rawa

mai o Kingi Ahata i Ramahiku. <sup>12</sup> A, no te taenga mai o te kingi i Ramahiku, ka kite te kingi i te aata: a ka whakatata te kingi ki te aata, ka tapae whakahere i runga. <sup>13</sup> Na ka tahuna e ia tana tahunga tinana me tana whakahere totokore, ka ringihia tana ringihanga, a tauhiuhia ana nga toto

o ana whakahere mo te pai ki runga ki te aata. <sup>14</sup> Na, ko te aata parahi, ko tera i te aroaro o Ihowa, nekehia mai ana e ia i mua o te whare, i te takiwa o tana aata, o te whare o Ihowa, a whakaturia

ana ki te taha tuaraki o tana aata. <sup>15</sup> A ka whakahau a Kingi Ahata i te tohunga, i a Uria, ka mea, Tahuna ki te aata nui te tahunga tinana o te ata, te whakahere totokore o te ahiahi, te tahunga tinana a te kingi, me tana whakahere totokore, te tahunga tinana hoki a te iwi katoa o te whenua, me ta ratou whakahere totokore me a ratou ringihanga; a me tauhiuhi ano ki reira nga toto katoa o te tahunga tinana, me nga toto katoa o te patunga tapu: engari ko te aata parahi hei mea ui maku.

<sup>16</sup> Na rite tonu ta Uria tohunga i mea ai ki nga mea katoa i whakahaua e Kingi Ahata.

<sup>17</sup> I tapahia hoki e Kingi Ahata nga awahi o nga turanga, tangohia ana e ia te takotoranga wai o runga o aua mea; i tangohia ano e ia te moana i runga i nga kau parahi, i era i raro i taua moana,

a whakatakotoria ana ki runga ki te whariki kohatu; <sup>18</sup> A ko te taupoki mo te hapati i hanga nei ki



roto ki te whare, me te tomokanga o te kingi i waho, whakaangahia ana e ia ki te whare o Ihowa,  
 he whakaaro ki te kingi o Ahiria. <sup>19</sup> Na, ko era atu meatanga i mea ai a Ahata, kihai ianei i tuhituhia  
 ki te pukapuka o nga meatanga o nga ra o nga kingi o Hura? <sup>20</sup> Na ka moe a Ahata ki ona matua,  
 a tanumia iho ki ona matua, ki te pa o Rawiri: a ko Hetekia, ko tana tama, te kingi i muri i a ia.

## Chapter 17

<sup>1</sup> No te tekau ma rua o nga tau o Ahata kingi o Hura i kingi ai a Hohea tama a Eaha ki Hamaria,  
 ki a Iharaira, a e iwa nga tau i kingi ai ia. <sup>2</sup> I kino tana mahi ki te titiro a Ihowa; otia kihai i rite ki  
 ta nga kingi o Iharaira i mua atu i a ia. <sup>3</sup> I whakaekea ia e Haramanehere kingi o Ahiria; a ka riro  
 a Hohea hei pononga mana, ka mau hakari hoki ki a ia. <sup>4</sup> Na ka mau i te kingi o Ahiria e whakatupu  
 he ana a Hohea; i tukua hoki e ia he karere ki a Ho kingi o Ihipa, a kihai i kawe hakari ki te kingi  
 o Ahiria, pera i tana i kawe ai i era atu tau. Na tutakina ana ia e te kingi o Ahiria, hereherea ana ki  
 te whare herehere. <sup>5</sup> Katahi ka whakaekea te whenua katoa e te kingi o Ahiria, haere ana ia ki  
 Hamaria, whakapaea ana, e toru tau. <sup>6</sup> I te iwa o nga tau o Hohea ka horo Hamaria i te kingi o  
 Ahiria, a whakahekea atu ana e ia a Iharaira ki Ahiria, a whakanohoia ana ki Haraha, ki Haporo, i  
 te taha o te awa, o Kotana, a ki nga pa o nga Meri.  
<sup>7</sup> I pera ai, mo te hara o nga tama a Iharaira ki a Ihowa, ki to ratou Atua, nana nei ratou i kawe  
 mai i te whenua o Ihipa i raro i te ringa o Parao kingi o Ihipa, mo ratou i wehi i nga atua ke, <sup>8</sup> A  
 haere ana i runga i nga tikanga a nga iwi i peia nei e Ihowa i mua i nga tama a Iharaira, a nga kingi  
 hoki o Iharaira i whakakingitia nei e ratou. <sup>9</sup> A mahi puku ana nga tama a Iharaira i nga mea kihai  
 i tika ki ta Ihowa, ki ta to ratou Atua, hanga ana e ratou etahi wahi tiketike ma ratou ki o ratou pa  
 katoa, ki te taumaihi a nga kaitutei, ki te pa whai taiepa. <sup>10</sup> Whakaturia ana e ratou he whakapakoko,  
 he Aherimi ki runga ki nga pukepukete tiketike katoa, ki raro hoki i nga rakau kouru nui katoa.  
<sup>11</sup> Tahuna ana e ratou he whakakakara ki reira, ki nga wahi tiketike katoa, pera ana me nga iwi i  
 whakahekea atu nei e Ihowa i mua i a ratou; mahia ana e ratou nga mahi kikino katoa hei  
 whakapataritari i a Ihowa: <sup>12</sup> Mahi ana hoki ratou ki nga whakapakoko i ki ai a Ihowa ki a ratou,  
 Kaua e meatia e koutou tenei mea. <sup>13</sup> Otia i whakaaturia e Ihowa te he o Iharaira, o Hura, he mea  
 korero na nga poropiti katoa, na nga matakite katoa; i mea ia, Hoki mai i o koutou ara he, puritia  
 aku whakahau me aku tikanga, kia rite ki te ture katoa i whakahaua e ahau ki o koutou matua, ki

taku i unga ai ki a koutou, he mea korero na aku pononga, na nga poropiti. <sup>14</sup> Heoi kihai ratou i rongo, engari whakapakeke ana i o ratou kaki, kia pera me nga kaki o o ratou matua, kihai nei i

whakapono ki a Ihowa, ki to ratou Atua. <sup>15</sup> Whakorekore ana ratou ki ana tikanga, ki tana kawenata hoki i whakaritea e ia ki o ratou matua, ki ana whakaaturanga i whakaaturia e ia ki a ratou; i whai ratou i nga mea tekateka noa, a teka noa iho ratou, arumia ana e ratou nga iwi i tetahi ta ha o ratou,

i tetahi taha, era i ako ra a Ihowa ki a ratou, kia kaua e rite te mahi ki ta ratou. <sup>16</sup> Na whakarerea ana e ratou nga whakahau katoa a Ihowa, a to ratou Atua, a hanga ana he whakapakoko whakarewa ma ratou, ko nga kuao kau e rua: i hanga ano e ratou he Ahera, a koropiko ana ki te ope katoa o te

rangi, mahi ana ki a Paara. <sup>17</sup> I meinga ano e ratou a ratou tama me a ratou tamahine kia tika na waenganui i te ahi: i tahuri ki nga tohu, ki nga karakia maori: i hoko hoki i a ratou hei mahi i te

kino ki te titiro a Ihowa, hei whakapataritari i a ia. <sup>18</sup> Na reira nui atu te riri o Ihowa ki a Iharaira,

a nekehia atu ana ratou e ia i tona aroaro: kihai tetahi i mahue, ko te iwi anake o Hura. <sup>19</sup> Me Hura hoki, kihai ratou i pupuri i nga whakahau a Ihowa, a to ratou Atua, heoi haere ana i runga i nga

tikanga i whakatakotoria e Iharaira. <sup>20</sup> Na whakakorekore ana a Ihowa ki nga uri katoa o Iharaira, whakawhiua ana ratou e ia, hoatu ana ki nga ringa o nga kaipahua, a maka noatia atu ratou e ia i

tona aroaro. <sup>21</sup> I titorehia atu hoki e ia a Iharaira i te whare o Rawiri, a meinga ana e ratou a Ieropoama tama a Nepata hei kingi: na aia ana a Iharaira e Ieropoama, kia kaua e whai i a Ihowa,

a nana ratou i hara ai, he nui te hara. <sup>22</sup> Na haere ana nga tama a Iharaira i nga hara katoa i hara ai

a Ieropoama; kihai ratou i mawehe atu i reira. <sup>23</sup> A nekehia atu ra ano a Iharaira e Ihowa i tona aroaro: ko tana hoki tena i ki ai, he mea korero na ana pononga katoa, na nga poropiti. Na ka whakahekea atu a Iharaira i to ratou whenua ki Ahiria a mohoa noa nei.

<sup>24</sup> Na ka kawea mai e te kingi o Ahiria he tangata i Papurona, i Kuta, i Awa, i Hamata, i Heparawaima, a whakanohoia ana ki nga pa o Hamaria, ki nga wahi o nga tama a Iharaira. Na kua

riro a Hamaria i a ratou, a nohoia ana e ratou nga pa o reira. <sup>25</sup> Na i te timatanga o to ratou noho i reira, kihai ratou i wehi i a Ihowa. Heoi unga ana e Ihowa he raiona ki a ratou, a whakamatea iho

etahi o ratou. <sup>26</sup> Na reira ka korero etahi ki te kingi o Ahiria, ka mea, Ko nga iwi i whakahekea ra e koe, i whakanohoia ra ki nga pa o Hamaria, kahore e matau ki nga ritenga a te Atua o te whenua: na reira ka unga e ia he raiona ki a ratou, na ka whakamatea nei ratou, mo ratou kahore e matau ki

nga ritenga a te Atua o te whenua. <sup>27</sup> Katahi ka whakahau te kingi e Ahiria, ka mea, Mauria ki reira tetahi o nga tohunga i whakahekea mai nei e koutou i reira; a ma ratou e haere ki reira noho

ai, mana hoki ratou e whakaako ki nga ritenga a te Atua o te whenua. <sup>28</sup> Katahi ka haere tetahi o nga tohunga i whakahekea atu i Hamaria, a noho ana ki Peteere, a nana ratou i whakaako ki te

29 tikanga mo to ratou wehi i a Ihowa. Otiia i hanga e tenei iwi, e tenei iwi he atua ake mona, a whakanohoia ana ki nga whare o nga wahi tiketike i hanga nei e nga Hamari; e tenei iwi, e tenei iwi ki o ratou pa i noho ai ratou.

30 Na ka hangaia e nga tangata o Papurona a Hukoto Penoto; na nga tangata o Kutu i hanga Nerekara; na nga tangata o Hamata i hanga Ahima;

31 A na nga Awi i hanga Nipihata raua ko Tarataka. I tahuna hoki e nga Heparawaimi a ratou tamariki ki te ahi, hei mea ki a Atamereke raua ko Anamereke, atua o Heparawaima.

32 Heoi wehi ana ratou i a Ihowa, a whakatohungatia ana e ratou no ratou ano hei tohunga ma ratou mo nga wahi tiketike; a ko era hei kaimahi ma ratou mo nga mea tapu i nga whare o nga wahi tiketike.

33 I wehi ratou i a Ihowa, me te mahi ano ki o ratou atua: pera ana i nga iwi i whakahekea atu nei ratou i reira.

34 Rite tonu ki o mua ritenga a ratou mahi a taea noatia tenei ra; kahore o ratou wehi i a Ihowa, kahore hoki a ratou mahi e rite ki a ratou tikanga, ki a ratou whakaritenga, ki te ture, ki te whakahau ranei i whakahau ai a Ihowa i nga tama a Hakop a, ko tana ingoa nei mona ko Iharaira;

35 I whakarite kawenata nei a Ihowa ki a ratou, i whakahau hoki i a ratou, i mea, Kaua e wehi i nga atua ke, kaua hoki e koropiko ki a ratou, kaua e mahi ki a ratou, kaua hoki e patu whakahere ki a ratou.

36 Engari a Ihowa, nana nei koutou i kawe mai i te whenua o Ihipa i runga i te kaha nui, i te ringa maro, ko ia ta koutou e wehi ai, ko ia ta koutou e koropiko ai; me patu whakahere ano ki a ia.

37 Na, ko nga tikanga me nga whakaritenga, ko te ture me te whakahau, kua oti na te tuhituhi e ia mo koutou, me pupuri e koutou, me mahi i nga ra katoa; kaua hoki e wehi i nga atua ke;

38 Kaua hoki e wareware ki te kawenata i whakaritea e ahau ki a koutou; kaua hoki e wehi ki nga atua ke;

39 Engari ko Ihowa, ko to koutou Atua, ta koutou e wehi ai, a mana koutou e whakaora i te ringa o o koutou hoariri katoa.

40 Otiia kihai ratou i rongo; na rite tonu ki nga ritenga o mua ta ratou i mea ai.

41 Heoi wehi ana aua iwi i a Ihowa, me te mahi ano ki o ratou whakapakoko; i pera ano a ratou tamariki, me nga tamariki a a ratou tamariki, me o ratou matua, a taea noatia tenei ra.

## Chapter 18

1 Na, no te toru o nga tau o Hohea tama a Eaha kingi o Iharaira, i kingi ai a Hetekia tama a Ahata kingi o Hura.

2 E rua tekau ma rima ona tau i tona kingitanga, a e rua tekau ma iwa nga tau i kingi ai ia ki Hiruharama; a ko te ingoa o tona whaea ko Api, he tamahine na Hakaraia.

3 Na he tika tana mahi ki te titiro a Ihowa, i rite ki nga mea katoa i mea ai a Rawiri, tona tupuna.

4 I

whakakahoretia e ia nga wahi tiketike, i tukitukia hoki nga whakapakoko, tuaina ana e ia te Ahera: a mongamonga ana i a ia te nakahi parahi, i hanga nei e Mohi; tahu tonu ai hoki nga tama a Iharaira

5  
i te whakakakara ki taua mea a taea noatia ta ua ra; a tapa ana e ia, ko Nehuhatana. I whakawhirinaki hoki ia ki a Ihowa, ki te Atua o Iharaira; na kahore he rite mona o nga kingi katoa

6  
o Hura i muri i a ia, o era ranei i mua atu i a ia. I piri tonu hoki ia ki a Ihowa, kihai i mahue te

7  
whai i a ia, engari i puritia e ia ana whakahau i whakahau ai a Ihowa ki a Mohi. Na i a ia a Ihowa, a oti pai ana tana i nga wahi katoa i haere ai ia. Na ka whakakeke ia ki te kingi o Ahiria, a kihai i

8  
mahu ki a ia. I patua e ia nga Pirihitini tae noa ki Kaha, ki ona rohe, i te taumaihi o nga kaitutei ki te pa taiepa.

9  
Na i te wha o nga tau o Kingi Hetekia, ara i te whitu o nga tau o Honea tama a Eraha kingi o

10  
Iharaira, ka whakaekea Hamaria e Haramanehere kingi o Ahiria, whakapaea ana e ia. A, i te mutunga o te toru o nga tau, ka horo a reira i a ratou; ara no te ono o nga tau o Hetekia, koia ra te

11  
iwa o nga tau o Hohea kingi o Iharaira, ka horo Hamaria. Na ka whakaekea e te kingi o Ahiria a Iharaira ki Ahiria, whakanohoia ana e ia ki Haraha, ki Haporo, ki te taha o te awa o Kotana ki

12  
nga pa ano hoki o nga Meri: Mo ratou kihai i rongu ki te reo o Ihowa, o to ratou Atua, engari takahia ana e ratou tana kawenata me nga mea katoa i whakahaua mai e Mohi, e ta Ihowa pononga;

13  
kihai i whakarangona, kihai i mahia. Na no te tekau ma wha o nga tau o Kingi Hetekia ka

14  
whakaekea nga pa taiepa katoa o Hura e Henakeripi kingi o Ahiria, a horo ana i a ia. Na ka unga tangata a Hetekia kingi o Hura ki te kingi o Ahiria ki Rakihi hei mea, Kua hara ahau; hoki atu i ahau: ko tau e whakapikau mai ai ki ahau ka pikaua e ahau. Na whakaritea ana e te kingi o Ahiria

15  
ki a Hetekia kingi o Hura kia toru rau t aranata hiriwa, kia toru tekau hoki taranata koura. Na hoatu ana e Hetekia ki a ia te hiriwa katoa i kitea ki te whare o Ihowa, ki nga taonga ano o te whare

16  
o te kingi. No taua wa ano ka tapahia e Hetekia te koura o nga tatau o te temepara o Ihowa, o nga pou hoki i whakakikoruatia nei e Hetekia kingi o Hura, a hoatu ana ki te kingi o Ahiria.

17  
Na ka unga e te kingi o Ahiria a Taratana, a Rapaharihi, a Rapahake i Rakihi ki a Kingi Hetekia ki Hiruharama, he nui te ope, Na haere ana ratou, ka tae ki Hiruharama. A, i to ratou taenga atu, ka haere ratou, ka tu ki te awakeri o te puna wai o runga, o tera i te huarahi o te mara a te

18  
kaihoroi kakahu. Na, ka karanga ratou ki te kingi, ka puta atu ki a ratou a Eriakimi tama a Hirikia,

19  
te rangatira o te whare, a Hepena kaituhituhi, a Ioaha tama a Ahapa te kaiwhakamahara. Na ka mea a Rapahake ki a ratou, Korero atu ainei ki a Hetekia, Ko te kupu tenei a te kingi nui, a te kingi

20  
o Ahiria, He aha tenei whakawhirinaki, e whakawhirinaki na koe? E mea na koe, otiia he mea ngutu kau, Tenei te ngarahu tika, te kaha mo te whawhai. Na e whakawhirinaki ana koe ki a wai,

<sup>21</sup>  
i whakakeke ai koe ki ahau? Nana, e whakawhirinaki ana koe ki tena kakaho pepe hei tokotoko, ki a ngoto ki roto ki tona ringa, na, kua tu. Ka pera ano a Parao kingi o Ihipa ki te hunga katoa e

<sup>22</sup>  
okioki ana ki a ia. Otiia ki te mea mai koutou ki ahau, Ko Ihowa, ko to matou Atua ta matou e whakawhirinaki nei: he teka ianei ko ia tena, nana nei nga wahi tiketike, me nga aata i whakakahoretia atu nei e Hetekia, a kua mea ia ki a Hura raua ko Hiruharama, Hei mu a i tenei

<sup>23</sup>  
aata i Hiruharama koutou koropiko ai? Na homai aiane he utu pupuri ki toku ariki, ki te kingi o Ahiria, a ka hoatu e ahau ki a koe etahi hoiho, kia rua mano, ki te taea e koe te whakanoho kaieke

<sup>24</sup>  
ki runga. A me pehea e taea ai e koe te pare atu te kanohi o tetahi rangatira kotahi o nga iti rawa o nga pononga a toku ariki, a ka whakawhirinaki koe ki Ihipa hei hariata, hei kaieke hoiho mau?

<sup>25</sup>  
I haere kau mai ranei ahau, kahore a Ihowa, ki te huna i tenei wahi? I mea a Ihowa ki ahau, Haere

<sup>26</sup>  
ki te whenua ra huna ai. Katahi ka mea a Eriakimi tama a Hirikia ratou ko Hepena, ko Ioaha, ki a Rapahake, Korero koa ki au pononga i te reo Hiriani; e matau ana hoki matou ki tena reo; kaua

<sup>27</sup>  
e korero mai ki a matou i te reo Hurai i te mea e whakarongo ana te iwi i runga i te taiepa. Ano ra ko Rapahake ki a ratou, I unga mai ranei ahau e toku ariki ki tou ariki, a ki a koe, hei korero i enei kupu? He teka ianei i unga mai ahau e ia ki nga tangata e noho ana i runga i te taiepa, kia

<sup>28</sup>  
kainga e ratou to ratou paru, kia inumia to ratou mimi, ara e koutou tahi? Katahi a Rapahake ka tu, a he nui tona reo ki te karanga i te reo Hurai; i korero ia, i mea, Whakarongo ki te kupu a te

<sup>29</sup>  
kingi nui, a te kingi o Ahiria. Ko te kupu tenei a te kingi Kei tinihangatia koutou e Hetekia; e

<sup>30</sup>  
kore hoki koutou e taea te whakaora e ia i tona ringa: Kei meinga hoki koutou e Hetekia kia whakawhirinaki ki a Ihowa, i a ia e ki na, He pono, tera tatou e whakaorangia e Ihowa, e kore hoki

<sup>31</sup>  
tenei pa e tukua ki te ringa o te kingi o Ahiria. Kua e rongu ki a Hetekia; ko te kupu tenei a te kingi o Ahiria, Houhia ta koutou rongu ki ahau, ka haere mai ki waho ki ahau; ka kai ai koutou i nga hua o tana waina, o tana waina, o tana piki, o tana piki, ka inu ano i te wai o tana puna, o ta na

<sup>32</sup>  
puna: Kia tae atu ra ano ahau ki te tiki atu i a koutou ki te whenua penei i to koutou nei whenua, ki te whenua witi, waina, ki te whenua taro, mara waina, ki te whenua hinu oriwa, honi hoki, kia ora ai koutou, kei mate; kua hoki e whakarongo ki a He tekia, i a ia e tohe na ki a koutou, e mea

<sup>33</sup>  
na, Ma Ihowa tatou e whakaora. I ora ranei i tetahi o nga atua o nga tauwiwi tona whenua i te

<sup>34</sup>  
ringa o te kingi o Ahiria? Kei hea nga atua o Hamata, o Arapara? kei hea nga atua o Heparawaima,

<sup>35</sup>  
o Hena, o Iwa? i whakaorangia ranei e ratou a Hamaria i toku ringa? Ko wai o nga atua katoa o nga whenua, kua whakaorangia e ratou to ratou whenua i toku ringa, e whakaorangia ai e Ihowa

<sup>36</sup>  
a Hiruharama i toku ringa? Otiia whakarongo kau ana tera te iwi, kihai i whakahoki kupu ki a

ia; ko ta te kingi hoki tena i ako ai, i ki ai, Kaua e whakahoki kupu atu ki a ia. <sup>37</sup> Katahi ka haere a Eriakimi tama a Hirikia, te rangatira o te whare, a Hepena te kaituhituhi, a Ioaha tama a Ahapa te kaiwhakamahara ki a Hetekia, he mea haehae o ratou kakahu, a korerotia ana e ratou ki a ia nga kupu a Rapahake.

## Chapter 19

<sup>1</sup> Na, I te rongonga o Kingi Hetekia, ka haea e ia ona kakahu, ka hipoki i a ia ki te kakahu taratara, haere ana ki te whare o Ihowa. <sup>2</sup> I unga hoki e ia a Eriakimi, te rangatira o te whare, ratou ko Hepena kaituhituhi, ko nga kaumatua o nga tohunga, he mea hipoki ki te kakahu taratara, ki a Ihaia poropiti tama a Amoho. <sup>3</sup> A ka mea ratou ki a ia, Ko te kupu tenei a Hetekia, Ko tenei ra, he ra no te raruraru, no te whakatuma, no te kohukohu: kua tae hoki nga tamariki ki te whanautanga, heoi kahore he kaha e whanau ai. <sup>4</sup> Tera pea ka rongu a Ihowa, tou Atua ki nga kupu katoa a Rapahake i unga mai nei e tona ariki, e te kingi o Ahiria, hei whakorekore ki te Atua ora; a ka riri ki nga kupu i rongu ai a Ihowa, tou Atua. Na kia ara tau inoi mo nga toenga e noho nei. <sup>5</sup> Heoi kua tae nga tangata a Kingi Hetekia ki a Ihaia. <sup>6</sup> A ka mea a Ihaia ki a ratou, Kia penei ta koutou korero ki to koutou ariki, Ko te kupu tenei a Ihowa, Kaua e wehi i nga kupu i rongu na koe, ki ena i kohukohu mai na nga tangata a te kingi o Ahiria ki ahau. <sup>7</sup> Nana, ka hoatu e ahau he wairua ki roto ki a ia, a tera ia e rongu i tetahi rongu, ka hoki ki tona whenua, a ka meinga ia e ahau kia hinga i te hoari i tona ake whenua.

<sup>8</sup> Na ka hoki a Rapahake, a rokohanga atu e whawhai ana te kingi o Ahiria ki Ripina: i rongu hoki ia kua maunu mai ia i Rakihi. <sup>9</sup> A, no tona rongonga ki a Tirihaka kingi o Etiopia, ki te korero, Nana, kei te haere mai ia ki te whawhai ki a koe: ka unga tangata ano ia ki a Hetekia, hei mea atu, <sup>10</sup> Kia penei ta koutou ki atu ki a Hetekia kingi o Hura, mea atu, Kei tinihangatia koe e tou Atua, e okioki atu na koe, i a ia e ki na, E kore a Hiruharama e hoatu ki te ringa o te kingi o Ahiria.

<sup>11</sup> Nana, tena koe kua rongu ki ta nga kingi o Ahiria i mea ai ki nga whenua katoa, ki ta ratou hunanga i a ratou: a e ora ranei koe? <sup>12</sup> I ora ranei i o ratou atua nga tauwiwi i huna ra e oku matua, a Kotana, a Harana, a Retepe, me nga tama a Erene, i Terahara ra? <sup>13</sup> Kei hea te kingi o Hamata, te kingi o Arapara, te kingi o te pa o Heparawaima, o Hena, o Iwa? <sup>14</sup> Na ka riro mai i a Hetekia te pukapuka i te ringa o nga karere, a ka korerotia e ia: na haere ana a Hetekia ki runga, ki te whare

<sup>15</sup>  
 o Ihowa, wherahia ana e ia ki te aroaro o Ihowa. Na ka inoi a Hetekia ki te aroaro o Ihowa, ka  
 mea, E Ihowa, e te Atua o Iharaira, e noho mai na i runga o nga kerupima, ko koe te Atua, ko koe  
<sup>16</sup>  
 anake, o nga kingitanga katoa o te whenua; nau i hanga te rangi me te whenua. Tahuri mai tou  
 taringa, e Ihowa, whakarongo mai; titiro mai ou kanohi, e Ihowa, kia kite koe; whakarongo ki nga  
<sup>17</sup>  
 kupu a Henakeripi, i unga mai nei i tenei hei whakorekore mo te Atua ora. He tika ano e Ihowa,  
<sup>18</sup>  
 kua kore i nga kingi o Ahiria nga iwi me o ratou whenua, Kua makaia atu hoki o ratou atua ki  
 roto ki te ahi: ehara hoki era i te atua, engari he mahi na te ringa tangata, he rakau, he kohatu; koia  
<sup>19</sup>  
 i huna ai e ratou. Tena ra, e Ihowa, e to matou Atua, whakaoranga matou i tona ringa, kia mohio  
 ai nga kingitanga katoa o te whenua ko Ihowa koe, ko te Atua, ko koe anake.  
<sup>20</sup>  
 Katahi a Ihaia tama a Amoho ka unga tangata ki a Hetekia, hei mea, Ko te kupu tenei a  
 Ihowa, a te Atua o Iharaira, I inoi mai na koe ki ahau mo Henakeripi kingi o Ahiria, na kua rongo  
<sup>21</sup>  
 ahau ki a koe. Ko ta Ihowa kupu tenei i korero ai mona, Kua whakahawea te tamahine wahine  
 a Hiona ki a koe, kua kataina koe e ia; kua ruru te matenga o te tamahine a Hiruharama ki a koe.  
<sup>22</sup>  
 Ko wai tau i whakorekore na, i kohukohu na? ki a wai tou reo i whakarahia na, tou mata i kake  
<sup>23</sup>  
 na ki runga? ki te Mea Tapu o Iharaira. Na au karere i whakorekore ai koe i te Ariki, kua mea  
 na koe, Kake ana ahau, me aku tini hariata, ki nga wahi tiketike o nga maunga, ki nga taha rawa o  
 Repanona; a ka tuaina e ahau nga hita raroa o reira me o reira kauri papai; a ka tomo ahau ki te  
<sup>24</sup>  
 whare tira haere o tona wahi whakamutunga mai, ki te ngahere o tona mara hua. Kua keria e  
 ahau, kua inumia ano nga wai ke, a ka maroke i te kapu o toku waewae nga awa katoa o Ihipa.  
<sup>25</sup>  
 Kahore ranei koe i rongo naku tena i mea i mua noa atu, a naku tena i hanga o nga ra onamata?  
<sup>26</sup>  
 no naiane kua meinga e ahau, ko koe hei mea i nga pa taiepa hei puranga rukerukenga. Koia i  
 iti ai te kaha o o reira tangata; wehi ana ratou, pororaru ana; rite tonu ratou ki te tarutaru o te parae,  
 ki te otaota matomato, ki te taru i runga i nga tuanui, ki te witi i ngingio i te mea kiano i ata tupu  
<sup>27</sup>  
 noa. Otiia e matau ana ahau ki tou nohoanga iho, ki tou haerenga atu, ki tou haerenga mai, me  
<sup>28</sup>  
 tau nananga ki ahau. Mo tau nananga ki ahau, a mo tau whakakake kua tae mai nei ki oku taringa,  
 mo reira ka kuhua e ahau taku matau ki tou ihu, taku paraire ki ou ngutu, a ka whakahokia koe na  
<sup>29</sup>  
 te ara i haere mai na koe. A ko te tohu tenei ki a koe: ka kai koutou i tenei tau i nga mea tupu  
 noa ake, a i te rua o nga tau ko nga tupu noa ake o te tau: na hei te toru o nga tau koutou whakato  
<sup>30</sup>  
 ai, kokoti ai, whakato ai i nga mara waina, kai iho ai i nga hua. Na, tera e hou ano whakararo  
<sup>31</sup>  
 nga pakiaka o nga morehu i mawhiti o te whare o Hura, a ka hua nga hua whakarunga. No te  
 mea tera e puta ake he toenga i Hiruharama, he orange i maunga Hiona: e taea hoki tenei e te ngakau

<sup>32</sup>  
 nui o Ihowa. Na ko ta Ihowa kupu tenei mo te kingi o Ahiria, E kore ia e haere mai ki tenei pa, e kore ano e perea mai he pere e ia ki konei, e kore ano e maua mai e ia he whakangungu rakau ki mua i tenei pa, e haupuria ranei he puke hei whawhaitanga ki konei. <sup>33</sup> Ko te ara i haere mai ai ia, ka hoki ano ia ma reira: e kore hoki ia e tae mai ki tenei pa, e ai ta Ihowa. <sup>34</sup> Ka tiakina hoki e ahau tenei pa, kia ora ai; he whakaaro ki ahau, ki taku pononga ano ki a Rawiri.

<sup>35</sup>  
 Na i taua po ka puta te anahera a Ihowa, a patua iho e ia i te puni o nga Ahiriana kotahi rau e waru tekau ma rima mano: a, i te marangatanga ake i te ata, nana, o ratou tinana! he tupapaku katoa ratou. <sup>36</sup> Heoi turia atu ana e Henakeripi kingi o Ahiria, haere ana, hoki ana, noho rawa atu kei Ninewe. <sup>37</sup> A, i a ia e koropiko ana i roto i te whare o tona atua, o Nitiroko, ka patua e ana tama, e Ataramereke raua ko Haretere ki te hoari: a mawhiti atu ana raua ki te whenua o Ararata. A ko Etara Harono, ko tana tama, te kingi i muri i a ia.

## Chapter 20

<sup>1</sup>  
 I aua ra ka mate a Hetekai, whano marere, Na ka tae mai a Ihaia poropiti tama a Amoho ki a ia, ka mea ki a ia, Ko te kupu tenei a Ihowa, Whakahaua iho tou whare; no te mea ka mate koe, kahore e ora. <sup>2</sup> Katahi ka tahuri tona mata ki te pakitara, ka inoi ki a Ihowa, ka mea, <sup>3</sup> Tena ra, e Ihowa, kia mahara ki oku haereerenga i tou aroaro i runga i te pono, i te ngakau tapatahi, ki taku meatanga i te pai ki tau titiro. Na tangi ana a Hetekia, nui atu te tangi. <sup>4</sup> Na kahore ano a Ihaia kia puta noa ki waenganui o te pa, kua puta mai te kupu a Ihowa ki a ia, kua mea, <sup>5</sup> Hoki atu, mea atu ki te rangatira o taku iwi, ki a Hetekia, Ko te kupu tenei a Ihowa, a te Atua o Rawiri, o tou tupuna, Kua whakarangona tau inoi e ahau, a kua kite ahau i ou roimata: nana, me whakaora koe e ahau: hei te toru o nga ra ka haere ko e ki runga, ki te whare o Ihowa. <sup>6</sup> Ka tapiritia ano e ahau ou ra ki nga tau kotahi tekau ma rima: a ka whakaorangia koe me tenei pa e ahau i te ringa o te kingi o Ahiria; a ka tiakina e ahau tenei pa, he whakaaro ki ahau ano, ki taku tangata hoki, ki a Rawiri. <sup>7</sup> I ki ano hoki a Ihaia, Tikina he papa piki. Na tikina ana e ratou, whakapakia ana ki te whewhe, na kua ora ia. <sup>8</sup> Na ka mea a Hetekia ki a Ihaia, He aha te tohu moku ka whakaorangia ahau e Ihowa? moku ka haere i te toru o nga ra ki te whare o Ihowa? <sup>9</sup> Ano ra ko Ihaia, Ko te tohu tenei a Ihowa ki a koe, ka oti i a Ihowa tana kupu i korero ai ia: kia tekau ranei nga nekehanga e neke atu ai te atarangi; kia tekau ranei nga whakahokinga e hoki ai? <sup>10</sup> Ano ra ko Hetekia, He mea noa iho kia tekau nga nekehanga e neke atu ai te atarangi; erangi kia tekau nga nekehanga e hoki ai te atarangi



<sup>11</sup>  
ki muri. Katahi a Ihaia poropiti ka karanga ki a Ihowa, a whakahokia ana e ia te atarangi, tekau nga nekehanga, o nga nekehanga i heke iho ai i te whakaatu haora a Ahata.

<sup>12</sup>  
I taua wa ka tukua e Peroraka Pararana, tama a Pararana kingi o Papurona he pukapuka me tetahi hakari ki a Hetekia: no te mea i rongoi ia i te mate a Hetekia. <sup>13</sup> A i whakarongo a Hetekia ki a ratou, whakakitea ana e ia ki a ratou te whare katoa o ana mea papai, te hiriwa, te koura, nga kinaki kakara, te hinu utu nui, me te whare o ana mea mo te whawhai me nga mea katoa i rokohanga ki roto ki ona taonga: kahore tetahi mea o tona whare, o tona kingitanga katoa, i kore te whakakitea

<sup>14</sup>  
e Hetekia ki a ratou. Katahi ka haere mai a Ihaia poropiti ki a Kingi Hetekia, ka mea ki mai hoki ratou ki a koe i hea? Ano ra ko Hetekia, i haere mai ratou i te whenua hoi, i Papurona. <sup>15</sup> Ano ra ko tera, He aha nga mea i kitea e ratou ki tou whare? Ka whakahokia e Hetekia, Kua kitea e ratou nga mea katoa i toku whare: kahore tetahi mea o oku taonga i kore te whakakitea e ahau ki a ratou.

<sup>16</sup>  
Na ka mea a Ihaia ki a Hetekia, Whakarongo ki te kupu a Ihowa. <sup>17</sup> Nana, kei te haere mai nga ra e kawea ai nga mea katoa o tou whare, me nga mea kua rongoa nei e ou matua taea noatia

tenei ra, ki Papurona: e kore tetahi mea e mahue, e ai ta Ihowa. <sup>18</sup> A ka tangohia e ratou etahi o au tama e puta mai i roto i a koe, e whanau mau; a hei unaka ratou i roto i te whare o te kingi o

<sup>19</sup>  
Papurona. Ano ra ko Hetekia ki a Ihaia, He pai te kupu a Ihowa i korerotia mai na e koe. I mea

ano hoki ia, Ehara oti i te pai ki te mau te rongoi me te pono i oku ra? <sup>20</sup> Na, ko era atu meatanga a Hetekia me ana mahi toa katoa, me tana hanganga i te puna, i te awakari, a whakaputaina ana e ia he wai ki te pa, kihai ianei ena i tuhituhia ki te pukapuka o nga meatanga o nga ra o nga kingi o

<sup>21</sup>  
Hura? Na ka moe a Hetekia ki ona matua, a ko tana tama, ko Manahi, te kingi i muri i a ia.

## Chapter 21

<sup>1</sup>  
Kotahi tekau ma rua nga tau o Manahi i tona kingitanga, a e rima tekau ma rima nga tau i

kingi ai ia ki Hiruharama; a ko te ingoa o tona whaea ko Hepetipa. <sup>2</sup> A he kino tana mahi ki te titiro a Ihowa, i rite tonu ki nga mea whakariharia a nga tau iwi i peia nei e Ihowa i te aroaro o nga tama

a Iharaira. <sup>3</sup> I hanga ano hoki e ia nga wahi tiketike i whakakorea ra e Hetekia, e tona papa i whakaarahia ake ana e ia he aata ki a Paara, hanga ana e ia he Ahera, pera ana me ta Ahapa kingi

o Iharaira i mea ai, a koropiko ana ki te ope katoa o te rangi, mahi ana ki a ratou. <sup>4</sup> I hanga hoki e ia etahi aata ki te whare o Ihowa, ki ta Ihowa i ki ra, Ko Hiruharama hei waihotanga mo toku ingoa.

<sup>5</sup>  
I hanga ano e ia etahi aata mo te ope katoa o te rangi ki nga marae e rua o te whare o Ihowa. <sup>6</sup> A

meatia ana e ia tana tama kia tika na waenganui i te ahi, rapua ana e ia he tohu i nga kapua, i nga nakahi, i whai hoki ia ki nga atua maori, ki nga mata maori; nui atu tana kino i mahi ai ki te titiro

<sup>7</sup> a Ihowa hei whakapataritari i a ia. A i whakaturia e ia he whakapakoko no Ahera, i mahia e ia ki te whare i ki ra a Ihowa ki a Rawiri raua ko tana tama ko Horomona, Hei tenei whare, hei Hiruharama

<sup>8</sup> i whiriwhiria nei e ahau i roto i nga iwi katoa o Iharaira ahau waiho ai i toku ingoa a ake ake. A heoi aku whakanekehanga i nga waewae o Iharaira i te whenua i hoatu e ahau ki o ratou matua: ki te mau raia ratou ki te mahi i nga mea katoa i whakahaua e ahau ki a ratou, kia rite ki te ture katoa

<sup>9</sup> i whakahaua e Mohi, e taku pononga ki a ratou. Otiia kihai ratou i rongu: i takina ketia ratou e Manahi kia nui atu ta ratou mahi kino i ta nga iwi i huna nei e Ihowa i te aroaro o nga tama a Iharaira.

<sup>10</sup> I korero ano a Ihowa, ara ana pononga, nga poropiti, i mea, <sup>11</sup> Kua mahi nei a Manahi kingi o Hura i enei mea whakarihariha, kino atu tana i nga mea katoa i mea ai nga Amori i mua i a ia; a

<sup>12</sup> kua mea nei ia i a Hura kia hara ki ana whakapakoko; Mo reira ko te kupu tenei a Ihowa, a te Atua o Iharaira, Tenei ahau te kawe nei i te kino ki Hiruharama raua ko Hura, e paorooro ai nga

<sup>13</sup> taringa e rua o nga tangata e rangona ai. Ka whakamarokia e ahau te aho o Hamaria ki runga ki Hiruharama, me te parameti o te whare o Ahapa; a ka horoia e ahau a Hiruharama, ka peratia me

<sup>14</sup> ta te tangata horoi i te rihi; horoia ana e ia, hurihia ana ko tua. A ka rukea atu e ahau te toenga o toku wahi tupu, ka hoatu ki nga ringa o o ratou hoariri; a hei taonga parau ratou, hei mea parakete

<sup>15</sup> ma o ratou hoariri katoa; Mo ratou i mahi i te kino ki taku titiro, i whakapataritari hoki i ahau, mai o te ra i puta mai ai o ratou matua i Ihipa a taea noatia tenei ra.

<sup>16</sup> I whakahekea ano hoki e Manahi he toto harakore, tona nui, a ki noa i a ia Hiruharama i tetahi pito ki tetahi; tapiritia ana

<sup>17</sup> tenei e ia ki tona hara i hara ai a Hura, i mea ai i te kino ki te titiro a Ihowa. Na, ko era atu meatanga a Manahi me ana mahi katoa, me tona hara i hara ai ia, kihai ianei ena i tuhituhia ki te

<sup>18</sup> pukapuka o nga meatanga o nga ra o nga kingi o Hura? Na ka moe a Manahi ki ona matua, a tanumia ana ki te kari o tona whare, ki te kari a Uha: a ko tana tama, ko Amono, te kingi i muri i a ia.

<sup>19</sup> E rua tekau ma rua nga tau o Amono i tona kingitanga, a e rua nga tau i kingi ai ia ki Hiruharama: a ko te ingoa o tona whaea ko Mehuremete, he tamahine na Harutu, no Iotopa.

<sup>20</sup> A he kino tana mahi ki te titiro a Ihowa, rite tonu tana mahi ki ta tona papa, ki ta Manahi. <sup>21</sup> I haere hoki ia i nga ara katoa i haere ai tona papa, i mahi ki nga whakapakoko i mahi ai tona papa, a

<sup>22</sup> koropiko ana ia ki aua mea. I whakarerea e ia a Ihowa, te Atua, o ona matua, kihai i haere i te ara o Ihowa. <sup>23</sup> Na ka whakatupu nga tangata a Amono i te mate mona, a patua iho e ratou te kingi

ki roto ano i tona whare. <sup>24</sup> Otiia i patua e nga tangata o te whenua te hunga katoa nana i whakatupu te he mo Kingi Amono; a meinga ana e nga tangata o taua whenua a Hohia, tana tama, hei kingi i muri i a ia. <sup>25</sup> Na, ko era atu meatanga i mea ai a Amono, kahore ianei i tuhituhia ki te pukapuka o nga meatanga o nga ra o nga kingi o Hura? <sup>26</sup> A i tanumia ia ki tona tanumanga ki te kari a Uha, a ko Hohia, ko tana tama, te kingi i muri i a ia.

## Chapter 22

<sup>1</sup> E waru nga tau o Hohia i tona kingitanga, a e toru tekau ma tahi nga tau i kingi ai ia ki Hiruharama. A ko te ingoa o tona whaea ko Ierira, he tamahine na Araia, no Pohokata. <sup>2</sup> A tika tonu tana mahi ki te titiro a Ihowa: i haere hoki ia i runga i nga ara katoa o tona tupuna o Rawiri, a kihai i peka ki matau, ki mau. <sup>3</sup> Na i te tekau ma waru o nga tau o Kingi Hohia ka unga e te kingi a Hapana tama a Ataria tama a Mehurama, te kaituhituhi, ki te whare o Ihowa; i mea ia, <sup>4</sup> Haere ki a Hirikia ki te tino tohunga, kia huihuia e ia te moni e kawea ana mai ki roto ki te whare o Ihowa, ta nga kaitiaki o te kuwaha i tango ai i te iwi; <sup>5</sup> Ka hoatu ki nga ringa o nga kaimahi o te mahi, o nga kaitohutohu o te whare o Ihowa; a ma ratou e hoatu ki nga kaimahi o te mahi i te whare o Ihowa, hei hanga mo nga wahi pakaru o te whare; <sup>6</sup> Ki nga kamura, ki nga kaihanganga, ki nga kaimahi kohatu; a hei hoko i nga rakau, i nga kohatu tarai, hei hanga mo te whare. <sup>7</sup> Otiia kihai i uiuia a ratou meatanga i te moni i hoatu nei ki o ratou ringa; he pono hoki ta ratou mahi. <sup>8</sup> Na ka mea a Hirikia tino tohunga ki a Hapana kaituhituhi, Kua kitea e ahau te pukapuka o te ture i te whare o Ihowa. Na ka hoatu e Hirikia te pukapuka ki a Hapana, a korerotia ana e ia. <sup>9</sup> Na ka haere a Hapana kaituhituhi ki te kingi, whakahokia ana te korero e ia ki te kingi, i mea ia, Kua ringiringihia e au pononga te moni i kitea ki te whare, a hoatu ana ki nga ringa o nga kaimahi i te mahi, o nga kaitohutohu i te whare o Ihowa. <sup>10</sup> Na ka whakaatu a Hapana kaituhituhi ki te kingi, ka mea, Kua homai e Hirikia tohunga he pukapuka ki ahau. Na korerotia ana e Hapana ki te aroaro o te kingi. <sup>11</sup> A, no te rongonga o te kingi i nga kupu o te pukapuka o te ture, ka haea e ia ona kakahu. <sup>12</sup> Na ka whakahau te kingi ki te tohunga, ki a Hirikia, ratou ko Ahikama tama a Hapana, ko Akaporo tama a Mikaia, ko Hapana kaituhituhi, ko Ahaia tangata a te kingi, ka mea, <sup>13</sup> Haere, ui atu ki a Ihowa moku, mo tenei iwi, mo Hura katoa hoki, he mea na nga kupu o tenei pukapuka kua kitea nei: he nui hoki te riri o Ihowa kua ngiha nei ki a tatou, no te mea kihai o tatou matua i rongo ki

14  
nga kupu o tenei pukapuka, kihai i mahi i nga mea katoa i tuhituhia hei mea ma tatou. Heoi haere ana a Hirikia tohunga ratou ko Ahikama, ko Akaporo, ko Hapana, ko Ahaia ki a Hurura, ki te wahine poropiti, wahine a Harumu kaitiaki kakahu, he tama hoki tera na Tikiwa tama a Harahaha:

15  
i Hiruharama hoki taua wahine e noho ana, i te wahi tuarua. Na korero ana ratou ki a ia. Na ka mea ia ki a ratou, Ko te korero tenei a Ihowa, a te Atua o Iharaira, Mea atu ki te tangata nana koutou

16  
i unga mai ki ahau, Ko ta Ihowa kupu tenei, Nana, ka kawea atu e ahau he kino ki runga ki tenei wahi, ki runga ano i ona tangata, ara nga kupu katoa o te pukapuka i korerotia na e te kingi o Hura;

17  
Mo ratou i whakarere i ahau, i tahu whakakakara ki nga atua ke, he whakapataritari hoki i ahau

18  
ki nga mahi katoa a o ratou ringa; koia i ngiha ai toku riri ki tenei wahi, a e kore e tineia. Otiia me ki atu e koutou ki te kingi o Hura nana nei koutou i unga mai ki te ui ki a Ihowa, Ko te kupu

19  
tenei a Ihowa, a te Atua o Iharaira; Na mo nga kupu i rongu na koe, Na te mea he ngawari tou ngakau, a kua whakaiti koe i a koe ki te aroaro o Ihowa, i a koe ka rongu na ki taku i mea ai mo tenei wahi, mo ona tangata hoki, kia meinga ratou hei ururua, hei kanga; a kua haehae i ou kakahu,

20  
kua tangi ki toku aroaro; na kua rongu ano hoki ahau i a koe, e ai ta Ihowa. Nana, ka huihuia atu koe e ahau ki ou matua, ka huihuia atu ano koe ki tou tanumanga i runga i te rangimarie, a e kore ou kanohi e kite i nga kino katoa e kawea mai e ahau ki tenei wahi. Na whakahokia ana te korero e ratou ki te kingi.

## Chapter 23

1  
Na ka unga tangata atu te kingi, a huihuia ana e ratou nga kaumatua katoa o Hura, o

2  
Hiruharama, ki a ia. Na ka haere te kingi ki te whare o Ihowa, ratou ko nga tangata katoa o Hura, ko nga tangata katoa o Hiruharama, ko nga tohunga, ko nga poropiti, ko te iwi katoa hoki, te iti, te rahi. A korerotia ana e ia ki o ratou taringa nga kupu katoa o te pu kapuka o te kawenata i kitea nei

3  
ki te whare o Ihowa. Na tu ana te kingi ki te taha o te pou, a whakaritea ana e ia he kawenata ki te aroaro o Ihowa, ara kia whakapaua tona ngakau, tona wairua, ki te whai ki a Ihowa, ki te pupuri i ana whakahau, i ana whakaaturanga, i ana tikanga, ki te whakamana ho ki i nga kupu o tenei kawenata kua tuhituhia nei ki tenei pukapuka; a tu tonu te iwi katoa ki te kawenata.

4  
Na ka whakahau te kingi ki te tino tohunga, ki a Hirikia, ki nga tohunga tuarua, ki nga kaitiaki kuwaha, kia whakaputaina ki waho o te temepara o Ihowa nga oko katoa i hanga ma Paara, mo te Ahera, ma te ope katoa ano hoki o te rangi. Na tahuna an a e ia aua mea ki waho o Hiruharama, ki

5  
nga mara i Kitirono, kawea ana nga pungarehu ki Peteere. I whakakahoretia hoki e ia nga tohunga whakapakoko i whakaritea ra e nga kingi o Hura hei tahu whakakakara ki nga wahi tiketike i nga

pa o Hura, a ki nga taha o Hiruharama, ratou ko nga kaitahu whakakakara ki a Paara, ki te ra, ki te

<sup>6</sup> marama, ki nga whetu, ki te ope katoa hoki o te rangi. I mauria ano e ia te Ahera i roto i te whare o Ihowa ki waho o Hiruharama, ki te awa ki Kitirono, a tahuna ana ki te awa ki Kitirono, a tukia ana kia ririki, ano he puehu, maka ana te puehu o taua mea ki runga ki nga tanumanga o te iwi nui.

<sup>7</sup>

I tukitukia ano e ia nga whare o te hunga whakahoroma i te taha o te whare o Ihowa, i te wahi i

<sup>8</sup> whatu ai nga wahine i nga pa mo te Ahera. A i whakaputaina e ia nga tohunga katoa i nga pa o Hura, whakapokea iho nga wahi tiketike i tahu whakakakara ai nga tohunga, o Kepa a tae noa ki Peerehepa; a i wahia e ia nga wahi tiketike o nga keti, era i te kuwaha o te keti o Hohua kawana o

<sup>9</sup> te pa, i te taha maui o te tangata i te keti o te pa. Otiia kihai nga tohunga o nga wahi tiketike i haere ki te aata a Ihowa i Hiruharama; engari i kai ratou i te taro rewenakore i roto i o ratou teina.

<sup>10</sup>

A i whakapokea e ia a Topete, tera i te raora o nga tama a Hinomo, kei mea tetahi tangata kia

<sup>11</sup> tika tana tama, tana tamahine ranei, na waenganui i te ahi hei mea ki a Moreke. I whakawateatia atu ano e ia nga hoiho i homai e nga kingi o Hura hei mea ki te ra, i te tomokanga o te whare o Ihowa, i te ruma o Natanamereke, o te kaitiaki ruma, i reira i waho ake; tahuna ana hoki e ia nga

<sup>12</sup> hariata o te ra ki te ahi. Na, ko nga aata i te tuanui o te ruma o runga, o Ahata, i hanga ra e nga kingi o Hura, me nga aata i hanga e Manahi ki nga marae e rua e te whare o Ihowa, i tukitukia e te

<sup>13</sup> kingi, wahia iho i reira, maka ana te puehu o aua mea ki te awa ki Kitiro no. A, ko nga wahi tiketike, ko era i te ritenga atu o Hiruharama i te taha matau o te maunga o te whakangaromanga, i hanga nei e Horomona kingi o Iharaira ma Ahatorete, ma te mea whakarihariha a nga Haironi, ma Kemoho, ma te mea whakarihariha a nga Moapi, ma Mirikomo, ma te mea whakarihariha a

<sup>14</sup> nga tama a Amono, whakapokea iho era e te kingi. I wawahia hoki e ia nga pou, i tapahia ki

<sup>15</sup> raro nga Aherimi, a whakakii ana o ratou wahi ki nga whenua tangata. Ko te aata hoki i Peteere, ko te wahi tiketike i hanga nei e Ieropoama tama a Nepata i hara ai a Iharaira, wahia iho ana e ia taua aata me te wahi tiketike; a tahuna ana e ia te wahi tiketike, tukia ana kia ririki, ano he puehu,

<sup>16</sup> a tahuna ana e ia te Ahera. A, i a Hohia e tahuri ana, ka kite ia i nga tanumanga i reira, i te maunga; na ka tonoa e ia he tangata ki te tiki i nga whenua i roto i nga tanumanga, na tahuna ana e ia ki runga ki te aata, whakapokea iho e ia, hei whakarite mo te kupu a Ihowa i korerotia e te

<sup>17</sup> tangata a te Atua, i korero nei i enei kupu. Katahi ia ka mea, He aha tena tohu e kite atu nei ahau? Na ka mea nga tangata o te pa ki a ia, Ko te tanumanga ia o te tangata a te Atua i haere mai

<sup>18</sup> i Hura, a korerotia ana e ia enei mea kua meatia nei e koe ki te aata i Peteere. Na ka mea ia, Waiho marie ia; kei whakakorikoria ona wheua e tetahi. Na kapea ake ana e ratou ona whenua me

<sup>19</sup> nga wheua o te poropiti i haere mai i Hamaria. Na, ko nga whare katoa o nga wahi tiketike, ko era i nga pa o Hamaria, i hanga nei e nga kingi o Iharaira hei whakapataritari i a Ihowa,

whakakahoretia ana e Hohia; rite tonu tana i mea ai ki aua whare ki nga mea katoa i mea ai ia ki  
<sup>20</sup>

Peteere. I patua ano hoki e ia nga tohunga katoa o nga wahi tiketike o reira ki runga ki nga aata,

tahuna ana hoki nga wheua tangata ki runga ki aua aata, a hoki ana ki Hiruharama. <sup>21</sup> Na ka  
 whakahau te kingi ki te iwi katoa, ka mea, Mahia te kapenga hei mea ki a Ihowa, ki to koutou Atua;

kia rite ki te mea i tuhituhia ki tenei pukapuka o te kawenata. <sup>22</sup> He pono kahore he rite mo tena  
 mahinga i te kapenga, mai o nga ra i nga kaiwhakawa i whakarite mo Iharaira, o nga ra katoa i nga

kingi o Iharaira, i nga kingi ano o Hura; <sup>23</sup> Engari to te tekau ma waru o nga tau o Kingi Hohia,

ara tenei kapenga i mahia nei ki a Ihowa ki Hiruharama. <sup>24</sup> Na ko te hunga i whai ki nga atua maori,  
 ki nga mata maori, ki nga terapimi, ki nga whakapakoko, ki nga mea whakarihariha katoa i kitea  
 ki te whenua o Hura, ki Hiruharama, whakakahoretia iho e Hohia, kia mana ai i a ia nga kupu o te  
 ture i tuhituhia ki te pukapuka i kitea e Hirikia tohunga ki te whare o Ihowa.

<sup>25</sup> Na kahore he kingi i mua atu i a ia hei rite mona te whakapau o tona ngakau, o tona wairua,  
 o tona kaha, ki te tahuri ki a Ihowa, rite tonu ki te ture katoa a Mohi; kahore hoki kia whakatika

tetahi rite mona i muri i a ia. <sup>26</sup> He ahakoa ra, kihai a Ihowa i tahuri ke i te muranga o tona riri nui  
 i mura ai tona riri ki a Hura, mo nga whakapataritaringa katoa i whakapataritari ai a Manahi i a ia.

<sup>27</sup> Na ka mea a Ihowa, Ka whakawateatia atu e ahau a Hura hoki i toku aroaro, ka peratia me taku  
 whakawateatanga i a Iharaira, a ka rukea atu e ahau tenei pa i whiriwhiria nei e ahau, a Hiruharama,

me te whare i ki ra ahau, Me waiho toku ingoa ki ko nei. <sup>28</sup> Na, ko era atu meatanga a Hohia me  
 ana mahi katoa, kihai ianei i tuhituhia ki te pukapuka o nga meatanga o nga ra o nga kingi o Hura?

<sup>29</sup> I ona ra ka haere a Parao Neko kingi o Ihipa ki te kingi o Ahiria ki te awa ki Uparati: na haere

ana a Kingi Hohia ki te tu ki a ia; a whakamatea iho ia e tera ki Mekiro, i tona kitenga i a ia. <sup>30</sup> Na  
 ka mauria atu e ana tangata tona tinana i Mekiro i runga i te hariata, a kawea ana ki Hiruharama,  
 tanumia iho ki tona tanumanga. Na ka mau te iwi o tera whenua ki a Iehoahata tama a Hohia, a  
 whakawahia ana ia, meinga ana hei kingi i muri i to na papa.

<sup>31</sup> E rua tekau ma toru nga tau o Iehoahata i tona kingitanga; a e toru nga marama i kingi ai ia

ki Hiruharama. A ko te ingoa o tona whaea ko Hamutara, he tamahine na Heremaia o Ripina. <sup>32</sup> A

he kino tana mahi ki te titiro a Ihowa; rite tonu ki nga mea katoa i mea ai ona matua. <sup>33</sup> Na herea  
 ana ia e Parao Neko ki Ripira, ki te whenua o Hamata, kia kaua ia e kingi ki Hiruharama; a

whakaritea ana e ia he takoha ki te whenua, kotahi rau taranata hiriwa, kotahi taranata koura. <sup>34</sup> Na  
 ka meatia e Parao Neko a Eriakimi tama a Hohia hei kingi i muri i tona papa, i a Hohia: whakawhitia  
 ketia ake e ia tona ingoa ko Iehoiakimi; ko Iehoahata ia tangohia ana e ia, kawea ana ki Ihipa, a i

mate atu ki reira. <sup>35</sup> Na ka hoatu e Iehoiakimi ki a Parao te hiriwa me te koura; otiia i takohatia e

ia te whenua kia hoatu ai te moni i kiia nei e Parao. Tohea ana e ia te hiriwa me te koura ki te iwi  
 o te whenua, te takoha a tenei, a tenei, hei hoatu mana ki a Para o Neko. <sup>36</sup> E rua tekau ma rima  
 nga tau o Iehoiakimi i tona kingitanga; a kotahi tekau ma tahi nga tau i kingi ai ia ki Hiruharama.  
 A ko te ingoa o tona whaea ko Tepura, he tamahine na Peraia o Ruma. <sup>37</sup> A he kino tana mahi ki  
 te titiro a Ihowa, i rite ki nga mea katoa i mea ai ona matua.

## Chapter 24

<sup>1</sup> I ona ra ka haere mai a Nepukaneha kingi o Papurona; na ka pononga a Iehoiakimi ki a ia, e  
 toru tau. Katahi tera ka tahuri, ka whakakeke ki a ia. <sup>2</sup> Na ka ngarea mai e Ihowa ki a ia nga ope o  
 nga Karari, me nga ope o nga Hiriani, me nga ope o nga Moapi, me nga ope o nga tama a Amona;  
 a ngarea ana mai ratou e ia ki a Hura hei huna mo reira, i rite ai te kupu a Ihowa i korerotia e ana  
 pononga, e nga poropiti. <sup>3</sup> He pono, na te kupu a Ihowa i pa ai tenei ki a Hura, hei whakawatea atu  
 i a ratou i tona aroaro, mo nga hara o Manahi, ara mo ana mea katoa i mea ai ia, <sup>4</sup> Mo te toto  
 harakore hoki i whakahekea e ia; i kapi katoa hoki a Hiruharama i a ia i te toto harakore, a kihai a  
 Ihowa i pai kia whakarerea noatia tenei. <sup>5</sup> Na, ko era atu meatanga a Iehoiakimi me ana mea katoa  
 i mea ai ia, kihai ianei i tuhituhia ki te pukapuka o nga meatanga o nga ra o nga kingi o Hura? <sup>6</sup> Na  
 ka moe a Iehoiakimi ki ona matua, a ko Iehoiakini, ko tana tama, te kingi i muri i a ia. <sup>7</sup> Na heoi  
 ano putanga o te kingi o Ihipa i tona whenua; kua riro hoki i te kingi o Papurona nga wahi katoa o  
 te kingi o Ihipa, no te awa ra ano o Ihipa tae noa ki te awa ki Uparati.  
<sup>8</sup> Kotahi tekau ma waru nga tau o Iehoiakini i tona kingitanga, a e toru nga marama i kingi ai  
 ia ki Hiruharama. A ko te ingoa o tona whaea ko Nehuhuta, he tamahine na Erenatana o Hiruharama.  
<sup>9</sup> A he kino tana mahi ki te titiro a Ihowa, i rite ki nga mea katoa i mea ai tona papa. <sup>10</sup> I taua wa  
 ka whakaekea a Hiruharama e nga tangata a Nepukaneha kingi o Papurona, a whakapaea ana te  
<sup>11</sup> pa. Na ka haere mai a Nepukaneha kingi o Papurona ki te pa, i te mea e whakapaea ana a reira  
<sup>12</sup> e ana tangata. Na ka puta a Iehoiakini kingi o Hura ki te kingi o Papurona, a ia, tona whaea, ana  
 tangata, ana rangatira, me ana kaiwhakahaere: na kua mau i te kingi o Papurona i te waru o nga tau  
<sup>13</sup> o tona kingitanga. Na maturia atu ana e ia i reira nga taonga katoa o te whare o Ihowa, me nga  
 taonga o te whare o te kingi; tapatapahia ana hoki e ia nga oko koura katoa i hanga e Horomona  
 kingi o Iharaira ki te temepara o Ihowa, pera ana me ta Ihowa i korero ai. <sup>14</sup> Whakahekea katoatia  
 ana hoki e ia a Hiruharama katoa, nga rangatira katoa, me nga marohirohi katoa, tekau mano nga

parau, me nga kaimahi katoa, me nga parakimete; kihai tetahi i mahue, heoi ano ko te hunga  
<sup>15</sup>  
 rawakore o te whenua. A i whakahekea e ia a Iehoiakini ki Pupurona; me te whaea o te kingi,  
 me nga wahine a te kingi, me ana kaiwhakahaere, me te hunga nunui o te whenua; whakahekea  
<sup>16</sup>  
 ana ratou e ia i Hiruharama hei parau ki Papurona. Me nga toa, e whitu mano, nga kaimahi, nga  
 parakimete, kotahi mano, nga marohirohi katoa e pai ana hei whawhai: kawea ana ratou e te kingi  
<sup>17</sup>  
 hei parau ki Papurona. Na meinga ana e te kingi o Papurona ko Matania, teina o tona papa, hei  
<sup>18</sup>  
 kingi i muri i a ia, whakawhitia ketia ana tona ingoa ko Terekia. E rua tekau ma tahi nga tau o  
 Terekia i tona kingitanga, a kotahi tekau ma tahi nga tau i kingi ai ki Hiruharama. A ko te ingoa o  
<sup>19</sup>  
 tona whaea ko Hamutara, he tamahine na Heremaia o Ripina. A he kino tana mahi ki te titiro a  
<sup>20</sup>  
 Ihowa; i rite ki nga mea katoa i mea ai a Iehoiakimi. Na reira, i a Ihowa ka riri nei, ka puta te  
 aitua ki Hiruharama, ki a Hura, a maka noatia atu ratou i tona aroaro: a whakakeke ana a Terekia  
 ki te kingi o Papurona.

## Chapter 25

<sup>1</sup>  
 Na i te iwa o nga tau o tona kingitanga, i te tekau o nga marama i te tekau o nga ra o te marama,  
 ka tae mai a Nepukaneha kingi o Papurona, a ia me tana ope katoa, ki Hiruharama, a nohoia ana e  
<sup>2</sup>  
 ia a reira; a hanga ana e ratou etahi taumaihi mo re ira a tawhio noa. Heoi ka whakapaea te pa a  
<sup>3</sup>  
 tae noa ki te tekau ma tahi o nga tau o Kingi Terekia. I te iwa o nga ra o te wha o nga marama he  
<sup>4</sup>  
 nui te matekai o te pa, a kahore he taro ma nga tangata o te whenua. Katahi ka wahia te pa, a rere  
 ana nga tangata whawhai katoa i te po na te ara o te kuwaha i waenganui o nga taiepa e rua, na tera  
<sup>5</sup>  
 i te kari a te kingi; he mea karapoti hoki te pa e nga Karari; ko te kingi i haere na te Arapa. Otiia  
 i whai te ope a nga Karari i te kingi, a ka mau ia ki nga mania i Heriko: a ko tana ope katoa i marara  
<sup>6</sup>  
 noa atu i a ia. Na ka mau i a ratou te kingi, ka kawea ki te kingi o Papurona ki Ripira; a ka korerotia  
<sup>7</sup>  
 te whakawa mona. Na ka whakamatea e ratou nga tama a Terekia i tona aroaro, whakamatapotia  
 iho nga kanohi o Terekia, a herea ana ia ki te mekameka, kawea ana ki Papurona.  
<sup>8</sup>  
 I te rima o nga marama, i te whitu o nga ra o te marama, ara i te tekau ma iwa o nga tau o  
 Kingi Nepukaneha, kingi o Papurona, ka haere mai a Neputaraarana rangatira o nga kaitiaki, he  
<sup>9</sup>  
 tangata na te kingi o Papurona, ki Hiruharama. Na ka tahuna e ia te whare o Ihowa, me te whare  
 o te kingi, me nga whare katoa o Hiruharama, tae noa ki nga whare nunui katoa; tahuna ana e ia ki



<sup>10</sup> te ahi. Wahia iho hoki nga taiepa o Hiruharama a whawhe noa e te ope katoa o nga Karari, i  
<sup>11</sup> haere mai nei ratou ko te rangatira o nga kaitiaki. Na, ko te morehu o te iwi i mahue i te pa, me  
 te hunga i papahoro atu, i taka atu ra ki te kingi o Papurona, me nga toenga atu o taua huihui, i  
<sup>12</sup> whakahekeka e Neputaraarana rangatira o nga kaitiaki. I waiho ia e te rangatira o nga kaitiaki  
<sup>13</sup> etahi o nga rawakore o te whenua hei kaimahi waina, hei kaimahi whenua. Na, ko nga pou parahi  
 i te whare o Ihowa, me nga turanga, me te moana parahi i te whare o Ihowa, wawahia ana e nga  
<sup>14</sup> Karari, a maua atu ana e ratou te parahi o aua mea ki Papurona. I maua atu ano e ratou nga pata,  
 me nga koko pungarehu, me nga kuku, me nga koko, me nga oko parahi katoa mo a ratou mahi  
<sup>15</sup> tapu. Ko nga oko ngarahu ano, ko nga peihana; ko nga mea koura, ko nga mea hiriwa, tena he  
<sup>16</sup> koura, tena he hiriwa, tangohia ake e te rangatira o nga kaitiaki. Ko nga pou e rua, ko te moana  
 kotahi, me nga turanga e rua i hanga e Horomona mo te whare o Ihowa; kahore he paunatanga o  
<sup>17</sup> te parahi o enei oko katoa. Ko te tiketike o tetahi o nga pou kotahi tekau ma waru nga whatianga,  
 he parahi te whakapaipai o runga: a ko te tiketike o te whakapaipai e toru nga whatianga; he parahi  
 katoa te mea i whiria, me nga pamekaranete o te whakapaipai a whawhe noa: r ite tonu hoki ki enei  
<sup>18</sup> to te rua o nga pou, he mea whiri ano tona. I tangohia ano e te rangatira o nga kaitiaki a Heraia,  
<sup>19</sup> te tino tohunga, ratou ko te tohunga tuarua, ko Tepania, ko nga kaitiaki tokotoru o te kuwaha. I  
 tangohia ano e ia i te pa tetahi kaiwhakahaere, ko te rangatira o nga tangata whawhai; tokorima o  
 nga tangata no te aroaro pu ake o te kingi, he hunga i rokohanga ki roto ki te pa: me te kaituhituhi,  
 ara te rangatira o te ope, te kaihuihui i nga tangata o te whenua; me nga tangata e ono tekau o te  
<sup>20</sup> iwi o te whenua i rokohanga e ia ki roto ki te pa. Na ka mau a Neputaraarana rangatira o nga  
<sup>21</sup> kaitiaki ki a ratou, kawea ana ki te kingi o Papurona, ki Ripira. Na patua ana ratou e te kingi o  
 Papurona, whakamatea ana ki Ripira, ki te whenua o Hamata. Heoi whakahekeka atu ana a Hura i  
 tona oneone.  
<sup>22</sup> Na, ko te hunga i mahue ki te whenua o Hura, ko nga mea i mahue i a Nepukaneha kingi o  
<sup>23</sup> Papurona, meinga ana e ia ko Keraria tama a Ahikama tama a Hapana hei kawana mo ratou. Na,  
 i te rongonga o nga rangatira ope katoa, o ratou ko a ratou tangata, kua meinga e te kingi o Papurona  
 a Keraria hei kawana, ka haere mai ratou ki a Keraria ki Mihipa, ara a Ihimaera tama a Netania, a  
 Iohanana tama a Karea, a Heraia tama a Ta nahumete Netopati, a Iaatania tama a tetahi Maakati,  
<sup>24</sup> me a ratou tangata. Na ka oati a Keraria ki a ratou, ki a ratou tangata hoki, ka mea ki a ratou,  
 Kaua e wehi, he mea mo nga pononga o nga Karari: e noho i te whenua, e mahi ki te kingi o  
<sup>25</sup> Papurona, a ka whai pai koutou. Otiia i te whitu o nga marama ka haere mai a Ihimaera tama a  
 Netania tama a Erihama, he momo kingi, ratou ko ona hoa, katohi tekau tangata, a patua iho a

<sup>26</sup> Keraria, mate rawa, ratou ko ona hoa, ko nga Hurai, ko nga Karari, i Mihipa. Na ka whakatika  
 te iwi katoa, te iti me te rahi, ratou ko nga rangatira ope, a haere ana ki Ihipa, i wehi hoki ratou i  
<sup>27</sup> nga Karari. Na, i te toru tekau ma whitu o nga tau o te whakahekenga atu o Iehoiakini kingi o  
 Hura, i te tekau ma rua o nga marama, i te rua tekau ma whitu o nga ra o te marama, ka whakaarahia  
 e Ewiri, Meroraka kingi o Papurona, i te tau i kingi ai ia, te m atenga o Iehoiakini kingi o Hura i  
<sup>28</sup> roto i te whare herehere. A he pai ana korero ki a ia, nekehia ake ana e ia tona torona ki runga  
<sup>29</sup> ake i nga torona o nga kingi i tona taha i Papurona. Ko nga kakahu o tona hereherenga i  
<sup>30</sup> whakawhitia e ia; a kai taro ana ia i tona aroaro i nga ra katoa i ora ai ia. A ko te wahi mana, he  
 mea pumau, he mea homai e te kingi ki a ia i tenei ra, i tenei ra, i nga ra katoa i ora ai ia.

## 1 Chronicles

### Chapter 1

<sup>1</sup> Ko Arama, ko Heta, ko Enoha; <sup>2</sup> Ko Kainana, ko Maharareere, ko Iarere; <sup>3</sup> Ko Enoka, ko  
 Matuhara, ko Rameka; <sup>4</sup> Ko Noa, ko Hema, ko Hama, ko Iapeta. <sup>5</sup> Ko nga tama a Iapeta; ko  
 Komere, ko Makoko, ko Marai, ko Iawana, ko Tupara, ko Meheke, ko Tiraha. <sup>6</sup> Ko nga tama a  
 Komere; ko Ahekenata, ko Ripata, ko Tokarama. <sup>7</sup> Na ko nga tama a Iawana; ko Erihaha, ko  
<sup>8</sup> Tarahihi, ko Kitimi, ko Totanimi. Na ko nga tama a Hama; ko Kuhu, ko Mitiraima, ko Putu, ko  
<sup>9</sup> Kanaana. A, ko nga tama a Kuhu; ko Tepa, ko Hawira, ko Hapata, ko Raama, ko Hapateka, Na  
<sup>10</sup> ko nga tama a Raama; ko Hepa, ko Rerana. Na Kuhu ko Nimirota: nana i timata te whakatangata  
<sup>11</sup> nui ki te whenua. Na Mitiraima ko Rurimi, ko Anamime, ko Rehapimi, ko Napatuhimi, <sup>12</sup> Ko  
<sup>13</sup> Pataruhimi, ko Kaharuhimi, nana nei nga Pirihitini, ko Kapatorimi. A na Kanaana ko tana  
<sup>14</sup> matamua, ko Hairona, ko Hete; <sup>15</sup> Me te Iepuhi, me te Amori, me te Kirikahi; Me te Hiwi, me  
<sup>16</sup> te Araki, me te Hini; <sup>17</sup> Me te Arawari, me te Temari, me te Hamati. Ko nga tama a Hema; ko  
 Erama, ko Ahura, ko Arapahata, ko Ruru, ko Arame, ko Uhu, ko Huru, ko Ketere, ko Meheke.  
<sup>18</sup> Na Arapahata ko Haraha; na Haraha ko Epere. <sup>19</sup> Whanau ake a Epere, e rua nga tama: ko te  
 ingoa o tetahi ko Pereke; no te mea hoki no ona ra i wehea ai te whenua; a ko te ingoa o tona teina

<sup>20</sup> ko Ioketana. Na Ioketana ko Aramotata, ko Herepe, ko Hataramaweta, ko Ieraha; <sup>21</sup> Ko Hatorama,  
<sup>22</sup> ko Utara, ko Tikera; Ko Epara, ko Apimaera, ko Hepa; <sup>23</sup> Ko Opira, ko Hawira, ko Iopapa. He  
<sup>24</sup> tama enei katoa na Ioketana. Ko Hema, ko Arapahata, ko Haraha; <sup>25</sup> Ko Epere, ko Pereke, ko  
<sup>26</sup> Reu; <sup>27</sup> Ko Heruku, ko Nahora, ko Teraha; Ko Aperama, ara ko Aperahama.  
<sup>28</sup> Ko nga tama a Aperahama; ko Ihaka, ko Ihimaera. <sup>29</sup> Ko o ratou whakatupuranga enei: ko  
<sup>30</sup> ta Ihimaera matamua, ko Nepaioto; muri iho ko Kerara, ko Atapeere, ko Mipihama, Ko Mihima,  
<sup>31</sup> ko Ruma, ko Maha, ko Hatara, ko Tema, Ko Ieturu, ko Napihi, ko Kerema. Ko nga tama enei  
<sup>32</sup> a Ihimaera. Na, ko nga tama a Ketura wahine iti a Aperahama; whanau ake ana, ko Timirana,  
<sup>33</sup> ko Iokohana, ko Merana, ko Miriana, ko Ihipaka, ko Huaha. Na, ko nga tama a Iokohana; ko Hepa,  
<sup>34</sup> ko Rerana. Ko nga tama a Miriana; ko Epa, ko Epere, ko Enoka, ko Apira, ko Ereraaha. He tama  
<sup>35</sup> enei katoa na Ketura. A na Aperahama ko Ihaka. Ko nga tama a Ihaka; ko Ehau, ko Iharaira.  
<sup>36</sup> Ko nga tama a Ehau; ko Eripata, ko Reuere, ko Ieuhu, ko Iaarama, ko Koraha. Ko nga tama  
<sup>37</sup> a Eripata; ko Temana, ko Omara, ko Tepi, ko Katama, ko Kenaha, ko Timina, ko Amareke. Ko  
<sup>38</sup> nga tama a Reuere; ko Nahata, ko Tera, ko Hamaha, ko Miha. Na ko nga tama a Heira; ko  
<sup>39</sup> Rotana, ko Hopara, ko Tipeona, ko Anaha, ko Rihona, ko Etere, ko Rihana. Na ko nga tama a  
<sup>40</sup> Rotana; ko Hori, ko Homama: a ko Timina te tuahine o Rotana. Na ko nga tama a Hopara: ko  
<sup>41</sup> Ariana, ko Manahata, ko Epara, ko Hepi, ko Onama. A ko nga tama a Tipeona; ko Aia, ko Anaha.  
<sup>42</sup> Ko nga tama a Anaha; ko Rihona. Ko nga tama a Rihona; ko Amarama, ko Ehepana, ko Itirana,  
<sup>43</sup> ko Kerana. Ko nga tama a Etere; ko Pirihana, ko Taawana, ko Takana. Ko nga tama a Rihana;  
<sup>44</sup> ko Uhu, ko Arana. Na ko nga kingi enei i kingi nei ki te whenua o Eroma i te mea kahore noa  
<sup>45</sup> he kingi i kingi ki nga tama a Iharaira; ko Pera tama a Peoro: ko te ingoa o tona pa ko Rinihapa.  
<sup>46</sup> A ka mate a Pera, ko Iopapa tama a Tera o Potoru te kingi i muri i a ia. Ka mate a Iopapa, ko  
<sup>47</sup> Huhama o te whenua o nga Temani te kingi i muri i a ia. A ka mate a Huhama, ko Harara tama  
<sup>48</sup> a Perara, nana nei i patu a Miriana i te parae o Moapa, te kingi i muri i a ia, a ko Awiti te ingoa o  
<sup>49</sup> tona pa. A ka mate a Harara, ko Hamara o Mahareka te kingi i muri i a ia. A ka mate a  
<sup>50</sup> Hamara, ko Haora o Rehopoto i te taha o te awa te kingi i muri i a ia. A ka mate a Haora, ko  
 Paarahanana tama a Akaporo te kingi i muri i a ia. A ka mate a Paarahanana, ko Harara te kingi

i muri i a ia: a ko Pai te ingoa o tona pa: ko Mehetapeere te ingoa o tana wahine: he tamahine na  
 Matarere tamahine a Metahapa. <sup>51</sup> A ka mate a Harara. Na ko nga ariki o Eroma; ko Ariki Timina,  
 ko Ariki Aria, ko Ariki Ietete; <sup>52</sup> Ko Ariki Ahoripama, ko Ariki Eraha, ko Ariki Pinona; <sup>53</sup> Ko  
 Ariki Kenaha, ko Ariki Temana, ko Ariki Mipitara; <sup>54</sup> Ko Ariki Makatiere, ko Ariki Irama. Ko  
 nga ariki enei o Eroma.

## Chapter 2

<sup>1</sup> Ko nga tama enei a Iharaira; ko Reupena, ko Himiona, ko Riwai, ko Hura, ko Ihakara, ko  
 Hepurona; <sup>2</sup> Ko Rana, ko Hohepa, ko Pineamine, ko Napatari, ko Kara, ko Ahera. <sup>3</sup> Ko nga tama  
 a Hura; ko Ere, ko Onama, ko Heraha: a ko enei tama tokotoru ana na Patehua Kanaani. Na i he a  
 Ere matamua a Hura i te aroaro o Ihowa; a whakamatea ana e ia. <sup>4</sup> Na whanau ake tana, i tana  
 hunaonga i a Tamara, ko Parete, ko Tera. Ko nga tama katoa a Hura tokorima. <sup>5</sup> Ko nga tama a  
 Parete; ko Heterono, ko Hamuru. <sup>6</sup> Ko nga tama a Tera; ko Timiri, ko Etana, ko Hemana, ko  
 Karakoro, ko Rara: huihuia ratou ka tokorima. <sup>7</sup> Na ko nga tama a Karami; ko Akara ko te  
 kaiwhakararu o Iharaira, i he nei i te mea i kanga. <sup>8</sup> A ko nga tama a Etana; ko Ataria. <sup>9</sup> Ko nga  
 tama hoki a Heterono, i whanau mana; ko Ierameere, ko Rame, ko Kerupai, <sup>10</sup> Na Rame ko  
 Aminarapa; na Aminarapa ko Nahahona, he rangatira no nga tama a Hura. <sup>11</sup> A na Nahahona ko  
 Harama, na Harama ko Poaha; <sup>12</sup> A na Poaha ko Opere, na Opere ko Hehe; <sup>13</sup> A ko te matamua  
 a Hehe ko Eriapa, ko Apinarapa hoki te tuarua, a ko Himea te tuatoru; <sup>14</sup> Ko Netaneere te tuawha,  
 ko Rara te tuarima; <sup>15</sup> Ko Oteme te tuaono, ko Rawiri te tuawhitu; <sup>16</sup> A, ko o ratou tuahine, ko  
 Teruia raua ko Apikaira. A, ko nga tama a Teruia; ko Apihai, ko Ioapa, ko Atahere, tokotoru.  
<sup>17</sup> Whanau ake ta Apikaira, ko Amaha: na, ko te papa o Amaha, ko Ietere Ihimaeri.  
<sup>18</sup> A ka whanau he tama ma Karepe, ma te tama a Heterono, i tana wahine i a Atupa, a i a  
 Ieriototo: a ko enei a tenei tama; ko Tehere, ko Hopapa, ko Ararano. <sup>19</sup> Na ka mate a Atupa, a ka  
 tangohia e Karepe mana a Eparata, a whanau ake ta raua ko Huru. <sup>20</sup> Whanau ake ta Huru, ko Uri;  
 whanau ake ta Uri, ko Petareere. <sup>21</sup> Na muri iho ka haere a Heterono ki te tamahine a Makiri, papa

o Kireara. E ono tekau ona tau i tana tangohanga i a ia; a whanau ake ta raua, ko Hekupu. <sup>22</sup> Whanau  
 ake ta Hekupu, ko Haira. E rua tekau ma toru ona pa i te whenua o Kireara. <sup>23</sup> A i tangohia e  
 Kehuru raua ko Arame nga pa o Haira i a ratou, a Kenata ano hoki, me ona pa ririki, e ono tekau  
 nga pa. Ko enei katoa he tama na Makiri, papa o Kireara. <sup>24</sup> A no muri i te matenga o Heterono i  
 Karepe Eparata, ka whanau a Apia wahine a Heterono, ko ta raua tama ko Ahuru papa o Tekoa.  
<sup>25</sup> Ko nga tama a Ierameere matamua a Heterono; ko Rame, ko te matamua, ko Puna, ko Orene,  
 ko Oteme, ko Ahia. <sup>26</sup> He wahine ano ta Ierameere, ko tona ingoa ko Atara; ko te whaea ia o  
 Onama. <sup>27</sup> Na, ko nga tama a Rame, a te matamua a Ierameere; ko Maata, ko Iamini, ko Ekere.  
<sup>28</sup> Na, ko nga tama a Onama; ko Hamai, ko Iara. Ko nga tama a Hamai; ko Natapa, ko Apihuru.  
<sup>29</sup> Na, ko te ingoa o te wahine a Apihuru ko Apihaira; whanau ake a raua; ko Ahapana, ko Moriri.  
<sup>30</sup> Na ko nga tama a Natapa; ko Herere, ko Apaima: i mate urikore ia a Herere. <sup>31</sup> Na ko nga tama  
 a Apaima; ko Ihi. Ko nga tama a Ihi; ko Hehana. A ko nga tama a Hehana; ko Aharai. <sup>32</sup> Ko nga  
 tama a Iara teina o Hamai; ko Ietere, ko Honatana: i mate urikore ano a Ietere. <sup>33</sup> Na ko nga tama  
 a Honatana; ko Perete, ko Tata. Ko nga tama enei a Ierameere. <sup>34</sup> Na, kahore he tama a Hehana;  
 engari he tamahine. He pononga ia ta Hehana, he Ihipiana, ko tona ingoa, ko Iaraha. <sup>35</sup> Na, ka  
 hoatu e Hehana tana tamahine ki tana pononga ki a Iaraha hei wahine mana; a whanau ake ta raua;  
 ko Atai. <sup>36</sup> Whanau ake ta Atai ko Natana, a na Natana ko Tapara; <sup>37</sup> Na Tapara ko Eperara, a na  
 Eperara ko Opere; <sup>38</sup> Na Opere ko Iehu, a na Iehu ko Ataria; <sup>39</sup> Na Ataria ko Herete, a na Herete  
 ko Eraha; <sup>40</sup> Na Eraha ko Hihamai, a na Hihamai ko Harumu; <sup>41</sup> Na Harumu ko Tekamia, a na  
 Tekamia ko Erihama. <sup>42</sup> Na, ko nga tama a Karepe teina o Ierameere, ko Meha tana matamua, ko  
 te papa ia o Tiwhi; me nga tama a Mareha te papa o Heperona. <sup>43</sup> Na ko nga tama a Heperona; ko  
 Koraha, ko Tapua, ko Rekeme, ko Hema. <sup>44</sup> Na Hema ko Rahama, ko te papa o Torokoama; a na  
 Rekeme ko Hamai. <sup>45</sup> Na ko te tama a Hamai ko Maono; a ko Maono te papa o Peteturu. <sup>46</sup> A  
 whanau ake ta Epa, ta te wahine iti a Karepe, ko Harana, ko Mota, ko Katete: na Harana ko Katete.  
<sup>47</sup> Na ko nga tama a Taharai; ko Rekeme, ko Iotama, ko Kehama, ko Perete, ko Epa, ko Haapa.  
<sup>48</sup> Whanau ake a Maaka, a te wahine iti a Karepe, ko Hepere, ko Tirihana. <sup>49</sup> Whanau ake ano ana,  
 ko Haapa, ko te papa o Maramana, ko Hewha papa o Makapena, papa hoki o Kipea: na, ko te

<sup>50</sup>  
 tamahine a Karepe, ko Akaha. Ko nga tama enei a Karepe tama a Huru, matamua a Eparata; ko  
<sup>51</sup>  
 Hopara papa o Kiriata Tearimi; Ko Harama papa o Peterehema, ko Harepe papa o Petekarere.  
<sup>52</sup>  
 Na, he tama ano a Hopara papa o Kiriata Tearimi; ko Haroe, me tetahi taha o nga Manaheti,  
<sup>53</sup>  
 Me nga hapu o Kiriata Tearimi; nga Itiri, nga Puti, nga Humati, nga Mihirai; no enei nga Torati,  
<sup>54</sup>  
 me nga Ehetauri. Ko nga tama a Harama; ko Peterehema, ko nga Netopati, ko Ataroto, ko te  
<sup>55</sup>  
 whare o Ioapa, ko tetahi taha o nga Manaheti, ko nga Tori. Me nga hapu o nga kaituhituhi i noho  
 ki Tapete; nga tirati, nga Himeati, nga Hukati. Ko nga Keni enei, ko nga uri o Hemata, o te papa o  
 te whare o Rekapa.

### Chapter 3

<sup>1</sup>  
 Na ko nga tama enei a Rawiri, ana i whanau ki Heperona: ko te matamua, ko Amanono, na  
 Ahinoama Ietereeri; ko te tuarua, ko Raniera, na Apikaira Karameri; <sup>2</sup>  
 he tama na Maaka tamahine a Taramai kingi o Kehuru: ko te tuawha, ko Aronia ko te tama a Hakiti:  
<sup>3</sup>  
 Ko te tuarima, ko Hepatia o Apitara: ko te tuaono, ko Itireama, na tana wahine, na Ekerā. <sup>4</sup>  
 Tokoono  
 i whanau mana ki Heperona; a e whitu nga tau e ono nga marama i kingi ai ia ki reira: a e toru tekau  
<sup>5</sup>  
 ma toru nga tau i kingi ai ia ki Hiruharama. Na ko enei ana i whanau ki Hiruharama; ko Himea,  
 ko Hopapa, ko Natana, ko Horomona, tokowha na Patahua tamahine a Amiere: <sup>6</sup>  
 Ko Ipihara ano  
 hoki, ko Erihama, ko Eriparete; <sup>7</sup>  
 Ko Noka, ko Nepeke, ko Iapia; <sup>8</sup>  
 Ko Erihama, ko Eriara, ko  
<sup>9</sup>  
 Eriperete, tokoiwa. Ko nga tama katoa enei a Rawiri; tera ano etahi, ko nga tama a nga wahine  
 iti; ko Tamara ano hoki to ratou tuahine.  
<sup>10</sup>  
 Na, ko te tama a Horomona, ko Rehopoama; ko tana tama ko Apia, ko tana tama ko Aha,  
<sup>11</sup>  
 ko tana tama ko Iehohapata; Ko tana tama ko Iorama, ko tana tama ko Ahatia, ko tana tama ko  
<sup>12</sup>  
 Ioaha; Ko tana tama ko Amatia, ko tana tama ko Ataria, ko tana tama ko Iotama. <sup>13</sup>  
 Ko tana  
 tama ko Ahata, ko tana tama ko Hetekia, ko tana tama ko Manahi; <sup>14</sup>  
 Ko tana tama ko Amono, ko  
<sup>15</sup>  
 tana tama ko Hohia. Na ko nga tama a Hohia; ko te tuatahi ko Iohanana, ko te tuarua ko  
<sup>16</sup>  
 Iehoiakimi, ko te tuatoru ko Terekia, ko te tuawha ko Harumu. A ko nga tama a Iehoiakimi: ko

<sup>17</sup>  
 tana tama ko Hekonia, ko tana tama ko Terekia. A ko nga tama a Hekonia, a te herehere; ko  
<sup>18</sup>  
 Haratiera, ko tana tama, Ko Marakirama, ko Peraia, ko Henatara, ko Iekamia, ko Hohama, ko  
<sup>19</sup>  
 Nerapia. Na ko nga tama a Peraia, ko Herupapera, ko Himeia; a, ko nga tama a Herupapera; ko  
<sup>20</sup>  
 Mehurama, ko Hanania; a ko Heromiti to raua tuahine: Me Hahupa ano, me Ohere, me Perekia,  
<sup>21</sup>  
 me Hataria, me Tuhapa Heterere, tokorima. Na ko nga tama a Hanania; ko Peratia, ko Ihaia; ko  
<sup>22</sup>  
 nga tama a Repaia, ko nga tama a Arana, ko nga tama a Oparia, ko nga tama a Hekania. Na ko  
 nga tama a Hekania; ko Hemaia; ko nga tama a Hemaia; ko Hatuhu, ko Ikara, ko Paria, ko Nearia,  
<sup>23</sup>  
 ko Hapata, tokoono. Na ko nga tama a Nearia; ko Erioenai, ko Hetekia, ko Atarikama, tokotoru.  
<sup>24</sup>  
 Na ko nga tama a Erioenai; ko Horaia, ko Eriahihi, ko Peraia, ko Akupu, ko Iohanana, ko Teraia,  
 ko Anani, tokowhitu.

#### Chapter 4

<sup>1</sup>  
 Ko nga tama a Hura: ko Parete, ko Heterono, ko Karami, ko Huru, ko Hopara. Na whanau  
 ake ta Reaia, ta te tama a Hopara; ko Iahata. Whanau ake ta Iahata, ko Ahumai, ko Rahara. Ko nga  
<sup>3</sup>  
 hapu enei o nga Torati. Na, ko nga tama enei a te papa o Etama; ko Ietereere, ko Ihima, ko Iripaha;  
<sup>4</sup>  
 ko te ingoa ano o to ratou tuahine, ko Haterereponi; Ko Penuere papa o Keroro, me Etere papa  
<sup>5</sup>  
 o Huhaha. Ko nga tama enei a Huru a te matamua a Eparata papa o Peterehema. Na tokorua nga  
<sup>6</sup>  
 wahine a Ahuru papa o Tekoa; ko Heraha, ko Naara. Na whanau ake a raua ko Naara; ko Ahutama,  
<sup>7</sup>  
 ko Hewhere, ko Temeni, ko Haahahatari, Ko nga tama enei a Naara. Na ko nga tama a Heraha;  
<sup>8</sup>  
 ko Terete, ko Ietoara, ko Etenana. A whanau ake a Koto; ko Anupu, ko Topepa, me nga hapu o  
<sup>9</sup>  
 Aharahere tama a Harumu. Na nui atu te ingoa o Tapete i to ona tuakana, teina; i huaina ano hoki  
 tona ingoa e tona whaea ko Tapete; i mea ia, No te mea i mamae toku ngakau i a ia i whanau i roto  
<sup>10</sup>  
 i ahau. A i karanga a Tapete ki te Atua o Iharaira, i mea, Aue! me i pono rawa tau manaaki  
 moku, me i whakanuia e koe te wahi moku, kia tata mai ano hoki tou ringa ki ahau, kia araia atu  
 hoki e koe te kino i ahau, kei mamae toku ngakau! Na ka homai e te Atua tana i inoi ai.  
<sup>11</sup>  
 Na whanau ake ta Kerupu, ta te teina o Hua ko Mehiri; ko te papa ia o Ehetono. Whanau  
<sup>12</sup>  
 ake ta Ehetono; ko Peterapa, ko Pahea, ko Tehina papa o Irinahaha. Ko nga tangata enei o Rekaha.

13 Na, ko nga tama a Kenaha; ko Otoniere, ko Heraia: na, ko nga tama a Otoniere; ko Hatata. Na, 14  
 whanau ake ta Meonotai, ko Opora: whanau ake ta Heraia, ko Ioapa matua o Keharahimi; he hunga  
 15 mohio ratou ki te mahi. Na, ko nga tama a Karepe tama a Iepune; ko Iru, ko Eraha, ko Naama:  
 me nga tama a Eraha; ara a Kenaha. 16 Me nga tama a Iehareere; ko Tiwhi, ko Tipaha, ko Tiria,  
 17 ko Atareere. Na, ko nga tama a Etera: ko Ietere, ko Merere, ko Epere, ko Tarono: a whanau ake  
 ana; ko Miriama, ko Hamai, ko Ihipa, papa o Ehetemoa. 18 A whanau ake a tana wahine, a Iehuria;  
 ko Iarere papa o Keroro, ko Hepere papa o Hoko, ko Iekutiere papa o Tanoa. Ko nga tama enei a  
 19 Pitia, tamahine a Parao i riro nei i a Merere. A, ko nga tama a te wahine a Horiia, tuahine o  
 Nahama, ko te papa o Keira Karami, me Ehetemoa Maakati. 20 Na, ko nga tama a Himono, ko  
 Amanono, ko Rina, ko Penehanana, ko Tirono. Na, ko nga tama a Ihi; ko Tohete, ko Penetohete.  
 21 Ko nga tama a Heraha tama a Hura; ko Ere papa o Reka, ko Raara papa o Mareha, me nga hapu  
 22 o te whare o nga kaimahi rinena, o te whare o Ahapea; Me Tokimi, me nga tangata o Kotepa,  
 me Ioaha, me Harapa, ko nga rangatira nei enei o Moapa, me Tahupi Reheme. Na he korero nonamata  
 23 enei. Ko enei nga kaihanganga rihi, me nga tangata i noho ki Netaimi, ki Keteraha: i noho ratou ki  
 reira ki te kingi ki ana mahi.  
 24 Ko nga tama a Himiona; ko Nemuere, ko Iamini, ko Iaripi, ko Tera, ko Haora: 25 Ko tana  
 tama ko Harumu; ko tana tama ko Mipihama; ko tana tama ko Mihima. 26 A, ko nga tama a Mihima;  
 ko tana tama ko Hamuere; ko tana tama ko Takuru; ko tana tama ko Himeiri. 27 Na kotahi tekau ma  
 ono nga tama a Himeiri, tokoono nga tamahine; kihai ia i tokomaha nga tamariki a ona tuakana, kihai  
 28 hoki o ratou hapu katoa i nui haere, kihai i rite ki nga tama a Hura. Na, ko o ratou nohoanga, i  
 Peerehepa, i Morara, i Hatarahuara; 29 I Piriha, i Atepe, i Torara; 30 I Petuere, i Horema, i Tikiraka;  
 31 I Petemarakapoto, i Hatarahuhimi, i Petepirei, i Haaraimi. Ko o ratou pa enei, a tae noa ki te  
 kingitanga o Rawiri. 32 Na, ko o ratou kainga, ko Etama, ko Aina, ko Rimono, ko Tokene, ko  
 Ahana; e rima nga pa: 33 Me o ratou kainga katoa i nga taha katoa o aua pa ra ano, tae noa ki Paara.  
 Ko o ratou nohoanga enei, a kei a ratou to ratou whakapapa. 34 Me Mehopapa ano, ratou ko  
 Tamareke, ko Hoha tama a Amatia; 35 Ko Hoera, ko Iehu tama a Tohipia, tama a Heraia, tama a  
 Ahiere; 36 Ko Erioenai, ko Taakopa, ko Hehohaia, ko Ahaia, ko Ariere, ko Tehimiere, ko Penaia;



37 Ko Tita tama a Hipi, tama a Arono, tama a Ieraia, tama a Himiri, tama a Hemaia: Ko enei, 38  
kua whakahuatia nei o ratou ingoa, he rangatira no o ratou hapu. I nui haere ano nga whare o o  
39 ratou matua. I haere hoki ratou ki te tapokoranga atu ki Keroro, ki te rawhiti ra ano o te raorao,  
40 ki te rapu haerenga mo a ratou kahui. A ka kitea e ratou he haerenga momona, he wahi pai, he  
41 whenua whanui ano, ata takoto rangimarie; no Hama hoki te hunga i noho ki reira i mua. Na ko  
te haerenga mai o te hunga kua tuhituhia nei o ratou ingoa i nga ra o Hetekia kingi o Hura, patua  
iho e ratou o ratou teneti me nga Meunimi, i kitea ki reira, huna rawatia iho hoki ratou taea noatia  
42 tenei ra, noho iho ana ki to ratou wahi; no te mea he haerenga i reira mo a ratou hipi. Na, ko  
etahi o ratou, ara o nga tama a Himiona, e rima rau tangata, i haere ki Maunga Heira, ko o ratou  
43 rangatira ko Peratia, ko Nearia, ko Repaia, ko Utiere, he tama enei na Ihi. A patua iho e ratou  
nga oranga o nga Amareki i mawhiti i mua: noho ana i reira a taea noatia tenei ra.

## Chapter 5

1 Na, ko nga tama a Reupena matamua a Iharaira; ko ia hoki te matamua; heoi, i te mea i  
whakapokea e ia te moenga o tona papa, ka hotau tona matamuatanga ki nga tama a Hohepa, tama  
a Iharaira; na e kore te whakapapa e timata i te matamua. 2 I nui ake hoki a Hura i ona tuakana,  
teina, he uri hoki nona te tino rangatira: otiia i a Hohepa te matamuatanga: 3 Ko nga tama a Reupena  
matamua a Iharaira; ko Enoka, ko Paru, ko Heterono, ko Karami. 4 Ko nga tama a Hoera; ko tana  
tama ko Hemaia, ko tana tama ko Koko, ko tana tama ko Hime; 5 Ko tana tama ko Mika; ko tana  
tama ko Reaia; ko tana tama ko Paara; 6 Ko tana tama ko Peeraha, ko tera i riro parau ra i a Tirikata  
Pirinehere kingi o Ahiria; he rangatira ia no nga Reupeni. 7 Na, ko ona teina me o ratou hapu, ki  
te whakapapatia o ratou whakatupuranga; ko nga tino rangatira ko Teiere, ko Hakaraia, 8 Ko Pera  
tama a Atata, tama a Hema, tama a Hoera, i noho nei ki Aroere a tae noa ki Nepo, ki Paarameono;  
9 I nohoia ano e ia te taha ki te rawhiti, tae noa ki te koraha e takoto mai ana i te awa i Uparati: no  
te mea i nui haere a ratou kararehe ki te whenua o Kireara. 10 Na i nga ra o Haora ka whawhaitia  
e ratou nga Hakari, hinga iho i o ratou ringa; noho ana ratou ki o ratou teneti i te whenua katoa o  
11 Kireara ki te rawhiti. Na ko nga tama a Kara i noho i te ritenga mai o to ratou i te whenua o

Pahana tae noa ki Hareka: <sup>12</sup> Ko Hoera te upoko, muri iho ko Hapana, ko Taanai, ko Hapata i  
<sup>13</sup> Pahana. Na, ko o ratou teina o nga whare o o ratou matua: ko Mikaera, ko Mehurama, ko Hepa,  
 ko Torai, ko Takana, ko Tia, ko Epere, tokowhitu. <sup>14</sup> Ko nga tama enei a Apihaira tama a Huri,  
 tama a Taroa, tama a Kireara, tama a Mikaera, tama a Tehihai, tama a Taharo, tama a Putu; <sup>15</sup> Ko  
<sup>16</sup> Ahi tama a Apariere, tama a Kuni; ko te upoko ia o nga whare o o ratou matua. A noho ana  
<sup>17</sup> ratou ki Kireara o Pahana, ki ona pa ririki, ki nga taha ano o Harono, ki o ratou taha ki waho. He  
 mea whakapapa enei katoa i nga ra o Iotama kingi o Hura, i nga ra ano o Ieropoama kingi o Iharaira.  
<sup>18</sup> Ko nga tama a Reupena, ratou ko nga Kari, ko tetahi tanga o te hapu o Manahi, no te hunga  
 toa, he hunga hapai i te whakangungu rakau, i te hoari, he hunga kopere i te kopere, e mahio ana  
 hoki ki te whawhai, e wha tekau ma wha mano e whitu rau e ono tekau taua hunga i ahei te haere  
<sup>19</sup> ki te whawhai. I whawhai hoki ratou ki nga Hakari, ki Ieturu, ki Napihi, ki Norapa. <sup>20</sup> I awhinatia  
 ano ratou ki te whawhai ki a ratou, a ka homai nga Hakari ki o ratou ringa, ratou ko o ratou hoa  
 katoa: i karanga hoki ratou ki te Atua i te whawhaitanga, a tahuri ana ia ki a ratou; mo ratou i  
<sup>21</sup> whakawhirinaki ki a ia. I riro ano hoki i a ratou a ratou kararehe; o a ratou kamera e rima tekau  
 mano, o nga hipi e rua rau e rima tekau mano, o nga kaihe e rua mano, o nga tangata kotahi rau  
<sup>22</sup> mano. He tokomaha hoki i hinga, mate rawa: na te Atua hoki te whawhai; a noho ana ratou ki  
<sup>23</sup> to ratou wahi a taea noatia te whakaraunga. I noho ano nga tama a tetahi tanga o he hapu o  
 Manahi ki te whenua; i tini haere ano ratou ki Pahana a tae noa ki Paaraheremona, ki Heniri, ki  
<sup>24</sup> Maunga Heremona ano. Na ko nga upoko enei o nga whare o o ratou matua; ara ko Epere, ko  
 Ihi, ko Eriere, ko Atariere, ko Heremaia, ko Horawia, ko Tahariere, he hunga nunui, he marohirohi,  
<sup>25</sup> he hunga ingoa nui, he upoko ano no nga whare o o ratou matua. Na kua he ratou ki te Atua o  
 o ratou matua, kua whai, kua puremu ki nga atua o nga iwi o te whenua i huna nei e te Atua i to  
<sup>26</sup> ratou aroaro. Na ka whakaohokia e te Atua o Iharaira te wairua o Puru kingi o Ahiria, te wairua  
 hoki o Tirikata Pirinehere kingi o Ahiria, a whakaraua ana ratou e ia, ara nga Reupeni, nga Kari,  
 me tetahi tanga o te hapu o Manahi, a kawea ana ratou e ia ki Har aha, ki Haporo, ki Hara, ki te  
 awa o Kotana a taea noatia tenei ra.

## Chapter 6

<sup>1</sup> Ko nga tama a Riwai; ko Kerehona, ko Kohata, ko Merari. <sup>2</sup> A, ko nga tama a Kohata; ko  
 Amarama, ko Itihara, ko Heperona, ko Utiere. <sup>3</sup> Na, ko nga tama a Amarama; ko Arona, ko Mohi,  
 ko Miriama. A, ko nga tama a Arona; ko Natapa, ko Apihu, ko Ereatara. ko Itamara. <sup>4</sup> Na Ereatara  
 ko Pinehaha, na Pinehaha ko Apihua. <sup>5</sup> Na Apihua ko Puki, a na Puki ko Uti. <sup>6</sup> Na Uti ko Terahia,  
 a na Terahia ko Meraioto; <sup>7</sup> Na Meraioto ko Amaria, a na Amaria ko Ahitupu; <sup>8</sup> Na Ahitupu ko  
 Haroko, a na Haroko ko Ahimaata; <sup>9</sup> Na Ahimaata hoki ko Ataria, a na Ataria ko Iohanana; <sup>10</sup> Na  
 Iohanana ko Ataria, ko ia nei te tohunga i mahi i roto i te whare i hanga e Horomona ki Hiruharama:  
<sup>11</sup> A na Ataria ko Amaria, na Amaria ko Ahitupu; <sup>12</sup> Na Ahitupu ko Haroko, na Haroko ko Harumu;  
<sup>13</sup> Na Harumu ko Hirikia, a na Hirikia ko Ataria; <sup>14</sup> Na Ataria ko Heraia, a ko ta Heraia ko Iohereke;  
<sup>15</sup> I whakaraua atu a Iohereke i te mauranga atu a Ihowa i a Hura, i Hiruharama hoki, na te ringa o  
 Nepukaneha. <sup>16</sup> Ko nga tama a Riwai; ko Kerehoma, ko Kohata, ko Merari. <sup>17</sup> A ko nga ingoa  
 enei o nga tama a Kerehoma: ko Ripini, ko Himei. <sup>18</sup> Na, ko nga tama a Kohata, ko Amarama, ko  
 Itihara, ko Heperona, ko Utiere. <sup>19</sup> Ko nga tama a Merari; ko Mahari, ko Muhi. Ko nga hapu ano  
 enei o nga Riwaiti i te tikanga iho o nga whare o o ratou matua. <sup>20</sup> Na Kerehoma; ko tana tama ko  
 Ripini, ko tana tama ko Iahata, ko tana tama ko Tima; <sup>21</sup> Ko tana tama ko Ioaha, ko tana tama ko  
 Iro, ko tana tama ko Tera, ko tana tama ko Teaterai. <sup>22</sup> Ko nga tama a Kohata; ko tana tama ko  
 Aminarapa, ko tana tama ko Koraha, ko tana tama ko Ahiri; <sup>23</sup> Ko tana tama ko Erekana, ko tana  
 tama ko Epiahapa, ko tana tama ko Ahiri; <sup>24</sup> Ko tana tama ko Tahata, ko tana tama ko Uriere, ko  
 tana tama ko Utia, ko tana tama ko Haora. <sup>25</sup> Na ko nga tama a Erekana; ko Amahai, ko Ahimoto.  
<sup>26</sup> Na, mo Erekana: ko nga tama a Erekana; ko tana tama ko Towhai, ko tana tama ko Nahata;  
<sup>27</sup> Ko tana tama ko Eriapa, ko tana tama ko Ierohama, ko tana tama ko Erekana. <sup>28</sup> Na, ko nga  
 tama a Hamuera; ko te matamua ko Hoera, a ko te tuarua ko Apia. <sup>29</sup> Ko nga tama a Merari; ko  
 Mahari, ko tana tama ko Ripini, ko tana tama ko Himei, ko tana tama ko Uha; <sup>30</sup> Ko tana tama ko  
 Himea, ko tana tama ko Hakia, ko tana tama ko Ahaia.  
<sup>31</sup> A ko te hunga tenei i whakaritea e Rawiri mo te mahi waiata i te whare o Ihowa, i te mea  
<sup>32</sup> ka whai okiokinga te aaka. I minita ano ratou ki te ritenga atu o te nohoanga o te tapenakara o

te whakaminenga, i waiata, a taea noatia te hanganga a Horomona i te whare o Ihowa ki Hiruharama:

33 katahi ratou ka tuturu ki ta ratou mahi i whakaritea ma ratou. Na ko te hunga tenei i tuturu, me a ratou tama. No nga tama a nga Kohati; ko Hemana, he kaiwaiata, he tama na Hoera, tama a

34 Hamuera, Tama a Erekanā, tama a Ierohama, tama a Eriere, tama a Toaha, 35 Tama a Tupu, tama a Erekanā, tama a Mahata, tama a Amahai, 36 Tama a Erekanā, tama a Hoera tama a Ataria, tama a Tepania, 37 Tama a Tahata, tama a Ahiari tama a Epiahapa, tama a Koraha, 38 Tama a Itihara, tama a Kohata, tama a Riwai, tama a Iharaira. 39 Ko tona teina ano hoki ko Ahapa, i tu nei ki tona ringa matau, ara a Ahapa, tama a Perakia, tama a Himea, 40 Tama a Mikaera, tama a Paaheia, tama a Marakia, 41 Tama a Eteni, tama a Tera, tama a Araia, 42 Tama a Etana, tama a Tima, tama a Himei, 43 Tama a Iahata, tama a Kerehoma, tama a Riwai. 44 Na i te taha ki maui ko o ratou teina, ko nga tama a Merari: ko Etana tama a Kihihī, tama a Apari, tama a Maruku, 45 Tama a Hahapia, tama a Amatia, tama a Hirikia, 46 Tama a Amati, tama a Pani, tama a Hamere, 47 Tama a Mahari, tama a Muhi, tama a Merari, tama a Riwai. 48 I whakaritea ano hoki o ratou tuakana, teina, nga Riwaiti, ki nga mahi katoa o te tapenakara o te whare o te Atua. 49 Ko Arona ia i mea whakahere, ratou ko ana tama, ki runga ki te aata tahunga tinana, ki runga hoki ki te aata tahu whakakakara; ko ta ratou ko nga mahi katoa o te whare tino tapu, ko te whakamarie mo Iharaira; ko nga mea katoa i whakahaua e Mohi pononga a te Atua. 50 Na ko nga tama enei a Arona; ko tana tama ko Ereatara, ko tana tama ko Pinehaha, ko tana tama ko Apihua, 51 Ko tana tama ko Puki, ko tana tama ko Uti, ko tana tama ko Terahia, 52 Ko tana tama ko Meraioto, ko tana tama ko Amaria, ko tana tama ko Ahitupu, 53 Ko tana tama ko Haroko, ko tana tama ko Ahimaata.

54 Na ko o ratou nohoanga enei i te tatau o o ratou puni i roto i o ratou rohe: i nga tama a Arona, o nga whanau o nga Kohati, no ratou nei hoki te rota tuatahi, 55 I hoatu ki a ratou a Heperona i te whenua o Hura, me nga wahi i waho ake o tera a whawhe noe; 56 Ko nga mara ia o te pa, me ona pa ririki, i hoatu ki a Karepe tama a Iepune. 57 A i hoatu ki nga tama a Arona, o nga pa o Hura, ko Heperona, ko te pa whakaora; ko Ripina me ona wahi o waho ake, ko Iatiri, ko Ehetemoa me nga wahi o waho ake; 58 Ko Hirene me ona wahi o waho ake, ko Repiri me ona wahi o waho ake; 59 Ko Ahana me ona wahi o waho ake, ko Petehemehe me ona wahi o waho ake: 60 A, no o te iwi

o Pineamine; ko Kepa me ona wahi o waho ake, ko Aremete me ona wahi o waho ake, ko Anatoto  
<sup>61</sup>  
me ona wahi o waho ake. Ko a ratou pa katoa i o ratou hapu katoa, kotahi tekau ma toru pa. A  
ki te toenga atu o nga tama a Kohata i hoatu, he mea na te rota, no roto i o tetahi hapu o te iwi, no  
<sup>62</sup>  
tetahi tanga o te iwi, te tanga o Manahi, tekau nga pa. A, ki nga tama a Kerehoma i o ratou hapu,  
tekau ma toru nga pa, no te iwi o Ihakara, no te iwi o Ahera, no te iwi o Napatari, no te iwi o Manahi  
<sup>63</sup>  
i Pahana. A ki nga tama a Merari i o ratou hapu, i hoatu tekau ma rua nga pa, he mea rota; no  
<sup>64</sup>  
te iwi o Reupena, no te iwi o Kara, no te iwi o Hepurona. Na, he mea hoatu enei pa me nga wahi  
<sup>65</sup>  
o waho ake e nga tama a Iharaira ki nga Riwaiti. I hoatu ano e ratou, he mea rota, enei pa kua  
huaina nei nga ingoa, no roto i o te iwi o nga tama a Hura, i o te iwi ano hoki o nga tama a Himiona,  
<sup>66</sup>  
i o te iwi ano hoki o nga tama a Pineamine. Na ko etahi o nga hapu o nga tama a Kohata i a  
<sup>67</sup>  
ratou etahi pa i o ratou rohe, no o te iwi o Eparaima. A i hoatu e ratou ki a ratou nga pa whakaora,  
a Hekeme i te whenua pukepuke o Eparaima me nga wahi o waho ake ona; a Ketere hoki me ona  
<sup>68</sup>  
wahi o waho ake; A Iokomeama me ona wahi o waho ake, a Petehorono me ona wahi o waho  
<sup>69</sup> <sup>70</sup>  
ake; A Atarono, me ona wahi o waho ake, a Katarimono me ona wahi o waho ake; A, no  
tetahi tanga o te iwi o Manahi; ko Anere me ona wahi o waho ake, ko Pireama me ona wahi o waho  
<sup>71</sup>  
ake; mo te hapu o nga mea i mahue o nga tama a Kohata. A ki nga tama a Kerehoma i hoatu i  
roto i o tetahi tanga o te iwi o Manahi, ko Korana i Pahana me ona wahi o waho ake, ko Ahataroto  
<sup>72</sup>  
me ona wahi o waho ake; No roto i o te iwi o Ihakara; ko Kerehe me ona wahi o waho ake, ko  
<sup>73</sup>  
Taperata me ona wahi o waho ake; Ko Ramoto me ona wahi o waho ake, ko Aneme me ona  
<sup>74</sup>  
wahi o waho ake; A no o te iwi o Ahera; ko Mahara me ona wahi o waho ake, ko Aparono me  
<sup>75</sup>  
ona wahi o waho ake; Ko Hukoko me ona wahi o waho ake, ko Rehopo me ona wahi o waho  
<sup>76</sup>  
ake; A no o te iwi o Napatari; ko Kerehe i Kariri me ona wahi o waho ake, ko Hamono me ona  
<sup>77</sup>  
wahi o waho ake, ko Kiriataima me ona wahi o waho ake. Ki era atu o nga Riwaiti, ki nga tama  
a Merari, i hoatu, no o te iwi o Hepurona, ko Rimono me ona wahi o waho ake, ko Taporo me ona  
<sup>78</sup>  
wahi o waho ake; A i tera taha o Horano, i te ritenga o Heriko, i te taha ki te rawhiti o Horano  
i hoatu ki a ratou etahi pa no o te iwi o Reupena, ko Petere i te koraha me ona wahi o waho ake,  
<sup>79</sup>  
ko Iahata me ona wahi o waho ake, Ko Keremoto me ona wahi o waho ake, ko Hepaata me ona  
<sup>80</sup>  
wahi o waho ake; A, no o te iwi o Kara; ko Ramoto i Kireara me ona wahi o waho ake, ko

81

Mahanaima me ona wahi o waho ake, Ko Hehepona me ona wahi o waho ake, ko Iatere me ona wahi o waho ake.

## Chapter 7

<sup>1</sup> Na, ko nga tama a Ihakara; ko Tora, ko Pua, ko Iahupu, ko Himirono, tokowha. <sup>2</sup> A, ko nga tama a Tora; ko Uti, ko Repaia, ko Teriere, ko Iahamai, ko Tipihama, ko Hamuera, ko nga upoko o nga whare o o ratou papa, ara o to Tora; he hunga maia ratou, he marohirohi i o ratou whakatupuranga; ko to ratou tokomaha i nga ra o Rawiri e rua tekau ma rua mano, e ono rau. <sup>3</sup> A, ko nga tama a Uti; ko Itirahia; ko nga tama a Itirahia; ko Mikaera, ko Oparia, ko Hoera, ko Ihiaa, tokorima: he upoko enei katoa. <sup>4</sup> Na ka hui ki a ratou, i o ratou whakatupuranga, i nga whare o o ratou matua, ko nga ropu hoia mo te whawhai, e toru tekau ma ono mano: he tokomaha hoki a ratou wahine, a ratou tamariki. <sup>5</sup> Na, ko o ratou teina i roto i nga hapu katoa o Ihakara, he toa, he marohirohi, e waru tekau ma whitu mano, ki te whakapapatia ratou katoa. <sup>6</sup> Ko nga tama a Pineamine; ko Pera, ko Pekere, ko Teriaere, tokotoru. <sup>7</sup> A, ko nga tama a Pera; ko Etepono, ko Uti, ko Utiere, ko Terimoto, ko Iri, tokorima; he upoko enei no nga whare o o ratou matua, he hunga tona, he marohirohi; taua ana ratou i o ratou whakapapa e rua tekau ma rua mano e toru tekau ma wha. <sup>8</sup> A, ko nga tama a Pekere; ko Temira, ko Toaha, ko Erietere, ko Erioenai, ko Omori, ko Teremoto, ko Apia, ko Anatoto, ko Aramete. He tama enei katoa na Pekere. <sup>9</sup> A, ka taua ratou i o ratou whakapapa, i o ratou whakatupuranga, nga upoko o nga whare o o ratou matua, nga toa, nga marohirohi, e rua tekau mano e rua rau. <sup>10</sup> A, ko nga tama a Teriarere; ko Pirihana: na, ko nga tama a Pirihana; ko Ieuhu, ko Pineamine, ko Ehuru, ko Kenaana, ko Tetana, ko Tarahihi, ko Ahihahara. <sup>11</sup> Ko enei katoa he tama na Teriarere, he upoko no nga whare o o ratou matua, he toa, he marohirohi, kotahi tekau ma whitu mano ratou e rua rau, he hoia hei haere ki te whawhai, ki te turanga riri. <sup>12</sup> Ko Tupimi ano, ko Hupimi, ko nga tama a Iri, ko Huhimi, ko nga tama a Ahere. <sup>13</sup> Ko nga tama a Napatari; ko Tahatiere, ko Kuni, ko Ietere, ko Harumu, ara ko nga tama a Piriha. <sup>14</sup> Ko nga tama a Manahi; ko Ahariere, i whanau nei i tana wahine: na tana wahine iti hoki, na te Arami, a Makiri papa o Kireara: <sup>15</sup> Na ka tangohia e Makiri hei wahine mana ko te tuahine o Hupimi raua ko Tupimi, ko te ingoa o to raua tuahine ko Maaka: ko te ingoa o te tuarua o ana tama ko Teropehara: a, he tamahine ano a Teropehara. <sup>16</sup> Na kua whanau a Maaka wahine a Makiri he

tama, a huaina iho tona ingoa ko Perehe; a ko te ingoa o tona teina ko Herehe; ko ana tama; ko  
 Urama, ko Rakeme. <sup>17</sup> Na, ko nga tama a Urama; ko Perana. Ko nga tama enei a Kireara, tama a  
 Makiri, tama a Manahi. <sup>18</sup> Na whanau ake a tona tuahine, a Hamorekete, ko Ihihoro, ko Apietere,  
 ko Mahara. <sup>19</sup> A, ko nga tama a Hemira; ko Ahiana ko Hekeme, ko Rikihi, ko Aniama.  
<sup>20</sup> Na, ko nga tama a Eparaima; ko Hutera, ko tana tama ko Pereke, ko tana tama ko Tahata,  
 ko tana tama ko Erara, ko tana tama ko Tahata, <sup>21</sup> Ko tana tama ko Tapara, ko tana tama ko Hutera,  
 ko Etere, ko Eriara; i patua enei e nga tangata o Kata i whanau nei ki taua whenua, mo ratou i haere  
 atu ki te tango i a ratou kararehe. <sup>22</sup> A he tini nga ra i tangihia ai ratou e to ratou papa, e Eparaima,  
 a haere ana mai ona tuakana, teina, ki te whakamarie i a ia. <sup>23</sup> A, i haere atu ia ki tana wahine, ka  
 hapu, a ka whanau he tama, a huaina iho tona ingoa ko Peria, no te mea kei roto tona whare i te he.  
<sup>24</sup> A ko Heraha tana tamahine, nana nei i hanga a Petehorono, to raro me to runga, me Uteneheraha.  
<sup>25</sup> Na ko Repaha tana tama, ko Rehepe hoki; ko tana tama ko Teraha, ko tana tama ko Tahana;  
<sup>26</sup> Ko tana tama ko Raarana, ko tana tama ko Amihuru, ko tana tama ko Erihama, <sup>27</sup> Ko tana tama  
 ko Nono, ko tana tama ko Hohua. <sup>28</sup> Na, ko o ratou kainga tupu, me o ratou nohoanga; ko Peteere,  
 me ona pa ririki; ki te taha ki te rawhiti ko Naarana; ki te taha ki te hauauru ko Ketere me ona pa  
 ririki; ko Hekeme ano hoki me ona pa ririki, tae noa ki Kaha me ona pa ririki; <sup>29</sup> A, i nga taha o  
 nga tama a Manahi ko Peteheana me ona pa ririki, ko Taanaka me ona pa ririki, ko Mekiro me ona  
 pa ririki, ko Roro me ona pa ririki. I noho ki enei nga tama a Hohepa tama a Iharaira. <sup>30</sup> Ko nga  
 tama a Ahera; ko Imina, ko Ihua, ko Ihui, ko Peria, me to ratou tuahine, me Hera. <sup>31</sup> A, ko nga  
 tama a Peria; ko Hepere, ko Marakiere, ko te papa nei ia o Piritawiti. <sup>32</sup> Na Hepere ko Taparete,  
 ko Homere, ko Hotama, me to ratou tuahine ano, me Hua. <sup>33</sup> A, ko nga tama a Taparete; ko Pahaka,  
 ko Pimihara, ko Ahawata. Ko nga tama enei a Taparete. <sup>34</sup> Na, ko nga tama a Hamere; ko Ahi, ko  
 Rohoka, ko Tehupa, ko Arame. <sup>35</sup> A, ko nga tama a tona teina, a Hereme; ko Topaha, ko Imina,  
 ko Herehe, ko Amara. <sup>36</sup> A, ko nga tama a Topaha; ko Hua, ko Haranepere, ko Huara, ko Peri, ko  
 Imira; <sup>37</sup> Ko Petere, ko Horo, ko Hamama, ko Hiriha, ko Itirana, ko Peera. <sup>38</sup> A, ko nga tama a  
 Ietere; ko Iepune, ko Phipa, ko Ara. <sup>39</sup> Ko nga tama a Ura; ko Araha, ko Haniere, ko Retia. <sup>40</sup> Ko  
 enei katoa he tama na Ahera, he upoko no nga whare o nga papa, he hunga whiriwhiri, he marohirohi,

he maia, ko nga rangatira nunui tonu. I to ratou tauanga i runga i te whakapapa, ko te tokomaha o te hunga hei haere ki te whawhai, ki te turan ga riri, e rua tekau ma ono mano tangata.

## Chapter 8

<sup>1</sup> Na whanau ake a Pineamine, ko tana matamua ko Pera, ko te tuarua ko Ahapere, ko te tuatoru ko Ahara, <sup>2</sup> Ko te tuawha ko Noha, ko te tuarima ko Rapa. <sup>3</sup> Na, ko nga tama a Pera, ko Arara, ko Kera, ko Apihuru; <sup>4</sup> Ko Apihua, ko Naamana, ko Ahoa; <sup>5</sup> Ko Kera, ko Hepupuana, ko Hurama. <sup>6</sup> A, ko nga tama enei a Ehuru: ko nga upoko enei o nga whare o nga matua o nga tangata o Kepa, a whakahekea ana ratou e ratou ki Manahata: <sup>7</sup> Me Naamana, me Ahia, me Kera, i whakahekea ratou e ia; a whanau ake ana ko Uha, ko Ahihuru. <sup>8</sup> I whanau ano hoki he tamariki ma Haharaima i te whenua o Moapa i muri iho i tana tononga atu i a ratou: ko ana wahine ko Huhimi, ko Paara. <sup>9</sup> Whanau ake a raua ko tana wahine ko Horehe; ko Iopapa, ko Tipia, ko Meha, ko Marakama; <sup>10</sup> Ko Teutu, ko Hakia, ko Mirima. Ko ana tama enei, ko nga upoko o nga whare o nga matua. <sup>11</sup> A whanau ake a raua ko Huhimi, ko Apitupu, ko Erepaara. <sup>12</sup> Ko nga tama a Erepaara; ko Epere, ko Mihama, ko Hamere, nana nei i hanga a Ono, a Roro me o reira pa ririki; <sup>13</sup> Ko Peria hoki raua ko Hema; ko nga upoko raua o nga whare o nga matua o nga tangata o Atarono i peia ai nga tangata o Kata; <sup>14</sup> Ko Ahio, ko Hahaka, ko Teremoto; <sup>15</sup> Ko Teparia, ko Arara, ko Arere; <sup>16</sup> Ko Mikaera, ko Ihipa, ko Toha, ko nga tama a Peria; <sup>17</sup> Ko Teparia, ko Mehurama, ko Heteki, ko Hepere; <sup>18</sup> Ko Ihimerai ano hoki, ko Ieteria, ko Iopapa, ko nga tama a Erepaara; <sup>19</sup> Ko Iakimi, ko Tikiri, ko Tapari; <sup>20</sup> Ko Erienai, ko Tiretai, ko Eriere; <sup>21</sup> Ko Araia, ko Peraia, ko Himirata, ko nga tama enei a Hime; <sup>22</sup> Ko Ihipana, ko Epere, ko Eriere; <sup>23</sup> Ko Aparono, ko Tikiri, ko Hanana; <sup>24</sup> Ko Hanania, ko Erama, ko Anatotia; <sup>25</sup> Ko Ipereia, ko Penuere; ko nga tama enei a Hahaka; <sup>26</sup> Ko Hamaherai, ko Heharia, ko Ataria; <sup>27</sup> Ko Tarehia, ko Iraia, ko Tikiri, ko nga tama a Ierohama. <sup>28</sup> Ko nga upoko enei o nga whare o nga matua i o ratou whakatupuranga, he upoko ratou. I noho enei ki Hiruharama. <sup>29</sup> A i Kipeono e noho ana te papa o Kipeono, a Teiere, a ko te ingoa o tana wahine ko Maaka: <sup>30</sup> A ko tana matamua ko Aparono, ko Turu, ko Kihi, ko Paara, ko Natapa; <sup>31</sup> Ko Keroro, ko Ahio,



<sup>32</sup>  
ko Takere. Na, whanau ake ta Mikiroto, ko Himea. I noho ano enei ki o ratou tuakana ki Hiruharama, i te wahi e anga tonu mai ana ki a ratou.

<sup>33</sup>  
Whanau ake ta Nere, ko Kihi; whanau ake ta Kihi, ko Haora; whanau ake ta Haora, ko Honatana, ko Marikihua, ko Apinarapa, ko Ehepaara. <sup>34</sup> Na, ko te tama a Honatana, ko Meripaara;

a whanau ake ta Meripaara, ko Mika. <sup>35</sup> Na, ko nga tama a Mika; ko Pitono, ko Mereke, ko Tarea,

ko Ahata. <sup>36</sup> Na Ahata ko Tehoara; na Tehoara ko Aremete, ko Atamawete, ko Timiri; a na Timiri

ko Mota: <sup>37</sup> Na Mota ko Pinea; ko Rapa tana tama, ko Ereaha tana tama, ko Atere tana tama: <sup>38</sup> Na tokoono nga tama a Atere; ko o ratou ingoa enei; ko Atarikama, ko Pokeru, ko Ihimaera, ko Hearia,

ko Oparia, ko Hanana. He tama enei katoa na Atere. <sup>39</sup> Na, ko nga tama a Eheke, a tona teina; ko

Urama tana matamua, ko Ieuhu te tuarua, ko Eriperete te tuatoru. <sup>40</sup> Na he maia, he marohirohi nga tama a Urama, he kaikopere, he tokomaha hoki a ratou tama, me nga tama a nga tama, kotahi rau e rima tekau. He tama enei katoa na Pineamine.

## Chapter 9

<sup>1</sup>  
Na, he mea whakapapa a Iharaira katoa; heoi, tena kua tuhituhia ki te pukapuka o nga kingi o Iharaira: na i whakaraua atu a Hura ki Papurona mo a ratou mahi he. <sup>2</sup> Na, ko nga tangata tuatahi i noho ki o ratou wahi, ki o ratou pa, ko Iharaira, ko nga tohunga, ko nga Riwaiti, ko nga Netinimi.

<sup>3</sup>  
Na noho iho ki Hiruharama o nga tama a Hura, o nga tama a Pineamine, o nga tama a Eparaima

raua ko Manahi; <sup>4</sup> Ko Utai tama a Amihuru, tama a Omori, tama a Imiri, tama a Pani: no nga tama

a Parete tama a Hura. <sup>5</sup> A, o nga Hironi; ko Ahaia te matamua ratou ko ana tama. <sup>6</sup> O nga tama a

Tera; ko Teuere ratou ko o ratou teina, e ono rau e iwa tekau. <sup>7</sup> O nga tama a Pineamine; ko Haru

tama a Mehurama, tama a Horawia, tama a Hahenua; <sup>8</sup> Ko Ipineia tama a Ierohama, ko Eraha tama

a Uti, tama a Mikiri, ko Mehurama tama a Hepatia, tama a Reuere, tama a Ipinia; <sup>9</sup> Me o ratou teina ano hoki i o ratou whakatupuranga, e iwa rau e rima tekau ma ono. He upoko enei tangata

katoa no nga whare o nga matua i nga whare o o ratou matua. <sup>10</sup> A, o nga tohunga; ko Ieraia, ko

Tehoiaripi, ko Iakini; <sup>11</sup> Ko Ataria, tama a Hirikia, tama a Mehurama, tama a Haroko, tama a

Meraioto, tama a Ahitupu; ko te rangatira ia o te whare o te Atua; <sup>12</sup> Ko Araia tama a Ierohama,

tama a Pahuru, tama a Marakia, ko Maahiai tama a Ariere, tama a Tahatera, tama a Mehurama,  
<sup>13</sup>  
 tama a Mehiremiti, tama a Imere; Me o ratou teina, nga upoko o nga whare o o ratou matua,  
 kotahi mano e whitu rau e ono tekau, he tangata pakari rawa hei mahi i nga mahi o te whare o te  
 Atua.

<sup>14</sup>  
 A, o nga Riwaiti; ko Hemaia tama a Hahupu, tama a Atarikama, tama a Hahapia; no nga  
 tama a Merari; <sup>15</sup>  
 Ko Pakapakakara, ko Herehe, ko Karara, ko Matania, tama a Mika, tama a Tikiri,

tama a Ahapa; <sup>16</sup>  
 Ko Oparia tama a Hemaia, tama a Karara, tama a Ierutunu, ko Perekia tama a  
 Aha, tama a Erekena, i noho nei ki nga kainga koraha o nga Netopati. <sup>17</sup>  
 Ko nga kaitiaki kuwaha,

ko Harumu, ko Akupu, ko Taramono, ko Ahimana, me o ratou teina: ko Harumu te upoko; <sup>18</sup>  
 Ko  
 to ratou turanga i mua, kei te kuwaha o te kingi, kei te rawhiti: he kaitiaki kuwaha ratou i roto i nga

ropu o nga tama a Riwai. <sup>19</sup>  
 Na, ko Harumu tama a Kore, tama a Epihapa, tama a Koraha, ratou  
 ko ona teina o te whare o tona matua, ko nga Korahi, ko ratou nga rangatira o nga mahi e mahia  
 ana, nga kaitiaki o nga kuwaha o te tapenakara: na, he rangatira o ratou matua no te ope a Ihowa,

he kaitiaki ano no te tomokanga. <sup>20</sup>  
 Na ko Pinehaha tama a Ereatara to ratou rangatira i mua; a i a

ia ano a Ihowa. <sup>21</sup>  
 Ko Hakaraia tama a Meheremia te kaitiaki o te kuwaha o te tapenakara o te

whakaminenga. <sup>22</sup>  
 Ko enei katoa i whiriwhiria nei hei kaitiaki mo nga kuwaha, e rua rau kotahi  
 tekau ma rua. He mea whakapapa enei ki o ratou kainga ake; na Rawiri raua ko Hamuera matakite

ratou i whakarite kia tuturu ki taua mahi. <sup>23</sup>  
 I a ratou ko a ratou tama te mahi tiroiro i nga kuwaha

o te whare o Ihowa, ara o te whare o te tapenakara i tenei tiakitanga, i tenei tiakitanga. <sup>24</sup>  
 He kaitiaki

kuwaha i nga taha e wha, whaka te rawhiti, whaka te hauauru, whaka te raki, whaka te tonga. <sup>25</sup>  
 Na  
 i whakaritea o ratou teina i o ratou kainga koraha kia haere mai i te takanga o nga ra e whitu, i ia

wa, i ia wa, hei hoa mo ratou: <sup>26</sup>  
 Ko nga tino kaitiaki tokowha hoki o te kuwaha, he Riwaiti nei  
 ratou, he tuturu tonu ta ratou mahi, a ko ratou nga rangatira o nga ruma, o nga takotoranga taonga

o te whare o te Atua. <sup>27</sup>  
 He nohoanga hoki to ratou i nga taha o te whare o te Atua; ma ratou hoki

te tiaki; ma ratou ano te uaki o nga tatau i tenei ata, i tenei ata. <sup>28</sup>  
 Ko etahi hoki o ratou ki te tiaki

i nga oko mo te mahi; tatau ai ina kawea mai ki roto, tatau ai ano ina mauria ki waho. <sup>29</sup>  
 I whakaritea  
 hoki etahi o ratou hei tiaki mo nga oko, mo nga mea mahi katoa ano o te wahi tapu, mo te paraoa,

mo te waina, mo te hinu, mo te parakihe, mo nga mea kakara. <sup>30</sup>  
 Ko etahi ano o nga tama a nga

tohunga hei hanga i te hinu o nga mea kakara. <sup>31</sup>  
 Na, ko Matitia, ko tetahi o nga Riwaiti, ko te

matamua a Harumu Korahi, ko tana mahi tuturu ko te tiro tiro i nga mea i tunua ki te rihi. Na ko etahi o o ratou teina, o nga tama a nga Kohati, nga kaiwhakaaro ki te taro aroaro, kia oti te hanga

32

i tenei hapati, i tenei hapati. Ko nga kaiwaiata ano enei, ko nga upoko o nga whare o nga matua o nga Riwaiti, i noho ratou i roto i nga ruma, a i noho watea ratou i era atu mahi i ta ratou na mahi

33

hoki ratou i te ao, i te po. Na ko enei nga upoko o nga whare o nga matua o nga Riwaiti, ko nga upoko ano ratou i o ratou whakatupuranga: i noho enei ki Hiruharama.

34

35 I noho ano ki Kipeono te papa o Kipeono, a Teiere; ko te ingoa o tana wahine ko Maaka.

36 Na, ko tana matamua ko Aparono, ko Turu hoki, ko Kihi, ko Paara, ko Nere, ko Natapa; Ko

37

Keroro, ko Ahio, ko Hakaraia, ko Mikiroto. Whanau ake ta Mikiroto, ko Himeana. I noho ano

38

enei ki o ratou tuakana ki Hiruharama, ki te wahi e anga tonu ana ki o ratou tuakana. Whanau

39

ake ta Nere, ko Kihi; whanau ake ta Kihi, ko Haora; whanau ake ta Haora, ko Honatana, ko

40

Marihihua, ko Apinarapa, ko Ehepaara. Ko te tama a Honatana, ko Meripaara: whanau ake ta

41

Meripaara, ko Mika. Na, ko nga tama a Mika; ko Pitono, ko Mereke, ko Taharea, ko Ahata.

42

Whanau ake ta Ahata, ko Iaraha; whanau ake ta Iaraha ko Aremete, ko Atamawete, ko Timiri;

43

whanau ake ta Timiri, ko Mota; Whanau ake ta Mota, ko Pinea; ko tana tama ko Repaia; ko tana

44

tama ko Ereaha; ko tana tama ko Atere. Na tokoono nga tama a Atere, ko o ratou ingoa enei; ko Atarikama, ko Pokeru, ko Ihimaera, ko Hearia, ko Oparia, ko Hanana: ko nga tama enei a Atere.

## Chapter 10

1 Na kua whawhai nga Pirihitini ki a Iharaira; a ka whati nga tangata o Iharaira i te aroaro o

2

nga Pirihitini, a hinga ana, mate rawa, i Maunga Kiripoa. Na ka whaia e nga Pirihitini a Haora

3

ratou ko ana tama; a patua iho e nga Pirihitini a Honatana ratou ko Apinarapa, ko Marikihua, nga

4

tama a Haora. Na kua taikaha haere te whawhai ki a Haora, a kua mau ia i nga kaikopere; a kua

5

he tona manawa i nga kaikopere. Katahi a Haora ka mea ki tana kaimau patu, Unuhia tau hoari, werohia hoki ahau; kei haere mai tenei hunga kokotikore, kei whakatupu kino i ahau. Otiia kihai i pai tana kaimau patu; he nui hoki no tona hopohopo. Heoi ka mau a Haora ki tana hoari, hinga iho

6

ana ki runga. A, no te kitenga o tana kaimau patu kua mate a Haora, ka hinga hoki ia ki runga ki

<sup>6</sup>  
 tana hoari, a ka mate. Heoi ka mate a Haora me ana tama tokotoru; mate tahi ana tona whare  
<sup>7</sup>  
 katoa. A, no te kitenga o nga tangata katoa o Iharaira i te raorao kua whati ratou, kua mate hoki  
 a Haora ratou ko ana tama, whakarerea ake e ratou o ratou pa, a rere ana; na ka haere mai nga  
 Pirihitini, a nohoia iho e ratou.  
<sup>8</sup>  
 A, i te aonga ake, i te haerenga mai o nga Pirihitini ki te muru i te hunga i patua, na ka kitea  
<sup>9</sup>  
 a Haora ratou ko ana tama e takoto ana i runga i Maunga Kiripoa. Na huia ana ona e ratou, tangohia  
 ana tona upoko me ana patu, tukua ana kia kawea puta noa i te whenua o nga Pirihitini a tawhio  
<sup>10</sup>  
 noa, kia kauwhautia ki a ratou whakapakoko, ki te iwi. I whakatakotoria hoki e ratou ana patu  
<sup>11</sup>  
 ki te whare o o ratou atua, a ko tona upoko titia ake e ratou ki te whare o Rakono. A, no te  
<sup>12</sup>  
 rongonga o Iapehe Kireara katoa ki nga mea katoa i mea ai nga Pirihitini ki a Haora, Ka whakatika  
 nga marohirohi katoa, tangohia iho e ratou te tinana o Haora, me nga tinana o ana tama, kawea ana  
 ki Iapehe, tanumia ana o ratou wheua ki raro i tetahi oki i Iapehe, a e whitu nga ra i nohopuku ai  
<sup>13</sup>  
 ratou. Heoi kua mate a Haora mo tona he i he ai ia ki a Ihowa, mo te kupu a Ihowa kihai nei i  
<sup>14</sup>  
 puritia e ia; mona hoki i ui ki tetahi, i a ia nei te atua maori, he rapu whakaaro, A kihai i rapu  
 whakaaro i a Ihowa: no reira i whakamatea ai ia e ia, a hurihia ketia ana te kingitanga ki a Rawiri  
 tama a Hehe.

## Chapter 11

<sup>1</sup>  
 Na ka huihui a Iharaira katoa ki a Rawiri ki Heperona, a ka mea, Tenei matou, he wheua nou,  
<sup>2</sup>  
 he kikokiko nou. I mua ake nei, i te mea ano ko Haora te kingi, ko koe te kaikawe atu, te kaikawe  
 mai, i a Iharaira: kua korerotia ano koe e Ihowa, e tou Atua, Ko koe hei hepara mo taku iwi, mo  
<sup>3</sup>  
 Iharaira, ko koe ano hei tino tangata mo taku iwi, mo Iharaira. Na ka haere nga kaumatua katoa  
 o Iharaira ki te kingi, ki Heperona, ka whakarite kawenata a Rawiri ki a ratou ki Heperona ki te  
 aroaro o Ihowa: a whakawahia ana e ratou a Rawiri hei kingi mo Iharaira, ko ta Ihowa hoki i ki ai,  
<sup>4</sup>  
 ara ko ta Hamuera. Na ka haere a Rawiri ratou ko Iharaira katoa ki Hiruharama, ara ki Iepuhu; i  
<sup>5</sup>  
 reira ano nga Iepuhi, nga tangata whenua. Na ka mea nga tangata o Iepuhu ki a Rawiri, E kore  
<sup>6</sup>  
 koe e tae mai ki konei. Heoi kua riro i a Rawiri te pourewa i Hiona; ko te pa ia o Rawiri. Na ka  
 mea a Rawiri, Ko te tangata mana te patu tuatahi ki nga Iepuhi, hei tino tangata ia, hei rangatira.  
<sup>7</sup>  
 Na ko Ioapa tama a Teruia kua tae wawe, a meinga ana ko ia te tino tangata. Na ka noho a Rawiri

8  
 ki te pourewa; koia i huaina ai e ratou a reira ko te pa o Rawiri. A i hanga e ia te pa a tawhio noa,  
 9  
 o Miro mai a taka noa; a na Ioapa i whakaora tera atu wahi o te pa. Na ka tino nui haere a Rawiri,  
 i a ia hoki a Ihowa, te Atua o nga mano.

10  
 Na ko nga tino tangata enei a Rawiri, i kaha rawa nei me ia mo tona rangatiratanga, ratou  
 11  
 ko Iharaira katoa, hei whakakingi i a ia; hei pera me ta Ihowa i ki ai mo Iharaira. A ko te tokomaha  
 tenei o nga marohirohi a Rawiri: ko Iahepeama, tama a tetahi Hakamoni, te rangatira o te toru  
 12  
 tekau; i ara ake tana tao ki nga rau e toru a patua iho e ia i te whakaekenga kotahi. I muri i a ia  
 13  
 ko Ereatara tama a Roro Ahohi; ko ia tetahi o nga marohirohi tokotoru. I a Rawiri ia i  
 Paharamime, a i huihui nga Pirihitini ki reira ki te whawhai, a i reira tetahi wahi whenua e kapi ana  
 14  
 i te parei; na kua rere te iwi i te aroaro o nga Pirihitini. Na tu ana raua i waenganui o taua wahi,  
 a ka mau i a raua, patua iho e raua nga Pirihitini: na nui atu te whakaoranga i whakaora ai a Ihowa.

15  
 Na ka haere nga rangatira tokotoru, no te toru tekau, ki raro, ki te kamaka ki a Rawiri, ki te ana  
 16  
 o Aturama: a ko te ope o nga Pirihitini i te raroraro i Repaima e noho a puni ana. Na i roto a

17  
 Rawiri i te pourewa i taua wa, a ko nga hoia pupuri a nga Pirihitini i Peterehema i taua wa. Na  
 ka minamina a Rawiri, a ka mea, Aue, me he tangata hei mea wai mai moku i te puna i Peterehema,  
 18  
 i tera i te kuwaha! Na tika ana taua tokotoru na waenganui o te puni o nga Pirihitini, a utuhia  
 mai ana he wai i te puna o Peterehema, i tera i te kuwaha; tangohia ana e ratou, mauria ana ki a

19  
 Rawiri: otiia kihai a Rawiri i pai ki te inu, engari ringihia ana e ia h ei mea ki a Ihowa. I mea ia,  
 Aue, ma toku Atua ahau e arai kei mea i tenei! kia inumia koia e ahau nga toto o enei tangata, me  
 i kotahi nei kua mate? me i kotahi hoki ratou kua mate i te tikinga atu. Na reira i kore ai ia i pai ki  
 20  
 te inu. Ko enei nga mahi a aua to a tokotoru. Na ko Apihai teina o Ioapa te rangatira o taua

21  
 tokotoru; i ara ake tana tao ki nga rau e toru, patua iho e ia; i whai ingoa ia i roto i te tokotoru. O  
 te tokotoru, nui atu tona kororia i to te tokorua, a meinga ana ko ia hei rangatira mo ratou: otiia  
 22  
 kihai ia i uru ki te tokotoru tuatahi. Me Penaia tama a Iehoiara, he tama na tetahi tangata toa o

Kapateere, he nui ana mahi, nana i patu nga tama tokorua a Ariere o Moapa; i haere ano ia ki raro,  
 23  
 a patua ana e ia tetahi raiona i roto i te rua i te wa o te hukarere. Nana hoki tetahi Ihipiana i patu,  
 he tangata nui, e rima nga whatianga te roa: he tao ano i te ringa o taua Ihipiana koia ano kei te  
 rakau a te kaiwhatu; na haere ana ia ki raro, ki a ia, he tokotoko hoki tana, a kapohia ana e ia te tao

24  
 i roto i te ringa o te Ihipiana, patua iho ia ki tana tao ano. Na Penaia tama a Iehoiara enei mahi;  
 25  
 i whai ingoa ano ia i nga toa tokotoru. Na, nona te kororia nui o te toru tekau; otiia kihai ia i uru

ki te tokotoru tuatahi. Na meinga ana ia e Rawiri hei rangatira mo ana kaitiaki. <sup>26</sup> Me nga maia  
 hoki o nga ope; ko Atahere teina o Ioapa, ko Erehanana tama a Roro o Peterehema, <sup>27</sup> Ko Hamoto  
 Harori, ko Herete Peroni; <sup>28</sup> Ko Ira tama a Ikehe Tekoi, ko Apietere Anatoti; <sup>29</sup> Ko Hipekai Huhati,  
 ko Irai Ahohi; <sup>30</sup> Ko Maharai Netopati, ko Herere tama a Paana, he Netopati; <sup>31</sup> Ko Itai tama a  
 Ripai, no Kipea, no nga tama a Pineamine, ko Penaia Pirotoni; <sup>32</sup> Ko Hurai, no nga awaawa o  
 Kaaha, ko Apiere Arapati; <sup>33</sup> Ko Atamawete Paharumi, ko Eriahapa Haaraponi; <sup>34</sup> Ko nga tama  
 a Haheme Kitoni, ko Honatana tama a Hake Harari; <sup>35</sup> Ko Ahiamata tama a Hakara Harari, ko Eripara  
 tama a Uru; <sup>36</sup> Ko Hewhere Mekerati, ko Ahia Peroni; <sup>37</sup> Ko Hetero Karameri, ko Naarai tama a  
 Etepai; <sup>38</sup> Ko Hoera teina o Natana, ko Mipihara tama a Hakeri; <sup>39</sup> Ko Tereke Amoni, ko Nahari  
 Peroti, ko te kaimau o nga patu a Ioapa tama a Teruia; <sup>40</sup> Ko Ira Itiri, ko Karepa Itiri; <sup>41</sup> Ko Uria  
 Hiti, ko Tapara tama a Aharai; <sup>42</sup> Ko Arina tama a Hiti Reupeni, he rangatira no nga Reupeni, e  
 toru tekau ona hoa; <sup>43</sup> Ko Hanana tama a Maaka, ko Iohapata Mitini; <sup>44</sup> Ko Utia Ahaterati, ko  
 Hama raua ko Teiere, ko nga tama a Hotama Aroeri; <sup>45</sup> Ko Teriaere tama a Himiri, raua ko tona  
 teina ko Toha te Titi; <sup>46</sup> Ko Eriere Mahawi, ratou ko Teripai, ko Tohawia, he tama na Erenaama,  
 ko Itima Moapi; <sup>47</sup> Ko Eriere, ko Opere, ko Taahiere Metopai.

## Chapter 12

<sup>1</sup> Ko te hunga tenei i haere ki a Rawiri ki Tikiraka, i a ia ano e putiki tonu ana i roto i te pa i te  
 wehi o Haora tama a Kihi: no nga marohirohi ratou, hei tuara mona ki te whawhai. <sup>2</sup> He hunga  
 kukume kopere ratou, ko te maui, ko te matau, ki te kotaha kohatu, ki te kopere i te pere; no nga  
 teina ano o Haora, no Pineamine. <sup>3</sup> Ko Ahietere te upoko, na ko Ioaha, he tama raua na Hema  
 Kipeati; ko Ietiere, ko Perete he tama na Atamawete; ko Peraka, ko Iehu Anatoti; <sup>4</sup> Ko Ihimaia  
 Kipeoni, he marohirohi ia i roto i te toru tekau, he rangatira ano no te toru tekau; ko Heremaia, ko  
 Tahatiere, ko Iohanana, ko Iohapara Kererati; <sup>5</sup> Ko Erutai, ko Terimoto, ko Pearia, ko Hemaria,  
 ko Hepatia Harupi; <sup>6</sup> Ko Erekanata, ko Ihia, ko Atareere, ko Toetere, ko Iahoepama, he Korahi

<sup>7</sup> ratou; Ko Toera, ko Teparia, he tama na Ierohama o Keroro. Na o nga Kari i maunu etahi ki a  
 Rawiri ki te pourewa i te koraha, he tangata marohirohi, i rauhangatia mo te whawhai, he hunga  
 hapai i te whakangungu rakau, i te tao: ko o ratou mata me te mea he kanohi raiona, rite tonu o  
<sup>8</sup>  
 ratou tere ki to nga a naterope i runga i nga maunga; Ko Etere te upoko, ko Oparia te tuarua, ko  
<sup>9</sup>  
 Eriapa te tuatoru; <sup>10</sup> Ko Mihimana te tuawha, ko Heremaia te tuarina; <sup>11</sup> Ko Atai te tuaono, ko  
<sup>12</sup> Eriere te tuawhitu; <sup>13</sup> Ko Iohanana te tuawaru, ko Eretapara te tuaiwa; <sup>14</sup> Ko Heremaia te tuatekau,  
 ko Makapanai te tekau ma tahi. <sup>15</sup> Ko enei o nga tama a Kara he rangatira ope: ko te mea iti rawa  
<sup>16</sup>  
 hei rangatira mo te rau, a ko te mea nui rawa hei rangatira mo te mano. Ko te hunga tenei i whiti  
 nei i Horano i te marama tuatahi, i te mea kua ngawha ki runga i ona pareparenga katoa; a whati  
<sup>17</sup>  
 ana i a ratou te hunga katoa o nga raorao whaka te rawhiti, a whaka te hauauru. I haere mai ano  
<sup>18</sup>  
 etahi o nga tama a Pineamine me etahi o a Hura ki te pourewa ki a Rawiri. Na ka puta a Rawiri  
 ki te whakatau i a ratou, a ka oho, ka mea ki a ratou, Ki te mea he haere pai mai ta koutou ki ahau,  
 he whakauru, ka kotahi tonu o tatou ngakau. Tena ki te tinihanga, te tuku i ahau ki oku hoariri, i te  
<sup>19</sup>  
 mea kahore nei he tutu a oku ringa, ma te Atua o o tatou matua e titiro mai, e riri. Na kua tau te  
 wairua ki a Amahai, ko ia nei te rangatira o te toru tekau, a ka ki ia, Kei a koe matou, e Rawiri, hei  
 hoa mou, e te tama a Hehe, Kia mau, kia mau te rongo ki a koe; kia mau ano ki ou whakauru; ko  
 tou Atua hoki hei whakauru mou. Na kua riro ratou i a Rawiri, a meinga ana ratou e ia hei rangatira  
<sup>20</sup>  
 rangapu. Na o Manahi hoki i papahoro etahi ki a Rawiri, i a ia i haere tahi ai me nga Pirihitini  
 ki te whawhai ki a Haora, otiiia kihai ratou i uru ki a ratou: i panaia hoki ia e nga rangatira o nga  
 Pirihitini, he mea, whakaaro ano e ratou, i mea ratou, T era ia e taka atu ki tona ariki, ki a Haora,  
<sup>21</sup>  
 ko o tatou upoko e raru. I a ia e haere ana ki Tikiraka, ka papahoro mai ki a ia o Manahi ko  
 Arana, ko Iotapara, ko Teriaere, ko Mikaera, ko Iotapara, ko Erihu, ko Tiritai, he rangatira no nga  
 mano o Manahi. <sup>22</sup> Ko ratou nga whakauru mo Rawiri ki te whawhai ki nga torohe; he marohirohi  
<sup>23</sup>  
 hoki, he toa, ratou katoa, he rangatira ope. I haere hoki ratou i taua wa ki a Rawiri i tena ra, i  
 tena ra, hei whakauru mona, no kua nui te ope, ano he ope na te Atua.  
<sup>24</sup>  
 Ko te tokomaha tenei o nga rangatira, he hunga i rite rawa mo te whawhai, i haere ki a Rawiri  
<sup>25</sup>  
 ki Heperona hei whakariro i te kingitanga o Haora ki a ia; kia rite ai ki ta Ihowa kupu. Ko nga  
 tama a Hura, he hunga hapai i te whakangungu rakau, i te tao e ono mano e waru rau, rite rawa i  
<sup>26</sup>  
 te patu mo te whawhai. O nga tama a Himiona, he marohirohi, he toa mo te whawhai, e whitu  
<sup>27</sup>  
 mano kotahi rau. O nga tama a Riwai e wha mano e ono rau. Na ko Iehoiara te rangatira o

te whare o Arona, a e toru mano e whitu rau ona hoa; <sup>28</sup> Me Haroko ano, he taitama marohirohi,  
 he toa, ratou ko te whare o tona papa, e rua tekau ma rua nga rangatira. <sup>29</sup> A, o nga tama a Pineamine,  
 o nga teina o Haora, e toru mano: ko to ratou nuinga hoki i mau tonu ki te whare o Haora a taea  
<sup>30</sup> noatia taua ra. Na o nga tama a Eparaima, e rua tekau mano e waru rau, he marohirohi, he toa,  
<sup>31</sup> he hunga whai ingoa i roto i nga whare o o ratou matua. A, o tetahi tanga o te iwi o Manahi,  
 kotahi tekau ma waru mano, he mea whakahua o ratou ingoa, hei haere ki te whakakingi i a Rawiri.  
<sup>32</sup> Na, o nga tama a Ihakara, he hunga mohio ki nga wa, i mohio ai ki nga mahi ma Iharaira; e rua  
<sup>33</sup> rau o ratou ariki; kei o enei mangai ano he tikanga mo o ratou teina. O Hepurona, ko te hunga  
 e ahei te haere ki te whawhai, he mohio ki te tatai i te riri, e mau ana i nga mea katoa mo te whawhai,  
<sup>34</sup> e rima tekau mano; he hunga e taea te whakatika te tatai o te riri, a kahore o ratou ngakau rua. A  
 o Napatari kotahi mano nga rangatira, e toru tekau ma whitu mano o ratou hoa, rite rawa i te  
<sup>35</sup> whakangungu rakau, i te tao. Na, o nga Rani, he hunga mohio ki te tatu, e rua tekau ma waru  
<sup>36</sup> mano e ono rau. O Ahera, he hunga haere ki te whawhai, he mohio ki te tatau, e wha tekau mano.  
<sup>37</sup> Na, o tera taha o Horano, o nga Reupeni, o nga Kari, o tetahi tanga o te hapu o Manahi, e mau  
<sup>38</sup> ana i nga mea whawhai katoa mo te tatau, kotahi rau e rua tekau mano. Ko enei, he tangata  
 whawhai katoa, he mohio ki te tatau, he tapatahi tonu te ngakau i haere ai ki Heperona ki te mea i  
 a Rawiri hei kingi mo Iharaira katoa. Na, ko era atu katoa o Iharaira, kotahi tonu te ngakau mo te  
<sup>39</sup> whakakingi i a Rawiri. A i reira ratou i a Rawiri, e toru nga ra e kai ana, e inu ana: he mea taka  
<sup>40</sup> hoki na o ratou tuakana, teina. Na, ko te hunga tata ki a ratou, tae noa atu ki a Ihakara, ki a  
 Hepurona, ki a Napatari, i kawe taro mai i runga i nga kaihe, i nga kamera, i nga muera, a i nga  
 kau, he kai, he paraoa, he papa piki, he tautau karepe, he waina, he hinu, he kau, h e hipi, tona tini;  
 he koa hoki no Iharaira.

### Chapter 13

<sup>1</sup> Na ka runanga a Rawiri ki nga rangatira o nga mano, o nga rau, ara ki nga rangatira katoa.  
<sup>2</sup> A i mea a Rawiri ki te whakaminenga katoa o Iharaira, Ki te pai koutou, a ka tika mai i to tatou  
 Atua, i a Ihowa, me tuku tangata tatou ki ia wahi, ki ia wahi, ki o tatou teina kua mahue nei ki nga  
 whenua katoa o Iharaira, ki a ratou ko nga tohuna ga, ko nga Riwaiti, ki nga pa, ki nga wahi o waho  
<sup>3</sup> ake o aua pa, kia huihui mai ratou ki a tatou; A me whakahoki mai e tatou te aaka a to tatou Atua



ki a tatou: kihai hoki tatou i rapu tikanga ki reira i nga ra o Haora. <sup>4</sup> Na ka mea te whakaminenga  
 katoa kia pera ano ratou; he tika hoki taua mea ki te titiro a te iwi katoa. <sup>5</sup> Heoi ka huihuia e Rawiri  
 a Iharaira katoa i Hihoro, i te awa o Ihipa a tae noa ki te haerenga atu ki Hamata, hei mau ake i te  
 aaka a te Atua i Kiriata Tearimi. <sup>6</sup> Na ko te haerenga o Rawiri ratou ko Iharaira katoa ki Paaraha,  
 ara ki Kiriata Tearimi o Hura, hei mau ake i reira i te aaka a te Atua, a Ihowa e noho nei i runga o  
 nga kerupima, i huaina nei ki te Ingoa. <sup>7</sup> Na ka mauria e ratou te aaka a te Atua i runga i te kata  
 hou, a tangohia ana mai i te whare o Apinarapa: a na Uha raua ko Ahio i arahi te kata. <sup>8</sup> Na ka  
 whakapaua te kaha e Rawiri ratou ko Iharaira katoa ki te takaro ki te aroaro o te Atua; he waiata  
 ano ta ratou, he hapa, he timipera, he himipora, he tetere.  
<sup>9</sup> A, ka tae ki te patunga witi a Hirono, ka totoro te ringa o Uha ki te pupuri i te aaka; i tapatupatu  
 hoki nga kau. <sup>10</sup> Na ka mura te riri o Ihowa ki a Uha, patua iho mo tona ringa i totoro ki te aaka;  
 a mate iho ia i reira i te aroaro o te Atua. <sup>11</sup> Na ka puri a Rawiri mo te toreretanga i torere ai a  
 Ihowa ki a Uha. Na huaina ana e ia taua wahi ko Pereteuha: e mau nei ano a taea noatia tenei ra.  
<sup>12</sup> Na ka wehi a Rawiri i a Ihowa i taua ra, a ka mea ia, Me pehea taku kawae mai i te aaka a Ihowa  
 ki ahau ki toku whare? <sup>13</sup> Heoi kihai a Rawiri i tango i te aaka ki a ia, ki te pa o Rawiri; i kawea  
 ketia e ia ki te whare o Opereeroma Kiti. <sup>14</sup> Na noho ana te aaka a te Atua ki te whanau a  
 Opereeroma, ki tona whare hoki, e toru nga marama. A ka manaakitia e Ihowa te whare o  
 Opereeroma me ana mea katoa.

## Chapter 14

<sup>1</sup> Na ka tonoa etahi karere e Hirama kingi o Taira ki a Rawiri, me etahi rakau, he hita, me nga  
 kaimahi kohatu, me nga kaimahi rakau, hei hanga whare mona. <sup>2</sup> Na ka mohio a Rawiri kua  
 whakapumautia ia e Ihowa hei kingi mo Iharaira; kua whakanuia hoki tona rangatiratanga, he  
 whakaaro ki tana iwi, ki a Iharaira. <sup>3</sup> Na ka tangohia ano e Rawiri he wahine mana ki Hiruharama;  
 a ka whanau ano etahi atu tama, etahi atu tamahine ma Rawiri. <sup>4</sup> A ko nga ingoa enei o ana i whanau  
 ki Hiruharama; ko Hamua, ko Hopapa, ko Natana, ko Horomona; <sup>5</sup> Ko Ipihara, ko Erihua, ko  
 Ereparete; <sup>6</sup> Ko Noka, ko Nepeke, ko Iapia; <sup>7</sup> Ko Erihama, ko Peeriara, ko Eriparete.

8  
 A, no te rongonga o nga Pirihitini kua oti a Rawiri te whakawahi hei kingi mo Iharaira katoa, ka haere nga Pirihitini katoa ki te rapu i a Rawiri. A ka rongo a Rawiri, a ka puta ia ki te tu i a ratou.

9  
 Na, tera nga Pirihitini kua haere mai, a kua takahi i te raorao o Repaima. 10 Na ka ui a Rawiri ki te Atua, ka mea, Me haere ranei ahau ki nga Pirihitini? E homai ranei ratou e koe ki toku ringa?

11  
 Na ka mea a Ihowa ki a ia, Haere; ka hoatu hoki ratou e ahau ki tou ringa. Heoi kua tae mai ratou ki Paaraperatimi; patua iho ratou i reira e Rawiri. Na ka mea a Rawiri, Pakaru ana i te Atua oku hoariri, he mea na toku ringa; koia ano kei te pakaruhanga wai. Na reira i huaina ai te ingoa o

12  
 taua wahi ko Paaraperatimi. A mahue ana i a ratou o ratou atua ki reira; na ka whakahau a Rawiri,

13  
 a tahuna ana ki te ahi. Na ka takahia ano e nga Pirihitini te raorao. 14 A ka ui ano a Rawiri ki te Atua, a ka mea te Atua ki a ia, Kua e haere ki te wahi i a ratou: me tahuri i a ratou, ka awhio

15  
 haere ki a ratou, ka whakaeke i a ratou i te ritenga o nga maperi. A, ka rangona e koe te tapuwae haruru i runga i nga maperi, ko reira koe puta ai ki te whawhai; no te mea kua riro te Atua ki mua

16  
 i a koe ki te patu i te ope o nga Pirihitini. Na peratia ana e Rawiri me ta te Atua i whakahau ai

17  
 ki a ia; a patua iho e ratou te ope o nga Pirihitini i Kipeono, a tae noa ki Katere. Na kua paku te ingoa o Rawiri ki nga whenua katoa; a ka mea a Ihowa i te wehi ki a ia kia pa ki nga iwi katoa.

## Chapter 15

1  
 Na ka hanga e Rawiri etahi whare mona ki te pa o Rawiri; i whakapaia ano e ia he wahi, i

2  
 whakatu teneti hoki mo te aaka a te Atua. Katahi a Rawiri ka mea, E kore e pai kia kawea te aaka a te Atua e tetahi atu, engari ma nga Riwaiti; ko ratou hoki ta Ihowa i whiriwhiri ai hei mau i te

3  
 aaka a te Atua, hei mahi hoki ki a ia i nga wa katoa. Na ka huihuia e Rawiri a Iharaira katoa ki

4  
 Hiruharama, ki te kawea i te aaka a Ihowa ki tona wahi i whakapaia ra e ia mona. I huihuia ano e

5  
 Rawiri nga tama a Arona ratou ko nga Riwaiti; O nga tama a Kohata; ko Uriere, ko te rangatira,

6  
 ratou ko ona teina kotahi rau e rua tekau: O nga tama a Merari; ko Ahaia, ko te rangatira, ratou

7  
 ko ona teina e rua rau e rua tekau: O nga tama a Kerehoma; ko Hoera, ko te rangatira, ratou ko

8  
 ona teina kotahi rau e toru tekau: O nga tama a Eritapana; ko Hemaia, ko te rangatira, ratou ko

9  
 ona teina e rua rau: O nga tama a Heperona; ko Eriere, ko te rangatira, ratou ko ona teina e waru

<sup>10</sup>  
 tekau: O nga tama a Utiere; ko Aminarapa, ko te rangatira, ratou ko ona teina kotahi rau kotahi  
<sup>11</sup>  
 tekau ma rua. I karangatia ano e Rawiri a Haroko raua ko Apiatara, nga tohunga, ratou ko nga  
<sup>12</sup>  
 Riwaiti, ko Uriere, ko Ahaia, ko Hoera, ko Hemaia, ko Eriere, ko Aminarapa, I mea ia ki a ratou,  
 Ko koutou nga rangatira o nga whare o nga matua o nga Riwaiti: whakatapua koutou, koutou ko  
 o koutou teina; ma koutou hoki e kawea te aaka a Ihowa, a te Atua o Iharaira ki te wahi i whakapaia  
<sup>13</sup>  
 e ahau mona. No te mea hoki ehara i a koutou i kawea i te tuatahi, no reira i torere mai ai a Ihowa,  
<sup>14</sup>  
 to tatou Atua ki a tatou, no te mea kihai i rite ki te tikanga ta tatou rapu i a ia. Heoi kei te  
 whakatapu nga tohunga me nga Riwaiti i a ratou, kia kawea ai e ratou te aaka a Ihowa, a te Atua o  
<sup>15</sup>  
 Iharaira. Na ka amohia e nga tama a nga Riwaiti te aaka a te Atua, ka pera me ta Mohi i whakahau  
<sup>16</sup>  
 ai, me ta Ihowa i korero ai; ko nga amo i runga i o ratou pokohiwi. I korero ano a Rawiri ki nga  
 rangatira o nga Riwaiti kia whakaritea o ratou teina hei kaiwaiata i runga i nga mea waiata, i nga  
 hatere, i nga hapa, i nga himipora, he mea e rangona, he reo koa hoki e whakaarahia ana e ratou.  
<sup>17</sup>  
 Na ka whakaritea e nga Riwaiti, ko Hemana tama a Hoera; o ona teina hoki ko Ahapa tama a  
<sup>18</sup>  
 Perekia; o o ratou teina, o nga tama a Merari ko Etana tama a Kuhaia; O o ratou teina, nga tuarua,  
 hei hoa mo ratou, ko Hakaraia, ko Pene, ko Taatiere, ko Hemiramoto, ko Tehiere, ko Uni, ko Eriapa,  
 ko Penaia, ko Maaheia, ko Matitia, ko Eripererehe, ko Mikineia, ko Opereeroma, ko Teiere; he kaitiaki  
<sup>19</sup>  
 kuwaha ratou. Na whakaritea ana ko nga kaiwaiata, ko Hemana, ko Ahapa, ko Etana, hei  
<sup>20</sup>  
 whakatangi i nga himipora parahi; Na ko Hakaraia, ko Atiere, ko Hemiramoto, ko Tehiere, ko  
<sup>21</sup>  
 Uni, ko Eriapa, ko Maaheia, ko Penaia, he mea i runga i nga hatere, he mea Aramoto; A ko  
 Matitia, ko Eripererehe, ko Mikineia, ko Opereeroma, ko Teiere, ko Atatia, i runga i nga hapa, he  
<sup>22</sup>  
 mea Heminiti, hei whakarewa. Na ko Kenania ano, ko te upoko a nga Riwaiti, hei whakahua: i  
<sup>23</sup>  
 whakaako ano ia ki te whakahua waiata; he mohio hoki ia. Ko Perekia raua ko Erekena nga  
<sup>24</sup>  
 kaitiaki tatau mo te aaka. Ko nga tohunga ano, ko Hepania, ko Iohapata, ko Netaneere, ko  
 Amahai, ko Hakaraia, ko Penaia, ko Erietere, hei whakatangi i nga tetere ki mua i te aaka a te Atua;  
 a ko Opereeroma raua ko Iahia nga kaitiaki tatau mo te aaka.  
<sup>25</sup>  
 Na haere ana a Rawiri ratou ko nga kaumatua o Iharaira, ko nga rangatira o nga mano ki te  
<sup>26</sup>  
 kawea i te aaka o te kawenata a Ihowa i te whare o Opereeroma i runga i te koa. A, ka awhina te  
 Atua i nga Riwaiti, na ratou nei i amo te aaka o te kawenata a Ihowa, na ka patua e ratou te  
<sup>27</sup>  
 whakahere, e whitu nga puru, e whitu nga hipi toa. Na, he koroka rinena pai te kakahu o Rawiri,  
 o nga Riwaiti katoa i amohia ai te aaka, o nga kaiwaiata, o Kenania ano, o te rangatira o te waiata,

me nga kaiwaiata hoki. He epora rinena ano to Rawiri. <sup>28</sup> Na kei te kawe a Iharaira katoa i te aaka o te kawenata a Ihowa, me te mahama ano ratou, me te tangi ano te koronete, te tetere, te himipora: paku ana te rongu o nga hatere, o nga hapa. <sup>29</sup> Na, i te taenga o te aaka o te kawenata a Ihowa ki te pa o Rawiri, ka titiro atu a Mikara tamahine a Haora i te matapihi, ka kite i a Kingi Rawiri e kanikani ana, e takaro ana: na ka whakahawe ki a ia i roto i tona ngakau.

## Chapter 16

<sup>1</sup> Heoi kawea ana e ratou te aaka a te Atua, whakaturia ana ki waenganui o te teneti i whakaarahia e Rawiri mona; a tapaea ana e ratou he tahunga tinana, he whakahere mo te pai ki te aroaro o te Atua. <sup>2</sup> A, ka mutu ta Rawiri whakaeke i nga tahunga tinana, i nga whakahere mo te pai, ka manaakitia e ia te iwi i runga i te ingoa o Ihowa. <sup>3</sup> I tuwhaina ano e ia ma nga tangata katoa o Iharaira, ma te tane, ma te wahine, kotahi rohi taro ma tenei, ma tenei, tetahi wahi kikokiko, me tetahi keke karepe whakamaroke. <sup>4</sup> I whakaritea ano e ia etahi o nga Riwaiti hei minita ki mua i te aaka a Ihowa, hei whakamahara, hei whakawhetai, hei whakamoemiti ki a Ihowa, ki te Atua o Iharaira: <sup>5</sup> Ko Ahapa hei tuatahi; i muri i a ia ko Hakaraia, ko Teiere, ko Hemiramoto, ko Penaia, ko Opereeroma, ko Teiere hoki ki nga hatere, ki nga hapa, ko Ahapa hei whakatangi i nga himipora: <sup>6</sup> Ko Penaia hoki raua ko Tahatiere, ko nga tohunga, kia tuturu tonu ta raua mau tetere ki mua i te aaka o te kawenata a te Atua. <sup>7</sup> I reira ano i taua ra ka whakaritea tuatahitia e Rawiri he whakamoemiti mo Ihowa, na te ringa o Ahapa ratou ko ona teina. <sup>8</sup> Whakawhetai atu ki a Ihowa, karanga ki tona ingoa; whakapuakina ana mahi ki waenganui o nga iwi. <sup>9</sup> Waiata ki a ia, himene ki a ia; korerotia ana mahi whakamiharo katoa. <sup>10</sup> Kia whakamanamana koutou ki tona ingoa tapu: kia hari nga ngakau o te hunga e rapu ana i a Ihowa. <sup>11</sup> Rapua a Ihowa, me tona kaha; rapua tonutia tona mata. <sup>12</sup> Maharatia ana mahi whakamiharo i mahi ai ia; ana merekara, me nga whakaritenga a tona mangai; <sup>13</sup> E nga uri o Iharaira, o tana pononga, e nga tama a Hakopa, e ana i whiriwhiri ai. <sup>14</sup> Ko Ihowa ia, ko to tatou Atua: kei te whenua katoa ana whakaritenga. <sup>15</sup> Maharatia tonutia tana kawenata, te kupu i kiia iho e ia ki te mano o nga whakatupuranga; <sup>16</sup> Te kawenata i whakarite ai ia ki a Aperahama, tana

<sup>17</sup> oati hoki ki a Ihaka; A whakapumautia iho hei tikanga ki a Hakopa, hei kawenata mau tonu ki  
<sup>18</sup> a Iharaira: I a ia i mea ra, Ka hoatu e ahau ki a koe te whenua o Kanaana hei wahi pumau mo  
<sup>19</sup> koutou: I te mea e torutoru ana ano koutou; ae, e tokoiti rawa ana, he manene hoki ki reira; I  
<sup>20</sup> a ratou e haereere ana i tenei iwi ki tera atu iwi, i tetahi rangatiratanga ki tetahi iwi ke. Kihai  
<sup>21</sup> ratou i tukua e ia kia tukinotia e te tangata; ae ra, i riria e ia nga kingi, he whakaaro ki a ratou; I  
<sup>22</sup> mea ia, Kei pa ki aku i whakawahi ai, kei kino hoki ki aku poropiti. Waiata, e te whenua katoa  
<sup>23</sup> ki a Ihowa; kauwhautia tana mahi whakaora i tena rangi, i tena rangi. Whakapuakina tona kororia  
<sup>24</sup> i waenganui i nga tauwi, ana mahi whakamiharo i waenganui i nga iwi katoa. He nui hoki a  
<sup>25</sup> Ihowa, kia nui te whakamoemiti ki a ia; kia wehingia nuitia atu hoki ia i nga atua katoa. He  
<sup>26</sup> whakapakoko hoki nga atua katoa o nga iwi: na Ihowa ia i hanga nga rangi. He honore, he  
<sup>27</sup> kingitanga kei tona aroaro; kei tona wahi te kaha me te koa. Tukua ki a Ihowa, e nga hapu o nga  
<sup>28</sup> iwi, tukua ki a Ihowa te kororia me te kaha. Tukua atu ki a Ihowa te kororia e tika ana mo tona  
<sup>29</sup> ingoa: maua mai he whakahere, haere mai ki tona aroaro: koropiko ki a Ihowa i roto i te ataahua o  
<sup>30</sup> te tapu. Kia wehi ra ki tona aroaro, e te whenua katoa: e u ano te ano, te taea te whakanekeneke.  
<sup>31</sup> Kia hari nga rangi, kia koa te whenua; kia mea ratou i roto i nga iwi, Ko Ihowa te kingi. Kia  
<sup>32</sup> haruru te moana, me nga mea e hua ana i roto; kia koa te mara, me nga mea katoa i runga: Ko  
<sup>33</sup> reira nga rakau o te ngahere waiata ai i te hari i te aroaro o Ihowa, e haere mai ana hoki ia ki te  
<sup>34</sup> whakarite i runga i te whenua. Whakawhetai ki a Ihowa, he pai hoki ia, he pumau tonu hoki  
<sup>35</sup> tana mahi tohu. Mea atu hoki, Whakaorangia matou, e te Atua o to matou whakaoranga, kohikohia  
<sup>36</sup> matou, whakaorangia matou i nga tauwi, kia whakawhetai ai matou ki tou ingoa tapu, kia  
<sup>37</sup> whakamanamana ai ki tou whakamoemititanga. Kia whakapaingia a Ihowa, te Atua o Iharaira  
<sup>38</sup> ake nei, a ake nei. Na ka mea te iwi katoa, Amine; a whakamoemiti ano ratou ki a Ihowa.  
<sup>39</sup> Heoi ka waiho e ia i reira, i mua i te aaka o te kawenata a Ihowa, a Ahapa ratou ko ona teina,  
<sup>40</sup> hei minita tonu ki mua i te aaka, i nga meatanga o tenei ra, o tenei ra: A Opereeroma me o ratou  
<sup>40</sup> teina, e ono tekau ma waru; a Opereeroma hoki tama a Ierutunu, raua ko Hoha hei kaitiaki tatau;  
<sup>39</sup> Ko Haroko tohunga me ona teina, me nga tohunga, ki mua o te tapenakara o Ihowa i te wahi  
<sup>40</sup> tiketike i Kipeono, Hei whakaeke tonu i nga tahunga tinana ma Ihowa ki runga ki te aata tahunga

tinana i te ata, i te ahiahi, hei mea i nga mea katoa i tuhituhia ki te ture a Ihowa, i whakahaua e ia  
 ki a Iharaira; <sup>41</sup> A, hei hoa mo ratou a Hemana raua ko Ierutunu, me era atu i whiriwhiria, i  
 whakahuatia nei nga ingoa, hei whakawhetai ki a Ihowa, no te mea he pumau tonu tana mahi tohu;  
<sup>42</sup> Hei hoa hoki mo ratou a Hemana raua ko Ierutunu me nga tetere me nga himipora ma nga  
 kaiwhakatangi kaha, me nga whakatangi mo nga waiata a te Atua: a ko nga tama a Ierutunu hei  
<sup>43</sup> kaitiaki kuwaha. Na haere ana te iwi katoa ki tona whare, ki tona whare; a hoki ana a Rawiri ki  
 te manaaki i tona whare.

## Chapter 17

<sup>1</sup> A, i a Rawiri e noho ana i tona whare, ka mea a Rawiri ki a Natana poropiti, Na kei te noho  
 ahau ki te whare hita, ko te aaka ia o te kawenata a Ihowa kei raro i te arai kakahu e noho ana.  
<sup>2</sup> Ano ra ko Natana ki a Rawiri, Meatia nga mea katoa i tou ngakau; kei a koe hoki te Atua. <sup>3</sup> Na i  
 taua po ka puta te kupu a te Atua ki a Natana, ka mea, <sup>4</sup> Haere, mea atu ki taku pononga, ki a  
 Rawiri, Ko te kupu tenei a Ihowa, Kaua e hanga e koe he whare hei nohoanga moku: <sup>5</sup> Kahore nei  
 hoki ahau i noho i roto i te whare, o te rangi i kawea mai ai e ahau a Iharaira a taea noatia tenei ra;  
<sup>6</sup> heoi he noho haere toku i tetahi teneti ki tetahi teneti, i tetahi tapenakara ki tetahi tapenakara. I  
 oku haereerenga katoa i roto i a Iharaira katoa i puaki ranei tetahi kupu aku ki tetahi o nga  
 kaiwhakarite o Iharaira i whakaritea e ahau hei hepara mo taku iwi? i mea ranei ahau, He aha koutou  
<sup>7</sup> te hanga whare hita ai moku? No reira kia penei tau ki atu aiane ki taku pononga, ki a Rawiri,  
 Ko te kupu tenei a Ihowa o nga mano, Naku koe i tango i te nohoanga hipi, i te whai hipi, hei  
<sup>8</sup> rangatira mo taku iwi, mo Iharaira: A, i a koe ahau i ou haerenga katoa; hautopea atu ana e ahau  
 ou hoariri katoa i tou aroaro; a meinga ana koe e ahau hei ingoa, hei pera ano me te ingoa o nga  
<sup>9</sup> mea nunui o te whenua. Na maku e whakarite he wahi mo taku iwi, mo Iharaira; ka whakatokia  
 ano ratou e ahau kia noho ki to ratou ake, e kore ano ratou e ngaueue a muri ake nei; e kore ano  
<sup>10</sup> ratou e pehia ki raro i muri nei e nga tama a te kino; e kore e pera me to mua, Me to te wa ano  
 i whakaritea ai e ahau nga kaiwhakarite mo taku iwi, mo Iharaira; a ka pehia e ahau ki raro ou  
<sup>11</sup> hoariri katoa. Ko tetahi, e mea atu ana ahau ki a koe, ma Ihowa e hanga he whare mou. A ka  
 tutuki ou ra, ka haere koe ki ou matua, na ka whakaarahia e ahau tou uri i muri i a koe i roto i au  
<sup>12</sup> tama, ka whakapumautia ano e ahau tona kingitanga. Mana e hanga he whare moku, a ka  
<sup>13</sup> whakapumautia e ahau tona torona a ake ake. Ko ahau hei matua ki a ia, ko ia hei tama ki ahau,

e kore ano e mutu toku aroha ki a ia, e kore e pera me toku i mutu ki tera i mua atu na i a koe. <sup>14</sup> A  
 ka tuturu ia ki toku whare, ki toku kingitanga a ake ake: a ka mau tonu tona torona mo ake tonu  
<sup>15</sup>  
 atu. Rite tonu ki enei kupu katoa, ki tenei putanga katoa, nga kupu a Natana ki a Rawiri.  
<sup>16</sup>  
 Na ka haere a Kingi Rawiri, ka noho ki te aroaro o Ihowa; a ka mea ia, Ko wai ahau, e Ihowa,  
<sup>17</sup>  
 e te Atua, he aha hoki toku whare, i kawea mai ai ahau e koe ki konei? He mea iti ano tenei ki  
 tau titiro, e te Atua; kua korerotia nei hoki e koe te whare o tau pononga a tau tini noa atu, a kua  
<sup>18</sup>  
 titiro mai hoki koe ki ahau, ano ki te tangata nui rawa, e Ihowa, e te Atua. Ko te aha ake hei  
 korerotanga ma Rawiri ki a koe mo te whakahonore i tau pononga? e mohio ana hoki koe ki tau  
<sup>19</sup>  
 pononga. He whakaaro ki tau pononga, e Ihowa, rite tonu ano ki ta tou ngakau, i mea ai koe i  
<sup>20</sup>  
 enei mea nunui katoa, i whakaritea mai ai enei mea nunui katoa. Kahore he rite mou, e Ihowa,  
<sup>21</sup>  
 kahore atu hoki he atua, ko koe anake; rite tonu ki nga mea katoa i rongo ai o matou taringa. Ko  
 tehea iwi hoki o te whenua hei rite mo tau iwi, mo Iharaira, i haere nei te Atua ki te hoki hei iwi  
 mana ake, hei mea ingoa mou, ki nga hanga nunui, whakamataku hoki, i te peinga atu i nga tau iwi  
<sup>22</sup>  
 i te aroaro o tau iwi i hokona nei e koe i Ihi pa? Kua meinga nei hoki e koe tau iwi, a Iharaira,  
<sup>23</sup>  
 hei iwi mau a ake ake: me koe hoki, e Ihowa hei Atua mo ratou. Na whakamana aiane, e Ihowa,  
 te kupu i korerotia e koe mo tau pononga, mo tona whare hoki ake ake, meatia hoki tau i korero ai.  
<sup>24</sup>  
 Kia mana ano, kia whakanuia hoki tou ingoa a ake ake, kia korerotia ai, Ko Ihowa o nga mano  
 te Atua o Iharaira, hei Atua ano ki a Iharaira; a ka tuturu tonu te whare o tau pononga, o Rawiri, ki  
<sup>25</sup>  
 tou aroaro. Nau nei hoki, e toku Atua, i whakapuaki mai ki tau pononga, ka hanga e koe he  
<sup>26</sup>  
 whare mona: koia te ngakau o tau pononga i anga ai ki te inoi ki tou aroaro. Na ko koe, e Ihowa,  
<sup>27</sup>  
 te Atua, a kua korerotia e koe tenei mea pai ki tau pononga: A kua pai tenei koe ki te manaaki  
 i te whare o tau pononga, kia pumau tonu ai ki tou aroaro: ko koe hoki hei manaaki, e Ihowa, a ka  
 manaakitia ake ake.

## Chapter 18

<sup>1</sup>  
 Na, muri iho i tenei, ka patua e Rawiri nga Pirihitini, a pehia ana e ia ki raro, tangohia ana e  
<sup>2</sup>  
 ia a Kata me ona pa ririki i te ringa o nga Pirihitini. I patua ano e ia a Moapa: na kua waiho nga  
<sup>3</sup>  
 Moapi hei pononga ma Rawiri, a homai ana he hakari e ratou. I patua ano e Rawiri a Hararetere

kingi o Topa a tae noa ki Hamata, i tona haerenga ki te whakau i tona rohe ki te awa, ki Uparati.

4

Na tangohia ana e Rawiri i a ia kotahi mono nga hariata, e whitu mano nga hoia eke hoiho, e rua tekau mano nga tangata haere i raro: a i whakangongea e Rawiri nga hoiho katoa o nga hariata,

5

engari i whakatoea o ratou nga mea mo nga hariata kotahi rau. A, no te haerenga mai o nga Hiriani o Ramahiku ki te whakauru i a Hararetere kingi o Topa, patua iho e Rawiri o nga Hiriani e rua

6

tekau ma rua mano tangata. Katahi ka whakanohoia e Rawiri he hoia pupuri ki Hiria o Ramahiku; a ka waiho nga Hiriani hei pononga ma Rawiri, a homai ana he hakari e ratou. Na homai ana e

7

Ihowa kia toa a Rawiri i ona haerenga katoa. A tangohia ana e Rawiri nga whakangungu rakau

8

koura o nga tangata a Hararetere, a kawea ana ki Hiruharama. A nui atu te parahi i tangohia e Rawiri i Tipihata, i Kunu, i nga pa o Hararetere; no reira te moana parahi, nga pou, me nga oko parahi i hanga nei e Horomona.

9

A, no te rongonga o Tohu kingi o Hamata kua patua e Rawiri te ope katoa a Hararetere kingi

10

o Topa, Ka tonoa e ia a Hatorama, tana tama, ki a Kingi Rawiri ki te oha ki a ia, ki te manaaki hoki i a ia, mona i whawhai ki a Hararetere, i patu hoki i a ia: he hoariri hoki a Hararetere no Tohu;

11

a he taonga ana, te tini o nga oko koura, hiriwa, para hi. Whakatapua ake era e Kingi Rawiri ma Ihowa hei tapiri mo te hiriwa, mo te koura, i maua mai e ia i nga iwi katoa; i nga Eromi, i nga

12

Moapi, i nga tama a Amona, i nga Pirihitini, i nga Amareki. Na i patua hoki e Apihai tama a

13

Teruia etahi o nga Eromi ki te Raorao Tote, kotahi tekau ma waru mano. I whakanohoia ano e ia he hoia pupuri ki Eroma: a ka meinga nga Eromi katoa hei pononga ma Rawiri. Na homai ana

14

e Ihowa kia toa a Rawiri i ona haerenga katoa. Na ko Rawiri te kingi o Iharaira katoa; a i mahi

15

i te whakawa, i te tika mo tona iwi katoa. A ko Ioapa tama a Teruia te rangatira ope, ko Iehohapata

16

tama a Ahiruru te kaiwhakamahara. Ko Haroko tama a Ahitupu raua ko Apimereke tama a

17

Apiatara nga tohunga; ko Hawaha hoki te kaituhituhi; Ko Penaia tama a Iehoiara te rangatira mo nga Kereti, mo nga Pereti; ko nga tama ia a Rawiri nga tino rangatira i te taha o te kingi.

## Chapter 19

1

Na i muri i tenei ka mate a Nahaha kingi o nga tama a Amona, a ko tana tama te kingi i muri

2

i a ia. Na ka mea a Rawiri, Ka puta toku aroha ki a Hanunu tama a Nahaha; i puta hoki te aroha o tona papa ki ahau. Na ka unga e Rawiri etahi tangata ki te whakamarie i a ia mo tona papa. Na



kua tae nga tangata a Rawiri ki te whenua o nga tama a Amona ki a Hanunu, ki te whakamarie i a

<sup>3</sup> ia. Otiia ka mea nga rangatira o nga tama a Amona ki a Hanunu, Ki tou whakaaro he whakahonore na Rawiri i tou papa i tonoa mai ai e ia nga kaiwhakamarie ki a koe? he teka ianei he titiro, he

whakangaro, he tutei i te whenua te mea i haere mai ai ana tangata ki a koe? <sup>4</sup> Heoi ka mau a Hanunu ki nga tangata a Rawiri, heua ana e ia, tapahia ana o ratou kakahu ki waenga, i te ritenga

<sup>5</sup> iho o o ratou papa, a tonoa atu ana ratou. Katahi ka haere etahi, ka korero ki a Rawiri i te meatanga ki aua tangata. Na ka tono tangata ia ki te whakatau i a ratou; he nui hoki te whakama o aua tangata. A ka mea te kingi, Hei Heriko koutou noho ai, kia tupu ra ano o koutou pahau, ko reir a hoki mai ai.

<sup>6</sup> A, no te kitenga o nga tama a Amona e piro ana ratou ki a Rawiri, ka hoatu e Hanunu ratou ko nga tama a Amona etahi taranata hiriwa kotahi mano kia kawea hei utu hariata, kaieke hoiho, i

Mehopotamia, i Aramamaaka, i Topa. <sup>7</sup> Heoi e toru tekau ma rua mano hariata i utua e ratou, me te kingi ano o Maaka ratou ko ana tangata; a haere mai ana ratou, noho ana ki mua i Merepa. Na

ka huihui nga tama a Amona i o ratou pa, haere ana mai ki te whawhai. <sup>8</sup> A, i te rongonga o Rawiri,

<sup>9</sup> ka tonoa e ia a Ioapa ratou ko te ope katoa, ara nga marohirohi. Na ka puta nga tama a Amona ki waho, a whakatakotoria ana o ratou ngohi ki te kuwaha o te pa. Na, ko nga kingi i haere nei, he

<sup>10</sup> mea motu ke ratou i te parae. A, no te kitenga o Ioapa e akina ana a mua, a muri ona e te hoariri, ka whiriwhiria e ia etahi i roto i te hunga whiriwhiri katoa o Iharaira, a whakaritea ana e ia hei tu

<sup>11</sup> i nga Hiriani: Ko te nuinga atu hoki o te iwi i tukua e ia ki te ringa o Apihai, o tona teina, a ka

<sup>12</sup> whakatikaia ratou e ratou hei tu i nga tama a Amona. I mea ano ia, Ki te kaha nga Hiriani i ahau, me awhina mai ahau e koe; ki te kaha ia nga tama a Amona i a koe, na maku koe e awhina atu.

<sup>13</sup> Kia maia, kia whakatane tatou; me whakaaro ki to tatou iwi, ki nga pa o to tatou Atua, a ma

<sup>14</sup> Ihowa e mea te mea e pai ana ki tana titiro. Heoi, ko te whakatatanga o Ioapa ratou ko tona

<sup>15</sup> nuinga ki te whawhai ki nga Hiriani, na, rere ana ratou i tona aroaro. A, no te kitenga o nga tama a Amona kua rere nga Hiriani, na, ka rere ano ratou i te aroaro o tona teina, o Apihai, a haere ana

<sup>16</sup> ki roto ki te pa. Katahi ka haere a Ioapa ki Hiruharama. A, no te kitenga o nga Hiriani kua patua ratou e Iharaira, ka tono tangata a ka tikina atu nga Hiriani i tawahi o te awa: a ko Topaka rangatira

<sup>17</sup> o te ope a Hararetere ki mua i a ratou. Na ka korerotia ki a Rawiri, a ka huihuia e ia a Iharaira katoa, a whiti ana ki tawahi o Horano, whakaekea ana e ia, whakatikaia ana e ia nga ngohi hei tu i a ratou. Na, ka oti nga ngohi te whakatika e Rawiri hei tu i nga Hiriani, ka whawhai rat ou ki a ia.

<sup>18</sup> Na ka rere nga Hiriani i te aroaro o Iharaira; a patua iho o nga Hiriani e Rawiri nga tangata o nga hariata e whitu mano, e wha tekau mano nga tangata haere i raro; i patua ano e ia a Topaka te

19  
rangatira ope. A, i te kitenga o nga tangata a Hararetere kua mate ratou i a Iharaira, ka houhia e ratou te rongo ki a Rawiri, a ka meinga ratou te rongo ki a Rawiri, a ka meinga ratou hei tangata mana: kihai hoki nga Hiriani i pai ki te awhina i nga tama a Am ona i muri atu.

## Chapter 20

1 A, i te takanga o te tau, i te wa e haere ai nga kingi ki te whawhai, na, ka arahina atu he taua maia e Ioapa; a huna iho e ratou te whenua o nga tama a Amona; haere ana, kei te whakapae i Rapa.  
Ko Rawiri ia i noho ki Hiruharama. Na ka patua a Ra pa e Ioapa, ngaro ana i a ia. 2 Tangohia ana e Rawiri te karauna o to ratou kingi i tona matenga, a ko tona taimaha i kitea e ia, kotahi taranata koura, he kohatu utu nui ano o taua karauna; potaea iho ki te matenga o Rawiri. I whakaputaina ano e ia nga taonga o te pa, tona tin i. 3 Na, ko nga tangata i roto, whakaputaina ana e ia ki waho, poroporoa iho e ia ki te kani, ki te rakaraka rino, ki te toki. Ko ta Rawiri tenei i mea ai ki nga pa katoa o nga tama a Amona. Na hoki ana a Rawiri me te iwi katoa ki Hiruharama.  
4 A, i muri iho i tenei ka tupu te whakawhai ki nga Pirihitini ki Ketere: katahi ka patua e Hipekai Huhati a Hipai o nga tama a Rapa; na pehia ana ratou ki raro. 5 A ka ara ano he whawhai ki nga Pirihitini; na ka patua e Erehanana, tama a Iaare, a Rahami teina o Koriata o Kata, ko te kakau o tana taoroa, rite tonu ki te rakau a te kaiwhatu. 6 Na i whawhai ano ki Kata, a i reira tetahi tangata roa, ko nga maihao o ona ringa me ona waewae e rua tekau ma wha, takiono ki ia ringa, a takiono ki ia waewae; a he uri ia no Rapa. 7 I tana whakataranga i a Iharaira, patua ana ia e Honatana tama a Himea tuakana o Rawiri. 8 I whanau enei a Rapa ki Kata; a hinga ana i te ringa o Rawiri, i te ringa ano o ana tangata.

## Chapter 21

1 Na ka tu a Hatana hei hoariri mo Iharaira, a ka whakakiki a Rawiri ki te tatau i a Iharaira.  
2 Na ka ki a Rawiri ki a Ioapa ratou ko nga rangatira o te iwi, Tikina taua a Iharaira, o Peerehepa atu a tae noa ki Rana, ka kawae mai ai i to ratou tokomaha ki ahau, kia mohio ai ahau. 3 Ano ra ko Ioapa, Ma Ihowa e mea tana iwi kia rau noa atu i a ratou e noho nei, otiia, e toku ariki, e te kingi, ehara ianei ratou katoa i te pononga na toku ariki? He aha ra tenei i whaia ai e toku ariki? he aha i

waiho ai hei take he mo Iharaira? <sup>4</sup> Otiia kaha tonu ta te kingi kupu i ta Ioapa. Heoi ka turia atu e Ioapa, haereerea ana e ia a Iharaira katoa; kua tae ki Hiruharama. <sup>5</sup> Na ka homai e Ioapa te tokomaha o te iwi i taua ki a Rawiri. Na a Iharaira katoa, he mano nga mano me nga mano kotahi rau, he hunga unu hoari; na a Hura, e wha rau e whitu tekau mano nga tangata unu hoari. <sup>6</sup> Ko Riwai ia raua ko Pineamine, kihai i taua e ia i roto i a ratou; he mea whakarihariha hoki ki a Ioapa te kupu a te kingi.

<sup>7</sup> Na ka riri te Atua ki tenei mea; a patua ana a Iharaira e ia. <sup>8</sup> Na ka mea a Rawiri ki te Atua, Nui atu toku hara i ahau i mea i tenei mea: na, tena, kia whakarerea noatia iho te he o tau pononga, nui atu hoki toku kuware. <sup>9</sup> Na ka puta te kupu a Ihowa ki ta Rawiri matakite, ki a Kara; i ki ia, <sup>10</sup>

Haere, ki atu ki a Rawiri, mea atu, Ko te kupu tenei a Ihowa, E toru enei mea ka whakaaria atu nei e ahau ki a koe, whiriwhiria tetahi o enei mau, a ka meatia e ahau ki a koe. <sup>11</sup> Heoi, ko te taenga o Kara ki a Rawiri, ka mea ki a ia, Ko te kupu tenei a Ihowa, Whiriwhiria mau, <sup>12</sup> Kia toru ranei nga tau matekai; kia toru ranei nga marama e whakangaromia ai koe i te aroaro o ou hoariri, me te hoari a ou hoa whawhai e hopu ana i a koe? kia toru ranei nga ra o te hoari a Ihowa, ara o te mate uruta ki te whenua, me te anahera a Ihowa e whakangaro ana, i nga rohe katoa o Iharaira. Na

<sup>13</sup> whakaaroa te kupu e whakahokia e ahau ki toku kaitono mai. Ano ra ko Rawiri ki a Kara, He noa iho oku whakaaro; na kia taka ahau ki te ringa o Ihowa, he nui hoki ana mahi aroha; kua hoki ahau e taka ki te ringa tangata. <sup>14</sup> Heoi whakapangia ana e Ihowa he mate uruta ki a Iharaira: a

<sup>15</sup> hinga iho o Iharaira e whitu tekau mano tangata. I tonoa ano e te Atua he anahera ki Hiruharama whakangaro ai; a ia a ia e mea ana ki te whakangaro, ka titiro a Ihowa, na ka puta ke to Ihowa whakaaro mo te kino, a ka mea ki te anahera whakangaro, Kua nui: kati tou ringa. Na tu ana te

<sup>16</sup> anahera a Ihowa i te patunga witi a Oronana Iepuhi. Na ka ara nga kanohi o Rawiri, ka kite i te anahera a Ihowa e tu ana i te takiwa o te whenua, o te rangi, me tana hoari, unu rawa, i tona ringa, e totoro ana ki runga i Hiruharama. Katahi ka tapapa a Rawiri ratou ko nga kaumatua, he kakahu

<sup>17</sup> tarat ara te hipoki. Ka mea a Rawiri ki te Atua, He teka ianei naku i ki kia taua te iwi? Ko ahau tenei te mea i hara, i mahi nei i te he; ko enei hipi ia, i aha ratou? E Ihowa, e toku Atua, kia pa ra tou ringa ki ahau, ki te whare ano o toku papa; kauaka ia ki tau iwi, hei whiu mo ratou.

<sup>18</sup> Katahi ka korero te anahera a Ihowa ki a Kara kia mea ia ki a Rawiri, kia haere a Rawiri ki runga, ki te whakaara i tetahi aata ki a Ihowa ki te patunga witi a Oronana Iepuhi. <sup>19</sup> Na haere ana

a Rawiri i ta Kara korero i korero ai ia i runga i te ingoa o Ihowa. <sup>20</sup> Na ka tahuri ake a Oronana,

<sup>21</sup> ka kite i te anahera; a piri ana ia, ratou ko ana tama tokowha. Na i te patu witi a Oronana. Na, i

a Rawiri e haere ana ki a Oronana, ka titiro a Oronana a ka kite i a Rawiri, na puta ana ia i te patunga witi, piko ana ki a Rawiri, tapapa ana ki te whenua. <sup>22</sup> Katahi ka mea a Rawiri ki a Oronana, Homai ki ahau te wahi i tenei patunga witi, kia hanga ai e ahau he aata ki a Ihowa; kia tino rite te utu ka homai ai e koe ki ahau, kia mutu ai te whiunga o te iwi. <sup>23</sup> Na ka mea a Oronana ki a Rawiri, Me tango mau, a ma toku ariki, ma te kingi e mea te mea e pai ana ki tana titiro; nana, ka hoatu e ahau ki a koe nga kau hei tahunga tinana, me nga patu witi hei wahie, me te witi ano hei whakahere totokore; ka h oatu katoa e ahau. <sup>24</sup> Na ka mea a Kingi Rawiri ki a Oronana, Kahore; engari ka hokona e ahau kia rite ano nga utu: e kore hoki ahau e tango i tau ma Ihowa, e kore hoki e whakaeke i nga mea kihai i utua hei tahunga tinana. <sup>25</sup> Heoi e ono rau nga hekere koura, he mea pauna, i hoatu e Rawiri ki a Oronana mo taua wahi. <sup>26</sup> A hanga ana e Rawiri he aata ki reira ma Ihowa, whakaekea ana he tahunga tinana, he whakahere mo te pai, a karanga ana ki a Ihowa. Na ka whakahokia tana i te rangi, he ahi ki runga ki te aata tahunga tinana. <sup>27</sup> Na ka korero a Ihowa ki te anahera, a whakahokia ana e ia tana hoari ki tona takotoranga. <sup>28</sup> I taua wa ano, i te kitenga o Rawiri kua whakarongo a Ihowa ki a ia i te patunga witi a Oronana Iephui, ka mea patunga tapu ia ki reira. <sup>29</sup> Ko te tapenakara hoki o Ihowa i hanga nei e Mohi ki te koraha, me te aata tahunga tinana, i te wahi tiketike i Kipeono i taua wa. <sup>30</sup> Kihai ia a Rawiri i ahei te haere ki mua o taua aata ki te rapu i ta te Atua; i wehi hoki ia i te hoari a te anahera a Ihowa.

## Chapter 22

<sup>1</sup> Katahi ka ki a Rawiri, ko te whare tenei o Ihowa, o te Atua, ko te aata tahunga tinana ano tenei ma Iharaira. <sup>2</sup> I whakahau ano a Rawiri kia huihuia nga tangata iwi ke o te whenua o Iharaira; i whakaritea e ia he kaihahau hei hahau kohatu tarai, hei hanga mo te whare o te Atua. <sup>3</sup> I mahia ano e Rawiri he rino, tona nui na, hei whao mo nga tatau o nga kuwaha, mo nga hononga, me te parahi ano, he nui noa atu, kihai i paunatia; <sup>4</sup> Me te rakau, he hita, kihai i taua; he maha hoki nga rakau, nga hita, i kawea mai e nga tangata o Hairona, o Taira, ki a Rawiri. <sup>5</sup> Na ka mea a Rawiri, He taitamariki taku tama, a Horomona, he ngawari, a ko te whare e hanga ma Ihowa, kia nui rawa te ingoa, te kororia, i nga whenua katoa: maku e timata te mahi mea mo reira. Na he maha nga mea i pae i a Rawiri i mua i tona mate nga.

<sup>6</sup> Katahi ka karangatia e ia tana tama a Horomona, a whakahaua ana e ia kia hanga te whare o  
Ihowa, o te Atua o Iharaira. <sup>7</sup> Na ka mea a Rawiri ki a Horomona, ki tana tama, Ko ahau, i whai  
<sup>8</sup> ngakau ahau ki te hanga i te whare mo te ingoa o Ihowa, o toku Atua. Otiia i puta mai te kupu a  
Ihowa ki ahau; i mea ia, He nui nga toto i whakahekea e koe; he nui nga whawhai i whawhai ai  
koe. E kore e hanga e koe he whare mo toku ingoa; he nui hoki nga toto i whakahekea e koe ki te  
<sup>9</sup> whenua ki toku aroaro: Nana, ka whanau he tama mau, he tangata ata noho; ka meinga ano ia e  
ahau kia ata noho i ona hoariri a tawhio noa: ko tona ingoa ko Horomona, a ka hoatu e ahau te  
<sup>10</sup> rongo mau, me te rangimarie ki a Iharaira i ona ra. Mana e hanga he whare mo toku ingoa; ko  
ia hei tama ki ahau, ko ahau hei papa ki a ia. Na ka whakapumautia e ahau te torona o tona kingitanga  
<sup>11</sup> ki a Iharaira a ake ake. Na, e taku tama, kia noho a Ihowa ki a koe; kia kake koe, kia hanga ano  
<sup>12</sup> e koe te whare o Ihowa, o tou Atua, kia rite ano ki tana kupu mou. Kia homai ano ia e Ihowa  
he ngakau whakaaro, he mohio, ki a koe, kia whakahaua e ia ki a koe he tikanga mo Iharaira; kia  
<sup>13</sup> puritia ai e koe te ture a Ihowa, a tou Atua, Ko reira koe kake ai, ki te puritia e koe, ki te mahia,  
nga tikanga, me nga whakaritenga i whakahaua e Ihowa ki a Mohi mo Iharaira. Kia kaha, kia maia;  
<sup>14</sup> kua e wehi, kua e pawera. Nana, i ahau e he nei, kua pae i ahau he koura mo te whare o Ihowa,  
kotahi rau mano taranata; he hiriwa, kotahi mano mano taranata; me te parahi, me te rino, e kore  
e taea te paunga, he nui hoki; me te rakau, me te kohatu, kua pae i ahau. Mau an o e tapiri etahi ki  
<sup>15</sup> era. Kei a koe ano tona tini o nga kaimahi, o nga kaihahau, o nga kaimahi i te kohatu, i te rakau,  
<sup>16</sup> me nga mea mohio katoa ki nga mahi katoa. E kore e taea te tatau te koura, te hiriwa, te parahi,  
te rino. Whakatika, e mahi, a hei a koe a Ihowa.  
<sup>17</sup> I whakahau ano a Rawiri i nga rangatira katoa o Iharaira kia uru ki te mahi a tana tama, a  
<sup>18</sup> Horomona; i mea ia, He teka ianei ko Ihowa, ko to koutou Atua, hei hoa mo koutou? a kua  
meinga koutou kia ata noho a tawhio noa? kua homai hoki e ia nga tangata o te whenua ki toku  
<sup>19</sup> ringa; a kua taea te whenua te pehi i te aroaro o Ihowa, i te aroaro ano o tana iwi. Na tukua o  
koutou ngakau, o koutou wairua, ki te rapu i a Ihowa, i to koutou Atua. Whakatika ki te hanga i te  
wahi tapu o te Atua, o Ihowa, ki te kawe mai ano i te aaka o te kawenata a Ihowa, i nga oko tapu  
a te Atua, ki te whare ka hanga nei mo te ingoa o Ihowa.

## Chapter 23

<sup>1</sup> Na kua koroheketia a Rawiri, kua rite ona tau; a ka meinga e ia tana tama a Horomona hei  
kingi mo Iharaira. <sup>2</sup> Na ka huihuia e ia nga rangatira katoa o Iharaira, ratou ko nga tohunga, ko nga  
<sup>3</sup> Riwaiti. Na ka taua nga Riwaiti, nga mea e toru tekau, he maha atu ranei, o ratou tau. Na, ko to  
<sup>4</sup> ratou tokomaha, he mea tatau a tangata tonu, e toru tekau ma waru mano. O enei, e rua tekau ma  
wha mano hei whakahaere i te mahi o te whare o Ihowa; na, ko nga rangatira, ko nga kaiwhakarite,  
<sup>5</sup> e ono mano. Na e wha mano hei kaitiaki kuwaha, a e wha mano hei whakamoemiti ki a Ihowa i  
<sup>6</sup> runga i nga mea whakatangi i hanga e ahau, e ai ta Rawiri, hei mea whakamoemiti. A wehea ana  
ratou e Rawiri, he wehenga, he wehenga, ki nga tama a Riwai, a Kerehona, a Kohata, a Merari.  
<sup>7</sup> O nga Kerehoni, ko Raarana, ko Himeii. <sup>8</sup> Ko nga tama a Raarana; ko te upoko ko Tehiere, ko  
<sup>9</sup> Tetama, ko Hoera, tokotoru. Ko nga tama a Himeii; ko Heromoto, ko Hatiere, ko Harana, tokotoru.  
<sup>10</sup> Ko nga upoko enei o nga whare o nga matua o Raarana. Na, ko nga tama a Himeii; ko Iahata,  
<sup>11</sup> ko Tina, ko Ieuhu, ko Peria. Ko enei tokowha he tama na Himeii. Ko Iahata te upoko, ko Tita te  
tuarua: na kihai i tokomaha nga tama a Ieuhu raua ko Peria, a hei whare matua raua, kotahi ano  
<sup>12</sup> tauanga. Ko nga tama a Kohata; ko Amarama, ko Itihara, ko Heperona, ko Utiere, tokowha.  
<sup>13</sup> Ko nga tama a Amarama; ko Arona raua ko Mohi. Na i motuhia a Arona hei whakatapu i nga  
mea tapu rawa, a ia me ana tama, ake ake hei tahu whakakakara ki te aroaro o Ihowa, hei minita  
<sup>14</sup> ki a ia, hei manaaki i runga i tona ingoa a ake ake. Na ko Mohi tangata a te Atua, no te iwi o  
<sup>15</sup> Riwai te karangatanga o ana tama. Ko nga tama a Mohi; ko Kerehoma, ko Erietere. <sup>16</sup> O nga  
<sup>17</sup> tama a Kerehoma, ko Hepuere te upoko. Na, ko nga tama a Erietere; ko Rehapia te upoko. A  
<sup>18</sup> kahore atu he tama a Erietere. He tokomaha rawa ia nga tama a Rehapia. O nga tama a Itihara;  
<sup>19</sup> ko Heromiti te upoko. O nga tama a Heperona; ko Teria te upoko, ko Amaria te tuarua, ko  
<sup>20</sup> Tahatiere te tuatoru, ko Tekameama te tuawha. O nga tama a Utiere; ko Mika te upoko, ko Ihiia  
<sup>21</sup> te tuarua. Ko nga tama a Merari; ko Mahari, ko Muhi. Ko nga tama a Mahari; ko Ereatara, ko  
<sup>22</sup> Kihii. Na ka mate a Ereatara; kahore ana tama; engari he tamahine: a riro ana ratou hei wahine  
<sup>23</sup> i o ratou tungane, i nga tama a Kihii. Ko nga tama a Muhi; ko Mahari, ko Erere, ko Teremoto,  
tokotoru.

<sup>24</sup> Ko nga tama enei a Riwai i nga whare o o ratou matua; ara nga upoko o nga whare o nga matua, he mea tatau a tangata, tenei ingoa, tenei ingoa o nga kaimahi i nga mea mo te whare o Ihowa, te hunga, e rua tekau, he maha atu hoki o ratou tau. <sup>25</sup> I mea hoki a Rawiri, Kua meinga nei e Ihowa, e te Atua o Iharaira tana iwi kia okioki, a ka mohu tonu ia ki Hiruharama: <sup>26</sup> Me nga Riwaiti, heoi ano ta ratou amohanga i te tapenakara, me ona mea katoa mo nga mahi ki reira. <sup>27</sup> Na nga kupu whakamutunga hoki a Rawiri i taua ai nga Riwaiti e rua nei tekau, he maha atu hoki, o ratou tau. <sup>28</sup> Ko te turanga hoki mo ratou kei te taha o nga tama a Arona, mo nga mahi o te whare o Ihowa, i nga marae, i nga ruma, i te purenga o nga mea tapu katoa, i te meatanga o te mahi te whare o te Atua; <sup>29</sup> Ara o te taro aroaro, o te paraoa mo te whakahere totokore, o nga keke rewenakore, o te mea i tunua ki te paraharaha, o te mea i paraipanatia, o nga mea katoa e mehuatia ana, e ruritia ana; <sup>30</sup> Hei tu i tenei ata, i tenei ata, ki te whakawhetai, ki te whakamoemiti ki a Ihowa; <sup>31</sup> kia pera hoki i te ahiahi; Hei whakaeke mo nga tahunga tinana katoa ma Ihowa i nga hapati, i nga marama hou, i nga hakari i whakaritea; he mea tatau tonu ratou, i runga i te tikanga mo ratou, i te aroaro tonu o Ihowa: <sup>32</sup> Ko ratou ano hei tiaki i nga mea o te tapenakara o te whakaminenga, hei tiaki i te wahi tapu, hei tiaki hoki i nga mea o o ratou tuakana, o nga tama a Arona, i te mea e mahi ana i nga mea o te whare o Ihowa.

## Chapter 24

<sup>1</sup> Na, ko nga wehenga o nga tama a Arona koia enei. Ko nga tama a Arona, ko Natapa, ko Apihu, ko Ereatara, ko Itamara. <sup>2</sup> I mate ia a Natapa raua ko Apihu ki te aroaro o to raua papa; kahore hoki a raua tama: a na Ereatara raua ko Itamara i mahi nga mahi a te tohunga. <sup>3</sup> Na ka wehea ratou e Rawiri ratou ko Haroko o nga tama a Ereatara, ko Ahimereke o nga tama a Itamara, he mea whakarite ki nga tikanga ma ratou mo a ratou mahi. <sup>4</sup> Na ka kitea he tokomaha rawa nga tino tangata o nga tama a Ereatara i o nga tama a Itamara; a ko to ratou wehenga tenei; o nga tama a Ereatara kotahi tekau ma ono nga tino tangata o nga whare o o ratou matua; o nga tama a Itamara, o nga whare o o ratou matua, tokowaru. <sup>5</sup> Ko to ratou wehenga hoki he mea rota, ko enei hui tahi ki era; a tera nga rangatira o te wahi tapu, me nga rangatira o te whare o te Atua no nga tama a Ereatara, no nga tama ano hoki a Itamara. <sup>6</sup> He mea tuhituhi ratou na Hemaia karaipi, tama a Netaneere, o nga Riwaiti, ki te aroaro o te kingi, o nga rangatira, o Haroko tohunga raua ko Ahimereke tama a Apiatara, ki te aroaro ano o nga upoko o nga whare o nga matua o nga tohunga, o nga Riwa iti:

kotahi whare matua i roto mo Ereatara, kotahi i roto mo Itamara. <sup>7</sup> Na, ko te putanga o te rota tuatahi,  
 no Tehoiaripi; ko te tuarua no Iraia, <sup>8</sup> Ko te tuatoru no Harimi, ko te tuawha no Heorimi, <sup>9</sup> Ko te  
 tuarima no Marakia, ko te tuaono no Miiamini, <sup>10</sup> Ko te tuawhitu no Hakoto, ko te tuawaru no  
 Apia, <sup>11</sup> Ko te tuaiwa no Hehua, ko te tekau no Hekania, <sup>12</sup> Ko te tekau ma tahi no Eriahihi, ko  
 te tekau ma rua no Iakimi, <sup>13</sup> Ko te tekau ma toru no Hupa, ko te tekau ma wha o Iehepeapa, <sup>14</sup> Ko  
 te tekau ma rima no Pirika, ko te tekau ma ono no Imere, <sup>15</sup> Ko te tekau ma whitu no Hetiri, ko te  
 tekau ma waru no Apahehe, <sup>16</sup> Ko te tekau ma iwa no Petahia, ko te rua tekau no Ehekiere, <sup>17</sup> Ko  
 te rua tekau ma tahi no Iakini, ko te rua tekau ma rua no Kamuru, <sup>18</sup> Ko te rua taku ma toru no  
 Teraia, ko te rua tekau ma wha no Maatia. <sup>19</sup> Ko nga tikanga enei mo ratou, mo a ratou mahi, mo  
 te tomo ki te whare o Ihowa, i runga i te ritenga mo ratou, i whakaritea e to ratou papa, e Arona,  
 ko ta Ihowa, ko ta te Atua o Iharaira i whakahau ai ki a ia.  
<sup>20</sup> Na ko era atu o nga tama a Riwai: o nga tama a Amarama; ko Hupaere: o nga tama a Hupaere;  
 ko Iehereia. <sup>21</sup> Na ko a Rehapia: o nga tama a Rehapia; ko te tuatahi ko Ihia. <sup>22</sup> O nga Itihari; ko  
 Heromoto: o nga tama a Heromoto; ko Iahata. <sup>23</sup> Na, ko nga tama a Heperona; ko Teria te tuatahi,  
 ko Amaria te tuarua, ko Tahatiere te tuatoru, ko Tekameama te tuawha. <sup>24</sup> O nga tama a Utiere;  
 ko Mika: o nga tama a Mika; ko Hamiri. <sup>25</sup> Ko te teina o Mika; ko Ihia: o nga tama a Ihia; ko  
 Hakaraia. <sup>26</sup> Ko nga tama a Merari; ko Mahari, ko Muhi: ko nga tama a Taatia; ko Peno. <sup>27</sup> Ko  
 nga tama a Merari, ara a Taatia; ko Peno, ko Hohama, ko Takuru, ko Ipiri. <sup>28</sup> Na Mahari, ko  
 Ereatara; a kahore a tenei tama. <sup>29</sup> Na ko a Kihia: ko te tama a Kihia, ko Ierameere. <sup>30</sup> Ko nga tama  
 ano a Muhi; ko Mahari, ko Erere, ko Terimoto. Ko nga tama enei a nga Riwaiti, no nga whare o o  
 ratou matua. <sup>31</sup> I maka rota ano enei i pera me o ratou tuakana, me nga tama a Arona, i te aroro  
 o Kingi Rawiri, o Haroko ano raua ko Ahimereke, o nga upoko ano o nga whare o nga matua o nga  
 tohunga, o nga Riwaiti, ara o nga tino matua i te ritenga o o ratou te ina.

## Chapter 25

<sup>1</sup> Na Rawiri hoki, ratou ko nga rangatira ope, i wehe mo te mahi etahi o nga tama a Ahapa, a  
 Hemana, a Ierutunu, hei poropiti i runga i te hapa, i te hatere, i te himipora. Na, ko te tokomaha o



nga kaimahi, me ta ratou mahi koia tenei: <sup>2</sup> No nga tama a Ahapa, ko Takuru, ko Hohepa, ko Netania, ko Atarera; ko te kaiwhakamahi mo nga tama a Ahapa, ko Ahapa; rite tahi ki ta te kingi

<sup>3</sup> tikanga tana poropiti. Ko a Ierutunu: ko nga tama a Ierutunu; ko Keraria, ko Teri, ko Ihaia, ko Hahapia, ko Matitia, tokoono: ko to ratou papa ko Ierutunu to ratou kaiwhakamahi. I poropiti ia i

<sup>4</sup> runga i te hapa, i whakawhetai, i whakamoemiti ki a Ihowa. Ko a Hemana: ko nga tama a Hemana; ko Pukia, ko Matania, ko Utiere, ko Hepuere, ko Terimoto, ko Hanania, ko Hanani, ko Eriata, ko

<sup>5</sup> Kirarati, ko Romamatietere, ko Iohopekaha, ko Maroti, ko Hotiri, ko Mahatioto. Ko enei katoa he tama na Hemana matakite a te kingi, mo nga mea a te Atua, hei hapai i te haona. Na homai ana

<sup>6</sup> e te Atua ki a Hemana kotahi tekau ma wha nga tama, tokotoru nga tamahine. Ko enei katoa he mea whakamahi na to ratou papa ki te waiata i te whare o Ihowa i runga i nga himipora, i te hatere, i te hapa, hei mahi ki te whare o te Atua, hei pera ano me ta te kingi i ki ai ki a Ahapa, ki a Ierutunu,

<sup>7</sup> ki a Hemana. Na, ko te tokomaha o ratou, o o ratou teina, i whakaakona ki nga waiata a Ihowa, ko te hunga mohio katoa, e rua rau e waru tekau ma waru.

<sup>8</sup> I maka rota ano ratou mo ta ratou e tiaki ai, te iti, te rahi, te kaiwhakaako raua ko te akonga.

<sup>9</sup> Na ko te putanga o te rota tuatahi no Ahapa, ki a Hohepa: o te tuarua no Keraria; tekau ma rua

<sup>10</sup> ratou ko ona teina, ko ana tama. O te tuatoru no Takuru: tekau ma rua ratou ko ana tama, ko ona

<sup>11</sup> teina. O te tuawha no Itiri; tekau ma rua ratou ko ana tama, ko ona teina. <sup>12</sup> O te tuarima no

<sup>13</sup> Netania; tekau ma rua ratou ko ana tama, ko ona teina. O te tuaono no Pukia; tekau ma rua ratou

<sup>14</sup> ko ana tama, ko ona teina. O te tuawhitu no Teharera; tekau ma rua ratou ko ana tama, ko ona

<sup>15</sup> teina. O te tuawaru no Ihaia; tekau ma rua ratou ko ana tama, ko ona teina. <sup>16</sup> O te tuaiwa no

<sup>17</sup> Matania; tekau ma rua ratou ko ana tama, ko ona teina. O te tekau no Himeji; tekau ma rua ratou

<sup>18</sup> ko ana tama, ko ona teina. O te tekau ma tahi no Atareere; tekau ma rua ratou ko ana tama, ko

<sup>19</sup> ona teina. O te tekau ma rua no Hahapia; tekau ma rua ratou ko ana tama, ko ona teina. <sup>20</sup> O te

<sup>21</sup> tekau ma toru no Hupaere; tekau ma rua ratou ko ana tama, ko ona teina. O te tekau ma wha no

<sup>22</sup> Matitia; tekau ma rua ratou ko ana tama, ko ona teina. O te tekau ma rima no Teremoto; tekau

<sup>23</sup> ma rua ratou ko ana tama, ko ona teina. O te tekau ma ono no Hanania; tekau ma rua ratou ko

<sup>24</sup> ana tama, ko ona teina. O te tekau ma whitu no Iohopekaha; tekau ma rua ratou ko ana tama,

<sup>25</sup> ko ona teina. O te tekau ma waru no Hanani; tekau ma rua ratou ko ana tama, ko ona teina. <sup>26</sup> O

te tekau ma iwa no Maroti; tekau ma rua ratou ko ana tama, ko ona teina. <sup>27</sup> O te rua tekau no Eriata; tekau ma rua ratou ko ana tama, ko ona teina. <sup>28</sup> O te rua tekau ma tahi no Hotiri; tekau ma rua ratou ko ana tama, ko ona teina. <sup>29</sup> O te rua tekau ma rua no Kirarati; tekau ma rua ratou ko ana tama, ko ona teina. <sup>30</sup> O te rua tekau ma toru no Mahatioto; tekau ma rua ratou ko ana tama, ko ona teina. <sup>31</sup> O te rua tekau ma wha no Romamatietere; tekau ma rua ratou ko ana tama, ko ona teina.

## Chapter 26

<sup>1</sup> Na, ko nga wehenga o nga kaitiaki kuwaha; no nga Korohi ko Meheremia tama a Kore, no nga tama a Ahapa. <sup>2</sup> Na, ko nga tama a Meheremia, ko Hakaraia te matamua, ko Teriaere te tuarua, ko Teparia te tuatoru, ko Iataniere te tuawha, <sup>3</sup> Ko Erama te tuarima, ko Iehohanana te tuaono, ko Erioenai te tuawhitu. <sup>4</sup> A ko nga tama a Opereeroma; ko Hemaia te matamua, ko Iehotapara te tuarua, ko Ioaha te tuatoru, ko Hakara te tuawha, ko Netaneere te tuarima, <sup>5</sup> Ko Amiere te tuaono, ko Ihakara te tuawhitu, ko Peurutai te tuawaru; he mea manaaki hoki ia na Ihowa. <sup>6</sup> A i whanau ano he tama ma tana tama ma Hemaia, he rangatira ratou mo te whare o to ratou papa: he marohirohi hoki ratou, he toa. <sup>7</sup> Ko nga tama a Hemaia; ko Otoni, ko Repaere, ko Opere, ko Eretapara; he marohirohi ano o ratou teina a Erihu raua ko Hemakia. <sup>8</sup> Ko enei katoa o nga tama a Opereeroma, me a ratou tama, me o ratou teina he kaha ki te mahi, e ono tekau ma rua; na Opereeroma. <sup>9</sup> Na he tama a Meheremia, he teina ano, he marohirohi, tekau ma waru. <sup>10</sup> He tama ano a Hoha o nga tama a Merari; ko Himiri te upoko; ahakoa ehara ia i te matamua, i meinga ia hei upoko e tona papa; <sup>11</sup> Ko Hirikia te tuarua, ko Teparia te tuatoru, ko Hakaraia te tuawha; ko nga tama katoa, me nga teina o Hoha, tekau ma toru. <sup>12</sup> I roto i enei nga wehenga o nga kaitiaki kuwaha, ara i roto i nga tino tangata, he mahi tiaki pera i ta o ratou tuakana, he minita i roto i te whare o Ihowa. <sup>13</sup> I maka rota ano ratou, te iti, te rahi, nga whare o o ratou matua, mo tenei kuwaha, mo tenei kuwaha. <sup>14</sup> Na i taka te rota whaka te rawhiti ki a Heremia. Katahi ka maka te rota a tana tama a Hakaraia, he mohio ia ki te whakatakoto whakaaro, a ko te rota mo te raki i puta ake mana. <sup>15</sup> Ki a Opereeroma

ko te rota mo te tonga; a ki ana tama ko te whare taonga. <sup>16</sup> Ki a Tupimi raua ko Hoha ko to te hauauru, me te kuwaha Harekete, i te huarahi e piki atu ai, tenei tiakanga i te ritenga mai o tenei tiakanga. <sup>17</sup> Tokoono nga Riwaiti mo to te rawhiti, tokowha mo to te raki i tenei ra, i tenei ra, tokowha mo to te tonga i tenei ra, i tenei ra, a ki te whare taonga tokorua, tokorua. <sup>18</sup> I Parapara whaka te hauauru, tokowha ki te huarahi, tokorua ki Parapara. <sup>19</sup> Ko nga wehenga enei o nga kaitiaki kuwaha i roto i nga tama a Kore, i nga tama ano a Merari. <sup>20</sup> Na o nga Riwaiti, ko Ahia ki nga taonga o te whare o Ihowa, ki nga taonga hoki kua oti te whakatapu. <sup>21</sup> Ko nga tama a Raarana; ko nga tama a nga Kerehoni na Raarana, ko nga upoko o nga whare o nga matua na Raarana Kerehoni; ko Tehieri. <sup>22</sup> Ko nga tama a Tehieri; ko Tetama, ko tona teina ko Hoera, i a ratou nga taonga o te whare o Ihowa. <sup>23</sup> No nga Amarami enei, ratou ko nga Itihari, ko nga Heperoni, ko nga Utieri. <sup>24</sup> Na ko Hepuere tama a Kerehoma tama a Mohi te rangatira mo nga taonga. <sup>25</sup> Me ona teina: na Erietere, tana tama a Rehapia, tana tama a Ihaia, tana tama a Iorama, tana tama a Tikiri, tana tama a Heromoto. <sup>26</sup> Ko tenei Heromoto ratou ko ona teina nga rangatira mo nga taonga katoa, mo nga mea i whakatapua, i whakatapua nei e Kingi Rawiri ratou ko nga upoko o nga whare o nga matua, ko nga rangatira o nga mano, o nga rau, ko nga rangatira ope. <sup>27</sup> Ko etahi o nga taonga parakete i riro parau mai, he mea whakatapu na ratou kia mau tonu ai te ora o te whare o Ihowa. <sup>28</sup> Na, ko nga mea katoa i whakatapua e Hamuera matakite, e Haora tama a Kihi, e Apanere tama a Nere, e Ioapa tama a Teruia, e te hunga katoa ano i whakatapua ai tetahi mea, i raro era i te ringa o Heromoto ratou ko ona teina. <sup>29</sup> O nga Itihari, ko Kenania ratou ko ana tama mo nga mahinga o waho ki a Iharaira, hei rangatira, hei kaiwhakawa. <sup>30</sup> O nga Heperoni, ko Hahapia ratou ko ona teina, he marohirohi, kotahi mano e whitu rau, hei rangatira i roto i te hunga o Iharaira i tenei taha o Horano whaka te hauauru, i nga minitanga katoa ki a Ihowa, i nga mahi ano a te kingi. <sup>31</sup> I roto i nga Heperoni ko Teriia te upoko, ara i roto i nga Heperoni, i runga ano i nga whakatapuranga o nga whare o nga matua. I te wha tekau o nga tau o te kingitanga o Rawiri i rapua ratou, a kua kitea etahi marohirohi i roto i a ratou, he toa, ki Iatere o Kireara. <sup>32</sup> Me ona teina, he toa, e rua mano e whitu rau, he upoko no nga whare o nga matua, meinga ana ratou e Kingi Rawiri hei rangatira mo nga Reupeni, mo nga Kari, mo tetahi tanga o te iwi o Manahi, mo nga mea katoa a te Atua, mo nga mea ano a te kingi.

## Chapter 27

<sup>1</sup> Na, ko nga tama a Iharaira, to ratou tokomaha, nga upoko o nga whare o nga matua, me nga rangatira o nga mano, o nga rau, me o ratou rangatira i mahi nei ki te kingi i nga mea katoa a nga wehenga i haere mai nei, i haere atu ranei, i tenei marama, i tenei marama, i nga marama katoa o te tau; e rua tekau ma wha mano o te wehenga kotahi. <sup>2</sup> Ko te rangatira o te wehenga tuatahi o te marama tuatahi, ko Iahoepama tama a Tapariere. E rua tekau ma wha mano i tona wehenga. <sup>3</sup> No nga tama ia a Perete, ko te rangatira o nga rangatira katoa o te ope mo te marama tuatahi. <sup>4</sup> Ko te rangatira o te wehenga mo te rua o nga marama, ko Rorai Ahohi, me tona wehenga; ko Mikiroto te rangatira. E rua tekau ma wha mano i tona wehenga. <sup>5</sup> Ko te tuatoru o nga rangatira ope, mo te toru o nga marama, ko Penaia tama a Iehoiara, he tohunga nui. E rua tekau ma wha mano i tona wehenga. <sup>6</sup> Ko taua Penaia tenei i nui nei i roto i te toru tekau, ko ia hoki te rangatira o te toru tekau. I roto tana tama a Amitapara i tona wehenga. <sup>7</sup> Ko te tuawha, mo te wha o nga marama, ko Atahere teina o Ioapa, me tana tama, me Teparia, i muri i a ia. E rua tekau ma wha mano i tona wehenga. <sup>8</sup> Ko te tuarima o nga rangatira, mo te rima o nga marama, ko Hamahutu Itirahi. E rua tekau ma wha mano i tona wehenga. <sup>9</sup> Ko te tuaono o nga rangatira, mo te ono o nga marama, ko Ira tama a Ikehe Tekoi. E rua tekau ma wha mano i tona wehenga. <sup>10</sup> Ko te tuawhitu, mo te whitu o nga marama, ko Herete Peroni, no nga tama a Eparaima. E rua tekau ma wha mano i tona wehenga. <sup>11</sup> Ko te tuawaru, mo te waru o nga marama, ko Hipekai Huhati, no nga Terahi. E rua tekau ma wha mano i tona wehenga. <sup>12</sup> Ko te tuaiwa, mo te iwa o nga marama, ko Apietere Anatoti, no nga Pineamine. E rua tekau ma wha mano i tona wehenga. <sup>13</sup> Ko te tekau, mo te tekau o nga marama, ko Maharai Netopati, no nga Terahi. E rua tekau ma wha mano i tona wehenga. <sup>14</sup> Ko te tekau ma tahi, mo te tekau ma tahi o nga marama, ko Penaia Piratoni, no nga tama a Eparaima. E rua tekau ma wha mano i tona wehenga. <sup>15</sup> Ko te tekau ma rua, mo te tekau ma rua o nga marama, ko Hererai Netopati, no Otoniere. E rua tekau ma wha mano i tona wehenga. <sup>16</sup> Na, ko nga rangatira o nga iwi o Iharaira: o nga Reupeni, ko Erietere tama a Tikiri te rangatira: o nga Himioni, ko Hepatia tama a Maaka: <sup>17</sup> O nga Riwaiti, ko Hahapia tama a Kemuere: o nga Aroni, ko Haroko: <sup>18</sup> O Hura, ko Erihu, no nga tuakana o Rawiri: o Ihakara, ko Omori tama a Mikaera: <sup>19</sup> O Hepurona, ko Ihimaia tama a Oparia; o Napatari ko Terimoto tama a Atariere: <sup>20</sup> O

nga tama a Eparaima, ko Hohea tama a Atatia: o tetahi tanga o te iwi o Manahi, ko Hoera tama a  
<sup>21</sup> Peraia: O tera tanga o te iwi o Manahi i Kireara, ko Iro tama a Hakaraia: o Pineamine, ko Taahiere  
<sup>22</sup> tama a Apanere: O Rana, ko Atareere tama a Ierohama. Ko nga rangatira enei o nga iwi o Iharaira.  
<sup>23</sup> Kihai ia i taua e Rawiri te hunga e rua tekau, he iti iho hoki nga tau; i mea hoki a Ihowa, ka  
<sup>24</sup> whakanuia e ia a Iharaira kia rite ki nga whetu o te rangi. Na Ioapa tama a Teruia i timata te  
tatau. Otiia kihai i oti i a ia; no te mea i pa he riri mo tenei mea ki a Iharaira; kihai hoki te tokomaha  
<sup>25</sup> i uru ki roto ki te tauanga o nga meatanga o nga ra o Kingi Rawiri. Na, ko te rangatira o nga  
taonga o te kingi, ko Atamawete tama a Ariere: ko te rangatira o nga whare taonga i nga mara, i  
<sup>26</sup> nga pa, i nga pa koraha, i nga taumaihi, ko Honatana tama a Utia. Ko te rangatira hoki o nga  
<sup>27</sup> kaimahi o te mara, i mahia ai te oneone, ko Eteri tama a Kerupu. Na mo nga mara waina ko  
Himeia Ramati. Ko te rangatira mo nga mea o nga mara waina e kawea ana ki nga toa waina, ko  
<sup>28</sup> Tapari Hipini. Mo nga oriwa, me nga hikamora i nga raorao, ko Paarahanana Kereri; mo nga  
<sup>29</sup> toa hinu ko Ioaha. Mo nga kau e haereere ana i Harono ko Hitirai Haroni; mo nga kau i nga  
<sup>30</sup> mania ko Hapata tama a Ararai. Mo nga kamera ko Opiri Ihimaeri. Mo nga kaihe ko Iehereia  
<sup>31</sup> Meronoti. Mo nga hipi, ko Iatiti Hakari. Ko enei katoa he rangatira no nga taonga o Kingi Rawiri.  
<sup>32</sup> Ko Honatana hoki, ko te matua keke o Rawiri, he kaiwhakatakoto whakaaro ia, he tangata mohio,  
<sup>33</sup> he karaipi. Ko Tehiere hoki tama a Hakamoni hei hoa mo nga tama a te kingi. Ko Ahitopere te  
<sup>34</sup> kaiwhakatakoto whakaaro a te kingi. Ko Huhai Araki he hoa no te kingi. I muri i a Ahitopere,  
ko Iehoiara tama a Penaia, ko Apiatara hoki. A, ko te rangatira ope a te kingi, ko Ioapa.

## Chapter 28

<sup>1</sup> Na ka whakaminea e Rawiri nga rangatira katoa o Iharaira, nga rangatira o nga iwi, nga  
rangatira o nga wehenga i mahi nei ki te kingi, me nga rangatira mano, me nga rangatira rau, me  
nga rangatira ano o nga taonga, o nga kararehe a te kingi, a an a tama, me nga kaiwhakahaere, me  
<sup>2</sup> nga marohirohi, me nga tangata maia katoa, ki Hiruharama. Na ka tu nga waewae o Kingi Rawiri  
ki runga, a ka korero ia, Whakarongo mai, e oku tuakana, e oku teina, e toku iwi. He ngakau toku  
ki te hanga i tetahi whare hei okiokinga mo te aaka o te kawenata a Ihowa, hei turanga waewae mo  
<sup>3</sup> to tatou Atua; na kua rite aku mea hei hanga. Otiia kua ki mai nei te Atua ki ahau, E kore e hanga

e koe he whare mo toku ingoa; he tangata whawhai koe, kua whakaheke toto hoki koe. Heoi kua whiriwhiria nei ahau e Ihowa, e te Atua o Iharaira i roto i te whare katoa o toku papa hei kingi mo Iharaira a ake ake. Kua whiriwhiria nei hoki e ia a Hura hei rangatira; me te whare ano o toku papa i roto i te whare o Hura; i whakapai hoki ia ki ahau i roto i nga tama a toku papa, a meinga ana

ahau hei kingi mo Iharaira katoa. A ko tana i whiriwhiri ai o aku tama katoa, he tokomaha hoki nga tama i homai nei e Ihowa ki ahau, ko taku tama, ko Horomona hei noho ki te torona o te kingitanga o Ihowa ki a Iharaira. I mea mai ano ia ki ahau, Ko Horomona, ko tau tama, mana e hanga toku whare, me oku marae; kua oti hoki ia te whiriwhiri e ahau hei tama maku, ko ahau hoki hei papa ki a ia. Ka whakapumautia ano e ahau tona kingitanga ake ake, ki te mau tana mahi i aku whakahau, i aku whakaritenga, ki te penei me tenei inaianei. Na i te mea e titiro mai nei a Iharaira katoa, ara ta Ihowa whakaminenga, a i to tatou Atua hoki e whakarongo mai nei, puritia, rapua nga whakahau katoa a Ihowa, a to koutou Atua, kia riro ai te whenua pai i a koutou, a whakarere tonu iho e koutou u mo a koutou tama i muri i a koutou ake ake. Me koe hoki, e taku tama, e Horomona, kia mohio koe ki te Atua o tou papa, kia tapatahi hoki te ngakau, kia hihiko te wairua e mahi ai koe ki a ia; e rapua ana hoki e Ihowa nga mea o nga ngakau katoa, a e mohiotia katoatia ana e ia nga tokonga ak e o nga whakaaro. Ki te rapua ia e koe, ka kitea, a ki te whakarerea ia e koe, ka peia koe e ia a ake ake. Na kia mahara, kua whiriwhiria nei hoki koe e Ihowa hei hanga i te whare mo te wahi tapu: kia kaha ki te mahi.

Katahi ka hoatu e Rawiri ki tana tama, ki a Horomona te tauira mo te whakamahau o te temepara, mo nga whare ano o reira, mo ona whare taonga, mo ona ruma o runga, mo ona ruma ano i roto, mo te wahi hoki mo te taupoko: Me te tauira mo nga mea katoa a te wairua i a ia, mo nga marae o te whare o Ihowa, mo nga whare taonga o te whare o te Atua, mo nga whare taonga mo nga mea kua oti te whakatapu: Mo nga wehenga o nga tohunga, o nga Riwaiti, mo nga meatanga katoatanga o te mahi mo te whare o Ihowa, mo nga oko katoa hei mea mahi ki te whare o Ihowa: Me te koura, he mea pauna, mo nga mea koura, mo nga mea katoa o tenei mahi, o tenei mahi; he hiriwa ano mo nga mea hiriwa katoa, he mea pauna, mo nga mea katoa o tenei mahi, o tenei mahi: Me te taimaha mo nga turanga rama koura, me o ratou rama koura; he mea pauna mo tenei turanga, mo tenei turanga, mo o ratou rama ano: he mea pauna ano mo nga turanga hiriwa, mo te turanga, mo ona rama, he mea whakarite ki te mahi mo tenei turanga, mo tenei turanga: I paunatia ano e ia te koura mo nga tepu taro aroaro, mo tenei tepu, mo tenei tepu; me te hiriwa mo nga tepu hiriwa: Me te koura parakore mo nga marau, mo nga peihana, mo nga kapu: mo nga pata koura hoki, he mea pauna mo tenei pata, mo tenei pata; me te hiriwa ano, he mea pauna, mo nga pata hiriwa katoa: Mo te aata tahu whakakakara ano he koura parakore, he mea pauna; he

koura mo te taurira o te hariata o nga kerupima e roha nei nga parirau hei hipoki mo te aaka o te kawenata a Ihowa. <sup>19</sup> Ko tenei katoa, e ai ta Rawiri, he mea tuhituhi, he mea whakaatu mai na Ihowa ki ahau; i runga hoki i ahau tona ringa; ara nga mea katoa o tenei taurira. <sup>20</sup> I mea ano a Rawiri ki tana tama, ki a Horomona, Kia kaha, kia maia, mahia, kaua e wehi, kaua e pawera; kei a koe na hoki a Ihowa, te Atua, ara toku Atua. E kore ia e whakarere i a koe, e kore ano koe e mahue i a ia, kia oti ra ano nga mea katoa mo te mahi ki te whare o Ihowa. <sup>21</sup> Nana, nga wehenga o nga tohunga, o nga Riwaiti, kei a koe ratou mo nga mahi katoa ki te whare o te Atua: kei a koe ano, mo nga meatanga katoa, nga tangata mohio katoa e hihiko noa ana, mo nga mahi katoa; me nga rangatira, me te iwi katoa; kei a koe tonu te kupu katoa.

## Chapter 29

<sup>1</sup> I mea ano a Kingi Rawiri ki te whakaminenga katoa, Ko taku tama, ko Horomona, ko te mea kotahi i whiriwhiria nei e te Atua, he tamariki ia, he mea ngawari, he nui hoki te mahi; ehara hoki i te whare mo te tangata; engari mo Ihowa, mo te Atua. <sup>2</sup> Na kua whakapaua nei e ahau oku uaua ki te mahi mea mai mo te whare o toku Atua, te koura mo nga mea koura, te hiriwa mo nga mea hiriwa, te parahi mo nga mea parahi, te rino mo nga mea rino, te rakau mo nga mea rakau, nga kohatu onika, nga kohatu e whakanohoia ana, nga kohatu kanapa, me nga mea kakano whakauru, nga kohatu utu nui katoa, me nga kohatu mapere, tona tini. <sup>3</sup> Tenei ano etahi, he pai tonu hoki noku ki te whare o toku Atua: naku ake tenei, he koura, he hiriwa ka hoatu nei mo te whare o toku Atua, hei tapiri mo nga mea katoa kua oti nei i ahau te mahi mai mo te whare tapu, <sup>4</sup> Ata, e toru mano taranata koura, no te koura o Opira, e whitu mano taranata hiriwa, he mea parakore, hei kopaki mo nga taha o nga whare: <sup>5</sup> Ko te koura mo nga mea koura, ko te hiriwa mo nga mea hiriwa, mo nga mea katoa, e mahia e nga ringa o nga kaimahi. Na ko wai e hihiko ana inaianei ki te tapae i a ia ma Ihowa? <sup>6</sup> Na hihiko tonu nga rangatira o nga whare o nga matua, me nga rangatira o nga iwi o Iharaira, nga rangatira o nga mano, o nga rau, ratou ko nga rangatira o te mahi a te kingi. <sup>7</sup> A homai ana e ratou mo te mahi ki te whare o te Atua he koura e rima mano taranata, tekau mano tarami, he hiriwa kotahi tekau mano taranata, he parahi kotahi tekau ma waru mano taranata, he rino kotahi rau mano taranata. <sup>8</sup> Na, ko te hunga i kitea nei ki a ratou he kohatu pai, homai ana e ratou ki roto ki nga taonga o te whare o Ihowa, ara ki te ringa o Tehiere Kerehoni. <sup>9</sup> Na ka koa te iwi, i a ratou i hihiko nei ki te tapae noa; he tapatahi hoki te ngakau i hihiko ai ratou ki ta Ihowa, mahi: nui atu hoki te koa i koa ai a Kingi Rawiri.

10

Na ka whakapai a Rawiri i a Ihowa i te tirohanga a te whakaminenga katoa. I mea a Rawiri, Kia whakapaingia koe, e Ihowa, e te Atua o to matou matua, o Iharaira, he mea no tua whakarere

11

a ake tonu atu. Nou hoki, e Ihowa, te nui, te mana, te kororia, te wikitoria, te honore; nou nga mea katoa i te rangi, i te whenua; nou te rangatiratanga, e Ihowa; he tiketike noa ake hoki koe, hei

12

upoko mo te katoa. Nau nga taonga, me te honore, ko koe hoki hei kingi mo te katoa; kei tou

13

ringa te kaha me te mana; ma tou ringa ano e homai te nui, te kaha, mo te katoa. Na, tenei matou,

14

e to matou Atua, te whakawhetai nei ki a koe, te whakamoemiti nei ki tou ingoa kororia. Ko wai oti ahau, a he aha toku iwi, i whai kaha ai matou, i penei ai te hihiko? nau hoki te katoa, nou

15

ano hoki ta matou ka hoatu nei ki a koe. He manene hoki matou i tou aroaro, he noho noa iho, he pera me o matou matua; rite tonu ki te atarangi o matou ra i runga i te whenua; kahore hoki he

16

tuturutanga. E Ihowa, e to matou Atua, ko tenei puranga katoa kua pae nei i a matou hei hanga

17

i tetahi whare mou, mo tou ingoa tapu, na tou ringa enei, nau hoki te katoa. E mohio ana hoki ahau, e toku Atua, e whakamatauria ana te ngakau e koe, e manako ana hoki koe ki te tika. Ko ahau nei, he tika toku ngakau i meatia noatia mai ai e ahau enei mea katoa; a tenei ahau te koa nei i toku

18

kitenga i tau iwi i konei e hihiko ana ki tau mahi. E Ihowa, e te Atua o Aperahama, o Ihaka, o Iharaira, o o matou matua, kia mau tenei ake nei, ake nei, i roto i nga tokonga ake o nga whakaaro

19

o te ngakau o tau iwi, whakaangahia hoki o ratou ngakau ki a koe. Ki taku tama hoki, ki a Horomona, homai he ngakau tapatahi, kia puritia ai e ia au whakahau, au whakaaturanga, au tikanga,

20

kia oti katoa i a ia; kia hanga hoki te whare, mo reira nei nga mea kua pae nei i ahau. Na ka mea a Rawiri ki te whakaminenga katoa, Tena, whakapaingia a Ihowa, to koutou Atua. Na kei te whakapai te whakaminenga katoa ki a Ihowa, ki te Atua o o ratou matua, tuohu ana ratou, piko ana ki a Ihowa,

21

ki te kingi hoki. I patu whakahere ano ratou ki a Ihowa, i whakaeke i nga tahunga tinana ki a Ihowa i te aonga ake o taua ra; kotahi mano puru, kotahi mano hipi toa, kotahi mano reme, me nga

22

ringihanga, me nga patunga tapu, tona tini, hei mea mo Iharaira katoa. Na kai ana ratou, inu ana i te aroaro o Ihowa i taua ra, he nui te koa. A ka tuaruatia ta ratou whakakingi i a Horomona tama a Rawiri; whakawahia ana ia ki a Ihowa, hei rangatira; ko Haroko hoki hei tohunga.

23

Katahi ka noho a Horomona ki te torona o Ihowa, hei kingi i muri i tona papa, i a Rawiri, a

24

kake ana; rongo tonu ano ki a ia a Iharaira katoa. Na, ko nga rangatira katoa, me nga marohirohi,

25

me nga tama katoa a Kingi Rawiri, ngawari noa iho ratou ki te kingi, ki a Horomona. A whakanuia rawatia ake a Horomona e Ihowa i te tirohanga a Iharaira katoa, homai ana ki a ia he kororia hingi,

26

kahore nei he rite i nga kingi katoa o Iharaira i mua i a ia Heoi ko Rawiri tama a Hehe te kingi



o Iharaira katoa. <sup>27</sup> Na, ko nga ra i kingi ai ia ki te Iharaira, e wha tekau tau; e whitu nga tau i kingi ai ia ki Heperona, e toru tekau ma toru nga tau i kingi ai ki Hiruharama. <sup>28</sup> Na ka mate ia, he pai tona koroheketanga, hira tonu ona ra, ona taonga, tona kororia; a ko tana tama, ko Horomona te kingi i muri i a ia. <sup>29</sup> Na, ko nga mahi a Kingi Rawiri, o mua, o muri, nana, kua oti te tuhituhi ki nga kupu a Hamuera matakite, ki nga kupu ano a Natana poropiti, ki nga kupu ano hoki a Kara matakite, <sup>30</sup> Me tona kingitanga katoa, me tona maia, me nga wa i a ia, i a Iharaira, i nga rangatiratanga katoa o nga whenua.

## 2 Chronicles

### Chapter 1

<sup>1</sup> Na kua u a Horomona tama a Rawiri ki tona rangatiratanga; i a ia ano a Ihowa, tona Atua, a whakanuia rawatia ana ia e ia. <sup>2</sup> Katahi a Horomona ka korero ki a Iharaira katoa, ki nga rangatira o nga mano, o nga rau, ki nga kaiwhakawa, ki nga kawana katoa o Iharaira katoa, ki nga upoko hoki o nga whare o nga matua. <sup>3</sup> Heoi haere ana a Horomona ratou ko te whakaminenga katoa ki te wahi tiketike i Kipeono; i reira hoki te tapenakara o te whakaminenga a te Atua, i hanga nei e Mohi pononga a te Atua ki te koraha. <sup>4</sup> Ko te aaka ia a te Atua, i mauria mai tera e Rawiri i Kiriata Tearimi, ki te wahi i whakapaia e Rawiri: kua whakaturia hoki e ia he teneti mo taua aaka ki Hiruharama. <sup>5</sup> Ko te aata parahi ano hoki i hanga e Petareere tama a Uri, tama a Huru, i reira tera i mua i te tapenakara o Ihowa: a rapua ana he tikanga i reira e Horomona ratou ko te whakaminenga. <sup>6</sup> Na haere ana a Horomona ki reira ki te aata parahi i te aroaro o Ihowa, ki tera i te tapenakara o te whakaminenga, a whakaekea ana e ia ki reira kotahi mano nga tahunga tinana. <sup>7</sup> I taua po ka puta te Atua ki a Horomona, a ka mea ki a ia, Inoi mai ki ahau ko te aha kia hoatu e ahau ki a koe. <sup>8</sup> Na ka mea a Horomona ki te Atua, Nui atu te aroha i whakaputaina e koe ki toku papa, ki a Rawiri; a meinga ana ahau e koe hei kingi i muri i a ia. <sup>9</sup> Heoi, e Ihowa, e te Atua, whakamana tau kupu ki toku papa, ki a a Rawiri; kua meinga nei hoki ahau e koe hei kingi mo te iwi e rite ano ki te onepu o te whenua te tini. <sup>10</sup> Na homai ki ahau he ngakau mahara, he mohio, mo toku haere atu, haere mai, i te aroaro o tenei iwi: ko wai hoki hei whakarite mo tenei iwi nui au? <sup>11</sup> Ano ra ko te Atua ki a Horomona, Na, i te mea ko ta tou ngakau tenei, kihai hoki koe i tono ki te taonga mou, ki te

rawa, ki te kororia, ki ou hoariri ranei kia mate, kihai hoki koe i tono kia maha ou ra; heoi tau i tono ai, he ngakau mahara, he mohio, kia whakarite ai koe mo taku iwi, kua oti na koe te mea e

<sup>12</sup>  
 ahau hei kingi mo ratou: Tenei ka hoatu nei ki a koe he ngakau mahara, he mohio; a ka hoatu e ahau ki a koe he taonga, he rawa, he kororia, kahore i rite o nga kingi i mua i a koe, e kore ano e rite i muri i a koe.

<sup>13</sup>  
 Heoi ka tae a Horomona i tana haere ki te wahi tiketike i Kipeono, i mua te te tapenakara o te whakaminenga, ki Hiruharama, a kingi ana ki a Iharaira. <sup>14</sup> Na ka huihuia he hariata e Horomona, he kaieke hoiho; kotahi mano e wha rau ana hariata, kotahi tekau ma rua mano ana kaieke hoiho,

<sup>15</sup>  
 waiho iho e ia ki nga pa hariata, ki te kingi ano ki Hiruharama. Na ka meinga e te kingi te hiriwa me te koura o Hiruharama kia rite ki te kohatu, i meinga ano e ia nga hita kia rite ki te hikamora i

<sup>16</sup>  
 te raorao; te tini. Ko nga hoiho i a Horomona he mea mau ake i Ihipa; i riro ropu mai i nga

<sup>17</sup>  
 kaihoko a te kingi, he ropu me tona utu. Na e ono rau nga hekere hiriwa i riro mai ai te hariata, i puta mai ai i Ihipa, kotahi rau e rima tekau i riro ai te hoiho. Ko ratou ano hei kawae hoiho mo nga kingi katoa o nga Hiti mo nga kingi ano o Hiria.

## Chapter 2

<sup>1</sup>  
 Na ka mea a Horomona kia hanga he whare mo te ingoa o Ihowa, he whare hoki mo tona kingitanga. <sup>2</sup> Na ka taua e Horomona e whitu tekau mano tangata hei kaipikau, e waru tekau mano

hoki hei tua i runga i te maunga, me nga kaitirotiro i a ratou e toru mano e ono rau. <sup>3</sup> Na ka tuku tangata a Horomona ki a Hurama kingi o Taira hei ki atu, Kia rite ki tau i mea ai ki toku papa, ki a Rawiri; i tukua mai hoki e koe he hita kia kawea mai mana, hei hanga i tetahi whare mona hei

<sup>4</sup>  
 nohoanga, kia pera hoki tau ki ahau. Nana, ka hanga e ahau he whare mo te ingoa o Ihowa, o toku Atua, ka whakatapua mona, hei tahunga mo te whakakakara reka ki tona aroaro, mo te taro aroaro tuturu, mo nga tahunga tinana o te ata, o te ahiahi, o nga hapati, o nga kowhititanga marama,

<sup>5</sup>  
 o nga hakari o Ihowa, o to matou Atua. He tikanga tenei ake ake ma Iharaira. Na he nui te whare

<sup>6</sup>  
 ka hanga nei e ahau; he nui hoki to matou Atua i nga atua katoa. Otira ko wai e ahei te hanga whare mona? kahore nei hoki e nui te rangi me te rangi o nga rangi hei nohoanga mona. Ko wai

<sup>7</sup>  
 koai ahau hei hanga whare mona, heoi nei hei tahu whakakakara ki tona aroaro? Tena, unga mai ki ahau tetahi tangata e mohio ana ki te mahi i te koura, i te hiriwa, i te parahi, i te rino, i te mea papura, whero, puru, e mohio ana ki te mahi i nga ahau whakairo katoa, hei hoa mo te hunga mohio

<sup>8</sup>  
 i ahau nei, i a Hura, i Hiruha rama, mo te hunga i whakatuturia e toku papa, e Rawiri. Tūkua mai  
 ano hoki ki ahau he rakau hita, he kauri, he aramuka i Repanona: e matau ana hoki ahau he hunga  
<sup>9</sup>  
 mohio au tangata ki te tapahi rakau i Repanona. Na ko aku tangata hei hoa mo au tangata, Hei  
 whakapai rakau maku, kia maha; no te mea he nui te whare ka hanga nei e ahau, he mea ka miharotia.  
<sup>10</sup>  
 Nana, ko taku e hoatu ai ki au tangata, ki nga kaitarai, ki nga kaitapahi i nga rakau, he witi, he  
 mea patu, e rua tekau mano mehua, he parei e rua tekau mano mehua, he waina e rua tekau mano  
 pati, he hinu e rua tekau mano pati.  
<sup>11</sup>  
 Na ka whakautua e Hurama kingi o Taira, he mea tuhituhi, tūkua ai e ia ki a Horomona, He  
<sup>12</sup>  
 aroha no Ihowa ki tana iwi i homai ai koe e ia hei kingi mo ratou. I mea ano a Hurama, Kia  
 whakapaingia a Ihowa, te Atua o Iharaira, nana nei i hanga te rangi me te whenua, nana hoki i  
 homai ki a Kingi Rawiri he tama ngarahu tika, e hua ana ona whakaaro, tona mohio, hei hanga i te  
<sup>13</sup>  
 whare mo Ihowa, i te whare ano mo tona kingitanga. Na kua unga atu nei e ahau tetahi tangata  
<sup>14</sup>  
 whakaaro, e hua ana tona mohio, na toku papa, na Hurama, He tama na tetahi wahine o nga  
 tamahine a Rana, ko tona papa he tangata no Taira, he mohio ki te mahi koura, hiriwa, parahi, rino,  
 kohatu, rakau, papaura, puru, rinena pai, whero; ki te whakairo hoki i nga whakairo katoa, ki te  
 whakatauria i nga whakaaro katoa e hoatu ki a ia; hei hoa mo au mea mohio, mo nga mea mohio  
<sup>15</sup>  
 ano hoki a toku ariki, a Rawiri, a tou papa. Na, ko te witi, ko te parei, ko te hinu, ko te waina, i  
<sup>16</sup>  
 korerotia mai na e toku ariki, mana e homai ki ana pononga; A ma matou e tapahi he rakau i  
 Repanona, kia rite ki au e mea ai mau: ka whakatere atu ai ki a koe i te moana ki Hopa, a mau e  
<sup>17</sup>  
 taritari ki Hiruharama. Na ka taua e Horomona nga tangata iwi ke i te whenua o Iharaira i muri  
 i te tauanga i taua ai e tona papa e Rawiri; a ka kitea kotahi rau e rima tekau ma toru mano e ono  
<sup>18</sup>  
 rau. A ka meinga etahi o ratou, e whitu tekau mano, hei kaipikau, e waru tekau mano ano hei  
 tarai i runga i te maunga, e toru mano e ono rau hei kaitirotiro, hei whakamahi i te iwi.

### Chapter 3

<sup>1</sup>  
 Katahi ka timata a Horomona te hanga i te whare o Ihowa ki Hiruharama, ki Maunga Moria,  
 ki te wahi i puta ai a Ihowa ki tona papa, ki a Rawiri, ki te wahi i whakapaia e Rawiri ki te patunga  
<sup>2</sup>  
 witi a Oronana Iepuhi. No te rua o nga ra o te rua o nga marama i timata ai ia te hanga, no te wha  
<sup>3</sup>  
 o nga tau o tona kingitanga. Na ko nga turanga enei i whakatakotoria e Horomona mo te hanganga  
 i te whare o te Atua. Ko te roa, i nga whatianga i muri o te ruri tuatahi, e ono tekau whatianga, a

<sup>4</sup>  
 koe te whanui e rua tekau whatianga. A, ko te whakamahau i te aronga ki mua o te whare, ko  
 tona roa i te ahua o te whanui o te whare e rua tekau whatianga, a ko te tiketike kotahi rau e rua  
<sup>5</sup>  
 tekau: a he mea whakakikorua e ia a roto ki te koura parakore. Na, ko te whare nui, he mea hipoki  
 nana ki te rakau, ki te kauri, whakakikoruatia ana e ia ki te koura pai, mahia iho hoki e ia ki runga  
<sup>6</sup>  
 he nikau, he mekameka. He mea whakapaipai hoki nana te whare ki te kohatu utu nui, kia ataahua  
<sup>7</sup>  
 ai. He koura hoki; no Parawaima te koura. I whakakikoruatia ano e ia te whare, nga kurupae, nga  
<sup>8</sup>  
 pou, ona taha, me ona tatau, ki te koura; i whakairoa ano he kerupima ki nga taha. I hanga ano e  
 ia te whare tapu rawa; ko te roa, ko te whanui o te whare, e rua tekau whatianga; ko tona whanui  
<sup>9</sup>  
 e rua tekau whatianga. Whakakikoruatia iho ki te koura pai, e ono rau taranata. Na, ko te taimaha  
 o nga whao, e rima tekau hekere koura. A i whakakikoruatia nga uma o runga ki te koura.  
<sup>10</sup>  
 I hanga ano e ia i roto i te whare tino tapu e rua nga kerupima, he mea whakairo;  
<sup>11</sup>  
 whakakikoruatia iho ki te koura. Ko nga parirau hoki o nga kerupima, e rua tekau whatianga te  
 roa: ko te parirau o tetahi, e rima whatianga, pa tonu ki te taha o te whare; ko tetahi parirau, e rima  
<sup>12</sup>  
 whatianga, pa tonu ki te parirau o tera kerupa. Na ko te parirau o tera kerupa, e rima whatianga,  
 pa tonu ki te taha o te whare: ko tetahi parirau, e rima ano hoki whatianga, he mea unguutu ano ki  
<sup>13</sup>  
 te parirau o tera kerupa. Na roha tonu nga parirau o enei kerupima, e rua tekau whatianga. Tu  
<sup>14</sup>  
 ana o raua waewae ki runga; ko o raua kanohi i anga ki te whare. I hanga ano e ia te arai ki te  
<sup>15</sup>  
 mea puru, papura, whero, ki te rinena pai; mahia iho hoki e ia ki te kerupa. I hanga ano e ia etahi  
 pou e rua ki mua i te whare, e toru tekau ma rima whatianga te roa, e rima whatianga o te  
<sup>16</sup>  
 whakapaipai i runga i tetahi, i tetahi. I hanga ano e ia he mekameka ki te ahurewa, whakanohoia  
 iho ki nga pito ki runga o nga pou. I hanga ano e ia etahi pamekaranete kotahi rau, whakanohoia  
<sup>17</sup>  
 iho ki nga mekameka. Whakaturia ana e ia aua pou ki mua o te temepara, kotahi ki matau, kotahi  
 ki mau, a huaina iho e ia te ingoa o tera ki matau ko Iakini, te ingoa hoki o tera ki mau ko Poaha.

## Chapter 4

<sup>1</sup>  
 I hanga ano e ia te aata parahi, e rua tekau whatianga te roa, e rua tekau whatianga te whanui,  
<sup>2</sup>  
 kotahi tekau hoki whatianga te tiketike. I hanga ano te moana, he mea whakarewa, tekau nga  
 whatianga o tetahi pareparenga ki tetahi pareparenga, he mea porotaka, e rima whatianga tona

tiketike: e toru tekau whatianga o te aho i paea ai. <sup>3</sup> I raro ko etahi mea e rite ana ki te kau, a taka noa, kotahi tekau nga whatianga, i te taha o te moana, a taka noa. E rua rarangi o nga kau i whakarewaina i tona whakarewanga. <sup>4</sup> I runga i nga kau kotahi tekau ma rua taua moana e tu ana, e toru e anga ana ki te raki, e toru e anga ana ki te hauauru, e toru e anga ana ki te tonga, e toru e anga ana ki te rawhiti: i runga hoki ko te moana; i anga whakaroto a muri katoa o ra tou. <sup>5</sup> He whanuitanga ringa te matotoru; rite tonu te hanganga o tona niao ki to te niao o te kapu, ki te puawai rengarenga; e toru mano pati o roto o taua moana ina ki. <sup>6</sup> A i hanga e ia etahi oko koroi kotahi tekau, a whakaturia ana e rima ki matau, e rima ki mau, hei horoinga. Ko nga mea i whakaekea hei tahunga tinana i horoia ki reira; ko te moana ia hei horoinga mo nga tohunga. <sup>7</sup> Na i hanga e ia nga turanga rama koura kotahi tekau, ki te ahau i whakaritea mo era mea; whakaturia ana e ia ki te temepara; e rima ki matau, e rima ki mau. <sup>8</sup> I hanga ano e ia nga tepu kotahi tekau, whakaturia ana ki te temepara, e rima ki matau, e rima ki mau. I hanga ano nga peihana koura kotahi rau. <sup>9</sup> I hanga ano e ia te marae o nga tohunga, me te marae nui, me nga tatau mo te marae; i whakakikoruatia nga tatau o aua wahi ki te parahi. <sup>10</sup> Na, ko te moana, whakatakotoria ana ki matau o te pito ki te rawhiti, whaka te tonga.

<sup>11</sup> I hanga ano e Hurama nga pata, nga koko pungarehu, nga peihana. Na kua oti i a Hurama te mahi i mahia e ia ma Kingi Horomona i te whare o te Atua; <sup>12</sup> Nga pou e rua, nga peihana, nga whakapaipai e rua i te pito ki runga o nga pou e rua, nga kupenga e rua hei kopaki mo nga peihana e rua o nga whakapaipai i te pito ki runga o nga pou; <sup>13</sup> Me nga pamekaranete e wha rau mo nga kupenga e rua; e rua rarangi pamekaranete mo tetahi kupenga hei kopaki mo nga peihana e rua o nga whakapaipai i nga pou. <sup>14</sup> I hanga ano e ia nga turanga; i hanga ano nga oko horoi i runga i nga turanga. <sup>15</sup> Kotahi te moana, tekau ma rua nga kau i raro i taua moana. <sup>16</sup> Ko nga pata, me nga koko pungarehu, me nga marau, me o ratou mea katoa, i hanga era e tona papa, e Hurama, ma Kingi Horomona mo te whare o Ihowa, kanapa tonu te parahi. <sup>17</sup> I whakarewaina aua mea e te kingi ki te mania o Horano, ki te wahi onematua i te takiwa o Hukota, o Tereata. <sup>18</sup> Heoi hanga ana e Horomona enei oko katoa, he tini noa iho; kihai hoki i kitea te taimaha o te parahi. <sup>19</sup> I hanga ano e Horomona nga oko katoa mo te whare o te Atua, me te aata koura, me nga tepu hei takotoranga mo te taro aroaro; <sup>20</sup> Me nga turanga rama, me o reira rama e tahuna nei ki mua i te ahurewa, ko te tikanga hoki tena; he mea parakore te koura; <sup>21</sup> Ko nga puawai, ko nga rama, ko nga kokopi, he mea koura, he koura pai rawa; <sup>22</sup> Me nga kuku, me nga peihana, me nga koko, me nga tahu kakara,

he parakore te koura; me te tapokoranga ki te whare, me ona tatau o roto ki te wahi tino tapu, me nga tatau o te whare, ara o te temepara, he koura.

## Chapter 5

<sup>1</sup> Na kua oti katoa te mahi i mahia e Horomona mo te whare o Ihowa. A ka kawea mai e Horomona nga mea i whakatapua e tona papa, e Rawiri: te hiriwa, te koura, nga oko katoa, hoatu ana e ia ki roto ki nga taonga o te whare o te Atua. <sup>2</sup> Katahi ka huihuia e Horomona nga kaumatua o Iharaira, me nga upoko katoa o nga iwi, nga rangatira o nga whare o nga matua o nga tama a Iharaira, ki Hiruharama, ki te mau ake i te aaka o te kawenata a Ihowa i roto i te pa o Rawiri, ara i <sup>3</sup> Hiona. Na ka huihuia ki te kingi nga tangata katoa o Iharaira, ki te hakari, i te whitu o nga marama. <sup>4</sup> Na ka haere mai nga kaumatua katoa o Iharaira, a ka hapainga ake te aaka e nga Riwaiti. <sup>5</sup> Kawea ana e ratou te aaka, me te tapenakara o te whakaminenga, me nga oko tapu katoa i roto i te tapenakara; kawea ana e nga tohunga, e nga Riwaiti. <sup>6</sup> Katahi a Kingi Horomona me te huihui katoa o Iharaira i huihui mai nei ki a ia ki mua i te aaka, ka patu i te hipi, i te kau, e kore nei e taea te korero, te tatau ranei, i te tini. <sup>7</sup> Na nga tohunga hoki i mau te aaka o te kawenata a Ihowa ki tona wahi, ki te ahurewa o te whare, ki te wahi tino tapu, ki raro i nga parirau o nga kerupima. <sup>8</sup> I roha tonu hoki nga parirau o nga kerupima ki runga i te wahi i te aaka, a hipokina iho ana a runga o te aaka, me ona amo, e nga kerupima. <sup>9</sup> Na, i te roroa o nga amo, kitea ai nga pito o nga amo i te aaka, i te ritenga atu o te ahurewa; otiia kihai i kitea ki waho; na kei reira tonu a tae noa ki tenei ra. <sup>10</sup> Kahore he mea i roto i te aaka, ko nga papa e rua anake i whaowhina nei ki reira e Mohi i Horepa i ta Ihowa whakaritenga kawenata ki nga tama a Iharaira i to ratou putanga mai i Ihipa. <sup>11</sup> A, i te putanga o nga tohunga i te wahi tapu; i whakatapua hoki nga tohunga katoa i kitea ki reira; kihai hoki nga tikanga mo nga wehenga i mau i taua ra; <sup>12</sup> Ko nga Riwaiti hoki, ko nga kaiwaiata, ko ratou katoa, ara ko Ahapa, ko Hemana, ko Ierutunu, me a ratou tama, me o ratou teina, he rinena ma o ratou kakahu; he himipora ano a ratou, he hatere, he hapa; tu ana ratou ki te taha ki te rawhiti o te aata, me nga tohunga kotahi rau e rua tekau e whakatangi ana i nga tetere: <sup>13</sup> Na reira, kia hui nga kaiwhakatangi tetere me nga kaiwaiata, kia kotahi tonu te reo i rangona, hei whakamoemiti; hei whakawhetai ki a Ihowa; kia whakarewa tahi ratou i o ratou reo me to nga tetere, me to nga himipora, me to nga mea rangi waiata, he whakamoemiti ki a Ihowa, me te mea, No te mea he pai ia: mau tonu hoki tana mahi tohu ake ake: hei reira kua ki te whare i te kapua, ara

te whare o Ihowa, <sup>14</sup> Na kihai nga tohunga i ahei te tu ki te minita, i te kapua hoki; kua ki hoki te whare o te Atua i te kororia o Ihowa.

## Chapter 6

<sup>1</sup> Na ka mea a Horomona, I mea a Ihowa, ka noho ia ki te pouri nui. <sup>2</sup> Otiia kua oti i ahau te hanga he whare hei nohoanga mou, he kainga pumau mou mo ake tonu atu. <sup>3</sup> Na ka tahuri te aroaro o te kingi a manaakitia ana e ia te huihui katoa o Iharaira, me te tu ano tera te huihui katoa o Iharaira. <sup>4</sup> I mea ia, Kia whakapaingia a Ihowa, te Atua o Iharaira, na tona mangai nei te kupu ki toku papa, ki a Rawiri, a kua rite nei i tona ringa; i mea hoki ia, <sup>5</sup> Mai o te ra i whakaputaina mai ai e ahau taku iwi i te whenua o Ihipa, kihai i whiriwhiria e ahau he pa i roto i nga iwi katoa o Iharaira e hanga ai he whare hei waihotanga iho mo toku ingoa ki reira; kihai hoki i whiriwhiria e ahau tetahi tangat a hei rangatira mo taku iwi, mo Iharaira: <sup>6</sup> Otiia kua whiriwhiria nei e ahau a Hiruharama hei waihotanga iho mo toku ingoa; kua whiriwhiria ano e ahau a Rawiri hei rangatira mo taku iwi, mo Iharaira. <sup>7</sup> Na i whai ngakau toku papa, a Rawiri, ki te hanga whare mo te ingoa o Ihowa, o te Atua o Iharaira. <sup>8</sup> Otiia i mea a Ihowa ki a Rawiri, ki toku papa, I te mea i roto i tou ngakau kia hanga he whare mo toku ingoa, he pai tau, ara te whakaaro a tou ngakau: <sup>9</sup> Otiia e kore taua whare e hanga e koe: engari tau tama e puta mai i tou hope, mana e hanga te whare mo toku ingoa. <sup>10</sup> Na kua mana nei i a Ihowa tana kupu i korero ai ia; a kua ara tenei ahau i muri i a Rawiri, i toku papa, a noho ana i runga i te torona o Iharaira, pera ana me ta Ihowa i korero ai, a hanga ana e ahau he whare mo te ingoa o Ihowa, o te Atua o Ih araira. <sup>11</sup> Na kua whakatakotoria e ahau ki reira te aaka, kei roto nei ta Ihowa kawenata, i whakaritea e ia ki nga tama a Iharaira. <sup>12</sup> Na ka tu ia ki mua i te aata a Ihowa, i te aroaro o te huihui katoa o Iharaira, a wherahia ana ona ringa: <sup>13</sup> Kua hanga hoki e Horomona he turanga parahi, e rima whatianga te roa, e rima whatianga te whanui, e toru whatianga te tiketike, a kua whakaturia e ia ki waenganui o te marae; tu ana ia ki runga ki taua turanga, na kua tuturi ona turi i te aroaro o te whakaminenga katoa o Iharaira, wherahia ana ona ringa whaka te rangi: <sup>14</sup> Na ka mea ia, E Ihowa, e te Atua o Iharaira, kahore he Atua hei rite mou i te rangi, i te whenua; e pupuri nei i te kawenata, i te aroha ki au pononga, ina whakapaua o ratou ngakau ki te haere i tou aroaro: <sup>15</sup> I mau tonu ra i a koe nga mea i korerotia e koe ki tau pononga, ki toku papa, ki a Rawiri; ae ra, i korerotia e tou mangai, a kua

rite nei i tou ringa; koia ano tenei inaianei <sup>16</sup> Na kia mau, e Ihowa, e te Atua o Iharaira, aiane i tau i korero ai ki tau pononga, ki toku papa, ki a Rawiri, i a koe i ki ra, E kore e whakakorea he tangata mau i toku aroaro hei noho ki te torona o Iharaira; ki te mahara raia au tama ki to rato u ara, ki te haere i runga i taku ture, ki te pera me koe i haere na i toku aroaro. <sup>17</sup> Na kia mana aiane i, e Ihowa, e te Atua o Iharaira, au kupu i korero ai koe ki tau pononga, ki a Rawiri. <sup>18</sup> Otiia he pono ranei, tera ranei te Atua e noho ki nga tangata, ki te whenua? nana, kahore e nui hei nohoanga mou te rangi me te rangi o nga rangi; a he aha ra tenei whare kua oti nei i ahau te hanga? <sup>19</sup> He ahakoa ra, kia anga mai koe ki te inoi a tau pononga, ki tana karanga, e Ihowa, e toku Atua, whakarongo ki te karanga, ki te inoi e inoi nei tau pononga ki tou aroaro: <sup>20</sup> Kia titiro mai ou kanohi ki tenei whare i te po, i te ao, ki te wahi i ki ai koe, ko reira hei waihotanga iho mo tou ingoa; whakarongo hoki ki te inoi e inoi ai tau pononga ki te ritenga mai o tenei wahi. <sup>21</sup> Kia rongu hoki koe ki nga karanga a tau pononga, a tau iwi hoki, a Iharaira, ina inoi ki te ritenga mai o tenei wahi; ae ra kia rongu koe i te wahi e noho na koe, ara i te rangi; a ka rongu, murua to ratou kino. <sup>22</sup> Ki te hara tetahi tangata ki tona hoa, a ka meinga he oati hei oati mana, a ka tae te oati ki mua i tou aata i tenei whare; <sup>23</sup> Na mau e whakarongo mai i te rangi, e mahi, e whakarite ta au pononga, mau e utu te tangata he, e mea iho tona ara ki runga ki tona mahunga; mau ano e whakatika ta te tika, e hoatu ki a ia nga mea e rite ana ki tona tika. <sup>24</sup> A, ki te patua tau iwi, a Iharaira, e te hoariri, mo ratou i hara ki a koe, a ka hoki ki a koe, ka whakaae ki tou ingoa, ka inoi, ka karanga ki tou aroaro i roto i tenei whare: <sup>25</sup> Na mau e whakarongo i nga rangi, e muru te hara o tau iwi, o Iharaira, e whakahoki mai ano ratou ki te whenua i homai e koe ki a ratou ko o ratou matua. <sup>26</sup> Ki te tutakina te rangi, a kahore he ua, mo ratou i hara ki a koe; a ka inoi ratou ki te ritenga mai o tenei wahi, ka whakaae ki tou ingoa, ka tahuri ke i to ratou hara, no ratou ka whakawhuia e koe: <sup>27</sup> Na mau e whakarongo i te rangi, e muru te hara o au pononga, o tau iwi hoki, o Iharaira, ina whakaakona ratou e koe ki te ara pai e haere ai ratou; mau hoki e tuku mai he ua ki tou whenua i homai nei e koe hei kainga pumau mo tau iwi. <sup>28</sup> Ki te mea te matekai to te whenua, he mate uruta, ki te mea he ngingio, he koriri, he mawhitiwhiti ranei, he whe ranei; ki te whakapaea whenua o o ratou pa; ki te pa mai he whiu, he mate turoro ranei: <sup>29</sup> Ki te mea he inoi, he karanga ranei na tetahi tangata, na tau iwi katoa ranei, na Iharaira, ina mohio tenei, tenei, ki tona pouri, ki tona whiu, a ka wherahia ona ringa ki te ritenga mai o tenei whare: <sup>30</sup> Na mau e whakarongo i te rangi, i tou nohoanga, e muru te he, e hoatu ki nga tangata nga mea e rite ana ki nga huarahi katoa o tenei, o tenei; e mohio ana hoki koe ki tona ngakau; ko koe anake nei hoki te mohio ana ki nga ngakau o nga tama a te tangata: <sup>31</sup> Kia wehi ai ratou i a koe, kia haere ai i au ara i nga ra katoa e ora ai ratou i te whenua i homai nei e koe ki o



32 matou matua. Na, ko te tangata iwi ke, ehara nei i tau iwi i a Iharaira, a ka tae mai i te whenua mamao, he whakaaro, ki tou ingoa nui, ki tou ringa kaha, ki tou takakau maro, a ka haere mai, ka  
 33 inoi ki te ritenga mai o tenei whare; Mau e whakarongo mai i nga rangi, i tou wahi e noho na koe, e mea nga mea katoa i karanga ai te tangata iwi ke ki a koe: kia mohio ai nga iwi katoa o te whenua ki tou ingoa, kia wehi ai i a koe, kia pera ai me tau iwi, me Iharaira; kia mohio ai hoki ka  
 34 oti tou ingoa te karanga ki runga ki tenei whare kua oti nei i ahau te hanga. Ki te haere tau iwi ki te whawhai ki ona hoariri i te ara e totoa ai ratou e koe, a ka inoi ki a koe ki te ritenga mai o  
 35 tenei pa kua whiriwhiria nei e koe, o te whare ano kua hanga nei e ahau mo tou ingoa: Na mau  
 36 e whakarongo mai i nga rangi ki ta ratou inoi, ki ta ratou karanga, e whakatika ta ratou, Ki te hara ratou ki a koe, kahore hoki he tangata i hapa i te hara, a ka riri koe ki a ratou, ka tuku i a ratou ki te hoa whawhai, a ka whakaraua atu ratou hei whakarau ki tetahi whenua e mamao atu ana, e  
 37 tata ana ranei; Otira ki te hoki ake to ratou mahara i te whenua i whakaraua atu ai ratou, a ka ripeneta ratou, ka inoi ki a koe i te whenua i whakaraua atu ai, ka mea, Kua hara matou, kua parori  
 38 ke ta matou mahi, kua mahi i te kino; Ki te tahuri o ratou ngakau katoa, o ratou wairua katoa, ki a koe i te whenua o to ratou whakaraunga i whakaraua atu ai ratou, a ka inoi ki te ritenga mai o to ratou nei whenua i homai e koe ki o ratou matua, o te pa ano i whiriwhiria nei e koe, o tenei  
 39 whare ano i hanga nei e ahau mo tou ingoa: Na mau e whakarongo mai i nga rangi, i tou wahi e noho na koe, ki ta ratou inoi, ki ta ratou karanga, mau hoki e whakatika ta ratou; me muru hoki  
 40 e koe te he o tau iwi i hara nei ki a koe. Na, e toku Atua, kia titiro mai ra ou kanohi, kia rongou taringa ki te inoi e inoia ana i tenei wahi. Na e ara, e Ihowa, e te Atua, ki tou okiokinga, a  
 41 koe ano, me te aaka o tou kaha: kia whakakakahuria au tohunga, e Ihowa, e te Atua, ki te  
 42 whakaoranga; a kia koa tau hunga tapu ki te pai. E Ihowa, e te Atua, kua e whakahokia te kanohi o tau i whakawahi ai; maharatia nga mahi atawhai i tau pononga, i a Rawiri.

## Chapter 7

1 Na, i te mutunga o te inoi a Horomona, ka heke iho te ahi i te rangi, a pau ake te tahunga  
 2 tinana, me nga patunga tapu; a ki tonu te whare i te kororia o Ihowa. A kihai i ahei i nga tohunga  
 3 te tomo ki te whare o Ihowa: ki tonu hoki te whare o Ihowa i te kororia o Ihowa. A ka matakitaki nga tama katoa a Iharaira i te hekenga iho o te ahi, i te kororia hoki o Ihowa i runga i te whare; na ka piko o ratou kanohi ki te whenua ki nga papa, a koropiko ana ratou, whakamoemiti ana ki a

Ihowa, me te ki ano, No te mea he p ai ia; he mau tonu tana mahi tohu. <sup>4</sup> Na kei te patu te kingi  
 ratou ko te iwi katoa i nga patunga tapu ki te aroaro o Ihowa. <sup>5</sup> Na patua ana e Kingi Horomona  
 he patunga tapu, e rua tekau ma rua mano kau, kotahi rau e rua tekau mano hipi. Na kua taia te  
 kawa o te whare o te Atua e te kingi, e te iwi katoa. <sup>6</sup> Tu ana tera nga tohunga i te aronga o a ratou  
 mahi, ko nga Riwaiti hoki me nga mea rangi waiata a Ihowa, i hanga nei e Kingi Rawiri hei  
 whakawhetai ki a Ihowa, he mau tonu nei tana mahi tohu, i nga wa i meinga ai ratou e Rawiri hei  
 whakamoemiti m ana: na whakatangi ana nga tohunga i nga tetere ki to ratou aroaro; a tu ana a  
 Iharaira katoa. <sup>7</sup> I whakatapua ano e Horomona a waenganui o te marae i mua i te whare o Ihowa;  
 i tukua hoki e ia ki reira he tahunga tinana, me te ngako o nga whakahere mo te pai: he iti hoki no  
 te aata parahi i hanga e Horomona hei meatanga mo nga tahunga tinana, mo nga whakahere totokore,  
 mo nga ngako. <sup>8</sup> Heoi mahia ana te hakari e Horomona i taua wa, e whitu nga ra, e ratou ko Iharaira  
 katoa, he nui atu te huihui, no te haerenga atu ki Hamata tae noa ki te awa o Ihipa. <sup>9</sup> Na i te waru  
 o nga ra he huihui nui na ratou: e whitu hoki nga ra i taia ai e ratou te kawa o te aata, a e whitu nga  
 ra o te hakari. <sup>10</sup> I te rua tekau ma toru o nga ra o te whitu o nga marama ka unga e ia te iwi ki o  
 ratou teneti, koa tonu ratou, pai tonu nga ngakau i te pai i meinga e Ihowa ki a Rawiri, ki a  
 Horomona, ki tana iwi ano, ki a Iharaira. <sup>11</sup> Na kua oti i a Horomona te whare o Ihowa, me te  
 whare o te kingi; na, ko nga mea katoa i puta ki te ngakau o Horomona kia mahia ki te whare o  
 Ihowa, ki tona whare ake hoki, oti pai ana i a ia.  
<sup>12</sup> Na ka puta a Ihowa ki a Horomona i te po, a ka mea ki a ia, Kua rongu ahau i tau inoi, kua  
 whiriwhiria ano e ahau tenei wahi moku, hei whare patunga tapu. <sup>13</sup> Ki te tutakina e ahau te rangi,  
 a kahore he ua, ki te whakahaua ranei e ahau nga mawhitiwhiti kia kai i te whenua, ki te unga ranei  
 e ahau tetahi mate uruta ki taku iwi; <sup>14</sup> Heoi ki te whakaiti taku iwi i a ratou, kua karangatia nei  
 hoki toku ingoa ki a ratou, ki te inoi, a ka rapu i toku mata, ka tahuri mai i o ratou ara he; ka  
 whakarongo mai ahau i te rangi, ka muru i to ratou hara, ka whakaora i te mate o to rato u whenua.  
<sup>15</sup> Ko tenei ka titiro oku kanohi, ka tahuri ano oku taringa ki nga mea e inoia ana ki tenei wahi.  
<sup>16</sup> Kua whiriwhiria nei hoki e ahau, kua whakatapua inaianei tenei whare, hei waihotanga iho mo  
 toku ingoa a ake ake; ko reira ano oku kanohi, me toku ngakau, i nga ra katoa. <sup>17</sup> Na ko koe, ki te  
 rite tau haere i toku aroaro ki te haere a tou papa, a Rawiri, ki te mahia nga mea katoa i whakahaua  
 e ahau ki a koe, ki te puritia e koe aku tikanga me aku whakaritenga; <sup>18</sup> Katahi ahau ka whakapumau  
 i te torona o tou kingitanga, ka pera me taku kawenata ki tou papa, ki a Rawiri, i ahau i mea ra, E  
<sup>19</sup> kore e whakakorea he tangata mau hei kawana mo Iharaira. Tena ki te tahuri ke atu koutou, a  
 ka whakarere i aku tikanga, i aku whakahau ka hoatu nei e ahau ki to koutou aroaro, a ka haere, ka

20

mahi ki nga atua ke, ka koropiko ki a ratou; Katahi o ratou pakiaka ka unuhia ake e ahau i toku oneone i hoatu nei e ahau ki a ratou; katahi tenei whare i whakatapua nei e ahau mo toku ingoa, ka akiritia atu e ahau i toku aroaro, a ka meinga hei whakatauki, hei taunutanga i roto i nga iwi katoa.

21

Na, ko tenei whare e tiketike nei, ka ai hei miharotanga ma nga tangata katoa e haere ana i tona taha; a ka mea ratou, Na te aha tenei mea i meatia ai e Ihowa ki tenei whenua, ki tenei whare?

22

Na ka whakautua e ratou, Mo ratou i whakarere i a Ihowa, i te Atua o o ratou matua i whakaputa mai nei i a ratou i te whenua o Ihipa, mo ratou i tango ki nga atua ke, a koropiko ana ki a ratou, mahi ana ki a ratou: na reira i kawea ai e ia tenei ke katoa ki a ratou.

## Chapter 8

1

Na, i te mutunga o nga tau e rua tekau i hanga ai e Horomona te whare o Ihowa, me tona whare ake,

2

Ka hanga e Horomona nga pa i homai e Hurama ki a Horomona, a whakanohoia ana e ia nga tama a Iharaira ki reira.

3

Na haere ana a Horomona ki Hamatatopa, hinga ana a reira i a ia.

4

I hanga ano e ia a Taramoro i te koraha, me nga pa taonga katoa i hanga nei e ia ki Hamata.

5

I hanga ano e ia a Petehorono ki runga, me Petehorono ano ki raro; he pa kapi tonu i te taiepa, i

6

te keti, i te tutaki; Me Paarata, me nga pa taonga katoa a Horomona, me nga pa hariata, me nga pa hoia eke hoiho, me nga mea katoa i hiahia ai a Horomona kia hanga ki Hiruharama, ki Repanona,

7

ki te whenua katoa o tona kingitanga. Ko te hunga katoa i mahue o nga Hiti, o nga Amori, o nga

8

Perihi, o nga Hiwi, o nga Iepuhi, ehara nei i a Iharaira; Ko a ratou tama i toe i muri i a ratou ki te whenua, he mea kihai i ngaro i nga tama a Iharaira, meinga ana ratou e Horomona hei homai

9

takoha a mohoa noa nei. Ko nga tama ia a Iharaira, kihai o ratou i meinga e Horomona hei pononga mo tana mahi; engari hei tangata whawhai ratou, hei rangatira mo ana rangatira, hei rangatira ano

10

mo ana hariata, mo ana hoia eke hoiho. A ko nga rangatira ano enei o nga kaitohutohu a Kingi

11

Horomona, e rua rau e rima tekau, hei rangatira mo te iwi. I kawea atu hoki e Horomona te tamahine a Parao i te pa o Rawiri ki te whare i hanga e ia mona. I mea hoki ia, Kaua taku wahine e noho ki te whare o Rawiri kingi o Iharaira; he tapu hoki nga wahi i tae ai te aaka a Ihowa.

12

Na ka whakaekea e Horomona he tahunga tinana ma Ihowa ki runga ki te aata a Ihowa i

13

hanga nei e ia ki mua i te whakamahau. Ko te mea o tenei ra, o tenei ra; rite tonu te whakaeke ki ta Mohi i whakahau ai, i nga hapati, i nga kowhititanga marama, i nga hakari nunui, e toru nga

meatanga i te tau, ara i te hakari taro rewenakore, i te hakari o nga wiki, i te hakari wha re tihokahoka.

14

I whakaritea ano e ia ta tona papa, ta Rawiri, mo nga wehenga o nga tohunga ki ta ratou mahi, mo nga Riwaiti ki ta ratou mahi, ki te whakamoemiti, ki te minita ki te aroaro o nga tohunga, ki nga meatanga o tenei ra, o tenei ra: mo nga kaitiaki k uwaha ano, mo o ratou wehenga ki nga

15

kuwaha; ko te mea hoki tena i whakahaua e Rawiri, e ta te Atua tangata. Kihai hoki ratou i peka ke i te whakahau a te kingi ki nga tohunga, ki nga Riwaiti, mo nga mea katoa, mo nga taonga.

16

Na kua rite te mahi katoa a Horomona tae rawa ake te ra i tu ai te whare o Ihowa, taea noatia

17

tona otinga. Na kua tino oti te whare o Ihowa. Katahi a Horomona ka haere ki Ehiono Kepere,

18

ki Eroto, ki te taha o te moana i te whenua o Eroma. Na ka unga mai e Hurama ana tangata ki a ia hei kawē mai i nga kaupuke me etahi tangata e mohio ana ki te moana; a rere ana ratou ko nga tangata a Horomona ki Opira, tangohia ana e ratou he koura e wha rau e rima tekau taranata, kawea ana ki a Kingi Horomona.

## Chapter 9

1

A, i te rongonga o te kuini o Hepa ki te rongonga o Horomona, ka haere mai ki te whakamatau i a Horomona ki nga kupu pakeke ki Hiruharama. Nui atu hoki te tira, he kamera ano e waha ana i nga mea kakara, i tona nui o te koura, i te kohatu utu nui. A, no tona taenga mai ki a Horomona,

2

ka korerotia e ia ki a ia nga mea katoa i tona ngakau. A whakaaturia ana e Horomona ki a ia te

3

tikanga o ana kupu katoa; kahore he kupu i ngaro i a Horomona, i kore te whakaatu ki a ia. A,

4

no te kitenga o te kuini o Hepa i te mohio o Horomona, i te whare hoki i hanga e ia, I te kai o tana tepu, i te nohoanga o ana tangata, i te turanga o ana kaimahi, i o ratou kakahu, i ana kairiringi waina, i o ratou kakahu; i tona pikitanga i piki atu ai ia ki te whare o Ihowa; kore ake he wairua i

5

roto i a ia. Na ka mea ia ki te kingi, Pono tonu nga mea i rongonga ai ahau i toku whenua mo au

6

mahi, mo tou mohio. Otiia kihai ahau i whakapono ki a ratou korero, a tae noa mai ahau, kite noa oku kanohi. Nana, kihai te hawhe o te nui o tou mohio i korerotia mai ki ahau: nui atu tau i te rongonga

7

i rongonga ai ahau. Ano te hari o au tangata, te hari o enei pononga au e tu tonu nei i tou aroaro, e

8

whakarongo nei ki tou mohio! Kia whakapaingia a Ihowa, tou Atua, i ahua eka nei ki a koe, i homai nei i a koe ki runga ki tona torona, hei kingi ma Ihowa, ma tou Atua; he aroha na tou Atua ki a Iharaira, he mea ano kia whakapumautia ai ratou ake ake, koia koe i meinga ai e i a hei kingi

9

mo ratou, hei mahi i te whakawa, i te tika. Na homai ana e ia ki te kingi kotahi rau e rua tekau

taranata koura, tona tini ano o nga mea kakara, me nga kohatu utu nui; kahore ano he mea kakara  
<sup>10</sup>

hei rite mo enei i homai nei e te kuini o Hepa ki a Kingi Horomona. Na, ko nga tangata a Hurama,  
 ratou ko nga tangata a Horomona, i kawea mai ai te koura i Opira, i kawea mai ano e ratou he rakau

<sup>11</sup>  
 aramuka, he kohatu utu nui hoki. Na ka hanga e te kingi aua rakau aramuka hei huarahi ki te  
 whare o Ihowa, ki te whare hoki o te kingi, a hei hapa, hei hatere, hei mea ma nga kaiwaiata: kahore

<sup>12</sup>  
 i kitea he pera i mua, i te whenua o Hura. Na ka hoatu e Kingi Horomona ki te kuini o Hepa nga  
 mea katoa i pai ai ia, ana hoki i tono ai, haunga nga mea i mauria mai e ia ki te kingi. Na ko tona  
 tahuritanga, ka haere ki tona ake whenua, ratou ko ana tangata.

<sup>13</sup>  
 Na, ko te taimaha o te koura i tae mai ki a Horomona i te tau kotahi, e ono rau e ono tekau

<sup>14</sup>  
 ma ono taranata koura; Haunga nga mea i mauria mai e nga kairapu taonga, e nga kaihokohoko.  
 I kawea mai ano he koura, he hiriwa, e nga kingi katoa o Arapia, e nga kawana o te whenua, ki a

<sup>15</sup>  
 Horomona. Na ka hanga e Kingi Horomona etahi pukupuku, e rua rau, he mea patu te koura; e

<sup>16</sup>  
 ono rau hekere o te koura patu i meatia ki te pukupuku kotahi: Me etahi pukupuku iti iho, e toru  
 rau, he mea patu ano te koura: e toru rau hekere koura i meatia ki te pukupuku kotahi: a

<sup>17</sup>  
 whakatakotoria ana e te kingi ki te whare o te ngahere o Repanona. I hanga ano e te kingi he

<sup>18</sup>  
 torona nui ki te rei, whakakikoruatia iho ki te koura parakore. A e ono nga kurupae ki te torona,  
 me te turanga waewae, he mea koura, he mea hono ki te torona, me nga okiokinga ano i te wahi e  
 nohoia ana, i tetahi taha, i tetahi taha, e rua hoki nga raiona e tu ana i te taha o nga okiokinga.

<sup>19</sup>  
 Kotahi tekau ma rua nga raiona i reira e tu ana i tetahi taha, i tetahi taha, i nga kaupae e ono.

<sup>20</sup>  
 Kahore he mea pera i hanga i tetahi atu rangatiratanga. Na, ko nga oko inu katoa a Kingi  
 Horomona, he koura kau; me nga oko katoa o te whare o te ngahere o Repanona, he koura parakore;

<sup>21</sup>  
 kahore he mea hiriwa; kihai te hiriwa i kiia he mea nui i nga ra o Horomona. He kaupuke hoki  
 a te kingi, rere ai ki Tarahihi me nga tangata a Hurama: kotahi te unga mai i nga tau e toru o nga

<sup>22</sup>  
 kaupuke o Tarahihi, me te mau mai i te koura, i te hiriwa, i te rei, i te makimaki, i te pikake. Na

<sup>23</sup>  
 nui atu a Kingi Horomona i nga kingi katoa o te whenua te whai taonga, te mohio. A i whai nga  
 kingi katoa o te whenua ki a Horomona, kia rongu i tona mohio i homai nei e te Atua ki tona ngakau.

<sup>24</sup>  
 A ka mauria mai e tena tana hakari, tana hakari, nga oko hiriwa, nga oko koura, nga kakahu, nga

<sup>25</sup>  
 mea mo te whawhai, nga mea kakara, nga hoiho, nga muera, he mea tatau a tau tonu. Na e wha  
 mano nga turanga a Horomona mo nga hoiho, mo nga hariata, tekau ma rua mano nga kaieke hoiho,

<sup>26</sup>  
 waiho ana e ia ki nga pa hariata, ki te kingi ano ki Hiruharama. Na ko ia te kingi mo nga kingi

<sup>27</sup> katoa, o te awa mai a tae noa ki te whenua o nga Pirihitini, ki te rohe ra ano ki Ihipa. Na meinga ana e te kingi te hiriwa o Hiruharama kia rite ki te kohatu; i meinga ano hoki e ia nga hita kia rite ki te hikamora i te raorao te tini. <sup>28</sup> A mauria ana mai e ratou he hoiho mo Horomona i Ihipa, i nga whenua katoa ano hoki. <sup>29</sup> Na, ko era atu meatanga a Horomona, o mua, o muri, kahore ianei i tuhituhia ki te pukapuka a Natana poropiti, ki te poropititanga ano a Ahia Hironi, ki nga kitenga ano a Iro matakite i nga mea mo Ieropoama tama a Nepata? <sup>30</sup> Na e wha tekau nga tau i kingi ai a Horomona i Hiruharama ki a Ihairaira katoa. <sup>31</sup> Na ka moe a Horomona ki ona matua, a tanumia ana ki te pa o tona papa, o Rawiri; a ka kingi ko Rehopoama, ko tana tama i muri i a ia.

## Chapter 10

<sup>1</sup> Na ka haere a Rehopoama ki Hekeme: kua tae mai hoki a Ihairaira katoa ki Hekeme ki te whakakingi i a ia. <sup>2</sup> A, no te rongonga o Ieropoama tama a Nepata; i Ihipa hoki ia, i rere hoki ki reira i te aroaro o Kingi Horomona; na hoki mai ana a Ieropoama i Ihipa. <sup>3</sup> Na ka tono tangata ratou ki te tiki i a ia. A ka haere a Ieropoama ratou ko Ihairaira katoa, ka korero ki a Rehopoama, ka mea, <sup>4</sup> He pakeke te ioka i meatia e tou papa ki a matou: na mau e whakamama ake te mahi pakeke a tou papa me tana ioka taimaha i meatia e ia ki a matou, a ka mahi matou ki a koe. <sup>5</sup> Na ka mea ia ki a ratou, Kia toru ra, ka hoki mai ki ahau. Na haere ana te iwi. <sup>6</sup> Na ka runanga a Kingi Rehopoama ki nga kaumatua i tu i te aroaro o tona papa, o Horomona, i a ia i te ora, ka mea, Ki to koutou whakaaro me pehea te kupu e whakahokia e ahau ki tenei iwi? <sup>7</sup> Na ka korero ratou ki a ia, ka mea, Ki te mea ka pai tau ki tenei iwi, a ka whakamanawareka koe i a ratou, a ka pai nga korero e korerotia e koe ki a ratou, na ko ratou hei pononga mau i nga ra katoa. <sup>8</sup> Otia whakarerea ake e ia te whakaaro i whakatakotoria mana e nga kaumatua, a runanga ana ki nga taitama i kaumatua ngatahi nei me ia, i tu nei ki tona aroaro. <sup>9</sup> I mea ia ki a ratou, Ki to koutou whakaaro me pehea te kupu e whakahokia e tatou ki tenei hunga i korero mai nei ki ahau, i mea mai nei, Whakamamakia ake te ioka i meatia e tou papa ki a matou? <sup>10</sup> Na ka korero ki a ia nga taitama i kaumatua ngatahi nei me ia, ka mea, Kia penei tau ki atu ki tenei hunga i korero mai nei ki a koe, i mea mai nei, I whakataimahatia e tou papa to matou ioka, na kia mama tau ki a matou; kia penei tau ki atu ki a ratou, ko toku maihao iti, ka nui atu i te hope o toku papa. <sup>11</sup> Na, i whakawaha e toku papa he ioka

taimaha ki a koutou, ka tapiritia e ahau tetahi atu mea ki to koutou ioka; he wepu ta toku papa i whiu ai i a koutou, otiia ka whiua koutou e ahau ki te kopiona.

12

Heoi kua tae a Ieropoama ratou ko te iwi katoa ki a Rehopoama i te toru o nga ra; ko ta te

13

kingi hoki tena i korero ai, i a ia i mea ra, Hoki mai ki ahau i te toru o nga ra. A pakeke tonu ta te kingi i whakahoki ai ki a ratou; whakarerea ake e Rehopoama te whakaaro o nga kaumatua,

14

Ka korero ki a ratou i runga i to nga taitama whakaaro, a ka mea, I whakataimahatia to koutou ioka e toku papa, heoi ka tapiritia atu ano e ahau: i whiua koutou e toku papa ki te wepu, ka whiua

15

ia koutou e ahau ki te kopiona. Heoi kihai i rongo te kingi ki ta te iwi; na te Atua hoki te take, kia mana ai tana kupu i korero ai a Ihowa, na te mangai o Ahia Hironi ki a Ieropoama tama a Nepata.

16

A, no te kitenga o Iharaira katoa kihai te kingi i rongo ki ta ratou, ka utua e te iwi te kingi; ka mea ratou, Ko te aha ianei to matou wahi i a Rawiri? kahore nei hoki o tatou wahi tupu i te tama a Hehe: ki o koutou teneti, e Iharaira! na kia w hai kanohi koe ki tou whare, e Rawiri! Heoi haere

17

ana a Iharaira katoa ki tona teneti, ki tona teneti. Ko nga tama ia a Iharaira e noho ana i nga pa

18

o Hura, ko Rehopoama i kingi mo ratou. Katahi ka tono a Kingi Rehopoama i te rangatira takoha, i a Harorama; a akina ana ia e nga tama a Iharaira ki te kohatu, a mate iho. Na hohoro tonu te eke

19

o Kingi Rehopoama ki tona hariata, a rere ana ki Hiruharama. Heoi whakakeke ana a Iharaira ki te whare o Rawiri, a taea noatia tenei ra.

## Chapter 11

1

Na, i te taenga o Rehopoama ki Hiruharama, ka huihuia e ia te whare o Hura rau ko Pineamine, kotahi rau e waru tekau mano; he hunga whiriwhiri, he hunga whawhai, hei whawhai ki a Iharaira,

2

kia hoki ai te kingitanga ki a Rehopoama. Na ka puta te kupu a Ihowa ki a Hemaia tangata a te

3

Atua; i mea ia, Korero ki a Rehopoama tama a Horomona, kingi o Hura, ki a Iharaira katoa hoki

4

i a Hura, i a Pineamine, mea atu, Ko te kupu tenei a Ihowa, Kei haere koutou ki runga, kei whawhai ki o koutou tuakana. Hoki atu ki tona whare, ki tona whare; naku hoki tenei mea. Heoi rongo tonu

5

ratou ki nga kupu a Ihowa, a hoki ana, kihai i haere ki te whawhai ki a Ieropoama. Na ka noho a

6

Rehopoama ki Hiruharama, a hanga ana e ia etahi pa tiaki ki Hura. Nana i hanga a Peterehema,

7

a Etema, a Tekoa, A Peteturu, a Hoko, a Aturama, 8 A Kata, a Mareha, a Tiwhi, 9 A Aroaraima,

10

a Rakihi, a Ateka, A Toraha, a Atarono, a Heperona. I a Hura enei raua ko Pineamine, he pa

<sup>11</sup> taiepa. I hanga ano e ia kia kaha etahi pa taiepa, whakawhiwhi rawa ki te rangatira mo roto, ki tona nui ano hoki o te kai, o te hinu, o te waina, <sup>12</sup> Ki te pukupuku, ki te tao ano hoki i roto i tenei pa, i tenei pa; no ka tino kaha rawa; i a ia hoki a Hura raua ko Pineamine.

<sup>13</sup> Na, ko nga tohunga me nga Riwaiti puta noa i a Iharaira, haere ana ratou ki a ia i o ratou rohe katoa. <sup>14</sup> I whakarerea hoki e nga Riwaiti o ratou wahi i nga pa, me o ratou kainga ake, a haere ana ki Hura, ki Hiruharama: i peia hoki ratou e Ieropoama ratou ko ana tama, kei mahi tohunga

ratou ki a Ihowa. <sup>15</sup> I whakaritea ano e ia etahi tohunga mana ki nga wahi tiketike, ki nga koati toa, ki nga kuaokau i hanga e ia. <sup>16</sup> Na i muri i a ratou ko te hunga o nga iwi katoa o Iharaira i homai nei i o ratou ngakau ki te rapu i a Ihowa, i te Atua o Iharaira, haere ana ratou ki Hiruharama

<sup>17</sup> ki te mea patunga tapu ki a Ihowa, ki te Atua o o ratou matua. Heoi na ratou i whakau te kingitanga o Hura, i whakakaha hoki a Rehopoama tama a Horomona, e toru tau: e toru hoki nga

tau i haere ai ratou i te ara o Rawiri raua ko Horomona. <sup>18</sup> Na ka tangohia e Rehopoama hei wahine mana a Maharata tamahine a Terimoto tama a Rawiri, a raua ko Apihaira tamahine a Eriapa tama

a Hehe; <sup>19</sup> Na, ko ana tama i whanau i tenei; ko Ieuhu, ko Hemaria, ko Tahama. <sup>20</sup> A i muri i tenei wahine ka tangohia e ia ko Maaka tamahine a Apoharama. Na, ko ana tama i whanau i tenei; ko

Apia, ko Atai, ko Tita, ko Heromiti. <sup>21</sup> Na ko Maaka tamahine a Apoharama ta Rehopoama i matenui ai o ana wahine katoa, o ana wahine iti ano hoki: kotahi tekau ma waru nga wahine i tangohia e ia, e ono tekau nga wahine i tangohia e ia, e ono tekau nga wahine iti; a e rua tekau ma

waru ana tama i whanau, e ono tekau nga tamahine. <sup>22</sup> Na ka meinga e Rehopoama ko Apia tama a Maaka hei upoko, hei rangatira, i roto i ona tuakana, teina; ko ia hoki tana i mea ai hei kingi.

<sup>23</sup> Na ka mahi tupato ia, a whakamararatia atu ana e ia ana tama ki nga whenua katoa o Hura, o Pineamine, ki nga pa taiepa katoa: nui atu hoki te kai i hoatu e ia ki a ratou. He tokomaha hoki nga wahine i rapua e ia ma ratou.

## Chapter 12

<sup>1</sup> Nawai a, no te unga o te kingitanga o Rehopoama, a ka whai kaha ia, whakarerea ake e ia te ture a Ihowa, e ratou ko Iharaira katoa. <sup>2</sup> Na i te rima o nga tau o Kingi Rehopoama ka haere mai a Hihaka kingi o Ihipa ki Hiruharama, kua whakakeke nei hoki ratou ki a Ihowa, <sup>3</sup> Me nga hariata tekau ma rua rau, me nga hoia eke hoiho e ono tekau mano: kahore hoki he tauanga o te hunga i



haere tahi mai i a ia i Ihipa; ko nga Rupimi, ko nga Hukiimi, ko nga Etiopiana. <sup>4</sup> Na kua riro i a ia  
 nga pa taiepa o Hura, a ka tae ki Hiruharama. <sup>5</sup> Katahi a Hemaia poropiti ka haere mai ki a  
 Rehopoama, ki nga rangatira o Hura i huihui nei ki Hiruharama i te wehi i a Hihaka, a ka mea ki  
 a ratou, Ko te kupu tenei a Ihowa, Kua whakarerea ahau e koutou, no reira kua waiho atu koutou  
 e ahau ki te ringa o Hihaka. <sup>6</sup> Katahi ka whakaiti nga rangatira o Iharaira me te kingi i a ratou, ka  
 mea, He tika a Ihowa. <sup>7</sup> A, no te kitenga o Ihowa kua whakaiti ratou i a ratou, ka puta te kupu a  
 Ihowa ki a Hemaia; i mea ia, Kua whakaiti ratou i a ratou; e kore ratou e huna e ahau; engari ka  
 hoatu e ahau ki a ratou he oranga, he mea iti nei; e kore hoki toku riri e t ahoroa ki runga ki  
 Hiruharama e te ringa o Hihaka. <sup>8</sup> Otiia ka meinga ratou hei pononga mana; kia mohio ai ratou ki  
 taku mahi, ki te mahi ano a nga kingitanga o nga whenua. <sup>9</sup> Heoi haere ana mai a Hihaka kingi o  
 Ihipa ki Hiruharama, tangohia ana e ia nga taonga o te whare o Ihowa, me nga taonga o te whare  
 o te kingi: riro katoa ana i a ia: tangohia ana ano e ia nga pukupuku koura i hanga nei e Horomona.  
<sup>10</sup> Na ka hanga e Kingi Rehopoama etahi pukupuku parahi hei whakakapi mo era, a tukua ana e ia  
 ki te ringa o te rangatira o nga kaitiaki, i tiaki nei i te tatau o te whare o te kingi. <sup>11</sup> Na i te wa i  
 haere ai te kingi ki te whare o Ihowa, ka haere nga kaitiaki ki te tiki, a whakahokia ana e ratou ki  
 te whare o nga kaitiaki. <sup>12</sup> Na i a ia ka whakaiti i a ia, ka tahuri atu te riri o Ihowa i a ia, kia kaua  
 ia e whakangaromia rawatia e ia: he pai hoki nga mea i kitea ki a Hura.  
<sup>13</sup> Heoi kua u a Kingi Rehopoama ki Hiruharama hei kingi: e wha tekau ma tahi hoki nga tau  
 o Rehopoama i a ia ka meinga hei kingi, a kotahi tekau ma whitu nga tau i kingi ai ia ki Hiruharama,  
 ki te pa i whiriwhiria e Ihowa i roto i nga iwi katoa o I haraira hei waihotanga iho mo tona ingoa.  
<sup>14</sup> A ko te ingoa o tona whaea ko Naama, he Amoni. He kino tana mahi; kihai hoki i whakatikaia  
 e ia tona ngakau ki te rapu i a Ihowa. <sup>15</sup> Na, ko nga meatanga a Rehopoama, o mua, o muri, kahore  
 ianei i tuhituhia ki te pukapuka a Hemaia poropiti, ki ta Iro matakite ano, kei reira nei nga korero  
 whakapapa? Na he whawhai ta Rehopoama raua ko Ieropoama ki a raua i nga ra katoa. <sup>16</sup> Na kua  
 moe a Rehopoama ki ona matua, a tanumia iho ki te pa o Rawiri; a ko Apia, ko tana tama, te kingi  
 i muri i a ia.

### Chapter 13

<sup>1</sup> No te tekau ma waru o nga tau o Kingi Ieropoama i kingi ai a Apia ki a Hura. <sup>2</sup> A e toru nga  
 tau i kingi ai ia ki Hiruharama. Ko te ingoa o tona whaea ko Mikaia, he tamahine na Uriere no

Kipea. A he whawhai ta Apia raua ko Ieropoama ki a raua. <sup>3</sup> Na ka whakatikaia e Apia nga ngohi o tana ope, he hunga maia mo te whawhai, e wha rau mano, he hunga whiriwhiri. I whakatikaia ano e Ieropoama ana ngohi hei whawhai ki a ia; e waru rau mano ana, he hunga whiriwhiri, he

marohirohi, he toa. <sup>4</sup> Na ka tu a Apia i runga i Maunga Temaraima, i te whenua pukepuke o

Eparaima, a ka mea, Whakarongo mai ki ahau, e Ieropoama, koutou ko Iharaira katoa; <sup>5</sup> Kua ranei koutou e mohio, he mea homai na Ihowa, na te Atua o Iharaira te kingitanga o Iharaira ki a Rawiri,

he mea oti tonu ki a ia, ratou ko ana tama, i runga ano i te kawenata tote? <sup>6</sup> Otira i whakatika ake a Ieropoama tama a Nepata, pononga a Horomona tama a Rawiri, kei te whakakeke ki tona ariki.

<sup>7</sup> Na ko te huihuinga o etahi tangata wairangi, he tama na Periara, ki a ia, kua whakapakari i a ratou ki a Rehopoama tama a Horomona, i te mea he taitamariki a Rehopoama, he ngawari hoki tona

ngakau, a kihai i kaha ki a ratou. <sup>8</sup> Na e mea na koutou ki te whakatenetene ki te kingitanga o Ihowa kei te ringa nei o nga tama a Rawiri; he huihui nui to koutou, a kei a koutou nga kua kau koura i

hanga na e Ieropoama hei atua mo koutou. <sup>9</sup> He teka ianei kua peia e koutou nga tohunga a Ihowa, nga tama a Arona, ratou ko nga Riwaiti; a whakatohungatia ana e koutou etahi tohunga, pera ana koutou me nga iwi o era atu whenua? Na, ko te tangata e haere ana ki te whakatohunga i a ia ki te puru, ki te tama a te kau, ki nga hipi toa e whitu, hei tohunga ia mo nga mea ehara nei i te atua.

<sup>10</sup> Tena ko matou, ko Ihowa to matou Atua, kihai hoki matou i whakarere i a ia. Na he tohunga a

matou e minita ana ki a Ihowa, ko nga tama a Arona, ko nga Riwaiti kei ta ratou mahi. <sup>11</sup> A e tahu tinana ana ratou ki a Ihowa, e tahu kakara reka ana i te ata, i te ahiahi: me te taro aroaro e whakatakotoria ana ki te tepu parakore; me te turanga rama koura me ona rama, hei tahu i nga ahiahi. E mau ana hoki i a matou nga mea a Ihowa, a to matou Atua; ko koutou ia kua whakarere

i a ia. <sup>12</sup> Na, tena, kei a matou te Atua hei rangatira, me ana tohunga, me nga tetere tangi nui, hei whakatangi i te whawhai ki a koutou. E nga tama a Iharaira, kua e whawhai ki a Ihowa, ki te Atua o o koutou matua; e kore hoki e taea e koutou.

<sup>13</sup> Otira i whakataka e Ieropoama he pehipehi kia haere awhio atu i muri i a ratou: na ko ratou

ki te aroaro o Hura, ko te pehipehi ki muri i a ratou. <sup>14</sup> A, i te tauritanga o Hura, na e tauria ana a mua, a muri, o ratou. Na karanga ana ratou ki a Ihowa, a whakatangi ana nga tohunga i nga tetere.

<sup>15</sup> Katahi ka hamama nga tangata o Hura. A, no te hamamatanga o nga tangata o Hura, na patua

iho e te Atua a Ieropoama ratou ko Iharaira katoa i te aroaro o Apia ratou ko Hura. <sup>16</sup> Na rere ana

nga tama a Iharaira i te aroaro o Hura, a homai ana ratou e te Atua ki o ratou ringa. <sup>17</sup> Patua iho ratou e Apia ratou ko tona iwi, he nui te parekura. Na hinga ana o Iharaira, he mea patu, e rima rau

mano, he hunga whiriwhiri. <sup>18</sup> Heoi kua riro ki raro nga tama a Iharaira i taua wa; a ka kaha nga

19  
 tama a Hura, no ratou i okioki ki a Ihowa, ki te Atua o o ratou matua. Na ka whaia a Ieropoama  
 e Apia, a ka riro etahi o ona pa i a ia, a Peteere me ona pa ririki, a Tehana me ona pa ririki, a Eperaina  
 me ona pa ririki. 20  
 A kihai a Ieropoama i whai kaha ano i nga ra o Apia, a patua ana ia e Ihowa,  
 21  
 mate ake. Otiia ka kaha haere a Apia. I tangohia ano e ia etahi wahine mana kotahi tekau ma  
 wha, a whanau ake, e rua tekau ma rua nga tama, kotahi tekau ma ono nga kotiro. 22  
 Na, ko era  
 atu meatanga a Apia, me ona ara, me ana kupu, kei te tuhituhi i roto i nga korero a Iro poropiti.

## Chapter 14

1  
 Heoi kua moe a Apia ki ona matua, a tanumia iho ki te pa o Rawiri. Na ko Aha, ko tana tama,  
 te kingi i muri i a ia. I ona ra i ata takoto te whenua, kotahi tekau tau. 2  
 Na he pai, he tika, nga mahi  
 a Aha ki te titiro a Ihowa, a tona Atua. 3  
 I whakakahoretia hoki e ia nga aata o nga atua ke, me nga  
 wahi tiketike, a i wawahia e ia nga pou, a turakina ana nga Aherimi; 4  
 A i whakahau ia ki a Hura  
 kia rapu i a Ihowa, i te Atua o o ratou matua, kia mahi hoki i te ture me te whakahau. 5  
 I  
 whakakahoretia atu ano e ia i roto i nga pa katoa o Hura nga wahi tiketike, me nga whakapakoko:  
 a i ata takoto te kingitanga i tona aroaro. 6  
 A hanga ana e ia etahi pa taiepa ki Hura; i ata takoto  
 hoki te whenua, kahore ana whawhai i aua tau; na Ihowa hoki ia i mea kia whai tanga manawa.  
 7  
 Koia ia i mea ai ki a Hura, Tatou ka hanga i enei pa, i te taiepa hoki a taka noa, i nga pourewa, i  
 nga tatau, i nga tutaki; kei to tatou nei aroaro tonu te whenua, no te mea i rapua e tatou a Ihowa, to  
 tatou Atua; rapua ana ia e tatou, na kua me inga nei e ia kia ta o tatou manawa a tawhio noa. Na  
 hanga ana e ratou, a oti pai ana ta ratou. 8  
 Na he hoia ano a Aha, he hunga hapai i te whakangungu  
 rakau, i te matia; o Hura, e toru rau mano; o Pineamine, he hunga hapai pukupuku, he hunga kukume  
 kopere, e rua rau e waru tekau mano; he marohirohi enei katoa, he toa.  
 9  
 Na ko te haerenga mai o Tera o Etiopia ki a ratou, ko tana ope kotahi mano mano, e toru rau  
 nga hariata. Haere mai ana ia ki Mareha. 10  
 Katahi ka puta a Aha ki te tu i a ia, a whakatakotoria  
 ana e raua a raua ngohi ki te raorao o Tepata, ki Mareha. 11  
 Na ka karanga a Aha ki a Ihowa, ki  
 tona Atua, ka mea, E Ihowa, kahore he mea ke atu i a koe hei awhina, ahakoa i te nui, ahakoa i te  
 hunga kahore he kaha: awhinatia matou, e Ihowa, e to matou Atua; ko koe hoki to matou okiokinga,  
 a nou te ingoa i haere mai ai matou ki tenei ope. E Ihowa, ko koe to matou Atua; kei pehia tau e te  
 tangata. 12  
 Heoi patua iho nga Etiopiana e Ihowa i te aroaro o Aha, i te aroaro ano o Hura. Na rere

13  
 ana nga Etiopiana. Na ka whaia ratou e Aha ratou ko ana tangata a tae noa ki Kerara: a ka hinga  
 o nga Etiopiana tona tini, kihai rawa ratou i ahei te hoki ake; i whakangaromia hoki ratou i te aroaro  
 o Ihowa, i te aroaro ano o tana ope; a nui atu nga taonga paraket e i riro i a ratou. 14  
 Patua iho hoki  
 e ratou nga pa katoa i Kerara a tawhio noa; i runga hoki i a ratou te wehi o Ihowa. Pahuatia ana e  
 ratou nga pa katoa; nui atu hoki te taonga i roto. 15  
 I patua ano nga teneti o nga kararehe; tangohia  
 ana nga hipi, me nga kamera, tona tini; a hoki ana ki Hiruharama.

## Chapter 15

1  
 Na ka eke te wairua o te Atua ki runga i a Ataria tama a Orere: 2  
 Na ka haere ia ki te whakatau  
 i a Aha, ka mea ki a ia, Whakarongo ki ahau, e Aha, koutou ko Hura katoa, ko Pineamine; kei a  
 koutou a Ihowa, i te mea i a ia koutou. Ki te rapua hoki ia e koutou, e kitea ia e koutou. Ki te  
 whakarerea ia e koutou ka whakarerea koutou e ia. 3  
 Na ka maha enei ra i kore ai te Atua pono i a  
 Iharaira, kahore he tohunga hei whakaako, kahore he ture. 4  
 I a ratou ia i te mate, ka tahuri ratou  
 ki a Ihowa, ki te Atua o Iharaira, rapu ana i a ia, a kitea ana ia e ratou. 5  
 Kahore hoki he maunga  
 rongu i aua wa, e haere atu ai tetahi, e haere mai ai ranei; he nui hoki nga whakararuraru o nga  
 tangata katoa o nga whenua. 6  
 Kua pakaru rikiriki hoki ratou, tetahi iwi i tetahi, tetahi pa i tetahi:  
 na te Atua hoki ratou i whakararu ki nga aitua katoa. 7  
 Ko koutou ia, kia kaha; kaua o koutou ringa  
 e ngoikore, no te mea ka whai utu ta koutou mahi.  
 8  
 A, i te rongonga o Aha i enei kupu, i te poropititanga a Orere poropiti, ka maia ia, a  
 whakakahoretia ana e ia nga whakapakoko whakarihariha puta noa i te whenua o Hura raua ko  
 Pineamine, i nga pa ano hoki o te whenua pukepuke o Eparaima i riro i a ia. I whakahoutia ano  
 hoki e ia te aata i mua i te whakamahau o Ihowa. 9  
 I huihuia ano e ia a Hura katoa raua ko Pineamine,  
 me nga manene e noho ana i a ratou o roto o Eparaima, o Manahi, o Himiona: i papahoro hoki enei  
 ki a ia, tona tini, i roto i a Iharaira, i to ratou kitenga kei a ia a Ihowa, tona Atua. 10  
 Heoi huihui  
 ana ratou ki Hiruharama i te toru o nga marama o te tekau ma rima o nga tau o te kingitanga o Aha.  
 11  
 Patua iho e ratou i taua wa ano hei whakahere ma Ihowa etahi o nga mea i riro i a ratou i te  
 parekura, e whitu rau kau, e whitu mano hipi hoki. 12  
 Na ka uru ratou ki te kawenata kia whakapaua  
 o ratou ngakau, o ratou wairua ki te rapu i a Ihowa, i te Atua o o ratou matua; 13  
 A, ko te tangata  
 e kore e rapu i a Ihowa, i te Atua o Iharaira, kia whakamatea, ahakoa iti, ahakoa rahi, ahakoa tana,

<sup>14</sup> ahakoa wahine. Nui atu to ratou reo ki te oati ki a Ihowa; hamama ana, tangi ana nga tetere me  
<sup>15</sup> nga koronete. Na koa katoa a Hura ki taua oati; kua whakapaua hoki o ratou ngakau ki te oati;  
 kua riro pu ano to ratou hiahia ki te rapu i a ia. I kitea ano ia e ratou, a ka meinga e Ihowa kia ta o  
<sup>16</sup> ratou manawa i tetahi taha, i tetahi taha. Na ko Maaka ano, ko te whaea o Kingi Aha, whakamutua  
 ake e ia tona kuinitanga, mona i hanga i te whakapakoko whakarihariha hei Ahera; tapahia iho hoki  
<sup>17</sup> e Aha tana whakapakoko, tukia ana kia ririki, tahuna ake ki te taha o te awa o Kitirono. Otiia  
 kihai i whakakorea nga wahi tiketike i roto i a Iharaira. He ahakoa ra, i tapatahi te ngakau o Aha i  
<sup>18</sup> ona ra katoa. I kawea hoki e ia ki te whare o te Atua nga mea i whakatapua e tona papa, me nga  
<sup>19</sup> mea i whakatapua e ia ano, te hiriwa, te koura, me nga oko. Na kore ake he whawhai, a tae noa  
 ki te toru tekau ma rima o nga tau o te kingitanga o Aha.

## Chapter 16

<sup>1</sup> I te toru tekau ma ono o nga tau o te kingitanga o Aha ka haere mai a Paaha kingi o Iharaira  
 ki a Hura, a hanga ana a Rama e ia, kia kaua ai tetahi e tukua kia haere atu ranei, kia haere mai  
<sup>2</sup> ranei ki a Aha kingi o Hura. Katahi ka tangohia katoatia e Aha te hiriwa me te koura i roto i nga  
 taonga o te whare o Ihowa, o te whare ano o te kingi, a hoatu ana kia kawea ki a Peneharara kingi  
<sup>3</sup> o Hiria, i Ramahiku hoki ia e noho ana; i mea ia, He kawenata ta taua, he pera me ta toku papa  
 raua ko tou papa: nana, te hiriwa, te koura i hoatu na e ahau kia kawea atu ki a koe. Haere, whakataka  
<sup>4</sup> tau kawenata ki a Paaha kingi o Iharaira, kia haere atu ai ia i toku taha. Na rongo tonu a Peneharara  
 ki a Kingi Aha, a tonoa ana e ia nga rangatira o ana ope ki nga pa o Iharaira; patua iho e ratou a  
<sup>5</sup> Iiono, a Rana, a Aperemaima, me nga pa taonga katoa o Napatari. A, no te rongonga o Paaha, ka  
<sup>6</sup> mutu tana hanga i Rama, a kore ake tona mahinga. Na ka tikina e Kingi Aha a Hura katoa; a taria  
 atu ana e ratou nga kohatu o Rama, me nga rakau o reira i hanga nei e Paaha; a hangaia ana e ia ki  
 aua mea a Kepa me Mihipa.  
<sup>7</sup> I taua wa ka haere a Hanani matakite ki a Aha kingi o Hura, a ka mea ki a ia, Kua okioki na  
 koe ki te kingi o Hiria, a kihai hoki koe i okioki ki a Ihowa, ki tou Atua, mo reira ka mawhiti atu  
<sup>8</sup> te ope o te kingi o Hiria i tou ringa. Ko nga Etiopiana, ko nga Rupimi, he teka ianei he ope tino  
 nui ratou, he maha noa atu hoki a ratou hariata, a ratou kaieke hoiho? heoi, i tou okiokinga ki a  
<sup>9</sup> Ihowa, homai ana ratou e ia ki tou ringa. E kopikopiko ana hoki nga kanohi o Ihowa i te whenua  
 katoa, hei whakaatu i te kaha o tana awhina i te hunga e tapatahi ana o ratou ngakau ki a ia. He

10  
 mahi kuware tenei nau; na ka whai pakanga koe i nga wa e takoto ake nei. Katahi ka riri a Aha ki taua matakite, a hoatu ana e ia ki te whare herehere; he pukuriri hoki nona ki a ia mo tenei mea.

11  
 I tukinotia ano e Aha etahi o te iwi i taua wa. Na, ko nga meatanga a Aha, o te timatanga, o

12  
 muri, kua oti te tuhituhi ki te pukapuka o nga kingi o Hura, o Iharaira. Na i te toru tekau ma iwa o nga tau o tona kingitanga ka mate a Aha i ona waewae; a he tino nui tona mate; otiia i tona matenga

13  
 kihai ia i rapu i ta Ihowa, engari i ta nga rata. Na kua moe a Aha ki ona matua; i mate hoki i te

14  
 wha tekau ma tahi o nga tau o tona kingitanga. A tanumia iho ia ki nga urupa i keria e ia mona ki te pa o Rawiri, whakatakotoria iho ki tetahi takotoranga e ki tonu ana i nga mea kakara, i nga tini mea whakaranu, he mea hanga na te kaiwhakaranu; a nui atu te tahunga i tahuna mona.

## Chapter 17

1  
 Na ko Iehohapata, ko tana tama, te kingi i muri i a ia, a ka tupu tona kaha ki te whawhai ki a

2  
 Iharaira. A i whakanohoia e ia he hoia ki nga pa taiepa katoa o Hura; whakanohoia ana ano e ia he hoia tiaki ki te whenua o Hura, ki nga pa hoki o Eparaima i tangohia nei e tona papa, e Aha.

3  
 Na i a Iehohapata a Ihowa; mona i haere i nga ara tuatahi o tona papa, o Rawiri, kihai hoki i rapu

4  
 i ta nga Paara; Otiia rapua ana e ia te Atua o tona papa, haere ana i runga i ana whakahua; kihai

5  
 tana i rite ki te mahi a Iharaira. Mo reira ka whakatuturutia e Ihowa te kingitanga ki tona ringa; a mauria ana mai e Hura katoa he hakari ki a Iehohapata; a he nui hoki ana taonga, tona kororia.

6  
 I nui ano tona ngakau i runga i nga ara a Ihowa; i whakakahoretia atu hoki e ia nga wahi tiketike,

7  
 me nga Aherimi i roto i a Hura. Na i te toru o nga tau o tona kingitanga ka tonoa e ia ana rangatira,

8  
 a Penehaira, a Oparia, a Tekaria, a Netaneere, a Mikaia kia whakaako i roto i nga pa o Hura; A hei hoa mo ratou ko nga Riwaiti, ko Hemaia, ko Netania, ko Teparia, ko Atahere, ko Hemiramoto, ko Honatana, ko Aronia, ko Topia, ko Topoaronia, he Riwaiti ratou; hei hoa ano mo ratou ko

9  
 Erihama, ko Iehorama, he tohunga enei. Na kei te whakaako ratou i roto i a Hura: i a ratou ano te pukapuka o te ture a Ihowa; i haereerea ano hoki e ratou nga pa katoa o Hura a taka noa, whakaako ai i te iwi.

10  
 Na i runga te wehi o Ihowa i nga kingitanga katoa o nga whenua i tetahi taha o Hura i tetahi

11  
 taha; heoi kihai ratou i whawhai ki a Iehohapata. I mauria mai ano e etahi o nga Pirihitini he hakari ki a Iehohapata, me te hiriwa hei takoha. I kawea mai ano hoki e nga Arapi he hipi ki a ia,

e whitu rau e whitu mano nga hipi toa, me nga koati toa e whitu mano e whitu rau. <sup>12</sup> Na ka tino  
 nui haere a Iehohapata. I hanga hoki etahi taumaihi e ia ki Hura, me etahi pa taonga. <sup>13</sup> A he nui  
 ana mahi i roto i nga pa o Hura; me nga tangata whawhai, nga toa marohirohi i Hiruharama. <sup>14</sup> A  
 ko to ratou tauanga tenei, i nga whare o o ratou matua: o Hura, ko nga rangatira mano; ko Arana  
 te rangatira, a ko ona hoa e toru rau mano nga toa marohirohi: <sup>15</sup> Na i tona taha ko Iehohanana, ko  
 te rangatira; ko ona hoa e rua rau e waru tekau mano. <sup>16</sup> Na i tona taha ko Amahia tama a Tikiri;  
 he mea hihiko noa ia ki a Ihowa; ko ona hoa e rua rau mano nga toa marohirohi. <sup>17</sup> Na, o Pineamine,  
 ko Eriara, he toa marohirohi; ko ona hoa he hunga hapai i te kopere, i te whakangungu rakau, e rua  
 rau mano. <sup>18</sup> Na i tona taha ko Iehotapara; ko ona hoa kotahi rau e waru tekau mano, he hunga rite  
 rawa i te patu mo te whawhai. <sup>19</sup> Mo ta te kingi ake enei; haunga a te kingi i whakanoho ai ki nga  
 pa taiepa puta noa i a Hura.

## Chapter 18

<sup>1</sup> Heoi nui atu nga taonga me te kororia o Iehohapata; a i piri ano raua ko Ahapa i te ara pakuwha.  
<sup>2</sup> Na i te mutunga o etahi tau ka haere atu ia ki a Ahapa, ki Hamaria. A he tini nga hipi me nga kau  
 i patua e Ahapa ma ratou ko ona hoa. Na kei te kukume ia i a ia kia haere tahi raua ki Ramoto  
<sup>3</sup> Kireara. A ka mea a Ahapa kingi o Iharaira ki a Iehohapata kingi o Hura, Kia haere taua ki Ramoto  
 Kireara? Ano ra ko tera ki a ia, Ko ahau, ko koe, rite tonu taua; ko toku iwi, ko tou iwi, rite tonu;  
 hei hoa ano matou mou ki te pakanga.  
<sup>4</sup> A ka mea a Iehohapata ki te kingi o Iharaira, Tena, rapua aianei tetahi kupu i a Ihowa. <sup>5</sup> Na  
 ka huihuia nga poropiti e te kingi o Iharaira, e wha rau tangata. Na ka mea ia ki a ratou, Me haere  
 ranei matou ki Ramoto Kireara ki te whawhai, kauaka ranei ahau e haere? Ano ra ko ratou; Haere;  
 ma te Atua hoki e homai ki te ringa o te kingi. <sup>6</sup> Na ka mea a Iehohapata, Kahore ranei i konei  
 tetahi atu, he poropiti na Ihowa, hei rapunga atu ma tatou? <sup>7</sup> Ano ra ko te kingi o Iharaira ki a  
 Iehohapata, Tenei ano tetahi tangata, hei rapunga atu ma tatou i ta Ihowa; otia e kino ana ahau ki  
 a ia; no te mea kahore ana poropiti pai moku; he kino kau tana i nga ra katoa; ko Mikaia tera, ko  
 te tama a Imi ra. Na ka mea a Iehohapata, Kaua e pena mai te kupu a te kingi. <sup>8</sup> Katahi te kingi o  
<sup>9</sup> Iharaira ka karanga ki tetahi o nga rangatira, ka mea, Kia hohoro mai a Mikaia tama a Imira. Na  
 i runga te kingi o Iharaira raua ko Iehohapata kingi o Hura i tona torona, i tona torona e noho ana,

oti rawa o raua kakahu te kakahu, a noho ana raua i te wahi tuwhera, i te kuwaha o te keti o Hamaria,  
<sup>10</sup>  
me te poropiti ano nga poropiti katoa i to raua aroaro. Na kua oti i a Terekia tama a Kenaana  
etahi haona rino te hanga mana. Ko tana kupu ano tenei, Ko te kupu tenei a Ihowa, Ka tukia nga  
<sup>11</sup>  
Hiriani e koe ki enei a poto noa. Me nga poropiti katoa, pera tonu ta ratou poropiti: i mea ratou,  
<sup>12</sup>  
Haere ki Ramoto Kireara, kia taea hoki tau; kua homai hoki e Ihowa ki te ringa o te kingi. A i  
korero te karere i haere nei ki te tiki i a Mikaia; i mea ki a ia, Nana, ko nga kupu a nga poropiti ki  
te kingi, kotahi tonu te mangai mo te pai; na kia rite tau kupu ki ta tetahi o ratou, kia pai au korero.  
<sup>13</sup>  
Na ka mea a Mikaia, E ora ana a Ihowa, ina, ko ta toku Atua e korero mai ai ki ahau, ko taku  
<sup>14</sup>  
tena e korero ai. A, no tona taenga ki te kingi, ka mea te kingi ki a ia, E Mikaia, me haere ranei  
matou ki Ramoto Kireara ki te whawhai, kua ranei? Ano ra ko tera ki a ia, Haere, kia taea hoki ta  
<sup>15</sup>  
koutou; ka homai hoki ratou ki to koutou ringa. Na ka mea te kingi ki a ia, Kia hia ianei aku  
whakaoati i a koe kia kati au e korero mai ai ki ahau i runga i te ingoa o Ihowa, ko te mea pono  
<sup>16</sup>  
anake. Katahi tera ka ki, I kite ahau i a Iharaira katoa e marara noa ana i runga i nga maunga,  
koia ano kei nga hipi kahore nei o ratou kaitiaki: a i mea a Ihowa, Kahore o enei ariki: kia hoki  
<sup>17</sup>  
marie ratou ki tona whare, ki tona whare. Na ka mea te kingi o Iharaira ki a Iehohapata, Kahore  
<sup>18</sup>  
iane i ahau i ki atu ki a koe, E kore e pai tana poropiti moku; engari he kino? Na ka mea tera,  
Mo reira whakarongo ki te kupu a Ihowa, I kite ahau i a Ihowa e noho ana i runga i tona torona, i  
<sup>19</sup>  
te mano katoa ano o te rangi e tu ana i tona matau, i tona mau i. Na ka mea a Ihowa, Ko wai hei  
whakapati i a Ahapa kingi o Iharaira kia haere ai, kia hinga ai ki Ramoto Kireara? Na puta ke ta  
<sup>20</sup>  
tenei kupu, puta ke ta tenei kupu. Na ko te putanga o tetahi wairua, tu ana i te aroaro o Ihowa,  
<sup>21</sup>  
ka mea, Maku ia e whakapati. A ka mea a Ihowa ki a ia, Me pehea? Ano ra ko tera, Me haere  
atu ahau, a hei wairua teka ahau i roto i nga mangai o ana poropiti katoa. Na ka mea ia, Mau ia e  
<sup>22</sup>  
whakapati, ka taea ano e koe. Haere, meatia tau na. Na, tena, kua hoatu inaianei e Ihowa he  
<sup>23</sup>  
wairua teka ki te mangai o enei poropiti au, kua kino ano ta Ihowa korero mou. Katahi ka  
whakatata a Terekia tama a Kenaana, ka patu i te paparinga o Mikaia, ka mea, I na hea te haerenga  
<sup>24</sup>  
atu o te wairua o Ihowa i ahau ki a koe, korero ai? Ano ra ko Mikaia, Tera koe e kite i te ra e  
<sup>25</sup>  
haere ai koe ki tetahi ruma i roto rawa piri ai. Katahi te kingi o Iharaira ka mea, Kawea atu a  
<sup>26</sup>  
Mikaia, whakahokia ki a Amono rangatira o te pa, ki a Ioaha hoki tama a te kingi: Ki atu hoki,  
Ko te kupu tenei a te kingi, Hoatu tenei ki te whare herehere, whangaia hoki ki te taro o te tangihanga,  
<sup>27</sup>  
ki te wai o te tangihanga, kia hoki mai ra ano ahau i runga i te rangimarie. Ano ra ko Mikaia,



Ki te tupono koe te hoki mai i runga i te rangimarie, heoi he teka naku i whakapuaki ta Ihowa korero. I mea ano ia, Whakarongo mai, e nga iwi katoa.

28

Heoi haere ana te kingi o Iharaira raua ko Iehohapata, kingi o Hura ki runga, ki Ramoto

29

Kireara. Na ka mea te kingi o Iharaira ki a Iehohapata, Me whakaputa ke toku ahau, ka haere ki te whawhai; ko koe ia kakahuria ou kakahu. Heoi whakaputa ke ana te kingi o Iharaira i tona

30

ahua, a haere ana raua ki te whawhai. Kua oti ano ana rangatira hariata te whakahau e te kingi

31

o Hiria; i mea ia, Kaua e whawhai ki te iti, ki te rahi; engari ki te kingi anake o Iharaira. Na, i te kitenga o nga rangatira o nga hariata i a Iehohapata, ka mea ratou, Ko te kingi o Iharaira tenei. Na kua mui ki a ia ki te whawhai. Otiia ko te karangatanga o Iehohapata, a ka awhinatia ia e Ihowa;

32

a na te Atua ratou i mea kia whakarere i a ia. Na, i te kitenga o nga rangatira o nga hariata ehara

33

i te kingi o Iharaira, hoki ana ratou i te whai i a ia. Na ka kumea te kopere e tetahi tangata, he mea noa iho, tu tonu te kingi o Iharaira i waenga pu o te hononga iho o te pukupuku: na reira tera i mea ai ki te kaiarataki o tana hariata, Tahuri tou ringa; kawea atu ahau i roto i te ope; kua tu hoki

34

ahau. Na ka rahi haere te whawhai i taua ra; a i whakamanawanui te kingi o Iharaira, i tu atu ki nga Hiriani i runga i tona hariata, a ahiahi noa; a i te rerenga o te ra ka mate.

## Chapter 19

1

Na hoki marie ana a Iehohapata ki tona whare, ki Hiruharama. A ka puta te matakite, a Iehu tama a Hanani, ki te whakatau i a ia, ka mea ki a Kingi Iehohapata, Me awhina ianei e koe te tangata kino, me aroha ki te hunga e kino ana ki a Ihowa? Na he riri tenei mou, he mea no te aroaro o

3

Ihowa. He ahakoa ra kua kitea etahi mea pai au. I whakakahoretia atu hoki e koe te Aheroto i te

4

whenua; i anga ano tou ngakau ki te rapu i te Atua. Na noho ana a Iehohapata ki Hiruharama, a ka haere atu ano ia puta noa i te iwi, i Peerehepa a tae noa ki te whenua pukepuke o Eparima, a whakahokia ana ratou e ia ki a Ihowa, ki te Atua o o ratou matua.

5

I whakaritea ano e ia he kaiwhakawa mo te whenua ki nga pa taiepa katoa o Hura, ki tenei

6

pa, ki tenei pa. I mea ano ia ki nga kaiwhakawa, Kia whai mahara ki ta koutou e mea ai; ehara hoki ta koutou whakarite whakawa i te mea ki te tangata, engari ki a Ihowa; kei a koutou ano ia

7

ina whakawa. Na kia tau te wehi o Ihowa ki a koutou, kia mau hoki ki te mahi; kahore hoki o to

8

tatou Atua, o Ihowa, whakahaere he, kahore he whakapai i te tangata, kahore he tango utu. I whakaritea ano e Iehohapata ki Hiruharama etahi o nga Riwaiti, o nga tohunga, o nga upoko o nga

whare o nga matua o Iharaira, mo ta Ihowa whakawa, mo nga tautohetohe. A hoki ana ratou ki  
<sup>9</sup>Hiruharama. I whakahau ano ia i a ratou, i mea, Meatia tenei i runga i te wehi o Ihowa, i te pono,  
<sup>10</sup>i te ngakau tapatahi. Ki te tae mai te tautohetohe ki a koutou, he mea na o koutou teina e noho  
 ana i o ratou pa, he toto penei ranei, he toto pera ranei, he ture ranei, he whakaritenga ranei, he  
 whakahau ranei, he tikanga ranei, me whakatupato ratou kia kaua e hara ki a Ihowa, kei takoto he  
<sup>11</sup>riri mo koutou, mo o koutou tuakana, teina. Meatia tenei, a e kore koutou e whai hara. Nana,  
 ko Amaria tino tohunga hei upoko mo koutou i nga mea katoa a Ihowa; ko Teparia hoki, tama a  
 Ihimaera, rangatira o te whare o Hura, mo nga mea katoa a te kingi: ko nga Riwaiti ano hei rangatira  
 i to koutou aroaro. Kia maia ki te mahi, a ko Ihowa hei hoa mo te pai.

## Chapter 20

<sup>1</sup>Na i muri i tenei ka haere mai nga tama a Moapa, ratou ko nga tama a Amona, a hei hoa mo  
 ratou ko etahi o nga Amoni, ki te whawhai ki a Iehohapata. <sup>2</sup>Katahi ka haere mai etahi, ka korero  
 ki a Iehohapata, ka mea, He ope nui tenei te haere mai nei ki a koe i tera taha o te moana, i Hiria.  
 Nana, kei Hatetono Tamara ratou, ara kei Enekeri. <sup>3</sup>Na ka wehi a Iehohapata, a ka tahuri tona  
 aroaro ki te rapu i a Ihowa: i karangatia ano e ia he nohopuku puta noa i a Hura. <sup>4</sup>Na ka huihuia  
 a Hura ki te rapu i ta Ihowa. I puta ratou i nga pa katoa o Hura ki te rapu i ta Ihowa. <sup>5</sup>Na ka tu a  
 Iehohapata i roto i te huihui o Hura, o Hiruharama, i te whare o Ihowa, i mua i te marae hou, <sup>6</sup>A  
 ka mea, E Ihowa, e te Atua o o matou matua, he teka ianei ko koe te Atua i te rangi, ko koe hoki  
 te kaiwhakahaere tikanga mo nga kingitanga katoa mo nga tauwiwi? kei tou ringa te kaha me te  
 marohirohi; kahore hoki tetahi hei tu atu ki a koe. <sup>7</sup>He teka ianei ko koe to matou Atua i peia ai  
 nga tangata o tenei whenua i te aroaro o tau iwi, o Iharaira, a homai ana e koe ki nga uri o  
 Aperahama, o tou hoa aroha a ake ake? <sup>8</sup>Na noho ana ratou ki konei; hanga ana e ratou ki konei  
 he wahi tapu mo tou ingoa; i mea hoki ratou, <sup>9</sup>Ki te puta he aitua ki a matou, he hoari, he  
 whakawakanga, he mate uruta, he matekai ranei, a ka tu matou ki te aronga o tenei whare, ki tou  
 aroaro, kei tenei whare hoki tou ingoa, a ka karanga ki a koe, i a matou ka mate nei, na, mau e  
<sup>10</sup>whakarong o mai, e whakaora. Na tenei nga tama a Amona, a Moapa, a Maunga Heira, kihai  
 nei i homai e koe ki a Iharaira kia whakaekea e ratou i to ratou haerenga mai i te whenua o Ihipa;  
 i peka ke hoki ratou i a ratou, kihai hoki i huna i a ratou; <sup>11</sup>Nana, ko ta ratou utu tenei ki a matou,  
 e haere mai ana ki te pei i a matou i tou kainga tupu i homai nei e koe hei kainga tupu mo matou.

12

E to matou Atua, e kore ianei koe e whakawa ki a ratou? kahore hoki o matou kaha i te aroaro o tenei ope nui e haere mai nei ki a matou; kahore hoki matou e mohio me aha matou: otiia e anga

13  
ana o matou kanohi ki a koe. Na tu tonu a Hura katoa ki te aroaro o Ihowa, a ratou kohungahunga, a ratou wahine, me a ratou tamariki.

14

I reira ka tau ki a Tahatiere tama a Hakaraia, tama a Penaia, tama a Teiere, tama a Matania,  
15  
he Riwaiti, no nga tama a Ahapa, te wairua o Ihowa i waenganui o te whakaminenga. Na ka

mea ia, Whakarongo, e Hura katoa, koutou ko nga tangata o Hiruharama, me koe ano hoki, e Kingi Iehohapata; ko te kupu tenei a Ihowa ki a Koutou, Kaua e wehi, kaua e pawera ki tenei ope nui; no

16

te mea ehara i a koutou te whawhai, engari na te Atua. Apopo ka haere ki raro ki te tu i a ratou: nana, kei te piki mai ratou i te pikitanga i Titi; a ka kite koutou i a ratou i te pito o te awaawa, i te

17

ritenga o te koraha o Ieruere. Kahore he rawa i whawhai ai koutou i tenei pakanga. Whakatikatika i a koutou, ka ata tu, ka matakotaki i ta Ihowa whakaoranga mo koutou, e Hura, e Hiruharama. Kaua

18

e wehi, kaua e pawera. Apopo ka haere ki to ratou aroaro; a ko Ihowa hei hoa mo k outou. Na piko tonu te kanohi o Iehohapata ki te whenua: a takoto ana a Hura katoa, ratou ko nga tangata o

19

Hiruharama, ki te aroaro o Ihowa, koropiko ana ki a Ihowa. Na kua tu nga Riwaiti, nga tama a nga Kohati, nga tama a nga Korahi; kei te whakamoemiti ki a Ihowa, ki te Atua o Iharaira; nui atu te reo.

20

Na ka maranga wawe ratou i te ata, a ka haere ki te koraha o Tekoa; a, i a ratou e haere ana, ka tu a Iehohapata, ka mea, Whakarongo, e Hura, koutou ko nga tangata o Hiruharama, whakapono ki ta Ihowa, ki ta to koutou Atua, a ka u koutou; whakapo no ki ta ana poropiti, a ka kake koutou.

21

Na ka whakatakoto whakaaro ia ki te iwi, a whakaritea ana e ia etahi hei waiata ki a Ihowa, hei whakamoemiti ki te ataahua o te tapu, i a ratou e haere ana i mua i te ope, hei mea, Whakamoemiti

22

ki a Ihowa, he mau tonu hoki tana mahi tohu. Na ka timata nei ratou te waiata, te whakamoemiti, ka whakatakotoria e Ihowa he pehipehi mo nga tama a Amona, a Moapa, mo o Maunga Heira i

23

haere mai nei ki te whawhai ki a Hura; a ka patua ratou. I whakatika hoki nga tama a Amona raua ko Moapa ki nga tangata o Maunga Heira, ki te huna, ki te whakangaro i a ratou; a ka poto i

24

a ratou nga tangata o Heira, na kua piri tenei ki tenei, hei whakangaro ratou i a ratou ano. A, no te taenga o Hura ki te pourewa i te koraha, te tirohanga ki te ope, nana, o ratou tinana e takoto ana

25

i te whenua, kihai tetahi i ora. Na, i te haerenga o Iehohapata ratou ko tona iwi ki te tango i o ratou taonga, he tini nga taonga i kitea ki a ratou, me nga tupapaku, me nga mea e matenuitia ana; huia ana mo ratou; kihai i taea te pikau; na e toru o ratou ra e tango ana i nga taonga, i te tini hoki.

26

A i te wha o nga ra ka huihui ratou ki te raorao o Peraka: i whakapai hoki ratou ki a Ihowa ki

reira; koia i tapa ai te ingoa o taua wahi, ko te raorao o Peraka, a tae noa ki tenei ra. <sup>27</sup> Katahi ka hoki nga tangata katoa o Hura, o Hiruharama, me Iehohapata ano i mua i a ratou; hoki koe ana ki Hiruharama; na Ihowa hoki ratou i mea kia koa ki a ratou hoariri. <sup>28</sup> Na ka tae ratou ki Hiruharama me nga hatere, me nga hapa, me nga tetere ki te whare o Ihowa. <sup>29</sup> Na tau ana te wehi o te Atua ki nga kingitanga katoa o nga whenua i to ratou rongonga kua whawhai a Ihowa ki nga hoariri o Iharaira. <sup>30</sup> Heoi ata takoto ana te kingitanga o Iehohapata; kua meinga hoki ia e tona Atua kia whai tanga manawa a tawhio noa.

<sup>31</sup> Na kingi ana a Iehohapata ki a Hura. E toru tekau ma rima ona tau i tona kingitanga; a e rua tekau ma rima ona tau i kingi ai ia ki Hiruharama. Na ko te ingoa hoki o tona whaea ko Atupa, he tamahine na Hirihiri. <sup>32</sup> I haere ano hoki ia i te ara o tona papa, o Aha, kihai hoki i peka ke i tera; i mahia e ia te mea e tika ana ki te titiro a Ihowa. <sup>33</sup> Otiia kihai nga wahi tiketike i whakakahoretia; kiano hoki te iwi i i whakaanga i o ratou ngakau ki te Atua o o ratou matua. <sup>34</sup> Na, ko era atu meatanga a Iehohapata, o mua, me o muri, nana, kei te tuhituhi i roto i te pukapuka a Iehu tama a Hanani, e korerotia na i roto i te pukapuka o nga kingi o Iharaira. <sup>35</sup> I muri i tenei ka huihuia nga whakaaro o Iehohapata kingi o Hura raua ko Ahatia kingi o Iharaira; he kino rawa ano nga mahi a tenei. <sup>36</sup> I huihuia hoki o raua whakaaro kia hanga he kaupuke hei rere ki Tarahihi. Na hanga ana e raua nga kaupuke ki Ehiono Kepere. <sup>37</sup> Katahi a Erietere tama a Rorawa o Mareha ka poropiti i te he mo Iehohapata, ka mea, Kua huihuia na o korua whakaaro ko Ahatia, mo reira kua pakaru au mahi i a Ihowa. Na kua pakura nga kaupuke, a kihai i ahei te rere ki Tarahihi.

## Chapter 21

<sup>1</sup> Na kua moe a Iehohapata ki ona matua, kua tanumia ki ona matua ki te pa o Rawiri; a ko Iehorama, ko tana tama, te kingi i muri i a ia. <sup>2</sup> He teina ano ona, he tama na Iehohapata, ko Ataria, ko Tehiere, ko Hakaraia, ko Ataria, ko Mikaera, ko Hepatia. Ko enei katoa he tama na Iehohapata kingi o Iharaira. <sup>3</sup> I hoatu hoki etahi hakari nui e to ratou papa ki a ratou, he hiriwa, he koura, he taonga utu nui, he pa taiepa i Hura: ko te kingitanga ia i hoatu e ia ki a Iehorama; no te mea ko ia te matamua. <sup>4</sup> A, ka kake a Iehorama ki te kingitanga o tona papa, ka whai kaha, na patua iho e ia ona teina katoa ki te hoari, me etahi o nga rangatira o Iharaira. <sup>5</sup> E toru tekau ma rua nga tau o

<sup>6</sup>  
 Iehorama i a ia i kingi ai, a e waru ona tau i kingi ai ia ki Hiruharama. Na haere ana ia i te ara o  
 nga kingi o Iharaira, pera ana me ta te whare o Ahapa i mea ai; he wahine hoki nana te tamahine a  
<sup>7</sup>  
 Ahapa; heoi he kino tana mahi ki te titiro a Ihowa. Otiia kihai i pai a Ihowa ki te whakangaro i  
 te whare o Rawiri: i whakaaro ki te kawenata i whakaritea e ia ki a Rawiri, ki tana hoki i ki ai, ka  
<sup>8</sup>  
 hoatu he rama ki a ia, ki ana tama, i nga ra katoa. I ona ra ka maunu a Eroma i raro i te ringa o  
<sup>9</sup>  
 Hura, a whakakingitia ake e ratou he kingi mo ratou. Katahi ka haere a Iehorama ratou ko ana  
 rangatira, me ana hariata katoa. Na maranga ana ia i te po, a patua iho e ia nga Eromi i karapotia  
<sup>10</sup>  
 ai ia, ratou ko nga rangatira o nga hariata. Heoi kua maunu a Eroma i raro i te ringa o Hura a  
 taea noatia tenei ra. I maunu ano a Ripina i taua wa i raro i tona ringa, nona hoki i whakarere i a  
<sup>11</sup>  
 Ihowa, i te Atua o ona matua. Na i hanga e ia he wahi tiketike ki nga maunga o Hura, a meinga  
 ana e ia nga tangata o Hiruharama kia moepuku, i kumea hoki e ia a Hura ki te he.  
<sup>12</sup>  
 Na kua tae mai ki a ia he mea i tuhituhia e Iraia poropiti, e mea ana, Ko te kupu tenei a  
 Ihowa, a te Atua o tou papa, o Rawiri, Na, i te mea kihai koe i haere i nga ara o tou papa, o  
<sup>13</sup>  
 Iehohapata, i nga ara ano o Aha kingi o Hura; Engari haere ana koe i te ara o nga kingi o Iharaira,  
 a meinga ana e koe a Hura, ratou ko nga tangata o Hiruharama, kia moepuku, kia rite ki nga moepuku  
 o te whare o Ahapa; a patua ana e koe ou teina o te whare o tou papa, he hunga i pai ake i a koe:  
<sup>14</sup> <sup>15</sup>  
 Nana, he nui te whiu e whiua ai e Ihowa tou iwi, au tamariki, au wahine, me ou rawa katoa: A  
 tera e nui ou mate, he mate no ou whekau, no ka puta ki waho ou whekau i te mate i tenei ra, i tenei  
<sup>16</sup>  
 ra. Na whakaarahia ana e Ihowa hei whawhai ki a Iehorama te wairua o nga Pirihitini, o nga  
<sup>17</sup>  
 Arapi ano i tata ki nga Etiopiana. Na ka whakaekea a Hura e ratou; kua pakaru ki roto, kahakina  
 ake e ratou nga taonga katoa i rokohanga ki te whare o te kingi, ana tama, me ana wahine, kihai  
<sup>18</sup>  
 rawa tetahi tama ana i mahue ki a ia, ko Iehoahata anake, ko te whakaotinga o ana tama. I muri  
<sup>19</sup>  
 i tenei katoa ka patua e Ihowa ona whekau; he mate kihai i taea te rongoa. A ka maha nga ra,  
 ka taea te mutunga o nga tau e rua, ka puta ona whekau ki waho, na tona mate hoki, a mate iho ia,  
<sup>20</sup>  
 he kino ona mate; kahore hoki a tona iwi tahunga mona pera me te tahunga mo ona matua. E  
 toru tekau ma rua ona tau i tona kingitanga, a e waru ona tau i kingi ai ia ki Hiruharama: na kihai  
 ia i matenuitia i tona haerenga; a tanumia ana ki te pa o Rawiri, engari kahore ki nga tanumanga o  
 nga kingi.

## Chapter 22

<sup>1</sup> A meinga ana e nga tangata o Hiruharama a Ahatia tana tama whakaotinga hei kingi i muri i a ia: i patua hoki nga tuakana katoa e te taua i haere mai nei i nga Arapi ki te puni. Heoi ka kingi a Ahatia, te tama a Iehorama kingi o Hura. <sup>2</sup> E wha tekau ma rua nga tau o Ahatia i tona kingitanga, a kotahi te tau i kingi ai ia ki Hiruharama. A ko te ingoa o tona whaea ko Ataria, he tamahine na Omori. <sup>3</sup> I haere ano ia i nga ara o te whare o Ahapa: ko tona whaea hoki tona kaiwhakatakoto whakaaro mo te mahi he. <sup>4</sup> Na mahia ana e ia te kino ki te titiro a Ihowa, i pera me te whare o Ahapa. Ko ratou hoki ona kaiwhakatakoto whakaaro i muri i te matenga o tona papa, hei ngaromanga mona. <sup>5</sup> Na haere ana ia i runga i to ratou whakaaro. I haere tahi ano raua ko Iehorama tama a Ahapa kingi o Iharaira ki te whawhai ki a Hataere kingi o Hiria, ki Ramoto Kireara; na kua tu a Iorama i nga Hiriani. <sup>6</sup> A hoki ana ia ki Ietereere kia rongoatia nga tunga i tu ai ia ki Rama, i tana whawhai ki a Hataere kingi o Hiria. Na ko te haerenga mai o Ataria tama a Iehorama kingi o Hura kia kite i a Iehorama tama a Ahapa ki Ietereere, e mate ana hoki ia. <sup>7</sup> Na, ko te whakangaromanga i a Ahatia, na te Atua, no tona haerenga ki a Iorama. I tona taenga hoki, ka puta raua ko Iehorama ki te tu i a Iehu tama a Nimihi, i whakawahia nei e Ihowa hei hatepe i te whare o Ahapa. <sup>8</sup> A, i a Iehu e whakawa ana ki te whare o Ahapa, ka tutaki ia ki nga rangatira o Hura, ratou ko nga tama a nga tuakana o Ahatia, e mahi ana ki a Ahatia: na patua iho ratou e ia. <sup>9</sup> Na ka rapua a Ahatia e ia, a ka mau i a ratou; i te piri hoki i Hamaria. Na ka kawea ki a Iehu, a whakamatea iho, tanumia iho; i ki hoki ratou, He tama ia na Iehohapata, na te tangata i whakapaua nei tona ngakau ki te rapu i a Ihowa. Na kore ake he kaha o te whare o Ahatia ki te pupuri i te kingitanga. <sup>10</sup> A, no te kitenga o Ataria whaea o Ahatia, kua mate tana tama, whakatika ana ia, a whakangaromia ana e ia nga uri kingi katoa o te whare o Hura. <sup>11</sup> Otiia tangohia ana e Iehohapeata, tamahine a te kingi, a Ioaha tama a Ahatia, he mea mau huna atu i roto i nga tama a te kingi i whakamatea ra, kawea atu ana raua ko tona kaihihi ki te whare moenga. Na huna ana ia e Iehohapeata tamahine a Kingi Iehorama, wahine a Iehoiara tohunga, he tuahine ano ia no Ahatia, te kitea e Ataria, i kore ai e whakamatea e ia. <sup>12</sup> Na i a ratou ia e huna ana i te whare o te Atua, e ono tau; na ko Ataria te kuini o te whenua.

## Chapter 23

<sup>1</sup> Na i te whitu o nga tau ka whakanuia e Iehoiara he kaha mona; i riro hoki i a ia nga rangatira rau, a Ataria tama a Ierohama, a Ihimaera tama a Iehohanana, a Ataria tama a Opere, a Maaheia

tama a Araia, a Erihapata tama a Tikiri, hei hoa mona, me a rawa ki te kawenata. <sup>2</sup> Na haereerea ana e ratou a Hura a taka noa, huihuia ana e ratou nga Riwaiti i roto i nga pa katoa o Hura, ratou ko nga upoko o nga whare o nga matua o Iharaira, a haere ana ratou ki Hiruharama. <sup>3</sup> Na ka whakarite kawenata te whakaminenga katoa ki te kingi i roto i te whare o te Atua. I mea ano ia ki a ratou, Nana, hei kingi te tama a te kingi, hei pera me ta Ihowa i korero ai mo nga tama a Rawiri.

<sup>4</sup> Ko tenei ta koutou e mea ai; ko te tuatoru o nga wehenga o koutou e haere mai ana i te hapati, ara o nga tohunga, o nga Riwaiti, hei kaitiaki mo nga kuwaha; <sup>5</sup> Ko tetahi o nga wehenga e toru hei te whare o te kingi; ko tetahi o nga wehenga e toru hei te kuwaha o te turanga; ko te iwi katoa hoki hei nga marae o te whare o Ihowa. <sup>6</sup> Kaua ia tetahi e tomo ki te whare o Ihowa, ko nga tohunga anake, ratou ko te hunga o nga Riwaiti e minita ana; ko ratou e haere ki roto, no te mea he tapu ratou. Ko te iwi katoa ia hei tiaki i nga mea a Ihowa. <sup>7</sup> Na me karapoti te kingi e nga Riwaiti a tawhio noa; hei tona ringa ano te patu a tenei, a tenei; a ki te tomo tetahi ki te whare, me whakamate.

Hei te taha tonu koutou o te kingi i tona haerenga mai, i tona haerenga atu. <sup>8</sup> Na ka meatia e nga Riwaiti, e Hura katoa nga mea katoa i whakahaua e Iehoiara tohunga; a ka mau ratou ki ana tangata, ki ana tangata, ki nga mea e haere ana ki roto i te hapati, ki te hunga ano e haere atu ana ki waho i te hapati; kihai hoki a Ie hoiara tohunga i tuku i nga wehenga kia haere. <sup>9</sup> A i homai e Iehoiara tohunga ki nga rangatira rau nga tao, nga pukupuku, me nga whakapuru tao a Kingi Rawiri; i roto hoki era i te whare o te Atua. <sup>10</sup> I whakaturia ano e ia te iwi katoa, me a ratou patu i te ringa o tenei, o tenei, i te koki ki matau o te whare, tae noa ki te koki ki mau i te whare, ki nga taha o te aata, o te whare, hei karapoti mo te kingi. <sup>11</sup> Katahi ka whakaputaina e ratou te tama a te kingi, potaea iho ki a ia te karauna; a homai ana te whakaaturanga ki a ia, na whakakingitia ana ia e ratou; a na Iehoiara ratou ko ana tama ia i whakawahi, me ta ratou karanga, Kia ora te kingi.

<sup>12</sup> A, no te rongonga o Ataria i te nge o te iwi e rere ana, e whakamoemiti ana ki te kingi, ka haere ia ki te iwi, ki te whare o Ihowa. <sup>13</sup> A ka titiro ia, na ko te kingi e tu ana i te taha o tona pou i te tomokanga, ko nga rangatira ano me nga tetere i te taha o te kingi; a ko te iwi katoa o te whenua e koa ana, e whakatangi ana i nga tetere; ko nga kaiwaiata hoki e whakatangi ana i nga mea rangi waiata, e arahi ana i te waiata whakamoemiti. Katahi ka haehae a Ataria i ona kakahu, ka karanga, He he, he he, te whakatakotoria nei! <sup>14</sup> Na ka whakaputaina e Iehoiara tohunga nga rangatira rau, nga kaitohutohu ope ki waho, a ka mea ia ki a ratou, Mauria mai ia ki waenganui i nga rarangi; a ko te tangata e whai i muri i a ia, whakamatea ki te hoari; i mea hoki te tohunga, Kaua ia e whakamatea i roto i te whare o Ihowa. <sup>15</sup> Heoi whakawateatia ana he haerenga mona; na ka tae ia ki te tomokanga o te kuwaha hoiho i te taha o te whare o te kingi, whakamatea iho ki reira. <sup>16</sup> Na ka whakaritea e Iehoiara he kawenata, he mea nana, na te iwi katoa, ratou ko te kingi, kia meinga

17  
 ratou hei iwi ma Ihowa. Na haere ana te iwi katoa ki te whare o Paara, wahia iho e ratou; mongamonga noa i a ratou ana aata, ona ahua; patua iho hoki e ratou a Matana tohunga o Paara ki  
 18  
 mua i nga aata. I whakarite kaitirotiro ano a Iehoiara mo te whare o Ihowa, he mea wehea nei e Rawiri ki roto ki te whare o Ihowa hei whakaeke i nga tahunga tinana a Ihowa, ko te mea hoki ia i tuhituhia i roto i te ture a Mohi; me te koa ano ratou, me te waiata; ko ta Rawiri hoki ia i  
 19  
 whakarite ai. I whakaturia ano e ia he kaitiaki kuwaha mo nga kuwaha o te whare o Ihowa, kei  
 20  
 haere ki roto te tangata e poke ana i tetahi mea. Na tikina ana e ia nga rangatira rau, nga tangata nunui, ratou ko nga kawana o te iwi, ko te iwi katoa ano hoki o te whenua, a mauria iho ana e ratou te kingi i te whare o Ihowa ki raro; na haere ana ratou na to runga kuwaha ki te whare o te kin gi,  
 21  
 a whakanohoia ana te kingi ki te torona o te kingitanga. Heoi koa tonu te iwi katoa o te whenua, a marire noa iho te pa: a patua ana e ratou a Ataria ki te hoari.

## Chapter 24

1  
 E whitu nga tau o Ioaha i a ia i kingi ai; a e wha tekau nga tau i kingi ai ia ki Hiruharama. A  
 ko te ingoa o tona whaea, ko Tipia, no Peerehepa. 2  
 Na he tika nga mahi a Ioaha ki te titiro a Ihowa  
 i nga ra katoa o te tohunga, o Iehoiara. 3  
 A i tangohia e Iehoiara he wahine mana, tokorua; a ka  
 whanau ana tama, ana tamahine. 4  
 I muri i tenei ka whai ngakau a Ioaha ki te whakahou i te whare  
 o Ihowa. 5  
 A ka oti nga tohunga me nga Riwaiti te huihui e ia, ka mea ia ki a ratou, Haere ki nga  
 pa o Hura, ki te kohikohi moni mai i a Iharaira katoa hei whakahou i te whare o to koutou Atua, i  
 tenei tau, i tenei tau; ma koutou hoki e whakahohoro taua mah i. Heoi kihai i hohoro i nga Riwaiti.  
 6  
 Na ka karanga te kingi ki a Iehoiara, ko te upoko hoki ia, a ka mea ki a ia, He aha koe te mea ai  
 ki nga Riwaiti kia mauria mai i a Hura, i Hiruharama, te mea i kohikohia, ta Mohi pononga a Ihowa  
 me ta te whakaminenga o Iharaira mo te tapenakara o te whakaaturanga? 7  
 Na nga tama hoki a taua  
 wahine kino a Ataria i wahi te whare o te Atua; a ko nga mea tapu katoa o te whare o Ihowa, meinga  
 ana e ratou mo nga Paara. 8  
 Heoi ka korero te kingi, a ka hanga he pouaka e ratou, whakaturia ana  
 ki waho, ki te kuwaha o te whare o Ihowa. 9  
 Na, ka pa te karanga puta noa i a Hura, i Hiruharama,  
 kia kawea mai ki a Ihowa te kohikohi i whakaritea e Mohi, e ta te Atua pononga, ki a Iharaira i te  
 koraha. 10  
 Na koa tonu nga rangatira katoa me te iwi katoa, a kawea ana mai e ratou, maka ana ki  
 roto ki te pouaka a rite noa. 11  
 A, i nga wa e kawea mai ai e nga Riwaiti te pouaka ki te whare



takoha o te kingi, a ka kitea kua rahi te moni, ka haere mai te kaituhituhi a te kingi raua ko te tangata a te tino tohunga, ka ringihia e raua nga mea i roto i te pouaka, na ka tang o raua, ka whakahoki

12  
ano ki tona wahi. Pena tonu ratou i ia ra, i ia ra, a nui atu te moni i kohikohia. A hoatu ana e te kingi raua ko Iehoiara ki nga tangata i te mahi o nga mea mo te whare o Ihowa; a na ratou i utu nga kaimahi kohatu, nga kamura, hei whakahou i te whare o Ihowa, nga kaimahi hoki i te rino, i te

13  
parahi, hei whakaora mo te whare o Ihowa. Heoi ka mahi nga kaimahi, a ka oti te mahi i a ratou;

14  
na kua meinga e ratou kia rite ki to mua ahua te tu o te whare o te Atua, kia kaha hoki. A, ka oti i a ratou, ka kawea te toenga o te moni ki te aroaro o te kingi raua ko Iehoiara, a ka waiho hei hanga i etahi oko mo te whare o Ihowa, i nga oko minita, i nga mea mo nga patunga tapu, i nga koko, i nga oko koura, hiriwa; a he whakaeke tonu ta ratou i te tahunga tinana i te whare o Ihowa i nga ra katoa o Iehoiara.

15  
Otiia kua koroheketia a Iehoiara, kua maha ona ra, a ka mate: kotahi rau e toru tekau ona

16  
tau i tona matenga. A tanumia ana ia ki te pa o Rawiri ki te taha o nga kingi; he pai hoki no tana

17  
mahiki a Iharaira, ki te Atua hoki, a ki tona whare. Na i muri i te matenga o Iehoiara ka haere

18  
mai nga rangatira o Hura, a ka piko ki te kingi. Na rongo tonu te kingi ki a ratou. Na whakarerea ake e ratou te whare o Ihowa, o te Atua o o ratou matua, mahi ana ratou ki nga Aherimi, ki nga

19  
whakapakoko. Na kua pa he riri ki a Hura, ki Hiruharama, mo tenei he o ratou. Heoi unga ana e ia nga poropiti ki a ratou hei whakahoki i a ratou ki a Ihowa, a whakawa ana ratou i a ratou: otiia

20  
kihai i rongo. Na kua tau te wairua o te Atua ki te tohunga, ki a Hakaraia tama a Iehoiara; a ka tu ia ki runga ake i te iwi, ka mea ki a ratou, Ko te kupu tenei a te Atua, he aha koutou ka takahi ai i nga whakahau a Ihowa? ma konei hoki ka kore ai koutou e ka ke. Kua whakarerea nei e koutou

21  
a Ihowa na kua whakarerea hoki koutou e ia. Na ka whakatupuria e ratou he he mona, a akina

22  
ia ki te kohatu, na te kingi i whakahau, ki te marae o te whare o Ihowa. Heoi kihai a Kingi Ioaha i mahara ki te aroha i whakaputaina e tona papa, e Iehoiara, ki a ia: heoi patua ana e ia tana tama.

23  
A i tona matenga, ka mea ia, Ma Ihowa e titiro, e rapu utu. Na taka rawa ake te tau, ka whakaekea ia e te taua o Hiria; a haere ana mai ratou ki a Hura, ki Hiruharama, whakangaromia ana e ratou nga rangatira katoa o te iwi i roto i te iwi, tukua ana e ratou o ratou taonga katoa kia kawea ki te

24  
kingi o Ra mahiku. He tokoiti hoki nga tangata o te taua o nga Hiriani i haere mai nei; a hoatu ana e Ihowa te ope nui rawa ki o ratou ringa, mo ratou i whakarere i a Ihowa, i te Atua o o ratou

25  
matua. Heoi tutuki ana i a ratou he whakawa mo Ioaha. A, no to ratou haerenga atu i a ia, i mahue iho hoki ia i a ratou he nui ona mate, ka whakatupuria e ana tangata he he mona, mo nga toto o nga tama a Iehoiara tohunga, a patua ana ia e ratou, ki runga ki tona moenga, a mate iho: na

26  
tanumia ana i a e ratou ki te pa o Rawiri, otiia kahore ki nga tanumanga o nga kingi. Na ko nga

tangata nana i whakatupu te he mona; ko Tapara, tama a tetahi wahine o Amona, a Himeata, ko Iehotapara, tama a tetahi wahine o Moapa, a Timiriti. <sup>27</sup> Na, ko ana tama, me te nui o nga taimaha i utaina ki runga ki a ia, me te hanganga i te whare o te Atua, nana, kei te tuhituhi ena i roto i nga korero o te pukapuka o nga kingi; a ko tana tama, ko Amatia, te kingi i muri i a ia.

## Chapter 25

<sup>1</sup> E rua tekau ma rima nga tau o Amatia i tona kingitanga, a e rua tekau ma iwa nga tau i kingi ai ia ki Hiruharama: a ko te ingoa hoki o tona whaea, ko Iehoarana, no Hiruharama. <sup>2</sup> Na he tika tana mahi ki te titiro a Ihowa, engari kihai i tapatahi te ngakau <sup>3</sup> A, ka pumau tona kingitanga, katahi ka whakamatea e ia ana tangata, nana nei i patu tona papa, te kingi. <sup>4</sup> Ko a raua tama ia kihai i whakamatea; engari i rite tana ki te mea i tuhituhia i te ture i te pukapuka a Mohi, ki ta Ihowa i whakahau ra, Kaua nga matua e mate mo to nga tamariki; kaua hoki nga tamariki e mate mo to nga <sup>5</sup> matua; engari me mate tenei i mo tona hara, tenei mo tona hara. Na i huihuia hoki e Amatia a Hura, a whakaritea ana he rangatira mano, he rangatira rau mo nga whare o o ratou matua, puta noa i a Hura katoa raua ko Pineamine. A taua ana ratou e ia, te hunga e rua tekau, he maha ake hoki, nga tau, a ka kitea e toru rau mano, whiriwhiri rawa, he hunga haere ki te whawhai, he hunga <sup>6</sup> hapai i te tao, i te whakangungu rakau. I utua ano hoki e ia etahi o Iharaira, kotahi rau mano, he marohirohi, he maia, kotahi rau taranata hiriwa. <sup>7</sup> Na, ko te taenga mai o tetahi tangata a te Atua ki a ia, ka mea E te kingi, kaua te taua a Iharaira e haere tahi koutou, no te mea kahore a Ihowa i a Iharaira, ara i nga tama katoa a Eparaima. <sup>8</sup> Otiia ki te haere koe, kia toa, kia kaha ki te whawhai; ma Ihowa ano koe e turaki i te aroaro o te hoariri; he kaha hoki to te Atua ki te awhina, ki te turaki. <sup>9</sup> Na ka mea atu a Amatia ki te tangata a te Atua, Ha, me pehea nga taranata kotahi rau i hoatu e ahau ki te taua a Iharaira? Ano ra ko te tangata a te Atua, E ahei ana i te Atua te homai ki a koe kia <sup>10</sup> rahi noa ake i tenei. Katahi ratou ka wehea atu e Amatia, ara te taua i haere mai ki a ia i Eparaima, kia hoki ki to ratou na wahi. Na mura rawa to ratou riri ki a Hura, a hoki ana ki to ratou wahi, mura <sup>11</sup> tonu te riri. Na ka whakapakari a Amatia i a ia, a arahina ana e ia tona iwi, haere ana ki Raorao <sup>12</sup> Tote, patua iho e ia nga tama a Heira, kotahi tekau mano. Na, ko era atu mano, kotahi tekau, i ora nei, whakaraua ana e nga tama a Hura, kawea ana ki te tihi o te kamaka, maka atu ana i te tihi <sup>13</sup> o te kamaka, a mongamonga noa ratou katoa. Otiia, ko nga tangata o te taua i whakahokia nei e Amatia, kei haere tahi ratou ki te whawhai, whakaeke ana e ratou nga pa o Hura, o Hamaria mai

ano a tae noa ki Petehorono, patua iho etahi o ratou, e toru mano, nui atu hoki te taonga i pahuati a e ratou.

14

A, muri i te taenga mai o Amatia i te patunga i nga Eromi, ka mauria mai e ia nga atua o nga tama a Heira, na ka whakaturia e ia hei atua mona, koropiko ana ia ki mua i a ratou, tahuna

15

ana e ia he whakakakara ki a ratou. Na reira ka mura te riri o Ihowa ki a Amatia, a unga ana mai e ia he poropiti ki a ia, hei korero ki a ia, He aha koe i rapu ai i ta nga atua o te iwi na? kihai na

16

hoki to ratou iwi i whakaorangia e ratou i tou ringa. Na, i a ia e korero ana ki a ia, ka mea te kingi ki a ia, Kua waiho ranei koe hei kaiwhakatakoto whakaaro mo te kingi? Kati tau; mo te aha koe kia patua? Na mutu ake ta te poropiti; otiia i ki ano ia, E mohio ana ano ahau kua takoto to te Atua w hakaaro mou, kia ngaro, mo tau meatanga i tenei, mou hoki kihai i rongo ki toku whakaaro.

17

Katahi a Amatia kingi o Hura ka whakatakoto whakaaro, a unga tangata ana ki a Ioaha tama a Iehoahata tama a Iehu kingi o Iharaira, hei ki atu, Tena, taua ka titiro tetahi ki te kanohi o tetahi.

18

Na ka unga tangata a Ioaha kingi o Iharaira ki a Amatia kingi o Hura, hei ki atu, i tono karere te tataramoa i Repanona ki te hita i Repanona, hei ki atu, Homai tau tamahine hei wahine ma taku

19

tama. Na ko te haerenga atu o tetahi kirehe i Repano na, takahia iho e ia taua tataramoa. E ki ana koe, Na, kua patua e koe Eroma; a kua whakanekhia ake koe e tou ngakau kia whakapehapeha. E noho ra ki tou whare: he aha koe ka whakapataritari ai, e kino ai koe, e hinga ai koe, a koe na,

20

koutou tahi ko Hura? Otiia kihai a Amatia i rongo; na te Atua hoki tena, kia hoatu ai ratou e ia

21

ki te ringa o o ratou hoariri, mo ratou i rapu tikanga i nga atua o Eroma. Heoi haere ana a Ioaha kingi o Iharaira, a ka titiro raua ko Amatia kingi o Hura, tetahi ki te kanohi o tetahi, ki Petehemehe

22

o Hura. Na kua patua a Hura i te aroaro o Iharaira, a rere ana ratou, tena ki tona teneti, tena ki

23

tona teneti. I mau ano a Amatia kingi o Hura tama a Ioaha tama a Iehoahata i a Ioaha kingi o Iharaira ki Petehemehe, a kawea ana ia ki Hiruharama, wawahia ana e ia te taiepa o Hiruharama,

24

i te kuwaha mai ano o Eparaima taea noatia te kuwaha o te koki, e wha rau whatianga. Na, ko te koura katoa, ko te hiriwa, me nga oko katoa i kitea ki te whare o te Atua, ki a Opereeroma, me nga taonga o te whare o te kingi, me etahi tangata hei taumau, tangohia ake e ia, a hoki ana ki

25

Hamaria. A tekau ma rima nga tau i ora ai a Amatia tama a Ioaha kingi o Hura i muri i te matenga

26

o Ioaha tama a Iehoahata kingi o Iharaira. Na, ko era atu meatanga a Amatia, o mua, me o muri,

27

nana, kahore ianei i tuhituhia ki te pukapuka o nga kingi o Hura, o Iharaira? Na no muri i te wa i mahue ai i a Amatia te whai i a Ihowa, ka whakatupuria he he mona ki Hiruharama, a rere ana ia

28

ki Rakihi. Otiia ka unga tangata ratou ki te whai i a ia ki Rakihi, a whakamatea iho ia ki reira. A mauria ana mai i runga hoiho, tanumia ana ki te taha o ona matua, ki te pa o Hura.

## Chapter 26

<sup>1</sup> Katahi te iwi katoa o Hura ka mau ki a Utia, kotahi tekau ma ono nei ona tau, a meinga ana  
 hei kingi i muri i tona papa, i a Amatia. <sup>2</sup> Na tenei i hanga Eroto, a whakahokia ana ki a Hura, i  
 muri i te moenga o te kingi ki ona matua. <sup>3</sup> Kotahi tekau ma ono nga tau o Utia i tona kingitanga,  
 a e rima tekau ma rua ona tau i kingi ai ia ki Hiruharama; a ko te ingoa o tona whaea, ko Iekoria,  
 no Hiruharama. <sup>4</sup> I tika tana mahi ki te titiro a Ihowa, i rite ki nga mea katoa i mea ai tona papa, a  
 Amatia. <sup>5</sup> I rapua e ia ta te Atua i nga ra o Hakaraia, he tangata mohio tera i nga whakakitenga mai  
 a te Atua. Na i nga ra i rapua ai e ia ta Ihowa, ka meinga ia e te Atua kia kake. <sup>6</sup> I haere ano ia ki  
 te whawhai ki nga Pirihitini, a wawahia ana e ia te taiepa o Kata, me te taiepa o Iapane, me te taiepa  
 o Aharoro; a hanga ana e ia etahi pa ki te whenua o Aharoro, ki roto hoki i nga Pirihitini. <sup>7</sup> A i  
 awhinatia ia e te Atua i te whawhai ki nga Pirihitini, ki nga Arapi i noho ki Kurupaara, ratou ko  
 nga Meunimi. <sup>8</sup> A homai ana e nga Amoni he hakari ki a Utia; paku ana hoki tona ingoa a tae noa  
 ki te tomokanga ki Ihipa; na ka nui atu tona kaha. <sup>9</sup> I hanga ano e Utia etahi pourewa ki Hiruharama,  
 ki te kuwaha i te kokonga, ki te kuwaha i te raorao, ki te koki o te taiepa, hanga ana e ia kia kaha.  
<sup>10</sup> I hanga ano e ia etahi pourewa ki te koraha, a keria ana etahi poka wai, he maha, he tini hoki ana  
 kararehe; i te raorao ano, a i te mania: a he kaimahi whenua ana, he kaimahi waina i nga maunga,  
 i nga mara whai hua hoki: he tangata ahu whenua hoki ia. <sup>11</sup> He ope ano ta Utia, he hunga whawhai;  
 i haere a ropu ki te whawhai; ko te tokomaha, kei to ratou tauanga e Teiere kaituhituhi raua ko te  
 kaiwhakahaere, ko Hanania, ko tetahi o nga rangatira a te kingi. <sup>12</sup> Ko te tokomaha katoa o nga  
 upoko o nga whare o nga matua o nga toa marohirohi, e rua mano e ono rau. <sup>13</sup> Na, ko te ope hei  
 arahi ma ratou, he mea i rakaia, e toru rau e whitu mano e rima rau, he hunga i kaha rawa ta ratou  
 whawhai, hei tuara mo te kingi ki te hoariri. <sup>14</sup> Kua pae noa ake i a Utia he whakangungu rakau  
 mo ratou puta noa i te ope, te tao, he potae, he pukupuku, he kopere, he kotaha piu kohatu. <sup>15</sup> I  
 hanga ano e ia etahi mea ki Hiruharama, he mea whakaaro na nga tangata mohio, hei uta ki runga  
 i nga pourewa, i nga pou koki, hei kopere i nga pere, i nga kohatu nunui hoki. A paku ana tona  
 ingoa ki tawhiti; he hanga whakamiharo hoki tona awhi natanga a kaha noa ake ia.  
<sup>16</sup> Otiia i a ia ka kaha nei, ka whakakake tona ngakau, ka mahi i te kino, a takahia ana e ia ta  
 Ihowa, ta tona Atua; i tomo hoki ia ki te temepara o Ihowa, ki te tahu whakakakara ki runga ki te  
 aata whakakakara. <sup>17</sup> Na ka haere atu i muri i a ia a Ataria tohunga, ratou ko etahi tohunga o Ihowa,

<sup>18</sup>  
 e waru tekau, he hunga maia. Na ka turia atu e ratou a Utia, te kingi, a ka mea ratou ki a ia, E kore e tika mau, e Utia, te tahu whakakakara ki a Ihowa; engari ma nga tohunga, ma nga tama a Arona, i whakatapua nei hei tahu whakakakara. Haere atu i te wahi tapu kua he hoki koe; ehara

<sup>19</sup>  
 hoki i te mea e whai kororia ai koe i te Atua, i a Ihowa. Katahi ka riri a Utia; i tona ringa ano he tahu kakara hei tahu whakakakara; a, i a ia e riri ana ki nga tohunga, ka puta ake te repera i tona

<sup>20</sup>  
 rae i te aroaro o nga tohunga i roto i te whare o Ihowa, i te taha o te aata tahu whakakakara. A, ko te tahuritanga o te tino tohunga, o Ataria, ratou ko nga tohunga katoa ki a ia, nana, he repera tera kei tona rae, peia ana ia e ratou i reira; ko ia ano i hohoro te haere, no te mea kua pakia ia e

<sup>21</sup>  
 Ihowa. Na he repera a Utia te kingi a taea noatia te ra i mate ai, a noho ana i te whare motuhake, he repera hoki, he mea momotu atu hoki i te whare o Ihowa; a ko tana tama ko Iotama, te rangatira

<sup>22</sup>  
 mo te whare o te kingi, hei kaiwhakarite mo te iwi o te whenua, Na ko era atu meatanga a Utia,

<sup>23</sup>  
 o mua, o muri, kua oti te tuhituhi e Ihaia poropiti tama a Amoho. Heoi kua moe a Utia ki ona matua, a tanumia iho ki ona matua ki te mara i to nga kingi tanumanga; i mea hoki ratou, He repera ia; a ko tana tama, ko Iotama, te kingi i muri i a ia.

## Chapter 27

<sup>1</sup>  
 E rua tekau ma rima nga tau o Iotama i tona kingitanga, a kotahi tekau ma ono nga tau i kingi

<sup>2</sup>  
 ai ia ki Hiruharama; a ko te ingoa hoki o tona whaea ko Ieruha, he tamahine na Haroko. A he tika tana mahi ki ta Ihowa titiro, i rite ki nga mea katoa i mea ai a Utia, tona papa. Otiia kihai ia i tomo

<sup>3</sup>  
 ki te temepara o Ihowa. I mahi tonu te iwi i te he. Nana i hanga te kuwaha o runga o te whare o

<sup>4</sup>  
 Ihowa, a he nui te wahi i hanga e ia ki runga ki te taiepa i Opere. I hanga ano e ia etahi pa ki nga

<sup>5</sup>  
 maunga o Hura; hanga ana ano e ia etahi taumaihi, etahi pourewa ki nga ngahere. I whawhai ano ia ki te kingi o nga tama a Amona, a taea ana ratou e ia. A homai ana e nga tama a Amona ki a ia i taua tau kotahi rau taranata hiriwa, tekau mano mehua witi, he parei hoki tekau nga mano. Ko

<sup>6</sup>  
 nga utu enei i homai e nga tama a Amona ki a ia, i te rua ano o nga tau, a i te toru ano hoki. Heoi ka kaha haere a Iotama, no te mea i whakatikaia e ia ona huarahi i te aroaro o Ihowa, o tona Atua.

<sup>7</sup>  
 Na, ko era atu meatanga a Iotama, me ana whawhai katoa, me ona huarahi, nana, kua oti te tuhituhi

<sup>8</sup>  
 ki te pukapuka o nga kingi o Iharaira rau ko Hura. E rua tekau ma rima ona tau i tona kingitanga,

<sup>9</sup>  
 a tekau ma ono nga tau i kingi ai ia ki Hiruharama. Na kua moe a Iotama ki ona matua, a tanumia iho ki te pa o Rawiri, a ko tana tama, ko Ahata, te kingi i muri i a ia.

## Chapter 28

<sup>1</sup> E rua tekau nga tau o Ahata i tona kingitanga, a tekau ma ono nga tau i kingi ai ia ki Hiruharama: kihai hoki ia i mahi i te tika ki ta Ihowa titiro, kihai i pera me tona papa, me Rawiri.

<sup>2</sup> I haere hoki ia i nga ara o nga kingi o Iharaira, i hanga ano i etahi whakapakoko whakarewa mo

<sup>3</sup> nga Paara. I tahu whakakakara ano ia ki te raorao o te tama a Hinomo, tahuna ana ano e ia ana tamariki ki te ahi; rite tonu tana ki nga mea whakarihariha a nga iwi i peia nei e Ihowa i te aroaro

<sup>4</sup> o nga tama a Iharaira. I patu whakahere ano ia, i tahu whakakakara ki nga wahi tiketike, ki nga

<sup>5</sup> pukepuke, ki raro i nga rakau kouru nui katoa. Na reira i tukua ai ia e Ihowa, e tona Atua ki te ringa o te kingi o Hiria; a patua ana ia e ratou, he tini ano hoki nga parau o ratou i whakaraua atu, kawea ana ki Ramahiku. I tukua atu ano ia ki te ringa o te kingi o Iharaira, patua iho e ia, h e nui te parekura.

<sup>6</sup> Kotahi hoki te rau e rua tekau mano i patua e Peka tama a Remaria ki Hura i te ra kotahi, he

<sup>7</sup> hunga maia katoa; mo ratou i whakarere i a Ihowa, i te Atua o o ratou matua. Na i patua e tetahi marohirohi o Eparaima, e Tikiri, a Maaheia tama a te kingi, a Atarikama, rangatira o te whare, me

<sup>8</sup> Erekena, to muri i te kingi. Whakaraua atu ana e nga tama a Iharaira e rua rau mano o o ratou tuakana, teina, nga wahine, nga tamariki, nga tamahine, nui atu hoki o ratou taonga i pahuatia e

<sup>9</sup> ratou; kawea atu ana e ratou nga taonga ki Hamaria. Otiia he poropiti ta te Atua i reira, ko Orere tona ingoa; a ka puta ia ki te whakatau i te taua e haere ana mai ki Hamaria, ka mea ki a ratou, Nana, he riri no Ihowa, no te Atua o o koutou matua, ki a Hura i homai ai ratou e ia ki o koutou

<sup>10</sup> ringa; patua iho e koutou, tutuki noa te riri ki te rangi. Heoi kei te mea koutou kia pehia ki raro nga tama o Hura, o Hiruharama, hei pononga tane, hei pononga wahine ma koutou; engari kahore

<sup>11</sup> ranei i a koutou na o koutou he hoki ki a Ihowa, ki to koutou Atua? Tena, whakarongo ki ahau, whakahokia nga whakarau i whakaraua mai e koutou i o koutou tuakana, teina; no te mea kei te

<sup>12</sup> mura te riri o Ihowa, o to koutou Atua, ki a koutou. Katahi ka whakatika etahi o nga upoko o nga tama a Eparaima, a Ataria tama a Iehohanana, a Perekia tama a Mehiremoto, a Hetekia tama

<sup>13</sup> a Harumu, ratou ko Amaha tama a Hararai, ka tu atu ki te hunga i haere mai nei i te whawhai, A ka mea ki a ratou, kei kawea mai e koutou nga whakarau na ki konei: ko ta koutou hoki e mea na hei homai ki a tatou he he ki a Ihowa, e whakanekheia ake ai o tatou hara me to tatou he: he nui

<sup>14</sup> hoki to tatou he, a he riri tenei te mura nei ki a Iharaira. Heoi whakarerea iho e nga tangata i nga

<sup>15</sup> patu nga whakarau, me nga taonga i te aroaro o nga rangatira ratou ko te huihui katoa. Na ka whakatika nga tangata i whakahuatia o ratou ingoa, ka mau ki nga whakarau, whakakakahuria ana

e ratou ki nga taonga nga mea kakahukore o ratou; whakakakahuria ana e ratou, whakawhiwhi rawa ki te hu, hoatu ana he mea hei kai, hei inu, whaka wahia ana, kawea ana nga mea kahakore katoa o ratou i runga i te kaihe, a tae noa ki Heriko, ki te pa nikau ki o ratou tuakana, teina. Na hoki ana ratou ki Hamaria.

<sup>16</sup> I taua wa ka unga tangata a Kingi Ahata ki nga kingi o Ahiria hei awhina mona. <sup>17</sup> No te mea kua tae mai ano nga Eromi; patua iho e ratou a Hura, whakaraua atu ana etahi whakarau.

<sup>18</sup> Kua whakaekea hoki e nga Pirihitini nga pa o te raorao, o te taha ki te tonga o Hura, a riro ana i a ratou a Petehemehe, a Atarono, a Kereroto, a Hoko me ona pa ririki, a Timina me ona pa ririki,

a Kimito me ona pa ririki: nohoia iho e ratou. <sup>19</sup> Na Ihowa hoki i whakaiti a Hura, mo ta Ahata, mo ta te kingi o Iharaira; mo tana mahi wairangi i roto i a Hura, nui atu hoki tona he ki a Ihowa.

<sup>20</sup> Na ka haere a Tirikata Pirinehere kingi o Ahiria ki a ia, ka whakararuraru i a ia, kihai hoki i

whakakaha i a ia. <sup>21</sup> I tangohia hoki e Ahata tetahi wahi i roto i te whare o Ihowa, i te whare ano o te kingi ratou ko nga rangatira, a hoatu ana ki te kingi o Ahiria; kihai ano tera i awhina i a ia.

<sup>22</sup> Na i te wa i he ai ia, ka tohe ano ia ki te he ki a Ihowa, taua kingi a Ahata. <sup>23</sup> I patu whakahere hoki ia ki nga atua o Ramahiku i patu nei i a ia; i ki hoki ia, Ko nga atua o nga kingi o Hiria kei te awhina i a ratou, na, me patu whakahere ahau ki a ratou, kia awhina ai ratou i ahau. Otiia ko ratou

ano hei whakangoikore i a ia, i a Iharaira katoa ano hoki. <sup>24</sup> Na ka huihuia e Ahata nga oko o te whare o te Atua, tapatapahia ana e ia nga oko o te whare o te Atua, a tutakina ana e ia nga tatau o

te whare o Ihowa. I hanga ano e ia etahi aata mana ki nga koki katoa o Hiruharama. <sup>25</sup> I hanga ano e ia ki nga pa o Hura etahi wahi tiketike hei tahu whakakakara ki nga atua ke, whakapataritaria ana

e ia a Ihowa, te Atua o ona matua. <sup>26</sup> Na, ko era meatanga atu ana, ko ana meatanga katoa o mua,

o muri, nana, kua oti te tuhituhi ki te pukapuka o nga kingi o Hura raua ko Iharaira. <sup>27</sup> Na kua moe a Ahata ki ona matua, a tanumia iho ki te pa, ki Hiruharama; otiia kihai i kawea ki nga tanumanga o nga kingi o Iharaira; a ko Hetekia, ko tana tama, te kingi i muri i a ia.

## Chapter 29

<sup>1</sup> E rua tekau ma rima nga tau o Hetekia i tona kingitanga, a e rua tekau ma iwa nga tau i kingi ai ia ki Hiruharama; ko te ingoa hoki o tona whaea ko Apia, he tamahine na Hakaraia. <sup>2</sup> A he tika

tana mahi ki ta Ihowa titiro, i rite ki nga mea katoa i mea ai tona papa, a Rawiri. <sup>3</sup> I te tuatahi o nga tau o tona kingitanga, i te marama tuatahi, ka uakina e ia nga tatau o te whare o Ihowa, hanga ana

<sup>4</sup>  
 e ia kia pai. Na ka mauria mai e ia ki roto nga tohunga ratou ko nga Riwaiti, a ka huihuia ratou  
<sup>5</sup>  
 ki te marae i te taha rawhiti, A ka mea ia ki a ratou, Whakarongo mai, e nga Riwaiti, whakatapua  
 koutou aiane, whakatapua hoki te whare o Ihowa, o te Atua o o koutou matua, maua atu hoki te  
<sup>6</sup>  
 mea poke i roto i te wahi tapu. I he hoki o tatou matua, i mahi i te kino i te titiro a Ihowa, a to  
 tatou Atua. Whakarerea ake ia e ratou, tahuri ke ana o ratou aroaro i te tapenakara o Ihowa; hurihia  
<sup>7</sup>  
 ake e ratou ko o ratou tuara. Ko nga tatau ano o te whakamahau, i tutakina e ratou; tineia iho nga  
 rama, kihai hoki he whakakakara i tahuna e ratou; a kahore he tahunga tinana i whakaekea i te wahi  
<sup>8</sup>  
 tapu ki te Atua o Iharaira. Koia te riri o Ihowa i anga ai ki a Hura, ki Hiruharama, a tukua ana  
<sup>9</sup>  
 ratou e ia kia whiuwhiua, hei miharo me ta o koutou kanohi e kite nei. Nana, kua hinga nei o  
 tatou matua i te hoari; ko te mea ano tenei i whakaraua ai a tatou tama, a tatou tamahine, a tatou  
<sup>10</sup>  
 wahine. Na ko ta toku ngakau tenei, kia whakaritea he kawenata ki a Ihowa, ki te Atua o Iharaira,  
<sup>11</sup>  
 kia tahuri atu ai i a tatou tona riri e mura nei. E aku tama, kua koutou e mangere: he mea  
 whiriwhiri nei hoki koutou na Ihowa hei tu ki tona aroaro, hei mahi ki a ia, hei minita ki a ia, hei  
 tahu whakakakara.  
<sup>12</sup>  
 Katahi ka whakatika nga Riwaiti, a Mahata tama a Amahai, a Hoera tama a Ataria, no nga  
 tama a nga Kohati: a, o nga tama a Merari, ko Kihira tama a Apari, ko Ataria tama a Iehareere: o  
<sup>13</sup>  
 nga Kerehoni hoki, ko Ioaha tama a Tima, ko Erene tama a Ioah a: A, o nga tama a Eritapana,  
<sup>14</sup>  
 ko Himiri, ko Teiere: o nga tama a Ahapa, ko Hakaraia, ko Matania; O nga tama a Hemana, ko  
<sup>15</sup>  
 Tehiere, ko Himeia; o nga tama e Ierutunu, ko Hemaia, ko Utiere. Na huihuia ana e ratou o ratou  
 tuakana, teina, kei te whakatapu ratou i a ratou, a haere ana ki roto ki ta te kingi i whakahau ai, ara  
<sup>16</sup>  
 ki ta Ihowa i ki ai, ki te pure i te whare o Ihowa. Na haere ana nga tohunga ki roto rawa i te  
 whare o Ihowa ki te tahi i te poke, a whakaputaina ana e ratou ki waho nga mea poke katoa i kitea  
 i roto i te temepara o Ihowa ki te marae o te whare o Ihowa. Na tangohia ana e nga Riwaiti, kawea  
<sup>17</sup>  
 ana ki waho ki te awa ki Kitirono. No te ra tuatahi o te marama tuatahi i timata ai ratou te  
 whakatapu, a no te waru o nga ra o te marama i tae ai ratou ki te whakamahau o Ihowa. Na  
 whakatapua ana e ratou te whare o Ihowa, e waru nga ra; a no te tekau ma ono o nga ra o te marama  
<sup>18</sup>  
 tuatahi i oti ai. Katahi ka haere ratou ki roto, kite kingi, ki a Hetekia, a ka mea, Kua tahia e matou  
 te poke o te whare o Ihowa, o te aata tahunga tinana, o ona mea katoa, o te tepu taro aroaro, o ona  
<sup>19</sup>  
 mea katoa. Ko nga oko katoa hoki i akiritia atu e Kingi Ahata i tona kingitanga, i a ia i he ra,  
 kua oti i a matou te whakapai, te whakatapu. Nana, ko aua mea ra kei te aronga o te aata a Ihowa.



20

Katahi ka maranga wawe a Kingi Hetekia i te ata, huihuia ana e ia nga rangatira o te pa,

21

haere ana ia ki runga, ki te whare o Ihowa. A ka kawea mai e ratou e whitu nga puru, e whitu nga hipi toa, e whitu nga reme, e whitu nga koati toa, hei whakahere hara mo te kingitanga, mo te wahi tapu, a mo Hura. Na whakahaua atu ana e ia kia whakaekea e nga tohunga, e nga tama a Arona

22

ki runga ki te aata a Ihowa. Heoi patua ana e ratou nga kau, a ka riro nga toto i nga tohunga, tauhiuhia atu ana e ratou ki te aata. I patua ano e ratou nga hipi toa, tauhiuhia atu ana nga toto ki

23

te aata. Patua ana ano e ratou nga reme, a tauhiuhia ana nga toto ki te aata. Na ka whakatataia mai e ratou nga koati toa hei whakahere hara i te aroaro o te kingi ratou ko te whakaminenga; pokia

24

iho ana o ratou ringa ki runga ki a ratou. Na ka patua e nga tohunga, whakaherea ana o ratou toto mo nga hara ki runga ki te aata, hei whakamarie mo Iharaira katoa: na te kingi hoki i ki mo

25

Iharaira katoa te tahunga tinana me te whakahere hara. I whakaturia ano e ia nga Riwaiti ki te whare o Ihowa, he himipora a ratou, he hatere, he hapa; ko ta Rawiri hoki ia i whakahau ai, ratou ko Kara matakite a te kingi, ko Natana poropiti: na Ihowa hoki te whakahau, ara na ana poropiti.

26

Tu ana tera nga Riwaiti, me nga mea whakatangi a Rawiri, me nga tohunga ano, mau tetere ana.

27

Na ka whakahau a Hetekia kia whakaekea te tahunga tinana ki runga ki te aata. Na i te wa i timata ai te tahunga tinana, ka timataia ano te waiata a Ihowa, me nga tetere, me nga mea whakatangi a

28

Rawiri kingi o Iharaira. Na koropiko katoa ana te whakaminenga, waiata ana nga kaiwaiata,

29

whakatangihia ana nga tetere: i mahia katoa tenei a mutu noa te tahunga tinana. A, no te mutunga

30

o te whakaeke, ka tuohu te kingi me ona hoa katoa i reira, a koropiko ana. I whakahau ano a Kingi Hetekia me nga rangatira ki nga Riwaiti kia whakamoemiti ki a Ihowa; hei nga kupu ano a Rawiri raua ko Ahapa matakite. Na kei te whakamoemiti ratou; me te koa; tuohu ana ratou, koropiko

31

ana ano. Katahi a Hetekia ka oho, ka mea, Na kua whakatapua nei koutou ki a Ihowa, neke mai, kawea mai nga patunga tapu, me nga whakawhetai ki te whare o Ihowa. Na kei te kawea mai te whakaminenga i nga patunga tapu, i nga whakawhetai, a he tahunga tinana ano ta nga ngakau hihiko

32

katoa. Na, ko te maha o nga tahunga tinana i kawea nei e te whakaminenga, e whitu tekau kau,

33

kotahi rau hipi toa, e rua rau reme. Ko enei katoa hei tahunga tinana ki a Ihowa. Na, ko nga mea

34

i whakatapua, e ono rau kau, e toru mano hipi. Otiia he torutoru rawa nga tohunga, kihai i kaha ki te tihore i nga tahunga tinana katoa. Na ka pikitia ratou e o ratou teina, e nga Riwaiti, a oti noa te mahi, kia oti ra ano te whakatapu a nga tohunga i a ratou; engari hoki nga Riwaiti i nga tohunga,

35

i tika o ratou ngakau ki te whakatapu i a ratou. A he tini nga tahunga tinana, me te ngako o nga whakahere mo te pai, me nga ringihanga ano mo nga tahunga tinana. Heoi kua oti te mahi o te

whare o Ihowa te whakatika. <sup>36</sup> Na koa tonu a Hetekia ratou ko te iwi katoa, mo ta te Atua i whakarite ai ma te iwi; he mea oho tata hoki tenei.

### Chapter 30

<sup>1</sup> Na ka tonu tangata a Hetekia ki a Iharaira katoa raua ko Hura; i tuhituhia ano e ia he pukapuka ki a Eparaima raua ko Manahi kia haere mai ki te whare o Ihowa ki Hiruharama, ki te mahi i te kapenga a Ihowa, a te Atua o Iharaira. <sup>2</sup> Kua oti hoki te whakaaro te whakatakoto e te kingi, ratou ko ana rangatira, ko te whakaminenga katoa i Hiruharama, kia mahia te kapenga i te rua o nga marama. <sup>3</sup> Kihai hoki i ahei te mahi i taua wa, no te mea kiano i ata rite te tokomaha o nga tohunga i whakatapua; kiano hoki te iwi i huihui ki Hiruharama. <sup>4</sup> A tika tonu taua mea ki te titiro a te kingi, ki te titiro ano a te whakaminenga katoa. <sup>5</sup> Heoi ka whakatakotoria te korero kia karangatia nuitia puta noa i a Iharaira i Peerehepa atu a tae noa ki Rana, kia haere mai ki te mahi i te kapenga a Ihowa, a te Atua o Iharaira ki Hiruharama: kihai ano hoki i mahia peratia e te nui tangata me te mea i tuhituhia. <sup>6</sup> Heoi haere ana nga kaikawe i nga pukapuka a te kingi ratou ko ana rangatira puta noa i a Iharaira raua ko Hura, pera ana me ta te kingi i whakahau ai; hei ki atu, E nga tama a Iharaira, hoki mai ki a Ihowa ki te Atua o Aperahama, o Ihaka, o Ihara ira, a ka hoki mai ia ki nga morehu o koutou i mawhiti nei i te ringa o nga kingi o Ahiria. <sup>7</sup> Kei rite hoki ki o koutou matua, ki o koutou tuakana, teina, i he nei ki a Ihowa, ki te Atua o o ratou matua; na tukua ana ratou e ia ki te whakangaro; koia ano tena ka kitea na e koutou. <sup>8</sup> Na kua e whakapakeketia o koutou kaki, kei rite ki o koutou matua; engari e tuku i a koutou ki a Ihowa, ka tomo ki tona wahi tapu i whakatapua nei e ia mo ake tonu atu: e mahi ki a Ihowa, ki to koutou Atua, a ka tahuri atu i a koutou tona riri e mura nei. <sup>9</sup> Ki te tahuri hoki koutou ki a Ihowa, ka tohungia o koutou tuakana, teina, me a koutou tamariki e nga tangata nana ratou i whakarau, a ka hoki mai ratou ki tenei whenua; he atawhai hoki, he mahi tohu ta Ihowa, ta to koutou Atua; e kore hoki tona m ata e tahuri ke i a koutou, ki te hoki koutou ki a ia. <sup>10</sup> Heoi haere ana nga kaikawe pukapuka i tenei pa ki tenei pa puta noa i te whenua o Eparaima, o Manahi, a tae noa ki Hepurona. Otiia kataina iho ratou, tawaia iho. <sup>11</sup> I whakaiti ia etahi tangata o Ahera, o Manahi, o Hepurona, i a ratou, a haere ana ki Hiruharama. <sup>12</sup> I runga ano hoki i a Hura te ringa o te Atua hei homai i te ngakau kotahi ki a ratou ko nga rangatira i whakahau ai, ara i ta Ihowa i ki ai.

13

Na he nui te iwi i huihui ki Hiruharama ki te mahi i te hakari o te taro rewenakore i te rua o nga marama, nui atu te whakaminenga. <sup>14</sup> Na whakatika ana ratou, kei te tango i nga aata i Hiruharama, kei te tango ano i nga aata tahu whakakakara, a maka ana ki te awa ki Kitirono.

15

Katahi ka patua te kapenga i te tekau ma wha o te rua o nga marama. A i whakama nga tohunga ratou ko nga Riwaiti, a whakatapua ana ratou e ratou ano, kawea ana e ratou he tahunga tinana ki

16

te whare o Ihowa. A tu ana ratou i to ratou turanga, i te wahi i whakaritea mo ratou, pera ana me ta te ture a Mohi, a ta te Atua tangata: ko nga tohunga hei tauhi i nga toto, ko nga Riwaiti hei

17

homai. He tokomaha hoki i roto i te whakaminenga kihai nei i whakatapu i a ratou: heoi ko nga Riwaiti hei patu i nga kapenga ma te hunga katoa kihai i purea, hei whakatapu i a ratou ki a Ihowa.

18

He tokomaha hoki o te iwi, ara he tokomaha no Eparaima, no Manahi, no Ihakara, no Hepurona, kihai i pure i a ratou, heoi kai ana ratou i te kapenga he mea kihai i rite ki ta te tuhituhi. Otiia i inoi

19

a Hetekia mo ratou, i mea, Ma Ihowa, ma te Me a pai e muru te he o nga tangata katoa, E whakapai ana i o ratou ngakau ki te rapu i te Atua, i a Ihowa, i te Atua o o ratou matua, ko to ratou

20

purenga ia kihai i rite ki to te wahi tapu. Na, ka whakarongo a Ihowa ki a Hetekia, a whakaorangia ana e ia te iwi.

21

A mahia ana e nga tama a Iharaira i kitea ki Hiruharama te hakari taro rewenakore, e whitu nga ra, nui atu te koa; whakamoemititia ana a Ihowa e nga Riwaiti ratou ko nga tohunga i tenei ra,

22

i tenei ra, me te waiata ano i runga i nga mea tangi nu i, he mea ki a Ihowa. A i whakamarie a Hetekia i nga ngakau o nga Riwaiti katoa i mohio pai nei ki te ritenga o te mahi ki a Ihowa, a kai ana ratou i te kai o taua hakari, e whitu nga ra, patua ana e ratou nga whakahere mo te pai, whaki

23

ana ki a Ihowa, ki te Atua o o ratou matua. Na ka whakatakotoria te whakaaro e te whakaminenga

24

katoa, kia mahia etahi atu ra e whitu. A koa ana ratou i a ratou e mahi ana i aua ra e whitu. I homai hoki e Hetekia kingi o Hura ki te whakaminenga hei whakahere etahi puru kotahi mano, etahi hipi e whitu mano; i homai ano e nga rangatira ki te whakaminenga etahi puru kotahi mano,

25

etahi hipi tekau mano. He tokomaha ano hoki nga tohunga i whakatapu i a ratou. Na koa tonu te whakaminenga katoa o Hura, ratou ko nga tohunga, ko nga Riwaiti, me te whakaminenga katoa i haere mai nei i a Iharaira me nga manene i haere mai nei i te whenua o Iharaira ki Hura noho ai.

26

Heoi he nui te koa i Hiruharama, no te mea no nga ra ano o Horomona tama a Rawiri kingi o

27

Iharaira kahore he penei me tenei i Hiruharama. Hatahi ka whakatika nga tohunga, nga Riwaiti, a manaakitia ana e ratou te iwi, a i rangona to ratou reo, i tae atu ano hoki ta ratou inoi ki tona nohoanga tapu, ki te rangi.

## Chapter 31

<sup>1</sup> Na, i te otinga o tenei katoa, ka haere atu a Iharaira katoa i reira ki nga pa o Hura, a pakarua rikirikitia ana e ratou nga pou karakiatanga, tuaina ana nga Aherimi, whakahoroa ana nga wahi tiketike me nga aata puta noa i Hura, i Pineamine, i Ep araima, i Manahi a poto noa. Na hoki ana

<sup>2</sup> nga tama katoa a Iharaira ki tona kainga, ki tona kainga, ki o ratou pa. I whakaritea ano e Hetekia nga wehenga o nga tohunga ratou ko nga Riwaiti, ara o ratou wehenga, mo te mahi a tenei, a tenei, ko nga tohunga ratou ko nga riwaiti ki nga tahunga tinana, ki nga whakahere mo te pai, hei minita,

<sup>3</sup> hei whakawhetai, hei w hakamoemiti i nga kuwaha o nga nohoanga o Ihowa. I whakaritea ano e ia ta te kingi wahi i roto i ona taonga mo nga tahunga tinana, ara mo nga tahunga tinana o te ata, o te ahiahi, mo nga tahunga tinana mo nga hapati, mo nga kowhititanga marama, a mo nga hakari i

<sup>4</sup> whakaritea; mo nga mea i tuhituh ia ki te ture a Ihowa. I mea ano ia ki te iwi, ki nga tangata o Hiruharama, kia homai te wahi ma nga tohunga ratou ko nga Riwaiti, kia tuku ai ratou i a ratou ki

<sup>5</sup> te ture a Ihowa. Puaki kau te kupu, ka kawea nuitia mai e nga tama a Iharaira nga matamaua o te witi, o te waina, o te hinu, o te honi, o nga hua katoa o te mara; tona nui hoki o te whakatekau o

<sup>6</sup> nga mea katoa i kawea mai e ratou. Na, ko nga tama a Iharaira raua ko Hura e noho ana i nga pa o Hura, i kawea mai e ratou te whakatekau o nga kau, o nga hipi, me te whakatekau o nga mea tapu i whakatapua nei ma Ihowa, ma to ratou Atua, whakatakotoria ana e ratou tenei puranga, te nei

<sup>7</sup> puranga. No te toru o nga marama i timata ai ta ratou whakatu i nga puranga, no te whitu o nga

<sup>8</sup> marama i oti ai. Na, no te taenga mai o Hetekia ratou ko nga rangatira ka kite i nga puranga,

<sup>9</sup> whakapai ana ratou i a Ihowa, i tana iwi hoki, i a Iharaira. Katahi ka uia nga tohunga me nga

<sup>10</sup> Riwaiti e Hetekia mo nga puranga. Na ka korero a Ataria te tino tohunga, no te whare o Haroko, ki a ia ka mea, No te timatanga o ta ratou kawea mai i nga whakahere ki te whare o Ihowa, ka kai matou, ka makona, nui atu hoki te toenga; e manaakitia ana hoki tana iwi e Ihowa. Na, ko te toenga, ko tenei haupu nui nei.

<sup>11</sup> Katahi a Hetekia ka ki kia whakapaia etahi ruma ki te whare o Ihowa. Na ka whakapaia

<sup>12</sup> A kawea ana e ratou ki roto nga whakahere, nga whakatekau, nga mea i whakatapua; pono tonu ta ratou; ko te kaitiaki o aua mea, ko Konania Riwaiti; ko tona tuarua, ko tona teina, ko Himeia.

<sup>13</sup> Ko Tehiere hoki, ko Atatia, ko Nahata, ko Atahere, ko Terimoto, ko Iotapara, ko Eriere, ko Ihimakia, ko Mahata, ko Penaia hei kaitirotiro, i raro ano i a Konania raua ko tona teina ko Himeia,

<sup>14</sup> he mea whakarite na Kingi Hetekia raua ko Ataria ranga tira o te whare o te Atua. Na ko Kore tama a Imina Riwaiti, kaitiaki ki te kuwaha ki te rawhiti, hei kaitiaki mo nga mea homai noa ki te

15  
 Atua, hei tuwha i nga whakahere o Ihowa, i nga mea tapu rawa. Na i raro i a ia ko Erene, ko  
 Miniadini, ko Hehua, ko Hemaia, ko Amaria, ko Hekania, i nga pa o nga tohunga, ki ta ratou mahi  
 tuturu, hei tuwha ma o ratou tuakana, teina, ma nga wehenga, ma te rahi, ma te iti: 16  
 Haunga era  
 i te whakapapa, nga tane e toru nei, maha atu ranei nga tau, ma te hunga katoa e tomo ana ki te  
 whare o Ihowa, te mea mo tenei ra, mo tenei ra, mo ta ratou mahi, i a ratou e mahi ana, ara i a ratou  
 i wehea ra hei tiaki; 17  
 Ma nga tohunga ano i te whakapapa, ma nga whare o o ratou matua, ratou  
 ko nga Riwaiti, ma te hunga e rua tekau, maha atu ranei nga tau, i a ratou i wehea ra hei tiaki;  
 18  
 Ma a ratou kohungahunga katoa ano i te whakapapa, ma a ratou wahine, ma a ratou tama, ma a  
 ratou tamahine, i te whakaminenga katoa; i runga hoki i te tapu ta ratou whakatapunga i a ratou ki  
 ta ratou mahi tuturu: 19  
 Ma nga tama ano a Arona, ma nga tohunga i nga mara i waho ake o o ratou  
 pa: kei tenei pa, kei tenei pa, etahi tangata, he mea whakahua o ratou ingoa, hei tuwha ma nga tane  
 katoa i roto i nga tohunga, ma te hunga katoa ano i roto i nga Riwaiti ku a oti te whakapapa. 20  
 Ko  
 ta Hetekia mahi tenei puta noa i a Hura; mahia ana e ia te pai, te tika, me te pono i te aroaro o Ihowa,  
 o tona Atua. 21  
 I nga meatanga katoa, i a ia ka anga nei ki nga mahi o te whare o te Atua, ki te ture,  
 ki nga whakahau, a ka rapu i tona Atua, i whakapaua tona ngakau ki te mahi, a oti pai tana.

## Chapter 32

1  
 I muri i enei mea, i te mea ka ata takoto, ka haere mai a Henakeripi kingi o Ahiria, tae tonu  
 mai ki Hura, whakapaea ana e ia nga pa taiepa; i mea hoki ia kia riro atu i a ia. 2  
 A, no te kitenga  
 o Hetekia kua tae mai a Henakeripi, e anga ana hoki ki te whawhai ki Hiruharama, 3  
 Ka whakatakoto  
 whakaaro ki ana rangatira, ki ana marohirohi, kia purua nga wai o nga puna i waho o te pa; a ko  
 ratou ona hoa mahi. 4  
 Heoi nui atu te iwi i huihui mai, a purua ana e ratou nga puna katoa, me te  
 awa e rere ana i waenganui o te whenua; i ki hoki ratou, He aha kia haere mai nga kingi o Ahiria,  
 kia nui te wai e kitea e ratou? 5  
 Na ka whakapakari ia, a hanga ana e ia te taiepa katoa i pakaru, a  
 eke noa ki nga pourewa; me tetahi atu taiepa ano i waho, i whakakahangia ano e ia a Miro i te pa  
 o Rawiri: a he tini nga pere me nga whakangungu rakau i hanga e ia. 6  
 I whakaritea ano e ia he  
 rangatira whawhai mo te iwi; a ka huihui i a ratou ki a ia ki te wahi whanui i te kuwaha o te pa. Na  
 ka korero whakamarie ia ki a ratou, ka mea, 7  
 Kia kaha, kia maia, kua e wehi, kua e pawera ki  
 te kingi o Ahiria, ki tana ope katoa: hira ake hoki to tatou i tona. 8  
 Ko tona he ringa kikokiko; ko

to tatou ia, ko Ihowa, ko to tatou Atua hei awahina mo tatou, hei whawhai i ta tatou whawhai. Na okioki tonu te iwi ki nga kupu a Hetekia kingi o Hura.

9

I muri i tenei ka unga mai ana tangata e Henakeripi kingi o Ahiria ki Hiruharama: ko ia hoki i te whakapae i Rakihi, a ko tona kingitanga katoa i a ia; hei mea ki a Hetekia kingi o Hura, ki a

10

Hura katoa ano i Hiruharama, Ko te kupu tenei a Henakeripi kingi o Ahiria, E whakawhirinaki

11

ana koutou ki te aha, i a koutou e whakapaea na i Hiruharama? He teka ianei he whakapati ta Hetekia i a koutou, he mea kia tukua ai koutou ki te mate i te kore kai, i te kore wai, i a ia e ki ra,

12

Tera tatou e whakaorangia e Ihowa, e to tatou Atua i te ringa o te kingi o Ahiria? He teka ianei na taua Hetekia nei i whakakore ona wahi tiketike, me ana aata, a ki ana ia ki a Hura, ki Hiruharama, mea ana, Hei mua i te aata kotahi koutou koropiko ai, ki runga ano i tenei koutou tahu ai i te

13

whakakakara? Kahore ranei koutou e mohio ki nga mea i mea ai ahau me oku matua ki nga iwi katoa o nga whenua nei? i taea ranei e nga atua o nga iwi o aua whenua te whakaora to ratou whenua

14

i toku ringa? Ko wai o nga atua o enei iwi i huna nei e oku matua i kaha ki te whakaora i tana

15

iwi i roto i toku ringa, e kaha ai to koutou Atua ki te whakaora i a koutou i roto i toku ringa? Na kei tinihangatia koutou e Hetekia, kei whakapati hoki ia i a koutou, kei pera me tana na; kua hoki e whakapono ki a ia; no te mea kihai i kaha te atua o tetahi iwi, o tetahi kingitanga ranei ki te whakaora i tana iwi i roto i toku ringa, i t e ringa ano o oku matua; e kore rawa to koutou Atua e

16

whakaora i a koutou i roto i toku ringa. Tera atu ano ta ana tangata i korero kino ai mo te Atua,

17

mo Ihowa, mo tana tangata ano, mo Hetekia. I tuhituhia ano e ia etahi pukapuka hei whakakorekore mo Ihowa, mo te Atua o Iharaira, hei korero kino mona; i ki ia, Kihai nei nga atua o nga iwi o nga whenua i kaha ki te whakaora i o ratou iwi i roto i toku ringa, e kore ano hoki te

18

Atua o He tekia e whakaora i tana iwi i roto i toku ringa. Na nui atu ta ratou karanga i te reo Hurai ki te iwi o Hiruharama i runga i te taiepa hei whakawehi i a ratou, hei whakararuru i a

19

ratou, he mea kia riro ai i a ratou te pa. Na, ko ta ratou korero mo te Atua o Hiruharama, rite

20

tonu ki ta ratou mo nga atua o nga iwi o te whenua, mo nga mahi a te ringa tangata. Na kei te inoi, kei te karanga ki te rangi a Kingi Hetekia raua ko te poropiti, ko Ihaia tama a Amoho, mo

21

tenei mea. Na ko te tukunga mai a Ihowa i te anahera, hautopea atu ana e ia nga toa marohirohi katoa ratou ko nga rangatira, ko nga tangata nunui, i te puni o te kingi o Ahiria. Heoi hoki ana ia ki tona whenua; whakama ana tona mata. Haere ana ia ki te wha re o tona atua, na patua iho ia i

22

reira ki te hoari e te hunga i puta i ona whekau. Heoi whakaorangia ake a Hetekia me nga tangata o Hiruharama e Ihowa i te ringa o Henakeripi kingi o Ahiria, i te ringa ano o era katoa, a arahina

23

ana ratou e ia i tetahi taha, i tetahi taha. A he tokomaha ki te kawhe i te hakari ki a Ihowa, ki

Hiruharama, i nga mea utu nui ano ki a Hetekia kingi o Hura; na kake tonu ake ia i reira i te tirohanga a nga iwi katoa.

<sup>24</sup>

I aua ra ka mate a Hetekia, whano marere. Na ko tana inoinga ki a Ihowa, ka korero tera ki

<sup>25</sup>

a ia, ka homai ano i te tohu ki a ia. Otiia kihai i rite ki te atawhainga ki a ia ta Hetekia utu: i

whakakake hoki tona ngakau; na kua takoto he riri mona, mo Hura, mo Hiruharama. <sup>26</sup> Otiia i whakaiti a Hetekia i a ia, mo tona ngakau i whakakake ra, a ia, me nga tangata ano o Hiruharama,

<sup>27</sup>

a kihai te riri o Ihowa i puta ki a ratou i nga ra o Hetekia. Na nui atu te taonga me te kororia i a Hetekia: a hanga ana e ia he toa taonga mo te hiriwa, mo te koura, mo nga kohatu utu nui, mo nga

<sup>28</sup>

mea kakara, mo nga whakangungu rakau, mo nga mea katoa e matenuitia ana; He toa ano mo nga hua o te witi, o te waina, o te hinu, me nga tunga mo ia kararehe, mo ia kararehe, me nga taiepa

<sup>29</sup>

mo nga kahui hipi. I hanga ano e ia etahi pa mona, a he tini ano nga kahui hipi, kau hoki: nui

<sup>30</sup>

atu hoki te taonga i homai e te Atua ki a ia. Na taua Hetekia ano i puru to runga putanga o te wai o Kihona; whakatikaia tonutia iho e ia ki te taha ki te hauauru o te pa o Rawiri. Oti pai ana

<sup>31</sup>

hoki i a Hetekia ana mahi katoa. I nga karere ia a nga rangatira o Papurona i unga mai nei ki a ia ki te ui ki te merekara i puta ki te whenua, i mahue ia i te Atua, kia whakamatauria ai ia, kia

<sup>32</sup>

mohiotia ai nga mea katoa i tona ngakau. Na, ko era atu meatanga a Hetekia, me ana mahi atawhai, nana, kua oti te tuhituhi ki te kite a Ihaia poropiti tama a Amoho, ki te pukapuka o nga

<sup>33</sup>

kingi o Hura, o Iharaira. Na kua moe a Hetekia ki ona matua, a tanumia iho ki to runga rawa o nga urupa o nga tama a Rawiri: a i tona matenga ka whakakororiatia ia e Hura katoa, ratou ko nga tangata o Hiruharama; a ko tana tama, ko Manahi, te kingi i muri i a ia.

### Chapter 33

<sup>1</sup>

Tekau ma rua nga tau o Manahi i tona kingitanga, a e rima tekau ma rima ona tau i kingi ai

<sup>2</sup>

ia ki Hiruharama. A he kino tana mahi ki te titiro a Ihowa, i rite ki nga mea whakarihariha a nga

<sup>3</sup>

iwi i peia nei e Ihowa i te aroaro o nga tama a Iharaira. I hanga ano hoki e ia nga wahi tiketike i wahia e tona papa, e Hetekia: i whakaara i nga aata ki nga Paara, i hanga Aherimi; koropiko ana

<sup>4</sup>

ia ki te ope o te rangi, mahi ana ki a ratou. I hanga ano e ia etahi aata ki te whare o Ihowa, ki ta

<sup>5</sup>

Ihowa i ki ra, Ko Hiruharama hei waihotanga mo toku ingoa ake ake. I hanga ano e ia etahi aata

<sup>6</sup>

ma te ope katoa o te rangi ki nga marae e rua o te whare o Ihowa. Meatia ana e ia ana tamariki

kia tika na waenganui i te ahi i te aroaro o te tama a Hinomi, rapua ana e ia he tohu i nga kapua, i nga nakahi; kei te makutu ano ia, kei te whai ki nga atua maori, ki nga mata maori: nui atu tana

7

kino i mahi ai ki te titiro a Ihowa, hei whakapataritari mona. I whakaturia ano e ia te whakapakoko, te ahua i hanga e ia, ki te whare o te Atua, ki ta te Atua i ki ra ki a Rawiri raua ko tana tama, ko Horomona, Hei tenei whare, hei Hiruharama i whiriwhiria nei e ahau i roto i nga iwi katoa o Iharaira,

8

ahau waiho ai i toku ingoa a ake ake: A heoi aku whakanekehanga i te waewae o Iharaira i te whenua i whakaritea e ahau mo o koutou matua; kia mau raia ratou ki te mahi i nga mea katoa i whakahaua e ahau ki a ratou, kia rite ki te ture katoa, ki nga tikanga, ki nga whakaritenga i whak

9

apuakina nei e Mohi. Heoi whakakotititia ana e Manahi a Hura me nga tangata o Hiruharama kia

10

nui atu ta ratou mahi kino i ta nga iwi i huna nei e Ihowa i te aroaro o nga tama a Iharaira. I korero hoki a Ihowa ki a Manahi ratou ko tona iwi; heoi kihai ratou i rongu.

11

Na reira i kawea mai ai e Ihowa ki runga ki a ratou nga rangatira o te ope o te kingi o Ahiria; a ka mau i a ratou a Manahi i te taura maitai; herea iho ki te mekameka, kawea ana ki Papurona.

12

Na i a ia i te he, ka inoi ia ki a Ihowa, ki tona Atua, ka whakaiti rawa i a ia i te aroaro o te Atua

13

o ona matua, Inoi ana ki a ia; a ka tahuri tera ki a ia, ka rongu ki tana inoi. Na ka whakahokia

14

ia ki Hiruharama, ki tona kingitanga. Katahi ka mohio a Manahi ko Ihowa te Atua. I muri i tenei ka hanga e ia he taiepa i waho o te pa o Rawiri, i te taha ki te hauauru o Kihona, ki te awaawa, a tae noa ki te tomokanga i te kuwaha ika; a taiepatia ana a Opere a whawhe noa, hanga ana e ia kia

15

tiketike rawa. I whakanohoia ano e ia etahi rangatira maia ki nga pa taiepa katoa o Hura. I whakakahoretia ano e ia nga atua ke, me te whakapakoko i roto i te whare o Ihowa, me nga aata katoa i hanga e ia ki te maunga o te whare o Ihowa ki Hiruharama; akiritia atu ana e ia ki waho o

16

te pa. I hanga ano e ia te aata a Ihowa; patua iho e ia ki runga he patunga mo te pai, a mo te

17

whakawhetai, i ki atu ano ki a Hura kia mahi ki a Ihowa, ki te Atua o Iharaira. I patu whakahere

18

ano ia te iwi i runga i nga wahi tiketike; otia ki a Ihowa, ki to ratou Atua anake. Na, ko era atu meatanga a Manahi, me tana inoi ki tona Atua, me nga korero a nga matakite i korero nei ki a ia i runga i te ingoa o Ihowa, o te Atua o Iharaira, nana, kei nga pukapuka o nga mahi a nga kingi o

19

Iharaira. Na, ko tana inoi, me to te Atua tahuritanga ki a ia, me tona hara katoa, me tona he, me nga wahi i hanga ai e ia nga wahi tiketike, i whakaturia ai e ia nga Aherimi, me nga whakapakoko

20

i te mea kiano ia i whakaiti i a ia, nana, kei te tuhituhi i roto i nga korero a Hohai. Heoi kua moe a Manahi ki ona matua, a tanumia iho ki tona whare, a ko tana tama, ko Amono, te kingi i muri i a ia.



<sup>21</sup> E rua tekau ma rua nga tau o Amono i tona kingitanga, a e rua nga tau i kingi ai ia ki  
<sup>22</sup> Hiruharama. A he kino tana mahi ki ta Ihowa titiro, i rite ki ta tona papa, ki ta Manahi i mea ai:  
 i patu whakahere hoki a Amono ki nga whakapakoko katoa i hanga e tona papa, e Manahi, a mahi  
<sup>23</sup> ana ki a ratou. Kihai hoki i whakaiti i a ia ki te aroaro o Ihowa, kihai i pera me tona papa, me  
<sup>24</sup> Manahi i whakaiti nei; heoi nui noa atu te he o taua Amono nei. Na, kua whakatupuria he he  
<sup>25</sup> mona e ana tangata; patua iho ia ki roto ki tona ake whare. Otiia i patua e te iwi o te whenua  
 nga tangata katoa i whakatupuria ai te he mo Kingi Amono; a ka meinga e te iwi o te whenua tana  
 tama, a Hohia, hei kingi i muri i a ia.

### Chapter 34

<sup>1</sup> E waru nga tau o Hohia i tona kingitanga, a e toru tekau ma tahi nga tau i kingi ai ia ki  
<sup>2</sup> Hiruharama. A tika tonu tana mahi ki te titiro a Ihowa: i haere hoki ia i runga i nga ara o tona  
<sup>3</sup> tupuna, o Rawiri; kihai hoki i peka ki matau, ki mau. I te waru hoki o nga tau o tona kingitanga,  
 i te mea he taitamariki ano ia, ka timata ia te rapu i te Atua o tona tupuna, o Rawiri; a i te tekau ma  
 rua o nga tau ka timata ia te tahi i te poke o Hura, o Hiruharama, ara i nga wahi tiketike, i nga  
<sup>4</sup> Aherimi, i nga whakapakoko whaowhao, i nga whakapakoko whakarewa. I wahia ano e ratou  
 nga aata a nga Paara i tona aroaro; tapahia ana e ia nga whakapakoko ra i runga ake o aua aata,  
 mongamonga noa i a ia nga Aherimi, nga whakapakoko whaowhao, me nga whakapakoko  
 whakarewa, tukia ana e ia kia puehu, ruia atu ana ki runga ki nga urupa o te hunga i patu whakahere  
<sup>5</sup> ki a ratou. I tahuna ano e ia nga whenua o nga tohunga ki runga ki a ratou aata, a tahia ana e ia  
<sup>6</sup> te poke o Hura, o Hiruharama. Pera ana ano ia i nga pa o Manahi, o Eparaima, o Himiona, a tae  
<sup>7</sup> noa ki Napatari, i roto i to ratou ururua, a puta noa, puta noa. Na ka wahia iho e ia nga aata, a ka  
 tukia nga Aherimi me nga whakapakoko kia puehu, a poto noa i a ia te tapatapahi nga whakapakoko  
 ra puta noa i te whenua o Iharaira: na hoki ana ia ki Hiruharama.  
<sup>8</sup> Na i te tekau ma waru o nga tau o tona kingitanga, i te mea ka oti nei te poke o te whenua, o  
 te whare, te tahi, ka unga e ia a Hapana tama a Ataria ratou ko maaheia kawana o te pa, ko te  
 kaiwhakamahara, ko Ioaha tama a Iehoahata, ki te hanga i te whare o Ihowa, o tona Atua, kia pai.  
<sup>9</sup> Na haere ana ratou ki a Hirikia tohunga nui, a hoatu ana e ratou te moni i kawea ki te whare o te  
 Atua, ta nga Riwaiti, ta nga kaitiaki o nga tataui i kohikohi ai i te ringa o Manahi, o Eparaima, i nga  
<sup>10</sup> morehu katoa o Iharaira, i a Hura katoa, i a Pineamine, i nga tangata ano o Hiruharama. A na

ratou i hoatu ki te ringa o nga kaimahi i tohutohu nei i te whare o Ihowa; a hoatu ana e enei ki nga  
 kaimahi i mahi nei i te whare o Ihowa hei hanga i nga pakaru, hei whakapai i te whare. <sup>11</sup> Ara i  
 hoatu e ratou ki nga kamura, ki nga kaihanganga, hei hoko i nga kohatu tarai, i nga rakau mo nga  
 hononga, hei whakanoho rakau ano ki nga whare i kore nei i nga kingi o Hura. <sup>12</sup> A pono tonu te  
 mahinga a aua tangata i te mahi; na, ko nga kaitohutohu i a ratou, ko Iahata, ko Oparia, he Riwaiti,  
 no nga tama a Merari; ko Hakaraia, ko Mehurama, no nga tama a nga Kohati, hei whakahohoro;  
 me etahi atu ano o nga Riwaiti katoa i mohio ki nga mea whakatangi. <sup>13</sup> Ko ratou ano hei rangatira  
 mo nga kaipikau, hei kaitirotiro ano mo te hunga katoa e mahi ana i tenei mahi ranei, i tera mahi  
 ranei; ko etahi ano o nga Riwaiti hei karaipi, hei kaitohutohu, hei kaitiaki kuwaha.  
<sup>14</sup> Na, i ta ratou maunga atu i te moni i kawea nei ki te whare o Ihowa, ka kitea e te tohunga,  
 e Hirikia te pukapuka o te ture a Ihowa i homai nei e Mohi. <sup>15</sup> Na ka oho a Hirikia, ka mea ki a  
 Hapana karaipi, Kua kitea e ahau te pukapuka o te ture i roto i te whare o Ihowa. A homai ana te  
 pukapuka e Hirikia ki a Hapana. <sup>16</sup> A na Hapana i kawea te pukapuka ki te kingi. I whakahokia ano  
 e ia te korero ki te kingi; i mea ia, ko nga mea katoa i homai ki te ringa o au pononga, e meatia ana  
 e ratou. <sup>17</sup> Kua ringihia hoki e ratou te moni i kitea i roto i te whare o Ihowa, a hoatu ana ki te ringa  
 ano o nga kaimahi. <sup>18</sup> Na ka korero a Hapana karaipi ki te kingi ka mea, Kua homai he pukapuka  
 ki ahau e Hirikia tohunga. A korerotia ana e Hapana i te aroaro o te kingi. <sup>19</sup> A, no te rongonga o  
 te kingi i nga kupu o te ture, haea ana e ia ona kakahu. <sup>20</sup> Na ka whakahau te kingi ki a Hirikia, ki  
 a Ahikama tama a Hapana, ki a Aparono tama a Mika, ki a Hapana karaipi, ki a Ahaia tangata a te  
 kingi, ka mea, <sup>21</sup> Haere, ui atu ki a Ihowa moku, mo nga morehu ano o Iharaira, o Hura, ara i te  
 tikanga o nga kupu o te pukapuka kua kitea nei: he nui hoki te riri o Ihowa kua ringihia nei ki a  
 tatou, no te mea kihai o tatou matua i pupuri i te kupu a Ihowa, kiha i i mahi i nga mea katoa i  
 tuhituhia ki tenei pukapuka. <sup>22</sup> Heoi haere ana a Hirikia ratou ko a te kingi i whakarite ai, ki a  
 Hurura ki te wahine poropiti, he wahine ia na Harumu, tama a Tokohata, tama a Haharaha, kaitiaki  
 kakahu; i Hiruharama hoki taua wahine e noho ana, i te wahi tuarua. Na korerotia a na enei mea e  
 ratou ki a ia. <sup>23</sup> Na ka mea ia ki a ratou, Ko te korero tenei a Ihowa, a te Atua o Iharaira, Mea atu  
 ki te tangata nana koutou i tono mai ki ahau, <sup>24</sup> Ko ta Ihowa kupu tenei, Tenei ahau te kawea nei i  
 te kino mo tenei wahi, mo nga tangata ano o konei, ara nga kanga katoa kua oti te tuhituhi ki te  
 pukapuka i korerotia ra i te aroaro o te kingi o Hura; <sup>25</sup> Mo ratou i whakarere i ahau, i tahu  
 whakakakara hoki ki nga atua ke, hei whakapataritari i ahau ki nga mahi katoa a o ratou ringa; koia  
 toku riri ka ringihia ai ki tenei wahi; e kore ano e tineia. <sup>26</sup> Otiia kia penei ta koutou ki atu ki te  
 kingi o Hura, nana nei koutou i tono mai ki te ui ki a Ihowa, Ko te kupu tenei a Ihowa, a te Atua o

27

Iharaira, Na, nga kupu i rongongona na koe, Na, i te mea i ngawari tou ngakau, a kua whakaiti koe i a koe i te aroaro o te Atua, i tou rongonga ki ana kupu mo tenei wahi, mo ona tangata ano, a kua whakaiti koe i a koe ki toku aroaro, kua haehae i ou kakahu, a kua tangi ki toku aroaro; kua rongongona

28

ahau, e ai ta Ihowa, Nana, ka huihuia atu koe e ahau ki ou matua ka huihuia atu koe ki tou tanumanga i runga i te rangimarie; e kore ano ou kanohi e kite i nga kino katoa e kawea mai e ahau ki tenei wahi, ki nga tangata ano o konei. Na whakahokia ana e ratou te kore ro ki te kingi.

29

Katahi te kingi ka tono tangata, a huihuia ana e ia nga kaumatua katoa o Hura, o Hiruharama.

30

Na haere ana te kingi ki te whare o Ihowa, ratou ko nga tangata katoa o Hura, ko nga tangata o Hiruharama, ko nga tohunga, ko nga Riwaiti, ko te iwi katoa, te rahi, te iti. Na ka korerotia e ia ki

31

o ratou taringa nga kupu katoa o te pukapuka o te kawenata i kitea nei ki te whare o Ihowa. Na tu ana te kingi ki tona turanga, a whakaritea ana e ia he kawenata ki te aroaro o Ihowa, ara kia whakapaua tona ngakau, tona wairua ki te whai ki a Ihowa, ki te pupuri i ana whakahau, i ana whakaaturanga, i ana tikanga, ki te whakamana ano i nga kupu o te kawenata kua tuhituhia nei ki

32

tenei pukapuka. Na meinga ana e ia te hunga katoa i kitea ki Hiruharama, ki Pineamine, kia tu ki tana. Na mahi ana nga tangata o Hiruharama i nga mea o te kawenata a te Atua, a te Atua o o

33

ratou matua. I whakakahoretia ano e Hohia nga mea whakarihariha katoa o nga whenua katoa i nga tama a Iharaira; a whakamahia ana e ia nga tangata katoa i kitea ki a Iharaira, kia mahi ki a Ihowa, ki to ratou Atua. I ona ra katoa kihai i mahue i a ratou te whai i a Ihowa, i te Atua o o ratou matua.

## Chapter 35

1

Na ka mahia e Hohia te kapenga ki Hiruharama hei mea ki a Ihowa; patua ana e ratou te

2

kapenga i te tekau ma wha o te marama tuatahi. I whakaturia ano e ia nga tohunga ki ta ratou

3

mahi, i whakatenatena ano i a ratou ki nga mahi o te whare o Ihowa. A i mea ia ki nga Riwaiti, ki nga kaiwhakaako o Iharaira katoa, ara ki te hunga i tapu ki a Ihowa, Whakatakotoria te aaka tapu ki te whare i hanga e Horomona tama a Rawiri, kingi o Iharaira: a kore ake e tau he pikaunga ki runga ki o koutou pokoh iwi; me mahi koutou aianei ki a Ihowa, ki to koutou Atua, ki tana iwi ano,

4

ki a Iharaira. Kia ata rite koutou, tenei whare, tenei whare o o koutou matua, i o koutou wehenga, kia rite ki te mea i tuhituhia e Rawiri kingi o Iharaira, ki te mea ano i tuhituhia e tana tama, e

5

Horomona. Me tu hoki ki te wahi tapu; kia rite ano nga wehenga o nga whare o nga matua o o koutou tuakana, teina, o nga tama a te iwi, a ma tenei, ma tenei, he wehenga o tetahi o nga whare

<sup>6</sup>  
 matua o nga Riwaiti. Ka patu ai i te kapenga, ka whakatapu ai i a koutou, ka whakapai ano i o  
 koutou tuakana, teina, kia rite ai ta ratou mahi ki ta Ihowa kupu, i korerotia ra e Mohi. <sup>7</sup> I homai  
 ano e Hohia ki nga tama a te iwi etahi reme, etahi kua koati i te kahui, enei katoa mo nga kapenga,  
 hei mea ma te hunga katoa i reira, e toru tekau mano te maha, e toru mano nga puru: no nga taonga  
<sup>8</sup>  
 enei a te kingi. I homai ano e ana rangatira, he mea tapae noa ki te iwi, ki nga tohunga, ki nga  
 Riwaiti. I homai e Hirikia, e Hakaraia, e Tehiere, ara e nga rangatira o te whare o te Atua ki nga  
<sup>9</sup>  
 tohunga etahi kararehe hei mea kapenga, e rua mano e ono rau, he pu ru hoki e toru rau. Na, ko  
 ona teina, ko Konania, ko Hemaia, ko Netaneere, me nga rangatira o nga riwaiti, me Hahapia, ratou  
 ko Teiere, ko Iotapara, homai ana e ratou ki nga Riwaiti hei mea kapenga, e rima mano o etahi  
<sup>10</sup>  
 kararehe ano, e rima rau nga puru. Heoi kua rite nga mea mo te mahi, a kau tu nga tohunga ki  
 o ratou turanga, me nga Riwaiti, tenei wehenga, tenei wehenga o ratou, ko ta te kingi hoki i whakahau  
<sup>11</sup>  
 ai. Na ka patua te kapenga, tauhuihia ana e nga tohunga te toto i homai nei ki o ratou ringa, a  
<sup>12</sup>  
 na nga Riwaiti i tihore. I wehea hoki e ratou nga tahunga tinana, hei hoatu ki nga wehenga o  
 nga whare o nga matua o te iwi, hei whakahere ki a Ihowa, kia rite ai ki te mea i tuhituhia ki te  
<sup>13</sup>  
 pukapuka a Mohi: pena ana ano ratou ki nga kau. A tunua ana e ratou te kapenga ki te ahi, rite  
 tonu ta ratou ki te tikanga. Ko era atu mea tapu ia i kohuatia ki te kohua, ki te pata, ki te hopane,  
<sup>14</sup>  
 a, hohoro tonu te tuwha ma te iwi katoa. A muri iho ka taka ma ratou ake ko nga tohunga; i te  
 mahi tonu hoki nga tohunga, nga tama a Arona, i te whakaeke i nga tahunga tinana, i te ngako a  
<sup>15</sup>  
 po noa; no reira ko nga Riwaiti hei taka ma ratou ko nga tohunga, ko nga tama a Arona. Na, ko  
 nga kaiwaiata, ko nga tama a Ahapa i to ratou na turanga, ko ta Rawiri hoki ia i whakahau ai, ratou  
 ko Ahapa, ko Hemana, ko Ierutunu matakite a te kingi. Na, ko nga kaitiaki kuwaha i tenei kuwaha,  
 i tenei kuwaha ratou; kahore he tikanga k ia mahua ta ratou mahi, ko o ratou tuakana hoki, ko nga  
<sup>16</sup>  
 Riwaiti, hei taka ma ratou. Heoi oti ake te mahi katoa ki a Ihowa i taua ra ano, ara te mahi i te  
 kapenga, me te whakaeke ano i nga tahunga tinana ki runga ki te aata a Ihowa, ko ta Kingi Hohia  
<sup>17</sup>  
 hoki i whakahau ai. Na i mahia i taua wa e nga tama a Iharaira i kitea ki reira te kapenga me te  
<sup>18</sup>  
 hakari taro rewenakore, e whitu ra: Kahore hoki he kapenga hei rite mo tera i mahia i roto i a  
 Iharaira, no nga ra ano o Hamuera poropiti: kahore hoki he kapenga i mahia e nga kingi katoa o  
 Iharaira hei rite mo ta Hohia i mahi ai, ratou ko nga tohunga, ko nga Riwaiti, ko Hura kato a, me  
<sup>19</sup>  
 te hunga o Iharaira i reira, me nga tangata ano o Hiruharama. No te tekau ma waru o nga tau o  
 te kingitanga o Hohia i mahia ai tenei kapenga.  
<sup>20</sup>  
 I muri i tenei katoa, i te mea ka oti i a Hohia te temepara te whakapai ka haere a Neko kingi  
<sup>21</sup>  
 o Ihipa ki te tatau ki Karakemihi ki te taha o Uparati, a puta ana a Hohia ki te tu i a ia. Otiia ka

tono tangata mai tera ki a ia, hei mea, Ko te aha ta taua, e te kingi o Hura? ehara taku inaianei i te mea ki a koe; engari ki te whare ka whawhaitia nei e ahau; kua mea nei hoki te Atua ki ahau kia hohoro taku. Kei pokanoa koe ki ta te Atua; kei ahau hoki ia, kei whakangaro ia i a koe. <sup>22</sup> Kihai ia te mata o Hohia i tahuri atu i a ia. Whakaahua ke ana ia i a ia, he mea kia whawhai raua; kihai ano i rongu ki nga kupu a Neko, no te mangai o te Atua; a haere ana ki te whawhai ki te raora o <sup>23</sup> Meki. Na ka kopere nga kaikopere ki a Kingi Hohia. A ka mea te kingi ki ana tangata, Kawea <sup>24</sup> atu ahau; he nui rawa hoki toku tunga. Na ka tangohia ia e ana tangata i te hariata, a utaina ana ki te tuarua o ana hariata, kawea atu ana ki Hiruharama, a mate iho ia; na tanumia ana ia ki nga <sup>25</sup> urupa o ona matua. A tangihia ana a Hohia e Hura katoa, e Hiruharama. A i waiatatia ano e Heremaia he apakura mo Hohia; i korerotia ano a Hohia e nga kaiwaiata, e nga tane, e nga wahine, i a ratou apakura, a taea noatia tenei ra; a waiho iho e ratou hei tikanga ma Iharaira. Nana, kei roto <sup>26</sup> na i nga waiata tangi. Na, ko era atu meatanga a Hohia, me ana mahi atawhai, rite tonu ki nga <sup>27</sup> mea i tuhituhia ki te ture a Ihowa, Ko ana meatanga o mua, o muri, nana, kei te tuhituhi i te pukapuka o nga kingi o Iharaira, o Hura.

### Chapter 36

<sup>1</sup> Katahi ka mau te iwi o te whenua ki a Iehoahata tama a Hohia, a meinga ana ia e ratou hei kingi i muri i tona papa ki Hiruharama. <sup>2</sup> E rua tekau ma toru nga tau o Iehoahata i tona kingitanga, a e toru nga marama i kingi ai ia ki Hiruharama. <sup>3</sup> Na ka whakataka ia e te kingi o Ihipa i Hiruharama; a tangohia ana e tera i te whenua, hei utu he, kotahi rau taranata hiriwa me te taranata <sup>4</sup> koura. I meinga ano tona tuakana a Eriakimi e te kingi o Ihipa hei kingi mo Hura, mo Hiruharama: whakawhitia ketia ake tona ingoa ko Iehoiakimi. Na tangohia ana to tenei teina, a Iehoahata, e <sup>5</sup> Neko, mauria ana e ia ki Ihipa. E rua tekau ma rima nga tau o Iehoiakimi i tona kingitanga, a kotahi tekau ma tahi nga tau i kingi ai ia ki Hiruharama; he kino ano hoki tana mahi ki te titiro a <sup>6</sup> Ihowa, a tona Atua. Whakaekea ana ia e Nepukaneka kingi o Papurona, herea iho ki te mekameka, <sup>7</sup> hei kawae i a ia ki Papurona. I mauria ano e Nepukaneha nga oko o te whare o Ihowa ki Papurona, <sup>8</sup> hoatu ana e ia ki roto ki tona temepara i Papurona. Na, ko era atu meatanga a Iehoiakimi, me ana mea whakarihariha i mea ai, me ana tikanga i kitea, nana, kei te tuhituhi i roto i te pukapuka o nga <sup>9</sup> kingi o Iharaira, o Hura: a ko tana tama, ko Iehoiakini, te kingi i muri i a ia. E waru nga tau o Iehoiakini i tona kingitanga, a e toru nga marama tekau nga ra i kingi ai ia ki Hiruharama. A he

10  
kino tana mahi ki ta Ihowa titiro. Na, i te takanga o te tau, ka tonu tangata a Kingi Nepukaneha, a mauria ana ia ki Papurona, me nga oko papai o te whare o Ihowa; a meinga ana e ia tona tuakana a Terekia hei kingi mo Hura, mo Hiruharama.

11 E rua tekau ma tahi nga tau o Terekia i tona kingitanga, a kotahi tekau ma tahi nga tau i kingi ai ia ki Hiruharama. 12 A he kino tana mahi ki te titiro a Ihowa, a tona Atua; kihai hoki ia i

13 whakaiti i a ia i te aroaro o te poropiti, o Heremaia, e korero ana i ta te mangai o Ihowa. I whakakeke ano hoki ia ki a Kingi Nepukaneha, nana nei ia i whakaoati ki te Atua; heoi whakamarokia ana e ia tona kaki, whakapakeketia ana e ia tona ngakau, kihai i tahuri ki a Ihowa,

14 ki te Atua o Iharaira. Me nga rangatira o nga tohunga, o te iwi, nui atu to ratou kino; i rite tonu ki nga mea whakarihariha katoa o nga tau iwi; whakapokea iho e ratou te whare o Ihowa i whakatapua

15 nei e ia, ki Hiruharama. A i unga tangata a Ihowa, te Atua o o ratou matua, ara ana karere ki a ratou; maranga wawe ana ia ki te tonu, he tohu hoki nana i tana iwi, i tona nohoanga. 16 Otiia tawaia iho e ratou nga karere a te Atua, whakahaweatia ana ana kupu, tukinotia ana ana poropiti,

17 a ara noa te riri o Ihowa ki tana iwi; a kahore noa iho he whakaoranga. Na reira i kawea ai e ia te kingi o nga Karari ki a ratou, a patua iho e ia a ratou taitama ki te hoari i roto i te whare o to ratou wahi tapu; kihai i tohungia e ia te taitama, te kotiro, te kaumatua, te koroheke tuara piko; hoatu

18 katoa ana e i a ki tona ringa. Na, ko nga oko o te whare o te Atua, ko nga mea nunui, ko nga mea ririki, ko nga taonga o te whare o Ihowa, me nga taonga o te kingi ratou ko ona rangatira;

19 kawea katoatia ana e ia enei ki Papurona. Tahuna ake e ratou te whare o te Atua, wahia iho te taiepa o Hiruharama, tahuna ana nga whare papai katoa ki te ahi, ngaro rawa i a ratou nga oko papai

20 katoa o reira. Whakahekea atu ana hoki e ia te hunga i toe i te hoari ki Papurona, a he pononga

21 ratou mana, ma ana tama, a taea noatia te kingitanga o Pahia: Hei whakaritenga mo te kupu a Ihowa, i korerotia e Heremaia, kia koa ra ano te whenua i ona hapati: he hapati hoki ona i nga ra katoa o te ngaromanga; kia rite ra ano nga tau e whitu tekau.

22 Na, i te tuatahi o nga tau o Hairuha kingi o Pahia, ka whakamana te kupu a Ihowa, i korerotia e Heremaia, ka whakaohokia e Ihowa te wairua o Hairuha kingi o Pahia. Na ka tukua e tera tana

23 karanga puta noa i tona kingitanga; he mea tuhituhi nana; i mea ia, Ko te kupu tenei a Hairuha kingi o Pahia, Kua oti nga kingitanga katoa o te whenua te homai ki ahau e Ihowa, e te Atua o nga rangi; kua whakahaua mai ano ahau e ia kia hanga i te whare mona ki Hiruharama, ki tera i Hura. Ko wai tenei o koutou o tana iwi katoa, hei a ia a Ihowa, tona Atua, kia haere ake hoki ia.

## Ezra

### Chapter 1

<sup>1</sup> Na, i te tau tuatahi o Hairuha kingi o Pahia, he mea kia whakamana ai te kupu a Ihowa, i whakapuakina e Heremaia, ka whakaohokia e Ihowa te wairua o Hairuha kingi o Pahia, a tukua ana e tera tana karanga puta noa i tona kingitanga, i tuhituhi hoki i e ia, i mea ia, <sup>2</sup> Ko te kupu tenei a Hairuha kingi o Pahia, kua oti nga kingitanga katoa o te whenua te homai ki ahau e Ihowa, e te Atua o nga rangi; kua whakahaua mai hoki ahau e ia kia hanga he whare mona ki Hiruharama, ki tera i Hura. <sup>3</sup> Ahakoa ko wai o koutou o tana iwi katoa, hei a ia tona Atua, a me haere ake ia ki Hiruharama, ki tera i Hura, ki te hanga i te whare o Ihowa, o te Atua o Iharaira, ko ia nei te Atua, kei Hiruharama ano ia. <sup>4</sup> Na, ko te tangata ka mahue ki te wahi e noho ai ia, ma nga tangata o tona wahi ia e awhina ki te hiriwa, ki te koura, ki te taonga, ki te kararehe, hei tapiri mo nga mea hoatu noa mo te whare o te Atua i Hiruharama.

<sup>5</sup> Katahi ka whakatika nga upoko o nga whare o nga matua o Hura, o Pineamine, me nga tohunga, me nga Riwaiti, me te hunga katoa i whakaohokia nei o ratou wairua e te Atua, ka mea ki te haere ki te hanga i te whare o Ihowa i Hiruharama. <sup>6</sup> Na, ko nga tangata katoa i o ratou taha, kei te whakakaha i o ratou ringa ki te oko hiriwa, ki te koura, ki te taonga, ki te kararehe, ki te mea utu nui, he mea tapiri ki nga mea homai noa katoa. <sup>7</sup> A i whakaputaina e Kingi Hairuha nga oko o te whare o Ihowa i kawea atu nei e ia ki roto ki te whare o ona atua; <sup>8</sup> I whakaputaina enei e Hairuha kingi o Pahia, ara e Mitirerata kaitiaki taonga, taua atu ana e ia ki a Hehepatara rangatira o Hura.

<sup>9</sup> Ko te maha tenei o aua mea: e toru tekau peihana koura, kotahi mano peihana hiriwa, e rua tekau ma iwa maripi; <sup>10</sup> E toru tekau nga haka koura, ko nga haka hiriwa, he ahua ke, e wha rau kotahi tekau; ko etahi oko ke, kotahi mano. <sup>11</sup> Ko nga oko katoa, ke nga mea koura, ko nga mea hiriwa, e rima mano e wha rau. Ko enei katoa i kawea atu e Hehepatara i te kawenga o nga whakarau i Papurona ki Hiruharama.

### Chapter 2

<sup>1</sup> Na ko nga tama enei o te kawanatanga i maunu atu nei i roto i nga whakarau, i te hunga i whakahekea, i era i whakahekea e Nepukaneha kingi o Papurona ki Papurona, a i hoki nei ki

Hiruharama, ki Hura, ki tona pa, ki tona pa; <sup>2</sup> I haere tahi nei me Herupapera; ko Hehua, ko Nehemia,  
 ko Heraia, ko Reeraia, ko Mororekai, ko Pirihana, ko Mitipara, ko Pikiwai, ko Rehumu, ko Paana.  
 Ko te tokomaha o nga tangata o te iwi o Iharaira: <sup>3</sup> Ko nga tama a Paroho, e rua mano kotahi rau  
 e whitu tekau ma rua. <sup>4</sup> Ko nga tama a Hepatia, e toru rau e whitu tekau ma rua. <sup>5</sup> Ko nga tama a  
 Araha, e whitu rau e whitu tekau ma rima. <sup>6</sup> Ko nga tama a Pahata Moapa, no nga tama a Hehua,  
 a Ioapa, e rua mano e waru rau kotahi tekau ma rua. <sup>7</sup> Ko nga tama a Erama, kotahi mano e rua rau  
 e rima tekau ma wha. <sup>8</sup> Ko nga tama a Tatu, e iwa rau e wha tekau ma rima. <sup>9</sup> Ko nga tama a Takai,  
 e whitu rau e ono tekau. <sup>10</sup> Ko nga tama a Pani, e ono rau e wha tekau ma rua. <sup>11</sup> Ko nga tama a  
 Pepai, e ono rau e rua tekau ma toru. <sup>12</sup> Ko nga tama a Atakara, kotahi mano e rua rau e rua tekau  
 ma rua. <sup>13</sup> Ko nga tama a Aronikama, e ono rau e ono tekau ma ono. <sup>14</sup> Ko nga tama a Pikiwai, e  
 rua mano e rima tekau ma ono. <sup>15</sup> Ko nga tama a Arini, e wha rau e rima tekau ma wha. <sup>16</sup> Ko nga  
 tama a Atere, a Hetekia, e iwa tekau ma waru. <sup>17</sup> Ko nga tama a Petai, e toru rau e rua tekau ma  
 toru. <sup>18</sup> Ko nga tama a Ioraha, kotahi rau kotahi tekau ma rua. <sup>19</sup> Ko nga tama a Hahumu, e rua  
 rau e rua tekau ma toru. <sup>20</sup> Ko nga tama a Kipara, e iwa tekau ma rima. <sup>21</sup> Ko nga tama a  
 Peterehema, kotahi rau e rua tekau ma toru. <sup>22</sup> Ko nga tangata o Netopa, e rima tekau ma ono.  
<sup>23</sup> Ko nga tangata o Anatoto, kotahi rau e rua tekau ma waru. <sup>24</sup> Ko nga tama a Atamawete, e wha  
 tekau ma rua. <sup>25</sup> Ko nga tama a Kiriataarimi, a Kepira, a Peeroto, e whitu rau e wha tekau ma toru.  
<sup>26</sup> Ko nga tama a Rama, a Kapa, e ono rau e rua tekau ma tahi. <sup>27</sup> Ko nga tama a Mikimaha, kotahi  
 rau e rua tekau ma rua. <sup>28</sup> Ko nga tangata o Peteere, o Hai, e rua rau e rua tekau ma toru. <sup>29</sup> Ko  
 nga tama a Nepo, e rima tekau ma rua. <sup>30</sup> Ko nga tama a Makapihi, kotahi rau e rima tekau ma  
 ono. <sup>31</sup> Ko nga tama a tetahi atu Erama, kotahi mano e rua rau e rima tekau ma wha. <sup>32</sup> Ko nga  
 tama a Harimi, e toru rau e rua tekau. <sup>33</sup> Ko nga tama a Roro, a Hairiri, a Ono, e whitu rau e rua  
 tekau ma rima. <sup>34</sup> Ko nga tama a Heriko, e toru rau e wha tekau ma rima. <sup>35</sup> Ko nga tama a Hena,  
 e toru mano e ono rau e toru tekau.  
<sup>36</sup> Ko nga tohunga: ara ko nga tama a Ieraia, o te whare o Hehua, e iwa rau e whitu tekau ma  
<sup>37</sup> Ko nga tama a Imere, kotahi mano e rima tekau ma rua. <sup>38</sup> Ko nga tama a Pahuru, kotahi



39  
 mano e rua rau e wha tekau ma whitu. Ko nga tama a Harimi, kotahi mano kotahi tekau ma  
 40  
 whitu. Ko nga Riwaiti: ara ko nga tama a Hehua, a Karamiere; no nga tama a Horawai, e whitu  
 41  
 tekau ma wha. Ko nga kaiwaiata: ara ko nga tama a Ahapa, kotahi rau e rua tekau ma waru.  
 42  
 Ko nga tama a nga kaitiaki kuwaha: ara ko nga tama a Harumu, ko nga tama a Atere, ko nga  
 tama a Taramono, ko nga tama a Akupu, ko nga tama a Hatita, ko nga tama a Hopai: huihuia kotahi  
 43  
 rau e toru tekau ma iwa. Ko nga Netinimi: ara ko nga tama a Tiha, ko nga tama a Hahupa, ko  
 44  
 nga tama a Tapaoto, Ko nga tama a Keroho, ko nga tama a Hiaha, ko nga tama a Parono, Ko  
 45  
 nga tama a Repana, ko nga tama a Hakapa, ko nga tama a Akupu, Ko nga tama a Hakapa, ko  
 46  
 nga tama a Haramai, ko nga tama a Hanana, Ko nga tama a Kirere, ko nga tama a Kahara, ko  
 47  
 nga tama a Reaia, Ko nga tama a Retini, ko nga tama a Nekora, ko nga tama a Katama, Ko  
 48  
 nga tama a Uha, ko nga tama a Pahea, ko nga tama a Pehai, Ko nga tama a Ahana, ko nga tama  
 49  
 a Meunimi, ko nga tama a Nepuhimi, Ko nga tama a Pakapuku, ko nga tama a Hakupa, ko nga  
 50  
 tama a Harahuru, Ko nga tama a Patarutu, ko nga tama a Mehira, ko nga tama a Haraha, Ko  
 51  
 nga tama a Parakoho, ko nga tama a Hihera, ko nga tama a Tamaha, Ko nga tama a Netia, ko  
 52  
 nga tama a Hatipa. Ko nga tama a nga tangata a Horomona: ara ko nga tama a Hotai, ko nga  
 53  
 tama a Hoperete, ko nga tama a Perura, Ko nga tama a Taara, ko nga tama a Tarakono, ko nga  
 54  
 tama a Kirere; Ko nga tama a Hepatia, ko nga tama a Hatira, ko nga tama a Pokerete o Tepaimi,  
 55  
 ko nga tama a Ami. Ko nga Netinimi katoa, ratou ko nga tama a nga tangata a Horomona, e toru  
 56  
 rau e iwa tekau ma rua. Na ko nga mea enei i haere mai i Teremera, i Terehareha, i Kerupu, i  
 57  
 Arana, i Imere; otiia kihai i taea e ratou te whakaatu te whare o o ratou papa, me to ratou kawai,  
 58  
 no Iharaira ranei; Ko nga tama a Teraia, ko nga tama a Topia, ko nga tama a Nekora, e ono rau  
 59  
 e rima tekau ma rua. Na, o nga tama a nga tohunga: ko nga tama a Hapaia, ko nga tama a Koto,  
 60  
 ko nga tama a Paratirai; i tangohia hoki e ia tetahi o nga tamahine a Paratirai Kireari hei wahine  
 61  
 mana, na kua huaina to ratou ingoa ki a ia. I rapua e enei to ratou pukapuka whakapapa, ara to  
 62  
 te hunga whakapapa tupuna, heoi kihai i kitea: na reira i kii ai ratou he poke, i mutu ake ai to ratou  
 63  
 tohungatanga. Katahi te kawana ka mea ki a ratou, kia kua ratou e kai i nga mea tapu rawa, kia  
 ara ake ra ano tetahi tohunga kei a ia nga Urimi me nga Tumime.

64

Ko te huihui katoa, rupeke, rupeke, e wha tekau ma rua mano e toru rau e ono tekau.

65

Haunga a ratou pononga tane, a ratou pononga wahine: e whitu mano enei e toru rau e toru tekau

ma whitu; i a ratou ano he kaiwaiata, he tane, he wahine, e rua rau. <sup>66</sup> Ko o ratou hoiho e whitu

rau e toru tekau ma ono; ko o ratou meura e rua rau e wha tekau ma rima; <sup>67</sup> Ko o ratou kamera e

wha rau e toru tekau ma rima; ko nga kaihe e ono mano e whitu rau e rua tekau. <sup>68</sup> Na ko etahi o nga upoko o nga whare o nga matua, i to ratou haerenga ki te whare o Ihowa i Hiruharama, hihiko

tonu ratou ki te homai mea hei whakatu mo te whare o te Atua ki tona wahi. <sup>69</sup> Rite tonu ki o ratou rawa nga mea i homai e ratou ki roto ki nga taonga mo te mahi, e ono tekau ma tahi mano nga moni

koura, e rima mano nga pauna hiriwa, me nga kakahu mo nga tohunga kotahi rau. <sup>70</sup> Na noho ana nga tohunga me nga Riwaiti, me etahi o te iwi, me nga kaiwaiata, me nga kaitiaki kuwaha, me nga Netinimi ki o ratou pa, me Iharaira katoa ano hoki ki o ratou pa.

### Chapter 3

1

Na, i te takanga mai o te whitu o nga marama, a i nga pa nga tama a Iharaira, me te mea he

tangata kotahi te iwi ki te huihui ki Hiruharama. <sup>2</sup> Katahi ka tu a Hehua tama a Iohereke ki runga, me ona teina, nga tohunga, me Herupapera tama a Haratiera, me ona teina, a hanga ana e ratou te aata a te Atua o Iharaira, hei whakaekenga mo nga tahunga tinana, kia rite ai ki te mea i tuhituhia

ki te ture a Mohi, a ta te Atua tangata. <sup>3</sup> Na whakaturia ana e ratou te aata ki tona turanga; i wehi hoki ratou i nga tangata o aua whenua: a whakaekoa atu ana e ratou ki runga nga tahunga tinana ki

a Ihowa, nga tahunga tinana o te ata, o te ahiahi. <sup>4</sup> I mahia ano e ratou te hakari tihokahoka, tera i tuhituhia ra; i whakaekoa ano nga tahunga tinana o tenei ra, o tenei ra, rite tonu te maha, rite tonu

nga tikanga, ko nga mea mo tenei ra i tenei ra. <sup>5</sup> A muri iho ko nga tahunga tinana tuturu, ko o nga kowhititanga marama, ko o nga wa katoa i whakaritea e Ihowa, he mea whakatapu nana, me a te

hunga katoa i tapae noa i te whakahere ki a Ihowa. <sup>6</sup> No te ra tuatahi o te whitu o nga marama i timata ai te whakaekoa i nga tahunga tinana ki a Ihowa: otiia kahore ano te turanga mo te temepara

o Ihowa kia takoto noa. <sup>7</sup> Na i haotu e ratou he hiriwa ki nga kaimahi katoa, ki nga kamura; a me etahi mea hei kai; hei inu, me te hinu ma nga Haironi, ma nga Tairani, hei mea mo etahi rakau hita kia kawea mai i Repanona ki te moana, ki Hopa, kia rite ai ki te kupu homai a Hairuha kingi o Pahia ki a ratou.

8

Na i te rua o nga tau o to ratou taenga ki te whare o te Atua, ki Hiruharama, i te rua o nga marama, ka timata a Herupapera tama a Haratiera, me Hehua tama a Iohereke, me era atu o o ratou teina, o nga tohunga, o nga Riwaiti, me te hunga katoa i maunu mai i te whakarau ki Hiruharama; i whakaritea ano e raua nga Riwaiti, te hunga e rua tekau, maha atu ranei, o ratou tau, hei kaitirotiro

9

i te mahinga o te whare o Ihowa. Katahi ka tu a Hehua me ana tama, me ona teina, a Karamiere me ana tama, me nga tama hoki a Hura, ano he tangata kotahi, hei kaitirotiro i nga kaimahi o te whare o te Atua: ko nga tama a Henarara, ratou ko a ratou tama, ko o ratou teina, ko nga Riwaiti.

10

Na i te whakatakotoranga a nga kaimahi i te turanga o te temepara o Ihowa, ka whakaturia nga tohunga, kakahu rawa nga kakahu, he tetere ano kei a ratou, me nga Riwaiti, nga tama a Ahapa e mau himipora ana, hei whakamoemiti mo Ihowa, hei pera me ta Rawiri kingi o Iharaira i whakarite

11

ai. Na ka waiata ratou tetahi ki tetahi, ka whakamoemiti, ka whakawhetai ki a Ihowa, me te mea, He pai hoki ia, a he mau tonu tana mahi tohu ki a Iharaira. Na hamama katoa ana te iwi, he nui te

12

hamama; ka whakamomemiti ki a Ihowa, no te mea ka takot o te turanga o te whare o Ihowa. Na he tokomaha o nga tohunga, o nga Riwaiti, o nga upoko o nga whare o nga matua, he koroheke, i kite i te whare tuatahi, no to ratou kitenga i te turanga mo tenei whare i to ratou aroaro, ka tangi,

13

he nui te reo; a he tokomaha i hamama te reo i te koa: Na kihai te reo o te hamama koa i taea e te iwi te wehe i roto i te reo o te iwi e tangi ana: he nui hoki te hamama i hamama ai te iwi, ka rangona te reo i tawhiti.

## Chapter 4

1

Na, i te rongonga o nga hoariri o Hura raua ko Pineamine e hanga ana e te hunga i whakaraua

2

nei te temepara o Ihowa, o te Atua, o Iharaira; Katahi ka haere ki a Herupapera, ki nga upoko o nga whare o nga matua, ka mea ki a ratou, Kia hanga tahi tatou; e rapu ana hoki matou i to koutou Atua, e pena ana me koutou; he patu whakahere tonu hoki ta matou ki a ia, no nga ra o Etera Harono

3

k ingi o Ahiria, i kawea mai ai matou ki konei. Otiia ko Herupapera ratou ko Hehua, ko era atu o nga upoko o nga whare o nga matua o Iharaira ka mea ki a ratou, Kahore he ahatanga a koutou ki a matou e hanga ai e koutou te whare mo to matou Atua; engari ma matou tonu e hanga, hei mea ki a Ihowa, ki te Atua o Iharaira; ko ta Kingi hairuha, kingi o Pahia tena i whakahau ai ki a matou.

4

Na ka whakawarea nga ringa o te iwi o Hura e te iwi o te whenua, whakararuraru ana ratou kei

5

hanga; A i utua e ratou etahi kaiwhakapuaki korero hei whakakahore mo to ratou whakaaro i nga ra katoa o Hairuha kingi o Pahia, a tae noa ki te kingitanga o Tariuha kingi o Pahia.

<sup>6</sup> Na, i te kingitanga o Ahahueruha, i te timatanga o tona kingitanga, ka tuhituhia e ratou he kupu whakahe mo nga tangata o Hura, o Hiruharama. <sup>7</sup> Na, i nga ra o Arataherehe ka tuhituhi a Pihirama, a Mitirerata, a Tapeere me era atu o o ratou hoa ki a Arataherehe kingi o Pahia. Na, ko te tuhituhinga o te pukapuka, no Hiria nga reta; no Hiria ano te reo. <sup>8</sup> Na Rehumu kaitiaki ture raua ko Himihai kaituhituhi i tuhituhi te pukapuka whakahe mo Hiruharama ki a Arataherehe, ki te kingi, koia tenei: <sup>9</sup> Na kei te tuhituhi a Rehumu kaitiaki ture, a Himihai kaituhituhi, ratou ko era atu o o raua hoa, ko nga Rinai, ko nga Aparahataki, ko nga Taraperi, ko nga Aparahi, ko nga Arakewi, ko nga tangata o Papurona, ko nga Huhanaki, ko nga Rehawi, ko nga Erami, <sup>10</sup> Me era atu ano o nga iwi i whakahekea mai e Ahanapere, e taua tangata nui, ingoa nui, a whakanohoia ana e ia ki nga pa o Hamaria, me era atu wahi i tera taha o te awa, a tera atu nga kupu. <sup>11</sup> Ko nga kupu tenei o te pukapuka i tukua e ratou ki a Kingi Arataherehe, Na au pononga, na nga tangata i tera taha o te awa, a tera atu nga kupu. <sup>12</sup> Kia mohiotia tenei e te kingi, ko nga Hurai i haere mai i tou taha, kua tae mai ki a matou ki Hiruharama; kei te hanga ratou i taua pa tutu, kino; kua whakaturia e ratou nga taiepa, kua oti ano nga turanga te honohono. <sup>13</sup> Na kia mohiotia tenei e te kingi, ki te hanga tenei pa, ki te whakaturia te taiepa, e kore e homai e ratou nga takoha taonga, nga takoha tangata, nga takoha huarahi: penei ka pa he raru ki nga kingi. <sup>14</sup> Na, i te mea e kai ana matou i te tote o te whare o te kingi, a e kore e tika kia titiro matou ki te kingi e whakaititia ana, koia i unga ai e matou he tangata kia mohio ai te kingi; <sup>15</sup> Kia rapua ai i roto i te pukapuka whakamahara a ou matua: a ka kitea e koe i roto i te pukapuka whakamahara, a ka mohio koe he pa tutu tenei pa, he kino ki nga kingi me nga whenua, a he whakaoho whakakeke ta ratou i reira i mua: ko te mea hoki t era i whakangaromia ai tenei pa. <sup>16</sup> E whakaatu ana tenei matou ki te kingi, ki te hanga tenei pa, a ka oti ona taiepa te whakatu, ma reira ka kore he wahi mou i tera taha o te awa. <sup>17</sup> Katahi ka tukua he kupu e te kingi ki a Rehumu kaitiaki ture, ki a Himihai kaituhituhi, ki era atu hoki o o raua hoa e noho ana i Hamaria, i era atu wahi ano o te whenua i tera taha o te awa, Kia ora, a tera atu nga kupu. <sup>18</sup> Ko te pukapuka i tukua mai nei e koutou ki a matou kua ata korerotia ki toku aroaro. <sup>19</sup> Na kua whakahau nei ahau, a kua rapua, kua kitea he pa whakakeke tena i mua ki nga kingi; he mahi tutu, he mahi whakakeke ta reira. <sup>20</sup> He kingi nunui ano hoki o Hiruharama i kingi ki nga whenua katoa i tena taha o te awa; i hoatu ano he takoha taonga, he takoha tangata, he takoha huarahi ki a ratou. <sup>21</sup> Na, kiia e koutou kia whakamutua te mahi a ena tangata, kia kaua hoki tena pa e hanga, kia hoatu ra ano e ahau tetahi atu ture. <sup>22</sup> Na kia tupato kei mangere ki tenei

mea: me tuku koia te he kia tupu hei he mo nga kingi? <sup>23</sup> Heoi, i te korerotanga o nga kupu o te pukapuka a Kingi Arataherehe ki te aroaro o Rehumu, o Himihai kaituhituhi ratou ko o raua hoa, hohoro tonu ratou ki Hiruharama ki nga Hurai, na, uaua tonu te ringa i whakamutua ai ta ratou.

<sup>24</sup> Katahi ka mutu te mahi o te whare o te Atua i Hiruharama. Mutu ake a taea noatia te rua o nga tau o te kingitanga o Tariuha kingi o Pahia.

## Chapter 5

<sup>1</sup> Katahi nga poropiti, a Hakai poropiti, raua ko Hakaraia, tama a Iro, ka poropiti ki nga Hurai i Hura, i Hiruharama; i poropiti ratou ki a ratou i runga i te ingoa o te Atua o Iharaira. <sup>2</sup> Katahi ka maranga a Herupapera tama a Haratiera, raua ko Hehua tama a Iohereke, timataia ana e raua te hanga i te whare o te Atua i Hiruharama: i a raua ano nga poropiti a te Atua hei hoa mo raua.

<sup>3</sup> I taua wa ano ka tae mai ki a ratou a Tatenai kawana o tenei taha o te awa, raua ko Hetara Potenai, me o raua hoa, a ka mea ki a ratou, Na wai koutou i whakahau kia hanga tenei whare, kia

whakaotia tenei taiepa? <sup>4</sup> Katahi ka penei ta matou kupu ki a ratou, Ko wai nga ingoa o nga tangata e hanga nei i tenei whare? <sup>5</sup> Otiia i runga i nga kaumatua o nga Hurai te kanohi o to ratou Atua, i kore ai ta ratou e whakamutua, kia tae atu ra ano taua mea ki a Tariuha: katahi ka whakahokia mai

ai he kupu mo tenei mea, he mea tuhituhi. <sup>6</sup> Ko nga kupu o te pukapuka i tukua e Tatenai kawana o tera taha o te awa, e Hetara Potenai, e ona hoa, e nga Aparahaki i tera taha o te awa, ki a Kingi Tariuha: <sup>7</sup> I tukua e ratou he pukapuka ki a ia, a i tuhituhia ki roto; Ki a Tariuha, ki te kingi, kia

tau te rangimarie katoa. <sup>8</sup> Kia mohiotia tenei e te kingi, i haere matou ki te whenua o Hura, ki te whare o te Atua nui e hanga nei ki nga kohatu nunui, e whakatakotoria ana hoki he rakau ki nga

taha: a kei te hohoro, kei te pai hoki te haere a tenei mahi a o ratou ringa. <sup>9</sup> Katahi matou ka ui ki aua kaumatua; he penei ta matou kupu ki a ratou, Na wai koutou i whakahau kia hanga tenei whare,

kia whakaotia enei taiepa? <sup>10</sup> I uia ano e matou o ratou ingoa, kia whakaaturia ai ki a koe, kia tuhituhia ai e matou nga ingoa o o ratou tino tangata. <sup>11</sup> Na ko ta ratou kupu tenei i whakahoki ai ki a matou, He pononga matou na te Atua o te rangi, o te whenua, e hanga ana hoki i te whare i hanga i mua noa atu, ka maha nei nga tau; a he kingi nui te kingi o Iharaira nana nei i hanga, i

whakaoti. <sup>12</sup> Otiia, i te whakapataritaringa a o matou matua ki te Atua o te rangi, ka hoatu ratou e ia ki te ringa o Nepukaneha Karari kingi o Papurona: nana tenei whare i tukituki, a whakaraua ana

e ia te iwi ki Papurona. <sup>13</sup> I te tuatahi ia o nga tau o Hairuha kingi o Papurona, ka puaki he tikanga

<sup>14</sup>  
 i a Kingi Hairuha kia hanga tenei whare o te Atua. Na, ko nga oko, ko nga mea koura, hiriwa,  
 o te whare o te Atua, i tangohia nei e Nepukaneha i te temepara i Hiruharama, i kawea ki te temepara  
 o Papurona, i tangohia era e Kingi Hairuha i te temepara o Papurona, a homai ana ki tetahi tangata,  
<sup>15</sup>  
 to na ingoa ko Hehepatara, i meinga nei e ia hei kawana, A i mea ia ki a ia, Tangohia enei mea,  
<sup>16</sup>  
 haere, kawea ki te temepara i Hiruharama; ka hanga hoki i te whare o te Atua ki tona wahi. Katahi  
 ka haere mai taua Hehepatara, whakatakotoria ana e ia te turanga mo te whare o te Atua i  
 Hiruharama: ko te hanganga ano tenei o te temepara, o reira ra ano a mohoa noa nei; heoi kahore  
<sup>17</sup>  
 ano kia oti noa. Na, ki te pai te kingi, me rapu i roto i te whare taonga o te kingi i kona, i Papurona,  
 koia ranei i whakatakotoria e Kingi Hairuha he tikanga kia hanga tenei whare o te Atua ki  
 Hiruharama? a kia meatia mai hoki e te kingi tana e pai ai mo tenei mea ki a matou.

## Chapter 6

<sup>1</sup>  
 Katahi ka puaki ta Tariuha tikanga, a ka rapua i roto i te whare pukapuka, kei reira nei nga  
<sup>2</sup>  
 taonga e rongoa ana i Papurona. Na kua kitea ki Akameta, i roto i te whare kingi i te whenua o  
<sup>3</sup>  
 nga Meri, he pukapuka, me tetahi kupu whakamahara i tuhituhia ki roto; koia tenei: I te tuatahi  
 o nga tau o Kingi Hairuha i puaki ta Kingi Hairuha tikanga; Mo te whare o te Atua i Hiruharama,  
 Me hanga te whare, te wahi e patua ai nga patunga tapu, kia u ano hoki te whakatakoto o nga  
<sup>4</sup>  
 turanga; kia ono tekau whatianga te tiketike, kia ono tekau whatianga te whanui; Kia toru nga  
 rarangi o nga kohatu nunui, kia kotahi hoki rarangi o te rakau hou: me hoatu ano nga utu i roto i te  
<sup>5</sup>  
 whare o te kingi; Me whakahoki ano nga oko koura, hiriwa, o te whare o te Atua, i tangohia nei  
 e Nepukaneha i roto i te temepara i Hiruharama, i kawea nei ki Papurona; me kawea ano ki te  
 temepara i Hiruharama, ki tona wahi, ki tona wahi, me whakatakoto e koe ki te whare o te Atua.  
<sup>6</sup>  
 Na, e Tatenai, e te kawana i tera taha o te awa, e Hetara Potenai, me o koutou hoa, me nga  
<sup>7</sup>  
 Aparahaki, i tera taha o te awa, kia matara mai koutou i reira. Waiho noa atu te mahi o tena whare  
 o te Atua. Waiho atu te kawana o nga Hurai, ratou ko nga kaumatua o nga Hurai, kia mahi ana i  
<sup>8</sup>  
 tena whare o te Atua i tona wahi. Tenei ano tetahi tikanga aku mo ta koutou e mea ai ki aua  
 kaumatua o nga Hurai, hei mea mo te hanganga o tenei whare o te Atua: kia hohoro te hoatu i etahi  
 o nga taonga o te kingi, ara o te takoha i tera taha o te awa, ki ena tangata, hei utu mea, kei  
<sup>9</sup>  
 whakawarea ratou. Na, ko nga mea e kore ana i a ratou, nga kua puru, nga hipi toa, nga reme  
 hei tahunga tinana ma te Atua o te rangi, te witi, te tote, te waina, te hinu, nga mea e whakaritea e

10  
nga tohunga i Hiruharama, kei mahue te hoatu ki a ratou i tena ra, i tena ra; Kia whakaherea ai e ratou etahi whakahere kakara ki te Atua o te rangi, kia inoi ai mo te kingi, mo ana tama, kia ora.

11  
Kua hanga ano hoki e ahau he tikanga, ki te whakaputaia ketia tenei kupu e tetahi, kia unuhia he kurupae i tona whare, a ka whakairi i a ia, ka tarona ai ki runga; kia meinga ano tona whare hei

12  
puranga paru, hei utu mo tena. Na ma te Atua nana nei i mea kia noho tona ingoa ki reira, e huna nga kingi katoa, me nga iwi, ina totoro o ratou ringa ki te whakaputa ke, ki te whakangaro i tena whare o te Atua i Hiruharama. Naku, na Tariuha te tikanga i whakatakoto; kia hoho ro te meatanga.

13  
Katahi a Tatenai, te kawana o tera taha o te awa, a Hetara Potenai me o raua hoa, i te mea na Kingi Tariuha i tono mai, ka hohoro tonu ta ratou pera. 14 Na kei te hanga nga kaumatua o nga Hurai; tika tonu ta ratou, he mea na te poropititanga a Hakai poropiti raua ko Hakaraia tama a Iro. Na hanga ana ratou, a oti ake; i rite tonu ki te whakahau a te Atua o Iharaira, ki te whakahau a

15  
Hairuha, a Ta riuha, a Arataherehe kingi o Pahia. No te toru o nga ra o te marama Arara i oti ai tenei whare, no te ono ano tera o nga tau o te kingitanga o Kingi Tariuha. 16 Na i taia e nga tama a Iharaira, e nga tohunga, e nga Riwaiti, me era atu o nga tama a te whakarau, te kawa o tenei whare

17  
o te Atua i runga i te koa. Tapaea ana hoki e ratou i te tainga o te kawa o tenei whare o te Atua, kotahi rau puru, e rua rau hipi toa, e wha rau reme; a hei whakahere hara mo Iharaira katoa, kotahi tekau ma rua koati toa, ko te maha hoki ia o nga iwi o Iharaira. 18 I whakaturia ano e ratou nga tohunga, tenei wehenga, tenei wehenga, me nga Riwaiti, tenei ropu, tenei ropu, mo nga mahi ki te

19  
Atua i Hiruharama; ko te mea hoki i tuhituhia ki te pukapuka a Mohi. I te tekau ma wha o te marama tuatahi ka mahi nga tama o te whakarau i te kapenga. 20 I purea hoki nga tohunga ratou ko nga Riwaiti, he mea pure huihui ratou, a patua ana e ratou te kapenga ma nga tama katoa o te

21  
whakarau, ma o ratou tuakana, ma nga tohunga, ma ratou ano hoki. Na ka kai nga tama a Iharaira i hoki mai nei i te whakarau, me te hunga katoa i mawehe mai nei ki a ratou i roto i te poke o nga iwi o te whenua, ki te rapu i a Ihowa, i te Atua o Iharaira, 22 A ka mahia e ratou te hakari o te taro rawenakore, e whitu nga ra, i runga i te koa: Na Ihowa hoki ratou i mea kia koa, nana hoki i whakaanga mai te ngakau o te kingi o Ahiria ki a ratou, i whakakaha ai ia i o ratou ringa ki te mahi i te whare o te Atua, o te Atua o Iharaira.

## Chapter 7

<sup>1</sup> I muri i enei mea, i te kingitanga o Arataherehe kingi o Pahia, na ko Etera tama a Heraia,  
 tama a Ataria, tama a Hirikia, <sup>2</sup> Tama a Harumu, tama a Haroko, tama a Ahitupu, <sup>3</sup> Tama a Amaria,  
 tama a Ataria, tama a Meraioto, <sup>4</sup> Tama a Terahia, tama a Uti, tama a Puki, <sup>5</sup> Tama a Apihua, tama  
 a Pinehaha, tama a Ereatara, tama a Arona tino tohunga: <sup>6</sup> I haere mai tenei Etera i Papurona; na  
 he karaipi kakama ia ki te ture a Mohi i homai nei e Ihowa, e te Atua o Iharaira. I runga ano i a ia  
 te ringa o Ihowa, o tona Atua, a homai ana e te kingi ki a ia nga mea katoa i tonoa e ia. <sup>7</sup> Na i haere  
 mai ano etahi o nga tama a Iharaira, no nga tohunga hoki, o nga Riwaiti, o nga kaiwaiata, o nga  
 kaitiaki keti, o nga Netinimi, ki Hiruharama i te whitu o nga tau o Kingi Arataherehe. <sup>8</sup> Na kua tae  
 ia ki Hiruharama i te rima o nga marama o te whitu o nga tau o te kingi. <sup>9</sup> No te tuatahi hoki o nga  
 ra o te marama tuatahi i timata ai ia te haere mai i Papurona, a no te tuatahi o nga ra o te rima o nga  
 marama i tae mai ai ki Hiruharama, i runga hoki i a ia te ringa pai o tona Atua. <sup>10</sup> I whakatikaia  
 hoki e Etera tona ngakau ki te rapu i te ture a Ihowa, ki te mahi ano hoki, a ki te whakaako i a  
 Iharaira ki nga tikanga, ki nga whakaritenga.

<sup>11</sup> Na ko nga kupu tenei o te pukapuka i homai e Kingi Arataherehe ki te tohunga, ki te karaipi  
 ki a Etera; he karaipi ia no nga kupu o nga whakahau a Ihowa, no ana tikanga hoki ki a Iharaira.

<sup>12</sup> Na Arataherehe kingi o nga kingi ki te tohunga, ki a Etera, ki te karaipi o te ture a te Atua o te

<sup>13</sup> rangi, he tino tika, he aha atu. Ko taku tikanga tenei ka whakatakotoria nei; Na, ko te hunga  
 katoa o te iwi o Iharaira, o ona tohunga hoki, o nga Riwaiti i toku kingitanga e whai ngakau ana

<sup>14</sup> kia haere ki Hiruharama, me haere tahi me koe. He mea unga na hoki koe na te kingi ratou ko  
 ana kaiwhakatakoto whakaaro tokowhitu, ki te ui i nga mea o Hura, o Hiruharama, kia rite ai ki te

<sup>15</sup> ture a tou Atua i tou ringa na; Ki te kawea ano i te hiriwa, i te koura i hoatu noa nei e te kingi,  
 ratou ko ana kaiwhakatakoto whakaaro ki te Atua o Iharaira, kei Hiruharama nei tona nohoanga,

<sup>16</sup> I te hiriwa katoa ano, i te koura e kitea e koe i te kawanatanga katoa o Papurona, i nga mea homai  
 noa ano a te iwi, a nga tohunga, a te hunga e homai noa ana mo te whare o to ratou Atua i

<sup>17</sup> Hiruharama. Na kia hohoro koe te hoko ki tenei moni he puru, he hipi toa, he reme, he whakahere  
 totokore, me nga ringihanga, ka whakaeke ai ki runga ki te aata o te whare o to koutou Atua i

<sup>18</sup> Hiruharama. Na, ko ta koutou ko ou teina e pai ai mo te toenga o te hiriwa, o te koura, meatia,  
<sup>19</sup> kia rite ki ta to koutou Atua e pai ai. A, ko nga oko ka hoatu nei ki a koe mo nga mahi o te whare

<sup>20</sup> o tou Atua, me hoatu e koe ki te aroaro o te Atua i Hiruharama. A, ko era atu mea e meatia ana  
 e koe mo te whare o tou Atua, e tika ana kia hoatu e koe, hoatu i roto i te whare taonga o te kingi.



21

Na, tenei ahau, a Kingi Arataherehe te whakatakoto nei i te tikanga ki nga kaitiaki taonga katoa i tawahi o te awa, na, ko nga mea katoa e tonoa i a koutou e Etera tohunga, e te karaipi o te ture a

22

te Atua o te rangi, kia hohoro te mea; Ahakoa kotahi rau taranata hiriwa, ahakoa kotahi rau mehua witi, ahakoa kotahi rau pati waina, ahakoa kotahi rau pati hinu; me te tote ano, e kore tona

23

taimaha e tuhituhia. Ko nga mea katoa e kiia mai ana e te Atua o te rangi, me mahi kia tino rite mo te whare o te Atua o te rangi: he aha oti kia ai ai he riri mai ki te kingitanga o te kingi ratou ko

24

ana tama? Kia mohio ano koutou; ko nga tohunga katoa, ko nga Riwaiti, ko nga kaiwaiata, ko nga kaitiaki keti, ko nga Netinimi, ko nga kaimahi o tenei whare o te Atua, e kore e tika kia tangohia

25

he takoha taonga, he takoha tangata, he takoha huarahi i a ra tou. Na mau, e Etera, kei a koe na hoki te mohio o te Atua, mau e whakarite nga kaiwhakarite, nga kaiwhakarongo totohe, hei whakarite mo nga iwi katoa i tera taha o te awa, hei te hunga katoa e mohio ana ki nga ture a tou Atua: na,

26

ko te hunga kahore e mohio, ma koutou e whakaako. A, ko te tangata e kore e mahi i te ture a tou Atua, i te ture ano a te kingi, kia hohoro te whakapa o te whiu ki a ia, te whakamate ranei, te pei ranei he whenua ke, me tango ranei ana taonga, me here ranei.

27

Kia whakapaingia a Ihowa, te Atua o o tatou matua, nana nei i homai te whakaaro penei ki

28

te ngakau o te kingi, ara kia whakapaia te whare o Ihowa i Hiruharama; Nana hoki i whakaputa aroha mai ki ahau i te aroaro o te kingi ratou ko ana kaiwhakatakoto whakaaro, o nga rangatira rarahi ano a te kingi. Na kua whai kaha ahau; i runga hoki i ahau te ringa o Ihowa, o toku Atua. Na ka huihuia e ahau etahi tino tangata i roto i a Iharaira, hei hoa haere moku ki runga.

## Chapter 8

1

Na ko nga upoko enei o nga whare o o ratou matua, ko nga whakapaparanga ano enei o te

2

hunga i haere atu hei hoa moku i Papurona, i te kingitanga o Kingi Arataherehe. O nga tama a

3

Pinehaha; ko Kerehoma: o nga tama a Itamara: ko Raniera: o nga tama a Rawiri; ko Hatuhu. O nga tama a Hekania, o nga tama a Paroho; ko Hakaraia: na, ko nga tane i taua ngatahitia me ia, he

4

mea whakapapa, kotahi rau e rima tekau. O nga tama a Pahata Moapa; ko Erihoenai tama a

5

Terahia; na, ko ona hoa, e rua rau nga tane. O nga tama a Hekania; ko te tama a Tahatiere; na,

6

ko ona hoa, e toru rau nga tana. O nga tama ano hoki a Arini; ko Epere tama a Honatana; na, ko

7

ona hoa, e rima tekau nga tane. Na, o nga tama a Erama, ko Ihaia tama a Ataria; na, ko ona hoa,

<sup>8</sup>  
 e whitu tekau nga tane. O nga tama a Hepatia; ko Teparia tama a Mikaera; na, ko ona hoa, e waru  
<sup>9</sup>  
 tekau nga tane. O nga tama a Ioapa; ko Oparia tama a Tehiere; na, ko ona hoa, e rua rau kotahi  
<sup>10</sup>  
 tekau ma waru nga tane. O nga tama a Heromiti; ko te tama a Tohipia; na, ko ona hoa, kotahi  
<sup>11</sup>  
 rau e ono tekau nga tane. O nga tama a Pepai; ko Hakaraia tama a Pepai; na, iko ona hoa, e rua  
<sup>12</sup>  
 tekau ma waru nga tane. Na o nga tama a Atakara; ko Iohanana tama a Hakatana; na, ko ona  
<sup>13</sup>  
 hoa, kotahi rau kotahi tekau nga tane. Na o nga tama whakamutunga a Aronikama; ko o ratou  
<sup>14</sup>  
 ingoa enei; ko Eriperete, ko Teiere, ko Hemaia; na, ko o ratou hoa, e ono tekau nga tane. O nga  
<sup>15</sup>  
 tama ano a Pikiwai; ko Utai, ko Tapuru; na, ko o ratou hoa, e whitu tekau nga tane. Na ka huihuia  
 ratou e ahau ki te awa e rere ana ki Ahawa, a noho ana matou i reira e toru nga ra; a, i taku tirohanga  
<sup>16</sup>  
 i te iwi, i nga tohunga, na kihai tetahi o nga tama a Riwai i kitea e ahau ki reira. Katahi ahau ka  
 tonono kia tikina a Erietere, a Ariere, a Hemaia, a Erenatana, a Iaripi, a Erenatana, a Natana, a Hakaraia,  
<sup>17</sup>  
 a Mehurama, he upoko enei; a Toiaripi ano a Erenatana, he kaiwhakaako raua. Na ka unga ratou  
 e ahau ki a Iro; ki te upoko o te kainga, o Kahipia; a i hoatu ano e ahau he kupu hei korero ma ratou  
 ki a Iro ratou ko ona teina, ko nga Netinimi, i te kainga, i Kahipia, kia kawea mai ai e ratou he  
<sup>18</sup>  
 minita ki a matou mo te whar e o to tatou Atua. Na i runga i a matou te ringa pai o to matou  
 Atua, a ka kawea mai e ratou ki a matou he tangata whai whakaaro, no nga tama a Mahari, tama a  
 Riwai, tama a Iharaira; a Herepia ano ratou ko ana tama, ko ona tuakana, teina, kotahi tekau ma  
<sup>19</sup>  
 waru; A Hahapia hoki me Ihaia, no nga tama a Merari, ratou ko ona tuakana, teina, me a ratou  
<sup>20</sup>  
 tama, e rua tekau; O nga Netinimi ano i whakaritea nei e Rawiri, e nga rangatira, mo nga mahi  
 a nga Riwaiti, e rua rau e rua tekau nga Netinimi; he mea whakahua katoa o ratou ingoa.  
<sup>21</sup>  
 Katahi ka karangatia e ahau he nohopuku ki reira ki te taha o te awa o Ahawa, kia whakaiti  
 ai matou i a matou ki te aroaro o to matou Atua, kia rapua ai e matou i a ia te ara tika mo matou,  
<sup>22</sup>  
 mo a matou tamariki, mo o matou taonga katoa. I whakama hoki ahau ki te tonono ki te kingi i  
 tetahi ropu hoia me etahi kaieke hoiho hei tuara mo matou ki te hoariri i te ara; i korero hoki matou  
 ki te kingi, i mea, Kei runga te ringa o to matou Atua i te hunga katoa e rapu ana i a ia, hei pai mo  
<sup>23</sup>  
 ratou: otiia ka whawhai tona kaha, me tona riri, ki te hunga katoa e whakarere ana i a ia. Na,  
 nohopuku ana matou, rapua ana e matou he tikanga i to matou Atua mo tenei mea, a tahuri mai ana  
 ia ki a matou.  
<sup>24</sup>  
 Na ka motuhia e ahau etahi o nga tohunga kotahi tekau ma rua, a Herepia, a Hahapia, me o  
<sup>25</sup>  
 ratou teina kotahi tekau. Paunatia ana e ahau te hiriwa, te koura, me nga oko ara te whakahere

ki te whare o to matou Atua i homai nei e te kingi ratou ko ana kaiwhakatakoto whakaaro, ko ana rangatira, e Iharaira katoa ano i reira. <sup>26</sup> I paunatia ano e ahau ki o ratou ringa te hiriwa e ono rau e rima tekau taranata, nga oko hiriwa kotahi rau taranata; te koura kotahi rau taranata. <sup>27</sup> Me nga peihana koura e rua tekau, kotahi mano tarami te taimaha; me nga oko e rua, he parahi pai, kanapa tonu, rite tonu ki te koura te utu nui. <sup>28</sup> I mea ano ahau ki a ratou, He tapu koutou ki a Ihowa, he tapu hoki nga oko; he mea whakahere noa ake ano hoki te hiriwa me te koura ma Ihowa, ma te Atua o o koutou matua. <sup>29</sup> Matapoporetia iho, tiakina, kia paunatia ra ano e koutou ki te aroaro o nga rangatira, o nga tohunga, o nga Riwaiti, o nga rangatira o nga whare o nga matua o Iharaira, ki Hiruharama, i roto i nga ruma o te whare o Ihowa. <sup>30</sup> Heoi riro ana i nga tohunga, i nga Riwaiti, te taimaha o te hiriwa, o te koura, o nga oko, hei mau ki Hiruharama, ki te whare o to tatou Atua. <sup>31</sup> Na ka turia e matou i te awa o Ahawa i te tekau ma rua o te marama tuatahi, ka haere ki Hiruharama. I runga hoki i a matou te ringa o to matou Atua, a whakaorangia ana matou e ia i te ringa o te hoariri, o te kaiwhanga i te ara. <sup>32</sup> Na kua tae matou ki Hiruharama, a noho ana i reira, e toru nga ra. <sup>33</sup> I te wha o nga ra, na ko taua hiriwa, koura, me nga oko, ka paunatia i roto i te whare o to tatou Atua e te ringa o Meremoto tama a Uria tohunga; i a ia ano a Ereatara tama a Pinehaha; i a raua hoki a Iotapara tama a Hehua; raua ko Noaria tama a Pinui, no nga Riwaiti. <sup>34</sup> He mea tatau, he mea pauna, tenei, tenei; i tuhituhia hoki nga taimaha katoa i taua wa ano. <sup>35</sup> Na, ko te hunga i haere mai nei i te whakarau, nga tama a te hunga i whakaraua atu, tapaea ana e ratou he tahunga tinana ma te Atua o Iharaira, kotahi tekau ma rua puru, he mea mo Iharaira katoa, e iwa tekau ma ono hipi toa, e whitu tekau ma whi tu reme, tekau ma rua koati toa, hei whakahere hara: ko tenei katoa hei tahunga tinana ki a Ihowa. <sup>36</sup> Na ka hoatu nga ture a te kingi ki nga kawana nui a te kingi, ki nga kawana iti i tera taha o te awa; a ko ratou hei whakaneke ake i ta te iwi, i te whare ano o te Atua.

## Chapter 9

<sup>1</sup> A, ka oti enei mea, ka haere mai nga rangatira ki ahau, ka mea, Kihai te iwi o Iharaira ratou ko nga tohunga, ko nga Riwaiti, i momotu i a ratou i roto i nga iwi o nga whenua; rite tonu ta ratou mahi ki nga mea whakarihariha a era, ara a nga Kana ani, a nga Hiti, a nga Perihi, a nga Iepuhi, a nga Amoni, a nga Moapi, a nga Ihipiana, a nga Amori. <sup>2</sup> Kua tangohia hoki e ratou etahi o a ratou tamahine ma ratou, ma a ratou tama. Na kua whakawhenumitia te momo tapu ki roto ki nga iwi o aua whenua. Ae ra, nui noa ake te ringa o nga rangatira, o nga tino tangata, ki tenei he. <sup>3</sup> Na, i toku

rongonga i tenei, haea ana e ahau toku kakahu me toku koroka, hutihutia ana e ahau nga huruhuru  
 o toku matenga, o oku pahau, a noho ana, miharo ana. <sup>4</sup> Katahi ka huihui mai ki ahau te hunga  
 katoa i wehi i nga kupu a te Atua o Iharaira, he mea mo te he o te hunga i whakaraua: a ko ahau i  
 noho me te miharo, a taea noatia te whakahere o te ahiahi.

<sup>5</sup> Na, i te whakahere o te ahiahi, ka maranga ake ahau i toku whakama, me toku kakahu ano  
 me toku koroka i haehaea; piko ana oku turi, a ka wherahia atu oku ringa ki a Ihowa, ki toku Atua;

<sup>6</sup> Na ka mea ahau, E toku Atua, he whakama ahau, numinumi kau ana ahau, te ara ai toku mata ki  
 a koe, e toku Atua. Kua tetere rawa hoki o matou he ki runga ake i o matou mahunga; nui atu to

matou poka ke, a tutuki noa ki te rangi. <sup>7</sup> Nui atu to matou poka ke, no nga ra ano o o matou matua  
 a taea noatia tenei ra: na o matou he hoki i hoatu ai matou, o matou kingi, o matou tohunga, ki te  
 ringa o nga kingi o nga whenua, ki te hoari, ki te whakarau, hei pahuatanga, a whakama iho te mata,

koia ano tenei inaianei. <sup>8</sup> Na he iti nei tenei wahi i whakaputaina ai he atawhai e Ihowa, e to matou  
 Atua, kia toe ai etahi morehu o matou; kia homai ai ki a matou he titi ki tona wahi tapu, kia  
 whakamaramatia ai o matou kanohi e to matou Atua, kia homai ai ki a matou he o ranga ngakau,

he mea iti, i a matou nei i te herehere. <sup>9</sup> He pononga hoki matou; heoi i a matou i te herehere kihai  
 matou i mahue i to matou Atua: na whakaputaina ana e ia he aroha ki a matou i te aroaro o nga  
 kingi o Pahia, i homai ai he oranga ngakau ki a matou, i whakaarahia ai te whare o to matou Atua,

i hanga ai ona wahi kua ururuatia, i homai ai he taiepa ki a matou ki Hura, ki Hiruharama. <sup>10</sup> Na  
 kia pehea he kupu ma matou, e to matou Atua, i muri i tenei? kua whakarerea hoki e matou au

whakahau, <sup>11</sup> I whakahaua e koe, ara e au pononga, e nga poropiti: i ki mai hoki koe, Ko te whenua  
 ka haere nei koutou ki reira tango ai, he whenua poke tera i nga poke o nga iwi o nga whenua, i a

ratou mea whakarihariha, ki tonu hoki i tetahi pito ki tetahi i to ratou poke. <sup>12</sup> Na, tena, kua a  
 koutou tamahine e hoatu ma a ratou tama, kua ano a ratou tamahine e tangohia mai ma a koutou  
 tama; kua ano e whai kia mau te rongo ki a ratou, kia whai pai ranei ratou a ake ake; kia kaha ai  
 koutou, kia kai ai hoki i nga mea p ai o te whenua, a waiho iho hei kainga mo a koutou tama ake

tonu atu. <sup>13</sup> Na kua pa nei enei mea katoa ki a matou mo a matou mahi he, mo te nui o to matou  
 poka ke, a i te mea he iti iho i o matou he au whiu, e to matou Atua, a homai ana e koe tenei wahi

whakaoranga: <sup>14</sup> Kia takahi ano ranei matou i au tikanga, kia marena ki nga iwi nana enei  
 whakarihariha? e kore ianei koe e riri ki a matou a poto noa matou i a koe, kore noa he morehu, he

oranga? <sup>15</sup> E Ihowa, e te Atua o Iharaira, he tika tau; e toe nei hoki matou, he morehu, koia ano  
 tenei inaianei. Nana, tenei matou kei tou aroaro, me o matou he: na tenei hoki te tu ai he tangata  
 ki tou aroaro.

## Chapter 10

<sup>1</sup> Na, I a Etera e inoi ana, e whaki hara ana, me te tangi, me te rutu i a ia ki mua i te whare o te Atua, na, nui atu te hui i rupeke ki a ia i roto i a Iharaira, nga tane, nga wahine, nga tamariki: nui

<sup>2</sup> atu hoki te tangi i tangi ai te iwi. Na ka oho a Hekania tama a Tehiere, ko tetahi nei ia o nga tama a Erama, ka mea ki a Etera, Kua he matou ki to tatou Atua, kua tango i nga wahine ke, i a nga iwi

<sup>3</sup> o te whenua. Tenei ano ia he mea e marama ai nga whakaaro o Iharaira ki tenei mea. Na kia whakaritea he kawenata ki to tatou Atua, kia whakarerea aua wahine katoa me a ratou tamariki, kia rite ai ki te whakaaro i whakatakotoria e toku ariki, e te hunga ano e wehi ana i te whakahau a

<sup>4</sup> to tatou Atua: kia rite ano te meatanga ki ta te ture. Whakatika, mau hoki te mahi; a ko matou hei

<sup>5</sup> hoa mou: kia uaua, meatia. Katahi ka whakatika a Etera, a whakaoatitia ana e ia nga rangatira o nga tohunga, o nga Riwaiti, o Iharaira Katoa, kia meatia tenei mea e ratou. A oati ana ratou.

<sup>6</sup> Katahi a Etera ka whakatika i mua i te whare o te Atua, a haere ana ki te ruma o Iehohanana tama a Eriahipi. A, no tona taenga ki reira, kihai ia i kai taro, kihai i inu wai; e pouri ana hoki ki te

<sup>7</sup> he o te hunga i whakaraua. Na ka karanga nui, puta noa i Hura, i Hiruharama, ki nga tama katoa

<sup>8</sup> o te whakarau, kia huihui ki Hiruharama. Na, ko te tangata e kore e tae mai i nga ra e toru, i ta nga rangatira ratou ko nga kaumatua i whakaaro ai, ka murua putia ona rawa katoa, a ka motuhia

<sup>9</sup> ia i roto i te whakaminenga o nga whakarau. Na ko te huihuinga mai o nga tangata katoa o Hura, o Pineamine ki Hiruharama i roto i aua ra e toru; ko te iwa tenei o nga marama, i te rua tekau o te marama. Na noho ana te iwi katoa i te marae o te whare o te Atua; wiri ana ratou, he whakaaro k

<sup>10</sup> i tenei mea, he nui ano hoki te ua. Na ka whakatika a Etera tohunga, ka mea ki a ratou, Kua he

<sup>11</sup> koutou, kua marenatia ki nga wahine ke, na kua neke ake te he o Iharaira. Na whakina atu nga he ki a Ihowa, ki te Atua o o koutou matua, meatia hoki tana i pai ai; motuhia mai hoki koutou i

<sup>12</sup> roto i nga iwi o te whenua, i nga wahine ke hoki. Na ka whakahokia e te iwi katoa, he nui o

<sup>13</sup> ratou reo ki te mea, Ka rite ki tau kupu ta matou e mea ai. Otiia he tokomaha te iwi, he wa ua nui hoki tenei; e kore ano matou e kaha ki te tu i waho, ehara hoki tenei i te mahi mo te ra kotahi,

<sup>14</sup> mo nga ra e rua ranei: he nui rawa hoki to matou he i tenei mea. Na me whakarite o tatou rangatira mo te huihui katoa, a me haere mai i nga wa e whakaritea te hunga katoa kua marena ki nga wahine ke i o tatou pa, ratou ko nga kaumatua o tenei pa, o tenei pa, me nga kaiwhakawa o reira, kia tahuri atu ra ano i a tatou te riri kaha o to tatou Atua, a kia tutuki ra ano tenei mea.

15 Ko Honatana anake tama a Atahere raua ko Tahatia tama a Tikiwa i tu atu ki tenei mea; a  
 ko o raua hoa ko Mehurama raua ko Hapetai Riwaiti. 16 Na i pena hoki nga tama o te whakarau.  
 A ka wehea a Etera tohunga me etahi upoko o nga whare o nga matua no tenei whare, no tenei  
 whare, o o ratou matua, he mea karanga katoa o ratou ingoa; a noho ana ratou i te ra tuatahi o te  
 tekau o nga maram a hei rapu i te tikanga o tenei mea. 17 Poto rawa ake nga tangata katoa i marena  
 ki nga wahine ke, ko te ra tuatahi o te tuatahi o nga marama. 18 Na kua mau etahi o nga tama a nga  
 tohunga he mea marena ki nga wahine ke; ara no nga tama a Hehua tama a Iohereke ratou ko ona  
 teina, ko Maaheia, ko Erietere, ko Iaripi, ko Keraria. 19 Na ka tukua mai o ratou ringa, mo a ratou  
 wahine kia whakarerea; a, ka he nei ratou, ka tapaea he hipi toa o te kahui mo to ratou he. 20 Na,  
 o nga tama a Imere; ko Hanani, ko Teparia. 21 A, o nga tama a Harimi; ko Maaheia, ko Iraia, ko  
 Hemaia, ko Tehiere, ko Utia. 22 O nga tama a Pahuru; ko Erioenai, ko Maaheia, ko Ihimaera, ko  
 Netaneere, ko Hotapara, ko Ereaha. 23 O nga Riwaiti; ko Hotapara, ko Himeia, ko Keraia, ara ko  
 Kerita, ko Petahia, ko Hura, ko Erietere. 24 O nga kaiwaiata; ko Eriahipi; o nga kaitiaki kuwaha;  
 ko Harumu, ko Tereme, ko Uri. 25 Na, o Iharaira; o nga tama a Paroho: ko Ramia, ko Tetia, ko  
 Marakia, ko Miamini, ko Ereatara, ko Marakia, ko Penaia. 26 O nga tama a Erama; ko Matania,  
 ko Hakaraia, ko Tehiere, ko Apari, ko Teremoto, ko Iraia. 27 O nga tama a Tatu; ko Erioenai, ko  
 Eriahipi, ko Matania, ko Teremoto, ko Tapara, ko Atita. 28 O nga tama a Pepai; ko Iehohanana,  
 ko Hanania, ko Tapai, ko Atarai. 29 A, o nga tama a Pani; ko Mehurama, ko Maruku, ko Araia, ko  
 Iahupu, ko Heara, ko Ramoto. 30 O nga tama a Pahata Moapa; ko Arana, ko Kerara, ko Penaia, ko  
 Maaheia, ko Matania, ko Petareere, ko Pinui, ko Manahi. 31 O nga tama a Harimi; ko Erietere, ko  
 Ihia, ko Marakia, ko Hemaia, ko Himiona, 32 Ko Pineamine, ko Maruku, ko Hemaria. 33 O nga  
 tama a Hahumu; ko Matenai, ko Matata, ko Tapara, ko Eriperete, ko Teremai, ko Manahi, ko Himeia.  
 34 O nga tama a Pani; ko Maarai, ko Amarama, ko Uere. 35 Ko Penaia, ko Pereia, ko Keru, 36 Ko  
 Wania, ko Meremoto, ko Eriahipi, 37 Ko Matania, ko Matenai, ko Taahau, 38 Ko Pani, ko Pinui,  
 ko Himeia, 39 Ko Heremai, ko Natana, ko Araia, 40 Ko Makanarepai, ko Hahai, ko Harai, 41 Ko  
 Atareere, ko Heremai, ko Hemaria, 42 Ko Harumu, ko Amaria, ko Hohepa, 43 O nga tama a Nepo;

ko Teiere, ko Matitia, ko Tapara, ko Tepina, ko Iarau, ko Hoera, ko Penaia, <sup>44</sup> Ko enei katoa, he hunga kua tango i te wahine ke, kei etahi hoki o ratou he wahine kua whanau tamariki.

## Nehemiah

### Chapter 1

<sup>1</sup> Ko nga kupu a Nehemia tama a Hakaria. Na, i te marama Kihireu, i te rua tekau o nga tau, i ahau i Huhana, i te whare kingi, <sup>2</sup> Ka tae mai a Hanani, tetahi o oku teina, ratou ko etahi tangata o Hura; a ka ui ahau ki a ratou ki nga Hurai i mawhiti, i mahue o nga whakarau, ki Hiruharama hoki.

<sup>3</sup> A ka mea ratou ki ahau, Ko nga oranga i mahue o nga whakarau i reira i taua kawanatanga he nui te he, te whakahaweatia: kua pakaru hoki te taiepa o Hiruharama, a kua wera ona keti i te ahi. <sup>4</sup> A, no toku rongonga i enei kupu, ka noho ahau, ka tangi, ka pouri hoki a taka noa etahi ra; na nohopuku ana ahau, inoi ana hoki ki te aroaro o te Atua o nga rangi,

<sup>5</sup> A ka mea ahau, Aue, e Ihowa, e te Atua o te rangi, ko te Atua nui ia e wehingia ana, e pupuri ana i te kawenata, i te atawhai mo te hunga e aroha ana ki a ia, e pupuri ana i ana whakahau: <sup>6</sup> Tena, kia tahuri mai tou taringa, kia titiro mai ano ou kanohi, kia whakarongo mai ai koe ki te inoi a tau pononga, e inoi atu nei ki tou aroaro i te ao, i te po, mo au pononga, mo nga tama a Iharaira, i ahau e whaki nei i nga hara o nga tama a I haraira i hara ai matou ki a koe; ae ra, kua hara ahau me te whare o toku papa. <sup>7</sup> He rawa ta matou mahi ki a koe, kihai hoki i pupuri i nga whakahau, i nga tikanga, i nga whakaritenga i whakahaua e koe ki tau pononga ki a Mohi. <sup>8</sup> Tena, maharatia te kupu i whakahaua e koe ki tau pononga, ki a Mohi, i mea ra koe, Ki te poka ke ta koutou, ka whakamararatia atu koutou e ahau ki roto ki nga iwi; <sup>9</sup> Otiia ki te tahuri mai ano koutou ki ahau, a ka pupuri, ka mahi i aku whakahau, ahakoa i peia etahi o koutou ki te pito whakamutunga o te rangi, ka kohikohia mai ratou e ahau i reira, ka kawea mai ano ki te wahi i whiriwhiria e ahau kia noho toku ingoa ki reira. <sup>10</sup> Na ko au pononga enei, ko tau iwi i hokona e koe, ara e tou kaha nui, e tou ringa kaha. <sup>11</sup> Tena, e te Ariki, tahuri mai tou taringa ki te inoi a tau pononga, ki te inoi hoki a au pononga e mea nei kia wehi i tou ingoa: kia tika ra ta tau pononga aiane, homai hoki ki a ia kia atawhaitia e tenei tangata. Ko ahau hoki te kaiwhakainu a t e kingi.

## Chapter 2

<sup>1</sup> Heoi i te marama Nihana i te rua tekau o nga tau o Kingi Arataherehe, i te mea he waina i tona aroaro, ka hapainga ake e ahau te waina, hoatu ana ki te kingi. Kahore hoki ahau i pouri i mua

<sup>2</sup> atu i tona aroaro. Na ka mea te kingi ki ahau, He aha tou kanohi i pouri ai; kahore nei hoki ou

<sup>3</sup> mate? ehara tenei i te mea ke atu i te pouri o te ngakau. Na nui atu toku wehi. Ano ra ko ahau ki

<sup>4</sup> te kingi, Kia ora tonu te kingi: he aha toku mata i kore ai e pouri, i te mea kua ururuatia te pa, te

<sup>5</sup> whare o nga tanumanga o oku matua, a kua pau ona keti i te ahi? Ano ra ko te kingi ki ahau, He

<sup>6</sup> aha te mea ka tonoa nei e koe? Heoi ko taku inoinga ki te Atua o te rangi. Na ka ki atu ahau ki

<sup>7</sup> te kingi, Ki te pai te kingi, ki te mea hoki e paingia ana tau pononga i tou aroaro, kia unga ahau e

<sup>8</sup> koe ki Hura, ki te pa o nga tanumanga o oku matua, kia hanga ai e ahau. Na ka mea te kingi ki

<sup>9</sup> ahau, i tona taha ano hoki te kuini e noho ana, Kia pehea te roa ou ka haere nei; a hei a hea koe

<sup>10</sup> hoki mai ai? Na kua pai ki te kingi kia unga ahau: a whakaritea ana e ahau he wa ki a ia. I mea

<sup>11</sup> ano ahau ki te kingi, Ki te pai te kingi, me homai he pukapuka ki ahau ki nga kawana i tawahi o te

<sup>12</sup> awa, kia tukua ahau e ratou kia puta atu a tae noa ki Hura; He pukapuka ano hoki ki a Ahapa,

<sup>13</sup> kaitiaki o te ngahere a te kingi, kia homai e ia etahi rakau ki ahau hei hanga mo nga kurupae o nga

<sup>14</sup> keti o te nohoanga rangatira i te whare, mo te taiepa hoki o te pa, mo te whare hoki e haere atu ai

<sup>15</sup> ahau. Na ka homai e te kingi ki ahau: i rite tonu ki ta te ringa pai o toku Atua i runga i ahau.

<sup>16</sup> Katahi ka haere ahau ki nga kawana i tera taha o te awa; hoatu ana e ahau nga pukapuka, a

<sup>17</sup> te kingi ki a ratou. I unga ano e te kingi etahi rangatira hoia, me etahi hoia eke hoiho hei hoa moku.

<sup>18</sup> A, no te rongonga o Hanaparata Horoni raua ko te pononga, ko Topia Amoni, nui rawa te kino

<sup>19</sup> i kino ai ki a raua; no te mea kua tae he tangata hei rapu i te pai mo nga tama a Iharaira. Heoi

<sup>20</sup> kua tae ahau ki Hiruharama, a e toru oku ra ki reira. Na ka maranga ahau i te po, matou ko etahi

<sup>21</sup> tangata torutoru hei hoa moku: kihai hoki i korerotia e ahau ki tetahi ta toku Atua i homai ai ki toku

<sup>22</sup> ngakau kia meatia ki Hiruharama: kahore hoki oku kararehe; heoi ano ko te kararehe i eke ai ahau.

<sup>23</sup> I haere ano ahau i te po i te kuwaha o te raorao, ki te ritenga o te puna tarakona, ki te kuwaha

<sup>24</sup> paru ano hoki, a tirotirohia iho e ahau nga taiepa o Hiruharama kua pakaru nei me ona keti kua pau

<sup>25</sup> nei i te ahi. Katahi ahau ka haere ki te kuwaha o te puna, ki te poka wai ano a te kingi; heoi

<sup>26</sup> kahore he wahi e haere atu ai te kararehe e waha ana i ahau. Na piki ana ahau i te awaawa i te

<sup>27</sup> po, tirotirohia ana e ahau te taiepa. Na tahuri ana ahau, tomo ana na te kuwaha o te raorao, hoki

<sup>28</sup> ana. Heoi kihai nga rangatira i mohio e haere ana ranei ahau ki hea, he aha ranei taku e mea nei;



kahore ano kia korerotia noatia e ahau ki nga Hurai, ki nga tohunga, ki nga tino tangata, ki nga rangatira, ki tera atu hunga ranei i mahi nei i nga mahi. <sup>17</sup> Katahi ka mea ahau ki a ratou, Ka kite koutou i te nui o to tatou aitua, ko Hiruharama kua ururuatia, ko ona keti kua wera i te ahi. Haere <sup>18</sup> mai, tatou ka hanga i te taiepa o Hiruharama; kei waiho tonu tatou hei tawainga. Na ka korerotia e ahau ki a ratou te ringa o toku Atua i pai nei ki runga i ahau, me nga kupu a te kingi i korerotia ki ahau. Na ka mea ratou, Tatou ka whakatika, ka hanga. Heoi kei te whakakaha ratou i o ratou <sup>19</sup> ringa mo tenei mahi pai. I te rongonga ia o Hanaparata Horoni, ratou ko te pononga, ko Topia Amoni, ko Keheme Arapi, ka whakahi mai ratou ki a matou, ka whakahawe ki a matou, ka mea, <sup>20</sup> He aha tenei mea ka meatia nei e koutou? ka whakakeke ranei koutou ki te kingi? Katahi ka whakahoki ahau ki a ratou, ka mea ki a ratou, Ko te Atua o te rangi, mana e tika ai ta matou. Na ka whakatika matou, ana tangata, ka hanga. Ko koutou ia, kahore he wahi, he tikanga, he maharatanga ranei, i Hiruharama.

### Chapter 3

<sup>1</sup> Katahi ka whakatika a Eriahipi, tino tohunga, ratou ko ona teina ko nga tohunga, kei te hanga i te kuwaha hipi; whakatapua ana e ratou, whakaturia ana e ratou ona tatau tae noa ki te pourewa o Meaha, whakatapua ana e ratou tae noa ki te pourewa o Hananeere. <sup>2</sup> I tona taha ko nga tangata o Heriko e hanga ana; a i te taha o era ko Takuru tama a Imiri. <sup>3</sup> Na, ko te kuwaha ika, na nga tama a Hahenaa i hanga; na ratou i whakanoho ona rakau, i whakatu hoki ona tatau, ona raka, me ona <sup>4</sup> tutaki. I ko atu i a ratou ko Meremoto tama a Uria, tama a Koto ki te hanga. A i ko atu i a ratou ko Mehurama tama a Perekia, tama a Mehetapeere ki te hanga. A i ko atu i ena ko Haroko tama a <sup>5</sup> Paana ki te hanga. I to ratou taha ko nga Tekoi ki te hanga; otira kihai o ratou tangata nunui i tuku i o ratou kaki ki te mahi a to ratou Ariki. <sup>6</sup> Na ko te kuwaha tawhito i hanga e Ioiara tama a Pahea, raua ko Mehurama tama a Pehoreia: na raua ona rakau i whakanoho, na raua ano i whakatu <sup>7</sup> ona tatau, me ona raka, me ona tutaki. I to raua taha e hanga ana a Meratia Kipeoni, a Tarono Meronoti, me nga tangata o Kipeono, o Mihipa, he wahi era no te torona o te kawana o tera taha o <sup>8</sup> te awa. I tona taha e hanga ana a Utiere tama a Harahaia, no nga kaimahi koura. I tona taha e hanga ana a Hanania tama a tetahi kaiwhakaranu. Na oti ake i a ratou a Hiruharama, tae noa ki te <sup>9</sup> taiepa nui. I to ratou taha e hanga ana a Repaia tama a Huru, rangatira o te hawhe o nga wahi o <sup>10</sup> Hiruharama. I to ratou taha e hanga ana a Ieraia tama a Harumapa, ki te ritenga atu ano o tona

11  
 whare. I tona taha e hanga ana a Hatuhu tama a Hahapania. Ko Marakia tama a Harimi, ko  
 12  
 Hahupu tama a Pahata Moapa, ki te hanga i tera atu wahi, i te pourewa ano hoki i nga oumu. I  
 tona taha e hanga ana a Harumu tama a Harohehe rangatira o te hawhe o nga wahi o Hiruharama,  
 13  
 a ia me ana tamahine. Ko te kuwaha o te raorao he mea hanga na Hanunu ratou ko nga tangata  
 o Tanoa. Na ratou i hanga, na ratou ano i whakatu ona tatau, ona rakau, me ona tutaki, kotahi mano  
 14  
 ano hoki nga whatianga o te taiepa, a tae noa ki te kuwaha paru. Ko te kuwaha paru na Marakia  
 tama a Rekapa rangatira o tetahi wahi o Petehakereme i hanga: nana i hanga, nana ano i whakatu  
 15  
 ona tatau, ona raka, me ona tutaki. Ko te kuwaha i te puna, he mea hanga tera na Harunu tama  
 a Korohote rangatira o tetahi wahi o Mihipa; nana i hanga, nana ano i hipoki, nana i whakatu ona  
 tatau, ona raka, ona tutaki, me te taiepa i te poka wai i Hiroa i te taha o te kari a te ki ngi, a tae noa  
 16  
 ki nga kaupae e heke iho ana i te pa o Rawiri. I muri i a ia e hanga ana a Nehemia tama a Atapuku,  
 rangatira o te hawhe o nga wahi o Peteturu, tae noa ki te ritenga o nga tanumanga o Rawiri, ki te  
 17  
 poka wai i hanga, ki te whare ano o te hunga nunui. I muri i a ia ka hanga ko nga Riwaiti, ko  
 Rehumu tama a Pani. I tona taha e hanga ana a Hahapia rangatira o te hawhe o nga wahi o Keira,  
 18  
 i tona wahi ano. I muri i a ia e hanga ana o ratou teina, ko Pawai tama a Henarara, rangatira o  
 19  
 te hawhe o nga wahi o Keira. I tona taha e hanga ana a Etere tama a Hehua, rangatira o Mihipa,  
 i tetahi wahi i te ritenga atu o te haerenga ki runga ki te takotoranga mea whawhai i te koki o te  
 20  
 taiepa. I muri i a ia ko Paruku tama a Tapai, uaua rawa tana hanga i tetahi atu wahi, i te koki o  
 21  
 te taiepa, a tae noa ki te tatau o te whare o Eriahipi, o te tino tohunga. I muri i a ia ka hanga ko  
 Meremoto, tama a Uria, tama a Koto, i tetahi atu wahi, i te tatau atu ano o te whare o Eriahipi, a  
 22  
 tae noa ki te pito o te whare o Eriahipi. I muri i a ia ka hanga ko nga tohunga, ko nga tangata o  
 23  
 te mania. I muri i a ia e hanga ana a Pineamine raua ko Hahupu, i te ritenga mai ano o to raua  
 whare. I muri i a ia e hanga ana a Ataria tama a Maaheia tama a Anania i te taha ano ki tona whare.  
 24  
 I muri i a ia ka hanga ko Pinui tama a Henarara i tetahi atu wahi, i te whare atu ano o Ataria, a  
 25  
 tae noa ki te koki o te taiepa, a ki te pikonga. Ko Parara tama a Utai i te ritenga atu o te koki o  
 te taiepa, o te pourewa hoki e kokiri ana ki waho i te whare o te kingi i runga, i te taha o te marae  
 26  
 o te whare herehere. I muri i a ia ko Peraia tama a Paroho. A i noho nga Netinimi ki Opere, a  
 tae noa ki te ritenga atu o te kuwaha wai, whaka te rawhiti, ki te pourewa ano hoki e uaki ana ki  
 27  
 waho. I muri i a ia ka hanga ko nga Tekoi i tetahi atu wahi, i te ritenga ano o te pourewa nui e  
 28  
 kokiri ana ki waho, a tae noa ki te taiepa o Opere. Ko to runga ake o te kuwaha hoiho ta nga

tohunga i hanga ai, i te ritenga ano o te whare o tenei tangata, o tenei tangata. <sup>29</sup> I muri i a ratou ka hanga ko Haroko tama a Imere i te ritenga ano o tona whare. I muri ano hoki i a ia ka hanga ko Hemaia tama a Hekania, kaitiaki o te kuwaha ki te rawhiti. <sup>30</sup> I muri i a ia ka hanga ko Hanania tama a Heremia, raua ko Hanunu, ko te tama tuaono a Tarapa, i tetahi atu wahi. I muri i a ia ka hanga ko Mehurama tama a Perekia i te ritenga ano o tona ruma. <sup>31</sup> I muri i a ia ka hanga ko Marakia tetahi o nga kaimahi koura, a tae noa ki te wahi i nga Netinimi, i nga kaihokohoko, i te ritenga atu ano o te kuwaha Mipikara, ki te pikitanga atu ano hoki i te koki. <sup>32</sup> Na, ko te takiwa o te pikitanga i te koki tae noa ki te kuwaha hipi, he mea hanga tera na nga kaimahi koura, na nga kaihokohoko.

#### Chapter 4

<sup>1</sup> No te rongonga ia o Hanaparata kei te hanga matou i te taiepa, ka riri, nui atu te riri, ka whakahi ki nga Hurai. <sup>2</sup> Na ka korero ia i te aroaro o ona teina, o te ope ano o Hamaria, ka mea, E aha ana enei Hurai ngoikore? e hanga pa ranei ratou? e mea patunga tapu ranei ratou? e oti ranei i a ratou i te ra kotahi? e whakaorangia ake ranei e ratou nga kohatu i ro to i nga puranga paru kua oti na te tahu? <sup>3</sup> Na i tona taha a Topia Amoni, a ka mea ia, Ko taua mea e hanga na e ratou, ki te piki atu he pokiha, ka pakaru ta ratou taiepa kohatu. <sup>4</sup> Whakarongo, e to matou Atua, e whakahaweatia ana hoki matou; whakahokia iho ano ta ratou taunu ki runga ki to ratou upoko; hoatu hoki ratou hei taonga parakete ki te whenua e whakaraua ai; <sup>5</sup> A kei hipokina to ratou he, kua ano to ratou hara e murua i tou aroaro; mo ratou i whakapataritari i a koe i te aroaro o nga kaihanga. <sup>6</sup> Na hanga ana e matou te taiepa; a ka honoa te taiepa katoa, kia tae ki te hawhe ano o tona tiketike: he ngakau hoki to te iwi ki te mahi. <sup>7</sup> I te rongonga ia o Hanaparata, o Topia, o nga Arapi, o nga Amoni, o nga Aharori, kua neke haere te hanga o nga taiepa o Hiruharama, a kua timata nga wahi pakaru te kapi, na nui atu to ratou riri. <sup>8</sup> Na ka whakatupu ngatahi ratou katoa i te he, kia haere mai ki te whawhai ki Hiruharama, whakaware ai. <sup>9</sup> Heoi inoi ana matou ki to matou Atua, whakaturia ana e matou he atiati mo ratou, i te ao, i te po, i te wehi hoki i a ratou. <sup>10</sup> Na ka mea a Hura, Kua hemo te kaha o nga kaipikau, e nui ana hoki te paru; na e kore matou e kaha ki te hanga i te taiepa. <sup>11</sup> I mea ano o matou hoariri, E kore ratou e mohio, e kore e kite, kia tae atu ra ano tatou ki waenganui i a ratou, ko reira tatou

12  
tukituki ai i a ratou, whakamutu ai hoki i te mahi. A, no te taenga mai o nga Hurai e noho ana i to ratou taha, tekau a ratou meatanga mai ki a matou i nga wahi katoa, Me hoki mai koutou ki a

13  
matou. Na reira i whakaturia ai e ahau ki nga wahi o raro, ki tua mai o te taiepa, ki nga wahi tuwhera ano hoki, whakaturia ana e ahau te iwi, tenei hapu, tenei hapu, o ratou, i a ratou ano a ratou

14  
hoari, a ratou tao, a ratou kopere. Na ka titiro ahau, ka whakatika ki runga, ka mea ki nga rangatira, ki nga tangata nunui, ki era atu ano o te iwi, Kaua e wehi ki a ratou. Kia mahara ki te Ariki, ki te mea nui e wehingia ana, ka whawhai kia ora ai o koutou tuakana, teina, a koutou tama,

15  
a koutou tamahine, a koutou wahine, me o koutou whare. A, ka rongo o matou hoariri ka mohiotia tera e matou, a kua whakataka nei e te Atua o ratou whakaaro, na hoki ana matou katoa ki te taiepa ki tana mahi, ki tana mahi.

16  
No taua ra ano ko tetahi tanga o aku tangata hei mahi i te mahi, a ko tetahi tanga o ratou hei pupuri i nga tao, i nga whakangungu rakau, i nga kopere, i nga pukupuku; ko nga rangatira, i muri

17  
ratou i te whare katoa o Hura. Ko nga kaihanganga i te taiepa, me nga kaiwaha i nga pikaunga, whakawaha ana ratou, a kotahi te ringa o tenei, o tenei, ki te mahi i te mahi, kotahi hei pupuri i te

18  
patu. Na, ko nga kaihanganga, whitiki rawa tana hoari ki tona taha, ki tona taha: na hanga ana ratou:

19  
i toku taha ano hoki ko te kaiwhakatangi tetere. I mea ano ahau ki nga rangatira, ki nga tangata nunui, ki era atu ano o te iwi, He nui te mahi, he tatahi, kua tohatoha noa atu ano tatou ki te taiepa,

20  
matara noa tetahi i tetahi; Ko te wahi e rongo ai koutou i te tangi o te tetere, me huihui ki a

21  
matou ki reira: ma to tatou Atua ta tatou pakanga. Heoi mahia ana e matou te mahi; na ko tetahi

22  
tanga ki te pupuri tao, no te haukanga ake ano o te ata a puta noa nga whetu. I mea ano ahau ki te iwi i taua wa, Kia moe tenei tangata, tenei tangata, me tana pononga ano, ki roto ki Hiruharama,

23  
a ka ai ratou hei kaitiaki mo tatou i te po, hei mahi ano i te awatea. Heoi ko ahau, ko oku teina, ko aku pononga, me nga kaitiaki i whai mai nei i ahau, kihai i whakarerea atu o matou kakahu. Mau tonu te patu a tenei, a tenei, i te haerenga ki te wai.

## Chapter 5

1  
Katahi ka nui atu te karanga a te iwi, ratou ko a ratou wahine, he whakahe mo o ratou tuakana,

2  
teina, mo nga Hurai. I reira hoki etahi e mea ana, Ko matou, ko a matou tama, me a matou

3  
tamahine, he tokomaha; tatou ki te hoko witi, kia kai ai tatou, kia ora ai. I reira hoki etahi e ki ana, Kua waiho o matou whenua, a matou mara waina, o matou whare hei taunaha; tatou ki te hoko

4  
witi mo te matekai. Me etahi hoki e ki ana, Kua riro mai he moni tarewa i a matou hei takoha me  
5  
te kingi; ko o matou whenua, ko a matou mara waina te tarewatanga. Na rite tonu o matou kikokiko  
ki nga kikokiko o o matou tuakana; rite tonu a matou tamariki ki a ratou tamariki: nana, e  
whakaponongatia ana e matou a matou tama me a matou tamahine, hei pononga, kua oti ano etahi  
o a matou tamahine te mea hei po nonga, kahore hoki a matou mea hei whakahoki mai; no te mea  
kei nga tangata ke o matou whenua, a matou mara waina.

6  
Na nui atu toku riri i toku rongonga i ta ratou karanga, i enei kupu. 7  
Katahi ka whakaaroaroa  
e toku ngakau i roto i ahau, a ka totohe ahau ki nga rangatira me nga tangata rarahi; i ki atu hoki  
ahau ki a ratou, E tangohia ana e koutou he moni whakatupu i tona teina, i tona teina. Na tu ana i

8  
ahau he hui nui hei whak ahe mo ratou. I mea ano ahau ki a ratou, Kua poto ta matou hei whakahoki  
mai i o tatou teina, i nga Hurai, kua oti nei te hoko ki nga tauwi, a ka hokona atu ano ranei e koutou  
o koutou tuakana, teina? ka hokona ranei ratou ki a tatou? Katahi ka whakarongo kau ratou, kihai

9  
hoki i kitea he kupu ma ratou. I mea ano ahau, Ehara tena i te mea pai e mea na koutou; kaua  
iane i koutou e haere i runga i te wehi ki to tatou Atua? kaua ranei e whakaaro ki te tawai mai a o

10  
tatou hoariri, a nga tauwi? Na, ko ahau, ko oku teina, me aku tangata, e tuku ana he moni, he  
witi ki a ratou mo te moni whakatupu. Tena ra, kia whakarerea atu e tatou tenei mahi tango i te

11  
moni whakatupu. Tena, whakahokia atu ki a ratou i tenei ra nei ano o ratou whenua, a ratou  
mara waina, mara oriwa, me o ratou whare me te wahi whakarau o te moni, o te witi, o te waina,

12  
o te hinu, e tangohia nei e koutou i a ratou. Katahi ratou ka ki mai, Me whakahoki atu e matou,  
e kore ano e tonoa e matou he mea i a ratou: ka rite ta matou e mea ai ki tau i ki mai na. Katahi ka

13  
karangatia e ahau nga tohunga, a ka meinga e ahau kia oati, mo tenei kupu kia mahia. I ruperupea  
ano e ahau te uma o toku, me taku ki ano, Ko te tangata e kore e whakamana i tenei kupu, kia penei  
ta Ihowa ruperupe i a ia i roto i tona whare, i tana mahi; kia rite ano ia ki tenei te ruperupe, te takoto  
kau. A ka ki mai te huihui katoa, Amine; ka whakamoemiti ano ratou ki a Ihowa. Na pera tonu te  
mah i a te iwi.

14  
No te ra ano i kiia ai ahau hei kawana mo ratou ki te whenua o Hura, no te rua tekau o nga  
tau, a tae noa ki te toru tekau ma rua o nga tau o Kingi Arataherehe, ara kotahi tekau ma rua tau,

15  
kahore ahau, oku teina ranei, i kai i te taro kawana. Otiia ko nga kawana o mua, ko era i mua i  
ahau, he taimaha ta ratou ki te iwi: i tangohia hoki e ratou he taro, he waina, i a ratou, me etahi  
hekere hiriwa e wha tekau; ae ra, i whakatupu rangatira ano a ratou tangata ki te iwi: kihai ia ahau

16  
i pera, i wehi hoki ki te Atua. I uaua tonu ano ahau ki te mahi i tenei taiepa, kihai hoki matou i

17  
hoko whenua mo matou; i huihuia atu ano hoki aku tangata katoa ki reira ki te mahi. Na, kotahi  
rau e rima tekau i taku tepu, no nga Hurai, no nga rangatira, haunga era atu i haere mai nei ki a

matou i roto i nga iwi i tetahi taha o matou, i tetahi taha. <sup>18</sup> Na, ko nga mea i taka maku i te ra kotahi, kotahi puru, e ono hipi, he mea pai; i taka ano etahi manu naku, a, kotahi i roto i nga ra kotahi tekau, ko nga tu waina katoa, tona nui; na ahakoa ko tenei katoa kihai ahau i mea ki te taro kawana, no te mea he taimaha rawa te hereherenga o tenei iwi. <sup>19</sup> Kia mahara mai ki ahau, e toku Atua, mo te pai, kia rite ki aku mea katoa i mea ai ahau ki tenei iwi.

## Chapter 6

<sup>1</sup> A, no te rongonga o Hanaparata, o Topia, o Keheme Arapi, o era atu o o matou hoariri, kua hanga e ahau te taiepa, kahore hoki he wahi pakaru i mahue: kahore ano ia kia oti noa i ahau nga tatau te whakatu ki nga kuwaha: <sup>2</sup> Na ka unga tangata mai a Hanaparata raua ko Keheme ki ahau, ka mea, Haere mai, tatou ka runanga ki tetahi o nga pa ririki i te mania i Ono. Otiia i whakaaro raua ki te mahi kino ki ahau. <sup>3</sup> Na ka unga tangata ahau ki a raua hei ki atu, He nui te mahi e mahi nei ahau; e kore e ahei kia heke atu. Kia whakamutua hei aha te mahi? ka whakarerea nei hoki e ahau, ki te heke atu ahau ki a korua. <sup>4</sup> Na e wha a raua tononga tangata mai ki ahau, ko taua tikanga ano; heoi whakahokia ana e ahau ko aua kupu ra ano. <sup>5</sup> Katahi a Hanaparata ka unga mai i tana tangata ki ahau, ko te rima o nga ngarenga mai, ko taua tikanga ano, he pukapuka tuwhera i tona ringa. <sup>6</sup> Ko te mea tenei tuhituhia ki reira, Kua paku te rongo ki nga tauiwi, e ki ana ano hoki a Kahamu, tenei koutou ko nga Hurai te mea nei kia whakakeke: koia i hanga ai e koe te taiepa; a e mea ana koe ko koe hei kingi mo ratou; ko ta nga korero hoki tenei. <sup>7</sup> Kua whakaturia ano e koe etahi poropiti hei karanga mou ki Hiruharama, hei ki, Kua whai kingi a Hura. Na ka whakaaturia enei kupu ki te kingi. Heoi, haere mai, kia kororerero taua. <sup>8</sup> Katahi ahau ka unga tangata ki a ia, hei ki atu, Ehara kau enei mea e korero nei koe; he mea tito noa hoki na tou ngakau ake. <sup>9</sup> Ko ta ratou katoa hoki, he whakawehi i a matou; i mea ratou, Tera o ratou ringa e whakawarea ki te mahi, e kore ai e mahia. Tena, e te Atua, whakakahangia oku ringa. <sup>10</sup> Katahi ahau ka haere ki te whare o Hemaia tama a Teraia tama a Mehetapeere, he mea tutaki hoki ia ki roto; a ka mea ia, Me runanga tatou ki te whare o te Atua, ki roto ki te temepara, me tutaki hoki e tatou nga tatau o te temepara; tera hoki ratou e haere mai ki te patu i a koe; ina, ko a te po ratou haere mai ai ki te patu i a koe. <sup>11</sup> Na ka mea ahau, Me oma ranei te tangata penei i ahau nei? ko wai te tangata o toku rite e haere ki roto ki te temepara kia ora ai? E kore ahau e haere ki roto. <sup>12</sup> Na ka mahara ahau ehara ia i te mea unga mai na te Atua; heoi hei he moku tana kupu i

<sup>13</sup> poropiti ai: he mea utu hoki ia na Topia raua ko Hanaparata. I utua ai ia, kia wehi ai ahau, kia  
<sup>14</sup> mahi pera a ka hara; kia whai mea ai ratou hei whakaingoa kino, hei tawai ma ratou ki ahau. Kia  
mahara, e toku Atua, ki a Topia raua ko Hanaparata, ki enei mahi a raua, ki a Noaria poropiti wahine,  
ki era atu ano o nga poropiti i mea nei ki te whakawehi i ahau.  
<sup>15</sup> Heoi kua oti te taiepa i te rua tekau ma rima o nga ra o te marama o Eruru; e rima tekau ma  
<sup>16</sup> rua nga ra. A, i te rongonga o o matou hoariri katoa, i taua mea, ka wehi nga tauwi katoa i tetahi  
taha o matou, i tetahi taha, a ko te tino hokinga iho o o ratou whakaaro; i kite hoki ratou he mea  
<sup>17</sup> mahi tenei mahi e to matou Atua. He tini ano nga pukapuka a nga rangatira o Hura i aua ra i tae  
<sup>18</sup> ki a Topia, me a Topia hoki i tae ki a ratou. He tokomaha hoki o Hura i oati ki a ia, he hunaonga  
hoki ia na Hekania tama a Araha; i tango ano tana tama a Iehohanana i te tamahine a Mehurama  
<sup>19</sup> tama a Perekia hei wahine. I korerotia ano e ratou ana mahi pai ki toku aroaro: i kawea ano e  
ratou aku kupu ki a ia. Heoi tukua mai ana e Topia etahi pukapuka hei whakawehi i ahau.

## Chapter 7

<sup>1</sup> Nawai a kua oti te taiepa te hanga, kua whakaturia nga tatau, kua whakaritea ano nga kaitiaki  
kuwaha, nga kaiwaiata, me nga Riwaiti. <sup>2</sup> Na ka tukua e ahau nga tikanga mo Hiruharama ki toku  
teina, ki a Hanani raua ko Hanania rangatira o te whare rangatira: he tangata pono hoki ia, a nui  
<sup>3</sup> atu i to te tokomaha tona wehi ki te Atua. I ki atu ahau ki a raua, Kaua e whakatuwheratia nga  
kuwaha o Hiruharama, kia mahana ra ano te ra; i a raua e tu ana, e tiaki ana, me tutaki e raua nga  
tatau, ka whakau hoki. Me whakatu ano he kaitiaki i roto i nga tangata o Hiruharama, ki tana wa  
<sup>4</sup> hi e tiaki ai, ki te ritenga o tona whare, o tona whare. Na he wharahi, he nui te pa, he torutoru ia  
nga tangata o roto; kahore hoki nga whare kia hanga.  
<sup>5</sup> Na ka homai e toku Atua ki roto ki toku ngakau kia huihuia nga rangatira, me nga tangata  
rarahi, me te iwi, kia whakapapa ai ratou. I kitea hoki e ahau te pukapuka whakapapa o te hunga i  
<sup>6</sup> haere mai i te timatanga; i kitea ano kua tuhituhia ki roto, Ko nga tama enei o te kawanatanga i  
haere mai i te whakarau, no te hunga i whakahekea, no era i whakahekea atu e Nepukaneha kingi  
<sup>7</sup> o Papurona, a hoki ana ki Hiruharama, ki Hura; ki tona pa, ki tona pa; I haere mai ratou ko  
Herupapera, ko Hehua, ko Nehemia, ko Ataria, ko Raamia, ko Nahamani, ko Mororekai, ko Pirihana,  
ko Mihiperete, ko Pikiwai, ko Nehumu, ko Paana. Ko te tokomaha tenei o nga tangata o te iwi o  
<sup>8</sup> Iharaira: Ko nga tama a Paroho, e rua mano kotahi rau e whitu tekau ma rua. <sup>9</sup> Ko nga tama a

10  
 Hepatia, e toru rau e whitu tekau ma rua. Ko nga tama a Araha, e ono rau e rima tekau ma rua.  
 11  
 Ko nga tama a Pahata Moapa, no nga tama a Henue raua ko Ioapa, e rua mano e waru rau kotahi  
 12 tekau ma waru. Ko nga tama a Erama, kotahi mano e rua rau e rima tekau ma wha. Ko nga  
 13  
 tama a Tatu, e waru rau e wha tekau ma rima. Ko nga tama a Takai, e whitu rau e ono tekau.  
 14  
 15 Ko nga tama a Pinui, e ono rau e wha tekau ma waru. Ko nga tama a Pepai, e ono rau e rua  
 16 tekau ma waru. Ko nga tama a Atakara, e rua mano e toru rau e rua tekau ma rua. Ko nga  
 17  
 tama a Aronikama, e ono rau e ono tekau ma whitu. Ko nga tama a Pikiwai, e rua mano e ono  
 18 tekau ma whitu. Ko nga tama a Arini, e ono rau e rima tekau ma rima. Ko nga tama a Atere,  
 19  
 a Hetekia, e iwa tekau ma waru. Ko nga tama a Hahumu, e toru rau e rua tekau ma waru. Ko  
 20  
 nga tama a Petai, e toru rau e rua tekau ma wha. Ko nga tama a Haripi, kotahi rau kotahi tekau  
 21  
 ma rua. Ko nga tama a Kipeono, e iwa tekau ma rima. Ko nga tangata o Peterehema, o Netopa,  
 22  
 kotahi rau e waru tekau ma waru. Ko nga tangata o Anatoto, kotahi rau e rua tekau ma waru.  
 23  
 24 Ko nga tangata o Pete Atamawete, e wha tekau ma rua. Ko nga tangata o Kiriata Tearimi, o  
 25  
 Kepira, o Peeroto, e whitu rau e wha tekau ma toru. Ko nga tangata o Rama, o Kapa, e ono rau  
 26  
 e rua tekau me tahi. Ko nga tangata o Mikimaha, kotahi rau e rua tekau ma rua. Ko nga  
 27  
 tangata o Peteere, o Hai, kotahi rau e rua tekau ma toru. Ko nga tangata o tera atu Nepo, e rima  
 28  
 tekau ma rua. Ko nga tama a tera atu Erama, kotahi mano e rua rau e rima tekau ma wha. Ko  
 29  
 nga tama a Harimi, e toru rau e rua tekau. Ko nga tama a Heriko, e toru rau e wha tekau ma  
 30  
 rima. Ko nga tama a Roro, a Hariri, a Ono, e whitu rau e rua tekau ma tahi. Ko nga tama a  
 31  
 Hena, e toru mano e iwa rau e toru tekau. Ko nga tohunga: ko nga tama a Ieraia, no te whare  
 32  
 o Hehua, e iwa rau e whitu tekau ma toru. Ko nga tama a Imere, kotahi mano e rima tekau ma  
 33  
 rua. Ko nga tama a Pahuru, kotahi mano e rua rau e wha tekau ma whitu. Ko nga tama a  
 34  
 Harimi, kotahi mano kotahi tekau ma whitu. Ko nga Riwaiti: ko nga tama a Henua, a Karamiere,  
 35  
 no nga tama ano hoki a Horewa, e whitu tekau ma wha. Ko nga kaiwaiata: ko nga tama a Ahapa,  
 36  
 kotahi rau e wha tekau ma waru. Ko nga kaitiaki kuwaha: ko nga tama a Harumu, ko nga tama  
 37  
 38  
 39  
 40  
 41  
 42  
 43  
 44  
 45



a Atere, ko nga tama a Taramono, ko nga tama a Akupu, ko nga tama a Hatita, ko nga tama a Hopai,  
 kotahi rau e toru tekau ma waru. <sup>46</sup> Ko nga Netinimi: ko nga tama a Tiha, ko nga tama a Hahupa,  
 ko nga tama a Tapaoto, <sup>47</sup> Ko nga tama a Keroho, ko nga tama a Hia, ko nga tama a Parono, <sup>48</sup> Ko  
 nga tama a Repana, ko nga tama a Hakapa, ko nga tama a Haramai, <sup>49</sup> Ko nga tama a Hanana, ko  
 nga tama a Kirere, ko nga tama a Kahara, <sup>50</sup> Ko nga tama a Reaia, ko nga tama a Retini, ko nga  
 tama a Nekora, <sup>51</sup> Ko nga tama a Katama, ko nga tama a Uha, ko nga tama a Pahea, <sup>52</sup> Ko nga  
 tama a Pehia, ko nga tama a Meunimi, ko nga tama a Nepihehimi, <sup>53</sup> Ko nga tama a Pakapuku, ko  
 nga tama a Hakupa, ko nga tama a Harahuru, <sup>54</sup> Ko nga tama a Patariti, ko nga tama a Mehira, ko  
 nga tama a Haraha, <sup>55</sup> Ko nga tama a Parakoho, ko nga tama a Hihera, ko nga tama a Tamaha,  
<sup>56</sup> Ko nga tama a Netia, ko nga tama a Hatipa. <sup>57</sup> Ko nga tama a nga pononga a Horomona: ko nga  
 tama a Hotai, ko nga tama a Hoperete, ko nga tama a Perira, <sup>58</sup> Ko nga tama a Taara, ko nga tama  
 a Tarakono, ko nga tama a Kirere, <sup>59</sup> Ko nga tama a Hepatia, ko nga tama a Hatiri, ko nga tama a  
 Pokerete o Tepaimi, ko nga tama a Amono. <sup>60</sup> Ko nga Netinimi katoa, ratou ko nga tama a nga  
 pononga a Horomona, e toru rau e iwa tekau ma rua. <sup>61</sup> Ko enei i haere mai i Teremera, i Terehareha,  
 i Kerupu, i Arono, i Imere: otiiia kihai i taea e ratou te whakaatu te whare o o ratou papa, to ratou  
 kawei, no Iharaira ranei ratou; <sup>62</sup> Ara ko nga tama a Teraia, ko nga tama a Topia, ko nga tama a  
 Nekora, e ono rau e wha tekau ma rua. <sup>63</sup> O nga tohunga hoki: ko nga tama a Hapaia, ko nga tama  
 a Koto, ko nga tama a Paratirai, i tango nei i tetahi o nga tamahine a Paratirai Kireari hei wahine  
 mana, a ka huaina to ratou ingoa ki a ia. <sup>64</sup> I rapua e enei te whakapapa o o ratou tupuna i roto i te  
 hunga kua oti te whakapapa; heoi kihai i kitea: na reira i kii ai ratou he poke, i mutu ake ai to ratou  
 tohungatanga. <sup>65</sup> Na ka mea te kawana ki a ratou, kia kaua ratou e kai i nga mea tapu rawa, kia ara  
 ake ra ano tetahi tohunga, kei a ia nga Urimi me nga Tumime. <sup>66</sup> Ko te whakaminenga katoa, ki  
 te huihuia, e wha tekau ma rua mano, e toru rau e ono tekau, <sup>67</sup> Haunga a ratou pononga tane, a  
 ratou pononga wahine, e whitu mano o enei e toru rau e toru tekau ma whitu: i a ratou ano he  
 kaiwaiata, he tane, he wahine, e rua rau e wha tekau ma rima. <sup>68</sup> Ko o ratou hoiho, e whitu rau e  
 toru tekau ma ono: ko o ratou muera, e rua rau e wha tekau ma rima. <sup>69</sup> E wha rau e toru tekau ma  
 rima nga kamera: ko nga kaihe, e ono mano e whitu rau e rua tekau. <sup>70</sup> Na i homai ano e etahi o

nga ariki o nga whare o nga matua he mea mo te mahi. Ta te kawana i homai ai ki roto ki nga taonga, kotahi mano tarami koura, e rima tekau peihana, e rima rau e toru tekau kakahu tohunga.

71

I homai ano e etahi o nga ariki o nga whare o nga matua ki roto ki nga taonga mo te mahi e rua

tekau mano tarami koura, e rua mano e rua rau pauna hiriwa. <sup>72</sup> Na, ko nga mea i homai e te nuinga o te iwi, e rua tekau mano tarami koura, e rua mano pauna hiriwa, e ono tekau ma whitu kakahu

tohunga. <sup>73</sup> Heoi noho ana nga tohunga i o ratou pa, me nga Riwaiti ano, ratou ko nga kaitiaki kuwaha, ko nga kaiwaiata, ko etahi o te iwi, ko nga Netinimi, ko Iharaira katoa. A, i te takanga mai o te whitu o nga marama, e noho ana nga tama a Iharaira i o ra tou pa.

## Chapter 8

1

Na ka huihui te iwi katoa, ano he tangata kotahi, ki te marae i te kuwaha wai, a ka mea ki a Etera karaipi kia mauria mai te pukapuka o te ture a Mohi, o tera i whakahaua e Ihowa ki a Iharaira.

2

Na ka mauria mai e Etera tohunga te ture ki te aroaro o te whakaminenga, o te tane, o te wahine,

o te hunga katoa e mohio ana ki te whakarongo, i te ra tuatahi o te whitu o nga marama. <sup>3</sup> A ka korerotia e ia i te marae i te kuwaha wai, i te ata iho a taea noatia a waenganui o te ra, i te aroaro o nga tane, o nga wahine, o te hunga whai whakaaro; na tau tonu mai nga taringa o te iwi katoa ki

te pukapuka o te ture. <sup>4</sup> I tu ano a Etera karaipi i runga i te turanga rakau i hanga nei hei mea pera, me te tu ano a Matitia, a Hema, a Anaia, a Uria, a Hirikia, a Maaheia ki tona taha ki matau, a ki tona taha ki mau ki Peraia, ko Mihaera, ko Marakia, ko Hahumu, ko Hah aparana, ko Hakaraia,

ko Mehurama. <sup>5</sup> Na wherahia ana e Etera te pukapuka i te aroaro o te iwi katoa; i runga ake hoki

ia i te iwi katoa; a i tana wherahanga, tu ana te iwi katoa. <sup>6</sup> Na ka whakapai a Etera ki a Ihowa, ki te Atua nui; a ka whakahokia e te iwi katoa, Amine, Amine, me te ara ano o ratou ringa: na tuohu

ana ratou, koropiko ana ki a Ihowa, me te ahu ano nga kanohi ki te whenua. <sup>7</sup> Ko Hehua ano, ko Pani, ko Herepia, ko Iamini, ko Akupu, ko Hapetai, ko Horiia, ko Maaheia, ko Kerita, ko Ataria, ko Iotapara, ko Hanana, ko Peraia, me nga Riwaiti, kei te whakamarama i te iwi ki te ture: tu tonu

hoki tera te iwi. <sup>8</sup> A marama tonu ta ratou korero i te pukapuka o te ture, me te whakaatu ano i nga tikanga, me te whakamarama ano i a ratou i te korerotanga.

9

Na ka mea a Nehemia, ko ia nei te kawana, a Etera tohunga, te karaipi, me nga Riwaiti i whakaako nei i te iwi, ki te iwi katoa, He ra tapu tenei na Ihowa, na to koutou Atua; kaua e tangi,

kaua e pouri. I te tangi hoki te iwi katoa i to ratou rong onga i nga kupu o te ture. <sup>10</sup> Katahi ia ka mea ki a ratou, Haere, kainga nga mea momona, inumia nga mea reka, hoatu ano etahi wahi kia

kawea ma te hunga kahore nei i taka he mea ma ratou; he ra tapu hoki tenei na to tatou Ariki; kaua hoki e pouri; kei te koa hoki ki a Ihowa he kaha mo koutou. <sup>11</sup> Heoi i whakamarie nga Riwaiti i te iwi katoa, i mea, Whakarongoa; he tapu hoki te ra nei, kaua hoki e pouri. <sup>12</sup> Na haere ana te iwi katoa ki te kai, ki te inu, ki te hoatu i etahi wahi ma etahi, ki te whakanui i te hari, no ratou ka mohio ki nga kupu i whakapuakina nei ki a ratou.

<sup>13</sup> Na i te rua o nga ra ka huihui nga ariki o nga whare o nga matua o te iwi katoa, ratou ko nga tohunga, ko nga Riwaiti, ki a Etera karaipi, kia mohiotia ai nga kupu o te ture. <sup>14</sup> Na ka kitea he mea i tuhituhia ki te ture i whakahaua e Ihowa, ara e Mohi, mo nga tama a Iharaira kia noho ki nga tihokahoka i te hakari i te whitu o nga marama; <sup>15</sup> Kia karanga nui hoki, kia paku te reo ki o ratou pa katoa, ki Hiruharama hoki, kia mea, Haere ki te maunga, tikina he rau oriwa, he rau rakau hinu, he rau ramarama, he rau nikau, he rau rakau rau maha, hei hanga mo nga tihokahoka, kia rite ai ki te mea i tuhituhia. <sup>16</sup> Heoi kua puta te iwi ki waho, kei te tiki, hanga ana e ratou he tihokahoka mo ratou ki te tuanui o te whare o tenei, o tenei, ki o ratou marae, ki nga marae ano o te whare o te Atua, ki te marae i te kuwaha wai, ki te marae i te kuwaha o Eparaim a. <sup>17</sup> Na kua hanga he tihokahoka e te whakaminenga katoa o te hunga i hoki mai i te whakarau, a noho ana i raro i nga tihokahoka; kihai hoki nga tama a Iharaira i pera, o nga ra ano i a Hohua tama a Nunu a taea noatia taua ra. A nui atu te koa. <sup>18</sup> I korerotia ano e ia te pukapuka o te ture a te Atua i tenei ra, i tenei ra, i te ra tuatahi a tae noa ki te ra whakamutunga. Na e whitu nga ra i mahi ai ratou i te hakari, a i te waru o nga ra, ko te huihuinga nui, ko te mea i whakaritea.

## Chapter 9

<sup>1</sup> I te rua tekau ma wha o nga ra o tenei marama ka huihui nga tama a Iharaira, nohopuku ana, he taratara ano nga kakahu, he oneone kei runga i a ratou. <sup>2</sup> Na ka wehea nga uri o Iharaira i roto i nga tangata ke katoa: tu ana ratou, whakina ana e ratou o ratou hara, me nga kino o o ratou matua.

<sup>3</sup> Tu ana ratou i to ratou wahi; a i tetahi o nga wehenga e wha o te ra ka korerotia te pukapuka o te ture a Ihowa, a to ratou Atua; a i tetahi o nga wehenga e wha o te ra ka whaki, ka koropiko ki a Ihowa, ki to ratou Atua.

<sup>4</sup> Na ka tu ki runga ki te pikinga o nga Riwaiti, a Hehua, a Pani, a Karamiere, a Hepania, a Puni, a Herepia, a Pani, a Kenani; nui atu to ratou reo ki te karanga ki a Ihowa, ki to ratou Atua.

<sup>5</sup> Katahi ka mea nga Riwaiti, a Hehua, a Karamiere, a Pani, a Hahapania, a Herepia, a Horiia, a Hepania, a Petahia, Whakatika, whakapai ki a Ihowa, ki to koutou Atua a ake ake: kia whakapaingia

ano tou ingoa kororia e whakanuia nei ki runga ake i ng a whakapai, i nga whakamoemiti katoa.

6

Ko koe, ina, ko koe anake a Ihowa; nau i hanga te rangi, te rangi o nga rangi, me o reira tini mea, te whenua, me nga mea katoa i runga, nga moana, me nga mea katoa i roto, ko koe hoki te

7

kaiwhakaora o aua mea katoa; e koropiko ana hoki te ope o te rangi ki a koe. Ko Ihowa koe, ko te Atua; nau i whiriwhiri a Aperama, a kawea mai ana e koe i Uru o nga Karari, huaina iho e koe

8

tona ingoa ko Aperahama; I kitea hoki e koe he ngakau pono tona ki tou aroaro, na whakaritea ana e koe he kawenata ki a ia, he mea kia homai te whenua o nga Kanaani, o nga Hiti, o nga Amori, o nga Perihi, o nga Iepuhi, o nga Kirikahi, kia homai ki ona uri, Na kua mana ne i i a koe au kupu;

9

he tika hoki koe. I kitea ano e koe te tukinotanga o o matou matua i Ihipa, i rongo ano ki ta ratou

10

karanga i te Moana Whero: Na homai ana e koe he tohu, he merekara, ki a Parao, ki ana tangata katoa, ki te iwi katoa o tona whenua: i mohio hoki koe ki ta ratou whakakake ki a ratou. Na kua

11

whai ingoa koe; koia ano tenei inaianei. I wahia ano e koe te moana ki to ratou aroaro, a whiti ana ratou i te wahi maroke, i waenganui o te moana. Tena ko nga kaiaru i a ratou, maka ana e koe

12

ki nga rire, ano he kohatu ki roto ki nga wai kaha. A arahina ana ratou e koe ki te pou kapua i

13

te awatea; ki te pou ahi i te po, hei whakamarama i to ratou ara e haere ai ratou. I heke iho ano koe ki Maunga Hinai, a korero ana ki a ratou i runga i te rangi; homai ana e koe ki a ratou he

14

whakaritenga tika, he ture pono, he tikanga pai, he whakahau. Ko tou hapati tapu nau i whakaatu ki a ratou; me nga whakahau, me nga tikanga, me te ture, nau i whakahau ki a ratou, ara na tau

15

pononga, na Mohi. I homai ano e koe he taro i te rangi mo to ratou matekai; i whakaputaina he wai i te kohatu mo to ratou matewai; i ki ano ki a ratou kia haere ki te tango i te whenua i oati ai

16

koe ka hoatu ki a ratou. Otiia ka whakakake ratou ko o matou matua, ka whakapakeke i o ratou

17

kaki, kihai hoki i rongo ki au whakahau, Kihai i whakaae kia rongo, kihai i mahara ki au merekara i mahia e koe i roto i a ratou; otiia kua pakeke o ratou kaki, whakakeke ana ratou, whakaritea ana e ratou he rangatira, kia hoki ai ratou ki ta ratou mahi pononga. Ko koe ia he Atua muru hara, he

18

tohu tangata, he atawhai, he puhoi ki te riri, he nui te aroha, a kihai i whakarere i a ratou. Ae ra, i ta ratou hanganga ano i te kua kau, i te mea whakarewa, i ta ratou kianga, Ko tou Atua tenei i

19

kawea mai ai koe i Ihipa, a nui atu a ratou whakapataritaringa; Otiia, i te maha o au mahi aroha, kihai koe i whakarere i a ratou i te koraha; kihai ratou i mahue i te pou kapua i te awatea, hei arahi

20

i a ratou i te ara, i te pou ahi i te po, hei whakamarama i a ratou, i te ara ano e haere ai ratou. I homai ano e koe tou wairua pai hei whakaako i a ratou, kihai hoki tau mana i kaiponuhia ki o ratou

21

mangai: i homai ano e koe he wai ki a ratou mo to ratou matewai. Ae ra, e wha tekau nga tau i atawhaitia ai ratou e koe i te koraha, a kihai i hapa ki tetahi mea; kihai o ratou kakahu i tawhitotia,

22  
 kihai ano o ratou waewae i pupuhi. I homai ano e koe nga kingitanga me nga iwi ki a ratou, a wehewehea ana ratou ki nga wahi mo ratou: heoi kua riro i a ratou te whenua o Hehepona, me te

23  
 whenua o Oka kingi o Pahana. I whakanuia ano e koe a ratou tamariki kia rite ki nga whetu o te rangi, a kawea mai ana ratou ki te whenua i ki ai koe ki o ratou matua ka haere ratou ki reira

24  
 tango ai. Heoi haere ana nga tamariki, riro ana te whenua i a ratou, a pehia ana e koe ki to ratou aroaro nga tangata whenua, nga Kanaani, homai ana e koe ki o ratou ringa, ratou, o ratou kingi, me

25  
 nga iwi o te whenua, kia meatia ki a ratou ta ratou i pai ai. Na kua riro i a ratou nga pa kaha, me te oneone momona, kua whiwhi ano ki nga whare e ki tonu ana i nga mea papai katoa, ki nga poka wai kua oti te keru, ki nga mara waina, oriwa, ki nga rakau hei kai, tona tini; a kai ana ratou, ka

26  
 makona, kua whai kiko, a koa ana ratou ki te nui o au mea pai. Otiia ka tutu ratou, a ka whakakeke ki a koe, maka ana e ratou tau ture ki muri ki o ratou tuara, patua iho e ratou au poropiti i whakaatu

27  
 tikanga nei ki a ratou, kia tahuri ai ratou ki a koe; nui atu a ratou whakapataritaringa. Na reira i hoatu ai ratou e koe ki te ringa o o ratou hoariri, a whakatoia iho ratou e ratou; heoi i nga wa i mate ai ratou, ka karanga ratou ki a koe, ka whakarongo koe i te rangi, a, i te maha o au mahi aroha,

28  
 homai ana e koe he kaiwhakaora ki a ratou, i ora ai ratou i te ringa o o ratou hoariri. Otiia ka whai tanga manawa, nei ratou, kei te mahi ano ratou i te kino ki tou aroaro: na whakarerea atu ana ratou e koe ki te ringa o o ratou hoariri, a ko era hei rangatira mo ratou. Na, ka hoki ratou, a ka karanga ki a koe, ka whakarongo koe i te rangi; he maha nga wa i whakaorangia ai ratou e koe, rite

29  
 tonu ki au mahi aroha; I whakaatu tikanga ano koe ki a ratou, kia hoki ai ki tau ture; otiia whakakake ana ratou, kihai hoki i rongo ki au whakahau, na ka hara ki au whakaritenga, he mea hoki enei e ora ai te tangata, ki te mahia e ia; whakahokia ana e ratou te pokohi wi, whakapakeketia

30  
 ana o ratou kaki, kihai hoki i rongo. He maha ano nga tau i kukume roa ai koe ki a ratou, i whakaatu tikanga ai ki a ratou, he mea na tou wairua i roto i au poropiti: heoi kihai i tahuri o ratou

31  
 taringa: na hoatu ana ratou e koe ki te ringa o nga iwi o nga whenua. He nui ia no tou aroha, te whakapotoa rawatia ai ratou e koe, te whakarerea ai ratou; he Atua atawhai hoki koe, he Atua aroha.

32  
 Na, tena, e to matou Atua, e te Atua nui, e te Atua kaha, e wehinga ana, e pupuri nei i te kawenata, i tae mahi tohu, kei iti ki tau titiro te he katoa i pa mai nei ki a matou, ki o matou kingi, ki o matou rangatira, ki o matou tohunga, ki o ma tou poropiti, ki o matou matua, ki tau iwi katoa, o nga ra o

33  
 nga kingi o Ahiria a tae noa mai ki tenei ra. Otira tika tonu tau i nga mea katoa i takina mai nei

34  
 ki a matou; he pono hoki tau mahi, ko ta matou ia he kino: Ko o matou kingi, ko o matou rangatira, ko o matou tohunga, ko o matou matua, kihai i mahia e ratou tau ture, kihai hoki i tahuri

35  
 ki au whakahau, ki au whakaatauranga i whakaaturia e koe ki a ratou. Kihai ratou i mahi ki a koe i to ratou kingitanga, a i tau pai nui i homai e koe ki a ratou, me te whenua nui, whenua momona,

<sup>36</sup>  
 i homai e koe ki to ratou aroaro, kihai ratou i tahuri i a ratou mahi kino. Nana, he pononga matou  
 i tenei ra; na, ko te whenua i homai nei e koe ki o matou matua, kia kainga ona hua, ona pai, nana,  
<sup>37</sup>  
 he pononga matou i reira. Nui atu hoki ona hua ma nga kingi i meinga nei e koe hei kingi mo  
 matou, no te mea i hara matou; kei ta ratou i pai ai te tikanga mo o matou tinana, mo a matou  
<sup>38</sup>  
 kararehe, a he nui atu te he i a matou nei. Ahakoa tenei katoa, ka whakarite matou i te kawenata  
 pono, tuhituhi rawa; ka hiritia iho e o matou rangatira, e o matou Riwaiti, e o matou tohunga.

### Chapter 10

<sup>1</sup> Na, ko te hunga nana i hiri, ko te kawana, ko Nehemia tama a Hakaria, ko Terekia, <sup>2</sup> Ko  
 Heraia, ko Ataria, ko Heremaia, <sup>3</sup> Ko Pahuru, ko Amaria, ko Marakia, <sup>4</sup> Ko Hatuhu, ko Hepania,  
 ko Maruku, <sup>5</sup> Ko Harimi, ko Meremoto, ko Oparia, <sup>6</sup> Ko Raniera, ko Kinetono, ko Paruku, <sup>7</sup> Ko  
 Mehurama, ko Apia, ko Miiamini, <sup>8</sup> Ko Maatia, ko Pirikai, ko Hemaia: ko nga tohunga enei. <sup>9</sup> Me  
 nga Riwaiti; ko Hehua tama a Atania, ko Pinui, no nga tama a Henarara, ko Karamiere; <sup>10</sup> Me o  
 ratou teina; ko Hepania, ko Horiia, ko Kerita, ko Peraia, ko Hanana, <sup>11</sup> Ko Mika, ko Rehopo, ko  
 Hahapia, <sup>12</sup> Ko Takuru, ko Herepia, ko Hepania, <sup>13</sup> Ko Horiia, ko Pani, ko Peninu. <sup>14</sup> Ko nga  
 rangatira o te iwi; ko Paroho, ko Pahata Moapa, ko Erama, ko Tatu, ko Pani, <sup>15</sup> Ko Puni, ko Atakara,  
 ko Pepai, <sup>16</sup> Ko Aronia, ko Pikiwai, ko Arini, <sup>17</sup> Ko Atere, ko Hetekia, ko Aturu, <sup>18</sup> Ko Horiia,  
 ko Hahumu, ko Petai, <sup>19</sup> Ko Haripi, ko Anatoto, ko Nepai, <sup>20</sup> Ko Makapiaha, ko Mehurama, ko  
 Hetiri, <sup>21</sup> Ko Mehetapeere, ko Haroko, ko Tarua, <sup>22</sup> Ko Peratia, ko Hanana, ko Anaia, <sup>23</sup> Ko  
 Hohea, ko Hanania, ko Hahupu, <sup>24</sup> Ko Harohehe, ko Pireha, ko Hopeke, <sup>25</sup> Ko Rehumu, ko  
 Hahapana, ko Maaheia, <sup>26</sup> Ko Ahia, ko Hanana, ko Anana, <sup>27</sup> Ko Maruku, ko Harimi, ko Paana.  
<sup>28</sup>  
 Na, ko era atu o te iwi, ko nga tohunga, ko nga Riwaiti, ko nga kaitiaki kuwaha, ko nga kaiwaiata,  
 ko nga Netinimi, me te hunga katoa i wehea i roto i nga iwi o nga whenua ki te ture a te Atua, ko  
 a ratou wahine, ko a ratou tama, ko a ratou tama hine, ko te hunga katoa i mohio, i whai whakaaro;  
<sup>29</sup>  
 Piri tonu ratou ki o ratou tuakana, teina, ki o ratou rangatira, a uru ana ki te kanga, ki te oati, kia  
 haere i runga i te ture a te Atua i homai nei e ia, ara e Mohi, e te pononga a te Atua, kia puritia hoki,  
 kia mahia nga whakahau katoa a Ihow a, a to matou Ariki, ana whakaritenga, me ana tikanga;

30

Kia kua hoki e hoatu a matou tamahine ma nga iwi o te whenua, kia kua e tangohia a ratou

tamahine ma a matou tama: <sup>31</sup> A, ki te kawea mai e nga iwi o te whenua etahi taonga, tetahi kai ranei i te ra hapati hei hoko, kia kua e hokona ta ratou mea i te hapati, i te ra tapu ranei; a me whakarere noa iho te whitu o nga tau, kua hoki e tohea te moni tarewa.

32

I hanga ano e matou he tikanga ma matou kia hoatu e matou te toru o nga wahi o te hekere

i te tau mo te mahi o te whare o to matou Atua; <sup>33</sup> Mo te taro aroaro, mo te whakahere totokore tuturu, mo nga tahunga tinana tuturu o nga hapati, o nga kowhititanga marama, mo nga hakari tuturu, mo nga mea tapu, mo nga whakahere hara, hei whakamarie mo Iharaira; mo te mahi katoa

ano o te whare o to matou Atua. <sup>34</sup> I maka rota ano matou, nga tohunga, nga Riwaiti, te iwi, mo te whakahere rakau kia kawea ki te whare o to matou Atua i runga i nga whare o o matou matua, i nga wa i whakaritea o tenei tau, o tenei tau, hei tahu ki runga ki te aata a Ihowa, a to matou Atua,

kia rite ai ki te mea i tuhituhia ki te ture; <sup>35</sup> Mo nga matamua o to matou oneone, mo nga matamua

ano o nga hua katoa o nga rakau katoa, kia kawea i tenei tau, i tenei tau, ki te whare o Ihowa; <sup>36</sup> Mo nga matamua ano o a matou tama, o a matou kararehe, kia peratia me te mea i tuhituhia ki te ture, mo nga matamua ano o a matou kau, o a matou hipi, kia kawea ki te whare o to matou Atua, ki nga

tohunga e minita nei i te whare o to matou Atua: <sup>37</sup> Kia kawea ano e matou nga matamua o a matou paraoa pokepoke, me a matou whakahere hapahapai, me nga hua o nga rakau katoa, o te waina, o te hinu, ki nga tohunga, ki nga ruma o te whare o to matou Atua; me nga whakatekau o nga hua o to matou oneo ne ki nga Riwaiti, e riro ana hoki i a ratou, i nga Riwaiti nga whakatekau i nga pa

katoa e ngaki ai matou. <sup>38</sup> Na ko te tohunga, ko te tama a Arona, hei hoa mo nga Riwaiti, ina tango nga Riwaiti i nga whakataekau; a me mau e nga Riwaiti nga whakatekau o nga whakatekau ki te

whare o to matou Atua, ki nga ruma, ki te whare taonga. <sup>39</sup> Me mau hoki e nga tama a Iharaira, e nga tama a Riwai, nga whakahere hapahapai, ara te witi, te waina, te hinu, ki nga ruma; kei reira hoki nga oko o te wahi tapu, me nga tohunga hei minita, me nga kaitiaki kuwaha, me nga kaiwaiata; e kore hoki e whakarerea e matou te whare o to matou Atua.

## Chapter 11

1

Na i noho nga rangatira o te iwi ki Hiruharama: a i maka rota te nuinga atu o te iwi mo te tangata takikotahi i te tekau kia kawea ki Hiruharama, ki te pa tapu, noho ai, a ko te tokoiwa ki era

atu pa. <sup>2</sup> A he moa manaaki na te iwi nga tangata katoa i hihiko noa ake ki te noho ki Hiruharama.

3

Na ko nga ariki enei o te kawanatanga i noho ki Hiruharama: i nga pa ia o Hura i noho ratou i

tona wahi, i tona wahi, i o ratou pa, ara a Iharaira, nga tohunga, nga Riwaiti, nga Netinimi, ratou  
 ko nga tama a nga pononga a Horomona. <sup>4</sup> Na i noho ki Hiruharama etahi o nga tama a Hura, o  
 nga tama ano a Pineamine. No nga tama a Hura; ko Ataia tama a Utia, tama a Hakaraia, tama a  
 Amaria, tama a Hepatia, tama a Maharareere, no nga tamariki a Perete; <sup>5</sup> Ko Maaheia tama a  
 Paruku, tama a Korohote, tama a Hataia, tama a Araia, tama a Toiaripi, tama a Hakaraia, tama a te  
 Hironi. <sup>6</sup> Ko nga tama katoa a Perete i noho ki Hiruharama e wha rau e ono tekau ma waru, he  
 hunga maia. <sup>7</sup> Na ko nga tama enei a Pineamine; ko Haru tama a Mehurama, tama a Toere, tama  
 a Peraia, tama a Koraia, tama a Maaheia, tama a Itiere, tama a Ihaia. <sup>8</sup> Na i muri i a ia, ko Kapai,  
 ko Harai, e iwa rau e rua tekau ma waru. <sup>9</sup> Na ko Hoera tama a Tikiri to ratou kaitirotiro; ko Hura  
 hoki tama a Henua te tuarua o nga rangatira o te pa. <sup>10</sup> O nga tohunga: ko Ieraia tama a Toiaripi,  
 ko Iakini; <sup>11</sup> Ko Heraia tama a Hirikia, tama a Mehurama, tama a Haroko, tama a Mereioto, tama  
 a Ahitupu, te rangatira mo te whare o te Atua, <sup>12</sup> Me o ratou teina i mahi nei i te mahi o te whare,  
 e waru rau e rua tekau ma rua: me Araia ano tama a Ierohama, tama a Peraria, tama a Amati, tama  
 a Hakaraia, tama a Pahuru, tama a Marakia, <sup>13</sup> Me ona teina, me nga ariki o nga whare o nga matua;  
 e rua rau e wha tekau ma rua: ko Amahai tama a Atareere, tama a Ahatai, tama a Mehiremoto, tama  
 a Imere, <sup>14</sup> Me o ratou teina, he marohirohi, he maia, kotahi rau e rua tekau ma waru: a ko to ratou  
 kaitirotiro, ko Tapariere tama a Haketorimi. <sup>15</sup> O nga Riwaiti ano: ko Hemaia tama a Huhupu,  
 tama a Atarikama, tama a Hahapia, tama a Puni; <sup>16</sup> Ko Hapetai, ko Itopara, no nga ariki o nga  
 Riwaiti, nga kaitirotiro o te mahi i waho o te whare o te Atua, <sup>17</sup> Ko Matania tama a Mika, tama  
 a Tapari, tama a Ahapa, te tino tangata hei timata i te whakamoemiti i te mea e karakia ana: ko  
 Pakapukia ano hoki ko te tuarua i roto i ona teina; ko Aparata tama a Hamua, tama a Karara, tama a  
 Ierutunu. <sup>18</sup> Ko nga Riwaiti katoa i te pa tapu, e rua rau e waru tekau ma wha. <sup>19</sup> Ko nga kaitiaki  
 kuwaha hoki, ko Akupu, ko Taramono, me o ratou teina i tiakina ai nga kuwaha, kotahi rau e whitu  
 tekau ma rua.  
<sup>20</sup> Na, ko era atu o Iharaira, o nga tohunga, o nga Riwaiti, kei nga pa katoa ratou o Hura, kei  
 tona wahi, kei tona wahi. <sup>21</sup> I noho ia nga Netinimi ki Opere: ko Tiha hoki raua ko Khipa nga  
 kaitirotiro o nga Netinimi. <sup>22</sup> Ko te kaitirotiro hoki o nga Riwaiti i Hiruharama, ko Uti tama a Pani,  
 tama a Hahapia, tama a Matania, tama a Mika, o nga tama a Ahapa nga kaiwaiata, mo te mahi i te  
 whare o te Atua. <sup>23</sup> Na te kingi hoki te tikanga mo ratou, kia tuturu te wahi ma nga kaiwaiata, he



<sup>24</sup> mea tatau a rangi tonu. Na ko Petahia tama a Mehetapeere, no nga tama a Tera, tama a Hura, i  
to te kingi taha ia i nga mea katoa a te <sup>25</sup> iwi. Na, ko nga kainga me o ratou mara, i noho etahi o  
nga tama a Hura ki Kiriata Arapa, ki ona pa ririki, ki Ripono, ki ona pa ririki, ki Tekapateere, ki  
ona kainga koraha, <sup>26</sup> Ki Hehua, ki Morara, ki Peteparete, <sup>27</sup> Ki Hatarahuara, ki Peerehepa, ki ona  
pa ririki, <sup>28</sup> Ki Tikiraka, ki Mekona, ki ona pa ririki, <sup>29</sup> Ki Enerimono, ki Toraha, ki Iaramuta;  
<sup>30</sup> Ko Tanoa, ko Aturama me o raua kainga, ko Rakihi, me o reira mara, ko Ateka, me ona pa ririki.  
Na, ko to ratou nohoanga, kei Peerehepa, a tae noa ki te raorao o Hinomo. <sup>31</sup> Ko nga tama hoki a  
Pineamine, ko era i Kepa, i noho ratou ki Mikimaha, ki Aiiia, ki Peteere, ki o ratou pa ririki; <sup>32</sup> Ki  
Anatoto, ki Nopo, ki Anania, <sup>33</sup> Ki Hatoro, ki Rama, ki Kitaima, <sup>34</sup> Ki Hariri, ki Tepoimi, ki  
Neparata, <sup>35</sup> Ki Roro, ki Ono, ki te raorao o nga tohunga mahi. <sup>36</sup> Na kei a Hura, kei a Pineamine,  
etahi tanga o nga Riwaiti.

## Chapter 12

<sup>1</sup> Na ko nga tohunga enei, me nga Riwaiti, i haere tahi i a Herupapera tama a Haratiera raua  
ko Hehua: ara ko Heraia, ko Heremaia, ko Etera, <sup>2</sup> Ko Amaria, ko Maruku, ko Hatuhu, <sup>3</sup> Ko  
Hekania, ko Rehumu, ko Meremoto, <sup>4</sup> Ko Iro, ko Kinetoto, ko Apia, <sup>5</sup> Ko Miamini, ko Maaria, ko  
Pirika, <sup>6</sup> Ko hemaia, ko Toiaripi, ko Ieraia, <sup>7</sup> Ko Haru, ko Amoko, ko Hirikia, ko Ieraia. Ko nga  
ariki enei o nga tohunga, o o ratou teina hoki, i nga ra o Hehua. <sup>8</sup> Na, ko nga Riwaiti; ko Hehua,  
ko Pinui, ko Karamiere, ko Herepia, ko Hura, ko Matania, kei a ia nei te tikanga mo te whakawhetai,  
kei a ia, ratou ko ona teina. <sup>9</sup> Na ko Pakapukia raua ko Uni, o ratou teina, kei to ratou aroaro i nga  
tiakanga. <sup>10</sup> Na ka whanau ake ta Hehua; ko Ioiakimi; whanau ake ta Ioiakimi, ko Eriahipi; whanau  
ake ta Eriahipi, ko Ioiara. <sup>11</sup> Whanau ake ta Ioiara, ko Honatana; whanau ake ta Honatana, ko  
Tarua; <sup>12</sup> Na, i nga ra o Ioiakimi, tera nga tohunga, ko nga ariki o nga whare o nga matua; ta Heraia,  
ko Meraia; ta Heremaia, ko Hanania; <sup>13</sup> Ta Etera, ko Mehurama; ta Amaria, ko Iehohanana; <sup>14</sup> Ta  
Meriku, ko Honatana; ta Hepania, ko Hohepa; <sup>15</sup> Ta Harimi, ko Arana, ta Meraioto, ko Herekai;

<sup>16</sup> Ta Iro, ko Hakaraia; ta Kinetono, ko Mehurama; <sup>17</sup> Ta Apia, ko Tikiri; ta Miniamini, ta Moaria,  
 ko Piritai; <sup>18</sup> Ta Pirika, ko Hamua; ta Hemaia, ko Honatana; <sup>19</sup> Ta Toiaripi, ko Matenai; ta Ieraia,  
 ko Uti; <sup>20</sup> Ta Harai, ko Karai; ta Amoko, ko Epere; <sup>21</sup> Ta Hirikia, ko Hahapia; ta Ieraia, ko  
<sup>22</sup> Netaneere. Ko nga Riwaiti i nga ra i a Eriahipi, i a Ioiara, i a Iohanana, i a Tarua, he mea tuhituhi  
 hei ariki mo nga whare o nga matua: me nga tohunga ano i te wa e kingi ana a Tariuha o Pahia.  
<sup>23</sup> Ko nga tama a Riwai, ko nga ariki o nga whare o nga matua, he mea tuhituhi ki te pukapuka o  
 nga ra, a tae noa ki nga ra o Iohanana tama a Eriahipi. <sup>24</sup> A ko nga ariki o nga Riwaiti; ko Hahapia,  
 ko Herepia, ko Hehua tama a Karamiere, me o ratou teina ano i te ritenga mai o ratou, hei  
 whakamoemiti, hei whakawhetai; ko te mea hoki ia i whakahaua e ta te Atua tangata, e Rawiri,  
 tenei tiakanga i te ritenga mai o tenei tiakanga. <sup>25</sup> Ko Matania, ko Pakapukia, ko Oparia, ko  
 Mehurama, ko Taramono, ko Akupu nga kaitiaki kuwaha, hei tiaki i nga whare taonga i nga kuwaha.  
<sup>26</sup> No nga ra enei i a Ioiakimi tama a Hehua tama a Iohereke, no nga ra ano hoki i a Nehemia  
 kawana, i a Etera tohunga, i te karaipi ra.  
<sup>27</sup> Na, i te tainga o te kawa o te taiepa o Hiruharama, i rapua nga Riwaiti i o ratou wahi katoa,  
 i meatia kia kawea ki Hiruharama, kia taia hoki te kawa i runga i te koa, i te whakawhetai, i te  
 waiata, i te himipora, i te hatere, i te hapa. <sup>28</sup> I huihui mai ano nga tama a nga kaiwaiata i te mania  
 i nga taha katoa o Hiruharama, i nga kainga ano hoki o nga Netopati; <sup>29</sup> I Petekirikara ano, i nga  
 mara hoki o Kepa, o Atamawete; i hanga hoki e nga kaiwaiata he kainga mo ratou ki nga taha katoa  
 o Hiruharama. <sup>30</sup> Na kei te pure nga tohunga ratou ko nga Riwaiti i a ratou; kei te pure hoki i te  
 iwi, i nga kuwaha, i te taiepa. <sup>31</sup> Katahi ka kawea e ahau nga rangatira o Hura ki runga ki te taiepa,  
 a whakaritea ana e ahau kia rua nga ropu nui hei whakawhetai, kotahi hei haere ki matau i runga i  
 te taiepa whaka te keti paranga paru: <sup>32</sup> A i muri i a ratou ka haere ko Hohaiia me tetahi tanga o  
 nga rangatira o Hura, <sup>33</sup> A Ataria, a Etera, a Mehurama, <sup>34</sup> A Hura, a Pineamine, a Hemaia, a  
 Heremaia, <sup>35</sup> Me etahi o nga tama a nga tohunga e mau tetere ana; me Hakaraia tama a Honatana,  
 tama a Hemaia, tama a Matania, tama a Mikaia, tama a Takuru, tama a Ahapa: <sup>36</sup> Me ona teina,  
 ara a Hemaia, a Atareere, a Mirarai, a Kirarai, a Maai, a Netaneere, a Hura, a Hanani, e mau ana i  
 nga mea whakatangi a ta te Atua tangata, a Rawiri: a ko Etera karaipi kei to ratou aroaro. <sup>37</sup> Na i  
 te keti o te puna wai, i te ritenga mai ano o ratou, ka haere atu ratou i nga kaupae o te pa o Rawiri,  
 i te pinakitanga o te taiepa i runga i te whare o Rawiri, tae noa ki te keti wai ki te rawhiti. <sup>38</sup> Na,  
 ko tera atu ropu o nga kaiwhakawhetai i haere ki te whakatutaki i a ratou, me ahau i muri i a ratou,

me tetahi tanga o te iwi i runga i te taiepa, i runga o te taumaihi oumu tae noa ki te taiepa whanui:  
39

I runga hoki i te keti o Eparaima, i te keti tawhito, i te keti ika, i te taumaihi o Hananeere, i te  
40  
taumaihi ano o Meaha tae noa ki te keti hipi: a tu tonu ratou ki te keti i te whare herehere. Na  
tu ana nga ropu e rua o nga kaiwhakawhetai ki te whare o te Atua, matou tahi ko tetahi tanga o nga

rangatira, 41 Ko nga tohunga; ko Eriakimi, ko Maaheia, ko Miniamini, ko Mikaia, ko Erioenai, ko

Hakaraia, ko Hanania, e mau tetere ana; 42 Ko Maaheia, ko Hemaia, ko Ereatara, ko Uti, ko  
Iehohanana, ko Marakia, ko Erama, ko Etere. Na nui atu te waiata a nga kaiwaiata ratou ko Itirahia,

43  
ko te kaitohutohu. He nui ano nga patunga tapu i patua e ratou i taua rangi, a koa ana ratou: he  
nui hoki te koa i meinga ai ratou e te Atua kia koa. I koa hoki nga wahine me nga tamariki, no ka  
rangona mai te koa o Hiruharama i tawhiti.

44  
I whakaritea ano i taua wa etahi kaitirotiro i nga ruma mo nga taonga, mo nga whakahere  
hapahapai, mo nga hua matamua, mo nga whakatekau; ma ratou e kohikohi ki reira i nga mara o  
nga pa, nga wahi i whakaritea e te ture ma nga tohunga ratou ko nga Riwaiti: i koa hoki a Hura ki

45  
nga tohunga, ki nga Riwaiti, ki nga mea e minita ana. Na kei te tiaki ratou i nga mea o to ratou  
Atua, kei te tiaki hoki i te purenga, a i pera ano nga kaiwaiata, me nga kaitiaki kuwaha; rite tonu

46  
ki te whakahau a Rawiri raua ko tana tama, ko Horomona. No nga ra hoki o Rawiri raua ko  
Ahapa, nonamata iho, tera ano te rangatira mo nga kaiwaiata, me nga waiata whakamoemiti, me

47  
nga whakawhetai ki te Atua. I nga ra hoki i a Herupapera, i nga ra ano i a Nehemia, i homai e  
Iharaira katoa nga wahi ma nga kaiwaiata, ma nga kaitiaki kuwaha, te wahi mo tenei ra, mo tenei  
ra: i whakatapua ano e ratou nga mea tapu ma nga Riwaiti; a ko nga Riwaiti hei whak atapu ma  
nga tama a Arona.

## Chapter 13

1  
I taua ra i korerotia i te pukapuka a Mohi, me te whakarongo ano te iwi, a ka kitea te mea i  
tuhituhia ki reira kia kua te Amoni me te Moapi e tapoko ki te whakaminenga a te Atua a ake ake;

2  
No te mea kihai i maua mai e ratou he taro, he wai, hei tukunga mai mo nga tama a Iharaira:  
engari, utua ana e ratou a Paraama hei hoariri mo ratou, hei kanga mo ratou: heoi whakaputaina

3  
ketia ake e to tatou Atua te kanga hei manaaki. Na, i to ratou rongonga i te ture, ka wehea atu e

4  
ratou nga whakauru katoa i roto i a Iharaira. Na, i mua ake o tenei ko Eriahihi, tohunga, kaitiaki

5  
i nga ruma o te whare o to tatou Atua, he whanaunga no Topia. Whakapaia ana e tenei he ruma

nui mona, ko te wahi i whakatakotoria nei i mua nga whakahere totokore, te parakihe, nga oko, me te whakatekau o te witi, o te waina hou, o te hinu, ko te mea i kiia iho ma nga Riwaiti, ratou ko nga kaiwaiata, ko nga kaitiaki tatau, me nga whakahere hapahapai ma nga tohunga. <sup>6</sup> Otiia i tenei wa katoa kahore ahau i Hiruharama; no te toru tekau ma rua nei hoki o nga tau o Arataherehe kingi o Papurona i tae ai ahau ki te kingi, a maha noa nga ra, ka inoitia e ahau i te kingi: <sup>7</sup> Na ka tae mai ahau ki Hiruharama, a ka mohio ki ta Eriahipi mahi kino, ki tana mo Topia, i a ia i whakapai i tetahi ruma mona i nga marae o te whare o te Atua; <sup>8</sup> Na kino rawa ki ahau; akiritia atu ana e ahau nga mea katoa o te whare o Topia i roto i taua ruma. <sup>9</sup> Katahi ahau ka korero; a tahia ana e ratou nga ruma. Na whakahokia ana e ahau ki reira nga oko o te whare o te Atua, nga whakahere totokore me te parakihe.

<sup>10</sup> I kite ano ahau kihai nga wahi ma nga Riwaiti i hoatu, na oma ana ratou ki tana mara, ki tana mara, nga Riwaiti, nga kaiwaiata i mahia ai te mahi. <sup>11</sup> Katahi ka whawhaitia e ahau nga rangatira; i mea ahau, He aha i whakarerea ai te whare o te Atua? Na huihuia ana ratou e ahau, whakaturia ana ki to ratou turanga. <sup>12</sup> Katahi ka kawea mai e Hura katoa nga whakatekau o te witi, o te waina hou o te hinu, ki nga whare taonga. <sup>13</sup> Na ka whakaritea e ahau he kaitiaki mo nga taonga, ko Heremia tohunga, ko Haroko karaipi, a o nga Riwaiti ko Peraia; i to ratou taha ko Hanana tama a Takuru tama a Matania: i kiia hoki ratou he hunga pono; a ko ta ratou, he tuwha ma o ratou tuak ana, teina. <sup>14</sup> Kia mahara, e toku Atua, ki tenei mea aku, kua hoki e horoia atu tenei tikanga pai aku i puta nei ki te whare o toku Atua, ki nga ritenga mahi ano mo reira.

<sup>15</sup> I aua ra ka kitea e ahau etahi i roto i a Hura e takahi ana i nga takahanga waina i te hapati, e kawea ana mai i nga paihere witi, e whakawaha ana i nga kaihe; me te waina ano, me nga karepe, me nga piki, me nga pikaunga katoa, e kawea mai ana e ratou ki Hiruharama i te ra o te hapati. Na whakaaturia ana e ahau to ratou he i te ra i hoko ai ratou i te kai. <sup>16</sup> I reira ano e noho ana etahi tangata o Taira, he ika te kawenga, me nga mea hoko katoa, a hokona ana e ratou i te hapati ki nga tama a Hura, i roto ano i Hiruharama. <sup>17</sup> Katahi ka whawhaitia e ahau nga rangatira o Hura. I mea ahau ki a ratou, He aha tenei mea kino e mea nei koutou, i a koutou ka whakapoke nei i te ra hapati?

<sup>18</sup> Kahore ianei o koutou matua i penei, a kawea mai ana e to tatou Atua tenei kino katoa ki runga ki a tatou, ki runga ano i tenei pa? Na ko koutou hei whakaneke ake i te riri mo Iharaira, i te mea ka whakapokea nei te hapati. <sup>19</sup> Na pouriuri kau nga kuwaha o Hiruharama i mua ake o te hapati, ka mea ahau, kia tutakina nga keti. I mea ano ahau kia kua e whakatuwheratia, kia taka ra ano te hapati: i whakaturia ano e ahau etahi o aku: tangata ki nga kuwaha, kei kawea mai ki roto he pikaunga i te ra o te hapati. <sup>20</sup> Heoi kotahi, e rua nga moenga i waho o Hiruharama, o nga tangata

21  
i nga taonga, o nga kaihoko i nga tini mea. Katahi ahau ka whakaatu i to ratou he, a ka mea ki a ratou, He aha koutou i moe ai i te aronga o te taiepa? Ki te pena ano koutou, ka totoro atu toku

22  
ringa ki a koutou. No taua ra ano i kore ai to ratou haere mai i te hapati. I ki atu ano ahau ki nga Riwaiti kia purea ratou, kia haere hoki ki te tiaki i nga kuwaha hei whakatapu mo te ra hapati. Maharatia ano tenei aku e toku Atua; tohungia hoki ahau, kia rite ki te nui o tou atawhai.

23  
I aua ra ano ka kite ahau i nga Hurai kei a ratou e noho ana etahi wahine o Aharoro, o Amona,

24  
o Moapa. Ko a ratou tama hoki, ko tetahi wahi o te reo no Aharoro, kihai ratou i mohio ki to nga Hurai reo; heoi i rite ki te reo o tetahi iwi, o tetahi iwi. 25 Na, whawhaitia iho e ahau, kanga iho, patua ana etahi o ratou, hutihutia ana o ratou makawe, whakaoatitia ana ki te Atua, Kaua e hoatu a koutou tamahine ki a ratou tama, kaua ano hoki e tangohia mai a ratou tamahine ma a

26  
koutou tama, ma koutou ranei. He teka ianei na enei mea i hara ai a Horomona kingi o Iharaira? he maha nga iwi, kahore rawa o ratou kingi hei rite mona, he mea aroha ia na tona Atua, a meinga ana e te Atua hei kingi mo Iharaira katoa: ahakoa ko ia, i meinga ia e nga wahine k e kia hara.

27  
Na kia rongoranei matou ki a koutou, kia mahi i tenei he nui katoa, kia tutu ki to tatou Atua, kia

28  
marena ki nga wahine ke? Na he hunaonga na Hanaparata Horoni tetahi o nga tama a Ioiara tama a Eriahipi tino tohunga; na peia ana ia e ahau i toku taha. 29 Kia mahara ki a ratou, e toku Atua, mo ratou i whakapoke i te tohungatanga, i te kawenata ano o te tohungatanga, o nga Riwaiti

30  
ano hoki. Heoi kua ma ratou i ahau i te poke o nga tangata ke, whakaritea ana hoki e ahau te

31  
mahitiaki a nga tohunga, a nga Riwaiti, te mahi a tenei, a tenei, Me te tikanga ano mo te whakahere wahie i nga wa i whakaritea; mo nga matamua ano. Maharatia ahau e toku Atua mo te pai.

## Esther

### Chapter 1

1  
Na i nga ra i a Ahahueruha, ara a Ahahueruha i kingi nei i Inia a tae noa ki Etiopia, kotahi rau e rua tekau ma whitu nga kawanatanga: 2 I aua ra, i te mea e ata noho ana a Kingi Ahahueruha

3  
i runga i te torona o tona kingitanga i Huhana, i te whare kingi, I te toru o nga tau o tona kingitanga, ka tukua e ia he hakari ma ana rangatira katoa ratou ko ana tangata; i tona aroaro ano te hunga

<sup>4</sup>  
 nunui o Pahia, o Meria, nga tangata rarahi, me nga rangatira o nga kawanatanga: I a ia e whakakite ana i te taonga me te kororia o tona kingitanga, i tona honore, i tona ataahua nui, he maha nga ra,

<sup>5</sup>  
 kotahi rau e waru tekau nga ra. Na, ka taka aua ra, ka tukua e te kingi he hakari ma te iwi katoa i reira i Huhana, i te whare kingi, ma te rahi, ma te iti, e whitu nga ra, i te marae i te kari te whare

<sup>6</sup>  
 o te kingi; Ko nga hipoki he mea ma, he kakariki, he puru; ko nga aho he rinena pai he mea papura, ko nga mowhiti i mau ai, he hiriwa; ko nga pou he mapere; ko nga tokotoranga he koura,

<sup>7</sup>  
 he hiriwa; a ko te papa o raro he mapere whero, ma, kowhai, mangu hoki. Ko nga kapu inu i hoatu ma ratou he oko koura; rere ke tonu te ahua o tenei oko, o tenei oko; tona nui ano o te waina

<sup>8</sup>  
 kingi, rite tonu ki ta te kingi tikanga. I rite ano te inu ki ta te ture, kahore he tohe; na te kingi taua tikanga i whakatakoto ki nga rangatira katoa o tona whare, ko ta te tangata i pai ai ko tana tera e

<sup>9</sup>  
 mea ai. I tukua ano e te kuini, e Wahati, he hakari ma nga wahine i roto i te whare kingi o Kingi Ahahueruha.

<sup>10</sup>  
 I te whitu o nga ra, i te mea e koa ana te ngakau o te kingi i te waina, ka mea ia ki a Mehumana ratou ko Pitita, ko Harapona, ko Pikita, ko Apakata, ko Tetara, ko Karakaha, ki nga rangatira ruma

<sup>11</sup>  
 tokowhiti i mahi i te aroaro o Kingi Ahahueruha, Kia kawea mai te kuini, a Wahati, ki te aroaro o te kingi, me te karauna kuini, kia whakakitea atu ai tona ataahua ki nga iwi, ki nga rangatira: he

<sup>12</sup>  
 pai hoki tona ahua. Otiia kihai a Kuini Wahati i pai kia haere mai i ta te kingi kupu i korerotia

<sup>13</sup>  
 e ana rangatira ruma. Na reira i riri rawa ai te kingi, a mura ana tona riri i roto i a ia. Katahi te kingi ka korero ki nga tangata whai whakaaro i mohio nei ki nga taima, ko ta te kingi tikanga hoki

<sup>14</sup>  
 ia, ki te hunga katoa e mohio ana ki te ture, ki te whakarite tikanga; Ko Karahena hoki i tata ki a ia, ko Hetara, ko Aramata, ko Tarahihi, ko Merehe, ko Marahena, ko Memukana, ara ko nga rangatira tokowhiti o Pahia, o Meria, i kite nei i te mata o te kingi, a i noho hei tuatahi i te kingitanga;

<sup>15</sup>  
 Ki ta te ture, ko te aha kia meatia ki te kuini, ki a Wahati, mona kihai i whakarite i te kupu a

<sup>16</sup>  
 Kingi Ahahueruha i kawea atu e nga rangatira ruma? Na ka mea a Memukana i te aroaro o te kingi ratou ko nga rangatira, Ehara i te mea ki te kingi anake ta Kuini Wahati he; engari ki nga

<sup>17</sup>  
 rangatira katoa ano, ki nga iwi katoa o nga kawanatanga katoa a Kingi Ahahueruha. Ka haere hoki te rongo o tenei mahi a te kuini ki nga wahine katoa, a ka whakahawea o ratou kanohi ki a ratou tane, ina ka korerotia, i mea a Kingi Ahahueruha kia kawea mai a Kuini Wahati ki tona aroaro,

<sup>18</sup>  
 a kihai tera i haere mai. Ka pena ano aiane i te kupu a nga wahine rangatira o Pahia, o Meria. kua rongo nei ki te mahi a te kuini ki nga rangatira katoa a te kingi. Na tera e nui atu te whakahawea

<sup>19</sup>  
 me te riri. Ki te pai te kingi, kia puta he kupu kingi mana, me tuhituhi hoki ki roto ki nga ture o nga Pahi, o nga Meri, kei taka, ara kia kaua a Wahati e haere mai ki te aroaro o Kingi Ahahueruha;

20  
 ko tona kuinitanga hoki kia hoatu e te kingi ki tetahi atu e pai ake ana i a ia. A, ka rangona ta te kingi tikanga e whakatakoto ai ia puta noa i tona kingitanga nui nei, katahi nga wahine katoa ka whakahonore i a ratou tane, i te iti, i te rahi. 21  
 Na pai tonu te kupu ki te whakaaro o te kingi, o nga rangatira; a rite tonu ki te kupu a Memukana ta te kingi i mea ai. 22  
 I tukua hoki e ia he pukapuka ki nga kawanatanga katoa a te kingi, ki tenei kawanatanga, ki tenei kawanatanga, he mea whakarite ki to reira tikanga mo te tuhituhi, ki tenei iwi, ki tenei iwi, he mea whakarite ki to reira reo, ara ko nga tane kat oa hei rangatira i roto i o ratou whare; a kia korerotia i te reo o to reira iwi.

## Chapter 2

1  
 I muri iho i enei mea, i te mea kua marie te riri o Kingi Ahahueruha, ka mahara ia ki a Wahati, ki tana i mea ai, ki te mea hoki i whakaritea mona. 2  
 Na ka mea nga tangata a te kingi i mahi nei ki a ia, Kia rapua mai etahi kotiro ataahua ma te kingi. 3  
 Kia whakaritea hoki e te kingi etahi kaititiro puta noa i nga kawanatanga o tona kingitanga, a ma ratou e huihui mai nga kotiro ataahua, he wahine, ki Huhana, ki te whare kini, ki te whare wahine, ki a Hekai, ki ta te kingi rangatira ruma, ko ia nei te kaitiaki o nga wahine; a kia hoatu nga mea hei tahi mo to ratou poke; 4  
 Na, ko te kotiro e pai ki ta te kingi titiro, ko ia hei kuini i te wahi o Wahati. Na pai tonu taua mea ki te whakaaro o te kingi, a pera ana ano ia. 5  
 I Huhana, i te whare kingi tetahi tangata, he Hurai, ko tona ingoa ko Mororekai, he tama na Haira, tama a Himei, tama a Kihi, he tangata no Pineamine. 6  
 He mea whakaheke mai i Hiruharama i roto i te whakahekenga i whakahekea ai a Hekonia kingi o Hura, i tera i whakahekea ra e Nepukaneha kingi o Papurona. 7  
 Na he mea atawhai nana a Haraha, ara a Ehetere, te tamahine a tona matua keke; no te mea kahore ona papa, ona whaea, a he atanga taua kotiro, he ataahua; i te matenga hoki o tona papa, o tona whaea, ka tangohia ia e Mororekai hei tamahine mana. 8  
 Heoi, ka rangona te kupu a te kingi, me tana ture, a ka tokomaha ano nga kotiro ka huihuia ki Huhana, ki te whare kingi, ki te ringa o Hekai, na ka mauria ano hoki a Ehetere ki te whare o te kingi, ki te ringa o Hekai kaitiaki wahine. 9  
 Na he pai taua kotiro ki tana titiro, ka atawhaitia hoki e ia; i hohoro hoki tana homai i nga mea hei tahi mo tona poke, me era atu mea ano mana, me nga kotiro tokowhitu i tika nei kia hoatu ki a ia, no roto i te whare o te kingi: i nekehia atu hoki ia, ratou ko ana kotiro ki te wahi pai rawa o te whare wahine. 10  
 Kihai i whakaaturia e Ehetere tona iwi me ona whanaunga; na Mororekai hoki i ako ki a ia kia kaua e whakaaturia. 11  
 Na haere ai a Mororekai i tenei ra, i tenei ra, ki mua i te marae o te whare wahine, kia mohio ai ia kei

te pehea a Ehetere, a ka peheatia ranei ia. <sup>12</sup> A, no ka rite te wa mo tenei kotiro, mo tenei kotiro, e haere ai ki a Kingi Ahahueruha, i te mea ka taka ona marama kotahi tekau ma rua, ko te ritenga hoki ia mo nga wahine, ko reira hoki rite ai nga ra mo te tahi o to ratou poke, ara e ono nga marama o te hinu maira, a e ono nga marama o nga mea kakara, o era atu mea ano e tahia ai te poke o nga wahine; <sup>13</sup> Ko te tikanga tenei mo te haerenga atu o tetahi kotiro ki te kingi; ko nga mea katoa i hiahia ai ia, i hoatu ki a ia, a ka riro i a ia i roto i te whare wahine ki te whare o te kingi. <sup>14</sup> I haere mai ia i te ahiahi, a i te ata ka hoki ki to nga wahine whare tuarua, ki te ringa o Haahakata, o ta te kingi rangatira ruma, ko ia nei te kaitiaki o nga wahine iti; heoi ano ona haerenga mai ki te kingi, kia hiahia ra ano te kingi ki a i a, kia whakahuatia ano hoki tona ingoa. <sup>15</sup> A, ka rite te wa e haere ai ki te kingi a Ehetere tamahine a Apihaira, a te matua keke o Mororekai, he mea tango nei hoki ia na tenei hei tamahine mana, kihai tera i mea ki tetahi mea mana, heoi ano ko ta Hekai i whakarite ai, ko ia nei ta te ki nga rangatira ruma, te kaitiaki o nga wahine. Na ahuaureka rawa a Ehetere ki te titiro a te hunga katoa i kite i a ia. <sup>16</sup> Heoi ka mauria a Ehetere ki a Kingi Ahahueruha, ki tona whare kingi, i te tekau o nga marama, ko Tepete hoki taua marama, i te whitu o nga tau o tona kingitanga. <sup>17</sup> Na nui atu te aroha o te kingi ki a Ehetere i tona ki nga wahine katoa, ahuaureka tonu ia, manakohia rawatia ana ia e ia i nga whaina katoa, potaea ana e ia te karauna kuini ki tona mahunga, meinga ana ia e ia hei kuini i te wahi o Wahati. <sup>18</sup> Katahi ka tukua e te kingi he hakari nui ma ana rangatira katoa ratou ko ana tangata, ara te hakari o Ehetere; whakangawaritia ano hoki e ia nga mea ki nga kawanatanga, a hoatu ana etahi hakari e ia, he mea i rite ki ta te kingi tikanga. <sup>19</sup> Na i te rua o nga huihuinga o nga wahine, kei te noho a Mororekai i te kuwaha o te kingi. <sup>20</sup> Kihai ano i whakaaturia e Ehetere ona whanaunga me tona iwi; ko ta Mororekai hoki tera i ako ai ki a ia; i whakarite hoki a Ehetere i te kupu a Mororekai, i pera me ia e whakatupuria ake ana i tona whare. <sup>21</sup> I aua ra, i te mea e noho ana a Mororekai i te kuwaha o te kingi, ka riri a Pikitana raua ko Terehe, tokorua o nga rangatira ruma a te kingi, he kaitiaki i te tatau, a ka whai kia pa te ringa ki a Kingi Ahahueruha. <sup>22</sup> Na kua mohiotia taua mea e Mororekai, a ka whakaaturia e ia ki a Ehetere, ki te kuini; korerotia ana e Ehetere ki te kingi i runga ano i te ingoa o Mororekai. <sup>23</sup> Na, ka oti taua mea te uiui, a ka kitea he tika, ka taronatia raua tokorua ki runga ki te rakau, a ka tuhituhia taua mea ki te pukapuka o nga meatanga o nga ra i te aroaro o te kingi.

### Chapter 3

<sup>1</sup> I muri i enei mea ka whakanuia e Kingi Ahahueruha a Hamana tama a Hamerata Akaki, hapainga ana ia ki runga, whakanekehia ake ana tona torona ki runga ake i o nga rangatira katoa e



<sup>2</sup>  
 noho ana i a ia. Na kei te tuohu, kei te koropiko ki a Hamana nga tangata katoa a te kingi i te kuwaha o te kingi; ko ta te kingi whakahau hoki tena mona. Ko Mororekai ia kihai i tuohu, kihai i

<sup>3</sup>  
 piko. Katahi ka mea nga tangata a te kingi i te kuwaha o te kingi ki a Mororekai, He aha koe i

<sup>4</sup>  
 takahi ai i ta te kingi whakahau? Korero noa ratou ki a ia i ia ra, i ia ra, heoi kihai ia i rongu ki a ratou. Na korerotia ana e ratou ki a Hamana, kia kitea ai e u ranei nga mea a Mororekai; kua

<sup>5</sup>  
 whakaaturia hoki e ia ki a ratou he Hurai ia. A, no te kitenga o Hamana kihai a Mororekai i tuohu,

<sup>6</sup>  
 kihai i piko ki a ia, na ki tonu a Hamana i te riri. Otiia i whakahawe tona whakaaro ki te whakapa ringa ki a Mororekai anake, kua oti hoki te korero ki a ia te iwi o Mororekai; na reira i whai ai a Hamana kia whakangaromia nga Hurai katoa i te kingitanga katoa o Ahahueruha, ara te iwi o Mororekai.

<sup>7</sup>  
 I te marama tuatahi, ara i te marama Nihana, i te tekau ma rua o nga tau o Kingi Ahahueruha, ka maka te Puri, ara te rota ki te aroaro o Hamana i tenei ra, i tenei ra, i tenei marama, i tenei marama

<sup>8</sup>  
 a te tekau ma rua ra ano, ara te marama Arara. Na ka mea a Hamana ki a Kingi Ahahueruha, Tenei tetahi iwi kei te tohatoha haere, kei te marara noa atu i roto i nga iwi o nga kawanatanga katoa o tou kingitanga; a ko a ratou ture he rere ke i a nga iwi katoa; kahore hoki ratou e mahi i a

<sup>9</sup>  
 te kingi ture. Na ehara i te mea pai mo te kingi kia tukua ta ratou. Ki te pai te kingi, me tuhituhi kia whakangaromia ratou: a maku e pauna atu kia tekau mano taranata hiriwa ki nga ringa o te

<sup>10</sup>  
 hunga mahi i ta te kingi mahi, kia kawea ki nga whare taonga o te kingi. Na ka unuhia e te kingi tona mowhiti i tona ringa, a hoatu ana ki a Hamana tama a Hamerata Akaki, ki te hoariri o nga

<sup>11</sup>  
 Hurai. A ka mea te kingi ki a Hamana, ka hoatu te hiriwa ki a koe, te iwi ano hoki, kia meatia

<sup>12</sup>  
 ki a ratou tau e pai ai. Katahi ka karangatia nga karaipi a te kingi i te marama tuatahi, i te tekau ma toru o nga ra o taua marama, a ka tuhituhia nga mea katoa i whakahaua e Hamana ki nga kawana a te kingi, ratou ko nga kawana iti o tenei kawanatanga, o tenei kawanata nga, ki nga rangatira hoki o tenei iwi, o tenei iwi; ki tenei kawanatanga, ki tenei kawanatanga, he mea whakarite ki to reira

<sup>13</sup>  
 reo; i tuhituhia i runga i te ingoa o Kingi Ahahueruha, hiri rawa ki te mowhiti o te kingi. Na ka tukua nga pukapuka kia kawea e nga kaikawe pukapuka ki nga kawanatanga katoa a te kingi, kia whakangaromia, kia patua, kia huna nga Hurai katoa, te taitama, me te koroheke, nga kohungahunga, me nga wahine, kia kotahi tonu te ra, i te tekau ma toru o nga ra i te tekau ma rua o nga marama,

<sup>14</sup>  
 ara o te marama Arara; kia pahuatia hoki o ratou taonga. Ko nga korero i tuhituhia, mo te ture kia hoatu ki nga kawanatanga katoa, i whakakitea nuitia ki nga iwi katoa, kia tatanga ai ratou i taua

<sup>15</sup>  
 ra. Haere ana nga kaikawe pukapuka, he mea whakahohoro e te kupu a te kingi, i hoatu ano te ture i Huhana, i te whare kingi. Na noho ana te kingi raua ko Hamana ki te inu; raruraru tonu ia te pa, a Huhana.

## Chapter 4

<sup>1</sup> No te mohiotanga o Mororekai ki nga mea katoa i meatia, haehaea ana e Mororekai ona kakahu, kei te kakahu i te kakahu taratara, kei te mea i te pungarehu ki a ia: haere ana ki waenganui o te pa, he nui, he tiwerawera tana tangi. <sup>2</sup> Na haere ana ia ki mua i te kuwaha o te kingi; e kore hoki e ahei kia haere ki roto i te kuwaha o te kingi ki te mea he taratara te kakahu. <sup>3</sup> Na, i nga kawanatanga katoa, i nga wahi i tae atu ai te kupu a te kingi me tana ture, nui atu te tangi o nga Hurai, te nohopuku, te aue, me te uhunga: a he tokomaha he kakahu taratara to ratou whariki, he pungarehu. <sup>4</sup> Na kua tae nga kotiro a Ehetere me ana rangatira ruma, kei te whakaatu ki a ia. Na tino mamae rawa te kuini. Hoatu ana e ia he kakahu kia kawea hei kakahu mo Mororekai, kia tangohia hoki ona kakahu taratara i a ia: otiia kihai ia i tango atu.

<sup>5</sup> Katahi a Ehetere ka karanga ki a Hataka, ki tetahi o nga rangatira ruma a te kingi i whakaritea nei e ia kia tu ki tona aroaro, a ka whakahau i a ia kia haere ki a Mororekai, kia mohiotia he aha ra tenei mea, a na te aha hoki. <sup>6</sup> Heoi haere ana a Hataka ki a Mororekai, ki te waharoa o te pa, ara ki te aronga o te kuwaha o te kingi. <sup>7</sup> A whakaaturia ana e Mororekai ki a ia nga mea katoa i pa ki a ia, me te tuturu o te moni i kiia e Hamana kia paunatia e ia ki roto ki nga whare taonga o te kingi hei mea mo nga Hurai kia whakangaromia. <sup>8</sup> I homai ano e ia ki a ia nga kupu o te ture i tuhituhia, i homai nei i Huhana kia whakangaromia ratou, a mana e whakakite ki a Ehetere, e whakaatu ki a ia, mana hoki ia e whakahau kia haere ki te kingi wawao ai; kia rapua hoki i tona aroaro he me a mo tona iwi. <sup>9</sup> Na haere ana a Hataka, whakaaturia ana e ia ki a Ehetere nga kupu a Mororekai.

<sup>10</sup> Katahi a Ehetere ka korero ki a Hataka, a hoatu ana e ia he kupu ki a Mororekai, hei mea: <sup>11</sup> E mohio ana nga tangata katoa a te kingi, me te iwi o nga kawanatanga a te kingi, ko nga tangata katoa, ahakoa tane, ahakoa wahine, e haere ana ki to roto marae, ki te kingi, i te mea kihai i karangatia, kotahi tonu tana ture kia whakamatea, ki te kahore ia e torona atu e te kingi te hepeta koura ki a ia kia ora ai. Engari ko ahau, ka toru tekau enei ra oku kihai i karangatia kia haere ki te kingi. <sup>12</sup> Na korerotia ana e ratou ki a Mororekai nga kupu a Ehetere. <sup>13</sup> Katahi a Mororekai ka ki atu kia whakahokia tenei kupu ki a Ehetere, Kei mahara koe na ka ora koe i te whare o te kingi, i nga Hurai katoa. <sup>14</sup> Ki te wahangu rawa hoki koe i tenei wa, tera e puta ake he tanga manawa, he whakaoranga mo nga Hurai i tetahi atu wahi. Na ko koe, ko te whare hoki o tou papa, ka ngaro; ko wai hoki ka mohio mo te wa penei pea i tae mai ai koe ki te kingitanga? <sup>15</sup> Katahi ka ki a Ehetere kia whakahokia tenei kupu ki a Mororekai, <sup>16</sup> Tikina, huihuia nga Hurai katoa e kitea ki Huhana, ka nohopuku ai koutou, hei mea moku; kua hoki e kai, kua e inu, kia toru nga ra, po, ao, ko ahau hoki, ko matou ko aku kotiro ka nohopuku ano; ko reira ahau haere ai ki te kingi; he mea kahore

nei e rite ki te ture. A ki te mea ka huna ahau, ka huna ahau. <sup>17</sup> Heoi haere ana a Mororekai, meatia ana e ia nga mea katoa i whakahaua ki a ia e Ehetere.

## Chapter 5

<sup>1</sup> Na i te toru o nga ra ka kakahuria e Ehetere ona kakahu kuini, a tu ana ia i te marae o roto o te whare o te kingi, i te ritenga atu o te whare o te kingi; ko te kingi hoki e noho ana i runga i te torona o tona kingitanga i te whare kingi, i te ritenga mai o te tatau o te whare. <sup>2</sup> A, i te kitenga atu o te kingi i a Ehetere, i te kuini, e tu ana i te marae ka manakohia ia e ia, a ka torona mai e te kingi te hepeta koura i tona ringa ki a Ehetere. Heoi ka whakatata atu a Ehetere, a ka pa ki te pito o te hepeta. <sup>3</sup> Katahi ka mea te kingi ki a ia, He aha tau mea, e te kuini, e Ehetere? he aha hoki te mea e tonoa nei e koe? ahakoa ko te hawhe o te kingitanga, ka hoatu ki a koe. <sup>4</sup> Ano ra ko Ehetere, Ki te mea he pai ki ta te kingi, kia haere mai te kingi raua ko Hamana aiane ki te hakari kua oti i ahau te taka mana. <sup>5</sup> Ano ra ko te kingi, Whakahohorotia a Hamana hei mea i ta Ehetere i ki ai. Na haere ana te kingi raua ko Hamana ki te hakari kua oti nei te taka e Ehetere. <sup>6</sup> A ka mea te kingi ki a Ehetere i te mea e inu waina ana, He aha tau e mea nei mau? ka hoatu ano ki a koe: he aha hoki tau e tonoa nei? ahakoa ko te hawhe o te kingitanga, ka meatia. <sup>7</sup> Katahi ka whakautu a Ehetere, ka mea, Ko taku i mea ai maku, ko taku i tonoa ai, <sup>8</sup> Ki te mea kua manakohia ahau e te kingi, ki te pai te kingi kia homai taku i mea ai maku, kia meatia taku i tonoa ai, me haere mai te kingi raua ko Hamana ki te hakari e taka e ahau ma raua; a, apopo ka whakaritea e ahau te kupu a te kingi. <sup>9</sup> Na ka puta atu a Hamana ki waho i taua ra me te koa, me te pai o te ngakau. Kei te kitenga ia o Hamana i a Mororekai i te kuwaha o te kingi, a kihai tera i whakatika, i oraora ki a ia, ki tonu a Hamana i te riri ki a Mororekai. <sup>10</sup> Otiia i whakamanawanui a Hamana, a hoki ana ki tona whare; a ka tonoa e ia he tangata ki te tiki i ona hoa, i tana wahine hoki, i a Herehe. <sup>11</sup> A korerotia ana e Hamana ki a ratou te kororia o ona taonga, te tokomaha o ana tamariki, me a te kingi whakanuinga katoa i a ia, me tana whakanekehanga i a ia ki runga ake i nga rangatira, i nga tangata a te kingi. <sup>12</sup> I mea ano a Hamana, He pono kihai tetahi i tukua mai e te kuini, e Ehetere hei hoa mo te kingi ki te hakari i taka e ia, ko ahau anake; kua kiia mai ano ahau hei hoa atu mo te kingi ki a ia apopo. <sup>13</sup> Heoi kahore he pai o tenei katoa ki ahau i ahau e kite tonu ana i te Hurai, i a Mororekai, e noho ana i te kuwaha o te kingi. <sup>14</sup> Katahi ka ki atu tana wahine, a Herehe, ratou ko ona hoa katoa ki a ia, Me hanga he tarawa, kia rima tekau whatianga te tiketike, a i te ata mau e ki atu ki te kingi kia

taronatia a Mororekai ki runga; katahi koe ka haere koa ai, korua ko te kingi ki te hakari. Na pai tonu taua kupu ki a Hamana, a ka meinga e ia kia hanga taua tarawa.

## Chapter 6

<sup>1</sup> I taua po kihai i moe te kingi, a ka mea kia kawea mai te pukapuka whakamahara ki nga meatanga o nga ra. Na ka korerotia ki te aroaro o te kingi. <sup>2</sup> Na ka kitea, kua oti te tuhituhi te whakaatu a Mororekai mo Pikitana raua ko Terehe, mo nga rangatira ruma tokorua a te kingi, he kaitiaki tetau, i whai raua kia pa te ringa ki a Kingi Ahahueruha. <sup>3</sup> Na ka mea te kingi, He aha te honore, te kororia, i whiwhi ai a Mororekai mo tenei? Ano ra ko nga tangata a te kingi i mahi nei ki a ia, Kihai tetahi mea i meatia ki a ia.

<sup>4</sup> Na ka mea te kingi, Ko wai kei te marae? Na tera a Hamana kua tae mai ki te marae o waho o te whare o te kingi, ki te korero ki te kingi, kia taronatia a Mororekai ki runga ki te tarawa kua oti te hanga mona. <sup>5</sup> Na ka mea nga tangata a te kingi ki a ia, Ko Hamana tenei e tu mai nei i te marae. Ano ra ko te kingi, Kia haere mai ia. <sup>6</sup> Heoi ka haere mai a Hamana. Na ka mea te kingi ke a ia, Ko te aha kia meatia ki ta te kingi tangata e pai ai kia whakahonoretia? Na ko te meatanga ake a Hamana i roto i tona ngakau, Ko wai atu i ahau ta te kingi e pai ai kia whakahonoretia? <sup>7</sup> Na ka mea a Hamana ki te kingi, Mo ta te kingi tangata e pai ai kia whakahonoretia, <sup>8</sup> Me kawea mai nga kakahu kingi, e kakahu nei te kingi me te hoiho ano e ekengia ana e te kingi, potae rawa he karauna kingi ki tona matenga; <sup>9</sup> Na ka hoatu taua kakahu me te hoiho ke te ringa o tetahi o nga tino rangatira a te kingi, kia whakakakahuria atu ki te tangata e pai ai te kingi kia whakahonoretia; na ka mea i a ia kia eke i runga i te hoiho i te waharoa o te pa, ka karanga haere ai i mua i a ia, Ka peneitia te tangata e pai ai te kingi kia whakahonoretia. <sup>10</sup> Katahi ka mea te kingi ki a Hamana, Kia hohoro tau tiki atu i te kakahu, i te hoiho, i tau i ki na, ka pera ai ki a Mororekai, ki te Hurai, e noho nei i te kuwaha o te kingi. Kei taka tetahi kupu o nga mea katoa i korerotia e koe. <sup>11</sup> Katahi ka tikina e Hamana te kakahu, me te hoiho, a whakakakahuria ana e ia a Mororekai, arahina ana i runga i te hoiho i te waharoa o te pa, me te karanga ano i tona aroaro, Ka peneitia te tangata e pai ai te kingi kia whakahonoretia.

<sup>12</sup> Na hoki ana a Mororekai ki te kuwaha o te kingi; ko Hamana ia i hohoro ki tona whare, pouri tonu, hipoki rawa te mahunga. <sup>13</sup> Na ka korerotia e Hamana ki tana wahine, ki a Herehe, ki ona hoa katoa nga mea katoa i pa ki a ia. Katahi ana tangata mohio, ratou ko tana wahine, ko Herehe, ka mea ki a ia, Ki te mea no nga uri o nga Hurai a Mororekai, kua timata na koe te hinga i tona

14

aroaro, e kore koe e kaha i a ia, engari ka hinga rawa koe i tona aroaro. I a ratou e korero ana ki a ia, ka tae mai nga rangatira ruma a te kingi, porangi tonu, hei arahi mo Hamana ki te hakari i taka e Ehetere.

## Chapter 7

1 Heoi, kua tae te kingi raua ko Hamana ki te hakari, ki te kuini, ki a Ehetere. 2 A ka mea ano te kingi ki a Ehetere i te rua o nga ra, i te mea e inu waina ana, He aha tau e mea nei mau, e Kuini Ehetere? Ka hoatu hoki ki a koe. He aha hoki tau e tono ai? ahakoa ko te hawhe o te kingitanga, 3 ka meatia. Katahi ka whakautu a Kuini Ehetere, ka mea, Ki te mea kua manakohia ahau e koe, e te kingi, a ki te pai te kingi; ko taku e mea ai maku, ko ahau kia whakaorangia, ko taku e tono nei maku, ko toku iwi. 4 Kua oti hoki matou, ahau me toku iwi, te hoko kia whakangaromia, kia whakamatea, kia huna. Otiia me i hokona matou hei pononga tane, hei pononga wahine, kua whakarongo puku ahau: e kore ano ia e rite i te hoariri nga mea a te kingi ka maumauria n ei. 5 Katahi ka utua e Kingi Ahahueruha, ka mea ki a Kuini Ehetere, Ko wai ra? Kei hea ra te tangata i pokanoa nei tona ngakau ki te mea i tenei mea? 6 Ano ra ko Ehetere, He hoariri, he hoa whawhai, anei ko te Hamana kino nei. Katahi ka mataka a Hamana i te aroaro o te kingi raua ko te kuini. 7 Na whakatika ana te kingi, i te inumanga waina, he riri hoki nona, a haere ana ki te kari o te whare. Ko Hamana hoki, tu tonu ki te inoi ki a Kuini Ehetere mona kia whakaorangia: i kite hoki ia kua takoto te he mona i te kingi. 8 Katahi ka hoki te kingi i te kari o te whare ki te whare inu waina, na ko Hamana kua takoto ki te takotoranga o Ehetere. Katahi ka mea te kingi, E takotoria ano ranei e ia te kuini i toku aroaro i te whare? Puta ana te kupu i te mangai o te kingi, ka hipokina e ratou te mata o Hamana. 9 Katahi ka mea a Harapona, tetahi o nga rangatira ruma i te aroaro o te kingi, Nana, te tarawa e rima tekau whatianga te tiketike, i hanga e Hamana mo Mororekai, nana nei te kupu pai mo te kingi, e tu ra i te whare o Hamana. Ano ra ko te kingi, Ta ronatia ia ki runga. 10 Heoi taronatia ana a Hamana ki runga ki te tarawa i oti ra i a ia mo Mororekai, a ka mariri iho te riri o te kingi.

## Chapter 8

1 No taua ra ka homai e Kingi Ahahueruha ki a Kuini Ehetere te whare o Hamana, hoariri o nga Hurai. A ka haere a Mororekai ki te aroaro o te kingi, na Ehetere hoki i whakaatu he whanaunga

ia nona. <sup>2</sup> E unuhia ana e te kingi tona mowhiti i tangohia mai nei e ia i a Hamana, a hoatu ana ki a Mororekai; a i whakanohoia a Mororekai e Ehetere ki te whare o Hamana.

<sup>3</sup> A i korero ano a Ehetere ki te aroaro o te kingi, me te takoto ano ki ona waewae, me te tangi ano, i inoi ki a ia kia karohia te kino a Hamana Akaki, me te whakaaro i whakaaro ai ia mo nga

Hurai. <sup>4</sup> Katahi ka torona atu e te kingi te hepeta koura ki a Ehetere. Heoi ka whakatika a Ehetere,

ka tu ki te aroaro o te kingi, <sup>5</sup> A ka mea, Ki te pai te kingi, ki te manakohia hoki ahau e ia, ki te mea he tika tenei mea ki to te kingi whakaaro, ki te mea he pai ahau ki tana titiro, me tuhituhi kia whakataka nga pukapuka i whakaaroa e Hamana tama a Hamerata Akaki ana i tuhituhi ai kia huna

nga Hurai i nga kawanatanga katoa a te kingi. <sup>6</sup> Me pehea hoki e ahei ai ahau te titiro ki te he e pa

ki toku iwi? me pehea hoki e ahei ai ahau te titiro ki te hunanga o oku whanaunga? <sup>7</sup> Ano ra ko Kingi Ahahueruha ki a Kuini Ehetere raua ko Mororekai Hurai, Nana, kua oti te hoatu e ahau ki a Ehetere te whare o Hamana; kua oti ano tera te tarona ki runga ki te rakau mo tona ringa i totoro

ki nga Hurai. <sup>8</sup> Ma korua ano e tuhituhi ta korua e pai ai mo nga Hurai, i runga i te ingoa o te kingi, hiri rawa ki te mowhiti o te kingi: he tuhituhi hoki i tuhituhia i runga i te ingoa o te kingi, a i hiritia

ki te mowhiti o te kingi, e kore e whakataka. <sup>9</sup> Katahi ka karangatia nga karaipi a te kingi i taua wa, i te toru o nga marama, ara i te marama Hiwana, i te rua tekau ma toru o nga ra o taua marama; a ka tuhituhia nga mea katoa i whakahau ai a Mororekai ki nga Hurai, ki nga kawana, ratou ko nga kawana iti, ko nga rangatira ano o nga kawanatanga, o Inia mai ano a tae noa ki Etiopia, kotahi rau e rua tekau ma whitu nga kawanatanga; ki tenei kawanatanga, ki tenei kawanatanga, he mea whakarite ki ta ratou tuhituhi; ki tenei iwi, ki tenei iwi, he mea whakarite ano ki to ratou reo; ki

nga Hurai ano, he mea whakarite ki ta ratou tuhituhi, ki to ratou reo. <sup>10</sup> Tuhituhia ana e ia i runga i te ingoa o Kingi Ahahueruha, hiri rawa ki te mowhiti o te kingi, a tukua ana nga pukapuka kia maua e nga kaikawe pukapuka i runga hoiho, i eke i runga i nga kararehe tere o nga mahi a te kingi,

he momo: <sup>11</sup> E mea ana i roto te tukunga a te kingi i nga Hurai o nga pa katoa kia huihui, kia tu ki runga, kia ora ai ratou, kia whakangaro, kia whakamate, kia huna i nga ope katoa o te iwi o te kawanatanga e tauria ai ratou ko a ratou kohungahunga, ko a ra tou wahine, kia pahua hoki i o ratou

taonga hei mea parakete, <sup>12</sup> I taua ra kotahi i nga kawanatanga katoa a Kingi Ahahueruha, ara i te

tekau ma toru o nga ra o te tekau ma rua o nga marama, koia nei te marama Arara. <sup>13</sup> I whakapuakina ki nga iwi katoa nga kupu i tuhituhia mo te ture kia whakatakotoria i nga kawanatanga katoa, kia

mataara ai nga Hurai i taua ra ki te rapu utu i o ratou hoariri. <sup>14</sup> Heoi haere ana nga kaikawe pukapuka, he mea waha e nga kararehe tere o nga mahi a te kingi, he mea whakahohoro, he mea akiaki e te kupu a te kingi. I homai ano te ture i Huhana, i te whare kingi.

15

Na haere ana a Mororekai i te aroaro o te kingi, ko tona kakahu he kakahu kingi, he puru, he ma, me te karauna koura nui, me tetahi kakahu hoki he rinenā pai, he papura. Na hamama ana,

hari ana te pa, a Huhana. <sup>16</sup> Na ko nga Hurai i maha, i koa, me te hari me te honore. <sup>17</sup> I nga kawanatanga katoa ano, i nga pa katoa i nga wahi i tae ai te kupu a te kingi me tana ture, he hari, he koa to nga Hurai, he kai hakari, he ra pai. A he tokomaha o nga iwi o te whenua i mea i a ratou hei Hurai; i tau hoki te wehi o nga Hura i ki a ratou.

## Chapter 9

1

Na i te tekau ma rua o nga marama, ara i te marama Arara, i te tekau ma toru o nga ra, i te mea ka tata te mahia te kupu a te kingi, me tana ture, i te ra ano i hua ai nga hoariri o nga Hurai ka

taea e ratou; otiia i puta ke ano, no te mea i taea e nga Hurai te hunga i kino ki a ratou; <sup>2</sup> Ka huihui nga Hurai ki o ratou pa i nga kawanatanga katoa a Kingi Ahahueruha, he mea kia pa ai nga ringa ki te hunga e whai ana kia mate ratou; a kihai tetahi i tu ki to ratou aroaro; kua tau hoki to ratou

wehi ki nga iwi katoa. <sup>3</sup> A, ko nga rangatira katoa o nga kawanatanga, me nga kawana, me nga kawana iti, me nga kaimahi i te mahi a te kingi, i awhina i nga Hurai; no te mea kua tau te wehi o

Mororekai ki a ratou. <sup>4</sup> He nui hoki a Mororekai i roto i te whare o te kingi, a i paku tona rongo ki

nga kawanatanga katoa: kua nui haere hoki taua tangata, a Mororekai. <sup>5</sup> Na patua iho e nga Hurai o ratou hoariri katoa ki te hoari, he parekura, he whakangaromanga; meatia ana e ratou ta ratou i

pai ai ki te hunga i kino ki a ratou. <sup>6</sup> I Huhana ano, i te whare kingi, e rima rau nga tangata i patua,

i whakangaromia e nga Hurai. <sup>7</sup> Ko Parahanarata ano, ko Rarapono, ko Ahapata, <sup>8</sup> Ko Porata, ko

Araria, ko Arirata, <sup>9</sup> Ko Paramahata, ko Arihai, ko Arirai, ko Waitata, <sup>10</sup> Ko nga tama kotahi tekau a Hamana tama a Hamerata, a te hoariri o nga Hurai, patua iho e ratou; kihai ia o ratou ringa

i pa ki nga taonga. <sup>11</sup> I taua ra ka kawea ki te kingi te tokomaha o te hunga i patua ki Huhana, ki

te whare kingi. <sup>12</sup> Na ka mea te kingi ki a Kuini Ehetere, E rima rau nga tangata kua patua nei e nga Hurai, huna rawa ki Huhana, ki te whare kingi, me nga tama kotahi tekau a Hamana; i pehea ra ratou i era kawanatanga a te kingi? he aha hoki tau e mea nei mau? ka hoatu hoki ki a koe. He

aha ake tau e tono ai? a ka meatia. <sup>13</sup> Ano ra ko Ehetere, Ki te pai te kingi, tukua nga Hurai i Huhana apopo kia mea i nga mea o te ture o tenei ra, kia whakairihia nga tama kotahi tekau a Hamana ki

runga ki te rakau. <sup>14</sup> Na ka mea te kingi kia meatia tenei, a ka homai te ture i Huhana. Na whakairihia

ana nga tama kotahi tekau a Hamana. <sup>15</sup> A i huihui nga Hurai i Huhana i te tekau ma wha ano o

nga ra o te marama Arara, a e toru rau nga tangata i patua e ratou i Huhana; kihai ia o ratou ringa

<sup>16</sup>  
i pa ki nga taonga. Na, ko era atu Hurai o nga kawanatanga a te kingi, i huihui ratou, a tu ana  
ki runga, kia ora ai ratou. Na ka ta o ratou manawa i o ratou hoariri, a patua iho e ratou o te hunga

<sup>17</sup>  
i kino ki a ratou e whitu tekau ma rima mano; kihai ano ia o ratou ringa i pa ki nga taonga. I  
meinga tenei i te tekau ma toru ano o nga ra o te marama Arara; i te tekau ma wha hoki ka ta te

<sup>18</sup>  
manawa, waiho iho e ratou hei ra mo te kai hakari, mo te hari. Engari ko nga Hurai i Huhana, i  
huihui i te tekau ma toru o nga ra o taua marama, i te tekau ma wha ano, a no te tekau ma rima ka

<sup>19</sup>  
whakata; waiho iho e ratou hei ra mo te kai hakari, mo te hari. Na reira nga Hurai e noho ana i  
nga pa koraha, i nga pa taiepakore, i mea ai ko te tekau ma wha o nga ra o te marama Arara hei ra  
mo te hari, mo te kai hakari, hei ra pai, e tuku tahua ai tetahi ki tetahi.

<sup>20</sup>  
Na ka tuhituhia e Mororekai enei mea katoa, a tukua ana e ia nga pukapuka ki nga Hurai  
katoa o nga kawanatanga katoa a Kingi Ahahueruha, ki nga mea e tata ana, ki nga mea i tawhiti,

<sup>21</sup>  
Kia whakapumautia te tikanga ma ratou, kia whakaritea te tekau ma wha o nga ra o te marama  
Arara, me te tekau ma rima ano o nga ra o taua marama, i ia tau, i ia tau,

<sup>22</sup>  
Kia rite ki nga ra i ta  
ai te manawa o nga Hurai i o ratou hoariri, ki te marama ano i puta ke ai to ratou tangi hei hari, to  
ratou pouri hei ra pai, kia meinga hei ra kai hakari, hei ra hari, e tukua ai etahi wahi ma tetahi, ma

<sup>23</sup>  
tetahi, me etahi mea ano ma nga rawakore. Na whakaae ana nga Hurai kia mahia nga mea i  
timataia nei e ratou, nga mea ano i tuhituhia e Mororekai ki a ratou.

<sup>24</sup>  
He mea mo ta Hamana tama  
a Hamerata Akaki; ko te hoariri nei ia o nga Hurai katoa; whakaaroa ana e ia he he mo nga Hurai,  
kia huna ratou; a maka ana e ia he Puri, ara he rota mo ratou kia whakamotitia, kia huna;

<sup>25</sup>  
No te  
taenga ia o taua mea ki te aroaro o te kingi, ka whakahau ia, na te pukapuka, kia hoki te whakaaro  
kino i whakaaroa e ia mo nga Hurai ki runga ki tona pane ake, a taronatia ana ia, ratou ko ana tama,

<sup>26</sup>  
ki runga ki te tarawa. Na reira i huaina ai aua ra ko Purimi, no te ingoa nei, no Puri. Na reira  
ano, no nga kupu katoa o tenei pukapuka, no ta ratou ano i kite ai o tenei mea, no nga mea ano i

<sup>27</sup>  
pa ki a ratou, I whakapumau ai nga Hurai i te tikanga, i whakaae ai hei mea ma ratou, ma o ratou  
uri, ma te hunga ano hoki e honoa ki a ratou, hei mea e kore e whakataka, kia whakaritea enei ra e

<sup>28</sup>  
rua, kia pera ano me te mea i tuhituhia, i te wa ano e tika ai i tenei tau, i tenei tau; Kia maharatia  
ano enei ra, kia mahia e nga whakatupuranga katoa, e nga hapu katoa, e nga kawanatanga katoa, e  
nga pa katoa, kia kua ano enei ra o Purimi e ngaro i roto i nga Hurai, me te maharatanga ki aua ra

<sup>29</sup>  
kia kua e mahue i o ratou uri. Katahi ka tuhituhi a Kuini Ehetere, ta Apihaira tamahine, a  
Mororekai Hurai ano, whakapau rawa to raua mana, kia whakapumautia tenei pukapuka tuarua o

<sup>30</sup>  
Purimi. A i tukua e ia he pukapuka ki nga Hurai katoa, ki nga kawanatanga kotahi rau e rua



tekau ma whitu o te kingitanga o Ahahueruha, no te rangimarie nga kupu, no te pono, <sup>31</sup> Kia whakapumautia enei ra o Purimi i nga wa e tika ai, kia pera me ta Mororekai Hurai raua ko Kuini Ehetere i whakatakoto ai ma ratou; me ta ratou ano i whakatakoto ai hei tikanga ma ratou, ma o ratou uri, ara nga nohopuku, me ta ratou tangi. <sup>32</sup> Na whakapumautia ana enei meatanga Purimi e te kupu a Ehetere; tuhituhia iho ki te pukapuka.

## Chapter 10

<sup>1</sup> I whakaritea ano e Kingi Ahahueruha he takoha ma te whenua, ma nga motu o te moana.  
<sup>2</sup> Na, ko nga meatanga katoa o tona kaha, o tona nui, me te korero katoa o te nui o Mororekai i whakanuia nei e te kingi, kihai ianei i tuhituhia ki te pukapuka o nga meatanga o nga ra o nga kingi o Meria, o Pahia? <sup>3</sup> Ko Mororekai Hurai hoki te tuarua o Kingi Ahahueruha, he nui ano ia i roto i nga Hurai, he matenuitanga na te mano tini o ona tuakana, teina; he rapu tonu tana i te pai mo tona iwi, he korero ano i te ata noho ki ona uri katoa.

## Job

### Chapter 1

<sup>1</sup> Tera tetahi tangata i te whenua o Uhu, ko Hopa tona ingoa; a ko taua tangata he tangata tapatahi, he tika, he tangata wehi ki te Atua, mawehe i te kino. <sup>2</sup> Na ka puta ona uri, tokowhitu nga tama, tokotoru nga tamahine. <sup>3</sup> Ko ana rawa hoki, e whitu mano nga hipi, e toru mano nga kamera, ko nga kau, e rima rau nga ioka, e rima rau nga kaihe uha, a ko ana pononga he tini noa atu; na reira nui atu taua tangata i nga tangata katoa o te rawhiti.  
<sup>4</sup> Na ka haere ana tama, ka taka he hakari ki o ratou whare, he ra ki to tenei, he ra ki to tenei; a ka tukua he karere hei karanga i o ratou tuahine tokotoru kia kai tahi, kia inu tahi ratou. <sup>5</sup> A ka taka nga ra o ta ratou kai hakari, ka unga tangata a Hopa, a whakatapua ana ratou, maranga wawe ana ia i te ata, whakaekea ana e ia he tahunga tinana, rite tonu ki a ratou katoa te maha; i mea hoki a Hopa, Tera pea kua hara aku tama, kua kan ga ki te Atua i roto i o ratou ngakau. Ko ta Hopa mahi tonu tenei i nga ra katoa.

<sup>6</sup> Na i tetahi o aua ra ka haere mai nga tama a te Atua, kia tu ai ratou i te aroaro o Ihowa, a haere ana mai a Hatana i roto i a ratou. <sup>7</sup> Na ka mea a Ihowa ki a Hatana, I haere mai koe i hea? <sup>8</sup> Ano ra ko Hatana ki a Ihowa, ka mea, I te kopikopiko, i te haereere i te whenua. Ano ra ko Ihowa ki a Hatana, Kua mahara ranei tou ngakau ki taku pononga, ki a Hopa, kahore hoki he rite mona i te whenua, he tangata ngakau tapatahi, he tika, e wehi ana i te Atua, e mawehe ana i te kino? <sup>9</sup> Ano ra ko Hatana ki a Ihowa, ka mea, He wehi noa ianei to Hopa i te Atua? <sup>10</sup> He teka ianei kua oti ia te karapoti e koe ki te taiepa, me tona whare, me ana mea katoa? Kua manaakitia e koe te mahi a ona ringa, kua nui haere hoki ana kararehe i runga i te whenua. <sup>11</sup> Engari totoro tou ringa, pa atu ki ana mea katoa; ina, ka kanga ia i a koe ki tou aroaro. <sup>12</sup> Ano ra ko Ihowa ki a Hatana, Nana, ko ana mea katoa kei tou ringa, kua ia tou ringa e totoro ki a ia. Heoi haere atu ana a Hatana i te aroaro o Ihowa. <sup>13</sup> Na, i tetahi o nga ra i te mea e kai ana ana tama, ana tamahine, e inu waina ana i roto i te whare o to ratou tuakana, <sup>14</sup> Ka haere mai tetahi karere ki a Hopa, ka mea, I te parau nga kau, me te kai ano nga kaihe i to ratou taha: <sup>15</sup> Na ka kokiri mai nga Hapeana, kahakina ana ratou; ko nga tangata hoki, patua iho ki te mata o te hoari; ko ahau anake kua mawhiti mai, toku kotahi, hei korero ki a koe. <sup>16</sup> I tenei ano e korero ana, ka tae mai ano tetahi, ka mea, Kua taka iho he ahi na te Atua i te rangi, a toro ana i roto i nga hipi, i nga tangata, a pau noa, ko ahau anake kua mawhiti mai, toku kotahi, hei korero ki a koe. <sup>17</sup> I tenei ano e korero ana, ka tae mai ano tetahi, ka mea, Wehea ake e nga Karari e toru nga matua, huaki ana ki nga kamera, kahakina ana e ratou; ko nga tangata patua iho ki te mata o te hoari, a ko ahau anake kua mawhiti mai, toku kotahi, hei korero ki a koe. <sup>18</sup> I tenei ano e korero ana, ka tae mai ano tetahi, ka mea, Ko au atama, ko au tamahine, i te kai, i te inu waina i roto i te whare o to ratou tuakana; <sup>19</sup> Na ko te putanga mai o tetahi hau nui i te koraha, patu pu ki nga koki e wha o te whare, hinga ana ki runga ki nga taitamariki; mate ake ratou; a ko ahau anake kua mawhiti mai, toku kotahi, hei korero ki a koe. <sup>20</sup> Katahi ka whakatika a Hopa; haea ana e ia tona koroka; heua ana tona mahunga; takoto ana ki te whenua; koropiko ana, <sup>21</sup> A ka mea ia, I puta tahanga mai ahau i te kopu o toku whaea, a ka hoki tahanga atu ano ahau ki reira. Na Ihowa i homai, na Ihowa i tango; kia whakapaingia te ingoa o Ihowa. <sup>22</sup> I tenei katoa kihai a Hopa i hara, kihai ano i whakauware ki ta te Atua.

## Chapter 2

<sup>1</sup> He ra ano ka haere mai nga tama a te Atua, kia tu i te aroaro o Ihowa. A ka haere mai hoki a  
 Hatana i roto i a ratou ki te aroaro o Ihowa tu ai. <sup>2</sup> Na ka mea a Ihowa ki a Hatana, i haere mai koe  
 i hea? Ano ra ko Hatana ki a Ihowa, I te kopikopiko, i te haereere i te whenua. <sup>3</sup> Na ka mea a Ihowa  
 ki a Hatana, Kua mahara ranei tou ngakau ki taku tangata, ki a Hopa? kahore he rite mona i te  
 whenua, he tangata ngakau tapatahi, he tika, e wehi ana i te Atua, e mawehe ana i te kino; u tonu  
 ano hoki tona tapatahitanga, ahakoa e whakaoho ana koe i ahau ki te he mona, kia whakangaromia  
 noatia ia. <sup>4</sup> Na ka utua e Hatana ta Ihowa, ka mea ia, He kiri mo te kiri; ae ra, ko nga mea katoa  
 hoki a te tangata ka hoatu hei utu mona kia ora. <sup>5</sup> Engari kia totoro atu tou ringa, kia pa ki tona  
 wheua, ki ona kikokiko, ina, ka kanga ia i a koe ki tou aroaro. <sup>6</sup> Na ka mea a Ihowa ki a Hatana,  
 Nana, kei tou ringa ia: otiia kia tupato kei mate rawa ia.  
<sup>7</sup> Heoi ka haere atu a Hatana i te aroaro o Ihowa; patua iho e ia a Hopa ki te whewhe kino i te  
 kapu o tona waewae, a tae noa ki tona tumuaki. <sup>8</sup> Na ka mau ia ki tetahi maramara rihi hei waru i  
 a ia, a noho ana i roto i te pungarehu. <sup>9</sup> Katahi tana wahine ka mea ki a ia, ka u tonu koia koe ki  
 tou tapatahitanga? kanga te Atua, ka mate ai. <sup>10</sup> Ano ra ko ia ki a ia, Rite tonu to kupu ki te kupu  
 a tetahi o nga wahine kuware. Ha! kia whiwhi tatou ki te pai i te Atua, a kia kua e whiwhi ki te  
 kino? I tenei katoa kihai i hara nga ngutu o Hopa.  
<sup>11</sup> Na, i te rongonga o nga hoa tokotoru o Hopa ki tenei aitua katoa i pa nei ki a ia, ka haere  
 mai ratou i tona wahi, i tona wahi, a Eripata Temani, a Pirirara Huhi, a Topara Naamati: he mea  
 whakarite hoki na ratou ki a ratou ano kia haere mai ki te tangi ki a ia, ki te whakamarie i a ia.  
<sup>12</sup> Na, i te marangatanga o o ratou kanohi i tawhiti, a kihai ratou i mohio ki a ia, na kua ara to ratou  
 reo, tangi ana; haea ana tona koroka, tona koroka, ruia iho e ratou he puehu ki runga ki o ratou  
 mahunga, he mea akiri atu whaka te rangi. <sup>13</sup> Heoi noho ana ratou i tona taha ki te whenua, e whitu  
 nga ra, e whitu nga po, kihai hoki i puaki he kupu a tetahi ki a ia: i kite hoki ratou he nui rawa tona  
 pouri.

## Chapter 3

<sup>1</sup> I muri i tenei ka puaki te mangai o Hopa, a ka kanga e ia tona ra. <sup>2</sup> Na ka oho a Hopa, ka  
<sup>3</sup> mea, Kia ngaro te ra i whanau ai ahau, te po i korerotia ai, He tamaroa kei roto i te kopu. <sup>4</sup> Waiho  
<sup>5</sup> taua ra mo te pouri; kaua e tirohia iho e te Atua i runga; kaua hoki e whitingia e te marama. Kia  
poke ia i te pouri, i te atarangi hoki o te mate; kia tauria iho e te kapua; kia whakawehia ano hoki  
e te whakapouritanga o te ra. <sup>6</sup> Na ko taua po, kia mau pu i te pouri kerekere: kei honoa ki nga ra  
o te tau; kei huihuia atu ina taua nga marama. <sup>7</sup> Nana, kia mokemoke taua po, kaua te reo koa e  
<sup>8</sup> uru ki roto. Kia kanga hoki e te hunga kanga i te ra, e te hunga mohio ki te whakaara rewiatana.  
<sup>9</sup> Kia pouri nga whetu o tona kakarauritanga; kia tatari ki te marama, a kahore noa iho; kei kite hoki  
i te takiritanga ata. <sup>10</sup> Mona kihai i tutaki i nga tatau o te kopu o toku whaea, kihai i huna i te mauui  
kei kitea e ahau.  
<sup>11</sup> He aha ahau te mate ai i te kopu? He aha te hemo ai i toku putanga mai i te kopu? <sup>12</sup> He  
aha i rite wawe ai nga turi moku, me nga u hei ngote maku? <sup>13</sup> Me i pena, kua ata takoto ahau, te  
ai he whakaohoho, moe ana ahau: katahi ahau ka whai okiokinga, <sup>14</sup> I roto i nga kingi, i nga  
kaiwhakatakoto whakaaro o te whenua i hanga nei i nga wahi mokemoke mo ratou, <sup>15</sup> I roto ranei  
i nga rangatira whai koura, o ratou nei whare ki tonu i te hiriwa: <sup>16</sup> Kua kahore noa iho ranei, kua  
pera me te materoto e ngaro nei, me nga kohungahunga kahore nei e kite i te marama. <sup>17</sup> Mutu ake  
i reira te whakararuraru a te hunga kino; okioki ana i reira te hunga kua mauui nga uaua. <sup>18</sup> Ata  
noho ana nga herehere i reira, te rongu i te reo o te kaitukino. <sup>19</sup> Kei reira te iti, te rahi, kahore hoki  
he rangatira o te pononga.  
<sup>20</sup> He aha te marama i homai ai ki te tangata kei roto nei i te mate? te ora ki te tangata kua kawa  
te wairua? <sup>21</sup> E koingo nei ki te mate, heoi kahore noa iho; e keru ana kia taea ia, nui atu i te keru  
i nga taonga huna. <sup>22</sup> Hari pu ratou, koa ana, ina kitea te urupa. <sup>23</sup> He aha ano te marama i homai  
ai ki te tangata kua huna nei tona ara, kua oti nei te tutakitaki mai e te Atua? <sup>24</sup> Kiano hoki ahau i  
kai, kua tae mai taku mapu: ano he wai oku hamama e ringihia ana. <sup>25</sup> No te mea kua tae mai ki  
ahau te mea whakawehi e wehi nei ahau; ko taku e pawera nei kua pa ki ahau. <sup>26</sup> Kahore oku  
humarie, kahore oku ata noho, ehara i te mea e okioki ana; na kua puta te raruraru.

## Chapter 4

<sup>1</sup> Katahi a Eripata Temani ka oho, ka mea, <sup>2</sup> Ki te anga matou ki te korero ki a koe, e pouri ranei koe? otira e taea e wai te pehi te kupu? <sup>3</sup> Nana, he tokomaha i whakaakona e koe: nau hoki i whakakaha nga ringa kahakore. <sup>4</sup> Ara ana i au kupu te tangata e hinga ana; nau hoki i kaha ai nga turi kua piko. <sup>5</sup> Inaianei kua tae mai ki a koe, a e hemo ana koe: e pa ana ki a koe, ohorere ana koe. <sup>6</sup> He taka ianei kei tou wehi ki te Atua he okiokinga whakaaro mou? Kei te tapatahi o ou huarahi he tumanakohanga mou? <sup>7</sup> Maharatia ra, ko wai o nga tangata harakore i huna? I ngaro ranei ki hea te hunga tika? <sup>8</sup> Ko taku hoki tenei i kite ai, ko te hunga e parau ana i te he, e rua ana i te raruraru, ko ia ra ano ta ratou e kokoti ai. <sup>9</sup> Huna ana ratou e te ha o te Atua, moti iho ratou i te hau o tona riri. <sup>10</sup> Ko te hamama o te raiona, ko te reo o te raiona tutu, ko nga niho o nga kua o raiona, whati ana. <sup>11</sup> Ngaro ana te raiona katua i te kore kai, a marara noa atu nga kua o a te raiona. <sup>12</sup> Na i kawea pukutia mai he korero ki ahau, a kapohia ana e toku taringa he komuhumuhu. <sup>13</sup> I nga whakaaroaronga, no nga kite o te po, i te mea ka au iho te moe a te tangata, <sup>14</sup> Ka pa te wehi ki ahau, me te ihiihi, a wiri ana oku wheua katoa. <sup>15</sup> Na ka tika atu he wairua i toku aroaro, tutu ana nga huruhuru o toku kikokiko. <sup>16</sup> Tu ana ia, otia kihai ahau i mohio ki tona mata; he ahua te mea i toku aroaro: tu puku ana; na ka rongu ahau i te reo e ki ana, <sup>17</sup> He nui atu ranei te tika o te tangata i to te Atua? He nui atu ranei i to tona Kaihanga to ma o te tangata? <sup>18</sup> Nana, kahore rawa ia e whakawhirinaki ki ana pononga; a ki tana, he he kei ana anahera. <sup>19</sup> Tera atu to te hunga e noho ana i roto i nga whare uku, he puehu to ratou turanga; mongamonga kau ratou i te aroaro o te purehurehu. <sup>20</sup> I waenganui o te ata, o te ahiahi, ka whakangaromia ratou; huna ana ratou ake tonu atu, te ai tetahi hei whakaaro atu. <sup>21</sup> Kahore ranei to ratou taura here teneti i motuhia i roto i a ratou? Mate ana ratou, kahore hoki he matauranga.

## Chapter 5

<sup>1</sup> Tena ra, karanga; ka whakao ranei tetahi ki a koe? a ka anga atu koe ki a wai o te hunga tapu?  
<sup>2</sup> E patua ana hoki te kuware e te aritarita, e whakamatea ana te whakaarokore e te hae. <sup>3</sup> I kite ahau  
i te kuware e hou ana ona pakiaka; kitea rawatia ake kua kanga e ahau tona nohoanga. <sup>4</sup> Kei tawhiti  
<sup>5</sup> atu ana tama i te ora, mongamonga noa ratou i te kuwaha, kahore hoki he kaiwhakaora. Ko ana  
hua ka kainga e te tangata matekai, ka riro i a ia ahakoa i roto i te tataramoa, a ka hamama te  
mahanga ki o ratou rawa.  
<sup>6</sup> Na e kore te he e puta ake i te puehu, e kore ano te raruraru e tupu ake i te oneone; <sup>7</sup> I whanau  
te tangata ki te raruraru, tona rite kei nga korakora e rere nei whakarunga. <sup>8</sup> Ko ahau ia ka rapu i  
ta te Atua; me tuku atu taku korero ki te Atua, <sup>9</sup> E mahi nei i nga mea nunui e kore nei e taea te  
rapu atu, i nga mea whakamiharo e kore nei e taea te tatau; <sup>10</sup> E homai nei i te ua ki te mata o te  
whenua, e unga nei i te wai ki te mata o nga parae; <sup>11</sup> E whakanoho nei i te hunga iti ki te wahi  
tiketike, a whakanekehia ake ana te hunga pouri ki te ora. <sup>12</sup> E haukoti nei i nga whakaaro o te  
hunga tinihanga, te taea e o ratou ringa ta ratou i mea ai. <sup>13</sup> Mau ake i a ia te hunga whakaaro i to  
ratou tinihanga: pororaru iho nga whakaaro o te hunga kotiti ke. <sup>14</sup> I te awatea nei, tutaki ana ratou  
ki te pouri; whawha ana ratou i te poutumarotanga, ano ko te po. <sup>15</sup> Otiia e whakaorangia ana e ia  
te rawakore i te hoari, i to ratou mangai, i te ringa ano o te tangata kaha. <sup>16</sup> Ka ai ano he  
tumanakohanga atu mo te ware; kokopi tonu ia te mangai o te kino.  
<sup>17</sup> Nana, ka hari te tangata e akona ana e te Atua: na kaua e whakahawea ki te papaki a te Kaha  
<sup>18</sup> Rawa. He whakamamae hoki tana, he takai ano; e patu ana ia, a ko ona ringa ano hei whakaora.  
<sup>19</sup> E ono nga matenga e whakaora ai ia i a koe; ahakoa e whitu, e kore te he e pa ki a koe. <sup>20</sup> I te  
matekai ka hokona koe e ia kei mate; i te tatauranga ano, kei pangia e te hoari. <sup>21</sup> Ka huna koe i  
te whiu a te arero, e kore ano koe e wehi i te whakangaromanga ina tae mai. <sup>22</sup> E kata ano koe ki  
<sup>23</sup> te whakangaromanga raua ko te hemokai; e kore hoki koe e wehi i nga kirehe o te whenua. No  
te mea ka takoto tau kawenata ki nga kohatu o te parae; ka mau ano ta koutou rongo ko nga kirehe  
<sup>24</sup> o te parae. Ka mohio ano koe e tu ana tou teneti i te aionuku, ka haereere ano koe ki tou nohoanga,  
<sup>25</sup> te ai he hara. Ka mohio ano koe he nui ou uri, he pera ano tou whanau me te tarutaru o te whenua.  
<sup>26</sup> Ka ata rite ou tau ina tae koe ki te urupa, ka pera ano me te puranga witi e hikitia ake ana i tona

<sup>27</sup>  
wa e rite ai. Nana, tenei, he mea rapu na matou ko te mea tika hoki ia; whakarangona mai, ka mohio iho hei pai mou.

## Chapter 6

<sup>1</sup> Na ka whakautu a Hopa, ka mea, <sup>2</sup> Aue, me i ata paunatia toku mamae, me i huihuia, me i whakairihia toku aitua ki te pauna! <sup>3</sup> Na inaianei taimaha ake i te onepu o te moana: heoi he ohorere rawa aku kupu. <sup>4</sup> Kei roto hoki i ahau nga pere a te Kaha Rawa, inumia ake e toku wairua to ratou paihana: rarangi tonu mai nga whakawehi a te Atua hei hoariri moku. <sup>5</sup> E tangi ano ranei te kaihe mohoa o i te mea kei te tarutaru ia? e tangi ano ranei te kau i te mea e kai ana? <sup>6</sup> E taea ranei te kai, te mea kahore nei ona ha, ki te kahore he tote? He reka ranei te whakakahukahu o te hua manu? <sup>7</sup> Hore rawa toku wairua e mea kia pa atu ki ena; to ratou rite ki ahau kei te kai whakarihariha. <sup>8</sup> Aue, me i riro mai taku i tonono ai, me i homai e te Atua taku e tumanako nei! <sup>9</sup> Me i pai hoki te Atua kia whakangaromia ahau, kia tukua mai tona ringa hei hatepe i ahau! <sup>10</sup> Penei kua ai ano he whakamarie moku; ae, ka tino hari ahau ki te mamae, kahore nei e tohu i ahau: kihai hoki nga kupu a te Mea Tapu i huna e ahau. <sup>11</sup> He aha toku kaha, e tatari ai ahau? He aha hoki toku mutunga, e whakamanawanui ai ahau? <sup>12</sup> He kaha kohatu ranei toku kaha? He parahi ranei oku kikokiko? <sup>13</sup> Ehara ranei i te mea kahore he awhina moku i roto i ahau, a kua oti te ngoi te pei i roto i ahau? <sup>14</sup> Ko te tangata e ngoikore ana te ngakau kia puta mai te aroha o tona hoa ki a ia, ahakoa kua mahue i a ia te wehi i te Kaha Rawa. <sup>15</sup> He mahi tinihanga ta oku teina, he pera me ta te awa; rere ana ratou ano he waipuke awaawa, <sup>16</sup> Kua mangu nei i te hukapapa, ngaro ana te hukarere i roto. <sup>17</sup> I te wa e mahana ai, ka memeha atu; i te weraweratanga, moti iho ratou i to ratou wahi. <sup>18</sup> Ka peka ke nga tira e haere ana ra reira; riro ana ki te kore, a ngaro iho. <sup>19</sup> Tirotirohia ana e nga tira o Tema; taria atu ana e nga tangata haere o Hepa. <sup>20</sup> Whakama ana ratou mo ratou i whakamanawa atu ki reira; te taenga ki aua awa, kanakana kau ana. <sup>21</sup> Na he kahore noa iho koutou; ka kite koutou i te mea whakamataku, a ka wehi.

<sup>22</sup> I mea ranei ahau, Homai ki ahau? He hakari ranei maku e homai i o koutou rawa? <sup>23</sup> I mea ranei, whakaorangia ahau i te ringa o te hoariri? Hokona ahau i roto i te ringa o te kaitukino?  
<sup>24</sup> Whakaakona ahau, a ka whakarongo puku ahau; whakaaturia ki ahau te mea i he ai ahau. <sup>25</sup> Ano te kaha o nga kupu tika! Ko te aha ia te riria ana e a koutou kupu? <sup>26</sup> E mea ana ranei koutou kia riria nga kupu? he hau kau nei hoki nga korero a te tangata kua pau ona whakaaro. <sup>27</sup> Ae ra, e mea ana koutou ki te maka rota mo nga pani, ki te mea i to koutou hoa hei taonga hokohoko. <sup>28</sup> Na whakaae mai, titiro mai ki ahau; he pono hoki e kore ahau e korero teka ki to koutou kanohi. <sup>29</sup> Tena ra, tahuri mai; kua hoki te he e waiho; ina, tahuri mai, he tika hoki taku take. <sup>30</sup> He he koia kei toku arero? e kore ranei toku hinengaro e mohio ki nga mea whanoke?

## Chapter 7

<sup>1</sup> He teka ranei kua takoto he pakanga mo te tangata i runga i te whenua, he rite ano ona ra ki nga ra o te kaimahi? <sup>2</sup> E rite ana ki te pononga, e matenui nei ki te atarangi, ki te kaimahi, e tumanako nei ki te utu mo tana mahi; <sup>3</sup> Koia toku rite, ka whiwhi nei ki nga marama horihori, a he mauui nga po kua whakaritea moku. <sup>4</sup> Ka takoto ahau, ka mea ahau, A hea ahau ara ai? he roa ia te po; heoi ka tahurihuri kau ahau a ao noa. <sup>5</sup> Ko te kakahu mo oku kikokiko he kutukutu, he pokuru oneone; ka kukuti toku kiri, a ka ngatata ano. <sup>6</sup> Ko oku ra hohoro atu i te rakau a te kaiwhatu; pau ake, te ai he tumanakohanga atu. <sup>7</sup> Kia mahara he hau oku ra; heoi ano kitenga o toku kanohi i te pai. <sup>8</sup> Ko te kanohi o te tangata e kite ana i ahau, heoi ano tona tirohanga mai ki ahau: kei runga i ahau ou kanohi, heoi kahore iho ahau. <sup>9</sup> Memeha atu te kapua, ngaro atu: he pera ano te tangata e haere ana ki te urupa; e kore e hoki ake. <sup>10</sup> E kore ia e hoki mai ano ki tona whare, e kore ano tona wahi e mahara ki a ia i muri. <sup>11</sup> Na e kore e kaiponuhia e ahau toku mangai; ka korero ahau i toku wairua e mamae nei; ka tangi i te kawa i toku ngakau. <sup>12</sup> He moana ranei ahau, he tohora, i mea ai koe i te kaitirotiro moku/ <sup>13</sup> Ki te mea ahau, kei toku moenga ahau te marie ai, ma toku takotoranga e whakamama taku tangi; <sup>14</sup> Na ka whakahaehaetia ahau e koe ki nga moe, ka whakawehia ahau ki nga mea e whakakitea



15 mai. A ki ta toku wairua he pai te tarona; pai ake te mate i enei wheua oku. 16 E whakarihariha ana ahau ki toku ora; kahore oku hiahia kia ora tonu ahau: waiho noa iho ahau, he mea teka noa hoki oku ra.

17 He aha te tangata, i whakanuia ai e koe? i anga ai tou ngakau ki a ia? 18 I titiro ai koe i a ia i tenei ata, i tenei ata, i honohono ai tau whakamatautau i a ia? 19 Kia pehea ake te roa ou kahore nei e tahuri atu i ahau, oku kahore nei e waiho noa iho e koe, kia horomia ai toku huware?

20 Mehemea kua hara ahau, kia aha atu ahau ki a koe, e te kaitiaki o nga tangata? he aha ahau i waiho ai e koe hei patunga mau i taimaha iho ai ahau ki ahau ano. 21 He aha koe te whakarere noa ai i toku he, te whakapahemo ai i toku kino? Akuanei hoki ahau moe ai ki te puehu, a ka ata rapu koe i ahau, otia kahore noa iho ahau.

## Chapter 8

1 Na ka whakautu a Pirirara Huhi, ka mea, 2 Kia pehea ake te roa o tau korero i enei mea? Kia pehea ake te roa o nga kupu a tou mangai e rite ai ki te hau kaha? 3 E whakaparori ke ranei te Atua i te whakawa? E whakaparori ke ranei te Kaha Rawa i te tika? 4 Ki te mea i hara au tamariki ki a ia, a kua maka atu ratou e ia hei utu mo to ratou he; 5 Ki te rapu wawe koe i to Atua, a ka inoi ki te Kaha Rawa; 6 Ki te mea he ma koe, he tika, ina, ka ara ake ia ki a koe aiane, ka manaakitia ano e ia te nohoanga o tou tika. 7 Ahakoa i iti tou timatanga, e nui noa atu tou whakamutunga.

8 Tena ra, ui atu ki to mua whakatupuranga; anga atu hoki ki te mea kua rapua e o ratou matua. 9 Nonanahi nei hoki tatou, kahore hoki e mohio; he atarangi nei hoki o tatou ra i runga i te whenua; 10 E kore ranei ratou e whakaako i a koe, e korero ki a koe, e puaki mai ranei he kupu i o ratou ngakau? 11 E tupu ranei te wiwi i te mea kahore he repo? E nui ranei te raupo ki te kahore he wai?

12 I te mea he kaiota tonu, a kihai i tapahia, kua maroke i mua ake i nga otaota katoa. 13 Ka pera ano nga ara o te hunga katoa e wareware ana ki te Atua, a ka riro ki te kore ta te tangata whakaponokore i tumanako ai. 14 Ka motuhia atu tana i whakamanawa atu ai, ko te whare hoki o te pungawerewere hei tumanakohanga mona. 15 Ka okioki atu ia ki tona whare; heoi e kore e tu: u tonu tana pupuri atu, otia e kore e mau. 16 E matomato ana i te mea kahore nei te ra, a e wana

<sup>17</sup>  
 ana ona peka i tana kari. Kapi tonu te puranga i ona pakiaka, e kitea ana e ia te wahi kamaka.  
<sup>18</sup>  
 Ki te whakamotitia iho ia i tona wahi, ka whakakahore taua wahi ki a ia, ka mea, Kahore ahau  
<sup>19</sup>  
 i kite i a koe. Nana, ko te hari tenei o tona ara, a ka tupu ake etahi atu i roto i te puehu.  
<sup>20</sup>  
 Nana, e kore te Atua e whakakahore ki te tangata tika, e kore ano e puritia e ia te ringa o  
<sup>21</sup>  
 nga tangata kino. Tera ano tou mangaika whakakiiia e ia ki te kata, ou ngutu ki te hamama. <sup>22</sup> He  
 whakama te kakahu mo te hunga e kino ana ki a koe, a ka kahore noa iho te tapenakara o te hunga  
 kino.

### Chapter 9

<sup>1</sup>  
 Na ka whakahoki a Hopa, ka mea, <sup>2</sup> E mohiotia ana ano tenei e ahau; engari ma te aha ka  
<sup>3</sup>  
 tika ai te tangata ki te Atua? Ki te pai ia ki te totohe ki a ia, kahore he kupu kotahi o roto i te mano  
<sup>4</sup>  
 e taea e ia te whakahoki ki a ia. He ngakau mohio ia, he pakari tona kaha: ko wai e whakauaua  
<sup>5</sup>  
 ki a ia, a e whiwhi i te pai? E nekehia ana e ia nga maunga, te mohio ratou; hurihia ake e ia i a ia  
<sup>6</sup>  
 e riri ana. E whakangaeuetia ana e ia te whenua, e nekehia atu ana i tona wahi, wiri ana ona pou.  
<sup>7</sup>  
 E korero nei ki te ra, a kore ake e whiti; hiritia putia iho e ia nga whetu. <sup>8</sup> Ko ia nei anake hei hora  
<sup>9</sup>  
 i nga rangi, hei takahi i runga i nga ngaru o te moana. Nana nei i hanga a Aketura, a Tautoru, a  
<sup>10</sup>  
 Matariki, me nga ruma i te tonga. Nana nei i mahi nga mea nunui, e kore nei e taea te rapu atu,  
<sup>11</sup>  
 ae ra nga mea whakamiharo, e kore nei e taea te tatau. Ina tonu ia e haere atu nei, a kahore ahau  
<sup>12</sup>  
 i kite; ka pahemo atu hoki ia, a kahore ahau e matau ki a ia. Nana, ka hopu ia i tana i aru ai, ma  
<sup>13</sup>  
 wai ia e arai? Ko wai hei ki atu ki a ia, E aha ana koe? E kore te Atua e whakahoki iho i tona  
 riri; e piko ana ki raro i a ia nga kaiawhina o Rahapa.  
<sup>14</sup>  
 A kia whakahoki kupu ano ahau ki a ia, kia whiriwhiri kupu ano maku ki a ia? <sup>15</sup> Ahakoa  
<sup>16</sup>  
 he tika ahau, e kore ahau e whakahoki kupu atu; engari ka inoi ahau ki toku kaiwhakawa. Me i  
 karanga atu ahau, a whakahokia mai ai e ia te kupu ki ahau, kihai ahau i whakaae tera kua  
<sup>17</sup>  
 whakarongo mai ia ki toku reo. E aki ana hoki ia ia ahau ki te tupuhi, e whakanui takekore ana  
<sup>18</sup>  
 hoki i oku mate. Kahore ahau e tukua e ia kia ta toku manawa; otiiia whakakiiia ana e ia toku

<sup>19</sup> wairua ki te kawa. Ki te korero tatou mo te kaha o te hunga pakari, nana, kei reira ia! A ki te  
<sup>20</sup> mea he whakawa, ko wai ra hei whakatakoto i te taima moku? Ahakoa he tika ahau, ma toku  
 mangai ano ahau e whakahe; ahakoa he tikanga tapatahi taku, ma reira ano e whakaatu toku ngaunga  
<sup>21</sup> ketanga. He tapatahi ahau; kahore ahau e whakaaro ki ahau ano; e whakahawea ana ahau ki toku  
 ora.  
<sup>22</sup> He kotahi tonu ena; koia ahau ka mea, e whakamotitia ana e ia te tapatahi raua ko te kino.  
<sup>23</sup> Na ka whakamate tata nei te whiu, he kata tana ki te whakamatautauranga o te hunga harakore.  
<sup>24</sup> Kua hoatu te whenua ki te ringa o te tangata kino; e taupokina ana e ia nga mata o nga  
 kaiwhakawa; ki te mea ehara i a ia, tena ko wai?  
<sup>25</sup> Na, ko te hohoro o oku ra, nui atu i to te kaikawe pukapuka; e rere ana, kahore hoki e kite i  
<sup>26</sup> te pai. Kua pahemo, kua pera me nga kaipuke tere, me te ekara ano e topa iho ana ki tana kai.  
<sup>27</sup> Ki te mea ahau, ka wareware ahau ki taku tangi, ka unuhia atu e ahau te pouri o toku mata, a ka  
<sup>28</sup> marama: E wehi ana ahau i oku mamae katoa, e mohio ana ahau e kore ahau e meinga e koe he  
 harakore. <sup>29</sup> Tera hoki ahau e whakahengia; he aha ahau i whakangenge kau ai i ahau? <sup>30</sup> Ki te  
<sup>31</sup> horoi ahau i ahau ki te hukarere, a ka meinga oku ringa kia ma rawa; Katahi ahau ka rumakina  
<sup>32</sup> e koe ki te poka, a whakarihariha mai ana oku kakahu ki ahau. Ehara hoki ia i te tangata, i te  
<sup>33</sup> penei me ahau nei, e whakahoki kupu ai ahau ki a ia, e haere tahi ai maua ki te whakawa. Kahore  
<sup>34</sup> he kaiwhakatikatika mo ta maua, kahore he tangata hei whakapa i tona ringa ki a maua tahi. Me  
<sup>35</sup> tango atu e ia tana patu i ahau, a kaua hoki tana whakamataku e whakawehi i ahau: Hei reira  
 ahau ka korero, a kahore e wehi i a ia; kahore hoki ahau e pera i roto i ahau.

## Chapter 10

<sup>1</sup> Kua hoha toku wairua ki toku ora; ka tukua e ahau taku tangi kia rere ana; ka korero ahau i  
 te kikiwatanga o toku ngakau. <sup>2</sup> Ka mea ahau ki te Atua, Kaua ahau e whakahengia; whakakitea  
 ki ahau te take i totohe ai koe ki ahau. <sup>3</sup> He mea pai ranei ki a koe kia tukino koe, kia whakahawea  
 ki te mahi a ou ringa, a kia whiti tou marama ki te whakaaro o te hunga kino? <sup>4</sup> He kanohi kikokiko

ranei ou? he penei ranei tau titiro me ta te tangata titiro? <sup>5</sup> He rite ranei ou ra ki o te tangata ra? He  
 rite ranei ou tau ki o te tangata ra? <sup>6</sup> I uiuia ai e koe toku kino, i rapua ai e koe toku hara? <sup>7</sup> Ahakoa  
 e mohio ana ano koe ehara ahau i te mea he, kahore ano tetahi hei whakaora i roto i tou ringa?  
<sup>8</sup> Na ou ringa ahau i mahi, i hanga, he mea hono marie i tetahi taha, i tetahi taha; otiia e  
 whakangaromia ana ahau e koe. <sup>9</sup> Kia mahara ra, nau ahau i hanga, ano he paru; tera ranei koe e  
 whakahoki ano i ahau ki te puehu? <sup>10</sup> He teka ianei he mea riringi ahau nau ano he waiu, meinga  
 ana ahau e koe kia tetepe ano he tihi? <sup>11</sup> Nau ahau i whakakakahu ki te kiri, ki te kikokiko, a nau  
 ano ahau i hohou ki te wheua, ki te uaua. <sup>12</sup> Whakawhiwhi ana ahau e koe ki te ora, ki te atawhai,  
 a he tirohanga mai nau i mau ai toku wairua. <sup>13</sup> Heoi huna ana ano enei mea e koe i roto i tou  
 ngakau: e mohio ana hoki ahau kei a koe ano tenei.  
<sup>14</sup> Ki te hara ahau, ka matauria e koe; e kore ano koe e whakakahore ki toku he. <sup>15</sup> Ki te he  
 ahau, aue toku mate: ki te tika ahau, e kore tonu e ara toku mahunga; he ki hoki noku i te whakama  
 me te titiro iho ki toku mate. <sup>16</sup> A ki te whakarewa ake toku mahunga i a ia, ka whaia ahau e koe  
 ano he raiona; a ka whakakite ano koe i a koe, i tou miharo, ki ahau. <sup>17</sup> E whakahoutia ana e koe  
 au kaiwhakaatu i oku he, e whakanuia ana hoki e koe tou riri ki ahau; ko nga putanga ketanga ko  
 te whawhai hei pehi i ahau. <sup>18</sup> He aha ra ahau i whakaputaina mai ai e koe i roto i te kopu? te hemo  
 noa atu ai ahau, a kihai tetahi kanohi i kite i ahau. <sup>19</sup> Penei kua rite ahau, ano kua kahore noa iho;  
 kua mauria atu ahau i te kopu ki te urupa. <sup>20</sup> He teka ranei he torutoru oku ra? Kati ra, waiho ake  
 koa ahau, kia ahua makoha ana i tenei wa iti, <sup>21</sup> Keiwha haere, ahau ki te wahi e kore nei ahau e  
 hoki mai, ki te whenua o te pouri, o te atarangi o te mata; <sup>22</sup> Ki te whenua o te pouri kerekere, o  
 te tino o te pouri; he whenua no te atarangi o te mate, kahore nei o reira tikanga, a ko tona marama,  
 koia ano te pouri.

## Chapter 11

<sup>1</sup> Ano ra ko Topara Naamati; i mea ia, <sup>2</sup> Kua ranei hei whakautua te tini o nga kupu? A e  
 whakatikaia ranei te tangata ngutu hohoro? <sup>3</sup> Ma au kupu whakapehapeha ranei e nohopuku ai nga  
 tangata? A, ina tawai koe, kua ranei he tangata e mea i a koe kia whakama? <sup>4</sup> E mea ana hoki koe,

He tino tika taku whakaako, a he ma ahau ki ou kanohi. <sup>5</sup> Aue, me i korero te Atua, me i puaki mai  
 ona ngutu ki te whakahe i a koe! <sup>6</sup> Me i whakaaturia mai e ia ki a koe nga mea ngaro o te matauranga,  
 te huhua o nga ara o tana mahi! Na kia matau koe, he iti iho i ou he ta te Atua e tango nei i a koe.  
<sup>7</sup> Ina whakatakina e koe, e kitea ranei e koe te Atua? E tino kitea rawatia ranei e koe te Kaha  
<sup>8</sup> Rawa? Kei te rangi te tiketike; ka pehea koe? Hohonu iho i te reinga; ko te aha e mohiotia e koe?  
<sup>9</sup> Ko tona takoto, roa atu i te whenua, whanui atu i te moana. <sup>10</sup> Ki te mea ka haukotia e ia, ka  
 herehera ranei, ka whakawakia ranei, ma wai ia e arai? <sup>11</sup> E mohio ana hoki ia ki nga tangata teka  
 noa; a e kite ana ia i te he, ahakoa e kore e whakaaroa e ia. <sup>12</sup> Otia ko te mea whakaarokore nei,  
 ko te tangata kahore rawa ona hinengaro, ae ra, to te tangata rite i tona whanautanga kei te kuao  
 kaihe mohoa.  
<sup>13</sup> Ki te whakatikaia e koe tou ngakau, a ka wherahia ou ringa ki a ia; <sup>14</sup> Ki te mea he he kei  
 tou ringa, whakamataratia atu, kaua hoki te kino e noho ki ou tapenakara; <sup>15</sup> He pono ko reira ara  
 ai tou mata, te ai he ira; ae, ka u hoki koe, te ai he wehi: <sup>16</sup> Tera hoki koe e wareware ki tou mauuii;  
 a e maharatia e koe ano ko nga wai kua rere atu. <sup>17</sup> A ko tou ora tera e marama ke atu i to te  
 poutumarotanga o ate ra; a ahakoa e pouri ano, ka rite ki te ata. <sup>18</sup> Ka tatu ou whakaaro, no te mea  
 ka whai tumanakohanga atu; ae, ka rapu koe i tetahi taha ou, i tetahi taha, a ka takoto marire koe.  
<sup>19</sup> E takoto iho ano koe, te ai he kaiwhakawehi; he tokomaha ano hoki e whai kia paingia e koe.  
<sup>20</sup> Ka poko ia nga kanohi o te hunga kino, kore ake he rerenga mo ratou; ko ta ratou e tumanako  
 atu ai ko te hemonga.

## Chapter 12

<sup>1</sup> Na ka whakautu a Hopa, ka mea, <sup>2</sup> He tika rawa ko koutou nga tangata, a ka mate tahi atu te  
 whakaaro nui me koutou. <sup>3</sup> Otira kei ahau ano hoki he ngakau, he pera ano me o koutou, kihai ahau  
 i hoki iho i a koutou: ko wai ra te he ana ki enei mea? <sup>4</sup> Toku rite kei te tangata e waiho ana hei  
 kata ma tona hoa, he tangata e karanga ana ki te Atua, a whakarongo mai ana tera ki a ia: e waiho  
 ana te mea tika, te mea tapatahi, hei kata. <sup>5</sup> Kei roto i te whakaaro o te tangata, e tau ana tana noho,  
 te whakahawea ki te aitua; e tauwhanga ana tena ki te hunga e paheke ana te waewae.

<sup>6</sup> Kei te rangatira nga teneti o nga kaipahua, a noho kore wehi ana te hunga e whakapataritari  
 ana ki te Atua; he ope noa mai hoki ta te Atua ki o ratou ringa. <sup>7</sup> Tena ra, ui atu ki nga kararehe,  
 ma ratou koe e whakaako; ki nga manu o te rangi, ma ratou e korero ki a koe; <sup>8</sup> Korero atu ranei  
 ki te whenua, a mana koe e whakaako; ka whakaaturia mai ano hoki ki a koe e nga ika o te moana.  
<sup>9</sup> Ko wai i kore te mohio ki enei mea katoa, he mea mahi tenei na te ringa o Ihowa? <sup>10</sup> Kei tona  
 ringa nei te wairua o nga mea ora katoa, te manawa hoki o nga kikokiko tangata katoa. <sup>11</sup> He teka  
 ianei e whakamatauria ana nga kupu e te taringa, pera hoki i te waha e whakarongo nei ki te reka  
 o tana kai?  
<sup>12</sup> Kei nga kaumatua nga whakaaro nui; kei te roa o nga ra te matau. <sup>13</sup> Kei a ia te whakaaro  
 nui me te kaha; kei a ia te tohutohu me te matauranga. <sup>14</sup> Nana, e wawahia ana e ia, kore iho e  
 hanga ano; e kopia ana e ia te tangata, kahore rawa he putanga. <sup>15</sup> Nana, e unuhia atu ana e ia nga  
 wai, a kua maroke; e tukua mai ana ano e ia, a ka hurihia te whenua. <sup>16</sup> Kei a ia te kaha me te mahi  
 totika; ko te tangata tinihanga me te tangata e tinihangatia ana, nana. <sup>17</sup> E kahakina atu ana e ia  
 nga kaiwhakatakoto whakaaro, he mea pahua; whakakuwaretia iho e ia nga kaiwhakawa. <sup>18</sup> Ko te  
 mana o nga kingi, wetekina ake e ia, herea iho e ia o ratou hope ki te whitiki. <sup>19</sup> E arahina atu ana  
 e ia nga tohunga, he mea pahua, hurihia iho e ia te hunga kaha. <sup>20</sup> Whakakorea ake e ia he kupu  
 ma te hunga ngakau pono, riro ana i a ia nga mahara o nga kaumatua. <sup>21</sup> E ringihia ana e ia te  
 whakahawe ki runga ki nga rangatira, e wetekina ana e ia te whitiki o te hunga kaha. <sup>22</sup> E hurahia  
 mai ana e ia nga mea hohonu i roto i te pouri, whakaputaina mai ana e ia te atarangi o te mate ki  
 te marama. <sup>23</sup> E whakanuia ana e ia nga iwi, a e huna ana e ia; e tohatohaina atu ana e ia nga iwi,  
 a e whakawhaititia mai ana ano ratou e ia. <sup>24</sup> E tangohia atu ana e ia te ngakau o nga rangatira o  
 te iwi o te whenua, a e meinga ana e ia kia kopikopiko noa i te wahi ururua kahore nei he ara.  
<sup>25</sup> Whawha noa ratou i roto i te pouri, kahore hoki he marama, a meinga ana ratou e ia kia hurori  
 haere ano he tangata haurangi.

## Chapter 13

<sup>1</sup> Nana, kua kitea katoatia tenei e toku kanohi, kua rongu toku taringa, kua mohio. <sup>2</sup> Ko ta  
 koutou e mohio na, ko taku ano tena e mohio nei: kahore hoki ahau i hoki iho i a koutou. <sup>3</sup> Ina, e  
 whai kupu ano ahau ki te Kaha Rawa: a e hiahia ana ki te korororero ki te Atua. <sup>4</sup> Ko koutou ia,  
 he hunga tito i te teka, he rata horihori noa koutou katoa. <sup>5</sup> Te pai na, me i mutu rawa a koutou  
 korero! Ko to koutou whakaaro nui hoki tena. <sup>6</sup> Tena ra, whakarongo mai ki taku tautohe, maharatia  
 nga whawhai a oku ngutu. <sup>7</sup> Me tautoko ta te Atua ki te kupu kino? me tautoko ranei tana ki te  
 tinihanga? <sup>8</sup> Ka whakapai kanohi koia koutou ki a ia? Ma koutou ranei ta te Atua tautohe? <sup>9</sup> He  
 pai ranei kia rapua ta koutou e ia? E maminga ranei koutou ki a ia, e pera me tetahi ka maminga  
 nei ki te tangata? <sup>10</sup> He pono ka whakahe ia ki a koutou ki te whakapai puku koutou i te kanohi.  
<sup>11</sup> E kore ranei koutou e matakū ki tona nui? E kore ranei te wehi ki a ia e tau ki a koutou? <sup>12</sup> Ko  
 a koutou pepeha nunui he whakatauki no te pungarehu, ko o koutou parepare he parepare paru.  
<sup>13</sup> Kati te korero, waiho noa iho ahau, kia korero ai ahau, ahakoa pa mai te aha ki ahau. <sup>14</sup> He  
 aha oku kikokiko i ngaua ai e oku niho? He aha toku wairua i waiho ai e ahau i roto i toku ringa?  
<sup>15</sup> Ahakoa whakamate noa ia i ahau, ka tatari tonu ahau ki a ia: otiia ka mau tonu ahau ki oku ara  
 i tona aroaro. <sup>16</sup> Ko tenei hoki hei oranga moku; e kore hoki te tangata atuakore e tae mai ki tona  
 aroaro. <sup>17</sup> Ata whakarongo ki aku korero: kia anga mai o koutou taringa ki taku e whakapuaki nei.  
<sup>18</sup> Na kua takoto taku mo te whakawa; e mohio ana ahau he tika ahau. <sup>19</sup> Ko wai ia hei totohe ki  
 ahau? Ka whakarongo puku hoki ahau aianeī, a ka hemo ahau. <sup>20</sup> Engari kua nga mea e rua e  
 meatia mai ki ahau; katahi ahau ka kore e huna i ahau i tou mata. <sup>21</sup> Kia matara atu tou ringa ki  
 tawhiti i ahau; a kua ahau e whakawehia e te matakū ki a koe. <sup>22</sup> Ko reira, mau e karanga, a maku  
 e whakao atu; maku ranei e korero, a mau e whakahoki kupu mai ki ahau.  
<sup>23</sup> Ka hia ra oku kino, oku hara? Meinga ahau kia matau ki toku he me toku hara. <sup>24</sup> He aha  
 tou mata i huna ai e koe? He aha ahau i kiia ai e koe he hoariri? <sup>25</sup> E kapokapohia ranei e koe te  
 pakawha e puhia haeretia ana? E whaia ranei e koe te papapa maroke? <sup>26</sup> Kei te tuhituhi na hoki  
 koe i nga mea kawa moku, e mea ana hoki kia riro mai i ahau nga he o toku taitamarikitanga.  
<sup>27</sup> Karapitia iho e koe oku waewae ki te rakau, he mea tohu nau oku ara katoa, a he mea tuhi nau

28

oku takahanga waewae tawhio noa: Ahakoa toku rite kei te mea pirau, e memeha noa ana, kei te kakahu e kainga ana e te purehurehu.

### Chapter 14

<sup>1</sup> Ko te tangata i whanau i te wahine, he torutoru ona ra; ki tonu ano i te raruraru. <sup>2</sup> Ano he puawai ia e puta mai ana, e kotia iho ana: rere ana ia, ano he atarangi, kahore hoki he tumautanga.

<sup>3</sup> E titiro mai ano ranei ou kanohi ki te penei? E mea ranei koe i ahau kia whakawa taua ki a taua?

<sup>4</sup> Ko wai hei homai i te mea ma i roto i te mea poke? Hore rawa. <sup>5</sup> Kua rite na hoki nga ra mona: kei a koe te maha o ona marama; takoto rawa i a koe te tikanga mona, a e kore ia e whiti ki tua.

<sup>6</sup> Tahuri ke atu te titiro i a ia, kia ai ona pariratanga, kia ata tutuki ai tona ra, kia rite ai ki o te kaimahi.

<sup>7</sup> Ka ai hoki he whakaaronga ki te rakau i tapahia, tera ano e pariri, e kore ano hoki e mutu te wana o tona pihi. <sup>8</sup> Ahakoa kua tawhitotia tona pakiaka a ki te whenua, a kua mate tona tinana i roto i te oneone; <sup>9</sup> Heoi ma te haunga o te wai ka pihi, ka kokiri ona peka ano ko ta te mea tupu.

<sup>10</sup> Ko te tangata ia, mate iho, marere noa iho; ae, ka hamo te tangata, a kei hea ia? <sup>11</sup> Pera i nga wai e he mai nei i te moana, i te awa e mimiti ana, ka maroke; <sup>12</sup> E pera ana ano te tangata, e takoto ana a kahore he whakatikanga ake: kahore he marangatanga ake mo ratou, a kia kore ra ano nga rangi; e kore ano ratou e ara i to ratou moe. <sup>13</sup> Aue, kia huna noatia oti ahau e koe ki te po, kia waihotia noatia iho ahau e koe kia ngaro ana, kia hoki ra ano tou riri; kia rohea noatia mai e koe tetahi wa moku, a ka mahara mai ai ano ki ahau! <sup>14</sup> Ki te mate te tangata, e ora ano ranei ia? Ka tatari ahau i nga ra katoa o toku ngananga, kia tae mai ra ano he whakaputanga moku. <sup>15</sup> Mau e karanga, kia whakao atu ai ahau; kahore hoki e kore ka matenui koe ki te mahi a ou ringa.

<sup>16</sup> Inaianei hoki e taua ana e koe oku hikoinga; he teka ianei e matatau tonu mai ana koe ki toku hara? <sup>17</sup> Hiri rawa toku he ki roto ki te putea, tuitui rawa e koe toku kino. <sup>18</sup> He pono ko te maunga e horo ana e memeha noa ake ana, e nekehia ana te toka i tona wahi; <sup>19</sup> E ngau ana te wai i nga kohatu; ma tona puhaketanga e horoi atu te puehu o te whenua; a whakangaromia iho e koe te tumanako a te tangata. <sup>20</sup> Taea ana ia e koe ake tonu atu, a pahure ana ia; puta ke ana i a koe



tona mata, a tonoa atu ana ia kia haere. <sup>21</sup> Ko te whakahonoretanga o ana tama, kahore e mohiotia e ia; ka hoki iho ratou hei ware, heoi kahore tetahi aha o ratou e maharatia e ia. <sup>22</sup> E mamae ano ia te kikokiko o tona tinana, a ka tangi tona wairua i roto i a ia.

## Chapter 15

<sup>1</sup> Na ka whakautua e Eripata Temani; i mea ia, <sup>2</sup> He horihori kau koia te matauranga e whakapuakina e te tangata whakaaro, kia whakakiia e ia tona kopu ki te hau marangai? <sup>3</sup> Me korero ranei ia ko nga kupu kore hua hei ako, ko nga whaikorero ranei kahore nei e whai tikanga? <sup>4</sup> Ae, kua whakakorea atu na e koe te wehi, kei te pupuri mai koe i te inoi i te aroaro o te Atua. <sup>5</sup> Na kei te whakaakona tou mangai e tou kino, a kei te whiriwhiria e koe ko te arero o te hunga tinihanga. <sup>6</sup> Ehara i ahau, na tou mangai ano i hopu tou kino; ko ou ngutu ano hei whakaatu i tou he. <sup>7</sup> Ko koe ianei te tangata tuatahi kua whanau? He mea hanga ranei koe no mua atu i nga pukepuke? <sup>8</sup> Kua rongorongo ranei koe i to te Atua whakaaro puku? Kei te kaiponu ranei koe i te whakaaro ki a koe anake? <sup>9</sup> Ko te aha te mohiotia ana e koe, a kahore e mohiotia e matou? Ko tehea whakaaro ano hoki ou kahore nei i a matou? <sup>10</sup> Kei a matou nga upoko hina ratou tahi ko nga tino koroheke, kaumatua rawa ake i tou papa. <sup>11</sup> He iti rawa ranei mou nga whakamarie a te Atua, te kupu ngawari e hoatu ana ki a koe? <sup>12</sup> He aha koe i kahakina atu ai e tou ngakau? He aha hoki ou kanohi i kimokimo ai, <sup>13</sup> I tahuri ai tou wairua ki te whakahe i te Atua? i puaki ai ena kupu i tou mangai? <sup>14</sup> He aha te tangata, e ma ai ia? te whanau ranei a te wahine, e tika ai? <sup>15</sup> Nana, kahore ia e whakawhirinaki ki ana mea tapu; kahore hoki nga rangi e ma ki tana titiro. <sup>16</sup> Katahi ia te he rawa ko te mea whakarihariha, ko te mea poke, ko te tangata e inu nei i te kino ano he wai. <sup>17</sup> Maku e whakaatu ki a koe, whakarongo mai ki ahau; ko te mea kua kitea e ahau, maku e korero atu. <sup>18</sup> He mea korero mai na nga mohio, he whakarereenga iho na o ratou matua: kihai hoki i huna e ratou: <sup>19</sup> Ki a ratou nei anake te homaitanga o te whenua; kihai hoki te tangata ke i tika i waenganui i a ratou. <sup>20</sup> E whakamamae ana te tangata kino i ona ra katoa, ara i te maha o nga tau e haupu nei mo te kaitukino. <sup>21</sup> He reo whakawehi kei roto i ona taringa; i te wa whai rawa ka tae

mai te kaipahua ki a ia: <sup>22</sup> Kahore ana whakaaetanga ake tera ia ka hoki ake i te pouri, e whanga  
 ana ano hoki te hoari ki a ia. <sup>23</sup> E kopikopiko noa ana ia ki te taro mana, e mea ana: Kei hea ra? E  
 mohio ana ia kua tata ki tona ringa te ra o te pouri. <sup>24</sup> Ko te ngakau mamae, me te tumatatenga,  
 hei whakawehi i a ia; ka kaha ake raua i a ia, me te mea he kingi kua rite ana mea mo te whawhai.  
<sup>25</sup> Kua totoro nei ona ringa ki te whawhai ki te Atua, kua whakatoatoa nei i a ia ki te whawhai ki  
 te Kaha Rawa; <sup>26</sup> Kua rere ki a ia me te kaki maro, me nga puku matotoru o ana whakangungu  
 rakau. <sup>27</sup> Kua kopakina hoki tona mata e tona ngako, a kua tupu te ngako o tona hope. <sup>28</sup> Na i  
 noho ia ki nga pa mahue, ki nga whare kahore i nohoia e te tangata, meake nei waiho hei puranga.  
<sup>29</sup> E kore ia e whai taonga, e kore ano ona rawa e mau, e kore ano hoki to ratou hua e taupe ki te  
 whenua. <sup>30</sup> E kore ia e puta i te pouri, ona peka ka maroke i te mura, ka riro atu ano ia i te manawa  
 o tona mangai. <sup>31</sup> Kei whakawhirinaki ia ki te mea teka noa, kei tinihanga ki a ia ano: no te mea  
 ko te teka noa hei utu ki a ia. <sup>32</sup> E kore tona ra e taea, kua rite; e kore ano tona peka e whai rau.  
<sup>33</sup> Ka ruiruia e ia ana karepe kaiota ano ko te waina, a ka maka tana puawai me te mea ko te oriwa.  
<sup>34</sup> Ka pakoko hoki te whakaminenga o te hunga atuakore, ka pau hoki i te ahi nga teneti o nga utu  
 whakapati. <sup>35</sup> He mahi nanakia te mea i hapu ki roto ki a ratou, whanau ake he teka noa; ko o ratou  
 kopu ano hei hanga i te tinihanga.

## Chapter 16

<sup>1</sup> Katahi a Hopa ka whakautu, ka mea, <sup>2</sup> Ka maha nga mea pena kua rangona nei e ahau: he  
 kaiwhakamarie haumaruru rawa koutou katoa. <sup>3</sup> E whai mutunga ranei nga kupu tikangakore? Na  
 te aha ranei koe i whakaoho ki te whakahoki kupu mai? <sup>4</sup> E taea ano e ahau te korero pena i a  
 koutou; me i penei to koutou wairua me toku wairua, hono tonu aku kupu ki a koutou, ka ruru ano  
 toku upoko ki a koutou. <sup>5</sup> E whakakaha ano ia toku mangai i a koutou, ka ai ano hoki te whakamarie  
 a oku ngutu hei pehi i to koutou mamae.  
<sup>6</sup> Ahakoa korero ahau, kahore toku pouri e iti iho; ki te mutu taku, ko tehea wahi o toku mamae  
 ka taharahara iho. <sup>7</sup> Inaianei ano kua meinga ahau e ia kia ruha: moti iho i a koe toku whakaminenga

<sup>8</sup> katoa. Na kua mau kita koe ki ahau, hei kaiwhakaatu i toku he: e whakatika ana mai hoki toku hirokitanga ki ahau, hei whakapuaki i toku he: e whakatika ana mai hoki toku hirokitanga ki ahau  
<sup>9</sup> hei whakapuaki i toku he. Haehaea ana ahau e ia i a ia e riri ana, e tukino ana ia i ahau; pakiri  
<sup>10</sup> ana ona niho ki ahau; e whakakoi mai ana toku hoariri i ona kanohi ki ahau. Hamama mai ana o ratou mangai ki ahau; whakahewea mai ana, kei te papaki ratou i toku paparinga; huihui ana ratou  
<sup>11</sup> kia kotahi hei whawhai ki ahau. Kua tukua ahau e te Atua ki te hunga he, whakarerea putia ana  
<sup>12</sup> ahau ki nga ringa o te hunga kino. Humarie ana taku noho, heoi kua wawahi ia i ahau; kua mau ia ki toku kaki, tatatia ake ahau kia pakaru rikiriki; whakaturia ana ahau e ia hei koperenga pere  
<sup>13</sup> mana. Karapotia ana ahau e ana kaikopere, motumotuhia ana e ia oku whatumanawa, kahore  
<sup>14</sup> hoki e tohungia; ringihia ana e ia toku au ki te whenua. He mea wawahi ahau nana, he wahanga,  
<sup>15</sup> he wahanga; ano he tangata kaha ia e rere mai ana ki runga ki ahau. Tuituia ana e ahau he kakahu  
<sup>16</sup> taratara mo toku kiri, whakaititia iho e ahau toku haona ki te puehu. Paruparu noa iho toku mata i te tangihanga, kei runga i oku kamo te atarangi o te mate;  
<sup>17</sup> Ahakoa kahore he tutu i oku ringa, a he ma taku inoi. <sup>18</sup> Kua, e te whenua, e hipokina oku  
<sup>19</sup> toto, kei whai wahi tanga ano hoki taku karanga. Kei te rangi nei ano inaianei te kaiwhakaatu  
<sup>20</sup> o taku, kei te wahi i runga toku kaititiro. E tawai mai ana oku hoa ki ahau, maturuturu tonu ia  
<sup>21</sup> nga roimata o toku kanohi ki te Atua. Kia tohe koa ia i to te tangata tika ki te Atua, i to te tama  
<sup>22</sup> hoki a te tangata ki tona hoa! Kia taka mai hoki nga tau torutoru nei, ka haere ahau i te ara e kore ai ahau e hoki mai ano.

## Chapter 17

<sup>1</sup> Kua pau toku manawa, moti rawa oku ra, kua rite te urupa moku. <sup>2</sup> He pono he hunga tawai  
<sup>3</sup> enei kei ahau, a kei roto tonu toku kanohi i a ratou whakakarangitanga. Tena ra, homai he punga  
<sup>4</sup> ko koe tonu hei whakakapi turanga moku; ko wai hei papaki ringa ki ahau? Kua huna hoki e koe  
<sup>5</sup> to ratou ngakau kei mohio; na reira e kore koe e whakaneke ake i a ratou. Ko te tangata e whaki  
<sup>6</sup> ana i ona hoa, he mea mo te utu, ko nga kanohi tonu o ana tamariki e hemo. Kua meinga hoki

ahau e ia hei hahani ma nga iwi; a kua waiho marakerake ahau hei whakaetietinga. <sup>7</sup> Kua atarua  
 toku kanohi i te tangi, rite tonu ki te atarangi oku wahi katoa. <sup>8</sup> Ka miharo te hunga tika ki tenei,  
 a ka whakaoho te tangata harakore i a ia ano hei whakahe i te atuakore. <sup>9</sup> Otiia ka mau te tangata  
 tika ki tona ara, a ko te tangata ringa ma ka neke haere ake te kaha.  
<sup>10</sup> Ko koutou katoa ia tahuri, anga mai nei, e kore hoki tetahi tangata mahara e kitea e ahau i  
 roto i a koutou. <sup>11</sup> Kua pahemo oku ra, motumotuhia ake oku whakaaro i whakatakoto ai, tae noa  
 ki nga whakaaro o toku ngakau. <sup>12</sup> Ko te po kua meinga e ratou hei ao; ko te marama, e ki ana  
 ratou, e tata tonu ana ki te pouri. <sup>13</sup> Ki te titiro ahau i te reinga hei whare moku; mehemea kua  
 wharikitia e ahau toku moenga ki te pouri; <sup>14</sup> Mehemea kua karanga ahau ki te pirau, ko koe toku  
 papa; ki te iro ranei, ko koe toku whaea, toku tuahine! <sup>15</sup> Kei hea ra he tumanakohanga atu moku?  
 A ko taku e tumanako atu ai ko wai e kite? <sup>16</sup> Ka riro ki raro ki nga taha o te reinga, ina whai  
 okiokinga i roto i te puehu.

## Chapter 18

<sup>1</sup> Ano ra ko Pirirara Huhi; i mea ia, <sup>2</sup> Kia pehea te roa o ta koutou whakatakoto mahanga mo  
 nga kupu? Kia whai mahara mai, muri iho ka korero matou. <sup>3</sup> He aha matou i kiia ai he kararehe,  
 i waiho ai hei mea poke ki ta koutou titiro mai? <sup>4</sup> Haea iho koe e koe ano, i a koe e riri ana. Mau  
 koia ka mahue ai te whenua, ka nekehia ai te toka i tona wahi?  
<sup>5</sup> E pirau ano hoki te rama a te hunga kino, a e kore te mura o tana ahi e marama. <sup>6</sup> Ka pouri  
 te marama i roto i tona teneti, ka pirau ano hoki tana rama i runga i a ia. <sup>7</sup> Ka whakakikitia nga  
 takahanga o tona kaha, ka kokiritia iho ano ia ki raro e tona whakaaro ake. <sup>8</sup> No te mea ka maka  
 ia e ona waewae ake ki te kupenga, ka haere hoki ia i runga i te reti. <sup>9</sup> Ka mau tona rekereke i te  
 tawhiti, a ka hopukia ia e te mahanga. <sup>10</sup> Kei te huna ki te whenua te aho mona, te rore hoki mona  
 ki te huarahi.  
<sup>11</sup> He whakamataku i nga taha katoa hei mea i a ia kia wehi, hei aruaru hoki i a ia i ona hikitunga  
 rekereke. <sup>12</sup> Ko tona kaha ka hemo i te kai, a kei te whanga tonu te aitua ki tona tatunga. <sup>13</sup> Ka

14  
 pau i tera nga wahi o tona tinana, ae, ka pau ona wahi i te matamua o te mate. Ka hutia atu ia i  
 15  
 roto i tona teneti, i whakamanawa ai ia, a ka kawea atu ia ki te kingi o nga whakamataku. Na  
 ka noho ki tona teneti te mea ehara nei i a ia: a ka ruia iho te whanariki ki runga ki tona kainga.  
 16  
 Ka maroke ake ona pakiaka i raro, a i runga ka tapahia atu tona manga. 17  
 Ka ngaro atu te  
 maharatanga ki a ia i runga i te whenua; e kore ano ia e whai ingoa i te huanui. 18  
 Ka peia atu ano  
 ia i roto i te marama ki te pouri, ka atiatia atu hoki i te ao. 19  
 E kore ia e whai tama, e whai tama  
 ranei a te tama, i roto i tona iwi, he morehu ranei i te wahi i noho ai ia. 20  
 Miharo ana ki tona ra te  
 hunga i muri i a ia, pera i te hunga i haere ra i mua, mau ana to ratou wehi. 21  
 He pono ko nga  
 nohoanga enei o te tangata kino, ko te wahi hoki tenei o te tangata kahore e mohio ki te Atua.

### Chapter 19

1  
 Na ka whakautua e Hopa, ka mea, 2  
 Kia peha ake te roa o ta koutou whakaporearea i toku  
 wairua, o ta koutou wawahi i ahau ki te kupu? 3  
 Ka tekau enei tawainga a koutou ki ahau, kahore  
 o koutou whakama i a koutou ka aki tonu nei i ahau. 4  
 Ki te mea ano hoki kua he ahau, kei ahau  
 ano toku he e noho ana. 5  
 Ki te mea ka whakanui mai koutou i a koutou ki ahau, a ka kauwhau mai  
 ki ahau i toku tawainga; 6  
 Kia mohio koutou na te Atua ahau i whakaparori i taku take, he mea hao  
 mai ahau nana ki tana kupenga. 7  
 Nana, e tangi ana ahau i te mahi nanakia, heoi kahore ahau e  
 whakarangona; e karanga awhina ana ahau, otiia kahore he whakawa.  
 8  
 Kua tutakina e ia toku ara, te puta ahau; tukua iho ana e ia te pouri ki oku ara. 9  
 Ko toku  
 kororia huia atu ana e ia; tangohia ana e ia te karauna i toku mahunga. 10  
 Wawahia ana ahau e ia  
 i nga taha katoa, a riro ana ahau; ko taku i tumanako atu ai huaranga atu ana e ia ano he rakau.  
 11  
 Kua mura mai hoki tona riri ki ahau; e kiia ana ahau e ia ko tetahi o ona hoariri. 12  
 E haere huihui  
 mai ana ana taua, e whakaneke ake ana i to ratou ara ki ahau, kei te whakapae i toku teneti i tetahi  
 taha, i tetahi taha. 13  
 Kua meinga e ia oku teina kia matara atu i ahau; ko aku i mohio ai kua tangata  
 ke ki ahau. 14  
 Ko oku whanaunga, mutu pu ta ratou; ko oku hoa ake, kua wareware ratou ki ahau.  
 15  
 Ko te hunga e noho ana i toku whare, me aku pononga wahine, kiia iho ahau e ratou he tangata

ke; he tangata no nga whenua ahau ki ta ratou titiro mai. <sup>16</sup> I karanga atu ahau ki taku pononga,  
 heoi kihai ia i whakao mai; ahakoa e inoi ana toku mangai ki a ia. <sup>17</sup> Ko toku ha tauhou ana ki taku  
 wahine, me taku inoi hoki ki nga tamariki o te kopu o toku whaea. <sup>18</sup> Ko nga tamariki nonohi ano  
 hoki, whakahawea mai ana ki ahau; ki te whakatika ahau, ka korero whakahe ratou moku. <sup>19</sup> E  
 whakarihariha mai ana ki ahau oku takahoa katoa, a ko aku i aroha ai kua tahuri mai ki ahau. <sup>20</sup> Piri  
 tonu toku iwi ki toku kiri, ki oku kikokiko, a ora ake oku, ko te kiri kau o oku niho. <sup>21</sup> Tohungia  
 mai ahau, tohungia mai ahau e koutou, e oku hoa; kua pa mai hoki te ringa o te Atua ki ahau. <sup>22</sup> He  
 aha koutou i tukino ai i ahau, i pera ai me te Atua, te makona koutou i oku kikokiko?  
<sup>23</sup> Aue, me i tuhituhia aku kupu! Aue, me i taia ki te pukapuka! <sup>24</sup> Me i whaoa ki te kamaka,  
 ki te pene rino, ki te mata, hei mea mo a mua noa atu! <sup>25</sup> Otiia e mohio ana ahau kei te ora toku  
 kaihoko, a i nga wa i muri nei ka tu ia ki runga ki te whenua; <sup>26</sup> A ahakoa i muri i te paunga o toku  
 kiri, ka titiro tonu ahau i roto i toku kikokiko ki te Atua: <sup>27</sup> E titiro ano ahau ki a ia, ahau nei ano;  
 a ma oku kanohi e matakitaki, kahore ma o tetahi atu. Pau rawa oku whatumanawa i roto i ahau.  
<sup>28</sup> Ki te ki koutou, Na, ta tatou hanga ki te tukino i a ia! kua kitea hoki te take o te mea i roto i ahau;  
<sup>29</sup> Kia wehi koutou kei mate i te hoari; no te mea ko te whiunga ki te hoari kei roto i te riri, e mohio  
 ai koutou he whakawa ano tenei.

## Chapter 20

<sup>1</sup> Katahi ka whakautua e Topara Naamati; i mea ia, <sup>2</sup> Na kona oku whakaaro i whakahoki kupu  
 ake ai i roto i ahau; na reira ano ahau i hohoro ai. <sup>3</sup> Kua rongo ahau i te whakahe moku, e pa ai te  
 whakama ki ahau, a na te wairua o toku ngakau mahara te kupu whakahoki ki ahau. <sup>4</sup> Kahore ranei  
 koe i mohio ki tenei i mua noa atu, i te wa ra ano i whakanohoia ai te tangata ki runga ki te whenua;  
<sup>5</sup> He poto te wa e whakamanamana ai te tangata kino, a ko te hari o te tangata atuakore he wheriko  
 kau? <sup>6</sup> Ahakoa eke noa tona nui ki nga rangi, a pa atu tona mahunga ki nga kapua; <sup>7</sup> Ka memeha  
 atu ano ia a ake ake, ka pera ano me tona paru: ko te hunga kua kite i a ia, ka mea, Kei hea ia? <sup>8</sup> Ka

rere atu ia ano he moemoea, e kore ano hoki e kitea: ae ka aia atu ia, ano he rekanga kanohi no te  
<sup>9</sup>  
 po. Ko te kanohi i kite i a ia e kore e kite ano; a heoi ano tirohanga a tona wahi ki a ia.  
<sup>10</sup>  
 E whakamanawareka ana tamariki i nga rawakore, ma ona ringa ano e whakahoki ona rawa.  
<sup>11</sup> E ki ana ona wheua i te tamarikitanga; engari ka takoto tahi me ia i roto i te puehu. <sup>12</sup> Ahakoa  
 reka te kino i roto i tona mangai, ahakoa huna e ia i raro i tona arero; <sup>13</sup> Ahakoa manawapatia  
 noatia e ia, a kahore e mahue i a ia, heoi pupuri tonu i roto i tona mangai; <sup>14</sup> Otira ka puta ke tana  
 kai i roto i ona whekau, ko te au o nga ahipi i roto i a ia. <sup>15</sup> I horomia e ia te taonga, ka ruakina  
 mai ano e ia; ma te Atua e akiri mai i roto i tona kopu. <sup>16</sup> Ka ngotea e ia te huware whakamate o  
 nga ahipi; ka mate ano ia i te arero o te waipera. <sup>17</sup> E kore ia e kite i nga awa, i nga wai rere o te  
 honi, o te pata. <sup>18</sup> Ko tana i uaua ai ka whakahokia e ia, e kore ano e horomia; ko tana utu ka rite  
 ki ona taonga; e kore ano e koa ki reira. <sup>19</sup> Nana hoki i tukino nga rawakore, whakarerea iho; murua  
 ana e ia he whare, a e kore e hanga ano e ia. <sup>20</sup> I te mea kahore ia i kite i te tatutanga i roto i a ia,  
 e kore ano etahi o nga mea e matea nuitia ana e ia e mau ki a ia. <sup>21</sup> Kahore tetahi mea i toe i kore  
 te horomia e ia; no reira e kore tetahi mea pai ona e mau tonu. <sup>22</sup> I a ia e whiwhi nui nei i te rawa,  
 e rawakore ano ia; ka tae mai ki a ia nga ringa katoa o te hunga kei roto i te mata.  
<sup>23</sup> I a ia ka mea ki te whakaki i tona kopu, ka maka mai e te Atua te kaha o tona riri ki runga  
 ki a ia, a ka ringihia iho ki a ia, i a ia ano e kai ana. <sup>24</sup> Ka rere atu ia i te patu rino, ka tu ia i te  
 kopere parahi, puta pu. <sup>25</sup> E unuhia ana, kua puta mai i roto i te tinana, ina, puta mai ana te mata  
 wheriko i roto i tona au: kua tau nga wehi ki a ia. <sup>26</sup> Ko te pouri katoa kei te takoto mai mo ana  
 taonga: ka kainga ia e te ahi, kihai i puhia e te tangata; ma reira e pau ai te toenga i roto i tona teneti.  
<sup>27</sup> Ka whakakitea mai tona he e nga rangi ka whakatika mai ano te whenua ki a ia. <sup>28</sup> Ko nga hua  
 o tona whare ka riro: ka rere, ano he wai, ona mea i te ra e riri ai ia. <sup>29</sup> Ko ta te Atua wahi tenei  
 ma te tangata kino, ko te taonga tupu i kiia e te Atua mona.

## Chapter 21

<sup>1</sup> Ano ra ko Hopa; i mea ia, <sup>2</sup> Ata whakarongo mai ki taku kupu, a hei tenei he kupu whakamarie  
 mai ma koutou. <sup>3</sup> Tukua ahau, a ka korero hoki ahau; a ka mutu aku korero, haere tonu ta koutou  
 tawai. <sup>4</sup> Ahau nei, ki te tangata koia taku amuamu? A he aha ahau te manawanui ai? <sup>5</sup> Titiro mai  
 ki ahau, miharo ai; kopania atu te ringa ki te mangai. <sup>6</sup> Mahara kau ahau, ka wehi, mau pu te wehi  
 o oku kikokiko.  
<sup>7</sup> He aha te hunga kino i ora ai, i koroheke ai, ae, i marohirohi ai to ratou kaha? <sup>8</sup> Pumau tonu  
 o ratou uri ki to ratou taha ki to ratou aroaro, a ko a ratou whanau kei ta ratou tirohanga atu. <sup>9</sup> O  
 ratou whare kei runga i te rangimarie, kahore he wehi, kahore hoki a te Atua patu ki a ratou. <sup>10</sup> E  
 kaha ana tana puru ki te ekeke, kahore hoki e he; ka whanau tana kau, kahore hoki he whakatahe.  
<sup>11</sup> E tukua mai ana e ratou a ratou kohungahunga ano he kahui hipi, e pekepeke ana a ratou tamariki.  
<sup>12</sup> He hunga hapai ratou i te timipera, i te hapa, e koa ana ki te tangi o te okana. <sup>13</sup> O ratou ra pau  
 tonu i runga i te ahuareka, kitea rawatia ake kua heke ki te po. <sup>14</sup> Koia ratou i mea ai ki te Atua,  
 Mawehe atu i a matou; kahore hoki o matou hiahia kia matau ki ou ara. <sup>15</sup> He aha ra te Runga  
 Rawa e mahi ai matou ki a ia? He aha hoki te rawa ki a matou ki te inoi ki a ia? <sup>16</sup> Nana, kahore  
 he pai mo ratou i o ratou ringa ake: matara atu i ahau te whakaaro o te hunga kino.  
<sup>17</sup> Pehea te maha o nga matenga o te rama a te hunga kino? O nga panga mai ano hoki o to  
 ratou aitua ki a ratou? O te tuwhanga mai a te Atua i nga mamae i a ia e riri ana? <sup>18</sup> E rite ai ratou  
 ki te kakau witi i mua i te hau, ki te papapa e kahakina atu ana e te paroro? <sup>19</sup> E mea ana koutou,  
 E rongoatia ana e te Atua tona kino hei mea mo ana tamariki. Mana e utu tera ki a ia tonu, kia mohio  
 ai ia. <sup>20</sup> Tukua kia kite ona ake kanohi i tona hunanga, a tukua ia kia inu i te riri o te Kaha Rawa.  
<sup>21</sup> He aha hoki tana manako ki tona whare i muri i a ia? ka poroa hoki ona marama i waenga? <sup>22</sup> E  
 whakaako ianei tetahi i te Atua ki te matauranga? Ko te kaiwhakawa hoki ia mo te hunga whakakake.  
<sup>23</sup> Tenei tangata, mate iho ia, pakari rawa ano hoki ona kaha, ata takoto ana ana mea katoa, kahore  
 hoki he raruraru. <sup>24</sup> Ki tonu ona u i te waiu, a e makuku ana ona wheua i te hinu. <sup>25</sup> Mate iho hoki  
 tera tangata, kawa tonu tona wairua, kahore hoki he pai hei kai mana. <sup>26</sup> Ka takoto ngatahi raua ki  
 te puehu, a ko te iro hei hipoki mo raua.



<sup>27</sup> Nana, e mohio ana ahau ki o koutou whakaaro, ki ta koutou ngarahu nanakia ano hoki moku.  
<sup>28</sup> E ki ana hoki koutou, Kei hea te whare o te rangatira? Kei hea hoki te teneti i noho ai te hunga  
<sup>29</sup> kino? Kahore ianei koutou i ui ki te hunga e haere atu ana i te ara? Kahore ranei koutou i mohio  
<sup>30</sup> ki a ratou tohu? Kei te rongoa nei hoki te tangata kono mo te ra o te whakangaro; ka whakaputaina  
<sup>31</sup> ratou i te ra o te riri. Ko wai e whakaatu i tona ara ki tona aroaro? Ko wai hoki hei hoatu i te utu  
<sup>32</sup> mo tana mahi ki a ia? Heoi ka kawea ia ki te urupa; kei te puranga he wahi mona. <sup>33</sup> Ka reka  
<sup>34</sup> ki a ia nga pokuru o te awaawa, ka whai mai ano hoki nga tangata katoa i a ia; e kore nei hoki e  
taea te tatau te hunga i mua i a ia. He pehea ra ta koutou whakamarie tinihanga i ahau, e toe na  
hoki te he i roto i a koutou kupu e whakahoki mai na?

## Chapter 22

<sup>1</sup> Ano ra ko Eripata Temani; i mea ia, <sup>2</sup> E whai pai ano ranei te Atua i te tangata? He pono e  
whai pai te tangata i a ia ano ki te mea he ngakau mohio tona. <sup>3</sup> He oranga ngakau ranei ki te Kaha  
<sup>4</sup> Rawa tou tika? Hei taonga ranei ki a ia, ki te meinga e koe ou ara kia tino tika? He wehi ranei  
nou i a ia i whakahe ai ia i a koe, i whakawa ai i a koe?  
<sup>5</sup> He teka ianei he nui tou he? Kahore hoki he pito whakamutunga o ou kino. <sup>6</sup> I tangohia noatia  
hoki e koe nga mea a tou teina hei taunaha, huia ana e koe nga kakahu o te hunga e noho tahanga  
<sup>7</sup> ana. Kihai i whakainumia e koe ki te wai te hunga ngenge; kaiponuhia ana e koe he taro ki te  
<sup>8</sup> hunga e matekai ana. Ko te tangata marohirohi, i a ia te whenua; ko te tangata honore, noho ana  
<sup>9</sup> ia i reira. Ko nga pouaru, unga rawakoretia atu ana e koe, whatiwhatiia ana nga ringa o nga pani.  
<sup>10</sup> Na reira karapotia putia ana koe e nga mahanga, raruraru ana koe i te wehi pa whakarere; <sup>11</sup> I  
te pouri ranei, e kore ai koe e kite; a nui atu te wai e taupoki na i a koe. <sup>12</sup> He teka ianei kei te wahi  
tiketike o te rangi te Atua? Tirohia atu ano hoki a runga o nga whetu, to ratou teitei! <sup>13</sup> A e mea  
<sup>14</sup> na koe, He aha ta te Atua e mohio ai? E puta mai ranei tana whakawa i roto i te kapua pouri? Ko  
tona wahi ngaro ko nga kapua matotoru, te kite ia; kei te taiawhio ano ia i nga rangi.

<sup>15</sup> Ka mau tonu ranei koe ki te ara o mua, i haerea ra e nga tangata kikino? <sup>16</sup> I kapohia atu  
 nei i te mea kahore ano i rite o ratou ra; tahoroa ana to ratou turanga ano he awa: <sup>17</sup> I mea nei ki  
 te Atua, Mawehe atu i a matou; a, He aha e taea e te Kaha Rawa mo matou? <sup>18</sup> Heoi i whakakiia  
 e ia o ratou whare ki nga mea papai: ko te whakaaro ia o te hunga kino e matara atu ana i ahau.  
<sup>19</sup> E kite ana te hunga tika, a koa ana: kataina iho ratou e te hunga harakore: <sup>20</sup> Me te ki, He pono  
 kua haukotia te hunga i tahuri mai ki a tatou, pau ake i te ahi te toenga o ratou.  
<sup>21</sup> Waiho ia hei hoa mou, katahi koe ka ata noho; ma reira ka tae mai ai te pai ki a koe. <sup>22</sup> Tahuri  
 mai ra ki te ture a tona mangai, rongoaia hoki ana kupu ki roto ki tou ngakau. <sup>23</sup> Ki te hoki koe  
 ki te Kaha Rawa, tera koe e hanga; ki te nekehia atu e koe te kino kia mamao i ou teneti. <sup>24</sup> A ka  
 whakapuranga koe i tau taonga ki te puehu, te koura o Opira ki waenga i nga kohatu o nga awa;  
<sup>25</sup> A ko te Kaha Rawa hei taonga mou, hei hiriwa utu nui ki a koe. <sup>26</sup> Ko reira hoki koe ahua  
 ai ki te Kaha Rawa, a ka ara ake tou mata ki te Atua. <sup>27</sup> Ka inoi ano koe ki a ia, a ka whakarongo  
 mai ia ki a koe; ka whakamana ano e koe au kupu taurangi. <sup>28</sup> Ka whakatakotoria hoki e koe he  
 tikanga, a ka whakapumautia ki a koe; ka whiti ano te marama ki runga ki ou ara. <sup>29</sup> Ki te maka  
 koe e ratou ki raro, ka ki koe, Tenei ano he whakaarahanga ake; ka whakaorangia ano e ia te ngakau  
<sup>30</sup> whakaiti. Ka whakaorangia e ia te tangata ahakoa ehara i te harakore: ae ra, ka whakaorangia  
 ia e te ma o ou ringa.

### Chapter 23

<sup>1</sup> Katahi ka whakautua e Hopa, i mea ia, <sup>2</sup> I tenei ra nei ano e amuamu ana taku tangi: nui noa  
 atu i taku aue te taimaha o te patunga i ahau. <sup>3</sup> Aue, me i mohio ahau ki te wahi e kite ai ahau i a  
 ia, kia tae rawa atu ai ahau ki tona nohoanga! <sup>4</sup> Ka ata whakatakotoria e ahau aku korero ki tona  
 aroaro, ka whakakiia hoki toku mangai ki nga kupu tautohetohe. <sup>5</sup> Ka mohio ahau ki nga kupu e  
 whakahokia mai e ia ki ahau, ka marama hoki tana e mea ai ki ahau. <sup>6</sup> E whakaputaina mai ranei  
 tona kaha nui ina tautohetohe ki ahau? Kahore; engari ka whai whakaaro ia ki ahau. <sup>7</sup> Ko reira te  
 tangata tika tautohetohe ai ki a ia: a ora tonu ake ahau i toku kaiwhakawa ake tonu atu.

<sup>8</sup> Nana, haere ana ahau ki mua, a kahore ia i reira; ki muri, heoi kahore ahau e kite i a ia: <sup>9</sup> Ki maui, ina ka mahi ia, heoi kahore ahau e kite i a ia; e huna ana ia i a ia ano i te taha ki matau, te kite ahau i a ia. <sup>10</sup> Otiia e mohio ana ia ki te ara e anga atu ai ahau: kia oti ahau te titiro iho e ia, ano he koura ahau i toku putanga mai. <sup>11</sup> Mau pu ona takahanga i toku waewae; u pu ahau ki tona ara, kihai hoki i peka ke. <sup>12</sup> Kihai hoki i mahue i ahau te whakahau a ona ngutu; ko nga kupu a tona mangai rongoa rawa ki ahau, nui atu i te kai i rite maku.

<sup>13</sup> Ko ia, kotahi tonu tona whakaaro, a ma wai ia e whakatahuri ke? Ko ta tona ngakau hoki i hiahia ai e meatia ana e ia. <sup>14</sup> E whakaotia ana hoki e ia nga mea i whakaritea moku: he maha ano hoki ana mahi pera. <sup>15</sup> Koia ahau i ohore ai i tona aroaro: ka whakaaroaro ahau, ka wehi i a ia.

<sup>16</sup> Ngohe noa hoki toku ngakau i te Atua, ohore ana ahau i te Kaha Rawa. <sup>17</sup> Kihai nei hoki ahau i whakangaromia i mua o te pouri, kihai hoki i hipokina e ia te pouri i toku aroaro.

## Chapter 24

<sup>1</sup> He aha nga wa te whakapurangatia ai e te Kaha Rawa? A he aha hoki te hunga e mohio ana ki a ia te kite ai i ona ra? <sup>2</sup> Tera etahi e whakaneke atu ana i nga rohe; e kahakina ana e ratou nga kahui, whangaia iho e ratou. <sup>3</sup> E aia atu ana e ratou te kaihe a nga pani, e tangohia ana hei taunaha te kau a te pouaru. <sup>4</sup> Whakapekaia ketia ana e ratou nga rawakore i te ara: huihui ana nga ware o te whenua, piri ana. <sup>5</sup> Nana, rite tonu ratou ki te kaihe mahoa o i te koraha, haere atu ana ki ta ratou mahi, e whai ana ki te kai; hei kai te koraha ma ratou, ma a ratou tamariki. <sup>6</sup> E kotia ana e ratou ta ratou witi i te mara; e kohia ana e ratou nga waina a te hunga tutu. <sup>7</sup> E takoto tahanga ana ratou i te po roa, kahore he kakahu, kahore hoki he hipoki i te maeke. <sup>8</sup> Maku iho ratou i te awaha o nga maunga, a, ka kore he rerenga, ka awahi i te kamaka. <sup>9</sup> Tera te hunga, e tangohia mai ana e ratou te pani i te u, e tango ana i ta te rawakore taunaha: <sup>10</sup> Koia ka haere tahanga ratou, kahore he kakahu, a, i te matekai ka hari i nga paihere witi; <sup>11</sup> E mahi nei i te hinu i roto i nga taiepa a aua tangata; e takahi nei i a ratou poka waina, me te mate i te wai. <sup>12</sup> E aue ana nga tangata i roto i te pa, e karanga ana hoki te wairua o te hunga i patua: kahore ano ia a te Atua whakakuware ki a ratou.

<sup>13</sup> No te hunga ratou e whakakeke ana ki te marama; kahore o ratou mohio ki ona ara, e kore  
 ano ratou e noho ki ona huarahi. <sup>14</sup> E maranga ana te kaikohuru i te mea ka marama, patua iho e  
 ia te ware me te rawakore; a i te po ka pena ia i te tahae. <sup>15</sup> E tatari ana te kanohi o te tangata  
 puremu kia nehunehu iho, e mea ana, E kore te kanohi e kite i ahau: e huna ana ia i tona mata. <sup>16</sup> E  
 keru ana ratou i nga whare i te pouri: i te awatea e pa ana ratou i a ratou: kahore ratou e mohio ki  
 te marama. <sup>17</sup> Ki a ratou katoa hoki e rite ana te ata ki te atarangi o te mate; e matau ana hoki ratou  
 ki nga whakamataku o te atarangi o te mate.  
<sup>18</sup> Tere tonu ia ki runga ki te mata o nga wai; he mea kanga to ratou wahi i runga i te whenua:  
 e kore ia e anga mai ki te ara ki nga mara waina. <sup>19</sup> Ka riro nga wai o te hukarere i te tauraki, i te  
 wera: te hunga hara ano hoki i te reinga. <sup>20</sup> Ka wareware te kopu ki a ia; he kai reka ia ma te iro;  
 e kore ia e maharatia i muri iho; ka whati hoki te kino ano he rakau. <sup>21</sup> E tukinotia ana e ia te  
 pakoko kihai nei i whanau; kahore hoki ana mahi pai ki te pouaru. <sup>22</sup> E kumea atu ana hoki e ia  
 nga marohirohi ki tona kaha: ka whakatika ake ia, kahore he tangata e u ki te ora. <sup>23</sup> I homai ano  
 e te Atua ki a ratou kia au te noho, a ka whakawhirinaki ratou ki reira; kei runga hoki i o ratou  
 huarahi ona kanohi. <sup>24</sup> E whakanekehia ake ana ratou; otia wahi iti nei, kua kahore noa iho ratou;  
 ae ra, ka whakaitia ratou, ka whakawateatia atu pera i era atu katoa, a ka tapahia atu ano ko nga  
 kauru o nga puku witi. <sup>25</sup> Ki te mea he teka tenei ko wai hei whakateka ki ahau, hei whakakahore  
 i taku korero?

## Chapter 25

<sup>1</sup> Ano ra ko Pirirara Huhi; i mea ia, <sup>2</sup> Kei a ia te kingitanga me te wehi: ko ia hei hohou i te  
 rongu i ona wahi tiketike. <sup>3</sup> E taea ranei ana ope te tatau? ko wai hoki i kore te whitingia e tona  
 marama? <sup>4</sup> A ma te aha ra te tangata ka whakatikaia mai ai e te Atua? Ma te aha ka ma ai te whanau  
 a te wahine? <sup>5</sup> Nana, ko te marama, kahore ona tiahotanga, kahore hoki nga whetu kia ma ki tana  
 titiro: <sup>6</sup> Kia iti rawa iho to te tangata, he kutukutu nei! to te tama a te tangata, he iro nei!

## Chapter 26

<sup>1</sup> Ano ra ko Hopa; i mea ia. <sup>2</sup> He hapai pehea tau i te kahakore? He whakaora pehea tau i te  
<sup>3</sup> ringa ngoikore? Ka tae tau whakatakoto whakaaro ma te whakaarokore! Te nui o tau whakaatu  
<sup>4</sup> tikanga! I puaki ki a wai au kupu? No wai te wairua i puta mai ra i a koe?  
<sup>5</sup> E wiri ana nga tupapaku i raro i te wai, me nga mea ano e noho ana i reira. <sup>6</sup> E takoto kau  
<sup>7</sup> ana te reinga i tona aroaro, kahore hoki he hipoki mo te whakangaro. E horahia atu ana e ia te  
<sup>8</sup> raki ki runga ki te wahi takoto kau, whakairihia ana e ia te whenua ki runga ki te kahore noa iho.  
<sup>9</sup> E takaia ana e ia nga wai ki roto ki ana kapua matotoru; a kahore te kapua e pakaru i raro i a ratou.  
<sup>10</sup> E kaiponuhia ana e ia a mua o tona torona, horahia ana e ia tana kapua ki runga. He mea karapoti  
<sup>11</sup> nana nga wai, rohe rawa, a tae noa ki te mutunga mai o te marama me te pouri. Wiri ana nga  
<sup>12</sup> pou o te rangi, miharo ana ki tana whakatupehupehu. Ko tona kaha hei whakakorikori i te moana,  
<sup>13</sup> maru ana te whakakake i tona matauranga. Na tona wairua i whakapaipai nga rangi; na tona  
<sup>14</sup> ringa i wero te nakahi tere. Na, he pito enei no ona ara; ano te iti o te wahi ona e rangona ana!  
 Ko te whatitiri ia o tona kaha, ko wai ka matau?

## Chapter 27

<sup>1</sup> Na i korero tonu ano a Hopa i tana pepeha; i mea, <sup>2</sup> E ora ana te Atua, nana nei i whakakahore  
<sup>3</sup> toku tika; te Kaha Rawa, nana nei i whakakawa toku wairua; Kei te toitu tonu hoki toku ora i roto  
<sup>4</sup> i ahau, a kei roto i oku pongaponga te wairua o te Atua; He pono, e kore oku ngutu e korero kino,  
<sup>5</sup> e kore te hianga e puaki i toku arero. Aue kia whakatikaia ta koutou e ahau! E kore e whakarerea  
<sup>6</sup> e ahau toku ngakau tapatahi, a mate noa. Ka mau taku pupuri ki toku tika, e kore e tukua atu e  
<sup>7</sup> ahau: e kore toku ngakau e whakahe ki ahau i ahau ano e ora nei.  
<sup>8</sup> Ko toku hoariri, kia rite ia ki te tangata kino; ko te tangata e whakatika mai ana ki ahau, kia  
<sup>8</sup> rite ia ki te tangata hara. He aha oti ta te whakaponokore e tumanako ai, ahakoa whiwhi ia i te

<sup>9</sup> rawa, ki te mea ka tangohia atu tona wairua e te Atua? E rongorangi te Atua ki tana tangi ina pa  
<sup>10</sup> te he ki a ia? E ahua ranei ia ki te Kaha Rawa, e karanga ranei ki te Atua i nga wa katoa?  
<sup>11</sup> Ka whakaakona koutou e ahau ki te ringa o te Atua; e kore e huna e ahau nga mea e takoto  
<sup>12</sup> mai nei i te Kaha Rawa. Nana, kua kite koutou katoa; a na te aha koutou i wairangi rawa ai?  
<sup>13</sup> Ko ta te Atua wahi tenei ma te tangata kino, ko te mea e whakarerea iho ma nga kaitukino, ko  
<sup>14</sup> ta te Kaha Rawa e riro i a ratou. Ki te mea ka tokomaha ana tamariki, hei mea ma te hoari; e  
<sup>15</sup> kore ano hoki ona uri e makona i te taro. Ko ona morehu ka tanumia ki te mate; e kore ano hoki  
<sup>16</sup> ana pouaru e tangi. Ahakoa amene ia i te hiriwa ano he puehu, a pae tonu te kakahu mona ano  
<sup>17</sup> he paru; E pae ano i a ia, otia ka kakahuria e te tangata tika, ka wehewehea hoki te hiriwa e te  
<sup>18</sup> harakore. Ka rite tana hanga i tona whare ki ta te purehuru; tona rite kei te whare tihokahoka  
<sup>19</sup> e hanga ana e te kaitiaki. Ka takoto ia, he tangata taonga, otia e kore e kohia ki te urupa; ko te  
<sup>20</sup> tirohanga ake a ona kanohi, na kua kahore noa iho ia. Rite tonu ki te wai nga whakawehi e mau  
<sup>21</sup> ai ia; tahaetia ana ia e te paroro i te po. Ka kahakina atu ia e te marangai, a riro ana ia; ka aia  
<sup>22</sup> atu ano ia i tona wahi. Ka aki mai hoki te Atua ki a ia, e kore ano ia e tohungia; mea noa ia kia  
<sup>23</sup> rere mai i roto i tona ringa. Ka papaki te tangata i o ratou ringa ki a ia, a ka whakahi, ka a atu i  
 a ia i tona wahi.

## Chapter 28

<sup>1</sup> He rua hoki to te hiriwa e puta mai ai, he wahi ano to te koura e whakarewaina ai. <sup>2</sup> He mea  
 tango mai te rino no roto i te whenua; no te kamaka te parahi, he mea whakarewa. <sup>3</sup> E whakatakotoria  
 ana e te tangata he mutunga mai mo te pouri, e rapua ana e ia ki te tino tutukitanga atu nga kohatu  
<sup>4</sup> o te pouri, o te atarangi o te mate. E pakaruhia mai ana e ia he rua i ko ake o nga nohoanga tangata;  
 kua wareware ratou i te waewae e haere ana; he tawhiti i te tangata to ratou tarenga, e piu atu ana,  
<sup>5</sup> e piu ana mai. Ko te whenua, e puta mai ana he taro i roto i a ia: a e hurihia ake ana a raro iho  
<sup>6</sup> ano he ahi. Hei wahi mo nga hapira ona kohatu, he puehu koura ano tona. <sup>7</sup> He ara tena kahore

i mohiotia e te manu, kiano i kitea e te kanohi o te whatura. <sup>8</sup> Kahore nga kirehe whakahi kia takahi  
 i taua ara kahore hoki a reira kia haerea e te raiona tutu. <sup>9</sup> E pa atu ana tona ringa ki te kiripaka;  
 hurihia ake e ia nga take o nga maunga. <sup>10</sup> E tapahia ana e ia he awa i roto i nga kamaka, a e kite  
 ana tona kanohi i nga mea utu nui katoa. <sup>11</sup> E herea ana e ia nga awa kei maturuturu; e whakaputa  
 mai ana hoki i nga mea ngaro ki te marama. <sup>12</sup> E kitea ia ki hea te whakaaro nui? kei hea hoki te  
 wahi o te mohio? <sup>13</sup> E kore te tangata e mohio ki tona utu, e kore ano taua hanga e kitea ki te  
 whenua o te ora.  
<sup>14</sup> E ki ake ana te rire, Kahore i ahau; e ki mai ana hoki te moana, Kahore i ahau. <sup>15</sup> E kore e  
 hokona ki te koura, e kore ano hoki e taea te pauna te hiriwa hei utu mona. <sup>16</sup> E kore e taea te  
 whakarite ki te koura o Opira, ki te onika utu nui, ki te hapira. <sup>17</sup> E kore e rite te koura, te kohatu  
 piata ki a ia: e kore e hokona ki nga oko koura parakore. <sup>18</sup> E kore e whakahuatia te kaa, nga  
 peara ranei; hira ake hoki te utu o te whakaaro nui i to te rupi. <sup>19</sup> E kore te topaha o Etiopia e rite  
 ki a ia, e kore e tau te koura parakore hei utu.  
<sup>20</sup> Ka haere mai ra i hea te whakaaro nui? Kei hea te wahi o te matau? <sup>21</sup> He mea huna atu na  
 hoki i nga kanohi o nga mea ora katoa, ngaro rawa i nga manu o te rangi. <sup>22</sup> E ki ake ana te  
 whakangaromanga raua ko te mate, i hakiri o maua taringa ki tona rongo. <sup>23</sup> E mohio ana te Atua  
 ki tona ara, kua kite ano ia i tona wahi. <sup>24</sup> E titiro ana hoki ia ki nga pito o te whenua, e kite ana  
 ia i nga mea i raro i te rangi, a puta noa; <sup>25</sup> E mea ana i te whakataimaha mo te hau; ae, e mehua  
 ana ia i nga wai ki te mehua. <sup>26</sup> I a ia e whakatakoto ana i te tikanga mo te ua, i te huarahi mo te  
 uira o te whatitiri, <sup>27</sup> Ka kitea e ia i reira, a whakapuakina mai ana; i whakaukia e ia, a ata rapua  
 ana e ia. <sup>28</sup> A ka mea ia ki te tangata, Na, ko te wehi ki te Ariki, ko te whakaaro nui tena; a ko te  
 mawehe atu i te kino, koia te matauranga.

## Chapter 29

<sup>1</sup> A i korero tonu a Hopa i tana pepeha, i mea, <sup>2</sup> Aue, me i rite ki nga marama o mua, ki nga ra  
i tiaki ai te Atua i ahau! <sup>3</sup> I tiaho mai ai tana rama ki toku matenga, a na tana whakamarama i haere  
ai ahau i te pouri: <sup>4</sup> Me i pera ano me ahau i nga ra o toku taiohitanga, i te mea nei kei runga to te  
Atua whakaaro puku i toku teneti; <sup>5</sup> I te mea e noho ana ano te Kaha Rawa i ahau, a kei tetahi taha  
oku aku tamariki, kei tetahi taha; <sup>6</sup> I horoia ai oku takahanga ki te pata, a rere mai ana nga awa  
hinu ki ahau i roto i te kohatu!  
<sup>7</sup> I toku haerenga atu ki te kuwaha ki te pa, a whakapai ana i te nohoanga moku i te waharoa,  
<sup>8</sup> Ka kite nga taitamariki i ahau, a piri ana ratou: whakatika ana nga koroheke, tu ana ki runga;  
<sup>9</sup> Mutu pu te korero a nga tino tangata, kua kopania te ringa ki o ratou mangai; <sup>10</sup> Ngaro ana te reo  
o nga rangatira, piri ana o ratou arero ki o ratou ngao. <sup>11</sup> No te rongonga hoki o te taringa i ahau  
manaaki ana i ahau; te kitenga o te kanohi i ahau, whakaae mai ana ki aku mahi: <sup>12</sup> No te mea naku  
i whakaora te rawakore i a ia e karanga ana, te pani me te tangata hoki kahore nei ona kaiawhina.  
<sup>13</sup> I tau ki runga ki ahau te manaaki a te tangata e tata ana ki te whakangaromanga; harakoa ana i  
ahau te ngakau o te pouaru. <sup>14</sup> I kakahuria e ahau te tika, a ko tera toku kakahu: e rite ana taku  
whakarite whakawa he koroka, he karauna. <sup>15</sup> He kanohi ahau ki te matapo, he waewae ki te kopa.  
<sup>16</sup> He matua ahau ki nga rawakore: a i ata rapua e ahau te tikanga o te totohe a te tangata kihai nei  
ahau i mohio. <sup>17</sup> Wawahia ana e ahau nga kauae o te tangata kino, a takiritia mai ana e ahau tana  
mea pahua i roto i ona niho.  
<sup>18</sup> Katahi ahau ka mea, Tera ahau e mate i roto i toku ohanga; ka whakanuia oku ra kia rite ki  
te onepu te maha: <sup>19</sup> Ko toku pakiaka tautoro tonu ki nga wai, a i te po tau ana te tomairangi ki  
runga ki toku peka: <sup>20</sup> Ko toku kororia hou tonu i roto i ahau, a hoki ake ana te kaha o taku kopere  
i toku ringa. <sup>21</sup> I whakarongo mai nga tangata ki ahau, i tatari, whakarongo puku ana ratou i ahau  
e whakatakoto whakaaro ana. <sup>22</sup> I muri i aku kupu kore ake ratou i korero ano; maturuturu iho ana  
aku kupu ki runga ki a ratou. <sup>23</sup> I taria mai ahau e ratou ano ko te ua; hamama mai ana o ratou  
mangai ano e tatari ana ki te ua o muri. <sup>24</sup> Ka kata ahau ki a ratou, kihai i whakaponohia e ratou;  
kihai hoki ratou i whakataka i te marama o toku mata. <sup>25</sup> Naku to ratou ara i whiriwhiri, a noho



ana ahau hei rangatira, noho ana hoki ahau ano he kingi i roto i te ope; i rite ahau ki te kaiwhakamarie o te hunga e tangi ana.

### Chapter 30

<sup>1</sup> Inaianei ia e kataina mai ana ahau e te hunga tamariki rawa i ahau, e te hunga kihai nei ahau i whakaae kia uru o ratou matua ki roto ki nga kuri o taku kahui. <sup>2</sup> Ae ra, hei aha maku te kaha o o ratou ringa? He hanga pirau nei hoki to ratou koroheketanga. <sup>3</sup> Tupuhi ana ratou i te rawakore, i te hemokai; e ngau ana ratou i te oneone pakapaka, i roto i te pouritanga o te tuhea, o te ururua. <sup>4</sup> E whawhaki ana ratou i nga marou i roto o nga rakau ririki; a ko nga pakiaka hunipa hei kai ma ratou. <sup>5</sup> He mea pei atu ratou i roto i nga tangata; e karangarangatia ana ratou ano he tahae. <sup>6</sup> Me noho rawa atu ratou i nga kapiti o nga awaawa, i nga waro o te whenua, i nga kamaka. <sup>7</sup> Tangi a kaihe ana ratou i roto i nga rakau ririki; huihuia ana ratou ki raro i nga ongaonga. <sup>8</sup> He tamariki ratou na nga kuware, ae ra, he tamariki na te hunga ingoakore; he hunga i patua atu i runga i te whenua. <sup>9</sup> Inaianei ia kua waiho ahau hei waiata ma ratou, ae, hei whakatauki ma ratou. <sup>10</sup> E whakarihariha mai ana ratou ki ahau, e neke rawa atu ana i ahau, a kahore e kaiponuhia e ratou te huware ki toku mata. <sup>11</sup> Kua oti hoki tana aho te wewete e ia, a e whakatupuria kinotia ana ahau e ia, a kua tukua e ratou te paraire i toku aroaro. <sup>12</sup> I te taha ki matau ka ara te marea; taia ana e ratou oku waewae, a akina ana nga ara o a ratou whakangaromanga ki ahau. <sup>13</sup> E taka kino ana ratou i toku ara, e whakatupu ana i te he moku, a kahore he hoa mahi mo ratou. <sup>14</sup> Rite tonu ki te wai nui e pakaru mai ana to ratou haerenga mai: i taua whakangaromanga nei, huri mai ana ratou ki runga ki ahau: <sup>15</sup> Kua tahuri mai nga whakawehi ki ahau, e aru ana ratou i toku whakaaro rangatira ano he hau; ko te whakahauora moku, pahemo ke ana ano he kapua. <sup>16</sup> Na inaianei kua maringi toku wairua i roto i ahau: mau pu ahau i nga ra o te tangi. <sup>17</sup> I te po e werohia ana oku wheua i roto i ahau; kahore hoki he okiokinga o nga mamae e ngau nei i ahau. <sup>18</sup> He kaha nui no toku mate i ahau ke ai toku kakahu; e awhi nei i ahau, e penei ana me te whiri o toku koti. <sup>19</sup> Kua maka ahau e ia ki te paru, kua rite ahau ki te puehu, ki te pungarehu. <sup>20</sup> E tangi ana ahau ki a koe, heoi kahore koe

e whakao mai ki ahau; e tu ana, heoi ka titiro kau mai koe ki ahau. <sup>21</sup> Kua huri ke, kua kino tau mahi ki ahau: ko te kaha o tou ringa kei te tukino i ahau. <sup>22</sup> Kua hapainga ake ahau e koe ki te hau, a meinga ana tera e koe hei hoiho moku; a whakamotitia iho ahau e koe i roto i te tupuhi. <sup>23</sup> E mohio ana hoki ahau tera ahau e kawea e koe ki te mate, ki te whare hoki i whakaritea mo te hunga ora katoa. <sup>24</sup> E kore ano ia tona ringa e totoro iho ki te urupa; ahakoa hei mate mona ka mea ia ki te karanga, he whakaaro ki enei mea. <sup>25</sup> Kihai ianei ahau i tangi ki te tangata he mate nei tona? kihai ranei toku wairua i pouri ki te rawakore? <sup>26</sup> I ahau i tatari ai ki te pai, heoi kua tae mai te kino; tumanako atu ana ahau ki te marama, heoi kua tae mai te pouri. <sup>27</sup> Ko oku whekau, me te mea e koropupu ana, te ata takoto; haukotia mai ana ahau e nga ra o te tangi. <sup>28</sup> E haereere pouri ana ahau, kahore he ra; ko taku whakatikanga ake i roto i te whakaminenga, ka karanga awhina. <sup>29</sup> Hei teina ahau ki nga tarakona, hei hoa mo nga ruru. <sup>30</sup> Ko toku kiri mangu tonu, e ngahoro ana i ahau, kaia ana oku wheua i te wera. <sup>31</sup> No reira i tahuri ke ai taku hapa ki te tangi, me taku okana ki te reo o te hunga e uhunga ana.

### Chapter 31

<sup>1</sup> Kua oti taku kawenata ki oku kanohi; kia whakaaroaro ahau hei aha ki te kotiro? <sup>2</sup> He aha ta te Atua wahi e tuwha mai ai i runga? He aha ta te Kaha Rawa taonga tupu i te wahi tiketike? <sup>3</sup> He teka ianei he whakangaromanga mo te tangata kino? he whiu mo nga kaimahi o te he? <sup>4</sup> He teka ianei e kitea ana e ia oku ara, e taua ana e ia oku hikoinga katoa? <sup>5</sup> Ki te mea i haere ahau i runga i te tekateka noa, a i hohoro toku waewae ki te tinihanga; <sup>6</sup> Kia paunatia ahau i runga i te pauna tika, kia mohio ai te Atua ki toku tapatahi: <sup>7</sup> Ki te mea i kotiti ke toku hikoinga i te ara, a i whai toku ngakau i oku kanohi; a ki te mea i mau te tongi ki oku ringa; <sup>8</sup> Kati, ko ahau hei whakato, a ma tetahi atu e kai; ae ra, tukua nga hua o taku mara kia hutia atu. <sup>9</sup> Ki te mea i whakawairangitia toku ngakau e te wahine, a i whanga ahau i te tatau o toku hoa; <sup>10</sup> Heoi kia huri paraoa taku wahine ma tetahi atu, kia piko iho ano hoki nga tangata ke ki runga i a ia. <sup>11</sup> He kino rawa hoki tera; ae ra, he he e tika ana kia whiua e nga kaiwhakawa: <sup>12</sup> He ahi hoki

13  
 tera e kai ana ki te whakangaromanga rawa, poto noa aku hua katoa. Ki te mea i whakahaweatia  
 e ahau te whakawa a taku pononga tane, a taku pononga wahine, i a raua e totohe ana ki ahau;

14  
 Ka pehea ra ahau ina whakatika te Atua? He aha taku kupu e whakahoki ai ki a ia ina tae mai ia

15  
 ki te titiro? He teka ranei na toku kaihanganga ia i hanga i roto i te kopu? a nana, na te kotahi, i  
 whai ahua ai maua i roto i te puku?

16  
 Ki te mea i kaiponuhia e ahau ta nga rawakore i hiahia ai, a meinga ana e ahau nga kanohi  
 o te pouaru kia pau i te minamina; 17  
 Ki te mea ranei i kainga taku maramara e toku kotahi, a kihai

18  
 te pani i kai i tetahi wahi; He mea whakatupu ia naku no toku taitamarikitanga ra ano me te mea  
 ko tona papa ahau: ko te pouaru he mea arahi naku no te kopu ra ano o toku whaea; 19  
 Ki te mea

i kite ahau i tetahi e tata ana ki te mate, he kore no te kakahu, a kahore he uhi mo te rawakore;  
 20

Ki te mea kihai tona hope i whakapai ki ahau, a kihai ia i mahana i nga huruhuru o taku kahui:

21  
 Ki te mea i ara toku ringa hei pehi i te pani, i toku kitenga he awina tera moku kei te kuwaha;

22  
 Na kia marere atu toku pokohiwi i roto i te peke, kia whati te takakau o toku ringa. 23  
 Ko te  
 whiu hoki a te Atua taku i wehi ai; kihai hoki i taea e ahau te aha i tona nui.

24  
 Ki te mea i u toku whakaaro ki te koura, a i mea ahau ki te koura parakore, Ko koe taku e  
 whakawhirinaki atu ai; 25  
 Ki te mea i koa ahau ki te maha o oku rawa, a ki te nui o ta toku ringa i

whiwhi ai; 26  
 Ki te mea i kite ahau i te ra e whiti ana, i te marama ranei e haere ana i tona tiahotanga;

27  
 A ka kumea pukutia atu toku ngakau, ka kihia toku ringa e toku mangai: 28  
 Na he kino tenei hei  
 whiunga ma nga kaiwhakawa: he teka hoki naku ki te Atua i runga. 29  
 Ki te mea i koa ahau ki te

whakangaromanga o te tangata i kino ki ahau, i whakaara ake ranei i ahau i te panga o te he ki a

30  
 ia; Ae, kihai ahau i tuku i toku mangai kia hara, kihai i whai kia kanga tona wairua; 31  
 Ki te  
 mea kahore nga tangata o toku teneti i mea, Tena koa te tangata kihai nei i makona i tona kikokiko?

32  
 Kihai te manene i moe i waho; i whakatuwheratia ano e ahau oku tatau ki te tangata haere;

33  
 Ki te mea i pera ahau me Arama, i hipoki i oku he, i huna i toku kino ki roto ki toku uma;

34  
 I wehi hoki ahau i te huihui nui, i mataku ki te whakahawea a nga hapu, a whakarongo kau ana,

35  
 kihai hoki i puta ki waho Aue, me i whakarongo mai tetahi ki ahau! Nana, tenei taku tohu, ma  
 te Kaha Rawa e whakahoki mai he kupu ki ahau; me i ahau noa te pukapuka i tuhituhia e toku

36  
 hoariri! Ina, kua amohia e ahau i runga i toku pokohiwi; kua herea e ahau hei karauna moku.

37

Kua whakaaturia e ahau ki a ia te maha o oku hikoinga; rite tonu ki ta te rangatira taku whakatata  
 atu ki a ia. <sup>38</sup> Ki te tangi taku oneone, he whakahe ki ahau, ki te uru ano ona moa ki te aue, <sup>39</sup> Ki  
 te mea i kainga e ahau ona hua, he mea kihai i utua, a naku ranei ona ariki i mate ai, <sup>40</sup> Na, kia riro  
 pu te witi i te tataramoa, te parei i te taru kino. Heoi ano nga korero a Hopa.

## Chapter 32

1

Heoi mutu ake te whakahoki kupu a enei tangata tokotoru ki a Hopa, no te mea he tika ia ki  
 tona nei whakaaro. <sup>2</sup> Na kua mura te riri o Erihu tama a Parakere Puti, no te whanau i a Rame:  
 mura ana tona riri ki a Hopa, no te mea ki tana tika rawa ia i te Atua. <sup>3</sup> I mura ano tona riri ki ona  
 hoa tokotoru, no te mea kihai i kitea e ratou he kupu hei whakahokinga atu, heoi kei te whakahe  
 ano ratou i a Hopa. <sup>4</sup> Na i tatari a Erihu kia korero ia ki a Hopa, no te mea he kaumatua ake ratou  
 i a ia. <sup>5</sup> A, no te kitenga o Erihu kahore he kupu i nga mangai o aua tangata tokotoru hei  
 whakahokinga atu, mura ana tona riri.

6

Na ka oho a Erihu tama a Parakere Puti, ka mea, He taitamariki ahau, ko koutou ia he koroheke  
 rawa; koia ahau i hopohopo ai, i wehi ai ki te whakaatu i toku whakaaro ki a koutou. <sup>7</sup> I mea ahau,  
 Ma nga ra te korero, ma nga tau kua maha e whakaatu te whakaaro nui. <sup>8</sup> Otiia he wairua ano to  
 te tangata, na te manawa ano o te Kaha Rawa ratou i whai mahara ai. <sup>9</sup> Ko nga tangata nunui,  
 kahore o ratou whakaaro nui, ko nga kaumatua, kahore e matau ki te whakawa. <sup>10</sup> Koia ahau i mea  
 ai, Whakarongo ki ahau; ka whakakite hoki ahau i toku whakaaro. <sup>11</sup> Nana, i tatari ahau ki a koutou  
 kupu; i whai taringa atu ki o koutou whakaaro mohio i a koutou e rapu kupu ana. <sup>12</sup> Nana, mahara  
 tonu atu ahau ki a koutou, a kihai tetahi o koutou i whakaatu i te he o Hopa, i whakahoki kupu ranei  
 ki ana korero. <sup>13</sup> Kei mea koutou, Kua kitea e matou te mohio, na te Atua ia i turaki, ehara i te  
 tangata. <sup>14</sup> Na kihai ana kupu i anga mai ki ahau; e kore ano tana e utua e ahau ki a koutou kupu.  
<sup>15</sup> Porahurahu kau ana ratou, kore ake a ratou kupu whakahoki: mutu ake a ratou korero. <sup>16</sup> Kia  
 tatari ahau, no te mea kahore ratou e korero, no te mea e tu kau ana ratou, kahore e whakahoki atu?  
<sup>17</sup> Me korero atu hoki e ahau aku kupu, maku ano e whakaatu toku whakaaro. <sup>18</sup> Ki tonu hoki ahau

<sup>19</sup> i te korero; e akiakina ana ahau e te wairua i roto i ahau. Nana, ko toku kopu rite tonu ki te waina  
<sup>20</sup> kahore nei ona putanga; ki te ipu hou e tata ana ia te pakaru. Me korero ahau, kia ta ai toku  
<sup>21</sup> manawa; ka puaki toku mangai, ka whakahoki kupu ahau. Na kua ahau e whakapai ki te kanohi  
<sup>22</sup> tangata; e kore hoki ahau e hoatu ingoa whakapaipai ki te tangata. Kahore hoki ahau e mohio  
 ki te whakapati; penei kua riro wawe ahau i toku Kaihanga.

### Chapter 33

<sup>1</sup> Tena ra, whakarongo, e Hopa, ki aku korero, kia whai taringa ki aku kupu katoa. <sup>2</sup> Nana, kua  
 puaki nei toku mangai, kei te korero toku arero i roto i toku mangai. <sup>3</sup> Ma aku kupu e whakapuaki  
 te tika o toku ngakau; ka korero pono oku ngutu i ta ratou e matau ana. <sup>4</sup> He mea hanga ahau na te  
 Wairua o te Atua, a na te manawa o te Kaha Rawa ahau i whai ora ai. <sup>5</sup> Ki te taea e koe, whakahokia  
 mai e koe he kupu ki ahau; whakatikaia au korero ki toku aroaro, e tu ki runga. <sup>6</sup> Nana, ko toku  
 anga ki te Atua he pena hoki i tau; he mea hanga nei ano hoki ahau ki te paru. <sup>7</sup> Nana, e kore te  
 wehi ki ahau e whakawehi i a koe; e kore ano hoki toku ringa e taimaha iho ki a koe.

<sup>8</sup> He pono kua hakiri oku taringa ki au kupu, a kua rongu atu ahau i te reo o au kupu, e mea  
<sup>9</sup> ana, He ma ahau, kahore oku he; he harakore ahau, kahore hoki he kino i roto i ahau: <sup>10</sup> Na e  
 rapu ana ia i te take riri ki ahau, e kiia ana ahau e ia he hoariri nona; <sup>11</sup> E karapitia ana e ia oku  
 waewae ki te rakau, e ata titiro ana ia ki oku hikoinga katoa. <sup>12</sup> Nana, maku e whawhati tau kupu,  
 ehara tenei mea au i te mea tika; nui atu hoki te Atua i te tangata. <sup>13</sup> He aha koe i totohe ai ki a ia?  
 E kore hoki e korerotia e ia te tikanga o tetahi o ana mea.

<sup>14</sup> Kotahi hoki, ae ra, e rua korerotanga a te Atua, otiia kahore e maharatia e te tangata. <sup>15</sup> I te  
 moe, i te putanga moemoea mai o te po, ina au iho te moe o te tangata, i nga moenga i runga i te  
 takotoranga; <sup>16</sup> Ko reira ia whakapuare ai i nga taringa o nga tangata, hiri ai hoki i te ako mo ratou;  
<sup>17</sup> Kia whakanekehia ai te tangata i tana whakaaro, kia hipokina ai hoki te whakapehapeha o te  
<sup>18</sup> tangata; E puritia ana e ia tona wairua kei tae ki te rua, tona ora kei riro i te hoari.

<sup>19</sup> E whiua ana hoki ia ki te mamae i runga i tona moenga, ki te ngau tonu hoki o ona wheua;  
<sup>20</sup> A whakarihariha ana tona ora ki te taro, tona wairua ki te kai whakaminamina. <sup>21</sup> E honia ana  
 ona kiko, a kore noa e kitea; a purero mai ana ona wheua kihai nei i kitea i mua. <sup>22</sup> Heoi e whakatata  
 ana tona wairua ki te rua, tona ora ki nga kaiwhakamate. <sup>23</sup> Ki te mea he karere tera kei a ia, he  
 kaiwhakaatu tikanga tetahi i roto i te mano, hei whakaatu i tona tika ki te tangata: <sup>24</sup> Na ka tohu  
 tera i a ia, a ka mea, Whakaorangia ia kei heke ki te rua, kua kitea hoki e ahau he utu. <sup>25</sup> Ko tona  
 kiri ka ngawari atu i to te tamaiti; ka hoki iho ia ki nga ra o tona tamarikitanga: <sup>26</sup> Ka inoi ia ki te  
 Atua, a ka manako tera ki a ia; heoi ka kite ia i tona mata i runga i te koa: a ka utua e ia te tika o te  
 tangata. <sup>27</sup> E waiata ana ia i te aroaro o nga tangata, e mea ana, Kua hara ahau, whakaparoritia ake  
 e ahau te tika, a kahore he pai ki ahau: <sup>28</sup> Kua whakaorangia e ia toku wairua kei riro ki te rua, a  
 e kite toku wairua i te marama.  
<sup>29</sup> Nana, e meatia ana enei mea katoa e te Atua, e tuaruatia ana, ae, e tuatorutia ana, ki te tangata,  
<sup>30</sup> Hei whakahoki mai i tona wairua i roto i te rua, kia whakamaramatia ai ki te marama o te ora.  
<sup>31</sup> Kia whai whakaaro mai, e Hopa, whakarongo mai ki ahau: kati tau, a ka korero ahau. <sup>32</sup> Ki te  
 mea he kupu tau, utua mai taku: korero, ko taku hoki i pai ai kia whakatikaia tau. <sup>33</sup> Ki te kahore,  
 whakarongo ki ahau: noho puku koe, a maku koe e whakaako ki te whakaaro nui.

### Chapter 34

<sup>1</sup> I korero ano hoki a Erihu, i mea, <sup>2</sup> Whakarongo ki aku kupu, e te hunga whakaaro nui; kia  
 whai taringa ki ahau, e te hunga mohio. <sup>3</sup> E whakamatau ana hoki te taringa i te kupu, e pera ana  
 me ta te mangai ki te reka o te kai. <sup>4</sup> Ko ta tatou e whiriwhiri ai ma tatou ko te mea tika: kia mohiotia  
 hoki e tatou, e tenei, e tenei, ko te aha te mea pai. <sup>5</sup> Kua mea nei hoki a Hopa, He tika taku, a kua  
 whakapeaua ketia e te Atua te whakawa moku: <sup>6</sup> Ahakoa kei ahau te tika ka kiia ahau he tangata  
 teka; e kore e mahu toku werohanga, ahakoa kahore oku he. <sup>7</sup> Ko wai te tangata e rite ki a Hopa,  
 me te mea he wai te tawai e inumia ana e ia? <sup>8</sup> Kua uru nei ki te tira o nga kaimahi i te he, a e haere

9  
tahi ana me nga tangata kikino. Kua mea hoki ia, Kahore he painga ki te tangata ki te ahua  
atu ia ki te Atua.

10  
No reira whakarongo mai ki ahau, e nga tangata ngakau mohio: e kore rawa te Atua e mahi  
i te kino; e kore rawa hoki te Kaha Rawa e mahi i te he. 11  
Ka utua hoki e ia te tangata mo tana  
mahī, ka rite hoki ki to te tangata ara nga mea e whakawhiwhia e ia ki a ia. 12  
Tika rawa, e kore  
te Atua e kino, e kore ano hoki te Kaha Rawa e whakaputa ke i te whakawa. 13  
Na wai ia i mea  
hei kaitirotiro mo te whenua? Na wai hoki i whakatakoto nga tikanga mo te ao katoa? 14  
Ki te anga  
mai tona ngakau ki te tangata, ki te kohia atu e ia ki a ia tona wairua me tona manawa; 15  
Ka hemo  
ngatahi nga kikokiko katoa, a ka hoki ano te tangata ki te puehu.

16  
Na ki te mea he ngakau mohio tou, whakarongo ki tenei; kia whai taringa mai ki te reo o  
aku kupu. 17  
E whai kingitanga ranei tetahi kotahi e kino ana ki te tika? E whakakino ranei koe ki  
te tangata tika, kaha hoki? 18  
E tau ana ranei te mea atu ki te kingi, He weriweri koe? ki nga rangatira  
ranei, He kino koutou? 19  
Kia iti rawa iho ki a ia e kore nei e whakapai ki te kanohi o nga rangatira,  
e kore nei e hira ake tona pai ki te hunga whai rawa i nga rawakore? No te mea he mahi ratou katoa  
na ona ringa. 20  
Kihai i aha kua mate ratou, kua mate i waenganui po; ka wiri te iwi, ka pahemo  
atu, ka riro te hunga nunui, kahore hoki he ringa. 21  
Kei runga hoki i nga ara o te tangata ona  
kanohi, e kitea ana e ia ona hikoinga katoa. 22  
Kahore he pouiri, kahore he atarangi o te mate e piri  
ai nga kaimahi i te kino. 23  
E kore hoki e nui atu i te tika te mea e whakawaha e ia ki te tangata, e  
haere ai ia ki te aroaro o te Atua ki te whakawa. 24  
Ka wawahia e ia nga tangata nunui, te mohiotia  
nga ara, a whakaturia ake etahi atu i muri i a ratou. 25  
Na e mohio ana ia ki a ratou mahi; a hurihia  
ake ratou e ia i te po, a mongamonga noa ratou. 26  
He hunga kino ratou, pakia iho e ia i te tirohanga  
a te tangata; 27  
Mo ratou i tahuri ke i te whai i a ia, kihai hoki i whakaaro ki tetahi o ona ara: 28  
Na  
ratou hoki i puta ai te tangi a te rawakore ki a ia, a rongoa ana ia ki te tangi a te hunga e tukinotia  
ana. 29  
Ki te meinga e ia kia ata noho, ko wai hei whakararuraru? A ki te huna e ia tona kanohi,  
ko wai e kite i a ia? ahakoa i meatia ki te iwi, ki te tangata ranei, rite tonu. 30  
Kore ake te  
whakaponokore e whai kingitanga, kore ake te iwi e mahangatia.

<sup>31</sup> Kua mea atu ranei ki te Atua, Kua pehia ahau e te whiu, e kore ahau e mahi i te he a muri  
<sup>32</sup> nei? Ko te mea kihai i kitea e ahau mau e whakaatu mai ki ahau; ki te mea i mahi ahau i te he,  
<sup>33</sup> ka mutu taku. Kia rite ranei tana utu ki tau e mea ai, i whakakahoretia ai e koe? Mau te whiriwhiri,  
<sup>34</sup> kahore maku: na mau e korero mai tau i mohio ai. Ka korero mai nga tangata ngakau mahara  
<sup>35</sup> ki ahau, ae ra, nga tangata whakaaro nui e whakarongo ana ki ahau: Kahore he matauranga o  
<sup>36</sup> Hopa i a ia i korero ra, kahore hoki he mahara i roto i ana kupu. He pai me i whakamatauria a  
<sup>37</sup> Hopa a te mutunga ra ano, mo ana kupu i whakahokia mai nei e ia, he mea i rite ki a nga tangata  
 kikino. E tapiritia ana hoki e ia te tutu ki runga ki tona hara, kei te pakipaki ia i ona ringa i  
 waenganui i a tatou, a whakanuia ana e ia ana kupu kite Atua.

### Chapter 35

<sup>1</sup> I korero ano a Erihu, i mea, <sup>2</sup> Ki tou whakaaro he tika tenei mau, e mea ana ranei koe, Nui  
 atu toku tika i to te Atua? <sup>3</sup> I mea ai koe, He aha te rawa ki a koe? a, He aha te painga ki ahau, hira  
<sup>4</sup> ake i te painga me i hara ahau? Maku e whakahoki he kupu ki a koe, ki a koutou ko ou hoa. <sup>5</sup> Kia  
 matatau atu tau titiro ki nga rangi; matakitakina atu hoki nga kapua e tiketike ake na i a koe.  
<sup>6</sup> Mehemea kua hara koe, ka ahatia ia e tau mahi? A ki te whakanuia au mahi tutu, e aha ana ranei  
<sup>7</sup> koe ki a ia? Ki te mea he tika tou, ko te aha e hoatu ana e koe ki a ia? Ko te aha ranei a tou ringa  
<sup>8</sup> e riro ana i a ia? Ka mamae pea tetahi tangata pena i a koe na i tou kino; ka whai painga pea ki  
 tetahi tama a te tangata tou tika.  
<sup>9</sup> He maha no nga tukinotanga i tangi ai ratou; na te ringaringa o te hunga nui i aue ai ratou kia  
<sup>10</sup> awhinatia. Kahore ia tetahi e mea ana, Kei hea toku Kaihanga, te Atua, e homai nei i nga waiata  
<sup>11</sup> i te po? E nui atu nei tana whakaako ki a tatou i tana ki nga kararehe o te whenua, nana hoki i  
<sup>12</sup> nui ai o tatou mahara i o nga manu o te rangi? Karanga ana ratou i reira, heoi kahore he kupu e  
<sup>13</sup> whakahokia mai, he mea na te whakapehapeha o te hunga kino. He pono e kore te tekateka noa  
 e whakarangona mai e te Atua, e kore ano hoki e tirohia mai e te Kaha Rawa.



14 Ka iti rawa iho ki te mea koe, kahore koe e kite i a ia, kei tona aroaro te whakarite whakawa;  
 na ka tatari koe ki a ia! <sup>15</sup> Na, kihai nei ia i tae mai i runga i tona riri, kihai ano hoki i aro nui mai  
 ki te whakamanamana; <sup>16</sup> Koia i puaki ai te mangai o Hopa, he mea horihori kau nei; kahore he  
 matauranga o nga kupu e whakamahatia nei e ia.

### Chapter 36

<sup>1</sup> I korero ano a Erihu, i mea, <sup>2</sup> Tukua ahau, kia iti nei, a ka whakaatu ahau ki a koe; he kupu  
 ano hoki aku mo ta te Atua. <sup>3</sup> Ka tikina atu e ahau toku mohio i tawhiti, ka whakatikaia e ahau ta  
 toku Kaihanga. <sup>4</sup> E kore rawa hoki aku kupu e teka: tenei kei a koe te tangata kua tino nui tona  
 matauranga.  
<sup>5</sup> Nana, he pakari te Atua, e kore ano ia e whakahawea: pakari tonu te kaha o tona matauranga.  
<sup>6</sup> E kore te tangata kino e whakaorangia e ia; mana te hunga mate e whiwhi ai ki nga mea e tika ana  
 ma ratou. <sup>7</sup> E kore e mutu tana titiro ki te tangata tika; engari ka whakanohoia ngatahitia ratou e  
 ia me nga kingi ki runga ki te torona ake ake, a ka whakanekehia ake hoki ratou. <sup>8</sup> Ki te mea kua  
 herea ratou ki te mekameka, mau pu i te rahiri, ara i nga mate, <sup>9</sup> Na ka whakakitea e ia ki a ratou  
 ta ratou mahi, me o ratou he, i mea ai ratou i nga mea whakapehapeha. <sup>10</sup> Ka whakapuaretia ano  
 e ia o ratou taringa ki te ako, a ka ki kia hoki i te kino. <sup>11</sup> Ki te rongou ratou, a ka mahi ki a ia, ka  
 pau o ratou ra i runga i te pai, o ratou tau i runga i nga ahuareka. <sup>12</sup> Otira ki te kore ratou e rongou,  
 ka ngaro ratou i te hoari, hemo iho ratou, kahore hoki he matauranga. <sup>13</sup> Ko te hunga whakaponokore  
 o ratou ngakau, puranga rawa i a ratou te riri; kahore a ratou karanga awhina ina herea ratou e ia.  
<sup>14</sup> Ka mate ratou i te taitamarikitanga, a ka ngaro to ratou ora i roto i te hunga poke.  
<sup>15</sup> Ko tana he whakaora i te rawakore ina mate, e whakapuaretia ana e ia o ratou taringa ina  
 tukinotia. <sup>16</sup> Ae ra, me koe ano, tera koe e riro i a ia i roto i te kuititanga ki te wahi whanui; a ki  
 tonu i te ngako te mea e whakatakotoria ki runga ki tau tepu. <sup>17</sup> Otiia ki tonu koe i te tikanga a te  
 tangata kino; a mau pu koe i nga tikanga, i te whakarite whakawa. <sup>18</sup> Na i te mea he riri tenei, kia

tupato kei riro koe i te nui o au rawa; aua hoki koe e whakapeautia e te nui o te utu. <sup>19</sup> E ranea  
 ranei ou rawa, e kore ai koe e taka he? nga uaua katoa ranei o tou kaha? <sup>20</sup> Kua e hiahiatia te po,  
 te wa e riro ai nga tangata i runga i to ratou whai. <sup>21</sup> Kia tupato, kua e tahuri ki te kino; ki tau hoki  
 he pai ake tenei i nga mate. <sup>22</sup> Nana, ko te Atua, ko tona kaha hei whakanui, ko wai te kaiwhakaako  
 hei rite mona? <sup>23</sup> Ko wai te kaitohutohu i te ara mona? Ko wai hei mea, Kua he tau mahi?  
<sup>24</sup> Kia mahara kia whakanuia e koe tana mahi, e waiatatia nei e te tangata. <sup>25</sup> Kua tirohia nei  
 e nga tangata katoa e matakitakina mai nei e te tangata i tawhiti. <sup>26</sup> Nana, he nui te Atua, e kore  
 ano e mohiotia e tatou; e kore ano hoki te maha o ona tau e taea te rapu atu. <sup>27</sup> Ko ia nei hei ngongo  
 ake i nga pata wai, ka tauia i tona kohu hei awaha: <sup>28</sup> Ka ringihia iho nei e nga kapua, a ka maturuturu  
 nui ki runga ki te tangata. <sup>29</sup> Ae ra, e mohiotia ana ranei e tetahi nga horahanga o nga kapua, te  
 ngangau o tona tapenakara? <sup>30</sup> Nana, e horahia ana e ia tona marama a tawhio noa i a ia; e hipokina  
 ana hoki e ia te takere o te moana. <sup>31</sup> Ko ana mea hoki ena hei whakawa mo nga iwi, nui tonu te  
 kai e homai ana e ia. <sup>32</sup> E hipokina ana e ia ona ringa ki te uira, a whakahaua iho e ia te wahi e pa  
 atu ai. <sup>33</sup> Hei kaiwhakaatu i a ia tona haruru, e waitohu ana hoki ki nga kararehe i te tupuhi meake  
 puta mai.

### Chapter 37

<sup>1</sup> Na konei ano wiri ana toku ngakau, maunu atu ana i tona wahi. <sup>2</sup> Ata whakarangona tona reo  
 e papa ana, te pakutanga hoki e puta mai ana i tona mangai. <sup>3</sup> E whakatikaia atu ana e ia ki nga  
 wahi katoa i raro i te rangi, ko tona uira hoki ki nga pito o te whenua. <sup>4</sup> I muri iho ko te reo e  
 hamama ana; papa ana te whatitiri o te reo o tona nui; e kore ano era a tauhikuhiku ina rangona  
 tona reo. <sup>5</sup> Ko ta te Atua whatitiri he reo whakamiharo; nui atu ana mahi, e kore hoki e mohiotia.  
<sup>6</sup> E ki ana hoki ia ki te hukarere, Hei runga koe i te whenua; ki te ua punehunehu ano hoki, raua  
 ko te ua ta o tona kaha; <sup>7</sup> Hiritia ake e ia te ringa o nga tangata katoa; kia mohio ai nga tangata  
 katoa nana nei i hanga ki tana mahi. <sup>8</sup> Haere ana nga kirehe ki nga piringa, noho ana i o ratou

<sup>9</sup> nohoanga. Puta mai ana te tupuhi i te whare o te tonga: te matao hoki i te hauraro. <sup>10</sup> Na te  
 manawa o te Atua i homai te huka: a kuiti iho te whanuitanga o nga wai. <sup>11</sup> Ae ra, e utaina ana e  
 ia te kapua matotoru ki te houku; tohatohaina ana e ia te kohu o tana uira: <sup>12</sup> E whakakopikopikoa  
 ana ano a tawhio noa, he mea hoki na ona whakaaro: hei mea i nga mea katoa e whakahaua atu ana  
 e ia ki te mata o te ao: <sup>13</sup> E whakaputaina ana e ia hei whiu, hei mea ranei mo tona whenua, hei  
 atawhai ranei.  
<sup>14</sup> Kia whai taringa mai ki tenei, e Hopa: tu marie, ka whakaaro ki nga mea whakamiharo a te  
 Atua. <sup>15</sup> E mohio ana ranei koe ki ta te Atua whakahautanga ki a ratou i tana, i puta ai te marama  
 o tana kapua? <sup>16</sup> E mohio ana ranei koe ki nga paunatanga o nga kapua, ki nga mahi whakamiharo  
 a te tino o te matauranga? <sup>17</sup> Ki ou kakahu nei ka mahana, ina whakamarietia e ia te whenua ki te  
 hau tonga? <sup>18</sup> Ka taea ranei e koe te whakatakoto ngatahi me ia te rangi hei papatupu, ano he  
 whakaata whakarewa? <sup>19</sup> Whakaaturia mai ki a matou ta matou e korero ai ki a ia; e kore hoki e  
 tika i te pouri ta matou whakatakoto o te korero. <sup>20</sup> E korerotia ranei ki a ia kei te mea ahau ki te  
 korero? Kia hiahia ranei te tangata kia horomia ia?  
<sup>21</sup> Na inaianei e kore nga tangata e kite ana i te marama e wheriko mai nei i te rangi: otiia ka  
 tika atu te hau, ka whakawateatia ratou. <sup>22</sup> E ahu mai ana i te hauraro te aho ano he koura; kei te  
 Atua te kororia whakawehi. <sup>23</sup> Ko te Kaha Rawa, e kore ia e taea te whakataki e tatou; hira rawa  
 tona kaha; a e kore ia e tukino i tana whakarite whakawa, i te nui o te tika. <sup>24</sup> Koia ka wehi nga  
 tangata i a ia: e kore ia e whai whakaaro ki te hunga ngakau mohio.

### Chapter 38

<sup>1</sup> Katahi a Ihowa ka whakahoki kupu ki a Hopa i roto i te tukauati, a ka mea, <sup>2</sup> Ko wai tenei e  
 whakapouri nei i nga whakaaro ki nga kupu kahore ona matauranga? <sup>3</sup> Tena ra, whitikiria tou hope,  
 whakatane; ka ui hoki ahau ki a koe, a mau e whakaatu mai ki ahau.  
<sup>4</sup> I hea koia koe i ahau e whakatakoto ana i te turanga o te whenua? Whakaaturia mai, ki te mea  
 e mohio ana koe ki te whakaaro. <sup>5</sup> Na wai i whakarite ona ruri? ki te mea e mohio ana koe: na wai

hoki i whakamaro te aho ki runga? <sup>6</sup> I whakaukia ona turanga ki runga ki te aha? Na wai hoki i  
 whakatakoto tona kohatu kokonga; <sup>7</sup> I te mea i waiata ngatahi nga whetu o te ata, a i hamama nga  
 tama katoa a te Atua i te koa? <sup>8</sup> Na wai hoki i tutaki te moana ki te tatau, i a ia e puta mai ana, me  
 te mea e whanau mai ana i roto i te kopu? <sup>9</sup> I ahau ra i mea ai i te kapua hei kakahu mona, i te pouri  
 kerekere hei takai mona. <sup>10</sup> A whakapuakina ana e ahau taku tikanga mona, mea rawa ki nga tutaki,  
 ki nga tatau, <sup>11</sup> Me taku ki atu ano, Ka taea mai e koe a konei, kati; hei konei ou ngaru whakakake  
 mau ai?  
<sup>12</sup> Ko koe koia, i ou ra nei, te kaiwhakahau i te ata; nau ranei te puaotanga i mohio ai ki tona  
 wahi; <sup>13</sup> Kia rurukutia e ia nga pito o te whenua, a ruperupea ake nga tangata kikino i roto? <sup>14</sup> Kua  
 whiti ke, kua pera ano me te paru i te hiri: tu ake ana nga mea katoa ano he kakahu: <sup>15</sup> A e  
 kaiponuhia ana to ratou marama ki te hunga kino, whati iho te ringa whakakake. <sup>16</sup> Kua tae atu  
 ranei koe ki nga matapuna o te moana? Kua whakatakina haeretia ranei e koe te rire? <sup>17</sup> Kua  
 whakapuaretia ranei ki a koe nga kuwaha o te mata? Kua kite ranei koe i nga kuwaha o te atarangi  
 o te mate? <sup>18</sup> Kua oti ranei te whakaaro e koe te whanuitanga o te whenua? Korero mai, ki te mea  
 e mohiotia katoatia ana e koe. <sup>19</sup> Kei hea te ara ki te nohoanga o te marama? Te pouri hoki, kei  
 hea tona wahi? <sup>20</sup> Kia kawea atu ai e koe ki tona rohe, a mohio iho koe ki nga huarahi ki tona  
 whare? <sup>21</sup> I mohio pea koe no te mea i whanau koe i taua wa, a he maha ou ra! <sup>22</sup> Kua tomo ranei  
 koe ki nga takotoranga o te hukarere, kua kite ranei koe i nga takotoranga o te whatu, <sup>23</sup> I aku i  
 rongoa ai mo te wa o te he, mo te ra o te tatauranga, o te pakanga? <sup>24</sup> Tena koa, te ara i marara atu  
 ai te marama, i pakaru atu ai te marangai ki runga ki te whenua?  
<sup>25</sup> Na wai i wehe he awa mo te waipuke, he ara mo te uira o te whatitiri; <sup>26</sup> Kia ua ai ki te  
 whenua, ki te wahi kahore nei he tangata; ki te koraha, kahore nei o reira tangata; <sup>27</sup> Hei  
 whakamakona i te tuhea, i te ururua; hei mea kia pariri te tupu o te otaota hou? <sup>28</sup> He matua tane  
 ano ranei to te ua? I whanau ranei i a wai nga pata o te tomairangi? <sup>29</sup> I puta mai i roto i to wai  
 kopu te huka tio? Ko te huka o te rangi, he whanau tena na wai? <sup>30</sup> Me te mea he kohatu e huna  
 ana i te wai; a whakatotoka ana te mata o te rire. <sup>31</sup> E taea ranei e koe te here te huihui o Matariki,

e wewete ranei nga here o Tautoru? <sup>32</sup> E taea ranei e koe te arahi mai te Mataroto i tona wa, te taki  
 mai ranei a Aketura ratou ko tana ropu? <sup>33</sup> E mohio ana ranei koe ki nga tikanga o te rangi? Mau  
 ranei e whai mana ai ki runga ki te whenua? <sup>34</sup> E ara ranei i a koe tou reo ki nga kapua, kia nui ai  
 nga wai hei taupoki i a koe? <sup>35</sup> E taea ranei e koe nga uira te unga atu, e haere ai ratou, me ta ratou  
 ki ano ki a koe, Tenei matou? <sup>36</sup> Na wai i whakanoho nga whakaaro nunui ki nga wahi o roto? Na  
 wai i homai nga mahara ki te ngakau? <sup>37</sup> Ko wai te mea whakaaro nui hei tatau i nga kapua? Ko  
 wai hei tahoro i nga ipu o te rangi? <sup>38</sup> Ina ka papatupu te puehu ano he mea whakarewa, a ka piri  
 nga pokuru ki a ratou ano? <sup>39</sup> Mau ranei e hopu he kai ma te raiona? Mau e nui ai he oranga mo  
 nga kua raiona, <sup>40</sup> Ina tapapa iho ratou i o ratou nohoanga, ina noho i te piringa whanga ai? <sup>41</sup> Na  
 wai i rite ai tana kai ma te raweni, ina tangi ana pi ki te Atua, ina kopikopiko ratou i te kore kai?

### Chapter 39

<sup>1</sup> E mohiotia ana ranei e koe te wa e whanau ai nga koati mohoa o te kamaka? E kitea putia  
 ana ranei e koe te wa e whakamamae ai nga hata? <sup>2</sup> E taua ano ranei e koe nga marama e rite ana  
 i a ratou? E mohio ana ranei koe ki te wa e whanau ai ratou? <sup>3</sup> Tuohu ana ratou, kua puta mai a  
 ratou kua, akiritia mai ana e ratou o ratou mea whakapouri. <sup>4</sup> E pai ana te ahua o a ratou kua, e  
 tupu ana i te parae; ka haere atu ratou, a kahore e hoki mai ano. <sup>5</sup> Na wai i tuku te kaihe mohoa  
 kia haere noa atu; nga here o te kaihe mohoa, na wai i wewete? <sup>6</sup> Ko te whare i whakaritea nei e  
 ahau mona, ko te koraha: ko ona nohoanga ko te wahi titiohea. <sup>7</sup> Whakahaweatia iho e ia te ngangau  
 o te pa; e kore ia e rongu ki te reo o te kaiakiaki. <sup>8</sup> Ko tona wahi kai kei te tuahiwi o nga maunga,  
 e rapua ana e ia nga mea matomato katoa. <sup>9</sup> E pai ranei te unikanga kia mahi ki a koe? Kei tau  
 takotoranga kai ranei he moenga mona? <sup>10</sup> E herea ranei e koe te unikanga ki tona taura i te awa  
 parautanga? E rakarakatia ranei e ia nga raorao me tana whai ano i a koe? <sup>11</sup> E whakawhirinaki  
 atu ranei koe ki a ia, no te mea e nui ana tona kaha? E whakarerea atu ranei e koe tau mahi mana?

12 E whakaponono atu ranei koe mana au hua e whakahoki mai; mana e kohikohi mai ki tau patunga witi?

13 E whakamanamana ana te parirau o te otereti; otira he atawhai ano ranei ta ona hou, ta ona raukura? 14 E whakarerea ana e ia ona hua ki te whenua, whakamahanatia iho e ia ki te puehu,

15 Wareware ake ia tera pea e pepe i te waewae, e takahia ranei e te kirehe o te parae. 16 He mea pakeke ia ki ana pi me te mea ehara i a ia: ahakoa ka maumauria tana mahi, kahore ona manawapa;

17 No te mea i whakakahoretia e te Atua he ngakau mahara mona, kihai hoki i homai he whakaaro ki a ia. 18 I te wa e maranga ai ia ki runga, whakahaweatia iho e ia te hoiho raua ko tona kaieke.

19 Nau ranei i hoatu tona kaha ki tae hoiho? Nau ranei tona kaki i whakakakahu ki te huruhuru?

20 Nau ranei ia i mea kia pekepeke, kia pera me te mawhitiwhiti? He hanga whakawehi te kororia o tona whewhengu. 21 E hukari ana ia ia te raorao, me te koa ano ki tona kaha: tika tonu ia ki te

hunga mau patu. 22 Whakahawea ana ia ki te wehi, kahore ona matakū; e kore ano ia e nunumi mai i te hoari. 23 Papa ana te papa pere ki tona taha, te tao e rarapa ana, me te timata. 24 E horomia ana e ia te whenua, me te ngangau me te riri; kahore ia i te whakaponono ko te reo tera o te tetere.

25 Ka tangi ana te tetere ka mea ia, Ha, ha! I tawhiti ano ka hongia e ia te pakanga, te whatitiri o nga rangatira, me te hamama.

26 He mohio nou i rere ai te kahu, i roha ai i ona parirau, i anga ai whaka te tonga? 27 Nau te kupu i kake ai te ekara? i hanga ai e ia tana ohanga ki te wahi tiketike? 28 Noho ana ia i runga i te

kamaka, kei reira tona kainga, kei te kamaka keokeo, kei te pa kaha. 29 A rapua ana e ia he kai i

reira; e kite atu ana ona kanohi i tawhiti. 30 Horomititia ake ana hoki nga toto e ana pi; a ko te wahi i nga tupapaku,, kei reira ano ia.

## Chapter 40

1 Korero mai ano a Ihowa ki a Hopa, i mea, 2 E tohe ana ranei ki te Kaha Rawa te tangata whakatohutohu? Ma te tangata e whakatupehupehu ana ki te Atua, mana e korero mai. 3 Ano ra

ko Hopa ki a Ihowa; i mea ia, 4 Nana, ehara noa iho ahau. Ko te aha taku e whakahoki atu ai ki a

5  
koe? Ka kopania toku ringa ki toku mangai. Kua kotahi taku koreotanga, a e kore ahau e whakahoki kupu atu; a tuarua rawa, otira kahore atu aku.

6 Katahi ka whakahokia mai e Ihowa ki a Hopa i roto i te tukauati, ka mea, 7 Tena ra, whakatane, whitikiria tou hope, a ka ui atu ahau ki a koe, mau ano e whakaatu mai ki ahau. 8 Me whakakahore ano ranei e koe taku whakawa? Me whakahe ki ahau kia whakatikaia ai tau? 9 He ringa pera ranei tou i to te Atua? He reo whatitiri ranei tou, he pera i tona? 10 Tena ra, rakai i a koe inaianei ki te rangatiratanga, ki te kororia; tatau i a koe ki te honore, ki te mana. 11 Ringihia atu te puhaketanga o tou riri; tirohia atu nga mea whakakake katoa, whakaititia iho. 12 Titiro atu ki nga mea whakakake katoa, whakapikoa iho; takahia iho ano hoki te hunga kino i te wahi e tu na ratou. 13 Huihuia atu ratou, huna ki te puehu, herea o ratou mata ki te wahi ngaro. 14 Na ko reira ahau whakaae ai ki a koe, ma tou ringa matau ano koe e whakaora.

15 Na whakaaroa a Pehemoto, he mea hanga ngatahi korua naku; e kai ra i te tarutaru, ano he kau. 16 Nana, ko tona kaha kei tona hope, ko tona pakaritanga kei nga uaua o tona kopu. 17 Ko tona hiawero, ano he hita e tawhiria ana e ia: powhiwhiwhi tonu nga uaua o tona huha. 18 Ko ona wheua, ano he korere parahi; ko ona rara, he poro rino. 19 Ko ia te tino mea nui o nga ara o te Atua: ko tona kaihanganga anake hei whakapa i tana hoari ki a ia. 20 He pono ko nga maunga hei homai kai mana; kei reira ano e takaro ana nga kirehe katoa o te parae. 21 Ko tona takotoranga ko raro i nga rakau kouru nui, i te rake kakaho, i te repo. 22 Hei taupoki mona te whakamarumaruru o nga rakau kouru nui, kei tetahi taha ona, kei tetahi taha, nga wirou o te awa. 23 Nana, ki te aki mai te waipuke, e kore ia e tui; u tonu tona whakaaro, ahakoa kokiri noa mai a Horano ki tona mangai. 24 E hopukia ranei ia e tetahi i a ia e mataara ana, e poka ranei i tona ihu ki te rore, puta noa?

## Chapter 41

1 E taea ranei a Rewiatana te kukume mai e koe ki te matau? te pehi ranei i tona arero ki te aho? 2 E whakanohoia ranei e koe he aho ki tona ihu? E pokaia ranei e koe tona kauae ki te matau?

<sup>3</sup> E maha ranei ana inoi ki a koe? E korero ngawari ranei ia ki a koe? <sup>4</sup> E whakarite kawenata ranei  
 ia ki a koe? e riro ai ia i a koe hei pononga oti tonu mai? <sup>5</sup> Ka rite ranei ia ki te manu hei mea takaro  
 mau? E herea ranei ia e koe hei mea ma au kotiro? <sup>6</sup> E waiho ranei ia hei taonga hokohoko ma nga  
 ropu tangata hi ika? E wehewehea atu ranei ma nga kaihokohoko? <sup>7</sup> E kapi ranei tona kiri i o tao?  
 tona pane i nga wero ika? <sup>8</sup> Kia pa tou ringa ki a ia; maharatia te whawhai, a kei pena a mua.  
<sup>9</sup> Nana, he hori kau te manako ki a ia: e kore ranei tetahi e hinga noa ki te kite kau atu i a ia?  
<sup>10</sup> Kahore he tangata e maia rawa hei whakaoho i a ia: na ko wai e tu ki toku aroaro?  
<sup>11</sup> Ko wai te tangata nana te mea kua takoto wawe ki ahau, e whakautu ai ahau ki a ia? Ahakoa  
 he aha te mea i raro i nga rangi, puta noa, naku katoa. <sup>12</sup> E kore e huna e ahau te korero mo ona  
 wahi, mo tona kaha, mo te ataahua hoki o tona hanganga. <sup>13</sup> Ma wai e tihore a waho o tona kakahu?  
 Ko wai e tae ki tana paraire rererua? <sup>14</sup> Ma wai e whakatuwhera nga tatau o tona mata? He wehi  
 kei ona niho a taka noa. <sup>15</sup> Ko tana e whakamanamana ai ko ona unahi pakari; tutaki rawa pera i  
 te hiri piri tonu. <sup>16</sup> Na, i te tata tonu o tetahi ki tetahi, e kore te hau e puta i waenga. <sup>17</sup> Piri tonu  
 ratou ki a ratou ano; mau tonu, e kore ano e taea te wehe. <sup>18</sup> Ka tihe ia, ka kowha mai te marama;  
 a ko te rite i ona kanohi kei nga kamo o te ata. <sup>19</sup> E puta ana mai i tona mangai he rama mura,  
 mokowhiti ana nga koraahi. <sup>20</sup> Puta ana te paowa i ona pongaponga, me te mea no te kohua e  
 koropupu ana, no te otaota e kaia ana. <sup>21</sup> Ngiha ana nga waro i tona ha, rere atu ana te mura i tona  
 mangai. <sup>22</sup> Kei tona kaki te kaha e noho ana, e tuapa ana te pawera i tona aroaro. <sup>23</sup> Ko ona kikokiko  
 tawerewere piri tonu: maro tonu ki runga ki a ia; e kore e taea te whakakorikori. <sup>24</sup> Pakari tonu  
 tona ngakau ano he kamaka; ae ra, maro tonu ano ko to raro kohatu huri.. <sup>25</sup> Ka whakarewa ia i a  
 ia ki runga, ka wehi nga tangata nunui: na te pororaru ka porangi noa iho ratou. <sup>26</sup> Ki te whai tetahi  
 i a ia ki te hoari, e kore e taea; ahakoa e te tao, e te pere, e te koikoi ranei. <sup>27</sup> Ki tona whakaaro he  
 kakau witi te rino, he rakau popopopo te parahi. <sup>28</sup> E kore ia e tahuti i te pere: ki a ia ka meinga  
 noatia nga kohatu o te kotaha hei papapa. <sup>29</sup> Kiia ake e ia nga patu hei papapa: e kataina ana e ia  
 te huhu o te tao. <sup>30</sup> Ko raro ona e rite ana ki te kohatu koikoi: e wharikitia ana e ia a runga o te



<sup>31</sup> paru ano he patunga witi. E meinga ana e ia te rire kia koropupu ano he kohua, me te moana kia  
<sup>32</sup> rite ki te hinu. E hangaia ana e ia he huarahi kia marama i muri i a ia; tera e maharatia he hina  
<sup>33</sup> te moana. I te whenua nei kahore he mea hei rite mona, he mea i hanga nei kahore ona wehi.  
<sup>34</sup> E titiro ana ia ki nga mea tiketike katoa: he kingi ia mo nga tama katoa a te whakapehapeha.

## Chapter 42

<sup>1</sup> A no ra ko Hopa ki a Ihowa; i mea ia, <sup>2</sup> E mohio ana ahau e taea e koe nga mea katoa, a e  
<sup>3</sup> kore tetahi whakaaro ou e taea te pehi. Ko wai tenei e huna nei i te whakaaro, a kahore nei he  
 matauranga? No reira korerotia ana e ahau he mea kihai i mohiotia e ahau, he mea whakamiharo  
<sup>4</sup> rawa, e kore nei e taea e ahau, a kihai i mohiotia e ahau. Tena ra, whakarongo, a ka korero ahau;  
<sup>5</sup> ka ui ahau ki a koe, a mau e whakaatu mai ki ahau. I rongohia ahau ki a koe, he rongohia na te taringa;  
<sup>6</sup> tena ko tenei, ka kite a kanohi nei ahau i a koe, Na whakarariharia ana ahau ki ahau ano, a ka  
 ripeneta i roto i te puehu, i te pungarehu.  
<sup>7</sup> Heoi i te mutunga o ta Ihowa korero i enei kupu ki a Hopa, na ka mea a Ihowa ki a Eripata  
 Temani, Kua mura toku riri ki a koe, ki a koutou ko ou hoa tokorua: no te mea kihai koutou i korero  
<sup>8</sup> i te mea tika moku, kihai i rite ki ta taku pononga, ki ta Hopa. Na tikina etahi puru ma koutou kia  
 whitu, kia whitu hoki nga hipi toa, a ka haere ki taku pononga, ki a Hopa, ka whakaeke ai i etahi  
 tahunga tinana ma koutou; a ma taku pononga, ma Hopa, e inoi mo koutou; ka manako hoki ahau  
 ki a ia, kia kore ai ahau e mea ki a koutou kia rite ki ta koutou mahi wairangi; kihai hoki koutou i  
<sup>9</sup> korero i te mea tika moku, kihai i rite ki ta taku pononga, ki to Hopa. Heoi haere ana a Eripata  
 Temani, a Pirirara Huhi, a Topara Naamati, a meatia ana e ratou ta Ihowa i korero ai ki a ratou. A  
 ka manako a Ihowa ki a Hopa.  
<sup>10</sup> A whakahokia ana a Hopa e Ihowa i te whakarau, i a ia i inoi ra mo ona hoa. Na, ko nga  
<sup>11</sup> mea katoa i a Hopa i mua, whakanekehia ake ana e Ihowa kia pera atu ano te maha. Katahi ka  
 haere mai ona tuakana, ona teina katoa, ratou ko ona tuahine katoa, me te hunga katoa i mohio ki  
 a ia i mua, hei hoa mona, ki te kai taro i roto i tona whare: tangi ana ki a ia, whakamarie ana i a ia  
 mo te he katoa i whakaekea nei e Ihowa ki a ia; a homai ana ki a ia e tenei, e tenei, tetahi moni me  
<sup>12</sup> tetahi whakakai koura. Heoi manaakitia ana a Hopa e Ihowa i te whakamutunga, nui atu i to te  
 timatanga; a kotahi tekau ma wha mano ana hipi, e ono mano nga kamera, kotahi mano topu nga

kau, kotahi mano nga kaihe uha. <sup>13</sup> Tokowhitu ano ana tama, tokotoru nga tamahine. <sup>14</sup> A tapa  
 iho e ia te ingoa o te tuatahi ko Hemaima, ko te ingoa o te tuarua ko Ketia, a ko te ingoa o te tuatoru  
 ko Kerenehapuku. <sup>15</sup> A kihai i kitea he wahine hei rite mo nga tamahine a Hopa te ataahua i te  
 whenua katoa; a i hoatu hoki e to ratou papa he wahi mo ratou i waenganui i o ratou tungane. <sup>16</sup> A  
 i ora a Hopa i muri i tenei kotahi rau e wha tekau nga tau, i kite ano ia i ana tamariki, i nga tamariki  
 ano hoki a ana tamariki, e wha nga whakatupuranga. <sup>17</sup> Heoi ka mate a Hopa, he koreheke, he  
 maha hoki ona ra.

## Psalms

### Chapter 1

<sup>1</sup> Ka hari te tangata kahore nei e haere i te whakaaro o te tangata kino, a kahore e tu i te ara o  
 te hunga hara, kahore ano e noho i te nohoanga o te hunga whakahi. <sup>2</sup> Engari ko te ture a Ihowa  
 tana e whakaahuareka ai; kei tona ture ona whakaaro i te ao, i te po. <sup>3</sup> E rite hoki ia ki te rakau i  
 whakatokia ki te taha o nga awa wai, e whai hua nei i te po e hua ai: e kore tona rau e memenga;  
 a ka pono ana mea katoa e mea ai ia.  
<sup>4</sup> E kore e pera nga tangata kino; engari ka rite ki te papapa e aia ana e te hau. <sup>5</sup> Ae ra, e kore  
 e tu te hunga kino i te whakawakanga, me te hunga hara i te whakaminenga o te hunga tika. <sup>6</sup> E  
 matau ana hoki a Ihowa ki te ara o te hunga tika: ko te ara ia o te hunga kino e ngaro.

### Chapter 2

<sup>1</sup> He aha ka nana ai nga tauwiwi, ka whakaaro horihori ai nga iwi? <sup>2</sup> Whakatika mai ana nga  
 kingi o te whenua, runanga tahi ana nga ariki, ki te whawhai ki a Ihowa, ki tana tangata hoki i  
 whakawahi ai; me te ki ano, <sup>3</sup> Kia motumotuhia e tatou a raua here, kia akiritia a raua taura i a  
 tatou. <sup>4</sup> Ko ia kei te rangi e noho ana, ka kata ia: ka whakahi te Ariki ki a ratou. <sup>5</sup> Na ka korero ia  
 ki a ratou me te riri ano: ka tino weriweri hoki, ka whakahorere i a ratou, <sup>6</sup> Ahakoa ra ka whakawahia  
 e ahau taku kingi ki runga ki taku maunga tapu, ki Hiona.

<sup>7</sup> Maku e whakapuaki te kupu, kua mea a Ihowa ki ahau, Ko koe taku tama, nonaiane koe i  
<sup>8</sup> whakaturia ai e ahau. Inoi ki ahau, a ka hoatu e ahau ki a koe nga tauwi hei kainga mou, me  
<sup>9</sup> nga topito o te whenua hei nohoanga tupu mou. Ka wawahi koe i a ratou ki te whiu rino,  
 mongamonga noa ratou i a koe, ano he oko na te kaihangarihi.  
<sup>10</sup> Na kia mahara ra, e nga kingi: kia akona, e nga kaiwhakawa o te whenua. <sup>11</sup> Mahi atu ki a  
<sup>12</sup> Ihowa i runga i te wehi, kia hari me te wiri. Kihia te tama kei riri ia, a ka mate koutou i te ara,  
 ka hohoro tonu hoki te mura o tona riri. Ka hari katoa te hunga e whakawhirinaki ana ki a ia.

### Chapter 3

<sup>1</sup> He himene na Rawiri, i tona omanga atu i tana tama i a Apoharama. E Ihowa, ano te tini o  
 oku hoariri, he tokomaha te hunga e whakatika mai ana ki ahau. <sup>2</sup> He tokomaha te mea ana ki toku  
 wairua, hore rawa he whakaoranga mona i te Atua. (Hera. <sup>3</sup> Ko koe ia, e Ihowa, hei whakangungu  
 rakau moku, hei kororia moku, hei kaiwhakaara i toku matenga.  
<sup>4</sup> I karanga toku reo ki a Ihowa: a whakahoki kupu mai ana ia ki ahau i tona maunga tapu.  
<sup>5</sup> (Hera. I takoto ahau, i moe; i ara ake ano; na Ihowa hoki ahau i whakamau ake. <sup>6</sup> E kore ahau e  
 mataku i nga mano tini o te iwi, kua whakatika mai nei ki ahau karopoti noa. <sup>7</sup> Whakatika, e Ihowa;  
 whakaorangia ahau, e toku Atua: nau hoki i patu te kauae o oku hoariri katoa; mangungu noa i a  
<sup>8</sup> koe nga niho o te hunga kino. Na Ihowa te whakaoranga: kei runga i tau iwi tau manaaki. (Hera.

### Chapter 4

<sup>1</sup> Ki te tino kaiwhakatangi Nekinoto. He himene na Rawiri. Whakahokia mai he kupu ki ahau,  
 e te Atua o toku tika, ina karanga ahau: i ahau i te pouri i whakaputaina ahau e koe; kia atawhai ki  
 ahau, whakarongo ki taku inoi. <sup>2</sup> E nga tama a te tangata, kia pehea te roa o ta koutou mea i toku  
 kororia hei whakama, o ta koutou aroha ki te horihori, o ta koutou whai i te teka? (Hera. <sup>3</sup> Otiia  
 kia mohio koutou he mea momotu ke na Ihowa te tangata tapu mana: e whakarongo a Ihowa ua  
<sup>4</sup> karanga ahau ki a ia. Kia oho koutou, a kua e hara: kororerero ki o koutou ngakau i runga i o

<sup>5</sup>  
koutou moenga, me te ata takoto ano. (Hera. Patua nga whakahere o te tika, me te okioki ano ki a Ihowa.

<sup>6</sup>  
He tokomaha te mea ana, Ma wai e whakakite te pai ki a matou? Kia ara, e Ihowa, te marama o tou mata ki runga ki a matou. <sup>7</sup> Hira ake te hari i homai e koe ki roto ki toku ngakau i to ratou i te wa i hua ai a ratou witi, ta ratou waina. <sup>8</sup> Ka takoto marire ahau, a moe tonu iho: ko koe anake hoki, e Ihowa, hei mea kia au toku noho.

## Chapter 5

<sup>1</sup>  
Ki te tino kaiwhakatangi Nehiroto. He himene na Rawiri. Tahuri tou taringa, e Ihowa, ki aku kupu, kia mohio koe ki toku whakaaroaronga. <sup>2</sup> Whakarongo ki te reo o taku karanga, e toku Kingi, e toku Atua, he inoi hoki taku ki a koe. <sup>3</sup> E rongo koe ki toku reo, e Ihowa, i te ata; i te ata ka whakatikaia atu e ahau taku inoi ki a koe, a ka titiro matatau atu. <sup>4</sup> Ehara hoki koe i te Atua e pai ana ki te hara, e kore te kino e noho ki a koe. <sup>5</sup> E kore te hunga wairangi e tu ki tou aroaro: e kinongia ana e koe nga kaimahi katoa i te kino. <sup>6</sup> E ngaro i a koe te hunga korero teka; e whakarihariha ana a Ihowa ki te tangata toto, ki te tangata hianga.

<sup>7</sup>  
Ko ahau ia ka haere i runga i te tini o au atawhai ki tou whare: ka koropiko ki te ritenga o tau temepara tapu, me te wehi ano ki a koe. <sup>8</sup> E Ihowa, arahina ahau i runga i tou tika, he hoariri hoki oku; whakatikaia tau ara i mua i ahau. <sup>9</sup> Kahore hoki he pono i o ratou mangai; he kino kau a roto i a ratou; he urupa puare noa o ratou korokoro; e patipati ana o ratou arero. <sup>10</sup> Whakataua te hara ki a ratou, e te Atua; kia hinga ratou i o ratou whakaaro; peia atu ratou me a ratou tini mahi tutu; mo ratou i whakakeke ki a koe. <sup>11</sup> Na kia hari katoa te hunga e whakawhirinaki ana ki a koe: kia hamama tonu ratou i te koa, mo ratou e hipokina nei e koe; a kia whakamanamana ki a koe te hunga e aroha ana ki tou ingoa. <sup>12</sup> No te mea ka manaakitia e koe, e Ihowa, te tangata tika; me he whakangungu rakau te manako e karapotia ai ia e koe.

## Chapter 6

<sup>1</sup> Ki te tino kaiwhakatangi Nekinoto, he mea Heminiti. He himene na Rawiri. E Ihowa, kua e whakatupehupehu mai ki ahau, ina riri koe, kua ano ahau e pakia ina arita mai koe. <sup>2</sup> E Ihowa, tohungia ahau, he ngoikore hoki ahau: rongoatia ahau, e Ihowa, e ohooho ana hoki oku wheua. <sup>3</sup> E ohooho noa iho ana hoki toku wairua: ko koe ia, e Ihowa, kia pehea atu te roa? <sup>4</sup> Hoki mai, e Ihowa, kia mawhiti atu toku wairua: kia mahara ki tou aroha, a whakaorangia ahau. <sup>5</sup> Kahore hoki he mahara ki a koe ina mate: ko wai hei whakawhetai ki a koe i roto i te reinga? <sup>6</sup> Mauiui iho ahau i toku auetanga; e manu ana toku moenga i ahau a pau noa te po; e whakamakukuria ana e ahau toku takotoranga ki oku roimata. <sup>7</sup> Pakoko kau toku kanohi i te tangi; kua koroheke haere i oku hoariri katoa. <sup>8</sup> Mawehe atu i ahau, e nga kaimahi katoa i te kino; kua rongo nei hoki a Ihowa i te reo o taku tangi. <sup>9</sup> Kua rongo a Ihowa ki taku inoi; ka manako a Ihowa ki taku karakia. <sup>10</sup> Ka whakama, ka pokaikaha noa iho oku hoariri katoa: ka hoki ratou, ka pa whakarere atu te whakama.

## Chapter 7

<sup>1</sup> He Hikaiono na Rawiri, tana i waiata ai ki a Ihowa mo nga kupu a Kuhu Pineamine. E Ihowa, e toku Atua, kei a koe toku whakawhirinakitanga: kia ora ahau i te hunga katoa e aru ana i ahau, kia mawhiti atu hoki ahau: <sup>2</sup> Kei haehae ia i toku wairua, ano he raiona, a titaritari noa, i te mea kahore he kaiarai. <sup>3</sup> E Ihowa, e toku Atua, ki te mea naku tena mahi, ki te mea he hara kei oku ringa; <sup>4</sup> Ki te mea i whakahokia e ahau he kino ki te tangata kua mau nei ta maua rongo; i whakaora nei hoki ahau i te tangata i kino noa mai ki ahau: <sup>5</sup> Kia arumia toku wairua e te hoariri, a kia mau; kia takahia hoki toku ora e ia ki te whenua, kia whakatokotoria ano toku kororia ki te puehu. (Hera. <sup>6</sup> E Ihowa, whakatika, kia riri koe, ara ake, e nana nei hoki oku hoa whawhai: kia oho ake hoki koe moku; kua kiia e koe te whakawa. <sup>7</sup> Tukua kia karapotia koe e te whakaminenga o nga iwi: ma runga atu i a ratou tou hokinga atu ki runga. <sup>8</sup> Ko Ihowa e whakarite whakawa ana mo nga iwi; kia rite, e Ihowa, tau whakawa moku ki taku mahi tika, ki te tapatahi hoki o oku whakaaro. <sup>9</sup> Kia whakamutua te kino o te hunga kino: whakaukia hoki te tangata tika: e whakamatautau ana hoki te Atua tika i nga ngakau, i nga whatumanawa.

<sup>10</sup> Kei te Atua toku whakangungu rakau, mana e whakaora te hunga ngakau tika. <sup>11</sup> He  
 kaiwhakawa tika te Atua, ae ra, he Atua e riri ana i tenei ra, i tenei ra. <sup>12</sup> Ki te kore tetahi e tahuri,  
 ka whakakoia e ia tana hoari; kua whakapikoa e ia tana kopere, a oti rawa te whakapai. <sup>13</sup> Oti rawa  
 ano ana mea whakamate te whakapai e ia; kua meinga e ia ana pere ano he ahi. <sup>14</sup> Nana, he kino  
 te mea e whakamamae nei ia; he whanoke te mea i hapu ki roto ki a ia, a whanau ake he teka. <sup>15</sup> I  
 pokaia e ia he poka, he mea kerī nana, taka iho ia ki roto ki te rua i mahia e ia. <sup>16</sup> Ka hoki tona  
 whanoke ki tona matenga, a ka tau iho tana tukino ki tona tumuaki. <sup>17</sup> Ka rite ki tona tika taku  
 whakamoemiti ki a Ihowa: ka himene atu hoki ahau ki te ingoa o Ihowa, o te Runga Rawa.

## Chapter 8

<sup>1</sup> Ki te tino kaiwhakatangi. Kititi. He himene na Rawiri. E Ihowa, e to matou Ariki, ano te nui  
 o tou ingoa i te whenua katoa! Paku ana i a koe tou kororia ki runga ake i nga rangi! <sup>2</sup> U pu i a koe  
 te kaha o te mangai o nga kohungahunga, o nga mea ngote u hei mea mo ou hoariri, hei pehi mo  
 te hoariri, mo te kairapu utu.  
<sup>3</sup> Ka titiro ahau ki au rangi, ki te mahi a ou maihao, ki te marama, ki nga whetu, i hanga nei e  
<sup>4</sup> koe; He aha te tangata i maharatia ai e koe? te tama ranei a te tangata i tirohia ai ia e koe?  
<sup>5</sup> Nohinohi nei te wahi i whakaititia iho ai ia e koe i te Atua, karaunatia ana ia e koe ki te kororia,  
 ki te honore. <sup>6</sup> Waiho iho e koe hei kingi mo nga mahi a ou ringa; kua waiho e koe nga mea katoa  
 i raro i ona waewae; <sup>7</sup> Nga hipi katoa, nga puru, me nga kirehe katoa o te parae; <sup>8</sup> Te manu o te  
<sup>9</sup> rangi, me te ika o te moana, e tere nei i nga ara o nga moana. E Ihowa, e to matou Ariki, ano te  
 nui o tou ingoa i te whenua katoa!

## Chapter 9

<sup>1</sup> Ki te tino kaiwhakatangi. Muturapena. He himene na Rawiri. Ka whakapaua toku ngakau ki  
 te whakamoemiti ki a Ihowa, ka korerotia e ahau au mahi whakamiharo katoa. <sup>2</sup> Ka koa ahau, ka

whakamanamana ki a koe, ka himene atu ki tou ingoa, e te Runga Rawa.<sup>3</sup> I te hokinga whakamuri  
o oku hoariri, tutuki ana ratou, ngaro iho i tou aroaro.<sup>4</sup> Nau hoki i whakatika aku korero me toku  
whakawa; i runga koe i te torona e noho ana, e whakarite tika ana.<sup>5</sup> Kua whakatupehupehu koe ki  
nga tauwi, huna ana e koe te tangata kino, horoia atu ana to ratou ingoa ake ake.<sup>6</sup> Ko te hoariri,  
mutu pu ratou, he ngaromanga oti tonu iho: a ko nga pa i huna e koe, ngaro whakarere to ratou  
whakamaharatanga.<sup>7</sup> Ko Ihowa ia noho tonu hei kingi ake, ake: kua whakapaia e ia tona torona  
mo te whakawa.<sup>8</sup> A e whakarite ia mo te ao i runga i te tika, ka whakatakoto tikanga mo nga iwi  
i runga i te pono.<sup>9</sup> Hei pa teko ano a Ihowa mo te tangata e tukinotia ana, hei pa teko i nga wa o  
te he.<sup>10</sup> A ka whakawhirinaki ki a koe te hunga e matau ana ki tou ingoa: no te mea e kore e  
whakarerea e koe, e Ihowa, te hunga e rapu ana i a koe.

<sup>11</sup> Himene ki a Ihowa e noho nei i Hiona: whakapuakina i waenganui i nga iwi ana mahi.<sup>12</sup> Ka  
whakataki toto ia, ka mahara ia ki a ratou: kahore e wareware i a ia te karanga a te hunga iti.

<sup>13</sup> Tohungia ahau, e Ihowa; titiro ki toku mate i te hunga e kino ana ki ahau, e te kaiwhakaara i  
ahau i nga tatau o te mate:<sup>14</sup> Kia whakakitea katoatia ai e ahau ou whakamoemiti i nga tatau o te  
tamahine o Hiona: ka hari ahau ki tau whakaoranga.<sup>15</sup> Kua tapoko nga tauwi ki te rua i keria e  
ratou: kua mau to ratou waewae i roto i te kupenga i huna e ratou.<sup>16</sup> Kua matauria a Ihowa ki te  
whakawa e whakaritea ana e ia: he mahanga mo te tangata kino te mahi a ona ringa. (Hikaiono.

<sup>17</sup> Hera.<sup>18</sup> Ka hoki nga tangata kino ki te reinga, ara nga iwi katoa e wareware ana ki te Atua.<sup>18</sup> E  
kore hoki e warewarea tonutia te tangata rawakore: e kore e taka tonu ta te hunga iti i tumanako  
atu ai.<sup>19</sup> E ara, e Ihowa, kei riro i ta te tangata: kia whakawakia nga tauwi i tou aroaro.<sup>20</sup> E  
Ihowa, meinga ratou kia wehi: kia matau nga tauwi he tangata nei ano ratou. (Hera.

## Chapter 10

<sup>1</sup> He aha koe ka tu mai ai i tawhiti, e Ihowa? ka whakangarongaro ai i nga wa o te he?<sup>2</sup> E  
whakakake ana te tangata kino, e tukino ana i te tangata iti: kia hopukina ratou ki nga whakaaro i  
whakaaro ai ratou.<sup>3</sup> E whakapehapeha ana hoki te tangata kino ki te hiahia o tona ngakau, a ko te  
hunga apo taonga, e whakakahore ana, ae ra, e whakahawe ana ki a Ihowa.<sup>4</sup> Ka mea te tangata

kino, i te whakapehapeha o tona mata, E kore e hiahiatia e ia. Kei roto i ona whakaaro katoa e mea ana, Kahore he Atua. <sup>5</sup> Whanoke tonu ona ara i nga wa katoa; kei runga noa ake au whakaritenga te kitea e ia, he mea whakatupereru e ia ona hoariri katoa. <sup>6</sup> E mea ana i roto i tona ngakau, e kore ahau e whakakorikoria: kahore hoki he he moku a nga whakatupuranga katoa. <sup>7</sup> Ki tonu tona mangai i te kanga, i te hianga, i te tukino: kei raro i tona arero te whanoke me te teka. <sup>8</sup> E noho ana ia, e whanga ana i nga pa koraha: e kohurutia ana e ia te hunga harakore i nga wahi ngaro; e matatau ana ona kanohi ki te hunga rawakore. <sup>9</sup> E whanga puku ana ia me he raiona i tona kuhunga: e whanga ana kia hopukia te tangata iti: e hopukia ana e ia te tangata iti, ua kumea ki tana. kupenga. <sup>10</sup> Kupapa ana ia, piko ana, hinga ana te hunga rawakore i ana mea kaha. <sup>11</sup> E mea ana i roto i tona ngakau, Ka wareware te Atua: e huna ana ia i tona mata, e kore ia e kite ake tonu atu. <sup>12</sup> Whakatika, e Ihowa, e te Atua, takiritia tou ringa: kaua e wareware ki te hunga iti. <sup>13</sup> He aha te tangata kino ka whakahawea ai ki te Atua? kua mea ia i roto i tona ngakau, E kore tenei e whakatakina e koe. <sup>14</sup> Kua kite koe; e tirohia nei hoki e koe te whanoke me te whakatoa, a ka utua e tou ringa: e tuku ana te rawakore i a ia ano ki a koe; ko koe hei tuara mo te pani. <sup>15</sup> Whatiia e koe te ringa o te tangata kino; tena ko te tangata nanakia, whakatakina tona kino, kia kahore ra ano e kitea e koe. <sup>16</sup> Ko Ihowa te Kingi ake ake: kua kahore ke nga tauwiwi i tona whenua. <sup>17</sup> E Ihowa, kua whakarongo koe ki te hiahia o te hunga whakaiti: mau ano o ratou ngakau e whakapai, ka tahuri ano tou taringa ki te whakarongo: <sup>18</sup> Ki te whakawa mo te pani, mo te tangata e tukinotia ana, kei whakamataku a mua ake te tangata o te whenua.

## Chapter 11

<sup>1</sup> Ki te tino kaiwhakatangi. Na Rawiri. Ko Ihowa taku e whakawhirinaki ai: he aha koutou ka mea ai ki toku wairua, rere a manu atu ki to koutou maunga? <sup>2</sup> Nana, kua whakapikoa te kopere e te hunga kino, e whakatikaia ana a ratou pere ki te aho, hei perenga pukutanga ma ratou ki te hunga ngakau tika. <sup>3</sup> Ki te wawahia nga turanga ake, me pehea te tangata tika? <sup>4</sup> Kei tona temepara tapu a Ihowa, kei te rangi te torona o Ihowa: e titiro ana ona kanohi, e whakamatautau ana ona kamo i nga tama a te tangata. <sup>5</sup> E whakamatautau ana a Ihowa i te tangata tika: a e kinogia ana e tona wairua te tangata kino me te tangata e aroha ana ki te tutu. <sup>6</sup> Ka uaina



e ia ki runga ki te hunga kino he mahanga, he ahi, he whanariki, he awaha tuaikerekere: ko te wahi tena mo to ratou kapu. <sup>7</sup> No te mea he tika a Ihowa, e aroha ana ki te tika; ka kite te hunga tika i tona kanohi.

## Chapter 12

<sup>1</sup> Ki te tino kaiwhakatangi. He himene na Rawiri. Whakaorangia, e Ihowa; ka mutu hoki nga tangata tapu; ka taweke atu te hunga pono i roto i nga tama a te tangata. <sup>2</sup> E korero teka ana ratou tetahi ki tetahi; he ngutu patipati, he ngakau rua o ratou ina korero. <sup>3</sup> Ka hatepea e Ihowa nga ngutu patipati katoa, me te arero e korero whakapehapeha ana; <sup>4</sup> E mea nei, Ma o tatou arero tatou ka kake ai; no tatou ano o tatou ngutu, ko wai hei ariki mo tatou? <sup>5</sup> Mo te tukinotanga i te hunga iti, mo te aue a te hunga rawakore, ka whakatika ahau aiane, e ai ta Ihowa, Ka whakanohoia ia e ahau ki te wahi e ora ai ia i nga tangata e whakatupereru ana ki a ia. <sup>6</sup> He kupu parakore nga kupu a Ihowa: he hiriwa i whakakorea nei te para i roto i te oumu whenua, he mea tuku whitu. <sup>7</sup> Ka tiakina ratou e koe, e Ihowa, ka whakaorangia ratou i tenei whakatupuranga ake tonu atu. <sup>8</sup> E haereere noa ana nga tangata kino i tetahi taha, i tetahi taha, i te mea e whakateiteitia ana te kino i roto i nga tama a te tangata.

## Chapter 13

<sup>1</sup> Ki te tino kaiwhakatangi. He himene na Rawiri. Kia pehea te roa o tou wareware ki ahau, e Ihowa? mo ake tonu atu ranei? Kia pehea te roa o tau hunanga i tou mata ki ahau? <sup>2</sup> Kia pehea te roa o toku whakaaroaronga i roto i toku wairua, o te pouri i roto i toku ngakau i tenei ra, i tenei ra? Kia pehea te roa o te whakakake mai a toku hoariri ki ahau? <sup>3</sup> Titiro mai, whakahokia mai he kupu ki ahau, e Ihowa, e toku Atua: whakamaramatia oku kanohi, kei moe ahau i te moe o te mate. <sup>4</sup> Kei mea mai toku hoariri, Kua taea ia e ahau: kei whakamanamana oku hoariri, ina whakakorikoria ahau. <sup>5</sup> Ko ahau ia e whakawhirinaki ana ki tau mahi toku: ka whakamanamana toku ngakau ki tau whakaoranga. <sup>6</sup> Ka waiata ahau ki a Ihowa, mona i atawhai mai ki ahau.

## Chapter 14

<sup>1</sup> Ki te tino kaiwhakatangi. Na Rawiri. Kua ki te wairangi i tona ngakau, Kahore he Atua. Kua  
 pirau ratou, he whakahouhou a ratou mahi, kahore tetahi e mahi ana i te pai. <sup>2</sup> I titiro iho a Ihowa  
 i te rangi ki nga tama a te tangata, kia kite me kahore tetahi e mahara ana, e rapu ana i te Atua.  
<sup>3</sup> Kua peka ke ratou katoa kua pirau tahi: kahore tetahi e mahi ana i te pai, kohore kia kotahi.  
<sup>4</sup> E kore ranei e mohio nga kaimahi katoa o te kino? e kai nei i toku iwi, me te mea e kai taro  
 ana, a kahore e karanga ki a Ihowa. <sup>5</sup> Na, i reira ratou e tuiri noa ana: kei roto hoki te Atua i te  
 whakatupuranga o te hunga tika. <sup>6</sup> Meinga ana e koutou te whakaaro o te hunga iti hei whakama,  
 no te mea ko Ihowa tona piringa. <sup>7</sup> Aue, me i puta mai te whakaoranga o Iharaira i Hiona! Kia  
 whakahokia e Ihowa tana iwi i te whakarau, ka whakamanamana a Hakopa, ka hari a Iharaira.

## Chapter 15

<sup>1</sup> He himene na Rawiri. E Ihowa, ko wai e noho ki tou tapenakara? Ko wai e noho ki tou maunga  
 tapu? <sup>2</sup> Ko ia he tapatahi nei te haere, he tika te mahi, he korero pono ano i roto i tona ngakau.  
<sup>3</sup> Kahore nei e ngautuara tona arero, kahore e kino te mahi ki tona hoa, kahore ana ingoa kino mo  
 tona hoa. <sup>4</sup> E whakahengia ana te tangata kino e ona kanohi, e whakahonoretia ana ia e ia te hunga  
 e wehi ana ki a Ihowa. Ahakoa mate i tana oati, kahore e whakapaheketia e ia. <sup>5</sup> Kahore e tuku i  
 tana moni hei moni whakatupu; kahore hoki e tango i te moni hei utu mate mo te tangata harakore.  
 Ki te penei te mahi a tetahi, e kore ia e whakakorikoria ake ake.

## Chapter 16

<sup>1</sup> He Mikitama na Rawiri. Tiakina ahau, e te Atua: e whakawhirinaki nei hoki ahau ki a koe.  
<sup>2</sup> Kua mea ahau ki a Ihowa, Ko koe toku Ariki, kahore oku pai i tua atu i a koe. <sup>3</sup> Ko te hunga tapu  
 i runga i te whenua, te hunga pai rawa, kua ahau katoa toku ahuareka ki a ratou. <sup>4</sup> Ka whakanuia  
 nga mamae o te hunga e whakawhiti ana i a Ihowa mo tetahi atua ke: e kore e ringihia e ahau a

ratou ringihanga toto, e kore ano o ratou ingoa e whakahuatia e oku ngutu. <sup>5</sup> Ko Ihowa te wahi i wehea mai moku, taku kapu hoki: ko koe te kaiwhakapumau i te wahanga maku. <sup>6</sup> Kua takoto oku aho ki nga wahi ahuaireka, ina, he wahi pai toku. <sup>7</sup> Ka whakapaingia e ahau a Ihowa, i whakamahara nei i ahau: ka whakaako ano hoki oku whatumanawa i ahau i te po.

<sup>8</sup> Kua waiho tonu e ahau a Ihowa ki toku aroaro: kei toku ringa matau nei ia, e kore ahau e whakakorikoria. <sup>9</sup> Koia i koa ai toku ngakau, i whakamanamana ai toku kororia, i takoto tumanako ai ano oku kikokiko. <sup>10</sup> No te mea e kore e waiho e koe toku wairua i te reinga, e kore e tukua tau Mea Tapu kia kite i te pirau. <sup>11</sup> Ka whakakitea mai e koe ki ahau te huarahi o te ora; kei tou aroaro te hari nui, kei tou matau nga ahuaireka e kore e mutu.

## Chapter 17

<sup>1</sup> He inoi na Rawiri. Whakarongo ki te tika, e Ihowa, tahuri mai ki taku karanga, kia titaha mai tou taringa ki taku inoi, ara ki ta te ngutu tinihangakore. <sup>2</sup> Kia puta mai te whakaritenga o taku whakawa i tou aroaro; tirohia mai e ou kanohi te mea rite. <sup>3</sup> Kua whakamatauria e koe toku ngakau; kua tirohirohia iho ahau e koe i te po; kua whakamatau koe i ahau, a kahore he mea i kitea e koe; e mea ana ahau kia kua e hara toku mangai. <sup>4</sup> Ko nga mahi ia a te tangata, ko nga kupu a tou mangai taku mea hei pa mai i ahau i nga ara o te kaiwhakangaro. <sup>5</sup> I whakaukia oku hikoinga ki au ara, kihai i paheke oku waewae. <sup>6</sup> Kua karanga nei ahau ki a koe, no te mea ka whakahoki kupu mai koe, e te Atua, ki ahau: whakatitahatia mai tou taringa ki ahau, whakarongo ki taku kupu. <sup>7</sup> Whakaaturia tou aroha whakamiharo, ko koe hoki, ko tou matau, te kaiwhakaora mo te hunga e whakawhirinaki ana ki a koe, i te hunga e whakatika mai ana.

<sup>8</sup> Tiakina ahau, ano ko te whatu o te kanohi, huna ahau ki raro i te taumarumarutanga o ou pakau, <sup>9</sup> I te hunga kino e tukino nei i ahau, i oku hoariri whakamate e karapoti nei i ahau. <sup>10</sup> E kopakia ana ratou e o ratou ngako: e korero whakapehapeha ana o ratou mangai. <sup>11</sup> Tenei o matou hikoinga te karapotia nei e ratou: matatau tonu iho o ratou kanohi ki te tuku iho i a matou ki te whenua. <sup>12</sup> Kei te raiona e hiahia ana ki te hopu kai te rite, kei te kua raiona e piri ana i nga wahi ngaro. <sup>13</sup> E ara, e Ihowa, haukotia tona aroaro, turakina ia ki raro; whakaorangia toku wairua ki

tau hoari i te tangata kino; <sup>14</sup> I nga tangata, ma tou ringa, e Ihowa, i nga tangata o te ao: kei tenei ora nei to ratou wahi, a e whakakiia ana o ratou kopu e koe ki tau taonga. E kiki ana ratou i te tamariki, whakarerea iho nga toenga o a ratou taonga ki a ratou kohungahunga. <sup>15</sup> Ko ahau, e kite ahau i tou mata i runga i te tika, a ka tatu toku ngakau, ina oho ake ahau, kia kite i tou ahua.

## Chapter 18

<sup>1</sup> Ki te tino kaiwhakatangi. He himene na te pononga a Ihowa, na Rawiri. Nana i whakahua nga kupu o tenei waiata ki a Ihowa i te ra i whakaoranga ai ia i te ringa o ona hoariri katoa, i te ringa ano o Haora. I mea ia, Ka aroha ahau ki a koe, e Ihowa, e toku kaha. <sup>2</sup> Ko Ihowa toku kamaka, toku pa, toku kaiwhakaora; toku Atua, toku tino kamaka, e whakawhirinaki ai ahau; toku whakangungu rakau, te haona o toku whakaoranga, toku pourewa tiketike. <sup>3</sup> Ka karanga ahau ki a Ihowa, e tika nei kia whakamoemititia: a ka ora i oku hoariri. <sup>4</sup> I karapotia ahau e nga whakawiringa a te mate, a whakawehia ana ahau e nga waipuke o te kino. <sup>5</sup> I karapotia ahau e nga whakawiringa a te reinga, i haukotia e nga mahanga a te mate. <sup>6</sup> I karanga ahau ki a Ihowa i toku paweratanga, i hamama ki toku Atua: i whakarongo ia ki toku reo i roto i tona temepara, i tae ano taku hamama ki tona aroaro, ki ona taringa. <sup>7</sup> Na ka ngaueue te whenua, ka ru, wiri ana nga putake o nga maunga, ngaueue ana i tona riri. <sup>8</sup> I kake he paowa i ona pongaponga, a kai ana te kapura a tona mangai, ngiha ana nga waro. <sup>9</sup> I whakapingoretia e ia nga rangi, a heke iho ana, a i raro te pouri matotoru i ona waewae. <sup>10</sup> I eke ia ki runga ki te kerupa, a rere ana: ae, i rere omaki ia i runga i nga parirau o te hau. <sup>11</sup> I meinga e ia te pouri hei wahi ngaro mona, hei teneti i tetahi taha ona, i tetahi taha; ko te pouritanga o nga wai, ko nga kapua matotoru o te rangi. <sup>12</sup> I rere atu ona kapua metotoru i te wherikotanga o tona aroaro: te whatu, me nga waro kapura. <sup>13</sup> I papa ano te whatitiri a Ihowa i nga rangi, a puaki ana te reo o te Runga Rawa; he whatu, he waro kapura. <sup>14</sup> I kokiritia e ia ana pere, a marara ana ratou: ae, i koperea hoki e ia te tini uira, a whati ana ratou. <sup>15</sup> Katahi ka kitea nga takere o nga wai, a ka takoto kau nga putake o te ao i tau whakatupehupehutanga, e Ihowa, i te whengunga o te manawa o ou pongaponga. <sup>16</sup> I tono karere mai ia i runga, ka mau ki ahau; toia ake ahau e ia i roto i nga wai maha. <sup>17</sup> Nana ahau i ora ai i toku hoariri kaha, i te hunga e kino ana

18  
 ki ahau; he kaha rawa hoki ratou i ahau. I huakina tatatia ahau e ratou i te ra o toku matenga;

19  
 ko Ihowa ia toku whakawhirinakitanga. I whakaputaina ahau e ia ki te wahi nui, i whakaorangia ahau e ia; he ahua eka nona ki ahau.

20  
 Rite tonu ki taku mahi tika ta Ihowa utu ki ahau: rite tonu ki te ma o oku ringa tana i

21  
 whakahoki ai ki ahau. Moku i pupuri i nga ara o Ihowa, a kihai i he, i whakarere i toku Atua.

22  
 Kei mua tonu hoki i ahau ana whakaritenga katoa, kihai ano i whakamataratia atu i ahau ana

23  
 tikanga. Tapatahi tonu hoki toku whakaaro ki tona aroaro, a i tiaki ahau i ahau kei kino. Na

24  
 ka homai e Ihowa he utu ki ahau, rite tonu ki toku tika, ki te ma o oku ringa i tona aroaro. He

25  
 tangata atawhai, ka atawhai hoki koe; he tangata tika, ka tika hoki koe. He tangata ma, ka ma

26  
 hoki koe; he tangata whakakeke, ka whakakeke hoki koe. E whakaorangia hoki e koe te iwi

27  
 ngakau mamae; ka whakahokia ano e koe ki raro nga kanohi whakakake. Mau hoki e whakau

28  
 taku rama: ma Ihowa, ma toku Atua, e whakamarama toku pouri.

29  
 Nau hoki ahau i rere ai na waenganui atu i te ropu: na toku Atua hoki i pekea ai e ahau te

30  
 taiepa. Tena ko te Atua, tika tonu tona ara: kua oti tana kupu te whakamatau; he whakangungu

31  
 rakau ia ki te hunga katoa e whakawhirinaki ana ki a ia. Ko wai oti te Atua, ki te kahore a Ihowa?

32  
 Ko wai hoki he kamaka, ki te kahore to tatou Atua? Ko te Atua, nana ahau i whitiki ki te kaha,

33  
 i mea kia tino tika toku ara. Ko ia hei mea i oku waewae kia rite ki o te hata: mana hoki ahau e

34  
 whakatu ki runga ki oku wahi tiketike. Ko ia hei whakaako i oku ringa ki te whawhai, a whati

35  
 ana te kopere parahi i oku ringa. Kua homai ano e koe ki ahau te whakangungu rakau o tau

36  
 whakaoranga: puritia ana ahau e tou ringa matau whakanuia ana e tou whakaaro mahakai. I

37  
 whakanuia e koe oku takahanga i raro i ahau; te paheke oku waewae. Ka arumia e ahau oku

38  
 hoariri, mau iho i ahau; e kore ahau e tahuri mai, a ngaro noa ratou. Maru ana ratou i ahau, te

39  
 kaha te whakatika: hinga ana ki raro i oku waewae. Nau hoki ahau i whitiki ki te kaha mo te

40  
 whawhai: piko ana i a koe ki raro i ahau te hunga e whakatika mai ana ki ahau. Kua meinga e

41  
 koe kia tahuri mai nga tuara o oku hoariri ki ahau, kia hautopea ai e ahau te hunga e kino ana ki

ahau. I karanga ratou, heoi kahore he kaiwhakaora: ki a Ihowa, otira kihai i whakahoki kupu ki

<sup>42</sup> a ratou. Na ka tukia ratou e ahau a rite noa ratou ki te puehu e puhia ana e te hau: akiritia atu  
 ana ratou ki waho, ano he paru no te huarahi. <sup>43</sup> Kua whakaorangia ahau e koe i nga ngangautanga  
 a te iwi; kua meinga e koe hei rangatira mo nga tauwiwi: hei apa moku te iwi kahore i matauria e  
<sup>44</sup> ahau. Kia rongu kau te taringa ki ahau, ka kakama tonu mai ratou ki ahau; ko nga tangata iwi  
 ke ngohe kau ki ahau. <sup>45</sup> Ka memeha haere nga tangata iwi ke: ka puta wehi mai hoki i roto i o  
 ratou kuhunga. <sup>46</sup> E ora ana a Ihowa; kia whakapaingia hoki toku kamaka, kia whakanuia te Atua  
 o toku whakaoranga: <sup>47</sup> Ko te Atua, mana nei e rapu he utu moku, mana e pehi nga iwi ki raro i  
<sup>48</sup> ahau. Mana ahau e mawhiti ai i oku hoariri, ae ra, mau ahau e mea kia teitei ake i te hunga e  
 whakatika mai ana ki ahau; ka whakaorangia ahau e koe i te tangata tutu. <sup>49</sup> Mo konei ka  
<sup>50</sup> whakawhetai ahau ki a koe, e Ihowa, i waenganui i nga tauwiwi: ka himene ki tou ingoa. He nui  
 nei tana whakaora i tana kingi; e whakaputa aroha ana ki tana tangata i whakawahi ai, ki a Rawiri  
 ratou ko ona uri ake ake.

## Chapter 19

<sup>1</sup> Ki te tino kaiwhakatangi. He himene na Rawiri. E korerotia ana e nga rangi te kororia o te  
 Atua; a e whakaaturia ana e te kikorangi te mahi a ona ringa. <sup>2</sup> E puaki ana te reo o tena rangi, o  
 tena rangi, e whakaatu mohiotanga ana hoki tena po, tena po. <sup>3</sup> Kahore he hamumu, kahore he  
 kupu, kahore e rangona to ratou reo. <sup>4</sup> Kua puta ta ratou aho ki te whenua katoa, a ratou kupu, a te  
 pito ra ano o te ao. Whakaturia ana e ia ki reira te tapenakara mo te ra; <sup>5</sup> A e puta ana ia me he tane  
 marena hou i tona whare moenga, whakai ana ia, pera ana me te tangata kaha e mea ana ki te oma  
 whakataetae. <sup>6</sup> Ko tona putanga kei tetahi pito o te rangi, a whawhe noa ke tetahi pito: kahore hoki  
 tetahi mea e ngaro i tona mahana.  
<sup>7</sup> Tapatahi tonu te ture a Ihowa, he mea whakatahuri i te wairua: pono tonu nga whakaatu a  
<sup>8</sup> Ihowa, e whakawhaiwhakaaro ana i te kuare. He tika nga ako a Ihowa, e whakahari ana i te  
 ngakau, he ma te whakahau a Ihowa, e whakamarama ana i nga kanohi. <sup>9</sup> He ma te wehi ki a Ihowa,  
<sup>10</sup> pumau tonu ake ake, he pono nga whakaritenga a Ihowa, tika kau ano. Engari ena e hiahiatia  
 ana i te koura, ae, i te tino koura ahakoa maha: reka atu i te honi, i te maturuturutanga iho o nga

<sup>11</sup> honikoma. Na ena ano tau pononga i whakatupato; he nui te utu ki te puritia. <sup>12</sup> Ko wai e matau  
 ana ki ona he? Whakamakia oku hara puku. <sup>13</sup> Puritia ano tau pononga kei riro i nga hara whakakake  
 hei rangatira moku: ko reira ahau tu tika ai, a ka watea i te he nui. <sup>14</sup> Kia manakohia nga kupu a  
 toku mangai: me nga whakaaro o toku ngakau i tou aroaro, e Ihowa, e toku kamaka, e toku kaihoko.

## Chapter 20

<sup>1</sup> Ki te tino kaiwhakatangi. He himene na Rawiri. Ma Ihowa e whakahoki he kupu ki a koe i  
 te ra o te he; ma te ingoa o te Atua o Hakopa koe e tiaki; <sup>2</sup> Mana e tono mai he awahina mou i te  
 wahi tapu, e whakau hoki koe i Hiona; <sup>3</sup> Mana e mahara ki au whakahere katoa, e manako ki au  
 tahunga tinana. (Hera. <sup>4</sup> Mana e homai ki a koe ta tou ngakau e mea ai, e whakamana katoa hoki  
 tau e wawata ai. <sup>5</sup> Ka hari matou ki tau whakaoranga, ka whakatu hoki i o matou kara i runga i te  
 ingoa o to matou Atua: ma Ihowa e whakarite au inoi katoa.  
<sup>6</sup> Katahi ahau ka matau e whakaora ana a Ihowa i tana tangata i whakawahi ai, ka whakahoki  
 kupu ia ki a ia i tona rangi tapu, me te kaha ano tona ringa matau ki te whakaora. <sup>7</sup> Ko ta etahi he  
 hariata, ko ta etahi he hoiho: ko tatou ia ka whakahua i te ingoa o Ihowa, o to tatou Atua. <sup>8</sup> Kua  
 piko ratou, kua hinga: ko tatou ia kua ara, kua tu ki runga. <sup>9</sup> Whakaorangia, e Ihowa: kia whakahoki  
 kupu mai te Kingi ina karanga matou.

## Chapter 21

<sup>1</sup> Ki te tino kaiwhakatangi. He himene na Rawiri. Ka hari te kingi ki tou kaha, e Ihowa; ano te  
 nui o tona whakamanamana ki tau whakaoranga! <sup>2</sup> Kua homai e koe ki a ia ta tona ngakau i hiahia  
 ai; kihai ano i kaiponuhia e koe ta ona ngutu i inoi ai. (Hera. <sup>3</sup> Kei mua nei hoki koe i a ia e homai  
 ana i nga manaakitanga o te pai; karaunatia ana e koe tona matenga ki te tino koura. <sup>4</sup> He ora tana  
 i inoi ai i a koe, a kua homai e koe ki a ia, he roa noa atu nga ra ake ake. <sup>5</sup> He nui tona kororia i

tau whakaoranga: uhia ana ia e koe ki te honore, ki te kororia. <sup>6</sup> Nau hoki ia i mea kia manaakitia rawatia ake ake: whakaharitia ana ia e koe ki te koa o tou mata.

<sup>7</sup> E whakawhirinaki ana hoki te kingi ki a Ihowa; e kore ano ia e whakangaeuetia, he atawhai hoki no te Runga Rawa. <sup>8</sup> Ka mau i tou ringa ou hoariri katoa: ka mau i tou ringa matau te hunga e kino ana ki a koe. <sup>9</sup> Ka meinga ratou e koe, kia rite ki te oumu kapura i te wa e riri ai koe: e horomia ratou e Ihowa ina weriweri ia, a ma te kapura ratou e kai. <sup>10</sup> Ka whakamotitia e koe o ratou hua i runga i te whenua, o ratou uri i waenganui o nga tama a te tangata. <sup>11</sup> He kino hoki ta ratou i whakatakoto ai mou, he mahi nanakia ta ratou i whakaaro ai, kihai nei i taea e ratou. <sup>12</sup> Mo reira ka meinga e koe kia tahuri o ratou tuara, ina whakatihia e koe au pere i runga i au aho ki o ratou mata. <sup>13</sup> Kia whakanuia koe, e Ihowa, i runga i tou kaha: ka waiata matou, ka himene ki tou nui.

## Chapter 22

<sup>1</sup> Ki te tino kaiwhakatangi. Airete Hahara. He himene na Rawiri. E toku Atua, e toku Atua, he aha koe i whakarere ai i ahau? he aha koe i matara atu ai ki te whakaora i ahau i nga kupu hoki o taku hamama? <sup>2</sup> E toku Atua, e karanga nei ahau i te awatea, heoi kahore koe e rongu, i te po ano kahore ahau e wahangu. <sup>3</sup> Otiia he tapu koe, kei nga whakamoemiti a Iharaira tou nohoanga. <sup>4</sup> I whakawhirinaki o matou matua ki a koe, i whakawhirinaki, a whakaorangia ana e koe. <sup>5</sup> I karanga ratou ki a koe, a kua ora; i whakawhirinaki ki a koe, a kihai i whakama. <sup>6</sup> Ko ahau ia he toke, ehara i te tangata: e tawaiia ana e te tangata, e whakahaweatia ana e te iwi. <sup>7</sup> Kataina iho ahau e te hunga katoa e kite ana i ahau, ko ana o ratou ngutu, ruru ana o ratou matenga, e ki mai ana, <sup>8</sup> Tukua atu koe ki a Ihowa, mana ia e whakaora: mana ia e whakaora, e pai ana hoki ia ki a ia. <sup>9</sup> Nau ia ahau i whakawhanau mai i roto i te kopu, i mea hoki kia tumanako, i ahau i nga u o toku whaea. <sup>10</sup> He mea whakarere atu ahau ki runga ki a koe no te kopu mai; ko koe toku Atua no te kopu mai ano o toku whaea. <sup>11</sup> Kei mamao atu i ahau, e tata ana hoki te he, kahore hoki he kaiawhina. <sup>12</sup> He tini nga puru e karapoti nei i ahau: e whakapaea ana ahau e nga mea kaha o Pahana. <sup>13</sup> E hamama ana o ratou



mangai ki ahau, ano he raiona e haehae ana, e hamama ana. <sup>14</sup> Kua ringihia ahau, ano he wai, kua  
 takoki katoa oku iwi; me te ware pi toku ngakau, e rewa ana i waenganui i oku whekau. <sup>15</sup> Kua  
 maroke toku kaha, ano he maramara rihi, piri tonu toku arero ki oku kauae; kua whakatakotoria  
 ano ahau e koe ki te puehu o te mate. <sup>16</sup> Kua karapotia nei hoki ahau e te kirehe, kua muia e te  
 whakaminenga o nga tangata hara: kua pokaia e ratou oku ringa me oku waewae. <sup>17</sup> E taea e ahau  
 te tatau oku iwi katoa: e titiro mai ana ratou, e matakitaki ana ki ahau. <sup>18</sup> E wehewehea ana oku  
 kakahu mo ratou, e maka rota ana mo toku weruweru. <sup>19</sup> Kua ra ia koe e matara atu, e Ihowa; e  
 toku kaha, hohoro mai hei awhina moku. <sup>20</sup> Whakaorangia toku wairua i te hoari, taku hoki e  
 matenui nei i te kuri. <sup>21</sup> Whakaorangia ahau i te mangai o te raiona: ae, i nga haona o nga kau maka  
 kua whakahokia mai e koe he kupu ki ahau.  
<sup>22</sup> Ka korerotia e ahau tou ingoa ki oku teina, ka whakamoemititia koe e ahau i waenganui i te  
 whakaminenga. <sup>23</sup> E te hunga e wehi ana ki a Ihowa, whakamoemiti ki a ia; whakakororiatia ia, e  
 te uri katoa o Hakopa, kia wehi hoki ki a ia, e te uri katoa o Iharaira. <sup>24</sup> Kihai hoki ia i whakahawea,  
 kihai i whakarihariha ki te aue o te ngakau mamae; kihai ano i huna i tona mata ki a ia, engari i  
 tana karangatanga ki a ia i whakarongo ia. <sup>25</sup> Ko koe taku e whakamoemiti ai i waenganui o te  
 whakaminenga nui, ka whakamana e ahau aku kupu taurangi ki te aroaro o te hunga e wehi ana ki  
 a ia. <sup>26</sup> Ka kai te hunga mahaki, a ka makona: ka whakamoemiti ki a Ihowa te hunga e rapu ana  
 ki a ia; kia ora tonu o koutou ngakau, ake, ake. <sup>27</sup> E mahara nga pito katoa o te whenua, a ka tahuri  
 ki a Ihowa: ka koropiko ano nga hapu katoa o nga iwi ki tou aroaro. <sup>28</sup> No Ihowa hokite  
 rangatiratanga, ko ia ano te kawana i waenganui o nga iwi. <sup>29</sup> Ka kai, a ka koropiko nga tangata  
 tetere katoa o te whenua: ka tuohu ki tona aroaro te hunga katoa e heke ana ki te puehu; tae no ki  
 te tangata kahore e ora i a ia tona wairua. <sup>30</sup> Tera e mahi tetahi uri ki a ia; ka waiho ki te Ariki hei  
 whakatupuranga. <sup>31</sup> E haere mai ratou, e kauwhau i tona tika ki te iwi e whanau a mua, he meatanga  
 tenei nana.

## Chapter 23

<sup>1</sup> He himene na Rawiri. Ko Ihowa toku hepara; e kore ahau e hapa. <sup>2</sup> Ko ia hei mea kia takoto  
 ahau ki nga wahi tarutaru hou: e arahi ana ia i ahau ki te taha o nga wai ata rere. <sup>3</sup> Ko ia hei  
 whakahoki ake i toku wairua: e arahi ana ia i ahau i nga ara o te tika, he whakaaro ki tona ingoa.  
<sup>4</sup> Ae, ahakoa haere ahau i te awaawa o te atarangi o te mate, kahore he kino e wehi ai ahau: no te  
 mea kei toku taha koe; ko tau rakau, ko tau tokotoko, ko ena hei oranga ngakau moku. <sup>5</sup> E taka ana  
 e koe he tepu ki toku aroaro i te tirohanga a oku hoariri, e whakawahia ana e koe toku matenga ki  
 te hinu, purena tonu taku kapu. <sup>6</sup> He pono e aru i ahau te pai me te atawhai i nga ra katoa e ora ai  
 ahau, a ka noho ahau ki te whare o Ihowa ake tonu atu.

## Chapter 24

<sup>1</sup> He himene na Rawiri. No Ihowa te whenua, me ona tini mea, te ao, me nga tangata e noho  
 ana i runga. <sup>2</sup> He mea whakatu hoki nana ki runga ki nga moana, he mea whakau ki runga ki nga  
 roma.  
<sup>3</sup> Ko wai e eke ki te maunga o Ihowa? Ko wai e tu ki tona wahi tapu? <sup>4</sup> Ko te tangata he ma  
 nei nga ringa, he harakore tona ngakau, kahore nei i ara tona wairua ki te horihori, a kahore i oati  
 teka. <sup>5</sup> Ka riro i a ia te manaaki a Ihowa, me te tika a te Atua o tona whakaoranga. <sup>6</sup> Ko te  
 whakaturanga tenei o te hunga e rapu ana ki a ia, e rapu nei i tou mate, e Hakopa. (Hera.  
<sup>7</sup> Kia ara o koutou matenga, e nga tatau, ara ake, e nga tatau onamata; a ka tomo te Kingi o te  
<sup>8</sup> kororia. Ko wai tenei Kingi kororia? Ko Ihowa, ko te kaha, ko te marohirohi, ko Ihowa, ko te  
<sup>9</sup> marohirohi ki te whawhai. Kia ara o koutou matenga, e nga tatau, kia ara ake, e nga tatau onamata,  
<sup>10</sup> a ka tomo te Kingi o te kororia. Ko wai tenei Kingi kororia? Ko Ihowa o nga mano, ko ia te  
 Kingi kororia. (Hera.

## Chapter 25

<sup>1</sup> Na Rawiri. Ka ara nei toku wairua ki a koe, e Ihowa. <sup>2</sup> E toku Atua, ko koe toku  
 whakawhirinakitanga: kei whakama ahau, aua oku hoariri e tukua kia whakaputa ki ahau. <sup>3</sup> Ae,  
 aua tetahi o te hunga e tatari ana ki a koe e tukua kia whakama: kia whakama te hunga e tinihanga

<sup>4</sup>noa ana. Whakakitea ki ahau au ara, e Ihowa; whakaakona ahau ki au huarahi. <sup>5</sup>Arahina ahau i  
 tou pono, whakaakona hoki ahau: ko koe hoki te Atua o toku whakaoranga; pau noa te ra i ahau e  
<sup>6</sup>tatari nei ki a koe. E Ihowa, kia mahara ki au mahi tohu, ki au mahi aroha; nonamata riro hoki  
<sup>7</sup>ena. Kua e maharatia nga hara o toku tamarikitanga, me oku kino: mahara mai koe ki ahau, e  
 Ihowa, kia rite ki tau mahi tohu, kia whakaaro ki tou pai.  
<sup>8</sup>He pai, he tika a Ihowa, a ka whakaakona e ia te hunga hara ki te huarahi. <sup>9</sup>Ka arahina e ia  
 te hunga mahaki i runga i te whakawa: ka akona hoki e ia te hunga mahaki ki tana ara. <sup>10</sup>He mahi  
 tohu, he pono nga ara katoa o Ihowa ki te hunga e pupuri ana i tana kawenata, i ana whakaaturanga.  
<sup>11</sup>Kia mahara ki tou ingoa, e Ihowa, a murua toku kino, he nui nei hoki. <sup>12</sup>Ko wai te tangata e  
 wehi ana ki a Ihowa? Ka whakaako ia i a ia ki te ara e pai ai ia. <sup>13</sup>Ka noho tona wairua i runga i  
 te pai, a ka riro te whenua i tona uri. <sup>14</sup>Kei te hunga e wehi ana i a ia te mea ngaro a Ihowa; a mana  
 e whakakite ki a ratou tana kawenata.  
<sup>15</sup>E tau tonu ana oku kanohi ki a Ihowa; mana hoki e unu ake oku waewae i te kupenga.  
<sup>16</sup>Tahuri mai ki ahau, tohungia hoki ahau; he mokemoke hoki ahau, e mamae ana te ngakau. <sup>17</sup>Kua  
 whakanuia nga whakapawera o toku ngakau: whakaputaina ahau i roto i nga mea e pehi nei i ahau.  
<sup>18</sup>Tirohia toku mate me toku mamae, a murua katoatia oku hara. <sup>19</sup>Tirohia mai oku hoariri, he  
 tokomaha hoki ratou: a he nanakia te kino e kino nei ratou ki ahau. <sup>20</sup>Tiakina toku wairua, a  
 whakaorangia ahau: kei whakama ahau; e whakawhirinaki ana hoki ahau ki a koe. <sup>21</sup>Tukua ma te  
 ngakau tapatahi, ma te tika ahau e tiaki; e tumanako ana hoki ahau ki a koe. <sup>22</sup>Hokona, e te Atua,  
 a Ihairaira i roto i ona whakapawera katoa.

## Chapter 26

<sup>1</sup>Na Rawiri. Whakawakia ahau, e Ihowa, kua haere nei hoki ahau i te tapatahitanga o toku  
 ngakau: kua whakawhirinaki ano ki a Ihowa, na, e kore e paheke. <sup>2</sup>Tirohia iho ahau, e Ihowa,  
 whakamatauria ahau, kia kitea oku whatumanawa me toku ngakau. <sup>3</sup>Kei mua hoki tou atawhai i  
 oku kanohi; kua haere nei ahau i tou pono. <sup>4</sup>Kahore ahau i noho tahi ki nga tangata horihori; e

5  
kore ano ahau e tomo tahi me nga tangata tinihanga. Kino tonu ahau ki te whakaminenga o nga  
kaimahi i te he, e kore ano ahau e noho tahi ki te hunga kino.

6 Ka horoia e ahau oku ringa ki te harakore, ka taiawhio ai i tau aata, e Ihowa; 7 A ka rangona  
toku reo e whakamoemiti ana, e whakapuaki ana i au mahi whakamiharo katoa. 8 E Ihowa, kua  
aroha nei ahau ki tou whare nohoanga, ki te wahi e nohoia ana e tou kororia. 9 Kei huia toku wairua  
ki roto ki te hunga hara, me toku ora ki roto ki te hunga toto. 10 He mahi nanakia hoki ta o ratou  
ringa; ki tonu o ratou matau i te utu whakapati. 11 Ko ahau ia, ka haere i runga i toku tapatahi:  
12 hokona ahau, tohungia hoki ahau. E tu ana toku waewae i te wahi tika: ka whakapaingia a Ihowa  
e ahau i roto i nga whakaminenga.

## Chapter 27

1 Na Rawiri. Ko Ihowa toku marama, toku whakaoranga; kia wehi ahau i a wai? Ko Ihowa te  
kaha o toku ora; ko wai e matakau ai ahau? 2 I te whakatatanga mai o te hunga kino, o oku hoariri,  
o oku hoa whaingia, ki te kai i oku kikokiko, tutuki ana ratou, hinga ana. 3 Ahakoa whakapae noa  
te ope i ahau e kore toku ngakau e wehi: ahakoa ara noa te pakanga ki ahau, ka au tonu ia ahau.  
4 Kotahi taku mea i inoi ai i a Ihowa, ko taku tena e rapu ai: kia noho i te whare o Ihowa i nga ra  
katoa e ora ai ahau, kia kite ai i te ataahua o Ihowa, kia ui ai i roto i tona temepara. 5 Ka huna hoki  
ahau e ia ki tona teneti i te ra o te he, ka huna ki te wahi ngaro i tona tapenakara, ka hapainga ahau  
ki runga ki te kohatu. 6 Na, aianeia ka teitei toku mahunga ki runga ake i oku hoariri, e karapoti nei  
i ahau; a ka patua e ahau i roto i tona tapenakara he whakahere hari; ka waiata ahau, ae ka himene  
ki a Ihowa.  
7 Whakarongo mai ki toku reo, e Ihowa, ua karanga ahau, tohungia ahau, whakahokia mai hoki  
he kupu ki ahau. 8 I a koe i mea, Rapua e koutou toku mata; ka mea toku ngakau ki a koe, ka rapu  
ahau i tou mata, e Ihowa. 9 Kauga tou mata e huna ki ahau, kauga tau pononga e peia atu ua riri koe:  
ko koe toku kaiawhina, kei mahue ahau i a koe, kei whakarerea e koe e te Atua o toku whakaoranga.  
10 Ki te whakarerea ahau e toku papa, e toku whaea, ko Ihowa hei tukunga atu moku. 11 E Ihowa,  
whakaakona ahau ki tau ara; arahina ahau i te ara tika, he hoariri hoki oku. 12 Kauga ahau e tukua

ki te hiahia o oku hoariri; kua whakatika mai hoki ki ahau he kaiwhakapae teka, me te hunga manawa nanakia. <sup>13</sup> Kua ngohe ahau, me i kua ahau i whakapono, tera ahau e kite i te pai o te Atua i te whenua o te ora. <sup>14</sup> Taria a Ihowa: kia maia, a kia kaha tou ngakau; ina, taria a Ihowa.

## Chapter 28

<sup>1</sup> Na Rawiri. Ka karanga ahau ki a koe, e Ihowa, e toku kohatu, kua e wahangu ki ahau; ki te wahangu hoki koe ki ahau, ka rite ahau ki te hunga e heke atu ana ki te poka. <sup>2</sup> Whakarongo ki toku reo inoi, ua karanga ahau ki a koe, ina totoro oku ringa ki tou ahurewa tapu. <sup>3</sup> Kua ahau e kumea tahitia me te hunga he; me nga kaimahi i te kino, he marie a ratou kupu ki o ratou hoa, he kino ia kei roto i o ratou ngakau. <sup>4</sup> Kia rite ki a ratou mahi tau e hoatu ai ki a ratou, ki te kino ano o a ratou hanga: kia rite ki nga mahi a o ratou ringa tau e hoatu ai ki a ratou, whakahokia ta ratou utu ki a ratou. <sup>5</sup> Na kahore nei ratou e whakaaro ki nga mahi a Ihowa, ki nga meatanga a ona ringa, mo reira ka whakahoroa iho ratou e ia, e kore ano e whakaturia ake.

<sup>6</sup> Kia whakapaingia a Ihowa mona i whakarongo mai ki toku reo inoi. <sup>7</sup> Ko Ihowa toku kaha, toku whakangungu rakau; i whakawhirinaki toku ngakau ki a ia, a awhinatia ana ahau; koia i hari ai toku ngakau, i whakamoemiti ai hoki taku waiata ki a ia. <sup>8</sup> Ko Ihowa to ratou kaha, ko ia ano te kaha whakaora o tana tangata i whakawahi ai. <sup>9</sup> Whakaorangia tau iwi, manaakitia tou kainga tupu: whangainga ratou, whakaarahia ake ake.

## Chapter 29

<sup>1</sup> He himene na Rawiri. Hoatu ki a Ihowa, e nga tama a te hunga nunui, hoatu ki a Ihowa te kororia me te kaha. <sup>2</sup> Hoatu ki a Ihowa te kororia e rite ana mo tona ingoa, koropiko ki a Ihowa i roto i te ataahua o te tapu. <sup>3</sup> Kei runga te reo o Ihowa i nga wai: e papa ana te whatitiri a te Atua o te kororia: kei runga a Ihowa i nga wai maha. <sup>4</sup> Kaha tonu te reo o Ihowa; kororia tonu te reo o Ihowa. <sup>5</sup> Mongamonga noa nga hita i te reo o Ihowa; ina, mongamonga noa i a Ihowa nga hita o Repanona. <sup>6</sup> Ko ia hei mea i a ratou kia mokowhiti, ano he kuao: a Repanona raua ko Hiriona, ano

he kua<sup>7</sup> kau maka. E wehewehe ana te reo o Ihowa i nga mura ahi. Wiri ana te koraha i te reo<sup>8</sup> o Ihowa: wiri ana i a Ihowa te koraha o Karehe. Whanau ana nga hata i te reo o Ihowa, tihorea<sup>9</sup> ana nga ngahere kia tahanga: i tona temepara ko te kupu a te katoa, Kororia. I noho a Ihowa hei<sup>10</sup> kingi i runga i te Waipuke; ae, ka noho a Ihowa hei kingi, ake ake. Ka homai e Ihowa he kaha<sup>11</sup> ki tana hunga; he rongu mau ta Ihowa manaaki mo tana hunga.

### Chapter 30

<sup>1</sup> He hemene, he waiata mo te tainga o te kawa o te whare. Na Rawiri. Ka whakanui ahau i a koe, e Ihowa; nau hoki ahau i hapai ake, a kihai i tukua oku hoariri kia hari ki ahau. E Ihowa, e<sup>2</sup> toku Atua, i karanga ahau ki a koe, a kore ake toku mate i a koe. E Ihowa, nau i whakaputa ake<sup>3</sup> toku wairua i te reinga; nau ahau i whakaora kei heke ki te poka. Himene ki a Ihowa, e tana hunga<sup>4</sup> tapu, whakawhetai hoki ki tona ingoa tapu. He iti hoki te wahi e riri ai ia; he oranga ki te manakohia e ia: e tau iho te tangi i te ahiahi, a i te ata he hari.<sup>5</sup>

<sup>6</sup> I mea ahau i toku wa i kake ai, E kore ahau e whakangaueuetia a muri ake nei. He<sup>7</sup> manakohanga nau, e Ihowa, i u ai i a koe te tu o toku maunga; i huna e koe tou mata a raru iho ahau. E Ihowa, i karanga ahau ki a koe, i inoi hoki ki a Ihowa. He aha te pai o oku toto ina heke<sup>8</sup> ahau ki te poka? Ma te puehu koia koe e whakamoemiti? mana oti e whakapuaki tou pono?<sup>9</sup>

<sup>10</sup> Whakarongo, e Ihowa, tohungia hoki ahau: e Ihowa, ko koe hei awhina moku. Kua puta ke<sup>11</sup> i a koe taku tangi hei kanikani: kua wewete i toku kakahu taratara, a whitikiria ana ahau e koe ki te koa;<sup>12</sup> Hei mea e himene ai toku kororia ki a koe, kore ake e wahangu. E Ihowa, e toku Atua, ka whakawhetai ahau ki a koe ake ake.

### Chapter 31

<sup>1</sup> Ki te tino kaiwhakatangi. He himene na Rawiri. E Ihowa, ko koe taku e whakawhirinaki nei; kei whakama ahau ake ake: whakaorangia ahau, he tika nei hoki koe. Anga mai tou taringa ki<sup>2</sup> ahau; hohoro te whakaora i ahau: kia ai koe hei kohatu kaha moku, hei whare tiaki moku. Ko koe<sup>3</sup>

hoki toku kohatu, toku pa: na kia mahara ki tou ingoa, a arahina ahau, tohutohungia hoki ahau.

<sup>4</sup> Kapohia ahau i roto i te kupenga i huna e ratou moku; ko koe hoki toku kaha. <sup>5</sup> Tenei toku wairua  
te tukua atu nei e ahau ki tou ringa; nau ahau i hoki e Ihowa, e te Atua o te pono. <sup>6</sup> E kino ana ahau  
ki te hunga e whakaaro ana ki nga mea tekateka noa; e whakawhirinaki ana hoki ahau ki a Ihowa.

<sup>7</sup> Ka whakamanamana ahau, ka hari ki tou atawhai; mou i titiro ki taku tangi; i matau hoki ki toku  
wairua i nga wa o te he; <sup>8</sup> Kahore ahau i kopia e koe ki roto ki te ringa o te hoariri: kua whakaturia  
e koe oku waewae ki te wahi nui.

<sup>9</sup> Tohungia ahau, e Ihowa, kei te he hoki ahau, pakoko kau toku mata i te pouri, toku wairua  
me toku kopu. <sup>10</sup> Ka hemo nei hoki toku ora i te tangi, me oku tau i te aue; poto iho toku kaha i

toku he, kurupopo ana oku iwi. <sup>11</sup> He tawainga ahau na oku hoariri katoa; ko te tino mahi ia tena  
a oku hoa noho tata, he mea wehi ahau na nga tangata i mohio ki ahau: ko te hunga i kite i ahau i

waho, rere ana i ahau. <sup>12</sup> Kua warewaretia ahau me te tupapaku kua ngaro atu i te ngakau; kua rite  
ki te oko pakaru. <sup>13</sup> I rongu hoki ahau i te ngautuara a te tini; i karapotia ahau e te wehi: i a ratou

e runanga ana ki te he moku, i mea kia whakamatea ahau. <sup>14</sup> Ko ahau ia i whakawhirinaki ki a koe,  
e Ihowa: i mea, Ko koe toku Atua. <sup>15</sup> Kei tou ringa oku taima, whakaorangia ahau i nga ringa o

oku hoariri, i te hunga e tukino ana i ahau. <sup>16</sup> Kia whiti tou mata ki tau pononga; whakaorangia  
ahau, he mahi tohu hoki tau. <sup>17</sup> Kei whakama ahau, e Ihowa; kua karanga hoki ahau ki a koe: kia

whakama te hunga kino, kia takoto puku i te reinga. <sup>18</sup> Whakamutua te korero a nga ngutu teka,  
he kino nei a ratou korero mo te tangata tika, na to ratou whakapehapeha hoki, na to ratou whakahihi.

<sup>19</sup> Ano te nui o tau pai kua rongoatia nei e koe mo te hunga e wehi ana ki a koe; i mahia nei e  
koe mo te hunga e whakawhirinaki ana ki a koe i te aroaro o nga tama a te tangata! <sup>20</sup> Ka huna  
ratou e koe ki te wahi ngaro i tou aroaro i nga rauhanganga a te tangata; ka huna ratou e koe ki roto ki

te teneti, kei taea e te ngangau a nga arero. <sup>21</sup> Kia whakapaingia a Ihowa, mona i mea kia miharotia  
tana mahi tohu ki ahau i te pa kaha. <sup>22</sup> I ki hoki ahau i toku potatututunga, Kua motuhia mai ahau

i mua i ou kanohi: ahakoa ra i rongu koe ki toku reo inoi i taku karangatanga ki a koe. <sup>23</sup> Arohaina  
a Ihowa, e tana hunga tapu katoa: e tiakina ana e Ihowa te hunga pono, a he nui tana utu ki te

kaimahi whakapehapeha. <sup>24</sup> Kia maia, kia kaha o koutou ngakau, e te hunga katoa e tumanako ana  
ki a Ihowa.

## Chapter 32

<sup>1</sup> Na Rawiri: he Makiri. Ka hari te tangata kua oti tana he te muru, tona hara te hipoki. <sup>2</sup> Ka  
<sup>3</sup> hari te tangata kahore nei e whakairia e Ihowa he hara ki a ia, a kahore he hianga i tona wairua. I  
<sup>4</sup> ahau kihai i kuihi, ngahengahe kau oku iwi i taku auetanga i te ra roa. No tou ringa i taimaha ki  
<sup>5</sup> ahau i te ao, i te po; kua whakaputaina ketia toku makukuranga, ano na te maroketanga o te raumati.  
<sup>6</sup> (Hera. I whakina e ahau toku hara ki a koe, kihai hoki i huna i toku kino: i mea ahau, Ka whakina  
<sup>7</sup> aku mahi tutu ki a Ihowa; a murua ana e koe te kino o toku hara. (Hera. Mo konei ka inoi ki a  
<sup>8</sup> koe nga tangata tapu katoa i te wa e kitea ai koe: he pono ka ngawha nga wai nui, e kore e tata ki  
<sup>9</sup> a ia.  
<sup>10</sup> Ko koe toku piringa; mau ahau e whakaora i te pouri, mau ahau e karapoti ki nga waiata  
<sup>11</sup> whakaora. (Hera. Ka tohutohungia koe e ahau, ka whakaakona koe ki te ara e haere ai koe; ma  
<sup>12</sup> toku kanohi koe e arahi. Kei rite koutou ki te hoiho, ki te muera ranei, kahore nei he matauranga;  
<sup>13</sup> he mea kuku nei o raua kauae ki te paraire, ki te moka hei pupuri mai; ki te kore hoki, e kore e tata  
<sup>14</sup> ki a koe. He tini nga mea whakapouri mo te tangata hara: ko te tangata ia e whakawhirinaki ana  
<sup>15</sup> ki a Ihowa, ka karapotia e te atawhai. Kia koa ki a Ihowa, whakamanamana, e te hunga tika: kia  
<sup>16</sup> hari, hamama, e te hunga ngakau tika katoa.

## Chapter 33

<sup>1</sup> Kia hari ki a Ihowa, e te hunga tika: he mea ataahua te whakamoemiti ma te hunga kore he.  
<sup>2</sup> Whakamoemiti ki a Ihowa i runga i te hapa; himene ki a ia i runga i te hatere kotahi tekau nei nga  
<sup>3</sup> aho. Waiatatia ki a ia he waiata hou: kia tika te whakatangi, kia nui te reo. <sup>4</sup> No te mea he tika  
<sup>5</sup> te kupu a Ihowa, a kei runga i te pono ana mahi katoa. E paingia ana e ia te tika me te whakawa:  
<sup>6</sup> ki tonu te whenua i te atawhai a Ihowa. Na te kupu a Ihowa nga rangi i hanga; ko nga mano katoa  
<sup>7</sup> hoki o reira na te ha o tona mangai. He mea huihui e ia nga wai o te moana, ano he puranga; he  
<sup>8</sup> mea whawhao e ia te rire ki nga pakoro. Kia wehi te whenua katoa ki a Ihowa; kia ohooho nga  
<sup>9</sup> tangata katoa o te ao ki a ia. I ki hoki ia, a kua oti: i whakahau, a tu tonu iho. <sup>10</sup> E whakataka ana



e Ihowa te whakaaro o nga tauwi: e whakakahoretia ana e ia nga meatanga a nga iwi. <sup>11</sup> Ko te whakaaro o Ihowa, tu tonu ake ake; ko nga meatanga a tona ngakau kei tena whakatupuranga, kei tena whakatupuranga.

<sup>12</sup> Ka hari te iwi no ratou nei Atua a Ihowa, te iwi kua whiriwhiria e ia hei taonga tupu mona.  
<sup>13</sup> E titiro iho ana a Ihowa i te rangi: e kite ana ia i nga tama katoa a te tangata. <sup>14</sup> Kei tona wahi nohoanga ia e matakitaki iho ana ki nga tangata katoa o te whenua. <sup>15</sup> Nana i hanga nga ngakau o ratou katoa, e mohiotia ana e ia a ratou mahi katoa. <sup>16</sup> E kore tetahi kingi e ora i te nui o te ope, e kore e ora te marohirohi i te nui o te kaha. <sup>17</sup> He mea teka te hoiho hei whakaora; ehara ano tona kaha nui i te mea e mawhiti ai. <sup>18</sup> Nana, kei runga i te hunga e wehi ana i a ia te kanohi o Ihowa, kei te hunga e tumanako ana ki tana mahi tohu; <sup>19</sup> Hei whakaora i o ratou wairua kei mate, hei mea i a ratou kia ora i te wa o te hemokai. <sup>20</sup> Kua tatari nei o tatou wairua ki a Ihowa; ko ia to tatou kaiawhina, to tatou whakangungu rakau. <sup>21</sup> Hari tonu to tatou ngakau ki a ia; no tatou hoki i whakawhirinaki ki tona ingoa tapu. <sup>22</sup> E Ihowa, hei runga i a matou tau mahi tohu; kia rite hoki ki ta matou tumanako ki a koe.

### Chapter 34

<sup>1</sup> Na Rawiri, i tona ahua i rere ke ra i te aroaro o Apimereke; na pei ana ia, a haere ana. Ka whakapaingia e ahau a Ihowa i nga wa katoa; he whakamoemiti tonu ta toku mangai ki a ia. <sup>2</sup> Ka whakamanamana toku wairua ki a Ihowa: ka rongu te hunga mahaki, a ka hari. <sup>3</sup> Kia whakanui tahi tatou i a Ihowa, kia whakateitei tahi hoki i tona ingoa. <sup>4</sup> I rapu ahau i a Ihowa, a rongu mai ana ia ki ahau, whakaorangia ana ahau e ia i oku wehi katoa. <sup>5</sup> I titiro ratou ki a ia, a kua marama: a kahore rawa he whakama o o ratou mata. <sup>6</sup> I karanga tenei tangata iti, a whakarongo ana a Ihowa, whakaora ana i a ia i ona whakapawera katoa. <sup>7</sup> E noho ana te anahera a Ihowa i tetahi taha, i tetahi taha, o te hunga e wehi ana i a ia, a e whakaora ana i a ratou. <sup>8</sup> Whakamatauria, kia kite ai koutou i te pai o Ihowa: ka hari te tangata e whakawhirinaki ana ki a ia. <sup>9</sup> Kia wehi ki a Ihowa, e tona

<sup>10</sup>  
 hunga tapu: e kore hoki e hapa nga tangata e wehi ana i a ia. E hapa ana nga kuao raiona, e mate ana i te kai: ko te hunga ia e rapu ana ki a Ihowa, e kore e hapa i tetahi mea pai.

<sup>11</sup>  
 Haere mai, e nga tamariki, whakarongo ki ahau: maku koutou e ako kia wehi ki a Ihowa.

<sup>12</sup> Ko wai te tangata e hiahia ana ki te ora, e whai ana kia maha nga ra, kia kite i te pai? <sup>13</sup> Tiakina tou arero kei kino, ou ngutu kei korero hianga. <sup>14</sup> Mawehe atu i te kino, mahia te pai; rapua te ata noho, whaia hoki. <sup>15</sup> E tau ana nga kanohi o Ihowa ki te hunga tika; me ona taringa ki ta ratou karanga. <sup>16</sup> E he ana te mata o Ihowa ki nga kaimahi i te kino, hei hatepe i a ratou i te whenua kei maharatia. <sup>17</sup> I karanga te hunga tika, a i whakarongo a Ihowa, whakaorangia ana ratou e ia i o ratou whakapawera katoa. <sup>18</sup> E tata ana a Ihowa ki te hunga ngakau maru: ka whakaorangia ano e ia te hunga wairua iro. <sup>19</sup> He tini nga mate o te tangata tika: otiia e whakaorangia ana ia e Ihowa i roto i era katoa. <sup>20</sup> E tiakina ana e ia ona wheua katoa: e kore tetahi e whati. <sup>21</sup> Ka mate i te kino te tangata hara; a ka he te hunga e kino ana ki te tangata tika. <sup>22</sup> E hokona ana e Ihowa te wairua o ana pononga, e kore ano e he tetahi o te hunga e whakawhirinaki ana ki a ia.

### Chapter 35

<sup>1</sup> Na Rawiri. E ngana, e Ihowa, ki te hunga e tohe ana ki ahau: whawhaitia te hunga e whawhai nei ki ahau. <sup>2</sup> Kia mau ki te whakangungu rakau, ki te puapua; whakatika hei awhina moku. <sup>3</sup> Unuhia te tao, araia te ara o te hunga e whai nei i ahau: ki mai ki toku wairua, Ko ahau tou whakaoranga.

<sup>4</sup> Kia whakama, kia numinumi te hunga e whai ana kia whakamatea ahau: kia whakahokia ki muri, kia whakapoauautia te hunga e whakatakoto ana i te kino moku. <sup>5</sup> Kia rite ratou ki te papapa e puhia ana e te hau; kia aia haeretia e te anahera a Ihowa. <sup>6</sup> Kia pouri to ratou ara, kia pahekeheke: kia whaia ratou e te anahera a Ihowa. <sup>7</sup> Kahore hoki he rawa i huna ai e ratou te poka o ta ratou kupenga moku; he mea keru takekore kia mate ai ahau. <sup>8</sup> Kia rokohanga poauautia ia e te ngaromanga; kia mau ano ko ia i tana kupenga i huna ai: kia taka ia ki taua tino ngaromanga. <sup>9</sup> A ka koa toku wairua ki a Ihowa, ka hari ki tana whakaoranga. <sup>10</sup> Ka ki katoa oku wheua, E Ihowa,

ko wai te rite mou, mo te kaiwhakaora o te iti i te tangata e kaha ake ana i a ia, ae o te iti, o te rawakore i tona kaipahua?

11

Whakatika ana nga kaiwhakapae teka: whakawakia ana ahau mo nga mea kihai nei ahau i

12

matau atu. Utua ana e ratou taku pai ki te kino, a whakatupu pani ana toku wairua. Tena ko ahau, i a ratou e mate ana, he kahu taratara toku, waikauwere ana toku wairua, kihai i kai: a hoki

13

mai ana taku inoi ki toku uma. Ko toku ahua me te mea he hoa ia, he teina noku: kupapa noa

14

iho ahau, ano he tangata e tangi ana ki tona whaea. I toku paheketanga ia koa ana ratou, huihui ana; huihui ana nga tangata kino noa iho hei hoariri moku, kihai ano ahau i mohio; haehae ana ratou

15

i ahau, kihai hoki i mutu. Rite tonu ki nga kaiwhakakata o nga hakari, tetea ana o ratou niho ki ahau.

16

17

E te Ariki, kia pehea te roa o tau titiro kau mai? Whakaorangia toku wairua i a ratou

whakangaromanga, taku e aroha nei, i nga raiona. Ka whakawhetai ahau ki a koe i roto i te

18

whakaminenga nui, ka whakamoemiti ki a koe i roto i te iwi maha. Kei hari pokanoa ki ahau

19

oku hoariri; kei whakakini te kanohi o te hunga e kino noa ana ki ahau. Ehara hoki ta ratou i te korero mo te rangimarie; heoi kei te whakatakoto kupu tinihanga ratou mo te hunga ata noho o te

20

whenua. Ina, hamama ana o ratou mangai ki ahau, e ki ana, Ha, ha, kua kite to matou kanohi.

21

Kua kite koe, e Ihowa: kua ra e wahangu; e te Ariki, kei matara i ahau. Oho ake, e ara ki te

22

23

whakarite i toku whakawa, ki taku tautohe, e toku Atua, e toku Ariki. Kia rite ki tou tika te

24

whakarite moku, e Ihowa, e toku Atua: kei koa ano ratou ki ahau. Kei mea ratou i roto i o ratou

25

ngakau, Ha, ko ta matou tena i pai ai: kei mea ratou, Kua horomia ia e tatou. Kia whakama, kia numinumi ngatahi, te hunga e koa ana ina he ahau: kia whakakakahuria ki te whakama, ki te

26

numinumi, te hunga e whakakake ana ki ahau. Kia hamama i te hari, kia koa te hunga e pai ana ki taku mahi tika: ae, kia mea tonu, kia whakanuia a Ihowa e whakapai nei ki te ora o tana pononga.

27

28

A ka korerotia e toku arero tau mahi tika, me te whakamoemiti ki a koe i te ra roa.

## Chapter 36

<sup>1</sup> Ki te tino kaiwhakatangi. Na te pononga a Ihowa, na Rawiri. E mea ana te mahi kino a te tangata hara i roto i toku ngakau, Kahore he wehi ki te Atua i mua i ona kanohi. <sup>2</sup> E whakapai ana hoki ona kanohi ake ki a ia ano, e kore e kitea tona hara, e kore e kinongia. <sup>3</sup> He kino nga kupu a tona mangai he rauhanga hoki, kua mahue i a ia te mahara, te mahi i te pai. <sup>4</sup> He mahi nanakia tana e whakaaro ai i runga i tona moenga; ehara i te pai te ara e turia ana e ia, kahore ona whakarihariha ki te kino.

<sup>5</sup> Kei nga rangi, e Ihowa, tau mahi tohu: tutuki noa atu tou pono ki nga kapua. <sup>6</sup> Rite tonu tou tika ki nga maunga o te Atua; he rire nui au whakaritenga: ko koe, e Ihowa, te kaiwhakaora i te tangata, i te kararehe. <sup>7</sup> Ano te pai o tou aroha, e te Atua: ka okioki nga tama a te tangata i raro i te taumarumarutanga iho o ou pakau. <sup>8</sup> Ka makona ratou i nga mea momona o tou whare: ka whakainumia ano e koe ki te awa o au mea whakahari. <sup>9</sup> Kei a koe hoki te puna o te ora; ma tou marama ka kite ai matou i te marama. <sup>10</sup> Kia roa tou aroha ki te hunga e matau ana ki a koe, tou tika hoki ki te hunga ngakau tika. <sup>11</sup> Kei puta mai ki ahau te waewae whakapakari; kei aia atu ahau e te ringa o te hunga hara. <sup>12</sup> Hinga iho i reira nga kaimahi i te kino: kua turakina iho, te ahei te ara ake.

### Chapter 37

<sup>1</sup> Na Rawiri. Kaua e mamae ki te hunga kino, kaua e hae ki nga kaimahi i te he. <sup>2</sup> No te mea ka hohoro ratou te kotia, te peratia me te tarutaru, a ka memenga me he otaota hou. <sup>3</sup> Whakawhirinaki ki a Ihowa, mahia te pai; e noho ki te whenua, a e aru i muri i te pono. <sup>4</sup> Whakaahuareka ki a Ihowa, a ka homai e ia ki a koe ta tou ngakau i hiahia ai. <sup>5</sup> Tukua tou ara ki a Ihowa; whakawhirinaki hoki ki a ia, a mana e mahi. <sup>6</sup> Mana hoki e whakaputa tou tika, ano he marama, ou ritenga me te mea ko te ra e tu ana.

<sup>7</sup> Okioki ki a Ihowa, tatari marie ki a ia: kei mamae ki te tangata e tere ana i tona ara, ki te tangata e taea ana e ia nga whakaaro kino. <sup>8</sup> Kati te riri, whakarerea hoki te arita; kei mamae koe, kei takina kia mahi i te kino. <sup>9</sup> No te mea ka hatepea atu te hunga kino: ko te hunga ia e tatari ana

10  
 ki a Ihowa, ka riro i a ratou te whenua. Kia potopoto ake nei hoki, a ka kore noa iho te hunga  
 kino: ae ra, ka ata tirohia e koe tona wahi, a kore kau noa iho ia. 11  
 Na ka riro te whenua i te hunga  
 mahaki; a ka hari ratou i te roa o te ata noho. 12  
 E whakangarahua ana te tangata kino mo te tangata  
 tika: pakiri ana ona niho ki a ia. 13  
 Ka kata te Ariki ki a ia, no te mea ka kite ia e tata ana tona ra.  
 14  
 Kua unuhia te hoari e te hunga kino, kua piko ta ratou kopere, hei turaki i te ware, i te rawakore,  
 hei kohuru i te hunga e tika ana, i te ara. 15  
 Ka tapoko ta ratou hoari ki o ratou ngakau: a ka whatiia  
 a ratou kopere. 16  
 Engari te wahi iti a te tangata tika i nga taonga o nga tangata kino tokomaha.  
 17  
 Ka whatiia hoki nga ringa o te hunga kino: u tonu ia i a Ihowa te hunga tika. 18  
 E matau ana a  
 Ihowa ki nga ra o te hunga tika: a ka pumau to ratou kainga ake ake. 19  
 E kore ratou e whakama i  
 te wa o te he, ka makona ano ratou i nga ra o te hemokai. 20  
 Ka ngaro ia te hunga kino, a ka rite  
 nga hoariri o Ihowa ki te momona o te tarutaru: ka mahea atu ratou; ka mahea atu me he paowa.  
 21  
 E tango ana te tangata kino i te taonga tarewa, kahore hoki ana utu: ko te tangata tika ia he  
 aroha tona, he homai. 22  
 Ka riro hoki te whenua i ana e manaaki ai; ka hatepea ano ana e kanga  
 ai. 23  
 Ka u i a Ihowa nga hikoinga o te tangata tika; e paingia ana hoki e ia tona ara. 24  
 Ahakoa  
 hinga, e kore e tino takoto rawa; ka u hoki ia i te ringa o Ihowa. 25  
 He tamariki ahau i mua, a kua  
 koroheke nei, heoi, kahore ahau i kite i te tangata tika e whakarerea ana, i ona uri hoki e pinono  
 taro ana. 26  
 I te ra roa he atawhai tonu tana, he ohaoha: ka manaakitia hoki ona uri. 27  
 Whakarerea  
 te kino, mahia te pai, ka noho tonu ai. 28  
 E aroha ana hoki a Ihowa ki te ritenga pai: e kore ano e  
 whakarere i tana hunga tapu; e tiakina tonutia ana ratou ake ake; ka hatepea atu ia nga uri o te hunga  
 kino. 29  
 Ka riro te whenua i te hunga tika, ka nohoia hoki a reira e ratou ake ake. 30  
 He kupu mohio  
 ta te mangai o te tangata tika; he ritenga pai ta tona arero e korero ai. 31  
 Kei tona ngakau te ture a  
 tona Atua; e kore e paheke tetahi o ona hikoinga. 32  
 E tau ana te titiro a te tangata kino ki te tangata  
 tika, a e whai ana kia whakamatea ia. 33  
 E kore a Ihowa e whakarere i a ia ki tona ringa: e kore  
 ano ia e whakatau he ki a ia ina whakawakia.  
 34  
 Taria a Ihowa, kia mau ki tana ara, a ka whakanuia koe e ia, ka whakawhiwhia hoki ki te  
 whenua: e hatepea atu te hunga kino, ka kite koe. 35  
 I kite ahau i te tangata kino e kake ana, e  
 tautorotoro ana me te rakau matomato i tona oneone tupu. 36  
 Heoi, pahure noa ake tetahi, a kore

kau noa iho; ae, i rapua ia e ahau, a kihai i kitea. <sup>37</sup> Waitohutia te tangata tika, tirohia iho te tangata  
 kore he: no te mea he marie te tukunga iho ki taua tangata. <sup>38</sup> Tena ko te hunga kino, ka ngaro  
 ngatahi atu ratou: te tukunga iho ki te hunga kino, ka hatepea atu ratou. <sup>39</sup> Na Ihowa ia te  
 whakaoranga o te hunga tika: ko ia to ratou pa kaha i te wa o te he. <sup>40</sup> Ma Ihowa ratou e awahina,  
 ko ia hoki hei tauarai mo ratou: ko ia hei tauarai mo ratou i te hunga kino, ka whakaorangia ratou  
 e ia, mo ratou ka whakawhirinaki ki a ia.

### Chapter 38

<sup>1</sup> He himene na Rawiri, hei whakamahara. E Ihowa, kaua e whakatupehupehu mai ki ahau ina  
 riri koe, kaua ano ahau e pakia ina arita koe. <sup>2</sup> Titi tonu hoki au pere ki ahau: kaha rawa te pehi a  
 tou ringa i ahau. <sup>3</sup> Kahore he wahi ora o oku kikokiko, na tou riri hoki: kahore ano e ata takoto oku  
 wheua, noku i hara nei. <sup>4</sup> Kua taupokina iho hoki toku matenga e oku kino: ano he pikaunga taimaha  
 e pehi rawa ana i ahau. <sup>5</sup> E piro ana oku whiunga, kua pirau i taku mahi pouau. <sup>6</sup> E whakawiria  
 ana ahau, piko rawa; e tangi haere ana i te roa o te ra. <sup>7</sup> Kei te tahuna hoki toku hope, kapi tonu:  
 kahore hoki he wahi ora o oku kikokiko. <sup>8</sup> Kua kore oku kaha, maru rawa ahau: hamama ana taku  
 aue i te mamae o toku ngakau. <sup>9</sup> E te Ariki, kei tou aroaro oku hiahia katoa; kahore hoki e ngaro i  
 a koe taku aue. <sup>10</sup> Kihakiha kau toku ngakau, kua hemo toku kaha: me te marama o oku kanohi,  
 kua kore hoki ena oku. <sup>11</sup> Matara noa atu i toku mate te turanga mai o nga tangata i aroha mai ki  
 ahau, o oku hoa hoki; i tawhiti ano oku whanaunga e tu ke mai ana.  
<sup>12</sup> E whakatakoto mahanga ana moku te hunga e whai ana i ahau kia whakamatea; he nanakia  
 ano nga kupu a te hunga e rapu ana i te he moku; he whakaaro tinihanga ano a ratou a pau noa te  
 ra. <sup>13</sup> Ko ahau ia, i rite ki te turi, kihai i rongu, ki te tangata wahangu, kahore nei e hamamu tona  
 mangai. <sup>14</sup> Na rite tonu ahau ki te tangata kahore nei e rongu, kahore nei he whakatupehupehu i  
 tona mangai. <sup>15</sup> E tumanako nei hoki ahau ki a koe, e Ihowa: ka whakahoki kupu mai ano koe, e  
 te Ariki, e toku Atua. <sup>16</sup> I mea hoki ahau, Kei koa mai ratou ki ahau: ka paheke toku waewae, ka  
 whakahihi ratou ki ahau. <sup>17</sup> Ko ahau hoki, meake kopa, a kei inua tonu i ahau toku pouri. <sup>18</sup> Ka

whaki hoki ahau i toku kino, ka pouri mo toku hara. <sup>19</sup> Ko oku hoariri ia hauhau tonu, kaha tonu;  
 kua tokomaha ano te hunga e kino noa ana ki ahau. <sup>20</sup> He hoariri ano ki ahau te hunga e utu ana i  
 te pai ki te kino: moku e whai ana i te pai. <sup>21</sup> Kua ahau e whakarerea, e Ihowa, e toku Atua; kei  
 mamao atu koe i ahau. <sup>22</sup> Hohoro ki te awchina i ahau, e te Ariki, e toku whakaoranga.

### Chapter 39

<sup>1</sup> Ki te tino kaiwhakatangi, ki a Jerutunu. He himene na Rawiri. I mea ahau, Ka ata whakaaro  
 ahau ki oku ara, kei hara toku arero; ka tiakina toku mangai, paraire rawa, i te mea kei toku aroaro  
 te tangata kino. <sup>2</sup> I whakamoroki ahau, i wahangu, kihai i puaki taku kupu, ahakoa pai; a ka oho  
 toku mamae. <sup>3</sup> Werawera ana toku ngakau i roto i ahau; i ahau e whakaaro ana ka ka te ahi, a ka  
 korero toku arero. <sup>4</sup> E Ihowa, meinga ahau kia matau ki toku mutunga, ki te maha hoki o oku ra,  
 e hia ranei: kia matau ai ahau he mea memeha noa ahau. <sup>5</sup> Nana, he whanuitanga ringa oku ra kua  
 homai nei e koe; he kahore noa iho ano oku tau i tou aroaro: ahakoa u noa te tu o nga tangata katoa,  
 he mea memeha kau. (Hera. <sup>6</sup> He pono kei roto i te atarangi te tangata e kopikopiko noa ana; he  
 pono e ohore noa ana ratou: e ami ana ia i te taonga, a kahore e matau ma wai ranei e kahi.  
<sup>7</sup> Na he aha taku e tatari atu nei, e te Ariki? Ko koe taku e tumanako ai. <sup>8</sup> Whakaorangia ahau  
 i aku mahi tutu katoa: kua ahau e waiho hei tawainga ma te wairangi. <sup>9</sup> Wahangu ana ahau, kihai  
 i kuihi toku mangai: he meatanga hoki tenei nau. <sup>10</sup> Nekehia atu i ahau tau whiu: ka ngaro ahau i  
 te pakinga a tou ringa. <sup>11</sup> Ka pakia e koe te tangata, ka whakatupehuphutia mo te hara, ka meinga  
 e koe tona ataahua kia memeha, kia pera me te purehuru: he pono he mea teka noa nga tangata  
 katoa. (Hera. <sup>12</sup> Whakarongo ki taku inoi, e Ihowa, kia titaha mai tou taringa ki taku karanga; kei  
 wahangu koe ki oku roimata: he heke hoki ahau nau, he manene, he pera me oku matua katoa.  
<sup>13</sup> Kia ata hanga ki ahau, kia ta ai toku manawa, keiwha haere atu ahau i konei, a ka kahore noa  
 iho.

### Chapter 40

<sup>1</sup> Ki te tino kaiwhakatangi. He himene na Rawiri. I tatari marie ahau ki a Ihowa: a anga ana ia  
 ki ahau, whakarongo ana ki taku karanga. <sup>2</sup> Na kei te tango ake ia i ahau i te poka whakamataku,  
 i te paru taoruoru; kei te whakatu i oku waewae ki runga ki te kohatu, kei te whakau i oku hikoinga.  
<sup>3</sup> A homai ana e ia he waiata hou ki toku mangai, he whakamoemiti ki to tatou Atua: he tokomaha  
 e kite, a ka wehi ka whakawhirinaki ki a Ihowa. <sup>4</sup> Ka hari te tangata kua waiho nei e ia a Ihowa  
 hei whakawhirinakitanga mona: a kahore e tahuri ki te hunga whakakake, ki te hunga hoki e peka  
 ana ki te teka. <sup>5</sup> E Ihowa, e toku Atua, he tini au mahi whakamiharo i mahia e koe, me ou whakaaro  
 ki a matou; e kore e taea te korero whakatepe atu ki a koe: me i mea ahau kia whakakitea, kia  
 korerotia, e kore e taea te tatau.  
<sup>6</sup> Kihai i matenuitia e koe te patunga tapu, me te whakahere; pokaia ana e koe oku taringa:  
 kihai koe i mea mai ki te tahunga tinana, ki te whakahere hara. <sup>7</sup> Na ko taku meatanga atu, Na kua  
 tae mai ahau: kei roto i te pukapuka te tuhituhi moku. <sup>8</sup> Ko taku pai ko te mea i tau e pai ai, e toku  
 Atua: ae ra, kei toku ngakau tau ture. <sup>9</sup> Kua kauwhautia e ahau te tika i roto i te whakaminenga  
 nui: nana, kihai i kopia oku ngutu, tena koe te matau ana, e Ihowa. <sup>10</sup> Kihai i huna e ahau tou tika  
 i roto i toku ngakau; kua korerotia e ahau tou pono me tau whakaoranga: kihai i hunga e ahau tou  
 aroha me tou pono i te whakaminenga nui.  
<sup>11</sup> Kei kaiponuhia tou aroha ki ahau, e Ihowa: ma tou atawhai me tou pono ahau e tiaki i nga  
 wa katoa. <sup>12</sup> Ta te mea kua karapotia ahau e nga kino e kore e taea te tatau: mau pu ahau i oku  
 kino, te ahei te titiro ake; he tini ke i nga makawe o toku matenga: a hemo iho toku ngakau. <sup>13</sup> Kia  
 pai, e Ihowa, ki te whakaora i ahau; e Ihowa, hohoro ki te awhina i ahau. <sup>14</sup> Kia whakama, kia  
 pororaru ngatahi te hunga e rapu ana i toku wairua kia whakamatea: kia whakahokia ki muri, kia  
 whakama te hunga e hiahia ana kia he ahau. <sup>15</sup> Kia huna, hei utu mo to ratou whakama te hunga  
 e mea mai ana ki ahau, Ha, ha. <sup>16</sup> Kia hari, kia koa ki a koe te hunga katoa e rapu ana i a koe; kia  
 mea tonu te hunga e pai ana ki tau whakaoranga, Kia whakanuia a Ihowa. <sup>17</sup> Ko ahau ia, he iti, he  
 rawakore; heoi e whakaaro ana te Ariki ki ahau: ko koe toku awhina, toku kaiwhakaora; kaua ra e  
 whakaroa, e toku Atua.

## Chapter 41



<sup>1</sup> Ki te tino kaiwhakatangi. He himene na Rawiri. Ka hari te tangata e whakaaro ana ki te rawakore; e whakaorangia ia e Ihowa i te ra o te he. <sup>2</sup> Ma Ihowa ia e tiaki, e whakaora; ka whakaharitia ia i runga i te whenua: e kore ano e tukua e koe ki nga hiahia o ona hoariri. <sup>3</sup> Ma Ihowa ia e whakakaha, i a ia e whakaruhi ana i runga i te moenga: mau ano e whakapai katoa tona moenga i a ia e mate ana. <sup>4</sup> I mea ahau, E Ihowa, tohungia ahau; rongoatia toku wairua; kua hara hoki ahau ki a koe. <sup>5</sup> He kino te korero a oku hoariri moku, e mea ana, A hea ranei ia mate ai, pirau ai tona ingoa? <sup>6</sup> A ki te haere mai ia kia kite i ahau, ka korero horihori ia: e ami ana tona ngakau i te kino mana; i tona putanga ki waho, korerotia ana e ia. <sup>7</sup> E komuhumuhu ana moku te hunga katoa e kino ana ki ahau; e whakatakoto ana i te kino moku. <sup>8</sup> E ai ta ratou, E piri ana te mate kino ki a ia; a ka takoto nei ia, heoi ano tona aranga ake. <sup>9</sup> Ae, ko toku hoa ake ano, i whakawhirinaki ai ahau, i kai nei i taku taro, kua hiki ake tona rekereke ki ahau. <sup>10</sup> Ko koe ia, e Ihowa, kia aroha ki ahau: a whakaarahia ahau, kia utua ai ratou e ahau. <sup>11</sup> Na konei ahau i matau ai e pai ana koe ki ahau, no te mea kahore toku hoariri e whakamanamana ki ahau. <sup>12</sup> Ko ahau ia, ko koe e whakamau ake ana i ahau i runga i toku ngakau tapatahi: e whakatu ake ana hoki i ahau ki tou aroaro ake tonu atu. <sup>13</sup> Kia whakapaingia a Ihowa, te Atua o Iharaira inamata riro ano, ake tonu atu ano hoki. Amine, ae Amine.

## Chapter 42

<sup>1</sup> Ki te tino kaiwhakatangi. He Makiri, ma nga tama a Koraha. Rite tonu ki te hata e kihakiha nei ki nga manga wai toku ngakau e kihakiha nei ki a koe, e te Atua. <sup>2</sup> E hiainu ana toku wairua ki te Atua, ki te Atua ora: a hea ahau tae ai, puta ai ki te aroaro o te Atua? <sup>3</sup> Ko oku roimata taku kai i te ao, i te po, i a ratou e mea tonu mai nei ki ahau, Kei hea tou Atua? <sup>4</sup> Ka mahara ahau ki enei mea; me te wai toku ngakau e maringi ana i roto i ahau: i haere hoki ahau i roto i te huihui, i haere tahi matou ki te whare o te Atua, he hari te reo, he whakamoemiti, me te huihui e mea hakari ana. <sup>5</sup> He aha koe i piko ai, e toku wairua? i ohorere ai i roto i ahau? Tumanako ki te Atua; tera ano ahau e whakawhetai ki a ia, mo te ora o tona mata.

<sup>6</sup> E toku Atua, kua piko toku wairua i roto i ahau: koia ahau ka mahara ai ki a koe i te whenua o Horano, o nga Heremoni, i Maunga Mitara. <sup>7</sup> Rara ana tetahi rire ki tetahi rire i te haruru o au awhiowhio wai: tika ana au ngaru katoa me au tuatea i runga i ahau. <sup>8</sup> Ahakoa ra e whakahaua mai ano e Ihowa tona atawhai i te awatea; a he waiata taku ki a ia i te po, he inoi ki te Atua o toku ora. <sup>9</sup> Ka mea ahau ki te Atua, E toku kohatu, he aha koe i wareware ai ki ahau? He aha ahau ka haere pouri ai i te tukino a te hoariri? <sup>10</sup> Ano he hoari i roto i oku wheua te tawai a oku hoariri: i a ratou e mea mai nei ki ahau i nga ra katoa, Kei hea tou Atua? <sup>11</sup> He aha koe i piko ai, e toku wairua? He aha koe i ohore ai i roto i ahau? Tumanako ki te Atua: tera ano ahau e whakawhetai ki a ia, ko te ora nei ia o toku mata, ko toku Atua.

### Chapter 43

<sup>1</sup> E te Atua, whakaritea taku whakawa, whakatikaia aku korero ki te iwi atuakore: whakaorangia ahau i te tangata tinihanga e mahi nei i te he. <sup>2</sup> Ko koe hoki te Atua o toku kaha: he aha ahau ka panga nei e koe? He aha ahau ka haere pouri ai i te tukino a te hoariri? <sup>3</sup> Tukua mai tou marama me tou pono hei arahi i ahau: hei kawe i ahau ki tou maunga tapu, ki ou tapenakara. <sup>4</sup> A ka haere ahau ki te aata a te Atua, ki te Atua, ki toku hari nui: ae, ka whakamoemiti ki a koe, e te Atua, e toku Atua, i runga i te hapa. <sup>5</sup> He aha koe i piko ai, e toku wairua? He aha koe i ohore ai i roto i ahau? Tumanako ki te Atua: tera ano ahau e whakawhetai ki a ia, ko te ora nei ia o toku mata, ko toku Atua.

### Chapter 44

<sup>1</sup> Ki te tino kaiwhakatangi, ma nga tama a Koraha. He Makiri. E te Atua, kua rongo o matou taringa, kua korerotia ki a matou e o matou matua, nga mahi i mahia e koe i o ratou ra, i nga ra o mua. <sup>2</sup> Nau nga tauwi i pana ki tou ringa, nau ratou i whakato: nau nga iwi i whiu, a whakamararatia ana ratou. <sup>3</sup> Ehara hoki i te mea, na ta ratou hoari i whiwhi ai ratou ki te whenua, ehara to ratou takakau i te mea i ora ai ratou: engari na tou matau, na tou takakau hoki, na te marama ano o tou mata, he pai hoki nou ki a ratou. <sup>4</sup> E te Atua, ko koe toku Kingi: whakahaua he whakaora mo

<sup>5</sup> Hakapa. Mau ka turaki ai matou i o matou hoariri; ma tou ingoa ka takahia ai e matou te hunga  
 e whakatika ana ki a matou. <sup>6</sup> E kore hoki ahau e whakawhirinaki ki taku kopere: e kore ano taku  
 hoari e whakaora i ahau. <sup>7</sup> Nau hoki matou i ora ai i o matou hoariri: nau ano i whakama ai te hunga  
 i kino ki a matou. <sup>8</sup> Ko te Atua ta matou e whakamanamana ai i te roa o te ra: ka whakamoemiti  
 ano matou ki tou ingoa ake ake. (Hera.  
<sup>9</sup> Otira kua panga nei matou e koe, kua meinga kia whakama: kahore hoki koe kia haere tahi  
 me a matou taua. <sup>10</sup> Kua meinga matou kia hoki whakamuri mai i te hoariri; kei te pahua ano i  
 etahi ma ratou te hunga e kino ana ki a matou. <sup>11</sup> Kua hoatu matou e koe, ano he hipi e kainga ana:  
 kua marara ki roto ki nga tauiwi. <sup>12</sup> E hokona ana e koe tau iwi, a hore he utu: kahore hoki koe e  
 whiwhi rawa i te utu mo ratou. <sup>13</sup> E meinga ana matou e koe hei tawainga ma o matou hoa kainga;  
 hei whakahaweatanga, hei whakakatanga mai ma te hunga i tetahi taha, i tetahi taha o matou. <sup>14</sup> E  
 meinga ana matou e koe hei whakatauki ma nga tauiwi; hei rurutanga matenga ma nga iwi. <sup>15</sup> Kei  
 mua tonu i ahau toku whakama; kua taupokina ahau e te pawera o toku mata; <sup>16</sup> I te reo o te  
 kaitawai, o te kaikohukohu; i te hoariri, i te kairapu utu.  
<sup>17</sup> Kua pa katoa tenei ki a matou; heoi kahore matou i wareware ki a koe, kihai ano i teka ki  
 tau kawenata. <sup>18</sup> Kahore to matou ngakau i tahuri whakamuri; kihai ano o matou hikoinga i peka  
 ke i tau ara; <sup>19</sup> I maru ai matou i a koe i te wahi o nga tarakona; a taupoki rawa ki te atarangi o te  
 mate. <sup>20</sup> Mehemea kua wareware matou ki te ingoa o to matou Atua, kua totoro ranei o matou  
 ringa ki te atua ke; <sup>21</sup> E kore ranei tenei e ata tirohia e te Atua? E matau ana hoki ia ki nga mea  
 ngaro o te ngakau. <sup>22</sup> Mou nei hoki matou i patua ai i te ra roa nei: kiia iho matou he hipi e patua  
 ana. <sup>23</sup> E ara, he aha koe ka moe ai, e te Ariki? Whakatika, kua matou e panga tonutia. <sup>24</sup> He aha  
 koe ka huna ai i tou mata? ka wareware ai ki to matou mamae, ki to matou tukinotanga? <sup>25</sup> Kua  
 piko nei hoki to matou wairua ki raro ki te puehu; piri rawa to matou kopu ki te whenua. <sup>26</sup> E ara,  
 hei awihina i a matou; kia mahara ki tou aroha, a hokona matou.

## Chapter 45

<sup>1</sup> Ki te tino kaiwhakatangi. He Homhanimi ma nga tama a Koraha. He Makiri, he waiata aroha. E pupuke ake ana te mea pai i roto i toku ngakau: ka korerotia e ahau aku i tito ai mo te kingi: he pene toku arero na te kaituhituhi hohoro. <sup>2</sup> Engari koe he ataahua i nga tama a te tangata: kua ringihia ou ngutu ki te ahuaareka, na reira i manaakitia ai koe e te Atua ake ake. <sup>3</sup> Whitikiria tau hoari ki tou huwha, e te Nui Rawa, tou kororia me tou honore. <sup>4</sup> Aratakina hoki tou hoiho i runga i tou honore, i te kaha, hei mea hoki mo te pono, mo te mahaki, mo te tika, a ma tou matau koe e whakaako ki nga mea whakamataku. <sup>5</sup> He koi au pere; ka hinga nga iwi ki raro i a koe; kei roto ratou i te ngakau o nga hoariri o te kingi. <sup>6</sup> He pumau, e te Atua, tou torona ake ake: he hepeta tika te hepeta o tou kingitanga. <sup>7</sup> Kua aroha koe ki te tika, kua kino ki te hara: na reira, nui atu i to ou hoa te whakawahinga a te Atua, a tou Atua i a koe ki te hinu o te hari. <sup>8</sup> Ko tou kakahu katoa he kakara maira, he aroe, he kahia; ko nga mea aho, whakatangitangi o nga whare rei nana koe i whakaahuareka. <sup>9</sup> Kei roto i au wahine honore nga tamahine kingi; kei tou matau te kuini e tu ana, no Opira te koura. <sup>10</sup> Whakarongo, e ko, titiro, tahuri iho tou taringa: a kia wareware koe ki tou iwi, ki te whare ano o tou papa. <sup>11</sup> Penei ka matenuitia e te kingi tou ataahua: ko ia hoki tou Ariki; a me koropiko ki a ia. <sup>12</sup> Ko reira ano te tamahine o Taira me te ohaoha: ka whai ano nga tangata taonga o te iwi kia manakohia e koe. <sup>13</sup> Kei roto te tamahine a te kingi, he kororia kau, he mea whakairo ki te koura tona kakahu. <sup>14</sup> He mea whakapaipai ki te ngira tona kakahu e kawea ai ia ki te kingi: ka arahina ki a koe nga wahine, ona takahoa e whai ana i a ia. <sup>15</sup> He hari, he koa ina kawea mai ratou; ka tomo ki te whare o te kingi. <sup>16</sup> Ko au tamariki hei whakakapi mo ou matua: ka meinga ano ratou e koe hei kawana mo te whenua katoa. <sup>17</sup> Ka meinga e ahau tou ingoa kia maharatia e nga whakatupuranga katoa: e whakamoemititia ai koe e nga iwi a ake ake.

## Chapter 46

<sup>1</sup> Ki te tino kaiwhakatangi, ma nga tama a Koraha. He waiata Aramoto. Ko te Atua to tatou piringa, to tatou kaha; he kaiawhina e tino tata ana i nga wa o te he. <sup>2</sup> Na reira kore ake to tatou wehi, ahakoa nekehia te whenua, ahakoa kahakina nga maunga ki waenga moana; <sup>3</sup> Ahakoa rara,

taupatupatu noa ona wai, ahakoa wiri nga maunga i tona huamo. (Hera. <sup>4</sup> He awa tena ko ona  
manga hei whakahari i te pa o te Atua, i te wahi tapu o nga tapenakara o te Runga Rawa. <sup>5</sup> Kei  
waenganui ona te Atua, e kore ia e whakakorikoria: ma te Atua ia e awhina i te putanga ano o te  
ata.

<sup>6</sup> I nana nga tauwiwi, i whakakorikoria nga rangatiratanga; puaki ana tona reo, rewa ana te  
whenua. <sup>7</sup> Kei a tatou a Ihowa o nga mano, ko te Atua o Hakopa to tatou piringa. (Hera. <sup>8</sup> Haere  
mai, tirohia nga mahi a Ihowa, nga whakangaromanga i whakaputaina e ia ki te whenua. <sup>9</sup> E  
whakamutua ana e ia nga whainganga a te pito ra ano o te whenua: whati ana i a ia te kopere, poro pu  
te tao, tahuna ake e ia te hariata ki te kapura. <sup>10</sup> Kia ata noho, a kia matau ko ahau te Atua; e  
whakanuia ahau i waenganui i nga tauwiwi, e whakanuia ahau i te whenua. <sup>11</sup> Kei a tatou a Ihowa  
o nga mano: ko te Atua o Hakopa to tatou piringa. (Hera.

## Chapter 47

<sup>1</sup> Ki te tino kaiwhakatangi. He himene ma nga tama a Koraha. Pakia o koutou ringa, e nga iwi  
katoa: hamama ki te Atua, kia hari te reo. <sup>2</sup> No te mea he wehi a Ihowa, te Runga Rawa, he kingi  
nui ia no te whenua katoa. <sup>3</sup> Mana e riro ai nga iwi ki raro i a tatou, me nga tautangata ki raro ki o  
tatou waewae. <sup>4</sup> Mana e whiriwhiri to tatou nohoanga mo tatou, te mea pai rawa o Hakopa, o tana  
i aroha ai. (Hera.

<sup>5</sup> Kua kake atu te Atua i roto i te hamama, a Ihowa i roto i te tangi o te tetere. <sup>6</sup> Himene ki te  
Atua, himene atu; himene ki to tatou Kingi, himene atu. <sup>7</sup> Ko te Atua hoki te Kingi o te whenua  
katoa: himene atu i runga i te mohio. <sup>8</sup> Ko te Atua te Kingi o nga tauwiwi: e noho ana te Atua i runga  
i te torona o tona tapu. <sup>9</sup> Kua huihui nga rangatira o nga iwi, hei iwi mo te Atua o Aperahama: na  
te Atua hoki nga whakangungu rakau o te whenua; kua whakanuia rawatia ia.

## Chapter 48

<sup>1</sup> He waiata, he himene ma nga tama a Koraha. He nui a Ihowa, kia nui hoki te whakamoemiti  
 ki a ia i te pa o to tatou Atua, i te maunga o tona tapu. <sup>2</sup> Ataahua ana te tairanga o Maunga Hiona,  
 ko ta te ao katoa e koa ai: kei te taha ki te raki te pa o te Kingi nui. <sup>3</sup> E matauria ana te Atua i roto  
 i ona whare papai hei piringa. <sup>4</sup> Na, huihui tahi mai ana nga kingi haere tahi atu ana ratou. <sup>5</sup> I kite  
 ratou, miharo iho: raruru ana, hohoro tonu atu. <sup>6</sup> Pa ana te wehi ki a ratou i reira, te mamae, ano  
 he wahine e whanau ana. <sup>7</sup> E wahia ana e koe nga kaipuke o Tarahihi ki te marangai.  
<sup>8</sup> Rite tonu ki ta matou i rongu ai, ta matou i kite ai i roto i te pa o Ihowa o nga mano, i te pa o  
 to tatou Atua: ma te Atua e whakapumau ake ake. (Hera. <sup>9</sup> I whakaaroaro matou ki tou atawhai, e  
 te Atua, i waenganui o tou temepara. <sup>10</sup> E te Atua, rite tahi ki tou ingoa te whakamoemiti mou, tae  
 noa atu ki nga pito o te whenua: ki tonu tou matau i te tika. <sup>11</sup> Kia hari a Maunga Hiona, kia koa  
 nga tamahine a Hura i au whakaritenga. <sup>12</sup> Taiawhiotia a Hiona, haere, a kopiko noa mai: taua ona  
 pourewa. <sup>13</sup> Maharatia ona pekerangi, tirohia ona whare papai; hei korerotanga ma koutou ki enei  
 ake whakatapuranga. <sup>14</sup> Ko tenei Atua hoki te Atua mo tatou ake ake: ko ia hei kaiarahi i a tatou  
 a mate noa.

## Chapter 49

<sup>1</sup> Ki te tino kaiwhakatangi. He himene ma nga tama a Koraha. Whakarongo ki tenei, e nga iwi  
 katoa: tahuri mai o koutou taringa, e nga tangata katoa o te ao. <sup>2</sup> E nga tangata iti, koutou ko nga  
 tangata rahi, e te tangata taonga korua ko te rawakore. <sup>3</sup> Ka whakapuakina he matauranga e toku  
 mangai: a he ata ngarahu te whakaaro o toku ngakau. <sup>4</sup> Ka titaha toku taringa ki te kupu whakarite;  
 ka puaki taku pepeha i runga i te hapa. <sup>5</sup> Kia wehi ahau ki te aha i nga ra o te kino, ina karapotia  
 ahau e te kino kei oku rekereke?  
<sup>6</sup> Ko te hunga e whakawhirinaki ana ki o ratou taonga, e whakamanamana ana ki te nui o o  
 ratou rawa; <sup>7</sup> E kore tetahi o ratou e ahei te hoko i tona teina, te hoatu ranei i tetahi utu mona ki te  
 Atua; <sup>8</sup> He nui hoki te utu mo to ratou wairua, a me whakarere atu ake ake; <sup>9</sup> Kia ora tonu ai ia

ake ake: kia kaua e kite i te pirau. <sup>10</sup> E kite ana hoki ia e matemate ana nga tangata whakaaro nui,  
 e ngaro ngatahi ana te poauau me te whakaarokore, a mahue iho o ratou taonga ki etahi atu. <sup>11</sup> Ki  
 to ratou whakaaro puku, tera e pumau tonu o ratou whare me o ratou nohoanga, ki nga  
 whakatupuranga katoa: huaina iho o ratou whenua ki o ratou ingoa. <sup>12</sup> Heoi kahore te tangata e  
 noho tonu i roto i te honore: ko tona rite kei nga kararehe ka moti nei. <sup>13</sup> Ko to ratou ara tenei, ara  
 ko to ratou poauau: heoi e whakapai ana to ratou uri ki a ratou korero. (Hera. <sup>14</sup> Kei te hipi te rite:  
 ko te wahi mo ratou ko te reinga; ko te mate hei hepara mo ratou, hei rangatira ano te hunga tika  
 mo ratou i te ata; ko to ratou ataahua ma te reinga e whakamoti, kia kore ai he whare mona.  
<sup>15</sup> Ma te Atua ia toku wairua e hoko mai i te reinga: ko ia hoki hei tukunga atu moku. (Hera.  
<sup>16</sup> Kaua e wehi ua whai taonga te tangata, ina nui haere te kororia o tona whare; <sup>17</sup> Kahore hoki  
 ana mea e mau atu ai ia ina mate; e kore tona kororia e tuku iho i muri i a ia. <sup>18</sup> Whakapai noa ia  
 i tona wairua i a ia e ora ana; a ka whakamoemititia koe ua pai au mahi ki a koe ano. <sup>19</sup> Ka haere  
 ia ki te whakatupuranga o ona tupuna: e kore rawa ratou e kite i te marama. <sup>20</sup> Ko te tangata e  
 whakahonoretia ana, a kahore e whai whakaaro, kei nga kararehe ka moti nei tona rite.

## Chapter 50

<sup>1</sup> He himene na Ahapa. Kua puaki te kupu a te Atua, a te Atua tonu, a Ihowa, a karangatia ana  
 e ia te whenua i te putanga mai o te ra, tae noa ki tona torengitanga. <sup>2</sup> Kua tiaho mai te Atua i roto  
 i Hiona, i te tino o te ataahua. <sup>3</sup> Ka haere mai to tatou Atua, e kore ano e wahangu: ka kai te kapura  
 i tona aroaro, a ka hukerikeri te awaha ki tetahi taha ona, ki tetahi taha. <sup>4</sup> Ka karangatia e ia nga  
 rangi i runga, me te whenua hoki, ki te whakaritenga mo tona iwi. <sup>5</sup> Huihuia mai ki ahau taku hunga  
 tapu, te hunga i whakarite kawenata ki ahau i runga i te patunga tapu. <sup>6</sup> A ma nga rangi e whakakite  
 tona tika: ko te Atua ake nei hoki te kaiwhakawa. (Hera.  
<sup>7</sup> Whakarongo, e toku iwi, a ka korero ahau; e Iharaira, ka whakaatu ahau ki a koe; ko ahau te  
 Atua, ko tou Atua. <sup>8</sup> E kore ahau e riri ki a koe mo au patunga tapu; a kei toku aroaro tonu au  
 tahunga tinana. <sup>9</sup> E kore ahau e tango i tetahi puru i roto i tou whare, i etahi koati toa ranei i roto i

<sup>10</sup>  
 au taiepa. Naku nei hoki nga kirehe katoa o te ngahere, nga kararehe i runga i te mano o nga  
<sup>11</sup>  
 pukepuke. E matau ana ahau ki nga manu katoa o nga maunga; naku ano nga kirehe o te parae.  
<sup>12</sup> Me he matekai toku, e kore ahau e korero ki a koe: naku nei hoki te ao, me ona tini mea. <sup>13</sup> E  
 kai koia ahau i te kikokiko o nga puru, e inu ranei i te toto o nga koati? <sup>14</sup> Ko te whakawhetai hei  
<sup>15</sup>  
 patunga tapu mau ki te Atua; whakamana hoki au kupu taurangi ki te Runga Rawa. A karanga  
 ki ahau i te ra o te he: maku koe e whakaora, a ka whakakororiatia ahau e koe.  
<sup>16</sup>  
 Ki te tangata hara ia ka mea te Atua, He aha mau te whakapuaki i aku tikanga, te whakahua  
<sup>17</sup>  
 ranei i taku kawenata e tou mangai? Kua kino nei hoki koe ki te ako, a e akiri ana i aku kupu ki  
<sup>18</sup>  
 muri i a koe. I tou kitenga i te tahae, na whakaae ana koe ki a ia; a whai tahi ana me te hunga  
<sup>19</sup> puremu. Kua tukua e koe tou mangai ki te kino; a e tito hianga ana tou arero. <sup>20</sup> Noho ana koe,  
<sup>21</sup>  
 ka korero kino ki tou teina: ngautuara tonu iho koe ki te tama a tou whaea. Ko au mahi enei, a  
 wahangu tonu ahau; i mea koe he pena pu ahau me koe: otira ka riria koe e ahau, ka whakararangitia  
<sup>22</sup>  
 ano aua mea ki tou aroaro. Na whakaaroa tenei, e te hunga kua wareware ki te Atua; kei haehaea  
<sup>23</sup>  
 koutou e ahau, a kahore he kaiwhakaora. Ko te whakamoemiti te patunga tapu e whai kororia  
 ai ahau: ko te tangata hoki he tika nei tona ara ka whakakitea e ahau ki a ia te whakaoranga a te  
 Atua.

## Chapter 51

<sup>1</sup>  
 Ki te tino kaiwhakatangi. He himene na Rawiri, i te taenga o Natana poropiti ki a ia, mo tona  
 haerenga ki a Patehepa. Tohungia ahau, e te Atua, kia rite ki tou atawhai: kia rite ki tou aroha nui  
<sup>2</sup> te murunga o oku he. Horoia rawatia toku kino: kia ma hoki toku hara. <sup>3</sup> E whaki ana hoki ahau  
<sup>4</sup>  
 i aku mahi tutu: kei toku aroaro tonu toku hara. He hara ki a koe, ki a koe anake, toku; i meatia  
<sup>5</sup>  
 ano tenei he ki tou aroaro; kia tika ai koe i tau korerotanga, kia ma ai hoki ina whakawa. Na i  
 whakaahuatia ahau i roto i te kino, i runga ano i te hara toku whakahaputanga ki roto ki toku whaea.  
<sup>6</sup>  
 Na ko tau e matenui ai ko te pono i nga wahi o roto, a ka whakaakona oku wahi ngaro e koe ki te  
 whakaaro nui.



<sup>7</sup> Porea ahau ki te hihopa, a ka ma ahau; horoia ahau, a ka ma ke atu i te hukarere. <sup>8</sup> Meinga  
 kia rongo ahau i te hari, i te koa, a ka whakamanamana nga iwi i whatiia nei e koe. <sup>9</sup> Huna tou mata  
 ki oku hara; a murua katoatia oku kino. <sup>10</sup> Hanga, e te Atua, he ngakau ma ki roto ki ahau:  
 whakahoutia hoki ki roto ki ahau he wairua tika. <sup>11</sup> Kauga ahau e maka i tou aroaro; kauga hoki tou  
 wairua tapu e tangohia i ahau. <sup>12</sup> Whakahokia mai ki ahau te hari o tau whakaoranga: tautokona  
 hoki ahau ki te wairua kakama. <sup>13</sup> Ko reira ahau whakaako ai i au ara ki te hunga tutu; a ka tahuri  
 te hunga hara ki a koe.  
<sup>14</sup> Whakaorangia ahau i te hara toto, e te Atua, e te Atua o toku whakaoranga, a ka waiatatia  
 au mahi tika e toku arero. <sup>15</sup> Whakatuwheratia oku ngutu, e te Ariki; a ka puaki i toku mangai te  
 whakamoemiti ki a koe. <sup>16</sup> Kahore nei hoki koe e aro ki te patunga tapu; penei kua hoatu e ahau:  
 kahore koe e ahuaireka ki te tahunga tinana. <sup>17</sup> Ko nga patunga tapu ma te Atua he wairua maru: e  
 kore koe e whakahawe e te Atua, ki te ngakau maru, ki te ngakau iro. <sup>18</sup> Kia pai koe ki te atawhai  
 i Hiona: hanga nga taipepa o Hiruharama. <sup>19</sup> Ko reira koe pai ai ki nga patunga tapu o te tika, ki  
 nga tahunga tinana, he mea whakaeke katoa: ko reira ratou whakaeke ai i nga puru ki runga ki tou  
 aata.

## Chapter 52

<sup>1</sup> Ki te tino kaiwhakatangi. He Makiri; na Rawiri, i a Roeke Eromi i haere, i whakaatu ki a  
 Haora, i mea ki a ia, Kua tae a Rawiri ki te whare o Ahimereke. He aha koe ka whakapakari ai ki  
 te kino, e te tangata nui? He pumau tonu te atawhai o te Atua. <sup>2</sup> E whakatakoto ana tou arero i nga  
 mea nanakia, e mahi hianga ana, ano he heu koi. <sup>3</sup> E arohaina rawatia ana e koe te kino i te pai, te  
 teka i te korero tika. (Hera. <sup>4</sup> E te arero hianga, e arohaina ana e koe nga kupu horomiti katoa. <sup>5</sup> Ka  
 whakangaro hoki te Atua i a koe ake tonu atu; ka tangohia atu koe e ia, ka takiritia atu i tou nohoanga,  
 ka hutia atu hoki koe i te whenua o te ora. (Hera.  
<sup>6</sup> E kite hoki te hunga tika, a ka wehi; ka kata hoki ki a ia, ka mea, <sup>7</sup> Inana, ko te tangata tenei  
 kihai nei i waiho e ia te Atua hei kaha mona; otiia, whakawhirinaki ana ki te tini o ana taonga,  
 whakapakari ana i runga i tana mahi kino. <sup>8</sup> Ko ahau ia, e rite ana ki te oriwa matomato i roto i te

whare o te Atua: ka whakawhirinaki ahau ki te mahi tohu a te Atua ake ake. <sup>9</sup> Ka whakamoemiti tonu ahau ki a koe, nau hoki tenei i mea: ka tumanako ano ki tou ingoa; he mea pai hoki, ki te aroaro o tau hunga tapu.

### Chapter 53

<sup>1</sup> Ki te tino kaiwhakatangi. Maharata. He Makiri, na Rawiri. Kua ki te wairangi i roto i tona ngakau, Kahore he Atua. Kua pirau ratou, he kino whakahouhou ta ratou mahi; kahore tetahi e mahi ana i te pai. <sup>2</sup> I titiro iho te Atua i te rangi ki nga tama a te tangata, kia kite me kahore tetahi e mahara ana, e rapu ana i te Atua. <sup>3</sup> Kua hoki ki muri ratou katoa, kua pirau tahi: kahore tetahi e mahi ana i te pai, kahore kia kotahi. <sup>4</sup> E kore ranei e mohio nga kaimahi i te kino? e kai nei i toku iwi, me te mea e kai taro ana; a kahore e karanga ki te Atua. <sup>5</sup> Wehi noa iho ratou i reira, i te wahi kahore he wehi, no te mea kua titaria e te Atua nga wheua o te tangata i whakapaea ai koe: kua whakama ratou i a koe; no te mea kua whakahaweatia ratou e te Atua. <sup>6</sup> Aue, me i puta mai te whakaoranga o Iharaira i Hiona! Kia whakahokia mai e te Atua tana iwi i te whakarau, ka whakamanamana a Hakopa, ka hari a Iharaira.

### Chapter 54

<sup>1</sup> Ki te tino kaiwhakatangi Nekinoto. He Makiri, na Rawiri i te haerenga o nga Tiwhi ki a Haora, ki ai, He teka ianei kei a matou a Rawiri e piri ana? E te Atua, kia whakaorangia ahau e tou ingoa; kia whakawakia hoki ahau e tou kaha. <sup>2</sup> E te Atua, whakarongo ki taku inoi, tahuri mai tou taringa ki nga kupu a toku mangai. <sup>3</sup> No te mea kua whakatika mai nga tangata iwi ki ki ahau, a e whaia ana toku wairua e te hunga tukino: kahore i waiho e ratou te Atua ki to ratou aroaro. (Hera. <sup>4</sup> Tenei te Atua hei kaiawhina moku; kei roto te Ariki i te hunga e tautoko ake ana i toku wairua. <sup>5</sup> Mana e utu te kino o oku hoariri: huna ratou, he pono nei hoki koe. <sup>6</sup> Ka kakama ahau ki te mea patunga tapu ki a koe, ka whakamoemiti ki tou ingoa, e Ihowa: he mea pai hoki. <sup>7</sup> Kua whakaorangia hoki ahau e ia i roto i nga he katoa: a kua titiro toku kanohi ki te mea e hiahia ana ahau ki oku hoariri.

## Chapter 55

<sup>1</sup> Ki te tino kaiwhakatangi Nekinoto. He Makiri, na Rawiri. E te Atua, tahuri mai tou taringa  
 ki taku inoi: kei whakangaro atu koe, ina tangi ahau. <sup>2</sup> Anga mai ki ahau, whakahokia mai he kupu  
 ki ahau: pokaikaha noa iho ahau i ahau e tangi nei, e hamama nei; <sup>3</sup> I te reo hoki o te hoariri, i te  
 tukino a te tangata kino: no te mea e utaina ana e ratou he hara ki runga ki ahau, a e kino ana ki  
 ahau, e riri ana. <sup>4</sup> Mamae pu toku ngakau i roto i ahau: kua taka ki runga ki ahau nga wehi  
 whakamate. <sup>5</sup> Kua pa ki ahau te wehi me te wiri: a pokia iho ahau e te whakamataku. <sup>6</sup> Na ko taku  
 meatanga, Aue, te whai pakau ahau me he kukupa; penei ka rere atu ahau, a ka whai okiokinga.  
<sup>7</sup> Katahi ahau ka rere ki tawhiti; a noho rawa atu i te koraha. (Hera. <sup>8</sup> Ka hohoro toku rere atu i te  
 hau, i te awaha.  
<sup>9</sup> Whakangaromia, e te Ariki, wehia o ratou arero; kua kitea hoki e ahau te tukino me te tutu o  
 roto o te pa. <sup>10</sup> Haereere ana ratou i te ao, i te po, i runga i ona taiepa, a tawhio noa: he kino kei  
 roto, he hianga. <sup>11</sup> He hara kei waenganui ona: kahore ona ara e mahue i te tinihanga, i te hianga.  
<sup>12</sup> Ehara hoki i te hoariri nana ahau i tawai; penei e taea e ahau te whakaririka: ehara hoki i te hoa  
 whawhai noku i whakakake ki ahau; penei kua piri ahau, kei kitea e ia. <sup>13</sup> Nau ia, na te tangata i  
 rite ki ahau, na toku takahoa, na taku i mohio ai. <sup>14</sup> Ahuareka tonu ta taua korerorero; haere tahi  
 ana hoki taua i roto i te ropu ki te whare o te Atua. <sup>15</sup> Kia mau ohorete ratou i te mate, kia heke  
 ora ki te reinga: he hara hoki kei o ratou nohoanga, kei waenganui i a ratou.  
<sup>16</sup> Ko ahau, ka karanga ahau ki te Atua: a ma Ihowa ahau e whakaora. <sup>17</sup> I te ahiahi, i te ata,  
 i te poutumarotanga, ka inoi ahau, ka tangi: a ka whakarongo ia ki toku reo. <sup>18</sup> Whakaorangia ana  
 e ia toku wairua i runga i te rangimarie i ahau e whakaekea ana: he tokomaha hoki oku hoa whawhai.  
<sup>19</sup> Ka whakarongo te Atua, no tua iho nei tona nohoanga, a ka whakahoki i ta ratou. (Hera.) Ko te  
 hunga kahore o ratou whakawhitiwhitinga, a kahore o ratou wehi ki te Atua. <sup>20</sup> Kua totoro ona  
 ringa ki te hunga kua mau nei ta ratou rongu ki a ia; kua whakataka e ia tana kawenata. <sup>21</sup> Maeneene  
 atu tona mangai i te pata, he whawhai ia kei roto i tona ngakau: ngawari atu ana kupu i te hinu,  
 kahore, he hoari kua oti te unu. <sup>22</sup> Maka ki runga ki a Ihowa tau pikaunga, a mana koe e whakau  
 ake: e kore e tukua e ia te hunga tika kia whakangaeuetia ake ake. <sup>23</sup> Mau ia ratou e mea, e te

Atua, kia heke ki te poka o te pirau: e kore nga tangata toto, nga tangata hianga e tutuki ki te hawhe o o ratou ra; ko ahau ia, ka whakawhirinaki ki a koe.

## Chapter 56

<sup>1</sup> Ki te tino kaiwhakatangi. Ionata ereme rehokime. Na Rawiri. He Mikitama, i a ia ka mau i nga Pirihitini ki Kata. Tohungia ahau e te Atua, ka horomia hoki ahau e te tangata: e tukino ana ia ki ahau i te ra roa nei, i a ia e ngangare tonu nei. <sup>2</sup> E whai ana oku hoariri i te ra roa nei, kia horomia ahau; he tokomaha nei hoki e whakahi ana, e whawhai mai ana ki ahau. <sup>3</sup> Ka whakawhirinaki ahau ki a koe i te wa e matakū ai ahau. <sup>4</sup> Ma te Atua ahau ka whakamoemiti ki tana kupu: e whakawhirinaki ana ahau ki te Atua, e kore ahau e wehi. He aha ta te kikokiko e mea ai ki ahau? <sup>5</sup> E whakariroia ketia ana e ratou aku kupu i nga ra katoa; heoi ano ta ratou e whakaaro ai ko te kino moku. <sup>6</sup> E huihui ana ratou, e piri ana: e titiro matatau ana ki oku hikoinga, i a ratou e whanga nei ki toku wairua. <sup>7</sup> Ma te he koia ratou ka mawhiti ai? kia riri koe, e te Atua, whakataka iho hoki nga iwi. <sup>8</sup> E taua ana e koe oku kopikopikotanga: rongoaia oku roimata ki roto ki tau ipu: kahore ianei i tau pukapuka? <sup>9</sup> I te ra e karanga ai ahau ka hoki whakamuri oku hoariri: e matau ana ahau ki tenei, kei ahau hoki te Atua. <sup>10</sup> Ma te Atua ahau ka whakamoemiti ai ki tana kupu; ma Ihowa ahau ka whakamoemiti ai ki tana kupu. <sup>11</sup> E whakawhirinaki ana ahau ki te Atua: e kore ahau e wehi. He aha ta te tangata e mea ai ki ahau? <sup>12</sup> Kei ahau nga kupu taurangi ki a koe, e te Atua: me tuku e ahau nga whakamoemiti ki a koe. <sup>13</sup> Nau hoki toku wairua i whakaora kei mata: e kore ianei koe e whakau i oku waewae kei paheke, kia haere ai ahau i te aroaro o te Atua i roto i te marama o te hunga ora.

## Chapter 57

<sup>1</sup> Ki te tino kaiwhakatangi. Aratakiti. He Mikitama. Na Rawiri, i tona rerenga i a Haora i a ia nei i roto i te ana. Tohungia ahau, e te Atua, tohungia ahau, e whakawhirinaki ana hoki toku wairua ki a koe: ae, ka piri ahau ki raro ki te taumarumarut anga o ou pakau, kia pahemo ra ano enei mate.

<sup>2</sup> Ka karanga ahau ki te Atua, ki te Runga Rawa, ki te Atua e oti ai aku mea katoa. <sup>3</sup> Ka unga mai e ia he kaiwhakaora moku i te rangi, ina tawai te tangata e mea ana kia horomia ahau; (Hera.) ka unga mai e te Atua tana mahi tohu me tona pono. <sup>4</sup> Kei waenganui toku wairua i nga raiona: e takoto ana ahau i waenganui i te hunga e kaia ana e te ahi; i nga tama hoki a te tangata, he tao nei o ratou niho, he pere, he hoari koi ano o ratou arero. <sup>5</sup> Kia whakanuia koe, e te Atua, ki runga ake i nga rangi: hei runga atu i te whenua katoa tou kororia. <sup>6</sup> Kua whakatakotoria e ratou he kupenga mo oku takahanga, kua piko toku wairua: kua keria e ratou he poka ki toku aroaro, a taka iho ko ratou ano ki roto. (Hera.

<sup>7</sup> Pamau tonu toku ngakau, e te Atua, pumau tonu toku ngakau: ka waiata ahau, ae, ka himene ahau. <sup>8</sup> E ara, e toku kororia; e ara, e te hatere, e te hapa: ka ara wawe ano ahau. <sup>9</sup> Ka whakamoemiti ahau ki a koe, e te Ariki, i waenganui i nga iwi; ka himene ki a koe i waenganui i nga tauwiwi. <sup>10</sup> He nui hoki tau mahi tohu, a tutuki noa ki nga rangi, me tou pono a tutuki noa ki nga kapua. <sup>11</sup> Kia whakanuia koe, e te Atua, ki runga i nga rangi: hei runga i te whenua katoa tou kororia.

## Chapter 58

<sup>1</sup> Ki te tino kaiwhakatangi. Aratakiti. He Mikitama. Na Rawiri. He korero puku ranei ta koutou i te pono? he tika ranei ta koutou whakarite, e nga tama a te tangata? <sup>2</sup> He pono, e mahia ana e koutou te he i roto i te ngakau, e paunatia ana e koutou te tutu a o koutou ringa i runga i te whenua.

<sup>3</sup> He tangata ke te hunga hara no te kopu mai ano; whanau kau kua kotiti ke, kua korero teka. <sup>4</sup> Ko to ratou paihana he rite ki to te nakahi, kei te neke turi e puru nei i tona taringa; <sup>5</sup> E kore nei e whakarongo ki te reo o te kaiwhakawai, ahakoa tino matau ia ki te whakawai.

<sup>6</sup> Whatiia, e te Atua, o ratou niho i roto i o ratou mangai: kowhakia, e Ihowa, nga niho nunui o nga kua raiona. <sup>7</sup> Kia mimiti ratou, ano he wai e heke atu ana: ka whakatikaia ana pere, kia rite ki te mea kua poutoa. <sup>8</sup> Kia memeha haere, a kia pahure, ano he ngata: kia rite ki te mea mate roto a te wahine, kahore nei i kite i te ra. <sup>9</sup> E kore e tukua kia rongu a koutou kohua i nga tataramoa, ka kahakina ratou e ia i roto i te awhiowhio, te mea kaiota, te mea e wera ana. <sup>10</sup> Ka hari te tangata

11  
tika ua kite i te utu: ka horoia e ia ona waewae ki nga toto o te tangata hara. A ka mea te tangata,  
Koia, ka whai utu te tangata tika: ina, he Atua ano tenei e whakawa ana i te whenua.

## Chapter 59

<sup>1</sup> Ki te tino kaiwhakatangi. Aratakiti. He Mikitama na Rawiri, i a Haora i tono tangata hei tiaki mo te whare, hei whakamate mona. Whakaorangia ahau, e toku Atua, i oku hoariri: whakateiteitia ake ahau i te hunga e whakatika ana ki ahau. <sup>2</sup> Whakaorangia ahau i nga kaimahi i te kino: kia ora ahau i te hunga toto. <sup>3</sup> Kei te whanga nei hoki ratou mo toku wairua: e whakamine ana te hunga kaha ki te whawhai ki ahau; kahore nei oku tutu, kahore oku hara, e Ihowa. <sup>4</sup> Hore oku kino, oma ana ratou, kei te takatu: e ara hei awahina moku, titiro mai hoki. <sup>5</sup> Ae ra, maranga, e Ihowa, e te Atua o nga mano, e te Atua o Iharaira, tirohia iho nga tauwi katoa: kua e tohungia tetahi o te hunga kino, e poka ke nei. (Hera. <sup>6</sup> Ka hoki mai ratou i te ahiahi, kei te tau, ano he kuri, taiawhiotia ana e ratou te pa. <sup>7</sup> Nana, kei te kupa o ratou mangai, he hoari kei o ratou ngutu: ki ta ratou, ko wai e rongu?) <sup>8</sup> Ko tau ia, e Ihowa, he kata ki a ratou: hei tawainga mau nga tauwi katoa. <sup>9</sup> E toku kaha, ka tatari ahau ki a koe: ko te Atua hoki toku pa. <sup>10</sup> Kei mua i ahau toku Atua aroha: ma te Atua ahau ka kite i taku i hiahia ai ki oku hoariri. <sup>11</sup> Kua ratou e whakamatea, kei wareware toku iwi: kia whakamararatia ratou e tou kaha; whakataka iho ratou, e te Ariki, e to matou whakangungu rakau. <sup>12</sup> Mo te hara o to ratou mangai, mo nga kupu a o ratou ngutu, hopukia ratou i runga i to ratou whakakake, mo ta ratou korero, he kanga, he teka. <sup>13</sup> Whakamotitia i runga i te riri, kia kahore ai ratou: a kia matau ratou ko te Atua te Kawana o Hakopa puta noa ki nga pito o te whenua. (Hera. <sup>14</sup> I te ahiahi tukua ratou kia hoki, tukua ratou kia tau, ano he kuri, kia taiawhio ratou i te pa. <sup>15</sup> Ka kopikopiko noa ratou ki te rapu kai, a ka tauwhanga i te po roa ina kore ratou e makona. <sup>16</sup> Ko ahau ia, ka waiatatia e ahau tou kaha; ae, i te ata ka hamamatia e ahau tau mahi toku: ko koe hoki toku pa, toku piringa i te ra o toku pouri. <sup>17</sup> Ka himene ahau ki a koe, e toku kaha: ko te Atua nei hoki toku pa, toku Atua aroha.

## Chapter 60

<sup>1</sup> Ki te tino kaiwhakatangi. Huhana Erutu. He Mikitama, na Rawiri, hei whakaako. No tana whawhaitanga ki a Aramanaharaima raua ko Aramatopa. Na hoki ana a Ioapa, a patua ana e ia a Eroma ki te Raorao Tote, kotahi tekau ma rua mano. E te Atua, kua pa nga matou e koe, kua oti matou te whakamarara e koe, kua riri koe; tahuri mai ano ki a matou. <sup>2</sup> Wiri ana te whenua i a koe: kua ngatata i a koe: whakakapia ona wahi pakaru; e ru ana hoki. <sup>3</sup> He mea pakeke kua whakakitea e koe ki tau iwi, kua oti matou te whakainu e koe ki te waina e wiri ai. <sup>4</sup> Kua homai e koe he kara ki te hunga e wehi ana i a koe: kia whakakitea hei mea mo te pono. (Hera. <sup>5</sup> Hei mea e mawhiti ai au e aroha ai: ma tou matau e whakaora, whakahokia mai hoki he kupu ki ahau.

<sup>6</sup> Kua korero te Atua i runga i tona tapu; ka hari ahau, ka kotikoti i Hekeme, ka roherohe hoki i te raorao o Hukota. <sup>7</sup> Noku Kireara, noku ano a Manahi, ko Eparaima ano hoki te kaha o toku matenga; ko Hura taku kaiwhakatakoto ture; <sup>8</sup> Ko Moapa taku oko horoi; ka maka e ahau toku hu ki runga ki Eroma: e Pirihitia, ko ahau hei whakamanamana mau. <sup>9</sup> Ma wai ahau e kawe ki te pa kaha? Na wai ahau i arahi ki Eroma? <sup>10</sup> He teka ranei, e te Atua, kua panga matou e koe? kahore hoki koe, e te Atua, e haere tahi me a matou taua. <sup>11</sup> Homai he awhina mo matou ki o matou hoariri: he teka noa hoki te awhina a te tangata. <sup>12</sup> Ma te Atua tatou ka toa ai: mana hoki e takahi ki raro o tatou hoa whawhai.

## Chapter 61

<sup>1</sup> Ki te tino kaiwhakatangi. Nekina. Na Rawiri. Whakarongo, e te Atua, ki taku karanga: tahuri mai ki taku inoi. <sup>2</sup> Ka karanga ahau ki a koe i te pito o te whenua, ina pehia toku ngakau: arahina ahau ki te kohatu e tiketike ake ana i ahau. <sup>3</sup> He piringa hoki koe moku: he pa kaha i te hoariri. <sup>4</sup> Ka noho ahau ki tou tapenakara ake ake, ka okioki ki ou pakau hei piringa. (Hera.

<sup>5</sup> Kua rongu nei hoki koe, e te Atua, i aku kupu tauranga kua homai e koe te wahi o te hunga e wehi ana ki tou ingoa. <sup>6</sup> Ka whakaraneatia e koe nga ra o te kingi; ona tau ki nga whakatupuranga

<sup>7</sup>  
katoa. E noho ia i te aroaro o te Atua ake ake: whakaritea mai he aroha, he pono, hei tiaki i a ia.  
<sup>8</sup>  
Penei ka himene ahau ki tou ingoa ake ake: ka whakamana e ahau aku kupu taurangi i tenei ra, i tenei ra.

## Chapter 62

<sup>1</sup>  
Ki te tino kaiwhakatangi, ki a Ierutonū. He himene na Rawiri. Ko te Atua anake taku e tatari nei: kei a ia te whakaoranga moku. <sup>2</sup>  
Ko ia anake toku kohatu, toku whakaoranga, toku pa hoki, e kore e nui toku ngaueuetanga. <sup>3</sup>  
Kia pehea te roa o ta koutou tatau ki te tangata, kia whakamatea ai e koutou, e koutou katoa, ka rite ki te taiepa e tungou ana, ki te wawa ka tata te hinga? <sup>4</sup>  
Heoi ano ta ratou e runanga ai ko te turaki i a ia i tona wahi teitei: e ahua ana ki te teka; e manaaki ana o ratou mangai, a e kanga ana a roto i a ratou. (Hera. <sup>5</sup>  
Tatari, e toku wairua, ki te Atua anaki; ko ia taku e tumanako nei. <sup>6</sup>  
Ko ia anake toku kohatu, toku whakaoranga, toku pa hoki; e kore ahau e whakangauetia. <sup>7</sup>  
Kei te Atua te whakaoranga moku, te kororia ano moku; kei te Atua te kohatu o toku kaha, toku piringa.  
<sup>8</sup>  
Whakawhirinaki ki a ia i nga wa katoa, e te iwi, ringihia to koutou ngakau ki tona aroaro: hei piringa mo tatou te Atua (Hera. <sup>9</sup>  
He pono he mea memeha noa nga ware, he teka noa nga rangatira; ki te paunatia ratou, mama noa ake ratou tahi i te horihori. <sup>10</sup>  
Kaua e whakawhirinaki ki te tukino, kei wairangi hoki ki te pahua: ki te tini haere nga taonga, kei whakamanawa to koutou ngakau ki reira. <sup>11</sup>  
Kotahi korerotanga a te Atua, ka rua oku rongonga i tenei, no te Atua te kaha. <sup>12</sup>  
Nau ano, e te Ariki, te mahi tohu: rite tonu hoki ki tana mahi tau utu ki te tangata.

## Chapter 63

<sup>1</sup>  
He himene na Rawiri, i a ia i te koraha o Hura. E te Atua, noku koe Atua; ka moata taku rapu i a koe. E hianu ana toku wairua ki a koe, e hiahia ana oku kikokiko ki a koe, i te whenua maroke, ruha noa, kahore nei he wai. <sup>2</sup>  
Koia i titiro atu ai ahau ki a koe i te wahi tapu, kia kite ai i tou kaha, i tou kororia.



<sup>3</sup> Pai atu tou aroha i te ora: mo reira ka whakamoemiti oku ngutu ki a koe. <sup>4</sup> Ina, ka whakapai  
 ahau ki a koe i ahau ano e ora nei; ka totoro atu oku ringa i runga i tou ingoa. <sup>5</sup> Ka makona toku  
 wairua, ano i te hinu wheua, i te ngako, a ka hari oku ngutu ina whakamoemiti toku mangai ki a  
<sup>6</sup> koe. Ina mahara ahau ki a koe i runga i toku moenga, ina whakaaro ki a koe i nga mataaratanga  
 o te po.  
<sup>7</sup> Ko koe hoki toku kaiawhina: na ka hari ahau ki te taumarumarutanga iho o ou pakau. <sup>8</sup> Piri  
 tonu toku wairua ki a koe: e tautoko ake ana tou matau i ahau. <sup>9</sup> Ko te hunga e whai ana i toku  
 wairua kia whakangaromia, ka riro ratou ki nga wahi o raro rawa o te whenua. <sup>10</sup> Ka tukua atu  
 ratou ki te kaha o te hoari: hei wahi ratou ma nga pokiha. <sup>11</sup> Tena ko te kingi, ka hari ia ki te Atua;  
 ka whakamanamana nga tangata katoa ko ia nei ta ratou oati: a ka purua te mangai o te hunga katoa  
 e korero teka ana.

## Chapter 64

<sup>1</sup> Ki te tino kaiwhakatangi. He himene na Rawiri. Whakarongo ki toku reo, e te Atua, ina inoi  
 atu ahau: tiakina toku ora i te wehi o te hoariri. <sup>2</sup> Huna ahau i te whakaaro ngaro o te hunga kino,  
 i te ngangau a nga kaimahi i te he; <sup>3</sup> Kua whakakoi nei i o ratou arero, ano he hoari, kua whakatika  
 nei i a ratou pere, ara i nga kupu kikino, <sup>4</sup> Hei koperenga pukutanga ma ratou ki te tangata tika;  
 kitea rawatia ake kua kopere ki a ia, kahore hoki he wehi. <sup>5</sup> E whakamaia ana ratou i a ratou ano  
 ki te mea kino; e runanga ana kia whakatakotoria pukutia he rore, e mea ana, Ko wai e kite i a  
<sup>6</sup> ratou? E rapu hara ana ratou; e mea ana, Kua ata rapu marie tatou: taea noatia te hohonutanga o  
 te whakaaro o ia tangata, a ko te ngakau he hohonu.  
<sup>7</sup> Ma te Atua ia e kopere he pere ki a ratou kitea rawatia ake kua tu ratou. <sup>8</sup> Heoi ka meinga  
 ratou kia tapatu, ko to ratou arero ake ano ka tu atu ki a ratou; a ka ruru i to ratou matenga te hunga  
<sup>9</sup> katoa e kite i a ratou. Ka wehi ano hoki nga tangata katoa, ka whakapuaki i te mahi a te Atua: ka  
<sup>10</sup> ata maharatia hoki e ratou tana mahi. Ka koa te tangata tika ki a Ihowa, ka whakawhirinaki hoki  
 ki a ia: ka whakamanamana ano te hunga ngakau tika katoa.

## Chapter 65

<sup>1</sup> Ki te tino kaiwhakatangi. He himene, he waiata na Rawiri. E taria ana koe, e te Atua, e te whakamoemiti i Hiona: a ka whakamana te kupu taurangi ki a koe. <sup>2</sup> E te kaiwhakarongo inoi, e haere nga kikokiko katoa ki a koe. <sup>3</sup> E kaha ake ana i ahau nga kino: a matou mahi tutu, mau ena e hipoki. <sup>4</sup> Ka hari te tangata e whiriwhiria e koe, e meatia e koe kia tata atu ki a koe, kia noho i roto i ou marae: ka makona matou i te pai o tou whare, o tou temepara tapu. <sup>5</sup> He mea whakawehi, he tapu, tau utu kupu ki a matou, e te Atua o to matou whakaoranga, e te okiokinga o nga pito katoa o te whenua, o te hunga hoki i tawhiti i runga o te moana;

<sup>6</sup> E whakau nei i nga maunga, he kaha hoki nona; tona whitiki nei he kaha. <sup>7</sup> E whakamarie nei i te haruru o nga moana, i te haruru o o ratou ngaru, i te ngangau hoki o nga iwi. <sup>8</sup> Ka wehi ano ki au tohu te hunga e noho ana i nga pito rawa: hari ana i a koe nga putake o te ata, o te ahiahi. <sup>9</sup> E tiroirohia ana e koe te whenua, e whakamakukuria ana, e whakamomonatia nuitia ana e koe; ki tonu te awa o te Atua i te wai: oti rawa ake te whakapai e koe, kua rite mai i a koe he witi mo aua wahi. <sup>10</sup> Makuku rawa i a koe ona moa, pe ana i a koe ona tupuke: e whakangawaritia ana e koe ki nga ua: e manaakitia ana e koe tona pihinga ake. <sup>11</sup> E karaunatia ana e koe te tau ki tou pai; e maturuturu ana hoki te momonatanga o ou ara. <sup>12</sup> E maturuturu ana ki nga wahi kai o te koraha: a whitikiria ana nga pukepuke ki te koa. <sup>13</sup> He hipi te kakahu o nga wahi kai; ngaro ana nga raorao i te witi; hamama ana ratou i te hari, waiata ana.

## Chapter 66

<sup>1</sup> Ki te tino kaiwhakatangi. He himene, he waiata. Hamama, e te whenua katoa, ki te Atua:

<sup>2</sup> Himenetia te kororia o tona ingoa, kia whai kororia te whakamoemiti ki a ia. <sup>3</sup> Mea atu ki te Atua, Ano te wehi o au mahi! Ma te nui o tou kaha e ngohengohe ai ou hoariri ki a koe. <sup>4</sup> E koropiko katoa te whenua ki a koe; ka himene ki a koe; ka himene ratou ki tou ingoa. (Hera. <sup>5</sup> Haere mai kia kite i nga mahi a te Atua: matakuru rawa tana mahi ki nga tama a te tangata. <sup>6</sup> Nana i mea te moana hei tuawhenua: haere a waewae ana ratou ra roto i te awa; hari ana matou ki a ia i reira.

7 Ko tona kawanatanga tuturu tonu i runga i tona kaha; e titiro ana ona kanohi ki nga tauwi; kei whakakake te hunga tutu. (Hera.

8 Whakapaingia to tatou Atua, e nga iwi; kia rangona te reo whakamoemiti ki a ia. Nana nei  
9 hoki i mau ai to tatou wairua ki te ora, kahore hoki e tukua e ia o tatou waewae kia nekehia. Kua  
10 whakamatauria hoki matou e koe, e te Atua: whakarewaia ana matou e koe, ano he hiriwa e  
11 whakarewaia ana. Kua kawea nei matou e koe ki roto ki te kupenga: whakapikaua ana e koe te  
12 mea whakamamae ki o matou hope. I meinga ano e koe o matou upoko kia ekengia hoihotia e  
te tangata; i ra roto matou i te kapura, i te wai: heoi whakaputaina mai ana matou e koe ki te wahi  
momona.

13 Ka tomo ahau me nga tahunga tinana ki tou whare; ka whakamana ahau i aku kupu taurangi  
14 ki a koe, Era i puaki i oku ngutu, i korerotia e toku mangai i ahau e pouri ana. Ka whakaekea  
15 e ahau mau nga mea momona hei tahunga tinana, ngatahi ano me te mea kakara o nga hipi toa; ka  
16 tukua e ahau he puru, he koati. (Hera. Haere mai, whakarongo, e koutou katoa e wehi ana ki te  
17 Atua, a maku e whakapuaki tana i mea ai ki toku wairua. I tangi toku mangai ki a ia: i whakanuia  
18 ano ia e toku arero. Ki te whakaaroa e toku ngakau te he, e kore te Ariki e whakarongo mai.

19 Nei ra he pono kua whakarongo te Atua, kua tahuri ia ki toku reo inoi. Kia whakapaingia te  
20 Atua, kihai nei i whakapeau ke i taku inoi, i tana atawhai hoki ki ahau.

## Chapter 67

1 Ki te tino kaiwhakatangi. Nekinoto. He himene, he waiata. Ma te Atua tatou e atawhai, mana  
tatou e manaaki; mana e mea kia tiaho tona mata ki a tatou; (Hera. 2 Kia matauria ai tau ara ki  
runga ki te whenua, tau whakaoranga i roto i nga tauwi katoa. 3 Kia whakamoemiti nga iwi ki a  
koe, e te Atua, kia whakamoemiti nga iwi katoa ki a koe. 4 Kia koa nga tauwi, kia waiata i te hari:  
no te mea ka tika tau whakawa mo nga iwi, a ka kawana koe i nga tauwi o te whenua. (Hera. 5 Kia  
whakamoemiti nga iwi ki a koe, e te Atua, kia whakamoemiti nga iwi katoa ki a koe. 6 Kua tuku  
mai nei te whenua i ona hua; a ka manaaki te Atua, to tatou Atua, i a tatou. 7 Ka manaaki te Atua  
i a tatou; a ka wehi nga pito katoa o te whenua i a ia.

## Chapter 68

<sup>1</sup> Ki te tino kaiwhakatangi. He himene, he waiata na Rawiri. Kia ara te Atua, kia marara ona  
hoariri: kia whati hoki i tona aroaro te hunga e kino ana ki a ia. <sup>2</sup> Aia atu ratou, peratia me te paowa  
e aia ana: kia rite ki te ware pi e rewa ana i te kapura te ngaromanga o te hunga kino i te aroaro o  
te Atua. <sup>3</sup> Kia koa ia te hunga tika; kia hari i te aroaro o te Atua: ae ra, kia tino hari pu ratou.  
<sup>4</sup> Waiata ki te Atua, himenetia tona ingoa; opehia ake he huanui mo tana hariata i nga koraha; tona  
ingoa ko IHA; kia hari hoki ki tona aroaro. <sup>5</sup> Hei matua mo nga pani, hei kaiwhakarite mo nga  
pouaru, te Atua i tona nohoanga tapu. <sup>6</sup> E whakanohoia ana e te Atua te mokemoke ki te whare; e  
whakaputaina ana e ia nga herehere ki te ora: ko te hunga tutu ia e noho i te wahi waikore.  
<sup>7</sup> E te Atua, i tou haerenga atu i mua i tau iwi: i tou haerenga i te koraha; (Hera. <sup>8</sup> I wiri te  
whenua, i tuturu iho ano nga rangi i te aroaro o te Atua; me taua Hinai ano i te aroaro o te Atua, o  
te Atua o Iharaira. <sup>9</sup> I taia mai, e koe, e te Atua, he ua nui; a i tou kainga e ruwaha ana ka whakaukia  
e koe. <sup>10</sup> I noho tau whakaminenga ki reira: na tou pai, e te Atua, i mea kai ai koe ma nga rawakore.  
<sup>11</sup> Ka homai e Ihowa te kupu: he ope nui nga wahine whakapuaki. <sup>12</sup> Whati rawa nga kingi o nga  
taua: a ko te wahine i noho i te whare, kei te tuwha i nga parakete. <sup>13</sup> I a koutou ka takoto noa i  
nga takotoranga hipi, he rite ki nga pakau o te kukupa kua paparuatia nei ki te hiriwa, ona hou ki  
te koura whero. <sup>14</sup> I te whakamararatanga a te Kaha Rawa i nga kingi i reira, koia ano kei te hukarere  
o Taramono te ma.  
<sup>15</sup> He maunga Atua a Maunga Pahana; he maunga tiketike a Maunga Pahana. <sup>16</sup> He aha koutou  
ka titiro titaha ai, e nga maunga tiketike, ki te maunga i hiahiatia nei e te Atua kia nohoia e ia? ae,  
ka nohoia e Ihowa ake ake. <sup>17</sup> Ko nga hariata a te Atua, e rua tekau mano, mano mano iho; kei  
roto i a ratou te Ariki, me te mea ko Hinai, ko te wahi tapu. <sup>18</sup> Kua kake koe ki runga, kua whakaraua  
e koe te whakarau: kua riro i a koe he ohaoha mo te tangata; ae, mo te hunga tutu ano, kia noho ai  
a Ihowa, te Atua ki a ratou. <sup>19</sup> Kia whakapaingia te Ariki, e whakawaha nei i ta tatou pikaunga i  
tenei ra, i tenei ra, te Atua o to tatou whakaoranga. (Hera. <sup>20</sup> Ko to tatou Atua te Atua o te  
whakaoranga: na Ihowa ano, na te Ariki, nga putanga ake i te mate. <sup>21</sup> Ka maru ia i te Atua te  
matenga o ona hoariri: me te tumuaki huruhuru o te tangata e haere tonu ana i ana kino.

<sup>22</sup> I mea te Ariki, Ka whakahokia mai e ahau i Pahana, ka whakahokia mai e ahau taku iwi i  
<sup>23</sup> nga rire o te moana: Kia toua ai tou waewae ki te toto, kia whiwhi ai te arero o au kuri ki tana  
<sup>24</sup> wahi o ou hoariri. I kite ratou, e te Atua, i ou haerenga, i nga haerenga o toku Atua, o toku Kingi,  
<sup>25</sup> i te wahi tapu. Ko nga kaiwaiata i haere i mua, i muri ko nga kaiwhakatangi, i waenganui o nga  
<sup>26</sup> kotiro e patupatu ana i nga timipera. Whakapaingia te Atua i roto i nga whakaminenga, te Ariki  
<sup>27</sup> hoki, e nga mea i puta mai i te matapuna o Iharaira. Kei reira a Pineamine, te whakaotinga, to  
<sup>28</sup> ratou ariki, nga rangatira o Hura, me to ratou ropu, nga rangatira o Hepurona, me nga rangatira o  
<sup>29</sup> Napatari. Kua oti he kaha mou te whakahau iho e tou Atua: whakaukia, e te Atua, tau i mea ai  
<sup>30</sup> mo matou. Ka maua mai e nga kingi he hakari ki a koe, mo tou temepara i Hiruharama. Riria  
<sup>31</sup> te kirehe o nga kakaho, te huinga puru, me nga kuao kau a nga iwi, me te takahi i nga pihi hiriwa  
<sup>32</sup> ki raro: whakamararatia nga iwi e ahuaireka ana ki te whainga. E puta mai nga rangatira i Ihipa:  
<sup>33</sup> meake hohoro te totoro o nga ringa o Etiopia ki te Atua. Ki a ia,  
<sup>34</sup> Waiata ki te Atua, e nga rangatiratanga o te whenua: himene ki te Ariki: (Hera. Ki a ia,  
<sup>35</sup> ko tona hariata nei ko nga rangi o nga rangi, nonamata: na, ka puaki tona reo, he reo kaha. Waiho  
<sup>35</sup> te kaha i te Atua, kei runga nei i a Iharaira tana mahi rangatira: kei nga kapua hoki tona kaha. Ka  
<sup>35</sup> wehingia koe, e te Atua, i roto i ou wahi tapu: ko te Atua o Iharaira te kaihomai i te kaha, i te mana,  
<sup>35</sup> ki tona iwi. Whakapaingia te Atua.

## Chapter 69

<sup>1</sup> Ki te tino kaiwhakatangi. Hohanimi. Na Rawiri. Whakaorangia ahau e te Atua, ka tae mai  
<sup>2</sup> hoki nga wai ki roto ki toku wairua. Ka tapoko ahau ki te oru hohonu, ki te wahi kahore nei he  
<sup>3</sup> tunga: kua tae ahau ki nga wai hohonu, ngaro iho ahau i nga waipuke. Kua ruwha ahau i taku  
<sup>4</sup> tangi; kua maroke toku korokoro: pakoko kau oku kanohi i ahau e tatari nei ki toku Atua. Tini  
<sup>4</sup> ke i nga makawe o toku matenga te hunga e kino noa ana ki ahau: he kaha rawa te hunga e mauahara  
<sup>5</sup> noa ana ki ahau, e mea nei kia whakamatea ahau; utua ana e ahau i reira nga mea kihai i tangohia  
<sup>5</sup> e ahau. E te Atua, e matau ana koe ki toku kuware; kahore hoki oku he e ngaro i a koe. E te  
<sup>6</sup> Ariki, e Ihowa o nga mano kaua te hunga e tatari ana ki a koe e whakama i ahau: e te Atua o Iharaira,

7  
 kei numinumi kau i ahau te hunga e rapu ana i a koe. Mou hoki ahau i waiho ai hei tawainga:  
 8  
 ngaro iho toku mata i te whakama. He tangata ke ahau ki oku hoa ake: hei tautangata ki nga tama  
 9  
 a toku whaea. Ka pau hoki ahau i te aroha ki tou whare: kua tau ano ki ahau nga tawai a te hunga  
 10  
 e tawai ana ki a koe. I ahau i tangi, i whakatiki hei whiu i toku wairua, ka waiho tena hei tawainga  
 11  
 moku. I kakahu hoki ahau i te kakahu taratara moku, a i waiho hei whakatauki ma ratou. Kei  
 12  
 te korero kino moku te hunga e noho ana i te kuwaha: waiatatia ana ahau e te hunga haurangi waina.  
 13  
 Ko ahau ia, ki a koe taku inoi, e Ihowa, i te wa e manakohia ai: whakahokia mai he kupu ki  
 14  
 ahau, e te Atua, i runga i te nui o tou aroha, o te pono o tau whakaoranga. Whakaoranga ahau  
 i roto i te oru, kei toremi: kia ora ahau i te hunga e kino ana ki ahau, i nga wai hohonu ano hoki.  
 15  
 Kei ngaro ahau i te waipuke, kei horomia e te rire; kei kopua ano te waha o te poka ki runga ki  
 16  
 ahau. E Ihowa whakahokia mai he kupu ki ahau; he pai hoki tou atawhai: tahuri mai ki ahau,  
 17  
 kia rite ki te nui o au arohatanga. A kua e huna tou mata ki tau pononga; e pouri ana hoki ahau:  
 18  
 hohoro te whakahoki kupu mai ki ahau. Whakatata mai ki toku wairua, hokona: whakaoranga  
 19  
 ahau, e mahi nei oku hoariri. E matau ana koe ki toku tawainga, ki toku whakama, ki toku  
 20  
 numinumi: kei tou aroaro oku hoariri katoa. Maru noa toku ngakau i te tawai; a ki tonu ahau i  
 te pouri: i titiro ahau ki tetahi hei aroha mai, a kore ake; ki etahi hei whakamarie, a kihai i kitea.  
 21  
 I homai he au hei kai maku: i toku matewaitanga ano i whakainumia ahau ki te winika.  
 22  
 Kia meinga ta ratou tepu i to ratou aroaro hei mahanga; hei rore hoki i to ratou wa rangimarie.  
 23  
 Kia whakapouritia o ratou kanohi, kei kite ratou: kia wiri tonu hoki o ratou hope. Ringihia  
 24  
 atu tou riri ki runga ki a ratou, kia mau hoki ratou i tou arita, i tou weriweri. Kia uruwaitia to  
 25  
 ratou nohoanga: kua tetahi e noho ki o ratou teneti. Mo ratou i tukino i te tangata i whiua nei  
 26  
 e koe; a korerotia ana e ratou te pouri o te hunga i werohia e koe. Tapiritia he kino ki runga ki  
 27  
 to ratou kino; kua hoki ratou e tukua kia tomo ki tou tika. Kia murua atu ratou i te pukapuka  
 28  
 o te ora, kua ano e tuhituhia ki roto ki te hunga tika. Ko ahau ia, he rawakore, he pouri; kia  
 29  
 whakateiteitia ake ahau, e te Atua, e tau whakaoranga.  
 30  
 Ka whakamoemiti taku waiata ki te ingoa o te Atua, ka whakanui ano taku whakawhetai i  
 31  
 a ia. Pai rawa tenei ki a Ihowa i te puru i te kau, i te mea whai haona, whai maikuku. Kua  
 32

kite te hunga mahaki, kua hari: ka ora ano o koutou ngakau, e te hunga e rapu nei i te Atua. <sup>33</sup> No  
 te mea ka rongu a Ihowa ki nga rawakore, e kore ano e whakahawe ki ana herehere. <sup>34</sup> Kia  
 whakamoemiti te rangi me te whenua ki a ia, nga moana, me nga mea katoa e tere ana i roto. <sup>35</sup> No  
 te mea tera e whakaorangia e te Atua a Hiona, ka hanga ano e ia nga pa o Hura; a ka noho ratou ki  
<sup>36</sup>  
 reira, ka riro hoki a reira i a ratou. A ka nohoia a reira e nga uri o ana pononga: hei kainga tupu  
 ano a reira mo te hunga e aroha ana ki tona ingoa.

### Chapter 70

<sup>1</sup>  
 Ki te tino kaiwhakatangi. Na Rawiri, hei whakamahara. Kia hohoro, e te Atua, ki te whakaora  
 i ahau: e Ihowa, hohoro ki te awahina i ahau. <sup>2</sup> Kia whakama, kia pororaru ngatahi te hunga e rapu  
 ana i toku wairua: kia whakahokia ki muri, kia whakama te hunga e hiahia ana kia he ahau. <sup>3</sup> Kia  
 whakahokia ki muri mo to ratou whakama, te hunga e mea ana ki ahau, Ha, ha. <sup>4</sup> Kia hari, kia koa,  
 ki a koe te hunga katoa e rapu ana i a koe; kia mea tonu te hunga e pai ana ki tau whakaoranga, Kia  
<sup>5</sup>  
 whakanuia te Atua. Ko ahau ia, he iti, he rawakore; hohoro mai, e te Atua, ki ahau: ko koe toku  
 awahina, toku kaiwhakaora; kua ra e whakaroa, e Ihowa.

### Chapter 71

<sup>1</sup>  
 Ko koe taku e whakawhirinaki ai, e Ihowa: kei whakama ahau ake ake. <sup>2</sup> Whakaorangia ahau,  
 i runga i tou tika, kia mawhiti ano ahau: tahuri mai tou taringa ki ahau, whakaorangia hoki ahau.  
<sup>3</sup>  
 Kia ai koe hei teko e noho ai ahau, hei hokihokinga tonutanga atu moku: kua kiia iho ahau e koe  
 kia whakaorangia: ko koe nei hoki toku kohatu, toku pourewa. <sup>4</sup> Whakaorangia ahau, e toku Atua,  
 i te ringa o te tangata kino, i te ringa o te whanoke, o te nanakia. <sup>5</sup> Ko koe nei hoki, e te Ariki, e  
 Ihowa, taku e tumanako atu nei, taku e whakawhirinaki nei no toku tamarikitanga ake ano. <sup>6</sup> Nau  
 ahau i tautoko ake no te kopu mai ano; nau ahau i tango mai i roto i nga whekau o toku whaea; ko  
<sup>7</sup>  
 koe taku e whakamoemiti tonu ai. He miharotanga ahau na te tini; ko koe ia toku piringa kaha.  
<sup>8</sup>  
 Kia ki toku mangai i te whakamoemiti ki a koe, i tou honore i te roa o te ra. <sup>9</sup> Kua ahau e panga

a te wa o te koroheketanga, kua ahau e whakarerea ina hemo toku kaha. <sup>10</sup> E korerotia ana hoki  
 ahau e oku hoariri, a e runanga tahi ana te hunga e whanga ana ki toku wairua. <sup>11</sup> E mea ana, Kua  
 whakarerea ia e te Atua: whaia, hopukia; kahore hoki tetahi hei whakaora. <sup>12</sup> E te Atua, kei matara  
 atu koe i ahau: e toku Atua, hohoro ki te awhina i ahau. <sup>13</sup> Kia whakama, kia pau nga hoariri o  
 toku wairua: kia hipokina ki te tawai, ki te whakama, te hunga e rapu ana i te he moku.  
<sup>14</sup> Ko ahau ia, ka tumanako tonu: ka hono tonu ano te whakamoemiti ki a koe. <sup>15</sup> Ma toku  
 mangai e whakakite tou tika, tau whakaoranga i te roa o te ra; kahore hoki ahau e mohio e hia ranei.  
<sup>16</sup> Ka haere ahau i runga i te kaha o te Ariki, o Ihowa, ka whakahuatia e ahau tou tika, tou anake.  
<sup>17</sup> E te Atua, he mea whakaako ahau nau, no toku tamarikitanga ake; a he whakapuaki taku i au  
 mahi whakamiharo a mohoa noa nei. <sup>18</sup> Na kua ahau e whakarerea, e te Atua, a koroheke noa,  
 hina noa ahau, kia whakakitea ra ano e ahau tou kaha ki tenei whakatupuranga, tou nui ki nga  
 tangata katoa e puta mai a mua. <sup>19</sup> Kei runga rawa ano tou tika, e te Atua, he nui nei hoki au mahi:  
 e te Atua, ko wai te rite ki a koe? <sup>20</sup> He nui, he kino nga pouritanga ngakau i whakakitea mai e koe  
 ki a matou; tera ano koe ka whakahauora i a matou, ka whakahoki ake ano i a matou i nga wahi  
 hohonu o te whenua. <sup>21</sup> Whakaraneatia e koe toku nui, a tahuri mai ano ka whakamarie i ahau.  
<sup>22</sup> Ka whakamoemiti ahau ki a koe i runga i te hatere, ara ki tou pono, e toku Atua: ka himene ahau  
 ki a koe i runga i te hapa, e te Mea Tapu o Iharaira. <sup>23</sup> Ka tino hari oku ngutu ua himene ahau ki  
 a koe: me toku wairua ano i hokona nei e koe. <sup>24</sup> Ka korerotia hoki e toku arero tou tika i te roa o  
 te ra: kua whakama nei hoki, kua numinumi kau te hunga i rapu i te he moku.

## Chapter 72

<sup>1</sup> Na Horomona. Homai, e te Atua, au whakaritenga ki te kingi, me tou tika ki te tama a te kingi.  
<sup>2</sup> Mana e whakawa tou iwi i runga i te tika, au rawakore i runga i te whakawa tika. <sup>3</sup> Ka kawea  
 mai e nga maunga te rongu mau ki te iwi, e nga pukepuke i runga i te tika. <sup>4</sup> Ka whakawa ia mo  
 nga ware o te iwi: ka whakaorangia e ia nga tamariki a te rawakore; mongamonga noa i a ia te  
 kaitukino. <sup>5</sup> I te ra e mau ana, i te marama hoki, ka pera te mau o to ratou wehi ki a koe i nga  
 whakatupuranga katoa. <sup>6</sup> E heke iho ia ano he ua ki runga ki te kotinga tarutaru, me nga ua e



<sup>7</sup> whakamakuku nei i te whenua. Ka tupu te tangata tika i ona ra: tona roa ano o te ata noho, a kore  
<sup>8</sup> noa te marama. Ka kingi ia i tenei moana, a tae noa ki tetahi moana, i te awa, a nga pito atu ano  
<sup>9</sup> o te whenua. Ka piko ki tona aroaro te hunga o te koraha: a ka mitimiti ona hoariri i te puehu.  
<sup>10</sup> Ka mau mai he hakari e nga kingi o Tarahihi, o nga motu: ka kawea mai he tahua e nga kingi  
<sup>11</sup> o Hepa, o Tepa. Ae, ka koropiko nga kingi katoa ki a ia: ka mahi nga iwi katoa ki a ia. <sup>12</sup> Ka  
<sup>13</sup> ora hoki i a ia te rawakore ua tangi atu, te ware hoki me te tangata kahore nei ona kaiawhina. E  
<sup>14</sup> tohu ia i te tangata iti, i te rawakore; ka ora ano i a ia nga wairua o nga rawakore. Ka hokona e  
<sup>15</sup> ia to ratou wairua i roto i te tukino, i te tutu, he mea utu nui hoki o ratou toto ki tana titiro. A e  
<sup>16</sup> ora ratou; ka hoatu ano ki a ia he koura no Hepa: ka tukua tonutia hoki te inoi mona; ka whakapaingia  
<sup>16</sup> ia i tenei ra, i tenei ra. He kutanga witi tera i runga i te whenua, i te tihi o nga maunga; ngarue  
<sup>17</sup> ana ona hua, ano ko Repanona, a ka rite te tupu o nga tangata o te pa ki to te tarutaru o te whenua.  
<sup>17</sup> Ka mau tonu tona ingoa ake ake; ka rite tona ingoa ki te ra te pumau: kei roto i a ia te manaaki  
<sup>18</sup> mo te tangata; ka korerotia tona koa e nga iwi katoa.  
<sup>18</sup> Kia whakapaingia a Ihowa, te Atua, te Atua o Iharaira: ko ia nei anake hei mahi i nga mahi  
<sup>19</sup> whakamiharo; Kia whakapaingia ano tona ingoa kororia mo ake tonu atu; kia ki katoa hoki te  
<sup>20</sup> whenua i tona kororia. Amine, ae Amine. Ko te mutunga tenei o nga inoi a Rawiri, a te tama a  
 Hehe.

### Chapter 73

<sup>1</sup> He himene na Ahapa. He pono, he pai te Atua ki a Iharaira; ki te hunga ngakau ma. <sup>2</sup> Ko ahau  
 ia, wahi iti kua tapepa oku waewae: me i kotahi kua paheke oku takahanga. <sup>3</sup> I hae hoki ahau ki te  
 hunga whakahi, i toku kitenga i te tangata hara e kake ana. <sup>4</sup> Kahore hoki he whakawiringa a te  
 mate i a ratou: he maro ano o ratou uaua. <sup>5</sup> Kahore nga mea whakapouri tangata e pa ki a ratou;  
 kahore ano ratou e whiua tahitia me te mano tangata. <sup>6</sup> Na reira, ano he hei te whakakake e awhi  
 nei i a ratou, ano he kakahu te tutu e hipokina nei ratou. <sup>7</sup> Pupuhi ana o ratou kanohi i te ngako:  
<sup>8</sup> nui ake nga mea i a ratou i a o ratou ngakau i hiahia ai. E whakahi ana ratou, e korero kino ana

mo te whakatoi: kei runga noa ake a ratou korero. <sup>9</sup> Tutuki tonu to ratou mangai ki nga rangi: e  
 kopikopiko ana hoki to ratou arero i runga i te whenua. <sup>10</sup> Koia tona iwi i hoki mai ai ki konei: a  
 e whakawiria ana he wai mo ratou, ki tonu te kapu. <sup>11</sup> E mea ana ratou, Ma te aha e matau ai te  
 Atua? He matauranga koia to te Runga Rawa? <sup>12</sup> Nana, ko te hunga kino tenei, kei runga tonu i te  
 whenua rangatira, e hua ana o ratou taonga. <sup>13</sup> He pono he maumau taku mea i toku ngakau kia  
 ma, taku horoi hoki i oku ringa ki te harakore. <sup>14</sup> E whiua ana hoki ahau i te roa o te ra, e pakia  
 ana i nga ata katoa.  
<sup>15</sup> Me i ki ahau, Ka penei taku korero; na e tinihanga ana ahau ki te whakatupuranga o au  
 tamariki. <sup>16</sup> I taku meatanga kia matauria tenei, ka kite ahau he mahi whakauaua rawa; <sup>17</sup> Tae noa  
 ahau ki te wahi tapu o te Atua, katahi ahau ka mohio ki to ratou mutunga. <sup>18</sup> He pono i whakaturia  
 ratou e koe ki nga wahi pahekeheke; a whakataka ana e koe ki te ngaromanga. <sup>19</sup> Ano te panga  
 whakareretanga o to ratou hunanga! kua pau rawa i nga wehi. <sup>20</sup> Ka rite ki te rekanga kanohi, ina  
 ara ake te tangata, tau whakahawea ki to ratou ahua, e te Ariki, ina ara ake koe.  
<sup>21</sup> Na mamae noa iho toku ngakau, a hukihuki ana oku whatumanawa. <sup>22</sup> He whakaarokore  
 hoki ahau, he kuware: me te mea he kirehe ahau i tou aroaro. <sup>23</sup> Ahakoa ra kei a koe tonu ahau; e  
 puritia ana e koe toku ringa matau. <sup>24</sup> Ma tou whakaaro ahau e arahi; muri iho ka riro ahau i a koe  
 ki te kororia. <sup>25</sup> Ko wai hoki toku i te rangi ko koe anake? Kahore atu hoki oku i te whenua e hiahia  
 ai, ko koe anake. <sup>26</sup> Hemo iho oku kikokiko me toku ngakau: ko te Atua ia te kaha o toku ngakau,  
 toku wahi ake ake. <sup>27</sup> Na, ko te hunga e mamao atu ana i a koe ka mate: ka ngaro i a koe te hunga  
 puremu katoa e whakarere nei i a koe. <sup>28</sup> Ko ahau ia, he pai ki ahau te whakatata ki te Atua: kua  
 waiho e ahau te Ariki, a Ihowa, hei whakawhirinakitanga moku, kia whakapuakina ai e ahau au  
 mahi katoa.

## Chapter 74

<sup>1</sup> He Makiri na Ahapa. E te Atua, he aha i panga ai matou e koe ake ake? He aha i pongere ai  
 tou riri ki nga hipi o tau mara? <sup>2</sup> Mahara ki tau whakaminenga i hokona e koe i mua, i utua e koe

hei iwi mo tou kainga tupu; a ki tenei Maunga Hiona i nohoia nei e koe. <sup>3</sup> Hiki ake ou waewae ki  
 nga whakangaromanga e mau tonu nei, ki nga mahi kino katoa a te hoariri ki te wahi tapu. <sup>4</sup> Kua  
 hamama nei ou hoariri i waenganui i au whakaminenga, kua whakaturia e ratou a ratou kara hei  
 tohu. <sup>5</sup> E rite ana ratou ki nga tangata e hapai ana i te titaha ki te puia rakau. <sup>6</sup> Inaianei ia e tukitukia  
 ana e ratou ona mea whakairo, pakaruhia iho ana ki te titaha, ki te hama. <sup>7</sup> Kua toua tou wahi tapu  
 ki te kapura, kua noa i a ratou te nohoanga o tou ingoa, kei te whenua e takoto ana. <sup>8</sup> I mea to ratou  
 ngakau, Me whakangaro ratou a poto ake: kua tahuna e ratou nga whare huihui katoa o te Atua i  
 te whenua. <sup>9</sup> Kahore matou e kite i o matou tohu, kahore atu he poropiti, kahore hoki tetahi o matou  
 e matau ana kia pehea ake te roa. <sup>10</sup> E te Atua, kia pehea ake te roa o te tawai a te hoariri? Ka  
 kohukohu tonu ranei te hoariri ki tou ingoa ake ake? <sup>11</sup> He aha i pepeke ai tou ringa, tou matau?  
 Unuhia i roto i tou uma, whakamotitia ratou.  
<sup>12</sup> Ko te Atua ia toku Kingi o tua iho, e mahi whakaora ana i waenganui i te whenua. <sup>13</sup> Nau,  
 na tou kaha i wawae te moana: pakaru ana i a koe nga matenga o nga tarakona i nga wai.  
<sup>14</sup> Mongamonga noa i a koe nga matenga o rewiatana: a hoatu ana ia e koe hei kai ma te iwi o te  
 koraha. <sup>15</sup> I wahia e koe te puna me te roma; mimiti ake i a koe nga awa nunui. <sup>16</sup> Nau te ao, nau  
 hoki te po; nau i whakarite te marama me te ra. <sup>17</sup> Nau i whakatu nga rohe katoa o te whenua: te  
 raumati me te hotoke, he mea whakarite ena nau.  
<sup>18</sup> Kia mahara ki tenei, kua tawai te hoariri, e Ihowa: kua kohukohu te hunga poauau ki tou  
 ingoa. <sup>19</sup> Kua e tukua te wairua o tau kukupa ki te kirehe: kei wareware ake ake ki te whakaminenga  
 o au rawakore. <sup>20</sup> Whakaaroa te kawenata; kua kiki hoki nga wahi pouri o te whenua i nga nohoanga  
 nanakia. <sup>21</sup> Kei hoki whakama mai te tangata e tukinotia ana: kia whakamoemititia tou ingoa e te  
 ware, e te rawakore. <sup>22</sup> E ara, e te Atua, tohea tau tohe: mahara ki ta te tangata poauau tawai ki a  
 koe a pau noa te ra. <sup>23</sup> Kei wareware ki te reo o ou hoariri: e kake tonu ana te ngangau a te hunga  
 e whakatika ana ki a koe.

## Chapter 75

<sup>1</sup> Ki te tino kaiwhakatangi. Aratakiti. He himene, he waiata na Ahapa. Ka whakawhetai tonu matou ki a koe, e te Atua; ka whakawhetai tonu matou, kei te tata mai hoki tou ingoa: e korerotia ana e te tangata au mahi whakamiharo. <sup>2</sup> Ka kitea e ahau te wa e rite ana, ka tika taku whakawa. <sup>3</sup> Kuteretere noa iho te whenua me ona tangata katoa; naku i whakatu ona pou. (Hera. <sup>4</sup> I mea ahau ki te hunga whakakake, Kati ra te whakakake; ki te hunga hara ano, Kaua e whakaarahia te haona. <sup>5</sup> Kaua to koutou haona e whakaarahia ki runga: kati te whakamaro i te kaki ina korero. <sup>6</sup> No te mea kahore he aranga i te rawhiti, kahore i te hauauru, kahore hoki i te tonga. <sup>7</sup> Ko te Atua ia te kaiwhakawa; ko tenei e whakaititia iho ana e ia, ko tera e whakaarahia ake ana. <sup>8</sup> Kei te ringa hoki o Ihowa he kapu, pahuka tonu te waina; ki tonu, whakananu rawa, hei ringihanga mana: ko nga ngangia ia, ma te hunga kino katoa o te whenua e tatau, e inu. <sup>9</sup> Ko ahau ia, ka kauwhau tonu: ka himene ki te Atua o Hakopa. <sup>10</sup> A ka kotia e ahau nga haona katoa o te hunga kino: ka whakaarahia ake ia nga haona o te tangata tika.

## Chapter 76

<sup>1</sup> Ki te tino kaiwhakatangi. Nekinoto. He himene, he waiata na Ahapa. E matauria ana te Atua i roto i a Hura, he nui tona ingoa i roto i a Iharaira. <sup>2</sup> Kei Harema hoki tona tapenakara; kei Hiona tona nohoanga. <sup>3</sup> I whati i a ia i reira nga pere o te kopere, te whakangungu rakau, te hoari, me nga mea mo te whawhai. (Hera. <sup>4</sup> Tera atu tou kororia, tou nui, i to nga maunga kirehe. <sup>5</sup> Kua pahuatia te hunga ngakau toa, moe ana ratou i ta ratou moe; kihai ano i whai ringa tetahi o nga marohirohi. <sup>6</sup> Na tau whakatupehupehu, e te Atua o Hakopa, i parangia ai te hariata me te hoiho e te moe. <sup>7</sup> Ko koe, ina, ko koe e wehingia; ko wai hoki e tu ki tou aroaro ina riri koe? <sup>8</sup> Nau i rangona iho ai te whakawa i te rangi: wehi ana te whenua, whakaririka kau ana, <sup>9</sup> I te aranga ake o te Atua ki te whakawa, ki te whakaora i te hunga mahaki katoa o te whenua. (Hera. <sup>10</sup> He pono ka whai kororia koe i te riri o te tangata: mau ano e whitiki te toenga o te riri. <sup>11</sup> Whakapuakina te kupu taurangi ki a Ihowa, ki to koutou Atua, whakamana hoki; e te hunga katoa i tetahi taha ona, i tetahi taha, mauria he hakari ki a ia, ka tika hoki te wehi ki a ia. <sup>12</sup> Mana e poro atu te wairua o nga rangatira: e matakuria ana ia e nga kingi o te whenua.

## Chapter 77

<sup>1</sup> Ki te tino kaiwhakatangi, ki a Ierutunu. He himene na Ahapa. Ki te Atua toku reo, e karanga  
 nei ahau, ki te Atua toku reo, a tera e tahuri mai tona taringa ki ahau. <sup>2</sup> I rapu ahau ki te Ariki i te  
 ra o toku pouri: maro tonu toku ringa i te po, kihai ano i pepeke; kihai toku wairua i pai kia  
 whakamarietia. <sup>3</sup> E mahara ana ahau ki te Atua, a e pouri ana: kei te whakaaroaro, a ngaro iho toku  
 wairua. (Hera. <sup>4</sup> E puritia ana e koe oku kanohi kia mataara tonu; he pouri ahau, te ahei te korero.  
<sup>5</sup> Ka hoki oku whakaaro ki nga ra onamata, ki nga tau o tua iho. <sup>6</sup> E whakamahara ana ahau ki taku  
 waiata i te po, e korerorero ana ki toku ngakau e rapurapu ana toku wairua. <sup>7</sup> Tera ranei te Ariki e  
 panga tonu ake ake? A heoi ano ranei ana manakohanga mai? <sup>8</sup> Kua kahore ranei tana mahi tohu  
 mo ake tonu atu? Kua whati ranei tana kupu a ake ake? <sup>9</sup> Kua wareware ranei te Atua ki te atawhai?  
 Kua riri ranei ia, a tutakina atu ana e ia tona aroha? (Hera. <sup>10</sup> Na ka mea ahau, Ko toku ngoikore  
 tenei: otira ka mahara ahau ki nga tau o te ringa matau o te Runga Rawa.  
<sup>11</sup> Ka mahara ahau ki nga mahi a Ihowa; ae ra, ka mahara ahau ki au mea whakamiharo o tua  
 iho. <sup>12</sup> Ka whakaaro hoki ahau ki au meatanga katoa, ka purakau ki au mahi. <sup>13</sup> E te Atua, kei te  
 wahi tapu tou ara: ko wai te atua nui hei rite ki te Atua? <sup>14</sup> Ko koe te Atua e mahi nei i nga mea  
 whakamiharo: kua whakapuakina e koe tou kaha i waenganui o nga iwi. <sup>15</sup> Hokona ana e tou ringa  
 tau iwi, nga tama a Hakopa raua ko Hohepa. (Hera. <sup>16</sup> I kite nga wai i a koe, e te Atua i kite nga  
 wai i a koe, matakua ana: i oho ano nga rire. <sup>17</sup> Ringihia ana he wai e nga kapua, puaki ana te haruru  
 o nga rangi: rererere ana au pere. <sup>18</sup> I roto i te awhiowhio te haruru o tau whatitiri: marama noa te  
 ao i nga uira; wiri ana te whenua, oioi ana. <sup>19</sup> I te moana tou ara, i nga wai nui tou huarahi, e kore  
 ano e kitea ou takahanga. <sup>20</sup> He mea arahi e koe tau iwi ano he kahui, ara e te ringa o Mohi raua  
 ko Arona.

## Chapter 78

<sup>1</sup> He Makiri na Ahapa. Kia anga mai te taringa, e toku iwi, ki taku ture: tahuri mai o koutou  
 taringa ki nga kupu a toku mangai. <sup>2</sup> Ka puaki te kupu whakarite i toku mangai, ka korerotia e ahau  
 nga mea ngaro onamata: <sup>3</sup> I rongoi nei, i matau nei tatou, i korero ai hoki o tatou matua ki a tatou.  
<sup>4</sup> E kore e huna e matou i a ratou tamariki: me whakaatu ki to muri whakatupuranga nga  
 whakamoemiti ki a Ihowa, me tona kaha, me ana mahi whakamiharo i mea ai ia. <sup>5</sup> Kua pumau hoki  
 i a ia he whakaaturanga i roto i a Hakopa, kua takoto he ture i roto i a Iharaira: a whakahaua mai  
 ana e ia o tatou tupuna, kia whakaakona ki a ratou tamariki. <sup>6</sup> Kia matauria ai e to muri  
 whakatupuranga, e nga tamariki e whanau, e ara ake a mua: mo ta ratou whakaatu ki a ratou tamariki.  
<sup>7</sup> Kia u ai ta ratou tumanako ki te Atua, kei wareware hoki ki nga mahi a te Atua: engari kia mau  
 ki ana whakahau. <sup>8</sup> Kei rite hoki ki o ratou tupuna, ki te whakatupuranga whakakeke, tutu, ki te  
 whakatupuranga kihai nei i whakatikatika i to ratou ngakau, kihai hoki i u to ratou wairua ki te  
 Atua.  
<sup>9</sup> He hunga mau patu nga tama a Eparaima, he hunga hapai kopere, heoi tahuri ana ratou i te  
 ra o te tauranga. <sup>10</sup> Kihai i puritia e ratou te kawenata a te Atua; kihai ano i pai ki te haere i tana  
 ture; <sup>11</sup> Heoi, kua wareware ki ana mahi, me ana mea whakamiharo i whakakitea e ia ki a ratou.  
<sup>12</sup> He mea whakamiharo ana mahi i te aroaro o o ratou tupuna, i te whenua o Ihipa, i te parae o  
 Toana. <sup>13</sup> Tapahia ana e ia te moana, a meinga ana ratou kia whiti: tu ake i a ia nga wai ano he  
 puranga. <sup>14</sup> He mea arahi ratou e ia i te awatea ki te kapua: i te roa hoki o te po ki te marama o te  
 ahi. <sup>15</sup> I wahia e ia nga kohatu i te koraha; a me te mea no nga rire nui tana wai hei inu ma ratou.  
<sup>16</sup> Puta mai ana i a ia he awa i roto i te kamaka: meinga ana nga wai kia heke, ano he waipuke.  
<sup>17</sup> Heoi ka hara ano ratou ki a ia: whakato i ana ki te Runga Rawa i te koraha. <sup>18</sup> Na kei te  
 whakamatautau to ratou ngakau i te Atua, kei te inoi kai ma to ratou hiahia. <sup>19</sup> I korero kino ano  
 ratou ki te Atua, i mea; E ahei ranei i te Atua te taka he tepu ki te koraha? <sup>20</sup> Nana, ko tana patunga  
 i te kohatu, ka pakaru mai te wai, a puke ana nga awa: e taea ano ranei e ia te homai taro, e pae  
 ranei i a ia he kikokiko ma tana iwi? <sup>21</sup> Na ko te rongonga o Ihowa, na ka riri: a toro ana te kapura  
 ki a Hakopa, puta ake ana te riri ki a Iharaira; <sup>22</sup> Mo ratou kihai i whakapono ki te Atua, kihai ano  
 i whakawhirinaki ki tana whakaoranga. <sup>23</sup> Nana nei hoki i whakahau nga kapua i runga, i

<sup>24</sup> whakatuwhera nga tatau o te rangi. A whakauaina iho te mana ki runga ki a ratou hei kai; homai  
<sup>25</sup> ana hoki e ia te witi o te rangi ma ratou. Kai ana te tangata i ta te anahera kai: i tukua e ia he kai  
<sup>26</sup> ma ratou, a makona noa. I whakaohokia e ia te marangai i te rangi: i takina ano te tonga e tona  
<sup>27</sup> kaha. A whakauaina iho e ia te kikokiko ki a ratou ano he puehu; he manu whai pakau ano he  
<sup>28</sup> one no te moana. A whakangahorotia iho e ia ki waenganui i to ratou puni: ki o ratou nohoanga  
<sup>29</sup> a tawhio noa. Na kai ana ratou, tino makona; i tukua hoki e ia ki a ratou ta ratou i hiahia ai:  
<sup>30</sup> Kihai ratou i ngaruru ki ta ratou i hiahia ai; a i roto tonu ta ratou kai i o ratou mangai, <sup>31</sup> Na ka  
 pa te riri o te Atua ki a ratou, a patua iho e ia te hunga tetere o ratou; piko ana i a ia nga taitamariki  
<sup>32</sup> o Iharaira. Ahakoa pa katoa tenei, i hara ano ratou, kihai ano i whakapono ki ana mahi  
<sup>33</sup> whakamiharo. I whakapaua ai e ia o ratou ra ki te horihori, o ratou tau ki te potatutatu. <sup>34</sup> Ka  
 patua ratou e ia, na, ka rapu ratou i a ia, a ka hoki, ka ui wawe ki te Atua. <sup>35</sup> Ka mahara hoki ko te  
 Atua to ratou kohatu, ko te Atua, ko te Runga Rawa, to ratou kaihoko. <sup>36</sup> Otiia kei te patipati o  
 ratou mangai ki a ia, a teka ana o ratou arero ki a ia. <sup>37</sup> Kihai hoki to ratou ngakau i tika ki a ia;  
<sup>38</sup> kihai ano ratou i u ki tana kawenata. Ko tana ia, he aroha; hipokina ana e ia te he, kihai ano i  
<sup>39</sup> whakangaro: ae ra, he maha ana whakahokinga iho i tona riri, a kihai i oho katoa tona riri. I  
 mahara hoki ia he kikokiko nei ratou: he hau e pahure atu ana, a e kore e hoki mai.  
<sup>40</sup> Ano te tini o a ratou whakatoinga i a ia i te koraha, o a ratou whakapouritanga i a ia i te  
<sup>41</sup> tahora! Hoki whakamuri ana ratou, whakamatautau ana i te Atua: whakatoia ana e ratou te Mea  
 Tapu o Iharaira. <sup>42</sup> Kihai ratou i mahara ki tona ringa, ki te ra i whakaorangia ai ratou e ia i te  
<sup>43</sup> hoariri; Ki tana meatanga i ana tohu ki Ihipa, i ana merekara ki te parae o Toana; <sup>44</sup> I puta ke  
<sup>45</sup> ai i a ia o ratou awa hei toto, me o ratou manga wai, te inu ai ratou. I tonoa ai e ia he huihuinga  
<sup>46</sup> namu ki a ratou, a pau iho ratou; he poroka, i huna ai ratou. A hoatu ana e ia o ratou hua ki te  
<sup>47</sup> moka; me to ratou mauui ki te mawhitiwhiti. Whakamatea ana e ia a ratou waina ki te whatu,  
<sup>48</sup> a ratou rakau hikamora ki te haupapa. Tukua ana e ia a ratou kararehe ma te whatu, a ratou kahui  
<sup>49</sup> ma nga uira. I tukua whakareretia e ia ki a ratou tona riri, aritarita, weriweri, me te raruraru; he  
<sup>50</sup> whakaeke na nga anahera kino. A whakatikaia ana e ia he ara mo tona riri; kihai i tohungia to

ratou wairua kei mate: otiia tukua ana e ia to ratou ora ki te mate uruta. <sup>51</sup> Na patua iho e ia nga  
 matamua i Ihipa, te muanga o to ratou kaha i nga teneti o Hama. <sup>52</sup> Otira arahina ana e ia ana ake  
 tangata ano he hipi; whakahaerea ana ratou e ia i te koraha ano he kahui. <sup>53</sup> Na ka arahina marietia  
 ratou e ia, te wehi ratou: ko o ratou hoariri ia taupokina iho e te moana. <sup>54</sup> Na ka kawea ratou e ia  
 ki te rohe o tona wahi tapu, ki tenei maunga, i hokona nei e tona matau. <sup>55</sup> Peia ana e ia nga tauwiwi  
 i to ratou aroaro: a wehea ana e ia he kainga mo ratou ki te aho, whakanohoia iho nga hapu o Iharaira  
 ki o ratou teneti. <sup>56</sup> Heoi ka whakamatauria, ka whakatoia e ratou te Atua, te Runga Rawa; kihai  
 hoki i mau ki ana whakaaturanga; <sup>57</sup> A hoki whakamuri ana, mahi hianga ana, pera ana me o ratou  
 matua: parori ke ana ratou, he pera me te kopere tinihanga. <sup>58</sup> Na ko o ratou wahi tiketike hei  
 whakapataritari i a ia; ko o ratou whakapakoko hei mea i a ia kia hae. <sup>59</sup> I te rongonga o te Atua,  
 ka riri, ka tino whakarihariha hoki ki a Iharaira. <sup>60</sup> A mahue ake i a ia te tapenakara a Hiro, te teneti  
 i whakaturia e ia ki waenganui i nga tangata; <sup>61</sup> A tukua ana e ia tona kaha hei whakarau, tona  
 kororia ki te ringa o te hoariri. <sup>62</sup> I tukua atu ano e ia tana iwi ma te hoari; a i riri ki tona kainga  
 tupu. <sup>63</sup> Pau ake a ratou taitama i te ahi; kihai ano a ratou kotiro i marenatia. <sup>64</sup> I hinga o ratou  
 tohunga i te hoari; kihai hoki i tangi a ratou pouaru. <sup>65</sup> Na ka maranga te Ariki ano ko tetahi i te  
 moe, me te tangata kaha e hamama ana i te waina. <sup>66</sup> A patua iho e ia a muri o ona hoariri, meinga  
 ana ratou e ia hei taunutanga mo ake tonu atu. <sup>67</sup> I whakakahore ano ia ki te teneti a Hohepa: a  
 kihai i whiriwhiri i te hapu o Eparaima; <sup>68</sup> Heoi ko te hapu o Hura tana i whiriwhiri ai, ko Maunga  
 Hiona tana i aroha ai. <sup>69</sup> A whakaturia ana e ia tona wahi tapu kia pera me nga wahi teitei; me te  
 whenua i whakapumautia e ia mo ake tonu atu. <sup>70</sup> I whiriwhiria ano e ia a Rawiri, tana pononga:  
 he mea tango nana i nga kainga hipi: <sup>71</sup> Mauria ana mai e ia i te whai i nga hipi whaereere, hei  
 whangai i a Hakopa, i tana iwi, i a Iharaira hoki, i tona kainga tupu. <sup>72</sup> A rite tonu ki te tapatahi o  
 tona ngakau tana whangai i a ratou: he arahi mohio hoki ta tona ringa i a ratou.

## Chapter 79



<sup>1</sup> He himene na Ahapa. E te Atua, kua tae mai nga tauwi ki tou kainga tupu, kua noa i a ratou  
 tou temepara tapu, kua waiho a Hiruharama kia puranga kau ana. <sup>2</sup> Ko nga tinana mate o au pononga  
 kua hoatu e ratou hei kai ma nga manu o te rangi, ko te kikokiko o tau hunga tapu ma nga kirehe  
 o te whenua. <sup>3</sup> Ko o ratou toto, ringihia ake e ratou ano he wai, ki nga taha o Hiruharama; kahore  
 hoki he tangata hei tanu i a ratou. <sup>4</sup> Kua waiho matou hei tawainga ma o matou hoa, hei katanga  
 ma te hunga i tetahi taha, i tetahi taha o matou. <sup>5</sup> Kia pehea te roa, e Ihowa? E riri tonu ranei koe  
 ake ake? E ngiha tonu ranei tou hae me he kapura?  
<sup>6</sup> Ringihia tou riri ki nga tauwi kahore nei e matau ki a koe, ki nga rangatiratanga kahore nei  
 e karanga ki tou ingoa. <sup>7</sup> Kua pau hoki a Hakopa i a ratou, kua ururua i a ratou tona nohoanga.  
<sup>8</sup> Kua ra e maharatia nga kino o o matou tupuna; kia hohoro tou aroha ki mua i a matou; kua  
 whakaititia rawatia hoki matou. <sup>9</sup> Awhinatia matou, e te Atua o to matou whakaoranga, kia  
 whakakororiatia ai tou ingoa: whakaorangia matou, hipokina hoki o matou hara, he mahara ki tou  
 ingoa. <sup>10</sup> Kia mea koia nga tauwi, Kei hea to ratou Atua? Kia kite atu matou e matau ana nga  
 tauwi ki te whakatakinga i te toto o au pononga i whakaheke nei. <sup>11</sup> Kia tae atu ki tou aroaro te  
 aue a te herehere: kia rite ki te nui o tou kaha tau whakaora i te hunga e meatia ana kia mate.  
<sup>12</sup> Takiwhititia atu te utu e hoatu e koe ki nga uma o o matou hoa mo ta ratou tawai, e tawai nei  
 ratou ki a koe, e te Ariki. <sup>13</sup> Penei ka whakawhetai matou, tau iwi, nga hipi hoki e hepara nei koe,  
 ki a koe ake ake: ka whakaitea e matou te whakamoemiti ki a koe, ki nga whakatupuranga katoa.

## Chapter 80

<sup>1</sup> Ki te tino kaiwhakatangi. Hohanimi Erutu. He himene na Ahapa. Tahuri mai tou taringa, e  
 te Heparo o Iharaira, e arahi nei i a Hohepa ano he kahui hipi; whiti mai koe e noho mai na i  
 waenganui i nga kerupima; <sup>2</sup> Whakaohoohokia tou kaha i te aroaro o Eparaima, o Pineamine, o  
 Manahi: a haere mai ki te whakaora i a matou. <sup>3</sup> Whakahokia ake matou, e te Atua: kia marama  
 mai tou mata, a ka ora matou. <sup>4</sup> E Ihowa, e te Atua o nga mano, kia pehea ake te roa o tou riri ki  
 te inoi a tau iwi? <sup>5</sup> Kua whangaia mai e koe he roimata hei taro ma ratou, he nui hoki te mehua  
 roimata kua homai nei e koe kia inumia e ratou. <sup>6</sup> Kua meinga matou e koe hei totohetanga ma o

matou hoa, a e kaina ana matou e o matou hoariri. <sup>7</sup> Whakahokia ake matou, e te Atua o nga mano; kia marama mai tou mata, a ka ora matou.

<sup>8</sup> I maua mai e koe he waina i Ihipa: ka oti i a koe nga tauwi te panga, na whakatokia iho e koe. <sup>9</sup> I whakapaia e koe he tunga mona, na, ka hou ona pakiaka, a ka kapi te whenua.

<sup>10</sup> Taumarumarua ana tona ata ki runga ki nga pukepuka; ko ona manga rite tonu ki nga hita a te Atua. <sup>11</sup> I tautototo atu ona manga ki te moana, ona rara ki te awa. <sup>12</sup> He aha i pakaruha ai e koe ona taiepa ki raro, kia kowhakiwhakia ai ia e nga tangata katoa e tika ana i te ara? <sup>13</sup> Mongamonga noa i te poaka toa o te ngahere, e kainga ana e te kirehe mohoa o te parae. <sup>14</sup> Tahuri mai ano, e te Atua o nga mano, e inoi atu nei matou: titiro iho i te rangi, kia kite mai koe, ka toro mai i tenei waina. <sup>15</sup> I te rakau i whakatokia e tou matau, i te manga hoki i meinga e koe kia pakari mau.

<sup>16</sup> Kua pau i te ahi, kua tuaina ki raro: ngaro iho ratou i te riri o tou mata. <sup>17</sup> Waiho tou ringa i runga i te tangata o tou matau, i te tama a te tangata i whakakahangia e koe mau. <sup>18</sup> Penei e kore matou e hoki atu i a koe: whakahauoranga matou, a ka karanga matou ki tou ingoa. <sup>19</sup> Whakahokia ake matou, e Ihowa, e te Atua o nga mano; kia marama mai tou mata, a ka ora matou.

## Chapter 81

<sup>1</sup> Ki te tino kaiwhakatangi. Kititi. Na Ahapa. Kia kaha te waiata ki te Atua, ki to tatou kaha: kia hari te hamama ki te Atua o Hakopa. <sup>2</sup> Whakahuatia te himene, maua mai ki konei te timipera, te hapa reka me te hatere. <sup>3</sup> Whakatangihia te tetere i te kowhititanga marama, i te kinga o te marama, i to tatou ra hakari. <sup>4</sup> Ko te tikanga hoki tenei ma Iharaira, he mea whakarite na te Atua o Hakopa. <sup>5</sup> I whakatakotoria tenei e ia ma Hohepa hei whakaaturanga, i tona haerenga puta noa i te whenua o Ihipa: i rongo ai ahau ki reira i tetahi reo, kahore ahau i matau. <sup>6</sup> I tangohia mai e ahau tona pokohiwi i te pikaunga: whakarerea ake e ona ringa te kete. <sup>7</sup> I karanga koe ki ahau i te pouritanga, a kua ora koe i ahau; i whakahoki kupu ahau ki a koe i te wahi ngaro o te whatitiri; i whakamatau i a koe ki nga wai o Meripa. (Hera.)

<sup>8</sup> Whakarongo, e taku iwi, a ka whakaatu ahau ki a koe: e Ihairaira, ki te whakarongo koe ki  
<sup>9</sup> ahau; Aua tetahi atua ke i roto i a koe; kua ano e koropiko ki te atua ke. <sup>10</sup> Ko Ihowa ahau, ko  
 tou Atua, i arahina mai ai koe i te whenua o Ihipa: kia nui te kowhera o tou mangai, a maku e  
<sup>11</sup> whakaki. Otiia kihai taku iwi i pai ki te whakarongo ki toku reo: kihai ano a Ihairaira i aro ki  
<sup>12</sup> ahau. Na tukua atu ana ratou e ahau ki te maro o o ratou ngakau: a haere ana ratou i runga i o  
<sup>13</sup> ratou whakaaro. Aue, te whakarongo taku iwi ki ahau! Te haere a Ihairaira i aku ara! <sup>14</sup> Penei  
 e kore e aha kua whati i ahau te tara o o ratou hoariri: kua tahuri ano toku ringa ki o ratou hoariri.  
<sup>15</sup> Ko te hunga e kino ana ki a Ihowa kua ngohengohe ki a ia: ko to ratou taima ia kua mau tonu.  
<sup>16</sup> Kua whangainga hoki ratou e ia ki te witi pai rawa, kua whakamakonatia ano koe e ahau ki te  
 honi i roto i te kohatu.

## Chapter 82

<sup>1</sup> He himene na Ahapa. E tu ana te Atua i roto i te whakaminenga o te Atua, e whakawa ana i  
 waenganui i nga atua. <sup>2</sup> Kia pehea ake te roa o ta koutou whakawa he, o ta koutou whakapai ki nga  
 kanohi o te hunga kino. (Hera. <sup>3</sup> Whakatikaia ta te ware, ta te pani: kia tika te whakawa mo te  
<sup>4</sup> ngakau mamae, mo te rawakore. Whakaorangia te ware me te rawakore; tangohia mai ratou i te  
<sup>5</sup> ringa o te tangata kino. Kahore o ratou matauranga, kakore hoki e mahara; e kopikopiko noa ana  
 ratou i te pouri; e oioi ana nga turanga katoa o te whenua.  
<sup>6</sup> I mea ahau, He atua koutou, he tama katoa na te Runga Rawa. <sup>7</sup> Heoi ka pera koutou me te  
<sup>8</sup> tangata, ka mate; ka hinga, ka pera me tetahi o nga piriniha. E ara, e te Atua, whakawakia te  
 whenua: mou hoki nga tauwi katoa.

## Chapter 83

<sup>1</sup> He waiata, he himene, na Ahapa. E te Atua, kei wahangu koe, kei whakarongo puku, kei ata  
<sup>2</sup> noho, e te Atua. He mea hoki, tenei ou hoariri te ngangau nei, a kua ara nga matenga o te hunga

e kino ana ki a koe. <sup>3</sup> Kua ata ngarahu ratou ki tau iwi, e whakatakoto korero ana hoki ratou mo  
 au mea huna. <sup>4</sup> Kua mea nei ratou, Tena, tatou ka huna i a ratou, kia kore ai tena iwi; kia kua ai  
 hoki e maharatia te ingoa o Iharaira a muri ake nei. <sup>5</sup> Kua kotahi to ratou ngakau i a ratou e runanga  
 ana: kua whakatakoto ratou he tikanga kino ki a koe; <sup>6</sup> Ko nga teneti o Eroma, o nga Ihimaeri, o  
 Moapa, o nga Hakarini; <sup>7</sup> A Kepara, a Amona, a Amareke, nga Pirihitini, me nga tangata o Taira:  
<sup>8</sup> Kua uru hoki a Ahiria ki roto ki a ratou; kua awhinatia e ratou nga tamariki a Rota. (Hera.  
<sup>9</sup> Peratia ratou me Miriana: me Hihera, me Iapini, i te awa i Kihona: <sup>10</sup> I mate nei ki Eneroro,  
 i waiho nei hei whakawairakau mo te whenua. <sup>11</sup> Kia rite o ratou rangatira ki a Orepe raua ko  
 Teepe, ae, o ratou ariki katoa hoki ki a Tapa raua ko Taramuna; <sup>12</sup> Mo ratou i mea, Tatou ka tango  
 i nga kainga o te Atua mo tatou. <sup>13</sup> E toku Atua, meinga ratou kia rite ki te awhiowhio puehu, ki  
 te papapa e puhia ana e te hau. <sup>14</sup> Kia rite ki te ahi e kai ana i te ngahere, ki te mura hoki e toro ai  
 nga maunga; <sup>15</sup> Kia pera te whai o tau awha i a ratou, tau whakaohore hoki i a ratou ki tau paroro.  
<sup>16</sup> Whakakiia o ratou kanohi ki te whakama: kia rapu ai ratou ki tou ingoa, e Ihowa. <sup>17</sup> Kia whakama,  
 kia ohore ratou ake ake; ae, kia numinumi ratou, kia ngaro hoki. <sup>18</sup> Kia matau ai ratou, ko koe  
 anake, ko Ihowa nei tou ingoa, te Runga Rawa i te whenua katoa.

## Chapter 84

<sup>1</sup> Ki te tino kaiwhakatangi. Kititi. He himene ma nga tama a Koraha. Ano te ataahua o ou  
 tapenakara, e Ihowa o nga mano! <sup>2</sup> E hiahia ana toku wairua, ae, e hemo ana ki nga marae o Ihowa:  
 e tangi ana toku ngakau me oku kikokiko ki te Atua ora. <sup>3</sup> Me te pihoihoi hoki kua kite i tetahi  
 whare, me te warou ano hoki i tetahi ohanga mona, hei takotoranga mo ana pi, ara i au aata, e Ihowa  
 o nga mano, e toku Kingi, e toku Atua. <sup>4</sup> Ka hari te hunga e noho ana i tou whare: he whakamoemiti  
 tonu ta ratou ki a koe. (Hera. <sup>5</sup> Ka hari te tangata ko tona kaha nei kei a koe: kei roto i o ratou  
 ngakau nga huarahi ki reira. <sup>6</sup> Ka haere ratou ra te raorao o Paka, ka meinga e ratou hei puna: ngaro

<sup>7</sup>  
 iho ano hoki nga poka i te ua. Ka haere atu ratou i te kaha ki te kaha; ka kitea ratou ki te aroaro o te Atua i Hiona.

<sup>8</sup>  
 E Ihowa, e te Atua o nga mano, whakarongo ki taku inoi: tahuri mai tou taringa, e te Atua o Hakopa. (Hera. <sup>9</sup> Titiro mai, e te Atua, e to matou whakangungu rakau: tirohia iho hoki te mata o tau tangata i whakawahi ai. <sup>10</sup> No te mea, he ra kotahi i ou whare, pai atu i nga ra kotahi mano: te tiaki tatau i te whare o toku Atua, pai atu ki ahau i te noho ki nga teneti o te kino. <sup>11</sup> He ra hoki a Ihowa te Atua, he whakangungu rakau: ka homai e Ihowa te atawhai me te kororia; e kore e kaiponuhia e ia tetahi mea pai ki te hunga e tapatahi ana te haere. <sup>12</sup> E Ihowa o nga mano, ka hari te tangata e whakawhirinaki ana ki a koe.

## Chapter 85

<sup>1</sup>  
 Ki te tino kaiwhakatangi. He himene ma nga tama a Koraha. E Ihowa, kua aro mai koe ki tou whenua, kua whakahokia mai e koe a Hakopa i te whakarau. <sup>2</sup> Kua murua e koe te kino o tau iwi, kua hipokina e koe o ratou hara katoa (Hera. <sup>3</sup> Kua mutu katoa tou weriweri; kua tahuri ke koe i te aritarita o tou riri. <sup>4</sup> Whakahokia ake matou, e te Atua o to matou whakaoranga: meinga hoki kia mutu tou riri ki a matou. <sup>5</sup> E riri ranei koe ki a matou ake ake? E mauahara tonu ranei, ki nga whakatupuranga katoa? <sup>6</sup> E kore ianei koe e whakahoki ake i a matou ki te ora: kia hari ai tau iwi ki a koe? <sup>7</sup> E Ihowa, whakakitea mai tau mahi tohu ki a matou: tukua mai ki a matou tau whakaoranga.

<sup>8</sup>  
 Ka whakarongo ahau ki ta te Atua, ki ta Ihowa, e korero ai: no te mea mo te rongo mau ana korero ki tana iwi, ki tana hunga tapu hoki; kua ia ratou e hoki ki te wairangi. <sup>9</sup> Ina, he tata tonu tana whakaoranga ki te hunga e wehi ana ki a ia, kia noho ai te kororia ki to tatou whenua. <sup>10</sup> Kua tutaki te mahi tohu raua ko te pono: kua kihi ki a raua te tika me te rongo mau. <sup>11</sup> Ka tupu ake te pono i te whenua, a ka titiro iho te tika i te rangi. <sup>12</sup> Ae, ka homai e Ihowa te pai: a ka tukua mai ona hua e to tatou whenua. <sup>13</sup> Ka haere te tika i mua i a ia, hei whakatu i a tatou ki te ara o ona hikoinga.

## Chapter 86

<sup>1</sup> He inoi na Rawiri. Whakatitahatia iho tou taringa, e Ihowa whakahokia mai he kupu ki ahau; he ware hoki ahau, he rawakore. <sup>2</sup> Tiakina toku wairua: he tapu hoki ahau; mau, e toku Atua, e whakaora tau pononga e whakawhirinaki atu nei ki a koe. <sup>3</sup> Tohungia ahau, e te Ariki: e karanga nei hoki ahau ki a koe i te ra roa nei. <sup>4</sup> Whakaharitia te wairua o tau pononga; ka ara atu nei hoki toku wairua, e te Ariki, ki a koe. <sup>5</sup> He pai hoki koe, e te Ariki, he ngawari: e ranea ana hoki tau mahi tohu ki te hunga katoa e karanga ana ki a koe. <sup>6</sup> Tahuri mai tou taringa, e Ihowa, ki taku inoi: whakarongo kitoku reo unene. <sup>7</sup> Ka karanga ahau ki a koe i te ra o toku pouri: e whakahoki kupu mai hoki koe ki ahau. <sup>8</sup> Kahore he rite mou, e te Ariki, i roto i nga atua: kahore hoki he rite mo au mahi. <sup>9</sup> Ka haere mai nga iwi katoa i hanga e koe, a ka koropiko ki tou aroaro, e te Ariki; ka whakakororia hoki i tou ingoa. <sup>10</sup> He nui hoki koe, e mahi ana i nga mea whakamiharo: ko koe anake te Atua. <sup>11</sup> Whakaakona ahau ki tau ara, e Ihowa; ka haere ahau i runga i tou pono: whakatapatahitia toku ngakau ki te wehi i tou ingoa. <sup>12</sup> Ka whakamoemiti katoa toku ngakau ki a koe, e te Ariki, e toku Atua: ka whakakororia ano i tou ingoa ake ake. <sup>13</sup> He nui hoki tau mahi tohu ki ahau: a kua whakaorangia e koe toku wairua i te reinga i raro riro. <sup>14</sup> E te Atua, kua whakatika ki ahau te hunga whakakake: kua whaia ano toku wairua e te huihuinga o te hunga tutu; kahore hoki koe e waiho i to ratou aroaro. <sup>15</sup> Ko koe ia, e te Ariki, he Atua atawhai, he tohu tangata: he puhoi ki te riri, e hua ana te mahi tohu me te pono. <sup>16</sup> Tahuri mai ki ahau, tohungia hoki ahau: homai tou kaha ki tau pononga, whakaorangia te tama a tau pononga wahine. <sup>17</sup> Whakakitea mai ki ahau he tohu mo te pai: kia kite ai te hunga e kino ana ki ahau, kia whakama ai: nou e Ihowa i awhina i ahau, i whakamarie i ahau.

## Chapter 87

<sup>1</sup> He himene, he waiata ma nga tama a Koraha. Kei nga maunga tapu tona turanga: <sup>2</sup> E arohaina  
 rawatia ana e Ihowa nga kuwaha o Hiona i nga nohoanga katoa o Hakopa. <sup>3</sup> He mea kororia nga  
 mea e korerotia ana mou, e te pa o te Atua. (Hera.  
<sup>4</sup> Ka korerotia e ahau a Rahapa raua ko Papurona ki roto i te hunga e matau ana ki ahau: tirohia  
 atu a Pirihitia, a Taira, a Etiopia; i whanau tenei ki reira. <sup>5</sup> Ae ra ko te kupu tenei mo Hiona, I  
 whanau tenei me tera ki reira: ma te Runga Rawa pu ano ia e whakapumau. <sup>6</sup> Ka korerotia e Ihowa,  
 ina tuhituhia nga iwi, I whanau tenei ki reira. (Hera. <sup>7</sup> Na ka mea te hunga waiata, me te hunga  
 kanikani, Kei a koe oku puna katoa.

## Chapter 88

<sup>1</sup> He waiata, he himene ma nga tama a Koraha. Ki te tino kaiwhakatangi. Maharata Reanoto.  
 He Makiri na Hemana Eterahi. E Ihowa, e te Atua o toku whakaoranga, he tangi taku ki tou aroaro  
 i te ao, i te po. <sup>2</sup> Kia tae atu taku inoi ki tou aroaro: whakatitahatia mai tou taringa ki taku tangi.  
<sup>3</sup> Kua ki hoki toku wairua i te pouri, a e whakatata ana toku ora ki te reinga. <sup>4</sup> Kua taua tahitia ahau  
 me te hunga e heke ana ki te rua; e rite ana ahau ki te tangata kahore ona awhina! <sup>5</sup> I maka ki  
 waenga i nga tupapaku, me he tangata i patua e takoto ana i te urupa, kahore nei e maharatia e koe  
 i muri; he mea momotu ke ratou na tou ringa. <sup>6</sup> Kua whakatakotoria ahau e koe ki te rua i raro riro,  
 ki te pouri, ki nga rire. <sup>7</sup> E pehia ana ahau e tou riri, e pakia ana hoki e koe ki au ngaru katoa. (Hera.  
<sup>8</sup> Kua whakamataratia atu e koe oku hoa kia tawhiti i ahau: kua meinga ahau e koe hei mea  
 whakarihariha ki a ratou: kua uakina mai ahau, a kahore e puta ki waho. <sup>9</sup> Kua he toku kanohi i te  
 tangihanga: e karanga ana ahau ki a koe, e Ihowa, i nga ra katoa, kua totoro hoki oku ringa ki a  
 koe.  
<sup>10</sup> Tera ranei koe e mahi merekara ki nga tupapaku? E ara koia te hunga kua mate ki te  
 whakamoemiti ki a koe? (Hera. <sup>11</sup> Ka kauwhautia ranei tou aroha i roto i te urupa? tou pono i roto  
 i te ngaromanga? <sup>12</sup> E matauria koia au mea whakamiharo i roto i te pouri? tou tika i te whenua o  
 te warewaretanga? <sup>13</sup> Ko ahau ia kua karanga ki a koe, e Ihowa: a i te ata ka tae atu taku inoi ki  
 tou aroaro. <sup>14</sup> He aha, e Ihowa, i panga ai toku wairua e koe? He aha i huna ai tou mata ki ahau?

15 No toku tamarikitanga ake ano i pakia ai ahau, i whakahemohemo ai: i ahau e pehia ana e au  
 whakawehi, ka pororaru noa iho. <sup>16</sup> I tika tou riri nui ma runga i ahau; kua haukotia ahau e au mea  
 whakawehi. <sup>17</sup> Ano he wai ratou ki te karapoti i ahau i te ra roa nei; hui tahi ratou ki te taiawhio i  
 ahau. <sup>18</sup> Kua wehea e koe kia tawhiti atu i ahau te hoa hei aroha mai, me oku hoa ki roto ki te pouri.

## Chapter 89

<sup>1</sup> He Makiri na Etana Eterahi. Ka waiatatia e ahau nga mahi tohu a Ihowa ake ake: ka  
 whakapuakina e toku mangai tou pono ki nga whakatupuranga katoa. <sup>2</sup> I mea hoki ahau, Ka hanga  
 ake te mahi tohu mo ake tonu atu: ka whakapumautia e koe tou pono ki nga tino rangi ra ano. <sup>3</sup> Kua  
 whakarite kawenata ahau ki taku i whiriwhiri ai: kua oati ki taku pononga ki a Rawiri; <sup>4</sup> Ka pumau  
 i ahau ou uri ake ake: ka hanga tou torona ki nga whakatupuranga katoa. (Hera.

<sup>5</sup> Ka whakamoemiti ano nga rangi, e Ihowa, ki au mahi whakamiharo; ki tou pono hoki i roto  
 i te whakaminenga o te hunga tapu. <sup>6</sup> Ko wai oti i nga rangi hei rite mo Ihowa? Ko wai i roto i nga  
 tama a te hunga nunui e rite ana ki a Ihowa? <sup>7</sup> He Atua whakamataku rawa i roto i te whakaminenga  
 o te hunga tapu, e wehingia ana i runga ake i a ratou katoa i tetahi taha, i tetahi taha ona? <sup>8</sup> E Ihowa,  
 e te Atua o nga mano, ko wai te mea kaha hei rite mou, e IHA? Hei rite ranei mo tou pono i tetahi  
 taha ou, i tetahi taha? <sup>9</sup> Ko koe te kingi o te huamo o te moana: ka oho ona ngaru, ko koe hei  
 whakamarino. <sup>10</sup> Mongamonga noa i a koe a Rahapa ano he tangata i patua: marara ana i a koe, i  
 tou ringa kaha ou hoariri. <sup>11</sup> Nau nga rangi, nau te whenua: te ao me ona mea e hua ana i runga,  
 nau ena i pumau ai. <sup>12</sup> Ko te raki me te tonga nau ena i hanga: ka hari a Taporo raua ko Heremona  
 ki tou ingoa. <sup>13</sup> He takakau marohirohi tou: he pakari tou ringa, rewa tonu tou matau ki runga.  
<sup>14</sup> Ko te tika me te whakawa te turanga o tou torona: e haere ana te mahi tohu me te pono i mua i  
 tou aroaro.

<sup>15</sup> Ka hari te iwi e mohio ana ki te tangi whakahari: e haere ana ratou, e Ihowa, i te marama o  
 tou mata. <sup>16</sup> E hari ana ratou ki tou ingoa i te roa o te ra: a ma tou tika ka kake ai ratou. <sup>17</sup> Ko koe



hoki te kororia o to ratou kaha: ma tau manako ano ka ara ai to matou haona. <sup>18</sup> Na Ihowa hoki to matou whakangungu rakau: a na te Mea Tapu o Iharaira to tatou kingi.

<sup>19</sup> I korero moemoea koe i reira ki tau Mea Tapu, i mea, Kua hoatu e ahau he kaha ki runga ki tetahi marohirohi; kua whakanuia e ahau tetahi i whiriwhiria i roto i te iwi. <sup>20</sup> Kua kitea e ahau

taku pononga, a Rawiri: kua whakawahia ia e ahau ki taku hinu tapu: <sup>21</sup> Ka u atu toku ringa hei awhina mona: ma toku takakau ano ia e whakakaha. <sup>22</sup> E kore te hoariri e whai wahi ki a ia: e kore

ano hoki te tama a te kino e tukino i a ia. <sup>23</sup> Maku e tukituki ona hoariri ki tona aroaro: ka whiua e ahau te hunga e kino ana ki a ia. <sup>24</sup> Otira ka mau ki a ia toku pono me taku mahi tohu: a ma toku

ingoa ka ara ai tona haona. <sup>25</sup> Maku ano tona ringa ka pa ai ki te moana: tona matau ki nga awa.

<sup>26</sup> Ka karanga ia ki ahau, Ko koe toku Papa, toku Atua, te kohatu o toku whakaoranga. <sup>27</sup> Ka waiho ano ia hei matamua maku ki runga ake i nga kingi o te whenua. <sup>28</sup> Ka rongoatia e ahau taku mahi

tohu mona ake tonu atu: ka mau tonu taku kawenata ki a ia. <sup>29</sup> Ka meinga hoki e ahau ona uri kia mau tonu ake ake, tona torona ano ko nga ra o te rangi. <sup>30</sup> Ki te whakarerea e ana tamariki taku

ture, a kahore e haere i aku whakaritenga; <sup>31</sup> Ki te takahi ratou i aku tikanga; a kahore e pupuri i aku whakahau; <sup>32</sup> Katahi ka whaia ta ratou mahi tutu e taku rakau, o ratou kino e te whiu. <sup>33</sup> Otira

e kore e tangohia rawatia e ahau taku mahi tohu i a ia, e tuku ranei i toku pono kia he. <sup>34</sup> E kore taku kawenata e takahia e ahau, e kore ano e whakarereketia te mea i puta i oku ngutu. <sup>35</sup> Kotahi

aku oatitanga i toku tapu; e kore ahau e teka ki a Rawiri. <sup>36</sup> Ka mau tonu tona uri ake ake; a ka rite tona torona ki te ra i toku aroaro. <sup>37</sup> Ka rite tona pumau ki to te marama ake ake: hei kaiwhakaatu pono ano i runga i te rangi. (Hera.

<sup>38</sup> Na kua panga nei koe, kua whakariharia, kua riri ki tau i whakawahi ai. <sup>39</sup> Kua weriweri koe ki te kawenata ki tau pononga: kua whakanoaia e koe tona karauna, taka noa ki te whenua.

<sup>40</sup> Kua pakaruhia e koe ona taiepa katoa; whakamotitia iho e koe ona pa kaha. <sup>41</sup> E pahua ana i a ia nga tangata katoa e tika ana i te ara: he tawainga ia na ona hoa tata. <sup>42</sup> Kua whakarewaina e koe

te ringa matau o ona hoa whawhai: kua meinga e koe kia hari ona hoa whawhai katoa. <sup>43</sup> Ae, e

ngore ana i a koe te mata o tana hoari: kihai ano koe i tautoko i a ia ki te tatauranga. <sup>44</sup> Kua

whakamutua e koe tona kororia, kua maka tona torona ki raro ki te whenua. <sup>45</sup> Kua poroa e koe  
 nga ra o tona taitamarikitanga: kua hipokina ia e koe ki te whakama. (Hera. <sup>46</sup> Kia pehea te roa, e  
 Ihowa, e whakangaro ai koe i a koe, ake tonu atu? Kia pehea te roa e toro ana tou riri ano he ahi?  
<sup>47</sup> Kia mahara ki te poto rawa o toku taima: he aha i hanga ai e koe nga tangata katoa hei kore noa  
<sup>48</sup> iho? Ko wai tena tangata e ora nei, a e kore e kite i te mate? E mawhiti koia i a ia tona wairua  
 i te kaha o te reinga? (Hera. <sup>49</sup> E te Ariki, kei hea au arohatanga o mua i oatitia ai e koe ki a Rawiri  
 i runga i tou pono? <sup>50</sup> Maharatia, e te Ariki, te tawai ki au pononga; e mau nei ki toku uma te tawai  
 a nga iwi nunui katoa: <sup>51</sup> Te tawai a ou hoariri, e Ihowa, ta ratou tawai nei ki nga hikoinga o tau i  
 whakawahi ai. <sup>52</sup> Kia whakapaingia a Ihowa ake ake. Amine, ae Amine.

## Chapter 90

<sup>1</sup> He inoi na Mohi, na te tangata a te Atua. E te Ariki, ko koe to matou nohoanga i nga  
 whakatupuranga katoa. <sup>2</sup> Kahore ano i whanau noa nga maunga, kahore i hanga e koe te whenua  
 me te ao, ko koe te Atua no tua whakarere a ake tonu atu. <sup>3</sup> E whakahokia ana e koe te tangata kia  
 mongamonga noa, a e mea ana, E hoki, e nga tama a te tangata. <sup>4</sup> Ki tau titiro hoki, he rite nga tau  
 kotahi mano ki te ra onanahi, kua pahure atu nei, ki te mataaratanga hoki i te po. <sup>5</sup> Me te mea na  
 te waipuke tau kahakinga i a ratou; he moe ratou: i te ata ano he tarutaru e tupu ana. <sup>6</sup> I te ata e  
 tupu ana, e pihia ana: i te ahiahi kua kotia, kua maroke.  
<sup>7</sup> Kua hemo nei hoki matou i tou riri: ka ohore hoki i tou aritanga. <sup>8</sup> Kua maka e koe o  
 matou kino ki tou aroaro, o matou mea huna ki te marama o tou mata. <sup>9</sup> Ka pau o matou ra katoa,  
 me te riri ano koe: hemo ake o matou tau ano he korero e korerotia ana. <sup>10</sup> Ko nga ra o o matou  
 tau e whitu tekau tau; a ki te whai kaha, ka waru tekau tau; heoi he mahi mauuiui, he pouri to ratou  
 kaha; ka hohoro hoki te hatepea atu, a ka rere atu matou. <sup>11</sup> Ko wai te matau ana ki te kaha o tou  
 riri? Rite pu ki te wehi ki a koe tou riri.  
<sup>12</sup> Akona matou ki te tatau i o matou ra, kia anga ai te ngakau ki te whakaaro. <sup>13</sup> Hoki mai, e  
 Ihowa, kia pehea ake te roa? A kia puta ke he whakaaro mou ki au pononga. <sup>14</sup> Kia na matou i te

ata i tau mahi tohu: kia hari ai matou, kia koa ai, i o matou ra katoa. <sup>15</sup> Whakaharitia matou, kia rite ki nga ra i whakawhiua ai matou e koe, ki nga tau i kite ai matou i te kino. <sup>16</sup> Kia puta mai tau mahi ki au pononga, me tou kororia ki a ratou tamariki. <sup>17</sup> A hei runga i a matou te ataahua o Ihowa, o to matou Atua: whakapumautia ano ki a matou te mahi a o matou ringa, ae ra, te mahi a o matou ringa, whakapumautia e koe.

## Chapter 91

<sup>1</sup> Ko te tangata kei te wahi ngaro o te Runga Rawa tona kainga, ka noho ia i raro i te taumarumarutanga o te Kaha Rawa. <sup>2</sup> Ka kiia e ahau a Ihowa, Ko ia toku piringa, toku pa, toku Atua, ka whakawhirinaki ahau ki a ia. <sup>3</sup> Mana hoki koe e whakaora i te mahanga a te kaihopu manu, i te mate nanakia. <sup>4</sup> Ka hipokina koe e ia ki ona hou, a ka piri koe ki raro i ona pakau: ko tona pono hei whakangungu rakau, hei puapua mou. <sup>5</sup> E kore koe e wehi i te mea whakamataku i te po: i te pere e rere ana i te awatea. <sup>6</sup> I te mate uruta e rere ana i te pouri: i te whakangaromanga e whakangaro ana i te poutumarotanga. <sup>7</sup> He mano te hinga ki tou taha, tekau hoki nga mano ki tou matau; otia e kore e tata ki a koe. <sup>8</sup> Ka titiro kau ou kanohi, ka matakitaki ki te utu mo te hunga kino. <sup>9</sup> Ko koe hoki, e Ihowa, toku piranga! kua waiho e koe te Runga Rawa hei nohoanga mou: <sup>10</sup> Kahore he kino e pa ki a koe, kahore ano he whiu e tata ki tou teneti. <sup>11</sup> Ka korerotia iho hoki koe e ia ki ana anahera kia tiakina koe i ou ara katoa. <sup>12</sup> Ma ratou koe e hiki ake ki o ratou ringa, kei tutuki tou waewae ki te kohatu. <sup>13</sup> Ka haere koe i runga i te raiona, i te neke: ka takahia e koe ki raro te kua o raiona me te nakahi. <sup>14</sup> Ka whakaora ahau i a ia, mona i aroha ki ahau; maku ia e whakateitei ake, mona i matau ki toku ingoa. <sup>15</sup> Ka karanga ia ki ahau, a ka whakahoki kupu ahau ki a ia: ka tata ahau ki a ia i te wa o te he; maku ia e whakaora, maku ano ia e whakahonore. <sup>16</sup> Ka whakaroaina e ahau ona ra, a na noa ia: ka whakakitea hoki taku whakaoranga ki a ia.

## Chapter 92

<sup>1</sup> He himene, he waiata mo te ra Hapati. He mea pai te whakawhetai ki a Ihowa, te himene atu  
 ki tou ingoa, e te Runga Rawa: <sup>2</sup> Te whakakite i tou atawhai i te ata, i tou pono i nga po katoa; <sup>3</sup> I  
 runga i te aho tekau, i te hatere; i te tangi huatau a te hapa. <sup>4</sup> Nau hoki ahau, e Ihowa, i whakahari  
 ki tau mahi: ka whakamanamana ahau ki nga meatanga a ou ringa. <sup>5</sup> Ano te nui o au mahi, e Ihowa!  
 hohonu rawa ou whakaaro. <sup>6</sup> Ko te tangata poauau, kahore ia e matau; kahore hoki tenei e mohiotia  
 e te kuware.  
<sup>7</sup> Kia pihi ake nga whakaarokore ano he tarutaru, a kia tupu nga kaimahi katoa i te kino; he  
 ngaromanga tena no ratou ake ake; <sup>8</sup> Ko koe ia, e Ihowa, kei runga rawa ake ake. <sup>9</sup> Na, ko ou hoa  
 whawhai, e Ihowa, na, ko ou hoa whawhai, ka ngaro; ka marara katoa nga kaimahi i te kino. <sup>10</sup> Otira  
 ka ara i a koe toku haona, ka pera i to te kau maka: ka whakawahia ahau ki te hinu hou. <sup>11</sup> Ka kite  
 hoki toku kanohi i taku i hiahia ai ki runga ki oku hoariri, ka rongo oku taringa i taku i hiahia ai o  
 te hunga kino e whakatika ana mai ki ahau. <sup>12</sup> Ka rite te tupu o te tangata tika ki to te nikau; ka  
 rite tona nui ki to te hita i Repanona. <sup>13</sup> Ko te hunga i whakatokia ki te whare o Ihowa ka tupu ki  
 nga marae o to tatou Atua. <sup>14</sup> Ka whai hua tonu ratou ua hina: ki tonu i te wai, matomato tonu;  
<sup>15</sup> Hei whakakite i te tika o Ihowa: ko ia toku kohatu, kahore hoki ona he.

### Chapter 93

<sup>1</sup> E kingi ana a Ihowa; he kororia tona kakahu; he kakahu to Ihowa, he mea whitiki ia ki te  
 kaha: kua u hoki te ao, te taea te nekeneke. <sup>2</sup> No mua iho tou torona i whakapumautia ai: nonamata  
 riro koe. <sup>3</sup> Ko nga roma, e Ihowa, kua ara, nga roma nei, kua ara to ratou reo; ka ara nga ngaru o  
 nga roma. <sup>4</sup> I runga ake i nga reo o nga wai maha, i nga tuatea nunui o te moana, ko Ihowa i runga,  
 te mea kaha. <sup>5</sup> Pono atu au whakaaturanga: he huatau te tapu mo tou whare, e Ihowa, mo ake tonu  
 atu.

### Chapter 94

<sup>1</sup> E Ihowa, e te Atua, e te Kairapu utu; e te Atua, e te Kairapu utu, tiaho mai. <sup>2</sup> E ara, e te  
 Kaiwhakawa o te whenua: hoatu te utu e rite ana ki te hunga whakakake. <sup>3</sup> Kia pehea te roa, e  
 Ihowa, o te hunga kino nei, kia pehea te roa o te hunga kino e whakamanamana ana? <sup>4</sup> Kei te korero  
 whakatu ratou, kei te korero whakahi: kei te korero whakapehapeha ki a ratou nga kaimahi katoa  
 i te kino. <sup>5</sup> Mongamonga noa tau iwi i a ratou, e Ihowa: e tukinotia ana e ratou tou kainga tupu.  
<sup>6</sup> E patua ana e ratou te pouaru, te manene: e kohuru ana i te pani. <sup>7</sup> A e mea ana, E kore a Ihowa  
 e kite; e kore e maharatia e te Atua o Hakopa. <sup>8</sup> Kia matau, e nga poauau o te iwi: a hea ano koutou  
 whai mahara ai, e nga kuware? <sup>9</sup> Ko te kaiwhakato o te taringa, e kore ranei ia e rongu? Ko te  
 kaihanganga o te kanohi, e kore ianei ia e kite? <sup>10</sup> Ko te kaipapaki o nga iwi e kore ranei ia e papaki,  
 ara ko te kaiwhakaako nei i te tangata kia mohio? <sup>11</sup> E matau ana a Ihowa ki nga whakaaro o te  
 tangata, he mea teka noa.  
<sup>12</sup> Ka hari te tangata e pakia ana e koe, e Ihowa: e whakaakona ana i roto i tau ture; <sup>13</sup> Kia  
 marie ai tona ngakau i a koe i nga ra o te he, a keria noatia iho te poka mo te tangata kino. <sup>14</sup> E  
 kore hoki a Ihowa e panga i tana iwi, e kore ano e whakarere i tona kainga tupu. <sup>15</sup> Engari e hoki  
 te whakawa ki te tika: a e arumia e nga tangata ngakau tika katoa. <sup>16</sup> Ko wai toku hei whakatika  
 ake ki te hunga kino? Ko wai toku hei tu ake ki nga kaimahi i te hara? <sup>17</sup> Mehemea kaua a Ihowa  
 hei awahina moku, penei kua noho kupukore noa atu toku wairua. <sup>18</sup> I taku meatanga, Ka paheke  
 toku waewae; na tau mahi tohu, e Ihowa, ahau i tautoko ake. <sup>19</sup> I oku whakaaronga maha i roto i  
 toku ngakau ko au whakamarie toku oranga ngakau. <sup>20</sup> Tera ranei e whakahoa ki a koe te torona  
 o te kino, e whakatakoto nei i te mahi nanakia hei ture? <sup>21</sup> Kei te whakahuihui ratou ki te poke i  
 te wairua o te tangata tika, e mea ana kia heke te toto harakore. <sup>22</sup> Ko Ihowa ia toku pa teko: ko  
 toku Atua hei kohatu piringa moku. <sup>23</sup> A nana i whakahoki to ratou kino ki runga ki a ratou, a tera  
 ia e whakangaro i a ratou i roto i o ratou kino: ma Ihowa, ma to tatou Atua ratou e whakangaro.

## Chapter 95

<sup>1</sup> Tena, kia waiata tatou ki a Ihowa: kia hari te hamama ki te kamaka o to tatou whakaoranga.  
<sup>2</sup> Kia haere tatou me te whakawhetai atu ki tona aroaro: kia ngahau hoki a tatou himene ki a ia.  
<sup>3</sup> No te mea he Atua nui hoki a Ihowa, he Kingi nui i nga atua katoa. <sup>4</sup> Kei tona ringa nga wahi  
hohonu o te whenua: a nana nga maunga teitei. <sup>5</sup> Nana te moana, nana ano i hanga, a na ona ringa  
i whai ahua ai te whenua maroke. <sup>6</sup> Haere mai tatou, kia koropiko, kia tuohu: kia tukua nga turi ki  
te aroaro o Ihowa, o to tatou Kaihanga.  
<sup>7</sup> Ko ia hoki to tatou Atua; ko tatou tana iwi e hepara ai, nga hipi a tona ringa. Ki te rongo  
koutou ki tona reo aiane. <sup>8</sup> Kua e whakapakeketia o koutou ngakau: kei pera me o te whakatoinga,  
me o te ra o te whakamatautauranga i te koraha; <sup>9</sup> I ahau i whakamatautauria e o koutou matua, i  
ata mohiotia, i to ratou kitenga ano hoki i aku mahi. <sup>10</sup> E wha tekau nga tau i hoha ai ahau ki tenei  
whakatupuranga, na ka mea ahau; He iwi ngakau kotiti ke ratou, kahore hoki ratou e mohio ki aku  
ara. <sup>11</sup> Na reira i riri ai ahau, i oati ai hoki; e kore ratou e tae ki toku okiokinga.

## Chapter 96

<sup>1</sup> Waiatatia he waiata hou ki a Ihowa: waiata, e te whenua katoa, ki a Ihowa. <sup>2</sup> Waiata ki a  
Ihowa, whakapaingia tona ingoa: whakakitea tana whakaoranga i tenei ra, i tenei ra. <sup>3</sup> Whakapuakina  
tona kororia i waenganui i nga tauwi, ana mahi whakamiharo i waenganui i nga iwi katoa. <sup>4</sup> He  
nui hoki a Ihowa, he tika ano kia nui te whakamoemiti ki a ia: kia wehingia nuitia ai i nga atua  
katoa. <sup>5</sup> He whakapakoko hoki nga atua katoa o nga iwi: na Ihowa ia i hanga nga rangi. <sup>6</sup> He honore,  
he kororia kei tona aroaro: kei tona wahi tapu te kaha me te ataahua. <sup>7</sup> Waiho atu i a Ihowa, e nga  
hapu katoa o nga iwi: waiho atu i a Ihowa te kororia me te kaha. <sup>8</sup> Waiho atu i a Ihowa te kororia  
e tika ana mo tona ingoa: maua mai he whakahere, haere mai hoki ki ona marae. <sup>9</sup> Koropiko ki a  
Ihowa i roto i te ataahua o te tapu: kia wehi ra ki tona aroaro, e te whenua katoa.  
<sup>10</sup> Mea atu i waenganui o nga tauwi, E kingi ana a Ihowa: ka u te whenua, te taea te  
whakangaeue; ka tika ana whakawa mo nga iwi. <sup>11</sup> Kia hari nga rangi, kia koa te whenua, kia  
haruru te moana, me nga mea e hua ana i roto. <sup>12</sup> Kia hari te mara, me nga mea katoa i runga: ko

13

reira ano koa ai nga rakau katoa o te ngahere; <sup>13</sup> Ki te aroaro o Ihowa, e haere mai ana hoki ia; e haere mai ana ia ki te whakawa mo te whenua: ka whakawa ia mo te ao i runga i te tika, mo nga iwi hoki i runga i tona pono.

### Chapter 97

<sup>1</sup> Ko Ihowa te Kingi, kia hari te whenua, kia koa nga tini moutere. <sup>2</sup> Ko te kapua me te pouri kei ona taha katoa: ko te tika, ko te whakawa, te turanga o tona torona. <sup>3</sup> He kapura e haere ana i mua i a ia, a pau ake ona hoariri a taka noa. <sup>4</sup> Marama tonu te ao i ana uira: i kite te whenua, a wiri ana. <sup>5</sup> Rewa noa nga maunga, ano he ware pi, i te aroaro o Ihowa, i te aroaro o te Ariki o te whenua katoa. <sup>6</sup> E whakapuakina ana e nga rangi tona tika: a e kitea ana e nga iwi katoa tona kororia. <sup>7</sup> Kia whakama katoa te hunga e mahi ana ki nga whakapakoko, e whakamanamana ana ki nga atua horihori: koropiko ki a ia, e nga atua katoa.

<sup>8</sup> I rongo a Hiona, a koa ana: whakamanamana ana nga tamahine o Hura, e Ihowa, ki au whakaritenga. <sup>9</sup> Ko koe hoki, e Ihowa, kei runga noa ake i te whenua katoa: kua whakanuia koe ki runga noa ake i nga atua katoa. <sup>10</sup> E te hunga e aroha ana ki a Ihowa, e kino ki te he: e tiakina ana e ia nga wairua o tana hunga tapu; e whakaorangia ana ratou e ia i nga ringa o te hunga kino.

<sup>11</sup> Kua oti te marama te whakato mo te hunga tika: me te koa mo te hunga ngakau tapatahi. <sup>12</sup> Kia hari ki a Ihowa, e te hunga tika: whakamoemiti ki tona ingoa tapu.

### Chapter 98

<sup>1</sup> He himene. Waiatatia ki a Ihowa he waiata hou; he mahi whakamiharo hoki ana: na tona ringa matau, na tona ringa tapu, i taea ai e ia te whakaora. <sup>2</sup> Kua whakakitea e Ihowa tana whakaoranga, kua whakapuakina e ia tona tika ki te aroaro o nga tauwiwi. <sup>3</sup> Kua mahara ia ki tana mahi tohu, ki tona pono ki te whare o Iharaira; a kua kite nga pito katoa o te whenua i te whakaoranga a to tatou Atua.

<sup>4</sup> Kia hari te hamama, e te whenua katoa, ki a Ihowa: hamama, kia hari, ae ra, himene atu.

<sup>5</sup> Himene ki a Ihowa i runga i te hapa; i runga i te hapa, me te himene ano te reo. <sup>6</sup> I runga i te tetere,

i te tangi ano o te koronete: kia hari te hamama ki te aroaro o Ihowa, o te Kingi. <sup>7</sup> Kia haruru te moana me nga mea e hua ana i roto, te ao me ona tangata e noho ana i runga. <sup>8</sup> Kia papaki nga ringa o nga roma, kia hari tahi nga pukepuke. <sup>9</sup> Ki te aroaro o Ihowa: e haere mai ana hoki ia ki te whakawa mo te whenua: ka whakawa ia mo te ao i runga i te tika, mo nga iwi hoki i runga i te pono.

### Chapter 99

<sup>1</sup> Ko Ihowa te Kingi; kia wiri nga iwi: e noho ana ia i waenganui i nga kerupima; kia ngaueue te whenua. <sup>2</sup> He nui a Ihowa i Hiona: kei runga ake ia i nga iwi katoa. <sup>3</sup> Kia whakamoemiti ratou ki tou ingoa nui, whakamataku; he tapu ia. <sup>4</sup> E matenui ana hoki te kaha o te kingi ki te whakawa tika; ko koe hei whakapumau i te pono: he whakawa tika, he hekore tau mahi i roto i a Hakopa. <sup>5</sup> Whakanuia a Ihowa, to tatou Atua: koropiko ki tona turanga waewae; he tapu ia. <sup>6</sup> Ko Mohi raua ko Arona i roto i ana tohunga, me Hamuera i roto i te hunga e karanga ana ki tona ingoa: i karanga ratou ki a Ihowa, a whakahoki kupu ana mai ia ki a ratou. <sup>7</sup> I korero ia ki a ratou i roto i te pou kapua: i pupuri ratou i ana whakaaturanga, i te tikanga i whakatakotoria e ia ki a ratou. <sup>8</sup> E Ihowa, e to matou Atua, i whakahoki kupu koe ki a ratou: he Atua tohu koe i a ratou, otia i rapu utu ano koe mo a ratou mahi. <sup>9</sup> Whakanuia a Ihowa, to tatou Atua, koropiko atu i tona maunga tapu: he tapu hoki a Ihowa, to tatou Atua.

### Chapter 100

<sup>1</sup> He himene whakamoemiti. Kia hari te hamama ki a Ihowa, e nga whenua katoa: <sup>2</sup> Mahi atu ki a Ihowa i runga i te koa, waiata haere ki tona aroaro. <sup>3</sup> Kia matau ki a Ihowa, ko ia te Atua: nana tatou i hanga, ehara hoki i a tatou: ko tana iwi tatou, ko ana hipi e hepara ai. <sup>4</sup> Tomokia ona tatau i runga i te whakawhetai, ona marae i runga i te whakamoemiti: whakawhetai atu ki a ia, whakapaingia tona ingoa. <sup>5</sup> He pai hoki a Ihowa, pumau tonu tana mahi tohu: a kei tena whakatupuranga, kei tena whakatupuranga, tona pono.



## Chapter 101

<sup>1</sup> He himene na Rawiri. Ka waiatatia e ahau te mahi tohu me te whakawa tika: ka himene atu  
 ahau ki a koe, e Ihowa. <sup>2</sup> Ka ata whakahaere ahau i ahau i runga i te ara tika. A hea koe haere mai  
 ai ki ahau? Ka haereere ahau i roto i toku whare i runga i te ngakau tapatahi. <sup>3</sup> E kore te mea tutua  
 e waiho e ahau i mua i oku kanohi; e kino ana ahau ki te mahi a te hunga peka ke: e kore e piri ki  
 ahau. <sup>4</sup> Ka mawehe atu i ahau te ngakau parori ke: e kore ahau e mohio ki te mea kino. <sup>5</sup> Ko te  
 tangata e ngautuara puku ana ki tona hoa ka whakangaromia e ahau: e kore ahau e aro ki te tangata  
 kanohi whakakake, ki te tangata ngakau whakapakari. <sup>6</sup> Kei runga i nga mea pono o te whenua  
 oku kanohi, kia noho ai ratou ki ahau: ko te tangata e haere ana i te ara tika, ka mahi tena ki ahau.  
<sup>7</sup> E kore e noho ki toku whare te kaimahi i te hianga: e kore e tu ki toku aroaro te tangata korero  
 teka. <sup>8</sup> I tenei ata, i tenei ata, ka whakangaromia e ahau nga tangata kikino katoa o te whenua: kia  
 hatepea atu ai i te pa o te Atua te hunga katoa e mahi ana i te kino.

## Chapter 102

<sup>1</sup> He inoi na te ngakau mamae, i a ia e pehia ana, a maringi a wai ana tana tangi ki te aroaro o  
 Ihowa. Whakarongo ki taku inoi, e Ihowa, kia puta atu taku tangi ki a koe. <sup>2</sup> Kua e huna tou mata  
 ki ahau i te ra e pouri ai ahau; whakatitahatia mai tou taringa ki ahau: hohoro te whakahoki kupu  
 mai ki ahau i te ra e karanga ai ahau. <sup>3</sup> Ka memeha hoki oku ra ano he paoa: ka kaia oku wheua  
 ano he motumotu. <sup>4</sup> Kua pakia toku ngakau, kua memenge, ano he tarutaru; i wareware ai ahau ki  
 te kai i taku taro. <sup>5</sup> Piri tonu oku iwi ki toku kiri i toku reo aue. <sup>6</sup> He rite ahau ki te matuku i te  
 koraha, ki te koukou i te wahi mokemoke. <sup>7</sup> Mataara tonu ahau; toku rite kei te pihoihoi mokemoke  
 i runga i te tuanui. <sup>8</sup> E tawai ana oku hoariri ki ahau i te ra roa; ko te hunga e porangirangi ana mai  
 ki ahau, ko ahau ta ratou oati. <sup>9</sup> Kainga ana e ahau te pungarehu ano he taro: whakananua iho toku  
 wai inu ki te roimata. <sup>10</sup> I tou riri hoki, i tou weriweri; nau hoki ahau i hapai ake, a taia atu ano  
 ahau e koe. <sup>11</sup> He rite oku ra ki te atarangi e whakawairua kau ana: a kua memenge ahau ano he  
 tarutaru.

<sup>12</sup> Ko koe ia, e Ihowa, ka mau tonu ake ake, ka maharatia ano koe e nga whakatupuranga katoa.  
<sup>13</sup> Tera koe e whakatika, e aroha ki a Hiona; kua taka mai hoki te wa, ae ra, te tino wa, hei atawhainga  
<sup>14</sup> i a ia. E manakohia ana hoki e au pononga ona kohatu, e awangawanga ana ki tona puehu.  
<sup>15</sup> Penei ka wehingia te ingoa o Ihowa e nga tauwi, tou kororia hoki e nga kingi katoa o te whenua.  
<sup>16</sup> Na Ihowa hoki i hanga a Hiona, kua kitea ia i tona kororia. <sup>17</sup> Kua tahuri ia ki te inoi a te rawakore:  
<sup>18</sup> kihai i whakahawea ki ta ratou inoi. Ka tuhituhia tenei mo to muri whakatupuranga: a ka  
<sup>19</sup> whakamoemiti ki a Ihowa te iwi meake hanga. Mona i titiro iho i te tiketike o tona wahi tapu:  
<sup>20</sup> i titiro iho a Ihowa i te rangi ki te whenua; Ki te whakarongo ki te aue a te herehere, ki te wewete  
<sup>21</sup> i te hunga kua motuhia mo te mate; Kia whakapuakina ai te ingo o Ihowa i Hiona, me te  
<sup>22</sup> whakamoemiti ki a ia i Hiruharama; I te huihuinga o nga iwi, o nga kingitanga, ki te mahi ki a  
<sup>23</sup> Ihowa.  
<sup>24</sup> Whakangoikoretia iho e ia toku kaha i te ara: kua torutoru i a ia oku ra. I mea ahau, E  
<sup>25</sup> toku Atua, kaua ahau e tangohia i waenganui o oku ra: kei nga whakatupuranga katoa ou tau.  
<sup>26</sup> Nonamata te whenua i whakaturia ai e koe, a he mahi nga rangi na ou ringa. Ko era e hemo  
<sup>27</sup> atu, ko koe ia e mau tonu: ae ra, ka tawhitotia katoatia me he weweru; ka whakaputaia ketia ratou  
<sup>28</sup> e koe ano he kakahu, a ka whakaputaia ketia. Ko koe ia, ko koe tonu, kahore hoki he mutunga  
 o ou tau. Ka whai nohoanga nga tama a au pononga, ka pumau o ratou uri ki tou aroaro.

### Chapter 103

<sup>1</sup> Na Rawiri. Whakapaingia a Ihowa, e toku wairua; e nga mea katoa i roto i ahau, whakapaingia  
<sup>2</sup> tona ingoa tapu. Whakapaingia a Ihowa, e toku wairua, kei wareware hoki ki ana painga katoa.  
<sup>3</sup> Ko ia te muru nei i ou kino katoa; te rongo a nei i ou mate katoa. <sup>4</sup> Ko ia te hoko nei i tou ora kei  
<sup>5</sup> ngaro; te karauna nei i a koe ki te atawhai, ki te aroha. Nana nei i makona ai tou mangai i nga  
<sup>6</sup> mea papai; i hou ai tou taitamarikitanga, i rite ai ki to te ekara. <sup>7</sup> I  
<sup>8</sup> Ka puta i a Ihowa nga mahi tika, me te whakawa tika ki te hunga katoa e tukinotia ana. Ki tonu a Ihowa i te aroha

me te atawhai, he puhoi ki te riri, he nui hoki tana mahi tohu. <sup>9</sup> E kore ia e whakatupuehupehu  
 tonu, e kore ano e mauahara ake ake. <sup>10</sup> Kihai i rite ki o tatou hara ana meatanga ki a tatou: kihai  
 ano i rite ki o tatou kino ana utu mai ki a tatou. <sup>11</sup> He rite hoki ki te rangi e tiketike ake ana i te  
 whenua, pera tonu te nui o tana mahi tohu ki te hunga e wehi ana ki a ia. <sup>12</sup> Pera i te matara o te  
 rawhiti i te uru, pera tonu tana whakamataratanga atu i a tatou mahi tutu i a tatou. <sup>13</sup> E aroha ana  
 te matua ki ana tamariki, pera tonu to Ihowa aroha ki te hunga e wehi ana ki a ia. <sup>14</sup> E matau ana  
 hoki ia ki to tatou ahua, e mahara ana he puehu tatou. <sup>15</sup> Ko te tangata ia, rite tonu ona ra ki o te  
 tarutaru: kei te puawai o te mara, ko tona ngawhatanga. <sup>16</sup> E rarungatia ana hoki e te hau, a kua  
 kahore; kahore hoki e mohiotia a muri e tona wahi. <sup>17</sup> Tena ko te mahi tohu a Ihowa no tua  
 whakarere, a ake tonu ake, ki te hunga e wehi ana ki a ia: tona tika hoki ki nga uri o nga tamariki;  
<sup>18</sup> Ki te hunga e pupuri ana i tana kawenata, ki te hunga hoki e mahara ana ki ana ako kia mahia.  
<sup>19</sup> Kua oti i a Ihowa tona torona te whakatu ki nga rangi; a e kawanatia ana nga mea katoa e  
 tona kingitanga. <sup>20</sup> Whakapaingia a Ihowa, e ana anahera, e hira nei te kaha, e whakarite nei i tana  
 kupu, e whakarongo nei ki tona reo ina korero. <sup>21</sup> Whakapaingia a Ihowa, e ana mano katoa, e ana  
 minita e mahi nei i tana e pai ai. <sup>22</sup> Whakapaingia a Ihowa, e ana mahi katoa i nga wahi katoa o  
 tona kingitanga: whakapaingia a Ihowa, e toku wairua.

### Chapter 104

<sup>1</sup> Whakapaingia a Ihowa, e toku wairua. E Ihowa, e toku Atua, he nui rawa koe; he honore, he  
 kororia ou kakahu. <sup>2</sup> E roropi nei i te marama ki a koe ano he kakahu, e hora nei i nga rangi ano  
 he kakahu tauarai. <sup>3</sup> E whakanoho nei i nga kurupae o ona ruma ki nga wai: e mea nei i nga kapua  
 hei hariata mona: e haere nei i runga i nga pakau o te hau. <sup>4</sup> E mea nei i nga hau hei karere mana,  
 i te mura ahi hei kaimahi mana. <sup>5</sup> Nana nei i whakatu te whenua ki runga ki ona turanga, kei  
 nekenekhehia ake ake. <sup>6</sup> Nau ano i hipoki ki te rire hei kakahu: tu ana nga wai i runga i nga maunga.  
<sup>7</sup> Rere ana ratou i tau riri: tahuti tonu atu i te reo o tau whatitiri; <sup>8</sup> Puke ake ana ra nga maunga,

9  
heke iho ana ma nga whawharua ki te wahi i whakaritea e koe mo ratou. Kua whakatakotoria e  
koe he rohe kei koni mai ratou, kei hoki mai hei taupoki mo te whenua.

10 Nana i tono nga puna ki roto ki nga awaawa, e rere nei i waenga o nga puke. 11 Hei wai mo  
nga kirehe katoa o te parae: na noa te matewai o nga kaihe mohoa. 12 Kei reira nga nohoanga o

13 nga manu o te rangi, e korihi nei i roto i nga manga. He mea whakamakuku nana nga puke i ona

14 ruma: ka makona te whenua i nga hua o au mahi. Ko ia hei whakatupu i te tarutaru ma te kararehe,

15 i te otaota hei mea ma te tangata; kia whakaputaina ake ai he taro i te whenua; He waina hei  
whakahari i te ngakau o te tangata, he hinu e piata ai tona mata, me te taro hei whakakaha i te

16 ngakau o te tangata. Ki tonu i te wai nga rakau a Ihowa, nga hita o Repanona i whakatokia e ia.

17 Hanga ake e nga manu he ohanga ki reira: te taaka, ko nga kauri tona whare. 18 Hei piringa nga  
puke tiketike mo nga koati mohoa: nga kohatu mo nga rapeti.

19 I hanga e ia te marama hei tohu taima: e matau ana te ra ki tona torengitanga. 20 Ko koe hei  
whakapouri, a kua po: na ngoki mai ana nga kirehe katoa o te ngahere. 21 Ko nga kua o raiona

22 ngengere ana ratou, he mea kai, he rapu kai ma ratou i te Atua. Ko te putanga mai o te ra ka

23 poto atu ratou, takoto ana i o ratou kuhunga. Ko te tangata ka haere ki ana hanga, ki tana mahi,

24 a ahiahi noa. Ano te tini o au mahi, e Ihowa! he mohio rawa tau mahi i aua mea katoa; ki tonu

25 te whenua i au taonga. Kei ko ra ko te moana, tona nui tuauriuri: kei reira nga mea ngokingoki

26 e kore e taea te tatau, nga kirehe hoki, ana nonohi, ana nunui. Kei reira nga kaipuke e teretere

27 ana: kei reira taua rewiatana i hanga e koe hei takaro ki reira. E tatari katoa ana enei ki a koe,

28 kia hoatu e koe te kai ma ratou i te wa e tika ai. Ko tau e hoatu ai ma ratou, kohikohia ana e

29 ratou: te wherahanga o tou ringa, makona tonu ratou i te pai. Ko te hunanga o tou mata, pororaru  
ana ratou: ka kapohia e koe to ratou manawa, ka marere ratou, a ka hoki ano ki to ratou puehu.

30 Ko tau tononga mai i tou wairua, kua hanga ratou; a whakahoutia ana e koe te mata o te whenua.

31 Kia whai kororia a Ihowa ake ake, kia hari a Ihowa ki ana mahi: 32 Tana tirohanga iho ki

33 te whenua, ru ana: kua pa ki nga puke, na pongere ana. Ka waiata ahau ki a Ihowa i ahau e ora

34 ana: ka himene ki toku Atua i ahau ano i te ao nei. Kia reka toku whakaaronga ki a ia, ka hari

ahau ki a Ihowa. <sup>35</sup> Kia moti nga tangata hara i runga i te whenua, ko te hunga kino kia poto katoa atu. Whakapaingia a Ihowa, e toku wairua. Whakamoemititia a Ihowa.

## Chapter 105

<sup>1</sup> Whakawhetai ki a Ihowa, karanga atu ki tona ingoa: whakapuakina ana mahi ki waenganui o nga iwi. <sup>2</sup> Waiata ki a ia, himene ki a ia: korerotia ana mahi whakamiharo katoa. <sup>3</sup> Whakamanamana ki tona ingoa tapu: kia hari te ngakau o te hunga e rapu ana i a Ihowa. <sup>4</sup> Rapua a Ihowa me tona kaha: rapua tonutia tona mata, ake ake. <sup>5</sup> Maharatia ana mahi whakamiharo i mahia e ia; ana merekara me nga whakaritenga a tona mangai, <sup>6</sup> E nga uri o Aperahama, o tana pononga, e nga tama a Hakopa, e ana i whiriwhiri ai. <sup>7</sup> Ko Ihowa ia, ko to tatou Atua; kei te whenua katoa ana whakaritenga. <sup>8</sup> Mahara tonu ia ki tana kawenata ake ake, ki te kupu i kiia iho e ia ki te mano o nga whakatupuranga. <sup>9</sup> Ki tana i whakarite ai ki a Aperahama, ki tana oati hoki ki a Ihaka; <sup>10</sup> A whakapumautia iho e ia hei tikanga ki a Hakopa, hei kawenata mau tonu ki a Iharaira. <sup>11</sup> I a ia ra i mea, Ka hoatu e ahau ki a koe te whenua o Kanaana hei wahi pumau mo koutou. <sup>12</sup> I te mea he hunga torutoru ratou: ae ra, he iti rawa, he manene ano ki reira. <sup>13</sup> I a ratou e haereere ana i tenei iwi ki tera atu iwi, i tetahi rangatiratanga ki tetahi iwi ke; <sup>14</sup> Kihai ratou i tukua e ia kia tukinotia e te tangata: he whakaaro ano ki a ratou i riria ai e ia nga kingi. <sup>15</sup> I mea ia, Kei pa ki aku i whakawahi ai: kei kino ki aku poropiti. <sup>16</sup> I karangatia e ia te matekai ki te whenua: whati katoa i a ia te tokotoko, ara te taro. <sup>17</sup> I tonoa e ia he tangata i mua i a ratou; i hokona a Hohepa hei pononga: <sup>18</sup> I whakamamaetia ona waewae ki te mekameka: takoto ana ia i te rino; <sup>19</sup> A puta noa tana kupu: whakamatautauria ana ia e te kupu a Ihowa. <sup>20</sup> I tono te kingi, a wetekina ana ia; ara te kingi o nga iwi, a tukua ana ia. <sup>21</sup> A meinga ana ia e ia hei ariki mo tona whare, hei rangatira mo ona taonga katoa; <sup>22</sup> Hei herehere i ana rangatira ua pai ia, hei ako i ana kaumatua ki te whakaaro. <sup>23</sup> I haere

mai ano a Ihairaira ki Ihipa: a noho ana a Hakopa ki te whenua o Hama. <sup>24</sup> Na ka tino whakanuia  
 e ia tana iwi: a ka meinga ratou kia kaha ake i o ratou hoariri.  
<sup>25</sup> I whakakoarotia e ia to ratou ngakau kia kino ki tana iwi, kia mahi lhianga ki ana pononga.  
<sup>26</sup> I tonoa e ia a Mohi, tana pononga, raua ko Arona, ko tana i whiriwhiri ai. <sup>27</sup> Whakaputaina ana  
 e raua ana tohu i waenganui i a ratou, he merekara i te whenua o Hama. <sup>28</sup> I tukua e ia te pouri, a  
 kua pouri: kihai ano ratou i whakakeke ki ana kupu. <sup>29</sup> I whakaputaia ketia e ia o ratou wai hei  
 toto; a mate ake i a ia a ratou ngohi. <sup>30</sup> I whakangahue ake to ratou whenua i te poroka, i roto i nga  
 whare moenga o o ratou kingi. <sup>31</sup> I whai kupu ia, a puta ana mai nga pokai namu: me te kutu i o  
 ratou kainga. <sup>32</sup> I tukua iho e ia ki a ratou te whatu hei ua, me te ahi mura ki to ratou whenua. <sup>33</sup> I  
 pakia ano e ia a ratou waina me a ratou piki; a whatiwhatia ana e ia nga rakau o o ratou kainga.  
<sup>34</sup> I korero ia, a puta ana mai te mawhitiwhiti me te moka, te taea te tatau. <sup>35</sup> A kainga katoatia ana  
 nga otaota o to ratou whenua; pau ake nga hua o to ratou oneone. <sup>36</sup> I whakamatea katoatia ano  
 hoki e ia nga matamua o to ratou whenua, te muanga o to ratou kaha. <sup>37</sup> A whakaputaina mai ana  
 ratou e ia, me te hiriwa, me te koura, kahore hoki he mea tuoi i roto i ana iwi. <sup>38</sup> Na hari ana a  
 Ihipa i to ratou haerenga; i mau hoki to ratou wehi ki a ratou. <sup>39</sup> I horahia e ia te kapua hei hipoki,  
 me te ahi hei whakamarama i te po. <sup>40</sup> I inoi ratou, a homai ana e ia te koitareke; a ka makona ratou  
 i te taro o te rangi. <sup>41</sup> I wahia e ia te kohatu, a ka pakaru mai nga wai: rere ana i nga wahi maroke,  
 koia ano kei te awa. <sup>42</sup> I mahara hoki ia ki tana kuputapu, ki a Aperahama ano, ki tana pononga.  
<sup>43</sup> A whakaputaina mai ana e ia tana iwi i runga i te hari, ana i whiriwhiri ai i runga i te koa. <sup>44</sup> A  
 homai ana e ia ki a ratou nga whenua o nga tauwiwi: a riro ana i a ratou nga mauuitanga o te iwi;  
<sup>45</sup> Kia puritia ai e ratou ana tikanga, kia mau ai ki ana ture. Whakamoemititia a Ihowa.

## Chapter 106

<sup>1</sup> Whakamoemititia a Ihowa. Whakawhetai ki a Ihowa; he pai hoki ia: he pumau tonu hoki tana  
 mahi tohu. <sup>2</sup> Me wai e korero nga mahi nunui a Ihowa: e whakakite katoa nga whakamoemiti ki a

<sup>3</sup> ia? Ka hari te hunga e mau ana ki te whakarite tika; me te kaimahi i te tika i nga wa katoa.  
<sup>4</sup> Maharatia mai ahau, e Ihowa, kia rite ki tau manako ki tau iwi: tirotirohia mai ahau i runga i tau  
<sup>5</sup> whakaoranga. Kia kite ai ahau i te pai o au i whiriwhiri ai: kia koa ai, koa tahi me tau iwi; kia  
whakamanamana tahi ai me tou kainga tupu.  
<sup>6</sup> Kua hara tahi matou me o matou matua, kua mahi matou i te kino, i te mea he. <sup>7</sup> Kihai o  
matou matua i mohio ki au mea whakamiharo i Ihipa, kihai hoki i mahara ki te tini o au arohatanga;  
engari ia i whakato i ratou ki a koe i te moana, ae, i te Moana Whero. <sup>8</sup> Otira whakaoranga ana  
ratou e ia, he whakaaro ki tona ingoa, kia matauria ai tona kaha. <sup>9</sup> I riria ano e ia te Moana Whero,  
a kua maroke: na arahina ana ratou e ia i nga rire, ano ko waenga koraha. <sup>10</sup> Na whakaoranga ake  
ratou e ia i te ringa o te tangata i kino ki a ratou; a hokona ana ratou i roto i te ringa o te hoariri.  
<sup>11</sup> A taupokina ana e nga wai o ratou hoariri, hore rawa tetahi morehu. <sup>12</sup> Na whakapono ana ratou  
ki ana kupu: a waiata ana i te whakamoemiti ki a ia.  
<sup>13</sup> Hohoro tonu to ratou wareware ki ana mahi: kihai i taria e ratou tona whakaaro: <sup>14</sup> Engari  
i whakaputa nui i o ratou hiahia i te tahora; whakamatautau ana ratou i te Atua i te koraha. <sup>15</sup> Na  
ka hoatu e ia ta ratou i inoi ai; otira i tukua atu e ia te hiroki ki to ratou wairua. <sup>16</sup> I hae hoki ratou  
ki a Mohi i te puni, ki a Arona ano, ki te tangata tapu a Ihowa. <sup>17</sup> Ko te hamamatanga o te whenua,  
na horomia ana a Ratana; a taupokina iho te ropu o Apirama. <sup>18</sup> A mura ana te ahi i to ratou ropu;  
wera ana i te mura te hunga kino. <sup>19</sup> I hanga e ratou he kua kau ki Horepa, a koropiko ana ki te  
whakapakoko i whakarewaina. <sup>20</sup> Koia i whitia ai e ratou to ratou kororia mo te mea i rite ki te  
puru kai tarutaru. <sup>21</sup> Wareware ake i a ratou te Atua, to ratou kaiwhakaora, i mahi nei i nga mea  
nunui ki Ihipa. <sup>22</sup> I nga mahi whakamiharo ki te whenua o Hama, i nga mea whakamataku ki te  
Moana Whero. <sup>23</sup> Na ka mea ia, kia whakangaromia ratou, me i kaua a Mohi, tana i whiriwhiri ai,  
te tu ki tona aroaro i te takiwa, hei papare ake i tona riri, kei huna ratou e ia. <sup>24</sup> Ae ra, i whakahawea  
ratou ki te whenua ahuareka; kihai ratou i whakapono ki tana kupu; <sup>25</sup> Heoi amuamu ana i roto i  
o ratou teneti, kihai i whakarongo ki te reo o Ihowa. <sup>26</sup> Na reira ka ara tona ringa ki a ratou, ki te  
turaki i a ratou i te koraha; <sup>27</sup> Ki te turaki i o ratou uri i roto i nga iwi: ki te whakamarara i a ratou  
ki nga whenua. <sup>28</sup> I whakauru atu hoki ratou ki a Paarapeoro: a kai ana i nga patunga tapu ma nga

<sup>29</sup> mea mate. Koia i whakapataritari ai ratou i a ia ki a ratou hanga kia riri; a pakaru ana mai te  
<sup>30</sup> mate uruta ki a ratou. Na ko te whakatikanga ake o Pinehaha, ki te whakaputa whakawa: a mutu  
<sup>31</sup> iho te mate. I kiia ai ia he tika i nga whakatupuranga katoa ake ake. <sup>32</sup> I whakapataritari ano  
<sup>33</sup> ratou i a ia ki nga wai o Meripa; na hemanawa ana a Mohi mo ratou: Na ratou hoki i whakato  
 tona wairua, i he ai te kupu a ona ngutu.  
<sup>34</sup> Kihai ratou i whakangaro i nga iwi i kiia nei e Ihowa ki a ratou; <sup>35</sup> Heoi uru ana ki roto ki  
 nga tauwiwi, a ako ana i a ratou mahi. <sup>36</sup> I mahi hoki ratou ki a ratou whakapakoko, i mahangatia ai  
<sup>37</sup> ratou. Ae, i patua e ratou a ratou tama me a ratou tamahine ma nga atua maori; <sup>38</sup> I whakahekea  
 hoki te toto harakore, nga toto o a ratou tama, o a ratou tamahine, i patua nei e ratou ma nga  
<sup>39</sup> whakapakoko o Kanaana; a poke iho te whenua i te toto. Na poke iho ratou i a ratou mahi: a  
<sup>40</sup> puremu ana ki a ratou mahi. Koia i mura ai te riri o Ihowa ki tana iwi; a whakarihariha ana ia  
<sup>41</sup> ki tona kainga tupu. A tukua ana ratou e ia ki te ringa o nga tauwiwi; waiho ana te hunga i kino  
<sup>42</sup> ki a ratou hei rangatira mo ratou. Na ka tukinotia ratou e o ratou hoariri: ka pehia ki raro i o  
<sup>43</sup> ratou ringa. He maha ana whakaoranga i a ratou: ko ratou ia i whakato ki a ia i o ratou whakaaro,  
<sup>44</sup> a whakaititia ana i ta ratou kino. Ahakoa ra, i titiro ia ki to ratou matenga, i tona rongonga i ta  
<sup>45</sup> ratou tangi: I mahara hoki ia ki tana kawenata ki a ratou, a rite tonu ki te tini o ana mahi aroha  
<sup>46</sup> te putanga ketanga o ona whakaaro: I meinga hoki ratou e ia kia arohaina e te hunga katoa i  
<sup>47</sup> whakaraua atu ai ratou. Whakaorangia matou, e Ihowa, e to matou Atua, kohikohia matou i roto  
 i nga tauwiwi: kia whakawhetai ai ki tou ingoa tapu, kia whakamanamana ai ki tou whakamoemiti.  
<sup>48</sup> Kia whakapaingia a Ihowa, te Atua o Iharaira, i tua whakarere ano, a ake ake. A kia mea katoa  
 te iwi, Amine. Whakamoemititia a Ihowa.

## Chapter 107

<sup>1</sup> Whakawhetai ki a Ihowa, he pai hoki ia: he pumau tonu hoki tana mahi tohu. <sup>2</sup> Kia pena ano  
 te korero a te hunga i hokona e Ihowa, i hokona nei e ia i roto i te ringa o te hoariri; <sup>3</sup> I kohikohia  
 nei i nga whenua, i te rawhiti, i te uru, i te raki, i te tonga. <sup>4</sup> I haereere ratou i te koraha i te wahi



5  
 mokemoke, te kitea tetahi pa hei nohoanga. I matekai ratou, i matewai: hemo noa to ratou wairua  
 6  
 i roto i a ratou. Na ka tangi ratou ki a Ihowa i to ratou pouri: a whakaorangia ana ratou e ia i o  
 7  
 ratou mate. A arahina ana e ia ra te ara tika; kia haere ai ki te pa hei nohoanga. Aue! me i  
 8  
 whakapaingia e te tangata a Ihowa mo tona atawhai, mo ana mahi whakamiharo ki nga tama a te  
 9  
 tangata! E whakamakonatia ana hoki e ia te wairua hiahia: ko te wairua hiakai, whakakia ana e  
 ia ki te pai.  
 10  
 Ko te hunga i noho i te pouri, i te atarangi o te mate: he mea here ki te mamae, ki te rino;  
 11  
 Mo ratou i tutu ki nga kupu a te Atua, i whakahawea ki te whakaaro o te Runga Rawa; Koia  
 12  
 i pehia iho ai e ia o ratou ngakau ki te mahi: hinga iho ratou, kahore hoki he kaiawhina. Na ka  
 13  
 tangi ratou ki a Ihowa i to ratou pouri; a ka whakaorangia ratou e ia i o ratou mate. Whakaputaina  
 14  
 mai ana ratou e ia i te pouri, i te atarangi o te mate; motumotuhia ana o ratou here. Aue! me i  
 15  
 whakapaingia e te tangata a Ihowa mo tona atawhai, mo ana mahi whakamiharo ki nga tama a te  
 16  
 tangata! Kua tukitukia hoki e ia nga tatau parahi: kua tapahia e ia nga tutaki rino, motu rawa.  
 17  
 Ko nga kuware, na a ratou mahi tutu, na o ratou kino, i pakia ai ratou. Ka wetiweti to  
 18  
 ratou wairua ki nga kai katoa; a ka whakatata ratou ki nga kuwaha o te mate. Na ka tangi ki a  
 19  
 Ihowa i to ratou pouri, a ka whakaorangia ratou e ia i o ratou mate. Tukua mai ana e ia tana  
 20  
 kupu, a rongoatia ana ratou: a whakaputaina ana ratou i o ratou ngaromanga. Aue! me i  
 21  
 whakapaingia e te tangata a Ihowa mo tona atawhai, mo ana mahi whakamiharo ki nga tama a te  
 22  
 tangata! Kia tukua ano e ratou te whakahere, ara te whakamoemiti; kia whakapuaki i ana mahi  
 i runga i te hari.  
 23  
 Ko te hunga e haere ana ki raro, ki te moana, i runga kaipuke, a e whai mahi ana i nga wai  
 24  
 nunui, Ko ratou e kite i nga mahi a Ihowa, i ana mahi whakamiharo i te rire. Puta kau tana  
 25  
 kupu, kua maranga te tupuhi, mana e whakatutu ona ngaru. Ka kake ratou ki runga ki te rangi,  
 26  
 ka heke ano ki raro ki te rire: ngohe noa o ratou wairua i te pawera. Ka tiu ratou, ka hurorirori  
 27  
 ano he tangata e haurangi ana; a kahore he mahara i toe. Heoi ka tangi ki a Ihowa i to ratou  
 28  
 hemanawa: a whakaorangia ana ratou i o ratou mate. Meinga ana e ia te tupuhi kia marino, ona  
 29  
 ngaru kia mariri. Na ka koa ratou, no te mea ka marie: a ka kawea ratou e ia ki te tauranga i  
 30

<sup>31</sup> hiahia ai ratou. Aue! me i whakapaingia e te tangata a Ihowa mo tona atawhai, mo ana mahi  
 whakamiharo ki nga tama a te tangata! <sup>32</sup> Kia whakanui hoki ratou i a ia i roto i te whakaminenga  
 o te iwi; kia whakamoemiti ki a ia i roto i te nohoanga kaumatua.  
<sup>33</sup> Ko ia hei mea i nga awa hei koraha, i nga puputanga wai hei oneone maroke; <sup>34</sup> I te whenua  
 whai hua, kia titohea, mo te hara o te hunga e noho ana i reira. <sup>35</sup> Ko ia hei mea i te koraha hei  
 harotoroto wai, i te whenua maroke hei puputanga wai. <sup>36</sup> A whakanohoia iho e ia te hunga matekai  
 ki reira, hanga ai i tetahi pa hei nohoanga; <sup>37</sup> Hei rui mara, hei whakato mara waina, e tupu ai, e  
 maha ai nga hua. <sup>38</sup> Ko ia ano hei manaaki i a ratou, no ka nui rawa; kahore hoki e tukua kia torutoru  
 haere a ratou kararehe. <sup>39</sup> Na kua iti haere ano ratou, kua piko i te tukino, i te he, i te pouri. <sup>40</sup> E  
 ringihia ana e ia te whakahawea ki runga ki nga rangatira: e meinga ana kia hehe i te ururua, i te  
 wahi kahore nei he ara; <sup>41</sup> Otira kei te whakateitei ia i te rawakore ki runga i te mamae, kei te mea  
 i ona hapu kia rite ki te kahui hipi. <sup>42</sup> Ka kite nga tangata tika, a ka hari; ko nga he katoa hoki,  
 kippia ake te mangai. <sup>43</sup> Ko te tangata whakaaro nui ka mahara ki enei mea, a ka mohio ratou ki te  
 aroha o Ihowa.

## Chapter 108

<sup>1</sup> He waiata, he himene na Rawiri. Pumau tonu toku ngakau, e te Atua; ka waiata ahau, ae ra,  
 ka himene ahau, me toku kororia ano. <sup>2</sup> E ara, e te hatere, e te hapa: ka ara wawe ano ahau. <sup>3</sup> Ka  
 whakamoemiti ahau ki a koe, e Ihowa, i waenganui i nga iwi: ka himene ki a koe i waenganui i nga  
 tauwiwi. <sup>4</sup> He nui atu hoki tau mahi tohu i nga rangi, a ko tou pono tutuki noa atu ki nga kapua.  
<sup>5</sup> Kia whakanuia koe, e te Atua, ki runga atu i nga rangi: hei runga atu i te whenua katoa tou kororia.  
<sup>6</sup> Kia puta tau i aroha ai, ma tou ringa matau matou e whakaora, a whakahokia mai he kupu ki  
 a matou. <sup>7</sup> Kua korero te Atua i runga i tona tapu: Ka hari ahau, ka kotikoti i Hekeme, ka roherohe  
 i te raorao o Hukota. <sup>8</sup> Noku Kireara; noku a Manahi; ko Eparaima ano hoki te kaha o toku matenga;  
 ko Hura taku hepeta. <sup>9</sup> Ko Moapa taku oko horoi; ka maka e ahau toku hu ki runga ki Eroma: ka  
 whakamanamana ahau ki Pirihitia. <sup>10</sup> Ma wai ahau e kawea ki te pa tuwatawata? Ko wai nana ahau

<sup>11</sup>  
 i arahi ki Eroma? He teka ianei kua panga matou e koe, e te Atua? kahore hoki koe, e te Atua,  
<sup>12</sup>  
 e haere tahi me o matou taua. Homai ki a matou he awahina ki te hoariri: he teka kau noa hoki  
<sup>13</sup>  
 te awahina a te tangata. Ma te Atua tatou ka toa ai: mana hoki e takahi ki raro o tatou hoa whawhai.

## Chapter 109

<sup>1</sup>  
 Ki te tino kaiwhakatangi. He himene na Rawiri. E te Atua, e whakamoemiti nei ahau, kei  
 wahangu koe: <sup>2</sup>  
 Kua puaki hoki te mangai o te tangata kino me te mangai o te tangata tinihanga,  
 ki te he moku: he teka o ratou arero, e korero nei moku. <sup>3</sup>  
 I karapotia hoki ahau e ratou ki nga kupu  
 mauahara, a i whawhai takekore ki ahau. <sup>4</sup>  
 Mo toku aroha he riri ta ratou whakautu: ko ahau ia, he  
 inoi taku. <sup>5</sup>  
 E homai ana e ratou ki ahau he kino mo te pai, he mauahara mo toku aroha.  
<sup>6</sup>  
 Meinga he tangata kino hei rangatira mona; kia tu he hoariri ki tona ringa matau. <sup>7</sup>  
 Kia tau  
 te he ki a ia, ina whakawakia: kia waiho ano tana inoi hei hara. <sup>8</sup>  
 Kia torutoru ona ra; kia riro tana  
 mahi tirotiro i tetahi atu. <sup>9</sup>  
 Kia pania ana tamariki, kia pouarutia hoki tana wahine. <sup>10</sup>  
 Kia kopikopiko  
 noa ana tamariki, pinono ai: kia rapu kai hoki ma ratou i o ratou wahi mokemoke. <sup>11</sup>  
 Kia haoa e  
 te kaituku moni ana mea katoa; kia pahuatia hoki e nga tangata iwi ke ana mauuitanga. <sup>12</sup>  
 Kauga  
 tetahi hei hoatu noa i te aroha ki a ia: kauga hoki tetahi hei atawhai i ana pani. <sup>13</sup>  
 Kia hatepea putia  
 ona uri: a i to muri whakatupuranga kia horoia rawatia atu o ratou ingoa. <sup>14</sup>  
 Kia maharatia e Ihowa  
 te kino o ona matua: kei murua hoki te hara o tona whaea. <sup>15</sup>  
 Kia mau tonu ki te aroaro o Ihowa:  
 kia hatepea atu ai e ia te maharatanga ki a ratou i runga i te whenua. <sup>16</sup>  
 Mona kihai i mahara ki te  
 mahi tohu: heoi tukino ana ia i te ware, i te rawakore, i te hunga ngakau maru, kia patua ai ratou.  
<sup>17</sup>  
 Ae ra, i pai ia ki te kanga, a kua tae mai ki a ia: kihai ia i aro ki te manaaki, heoi kua mamao tera  
<sup>18</sup>  
 i a ia. I kakahu ia i te kanga ki a ia, ano ko tona kakahu: na kua tae tera ki roto ki a ia ano he  
<sup>19</sup>  
 wai, me he hinu hoki ki roto ki ona wheua. Waiho ki a ia hei kakahu hipoki mona, hei whitiki  
<sup>20</sup>  
 hoki e whitikiria tonutia ai ia. Na hei utu tena ma Ihowa ki oku hoariri, ki te hunga hoki e korero  
 kino nei ki toku wairua.

<sup>21</sup> Kia puta tau mahi moku, e te Atua, e te Ariki, he whakaaro ki tou ingoa: na te mea he pai  
 tau mahi tohu, whakaorangia ahau, <sup>22</sup> He ware hoki ahau, he rawakore, kua mamae hoki toku  
 ngakau i roto i ahau. <sup>23</sup> Ka riro ahau me te atarangi e whakawairua kau ana: e peipeia ana ahau me  
 he mawhitiwhiti. <sup>24</sup> Hurorirori kau oku turi i te nohopuku; a e kohia ana te ngako o oku kikokiko.  
<sup>25</sup> Kua waiho ahau hei tawainga ma ratou: ka kite ratou i ahau, ka ruru o ratou matenga. <sup>26</sup> Awhinatia  
 ahau, e Ihowa, e toku Atua: kia rite ki tou aroha tau whakaora i ahau. <sup>27</sup> Kia matau ai ratou ko tou  
 ringa itene: a nau tenei, e Ihowa, i mea. <sup>28</sup> Ma ratou e kanga, mau ia e manaaki: kia whakama ratou  
 ina whakatika; ko tau pononga ia kia hari. <sup>29</sup> Kia whakakakahuria oku hoariri ki te whakama, a ko  
 to ratou numinumi hei koroka hipoki mo ratou. <sup>30</sup> Ka tino whakawhetai toku mangai ki a Ihowa,  
 ae ra, ka whakamoemiti ahau ki a ia i waenganui o te mano. <sup>31</sup> E tu hoki ia ki te ringa matau o te  
 rawakore, hei whakaora i a ia i te hunga e whakahe ana i tona wairua.

## Chapter 110

<sup>1</sup> He himene na Rawiri. I mea a Ihowa ki toku Ariki: Hei toku matau koe noho ai, kia meinga  
 ra ano e ahau ou hoariri hei turanga waewae mou. <sup>2</sup> Ma Ihowa e tono mai te tokotoko o tou kaha  
 i Hiona: hei rangatira koe i waenganui i ou hoariri. <sup>3</sup> Ka kakama tou iwi ki te tapae atu i a ratou i  
 te ra o tou kaha: i te ataahua o nga mea tapu, no te kopu mai o te ata, kei a koe te tomairangi o tou  
 whanaketanga. <sup>4</sup> Kua oati a Ihowa, e kore ano tana e puta ke; Hei tohunga koe ake ake, no te tikanga  
 o Merekihereke.  
<sup>5</sup> Kei tou matau te Ariki, ka maru i a ia nga kingi i te ra e riri ai ia. <sup>6</sup> E whakawa ia i waenganui  
 i nga tauwiwi; e whakakiiia e ia nga whenua ki te tupapaku: ka maru i a ia nga upoko i nga whenua  
 maha. <sup>7</sup> Ka inu wai ia i te awa i te ara: a ka ara tona matenga.

## Chapter 111

<sup>1</sup> Whakamoemititia a Ihowa. Ka whakapaua toku ngakau ki te whakawhetai ki a Ihowa, i te runanga o te hunga tika, i te whakaminenga. <sup>2</sup> He nui nga mahi a Ihowa; e whakatakina ana e te hunga katoa e manako ana ki aua mea. <sup>3</sup> He mea honore, he mea kororia tana mahi: tu tonu tona tika ake ake. <sup>4</sup> Kua meinga e ia kia maharatia ana mahi whakamiharo: he atawhai a Ihowa, he aroha. <sup>5</sup> E homai ana e ia he kai ma te hunga e wehi ana ki a ia: ka mahara tonu ia ki tana kawenata. <sup>6</sup> Kua whakakitea e ia ki tana iwi te kaha o ana mahi, i tana hoatutanga i to nga tauwiwi hei kainga tupu mo ratou. <sup>7</sup> Ko nga mahi a ona ringa he pono, he whakawa tika: pono tonu ana akoranga katoa, <sup>8</sup> U tonu ake ake, e mahia ana i runga i te pono, i te tika. <sup>9</sup> I tonoa mai e ia he whakaoranga mo tana iwi: kua kiia iho e ia tana kawenata mo ake tonu atu; he tapu tona ingoa, e wehingia ana. <sup>10</sup> Ko te timatanga o te whakaaro nui he wehi ki a Ihowa: he ngarahu nui to te hunga katoa nana era mahi; mau te whakamoemiti ki a ia, ake ake.

## Chapter 112

<sup>1</sup> Whakamoemititia a Ihowa. Ka hari te tangata e wehi ana i a Ihowa, e aro nui ana ki ana whakahau. <sup>2</sup> Ka nui ona uri ki runga ki te whenua; ka manaakitia te whakatupuranga o te hunga tika. <sup>3</sup> Kei tona whare te rawa, te taonga: ka pumau tonu tona tika, ake ake. <sup>4</sup> Ka maea ake te marama i roto i te pouri ki te hunga tika: he atawhai ia, he aroha, he tika. <sup>5</sup> He pono ka whiwhi painga te tangata he atawhai, he ohaoha tana mahi: ka u ana kupu i te whakawakanga. <sup>6</sup> E kore hoki ia e whakangaueuetia ake ake: ka maharatia tonutia te tangata tika ake ake. <sup>7</sup> E kore ia e matakau i te rongu kino: e u ana tona ngakau, e whakawhirinaki ana ki a Ihowa. <sup>8</sup> Ka u tona ngakau, e kore ia e wehi, kia kite ra ano ia i tana i hiahia ai ki ona hoariri. <sup>9</sup> Kua tuwhaina e ia, kua hoatu ki te hunga rawakore: pumau tonu tona tika ake ake; ka ara tona haona i runga i te kororia. <sup>10</sup> Ka kite te tangata kino, a ka pouri; ka pakiri ona niho, memeha iho: pirau iho te hiahia o te hunga kino.

## Chapter 113

<sup>1</sup> Whakamoemititia a Ihowa. Whakamoemititia, e nga pononga a Ihowa, whakamoemititia te  
 ingoa o Ihowa. <sup>2</sup> Kia whakapaingia te ingo o Ihowa aiane i a ake ake. <sup>3</sup> Kia whakamoemititia te  
 ingoa o Ihowa i te putanga mai o te ra, a tae noa ki tona torengetanga. <sup>4</sup> Kei runga rawa a Ihowa i  
 nga iwi katoa: kei runga ake i nga rangi tona kororia. <sup>5</sup> Ko wai te rite ana ki a Ihowa, ki to tatou  
 Atua, kei runga nei tona nohoanga, <sup>6</sup> E whakaiti nei i a ia ki te titiro iho ki nga mea kei te rangi,  
 kei te whenua? <sup>7</sup> E whakaara ake ana ia i te iti i roto i te puehu, e whakateitei ake ana i te rawakore  
 i roto i te puranga paru; <sup>8</sup> Kia whakanohoia ai e ia ki roto ki nga rangatira, ki nga rangatira o tana  
 iwi. <sup>9</sup> Nana hoki te pakoko i whai whare ai, hei whaereere e koa ana ki ana tamariki.  
 Whakamoemititia a Ihowa.

#### Chapter 114

<sup>1</sup> I te putanga mai o Iharaira i Ihipa, o te whare o Hakopa i te iwi reo ke, <sup>2</sup> Ko Hura tona wahi  
 tapu, ko Iharaira tona rangatiratanga. <sup>3</sup> I kite te moana, a whati ana: i whakahokia ki muri a Horano.  
<sup>4</sup> Pekepeke ana nga maunga ano he hipi toa, nga pukepuke ano he reme. <sup>5</sup> I ahatia koe, e te moana,  
 i whati ai koe e Horano, i whakahokia ai koe ki muri? <sup>6</sup> E nga maunga, i pekepeke ai koutou ano  
 he hipi toa; e nga pukepuke, ano he reme? <sup>7</sup> E wiri, e te whenua, i te aroaro o te Ariki; i te aroaro  
 o te Atua o Hakopa; <sup>8</sup> I meinga ai te toka hei hopua wai; te kiripaka hei puna wai.

#### Chapter 115

<sup>1</sup> Aua ki a matou, e Ihowa, aua ki a matou, engari me hoatu te kororia ki tou ingoa: whakaaroa  
 tou aroha, tou pono. <sup>2</sup> Kia mea koia nga tauwiwi: Kei hea ianei to ratou Atua? <sup>3</sup> Kei te rangi ia to  
 matou Atua; kua meatia e ia nga mea katoa i pai ai ia. <sup>4</sup> He hiriwa a ratou whakapakoko, he koura,  
 he mahi na te ringa tangata. <sup>5</sup> He mangai o ratou, a kahore e korero: he kanohi o ratou, a kahore e  
 kite: <sup>6</sup> He taringa o ratou, a kahore e rongu: he ihu o ratou, a kahore e hongu: <sup>7</sup> He ringa o ratou, a

kahore e whawha: he waewae o ratou, a kahore e haere: kahore hoki o ratou korokoro e korero.

8

Ka rite ki a ratou o ratou kaihangā; ae ra, te hunga katoa ano e whakawhirinaki ana ki a ratou.

9

E Iharaira, whakawhirinaki ki a Ihowa: ko ia to ratou awhina, to ratou whakangungu rakau.

10

E te whare o Arona, whakawhirinaki ki a Ihowa: ko ia to ratou awhina, to ratou whakangungu

rakau. <sup>11</sup> E te hunga e wehi ana i a Ihowa, whakawhirinaki ki a Ihowa: ko ia to ratou awhina, to

ratou whakangungu rakau. <sup>12</sup> Kua mahara a Ihowa ki a tatou, mana tatou e manaaki: mana e manaaki

te whare o Iharaira, mana e manaaki te whare o Arona. <sup>13</sup> Ka manaakitia e ia te hunga e wehi ana

ki a Ihowa, te iti, te rahi. <sup>14</sup> Ka tapiritia ano e Ihowa ki a koutou, ki a koutou tahi ko a koutou

tamariki. <sup>15</sup> He manaakitanga koutou na Ihowa, na te kaihangā o te rangi, o te whenua. <sup>16</sup> Ko nga

rangi, he rangi no Ihowa; ko te whenua ia, he mea homai nana ki nga tama a te tangata. <sup>17</sup> E kore

nga tupapaku e whakamoemiti ki a Ihowa: me te hunga katoa ano e heke ana ki te wahangutanga.

18

Ko matou ia ka whakapai ki a Ihowa aianei a ake ake. Whakamoemititia a Ihowa.

## Chapter 116

<sup>1</sup> E aroha ana ahau ki a Ihowa: mona i whakarongo ki toku reo, ki aku inoi. <sup>2</sup> I tahuri mai tona

taringa ki ahau: mo reira ka karanga ahau ki a ia i ahau e ora ana. <sup>3</sup> I karapotia ahau e nga whakawiringa a te mate: mau pu ahau i nga mamae o te reinga, i kite ahau i te pawera, i te pouri.

4

Na ko taku karangatanga ki te ingoa o Ihowa; Tena ra, e Ihowa, whakaorangia toku wairua. <sup>5</sup> He

atawhai a Ihowa, he tika: ae, he aroha to tatou Atua. <sup>6</sup> E tiakina ana e Ihowa te hunga kuware: i

whakaititia ahau, a nana ahau i whakaora. <sup>7</sup> E hoki, e toku wairua, ki tou okiokinga; kua atawhaitia

hoki koe e Ihowa. <sup>8</sup> Nau hoki toku wairua i whakaora kei mate, oku kanohi kei whai roimata, oku

waewae kei paheke. <sup>9</sup> Tera ahau e haereere i te aroaro o Ihowa i te whenua o te ora.

<sup>10</sup> I whakapono ahau, koia ahau i korero ai: he nui toku whakawhiunga. <sup>11</sup> I mea ahau i toku

ohoretanga, He teka kau nga tangata katoa. <sup>12</sup> He aha taku e whakahoki ai ki a Ihowa mo ana

atawhaingā katoa i ahau? <sup>13</sup> Ka mau ahau ki te kapu o te whakaoranga, ka karanga ki te ingoa o

<sup>14</sup> Ihowa. Ka whakamana e ahau aku kupu taurangi ki a Ihowa i te aroaro o tana iwi katoa. <sup>15</sup> He  
 mea utu nui ki ta Ihowa titiro te matenga o tana hunga tapu. <sup>16</sup> E Ihowa, he pono ko ahau tau  
 pononga; ko ahau tau pononga, ko te tama a tau pononga wahine; nau i wewete oku here. <sup>17</sup> Ka  
 tukua e ahau te patunga tapu, ara te whakawhetai: ka karanga ki te ingoa o Ihowa. <sup>18</sup> Ka whakamana  
 e ahau aku kupu taurangi ki a Ihowa, ae, ki te aroaro o tana iwi katoa. <sup>19</sup> Ki nga marae o te whare  
 o Ihowa, ki waenganui ou, e Hiruharama. Whakamoemititia a Ihowa.

### Chapter 117

<sup>1</sup> Whakamoemititia a Ihowa, e nga tau iwi katoa: whakamoemititia ia, e nga iwi katoa. <sup>2</sup> He nui  
 hoki tana mahi tohu ki a tatou: e mau ana hoki te pono o Ihowa ake ake. Whakamoemititia a Ihowa.

### Chapter 118

<sup>1</sup> Whakawhetai ki a Ihowa; he pai hoki ia, he pumau tonu hoki tana mahi tohu. <sup>2</sup> Kia mea a  
 Iharaira, He pumau tonu tana mahi tohu. <sup>3</sup> Kia mea te whare o Arona, He pumau tonu tana mahi  
 tohu. <sup>4</sup> Kia mea te hunga e wehi ana i a Ihowa, He pumau tonu tana mahi tohu. <sup>5</sup> I karanga ahau  
 ki a Ihowa i roto i te pouri: i whakahoki kupu mai a Ihowa ki ahau, i whakatu hoki i ahau ki te wahi  
 whanui. <sup>6</sup> Kei ahau a Ihowa; e kore ahau e wehi: he aha ta te tangata e mea ai ki ahau? <sup>7</sup> Kei ahau  
 a Ihowa kei roto i oku kaiawhina: no reira tera ahau e kite i taku i hiahia ai ki te hunga e kino ana  
 ki ahau. <sup>8</sup> Ko te whakawhirinaki ki a Ihowa, pai atu i te whakaaro ki te tangata. <sup>9</sup> Ko te  
 whakawhirinaki ki a Ihowa, pai atu i te okioki ki nga rangatira. <sup>10</sup> I karapotia ahau e nga iwi katoa:  
 ka ngaro ratou i ahau i runga i te ingoa o Ihowa. <sup>11</sup> I karapotia ahau e ratou: ae, i karapotia ahau e  
 ratou: ka ngaro ratou i ahau i runga i te ingoa o Ihowa. <sup>12</sup> Me te mea he pi ratou e mui ana ki ahau;  
 kua pirau ratou ano he ahi tataramoa: i ngaro hoki ratou i ahau i runga i te ingoa o Ihowa. <sup>13</sup> Kaha  
 pu tau turaki i ahau, kia hinga ai ahau: na Ihowa ia ahau i awahina mai. <sup>14</sup> Ko Ihowa toku kaha,  
 taku himene, ko ia ano toku whakaoranga. <sup>15</sup> He reo hari, he reo whakaoranga, kei nga tapenakara



o te hunga tika: he maia nga mahi a te ringa matau o Ihowa. <sup>16</sup> Kua whakanuia te matau o Ihowa:  
 he maia nga mahi a te ringa matau o Ihowa. <sup>17</sup> E kore ahau e mate, engari tera ahau e ora, hei  
 whakapuaki i nga mahi a Ihowa. <sup>18</sup> I pakia rawatia ahau e Ihowa: otiia kihai ahau i tukua e ia kia  
 mate.  
<sup>19</sup> Whakatuwheratia ki ahau nga kuwaha o te tika: ka tomo ahau ki roto, ka whakamoemiti ki  
 a Ihowa. <sup>20</sup> Ko te kuwaha tenei o Ihowa: ka tomo te hunga tika ki reira. <sup>21</sup> Ka whakamoemiti ahau  
 ki a koe, mou i whakahoki kupu mai ki ahau, kua meinga hoki ko koe hei whakaora moku. <sup>22</sup> Ko  
 te kohatu i kapea e nga kaihangā, kua meinga hei upoko mo te kokonga. <sup>23</sup> Na Ihowa tenei: he  
 mea miharo ki o tatou kanohi. <sup>24</sup> Ko te ra tenei i hanga e Ihowa kia whakamanamana, kia koa tatou  
 i reira. <sup>25</sup> Whakaorangia ra aianeī, e Ihowa: tena ra, e Ihowa, homai he ngahuru ki a matou. <sup>26</sup> Kia  
 whakapaingia te tangata e haere mai ana i runga i te ingoa o Ihowa: kua whakapaingia koutou e  
 matou i roto i te whare o Ihowa. <sup>27</sup> Ko Ihowa te Atua, a nana i homai te marama ki a tatou: herea  
 te patunga tapu ki nga aho, ki nga haona ra ano o te aata. <sup>28</sup> Ko koe toku Atua, maku koe e  
 whakamoemiti: toku Atua, maku koe e whakanui. <sup>29</sup> Whakawhetai ki a Ihowa; he pai hoki ia: he  
 pumau tonu tana mahi tohu.

## Chapter 119

<sup>1</sup> AREPE Ka hari te hunga he tapatahi nei i te ara, e haere nei i te ture a Ihowa. <sup>2</sup> Ka hari te  
 hunga e mau ana ki ana whakaaturanga; e whakapaua ana o ratou ngakau ki te rapu i a ia. <sup>3</sup> Ae, e  
 kore ratou e mahi i te kino; e haere ana ratou i ana ara.  
<sup>4</sup> Kua oti matou te whakahau ki au akoranga, kia ata puritia e matou. <sup>5</sup> Aue, me i whakatikaia  
 toku ara ki te pupuri i au akoranga! <sup>6</sup> Ko reira ahau ka kore ai e whakama: i ahau ka whai whakaaro  
 nei ki au whakahau katoa.  
<sup>7</sup> Ka whakamoemiti ahau ki a koe i runga i te ngakau tika, ina ako ahau i au whakaritenga tika.  
<sup>8</sup> Ka puritia e ahau au tikanga: kua ahau e whakarerea rawatia. PETA  
<sup>9</sup> He aha te mea e ma ai i te taitamariki tona ara? kia rite ki tau kupu tana whakamaharatanga  
 iho.

- 10 Kua whakapaua e ahau toku ngakau ki te rapu i a koe: kua ahau e tukua kia kotiti ke i au whakahau.
- 11 Kua whakatakotoria e ahau tau kupu ki roto ki toku ngakau, kei hara ahau ki a koe.
- 12 E Ihowa, ka whakapaingia koe: whakaakona ahau ki au tikanga.
- 13 Kua whakapuakina e oku ngutu nga whakaritenga katoa a tou mangai. <sup>14</sup> Ko toku koa i te ara o au whakaaturanga, me te mea mo nga taonga katoa. <sup>15</sup> Ka whakaaroaro ahau ki au ako, a ka whai mahara ki au huarahi. <sup>16</sup> He oranga ngakau ki ahau au tikanga: e kore ahau e wareware ki tau kupu. KIMERE
- 17 Kia atawhai ki tau pononga, kia ora ai ahau; kia puritia ai hoki tau kupu.
- 18 Whakatirohia oku kanohi kia kite ai ahau i nga mea whakamiharo i roto i tau ture.
- 19 He manene ahau i runga i te whenua: kua au whakahau e huna ki ahau.
- 20 Ka ngawha toku wairua i te matenui atu ki au whakaritenga i nga wa katoa.
- 21 Kua riria e koe te hunga whakakake kua oti nei te kanga, e kotiti ke nei i au whakahau.
- 22 Parea atu i ahau te tawai me te whakahawe: kua mau hoki ahau ki au whakaaturanga.
- 23 I noho ano hoki nga rangatira ki te korero kino moku: otira e whakaaro ana tau pononga ki au tikanga.
- 24 Ko au whakaaturanga ano toku oranga ngakau, oku hoa whakatakoto whakaaro. TARETE
- 25 Piri tonu toku wairua ki te puehu; whakahauoratia ahau kia rite ki atu kupu.
- 26 I whakaaturia e ahau oku ara, a whakahoki kupu ana koe ki ahau: whakaakona ahau ki au tikanga. <sup>27</sup> Meinga ahau kia matau ki te ara o au ako: kia whakaaroaro ai ahau ki au mahi whakamiharo.
- 28 E maturuturu iho ana toku wairua i te pouri: kia rite ki tau kapu tau whakau ake i ahau.
- 29 Whakamataratia atu i ahau te ara o te teka: kia atawhai mai hoki, a homai tau ture.
- 30 Kua whiriwhiria e ahau te ara o te pono: ka waiho e ahau au whakaritenga ki toku aroaro.
- 31 Piri tonu ahau ki au whakaaturanga: e Ihowa, kei whakama ahau. <sup>32</sup> Ka oma ahau i te ara o au whakahau, ina whakanuia e koe toku ngakau. HE

- 33 E Ihowa, whakaakona ahau ki te ara o au tikanga: a ka mau i ahau taea noatia te mutunga.
- 34 Homai he matauranga ki ahau, a ka mau i ahau tau ture; ka whakapaua toku ngakau ki te pupuri.
- 35 Meinga ahau kia haere i te ara o au whakahau; ko taku hoki tena e whakaahuareka nei.
- 36 Whakaangahia toku ngakau ki au whakaaturanga; kaua hoki ki te apo.
- 37 Whakatahuritia ketia oku kanohi kei kite i te horihori: whakahauorangia ahau i tau ara.
- 38 Whakapumautia tau kupu ki tau pononga, e wehi nei ki a koe.
- 39 Parea atu toku tawainga, e wehi nei ahau: he pai hoki au whakaritenga.
- 40 Nana, kua matenui ahau ki au ako: whakahauorangia ahau i runga i tou tika. WHAU
- 41 Kia puta ano au mahi tohu ki ahau, e Ihowa: ara tau whakaoranga, kia rite ki tau kupu.
- 42 Penei ka whai kupu maku ki toku kaitawai; noku ka whakawhirinaki ki tau kupu.
- 43 Kua e tangohia rawatia i toku mangai te kupu o te pono: e tumanako nei hoki ahau ki au whakaritenga.
- 44 Penei ka puritia e ahau tau ture ake ake.
- 45 A ka haereere noa ahau; kua rapua hoki e ahau au akoranga.
- 46 Ka korerotia ano e ahau au whakaaturanga ki te aroaro o nga kingi, e kore ano e whakama.
- 47 A ka waiho e ahau hei oranga ngakau moku au whakahau e aroha nei ahau.
- 48 Ka toro atu hoki oku ringa ki au whakahau e aroha nei ahau, ka whakaaroaro ano ki au tikanga. TAINE
- 49 Maharatia te kupu ki tau pononga, no te mea kua meinga ahau e koe kia tumanako atu.
- 50 Ko toku oranga ngakau tenei i ahau e tangi nei: na tau kupu nei hoki ahau i whakahauora.
- 51 Nui rawa te whakahi ki ahau o te hunga whakakake: heoi kihai ahau i peka ke i tau ture.
- 52 I mahara ahau ki au whakaritenga, e Ihowa, o tua iho; a marie ana toku ngakau.
- 53 Mau pu ahau i te pawera, mo te hunga kino kua whakarere nei i tau ture.
- 54 Ko au tikanga aku e himene ai i te whare i noho manene ai ahau.
- 55 I mahara ahau ki tou ingoa i te po, e Ihowa: a puritia ana e ahau tau ture.
- 56 I ahau tenei, he mau noku ki au ako. KETE
- 57 Ko Ihowa toku wahi: kua mea nei ahau, ka pupuri ahau i au kupu.

- 58 I whakapaua toku ngakau ki te inoi ki a koe kia pai mai: kia rite ki tau kupu tau mahi tohu ki ahau.
- 59 I whakaaro ahau ki oku ara: a anga ana oku waewae ki au whakaaturanga. 60 I hohoro ahau, a kihai i whakaroa ki te pupuri i au whakahau.
- 61 Karapotia putia ana ahau e nga here a te hunga kino: kihai ia ahau i wareware ki tau ture.
- 62 I waenganui po ka ara ahau ki te whakawhetai ki a koe mo au whakaritenga tika.
- 63 He hoa ahau no te hunga katoa e wehi ana i a koe; no te hunga ano e pupuri ana i au ako.
- 64 Ki tonu, e Ihowa, te whenua i tau mahi tohu: whakaakona ahau ki au tikanga. TETE
- 65 Pai rawa tau hanga ki tau pononga, e Ihowa; rite tonu ki tau kupu. 66 Whakaakona ahau ki te ngarahu pai, ki te matauranga: kua whakapono hoki ahau ki au whakahau.
- 67 I ahau kiano i whakawhiua, i he ahau: tena ko tenei ka puritia e ahau tau kupu.
- 68 He pai koe, he pai hoki au mahi: whakaakona ahau ki au tikanga.
- 69 Kua titoa e te hunga whakakake he teka moku: ka whakapaua toku ngakau ki te pupuri i au ako. 70 He ngako rawa to ratou ngakau, koia ano kei te taupa: ko ahau ia, he oranga ngakau ki ahau tau ture.
- 71 Marie ano ahau kia pehia e te pouri; i ako ai ahau i au tikanga.
- 72 Ko te ture a tou mangai pai ke atu ki ahau i nga mano o te koura, o te hiriwa. IOTA
- 73 Na ou ringa ahau i hanga, i whakawhaiahua: homai he matauranga ki ahau, kia ako ai ahau ki au whakahau.
- 74 Ka hari te hunga e wehi ana i a koe ina kite i ahau: noku i tumanako ki tau kupu.
- 75 E matau ana ahau, e Ihowa, he tika au whakaritenga; a he pono nou i pehia ai toku ngakau e koe.
- 76 Tena ra, waiho tau mahi tohu hei whakamarie moku; kia rite ki tau kupu ki tau pononga.
- 77 Kia puta ki ahau au mahi aroha, kia ora ai ahau; ko tau ture hoki toku oranga ngakau.
- 78 Kia whakama te hunga whakakake; no te mea kahore he take i he ai ta ratou hanga ki ahau; ko ahau ia ka whakaaroaro ki au akoranga. 79 Ko te hunga e wehi ana ki a koe me anga ki ahau, a ka mohio ratou ki au whakaaturanga.
- 80 Kia tapatahi toku ngakau ki au tikanga; kei whakama ahau. KAPA

- 81 E matenui ana toku wairua ki tau whakaoranga: otiia ka tumanako ahau ki tau kupu.
- 82 Matawaia ana oku kanohi, he meatanga ki tau kupu, i ahau e mea ana, Ahea koe whakamarie ai i ahau?
- 83 Kua rite nei hoki ahau ki te koki i roto i te paoa: he ahakoa e kore ahau e wareware ki au tikanga.
- 84 E hia nga ra o tau pononga? a hea koe whakarite whakawa ai mo te hunga e tukino nei i ahau?
- 85 Kua kerī poka te hunga whakakake moku; he mea kahore e rite ki tau ture. 86 Pono tonu au whakahau katoa: e tukino takekore ana ratou i ahau; awhinatia mai ahau. 87 Wahi iti kua moti ahau i a ratou i runga i te whenua: otira kihai i mahue i ahau au akoranga.
- 88 Kia rite ki tou aroha tau whakahauora i ahau: a ka puritia e ahau nga whakaaturanga a tou mangai. RAMERE
- 89 Pumau tonu tau kupu, e Ihowa, ake ake i runga i te rangi. 90 Kei nga whakatupuranga katoa tou pono: whakaungia ana e koe te whenua, a e tu nei ano. 91 E tu nei ano inaianei, pera tonu me tau i whakarite ai, he pononga hoki nga mea katoa nau.
- 92 Me kua tau ture hei oranga mo toku ngakau, kua ngaro ahau i reira i toku auetanga.
- 93 E kore rawa ahau e wareware ki au ako, he mea whakahauora hoki nau ena i ahau.
- 94 Nau ahau, mau ahau e whakaora: kua rapua hoki e ahau au ako.
- 95 Kua tatari te hunga kino ki ahau kia whakamatea: ka whakaaro ia ahau ki au whakaaturanga.
- 96 Kua kitea e ahau te mutunga o nga mea tino tika katoa: he whanui rawa ia tau whakahau. MEME
- 97 Ano toku aroha ki tau ture! Ko taku tena e whakaaroaro ai i te roa o te ra.
- 98 Nau i hira ake ai oku whakaaro i o oku hoariri, na au whakahau, e piri tonu nei ki ahau.
- 99 Nui atu oku mahara i o oku kaiwhakaako katoa: noku i whakaaroaro tonu ki au whakaaturanga.
- 100 Tera atu toku mohio i to nga kaumatua, no te mea i pupuri ahau i au ako.
- 101 Kua kaiponuhia mai e ahau oku waewae i nga ara kino katoa, kia pupuri ai ahau i tau kupu.
- 102 Kihai ahau i titaha i au whakaritenga; nau hoki ahau i ako.

- 103 Ano te reka o au kupu ki toku ngao; ae ra, reka atu i te honi ki toku mangai. 104 Na au ako  
 ahau i whai mohio ai: na reira ahau i kino ai ki nga ara teka katoa. NUNU
- 105 He rama tau kupu ki oku waewae, he marama ki toku ara.
- 106 Kua oati ahau, a ka whakamana ano e ahau: kia puritia e ahau au whakaritenga tika.
- 107 He nui te mamae o toku ngakau: whakahauorangia ahau, e Ihowa, kia rite ki tau kupu.
- 108 Manakohia, e Ihowa, nga ohaohatanga a toku mangai, whakaakona hoki ahau ki au  
 whakaritenga.
- 109 Kei toku ringa tonu toku wairua, heoi kahore ahau e wareware ki tau ture. 110 Kua  
 whakatakotoria e te hunga kino he mahanga moku: heoi kahore ahau i peka ke i au ako.
- 111 Ka waiho e ahau au whakaaturanga hei kainga tupu moku ake ake: ko toku koanga ngakau  
 112 hoki ena. Kua whakaanga e ahau toku ngakau ki te mahi tonu i au tikanga: a te mutunga ra  
 ano. HAMEKE
- 113 E kino ana ahau ki te hunga whakaaro ruarua; ko tau ture ia taku e aroha ai.
- 114 Ko toku piringa koe, ko toku whakangungu rakau: e tumanako ana ahau ki tau kupu.
- 115 Mawehe atu i ahau, e te hunga kino; ka whakaritea hoki e ahau nga whakahau a toku Atua.
- 116 Kia rite ki tau kupu tau tautoko ake i ahau, kia ora ai ahau: kua hoki ahau e tukua kia  
 117 whakama ki taku e tumanako atu nei. Tautokona ake ahau, kia ora ai ahau, a ka whai whakaaro  
 tonu ahau ki au tikanga.
- 118 Kua whakahaweatia e koe te hunga katoa e kotiti ke ana i au tikanga; he horihori hoki to  
 119 ratou tinihanga. Ka whakakahoretia e koe te hunga kino katoa o te whenua, ano he para mata:  
 koia ahau i aroha ai ki au whakaaturanga. 120 Wiri ana oku kikokiko i te wehi ki a koe; e matakua  
 ana hoki ahau ki au whakaritenga. AINE
- 121 He whakawa tika, he tika taku mahi: kua ahau e tukua ki oku kaitukino. 122 Ko koe hei  
 tuara mo tau pononga mo te pai: kei tukinotia ahau e te hunga whakakake.
- 123 Matawaia ana oku kanohi i te meatanga ki tau whakaora, ki te kupu hoki o tau tika.
- 124 Kia rite ki tou aroha tau mahi ki tau pononga: whakaakona hoki ahau ki au tikanga. 125 He  
 pononga ahau nau; homai he mahara ki ahau, kia matau ai ki au whakaaturanga.
- 126 Kua rite te wa hei mahinga ma Ihowa; kua whakakahoretia hoki e ratou tau ture.

- 127 Na reira i arohaina rawatia ai e ahau au whakahau i te koura, ae, i te tino koura. 128 Na reira tika tonu ki ahau au ako katoa mo nga mea katoa: kino iho ano ahau ki nga ara teka katoa. PE
- 129 He mea whakamiharo au whakaaturanga: i mau ai toku wairua ki reira.
- 130 Ko te whakapuakanga o au kupu he homai marama; na reira i homai he mahara ki nga kuware.
- 131 I hamama toku mangai, i kihakiha: he matenui noku ki au whakahau.
- 132 Tahuri mai ki ahau, tohungia hoki ahau: kia rite ki tau hanga ki te hunga e aroha ana ki tou ingoa.
- 133 Whakatikaia oku hikoinga ki runga i tau kupu: kua hoki tetahi he e tukua hei rangatira moku.
- 134 Whakaorangia ahau i te tukino a te tangata: a ka puritia e ahau au ako.
- 135 Kia marama mai tou mata ki tau pononga: whakaakona hoki ahau ki au tikanga.
- 136 Heke noa nga awa wai o oku kanohi; mo ratou kahore i pupuri i tau ture. TARI
- 137 He tika koe, e Ihowa, he tika ano au whakaritenga. 138 He tika, he pono rawa au whakaaturanga i whakahaua mai e koe.
- 139 Ka ngaro ahau i toku ngakau whakapuke, mo au kupu ka wareware nei i oku hoariri.
- 140 Hore rawa he para o tau kupu: koia i arohaina ai e tau pononga.
- 141 He iti ahau, e whakahaweatia ana: heoi kahore ahau e wareware ki au ako.
- 142 He tika pumau tonu tou tika; he pono hoki tau ture.
- 143 Kua pa mai ki ahau te pouri me te mamae: ko au whakahau ia toku oranga ngakau.
- 144 Pumau tonu te tika o au whakaaturanga: homai he mahara ki ahau, a ka ora ahau. KOPO
- 145 I whakapaua toku ngakau ki te karanga; whakahokia mai he kupu ki ahau, e Ihowa; ka mau i ahau au tikanga. 146 I karanga ahau ki a koe: whakaorangia ahau, a ka puritia e ahau au whakaaturanga.
- 147 Kiano te ata i puao noa, kua karanga ahau: i tumanako ahau ki au kupu. 148 I hohoro oku kanohi i nga mataaratanga ki te whakaaroaro ki tau kupu.
- 149 Whakarongo ki toku reo, kia rite ki tou aroha: kia rite, e Ihowa, ki tau i whakarite ai tau whakahauora i ahau.

150 E whakatata mai ana te hunga e whai ana i te whanoke: kei tawhiti atu ratou i tau ture.

151 E tata ana mai koe, e Ihowa: he pono katoa au whakahau.

152 Nonamata ahau i matau ai ki au whakaaturanga, he mea whakapumau nau no tua whakarere.

REHE

153 Whakaaro mai ki toku mate, a whakaorangia ahau: kahore hoki ahau e wareware ki tau

ture. 154 Tohea taku tohe, whakaorangia hoki ahau: kia rite ki tau kupu tau whakahauoranga i ahau.

155 Kei tawhiti atu i te hunga kino te whakaoranga: kahore hoki ratou e rapu ki au tikanga.

156 E Ihowa, he nui au mahi tohu: kia rite ki au whakaritenga tau whakahauora i ahau.

157 He tokomaha oku kaitukino, oku hoariri: heoi kahore ahau i peka ke i au whakaaturanga.

158 I kite ahau i nga kaimahi i te kino, a pouri iho: no ratou kahore e pupuri i tau kupu.

159 Tirohia mai toku aroha ki au ako: kia rite ki tou aroha, e Ihowa, tau whakahauora i ahau.

160 Ko te huinga katoatanga o tau kupu he pono; pumau katoa anao au whakaritenga tika ake. HINE

161 Hore he rawa i tukinotia ai ahau e nga rangatira: otia e wehi ana toku ngakau i tau kupu.

162 E hari ana ahau ki tau kupu: ano he tangata kua whiwhi ki te taonga nui.

163 E kino ana ahau, e whakarihariha ana ki te korero teka: ko tau ture ia taku i aroha ai.

164 Takiwhitu aku whakamoemiti ki a koe i te ra tahi mo au whakaritenga tika.

165 He rangimarie nui to te hunga e aroha ana ki tau ture: e kore hoki o ratou waewae e tutuki.

166 A kua tumanako ahau ki tau whakaora, e Ihowa, kua mahi ahau i au whakahau.

167 Kua puritia e toku wairua au whakaaturanga, ae, e arohaina nuitia ana e ahau. 168 Kua puritia e ahau au ako me au whakaaturanga: kei tou aroaro hoki oku ara katoa. TAU

169 Tukua atu taku tangi kia tata atu ki tou aroaro, e Ihowa: homai he mahara ki ahau, kia rite

170 ki tau kupu. Kia tae atu taku inoi ki tou aroaro: kia rite ki tau kupu whakaora i ahau.

171 Kia whakapuaki oku ngutu i te whakamoemiti: e whakaako ana hoki koe i ahau ki au tikanga.

172 Ma toku arero e korero tau kupu: he tika hoki au whakahau katoa.



173 Kia rite tou ringa ki te awhina i ahau; kua whiriwhiria hoki e ahau ko au ako. 174 Kua matenui ahau ki tau whakaora, e Ihowa: ko tau ture hoki toku oranga ngakau.

175 Kia ora toku wairua, a ka whakamoemiti ia ki a koe: kia awhinatia hoki ahau e au whakaritenga.

176 Kua kotiti ke ahau me he hipi ngaro: rapua tau pononga, kahore hoki ahau e wareware ki au whakahau.

### Chapter 120

<sup>1</sup> He waiata; he pikitanga. I tangi, ahau ki a Ihowa i toku matenga; a i whakahoki kupu mai ia ki ahau. <sup>2</sup> E Ihowa, whakaorangia toku wairua i te ngutu teka, i te arero hianga. <sup>3</sup> Ko te aha e hoatu ki a koe? ko te aha hoki e tapiritia atu mau, e te arero hianga? <sup>4</sup> Ko nga pere koi a te hunga nunui, me nga waro hunipa.

<sup>5</sup> Aue, toku mate, to te manene i Meheke, toku hoki e noho nei i nga teneti o Kerara! <sup>6</sup> Kua roa te nohoanga tahitanga o toku wairua ki te tangata e kino ana ki te ata noho. <sup>7</sup> Mo te ata noho ahau, engari ka korero ahau, ka anga ratou ka whawhai.

### Chapter 121

<sup>1</sup> He waiata; he pikitanga. Ka anga atu oku kanohi ki nga maunga; no reira nei te awhina moku. <sup>2</sup> No Ihowa te awhina moku, no te kaihanganga o te rangi, o te whenua. <sup>3</sup> E kore ia e tuku i tou waewae kia nekehia; e kore tou kaitiaki e moe. <sup>4</sup> Ina, e kore te kaitiaki o Iharaira e parangia, e moe. <sup>5</sup> Ko Ihowa tou kaitiaki, ko Ihowa tou whakamarumaruru i tou matau. <sup>6</sup> E kore koe e pakia e te ra i te awatea, e te marama ranei i te po. <sup>7</sup> Ma Ihowa koe e tiaki i roto i nga kino katoa; mana e tiaki tou wairua. <sup>8</sup> Ma Ihowa e tiaki tou haerenga atu, me tou haerenga mai aianeia a ake tonu atu.

### Chapter 122

<sup>1</sup> He waiata; he pikitanga. Na Rawiri. I koa ahau i ta ratou meatanga mai ki ahau; Tatou ka  
 haere ki te whare o Ihowa. <sup>2</sup> E tu ana o matou waewae ki ou tatau, e Hiruharama: <sup>3</sup> Ko te hanganga  
 o Hiruharama, rite tonu ki to te pa kua tuhonohonoa ki a ia ano.. <sup>4</sup> Haereere ana ki reira nga iwi,  
 nga iwi o Ihowa, ki to Iharaira whakaaturanga, ki te whakawhetai ki te ingoa o Ihowa. <sup>5</sup> Kua  
 whakaturia hoki ki reira nga torona whakawa, nga torona o te whare o Rawiri.  
<sup>6</sup> Inoia he ata noho mo Hiruharama: ka whiwhi ki te pai te hunga e aroha ana ki a koe. <sup>7</sup> Kia  
 mau te rongu ki ou taiepa, me te pai ki ou whare kingi. <sup>8</sup> He mea mo oku teina, mo oku hoa, taku  
 e mea nei, Kia mau te rongu ki roto ki a koe. <sup>9</sup> He whakaaro ki te whare o Ihowa, o to tatou Atua,  
 ka rapu ahau i te pai mou.

### Chapter 123

<sup>1</sup> He waiata; he pikitanga. Ka anga atu oku kanohi ki a koe, e koe e noho mai nei i nga rangi.  
<sup>2</sup> Ina, pera tonu nga kanohi o nga pononga e titiro nei ki te ringa o to ratou rangatira, nga kanohi  
 hoki o te kotiro ki te ringa o tona rangatira wahine; me o matou kanohi e titiro nei ki a Ihowa, ki  
 to matou Atua, kia tohu ra ano ia i a matou. <sup>3</sup> Tohungia matou, e Ihowa, tohungia matou: kua tino  
 kapi hoki matou i te whakahawea. <sup>4</sup> Kapi tonu to matou wairua i te whakahi a te hunga e noho noa  
 ana, i te whakahawea a te hunga whakakake.

### Chapter 124

<sup>1</sup> He waiata; he pikitanga. Na Rawiri. Me kua a Ihowa i a tatou, he ki tenei ma Iharaira: <sup>2</sup> Me  
 kua a Ihowa i a tatou, i te whakatikanga mai o te tangata ki a tatou; <sup>3</sup> Penei kua horomia oratia  
 tatou e ratou, i te muranga o to ratou riri ki a tatou. <sup>4</sup> Kua ngaro tatou i nga wai, kua taupokina o  
 tatou wairua e te ia. <sup>5</sup> Penei kua taupokina o tatou wairua e nga wai whakakake.

<sup>6</sup> Kia whakapaingia a Ihowa, kihai nei i tuku i a tatou hei ngaunga ma o ratou niho. <sup>7</sup> Kua mawhiti o tatou wairua, me he manu i roto i te mahanga a nga kaihopu; kua motu te mahanga, a mawhiti ana tatou. <sup>8</sup> Kei te ingoa o Ihowa he awahina mo tatou, kei te kaihanganga i te rangi, i te whenua.

### Chapter 125

<sup>1</sup> He waiata; he pikitanga. Ko te hunga e whakawhirinaki ana ki a Ihowa ka rite ki Maunga Hiona, e kore nei e taea te whakangauue, pumau tonu ake ake. <sup>2</sup> Me nga maunga e taiawhio nei i Hiruharama, te karapoti a Ihowa i tona iwi, aianeia ake tonu atu. <sup>3</sup> E kore hoki te tokotoko a te whakaarokore e waiho tonu i runga i te wahi o te hunga tika: kei totoro te ringa o te hunga tika ki te kino.

<sup>4</sup> Kia pai tau mahi, e Ihowa, ki te hunga pai, ki te hunga he tika nei o ratou ngakau. <sup>5</sup> Ko te hunga ia e peka ke ana ki o ratou ara kopikopiko, ma Ihowa ratou e arahi tahi atu me nga kaimahi i te kino. Kia mau te rongu ki a Iharaira.

### Chapter 126

<sup>1</sup> He waiata; he pikitanga. I ta Ihowa whakahokinga mai i nga pononga o Hiona i rite matou ki te hunga e moehewa ana. <sup>2</sup> Katahi to matou mangai ka ki i te kata, to matou arero hoki i te waiata: katahi ka korerotia i roto i nga tauwiwi, He nui nga mahi a Ihowa ki a ratou. <sup>3</sup> He mea nunui a Ihowa i mea ai mo tatou, a e koa ana tatou.

<sup>4</sup> E Ihowa, whakahokia matou i te whakarau: kia pera me nga awa o te tonga. <sup>5</sup> Ko te hunga e rui ana i runga i te roimata, ka kokoti i runga i te hari. <sup>6</sup> Ahakoa haere tangi atu ia me te kawae i ana purapura hei whakatokanga; tera ia e haere hari mai ano me te mau mai i ana paihere.

### Chapter 127

<sup>1</sup> He waiata; he pikitanga. Na Horomona. Ki te kore e hanga e Ihowa te whare, he maumau mahi ta nga kaihanganga; ki te kore e tiakina e Ihowa te pa, maumau mataara noa te kaitiaki. <sup>2</sup> He maumau to koutou ara wawe, to koutou noho roa i te po, ta koutou kai i te taro o te mauui: ko tana moe tena ka homai nei ki tana e aroha ai. <sup>3</sup> Na he taonga pumau na Ihowa nga tamariki, ko nga hua ano o te kopu tana utu. <sup>4</sup> E rite ana ki nga pere i te ringaringa o te tangata kaha te whanau o te taitamarikitanga. <sup>5</sup> Ka hari te tangata kua ki nei tana papa pere i a ratou: e kore ratou e whakama, ina korero ki o ratou hoariri i te kuwaha.

### Chapter 128

<sup>1</sup> He waiata; he pikitanga. Ka hari nga tangata katoa e wehi ana i a Ihowa: e haere ana i ana ara. <sup>2</sup> E kai hoki koe i te mahinga a ou ringa: e hari koe, a ka tau te pai ki a koe. <sup>3</sup> E rite tau wahine ki te waina hua, i roto rawa i tou whare: au tamariki ki nga mahuri oriwa, i nga taha o tau tepu. <sup>4</sup> Na he pera te manaaki mo te tangata e wehi ana i a Ihowa. <sup>5</sup> Ka Manaakitia koe e Ihowa i Hiona; a e kite koe i te pai o Hiruharama i nga ra katoa e ora ai koe. <sup>6</sup> Ae, e kite koe i nga tamariki a au tamariki. Kia mau te rongu ki a Iharaira.

### Chapter 129

<sup>1</sup> He waiata; he pikitanga. He ki tenei ma Iharaira, Ka maha a ratou tukinotanga i ahau o toku tamarikitanga ake; <sup>2</sup> Ka maha a ratou tukinotanga i ahau o toku tamarikitanga ake; heoi kihai ahau i taea e ratou. <sup>3</sup> I parautia toku tuara e nga kaiparau; he roa a ratou parautanga. <sup>4</sup> He tika ta Ihowa: motu pu i a ia nga aho a te hunga kino. <sup>5</sup> Kia whakama, kia whakahokia ki muri, te hunga katoa e kino nei ki Hiona. <sup>6</sup> Kia rite ratou ki te tarutaru i nga tuanui, e memenge nei i te mea kiano i tupu ake. <sup>7</sup> E kore nei e ki te ringa o te kaikoti, te uma hoki o te kaipaihere. <sup>8</sup> E kore ano te hunga e haere ana i te taha e mea, Kia tau ki a koutou te manaaki a Ihowa: ko ta matou manaaki tenei ki a koutou i runga i te ingoa o Ihowa.

### Chapter 130

<sup>1</sup> He waiata; he pikitanga. I karanga ahau ki a koe, e Ihowa, i roto i nga hohonu. <sup>2</sup> E te Ariki, whakarongo mai ki toku reo: kia anga mai ou taringa ki toku reo inoi. <sup>3</sup> Me i maharatia e koe nga kino, e Ihowa, ko wai, e te Ariki, e tu? <sup>4</sup> Otira he muru hara tau, e wehingia ai koe.

<sup>5</sup> E tatari ana ahau ki a Ihowa; e tatari ana toku wairua: e tumanako ana hoki ahau ki tana kupu.

<sup>6</sup> Ko te taringa o toku wairua i te Ariki nui atu i to te hunga e whanga ana ki te ata; ae, i to te hunga e whanga ana ki te ata. <sup>7</sup> E Iharaira, kia tumanako ki a Ihowa, kei a Ihowa hoki te mahi tohu, a kei a ia te hokonga nui. <sup>8</sup> A mana a Iharaira e hoko i roto i ona he katoa.

### Chapter 131

<sup>1</sup> He waiata; he pikitanga. Na Rawiri. E Ihowa, ehara toku i te ngakau whakapehapeha: ehara ano oku i te kanohi whakakake: kahore hoki ahau e rahurahu ki nga mea nunui, e kore nei e taea e ahau. <sup>2</sup> He pono kua meinga e ahau toku wairua kia tau, a kia mahaki, pera i to te tamaiti kua wehea i te u o tona whaea: he rite toku wairua ki te tamaiti katahi nei ka wehe i te u. <sup>3</sup> E Iharaira, kia tumanako ki a Ihowa: aianeia a ake tonu atu.

### Chapter 132

<sup>1</sup> He waiata; he pikitanga. E Ihowa, maharatia a Rawiri, me ona mamaetanga ngakau katoa;

<sup>2</sup> Tana oati ki a Ihowa, tana kupu taurangi ki te Mea Nui o Hakopa; <sup>3</sup> E kore rawa ahau e tae ki toku whare e noho ai ahau, e eke ranei ki runga ki toku moenga; <sup>4</sup> E kore ahau e tuku i oku kanohi kia moe, i oku kamo kia nenewha; <sup>5</sup> Kia kitea ra ano e ahau he wahi mo Ihowa, he nohoanga mo te Mea Nui o Hakopa. <sup>6</sup> Na i rangona e matou ki Eparata, i kitea ki nga mara o te ngahere. <sup>7</sup> Ka haere matou ki roto ki ona tapenakara; ka koropiko ki tona turanga waewae. <sup>8</sup> E ara, e Ihowa, ki tou okiokinga, a koe, me te aaka o tou kaha. <sup>9</sup> Kia whakakakahuria au tohunga ki te tika; kia hamama

<sup>10</sup>  
tau hunga tapu i te hari. Whakaaro ki a Rawiri, ki tau pononga: kua e whakapeaua atu te mata o tau i whakawahi ai.

<sup>11</sup>  
Kua oati pono a Ihowa ki a Rawiri, e kore ia e tahuri ke i tena; Ka whakanohoia e ahau tetahi hua o tou kopu ki tou torona. <sup>12</sup> Ki te puritia e au tama taku kawenata, me taku whakaaturanga e

ako ai ahau ki a ratou, ka noho ano a ratou tama ki tou torona ake ake. <sup>13</sup> Kua whiriwhiria hoki e

Ihowa a Hiona; kua hiahiatia e ia hei nohoanga mona. <sup>14</sup> Ko toku okiokinga tenei ake ake; ko konei

ahau noho ai, kua hiahiatia hoki e ahau. <sup>15</sup> Ka manaakitia rawatia e ahau tana kai; ka

whakamakonatia e ahau ona rawakore ki te taro. <sup>16</sup> Ka whakakakahuria hoki e ahau ona tohunga

ki te whakaoranga; a ka hamama tona hunga tapu i te hari. <sup>17</sup> Ka meinga e ahau kia pihi ki reira

te haona o Rawiri: kua whakapaia e ahau he rama mo taku i whakawahi ai. <sup>18</sup> Ka whakakakahuria e ahau ona hoariri ki te whakama; a ka matomato tona karauna i runga i a ia.

### Chapter 133

<sup>1</sup>  
He waiata; he pikitanga. Na Rawiri. Na, ano te pai, ano te ahuaireka o te nohoanga o nga teina, o nga tuakana i runga i te whakaaro kotahi! <sup>2</sup> Tona rite kei te hinu utu nui i runga i te upoko, i heke

iho nei ki te pahau, ae ki te pahau o Arona; i heke iho nei ki te remu o ona kakahu: <sup>3</sup> Kei te tomairangi ano o Heremona, kei tera i heke iho ki nga maunga o Hiona: i whakahaua iho hoki e Ihowa te manaaki mo reira, te ora mo ake tonu atu.

### Chapter 134

<sup>1</sup>  
He waiata; he pikitanga. Na, whakapaingia a Ihowa, e nga pononga katoa a Ihowa, e tu nei i te whare o Ihowa i te po. <sup>2</sup> Totoro ake o koutou ringa ki te wahi tapu, whakapaingia hoki a Ihowa.

<sup>3</sup>  
Ma Ihowa koe e manaaki i roto i Hiona, mana, ma te kaihanganga o te rangi, o te whenua.

## Chapter 135

<sup>1</sup> Whakamoemititia a Ihowa. Whakamoemititia te ingoa o Ihowa; whakamoemititia ia, e nga  
<sup>2</sup> pononga a Ihowa. E koutou e tu nei i roto i te whare o Ihowa, i nga marae o te whare o to tatou  
<sup>3</sup> Atua. Whakamoemititia a Ihowa; he pai hoki a Ihowa; himene atu ki tona ingoa; he mea ahua  
<sup>4</sup> hoki tena. Kua whiriwhiria hoki e Ihowa a Hakopa mana, a Iharaira hei tino taonga mona.  
<sup>5</sup> E matau ana hoki ahau he nui a Ihowa: kei runga atu hoki to tatou Ariki i nga atua katoa.  
<sup>6</sup> Ko nga mea katoa i pai ai a Ihowa, kua oti i a ia, i te rangi, i te whenua, i nga moana, i nga wahi  
<sup>7</sup> hohonu katoa. Nana i pupu ake ai nga kohu i nga pito o te whenua: i hanga e ia nga uira mo te  
<sup>8</sup> ua; e whakaputaina mai ana e ia te hau i roto i ona whare taonga. Nana nei i patu nga matamua  
<sup>9</sup> o Ihipa, a te tangata, a te kararehe; I tonoa e ia he tohu, he merekara ki waenganui ou, e Ihipa: ki  
<sup>10</sup> runga ki a Parao ratou ko ana pononga katoa. Nana i patu nga iwi maha, i whakamate nga kingi  
<sup>11</sup> rarahi; A Hihona kingi o nga Amori, a Oka kingi o Pahana, me nga rangatiratanga katoa o  
<sup>12</sup> Kanaana; A homai ana e ia to ratou whenua hei kainga pumau, hei kainga pumau mo Iharaira,  
<sup>13</sup> mo tana iwi. E Ihowa, pumau tonu tou ingoa, me tou maharatanga, e Ihowa, ki nga  
<sup>14</sup> whakatupuranga katoa. Ka whakawa hoki a Ihowa mo tana iwi; a ka puta ke tona whakaaro ki  
<sup>15</sup> ana pononga. He hiriwa, he koura nga whakapakoko a nga tauwi, he mahi na te ringa tangata. He  
<sup>16</sup> mangai o ratou, a kahore e korero: he kanohi o ratou, a kahore e kite: He taringa o ratou, a kahore  
<sup>17</sup> e rongu: kahore ano he manawa i o ratou mangai. Ka rite ki a ratou te hunga nana ratou i hanga;  
<sup>18</sup> ae, me nga tangata katoa e whakawhirinaki ana ki a ratou. Whakapaingia a Ihowa, e te whare o  
<sup>19</sup> Iharaira; whakapaingia a Ihowa, e te whare o Arona; Whakapaingia a Ihowa, e te whare o Riwai;  
<sup>20</sup> whakapaingia a Ihowa, e te hunga katoa e wehi ana i a Ihowa; Kia whakapaingia a Ihowa i roto  
<sup>21</sup> i Hiona, e noho nei i Hiruharama. Whakapaingia a Ihowa.

## Chapter 136

<sup>1</sup> Whakawhetai ki a Ihowa, he pai hoki ia: he mau tonu hoki tana mahi tohu. <sup>2</sup> Whakawhetai  
 ki te Atua o nga atua: he mau tonu hoki tana mahi tohu. <sup>3</sup> Whakawhetai ki te Ariki o nga ariki: he  
 mau tonu hoki tana mahi tohu. <sup>4</sup> E mahi nei tona kotahi i nga merekara nunui: he mau tonu hoki  
 tana mahi tohu. <sup>5</sup> I tohunga rawa nei ki te hanga i nga rangi: he mau tonu hoki tana mahi tohu. <sup>6</sup> I  
 whakatakoto nei i te whenua ki runga ki nga wai: he mau tonu hoki tana mahi tohu. <sup>7</sup> Ki te kaihanganga  
 i nga whakamarama nunui: he mau tonu hoki tana mahi tohu; <sup>8</sup> I te ra hei tohutohu i te awatea: he  
 mau tonu hoki tana mahi tohu; <sup>9</sup> I te marama me nga whetu hei tohutohu i te po: he mau tonu hoki  
 tana mahi tohu.  
<sup>10</sup> Ki te kaipatu i Ihipa, ara i a ratou matamua: he mau tonu hoki tana mahi tohu; <sup>11</sup> A arahina  
 mai ana a Iharaira i waenganui i a ratou: he mau tonu hoki tana mahi tohu; <sup>12</sup> Na te ringa kaha me  
 te takakau maro: he mau tonu hoki tana mahi tohu. <sup>13</sup> I tapahi nei i te Moana Whero a motu rawa:  
 he mau tonu hoki tana mahi tohu; <sup>14</sup> A meinga ana a Iharaira kia haere ra waenganui: he mau tonu  
 hoki tana mahi tohu; <sup>15</sup> A hurihia ana a Parao me ana mano ki te Moana Whero: he mau tonu hoki  
 tana mahi tohu. <sup>16</sup> I arahi nei i tana iwi ra te koraha: he mau tonu hoki tana mahi tohu. <sup>17</sup> I patu  
 nei i nga kingi nunui: he mau tonu hoki tana mahi tohu; <sup>18</sup> I whakamate nei i nga kingi rongonui:  
 he mau tonu hoki tana mahi tohu; <sup>19</sup> I a Hihona kingi o nga Amori: he mau tonu hoki tana mahi  
 tohu; <sup>20</sup> I a Oka kingi o Pahana: he mau tonu hoki tana mahi tohu; <sup>21</sup> A homai ana to ratou whenua  
 hei kainga pumau: he mau tonu hoki tana mahi tohu; <sup>22</sup> Hei kainga pumau mo Iharaira, mo tana  
 pononga: he mau tonu hoki tana mahi tohu.  
<sup>23</sup> I mahara nei ki a tatou i to tatou itinga; he mau tonu hoki tana mahi tohu: <sup>24</sup> A whakaorangia  
 ana tatou i o tatou hoariri: he mau tonu hoki tana mahi tohu. <sup>25</sup> Ko ia te kaihomai i te kai ma nga  
 kikokiko katoa: he mau tonu hoki tana mahi tohu. <sup>26</sup> Whakawhetai ki te Atua o te rangi: he mau  
 tonu hoki tana mahi tohu.

### Chapter 137



<sup>1</sup> I te taha o nga wai o Papurona, noho ana tatou i reira, ae, tangi ana tatou, ia tatou i mahara ai  
 ki Hiona. <sup>2</sup> Whakairia ake e tatou a tatou hapa ki runga ki nga wirou i waenganui o reira. <sup>3</sup> No te  
 mea i tono i reira te hunga nana tatou i herehere ki etahi waiata i a tatou, me te hunga nana tatou i  
 tukino i tono mai he hari i a tatou, i mea mai, Waiatatia mai ki a matou tetahi o nga waiate o Hiona.  
<sup>4</sup> Me pehea matou ka waiata ai i te waiata a Ihowa i te whenua tauhou? <sup>5</sup> Ki te wareware ahau ki  
 a koe, e Hiruharama, kia wareware toku ringa matau ki tana mahi. <sup>6</sup> Ki te kore ahau e mahara ki a  
 koe, kia piri toku arero ki toku ngao; ki te kore ahau e whakanui i Hiruharama ki runga ake i taku  
 mea i tino hari ai.  
<sup>7</sup> E Ihowa, maharatia nga tama a Eroma i te ra o Hiruharama; ta ratou meatanga, Whakahoroa,  
 whakahoroa, a taea rawatia ano tona turanga. <sup>8</sup> E te tamahine o Papurona, meake nei whakangaromia,  
 ka hari te tangata e utua ai koe mo tau i mea ai ki a matou. <sup>9</sup> Ka hari te tangata e hopu ana, e ta ana  
 i au mea nohinohi ki runga ki te kohatu.

### Chapter 138

<sup>1</sup> Na Rawiri. Ka whakapaua toku ngakau ki te whakawhetai ki a koe: ka himene atu ahau ki a  
 koe i te aroaro o nga atua. <sup>2</sup> Ka koropiko atu ahau ki te ritenga o tou temepara tapu, a ka  
 whakamoemiti ki tou ingoa, mo tou aroha me tou pono: kua whakanuia hoki e koe tau kupu ki  
 runga ake i tou ingoa katoa. <sup>3</sup> I whakahoki kupu mai koe ki ahau i te ra i karanga ai ahau: a  
 whakahirihiritia ana e koe toku wairua ki te kaha. <sup>4</sup> Ka whakamoemiti nga kingi katoa o te whenua  
 ki a koe, e Ihowa, kua rongu hoki ratou ki nga kupu a tou mangai. <sup>5</sup> Ae, e waiata ratou mo nga ara  
 o Ihowa: he nui hoki te kororia o Ihowa.  
<sup>6</sup> Ahakoa hoki kei runga rawa a Ihowa, e titiro iho ana ano ia ki te hunga papaku: tena ko te  
 tangata whakakake, i tawhiti ano kua matauria e ia. <sup>7</sup> Ahakoa haere ahau i waenganui o te he, mau  
 ahau e whakahauora: ka totoro tou ringa ki te riri o oku hoa whawhai, ma tou ringa matau ano ahau  
 e whakaora. <sup>8</sup> Ma Ihowa e whakaoti aku mea: e Ihowa, e mau ana tau mahi tohu ake ake; kua e  
 whakarerea nga mahi a ou ringa.

## Chapter 139

<sup>1</sup> Ki te tino kaiwhakatangi. He Himene na Rawiri. E Ihowa, kua tiroirohia ahau e koe, kua mohiotia ano e koe. <sup>2</sup> E matau ana koe ki toku nohoanga iho, ki toku whakatikanga ake; e mohio ana koe ki oku whakaaro i tawhiti. <sup>3</sup> E kitea putia ana e koe toku ara me toku takotoranga iho; e matatau ana hoki koe ki oku ara katoa. <sup>4</sup> Kahore rawa hoki he kupu i toku arero, i toe i a koe te mohio, e Ihowa. <sup>5</sup> Kua hanga a muri, a mua, oku e koe: kua pa ano tou ringa ki ahau. <sup>6</sup> He mea whakamiharo rawa, kei tawhiti atu hoki i ahau, tenei matauranga: kei runga noa atu, e kore e taea e ahau.

<sup>7</sup> Me haere ahau ki hea i tou wairua? Me oma ranei ahau ki hea i tou aroaro? <sup>8</sup> Ki te kake ahau ki te rangi, kei reira koe: ki te wharikitia e ahau toku moenga i roto i te reinga, kei reira ano koe. <sup>9</sup> Ki te tango ahau ki nga pakau o te ata, a ka noho ki nga topito o te moana; <sup>10</sup> Kei reira ano tou ringa hei arahi i ahau, tou matau hei pupuru i ahau. <sup>11</sup> Ki te mea ahau, He pono, tera ahau e hipokina e te pouri, a ko te marama i tetahi taha oku, i tetahi taha, ka meinga he po; <sup>12</sup> Ahakoa te pouri kahore e huna mai i a koe, engari ka marama te po ano ko te ao: ki a koe rite tahi te pouri me te marama. <sup>13</sup> I a koe hoki oku whatumanawa: nau hoki ahau i hipoki i roto i te kopu o toku whaea.

<sup>14</sup> Ka whakawhetai ahau ki a koe; he mea whakawehi, he mea whakamiharo toku hanganga; he mahi whakamiharo au mahi, mohio rawa ano toku wairua ki tena. <sup>15</sup> Kihai i huna oku wahi i a koe, i ahau e hanga ngarotia ana, e ata whakairohia ana i nga wahi hohonu rawa o te whenua. <sup>16</sup> I kite ou kanohi i ahau, kahore ano kia ahua noa: i tuhituhia katoatia ano hoki oku wahi ki tau pukapuka, i nga rangi i whakaahua ai, i te mea kahore ano tetahi i oti noa.

<sup>17</sup> Kia pehea mai hoki te matenui o ou whakaaro ki ahau, e te Atua; koia ano te ranea, ina huihuia! <sup>18</sup> Ki te taua e ahau, maha atu i te onepu: ka oho ake ahau, kei a koe tonu ahau. <sup>19</sup> He pono ka patua e koe, e te Atua, te tangata kino: mawehe koia atu i ahau, e nga tangata toto. <sup>20</sup> He kino hoki a ratou kupu mou: e whakahua noa ana ou hoariri i tou ingoa. <sup>21</sup> Kahore ianei ahau, e Ihowa, e kino ki te hunga e kino ana ki a koe? e whakarihariha hoki ki te hunga e whakatika ana ki a koe? <sup>22</sup> He tino kino taku kino ki a ratou: waiho iho ratou e ahau hei hoariri moku. <sup>23</sup> Tirohia iho ahau, e te Atua, kia matau hoki koe ki toku ngakau: whakamatautauria ahau, kia matau hoki

koe ki oku whakaaro: <sup>24</sup> Kia kite mehemea kei ahau tetahi ara o te kino, ka arahi ai i ahau i te ara pumau.

## Chapter 140

<sup>1</sup> Ki te tino kaiwhakatangi. He himene na Rawiri. Whakaorangia ahau, e Ihowa, i te tangata kino: araia atu i ahau te tangata tutu: <sup>2</sup> E whakaaro kino nei i o ratou ngakau: e whakamine nei i a ratou i nga wa katoa ki te whawhai. <sup>3</sup> Kua whakakoia to ratou arero, ano he nakahi: kei raro i o ratou ngutu te wai whakamate o te neke. (Hera. <sup>4</sup> Tiakina ahau, e Ihowa, i nga ringa o te hunga kino: araia atu i ahau te tangata tutu, kua mea nei kia tutea oku hikoinga. <sup>5</sup> Kua huna e te hunga whakakake te mahanga moku, me nga aho; kua horahia e ratou he kupenga ki te taha o te ara: kua whakapikoa e ratou he rore moku. (Hera. <sup>6</sup> I mea ahau ki a Ihowa, Ko koe toku Atua: whakarongo, e Ihowa, ki toku reo inoi. <sup>7</sup> E Ihowa, e te Ariki, e te kaha o toku whakaoranga, nau i hipoki toku upoko i te ra o te tatauranga.

<sup>8</sup> Aua e whakaaetia, e Ihowa, nga hiahia o te tangata kino: kei taea tona whakaaro koroke; kei whakakake ratou. (Hera. <sup>9</sup> Tena ko te upoko o te hunga e whakapae nei i ahau, kia hipokina ratou e te kino o o ratou ngutu. <sup>10</sup> Kia taka he waro mura ki runga ki a ratou: kia panga ratou ki te ahi, ki roto ki nga poka hohonu, kei whakatika ake ano ratou. <sup>11</sup> E kore te tangata korero kino e whakapumautia ki runga ki te whenua: ma te kino e aruaru te tangata tutu, kia turakina atu ia ki raro. <sup>12</sup> E matau ana ano ahau ma Ihowa e tohe te whakawa a te tangata e tukinotia ana, te mea hoki e rite ana ma nga rawakore. <sup>13</sup> He pono ka whakawhetai te hunga pai ki tou ingoa: ka noho te hunga tika ki tou aroaro.

## Chapter 141

<sup>1</sup> He himene na Rawiri. E Ihowa, kua tangi nei ahau ki a koe; hohoro mai ki ahau: whakarongo ki toku reo ua karanga ahau ki a koe. <sup>2</sup> Kia whakatikaia taku inoi ki tou aroaro, hei whakakakara;

te toronga atu hoki o oku ringa ano ko te whakahere o te ahiahi. <sup>3</sup> Homai he kaitiaki mo toku mangai, e Ihowa: tiakina te kuwaha o oku ngutu. <sup>4</sup> Kauga e whakaangahia toku ngakau ki te mea kino, ki te mahi i nga mahi hianga i roto i nga kaimahi i te kino: kauga ano ahau e kai i a ratou mea papai.

<sup>5</sup> Ma te tangata tika ahau e patu: he mahi aroha tena; mana ahau e riri; he hinu tena ki runga ki te upoko; kauga ia e paopaongia e toku upoko: ahakoa hoki i roto i to ratou kino ka inoi tonu ahau.

<sup>6</sup> E turakina ana o ratou kaiwhakawa ki te taha o te kohatu; a ka rongu ratou i aku kupu; he reka hoki. <sup>7</sup> Pera i tetahi e haehae ana, e wawahi ana i te whenua, e titaritaria ana o matou wheua ki te waha o te reinga. <sup>8</sup> Otiia e tau ana oku kanohi, e Ihowa, e te Ariki, ki a koe: ko koe toku whakawhirinakitanga; kauga toku wairua e waiho pani. <sup>9</sup> Tiakina ahau kei mau i nga mahanga i whakatakotoria e ratou moku, i nga rore hoki a nga kaimahi i te kino. <sup>10</sup> Kia taka te hunga kino ki roto ki a ratou kupenga ano: ko ahau ia kia mawhiti.

## Chapter 142

<sup>1</sup> He Makiri na Rawiri; he inoi i a ia i roto i te ana. He karanga ta toku reo ki a Ihowa; he inoi ta toku reo ki a Ihowa. <sup>2</sup> Horahia ana taku inoi ki tona aroaro; whakaaturia ana e ahau toku mate ki tona aroaro. <sup>3</sup> I te ngaromanga o toku wairua i roto i ahau i matau koe ki toku ara: kua whakatakotoria pukutia e ratou te mahanga moku i te ara i haere ai ahau.

<sup>4</sup> Titiro ki toku taha matau, kia kite; kahore hoki tetahi tangata e mohio ana ki ahau; kahore he piringa moku; kahore tetahi e mahara ana ki toku wairua. <sup>5</sup> I karanga ahau ki a koe, e Ihowa: i mea, Ko koe toku piringa, toku wahi i te whenua o te hunga ora. <sup>6</sup> Tahuri mai ki taku karanga: kua whakaititia rawatia hoki ahau: whakaorangia ahau i oku kaitukino: he kaha rawa hoki ratou i ahau.

<sup>7</sup> Whakaputaina toku wairua i te herehere, kia whakamoemiti ai ahau ki tou ingoa: ka karapotia ahau e te hunga tika; nou ka atawhai nei i ahau.

## Chapter 143

<sup>1</sup> He himene na Rawiri. E Ihowa, whakarongo ki taku inoi, kia titaha mai tou taringa ki aku inoi: whakahokia mai he kupu ki ahau i runga i tou pono, i runga i tou tika. <sup>2</sup> A kua e anga e whakawa ki tau pononga: ki tau titiro hoki kahore tetahi mea ora e tika. <sup>3</sup> Kua tukinotia hoki toku wairua e te hoariri; patua iho e ia toku ora ki raro ki te whenua: meinga ana ahau e ia kia noho i nga wahi pouri, kia rite ki nga tupapaku onamata. <sup>4</sup> Na reira i ngaro ai toku wairua i roto i ahau: moti rawa toku ngakau i roto i ahau. <sup>5</sup> E mahara ana ahau ki nga ra onamata; e whakaaro ana ki au mahi katoa: e whakaaroaro ana ahau ki nga meatanga a ou ringa. <sup>6</sup> Totoro tonu atu oku ringa ki a koe: e hiainu ana toku wairua ki a koe, ano he whenua mauiui. (Hera.

<sup>7</sup> Hohoro te whakahoki kupu mai ki ahau, e Ihowa; ka hemo toku wairua: kei huna tou mata ki ahau; kei rite ahau ki te hunga e heke ana ki te poka. <sup>8</sup> Meinga kia rongo ahau ki tou aroha i te ata; e whakawhirinaki ana hoki ahau ki a koe: meinga kia matau ahau ki te ara e haere ai ahau; kua ara nei hoki toku wairua ki a koe. <sup>9</sup> Whakaorangia ahau, e Ihowa, i oku hoariri: ka kuhu nei ahau ki roto ki a koe. <sup>10</sup> Whakaakona ahau ki te mea i tau e pai ai; ko koe hoki toku Atua: he pai tou wairua; arahina ahau ki te whenua o te tika. <sup>11</sup> Whakahauorangia ahau, e Ihowa, he whakaaro ki tou ingoa; whakaarohia tou tika, ka whakaputa ake i toku wairua i roto i te pouri. <sup>12</sup> Aroha mai hoki, a huna oku hoariri: whakangaromia katoatia ano nga kaitukino o toku wairua: he pononga hoki ahau nau.

## Chapter 144

<sup>1</sup> Na Rawiri. Kia whakapaingia a Ihowa, toku kamaka, e whakaako nei i oku ringa ki te whawhai, i oku maihao ki te tatau; <sup>2</sup> Ko te atawhai moku, ko toku pa, ko toku pourewa me toku kaiwhakaora; ko toku whakangungu rakau, ko taku e whakawhirinaki ai; ko te kaipehi hoki o toku iwi ki raro i ahau. <sup>3</sup> E Ihowa, he aha te tangata i maharatia ai ia e koe? Te tama ranei a te tangata i whakaaroa ai ia e koe? <sup>4</sup> Ko te rite o te tangata kei te mea memeha noa: ona ra me te mea he atarangi e rere atu ana. <sup>5</sup> Whakapikoa iho ou rangi e Ihowa, a heke iho: pa ki nga maunga, a ka pongere. <sup>6</sup> Kokiritia mai he uira hei whakamarara i a ratou: koperea mai au pere, kia whati ai ratou. <sup>7</sup> Totoro iho tou

ringa i runga: tangohia ahau, whakaorangia ahau i nga wai nunui, i te ringa o nga tangata ke; <sup>8</sup> E korero teka nei to ratou mangai, a he ringa matau teka to ratou ringa matau.

<sup>9</sup> Ka waiatatia e ahau he waiata hou ki a koe, e te Atua: ka himene atu ahau ki a koe i runga i te hatere aho tekau. <sup>10</sup> Ko ia te kaihomai i te whakaoranga ki nga kingi, te kaiwhakaora i a Rawiri,

i tana pononga, i te hoari whakamate. <sup>11</sup> Tangohia ahau, whakaorangia hoki i nga ringa o nga tangata ke, e korero teka nei o ratou mangai, a he ringa matau teka to ratou ringa matau. <sup>12</sup> A, kia rite a matou tama i to ratou taitamarikitanga ki nga mahuri e tupu ake ana; a matou tamahine hoki

ki nga kohatu kokonga, whakapaipai rawa, no te whare rangatira te tauira; <sup>13</sup> Kia ki a matou pakoro, mo te tiki noa atu i tena mea, i tena mea: kia mano, kia tini nga hua o a matou hipi i o matou parae;

<sup>14</sup> Kia taimaha a matou kau i nga pikaunga; kia kahore he pakarutanga mai ki roto, he whatinga atu hoki ki waho, a kia kahore he aue i o matou huarahi; <sup>15</sup> Ka hari te iwi e pena ana: ae, ka hari te iwi ko Ihowa nei to ratou Atua.

## Chapter 145

<sup>1</sup> Na Rawiri, he whakamoemiti. Ka whakanui ahau i a koe, e toku Atua, e te Kingi: ka whakapai ki tou ingoa ake ake. <sup>2</sup> Ka whakapai ahau ki a koe i nga ra katoa: ka whakamoemiti ki tou ingoa ake ake. <sup>3</sup> He nui a Ihowa, kia nui ano te whakamoemiti ki a ia: e kore e taea tona nui te rapu. <sup>4</sup> Ma tetahi whakatupuranga e whakamoemiti au mahi, tae noa atu ki tetahi whakatupuranga; e korero hoki au mahi nunui. <sup>5</sup> Ka korerotia e ahau te kororia, te honore o tou nui, me au mahi whakamiharo.

<sup>6</sup> Ka korerotia ano e te tangata te kaha o au mahi whakamataku: maku ano e korero tou nui. <sup>7</sup> Ka whakapuakina e ratou te mahara ki te nui o tou pai: ka waiatatia ano tou tika. <sup>8</sup> He atawhai a Ihowa, he aroha: he puhoi ki te riri, he nui tana mahi tohu. <sup>9</sup> He pai a Ihowa ki nga mea katoa; kei runga ano tona aroha i ana mahi katoa.

<sup>10</sup> E whakamoemititia koe, e Ihowa, e au mahi katoa: e whakapaingia e tou hunga tapu. <sup>11</sup> Ma ratou e korero te kororia o tou kingitanga, e kauwhau hoki tou kaha; <sup>12</sup> Kia mohiotia ai e nga tama

a te tangata ana mahi nunui, me te kororia o te maruwehi o tona kingitanga. <sup>13</sup> He kingitanga mutungakore tou kingitanga; kei nga whakatupuranga katoa tou rangatiratanga. <sup>14</sup> E tautokona ana

e Ihowa te hunga katoa e hinga ana: e whakaarahia ake ana hoki e ia te hunga katoa kua whakapikoa  
<sup>15</sup> iho. E tatari ana ki a koe nga kanohi o te katoa; a e hoatu ana e koe ki a ratou ta ratou kai i te  
<sup>16</sup> wa e tika ai. E whakatuwhera ana koe i tou ringa, a makona iho i a koe te hiahia o nga mea ora  
<sup>17</sup> katoa. He tika nga ara katoa o Ihowa: he tapu hoki ana mahi katoa. <sup>18</sup> E tata ana a Ihowa ki te  
<sup>19</sup> hunga katoa e karanga ana ki a ia: ki te hunga katoa e karanga pono ana ki a ia. Ka whakamana  
e ia te hiahia o te hunga e wehi ana i a ia: e whakarongo hoki ia ki ta ratou tangi, a ka whakaora i  
<sup>20</sup> a ratou. Ko Ihowa hei tiaki i te hunga katoa e aroha ana ki a ia: ko te hunga kino katoa ia e ngaro  
<sup>21</sup> i a ia. Ma toku mangai e korero te whakamoemiti ki a Ihowa: kia whakapai ano hoki nga kikokiko  
katoa ki tona ingoa tapu ake ake.

### Chapter 146

<sup>1</sup> Whakamoemititia a Ihowa. E toku wairua, whakamoemititia a Ihowa. <sup>2</sup> I ahau e ora nei ka  
whakamoemiti ahau ki a Ihowa; ka himene ahau ki toku Atua i ahau i te ao nei. <sup>3</sup> Kei whakawhirinaki  
ki nga rangatira, ki te tama ranei a te tangata, kahore nei he awhina. <sup>4</sup> Ko te putanga atu o tona  
wairua, hoki ana ia ki tona oneone; kore iho ona whakaaro i taua ra pu ano.  
<sup>5</sup> Ka hari te tangata ko te Atua nei o Hakopa tona kaiawhina: ko tana e tumanako ai ko Ihowa,  
ko tona Atua; <sup>6</sup> Ko te kaihanganga o te rangi, o te whenua, o te moana, o nga mea katoa o reira; e  
pupuri nei i te pono ake ake; <sup>7</sup> E tohe nei i te whakawa a te hunga e tukinotia ana: e whangai nei i  
te hunga mate hiakai: ko Ihowa hei wewete i nga herehere: <sup>8</sup> Ko Ihowa hei whakatitiro i nga matapo:  
ko Ihowa hei whakaara i te hunga kua whakapikoa iho: e aroha ana a Ihowa ki te hunga tika. <sup>9</sup> Ko  
Ihowa hei tiaki i nga manene; ko ia hei tautoko i te pani, i te pouaru: ko te ara ia o te hunga kino,  
ka huripokitia e ia. <sup>10</sup> Ko Ihowa hei kingi ake ake, ae, ko tou Atua, e Hiona, tae noa ki nga  
whakatupuranga katoa. Whakamoemititia a Ihowa.

### Chapter 147

<sup>1</sup> Whakamoemititia a Ihowa; he pai hoki te himene ki to tatou Atua: ahuareka rawa, ataahua tonu te whakamoemiti. <sup>2</sup> Ko Ihowa hei hanga i Hiruharama: mana hoki nga whati o Iharaira e kohikohi. <sup>3</sup> Ko ia hei rongoa i te hunga ngakau maru: mana e takai o ratou wahi mamae. <sup>4</sup> E taua ana e ia nga whetu, te maha: e huaina ana hoki e ia o ratou ingoa katoa. <sup>5</sup> He nui to tatou Ariki, he nui hoki tona kaha: e kore e taea tona matauranga te whakaaro. <sup>6</sup> Ko Ihowa te kaitautoko mo te hunga mahaki: ka turakina e ia te hunga kino ki te whenua. <sup>7</sup> Waiata, whakawhetai ki a Ihowa: himene i runga i te hapa ki to tatou Atua: <sup>8</sup> Ko ia nei te kaiuwhi i te rangi ki nga kapua, te kaihanga i te ua mo te whenua: e whakatupu ana ia i te tarutaru ki runga ki nga maunga. <sup>9</sup> E homai ana e ia he kai ma te kirehe: ma nga pi raweni hoki ina tangi. <sup>10</sup> E kore ia e ahuareka ki te kaha o te hoiho: e kore ia e manako ki nga waewae o te tangata. <sup>11</sup> E manako ana a Ihowa ki te hunga e wehi ana i a ia, ki te hunga e tumanako ana ki tona aroha.

<sup>12</sup> Whakamoemititia a Ihowa, e Hiruharama: whakamoemititia tou Atua, e Hiona. <sup>13</sup> Nana nei hoki i whakakaha nga tutaki o ou tatau: manaakitia ana e ia au tamariki i roto i a koe. <sup>14</sup> Nana ano i mau ai te rongoa i roto i ou rohe: nana koe i makona ai i te witi pai rawa. <sup>15</sup> E tukua ana e ia tana kupu ki te whenua: tere rawa te rere o tana kupu. <sup>16</sup> E homai ana e ia te hukarere ano he huruhuru hipi: e whakatitaritaria ana te haupapa ano he pungarehu. <sup>17</sup> Maka mai ana e ia tana hauhunga ano he maramara: ko wai e tu i mua i tana matao? <sup>18</sup> E tukua ana e ia tana kupu, a whakarewaina ana aua mea: ka meinga tana hau kia pupuhi, rere ana nga wai. <sup>19</sup> E whakakitea ana e ia tana kupu ki a Hakopa; ana tikanga, me ana whakaritenga ki a Iharaira. <sup>20</sup> Kahore i pera tana hanga ki tetahi iwi; kihai ano ana whakaritenga i mohiotia e ratou. whakamoemititia a Ihowa.

## Chapter 148

<sup>1</sup> Whakamoemititia a Ihowa. Whakamoemititia a Ihowa i runga i nga rangi: whakamoemititia ia i nga wahi tiketike. <sup>2</sup> Whakamoemititia ia, e ana anahera katoa: whakamoemititia ia, e ana mano whaioio. <sup>3</sup> Whakamoemititia ia, e te ra, e te marama: whakamoemititia ia, e nga whetu whakamarama



<sup>4</sup> katoa. Whakamoemititia ia, e nga rangi o nga rangi, e nga wai hoki o runga atu i nga rangi. <sup>5</sup> Kia  
 whakamoemititia e ratou te ingoa o Ihowa: nana hoki i whakahau, a kua hanga ratou. <sup>6</sup> Nana hoki  
 aua mea i whakapumau ake ake: i whakatakotoria e ia he tikanga e kore e taka.  
<sup>7</sup> Whakamoemititia a Ihowa, i runga i te whenua, e nga tarakona, e nga rire katoa; <sup>8</sup> E te kapura,  
 e te whatu; e te hukarere, e te kohu; e te tupuhi, e mahi nei i tana kupu; <sup>9</sup> E nga maunga, e nga puke  
 katoa; e nga rakau hua, e nga hita katoa; <sup>10</sup> E nga kirehe, e nga kararehe katoa; e nga mea  
 ngokingoki, e nga manu whai pakau: <sup>11</sup> E nga kingi o te whenua, e nga iwi katoa; e nga rangatira,  
 e nga kaiwhakawa katoa o te whenua: <sup>12</sup> E nga taitama, e nga taitamahine; e nga koroheke ratou  
 ko nga tamariki: <sup>13</sup> Kia whakamoemititia e ratou te ingoa o Ihowa: nona anake hoki te ingoa e nui  
 ana; kei runga ake i te whenua, i te rangi, tona kororia. <sup>14</sup> Ko ia hoki te kaiwhakaara o te haona o  
 tana iwi; e whakamoemititia ana e ana tangata tapu katoa; e nga tama a Iharaira, e te iwi e tata ana  
 ki a ia. Whakamoemititia a Ihowa.

### Chapter 149

<sup>1</sup> Whakamoemititia a Ihowa. Waiatatia ki a Ihowa he waiata hou, me te whakamoemiti ki a ia  
 i te whakaminenga o te hunga tapu. <sup>2</sup> Kia hari a Iharaira ki tona kaihangā: kia koa nga tama a Hiona  
 ki to ratou Kingi. <sup>3</sup> Kia whakamoemiti ratou ki tona ingoa me te kanikani ano: kia himene ratou  
 ki a ia i runga i te timipera, i te hapa. <sup>4</sup> E manako ana hoki a Ihowa ki tana iwi: mana e whakaataahua  
 te hunga mahaki ki te whakaoranga. <sup>5</sup> Kia koa te hunga tapu i runga i te kororia: kia hamama ratou  
 i te hari i runga i o ratou moenga.  
<sup>6</sup> Kia whai whakamoemiti o ratou mangai ki te Atua, kia whai hoari matarua to ratou ringa;  
<sup>7</sup> Hei rapu utu i nga tauwiwi, hei whiu i nga iwi; <sup>8</sup> Hei herehere i o ratou kingi ki te makameka, i o  
 ratou tangata nunui ki nga here rino; <sup>9</sup> Hei whakaputa ki a ratou i te whakaritenga kua oti te tuhituhi:  
 No tona hunga tapu katoa tenei honore. Whakamoemititia a Ihowa.

### Chapter 150

<sup>1</sup> Whakamoemititia a Ihowa. Whakamoemititia te Atua i tona wahi tapu: whakamoemititia ia i te kikorangi o tona kaha. <sup>2</sup> Whakamoemititia ia mo ana mahi nunui: kia rite ki te hira o tona nui te whakamoemiti ki a ia. <sup>3</sup> Whakamoemititia ia i runga i te tangi o te tetere: whakamoemititia ia i runga i te hatere, i te hapa. <sup>4</sup> Whakamoemititia ia i runga i te timipera, i te kanikani: whakamoemititia ia i runga i nga mea aho, i nga okana. <sup>5</sup> Whakamoemititia ia i runga i te himipora tangi nui: whakamoemititia ia i runga i te himipora tangi tiori. <sup>6</sup> E nga mea katoa e whai manawa ana, whakamoemititia a Ihowa. Whakamoemititia a Ihowa.

## Proverbs

### Chapter 1

<sup>1</sup> Ko nga whakatauki a Horomona tama a Rawiri, kingi o Iharaira; <sup>2</sup> E mohiotia ai te whakaaro nui, te ako; e kitea ai nga kupu o te matauranga; <sup>3</sup> E riro mai ai te ako a te ngakau mahara, te tika, te whakawa, te mea ano e rite ana; <sup>4</sup> Hei hoatu i te ngakau tupato ki nga kuware, i te matauranga, i te ngarahu pai ki te taitamariki; <sup>5</sup> Kia whakarongo ai te tangata whakaaro nui, kia nui ake ai tona mohio; kia whiwhi ai te tangata tupato ki nga whakaaro mohio: <sup>6</sup> E mohio ai ia ki te whakatauki, ki te kupu whakarite, ki nga kupu a nga whakaaro nui, ki a ratou korero whakapeka.

<sup>7</sup> Ko te wehi ki a Ihowa te timatanga o te matauranga; e whakahawea ana te whakaarokore ki te whakaaro nui, ki te ako. <sup>8</sup> Whakarongo, e taku tama, ki te ako a tou papa, kauhoki e whakarerea te ture a tou whaea; <sup>9</sup> Ka waiho hoki ena hei pare ataahua mo tou matenga, hei mekameka whakapaipai mo tou kaki.

<sup>10</sup> E taku tama, ki te whakawaia koe e te hunga hara, kauhoki e whakaae. <sup>11</sup> Ki te mea ratou, Tatou ka haere, ka whakapapa atu, ka whakaheke toto; kia whanga puku tatou, he mea takekore, mo te tangata harakore: <sup>12</sup> Horomia oratia ratou e tatou, peratia me ta te rua tupapaku; ka riro tinana ratou, ka pera me te hunga e heke atu ana ki te poka: <sup>13</sup> Ka kitea e tatou nga taonga utu nui katoa, ka whakakiia o tatou whare ki ta tatou e pahua ai: <sup>14</sup> Maka mai tou wahi ki roto ki to matou; kia

<sup>15</sup> kotahi te putea ma tatou katoa. E taku tama, kua e haere tahi i te ara me ratou; kaiponuhia tou  
<sup>16</sup> waewae i to ratou huarahi; E rere ana hoki o ratou waewae ki te kino, e hohoro ana ratou ki te  
<sup>17</sup> whakaheke toto. He maumau hoki te hora o te kupenga ki te tirohanga a tetahi manu. <sup>18</sup> Ko  
 ratou, he whakaheke i o ratou toto ano i whakapapa ai ratou; he whakamate i a ratou ano i piri ai  
<sup>19</sup> ratou. Ka pena nga huarahi o te hunga apo taonga; ko te ora ano o ona rangatira e tangohia.  
<sup>20</sup> E hamama ana te whakaaro nui i te huarahi; e puaki ana tona reo i nga waharoa; <sup>21</sup> E karanga  
 ana ia i te tino wahi whakaminenga; i te wahi tuwhera o nga kuwaha, i roto i te pa, e puaki ana ana  
<sup>22</sup> kupu; E te hunga kuware, kia pehea ake te roa o to koutou aroha ki te kuwaretanga? O te hiahia  
 ranei o te hunga whakahi ki to ratou whakahi? O te whakakino ranei a te hunga wairangi ki te  
<sup>23</sup> matauranga? Tahuri mai ki taku ako: na ka ringihia e ahau toku wairua ki a koutou, ka whakaaturia  
<sup>24</sup> aku kupu ki a koutou. I karanga atu hoki ahau, heoi kihai koutou i pai mai; i totoro atu toku  
<sup>25</sup> ringa, a kihai tetahi i whai whakaaro mai; Heoi whakakahoretia iho e koutou toku whakaaro  
<sup>26</sup> katoa, kihai hoki i aro ki taku ako: Mo reira ka kata ahau i te ra o to koutou aitua; ka tawai ina  
<sup>27</sup> pa te pawera ki a koutou. Ina tae mai to koutou pawera ano he tupuhi, a ka pa mai to koutou  
<sup>28</sup> aitua ano he paroro; ina tae mai te pouri me te ngakau mamae ki a koutou. Ko reira ratou karanga  
 ai ki ahau, a e kore ahau e whakahoki kupu atu; ka rapu nui ratou i ahau, otiia e kore ahau e kitea  
<sup>29</sup> e ratou: Mo ratou i kino ki te matauranga; kihai hoki i whiriwhiria e ratou te wehi ki a Ihowa;  
<sup>30</sup> Kihai i aro mai ki oku whakaaro; whakahawea ana ratou ki taku kupu riri katoa. <sup>31</sup> Na reira ka  
<sup>32</sup> kai ratou i nga hua o to ratou nei ara, ka whakakiiia ano hoki ki nga mea i titoa e ratou. Ko te  
 tahuritanga atu hoki o nga kuware hei patu i a ratou; ko te ngakau warea ano hoki o nga wairangi  
<sup>33</sup> hei huna i a ratou. Ko te tangata ia e rongohia ana ki ahau, ka au tona noho, ka tea hoki i te wehi  
 ki te kino.

## Chapter 2

<sup>1</sup> E taku tama, ki te tango koe i aku kupu, ki te huna i aku whakahau ki roto ki a koe; <sup>2</sup> A ka  
 tahuri tou taringa ki te whakaaro nui, ka anga ano tou ngakau ki te matauranga; <sup>3</sup> Ae ra, ki te mea  
 ka karangarangatia e koe te matauranga, a ka puaki tou reo ki te ngakau mohio; <sup>4</sup> Ki te rapua hoki

ia e koe ano he hiriwa, ki te kimihia ano he taonga huna; <sup>5</sup> Ko reira koe matau ai ki te wehi o Ihowa,  
 kite ai i te mohio ki te Atua. <sup>6</sup> Ma Ihowa hoki e homai te whakaaro nui; no tona mangai te  
 matauranga me te ngakau mohio. <sup>7</sup> E rongoatia ana e ia te whakaaro nui ma te hunga tika; he  
 whakangungu rakau ia mo te hunga he tapatahi nei te haere; <sup>8</sup> Kia tiakina ai e ia nga ara o te  
 whakawa, kia tohungia ai te ara o tana hunga tapu. <sup>9</sup> Ko reira koe mohio ai ki te tika, ki te whakawa,  
 ki te mea ano e rite ana, ae ra, ki nga ara pai katoa.  
<sup>10</sup> Ka uru hoki te whakaaro nui ki roto ki tou ngakau, a ka reka te matauranga ki tou wairua;  
<sup>11</sup> Ka ai te ngarahu pai hei tiaki i a koe, te ngakau mohio hei pupuri i a koe; <sup>12</sup> Hei kukume mai i  
 a koe i te ara o te kino, i te tangata e puta ke ana ana korero; <sup>13</sup> I te hunga e whakarere nei i nga  
 ara o te tika, e haere ana i nga ara o te pouri; <sup>14</sup> E koa ana, i a ratou e mahi ana i te kino, e hari ana  
 ki nga tikanga parori ke o te kino; <sup>15</sup> He ara kopikopiko o ratou, he whanoke ratou i o ratou huarahi:  
<sup>16</sup> Hei whakaora i a koe i te wahine tauhou, i te wahine tauhou e whakapati nei ki ana kupu; <sup>17</sup> Kua  
 whakarerea nei e ia te hoa o tona tamahinetanga, kua wareware ki te kawenata o tona Atua. <sup>18</sup> E  
 heke atu ana hoki tona whare ki te mate, ona ara ki nga tupapaku. <sup>19</sup> Ko te hunga katoa e haere atu  
 ana ki a ia e kore e hoki mai; e kore ano e mau i a ratou nga ara o te ora. <sup>20</sup> A ka haere koe i nga  
 ara o nga tangata pai, ka mau ano ki nga ara o te hunga tika. <sup>21</sup> Ka noho hoki te hunga tika ki te  
 whenua; ka mau te hunga ngakau tapatahi ki reira. <sup>22</sup> Ka hatepea atu ia te hunga kino i runga i te  
 whenua; ka hutia atu i reira te hunga he kopeka ta ratou mahi.

### Chapter 3

<sup>1</sup> E taku tama, kei wareware ki taku ture; kia puritia hoki aku whakahau e tou ngakau: <sup>2</sup> Katahi  
 ka nui ake nga ra roa mou, nga tau e ora ai, me te ata noho. <sup>3</sup> Kei whakarerea koe e te atawhai, e  
 te pono; heia ki tou kaki; tuhituhia iho, ko tou ngakau ano hei papa. <sup>4</sup> Penei ka whiwhi koe ki te  
 atawhai, ki te matauranga pai i te aroaro o te Atua, o te tangata. <sup>5</sup> Whakapaua tou ngakau ki te

whakawhirinaki ki a Ihowa, kaua hoki e okioki ki tou matauranga ake. <sup>6</sup> I ou ara katoa whakaaro ki a ia, a mana e whakatika ou huarahi.

<sup>7</sup> Kei whakaaro ki a koe he mohio koe; e wehi ki a Ihowa, kia mawehe i te kino. <sup>8</sup> Hei ora tena ki tou pito, hei makuku ki ou wheua. <sup>9</sup> Kia whai kororia a Ihowa i ou rawa, i nga matamua ano

hoki o au hua katoa. <sup>10</sup> A ka ki au toa i nga mea maha, ka pakaru ano hoki au rua waina i te waina.

<sup>11</sup> E taku tama, kaua e whakahawea ki ta Ihowa papaki; kei ngakaukore ano koe ina akona e ia:

<sup>12</sup> Ka akona hoki e Ihowa tana e aroha ai, ka pera tana me ta te matua ki te tamaiti e matenuitia ana e ia.

<sup>13</sup> Ka hari te tangata kua kitea nei e ia te whakaaro nui, me te tangata ano kua whiwhi ki te matauranga. <sup>14</sup> Pai atu hoki te hokohoko o tera i to te hiriwa e hokohokona nei, ona hua i te koura

parakore. <sup>15</sup> Nui atu ona utu i o nga rupi; e kore ano hoki nga mea katoa e minaminatia e koe e rite

ki a ia. <sup>16</sup> Kei tona ringa matau nga ra roa; kei tona mau i nga taonga me te kororia. <sup>17</sup> Ko ona ara

he ara ahuareka, ko ona ara katoa he rangimarie. <sup>18</sup> He rakau ia no te ora ki te hunga e u ana ki a ia; ka hari te tangata e pupuri ana i a ia. <sup>19</sup> Na te whakaaro nui o Ihowa i whakaturia ai e ia te

whenua; na tona mohio tana whakapumautanga i nga rangi. <sup>20</sup> He mohio nona i pakaru ai nga rire, i maturuturu ai te tomairangi o nga kapua.

<sup>21</sup> E taku tama, kei kotiti ke ena i ou kanohi: puritia te whakaaro nui me te ngarahu pai. <sup>22</sup> Kei ena he oranga mo tou wairua, he whakapaipai mo tou kaki. <sup>23</sup> Penei ka haere koe i tou ara, te ai

he wehi, e kore ano tou waewae e tutuki. <sup>24</sup> Ka takoto koe, e kore e wehi, ina, ka takoto koe, ka

reka ano tau moe. <sup>25</sup> Kua e wehi i te matakau huaki tata, i te whakangaromanga ranei o te hunga

kino ina pa mai. <sup>26</sup> Ko Ihowa hoki hei okiokinga mou, a mana e tiaki tou waewae kei mau.

<sup>27</sup> Kua e kaiponuhia te pai ki te hunga i tika nei ma ratou, i nga wa e taea ai e tou ringa.

<sup>28</sup> Kua e mea ki tou hoa, Haere, ka hoki mai ai, a apopo ka hoatu e ahau; i te mea kei a koe ano te mea e takoto ana. <sup>29</sup> Kei whakatakoto i te kino mo tou hoa, kei te noho hu noa na hoki ia i tou

taha. <sup>30</sup> Kei ngangau pokanoa ki te tangata, ki te mea kahore ana mahi kino ki a koe. <sup>31</sup> Kei hae

ki te tangata nanakia, kua hoki e whiriwhiria tetahi o ona ara. <sup>32</sup> He mea whakarihariha hoki te

whanoke ki a Ihowa; kei te hunga tika ia tona whakaaro ngaro. <sup>33</sup> He kanga na Ihowa kei roto i te  
 whare o te tangata kino, he mea manaaki ia nana te nohoanga o te hunga tika. <sup>34</sup> He pono ka  
 whakahi ia ki te hunga whakahi, ka puta ia tona atawhai ki te hunga whakaiti. <sup>35</sup> Ka whiwhi te  
 hunga whakaaro nui ki te kororia; he whakama ia te whakanui o nga wairangi.

## Chapter 4

<sup>1</sup> Whakarongo, e aku tamariki, ki te whakaako a te matua, tahuri mai hoki kia matauria ai nga  
 whakaaro mohio. <sup>2</sup> He pai hoki te kupu mohio ka hoatu nei e ahau ki a koutou, kaua taku ture e  
 whakarerea. <sup>3</sup> He tama ano hoki ahau ki toku papa, a he ngawari, he mea kotahi e matenuitia ana  
 e toku whaea. <sup>4</sup> I whakaako ano ia i ahau, i mea ki ahau, Puritia aku kupu e tou ngakau; kia mau  
 ki aku whakahau, a e ora koe. <sup>5</sup> Whaia mou te whakaaro nui, whaia mou te matauranga; kua e  
 wareware ki tera, kua hoki e neke atu i nga kupu a toku mangai. <sup>6</sup> Kua ia e whakarerea, a mana  
 koe e tiaki; arohaina ia, a mana koe e mau ai. <sup>7</sup> Ko te whakaaro nui te tino mea; no reira whaia mau  
 te whakaaro nui; a i ou whiwhinga katoa, kia whiwhi koe ki te matauranga. <sup>8</sup> Whakanuia ia, a mana  
 koe ka kake ai; ka whakahonore ia i a koe ki te awhitia e koe. <sup>9</sup> Ka homai e ia he pare ataahua ki  
 tou mahunga, ka potaea ano koe e ia ki te karauna whakapaipai. <sup>10</sup> Whakarongo, e taku tama,  
 maharatia aku kupu, a he maha nga tau e ora ai koe. <sup>11</sup> He mea whakaako koe naku ki te ara o te  
 whakaaro nui; he mea arahi koe naku i nga ara o te tika. <sup>12</sup> Ka haere koe, e kore ou takahanga e  
 whakakikitia mai; ki te rere koe, e kore koe e tutuki. <sup>13</sup> Kia mau ki te ako, kua e tukua atu;  
 matapoporetia iho, ko tou orange hoki ia.

<sup>14</sup> Kua e haere i te ara o te hunga kino, kua hoki e takahia te huarahi o te hunga he. <sup>15</sup> Anga  
 ke ake, kua e tika na reira; peka ake i taua ara, haere tonu atu. <sup>16</sup> E kore hoki ratou e moe ki te  
 kore e oti tetahi mahi he ma ratou; riro rawa to ratou moe, ki te kahore tetahi tangata e hinga i a  
 ratou. <sup>17</sup> No te kino hoki te taro e kainga ana e ratou, no te nanakia te waina e inumia ana e ratou.  
<sup>18</sup> Ko te huarahi ia o te hunga tika, koia ano kei te marama e whiti ana, a ka neke haere tonu ake

<sup>19</sup>  
 tona marama, a taea noatia te tino ra. Ko te ara o te hunga kino, me he pouri; e kore ratou e mohio ki te mea i tutuki ai ratou.

<sup>20</sup> E taku tama, tahuri ki aku kupu; anga mai tou taringa ki aku korero. <sup>21</sup> Kei kotiti ke enei i ou kanohi; puritia i waenganui o tou ngakau. <sup>22</sup> He oranga enei mo te hunga e kitea ai, he rongoa mo o ratou kikokiko katoa. <sup>23</sup> Kia pau ou mahara ki te tiaki i tou ngakau; no reira hoki nga putanga o te ora. <sup>24</sup> Whakarerea te mangai whanoke, kia matara rawa i a koe nga ngutu tutu. <sup>25</sup> Kia hangai tonu te titiro whakamua a ou kanohi; kia titiro ou kamo ki mua tonu i a koe. <sup>26</sup> Whakatikaia te huarahi o ou waewae, kia u ano hoki ou ara katoa. <sup>27</sup> Kauga e peka ki matau, ki mau; kia anga ke tou waewae i te kino.

## Chapter 5

<sup>1</sup> E taku tama, tahuri ki oki whakaaro nui, kia anga tou taringa ki toku matauranga: <sup>2</sup> Kia u ai koe ki te ngarahu pai, kia mau ai te matauranga i ou ngutu. <sup>3</sup> Ko nga ngutu hoki o te wahine ke, kei te maturuturunga iho o te honikoma, ngawari iho tona mangai i te hinu. <sup>4</sup> He kawa rawa hoki tona mutunga i te taru kawa; he koi, ano he hoari matarua. <sup>5</sup> Ko ona waewae e heke ana ki te mate, mau pu te reinga i ona takahanga; <sup>6</sup> Heoi kahore i kitea e ia te ara totika ki te ora: he kotiti ke ona ara, a kahore ia i te matau. <sup>7</sup> Na reira, e aku tamariki, whakarongo mai ki ahau, kei mahue hoki nga kupu a toku mangai. <sup>8</sup> Kia matara tou ara i a ia, kauga hoki e tata ki te tatau o tona whare; <sup>9</sup> Kei hoatu tou honore ki nga tangata ke, ou tau ki te hunga nanakia: <sup>10</sup> Kei makona nga tangata ke i tou kaha, kei riro ou mauui ki te whare o te tangata ke; <sup>11</sup> A ka tangi koe i tou whakamutunga, ina poto ou kikokiko me tou tinana. <sup>12</sup> A ka mea, Katae toku kino ki te ako; katae te mauui o toku ngakau ki te tohutohu! <sup>13</sup> Kihai hoki ahau i whakarongo ki te reo o oku kaiwhakaako, kihai toku taringa i anga ki te hunga e tohutohu ana i ahau. <sup>14</sup> Wahi iti kei nga kino katoa ahau i waenganui o te whakaminenga, o te huihui.

<sup>15</sup> Inumia he wai i roto i tau ake rua, me nga wai rere ano i roto i tau ake poka. <sup>16</sup> Kia tohatoha  
 noa atu koia au puna wai, nga awa wai i nga huarahi? <sup>17</sup> Waiho ena mau anake, kauaka ma koutou  
 tahi ko nga tangata ke. <sup>18</sup> Kia manaakitia tau puna wai: kia koa ano koe ki te wahine o tou  
 taitamarikitanga. <sup>19</sup> Kia rite ia ki taua mea ahua, ki te hata, ki te mea ataahua ki te anaterope;  
 kia makona koe i ona u i nga wa katoa, kia matenuitia tonutia e koe tona aroha. <sup>20</sup> He aha oti koe,  
 e taku tama, ka matenui ai ki te wahine ke, i awahi ai i te uma o te wahine ke? <sup>21</sup> Kei mua hoki i  
 nga kanohi o Ihowa nga ara o te tangata, a e meinga ana e ia kia papatairite ona ara katoa. <sup>22</sup> Ko  
 ona kino ano hei hopu i te tangata kino, hei taura ona hara e mau ai ia. <sup>23</sup> Ka mate ia, he mea kihai  
 i whakaakona, ka pohehe i te nui o tona wairangi.

## Chapter 6

<sup>1</sup> E taku tama, ki te mea ko tau hei whakakapi mo ta tou hoa, ki te mea kua papaki tou ringa  
 mo te tangata ke, <sup>2</sup> Kua oti koe te mahanga e nga kupu a tou mangai, kua mau koe i nga kupu a  
 tou mangai. <sup>3</sup> Meinga tenei inaianei, e taku tama, kia ora ai koe, he mea hoki kua taka koe ki roto  
 ki te ringa o tou hoa; haere whakaiti i a koe, a ka tohe ki tou hoa. <sup>4</sup> Kei tukua iho te moe ki ou  
 kanohi; kei tunewha ou kamo. <sup>5</sup> Whakaora i a koe ano he anaterope i roto i te ringa o te kaiwhai,  
 ano he manu i roto i te ringa o te kaihopu.

<sup>6</sup> Haere ki te popokorua, e te tangata mangere, matakitakina iho ona ara, kia nui ai ou whakaaro:  
<sup>7</sup> Kahore nei ona kaitohutohu, ona kaitirotiro, ona rangatira, <sup>8</sup> Heoi e mahi kai ana mana i te raumati,  
 e kohikohi ana i te kai mana i te kotinga witi. <sup>9</sup> Kia pehea ake te roa o tau takoto, e te tangata  
 mangere? A hea koe maranga ai i tau moe? <sup>10</sup> Kia iti ake nei te wahi e parangia ai, kia iti ake nei  
 te moe, kia iti ake te kotuinga o nga ringa i a koe e takoto na: <sup>11</sup> Na ka rite ki te kaipahua te putanga  
 mai o te muhore ki a koe, tou rawakore, ano he tangata he patu nei tana.

<sup>12</sup> Ko te tangata kahore ona painga, ko te tangata hara, e haereere ana me te mangai tu ke; <sup>13</sup> E  
 whakakini ana ona kanohi, e korero ana ona waewae, e tuhi ana ona maihao; <sup>14</sup> Kei roto te whanoke



i tona ngakau, e whakatakoto ana ia i te kino i nga wa katoa; e rui ana ia i te ngangare. <sup>15</sup> Mo reira  
 ka huaki tata te aitua ki a ia; e kore e aha ka whatiia ia, te taea te rongoa. <sup>16</sup> E ono nga mea e kino  
 ana ki a Ihowa; ae ra, e whitu nga mea e whakariharihanga ana e ia: <sup>17</sup> Ko te kanohi whakakake,  
 ko te arero teka, ko nga ringa whakaheke i te toto harakore; <sup>18</sup> He ngakau e whakatakoto ana i nga  
 whakaaro kikino, he waewae e hohoro ana te rere ki te hianga; <sup>19</sup> He kaiwhakaatu teka e korero  
 teka ana, ko te tangata hoki e rui ana i te ngangare ki waenganui i nga tuakana, i nga teina.  
<sup>20</sup> E taku tama, puritia te whakahau a tou papa, kaua hoki e whakarerea te ture a tou whaea:  
<sup>21</sup> Kia mau tonu te takai ki tou ngakau, heia ki tou kaki. <sup>22</sup> Ko tou kaiarahi ano tera ina haere koe;  
 mana koe e tiaki ina takoto koe; ka korero mai ano ki a koe; ina ara koe. <sup>23</sup> He rama hoki te  
 whakahau; a he marama te ture; ko nga riringa hoki, e whakaako ana, he ara ki te ora; <sup>24</sup> Hei tiaki  
 i a koe kei he i te wahine kino, i te whakapati a te arero o te wahine ke. <sup>25</sup> Kei hiahia koe ki tona  
 ataahua i roto i tou ngakau; kei mau ano koe i ona kamo. <sup>26</sup> Ko te tukunga iho o te tangata he wahi  
 taro, he mea mo te wahine kairau; ko ta te wahine purema e whai ana ko te wairua utu nui. <sup>27</sup> E  
 taea ranei e te tangata te tango i te ahi ki roto ki tona uma, a e kore ona kakahu e wera? <sup>28</sup> E taea  
 ranei e tetahi te haere i runga i nga waro ratarata, a e kore ona waewae e hunua? <sup>29</sup> Ka pera ano te  
 tangata e haere ana ki te wahine a tona hoa; e kore e kore ka whiua te tangata e pa ana ki a ia. <sup>30</sup> E  
 kore e whakahaweatia e te tangata te tahae, ki te tahaetia e ia he mea e makona ai tona wairua i a  
 hiakai ia. <sup>31</sup> Otiia ki te kitea ia, kia takiwhitu ana e whakautu ai; me homai e ia nga rawa katoa o  
 tona whare. <sup>32</sup> Ko te tangata e puremu ana ki te wahine, kahore ona mohio: ko te tangata e pera  
 ana, kei te whakangaro ia i tona wairua. <sup>33</sup> He kaiakiko, he whakama te wahi mona; e kore ano  
 tona ingoa kino e horoia atu. <sup>34</sup> He riri nui hoki na te tangata te hae; e kore ano e tohungia e ia i te  
 ra rapu utu. <sup>35</sup> E kore ia e manako ki tetahi utu; e kore hoki e tatu tona ngakau, ahakoa he nui au  
 hakari e tapae ai.

## Chapter 7

<sup>1</sup> E taku tama, puritia aku kupu, huna aku whakahau ki roto ki a koe. <sup>2</sup> Puritia aku whakahau,  
a ka ora; taku ture, ano ko te whatupango o tou kanohi. <sup>3</sup> Herea ki ou maihao; tuhituhia, ko tou  
ngakau ano hei papa. <sup>4</sup> Ki atu ki te whakaaro nui, He tuahine koe noku; kiia hoki te matauranga  
ko tou whanaunga wahine: <sup>5</sup> Kia ai enei hei tiaki i a koe kei he i te wahine ke, i te wahine ke, he  
korero whakapati nei ana.

<sup>6</sup> I titiro atu hoki ahau i te matapihi o toku whare i roto i toku whakakahokaho; <sup>7</sup> A i matakitaki  
ahau i roto i nga kuware, i kite i roto i nga taitama, i tetahi tamaiti kahore rawa he whakaaro, <sup>8</sup> E  
haere ana i te ara i te wahi tata e piko atu ai ki a ia, a haere ana ia i te ara ki tona whare. <sup>9</sup> I te  
kakarauritanga, i te ahiahi o te ra, i te titiwhatanga o te po, i te pouri kerekere. <sup>10</sup> Na, kua tutaki  
tetahi wahine ki a ia, he kakahu puremu tona, he ngakau hianga. <sup>11</sup> He mangai koroki tona, he  
tohetohē; ko ona waewae, kahore e tau ki tona whare: <sup>12</sup> Inaianei kei nga ara ia, inamata kei nga  
waharoa, e tauwhanga ana i nga kokinga katoa. <sup>13</sup> Koia i hopukia ai ia e ia, kei te kihi i a ia, a ka  
mea atu ki a ia, me te whakato i ano i tona mata, <sup>14</sup> He patunga mo te pai kei ahau; no tenei ra nei  
ahau i whakamana ai i aku kupu taurangi; <sup>15</sup> Koia ahau i haere mai ai ki te whakatau i a koe, ki te  
ata rapu i tou mata, a ka kitea nei koe e ahau. <sup>16</sup> Ko toku moenga kua horahia e ahau, whakapaipai  
rawa ki te kaitaka, ki nga kakahu purepure no te rinena o Ihipa. <sup>17</sup> Kua ruia e ahau toku moenga  
ki nga mea whakakakara, ki te maira, ki te aroe, ki te hinamona. <sup>18</sup> Haere mai, kia whaowhina taua  
ki te aroha, a ao noa; kia ora o taua ngakau i te aroha. <sup>19</sup> Kahore hoki taku tane i te whare: kua riro  
ia, he haere tawhiti: <sup>20</sup> I maua atu e ia he putea moni i tona ringa; ka hoki mai ano ia i te kowhititanga  
o te marama. <sup>21</sup> He maha no ana korero whakawai, riro ana ia i a ia ki tana; na te whakapati a ona  
ngutu ka kumea atu ia e ia. <sup>22</sup> Haere tonu ia i muri i a ia, ano he kau e haere ana kia patua, he  
kuware ranei e haere ana ki nga rakau here waewae e whiua ai te he; <sup>23</sup> A tu noa te tao ki tona ate  
puta rawa; rite tonu ia ki te manu e hohoro ana ki te mahanga, te mohio he matenga tera mona.

<sup>24</sup> No reira, e aku tamariki, whakarongo ki ahau, maharatia nga kupu a toku mangai. <sup>25</sup> Kei  
peau ke tou ngakau ki ona ara, kei kotiti ke ki ona huarahi. <sup>26</sup> He tokomaha hoki nga tangata i tu,

i hinga i a ia, ae ra, he ope nui rawa tana i patu ai. <sup>27</sup> He huarahi tona whare ki te reinga, e anga ana ki raro ki nga ruma o te mate.

## Chapter 8

<sup>1</sup> He teka ianei kei te karanga te whakaaro nui, e puaki ana ano te reo o te matauranga? <sup>2</sup> I runga i nga wahi tiketike tona turanga, i te ara i te tutakitanga o nga huarahi; <sup>3</sup> Hamama ana ia i te taha o nga kuwaha, i te ngutu o te pa, i te tomokanga atu i nga tatau: <sup>4</sup> Ki a koutou, e nga tangata, taku karanga; ki nga tama ano a te tangata toku reo. <sup>5</sup> E nga kuware, kia matau koutou ki te ngarahu tupato; e nga wairangi, kia mohio te ngakau. <sup>6</sup> Whakarongo mai, ka korerotia hoki e ahau nga mea pai rawa; ko ta oku ngutu e whakapuaki ai ko nga mea e rite ana. <sup>7</sup> He pono hoki te korero a toku mangai; he mea whakarihariha ano te kino ki oku ngutu. <sup>8</sup> Kei runga i te tika nga kupu katoa a toku mangai; kahore he whakapeka, he whanoke ranei, i roto. <sup>9</sup> Ko enei katoa he marama ki te tangata e matau ana, he tika ki te hunga i kitea ai te mohio. <sup>10</sup> Manakohia mai taku ako, kua te hiriwa; ko te matauranga, nui atu i te koura pai rawa. <sup>11</sup> Pai atu hoki te whakaaro nui i nga rupi; e kore hoki nga mea katoa e minaminatia nei e tau hei whakarite mona.

<sup>12</sup> Kua meinga e ahau, e te whakaaro nui, ko te ngarahu pai hei nohoanga moku, e kitea ana e ahau te mohio me te ata whakaaro. <sup>13</sup> Ko te wehi ki a Ihowa koia tena ko te kino ki te he: e kino ana ahau ki te whakapehapeha, ki te whakakake, ki te ara he, ki te mangai whanoke. <sup>14</sup> Ko te whakaaro tika, ko te whakaaro nui, naku; ko ahau te matauranga, kei ahau te kaha. <sup>15</sup> Naku nga kingi i kingi ai, naku nga rangatira i whakatakoto ai i te tika. <sup>16</sup> Naku i whai rangatiratanga ai nga rangatira, nga tangata nunui, ara nga kaiwhakawa katoa o te whenua. <sup>17</sup> E arohaina ana e ahau te hunga e aroha ana ki ahau; ko te hunga hoki e ata rapu ana i ahau, e kite ratou i ahau. <sup>18</sup> He taonga, he kororia kei ahau; ae ra, he rawa mau tonu, he tika. <sup>19</sup> Pai atu oku hua i te koura, ae ra, i te koura parakore; ko nga mea e puta ana i ahau, pai atu i te hiriwa kowhiri. <sup>20</sup> Kei nga ara o te tika ahau e

<sup>21</sup>  
 haere ana, kei waenganui i nga huarahi o te whakawa: Kia meinga ai e ahau te hunga e aroha  
 ana ki ahau kia whiwhi ki te rawa, kia whakakiiia ai e ahau a ratou takotoranga taonga.

<sup>22</sup> I a Ihowa ahau, no te timatanga ra ano o ona ara, no mua atu i ana mahi o nehera. <sup>23</sup> Nonamata  
 riro ahau i whakaritea ai, no te timatanga, no mua atu i te whenua. <sup>24</sup> I te mea kahore ano nga rire,  
 kua whanau ahau; i te mea kiano he puna whai wai. <sup>25</sup> No mua atu i te whakaunga o nga maunga,  
 no mua i nga pukepuke toku whanautanga: <sup>26</sup> I te mea kahore ano i hanga noatia e ia te whenua,  
 me nga parae, me te timatanga o te puehu o te ao. <sup>27</sup> I tana whakaturanga i nga rangi, i reira ano  
 ahau: i tana whakaritenga i te awahi mo te mata o te rire; <sup>28</sup> I tana whakapumautanga i nga rangi i  
 runga; i te tototanga o nga puna o te rire; <sup>29</sup> I tana rohenga mai i te moana, kei takahia tana kupu  
 e nga wai; i tana waitohutanga i nga turanga o te whenua; <sup>30</sup> I reira ahau i tona taha, he tohunga  
 ki nga mahi: he ahurekatanga ahau nona i ia ra, i ia ra, e koa ana i nga wa katoa i tona aroaro;  
<sup>31</sup> E koa ana ki tana ao; a ko taku i ahureka ai ko nga tama a te tangata.

<sup>32</sup> No reira, e aku tamariki, whakarongo mai ki ahau: ka hari hoki te hunga e pupuri ana i oku  
<sup>33</sup> ara. Whakarongo mai ki te ako, kia whai whakaaro ai koutou; kaua hoki e paopaongia. <sup>34</sup> Ka  
 hari te tangata e whakarongo ana ki ahau, e tatari ana i oku tatau i tenei ra, i tenei ra, e whanga ana  
<sup>35</sup> i nga pou o oku kuwaha. Ko te tangata hoki e kite ana i ahau, e kite ana i te ora, ka whiwhi ano  
<sup>36</sup> ia ki ta Ihowa manako mai. Ko te tangata ia e hara ana ki ahau, he mahi nanakia tana ki tona  
 wairua ake; ko te hunga katoa e kino ana ki ahau, e aroha ana ki te mate.

## Chapter 9

<sup>1</sup> Kua oti i te whakaaro nui tetahi whare mona te hanga, e whitu nga pou kua oti te tarai e ia:  
<sup>2</sup> Kua oti ana kararehe te patu e ia; whakananu rawa tana waina; kua oti ano tana tepu te whakapai.

<sup>3</sup> Kua unga e ia ana kotiro, e karanga ana ia i runga i nga wahi tiketike rawa o te pa. <sup>4</sup> Ki te mea he  
 kuware tetahi, me peka mai ia ki konei: ko te tangata maharakore, ko tana kupu tenei ki a ia, <sup>5</sup> Haere  
 mai, kainga taku taro, inumia hoki te waina kua oti nei te whakananu e ahau. <sup>6</sup> Kati ra, e te hunga  
 kuware, kia ora ai koutou; haere hoki i te ara o te matauranga. <sup>7</sup> Ko ia e papaki ana i te tangata

whakahihi, ka whakama; a ko ia e riri ana i te tangata kino, ka piri mai he he ki a ia. <sup>8</sup> Kua e riria te tangata whakahi, kei kino ia ki a koe: riria ko te tangata whakaaro nui, a ka aroha ia ki a koe.

<sup>9</sup> Hoatu te mohio ki te tangata whakaaro nui, a ka neke ake ona whakaaro; whakaakona te tangata tika, a ka nui ake tona mohio. <sup>10</sup> Ko te timatanga o te whakaaro nui ko te wehi ki a Ihowa; ko te matauranga, ko te mohio ki te Mea Tapu. <sup>11</sup> Maku hoki ka maha ai ou ra, maku ka neke ake ai nga tau e ora ai koe. <sup>12</sup> Ki te nui ou whakaaro, mou ano ou whakaaro nui; ki te whakahi koe, mau anake tau pikaunga.

<sup>13</sup> Ko te wahine wairangi, he mangai nui ia; he kuware ia, kahore ona mohio ki te aha, ki te aha. <sup>14</sup> Noho ana ia i te kuwaha o tona whare i runga i te nohoanga i nga wahi tiketike o te pa;

<sup>15</sup> Kia karanga atu ai ia ki nga tangata e haere ana i te ara, e maro tonu ana o ratou huarahi, <sup>16</sup> Ko te kuware, peka mai ki konei; tena ko te tangata whakaarokore, ko tana kupu tenei ki a ia, <sup>17</sup> He reka te wai tahae, a he ahua reka te taro kai huna. <sup>18</sup> Te mohio ia kei reira nga tupapaku; kei te reinga riro ana i karanga ai.

## Chapter 10

<sup>1</sup> Ko nga whakatauki a Horomona. He tama whakaaro nui, ka koa te papa: tena he tama kuware, he utanga nui mo tona whaea.

<sup>2</sup> Kahore he rawa o nga taonga o te kino: ma te tika ia te oranga ake i te mate. <sup>3</sup> E kore a Ihowa e tuku i te wairua o te tangata tika kia hemokai: ka pana atu ia e ia te hiahia o te hunga kino.

<sup>4</sup> He rawakore te tukunga iho o te ringa ngehe: ma te ringa kakama ia ka hua te taonga.

<sup>5</sup> He kohi raumati ta tama ngakau mahara: he whakama ia te rawa a tama moe ngahuru.

<sup>6</sup> He manaaki kei te tumuaki o te tangata tika: he arita ia kei te waha o te tangata kino, taupoki ai.

<sup>7</sup> Ka manaakitia te maharatanga ki te tangata tika; ka pirau ia te ingoa o te hunga kino.

<sup>8</sup> He ngakau whakaaro, ka tahuritia te whakahau: he ngutu wairangi, ka hinga.

<sup>9</sup> Ko te tangata haere tika, e haere ora ana: ko te tangata parori ke ona ara, ka mohiotia ia.

<sup>10</sup> Ma te whakakini o te kanohi ka puta ai te pouri: ko te ngutu wairangi ia, ka hinga.

- 11 He puna ora te mangai o te tangata tika; tena ko te mangai o te hunga kino, ka taupokina tera e te mahi nanakia.
- 12 Ko to te mauahara he whakaoho i nga totohe; ko te aroha he hipoki i nga he katoa.
- 13 E kitea te whakaaro nui ki nga ngutu o te tangata matau; ko te rakau ia te mea mo te tuara o te ngakaukore.
- 14 Rongoa ai te hunga whakaaro nui i te matauranga: he whakangaromanga ia kei te hori tonu, te mangai o te wairangi.
- 15 Ko ona rawa te pa kaha o te tangata taonga: tena ko te hunga kore taonga, hei whakangaromanga to ratou rawakore.
- 16 Ko te mahi a te tangata tika e ahu ana ki te ora: ko nga hua o te kino ki te hara.
- 17 Kei te ara ki te ora te tangata e pupuri ana i te kupu ako; ko te tangata ia e kore e pai kia riria tona he, ka kotiti ke.
- 18 Ko te tangata e huna ana i te mauahara he ngutu teka: a he kuware te tangata e whakapuaki ana i te ngautuara.
- 19 E kore nga kupu maha e hapa i te kino; he mahara nui ia te tangata he ngutu kokopi nei ona.
- 20 He hiriwa pai rawa te arero o te tangata tika; ko te ngakau o te hunga kino, he hauwarea
- 21 rawa. He tokomaha e whangaia ana e nga ngutu o te tangata tika; ka mate ia te hunga kuware, he kore no te ngakau mahara.
- 22 Ka hua te taonga i ta Ihowa manaaki: kahore hoki e kinakitia e ia ki te pouri.
- 23 Hei takaro ma te wairangi te mahi he; ma te tangata matau ia ko te whakaaro nui.
- 24 Ko ta te tangata kino i wehi ai ka tae ano ki a ia; a, ko ta te hunga tika i hiahia ai, ka homai.
- 25 Pahure rawa ake te tukauati kua kore te hunga kino: tena ko te tangata tika he turanga pumau tera.
- 26 He winika ki nga niho, he paowa ki nga kanohi: koia ano te mangere ki ona kaiunga.
- 27 Ko te wehi ki a Ihowa e whakaroa ana i nga ra: ka whakapotoa mai ia nga tau o te hunga
- 28 kino. Tumanako atu te hunga tika, koa iho; tumanako atu te hunga kino, ngaro iho.
- 29 He kaha mo te tangata tika ta Ihowa ara; he whakangaromanga ia mo nga kaimahi i te kino.
- 30 E kore te tangata tika e whakangaueuetia a ake ake; e kore ia e nohoia e te hunga kino te whenua.

31 Ko te mangai o te tangata tika hua ana te whakaaro nui; ka tapahia ia te arero whanoke. E  
 32 mohio ana nga ngutu o te tangata tika ki nga mea ka manakohia; he whanoke ia e whakapuakina  
 ana e te mangai o te hunga kino.

## Chapter 11

1 He mea whakarihariha ki a Ihowa te pauna he; engari te taimaha tika tana i pai ai.  
 2 Ka tae te whakapehapeha, ka tae ano te whakama; kei te hunga whakaiti ia te whakaaro nui.  
 3 Ko to ratou ngakau tapatahi hei arahi i te hunga tika; ka ai ano ko te whanoke ia o te hunga  
 poka ke hei whakangaro mo ratou.  
 4 E kore te taonga e whai mana i te ra o te riri: kei te tika ia he oranga ake i te mate.  
 5 Ma te tika o te ngakau tapatahi ka tika ai tona ara; ka hinga ia te tangata kino i runga i tona  
 6 kino. Ma te tika o te hunga tika ka mawhiti ai ratou; ka mau ia nga poka ke i runga i to ratou kino.  
 7 I te matenga o te tangata kino, kore iho ana mea i tumanako atu ai: kahore noa iho he  
 tumanakohanga ma te hunga he.  
 8 Ka mawhiti te tangata tika i roto i te raru, a ka riro te tangata kino hei whakakapi mo tona  
 turanga.  
 9 Hei huna mo tona hoa te mangai o te tangata whakaponokore; na ma te mohio te hunga tika  
 ka mawhiti ai.  
 10 Ka pai te hunga tika, ka hari te pa: ka whakangaromia te hunga kino, ka tangi te umere.  
 11 Ma te manaaki o te hunga tika ka kake ai te pa; ka pakaru ia i te mangai o te hunga kino.  
 12 Ko te tangata e whakahawea ana ki tona hoa he maharakore: tena ko te tangata matau,  
 13 whakarongo puku ana. Ko te tangata haere, ka kawekawe korero e whaki ana i nga mea ngaro:  
 ko te tangata i te wairua pono, e hipoki ana i te korero.  
 14 Ki te kahore he mohio hei arahi, ka hinga te iwi: he ora ia kei nga kaiwhakatakoto whakaaro  
 tokomaha.  
 15 Ko te tangata ko tana nei hei whakakapi mo ta te tangata ke, ka mamae; kei te ora ia te  
 tangata e kino ana ki te tikanga whakakapi turanga.  
 16 Ka mau te kororia i te wahine tikanga pai; ka mau hoki te taonga i nga tangata taikaha.

17

He atawhai i tona wairua ta te tangata atawhai; a he whakararu i ona kikokiko ta te tangata nanakia.

18

Ko te mahi a te tangata kino e utua ana ki te teka: ko te utu ia mo te kaiwhakatakoto i te tika, u rawa.

19

Ko te tangata u ki te tika, ka whiwhi ki te ora: a, ko te tangata e whai ana i te kino e mea ana i te mate mona.

20

Ko ta Ihowa e whakarihariha ai he ngakau whanoke; ko tana e ahua e ai ko te hunga e tika ana to ratou ara.

21

Ahako awhi nga ringa ki a raua, e kore te tangata kino e waiho kia kore e whiua; ka mawhiti ia te uri o te hunga tika.

22

Rite tonu ki te whakakai koura i te ihu o te poaka te wahine ataahua kahore nei ona ngarahu pai.

23

Ko ta te hunga tika e minamina ai, ko te pai anake; ko te tumanako ia a te hunga kino, ko te riri.

24

Tera tetahi kei te rui, a tapiritia mai ana ano; tera tetahi kei te kaiponu i te mea e tika ana, heoi rawakore noa iho.

25

Ko te wairua ohaoha ka momona: ko te tangata e whakamakuku ana, ka whakamakukuria ano ia.

26

Ko te tangata e kaiponu ana i te witi, ka kanga tera e te nuinga; ka tau ia te manaaki ki runga ki te mahunga o te tangata e hoko atu ana.

27

Ko te tangata e ata rapu ana i te pai, e rapu ana i te whakapai: ko te tangata ia e rapu ana i te he, ka tae tera ki a ia.

28

Ko te tangata e whakawhirinaki ana ki ona taonga, ka taka: na, ko te hunga tika ka rite to ratou tupu ki to te rau matomato.

29

Ko te tangata e whakararu ana i tona whare, he hau te taonga e whakarerea iho mona: hei pononga ano te kuware ma te ngakau whakaaro nui.

30

Ko nga hua o te tangata tika he rakau no te ora; ka hopu wairua ano te tangata whakaaro tika.

31

Nana, he utu ano to te tangata tika i runga i te whenua: nui atu ia to te tangata kino raua ko te tangata hara.



**Chapter 12**

- 1  
Ko te tangata e aroha ana ki te kupu ako e aroha ana ki te matauranga; na, ko te tangata e kore e pai kia riria tona he, he poauau tera.
- 2  
Ko te tangata pai ka whiwhi ki ta Ihowa whakapai; otiia ka whakahengia e ia te tangata ngarahu kino.
- 3  
E kore ta te tangata e u i te kino: na, ko te pakiaka o te hunga tika, e kore tera e whakakorikoria.
- 4  
He wahine e u ana tona pai, hei karauna tera ki tana tane; tena ko te wahine i whakama ai ia, hei pirau tera i roto i ona wheua.
- 5  
Ko nga whakaaro o te hunga tika he tika: ko nga whakaaro ia o te hunga kino he tinihanga.
- 6  
Ko nga kupu a te hunga kino e mea ana kia tauwhanga i te toto: ma te mangai ia o te hunga tika ratou ka ora ai.
- 7  
Ka hurihia iho te hunga kino, a kore iho; ko te whare ia o te hunga tika ka tu tonu.
- 8  
Ka rite ki tona ngarahu te whakamoemiti mo te tangata; ko te ngakau parori ki ia ka whakahaweatia.
- 9  
Ko te tangata e whakahaweatia ana, he pononga nei tana, pai ake ia i te tangata e whakanui ana i a ia ano, a kahore ana kai.
- 10  
Ko te tangata tika e whakaaro ana ia ki te ora o tana kararehe; he nanakia ia nga mahi atawhai a te hunga kino.
- 11  
Ko te tangata e mahi ana i tona oneone ka makona ia i te taro; tena ko te tangata e whai ana i te hunga tekateka noa, kahore ona ngakau mahara.
- 12  
Ko ta te tangata kino e minamina ai ko te kupenga a te hunga kino; e whai hua ana ia te pakiaka o te hunga tika.
- 13  
Ka mau te tangata kino i te pokanga ketanga o ona ngutu; ka puta mai ia te tangata tika i roto i te raru.
- 14  
Ma nga hua o tona mangai ka makona ai te tangata i te pai; ka riro mai ano i te tangata nga utu o ta ona ringa.
- 15  
He tika tonu ki ona kanohi ake te ara o te kuware: e whakarongo ana ia te tangata whakaaro nui ki te kupu whakatupato.
- 16  
Ko te kuware, e mohiotia wawetia ana tona riri: e hipokina ana ia te whakama e te tangata ngarahu tupato.

17

Ko ta te tangata korero pono he whakapuaki i te tika; ko ta te kaiwhakaatu teka ia he tinihanga.

18

He tangata ano ko ana korero maka noa, me te mea ko nga werohanga a te hoari; he rongoa ia te arero o te hunga whakaaro nui.

19

Ka u tonu te ngutu pono a ake ake; mo naianeia kau ia te arero teka.

20

He tinihanga kei roto i te ngakau o nga kaitito i te kino; he koa ia to nga kaiwhakatakoto korero e mau ai te rongoa.

21

E kore tetahi kino e pa ki te tangata tika; engari te hunga kino ka ki i te kino.

22

He mea whakarihariha ki a Ihowa nga ngutu teka; ko tana e ahuaireka ai ko nga kaimahi i te pono.

23

Hipoki ai te tangata tupato i te matauranga: e karanga nui ana ia te ngakau o nga kuware i te kuwaretanga.

24

Mo te ringa o nga uaua te kingitanga; hei homai takoha ia te mangere.

25

Ma te pouri i roto i te ngakau o te tangata e piko ai ia: ma te kupu pai ia ka marama ai.

26

Hira ake te tangata tika i tona hoa; te hunga kino ia ka whakapohehetia e to ratou ara ano.

27

Kahore te tangata mangere e tunu i tana mea i hopu ai: ma te tangata uaua ia te taonga utu nui a nga tangata.

28

He ora kei te ara o te tika; kahore hoki he mate i tona ara.

### Chapter 13

1

Ko te tama whakaaro nui ka rongoa ki ta tona papa ako: ko te tangata whakahi ia e kore e rongoa ki te riri.

2

E kai te tangata i te pai i te hua o tona mangai: ka kai ia te wairua o te hunga wanoke i te tutu.

3

Ko te tangata e tiaki ana i tona mangai e pupuri ana i tona ora: ko te tangata ia e hamama nui ana ona ngutu, ko te whakangaromanga mona.

4

E hiahia ana te wairua o te tangata mangere, a kahore he mea mana: ka meinga ia kia momona te wairua o te hunga uaua.

5

E kino ana te tangata tika ki te korero teka: he mea whakarihariha ia te tangata kino, a whakama noa iho.

- 6  
Ko te tika hei kaitiaki mo te tangata e tapatahi ana te ara: ka whakataka ano te tangata kino e te hara.
- 7  
Tera tetahi kei te amene taonga mona, heoi kahore rawa he mea i a ia: tera tetahi kei te whakarawakore i a ia, heoi nui atu ona rawa.
- 8  
Ko nga utu mo te tangata kia ora, ko ona rawa: tena ko te rawakore, e kore e rongoi i te riri.
- 9  
E koa ana te marama o te hunga tika: ka keto ia te rama o te hunga kino.
- 10  
He totohe anake i ahu mai i te whakapehapeha: he whakaaro nui ia kei te hunga i nga kupu tika.
- 11  
Ko nga taonga i puta mai i te whakamanamana ka iti haere: ko ta te tangata i whakaemi ai, he mea mahi, ka tupu haere.
- 12  
He manako taringa roa, he patu ngakau: ka tae te koronga, ko te rakau ia o te ora.
- 13  
Ko te tangata e whakahawe ana ki te kupu, ka ngaro i a ia ano; ko te tangata ia e wehi ana i te whakahau, ka whiwhi ki te utu.
- 14  
Ko te ture o te hunga whakaaro nui, he puna no te ora, e puta ai i nga reti o te mate.
- 15  
Ko to te ngarahu pai he homai atawhai; he taikaha ia te ara o te hunga nanakia.
- 16  
He mahi mohio ta te tangata tupato; ko ta te wairangi he hora i te kuwaretanga.
- 17  
Ka hinga te karere kino ki te kino; ko te karere pono ia, ano he rongoa.
- 18  
Ko te tangata kahore e pai ki te papaki, mana te rawakore, te whakama; engari ko te tangata e whai mahara ana ki te ako, ka whakahonoretia.
- 19  
Ko te hiahia kua rite, he reka ki te wairua: he whakarihariha ia ki nga kuware te whakarere i te kino.
- 20  
Haere i te taha o te hunga whakaaro nui, a ka whai whakaaro koe: ko te takahoa ia o nga kuware, ka mamae.
- 21  
Ka whai te kino i te hunga hara; ko te utu ia ki te hunga tika, he pai.
- 22  
He whakarerenga iho ta te tangata pai mo nga tamariki a nga tamariki; kei te rongoa mo te tangata tika nga taonga o te tangata hara.
- 23  
He nui te kai kei te ngakinga a nga rawakore; tera ia te mea e ngaro ana i te kore o te tikanga pai.
- 24  
Ko te tangata e kaiponu ana i tana whiu, e kino ana ia ki tana tama; ko te tangata ia e aroha ana ki a ia, ka papaki wawe i a ia.

25

Kai ana te tangata tika, makona ana tona wairua; ka hapa ia te kopu o te tangata kino.

## Chapter 14

1

Ko ta te wahine whakaaro nui he hanga i tona whare; ko ta te wahine wairangi, ko ona ringa hei wahi iho.

2

Ko te tangata e haere ana i runga i tona tika, e wehi ana i a Ihowa; ko te tangata he parori ki ona ara e whakahawea ana ki i ia.

3

Kei te mangai o te wairangi he patu whakapehapeha; ma nga ngutu ia o te hunga whakaaro nui ratou ka ora ai.

4

Ki te kahore he kau, ka ma te takotoranga kai; ma te kaha ia o te kau ka nui ai nga hua.

5

E kore te kaiwhakaatu pono e teka; ka puaki ia te teka i te kaiwhakaatu teka.

6

E rapu ana te tangata whakahi i te whakaaro nui, heoi kahore e kitea e ia; ki te tangata matau ia he mama noa te matauranga.

7

Haere atu ki te aroaro o te kuware, ina kahore e kitea e koe he ngutu matau ona.

8

Ko te whakaaro nui o te tangata tupato, he matau ki tona ara; ko te wairangi o nga kuware, he tinihanga.

9

Ko ta nga wairangi he kata ki te he: na kei te hunga tika te whakaaro pai.

10

E mohio ana te ngakau ki tona ake mamae, e kore ano hoki tona koa e pikitia e te tangata ke.

11

Ka whakangaromia te whare o te hunga kino: ka tupu ia te teneti o te hunga tika.

12

He huarahi ano tera e tika ana ki ta te tangata titiro, ko tona mutunga ia ko nga huarahi ki te mate.

13

Ahakoia e kata ana, e mamae ana te ngakau; a, ko te mutunga o te koa, he pouri.

14

Ko te tangata i te ngakau tahuri ke, ka makona i ona ara ake: a ko te tangata pai ka makona i tana ake ano.

15

Ko ta te kuware he whakapono ki nga kupu katoa; tena ko te tangata tupato, ka ata titiro ki tana hikoi.

- 16 E wehi ana te tangata whakaaro nui, ka neke atu i te kino; ko te kuware ia ka whakahi, ka tohe.
- 17 Ko te tangata riri wawe ka mahi i te wairangi; ka kinongia ano hoki te tangata i nga rauhanga kino.
- 18 He wairangi te whakarereanga iho mo nga kuware; ko te tangata tupato ia ka karaunatia ki te matauranga.
- 19 E piko ana te hunga kino ki te aroaro o te hunga pai; a ko te hunga he ki nga kuwaha o te tangata tika.
- 20 E kinongia ana te rawakore e tona hoa ake nei ano; he tokomaha ia nga tangata e aroha ana ki te tangata taonga.
- 21 Ko te tangata e whakahawe ana ki tona hoa, e hara ana; ko te tangata ia e atawhai ana ki nga rawakore, ka hari.
- 22 He teka ianei e kotiti ke ana nga kaiwhakatakoto i te kino? He atawhai ia, he pono, kei nga kaihanga i te pai.
- 23 He hua to nga mauuitanga katoa; tena ko te korero o nga ngutu e ahu ana ki te rawakore.
- 24 Hei karauna mo nga whakaaro nui o ratou taonga; ko te wairangi ia o nga kuware, he wairangi kau.
- 25 Ka ora nga wairua i te kaiwhakaatu pono: ko te tangata korero teka ia e mea ana kia tinihanga.
- 26 U tonu, kaha tonu te whakaaro ina wehi ki a Ihowa; ka whai rerenga atu ano hoki ana tamariki.
- 27 He puna ora te wehi ki a Ihowa, e mahue ai nga reti o te mate.
- 28 Ma te nui o te iwi ka whai honore ai te kingi; ma te kore o te iwi ka taka ai te rangatira.
- 29 He matauranga nui to te tangata manawanui; ko te tangata riri wawe ia, e whakaneke ake ana ia i te wairangi.
- 30 He ora ki nga kikokiko te ngakau ora; ko te hae ia, he pirau ki nga wheua.
- 31 Ko te tangata e tukino ana i te ware, he tawai tana ki tona Kaihanga; ko te tangata ia e atawhai ana i te rawakore, e whakahonore ana i a ia.
- 32 E uakina iho ana te tangata kino i runga i tona he; ko te tangata tika ia ka whai tumanakohanga i tona matenga.
- 33 Ka noho te whakaaro nui ki te ngakau o te tangata matau; engari ko te mea kei te wahi ki roto o nga kuware e whakaaturia ana.

34 Ma te tika ka kake ai te iwi; ma te hara ia ka ingoa kino ai nga iwi.

35 Ka manako te kingi ki te pononga mahara; a ka riri ki te tangata i takea ai te whakama.

## Chapter 15

1 Ma te kupu ngawari e kaupare te riri; ma te kupu taimaha ia e whakaoho te riri.

2 Ko te arero o te tangata whakaaro nui e whakahua tika ana i te matauranga: e whakapuaki ana ia te mangai o nga kuware i te wairangi.

3 Kei nga wahi katoa nga kanohi o Ihowa, e titiro ana ki te hunga kino, ki te hunga pai.

4 Ko te arero reka he rakau no te ora; tena ki te wanoke a roto he wawahi wairua.

5 E whakahawe ana te wairangi ki te papaki a tona papa; ko te tangata ia e mahara ana ki te ako ka mohio ki te tupato.

6 He nui te taonga kei te whare o te tangata tika; he raruraru ia kei roto i nga mea hua ki te tangata kino.

7 E ruia ana te matauranga e nga ngutu o nga whakaaro nui: kahore ia he pena a te ngakau o nga kuware.

8 He mea whakarihariha ki a Ihowa te whakahere a te hunga kino: engari e manako ana ia ki te inoi a te hunga tika.

9 He mea whakarihariha ki a Ihowa te huarahi o te tangata kino: ko te tangata ia e whai ana i te tika tana e aroha ai.

10 He kino te papaki ki te tangata e whakarere ana i te ara; a, ko te tangata e kino ana ki te ako, ka mate.

11 Kei te aroaro o Ihowa te reinga me te whakangaromanga; engari rawa hoki nga ngakau o nga tama a te tangata.

12 E kore te tangata whakahi e aroha ki te kaipapaki; e kore hoki e haere ki te hunga whakaaro nui.

13 Ma te koa o te ngakau ka pai ai te mata: ma te pouri ia o te ngakau ka maru ai te wairua.

14 E rapu ana te ngakau mohio i te matauranga; ko te kuware ia ta te mangai o nga wairangi e kai ai.

15 He kino nga ra katoa o te hunga pouri; he hakari tonu ta te tangata i te ngakau marama.

16 He pai ke te iti i kinakitia ki te wehi ki a Ihowa, i te nui taonga i kinakitia ki te raruraru.

17 He pai ake te tina puwha ko te aroha hei kinaki, i te kau whangai e kinakitia ana ki te mauahara.

18 He whakaoho tautohe ta te tangata pukuriri: he pehi pakanga ia ta te tangata manawanui.

19 Ko te ara o te tangata mangere, ano he taiepa tataramoa; he ara nui ia to te tangata tika.

20 He tama whakaaro nui, ka koa te papa: tena ko te tama kuware, he whakahaweana ki tona whaea.

21 Ki te tangata maharakore he mea whakahari te wairangi; he tika ia te haere a te tangata matau.

22 Ki te kahore he runanga, ka pororaru nga tikanga: ma te tokomaha ia o nga kaiwhakatakoto whakaaro ka mau ai.

23 Kei ta tona mangai i whakahoki ai he koa mo te tangata: ko te kupu i te wa i tika ai, ano te pai!

24 Ki te tangata whakaaro nui e ahu whakarunga ana te ara ki te ora, he mea kia mahue ai i a ia te reinga o raro.

25 Ka hutia ake e Ihowa te whare o te tangata whakakake: engari ka whakapumautia e ia te rohe o te pouaru.

26 He mea whakarihariha ki a Ihowa nga whakaaro nanakia; he mea kohakore ia nga kupu ahuaereka.

27 Ko te tangata apo taonga, raruraru ana i a ia tona whare; ka ora ia te tangata e kino ana ki nga mea homai noa.

28 Ko te ngakau o te tangata tika e ata whakaaro ana ki te kupu hei whakahokinga; ko te mangai ia o te tangata kino e tahoro ana i nga mea kikino.

29 E matara ana a Ihowa i te hunga kino: otii e rongoa ana ia ki te inoi a te hunga tika.

30 Ma te marama o nga kanohi ka koa ai te ngakau: a ma te rongoa pai ka momona ai nga wheua.

31 Ko te taringa e whakarongo ana ki te whakatupato e ora ai, ka noho i waenga i te hunga whakaaro nui.

32 Ko te tangata e whakakahore ana ki te papaki, e whakahaweana ki tona wairua; engari ko te tangata e rongoa ana ki te ako, ka whiwhi ki te ngakau mahara.

33

Ko te wehi ki a Ihowa te ako o te whakaaro nui; ko te ngakau whakaiti hoki e haere ana i mua i te honore.

## Chapter 16

1

Ko nga whakatakataka a te ngakau na te tangata; engari ko te kupu whakahoki a te arero na Ihowa.

2

Ko nga ara katoa o te tangata he ma ki ona ake kanohi; ko Ihowa ia ki te pauna i nga wairua.

3

Utaina au mahi ki runga ki a Ihowa, a ka whakapumautia ou whakaaro.

4

He mea hanga na Ihowa nga mea katoa mo tona tutukitanga, mo tona: ae ra, ko te tangata kino hoki mo te ra o te kino.

5

He mea whakaritariha na Ihowa te hunga ngakau whakakake katoa; ahakoa pupuri te ringa ki te ringa, e kore ia e kore te whiua.

6

Ko te mahi tohu tangata me te pono hei pure mo te kino; ma te wehi hoki ki a Ihowa ka mawehe atu ai te tangata i te kino.

7

Ki te pai a Ihowa ki nga ara o te tangata, ka meinga e ia ona hoariri nei ano kia mau te rongo ki a ia.

8

He pai ake te mea iti i runga i te tika, i nga hua maha ki te kahore he tika.

9

Ko te ngakau o te tangata hei whakaaro i tona ara; ko Ihowa ia hei whakatika i tona hikoi.

10

He kupu atua kei nga ngutu o te kingi; e kore tona mangai e poka ke ina whakawa.

11

Ko te taimaha tika, ko te pauna tika, na Ihowa; he mahi nana nga kohatu katoa o te putea.

12

He mea whakaritariha ki nga kingi te mahi i te kino; na te tika hoki i u ai te torona.

13

He mea ahuaureka ki nga kingi nga ngutu tika: e aroha ana hoki ratou ki te tangata e korero tika ana.

14

Ko te riri o te kingi ano he karere mo te mate: engari ka whakamarietia e te tangata whakaaro

15

nui. He ora kei te marama o te mata o te kingi: a ko tana manako he rite ki te kapua o to muri ua.

16

Ko te whiwhi ki te whakaaro nui, ano te pai! pai atu i te whiwhi ki te koura; ko te whiwhi hoki ki te matauranga te mea e hiahiaitia nuitia atu i te hiriwa.



17

Ko te huanui o te hunga tika he mawehe atu i te kino: ko te tangata e whai whakaaro ana ki tona ara, ka mau tona wairua.

18

Haere ai te whakakake i mua o te whakangaromanga, te wairua whakapehapeha i mua i te hinganga.

19

Ko te ngakau whakaiti i waenga i te hunga rawakore, pai atu i te uru ki te tuwahanga taonga a te hunga whakakake.

20

Ko te tangata e tahuri ana ki te kupu, ka kite i te pai: a ko te tangata e whakawhirinaki ana ki a Ihowa, ka hari.

21

Ka kiia te whakaaro nui he matau; ma te reka hoki o nga ngutu ka neke ai te mohio.

22

Ko te matauranga te puna o te ora mo te tangata i whiwhi ki tera; ko te ako ia mo te hunga wairangi ko to ratou wairangi ano.

23

Ma te ngakau o te tangata whakaaro nui e tohutohu tona mangai, e apiti hoki he kupu mohio ki ona ngutu.

24

Ko nga kupu matareka ano kei te honikoma, he reka ki te wairua, he rongoa ki nga wheua.

25

Tera he ara e tika ana ki te titiro a te tangata; ko tona mutunga ia ko nga ara ki te mate.

26

Ko te hiahia o te tangata e mahi ana, e mahi ana mona; no te mea e akiakina ana ia e tona mangai.

27

E whakatakoto ana te tangata tikangakore i te kino, a kei ona ngutu ano he ahi e ka ana.

28

Ko ta te tangata whanoke he titaritari i te raruraru; ko ta te tangata kawekawe korero he wehewehe i nga hoa tupu.

29

Whakawai ai te tangata nanakia i tona hoa, kawea ai i a ia ki te huarahi kahore i pai. 30 Ko te tangata e whakamoe ana i ona kanohi, e mea ana kia whakaaroa ai e ia nga mea whanoke; ko te tangata e kokopi ana i ona ngutu e whakatutuki ana i te kino.

31

He karauna kororia te mahunga hina, e ka kitea i runga i te ara o te tika.

32

Engari rawa te tangata manawanui i te tangata kaha, te tangata e pehia ana e ia tona wairua i te tangata i horo ai te pa.

33

E maka ana te rota ki roto ki te kokorutanga o te kakahu; kei a Ihowa ia te tikanga katoa.

## Chapter 17

1

Ko te maramara kai, ko te mea maroke me te ata noho hei kinaki, pai atu i te whare ki i nga hakari a te nganagare.

2

Hei rangatira te pononga mahara mo te tama i whakama ai; ka whai wahi ano ia i roto i to nga teina.

3

Ko te oko tahu para mo te hiriwa, ko te oumu mo te koura; ko Ihowa ia hei whakamatau mo nga ngakau.

4

Ko te kaimahi i te he ka tahuri ki ta te ngutu kino; a ka whai taringa te teka ki ta te arero whanoke.

5

Ko te taunu ki te rawakore he tawai ki tona Kaihanga: ko te tangata e koa ana ki nga aitua, e kore e kore te whiua.

6

Hei karauna mo nga koroheke nga tamariki a nga tamariki: na, ko te kororia o nga tamariki ko o ratou matua.

7

E kore te reo rangatira e tau ki te kuware: hore rawa ano hoki te ngutu teka ki te rangatira.

8

Ko te tangata i te mea homai noa, he kohatu whakapaipai tera ki tana titiro; tona tahuritanga ake ki hea, ki hea, ka whiwhi ki te pai.

9

Ko te tangata e hipoki ana i te he, e whai ana i te aroha; tena ko te tangata kororerero, e wehewehe ana i nga hoa tupu.

10

Ko te ngotonga o te kupu riri ki roto ki te tangata matau, nui atu i to nga whiu kotahi rau ki roto ki te whakaarokore.

11

He whakakeke kau ta te tangata kino e whai ai; no reira ka tukua atu he karere nanakia ki a ia.

12

Kia tutaki ki te tangata te pea kua tangohia ana kua; pai atu i te whakaarokore i a ia e wairangi ana.

13

Ko te tangata e homai ana i te kino hei utu mo te pai, e kore te kino e neke atu i tona whare.

14

Ko te timatanga o te totohe i rite ki te tangata e tuku ana i te wai kia rere: na reira waiho atu te totohe i te mea kiano i oho te ngangare.

15

Ko te tangata e whakatika ana i ta te tangata kino, me ia e whakahe ana i ta te tangata tika, he rite tahi taua rua, he mea whakarihariha ki a Ihowa.

16

Hei aha te utu i te ringa o te kuware, hei hoko i te whakaaro nui, kahore nei hoki ona matauranga?

17

E aroha ana te hoa i nga wa katoa; na, ko te teina, ko te tuakana, i whanau tera mo nga aitua.

18

Ko ta te tangata ngakaukore he papaki ringa; kua waiho hei whakakapi turanga i te aroaro o tona hoa.

19

Ko te tangata e aroha ana ki te nganagare e aroha ana ki te kino; ko te tangata e whakarewa ana i tona kuwaha e rapu ana i te whakangaromanga.

20

Ko te ngakau parori ke e kore e kite i te pai; ko te tangata he whanoke tona arero ka taka ki te kino.

21

Ka whanau he whakaarokore ma tetahi tangata, hei whakapouri tera mona: e kore ano hoki e koa te papa o te poauau.

22

He rongoa pai te ngakau koa; ki te maru ia te wairua, ka maroke nga wheua.

23

E tango ana te tangata kino i te mea whakapati i te uma, hei whakapeau ke i nga ara o te whakarite whakawa.

24

Kei te aroaro o te tangata matau nga whakaaro nui; kei nga pito ia o te whenua nga kanohi o te whakaarokore.

25

Ko te tamaiti whakaarokore he mea whakapouri i tona papa, he mea whakakawa i te ngakau o tona whaea.

26

Ehara ano hoki i te mea pai kia whiua te tangata tika, kia patua ranei nga rangatira mo te tika.

27

He matauranga to te tangata e tohu ana i ana kupu: a he whakaaro to te tangata i te wairua

manawanui. <sup>28</sup> Ko te wairangi nei ano, ki te whakarongo puku, ka kiia he whakaaro nui: ki te kokopi ona ngutu, ka kiia ia he tupato.

## Chapter 18

1

Ko te tangata tu ke, e whai ana i ta tona ake hiahia, e ngangau ana ki nga whakaaro totika katoa.

2

Kahore o te whakaarokore ahuaireka ki te matauranga; engari kia whakakitea e ia tona ngakau.

3

I te taenga mai o te tangata kino ka tae mai ano te whakahawea, me te tawai hei hoa mo te whakama.

4

He wai hohonu nga kupu a te mangai o te tangata; he awa e rere ana te puna o te whakaaro nui.

- 5 Ehara i te mea pai te whakapai ki te kanohi o te tangata kino, te whakapeau ke ranei i ta te tangata tika ina whakawa.
- 6 E uru ana nga ngutu o te whakaarokore ki te totohe, e karanga ana tona mangai ki nga whiu.
- 7 Hei hunga ano mona te mangai o te whakaarokore; a ko ona ngutu hei rore mo tona wairua.
- 8 Ano he kai reka nga kupu a te kawae korero; tae tonu iho ki nga wahi o roto rawa o te kopu.
- 9 Ko te tangata ano hoki e mangere ana ki tana mahi, hei teina ia ki te tangata maumau.
- 10 Hei pourewa kaha te ingoa o Ihowa; rere ana te tangata tika ki reira, a ora ake.
- 11 Ko nga rawa o te tangata taonga hei pa kaha mona, hei pa tiketike ki tona whakaaro.
- 12 I mua ake o te whakangaromanga ka whakakake te ngakau o te tangata; i mua ake ano hoki o te honore ko te ngakau papaku.
- 13 Ko te tangata e whakahoki kupu ana i te mea kahore ano ia i rongonoa, he mahi wairangi tera nana, he hanga whakama.
- 14 E whakamanawanui te wairua o te tangata ki tona mate; tena ko te wairua maru, ko wai e kaha ki tera?
- 15 Ka whiwhi te ngakau o te tangata matau ki te mohio; e rapu ana hoki te taringa o nga whakaaro nui ki te mohio.
- 16 Ma te mea tuku noa a te tangata ka watea ai he wahi mona, ka kawea hoki ia e tera ki te aroaro o nga tangata nunui.
- 17 Ko te tangata nana te kupu tuatahi i te whakawa me te mea kei a ia te tika; na ka haere mai tona hoa, kei te rapu i te tikanga o tana.
- 18 Ma te rota e mutu ai nga tautohe, a ko tera hei tauarai i waenganui o te hunga kaha.
- 19 Ko te tuakana, teina ranei, i whakatakariritia, pakeke atu i te pa kaha: a ko aua tu ngangare me he tutaki tata no te whare rangatira.
- 20 Ka ki te kopu o te tangata i nga hua o tona mangai, ka makona ia i nga hua o ona ngutu.
- 21 Ko te mate, ko te ora kei te arero: ko te hunga e aroha ana ki tera ka kai i ona hua.
- 22 Ko te tangata kua kite i te wahine mana, kua kite i te mea pai, kua whiwhi hoki ki ta Ihowa whakapai.
- 23 He inoi ta te rawakore hanga; he taikaha ia te whakahoki a te tangata taonga.

24

Ko te tangata tini nga hoa aroha e whai ana i te he mona; tera ano ia te hoa aroha, nui atu i to te tuakana, i to te teina, tona piri mai.

## Chapter 19

1

He pai ke te rawakore e haere ana i runga i tona tapatahi, i te ngutu whanoke, i te whakaarokore.

2

Na ehara hoki i te mea pai kia kua he matauranga mo te wairua; a, ko te tangata e hohoro ana ona waewae, ka hara.

3

E whakaparoritia ana te ara o te tangata e tona wairangi: e amuamu ana hoki tona ngakau ki a Ihowa.

4

Ma te rawa ka tokomaha atu ai nga hoa aroha: e wehea atu ana ia te rawakore i tona hoa aroha.

5

E kore te kaiwhakapae teka e whakaharakoretia; e kore hoki e mawhiti te tangata korero teka.

6

He tokomaha e whai kia manakohia e te tangata ringa mahora; he hoa aroha hoki nga tangata

katoa no te tangata e homai mea ana. <sup>7</sup> E kino ana nga teina katoa o te rawakore ki a ia: na nui ke atu te mataratanga atu o ona hoa i a ia! Whai noa ana kupu i a ratou, heoi kua riro ratou.

8

Ko te tangata e mea ana ki te whakaaro nui mona, e aroha ana ki tona wairua ake: ko te tangata e pupuri ana i te matauranga, ka tutaki ki te pai.

9

E kore te kaiwhakapae teka e whakaharakoretia; ka huna hoki te tangata korero teka.

10

E kore e tau te noho rangatira ki te whakaarokore; he makere rawa te noho ko te pononga hei rangatira mo nga rangatira.

11

Ko te ngarahu tupato ka pupuri i tona riri; a hei whakakororia mona te whakarere noa iho i te he.

12

Ko te riri o te kingi rite tonu ki te hamama o te raiona; ko tana manako ia ano he tomairangi i runga i te tarutaru.

13

He aitua mo tona papa te tamaiti whakaarokore: a, ko nga ngangare a te wahine, me te maturuturu puputu tonu.

14

He whare, he taonga i tuku iho i nga matua: ko te hoa wahine mahara i a Ihowa.

15

Ma te mangere e mea kia moe i te moe reka; ka matekai hoki te wairua o te rora.

16

Ko te tangata e pupuri ana i te whakahau e pupuri ana i tona wairua: engari ko te tangata kore whakaaro ki ona ara ka mate.

17

Ko te tangata e ohaoha ana ki te rawakore e whakatarewa moni ana ki a Ihowa, a ka utua ki a ia tana mahi atawhai.

18

Pakia tau tama, i te mea kua whai manakohanga; kua hoki tou ngakau e whai tonu i te whakangaromanga mona.

19

Ko te tangatariri nui mana e waha tona he: ki te whakaora hoki koe i a ia, ka waiho tonu tena hei mahi mau.

20

Whakarongo ki te kupu tohutohu, tahuri mai hoki ki te ako, kia whai whakaaro ai koe i tou mutunga iho.

21

He maha nga whakaaro i roto i te ngakau o te tangata; e tu tonu ana ia ta Ihowa tikanga.

22

Ko te hiahia o te tangata te aronga o tana atawhai: engari te rawakore i te tangata teka.

23

Ko te wehi ki a Ihowa te ara ki te ora: a, ko te tangata kei a ia tera, ka noho makona; e kore tetahi he e pa ki a ia.

24

E kuhua ana e te mangere tona ringa ki te rihi, e kore rawa nei e whakahokia e ia ki tona mangai.

25

Pakia te tangata whakahi, a ka tupato nga kuware: akona hoki te tangata mahara, a ka mohio ia ki te matauranga.

26

Ko te tangata e pahua ana i tona papa, e pei atu ana hoki i tona whaea, he tama ia e whakama ai, e ingoa kino ai hoki.

27

Kati, e taku tama, te whakarongo ki te ako hei mea kau e kotiti atu ai i nga kupu o te matauranga.

28

E whakahi ana te kaiwhakaatu he ki te whakawa; e horomia ana hoki te kino e te mangai o te hunga kino.

29

Kua rite he whakawa mo nga whakahi, he whiu mo te tuara o nga whakaarokore.

## Chapter 20

1

Ko ta te waina he whakahi, ko ta te wai kaha he ngangau: a, ko te hunga katoa e whakapohehetia ana e tera, kahore o ratou whakaaro nui.

2

Ano he raiona e hamama ana te wehi o te kingi: ko te tangata e whakaoho ana i a ia kia riri, e hara ana ki tona wairua ake.

3

He whakahonore mo te tangata te noho watea mai i te ngangare: engari ko nga wairangi he kowhetewhete tonu.

4

Kahore te mangere e parau, he mea ki te hotoke; no reira ka pakiki kai mana i te kotinga witi, a kahore e whiwhi.

5

He wai hohonu te whakaaro i roto i te ngakau o te tangata; e utuhia ano ia e te tangata matau.

6

Ko ta te tini o te tangata he kauwhau i tona atawhai ake; ko wai ia e kite i te tangata pono?

7

Ko te tangata tika, e haere ana i runga i tona tapatahi, ka manaakitia ana tamariki i muri i a ia.

8

Ko te kingi e noho ana i runga i te torona whakawa, titaritaria ana e ona kanohi nga he katoa.

9

Ko wai e mea, Kua ma i ahau toku ngakau, kua tahia atu oku hara?

10

Ko nga pauna huhua, ko nga mehua huhua, he rite tahi taua rua, he mea whakarihariha anake ki a Ihowa.

11

He tamariki nei ano ka mohiotia ki ana hanga, he ma ranei, he tika ranei tana mahi.

12

Ko te taringa rongo, ko te kanohi titiro, na Ihowa raua ngatahi i hanga.

13

Kaua e matenuitia te moe, kei rawakoretia koe; titiro ou kanohi, a ka makona koe i te taro.

14

Ehara ehara, e ai ta te kaihoko: tona haerenga atu ia, kei te whakamanamana.

15

He koura tena me te tini o te rupi; engari he taonga utu nui nga ngutu o te matauranga.

16

Tangohia te kakahu o te kaiwhakakapi mo te tangata ke; puritia hoki te tangata i taunahatia hei whakakapi mo nga tangata ke.

17

He reka ki te tangata te taro o te teka; muri iho ka ki tona mangai i te kirikiri.

18

Ma te runanga ka u ai nga whakaaro; kia pai hoki te ngarahu ina anga ki te whawhai.

19

Ko te tangata e kopikopiko ana ki te kawekawe korero, ka whakina e ia nga korero ngaro: na reira kaua e raweke atu ki te tangata ngutu hamama.

20

Ko te tangata e kanga ana i tona papa, i tona whaea, ka tineia tona rama i roto i te pouri kerekere.

21

I te timatanga e hohoro mai pea te taonga; e kore ia tona mutunga e whakapaingia.

22

Kaua e mea, Ka utua e ahau te kino: taria ta Ihowa, a kei a ia he oranga mou.

23

He mea whakarihariha ki a Ihowa nga taimaha rere ke; a e kore hoki te pauna tinihanga e pai.

24

Na Ihowa nga haereerenga o te tangata: na ma te aha te tangata ka matau ai ki tona ara?

25

Hei rore ki te tangata te oho noa ake ki te mea, He tapu! a, i muri i nga ki taurangi, kia uiui.

26

Ka titaritaria e te kingi whakaaro nui te hunga kino, a ka hurihia hoki e ia te wira patu witi ki runga ki a ratou.

27

He rama na Ihowa te manawa o te tangata, e rapu ana i nga mea katoa i roto rawa i te kopu.

28

Hei kaitiaki mo te kingi te atawhai me te pono; e tautokona ake ana hoki tona torona e te atawhai.

29

Ko te kororia o nga taitama ko to ratou kaha: a, ko te ataahua o nga kaumatua ko te upoko hina.

30

E tahia atu ana te kino e nga karawarawa o te patunga; a e tae rawa ana nga whiu ki nga wahi o roto rawa o te kopu.

## Chapter 21

1

Kei roto te ngakau o te kingi i te ringa o Ihowa ano he awa rerenga wai; e whakaangahia ana e ia ki nga wahi katoa e pai ai ia.

2

Ko nga ara katoa o te tangata, tika kau ki ona kanohi ake: ko Ihowa ia hei pauna i nga ngakau.

3

Ko te mahi i te tika, i te whakawa, ki ta Ihowa, pai atu i te patunga tapu.

4

He kanohi whakakake, he ngakau whakapehapeha, a ko te rama hoki o te hunga kino, he hara kau.

5

Ko nga whakaaro o te tangata uaua e ahua anake ana ki te hua o te taonga: ko te hunga takare katoa ia e whawhai kau ana ki te muhore.

6

E rite ana ta te arero teka ami i te taonga ki te mamaoa e aia noatia ana; ko te hunga e rapu ana i era e rapu ana i te mate.

7

Ma te pahua a te hunga kino e tahi atu ratou; mo ratou kahore e pai ki te whakawa.



8

He ara tino kopikopiko to te tangata e waha ana i te hara: tena ko te tangata ma, he tika tana mahi.

9

He pai ke te noho i te kokonga o te tuanui, i te noho tahi me te wahine ngangare i roto i te whare mahorahora.

10

Ko ta te wairua o te tangata kino he hiahia ki te kino; e kore ona kanohi e manako ki tona hoa.

11

Ki te whiua te tangata whakahi, ka whai whakaaro te kuware: a, ki te whakaakona te tangata whakaaro nui, ka whiwhi ia ki te matauranga.

12

Ka ata whakaaroa e te tangata tika te whare o te tangata kino; te peheatanga e whakataka ai te hunga kino ki te mate mo ratou.

13

Ko te tangata e puru ana i ona taringa ki te karanga a te rawakore, tera hoki ia e karanga, heoi e kore e whakarangona.

14

Ma te mea homai puku ka marie ai te riri, ma te moni whakapati hoki i roto i te uma ka marie ai te aritarita kaha.

15

He mahi koa na te tangata tika te whakawa; mo nga kaimahi ia i te kino, ko te whakangaromanga.

16

Ko te tangata e kotiti ke ana i te huarahi o te mahara, ka noho ia i te whakaminenga o nga tupapaku.

17

Ko te tangata matenui ki nga ahuaureka, ka rawakore: a, ko te tangata e matenui ana ki te waina, ki te hinu, e kore e whai taonga.

18

Hei utu te tangata kino mo te tangata tika; a ka haere mai te tangata kopeka hei whakakapi mo te tangata tu tika.

19

He pai ke te noho i te koraha, i te noho tahi me te wahine tohetohe, wahine pukukino.

20

Kei te nohoanga o te tangata whakaaro nui te taonga momohanga me te hinu; heoi maumauria ake e te wairangi.

21

Ko te tangata e whai ana i te tika, i te atawhai, ka whiwhi ki te ora, ki te tika, ki te honore.

22

Ka pikitia e te tangata whakaaro nui te pa o nga marohirohi, ka taka hoki i a ia te kaha i whakawhirinaki ai ratou.

23

Ko te tangata e tiaki ana i tona mangai, i tona arero, e tiaki ana i tona wairua kei raru.

24

Ko te tangata whakakake, whakapehapeha, ko te tangata whakahi tona ingoa, e mahi ana ia i runga i te whakahirahira o tona whakamanamana.

- 25 Ka mate te tangata mangere i tona hiahia ano; e kore hoki ona ringa e pai ki te mahi. 26 Tera te hanga he kaiapo tonu a pau noa te ra: ko ta te tangata tika ia he homai, kahore hoki ana kaiponu.
- 27 He mea whakarihariha te whakahere a te tangata kino; tera noa ake ina he te whakaaro i kawea mai ai e ia.
- 28 Ka mate te kaiwhakaatu teka; na, ko te tangata whakarongo, ka korero, kahore he kaiwhakahe.
- 29 Ka whakamaro te tangata kino i tona mata: tena ko te tangata tika, ka whakapai i ona ara.
- 30 I to Ihowa aroaro kahore he whakaaro nui, kahore he matauranga, kahore he kupu mohio,
- 31 e tu. Kua rite noa ake he hoiho mo te ra o te whawhai; kei a Ihowa ia te whakaoranga.

## Chapter 22

- 1 Engari te ingoa pai e whiriwhiria rawatia i nga taonga nui, me te manakohanga aroha i te hiriwa, i te koura.
- 2 Ka tutataki te tangata taonga raua ko te rawakore; ko Ihowa te kaihanganga o ratou katoa.
- 3 Ko te tangata tupato, ka kitea atu e ia te he, ka huna i a ia; ko nga kuware, haere tonu atu, mamae tonu atu.
- 4 Ko te hua o te mahaki, a ko te wehi ki a Ihowa, he taonga, he honore, he ora.
- 5 He tataramoa, he mahanga kei te ara o te whanoke; ko te tangata ia e tiaki ana i tona wairua, ka matara atu i ena.
- 6 Whakatupuria ake te tamaiti i te ara e haere ai ia, a, ka kaumatua, e kore e mahue i a ia.
- 7 E whakatakoto tikanga ana te tangata taonga mo nga rawakore; a, ko te tangata i te nama, hei pononga ia ma te tangata nana i whakatarewa mai.
- 8 Ko te kairui o te kino, ka kokoti i te he: a ka kahore noa iho te patu o tona riri.
- 9 Ko te kanohi ohaoha, ka manaakitia tera; e hoatu ana hoki e ia tetahi wahi o tana taro ma te rawakore.
- 10 Peia atu te tangata whakahi, a ka riro te ngangare; ka mutu ano hoki te totohe me te whakahawe.
- 11 Ko te tangata e matenui ana ki te ngakau ma, ko te kingi he hoa mona, mo te ahuareka o ona ngutu.

- 12 Ma nga kanohi o Ihowa e tiaki te tangata whai matauranga, e whakataka ana hoki e ia nga kupu a te tangata kopeka.
- 13 E mea ana te mangere, He raiona kei waho: ka whakamatea ahau ki nga huarahi.
- 14 He poka hohonu te mangai o nga wahine ke: ka taka ki roto ta Ihowa tangata e whakarihariha ai.
- 15 Paihere rawa te wairangi ki roto ki te ngakau o te tamaiti; otiia ma te rakau o te whiu e pei kia matara atu i a ia.
- 16 Ko te tangata e tukino ana i te rawakore kia maha atu ai he taonga mana, me te tangata hoki e hoatu mea ana ki te tangata taonga, ka tutuki raua ki te muhore kau.
- 17 Anga mai tou taringa, whakarongo mai hoki ki nga kupu a te hunga whakaaro nui, kia tahuri mai hoki tou ngakau ki toku matauranga.
- 18 He mea ahareka hoki, mehemea ka puritia e koe i roto i tou kopu, ki te u ngatahi raua ki runga ki ou ngutu;
- 19 Kia okioki ai koe ki a Ihowa, koia i whakakitea ai e ahau aua mea ki a koe i tenei ra, ki a koe na ano.
- 20 He teka ianei hira rawa nga mea kua tuhituhia atu nei e ahau ki a koe, he kupu ako, he kupu mohio;
- 21 Kia mohio ai koe ki te tuturutanga o nga kupu o te pono, kia whakahokia ai e koe he kupu pono ki te hunga e ngare ana i a koe?
- 22 Kauga e pahuatia te rawakore, no te mea he rawakore ia, kauga hoki e whakatupuria kinotia te tangata iti i te kuwaha:
- 23 No te mea ka tohea e Ihowa ta ratou tohe, ka pahuatia ano hoki e ia te wairua o te hunga e pahua ana i a ratou.
- 24 Kauga e whakahoa ki te tangata pukuriri; kei haere tahi hoki koe i te tangata aritarita;
- 25 Kei akona e koe ona ara, a ka riro i a koe he mahanga mo tou wairua.
- 26 Kei uru koe ki roto ki te hunga papaki ringa, ki nga kaiwhakakapi turanga ranei mo te moni tarewa:
- 27 Ki te kahore au mea hei utu, hei aha i tangohia ai e ia tou moenga i raro i a koe?
- 28 Kauga e whakanekehia atu te rohe tawhito i whakatakotoria e ou matua.
- 29 Kei te kite ranei koe i tetahi tangata e uaua ana ki tana mahi? ka tu ia ki te aroaro o nga kingi; e kore ia e tu ki te aroaro o nga ware.

## Chapter 23

<sup>1</sup> Ki te noho tahi korua ko te rangatira ki te kai, ata whakaaroa marietia tera i tou aroaro:  
<sup>2</sup> Whakapakia he maripi ki tou korokoro, ki te mea he tangata kakai koe. <sup>3</sup> Kua e hiahia ki ana  
 mea reka: he kai tinihanga hoki era.  
<sup>4</sup> Kua e taruke ki te mea taonga: kati tau mea ki tou matauranga. <sup>5</sup> E anga mai ranei ou kanohi  
 ki taua mea korekore nei? He pono hoki ka whai parirau te taonga, koia ano kei te ekara, rere ana  
 whaka te rangi.  
<sup>6</sup> Kua e kainga te kai a te tangata kanohi kino, kei minamina hoki koe ki ana mea reka. <sup>7</sup> Ko  
 tana hoki e mea ai i roto i a ia, pera tonu ia: E kai, e inu; koia tana kupu ki a koe; kahore ia ona  
 ngakau ki a koe. <sup>8</sup> Ko te kongakonga i kainga e koe, ka ruakina e koe, ka maumauria ano hoki au  
 kupu reka.  
<sup>9</sup> Kua e korero ki nga taringa o te kuware; ka whakahawea hoki ia ki te whakaaro nui o au  
 kupu.  
<sup>10</sup> Kei whakanekhehia e koe te rohe tawhito; kei haere koe ki nga mara a te pani: <sup>11</sup> No te mea  
 he kaha to ratou kaiwhakaora; ka tohea e ia ta ratou tohe ki a koe.  
<sup>12</sup> Anga atu tou ngakau ki te ako, me ou taringa ki nga kupu o te matauranga. <sup>13</sup> Kua e tohungia  
 te whiu ki te tamaiti: ki te patua hoki ia e koe ki te rakau, e kore ia e mate. <sup>14</sup> Tatatia ia e koe ki te  
 rakau, a ka whakaorangia e koe tona wairua i te reinga. <sup>15</sup> E taku tama, ki te whakaaro nui tou  
 ngakau, ka koa hoki toku ngakau, ae ra, toku nei ano: <sup>16</sup> Ae ra, ka hari oku whatumanawa, ina  
 korero ou ngutu i nga mea tika.  
<sup>17</sup> Kei hae tou ngakau ki te hunga hara; engari kia wehi koe ki a Ihowa, a pau noa te ra. <sup>18</sup> He  
 pono hoki tera ano he whakautu; e kore ano hoki tau i tumanako ai e hatepea atu.  
<sup>19</sup> Whakarongo ra, e taku tama, kia whai whakaaro hoki koe, a whakatikaia tou ngakau i te  
 ara. <sup>20</sup> Kei uru ki te hunga kakai waina; ki te hunga pukukai kikokiko: <sup>21</sup> No te mea ka tutuki tahi  
 te tangata inu raua ko te tangata kakai ki te rawakore; he tawhetawhe hoki te kakahu a te momoe  
 mo te tangata. <sup>22</sup> Whakarongo ki tou papa nana koe; kua hoki e whakahawea ki tou whaea ina  
 ruruhi ia. <sup>23</sup> Hokona te pono, kua hoki e whakawhitiwhitia; ae ra, te whakaaro nui, te ako hoki,  
 me te matauranga. <sup>24</sup> Nui atu hoki te koa o te papa o te tangata tika; a, ko te tangata e whanau he  
 tama whakaaro nui mana, ka hari ia ki a ia. <sup>25</sup> Kia hari tou papa raua ko tou whaea, ina, kia koa te  
 wahine i whanau ai koe. <sup>26</sup> E taku tama, homai tou ngakau ki ahau, kia manako ano hoki ou kanohi

27  
ki aku ara. No te mea he rua hohonu te wahine kairau; he poka kuiti te wahine ke. 28  
whanga ia ano he kaipahua, a ka whakatokomahatia e ia nga tangata poka ke.

29  
Ko wai e aue? Ko wai e tangi? Ko wai e totohe? Ko wai e ngangautia? Ko wai e maru, he  
mea takekore? Ko wai e whero tonu ona kanohi? 30  
Ko te hunga e noho roa ana ki te waina; ko te  
hunga e haere ana ki te rapu i te waina whakaranu. 31  
Kaua e titiro ki te waina i te mea e whero  
ana, ina puta tona kara i roto i te kapu, ina mania tona heke. 32  
Tona tukunga iho ano he nakahi e  
ngau ana, koia ano kei te wero a te neke. 33  
E kite hoki ou kanohi i nga mea rereke, a ka puta he  
kupu rereke i tou ngakau. 34  
Ae ra, ka rite koe ki te tangata e takoto ana i waenga moana, ki te  
tangata ranei e takoto ana i te tihi o te rewā. 35  
A ka mea koe, Patua ana ahau e ratou, a kihai ahau  
i mamae; tatatia ana ahau e ratou, a kihai ahau i mohio: a hea ahau ara ake ai? Ka rapua ano e ahau.

## Chapter 24

1  
Kei hae koe ki te hunga kino, kaua hoki e hiahia hei hoa mo ratou. 2  
Ko ta to ratou ngakau  
hoki e whakaaro ai, he tukino, ko ta o ratou ngutu e korero ai, he whanoke.

3  
Ma te whakaaro nui ka hanga ai te whare, a ma te matauranga ka u ai: 4  
Ma te mohio hoki  
ka ki ai nga ruma i nga taonga utu nui katoa, i nga mea ahuareka. 5  
He kaha te tangata whakaaro  
nui; ae, e whakanuia ana e te tangata mohio te kaha. 6  
Na kia pai te ngarahu ina anga koe ki te  
whawhai: kei te tokomaha hoki o nga kaiwhakatakoto whakaaro te ora.

7  
He tiketike rawa te whakaaro nui mo te wairangi: e kore e kuihi tona mangai i te kuwaha.

8  
Ko te tangata e whakaaro ana ki te kino, ka kiia he whanoke. 9  
He hara te whakaaro wairangi: he  
mea whakarihariha ano ki te tangata te tangata whakahi.

10  
Ki te ngoikore koe i te ra o te he, he iti tou kaha.

11  
Whakaorangia te hunga e kawea atu ana ki te mate, a puritia mai hoki e koe te hunga e meatia  
12  
ana kia whakamatea. Ki te mea koe, Nana, kihai tenei i mohiotia e matou: kahore ianei te kaipauna  
ngakau i te whakaaro ki tera? a, ko te kaitiaki o tou wairua, kahore ranei ia e mohio? e kore ranei  
e homai e ia ki te tangata kia rite ki tana mahi?

13 Kainga, e taku tama, te honi, he pai hoki; me te honikoma, he mea reka hoki ki tou mangai:

14 Ka mohio ai koe ki te whakaaro nui, he mea ki tou wairua: ki te kitea e koe, he tukunga iho ano tona, e kore hoki tau i tumanako ai e hatepea.

15 Kauga, e te tangata kino, e whanga ki te nohoanga o te tangata tika; kei tukino koe ki tona

16 takotoranga. E hinga ana hoki te tangata tika, e whitu hinganga, ka ara ake ano: ka whakataka ia te hunga kino e te he.

17 Kauga e harakoa ki te hinga tou hoariri, kauga hoki tou ngakau e hari ina taka ia: 18 Kei kite a Ihowa, a ka he ki tana titiro, a ka tahuri atu tona riri i a ia.

19 Kei mamae koe, he mea mo nga kaimahi i te kino, kei hae hoki ki te hunga kino. 20 Kahore hoki he mutunga pai ki te tangata kino; ka keto hoki te rama a te hunga kino.

21 E taku tama, e wehi ki a Ihowa, ki te kingi hoki: a, kauga e whakauru noa atu ki te hunga e

22 mea ana ki te whakaputa ke. No te mea ka puta tata te aitua mo ratou: a ko wai ka mohio ki te whakangaromanga o raua tokorua?

23 He whakatauki ano hoki enei na te hunga whakaaro nui. Ehara i te mea pai kia whakaaro ki

24 te kanohi tangata ina whakawa. Ko te tangata e mea ana ki te tangata kino, He tika koe; ka kanga

25 nga iwi ki a ia, ka whakarihariha nga tauwiwi ki a ia. Otiia ka koa nga ngakau o te hunga e riria

26 ai tona he, ka tau iho ano hoki te manaaki pai ki runga ki a ratou. Ka kihia e ia nga ngutu e whakahoki ana i nga kupu tika.

27 Meinga kia takoto pai tau mahi i waho, kia rite hoki hei meatanga mau i te mara; muri iho ka hanga i tou whare.

28 Kauga koe e tu hei kaiwhakaatu he mo tou hoa, i te mea kahore he take; a kauga e tinihanga

29 ki ou ngutu. Kauga e ki, Ka meatia ano e ahau ki a ia tana i mea ai ki ahau; ka rite ki ta te tangata mahi taku e whakahoki ai ki a ia.

30 I haere ahau i te taha o te mara a te mangere, i te taha hoki o te mara waina a te tangata

31 kahore ona mahara; Na, kua tupuria katoatia e te tataramoa, kapi tonu te mata o te mara i te

32 ongaonga, a ko to reira taiepa kohatu kua oti te wahi. Katahi ahau ka titiro, ka ata whakaaroaro:

33 ka kite ahau, a ka hopu mai hei ako moku. Kia iti ake nei te wahi e parangia ai, kia iti ake nei

34 te moe, kia iti ake te kotuituitanga o nga ringa ka moe ai: Ka pera te haerenga mai o tou muhore ano he kaipahua; o tou rawakore hoki ano he tangata mau patu.

## Chapter 25

1 He whakatauki ano enei na Horomona, he mea tuhi e nga tangata a Hetekia kingi o Hura.

2 Ko to te Atua whakakororia, he hunga mea; ko to nga kingi whakakororia he rapu mea. 3 Ko te rangi mo te tiketike, ko te whenua mo te hohonu, a ko te ngakau o nga kingi, te taea te rapu.

4 Tahia atu te para i te hiriwa, a ka puta mai he oko ma te kaitahi para: 5 Tangohia atu te tangata kino i te aroaro o te kingi, a ka u tona torona i runga i te tika.

6 Kei whakaputa i a koe ki mua i te aroaro o te kingi, kei tu hoki ki te wahi o nga metararahi.

7 He pai he hoki kia kiia mai ki a koe, Haere mai ki runga nei; i te mea kia whakahokia iho koe ki raro i te aroaro o te rangatira i kitea nei e ou kanohi.

8 Kei hohoro te haere ki te ngangare, kei kore e kitea e koe tau e mea ai i tona mutunga iho, ina meinga koe e tou hoa kia whakama. 9 Tohea tau tohe ki tou hoa tonu, a kua e whakina te mea

10 hunga a tetahi: Kei kohukohutia koe e te tangata i rongo, a kore ake tou ingoa kino e tahuri atu.

11 He kupu i tika te korero, ko tona rite kei nga a poro koura i roto i nga kete hiriwa. 12 He pera i te whakakai koura, i te whakapaipai koura parakore koia ano te ako a te whakaaro nui ki te taringa rongo.

13 Rite tonu ki te matao o te hukarere i te kotinga witi te karere pono ki ona kaingare; ka ora hoki i a ia te ngakau o ona ariki.

14 He pera i nga kapua me te hau uakore, koia ano te rite o te tangata e whakamanamana ana ki ana hakari horihori.

15 Ma te roa e whakamanawanui ana ka whakaae mai ai te kingi, a ma te arero ngawarika mangungu ai te wheua.

16 Kua kitea e koe he honi? Kainga ko te wahi e makona ai koe; kei ki rawa koe i taua mea, ka ruakina e koe.

17 Kia takitahi tou waewae ki te whare o tou hoa; kei hoha ia ki a koe, a ka kino ki a koe.

18 Ko te tangata e whakaatu teka ana mo tona hoa, he patu ia, he hoari, a he pere koi.

19 Ko te whakawhirinaki ki te tangata tinihanga i te wa o te raru, e rite ana ki te niho whati, ki te waewae kua takoki.

20 Ko te tangata e waiata ana ki te ngakau pouri, e rite ana ki te tangata e whakarere ana i te kakahu i te rangi maeke, ki te winika hoki i runga i te houra.

21 Ki te matekai tou hoariri whangaia ki te taro; ki te matewai whakainumia ki te wai; 22 Ka purangatia hoki e koe he waro kapura ki tona mahunga, a ka utua tau e Ihowa.

23 E mauria ana mai e te hauraro he ua: e peratia ana hoki e te arero ngautuara, he kanohi pukuriri.

24 He pai ke te noho i te kokonga o te tuanui, i te noho tahi me te wahine ngangare i roto i te whare mahorahora.

25 He rongopai no te whenua tawhiti, tona rite kei nga wai matao ki te wairua matewai.

26 Me te manawa whenua i takatakahia, me te puna i whakaparuparutia, koia ano te tangata tika e hinga ana i te aroaro o te tangata kino.

27 Ehara i te mea pai te kai nui i te honi; waihoki ko a te tangata rapu i to ratou ake kororia ehara i te kororia.

28 Ko te tangata e kore nei e pehi i tona wairua, e rite ana ki te pa kua pakaru, kahore ona taiepa.

## Chapter 26

1 He pera i te hukarere i te raumati, i te ua hoki i te kotinga witi, te kore e tau o te honore mo te wairangi.

2 He pera i te manu e rererere noa ana, i te waroa i ona rerenga te kanga pokanoa; e kore e whakatau.

3 He whiu mo te hoiho, he paraire mo te kaihe, a he rakau mo te tuara o nga wairangi.

4 Kei rite ki tona whakaarokore tau whakautu ki te wairangi, kei rite hoki a koe na ki a ia. 5 Kia rite ki tona whakaarokore tau whakautu ki te wairangi, kei mea ia he whakaaro nui ia.

6 Ko te tangata e tuku korero ana ma te ringa o te wairangi, e tapahi ana i ona waewae ano, e inumia ana hoki te he. 7 E tautau noa ana nga waewae o te kopa: he pera hoki te whakatauki i te

8 mangai o te wairangi. Ko te takai mea whakapaipai i roto i te puranga kohatu, ko tona rite kei te tangata e whakakororia ano i te wairangi. 9 E rite ana ki te tataramoa e wero nei i te ringa o te haurangi, koia ano te whakatauki i te mangai o nga wairangi.

10 Ka rite ki te kaikopere i tu ai te katoa, te tangata e utu ana i te wairangi me te tangata hoki e utu ana i nga tira haere.



11 Ka rite ki te kuri e hoki nei ki tona ruaki, te wairangi e tuarua ana i tona poauau.

12 Ka kite koe i te tangata e mea ana ki a ia he whakaaro nui? Ki ta te whakaaro tera e rahi ake ta te wairangi i tana.

13 E ki ana te mangere, He raiona kei te ara; he raiona kei nga waharoa.

14 He pera i te tatau e taurihuri ra i runga i ona inihi, koia ano te mangere i runga i tona moenga.

15 E kuhua ana e te mangere tona ringa ki te rihi; he mahi ngenge rawa ki a ia te whakahoki mai ki tona mangai.

16 He nui ke ake te whakaaro nui o te mangere, ki tana nei whakaaro, i to nga tangata tokowhitu e whakaatu ana i te tikanga.

17 Ko te tangata e haere atu ana, e pokanoa ana ki te whawhai ehara nei i a ia, ko tona rite kei te tangata e hopu ana i te kuri ki ona taringa.

18 Rite tonu ki te haurangi e makamaka ana i nga mea mura, i nga pere, i te mate, <sup>19</sup> Te tangata e tinihanga ana ki tona hoa, e mea ana, He teka ianei he takaro taku?

20 Ki te kahore he wahie, ka mate te ahi: ki te kore hoki he tangata kawekawe korero, ka mutu te ngangare. <sup>21</sup> He waro ki nga ngarahu wera, he wahie ki te ahi; he pera te tangata totohe ki te

tahu i te ngangare. <sup>22</sup> He rite nga kupu a te kaikawekawe korero ki te maramara reka, tae tonu iho ki nga wahi o roto rawa o te kopu.

23 He ngutu puka me te ngakau kino, ko te rite kei te oko oneone i whakakikoruatia ki te para hiriwa.

24 Ko te tangata mauahara e whakaware ana ki ona ngutu, otiia e rongoaia ana e ia te tinihanga ki roto ki a ia: <sup>25</sup> Ki te pai tona reo, kaua e whakapono ki a ia; e whitu hoki nga mea whakaritarihi

kei roto i tona ngakau. <sup>26</sup> Ahakoa hipoki tona mauahara i a ia ki te tinihanga, ka whakakitea nuitia tona kino ki te aroaro o te whakaminenga.

27 Ko te tangata e keru ana i te rua, ka taka ano ki roto: a ko te tangata e huri ana i te kohatu, ka hoki mai ano ki runga ki a ia.

28 E kino ana te arero teka ki ana i kuru ai; a, ko ta te mangai whakapati, he mahi kia ngaro.

## Chapter 27

1  
Kei whakamanamana koe ki te ra apopo; kahore hoki koe e mohio ko te aha e puta mai i roto i te ra.

2  
Ma tetahi atu tangata te whakamoemiti mou, kaua ma tou mangai ake; ma te tangata ke, kaua ma ou ngutu ake.

3  
He taimaha te kohatu, he taimaha ano te kirikiri; he taimaha atu ia i a raua tahi te pukuriri o te wairangi. 4  
He mea nanakia te riri, he rutaki te aritarita; ko wai ia e tu i mua i te hae?

5  
He pai ke te riri matanui i te aroha huna. 6  
Ko nga patu a te hoa aroha he mea na te pono: ko nga kihi ia a te hoariri auau rawa.

7  
E ngaruru ana te wairua makona ki te honikoma: engari ki te wairua hiakai, reka kau nga mea kawa katoa.

8  
Rite tonu ki te manu e atiutiu noa atu ana i tona kohanga te tangata e atiutiu noa atu ana i tona wahi.

9  
He whakahari ngakau te hinu me te whakakakara; he pera ano nga ahua<sup>10</sup>reka o to te tangata hoa aroha i ahu mai i nga tikanga mateoha i whakatakotoria e tona ngakau. Ko tou hoa aroha ake, a ko te hoa hoki o tou papa, kaua e whakarerea; kaua hoki e haere ki te whare o tou tuakana i te ra e mate ai koe: he pai ke hoki te hoa e tata ana i te tuakana i tawhiti.

11  
E taku tama, kia whakaaro nui, kia koa ai toku ngakau, kia whakahoki kupu ai hoki ahau ki te hunga e tawai ana ki ahau.

12  
E kite atu ana te tangata tupato i te he, a ka huna i a ia: tena ko te kuware, haere tonu atu, mamae tonu atu.

13  
Tangohia te kakahu o te kaiwhakakapi mo te tangata ke; tona taunaha ano hoki mo ta te wahine ke.

14  
Ko te tangata e maranga ana i te atatu, he nui hoki tona reo ki te manaaki i tona hoa ka kiia tana he kanga.

15  
He maturuturu e puputu tonu ana i te ra nui te ua, he wahine ngangare, rite tonu raua: 16  
Ko te tangata e mea ana ki te pehi i a ia, e mea ana ki te pehi i te hau, a ka tutaki tona ringa matau ki te hinu.

17  
Ko te rino hei whakakoi mo te rino; waihoki ko te tangata ano hei whakakoi i te mata o tona hoa.

18  
Ko te kaitiaki o te piki, ka kai i ona hua: ka whakahonoretia te tangata e whakaaro ana ki tona rangatira.

19

He pera i te wai, tiro atu, tiro mai he kanohi, ka pena ano to te tangata ngakau ki te tangata.

20

Ko te reinga, ko te whakangaromanga, e kore e makona; e kore ano hoki e makona nga kanohi o te tangata.

21

Ko te oko tahu para mo te hiriwa, ko te oumu mo te koura; a, ko te whakanui i a ia, hei whakamatautau mo te tangata.

22

Ahakoia i tukua e koe te wairangi ki te tuki i roto i te kumete i waenga i nga witi pepe, e kore tona whakaarokore e riro.

23

Kia anga nui koa kia mohio ki te ahua o au hipi, a kia pai te tiaki i au kahui kau: <sup>24</sup> E kore

hoki te taonga e mau tonu; e mau ianei te karauna ki nga whakatupuranga katoa? <sup>25</sup> Kua whaiti te

hei, e kitea ana te tupu hou, a e kohikohia ana nga otaota o nga maunga. <sup>26</sup> Hei mea kakahu mou

nga reme, a koe nga koati hei utu mo te mara. <sup>27</sup> A tera te waiu koati, he nui noa atu hei kai mau, hei kai hoki ma tou whare, hei oranga ano hoki mo au kotiro.

## Chapter 28

1

E rere ana te hunga kino i te mea kahore he kaiwhai: ko te tangata tika ano ia, ano he raiona te maia.

2

He he no tetahi whenua i tokomaha ai ona rangatira; na kia ai he tangata e mahara ana, e matau ana, ka mau roa ai tona ahua.

3

Ko te tangata rawakore e tukino ana i nga ware, ko tona rite kei te ua ta e kore ai te kai.

4

Ko te hunga e whakarere ana i te ture, he whakamoemiti ta ratou ki te tangata kino: ko ta nga kaipupuri ia o te ture he ngangare ki a ratou.

5

E kore te hunga kino e mohio ki te whakawa: ko te hunga ia e rapu ana i a Ihowa, ka mohio ratou ki nga mea katoa.

6

He pai ki te rawakore e haere ana i runga i tona tapatahi, i te tangata he parori ke ona ara, ahakoia he whai taonga ia.

7

Ko te tangata e pupuri ana i te ture, he tamaiti mohio ia; engari ko te tangata whakahoa ki te hunga kakai, ka whakama tona papa i a ia.

8

Ko te tangata e whakanui ana i ona rawa ki te moni whakatupu, ki te whakapiki utu, e kohia ana e ia era ma te tangata e atawhaitia ai te rawakore.

9

Ko te tangata e tahuri ke ana tona taringa, a kahore e rongu ki te ture, ko tana inoi nei ano he mea whakarihariha.

10

Ko te tangata i meinga ai te hunga tika kia kotiti ke ki te ara he, ka taka a ia ano ki tana ake poka: ka whiwhi ia te hunga ngakau tapatahi ki te pai.

11

Ki te whakaaro a te tangata taonga he nui tona whakaaro mohio; otia e rapua ana tana e te rawakore whai whakaaro.

12

Nui atu te ataahua, ina koa te hunga tika: engari ki te ara te hunga kino, ka huna nga tangata i a ratou.

13

Ko te tangata e hipoki ana i ona he, e kore tana e kake; ko te tangata ia e whaki ana, a e whakarere ana, ka tohungia.

14

Ka hari te tangata e wehi tonu ana: ko te tangata ia e whakapakeke ana i tona ngakau, ka taka ki te kino.

15

E rite ana ki te raiona e hamama ana, ki te pea e kopikopiko ana, te tangata kino e kingi ana ki te iwi rawakore.

16

Ko te rangatira kore whakaaro he nui ano tana tukino: ko te tangata ia e kino ana ki te apo ka roa ona ra.

17

Ko te tangata e waha ana i te toto o te tangata, ka rere ia ki roto ki te rua; kua tetahi e pupuri i a ia.

18

Ko te tangata he tapatahi nei te haere, ka ora: ko te tangata ia he parori ke ona ara, hinga tonu iho.

19

Ko te tangata e ngaki ana i tona oneone, ka makona i te taro; ko te tangata ia e whai ana i te hunga wairangi, ka whiwhi nui ki te rawakore.

20

Ko te tangata pono, ka nui nga manaaki mona: ko te tangata ia e hikaka ana ki te mea taonga, e kore ia e kore te whiwhi i te he.

21

Ko te whakapai kanohi ehara i te mea pai: ehara ano hoki i te mea pai kia he te tangata mo te kongakonga taro.

22

Ko te tangata he kino tona kanohi e takare tonu ana ki te taonga; kahore hoki ia e whakaaro ka tae mai te kore o te rawa ki a ia.

23

Ko te tangata i riria ai te he o tetahi ka nui atu te manako ki a ia i muri iho, i te manako ki te tangata i whakapati nei tona arero.

24

Ko te tangata e pahua ana i tona papa, i tona whaea, a e ki ana, Ehara i te he; he hoa ia no te kaiwhakangaro.

25

Ko ta te tangata ngakau apo he whakapatari pakanga: ko te tangata ia e okioki ana ki a Ihowa ka tetere.

26

He kuware te tangata e whakawhirinaki ana ki tona ake ngakau: ko te tangata ia e haere ana i runga i te whakaaro nui, ka mawhiti.

27

Ko te tangata e hoatu ana ki te rawakore, e kore ia e hapa; ko te tangata ia e kaupare ana i ona kanohi, ka maha nga kanga mona.

28

Ka ara te hunga kino, ka huna nga tangata i a ratou: na ki te ngaro ratou, ka tupu te hunga tika.

## Chapter 29

1

Ko te tangata he maha nei nga riringa i tona he, a ka whakapakeke i tona kaki, ka whatiia ohoreretia ia; te taea te rongoa.

2

Ka whakanuia te hunga tika, ka koa te iwi; ka kingi te tangata kino, ka aue te iwi.

3

Ko te tangata e matenui ana ki te whakaaro nui e whakahari ana i tona papa; ko te tangata ia e piri ana ki nga wahine kairau, he maumau taonga tana.

4

Ma te whakawa a te kingi e mau ai te whenua; ka whakataka ia e te tangata e tango ana i nga mea homai noa.

5

Ko te tangata e whakapati ana ki tona hoa, e whakatakoto kupenga ana mo ona waewae.

6

He rore kei roto i te he o te tangata kino; ko te tangata tika ia he waiata tana, he koa.

7

E mahara ana te tangata tika ki te take a te rawakore: kahore o te tangata kino whakaaro kia mohiotia e ia.

8

Ma nga tangata whakahi e tahu te pa kia mura: ko ta te hunga whakaaro nui ia he whakatahuri atu i te riri.

9

Ki te totohe te tangata whakaaro nui ki te tangata wairangi, ahakoa riri ia, kata ranei, kahore he tanga.

10

E mauahara ana te tangata whakaheke toto ki te tangata i te ngakau tapatahi: tena ko te hunga tika, ka whai ratou kia whakaorangia ia.

11

E tuakina ana e te wairangi tona riri katoa ki waho: e puritia mai ana ia e te tangata whakaaro nui, e pehia ana.

12

Ki te whakarongo te rangatira ki te teka, he kino katoa ana tangata.

13

E tutaki ana te rawakore raua ko te kaitukino ki a raua; ko Ihowa te kaiwhakamarama o nga kanohi o raua tokorua.

14

Ko te kingi e pono ana tana whakawa mo nga rawakore, ka whakapumautia tona torona ake ake.

15

Ko te whiu, ko te riri i te he, he mea homai era i te whakaaro nui: tena ko te tamaiti mahue noa, ka whakama i a ia tona whaea.

16

Ka tokomaha te hunga kino, ka nui te he: ka kite ia te hunga tika i to ratou hinganga.

17

Pakia tau tama, a ka whai okiokinga koe i a ia; ae ra, he ahua eka tana e homai ai ki tou wairua.

18

Ki te kahore he whakakitenga, ka kore te iwi e tupato: ko te kaipupuri ia i te ture, ka hari ia.

19

Ehara te kupu i te papaki mo te pononga: ahakoa hoki ia matau, e kore ia e rongu.

20

Ka kite ranei koe i te tangata kaika ki te korero? engari te wairangi ka totika ake i a ia.

21

Ko te tangata e penapena ana i tana pononga mai o te tamarikitanga, ka waiho ia e ia i te mutunga hei tama tupu.

22

He whakaoho whawhai ta te tangata pukuriri: he nui rawa hoki te he o te tangata aritarite.

23

Ka whakaititia iho te tangata e tona whakapehapeha: ka whai honore ia te tangata ngakau papaku.

24

Ko te tangata e whakauru ana ki ta te tahae, e kino ana ki tona ake wairua: e rongu ana ia i te kanga, kahore e kiki.

25

He rore e homai ana e te wehi ki te tangata: ko te tangata ia e whakawhirinaki ana ki a Ihowa ka mawhiti.

26

He tokomaha e whai ana kia paingia e te rangatira: otiia i ahu mai i a Ihowa te whakawa mo te tangata.

27

He mea whakarihariha ki te hunga tika te tangata whakahaere he; a he mea whakarihariha hoki ki te tangata kino te tangata he tika tona ara.

## Chapter 30

<sup>1</sup> Ko nga kupu a Akuru tama a Iakehe; ko te poropititanga. I korero taua tangata ki a Itiere, ki  
a Itiere raua ko Ukara, <sup>2</sup> He pono ko ahau te mea poauau rawa o nga tangata, kahore hoki he  
matauranga tangata i roto i ahau. <sup>3</sup> Kihai hoki ahau i whakaakona ki te whakaaro nui, kihai ano i  
mohio ki te Mea Tapu. <sup>4</sup> Ko wai kua piki atu ki te rangi, a heke mai ai ano? Ko wai kua pupu i te  
hau ki roto ki ona ringa? Na wai i takai nga wai ki roto ki tona kakahu? Na wai i whakapumau nga  
pito katoa o te whenua? Ko wai tona ingoa, a ko wai hoki te ingoa o tana tam a, ki te mohiotia e  
<sup>5</sup> koe? Ko nga kupu katoa a te Atua he mea whakamatau: he whakangungu rakau ia ki te hunga  
katoa e whakawhirinaki ana ki a ia. <sup>6</sup> Kua e tapiritia etahi kupu ki ana, kei riria e ia tou he, a ka  
kitea koe he tangata korero teka.  
<sup>7</sup> E rua nga mea kua inoia e ahau i a koe; kua ena e kaiponuhia i ahau i mua i toku matenga;  
<sup>8</sup> Whakamataratia atu i ahau te horihori me te korero teka; kua e homai te rawakore ki ahau, te  
taonga ranei; whangaia ahau ki te kai e rite ana maku: <sup>9</sup> Kei makona ahau, a ka whakakahore ki a  
koe, ka mea, Ko wai a Ihowa? Kei rawakore ranei ahau, a ka whanako, ka whakahua noa hoki i te  
ingoa o toku Atua.  
<sup>10</sup> Kua e korerotia te pononga ki tona ariki, kei kanga ia i a koe, a ko koe e he. <sup>11</sup> Tera te  
whakatupuranga, he kanga ta ratou i to ratou papa, kahore hoki e manaaki i to ratou whaea. <sup>12</sup> Tera  
te whakatupuranga, he ma ki ta ratou na titiro, otira kahore ano kia horoia atu to ratou paru. <sup>13</sup> Tera  
te whakatupuranga, Na, te whakakake o o ratou kanohi! Kua whakarewaina ake hoki o ratou kamo.  
<sup>14</sup> Tera te whakatupuranga, ko o ratou niho ano he hoari, ko o ratou niho purakau ano he maripi,  
hei horo i te hunga iti i runga i te whenua, i nga rawakore hoki i roto i nga tangata.  
<sup>15</sup> E rua nga tamahine a te ngate, ko ta raua karanga, Homai, homa. E toru nga mea e kore rawa  
e makona, ae ra, e wha nga mea e kore e ki, Kati: <sup>16</sup> Ko te rua tupapaku; ko te kopu pakoko; ko te  
whenua kihai i pukuwaitia; a ko te ahi e kore nei e ki, Kati. <sup>17</sup> Ko te kanohi e whakahi ana ki te  
papa, e whakahawea ana ki te whakarongo ki tona whaea, ma nga raweni o te awaawa ia e tikaro,  
a ma nga pi ekara e kai.  
<sup>18</sup> E toru nga mea he whakamiharo rawa, e kore e taea e ahau, ae ra, e wha kahore e mohiotia  
e ahau: <sup>19</sup> Ko te huarahi o te ekara i te rangi; ko te huarahi o te nakahi i runga i te kamaka; ko te  
huarahi o te kaupuke i waenga moana; a ko te huarahi o te tangata ki te kotiro. <sup>20</sup> He pera ano te  
huarahi o te wahine puremu; ka kai ia, a ka horoi i tona mangai, a ka ki, Kahore aku mahi he. <sup>21</sup> E

toru nga mea e korikori ai te whenua, a e wha, he mea e kore e manawanuitia e ia: <sup>22</sup> Ko te pononga  
 ina whakakingitia ia; ko te wairangi hoki ina makona i te taro; <sup>23</sup> Ko te wahine whakarihariha ina  
 whiwhi i te tane; a ko te pononga wahine ina tuku iho mana nga mea a tona rangatira.  
<sup>24</sup> E wha nga mea ririki i runga i te whenua, he nui noa atu ia nga whakaaro: <sup>25</sup> Ko nga  
 popokorua ehara i te iwi kaha, heoi e mea ana i te kai ma ratou i te raumati; <sup>26</sup> Ko nga koni, he iwi  
 ngoikore, heoi e hanga ana i o ratou whare ki te kamaka; <sup>27</sup> Ko nga mawhitiwhiti, kahore o ratou  
 kingi, heoi haere ropu ana ratou katoa; <sup>28</sup> Ko te mokomoko, ko ona peke hei pupuri mana; otiia  
 kei roto ia i nga whare kingi.  
<sup>29</sup> E toru nga mea, he tau ta ratou hikoi, ae ra, e wha he huatau ki te haere: <sup>30</sup> Ko te raiona, ko  
 te mea kaha rawa o nga kararehe, e kore nei e tahuri mai i te aroaro o tetahi; <sup>31</sup> Ko te kuri horo;  
 ko te koati toa ano hoki; a ko te kingi, kahore nei tetahi e maranga ake ki a ia. <sup>32</sup> Ki te mea he mahi  
 kuware tau i a koe i whakaneke ake ai i a koe, ki te mea ranei i whakaaro kino koe, kopania tou  
 ringa ki tou mangai. <sup>33</sup> He pono hoki ki te hurihia te waiu ka puta mai he pata, a ki te kowiria te  
 ihu ka puta mai he toto: waihoki ki te akina te riri ka puta he whawhai.

### Chapter 31

<sup>1</sup> Ko nga kupu a Kingi Remuera; ko te poropititanga i whakaakona ai ia e tona whaea. <sup>2</sup> He  
 aha, e taku tama? He aha, e te tama a toku kopu? A he aha, e te tama a aku kupu taurangi? <sup>3</sup> Kaua  
 e hoatu tou kaha ki nga wahine, ou ara hoki ki te mea whakangaro o nga kingi. <sup>4</sup> Ehara ma nga  
 kingi, e Remuera, ehara ma nga kingi te inu waina; ehara hoki ma nga rangatira te mea, Kei hea  
 he wai kaha? <sup>5</sup> Kei inu ratou, a ka wareware ki te ture, a ka whakapeau ke i te whakawa o te tangata  
 e tukinotia ana. <sup>6</sup> Hoatu he wai kaha ma te tangata e tata ana te marere, he waina hoki ki nga wairua  
 pouri: <sup>7</sup> Tukua ia kia inu, kia wareware ai ki tona rawakore, a kore ake he mahara ki ona mate.  
<sup>8</sup> Kia puaki tou mangai mo te wahangu, i te whakawakanga o te hunga katoa kua waiho mo te mate.  
<sup>9</sup> Kia puaki tou mangai, whakaritea te whakawa i runga i te tika, tohea te tohe a te ware, a te rawakore.



<sup>10</sup> Ko wai e kite i te wahine e u ana tona pai? Ko tona utu hoki kei runga noa atu i to nga rupi.  
<sup>11</sup> Ka whakapono te ngakau o tana tane ki a ia, a kahore ona hapanga i te taonga. <sup>12</sup> He pai tana e  
 mea ai ki a ia, kahore hoki he kino, i nga ra katoa e ora ai ia. <sup>13</sup> E kimi ana ia i te huruhuru hipi, i  
 te muka, a ka ngakau nui te mahi a ona ringa. <sup>14</sup> Ko tona rite kei nga kaipuke o nga kaihokohoko;  
 e mauria mai ana e ia tana kai i tawhiti. <sup>15</sup> E maranga ana hoki ia i te mea e po tonu ana, a hoatu  
 ana e ia he kai ma tona whare, he mahi hoki e rite ana ma ana kotiro. <sup>16</sup> E whakaaroaro ana ia ki  
 tetahi mara, a ka hokona e ia: whakatokia ana e ia he mara waina, he hua na ona ringa. <sup>17</sup> E whitiki  
 ana ia i tona hope ki te kaha, e mea ana i ona takakau kia pakari. <sup>18</sup> Ka kite ia he pai tana i hokohoko  
 ai: e kore tana rama e mate i te po. <sup>19</sup> Ka totoro atu ona ringa ki te mea takai miro, ka pupuri ona  
 ringa ki te pou muka. <sup>20</sup> Ka wherahia tona ringa ki te ware; ae ra, ka totoro atu ona ringa ki te  
 rawakore. <sup>21</sup> E kore ia e wehi i te hukarere mo tona whare; no te mea kua kakahuria tona whare  
 katoa ki te ngangana. <sup>22</sup> Oti ake i a ia te whatuwhatu he whariki mona; he rinena pai, he papura  
 ona kakahu. <sup>23</sup> E mohiotia ana tana tane i nga kuwaha, ina noho tahi ia ki nga kaumatua o te  
 whenua. <sup>24</sup> E hanga ana e ia he rinena pai, a hokona atu ana; e hoatu ana e ia he whitiki ki nga  
 kaihoko. <sup>25</sup> He kaha, he honore ona kakahu; a e kata ana ia ki nga ra o muri atu. <sup>26</sup> He nui ona  
 whakaaro ina puaki tona mangai; kei tona arero te ture o te atawhai. <sup>27</sup> Ka ata tirohia e ia nga ara  
 o tona whare, e kore ano ia e kai i te taro o te mangere. <sup>28</sup> Ka whakatika ana tamariki, a he kupu  
 manaaki ta ratou mona; Tana tane hoki, ka whakamoemiti ano ia ki a ia, ka mea: <sup>29</sup> He tokomaha  
 nga tamahine i u te pai o ta ratou mahi, otiia hira ake tau i a ratou katoa. <sup>30</sup> He mea teka noa te  
 manako, he mea horihori te ataahua: tena ko te wahine e wehi ana i a Ihowa, ko ia e whakamoemitia.  
<sup>31</sup> Hoatu ki a ia o nga hua o ona ringa; a ma ana mahi ia e whakamoemiti i nga kuwaha.

## Ecclesiastes

### Chapter 1

<sup>1</sup> Ko nga kupu a te Kaikauwhau, ara a te tama a Rawiri, i kingi nei ki Hiruharama. <sup>2</sup> He tino horihori rawa, e ai ta te Kaikauwhau, he tino horihori rawa; he horihori katoa. <sup>3</sup> He aha te pai ki te tangata o tona mauiu katoa e mauiu ai ia i raro i te ra?

<sup>4</sup> Ko tenei whakatupuranga e haere atu ana, ko tera whakatupuranga e haere mai ana: ko te whenua ia, mau tonu. <sup>5</sup> E whiti ana hoki te ra, e heke atu ana te ra, hohoro tonu atu ki tona wahi whiti mai ai. <sup>6</sup> E anga ana te hau ki te tonga, na ka taka ki te raki; he hanga takataka tonu tana i tona ara, a ka hoki mai ano te hau ki ona takatakanga. <sup>7</sup> E rere ana nga awa katoa ki te moana, heoi kahore e ki te moana: ko te wahi i rere mai ai nga awa, ka hoki atu ano ratou ki reira. <sup>8</sup> Mauiui rawa nga mea katoa, e kore e taea e te tangata te korero: e kore te kanohi e ngata i te matakaitaki, e kore te taringa e ki i te whakarongo.

<sup>9</sup> Ko to mua mea koia ano hei mea aianei; a ko te mea i mahia i mua ka mahia ano aianei; kahore hoki he mea hou i raro i te ra. <sup>10</sup> Tera ano ranei he mea e ki ai tetahi, Titiro, he mea hou tenei? He mea ia no nga wa o mua, no era i mua atu i a tatou. <sup>11</sup> Kahore he mahara ki nga whakatupuranga o mua; kahore hoki e maharatia nga whakatupuranga e haere mai a muri nei e te hunga o muri atu.

<sup>12</sup> Ko ahau, ko te Kaikauwhau, te kingi o Iharaira i Hiruharama. <sup>13</sup> Na ka whakaangahia e ahau toku ngakau ki te whakaaro nui hei rapu, hei kimi i nga mea katoa e mahia ana i raro i te rangi: na te Atua tenei whakararuraru kino i homai ki nga tama a te tangata hei whakararu i a ratou. <sup>14</sup> Kua kite ahau i nga mea katoa e mahia ana i raro i te ra. Nana, he horihori katoa, he whai hoki i te hau.

<sup>15</sup> Ko te mea piko e kore e taea te whakahangai: ko te mea koha e kore e taea te tatau. <sup>16</sup> I korerorero ahau ki toku ngakau, i mea, Nana, kua whiwhi rawa ahau i te whakaaro nui ki runga ake i o te hunga katoa i mua atu i ahau i Hiruharama: ae ra, he maha nga mea kua kitea e toku ngakau o te whakaaro nui, o te matauranga. <sup>17</sup> Na ka whakaangahia e ahau toku ngakau kia mohio ki te whakaaro nui, kia mohio ki te haurangi, ki te wairangi: a kua kite ahau he whai ano hoki tenei i te hau. <sup>18</sup> Ma te nui hoki o te whakaaro ka nui ai te pouri: a ko te tangata e whakaneke ake ana i te matauranga e whakaneke ake ana i te mamae.

## Chapter 2

<sup>1</sup> I mea ahau i roto i toku ngakau, Tena ra, ka whakamatauria koe e ahau ki te koa; na, te  
 ahuaureka mau. Heoi, he horihori ano hoki tenei. <sup>2</sup> Ko te kata, kiia iho e ahau he haurangi; ko te  
 koa, He mahi aha tana? <sup>3</sup> I whai ahau i roto i toku ngakau me pehea te whakaahuareka i toku  
 kikokiko ki te waina, me te whakahaere ano ia a toku ngakau i ahau i runga i te whakaaro nui; a  
 me pehea taku hopu i te wairangi, kia kitea ra ano e ahau he aha ra tena mea pai a n ga tama a te  
 tangata e mahia nei i raro i te rangi i nga ra katoa e ora nei ratou. <sup>4</sup> I mahia e ahau etahi mahi nunui  
 maku; i hanga e ahau etahi whare moku; i whakatokia e ahau etahi mara waina maku; <sup>5</sup> I hanga e  
 ahau etahi kari maku, me etahi mara rakau, whakatokia iho e ahau ki reira nga tu rakau katoa e  
 whai hua ana. <sup>6</sup> I hanga e ahau he poka wai maku hei whakamakuku mai i reira i te ngahere, i te  
 wahi i whakatupuria ai nga rakau. <sup>7</sup> I hokona e ahau he pononga tane, he pononga wahine, a he  
 pononga ano i whanau ki toku whare; he tini hoki aku kahui kau, aku kahui hipi, maha atu i a te  
 hunga katoa i mua atu i ahau i Hiruharama. <sup>8</sup> I amenea mai ano e ahau he hiriwa, he koura, me te  
 taonga i rawe ki nga kingi, ki nga kawanatanga; i meatia ano e ahau he kaiwaiata tane, he kaiwaiata  
 wahine, me nga ahuaureka ano a nga tama a te tangata, te tini o te wahine iti. <sup>9</sup> Heoi kua nui ahau,  
 neke noa ake ana aku i a te hunga katoa i mua ake i ahau i Hiruharama, me te mau ano hoki toku  
 whakaaro nui. <sup>10</sup> Ko nga mea katoa ano hoki i hiahiatia e oku kanohi, kihai i kaiponuhia e ahau i  
 a raua, kihai ano i pehia e ahau toku ngakau i te meatanga atu ki tetahi whakahari; i hari hoki toku  
 ngakau i oku ruhatanga katoa; a ko te wahi tenei maku o oku ruha tanga katoa. <sup>11</sup> Katahi ahau ka  
 titiro ki nga mahi katoa i mahia e oku ringa, ki te ruhatanga hoki i ruha ai ahau i te mahinga; nana,  
 he horihori katoa, he whai kau i te hau, a kahore he hua pai i raro i te ra.  
<sup>12</sup> I anga ano ahau ki te matakitaki ki te whakaaro nui, ki te haurangi, ki te wairangi: he aha  
 koia te mea e taea e te tangata e haere mai ana i muri i te kingi? heoi ano ko te mea kua oti noa ake.  
<sup>13</sup> Katahi ahau ka kite, hira ake te whakaaro nui i te wairangi; he pera hoki me te marama e hira  
 ake ana i te pouri. <sup>14</sup> Ko te tangata whakaaro nui, kei tona mahunga ona kanohi, a kei te pouri te  
 wairangi e haere ana: otiia i kite ano ahau kotahi tonu te mea e pa ana ki a ratou katoa. <sup>15</sup> Katahi  
 ahau ka ki ake i roto i toku ngakau: Ko te mea i pa ki te wairangi ka pa ano ki ahau nei ano hoki;  
 he aha hoki oku whakaaro i nui ake ai? Na ko taku kianga ake i roto i toku ngakau, he horihori ano  
 hoki tenei. <sup>16</sup> No te mea kahore he maharatanga ki te tangata whakaaro nui, pera ano i te kore ki  
 te wairangi a ake ake; ina hoki i nga ra e haere ake nei kua wareware noa kae nga mea katoa. Na,  
 ko to te tangata whakaaro nui tona matenga, pera ano i to te waira ngi!

<sup>17</sup> Na kua kino ahau ki te ora; no te mea he he ki ahau te mahi e mahia ana i raro i te ra: he horihori katoa hoki, he whai kau i te hau. <sup>18</sup> I kino ano hoki ahau ki toku mauui i mauui ai ahau i raro i te ra: ina hoki me waiho iho e ahau ma te tangata i muri i ahau. <sup>19</sup> Ko wai hoki e mohio ana hei tangata whakaaro nui ranei ia, hei wairangi ranei? otiia hei a ia te tikanga mo oku mauui katoa i mauui ai ahau, i nui ai ano hoki oku whakaaro i raro i te ra. He horihori ano hoki tenei. <sup>20</sup> Na ka anga ahau, ka mea kia whakaparahako toku ngakau ki te mauui katoa i mauui ai ahau i raro i te ra. <sup>21</sup> Tenei hoki tetahi tangata kei runga nei i te whakaaro nui tana mahi, kei runga i te matauranga, kei runga i te mohio; otiia ka waiho e ia hei wahi ma te tangata kihai nei i mahi. He horihori ano tenei, he he nui. <sup>22</sup> He aha oti te tukunga iho ki te tangata o tona mauui katoa, o te ngana o tona ngakau i mauui ai ia i raro i te ra? <sup>23</sup> He pouri kau hoki ona ra katoa, he ngakau mamae tona raruraru, e kore ano hoki tona ngakau e okioki i te po. Na he horihori ano hoki tenei. <sup>24</sup> Kahore he mea pai ma te tangata i tua atu i te kai, i te inu, i te mea kia whiwhi tona wairua i te pai i roto i tona mauui. I kite ano hoki ahau i tenei, no te ringa o te Atua tenei. <sup>25</sup> Ko wai oti e nui atu tana kai, ko wai e reka ake i ahau? <sup>26</sup> Ki te tangata hoki e pai ana ki to te Atua aroaro e homai ana e ia he whakaaro nui, he matauranga, he koa; ki te tangata hara ia e homai ana e ia he raruraru, ki te kohikohi, ki te amene mea mai, hei hoatutanga mana ki te tangata e pai ana ki to te Atua aroaro. He horihori ano hoki tenei, he whai i te hau.

### Chapter 3

<sup>1</sup> He taima ano kua takoto mo nga mea katoa, me te wa mo nga meatanga katoa i raro i te rangi: <sup>2</sup> He wa e whanau ai, he wa e mate ai; he wa e whakato ai, he wa e hutia ai te mea i whakatokia; <sup>3</sup> He wa e patu ai, he wa e rongoa ai; he wa e wawahi iho ai, he wa e hanga ake ai; <sup>4</sup> He wa e tangi ai, he wa e kata ai; he wa e aue ai, he wa e kanikani ai; <sup>5</sup> He wa e akiritia atu ai nga kohatu, he wa e kohikohia ai nga kohatu; he wa e awhi ai, he wa e kore ai e awhi; <sup>6</sup> He wa e rapu ai, he wa e ngaro ai; he wa e tiaki ai; he wa e akiri atu ai; <sup>7</sup> He wa e haehae ai, he wa e tuitui ai; he wa e whakarongo puku ai, he wa e korero ai; <sup>8</sup> He wa e aroha ai, he wa e mauahara ai; he wa e whawhai

ai, he wa e mau ai te rongo. <sup>9</sup> He aha te pai ki te kaimahi i tana mea i mau i ai ia? <sup>10</sup> Kua kite ahau i te raruraru e homai ana e te Atua ki nga tama a te tangata hei whakararu i a ratou.

<sup>11</sup> I hanga e ia nga mea katoa kia ataahua i tona wa ano: a i whakanohoia e ia te ao ki o ratou ngakau, engari kia kaua te tangata e kite i ta te Atua mahi i mahi ai, mai i te timatanga a taea noatia

te mutunga. <sup>12</sup> E mohio ana ahau kahore he mea pai atu mo ratou i te ngakau hari, i te mahi i te

pai i a ratou e ora ana. <sup>13</sup> A he mea hoki na te Atua kia kai nga tangata katoa, kia inu, kia kite ano

hoki i te pai o to ratou mau i katoa. <sup>14</sup> E mohio ana ahau ko nga mea katoa e hanga ana e te Atua, ka mau tonu a ake ake: e kore tetahi mea e honoa mai, e kore ano hoki tetahi wahi e tangohia atu:

i meatia hoki e te Atua kia wehi ai nga tangata i tona aroaro. <sup>15</sup> Ko to mua mea koia ano tenei inaianei; na, ko te mea e puta mai a mua kua puta noa ake; e rapua ana ano e te Atua te mea onamata.

<sup>16</sup> Na i kitea ano e ahau i raro i te ra, ko te wahi o te whakawa i reira ia te kino; a ko te wahi o

te tika ko te kino i reira. <sup>17</sup> Ka mea ahau i roto i toku ngakau, Tera e whakawakia e te Atua te tangata tika rau ko te tangata kino: no te mea kua takoto te wa i reira mo nga meatanga katoa, mo

nga mahi katoa. <sup>18</sup> I mea ahau i roto i toku ngakau, Na te mea mo nga tama a te tangata, he mea

na te Atua hei whakaatu i a ratou, kia kite ai ratou he pera noa iho ratou i te kararehe. <sup>19</sup> Ko te mea

hoki e pa ana ki nga tama a te tangata, e pa ana ki nga kararehe; kotahi tonu te mea e pa ana ki a ratou; ko te matenga o tetahi rite tonu ki te matenga o tetahi; ae ra, kotahi tonu ano manawa o ratou

katoa; kihai hoki te tangata i hip a ake i te kararehe; he horihori hoki te katoa. <sup>20</sup> E haere ana te

katoa ki te wahi kotahi; no te puehu nei te katoa, ka hoki ano te katoa ki te puehu. <sup>21</sup> Ko wai e

matau ana ki te wairua o te tangata, e haere ana ranei ki runga, ki te wairua ranei o te kararehe,

mehemea ranei e heke iho ana ki raro ki te whenua? <sup>22</sup> Na ka kite ahau kahore he pai nui atu i

tenei, ara kia koa te tangata ki ana mahi; ko te wahi hoki tera mana: ma wai ia e whakahoki mai, e mea kia kite i nga mea e puta mai i muri i a ia?

## Chapter 4

<sup>1</sup> Na ka tahuri ahau, a ka titiro ki nga tukinotanga katoa e mahia nei i raro i te ra: na ko nga roimata o te hunga i tukinotia, kahore hoki o ratou kaiwhakamarie; a he kaha kei te ringa o o ratou

kaitukino, otia kahore o ratou kaiwhakamarie. <sup>2</sup> Na, ko taku whakamoemiti ki te hunga mate kua

mate noa ake, nui atu i taku ki te hunga ora e ora nei. <sup>3</sup> Engari ia pai atu i a raua te tangata kahore ano i whanau noa, kahore ano i kite noa i te mahi he e mahia nei i raro i te ra.

<sup>4</sup> Na ka kite ahau i te mauui katoa, i nga mahi tohunga katoa, he mea hoki tenei e hae ai te tangata ki tona hoa. He horihori ano hoki tenei, a he whai kau i te hau. <sup>5</sup> Ko te wairangi, kei te kotui i ona ringa, a kainga ana e ia ona kikokiko ake. <sup>6</sup> He pai ke te ringa ki i runga i te ata noho, i nga ringa ki e rua, ki te mea he ruha, he whai noa i te hau.

<sup>7</sup> Katahi ahau ka tahuri, a ka kite i te horihori i raro i te ra. <sup>8</sup> He tangata tera, ko ia anake, kahore hoki ona tokorua; ae ra, kahore ano hoki ana tama, ona tuakana, teina ranei; heoi kahore he mutunga o tana mahi katoa, e kore ano hoki ona kanohi e makona i nga taonga. Na ka mea ia, Ki a wai toku whakaaro i a hau ka mahi nei, ka whakatiki nei i toku wairua ki te pai? He horihori ano tenei, he raruraru kino. <sup>9</sup> Erangi te tokorua i te kotahi; no te mea ka whiwhi raua ki te utu pai i ta raua mahi.

<sup>10</sup> Ki te hinga hoki tetahi, ma tona hoa ia e whakaara: aue, te mate mo te kotahi, ina hinga, ki te kahore te whakatokorua hei whakaara i a ia! <sup>11</sup> Ki te takoto tahi ano nga tokorua, ka mahana raua; he tangata kotahi ia, ma te aha ka mahana ai tona kotahi? <sup>12</sup> Ki te kaha tetahi i a ia kotahi nei, ka maia te tokorua ki a ia; e kore hoki te aho takitoru e motu wawe.

<sup>13</sup> Pai ake te tamaiti rawakore, whakaaro nui i te kingi kua koroheketia, kua wairangi, kua kore nei ona mohio ki te whakarongo ina whakatupatoria. <sup>14</sup> I puta mai hoki tera i roto i te whare herehere, hei kingi; ae ra, ahakoa i roto i tona whenua i kingi ai, i whanau rawakore mai ia. <sup>15</sup> I kite ahau i te hunga ora katoa e haere nei i raro i te ra, kei te tama ratou, kei te tuarua, kua tu nei i te tunga o tera. <sup>16</sup> Kahore he mutunga o te iwi katoa, ara o te hunga ko ia nei to ratou ariki; na e kore o muri iho i a ia e koa ki a ai. He pono, he horihori ano hoki tenei a he whai kau i te hau.

## Chapter 5

<sup>1</sup> Tiakina tou waewae ina haere koe ki te whare o te Atua; he pai ke te whakatata ki te whakarongo i te hoatu i te patunga tapu a nga wairangi: kahore hoki ratou e mohio he mahi kino ta ratou. <sup>2</sup> Kei porahurahu tou mangai, kei hohoro hoki te puaki o tetahi kupu a tou ngakau i te aroaro o te Atua; no te mea kei te rangi te Atua, a ko koe kei runga i te whenua: mo reira kia torutoru au kupu. <sup>3</sup> Ka puta mai hoki te rekanga kanohi ina nui te raruraru; me te reo o te wairangi ki te maha o nga kupu.

<sup>4</sup> Ki te kiia taurangitia e koe tetahi mea ma te Atua, kei whakaroa koe ki te whakamana; e kore hoki ia e pai ki nga wairangi: whakamana e koe tau i ki taurangi ai. <sup>5</sup> He pai ke ki te kore au ki taurangi, i te puta i a koe o te kupu taurangi a kahore i whakamana e koe. <sup>6</sup> Kei tukua e koe tou mangai kia mea hara mo ou kikokiko; kaua hoki e ki ki te aroaro o te anahera, he pohehe; kia riri te Atua ki tou reo hei aha, a he iho i a ia te mahi a ou ringa? <sup>7</sup> Na konei tenei mea, na te maha o nga rekanga kanohi, o nga horihori, o nga korero maha; ko koe ia kia wehi i te Atua. <sup>8</sup> Ki te kite koe i te rawakore e tukinotia ana, a e kahakina ketia ana te whakawa raua ko te tika i te kawanatanga, kaua e miharo ki taua mea: no te mea e maharatia ana e tetahi, he tiketike ake nei i te mea tiketike; tenei ano hoki tetahi e tiketike ake ana i a ratou.

<sup>9</sup> Ma te katoa ano hoki nga hua o te whenua; a ko te kingi hoki na, e mahia ana e te mara he mea mana. <sup>10</sup> Ko te tangata e aroha ana ki te hiriwa e kore e makona i te hiriwa; a e kore hoki te tangata e whai ana ki nga mea maha, ki nga hua. He horihori ano tenei. <sup>11</sup> Ki te maha nga rawa, ka tokomaha ano nga tangata hei kai: he aha hoki te pai ki te tangata nana aua mea? Ko te matakitaki kau atu a ona kanohi. <sup>12</sup> Ka reka tonu te moe a te tangata mahi, ahakoa iti tana kai, nui ranei; ko te tangata taonga ia, e kore e tukua e ana mea maha kia moe. <sup>13</sup> Tera tetahi he ngau kino i kitea e ahau i raro i te ra, ara, he taonga e puritia ana e te tangata nana, hei whakamamae ano i a ia: <sup>14</sup> A ka pau aua taonga i te raruraru kino: na, ka whanau he tama mana, kahore he mea i tona ringa. <sup>15</sup> Ka rite ki tona haerenga mai i te kopu o tona whaea, ka hoki tahanga atu ano ia, ka pera i tona haerenga mai, e kore ano e riro i a ia tetahi wahi mo tana mahi hei maunga atu ma tona ringa. <sup>16</sup> A he he ngau kino ano hoki tenei, ara ko tona haerenga atu ka rite i nga mea katoa ki tona haerenga mai: he aha oti te pai ki a ia? ko tana i mahi ai ma te hau. <sup>17</sup> A i ona ra katoa ka kai ia i roto i te pouri, ka pororaru tona ngakau, ka pangia e te mate, ka pukuriri. <sup>18</sup> Nana, ko taku i kite ai, he mea pai, he mea ataahua, kia kai te tangata, kia inu, kia kite hoki i te pai o tona mauuiui katoa i mauuiui ai ia i raro i te ra i nga ra katoa e ora ai ia, e homai nei e te Atua ki a ia; nana hoki tena wahi. <sup>19</sup> Ko nga tangata katoa hoki i homai ai e te Atua he taonga, he rawa, i tukua mai ai ki a ratou te tikanga mo te kai i tetahi wahi o aua mea, mo te tango i te wahi ma ratou, a kia koa ratou i to ratou mauuiui; he mea homai tenei na te Atua. <sup>20</sup> E kore hoki e nui tona mahara ki nga ra i ora ai ia; no te mea he koa mo tona ngakau ta te Atua i whakahoki ai ki a ia.

## Chapter 6

<sup>1</sup> Tera tetahi he i kitea e ahau i raro i te ra, he mea taimaha ano ki runga ki nga tangata: <sup>2</sup> He tangata i homai nei e te Atua ki a ia he taonga, he rawa, he kororia, a kihai tona wairua i hapa ki tetahi mea i hiahia ai ia, otiia kihai i tukua e te Atua ki a ia te tikanga mo te kai i tetahi wahi o aua

mea, engari kainga ana e te tangata k e. He horihori tenei, he mate kino. <sup>3</sup> Ki te kotahi rau nga tamariki a tetahi tangata, a he maha nga tau e ora ai ia, maha atu nga ra o ona tau, a kahore tona wairua i ngata i te pai, kahore hoki ia e whai tanumanga; e mea ana ahau tera noa atu te pai o te

<sup>4</sup> materoto i a ia. I haere mai hoki tera i runga i te horihori, a haere atu ana i runga i te pouri, a ka

<sup>5</sup> taupokina tona ingoa e te pouri. Kihai hoki ia i kite i te ra, kihai ano i mohio ki a ia; nui atu to

<sup>6</sup> tenei okioki i to tera; Ae, ahakoa kotahi mano topu nga tau i ora ai ia, heoi kahore he pai i kitea e ia. He teka ianei e haere ana te katoa ki te wahi kotahi?

<sup>7</sup> Ko nga mea katoa i mau i ai te tangata hei mea ano mo tona mangai, otiia e kore tona wairua

<sup>8</sup> e makona. He aha oti ta te tangata whakaaro nui e hira ake ana i ta te wairangi? He aha hoki ta

<sup>9</sup> te ware, e mohio nei ki te haere i te aroaro o te hunga ora? He pai ke te kite o nga kanohi i te

<sup>10</sup> kaipaowe o te hiahia: he horihori ano tenei, a he whai i te hau. Ko nga mea katoa o mua kua oti noa ake te hua ki te ingoa, a e mohiotia ana ko te tangata: e kore hoki ia e tau hei totohe ki te mea e kaha atu ana i a ia.

<sup>11</sup> Ka maha nei nga mea hei whakanui i te horihori, he aha te painga ki te tangata? <sup>12</sup> Ko wai hoki e mohio ana he aha te mea pai ki te tangata i a ia nei i te ora, i nga ra katoa o tona oranga horihori, e rite nei ki te atarangi i a ia e mahi nei? Ko wai hoki hei whakaatu ki te tangata ko te aha e puta mai i muri i a ia i raro i te ra?

## Chapter 7

<sup>1</sup> Ko te ingoa pai, pai atu i te hinu utu nui; ko te ra o te matenga, pai atu i te ra o to te tangata

<sup>2</sup> whanautanga. Ko te haere ki te whare tangihanga, pai atu i te haere ki te whare hakari; ko te

<sup>3</sup> mutunga hoki ia o nga tangata katoa; a ka rongoatia e te tangata ora ki roto ki tona ngakau. Ko

<sup>4</sup> te ngakau mamae, pai atu i te kata; ma te pouri hoki o te mata ka pai ai te ngakau. Kei te whare tangihanga te ngakau o te hunga whakaaro nui; kei te whare ia o te kata te ngakau o nga wairangi.



5 Ko te whakarongo, ina riria te he e te tangata whakaaro nui, pai atu i ta te tangata whakarongo ki  
 te waiata a nga wairangi. Rite tonu hoki ki te papatanga o nga tataramoa i raro i te kohua te kata  
 a te wairangi. He horihori ano tenei.

7 He pono ma te pahua ka wairangi ai te tangata whakaaro nui, ma te mea homai noa hoki ka  
 kore ai te ngakau mahara. 8 Ko te mutunga o te mea, pai atu i tona timatanga: pai atu te wairua  
 manawanui i te wairua whakakake. 9 Kei hohoro tou wairua ki te riri: kei te uma hoki o nga wairangi  
 te riri e noho ana. 10 Kua e mea, He aha nga rangi o mua i pai ake ai i enei? Kahore hoki he  
 whakaaro nui ou i ui ai koe ki tena.

11 He pai tonu te whakaaro nui, ano he taonga tuku iho: ae ra, he pai rawa ake ki te hunga e  
 kite ana i te ra. 12 Hei whakamarumaruru iho te whakaaro nui, hei pera hoki i te moni te  
 whakamarumaruru: ko te pai ia o te matauranga koia tenei, ka ora i te whakaaro nui nga tangata nana.

13 Whakaaroa ta te Atua mahi: ko wai hoki hei mea kia tika tana i mea ai kia hape? 14 I te ra pai  
 kia koa, a i te ra kino whakaaro: kua mahia nei hoki e te Atua tetahi kia takoto tahi me tetahi, he  
 mea kia kua ai e kitea e te tangata tetahi mea i muri i a ia. 15 Kua kite ahau i tenei katoa i nga ra  
 oku i te horihori; he tangata tika tetahi, ngaro iho ia i runga i tona tika; he tangata kino tetahi, roa

noa iho ia i te ao i runga i tona kino. 16 Kua e whakanuia rawatia tou tika; kua hoki e whakanuia  
 rawatia ou whakaaro: he aha koe i whakangaro ai i a koe? 17 Kua e whakanuia rawatia tou kino,  
 kua ano hoki e wairangi: kia mate koe hei aha, i te mea kahore ano tou wa kia rite noa? 18 He pai  
 ki te puritia tenei kupu e koe; kua hoki tou ringa e unuhia mai i tera; ko te tangata hoki e wehi ana

i te Atua ka puta mai i roto i era katoa. 19 Ko te whakaaro nui rahi ake tona kaha mo te tangata  
 whakaaro i to nga rangatira kotahi tekau i roto i te pa. 20 Kahore hoki he tangata tika i te whenua

e mahi ana i te pai, a kahore ona hara. 21 Kua ano e whakarongo ki nga mea katoa e korerotia  
 ana; kei rongu koe ki tau pononga e kanga ana i a koe; 22 He maha hoki nga wa, e mohio ana tou  
 ngakau, i kanga ai koe ano i etahi.

23 I whakamatauria e ahau tenei katoa, he mea whakaaro marie; i mea ahau, ka whakaaro nui  
 ahau; otiia i matara noa atu tenei i ahau. 24 Ko te mea onaianei he tawhiti rawa, he hohonu rawa

hoki; ko wai hei kite? 25 I anga toku ngakau, i mea kia mohio, kia kimihia, kia rapua nga whakaaro  
 nui me nga tikanga, kia mohio ano hoki he wairangi te kino, he porangi te wairangi: 26 A ka kite

ahau i te mea kawa atu i te mate, ara i te wahine, he rore nei, he kupenga tona ngakau, he rahiri hoki ona ringa: ko te tangata e paingia ana e te Atua ka mawhiti i a ia; ko te tangata hara ia ka mau

<sup>27</sup> i a ia. Nana, kua kitea tenei e ahau, e ai ta te Kaikauwhau, he mea whakarite tetahi mea ki tetahi,

<sup>28</sup> kia kitea ai te tikanga: He mea e rapua nei ano e toku wairua, a kahore ano i kitea: kotahi te tangata i kitea e ahau i roto i te mano; na i roto i enei katoa kahore ahau i kite i tetahi wahine.

<sup>29</sup> Nana, ko tenei anake i kitea e ahau, ara i tika te tangata i ta te Atua hanganga; engari he maha nga tikanga i rapua e ratou.

## Chapter 8

<sup>1</sup> Ko wai hei rite mo te tangata whakaaro nui? Ko wai hoki e mohio ana ki te tikanga o tetahi mea? Ka ai te whakaaro nui o te tangata hei mea kia tiaho tona mata, ka puta ke ano hoki te taikaha

<sup>2</sup> o tona mata. Ko taku tenei ki a koe, Puritia te kupu a te kingi, me whakaaro ano hoki ki ta te Atua

<sup>3</sup> oati. Kei mea wawe koe ki te haere atu i tona aroaro; kua ano hoki e tohe tonu ki te mea kino;

<sup>4</sup> ka oti hoki i a ia nga mea katoa e pai ai ia. No te mea he mana to te kupu a te kingi; a ko wai hei

<sup>5</sup> mea atu ki a ia, E aha ana koe? Ko te kaupupuri o te whakahau, e kore rawa e mohio ki te mea he. E mohio ana te ngakau o te whakaaro nui ki te wa, ki te tikanga.

<sup>6</sup> He wa hoki to nga meatanga katoa, he tikanga ano; he nui hoki no te he o te tangata i runga

<sup>7</sup> i a ia. Kahore hoki ia e mohio, ko te aha e puta a mua: ma wai hoki e whakaatu ki a ia te peheatanga

<sup>8</sup> o te putanga? Kahore he tangata e whai mana ana ki te wairua, ki te pupuri i te wairua; kahore hoki he mana ki te ra o te mate: i taua pakanga hoki e kore tetahi e tukua atu; e kore ano te kino e whakaora i te mea e tukua atu ki a ia.

<sup>9</sup> I kite ahau i tenei katoa, i anga ano toku ngakau ki nga meatanga katoa e meatia ana i raro i

<sup>10</sup> te ra; he wa ano ka whai mana tetahi tangata ki tetahi tangata hei he mona. I kite ano ahau i reira

i te hunga kino e tanumia ana, a i haere mai ratou ki te wahi o te tanumanga; a ko te hunga i mahi i te tika i haere atu i te wahi o te tapu, a warewaretia ana ratou e te pa: he horihori ano hoki tenei.

<sup>11</sup> He kore i hohoro te whakaoti i te kupu whiu mo te mahi he, koia i ki tonu ai nga ngakau o nga

<sup>12</sup> tama a te tangata i roto i a ratou ki te tohe ki te mahi i te kino. Ahakoa he rau nga mahi he a te

tangata hara, a ka roa ona ra; heoi e mohio ana ano ahau, ka pai te tukunga iho ki te hunga e wehi

13  
ana i te Atua, e wehi nei i tona aroaro. E kore ia e pai te tukunga iho ki te tangata kino, e kore ano e whakaroaina e ia ona ra, he atarangi nei te rite; mona kihai i wehi i te aroaro o te Atua.

14  
He horihori tenei e mahia nei i runga i te whenua; ara he hunga tika enei, a ko te mea e pa ana ki a ratou pera tonu i te mea e pa ana ki te mahi a te hunga kino: a, he hunga kino enei, a ko te mea e pa ana ki a ratou pera tonu i te mea e pa ana ki te mahi a te hunga tika: i ki ahau he horihori

15  
ano hoki tenei. Katahi ahau ka whakamoemiti ki te koa; no te mea kahore he mea pai ake ma te tangata i raro i te ra, ko te kai anake, ko te inu, ko te harakoa: ko tera hoki e mau ki a ia i roto i tona

16  
mauiui i nga ra o tona oranga, i homai nei e te Atua ki a ia i raro i te ra. I taku tukunga i toku ngakau kia mohio ki te whakaaro nui, kia kite i te raruraru e mahia nei i runga i te whenua: i te ao

17  
nei hoki, i te po kahore ona kanohi e kite i te moe: Katahi ahau ka kite i te mahi a te Atua, ara e kore e kitea e te tangata te mahi e mahia ana i raro i te ra: ahakoa mauuiui noa te tangata i te rapunga, e kore e kitea e ia: ae ra, ahakoa mea noa te tangata whakaaro nui kia mohiotia e ia, e kore e taea kia kitea e ia.

## Chapter 9

1  
Na ko tenei katoa he mea whakaaro na toku ngakau, ara kia ata tiroirohia tenei katoa; ko te hunga tika, ko te hunga whakaaro nui, me a ratou mahi, kei roto i te ringa o te Atua: e kore te tangata

2  
e mohio he aroha ranei, he kino ranei; kei to ratou aroaro nga mea katoa. He rite tonu te panga mai o nga mea katoa ki nga tangata katoa; kotahi tonu te mea e pa ana ki te tangata tika, ki te tangata kino; ki te pai, ki te ma, ki te poke; ki te tangata i te patunga tapu, ki te tangata kahore nei ana patunga tapu: ko te tangata pai rite tonu ki te tangata hara, ko te tangata e oati ana, ki te tangata e

3  
wehi ana i te oati. He he tenei i roto i nga mea katoa e meatia ana i raro i te ra, kotahi tonu te mea e pa ana ki te katoa; ko te ngakau ano hoki o nga tama a te tangata ki tonu i te kino; kei roto hoki te haurangi i o ratou ngakau i a ratou e ora ana; a muri iho k a riro ratou ki nga tupapaku.

4  
Ko te tangata hoki e tuhono ana ki te hunga ora katoa ka whai tumanakohanga: pai atu hoki te kuri ora i te raiona mate. E mohio ana hoki te hunga ora tera ratou e mate: ko nga tupapaku ia, kahore o ratou mohio ki tetahi mea, kahore ake hoki he utu i a ratou; ka warewaretia hoki te mahara

6  
ki a ratou. Ko to ratou aroha hoki, ko to ratou riri, ko to ratou hae, kua kore noa ake; kahore hoki

7  
he wahi i a ratou a ake ake, o nga mea katoa e meatia ana i raro i te ra. Haere, kainga tau kai i runga i te hari, inumia hoki tau waina i runga i te ngakau hari; no te mea kua manako noa ke te

8  
Atua ki au mahi. I nga wa katoa kia ma ou kakahu: kaua hoki e whakakahoretia te hinu mo tou

9  
mahunga. Kia ora tou ngakau i tou hoa wahine e aroha na koe i nga ra katoa o tou oranga horihori, i homai nei ki a koe i raro i te ra, i nga ra katoa o tou horihori: ko te wahi hoki tena mou i tenei ao,

10  
i tou mauui ano hoki e mauui na koe i raro i te ra. Ko nga mea katoa e kitea e tou ringa kia mahia, kia puta tou uaua ki te mahi; kahore hoki he mahi, kahore he tikanga, kahore he matauranga, kahore he whakaaro nui i te reinga, i te wahi ka haere atu na koe ki reira.

11  
I hoki ahau, a i kite ahau i raro i te ra, ehara i te mea ko te hunga tere e puta i te oma, ko te hunga marohirohi ranei e toa i te pakanga, ko te hunga whakaaro nui ranei e whiwhi i te taro, ko te hunga mohio ranei e whiwhi i te taonga, ko te h unga tohunga ranei e manakohia, engari na te

12  
wa, na te tupono noa, i homai ki a ratou katoa. Kahore hoki te tangata e mohio ki te wa mona: he rite ki nga ika e haoa ana ki te kupenga nanakia, ki nga manu hoki e mau ana i te mahanga, he pera ano hoki nga tama a te tangata, e mahangatia ana i te wa whakarihariha, ina puta whakarere mai ki a ratou.

13  
I kitea ano e ahau te whakaaro nui penei i raro i te ra, a he mea nui ki ahau: Tera tetahi pa iti, me ona tangata torutoru i roto; na ka haere mai tetahi kingi nui ki te tu i reira, whakapaea

14  
ana e ia, hanga ana e ia etahi pourewa nunui hei tatau atu ki reira. Na i kitea tetahi tangata rawakore, whakaaro nui, i roto, a nana, na tona whakaaro nui, ka ora te pa; otiia kihai tetahi tangata

15  
i mahara ki taua tangata rawakore. Na ko taku kianga ake, Engari rawa te whakaaro nui i te kaha: heoi whakahaweatia iho nga whakaaro nui o te rawakore, kihai hoki ana kupu i whakarangona.

16  
17  
Ko nga kupu a te hunga whakaaro nui, he mea ata korero, e rangona nuitia ake ana i te hamama

18  
a te rangatira o nga wairangi. Pai ake te whakaaro nui i nga rakau o te riri: otiia kotahi noa te tangata hara, he nui tana pai e takakino ai.

## Chapter 10

1  
Ma nga ngaro mate ka piro whakahouhou ai te hinu a te kaiwhakananu: ka pera ano te whakaaro nui me te ingoa nui, he iti noa te wairangi mana e tami.

2  
Kei tona ringa matau te ngakau o te tangata whakaaro nui; kei tona mau ia te ngakau o te wairangi. Ae ra hoki, ka haere te wairangi i te ara, ka taka ona mahara, a ka korero ia ki nga tangata katoa he wairangi ia.

3  
4  
Ki te ara te wairua o te rangatira, he riri ki a koe, kua tou wahi e whakarerea; ka ai hoki te whakangawari hei whakamarie mo nga hara nui. Tenei tetahi kino i kitea e ahau i raro i te ra, e

5  
rite tonu ana ki te he i puta mai i te rangatira. Ko te wairangi e whakanohia ana ki runga ki nga

<sup>7</sup> wahi tiketike rawa, a ko nga tangata taonga e noho ana i te wahi i raro. I kite ahau i nga kaimahi  
<sup>8</sup> i runga i te hoiho, a ko nga rangatira e haere ana, ano he kaimahi, i runga i te whenua. Ko te  
 tangata e keru ana i te rua, ka taka ano ki roto; ko te tangata e wahi ana i te taiepa, ka ngaua e te  
<sup>9</sup> nakahi. Ko te tangata e tarai ana i nga kohatu, ka mamae ano i reira; ko te tangata e tata ana i te  
<sup>10</sup> rakau, ka ora noa ano i reira. Ki te puhuki te rino, a kahore e whakakoia te mata, kia nui ake ano  
<sup>11</sup> tona kaha; he pai ia nga whakaaro nui hei whakatikatika. Ki te ngau te nakahi i te mea kiano i  
 whakawaia, kahore hoki he painga o te kaiwhakawai.  
<sup>12</sup> He ataahua nga kupu a te mangai o te tangata whakaaro nui; tena ko te wairangi ka horomia  
<sup>13</sup> a ia ano e ona ngutu. Ko te timatanga o nga kupu a tona mangai he wairangi; ko te mutunga o  
<sup>14</sup> tana korero, he haurangi, he he. He maha ano hoki nga kupu a te wairangi: engari e kore te  
 tangata e mohio ko te aha e puta mai. Na, ko nga mea e puta mai i muri i a ia, ma wai ra e whakaatu  
<sup>15</sup> ki a ia? Hoha iho nga wairangi i tana mahi i tana mahi: e kore nei hoki ia e matau ki te haere ki  
 te pa.  
<sup>16</sup> Aue, te mate mou, e te whenua he tamaiti nei tou kingi, a e kai ana ou rangatira i te ata!  
<sup>17</sup> Ka hari koe, e te whenua, he tamaiti nei no nga rangatira tou kingi, a e kai ana ou rangatira i te  
<sup>18</sup> wa e tika ai, hei mea whakakaha, ehara i te mea hei whakahaurangi. Ma te mangere ka totohu  
<sup>19</sup> iho ai te tuanui o te whare; ma te ngoikore ano o nga ringa ka tuturu ai te whare. Hei mea mo  
 te kata te hakari i tukua ai, he mea whakahari ano te waina; a ma te hiriwa ka rite ai nga mea katoa.  
<sup>20</sup> Kaua e kanga te kingi, kaua rawa i roto i tou whakaaro; kaua hoki e kanga te tangata taonga i  
 roto i tou whare moenga: no te mea ka kawea te reo e tetahi manu o te rangi, ka korerotia hoki taua  
 mea e tetahi mea whai parirau.

## Chapter 11

<sup>1</sup> Maka tau taro ki te mata o nga wai; kia maha hoki nga ra ka kitea ano e koa. <sup>2</sup> Hoatu tetahi  
 wahi ma te tokowhitu, ae ma te tokowaru ano hoki; e kore hoki koe e mohio ko tehea kino e puta  
<sup>3</sup> mai ki te whenua. Ki te ki nga kapua i te ua, ka ringihia ki te whenua: ki te hinga hoki te rakau  
<sup>4</sup> ki te tonga, ki te raki ranei, ko te wahi e hinga ai te rakau, ko reira ano ia takoto ai. Ko te tangata

e whai mahara ana ki te hau, e kore e rui; ko te tangata titiro kapua e kore e kokoti. <sup>5</sup> Na, ka kore ano koe e mohio ki te huarahi o te hau, ki te tupu ranei o nga wheua i roto i te kopu o te wahine hapu; e kore ano hoki e mohiotia e koe te mahi a te Atua, a te kaimahi o nga mea katoa. <sup>6</sup> I te ata ruia tau purapura, a i te ahiahi kaua e pepeke tou ringa; kahore hoki koe e mohio ko tenei ranei e tika, ko tera ranei, ko raua ranei e rua ka pai ngatahi.

<sup>7</sup> He pono he ahuareka te marama, a he mea pai ki nga kanohi te titiro ki te ra. <sup>8</sup> Ae ra, ki te maha nga tau e ora ai te tangata, kia hari ia ki aua tau katoa; engari kia mahara ia ki nga tau o te pouri, tera hoki e maha. Ko nga mea e haere ake ana he horihori katoa. <sup>9</sup> Kia koe, e te taitamariki, ki tou taitamarikitanga; kia whakahari ano hoki tou ngakau i a koe i nga ra o tou taitamarikitanga, haere hoki i nga ara o tou ngakau, i te tirohanga ano a ou kanohi: otiia kia mohio ano koe, he mea enei katoa e riro ai koe i te Atua ki te whakawa. <sup>10</sup> No reira whakawateatia atu te riri i tou ngakau, a whakanekehia atu te kino i tou kikokiko: he mea horihori nei hoki te taitamarikitanga, me te houkuratanga.

## Chapter 12

<sup>1</sup> Kia mahara ra ki tou Kaihanga i nga ra o tou tamarikitanga, i te mea kahore ano kia tae noa mai nga ra o te kino, a kahore ano kia tata mai nga tau e ki ai koe, Kahore oku ahuareke ki enei tau; <sup>2</sup> I te mea kahore ano kia pouri noa te ra, te marama, te marama, me nga whetu, a kahore ano kia hoki mai nga kapua i muri i te ua: <sup>3</sup> I te ra e wiri ai nga kaitiaki o te whare, a ka piko iho nga tangata marohirohi, ka mutu ano hoki ta nga kaihuri, no te mea he torutoru ratou, ka pouri ano hoki nga mea e titiro mai nei i nga matapihi. <sup>4</sup> A ka tutakina nga tatau i te huarahi; a ka iti te haruru o te huri, a ka ara ake tetahi i te tangi o te manu, ka whakahokia iho hoki ki raro nga kotiro katoa o te waiata; <sup>5</sup> Ae ra, ka wehi ratou i te mea tiketike, kei te huarahi hoki nga mea whakamataku; a ka puawai te aramona, ka taimaha ano hoki te mawhitiwhiti, ka iti haere te hiahia: ka haere nei hoki te tangata ki tona whare tuturu, a ka haereere nga kaitangi i nga huarahi: <sup>6</sup> I te mea kahore ano kia mawheto noa te aho hiriwa, kia pakaru noa ranei te oko koura, kia pakaru ranei te haka ki te puna, kia pakaru te wira ki te poka wai; <sup>7</sup> A ka hoki te puehu ki te whenua, ki tona ahua o mua, a ka hoki te wairua ki te Atua nana nei i homai.

<sup>8</sup> He horihori, he tino horihori, e ai ta te Kaikauwhau; he horihori te katoa. <sup>9</sup> Na no te mea he tangata whakaaro nui te Kaikauwhau, koia i whakaakona tonutia ai e ia te iwi ki te matauranga; ae

ra, i whakaaroaro ia, i rapu, a i ata whakatakotoria e ia nga whakatauki maha. <sup>10</sup> I whai te  
<sup>11</sup> Kaikauwhau kia kitea nga kupu huatau: he mea tika ano te mea i tuhituhia, he kupu pono. Ko  
 nga kupu a te hunga whakaaro nui koia ano kei nga werowero, a ko nga kupu a nga kaihuihui o  
<sup>12</sup> nga whakaminenga kei nga whao i titia kia mau, he mea i homai e te hepara kotahi. A kia ai  
 enei hei whakatupato i a koe, e taku tama; ko te tuhi i nga pukapuka maha kahore he mutunga; ki  
 te nui hoki te ako ka mauui te kikokiko.  
<sup>13</sup> Ko te whakamutunga tenei o te mea katoa; kua rangona katoatia; e wehi ki te Atua, puritia  
<sup>14</sup> ana whakahau: ko nga mea katoa hoki enei hei mahi ma te tangata. No te mea ka whakawakia  
 nga mahi katoa e te Atua, te mea huna ano hoki, ahakoa pai, ahakoa kino.

## Song of Solomon

### Chapter 1

<sup>1</sup> Ko te waiata o nga waiata, ko ta Horomona.  
<sup>2</sup> Kia kihia ahau e ia ki nga kihi a tona mangai: he pai atu hoki tou aroha i te waina. <sup>3</sup> He kakara  
 pai to ou hinu; ko tou ingoa ano he hinu kua oti te riringi; na reira i aroha ai nga wahine ki a koe.  
<sup>4</sup> Kumea ahau; ka rere atu matou, ka whai i a koe: kua oti ahau te kawe e te kingi ki ona ruma: ka  
 koa matou, ka hari ki a koe; engari tou aroha i te waina hei maharatanga atu ma matou: e tika ana  
<sup>5</sup> to ratou aroha ki a koe. He mangu ahau, otiia he ataahua ano, e nga tamahine o Hiruharama, rite  
<sup>6</sup> tonu ano ki nga teneti o Kerara, ki nga kakahu tauarai o Horomona. Kua e titiro mai ki ahau, no  
 te mea he parauri ahau, no te mea kua tahuna ahau e te ra. I riri nga tama a toku whaea ki ahau,  
 meinga ana ahau e ratou hei kaitiaki mo nga mara waina; ko taku mara ia, ko taku ake, kihai i  
 tiakina e ahau.  
<sup>7</sup> Whakaaturia mai ki ahau, e ta toku wairua e aroha nei, ko hea koe whangai ai, ko hea koe  
 mea ai i tau kahui kia takoto i te poutumarotanga; kia rite ahau hei aha ki te mahunga taupoki i te  
<sup>8</sup> taha o nga kahui a ou hoa? Ki te kore koe e mohio, e te mea ataahua rawa o nga wahine, haere  
 atu i runga i nga takahanga o nga hipi, ka whangai i au kua koati i te taha o nga nohoanga o nga  
<sup>9</sup> hepara. Kua whakaritea koe e ahau, e taku e aroha nei, ki tetahi o nga hoiho o nga hariata a Parao.

10 He ataahua ou paparinga i nga whiri o nga makawe, tou kaki i nga tautau o nga mea whakapaipai.  
 11 Ka hanga e matou etahi mekameka koura mou, he mea tia ki te hiriwa.  
 12 I te kingi e noho ana i tona tepu, ka puta te kakara o toku nara. 13 Ko te rite ki ahau o taku  
 e aroha nei kei te paihere maira, e takoto nei i waenganui i oku u. 14 He tautau hena ki ahau taku  
 e aroha nei, i nga mara waina o Enekeri. 15 Nana, he ataahua koe, e taku e aroha nei; nana, he  
 purotu koe; ko ou kanohi kei te kukupa. 16 Nana, he ataahua koe, e taku kaingakau, ae ra, he  
 ahuaureka: matomato tonu ano hoki to taua moenga. 17 He hita nga kurupae o to taua whare, he  
 kauri nga heke.

## Chapter 2

1 He puawai ahau no Harono, he rengarenga no nga awaawa. 2 He rengarenga i roto i nga  
 tataramoa, ko taku e aroha nei i waenga i nga tamahine.  
 3 Kei te aporo i roto i nga rakau o te ngahere te rite o taku kaingakau i roto i nga taitamariki.  
 Ahuaureka ana taku noho iho i raro i tona taumarumarutanga, a he reka ana hua ki toku ngao. 4 I  
 kawea ahau e ia ki te whare hakari, a ko tona kara i runga i ahau he aroha. 5 Whakakahangia ake  
 ahau ki te karepe whakamaroke, whakahauorangia ahau ki te aporo; e mate ana hoki ahau i te aroha.  
 6 Kei raro i toku mahunga tona mau, e awhi ana tona matau i ahau. 7 He ki tenei naku ki a koutou,  
 e nga tamahine o Hiruharama, i te aroaro ano o nga anaterope, o nga hata o te parae, kua e  
 whakaohokia, kua e whakaarahia taku e aroha nei, a kia pai ra ano ia.  
 8 Ko te reo ra o taku e aroha nei! Nana, te haere mai nei ia, e tupekepeke ana i runga i nga  
 maunga, e mokowhiti ana i runga i nga pukepuke. 9 Rite tonu taku e aroha nei ki te anaterope, ki  
 te kua hata ranei: tenei ia te tu mai nei i muri o to matou taiepa, e matakitaki mai ana i nga matapihi,  
 e whakaata mai ana ra roto i te mea ripekapeka. 10 I korero mai taku e aroha nei, i mea mai ki ahau,  
 E ara, e taku ipo, e taku mea ataahua, ka haere mai. 11 Nana, kua pahemo te hotoke, kua mutu te  
 ua, kua kore; 12 Kua puta nga puawai ki te whenua; kua tata te wa e korihi ai nga manu, a e rangona  
 ana te reo o te kukupa ki to tatou whenua; 13 Kua kopuku nga hua hou o te piki, kua puaka nga  
 waina, e kakara mai nei. Maranga, e toku hoa, e taku mea ataahua, haere mai hoki.



14

E taku kukupa i roto i nga kapiti o te kamaka, i te wahi ngaro o te pikitanga, kia kite ahau i tou ahua, kia rongo ahau i tou reo; he reka hoki tou reo, he ataahua tou mata. Hopukia mai ma taua nga pokiha, nga pokiha ririki e takakino nei i a taua mara waina; kua puawai hoki a taua waina.

16

Naku taku kaingakau, nana hoki ahau: kei waenga ia i nga rengarenga e whangai ana i tana kahui.

17

I te mea kiano i matao te ra, a kiano i rere noa nga atarangi, tahuri mai, e taku e aroha nei, kia rite koe ki te anaterope, ki te kua o hata, i nga maunga o Petere.

### Chapter 3

1

I te po, i runga i toku moenga, i rapua e ahau ta toku wairua i aroha ai: i rapua e ahau, heoi kihai i kitea. Ka mea ahau, Ka whakatika ahau aiane, ka kopikopiko i roto i te pa, i nga huarahi,

i nga waharoa, ka rapu i ta toku wairua i aroha ai: rapua ana ia e ahau, heoi kihai i kitea. I tutaki ki ahau nga kaitiaki e kopikopiko nei i roto i te pa: ano ra ko ahau ki a ratou, I kite ranei koutou i

ta toku wairua e aroha nei? Pahemo kau atu ratou, kua tutaki ahau ki ta toku wairua e aroha nei; kei te pupuri ahau i a ia, kihai hoki ia i tukua atu e ahau, a kawea noatia atu ia e ahau ki te whare

o toku whaea, ki te ruma o te wahine i whanau ai ahau. He ki tenei naku ki a koutou, e nga tamahine o Hiruharama, i te aroaro o nga anaterope, o nga hata o te parae, kaua e whakaoho, kaua e whakaara i taku e aroha nei, kia pai ra ano ia.

6

Ko wai tenei e whakaputa mai nei i te koraha, ano ko nga pou paowa, kakara tonu i te maira, i te parakihe, i nga puehu katoa a te kaihoko?

7

Nana, ko te amo o Horomona; e toru tekau nga tangata marohirohi i tetahi taha, i tetahi taha, no nga marohirohi o Iharaira. He hunga mau hoari ratou katoa, he mea whakaako ki te whawhai;

kei tona huwaha ano te hoari a tenei, a tenei, i te wehi hoki i te po. I hanga e Kingi Horomona he

amo mona, no Repanona te rakau. Ko ona pou i hanga e ia ki te hiriwa, he koura a raro, he papura tona nohoanga, he mea whariki a waenganui ki te aroha, no nga tamahine o Hiruharama.

11

Haere, e nga tamahine o Hiona, ka matakitaki i a Kingi Horomona, me te karauna ano i karaunatia ai ia e tona whaea i te ra o tona marenatanga, i te ra hoki i koa ai tona ngakau.

## Chapter 4

<sup>1</sup> Nana, he ataahua koe, e toku hoa; nana, he ataahua koe; no nga kukupa ou kanohi i muri i tou arai: ko ou makawe, koia ano kei te kahui koati e takoto haere ana i te taha o Maunga Kireara.

<sup>2</sup> Ko ou niho, ano he kahui hipi uha katahi tonu ka oti te kutikuti, i haere mai i te horoi; rite katoa ratou i te mahanga, kahore hoki he mea pakoro i roto i a ratou.

<sup>3</sup> Ko ou ngutu, ano he aho ngangana, ahuaureka ana tou mangai: rite tonu ki tetahi wahi o te pamekaranete ou rahirahinga i muri i tou arai.

<sup>4</sup> Rite tonu tou kaki ki te pourewa o Rawiri, he mea i hanga hei iringa mo nga patu, kei reira nei nga whakangungu rakau kotahi mano e iri ana, ko nga whakapuru tao katoa a te hunga marohirohi.

<sup>5</sup> Ko ou u e rua rite tonu ki nga kua e rua, he mahanga na nga anaterope, e kai ana i waenga i nga rengarenga.

<sup>6</sup> I te mea kiano i matao noa te ra, a kiano i rere noa nga atarangi, ka haere ahau ki te maunga maira, ki te pukepuke parakihe.

<sup>7</sup> He ataahua katoa koe, e toku hoa; kahore hoki ou koha.

<sup>8</sup> Taua ka haere atu i Repanona, e toku hoa, taua atu i Repanona: matakitaki ai i te tihi o Amana, i te tihi o Heniri raua ko Heremona, i te nohoanga o nga raiona, i nga maunga o nga reparo.

<sup>9</sup> Riro pu toku ngakau i a koe, e toku tuahine, e toku hoa: riro pu toku ngakau i tetahi o ou kanohi, i tetahi o nga mekameka whakapaipai o tou kaki.

<sup>10</sup> Ano te ataahua o tou aroha, e toku tuahine, e toku hoa! Ano te pai o tou aroha! nui atu i te waina: ko te kakara hoki o ou hinu, nui atu i nga kinaki kakara katoa.

<sup>11</sup> He honi kei ou ngutu, e toku hoa, e maturuturu ana; he honi, he waiu kei raro i tou arero: ko te kakara hoki o ou kakahu, koia ano kei te kakara o Repanona!

<sup>12</sup> He kari kua oti te tutaki toku tuahine, toku hoa; he manawa whenua kua oti te papuni, he puna kua oti te hiri.

<sup>13</sup> Ko nga mea e wana ana i a koe he kari pamekaranete, he pai whakarere nga hua; he hena, he rakau nara,

<sup>14</sup> He nara, he hapirone, he karamu, he hinamona, me nga rakau parakihe katoa; he maira, he aroe, me nga mea nui katoa o nga kinaki kakara.

<sup>15</sup> He puna koe no nga kari, he poka wai ora, he awa toto mai hoki no Repanona.

<sup>16</sup> E ara, e te hauraro; haere mai hoki, e te tonga: pupuhi mai ki taku kari, kia rere ai nga kinaki kakara ki waho. Tukua taku e aroha nei kia haere mai ki tana kari, ki te kai i ana hua pai.

## Chapter 5

<sup>1</sup>  
Kua tae mai ahau ki taku kari, e toku tuahine, e toku hoa; kua oti taku maira me taku kinaki kakara te koho, kua kainga e ahau taku honikoma me taku honi; kua inumia e ahau taku waina me taku waiu. E kai, e oku hoa; e inu, ina, kia nui te inu, e taku e aroha nei.

<sup>2</sup>  
I te moe ahau, ko toku ngakau ia i te oho. Ko te reo tenei o taku e aroha nei e patuki ana, e mea ana, Te tatau ki ahau, e toku tuahine, e toku hoa, e taku kukupa, e taku mea pokekore; ki tonu

hoki toku mahunga i te tomairangi, oku makawe ano hok i i nga kopata o te po. <sup>3</sup> Kua oti toku koti te unu e ahau: me pehea e kakahuria ai ano? Kua oti oku waewae te horoi; kia whakaparua ano

koia e ahau? <sup>4</sup> I kuhua mai tona ringa e taku e aroha nei i te kohao o te tatau, a oho ana toku manawa

mona. <sup>5</sup> I ara atu ahau ki te uaki i te tatau ki taku i aroha ai; maturuturu ana te maira i oku ringa,

te maira waiwai i oku maihao ki nga puritanga o te tutaki. <sup>6</sup> Uakina ana e ahau ki taku i aroha ai; heoi kua maunu atu taku i aroha ai, a kua riro: toku wairua riro pu i tana kupu: i rapu ahau i a ia;

heoi kihai i kitea; i karangatia atu ia e ahau, kihai ano ia i whakahoki kupu mai. <sup>7</sup> I tutaki ki ahau nga kaitiaki e kopikopiko nei i te pa; patua ana ahau e ratou, mamae ana ahau i a ratou; tangohia

ana toku hipoki i ahau e nga kaitiaki o nga taiepa. <sup>8</sup> He ki atu tenei naku ki a koutou, e nga tamahine o Hiruharama, Ki te tutaki koutou ki taku e aroha nei, ki atu ki a ia, e mate ana ahau i te aroha.

<sup>9</sup>  
E te wahine ataahua rawa o nga wahine, he aha te nuinga ake o tau i aroha ai i tetahi atu e arohaina ana? He aha te nuinga ake o tau i aroha ai i tetahi atu e arohaina ana, i pena ai tau ki mai

ki a matou? <sup>10</sup> He ma taku i aroha ai, he kiri wherowhero, ko te mea nui rawa o nga mano kotahi

tekau. <sup>11</sup> Ko tona mahunga kei te tino koura, he mea parakore, ko ona makawe he mawhatu, a

mangu tonu, ano he raweni. <sup>12</sup> Ko ona kanohi kei o nga kukupa i te taha o nga awa wai, he mea

horoi ki te waiu, pai rawa te whakanoho. <sup>13</sup> Ko ona paparinga, ano he tupuranga kinaki kakara, ano he rarangi tarutaru reka; ko ona ngutu, me te mea he rengarenga e whakamaturu iho ana i te

wai maira. <sup>14</sup> Ko ona ringa, ano he mowhiti koura i whakanohia he perira ki roto: ko tona tinana,

kei te rei pai rawa, he mea whakakikorua ki te hapira. <sup>15</sup> Ko ona waewae, rite tonu ki te pou mapere, he mea whakatu ki nga turanga koura pai rawa; ko tona ahua koia ano kei Repanona, me te hita te

tino pai rawa. <sup>16</sup> Ko tona mangai he tino reka: ae ra, he ahua reka katoa ia. Ko taku tenei i aroha ai, ko toku hoa ano tenei, e nga tamahine o Hiruharama.

## Chapter 6

<sup>1</sup> Kua riro ki hea tau e aroha na, e te wahine ataahua rawa o nga wahine? I anga ki hea tau e aroha na, kia rapu tahi ai matou me koe? <sup>2</sup> Kua riro taku e aroha nei ki raro, ki tana kari, ki nga tupuranga o nga kinaki kakara, ki nga kari kai ai, ki te kato i nga rengarenga. <sup>3</sup> Na taku e aroha nei ahau, a naku taku e aroha nei: kei nga rengarenga ia e whangai ana i tana kahui.

<sup>4</sup> He ataahua koe, e toku hoa, he pera me Tirita; he ahua koe, pera me Hiruharama, he whakamataku pera me te taua e tare ana nga kara. <sup>5</sup> Tahuri atu ou kanohi i ahau, ka riro hoki ahau i a raua; ko ou makawe, koia ano kei te kahui koati e takoto ana i te taha o Kireara. <sup>6</sup> Ko ou niho ano he kahui hipi uha e haere mai ana i te horoi, rite katoa i te mahanga, kahore hoki he pakoro i roto i a ratou. <sup>7</sup> Rite tonu ki tetahi wahi o te pamekaranete ou rahirahinga i muri i tou arai. <sup>8</sup> E ono tekau enei kuini, e waru tekau nga wahine iti, me nga wahine e kore e taea te tatau. <sup>9</sup> Ko taku kukupa, ko taku mea pokekore, he mea kotahi noa; ko ia anake ta tona whaea; ko ia te mea i paingia rawatia e te wahine i whanau ai ia: i kite nga tamahine i a ia, kei te manaaki i a ia; ae ra, ko nga kuini me nga wahine iti, whakamoemiti ana ratou ki a ia. <sup>10</sup> Ko wai tenei e matakitaki mai nei, ano ko te ata, ataahua tonu, ano ko te marama, marama rawa, koia ano kei te ra, whakawehi rawa, me te mea he taua e tare ana nga kara?

<sup>11</sup> I haere atu ahau ki te kari nati, kia kite i nga taru matomato o te awaawa; kia kite e tupu ana ranei te waina, e kopuku ana ranei nga pamekaranete. <sup>12</sup> Mohio rawa ake ahau kua meinga ahau e toku wairua kia tau ki waenga ki nga hariata o toku iwi rangatira. <sup>13</sup> Hoki mai, hoki mai, e te Hurami, hoki mai, hoki mai, kia matakitaki ai matou ki a koe. He aha ta koutou e titiro ai ki te Hurami me te mea ko te haka o Mahanaima?

## Chapter 7

<sup>1</sup> Ano te ataahua o ou waewae i roto i ou hu, e te tamahine a te rangatira! Ko nga hononga o ou huha, koia ano kei o nga peara, he mea hanga na nga ringa o te kaimahi mohio. <sup>2</sup> Ko tou pito, koia ano kei te oko porotaka, kihai i hapa i te waina whakaranu; ko tou kopu, ano he puranga witi kua oti te karapoti ki nga rengarenga. <sup>3</sup> Ko ou u e rua, ano ko nga kua e rua, he mahanga na te anaterope. <sup>4</sup> Ko tou kaki ano he pourewa rei; ko ou kanohi, ano ko nga roto wai i Hehepona, i te kuwaha o Peterapimi; ko tou ihu, ano ko te pourewa o Repanona, e titiro atu nei ki Ramahiku. <sup>5</sup> Ko

tou mahunga i runga i a koe rite tonu ki Karamere, a ko te makawe o tou mahunga ki te papura; e mau herehere ana te kingi i roto i ona uru. <sup>6</sup> Ano te ataahua, ano te pai ou, e te mea e arohaina ana, ahuareka tonu! <sup>7</sup> Rite tonu koe ki te nikau i a koe e tu nei, a ko ou u ki nga tautau karepe. <sup>8</sup> I mea ahau, Ka pikitia e ahau te nikau, ka hopukia atu e ahau ona manga: kia rite ou u ki nga tautau o te waina, te kakara o tou ha ki te aporo; <sup>9</sup> A ko tou mangai kia rite ki te waina tino pai e mania nei tana heke ma taku e aroha nei, e rere ana na nga ngutu o te hunga e moe ana.

<sup>10</sup> Kei taku e aroha nei ahau; ko ahau ano tana e hiahia ai. <sup>11</sup> Haere mai, e taku e aroha nei, taua ka haere ki te parae, ka moe taua ki nga pa ririki. <sup>12</sup> Kia moata to taua maranga ki nga mara waina; kia kite ai, e tupu ana ranei te waina, kua puta ranei te karepe hou, e kopuku ana ranei nga pamekaranete; ko reira hoatu ai e ahau toku aroha ki a koe. <sup>13</sup> Kei te patu te kakara o nga manitareki, kei o taua kuwaha ano nga momo hua papai katoa, nga mea hou, nga mea tawhito, he mea rongoa naku mau, e taku e aroha nei.

## Chapter 8

<sup>1</sup> Aue me i rite koe ki toku tungane i ngote nei i nga u o toku whaea! Ka kite ahau i a koe i waho, ka kihia koe e ahau; ae, e kore tetahi e whakahawea ki ahau. <sup>2</sup> Ka aratakina koe e ahau, ka kawea ki te whare o toku whaea, ko ia ano hei whakaako i ahau; ka whakainumia koe e ahau ki te waina whakaranu, ki te wai o taku pamekaranete. <sup>3</sup> Ko tona maui ki raro i toku matenga, ko tona matau ki te awahi i ahau. <sup>4</sup> He ki atu tenei naku ki a koutou, e nga tamahine o Hiruharama, kua e whakaohokia, kua e whakaarahia taku e aroha nei, kia pai ra ano ia.

<sup>5</sup> Ko wai tenei e haere mai nei i te koraha e taupuhipuhi nei ki tana i aroha ai? Naku koe i whakaara ake i raro i te aporo; ko te wahi tena i puta mai ai koe i roto i tou whaea; i puta mai ano koe i reira i roto i te wahine i whanau ai koe. <sup>6</sup> Waiho ahau hei hiri ki tou ngakau, hei hiri ki tou ringa; rite tahi hoki ki to te mate te kaha o te aroha; nanakia tonu te hae, ano ko te urupa, ko ona hiko, he hiko ahi, he mura pu na Ihowa. <sup>7</sup> Nui te wai, e kore te aroha e taea te tinei, e kore ano e ngaro i nga awa: ahakoa i hoatu e te tangata nga rawa katoa o tona whare mo te aroha, ka whakahaweatia rawatia.

<sup>8</sup> He teina nohinohi to matou, kahore hoki ona u: me pehea matou ki to matou teina i te ra e korerotia ai ia? <sup>9</sup> Ki te mea he taiepa ia, ka hanga e tatou he pourewa ki runga ki a ia, he mea hiriwa:

ki te mea he tatau ia, ka whakakopakina ia e tatou ki nga papa hita. <sup>10</sup> He taiepa ahau, ko oku u,  
 ano ko ona pourewa; no reira, ki tana titiro mai, i rite ahau ki tetahi kua kite i te ata noho. <sup>11</sup> He  
 mara waina ta Horomona i Paarahamono, tukua atu ana e ia te mara ki nga kaitiaki; kotahi mano  
 nga hiriwa hei kawenga mai ma tenei, ma tenei hei utu mo ona hua. <sup>12</sup> Ko taku mara, ko taku ake,  
 kei toku aroaro: mau, e Horomona, te kotahi mano, a ma nga kaitiaki o ona hua e rua rau.  
<sup>13</sup> E koe e noho nei i nga kari, e whakarongo ana nga hoa ki tou reo: meinga kia rongu ahau.  
<sup>14</sup> Kia hohoro, e taku e aroha nei, kia rite koe ki te anaterope, ki te kua o hata ranei i runga i nga  
 maunga kinaki kakara.

## Isaiah

### Chapter 1

<sup>1</sup> Ko te kite a Ihaia, a te tama a Amoho, i kite ai ia mo Hura, mo Hiruharama, i nga ra o nga  
 kingi o Hura, o Utia, o Iotama, o Ahata, o Hetekia.  
<sup>2</sup> Whakarongo, e nga rangi, kia whai taringa ano, e te whenua, kua korero hoki a Ihowa: Kua  
 atawhai tamariki ahau, kua whakatupu hoki, na kua tahuri mai ratou ki ahau. <sup>3</sup> E mohio ana te kau  
 ki tona ariki, te kaihe ki te takotoranga kai a tona rangatira: ko Iharaira ia kahore e mohio, kahore  
 taku iwi e whakaaro. <sup>4</sup> Aue, e te iwi hara, he hunga taimaha i te kino, he uri no nga kaimahi i te  
 he, he tamariki whakangau ke: kua whakarerea e ratou a Ihowa, kua whakahawea ki te Mea Tapu  
 o Iharaira, kua tangata ke ratou a kua hoki whakamuri. <sup>5</sup> Kia patua tonutia hoki koutou hei aha, i  
 tutu tonu ai koutou? kei te mate katoa te mahunga, kei te ruhi katoa hoki te ngakau. <sup>6</sup> Kahore ona  
 wahi ora, ake i te kapu o tona waewae a tae noa ki te mahunga; he kaiakiko kau, he karawarawa,  
 he whiunga kua pirau: kihai ena i romia, kihai i takaia, kihai ano hoki i whakangawaritia ki te hinu.  
<sup>7</sup> Ko to koutou whenua kua ururuatia; ko o koutou pa kua wera i te ahi; he tangata ke kei te kai i to  
 koutou oneone i to koutou aroaro, ururua ana, koia ano kei ta te tangata ke raupatutanga. <sup>8</sup> A ka  
 mahue iho te tamahine a Hiona, ano he tihokahoka i te mara waina, ano he wharau i te mara kukamo,  
<sup>9</sup> he pa e whakapaea ana. Me i kahore a Ihowa o nga mano te waiho i tetahi toenga nohinohi rawa  
 nei ki a tatou, kua pera tatou me Horoma, kua rite tatou ki Komora.

10 Whakarongo ki te kupu a Ihowa, e nga rangatira o Horoma; kia whai taringa mai, e te iwi o  
 11 Komora, ki te ture a to tatou Atua. Hei aha maku a koutou patunga maha? e ai ta Ihowa: kua  
 makona ahau i nga tahunga o nga tinana o nga hipi toa, i te ngako o nga kararehe whangai; kahore  
 12 hoki aku manakohanga atu ki te toto o nga puru, o nga reme, o nga koati toa ranei. Ka haere  
 mai koutou, ka whakakite mai ki toku aroaro, ko wai i ki atu ki tenei mea a o koutou ringa, kia  
 13 takahia oku marae? Kati te mau mai i nga whakahere horihori: he mea whakarihariha ki ahau  
 te whakakakara; te kowhititanga marama, te hapati, te karangatanga o nga whakaminenga, e kore  
 14 ahau e manawanui ki te kino, ki te huihui nui. Ko a koutou kowhititanga marama, ko a koutou  
 15 hakari whakarite, e kino ana toku ngakau: he mea porearea ki ahau; he hanga whakahoha. Na  
 ka wherahia mai o koutou ringa, ka huna e ahau oku kanohi ki a koutou; ae ra, ka whakanuia e  
 koutou te inoi e kore ahau e rongu, kapi tonu o koutou ringa i te toto.

16 Horoi i a koutou, kia ma; whakarerea atu te kino o a koutou hanga i mua i oku kanohi; kati  
 17 te mahi i te kino; Akona te mahi pai; rapua te whakawa; whakatikaia ta te tangata e tukinotia  
 18 ana; whakawakia ta te pani; tohea ta te pouaru. Tena ra, tatou ka kororerero, e ai ta Ihowa;  
 ahakoa i rite o koutou hara ki te mea ngangana, ka pera me te hukarere te ma; ahakoa i whero me  
 19 te mea whakawhero, ka rite ki te huruhuru hipi. Ki te mea ka pai koutou, a ka rongu, ka kai  
 20 koutou i nga mea pai o te whenua; Ki te whakakahore koutou, a ka tutu, ka pau koutou i te hoari;  
 kua korero hoki te mangai o Ihowa.

21 Aue! tona kairautanga o te pa pono! i ki nei ia i te whakawa! he nohoanga no te tika, inaianei  
 22 ia no nga kaikohuru. Ko tau hiriwa kua meinga hei para, ko tau waina, kua whakaranua ki te  
 23 wai. Ko ou rangatira kei te whakakeke, a he hoa ratou no te hunga tahae; e whakapai ana ratou  
 ki te moni whakapati, e whai ana i te utu; kahore ratou e whakawa ana mo te pani, a kahore te tohe  
 24 a te pouaru e tae ana ki a ratou. No reira ka mea te Ariki, a Ihowa o nga mano, te Mea Nui o  
 25 Ihairaira, Na! ka whai mamatanga ahau i oku hoariri, ka whai utu ahau i oku hoariri: Ka tahuri  
 26 atu hoki toku ringa ki a koe, a ka tahia rawatia tou para, ka wehea katoatia atu ano tou tine: A  
 ka whakahokia mai e ahau ou kaiwhakawa kia rite ki o mua, me ou kaiwhakatakoto whakaaro, kia  
 27 rite ki o te timatanga; muri iho ka kiia koe, Ko te pa o te tika, ko te pa piripono. Ka hokona a  
 28 Hiona i runga i te whakawa, ana tangata hoki, e tahuri mai ana, i runga i te tika. Ka huihuia ia  
 kia kotahi tonu te whakangaromanga o te hunga poka ke, o te hunga hara, a ka whakamotitia te

<sup>29</sup> hunga e whakarere ana i a Ihowa. Ka whakama hoki ratou i nga oki i matenuitia e koutou,  
<sup>30</sup> numinumi kau koutou i nga kari i whiriwhiria e koutou. Ka rite hoki koutou ki te oki kua memenge  
<sup>31</sup> ona rau, ki te kari ano hoki kahore nei ona wai. A hei muka te mea kaha, hei korakora ano tana  
 mahi; na ka ngiha ngatahi raua, kahore hoki he tangata hei tinei.

## Chapter 2

<sup>1</sup> Ko te kupu i kitea e Ihaia tama a Amoho mo Hura raua ko Hiurharama. <sup>2</sup> Na tenei ake, kei  
 nga ra whakamutunga, ka whakapumautia te maunga i to Ihowa whare ki te tihi o nga maunga, ka  
 whakanekehia ake ano ki runga i nga pukepuke; a ka rere nga iwi katoa ki reira. <sup>3</sup> Ka haere hoki  
 nga iwi maha, ka mea, Haere mai, tatou ka haere ki runga ki te maunga o Ihowa, ki te whare o te  
 Atua o Hakopa: ka whakaakona tatou e ia ki ana ara; ka haere hoki tatou i ana huarahi; no te mea  
 ka puta mai te ture i Hiona, me te kupu a Ihowa i Hiruharama. <sup>4</sup> Ka whakarite hoki ia i nga whakawa  
 a nga iwi, ka riria ano e ia nga iwi maha: na ka patupatua e ratou a ratou hoari hei hea parau, a ratou  
 tao hei mea tapahi manga; e kore tetahi iwi e hapai hoari ki tetahi iwi, mutu pu ta ratou ako ki te  
 whawhai. <sup>5</sup> E te whare o Hakopa, haere mai, tena tatou ka haere i to Ihowa marama.  
<sup>6</sup> Kua whakarerea nei e koe tau iwi, te whare o Hakopa, no te mea kei te ki ratou i nga tikanga  
 mai no te rawhiti, a he tohunga maori ratou, he pera me nga Pirihitini, e papaki ringa ana hoki ratou  
 me nga tamariki a rau o iwi. <sup>7</sup> Ki tonu hoki to ratou whenua i te hiriwa, i te koura, a kahore he  
 mutunga o o ratou taonga: kapi tonu hoki to ratou whenua i te hoiho, a kahore he mutunga o a ratou  
 hariata. <sup>8</sup> Ko to ratou whenua ki tonu i te whakapakoko; e koropiko ana ratou ki te mahi a o ratou  
 ringa, ki ta o ratou maihao i hanga ai. <sup>9</sup> A e whakapikoa ana te tangata ware, e whakaititia ana te  
 tangata nui; mo reira kaua ratou e tohungia.  
<sup>10</sup> E tomo ki roto ki te kamaka, e huna ki roto ki te puehu, i te wehi ki a Ihowa, i te kororia o  
 tona nui. <sup>11</sup> Ka whakaititia nga kanohi whakapehapeha o te tangata, ka whakapikoa iho ano hoki  
 te whakakae o nga tangata, a ko Ihowa anake e whakanuia i taua ra. <sup>12</sup> No te mea ka tae iho he ra  
 no Ihowa o nga mano ki te hunga whakapehapeha, ki te hunga whakakae katoa, ki te hunga katoa  
 kua neke ake; a ka whakaititia iho: <sup>13</sup> Ki nga hita katoa ano o Repanona kua tiketike, kua neke  
 ake, ki nga oki katoa ano o Pahana; <sup>14</sup> Ki nga maunga tiketike katoa, ki nga pukepuke katoa kua



<sup>15</sup> purero ki runga: Ki nga pourewa tiketike katoa, ki nga taiepa kaha katoa ano hoki, <sup>16</sup> Ki nga  
<sup>17</sup> kaipuke katoa o Tarahihi, ki nga whakaahua katoa e minaminatia ana. A e whakapikoa iho to  
 te tangata whakapehapeha, e whakaititia iho ana ano hoki te whakakake o nga tangata, ko Ihowa  
<sup>18</sup> anake e whakanuia i taua ra. A ka ngaro whakarere nga whakapakoko, <sup>19</sup> A ka haere nga tangata  
 ki nga ana o nga kamaka, ki nga rua o te whenua, i te wehi ki a Ihowa, i te kororia o tona nui, ina  
<sup>20</sup> whakatika ia ki te rure kaha i te whenua. A taua ra ka akiritia atu e te tangata ana whakapakoko  
 hiriwa me ana whakapakoko koura i hanga e ratou hei koropikotanga mana, ki nga kiore, ki nga  
<sup>21</sup> pekapeka; Haere ai ki nga ana o nga kohatu, ki nga kapiti o nga kamaka, i te wehi ki a Ihowa,  
 i te kororia o tona nui, ina whakatika ia ki te rurerure i te whenua. <sup>22</sup> Kati ta koutou mea ki te  
 tangata kei ona pongaponga nei tona manawa; kia pehea hoki te whakaaro ki a ia?

### Chapter 3

<sup>1</sup> No te mea tenei te Ariki, a Ihowa o nga mano, te tango atu nei i Hiruharama, i a Hura, i te  
 titoko me te tokotoko, i te titoko taro katoa, i te titoko wai katoa; <sup>2</sup> I te marohirohi, i te tangata  
 whawhai; i te kaiwhakawa, i te poropiti, i te tohunga, i te tautahito; <sup>3</sup> I te rangatira rima tekau, i te  
 tangata nui, i te kaiwhakatakoto whakaaro, i te kaimahi mohio, i te mea matau ki te taki. <sup>4</sup> Ka hoatu  
 ano e ahau he tamariki hei rangatira mo ratou, he kohungahunga hoki hei kingi mo ratou. <sup>5</sup> Ka  
 tukinotia ano te iwi, tetahi e tetahi, te tangata e tona hoa tata; ka whakahihi hoki te tamariki ki te  
 kaumatua, te mea e whakahaweatia ana ki te tangata e whakahonoretia ana. <sup>6</sup> E mau hoki te tangata  
 ki tona tuakana, i te whare o tona papa, a ka mea, He kakahu tou, hei rangatira koe mo matou, a  
 hei raro i tou ringa tenei whakatakanga: <sup>7</sup> A taua ra ka karanga nui ia, ka mea, E kore ahau e pai  
 hei kaiwhakaora; kahore hoki he taro i toku whare, kahore he kakahu: kaua ahau e meinga e koutou  
 hei rangatira mo te iwi. <sup>8</sup> Kua taka hoki a Hiruharama, kua hinga a Hura; kua whawhai nei hoki to  
 ratou arero, me a ratou mahi, ki a Ihowa, whakapataritari ai i nga kanohi o tona kororia.  
<sup>9</sup> Ko te titiro hoki a o ratou kanohi hei kaiwhakaatu mo to ratou he; e pera ana me Horoma e  
 whakapuaki ana i o ratou hara, kahore e huna. Aue te mate mo to ratou wairua! ko ta ratou utu hoki  
 ki a ratou ano, ko te kino. <sup>10</sup> Mea atu ki te tangata tika, ko te pai mona: ka kainga hoki e ratou nga  
 hua o a ratou mahi. <sup>11</sup> Aue te mate mo te tangata kino! ko te he mona: ka riro hoki i a ia te utu o

<sup>12</sup>  
 ta ona ringa. Tena ko taku iwi, he tamariki o ratou kaitukino, he wahine hoki e kingi ana mo  
 ratou. E taku iwi, ko ou kaiarahi kei te whakapohehe i a koe, kei te whakakahore hoki i te tikanga  
<sup>13</sup>  
 o ou huarahi. E whakatika ake ana a Ihowa ki te tohe, e tu ana ia ki te whakawa i nga iwi. <sup>14</sup> Ka  
 timata ta Ihowa whakawa i nga kaumatua o tana iwi, i ona rangatira ano hoki: Ko koutou nana i  
<sup>15</sup>  
 pau ai te mara waina; ko nga taonga a nga rawakore i pahuatia kei roto i o koutou whare: He  
 aha ta koutou tikanga i kuru ai koutou i taku iwi, i orohina ai e koutou nga mata o nga rawakore?  
 e ai ta te Ariki, ta Ihowa o nga mano.  
<sup>16</sup>  
 Na i mea ano a Ihowa, Na i te mea e whakapehapeha ana nga tamahine o Hiona, e haere ana  
 me te uatoko o nga kaki, me te takataka o nga karu, ka whakameamea, me te tatangi ano nga  
<sup>17</sup>  
 waewae: Mo reira ka whakangaua e te Ariki ki te patito te tumuaki o nga tamahine o Hiona, ka  
 takoto kau ano hoki i a Ihowa o ratou wahi ngaro. <sup>18</sup> I taua ra ka kore i te Ariki te ataahua o nga  
 mea tatangi o nga waewae, o nga whakapaipai ripekapeka, o nga heitiki; <sup>19</sup> Nga mekameka, nga  
<sup>20</sup>  
 poroporo me nga arai kanohi, Nga potae, nga whakapaipai o nga waewae, nga pakawe, nga  
 pouaka hongihongi me nga whakakai, <sup>21</sup> Nga mowhiti, nga whakapaipai o te ihu, <sup>22</sup> Nga kakahu  
 whakapaipai, nga koroka, nga hooro me nga pukoro, <sup>23</sup> Nga whakaata me te rinena pai, nga potae  
<sup>24</sup>  
 me nga arai whakapaipai. Na he kakara pai i mua, tera e puta ake he piro; he whitiki, tuku iho  
 he tawhetawhe; he koukou huatau, tau iho he pakira kau; he tatua whakapaipai, kopakina iho ki te  
<sup>25</sup>  
 kakahu taratara: he ataahua, hunuhunua ake. Ka hinga ou tangata i te hoari, ou marohirohi i te  
<sup>26</sup>  
 whawhaitanga. Ka tangi, ka aue ona kuwaha; a ka mokemoke ia, ka tau ki te whenua.

## Chapter 4

<sup>1</sup>  
 E mau ano nga wahine tokowhiti ki te tangata kotahi i taua ra, a ka mea, Ko ta matou taro  
 ano hei kai ma matou, ko o matou kakahu ano hei kakahu mo matou; ko tou ingoa noa kia  
 whakahuatia mo matou; tangohia atu e koe to matou ingoa kino.  
<sup>2</sup>  
 I taua ra tera e ataahua te peka o Ihowa, e kororia rawa, a ka mamaru te hua o te whenua, ka  
<sup>3</sup>  
 whakapaipai, hei mea ma nga morehu o Iharaira. Na, ko te tangata i toe ki Hiona, i mahue ki  
 Hiurharama, ka kiia he tapu, ara nga tangata katoa kua oti te tuhituhi ki roto ki te hunga ora i  
<sup>4</sup>  
 Hiruharama: Ina oti te paru o nga tamahine o Hiona te horoi e te Ariki, ina purea e ia nga toto o

5

Hiruharama i roto i a ia, ki te wairua o te whakawa, ki te wairua tahutahu. A ka hanga e Ihowa ki runga ki te nohoanga katoa o Maunga Hiona, ki runga ano hoki i ona huihuinga, he kapua me te paowa i te awatea, he aho no te ahi murara i te po; no te mea ka horahia he hipoki ki runga katoa o te kororia. A ka ai he tihokahoka hei whakamarumaruru i te awatea mo te werawera, hei rerenga atu hoki, hei whakaruru mo te tupuhi, mo te ua.

## Chapter 5

1 Na, me waiata e ahau he waiata na taku i aroha nei mo taku i kaingakau ai, he mea mo tana mara waina. He mara waina ta taku kaingakau i tetahi pukepuke momona: Na taiepatia ana e ia, kohikohia ana e ia nga kohatu o reira, whakatokia ana e ia ki te waina pai rawa, hanga ana e ia he pourewa ki waenganui, keria ana ano e ia he poka waina ki reira: a ka tatari ia kia whai karepe, na ka hua mai he karepe mao ri. Na, e te hunga e noho nei i Hiruharama, me nga tangata o Hura, whakaritea ta maua whakawa ko taku mara waina. Ko te aha ake ano ra i ahei kia mahia ki taku mara, kihai i mahia e ahau ki reira? he aha ra, i ahau i tatari ai kia hua mai he karepe, i puta ke mai ai he karepe maori? Na inaianei maku e whakaatu ki a koutou taku e mea ai ki taku mara waina: Ka tangohia atu e ahau tona pa whakaruru hau, a ka pau ia te kai; ka tukitukia hoki e ahau tona taiepa, a ka takatakahia: A ka meinga e ahau kia ururua; e kore e tapatapahia, e kore e ngakia; engari ka huaranga ake te tataramoa me te tumatakuru: ka ako atu hoki ahau ki nga kapua kia kaua te ua e uaina ki reira. Ko te mara waina hoki a Ihowa o nga mano, ko te whare o Iharaira, a ko nga tangata o Hura tana mea ahuaireka i whakato ai: ka tatari ia ki te whakawa, na ko te tukino; ki te tika, na he aue.

8 Aue te mate mo te hunga e hono ana i te whare ki te whare, e whakapiri nei i te mara ki te mara, a kore noa iho he wahi, a ka meinga koutou kia noho, ko koutou anake, i waenganui i te whenua. Ko ta Ihowa o nga mano tenei i hamumu ai ki oku taringa, He pono, he tini nga whare ka mokemoke, tona nunui, tona ataahua, ka noho tahanga kau. No te mea kotahi tekau nga eka o te mara waina, ka maea ake kotahi tonu te pati: i ki te homa i te purapura, ka maea ake kotahi te epa. Aue te mate mo te hunga e maranga wawe ana i te ata ki te whai i te wai kaha; e kawea ana i te roa o te po, nawai a ka tahuna e te waina! Ko te hapa me te hatere, ko te timipera me te putorino, ko te waina, kei a ratou hakari ena: heoi kahore a ratou mahara ki te mahi a Ihowa, kahore hoki he whakaaro ki te mahi a ona ringa. Koia i riro ai toku iwi i te parau, he kore matauranga;

ko o ratou tangata ingoa nui hoki kua hemo i te kai, a ko to ratou mano tini kua pakapaka rawa i te  
<sup>14</sup>matewai. Na reira te reinga i whakanui ai i tona hiahia, i whewhera noa atu ai i tona mangai; a

heke atu ana ki reira to ratou kororia, o ratou mano tini, to ratou whakahi, me te tangata e  
<sup>15</sup>whakamanamana ana i roto i a ratou. Ka whakapikoa ano hoki te tangata ware, a ka whakaititia

te tangata nui ka whakahokia iho hoki nga kanohi o te hunga whakakake: <sup>16</sup>Otiia ka whakanekehia  
 ake a Ihowa o nga mano i runga i te whakawa, ka whakatapua ano te Atua, te Mea Tapu, i runga i

te tika. <sup>17</sup>Ko reira nga reme kai ai, ano kei to ratou wahi, a ka kainga e nga mea haere noa nga  
 wahi kua ururuatia o te hunga tetere.

<sup>18</sup>Aue te mate mo te hunga e kumea ana e ratou te he ki nga aho o te horihori, te hara hoki me

te mea ki te taura o te kata: <sup>19</sup>E mea nei, Kia hihiko ia, kia hohoro tana mahi, kia kite ai matou:  
 kia whakatata mai hoki, kia tae mai te whakaaro o te Mea Tapu o Iharaira, kia mohio ai matou.

<sup>20</sup>Aue te mate mo te hunga e mea nei ki te kino, he pai, ki te pai hoki, he kino; e mea nei i te pouri

hei marama, i te marama hoki hei pouri; e mea nei i te kawa hei reka, i te reka hei kawa! <sup>21</sup>Aue  
 te mate mo te hunga he nui nei o ratou whakaaro ki ta ratou titiro, e mahara ana hoki he hunga

mohio ratou! <sup>22</sup>Aue te mate mo te hunga kaha ki te inu waina, he hunga uaua ano ki te whakararu  
 i te wai kaha: <sup>23</sup>E whakatika nei i ta te tangata he, he whakaaro ki te utu; e tango atu nei i te tika

o te tangata tika. <sup>24</sup>Mo reira ka rite ki te kainga a te arero o te ahi i te kakau witi, ki te hinganga  
 o te otaota maroke ki roto ki te mura; ka pera to ratou pakiaka te pirau, ka rere to ratou puawai ki

runga, ano he puehu: mo ratou i whakakahore ki te ture a Ihowa o nga mano, i whakahawea ano  
 hoki ki te kupu a te Mea Tapu o Iharaira. <sup>25</sup>Na reira te riri o Ihowa i mura ai ki tana iwi, a kua

torona e ia tona ringa ki te whawhai ki a ratou, a patua iho ratou e ia; i ngaueue nga maunga, a ko  
 o ratou tinana mate me te mea he paru i waenganui o nga huarahi. Na ahakoa tenei katoa, kah ore

tona riri i te tahuri atu, maro tonu tona ringa. <sup>26</sup>Ka whakaarahia ano hoki e ia he kara ki nga iwi  
 i tawhiti; ka whiowhio ano ki a ratou ki te pito o te whenua. Nana, ka hohoro, ka tere tonu ta ratou

haere mai. <sup>27</sup>E kore tetahi o ratou e ngenge, e kore e tapepa te waewae; e kore tetahi e parangia,  
 e kore e moe; e kore te whitiki o o ratou hope e mawheto, e kore ano te here o o ratou hu e motu.

<sup>28</sup>Ko a ratou pere, koi tonu, he piko katoa a ratou kopere; ko nga paua o o ratou hoiho ka kiia he

mata, a ko o ratou wira he awhiowhio: <sup>29</sup>Ko ta ratou hamama, koia ano kei ta te raiona, ka hamama  
 ratou ano he kuao raiona: ae ra, ka ngaengere ratou, ka hopukina: ae ra, ka ngengere ratou, ka

hopukina ta ratou tupapaku, kawhakina tonutia atu, kahore hoki he tangata hei whakaora. <sup>30</sup>Na

ka hamama ratou ki a ratou i taua ra, me te mea ko te moana e haruru ana: a, ki te titiro tetahi ki te whenua, nana, he pouri me te tuatea, a kua pouri te marama i ona kapua.

## Chapter 6

<sup>1</sup> I te tau i mate ai a Kingi Utia i kite ahau i te Ariki e noho ana i runga i te torona, he tiketike, he mea whakarewa ake ki runga, ki tonu ano hoki te temepara i te remu o tona. <sup>2</sup> E tu ana nga herapima i runga ake i a ia: e ono nga parirau o tetahi, o tetahi; i hipokina e ia tona mata ki tetahi rua, ona waewae hoki ki tetahi rua, a ko tetahi rua hei rere mana. <sup>3</sup> A i karanga ratou tetahi ki tetahi, i mea, He tapu, he tapu, he tapu, a Ihowa o nga mano; ki katoa te whenua i tona kororia. <sup>4</sup> I oioi ano nga pou o nga tatau i te reo o tera i karanga ra, ki tonu te whare i te paowa.

<sup>5</sup> Na ko taku kianga ake, Aue te mate moku! ka ngaro hoki ahau; he tangata ngutu poke hoki ahau, e noho ana i waenganui i te iwi ngutu poke; kua kite nei hoki oku kanohi i te kingi, i a Ihowa o nga mano. <sup>6</sup> Na ko te rerenga mai o tetahi o nga herapima ki ahau, he waro mura i tona ringa, he mea tango mai e ia i te aata ki te kokopi. <sup>7</sup> Whakapangia mai ana e ia ki toku mangai, me tana ki mai, Nana, kua pa tenei ki ou ngutu; na kua riro tou he, kua murua tou hara. <sup>8</sup> Na ka rongu ahau i te reo o te Ariki e mea ana, Ko wai taku e unga ai, ko wai ta tatou hei haere? Ano ra ko ahau, Tenei ahau, ngarea ko ahau.

<sup>9</sup> Ano ra ko ia, Haere, mea atu ki tenei iwi, Rongo noa koutou, e kore e matau; titiro noa koutou, e kore e kite. <sup>10</sup> Meinga te ngakau o tenei iwi kia ngako, o ratou taringa kia taimaha, whakamoea o ratou kanohi; kei kite o ratou kanohi, kei rongu o ratou taringa, kei matau o ratou ngakau, a ka tahuri, ka whakaorangia. <sup>11</sup> Ano ra ko ahau, E te Ariki, kia pehea te roa? Na ka mea ia, Kia uruatuia ra ano nga pa, a kore noa he tangata hei noho, kia kore ra ano he tangata mo roto i nga whare, kia tino uruatuia rawatia ano hoki te whenua. <sup>12</sup> Kia whakamataratia e Ihowa nga tangata ki tawhiti, a ka nui te whakarereanga i waenganui i te whenua. <sup>13</sup> A, ki te mau ano he whakatekau i roto i a ia, ka kainga tuaruatia ano ia: ka rite ki te terepini, ki te oki, e mau tonu nei tona uho, i te mea kua tuaina; na hei uho mona te uri tapu.

## Chapter 7

<sup>1</sup> Na i nga ra o Ahata tama a Iotama, tama a Utia, kingi o Hura ka haere mai a Retini kingi o Hiria raua ko Peka tama a Remaria kingi o Iharaira ki Hiruharama tatau ai ki reira; kihai ia a reira  
<sup>2</sup> i taea e raua. A ka korerotia ki te whare o Rawiri, ko Hiria kei te whakapiri ki a Eparaima. Na ka kapakapa tona ngakau, me te ngakau o tona iwi, ano ko nga rakau o te ngahere e ngarue ana i te  
<sup>3</sup> hau. Katahi a Ihowa ka mea ki a Ihaia, Tena, haere ki te whakatau i a Ahata, korua ko tau tama, ko Hearatahupu ki te pito o te awakeri o te puna wai i runga, ki te ara i te mara a te kaihoroi kakahu;  
<sup>4</sup> Ka mea ki a ia, Kia mahara, kia ata noho; kua e wehi, kua hoki tou ngakau e pawera ki nga pito e rua o enei ngotongotu e paowa nei, ki te riri nui o Retini ratou ko Hiria, o te tama hoki a Remaria.  
<sup>5</sup> Na kua whakaaroa nei e Hiria, ratou ko Eparaima, ko te tama a Remaria, he kino mou, kua mea nei ratou,  
<sup>6</sup> Tatou ka haere ki a Hura whakatupu kino ai i a ia, a ka wahi mai ai tatou i tetahi wahi ma tatou, ka whakakingi ai hoki i tetahi kingi i waenganui i a ia, ara i te tama a Tapeara:  
<sup>7</sup> Ko te kupu tenei a te Ariki, a Ihowa, E kore e tu, e kore ano e taea. Ko te upoko hoki o Hiria ko Ramahiku, a ko te upoko o Ramahiku ko Retini: na i enei tau e ono tekau ma rima ka pakarukaru  
<sup>8</sup> a Eparaima, kore ake tena iwi. Na ko te upoko o Eparaima ko Hamaria, ko te upoko hoki o Hamaria ko te tama a Remaria. Ki te kore koutou e whakapono, he pono e kore ta koutou e u.  
<sup>9</sup> A i korero ano a Ihowa ki a Ahata, i mea,  
<sup>10</sup> Inoia tetahi tohu mau i a Ihowa, i tou Atua; inoia he mea i te hohonu, i te wahi tiketike ranei i runga.  
<sup>11</sup> Ano ra ko Ahata, E kore ahau e inoi, e kore ano e whakamatautau i a Ihowa.  
<sup>12</sup> Na ka ki tera, Tena, whakarongo e te whare o Rawiri; he mea iti ianei ki a koutou kia hoha nga tangata i ta koutou, i mea ai koutou kia hoha ano hoki toku Atua?  
<sup>13</sup> Mo reira ma te Ariki ano e hoatu he tohu ki a koutou. Nana, ka hapu he wahine, ka whanau hoki he tama, a ka huaina e ia tona ingoa ko Emanuera.  
<sup>14</sup> He pata, he honi, hei kai mana, ina mohio ia ki te paopao ki te kino, ki te whiriwhiri i te pai.  
<sup>15</sup> Mohio rawa hoki te tamaiti ki te paopao ki te kino, ki te whiriwhiri i te pai, ka mahue te whenua e whakariharihangia nei e koe ona kingi e rua.  
<sup>16</sup> Tera e kawea mai e Ihowa ki a koe, ki tou iwi hoki, a ki te whare o tou papa, he ra kihai nei i tae mai, no te ra i mawehe ai a Eparaima i roto i a Hura; ara te kingi o Ahiria.  
<sup>17</sup> Na i taua ra ka whiowhio a Ihowa ki te ngaro i te wahi whakamutunga mai o nga awa o Ihipa, ki te pi ano hoki i te whenua o Ahiria.  
<sup>18</sup> A ka rere mai ratou, ka tau katoa ki nga awaawa ka uruatuia nei, ki nga rua o nga kamaka, ki nga tataramoa katoa, ki nga wahi tarutaru katoa.  
<sup>19</sup> I taua ra ka heua e te Ariki ki te heu i utua, ki nga wahi i tera taha o te awa, ara ki te kingi o Ahiria, te mahunga me te huruhuru  
<sup>20</sup>

o nga waewae: ka pau ano hoki i a ia te pahau. <sup>21</sup> Na i taua ra ka atawhaitia e te tangata he kuao  
 kau me nga hipi e rua; <sup>22</sup> A he nui te waiu e tukua e ratou, no ka kai pata ia: ka kainga hoki he  
 pata, he honi e te hunga katoa ka mahue ki te whenua. <sup>23</sup> A i taua ra, ko nga wahi katoa i reira nei  
 nga waina kotahi mano, ko te utu kotahi mano hiriwa, ka waiho era mo nga tataramoa, mo nga  
 tumatakuru. <sup>24</sup> He pere, he kopere a nga tangata ina haere mai ki reira; ka riro katoa hoki te whenua  
 i te tataramoa, i te tumatakuru. <sup>25</sup> Na ko nga puke katoa e ngakia ana ki te karaone, e kore koe e  
 tae ki reira i te wehi o te tataramoa, o te tumatakuru; engari he wahi tera e tukua ai nga kau, e takahi  
 ai nga hipi.

## Chapter 8

<sup>1</sup> I ki mai ano a Ihowa ki ahau, Tikina atu tetahi papa nui mau, ka tuhituhi ki runga, ki te pene  
 a te tangata, Mo Mahereharara Hapaha; <sup>2</sup> Na maku e mea etahi kaiwhakaatu pono hei whakaatu  
 mo taku, ara a Uria tohunga raua ko Tekaria tama a Teperekia. <sup>3</sup> Na ko taku haerenga atu ki te  
 poropiti wahine, kua hapu, whanau ake he tama. Katahi a Ihowa ka ki mai ki ahau, Huaina tona  
 ingoa ko Mahereharara Hapaha. <sup>4</sup> No te mea mohio rawa ake te tamaiti ki te karanga, E toku papa,  
 e toku whaea, ka riro nga taonga o Ramahiku, me nga mea parakete o Hamaria i te aroaro o te kingi  
 o Ahiria. <sup>5</sup> I korero mai ano a Ihowa ki ahau, i mea. <sup>6</sup> Na kua paopao nei tenei iwi ki nga wai ata  
 rere o Hiroa, a e koa ana ki a Retini raua ko te tama a Remaria; <sup>7</sup> Na, tenei te takina mai nei e te  
 Ariki nga wai o te awa ki runga ki a ratou, he kaha, he nui, ara te kingi o Ahiria, me tona kororia  
 katoa: ka ngawha ano ia ki runga i ona pareparenga katoa, ka pari ano hoki ki runga i ona tahatika  
 katoa: <sup>8</sup> Ka rere tonu atu ia ki a Hura; ka puhake atu, a ka puta; ka pa ki te kaki rawa; a ka kapi i  
 te rohanga o ona parirau te whanuitanga o tou whenua, e Emanuera.  
<sup>9</sup> E anga, ka whakatupu raruraru, e nga iwi, a ka pakaru rikiriki koutou; kia whai taringa hoki,  
 e te hunga katoa o nga whenua i tawhiti; whitiki, a ka pakaru rikiriki koutou; whitiki, a ka  
 mongamonga noa koutou. <sup>10</sup> Whakatakotoria he whakaaro, a ka taka noa iho; korerotia te kupu, e  
 kore ano e tu; kei a matou nei hoki te Atua. <sup>11</sup> Ko ta Ihowa korero hoki tenei ki ahau i runga i te  
 ringa kaha, me tana whakaako ano i ahau kia kaua e haere i te ara o tenei iwi; ka ki mai, <sup>12</sup> Kaua  
 e ki, He he te whakatakotoria nei i nga mea katoa e ki atu ai tenei iwi, He he te whakatakotoria nei;

kua hoki e wehi i ta ratou e wehi ai, kua ano e pawera ki reira. <sup>13</sup> Ko Ihowa o nga mano, ko ia  
 ta koutou e whakatapu ai; ko ia hei wehi ma koutou, ko ia hei pawera ma koutou. <sup>14</sup> A ka ai ia hei  
 wahi tapu; hei kohatu tutukitanga waewae ia, hei kamaka e hinga ai nga whare e rua o Iharaira, hei  
 rore ano hoki, hei mahanga ki nga tangata o Hiruharama. <sup>15</sup> He tokomaha ano hoki o ratou e tutuki  
 te waewae ki reira, e hinga, pakaru iho, e mahangatia, mau tonu iho.  
<sup>16</sup> Takaia te whakaaturanga, hiritia te ture i roto i aku akonga. <sup>17</sup> A ka tatari ahau ki a Ihowa  
 e hunga nei i tona mata ki te whare o Hakopa, ka tumanako atu ki a ia. <sup>18</sup> Nana, ko matou ko nga  
 tamariki i homai nei e Ihowa ki ahau hei tohu, hei mea whakamiharo i roto i a Iharaira, he mea na  
 Ihowa o nga mano e noho nei i Maunga Hiona. <sup>19</sup> Na, ki te mea mai ratou ki a koutou, Me rapu  
 tikanga koutou i te hunga he atua maori nei o ratou, i nga matakite, i te hunga e kowhetewhete ana,  
 e ngunguru ana: kua ianei tetahi iwi e rapu tikanga ki to ratou Atua? me rapu atu ranei ratou ki ng  
 a mea mate mo nga mea ora? <sup>20</sup> Ki te ture, ki te whakaaturanga! ki te kore e rite ta ratou korero ki  
 tenei kupu, ina, kahore he ata mo ratou. <sup>21</sup> A ka tika ano ratou na reira, ruha noa iho, e mate ana i  
 te kai: i a ratou ka mate nei i te kai, ka tupu te riri, a ka kanga e ratou to ratou kingi, me to ratou  
 Atua, a ka tahuri o ratou kanohi whakarunga: <sup>22</sup> A ka titiro ratou ki te whenua, na, he whakapawera,  
 he pouri, ko te poruru o te mamae; a ka aia atu ratou ki roto ki te pouri kerekere.

## Chapter 9

<sup>1</sup> Otiia e kore e pouri tonu ia i mamae nei. I te wa i mua i whakaititia e ia te whenua o Hepurona  
 me te whenua o Napatari: i te wa ia i muri nei ka whakakororiatia e ia, i te ara o te moana, i tawahi  
 o Horano, i Kariri o nga tauwi. <sup>2</sup> Ko te hunga i haereere i te pouri, kua kite i te marama nui: ko  
 nga tangata e noho ana i te whenua o te atarangi o te mate, kua whiti te marama ki a ratou. <sup>3</sup> Kua  
 whakatokomahatia e koe te iwi, kua whakanuia e koe to ratou koa; koa noa iho ratou ki tou aroaro,  
 me te mea e koa ana ki te kotinga witi, e whakamanamana ana ranei ki nga taonga parakete e  
 wehewehea ana. <sup>4</sup> Whati pu hoki i a koe te ioka o tana kawenga, te rakau whiu mo tona pokohiwi,  
 te rakau o tona kaiwhakatupu kino, koia ano kei to te ra i a Miriana. <sup>5</sup> Ko nga mea whawhai katoa  
 hoki a te tangata whawhai mo te ngangau, ko nga kakahu i okeokea ki te toto, hei tahunga ena, hei  
 kai ma te ahi. <sup>6</sup> Kua whanau nei hoki he tamaiti ma tatou, kua homai he tama ki a tatou; a ki runga  
 ki tona pokohiwi te rangatiratanga; na, ko te ingoa e huaina ki a ia ko Whakamiharo, ko  
 Kaiwhakatakoto Whakaaro, ko te Atua Kaha Rawa, ko te Matua Mutungakore, ko t e Rangatira o



<sup>7</sup>  
te Rongomau. Kahore he mutunga o te nui haere o tona kingitanga, o te mau o tana rongo, ki runga ki te torona o Rawiri, ki runga hoki i tona rangatiratanga, kia u ai, kia mau ai hoki i runga i te whakawa, i runga i te tika aiane i ake tonu atu. Ka oti tenei i te ngakau whakapuke o Ihowa o nga mano.

<sup>8</sup> I unga e te Ariki he kupu ki a Hakopa, kua tau ano ki a Iharaira. <sup>9</sup> A ka mohio te iwi katoa, a Eparaima ratou ko te tangata o Hamaria, he whakapehapeha nei, he ngakau nui nei to ratou ki te

<sup>10</sup> ki mai, Kua horo nga pereki, a ma tatou e hanga ki te kohatu tarai; kua oti nga hikamora te

tapahi, ka puta ke i a tatou he hita. <sup>11</sup> No reira ka whakaarahia e Ihowa nga hoariri o Retini ki a ia,

a ka oho i a ia ona hoa whawhai; <sup>12</sup> Ko nga Hiriani ki mua, ko nga Pirihitini ki muri, hamama tonu ki te kai i a Iharaira. Ahakoa ko tenei katoa e kore tona riri e tahuri ke, engari maro tonu tona ringa.

<sup>13</sup> Na kihai ano te iwi i tahuri ki to ratou kaiwhiu, kihai ano hoki i rapu i a Ihowa o nga mano.

<sup>14</sup> Mo reira ka tapahia e Ihowa te upoko o Iharaira me te hiawero, te nikau me te wiwi, i te ra kotahi.

<sup>15</sup> Ko te kaumatua me te tangata ingoa nui, ko ia te upoko; ko te poropiti whakaako teka, ko ia te

hiawero. <sup>16</sup> Ko nga kaiarahi hoki o tenei iwi hei whakapohehe i a ratou, a pau ake a ratou i arahi

ai. <sup>17</sup> Mo reira kahore o te Ariki koa ki a ratou taitamariki, e kore ano e tohungia a ratou pani, a ratou pouaru; no te mea he noa ratou katoa, he kaimahi i te kino, he wairangi te korero a nga mangai

katoa. Ahakoa ko tenei katoa, e kore tona riri e ta huri ke, engari maro tonu tona ringa. <sup>18</sup> Kei te toro nei hoki te kino, ano he ahi: pau ake i a ia nga tataramoa me nga tumatakuru; na ka ka ki nga

rakau pururu o te ngahere, ka pupu ake nga kapua pongere o te paowa whakarunga. <sup>19</sup> Na te riri o Ihowa o nga mano i toro ai te whenua; a ko te iwi, ano he kai ma te ahi; e kore tona tuakana, tona

teina e tohungia e tetahi. <sup>20</sup> A ka kapohia e tetahi mana i te taha ki matau, a ka matekai ano; a ka kai ia i te taha ki mau, a e kore ratou e makona; ka kainga e ratou, e tena, e tena o ratou te kikokiko

o tona ake ringa: <sup>21</sup> A Manahi ki a Eparaima; a Eparaima ki a Manahi; a ko raua tokorua ki a Hura. Ahakoa ko tenei katoa, e kore tona riri e tahuri ke, engari maro tonu tona ringa.

## Chapter 10

<sup>1</sup> Aue te mate mo te hunga e whakatakoto ana i nga tikanga he, mo nga kaituhituhi ano hoki e

tuhituhi nei i te mea nanakia; <sup>2</sup> Hei whakakotiti ke i te whakawa mo nga rawakore, hei tango noa iho i te mea e tika ana ma nga ware o toku iwi, kia waiho ai nga mea a te pouaru hei taonga ma

ratou, kia pahuatia ai e ratou nga pani! <sup>3</sup> Ka pehea ra koutou i te ra o te tirohanga mai, o te whakangaromanga ka pa mai i tawhiti? ka rere koutou ki a wai hei awhina? a ka waiho to koutou

kororia ki hea? <sup>4</sup> Ka piko noa iho ratou ki raro i nga herehere, ka hinga ki raro i te iwi i patua. Ahakoa ko tenei katoa, e kore tona riri e tahuri ke, engari maro tonu tona ringa.

<sup>5</sup> Aue, e te Ahiriana, te rakau o toku riri, te whiu kei tona ringa ko toku aritarita! <sup>6</sup> Ka unga ia e ahau ki te iwi ngutukau; he he mo te iwi o toku riri taku e whakahau ai ki a ia, ki te taonga parakete

mana, ki te pahua, ki te mea i a ratou hei takahanga, hei pera me te paru o nga ara. <sup>7</sup> Kahore ia ona whakaaro penei, kihai hoki tona ngakau i mea ki te penei; engari he whakangaro ta tona ngakau,

kia kaua ano hoki e torutoru nga iwi e hatepea e ia. <sup>8</sup> E ki ana hoki ia, He teka ianei he kingi katoa

aku rangatira? <sup>9</sup> He teka ianei he rite a Karano ki Karakemihi, he rite a Hamata ki Arapara, he rite

a Hamaria ki Ramahiku? <sup>10</sup> Ka rite ki nga kingitanga o nga whakapakoko i tupono mai ki toku

ringa; nui atu nei hoki o ratou whakapakoko i o Hiruharama, i o Hamaria; <sup>11</sup> E kore ianei taku e mea ai ki Hiruharama, ki ona whakapakoko, e rite ki taku i mea ai ki Hamaria, ki ona whakapakoko?

<sup>12</sup> Na, tenei ake, kia oti i te Ariki tana mahi katoa ki Maunga Hiona, ki Hiruharama, ka whiua e ahau nga hua o te ngakau nui o te kingi o Ahiria, me te kororia ano o ona kanohi whakakake.

<sup>13</sup> Kua ki na hoki ia, Na te kaha o toku ringa i oti ai tenei i ahau, na toku whakaaro nui; he tangata whai mahara hoki ahau: kua whakanekehia hoki e ahau nga rohe o nga iwi, kua pahuatia ano e ahau

o ratou taonga, a kua riro i ahau, i te marohirohi, ki raro te hunga noho o nga torona: <sup>14</sup> Na kua kitea e toku ringa nga taonga o nga iwi, ano he kohanga: i rite hoki ki te kohikohinga a tetahi i nga hua manu i mahue, taku kohikohinga i te whenua katoa: a kihai i oraora te parirau o tetahi, kihai i

hamama te mangai, kihai hoki i pipi. <sup>15</sup> E whakahihi ranei te titaha ki te tangata nana nei ia i whakamahi ki te hahau? e whakakake ranei te kani ki te tangata nana nei ia i kani ai? me te mea nei ko te patupatu hei whakakorikori i tona kaihapai, ko te tokotoko ranei hei hapai i te tan gata

ehara nei i te rakau. <sup>16</sup> Mo reira ka unga mai e te Ariki, e te Ariki o nga mano, te hiroki ki ona mea

momona; a ka ka ake a raro o tona kororia, he mea whakau, koia ano kei te ka o te ahi. <sup>17</sup> A hei ahi te marama o Iharaira, a ko tana Mea Tapu ano hoki hei mura; a ka wera ona tumatakuru, ona

tataramoa, pau ake i te ra kotahi. <sup>18</sup> Ka pau ano hoki i a ia te kororia o tona ngahere, o tana mara momona, te wairua raua ko te tinana; a, hei te otinga, me te mea kua ngohe te ngakau o te kaihapai

<sup>19</sup> kara. Na, ko te toenga o nga rakau o tona ngahere, he torutoru, ma te tamaiti noa e tuhituhi.

20 I taua ra ka whakamutua e nga toenga o Iharaira ratou ko nga morehu o te whare o Hakopa, ta ratou okioki ki to ratou kaiwhiu; engari ka okioki pono ratou ki a Ihowa, ki te Mea Tapu o Iharaira.

21 He toenga ano e hoki mai, ko te toenga o Hakopa, ki te Atua kaha rawa. 22 No te mea ahakoa i rite tou iwi, a Iharaira ki te onepu o te moana, he toenga kau o ratou e hoki mai: ko te whakaotinga i whakaritea, me te mea e puhake ana i te tika. 23 Ka oti ra hoki, ka mahia ano hoki e te Ariki, e Ihowa o nga mano, te mea i whakaritea ki waenganui i te whenua katoa.

24 Na reira tenei kupu a te Ariki, a Ihowa o nga mano, E taku iwi e noho nei i Hiona kaua e wehi i te Ahiriana: ahakoa patu ia i a koe ki te rakau, hapainga mai ranei e ia tona tokotoko ki a koe, pera me ta Ihipa. 25 He wahi iti rawa nei, a ka whakatutukitia te weriweri, toku riri hoki, i a ratou ka huna. 26 Ka oho ano i a Ihowa o nga mano he whiu mona, he pera me te patunga o Miriana ki te kamaka ki Orepe; a ka iri tona tokotoko i runga i te moana, a ka hapainga e ia, pera i tana i Ihipa. 27 Na i taua ra ka makere atu tana pikaunga i tou pokohiwi, me tana ioka i tou kaki, a ka kore noa iho ano hoki te ioka i te whakawahinga. 28 Kua tae ki Aiata, kua pahemo ki Mikirono; ko ana mea rongoatia ake e ia ki Mikimaha: 29 Kei tenei taha ratou o te whakawhitinga; kua noho a puni ratou ki Kepa: pawera noa iho a Rama; kua rere a Kipea o Haora. 30 Kia nui tou reo, e te tamahine a Karimi! whakarongo, e Raihi! He mate tou, e Anatoto! 31 He whati a Maramena; kei te huihui nga tangata o Kepimi, he tahuti. 32 Hei tenei ra ano ka tu ia ki Nopo: kei te ruru tona ringa ki te maunga o te tamahine a Hiona, ki te pukepuke i Hiruharama. 33 Nana, ka tapahia e te Ariki, e Ihowa o nga mano, nga peka, nui atu hoki te wehi: a ka tuaina ki raro nga mea he tiketike nei te ahua, ka whakaititia ano hoki nga mea whakakake. 34 Ka tuaina ano e ia nga rakau poruru o te ngahere ki te rino, ka hinga ano hoki a Repanona i te mea nui.

## Chapter 11

1 A tera e puta ake he wana i te take i a Hehe, a ka whai hua tetahi peka e tupu ake i roto i ona pakiaka: 2 Ka noho hoki te wairua o Ihowa ki runga ki a ia, te wairua o te whakaaro nui, o te matauranga, te wairua o te whakatakoto whakaaro, o te kaha, te wairua o te mohio, o te wehi ki a Ihowa; 3 A, ko tana e ahuaireka ai ko te wehi ki a Ihowa: e kore ano ia e whakawa i runga i ta ona

kanohi e kite ai, e kore ano e whakaaro ki ta ona taringa e rongong ai, ina riria e ia te he. <sup>4</sup> Engari ka whakawa ia mo nga rawakore i runga i te tika; i runga ano i te tika tona riri i te he, he whakaaro nona ki te hunga mahaki o te whenua; he whiu na tona mangai tana patu mo te whenua, ka whakamatea ano e ia te tangata kino ki te manawa o ona ngutu. <sup>5</sup> A hei whitiki te tika mo tona hope, hei whitiki ano te pono mo ona whatumanawa. <sup>6</sup> Ka noho tahi ano te wuruhi raua ko te reme, ka takoto tahi te reparo raua ko te kua koati; ko te kua kau, ko te kua raiona, ko te mea momona, kotahi ano ropu; a ma te tamaiti iti ratou e arahi. <sup>7</sup> A ka kai te kau raua ko te pea; ka takoto tahi ano hoki a raua kua: a ka rite te raiona ki te kau, ka kai i te kakau witi. <sup>8</sup> Ka takaro hoki te tamaiti ngote u i runga i te rua o te ahipi, a ka pa atu te ringa o te tamaiti kua whakamutua te kai u ki te nohoanga o te neke. <sup>9</sup> E kore ratou e tukino, e kore ano e whakamate puta noa i toku maunga tapu: no te mea ka kapi te whenua i te matauranga ki a Ihowa, ano ko nga wai e taupoko nei i te moana. <sup>10</sup> Na i taua ra ko tetahi pakiaka o Hehe, ka tu hei kara ki nga iwi, ka rapua mai e nga tau iwi; ko tona okiokinga hoki, kororia rawa. <sup>11</sup> I taua ra ka anga ano te ringa o te Ariki, a ka tuaruatia te whakahoki mai o nga morehu o tana iwi e mahue i Ahiria, i Ihipa, i Patoro, i Kuhu, i Erama, i Hinara, i Hamata, i nga motu ano o te moana. <sup>12</sup> Ka whakaturia ano e ia he kara ki nga iwi, a ka huihuia mai te hunga o Iharaira i peia atu, ka whakaminea mai ano nga mea o Hura i marara atu, i nga pito e wha o te whenua. <sup>13</sup> Ka haere atu hoki te hae o Eparaima, ka hatepea atu ano hoki nga hoariri o Hura: e kore a Eparaima e hae ki a Hura, e kore ano a Hura e whakato ki a Eparaima. <sup>14</sup> Engari ka rere iho ratou i runga i te pokohiwi o nga Pirihitini i te taha ki te hauauru, ka pahuatia ngatahitia e ratou te hunga o te rawhiti; ka pa o ratou ringa ki runga ki a Eroma raua ko Moapa; ka whakarongo hoki nga tama a Amona ki a ratou. <sup>15</sup> A ka whakangaromia rawatia e Ihowa te arero o te moana i Ihipa; a he hau hunuhunu tana e ruru ai i tona ringa ki runga ki te awa, e patu ai kia whitu ona rerenga, a ka meinga nga tangata kia whiti maroke noa atu. <sup>16</sup> A ka takoto he ara haerenga mai i Ahiria mo nga morehu o tana iwi ka mahue; ka rite ano ki to Iharaira i te ra i haere mai ai ia i te whenua o Ihipa.

## Chapter 12

<sup>1</sup> A i taua ra ka mea koe, Ka whakamoemiti atu ahau ki a koe, e Ihowa: ahakoa hoki i riri koe ki ahau, kua tahuri atu tou riri, a kei te whakamarie koe i ahau. <sup>2</sup> Nana, ko te Atua toku whakaoranga; ka whakawhirinaki ahau, e kore ano e wehi; ko te Ariki hoki, ko IHOWA toku kaha, taku waiata,

ko ia ano hei whakaoranga moku. <sup>3</sup> Na ka utu wai koutou i runga i te koa i roto i nga puna o te whakaoranga;

<sup>4</sup> Ka mea ano hoki i taua ra, Whakamoemititia a Ihowa, karanga atu ki tona ingoa; whakaaturia ana mahi ki roto i nga iwi; kauwhautia atu kua oti tona ingoa te whakaneke ake. <sup>5</sup> Waiata ki a Ihowa, he nui noa atu hoki ana mahi: meinga kia mohiotia tenei puta noa i te ao. <sup>6</sup> Hamama, kia nui te reo, e te wahine e noho ana i Hiona, he nui hoki te Mea Tapu o Iharaira i waenganui i a koe.

### Chapter 13

<sup>1</sup> Ko te poropititanga mo Papurona i kitea e Ihaia tama a Amoho. <sup>2</sup> Whakaarahia he kara ki runga ki te maunga horehore, kia rahi te reo ki a ratou, tawhiritia atu te ringa kia haere mai ai ratou ki roto ki nga kuwaha o nga rangatira. <sup>3</sup> Kua oti aku i whakatapu ai te whakahau, kua karangatia ano hoki e ahau aku marohirohi ki toku riri, ara aku e whakamanamana nui nei. <sup>4</sup> Ko te haruru o te huihui i runga i nga maunga, tona rite kei to te iwi nui! he haruru, he ngangau no te huihui o nga kingitanga o nga iwi! e whakataka ana e Ihowa o nga mano te ope mo te whawhai. <sup>5</sup> E haere mai nei ratou i tawhiti, i te pito o te rangi, a Ihowa me nga patu a tona riri, ki te whakangaro i te whenua katoa!

<sup>6</sup> Aue koutou, kua tata hoki te ra o Ihowa; tera e puta mai, ano he whakangaromanga na te Kaha Rawa. <sup>7</sup> No reira ka ngoikore nga ringa katoa, ka ngohe noa iho nga ngakau katoa o nga tangata.

<sup>8</sup> Ka ohore ano ratou: mau pu i te mamae, i te whakapouri; ko to ratou mamae koia ano kei to te wahine e whakawhanau ana: ka miharo ratou tetahi ki tetahi, a ko o ratou mata, ano he mura ahi.

<sup>9</sup> Nana, e haere mai nei te ra o Ihowa, he kino, he riri, he whakatakariri e mura ana; hei whakaururua i te whenua, hei whakangaro atu hoki i reira i ona tangata hara. <sup>10</sup> Ko nga whetu hoki o te rangi, ko nga kahui whetu ano hoki o reira, kahore e homai i to ratou marama: ka pouri noa iho te ra i

tona haerenga mai, kore ake hoki e titi te atarau. <sup>11</sup> Ka whiua ano e ahau te ao mo to ratou kino, te hunga kino hoki, mo to ratou he; ka whakamutua hoki e ahau te whakapehapeha o te hunga

whakakake, ka whakahokia iho ano ki raro te whakapehapeha o te hunga kino. <sup>12</sup> Ka meinga ano e ahau kia nui atu te utu mo te tangata i to te koura pai; ae ra, he tangata, kia nui atu i to te koura

<sup>13</sup> parakore o Opira. Na reira ka meinga e ahau nga rangi kia wiri, ka ruperupea atu ano te whenua

14  
 i tona wahi, he riri no Ihowa o nga mano, he ra ano e mura ai tona riri. A ka rite ki te anaterope  
 e whaia ana, ki nga hipi kahore nei o ratou kaihuihui, ka tahuri ratou ki tona iwi, ki tona iwi, ka  
 15  
 rere ki tona whenua, ki tona whenua. Ko te hunga katoa e kitea ana, ka werohia; ko te hunga  
 16  
 katoa e hopukia ana, ka hinga i te hoari. Ka taia iho hoki a ratou kohungahunga i ta ratou  
 17  
 tirohanga; ka pahuatia o ratou whare, ka moea ano a ratou wahine. Tenei ahau te whakaoho atu  
 nei i nga Meri ki a ratou, he hunga e kore nei e whakaaro ki te hiriwa; na, ko te koura, e kore e  
 18  
 matenuitia e ratou. Ka taia iho ano hoki nga taitamariki e a ratou kopere, mongamonga noa; e  
 kore ano e tohungia nga hua o te kopu; e kore o ratou kanohi e manawapa ki nga tamariki.  
 19  
 A ko Papurona, ko te kororia o nga kingitanga, ko te mea ataahua whakahirahira a nga Karari,  
 20  
 tera ia e rite ki ta te Atua hurihanga i Horoma, i Komora. E kore e nohoia a, ake ake, e kore e  
 waiho hei kainga a, tena whakatupuranga, tena whakatupuranga; e kore ano e whakaturia e te Arapi  
 tona teneti ki reira; e kore ano a reira e waiho e nga hepara hei takotoranga mo a ratou kahui.  
 21  
 Engari hei takotoranga a reira mo nga kuri mahoao o te koraha; ka ki hoki o ratou whare i nga  
 kararehe pouri; a ka nohoia a reira e nga otereti, ka waiho hoki hei tupekepeketanga mo nga mea  
 22  
 ahua koati. Ka tangi ano hoki nga wuruhi i roto i o ratou whare kingi, me nga kuri mahoao i  
 roto i o ratou whare ataahua; kua tata mai hoki tona wa, e kore ano ona ra e roa.

## Chapter 14

1  
 No te mea ka aroha a Ihowa ki a Hakopa, ka whiriwhiria ano a Iharaira e ia; ka meinga hoki  
 ratou kia ata noho ki to ratou ake oneone; ka piri ano te tangata ke ki a ratou, ka uru ano hoki ki  
 2  
 roto ki te whare o Hakopa. E tango ano nga iwi i a ratou, e kawe i a ratou ki to ratou wahi, riro  
 tonu iho ratou i te whare o Iharaira hei pononga tane, hei pononga wahine i te oneone a Ihowa: a  
 3  
 hei whakarau mo ratou o ratou kaiwhakarau, ko ratou ano hei rangatira mo o ratou kaitukino. Na,  
 i te ra e meinga ai koe e Ihowa kia okioki i tou pouri, i tou pawera, i te mahi pakeke ano hoki i  
 whakamahia ai koe,  
 4  
 Ko reira maranga ai tenei pepeha au mo te kingi o Papurona, ka mea hoki koe, Anana! mutu  
 5  
 pu ta te kaitukino, mutu pu ta te pa koura! Whati ana i a Ihowa te tokotoko o te hunga kino, te  
 6  
 hepeta o nga kingi; Nana i patu nga iwi, me te riri, me te patu kihai i tamutu, nana i whakahaere  
 7  
 nga iwi i runga i te riri, me te whakatupu kino, kahore he kaiaraarai. Kua whai okiokinga, kua

8  
 ata noho te whenua katoa; pakaru mai ana ta ratou waiata. Ae, kei te koa nga kauri ki a koe, ratou ko nga hita o Repanona, e ki ana, No tou taunga ano ki raro i kore ai te kaitapahi e tae mai ki a

9  
 matou. Ko te reinga i raro, oho ana i a koe, he tutakitanga ki a koe i tou taenga atu; he meatanga ki a koe i whakaarahia ai e ia nga tupapaku, nga mea nunui o te whenua; maranga ana i a ia nga

10  
 kingi katoa o nga iwi i runga i o ratou torona. Ka korero ratou katoa ki a koe, ka mea, Ko koe

11  
 ano hoki, kua ngoikore penei me matou? kua rite koe ki a matou? Kua oti tou kororia te whakahoki iho ki te reinga, me te rangi ano o au hatere: ko te whariki mou ko te kutukutu, ko te hipoki mou

12  
 ko nga toke. Anana! tou takanga iho i te rangi, e Tawera, e te tama a te ata! te tapahanga iho i

13  
 a koe ki raro, nau nei i tuku nga iwi ki raro! I mea hoki tou ngakau, Ka piki ahau ki te rangi, ka whakanekehia ake e ahau toku torona ki runga i nga whetu a te Atua, ka noho ano ahau ki te maunga

14  
 o te whakaminenga, ki nga taha rawa ki te raki. Ka pikitia e ahau a runga ake o nga wahi tiketike

15  
 o nga kapua; ka rite ahau ki te Runga Rawa. Otira ka whakahokia iho koe ki te reinga, ki nga

16  
 pito rawa o te rua. Ko te hunga e kite i a koe, matatau tonu ta ratou titiro ki a koe, me ta ratou ata whakaaroaro ano, Ko te tangata ianei tenei i wiri ai te whenua, i ngaueue ai nga rangatiratanga;

17  
 I mea nei i te ao hei koraha, wahia ana e ia ona pa: kihai i tuku i ana herehere ki to ratou wahi?

18  
 Ko nga kingi katoa o nga iwi, ko ratou katoa, takoto ana i tona whare, i tona whare, i runga i te

19  
 kororia. Ko koe ia he mea maka mai i tou urupa, ano he peka e whakariharihangia ana, he mea whakakakahu ki te hunga i patua, i werohia ki te hoari, e haere ana ki raro ki nga kohatu o te rua;

20  
 ano he tinana i takatakahia e te waewae. E kore te tanumanga mou e huihuia ki to ratou, mou i whakangaro i tou whenua, i patu i tou iwi: e kore te uri o nga kaimahi i te kino e whai ingoa, ake

21  
 ake. Kia tere te patu mo ana tamariki, mo te he o o ratou matua; kei kake, kei riro ano i a ratou

22  
 te whenua, kei kapi te mata o te ao i o ratou pa. Ka whakatika hoki ahau ki a ratou, e ai ta Ihowa o nga mano, ka tapahia atu ano e ahau i Papurona te ingoa me te toenga, te tama me te mokopuna,

23  
 e ai ta Ihowa. Ka meinga ano a reira e ahau hei kainga mo te matuku, hei harotoroto wai; ka purumatia ano e ahau ki te puruma o te whakangaromanga, e ai ta Ihowa o nga mano.

24  
 Kua oati a Ihowa o nga mano, kua mea, Ina, u tonu taku i whakaaro ai: ko taku i whakatakoto

25  
 ai, mau tonu; Mo te Ahiriana kia whati i ahau ki toku whenua, kia takatakahia ki runga ki oku maunga: ko reira tana ioka marere ai i runga i a ratou; a ka marere tana pikaunga i runga i o ratou

26  
 pokohiwi. Ko te whakaaro tenei kei te takoto mo te whenua katoa: ko te ringa ano tenei e totoro

<sup>27</sup> atu nei ki nga iwi katoa. Kua takoto hoki i a Ihowa o nga mano, a ma wai e whakataka? kua  
<sup>28</sup> totoro tona ringa, a ko wai hei mea kia pepeke? No te tau i mate ai a Kingi Ahata tenei  
<sup>29</sup> poropititanga. Kei koa, e Pirihitia katoa, ki te whatinga o te rakau a te kaiwhiu i a koe: tera hoki  
 e puta ake he neke i roto i te pakiaka o te nakahi, a ko tona hua he nakahi e rere ana me he ahi.  
<sup>30</sup> Na ka kai nga matamua o nga ware, ka takoto nga rawakore, te ai he wehi; ka whakamatea ano  
<sup>31</sup> e ahau tou pakiaka ki te hemokai, a ka patua ou morehu. Aue, e te kuwaha; hamama, e te pa;  
 harotu kau koe, e Pirihitia katoa: e puta mai hoki te paowa i te raki: e kore tetahi e tu ke mai i te  
<sup>32</sup> wa i whakaritea mona. A he aha te kupu e whakahokia ki nga karere o te iwi? Ina ra, na Ihowa  
 a Hiona i whakatu, a ka ai a reira hei rerenga atu mo nga mea o tana iwi i tukinotia.

## Chapter 15

<sup>1</sup> Ko te poropititanga mo Moapa. He po kotahi ka ngaro a Ara o Moapa, a kore iho; he po ano  
 hoki, ka ngaro a Kiri o Moapa, a kore iho. <sup>2</sup> Kua riro ia ki runga ki Paiti, ki Ripono, ki nga wahi  
 tiketike tangi ai: ka auetia e Moapa a Nepo raua ko Merepa; he mea moremore katoa o ratou  
<sup>3</sup> mahunga, tapahi rawa nga kumikumi katoa. Ko o ratou whitiki i o ratou ara he kakahu taratara:  
<sup>4</sup> ka aue ratou katoa i runga i o ratou whare, i o ratou waharoa, nui atu te tangi. Ka hamama hoki  
 a Hehepona raua ko Ereare: ka rangona to ratou reo i Iahata rawa: no reira hamama ana nga mau  
<sup>5</sup> patu o Moapa; ka wiri tona wairua i roto i a ia. E tangi ana toku ngakau ki a Moapa; rere ana ona  
 rangatira ki Toara, ki Ekarata Herihia: he tangi nei hoki ta ratou i te pikitanga ki Ruhiti, i te mea e  
 piki ana i reira; i te ara hoki ki Horonaimi ka pa ta ratou karanga o te ngaromanga.  
<sup>6</sup> Ka takoto kau noa nga wai o Nimirimi: kua maroke hoki te tarutaru, kua mate te otaota, kahore  
<sup>7</sup> he mea e tupu ana. Na, ko a ratou mea maha, me a ratou mea i te rongoa, ka kawea e ratou ki te  
<sup>8</sup> awa i nga wirou. Kua taiawhiohia hoki nga rohe o Moapa e te karanga; kua tae tona aue ki  
<sup>9</sup> Ekeraima, tona aue ki Peererimi. Kei te ki hoki nga wai o Rimono i te toto; tera atu taku e whakapa  
 ai ki Rimona, he raiona ki nga oranga o Moapa, ki nga morehu ano o te whenua.

## Chapter 16



<sup>1</sup> Unga e koutou nga reme ki te rangatira o te whenua, i Hera i te koraha, ki te maunga o te tamahine a Hiona. <sup>2</sup> Kei te manu haereere noa hoki, kei te mea i maka mai i te kohanga, te rite o nga tamahine a Moapa i nga kauanga i Aranono. <sup>3</sup> Kia takoto te whakaaro, whakaritea te whakawa; ko tou whakamarumaruru i te poutumarotanga kia rite ki te po; huna te hunga i peia; kua te atiutiu noa e whakaaturia. <sup>4</sup> Tukua aku whati kia noho ki a koe; tena ko Moapa, ko koe hei piringa mo ratou kei mate i te kaipahua: kua kore hoki te kaiwhakate, mutu pu ta te kaipahua, kua poto atu nga kaiwhakatupu kino i runga i te whenua. <sup>5</sup> A ka whakapumautia he torona i runga i te tohu tangata: ka nohoia e tetahi i runga i te pono, i roto ano i te teneti o Rawiri; me te whakawa, me te rapu i te tikanga o te whakawa, he hohoro hoki ki te mahi i te tika.

<sup>6</sup> Kua rongo tatou ki te whakakake o Moapa; nui atu tona whakakake; ki tona whakapehapeha, ki tona whakakake, ki tona pukuriri; kahore he tikanga o ana whakamanamana. <sup>7</sup> Mo reira ka aue a Moapa ki a Moapa, ka aue katoa; ka tangi koutou ki nga keke karepe o Kiriharehete, kua moti rawa. <sup>8</sup> Kua kahakore hoki nga mara o Hehepona, me te waina o Hipima; he mea whatiwhati na nga rangatira o nga iwi ona waina pai rawa, i tae nei ki Iatere rawa, i toro haere atu ki te koraha: i toha haere ona peka, i whiti ki tera taha o te moana. <sup>9</sup> Mo reira ka tangihia e ahau te waina o Hipima, kei te tangi mo Iatere te rite: ka whakamakuku ahau i a koe ki oku roimate, e Hehepona, e Ereare; kua tau hoki te hamama o te pakanga ki runga ki au hua raumati, ki runga ki tau tapahanga witi.

<sup>10</sup> Kua tangohia atu te hari, me te koa i te mara momona; kahore hoki he waiata i nga mara waina, kahore he iere harakoa; e kore nga kaitakahi e takahi waina i a ratou poka waina; kua whakamutua e ahau te hamama o te mahinga waina. <sup>11</sup> Na reira, ano he hapa oku whekau e tangi ana ki a Moapa, a roto i ahau ki Kiriharehe. <sup>12</sup> Na, ka puta mai a Moapa, ka mauui i runga i te wahi tiketike, a ka haere ki tona wahi tapu inoi ai, heoi e kore e taea e ia. <sup>13</sup> Ko te kupu tenei i korerotia e Ihowa mo Moapa i mua. <sup>14</sup> Engari kua korero a Ihowa inaianei, kua mea, Kia toru nga tau, kia rite ki nga tau o te kaimahi, ka whakahaweatia te kororia o Moapa, me tona mano tini; a ko te toenga he iti rawa, he kahore noa iho.

## Chapter 17

<sup>1</sup> Ko te poropitianga mo Ramahiku. Nana, kua kore a Ramahiku hei pa; ka puranga kau. <sup>2</sup> Kua mahue nga pa o Aroere; mo nga kahui era, ka takoto ratou, te ai he kaiwhakawehi. <sup>3</sup> Ka kore ano

he pa kaha mo Eparaima, he kingitanga mo Ramahiku, he toenga ranei o Hiria: ka rite ratou ki te kororia o nga tama a Iharaira, e ai ta Ihowa o nga mano. <sup>4</sup> Na i taua ra ka meinga te kororia o

Hakaopa kia tupuhi, ka hiroki haere hoki te ngako o ona kikokiko. <sup>5</sup> A ka rite ki ta te kaitapahi kohikohinga i te witi, ki te tapahanga hoki a ona ringa i nga hua witi; ae, ka rite ki te hamunga o nga hua witi i te raorao i Repaima.

<sup>6</sup> Otiia e toe ano etahi karepe hei hamunga; ka rite ki te ruiruinga o te oriwa; e rua, e toru nga oriwa i te pito o to runga rawa peka, e wha, e rima i te peka i waho rawa, i te mea whai hua, e ai ta

Ihowa, ta te Atua o Iharaira. <sup>7</sup> I taua ra ka titiro he tangata ki tona Kaihanga, ka anga ona kanohi

ki te Mea Tapu o Iharaira. <sup>8</sup> E kore ano e titiro ki nga aata i hanga nei e ona ringa, e kore e anga ki te mea i mahia e ona maihao, ki nga Aherimi ranei, ki nga whakapakoko ranei.

<sup>9</sup> I taua ra ka rite ona pa kaha ki te wahi i whakarerea i te ngahere, i te tihi ano o te maunga, i whakarerea ra i te aroaro o nga tama a Iharaira; na ko te ngaromanga. <sup>10</sup> Kua wareware hoki koe

ki te Atua o tou whakaoranga, a kua kahore i mahara ki te kamaka o tou kaha, mo reira ka

whakatupuria e koe he mea ataahua, ka whakatokia ano ki te peka ke: <sup>11</sup> I te ra e whakato ai koe, ka taiepatia e koe, a i te ata matomato tonu tau i whakato ai: i te ra ia o te pouri, o te mamae ngau kino, ka memeha atu te kotinga.

<sup>12</sup> Anana, te ngangau o nga iwi maha, e nge ana ano he haruru no nga moana! me te rere o nga

iwi, e wawa ana koia ano kei te turituri o nga wai nunui! <sup>13</sup> Ano ko te taheke o nga wai maha te haruru o nga iwi; otiia ka riria ratou e ia, a ka rere ki tawhiti, ka whaia, ano he papapa no nga

maunga i te upoko o te hau, ano he puehu awhiowhio e aia ana e te tupuhi. <sup>14</sup> I te ahiahi, na ko te pawera; kiano i puao kua kore ratou. Ko te wahi tenei ma te hunga e pahua ana i a tatou, ko te mea tenei e wehea ma te hunga e muru ana i a tatou.

## Chapter 18

<sup>1</sup> Ha, ko te whenua e kapakapa nei nga parirau i tera taha o nga wai o Etiopia! <sup>2</sup> E unga karere nei i runga i te moana, a ko o ratou kaipuke he kakaho i runga i nga wai, e ki ana, Haere, e nga karere tere, ki tetahi iwi roroa, maheni hoki, ki te iwi i wehingia i to ratou timatanga iho a mohoa noa nei; ki te iwi he mahi ruri ne i, he takatakahi nei tana, ko tona whenua wahia iho e nga awa.

<sup>3</sup> E nga tangata katoa o te ao, e te hunga e noho ana i te whenua, titiro mai, ina whakaarahia te kara

ki runga i nga maunga; whakarongo mai, ina whakatangihia te tetere. <sup>4</sup> Ko ta Ihowa kupu hoki

tenei ki ahau, Ka ata noho ahau, ka titiro hoki i toku nohoanga; ka rite ahau ki te mahana i te mea  
ka mahea, ka rite ki te kapua tomairangi i te mahana o te kotinga. <sup>5</sup> Hei mua hoki i te kotinga, kia  
ngahoro te puawai, kia puta ki te puawai he karepe e maoa haere ana, na ka hatepea atu e ia nga  
peka ririki ki te tapahi peka, a ko nga manga ka tangohia, ka tapahia ki raro. <sup>6</sup> Ka waiho ngatahi  
atu ratou ma nga manu tokokai o nga maunga, ma nga kararehe hoki o te whenua; ka whakatau  
nga manu tokokai ki runga ki a ratou i te raumati, ka whakakainga hoki nga kararehe katoa o te  
<sup>7</sup> whenua ki reira i te hotoke. I taua wa ka maua mai he hakari ki a Ihowa o nga mano, o te iwi  
roroa, maheni hoki, na te iwi i wehingia i to ratou timatanga iho, a mohoa noa nei, na te iwi he  
mahi ruri nei, he takatakahi nei tana, a ko tona whenua wahia iho e nga awa, ki te wa hi o te ingoa  
o Ihowa o nga mano, ki Maunga Hiona.

## Chapter 19

<sup>1</sup> Ko te poropititanga mo Ihipa. Tenei a Ihowa te rere mai nei i runga i te kapua tere, tae tonu  
ki Ihipa, a ka oho nga whakapakoko o Ihipa i tona aroaro, ngohe noa iho te ngakau o Ihipa i  
<sup>2</sup> waenganui ona. Ka whakaangahia ano e ahau nga Ihipiana ki nga Ihipiana, a ka whawhai ratou  
ki tona teina, ki tona tuakana, ki tona hoa, ki tona hoa, te pa ki te pa, te kingitanga ki te kingitanga.  
<sup>3</sup> Na ka meinga te wairua o Ihipa kia kahore noa iho i waenganui i a ia; ka whakangaromia hoki e  
ahau ona whakaaro: a ka rapua e ratou he tikanga i nga whakapakoko, i nga tohunga whakawai, i  
<sup>4</sup> te hunga he atua maori nei o ratou, i nga matakite. Ka tukua putia atu ano e ahau nga Ihipiana ki  
te ringa o te rangatira pakeke; he kingi taikaha ano te kingi mo ratou, e ai ta te Ariki, ta Ihowa o  
<sup>5</sup> nga mano. Ka kore haere hoki nga wai o te moana, ka mimiti, ka maroke te awa. <sup>6</sup> A ka piro nga  
<sup>7</sup> awa; ka mimiti, a ka maroke nga awa o Ihipa: ka mate nga kakaho me nga raupo. Ko nga otaota  
i te taha o te Naere, i te pareparenga o te Naera, me nga mea katoa i whakatokia ki te taha o te  
<sup>8</sup> Naere, ka maroke, ka aia noatia atu, ka kore noa iho. Ka tangi ano nga kaihi ika, ka aue te hunga  
katoa e maka ana i te matau ki roto ki te Naera, ka pouri ano nga kaihora o nga kupenga ki runga  
<sup>9</sup> ki nga wai. Ka whakama hoki nga kaimahi o te muka pai, ratou ko nga kaiwhatu o nga kakahu  
<sup>10</sup> ma. Ko ona turanga, mongamonga noa, ka pouri hoki nga wairua o nga kaimahi katoa e utua  
<sup>11</sup> ana. He tino wairangi nga rangatira o Toana; he tino poauau hoki nga whakaaro o nga  
kaiwhakatakoto whakaaro mohio a Parao. He pehea ra ta koutou ki atu ki a Parao, He tama ahau  
<sup>12</sup> na te hunga whakaaro nui, he tama na nga kingi onamata? Tena, kei hea ratou, au tangata

whakaaro nui? ma ratou e whakaatu ki a koe inaianei; meinga kia mohio ratou ki ta Ihowa o nga  
<sup>13</sup>  
 mano i whakatakoto ai mo Ihipa. Kua whakakuaretia nga rangatira o Toana, kua tinihangatia  
 nga rangatira o Nopa; pohehe iho a Ihipa i a ratou, ko ratou na ano te kohatu o te kokonga o nga  
<sup>14</sup>  
 iwi o reira. Kua oti i a Ihowa te wairua whanoke te konatu ki waenganui ona; a kua  
 whakapohehetia e ratou a Ihipa i ana mahi katoa, koia ano kei te tangata haurangi e kotiti ke ana,  
<sup>15</sup>  
 e hurori ana i roto i tona ruaki. Ka kahore noa iho ano he mahi ma Ihipa, hei mahinga ma te  
<sup>16</sup>  
 upoko, ma te hiawero, ma te nikau, ma te wiwi. I taua ra ka rite a Ihipa ki te wahine: ka wehi  
<sup>17</sup>  
 ka pawera i te rurutanga o te ringa o Ihowa o nga mano, e ruru ai ia ki tera wahi. A ka ai te  
 whenua o Hura hei whakawehi mo Ihipa, a ko nga tangata katoa e whakahuatia atu ai ia, ka wehi,  
 i te tikanga hoki kua takoto i a Ihowa o nga mano mo reira.  
<sup>18</sup>  
 I taua ra e rima nga pa i te whenua o Ihipa, ko to raua reo ko te reo o Kanaana, a ko Ihowa  
<sup>19</sup>  
 o nga mano ta ratou e oati ai; ko tetahi e huaina, Ko te pa o te ngaromanga. I taua ra ka tu he  
 aata ma Ihowa i waenganui o te whenua o Ihipa, me te pou i te taha o to reira rohe, he mea ki a  
<sup>20</sup>  
 Ihowa. A hei tohu tera, hei kaiwhakaatu mo Ihowa o nga mano i te whenua o Ihipa; ka karanga  
 hoki ratou ki a Ihowa, he mea mo nga kaitukino, a ka unga e ia he kaiwhakaora ki a ratou, he  
<sup>21</sup>  
 kaiwawao; a mana ratou e whakaora. A ka mohiotia a Ihowa e Ihipa, ka mohiotia hoki a Ihowa  
 e nga Ihipiana i taua ra; ae ra ka mahia e ratou te patunga tapu me te whakahere; ka puaki hoki ta  
<sup>22</sup>  
 ratou kupu taurangi ki a Ihowa, a ka mana ano i a ratou. Ka whiua ano a Ihipa e Ihowa, ka whiua,  
 ka rongoatia ano e ia: a ka hoki mai ratou ki a Ihowa, ka tahuri ano ia ki ta ratou inoi, ka rongoa i  
<sup>23</sup>  
 a ratou. I taua ra ka takoto he ara i Ihipa ki Ahiria, a ka tae te Ahiriana ki Ihipa, te Ihipiana ano  
<sup>24</sup>  
 ki Ahiria, a ka koropiko tahi te Ihipiana raua ko te Ahiriana. I taua ra hei tuatoru a Iharaira mo  
<sup>25</sup>  
 Ihipa, mo Ahiria, hei manaaki i waenganui o te whenua. E manaakitia ano ratou e Ihowa o nga  
 mano, e ki ia, Kia manaakitia a Ihipa, taku iwi, a Ahiria, te mahi a oku ringa, a Iharaira hoki, toku  
 kainga tupu.

## Chapter 20

<sup>1</sup>  
 I te tau i haere mai ai a Taratana ki Aharoro, i a ia i unga ra e Harakono kingi o Ahiria, i tana  
<sup>2</sup>  
 whawhaitanga ki Aharoro, a horo ana a reira i a ia; I taua wa ka korero a Ihowa, ara a Ihaia tama  
 a Amoho, ka ki, Wetekina atu te kakahu taratara i tou hope, whakarerea atu ano tou hu i tou waewae.

Na pera ana ia, haere tahanga ana, kahore hoki he hu. <sup>3</sup> Na ka mea a Ihowa, Ka rite ki taku pononga, ki a Ihaia, ka toru nei ona tau e haere tahanga ana, kahore hoki he hu, hei tohu, hei mea whakamiharo  
 ki a Ihipa raua ko Etiopia; <sup>4</sup> Ka pena ano ta te kingi o Ahiria arahi i nga Ihipiana hei parau, i nga Etiopiana hei whakarau, i te taitamariki, i te kaumatua, kahore he kakahu, kahore he hu, takoto kau  
 ana nga papa, whakama iho a Ihipa. <sup>5</sup> Ka pororaru ano ratou, ka whakama ki a Etiopia, ki ta ratou  
 i tumanako ai, ki a Ihipa ano, ki to ratou kororia. <sup>6</sup> A e mea te tangata o taua takutai i taua ra, Nana, ko ta tatou tenei i tumanako ai, ko ta tatou i rere atu ai kia ora ai i te kingi o Ahiria; a me pehea tatou ka mawhiti ai?

## Chapter 21

<sup>1</sup> Ko te poropititanga mo te koraha o te moana. Ka rite ki nga awhiowhio i te tonga e pupuhi ana, tona haerenga mai i te koraha i te whenua e wehingia ana. <sup>2</sup> He kino rawa te kitenga kua whakaaturia nei ki ahau; kei te tinihanga te tangata tinihanga, kei te pahua te kaipahua. Whakaekea, e Erama whakapaea, e Meria mutu pu i ahau nga auetanga katoa o reira. <sup>3</sup> Na reira ki tonu toku hope i te mamae, whakawiri rawa nga mea e ngau nei i ahau, ano ko te whakawiringa o te wahine e whakawhanau ana: mamae ana ahau, kore ake e rongu; ohorere ana, kore ake e kite. <sup>4</sup> Kahekahe ana toku manawa, wehi ana i te whakamataku: ko te ahiahi po i hiahiatia e ahau, puta ake ana hei mea e tuiri ai ahau. <sup>5</sup> Kei te whakapai ratou i te tepu, kua whakaritea he kaitutei, kei te kai ratou, kei te inu: whakatika, e nga rangatira, pania te whakangungu rakau. <sup>6</sup> Ko ta te Ariki kupu hoki tenei ki ahau Tikina, whakaturia he kaitutei, mana e whakaatu tana e kite ai. <sup>7</sup> Na ka kitea e ia te ope, nga kaieke hoiho tatakirua, he ropu kaihe, he ropu kamera, kia ata whakarongo marie ia. <sup>8</sup> Katahi tera ka karanga, ano he raiona: e Toku Ariki, kei runga ahau i te wahi tutei e tu tonu ana i te awatea; pau katoa ano nga po i ahau e tu nei i taku mahi tiaki. <sup>9</sup> Nana, tenei te haere mai nei he ropu tangata, me nga kaieke hoiho, he tatakirua. Na ka oho ia, ka mea, Kua horo a Papurona, kua horo; ko nga whakapakoko katoa ano o ona atua, wawahia iho ki te whenua. <sup>10</sup> E taku patunga witi, e te witi o taku patunga; ko taku i rongu ai ki a Ihowa o nga mano, ki te Atua o Iharaira, e whakaaturia nei e ahau ki a koutou.

<sup>11</sup> Ko te poropititanga mo Ruma. E karanga mai ana tetahi ki ahau i Heira, E te kaitutei, ko te aha i te po? E te kaitutei, ko te aha i te po? <sup>12</sup> Ka ki mai te kaitutei, Kei te haere mai te ata raua ko te po: ki te uia e koutou, e ui: hoki mai, haere mai.

<sup>13</sup> Ko te poropititanga mo Arapia. Kei te ngahere i Arapia he nohoanga mo koutou i te po, e nga tira haere o Reranimi. <sup>14</sup> I kawea e ratou he wai mo te tangata e matewai ana; i haere nga tangata o te whenua o Tema ki te whakatau i nga tangata e rere ana, me ta ratou taro. <sup>15</sup> Ka rere mai hoki ratou i nga hoari, i te hoari kua oti te unu, i te kopere kua oti te whakapiko, i te pakaha ano o te whawhai. <sup>16</sup> Ko ta te Ariki kupu hoki tenei ki ahau, Kia kotahi tau, ko te tau hoki o te kaimahi, a ka poto katoa te kororia o Kerara. <sup>17</sup> Na ko nga morehu o nga kaikopere, ko nga marohirohi o nga tama a Kerara, ka torutoru; ko te kupu hoki tenei a Ihowa, a te Atua o Iharaira.

## Chapter 22

<sup>1</sup> Ko te poropititanga mo te raorao o te whakakitenga. He aha ra nou, i piki katoa ai koe ki nga tuanui? <sup>2</sup> E koe, e ki tonu nei koe i te nge, he pa tirituri, he pa koa: ko ou tangata i patua ehara i te mea patu na te hoari, ehara i te hunga i mate i te whawhai. <sup>3</sup> Rere ngatahi ana ou rangatira katoa, herea ana ratou e nga kaikopere, te hunga katoa i kitea i roto i a koe, herea ngatahitia ana ratou, te hunga i rere mai i tawhiti. <sup>4</sup> Koia ahau i mea ai, Kati te titiro ki ahau, ka nui toku tangi; kaua e tohe ki te whakamarie i ahau mo te pahuatanga o te tamahine a toku iwi. <sup>5</sup> He ra hoki tenei no te raruraru, no te takahanga, no te pokaikaha, he mea na te Ariki, na Ihowa o nga mano, i te raorao o te whakakitenga; he pakaruhanga i nga taiepa, he karangatanga ki nga maunga. <sup>6</sup> Ko ta Erama, he mau i te papa pere, me nga hariata tangata me nga kaieke hoiho; ko ta Kiri he whakaputa mai i te whakangungu rakau ki waho. <sup>7</sup> Na kapi ana ou raorao whakapaipai i te hariata, tu ana nga rarangi o nga kaieke hoiho ki te kuwaha.

<sup>8</sup> Na mauria atu ana e ia te hipoki o Hura; a ka titiro koe i taua ra ki nga patu i roto i te whare o te ngahere. <sup>9</sup> A ka kite koutou i nga pakaru o te pa o Rawiri, he maha; ka huia hoki e koutou nga wai o te poka o raro. <sup>10</sup> A taua ana e koutou nga whare o Hiruharama; wawahia ana e koutou nga whare hei hanga mo te taiepa. <sup>11</sup> Ka hanga ano e koutou he awa ki waenganui i nga taiepa e rua

mo nga wai o te poka tawhito; kahore ia o koutou whakaaro ki te kaimahi o tena mea, kahore hoki e titiro ki tona kaihanganga o mua noa atu. <sup>12</sup> Heoi ko te karangatanga a te Ariki, a Ihowa o nga mano, i taua ra ki te tangi, ki te aue, ki te moremore, ki te whitiki i te kakahu taratara: <sup>13</sup> Na ko te koa, ko te hari, ko te patu kau, ko te patu hipi, ko te kai kikokiko, ko te inu waina; kia kai tatou, kia inu; apopo hoki tatou mate ai. <sup>14</sup> Na ka whakaatu a Ihowa o nga mano ki oku taringa, He pono, e kore rawa tenei he o koutou e murua, a mate noa koutou, e ai ta te Ariki, ta Ihowa o nga mano.

<sup>15</sup> Ko te kupu tenei a te Ariki, a Ihowa o nga mano, Haere mai, haere ki tenei kaitiaki o nga moni, ki a Hepena, ki te rangatira o te whare, mea atu, <sup>16</sup> He aha tau i konei? ko wai hoki tau i konei, i haua ai e koe he tanumanga mou ki konei? e hahau ana koa he tanumanga mona i te wahi tiketike, e tarai ana he nohoanga mona ki te kamaka! <sup>17</sup> Nana, ka maka kinotia atu koe e Ihowa, ka peratia i ta te tangata kaha; ae ra, ka kopakina rawatia koe e ia. <sup>18</sup> He pono ka tahuri ia, ka whiua koe, ano he mea porotaka ki tetahi whenua nui: hei reira koe mate ai, ki reira ano hoki nga hariata o tou kororia, e koe, e te whakama o te whare o tou ariki. <sup>19</sup> Ka peia atu hoki koe e ahau i tou turanga, ka turakina iho ano koe e ia i tou wahi. <sup>20</sup> I taua ra ka karangatia e ahau taku pononga, e Eriakimi tama a Hirikia. <sup>21</sup> Ka whakakahuria ano ia e ahau ki tou kakahu, ka whakakahangia hoki ki tou whitiki, ka hoatu ano tou kawanatanga ki tona ringa: a hei matua ia ki nga tangata o Hiruharama, ki te whare ano o Hura. <sup>22</sup> Ka waiho ano e ahau te ki o te whare o Rawiri ki runga ki tona pokohiwi; na mana e whakatuwhera, a kahore he tangata hei tutaki, mana e tutaki a kahore he tangata hei whakatuwhera. <sup>23</sup> Ka titia hoki ia e ahau ano he titi ki te wahi mau, a hei torona kororia ia ki te whare o tona papa. <sup>24</sup> Ka whakarihia ano e ratou ki runga ki a ia te kororia katoa o te whare o tona papa, nga uri, nga whanau, nga oko ririki katoa, ara nga oko hei peihana, me nga oko katoa ano hei haka. <sup>25</sup> I taua ra, e ai ta Ihowa o nga mano, ka tau i te titi i titia nei ki te wahi mau, ka tapahia, ka marere ki raro; ka motuhia atu ano te mea e iri ana i runga: na Ihowa hoki te kupu.

### Chapter 23

<sup>1</sup> Ko te poropititanga mo Taira. Aue, e nga kaipuke o Tarahihi; kua moti hoki ia, i kore ai he whare, i kore ai he tapokoranga: no te whenua o Kitimi te whakaaturanga ki a ratou. <sup>2</sup> Whakarongoa, e nga tangata o te motu; kua ki na koe i ta nga kaihekohoko o Hairona e rere nei i te moana. <sup>3</sup> Kei

nga wai nui, kei nga purapura o Hihoro, kei te tapahanga witi o te Naera, ona hua; ko ia ano te  
<sup>4</sup> kaihokohoko ki nga iwi. Kia whakama koe, e Hairona, kua korero hoki te moana, te pa kaha o te  
moana kua mea, Kahore oku mamae hapu, kahore hoki ahau i whanau, kahore i atawhai tamariki,  
<sup>5</sup> kahore i whakatupu kotiro. Ka tae te rongu ki Ihipa, ka tino mamae ratou, ki te rongu o Taira.  
<sup>6</sup> Whakawhiti atu ki Tarahihi; aue, e nga tangata o te motu. <sup>7</sup> Ko to koutou pa koa ianei tenei, ko  
<sup>8</sup> tona tawhito nei no nga ra ano onamata? na ona waewae hoki ia i kawe ki tawhito noho ai. Na  
wai i whakatakoto tenei whakaaro mo Taira, mo te pa whakakarauna, he rangatira nei ona  
<sup>9</sup> kaihokohoko; ko ona kaiwhakawhitiwhiti taonga, ko nga metararahi o te whenua? Na Ihowa o  
nga mano i whakatakoto, hei whakapoke i te whakapehapeha o nga mea ataahua katoa, hei mea  
<sup>10</sup> kia whakahaweatia nga metararahi o te whenua. Tika atu na waenganui i tou whenua, ano ko te  
Naera, e te tamahine a Tarahihi: kua kore he whitiki mou a mua ake. <sup>11</sup> Kua totoro tona ringa ki  
runga ki te moana, whakangaueuetia ana e ia nga rangatiratanga. Na Ihowa te whakahau mo Kanaana,  
<sup>12</sup> kia ngaro ona pa kaha. I mea ano ia, Kati rawa tou koa, e te wahine e tukinotia nei, e te tamahine  
<sup>13</sup> a Hairona: whakatika, whakawhiti atu ki Kitimi; ahakoa i reira kahore he okiokinga mou. Nana,  
te whenua o nga Karari, kua kahore tena iwi; kua whakaritea a reira e nga Ahiriana mo nga kirehe  
o te koraha: na ratou i whakaara a ratou pourewa, kua horo i a ratou ona whare kingi; kua meinga  
<sup>14</sup> e ia hei ururua. Aue, e nga kaipuke o Tarahihi: kua kore hoki to koutou pa kaha.  
<sup>15</sup> I taua ra ka warewaretia a Taira, e whitu tekau tau, ko nga ra hoki o te kingi kotahi: i te  
mutunga o nga tau e whitu tekau ka rite ta Taira ki te waiata a te wahine kairau. <sup>16</sup> E mau ki te  
hapa, taiawhiotia te pa, e te wahine kairau i warewaretia nei; kia pai te waiata, kia maha nga waiata,  
<sup>17</sup> kia maharatia ai koe. Na i te mutunga o nga tau e whitu tekau ka tirohia a Taira e Ihowa, a ka  
hoki ia ki tana utu, ka kairau ano ki nga kingitanga katoa o te whenua i runga i te mata o te oneone.  
<sup>18</sup> Na, ko ana mea hokohoko, me ona utu, he tapu ki a Ihowa: e kore e whaowhina ki te toa, e kore  
ano e rongootia; engari ma te hunga e noho ana i te aroaro o Ihowa ana mea hokohoko, a ka makona  
ratou i te kai, ka roa ano te mau o te kakahu.

## Chapter 24

<sup>1</sup> Nana, kua meinga e Ihowa te whenua kia noho tahanga, kia takoto kau, kua porohurihia ake  
e ia, a kua whakamararatia ona tangata. <sup>2</sup> A ka rite te iwi ki te tohunga, te pononga ki tona ariki,



te pononga wahine ki tona rangatira wahine, te tangata i utua ai te taonga ki te tangata i a ia nei te  
 utu, te kaiwhakatarewa mai ki te tangata i te nama, te tangata i te moni whakatupu ki te tangata  
 nana nei i homai ki a ia. <sup>3</sup> Ka moti rawa ta te whenua, pahua rawa: kua korerotia hoki e Ihowa tenei  
 kupu. <sup>4</sup> E tangi ana te whenua, ngohe noa iho; kahakore kau te ao, ngohe noa iho; harotu kau te  
 hunga rarahi o te whenua. <sup>5</sup> Kua poke ano te whenua i raro i ona tangata; kua takahia hoki nga ture,  
 whakaputaia ketia ake e ratou te tikanga i whakatakotoria, whakataka ana e ratou te kawenata  
 onamata. <sup>6</sup> Na reira i kainga ai te whenua e te kanga, kitea iho te hara o ona tangata; na reira i wera  
 ai nga tangata o te whenua, a he torutoru te hunga i toe. <sup>7</sup> E tangi ana te waina hou; kua kahakore  
 te waina; kei te mapu te hunga ngakau koa katoa. <sup>8</sup> Ka mutu te koa o nga timipera, kua kore te nge  
 o te hunga e hari ana; mutu ake te koa o te hapa. <sup>9</sup> Kore ake ta ratou waiata i te mea e inu waina  
 ana; ka kawa te wai kaha ki te hunga e inu ana. <sup>10</sup> Kua pakaru te pa o te pororaru, tutaki rawa nga  
 whare katoa, te ai he tomokanga atu. <sup>11</sup> He karanga kei nga ara, he mea mo te waina; kua pouri  
 katoa te koa, kua riro te harakoa o te whenua. <sup>12</sup> Mahue iho ki te pa ko te ururua; ko te kuwaha,  
 he mea whiu ki te whakangaromanga.  
<sup>13</sup> Ka penei te hanga i waenganui i te whenua i roto i nga iwi; kei te ruiuinga o te oriwa te rite,  
 kei te hamunga o nga karepe ina mutu te whawhaki. <sup>14</sup> Ka ara to ratou reo, ka waiata ratou; mo te  
 nui hoki o Ihowa, ka hamama mai ratou i te moana. <sup>15</sup> Na whakakororiatia a Ihowa i te rawhiti, te  
 ingoa o Ihowa, o te Atua o Iharaira, i nga motu o te moana.  
<sup>16</sup> I te pito rawa o te whenua kua rangona nga waiata e tatou, he kororia ki te tangata tika. Otiia  
 ka ki ake ahau, Kei te whakaheke ahau! kei te whakaheke! aue te mate i ahau! he mahi tinihanga  
 ta te hunga tinihanga; nui atu te tinihanga o te hunga tinihanga. <sup>17</sup> Ko te wehi, ko te rua, ko te rore,  
 kei a koe, e te tangata o te whenua. <sup>18</sup> Na, ko te tangata e rere mai i te ngangau o te wehi, ka taka  
 ki te rua; a ko te tangata e puta ake ana i roto i te rua, ka mau i te rore; kua puare hoki nga matapihi  
 o runga, a e ru ana nga turanga o te whenua. <sup>19</sup> Ngakongako kau te whenua, memeha kau noa iho  
 te whenua, ngaueue kau te whenua. <sup>20</sup> Hurorirori kau te whenua ano he haurangi, nekenekhia  
 ana, me te mea he whare tira; ka taimaha iho hoki tona he ki runga ki a ia, ka hinga, heoi ano ona  
 aranga ake. <sup>21</sup> I taua ra ka whiua e Ihowa te ope o te hunga kua neke ake, me nga kingi o te whenua  
 i runga i te whenua. <sup>22</sup> A ka huihuia ratou, ka peratia me nga herehere e huihuia ana ki te rua, ka

23

tutakina hoki ki te whare herehere, a ka maha nga ra ka tirohia iho ratou. Ko reira te marama numinumi kau ai, ka whakama ano hoki te ra; ka kingi hoki a Ihowa o nga mano ki Maunga Hiona, ki Hiurharama, ki te aroaro ano o ana kaumatua i runga i te kororia.

## Chapter 25

<sup>1</sup> E Ihowa, ko koe toku Atua; ka whakanuia koe e ahau, ka whakamoemititia e ahau tou ingoa; he mahi whakamiharo hoki au, ara ko nga whakaaro i takoto nei i mua, i runga i te pono, i te tika.

<sup>2</sup> Kua meinga hoki e koe te pa hei puranga; te pa kaha, hei ururua; te whare kingi o nga tangata ke, kore iho tera pa; e kore e hanga a ake ake. <sup>3</sup> Na ka whakakororiatia koe e te iwi kaha, ka wehi te

<sup>4</sup> pa o nga iwi nanakia i a koe. Hei pa kaha hoki koe mo te ware, hei pa kaha mo te rawakore i tona henga, hei whakaruru kei mate i te tupuhi, hei whakahauhau mo te werawera, ina rite te hau o te <sup>5</sup> hunga nanakia ki te tupuhi e aki mai ana ki te taiepa. Ka rite ki te mahana i te wahi maroke te ngangau o nga tangata ki ka whakahokia iho nei e koe; ka rite ki te mahana i nga wa e whakamarumarua ana e te kapua, ka iti iho te waiata a te hunga nanakia.

<sup>6</sup> A ka tukua e Ihowa o nga mano he hakari ma nga iwi katoa ki runga ki tenei maunga, he mea momona, he waina nganga hei hakari, he mea momona, ki tonu i te hinu wheua, he waina nganga,

<sup>7</sup> tatari rawa. Ka whakakahoretia ano e ia i runga i tenei maunga te mata o te hipoki e hipoki nei i <sup>8</sup> nga iwi katoa, me te taupoki e taupoki nei i nga tauwi katoa. Kua horomia e ia te mate ake ake; a ka horoia e te Ariki, e Ihowa, nga roimata o nga kanohi katoa, ka whakakahoretia ano e ia te whakahawe ki tana iwi puta noa i te whenua; na Ihowa nei hoki te kupu.

<sup>9</sup> Ko te kupu ano tenei i taua ra, Nana, ko to tatou Atua tenei: i tatari tatou ki a ia, ka ora ano <sup>10</sup> tatou i a ia: ko Ihowa tenei; i tatari tatou ki a ia; ka hari tatou, ka koa ki tana whakaoranga. No te mea ka okioki te ringa o Ihowa ki tenei maunga, a ka takahia a Moapa ki raro i tona wahi, me te

<sup>11</sup> kakau witi e takahia ana ki te wai o te puranga paru. A ka totoro ona ringa i waenganui o reira pera me te kaikauhoe e toro ana i ona ringa ina kauhoe ia; ka tukua hoki ki raro tona whakapehapeha

<sup>12</sup> me nga mahi a ona ringa. Na, ko te wahi kaha o te pourewa tiketike o ou taiepa, kua tukua iho e ia, takoto rawa, pa rawa ki te whenua, ki te puehu rawa.

## Chapter 26

<sup>1</sup> I taua ra ka waiatatia tenei waiata i te whenua o Hura. He pa kaha to tatou; ka whakaritea e  
 ia te whakaora hei taiepa, hei pekerangi. <sup>2</sup> Whakatuwheratia nga kuwaha, kia tomo mai ai te iwi  
 tika e pupuri ana i te pono. <sup>3</sup> Mau e pupuri i runga i te rangimarie rawa te tangata e u ana te whakaaro  
 ki a koe; nana hoki i whakawhirinaki ki a koe. <sup>4</sup> Whakawhirinaki ki a Ihowa a ake ake, no te mea  
 kei te Ariki, kei a Ihowa, he kamaka mau tonu.

<sup>5</sup> Kua whakahokia iho hoki e ia te hunga e noho ana i runga, te pa tiketike; takoto rawa i a ia,  
 takoto rawa ki te whenua, pa rawa ki te puehu: <sup>6</sup> Takahia iho e te waewae, e nga waewae o nga  
 rawakore, e nga takahanga o nga ware. <sup>7</sup> Ko te ara o te tangata tika, he tika; e whakatikaia ana e  
 koe, e te mea tika, te ara o te tangata tika. <sup>8</sup> Kei te ara nei ano matou o au whakaritenga e tatari ana  
 ki a koe, e Ihowa; ko tou ingoa, ko te mahara ki a koe ta o matou wairua e minamina nei. <sup>9</sup> Minamina  
 tonu ahau, toku ngakau, ki a koe i te po; ae ra, ka moata ahau, toku wairua, ki te rapu i a koe; no  
 te mea i nga wa e puta ai au whakaritenga ki te whenua, ka akona te tika e nga tangata o te ao.

<sup>10</sup> Atawhaitia iho te tangata kino, e kore ia e ako i te tika; i te whenua o te tika ka he tana mahi, e  
 kore ano ia e kite i te nui o Ihowa. <sup>11</sup> E Ihowa, kua ara tou ringa ki runga, heoi kahore ratou e kite:  
 otiia ka kite ratou i tou hae mo te iwi, a ka whakama; ae ra, ma te ahi e kai ou hoariri.

<sup>12</sup> Ka whakaritea e koe, e Ihowa, he rangimarie mo matou, nau nei hoki i mahi a matou mahi  
 katoa ma matou. <sup>13</sup> E Ihowa, e to matou Atua, he ariki ke ano, i tua ake i a koe, i noho hei rangatira  
 mo matou; mau anake ia matou ka mahara ai ki tou ingoa. <sup>14</sup> Kua mate ratou, e kore e ora; he  
 tupapaku ratou, e kore e ara; na kua tirohia nei ratou e koe, ngaro iho i a koe, huna katoatia ana e  
 koe te mahara ki a ratou. <sup>15</sup> Kua whakaraneatia e koe te iwi, e Ihowa, kua whakaraneatia e koe te  
 iwi: kua whai kororia koe: nau i whakanui nga rohe katoa o te whenua. <sup>16</sup> E Ihowa, i te rarururutanga  
 i haere atu ratou ki a koe, a i ringihia atu e ratou he inoi, i te mea e papaki ana koe i a ratou. <sup>17</sup> He  
 pera i te wahine hapu, ka tata ia te whanau, e whakamamae ana, e aue ana i ona mamae; ko to matou  
 rite tera i tou aroaro, e Ihowa. <sup>18</sup> I te hapu matou, i te mamae matou, kua whanau ta matou me te  
 mea he hau; kihai i oti i a matou he whakaora i runga i te whenua; kihai ano hoki i hinga nga tangata  
 o te ao. <sup>19</sup> Ka ora ou tangata mata; ka ara oku tinana mate, Maranga, waiata, e te hunga kei te puehu  
 nei to koutou kainga; no te mea kei te tomairangi o nga otaota te rite o tou tomairangi; a ka maka  
 mai nga tupapaku e te whenua.

20

Haere, e toku iwi, e tomo ki roto ki ou ruma, tutakina ou tatau i muri i a koe; e piri, he wahi

iti kau nei, kia pahemo ra ano te riri. <sup>21</sup> No te mea tenei a Ihowa te puta nei i tona wahi ki te whiu i te he o nga tangata o te whenua; a ka whakakitea ona toto e te whenua; e kore ano e hipokina e ia i muri nei tona hunga i patua.

## Chapter 27

1

I taua ra ka patua e Ihowa ki tana hoari maro, hoari nui, hoari kaha a Rewiatana, te nakahi tere, a Rewiatana, te nakahi korohape; ka tukitukia hoki e ia te tarakona i te moana. <sup>2</sup> I taua ra: He

mara waina, waiata atu koutou ki reira. <sup>3</sup> Ko ahau, ko Ihowa hei tiaki i a ia; hono tonu taku whakamakuku; ka tiakina e ahau i te po, i te ao, kei tukinotia. <sup>4</sup> Kahore he riri i roto i ahau. He kore noa no nga tataramoa, no nga tumatkauru hei whawhai mai ki ahau! Penei kua haere tonu atu

ahau ki runga ki a ratou, tahuna ngatahitia ake e ahau. <sup>5</sup> Kia hopukia mai ranei e ia toku kaha, kia houhia ai te rongu ki ahau; ae ra, kia houhia ano tana rongu ki ahau. <sup>6</sup> A nga ra e haere mai nei ka whai pakiaka nga uri o Hakopa; ka whai puawai, ka kopuku a Iharaira: a ka kapi i a ratou te mata o te ao katoa i te hua.

7

I rite ranei tana patu i a ia ki tana patunga i ona kaipatu? i rite ranei tona whakamatenga ki te whakamatenga o ana i whakamate ai? <sup>8</sup> He mea mehua tau ngangare ki a ia i tona tukunga atu e

koe; kawhakina ana ia e ia ki tana hau pakaha i te ra o te marangai. <sup>9</sup> Na ko tenei hei muru i te he o Hakopa; ko nga hua katoa enei o te tahianga i tona hara; kia meinga e ia nga kohatu katoa o te aata kia rite ki te kohatu taioma, kurukuru rawa, a kore ake nga Aherimi me nga whakapakoko e ara

ake ake. <sup>10</sup> Kei te mokemoke hoki te pa taiepa, he kainga mahue, he mea whakarere, he pera i te

koraha: kai ana te kuaou kau i reira, takoto ana i reira, pau ake i a ia ona manga. <sup>11</sup> Ka memenge ona peka, ka whatiia atu: ka haere mai nga wahine, tahuna ana e ratou ki te ahi; ehara hoki ia i te iwi e whai mahara ana: no reira e kore ratou e tohungia e to ratou kaihanganga, e kore ano to ratou

kaiwhakaahua e aroha ki a ratou. <sup>12</sup> I taua ra ka taia nga hua e Ihowa i te waipuke o te awa, a tae

noa ki te awa o Ihipa, a ka kohikohia takitahitia koutou, e nga tama a Iharaira. <sup>13</sup> I taua ra ka whakatangiia he tetere nui; a ka haere mai te hunga i tata te ngaro i te whenua o Ahiria, me te hunga i te whenua o Ihipa i peia atu; a ka koropiko ratou ki a Ihowa ki te maunga tapu, ki Hiurharama.

## Chapter 28

<sup>1</sup> Aue te he mo te karauna whakapehapeha o te hunga haurangi o Eparaima, ki te puawai memenge hoki o tona ataahua whakakororia, tera i te wahi ki runga o te awaawa momona o te hunga kua hinga i te waina! <sup>2</sup> Nana, he mea kaha, he mea pakari ta te Ariki; koia ano kei te awa whatu, kei te tupuhi e wawahi ana, kei te waipuke, he wai nui e ngawha atu ana, ka taia iho ano e tona ringa ki te whenua. <sup>3</sup> Ka takahia e nga waewae te karauna whakapehapeha o te hunga haurangi o Eparaima. <sup>4</sup> A, ko te puawai memenge o tona ataahua whakakororia, kei te wahi nei ki runga o te awaawa momona, ka rite ki te hua matamua o te piki i te mea kahore ano te raumati; a, ka kite te mea i titiro atu, ka horomia e ia i te mea kei tona ringa ano. <sup>5</sup> I taua ra ko Ihowa o nga mano hei karauna kororia, hei potae ataahua ki nga morehu o tana iwi: <sup>6</sup> Hei wairua whakawa ki te tangata e noho ana ki te whakawa, hei kaha mo te hunga e whakahoki ana i te whawhai i te kuwaha. <sup>7</sup> Otiia kua pohehe ano enei i te waina, a kua kototi ke i te wai kaha; ko te tohunga, ko te poropiti, kua pohehe i te wai kaha, kua horomia raua e te waina, a kua kotiti ke i te wai kaha; he titiro he ta raua, e tapepa ana ta raua whakawa. <sup>8</sup> Ki tonu hoki nga tepu katoa i te ruaki, i te paru, kahore he wahi ma. <sup>9</sup> Ko wai e whakaakona e ia ki te matauranga? ko wai e meinga e ia kia mohio ki te kupu? ko te hunga kua whakamutua ta ratou kai waiu, kua tangohia mai i te u? <sup>10</sup> He whakahau nei hoki tenei i runga i te whakahau, he whakahau i runga i te whakahau; he ako i runga i te ako, he ako i runga i te ako; he iti ki konei, he iti ki ko ra. <sup>11</sup> Engari ma etahi tangata rere ke nga ngutu, he reo ke te reo e korero ai ia ki tenei iwi: <sup>12</sup> I ki atu ia ki a ratou, Ko te okiokinga tenei, hoatu e koutou he okiokinga ki te tangata mauui; ko te tanga manawa hoki tenei: na, kihai ratou i pai ki te whakarongo. <sup>13</sup> No reira, ko ta Ihowa kupu ki a ratou he whakahau i runga i te whakahau, he whakahau i runga i te whakahau; he ako i runga i te ako, he ako i runga i te ako; he wahi iti ki konei, he wahi iti ki ko ra: kia haere ai ratou, ka hinga whakamuri, ka wawahia, ka mahangatia, ka mau. <sup>14</sup> Mo reira whakarongo ki te kupu a Ihowa, e te hunga whakahi, e nga rangatira o tenei iwi i Hiurharama: <sup>15</sup> Kua mea na hoki koutou, Kua whakarite kawenata matou ki te mate; kua rite a matou whakarite ko te reinga; ki te paaha i waenga te whiu i rite nei ki te waipuke, e kore e tae mai ki a matou; no te mea kua oti te teka te mea e matou hei whakawhiri nakitanga, ka piri matou ki roto ki te horihori. <sup>16</sup> Na ko te kupu tenei a te Ariki, a Ihowa, Nana, tenei ahau te whakatakoto nei i te kohatu ki Hiona hei turanga, he kohatu kua oti te whakamatautau, mo te kokonga, he mea utu

<sup>17</sup>  
 nui, he turanga u: ko te tangata e whakapono ana e kore e potatutatu. Ka whakatakotoria ano e  
 ahau te tikanga o te whakawa, mea rawa ki te aho, me te tika ano, paramu rawa: a ka tahia atu te  
<sup>18</sup>  
 whakawhirinakitanga teka e te whatu, ka huri ano nga wai ki runga ki te piringa. Ka whakataka  
 hoki ta koutou kawenata ki te mate; e kore ano e tu ta koutou i whakarite ai ki te reinga; ko te whiu  
<sup>19</sup>  
 i rite nei ki te waipuke, ki te tika atu i waenga, ka waiho koutou hei takahanga mana. I ona wa  
 e haere atu ai taua whiu, ka riro koutou i a ia: ka haere atu hoki i tenei ata, i tenei ata, i te ao, i te  
<sup>20</sup>  
 po; a he whakamataku anake te mea kia mohio ki te kupu. He poto hoki te moenga, e kore e  
<sup>21</sup>  
 wharoro te tangata; he whaiti te hipoki, e kore e taea te roropi mai. No te mea ka rite ki tera i  
 Maunga Peratimi to Ihowa whakatikanga ake, kei tera i te raorao i Kipeno te rite o tona riri; kia  
 mahi ai ia i tana mahi, i tana mahi rere ke, kia whakatutuki ai i tana hanga, i tana hanga rere ke.  
<sup>22</sup>  
 Na kati ra ta koutou whakahi, kei whakaukia o koutou here: kua rongo nei hoki ahau ki te Ariki,  
 ki a Ihowa o nga mano, ki te whakaotinga, ki te mea i whakaritea mo te whenua katoa.  
<sup>23</sup>  
 Kia whai taringa mai, whakarongo hoki ki toku reo; mahara mai, whakarongo ki taku korero.  
<sup>24</sup>  
 Ko ta te kaiparau koia i nga ra katoa he parau, hei whakatokanga? he whakatuwhera tonu ranei  
<sup>25</sup>  
 tana, he wawahi i nga pokurukuru o tona oneone? Ka oti i a ia te mata o taua mara te mea kia  
 rite, e kore ianei ia e maka atu i te pi, e whakato i te kumine, e rui i te witi, rarangi rawa, i te parei  
<sup>26</sup>  
 ki te wahi i whakaritea, me te rai ano ki tona tapa? Ko tona Atua hoki hei whakaako i a ia ki te  
<sup>27</sup>  
 tikanga pai, hei tohutohu ano i a ia. E kore hoki nga pi e patua ki te mea koi, e kore ano te wira  
 kata e hurihia ki runga ki te kumine; engari e patua ana nga pi ki te rakau, nga kumine ki te patupatu.  
<sup>28</sup>  
 Ko te witi hei taro e kurua ana; e kore hoki e patua tonutia e ia; na, ahakoa tohaina e te wira o  
<sup>29</sup>  
 tana kata, e ana hoiho ranei, kahore e tukia e ia kia ririki. E puta mai ana hoki tenei i a Ihowa o  
 nga mano, he mea whakamiharo nei ona whakaaro, he nui ano ana tikanga.

## Chapter 29

<sup>1</sup>  
 Aue te mate mo Ariere, mo Ariere, mo te pa i noho ai a Rawiri! tapiritia iho tetahi tau ki tetahi  
<sup>2</sup>  
 tau; mahia nga hakari i nga wa e rite ai: Hei reira raru ai i ahau a Ariere, a ka pouri; ka tangi: a  
<sup>3</sup>  
 ka rite ia ki ahau ano ko Ariere. Ka nohoia atu ano koe e ahau, a karapoi noa; ka whakapaea koe  
<sup>4</sup>  
 ki te parepare, ka ara ano i ahau he taiepa hei tatau ki a koe. A ka whakahokia iho koe, ka korero

ake i te whenua; ka iti ano tau kupu i roto i te puehu; ka rite tou reo ki to te tangata i te atua maori,  
 he mea puta ake i te whenua, ka kohimu ake tau kupu i roto i te puehu. <sup>5</sup> Ko te huihuinga ia o ou  
 hoariri ka rite ki te puehu ririki, a koe te huihuinga o te hunga nanakia ki te papapa e rere atu ana:

<sup>6</sup> ae ra, ka hemorere tonu. Ka pa ta Ihowa o nga mano ki a ia, he whatitiri, he ru, he reo nui, he  
 tukauati, he tupuhi, he mura ahi e ka ana. <sup>7</sup> A ka rite ki te moe, ki te rekanga kanohi o te po nga  
 iwi maha katoa e whawhai ana ki Ariere, ara te hunga katoa e ngangare ana ki a ia, ki tona pa kaha,

<sup>8</sup> e whakatupu kino ana hoki i a ia. Ka rite ano ki te tangata matekai e moe ana, na kei te kai ia;  
 heoi, kei te ohonga ake, e takoto kau ana tona wairua: ka rite hoki ki te tangata matewai e moe ana,  
 na kei te inu ia; te ohonga ake, kahore he kaha, kei te hiahia ano tona wairua: ko te rite tera o te hui  
 o nga iwi katoa e whawhai ana ki Maunga Hiona.

<sup>9</sup> E tu koutou, e miharo; e hari, a ka matapo: e haurangi ana ratou, ehara ia i te waina; e hurori  
 ana, engari ehara i te wai kaha. <sup>10</sup> No te mea kua ringihia e Ihowa te wairua o te moe au tonu ki  
 runga ki a koutou, kua oti ano i a ia te whakamoe o koutou kanohi, nga poropiti; ko o koutou

<sup>11</sup> rangatira, ko nga matakite, kua taupokina e ia. A ka rite ki a koutou te kitenga katoa ki nga kupu  
 o tetahi pukapuka i hiritia, e hoatu ana e nga tangata ki tetahi tangata matua ki te korero pukapuka,

ka mea atu, Tena, korerotia tenei: a ka mea mai ia, E kore e taea e ahau, e hiri na hoki. <sup>12</sup> Na ka  
 hoatu taua pukapuka ki te mea kahore nei e matau ki te korero pukapuka; na ko te kianga atu, Tena,

<sup>13</sup> korerotia tenei: ano ra ko ia, Kahore ahau e matau ki te korero. Na ka mea te Ariki, I te mea e  
 whakatata ana mai te iwi nei ki ahau, a e whakahonore ana i ahau ki to ratou mangai, ki o ratou  
 ngutu, otiia e matara noa atu ana i ahau o ratou ngakau, a ko to ratou wehi ki ahau he mea whakaako

<sup>14</sup> e ta te tangata to hutohu: Na, ka tahuri ahau ki te mahi i tetahi mahi whakamiharo ki waenganui  
 i tenei iwi, he mahi whakamiharo rawa, he miharo whakaharahara: ka whakamotitia hoki nga

<sup>15</sup> whakaaro o o ratou mea whakaaro nui, ka ngaro te matauranga o o ratou mea mohio. Aue te  
 mate mo te hunga e whai ana i te wahi hohonu, kia ngaro ai to ratou whakaaro i a Ihowa; a kei te  
 pouri a ratou mahi, e mea ana hoki, Ko wai e kite ana i a tatou? ko wai e matau ana ki a tatou?

<sup>16</sup> Ta koutou whakaputa ke! E kiia ranei te kaihanganga rihi he rite ki te paru? e ki ake ranei te mea i  
 hanga ki tona kaihanganga, Kihai ahau i hanga e ia? e mea ake ranei te mea i mahia ki tona kaimahi,  
 Kahore ona matauranga?

<sup>17</sup> He teka ranei he iti rawa nei te takiwa, a ka puta ke a Repanona hei mara whai hua, a ka kiia  
 te mara whai hua hei ngahere? <sup>18</sup> I taua ra ka rongoa nga turi i nga kupu o te pukapuka, ka kite ano

nga kanohi o nga matapo i roto i te kakarauri, i te pouri. <sup>19</sup> Ka neke ake ano te hari o te hunga

<sup>20</sup> mahaki ki a Ihowa, ka koa ano nga tangata rawakore ki te Mea Tapu o Iharaira. Kua moti hoki

te tangata nanakia; a ko te tangata whakahi, kua poto; kua hatepea atu ano te hunga katoa i whanga  
 ki te kino: <sup>21</sup> E whakatau he nei ki te tangata e korero ana, e whakatakoto rore nei mo te kairiri o  
 te he i te kuwaha; a kahore he rawa i whakapeaua ketia ai e ratou te tangata tika. <sup>22</sup> Na ko te kupu  
 tenei a Ihowa, nana nei a Aperahama i hoko, mo te whare o Hakopa, E kore a Hakopa e whakama  
 aiane, e kore ano e koma tona mata aiane. <sup>23</sup> Engari kia kite ia i ana tamariki, i te mahi a oku  
 ringa, i roto i a ia, ka whakatapua e ratou toku ingoa; ae ra, ka whakatapua ano e ratou te Mea Tapu  
 o Hakopa, a ka wehi ki te Atua o Iharaira. <sup>24</sup> Ka mohiotia ano te matauranga e nga wairua kotiti  
 ke, a ka ako te hunga amuamu ki te kupu mohio.

### Chapter 30

<sup>1</sup> Aue te mate mo nga tamariki whakakeke, e ai ta Ihowa, e hanga whakaaro nei, otiia ehara i  
 te mea naku; e hipoki nei i te hipoki, ehara ia i te mea na toku wairua, he mea kia taparua iho ai e  
 ratou he hara ki runga ki te hara: <sup>2</sup> E haere nei ki raro ki Ihipa, kahore hoki e ui tikanga ki toku  
 mangai; hei kaha hoki mo ratou te kaha o Parao, a e mea ana kia whakawhirinaki ki te  
 taumarumarunga iho o Ihipa! <sup>3</sup> Mo reira hei mea whakama ki a koutou te kaha o Parao, hei mea  
 ano e numinumi ai koutou te whakawhirinaki ki te taumarumarunga iho o Ihipa. <sup>4</sup> I Toana hoki  
 ana rangatira, i tae ano ana karere ki Hanehe. <sup>5</sup> Whakama katoa ratou ki te iwi kahore nei a ratou  
 pai mo ratou, kahore he awhina, kahore he pai; engari he whakama, he ingoa kino. <sup>6</sup> Ko te  
 poropititanga mo nga kararehe o te tonga. I te whenua o te raruraru, o te ngakau mamae, no reira  
 nei te raiona uha me te raiona toa, te waipera me te nakahi e rere nei me he ahi, ka kawea atu e  
 ratou o ratou rawa i runga i nga pokohiwi o ng a kua kaihe, o ratou taonga i runga i nga koropuku  
 o nga kamera ki te iwi kahore nei a ratou pai mo ratou. <sup>7</sup> Ko ta Ihipa awhina hoki he horihori, he  
 kore noa iho: koia i huaina ai e ahau, ko Rahapa noho tonu.  
<sup>8</sup> Na haere, tuhituhia ki te papa ki to ratou aroaro, taia iho hoki ki te pukapuka; me waiho ano  
 tena i nga ra i muri hei kaiwhakaatu a ake ake. <sup>9</sup> He tutu hoki tenei iwi, he tamariki korero teka,  
 he tamariki kahore e pai ki te whakarongo ki te ture a Ihowa: <sup>10</sup> Ko ta ratou nei kupu ki nga matakite,  
 Kaua e kite; ki nga poropiti, Kaua e poropititia ki a matou nga mea tika; korero ki a matou i nga  
 mea ngawari; hei nga mea tinihanga he poropititanga ma koutou: <sup>11</sup> Peka atu i te ara, whakarerea  
 te huarahi, kati ta te Mea Tapu o Iharaira te mea mai ki to matou aroaro. <sup>12</sup> Na ko te kupu tenei a



te Mea Tapu o Iharaira, Kua paopao na koutou ki tenei kupu, kua okioki ano ki te tukino, ki te

whanoke, u tonu atu ki reira: <sup>13</sup> Na, ko te tukunga iho o tenei he ki a koutou, ka rite ki te pakaru o te taiepa, meake nei hinga, kua ngawha haere i te wahi tiketike, kitea rawatia ake kua puta

whakarere tona pakaru. <sup>14</sup> Ka wahia hoki e ia, pera i te oko a te kaihangā rihi e wahia ana, mongamonga noa, e kore e tohungia; na e kore e kitea i roto i ona kongakonga he maramara hei

tango ahi mai i te kanga ahi, hei utu wai ake ranei i te poka. <sup>15</sup> Ko te kupu hoki tenei a te Ariki, a Ihowa, a te Mea Tapu o Iharaira, Ma te tahuri mai, ma te humarie ka ora ai koutou; kei te ata noho,

kei te whakawhirinaki he kaha mo koutou; heoi kihai koutou i pai. <sup>16</sup> Na i ki na koutou, Kahore, engari me rere matou i runga i te hoiho; mo reira ka rere koutou: a, Ka eke matou ki runga ki te

mea tere; mo reira ka tere ano te hunga e whai ana i a koutou. <sup>17</sup> Ko te mano kotahi, ka rere i te riri a te tangata kotahi; ka rere koutou i te riri a te tokorima; a ka mahue koutou ano he pou kara i te tihi o te maunga, ano he kara i runga i te pukepuke.

<sup>18</sup> Na konei ano a Ihowa ka tatari, he mea kia atawhaitia ai koutou e ia, na konei ano ia ka whakanekehia ake, kia tohungia ai koutou e ia: he Atua whakawa hoki a Ihowa, ka hari te hunga

katoa e tatari ana ki a ia. <sup>19</sup> Tera hoki te iwi e noho ki Hiona, ki Hiruharama; mutu ake tou tangi: he pono ka aroha ia ki a koe, ki tou reo e tangi ana; ka rongoa ia ki a koe, ka whakahoki kupu ia ki

a koe. <sup>20</sup> Ahakoa homai e te Ariki hei taro ma koutou ko te ngakau mamae, hei wai ano ko te tukino, e kore ou kaiwhakaako e huna a muri; engari ka kite ou kanohi i ou kaiwhakaako: <sup>21</sup> A ka

rongo ou taringa i te kupu i muri i a koe e mea ana, Ko te ara tenei: na konei atu, ina tahuri koutou ki matau, ina tahuri ki mau. <sup>22</sup> Ka whakapokea hoki e koutou te kopaki o au whakapakoko hiriwa,

me te mea whakakikorua o au whakapakoko koura whakarewa: ka rukerukea atu e koe, ano he mea poke, a ka mea ki taua mea, Haere atu. <sup>23</sup> A ka homai e ia he ua ki tau purapura e whakatokia e

koe ki te oneone, he taro ano, he hua no te oneone, a ka whai ngako, ka nui taua mea: i taua ra ano he nunui nga parae e kai ai au kararehe. <sup>24</sup> A ko nga kau me nga kua kaihe e mahi ana i te oneone,

ka kai i te kai pai, he mea i whakarereka ki te koko, ki te whakarereka witi. <sup>25</sup> A i runga i nga maunga tiketike katoa, i nga pukepuke ikeike katoa, ka rere he awa, he manga wai, i te ra o te

parekura nui, ina hinga nga pourewa. <sup>26</sup> Ko te marama hoki o te marama ka rite ki te marama o te ra, a ko te marama o te ra, e whitu ona whakanekehanga ake, ka rite ki te marama o nga ra e whitu, i te ra e takaia ai e Ihowa te kaiakiko o tana iwi, ina rongoaia e ia te patunga i patua ai ratou.

<sup>27</sup> Nana, kei te haere mai te ingoa o Ihowa i tawhiti, ka tonu tona riri, pongere tonu te paowa e kake ana; ki tonu ona ngutu i te riri, ko tona arero koia ano kei te ahi e kai ana: <sup>28</sup> Ko tona manawa,

ano he awa e ngawha ana, tae ana ki te kaki rawa, hei tatari i nga iwi ki te tatari o te horihori; a

<sup>29</sup> mau rawa ki nga kauae o nga iwi he paraire, hei whakapohehe i a ratou. Ka waiata koutou, me te mea ko te po e mahia ai te hakari tapu; ka koa te ngakau, ano he tangata e haere ana me tana  
<sup>30</sup> putorino, e haere ana ki te maunga o Ihowa, ki te Kamaka o Iharaira. Ka meinga hoki e Ihowa tona reo kororia kia rangona, kia kitea te tautanga iho o tona ringa, me te weriweri o tona riri, te  
<sup>31</sup> mura o te ahi e kai ana, te apuhau, te tupuhi, me te nganga kohatu. Ma te reo hoki o Ihowa ka  
<sup>32</sup> pakaru ai te Ahiriana i whiu nei ki te rakau. A ko nga whakapanga katoa o te tokotoko i whakaritea, ko ta Ihowa hoki e whakapa ai ki a ia, ka meinga ki nga timipera, ki nga hapa: he  
<sup>33</sup> whawhai whakangaueue hoki tana whawhai ki a ratou. No mua iho hoki a Topete i whakaritea ai; ae ra, kua rite mo te kingi; kua oti te whakahohonu, te whakanui: ko tona puranga he ahi, nui atu hoki te wahie; ko te manawa o Ihowa, ano he awa whanariki, hei whakangiha.

### Chapter 31

<sup>1</sup> Aue te mate mo te hunga e haere ana ki raro, ki Ihipa ki te tiki whakauru, e okioki ana ki te hoiho; e whakawhirinaki ana ki te hariata, no te mea he maha, ki te kaieke hoiho ano, no te mea he nui te kaha; kahore ia e titiro ki te Mea Tapu o Iharaira, kahore hoki e rapu tikanga ki a Ihowa!

<sup>2</sup> Otiia he whakaaro nui ano ia, ka takina mai ano te kino e ia, e kore ano ana kupu e unuhia e ia: engari ka whakatika ia ki te whare o nga kaimahi i te kino, ki nga whakauru o nga kaimahi i te he.

<sup>3</sup> Na he tangata nei nga Ihipiana, ehara hoki i te Atua; he kikokiko ano hoki o ratou hoiho, ehara i te wairua. Te whakamarokanga mai o to Ihowa ringa, ka hinga te kaiawhina, taka tonu atu te tangata

<sup>4</sup> e awhinatia ana, a ka he ngatahi ratou. Ko ta Ihowa kupu hoki tenei ki ahau, Ka rite ki te raiona, ki te kua raiona e hamama ana ki tana tupapaku, i te mea ka karangarangatia nga hepara tokomaha ki a ia, kahore ona wehi ki to ratou reo, e kore ano ia e whakaririka ki to ratou ngangau; ka pera ano te haerenga iho o Ihowa o nga mano ki te whawhai ki runga ki Maunga Hiona me to reira

<sup>5</sup> pukepuke. Ka rite ki nga manu e rere ana ta Ihowa o nga mano tiaki i Hiruharama, ka tiakina, ka whakaorangia, ka tika atu ia na runga, ka araaraia e ia.

<sup>6</sup> Tahuri ki a ia, kua hohonu rawa nei ta koutou tutu ki a ia, e nga tama a Iharaira. <sup>7</sup> A taua ra hoki ka whakahawea te tangata ki ana whakapakoko hiriwa, ki ana whakapakoko koura, i hanga e

<sup>8</sup> o koutou ringa ma koutou hei hara. Hei reira te Ahiriana ka hinga i te hoari, ehara na te tangata; a ka pau ia i te hoari, ehara i te tangata: a ka rere atu ia i te hoari, ka meinga hoki ana taitamariki

<sup>9</sup> kia utu takoha. A ka memeha tona kamaka, he wehi hoki, a ka matakua ona rangatira i te kara, e ai ta Ihowa, kei Maunga Hiona nei tana ahi, kei Hiruharama tana oumu.

## Chapter 32

<sup>1</sup> Nana, ka kingi te kingi i runga i te tika, ka whakahaere tikanga ano nga rangatira i runga i te  
<sup>2</sup> whakawa. A ka ai he tangata hei kuhunga ina pa te hau, hei piringa kei mate i te tupuhi; ka rite  
<sup>3</sup> ki nga awa wai i te wahi maroke, ki te ata o te kohatu nui i te whenua ngaunga ra. Na e kore e  
<sup>4</sup> atarua nga kanohi o te hunga kite; ka whakarongo ano te hunga i te taringa rongu. Ka matauria  
<sup>5</sup> ano te matauranga e te ngakau o te hunga ponana, a ka hohoro te arero o nga reo kikiki ki te korero  
<sup>6</sup> marama. E kore te wairangi e kiia i muri he ohaoha, e kore ano te kaiponu e kiia he atawhai. Ka  
<sup>7</sup> korero hoki te tangata nanakia i te nanakia, a ka mahi tona ngakau i te kino, kia whakahawea ai ki  
<sup>8</sup> te tapu, kia puta ke ai tana korero ki a Ihowa, kia noho tahanga ai i a ia te wairua o te tangata  
<sup>9</sup> matekai, kia moti ai hoki he wai mo te tangata matewai. He kino hoki nga hanga a te kaiponu: e  
<sup>10</sup> whakatakotoria ana e ia he whakaaro kino, he korero teka e he ai te hunga iti, ahakoa e tika ana  
<sup>11</sup> ano nga korero a te rawakore. He ohaoha ia nga tikanga a te ohaoha; a ka u ia ki nga mahi ohaoha.  
<sup>12</sup> Whakatika e nga wahine e noho pai ana, whakarongo ki toku reo: e nga tamahine  
<sup>13</sup> whakaarokore, kia whai taringa ki aku kupu. He maha nga ra i tua atu i te tau e raruraru ai koutou,  
<sup>14</sup> e nga wahine maharakore: no te mea ka kore te whakinga waina, e kore hoki e tae mai te  
<sup>15</sup> kohikohinga. E wiri, e nga wahine e noho humarie ana; pokaikaha noa iho, e te hunga maharakore;  
<sup>16</sup> whakarerea nga kakahu, noho tahanga, whitikiria he kakahu taratara ki o koutou hope. Ka papaki  
<sup>17</sup> ratou ki nga uma mo nga mara ataahua, mo te waina hua. Ka puta ake te tataramoa me te  
<sup>18</sup> tumatakuru ki te oneone o taku iwi, ina, ki runga ki nga whare koa katoa o te pa hari: No te mea  
<sup>19</sup> ka mahue te whare kingi, ka whakarerea te pa tokomaha: ko te puke me te pourewa ka waiho hei  
<sup>20</sup> ana a ake ake, hei mea e koa ai nga kaihe mohao, hei wahi kai ma nga kahui; Kia ringihia mai  
<sup>21</sup> ra ano i runga te wairua ki a tatou, kia meinga ra ano te koraha hei mara whai hua, kia kiia ano te  
<sup>22</sup> mara whai hua he ngahere. Ko reira te whakawa noho ai ki te koraha, a hei kainga te mara hua  
<sup>23</sup> mo te tika. A ko te mahi a te tika he rongu mau; ko te whakaotinga o te tika he ata noho, he  
<sup>24</sup> ngakau u a ake ake. Ka noho hoki taku iwi ki te nohoanga o te rongu mau, ki nga kainga e u ai  
<sup>25</sup> te ngakau, ki nga okiokinga humarie. Ka tarere iho ia te whatu i te hinganga o te ngahere; a ka  
<sup>26</sup> whakahoroa rawatia te pa ki raro. Ano te hari o koutou, o te hunga e whakato ana ki te taha o  
<sup>27</sup> nga wai katoa, e tuku atu ana i nga waewae o te kau, o te kaihe.

## Chapter 33

<sup>1</sup>  
 Aue te mate mou e pahua nei, a kihai koe i pahuatia; e tinihanga nei, a kihai ano koe i tinihangatia! kia mutu tau pahua, ka pahuatia ano koe: kia mutu tau tinihanga, ka tinihangatia koe.

<sup>2</sup>  
 Kia atawhai, e Ihowa, ki a matou; kua tatari nei matou ki a koe: ko koe hei ringa mo ratou i tenei ata, i tenei ata, hei whakaora mo matou i nga wa o te raru. <sup>3</sup> I te rongonga i te ngangau, whati ana nga iwi: i tou aranga ki runga, marara ana nga iwi. <sup>4</sup> Ko te kohikohinga o o koutou taonga ano he moka e kohi ana; kei te tarapeke o te mawhitiwhiti te rite ina kokiritia e ratou. <sup>5</sup> Ka whakanuia a Ihowa; kei runga hoki tona nohoanga; nana a Hiona i ki ai i te whakawa, i te tika. <sup>6</sup> A ka u nga wa i a koe; hua tonu te whakaora, te whakaaro nui, te matauranga; ko te wehi ki a Ihowa hei taonga mona. <sup>7</sup> Nana, he tangi o ratou maia i waho; ko nga karere hohou rongu, tiwerawera ana te tangi.

<sup>8</sup>  
 Kua uruatuatia nga ara, kua kore e haerea e te tangata: kua paheke i a ia te kawenata, whakahawea ana ia ki nga pa: kahore te tangata e whakaaroa e ia. <sup>9</sup> E tangi ana te whenua, ngohe noa iho; kua whakama a Repanona, kua memenga; a Harono, rite tonu ki te koraha; ko nga rau o Pahana, o Karamere, ruirui rawa. <sup>10</sup> Katahi ahau ka whakatika, e ai ta Ihowa; katahi ahau ka whakarewa ake i ahau, katahi ahau ka neke ake. <sup>11</sup> Ko to koutou hapu he papapa, whanau ake he kakau witi; ko to koutou manawa, ka rite ki te ahi, ka kai i a koutou. <sup>12</sup> Ka rite hoki nga iwi ki nga tahunga kotakota; ki te tataramoa kua tapahia, e tahuna ana ki te ahi.

<sup>13</sup>  
 Whakarongo, e koutou o tawhiti, ki taku i mea ai; e te hunga e tata ana, kia mohio mai ki toku kaha. <sup>14</sup> Pawera noa iho nga tangata hara i Hiona, mau pu te hunga atuakore i te tuiiri. Ko wai o tatou e noho ki te ahi e kai ana? ko wai o tatou e noho ki nga tahunga e kore nei e mutu? <sup>15</sup> Ko te tangata e haere ana i runga i te tika, he tika ano ana korero; ko te tangata e whakahawea ana ki nga taonga o te tukino, e rukerukea ana e tona ringa te utu whakapati; e punia ana ona taringa kei rangona he korero toto, e whakamoe ana i on a kanohi kei kite i te kino; <sup>16</sup> Ko te nohoanga mo tera kei runga rawa; ko tona wahi arai riri ko nga kaha o nga kamaka: ka homai he taro mana, ka pumau te wai mona. <sup>17</sup> Ka kite ou kanohi i te kingi, i tona ataahua: ka matakitaki ano ki te whenua e hora mai ana i tawhiti. <sup>18</sup> Ka whakaaroaroa te wehi e tou ngakau: kei hea te kaitatau, kei hea te kaipauna takoha? kei hea te kaitatau o nga pourewa? <sup>19</sup> E kore koe e kite i te iwi nanakia, he hohonu

nei to ratou reo, kahore e rangona e koe; he rereke te reo, e kore e matauria e koe. <sup>20</sup> Titiro ki Hiona, ki te pa o a tatou hakari: ka kitea e ou kanohi a Hiruharama, he nohoanga humarie, he teneti, e kore e nekehia; e kore tetahi o ona titi e unuhia a ake ake, e kore ano tetahi o ona taura e motu.

<sup>21</sup> Engari ki reira a Ihowa ki a tatou me tona nui, hei wahi mo nga awa whanui mo nga wai nunui;

kahore hoki he waka e hoehoea ki reira, kahore he kaipuke nui e tika na reira. <sup>22</sup> No te mea ko Ihowa to tatou kaiwhakawa, ko Ihowa to tatou kaiwhakatakoto tikanga, ko Ihowa to tatou kingi;

mana tatou e whakaora. <sup>23</sup> Kua tangoro kau ou puwhenua, te taea te turanga o to ratou rewa te whakau, te taea te ra te whewhera: na nui atu te taonga parakete e wehewehea ana, pahuatia ana

nga taonga parau e nga kopa. <sup>24</sup> Kahore hoki he kianga ake a te tangata whenua, He mate toku; ko te iwi e noho ana i reira, ka murua to ratou he.

## Chapter 34

<sup>1</sup> Whakatata mai, e nga iwi, kia rongoi ai, kia whai taringa mai, e nga iwi: kia rongoi te whenua,

me nga mea e hua ana i runga, te ao, me nga mea katoa e puta ana i roto i a ia. <sup>2</sup> Kei runga hoki i nga iwi katoa te riri o Ihowa, tona weriweri kei runga i o ratou ope katoa: ngaro rawa i a ia, tukua

ana kia patua. <sup>3</sup> Ka akiritia atu ano o ratou tupapaku i patua, ka puta ake hoki te piro o o ratou

tinana, a ka rewa nga maunga i o ratou toto. <sup>4</sup> Na ka memeha nga ope katoa o te rangi, ko nga rangi, koia ano kei te pukapuka i pokaia; ko o ratou ope katoa ka whakangaro haere, koia ano kei te rau

waina ka marere nei, kei te rau piki e marere ana i runga i te rakau piki. <sup>5</sup> Kua inu hoki taku hoari, makona ana, i te rangi: nana, ka tae iho ki a Eroma, ki te iwi i kanga e ahau, ki te whakarite whakawa.

<sup>6</sup> Ki tonu te hoari a Ihowa i te toto; kua momona i te ngako, i te toto o nga reme, o nga koati, i te ngako o nga whatukuhu o nga hipi toa; he patunga tapu hoki ta Ihowa i Potorā, he parekura nui i

te whenua o Eroma. <sup>7</sup> A ka haere tahi mai i roto i a ratou nga kau maka, nga kau okiha ratou ko

nga puru; a ka haurangi to ratou whenua i te toto, ka momona to ratou puehu i te ngako. <sup>8</sup> Ko te ra hoki ia o ta Ihowa rapu utu, ko te tau whakautu mo ta Hiona totohe.

<sup>9</sup> A ka puta ke ona awa hei kapia, ko tona puehu hei whanariki; na, ko tona whenua, he kapia

e ka ana! <sup>10</sup> E kore e tineia i te po, i te ao; ka kake tona paowa ake ake: i tera whakatupuranga, i tera whakatupuranga ka takoto he ururua kau; e kore tetahi tangata e tika na reira a ake tonu atu.

<sup>11</sup> Ka riro ano a reira hei kainga mo te kawau, mo te matuku; ka noho ano te ruru raua ko te raweni

ki reira, ka whakamarokia ano hoki e ia te taura o te pororaru ki runga, me te kohatu whakatika o  
 te kore noa iho. <sup>12</sup> Ka karangatia ona rangatira kia whakakingitia, kahore tetahi e tae mai; a ka  
 kore noa iho ona rangatira katoa. <sup>13</sup> A ka tupu te tataramoa ki ona whare kingi, he ongaonga, he  
 tumatakuru ki ona pa kaha, a ka waiho hei nohoanga mo te kirehe mohoa, hei marae mo te oteriti.  
<sup>14</sup> Ko nga kuri mohoa o te koraha ka tutaki ki nga wuruhi, ka karanga te mea ahua koati ki tona  
 hoa; ka takoto ano te ngarara haere po ki reira, ka kitea he okiokinga mona ki reira. <sup>15</sup> Ka hanga  
 ano e te ruru nui tona kohanga ki reira, whanau iho, pao iho nga hua, whakamine ano ki raro i tona  
 taumarumarunga iho: ka huihui ano ki reira nga whatura, ratou ko tana tane, ko tana tane. <sup>16</sup> Rapua  
 i roto i ta Ihowa pukapuka, korerotia hoki; e kore tetahi o enei e ngaro, e kore tetahi o enei e hapa  
 i te tane mana; na toku mangai nei hoki te whakahau, ko tona wairua ano to ratou kaiwhakamine.  
<sup>17</sup> Nana hoki i maka te rota mo ta ratou, na tona ringa ano i wehewehe taua wahi mo ratou, mea  
 rawa ki te aho: hei kainga a reira mo ratou a ake ake, ka nohoia a reira e ratou i tena whakatupuranga,  
 i tena whakatupuranga.

### Chapter 35

<sup>1</sup> Ka koa te koraha me te wahi mokemoke, ka hari te koraha, koia ano kei te rohi te whai puawai.  
<sup>2</sup> Nui atu te tupu, ka koa, ae ra, koa ana, waiata ana: ka hoatu te kororia o Repanona ki reira, te nui  
 o Karamere, o Harono: ka kite ratou i te kororia o Ihowa, i te nui o to tatou Atua. <sup>3</sup> Whakakahangia  
 nga ringa ngoikore, whakaungia nga turi ngonge. <sup>4</sup> Mea atu ki te hunga ngakau potatutatu, Kia  
 kaha, kaua e wehi: nana, ka haere mai to koutou Atua, me te rapu utu, me te whakautu a te Atua;  
 ka haere mai ano ia ki te whakaora i a koutou.  
<sup>5</sup> Ko reira nga kanohi o nga matapo kite ai, a ka puare nga taringa o nga turi. <sup>6</sup> Ko reira te kopa  
 tupeke ai, ano he hata, ka waiata te arero o te whango; no te mea ka pakaru mai nga wai i te koraha,  
 nga awa i te wahi titohea. <sup>7</sup> Na ka meinga te kirikiri mumura hei harotoroto, te whenua maroke hei  
 puputanga wai: a i te nohoanga i takoto ai nga kirehe mohoa, ko te tarutaru, ko te kakaho, ko te  
 wiwi. <sup>8</sup> Ka whai huanui ano a reira, me tetahi ara, ka kiia hoki, Ko te ara o te tapu; e kore te poke  
 e haere i reira; engari ka waiho mo ratou; a ko te tangata haere ara, ahakoa he wairangi, e kore e  
 he ki reira. <sup>9</sup> Kahore o reira raiona, e kore ano tetahi kararehe kai kino e tika na reira, e kore e kitea  
 ki reira; engari ka haereerea e te hunga i hokona. <sup>10</sup> Na, ko a Ihowa i hoko ai ka hoki mai, ka haere

mai i runga i te waiata ki Hiona; i runga i o ratou mahunga ko te haringa e kore e mutu: ka whiwhi ratou ki te koa, ki te hari, a rere atu ana te pouri me te aue.

### Chapter 36

<sup>1</sup> Na no te tekau ma wha o nga tau o Kingi Hetekia ka whakaekea mai nga pa taiepa katoa o Hura e Henakeripi kingi o Ahiria, a riro ana i a ia. <sup>2</sup> Na ka tonoa mai e te kingi o Ahiria a Rapahake i Rakihi ki a Kingi Hetekia, ki Hiruharama; he nui te ope. Na tu ana ia ki te awakeri o to runga puna wai, ki te ara i te mara o te kaihoroi kakahu. <sup>3</sup> Na ka puta atu ki a ia a Eriakimi, tama a Hirikia, rangatira o te whare, ratou ko Hepena, kaituhituhi, ko Ioaha, tama a Ahapa, kaiwhakamahara. <sup>4</sup> Na ka mea a Rapahake ki a ratou, Tena, mea atu ki a Hetekia, ko te kupu tenei a te kingi nui, a te kingi o Ahiria, He aha tenei whakawhirinaki e whakawhirinaki na koe? <sup>5</sup> Ki taku, ko tau ngarahu, me tou kaha mo te whawhai he kupu noa iho. Ko wai tou whakawhirinakitanga, i whakakeke ai koe ki ahau? <sup>6</sup> Na e whakawhirinaki na koe ki tena kakaho whati hei tokotoko, ki Ihipa; ki te whakahinga atu te tangata ki reira, ka ngoto ki tona ringa, na kua tu. Ka pera ano a Parao kingi o Ihipa ki te hunga katoa e okioki ana ki a ia. <sup>7</sup> Na ki te mea koe ki ahau, ko Ihowa, ko to matou Atua ta matou e whakawhirinaki nei: he teka ianei nana nga wahi tiketike, me nga aata e whakakahoretia na e Hetekia, i mea na ki a Hura raua ko Hiruharama, Hei mua i tenei aata koutou koropiko ai? <sup>8</sup> Na, tena ra, homai aiane he utu pupuri ki toku ariki, ki te kingi o Ahiria, a ka hoatu e ahau etahi hoiho ki a koe, kia rua mano, ki te taea e koe te whakanoho he kaieke ki runga ki a ratou. <sup>9</sup> A me pehea e hoki ai i a koe te kanohi o tetahi rangatira o nga mea ririki rawa o nga pononga a toku ariki; i a koe ka whakawhirinaki ki Ihipa ki te hariata, ki te kaieke hoiho mau? <sup>10</sup> I ngaro ranei a Ihowa i toku haerenga mai ki te huna i tenei whenua? I mea mai a Ihowa ki ahau, Haere ki tera whenua huna ai.

<sup>11</sup> Na ka mea a Eriakimi ratou ko Hepena, ko Ioaha, ki a Rapahake, Tena, korero Hiriani mai ki au pononga; e mohiotia ana hoki tena reo e matou, kua hoki e korero reo Hurai mai ki a matou, i te mea e whakarongo ana te iwi nei i runga i te taiepa. <sup>12</sup> Ano ra ko Rapahake, I tonoa mai ranei ahau e toku ariki ki tou ariki, ki a koe ranei, hei korero i enei kupu? he teka ianei ki nga tangata e noho ana i runga i te taiepa, kia kainga e ratou to ratou paru, kia inumia ano to ratou mimi, ara e koutou tahi? <sup>13</sup> Na tu ana a Rapahake, a nui atu tona reo ki te karanga i te reo o nga Hurai; ka mea, Whakarongo ki nga kupu a te kingi nui, a te kingi o Ahiria. <sup>14</sup> Ko te kupu tenei a te kingi, Kei

<sup>15</sup>  
 tinihangatia koutou e Hetekia; e kore hoki koutou e taea e ia te whakaora. Kei meinga koutou e Hetekia kia whakawhirinaki ki a Ihowa, i a ia e ki na, Tera tatou ka whakaorangia e Ihowa; e kore tenei pa e tukua ki te ringa o te kingi o Ahiria. <sup>16</sup> Kua e rongu ki a Hetekia; ko te kupu hoki tenei a te kingi o Ahiria, Houhia tau rongu ki ahau, haere mai hoki ki waho, ki ahau; ka kai ai koutou i nga hua o tana waina, o tana waina, o tana piki, o tana piki, ka inu ano i te wai o tana puna, o tana puna: <sup>17</sup> Kia tae atu ra ano ahau ki te tiki atu i a koutou ki te whenua e penei ana me to koutou nei whenua, ki te whenua witi, waina, ki te whenua taro, mara waina. <sup>18</sup> Kei whakapatia koutou e Hetekia, ki te mea ia, Ma Ihowa tatou e whakaora. I whakaorangia ranei e tetahi o nga atua o nga tauwiwi tona whenua i te ringa o te kingi o Ahiria? <sup>19</sup> Kei hea nga atua o Hamata, o Arapara? kei hea nga atua o Heparawaima? i whakaorangia ranei e ratou a Hamaria i toku ringa? <sup>20</sup> Na wai o nga atua katoa o enei whenua i whakaora to ratou whenua i toku ringa, e whakaorangia ai e Ihowa a Hiruharama i toku ringa? <sup>21</sup> Heoi whakarongo kau ana ratou, kihai i utua tana; ko ta te kingi hoki tena i ako ai; i ki ia, Kua e utua tana. <sup>22</sup> Na haere ana e Eriakimi, tama a Hirikia, rangatira o te whare ratou ko Hepena kaituhituhi, ko Ioaha, tama a Ahapa, kaiwhakamahara, ki a Hetekia, he mea haehae o ratou kakahu, a korerotia ana e ratou ki a ia nga kupu a Rapahake.

### Chapter 37

<sup>1</sup>  
 Na ka rongu a Kingi Hetekia, haea ana e ia ona kakahu, kei te hipoki i a ia ki te kakahu taratara, a haere ana ki te whare o Ihowa. <sup>2</sup> I tonoa ano e ia a Eriakimi rangatira o te whare, a Hepena kaituhituhi, me nga kaumatua o nga tohunga, he mea hipoki ki te kakahu taratara, ki a Ihaia poropiti, tama a Amoho; <sup>3</sup> Hei mea ki a ia, Ko te kupu tenei a Hetekia, Ko tenei ra, he ra no te he, no te whakatuma, no te whakama; kua taea hoki te whanautanga tamariki, heoi kahore he kaha e whanau ai. <sup>4</sup> Tera pea a Ihowa, tou Atua, ka rongu ki nga kupu a Rapahake i tonoa mai nei e tona ariki, e te kingi o Ahiria, hei whakorekore ki te Atua ora; a ka riri ki nga kupu i rongu ai a Ihowa, tou Atua. <sup>5</sup> Na kia ara tau inoi mo nga toenga e noho nei. Na ko te haerenga atu o nga tangata a Kingi Hetekia ki a Ihaia, <sup>6</sup> Ka mea a Ihaia ki a ratou, Ki atu ki to koutou ariki, Ko te kupu tenei a Ihowa, Kua e wehi i nga kupu i rongu ra koe, ki era i kohukohu mai ra nga tangata a te kingi o Ahiria ki ahau. <sup>7</sup> Na ka tonoa e ahau he wairua ki a ia, a ka rongu ia i tetahi rongu, ka hoki ki tona whenua; ka meinga ano hoki ia e ahau kia hinga i te hoari i tona whenua.



8 Na hoki ana a Rapahake, a rokohanga atu e ia e whawhai ana te kingi o Ahiria ki Ripina: i  
 rongo hoki ia kua hapainga mai e ia i Rakihi. 9 A ka rongo ia ki a Tirihaka kingi o Etiopia, ki te  
 korero, Kei te haere mai ki te whawhai ki a koe; na ka rongo ia, ka tono tangata ano ki a Hetekia,  
 10 ka mea. Ki atu ki a Hetekia kingi o Hura, mea atu, Kei tinihangatia koe e tou Atua, e tau e okioki  
 na koe, i a ia e ki na, E kore a Hiruharama e hoatu ki te ringa o te kingi o Ahiria. 11 Nana, kua  
 rongo na koa ki ta nga kingi o Ahiria i mea ai ki nga whenua katoa, ki ta ratou hunanga rawatanga  
 i a ratou: a e ora ranei koe? 12 I whakaora ranei nga atua o nga tauwiwi i nga wahi i huna e oku  
 matua; i Kotana, i Harana, i Retepe, i nga tama a Erene, i era i Terahara? 13 Kei hea te kingi o  
 Hamata, te kingi o Arapara, te kingi o te pa o Heparawaima, o Hena, o Iwa? 14 Na ka tangohia mai  
 e Hetekia te pukapuka i te ringa o nga karere, korerotia ana e ia. Na haere ana a Hetekia ki runga,  
 ki te whare o Ihowa, wherahia ana e ia ki te aroaro o Ihowa. 15 Na ka inoi a Hetekia ki a Ihowa,  
 ka mea, 16 E Ihowa o nga mano, e te Atua o Iharaira, e noho na i runga o nga kerupima, ko koe te  
 Atua, ko koe anake, o nga kingitanga katoa o te whenua; nau i hanga te rangi me te whenua.  
 17 Tahuri mai tou taringa, e Ihowa, whakarongo mai; titiro mai ou kanohi e Ihowa, kia kite koe;  
 kia rongo ki nga kupu katoa a Henakeripi, ki tana i tuku mai ai hei whakorekore mo te Atua ora.  
 18 He tika ano, e Ihowa, kua kore i nga kingi o Ahiria nga iwi katoa, me to ratou whenua. 19 Kua  
 maka ano e ratou o ratou atua ki te ahi; no te mea ehara ratou i te atua; engari he mahi na te ringa  
 tangata, he rakau, he kohatu; koia i huna ai e ratou. 20 Tena ra, whakaorangia matou aiane, e  
 Ihowa, e to matou Atua, i tona ringa, kia mohio ai nga kingitanga katoa o te whenua ko koe a Ihowa,  
 ko koe anake.  
 21 Katahi a Ihaia tama a Amoho ka tono tangata ki a Hetekia, hei mea, Ko te kupu tenei a  
 Ihowa, a te Atua o Iharaira, I te mea i inoi koe ki ahau mo Henakeripi kingi o Ahiria; 22 Na ko ta  
 Ihowa kupu tenei i korero ai mona, Kua whakahawea te wahine, te tamahine a Hiona ki a koe:  
 23 kataina iho koe e ia; ruru ana te mahunga o te tamahine a Hiurharama ki a koe. Ko wai tau i  
 whakorekore na, i kohukohu na? ki a wai tou reo i whakarahia na, tou kanohi i kake na ki runga?  
 24 ki te Mea Tapu o Iharaira. Meatia ana e koe au karere hei whakorekore mo te Ariki; kua mea  
 na koe, Kua kake ahau, me aku tini hariata, ki runga ki nga wahi tiketike o nga maunga, ki roto  
 rawa o Repanona; ka tuaina ano e ahau nga hita roroa o reira, me o reira kauri papai: ka tae ano  
 ahau ki te wahi tiketike o tona wahi whakamutungai mai, ki te ngahere o tona mara whai hua.  
 25 Keria ana e ahau, inu wai ana ahau, maroke ake i te kapu o toku waewae nga awa katoa o Ihipa.

26

Kahore ranei koe i rongu i mua noa atu, naku tena i mea? i nga ra onamata naku tena i hanga? Katahi nei ka whakaputaina e ahau, a ka waiho na koe hei mea i nga pa taiepa hei puranga

rukerukenga. <sup>27</sup> Koia i iti ai te kaha o o reira tangata; wehi ana ratou, porahurahu kau ana; rite tonu ki te tarutaru o te parae, ki te otaota matomato, ki te taru i runga i nga tuanui, ki te witi i ngingio i

te mea kiano i tupu noa. <sup>28</sup> Otira e matau ana ahau ki tou nohoanga iho, ki tou haerenga atu, ki tou

haerenga mai, me tou nananga ki ahau. <sup>29</sup> Na, mo tau nananga ki ahau, mo te mea kua tae ake nei tau whakamanamana ki oku taringa, mo reira ka kuhua e ahau taku matau ki tou ihu, taku paraire

ki ou ngutu; a ka whakahokia koe na te ara i haere mai na koe. <sup>30</sup> A ko te tohu tenei ki a koe, I tenei tau ka kai koutou i nga mea tupu noa ake, a i te rua o nga tau ko nga tupu noa ake o te tau; na hei te toru o nga tau koutou whakato ai, kokoti ai, whakato ai i nga mara waina, kai ai i nga hua o

aau mara. <sup>31</sup> Na, tera e hou ano whakararo nga pakiaka o nga oranga i mawhiti o te whare o Hura,

ka hua ano nga hua whakarunga. <sup>32</sup> E puta ake hoki he toenga i Hiruharama, he oranga i Maunga

Hiona. E taea tenei e te ngakau nui o Ihowa o nga mano. <sup>33</sup> Na ko ta Ihowa kupu tenei mo te kingi o Ahiria, E kore ia e haere mai ki tenei pa, e kore ano e perea he pere e ia ki konei, e kore ano e maua e ia he whakangungu rakau ki mua i tenei pa, e opehia ranei he puke hei whawhaitanga ki

konei. <sup>34</sup> Ko te ara i haere mai ai ia, ka hoki ia ma reira; e kore ano ia e tae ki tenei pa, e ai ta Ihowa.

<sup>35</sup> Ka tiakina hoki e ahau tenei pa, ka whakaorangia; he whakaaro ki ahau, ki taku pononga ano, ki

a Rawiri. <sup>36</sup> Na ka puta atu te anahera a Ihowa, a patua iho e ia i te puni o nga Ahiriana kotahi rau e waru tekau ma rima mano: a te marangatanga ake i te ata, nana, o ratou tinana! he tupapaku katoa

ratou. <sup>37</sup> Na turia atu ana e Henakeripi kingi o Ahiria, haere ana, hoki ana, noho rawa atu kei

Ninewe. <sup>38</sup> A i a ia e koropiko ana i te whare o tona atua, o Nitiroko, patua iho ia e ana tama, e Ataramereke raua ko Heretere, ki te hoari; mawhiti tonu atu raua ki te whenua o Ararata, a ko tana tama ko Etara Harono, te kingi i muri i a ia.

## Chapter 38

<sup>1</sup> I aua ra ka turoro a Hetekia, me kahore ka marere. Na ka haere a Ihaia poropiti, tama a Amoho ki a ia, ka mea ki a ia, Ko te kupu tenei a Ihowa, Whakahaua iho tou whare, no te mea ka mate koe,

e kore e ora. <sup>2</sup> Na ka tahuri te mata o Hetekia ki te pakitara, a ka inoi ki a Ihowa, <sup>3</sup> Ka mea, Tena ra, e Ihowa kia mahara ki oku haereerenga i tou aroaro i runga i te pono, i te ngakau tapatahi, ki

taku meatanga i te pai ki tau titiro. Na tangi ana a Hetekia; nui atu te tangi. <sup>4</sup> Na ka puta te kupu a Ihowa ki a Ihaia, ka mea, <sup>5</sup> Haere, mea atu ki a Hetekia, Ko te kupu tenei a Ihowa, a te Atua o Rawiri, o tou tupuna, Kua rangona tau inoi e ahau, kua kitea e ahau ou roimata: nana, ka tapiritia e ahau ou ra ki nga tau kotahi tekau ma rima. <sup>6</sup> Ka whakaorangia koe me tenei pa e ahau i te ringa o te kingi o Ahiria; ka tiakina ano e ahau tenei pa; <sup>7</sup> Ko te tohu ano tenei a Ihowa ki a koe, ka oti i a Ihowa tenei mea i korerotia nei e ia. <sup>8</sup> Nana, ka whakahokia ake e ahau te atarangi i nga nekehanga i heke atu ai i runga i te whakaatu haora a Ahata; kia tekau nga nekehanga whakamuri. Na kotahi tekau nga nekehanga i hoki ake ai te ra, no nga nekehanga ano i heke iho ai.

<sup>9</sup> Ko te tuhituhi a Hetekia kingi o Hura, i a ia i mate ra, a ora ake ana i tona mate. <sup>10</sup> I mea ahau, I te poutumarotanga o oku ra, tera ahau e tomo ki nga kuwaha o te reinga: kua tangohia atu i ahau te toenga o oku tau. <sup>11</sup> I ki ahau, e kore ahau e kite i a Ihowa, ara i a Ihowa i runga i te whenua o te hunga ora; heoi ano aku tirohanga ki te tangata, ki te hunga e noho ana i te ao. <sup>12</sup> Ko te wa i ahau nei kua riro, mauria atu ana i ahau, ano he teneti no te hepara; kei ta te kaiwhatu kakahu taku kopaki i toku ora; ka tapahia mai ahau e ia i roto i nga miro: i te ao, i te po, mutu pu taku i a koe. <sup>13</sup> I whakamarie ahau i ahau a taea noatia te ata; tera tana e rite ki ta te raiona, ka wawahia e ia oku iwi katoa; i te ao, i te po, mutu pu taku i a koe. <sup>14</sup> I koroki ahau, pera i ta te warou, i ta te kareni; i tangi ahau me te kukupa; matawaia ana oku kanohi i te tirohanga whakarunga. E Ihowa, e tukinotia ana ahau, pikitia toku turanga. <sup>15</sup> Kia pehea he kupu maku? Nana i korero ki ahau, nana ano i mahi; i oku tau katoa ka ata haere ahau i runga i te kawa o toku wairua. <sup>16</sup> E te Ariki, kei enei mea te ora o te tangata, kei enei mea katoa ano te ora o toku wairua: mo reira whakahokia ake ahau e koe ki te ora, kia ora ai ahau. <sup>17</sup> Nana, he mea kia rangimarie ai ahau i pa ai te pouri kino ki ahau: otiia he aroha nou ki toku wairua i ora ai ahau i roto i te rua o te ngaromanga: kua oti nei hoki oku hara katoa te maka e koe ki muri i tou tuara. <sup>18</sup> E kore hoki e taea e te reinga te whakawhetai ki a koe, e kore te mate e ahei te whakamoemiti ki a koe; ko te hunga e heke ana ki te rua kahore o ratou tumanako ki tou pono. <sup>19</sup> Ko te tangata ora, ko te tangata ora, mana te whakawhetai ki a koe, te penei me taku nei i tenei ra: tera tou pono ka whakakitea e te matua ki nga tamariki. <sup>20</sup> I tata mai a Ihowa ki te whakaora i ahau, mo reira ka waiatatia e matou aku waiata i runga i nga aho whakatangi i nga ra katoa e ora ai matou i roto i te whare o Ihowa. <sup>21</sup> I ki hoki a Ihaia, Tikina he papa piki, whakapiritia ki te whewhe, a ka ora ia. <sup>22</sup> I ki ano a Hetekia, He aha te tohu tera ahau ka haere ki runga ki te whare o Ihowa?

## Chapter 39

<sup>1</sup> I taua wa ka tukua mai he pukapuka me tetahi hakari ki a Hetekia e Meroraka Pararana, tama a Pararana kingi o Papurona; i rongohoki i te mate ia a kua ora. <sup>2</sup> A koa tonu a Hetekia ki a ratou, whakakitea ana e ia ki a ratou te whare o ana mea papai, te hiriwa, te koura, nga kinaki kakara, te hinu pai, me te whare katoa o ana mea mo te whawhai, me nga mea katoa i rokohanga ki roto ki ona taonga; kahore tetahi mea o tona whare, o tona kingitanga katoa, i kore te whakakitea e Hetekia ki a ratou. <sup>3</sup> Katahi a Ihaia poropiti ka haere ki a Kingi Hetekia, ka mea ki a ia, I pehea mai enei tangata? i haere mai hoki ratou i hea ki a koe? Ano ra ko Hetekia, I haere mai ratou ki ahau, i te whenua hoi, i Papurona. <sup>4</sup> Ano ra ko tera, Ko ehea mea i kitea e ratou i roto i tou whare? Ka mea a Hetekia, Kua kitea e ratou nga mea katoa i toku whare. Kahore tetahi mea i roto i oku taonga i kore te whakakitea e ahau ki a ratou.

<sup>5</sup> Na ka mea a Ihaia ki a Hetekia, Whakarongo ki te kupu a Ihowa o nga mano. <sup>6</sup> Nana, kei te haere mai nga ra e kawea ai ki Papurona nga mea katoa o tou whare, me nga mea kua rongoaia nei e ou matua a taea noatia tenei ra; e kore tetahi mea e mahue, e ai ta Ihowa. <sup>7</sup> Ka tangohia ano e ratou tetahi o au tama e puta mai i a koe, e whanau nei mau; a hei unaka ratou ki te whare o te kingi o Papurona. <sup>8</sup> Ano ra ko Hetekia ki a Ihaia, Pai tonu te kupu a Ihowa i korerotia na e koe. I mea hoki ia, Ka mau hoki te rongohoki me te pono i oku ra.

## Chapter 40

<sup>1</sup> Whakamarietia, whakamarietia taku iwi, e ai ta to koutou Atua. <sup>2</sup> Korero i runga i te whakamarie ki Hiruharama, karanga ki a ia, kua mutu tana whawhai, kua murua tona he: i haere rua hoki ta te ringa o Ihowa ki a ia hei utu mo ona hara katoa.

<sup>3</sup> He reo no tetahi e karanga ana, Whakapaia e koutou i te koraha te huarahi o Ihowa, whakatikaia i te titiohea he ara nui mo to tatou Atua. <sup>4</sup> Ko nga raorao katoa ka whakarewaina ake, ko nga maunga katoa me nga pukepuke, ka whakapapakutia iho: ko nga wahi kopikopiko ka meinga kia tika, ko nga wahi taratara kia papatairite. <sup>5</sup> Ka whakapuakina ano te kororia o Ihowa, a ka kite ngatahi nga kikokiko katoa: he mea korero hoki tenei na te mangai o Ihowa. <sup>6</sup> I mea mai te reo o tetahi, Karanga. A ka mea tetahi, Ko te aha kia karangatia e ahau? He tarutaru nga kikokiko katoa, a ko tona pai katoa, rite tonu ki te puawai o te parae. <sup>7</sup> Ko te tarutaru ka maroke, ko te puawai ka memenga, no

8  
te mea e hangia ana e te wairua o Ihowa: he pono, he tarutaru te iwi. Ko te tarutaru e maroke, ko te puawai e memenge; ko te kupu ia a to tatou Atua, tu tonu.

9  
E koe, e te kaikawe o te rongo pai ki Hiona, e piki ki te maunga tiketike; e koe, e te kaikawe o te rongo pai ki Hiruharama, whakaarahia tou reo, kia kaha; whakaarahia, kua hei wehi; korero

10  
atu ki nga pa o Hura, Nana, to koutou Atua! Nana, ka haere mai te Ariki, a Ihowa, i runga i te kaha, ka whakahaerea ano tona kingitanga e tona ringa: na, ko te utu mona kei a ia ano, kei tona

11  
aroaro te wahi mana. Ka rite ki ta te hepara tana whangai i tana kahui, ka whakaminea nga reme e tona ringa, ka hikitia ki tona uma, ka ata arahina nga mea e whakangote ana.

12  
Na wai i mehua nga wai ki te kapu o tona ringa, he whanganga ringaringa ano tana ruri mo nga rangi, whaowhina ake e ia te puehu o te whenua ki te mehua, ko nga maunga, paunatia ana e

13  
ia, ki te pauna ringaringa, ko nga pukepuke ki te pauna papa? Na wai ta te wairua o Ihowa i tika

14  
ai? ko wai ranei tana kaiwhakatakoto whakaaro hei whakaako i a ia? Ko wai tona hoa whakatakoto whakaaro hei tohutohu i a ia ki te ara o te whakawa, hei whakaako i a ia ki te matauranga, hei

15  
whakakite i te ara o te mohio ki a ia? Nana, ko nga iwi, ano he pata wai i roto i te peere! ki ta te whakaaro he puehu ririki ratou i te pauna; nana, ko nga motu, maua ake e ia, he mea ririki rawa

16  
te rite. E kore ano e ranea a Repanona mo te ahi, me nga kararehe hoki o reira, e kore e ranea

17  
hei tahunga tinana. Ko nga iwi katoa, he kore noa iho i tona aroaro; iti iho ratou i te kahore, he horihori kau i tona whakaaro.

18  
Na ka whakaritea e koutou te Atua ki a wai? he aha hoki te ahua e whakaahuatia ai ia e

19  
koutou? Ko te whakapakoko, na te kaimahi ia i whakarewa, na te kaitahu i whakakikorua ki te koura, a hanga ana mo reira he mekameka hiriwa.

20  
Ko te tangata, he rawakore rawa ia ki te hoatu whakahere pera, whiriwhiria ana e ia he rakau e kore e pirau; rapua ana e ia he kaimahi mohio

21  
mana, hei hanga i tetahi whakapakoko e kore e nekenekhia. Kahore ianei koutou i mohio? kahore koutou i rongo? kahore ianei i korerotia ki a koutou i te timatanga? kahore ianei koutou i

22  
matau i nga whakaturanga ra ano o te whenua? Ko ia te noho ana i runga i te porohita o te whenua, a ko o reira tangata, ano he mawhitiwhiti; ko nga rangi, horahia ana e ia ano he kakahu

23  
tauarai, horahia ana e ia ano he teneti hei nohoanga; Ko nga rangatira, whakahokia iho e ia ki te kahore; ko nga kaiwhakawa o te whenua, meinga ana e ia hei mea horihori noa iho.

24  
Ae ra, kahore ratou i whakatokia; ae ra, kahore ratou i ruia; ae ra, kahore to ratou take i whai pakiaka ki te whenua: ka pupuhi hoki ia ki a ratou, a ka maroke ratou; ka rite ki te kakau witi, ka kawhakina

<sup>25</sup>  
 e te paroro. Na ki ta koutou, kei to wai he ahua moku? ka rite ranei ahau ki a wai? e ai ta te Mea  
<sup>26</sup>  
 Tapu. E ara o koutou kanohi ki runga titiro ai, na wai enei mea i hanga, na wai o ratou mano i  
 whakaputa mai he mea tatau tonu: karangatia ana e ia nga ingoa o ratou katoa, maroro rawa, pakari  
 tonu te kaha; e kore tetahi e ngaro.  
<sup>27</sup>  
 He aha koe i korero ai, e Hakopa, i mea ai, e Iharaira, Kua huna toku ara ki a Ihowa, kua  
<sup>28</sup>  
 mahue i toku Atua toku whakawa? Kahore koe i mohio? kahore koe i rongu, ko te Atua onamata,  
 ko Ihowa, ko te Kaihanga o nga pito o te whenua, e kore ia e ngenge, e kore ia e mauuiui? e kore  
<sup>29</sup>  
 tona matauranga e taea te rapu. E homai ana e ia he kaha ki te hunga ngenge: a whakanuia ana  
<sup>30</sup>  
 e ia te pakari o te mea ngoikore. Ahakoa ko nga taitamariki, ka ngenge tonu, ka mauuiui, a ko  
<sup>31</sup>  
 nga taitama, ka hinga rawa. Tena ko te hunga e tatari ana ki a Ihowa, puta hou ana he kaha mo  
 ratou; kake ana ratou ki runga; ko nga parirau, koia ano kei o nga ekara; ka rere ratou, a e kore e  
 mauuiui; ka haere, a e kore e ngenge.

## Chapter 41

<sup>1</sup>  
 Whakarongoa i toku aroaro, e nga motu; a kia puta hou mai he kaha mo nga iwi: me neke  
 mai ratou; a me korero ratou: tatou tahi me whakatata ki te whakawa. <sup>2</sup> Na wai i whakaara ake  
 tetahi i te rawhiti, i karangatia e ia i runga i te tika ki tona waewae? homai ana e ia nga iwi ki tona  
 aroaro, meinga ana ia e ia hei rangatira mo nga kingi; homai ana ratou e ia ano he puehu ki tana  
<sup>3</sup>  
 hoari, ano he kakau wit i e aia ana, ki tana kopere. Whaia ana ratou e ia, haere ora atu ana ia; ae  
<sup>4</sup>  
 ra, i te ara kihai i haerea e ona waewae. Na wai oti tenei i mahi, karangaranga ai i nga  
 whakatupuranga mai i te timatanga! Ko ahau, ko Ihowa, ko te timatanga, a kei nga whakamutunga,  
<sup>5</sup>  
 ko ahau nei. I kite nga motu, a wehi ana, piri noa iho nga pito o te whenua, whakatata ana, haere  
<sup>6</sup>  
 mai ana. Uru ana ratou ki te mahi a tona hoa, a tona hoa, me ta ratou ki ki tona tuakana, ki tona  
<sup>7</sup>  
 teina, Kia maia. Na kei te whakatenatena te kamura i te kaitahu koura, te kaiwhakamaeneene ki  
 te hama, i te tangata e patu ana ki te paepae, ko tana kupu mo te whakapiringa, kei te pai; na  
<sup>8</sup>  
 whakaukia ana e ia ki te whao, te taea te whakanekeneke. Ko koe, e Iharaira, ko taku pononga,  
<sup>9</sup>  
 ko Hakopa, ko taku i whiriwhiri ai, ko te uri o taku i aroha ai, o Aperahama; Ko taku ano i tango  
 mai ai i nga pito o te whenua; he mea karanga nei hoki koe naku i roto i ona topito; ko taku kupu  
 hoki ki a koe, Ko koe taku pononga; he mea whiriwhiri koe naku, kahore koe e maka atu e ahau.

10

Kaua e wehi; kei a koe nei hoki ahau; kaua ano e tiroiro; ko ahau nei hoki tou Atua: maku koe e whakakaha, ae ra, maku koe e awhina, ka tautokona ake ano koe e te ringa matau o toku tika.

11

Nana, ka whakama, ka numinumi kau te hunga katoa e riri ana ki a koe: ka rite ki te kahore; ka

12

ngaro te hunga e ngangare ana ki a koe. Ka rapua ratou, ou hoariri, e koe, a e kore e kitea; ko

13

te hunga i whawhai ki a koe, ka rite ki te kahore, ki te moti noa iho. No te mea ko ahau, ko Ihowa, ko tou Atua, kei te pupuri i tou matau, kei te mea ki a koe, Kaua e wehi; ko ahau hei whakauru

14

mou. Kaua e wehi, e te kutukutu, e Hakopa, e nga tangata o Iharaira; maku koe e awhina, e ai

15

ta Ihowa, ta tou kaihoko, ta te Mea Tapu o Iharaira. Nana, kua meinga koe e ahau hei patu witi, koi tonu, hou tonu, he whai niho: ka patua e koe nga maunga, a ngotangota noa; ko nga pukepuke,

16

ka meinga e koe kia rite ki te papapa. Rererere ana ratou i a koe, kahikina tonutia atu e te hau, titaritaria ake ratou e te paroro: ko koe ia ka hari ki a Ihowa, ka whakamanamana ki te Mea Tapu

17

o Iharaira. E rapu ana nga ware, nga rawakore i te wai, a kahore kau, he ake o ratou arero i te matewai: ka rongohau, a Ihowa, ki ta ratou; e kore ahau, te Atua o Iharaira, e whakarere i a ratou.

18

Ka whakapuaretia e ahau he awa ki nga wahi tiketike, he puna wai i waenganui i nga raorao; ka

19

meinga e ahau te koraha hei harotoroto wai, te whenua maroke hei puputanga wai. Ka whakatokia e ahau te koraha ki te hita, ki te kowhai, ki te ramarama, ki te rakau hinu; ka tu i ahau te kauri ki

20

te titohea, te rimu, ratou tahi ano ko te ake. Kia kite ai ratou, kia mohio ai, kia mahara ai, kia matau ngatahi ai, he mea mahi tenei na te ringa o Ihowa; na te Mea Tapu o Iharaira tenei i hanga.

21

Kawea mai ta koutou totohe, e ai ta Ihowa; whakaputaina mai a koutou kupu kaha, e ai ta

22

te Kingi o Hakopa. Me whakaputa mai e ratou, a me whakaatu mai ki a tatou nga mea meake pono mai: whakaaturia mai e koutou nga mea o te tuatahi, he pehea ranei, kia whakaaroarohia ai e tatou, kia mohiotia ai to ratou mutunga iho; korerotia ranei ki a tatou nga mea e puta a mua.

23

Whakaaturia nga mea e haere ake ana i muri, kia mohio ai matou he atua koutou: tena ra, mahia

24

he pai, he kino ranei, kia wehi ai matou, kia kite ngatahi ai. Nana, no te kahore koutou, ko a

25

koutou mahi no te kahore rawa; he mea whakarihariha te tangata nana koutou i whiriwhiri. Kua oho mai i ahau tetahi i te raki, a kua tae mai ia; no te rerenga mai o te ra tetahi e karanga ana ki toku ingoa: ko tona taenga mai ki nga rangatira, ano e eke ana ki te paru pokepoke, ano ko te

26

kaihanga rihi e takatakahi ana i te paru. Na wai i whakaatu mai i te timatanga, kia mohio ai tatou? na wai i nga wa onamata, mo ta tatou ki ake, He tika tana? ae ra, kihai i whakaaturia e tetahi,

27

ae ra, kihai i korerotia e tetahi, kihai ano tetahi i rongohau i a koutou korero. Maku te kupu tuatahi

ki Hiona, Nana, tenei ratou: a ka hoatu e ahau ki Hiruharama he kaikawe i te rongopai.<sup>28</sup> I titiro ano ahau, a kahore he tangata; na i roto i enei katoa kahore he kaiwhakatakoto whakaaro hei whakahoki kupu mai i taku uinga ki a ratou.<sup>29</sup> Nana, ko ratou katoa he horihori kau; he kore noa iho a ratou mahi: ko a ratou whakapakoko whakarewa he hau, he mea tikangakore.

## Chapter 42

<sup>1</sup> Nana, taku pononga e tautokona ake nei e ahau, taku i whiriwhiri ai, ahua eka tonu toku ngakau ki a ia: ka waiho e ahau toku wairua ki runga ki a ia; mana e whakapuaki te whakawa ki nga tauwi.<sup>2</sup> E kore ia e hamama, e kore ano tona reo e ara, e kore e rangona i te ara.<sup>3</sup> Ko te kakaho kope e kore e whatiia porokeretia e ia: e kore hoki te muka whakapaowa e tineia e ia: ka whakapuakina e ia te whakawa i runga i te pono.<sup>4</sup> E kore ia e ngoikore, e kore e ngakaukore, kia takoto ra ano i a ia te whakawa ki te whenua: ka tatari ano nga motu ki tana ture.

<sup>5</sup> Ko te kupu tenei a te Atua, a Ihowa, nana nei nga rangi i hanga, i hora; nana nei i takoto ai te whenua me nga mea ano e puta mai ana i reira; nana nei i homai he manawa ki o reira tangata, me te wairua ano ki te hunga e haereere ana i reira.<sup>6</sup> He mea karanga koe naku, na Ihowa, i runga i te tika, maku ano tou ringa e pupuri, maku koe e tiaki, ka hoatu ano koe e ahau hei kawenata ki te iwi, hei marama mo nga tauwi;<sup>7</sup> Hei whakatitiro i nga kanohi matapo, hei whakaputa mai i nga herehere i roto i te whare e tutaki tonu ana, i te hunga e noho ana i te pouri, i roto i te whare herehere.

<sup>8</sup> Ko Ihowa ahau: ko toku ingoa tena: e kore ano e tukua e ahau toku kororia ki tetahi atu, toku whakamoemiti ki te whakapakoko.<sup>9</sup> Nana, kua puta mai nga mea o mua, he mea hou enei e whakaaturia nei e ahau: i te mea kahore ano kia pihi noa ka korerotia nei e ahau ki a koutou.

<sup>10</sup> Waiatatia ki a Ihowa he waiata hou, me te whakamoemiti ki a ia i te pito o te whenua, e te hunga e haere ana ki raro, ki te moana, e o reira tini mea, e nga motu, e nga tangata e noho ana i reira.

<sup>11</sup> No reira kia nui te reo o te koraha, o nga pa ano o reira, o nga kainga, e nohoia ana e Kerara; kia waiata nga tangata o Here, kia hamama ratou i runga i te tihi o nga maunga.<sup>12</sup> Kia whakakororiatia a Ihowa e ratou, kia kauwhautia te whakamoemiti ki a ia i nga motu.

<sup>13</sup> Ka puta mai a Ihowa, ko te ahua kei to te tangata marohirohi; ka whakaoho i te hae ka pera i te tangata whawhai; ka karanga, ae ra, ka hamama; ka kaha noa atu i ona hoariri.<sup>14</sup> Ka roa nei taku whakamorokitanga, i whakarongo puku ahau, whakakoromaki tonu; katahi nei ahau ka aue,



ka pera me te wahine e whanau ana; ka whakahotu ahau, ka kahekahe ngatahi. <sup>15</sup> Ka whakaururuatia  
 e ahau nga maunga me nga pukepuke, ka maroke i ahau nga otaota katoa o reira; ka meinga nga  
 awa hei motu, ka maroke ano i ahau nga harotoroto. <sup>16</sup> Ka kawea ano e ahau nga matapo ma te ara  
 kihai nei ratou i mohio: ka meinga te pouri hei marama ki to ratou aroaro, me nga wahi kopikopiko  
 kia tika. Ka meatia enei mea e ahau ki a ratou, e kore ano ahau e whakarere i a ratou. <sup>17</sup> Ka hoki  
 ratou ki muri, nui atu to ratou whakama, to te hunga e whakawhirinaki ana ki nga whakapakoko,  
 e mea ana ki te mea whakarewa, Ko koutou o matou atua.  
<sup>18</sup> Whakarongo, e nga turi; titiro, e nga matapo, kia kite ai koutou. <sup>19</sup> Ko wai atu te matapo?  
 ko taku pononga nei anake; ko wai te turi hei rite mo taku pononga i unga nei e ahau? ko wai te  
 matapo hei rite mo te tangata e mau nei tana rongu ki ahau? ko wai te matapo hei rite mo ta Ihowa  
 pononga? <sup>20</sup> He maha nga mea e kitea ana e koe, heoi kahore e mahara: e puare ana ona taringa,  
 heoi kahore e rongu. <sup>21</sup> Pai tonu mai a Ihowa, he whakaaro ki tona tika; ka whakanuia e ia te ture,  
 ka whakahonoretia. <sup>22</sup> Ko tenei iwi ia he pahuatanga, he taonga parau; he mea mahanga ratou katoa  
 i roto i nga rua, ngaro tonu i roto i te whare herehere, hei pahuatanga ratou, kahore hoki he  
 kaiwhakaora; hei taonga parau; kahore hoki he tangata e ki ana, Whakahokia. <sup>23</sup> Ko wai i roto i a  
 koutou e whai taringa ki tenei? ko wai e mahara mai, e whakarongo mai, mo nga wa hoki o muri?  
<sup>24</sup> Na wai a Hakopa i tuku hei taonga parau? a Iharaira hoki hei meatanga ma nga kaipahua? he  
 teka ianei na Ihowa? kua hara nei hoki tatou ki a ia, kinai hoki ratou i pai kia haere i ana ara, kihai  
 i whakarongo ki tana ture. <sup>25</sup> Na reira ringihia ana e ia te aritarita o tona riri ki a ia, me te pakanga  
 kaha; wera ana ia i tetahi taha, i tetahi taha, te mohio ia; tahuna ana ia, heoi kihai tona ngakau i  
 mahara.

### Chapter 43

<sup>1</sup> Na inaianei ko te kupu tenei a Ihowa, a tou kaihanga, e Hakopa, a tou kaiwhakaahua, e Iharaira,  
 Kaua e wehi: kua oti nei hoki koe te hoko e ahau, kua karangatia e ahau tou ingoa; naku koe. <sup>2</sup> Ka  
 haere koe i roto i te wai, ko ahau hei hoa mou; i nga awa ano, e kore e huri mai ki runga i a koe; ki  
 te haere koe i roto i te ahi, e kore koe e wera, e kore ano te mura e ka ki a koe. <sup>3</sup> Ko Ihowa hoki  
 ahau, ko tou Atua, ko te Mea Tapu o Iharaira, ko tou kaiwhakaora: i hoatu e ahau a Ihipa hei utu  
 mou, a Etiopia raua ko Tepa hei wahi mou. <sup>4</sup> I te mea he taonga nui koe ki taku titiro, he mea e  
 whakahonoretia ana, a i arohaina koe e ahau; mo reira ka hoatu e ahau he tangata mo tou turanga,

5  
 he iwi hoki hei utu mou kia ora. Kaua e wehi: kei a koe nei hoki ahau: ka kawea mai e ahau ou  
 uri i te rawhiti, ka kohikohia mai koe i te uru. 6  
 Ka mea ahau ki te raki, Homai; ki te tonga, Kaua  
 e kaiponuhia: kawea mai aku tama i tawhiti, aku tamahine i te pito o te whenua; 7  
 Te hunga katoa  
 i huaina nei toku ingoa mo ratou: naku hoki ratou i hanga hei whakakororia moku: naku ia i  
 whakaahua, naku hoki ia i mahi.

8  
 Whakaputaina mai nga matapo he kanohi nei o ratou, nga turi he taringa nei o ratou. 9  
 Kia  
 huihui nga iwi katoa, kia rupeke tahi nga tauwiwi: ko wai i roto i a ratou hei whakaatu i tenei, hei  
 korero i nga mea o mua ki a tatou? kia homai e ratou o ratou kaiwhakaatu, kia whakatikaia atu ai

10  
 ta ratou: ma ratou ranei e whakarongo, e mea mai, He pono. Ko koutou hei whakaatu mo taku,  
 e ai ta Ihowa, me taku pononga i whiriwhiria e ahau, kia mohio ai koutou, kia whakapono ai ki  
 taku, kia matau ai ko ahau ia, kahore he Atua i whakaahuatia i mua i ahau, kahore hoki tetahi i muri

11  
 i ahau. Ko ahau, ko ahau nei ano, a Ihowa; kahore atu hoki he kaiwhakaora, ko ahau anake.

12  
 Naku i whakaatu, naku hoki i whakaora, naku ano i korero, i te mea kahore he atua ke i roto i a  
 koutou: na ko koutou hei kaiwhakaatu moku, e ai ta Ihowa, a ko te Atua ahau. 13  
 Ae ra, i te mea  
 kahore ano he ra ko ahau tenei; e kore hoki tetahi e whakaora ake i roto i toku ringa: maku e mahi,  
 ko wai hoki hei whakakahore?

14  
 Ko te kupu tenei a Ihowa, a to koutou kaihoko, a te Mea Tapu o Iharaira, He whakaaro ki a  
 koutou i unga tangata ai ahau ki Papurona, a ka mauria mai e ahau ratou katoa, he mawhiti mai,

15  
 ara nga Karari i runga i nga kaipuke i harakoa ai ratou. Ko Ihowa ahau, ko to koutou Mea Tapu,  
 ko te kaihanganga o Iharaira, ko to koutou Kingi. 16  
 Ko te kupu tenei a Ihowa nana nei i homai te ara

17  
 i te moana, te huarahi i roto i nga wai kaha; Nana nei i whakaputa mai te hariata, te hoiho, te  
 ope, me te kaha; takoto tahi ana ratou, te ara ki runga: kua keto ratou, kua tineia, ano he muka.

18  
 Kaua e mahara ki nga mea o mua; ko nga mea onamata kaua e whakaaroa. 19  
 Tenei ahau te mahi  
 nei i te mea hou; akuanei te tupu ai: e kore ranei e mohiotia e koutou? ka oti i ahau he ara i te koraha,

20  
 he awa i te titohea. Ka whakakororiatia ahau e nga kararehe o te parae, e nga kirehe mohoa, e  
 nga otereti; no te mea ka hoatu e ahau he wai i te koraha, he awa i te titohea, hei inu ma taku iwi,

21  
 ma taku i whiriwhiri ai; Ma te iwi i whakaahuatia e ahau maku, ma ratou e kauwhau te  
 whakamoemiti moku.

22  
 Na kihai nei koe i karanga ki ahau, e Hakopa; kua hoha koe ki ahau e Iharaira. 23  
 Kihai i  
 kawea mai e koe ki ahau au hipi hei tahunga tinana; kihai ano ahau i whakakororiatia ki au patunga  
 tapu. Kahore aku whakamahi i a koe ki te whakahere, kihai ano koe i ngenge, i te meatanga i te

24 whakakakara. Kihai i hokona e koe he kakaho reka maku ki te moni, kihai hoki ahau i makona i te ngako o au patunga tapu; engari i whakamahia ahau e koe ki ou hara, mauiui ana ahau i au mahi  
 25 he. Ko ahau, ko ahau nei ano, te kaimuru atu i ou he, he whakaaro ano ki ahau: e kore ano ou hara e maharatia e ahau.  
 26 Whakamaharatia ahau; tatou ka whakawa ki a tatou ano; korerotia e koe tau, kia whakatikaia ai koe.  
 27 Ko tou papa tuatahi, i hara; ko ou kaiwhakaako, whakakeke ana ki ahau.  
 28 Na reira whakapokea iho e ahau nga rangatira o te wahi tapu, a hoatu ana e ahau a Hakopa ki te kanga, a Iharaira ki te tawai.

### Chapter 44

1 Na whakarongo, e taku pononga, e Hakopa, e Iharaira, e taku i whiriwhiri ai. 2 Ko te kupu tenei a Ihowa, a tou kaihanga, nana nei koe i whakaahua i roto i te kopu, mana nei koe e awahina, Kaua e wehi, e Hakopa, e taku pononga, e Iehuruna, e taku i whiriwhiri ai. 3 No te mea ka ringihia e ahau he wai ki runga ki te tangata matewai, he awa ki te wahi maroke: ka ringihia e ahau toku wairua ki ou uri, taku manaaki ki tau whanau. 4 A ka tupu ratou i waenga taru, ano he wirou i te taha o nga rerenga wai. 5 Ka ki ake tenei, Na Ihowa ahau; ko tetahi atu, karangatia ana e ia ko Hakopa hei ingoa mona; ko tetahi atu, tuhituhi ana tona ringa ki a Ihowa, whakahuatia ake e ia ko Iharaira hei ingoa mona. 6 Ko te kupu tenei a Ihowa, a te Kingi o Iharaira, a tona kaihoko ano, a Ihowa o nga mano, Ko ahau te tuatahi ko ahau ano te mutunga; Kahore atu hoki he atua, ko ahau anake. 7 Ko wai hoki hei rite moku, hei karanga, hei whakaatu, hei whakarite kia noho rarangi, mai o toku whakaritenga i te iwi onamata? a ma ratou e whakaatu nga mea meake puta mai, me nga mea ano e puta a mua. 8 Kaua e wehi, kaua e pawera: kihai ianei i korerotia e ahau ki a koe nga mea onamata, i whakaaturia hoki? ko koutou ano hei kaiwhakaatu moku. Tera atu ranei tetahi atua ke? ae ra, kahore he kamaka; kahore ahau e mohio ki tetahi. 9 Ko nga kaiwhakaahua o te whakapakoko, he horihori katoa ratou; kahore hoki he pai o a ratou mea ahuareka: ko o ratou kaiwhakaatu kahore e kite, kahore e mohio; e whakama ai ratou. 10 Ko wai te kaiwhakaahua o tetahi atua, te kaiwhakarewa ranei o te whakapakoko kahore nei ona pai? 11 Nana, ko ona hoa katoa, ka whakama: ko nga kaimahi ano, he tangata nei ratou: kia huihui mai ratou katoa, tu ai. Ka wehi, ka whakama ngatahi. 12 E hangaia ana e te parakimete he toki, ka mahi i roto i nga waro, whakaahuatia ana e ia ki te hama, puta ana te kaha o tona ringa ki te mahi i taua

13  
mea; ka hemo ano ia i te kai, kore noa iho he kaha; kahore e inu i te wai, mauiu noa iho. Ko te kamura, whakamarokia mai ana e ia te aho, tuhia iho e ia ki te pene, mahia ana e ia ki te waru; tohungia ana e ia ki te kapehu, mahia ana e ia kia rite ki te ahua o te tangata, ki te ataahua ano o te

14  
tangata; hei mea mo roto i te whare. Tuaina ana e ia he hita mana, tikina ana e ia te kaiperi, me te oki, a whakapakaritia ana e ia mana tetahi i roto i nga rakau o te ngahere; whakatokia ana e ia

15  
te ahe hei whakatupu ma te ua. Katahi ka waiho hei wahie ma te tangata: ka tangohia hoki e ia tetahi wahi hei whakamahana i a ia; ina, whakaungia ana e ia, hei tunu taro; na kei te hanga ano ia i tetahi atua, koropikoria atu ana e ia; mahia ana e ia hei whakapakoko, tapapa to nu atu ki reira.

16  
Ko tetahi wahi o taua rakau, e tahuna ana e ia ki te ahi, ko tetahi wahi, hei mea i te kikokiko hei kai mana; tunua ana e ia tana e tunu ai, a ka makona: ae ra, ka mahana ano ia, a ka mea, Ha, kua

17  
mahana ahau, kua kite i te ahi. Ko te toenga, hanga ake e ia hei atua, hei whakapakoko mana: tapapa ana ia, koropiko ana, inoi ana ki taua mea, ka mea, Whakaorangia ahau; ko koe nei hoki

18  
toku atua. Kahore ratou e mohio, kahore e mahara; no te mea kua araia e ia o ratou kanohi kei

19  
kite, o ratou ngakau kei matau. Kahore hoki e anga ake te ngakau o tetahi, kahore e mohio, kahore e matau, e ki ake ai ia, Ko tetahi wahi o tenei i tahunga e ahau ki te ahi; i tunua ano e ahau he taro ki ona ngarahu, tunua ana e ahau he kikokiko, kainga ake e ahau; a kia meing a e ahau te

20  
toenga o taua rakau hei mea whakarihariha? me tapapa ranei ahau ki te take rakau? Ko tana kai, he pungarehu; kua tinihangatia tona ngakau, a ngau ke ana ia, te whakaora ia i tona wairua, te ki ake ranei, Kahore ranei he korero teka i toku matau?

21  
Kia mahara ki enei, e Hakopa, e Iharaira; he pononga hoki koe naku; naku koe i whai ahua

22  
ai, he pononga hoki koe naku: e Iharaira, e kore koe e wareware i ahau. Ko ou he, murua ake e ahau, me te mea he kapua matotoru; ko ou hara, me te mea he kapua: hoki mai ki ahau; naku hoki

23  
koe i hoko. Waiata, e nga rangi, he mahi hoki tenei na Ihowa. Hamama, e nga wahi o raro rawa o te whenua. Kia pakaru mai ta koutou waiata, e nga maunga, e te ngahere, e nga rakau katoa o

24  
reira; no te mea kua oti a Hakopa te hoko e Ihowa, kua whai kororia ia i a Iharaira. Ko te kupu tenei a Ihowa, a tou kaihoko, nana nei koe i whai ahua ai, no roto mai ano i te kopu, Ko Ihowa ahau, ko te kaihanganga o nga mea katoa, naku anake nga rangi i hora, naku i takoto ai te whenua: ko

25  
wai toku hoa? Ko nga tohu a te hunga korero teka he ana i a ia, ko nga tohunga tuaahu whakahaurangitia ana e ia; ko te hunga whakaaro nui, whakahokia ana e ia ki muri, ko to ratou

26  
matauranga, whakapouautia iho. Mana pu i a ia te kupu a tana pononga, te whakaaro a ana karere rite rawa i a ia; ko tana kupu ki Hiruharama, Ka nohoia koe; ki nga pa o Hura, Ka hanga

27  
koutou; maku ano e whakaara ona wahi kua ururuatia. Ko tana kupu ki te rire, Kia mimiti: maku

28  
ano e whakamaroke ou awa. Ko tana kupu mo Hairuha, He hepara ia naku, ka rite ano i a ia taku katoa i pai ai; mana hoki e ki ki Hiruharama, Ka hanga koe; a ki te temepara, Ka whakatakotoria ou turanga.

## Chapter 45

1 Ko te kupu tenei a Ihowa ki tana i whakawahi ai, ki a Hairuha, he mea pupuri nei naku tona ringa matau, kia pehia ai e ia nga iwi ki raro i a ia; maku ano e wewete to nga hope o nga kingi; ko nga tatau ka whakapuaretia ki tona aroaro; e kore ano nga kuwaha e tutakina. 2 Ko ahau e haere i mua i a koe, ki te whakatikatika i nga wahi tapokopoko: ko nga tatau parahi ka pakaru i ahau; ka tapahia ano e ahau nga tutaki rino. 3 Ka hoatu ano e ahau ki a koe nga taonga o te pouri, me nga mea huna o nga wahi ngaro, kia mohio ai koe ko Ihowa ahau, e whakahua atu nei i tou ingoa, ko te Atua o Iharaira. 4 He whakaaro naku ki taku pononga, ki a Hakopa, ki a Iharaira, ki taku i whiriwhiri ai, na reira koe, tou ingoa, i karangatia ai e ahau: whakahuatia ana e ahau tou ingoa i te mea kahore ano koe kia mohio ki ahau.

5 Ko Ihowa ahau, kahore atu hoki; kahore ke atu he atua, ko ahau anake: maku koe e whitiki, ahakoa kahore koe i mohio ki ahau: 6 Kia mohio ai te hunga i te rawhiti, me o te uru, kahore atu, ko ahau anake. Ko Ihowa ahau, kahore ke atu. 7 Naku te marama i whai ahua ai, naku i hanga te pouri; ko ahau te kaihou rongu, te kaihanganga ano o te kino: ko ahau, ko Ihowa, te kaimahi o enei mea katoa. 8 Maturuturu iho, e nga rangi i runga; kia ringihia mai ano he tika e nga kapua; kia puare te whenua, kia hua te whakaora, kia wana ngatahi te tika; naku, na Ihowa, taua mea i hanga.

9 Aue te mate mo te tangata e totohe ana ki tona Kaiwhakaahua! He maramara rihi i roto i nga maramara rihi o te oneone! E mea ake ranei te paru ki tona kaiwhakaahua, He aha tau e mahi na? e mea ranei tau i hanga ai, Kahore ona ringa? 10 Aue te mate mo te tangata e mea ana ki tona papa, He aha tau kua whanau nei? ki te wahine ranei, He aha te mea ka whakamamae na koe?

11 Ko te kupu tenei a Ihowa, a te Mea Tapu o Iharaira, a tona Kaiwhakaahua ano, Uia mai ki ahau nga mea e puta mai a mua; ko nga meatanga ki aku tamariki, ki te mahi hoki a oku ringa, whakahaua mai ahau e koe. 12 Naku i mahi te whenua, i hanga hoki nga tangata o runga: naku, na oku ringa i hora nga rangi; ko o ratou mano katoa he mea whakahau naku. 13 Naku ia i whakaara ake i runga i te tika, maku ano e whakatikatika ona ara katoa: ko ia hei hanga i toku pa, hei tuku i aku parau kia haere, kahore hoki he utu, kahore he moni whakapati, e ai ta Ihowa o nga mano.

14

Ko te kupu tenei a Ihowa, Ko nga mauui o Ihipa, ko nga taonga hokohoko o Etiopia, ko nga Tapeani, he tangata roroa, ka tae mai ki a koe, a ka riro i a koe; ka whai ratou i a koe; ka tae mekameka mai, ka piko ki a koe, ka mea, He pono kei roto i a koe te Atua, kahore atu hoki, kahore

15

he Atua. He pono he Atua koe e whakangaro ana i a koe, e te Atua o Iharaira, e te Kaiwhakaora.

16

Ka whakama, ae ra, ka numinumi kau ratou katoa; ka riro ngatahi ki te whakama nga kaimahi o

17

nga whakapakoko. Ko Iharaira ia, ka ora i roto i a Ihowa, he whakaoranga pumau tonu. E kore

18

koutou e whakama, e kore e numinumi a ake ake. Ko te kupu hoki tenei a Ihowa, a te kaihanganga o nga rangi; ko ia te Atua; nana i whakawhaiahua te whenua, nana i mahi; nana i whakapumau, kihai i hanga e ia hei takoto kau, i whakaahuatia e ia hei nohoanga. Ko Ihowa ahau, kahore ke atu.

19

Kihai ahau i korero i te wahi ngaro, i te wahi pouri o te whenua; kihai ahau i mea ki te uri o Hakopa, Rapua ahau, he mea noa iho. Ko taku korero, ko ta Ihowa, kei te tika, e whakaatu ana i nga mea e rite ana.

20

Huihui, haere mai, whakatata ngatahi mai, e nga oranga o nga iwi: kahore he mohio o te hunga e mau ana i te rakau o ta ratou whakapakoko, e inoi ana ki te atua e kore nei e whakaora.

21

Whakaaturia, kawea mai kia tata, kia whakatakoto whakaaro ngatahi ratou: na wai tenei i korero i mua riro na wai i whakaatu i nga wa onamata? He teka ianei naku, na Ihowa? Kore atu hoki he

22

atua, ko ahau anake; he Atua tika, he kaiwhakaora; kahore ke atu, ko ahau anake. Tahuri mai

23

ki ahau, kia ora ai koutou, e nga pito katoa o te whenua: ko te Atua hoki ahau, kahore ke atu. Kua waiho ahau e ahau ano hei oati; kua puta atu te kupu i toku mangai i te tika, e kore ano e

24

hoki mai, ara ka tuturi nga turi katoa ki ahau, ka oati mai ano nga arero katoa; Ka mea mai tetahi ki ahau, Kei a Ihowa anake te tika, te kaha: ka haere mai ki a ia nga tangata, a ko nga tangata katoa

25

i riri ki a ia ka whakama. Ma Ihowa ka tika ai, ka whakamanamana ai te uri katoa o Iharaira.

## Chapter 46

1

Kua piko a Pere, kua tuohu a Nepo; kei runga i te kirehe, i te kararehe a ratou whakapakoko: ko nga mea e haria haeretia ana e koutou ka meinga hei kawenga, hei taimaha ki te kararehe mauui

2

ra. Tuohu ana ratou, piko ngatahi ana; kihai i taea te pikaunga te pupuri, heoi ko ratou nei ano ka

3

riro hei parau. Whakarongo ki ahau, e te whare o Hakopa, e nga morehu katoa o te whare o Iharaira, he mea waha nei koutou naku no te kopu mai ano, he mea pikau no roto mai ra ano i te

<sup>4</sup>  
puku. Tae noa atu ki to koutou koroheketanga ko ahau tenei, ka pikaua ano koutou e ahau a hina noa; naku i mahi, maku ano e mau, maku ano e pikau, maku ano e whakaora.

<sup>5</sup>  
Ki ta koutou kei to wai he ahua moku? ko wai e rite ana ki ahau? me whakarite ahau ki a wai, e kotahi ai to maua ahua? <sup>6</sup> Ko te hunga e tahoro ana i te koura i te peke, e pauna ana i te hiriwa ki te pauna, kei te utu i te kaitahu koura, hanga ake e ia hei atua; tapapa ana ratou, koropiko ana.

<sup>7</sup>  
Amohia ana ia e ratou i runga i te pokohiwi, pikaua ana, kua waiho e ratou ki tona wahi, tu ana ia; te taea e ia te nekeneke atu i tona wahi: ka karanga ano hoki tetahi ki a ia, heoi e kore ia e whakahoki kupu, e kore e whakaora i a ia i roto i tona mate. <sup>8</sup> Mahara ki tenei, whakatane,

whakahokia ki te ngakau, e te hunga poka ke. <sup>9</sup> Maharatia nga mea tuatahi onamata: ko ahau hoki te Atua, kahore ke atu; ko ahau te Atua, kahore hoki tetahi hei rite moku. <sup>10</sup> I te timatanga e whakaatu ana i nga mea o te mutunga, a i nga wa onamata ko nga mea kahore ano i meatia; i ki

ahau, <sup>11</sup> Ko te whakaaro i whakatakotoria e ahau mau tonu, ka oti ano i ahau taku katoa i pai ai. Ka karangatia hoki e ahau he manu kai kino i te rawhiti, ko te tangata kei a ia toku whakaaro i te whenua tawhiti; ina, kua korerotia nei e ahau, ka whakaputaina ano e ahau; kua takoto i ahau, ka oti ano i

ahau. <sup>12</sup> Whakarongo ki ahau, e te hunga ngakau pakari, e matara atu ana i te tika: <sup>13</sup> Ka kawea mai e ahau toku tika kia tata; e kore e matara atu; e kore ano taku whakaora e roa; ka whakawhiwhia ano e ahau a Hiona ki te whakaora, mo Iharaira, mo toku kororia.

## Chapter 47

<sup>1</sup>  
Haere iho, e noho ki te puehu, e te tamahine wahine a Papurona: e noho ki te whenua, kahore he torona, e te tamahine a nga Karari; e kore hoki koe e kiia i muri he kiri angiangi, he whakatarapi.

<sup>2</sup>  
E mau ki nga kohatu mira, hurihia he paraoa: tangohia ake tou arai, huhua ake te waewae, kia takoto kau te huha; e whiti i nga awa. <sup>3</sup> Ka kitea ou wahi e takoto tahanga ana, ae ra ka kitea tou

mea e whakama ai koe: ka rapu utu ahau, e kore ano e whakaae ki tetahi tangata. <sup>4</sup> Ko to tatou kaihoko, ko Ihowa o nga mano tona ingoa, ko te Mea Tapu o Iharaira. <sup>5</sup> Noho kupukore, haere ki te pouri, e te tamahine a nga Karari; e kore hoki koe e kiia i muri, ko te wahine rangatira o nga

kingitanga. <sup>6</sup> I riri ahau ki taku iwi, i whakapokea toku kainga tupu; tukua ana e ahau ki tou ringa; kihai i puta tou aroha ki a ratou, whakataimahatia rawatia iho e koe tau ioka ki te kaumatua.

7 I mea ano koe, Hei wahine rangatira ahau ake ake: na kihai noa iho tou ngakau i mea ki enei  
 mea; kihai koe i mahara ki tona mutunga. 8 Na whakarongo aiane ki tenei, e te wahine e whai na  
 ki nga ahuareka, e noho kore wehi na, e mea na i roto i tou ngakau, Tenei ahau, kahore atu hoki,  
 ko ahau anake; e kore ahau e noho pouaru, e kore ahau e mohio ki te matenga o nga tamariki.  
 9 Otira ka pa whakarere enei e rua ki a koe i te ra kotahi, te matenga o nga tamariki, te pouarutanga;  
 ka pa enei ki a koe i tona tonuitanga, ahakoa te nui o au mahi makutu, te maha rawa o au whaiwhaia.  
 10 I whakawhirinaki hoki koe ki tou kino, i mea, Kahore he kaititiro moku: ko ou whakaaro nui me  
 tou mohio, na ena koe i whakangau ke; i mea ai koe i tou ngakau, Ko ahau tenei, kahore ke atu, ko  
 ahau anake. 11 Mo reira ka tae mai te kino ki a koe, e kore tona putanga e mohiotia e koe, ka taka  
 ano te he ki a koe, e kore e taea e koe te karo; ka tae hohoro mai ano ki a koe te whakangaro, e kore  
 e mohiotia e koe. 12 Tena ra, e tu, me au whaiwhaia, me au makutu maha, i mahia ra e koe i tou  
 tamarikitanga ake, me kahore koe e whai pai, me kahore tau e taea. 13 Kua hoha koe i te maha o  
 nga whakaaro i whakatakotoria e koe. Tena ra, kia tu nga kaiwhakaaro ki nga rangi, nga kaititiro  
 ki nga whetu, nga mea mohio ki nga marama, kia whakaorangia koe e ratou i nga mea meake tupono  
 ki a koe. 14 Nana, ka rite ratou ki te kakau witi, ka wera i te ahi; e kore ratou e ora i te ngaunga a  
 te ahi: ehara i te ngarahu hei whakamahanatanga, ehara hoki i te ahi hei painatanga. 15 Na ka pera  
 nga mea ki a koe, i mahi ai koe ki reira: ko te hunga i hokohoko ki a koe mai i tou taitamarikitanga,  
 ka kotiti atu ratou ki tona wahi, ki tona wahi; kahore he kaiwhakaora mou.

## Chapter 48

1 Whakarongo ki tenei, e te whare o Hakopa, e te hunga kua huaina nei ko Iharaira hei ingoa  
 mo koutou, kua puta ake nei i roto i nga wai o Hura; e whakaoati ana i te ingo o Ihowa, e whakahua  
 ana i te Atua o Iharaira, ehara ia i te mea i runga i te pono, i te tika. 2 Ki ta ratou karanga hoki, no  
 te pa tapu ratou, e okioki ana hoki ki te Atua o Iharaira; ko Ihowa o nga mano tona ingoa. 3 He  
 mea whakaatu naku nonamata nga mea o mua; ae ra, i puta ano hoki aua mea i toku mangai, he  
 mea korero naku; kitea rawatia ake kua mahia e ahau, kua puta. 4 I mohio hoki ahau he pakeke  
 koe, he uaua rino hoki tou kaki, he parahi tou rae; 5 Na reira naku i whakaatu ki a koe inamata;  
 kiano i puta kua korerotia e ahau ki a koe: kei ki koe, Na taku whakapakoko ena mahi, he mea  
 whakahau enei na te mea i whaowhaoa e ahau, na te mea i whakarewaina e ahau. 6 Kua rongu koe;  
 tirohia tenei katoa: a e kore ianei e whakaaturia e koutou? Kua korerotia nei e ahau ki a koe he mea



hou, he mea i muri i tenei wa, he mea huna, kihai i mohiotia e koe; <sup>7</sup> He mea hanga nonaianei, kahore hoki inamata: i mua i tenei ra kihai i rangona e koutou; kei ki koe, Nana, i mohiotia e ahau.

<sup>8</sup> Ae ra, kihai koe i rongu, kihai i mohio; ae ra, mai o mua kihai tou taringa i whakapuaretia: i mohio hoki ahau i mahi tinihanga koe, a no te kopu ano koe i huaina ai he poka ke.

<sup>9</sup> Ka whakaaro ahau ki toku ingoa, a ka puhoi toku riri; ka whakaaro ki te whakamoemiti ki ahau, a ka pehi i taku ki a koe, kei hatepea atu koe. <sup>10</sup> Kua oti ou para te tahi e ahau, ehara ia i te

mea hei hiriwa; he mea whiriwhiri koe naku i roto i te oumu, i te tangi. <sup>11</sup> He whakaaro ki ahau, he whakaaro ki ahau, i meatia ai tenei e ahau: kia whakapokea koia toku ingoa? e kore ano toku

kororia e hoatu e ahau ki tetahi atu. <sup>12</sup> Whakarongo ki ahau, e Hakopa, e Ihairaira, e taku i karanga

ai; ko ahau ia, ko ahau te tuatahi, ko ahau ano te mutunga. <sup>13</sup> Ae ra, na toku ringa i whakatakoto nga turanga o te whenua, na toku matau i hora nga rangi; ki te karangatia ratou e ahau, ka tu ngatahi

<sup>14</sup> ratou. Huihui mai, e koutou katoa, whakarongo hoki; na wai o ratou enei mea i whakaatu? He mea aroha ia na Ihowa; ka oti i a ia tana i pai ai ki Papurona, ka pa ano tona ringa ki nga Karari.

<sup>15</sup> Naku, naku te kupu, ae ra, he mea karanga ia naku, naku ia i kawe mai, ka tika ano i a ia tona ara.

<sup>16</sup> Whakatata mai ki ahau, whakarongo ki tenei; ko taku, no te timatanga ra ano ehara i te korero puku: i nga wa o aua mea, i reira ahau; na, inaianei na te Ariki, na Ihowa ahau i unga mai, na tona

wairua ano. <sup>17</sup> Ko te kupu tenei a Ihowa, a tou kaihoko, a te Mea Tapu o Ihairaira, Ko Ihowa ahau, ko tou Atua e whakaako nei i a koe ki te pai mou, e arahi nei i a koe i te ara e haere ai koe. <sup>18</sup> Aue,

me i rongu koe ki aku whakahau, ina, kua rite ki te awa te mau o te rongu ki a koe; ko tou tika, koia

ano kei nga ngaru o te moana. <sup>19</sup> Kua rite ano ou uri ki te onepu, nga whanau o ou whekau ki te kirikiri o reira; ko tona ingoa kihai i hatepea atu, kihai i whakangaromia i toku aroaro. <sup>20</sup> Haere

atu i Papurona, e rere i roto i nga Karari; kia waiata te reo i a koutou e whakaatu ana; korerotia tenei, whakapuakina ki te pito o te whenua; ki atu, Kua oti i a Ihowa tana pononga, a Hakopa te

<sup>21</sup> hoko. Kihai ano ratou i matewai i a ia e arahi ana i a ratou i nga koraha; i meinga e ia te wai mo

ratou kia rere i roto i te kamaka: i wahia e ia te kamaka, a pupu mai ana te wai. <sup>22</sup> Kahore he maunga rongu ki te hunga kino, e ai ta Ihowa.

## Chapter 49

<sup>1</sup> Whakarongo, e nga motu, ki ahau; kia whai whakaaro, e nga iwi o tawhiti; na Ihowa ahau i  
karanga, no te kopu mai ano; no nga whekau o toku whaea i whakahua ai ia i toku ingoa. <sup>2</sup> A meinga  
iho e ia toku mangai hei hoari koi; huna ana ahau e ia ki te taumarumarunga iho o tona ringa; a  
meinga ana ahau e ia hei pere kua oti te oro; kuhua ana ahau e ia ki tana papa pere. <sup>3</sup> I mea ano ia  
ki ahau, Ko koe taku pononga; ko Iharaira, mau ka whai kororia ai ahau. <sup>4</sup> Ko ahau ia i mea,  
Maumau mauiui noa ahau, he kore noa iho, he tekateka noa i whakapaua ai e ahau toku kaha; raia,  
kei a Ihowa he whakawa moku, kei toku Atua hoki he wahi maku. <sup>5</sup> Na akuanei, e ai ta Ihowa,  
nana nei ahau i whakaahua i te kopu hei tangata mana, hei whakahoki mai i a Hakopa ki a ia, kia  
kohikohia ai a Iharaira ki a ia; ka nui hoki ahau ki te aroaro o Ihowa, ko toku Atua hoki hei kaha  
moku; <sup>6</sup> Ae ra, i mea ia, He mea nohinohi kia waiho koe hei tangata maku, hei whakaara i nga iwi  
o Hakopa, hei whakahoki mai i nga oranga o Iharaira: ka hoatu ano koe e ahau hei marama ki nga  
tauwi, kia ai koe hei whakaoranga maku, a te pito ra ano o te ao.  
<sup>7</sup> Ko te kupu tenei a Ihowa, a te kaihoko o Iharaira, a tona Mea Tapu hoki, ki ta te tangata e  
whakahawea nei, ki ta te iwi e whakarihariha nei, ki te pononga a nga ariki, Ka kite nga kingi, ka  
whakatika ano, ka koropiko hoki nga rangatira; he mea hoki na Ihowa, he pono hoki ia, na te Mea  
Tapu o Iharaira; nana hoki koe i whiriwhiri. <sup>8</sup> Ko te kupu tenei a Ihowa: No te ra manakohanga  
atu i whakahoki kupu ai ahau ki a koe, no te ra whakaora hoki i awhinatia ai koe e ahau; maku ano  
koe e tiaki, ka hoatu ano koe e ahau hei kawenata mo te iwi, hei whakaara i te whenua, hei mea kia  
no hoia nga kainga tupu kua ururuatia; <sup>9</sup> Hei mea ki nga herehere, Haere; ki te hunga i te pouri,  
Whakaatu i a koutou: ka kai ratou ki nga ara, ka ai hoki he wahi kai ma ratou ki nga pukepuke  
katoa. <sup>10</sup> E kore ratou e matekai, e kore ano e matewai, e kore hoki te werawera, te ra ranei, e  
pakakinakina ki a ratou; no te mea ko to ratou kaiatawhai hei arahi i a ratou; mana hoki ratou e  
arahi ki nga puna wai. <sup>11</sup> A ka waiho e ahau oku maunga katoa hei ara, ka whakateiteitia hoki oku  
huanui. <sup>12</sup> Nana, ka haere mai enei i tawhiti; nana, ko ena i te raki, i te taha hoki ki te uru, ko ena  
hoki i te whenua o Hinimi.  
<sup>13</sup> Waiata, e nga rangi; kia hari hoki, e te whenua; kia pakaru mai ta koutou waiata, e nga  
maunga: ka whakamarie hoki a Ihowa i tana iwi, ka aroha hoki ki ana kua tukinotia nei. <sup>14</sup> Otiia i  
mea a Hiona, Kua whakarerea ahau e Ihowa, kua wareware ahau i toku Ariki. <sup>15</sup> Tera ranei e  
wareware i te wahine tana kohungahunga, a kore ake ona aroha ki te tamaiti a tona kopu? E wareware  
ano ratou: ko ahau nei, e kore ahau e wareware ki a koe. <sup>16</sup> Nana, kua taia koe e ahau ki nga kapu

17  
o oku ringa; kei toku aroaro tonu ou taiepa. Ka hohoro au tamariki; ka haere atu i roto i a koe ou kaiwawahi, ou kaiwhakamoti.

18  
Tahuri ake ou kanohi a karapoi noa, titiro hoki; ka huihui katoa ena, ka haere mai ki a koe. E ora ana ahau, e ai ta Ihowa, ina, ka kakahu koe i a ratou, ano he mea whakapaipai, ka herehere hoki i a ratou ki a koe, kei nga mea o te wahine marena hou te rite. 19 Na, ko ou wahi ururua, ko ou wahi kua tuheatia me tou whenua kua huna, he pono ka kopiri rawa koe mo nga kainoho, a ka

20  
matara atu ou kaiwhakamoti. Ko nga tamariki i whakapania ai koe, tera ano ratou e mea ki ou taringa, E kiki ana te wahi nei moku: whakawateatia atu, kia noho ai ahau. 21 A ka mea koe i tou ngakau, Na wai enei i whanau ai ki ahau, kua whakakorea nei aku tamariki i ahau, he moke, he parau, he kopikopiko nei ahau? na wai ra enei i whakatupu ake? Nana, i waiho mokemoke ahau:

22  
ko enei, i hea ra enei? Ko te kupu tenei a te Ariki, a Ihowa, Nana, ka ara atu toku ringa ki nga tauwiwi, ka tu hoki taku kara ki nga iwi: a ka maua mai e ratou au tama, awhi rawa ki o ratou uma,

23  
ka kawea mai hoki au tamahine i runga i o ratou pokohiwi. A hei matua atawhai mou nga kingi, ko a ratou kuini hoki hei kaiwhakangote mou: ka piko iho ratou ki a koe, tapapa rawa ki te whenua, ka mitimiti hoki i te puehu o ou waewae: a ka mohio koe ko Ihowa ahau; e kore hoki te hunga e tatari ana ki aha u e whakama.

24  
Tera ranei e tangohia nga taonga parau i te tangata kaha, e mawhiti ranei te tangata kua tika

25  
nei tona hereherenga? Na ko te kupu tenei a Ihowa, Ina, ka tangohia mai nga herehere a te tangata kaha, ka whakahokia mai ano nga taonga parau a te nanakia: ka ngangare ano ahau ki te tangata e

26  
ngangare ana ki a koe, ka whakaora hoki i au tamariki. A ka whangaia atu e ahau to ratou kikokiko ake ma ou kaiwhakatupu kino; ka haurangi ano ratou i o ratou ake toto, me te mea na te waina reka; a ka mohio nga kikokiko katoa ko ahau, ko Ihowa, e whakaora nei i a koe, ko tou kaihoko hoki, ko te Mea Nui o Hakopa.

## Chapter 50

1  
Ko te kupu tenei a Ihowa, Kei hea ianei te pukapuka whakarere o to koutou whaea, i whakarerea ai ia e ahau? Ko wai ranei te tangata, i ahau ana moni, i hokona atu ai koutou e ahau ki a ia? Nana, he kino no koutou i hokona atu ai koutou, na a koutou mahi whanoke ano i whakarerea

2  
ai to koutou whaea. Na te aha i taku haerenga mai i kore ai he tangata, he aha i taku karangatanga i kore ai tetahi e oho ake? kua mutua koia toku ringa, te tau ai te araarai? kua kore ranei he kaha moku hei whakaora? Nana, maku, ma taku kupu riri, ka maroke ai te m oana, ka meinga ai nga awa

hei koraha: piro ana o ratou ika i te waikore, ka mate hoki i te matewai.<sup>3</sup> E whakakakahu ana ahau i nga rangi ki te mangu, uhia iho te taratara hei hipoki mo ratou.

<sup>4</sup> Kua homai ki ahau e te Ariki, e Ihowa, he arero matau, kia mohio ai ahau ki te ata ngarahu atu i te korero ki te tangata e mauui ana. E whakaara ana ia i tenei ata, i tenei ata, e whakaara ana i toku taringa ki te whakarongo kia pera me ta te hu nga mohio.<sup>5</sup> Kua oti te whakatuwhera e te

Ariki, e Ihowa toku taringa, kihai hoki ahau i tutu, kihai i hoki whakamuri.<sup>6</sup> Tukua atu ana e ahau toku tuara ki nga kaiwhiu, oku paparinga ki nga kaihutihuti; ko toku kanohi kihai i huna kei

whakama, kei tuwhaina.<sup>7</sup> No te mea ka awhinatia mai ahau e te Ariki, e Ihowa; koia ahau te whakama ai; koia i whakamarotia ai e ahau toku kanohi ano he kiripaka; e mohio ana hoki ahau e

kore ahau e whakama.<sup>8</sup> E tata ana te kaiwhakatikatika moku; ko wai hei whawhai ki ahau? kia tu

ngatahi taua: ko wai he hoariri moku? kia tata mai ia ki ahau.<sup>9</sup> Nana, ko te Ariki, ko Ihowa, hei awhina moku; ko wai hei whakahe i ahau? Nana, ka tawhitotia katoatia ratou ano he kakahu, ka pau ratou i te purehurehu.

<sup>10</sup> Ko wai o koutou e wehi ana i a Ihowa, e rongu ana ki te reo o tana pononga; ko te tangata e haere ana i te pouri, kahore hoki he whakamarama, kia okioki ia ki te ingoa o Ihowa, kia

taupuhipuhi atu ki tona Atua.<sup>11</sup> Nana, e koutou katoa e tahu na i te ahi, e whitiki na i a koutou ki nga rama muramura; haere i te marama o ta koutou ahi, i nga rama muramura hoki i whakangihaia na e koutou. Tenei ta toku ringa mo koutou, ka takoto iho koutou me te tangi ano.

## Chapter 51

<sup>1</sup> Whakarongo ki ahau, e koutou e whai na i te tika, e rapu na i a Ihowa; titiro ki te kohatu i haua mai ai koutou, ki te poka i te rua i keria mai ai koutou.<sup>2</sup> Titiro ki a Aperahama, ki to koutou matua, ki a Hera hoki i whanau ai koutou: he kotahi hoki ia, karangatia ana ia e ahau, manaakitia

ana, whakanuia ana.<sup>3</sup> Ta te mea kua whakamarie a Ihowa i Hiona; kua whakamarie ia i ona wahi katoa ka ururuatia, kua mea hoki i tona wahi koraha kia rite ki Erene, i tona wahi titohea kia rite ki te kari a Ihowa; he koa, he hari, ka kitea i roto, he whakawhetai, me te reo hoki e waiata ana.

<sup>4</sup> Whakarongo ki ahau, e aku tangata, kia whai taringa ki ahau, e taku iwi: ka puta atu hoki he ture i roto i ahau, ka takoto ano i ahau taku whakawa hei whakamarama mo nga iwi.<sup>5</sup> Kei te tata mai toku tika; kua puta taku whakaora, ma oku ringa e whakawa mo nga iwi: ka tatari ki ahau nga

motu, ka okioki ki toku ringa.<sup>6</sup> Anga ake o koutou kanohi ki nga rangi, tirohia iho te whenua i

raro; ka memeha atu hoki nga rangi, ano he paowa, ka tawhitotia te whenua, me he kakahu, ko te hunga hoki e noho ana i reira ka apena te mate: ko taku whakaoranga ia ka mau tonu: e ko re ano

7 toku tika e heke. Whakarongo ki ahau, e koutou e mohio na ki te tika, e te hunga kei o koutou

8 ngakau nei taku ture; kei wehi i te tawai a te tangata, kei numinumi i a ratou taunu. Ka kai hoki te purehurehu i a ratou, ano he kakahu, ka pau ratou, ano he huruhuru hipi i te huhu: ka mau tonu ia toku tika, taku whakaora ki nga whakapaparanga katoa.

9 Maranga, maranga, kakahuria te kaha, e te ringa o Ihowa! maranga, kia rite ki nga ra o mua ra, ki nga whakatupuranga onamata. Ehara oti i a koe nana i kotikoti a Rahapa, i wero te tarakona?

10 Ehara oti i a koe nana i whakamaroke te moana, nga wai o te rire nui? ko nga wai hohonu o te

11 moana waiho ake e koe hei huarahi haerenga mo te hunga kua oti te hoko. Na, ko a Ihowa i hoko ai ka hoki mai, ka haere mai ki Hiona, me te waiata ano ratou: i runga i o ratou mahunga he

12 hari e kore e mutu: ka whiwhi ratou ki te koa, ki te hari; a rere ana te pouri me te aue. Ko ahau, ina, maku koutou e whakamarie; ko wai koe, e wehi na i te tangata e matemate nei, i te tama a te

13 tangata ka meinga nei hei tarutaru? Ka wareware nei hoki ki a Ihowa, ki tou kaihanganga, nana nga rangi i hora, nana i whakatakoto te turanga mo te whenua; ka pawera tonu koe i nga ra katoa i te riri o te kaiwhakawhiu, i te mea e anga mai ana ia ki te whakamate? a kei hea te riri o t e

14 kaiwhakawhiu? Hohoro tonu te wetekina o te herehere i whakaraua; e kore hoki ia e mate, e

15 heke ki te poka, e kore hoki e whakakorea he taro mana. Ko Ihowa ia ahau, ko tou Atua, i

16 whakakorikori nei i te moana, a hamama ana ona ngaru: ko Ihowa o nga mano tona ingoa. A kua hoatu e ahau aku kupu ki tou mangai; kua hipokina koe ki te marumaru o toku ringa, kia whakatokia ai nga rangi, kia takoto ai te turanga mo te whenua, hei mea hoki ki Hiona, Ko koe taku iwi.

17 Maranga, maranga, whakatika, e Hiruharama, i whakainumia nei e te ringa o Ihowa ki te

18 kapu o tona riri: kua inu koe i nga nganga o te kapu wiri, he mea tatau nau. Kohore kau tetahi hei tautiti i a ia o nga tama katoa i whanau i roto i a ia; kahore hoki tetahi o nga tama i atawhaitia

19 e ia hei pupuri i tona ringa. Ka rua enei mea ka pono nei ki a koe; ko wai hei tangi ki a koe/ ko te whakangaromanga, ko te wawahanga, ko te matekai, ko te hoari: me pehea taku whakamarie i

20 a koe? Kua hemo au tama; e takoto ana i te ahunga mai o nga ara katoa, ano he anaterope i roto

21 i te kupenga; ki tonu ratou i te riri o Ihowa, i te whakatupehupehu o tou Atua. Mo reira,

22 whakarongo ki tenei, e koe kua tukinotia nei; e haurangi ana, raia, ehara i te haurangi waina. Ko te kupu tenei a tou Ariki, a Ihowa, ara a tou Atua, e tohe nei i ta tona iwi, Nana, ka tangohia e ahau

te kapu wiri i tou ringa, nga nganga o te kapu o toku riri; e kore e inumia ano e koe a muri ake nei.  
23

A ka hoatu e ahau ki te ringa o te hunga e whakatupu kino nei i a koe, i mea ra ki tou wairua, Piko iho nei, kia haere atu ai matou; na kua whakatakotoria e koe tou tuara hei whenua, hei huarahi mo te hunga i haere atu ra.

## Chapter 52

1 Maranga, maranga; kakahuria tou kaha, e Hiona; kakahuria ou kahu whakapaipai, e Hiruharama, e te pa tapu! no te mea heoi ano haerenga mai ki a koe o te mea kokotikore, o te mea

2 poke. Ruperupea atu te puehu i a koe, whakatika, noho iho, e Hiruharama: wetekina nga here i

3 tou kaki, e te tamahine herehere a Hiona. Ko te kupu hoki tenei a Ihowa, Kua hokona kautia atu

4 koutou; na ehara i te moni mana koutou e whakahoki mai. Ko te kupu hoki tenei a te Ariki, a Ihowa, I haere atu taku iwi ki Ihipa i mua, ki reira noho ai; na kahore he rawa i whakatupuria kinotia

5 ai ratou e te Ahiriana. Na he aha ra taku i konei, e ai ta Ihowa; ka kahakina kautia atu nei hoki taku iwi? tangi aue ana i o ratou rangatira, e ai ta Ihowa, e whakahaweatia tonutia ana toku ingoa

6 i tenei ra, i tenei ra. Mo konei ka mohio taku iwi ki toku ingoa: mo konei ka mohio ratou i taua ra ko ahau te korero nei; nana, ko ahau tenei.

7 Ano te ahua eka o nga waewae i runga i nga maunga o te kaikawe i te rongo pai, e kauwhau ana i te maunga rongo; e kawae mai ana i te rongo whakahari o te pai, e kauwhau ana i te ora; e mea

8 ana ki a Hiona, E kingi ana tou Atua! Te reo o au tutei! ka maranga i a ratou te reo, ka waiata

9 ngatahi; no te mea ka kite ratou he kanohi, he kanohi, ua whakahoki a Ihowa i Hiona. Hamama, waiata ngatahi, e nga wahi o Hiruharama kua ururuatia; kua whakamarie hoki a Ihowa i tana iwi,

10 kua hoko i Hiruharama. Kua huhua te ringa tapu o Ihowa ki te aroaro o nga tauiwi katoa, a ka

11 kite nga pito katoa o te ao i te whakaora a to tatou Atua. Maunu, maunu, haere atu i reira: kaua

12 e pa ki te mea poke; haere atu i roto i a ia; kia ma, e nga kai mau o nga oko a Ihowa. E kore hoki koutou e haere kaika, e kore hoki e haere pera i te whati; no te mea ka haere a Ihowa i to koutou aroaro; ko te Atua hoki o Iharaira hei hiku mo koutou.

13 Nana, ka mahi tupato taku pononga, ka whakatiketitia ia, ka hapainga ki runga, a ka tiketike

14 rawa atu. Pera i te tini i miharo ki a koe; i kino iho hoki tona kanohi i to te tangata, tona ahua i

15 to nga tama a te tangata: Waihoki he maha nga iwi ka tauhiuhia e ia; a ka kopi te mangai o nga

kingi ki a ia; no te mea ko nga mea kihai i korerotia ki a ratou ka kitea, ko nga mea kihai i rangona ka mohiotia.

### Chapter 53

<sup>1</sup> Ko wai i whakapono ki ta matou korero; i whakaaturia ranei ki a wai te ringaringa o Ihowa?

<sup>2</sup> Ka tupu ake hoki ia ki tona aroaro, ano he rakau wana, me te pakiaka hoki i te oneone maroke, kahore ona ahuareka, kahore hoki he pai; a ka titiro tatou ki a ia, te ai he ataahua e minamina ai

<sup>3</sup> tatou ki a ia. I whakahengia, i whakakahoretia ia e te tangata; he tangata pouri, kua mohio hoki ki te tangi: a, i ahua huna nga kanohi ki a ia; i whakakahoretia, kihai hoki tatou i whakaaro ki a ia.

<sup>4</sup> He pono, nana o tatou mate i pikau, nana hoki i waha o tatou pouri: ko tatou ia i mea, i tukitukia, i patua ia e te Atua, i whakawhiua. <sup>5</sup> Kahore, i werohia ia mo o tatou he, i kurua mo o tatou kino: nona te whiunga i mau ai to tatou rongoa, kei ona karawarawa hoki he rongoa mo tatou.

<sup>6</sup> Ko tatou katoa, ano he hipi, kua marara ke, kua anga atu tatou ki tona ara, ki tona ara; na Ihowa ia i mea kia tau iho ki a ia te kino o tatou katoa. <sup>7</sup> I tukinotia ia, i whakawhiua; heoi kihai i kuihi tona mangai: ano he reme i arahina ia kia patua, me te hipi hoki i te aroaro o ona kaikutikuti e

<sup>8</sup> wahangu ana, kihai i kuihi tona waha. Na te tukino, na te whakawa, tangohia atu ana ia; tena ko tona whakatupuranga, ko wai o ratou i whakaaro kua wehea atu ia i te ao ora? he mahi he hoki na

<sup>9</sup> taku iwi i patua ai ia. A ka whakaritea hei te hunga kino he urupa mona; i te tangata taonga ia i tona matenga; ahakoa kahore ana mahi tutu, kahore ano he tinihanga i tona mangai.

<sup>10</sup> Otiia i pai hoki a Ihowa kia kurua ia; nana ia i mea kia mamae. Ina meinga e koe tona wairua hei whakahere mo te he, ka kite ia i tona uri, ka whakaroa i ona ra, a ko ta Ihowa i pai ai ka ata oti

<sup>11</sup> i a ia. Ka kite ia i ta tona wairua i uaua ai, a tatu ana te ngakau: ma te mohio ki a ia ka whakatikaia

<sup>12</sup> ai te tini e taku pononga tika; mana hoki o ratou kino e waha. Mo reira ka hoatu e ahau he wahi mona i roto i o te hunga nui, a ka tu ngatahi ia me te hunga kaha i te taonga: mo tona wairua i ringihia e ia ki te mate, a i taua ngatahitia me nga poka ke; nana hoki nga hara o te tini i waha, nana i wawao nga poka ke.

### Chapter 54

<sup>1</sup> Waiata, e te pakoko, e koe kahore ano nei i whanau: kia pakaru mai te waiata, hamama, e koe kahore ano kia whakamamae: he tini hoki nga tamariki a te noho kau i nga tamariki a te mea whai  
<sup>2</sup> hoa, e ai ta Ihowa. Kia rahi atu te turanga mo tou teneti; kia maro hoki nga uhi o ou nohoanga:  
<sup>3</sup> aua e kaiponuhia; kia roa ou taura, kia u hoki ou poupou. Ka tohatoha noa atu hoki koe ki matau,  
<sup>4</sup> ki mau; a ka riro nga tauwi i ou uri; ma ratou ano ka nohoia ai nga pa kua ururutia. Kaua e  
 wehi; ta te mea e kore koe e whakama; kaua ano e numinumi, ta te mea e kore koe e whakama; no  
 te mea ka wareware i a koe te whakama o tou tamahinetanga; a heoi ano maharatanga ki te ingoa  
<sup>5</sup> kino o tou pouarutanga. Ko tou Kaihanga tau tahu; ko Ihowa o nga mano tona ingoa; ko te Mea  
 Tapu hoki o Iharaira tou kaiwhakaora; ko te Atua o te whenua katoa ka huaina ki a ia.  
<sup>6</sup> No te mea kua karanga a Ihowa ki a koe, ano he wahine kua whakarerea, kua pouri te ngakau,  
 ano he hoa wahine o te taitamarikitanga, i te mea kua mahue, e ai ta tou Atua. He iti te wahi i  
<sup>7</sup> mahue ai koe i ahau; he nui ia nga atawhainga e kohikohi ai ahau i a koe. He riri puhake, i huna  
<sup>8</sup> ahau i toku kanohi i a koe, he wahi iti; he aroha mau tonu ia toku e aroha ai ki a koe, e ai ta Ihowa,  
<sup>9</sup> ta tou kaiwhakaora. He penei hoki tenei ki ahau me nga wai i a Noa; i ahau i oati ra, e kore e  
 hurihia ano te whenua e nga wai i a Noa: waihoki ka oati nei ahau, e kore ahau e riri ki a koe, e  
<sup>10</sup> kore ano e whakatupehupehu ki a koe. Ko nga maunga hoki ka riro ke, ko nga pukepuke ka  
 nekehia atu; tena ko toku aroha e kore e rere ke i a koe, e kore ano e nekehia ketia te kawenata e  
 mau ai taku rongu; e ai ta Ihowa e atawhai nei i a koe.  
<sup>11</sup> E koe, kua whakawhiua nei, kua puhia nei e te awaha! kahore ano i whakamarietia, nana,  
 maku ou kohatu e whakatakoto, he pai hoki te kakano; ka hanga ano e ahau ou turanga ki te hapira.  
<sup>12</sup> Ka hanga ano e ahau ou tihi ki te rupi, ou tatau ki te karapanaka, ou rohe katoa ano ki nga kohatu  
<sup>13</sup> whakapaipai. A ka whakaakona e Ihowa au tamariki katoa; ka nui hoki te rangimarie ki au  
<sup>14</sup> tamariki. Ka whakaturia koe ki runga ki te tika, ka whakamataratia atu i a koe te tukino; e kore  
<sup>15</sup> hoki koe e wehi; e kore ano te pawera e tata ki a koe. Nana, huihui noa ratou, ehara ia i te mea  
<sup>16</sup> naku: ko te tangata e huihui ana ki te whawhai ki a koe ka papahoro, he mea mou. Nana, naku  
 i hanga te parakimete e pupuhi nei i te ahi waro, e mau nei i te mea hei mahi mana; naku hoki te  
<sup>17</sup> kaihuna i hanga hei whakamoti. E kore tetahi patu e hanga ana mou e marohirohi: ko nga arero  
 katoa e whakatika mai ana ki a koe ki te whakawa, mau ano e whakahe. Ko ta nga pononga a Ihowa  
 tenei, tuku iho, tuku iho; naku hoki ratou i tika ai, e ai ta Ihowa.



## Chapter 55

<sup>1</sup> E! e nga tangata katoa e matewai ana, haere mai ki nga wai! me te tangata kahore ana moni; haere mai, hokona, kainga! Haere mai, hokona he waina, he waiu; kua he moni, kua he utu. <sup>2</sup> He aha ra i hokona ai e koutou te moni mo nga mea ehara i te taro, to koutou uaua mo nga mea e kore ai koutou e makona? ata whakarongo mai ki ahau, a kainga te mea pai; kia ora hoki o koutou wairua i nga mea momona. <sup>3</sup> Tahuri mai o koutou taringa, haere mai ki ahau; whakarongo mai, a ka ora o koutou wairua, a maku e whakarite ki a koutou he kawenata mau tonu, ara nga atawhainga pono i a Rawiri. <sup>4</sup> Nana, kua waiho ia e ahau hei kaiwhakaatu ki nga iwi, hei rangatira, hei kaiwhakahau mo nga tauwiwi. <sup>5</sup> Nana, ka karanga koe i te iwi kihai i mohiotia e koe; ka rere mai ano ki a koe nga iwi kahore i mohio ki a koe; mo Ihowa hoki, mo tou Atua, mo te Mea Tapu o Iharaira; nana hoki koe i whakanui. <sup>6</sup> Rapua a Ihowa, kei kitea ana ia: karangatia atu, kei tata ana mai ia. <sup>7</sup> Kia whakarere te tangata kino i tona ara, te tangata mahi he i ona whakaaro; kia hoki ki a Ihowa, a ka aroha ia ki a ia; ki to tatou Atua hoki, he nui rawa hoki tana mahi tohu. <sup>8</sup> Ehara hoki oku whakaaro i o koutou whakaaro, o koutou hurarahi i oku huarahi, e ai ta Ihowa. <sup>9</sup> Ta te mea e ikeike ake ana te rangi i te whenua, waihoki ko oku huarahi e ikeike ake ana i o koutou huarahi, ko oku whakaaro i o koutou whakaaro. <sup>10</sup> Ka rite hoki ki te ua raua ko te hukarere e rere iho ana i te rangi, a e kore e hoki ki reira; engari e whakamakuku ana i te whenua, e mea ana kia whai hua, kia pihi ake, kia homai ano he purapura ma te kaiwhakato, he taro ma te tangata e kai an a: <sup>11</sup> Ka pena ano taku kupu e puta ana i toku mangai: e kore e hoki kau, mai ki ahau; engari ka meatia taku i pai ai, ka taea hoki taku i unga atu ai. <sup>12</sup> Ta te mea ka haere atu koutou me te hari ano, ka arahina i runga i te rangimarie; ka pakaru mai te waiata a nga maunga, a nga pukepuke, i to koutou aroaro, a ka papaki ringa nga rakau katoa o te whenua. <sup>13</sup> He tataramoa i mua, ka puta ake he kauri; he tumatakuru i mua, ka puta ake he ramarama: a ka waiho hei ingoa ki a Ihowa, hei tohu mo a mua tonu atu, e kore e motuhia.

## Chapter 56

<sup>1</sup> Ko te kupu tenei a Ihowa, Puritia te whakawa, mahia te tika; no te mea ka tata he putanga mo taku whakaora, he whakakitenga mo toku tika. <sup>2</sup> Ka hari te tangata nana tenei mahi, te tama a te

tangata e pupuri nei i a ia, mau tonu; e pupuri ana, a kahore e whakapoke i te hapati, e tiaki ana i tona ringa kei mahi i tetahi he.

<sup>3</sup>

Kaua hoki te tama a te tangata ke, kua hona nei ki a Ihowa, e korero, e mea, He pono ka wehea rawatia mai ahau e Ihowa i roto i tana iwi; kaua ano te unaka e ki, Nana, he rakau maroke ahau.

<sup>4</sup>

Ko ta Ihowa kupu hoki tenei mo nga unaka e pupuri ana i aku hapati, e whiriwhiri ana i nga mea

e paingia ana e ahau, a e hopu ana i taku kawenata; <sup>5</sup> Ka hoatu e ahau he wahi ki a ratou i roto i toku whare, i roto ano i oku taiepa, he ingoa ano e pai ake ana i o nga tama, i o nga tamahine; he

ingoa mau tonu taku e hoatu ai ki a ratou, he mea e kore e hatepea atu. <sup>6</sup> Ko nga tamariki hoki a te tangata ke, kua oti te hono ki a Ihowa, he mea kia mahi ai ratou ki a ia, kia aroha ki te ingoa o Ihowa, kia waiho hei pononga mana; ko te hunga katoa e pupuri ana, a kahore e whakapoke i te

hapati, a e hopu ana i taku kawenata; <sup>7</sup> Ka kawea ratou e ahau ki toku maunga tapu, ka whakahari ano ahau i a ratou i roto i toku whare inoi; ka manakohia a ratou tahunga tinana, me a ratou patunga

tapu i runga i taku aata; no te mea ka kiia toku whare, He whare inoi mo nga iwi katoa. <sup>8</sup> He kupu tenei na te Ariki, na Ihowa, na te kaikohikohi mai o te hunga o Iharaira i peia atu, Kua kohikohia era ki a ia; ka kohikohi ano ahau i etahi atu ki a ia.

<sup>9</sup>

E nga kirehe katoa o te parae, haere mai ki te kai, e nga kirehe katoa o te ngahere. <sup>10</sup> Ko ona tutei, he matapo katoa, kahore e mohio; he kuri reokore katoa ratou, e kore e tau; he momoe, he

takoto, e matenui ana ki te moe. <sup>11</sup> Ae ra, he kuri apo kai ratou, kahore rawa e makona; he hepara enei e kore e ngoto te matauranganga; anga katoa ana ratou ki tona ara, ki tona ara, ki te mea taonga

mona i tona wahi, i tona wahi. <sup>12</sup> Ko ta ratou ki, Haere mai, maku e tiki he waina, kia nui ano ta tatou inu i te wai kaha; a ka rite te ra apopo ki tenei ra, he ra kei runga noa atu tona nui.

## Chapter 57

<sup>1</sup>

Ka riro ki te kore te tangata tika, a kahore e maharatia iho e te ngakau o tetahi tangata: e tangohia atu ano hoki te hunga tohu tangata; te mahara tetahi, e tangohia atu ana te tangata tika kei

kite i te he. <sup>2</sup> Ka haere ia ki te rangimarie, ka okioki ratou ki o ratou takotoranga, ka haere tena, tena, i runga i tona whakaaro tapatahi.

<sup>3</sup>

Ko koutou ia, awahi mai ki konei, e nga tama a te wahine makutu, e nga uri o te tangata puremu,

o te wahine kairau. <sup>4</sup> He takaro ta koutou ki a wai? ki a wai te hamama nui o o koutou mangai, te

whetero roa o te arero? He teka ianei he whanau koutou na te poka ke, he uri no te teka, <sup>5</sup> Koutou,

e tahu na i o koutou hiahia i waenga i nga oki, i raro i nga rakau kouru nui katoa; e patu na i nga

tamariki i nga awaawa, i raro i nga pari kohatu? <sup>6</sup> Kei nga kohatu maeneene o te awa tou whai; ko ena, ko ena te rota i a koe; ringihia ana e koe he ringihanga ki ena, whakaekea atu ana he whakahere.

E marie ranei ahau ki ena? <sup>7</sup> I runga i te maunga tiketike, aua noa atu ki runga, i hanga e koe tou

takotoranga, piki ai ki reira ki te mea patunga tapu. <sup>8</sup> Kua oti ano tou whakamahara te whakatu e koe ki tua i te tatau, i nga pou: kua hura hoki koe i a koe ki tetahi atu, ehara i ahau, kua piki ki runga; kei te whakanui i tou takotoranga, whakaritea ana e koe he kawenata ki a ratou; i matenuitia

ano e koe to ratou takotoranga i te wahi i kite ai koe. <sup>9</sup> I haere atu ano koe ki te kingi, mea rawa ki te hinu, whakanuia ana e koe au hinu whakaranu; unga ana e koe au karere ki tawhiti, whakaititia

ana koe e koe ano ki raro rawa ki te reinga. <sup>10</sup> Mauiui ana koe i te roa o tou ara; otia kahore koe

i mea, Kahore he manakohanga, Kua kitea e koe e nui haere ana tou kaha; koia koe te ruha ai. <sup>11</sup> I pawera koe, i wehi i a wai, i teka ai koe, i kore ai e mahara ki ahau, i kore ai tou ngakau e mea mai?

kihahi ianei ahau i whakarongo puku he wa roa i mua ra ano, na kahore ou wehi ki ahau? <sup>12</sup> Maku e whakaatu tou tika; tena ko au mahi, e kore koe e whai pai i ena.

<sup>13</sup> Ka tangi koe, ma ou huihui koe e whakaora; otia ka kahakina ratou e te hau, ka riro katoa atu i te nga: ko te tangata ia e whakawhirinaki ana ki ahau, mona te whenua, ka riro hoki i a ia toku

maunga tapu; <sup>14</sup> Ka ki ano ia, Opehia ake, opehia ake, whakapaia te ara, hapainga atu te tutukitanga

waewae i te ara o taku iwi. <sup>15</sup> Ko te kupu hoki tenei a te Mea tiketike o runga rawa, ko tona kainga nei kei nga wa onamata, ko tona ingoa ko Tapu; ko te wahi e noho nei ahau kei te tiketike, kei te tapu, i te tangata he maru rawa tona ngakau, he papaku, hei whakahauora i te wairua o te hunga

papaku, hei whakahauora i te ngakau o nga mea kua maru. <sup>16</sup> E kore hoki ahau e whawhai a ake ake, e kore ano e mau tonu toku riri: pena ka pehia rawatia te wairua i toku aroaro, me nga manawa i hanga e ahau.

<sup>17</sup> He he no tona apo taonga i riri ai ahau, i patu ai i a ia; i huna ahau i toku mata, i riri, a haere

kotiti ke ana ia i runga i te ara o tona ngakau. <sup>18</sup> Kua kite ahau i ona ara, ka rongoatia ano ia e ahau: ka arahi ano ahau i a ia, ka whakahoki ano i nga whakamarietanga ki a ia, ki ona tangata ano hoki

e tangi ana. <sup>19</sup> Ko ahau te kaihanga o nga hua o nga ngutu; Ka mau, ka mau te rongu ki te hunga

i tawhiti, ki te hunga i tata, e ai ta Ihowa; maku ano ia e rongoa. <sup>20</sup> Ko te hunga kino ia rite tonu

ki te moana ngarungaru; e kore e marino, heoi kei te aia ake e ona wai te puehu, te paru. <sup>21</sup> Kahore he maunga rongu ki te hunga kino, e ai ta toku Atua.

## Chapter 58

<sup>1</sup> Kia rahi te karanga, kaua e kaiponuhia, kia rite ki te tetere te nui o tou reo, whakaaturia ki taku iwi to ratou poka ke, o ratou hara ki te whare o Hakopa. <sup>2</sup> He rapu ano ia ta ratou i ahau i tenei ra, i tenei ra, e ahuaireka ana hoki ki te mohio ki aku ara: me te mea he iwi e mahi ana i te tika, a kihai i whakarere i te whakaritenga a tona Atua, e ui ana ratou ki ahau ki nga whakaritenga o te tika, e a huareka ana ki te awhi ki te Atua.

<sup>3</sup> Ko ta ratou ki, he aha matou i nohopuku ai, a kahore koe e titiro mai? he aha matou i whakapouri ai i o matou wairua, te mohio mai koe? Nana, i te ra e nohopuku ai koutou e kitea ana e koutou te ahuaireka mo koutou ano; e akiakina ana hoki e koutou u a koutou whakamauiui katoa.

<sup>4</sup> Nana, ko ta koutou nohopuku, hei mea totohe, hei mea ngangare, kia moto ai ki te ringa o te kino: kahore koutou i nohopuku i tenei ra hei mea kia rangona ai to koutou reo i runga. <sup>5</sup> Ko taku nohopuku ianei tenei i whiriwhiri ai? he ra e whakapouri ai te tangata i tona wairua? He tuohu koia no te mahunga o te tangata, ano he kakaho? he whariki i te kakahu taratara, i te pungarehu, ki raro i a

ia? E kiia ranei tenei e koe he no hopuku, he ra e manakohia ana e Ihowa? <sup>6</sup> He teka ianei ko te nohopuku tenei i whiriwhiria e ahau? kia whakatangorotia nga here a te kino, kia wetekina nga paihere o te ioka, kia tukua te hunga e tukinotia ana kia haere noa atu, kia wawahia e koutou nga

ioka katoa? <sup>7</sup> He teka ianei ko te tuwha i tau taro ma te tangata e mate ana i te kai, ko te mau mai ki tou whare i nga rawakore i peia atu? kia hipokina hoki te tangata e tu tahanga ana, ina kitea e koe; kia kaua hoki e huna i a koe i ou kikokiko ake?

<sup>8</sup> Ko reira tou marama puta ai, ano ko te puaotanga, ka hohoro ano ou mate te mahu; ka haere tou tika ki mua i a koe, ko te kororia ano o Ihowa hei hiku mou. <sup>9</sup> Ko reira koe karanga ai, a ka whakahoki kupu mai a Ihowa; ka tangi koe, a ka mea ia, Tenei ahau. Ki te whakarerea atu e koe te

ioka i waenganui i a koe, te kokirihanga atu o te maihao, me te korero kino; <sup>10</sup> Ki te mea ano ka whai ngakau koe ki te tangata matekai, a ka makona i a koe te wairua e pehia ana e te mamae; ko

reira tou marama puta ai i roto i te pouri, ka rite hoki tou pouri ki te poutumaro: <sup>11</sup> Ka arahina tonutia ano koe e Ihowa, ka makona ano tou wairua i a ia i nga wahi kore wai, ka whakakahangia ano ou whenua; a ka rite koe ki te kari kua oti te whakamakuku ki te wai, ki te puna hoki e pupu

ake ana, e kore nei ona wai e poto. <sup>12</sup> Ka hanga ano e ou uri nga wahi kua ururuatia noatia ake; ka ara ano i a koe nga turanga o nga whakapaparanga maha; a ka huaina koe, Ko te kaihanganga o te taiepa pakaru, Ko te kaiwhakahou o nga wahi i nga ara hei nohoanga.

<sup>13</sup> Ki te tahuri atu tou waewae i te hapati, i te mea i tau i pai ai i taku ra tapu, a ka kiia e koe te hapati he ahurareka, he tapu no Ihowa, he mea honore, a ka whakahonoretia ia e koe, ka kore hoki

14

e mahi i ou ara ake, e kite i au ake e ahuaireka ai, e korero i au korero ake: Katahi koe ka whai  
 oranga ngakau i roto i a Ihowa; ka meinga ano e ahau nga wahi tiketike o te whenua hei hoiho mou;  
 ka whangaia hoki koe ki te wahi tupu a tou papa, a Hakopa: na te mangai hoki o Ihowa te kupu.

## Chapter 59

1 Nana, kihai i mutua te ringa o Ihowa, te tau ai te whakaora; kihai ano i taimaha tona taringa,  
 te rongo ai ia. 2 Engari na o koutou he i wehe koutou ko to koutou Atua, na o koutou hara ano i  
 huna ai tona mata ki a koutou, te whakarongo ai ia. 3 Kua poke hoki o koutou ringa i te toto, o  
 koutou maihao i te he; ko o koutou ngutu kua korero teka, ko o koutou arero kei te whakapuaki i  
 te whanoke. 4 Kahore he karanga ki te tika, kahore he tohe ki te pono; ko te horihori to ratou  
 okiokinga, e korero teka ana ratou; ko to ratou hapu he nanakia, whanau ake te kino. 5 E paoa ana  
 e ratou nga hua o te neke, e hanga ana e ratou te whare pungawerewere: ko te tangata e kai ana i a  
 ratou hua ka mate, a ki te kopengia tetahi, ka puta he waipera. 6 E kore o ratou whare pungawerewere  
 e tau hei kakahu, e kore ano ratou e whai hipoki i a ratou mahi: ko a ratou mahi he mahi na te kino,  
 he mahi nanakia kei o ratou ringa. 7 E rere ana o ratou waewae i te kino, hohoro tonu hoki ratou  
 ki te whakaheke i te toto harakore: ko o ratou whakaaro he whakaaro ki te kino, he whakamoti, he  
 wawahi kei o ratou ara. 8 Kahore o ratou matauranga ki te ara o te rangimarie, kahore hoki he  
 whakawa i o ratou ara; ko o ratou huarahi, whakakopikopikoa ake e ratou: ko te hunga katoa e  
 haere ana na reira, e kore e mohio ki te rangimarie.

9 Na reira matara noa atu te whakawa i a tatou, te mau tatou i te tika: e taria atu ana e tatou te  
 marama, na ko te pouri; te tiaho, na kei te haere nei tatou i te pouri. 10 E whawha ana tatou ki te  
 taiepa ano he matapo, ae ra, me te mea ko te hunga kahore he kanohi: e tutuki ana o tatou waewae  
 i te poutumarotanga me te mea i te ahiahi; he rite tatou ki te tupapaku i roto i nga tangata pakari.

11 Kei te ngenere tatou katoa ano he pea; ko to tatou rite kei te kukupa e tumutumu tonu ana. E  
 tatari ana tatou ki te whakawa, heoi kua kahore; ki te whakaora, otiia kei tawhiti atu i a tatou.

12 Kua nui hoki o matou poka ke i tou aroaro, e whakaatu ana hoki o matou hara i to matou he; kei  
 a matou nei hoki o matou poka ke, a ko o matou kino, e mohiotia ana era e matou; 13 He poka ke,  
 he whakakahore ki a Ihowa, he peka atu i te whai i to matou Atua, he whanoke nga korero, he  
 whakakeke; kua hapu, kua puaki i te ngakau he kupu teka. 14 Kua tahuri atu nei ki muri te whakawa,  
 ko te tika tu mai ana i tawhiti; kua hinga hoki te pono i te waharoa, a kahore he tomokanga mo te

<sup>15</sup> tika. Ae ra, kua kore te pono; a ko te tangata e whakarere ana i te kino ka waiho hei taonga parau. Na ka kite a Ihowa, ka kino ki tana titiro, no te mea kahore he whakawa.

<sup>16</sup> Na titiro rawa mai ia, kahore he tangata, miharo ana ia no te mea kahore he kaiwawao; na, kei tona ringa he whakaora mona; ko tona tika, na tera ia i tautoko ake. <sup>17</sup> I kakahuria hoki e ia te tika hei pukupuku, ko te whakaora hei potae ki tona mahunga; kakahuria ana e ia nga kakahu o te

rapu utu hei kakahu, ropia mai ana te hae hei koroka. <sup>18</sup> Ko tana utu ka rite ki a ratou mahi, he riri

ki ona hoa whawhai, he utu ki ona hoariri; ki nga motu hoki ka homai e ia he utu. <sup>19</sup> Na ka wehingia te ingoa o Ihowa i te uru, tona kororia i te rawhiti. Ka haere mai hoki ia ano he awa e taheke ana,

e aia ana e te manawa o Ihowa. <sup>20</sup> A ka haere mai te kaihoko ki Hiona, ki te hunga o Hakopa e

tahuri atu ana i te poka ke, e ai ta Ihowa. <sup>21</sup> Ko ahau nei, ko taku kawenata tenei ki a ratou, e ai ta Ihowa: Ko toku wairua i a koe na, me aku kupu i hoatu e ahau ki tou mangai, e kore e neke atu i tou mangai, i te mangai o ou uri, i te mangai ano o nga uri o ou uri, e ai ta Ihowa, aianeia a ake tonu atu.

## Chapter 60

<sup>1</sup> E ara, kia marama; kua tae mai hoki tou marama, kua whiti te kororia o Ihowa ki a koe. <sup>2</sup> Tera hoki e hipokina te whenua e te pouri, nga iwi e te pouri kerekere; ka whiti ia a Ihowa ki a koe, ka

kitea hoki ki a koe tona kororia. <sup>3</sup> A ka haere mai nga tauwiwi ki tou marama, nga kingi ki ou hihi,

ina whiti mai. <sup>4</sup> Kia ara ou kanohi i tetahi taha, i tetahi taha, titiro atu hoki; kei te huihui ratou katoa, e haere mai ana ki a koe; ka haere mai au tama i tawhiti, ka hikitia hoki au tamahine ki nga ringa.

<sup>5</sup> Ka kite koe i reira, ka whakamaramatia, ka wehi ano tou ngakau, ka nui; no te mea ka tahuri ki a

koe nga mea maha o te moana, ka tae ano ki a koe nga taonga o nga tauwiwi. <sup>6</sup> Ka kapi koe i te kamera, he tini, i nga kamera tere o Miriana, o Epa; ka haere mai era katoa i Hepa: me te mau mai

ano i te koura, i te whakakakara; ka kauwhautia ano e ratou nga whakamoemiti ki a Ihowa. <sup>7</sup> Ka huihuia nga hipi katoa o Kerara ki a koe, hei kaimahi mau nga hipi toa o Nepaiota; ka manakohia

ratou ina eke ki runga ki taku aata, a ka whakakororiatia e ahau te whare o toku kororia. <sup>8</sup> Ko wai enei e rere nei ano he kapua, me he kukupa nei, ki o ratou matapihi?

<sup>9</sup> He pono ka tatari nga motu ki ahau, me nga kaupuke o Tarahihi i te tuatahi, ki te kawae mai i au tama i tawhiti: i a ratou, i ta ratou hiriwa, i ta ratou koura hoki, hei mea ki te ingoa o Ihowa, o

<sup>10</sup>  
 tou Atua, ki te Mea Tapu o Iharaira, no te mea ka oti koe te whakakororia e ia. Ka hanga ano  
 ou taiepa e nga tangata ke, ko o ratou kingi ano hei kaimahi mau: he riri hoki noku i patu ai ahau  
<sup>11</sup>  
 i a koe, he manako ia naku i atawhai ai ahau i a koe. Ka tuwhera tonu ano ou kuwaha: e kore e  
 tutakina i te ao, i te po, kia kawea mai ai nga taonga o nga tauwi ki a koe, kia arahina mai ai hoki  
<sup>12</sup>  
 o ratou kingi me ratou. Ko te iwi hoki, me te kingitanga, e kore e mahi ki a koe, ka ngaro; ina,  
<sup>13</sup>  
 ka moti rawa aua iwi. Ka tae mai te kororia o Repanona ki a koe, te kauri, te rimu, me te ake  
 ngatahi hei whakapaipai, mo te wahi i toku kainga tapu, a ka whakakororiatia e ahau te wahi o oku  
<sup>14</sup>  
 waewae. Ka haere mai ano, ka piko ki a koe nga tama a ou kaitukino, a ko te hunga katoa i  
 whakahawea ki a koe, ka piko ki nga kapu o ou waewae; a ka kiia koe, Ko te pa o Ihowa, Ko te  
 Hiona o te Mea Tapu o Iharaira.  
<sup>15</sup>  
 He mea whakarere nei koe i mua, he mea i kinongia, kahore hoki tetahi kia haere i waenganui  
 i a koe, na ka meinga koe e ahau hei mea nui e mau tonu ana, he kaonga ngakau ki nga  
<sup>16</sup>  
 whakatupuranga maha. Ka ngotea ano e koe te waiu o nga tauwi, ka ngotea te u o nga kingi: a  
<sup>17</sup>  
 ka mohio koe ko ahau, ko Ihowa, tou kaiwhakaora, tou kaihoko, te Mea Nui o Hakaopa. Ko te  
 parahi ka whakaputaia ketia e ahau hei koura, ko te rino ka whakaputaia ketia hei hiriwa, ka puta  
 ke te rakau hei parahi, ka puta ke nga kohatu hei rino; ko ou kaitohutuhu ka meinga he rongu e mau  
<sup>18</sup>  
 ana, ko ou kaiakiaki he tika. E kore e rangona i muri te mahi nanakia ki tou whenua; te whakamoti  
 te wawahi, ki ou rohe; engari ka kiia, ou taiepa, ko te Whakaoranga, ou kuwaha ko te Whakamoemiti.  
<sup>19</sup>  
 E kore te ra e waiho i muri hei whakamarama mou i te awatea; na, ko te marama e tiaho nei, e  
 kore tera e whakamarama i a koe; ko Ihowa hoki hei whakamarama mou ake ake, ko tou Atua hoki  
<sup>20</sup>  
 hei whakakororia i a koe. Heoi ano hekenga o tou ra, e kore ano tou marama e pewa; no te mea  
<sup>21</sup>  
 ko Ihowa hei whakamarama pumau mou, a ka mutu nga ra o tou tangihanga. Ko tou iwi hoki,  
 tika katoa, ka pumau tonu ki a ratou te whenua; he peka whakato naku, he mahi na oku ringa, kia  
<sup>22</sup>  
 whai kororia ai ahau. To te mea nohinohi putanga ake, he mano, to te mea iti, he iwi kaha: maku,  
 ma Ihowa, e whakahohoro i tona wa e rite ai.

## Chapter 61

<sup>1</sup>  
 Kei runga i ahau te wairua o te Ariki, o Ihowa; na Ihowa nei hoki ahau i whakawahi hei  
 kauwhau i te rongu pai ki te hunga mahaki; kua unga mai ahau e ia ki te takai i te hunga ngakau  
 maru, ki te kauwhau ki nga whakarau kia haere noa, ki nga hereh ere, kua tuwhera te whareherehere;

2

Kia karangatia te tau manako mai o Ihowa, te ra rapu utu o to tatou Atua; kia whakamarietia te hunga katoa e tangi ana: <sup>3</sup> Kia whakatakotoria he tikanga mo te hunga katoa o Hiona e tangi ana, kia whakaputaia ketia o ratou pungarehu hei ataahua, te tangihanga hei hinu koa, te wairua pouri hei kakahu whakamoemiti; a ka kiia ratou he rakau na te tika, he mea whakato na Ihowa, kia whai kororia ai ia.

4

Ka hanga ano e ratou nga wahi kua ururuatia noatia ake, ka ara i a ratou nga wahi kua kore rawa i mua, ka whakahoutia e ratou nga pa kua ururuatia, nga mea kua kore i era whakaturupuranga

5

noa atu. A ka tu te tangata ke, ka whangai i a koutou hipi, ko nga tama ano a te tangata ke hei

6

kaiparau ma koutou, hei kaitiaki waina ma koutou. Ko koutou ia ka kiia ko nga tohunga a Ihowa, ka kiia koutou ko nga minita a to tatou Atua: ko nga taonga o nga tauwiwi hei kai ma koutou, ko to

7

ratou kororia hei whakamanamana ma koutou. Mo to koutou whakama e rua nga whakautu; mo te numinumi kau ka koa ratou ki ta ratou wahi: ae ra, i to ratou whenua ka haere rua mai nga mea

8

ma ratou, ka mau tonu hoki to ratou koa. E aroha ana hoki ahau, a Ihowa, ki te whakawa, e kino ana ki te pahua, ki te whakahaere he; ka hoatu ano e ahau i runga i te pono ta ratou i mahi ai, ka

9

whakaritea he kawenata mau tonu ki a ratou. Ka matauria ano to ratou uri i roto i nga tauwiwi, o ratou whanau i roto i nga iwi: ko te hunga katoa e kite ana i a ratou ka mohio ki a ratou he uri no ta Ihowa i manaaki ai.

10

Ka nui toku koa ki a Ihowa, ka whakamanamana toku wairua ki toku Atua; kua whakakakahuria hoki ahau e ia ki nga kakahu o te whakaoranga, ropia mai ana e ia te tika ki ahau hei koroka; ka rite ki ta te tane marena hou e kopare nei i te whakapaipa i ki a ia, ki ta te wahine

11

marena hou whakapaipai i a ia ki ana mea whakapaipai. Ka rite hoki ki ta te whenua e mea nei i tona tupu kia kokiri ake, ki ta te kari e mea nei i nga mea kua whakatokia ki reira kia tupu, ka pena ano ta te Ariki, ta Ihowa, ka meinga e ia te tika me te whakamoemiti kia tupu ki te aroaro o nga iwi k atoa.

## Chapter 62

1

He whakaaro ki Hiona i kore ai ahau e noho hu, he whakaaro, ki Hiruharama te ata noho ai ahau, kia puta ra ano tona tika ano he tiahotanga, tona whakaoranga ano he rama e ka ana. <sup>2</sup> A ka

kite nga tauwiwi i tou tika, nga kingi katoa i tou kororia; a he ingoa hou e whakahuatia ki a koe, he

3

mea whakahua na te mangai o Ihowa. Hei karauna ataahua ano koe i te ringa o Ihowa, hei potae



kingi i te ringa o tou Atua. <sup>4</sup> E kore koe e kiia a muri ake nei, He mea whakarere; heoi ano kianga o tou whenua, He ururua; engari ka huaina koe, ko Hepetipa; tou whenua, ko Peura: no te mea ka ahuareka a Ihowa ki a koe, a ka whai tahu tou whenua. <sup>5</sup> Kei te marenatanga hoki o te taitamariki ki te wahine te rite o te marenatanga o au tamariki ki a koe; kei te koa hoki o te tane marena hou ki te wahine marena hou te rite o te koa o tou Atua ki a koe.

<sup>6</sup> Kua oti he kaitiaki te whakarite e ahau ki ou taiepa, e Hiruharama; e kore e kopia te mangai i te ao, i te po. E nga kaiwhakahua o to Ihowa ingoa, kei ata noho, <sup>7</sup> Kua hoki e whakamutua ta koutou ki a ia, kia whakapumautia ra ano a Hiruharama e ia, kia meinga ra ano hei whakamoemiti i runga i te whenua. <sup>8</sup> Kua oatitia e Ihowa tona ringa matau, tona takakau kaha, E kore e hoatu e ahau tau witi a muri hei kai ma ou hoariri; e kore ano nga tangata ke e inu i tau waina i mauui ai koe. <sup>9</sup> Engari ko nga tangata nana i whawhaki, ma ratou e kai, whakamoemiti tonu atu ki a Ihowa; a ko nga tangata nana i kohikohi mai, ka inumia e ratou ki nga marae o toku wahi tapu.

<sup>10</sup> Tika atu, tika atu ma nga kuwaha; whakapaia te ara o te iwi; opehia ake, opehia ake te huanui; kohikohia atu nga kamaka; whakaarahia he kara ki nga iwi. <sup>11</sup> Nana, kua korero a Ihowa ki te pito o te whenua, Mea atu ki te tamahine a Hiona, Nana, ko tou whakaoranga te haere mai nei! nana, kei a ia tona utu, kei tona aroaro ano tana mahi. <sup>12</sup> A ka huaina ratou, Ko te iwi tapu, Ko ta Ihowa i hoko ai; ka huaina ano hoki koe, He mea i rapua, He pa kahore i mahue.

### Chapter 63

<sup>1</sup> Ko wai tenei e haere mai nei i Eroma, he mea rongoa mai nga kakahu i Potorā? tenei he kororia rawa nei ona kakahu, e haere ana i runga i te nui o tona kaha? Ko ahau e korero atu nei i runga i te tika, ko te mea kaha ki te whakaora. <sup>2</sup> He aha i whero ai ou kakahu? i rite ai ou weweru ki o te kaitakahi i te takahanga waina? <sup>3</sup> Na toku kotahi te takahanga waina i takahi, kahore hoki he tangata o te iwi hei hoa moku: takahia iho ratou e ahau, he riri noku; takatakahia ana ratou e ahau ki raro, i ahau e weriweri ana; pati ana o ratou toto ki oku weruweru, whakapokea iho e ahau toku kakahu katoa. <sup>4</sup> Kei roto hoki i toku ngakau te ra o te rapu utu; kua tae mai ano te tau o aku i hoko ai. <sup>5</sup> Na ka titiro atu ahau, a kahore he kaiawhina, miharo ana ahau no te mea kahore he kaitautoko ake: na kua meatia e toku takakau, he whakaoranga moku; ko toku weriweri, na tera ahau i tautoko ake. <sup>6</sup> Na takahia ana e ahau nga iwi i ahau e riri nei; i ahau ano e weriweri ana ka whakahaurangitia ratou e ahau, a ringihia ana e ahau to ratou toto ki te whenua.

<sup>7</sup> Ka whakahuatia e ahau nga mahi aroha a Ihowa, nga whakamoemiti ki e Ihowa, ka rite ki nga mea i homai e Ihowa, ki a tatou; ki te nui hoki o te pai ki te whare o Iharaira i homai nei e ia ki a ratou; he mea i rite tonu ki ana mahi tohu tangata, ki te nui ano o ana mahi aroha. <sup>8</sup> I mea hoki ia, He pono, ko taku iwi ratou, he tamariki e kore e korero teka: na ko ia to ratou kaiwhakaora. <sup>9</sup> I o ratou pouritanga ngakau katoa i pouri ano ia, a whakaorangia ake ratou e te anahera o tona aroaro; he aroha nona, he mahi tohu tangata i hoko ai ia i a ratou, hikitia ana ratou, whakahaereerea ana i nga ra katoa onamata. <sup>10</sup> Heoi whakakeke ana ratou, whakapouritia iho e ratou tona wairua tapu. Na ka puta ke ia hei hoariri mo ratou; kei te whawhai ano ia ki a ratou. <sup>11</sup> Katahi ia ka mahara ki nga ra o mua, ki a Mohi, ki tana iwi, i mea ia, Kei hea ia nana ratou i kawae ake i te moana me nga hepara o tana kahuri? kei hea te kaiwhakanoho o tona wairua tapu ki waenganui i a ratou? <sup>12</sup> I arahi nei i a ratou, he meatanga na te ringa matau o Mohi, na tona takakau kororia? i wahi nei i nga wai i to ratou aroaro, hei mea i tetahi ingoa mona e mau tonu ana? <sup>13</sup> I arahi nei i a ratou i waenganui o te moana, ano he hoiho i te koraha, te hinga ratou? <sup>14</sup> Kei te kararehe e haere ana ki raro ki te awaawa te rite, pera tonu ta te wairua o Ihowa meatanga i a ratou kia okioki: pera tonu tau arahanga i tau iwi, i whai ingoa kororia ai koe. <sup>15</sup> Titiro mai i runga i te rangi, matakītiki mai i runga i te nohoanga o tou tapu, o tou kororia; kei hea tou ngakau nui, me au mahi nunui? ko te ohoohonga o ou whekau, ko au mahi tohu ka pehia iho ki ahau. <sup>16</sup> He pono ko koe to matou papa, kahore nei hoki a Aperahama e mohio ki a matou, kahore ano hoki a Iharaira e mahara ki a matou: ko koe, e Ihowa, to matou papa; ko to matou kaihoko, nonamata mai tou ingoa. <sup>17</sup> He aha koe, e Ihowa, i mea ai i a matou kia kotiti atu i au ara, whakapakeketia iho e koe o matou ngakau kia kua e wehi ki a koe? Hoki mai, kia mahara ki au pononga, ki nga hapu o tou kainga pumau. <sup>18</sup> He iti nei te wa i mau ai taua kainga ki te iwi o tou tapu: e takatakahia ana tou wahi tapu e o matou hoariri. <sup>19</sup> Kua meinga matou kia rite ki te hunga kihai nei koe i kingi mo ratou; ki te hunga kihai nei i huaina ki tou ingoa.

## Chapter 64

<sup>1</sup> Aue me i haehae koe i nga rangi, me i heke iho, me i rere a wai nga maunga i tou aroaro!  
<sup>2</sup> Kia rite ki te ngiha o te ahi tahu rara, ki te ahi e koropupu ai nga wai; kia mohiotia ai tou ingoa e ou hoariri, kia wiri ai nga iwi i tou aroaro! <sup>3</sup> I tau meatanga i nga mea wehi kihai nei i whakaaroa

<sup>4</sup>  
 e matou, i heke iho koe, rere a wai ana nga maunga i tou aroaro. Kahore hoki kia rangona noatia i mua, kihai i mohiotia e te taringa, kihai hoki te kanohi i kite i te Atua, ko koe anake, e mahi nei i nga mea mo te tangata e tatari ana ki a ia. <sup>5</sup> Ko tau, he whakatau ki te tangata e koa ana, e mahi ana i te tika, ki te hunga e mahara ana ki a koe i au ara. Nana, i riri na koe, he hara hoki no matou; kua roa noa atu matou ki aua ara, a ka ora ranei matou?

<sup>6</sup>  
 Ko matou katoa hoki kua rite ki te tangata poke, a ko o matou tika ki te kakahu kua paru: e memenge ana matou katoa ano he rau rakau; kei te hau te rite o o matou kino e kahaki nei i a matou.

<sup>7</sup>  
 Kahore hoki he tangata e karanga ana ki tou ingoa, e whakaoho ana i a ia ki te hopu i a koe: kua huna nei hoki e koe tou mata ki a matou, a kua huna matou e koe na o matou he. <sup>8</sup> Na inaianei, e Ihowa, ko koe to matou papa; ko matou te paru, ko koe to matou kaipokepoke; he mahi hoki matou katoa na tou ringa. <sup>9</sup> Kua, e Ihowa, e whakanuia rawatia te riri, kua hoki e mahara tonu ki te kino. Nana, titiro mai ra, he iwi matou katoa nau. <sup>10</sup> He koraha kau ou pa tapu, he koraha a Hiona, kua ururutia a Hiruharama. <sup>11</sup> Ko to matou whare tapu, ko to matou whare ataahua, ko te wahi i whakamoemiti ai o matou matua ki a koe, kua waiho hei kanga ma te ahi, moti iho a matou mea matenui katoa. <sup>12</sup> Ka whakamanawanui ranei koe, e Ihowa, ki enei mea? ka whakarongo puku ranei koe? ka nui rawa ranei tau whakatupukino i a matou?

## Chapter 65

<sup>1</sup>  
 E rapua ana ahau e te hunga kihai nei i ui ki ahau; e kitea ana ahau e te hunga kihai nei i kimi i ahau: i mea ahau, Tenei ahau, tenei ahau, ki te iwi kihai nei i karangatia toku ingoa ki a ratou.

<sup>2</sup>  
 Tuwhera tonu oku ringa i te ra roa nei ki te iwi tutu e haere nei i te ara kahore i pai, e whai ana i o ratou whakaaro ake, <sup>3</sup> Ki te iwi he whakapataritari tonu nei ta ratou ki ahau ki toku aroaro, he patu whakahere i roto i nga kari, he tahu whakakakara ki runga ki nga aata pereki; <sup>4</sup> E noho nei i nga urupa, e moe ana i roto i nga wahi ngaro; e kai ana i te kikokiko poaka, a he hupa no nga mea whakarihariha kei roto i a ratou oko. <sup>5</sup> Ko ta ratou kupu, Tu atu, kua e whakatata ki ahau; he tapu rawa hoki ahau i a koe. He paowa enei ki toku ihu, he ahi e ka ana, a pau noa te ra. <sup>6</sup> Nana, kua oti te tuhituhi ki toku aroaro; e kore ahau e whakarongo puku; ae ra, ka utua e ahau, ka utua ki roto ki o ratou uma, <sup>7</sup> Ara o koutou kino, hui atu ki nga kino o o koutou matua, e ai ta Ihowa, i tahu

whakakakara nei ki runga ki nga maunga, i whakaiti nei i ahau i runga i nga pukepuke: mo reira ka matua mehuatia atu e ahau ta ratou mahi ki to ratou uma.

8

Ko te kupu tenei a Ihowa, Ka rite ki te waina hou e kitea ana i roto i te tautau, a ka kiia, Kaua e whakakorea, he manaaki hoki kei roto; ka pera ano taku e mea ai, he whakaaro ki aku pononga,

9

kei kore ratou katoa. Ka whakaputaina ake ano e ahau he uri i roto i a Hakopa, i roto hoki i a Hura, he tangata mona nei aku maunga: ka riro ano a reira i aku i whiriwhiri ai, ka noho aku pononga

10

ki reira. A hei puninga hipi a Harono, hei tapapatanga te raorao i Akoro mo nga kau a taku iwi i rapu nei i ahau.

11

Ko koutou ia kua whakarere i a Ihowa, kua wareware ki toku maunga tapu, kua whakapaia

12

e koutou he tepu ma Kara, whakakiiia ana e koutou he ringihanga ki a Meni; Ka tukua atu koutou e ahau ma te hoari, ka tuohu koutou katoa, ka tukitukia: no te mea i karanga ahau, a kihai koutou i whakao mai, i korero ahau, a kihai koutou i whakarongo; heoi mahia ana e koutou te kino ki taku

13

tirohanga, whiriwhiria ana e koutou te mea kihai i paingia e ahau. Na ko te kupu tenei a te Ariki, a Ihowa, Nana, ko aku pononga, ka kai ratou, ko koutou ia ka matekai: nana, ko aku pononga, ka inu ratou, ko koutou ia ka matewai; nana, ko aku pononga, ka koa ratou, ko koutou ia ka whakama:

14

Nana, ko aku pononga, ka waiata ratou he koa no te ngakau, ko koutou ia ka tangi i te pouri o

15

te ngakau, ka aue i te maru o te wairua. A ka waiho ano e koutou to koutou ingoa hei kanga ma aku i whiriwhiri ai, a ka whakamatea koutou e te Ariki, e Ihowa, ka huaina hoki e ia he ingoa ke

16

ki ana pononga: Kia waiho te tangata e manaaki ana i a ia ano i te whenua, mana ia e manaaki i runga i te Atua o te pono; ko te tangata hoki e oati ana i te whenua, ko te Atua o te pono hei oati mana; no te mea ka warewaretia nga raru o mua, a no te mea kei te huna atu i oku kanohi.

17

Tenei hoki ahau kei te hanga i nga rangi hou, i te whenua hou; e kore ano o mua e maharatia,

18

e kore ano e puta ake ki te ngakau. Engari kia koa koutou, kia whakamanamana ki taku e hanga nei ake ake; no te mea tenei ahau te hanga nei i Hiruharama hei whakamanamananga, i tona iwi

19

ano hei koanga ngakau. Ka whakamanamana ano ahau ki Hiruharama, ka koa ki taku iwi: e kore

20

ano e rangona i muri te reo e tangi ana, te reo e aue ana i roto i a ia. Kahore o reira kohungahunga he torutoru nei ona ra ake ake, kahore he koroheke kihai i rite ona ra; no te mea kotahi rau nga tau

21

o te taitamariki i tona matenga; ko te tangata hara ia, kotahi rau nei ona tau, he mea kanga. Ka

22

hanga whare ano ratou, nohoia iho, ka whakatokia he mara waina, ka kainga ano nga hua. E kore e hanga e ratou hei nohoanga iho mo te tangata ke, e kore e whakatokia hei kai ma tetahi atu tangata: no te mea ka rite nga ra o taku iwi ki nga ra o te rakau, a ka roa aku i whiriwhiri ai e

23

ahuareka ana ki te mahi a o ratou ringa. E kore ratou e mauui noa, e kore e whanau hei mate;

no te mea he uri ratou no a Ihowa i manaaki ai, ratou tahi ano ko ta ratou whanau. <sup>24</sup> Kahore ano  
 ratou kia karanga noa, kua whakao atu ahau; i a ratou ano e korero ana, ka rongo ahau. <sup>25</sup> Ko te  
 wuruhi, ko te reme, ka kai tahi raua; ko te raiona, ka rite ki te kau, ka kai kakau witi; ko te nakahi,  
 ko te peuhu hei kai mana. E kore ratou e tukino, e whakamate, puta noa i toku maunga tapu, e ai  
 ta Ihowa.

## Chapter 66

<sup>1</sup> Ko te kupu tenei a Ihowa, Ko te rangi toku torona, ko te whenua toku turanga waewae: kei  
 hea te whare ka hanga nei e koutou moku? kei hea hoki te wahi hei okiokinga moku? <sup>2</sup> Ko enei  
 mea katoa hoki he mea hanga na toku ringa, a na kona enei mea katoa i oti ai, e ai ta Ihowa; ko  
 tenei ia taku e titiro ai, ko te tangata e iti ana, kua maru te wairua, a e wiri ana ki taku kupu. <sup>3</sup> Ko  
 te tangata e patu ana i te kau, me te mea e tukituki ana i te tangata; te tangata he reme nei tana  
 patunga tapu, me te mea he kaki kuri e poutoa ana e ia; te tangata e whakaeke ana i te whakahere,  
 me te mea e whakaeke ana i te toto poaka; te tangata e tahu ana i te whakakakara, me te mea e  
 manaaki ana i te whakapakoko. Ae ra, kua whiriwhiria e ratou o ratou ara, e ahuareka ana hoki to  
 ratou wairua ki a ratou mea whakarihariha. <sup>4</sup> Ka whiriwhiria ano e ahau o ratou whakaaro horihori,  
 a ka kawea a ratou i wehi ai ki runga ki a ratou; no te mea i karanga ahau, a kihai tetahi i whakao  
 mai, i korero ahau, a kihai ratou i rongo; heoi mahia ana e ratou te kino i taku tirohanga, a whiriwhiria  
 ana e ratou te mea kihai i paingia e ahau.  
<sup>5</sup> Whakarongo ki te kupu a Ihowa, e te hunga e wiri ana ki tana kupu; Ko o koutou tuakana i  
 kino ra ki a koutou, i pei ra i a koutou, he whakaaro ki toku ingoa, i mea, Kia whakakororiatia a  
 Ihowa, kia kite hoki matou i to koutou koa; na ka whakama ratou. <sup>6</sup> He reo, he ngangau, kei te pa,  
 he reo kei te temepara, ko te reo o Ihowa e whakautu ana i ona hoariri. <sup>7</sup> Kiano ia i whakamamae,  
 kua whanau; kiano i pa ona mamae, kua whanau he tane. <sup>8</sup> Ko wai i rongo i te penei? ko wai i kite  
 i nga mea penei? E whakamamae ranei te whenua i te ra kotahi? e whanau ranei te iwi i te meatanga  
 kotahi? whakamamae kau hoki a Hiona, kua whanau ana tama. <sup>9</sup> Tera ranei e meinga e ahau kia  
 taka te ara, a kia kaua e whanau? e ai ta Ihowa; ka meinga ranei e ahau kia whanau, a kopia iho te  
 kopu? e ai ta tou Atua. <sup>10</sup> Kia koa tahi me Hiruharama, whakamanamana ki a ia, e te hunga katoa  
 e aroha ana ki a ia; kia hari tahi me ia, kia hari, e te hunga katoa e tangi ana ki a ia. <sup>11</sup> He mea hoki  
 ka ngote koutou, a ka makona i te u, ara i ana whakamarie, he mea hoki ka whakatete koutou, a ka

12  
 ora te ngakau i te nui o tona kororia. Ko te kupu hoki tenei a Ihowa, Nana, ano he awa te rangimarie ka horahia atu e ahau ki a ia; ano he waipuke te kororia o nga tauwi: ko reira koutou

13  
 ngote ai; ka hikitia koutou ki ona kaokao, ka poipoia ki ona turi. Ka rite hoki ki te tangata e whakamarietia ana e tona whaea, ka whakamarie ano ahau ki a koutou; ka whai whakamarietanga

14  
 ano koutou i roto i Huriharama. Ka kite koutou i tenei, ka koa o koutou ngakau; ko o koutou whenua, koia ano kei te otaota te tupu; a ka mohiotia te ringa o Ihowa ki ana pononga, tona riri ki ona hoariri.

15  
 Nana, ka haere mai a Ihowa me te ahi, ko ona hariata koia ano kei te tukauati; ki te tuku i

16  
 tona riri i runga i te weriweri, i tana whakatupehupehu i roto i nga mura ahi. No te mea he ahi ta Ihowa, me tana hoari ano, ina totohe ia ki nga kikokiko katoa, ka tokomaha ano nga tupapaku a

17  
 Ihowa. Ko te hunga e whakatapu ana i a ratou, e pure ana i a ratou i nga kari, e whai ana i tetahi i waenganui, ko te hunga e kai ana i te kikokiko poaka, i te mea whakarihariha, i te kiore, ka pau

18  
 ngatahi ratou, e ai ta Ihowa. E mohio ana hoki ahau ki a ratou mahi, ki o ratou whakaaro. Tenei

19  
 ake ka huihuia e ahau nga iwi katoa, nga reo, a ka haere mai ratou, ka kite i toku kororia. Ka meinga ano e ahau he tohu ki roto i a ratou, ka unga ano e ahau o ratou morehu ki nga iwi, ki Tarahihi, ki Puru, ki Ruru, ki te hunga kukume kopere, ki Tupara, ki Iawana, ki nga motu i tawhiti kihai nei i rongo ki toku rongo, kihai ano i kite i toku kororia; a ka whakaaturia e ratou toku kororia

20  
 i roto i nga tauwi. Ka kawea mai ano e ratou o koutou teina katoa i roto i nga iwi katoa hei whakahere ki a Ihowa, i runga i te hoiho, i te hariata, i te amo, i te muera, i te kamera tere, ki toku maunga tapu ki Hiruharama, e ai ta Ihowa; ka rite ki ta nga tama a I haraira e kawea nei i te whakahere

21  
 i roto i te oko ma ki te whare o Ihowa. Ka tango hoki ahau i etahi o ratou hei tohunga, hei Riwaiti,

22  
 e ai ta Ihowa. Ka rite hoki ki te rangi hou, ki te whenua hou, ka hanga nei e ahau, a ka pumau

23  
 tonu ki toku aroaro, e ai ta Ihowa, ka pera te pumau o to koutou uri, o to koutou ingoa. A tenei ake ka haere mai nga kikokiko katoa i tenei marama, i tenei marama, i tenei hapati, i tenei hapati,

24  
 ki te koropiko ki toku aroaro, e ai ta Ihowa. A ka haere atu ratou, ka matakitaki ki nga tinana o nga tangata i he nei ki ahau: e kore hoki to ratou kutukutu e mate, e kore ano to ratou ahi e tineia, a hei mea whakarihariha ratou ki nga kikokiko katoa.

## Jeremiah

### Chapter 1

<sup>1</sup> Ko nga kupu a Heremaia tama a Hirikia, ko ia nei tetahi o nga tohunga i Anatoto i te whenua  
o Pineamine: <sup>2</sup> I puta nei ki a ia te kupu a Ihowa i nga ra o Hohia tama a Amono, kingi o Hura, i  
te tekau ma toru o nga tau o tona kingitanga. <sup>3</sup> I puta ano hoki i nga ra o Iehoiakimi tama a Hohia  
kingi o Hura, a taka noa te tekau ma tahi o nga tau o Terekia tama a Hohia kingi o Hura, taea noatia  
te whakaraunga o Hiruharama i te rima o nga marama.  
<sup>4</sup> Na i puta te kupu a Ihowa ki ahau, i mea, <sup>5</sup> Kiano koe i hanga e ahau i roto i te kopu, kua  
mohio ahau ki a koe, a kiano koe i puta mai i te puku, kua whakatapua koe e ahau; kua whakaritea  
<sup>6</sup> koe e ahau hei poropiti ki nga iwi. Na ka mea ahau, Aue, e Ihowa, e te Atua, nana, kahore e taea  
e ahau te korero, he tamariki nei hoki ahau. <sup>7</sup> Ano ra ko Ihowa ki ahau, Kaua e mea, He tamariki  
ahau: no te mea, ahakoa ko wai te hunga e unga atu ai koe e ahau, me haere tonu koe, me korero  
<sup>8</sup> hoki e koe nga mea katoa e whakahaua e ahau ki a koe. Kaua e wehi i a ratou; kei a koe hoki  
<sup>9</sup> ahau hei whakaora i a koe, e ai ta Ihowa. Na ka totoro mai te ringa o Ihowa, a ka pa ki toku  
<sup>10</sup> mangai; a ka mea a Ihowa ki ahau, Nana, kua hoatu nei e ahau aku kupu ki tou mangai: Titiro,  
no tenei ra i meinga ai koe e ahau hei whakatakoto tikanga ki nga iwi, ki nga kingitanga, hei unu  
atu, hei wahi iho, hei whakangaro, hei turaki iho, hei hanga, hei whakato.  
<sup>11</sup> I puta mai ano te kupu a Ihowa ki ahau, i mea, He aha te mea e kite na koe, e Heremaia?  
<sup>12</sup> Ano ra ko ahau, He peka aramona taku e kite nei. Ano ra ko Ihowa ki ahau, Ka pai tau tirohanga  
<sup>13</sup> atu; no te mea ka tirohia e ahau taku kupu, ka mahia. Na ko te rua o nga putanga mai o te kupu  
a Ihowa ki ahau; i mea ia, He aha te mea e kite na koe? Ano ra ko ahau, He kohua e koropupu ana  
<sup>14</sup> taku e kite nei, a ko tona mata e anga mai ana i te raki. Na ka mea a Ihowa ki ahau, Ka puta mai  
<sup>15</sup> i te raki he kino mo nga tangata katoa o te whenua. Tenei hoki ahau te karanga nei ki nga hapu  
katoa o nga kingitanga o te raki, e ai ta Ihowa; a ka haere mai ratou, ka whakatu i tona torona, i  
tona torona, ki te tomokanga i nga kuwaha o Hiruharama, ki ona taiepa katoa, a karapoi noa, ki nga  
<sup>16</sup> pa k atoa ano o Hura. Ka puaki ano i ahau aku whakawakanga ki a ratou mo o ratou kino katoa;  
mo ratou i whakarere i ahau, i tahu whakakakara ki nga atua ke, i koropiko ki nga mahi a o ratou  
<sup>17</sup> ringa. Na, ko koe, whitikiria tou hope, whakatika, korerotia ki a ratou nga mea katoa e whakahaua  
e ahau ki a koe; aua e wehi i a ratou, kei meinga koe e ahau kia numinumi kau ki to ratou aroaro.  
<sup>18</sup> No te mea hoki kua meinga koe e ahau i tenei ra hei pa taiepa, hei pou rino, hei taiepa parahi ki  
te whenua katoa, ki nga kingi o Hura, ki ona rangatira, ki ona tohunga, ki te iwi ano o te whenua.

19

A ka whawhai ratou ki a koe, otira e kore koe e taea e ratou; no te mea kei a koe ahau, e ai ta Ihowa, hei whakaora i a koe.

## Chapter 2

<sup>1</sup> I puta ano te kupu a Ihowa ki ahau, i mea, <sup>2</sup> Haere, karanga ki nga taringa o Hiruharama, mea atu, Ko te kupu tenei a Ihowa, E mahara ana ahau ki a koe, ki te mahi pai a tou tamarikitanga, ki <sup>3</sup> te aroha i tou marenatanga, i a koe i aru i ahau i te koraha, i te whenua kihai i whakatokia. He tapu a Iharaira ki a Ihowa, ko nga matamua ia o ona hua: ko te hunga katoa e kai ana i a ia, ka kiia <sup>4</sup> he he ta ratou; ka pa te kino ki a ratou, e ai ta Ihowa. Whakarongo ki te kupu a Ihowa, e te whare <sup>5</sup> o Hakopa, e nga hapu katoa o te whare o Iharaira: Ko te kupu tenei a Ihowa, He aha taku kino i mau i o koutou matua, i matara atu ai ratou i ahau, i whai ai ratou i te horihori, a horihori iho ratou? <sup>6</sup> Kahore hoki a ratou kainga ake, Kei hea a Ihowa, nana nei tatou i kawe mai i te whenua o Ihipa, nana nei tatou i arahi i te koraha, i te whenua titohea, he maha nei nga rua, i te whenua o te matewai, <sup>7</sup> o te atarangi o te mate, i te whenua kihai i h aerea e te tangata, kihai ano i nohoia e te tangata? A naku koutou i kawe mai ki te whenua maha ona hua, ki te kai i ona hua, i ona mea papai. Na, i to koutou taenga mai, kei te whakapoke i toku whenua, meinga ana e koutou toku wahi tupu hei mea <sup>8</sup> whakarihariha. Kahore nga tohunga i ki, Kei hea a Ihowa; ko nga kairahurahu o te ture, kahore i matau ki ahau; kua he hoki nga rangatira ki ahau; ko nga poropiti, na Paara nga tikanga i poropiti ai ratou, whaia ana e ratou nga mea kahore nei he pai. <sup>9</sup> Mo reira ka totohe ano ahau ki a koutou, e ai ta Ihowa, ka totohe hoki ahau ki nga tama a a <sup>10</sup> koutou tama. Tena ra, whiti atu ki nga motu o Kitimi titiro ai; unga tangata ano ki Kerara, ka <sup>11</sup> whakaaroaro marie; tirohia hoki mehemea tera ano te rite o tenei mea i mua. I whakaputaia ketia ranei ona atua e tetahi iwi, ehara nei ano i te atua? Na, ko toku iwi, kua whakaputaina ketia e ratou <sup>12</sup> to ratou kororia hei mea kahore ona pai. Miharo mai, e nga rangi, ki tenei, kia nui hoki te wehi, <sup>13</sup> kia ngaro noa iho, e ai ta Ihowa. Ka rua hoki nga he kua mahia nei e taku iwi; ko ahau, ko te puna o nga wai ora kua mahue i a ratou, haua iho e ratou etahi poka, he poka pakaru, e kore nei e mau te wai ki roto. <sup>14</sup> He pononga ranei a Iharaira? he pononga i whanau ki te whare? he aha ia i waiho ai hei <sup>15</sup> pahuatanga? Kua ngengere nga raiona kua o ki a ia, kua hamama: a kua meinga e ratou tona



whenua kia ururua; kua tahuna ona pa, kahore hoki te tangata noho i reira. <sup>16</sup> I pakaru ano tou

tumuaki i nga tamariki o Nopo, o Tahapanehe. <sup>17</sup> He teka ianei nau ano tenei i mahi ki a koe, i te

mea nau i whakarere a Ihowa, tou Atua, i a ia e arahi ana i a koe i te ara? <sup>18</sup> Tena ra ko te aha mau i te ara ki Ihipa i inu ai koe i nga wai o Hihoro? he aha ranei mau i te ara ki Ahiria, i inu ai koe i

nga wai o te awa? <sup>19</sup> Ko tou he ano hei riri i tau, ko ou tahuritanga ketanga ano hei papaki i a koe. Kia mohio koe, kia kite hoki, he mea kino, he mea kawa, kei tau whakarereanga i a Ihowa, i tou Atua, kahore hoki ou wehi ki ahau, e ai ta te Ariki, ta Ihowa o nga man o.

<sup>20</sup> I wahia hoki tou ioka e ahau i mua, motumotuhia ana e ahau ou here; a ki mai ana koe, E kore ahau e mahi; heoi i runga koe i nga pukepuke tiketike katoa, i raro hoki i nga rakau kouru nui

katoa, e koropiko ana, e kairau ana. <sup>21</sup> He waina pai ano koe i taku whakatokanga i a koe, he momo

pai katoa. Na te aha koe i puta ke ai ki ahau, he mea kua heke te tupu, he waina ke? <sup>22</sup> Ahakoa i horoi koe i a koe ki te hora, a nui noa tau hopi, e mau ana ano tou he ki toku aroaro, e ai ta te

Ariki, ta Ihowa. <sup>23</sup> He pehea tau ki, Kahore oku poke, kihai ahau i whai i a Paarimi? Tirohia iho ou ara i te raorao, kia mohio ki au mahi. Tou rite, kei te kamera tere kopikopiko tonu ona ara; <sup>24</sup>

Kei te kaihe mohoa kua mohio ki te koraha, e hongia ana i te hau mo tona hiahia; ka matenui ia ko wai hei whakahoki i a ia? ko te hunga katoa e rapu ana i a ia e kore e whakangenge noa i a ratou;

i tona marama ano ka kitea ia e ratou. <sup>25</sup> Kaiponuhia tou waewae, kei kore te hu, tou korokoro hoki kei mate i te wai. Na, kei te mea koe, Kua he: kahore; he tangata ke hoki aku i aroha ai, a ko ratou

taku e whai ai. <sup>26</sup> Ka whakama te tahae ina mau, ka pena ano te whare o Iharaira, ka whakama;

ratou ko o ratou kingi, ko o ratou rangatira, ko o ratou tohunga, ko o ratou poropiti, <sup>27</sup> I a ratou e mea na ki te rakau, Ko koe toku papa; ki te kamaka, I whanau ahau i roto i a koe, hurihia ake e ratou ko te kohamo ki ahau, kahore hoki te aroaro: heoi i te wa e he ai ratou, ka ki mai ratou,

Whakatika ki te whakaora i a matou. <sup>28</sup> Kei hea ra ou atua i hanga e koe mou? kia whakatika ratou, ki te mea ka ora koe i a ratou i te wa e he ai koe: rite tonu hoki ki ou pa te maha o ou atua, e Hura.

<sup>29</sup> He aha te mea e totohe ai koutou ki ahau? kua mahi ke koutou katoa i te kino ki ahau, e ai

ta Ihowa. <sup>30</sup> Maumau whiu noa ahau i a koutou tamariki; kihai ratou i akona: ko ta koutou hoari

nana i kai o koutou poropiti, i pera ano me ta te raiona kai kino. <sup>31</sup> E te whakatupuranga nei, whakaaroa te kupu a Ihowa, He koraha ranei ahau ki a Iharaira? he whenua pouri kerekere? he aha

taku iwi i mea ai, Kua matara matou; heoi ano o matou taenga atu ki a koe? <sup>32</sup> E wareware ranei te kotiro ki ana whakapaipai, te wahine marena hou ki ona whitiki? ko taku iwi ia kua wareware

<sup>33</sup>  
 ki ahau, e kore nga ra e taea te tatau. Tau mahi ki te whakapai i tou ara hei rapunga i te aroha!  
 Na kei te whakaako koe i nga wahine kikino ano hoki ki ou ara. <sup>34</sup> Kua kitea ano ki nga remu o  
 ou kakahu te toto o nga wairua o nga ware harakore. Kihai i kitea e ahau i te wahi i pakaru ai, engari  
<sup>35</sup>  
 i runga i enei katoa. Heoi kei te ki na koe, He harakore nei ahau; he pono e tahuri ke atu ana  
 tona riri i ahau. Nana, ka whakawa ahau i a koe, mo tau kianga, Kahore oku hara. <sup>36</sup> He aha koe i  
 kopikopiko rawa ai, i mea ai kia pokaia ketia he ara mou? Ka whakama ano koe ki Ihipa, ka pera  
<sup>37</sup>  
 me koe i whakama ra ki Ahiria. Ina, ka haere atu ano koe i reira, i runga ano ou ringa i tou  
 matenga, no te mea kua paopao a Ihowa ki ou whakawhirinakitanga, e kore ano koe e whai wahi  
 i ena.

### Chapter 3

<sup>1</sup>  
 E korerotia ana, kite whakarerea e te tangata tana wahine, a ka haere atu ia i tona taha, ka riro  
 i te tane ke, e hoki ano ranei ia ki a ia? E kore ianei taua whenua e poke rawa? Ko koe ia kua kairau  
<sup>2</sup>  
 ki nga hoa tokomaha: na, hoki mai ki ahau, e a i ta Ihowa. Kia ara ou kanohi ki nga pukepuke  
 moremore, tirohia; ko tehea te wahi i kore ai koe e puremutia? Nohoa atu ana ratou e koe i nga  
 ara, pera ana me te Arapi i te koraha; a poke iho i a koe te whenua i ou kairautanga, i tau mahi kino.  
<sup>3</sup>  
 Na reira i kaiponuhia ai nga ua, kahore hoki he ua o muri; engari he rae tou no te wahine kairau,  
<sup>4</sup>  
 e whakakahore ana ki te whakama. E kore ianei koe e karanga ki ahau i nga wa a muri nei, E toku  
 papa, ko koe te kaiarahi o toku taitamarikitanga? <sup>5</sup> E mau ranei tona riri a ake ake? E whakapumautia  
 tonutia ranei e ia? Nana, kua korerotia e koe, kua mahia nga mea kino, kua rite ki tau.  
<sup>6</sup>  
 I ki mai ano a Ihowa ki ahau i nga ra o Kingi Hohia, Kua kite ranei koe i nga mahi a Iharaira  
 tahuri ke? kua haere ia ki runga ki nga maunga tiketike katoa, ki raro i nga rakau kouru nui katoa,  
<sup>7</sup>  
 ki reira kairau ai. I mea ano ahau i muri i tana meatanga i enei mea katoa, Ka hoki mai ia ki ahau;  
<sup>8</sup>  
 heoi kihai ia i hoki mai, me te titiro ano tona tuakana tinihanga, a Hura. A i kite ahau, i taku  
 peinga atu i a Iharaira tahuri ke mo taua take nei ano, mo tona puremutanga, a i taku hoatutanga  
 he pukapuka whakarere ki a ia, na kihai tona tuakana, a Hura tinihanga i wehi; heoi haere ana ano  
<sup>9</sup>  
 ia, kairau ana. Na, ko te otinga, kua poke te whenua i te rongo o tona puremutanga, puremu ana  
<sup>10</sup>  
 ia ki te kohatu, ki te rakau. Na ahakoa ko tenei katoa, kihai i whakapaua te ngakau o tona tuakana

11  
tinihanga, o Hura, ki te hoki ki ahau; he hoki teka kau ia, e ai ta Ihowa. Na ka mea a Ihowa ki ahau, A Iharaira tahuri ke, nui atu tana whakatika i a ia i ta Hura, i ta te mea tinihanga.

12  
Haere, karangatia enei kupu whaka te raki, mea atu, Hoki mai, e Iharaira tahuri ke, e ai ta Ihowa; e kore ahau e mea i toku riri kia tau ki a koutou; he atawhai hoki ahau, e ai ta Ihowa, e kore

13  
ahau e mauahara tonu. Whakina kautia tou he, ara kua kino koe ki a Ihowa, ki tou Atua, kua whakamararatia atu e koe ou ara ki nga tangata ke i raro i nga rakau kouru nui katoa, kihai ano i

14  
rongo ki toku reo, e ai ta Ihowa. Hoki mai, e nga tamariki tahuri ke, e ai ta Ihowa; kua marenatia hoki koutou e ahau: a ka tangohia koutou e ahau, tetahi i roto i te pa, tokorua hoki i roto i te hapu,

15  
ka kawea ano koutou e ahau ki Hiona. A ka hoatu e ahau he hepara mo koutou, ko aku i pai ai,

16  
ka whangaia ano koutou e ratou ki te matauranga, ki te whakaaro pai. A tenei ake, ina nui, ina hua koutou ki te whenua i aua ra e ai ta Ihowa, heoi ano a ratou kianga ake, Ko te aaka o te kawenata a Ihowa; e kore ano e puta ake ki te ngakau; e kore hoki e maharatia taua mea e ratou, e kore ano

17  
ratou e haereere ki reira, kahore hoki he mahinga pera i muri iho. I taua wa ka kiia e ratou a Hiruharama, ko te torona o Ihowa; a ka huihuia nga iwi katoa ki reira, ki te ingoa o Ihowa, ki

18  
Hiruharama; a heoi ano to ratou haere i runga i te maro o o ratou ngakau kino. I aua ra ka haere tahi te whare o Hura raua ko te whare o Iharaira, ka huihuia ano to ratou haere mai i te whenua i

19  
te raki, ki te whenua i hoatu e ahau hei kainga tupu ki o koutou matua. I mea ano ahau, Me pehea e oti ai koe te whakauru e ahau ki nga tamariki, e hoatu ai e ahau ki a koe he whenua e minaminatia ana, he kainga tupu, he wahi ataahua no nga mano o nga iwi? i mea ano ahau, ka karangatia ahau e koe, E toku papa, e kor e ano koe e tahuri atu i te whai i ahau.

20  
Rite rawa ki ta te wahine i whakarere tinihanga i tana tahu ta koutou mahi tinihanga ki ahau,

21  
e te whare o Iharaira, e ai ta Ihowa? E rangona ana he reo i runga i nga puke moremore, ko te tangi, ko nga inoi hoki a nga tama a Iharaira; mo ratou i whakaparori ke i to ratou ara, wareware

22  
ake i a ratou a Ihowa, to ratou Atua. Hoki mai, e nga tamariki tahuri ke, maku e rongoa o koutou tahuritanga ketanga. Tenei matou te haere atu nei ki a koe; ko koe hoki a Ihowa, to matou Atua.

23  
He pono, he hori kau te awhina e taria ana mai i nga pukepuke, te nge i runga i nga maunga: tika

24  
rawa kei a Ihowa, kei to tatou Atua te whakaora mo Iharaira. Kua pau hoki i te mea whakama te mauui o o tatou matua, no to tatou tamarikitanga ake ano; a ratou hipi, a ratou kau, a ratou tama,

25  
me a ratou tamahine. Takoto tatou i roto i to tatou whakama, ma to tatou matangerengere tatou e hipoki: kua hara hoki tatou ki a Ihowa, ki to tatou Atua, tatou ko o tatou matua, no to tatou tamarikitanga ake ano a mohoa noa nei; kihai hoki tatou i rongo ki te reo o Ihowa, o to tatou Atua.

## Chapter 4

<sup>1</sup> Ki te mea ka hoki mai koe e Iharaira, e ai ta Ihowa, hoki mai ki ahau; ki te whakarerea ano e koe au mea whakarihariha i toku aroaro, e kore koe e riro ke; <sup>2</sup> Ka oati ano koe, Kei te ora a Ihowa i runga i te pono, i te whakawa ai, ki te tika, mana hoki nga iwi ka whakapai ai ki a ratou ano, ka whakamanamana ano ratou ki a ia.

<sup>3</sup> Ko te kupu hoki tenei a Ihowa ki nga tangata o Hura, a ki Hiruharama, Ngakia ta koutou patohe: kua hoki e whakato ki roto ki nga tataramoa. <sup>4</sup> Kotia hoki koutou, hei mea ki a Ihowa, whakarerea hoki nga kiri matamata o o koutou ngakau, e nga tangata o Hura, e te hunga ano e noho ana i Hiruharama; kei puta toku riri ano he ahi, kei mura, a kahore e tineia, mo te kino hoki o a koutou mahi.

<sup>5</sup> Karangatia i roto i a Hura, kia rongu a Hiruharama, mea atu, Whakatangihia te tetere ki te whenua: karanga, mea atu, Whakamine mai, tatou ka haere ki nga pa taiepa. <sup>6</sup> Whakaarahia te kara ki te ritenga o Hiona, putere atu koutou, kua e tu; no te mea ka kawea mai e ahau he kino i te raki, he whatianga nui. <sup>7</sup> Kei te haere mai he raiona i tona urupuia rakau, kei te ara ano he kaiwhakangaro mo nga tauiwii; kei te ara ia, kua puta mai ia i tona wahi; hei whakangaro i tou whenua, hei mea i ou pa kia ururua, kahore he tangata hei noho. <sup>8</sup> Mo konei whitikiria he kakahu taratara ki a koutou, e tangi, aue; no te mea kahore te muranga o to Ihowa riri e tahuri atu i a tatou. <sup>9</sup> I taua ra, e ai ta Ihowa, ka pirau te ngakau o te kingi, me te ngakau o nga rangatira; a ka miharo nga tohunga, a ko

nga poropiti ketekete kau ana. <sup>10</sup> Ano ra ko ahau, Aue, e te Ariki, e Ihowa, kua pohehe rawa i a koe tenei iwi, a Hiruharama ano, i te kupu nei, Ka mau te rongu ki a koutou. Tena ia, kua pa te

<sup>11</sup> hoari ki te wairua. I taua wa ka korerotia ki tenei iwi, ki Hiruharama ano, He hau wera no nga wahi tiketike i te koraha e tika mai ana ki te tamahine a taku iwi, ehara i te mea hei powhiriwhiri,

<sup>12</sup> hei tahi ranei; He hau totopu no aua wahi ka tae mai ki ahau. Akuanei ahau whakapuaki ai i te

<sup>13</sup> whakawa mo ratou. Nana, ko tona haerenga mai ka rite ki nga kapua, rite tonu ano ona hariata ki te tukauati; he tere rawa ona hoiho i te ekara. Aue, te mate mo tatou! kei te pahuatia hoki tatou.

<sup>14</sup> Horoia atu te kino o tou ngakau, e Hiruharama, kia ora ai koe. Kia pehea te roa o te noho o ou

<sup>15</sup> whakaaro kino i roto i a koe? No te mea e whakaatu mai ana he reo i Rana, e mea ana hoki i te

<sup>16</sup> kino kia rangona I maunga Eparaima. Korero ki nga iwi; nana, kia rangona te he mo Hiruharama,

<sup>17</sup> kei te haere mai he kaitiaki i te whenua tawhiti, ka puaki to ratou reo mo nga pa o Hura. Ko ta ratou ki a ia rite tonu ki ta nga kaitiaki o te mara i tetahi taha, i tetahi taha, mona i tutu ki ahau, e

18  
ai ta Ihowa. Na tou ara, na au mahi, enei i pa ai ki a koe; nou tenei he; he kawa hoki, kua pa hoki ki tou ngakau.

19  
Oku whekau, oku whekau! mamae pu a roto o toku ngakau, oho ana toku ngakau i roto i ahau; e kore ahau e whakarongo puku; kua rongo hoki koe, e toku wairua, ki te tangi o te tetere, ki

20  
te hamama o te whawhai. He ngaromanga hono iho ki te ngaromanga te karangatia nei; kua pahuatia katoatia hoki te whenua; kitea rawatia ake kua pahuatia oku teneti, mea kau iho ko oku

21  
kakahu arai. Kia pehea ake te roa oku ka titiro nei ki te kara, ka rongo nei ki te tangi o te tetere?

22  
He wairangi hoki taku iwi, kahore e mohio ki ahau: he tamariki kuware, kahore o ratou

matauranga; e mohio ana ratou ki te mahi kino, ki te mahi pai ia kahore he matauranga. I titiro ahau ki te whenua, na, kahore he ahua, e takoto kau ana, ki nga rangi ano, na, kahore o reira marama.

24  
I titiro ahau ki nga maunga, na, e ngaueue ana, a ko nga pukepuke katoa e nekeneke haere ana.

25  
I titiro ahau, a kahore he tangata, a ko nga manu katoa o te rangi kua rere atu. I titiro ahau, na, he koraha kau te mara momona, kua pakura ona pa katoa i te aroaro o Ihowa, i te muranga o

27  
tona riri. Ko te kupu hoki tenei a Ihowa, Ka ururua katoa te whenua, otiia e kore e whakapaua

28  
rawatia e ahau. Mo konei ka tangi te whenua, ka mangu ano te rangi i runga: no te mea kua korero nei ahau, kua takoto toku whakaaro, a kahore ano i puta ke taku, e kore hoki ahau e tahuri

29  
atu i tena. Ka whati katoa te pa i te ngangau o nga hoia eke hoiho, o nga kaikopere; ka haere ratou ki roto ki nga urupuia rakau, ka piki ki nga kamaka: ka mahue katoa nga pa, kahore hoki

30  
tetahi tangata e noho ki roto. A, ko koe, kia oti koe te pahua, ka pehea koe? Ahakoa kakahu noa koe i te ngangana, ahakoa whakapaipai noa koe i a koe ki nga whakapaipai koura, ahakoa haehae noa koe i ou kanohi, mea rawa ki te pukepoto, maumau mea noa koe i a koe kia ataahua; ka

31  
whakahawe ki a koe te hunga i aroha ki a koe, ka whai kia mate koe. Kua rongo hoki ahau i te reo, me te mea no te wahine e whanau ana, he mamae, me te mea ko tana matamua e puta ana, ko te reo o te tamahine a Hiona e whakahotuhotu ana, whewhera tonu ona ringa, me te karenga, Aue te mate i ahua! kua hemo hoki toku wairua i mua i nga kaiwhakamate.

## Chapter 5

1  
E oma, kopikopiko koutou i nga ara o Hiruharama, tirohia kia mohio ai koutou, rapua i nga waharoa o reira, me kahore e kite i tetahi tangata, mehemea tera he tangata e whakarite pai ana, e

2  
rapu ana i te pono; a ka murua e ahau nga he o reira. Na ahakoa mea noa ratou, Kei te ora a Ihowa;

<sup>3</sup> he pono he oati teka ta ratou. He teka ianei, e Ihowa, kei runga ou kanohi i te pono? i whiua ratou e koe, heoi kihai i pouri; moti iho ratou i a koe, heoi kahore i pai kia anga mai ki te ako; kua meinga

<sup>4</sup> e ratou o ratou mata kia maro atu i te kohatu, kua kore e pai ki te hoki mai. Koia ahau i mea ai, He pono he rawakore enei, he kuware, kahore hoki ratou e mohio ki te ara a Ihowa, ki te whakarite

<sup>5</sup> a to ratou Atua; Ka haere ahau ki nga tangata rarahi, ka korero ki a ratou; e mohio ana hoki ratou ki te ara a Ihowa, ki te whakarite a to ratou Atua: heoi ko enei, kotahi tonu ratou tahi nana i wawahi

<sup>6</sup> te ioka, i motumotu hoki nga here. Mo reira ka whakamatea ratou e te raiona i roto i te ngahere, ka pahuatia e te wuruhi o nga ahiahi, ka tuteia o ratou pa e te reparo, ko te hunga katoa e puta mai ki waho ka haehaea; he maha hoki o ratou pokanga ketanga, kua nui haere o ratou tah uritanga

<sup>7</sup> ketanga. Me pehea e murua ai e ahau tenei he ou? kua whakarere nei au tama i ahau, oatitia ana e ratou nga mea ehara nei i te atua; i to ratou makonatanga i taku kai, na kei te puremu, ropu tonu

<sup>8</sup> ratou i roto i nga whare o nga wahine kairau. Ko to ratou rite kei te hoiho whangai i te ata: e tangi

<sup>9</sup> ana ki te wahine a tona hoa, a tona hoa. E kore ianei ahau e whiu mo enei mea? e ai ta Ihowa: e kore ianei toku wairua e rapu utu i te iwi penei?

<sup>10</sup> Haere koutou ki runga ki ona taiepa wawahi ai; otiia kua e whakapaua rawatia;

<sup>11</sup> whakakahoretia ona pekerangi; ehara hoki ena i a Ihowa He nui hoki te tinihanga o te whare o

<sup>12</sup> Iharaira raua ko te whare o Hura ki ahau, e ai ta Ihowa. Kua whakakahore ratou ki ta Ihowa, kua mea, ehara i a ia; e kore hoki te he e tae mai ki a tatou; e kore ano tatou e kite i te hoari, i te

<sup>13</sup> hemokai. Ko nga poropiti he hau kau, kahore hoki he kupu i a ratou: ko enei mea ka pa ki a

<sup>14</sup> ratou. Na reira tenei kupu a Ihowa, a te Atua o nga mano, Mo ta koutou korerotanga i tena kupu, tenei ahau te mea nei i aku kupu i roto i tou mangai hei ahi, ko tenei iwi hoki hei rakau, a ka pau

<sup>15</sup> ratou. Tenei ahau te kawe nei i tetahi iwi o tawhiti ki a koutou, e te whare o Iharaira, e ai ta Ihowa; he iwi kaha, he iwi nonamata riro, he iwi kahore nei koe e mohio ki tona reo, kahore ano

<sup>16</sup> hoki e marama ki tana e korero ai. Ko tana papa pere he urupa tuwhera, he tangata marohirohi

<sup>17</sup> katoa ratou. A ka pau i a ratou au hua e kotia ana, me tau taro, nga kai hei kainga ma au tama, ma au tamahine; ka pau i a ratou au hipi me au kau; ka pau i a ratou au waina me au piki; ka hautopea

<sup>18</sup> iho ki te hoari ou pa taiepa, au i whakawhirinaki ai. Ahakoa i aua ra ano, e ai ta Ihowa, e kore

<sup>19</sup> e whakapaua rawatia taku ki a koutou. Na, ki te ki mai koutou a mua, He aha a Ihowa, to tatou Atua i mea ai i enei mea katoa ki a tatou? ko reira koe ki atu ai ki a ratou, Ka pena i a koutou kua whakarere na i ahau, kua mahi na ki nga atua ke i to koutou whenua, waihoki ka mahi koutou ki nga tangata ke i te whenua ehara nei i a koutou.

<sup>20</sup> Whakaaturia tenei i roto i te whare o Hakopa, kia rangona ano i roto i a Hura; mea atu,  
<sup>21</sup> Tena, whakarongo ki tenei, e te iwi wairangi kahore nei he ngakau, he kanohi nei o ratou, heoi  
 kahore e kite, he taringa o ratou, a kahore e rongo. <sup>22</sup> Kahore ranei o koutou wehi ki ahau? e ai ta  
 Ihowa; e kore ianei koutou e hopohopo ki toku aroaro? naku nei hoki i mea te onepu hei rohe ki te  
 moana, he tikanga mau tonu, e kore ano e koni mai: ahakoa ngana noa ona ngaru, e kore e taea ta  
 ratou; hamama noa, e kore ano e koni mai. <sup>23</sup> Ko tenei iwi ia, he tutu, he whakakeke o ratou ngakau;  
<sup>24</sup> kua peka ke atu ratou, kua riro. Kahore hoki a ratou kianga ake i roto i o ratou ngakau, Tena,  
 kia wehi tatou ki a Ihowa, ki to tatou Atua, ko ia nei te kaihomai i te ua; i to mua, i to muri, i te wa  
 e tika ai; nana nei i mau ai ki a tatou nga wiki i whakaritea mo te kotinga.  
<sup>25</sup> Na o koutou he enei i puta ke ai, ko o koutou hara ano hei kaiponu atu i te pai i a koutou.  
<sup>26</sup> E kitea ana hoki he hunga kino i roto i taku iwi: titiro matatau mai ana ratou, me te mea he  
 kaihopu manu e kupapa ana; kei te whakatakoto mahanga ratou, kei te hopu tangata. <sup>27</sup> Kei te  
 whare manu e ki ana i nga manu te rite o o ratou whare e ki tonu nei i te tinihanga: na reira ratou i  
 nui ai, i whai taonga ai. <sup>28</sup> Tetera tonu ratou, towahiwahi ana; kua neke rawa ake ta ratou i nga  
 mahi a te hunga kino: ko te whakawa, ko te whakawa a te pani, kahore i whakaritea e ratou, heoi  
 kake tonu ratou; kahore hoki e whakatikaia e ratou te whakawa a nga rawakore. <sup>29</sup> E kore ranei  
 ahau e whai mahara ki enei mea? e ai ta Ihowa; e kore ranei toku wairua e rapu utu i te iwi penei?  
<sup>30</sup> Whakamiharo rawa, whakawehi rawa te mea e meatia ana ki te whenua; <sup>31</sup> E poropiti teka ana  
 nga poropiti; a e whakahaere ana nga tohunga, ko ta ratou te tikanga; a pai tonu taku iwi ki te pena.  
 Na ka pehea ra koutou i tona tukunga iho?

## Chapter 6

<sup>1</sup> Putere atu, e nga tama a Pineamine, i roto i Hiruharama, whakatangihia te tetera ki Tekoa,  
 kokiritia ake he ahi tohu ki Petehakereme: he kino hoki te titiro mai nei i te raki, he  
 whakangaromanga nui. <sup>2</sup> Ka tapahia atu e ahau te wahine ataahua, te wahine whakatarapi, te  
 tamahine a Hiona. <sup>3</sup> Ka haere mai nga hepara, me a ratou kahui ki a ia; ka whakaturia o ratou teneti  
 ki tetahi taha ona, ki tetahi taha; ka kai ratou ki tona wahi, ki tona wahi. <sup>4</sup> Kia rite nga mea mo te  
 whawhai ki a ia; whakatika, kia whakaekea i te poutumarotanga. Aue, te mate mo tatou! kua  
<sup>5</sup> tawharara hoki te ra, kua whakawairua kau ano nga atarangi o te ahiahi. Maranga, kia whakaekea

e tatou i te po, kia wawahia ano ona whare kingi. <sup>6</sup> Ko te kupu hoki tenei a Ihowa o nga mano, Tuaina he rakau, haupuria ake he pukepuke hei whawhai ki Hiruharama; ko te pa tenei e whiua;

he tukino kau tana i roto i a ia. <sup>7</sup> Rite tonu ki te pukenga ake o te wai o te puna te pukenga ake o tona kino: he tukino, he pahua te rangona ana i roto i a ia; kei toku aroaro tonu te mamae me te

patunga. <sup>8</sup> E ako, e Hiruharama, kei puta ke toku ngakau ki a koe, kei meinga koe e ahau kia ururuatia, he whenua kahore e nohoia.

<sup>9</sup> Ko te kupu tenei a Ihowa o nga mano, Ka ata, hamua marietia nga toenga o Iharaira, ano he waina; kia rite tau ki ta te kaikohi karepe, whakahokia iho tou ringa ki roto ki nga kete. <sup>10</sup> Ki a wai ra taku korero, taku whakaatu tikanga, e rongoi ai ratou? nana, he mea kokotikore to ratou taringa, te whakarongo ai ratou: nana, hei tawainga ma ratou te kupu a Ihowa, kahore e arongia e ratou.

<sup>11</sup> Na, ki tonu ahau i te riri o Ihowa; ruha iho ahau i te koromaki: ringihia ki runga ki te kohungahunga i te ara, ki te whakaminenga ano o nga taitamariki, hui katoa: no te mea ka hopukia

te tane raua ko te wahine, te koroheke raua ko te tangata kua maha ona ra. <sup>12</sup> Ka riro ke o ratou whare i etahi atu, nga mara ngatahi ano ko nga wahine: no te mea ka totoro toku ringa ki nga tangata

o te whenua, e ai ta Ihowa. <sup>13</sup> Ko te mea iti o ratou, ko te mea nui hoki kei runga i te apo; ko te

poropiti, ko te tohunga, ratou katoa kei te mahi teka: <sup>14</sup> Ko ta ratou rongotanga hoki i te mamae o taku iwi he hanga noa iho; e ki ana, Ka mau te rongoi, ka mau te rongoi; i te mea kahore nei he

maunga rongoi. <sup>15</sup> I whakama ranei ratou i a ratou e mahi ana i nga mea whakarihariha? hore rawa o ratou whakama, kahore hoki i mohio ki te numinumi: mo reira ka hinga ratou i roto i te hunga e

hinga ana: i te wa e whiu ai ahau i a ratou, ka whakataka ratou, e ai ta Ihowa. <sup>16</sup> Ko te kupu tenei a Ihowa, E tu ki nga ara, tirohia atu, uia nga ara tawhito kei hea te ara pai, ka haere i reira, a ka kite koutou i te tanga reira, a ka kite koutou i te tanga manawa mo o koutou wairua. Heoi e ki mai ana

ratou, E kore matou e haere i reira. <sup>17</sup> I whakaturia ano e ahau etahi kaitutei mo koutou, i mea ahau, Whakarongo ki te tangi o te tetere. Heoi e ki ana ratou, E kore matou e whakarongo.

<sup>18</sup> Mo reira, whakarongo, e nga iwi, kia mohio ano koe, e te huihui, ki nga mea kei roto i a

ratou. <sup>19</sup> Whakarongo, e te whenua; tenei ahau te kawae mai nei i te kino mo tenei iwi, i nga hua o o ratou whakaaro; mo ratou kihai i whakarongo ki aku korero; ko taku ture, paopaongia ake e ratou.

<sup>20</sup> Hei aha te whakakakara i tae mai ai ki ahau i Hepa, te kakaho kakara i te whenua tawhiti? e kore

a koutou tahunga tinana e arongia, e kore ano a koutou patunga tapu e reka ki ahau. <sup>21</sup> Mo reira ko te kupu tenei a Ihowa, Tenei ahau te whakatakoto nei i nga tutukitanga waewae e ki mua i tenei iwi, e tutuki ngatahi ai nga matua, nga tamariki; ka ngaro te tangata noho tata raua ko tona hoa.



22

Ko te kupu tenei a Ihowa, Tenei te haere mai nei he iwi i te whenua ki te raki, ka whakaarahia mai ano he iwi nui i nga pito o te whenua.

23

Ka mau ratou ki te kopere, ki te tao; he nanakia ratou, e kore hoki e tohu tangata; ko to ratou reo, ano kei te moana e haruru ana, a eke ai ratou i runga i te hoiho; rarangi rawa ratou, me te mea he tangata e mea ana ki te whawhai ki a koe, e t e tamahine

24

a Hiona. Kua rongu matou ki tona rongu; ngoikore iho o matou ringa; mau pu matou i te pawera,

25

i te mamae, me te mea he wahine e whanau ana. Kei puta atu ki te mara, kaua hoki e haere i te

26

ara; kei reira hoki te hoari a te hoariri, a kei nga taha katoa te wehi. E te tamahine a taku iwi, whitikiria te kakahu taratara, ka takaoriori ki te pungarehu, hei te tangi ki te huatahi tau tangi ki a

27

koe, kia tiwerawera te tangi: no te mea kihai i aha kua tae mai te kaipahua ki a tatou. Kua oti koe te mea e ahau hei pourewa, hei pa kaha, i roto i toku iwi; kia mohio ai koe, kia whakamatau ai

28

i to ratou ara. He tino nui to ratou tutu, a ko ta ratou i a ratou e haereere ana he ngau tuara: he

29

parahi ratou, he rino; he hunga whakangau ke ratou katoa. Kei te kaka te hau o te pupuhi ahi; kua pau te mata i te ahi, maumau whakarewa noa te kaitahi para: kahore nei hoki te hunga kino kia

30

unuhia atu. E huaina ratou e te tangata he hiriwa i paopaongia, no te mea kua paopao nei a Ihowa ki a ratou.

## Chapter 7

1

Ko te kupu i a Heremaia, he mea na Ihowa; i ki mai ia, E tu ki te kuwaha o te whare o Ihowa, ka karanga i tenei kupu ki reira, ka mea, Whakarongo ki te kupu a Ihowa, e Hura katoa e tomo nei

3

ki enei kuwaha ki te koropiko ki a Ihowa. Ko te kupu tenei a Ihowa o nga mano, a te Atua o Ihairaira, Whakapaia o koutou ara me a koutou mahi, a ka meinga e ahau kia noho koutou ki tenei

4

wahi. Kei whakawhirinaki ki nga kupu teka noa, kei ki, Ko te temepara o Ihowa, ko te temepara

5

o Ihowa, ko te temepara o Ihowa enei. Ki te whakapaia rawatia hoki o koutou ara, me a koutou mahi; ki te mea ka tika rawa ta koutou whakarite whakawa i waenganui i te tangata raua ko tona

6

hoa; Ki te kore koutou e tukino i te manene, i te pani, i te pouaru, a kahore e whakaheke i nga

7

toto o te harakore ki tenei wahi, kahore hoki e haere, e whai i nga atua ke hei he mo koutou: Katahi ahau ka mea i a koutou kia noho ki tenei wahi, ki te whenua i hoatu e ahau ki o koutou matua

8

inamata ake ake. Nana, kei te whakawhirinaki na koutou ki nga kupu teka, kahore nei he pai. E

9

tahae ranei koutou, e patu tangata, e puremu? e oati teka ranei? e tahu whakakakara ranei ki a Paara,

10  
 e whai ranei i nga atua ke kihai i matauria e koutou; A ka haere mai, ka tu ki toku aroaro i tenei  
 whare kua huaina nei ki toku ingoa, ka mea, Kua ora matou; kia mahi ai koutou i enei mea

11  
 whakarihariha katoa? Ki ta koutou titiro kua waiho koia hei ana mo nga kaipahua tenei whare

12  
 kua huaina nei ki toku ingoa? Nana, kua kite ahau, ahau nei ano, e ai ta Ihowa. Engari haere ra  
 ki toku wahi i Hiro, ki te wahi i whakanohoa mataatitia ai e ahau toku ingoa, tirohia taku i mea ai

13  
 ki reira mo te kino o taku iwi, o Iharaira. Na, inaianei, i ta koutou meatanga i enei mea katoa, e  
 ai ta Ihowa, i korero ano ahau ki a koutou; maranga wawe ana ahau, korero ana, heoi kihai koutou

14  
 i rongu mai; karanga ana ahau ki a koutou, a kihai i utua taku; Na, ko taku e mea ai ki tenei  
 whare i huaina nei ki toku ingoa, ki ta koutou e whakawhirinaki nei, ki te wahi ano i hoatu nei e

15  
 ahau ki a koutou, ki o koutou matua, ka rite ki taku i mea ai ki Hiro. Ka akiritia atu ano koutou  
 e ahau i toku aroaro, ka peratia me taku akiritanga i o koutou teina katoa, i nga uri katoa o Eparaima.

16  
 Heoi, kua koe e inoi mo tenei iwi; kei ara hoki tetahi tangi, tetahi kupu wawao au mo ratou,

17  
 kua hoki ahau e whakamarietia, no te mea e kore ahau e rongu ki a koe. Kahore ianei koe i te

18  
 kite i ta ratou e mea nei i nga pa o Hura, i nga ara ano o Hiruharama? Ko nga tamariki kei te  
 kohikohi wahie, ko nga matua kei te whakau i te ahi, ko nga wahine kei te pokepoke i te paraoa  
 hei hanga i etahi keke, he mea ki te kuini o te rangi, riringi tonu iho i te ringihanga ki nga atua ke,

19  
 hei whakapataritari i a hau. He whakapataritari ranei ta ratou ki ahau? e ai ta Ihowa; te teka ianei

20  
 ki a ratou ano, a whakama iho o ratou mata? Na, ko te kupu tenei a te Ariki, a Ihowa, Nana, ka  
 ringihia toku riri, toku aritarita, ki runga ki tenei wahi, ki runga ki te tangata, ki te kararehe, ki te  
 rakau o te mara, ki nga hua o te oneone; a ka ngiha, e kore ano e tineia.

21  
 Ko te kupu tenei a Ihowa o nga mano, a te Atua o Iharaira, Ko a koutou tahunga tinana

22  
 tapiritia iho ki runga ki a koutou patunga tapu, kainga hoki he kikokiko. Kahore hoki aku korero  
 ki o koutou matua, kahore aku whakahau ki a ratou i te ra i kawea mai ai ratou e ahau i te whenua

23  
 o Ihipa, mo nga tahunga tinana, mo nga patunga tapu. Engari ko te kupu tenei i whakahaua e  
 ahau ki a ratou; i ki ahau, Whakarongo ki toku reo, a hei Atua ahau mo koutou, ko koutou hoki hei  
 iwi maku, me haere ano koutou i runga i te ara katoa ka whakahaua nei e ahau ki a koutou, kia

24  
 whiwhi ai ki te pai. Otiia kihai ratou i rongu, kihai ano i tahuri to ratou taringa; na haere ana  
 ratou i runga i o ratou ake whakaaro, i nga tikanga pakeke o o ratou ngakau kino; ko ta ratou he

25  
 anga ki muri, kihai hoki i anga ki mua. No te ra i haere mai ai o koutou matua i te whenua o  
 Ihipa tae mai ki tenei ra taku tononga atu i aku pononga katoa, i nga poropiti, ki a koutou, maranga

26  
 wawe ana ahau i tenei ra, i tenei ra, unga ana ratou e ahau. Heoi kihai ratou i rongu ki ahau,

kihai ano i tahuri to ratou taringa; na whakapakeketia ana e ratou to ratou kaki: kino iho ta ratou i ta o ratou matua. <sup>27</sup> Na mau e korero enei kupu katoa ki a ratou, e kore ia ratou e rongu ki a koe:

karanga ki a ratou; e kore ano e utua tau. <sup>28</sup> A me ki atu ki a ratou, Ko te iwi tenei kihai nei i rongu ki te reo o Ihowa, o to ratou Atua, kihai hoki i pai ki te ako: kua kore te pono, kua tapahia atu i to ratou mangai.

<sup>29</sup> Waruhia ou makawe, e Hiruharama, maka atu, anga atu ki te tangi ki runga ki nga wahi

tiketike: kua paopaongia nei hoki e Ihowa, kua whakarerea te whakatupuranga i riri ai ia. <sup>30</sup> He kino hoki te mahi a nga tama a Hura ki taku titiro, e ai ta Ihowa; whakaturia ake e ratou a ratou

mea whakarihariha ki te whare kua huaina nei ki toku ingoa, whakapokea iho e ratou. <sup>31</sup> Hanga ake e ratou nga wahi tiketike o Topete, o tera i te raorao o te tama a Hinomo, hei tahunga mo a ratou tama, mo a ratou tamahine ki te ahi; he mea kihai nei i whakahaua e ahau, kihai ano i puta

ake i roto i toku ngakau. <sup>32</sup> Mo reira, na, kei te haere mai nga ra, e ai ta Ihowa, e kore ai e kiia i muri, Ko Topete, Ko te raorao o te tama a Hinomo, ranei; engari Ko te raorao i te parekura: ka tanu

tangata hoki ratou ki Topete, a kia kore ra ano he wahi hei tanumanga. <sup>33</sup> A ka waiho nga tinana o tenei iwi hei kai ma nga manu o te rangi, ma nga kararehe o te whenua; kahore hoki he

kaiwhakawehi atu. <sup>34</sup> Ka whakamutua ano e ahau i roto i nga pa o Hura, i nga ara ano o Hiruharama, te reo koa, te reo hari, te reo o te tane marena hou, te reo o te wahine marena hou: no te mea ka ururuatia te whenua.

## Chapter 8

<sup>1</sup> I taua wa, e ai ta Ihowa, ka whakaputaina mai ki waho nga wheua o nga kingi o Hura, me nga whenua o ona rangatira, me nga whenua o nga tohunga, ma nga wheua o nga poropiti, me nga

wheua o nga tangata o Hiruharama i roto i o ratou tanumanga: <sup>2</sup> A ka tohatohaina e ratou ki mua i te ra, i te marama, i te mano katoa o te rangi, i a ratou i aroha ai, i mahi ai, i whai ai, i rapu ai, i koropiko ai: e kore e kohikohia, e kore e tanumia; ka waiho hei whakawairakau ki te mata o te

oneone. <sup>3</sup> A pai ake te mate i te ora ki ta nga morehu katoa, ki ta nga toenga o tenei hapu kino e toe ki nga wahi katoa e peia atu ai ratou e ahau, e ai ta Ihowa o nga mano.

<sup>4</sup> Mea atu ano ki a ratou, Ko te kupu tenei a Ihowa, Ka hinga ranei, a kore ake e ara? ka tahuri atu ranei ia, a kore ake e tahuri mai? <sup>5</sup> He aha tenei iwi o Hiruharama i tahuri ke ai, a mau tonu iho

te tahuri ke? e hopukia atu ana e ratou te tinihanga, kahore e pai ki te hoki mai. <sup>6</sup> I whakarongo

ahau, i rongo ano, kihai i tika a ratou korero; kihai tetahi i ripeneta ki tona kino, kihai i mea, He aha taku i mea ai? anga ana te katoa ki tana oma, ki tana oma, pera ana me te hoiho e kokiri atu

<sup>7</sup> ana ki te tatauranga. Ae ra, ko te taka i te rangi, e mohio ana ki nga wa i whakaritea mona, ko te kukupa ano, ko te kareni, me te warou, mahara tonu ratou ki te wa e haere mai ai ratou; ko taku

<sup>8</sup> iwi ia, kahore e mohio ki ta Ihowa i whakarite ai. He pehea ta koutou e ki, He hunga whakaaro nui tatou, kei a tatou te ture a Ihowa? Nana, he horihori te mahi a te pene horihori a nga kaituhituhi.

<sup>9</sup> Ko te hunga whakaaro nui, whakama ana ratou, wehi noa iho ratou, hopukia iho; nana, kua paopao

<sup>10</sup> nei ratou ki te kupu a Ihowa, a he pehea te whakaaro nui i roto i a ratou? Mo reira ka hoatu e ahau a ratou wahine ma te tangata ke, a ratou mara ki nga tangata mona te wahi; ko ratou katoa, i te iti ki te rahi, kei te apo mea ma ratou; ko te poropiti, ko te tohunga, ko ratou katoa, kei te mahi

<sup>11</sup> teka. Kua rongoatia e ratou te pakaru o te tamahine a taku iwi, he mea panga noa iho, e mea

<sup>12</sup> ana, Ka mau te rongo, ka mau te rongo; i te mea kahore he maunga rongo. I whakama ranei ratou i ta ratou mahinga i te mea whakarihariha? Hore rawa o ratou whakama; kahore hoki ratou i mohio ki te numinumi: mo reira ka hinga ratou i roto i te hunga e hinga ana; i te wa e whiua ai ratou, ka tutuki o ratou waewae, e ai ta Ihowa.

<sup>13</sup> Ka moti rawa ratou i ahau, e ai ta Ihowa: kahore he karepe mo te waina, kahore he piki mo

<sup>14</sup> te piki; ka memenge ano te rau; a ko nga mea i hoatu e ahau ki a ratou, ka pahemo atu. He aha tatou i noho tonu ai? huihui, kia haere tatou ki nga pa kaha, ki reira whakamoroki kau ai: kua kore hoki i a Ihowa, i to tatou Atua he kupu ma tatou, whakainumia ana tatou e ia ki te wai kawa; no te

<sup>15</sup> mea kua hara tatou ki a Ihowa. Tatari noa ki te rongo mau; heoi kahore he pai; ki te wa e ora ai

<sup>16</sup> nga mate, na ko te raruraru. I rangona ki Rana te whengu o ona hoiho; ngateri ana te whenua katoa i te reo o ana mea kaha e hamama ana; kua haere mai hoki ratou, pau ake i a ratou te whenua

<sup>17</sup> me ona mea maha, te pa me nga tangata o roto. Nana, ka ngarea atu e ahau he nakahi, he neke,

<sup>18</sup> e kore nei e whakawaia, ki a koutou; a ka ngau ratou i a koutou, e ai ta Ihowa. Aue, te taea te

<sup>19</sup> whakamarie te pouri i ahau! e ngohe nei te ngakau i roto i ahau. Nana, he reo tangi no te tamahine

a taku iwi, i ahu mai i te whenua tawhiti! He teka ianei kei roto a Ihowa i Hiona? he teka ianei kei roto tona kingi i a ia? He aha ratou i whakapataritari ai i ahau ki a ratou whakapakoko, ki nga

<sup>20</sup> horihori rere ke? Kua pahemo te kotinga, kua taka te raumati; ko tatou, kahore he whakaoranga

<sup>21</sup> mo tatou. He mamae ki te tamahine a taku iwi i mamae ai ahau, mangu iho ahau, mau pu ahau

<sup>22</sup> i te miharo. Kahore ianei he hinu whakaora i Kireara? Kahore ianei o reira rata? he aha ra te hoki mai ai te ora ki te tamahine a taku iwi?

## Chapter 9

<sup>1</sup> Aue, me he wai toku mahunga! me he puna roimata oku kanohi, kia tangihia ai e ahau nga  
<sup>2</sup> tupapaku o te tamahine a taku iwi i te ao, i te po! Aue, me he tihokahoka toku, he mea na te tira  
 haere i te koraha! kia whakarerea ai e ahau taku iwi, kia mawehe ai i roto i a ratou, he hunga puremu  
<sup>3</sup> katoa nei hoki ratou, he huihuinga no te hunga tinihanga. Me te mea he kopere na ratou o ratou  
 arero e whakapikoa ana hei korero teka: kua tupu kaha ake ratou i runga i te whenua, kahore ia mo  
 te pono; engari e koni atu ana i te kino ki te kino, kahore hoki o ratou mohio ki ahau, e ai ta Ihowa.  
<sup>4</sup> Kia tupato i o koutou hoa, e tenei, e tenei, kaua e whakawhirinaki ki te tuakana, ki te teina: no te  
 mea he maminga rawa ta nga tuakana, ta nga teina katoa; kei runga ano i te ngautuara te haere o  
<sup>5</sup> nga hoa katoa. Ka tinihangatia e ratou tona hoa, tona hoa, kahore hoki he pono o te korero; kua  
 whakaakona e ratou o ratou arero ki te korero teka; ruha noa ratou i te mahinga i te he. Kei waenga  
<sup>6</sup> tinihanga koe e noho ana: na te tinihanga ratou te pai ai ki te mohio ki ahau, e ai ta Ihowa. Heoi  
<sup>7</sup> ko te kupu tenei a Ihowa o nga mano, Nana, ka whakarewa ahau i a ratou, ka whakamatau i a ratou;  
 me pehea hoki ahau, ko te tamahine nei ia a taku iwi? <sup>8</sup> Ko te rite i to ratou arero kei te kopere  
 whakamate; he korero tinihanga tana: he korero pai ta te mangai o tetahi ki tona hoa, kei roto ia i  
<sup>9</sup> tona ngakau e whanga ana mona. E kore ianei ahau e whiu i a ratou mo enei mea? e ai ta Ihowa;  
 e kore ianei toku wairua e rapu utu i te iwi penei? <sup>10</sup> He whakaaro ki nga maunga i ara ai taku  
 tangi, taku aue, he whakaaro ki nga puninga o te koraha taku uhunga; no te mea kua wera, kahore  
 tetahi tangata e tika na reira, kahore e rangona te reo o nga kararehe; ko nga manu o te rangi, ko  
<sup>11</sup> nga karare he, putere atu ana, kua riro. Ka meinga hoki e ahau a Hiruharama hei puranga, hei  
 nohoanga kuri mohoa, ka meinga ano e ahau nga pa o Hura kia ururuatia, te ai he tangata.  
<sup>12</sup> Ko wai te tangata whakaaro nui e matau ana ki tenei? i korerotia ano ki a wai e te mangai o  
 Ihowa, mana e whakaatu? he aha ra te whenua i whakangaromia ai, i wera ai, ano ko te koraha,  
<sup>13</sup> kahore he tangata e tika ana i reira? Ano ra ko Ihowa, Mo ratou i whakarere i taku ture i hoatu  
<sup>14</sup> e ahau ki to ratou aroaro, a kihai i whakarongo ki toku reo, kihai i haere i taua ara; Na haere ana  
 ratou i nga tikanga maro o o ratou ngakau; kei te wahi i nga Paarimi i whakaakona nei e o ratou  
<sup>15</sup> matua ki a ratou. Heoi ko te kupu tenei a Ihowa o nga mano, a te Atua o Iharaira, Tenei ahau te  
<sup>16</sup> whangai nei i a ratou, i tenei iwi, ki te taru kawa, te whakainu nei i a ratou ki te wai kawa. Ka  
 whakamararatia ano ratou e ahau ki roto ki nga iwi kihai nei i mohiotia e ratou, e o ratou matua:  
<sup>17</sup> ka unga ano e ahau te hoari hei whai i a ratou a poto noa ratou i ahau. Ko te kupu tenei a Ihowa

o nga mano, Whakaaroa e koutou, karangatia hoki nga wahine tangi kia haere mai; unga tangata  
 ki nga wahine whakaaro nui kia haere mai. <sup>18</sup> Kia hohoro ano te ara o ta ratou tangi mo tatou, kia  
 tarere ai nga roimata o o tatou kanohi, kia maringi iho ai nga wai o o tatou kamo. <sup>19</sup> No te mea e  
 rangona ana te reo tangi i Hiona, Ano to tatou pahuatanga! Nui atu to tatou whakama, no te mea  
 kua mahue i a tatou te whenua, no te mea kua turakina mai e ratou o tatou nohoanga. <sup>20</sup> Whakarongo  
 raia, e nga wahine, ki te kupu a Ihowa, kia riro ano i o koutou taringa te kupu a tona mangai;  
 whakaakona a koutou tamahine ki te tangi, nga hoa hoki o tenei, o tenei, ki te uhunga. <sup>21</sup> No te  
 mea kua tae ake te mate ki roto ki o tatou matapihi, kua tomo ki o tatou whare kingi, hautope atu  
 ai i nga kohungahunga i waho, i nga taitamariki ano hoki i nga huanui. <sup>22</sup> Korero, Ko te kupu tenei  
 a Ihowa, Tera nga tinana o nga tangata e hinga ano he whakawairakau ki te mata o te mara, ano he  
 kutanga witi i muri i te kaitapahi, a kahore he kaikohi.  
<sup>23</sup> Ko te kupu tenei a Ihowa, Kua te tangata whakaaro nui e whakamanamana ki tona whakaaro  
 nui, kua hoki te marohirohi e whakamanamana ki tona marohirohi; kua te tangata taonga e  
 whakamanamana ki ona taonga; <sup>24</sup> Engari ko tenei hei whakamanamananga ma te tangata  
 whakamanamana, ara kua whai whakaaro ia, kua mohio ki ahau, ko Ihowa, ahau, ko te kaimahi o  
 te mahi tohu, o te whakawa, o te tika i runga i te whenua: ko aku hoki enei e whakaahuareka ai, e  
 ai t a Ihowa. <sup>25</sup> Nana, kei te haere mai nga ra, e ai ta Ihowa, e whiua ai e ahau te hunga katoa i  
 kotia i roto i to ratou kotingakore; <sup>26</sup> Ko Ihipa, ko Hura, ko Eroma, ko nga tama a Amona, ko  
 Moapa, ko te hunga katoa e noho ana i te koraha, e whakaihoa nei nga tapa o o ratou makawe: he  
 mea kokotikore hoki nga iwi katoa; ko te whare katoa ano o Iharaira, he mea kokotikore te ngakau.

## Chapter 10

<sup>1</sup> Whakarongo ki te kupu kua korerotia nei e Ihowa ki a koutou, e te whare o Iharaira: <sup>2</sup> Ko te  
 kupu tenei a Ihowa, Kua e akona te ara o nga tauwi, kua ano e wehi i nga tohu o te rangi; e wehi  
 ana hoki nga tauwi i aua mea. <sup>3</sup> He mea teka noa hoki nga tikanga a nga iwi: e tapahia ana hoki e  
 tetahi he rakau i roto i te ngahere, he mahi na nga ringa o te kaimahi, ki te titaha. <sup>4</sup> Kei te  
 whakapaipai i taua mea ki te hiriwa, ki te koura, whakamau rawa ki nga titi, ki nga hama, te taea  
 te whakakorikori. <sup>5</sup> He rite aua mea ki te nikau, i ata mahia, kahore ia he kupu; me amo, he kore  
 no ratou e haere. Kua e wehi i a ratou, no te mea e kore e taea e ratou te kino, kahore hoki e ahei  
 i a ratou te mea i te pai. <sup>6</sup> Kahore rawa he rite mou, e Ihowa; he nui koe, he nui ano tou ingoa i

<sup>7</sup>  
 runga i te kaha. Ko wai e kore e wehi i a koe, e te Kingi o nga iwi? he tika hoki tena ki a koe; no  
 te mea i roto i nga tangata whakaaro nui katoa o nga iwi, i roto i o ratou kingitanga katoa, kahore  
<sup>8</sup>  
 he rite mou. Huihuia ratou, he poauau rawa, he wairangi: ko ta nga whakapakoko e whakaako  
<sup>9</sup>  
 ai, he rakau tonu ia. E maua mai ana he hiriwa paraharaha i Tarahihi, he koura i Upata, he mahi  
 na te kaimahi, na nga ringa ano o te kaiwhakarewa koura: he puru, he papura o ratou kakahu; he  
<sup>10</sup>  
 mea mahi katoa na te hunga tohunga. Ko Ihowa ia te Atua pono, ko ia te Atua ora, he kingi  
<sup>11</sup>  
 pumau tonu; ka riri ia, ka wiri te whenua, e kore ano nga iwi e kaha ake ina aritarita ia. Kia penei  
 ta koutou ki atu ki a ratou, Ko nga atua kihai nei i hanga i te rangi, i te whenua, ka ngaro i runga i  
<sup>12</sup>  
 te whenua, i raro atu ano hoki nga rangi. Nana i hanga te whenua, na tona kaha hoki; ko te ao  
<sup>13</sup>  
 he mea whakapumau na ona whakaaro nui; ko nga rangi he mea hora na tona matauranga. Ka  
 puaki tona reo, he haruru wai kei nga rangi, e meinga ana e ia nga kohu kia pupu ake i nga pito o  
 te whenua; e hanga ana e ia nga uira mo te ua, e whakaputaina mai ana te hau i roto i ona whare  
<sup>14</sup>  
 taonga. Poauau kau nga tangata katoa, a kahore he mohio: ko nga kaiwhakarewa koura katoa  
 whakama iho i te whakapakoko: he mea teka hoki tana i whakarewa ai, kahore hoki he wairua i  
<sup>15</sup>  
 roto. He horihori kau ratou, he mahi pohehe; i te wa e pa ai ia ki a ratou ka ngaro. Kahore e  
<sup>16</sup>  
 rite ki era te wahi i a Hakopa; ko ia hoki te kaiwhakaahua o nga mea katoa; ko Iharaira hoki te iwi  
 o tona kainga tupu, ko Ihowa o nga mano tona ingoa.  
<sup>17</sup>  
 Kohikohia au mea i te whenua, e koe e noho na i te pa e whakapaea ana. Ko te kupu hoki  
<sup>18</sup>  
 tenei a Ihowa, Tenei ahau te piupiu atu nei i nga tangata o te whenua i tenei wa, te whakatupu kino  
 nei hoki i a ratou, kia kitea ai e ratou.  
<sup>19</sup>  
 Aue, te mate i ahau, mamae rawa toku marutanga: otiia  
<sup>20</sup>  
 kua mea nei ahau, He pono noku tenei mate, me whakamanawanui. Kua pahuatia toku teneti,  
 ko aku aho motumotu katoa: kua rito atu aku tamariki i toku taha, kua kore: kahore ake he tangata  
<sup>21</sup>  
 hei whakamaro i toku teneti, hei whakaara i oku kakahu arai. Kua poauau nei hoki nga hepara;  
 kihai a Ihowa i rapua e ratou; na reira i kore ai e tika ta ratou, ka marara hoki a ratou kahui katoa.  
<sup>22</sup>  
 Nana, te haere mai nei te reo o nga korero, nui atu te whakaohooho, no te whenua ki te raki, hei  
<sup>23</sup>  
 mea i nga pa o Hura hei ururua, hei nohoanga mo nga kirehe mohoa. E mohio ana ano ahau,  
 e Ihowa, kahore o te tangata ara i a ia ake ano: kahore hoki i te tangata e haereere nei mana e  
<sup>24</sup>  
 whakatikatika ona hikoinga. Pakia ahau, e Ihowa, me te whakariterite ano ia; kauaka ina riri  
<sup>25</sup>  
 koe, kei kahore ahau i a koe. Ringihia atu tou riri ki nga tauwiwi kahore nei e matau ki a koe, ki  
 nga hapu kahore nei e karanga ki tou ingoa; kua pau hoki a Hakopa i a ratou, ae ra, pau rawa, moti  
 rawa, ko tona mohoa hoki whakaururutia ana e ratou.

## Chapter 11

<sup>1</sup> Ko te kupu i pa mai ki a Heremaia he mea na Ihowa; i ki ia, <sup>2</sup> Whakarongo koutou ki nga kupu o tenei kawenata, korero hoki ki nga tangata o Hura ratou ko te hunga e noho ana i Hiruharama;

<sup>3</sup> Mea atu ki a ratou, Ko te kupu tenei a Ihowa, a te Atua o Iharaira, Ka kanga te tangata e kore e whakarongo ki nga kupu o tenei kawenata, <sup>4</sup> I whakahaua nei e ahau ki o koutou matua i te ra i kawea mai ai ratou e ahau i te whenua o Ihipa, i roto i te oumu rino; i ahau i ki ra, Whakarongo ki toku reo, mahia hoki aua mea, kia rite ki nga mea katoa i whakahaua e ahau ki a koutou; a ka wa

<sup>5</sup> iho koutou hei iwi maku, ko ahau hoki hei Atua mo koutou: Kia whakamana ai e ahau te oati i oatitia e ahau ki o koutou matua, kia hoatu ki a ratou he whenua e rerengia ana e te waiu, e te honi, penei me tenei ra. Katahi ka whakahoki ahau, ka mea, Koia ano tena, e Ihowa. <sup>6</sup> Na ka ki mai a Ihowa ki ahau, Karangatia enei kupu katoa ki nga pa o Hura, ki nga ara ano o Hiruharama, mea

<sup>7</sup> atu, Whakarongo ki nga kupu o tenei kawenata, mahia hoki. I tino whakatupato hoki ahau i o koutou matua i te ra i kawea mai ai ratou e ahau i te whenua o Ihipa, a taea noatia tenei ra, maranga

<sup>8</sup> wawe ana ahau, whakatupato ana; mea ana, Whakarongo ki toku reo. Heoi kihai ratou i rongo, kihai i tahuri o ratou taringa; otiia haere ana ratou, ia tangata, ia tangata, i runga i nga tikanga pakeke a tona ngakau kino: mo reira ka takina e ahau ki a ratou nga kupu katoa o tenei kawenata i whakahaua

<sup>9</sup> nei e ahau kia mahia, a kihai nei i mahia e ratou. I mea ano a Ihowa ki ahau, Kua kitea te he e whakatakotoria ana e nga tangata o Hura, e te hunga e noho ana i Hiruharama. <sup>10</sup> Kua hokia e ratou nga he o o ratou matua o mua, kihai nei i pai ki te whakarongo ki aku kupu, haere ana ratou ki te whai i nga atua ke, mahi ana ki a ratou: kua whakataka e te whare o Iharaira ratou ko te whare o Hura taku kawenata i whakaritea e ahau ki o ratou matua.

<sup>11</sup> Mo reira ko te kupu tenei a Ihowa, Tenei te takina nei e ahau ki a ratou, he he; e kore ano ratou e mawhiti; ka karanga ano ratou ki ahau, otiia e kore ahau e rongo ki a ratou. <sup>12</sup> A ka haere nga pa o Hura me nga tangata o Hiruharama, ka karanga ki nga atua e tahu whakakakara nei ratou

<sup>13</sup> ki a ratou: hore rawa ia a ratou whakaora mo ratou i te wa e raru ai. I rite hoki ou atua, e Hura, ki ou pa te maha; me nga aata i hanga e koutou ma taua mea whakama, rite tonu ki nga ara o Hiruharama te maha, ara nga aata tahu whakakakara ki a Paara. <sup>14</sup> Heoi kaua e inoi mo tenei iwi; kei ara hoki tetahi tangi, tetahi kupu wawao mo ratou; no te mea e kore ahau e rongo i te wa e

<sup>15</sup> karanga ai ratou ki ahau, ina raru ratou. Ko te aha ma taku wahine aroha i roto i toku whare, kua mahi he nei hoki ia, he tini nga hoa, a kua kore te kikokiko tapu i a koe? i tau mahinga i te kino, na, kei te whakamanamana koe. <sup>16</sup> I huaina e Ihowa tou ingoa, Ko te oriwa matomato, ataahua,



17  
hua papai: nui atu te reo ngangau i tahuna ai e ia te ahi mona, kua whatiwhatia ona manga. Kua korerotia nei hoki e Ihowa o nga mano, e tou kaiwhakato, he he mou, hei utu mo te kino o te whare o Iharaira raua ko te whare o Hura, i mahia nei e ratou hei he mo ratou, hei whakapatari i ahau, i a ratou ka tahu whakakakara nei ki a Paara.

18 I meinga ano ahau e Ihowa kia mohio ki taua mea, a mohio ana ahau: i whakakitea mai ano e koe ki ahau a ratou mahi. 19 Ko ahau ia i rite ki te reme, e arahina ana kia patua; kihai i mohio, e hanga whakaaro ana ratou moku, e mea ana, Kia kore i a tatou te rakau me ona kua, kia tapahia

20 atu ia i runga i te whenua o te hunga ora, kia kore ai he maharatanga ki tona i ngoa. Tena, e Ihowa o nga mano, kei runga nei hoki i te tika tau whakawa, e whakamatau ana koe i nga whatumanawa, i te ngakau, kia kite ahau i tau rapunga utu i a ratou: kua whakakitea atu nei hoki

21 e ahau taku totohe ki a koe. Heoi ko te kupu tenei a Ihowa mo nga tangata o Anatoto e whai nei kia whakamatea koe, e mea nei, Kaua e poropiti i runga i te ingoa o Ihowa, kei mate koe i to matou

22 ringa: Mo reira ko te kupu tenei a Ihowa o nga mano, Tenei ahau te whiu nei i a ratou: ka mate nga taitamariki i te hoari; ko a ratou tama, ko a ratou tamahine, ka mate i te hemokai. 23 E kore ratou e whai morehu; no te mea ka kawea e ahau he kino ki nga tangata o Anatoto, ara ko te tau e whiua ai ratou.

## Chapter 12

1 Tika tonu koe, e Ihowa, ina totohe ahau ki a koe; otiia kia korerotia e ahau ki a koe nga whakaritenga: He aha i whai pai ai te ara o te hunga kino? he aha i noho humarie ai te hunga katoa

2 he nui rawa nei to ratou tinihanga? Whakatokia ana ratou e koe, ae ra kua whai pakiaka ratou; kei te tupu ake, ae ra kua whai hua; i o ratou manga i e tata ana koe; i o ratou whatumanawa ia kei

3 tawhiti koe. Otiia e mohio ana koe ki ahau, e Ihowa, kua kite koe i ahau, e whakamatautau ana hoki koe i toku ngakau ki a koe: toia mai ratou ano he hipi e patua ana, motuhia atu ratou mo te ra

4 o te parekura. Kia pehea te roa o te whenua ka tangi nei, o te otaota o nga mara katoa ka maroke nei? hei mea mo te kino o ona tangata, kua pau ona kararehe me nga manu; no te mea i ki ratou, E

5 kore ia e kite i to tatou mutunga iho. Na, mehemea i rere koe i roto i te hunga haere i raro, a ka ngenge i a ratou, ka pehea ra tau whakataetae ki nga hoiho? na ahakoa u tou noho i te whenua

6 rangatira, ka pehea ra koe i te whakapehapeha o Horona? Ko ou tuakana nei hoki, ko ou teina, me te whare o tou papa, kei te tinihanga ki a koe, ko ratou ano kei te karanga nui i muri i a koe: kaua e whakapono ki ta ratou, ina korero pai ki a koe.

<sup>7</sup> Kua mahue i ahau toku whare, whakarerea ake toku kainga pumau; tukua ana e ahau te wahine  
 i arohaina e toku wairua ki te ringa o ona hoariri. <sup>8</sup> Ko toku kainga tupu, tona rite ki ahau kei te  
 raiona i roto i te ngahere: hamama ana ia ki ahau, na reira kino iho ahau ki a ia. <sup>9</sup> Ko toku kainga  
 tupu, ki ahau he rite ki te manu kotingotingo; hei hoariri mona nga manu i tetahi taha, i tetahi taha.  
<sup>10</sup> Haere mai koutou, huihuia mai nga kirehe katoa o te parae, mauria mai ki te horo kai. Moti ake  
 taku mara waina i nga hepara tokomaha, kua takatakahia e ratou toku wahi, kua meinga hoki e  
<sup>11</sup> ratou taku wahi i matenui ai hei koraha, ururua rawa. Kua meinga e ratou hei ururua, a i a ia e  
 ururua nei, tangi ana ia ki ahau; kua ururua katoa te whenua, no te mea kahore he tangata e mahara  
<sup>12</sup> ake ana tona ngakau. Kua tae nga kaipahua ki nga wahi tiketike katoa o te koraha; ka kai hoki  
 te hoari a Ihowa i tetahi pito o te whenua a tae noa ki tetahi pito o te whenua: ki nga kikokiko katoa  
<sup>13</sup> kahore he maunga rongo. He witi ta ratou i rui ai, he tataramoa ta ratou i kokoti ai; kua  
 whakamamae ratou i a ratou, a kahore he pai ki a ratou: ka whakama ano koutou ki a koutou hua  
 i te riri o Ihowa ka mura nei.  
<sup>14</sup> Ko te kupu tenei a Ihowa mo oku hoa tata katoa e kino nei, kua pa nei ki te wahi tupu i hoatu  
 e ahau mo taku iwi, mo Iharaira, Tenei ahau te huhuti atu nei i a ratou i runga i to ratou whenua,  
<sup>15</sup> ka hutia atu ano e ahau te whare o Hura i waenganui i a ratou. A tenei ake, kua mutu taku huhuti  
 atu i a ratou, ka hoki ahau, ka aroha ki a ratou, ka whakahoki ano i a ratou ki tona wahi, ki tona  
<sup>16</sup> wahi, ki tona whenua, ki tona whenua. A tenei ake, ki te ako marie ratou ki nga ara o taku iwi,  
 a ka oatitia toku ingoa, ara, E ora ana a Ihowa; ki te pera ratou me ratou i whakaako ra i taku iwi  
<sup>17</sup> kia oatitia a Paara; katahi ka hanga ratou ki waenganui i taku iwi. Tena ko tenei e kore ratou e  
 rongo, katahi taua iwi ka hutia rawatia atu e ahau, ka whakangaromia, e ai ta Ihowa.

### Chapter 13

<sup>1</sup> Ko te kupu tenei a Ihowa ki ahau, Tikina, hokona he whitiki rinena mou, ka whitiki ai ki tou  
 hope; kua hoki e tukua ki te wai. <sup>2</sup> Heoi kua hokona e ahau tetahi whitiki, ko ta Ihowa i ki ai,  
 whitikiria iho e ahau ki toku hope. <sup>3</sup> Na ko te rua o nga putanga mai o te kupu a Ihowa ki ahau; i  
 mea ia, <sup>4</sup> E mau ki te whitiki i hokona e koe, ki tera i tou hope, ka whakatika, ka haere ki Uparati,  
<sup>5</sup> ka huna ki tetahi rua i te kamaka. Heoi haere ana ahau, huna ana i taua mea ki Uparati, pera tonu

me ta Ihowa i whakahau ai ki ahau. <sup>6</sup> A ka maha nga ra, ka ki mai a Ihowa ki ahau, Whakatika, haere ki Uparati, tikina i reira te whitiki i whakahau ai ahau ki a koe kia huna ki reira. <sup>7</sup> Katahi ka haere ahau ki Uparati, kei te kerī, tangohia mai ana e ahau te whitiki i te wahi i huna ai e ahau: na, kua kino te whitiki, kihai i pai mo tetahi mea. <sup>8</sup> Katahi ka puta mai te kupu a Ihowa ki ahau; i mea ia, <sup>9</sup> Ko te kupu tenei a Ihowa, Ka pena ano taku whakakino i te whakapehapeha o Hura, i te whakapehapeha nui o Hiruharama. <sup>10</sup> Ko tenei iwi kino e kore nei e pai ki te whakarongo ki aku kupu, e haere ana i runga i nga tikanga pakeke o o ratou ngakau, e whai ana i nga atua ke, e mahi ana, e koropiko ana ki a ratou, ka rite ratou ki tenei whitiki e kore nei e pai mo tetahi mea. <sup>11</sup> He penei i te whitiki e piri nei ki te hope o te tangata, pena tonu taku meatanga i te whare katoa o Iharaira, i te whare katoa o Hura, kia piri ki ahau, e ai ta Ihowa, kia waiho ai ratou hei iwi maku, hei ingoa, hei whakamoemiti, hei kororia; h eoi kihai ratou i rongō.

<sup>12</sup> Na me korero tenei kupu ki a ratou, Ko te kupu tenei a Ihowa, a te Atua o Iharaira, Ka whakakia katoatia nga pounamu ki te waina: a e mea ano ratou ki a koe, kihai ianei matou i tino mohio ka whakakia katoatia nga pounamu ki te waina? <sup>13</sup> Ko reira koe mea ai ki a ratou, Ko te kupu tenei a Ihowa, Tenei ahau te whakaki nei i nga tangata katoa o tenei whenua, ara i nga kingi e noho ana i runga i te torona o Rawiri, ratou ko nga tohunga, ko nga poropiti, ko nga tangata katoa ano o Hi ruharama ki te haurangi. <sup>14</sup> Ka akina atu ano ratou e ahau tetahi ki tetahi, nga matua ngatahi ano ko nga tamariki, e ai ta Ihowa; e kore e tohungia e ahau, e kore e manawapatia, e kore e arohaina, kia kore ai ratou e ngaro i ahau. <sup>15</sup> Whakarongo, tahuri mai nga taringa; kua e whakapehapeha; na Ihowa hoki te kupu. <sup>16</sup> Whakakororiatia to koutou Atua, a Ihowa, i te mea kiano ia i whakapouri noa, i te mea kiano o koutou waewae i tutuki i runga i nga maunga pouri, i te mea hoki e tatari ana koutou ki te marama, na kua puta ke i a ia ko te atarangi o te mate, kua meinga kia pouri kerekere. <sup>17</sup> Tena ki te kore koutou e rongō, ka tangi toku wairua i nga wahi ngaro ki to koutou whakapehapeha: nui atu ano te tangi o toku kanohi, tarere iho ano nga roimata; no te mea ka whakaraua te kahui a Ihowa. <sup>18</sup> Mea atu ki te kingi raua ko te kuini, Whakaititia korua, e noho: no te mea ka riro iho o korua whakapaipai mahunga, te karauna o to korua kororia.

<sup>19</sup> Ka tutakina nga pa o te tonga, kahore he kaiwhakatuwhera, ka whakaraua katoatia a Hura, poto rawa ki te whakarau. <sup>20</sup> E ara o koutou kanohi, tirohia te hunga e haere mai ana i te raki: kei hea te kahui i hoatu ki a koe? tau kahui ataahua na? <sup>21</sup> Ka pehea tau kupu ina whakanohoia e ia ou hoa ki runga ake i a koe hei mahunga, nau na hoki ratou i ako hei rangatira, hei ariki mou? E kore ianei koe e mau pu i te mamae, ano he wahine e whakawhanau ana?

<sup>22</sup> Na ki te mea koe i roto i tou ngakau, He aha enei mea i pa ai ki ahau? Na te nui o tou kino  
 i hurahia ai te remu o tou, i whakatupuria kinotia ai ou rekereke. <sup>23</sup> E taea ranei e te Etiopiana te  
 whakaputa ke tona kiri, e te reparo ranei tona kotingotingo? me kore noa e taea te mahi pai e koutou  
 kua taunga nei ki te mahi kino. <sup>24</sup> Ka titaritaria ano ratou e ahau, ano he papapa e rere ana i runga  
 i te hau o te koraha. <sup>25</sup> Ko te rota tena mau, ko te wahi i ruritia atu e ahau mou, e ai ta Ihowa; mou  
 i wareware ki ahau, i whakawhirinaki ki te teka. <sup>26</sup> Ka hurahia hoki e ahau nga remu o tou ki runga  
 ki tou kanohi, a ka kitea tou mea e whakama ai koe. <sup>27</sup> Kua kite ahau i ou whakarihariha, i ou  
 puremutanga, tau tangi a hoiho, te weriweri o tou moepuku, i runga i nga pukepuke i te parae. Aue  
 te mate mou, e Hiruharama! e kore nei koe e meinga kia ma; a hea rawa ra ano?

## Chapter 14

<sup>1</sup> Ko te kupu a Ihowa i puta mai ki a Heremaia, he mea mo te tauraki. <sup>2</sup> Kei te tangi a Hura,  
 ngehe kau ona kuwaha, kua noho ki te whenua he mangu ona kakahu; kua kake te aue o Hiruharama  
 ki runga. <sup>3</sup> Na ka unga o ratou ariki i a ratou tamariki ririki ki nga awa: ka tae ratou ki nga poka,  
 kahore e kite wai; ka hoki me a ratou oko, tahanga kau: ka whakama ratou, ka numinumi, ka hipoki  
 i o ratou mahunga. <sup>4</sup> I te ngatata o te oneone, kahore ano nei hoki he ua ki runga ki te whenua, ka  
 whakama nga kaiparau, ka hipoki i o ratou mahunga. <sup>5</sup> Ae ra, ko te hata ano, whanau ana ia i  
 waenga parae, a whakarerea ake e ia tana kua, no te mea kahore he tarutaru. <sup>6</sup> Na ka tu nga kaihe  
 mohoa o i runga i nga wahi tiketike, ka kihakiha ano he kirehe mohoa; matawaia ana o ratou kanohi,  
 kahore hoki he otaota. <sup>7</sup> Ahakoa whakaatu noa o matou kino i to matou he, e mahi koe, e Ihowa,  
 kia mahara hoki ki tou ingoa: kua tini nei hoki o matou tauritanga ketanga, kua hara matou ki a  
 koe. <sup>8</sup> E koe, e te tumanako a Iharaira, e tona kaiwhakaora i te wa o te raru, he aha koe i noho ai i  
 te whenua ano he manene, i rite ai ki te tangata haere e peka ana ki tetahi moenga mona i te po?  
<sup>9</sup> He aha koe i rite ai ki te tangata e ketekete kau ana, ki te marohirohi e kore nei e kaha ki te  
 whakaora? kei waenganui ano ia koe i a matou, e Ihowa, kua huaina tou ingoa mo matou; kua  
 hoki matou e whakarerea.  
<sup>10</sup> Ko te kupu tenei a Ihowa ki tenei iwi, He pena tonu to ratou matenui ki te taihaere; kihai i  
 kaiponuhia o ratou waewae; no reira kahore a Ihowa e manako ki a ratou; ka mahara ia aiane ki o  
 ratou he, a ka whiu i o ratou hara. <sup>11</sup> A ka mea a Ihowa ki ahau, Kua e inoi mo tenei iwi ki te pai

<sup>12</sup>  
mo ratou. Ka nohopuku ratou, e kore ahau e rongu ki ta ratou karanga; ka whakaekea e ratou te tahunga tinana me te whakahere, e kore ahau e manako ki a ratou; engari ka poto ratou i ahau, i te

<sup>13</sup>  
hoari, i te hemokai, i te mate uruta. Ano ra ko ahau, Aue, e te Ariki, e Ihowa, nana, ko nga poropiti te mea nei ki a ratou, E kore koutou e kite i te hoari, e kore ano te hemokai e pa ki a koutou;

<sup>14</sup>  
engari maku e mea kia tuturu rawa te mau o te rongu ki a koutou i tenei wahi. Ano ra ko Ihowa ki ahau, Kei te poropiti teka nga poropiti i runga i toku ingoa: kihai ratou i unga e ahau, kihai ratou i whakahaua e ahau, kihai hoki ahau i korero ki a ratou: he kitenga teka ta ratou e poropiti na ki a

<sup>15</sup>  
koutou, he whakaaro ki n ga tohu, he mea horihori, he mea tinihanga na o ratou ngakau. Mo reira ko te kupu tenei a Ihowa mo nga poropiti e poropiti nei i runga i toku ingoa, he hunga kihai i unga e ahau, i a ratou e mea nei, E kore te hoari, te hemokai ranei e pa ki tenei whenua: Ka poto

<sup>16</sup>  
ena poropiti i te hoari, i te hemokai. Na, ko te iwi ki a ia nei ta ratou poropititanga, ka akiritia ki nga ara o Hiruharama i te ngaunga a te hemokai, a te hoari; kahore hoki he tangata hei tanu i a ratou, i a ratou, i a ratou wahine, i a ratou tama, i a ratou tamahine; no te mea ka ringihia e ahau to ratou kino ki runga ki a ratou.

<sup>17</sup>  
Na me korero e koe tenei kupu ki a ratou, Kia hirere iho te roimata o oku kanohi i te po, i te ao, kua hoki e mutu; no te mea he nui te pakaru i pakaru ai te tamahine a taku iwi, mamae rawa

<sup>18</sup>  
te patunga. Ki te haere ahau ki te parae, nana, ko nga tupapaku a te hoari! ki te tomo ahau ki te pa, nana, ko te hunga e mate ana i te hemokai! ko te poropiti hoki raua tahi ko te tohunga kei te

<sup>19</sup>  
haereere noa iho i te whenua a kahore e mohio. Kua paopao rawa ranei koe ki a Hura? kua whakarihariha ranei tou wairua ki Hiona? He aha koe i patu ai i a matou, te ai he mahunga mo o matou mate? I tatari matou ki te rongu mau, heoi kahore he pai; ki te wa e mahu ai, na ko te raruraru.

<sup>20</sup>  
Tenei matou, e Ihowa, te whaki nei i to matou kino, i te he o o matou matua: kua hara hoki matou

<sup>21</sup>  
ki a koe. Kua e whakarihariha ki a matou, whakaaro ki tou ingoa; kua e whakaititia te torona

<sup>22</sup>  
o tou kororia; kia mahara, kua e whakataka tau kawenata ki a matou. Kei roto ranei i nga mea horihori a nga tauwi tetahi hei mea kia ua? ma nga rangi ranei e homai nga ua nehu? he teka ianei ko koe ia, e Ihowa, e to matou Atua? na reira matou ka tatari ki a koe; nau hoki i hanga enei mea katoa.

## Chapter 15

<sup>1</sup>  
Na ka mea a Ihowa ki ahau, Ahakoa i tu a Mohi raua ko Hamuera ki toku aroaro, e kore ahau e whai ngakau ki tenei iwi: maka atu ratou i toku aroaro, kia haere atu ratou. <sup>2</sup> Na ki te mea ratou

ki a koe, Me haere matou ki hea? katahi koe ka mea ki a ratou, Ko te kupu tenei a Ihowa, Ko nga mea mo te mate, ki te mate; a ko nga mea ma te hoari, ki te hoari; ko nga mea hoki mo te hemokai,

ki te hemokai; a ko nga mea mo te whakarau, ki te whakarau. <sup>3</sup> E wha hoki nga tu mea e whakaritea e ahau mo ratou, e ai ta Ihowa: ko te hoari hei whakamate, ko nga kuri hei haehae, a ko nga manu

o te rangi, ko nga kararehe hoki o te whenua hei kai, hei whakamoti. <sup>4</sup> Ka tukua hoki ratou e ahau kia poipoia haeretia i waenga i nga kingitanga katoa o te whenua, mo ta Manahi tama a Hetekia

kingi o Hura, mo tana i mea ai ki Hiruharama. <sup>5</sup> Ko wai oti e tohu i a koe, e Hiruharama? ko wai

ranei e tangi ki a koe? ko wai e peka atu ki te ui, kei te ora ranei koe? <sup>6</sup> Kua whakarerea ahau e koe, e ai ta Ihowa, kua hoki whakamuri koe: koia i totoro atu ai toku ringa ki a koe, i whakamotitia

ai koe; kua hoha ahau ki te ripeneta. <sup>7</sup> Kua powhiriwhiritia ratou e ahau ki te mea powhiriwhiri i nga kuwaha o te whenua; kua whakapania ratou e ahau i te tamariki, kua ngaro i ahau taku iwi;

kahore ratou i tahuri mai i o ratou ara. <sup>8</sup> Ko a ratou pouaru i toku aroaro kua tokomaha atu i te onepu o nga moana: kua kawea e ahau ki a ratou, hei hoariri mo te whaea o nga taitama, he kaipahua i te poutumarotanga: kua meinga e ahau kia pa whakarere ki a ia te pawera me te tumatatenga.

<sup>9</sup> Ngohe kau te wahine ka tokowhitu nei ana tamariki; kua hemo tona wairua; kua rere tona ra i te mea ko te awatea nei ano; kua whakama hoki ia, kua numinumi kau: ka tukua atu hoki e ahau o ratou morehu ki te hoari i te aroaro o o ratou hoariri, e a i ta Ihowa.

<sup>10</sup> Aue, toku mate, e toku whaea, i whanau mai ahau i roto i koe he tangata totohe, he tangata ngangare ki te whenua katoa! kihai ahau i whakatarewa atu i te moni whakatupu, kihai ano te moni

whakatupu i whakatarewaina mai ki ahau; otia kei te kang a ratou katoa ki ahau. <sup>11</sup> I mea a Ihowa, He pono ka whakakahangia koe e ahau mo te pai; he pono ka meinga e ahau te hoariri kia inoi ki

a koe i te wa o te he, i te wa o te mamae. <sup>12</sup> E taea ranei e tetahi te wahi te rino, te rino o te raki,

te parahi ranei? <sup>13</sup> Ka hoatu e ahau ou rawa me ou taonga hei taonga parakete, kahore hoki he utu,

a hei mea tera mo ou hara katoa, ara i ou rohe katoa. <sup>14</sup> A ka meinga ratou e ahau kia haere tahi me ou hoariri ki te whenua kihai i mohiotia e koe: no te mea kei te ngiha he ahi i ahau e riri nei, ka tonu atu ki a koutou.

<sup>15</sup> E Ihowa, e mohio ana koe; mahara ki ahau, tirohia ahau, rapua he utu mo toku matenga i oku kaitukino; kua ahau e tangohia atu i a koe ka puhoi nei ki te riri: kia mohio koe, mou ahau i

tawaia ai. <sup>16</sup> I kitea au kupu, a kainga ake e ahau; a ki ahau hei whakakaoa, hei whakahari au kupu

mo toku ngakau: kua huaina hoki tou ingoa moku, e Ihowa, e te Atua o nga mano. <sup>17</sup> Kihai ahau i noho i roto i te whakaminenga o te hunga whakahi, kihai i whakamanamana atu; i noho mokemoke

ahau, he whakaaro ki tou ringa: kua whakakiiia nei hoki ahau e koe ki te riri. <sup>18</sup> He aha toku mamae

i mau tonu ai, toku patunga te mahu ai, te pai ai ki te rongoa? ka rite rawa ranei koe ki ahau me te

awa paremoremo, me nga wai e kore e mau? <sup>19</sup> Mo reira ko te kupu tenei a Ihowa, Ki te hoki koe na ka whakahokia koe e ahau, kia tu ai koe ki toku aroaro; a ki te tangohia atu e koe te mea utu nui i te mea kino, ka rite koe ki toku mangai: ko ratou e hoki ki a koe, kaua ia koe e hoki ki a ratou.

<sup>20</sup> Ka meinga hoki koe e ahau ki tenei iwi hei taiepa parahi; a ka whawhai ratou ki a koe, otia e kore ratou e kaha ki a koe; no te mea kei a koe ahau hei whakaora i a koe, e mawhiti ai koe, e ai ta

<sup>21</sup> Ihowa. Ka meinga ano koe e ahau kia mawhiti i roto i te ringa o te hunga kino, ka hokona ano koe e ahau i roto i te ringa o te hunga nanakia.

## Chapter 16

<sup>1</sup> I puta mai ano te kupu a Ihowa ki ahau, i mea ia. <sup>2</sup> Kaua koe e moe hoa, kauaka hoki he tama,

he tamahine mau i tenei wahi. <sup>3</sup> Ko te kupu hoki tenei a Ihowa mo nga tama, mo nga tamahine ka whanau ki tenei wahi, mo o ratou whaea hoki i whanau ai ratou, mo o ratou papa ano na ratou nei

aau tamariki i tenei whenua; <sup>4</sup> He kino rawa nga mate e mate ai ratou; e kore ratou e tangihia, e kore hoki e tanumia; ka waiho ratou hei whakawairakau i runga i te mata o te oneone: ka poto atu ratou i te hoari, i te hemokai; ko o ratou tinana hei kai ma nga manu o te rangi, ma nga kararehe

<sup>5</sup> o te whenua. Ko te kupu hoki tenei a Ihowa, Kaua e tomo ki te whare tangihanga, kaua hoki e haere ki te tangi, ki te uhunga i a ratou: kua tangohia atu hoki e ahau taku rangimarie i tenei iwi, e

ai ta Ihowa, ara te aroha noa me nga mahi tohu. <sup>6</sup> Ka mate nga mea nunui ratou ko nga mea ririki ki tenei whenua; e kore ratou e tanumia, e kore hoki te tangata e tangi ki a ratou, e kore e haehae i

a ratou, e kore e whakamoremore i o ratou mahunga mo ratou: <sup>7</sup> E kore hoki e tuwhaina mai te taro ma ratou i te tangihanga, hei whakamarie i a ratou mo te tupapaku; e kore hoki e homai ki a

ratou te kapu whakamarie kia inumia, ina mea ki tona papa, ki tona whaea. <sup>8</sup> Kaua ano hoki koe e

tomo ki te whare hakari noho tahi ai me ratou, kai ai, inu ai ranei. <sup>9</sup> Ko te kupu hoki tenei a Ihowa o nga mano, a te Atua o Iharaira, Nana, ka whakamutua e ahau i tenei wahi, i mua i o koutou kanohi a i o koutou ra, te reo o te harakoa, te reo o te hari, te reo o te tane marena hou, te reo o te wahine marena hou.

<sup>10</sup> Na, ka korerotia e koe enei kupu katoa ki tenei iwi, a ka mea ratou ki a koe, Na te aha tenei kino nui katoa i korerotia mai ai e Ihowa ki a matou? he aha hoki to matou he? he aha ano to matou

hara i hara ai matou ki a Ihowa, ki to matou Atua? <sup>11</sup> Katahi koe ka mea ki a ratou, No te mea i whakarerea ahau e o koutou matua, e ai ta Ihowa, a haere ana ratou ki te whai i nga atua ke mahi

ana ki a ratou, koropiko ana ki a ratou, whakarerea ana ahau e ratou, kihai hoki ratou i pupuri i taku  
<sup>12</sup>

tur e; Me koutou ano, kino atu ta koutou mahi i ta o koutou matua; no te mea, nana, kei te whai  
 koutou i nga tikanga pakeke o tona ngakau kino, o tona ngakau kino, na wai a kahore koutou e

<sup>13</sup>  
 rongu ki ahau: Na reira ka akiritia atu koutou e ahau i tenei whenua ki tetahi whenua kihai i  
 mohiotia e koutou, e o koutou matua ranei; a ki reira koutou mahi ai ki nga atua ke i te ao, i te po;  
 e kore hoki e puta toku aroha ki a koutou.

<sup>14</sup>

Nana, kei te haere ake nei hoki nga ra, e ai ta Ihowa, e kore ai e korerotia, E ora ana a Ihowa

nana nei i kawe mai nga tama a Iharaira i te whenua o Ihipa; <sup>15</sup> Engari, E ora ana a Ihowa nana  
 nei i kawe mai nga tama a Iharaira i te whenua ki te raki, i nga whenua katoa ano i peia atu ai ratou  
 e ia: a ka whakahokia mai ratou e ahau ki to ratou whenua i hoatu ra e ahau ki o ratou matua.

<sup>16</sup>

Nana, ka tikina atu e ahau etahi kaihi ika tokomaha, e ai ta Ihowa, a ka hiia ratou e ratou: muri  
 iho ka tikina e ahau he tangata whai kirehe mohoa, he tokomaha, a ka whaia ratou i runga i nga

maunga katoa, i runga i nga pukepuke katoa, i roto hoki i nga rua o nga kamaka. <sup>17</sup> No te mea kei  
 runga oku kanohi i o ratou ara katoa; kahore hoki e huna atu i toku mata, kahore ano to ratou he e

huna i oku kanohi. <sup>18</sup> Na ka matua rite i ahau nga utu mo to ratou he, mo to ratou hara, kia rua;  
 mo ratou i whakapoke i toku whenua ki nga tinana o a ratou mea anaunu, i whakaki hoki i toku

wahi tupu ki a ratou mea whakarihariha. <sup>19</sup> E Ihowa, e toku kaha, e toku pa kaha, e toku rerenga  
 atu i te wa o te raru, tera e haere mai nga iwi i nga pito o te whenua ki a koe, a ka mea, Koia ano!

he teka kau nga taonga tupu o o tatou matua, he horihori, he mea huakore. <sup>20</sup> E hanga ranei te

tangata i etahi atua mona, ehara nei i te atua? <sup>21</sup> Mo reira ka meinga ratou e ahau kia mohio, ka  
 meinga ratou e ahau kia mohio i tenei wa kotahi nei ki toku ringa, ki toku kaha hoki; a ka mohio  
 ratou, ko Ihowa toku ingoa.

## Chapter 17

<sup>1</sup>

Kua oti te hara o Hura te tuhituhi ki te pene rino, ki te mata hoki o te taimana: he mea

whaowhao rawa ki te papa o to ratou ngakau, ki runga hoki ki nga haona o a koutou aata; <sup>2</sup> I a ratou  
 tamariki e mahara ana ki a ratou aata, ki a ratou Aherimi hoki i te taha o nga rakau kouru nui i runga

i nga pukepuke tiketike. <sup>3</sup> E toku maunga i te parae, ka hoatu e ahau ou rawa, ou taonga katoa kia

pahuatia, me ou wahi tiketike, he mea mo te hara, puta noa i ou rohe katoa. <sup>4</sup> A ko koe, nau ake  
 ano, ka mutu ki tou kainga tupu i hoatu na e ahau ki a koe; a ka meinga koe e ahau kia mahi ki ou



hoariri ki te whenua kihai i mohiotia e koe: no te mea kua tahuna e koutou he ahi i ahau e riri ana, ko tona ka mo ake tonu atu.

5

Ko te kupu tenei a Ihowa: Ka kanga te tangata e whakawhirinaki ana ki te tangata, e mea ana

hoki i te kikokiko hei ringa mona, e kotiti ke ana hoki tona ngakau i a Ihowa. <sup>6</sup> Ka rite hoki ia ki te manoao i te koraha, e kore hoki e kite i te putanga mai o te pai; engari ko nga wahi waikore o te

koraha hei kainga mona, he whenua tote, e kore nei e nohoia. <sup>7</sup> Ka manaakitia te tangata e

whakawhirinaki ana ki a Ihowa, ko Ihowa tana e tumanako ai. <sup>8</sup> Ka rite hoki ia ki te rakau i whakatokia ki te taha o nga wai, e toro nei ona pakiaka ki te awa, a kahore e wehi i te tikakatanga mai o te ra, engari ka matomato tonu tona rau; e kore e manukanuka i te tau raki, e kore ano hoki

e mutu tona whai hua. <sup>9</sup> Ko te ngakau, he mea tinihanga atu i nga mea katoa, a he tino mate rawa:

e mohiotia ranei e wai? <sup>10</sup> Ko taku, ko ta Ihowa, he rapu i te ngakau, he whakamatautau i nga whatumanawa, kia hoatu ai ki tenei, ki tenei kia rite ki tona ara ake, kia rite hoki ki nga hua o ana

mahi. <sup>11</sup> Ka rite ki te patiri, e whakawhaiti nei i nga pi, ehara i a ia i whakawhanau, he pera te tangata e whiwhi ana ki te taonga, a kahore i tika mana; i waenganui o ona ra ka mahue ia i a ratou, a wairangi noa iho ia i tona mutunga iho.

12

Ko to tatou wahi tapu he torona kororia, he mea whakanoho ki te wahi tiketike mai i te

timatanga. <sup>13</sup> E Ihowa, e ta Iharaira e tumanako nei, ka whakama te hunga katoa e whakarere ana i a koe; ka tuhituhia ki te whenua te hunga e kotiti ana i ahau, mo ratou i whakarere i a Ihowa, i te

puna wai ora. <sup>14</sup> Rongoatia ahau, e Ihowa, a ka mahu toku mate; whakaorangia ahau, a ka ora ahau:

ko koe hoki taku e whakamoemiti ai. <sup>15</sup> Nana, kei te ki mai ratou ki ahau, Kei hea te kupu a Ihowa?

tena ra, kia puta mai. <sup>16</sup> Na, ko ahau nei, kihai ahau i hohoro atu i te mahi hepara i muri i a koe, kihai hoki i hiahia ki te ra o te mamae; e mohio ana ano koe: i mua i tou kanohi te mea i puta mai

i oku ngutu. <sup>17</sup> Kei waiho koe hei whakawehi moku: ko koe taku e whakamanawa atu ai i te ra o

te he. <sup>18</sup> Kia whakama te hunga e tukino ana i ahau, kaua ia ahau e whakama: kia wehi ratou, kaua ia ahau e wehi: kawea te ra o te kino ki runga ki a ratou, kia rua hoki nga whakangaromanga e whakangaro ai koe i a ratou.

19

I penei mai ta Ihowa kupu ki ahau, Haere, e tu ki te kuwaha o nga tama a te iwi, e tomo ai

nga kingi o Hura, e haere atu ai hoki, a ki nga kuwaha katoa o Hiruharama: <sup>20</sup> A ka mea ki a ratou, Whakarongo ki te kupu a Ihowa, e nga kingi o Hura, e Hura katoa, e nga tangata katoa hoki o

Hiruharama, e tomo nei ma enei kuwaha: <sup>21</sup> Ko te kupu tenei a Ihowa, Kia tupato ki a koutou, a

kaua he kawenga e waha i te ra hapati, kaua ano e maua mai ki roto ma nga kuwaha o Hiruharama;  
<sup>22</sup>

Kaua hoki he kawenga e maua atu i o koutou whare i te ra hapati, kaua hoki koutou e mahi i tetahi mahi; engari me whakatapu e koutou te ra hapati, kia rite ki taku i whakahau ai ki o koutou

matua; <sup>23</sup> Otiia kihai ratou i rongu, kihai hoki i tahuri to ratou taringa, engari i whakapakeke i to

ratou kaki, kei rongu ratou, kei manako hoki ki te ako. <sup>24</sup> Na, ki te ata whakarongo koutou ki ahau, e ai ta Ihowa, kia kaua e mau kawenga ma nga kuwaha o tenei pa i te ra hapati, engari kia whakatapu

i te ra hapati, kia kaua e mahi i tetahi mahi i reira; <sup>25</sup> Katahi ka tomo ki nga kuwaha o tenei pa he kingi, he rangatira, e noho ana i runga i te torona o Rawiri, e eke ana ki te hariata, ki te hoiho, ratou, a ratou rangatira, me nga tangata o Hura, me te hunga e noho ana i Hiruharama; a ka tuturu tene i

pa a ake ake. <sup>26</sup> A ka haere mai nga tangata i nga pa o Hura, i nga wahi i nga taha o Hiruharama, i te whenua o Pineamine, i te mania, i nga maunga, i te tonga hoki, me te mau mai he tahunga tinana, he patunga tapu, he whakahere, he whakakakara, a ka maua mai hok i he whakawhetai, ki

te whare o Ihowa. <sup>27</sup> Ki te kore ia koutou e whakarongo ki taku kia whakatapua te ra hapati, kia kaua hoki e maua he kawenga, a ka tomo ki nga kuwaha o Hiruharama i te ra hapati; katahi ka ngiha i ahau he ahi i nga kuwaha o reira, a ka pau nga whare kingi o Hiruharama, e kore ano e tineia.

## Chapter 18

<sup>1</sup> Ko te kupu i puta mai ki a Heremaia, he mea na Ihowa; i ki ia, <sup>2</sup> Whakatika, haere ki raro, ki te whare o te kaihanganga rihi, a ki reira ahau mea ai kia rongu koe i aku kupu. <sup>3</sup> Katahi ahau ka haere

ki raro, ki te whare o te kaihanganga rihi, na, kei te mahi ia i tana mahi i runga i nga wira. <sup>4</sup> Na, i te henga i roto i te ringa o te kaihanganga rihi o te oko i hanga e ia ki te paru, ka hanga ano e ia tetahi atu

oko ki taua mea, ko ta te kaihanganga rihi i kite ai e tika ana kia hanga. <sup>5</sup> Na ka puta mai te kupu a

Ihowa ki ahau; i mea ia, <sup>6</sup> E kore ianei e ahei i ahau te mea i ta tenei kaihanganga rihi ki a koutou, e te whare o Iharaira? e ai ta Ihowa. Nana, ko te paru i roto i te ringa o te kaihanganga rihi, ko to koutou

rite tena i roto i toku ringa, e te whare o Iharaira. <sup>7</sup> I te wa tonu e korero ai ahau mo tetahi iwi, mo

tetahi kingitanga, kia hutia ake, kia wahia iho, kia whakangaromia; <sup>8</sup> Ki te tahuri taua iwi i korerotia ra e ahau i to ratou kino, ka puta ke toku whakaaro mo te kino i whakaaro ai ahau kia meatia ki a

ratou. <sup>9</sup> A i te wa tonu e korerotia ai e ahau tetahi iwi, tetahi kingitanga ranei, kia hanga, kia

<sup>10</sup>  
whakatokia, <sup>10</sup> Ki te mahi taua iwi i te kino ki taku titiro, e kore ai e rongu ki toku reo, katahi ka puta ke toku whakaaro mo te pai, i mea nei ahau hei pai mo ratou.

<sup>11</sup>  
Na, tena, korero ki nga tangata o Hura, ki te hunga hoki e noho ana i Hiruharama, mea atu, Ko te kupu tenei a Ihowa: Nana, tenei ahau te hanga nei i te kino mo koutou, te whakatakoto whakaaro nei mo koutou: tenei ra, hoki mai aiane i tona ara k ino, i tona ara kino, whakatikaia

<sup>12</sup>  
hoki o koutou ara, a koutou mahi. <sup>12</sup> Otiia ka ki ratou, Kahore he painga: ka haere tonu hoki matou i a matou nei i whakaaro ai, a ka mahi matou i nga tikanga pakeke a te ngakau kino o tena, o tena.

<sup>13</sup>  
Na reira tenei kupu a Ihowa, Tena, uia atu ki nga iwi, ko wai i rongu ki nga mea penei; he hanga

whakawehi rawa te mahi a te wahine o Iharaira. <sup>14</sup> E whakarere ranei te hukarere o Repanona i te

kohatu o te parae? ka maroke ranei nga wai matao e rere iho ana i tawhiti? <sup>15</sup> Kua wareware hoki taku iwi ki ahau, kua tahu whakakakara ki te horihori; a kua meinga kia tutuki ratou i o ratou ara,

i nga huarahi onamata, haere ai i nga huarahi i rahaki, i te ara kihai i opehia ake; <sup>16</sup> Kia meinga to ratou whenua hei miharotanga, hei mea e whakatoia mai ai a ake ake; ka oho katoa nga tangata e

tika ana na reira, ka ruru i tona mahunga. <sup>17</sup> Ka titaritaria ratou e ahau ano na te hau marangi i te aroaro o te hoariri; ka titiro ahau ki to ratou tuara, kahore ki to ratou kanohi, i te ra o to ratou aitua.

<sup>18</sup>  
Katahi ratou ka mea, Haere mai, tatou ka whakatakoto whakaaro mo Heremaia; e kore hoki e ngaro te ture i te tohunga, te whakaaro ranei i te tangata whakaaro nui, te kupu ranei i te poropiti.

Haere mai, tatou ka patu i a ia ki te arero; kaua hoki e whakarongo ki tetahi o ana kupu. <sup>19</sup> Kia whai whakaaro koe ki ahau, e Ihowa, whakarongo hoki ki te reo o te hunga e totohe ana ki ahau.

<sup>20</sup>  
E utua ranei te pai ki te kino? kua keria nei hoki e ratou he rua mo toku wairua. Kia mahara ki toku tunga ki tou aroaro ki te korero i te pai mo ratou, ki te whakatahuri atu hoki i tou aritarita i a

ratou. <sup>21</sup> Mo reira hoatu a ratou tamariki ki te hemokai, tukua atu ki te kaha o te hoari; whakapania a ratou wahine i te tamariki, whakapouarutia; tukua o ratou tangata kia whakamatea, a ratou

taitamariki kia patua ki te hoari i te whawhai. <sup>22</sup> Kia rangona he tangi i roto i o ratou whare, ina kawea e koe he ope huaki tata ki a ratou: kua keria hoki e ratou he rua hei hopu i ahau, kua huna

hoki he rore mo oku waewae. <sup>23</sup> Otiia, e Ihowa, e mohio ana koe ki o ratou whakaaro katoa moku kia whakamatea; kaua he whakamarie mo to ratou he, kaua ano to ratou hara e murua atu i tou aroaro: engari kia whakataka atu ratou i tou aroaro; mau e mea ki a ratou i te wa e riri a i koe.

## Chapter 19

<sup>1</sup> Ko te kupu tenei a Ihowa, Haere, hokona mai tetahi pounamu oneone a te kaihanganga rihi, ka tango mai hoki i etahi o nga kaumatua o te iwi, i etahi o nga kaumatua o nga tohunga; <sup>2</sup> Ka haere ki te raorao o te tama a Hinomo, ki tera i te tomokanga ki te kuwaha Hahiti, a ka karanga i reira i nga kupu e korerotia e ahau ki a koe: <sup>3</sup> Ki atu, Whakarongo ki te kupu a Ihowa, e nga kingi o Hura, e te hunga e noho ana i Hiruharama, Ko te kupu tenei a Ihowa o nga mano, a te Atua o Iharaira: Tenei ahau te kawea nei i te kino ki tenei wahi, a ko nga tangata katoa e rongono ana, ka tioro oro ona taringa. <sup>4</sup> Kua whakarere nei ratou i ahau, kua whakarereketia e ratou tenei wahi, kua tahu whakakakara ki konei ki nga atua ke, kihai nei i mohiotia e ratou, e ratou ko o ratou matua, e nga kingi hoki o Hura; a kua whakakiiia e ratou tenei wahi ki te toto o te hunga kore hara. <sup>5</sup> Kua hanga hoki e ratou nga wahi tiketike o Paara, kia tahuna ai e ratou a ratou tamariki ki te ahi hei tahunga tinana ki a Paara; he mea kihai i whakahaua e ahau, kihai i korerotia e ahau, kihai ano hoki i puta ake i toku ngakau. <sup>6</sup> Mo reira, nana, kei te haere mai nga ra, e ai ta Ihowa, e kore ai tenei wahi e huaina, ko Topete, Ko te raorao o te tama a Hinomo, ranei; engari Ko te raorao o te Parekura. <sup>7</sup> Na ka meinga e ahau kia he te whakaaro o Hura raua ko Hiruharama ki tenei wahi; a ka meinga ratou e ahau kia hinga i te hoari i te aroaro o o ratou hoariri, i te ringa ano o te hunga e whai ana kia whakamatea ratou: a ko o ratou tinana ka hoatu e ahau hei kai ma nga manu o te rangi, ma nga kararehe hoki o te whenua. <sup>8</sup> A ka meinga e ahau tenei pa hei miharotanga, hei whakahianga; ko nga tangata katoa e haere i konei ka oho, ka whakahi ki ona mate uruta katoa. <sup>9</sup> Ka meinga ano ratou e ahau kia kai i nga kikokiko o a ratou tama, i nga kikokiko o a ratou tamahine, a ka kai ratou i nga kikokiko o tona hoa tata, o tona hoa tata, i te whakapaenga, i te kopananga e kopania ai ratou e o ratou hoariri, e te hunga hoki e whai ana kia whakamatea ratou.

<sup>10</sup> Katahi koe ka wahi i te pounamu i te tirohanga a nga tangata ka haere tahi atu na koutou,

<sup>11</sup> A ka mea atu ki a ratou, Ko te kupu tenei a Ihowa o nga mano, Ka rite taku wawahi i tenei iwi, i tenei pa, ka penei me te wahanga o te oko a te kaihanganga rihi, e kore nei e taea te tapitapi kia ora ano: a ka tanu hoki ratou ki Topete, kia kore ra ano he wahi hei tanumanga. <sup>12</sup> Ko taku tenei e mea ai ki tenei wahi, e ai ta Ihowa, ki ona tangata hoki, kia meinga ra ano tenei pa kia rite ki Topete:

<sup>13</sup> A ko nga whare o Hiruharama, me nga whare o nga kingi o Hura, kua whakapokea nei, ka rite ki tenei wahi, ki Topete, ara ko nga whare katoa i tahu whakakakara ai ratou i runga i nga tuanui ki te ope katoa o te rangi, i ringihia ai hoki e ratou he ringihanga ki nga atua ke. <sup>14</sup> Katahi ka haere mai a Heremaia i Topete, i te wahi i unga ai ia e Ihowa ki te poropiti; a tu ana ia i te marae o te whare o Ihowa, a ka mea ki te iwi katoa, <sup>15</sup> Ko te kupu tenei a Ihowa o nga mano, a te Atua o Iharaira, Nana, ka kawea mai e ahau ki runga ki tenei pa, a ki runga hoki i ona pa katoa, te kino

katoa i korerotia ra e ahau mo konei; no te mea kua whakapakeketia e ratou o ratou kaki, kia kore ai ratou e rongu ki aku kupu.

## Chapter 20

<sup>1</sup> Na ka rongu a Pahuru tama a Imere tohunga, tino kawana i roto i te whare o Ihowa, i a Heremaia e poropiti ana i enei mea. <sup>2</sup> Katahi a Pahuru ka patu i a Heremaia poropiti, kuhuna ana e ia ki te here waewae i te kuwaha o runga o Pineamine, ki tera i te whare o Ihowa. <sup>3</sup> Na i te aonga ake ka whakaputaina mai a Heremaia e Pahuru i te here waewae. Katahi a Heremaia ka mea ki a ia, Ehara a Pahuru i te ingoa i huaina e Ihowa mou, engari ko Makoro Mihapipi. <sup>4</sup> No te mea ko te kupu tenei a Ihowa, Nana, ka meinga koe e ahau hei whakawehi mou ano, mo ou hoa katoa ano hoki; ka hinga ratou i te hoari a o ratou hoariri, me te titiro ano ou kanohi: ka hoatu ano e ahau a Hura katoa ki te ringa o te kingi o Papu urona, a mana ratou e whakarau ki Papurona, e patu ki te hoari. <sup>5</sup> Ka hoatu ano e ahau nga rawa katoa o tenei pa, me ana mea katoa i hua mai, me ana mea utu nui katoa, ae ra, me nga taonga katoa o nga kingi o Hura, ka hoatu e ahau ki te ringa o o ratou hoariri, a ka pahuatia e ratou, ka tangohia, ka maua hoki ki Papurona. <sup>6</sup> Na, ko koe, e Pahuru, koutou ko nga tangata katoa e noho ana i tou whare, ka riro koutou ki te whakarau: a ka tae koe ki Papurona, mate atu ki reira, tanumia atu ki reira, a koe me ou hoa aroha katoa, i poropiti teka atu na koe ki a ratou.

<sup>7</sup> E Ihowa, nau ahau i hangarau, a raru ana ahau: he kaha rawa koe i ahau, a kua taea tau: kua waiho ahau hei whakakatanga i te ra katoa, kei te whakatoia ahau e te katoa. <sup>8</sup> I oku korerotanga katoa hoki, ka hamama ahau; ka karanga ahau, He mahi nanakia, he pahua: no te mea kua waiho te kupu a Ihowa hei tawainga moku, hei whakatoinga, i te ra katoa. <sup>9</sup> A ki te ki ahau, E kore ahau e whakahua i a ia, e kore ano hoki e korero i runga i tona ingoa a muri ake nei; na ka ka i roto i toku ngakau me te mea he ahi e ngiha ana, tutaki iho ki roto ki oku whenua, a ka ruha ahau i te koromaki, a kahore e taea e ahau te pupuri. <sup>10</sup> Kua rongu hoki ahau i te hahani a te tini, he whakawehi i nga taha katoa. Whakahengia, a ka whakahengia ia e matou, e ai ta oku hoa tapui katoa, te hunga e whanga ana i ahau kia tatu; tera pea ia e taea te whakawai, a ka kaha tatou ki a ia, a ka whiwhi tatou ki te utu i a ia. <sup>11</sup> Otiia kei ahau a Ihowa, ano he marohirohi, he mea whakamataku: na reira ka tutuki nga waewae o oku kaitukino, e kore hoki ta ratou e taea: tera e nui to ratou whakama, he whakama mau tonu, a e kore e warewarea, no te mea kihai i mahia ta ratou i runga i te whakaaro nui. <sup>12</sup> Otiia, e Ihowa o nga mano, e whakamatautau nei i te tangata tika, e kite nei i nga whatumanawa, i te ngakau, tukua ahau kia kite i tau utu ki a ratou; kua

whakakitea nei hoki e ahau ki a koe taku totohe. <sup>13</sup> Waiata ki a Ihowa, whakamoemititia a Ihowa; kua whakaorangia nei hoki e ia te wairua o te rawakore i te ringa o nga kaimahi i te kino.

<sup>14</sup> Kia kanga te rangi i whanau ai ahau; kua e whakapaingia te ra i puta mai ai ahau i roto i toku whaea. <sup>15</sup> Kia kanga te tangata nana i kawe te korero ki toku papa, i mea, Kua whanau he

tamaiti mau, he tane; meinga ana kia nui tona koa. <sup>16</sup> Kia rite taua tangata ki nga pa i hurihia e Ihowa, kihai nei i ripenetatia e ia: kia rangona e ia te karanga i te ata, te hamama i te poutumarotanga;

<sup>17</sup> He kore nona kihai i whakamate i ahau i te putanga mai ano i te kopu; a kia waiho ai toku whaea hei urupa moku, kia mau tonu ai te hapu o tona kopu. <sup>18</sup> He aha ahau i puta mai ai i te kopu, kia kite i te raruraru, i te mauiui, kia poto ano oku ra i te whakama?

## Chapter 21

<sup>1</sup> Ko te kupu i puta mai ki a Heremaia, he mea na Ihowa, i te ngarenga a Kingi Terekia i a Pahuru tama a Merekia, i a Tepania hoki, tama a Maaheia tohunga, ki a ia, hei ki, <sup>2</sup> Rapua koa tetahi tikanga i a Ihowa mo tatou; kei te whawhai nei hoki a Nepukareha kingi o Papurona ki a tatou: tera pea ta Ihowa mahi ki a tatou e rite ki ana mea whakamiharo katoa, a ka haere atu ia i to

tatou wahi. <sup>3</sup> Katahi a Heremaia ka mea atu ki a ratou, Ko ta koutou tenei e korero ai ki a Terekia:

<sup>4</sup> Ko te kupu tenei a Ihowa, a te Atua o Iharaira, Nana, ka whakahokia atu e ahau nga patu mo te whawhai i o koutou ringa, mo ta koutou whawhai ki te kingi o Papurona, ki nga Karari, e whakapae

nei i a koutou i waho o te taiepa, ka huihuia hoki rato u e ahau ki waenganui o tenei pa. <sup>5</sup> A ko ahau nei ano hei whawhai ki a koutou ki te ringa maro, ki te takakau kaha, i runga i te riri, i te

weriweri, i te aritarita nui. <sup>6</sup> A ka patua e ahau nga tangata o tenei pa, te tangata, te kararehe: ka

mate ratou i te mate uruta nui. <sup>7</sup> Na, muri iho, e ai ta Ihowa, ka hoatu e ahau a Terekia kingi o Hura ratou ko ana tangata, ko te iwi, ara ko te hunga o tenei pa e toe i te mate uruta, i te hoari, i te hemokai, ki te ringa o Nepukareha kingi o Papurona, ki te ringa o o ratou hoa whawhai, ki te ringa hoki o te hunga e whai ana kia whakamatea ratou: a ka patua ratou e ia ki te mata o te hoari; e kore ratou e tohungia e ia, e kore e manawapatia, e kore e arohaina.

<sup>8</sup> Korero atu ano hoki koe ki tenei iwi, Ko te kupu tenei a Ihowa, Nana, kua takoto i ahau ki to koutou aroaro te ara ki te ora, me te ara ki te mate. <sup>9</sup> Ko te tangata ka noho i tenei pa, ka mate i te hoari, i te hemokai, i te mate uruta; ko te tangata ia e haere atu ana, a ka taka atu ki nga Karari e

whakapae nei i a koutou, ka ora ia, a ko tona oranga hei taonga parakete ki a ia. <sup>10</sup> No te mea kua whakamau atu toku mata ki tenei pa hei kino, kahore hoki hei pai, e ai ta Ihowa: ka hoatu ki te ringa o te kingi o Papurona, a ka tahuna e ia ki te ahi. <sup>11</sup> Na, ko te mea mo te whare o te kingi o Hura, whakarongo koutou ki te kupu a Ihowa; <sup>12</sup> E te whare o Rawiri, ko te kupu tenei a Ihowa, Whakaritea te whakawa i te ata, whakaorangia ake hoki te tangata e pahuatia ana i roto i te ringa o te kaitukino, kei puta toku riri ano he ahi, a ka ka, te taea te tinei, mo te kino hoki o a koutou mahi. <sup>13</sup> Nana, hei hoariri ahau mou, e te wahine e noho na i te raorao, i te kamaka hoki o te wahi papatairite, e ai ta Ihowa; koutou nana na te kupu, Ko wai e haere mai ki a tatou? ko wai ranei e tomo ki o tatou nohoanga? <sup>14</sup> A ka rite ki nga hua o a koutou mahi taku whiu i a koutou, e ai ta Ihowa: a ka ngiha i ahau he ahi i tona ngahere, e pau ai nga mea katoa a taka noa, taka noa i a ia.

## Chapter 22

<sup>1</sup> Ko te kupu tenei a Ihowa; Haere ki raro, ki te whare o te kingi o Hura, ka korero i tenei kupu ki reira, <sup>2</sup> Mea atu Whakarongo ki te kupu a Ihowa, e te kingi o Hura, e noho na i runga i te torona o Rawiri, a koe, koutou ko ou tangata, ko tou iwi e tomo ana ki enei kuwaha; <sup>3</sup> Ko te kupu tenei a Ihowa, Whakaritea te whakawa me te tika, whakaorangia te tangata e pahuatia ana i te ringa o te kaitukino: kua e mauria kinotia, kua e whakatupuria kinotia te manene, te pani, te pouaru, kua hoki e whakahekea te toto harakor e ki tenei wahi. <sup>4</sup> No te mea ki te mahia maretia tenei e koutou, katahi ka tomo mai ki nga kuwaha o tenei whare he kingi e noho ana i runga i te torona o Rawiri, e eke ana ki te hariata, ki te hoiho, a ia, me ana tangata, me tona iwi. <sup>5</sup> Engari ki te kore koutou e whakarongo ki enei kupu, hei oati tenei maku ki ahau ano, e ai ta Ihowa, tera tenei whare e takoto kau. <sup>6</sup> Ko te kupu hoki tenei a Ihowa mo te whare o te kingi o Hura, Ko Kireara koe ki ahau, a ko te tihi o Repanona; otiia he pono ka meinga koe e ahau hei koraha, hei pa hoki e kore e nohoia. <sup>7</sup> A ka whakaritea e ahau he kaiwhakangaro mou, rite rawa i tana patu, i tana patu: a ka tuaina e ratou ou hita papai, ka maka hoki ki te ahi. <sup>8</sup> A he maha nga iwi e haere ma te taha o tenei pa, a ka mea tena ki tona hoa, ki tona hoa, He aha tenei i meatia e Ihowa ki tenei pa nui? <sup>9</sup> Katahi ratou ka ki ake, Mo ratou i whakarere i te kawenata a Ihowa, a to ratou Atua, a koropiko ana ki nga atua ke, mahi atu ana ki a ratou. <sup>10</sup> Kua koutou e tangi ki te tupapaku, e uhunga ranei ki a ia: engari kia nui te tangi mo te tangata e haere atu ana; no te mea e kore ia e hoki mai a muri, e kore ano e kite i te whenua i whanau

11  
ai ia. Ko te kupu hoki tenei a Ihowa mo Harumu tama a Hohia, kingi o Hura, i kingi nei i muri i tona papa, i a Hohia, i haere atu nei hoki i tenei wahi; E kore ia e hoki mai ki konei a ake ake:

12  
Engari hei te wahi i whakaraua atu ai ia, ka mate ia ki reira, a e kore ia e kite i tenei whenua a

13  
ake ake. Aue, te mate mo te tangata e hanga nei i tona whare ki te he, i nga ruma hoki o reira ki te whakawa he; e whakamahi nei i tona hoa, kahore e utua, kahore hoki e hoatu to tana mahi ki a

14  
ia; E mea ana, Ka hanga e ahau he whare mahorahora moku, he rarahi nga ruma, pokaia ana he

15  
matapihi mona i roto; a ko te hipoki he hita, pania ake ki te whero ngangana. E kingi ranei koe, no te mea e whai ana koe kia pera rawa atu te hita? kihai ianei tou papa i kai, i inu, i whakarite i te

16  
whakawa, i te tika? a he pai i reira ki a ia. I whakaritea e ia te whakawa a te ware, a te rawakore;

17  
a he pai i reira. He teka ianei ko te mohio tenei ki ahau? e ai ta Ihowa. Kahore hoki ou kanohi, ou ngakau mo tetahi mea ke atu, heoi mo tou apo anake, mo te whakaheke i te toto harakore, mo

18  
te tukino, mo te tutu, hei mahi, mau. Mo reira ko ta Ihowa kupu tenei mo Iehoiakimi tama a Hohia kingi o Hura; Kahore he tangi mona, he mea, Aue, e toku tuakana! ko tenei ranei, Aue, e te

19  
tuahine! kahore ratou e tangi mona, e mea, Aue, te ariki! Aue, tona kororia! Ka tanumia ia ki te tanu o te kaihe, ka toia, ka maka ki waho i nga kuwaha o Hiruharama.

20  
E piki ki Repanona tangi ai; kia puaki hoki tou reo i Pahana: tangi mai hoki i Aparimi; kua

21  
mongamonga katoa hoki te hunga i aroha ki a koe. I korero ahau ki a koe i te wa o tou rangatiratanga; engari i mea koe, E kore ahau e rongu. Ko tau tikanga tenei no tou tamarikitanga

22  
ake, kihai koe i rongu ki toku reo. Ma te hau e whangai au hepara katoa, ka riro hoki te hunga i aroha ki a koe ki te whakarau: katahi rawa koe ka whakama, ka numinumi kau ki tou kino katoa.

23  
E te wahine e noho na i Repanona, e hanga na i tou kohanga ki nga hita, ano te nui o te manawapa

24  
mou ina tae nga mamae ki a koe, te mamae e rite ana ki to te wahine e whanau ana! E ora ana ahau, e ai ta Ihowa, ahakoa a Konia tama a Iehoiakimi kingi o Hura, ko te mowhiti i runga i toku

25  
ringa matau, ka unuhia tonutia atu koe e ahau i reira; A ka hoatu koe e ahau ki te ringa o te hunga e whai ana kia whakamatea koe, ki te ringa ano o te hunga e wehi na koe, ara ki te ringa o

26  
Nepukareha kingi o Papurona, ki te ringa hoki o nga Karari. Ka akiritia atu ano koe e ahau me tou whaea i whanau ai koe ki tetahi atu whenua ehara nai i te wahi i whanau ai korua; a mate atu

27  
korua ki reira. Engari ko te whenua i okaka tonu ai o raua ngakau kia hoki ki reira, e kore raua

28  
e hoki ki reira, Ko tenei tangata, ko Konia, he oko pakaru ranei ai e whakahaweatia ana? he oko kahore e matenuitia ana? he aha i akiritia atu ai, ratou ko ona uri, i maka atu ai ki te whenua kihai



29  
i mohiotia e ratou? E te whenua, te whenua, te whenua, whakarongo ki te kupu a Ihowa. 30  
Ko te kupu tenei a Ihowa, Tuhituhia e koutou tenei tangata, he urikore, he tangata e kore e oti pai tana i ona ra e ora ai: e kore hoki e totika ta tetahi o ona uri e noho ana i runga i te torona o Rawiri, e kingi ana a muri ake nei i roto i a H ura.

### Chapter 23

1  
Aue, te mate mo nga hepara e whakakorekore nei, e whakamarara nei i aku hipi i hepara ai,  
e ai ta Ihowa. 2  
Mo reira ko te kupu tenei a Ihowa, a te Atua o Iharaira mo nga hepara e whangai nei i taku iwi, Kua whakamararatia e koutou aku hipi, aia atu ana ratou, kihai hoki i tiroirohia e koutou; nana, ka whiua koutou e ahau mo te kino o a koutou mahi, e ai ta Ihowa. 3  
A ka huihuia mai e ahau nga toenga o aku hipi i nga whenua katoa i peia atu ai ratou e ahau, ka whakahokia mai hoki ratou ki o ratou puninga, a ka hua ratou, ka tini. 4  
A ka whakaarahia ake e ahau etahi kepara mo ratou, mana ratou e whangai: a e kore ratou e wehi a muri ake nei, e kore e pawera, e kore hoki tetahi e ngaro atu, e ai ta Ihowa. 5  
Nana, kei te haere mai nga ra, e ai ta Ihowa, e whakaarahia ai e ahau he Manga tika mo Rawiri, a ka kingi ia, he kingi, a ka mahi i runga i te whakaaro nui, ka whakarite hoki i te whakawa, i te tika ki te whenua. 6  
I ona ra ka whakaorangia a Hura, ka noho humarie a Iharaira: a ko tona ingoa tenei e karangatia ai ia, Ko Ihowa to tatou tika. 7  
No reira, na, kei te haere mai nga ra, e ai ta Ihowa, e kore ai e korerotia, E ora ana a Ihowa nana nei i kawae mai nga tama a Iharaira i te whenua o Ihipa; 8  
Engari, E ora ana a Ihowa nana nei i kawae mai, nana nei i arahi mai nga uri o te whare o Iharaira i te whenua ki te raki, i nga whenua katoa ano i peia atu ai ratou e ahau; a ka noho ratou ki to ratou oneone. 9  
Na mo nga poropiti. Kei te maru toku ngakau i roto i ahau, ngaueue ana oku wheua katoa; e rite ana ahau ki te tangata haurangi, ki te tangata kua mate i te waina; he whakaaro hoki ki a Ihowa, he whakaaro ki ana kupu tapu. 10  
Kei te kapi hoki te whenua i te tangata puremu; kei te tangi hoki te whenua, he mea mo te kanga; kua maroke nga wahi kai o te koraha; a ko to ratou rerenga he kino, ko to ratou kaha, kahore i tika. 11  
No te mea ko te poropiti, ko te tohunga, kua poke ngatahi raua: ae ra, kua kitea e ahau to ratou kino i roto i toku whare, e ai ta Ihowa. 12  
Mo reira ka rite to ratou ara ki a ratou ki nga wahi pahekeheke i roto i te pouri: ka aia atu ratou, a ka taka ki reira: ka kawea atu hoki e ahau he kino ki runga ki a ratou, ko te tau hoki e tiroirohia ai ratou, e ai ta Ihowa. 13  
A kua kite ahau i te wairangi i roto i nga poropiti o Hamaria; na Paara ta ratou poropititanga, a

14  
whakapohehetia ana e ratou taku iwi, a Ihairaira. Kei nga poropiti ano hoki o Hiruharama, kua kitea e ahau tetahi mea whakahouhou rawa; e puremu ana ratou, a ka haere i runga i te teka, a e whakakahangia ana e ratou nga ringa o nga kaimahi o te kino, e kore rawa ai tetahi e tahuri mai i tona ki no; ki ahau kua rite ratou katoa ki Horoma, a ko nga tangata o reira, koia ano kei o Komora.

15  
Mo reira ko te kupu tenei a Ihowa o nga mano mo nga poropiti: Nana, ka whangaia ratou e ahau ki te taru kawa, a ka whakainumia ratou ki te wai kawa: no te mea i ahau atu i nga poropiti o

16  
Hiruharama te takahi tapu puta noa i te whenua katoa. Ko te kupu tenei a Ihowa o nga mano, Kei whakarongo ki nga kupu a nga poropiti e poropiti na ki a koutou: e ako ana ratou i a koutou ki te wairangi: e korero ana ratou i te kite a to ratou ake ngakau, a ehara i te mea na te mangai o Ihowa.

17  
E mea tonu ana ratou ki te hunga e whakahawe ana ki ahau, Kua ki mai a Ihowa, Ka mau te rongo ki a koutou; a, ki te hunga katoa e haere ana i runga i nga tikanga pakeke o o ratou ngakau,

18  
e mea ana ratou, E kore te kino e tae mai ki a koutou. Ko wai oti i tu i runga i to Ihowa whakaaro,

19  
e kite ai, e rongo ai ranei ki tana kupu? ko wai i mahara ki taku kupu, i rongo hoki? Nana, kua puta te tukauati i a Ihowa, koia ano ko tona riri, ae ra, he tukauati powaiwai: tera e pakaru ki runga

20  
ki te upoko o te hunga kino. E kore e hoki to Ihowa riri, kia oti ra ano, kia whakapumautia ra

21  
ano e ia nga whakaaro o tona ngakau: i nga ra whakamutunga ka tino marama koutou. Kihai ahau i unga i enei poropiti, heoi rere ana ratou; kihai ahau i korero ki a ratou, heoi kei te poropiti

22  
ratou. Otiia me i tu ratou i runga i toku whakaaro, kua meinga e ratou taku iwi kia rongo ki aku

23  
kupu, kua whakahokia mai e ratou i to ratou ara kino, i te kino hoki o a ratou mahi. He Atua

24  
tata ianei ahau, e ai ta Ihowa, a ehara i te Atua i tawhiti? E taea ranei e tetahi te huna i a ia ki nga wahi ngaro, e kore ai ia e kitea e ahau? e ai ta Ihowa. He teka ianei kapi tonu i ahau te rangi

25  
me te whenua? e ai ta Ihowa. Kua rongo ahau i nga kupu a nga poropiti, e poropiti teka na i

26  
runga i toku ingoa, e mea na, He moe naku, he moe naku. Kia pehea te roa o te mau o tenei i roto i te ngakau o nga poropiti, e poropiti teka na; ara o nga poropiti, e poropiti na i te tinihanga o

27  
to ratou ngakau? E whakaaro na, ma a ratou moe e korerotia na e ratou ki tona hoa, ki tona hoa, ka meinga ai taku iwi kia wareware ki toku ingoa, kia pera me o ratou matua i wareware nei ki toku

28  
ingoa, i mea nei ki a Paara. Ko te poropiti he moe nei tana, me korero e ia te moe; a ko te tangata i a ia taku kupu, kia pono tana korero i taku kupu. He aha oti ta te papapa ki te witi? e ai ta Ihowa.

29  
He teka ianei e rite ana taku kupu ki te ahi? e ai ta Ihowa; ki te hama e wahi nei i te kamaka a

30  
mongamonga noa? Mo reira, na, hei hoariri ahau mo nga poropiti, e ai ta Ihowa, e tahae nei i

aku kupu i tona hoa, i tona hoa. <sup>31</sup> Nana, hei hoariri ahau mo nga poropiti, e ai ta Ihowa, mo te  
 hunga e whakamahi nei i o ratou arero, e ki nei, E mea ana ia. <sup>32</sup> Nana, hei hoariri ahau, e ai ta  
 Ihowa, mo te hunga e poropiti ana i nga moe teka, a korerotia ana e ratou, whakapohehetia ana e  
 ratou taku iwi ki a ratou korero teka, ki ta ratou whakapehapeha wairangi: otia ehara ratou i ahau  
 i unga, i whakaha u ranei; e kore rawa hoki tenei iwi e whai pai i a ratou, e ai ta Ihowa.

<sup>33</sup> A, ki te ui tenei iwi, ki a koe, te poropiti, te tohunga ranei, ki te mea, Tena koa ta Ihowa  
 pikaunga? katahi koe ka ki atu ki a ratou, E tae te pikaunga! Ka maka atu koutou e ahau, e ai ta  
<sup>34</sup> Ihowa. Na, ko te poropiti, ko te tohunga, ko te iwi ranei, e mea ana, Ko te pikaunga a Ihowa,  
<sup>35</sup> ka whiua e ahau taua tangata, ratou ko tona whare. Ko te kupu tenei ma koutou ki tona hoa, ki  
 tona hoa, ki tona teina, ki tona tuakana, Tena koa te kupu i whakahokia mai e Ihowa? a, I pehea  
<sup>36</sup> mai a Ihowa? Kati hoki ta koutou whakahua i te pikaunga a Ihowa; no te mea ko te kupu ake a  
 tenei, a tenei hei pikaunga mana; kua whakarereketia hoki e koutou nga kupu a te Atua, ora, a Ihowa  
<sup>37</sup> o nga mano, a to tatou Atua. Ko tau tenei e korero atu ai ki te poropiti, He aha te whakautu a  
<sup>38</sup> Ihowa ki a koe? ko tenei hoki, I pehea mai a Ihowa? Engari ki te mea koutou, Ko te pikaunga  
 a Ihowa; na ko te kupu tenei a Ihowa; Mo ta koutou korero i tena kupu, Ko te pikaunga a Ihowa,  
<sup>39</sup> a kua unga tangata ahau ki a koutou, hei mea, Kua koutou e ki, Ko te pikaunga a Ihowa; Mo  
 reira, na, ka wareware rawa ahau ki a koutou, ka akiritia atu ano koutou i toku aroaro, me te pa i  
<sup>40</sup> hoatu e ahau ki a koutou ko o koutou matua. Ka utaina hoki e ahau he ingoa kino ki runga ki a  
 koutou, he mea mau tonu, he whakama hoki e mau tonu ana, a e kore e wareware.

## Chapter 24

<sup>1</sup> I whakakite a Ihowa ki ahau, na, e rua nga kete piki i whakaturia ki mua i te temepara o Ihowa;  
 i muri iho i te whakaraunga a Nepukareha kingi o Papurona i a Hekonia tama a Iehoiakimi kingi  
 o Hura, ratou ko nga rangatira o Hura, ko nga kamura, ko nga parakimete i Hiruharama, i tana  
<sup>2</sup> kawenga hoki i a ratou ki Papurona. He pai rawa nga piki o tetahi o nga kete, he rite tonu ki nga  
 piki matamua: a he kino rawa nga piki o tetahi o nga kete, kahore e taea te kai, i te kino rawa.  
<sup>3</sup> Katahi a Ihowa ka mea ki ahau, He aha tau e kite na, e Heremaia? Ano ra ko ahau, He piki; ko  
 nga piki pai, he tino pai; a, ko nga mea kino, he tino kino, kahore e taea te kai, i te kino rawa. <sup>4</sup> Na  
<sup>5</sup> ka puta mai te kupu a Ihowa ki ahau, i mea ia, Ko te kupu tenei a Ihowa, a te Atua o Iharaira; Ka  
 penei i nga piki pai nei toku mohio ki te hunga o Hura i whakaraua nei, i unga atu nei e ahau i tenei

<sup>6</sup>  
 wahi ki te whenua o nga Karari, hei pai mo ratou. Ka whakamau tonu atu hoki oku kanohi ki a  
 ratou mo te pai, a ka whakahokia mai ano ratou e ahau ki tenei whenua: ka hanga ano ratou e ahau,  
<sup>7</sup>  
 e kore hoki e wahia iho; ka whakatokia ratou e ahau, e kore ano e hutia atu. Ka hoatu hoki e ahau  
 he ngakau ki a ratou kia mohio ki ahau, ko Ihowa ahau: a ka waiho ratou hei iwi maku, a ko ahau  
<sup>8</sup>  
 hei Atua mo ratou: no te mea ka whakapaua o ratou ngakau ki te hoki mai ki ahau. Na mo nga  
 piki kino, e kore nei e taea te kai, i te kino rawa; he pono ko te kupu tenei a Ihowa, Ka pena taku  
 hoatutanga i a Terekia kingi o Hura, ratou ko ana rangatira, ko nga morehu o Hiruharama e mahue  
<sup>9</sup>  
 ki tenei whenua, e noho ana hoki i te whenua o Ihipa: Ka tino hoatu hoki ratou e ahau kia poipoia  
 haeretia i roto i nga kingitanga katoa o te whenua, hei he mo ratou; hei hahani, hei whakatauki, hei  
<sup>10</sup>  
 taunu, hei kanga, i nga wahi katoa e peia atu ai ratou e ahau. Ka unga atu ano e ahau he hoari,  
 te hemokai, te mate uruta ki a ratou, kia poto ra ano ratou i runga i te whenua i hoatu e ahau ki a  
 ratou ko o ratou matua.

## Chapter 25

<sup>1</sup>  
 Ko te kupu i puta mai ki a Heremaia mo te iwi katoa o Hura i te wha o nga tau o Iehoiakimi  
 tama a Hohia kingi o Hura; ko te tau tuatahi tera o Nepukareha kingi o Papurona; I korerotia taua  
<sup>2</sup>  
 mea e Heremaia, e te poropiti, ki te iwi katoa o Hura, ki nga tangata katoa hoki o Hiruharama; i ki  
<sup>3</sup>  
 ia, No te tekau ma toru o nga tau o Hohia tama a Amono kingi o Hura, a tae noa mai ki tenei ra,  
 ka rua tekau ma toru enei nga tau, te putanga mai o te kupu a Ihowa ki ahau, me taku korero ano  
<sup>4</sup>  
 ki a koutou, moata ai i te ata a ka korero; heoi kihai kou tou i rongou. Na kua unga e Ihowa ana  
 pononga katoa, nga poropiti ki a koutou, moata ai i nga ata a ka unga i a ratou; heoi kihai koutou  
<sup>5</sup>  
 i rongou, kihai ano o koutou taringa i anga ki te whakarongo; I mea ratou, Tahuri mai koutou, e  
 tera, e tera i tona ara kino, i te kino hoki o a koutou mahi, a e noho ki te oneone i homai e Ihowa  
<sup>6</sup>  
 ki a koutou ko o koutou matua, onamata a ake ake. Kua hoki e whaia he atua ke, kua e mahi  
 ki a ratou, kua e koropiko ki a ratou, kua hoki ahau e whakapataritaria ki te mahi a o koutou  
<sup>7</sup>  
 ringa; a e kore koutou e he i ahau. Heoi kihai koutou i rongou ki ahau, e ai ta Ihowa; he mea kia  
 whakapataritaria ai ahau ki te mahi a o koutou ringa, hei he ano mo koutou.  
<sup>8</sup>  
 Mo reira ko te kupu tenei a Ihowa o nga mano, Na kihai na koutou i rongou ki aku kupu,  
<sup>9</sup>  
 Nana, ka unga tangata ahau ki te tiki i nga hapu katoa o te raki, e ai ta Ihowa, a ka unga tangata  
 ahau ki taku pononga, ki a Nepukareha kingi o Papurona, a ka kawea mai ratou ki tenei whenua,

ki ona tangata hoki, a ki nga iwi katoa nei a tawhio noa; ka tino whakangaromia ratou e ahau, ka  
 meinga hei miharotanga, hei whakahianganga atu, hei ururua tuturu. <sup>10</sup> Ka tangohia atu hoki e ahau i  
 a ratou te reo o te koa, te reo o te hari, te reo o te tane marena hou, te reo o te wahine marena hou,  
 te haruru o nga kohatu mira, te marama hoki o te rama. <sup>11</sup> A ka waiho tenei whenua katoa hei  
 ururua, hei keteketenga; a ka mahi enei iwi ki te kingi o Papurona, e whitu tekau tau. <sup>12</sup> A ka rite  
 nga tau e whitu tekau, ka whiua e ahau te kingi o Papurona me taua iwi, e ai ta Ihowa, mo to ratou  
 kino, me te whenua hoki o nga Karari; ka meinga a reira e ahau kia ururua a ake ake. <sup>13</sup> Ka kawea  
 hoki e ahau ki runga ki taua whenua aku kupu katoa i korerotia e ahau mo reira, nga mea katoa kua  
 oti te tuhituhi ki tenei pukapuka, kua poropititia nei e Heremaia mo aua iwi katoa. <sup>14</sup> Ka whakamahia  
 hoki ratou, ae ra, ratou e nga iwi maha, e nga kingi nunui hoki: a ka rite ki a ratou hanga, ki te mahi  
 hoki a o ratou ringa taku utu ki a ratou.  
<sup>15</sup> Ko te kupu hoki tenei a Ihowa, a te Atua, o Iharaira ki ahau, Tangohia te kapu waina o tenei  
 riri i toku ringa, whakainumia ma nga iwi katoa ka unga nei koe e ahau ki a ratou. <sup>16</sup> A ka inu  
 ratou, hurori atu, hurori mai, ka haurangi, i te hoari e unga e ahau ki waenganui i a ratou. <sup>17</sup> Katahi  
 ahau ka tango i te kapu i te ringa o Ihowa, whakainumia ana ma nga iwi katoa i unga nei ahau e  
 Ihowa ki a ratou: <sup>18</sup> Ara ma Hiruharama, ma nga pa o Hura, ma ona kingi, a ma ona rangatira, kia  
 meinga ai ratou hei ururua, hei miharotanga, hei whakahianganga, hei kanga; hei penei me to tenei ra;  
<sup>19</sup> Ma Parao kingi o Ihipa, ratou ko ana tangata, ko ana rangatira, ko tona iwi katoa; <sup>20</sup> Ma nga iwi  
 i whakaranua, ma nga kingi katoa o te whenua o Uhu, ma nga kingi katoa o te whenua o nga  
 Pirihitini, ma Ahakarono, ma Kaha, ma Ekerono, ma nga morehu ano o Aharoro: <sup>21</sup> Ma Eroma,  
 ma Moapa, ma nga tama a Amona; <sup>22</sup> Ma nga kingi katoa o Taira, ma nga kingi katoa o Hairona,  
 ma nga kingi o te motu i tera taha o te moana; <sup>23</sup> Ma Rerana, ma Tema, ma Putu, ma te hunga  
 katoa e tapahia ana nga tapa o o ratou makawe; <sup>24</sup> Ma nga kingi katoa o Arapia, ma nga kingi katoa  
 o te iwi i whakaranua, e noho ana i te koraha; <sup>25</sup> Ma nga kingi katoa o Timiri, ma nga kingi katoa  
 o Erama, ma nga kingi katoa o nga Meri. <sup>26</sup> Ma nga kingi katoa o te raki, ma nga mea e tata ana,  
 ma nga mea i tawhiti, ma tetahi, ma tetahi; ma nga kingitanga katoa hoki o te ao, i te mata o te  
 oneone: a ka inu te kingi o Hehaka i muri i a ratou. <sup>27</sup> Me ki ano e koe ki a ratou, Ko te kupu tenei  
 a Ihowa o nga mano, a te Atua o Iharaira; E inu koutou, a haurangi iho, ruaki, e hinga ki raro, kaua  
 e ara mai ano ki runga, i te hoari hoki e unga e ahau ki waenganui i a koutou. <sup>28</sup> Na, ki te kore  
 ratou e pai ki te tango i te kapu i roto i tou ringa kia inumia, katahi koe ka mea ki a ratou, Ko te

29

kupu tenei a Ihowa o nga mano; Me inu rawa nei e koutou. No te mea, nana, ka timata ahau ki te whakatupu kino i te pa i huaina nei toku ingoa mo reira: a kia tukua koutou kia kahore rawa e whiua? E kore ra koutou e kore te whiua: no te mea ka karangatia e ahau he hoari ki runga ki nga tangata katoa o te whenua, e ai ta Ihowa o nga mano.

30

Mo reira me poropiti e koe enei kupu katoa ki a ratou, mea atu ki a ratou, Ka hamama mai a Ihowa i te wahi tiketike, ka puaki mai tona reo i tona kainga tapu; ka tino nui tana hamama ki tana taiepa hipi; ka umere ia, ka pera i ta nga kaitakahi k arepe, ki nga tangata katoa o te whenua.

31

Ka paku te ngangau ki te pito ra ano o te whenua; no te mea he totohe ta Ihowa ki nga iwi, ka whakawakia e ia nga kikokiko katoa; ko te hunga kino, ka tukua e ia ki te hoari, e ai ta Ihowa.

32

Ko te kupu tenei a Ihowa o nga mano, Ka puta atu he kino i tetahi iwi ki tetahi iwi, a ka

33

whakatututia he tukauati nui i nga pito rawa o te whenua. Na, ko nga tupapaku a Ihowa ka takoto i taua ra i tetahi pito o te whenua tae noa ki tetahi pito o te whenua: e kore hoki ratou e tangihia, e

34

kore ano e kohikohia, e tanumia ranei; hei whakawairakau ratou ki te mata o te whenua. Aue, e nga hepara, hamama; okeoke i roto i te pungarehu, e nga metararahi o te kahui: kua tae mai hoki nga ra mo koutou kia patupatua, a ka tukitukia koutou e ahau mongamonga noa, a ka taka koutou

35

ano he oko i matenuitia. A ka kore he wahi hei rerenga mo nga hepara, kahore he mawhititanga

36

mo nga metararahi o te kahui. He reo no te tangi o nga hepara, he aue no nga metararahi o te

37

kahui! no te mea e pahuatia ana e Ihowa to ratou haerenga hipi. A ka meinga kia nohopuku nga

38

nohoanga hipi humarie; no te mea ka mura te riri o Ihowa. Ka whakarerea e ia tona kuhunga, ka pera i te raiona; ka waiho hoki to ratou whenua hei miharotanga i te taikaha o te hoari tukino, i te muranga o tona riri.

## Chapter 26

1

I te timatanga o te kingitanga o Iehoiakimi tama a Hohia kingi o Hura, ka puta mai tenei kupu

2

i a Ihowa; i mea ia, Ko te kupu tenei a Ihowa; E tu ki te marae o te whare o Ihowa, korerotia hoki ki nga pa katoa o Hura e haere mai ana ki te koropiko i roto i te whare o Ihowa, nga kupu katoa e

3

whakahau nei ahau ki a koe kia korerotia ki a ratou; kua tetahi kupu e kaiponuhia: Tera pea ka rongo ratou, a ka tahuri ia tangata, ia tangata, i o ratou ara kino; kia puta ke ai toku whakaaro mo

4

te kino, e mea nei ahau kia meatia ki a ratou mo te kino o a ratou mahi. A ka ki atu koe ki a ratou, Ko te kupu tenei a Ihowa: Ki te kahore koutou e rongo ki ahau, ka haere i runga i taku ture kua

5  
hoatu nei e ahau ki to koutou aroaro, E rongu ki nga kupu a aku pononga, a nga poropiti e unga nei e ahau ki a koutou, maranga wawe ai i te ata a ka unga i a ratou, otia kihai koutou i rongu;

6  
Na ka meinga e ahau tenei whare kia rite ki Hiro, ka meinga hoki tenei pa hei kanga ma nga iwi katoa o te whenua.

7  
A ka rongu nga tohunga, nga poropiti, me te iwi katoa i a Heremaia, e korero ana i enei kupu  
8  
i te whare o Ihowa. Na, i te mutunga o te korero a Heremaia i nga mea katoa i whakahaua ai ia e Ihowa kei korerotia ki te iwi katoa, ka hopukia ia e nga tohunga, e nga poropiti, e te iwi katoa

9  
hoki, me te ki, Ko te mate kau mou. He aha koe i poropiti ai i runga i te ingoa o Ihowa, i ki ai, Ka rite tenei whare ki Hiro, ka ururuatia tenei pa, te ai he tangata hei noho? Na, i te huihui te iwi

10  
katoa ki a Heremaia, ki te whare o Ihowa. A, no te rongonga o nga rangatira o Hura ki enei mea, ka haere atu ratou i te whare o te kingi ki te whare o Ihowa, a noho ana i te kuwaha o te keti hou o

11  
te whare o Ihowa. Katahi ka korero nga tohunga ratou ko nga poropiti ki nga rangatira, ki te iwi katoa hoki, ka mea, Ka tika te mate mo tenei tangata; kua poropiti hoki ia i te he mo tenei pa; kua

12  
rongu na hoki o koutou taringa. Katahi a Heremaia ka korero ki nga rangatira katoa, ki te iwi katoa, ka mea, Na Ihowa ahau i unga mai ki te poropiti mo tenei whare, mo tenei pa, i nga kupu

13  
katoa i rongu na koutou. Na reira whakatikatikaia o koutou ara, a koutou mahi, whakarongo hoki ki te reo o Ihowa, o to koutou Atua; a ka ripeneta a Ihowa ki te kino i korerotia e ia mo koutou.

14  
Tena ko ahau, kei roto ahau i to koutou ringa: ma koutou e mea ki ahau te mea e pai ana, e rite

15  
ana ki ta koutou titiro. Otia kia tino mohio koutou, ki te whakamatea ahau e koutou, e kawea ana koutou i te toto harakore ki runga i a koutou ano, ki runga ki tenei pa, ki ona tangata ano hoki: no te mea he pono, na Ihowa ahau i ngare atu ki a koutou ki te korero i ene i kupu katoa ki o koutou taringa.

16  
Katahi nga rangatira ratou ko te iwi katoa ka ki atu ki nga tohunga ratou ko nga poropiti, Kahore he take e mate ai tenei tangata; kua korero mai hoki ia ki a tatou i runga i te ingoa o Ihowa,

17  
o to tatou Atua. Na ka whakatika etahi o nga kaumatua o te whenua, ka korero ki te huihui katoa

18  
o te iwi, ka mea, I poropiti a Mika Morahati i nga ra o Hetekia kingi o Hura, i korero ki te iwi katoa o Hura, i mea, Ko te kupu tenei a Ihowa o nga mano; Ka parautia a Hiona, ka rite ki te mara, a hei puranga a Hiruharama, ka rite hoki te maunga o te whare ki ng a wahi tiketike o te ngahere.

19  
I anga ranei a Hetekia kingi o Hura ratou ko Hura katoa, i mea rawa ki te whakamate i a ia? He teka ianei i wehi ia i a Ihowa, a inoi ana ki te mata o Ihowa, a ripeneta ana a Ihowa ki te kino i korerotia e ia mo ratou? Na ko tatou, ma konei tato u e mea ai i te kino nui ki o tatou nei wairua.

20  
Na tera ano hoki tetahi tangata i poropiti i runga i te ingoa o Ihowa, ko Uriia tama a Hemaia o

Kiriata Tearimi; i poropiti ia i te he mo tenei pa, mo tenei whenua hoki, he penei ano me nga kupu  
<sup>21</sup>  
katoa a Heremaia; A, no te rongonga o Kingi Iehoiakimi ratou ko ana metararahi, ko nga rangatira  
katoa, i ana kupu, ka whai te kingi kia whakamatea ia; no te rongonga ia o Uriia, ka wehi, ka rere,  
<sup>22</sup>  
a haere ana ki Ihipa. Na ka unga e Iehoiakimi he tangata ki Ihipa, ara a Erenatana tama a Aikaporo,  
<sup>23</sup>  
ratou ko ona hoa ki Ihipa. Na tikina atu ana a Uriia e ratou i Ihipa, kawea mai ana ki a Kingi  
Iehoiakimi; patua iho e ia ki te hoari, maka ana e ia tona tinana ki nga tanumanga o nga tamariki  
<sup>24</sup>  
a te iwi. Otiia i a Heremaia te ringa o Ahikama tama a Hapana, i kore ai ia e tukua ki te ringa o  
te iwi kia whakamatea.

## Chapter 27

<sup>1</sup>  
I te timatanga o te kingitanga o Iehoiakimi tama a Hohia kingi o Hura ka puta mai tenei kupu  
a Ihowa ki a Heremaia, i mea ia, <sup>2</sup>  
Ko te kupu tenei a Ihowa ki ahau, Hanga he here, he ioka mou,  
<sup>3</sup>  
ka whakanoho ai ki tou kaki; Na tukua ki te kingi o Eroma, ki te kingi o Moapa, ki te kingi o nga  
tama a Amona, ki te kingi o Taira, ki te kingi hoki o Hairona: ma te ringa o nga karere e haere mai  
<sup>4</sup>  
ana ki Hiruharama, ki a Terekia kingi o Hura, e mau. Me whakahau ano ratou e koe kia ki atu ki  
o ratou ariki, Ko te kupu tenei a Ihowa o nga mano, a te Atua o Iharaira, Kia penei ta koutou ki atu  
<sup>5</sup>  
ki o koutou ariki: Naku i hanga te whenua, te tangata me te kararehe i runga i te mata o te whenua,  
<sup>6</sup>  
na toku kaha nui, na toku ringa maro tonu; na e hoatu ana e ahau ki taku e pai ai. Na inaianei kua  
oti te hoatu e ahau enei whenua katoa ki te ringa o Nepukaneha kingi o Papurona, ki taku pononga;  
<sup>7</sup>  
a kua hoatu ano e ahau nga kirehe o te parae ki a ia kia whakamahia e ia. A ka mahi nga iwi katoa  
ki a ia, ki tana tama, ki te tama ano hoki a tana tama, kia taka ra ano te wa o tona ake whenua; a  
<sup>8</sup>  
hei reira ia whakamahia ai e nga iwi maha, e nga kingi nunui hoki. Na ko te iwi, a ko te kingitanga,  
e kore e mahi ki taua Nepukaneha kingi o Papurona, e kore hoki e tuku i o ratou kaki ki raro ki te  
ioka a te kingi o Papurona, ka whiua e ahau taua iwi, e ai ta Ihowa, ki te hoari, ki te hemokai, ki te  
<sup>9</sup>  
mate uruta, kia moti ra ano ratou i ahau ki tona ringa. Tena ko koutou, kua koutou e rongu ki o  
koutou poropiti, ki o koutou tohunga tuaahu, ki o koutou moemoea, ki o koutou tohunga kapua, ki  
o koutou tohunga makutu, e korero na ki a koutou, e mea na, E kore koutou e mahi ki te kingi o  
<sup>10</sup>  
Papurona: No te mea e poropiti ana ratou i te teka ki a koutou, he mea kia matara atu ai koutou  
<sup>11</sup>  
i to koutou oneone; kia peia ai hoki koutou e ahau, kia ngaro ai. Engari ko te iwi e tuku ana i o



ratou kaki ki raro ki te ioka a te kingi o Papurona, a ka mahi ki a ia, ka waiho ratou e ahau ki to ratou oneone, e ai ta Ihowa; a ka ngakia e ratou, ka noho hoki ratou ki reira.

12

Na rite tonu ki enei kupu katoa taku i korero ai ki a Terekia kingi o Hura, i mea ahau, Tukua atu o koutou kaki ki raro ki te ioka a te kingi o Papurona; e mahi ki a ia, ki a ratou ko tona iwi, a

13

ka ora koutou. Kia mate koutou hei aha, koutou ko tou iwi i te hoari, i te hemokai, i te mate

14

uruta, i ta Ihowa i ki a mo te iwi e kore nei e mahi ki te kingi o Papurona? Kua hoki e rongo ki nga kupu a nga poropiti e korero na ki a koutou, e mea na, E kore koutou e mahi ki te kingi o

15

Papurona: e poropiti teka ana hoki ratou ki a koutou. Ehara hoki ratou i ahau i unga atu, e ai ta Ihowa, otiia kei te poropiti teka ratou i runga i toku ingoa; he mea kia peia ai koutou e ahau, a kia

16

ngaro ai koutou, me nga poropiti e poropiti na ki a koutou. I korero ano ahau ki nga tohunga, ki tenei iwi katoa, i mea, Ko te kupu tenei a Ihowa; Kei rongo koutou ki nga kupu a o koutou poropiti e poropiti na ki a koutou, e mea na, Nana, ka tata te whakahokia mai nga oko o te whare

17

o Ihowa i Papurona: h e poropiti teka hoki ta ratou ki a koutou. Kei whakarongo ki a ratou; e

18

mahi ki te kingi o Papurona, kia ora ai koutou: kia ururuatia tenei pa hei ahau? Otira, ki te mea he poropiti ratou, ki te mea kei a ratou te kupu a Ihowa, me inoi ratou inaianei ki a Ihowa o nga mano, kia kua nga oko e toe nei ki te whare o Ihowa, ki te whare o te kingi o Hura, ki Hiruharama,

19

e tae ki Papurona. Ina hoki te kupu a Ihowa o nga mano mo nga pou, mo te moana, mo nga

20

turanga, a mo nga toenga o nga oko kua mahue nei ki tenei pa, Kihai nei i riro i a Nepukaneha kingi o Papurona i tana whakaraunga atu i a Hekonia tama a Iehoiakimi kingi o Hura i roto i

21

Hiruharama ki Papurona, ratou ko nga rangatira katoa o Hura, o Hiruharama; Ae ra, ko te kupu tenei a Ihowa o nga mano, a te Atua o Iharaira, mo nga oko e toe nei ki te whare o Ihowa, ki te

22

whare hoki o te kingi o Hura, ki Hiruharama; Ka kawea aua mea ki Papurona, ka takoto hoki ki reira, taea noatia te ra e pa ai ahau ki a ratou, e ai ta Ihowa; hei reira ka maua mai e ahau, ka whakahokia mai ki tenei wahi.

## Chapter 28

1

I taua tau, i te timatanga o te kingitanga o Terekia kingi o Hura, i te wha o nga tau, i te rima o nga marama, ka korero a Hanania poropiti tama a Aturu, he tangata no Kipeono, ki ahau i roto i

2

te whare o Ihowa, i te aroaro o nga tohunga ratou ko te iwi katoa; i mea ia, Ko te kupu tenei a Ihowa o nga mano, a te Atua o Iharaira, e ki ana ia, Kua whati i ahau te ioka a te kingi o Papurona.

3

E kore e tutuki rawa nga tau e rua, ka whakahokia mai e ahau ki tenei wahi nga oko katoa o te whare o Ihowa i maua atu e Nepukaneha kingi o Papurona i tenei wahi, i kawea atu e ia ki Papurona:

4

A ka whakahokia mai e ahau ki tenei wahi a Hekonia tama a Iehoiakimi kingi o Hura, ratou ko nga whakarau katoa o Hura i haere nei ki Papurona, e ai ta Ihowa: no te mea ka whati i ahau te ioka

5

a te kingi o Papurona. Katahi ka mea atu a Heremaia poropiti ki a Hanania poropiti i te aroaro o

6

nga tohunga, i te aroaro ano o te iwi katoa e tu ana i te whare o Ihowa, I mea taua Heremaia poropiti, Amine: kia pena mai ano a Ihowa: kia mahia hoki e Ihowa au kupu i poropititia na e koe mo nga oko o te whare o Ihowa, mo nga whakarau katoa hoki, ka whakahokia mai i Papurona ki

7

tenei wahi. Otiia kia rongu mai koe inaianei ki tenei kupu e korerotia nei e ahau ki ou taringa, ki

8

nga taringa ano o te iwi katoa: Ko nga poropiti i mua atu i ahau, i mua atu hoki i a koe, i mua noa atu, i poropititia e ratou he he mo nga whenua maha, mo nga kingitanga nunui, he whawhai, he

9

kino, he mate uruta. Ko te poropiti e poropiti ana i te rongu mau, ki te tutuki te kupu a te poropiti, hei reira ka mohiotia taua poropiti, he pono na Ihowa ia i unga mai.

10

Katahi ka mau a Hanania poropiti ki te ioka i te kaki o Heremaia poropiti, wahia ana e ia.

11

A ka korero a Hanania poropiti i te aroaro o te iwi katoa, ka mea, Ko te kupu tenei a Ihowa, Ka peneitia e ahau te wahi atu i te ioka a Nepukaneha kingi o Papurona i roto i nga ra o nga taua e rua

12

i te kaki o nga iwi katoa. Na haere ana a Heremaia poropiti i tona ara. Katahi ka puta mai te kupu a Ihowa ki a Heremaia i muri i te wawahanga a Hanania poropiti i te ioka i te kaki o Heremaia

13

poropiti, a ka mea ia, Haere, korero ki a Hanania, mea atu, Ko te kupu tenei a Ihowa: Kua wahia

14

e koe nga ioka rakau; otira me hanga e koe etahi ioka rino hei whakakapi mo ena. Ko te kupu hoki tenei a Ihowa o nga mano, a te Atua o Iharaira: Kua whakanohoia e ahau he ioka rino ki te kaki o enei iwi katoa, kia mahi ai ratou ki a Nepukaneha kingi o Papurona: ina, ka mahi ratou ki a

15

ia; kua hoatu ano e ahau nga kirehe o te parae ki a ia. Katahi ka mea te poropiti, a Heremaia, ki te poropiti, ki a Hanania, Whakarongo mai, e Hanania; ehara koe i a Ihowa i unga; kua mea ia koe

16

i tenei iwi kia whakawhirinaki ki te teka. Mo reira ko te kupu tenei a Ihowa, Nana, ka peia atu koe e ahau i te mata o te oneone: i tenei tau ano ka mate koe, no te mea kua korero koe i te tutu ki

17

a Ihowa. Na i taua tau ano ka mate a Hanania i te whitu o nga marama.

## Chapter 29

<sup>1</sup> Ko nga kupu enei o te pukapuka i tukua e Heremaia poropiti i Hiruharama ki nga morehu o nga kaumatua i whakaraua atu nei, ki nga tohunga, ki nga poropiti, ki te iwi katoa i whakaraua atu e Nepukaneha i Hiruharama ki Papurona; <sup>2</sup> I muri tenei i te haerenga atu o Kingi Hekonia i Hiruharama, ratou ko te kuini, ko nga unaka, ko nga rangatira o Hura, o Hiruharama, me nga kamura ratou ko nga parakimete; <sup>3</sup> He mea kawe na Eraha tama a Hapana, raua ko Kemaria tama a Hirikia; he mea unga ano enei na Terekia kingi o Hura ki Papurona, ki a Nepukaneha kingi o Papurona; i mea ia, <sup>4</sup> Ko te kupu tenei a Ihowa o nga mano, a te Atua o Iharaira, ki nga whakarau katoa, i meinga nei e ahau kia whakaraua atu i Hiruharama ki Papurona; <sup>5</sup> Hanga he whare mo koutou, ka noho i roto; whakatokia he kari, ka kai i o ratou hua; <sup>6</sup> Marenatia he wahine, kia whanau he tama, he tamahine ma koutou; meatia he wahine ma a koutou tama, tukua hoki a koutou tamahine ki te tane, kia whanau ai he tama, he tamahine ma ratou; a kia tini koutou ki reira, kaua hei torutoru. <sup>7</sup> Rapua hoki te rongu mau mo te pa kua meinga na koutou e ahau kia whakaraua ki reira, inoi hoki ki a Ihowa mo reira; ma te mau hoki o tona rongu ka whiwhi ai koutou ki te rangimarie. <sup>8</sup> Ko te kupu hoki tenei a Ihowa o nga mano, a te Atua o Iharaira: Kei tinihangatia koutou e a koutou poropiti, e a koutou tohunga tuaahu e noho na i roto i a koutou, kaua hoki e rongu ki a koutou moe e meinga na e koutou kia moea. <sup>9</sup> No te mea e poropiti teka ana ratou ki a koutou i runga i toku ingoa: ehara ratou i te mea naku i unga, e ai ta Ihowa. <sup>10</sup> Ko te kupu hoki tenei a Ihowa, Kia rite nga tau e whitu tekau ki Papurona, ka tirohia koutou e ahau; a ka whakatutukitia e ahau taku kupu pai ki a koutou, mo koutou kia whakahokia mai ki tenei wahi. <sup>11</sup> Kei te mohio hoki ahau ki nga whakaaro e whakaaro nei ahau ki a koutou, e ai ta Ihowa, he whakaaro mo te rongu mau, ehara mo te kino, kia hoatu te tumanako ki a koutou i o koutou ra whakamutunga. <sup>12</sup> A tera koutou e karanga ki ahau, a ka haere koutou ka inoi ki ahau, a ka rongu ahau ki a koutou. <sup>13</sup> Ka rapua ano ahau e koutou, a ka kitea e koutou, ina whakapaua o koutou ngakau ki te rapu i ahau. <sup>14</sup> A ka kitea ahau e koutou, e ai ta Ihowa, ka whakahokia hoki e ahau to koutou whakaraunga, a ka kohikohia koutou e ahau i roto i nga iwi katoa, i nga wahi katoa i peia atu ai koutou e ahau, e ai ta Ihowa; a ka whakahokia mai koutou e ahau ki te wahi i whakaraua atu ai koutou e ahau. <sup>15</sup> Kua ki hoki koutou, Kua ara i a Ihowa etahi poropiti mo tatou i Papurona. <sup>16</sup> Ko te kupu hoki tenei a Ihowa mo te kingi e noho ana i runga i te torona o Rawiri, mo te iwi katoa hoki e noho ana i tenei pa, mo o koutou teina kihai nei i haere tahi koutou i te whakaraunga; <sup>17</sup> Ko te kupu tenei a Ihowa o nga mano: Nana, ka unga atu e ahau ki runga ki a ratou te hoari, te hemokai, te mate uruta, a ka meinga ratou e ahau kia rite ki nga piki kikino, e kore nei e taea te kai i te kino

18  
 rawa. A ka whaia ratou e ahau ki te hoari, ki te hemokai, ki te mate uruta, ka tukua hoki ratou  
 kia poipoia i waenganui i nga kingitanga katoa o te whenua, hei kanga, hei miharotanga, hei  
 whakahianga atu, a hei hahani, i roto i nga iwi katoa e peia at u ai ratou e ahau. 19  
 No te mea kihai  
 ratou i rongo ki aku kupu, e ai ta Ihowa, ki aku kupu i unga ra e ahau kia kawea ki a ratou e aku  
 pononga, e nga poropiti, moata ai i te ata ki te unga i a ratou; heoi kihai koutou i rongo, e ai ta  
 Ihowa. 20  
 Mo reira whakarongo mai ki te kupu a Ihowa, koutou katoa o te whakaraunga, kua unga  
 atu nei e ahau i Hiruharama ki Papurona. 21  
 Ko te kupu tenei a Ihowa o nga mano, a te Atua o  
 Iharaira, mo Ahapa tama a Koraia, mo Terekia tama a Maaheia, e poropiti teka na ki a koutou i  
 runga i toku ingoa: Nana, ka hoatu raua e ahau ki te ringa o Nepukareha kingi o Papurona; a mana  
 raua e whakamate i o koutou aroaro. 22  
 A ka ai raua hei kanga ma nga whakarau katoa o Hura i  
 Papurona, ka korerotia, Kia meinga koe e Ihowa kia rite ki a Terekia raua ko Ahapa, i tunua nei e  
 te kingi o Papurona ki te ahi; 23  
 Kua mahi poauau hoki raua i roto i a Iharaira, kua puremu ki nga  
 wahine a o raua hoa, kua korero hoki i nga kupu teka i runga i toku ingoa, he mea kihai i whakahaua  
 atu e ahau ki a raua; ko ahau tenei e mohio ana, ko ahau te kaiwhakaatu, e ai ta Ihowa.  
 24  
 Na mo Hemaia Neherami me korero koe, me ki atu, 25  
 Ko te kupu tenei a Ihowa o nga  
 mano, a te Atua o Iharaira, e mea ana ia, I te mea kua tukua e koe etahi pukapuka i runga i tou ake  
 ingoa ki te iwi katoa i Hiruharama, ki te tohunga, ki a Tepania tama a Maaheia, ratou ko nga tohunga  
 katoa, kua me a atu, 26  
 Kua oti koe te mea e Ihowa hei tohunga i muri i a Iehoiara tohunga, kia  
 waiho ai ko koutou hei kaitirotiro i roto i te whare o Ihowa mo te tangata katoa e haurangi ana, e  
 whakaporopiti ana i a ia, kia maka e koe ki nga here waewae, ki nga here r inga. 27  
 Na he aha ra  
 te riria ai e koe a Heremaia Anatoti, e whakaporopiti na i a ia ki a koutou? 28  
 Kua tukua mai nei  
 hoki e ia he kupu ki a matou ki Papurona, e mea ana, Ka roa te whakaraunga: hanga he whare mo  
 koutou, ka noho i roto; whakatokia he kari, kainga o ratou hua. 29  
 Na i korerotia tenei pukapuka  
 e Tepania tohunga ki nga taringa o Heremaia poropiti. 30  
 Katahi ka puta mai te kupu a Ihowa ki a  
 Heremaia, i mea ia, 31  
 Tukua he kupu ki nga whakarau katoa, mea atu, Ko te kupu tenei a Ihowa  
 mo Hemaia Neherami: Kua poropiti na a Hemaia ki a koutou, a kihai hoki ia i unga e ahau, a kua  
 meinga koutou e ia kia whakawhirinaki ki te teka, 32  
 Mo reira ko te kupu tenei a Ihowa, Nana, ka  
 whiua e ahau a Hemaia Neherami ratou ko ona uri; kore iho he tangata mona hei noho i roto i tenei  
 iwi, e kore hoki ia e kite i te pai e mahia e ahau ki taku iwi, e ai ta Ihowa; no te mea kua korero ia  
 i te tutu mo Ihowa.

## Chapter 30

<sup>1</sup> Ko te kupu i puta mai ki a Heremaia, he mea na Ihowa; i mea ia, <sup>2</sup> Ko te kupu tenei a Ihowa, a te Atua o Iharaira, e mea ana, Tuhihia ki te pukapuka nga kupu katoa i korerotia e ahau ki a koe. <sup>3</sup> Tenei ake hoki nga ra, e ai ta Ihowa, e whakahokia mai ai e ahau taku iwi, a Iharaira raua ko Hura, i te whakarau, e ai ta Ihowa: a ka whakahokia mai ratou e ahau ki te whenua i hoatu e ahau ki o ratou matua, a ka riro a reira i a ratou. <sup>4</sup> A ko nga kupu enei i korerotia e Ihowa mo Iharaira raua ko Hura, <sup>5</sup> Ko te kupu hoki tenei a Ihowa: Kua rongoa tatou i te reo o te tuiri, o te wehi, ehara i te rongoa mau. <sup>6</sup> Tena ra, ui atu, kia kite ai koutou, he whanau tamariki ranei ta te tane: He aha ahau i kite ai i nga tangata katoa ko o ratou ringa kei o ratou hope, koia ano kei te wahine e whanau ana, kua puta ke ano nga kanohi katoa, kua koma? <sup>7</sup> Aue! he ra nui hoki taua ra, kahore he rite mona: ko te wa hoki ia o to Hakopa mamae; otiia ka whakaorangia ia i taua mamae. <sup>8</sup> Na i taua ra, e ai ta Ihowa o nga mano, ka wahia e ahau tana ioka i tou kaki, ka motuhia hoki ou here; e kore hoki ia e whakamahia e nga tangata ke i muri iho: <sup>9</sup> Engari ka mahi ratou ki a Ihowa, ki to ratou Atua, ki a Rawiri hoki, ki to ratou kingi e whakaarahia ake e ahau mo ratou. <sup>10</sup> Na reira kua e wehi, e taku pononga, e Hakopa, e ai ta Ihowa, kua hoki e pawera, e Iharaira: nana, ka whakaora hoki ahau i a koe i tawhiti, i ou uri ano i te whenua i whakaraua atu ai ratou; a ka hoki mai a Hakopa, ka ata noho, ka whai tanga m anawa, te ai he kaiwhakawehi mona. <sup>11</sup> No te mea hei hoa ahau mou, e ai ta Ihowa, hei whakaora i a koe: ka poto rawa hoki i ahau nga iwi katoa kua whakamararatia atu na koe ki reira, otiia e kore koe e poto rawa i ahau; engari ka pakia koe e ahau, he mea whakarite marie atu, e kore a no hoki koe e tukua kia kahore rawa e whiua. <sup>12</sup> Ko te kupu hoki tenei a Ihowa, Ko tou pakaru e kore e mahu, he mamae rawa tou marutanga. <sup>13</sup> Kahore he tangata hei tohe i tau, kia takaia ai koe: kahore ou rongoa whakamahu. <sup>14</sup> Ko te hunga katoa i aroha ki a koe kua wareware ki a koe; kahore ratou e rapu i a koe; no te mea i patua koe e ahau ki te patu a te hoariri, ki te whiu hoki a te tangata nanakia; he nui hoki no tou kino, he maha no ou hara. <sup>15</sup> He aha koe i tangi ai ki tou pakaru? e kore tou mamae e taea te rongoa: mo te nui hoki o tou kino, he maha no ou hara, i meinga ai e ahau enei mea ki a koe. <sup>16</sup> Na reira ko te hunga katoa e kai ana i a koe, ka kainga ratou; ko ou hoariri katoa, ko ratou katoa, ka riro ki te whakarau; ko te hunga e pahua ana i a koe ka pahuatia ratou, a ka tukua e ahau hei taonga parau te hunga katoa e muru ana i a koe. <sup>17</sup> Ka whakahokia atu hoki e ahau te ora ki a koe, ka rongoa e ahau ou marutanga, e ai ta Ihowa; no te mea kua kiia koe e ratou, he peinga, kua mea, Ko Hiona tenei e kore nei e rapua e te tangata.

18 Ko te kupu tenei a Ihowa: Nana, ka whakahokia mai e ahau i te whakarau nga teneti o Hakopa, ka aroha ki ona nohoanga; a ka hanga te pa ki runga ki tona puranga ano, ka whakapumautia  
 19 ano nga tikanga o te whare kingi. Ka puta mai ano i reira te whakamoemiti, me te reo o te hunga e kata ana: a ka whakanuia ratou e ahau, e kore ratou e torutoru: ka whakakororiatia hoki ratou e  
 20 ahau, a e kore ratou e iti. A ka rite a ratou tamariki ki o mua; ka whakapumautia hoki to ratou  
 21 whakaminenga ki toku aroaro, a ka whiua e ahau te hunga katoa e tukino ana i a ratou. A ko to ratou metararahi ko tetahi ano o ratou, ka puta ake hoki to ratou kawana i roto i a ratou; a ka meinga ia e ahau kia whakatata mai, a ka haere mai ia ki ahau: ko wai oti tenei kua toa nei ki te haere mai  
 22 ki ahau? e ai ta Ihowa. A hei iwi koutou maku, ko ahau hoki hei Atua mo koutou. Nana, ko  
 23 te tukauati a Ihowa, ara ko tona riri mura tonu, te paoho atu na, he tukauati e tahi ana: tera e aki ki  
 24 runga ki te mahunga o te hunga kino. E kore e tahuri atu te riri kino o Ihowa, kia oti ra ano i a ia, kia whakapumautia ra ano e ia nga whakaaro o tona ngakau: i nga ra whakamutunga ka matau koutou.

### Chapter 31

1 I taua wa, e ai ta Ihowa, ka waiho ahau hei Atua mo nga hapu katoa o Iharaira, ko ratou hoki  
 2 hei iwi maku. Ko te kupu tenei a Ihowa, Ko te iwi i toe i te hoari, i kite i te manako ki te koraha;  
 3 ara a Iharaira, i ahau i haere atu ai ki te mea tanga manawa mona. I puta mai a Ihowa ki ahau i mua noa atu, i mea mai, Ae ra, he aroha pumau toku i aroha ai ahau ki a koe: na reira te atawhai i  
 4 kukume ai ahau i a koe. Ka hanga ano koe e ahau, a ka oti koe te hanga, e te wahine o Iharaira: tera ano koe ka whakapaipai ki au timipera, a ka haere atu i roto i nga kanikani a te hunga harakoa.  
 5 Tera koe e whakato ano he mara waina ki runga ki nga maunga o Hamaria: ka whakato nga  
 6 kaiwhakato, a ka kai i ona hua. No te mea tena ano te ra, e karanga ai nga kaitiaki i runga i nga pukepuke o Eparaima, Whakatika, tatou ka haere ki runga, ki Hiona, ki a Ihowa, ki to tatou Atua.  
 7 Ko te kupu hoki tenei a Ihowa, Waiata i runga i te koa ki a Hakopa, hamama mo te metararahi o nga iwi: korerotia atu, whakamoemititia, mea atu, E Ihowa, whakaorangia tau iwi, te morehu o  
 8 Iharaira. Nana, ka kawea mai ratou e ahau i te whenua ki te raki, ka kohikohia mai i nga topito o te whenua, me nga matapo, me nga kopa, me te wahine e hapu ana, me te wahine hoki e  
 9 whakamamae ana, i o ratou taha; he hui nui tonu ratou e hoki mai ai ki kon ei. Ka haere mai ratou me te tangi, a ka arahina ratou e ahau i runga i te inoi: ka meinga ratou e ahau kia haere i te taha o

nga awa wai, ma te ara tika e kore ai o ratou waewae e tutuki i reira; no te mea he papa ahau ki a Iharaira, a ko Eparaima t aku matamua.

10

Whakarongo ki te kupu a Ihowa, e nga iwi, korerotia hoki ki nga motu o tawhiti, mea atu, Ko te kaititaritari o Iharaira, mana ratou e whakawhaiti, mana ratou e tiaki, ka rite ki ta te hepara

11

i tana kahui. Kua hokona nei hoki a Hakopa e Ihowa, utua ana e ia, tangohia mai ana i roto i te

12

ringa o te mea i kaha rawa i a ia. Na ka haere mai ratou ka waiata i te wahi tiketike o Hiona, ka rere huihui ki te pai o Ihowa, ki te witi, ki te waina, ki te hinu, a ki nga kua o hipi, kua kau: a ka

13

rite o ratou wairua ki te kari kua oti te whakamakuku; a ka tino mutu rawa ta ratou tangi. Katahi te wahine ka koa ki te kanikani, me nga taitama ngatahi ko nga kaumatua: ka meinga hoki e ahau

14

ta ratou tangi hei koa, ka whakamarietia ratou, a ka meinga ratou kia hari i o ratou mamae. Ka whakatinatia e ahau te wairua o nga tohunga ki te ngako, ka makona ano toku iwi i toku pai, e ai ta

15

Ihowa. Ko te kupu tenei a Ihowa, I rangona he reo ki Rama, he uhunga, he tangi, tiwerawera ana, ko Rahera e tangi ana ki ana tamariki, a kihai i pai kia whakamarietia mo ana tamariki, kua

16

kahore nei. Ko te kupu tenei a Ihowa, Whakamutua te tangi o tou reo, nga roimata hoki i ou kanohi; no te mea ka whai utu tau mahi, e ai ta Ihowa; a ka hoki mai ano ratou i te whenua o te

17

hoariri. Ka whai tumanakohanga hoki tou mutunga, e ai ta Ihowa, a ka hoki mai au tamariki ki to ratou ake rohe.

18

He pono kua rongu ahau i a Eparaima e tangi ana ki a ia ano, penei, Kua pakia ahau e koe, a i pakia ahau, pera i te kua kau kihai i whakaakona ki te ioka: whakatahuritia ahau, a ka tauri

19

ahau; ko koe nei hoki a Ihowa, toku Atua. He pono i muri i toku tauritanga, i ripeneta ahau; a i muri i toku whakaakoranga i papaki ahau ki toku huha: i whakama ahau, ae ra, i numinumi kau,

20

no te mea e waha ana e ahau te ingoa kino o toku taitamarikitanga. He tamaiti matenui ianei a Eparaima naku? he tamaiti ahuareka ianei? no te mea ka korero ana ahau i te he mona, mau tonu toku maharahara ki a ia: no reira oku whekau i oho ai ki a ia; he pono ka tohungia ia e ahau, e ai

21

ta Ihowa. Whakaturia ake etahi tohu ara mau, hanga he pou waitohu: e anga tou ngakau ki te

22

huanui, ki te ara i haere ai koe: hoki mai, e te wahine o Iharaira, hoki mai ano ki enei pa ou. Kia pehea te roa o tou kopikopiko, e te tamahine taurihuri ke? kua hanga hoki e Ihowa he mea hou ki

23

runga ki te whenua, Ka karapoti te wahine i te tane. Ko te kupu tenei a Ihowa o nga mano, a te Atua o Iharaira, Tenei ake ka korerotia ano tenei kupu ki te whenua o Hura, ki ona pa hoki, ina whakahokia mai ratou e ahau i te whakarau: Kia manaaki a Ihowa i a koe, e te nohoanga o te tika,

24

e te maunga o te tapu. A ka noho tahi a Hura me ona pa katoa ki reira; te hunga ngaki i te whenua

25

me te hunga ano e haere tahi ana me nga kahui. Kua tino whakamakonatia hoki e ahau te wairua

ruha, kua whakakiiia ano nga wairua katoa e pouri ana. <sup>26</sup> I konei ka maranga ahau, a ka titiro; na he reka ki ahau taku moe.

<sup>27</sup> Nana, kei te haere mai nga ra, e ai ta Ihowa, e whakatokia ai e ahau te whare o Iharaira me te whare o Hura ki te purapura tangata, ki te purapura kararehe. <sup>28</sup> Na ka pera i ahau i tiaki ai i a ratou i mua, he mea kia hutia ake, kia wahia iho, kia turakina ki raro, kia whakangaromia, kia

tukinotia; ka pera ano taku tiaki i a ratou, he mea kia hanga, kia whakatokia, e ai ta Ihowa. <sup>29</sup> I aua ra ka mutu ta ratou ki, Kua kai nga matua i nga karepe kaiota, a moniania ana nga niho o nga

tamariki. <sup>30</sup> Engari ka mate tenei, tenei, i runga i tona kino, i tona kino: ko nga tangata katoa e kai ana i te karepe kaiota, ko ona niho ano e moniania. <sup>31</sup> Nana, kei te haere mai nga ra, e ai ta Ihowa,

e whakaritea ai e ahau he kawenata hou ki te whare o Iharaira, ki te whare hoki o Hura: <sup>32</sup> E kore ano ia e rite ki te kawenata i whakaritea e ahau ki o ratou matua i te ra i pupuri ai ahau ki o ratou ringa, a kawea mai ana ratou i te whenua o Ihipa; whakataka ana e ratou taua kawenata aku, ahakoa

i waiho ahau hei tahu marena ma ratou, e ai ta Ihowa. <sup>33</sup> Engari ko te kawenata tenei e whakaritea e ahau ki te whare o Iharaira i muri i aua ra, e ai ta Ihowa; Ka hoatu e ahau taku ture ki o ratou wahi i roto, ka tuhituhia ano ki to ratou ngakau; a ko ahau hei Atua mo ratou, ko ratou hei iwi maku.

<sup>34</sup> I muri nei kahore he whakaako a tetahi i tona hoa tata, a tetahi i tona teina, kahore he ki atu, Kia mohio ki a Ihowa; ka mohio hoki ratou katoa ki ahau, i te iti o ratou tae noa ki te mea rahi rawa, e ai ta Ihowa: no te mea ka whakarerea noatia e ahau to ratou kino, a heoi ano oku mahara ki to ratou hara.

<sup>35</sup> Ko te kupu tenei a Ihowa, nana nei i homai te ra hei whakamarama i te awatea, me nga tikanga o te marama, o nga whetu, hei whakamarama i te po, nana hoki i whakatutehu te moana, i

nganga ai ona ngaru; ko Ihowa o nga mano tona ingoa: <sup>36</sup> Ki te mawehe atu enei tikanga i toku

aroaro, e ai ta Ihowa, ko reira ano ka kore te uri o Iharaira hei iwi i toku aroaro a ake ake. <sup>37</sup> Ko te kupu tenei a Ihowa: Mehemea e taea ana te ruri te rangi i runga, te rapu hoki nga turanga o te whenua i raro, katahi hoki ahau ka paopao ki nga uri katoa o Iharaira mo nga mea katoa kua mahia

e ratou, e ai ta Ihowa. <sup>38</sup> Nana, kei te haere mai nga ra, e ai ta Ihowa, e hanga ai te pa hei mea ki

a Ihowa, i te pourewa atu o Hananeere tae noa ki te kuwaha o te koki. <sup>39</sup> A ka tae tonu atu te aho

ruri, tika tonu atu ki te pukepuke ki Karepe, taiawhio tonu atu ki Koata. <sup>40</sup> Na, ko te raorao katoa i nga tupapaku, i nga pungarehu, a ko nga mara katoa hoki, a tae noa ki te awa, ki Kitirono, ki te koki i te kuwaha hoiho whaka te rawhiti, ka tapu katoa ki a Ihowa; e kore e hutia ake, e kore ano e wahia iho a ake ake.



## Chapter 32

<sup>1</sup> Ko te kupu i puta mai ki a Heremaia, he mea na Ihowa, i te tekau o nga tau o Terekia kingi  
o Hura, ara i te tekau ma waru o nga tau o Nepukareha. <sup>2</sup> Na i taua wa e whakapaea ana a Hiruharama  
e te taua a te kingi o Papurona; a ko Heremaia poropiti kua oti te tutaki ki roto ki te marae o te  
whare herehere i te whare o te kingi o Hura. <sup>3</sup> Na Terekia hoki, na te kingi o Hura ia i tutaki; i mea  
tera, He aha koe i poropiti ai, i ki ai, Ko te kupu tenei a Ihowa, Nana, ka hoatu e ahau tenei pa ki  
te ringa o te kingi o Papurona, a ka horo i a ia; <sup>4</sup> A ko Terekia kingi o Hura, e kore e mawhiti i te  
ringa o nga Karari; engari ka tukua putia ia ki te ringa o te kingi o Papurona, a ka korero ia ki a ia  
he mangai ki te mangai, a e kite hoki ona kanohi i ona kanohi; <sup>5</sup> A ka arahina e ia a Terekia ki  
Papurona, a ki reira ia noho ai, kia tae atu ra ano ahau ki te tiro tiro i a ia, e ai ta Ihowa; ahakoa  
whawhai koutou ki nga Karari, e kore e taea e koutou? <sup>6</sup> Na ka mea a Heremaia, I puta mai te kupu  
a Ihowa ki ahau, i mea ia, <sup>7</sup> Nana, tera e tae mai ki a koe a Hanameere tama a Harumu, a tou matua  
keke, a ka mea, Mau e hoko taku mara i Anatoto; kei a koe na hoki te tikanga o te utu whakahoki.  
<sup>8</sup> Na ka haere mai ki ahau a Hanameere tama a toku matua keke, ka pera me ta Ihowa i ki ai, ki te  
marae o te whare herehere, a ka mea ki ahau, Tena koa, hokona taku mara i Anatoto, i te whenua  
o Pineamine; kei a koe hoki te tikanga o taua wahi, mau ano te utu e hoki ai; hokona mau. Katahi  
<sup>9</sup> ahau ka mohio, he kupu tenei na Ihowa. Na ka hokona e ahau te mara a Hanameere tama a toku  
matua, keke, tera i Anatoto, a paunatia atu ana e ahau te moni mana, ara tekau ma whitu nga hekere  
<sup>10</sup> hiriwa. Na ka tuhituhi ahau ki te pukapuka, hiri rawa, karangatia ana nga kaititiro, a paunatia  
atu ana e ahau te moni mana ki te pauna. <sup>11</sup> Na ka mau ahau ki te pukapuka o te hoko, ki te mea  
hiri i rite nei ki ta te ture, ki ta nga tikanga, a ki te mea hirikore: <sup>12</sup> A hoatu ana e ahau te pukapuka  
o te hoko ki a Paruku tama a Neria, tama a Maaheia i te tirohanga ano a Hanameere tama a toku  
matua keke, i te tirohanga hoki a nga kaititiro i tuhituhia ai te pukapuka o te hoko, i te tirohanga  
ano hoki a nga Hura i katoa e noho ana i te marae o te whare herehere. <sup>13</sup> Na ka whakahau ahau  
ki a Paruku i o ratou aroaro, i mea atu ahau, <sup>14</sup> Ko te kupu tenei a Ihowa o nga mano, a te Atua o  
Iharaira: Maua atu enei pukapuka, tenei pukapuka o te hoko, te mea hiri me tenei pukapuka hirikore,  
<sup>15</sup> whaowhina ki te oko oneone; kia maha ai nga ra e mau ai. Ko te kupu hoki tenei a Ihowa o nga  
mano, a te Atua o Iharaira, Tera nga whare, nga mara, me nga mara waina ka hokohokona ano a  
muri nei ki tenei whenua.

<sup>16</sup> Na, i muri i taku hoatutanga i te pukapuka o te hoko ki a Paruku tama a Neria, ka inoi ahau  
 ki a Ihowa, ka mea, <sup>17</sup> Aue, e te Ariki, e Ihowa, nana, kua hanga e koe te rangi me te whenua, na  
 tou kaha nui, na tou ringa maro; kahore he mea e pakeke ki a koe: <sup>18</sup> He mahi aroha nei tau ki nga  
 mano, e utua ana e koe te kino o nga matua ki roto ki te uma o a ratou tamariki i muri i a ratou: ko  
 tona ingoa ko te Atua nui, ko te Atua marohirohi, ko Ihowa o nga mano: <sup>19</sup> He nui ki te whakaaro,  
 he kaha ki te mahi: e tuwhera ana hoki ona kanohi ki nga ara katoa o nga tama a te tangata; he mea  
 kia rite ai ki tona ara ake, ki nga hua o ana mahi, nga mea e hoatu ai ki tenei, ki tenei: <sup>20</sup> Nau nei  
 i homai nga tohu me nga mea whakamiharo ki te whenua o Ihipa, a taea noatia tenei ra, i roto i a  
 Iharaira, i era atu hoki; a meinga ana e koe he ingoa mou, penei i tenei inaianei; <sup>21</sup> Nau nei hoki i  
 kawe mai tau iwi, a Iharaira, i te whenua o Ihipa i runga i nga tohu, i nga mea whakamiharo, i te  
 ringa kaha, i te takakau maro hoki, i te wehi nui; <sup>22</sup> A homai ana e koe ki a ratou tenei whenua i  
 oati ai koe ki o ratou matua ka homai ki a ratou, he whenua e rerengia ana e te waiu, e te honi;  
<sup>23</sup> Na haere mai ana ratou, a riro ana a konei i a ratou; heoi kihai ratou i rongu ki tou reo, kihai hoki  
 i haere i runga i tau ture; kihai rawa i mahia e ratou tetahi o nga mea i whakahaua e koe ki a ratou  
 kia mahia: koia i meinga ai e koe tenei ki no katoa kia pa ki a ratou. <sup>24</sup> Nana, nga puke, kua tae  
 mai ratou ki te pa, kia horo ai; a ka hoatu te pa ki te ringa o nga Karari e whawhai nei ki konei, na  
 te hoari hoki, na te hemokai, na te mate uruta: a, ko tau i korero ra, kua rite; nana, e kite nei koe.  
<sup>25</sup> Heoi kua mea mai na koe, e te Ariki, e Ihowa, ki ahau, Hokona te mara mau ki te moni, whakaturia  
 ano nga kaititiro; kahore ia, kua tukua te pa ki te ringa o nga Karari.  
<sup>26</sup> Katahi ka puta mai te kupu a Ihowa ki a Heremaia; i mea ia, <sup>27</sup> Nana, ko Ihowa ahau, ko te  
 Atua o nga kikokiko katoa: tera ranei tetahi mea e pakeke rawa ki ahau? <sup>28</sup> Heoi ko te kupu tenei  
 a Ihowa, Nana, ka hoatu e ahau tenei pa ki te ringa o nga Karari, ki te ringa o Nepukareha kingi o  
 Papurona, a ka horo i a ia: <sup>29</sup> A ka haere mai nga Karari e whawhai nei ki tenei pa, ka tahu i tenei  
 pa ki te ahi, ka wera hoki i a ratou, me nga whare i tahu whakakakara ai ratou i runga i nga tuanui  
 ki a Paara, i ringihia ai hoki nga ringihanga ki nga atua ke, hei whakapatar itari i ahau. <sup>30</sup> No te  
 mea ko nga tamariki a Iharaira ratou ko nga tamariki a Hura, he kino kau ta ratou i mahi ai i taku  
 tirohanga, no to ratou tamarikitanga ake ano: he whakapataritari kau hoki ta nga tamariki a Iharaira  
 i ahau ki te mahi a o ratou ringa, e ai ta Ihowa. <sup>31</sup> Ko te ahau hoki o tenei pa ki ahau he mea  
 whakaoho o toku riri, i toku weriweri, no te ra i hanga ai e ratou a tae noa mai ki tenei ra; kia nekehia  
<sup>32</sup> atu ra ano e ahau i toku aroaro; Mo te kino katoa a nga tamariki a Iharaira ratou ko nga tamariki  
 a Hura, i mahia nei e ratou hei whakapataritari i ahau, e ratou, e o ratou kingi, e o ratou rangatira,

e o ratou tohunga, e o ratou poropiti, e nga tangata o Hura, e nga tangata ho ki o Hiruharama. <sup>33</sup> A  
 kua parea mai e ratou te kohamo, kahore te kanohi ki ahau: a, ahakoa naku ratou i whakaako, moata  
<sup>34</sup>  
 ai i te ata me te ako i a ratou, kihai ratou i rongu, i manako ki te ako. Heoi whakaturia ana e  
 ratou a ratou mea whakarihariha ki te whare i huaina nei toku ingoa mo reira, whakapokea iho.  
<sup>35</sup>  
 A hanga ana e ratou nga wahi tiketike o Paara, era i te raorao o te tama a Hinomo, kia meinga  
 ai a ratou tama, me a ratou tamahine, kia tika i roto i te ahi ki a Moreke; he mea kihai i whakahaua  
 e ahau, kihai hoki i puta ake i toku ngakau, kia m ahia e ratou tenei mea whakarihariha, e hara ai  
<sup>36</sup>  
 a Hura. Mo reira ko te kupu tenei inaianei a Ihowa, a te Atua o Iharaira mo tenei pa, e ki na  
 koutou, Ka tukua ki te ringa o te kingi o Papurona, ma te hoari, ma te hemokai, ma te mate uruta;  
<sup>37</sup>  
 Nana, ka kohikohia mai ratou e ahau i nga whenua katoa i peia atu nei ratou e ahau ki reira, i  
 toku riri, i toku weriweri, i te aritarita nui; ka whakahokia mai ano ratou e ahau ki tenei wahi, a ka  
<sup>38</sup> <sup>39</sup>  
 meinga kia noho humarie; A ko ratou hei iwi maku, ko ahau hoki hei Atua mo ratou. A ka  
 hoatu e ahau he ngakau kotahi ki a ratou, he ara kotahi, kia wehi ai ratou i ahau a ake ake; hei pai  
<sup>40</sup>  
 mo ratou, mo a ratou tamariki hoki i muri i a ratou. Ka whakaritea ano e ahau he kawenata mau  
 tonu ki a ratou, he mea e kore e whakatahuritia atu e ahau i a ratou, kia mahia he pai ki a ratou; a  
<sup>41</sup>  
 ka hoatu e ahau toku wehi ki o ratou ngakau, kei whakarere ratou i ahau. Ae ra, ka koa ahau ki  
 a ratou hei mea i te pai ki a ratou, a he pono ka whakapaua toku ngakau, ka whakapaua hoki toku  
<sup>42</sup>  
 wairua ki te whakato i a ratou ki tenei whenua i runga i te pono. No te mea ko te kupu tenei a  
 Ihowa: Ka pera i taku kawenga i tenei kino nui katoa ki runga ki tenei iwi, waihoki ka kawea e  
<sup>43</sup>  
 ahau ki runga ki a ratou te pai katoa i korerotia e ahau mo ratou. Ka hokohokona ano he mara  
 ki tenei whenua, e ki na koutou mo reira, He ururua, te ai he tangata, he kararehe ranei; kua hoatu  
<sup>44</sup>  
 ki te ringa o nga Karari. Ka hokona e te tangata he mara ki te moni, ka tuhituhia ano he pukapuka,  
 ka hiritia, ka whakaturia nga kaititiro, i te whenua o Pineamine, i nga taha o Hiruharama, i nga pa  
 hoki o Hura, i nga pa o te whenua pukepuke, i nga pa o nga raorao, i nga pa hoki o te tonga: no te  
 mea ka whakahokia mai ratou e ahau i te whakarau, e ai ta Ihowa.

### Chapter 33

<sup>1</sup>  
 Na ko te rua o nga putanga mai o te kupu a Ihowa ki a Heremaia, i a ia ano e tutaki ana ki te  
 marae o te whare herehere; i ki ia, <sup>2</sup>  
 Ko te kupu tenei a Ihowa nana nei tenei i mahi, a Ihowa nana  
 nei i whakaahua, i pumau ai; ko Ihowa tona ingoa; <sup>3</sup>  
 Karanga ki ahau, a ka whakahoki kupu ahau

ki a koe, ka whakakitea hoki e ahau ki a koe nga mea nunui, nga mea pakeke, he mea kihai i mohiotia e koe. <sup>4</sup> Ko te kupu hoki tenei a Ihowa, a te Atua o Iharaira, mo nga whare o tenei pa, mo nga whare hoki o nga kingi o Hura, ka oti nei te wahi iho hei arai atu i nga puke, i te hoari; <sup>5</sup> E haere mai ana ratou ki te whawhai ki nga Karari, engari ia ki te whakaki i aua wahi ki nga tinana o nga tangata i patua e ahau i toku riri, i toku weriweri, o te hunga no ratou nga kino katoa i huna ai e ahau toku mata ki tenei pa. <sup>6</sup> Nana, ka kawea mai e ahau he ora, he rongoa ki tenei pa, a ka rongoaia ratou e ahau; a ka whakakitea e ahau ki a ratou te nui o te rangimarie me te pono. <sup>7</sup> Ka whakahokia mai ano e ahau a Hura i te whakarau, a Iharaira hoki i te whakarau, a ka hanga ratou e ahau, koia ano kei to te timatanga. <sup>8</sup> Ka purea ano e ahau to ratou kino katoa i hara ai ratou ki ahau; a ka murua e ahau o ratou kino katoa i hara ai ratou ki ahau, i poka ke ai ta ratou mahi ki ahau. <sup>9</sup> A ka waiho tenei pa hei ingoa koa ki ahau, hei whakamoemiti, hei kororia, i te aroaro o nga iwi katoa o te whenua, ka rongoa nei ratou ki nga pai katoa e meatia e ahau ki a ratou, a ka wehi ratou, ka wiri i te pai katoa, i te rangimarie katoa, e meatia e ahau ki konei.

<sup>10</sup> Ko te kupu tenei a Ihowa, Tera ano ka rangona ki tenei wahi, e ki nei koutou mo reira, He ururua, kahore he tangata, kahore he kararehe, ara ki nga pa o Hura, ki nga ara o Hiruharama e mokemoke nei, te ai he tangata, te ai he kainoho, te ai he kararehe, <sup>11</sup> Te reo o te koa, te reo o te hari, te reo o te tane marena hou me te reo o te wahine marena hou, te reo hoki o te hunga e ki ana, Whakawhetai ki a Ihowa o nga mano, he pai hoki a Ihowa, he mau tonu ano tana mahi tohu: o te hunga hoki e kawea mai ana i nga whakahere whakawhetai ki roto ki te whare o Ihowa. No te mea ka whakahokia mai ano e ahau te whenua i te whakarau, ka rite ano ki to te timatanga, e ai ta Ihowa.

<sup>12</sup> Ko te kupu tenei a Ihowa o nga mano: Tera ano te wahi e ururua nei, kahore nei he tangata, kahore he kararehe, me ona pa katoa, ka nohoia ano e nga hepara, e mea ana i a ratou hipi kia takoto.

<sup>13</sup> I nga pa o te whenua pukepuke, i nga pa o te mania, i nga pa o te tonga, i te whenua o Pineamine, i nga taha o Hiruharama, i nga pa hoki o Hura, ka haere atu nga hipi i raro i nga ringa o te kaitatau,

e ai ta Ihowa. <sup>14</sup> Nana, kei te haere mai nga ra, e ai ta Ihowa, e whakamana ai e ahau te kupu pai

i korerotia ra e ahau mo te whare o Iharaira, mo te whare hoki o Hura. <sup>15</sup> I aua ra, a i taua wa, ka meinga e ahau tetahi Manga o te tika kia tupu ake mo Rawiri; a ka mahia e ia te whakawa me te

tika ki te whenua. <sup>16</sup> I aua ra ka whakaorangia a Hura, ka mohio humarie hoki a Hiruharama: a ko te ingoa tenei e huaina mona, Ko Ihowa to tatou tika.

<sup>17</sup> Ko te kupu hoki tenei a Ihowa, E kore e whakakorea he tangata mo Rawiri hei noho ki te

torona o te whare o Iharaira; <sup>18</sup> E kore ano e whakakorea atu he tangata mo nga tohunga, mo nga Riwaiti i toku aroaro, hei whakaeke i nga tahunga tinana, hei tahu i nga whakahere, hei mahi i te

<sup>19</sup> patunga tapu i nga ra katoa. I puta mai ano te kupu a Ihowa ki a Heremaia; i ki ia, <sup>20</sup> Ko te kupu tenei a Ihowa, Ki te taea e koutou te whakataka taku kawenata o te awatea, me taku kawenata o te po, kia kore ai he ao, he po, i o raua wa e tika ai; <sup>21</sup> Katahi ka taka taku kawenata ki taku pononga, ki a Rawiri, e kore ai he tama mana, hei kingi ki tona torona; me taku hoki ki aku minita, ki nga Riwaiti, ki nga tohunga. <sup>22</sup> E kore nei te ope o te rangi e taea te tatau, e kore ano te onepu o te moana e taea te mehua, ka pena ano taku whakanui i nga uri o taku pononga, o Rawiri, i nga Riwaiti hoki e minita nei ki ahau. <sup>23</sup> A ka puta mai te kupu a Ihowa ki a Heremaia; i mea ia, <sup>24</sup> Kahore ranei koe e mahara ki ta tenei iwi i korero ai, i mea ai, Ko nga hapu e rua i whiriwhiria ra e Ihowa, kua paopaongia e ia? Ko ta ratou whakahawea tena ki taku iwi, kia kua ratou e kiia ano he iwi i to ratou aroaro. <sup>25</sup> Ko te kupu tenei a Ihowa: Ki te kahore e tu taku kawenata o te ao, o te po, a ehara nga tikanga o te rangi, o te whenua, i te mea whakatakoto naku; <sup>26</sup> Katahi ka paopaongia e ahau nga uri o Hakopa raua ko taku pononga, ko Rawiri, e kore ai e tangohia tetahi o ona uri hei kaiwhakahaere tikanga mo nga uri o Aperahama, o Ihaka, o Hakopa: no te mea ka whakahokia mai ratou e ahau i te whakarau, ka t ohungia hoki ratou e ahau.

### Chapter 34

<sup>1</sup> Ko te kupu i puta mai ki a Heremaia na Ihowa, i a Nepukaneha kingi o Papurona ratou ko tana ope katoa, ko nga kingitanga katoa o te whenua i raro i tona mana, me nga iwi katoa, i whawhai ai ki Hiruharama me ona pa katoa; i mea ia, <sup>2</sup> Ko te kupu tenei a Ihowa, a te Atua o Iharaira, Haere, korero ki a Terekia kingi o Hura, mea atu ki a ia, Ko te kupu tenei a Ihowa, Nana, ka hoatu e ahau tenei pa ki te ringa o te kingi o Papurona, a ka tahuna e ia ki te ahi. <sup>3</sup> A e kore koe e mawhiti i roto i tona ringa, engari ka mau pu koe, ka tukua hoki ki tona ringa; a ka kite ou kanohi i nga kanohi o te kingi o Papurona, a ka korero ia ki a koe he mangai ki te mangai, ka tae ano hoki koe ki Papurona. <sup>4</sup> Whakarongo ano hoki ki te kupu a Ihowa, e Terekia kingi o Hura; ko te kupu tenei a Ihowa mou, E kore koe e mate i te hoari; <sup>5</sup> Engari ka mate koe i runga i te rangimarie; na, ko nga tahunga o ou matua, o nga kingi o mua, i mua atu i a koe, ka pena ano he tahunga mou; a ka tangi ratou ki a koe, ka mea, Aue, e te Ariki! naku nei hoki te kupu i korero, e ai ta Ihowa. <sup>6</sup> Katahi a Heremaia poropiti ka korero i enei kupu katoa ki a Terekia kingi o Hura i Hiruharama. <sup>7</sup> I te mea e whawhai ana te ope o te kingi o Papurona ki Hiruharama, ki nga pa katoa o Hura i mahue, ki Rakihi, ki Ateka: ko enei anake hoki o nga pa o Hura i mahue, he pa taiepa.

8 Ko te kupu i puta mai ki a Heremaia na Ihowa, i muri i te whakaritenga kawenata a Kingi  
Terekia ki te hunga katoa i Hiruharama, kia karangatia ki a ratou te haere noa; 9 Kia tukua e tera,  
e tera, tana pononga tane, tana pononga wahine, ki te mea he tane, he wahine ranei no nga Hiperu,  
kia haere noa atu; kia kaua tetahi e whakamahi i a ratou, ara i tona teina, i te Hurai: 10 A ka rongo  
nga rangatira katoa ratou ko te iwi katoa i uru nei ki te kawenata, kia tukua e tera, e tera, tana  
pononga tane, tana pononga wahine, kia haere noa atu, kia kaua e whakamahia ratou i muri atu; na  
11 rongo tonu ratou, a tukua atu ana e ra tou. Engari i muri iho ka tahuri ano ratou, a meinga ana  
e ratou kia hoki mai nga pononga tane, me nga pononga wahine i tukua ra e ratou kia haere noa  
12 atu, whakataurekarekatia iho ratou hei pononga tane, hei pononga wahine: Na reira ka puta mai  
13 te kupu a Ihowa ki a Heremaia, he mea na Ihowa; i ki ia, Ko te kupu tenei a Ihowa, a te Atua o  
Iharaira, I whakaritea e ahau he kawenata ki o koutou matua i te ra i kawea mai ai ratou e ahau i te  
14 whenua o Ihipa, i te whare pononga; i mea ahau, I te mutunga o nga tau e whitu me tuku e koutou  
tona tuakana, tona teina, ki te mea he Hiperu i hokona ki a koe, a kua mahi ki a koe e ono nga tau,  
me tuku e koe kia haere noa atu i tou taha: otira kihai o koutou matua i rongo ki ahau, kihai ano o  
15 ratou taringa i anga mai. Na i tahuri nei koutou i tenei ra, i mahi i te mea e tika ana ki taku titiro,  
i te karangatanga ai he haere noa atu e tera, e tera, ki tona hoa, ki tona hoa; a i whakaritea e koutou  
16 he kawenata ki toku aroaro i roto i te whare kua huaina nei tok u ingoa ki reira: Otiia tahuri ana  
koutou, whakapokea ana e koutou toku ingoa, whakahokia ana e koutou tana pononga tane, tana  
pononga wahine i tukua ra e koutou kia haere noa atu ki ta ratou i pai ai, whakataurekarekatia iho  
17 ratou e koutou hei pononga tane, hei pononga wahine ma koutou. Mo reira ko te kupu tenei a  
Ihowa; Kihai koutou i rongo ki ahau, ki te karanga i te haere noa atu ki tona teina, ki tona tuakana,  
ki tona hoa, ki tona hoa: nana, maku e karanga ki a koutou he haere noa atu, e aita Ihowa, ma te  
hoari, ma te mate uruta, ma te matekai; a ka meinga koutou e ahau kia poipoia haeretia i waenganui  
18 i nga kingitanga katoa o te whenua. Ka hoatu hoki e ahau nga tangata i whakataka nei i taku  
kawenata, a kihai i whakamana i nga kupu o te kawenata i whakaritea e ratou i toku aroaro, i a  
19 ratou i tapahi ai i te kuao kau kia rua, a haere ana i waenganui i ona wahi; Nga rangatira o Hura,  
nga rangatira hoki o Hiruharama, nga unaka, nga tohunga, me te iwi katoa o te whenua i haere nei  
20 i waenganui o nga wahi o te kuao kau; Ka tino hoatu ratou e ahau ki te ringa o o ratou hoariri,  
ki te ringa hoki o te hunga e whai ana kia whakamatea ratou: a hei kai o ratou tinana ma te manu  
21 o te rangi, ma te kararehe o te whenua. Ka hoatu ano e ahau a Terekia kingi o Hura ratou ko ana  
rangatira, ki te ringa o o ratou hoariri, ki te ringa hoki o te hunga e whai ana kia whakamatea ratou,  
22 ki te ringa ano o te ope o te kingi o Papurona i haere atu nei i a koutou. Nana, maku e whakahau,  
e ai ta Ihowa, a ka meinga ratou kia hoki mai ki tenei pa; a ka whawhai ratou ki reira, ka horo hoki

i a ratou, a ka tahuna ki te ahi: a ka meinga e ahau nga pa o Hura kia ururuatia, te ai he tangata hei noho.

## Chapter 35

<sup>1</sup> Ko te kupu i puta mai ki a Heremaia na Ihowa, i nga ra o Iehoiakimi tama a Hohia kingi o Hura; i mea ia, <sup>2</sup> Haere ki te whare o nga Rekapi, korero atu ki a ratou, ka kawea i a ratou ki te whare o Ihowa, ki tetahi o nga ruma, ka whakainu i a ratou ki te waina. <sup>3</sup> Na ka tikina e ahau a Iaatania tama a Heremaia, tama a Hapatinia, ratou ko ona teina, ko ana tama katoa, ko te whare katoa hoki o nga Rekapi; <sup>4</sup> A kawea ana ratou e ahau ki te whare o Ihowa, ki te ruma o nga tama a Hanana tama a Ikiraria, he tangata na te Atua, ki tera i te taha o te ruma o nga rangatira, i runga ake i te ruma o te kaitiaki tatau, o Maaheia tama a Harumu: <sup>5</sup> A whakaturia ana e ahau etahi oko, ki tonu i te waina, me etahi kapu ki te aroaro o nga tama o te whare o nga Rekapi. Na ka mea atu ahau ki a ratou, Inumia e koutou he waina. <sup>6</sup> Ano ra ko ratou, E kore matou e inu waina; i ako hoki to matou papa, a Ionarapa, tama a Rekapa, ki a matou, i mea, Kei inu waina koutou ko a koutou tamariki a ake ake: <sup>7</sup> Kua hoki koutou e hanga whare, e whakato purapura, e whakato mara waina ranei, kua hoki he pena ma koutou; engari, i o koutou ra katoa, me noho teneti; kia maha ai nga ra e ora ai koutou ki te mata o te oneone e noho manene nei koutou. <sup>8</sup> Na rongo tonu matou ki te reo o to matou papa, o Ionarapa tama a Rekapa, ki nga mea katoa i whakahau ai ia ki a matou, kia kua e inu waina i o matou ra katoa, matou, a matou wahine, a matou tama, a matou tamahine; <sup>9</sup> Kia kua ano e hanga whare hei nohoanga mo matou: kahore hoki a matou mara waina, mara ke ranei, purapura ranei; <sup>10</sup> Engari ko o matou nohoanga he teneti, rongo tonu matou, mahi tonu i nga mea katoa i whakahaua e to matou papa, e Ionarapa, ki a matou. <sup>11</sup> Otiia, i te whakaekenga a Nepukareha kingi o Papurona i te whenua, ka mea matou, Haere mai, haere tatou ki Hiruharama, kei mate i te ope a nga Karari, i te ope hoki a nga Hiriani; na noho ana matou i Hiruharama. <sup>12</sup> Katahi ka puta mai te kupu a Ihowa ki a Heremaia; ka mea ia, <sup>13</sup> Ko te kupu tenei a Ihowa o nga mano, a te Atua o Iharaira; Haere, mea atu ki nga tangata o Hura, ki te hunga hoki e noho ana i Hiruharama, E kore ianei koutou e manako ki te ako, e rongo ki aku kupu? e ai ta Ihowa. <sup>14</sup> Kua tutuki nga kupu a Ionarapa tama a Rekapa i whakahau ai ia ki ana tamariki kia kua e inu waina; kihai hoki ratou i inu a taea noatia tenei ra, no te mea e whakarongo ana ratou ki te ako a to ratou papa: ko ahau ia, i korero ahau ki a koutou, moata ai i te ata ka korero; heoi kihai koutou

15  
i rongou ki ahau. I unga atu ano e ahau aku pononga katoa, nga poropiti, maranga wawe ana ahau, unga ana i a ratou, ki a koutou, me te ki atu, Tahuri mai koutou, e tera, e tera o koutou i o koutou ara kino, ka whakapai i a koutou mahi, kaua hoki e whai ki nga atu a ke, kaua e mahi ki a ratou, a ka noho koutou ki te whenua i hoatu e ahau ki a koutou ko o koutou matua: heoi kihai i anga mai

16  
o koutou taringa, kihai hoki i rongou ki ahau. Na, kua whakamana nei e nga tama a Ionarapa tama a Rekaapa te ako a to ratou papa i ako ai ia ki a ratou, engari ko tenei iwi, kihai i rongou ki ahau:

17  
Mo reira ko te kupu tenei a Ihowa, a te Atua o nga mano, a te Atua o Iharaira; Nana, ka kawea mai e ahau ki a Hura, ki nga tangata katoa hoki o Hiruharama, nga kino katoa i korerotia e ahau mo ratou: no te mea i korero ahau ki a ratou, a kihai i rongou; i karanga ahau ki a ratou, a kihai ratou

18  
i whakahoki kupu mai. Na ka mea a Heremaia ki te whare o nga Rekaapi, Ko te kupu tenei a Ihowa o nga mano, a te Atua o Iharaira; I te mea i rongou koutou ki te ako a to koutou papa, a

19  
Ionarapa, i pupuri hoki i ana ako katoa, i mahi i nga mea katoa i akona e ia ki a kou tou; Mo reira ko te kupu tenei a Ihowa o nga mano, a te Atua o Iharaira: E kore e kore he tangata ma Ionarapa tama a Rekaapa, hei tu ki toku aroaro i nga ra katoa.

## Chapter 36

1  
Na i te wha o nga tau o Iehoiakimi tama a Hohia kingi o Hura, ka puta mai tenei kupu ki a

Heremaia na Ihowa; i mea ia, 2  
Tikina tetahi pukapuka mau, ka tuhituhi ki reira i nga kupu katoa i korerotia e ahau ki a koe mo Iharaira, mo Hura, mo nga iwi katoa hoki, o te ra ano i korero ai ahau

3  
ki a koe, o nga ra i a Hohia a tae noa ki tenei ra. Tera pea te whare o Hura e rongou ki te kino katoa e whakaaro nei ahau kia meatia ki a ratou; kia tahuri ratou, ia tangata, ia tangata, i o ratou ara kino;

4  
a tera e murua e ahau to ratou he, to ratou hara. Katahi a Heremaia ka karanga ki a Paruku, tama a Neria: na ka tuhituhia e Paruku ki te pukapuka no te mangai o Heremaia, nga kupu katoa a Ihowa

5  
i korero ai ki a ia. Na ka whakahau a Heremaia i a Paruku, ka mea, Kua tutakina ahau: e kore e

6  
ahei i ahau te haere ki te whare o Ihowa. No reira haere koe, ka korero i te pukapuka i tuhituhia e koe, ko taku i korero ai, ko nga kupu a Ihowa, ki nga taringa o te iwi i te whare o Ihowa i te ra

7  
nohopuku: me korero ano e koe ki nga taringa o Hura katoa e haere mai ana i o ratou pa. Tera pea ka takoto ta ratou inoi ki te aroaro o Ihowa, a ka hoki ratou i tona ara kino, i tona ara kino: he

8  
nui hoki te riri, he nui te weriweri i korerotia e Ihowa mo tenei iwi. Na meatia ana e Paruku tama a Neria nga mea katoa i whakahau ai ia e Heremaia poropiti, korerotia ana e ia i roto i te pukapuka nga kupu a Ihowa i te whare o Ihowa.



9

Na i te rima o nga tau o Iehoiakimi tama a Hohia kingi o Hura, i te iwa o nga marama, ka karangatia e ratou he nohopuku ki te aroaro o Ihowa mo te iwi katoa i Hiruharama, mo te iwi katoa

10

hoki i haere mai i nga pa o Hura ki Hiruharama. Katahi ka korerotia e Paruku i roto i te pukapuka nga kupu a Heremaia i roto i te whare o Ihowa, i te ruma o te kaituhituhi, o Kemaria tama a Hapana, i te marae o runga, i te kuwaha o te keti hou o te whare o Ihowa, me te whakarongo ano te iwi k

11

atoa. A, no te rongonga o Mikaia tama a Kemaria, tama a Hapana, ki nga kupu katoa a Ihowa i

12

roto i te pukapuka, Ka haere ia ki raro, ki te whare o te kingi, ki te ruma o te kaituhituhi, na, i reira nga rangatira katoa e noho ana, a Erihama kaituhituhi, ratou ko Teraia tama a Hemaia, ko Erenatana tama a Akaporo, ko Kemaria tama a Hapana, ko Terekia tama a Hanania, ko nga rangatira

13

katoa ano hoki. Katahi a Mikaia ka whakaatu ki a ratou i nga kupu katoa i rongongonga ai ia, i te

14

korerotanga a Paruku i te pukapuka ki nga taringa o te iwi. Na reira ka unga atu e nga rangatira katoa a Iehuri, tama a Netania, tama a Heremia, tama a Kuhi, ki a Paruku, hei ki atu, Mauria mai e koe i tou ringa te pukapuka i korerotia na e koe ki nga taringa o te iwi, a ka haere mai. Na mauria

15

ana e Paruku tama a Neria te pukapuka i tona ringa, a haere ana ki a ratou. Na ka mea ratou ki a ia, Tena, e noho, korerotia hoki ki o matou taringa. Heoi korerotia ana e Paruku ki o ratou taringa.

16

Na, i to ratou rongonga ki nga kupu katoa, ka wehi ratou, ka tahuri tetahi ki tetahi, a ka mea atu

17

ki a Paruku, Ka korerotia maretia e matou enei kupu katoa ki te kingi. A ka ui ratou ki a Paruku, ka mea, Tena koa, whakaaturia mai ki a matou, I pehea tau tuhituhi i enei kupu katoa a tona mangai?

18

Ano ra ko Paruku ki a ratou, Na tona mangai enei kupu katoa i korero ki ahau, a tuhituhia iho e

19

ahau ki te mangumangu ki te pukapuka. Katahi nga rangatira ka mea ki a Paruku, Haere, e huna i a koe, korua ko Heremaia, kaua hoki tetahi e mohio kei hea korua.

20

Na haere ana ratou ki te kingi ki te marae; otiia i waiho e ratou te pukapuka i te ruma o

21

Erihama kaituhituhi; a korerotia ana e ratou nga kupu katoa ki nga taringa o te kingi. Heoi ka unga e te kingi a Iehuri ki te tiki i te pukapuka. Na tikina ana e ia i te ruma o Erihama kaituhituhi; a korerotia ana e Iehuri ki nga taringa o te kingi, ki nga taringa hoki o nga rangatira katoa e tu ana

22

i te taha o te kingi. Na, i te noho te kingi i te whare hotoke i te iwa o nga marama: a he ahi i te

23

kanga ahi e ka ana i tona aroaro. Na, ka toru, ka wha nga wharangi i korerotia e Iehuri, ka tapahia e te kingi ki te maripi a te kaituhituhi, maka atu ana ki te ahi i te kanga ahi, a pau noa te pukapuka

24

katoa i te ahi i roto i te kanga ahi. Na kahore ratou i wehi, kahore hoki i haehae i o ratou kakahu,

25

te kingi ranei, tetahi ranei o ana pononga i rongongonga ai enei kupu katoa. Na tera a Erenatana ratou ko Teraia, ko Kemaria, kua tohe ki te kingi kia kaua e tahuna te pukapuka: otiia kihai ia i rongongonga ai

<sup>26</sup>  
 a ratou. Na ka whakahaua e te kingi a Ierameere tama a te kingi, ratou ko Heraia tama a Atariere, ko Heremia tama a Apareere kite hopu i a Paruku kaituhituhi, raua ko Heremaia poropiti; otira i  
<sup>27</sup>  
 huna raua e Ihowa. Katahi ka puta mai te kupu a Ihowa ki a Heremaia, i muri i te tahunga a te kingi i te pukapuka, i nga kupu hoki i tuhituhia ra e Paruku i te mangai o Heremaia; i mea ia,  
<sup>28</sup>  
 Tikina ano tetahi atu pukapuka, tuhituhia ki reira nga kupu katoa o mua ra, o te pukapuka tuatahi  
<sup>29</sup>  
 i tahuna ra e Iehoiakimi kingi o Hura. Na, ko te kupu mau mo Iehoiakimi kingi o Hura, Ko te kupu tenei a Ihowa: I tahuna e koe te pukapuka nei, i ki koe, He aha i tuhituhia ai e koe ki konei, i ki ai, Ka tino haere mai te kingi o Papurona, ka whakangaro i tenei whenua, ka moti ano i a ia te  
<sup>30</sup>  
 tangata me te kararehe o konei? Mo reira ko te kupu tenei a Ihowa mo Iehoiakimi kingi o Hura; E kore ia e whai tangata hei noho ki te torona o Rawiri: a ka maka atu tona tinana ki te werawera  
<sup>31</sup>  
 i te awatea, ki te huka i te po. Ka whiua hoki ia e ahau, ratou ko ona uri, ko ana tangata mo to ratou he; a ka kawea mai e ahau ki a ratou, ki nga tangata o Hiruharama, ki nga tangata hoki o Hura,  
<sup>32</sup>  
 te kino katoa i korerotia e ahau mo ratou, a kihai nei ratou i whakarongo. Na ka tangohia e Heremaia tetahi atu pukapuka, a hoatu ana e ia ki te kaituhituhi, ki a Paruku tama a Neria; nana i tuhituhi ki reira no te mangai o Heremaia nga kupu katoa o te pukapuka i tahuna ra e Iehoiakimi kingi o Hura ki te ahi: a tapirit ia atu ana ki era etahi atu kupu maha pera.

## Chapter 37

<sup>1</sup>  
 Na kua kingi a Terekia tama a Hohia, i muri i a Konia tama a Iehoiakimi, i whakakingitia nei e Nepukareha kingi o Papurona ki te whenua o Hura. <sup>2</sup> Otiia kihai ia i whakarongo, ratou ko ana tangata, ko te iwi ano hoki o te whenua, ki nga kupu a Ihowa i korerotia e Heremaia poropiti. <sup>3</sup> Na ka unga e Terekia, e te kingi, a Iehukara tama a Heremia raua ko Tepania tama a Maaheia tohunga ki a Heremaia poropiti, hei ki atu, Tena koa, inoi mo tatou ki a Ihowa, ki to tatou Atua. <sup>4</sup> Na, ko Heremaia, i te haere mai, i te haere atu i roto i te iwi: kahore hoki ia i maka ki te whare herehere. <sup>5</sup> Na kua puta mai te taua a Parao i Ihipa; a, no te rongonga o nga Karari i whakapae ra i Hiruharama i to ratou rongu, ka maunu atu ratou i Hiruharama. <sup>6</sup> Katahi ka puta mai te kupu a Ihowa ki a Heremaia poropiti; i mea ia, <sup>7</sup> Ko te kupu tenei a Ihowa, a te Atua o Iharaira: Kia penei ta korua korero atu ki te kingi o Hura, nana nei korua i unga mai ki te rapu tikanga i ahau; Nana, ko te ope a Parao i puta mai ra hei awhina mo koutou, ka hoki ki tona whenua, ki Ihipa. <sup>8</sup> A ka hoki mai nga

Karari, ka tatau ki tenei pa, ka horo hoki i a ratou, ka tahuna ki te ahi. <sup>9</sup> Ko te kupu tenei a Ihowa, Kei tinihanga i a koutou ano, kei mea, Ka haere rawa atu nga Karari i a tatou: no te mea e kore  
<sup>10</sup> ratou e haere. Ahakoa me i patua e koutou te ope katoa o nga Karari e tatau na ki a koutou, a toe ake o ratou ko etahi tangata taotu, ka whakatika ano ratou i tona teneti, i tona teneti, a ka tahu i tenei pa ki te ahi.  
<sup>11</sup> Na, i te whatinga atu o te ope o nga Karari i Hiruharama i te wehi ki te ope a Parao, <sup>12</sup> Katahi a Heremaia ka puta atu i Hiruharama, he haere ki te whenua o Pineamine, kia riro mai te wahi mana  
<sup>13</sup> i reira, i roto i te iwi. A, i a ia i te kuwaha o Pineamine, i reira tetahi rangatira tiaki, ko tona ingoa ko Iriia, he tama na Heremia tama a Hanania; heoi hopukia ana a Heremaia e ia, me te ki  
<sup>14</sup> ano, E tahuti atu ana koe ki nga Karari. Katahi ka mea a Heremaia, He teka; kahore aku tahuti ki nga Karari. Otiia kihai ia i rongu ki tana: na hopukia ana a Heremaia e Iriia, kawea ana ki nga  
<sup>15</sup> rangatira. Na riri ana nga rangatira ki a Heremaia, whiua ana ia e ratou, tukua ana ki te whare  
<sup>16</sup> herehere, ki te whare o Honatana kaituhituhi: kua waiho hoki tera e ratou hei whare herehere. I te taenga o Heremaia ki roto ki te whare herehere, ki roto ki nga ruma, a ka maha nga ra e noho  
<sup>17</sup> ana a Heremaia ki reira; Katahi a Kingi Terekia ka unga tangata ki te tiki i a ia. Na ka ui puku te kingi ki a ia, i roto i tona whare, ka mea, He kupu ano ranei ta Ihowa? A ka mea a Heremaia,  
<sup>18</sup> Tenei ano. I mea ano ia, Ka hoatu koe ki te ringa o te kingi o Papurona. Na i mea atu ano a Heremaia ki a Kingi Terekia, He aha toku hara ki a koe, ki au tangata ranei, ki tenei iwi ranei, i  
<sup>19</sup> tukua ai ahau e koutou ki te whare herehere? Kei hea a koutou poropiti i poropiti ra ki a koutou,  
<sup>20</sup> i mea ra, E kore te kingi o Papurona e tae mai ki a koutou, ki tenei whenua ranei? Na, whakarongo aiane, e toku ariki, e te kingi: tukua atu koa taku inoi kia manaakitia ki tou aroaro; kia kua ahau  
<sup>21</sup> e whakahokia ki te whare o Honatana kaituhituhi, kei mate ahau ki reira. Na ka whakahaua e Kingi Terekia, a ka kawea a Heremaia ki te marae o te whare herehere, a ka hoatu e ratou mana he rohi taro i tenei ra, i tenei ra, no te ara o nga kaitunu taro, a pau noa te taro katoa o te pa. Na noho ana a Heremaia i te marae o te whare herehere.

## Chapter 38

<sup>1</sup> A i rongu a Hepatia tama a Matana, ratou ko Keraira tama a Pahuru, ko Iukara tama a Heremia, ko Pahuru tama a Marakia, i nga kupu i korerotia e Heremaia ki te iwi katoa, i a ia i ki ra, <sup>2</sup> Ko te kupu tenei a Ihowa, Ko te tangata e noho ana i tenei pa ka mate i te hoari, i te hemokai, i te mate

uruta: ko te tangata ia e haere atu ana ki nga Karari, ka ora; a ka waiho tona wairua hei taonga parau  
 ki a ia, a ka ora ia. <sup>3</sup> Ko te kupu tenei a Ihowa, Ka tino hoatu tenei pa ki te ringa o te ope a te kingi  
 o Papurona, a ka horo i a ia. <sup>4</sup> Na ka mea atu nga rangatira ki te kingi, Me whakamate tenei tangata;  
 ma tana penei hoki ka ngoikore ai nga ringa o nga tangata whawhai e toe ana ki te pa nei, me nga  
 ringa o te iwi katoa, ma tana korero i enei tu kupu ki a ratou: kahore hoki tene i tangata i te rapu i  
 te pai mo tenei iwi, engari i te kino. <sup>5</sup> Na ka mea a Kingi Terekia, Nana, kei to koutou ringa ai:  
 ehara hoki te kingi i te mea e ahei te whakahe ki ta koutou. <sup>6</sup> Katahi ratou ka mau ki a Heremaia,  
 maka ana e ratou ki te poka a Marakia tama a te kingi, ki tera i te marae o te whare herehere; a  
 tukua ana a Heremaia e ratou ki raro, ki te taura. Na kahore he wai i roto i te poka, engari he oru:  
 a tapoko ana a Heremaia ki te oru. <sup>7</sup> Na, i te rongonga o Eperemereke Etiopiana, he unaka no te  
 whare o te kingi, kua tukua a Heremaia ki te poka; e noho ana hoki te kingi i te kuwaha o Pineamine  
 i taua wa; <sup>8</sup> Katahi a Eperemereke ka haere atu i te whare o te kingi, ka korero ki te kingi, ka mea,  
<sup>9</sup> E toku ariki, e te kingi, he kino nga mea kua mahia e enei tangata i a ratou katoa i mahi ai ki a  
 Heremaia poropiti, kua maka nei e ratou ki te poka; a tera ia e mate ki te wahi kei reira nei ia i te  
 hemokai: kahore atu hoki he taro i te pa. <sup>10</sup> Katahi te kingi ka whakahau ki a Eperemereke Etiopiana,  
 ka mea, Mauria atu etahi tangata i konei, kia toru tekau, ka tango ake i a Heremaia poropiti i roto  
 i te poka, keiwha mate ia. <sup>11</sup> Heoi kua mau a Eperemereke ki nga tangata hei hoa mona, a haere  
 ana ki te whare o te kingi ki raro i te whare taonga, tangohia ana mai e ia i reira etahi karukaru  
 tawhito me etahi tawhetawhe pirau, tukua iho ana e ia ki nga taura ki a Heremaia k i roto ki te poka.  
<sup>12</sup> Katahi a Eperemereke Etiopiana ka mea iho ki a Heremaia, Tena, kahua nga karukaru tawhito  
 nei me nga tawhetawhe pirau nei ki raro i ou peke, ki raro atu i nga taura. Na peratia ana e Heremaia.  
<sup>13</sup> Heoi ka hutia ake e ratou a Heremaia ki nga taura, whakaputaina ake ana ia i roto i te poka: a  
 noho tonu iho a Heremaia ki te marae o te whare herehere.  
<sup>14</sup> Katahi a Kingi Terekia ka unga tangata atu ki te tiki i a Heremaia poropiti ki a ia, ki te tuatoru  
 o nga tomokanga, i te whare o Ihowa: a ka mea te kingi ki a Heremaia, Me ui e ahau tetahi mea i  
 a koe; kua e huna tetahi mea i ahau. <sup>15</sup> Ano ra ko Heremaia ki a Terekia, Ki te whakaaturia e ahau  
 ki a koe, he teka ianei ko te whakamate kau tau moku? a ki te whakatakotoria e ahau he whakaaro  
 ki a koe, e kore koe e whakarongo ki ahau. <sup>16</sup> Heoi ka oati puku a Kingi Terekia ki a Heremaia,  
 ka mea, E ora ana a Ihowa, nana nei tenei wairua i hanga mo tatou, e kore ahau e whakamate i a  
 koe, e kore ano koe e tukua e ahau ki te ringa o enei tangata e whai nei kia whakamatea koe.  
<sup>17</sup> Katahi a Heremaia ka mea atu ki a Terekia, Ko te kupu tenei a Ihowa, a te Atua o nga mano, a  
 te Atua o Iharaira; Ki te haere atu koe ki nga rangatira o te kingi o Papurona, ka ora tou wairua, e

18  
 kore hoki tenei pa e tahuna ki te ahi; engari ka or a koe me tou whare: Tena ki te kore koe e haere ki nga rangatira a te kingi o Papurona, katahi tenei pa ka hoatu ki te ringa o nga Karari, a ka tahuna e ratou ki te ahi, a e kore koe e mawhiti i o ratou ringa. 19 Na ka mea a Kingi Terekia ki a Heremaia, E wehi ana ahau i nga Hurai i papahoro atu nei ki nga Karari, kei tukua ahau ki o ratou ringa, ka tawaitia ahau e ratou. 20 Otiia ka mea a Heremaia, E kore koe e tukua e ratou. Whakarongo oti ki te reo o Ihowa e korerotia nei e ahau ki a koe: na ka whiwhi koe ki te pai, a ka ora tou wairua. 21 Tena ki te kore koe e pai ki te haere atu, ko te kupu tenei i whakakitea e Ihowa ki ahau: 22 Inana, ko nga wahine katoa e mahue ana ki te whare o te kingi o Hura ka whakaputaina ki waho ki nga rangatira a te kingi o Papurona, a ka mea aua wahine, i tohea koe e ou hoa aroha, a riro ana koe i ta ratou: na, ka totohu nei ou waewae ki te pa ru, kua hoki ke atu ratou ki muri. 23 Na ka whakaputaina e ratou au wahine katoa, me au tamariki, ki waho ki nga Karari: a e kore e mawhiti i o ratou ringa, engari ka mau koe i te ringa o te kingi o Papurona: a mau e tahuna ai tenei pa ki te ahi. 24 Katahi a Terekia ka mea ki a Heremaia, Kei mohiotia enei kupu e tetahi, a e kore koe e mate. 25 Otiia, ki te rongo nga rangatira kua korero ahau ki a koe, a ka tae ratou ki a koe, ka mea ki a koe, Tena, whakaaturia mai ki a matou, he aha tau i korero ai ki te kingi: kua e huna ki a matou, a e kore matou e whakamate i a koe: i pehea hoki t e korero a te kingi ki a koe? 26 Katahi koe ka mea ki a ratou, I te kawae ahau i taku inoi ki te kingi, kia kua ahau e whakahokia ki te whare o Honatana, ki reira mate ai. 27 Ko te haerenga mai tera o nga rangatira katoa ki a Heremaia, ka ui ki a ia; a korerotia ana e ia i runga i nga kupu katoa i whakahaua ra e te kingi. Heoi mutu tonu ta ratou korero ki a ia; no te mea kahore taua mea i mohiotia. 28 Heoi noho ana a Heremaia i te marae o te whare herehere, a taea noatia te ra i horo ai a Hiruharama. Na, i te horonga o Hiruharama,

### Chapter 39

1 I te iwa o nga tau o Terekia kingi o Hura, i te tekau o nga marama, ka haere mai a Nepukareha kingi o Papurona ratou ko tana ope katoa ki Hiruharama, a whakapaea ana a reira e ratou; 2 I te tekau ma tahi o nga tau o Terekia, i te wha o nga marama, i te iwa o nga ra o te marama, ka pakaru te pa: 3 Na ka haere mai nga rangatira katoa a te kingi o Papurona, a noho ana i te kuwaha o waenganui, a Nerekara Haretere, a Hamakara Nepo, a Harehekimi, a Rapahari, a Nerekara Haretere, a Rapamaka, ratou ko era atu rangatira a te kingi o Papurona. 4 Na, i te kitenga o Terekia kingi o Hura ratou ko nga tangata whawhai katoa, rere ana ratou, puta atu ana ki waho o te pa i te po, ma

te ara i te kari waho o te pa i te po, ma te ara i te kari a te kingi, ma te kuwaha i waenganui i nga taiepa e ru a: a puta atu ana ia i te ara o te Arapa. <sup>5</sup> Otiia i whaia ratou e te ope o nga Karari, a ka mau a Terekia ki nga mania i Heriko. Na hopukia ana ia, kawea ana ki a Nepukareha kingi o Papurona, ki Ripira i te whenua o Hamata: a whakawhakia ana ia e ia. <sup>6</sup> Katahi ka tukitukia e te kingi o Papurona nga tama a Terekia ki tona aroaro ki Ripira: a i tukitukia ano e te kingi o Papurona nga rangatira katoa o Hura. <sup>7</sup> I whakamatapotia hoki e ia nga kanohi o Terekia, herea iho ia ki te mekameka, kawea ana ki Papurona. <sup>8</sup> Na tahuna ana e nga Karari te whare o te kingi, me nga whare o te iwi, ki te ahi, wawahia iho e ratou nga taiepa o Hiruharama. <sup>9</sup> Katahi ka whakaraua e Neputaraarana, rangatira o nga kaitiaki, ka mauria ki Papurona te toenga o te iwi i mahue ki te pa, me te hunga i papahoro atu, i taka atu ki a ia, me era atu o te iwi i mahue ki te pa. <sup>10</sup> Otiia i mahue iho i a Neputaraarana, rangatira o nga kaitiaki, nga ware o te iwi, kahore nei o ratou rawa, ki te whenua o Hura, a hoatu ana e ia he mara waina me etahi atu mara ki a ratou i taua ra.

<sup>11</sup> Na i tohutohu a Nepukareha kingi o Papurona ki a Neputaraarana, rangatira o nga kaitiaki, mo Heremaia i mea ia, <sup>12</sup> Tikina ia, kia pai hoki te tiaki i a ia, a kaua ia e tukinotia; engari ko tana e ki mai ai, ko tau tena e mea ai ki a ia. <sup>13</sup> Heoi ka unga tangata a Neputaraarana rangatira o nga kaitiaki, ratou ko Nepuhahapana, ko Rapahari, ko Nerekara Haretere, ko Rapamaka, ratou ko nga rangatira katoa a te kingi o Papurona; <sup>14</sup> Unga tangata ana ratou, a tikina atu ana a Heremaia i te marae o te whare herehere, a tukua atu ana ia e ratou ki a Keraria tama a Ahikama, tama a Hapana kia kawea ki te kainga: na noho ana ia i waenganui i te iwi. <sup>15</sup> Na i puta mai te kupu a Ihowa ki a Heremaia, i a ia e here ana i te marae o te whare herehere; i mea ia, <sup>16</sup> Haere, korero ki a Eperemereke Etiopiana, mea atu, Ko te kupu tenei a Ihowa o nga mano, a te Atua o Iharaira: Nana, ka takina mai e ahau aku kupu ki runga ki tenei pa, hei kino, ehara ano hoki i te pai; a ka tutuki ki tou aroaro i taua ra. <sup>17</sup> Otiia ka whakaorangia koe e ahau i taua ra, e ai ta Ihowa: e kore hoki koe e tukua ki te ringa o te hunga e wehi na koe. <sup>18</sup> Ka tino whakaorangia hoki koe e ahau, a e kore koe e hinga i te hoari, engari ka waiho tou wairua hei taonga parakete ki a koe: mou i whakawhirinaki ki ahau, e ai ta Ihowa.

## Chapter 40

<sup>1</sup> Ko te kupu i puta mai ki a Heremaia, he mea na Ihowa, i muri i te tukunga a Neputaraarana rangatira o nga kaitiaki i a ia kia haere atu i Rama, i tana tikinga i a ia, i te mea kei te here ia, he

mea mekameka, i roto i nga whakarau katoa o Hiruhar ama, o Hura, e whakaraua ana ki Papurona.

<sup>2</sup>

Na ka mau te rangatira o nga kaitiaki ki a Heremaia, a ka mea ki a ia, Na Ihowa, na tou Atua tenei

kino i korero mo tenei wahi. <sup>3</sup> Na kua takina nei e Ihowa, kua oti i a ia tana i korero ai; no te mea kua hara koutou ki a Ihowa, a kihai i whakarongo ki tona reo, koia tenei mea i pa ai ki a koutou.

<sup>4</sup>

Na, inaianei, ka wetekina koe e ahau i tenei ra i nga mekameka i runga i ou ringa na. Ki te pai koe ki te haere tahi i ahau ki Papurona, haere mai, a maku koe e ata tirotiro: ki te kino ki a koe te haere tahi mai i ahau ki Papurona, kauaka: nana, kei tou aroaro te whenua katoa; na ko tau wahi e kite ai

koe he pai, he ata tau hei haerenga atu mou, haere ki reira. <sup>5</sup> Kiano ia i hoki noa, ka mea tera, Kati, hoki atu ki a Keraria tama a Ahikama, tama a Hapana, kua meinga hoki ia e te kingi o Papurona hei kawana mo nga pa o Hura, a ka noho ki a ia i roto i te iwi; mau ranei e haere ki te wahi e tau ana ki tau ti tiro, kia haere ki reira. Na ka homai e te rangatira o nga kaitiaki he o mona, me tetahi

hakari, a tukua ana ia kia haere. <sup>6</sup> Katahi a Heremaia ka haere ki a Keraria tama a Ahikama ki Mihipa; a noho ana ki a ia i roto i te iwi i mahue iho ki te whenua.

<sup>7</sup>

Na, i te rongonga o nga rangatira katoa o nga ope i nga parae, ratou ko a ratou tangata, kua oti a Keraria tama a Ahikama te mea hei kawana mo te whenua e te kingi o Papurona, a kua tukua ki a ia nga tikanga mo nga tane, mo nga wahine, mo nga tam ariki, mo nga rawakore o te whenua,

mo te hunga hoki kihai i whakaraua ki Papurona; <sup>8</sup> Katahi ratou ka haere mai ki a Keraria, ki Mihipa, ara a Ihimaera tama a Netania, a Hohanana raua ko Honatana, nga tama a Karea, a Heraia tama a Tanahumete, nga tama a Epai Netopati, a Hetania tama a tetahi Maakati, enei, me a ratou

tangata. <sup>9</sup> A ka oati a Keraria tama a Ahikama, tama a Hapana, ki a ratou ko a ratou tangata, ka mea, Kaua e wehi ki te mahi ki nga Karari: e noho ki te whenua, e mahi ki te kingi o Papurona, a

ka whai pai koutou. <sup>10</sup> Ko ahau nei ia, nana, ka noho ahau i Mihipa, hei tu atu i mua i nga Karari e haere mai ana ki a tatou: tena ko koutou, kohikohia e koutou nga waina me nga hua raumati, me

te hinu, whaowhina ki a koutou oko, a ka noho i roto i o koutou pa i riro ra i a koutou. <sup>11</sup> Waihoki, i te rongonga o nga Hurai katoa i Moapa, i roto i nga tama a Amona, i Eroma, i roto hoki i nga whenua katoa, kua waiho e te kingi o Papurona he morehu o Hura, a kua meinga e ia a Keraria

tama a Ahikama, tama a Hapana, hei kawana mo ratou u; <sup>12</sup> Katahi nga Hurai katoa i nga wahi katoa i peia atu ai ratou ka hokihoki mai, a haere mai ana ki te whenua o Hura, ki a Keraria, ki Mihipa,

a kohikohia ana e ratou he waina, he hua raumati, tona nui. <sup>13</sup> I haere mai ano a Hohanana tama a

Karea, ratou ko nga rangatira katoa o nga ope i nga parae ki a Keraria, ki Mihipa, <sup>14</sup> I mea ki a ia, E mohio ana ranei koe, kua unga mai e Paarihi kingi o nga tama a Amona, a Ihimaera tama a Netania

ki te whakamate i a koe? Otiia kihai a Keraria tama a Ahikama i whakapono ki a ratou. <sup>15</sup> Katahi a Hohanana tama a Karea ka korero puku ki a Keraria, i Mihipa, ka mea, Tena, tukua ahau kia

haere, a maku e patu a Ihimaera tama a Netania, a e kore a mohiotia e tetahi tangata. Kia patua koe e ia hei aha? pena ka marara noa iho nga Hurai katoa kua huihui mai nei ki a koe, moti iho nga morehu o Hura. <sup>16</sup> Otiia i mea a Keraria tama a Ahikama ki a Hohanana tama a Karea, Kaua tenei e meatia e koe; he teka hoki tau korero mo Ihimaera.

## Chapter 41

<sup>1</sup> Na i te whitu o nga marama ka haere mai a Ihimaera tama a Netania, tama a Erihama, he uri kingi, ko ia tetahi o nga tino rangatira a te kingi, me ona hoa kotahi tekau, ki a Keraria tama a Ahikama, ki Mihipa; na kei te kai taro ratou tahi ki reira, ki Mihipa. <sup>2</sup> Katahi ka whakatika ake a Ihimaera tama a Netania, ratou ko ona hoa kotahi tekau, a patua ana a Keraria tama a Ahikama, tama a Hapana ki te hoari, mate rawa, a ia i meinga nei e te kingi o Papurona hei kawana mo te whenua. <sup>3</sup> Na i patua ano e Ihimaera nga Hurai katoa i a ia, i a Keraria, i Mihipa, ratou ko nga Karari i kitea ki reira, ara nga tangata whawhai. <sup>4</sup> Na i te rua o nga ra i muri i tana whakamatenga i a Keraria, a kihai i mohiotia e tetahi tangata, <sup>5</sup> Ka haere mai etahi tangata i Hekeme, i Hiro, i Hamaria, e waru tekau nga tangata, heu rawa o ratou pahau, haehae rawa nga kakahu, he mea haehae ano hoki ratou, me nga whakahere, me te whakakakara ano i o ratou ringa hei tapaenga ki te whare o Iho wa. <sup>6</sup> Na ka haere atu a Ihimaera tama a Netania i roto i Mihipa ki te whakatau i a ratou, me te tangi haere ano i a ia e haere ana: a, i tona tutakitanga ki a ratou, ka mea ia ki a ratou, Haere mai ki a Keraria tama a Ahikama. <sup>7</sup> Heoi, i to ratou taenga ki roto ki te pa, ka patua ratou e Ihimaera tama a Netania, a maka ana e ratou ko ona hoa ki roto ki te poka. <sup>8</sup> Otiia tera ano etahi kotahi tekau i kitea i roto i a ratou, i ki atu ki a Ihimaera, Kaua matou e whakamatea; he taonga hoki a matou kei te parae, he witi, he parei, he hinu, he honi, kei te huna. Na ka mutu tana, a kihai ratou i whakamatea e ia i roto i o ratou teina. <sup>9</sup> Na, ko te poka i maka ai e Ihimaera nga tinana katoa o nga tangata i patua nei e ia ki te taha o Keraria, ko tera i hanga e Kingi Aha i te wehi ki a Paaha, kingi o Iharaira, whakakii ana taua poka e Ihimaera tama a Netania ki te hunga i patua. <sup>10</sup> Katahi ka whakaraua e Ihimaera nga morehu katoa o te iwi i Mihipa, nga tamahine a te kingi, me nga morehu katoa i Mihipa, ko te hunga i meinga nei e Neputaarana rangatira o nga kaitiaki, a Keraria tama a Ahikama hei kawana mo ratou; whakaraua an a ratou e Ihimaera tama a Netania, a haere ana ia, whiti ana ki nga tama a Amona. <sup>11</sup> I te rongonga ia o Hohanana tama a Karea, ratou ko nga rangatira katoa o nga ope i a ia, ki te kino katoa i mahia e Ihimaera tama a Netania, <sup>12</sup> Katahi ka tango ratou i nga tangata katoa, a



haere ana ki te whawhai ki a Ihimaera tama a Netania, a rokohanga atu ia i te taha o nga wai nunui  
<sup>13</sup> i Kipeono. A, no te kitenga o te hunga katoa i a Ihimaera i a Hohanana tama a Karea, i ona hoa  
<sup>14</sup> hoki, i nga rangatira katoa o nga ope, na ka koa ratou. Ko te tino tahuritanga o te hunga katoa i  
<sup>15</sup> whakaraua e Ihimaera i Mihipa, hoki ana, haere ana ki a Hohanana tama a Karea. Engari ko  
 Ihimaera tama a Netania i mawhiti atu i a Hohanana, ratou ko nga tangata tokowaru, a haere ana  
<sup>16</sup> ki nga tama a Amona. Katahi ka mau a Hohanana tama a Karea, ratou ko ona hoa, ko nga  
 rangatira katoa o nga ope, i nga morehu katoa o te iwi, i era o Mihipa i whakahokia mai e ia i a  
 Ihimaera tama a Netania, i muri i tana patunga i a Keraria tama a Ahikama, ara nga tangata whawhai,  
<sup>17</sup> nga wahine, nga tamariki, nga unaka hoki i whakahokia mai e ia i Kipeono; A haere ana, noho  
<sup>18</sup> ana i Kerutu Kimihama, i te taha o Peterehema, he mea kia haere ai ratou ki Ihipa, I te wehi ki  
 nga Karari; i wehi hoki ratou i a ratou, mo te patunga a Ihimaera tama a Netania i a Keraria tama  
 a Ahikama, i meinga nei e te kingi o Papurona hei kawana mo te whenua.

## Chapter 42

<sup>1</sup> Katahi nga rangatira katoa o nga ope, ratou ko Hohanana tama a Karea, ko Tetania tama a  
 Hohaia, ko te iwi katoa hoki, i te iti ki te rahi, ka haere mai, <sup>2</sup> A ka mea ki a Heremaia poropiti,  
 Tena, tukua atu ta matou inoi kia manaakitia ki tou aroaro; mau hoki e inoi mo matou ki a Ihowa,  
 ki tou Atua, ara mo enei morehu katoa; he torutoru noa hoki matou o te tokomaha i toe iho, e kite  
<sup>3</sup> na ou kanohi i a matou: Kia whakaaturia mai e Ihowa, e tou Atua, ki a matou te ara e haere ai  
<sup>4</sup> matou, te mea e mahi ai matou. Ano ra ko Heremaia poropiti ki a ratou, Kua rongo ahau ki a  
 koutou; nana, ka inoi ahau ki a Ihowa, ki to koutou Atua, ka rite ki a koutou kupu na: a, ko nga  
 kupu katoa e whakahokia mai e Ihowa ki a koutou, ka whakaaturia e ahau ki a koutou; e kor e tetahi  
<sup>5</sup> kupu e kaiponuhia e ahau ki a koutou. Ano ra ko ratou ki a Heremaia, He pono, he tika hoki a  
 Ihowa hei kaiwhakaatu mo ta tatou, ki te kahore e rite ta matou e mea ai ki nga kupu katoa e unga  
<sup>6</sup> mai ai koe e Ihowa, e tou Atua, ki a matou. Ahakoa pai, ahakoa kino, ka rongo matou ki te reo o  
 Ihowa, o to tatou Atua, ka unga nei koe e matou ki a ia; kia whai pai ai matou, ki te rongo matou  
 ki te reo o Ihowa, o to tatou Atua.  
<sup>7</sup> Na i te mutunga o nga ra kotahi tekau ka puta mai te kupu a Ihowa ki a Heremaia. <sup>8</sup> Katahi  
 ia ka karanga ki a Hohanana tama a Karea, ratou ko ona hoa, ko nga rangatira katoa o nga ope, ki  
<sup>9</sup> te iwi katoa hoki, ki te iti, ki te rahi, A ka mea ki a ratou, Ko te kupu tenei a Ihowa, a te Atua o

10

Iharaira, i unga nei ahau e koutou ki te whakatakoto i ta koutou inoi ki tona aroaro; Ki te noho tonu koutou ki tenei whenua, katahi ahau ka hanga i a koutou, a kahore e wahi iho i a koutou, ka whakatokia hoki koutou e ahau, a kahore e hutia ake: no te mea e ripeneta ana ahau ki te kino kua

11

oti nei i ahau te mea ki a koutou. Kua e wehi i te kingi o Papurona, e wehingia na e koutou: kua e wehi i a ia, e ai ta Ihowa; no te mea kei a koutou ahau hei whakaora i a koutou, hei tango i

12

a koutou i roto i tona ringa. A ka tukua atu aku mahi atawhai ki a koutou, kia atawhai ai ia i a

13

koutou, a ka whakahoki i a koutou ki to koutou oneone. Tena ki te mea koutou, E kore matou

14

e noho ki tenei whenua; a ka kore koutou e rongu ki te reo o Ihowa, o to koutou Atua; Ka mea, Kahore; engari ka haere matou ki te whenua o Ihipa, ki te wahi e kore ai matou e kite i te whawhai, e kore ai hoki e rongu i te tangi o te tetere, a e kore ai e hiakai ki te taro; a hei reira tatou noho ai:

15

Na kia rongu koutou aianei, e nga morehu o Hura, ki te kupu a Ihowa, Ko te kupu tenei a Ihowa o nga mano, a te Atua o Iharaira, Ki te maro tonu o koutou kanohi ki te haere ki Ihipa, a ka haere

16

koutou ki reira noho ai; Na ka mau koutou i te hoari, e wehingia nei e koutou, ki reira, ki te whenua o Ihipa, a ka whaia tatatia koutou e te hemokai, e wehi na koutou, ki reira, ki Ihipa; a ka

17

mate koutou ki reira. Na ka pena nga tangata katoa e naro ana o ratou kanohi ki te haere ki Ihipa ki reira noho ai; ka mate ratou i te hoari, i te hemokai, i te mate uruta: a e kore tetahi o ratou e toe,

18

e mawhiti i te kino e takina mai e ahau ki runga ki a ratou. Ko te kupu hoki tenei a Ihowa o nga mano, a te Atua o Iharaira; Ka rite ki taku ringihanga i toku riri, i toku weriweri, ki runga ki nga tangata o Hiruharama, ka pena ano taku ringihanga i toku weriweri ki runga ki a koutou, ina tae koutou ki Ih ipa: a hei kohukohutanga, hei hahanitanga; a e kore koutou e kite i tenei wahi a muri

19

atu. Kua puaki ta Ihowa kupu mo koutou, E nga morehu o Hura, Kua e haere ki Ihipa: kia tino

20

mohio koutou kua oti te whakaatu e ahau ki a koutou i tenei ra. Kua tinihanga hoki koutou ki o koutou na wairua ano; i unga hoki koutou i ahau ki a Ihowa, ki to koutou Atua, i ki mai, Inoi mo matou ki a Ihowa, ki to tatou Atua; a, ko nga mea katoa e korerotia e Ihowa, e to tatou Atua, mau

21

e whakaatu ki a mat ou, a ka mahia e matou. Na kua whakaaturia nei e ahau ki a koutou i tenei ra; otira kihai koutou i rongu ki te reo o Ihowa, o to koutou Atua, i nga mea katoa i unga ai ahau e

22

ai ki a koutou. Ko tenei, kia tino mohio koutou, tera koutou e mate i te hoari, i te hemokai, i te mate uruta, ki te wahi i hiahia ai koutou kia haere ki reira noho ai.

### Chapter 43

<sup>1</sup> A ka mutu te korero a Heremaia ki te iwi katoa i nga kupu katoa a Ihowa, a to ratou Atua, i unga ai ia ki a ratou e Ihowa, e to ratou Atua, ara enei kupu katoa, <sup>2</sup> Katahi ka korero a Ataria tama a Hohaia, ratou ko Hohana tama a Karea, ko nga tangata whakapehapeha katoa ano hoki, ka mea ki a Heremaia, E korero teka ana koe: kihai a Ihowa, to tatou Atua, i unga mai i a koe hei mea, Kauga koutou e haere ki Ih ipa, ki reira noho ai: <sup>3</sup> Engari na Paruku, na te tama a Neria koe i whakakiki ki te he mo matou, kia tukua ai matou ki te ringa o nga Karari, kia whakamatea ai matou e ratou, kia whakaraua ai hoki ki Papurona. <sup>4</sup> Na kihai a Hohana tama a Karea, ratou ko nga rangatira katoa o nga ope, ko te iwi katoa hoki, i rongo ki te reo o Ihowa, kia noho ki te whenua o Hura. <sup>5</sup> Engari i mau a Hohana tama a Karea, ratou ko nga rangatira katoa o nga ope, ki nga morehu katoa o Hura i peai nei ratou ki nga iwi katoa, a i hoki mai ki te whenua o Hura noho ai; <sup>6</sup> Ki nga tana, ki nga wahine, ki nga tamariki, ki nga tamahine hoki a te kingi, ki nga tangata katoa i waiho e Neputaraana rangatira o nga kaitiaki ki a Keraria tama a Ahikama, tama a Hapana, ki a Heremaia poropiti, ki a Paruku hoki tama a Neria; <sup>7</sup> A haere ana ratou ki te whenua o Ihipa; kihai hoki ratou i rongo ki te reo o Ihowa: na ka tae ratou ki Tahapanehe. <sup>8</sup> Katahi ka puta mai te kupu a Ihowa ki a Heremaia ki Tahapanehe; i mea ia, <sup>9</sup> Maua atu etahi kohatu nunui i tou ringa, a ka huna ki roto ki te paru ki te papa pereki, ki tera i te kuwaha o te whare o Parao i Tahapanehe, a kia kite hoki nga tangata o Hura; <sup>10</sup> A ka mea ki a ratou, Ko te kupu tenei a Ihowa o nga mano, a te Atua o Iharaira: Nana, ka unga tangata ahau ki te tiki i taku pononga, i a Nepukareha kingi o Papurona, a ka whakaturia e ahau tona torona ki runga ki enei kohatu kua huna nei e ahau; a ka horahia e ia tona teneti kingi ki runga. <sup>11</sup> Na ka tae mai ia, a ka patu i te whenua o Ihipa; ko te hunga mo te mate ka tukua ki te mate, ko te hunga mo te whakarau ki te whakarau, a ko te hunga mo te hoari ki te hoari. <sup>12</sup> Ka ngiha ano i ahau he ahi i roto i nga whare o nga atua o Ihipa; ka tahuna ratou e ia, a ka whakaraua atu: a ka kakahuria e ia te whenua o Ihipa, ano he hepara e kakahu ana i tona kakahu; a ka haere atu ia i reira i runga i te rangimarie. <sup>13</sup> Ka wawahia hoki e ia nga whakapakoko o Petehemehe, o tera i te whenua o Ihipa, ka tahuna ki te ahi nga whare o nga atua o Ihipa.

## Chapter 44

<sup>1</sup> Ko te kupu i puta mai ki a Heremaia mo nga Hurai katoa e noho ana i te whenua o Ihipa, e noho ana i Mikitoro, i Tahapanehe, i Nopo, i te whenua hoki o Patoro; i mea ia, <sup>2</sup> Ko te kupu tenei

a Ihowa o nga mano, a te Atua o Iharaira: Kua kite koutou i te kino katoa i takina mai nei e ahau ki runga ki Hiruharama, ki nga pa katoa hoki o Hura; na, i tenei ra he ururua ratou, kahore hoki he

<sup>3</sup> tangata e noho ana i reira; Mo ta ratou kino i mahia e ratou hei whakapataritari i ahau, i to ratou haerenga ki te tahu whakakakara, a ki te mahi ki nga atua ke, kihai nei ratou i mohio, ratou, koutou

<sup>4</sup> ranei, o koutou matua ranei. He ahakoa ra, i unga atu e ahau aku pononga katoa, nga poropiti, ki a koutou, maranga wawe ana ahau ki te unga i a ratou; i mea ahau, Kaua ra e mahia tenei mea

<sup>5</sup> whakarihariha e kino nei ahau. Otiia kihai ratou i rongu, kihai hoki i tahuri mai o ratou taringa,

<sup>6</sup> kihai i hoki mai i to ratou kino, ara i te tahu whakakakara ki nga atua ke. Koia i ringihia atu ai toku weriweri, toku riri, ngiha tonu ki nga pa o Hura, ki nga ara hoki o Hiruharama; na he ururua

<sup>7</sup> ratou, he tuhea, koia ano tenei inaianei. Mo reira ko te kupu tenei inaianei a Ihowa, a te Atua o nga mano, a te Atua o Iharaira; He aha koutou i mahi ai i tenei kino nui mo o koutou wairua, ka hatepe atu i a koutou, i nga tane, i nga wahine, i te kohungahunga, i te mea ngote u, i roto i a Hura,

<sup>8</sup> a kore iho he toenga o koutou e mahue? I a koutou i whakapataritari na i ahau ki nga mahi a o koutou ringa, i a koutou ka tahu whakakakara nei ki nga atua ke i te whenua o Ihipa, kua haere atu na koutou ki reira noho ai, e hatepea atu ai koutou, e waiho ai koutou hei kanga, hei ingoa kino i

<sup>9</sup> roto i nga iwi katoa o te whenua. Kua wareware ranei koutou ki te kino o o koutou matua, ki te kino o nga kingi o Hura, ki te kino hoki o a ratou wahine, ki o koutou na kino, ki te kino hoki o a

<sup>10</sup> koutou wahine i mahia nei e ratou ki te whenua o Hura, ki nga ara hoki o Hiruharama? Taea noatia tenei ra kahore ano ratou i whakaiti i a ratou, kahore ano i wehi, kahore i haere i runga i taku ture, i runga i aku tikanga i hoatu e ahau ki to koutou aroaro, ki te aroaro hoki o o koutou matua.

<sup>11</sup> Mo reira ko te kupu tenei a Ihowa o nga mano, a te Atua o Iharaira: Nana, ka anga ke atu toku

<sup>12</sup> mata i a koutou mo te kino, he hatepe i a Hura katoa. Na ka mau ahau ki nga morehu o Hura, kua maro nei o ratou mata ki te haere ki te whenua o Ihipa, ki reira noho ai, a ka poto ratou katoa; ka hinga ratou ki te whenua o Ihipa; ka pau ratou i te hoari, i te hemokai; ka mate ratou, mai i te iti ki te rahi, i te hoari, i te hemokai: a ka waiho ratou hei kanga, hei miharotanga, hei kohukohutanga,

<sup>13</sup> hei ingoa kino. No te mea ka whiua e ahau te hunga e noho ana i te whenua o Ihipa, ka rite ki

<sup>14</sup> taku whiunga i Hiruharama ki te hoari, ki te hemokai, ki te mate uruta: Na ka kore tetahi o nga morehu o Hura i haere nei ki te whenua o Ihipa noho ai e mawhiti, e toe, hei hoki ki te whenua o Hura, ki te wahi e hiahia nei ratou kia hoki ki reira noho ai: na e kore tetahi e hoki ko te hunga anake e mawhiti atu.

<sup>15</sup> Na katahi nga tangata katoa i mohio kua tahu whakakakara a ratou wahine ki nga atua ke, nga wahine katoa hoki e tu mai ana, he nui te huihui, me te iwi katoa hoki e noho ana i te whenua

<sup>16</sup> o Ihipa, i Patoro, ka whakahoki ki a Heremaia, ka mea, Na, mo te kupu kua korerotia nei e koe

17  
 ki a matou i runga i te ingoa o Ihowa, e kore matou e rongu ki a koe. Engari ka tino mahi matou i nga mea katoa i puaki i o matou mangai, ka tahu whakakakara ki te kuini o te rangi, ka riringi ano i nga ringihanga ki a ia, ka pera me ta matou, me ta o matou matua, me ta o matou kingi, me ta o matou rangatira i nga pa o Hura, i nga ara o Hiruharama: i makona hoki matou i reira i te kai, i pai

18  
 hoki matou, a kihai i kite i te he. Otiia no te mutunga o ta matou tahu whakakakara ki te kuini o te rangi, o ta matou ringihanga i nga ringihanga ki a ia, kua kore nga mea katoa, i a matou, a poto

19  
 iho matou i te hoari, i te hemokai. A, i a matou i tahu whakakakara ai ki te kuini o te rangi, i riringi ai hoki i nga ringihanga ki a ia, e ngaro ana ranei a matou tane i a matou e hanga ana i nga keke nana, hei karakia ki a ia; i a matou hoki i riringi ai i nga ringihanga mana?

20  
 Katahi a Heremaia ka korero ki te iwi katoa, ki nga tane, ki nga wahine, ki te iwi katoa ano

21  
 nana taua kupu whakautu ki a ia, ka mea, Ko te whakakakara i tahuna ra e koutou ki nga pa o Hura, ki nga ara hoki o Hiruharama, e koutou, e o koutou matua, e o koutou kingi, e o koutou rangatira, e te iwi hoki o te whenua, kihai ianei ena mea i maharatia e Ihowa, kihai ianei i puta ake

22  
 ki tona ngakau? A te ahei a Ihowa te whakamanawanui tonu i te kino o a koutou hanga, i nga mea whakariharaha i mahia e koutou; heoi kua ururua to koutou whenua, kua waiho hei miharotanga,

23  
 hei kohukohutanga, te ai te tangata hei noho, koia ano tenei inaianei. No te mea kua tahu koutou i te whakakakara, kua hara hoki ki a Ihowa, a kihai i rongu ki te reo o Ihowa, kihai hoki i haere i runga i tana ture, i runga i ana tikanga, i runga i ana whakaatu; mo reira i tutaki ai tenei he ki a

24  
 koutou, koia ano tenei inaianei. I mea atu ano a Heremaia ki te iwi katoa, ki nga wahine katoa

25  
 hoki, Whakarongo ki te kupu a Ihowa, e Hura katoa i te whenua o Ihipa nei: Ko te kupu tenei a Ihowa o nga mano, a te Atua o Iharaira; e ki ana ia: Ko koutou, me a koutou wahine, kua korero o koutou mangai, kua rite ano i o koutou ringa te kupu, Ka mahia marietia e matou a matou kupu taurangi i korerotia e matou, kia ta hu whakakakara ki te kuini o te rangi, kia riringi i nga ringihanga

26  
 ki a ia: tena whakaungia a koutou kupu taurangi, mahia hoki a koutou kupu taurangi. Mo reira whakarongo ki te kupu a Ihowa, e Hura katoa e noho nei i te whenua o Ihipa: Nana, kua oatitia e ahau toku ingoa nui, e ai ta Ihowa, e kore toku ingoa e whakahuatia a muri ake nei e te mangai o

27  
 tetahi tangata o Hura i te whenua katoa o Ihipa, e kore e kiia, E ora ana te Ariki, a Ihowa. Nana, kei te tiro tiro ahau i a ratou mo te kino, ehara i te mea hei pai: a, ko nga tangata katoa o Hura i te

28  
 whenua o Ihipa, ka poto i te hoari, i te hemokai hoki, a moti noa ratou. A, ko nga morehu i te hoari, ka hoki atu i te whenua o Ihipa ki te whenua o Hura, he hunga torutoru; a ka mohio nga morehu katoa o Hura i haere nei ki te whenua o Ihipa noho ai, ko ta wai kupu e tu, ko taku ranei,

29  
 ko ta ratou ranei. A ko te tohu tenei ki a koutou, e ai ta Ihowa, ka whiua koutou e ahau ki tenei

30  
 wahi, kia mohio ai koutou ka mau tonu aku kupu ki te kino mo koutou. Ko te kupu tenei a Ihowa,

Nana, ka hoatu e ahau a Parao Hopara kingi o Ihipa ki te ringa o ona hoariri, ki te ringa hoki o te hunga e whai ana kia whakamatea ia; ka rite ano ki taku hoatutanga i a Terekia kingi o Hura ki te ringa o Nepukareha ki ngi o Papurona, o tona hoariri i whai nei kia whakamatea ia.

## Chapter 45

<sup>1</sup> Ko te kupu i korerotia e Heremaia poropiti ki a Paruku tama a Neria, i tana tuhituhinga i enei kupu ki te pukapuka, na Heremaia i korero, i te wha o nga tau o Iehoiakimi kingi o Hura; i ki ia,  
<sup>2</sup> Ko te kupu tenei a Ihowa, a te Atua o Iharaira mou, e Paruku; <sup>3</sup> I mea koe, Aue, toku mate nei hoki! kua tapiritia hoki e Ihowa toku mamae ki te tangi; mauui noa ahau i toku auetanga, te ai he pariratanga. <sup>4</sup> Ko tau tenei e ki atu ai ki a ia, Ko te kupu tenei a Ihowa: Nana, ko taku i hanga ai ka wahia iho ano e ahau, a ko taku i whakato ai ka hutia atu ano e ahau; a ko tenei ki te whenua katoa. <sup>5</sup> A e rapu ana koe i nga mea nunui mau? kua e rapua; no te mea kei te kawea atu e ahau he kino mo nga kikokiko katoa, e ai ta Ihowa: engari ka hoatu e ahau tou wairua ki a koe hei taonga parakete i nga wahi katoa e haere atu ai koe.

## Chapter 46

<sup>1</sup> Ko te kupu a Ihowa i puta mai ki a Heremaia poropiti mo nga iwi: <sup>2</sup> Mo Ihipa: mo te ope a Parao Neko kingi o Ihipa, mo tera i te awa, i Uparati, i Karakemihi, i patua ra e Nepukareha kingi o Papurona i te wha o nga tau o Iehoiakimi tama a Hohia kingi o Hura. <sup>3</sup> Whakapaia te whakangungu rakau me te puapua, whakatata ki te whawhai. <sup>4</sup> Whakanohoia nga hoiho, e eke, e nga kaieke hoiho, a tu atu me o koutou potae; whakakanapatia nga tao, kakahuria nga pukupuku. <sup>5</sup> He aha ahau i kite ai i tenei? kei te powera ratou, kua hoki ki muri; kua whati noa atu, kihai hoki i titiro whakamuri: kei nga taha katoa te wehi, e ai ta Ihowa. <sup>6</sup> Kua te tangata tere e rere atu, kua hoki te marohirohi e mawhiti; kei te raki, kei te awa, kei Uparati, kua tutuki o ratou waewae, kua hinga. <sup>7</sup> Ko wai tenei e puhake ake nei me te mea ko te Naera, e tutu nei ona wai me te mea ko nga awa? <sup>8</sup> I puhake mai a Ihipa ano ko te Naera, i tutu ona wai ano ko nga awa: a ka mea ia, Ka puhake atu ahau, a ka taupokina te whenua; ka ngaro i ahau te pa me ona tangata. <sup>9</sup> Haere atu, e nga hoiho; e ngana, e nga hariata; tukua atu nga marohirohi; a Kuhu, a Putu, e rahurahu nei i te whakangungu rakau; nga

10  
Rurimi, e rahurahu nei, e whakapiko nei i te kopere. Ko taua ra hoki he ra na te Ariki, na Ihowa o nga mano, he ra rapu utu, e whai utu ai ia i ona hoariri; a ka horomi te hoari, a ka makona, ka inu hoki, ki rawa i o ratou toto; no te mea he patunga tapu ta te Ariki, ta Ihowa o nga mano i te whenu

11  
a ki te raki, i te taha o te awa o Uparati. Haere ki runga, ki Kireara, e te tamahine wahine a Ihipa, ka tiki he pama; ka maumau tau mahi i nga rongoa maha; kahore he ora mou.

12  
Kua rongo nga iwi ki tou whakama, kua paku tau karanga ki nga whenua: kua tutuki nei hoki te waewae o te marohirohi ki te marohirohi, kua hinga ngatahi tautokorua. 13 Ko te kupu i korerotia e Ihowa ki a Heremaia poropiti, tera ka haere mai a Nepukareha kingi o Papurona ki te

14  
patu i Ihipa. Kauwhautia e koutou ki Ihipa, panuitia ki Mikitoro, panuitia ki Nopo, ki Tahapanehe,

15  
mea atu, E tu, kia tumatohi; kua kai hoki te hoari i tetahi taha ou, i tetahi taha. He aha ou maia

16  
i tahia atu ai? kihai ratou i tu, na Ihowa hoki ratou i a atu. He tini nga mea nana i tukoki ai, ae ra, i hinga ratou tetahi ki runga ki tetahi: i mea ano, Whakatika, tatou ka haere ki to tatou nei iwi,

17  
ki te whenua i whanau ai tatou, i te hoari tukino. I karanga ratou i reira, He turituri kau a Parao

18  
kingi o Ihipa; kua tukua e ia kia pahemo te wa i whakaritea. E ora ana ahau, e ai ta te Kingi, ko Ihowa o nga mano nei tona ingoa, kei Taporu i roto i nga maunga, kei Karamere hoki i te moana

19  
he rite mo tona haerenga mai. E koe, e te tamahine, e noho nei i Ihipa, mahia nga mea mou mo

20  
te whakaraunga: no te mea ka ururuatia a Nopo, ka wera, te ai te tangata hei noho. He kuao kau

21  
ataahua rawa a Ihipa; otiia kua tae mai te whakangaro i te raki, tenei kua tae mai. Ko ana tangata hoki i utu ai, rite tonu i roto i a ia ki te kuao whangai; kua tahuri atu ano hoki ratou, kua oma ngatahi

22  
atu, kihai hoki i tu; no te mea kua tae mai te ra o to ratou aitua ki a ratou, te wa e whiua ai. Ko tona reo ka rite te puaki ki to te nakahi; no te mea he taua ta ratou ina haere, ka haere mai ratou ki

23  
a ia me nga toki, ka rite ki nga kaitapahi rakau. Ka tuaina e ratou tona ngahere, e ai ta Ihowa, ahakoa e kore tona mutunga e taea te rapu; he tini ke hoki ratou i te mawhitiwhiti, e kore e taea te

24  
tatau. Ka whakama te tamahine a Ihipa; ka tukua ia ki te ringa o te iwi ki te raki. 25 E mea ana a Ihowa o nga mano, te Atua o Iharaira: Nana, ka whiua e ahau a Amono o No, a Parao, a Ihipa hoki, me o reira atua, me o reira kingi; a Parao rawa, ratou ko te hunga e whakawhirinaki ana ki a

26  
ia: Ka tukua hoki ratou e ahau ki te ringa o te hunga e whai ana kia whakamatea ratou, ki te ringa ano o Nepukareha kingi o Papurona, ki te ringa o ana tangata: a muri iho ka nohoia, ka pera

27  
me nga ra o mua, e ai ta Ihowa. Ko koe ia, kaua e wehi, e taku pononga, e Hakopa, kaua e pawera, e Iharaira: no te mea, nana, maku koe e whakaora i tawhiti, ou uri hoki i te whenua i whakaraua ai ratou; a ka hoki mai a Hakopa, ka ata noho, ka whai tanga manawa, te ai he kaiwha

28  
 kawehi mona. <sup>28</sup> Kua koe e wehi, e taku pononga, e Hakopa, e ai ta Ihowa; kei a koe nei hoki ahau: ka poto rawa hoki i ahau nga iwi katoa kua peia nei koe e ahau ki reira, otiia e kore koe e poto rawa i ahau; engari ka pakia koe e ahau, he mea whakarite marie, e kore ia koe e tukua kia kore e whiua.

### Chapter 47

<sup>1</sup> Ko te kupu a Ihowa i puta mai ki a Heremaia poropiti mo nga Pirihitini i te mea kahore ano a Parao i patu noa i Kaha. <sup>2</sup> Ko te kupu tenei a Ihowa: Nana, te puta mai nei nga wai i te raki, ka meinga hei waipuke e ngawha ana, a ka pokia te whenua me ona mea katoa, te pa me nga tangata e noho ana i roto: a ka hamama nga tangata, ka aue hoki nga tangata katoa o te whenua. <sup>3</sup> Hei te haruru o te takahi o nga paua o ona hoiho kaha, hei te rorohu o ona hariata, hei te ngaeha o ona wira, kore iho nga matua e tahuri ki muri ki a ratou tamariki i te ngoikore hoki o nga ringa; <sup>4</sup> Na, mo te ra e haere mai nei, e pahuatia ai nga Pirihitini katoa, e hatepea atu ai i Taira, i Hairona nga kaiawhina katoa e toe nei: ka pahuatia hoki e Ihowa nga Pirihitini, nga morehu o te motu, o Kapatoro. <sup>5</sup> Kua tae te pakira ki runga ki Kaha; kua whakamotitia a Ahakerono, me te toenga ano o to ratou awaawa: kia pehea te roa o tau haehae i a koe? <sup>6</sup> E te hoari a Ihowa, kia pehea te roa ka ata takoto ai koe? hoki atu ki roto ki tou kopaki: okioki, kati hoki tau. <sup>7</sup> Me pehea koe e ata takoto ai, kua hoatu nei hoki e Ihowa he whakahau ki a koe? he he mo Ahakerono, mo te tahatika hoki o te moana, kua whakaritea e ia ki reira.

### Chapter 48

<sup>1</sup> Mo Moapa. Ko te kupu tenei a Ihowa o nga mano, a te Atua o Iharaira: Aue, te mate mo Nepo! kua pahuatia hoki; kua meinga a Kiriataima kia whakama, kua riro: kua meinga a Mihikapa kia whakama, kua wawahia iho ia. <sup>2</sup> Kua kahore te whakamoemiti mo Moapa; i Hehepona ratou e whakatakoto ana i te kino mona, Haere mai, tatou ka hatepe atu i a ia, kia kore ai tena iwi. Ko koe ano hoki, e Maramene, ka whakanohopukutia koe; ka aru te hoari i a koe. <sup>3</sup> Ka puta te reo aue i Horonaimi, he pahua, he whakangaromanga nui! <sup>4</sup> Ka oti a Moapa te tukituki; he aue ka rangona, na ana mea ririki. <sup>5</sup> Ka haere hoki ratou ma te pikinga atu ki Ruhiti me te tangi haere tonu; no te



mea i te heketanga ki Horonaimi kua rongou ratou i te mamae kino o te aue ki te whakangaromanga.

<sup>6</sup> E rere, kahaki i a koutou kia ora ai, kia rite ai ki te manoao i te koraha. <sup>7</sup> No te mea, nau i whakawhirinaki ki au mahi, ki au taonga, koia ano koe ka horo ai: a ka riro a Kemoho i te whakarau,

ratou tahi ko ona tohunga, ko ona rangatira. <sup>8</sup> Ka tae te kaipahua ki nga pa katoa, e kore hoki tetahi

pa e puta; ka ngaro te raorao, ka huna hoki te mania; ka pera me ta Ihowa i korero ai. <sup>9</sup> Hoatu he parirau mo Moapa, kia rere atu ai, kia puta ai: a ka ururuatia ona pa, te ai he tangata hei noho ki

<sup>10</sup> reira. Ka kanga te tangata e mahi whakaparahako ana i ta Ihowa mahi, a ka kanga hoki te tangata

e kore nei e tuku i tana hoari ki te toto. <sup>11</sup> I runga a Moapa i te rangimarie no tona tamarikitanga ake, a i ata takoto ia i runga i ona nganga, kihai i ringihia atu i tetahi oko ki tetahi oko, kihai ano

hoki ia i riro i te whakarau: heoi mau tonu tona reka ki a ia, a kihai tona kakara i re re ke. <sup>12</sup> Mo reira, nana, kei te haere mai nga ra, e ai ta Ihowa, e unga ai e ahau ki a ia te hunga ringiringi, a ka ringihia atu ia e ratou; a ka noho tahanga i a ratou ana oko, ka pakaru rikiriki hoki a ratou pounamu.

<sup>13</sup> Na ka whakama a Moapa ki a Kemoho, ka pera me te whare o Iharaira i whakama ra ki Peteere, ki ta ratou i whakawhirinaki ai.

<sup>14</sup> He pehea ta koutou e ki na, He marohirohi tatou, he uaua ki te whawhai? <sup>15</sup> Kua pahuatia a Moapa, a kua piki atu ratou ki ona pa, kua heke iho hoki ana taitama, he mea whiriwhiri, kei raro,

he parekura, e ai ta te Kingi, ko Ihowa, nei o nga mano tona ingoa. <sup>16</sup> Ka tata te aitua o Moapa te

puta, a kei te tino kaika mei te he mona. <sup>17</sup> Tangihia ia, e koutou katoa i tetahi taha ona, i tetahi taha, e koutou e mohio ana ki tona ingoa; ki ake, Ano te whatinga o te rakau kaha, o te tokotoko

<sup>18</sup> ataahua! E te tamahine e noho mai nei i Ripono, makere mai i tou kororia, e noho ki te matewai;

no te mea kua tae te kaipahua o Moapa ki a koe, kua kore i a ia ou wahi kaha. <sup>19</sup> E te wahine e noho ana i Aroere, e tu ki te ara titiro ai: ui atu ki te tangata e rere ana, ki te wahine e mawhiti ana;

mea atu, he aha kua meatia? <sup>20</sup> Kua whakama a Moapa; kua pakaru: aue, e tangi; korerotia ki

Aranono, kua oti a Moapa te pahua. <sup>21</sup> Kua tae atu ano te whakawa ki te mania; ki Horono, ki

Iahata, ki Mepaata; <sup>22</sup> A ki Ripono, ki Nepo, ki Peteripirataima; <sup>23</sup> A Kiriataima, ki Petekamuru,

ki Petemeono; <sup>24</sup> Ki Keriooto, ki Potoro, ki nga pa katoa o te whenua o Moapa, ki nga mea i tawhiti,

ki nga mea e tata ana. <sup>25</sup> Kua oti te haona o Moapa te pouto atu, kua whati tona ringa, e ai ta Ihowa.

<sup>26</sup> Meinga ia e koutou kia haurangi; mona i whakakakake ki a Ihowa: a ka okeoke a Moapa i roto

i tona ruaki, a ka waiho ano ia hei katanga. <sup>27</sup> He teka ianei i waiho a Iharaira hei katanga mau? i

kitea ranei ia i roto i nga tahae? no te mea i au korerotanga katoa mona, e oraora ana te mahunga.

28

E nga tangata o Moapa, whakarerea nga pa, e noho ki te kamaka; a kia rite ki te kukupa e hanga

29

nei i tona ohanga ki nga taha o te kuwaha o te rua. Kua rongo tatou i te whakahihi o Moapa, nui atu hoki tona whakahihi; i tona whakakake, i tona whakamanamana, i tona whakapehapeha, i te

30

whakahirahira hoki o tona ngakau. E mohio ana ahau ki tona riri, e ai ta Ihowa, otiia kahore he

31

tikanga; kahore he rawa o ana whakapehapeha. Mo reira ka tangi ahau mo Moapa; ae ra, ka aue

32

ahau mo Moapa katoa: ka uhunga ratou mo nga tangata o Kiriherehe. E te waina o Hipima, ka tangihia koe e ahau, nui atu i te tangihanga mo Iatere: kua whiti ou peka ki tera taha o te moana, kua tae rawa ki te moana o Iatere: kua kokiri atu te kaipahua ki au hua raumati, ki tau kohikohinga

33

waina. A kua whakakahoretia atu te koa me te hari i te mara momona, i te whenua hoki o Moapa; a kua mutu i ahau he waina mo nga takahanga waina; e kore tetahi e hamama i te takahanga; ko to

34

ratou hamama ehara i te hamama. No te auetanga i Hehepona tae noa ki Ereare, ki Iahata, te puakanga o to ratou reo, no Toara tae noa ki Horonaimi, ki Ekerata Herihiia: no te mea ka mokemoke

35

ano hoki nga wai o Nimirimi. Ka meinga ano hoki e ahau kia mutu i roto i a Moapa, e ai ta Ihowa, te tangata whakaeke whakahere ki te wahi tiketike, me te tangata tahu whakakakaraki ona

36

atua. Na reira kei te tangi toku ngakau ki a Moapa ano he putorino, kei te tangi hoki toku ngakau

37

ano he putorino ki nga tangata o Kiriherehe; na reira kua moti nga mea maha i mahia e ia. He mea moremore katoa hoki nga mahunga, ko nga kumikumi katoa tapahi rawa: he haehaenga kei

38

nga ringa katoa, he kakahu taratara kei nga hope. Kei runga i nga tuanui katoa o Moapa a kei ona ara he uhunga kei nga wahi katoa: no te mea kua pakaru i ahau a Moapa, ano he oko e kore e

39

manakohia, e ai ta Ihowa. Ano tona wawahanga! Ta ratou aue! ina, te tahuritanga mai o te tuara o Moapa i te whakama! na ka waiho a Moapa hei katanga, hei whakawehi ki te hunga i tetahi taha

40

ona, i tetahi taha. No te mea ko te kupu tenei a Ihowa, Nana, ka rere ia ano he ekara, ka roha

41

hoki ona parirau ki runga ki Moapa. Kua horo Kerimoto, kua riro nga wahi kaha, a ka rite te

42

ngakau o nga marohirohi o Moapa i taua ra ki te ngakau o te wahine e whakamamae ana. A ka

43

huna a Moapa, ka kore tena iwi, mona i whakakake ki a Ihowa. Ko te wehi, ko te poka, ko te

44

rore, kei a koe, e te tangata o Moapa, e ai ta Ihowa. Ko te tangata e rere ana i te wehi, ka taka ki te poka; a ko te tangata e puta ake ana i te poka, ka mau i te rore: ka takina hoki e ahau ki runga

45

ki a ia, ara ki a Moapa, te tau e tiroirohia ai ratou, e ai ta Ihowa. Ko te hunga i rere, tu ana ratou i raro i te ata o Hehepona, kahore he kaha: kua puta atu hoki he ahi i Hehepona, he mura i waenganui

o Hihono, a kua pau te koki o Moapa, te tumuaki hoki o nga tama a te ngangau. <sup>46</sup> Aue, te mate mou, e Moapa! kua huna te iwi o Kemoho: kua riro hoki au tama hei whakarau, au tamahine hoki hei whakarau. <sup>47</sup> Otiia ka whakahokia mai ano e ahau a Moapa i te whakarau i nga ra whakamutunga, e ai ta Ihowa. Heoi ano te whakawa mo Moapa.

## Chapter 49

<sup>1</sup> Mo nga tamariki a Amona. Ko te kupu tenei a Ihowa: Kahore ianei a Iharaira tamariki? kahore ana tangata hei whakarerenga iho mo ana taonga? na he aha a Kara i riro ai i a Marakomo, i noho ai tona iwi ki roto ki ona pa? <sup>2</sup> Mo reira, tenei nga ra te haere mai nei, e ai ta Ihowa, e meinga ai e ahau te whakaoho o te riri kia rangona ki Rapa o nga tama a Amona; a ka waiho hei puranga kua ururuatia, ka tahuna ana tamahine ki te ahi: a ka riro i a Iharaira te hunga i a ratou nei ia i mua, e ai ta Ihowa. <sup>3</sup> Aue, e Hehepona, kua pahuatia hoki a Hai; e tangi, e nga tamahine a Rapa, whitikiria koutou ki te kakahu taratara: e tangi, ka omaoma noa i waenga i nga taiepa; no te mea ka riro a Marakomo i te whakarau, ona tohunga me ona rangatira ngatahi ano. <sup>4</sup> He aha koe i whakamanamana ai ki nga raora, ki tou raora taheke, e te tamahine taurihuri ke? e whakawhirinaki nei ki ona taonga, e mea nei, Ko wai e haere mai ki ahau? <sup>5</sup> Nana, ka takina e ahau he wehi ki runga ki a koe, e ai ta te Ariki, ta Ihowa o nga mano, he mea na te hunga katoa i tetahi taha ou, i tetahi taha; a ka aia rawatia atu koutou, tera, tera, ki waho, a kahore he kaitawhiu mai mo te mea i marara atu. <sup>6</sup> Hei muri ia ka whakahokia e ahau nga tama a Amona i te whakarau, e ai ta Ihowa.

<sup>7</sup> Mo Eroma. Ko te kupu tenei a Ihowa o nga mano: Kua kahore ranei te whakaaro nui i Temana? kua moti ianei te whakatakoto korero a te hunga mohio? kua memeha ranei to ratou whakaaro nui? <sup>8</sup> E rere koutou, tauri atu, hei roro riro noho ai, e nga tangata o Rerana; no te mea ka takina mai e ahau te aitua o Ehau ki runga ki a ia, i te wa e tiroiro ai ahau i a ia. <sup>9</sup> Ki te tae atu he kaikohikohi karepe ki a koe, e kore ianei e mahue i a ratou etahi karepe hei hamunga? ki te mea he tahae i te po, e kore ianei ratou e tukituki kia makona rawa ratou? <sup>10</sup> Kua takoto kau ia i ahau a Ehau, kua hurahia e ahau ona wahi ngaro, te ahei ia te huna i a ia: kua oti ona uri te pahua, ona teina me ona hoa tata, a kua kore hoki ia. <sup>11</sup> Waiho au pani, maku e whakaora; ko ou pouaru, kia whakawhirinaki ratou ki ahau. <sup>12</sup> Ko te kupu hoki tenei a Ihowa: Nana, ko te hunga i takoto nei te tikanga kia kaua e inu i te kapu, he pono ka inumia e ratou; a ko koe ranei te mea e kore rawa e whiua? e kore e kore ka whiua koe, engari ka tino inu nei koe. <sup>13</sup> No te mea kua waiho ahau e ahau ano hei oati, e ai ta

Ihowa, ka waiho a Potora hei miharotanga, hei ingoa kino, hei ururua, hei kanga ano hoki; a ka

waiho ona pa katoa hei koraha ake ake. <sup>14</sup> Kua rangona e ahau he korero i a Ihowa, kua oti hoki te karere te tuku ki nga iwi, hei ki atu, Whakahuihui i a koutou, haere mai hoki ki a ia, a ka whakatika

atu ki te whawhai. <sup>15</sup> No te mea, na, kua meinga koe e ahau kia iti i roto i nga tauwiwi, he mea

whakahawea i roto i nga tangata. <sup>16</sup> Tena ko tou whakamataku, he whakakake no tou ngakau i pohewa ai koe, e koe e noho na i nga kapiti o te kamaka, e pupuri na i te wahi tiketike o te pukepuke: ahakoa hanga e koe tou ohanga kia rite ki to te ekara te tiketike, ka whakahokia iho koe e ahau i

reira, e ai ta Ihowa. <sup>17</sup> A ka meinga a Eroma hei miharotanga: ko nga tangata katoa e tika ana na

reira, ka miharo, ka hi mai ki ona whiunga katoa. <sup>18</sup> Ka rite ki te hurihanga o Horoma, o Komora, o nga pa hoki i tata ki reira, e ai ta Ihowa, e kore tetahi tangata e whai kainga ki reira, e kore hoki

tetahi tama a te tangata e noho ki reira. <sup>19</sup> Nana, ka rite ia ki te raiona e haere ake ana i te whakamanamana o Horano ki te nohoanga kaha: otiia ka meinga ohoreretia ai e ahau kia rere atu i a ia; a ko wai te mea e whiriwhiria e ahau ko ia hei rangatira mona? Ko wai hoki e rite ana ki aha

u? ko wai hei whakarite he wa moku? ko wai ano tenei hepara hei tu ki toku aroaro? <sup>20</sup> Mo reira whakarongo ki te tikanga a Ihowa kua whakatakotoria e ia mo Eroma; ki ona whakaaro hoki, kua whakaaroa e ia mo nga tangata o Temana: He pono ka toia atu ratou, ara nga mea ririki o te kahui;

he pono ka meinga e ia to ratou nohoanga, rat ou hoki kia ngaro. <sup>21</sup> Oho ana te whenua i te haruru

o to ratou hinganga: tera te hamama, rangona ana mai tona ngangau i te Moana Whero. <sup>22</sup> Nana, ka haere mai ia a ka rere ano he ekara, a ka roha atu ona parirau ki runga ki Potora: a ka rite te ngakau o nga marohirohi o Eroma i taua ra ki te ngakau o te wahine e whakamamae ana.

<sup>23</sup> Mo Ramahiku. Kua whakama a Hamata, raua ko Arapara; no te mea kua tae he rongo kino

ki a ratou, harotu kau ratou: tera te tangi kei te moana; kahore e marino. <sup>24</sup> Kua ngoikore a Ramahiku, kua anga ki te rere, mau pu hoki i te wehi: kua rokohanga hoki ia e te raru, e te mamae,

me te mea he wahine e whanau ana. <sup>25</sup> Taukiri e! kihai i mahue te pa e whakamoemititia ana, te

pa i koa ai ahau! <sup>26</sup> Heoi hinga ana ana taitama i ona waharoa, moti pu nga tangata whawhai katoa

i taua ra, e ai ta Ihowa o nga mano. <sup>27</sup> Na ka tahuna ano e ahau he ahi i roto i te taiepa o Ramahiku, a ka pau i reira nga whare kingi o Peneharara.

<sup>28</sup> Mo Kerara, mo nga kingitanga hoki o Hatoro i patua nei e Nepukareha kingi o Papurona. Ko te kupu tenei a Ihowa: Whakatika koutou, whakaekea a Kerara, pahuatia hoki nga tama o te

rawhiti. <sup>29</sup> Ka tangohia e ratou o ratou teneti, a ratou hipi; a ka mauria atu e ratou ma ratou o ratou kakahu arai, a ratou oko katoa, me a ratou kamera: a tera ratou e karanga ki a ratou, He wehi kei

<sup>30</sup>  
 nga taha katoa. E rere koutou, haere atu ki tawhiti, nohoia a roto riro, e nga tangata o Hatoro, e ai ta Ihowa; kua takoto hoki te tikanga a Nepukareha kingi o Papurona mo koutou, kua whakaaroa hoki e ia he whakaaro mo koutou. <sup>31</sup> Whakatika, whakaekia te iwi e noho ana i te rangimarie, e noho kore wehi na, e ai ta Ihowa; kahore na o ratou keti, kahore he tutaki, e noho takitahi ana. <sup>32</sup> A ka pahuatia a ratou kamera, a hei taonga parau hoki te tini o a ratou kararehe: a ka whakamararatia e ahau ki nga hau katoa te hunga i tapahia nga tapa o o ratou makawe; a ka takina mai e ahau te aitua mo ratou i nga taha katoa o ratou, e ai ta Ihowa. <sup>33</sup> A hei nohoanga a Hatoro mo nga kuri mohoa, hei ururua ake ake: e kore tetahi tangata e whai kainga ki reira, e kore ano hoki tetahi tama a te tangata e noho ki reira. <sup>34</sup> Ko te kupu a Ihowa i puta mai ki a Heremaia poropiti mo Erama i te timatanga o te kingitanga o Terekia kingi o Hura; i mea ia, <sup>35</sup> Ko te kupu tenei a Ihowa o nga mano: Nana, ka whatiia e ahau te kopere a Erama, te mea nui rawa o to ratou kaha. <sup>36</sup> A ka takina atu e ahau nga hau e wha i nga pito e wha o te rangi ki runga ki Erama, a ka titaritara atu ratou e ahau ki aua hau katoa; kahore hoki he iwi e kore te taea atu e te hunga o Erama ka peia atu nei. <sup>37</sup> A ka meinga e ahau a Erama kia wehi i te aroaro o ona hoariri, i te aroaro hoki o te hunga e whai ana kia whakamatea ratou: ka takina hoki e ahau he kino ki runga ki a ratou, ko toku riri e mura ana, e ai ta Ihowa; a ka unga e ahau te hoari ki m uri i a ratou, a kia poto ra ano ratou i ahau: <sup>38</sup> Na ka whakaturia e ahau toku torona ki Erama, a ka whakakahoretia atu to reira kingi, ratou ko nga rangatira, e ai ta Ihowa. <sup>39</sup> Otiia hei nga ra whakamutunga ka whakahokia e ahau a Erama i te whakarau, e ai ta Ihowa.

## Chapter 50

<sup>1</sup> Ko te kupu i korerotia e Ihowa mo Papurona, mo te whenua o nga Karari, i puaki i a Heremaia poropiti. <sup>2</sup> Kauwhautia i roto i nga tauwiwi, panuitia, a ka whakaara he kara; panuitia atu, kau e huna: mea atu, Kua horo a Papurona, kua whakama a Pere, kua pororaru a Meroraka; kua whakama ana whakapakoko, kua wehi ana whakaahua. <sup>3</sup> No te mea kei te haere mai he iwi ki a ia i te raki, mana e ururua ai tona whenua, e kore ano tetahi e noho ki reira: kua rere ratou, kua heke, te tangata, te kararehe. <sup>4</sup> I aua ra, i taua wa hoki, e ai ta Ihowa, ka haere mai nga tama a Iharaira, ratou tahi ko nga tama a Hura; ka haere ratou me te tangi haere, a ka rapu i a Ihowa, i to ratou Atua. <sup>5</sup> Tera ratou e ui mo Hiona, me te anga ano o ratou kanohi ki reira, me te ki, Haere mai koutou, ka hono

6  
i a koutou ki a Ihowa, i runga i te kawenata mau tonu, e kore e wareware. Ko taku iwi he hipi  
ngaro: na o ratou hepara ratou i kotiti ke ai, na ratou hoki ratou i tahuri ke ai i runga i nga maunga:

7  
kua haere atu ratou i te maunga ki te pukepuke, kua wareware ki to ratou takotoranga. Kua kainga  
ratou e he hunga katoa i kite i a ratou: a kua mea o ratou hoariri, Kahore o tatou he, kua hara nei  
hoki ratou ki a Ihowa, ki te nohoanga o te tika, ara ki a Ihowa, ki ta o ratou matua i tumanako ai.

8  
Rere atu i roto i Papurona, heke atu i te whenua o nga Karari, a kia rite ki nga koati toa i mua i  
nga kahui.

9  
No te mea, nana, ka whakaarahia e ahau, ka whakaekea hoki ki Papurona he huihuinga o nga  
iwi nunui no te whenua ki te raki: a ka takoto o ratou matua hei whawhai ki a ia; ka horo ia i reira:

10  
ka rite a ratou pere ki a te marohirohi mohio; e kore t etahi e hoki kau mai. A ka pahuatia a

11  
Karari: ka tatu nga ngakau o te hunga katoa e pahua ana i a ia, e ai ta Ihowa. No te mea e koa  
ana koutou, no te mea e whakamanamana ana koutou, e te hunga e pahua nei i toku kainga tupu,  
no te mea e takarokaro ana koutou, pera i te kau kua e takahi ana i te witi, e tangi ana pera i nga

12  
hoiho kaha; Ka nui rawa te whakama o to koutou whaea; matangerengere ana te wahine i whanau

13  
ai koutou: nana, ko ia hei muri rawa o nga iwi, hei koraha, hei whenua waikore, hei ururua. He  
riri no Ihowa e kore ai e nohoia, engari ka waiho hei ururua katoa a reira: ko nga tangata katoa e

14  
tika ana na Papurona ka miharo, ka hi ki ona whiunga katoa. Whakatakoto i o koutou matua hei  
whawhai ki Papurona, ki tetahi taha, ki tetahi taha, e te hunga whakapiko kopere katoa; kopere atu

15  
ki a ia, kua e kaiponuhia nga pere: kua hara hoki ia ki a Ihowa. Hamama ki a ia i tetahi taha, i  
tetahi taha: kua whakangawari ia i a ia: kua hinga ona parepare, kua oti ona taiepa te wahi iho: he  
rapunga utu hoki na Ihowa; rapua he utu i a ia; kia rite ki tana i mea ai ta koutou e mea ai ki a ia.

16  
Hatepea atu te kairui i roto i Papurona, me te kairahurahu o te toronaihi i te wa e kotia ai te witi.  
He wehi no ratou i te hoari tukino, ka tahuri ki tona iwi, ki tona iwi, rere ana ratou ki tona whenua,

17  
ki tona whenua. He hipi a Iharaira i marara atu; kua aia atu ia e nga raiona: i te tuatahi na te  
kingi o Ahiria ia i kai: i te whakamutunga na tenei Napukareha kingi o Papurona ona whenua i

18  
wahi. Mo reira ko te kupu tenei a Ihowa o nga mano, a te Atua o Iharaira: Nana, ka whiua e

19  
ahau te kingi o Papurona me tona whenua, ka pera me taku whiunga i te kingi o Ahiria. A ka  
whakahokia e ahau a Iharaira ki tona takanga, a ka kai ia ki runga ki Karamere, ki Pahana, ka

20  
makona hoki tona wairua ki runga ki nga pukepuke o Eparaima, ki Kireara. I aua ra, a i taua  
wa, e ai ta Ihowa, ka rapua te he o Iharaira, a kahore noa iho; nga hara hoki o Hura, a e kore e kitea:  
ka murua hoki e ahau te kino o te hunga ka whakatoea nei e ahau.

21 Haere atu ki te whenua o Merataimi, ki reira tatau ai, a ki nga tangata hoki o Pekoro: whakamotitia, whakangaromia rawatia, whaia ratou, e ai ta Ihowa, mahia hoki nga mea katoa i whakahaua e ahau ki a koe. 22 He ngangau no te whawhai kei te whenua, he whakangaromanga nui. 23 Tona poroporongarawatanga, wawahia ana te hama o te ao katoa! tona ururutanga o Papurona i roto i nga tauwiwi! 24 I whakatakotoria e ahau he mahanga mou, a kua mau koe, e Papurona, kihai hoki koe i mohio: kua kitea koe, kua hopukia hoki, mou i totohe ki a Ihowa. 25 Kua whakapuaretia e Ihowa tona whare taonga, kua whakaputaina mai e ia ki waho nga patu o tona riri: he mahi hoki ta te Ariki, ta Ihowa o nga mano, hei mahinga ki te whenua o nga Karari. 26 Haere mai ki a ia i te pito rawa ra ano, whakapuaretia ona toa: opehia ake hei puranga, whakangaromia rawatia: kua rawa he wahi ona e mahue. 27 Patua ana puru katoa; tukua ratou kia haere ki raro ki te patunga: aue, te mate mo ratou! kua tae mai hoki to ratou ra, te wa e whiua ai ratou. 28 Ko te reo o te hunga e rere ana, e mawhiti ana i te whenua o Papurona, hei korero ki te whenua o Hiona i te rapu utu a Ihowa, a to tatou Atua, i te rapu utu mo tona temepara. 29 Karangarangatia kia hui nga kaikopere ki te tatau ki Papurona, te hunga katoa e whakapiko ana i te kopere; whakapaea tena pa, karapoi noa; kua rawa tetahi ona e mawhiti; utua tana mahi; kia rite ki nga mea katoa i mea ai ia ta koutou e mea ai k i a ia: no te mea kua whakapehapeha ia ki a Ihowa, ki te Mea Tapu o Iharaira. 30 Mo reira ka hinga ana taitama ki ona huarahi, a ka whakamotitia ana tangata whawhai katoa i taua ra, e ai ta Ihowa. 31 Nana, hei hoariri ahau mou, e te mea whakakake, e ai ta te Ariki, ta Ihowa o nga mano: no te mea kua tae mai tou ra, te ra e whiua ai koe e ahau. 32 A ka tutuki nga waewae o te mea whakapehapeha, ka hinga, a kahore he kaiwhakaara mona: a ka ngiha i ahau he ahi ki roto ki ona pa, a ka pau i tera nga mea katoa i tetahi taha ona, i tetahi taha. 33 Ko te kupu tenei a Ihowa o nga mano: Kei te tukinotia ngatahitia nga tamariki a Iharaira, ratou ko nga tamariki a Hura: a kei te puritia ratou, mau rawa, e o ratou kaiwhakarau; e kore ratou e pai ki te tuku i a ratou. 34 He kaha to ratou kaihoko; ko Ihowa o nga mano tona ingoa: ka whakapaua e ia te tohe i ta ratou tohe, kia hoatu ai e ia he tanga manawa ki te whenua, a he ohooho ki nga tangata o Papurona. 35 Kei runga i nga Karari te hoari, e ai ta Ihowa, kei runga ano i nga tangata o Papurona, kei runga i ona rangatira, kei runga hoki i ona tangata whakaaro nui. 36 Kei runga te hoari i te hunga whakapehapeha, a ka wairangi ratou: he hoari kei runga i ana marohirohi, a ka pawera ratou. 37 Kei runga te hoari i o ratou hoiho, kei runga i o ratou hariata, kei runga hoki i nga whakauru katoa i roto i a ia, a ka rite ratou ki te wahine; kei runga te hoari i ona taonga, a ka

<sup>38</sup>  
 pahuatia. He mimiti kei runga i ona wai, a ka maroke: he whenua whakapakoko hoki ia, a e  
<sup>39</sup>  
 porangi ana ratou ki nga atua whakawehi. Mo reira ka nohoia a reira e nga kirehe mohao o te  
 koraha ratou ngatahi ko nga wuruhi, a ka noho ano hoki nga otereti ki reira; a e kore a reira e nohoia  
 a ake ake; kahore hoki e whai kainga a reira i tetahi whakatupuranga ki tetahi whakatupura nga.  
<sup>40</sup>  
 Ka rite ki ta te Atua hurihanga i Horoma, i Komora, i nga pa ano hoki e tata ana ki reira, e ai ta  
 Ihowa; ka pera te kore o te tangata e noho ki reira, e kore ano hoki tetahi tama a te tangata e whai  
<sup>41</sup>  
 kainga ki reira. Nana, kei te haere mai he iwi i te raki; a he iwi nui, he tokomaha hoki nga kingi  
<sup>42</sup>  
 e maranga mai i nga topito o te whenua. Ka rarau ratou ki te kopere, ki te tao; he iwi nanakia  
 ratou, e kore e tohu tangata; a parara ana to ratou reo pera i te haruru o te moana, kei runga hoiho  
 hoki e eke ana; rarangi rawa katoa, ano he tangata e mea ana ki te whawhai, hei tatau ki a koe, e te  
<sup>43</sup>  
 tamahine a Papurona. Kua rongu te kingi o Papurona i to ratou rongu, a kei te ngohe ona ringa:  
<sup>44</sup>  
 kua mau ia i te pawera, i te mamae hoki, me te mea he wahine e whanau ana. Nana, ka haere  
 ake ia ano he raiona i te ngawhatanga o Horoano ki te nohoanga kaha: otiia e kore e rokohanga  
 taku meatanga i a ratou kia rere atu i reira; a ko wai te mea e whiriwhiria kia whakaritea e ahau hei  
 rangatira mona? Ko wai oti e rite ana ki ahau? ko wai hoki hei whakarite wa mai ki ahau? ko wai  
<sup>45</sup>  
 hoki te hepara hei tu ki toku aroaro? Mo reira whakarongo ki te tikanga a Ihowa, kua  
 whakatakotoria e ia mo Papurona; ki ona whakaaro hoki i whakaaroa e ia mo te whenua o nga  
 Karari: He pono ka toia atu ratou e ratou, ara nga mea ririki o te kahui: he pono ka whakangaromia  
<sup>46</sup>  
 ratou ko o ratou nohoanga e ia. Ngateri ana te whenua i te haruru o te horonga o Papurona,  
 rangona ana te hamama i roto i nga iwi.

## Chapter 51

<sup>1</sup>  
 Ko te kupu tenei a Ihowa: Nana, ka whakaarahia e ahau he hau whakamoti mo Papurona, mo  
<sup>2</sup>  
 te hunga hoki e noho ana i Repekamai. Ka unga ano e ahau he kaititaritari ki Papurona, a ka titaria  
 e ratou; ka meinga tona whenua kia takoto kau: no te mea i te ra o te he ka tatau ratou ki a ia i tetahi  
<sup>3</sup>  
 taha, i tetahi taha. Kua te kiakopere e whakapiko i tana kopere, kua ano hoki ia e whakarewa  
 ake i a ia me te pukupuku ki runga i a ia: kua ana taitama e tohunga; whakangaromia rawatia e  
<sup>4</sup>  
 koutou tana ope katoa. Na ka hinga nga tupapaku ki te whenua o nga Karari, he mea wero ki ona  
<sup>5</sup>  
 ara. Kahore hoki a Iharaira i whakarerea, kahore ano hoki a Hura, e tona Atua, e Ihowa o nga  
<sup>6</sup>  
 mano; ahakoa kei te kapi to ratou whenua i te hara ki te Mea Tapu o Iharaira. Rere atu i roto o



Papurona, e kuhu he tangata i tona wairua i tona; kei hatepea atu koutou i roto i tona he; no te mea  
<sup>7</sup>  
ko te wa tenei o ta Ihowa rapu utu; ka rite tana utu ki a ia. He kapu koura a Papurona i roto i te  
ringa o Ihowa, nana i haurangi ai te whenua katoa: kua inumia tona waina e nga iwi; na reira ka  
<sup>8</sup>  
haurangi nga iwi. Inamata kua taka a Papurona, kua pakaru: e tangi ki a ia; e mau i te pama mo  
<sup>9</sup>  
tona mamae, me kore noa ia e taea te rongoa. Tera e rongoaia e matou a Papurona, heoi kihai ia  
i ora: whakarerea ia, ka haere tatou ki tona whenua, ki tona whenua; no te mea kua tutuki atu tona  
<sup>10</sup>  
whakawa ki te rangi, kua rewa ake ki nga kapua ra ano. Kua whakaputaina e Ihowa to tatou  
<sup>11</sup>  
tika: haere mai, kia korerotia e tatou te mahi a Ihowa, a to tatou Atua ki Hiona. Whakakoia nga  
pere; puritia nga whakangungu rakau, kia mau: kua whakaohongia e Ihowa te wairua o nga kingi  
o nga Meri; he tikanga hoki tana mo Papurona kia whakangaromia; no te mea he rapunga utu tenei  
<sup>12</sup>  
na Ihowa, he rapunga utu mo tona temepara. Whakaarahia he kara ki nga taiepa o Papurona,  
whakakahangia nga kaitiaki, whakaritea nga kaitiaki, whakatakotoria nga pehipehi: kua takoto hoki  
<sup>13</sup>  
i a Ihowa, kua oti ano i a ia tana i korero ai mo nga tangata o Papurona. E te wahine e noho na  
i runga i nga wai maha, he maha nei ou taonga, kua tae mai tou whakamutunga, te ruri mo tou apo  
<sup>14</sup>  
taonga. Kua oatitia e Ihowa o nga mano tona oranga, kua mea, He pono ka whakakiiia koe e  
<sup>15</sup>  
ahau ki te tangata, kei te huhu te rite; a ka hamama ratou ki a koe. Nana i hanga te whenua, na  
tona kaha; ko te ao nana i whakapumau, na ona whakaaro nui; ko nga rangi na tona matauranga i  
<sup>16</sup>  
hora. Kia puaki tona reo, ka haruru nga wai i nga rangi, ka meinga e ia nga kohu kia piki ake i  
nga pito o te whenua; e hanga ana e ia nga uira me te ua, e whakaputaina mai ana te hau i roto i  
<sup>17</sup>  
ona whare taonga. Ka poauau katoa te tangata, ka kore he mohio; whakama iho nga kaiwhakarewa  
koura katoa i tana whakapakoko: he mea teka hoki tana i whakarewa ai, kahore he manawa i roto  
<sup>18</sup>  
i a ratou. He horihori kau ratou, he mea pohehe: ka ngaro ratou i te wa e tiroirohia ai ratou.  
<sup>19</sup>  
Kahore e rite ki era te wahi i a Hakopa: ko ia hoki te kaiwhakaahua o nga mea katoa; a ko Iharaira  
<sup>20</sup>  
te iwi o tona kainga tupu: ko Ihowa o nga mano tona ingoa. Ko koe taku toki poutangata, ko  
aku patu mo te whawhai: hei wawahi koe maku mo nga iwi, hei whakamoti maku mo nga kingitanga;  
<sup>21</sup>  
Hei wawahi ano koe maku mo te hoiho raua ko tona kaieke: hei wawahi koe maku mo te hariata,  
<sup>22</sup>  
mo te tangata ano i runga; Hei wawahi koe maku mo te tangata, mo te wahine; hei wawahi koe  
maku mo te koroheke, mo te tamariki; hei wawahi koe maku mo te taitama, mo te taitamahine;  
<sup>23</sup>  
Hei wawahi koe maku mo te hepara, mo tana kahui; hei wawahi koe maku mo te kaiparau, mo  
<sup>24</sup>  
ana kau hoki kua oti te ioka; hei wawahi koe maku mo nga rangatira, mo nga ariki. Ka utua hoki

e ahau a Papurona, me nga tangata katoa o Karari mo ta ratou kino katoa i mea ai ratou ki Hiona i  
<sup>25</sup>  
ta koutou tirohanga, e ai ta Ihowa. Nana, hei hoariri ahau mou, e te maunga whakamoti, e ai ta  
Ihowa, e huna na koe i te whenua katoa: a ka totoro atu toku ringa ki a koe, ka hurihia iho koe i  
<sup>26</sup>  
runga i nga toka, a ka meinga koe hei maunga kua oti te tahu. A e kore tetahi kohatu e tangohia  
mai e ratou i a koe mo te kokonga, tetahi kohatu ranei mo nga turanga; engari ka ururua koe a ake  
<sup>27</sup>  
ake, e ai ta Ihowa. Whakaarahia e koe he kara ki te whenua, whakatangihia te tetere i roto i nga  
iwi, kia rite mai nga iwi hei whawhai ki a ia, karangarangatia hei whawhai ki a ia nga kingitanga  
o Ararata, o Mini, o Ahakenaha: whakaritea he rangatira hei mea ki a i a; meinga nga hoiho kia  
<sup>28</sup>  
kokiri ake ano he tatarakihi puhuruhuru. Kia rite mai nga iwi, nga kingi o nga Meri, o ratou  
<sup>29</sup>  
rangatira, o ratou ariki, me te whenua katoa ano o tona kingitanga hei whawhai ki a ia. Na kei  
te wiri te whenua, kei te mamae: no te mea kei te tu tonu nga whakaaro katoa o Ihowa mo Papurona,  
<sup>30</sup>  
kia meinga te whenua o Papurona hei ururua, te ai he tangata. Kua kahore nga marohirohi o  
Papurona e whawhai, kei te noho ratou i roto i o ratou wahi kaha; kua kore to ratou kaha; kua rite  
<sup>31</sup>  
ratou ki te wahine: kua wera ona nohoanga; kua whati ona tutaki. Ka rere tetahi kaikorero kia  
tutaki ki tetahi, tetahi karere hoki kia tutaki ki tetahi, hei whakaatu ki te kingi o Papurona kua horo  
<sup>32</sup>  
tona pa i nga taha katoa: Kua riro ano nga whitinga, kua wera nga kakaho i te ahi, a kua matakū  
<sup>33</sup>  
nga tangata whawhai. Ko te kupu hoki tenei a Ihowa o nga mano, a te Atua o Iharaira: Ko te  
rite i te tamahine a Papurona kei te patunga witi i te wa e takahia ai; he wa iti ake, ka tae ki te wa  
<sup>34</sup>  
o tona kotinga. Kua pau ahau i a Nepukareha kingi o Papurona, kua pepe ahau i a ia, kua meinga  
ahau e ia hei oko tahanga, kua horomia ahau e ia ano na te tarakona, whakakia ana hoki e ia tona  
<sup>35</sup>  
kopu ki aku kia reka; kua maka ahau e ia ki waho. Hei runga i Papurona te tukinotanga ki ahau,  
ki oku kikokiko hoki, e ai ta te wahine o Hiona; a hei runga i nga tangata o Karari oku toto, e ai ta  
<sup>36</sup>  
Hiruharama. Mo reira ko te kupu tenei a Ihowa, Nana, ka tohe ahau i tau tohe, a ka rapu ahau i  
<sup>37</sup>  
nga utu mou; a ka mimiti i ahau tona moana, ka maroke hoki ona puna. A ka waiho a Papurona  
hei puranga, hei nohoanga mo nga kirehe mohoa, hei miharotanga, hei whakahianga atu, te ai te  
<sup>38</sup>  
tangata. Ka hamama ngatahi ratou, ano he raiona; ka ngangara ratou ano he kua raiona. Kia  
<sup>39</sup>  
werawera ratou, ka taka e ahau he hakari ma ratou, a ka whakahaurangitia ratou e ahau, kia  
<sup>40</sup>  
whakamanamana ai ratou, kia moe ai i te moe roa, te korikori, e ai ta Ihowa. Ka riro ratou i ahau  
<sup>41</sup>  
ki raro, ano he reme ki te patunga; ano he hipi toa i huihuia atu ki nga koati toa. Taukiri e, kua  
horo a Hehaka! kua huakina tatatia te whakamoemiti a te whenua katoa. Taukiri e kua waiho a  
<sup>42</sup>  
Papurona hei ururua i roto i nga iwi! Kua tae ake te moana ki Papurona; kua taupokina ia e ona

<sup>43</sup>  
 ngaru maha. Kua moti ona pa, he whenua waikore, he ururua, e kore e nohoia e tetahi tangata,  
 e kore hoki tetahi tama a te tangata e tika na reira. <sup>44</sup> Ka whiua hoki e ahau a Pere i Papurona, ka  
 whakaputaina mai e ahau i roto i tona mangai te mea i horomia e ia; e kore ano nga iwi e rere a wai  
 mai ki a ia a mua; ae ra, ka hinga ano te taiepa o Papurona. <sup>45</sup> E taku iwi, puta atu i roto i a ia,  
 kahaki koutou i a koutou, i tera, i tera, i te mura o to Ihowa riri. <sup>46</sup> Kei hopi o koutou ngakau, kei  
 wehi hoki koutou ki te rongo meake nei rangona ki te whenua; no te mea ka tae mai he rongo i  
 tetahi tau, a i muri i tena i tetahi atu tau ka tae mai ano he rongo, he tukino ki te whenua, he rangatira  
 e whakatika ana ki te rangatira. <sup>47</sup> Mo reira, nana, kei te haere mai nga ra e whiua ai e ahau nga  
 whakapakoko o Papurona, a ka whakama tona whenua katoa; a ka hinga ona tupapaku i roto i a ia.  
<sup>48</sup>  
 Na katahi ka waiata te rangi me te whenua, me nga mea katoa i reira ki Papurona, he hari hoki;  
<sup>49</sup>  
 no te mea ka haere mai nga kaipahua ki a ia i te raki, e ai ta Ihowa. I te mea na Papurona i mea  
 nga tupapaku o Iharaira kia hinga, waihoki ka hinga ki Papurona nga tupapaku o te whenua katoa.  
<sup>50</sup>  
 E koutou kua mawhiti atu na i te hoari, haere koutou, kua e tu noa; mahara ki a Ihowa i tawhiti,  
 tukua mai hoki a Hiruharama ki roto ki o koutou ngakau. <sup>51</sup> Whakama ana matou, mo matou i  
 rongo i te tawai; kua taupokina o matou mata e te porohurahu: kua tae mai hoki nga tautangata ki  
 nga wahi tapu o te whare o Ihowa. <sup>52</sup> Mo reira, nana, kei te haere mai nga ra, e ai ta Ihowa, e whiua  
 ai e ahau ana whakapakoko; a tera e ngunguru te hunga i werohia a puta noa i tona whenua katoa.  
<sup>53</sup>  
 Ahakoa i kake atu a Papurona ki runga ki te rangi, ahakoa i hanga e ia tona wahi tiketike kaha  
<sup>54</sup>  
 kia kaha rawa, e tae atu ano i ahau nga kaipahua ki a ia, e ai ta Ihowa. He reo te hamama mai  
 nei i Papurona, he wawahanga nui kei te whenua o nga Karari! <sup>55</sup> No te mea kei te pahua a Ihowa  
 i Papurona, a kei te whakakore atu i te reo nui i roto i a ia; a ka haruru o ratou ngaru ano ko nga  
 wai maha, ka puta te tuki o to ratou reo: <sup>56</sup> Kua tae mai hoki te kaipahua ki a ia, ki Papurona, kua  
 mau hoki ona marohirohi, kua mongamonga a ratou pere: no te mea he Atua a Ihowa no te whakahoki  
 utu, a he pono ka tino takoto tana utu. <sup>57</sup> Na ka whakahaurangitia e ahau ona rangatira, ona tangata  
 whakaaro nui, ona kawana, ona ariki, ona marohirohi hoki; a ka moe ratou i te moe roa, te korikori,  
<sup>58</sup>  
 e ai ta te Kingi, ko tona ingoa nei ko Ihowa o nga mano. Ko te kupu tenei a Ihowa o nga mano:  
 Ka pakaru rawa nga taiepa wharahi o Papurona, a ka wera ona kuwaha tiketike i te ahi; a ka mauuiui  
 nga iwi mo te kore noa iho, nga iwi hoki mo te ahi; a ruha noa ratou.  
<sup>59</sup>  
 Ko te kupu i whakahaua e Heremaia poropiti ki a Heraia tama a Neria tama a Maaheia i to  
 raua haerenga tahitanga atu ko Terekia kingi o Hura ki Papurona i te wha o nga tau o tona kingitanga.

Na ko Heraia te tino rangatira o te whare kingi. <sup>60</sup> Na tuhituhia iho e Heremaia ki te pukapuka te kino katoa meake puta ki Papurona, ara enei kupu katoa kua tuhituhia nei mo Papurona. <sup>61</sup> A i mea a Heremaia ki a Heraia, E tae koe ki Papurona, me tino korero e koe enei kupu katoa, <sup>62</sup> A ka mea, E Ihowa, kua korerotia e koe tenei wahi kia hatepea atu, kia kua hoki tetahi e noho ki konei, tangata ranei, kararehe ranei, engari kia waiho tonu hei ururua ake ake. <sup>63</sup> Na, ka mutu tau korero i tenei pukapuka, herea e koe ki reira tetahi kohatu, ka maka atu ai ki waenganui o Uparati: <sup>64</sup> A ka mea atu koe, Ka penei te totohutanga o Papurona, e kore hoki e puea ake ano, i te kino e takina mai e ahau ki runga ki a ia: a ka ruha ratou. I mutu ki konei nga kupu a Heremaia.

## Chapter 52

<sup>1</sup> E rua tekau ma tahi nga tau o Terekia i a ia i kingi ai; a kotahi tekau ma tahi nga tau i kingi ai ia ki Hiruharama: a ko te ingoa o tona whaea ko Hamutara, he tamahine na Heremaia o Ripina.

<sup>2</sup> A i kino tana mahi ki te titiro a Ihowa, i rite ki nga mea katoa i mea ai a Iehoiakimi. <sup>3</sup> Na reira i a Ihowa ka riri nei, ka puta mai te aitua ki Hiruharama, ki a Hura, a maka noatia atu ratou i tona aroaro; a i whakakeke a Terekia ki te kingi o Papurona. <sup>4</sup> Na i te iwa o nga tau o tona kingitanga, i te tekau o nga marama, i te tekau o nga ra o te marama, ka tae mai a Nepukareha kingi o Papurona, a ia me tana ope katoa ki Hiruharama, a whakapaea ana e ia; a hanga ana e ratou etahi taumaihi a taka noa, hei whawhai atu ki reira. <sup>5</sup> Heoi ka whakapaea te pa a tae noa ki te tekau ma tahi o nga tau o Kingi Terekia. <sup>6</sup> I te wha o nga marama, i te iwa o nga ra o te marama, ka tino nui te matekai o te pa, na kahore he taro ma nga tangata o te whenua. <sup>7</sup> Katahi ka pakaru te pa, rere ana nga tangata whawhai katoa, puta ana i roto i te pa i te po, na te ara o te kuwaha i waenganui o nga taiepa e rua, na tera i te kari a te kingi, i karapotia hoki te pa e nga Karari; a haere ana ratou na te ara o te Arapa.

<sup>8</sup> Otiia i whaia te kingi e te ope o nga Karari, a hopukia ana a Terekia ki nga mania i Heriko; a i marara noa atu tana ope katoa i tona taha. <sup>9</sup> Na ka mau ratou ki te kingi, a kawea ana ki te kingi o Papurona, ki Ripira i te whenua o Hamata; a whakaputaia ana e ia te whakawa mona. <sup>10</sup> Na tukitukia ana e te kingi o Papurona nga tama a Terekia i tana tirohanga: i tukitukia ano e ia nga rangatira katoa o Hura ki Ripira. <sup>11</sup> Na tikarohia ana e ia nga kanohi o Terekia; a herea ana ia e te kingi o Papurona ki te mekameka, kawea ana ki Papurona, maka ana ki te whare herehere, a taea noatia te ra i mate ai ia.

12

Na i te rima o nga marama, i te tekau o nga ra o te marama, ko te tekau ma iwa hoki ia o nga tau o Kingi Nepukareha kingi o Papurona, ka haere mai a Neputaraarana rangatira o nga kaitiaki,

13

he tangata tu i te aroaro o te kingi o Papurona, ki Hiru harama. Na tahuna ake e ia te whare o Ihowa, me te whare o te kingi; a tahuna ana e ia ki te ahi nga whare katoa o Hiruharama, nga whare

14

katoa hoki o te hunga nunui. Na ka wawahia e te ope katoa o nga Karari, e ta te rangatira o nga

15

kaitiaki, nga taiepa katoa o Hiruharama a whawhe noa. Katahi ka whakahekea atu e Neputaraarana rangatira o nga kaitiaki etahi o nga tino rawakore o te iwi, me era atu ano o te iwi i mahue ki te pa, me te iwi i papahoro atu, i taka atu ki te kingi o Papurona, me nga morehu ano o taua huihui.

16

Engari i waiho e Neputaraarana rangatira o nga kaitiaki etahi o nga tino rawakore o te whenua

17

hei kaimahi waina, hei paruaruru. Na, ko nga pou parahi i te whare o Ihowa, ko nga turanga me te moana parahi i te whare o Ihowa, wawahia ana e nga Karari, a maua atu ana e ratou te parahi

18

katoa o aua mea ki Papurona. I maua atu ano e ratou nga pata, nga koko pungarehu, nga kutikuti

19

rama, nga peihana, nga koko, me nga oko parahi katoa mo a ratou mahi tapu. Ko nga kapu, ko nga paepae ngarahu, ko nga peihana, ko nga pata, ko nga turanga rama, ko nga koko, ko nga oko; ko nga mea i hanga ki te koura, he koura, ko nga mea i hanga ki te hiriwa, he hiriwa, i maua katoatia

20

atu e te rangatira o nga kaitiak i. Na ko nga pou e rua, ko te moana kotahi, ko nga puru parahi kotahi tekau ma rua i raro i nga turanga, i hanga nei e Kingi Horomona mo te whare o Ihowa: kahore

21

he paunatanga o te parahi o enei oko katoa. Na ko nga pou, kotahi tekau ma waru whatianga te tiketike o te pou kotahi; tekau ma rua hoki nga whatianga o te aho hei pae mona; na, ko te matotoru,

22

e wha nga ringa: he tuwhera a roto. A ko te whakapaipai o runga he parahi; ko te tiketike o te whakapaipai kotahi, e rima nga whatianga, he parahi katoa te mea i whiria me nga pamekaranete i tetahi taha o te whakapaipai, i tetahi taha. Rite tonu hoki ki enei o te rua o nga pou, me nga

23

pamekaranete ano. Na e iwa tekau ma ono nga pamekaranete o nga taha; a ko nga pamekaranete katoa i te mea i whiria, kotahi te rau, a whawhe noa.

24

Na tangohia ana e te rangatira o nga kaitiaki a Heraia, te tino tohunga, me te tohunga tuarua,

25

me Tepania, me nga kaitiaki tokotoru o te kuwaha: I tangohia hoki e ia i roto i te pa tetahi rangatira o nga tangata whawhai, tokowhitu hoki no te aroaro pu ake o te kingi, he hunga i rokohanga ki roto ki te pa; me te kaituhituhi a te rangatira ope, ko ia nei te kaihuihui i nga tangata o te whe nua; e ono tekau hoki nga tangata o te iwi o te whenua, he hunga i rokohanga e ia ki roto ki te pa.

26

Na ka mau a Neputaraarana rangatira o nga kaitiaki ki a ratou, kawea ana ki te kingi o Papurona

27

ki Ripira. Na patua iho ratou e te kingi o Papurona, whakamatea iho ki Ripira, ki te whenua o

28  
Hamata. Heoi whakahekea atu ana a Hura i tona oneone. Ko te hunga tenei i whakaraua atu e  
29  
Nepukareha: i te whitu o nga tau e toru mano e rua tekau ma toru nga Hurai: I te tekau ma waru  
o nga tau o Nepukareha, e waru rau e toru tekau ma rua nga tangata i whakaraua atu e ia i  
30  
Hiruharama: I te rua tekau ma toru o nga tau o Nepukareha, e whitu rau e wha tekau ma rima  
nga tangata o nga Hurai i whakaraua atu e Neputaraarana, e te rangatira o nga kaitiaki: ko aua  
tangata katoa e wha mano e ono rau.  
31  
Na i te toru tekau ma whitu o nga tau o te whakahekenga atu o Iehoiakini kingi o Hura, i te  
tekau ma rau o nga marama, i te rua tekau ma rima o nga ra o te marama, ka whakaarahia e Ewiri  
Meroraka kingi o Papurona, i te tau tuatahi i kingi ai ia, te mahunga o Iehoiakini kingi o Hura,  
32  
whakaputaina ana ia e ia i roto i te whare herehere; A korero pai ana ia ki a ia, nekehia ake ana  
33  
e ia tona torona ki runga ake i te torona o nga kingi i tona taha i Papurona. Kakahuria ana e ia  
he kakahu ke i ona kakahu o te herehere, a kai taro ana ia i tona aroaro i nga ra katoa i ora ai ia.  
34  
Na, ko tana kai he kai i homai tonu e te kingi o Papurona mana, he mea mo tenei ra, mo tenei  
ra, a taea noatia te ra o tona matenga, i nga ra katoa i ora ai ia.

## Lamentations

### Chapter 1

1  
Taukiri e! noho mokemoke ana te pa i ki nei i te tangata! Ano tona rite he pouaru! kua waiho  
2  
hei hoatu takoha te mea i nui nei i roto i nga iwi, te rangatira i roto i nga kawanatanga! Nui atu  
tana tangi i te po, a kei ona paparinga ona roimata: i roto i te hunga katoa i aroha ki a ia, kahore he  
3  
kaiwhakamarie mona; kua tinihanga ona hoa ki a ia, kua meinga ratou hei hoariri mona. Kua  
haere a Hura ki te whakarau, he tangi hoki, he whakamahinga nui; kei te noho ia i roto i nga tauwiwi,  
kahore e kitea e ia he tanga manawa: kua hopukia ia e ona kaiwhai katoa i roto i nga wahi kuiti.  
4  
Kei te tangi nga ara o Hiona, no te mea kahore he tangata e haere mai ana ki te huihuinga nui; kua  
ururuatia ona kuwaha katoa, e aue ana ana tohunga, ko ana wahine kei te pouri, a ko ia, kei roto ia  
5  
i te mamae. Kua waiho ona hoariri hei upoko, kei te noho humarie ona hoa whawhai; no te mea  
6  
kua whiua ia e Ihowa mo ona he maha: kua riro ana tamariki hei parau i te aroaro o te hoariri. Kua  
wehe atu i te tamahine a Hiona tona nui katoa: kua rite ona rangatira ki nga hata kihai i pono ki te

wahi kai, haere kahakore ana ratou i te aroaro o te kaiwhai. <sup>7</sup> E mahara ana a Hiruharama i nga ra  
 o tona tangi, o ona wherutanga, ki ana mea ahuaireka katoa o nga ra o mua: i te takanga o tona iwi  
 ki roto ki te ringa o te hoariri, a kahore he kaiawhina mona, ka kite nga hoariri i a ia, ka kata ki ona  
<sup>8</sup>  
 mutunga. Nui atu te hara o Hiruharama; na reira ia i meinga ai, ano hei mea poke: ko te hunga  
 katoa i whakahonore i a ia, whakahawe ana ki a ia, no te mea kua kite ratou i tona tahangatanga:  
<sup>9</sup>  
 ae ra, kei te aue ia, kei te hoki ki muri. Kei ona kurupatu tona poke, kahore ona mahara ki tona  
 whakamutunga; na reira he hanga whakamiharo tona tukunga iho ki raro: kahore he kaiwhakamarie  
<sup>10</sup>  
 mona: e Ihowa, titiro mai ki toku mate: kua whakahirahira hoki te hoariri i a ia. Kua wherahia  
 atu te ringa o te hoariri ki runga ki ana mea ahuaireka katoa; kua kite nei ia i nga iwi e tomo mai  
<sup>11</sup>  
 ana ki tona wahi tapu, era i ako ra koe kia kua ratou e uru ki tau whakaminenga. Kei te aue  
 tona iwi katoa; kei te rapu taro ratou: e hoatu ana e ratou a ratou mea ahuaireka hei utu kai, hei  
 whakahauora ake mo te wairua: titiro mai, e Ihowa, whakaaro mai, kua whakahouhou hoki ahau.  
<sup>12</sup>  
 He kahore noa iho tenei ki a koutou, e koutou e haere nei i te ara? Whakaaro mai, titiro mai,  
 e rite ana ranei tetahi mamae ki toku mamae, e mahia nei moku, ki ta Ihowa nei whiu moku i te ra  
<sup>13</sup>  
 i mura ai tona riri? Kua tukua iho nei e ia i runga, he ahi ki oku wheua, a e wera ana i tera: kua  
 horahia e ia he kupenga mo oku waewae, kua whakahokia ahau ki muri; kua tukua ahau e ia ki te  
<sup>14</sup>  
 kahore, ki te whakaruhi, a pau noa te ra. Ko te ioka o oku he herea iho e tona ringa, whiri rawa,  
 kua eke ake ki runga ki toku kaki: kua he i a ia toku kaha, kua tukua ahau e te Ariki ki te ringa  
<sup>15</sup>  
 tangata, a kahore oku kaha ki te whakatika ake. Kua kore noa iho i te Ariki oku marohirohi katoa  
 i roto i ahau; kua karangatia e ia he huihui ki ahau hei wawahi i aku taitama: kua takatakahia e te  
<sup>16</sup>  
 Ariki te tamahine wahine a Hura, ano he takahanga waina. Na enei mea ahau i tangi ai: ko toku  
 kanohi, tarere ana te wai o toku kanohi: no te mea kei tawhiti atu i ahau te kaiwhakamarie hei  
 whakahauora ake i toku wairua: ko aku tamariki kei te noho kau noa iho, no te mea kua kaha te  
<sup>17</sup>  
 hoariri. Kua wherahia e Hiona ona ringa; kahore he kaiwhakamarie mona; na Ihowa te whakahau  
 mo Hakopa, hei hoariri mona te hunga e karapoti ana i a ia: kua rite a Hiruharama i roto i a ratou  
<sup>18</sup>  
 ki te wahine e paheke ana. He tika hoki a Ihowa; i whakakeke hoki ahau ki tana kupu: tena  
 whakarongo mai, e nga iwi katoa, titiro mai hoki ki toku mamae; kua riro aku wahine, aku taitama,  
<sup>19</sup>  
 i te whakarau. I karanga ahau ki te hunga i aroha ki ahau, heoi kei te tinihanga ki ahau; ko oku  
 tohunga, ko oku kaumatua, hemo noa iho ratou i roto i te pa, i a ratou e rapu kai ana ma ratou hei  
<sup>20</sup>  
 whakahauora ake i o ratou wairua. Titiro mai, e Ihowa, he mamae hoki toku, e ohooho ana oku  
 whekau; ko toku ngakau hurikiko ana i roto i ahau: he nui noa atu hoki toku whakakeke: i waho  
<sup>21</sup>  
 ko te hoari ki te whakamoti, i roto kei te mate te rite. Kua rongo ratou kei te aue ahau, te ai he  
 kaiwhakamarie moku: kua rongo oku hoariri katoa ki toku matenga, koa ana ratou ki tau i mea ai:

22

ka kawea mai e koe te ra i karangatia e koe, a ka rite ratou ki ahau. Kia tae to ratou kino katoa ki tou aroaro: meatia ano ki a ratou tau i mea mai ai ki ahau mo oku he katoa: ka maha nei hoki oku auetanga; ko toku ngakau whakaruhi rawa.

## Chapter 2

1 Taukiri e! te taupokinga a Ihowa i te tamahine a Hiona ki te kapua, i a ia e riri ana! kua maka iho e ia te ataahua o Iharaira i runga i te rangi ki te whenua; kihai ano i mahara ki tona turanga

2 waewae i te ra i riri ai ia. Kua horomia e te Ariki nga nohoanga katoa o Hakopa, kihai i tohungia: i a ia i riri ra, wahia iho e ia nga pa kaha o te tamahine a Hura; tae tonu ki te whenua: poke iho i a

3 ia te kingitanga me ona rangatira. Poutoa katoatia atu ana e ia te hoana o Iharaira i tona riri e mura ana; whakahokia mai ana e ia ki muri tona ringa matau i te aroaro o te hoariri; ngiha mai ana

4 ia ki a Hakopa, ano he mura ahi e kai ana i tetahi taha, i tetahi taha. Kua piko i a ia tana kopere, koia ano kei ta te hoariri; ko tona ringa matau i a ia i tu ra, rite tonu ki to te hoa whawhai, tukitukia ana e ia te hunga katoa i ahuaireka mai ki te titiro atu: i roto i te tapenakara o te tamahine a Hiona,

5 ano he a hi tona riri e ringihia mai ana e ia. Kua rite te Ariki ki te hoariri, kua horomia e ia a Iharaira; kua horomia e ia ona whare kingi katoa, kua whakamotitia e ia ona pa taiepa: a kua

6 whakanuia e ia te tangi me te aue o te tamahine a Hura. Kua takiritia e ia tona tihokahoka, ano no te kari: moti iho i a ia tona wahi whakaminenga: kua meinga e Ihowa te huihui nui me te hapati kia warewaretia i roto i Hiona, whakahaweatia iho e ia te kingi raua ko te tohunga i tona riri e

7 aritarita a na. Kua panga atu e te Ariki tana aata, kua weriweri ia ki tona wahi tapu, tukua atu ana e ia nga taiepa o o reira whare kingi ki roto ki te ringa o te hoariri; kua hamama ratou i roto i te

8 whare o Ihowa, me te mea ko te ra o te hakari nui. He whakaaro to Ihowa mo te whakamoti i te taiepa o te tamahine a Hiona; kua oti te aho te whakamaro atu e ia, kahore ano tona ringa i pepeke, whakangaro tonu ia; na reira tangi ana i a ia te pekerangi me te taiepa; raua ngatahi, ngohe kua.

9 Kua totohu ona keti ki roto ki te whenua; kua kore i a ia, kua whati hoki ona tutaki; kei roto tona kingi me ona rangatira i nga tauwiwi, kahore nei o reira ture; ae ra, kahore ana poropiti e whiwhi ki te kite na Ihowa.

10 Kei runga i te whenua nga kaumatua o te tamahine a Hiona e noho ana, whakarongo kau ana: opehia ake e ratou he puehu ki runga ki o ratou mahunga; whitiki rawa te kakahu taratara; ko

11 nga wahine o Hiruharama, tuohu tonu o ratou mahunga ki te whenua. Matawaia rawa oku kanohi i te roimata, e ohooho ana oku whekau, kua maringi toku ate ki runga ki te whenua, he meatanga ki te wawahanga o te tamahine a toku iwi; no te mea hemo ana nga kohungahunga me nga mea



12  
 ngote u i nga huarahi o te pa. Kei te ki atu ratou ki o ratou whaea, Kei hea he witi, he waina? I  
 a ratou e hemo ana, e pera ana me te hunga kua patua ki nga huarahi o te pa, e maringi ana o ratou  
 13  
 wairua ki nga uma o o ratou whaea. Ko te aha taku hei whakaatu ki a koe? ko te aha e waiho e  
 ahau hei ahua mou, e te tamahine a Hiruharama? Ko wai e waiho e ahau hei rite ki a koe, e  
 whakamarie ai ahau i a koe, e te tamahine wahine a Hiona? He nui hoki tou pakaru, koia ano kei  
 14  
 te moana; ko wai hei rongoa i a koe? Ko nga mea i kitea e ou poropiti mou, he teka, he mea  
 horihori; kihai ano i hurahia e ratou tou he, e hoki ai koe i te whakarau; heoi ano ta ratou i kite ai  
 15  
 mou he poropititanga wairangi, he mea hei pana atu i a koe. Kei te papaki ringa ki a koe te hunga  
 katoa e tika ana i te ara, e hi ana, ruru ana o ratou mahunga ki te tamahine a Hiruharama; ko ta  
 ratou kupu, Ko te pa ianei tenei i korerotia nei, Ko te tino o te ataahua, Ko te whakahari o te whenua  
 16  
 katoa? Hamama tonu ki a koe nga mangai o ou hoariri katoa; e hi ana, tete ana o ratou niho: e  
 mea ana, Kua horomia ia e tatou: ko te rangi pu ano tenei i taria atu e tatou, kua tupono mai ki a  
 17  
 tatou, kua kitea e tatou. Kua oti i a Ihowa tana i whakaaro ai; kua whakaritea tana kupu i  
 whakahaua e ia i nga ra o mua: wahia iho e ia, kihai hoki i tohungia; kua meinga e ia te hoariri kia  
 18  
 koa ki a koe, kua ara i a ia te haona o ou hoariri. I karanga o ratou ngakau ki te Ariki, E te taiepa  
 o te tamahine a Hiona, kia rere iho nga roimata ano he awa, i te ao, i te po: kei whakata koe, kei  
 19  
 mutu ta te whatu o tou kanohi. Maranga, hamama i te po, i te timatanga o nga mataaratanga:  
 ringihia atu tou ngakau ano he wai ki to te Ariki aroaro; kia ara ake ou ringa ki a ia, kia ora ai au  
 20  
 kohungahunga e hemo nei i te kai i te ahunga mai o nga huarahi katoa. Titiro mai, e Ihowa,  
 whakaaroa ko wai i peneitia e koe! E kai ranei nga wahine i o ratou hua, i nga kohungahunga e  
 21  
 hikihikitia ana? Kia patua koia te tohunga me te poropiti ki te wahi tapu o te Ariki? Kei te takoto  
 te taitama raua ko te koroheke i runga i te whenua i nga huarahi; kua hinga aku wahine, aku  
 taitamariki, i te hoari; he mea whakamate nau i te ra i riri ai koe; tukitukia ana e koe, kihai hoki i  
 22  
 tohungia. Kua karanga koe ki oku whakawehi i nga taha katoa, pera i te ra o te huihuinga nui,  
 a kahore tetahi i mawhiti, i mahue ranei i te ra i riri ai a Ihowa: ko aku i hikihiki ai, i whakatuputupu  
 ai, poto ake i toku hoariri.

### Chapter 3

1  
 Ko ahau te tangata kua kite i te pouri, he mea na te rakau o tona riri. 2  
 I arahina e ia, i meinga  
 3  
 kia haere i te pouri, kahore i te marama. He pono kua tahuri mai ia ki ahau, kua anga mai tona

ringa ki ahau, a pau noa te ra. <sup>4</sup> Kua meinga nei e ia oku kikokiko me toku kiri kia rite ki o te  
 koroheke, mangungu kau i a ia oku wheua. <sup>5</sup> Kua hanga e ia he patu moku; karapotia ana ahau ki  
 te wai kawa, ki te raruraru. <sup>6</sup> Kua meinga ahau e ia kia noho ki nga wahi pouri, kia pera me te  
 hunga kua mate noa ake. <sup>7</sup> Kua oti ahau te taiepa mai e ia, te puta atu ahau; kua meinga e ia toku  
 mekameka kia taimaha. <sup>8</sup> Ae ra, i ahau e karanga ana, e hamama ana kia awhinatia, ka araia mai  
 e ia taku inoi. <sup>9</sup> Kua oti ano oku ara te taiepa mai e ia ki te kohatu tarai, whakakopikopikoa ake e  
 ia oku ara. <sup>10</sup> Ko tona rite ki ahau kei te pea e whanga ana, kei te raiona i nga wahi ngaro.  
<sup>11</sup> Whakangaua ketia ana e ia oku ara, haehaea putia iho ahau; meinga ana ahau e ia kia noho kau  
 noa iho. <sup>12</sup> Kua whakapikoa e ia tana kopere, a whakaturia ake ahau e ia hei koperenga pere.  
<sup>13</sup> Kua meinga e ia nga pere o tana papa pere kia ngoto ki oku whatumanawa. <sup>14</sup> Kua waiho ahau  
 hei katanga ma toku iwi katoa; hei waiata ma ratou a pau noa te ra. <sup>15</sup> Kua whakakiiia ahau e ia ki  
 nga mea kawa, whakainumia rawatia ana ahau e ia ki te taru kawa. <sup>16</sup> Kua whatiwhatiia ano hoki  
 e ia oku niho ki te kirikiri, hipokina ana ahau e ia ki te pungarehu. <sup>17</sup> Kua nekehia atu e koe toku  
 wairua kei tata ki te rangimarie; i wareware ahau ki te pai. <sup>18</sup> Ki tonu ake ahau, kua pirau toku  
 kaha, kahore he tumanakohanga maku ki a Ihowa. <sup>19</sup> Mahara ki toku ngakau mamae, ki toku pouri,  
 ki te taru kawa, ki te wai kawa. <sup>20</sup> Maharahara tonu toku wairua ki a ratou, piko tonu iho i roto i  
 ahau.  
<sup>21</sup> E whakahokia ake ana tenei e ahau ki toku ngakau, koia i tumanako ai ahau. <sup>22</sup> He mahi  
 tohu na Ihowa te poto ai tatou, he kore no ana mahi aroha e mutu. <sup>23</sup> E hou tonu ana ratou i tenei  
 ata, i tenei ata; he nui tou pono. <sup>24</sup> Ko Ihowa te wahi moku, e ai ta toku wairua; no reira ka tumanako  
 ahau ki a ia. <sup>25</sup> He pai a Ihowa ki te hunga e tumanako ana ki a ia, ki te wairua e rapu ana i a ia.  
<sup>26</sup> He pai ano kia tumanako te tangata, kia tatari marie hoki ki ta Ihowa whakaora. <sup>27</sup> He pai ano  
 mo te tangata kia amohia e ia te ioka i tona tamarikitanga. <sup>28</sup> Me noho ia, tona kotahi, me  
 whakarongo puku hoki, no te mea nana i uta ki a ia. <sup>29</sup> Me tuku e ia tona mangai ki te puehu;  
<sup>30</sup> mehemea pea tera he tumanakohanga. Me hoatu e ia tona paparinga ki te tangata e papaki ana

i a ia: kia ki tonu ia i te tawai. <sup>31</sup> E kore hoki e mau tonu ta Ihowa panga: <sup>32</sup> Ahakoa whakapouri  
 ia, ka aroha ano ia, ka rite ki te nui o tana mahi tohu. <sup>33</sup> Kahore hoki ona ngakau whiu, whakapouri  
 ranei, i nga tama a te tangata. <sup>34</sup> Ko te kuru i nga herehere katoa o te whenua ki raro i ona waewae;  
<sup>35</sup> Ko te whakapeau ke i te tika o te tangata ina whakawakia i te aroaro o te Runga Rawa; <sup>36</sup> Ko te  
 whakariro ke i ta te tangata ina totohe, e kore tena e whakapaingia e te Ariki.  
<sup>37</sup> Ko wai tenei hei ki mai, a ka oti, i te mea kihai i whakahaua e te Ariki? <sup>38</sup> He teka ianei e  
 puta mai ana te kino me te pai i roto i te mangai o te Runga Rawa? <sup>39</sup> He aha te tangata ora i  
 amuamu ai, te tangata ina whiua mo ona hara? <sup>40</sup> E rapu tatou, e kimi i o tatou ara, a ka tahuri ano  
 ki a Ihowa. <sup>41</sup> Kia ara atu o tatou ngakau me o tatou ringa ki te Atua i te rangi.  
<sup>42</sup> I he matou, i whakakeke; kihai ano koe i muru i to matou he. <sup>43</sup> Kua hipokina nei e koe ki  
 te riri, tukinotia ana matou e koe: tukitukia ana e koe, kihai ano i tohungia e koe. <sup>44</sup> Hipokina ana  
 e koe he kapua ki a koe, kei puta atu ta matou inoi. <sup>45</sup> Kua meinga matou e koe hei paru tahinga,  
 hei mea akiri i waenga i nga iwi. <sup>46</sup> Kua hamama mai nga mangai o o matou hoariri katoa ki a  
 matou. <sup>47</sup> Ko te wehi, ko te rua, kua tae mai kei a matou, te whakamoti me te wawahi. <sup>48</sup> Kei te  
 tarere nei nga awa wai i toku kanohi, mo te wawahanga o te tamahine a toku iwi. <sup>49</sup> Maturuturu  
 ana te wai i toku kanohi, kahore hoki e mutu, te ai he pariratanga, <sup>50</sup> Kia titiro mai ra ano a Ihowa,  
 kia kite mai ra ano ia i runga i te rangi. <sup>51</sup> E meatia iho ana toku ngakau e toku kanohi, mo nga  
 tamahine katoa o toku pa. <sup>52</sup> Kua whaia kinotia ahau ano he manu e ratou, e te hunga e hoariri ana  
 ki ahau, kahore he take. <sup>53</sup> Ngaro iho i a ratou toku ara i roto i te poka, kua maka e ratou he kohatu  
 ki runga ki ahau. <sup>54</sup> I rere nga wai i runga i toku mahunga: i mea ahau, kua motuhia ketia ahau.  
<sup>55</sup> I karanga ahau ki tou ingoa, e Ihowa, i roto i te poka i raro rawa. <sup>56</sup> I rongo koe ki toku reo;  
 kua e huna tou taringa ki te tanga o toku manawa, ki taku karanga. <sup>57</sup> I whakatata mai koe i te ra  
 i karanga ai ahau ki a koe; i ki mai koe, Kua e wehi. <sup>58</sup> Kua tohea e koe, e te Ariki, nga tohe a  
 toku wairua; kua hokona e koe toku ora. <sup>59</sup> Kua kite koe, e Ihowa, i te he i mahia ki ahau: mau e  
 whakarite taku whakawa. <sup>60</sup> Kua kite koe i to ratou mauahara katoa, i o ratou whakaaro katoa

<sup>61</sup> moku. Kua rongo koe ki ta ratou tawai, e Ihowa, ki o ratou whakaaro katoa moku; <sup>62</sup> Ki nga  
<sup>63</sup> ngutu o te hunga i whakatika mai ki ahau, ki ta ratou tikanga moku, a pau noa te ra. Tirohia mai  
<sup>64</sup> to ratou nohoanga iho, to ratou whakatikanga ake; ko ahau te waiatatia nei e ratou. Hoatu he  
<sup>65</sup> utu ki a ratou, e Ihowa, kia rite ki te mahi a o ratou ringa. Hoatu ki a ratou he ngakau pakeke,  
<sup>66</sup> tau kanga ki a ratou. Whaia ratou i runga i te riri, whakangaromia atu ratou i raro i nga rangi o  
 Ihowa.

### Chapter 4

<sup>1</sup> Taukiri e! tona haumarurutanga o te koura! tona putanga ketanga o te koura parakore, tino  
 pai! Kua ringihia nga kohatu o te wahi tapu ki te ahunga mai o nga ara katoa. <sup>2</sup> Ko nga tamariki a  
 Hiona, ko nga mea papai, i rite nei ki te koura parakore, taukiri e! kua kiia ratou he haka oneone,  
<sup>3</sup> he mea hanga na nga ringa o te kaipokepoke. Ko nga kirehe mohoa nei hoki, e tukua iho ana te  
 u e ratou, e whakangotea ana e ratou a ratou kua: kua taikaha te tamahine a toku iwi, kua rite ki  
<sup>4</sup> nga otereti o te koraha. Piri ana te arero o te tamaiti ngote u ki te ngao o tona mangai i te hiainu:  
 e tono ana nga kohungahunga i te taro ma ratou, heoi kahore he tangata hei whatiwhati atu ma  
<sup>5</sup> ratou. Ko te hunga i kai i nga mea papai, kei te noho mokemoke i nga ara: ko te hunga i  
 whakatupuria i roto i nga kakahu ngangana, kei te awahi i nga puranga paru. <sup>6</sup> No te mea ko te he  
 o te tamahine a toku iwi nui atu i te hara o Horoma, i hurihia ohoreretia ra i mua, kahore hoki he  
<sup>7</sup> ringa i u ki a ia. Ko ona rangatira pai atu i te hukarere te pokekore, ma atu hoki ratou i te waiu,  
<sup>8</sup> puwhero ake o ratou tinana i nga rupi, orohina ake ratou ki te oro o te hapaira. Mangu iho to ratou  
 mata i tetahi ngarahu; kahore ratou e mohiotia i nga ara: piri tonu o ratou kiri ki o ratou wheua; kua  
<sup>9</sup> memenge, kua rite ki te rakau. Ko te hunga i patua e te hoari, pai ake to ratou i to te hunga i patua  
<sup>10</sup> e te hemokai; no te mea ka honia noatia enei, ka werohia, he kore hoki no nga hua o te mara. Ko  
 nga wahine, ko te hunga aroha, kei te kohua i a ratou tamariki ki o ratou ringa: he kai era ma ratou  
<sup>11</sup> i te wawahanga o te tamahine a toku iwi. Kua whakapaua e Ihowa tona riri nui, kua ringihia mai  
<sup>12</sup> e ia tona riri nui; kua tahuna hoki e ia he ahi ki Hiona, na reira i pau ai ona turanga. Kihai i  
 whakapono mai nga kingi o te whenua, kihai ano hoki nga tangata o te ao, tera te hoariri raua ko  
 te hoa whawhai e tomo mai ki nga kuwaha o Hiruharama.

<sup>13</sup> I pera ai he hara no ona poropiti, he he no ona tohunga kua whakaheke nei i nga toto o te  
<sup>14</sup> hunga tika ki waenganui ona; E kopikopiko ana ratou ano he matapo i nga ara; kua poke ratou  
<sup>15</sup> i te toto, te pa ai te tangata ki o ratou kakahu. I karanga ratou ki a ratou; Haere atu, e poke ana;  
 haere atu, haere atu, kei pa; i to ratou whatinga, i a ratou e atiutiu noa atu ana, i ki nga tangata i  
<sup>16</sup> roto i nga tauwiwi, Kahore he nohoanga iho mo ratou ki konei. Kua wehewehea ratou e te riri o  
 Ihowa: e kore ia e titiro ki a ratou i muri nei: kihai ratou i whakaaro ki nga kanohi o nga tohunga,  
<sup>17</sup> kihai i manako ki nga kaumatua. E matawaia tonu ana o tatou kanohi i tatou e titiro ana ki te  
 awhina tekateka noa mo tatou: i a tatou e tiaki atu ana, i whanga noa tatou ki te iwi e kore e whakaora.  
<sup>18</sup> E whaia ana e ratou o tatou hikoinga, te haere ai tatou i o tatou waharoa: kua tata to tatou  
<sup>19</sup> whakamutunga, kua rite o tatou ra; no te mea kua tae mai to tatou whakamutunga. Nui atu te  
 tere o o tatou kaiwhai i to nga ekara o te rangi: i arumia tatou e ratou i runga i nga maunga; i whanga  
<sup>20</sup> mai ano ratou ki a tatou i te koraha. Ko te manawa o o tatou pongaponga, ko ta Ihowa i whakawahi  
 ai, i mau ki roto ki a ratou rua; i ki ra tatou mona, Ma tona taumarumarunga iho ka ora ai tatou i  
 roto i nga tauwiwi.  
<sup>21</sup> Kia hari, kia koa, e te tamahine a Eroma e noho na i te whenua o Uhu; ka tae atu ano te kapu  
<sup>22</sup> ki a koe; ka haurangi koe, ka whakarere ano koe i ou kakahu. Kua rite te whiu mo tou he, e te  
 tamahine a Hiona; heoi ano tana whakaraunga i a koe: ka whiua e ia tou he, e te tamahine a Eroma,  
 ka hurahia ano e ia ou hara.

## Chapter 5

<sup>1</sup> Kia mahara, e Ihowa, ki te mea kua pa nei ki a matou: tirohia mai, kia kite ai koe i to matou  
<sup>2</sup> ingoa kino. Kua riro to matou wahi tupu i nga tangata ke, o matou whare i nga tautangata. <sup>3</sup> He  
 pani matou, kahore he matua, ko o matou whaea ano he pouaru. <sup>4</sup> Na te moni i inu wai ai matou;  
<sup>5</sup> ko a matou wahie he mea hoko. Kei runga kei o matou kaki o matou kaiwhai: e mauui ana matou,  
<sup>6</sup> kahore he tanga manawa mo matou. Kua hoatu e matou te ringa ki nga Ihipiana, ki nga Ahiriana,  
<sup>7</sup> kia makona ai matou i te taro. I hara o matou matua, a kua kore; a kua whakawaha e matou o  
<sup>8</sup> ratou he. Ko nga pononga o matou rangatira: kahore he kaiwhakaora mo matou i o ratou ringa.

<sup>9</sup> E tata mate matou ka whiwhi ai i te taro, i te hoari hoki o te koraha. <sup>10</sup> Mangu ana o matou kiri  
 ano he oumu, i te wera ngau kino o te hemokai. <sup>11</sup> Taea ana e ratou nga wahine o Hiona, nga wahine  
 i nga pa o Hura. <sup>12</sup> Ko nga rangatira, taronatia ake e to ratou ringa; kihai nga kanohi o nga kaumatua  
 i whakahonoretia. <sup>13</sup> Ko nga taitama kei te waha i te huri, hinga ana nga tamariki i te pikaunga  
 wahie. <sup>14</sup> Ko nga kaumatua i nga kuwaha kua kore, me te waiata hoki a nga taitama. <sup>15</sup> Kua mutu  
 te koa o o matou ngakau, kua puta ke ta matou kanikani hei uhunga. <sup>16</sup> Kua taka te karauna o to  
 matou mahunga; aue, te mate mo matou! kua hara hoki matou.  
<sup>17</sup> Na reira whakarui noa iho o matou ngakau; na enei mea pouriuri ana o matou kanohi.  
<sup>18</sup> Na te maunga hoki o Hiona kua ururutia nei, e haereera nei e nga pokiha. <sup>19</sup> Pumau tonu koe,  
 ake ake, e Ihowa; ko tou torona kei tera whakatupuranga, kei tera whakatupuranga. <sup>20</sup> He aha koe  
 i wareware tonu ai ki a matou? he aha koe i whakarere ai i a matou, a roa noa iho nga ra?  
<sup>21</sup> Whakatahuritia atu matou ki a koe, e Ihowa, a ka tahuri matou: whakahoutia o matou ra, kia rite  
 ki o mua. <sup>22</sup> Otiia kua tino whakakahore rawa koe ki a matou, e tino nui ana tou riri ki a matou.

## Ezekiel

### Chapter 1

<sup>1</sup> Na i te toru tekau o nga tau, i te wha o nga marama, i te rima o nga ra o te marama, i ahau i  
 roto i nga whakarau o te awa, o Kepara, na ka puare nga rangi, a ka kite ahau i nga putanga Atua.  
<sup>2</sup> I te rima o nga ra o te marama, ara i te rima o nga tau o to Kingi Iehoiakini whakaraunga, <sup>3</sup> Ka  
 haere tika tonu mai te kupu a Ihowa ki a Ehekiera tohunga, tama a Puti, i te whenua o nga Karari,  
 i te taha o te awa, o Kepara; a i runga te ringa o Ihowa i a ia i reira.  
<sup>4</sup> A ka titiro atu ahau, na, he tukauati e puta mai ana i te raki, he kapua nui, he ahi e hoki iho  
 ana ki roto ki a ia ano, wheriko tonu i tetahi taha, a i waenganui, i rite ki te kara o te amipere, i  
 waenganui ano i te ahi. <sup>5</sup> Na ka puta mai i waenganui o taua ahi ko te ahua o nga mea ora e wha.  
 Ko to ratou ahua ano tenei; i rite ratou ki te tangata. <sup>6</sup> Na e wha nga mata o tetahi, o tetahi o ratou,  
 e wha nga parirau o tetahi, o tetahi. <sup>7</sup> Ko o ratou waewae, he waewae tika tonu; ko te kapu ano o

o ratou waewae rite tonu ki te kapu o te waewae o te kua o kua: wheriko tonu, rite tonu ki te  
kanapatanga o te parahi kua oti te oro. He ringa tangata ano o ratou i raro i o ratou parirau, i o  
<sup>8</sup>  
ratou taha e wha: na, ko ratou tokowha, ko o ratou mata, ko o ratou parirau, koia tenei; He mea  
hono o ratou parirau tetahi ki tetahi; kihai ratou i tahuri i a ratou e haere ana; i haere tika tonu atu  
<sup>9</sup>  
tetahi, tetahi. Na, ko te ahua o o ratou mata, he mata tangata o ratou; he mata raiona o ratou  
tokowha i te taha ki matua; he mata kau o ratou tokowha i te taha ki mau; he mata ekara ano o  
<sup>10</sup>  
ratou tokowha. Na, ko o ratou mata, ko o ratou parirau he mea wehe a runga: ko o te mea kotahi  
<sup>11</sup>  
e rua nga parirau e piri ana tetahi ki tetahi, e rua hei hipoki mo o ratou tinana. I haere tika tonu  
atu hoki ratou tetahi, tetahi: ko te wahi hei haerenga atu mo te wairua, haere ana ratou ki reira: kihai  
<sup>12</sup>  
ratou i tahuri i a ratou e haere ana. Na, ko te rite o aua mea ora, ko to ratou ahua, koia ano kei  
te ngarahu ahi i te mea e ka ana, kei te ahua ano o te rama: i haereere taua ahi i roto i aua mea ora,  
<sup>13</sup>  
mura tonu, i puta mai ano he uira i roto i te ahi. Na ko te oma, ko te hokinga o aua mea ora, rite  
<sup>14</sup>  
tonu te ahua ki to te hikonga uira.

<sup>15</sup>  
Na i taku tirohanga ki nga mea ora, nana, ko tetahi wira i runga i te whenua, i te taha o nga  
<sup>16</sup>  
mea ora, kotahi mo te mea kotahi o ona mata e wha. Ko te ahua o nga wira, me to ratou mahinga,  
rite tonu te kara ki to te perira: rite tonu aua wira e wha; ko to ratou ahua, ko to ratou mahinga, me  
<sup>17</sup>  
te mea he wira i roto i te wira. I to ratou haerenga i haere i runga i o ratou taha e wha; kihai i  
<sup>18</sup>  
tahuri i a ratou e haere ana. Na, ko o ratou awhi, tiketike rawa, he hanga whakawehi, kapi tonu  
<sup>19</sup>  
ano i te kanohi o ratou awhi i tetahi taha, i tetahi taha, o ratou e wha. Na i te haerenga o nga mea  
ora i haere ano nga wira i to ratou taha; a ka ara nga mea ora i runga i te whenua, ka ara ano nga  
<sup>20</sup>  
wira. Ko te wahi hei haerenga atu mo te wairua, i haere ratou ki reira; ko reira hei haerenga mo  
te wairua; i ara ano nga wira ki runga i to ratou ritenga atu: no te mea i roto i nga wira te wairua o  
<sup>21</sup>  
te mea ora. I haere era, ka haere enei; i tu era, ka tu enei; a ka ara ake era i runga i te whenua,  
ka ara ano nga wira i to ratou ritenga atu; no te mea kei roto te wairua o te mea ora i nga wira.  
<sup>22</sup>  
Na i runga ake i te mahunga o te mea ora ko te ahua o te kikorangi, rite tonu te kara ki to te  
<sup>23</sup>  
karaihe e wehingia ana, he mea hora atu i runga i o ratou mahunga i te taha ki runga. Na, i raro  
i te kikorangi, ko o ratou parirau, torotika tonu, anga tonu mai tetahi ki tetahi: o te mea kotahi e rua  
<sup>24</sup>  
hei hipoki i tetahi taha, o te mea kotahi ano e rua hei hipoki i tera taha o o ratou tinana. A i a  
ratou e haere ana, i rongo ahau i te haruru o o ratou parirau me te mea ko te haruru o nga wai maha,  
me te mea ano ko te reo o te Kaha Rawa, he reo e turituri ana, ano he nge no tetahi ope: i nga wa

<sup>25</sup>  
i tu ai ratou i tukua iho o ratou parira u. I puta iho ano he reo i te kikorangi i runga i o ratou mahunga; i te mea ka tu ratou, ka tukua iho o ratou parirau.

<sup>26</sup>  
Na, i runga i te kikorangi i runga ake i o ratou mahunga ko te ahua o tetahi torona, he mea rite ki te kohatu hapaira: a i runga i te ahua o te torona ko tetahi ahua e rite ana ki to te tangata i

<sup>27</sup>  
runga i taua torona, i te taha ki runga. I kite atu ano ahau me te mea no te amipere te kara, he mea rite ki te ahua o te ahi i roto a taka noa, taka noa, i te ahua o tona hope, a haere whakarunga, i te ahua ano o tona hope, a haere whakararo, i kite atu ahau me te mea ko te ahua o te ahi, a wheriko

<sup>28</sup>  
tonu te marama i tetahi taha, i tetahi taha ona. Rite tonu ki te ahua o te kopere i te kapua i te ra ua te ahua o te wherikotanga a taka noa. Ko te ahua tena, ko te ritenga o te kororia o Ihowa. No toku kitenga, tapapa ana ahau ki raro; na, ka rongu ahau i te reo o tetahi e korero ana.

## Chapter 2

<sup>1</sup>  
Na ka mea ia ki ahau, E te tama a te tangata, e tu ou waewae ki runga, a ka korero ahau ki a

<sup>2</sup>  
koe. Na kua tae mai te wairua ki roto ki ahau i tana korerotanga ki ahau, i tana meatanga kia tu oku waewae ki runga; a ka rongu ahau i a ia e korero ana ki ahau. <sup>3</sup> Na ka mea ia ki ahau, E te tama a te tangata, ka unga koe e ahau ki nga tama a Ihairaira, ki nga iwi whakakeke, kua whakakeke nei

<sup>4</sup>  
ki ahau; ko ratou ko o ratou matua kua tutu ki ahau a taea noatia tenei ra nei ano. A ko nga tamariki he whakatoi, he kaki maro; na ka unga koe e ahau ki a ratou, a me ki atu e koe ki a ratou, Ko te

<sup>5</sup>  
kupu tenei a te Ariki, a Ihowa. Na ko ratou, ma ratou e rongu, ma ratou e kore e rongu, he whare whakakeke hoki ratou, ka mohio, na i roto i a ratou te poropiti e noho ana.

<sup>6</sup>  
Na ko koe, e te tama a te tangata, kua e wehi i a ratou, kua e wehi i a ratou kupu, ahakoa he tataramoa, he tumatakuru i tou taha, a e noho ana koe i roto i nga kopiona; kua e wehi i a ratou

<sup>7</sup>  
kupu, kua hoki e pairi ina titiro mai ratou, ahakoa he whare whakakeke ratou. Me korero ano e koe aku kupu ki a ratou, ma ratou e whakarongo, ma ratou ranei e kore e whakarongo: nui atu hoki

<sup>8</sup>  
to ratou whakakeke. Ko koe ia, e te tama a te tangata, whakarongo ki taku e mea nei ki a koe; Kua koe e whakakeke, kei rite ki taua whare whakakeke: hamama tou mangai, kainga hoki te mea

<sup>9</sup>  
ka hoatu nei e ahau ki a koe. Na, i taku tirohanga atu, nana, ko tetahi ringa e totoro mai ana ki

<sup>10</sup>  
ahau; nana, ko tetahi pukapuka i roto i te ringa; Na wherahia ana e ia taua pukapuka ki toku aroaro, he mea tuhituhi a roto, a waho: ko te mea i tuhituhia ki reira he tangi, he uhunga, he aue.



## Chapter 3

<sup>1</sup> Na ka ki mai ia ki ahau, E te tama a te tangata, ko tau i kite ai kainga, kainga tenei pukapuka,  
 ka haere, ka korero ki te whare o Iharaira. <sup>2</sup> Na kua hamama toku mangai, a meinga ana ahau e ia  
 kia kai i taua pukapuka. <sup>3</sup> I mea ano ia ki ahau, E te tama a te tangata, kia kai tou kopu, kia ki ano  
 hoki tou puku i tenei pukapuka ka hoatu nei e ahau ki a koe. Katahi ka kainga e ahau; na me te honi  
 taua mea i roto i toku mangai te reka. <sup>4</sup> Na ka mea ia ki ahau, E te tama a te tangata, whakatika,  
 haere ki te whare o Iharaira, korerotia aku kupu ki a ratou. <sup>5</sup> Ehara hoki i te mea e unga ana koe ki  
 te iwi he tauhou tona reo, he pakeke ranei; engari ki te whare o Iharaira. <sup>6</sup> Ehara i te mea ki nga  
 iwi maha he rere ke nei, he pakeke hoki to ratou reo, e kore nei koe e mohio ki a ratou kupu. He  
 pono, ki te unga koe e ahau ki a ratou, kua whakarongo ratou ki a koe. <sup>7</sup> E kore ia te whare o Iharaira  
 e pai ki te whakarongo ki a koe; no te mea e kore ratou e pai ki te whakarongo ki ahau; he rae  
 pakeke hoki to te whare katoa o Iharaira, he ngakau pakeke. <sup>8</sup> Nana, kua oti tou mata te mea e ahau  
 kia pakeke ki o ratou mata; tou rae kia pakeke ki o ratou rae. <sup>9</sup> Kua oti tou rae te mea e ahau kia  
 rite ki te kohatu tino maro, maro atu i te mata: kaua e wehi i a ratou, kaua hoki e pairi ina titiro  
 ratou, ahakoa he whare whakakeke ratou. <sup>10</sup> I mea ano ia ki ahau, E te tama a te tangata, Ko aku  
 kupu katoa ka korerotia e ahau ki a koe rongoatia ki tou ngakau, whakarangona mai ano e ou taringa.  
<sup>11</sup> Na whakatika, haere ki nga whakarau, ki nga tama a tou iwi, korero ki a ratou, mea atu, Ko te  
 kupu tenei a te Ariki, a Ihowa; ma ratou e rongo, ma ratou ranei e kore e rongo. <sup>12</sup> Katahi ka  
 hapainga ake ahau e te wairua, a ka rangona e ahau i muri i ahau he reo, he haruru nui e mea ana,  
 Kia whakapaingia te kororia o Ihowa i tona wahi. <sup>13</sup> I rongo ano ahau i te haruru o nga parirau o  
 nga mea ora e pa ana tetahi ki tetahi, i te haruru ano o nga wira i to ratou taha, he haruru nui e  
 ngateri haere ana. <sup>14</sup> Heoi ka hapainga ahau e te wairua, kahakina ana ahau e ia: a haere pouri ana  
 ahau, me te pawera o toku wairua; a i kaha te ringa o Ihowa ki runga ki ahau. <sup>15</sup> Katahi ahau ka  
 tae ki nga whakarau i Terapipi, e noho ra i te awa, i Kepara, ki te wahi hoki i noho ai ratou; a e  
 whitu nga ra oku e noho ketekete ana i roto i a ratou.  
<sup>16</sup> Na i te mutunga o nga ra e whitu, ka puta mai te kupu a Ihowa ki ahau, i mea ia, <sup>17</sup> E te  
 tama a te tangata, kua oti koe te mea e ahau hei kaitutei ma te whare o Iharaira. Na whakarongo ki  
 te kupu o toku mangai, a ko koe hei kaiwhakatupato maku i a ratou. <sup>18</sup> Ki te mea ahau ki te tangata  
 kino, Ko te mate kau mou; a ka kore koe e whakatupato i a ia, ka kore e korero, e whakatupato i  
 taua tangata kino ki tona ara kino kia ora ai ia; ka mate taua tangata kino i runga i tona he; otiia ka

19  
rapua e ahau he utu mo ona toto i tou ringa. Engari ki te whakatupato koe i taua tangata kino, a ka kore ia e tahuri mai i tona kino, i tona ara kino, ka mate ia i runga i tona he; otiia kua ora i a koe

20  
tou wairua. Na ki te tahuri atu te tangata tika i tona tika, a ka mahia e ia te kino, a ka hoatu e ahau he tutukitanga waewae ki tona aroaro, ka mate ia: i te mea kihai koe i whakatupato i a ia, ka mate ia i runga i tona hara, e kore ano ana mahi tika i mah ia e ia e maharatia; otiia ka rapua e ahau

21  
he utu mo ona toto i tou ringa. Na ki te whakatupato koe i te tangata tika kia kaua te tangata tika e hara, a ka kore ia e hara, he pono ka ora ia, nona hoki i rongo ki te whakatupato, a ka ora tou wairua i a koe.

22  
Na kua tae mai te ringa o Ihowa ki runga ki ahau; a ka mea ia ki ahau, Whakatika, haere ki

23  
te mania, a ka korero ahau ki a koe ki reira. Katahi ahau ka whakatika, a haere ana ki te mania: na, ko te kororia o Ihowa i reira e tu ana, rite tonu ki te kororia i kitea e ahau ki te awa, ki Kepara,

24  
a tapapa ana ahau. Katahi ka uru te wairua ki roto ki ahau, a ka meinga e ia oku waewae kia tu ki runga: na ka korero mai ia ki ahau, ka mea ki ahau, Haere, tutakina atu koe ki roto ki tou whare.

25  
Ko koe ia, e te tama a te tangata, nana, ka meatia iho e ratou he here ki a koe, a ka herea koe ki

26  
aua here, e kore ano koe e puta ki roto ki a ratou. Ka meinga ano e ahau tou arero kia piri ki tou ngao, a ka wahangu koe, e kore ano koe e waiho hei kairiri mo to ratou he; no te mea he whare

27  
whakakeke ratou. Otiia i te wa e korero ai ahau ki a koe ka whakatuwheratia e ahau tou mangai, a ka mea koe ki a ratou, Ko te kupu tenei a te Ariki, a Ihowa, Ko te tangata e rongo ana, mana e whakarongo; ko te tangata e kore e rongo, kaua ia e whakarongo: he wha re whakakeke hoki ratou.

## Chapter 4

1  
Na, ko koe hoki, e te tama a te tangata, tikina tetahi pereki mau, whakatakotoria ki tou aroaro,

2  
ka tuhituhi ai he pa, ko Hiruharama, ki runga. Whakapaea ano taua mea, hanga he taumaihi hei whakapae mona; haupuria ake he pukepuke hei whakapae mona, hanga he nohoanga taua, hei

3  
whawhai ki reira, hanga hoki nga mea wawahi mona, a taka noa. Tikina ano tetahi rino paraharaha mau, whakaturia ake hei taiepa rino ki waenganui ou, o te pa; kia anga atu ano tou mata ki reira, a

4  
ka whakapaea a reira, me whakapae hoki e koe. Hei tohu tenei ki te whare o Iharaira. Me takoto ano hoki koe ki tou taha mau, ka uta ai i te kino o te whare o Iharaira ki runga ki taua taha: ko tau

5  
wahanga i to ratou kino ka rite ki te maha o nga ra i takoto ai koe ki taua taha. Kua oti hoki i ahau nga tau o ta ratou kino te uta ki runga ki a koe, kei te maha o nga ra te ritenga, ara e toru rau e iwa

<sup>6</sup>  
 tekau nga ra; na ka waha e koe te he o te whare o Iharaira. A, ka poto enei i a koe, me takoto hoki  
 koe ki tou taha matau, a ka waha koe i te he o te whare o Hura: ko taku i whakarite ai ki a koe, e  
<sup>7</sup>  
 wha tekau nga ra, he ra mo te tau, he ra mo te tau. Whakaangahia atu hoki tou kanohi ki te  
<sup>8</sup>  
 whakapaenga o Hiruharama, tahanga kau tou ringa; a ka poropiti koe i te he mo reira. Nana, ka  
 meatia koe e ahau ki te here, a e kore koe e huri i tetahi taha ou ki tetahi taha ou, kia poto ra ano i  
 a koe ou ra whakapae.  
<sup>9</sup>  
 Tikina hoki he witi mau, he parei, he pini, he mirete, he rai, ka maka ki roto ki te oko kotahi,  
 ka hanga i tetahi taro mau; kia rite ki te maha o nga ra e takoto ai koe ki tou taha, e toru rau e iwa  
<sup>10</sup>  
 tekau nga ra e kainga ai taua mea e koe. Me pauna ano tau kai e kainga ai e koe, kia rua tekau  
<sup>11</sup>  
 nga hekere i te ra kotahi; me kai e koe i tenei wa, i tenei wa. Me mehua ano te wai e inumia e  
<sup>12</sup>  
 koe; ko te wahi whakaono o te hine, me inu e koe i tenei wa, i tenei wa. A me kai e koe te kai  
 ano he keke parei, a me tunu taua mea i ta ratou tirohanga ki te paru e puta mai ana i te tangata.  
<sup>13</sup>  
 A i ki mai a Ihowa, Ka pena ano te kai a nga tama a Iharaira, i ta ratou taro poke i roto i nga  
<sup>14</sup>  
 tauwi e peia atu ai ratou e ahau. Na ko taku kainga ake, Aue, e te Ariki, e Ihowa! nana, kihai  
 toku wairua i poke; kihai ano ahau i kai i te mea mate maori, i te mea i haea e te kirehe, o toku  
 tamarikitanga ano a mohoa noa nei; kihai ano tetahi kikokiko whakarihariha i tapoko ki roto ki  
<sup>15</sup>  
 toku mangai. Katahi ka mea ia ki ahau, Titiro, kua hoatu e ahau ki a koe te paru kau hei whakarite  
<sup>16</sup>  
 mo te paru tangata, a ka tunu koe i tau taro ki aua mea. Na ka mea ia ki ahau, E te tama a te  
 tangata, kua oti te whawhati e ahau te tokotoko, ara te taro i Hiruharama; a, ko ta ratou taro e kai  
 ai he mea pauna, i runga ano i te manukanuka; he mea mehua ano te wai, ka inumia e ratou i runga  
<sup>17</sup>  
 i te ketekete: He mea kia kore ai he taro, he wai, ma ratou, ketekete iho tetahi ki tetahi, memeha  
 noa iho i runga i to ratou he.

## Chapter 5

<sup>1</sup>  
 Na ko koe, e te tama a te tangata, tikina he hoari koi mau, tikina hei heu mau, ko te heu a te  
 kaiheu, ka whakahaere ai ki runga ki tou mahunga, ki tou pahau ano: katahi ka tiki i etahi pauna  
<sup>2</sup>  
 hei pauna mau, ka wehe ai i nga makawe. Ko tetahi whakatoru o nga wahi me tahu e koe ki te  
 ahi ki waenganui o te pa, ina rite nga ra o te whakapaenga: na ka mau ki tetahi whakatoru, ka hahau  
 ki te hoari i tetahi taha ona, i tetahi taha: a ko tetahi whakatoru me titari atu ki te hau: ka maunu  
<sup>3</sup>  
 hoki i ahau te hoari hei whai i a ratou. Me tango ano e koe etahi o aua makawe, kia torutoru, ka

4  
takai ki roto ki nga pito o tou. Me tango etahi o aua makawe, ka maka ki waenganui o te ahi, ka tahu ai ki te ahi; ka puta mai i reira he ahi ki te whare katoa o Iharaira.

5  
Ko te kupu tenei a te Ariki, a Ihowa, Ko Hiruharama tenei; he mea whakatu ia naku ki waenga o nga iwi, a ko nga whenua e karapoi ana i a ia. 6 A kua whakakeke ia ki aku whakaritenga, nui atu hoki tana mahi kino i ta nga iwi, ki aku tikanga hoki, nui atu i ta nga whenua i tetahi taha ona, i tetahi taha: kua paopao nei hoki ratou ki aku whakaritenga, a kihai i waiho e ratou aku tikanga he

7  
i ara mo ratou. No reira ko te kupu tenei a te Ariki, a Ihowa, I te mea kua nui ake to koutou tutu i to nga iwi i tetahi taha o koutou, i tetahi taha, kihai hoki koutou i haere i runga i aku tikanga, kihai i mahi i aku whakaritenga, kihai ano i rite ta koutou ma hi ki nga ritenga a nga iwi i tetahi taha o

8  
koutou, i tetahi taha; Mo reira ko te kupu tenei a te Ariki, a Ihowa, Nana ko ahau, ko ahau rawa nei, hei hoariri mou; a ka whakaritea e ahau he whakaritenga i waenganui ou i te tirohanga a nga

9  
iwi. Ka mahia ano e ahau i roto i a koe he mea kihai i mahia e ahau i mua, e kore he pena e mahia

10  
e ahau a muri; mo au mea whakarihariha katoa hoki. A ka kai nga matua i nga tamariki i roto i a koe, ka kai ano nga tamariki i o ratou matua; ka mahia ano e ahau he whakaritenga i roto i a koe,

11  
ka titaria atu ano e ahau ou morehu katoa ki nga hau katoa. Mo reira, e ora ana ahau, e ai ta te Ariki, ta Ihowa, kua whakapokea nei e koe toku wahi tapu ki au mea whakarihariha katoa, ki au mea anuanu katoa, mo reira ka tino whakaititia ano koe e ahau; e kore toku kanohi e manawapa, e

12  
kore ano ahau e to hu. Ka mate tetahi whakatoru ou i te mate uruta, ka poto atu hoki i te hemokai i roto i a koe; a ka hinga tetahi whakatoru ou i te hoari i tetahi taha ou, i tetahi taha: na, ko tetahi whakatoru, ka titaria e ahau ki nga hau katoa, ka maunu ano i aha u te hoari hei whai i a ratou.

13  
Na ka whakapaua atu toku riri, ka meinga ano e ahau kia tutuki toku weriweri ki runga ki a ratou, ka whai whakamarietanga ano ahau; a ka mohio ratou ko Ihowa ahau te korero nei i runga i toku

14  
hae, ina whakapaua e ahau toku weriweri ki runga ki a ratou. Ka meinga ano koe e ahau hei ururua, hei ingoa kino i roto i nga iwi i tetahi taha ou, i tetahi taha, i te tirohanga a nga tangata katoa

15  
e haere atu ana. Heoi ka waiho a kona hei ingoa kino, hei tawainga, hei mea e ako ai, e miharo ai nga iwi i tetahi taha ou, i tetahi taha, ina mahia e ahau nga whakaritenga ki a koe i runga i te riri,

16  
i te weriweri, i nga whakatupehupehu, aritarita rawa: naku, n a Ihowa te kupu, Ina tukua e ahau ki a ratou nga pere kino o te hemokai, hei whakamoti, ko aku e tuku atu ai hei whakamoti i a koutou;

17  
ka whakanuia ano e ahau to koutou hemokai, whati iho to koutou tokotoko, ara te taro. Ka tukua atu ano e ahau te hemokai ki a koutou, me nga kirehe kikino, a ka poto i a ratou au tamariki; ka tika atu ano te mate uruta me te whakaheke toto i waenganui i a koe; ka kawea atu ano e ahau te hoari ki a koe. Naku na Ihowa te kupu.

## Chapter 6

<sup>1</sup> I puta ano te kupu a Ihowa ki ahau, i mea, <sup>2</sup> E te tama a te tangata, anga atu tou mata ki nga  
<sup>3</sup> maunga o Iharaira, ka poropiti ki a ratou, Ka mea atu, E nga maunga o Iharaira, whakarongo ki  
 te kupu a te Ariki, a Ihowa: Ko te kupu tenei a te Ariki, a Ihowa ki nga maunga, ki nga pukepuke,  
 ki nga awa, ki nga raorao: Tenei ahau, ahau nei ano, te kawe nei i te hoari ki runga ki a koutou, a  
<sup>4</sup> ka kore i ahau o koutou wahi tiketike. Ka whakaururuatia a koutou aata, ka tukitukia a koutou  
 whakapakoko: a ka maka e ahau ki mua i a koutou whakapakoko o koutou tangata i whakamatea.  
<sup>5</sup> Ka takoto ano i ahau nga tinana o nga tama a Iharaira ki mua i a ratou whakapakoko; ka titaria  
 ano e ahau o koutou wheua ki a koutou aata a taka noa. <sup>6</sup> I o koutou nohoanga katoa ka ururuatia  
 nga pa, ka mokemoke ano nga wahi tiketike, he mea kia ururuatia ai a koutou aata, kia mokemoke  
 ai; kia tukitukia ai ano a koutou whakapakoko, mutu ake ta ratou; ka poutoa ano a koutou  
 whakapakoko, kia whakak ahoretia ai hoki a koutou mahi. <sup>7</sup> Ka hinga ano te parekura i roto i a  
 koutou; a ka mohio koutou ko Ihowa ahau.  
<sup>8</sup> Ka toe ano ia i ahau etahi, kia mawhiti ai etahi o koutou i te hoari i roto i nga iwi, ina titaria  
<sup>9</sup> atu koutou ki nga whenua. Na, ko te hunga o koutou e mawhiti, ka mahara ratou ki ahau i roto i  
 nga iwi e whakaraua atu ai ratou, ki taku pakaruhanga i to ratou ngakau puremu, kua mawehe atu  
 nei i ahau, me o ratou kanohi hoki, e haere nei ki te puremu ki o ratou whakapakoko: a anuanu iho  
 ratou ki a ratou ano mo nga kino i mahia nei e ratou, mo a ratou mea whakarihariha katoa. <sup>10</sup> Ka  
 mohio hoki ratou ko Ihowa ahau; ehara ano taku i te mea noa iho i taku kianga ka mahia tenei kino  
 ki a ratou.  
<sup>11</sup> Ko te kupu tenei a te Ariki, a Ihowa, papaki tou ringa, takahi iho tou waewae, me te ki ake  
 ano, Aue, te mate mo nga kino whakarihariha katoa o te whare o Iharaira! ka hinga hoki ratou i te  
<sup>12</sup> hoari, i te hemokai, i te mate uruta. Ko te tangata i tawhiti ka mate i te mate uruta; ko te tangata  
 e tata ana ka hinga i te hoari; ko te tangata e toe ana, e whakapaea ana, ka mate i te hemokai: na ka  
<sup>13</sup> whakapaua e ahau toku riri ki a ratou. A ka mohio koutou ko Ihowa ahau, ina takoto o ratou  
 tangata i patua i waenganui o a ratou whakapakoko i tetahi taha o a ratou aata, i tetahi taha, i runga  
 i nga pukepuke tiketike katoa, i runga i nga tihi katoa o nga maunga, i raro ano i nga rak au kouru  
 nui katoa, i raro i nga oki pururu katoa, i te wahi i tukua atu ai e ratou te kakara reka ki a ratou  
<sup>14</sup> whakapakoko katoa. Ka totoro atu hoki toku ringa ki a ratou, a ka meinga te whenua kia ururua,  
 kia takoto kau, i te koraha e anga ana ki Ripirata, puta noa i o ratou nohoanga: a ka mohio ratou  
 ko Ihowa ahau.

## Chapter 7

<sup>1</sup> I puta mai ano te kupu a Ihowa ki ahau; i mea, <sup>2</sup> Na, e koe, e te tama a te tangata, ko te kupu tenei a te Ariki, a Ihowa, ki te whenua o Iharaira: He whakamutunga! kua tae mai te whakamutunga  
<sup>3</sup> ki nga pito e wha o te whenua. Ko aiane te whakamutunga mou, ka tukua atu e ahau toku riri ki runga ki a koe, ka rite ano ki ou ara taku whakarite mou; ka hoatu ano e ahau au mea whakarihariha  
<sup>4</sup> katoa ki runga ki a koe. E kore ano toku kanohi e manawapa ki a koe, e kore ahau e tohu: engari ka hoatu e ahau te utu o ou ara ki a koe; ka mau hoki au mea whakarihariha ki roto i a koe, a ka  
<sup>5</sup> mohio koutou ko Ihowa ahau. Ko te kupu tenei a te Ariki, a Ihowa: He kino! he kino kotahi!  
<sup>6</sup> nana, te haere mai nei. He whakamutunga kua tae mai, kua tae mai te whakamutunga, kei te oho  
<sup>7</sup> ki a koe; nana, e haere mai nei. Ko te mea kua rite mou, tenei kua tae mai, e te tangata o te whenua: kua tae mai te wa, kua tata te ra; he ra no te ngangau, ehara i te ra o te umere harakoa i runga o nga  
<sup>8</sup> maunga. Akuanei ka tata te ringihia e ahau toku weriweri ki runga ki a koe, ka whakapaua e ahau toku riri ki a koe, ka rite ano ki ou ara taku whakarite mou; ka hoatu ano e ahau he utu ki a koe mo  
<sup>9</sup> au mea whakarihariha katoa. E kore ano toku kanohi e manawapa, e kore ahau e tohu; ka rite ki ou ara taku e hoatu ai ki a koe, ka mau ano au mea whakarihariha ki waenganui i a koe; a ka mohio  
<sup>10</sup> koutou e whiu ana ano ahau, a Ihowa. Nana, te ra; nana, kua tae mai: kua puta te mea ku rite  
<sup>11</sup> mou; kua puawai te tokotoko, kua kopuku te whakapehapeha. Kua ara te tutu hei tokotoko mo te kino: e kore e toe tetahi o ratou, tetahi ranei o to ratou mano, o o ratou taonga ranei; kahore ano  
<sup>12</sup> hoki he arikitanga i roto i a ratou. Kua tae mai te wa, kua tata te ra: kua te kaihoko mai e koa;  
<sup>13</sup> kua ano te kaihoko atu e pouri: no te mea ka pa te riri ki tona mano katoa. No te mea ahakoa i te ora raua, e kore te tangata i te utu e hoki atu ki te mea i hokona; mo ona mano katoa hoki te whakakitenga, e kore ratou e hoki; e kore ano tetahi e whakakaha i a ia i runga i tona he i ana mahi  
<sup>14</sup> i a ia e ora ana. Kua whakatangihia e ratou te tetere, a kua whakaritea nga mea katoa; heoi kahore  
<sup>15</sup> he tangata e haere ana ki te whawhai; no te mea kei runga toku riri i ona mano katoa. I waho ko te hoari, i roto ko te mate uruta, ko te hemokai. Ko te tangata i te parae ka mate i te hoari; ko te tangata i te pa ka pau i te hemokai, i te mate uruta.  
<sup>16</sup> Ko nga morehu o ratou e mawhiti, ka mawhiti, a ka noho ki nga maunga, ka rite ki nga  
<sup>17</sup> kukupa o nga awaawa, tumutumu katoa ratou i runga i tona he, i tona he. Ka ngoikore katoa nga  
<sup>18</sup> ringa, a ka ngonge nga turi ano he wai. Ka whitikiria ano he kakahu taratara ki a ratou, ka taupokina ratou e te wehi; he whakama kei nga mata katoa, a i runga i o ratou mahunga katoa ko

19 te pakira. Ka maka e ratou ta ratou hiriwa ki nga ara, ka waiho ta ratou koura hei mea poke; e kore ta ratou hiriwa, ta ratou koura, e tau hei whakaora i a ratou i te ra o to Ihowa riri; e kore e ngata o ratou wairua, e kore ano e ki o ratou puku i era: ko te tutukitanga waewae hoki tera i he ai

20 ratou. Na, ko te ataahua o tona whakapaipai, nana i whakawhiwhi ki te kororia: heoi hanga ana e ratou nga ahua o a ratou mea anuanu, o a ratou mea whakarihariha ki reira: no reira meinga iho

21 e ahau hei mea poke ki a ratou. Ka tukua ano e ahau hei taonga parakete ki te ringa o nga tangata

22 ke, ki nga tangata kino o te whenua, hei taonga parau; a ka whakapokea e ratou. Ka tahuri atu ano toku mata i a ratou, a ka whakapokea e ratou toku wahi ngaro; ka tae mai ano nga kaipahua ki reira whakapoke ai.

23 Hanga he mekameka: kua ki hoki te whenua i nga he whakaheke toto; ki tonu hoki te pa i

24 te tutu. Mo reira ka kawea mai e ahau nga tauwi kino rawa, a ka riro o ratou whare i a ratou;

25 ka mutu ano i ahau te whakapehapeha o te hunga kaha, ka whakapokea o ratou wahi tapu. Kei

26 te haere mai te whakangaromanga; ka rapua e ratou te rangimarie; heoi kahore noa iho. Ka tae mai te aitua ki runga ki te aitua, te rongo ki runga ki te rongo: a ka rapua e ratou ta te poropiti

27 whakakitenga; heoi ka whakakahoretia te ture i te tohunga, te whakaaro i nga kaumatua. Ka tangi te kingi, ko te ngaromanga hoki he kakahu mo te rangatira, ka ohooho ano nga ringa o te iwi o te whenua; ka rite ki o ratou ara taku e mea ai ki a ratou, kei a ratou ritenga ano hoki he ritenga mo taku whakawa i a ratou; a ka mohio rato u ko Ihowa ahau.

## Chapter 8

1 Na i te ono o nga tau, i te ono o nga marama, i te rima o nga ra o te marama, e noho ana ahau i roto i toku whare, me te noho ano nga kaumatua o Hura i toku aroaro, na ka tau iho te ringa o te

2 Ariki, o Ihowa, ki runga ki ahau i reira. Na ka titiro atu ahau, nana, ko tetahi ahua me te mea he ahi ki te titiro atu; i tona hope a whakararo, he ahi ki te titiro atu; i tona hope ano a whakarunga,

3 he wherikotanga ki te titiro atu, he mea rite te kara ki to te amipere. Na ka totoro mai te ahua o te ringa, a hopukia ana ahau e ia i tetahi o nga makawe o toku matenga: katahi ahau ka hapainga atu e te wairua ki waenganui o te whenua, o te rangi, a kawea ana ahau e ia ki Hiruharama, he whakakitenga hoki na te Atua, ki te kuwaha o te keti o to roto marae e anga ana ki te raki; kei reira

4 nei te nohoanga o te whakapakoko o te hae, e puta ai te hae. Na i reira ano te kororia o te Atua o

5 Iharaira, he pera me te kitenga i kitea e ahau ki te mania. Katahi ka mea ia ki ahau, E te tama a

te tangata, tena ra, anga atu ou kanohi ra te ara ki te raki. Heoi ka anga oku kanohi ra te ara ki te raki, nana, i te taha ki te raki, i te kuwaha o te aata, ko tenei whakapakoko o te hae i te tomokanga

<sup>6</sup> atu. A ka mea ia ki ahau, E te tama a te tangata, ka kite ranei koe i ta ratou e mea nei? ara i nga mea whakarihariha nui e mahia nei e te whare o Iharaira ki konei, e matara ai ahau i toku wahi tapu? otiia tera koe e kite ano i etahi atu mea whakarih ariha nunui.

<sup>7</sup> Na ka kawea ahau e ia ki te kuwaha o te marae; a, no taku tirohanga atu, nana, ko tetahi puta  
<sup>8</sup> i te taiepa. Katahi ia ka mea ki ahau, E te tama a te tangata, tena, keria te taiepa; a, i taku keringa

<sup>9</sup> i te taiepa, na ko tetahi kuwaha. A ka mea tera ki ahau, Haere ki roto, kia kite ai koe i nga mea  
<sup>10</sup> whakarihariha, i nga mea kino e mahia nei e ratou ki konei. Heoi haere ana ahau ki roto, a ka

kite; na, ko nga ahua katoa o nga mea ngokingoki, o nga kararehe whakarihariha, me nga whakapakoko katoa o te whare o Iharaira, he mea tuhituhi ki te taha o te whare a taka noa, taka

<sup>11</sup> noa. A i o ratou aroaro e tu ana e whitu tekau nga tangata, no nga kaumatua o te whare o Iharaira, a i waenganui o ratou e tu ana ko Iatania tama a Hapana, he tahu whakakakara i te ringa o tenei,

<sup>12</sup> o tenei; a i kake whakarunga te kakara o te kapua o te whakakakara. Katahi ia ka mea ki ahau, Kua kite ranei koe, e te tama a te tangata, i ta nga kaumatua o te whare o Iharaira e mea nei i te pouri, ia tangata, ia tangata, i ona whare whakaahua? e ki ana hoki ratou, E kore a Ihowa e kite i a tatou; kua mahue te whenua i a Ihowa.

<sup>13</sup> I mea mai ano ia ki ahau, Tera koe e kite ano i etahi atu mea whakarihariha nunui e mahia

<sup>14</sup> ana e ratou. Katahi ahau ka kawea e ia ki te kuwaha o te keti o te whare o Ihowa, e anga ana  
<sup>15</sup> whaka te raki; na ko nga wahine e noho ana i reira, e tangi ana ki a Tamutu. Katahi ia ka mea

ki ahau, Ka kite ranei koe i tenei, e te tama a te tangata? Tera koe e kite ano i etahi mea whakarihariha

<sup>16</sup> nunui atu i enei. Na ka kawea ahau e ia ki to roto marae o te whare o Ihowa; nana, i te kuwaha o te temepara o Ihowa, i te takiwa o te whakamahau, o te aata, ko etahi tangata, ki te whakaaro iho e rua tekau ma rima, ko o ratou tuara e anga ana ki te temepara o Ihowa, ko o ratou mata ki te

<sup>17</sup> rawhiti; e koropiko ana ratou ki te ra whaka te rawhiti. Katahi ka mea ia ki ahau, Ka kite ranei koe i tenei, e te tama a te tangata? He mea mama noa ake ianei tenei ki te whare o Hura kia mahia e ratou nga mea whakarihariha e mahia nei e ratou ki konei? na ratou hoki i kapi ai te whenua i te tutu, a hoki mai ana ratou ki te whakapataritari i ahau: nana, kei te whakapa ano ratou i te manga

<sup>18</sup> ki to ratou ihu. Na ka mahi ano ahau i runga i te weriweri; e kore toku kanohi e manawapa, e kore ano ahau e tohu; ahakoa nui to ratou reo e karanga ai ki oku taringa, e kore ahau e rongu ki a ratou.



## Chapter 9

<sup>1</sup> I karanga ano ia ki oku taringa, he nui te reo, i mea, Kia whakatata mai nga kaitirotiro o te pa, me tana patu whakangaro i te ringa o tenei, o tenei. <sup>2</sup> Na tokoono nga tangata e haere mai ana i te ara o to runga kuwaha e anga ana ki te raki, me tana patu whakamate ano i te ringa o tenei, o tenei: ko tetahi tangata ano i roto i a ratou he rinena tona kakahu, he pounamu ano na te kaituhituhi i tona taha. Na tomo ana ratou, tu ana i te taha o te aata parahi. <sup>3</sup> Na kua kake atu te kororia o te Atua o Iharaira i te kerupa, ko tona taunga nei tera, ki te paepae o te whare: na ka karanga tera ki te tangata, he rinena nei tona kakahu, ki tera kei tona taha nei te pounamu a te kaituhituhi; <sup>4</sup> A ka mea a Ihowa ki a ia, E tika na waenganui i te pa, na waenga i Hiruharama, ka whakapiri i tetahi tohu ki nga rae o nga tangata e aue ana, e tangi ana, mo nga mea whakarihariha katoa e mahia ana i waenganui o konei.

<sup>5</sup> I mea ano ia ki era atu, me te whakarongo ano ahau, E tika koutou na waenganui o te pa i muri i a ia patu ai: kua o koutou kanohi e manawapa, kua e tohu. <sup>6</sup> Patua kia ngaro te kaumatua, te taitama, te kotiro, me nga kohungahunga, me nga wahine; kua ia e tata ki tetahi tangata i a ia nei te tohu; me timata ki toku wahi tapu. Na kua timata ratou ki nga kaumatua i te aronga o te whare. <sup>7</sup> I mea ano ia ki a ratou, Whakapokea te whare, whakakiiia nga marae ki te tupapaku: haere koutou. Heoi haere ana ratou, na kei te patu i roto i te pa. <sup>8</sup> Na i a ratou e patu ana, a ka mahue ahau, ka tapapa ahau, ka karanga, ka mea, Aue, e te Ariki, e Ihowa! ka ngaro ianei i a koe nga morehu katoa o Iharaira, i te mea ka ringihia nei e koe tou weriweri ki runga ki Hiruharama? <sup>9</sup> Ano ra ko ia ki ahau, He nui rawa te he o te whare o Iharaira raua ko Hura, kua ki hoki te whenua i te toto, kua ki ano te pa i te whakaroiroinga o te whakawa: e mea ana hoki ratou, Kua mahue te whenua i a Ihowa, e kore a Ihowa e kite. <sup>10</sup> Na, ko ahau nei hoki, e kore toku kanohi e manawapa, e kore ahau e tohu; ka hoatu e ahau te utu o to ratou ara ki runga ki to ratou mahunga. <sup>11</sup> Na, ko te tangata i te kakahu rinena, tera kei tona taha ra te pounamu mangumangu, korerotia ana e ia taua mea, i ki ia, Kua oti i ahau tau i whakahau ra ki ahau.

## Chapter 10

<sup>1</sup> Katahi ahau ka titiro atu, nana, i te kikorangi, i runga ake i te mahunga o nga kerupima, ka kitea i runga i a ratou me te mea he kohatu hapaira, rite tonu ki te ahua o te torona ki te titiro. <sup>2</sup> Na ka korero ia ki te tangata i te kakahu rinena, i mea ia, Tomo atu ki waenganui o nga wira e hurihuri

na, ara ki raro i te kerupa, whakakiia ou ringa e rua ki nga waro ahi i waenganui i nga kerupima,  
ka rui ki runga ki te pa. Na haere ana ia me te titiro ano ahau. <sup>3</sup> Na i tu nga kerupima ki te taha ki  
matau o te whare, i te tomonga o taua tangata; ki tonu hoki to roto marae i te kapua. <sup>4</sup> Katahi ka  
kake te kororia o Ihowa i te kerupa, a ka tu i runga ake i te paepae o te whare; ki tonu iho te whare  
i te kapua, ki tonu hoki te marae i te kanapatanga o to Ihowa kororia. <sup>5</sup> Na, ko te haruru o nga  
parirau o nga kerupima, i rangona ki te marae ra ano o waho, me te mea ko te reo o te Atua Kaha  
Rawa ina korero. <sup>6</sup> Na, i tana whakahaunga i te tangata i te kakahu rinena, i tana meatanga, Tikina  
he ahi i waenganui o nga wira hurihuri, i waenganui o nga kerupima; katahi tera ka haere ki roto,  
ka tu ki te taha o tetahi wira. <sup>7</sup> Na ka totoro te ringa o te kerupa i waenganui o nga kerupima ki te  
ahi i waenganui o nga kerupima, hapainga ana e ia i reira, hoatu ana ki nga ringa o tera i te kakahu  
rinena. Na tangohia ana e tera, a puta atu ana.

<sup>8</sup> I kitea ano te ahua o te ringa tangata i nga kerupima i raro i o ratou parirau. <sup>9</sup> A i kite ahau,  
na e wha nga wira i te taha o nga kerupima, kotahi te wira i te taha o te kerupa kotahi, ko tetahi  
wira i te taha o tetahi atu kerupa. Na, ko te ahua o nga wira koia ano kei te kara o te kohatu perira.

<sup>10</sup> Na ki te tirohia atu aua mea, kotahi ano te ahua o ratou e wha, me te mea kotahi te wira i roto i  
te wira. <sup>11</sup> I to ratou haerenga i haere i o ratou taha e wha; kihai i tahuri i a ratou i haere ra, engari,  
ko te wahi i anga atu ai te matenga, whai tonu atu ratou ki reira; kihai i tahuri i a ratou i haere ra.

<sup>12</sup> Na, ko to ratou tinana katoa, ko o ratou tuara, ko o ratou ringa, ko o ratou parirau, a ko nga wira  
hoki, kapi tonu i te kanohi a taka noa, ara nga wira i a ratou tokowha. <sup>13</sup> Na ko nga wira ra, i  
karangatia i ahau ano e whakarongo ana, ko nga wira hurihuri. <sup>14</sup> Na e wha nga mata o tetahi, o  
tetahi; ko te mata tuatahi he mata kerupa, ko te mata tuarua he mata tangata, ko te tuatoru he mata  
raiona, ko te tuawha he mata ekara. <sup>15</sup> Na ka maiangi nga kerupima ki runga. Ko te mea ora tenei  
i kitea e ahau ki te awa, ki Kepara. <sup>16</sup> Na, i te haerenga o nga kerupima, i haere ano nga wira i to  
ratou taha, a ka ara ake nga parirau o nga kerupima, he mea kia maiangi ake ai i te whenua, kihai  
aua wira i tahuri ke i to ratou taha. <sup>17</sup> Ka tu era, ka tu enei; ka maiangi era ki runga, ka maiangi  
ano enei ki runga; no te mea i roto i a ratou te wairua o te mea ora. <sup>18</sup> Na kua riro atu te kororia o  
Ihowa i runga i te paepae o te whare, tau ana ki runga ki nga kerupima. <sup>19</sup> Na ka ara nga parirau  
o nga kerupima, maiangi ana i te whenua, i ahau e titiro atu ana i to ratou haerenga atu, me nga  
wira ano i to ratou taha: a tu ana ratou i te kuwaha o te keti ki te rawhiti o te whare o Ihowa; a i  
runga i a ratou te korori a o te Atua o Iharaira, i te taha ki runga. <sup>20</sup> Ko te mea ora tenei i kitea e

ahau i raro i te atua o Iharaira, i te awa, i Kepara; i mohio ano ahau he kerupima era. <sup>21</sup> E wha nga mata o tenei, o tenei, e wha ano nga parirau o tenei, o tenei; i raro ano i o ratou parirau ko te ahua o te ringa tangata. <sup>22</sup> Na, ko te ahua o o ratou mata ko aua mata i kitea ra e ahau ki te awa, ki Kepara, o ratou ahua me ratou ano; i tika tonu atu ratou tetahi, tetahi.

## Chapter 11

<sup>1</sup> I hapainga ake ano ahau e te wairua, a kawea ana e ia ki te keti ki te rawhiti o te whare o Ihowa, ki tera e anga ra ki te rawhiti. Na i te kuwaha o te keti e rua tekau ma rima nga tangata; a i kite ahau i roto i a ratou i a Iaatania tama a Aturu raua ko Peratia tama a Penaia, he rangatira no te iwi. <sup>2</sup> Na ka mea ia ki ahau, E te tama a te tangata, ko nga tangata enei e whakaaro ana i te kino, e whakatakoto ana i te tikanga he i roto i tenei pa: <sup>3</sup> E ki ana, kahore ano i tata te wa e hanga whare ai: ko tenei pa te kohua, ko tatou te kikokiko. <sup>4</sup> Mo reira poropititia te he mo ratou; poropititia, e te tama a te tangata. <sup>5</sup> Na ka tau te wairua o Ihowa ki ahau, a ka mea ki ahau, Ki atu, Ko te kupu tenei a Ihowa, Ko ta koutou korero tenei, e te whare o Iharaira: na, ko na mea e puta ake ana i o koutou wairua, mohio tonu ahau. <sup>6</sup> Kua whakatokomahatia e koutou a koutou tupapaku ki tenei pa, kua whakakiiia ano e koutou ona huarahi ki te tupapaku. <sup>7</sup> Mo reira ko te kupu tenei a te Ariki, a Ihowa, Ko a koutou tupapaku kua hinga nei i a koutou ki waenganui o tenei pa, ko ratou te kikokiko, ko tenei pa te kohua: ko koutou ia ka whakaputaina atu i waenganui o konei. <sup>8</sup> I wehi koutou i te hoari; ka kawea mai ano e ahau te hoari ki a koutou, e ai ta te Ariki, ta Ihowa. <sup>9</sup> Ka whakaputaina atu ano koutou e ahau i waenganui o konei, ka hoatu ki te ringa o te tangata ke, ka mahia ano e ahau he whakawa i waenganui i a koutou. <sup>10</sup> Ka hinga koutou i te hoari; ka whakawakia koutou e ahau ki te rohe o Iharaira, a ka mohio koutou ko Ihowa, ahau. <sup>11</sup> E kore tenei pa e waiho hei kohua mo koutou, e kore ano hoki koutou e waiho hei kikokiko mo roto; ka whakawakia koutou e ahau ki te rohe o Iharaira; <sup>12</sup> A ka mohio koutou ko Ihowa ahau; kihai hoki koutou i haere i runga i aku tikanga, a kihai i mahia e koutou aku whakaritenga, engari i rite tonu a koutou mahi ki nga ritenga a nga iwi i tetahi taha, i tetahi taha o koutou. <sup>13</sup> Na i ahau e poropiti ana, ka mate a Peratia tama a Penaia. Katahi ahau ka tapapa ki raro, he nui toku reo ki te karanga, i mea ahau, Aue, e te Ariki, e Ihowa! ka poto rawa ranei i a koe nga morehu o Iharaira?

14 I puta mai ano te kupu a Ihowa ki ahau, i mea ia, 15 E te tama a te tangata, ko ou tuakana, ko ou teina, ko ou whanaunga, ko te whare katoa ano o Iharaira, rupeke, rupeke, ko ratou enei, kua ki mai nei nga tangata o Hiruharama ki a ratou, kia matara atu i a Ihowa; kua homai tenei whenua

16 ki a matou hei kainga tupu: Mo reira me ki atu, Ko te kupu tenei a te Ariki, a Ihowa, Ahakoa i maka atu ratou e ahau ki tawhiti, ki roto ki nga iwi, ahakoa i whakamararatia ratou e ahau ki nga whenua, ka ai ano ia ahau hei wahi tapu mo ratou i nga whenua e tae ai ratou mo te wa nohinohi

17 nei. Mo reira me ki atu, Ko te kupu tenei a te Ariki, a Ihowa, Ka kohikohia koutou e ahau i roto i nga iwi, ka huihuia ano i nga whenua i whakamararatia ai koutou, ka hoatu ano e ahau te oneone

18 o Iharaira ki a koutou. Ka tae ano ratou ki reira, ka whakakahoretia ano e ratou nga mea

19 whakarihariha katoa o reira, me nga mea anuanu o reira. Ka hoatu ano e ahau he ngakau kotahi ki a ratou, ka hoatu ano he wairua hou ki a koutou; ka tangohia ano e ahau te ngakau kohatu i o

20 ratou kikokiko, a ka hoatu he ngakau kikokiko ki a ratou: Kia haere ai ratou i runga i aku tikanga, kia puritia ai aku whakaritenga, mahia iho: a waiho tonu iho ratou hei iwi maku, ko ahau ano hei

21 Atua mo ratou. Ko te hunga ia kei te whai nei o ratou ngakau i te ngakau o a ratou mea whakarihariha, o a ratou mea anuanu, ka utua e ahau o ratou ara ki runga ki o ratou mahunga, e ai ta te Ariki, ta Ihowa.

22 Katahi ka ara nga parirau o nga kerupima, a ko nga wira i to ratou taha; i runga ano hoki te

23 kororia o te Atua o Iharaira i a ratou, i te taha ki runga. Na ka kake te kororia o Ihowa i roto i

24 te pa, tu rawa ki runga ki te maunga ki te taha ki te rawhiti o te pa. Muri iho ka hapainga ahau e te wairua, he mea i roto i te whakakitenga, na te wairua o te Atua, ki Karari, ki nga whakarau.

25 Heoi ka kake atu i ahau te kitenga i kitea e ahau. Na korerotia ana e ahau ki nga whakarau nga mea katoa i whakakitea ki ahau e Ihowa.

## Chapter 12

1 I puta mai ano te kupu a Ihowa ki ahau, i mea, 2 E te tama a te tangata, kei te noho koe i waenganui i te whare whakakeke, he kanohi nei o ratou hei titiro, heoi kahore e titiro, he taringa o

3 ratou e rongoi ai, heoi kahore e rongoi; no te mea he whare whakakeke ratou. Mo reira whakapaingia etahi mea mau, e te tama a te tangata, mo te heke, ka heke i te awatea i ta ratou tirohanga; me heke atu i tou wahi ki tetahi atu wahi i ta ratou tirohanga; tera pea ratou e mahara iho, ahakoa he whare

4 whakakeke ratou. Whakaputaina mai ano au mea ki waho i te awatea i ta ratou tirohanga, kia rite

ki nga mea a te heke: me haere atu koe i te ahiahi i ta ratou tirohanga, kia rite ki te haerenga o te  
<sup>5</sup> heke. Pokaia e koe te taiepa i ta ratou tirohanga, a maua atu tau kawenga ma reira. <sup>6</sup> I a ratou e  
titiro ana, amohia e koe i runga i tou pokohiwi, me mau atu i te pouri; ko tou mata hipoki rawa, kei  
<sup>7</sup> kite koe i te whenua; no te mea kua whakaturia koe e ahau hei tohu ki te whare o Iharaira. Na  
mahia ana e ahau nga mea i whakahaua mai ai ahau; whakaputaina ana e ahau aku mea i te awatea,  
nga mea a te heke, a i te ahiahi ka pokaia e ahau te taiepa he mea mea na toku ringa; i whakaputaina  
<sup>8</sup> e ahau i te pouri, amohia ana e ahau i runga i toku pokohiwi i ta ratou tirohanga. Na i te ata ka  
<sup>9</sup> puta mai te kupu a Ihowa ki ahau; i mea ia, E te tama a te tangata, kihai ianei te whare o Iharaira,  
te whare whakakeke, i mea ki a koe, E aha ana koe? <sup>10</sup> Ki atu ki a ratou, Ko te kupu tenei a te  
Ariki, a Ihowa; Mo te rangatira i Hiruharama tenei pikaunga, mo te whare katoa o Iharaira e noho  
<sup>11</sup> nei ratou i reira. Ki atu, hei tohu ahau ki a koutou; ka penei i taku i mea nei, ka peratia ano ki a  
<sup>12</sup> ratou; ka heke atu ratou, ka riro i te whakarau. Ko te rangatira i roto i a ratou ka amo te pokohiwi  
i te pouri, ka haere atu; ka pokaia te taiepa hei whakaputanga atu; ko tona mata hipoki rawa, no te  
<sup>13</sup> mea e kore ia e kite i te whenua ki ona kanohi. Ka taupokina ano ia e ahau ki taku kupenga, ka  
mau i taku rore; ka kawea ano ia e ahau ki Papurona, ki te whenua o nga Karari; otiia e kore ia e  
<sup>14</sup> kite i reira, ahakoa ka mate ia ki reira. A ka titaritaria atu e ahau ki nga hau katoa te hunga katoa  
i tetahi taha ona, i tetahi taha, hei awihina i a ia, ratou ko ona ropu katoa; ka maunu ano i ahau te  
<sup>15</sup> hoari hei whai i a ratou. A ka mohio ratou ko Ihowa ahau, ina whakamararatia ratou e ahau ki  
<sup>16</sup> roto ki nga tauwiwi, ina titaritaria ki nga whenua. Ka whakatoea ano ia etahi o ratou e ahau, he  
hunga torutoru, i te hoari, i te hemokai, i te mate uruta; kia korero ai ratou i a ratou mea  
whakarihariha katoa i roto i nga iwi ka haere atu nei ratou ki reira, a ka mohio ratou ko Ihowa ahau.  
<sup>17</sup> I puta mai ano te kupu a Ihowa ki ahau, i mea, <sup>18</sup> E te tama a te tangata, e wiri koe ina kai  
<sup>19</sup> i tau taro, inumia hoki tou wai i runga i te ohooho, i te manukanuka; Ki atu hoki ki te iwi o te  
whenua, Ko te kupu tenei a te Ariki, a Ihowa mo nga tangata o Hiruharama, mo te oneone o Iharaira:  
Ka kainga e ratou ta ratou taro i runga i te manukanuka, ka inumia hoki to ratou wai i runga i te  
miharo, he mea kia ta koto kau ai tona whenua i ona mea maha, mo te tutu o nga tangata katoa e  
<sup>20</sup> noho ana i reira. Na, ko nga pa e nohoia ana, ka waiho hei koraha, ka uruatuatia ano te whenua;  
a ka mohio koutou ko Ihowa ahau.  
<sup>21</sup> I puta mai ano te kupu a Ihowa ki ahau, i mea: <sup>22</sup> E te tama a te tangata, he aha tena  
whakatauki a koutou i te whenua o Iharaira, e mea na, Ka roa nei nga ra, kua kore ano he kitenga?  
<sup>23</sup> Mo reira ki atu ki a ratou, Ko te kupu tenei a te Ariki, a Ihowa, Ka mutu i ahau tenei whakatauki,  
e kore ano e whakataukitia e ratou a muri ake nei i roto i a Iharaira; mea atu ia ki a ratou, Ka tata

nga ra, me te meatanga ano o nga kitenga kat oa. <sup>24</sup> No te mea i muri nei kahore he kitenga teka, kahore he poropititanga tinihanga i roto i te whare o Iharaira. <sup>25</sup> Ko Ihowa hoki ahau; ka korero ahau, a ko te kupu e korerotia e ahau, ka oti; e kore e kumea kia roa i muri nei: no te mea i o koutou ra nei, e te whare whakakeke, ka korerotia e ahau, ka mahia ano te kupu, e ai ta te Ariki, ta Ihowa.

<sup>26</sup> I puta mai ano te kupu a Ihowa ki ahau, i mea, <sup>27</sup> E te tama a te tangata, nana, e ki ana te whare o Iharaira, Mo nga ra maha te kitenga e kitea nei e ia, ko nga wa i tawhiti rawa tana e poropiti nei.

<sup>28</sup> Mo reira ki atu ki a ratou, Ko te kupu tenei a te Ariki, a Ihowa, E kore tetahi o aku kupu e kumea kia roa a muri nei; engari ko te kupu e korerotia e ahau ka oti, e ai ta te ariki, ta Ihowa.

### Chapter 13

<sup>1</sup> I puta mai ano te kupu a Ihowa ki ahau, i mea, <sup>2</sup> E te tama a te tangata, poropititia he he mo nga poropiti o Iharaira e poropiti nei, mea atu hoki ki te hunga no o ratou ngakau ta ratou e poropiti nei, Whakarongo ki te kupu a Ihowa. <sup>3</sup> Ko te kupu tenei a te ariki, a Ihowa; Aue, te mate mo nga poropiti wairangi, e whai nei i o ratou wairua ake, a kihai i kite i tetahi mea! <sup>4</sup> I rite tonu ou poropiti, e Iharaira, ki nga pokiha i nga wahi koraha. <sup>5</sup> Kihai koutou i haere ki nga wahi pakaru, kihai ano i hanga i te taiepa mo te whare o Iharaira, hei turanga i te taturanga i te ra o Ihowa. <sup>6</sup> He kitenga teka, he tuaahu horihori ta ratou e ki ra, E ai ta Ihowa; ehara ratou i a Ihowa i unga: a kua meinga e ratou te tangata kia tumanako, tera e mana te kupu. <sup>7</sup> He teka ianei he kitenga teka ta koutou kitenga, he horihori te tuaahu i korero ai koutou, i ki ai, E ki ana a Ihowa; a kihai nei ahau i korero?

<sup>8</sup> Mo reira ko te kupu tenei a te Ariki, a Ihowa, Kua korero na koutou i te teka, kua kite i te horihori, mo reira he hoariri tenei ahau mo koutou, e ai ta te Ariki, ta Ihowa. <sup>9</sup> Ka pa ano toku ringa ki nga poropiti he horihori nei ta ratou kitenga, ki nga tohunga tuaahu teka; e kore ratou e noho ki te runanga o taku iwi, e kore e tuhituhia ki te tuhituhinga o te whare o Iharaira, e kore ano e tae ki te whenua o Iharaira; a ka mohio koutou ko te Ariki ahau, ko Ihowa.

<sup>10</sup> Mo ratou, ae ra, mo ratou i whakapohehe i taku iwi, i mea, Ka mau te rongo; i te mea kahore he maunga rongo; na ko tetahi kei te hanga i te pakitara, a ko ratou hei pani ki te paru kihai i konatunatua. <sup>11</sup> Mea atu ki nga kaipani o te paru kihai i konatunatua, tera e hinga; ka puta te ua, he waipuke; ka taka iho ano koutou, e nga nganga o te whatu; ka wahia ano hoki e te hau, e te paroro. <sup>12</sup> Nana, ka hinga te pakitara, kahore ranei he ki ki a koutou, kei hea te paninga i pania ra

<sup>13</sup>  
 e koutou? Mo reira ko te kupu tenei a te Ariki, a Ihowa; Ina, ka wahia e ahau ki te hau, ki te paroro, i toku weriweri; ka puta ano te ua, te waipuke, i toku riri, me nga ngangana ano o te whatu i

<sup>14</sup>  
 toku weriweri, hei whakapoto rawa. Ka paparu pera i ahau te pakitara i pania ra e koutou ki te paru kihai i konatunatua, pa tonu iho ki te whenua, ka whakakitea ano ona turanga; a ka hinga, ka

<sup>15</sup>  
 poto ano koutou ki waenganui o taua pakitara; a ka mohio koutou ko Ihowa ahau. Ka whakapaua peratia e ahau toku weriweri ki te pakitara, ki te hunga ano nana i pani ki te paru kihai i konatunatua;

<sup>16</sup>  
 ka mea hoki ahau ki a koutou, kua kore te pakitara, kua kore ano te hunga nana i pani; Ara nga poropiti o Iharaira mo Hiruharama nei ta ratou e poropiti ai, e kite nei i te kitenga mona, i te rongong mau, i te mea kahore he rongong mau, e ai ta te Ariki, ta Ihowa.

<sup>17</sup>  
 Na ko koe, e te tama a te tangata, anga atu tou mata ki nga tamahine a tou iwi e poropiti nei,

<sup>18</sup>  
 he mea no o ratou ngakau ake; poropititia ano he he mo ratou, Mea atu, Ko te kupu tenei a te Ariki, a Ihowa; Aue, te mate mo nga wahine e tuitui urunga ana ki nga tuke katoa; e hanga arai ana mo nga mahunga o te roa, o te poto, hei whai wairua! Ka whai ranei koutou i nga wairua o taku

<sup>19</sup>  
 iwi? ka whakaora ranei i etahi hei wairua ma koutou? Kua whakapokea ahau e koutou i waenga i taku iwi hei utu mo nga kutanga parei, mo nga kongakonga taro, hei whakamate i nga wairua e kore e tika kia whakamatea, hei whakaora i nga wairua e kore e tika kia ora, i a koutou ka korero

<sup>20</sup>  
 teka na ki taku iwi e whakarongo nei ki a koutou korero teka. Mo reira ko te kupu tenei a te Ariki, a Ihowa; Nana, e he ana ahau ki o koutou urunga i whaia ai nga wairua e koutou i reira, i meinga ai kia rere, ka haea atu ano e ahau i o koutou ringa; ka tukua ano e ahau nga wairua kia

<sup>21</sup>  
 haere, a koutou wairua e whai na, e mea na kia rere. Ka haea atu ano e ahau o koutou arai, ka whakaorangia hoki taku iwi i roto i o koutou ringa; e kore ano e waiho i o koutou ringa hei whainga

<sup>22</sup>  
 atu; a ka mohio koutou ko Ihowa ahau. No te mea kua whakapouritia e koutou ki te kupu teka te ngakau o te tangata tika, kihai nei i whakapouritia e ahau; a whakaungia ana nga ringa o te tangata

<sup>23</sup>  
 kino, i kore ai e tahuri mai i tona ara kino, kia ora ai: Mo reira e kore koutou e kite i te horihori a muri ake nei, i nga tikanga ranei ki nga tuaahu: a ka whakaorangia hoki e ahau taku iwi i roto i o koutou ringa; a ka mohio koutou ko Ihowa ahau.

## Chapter 14

<sup>1</sup>  
 Katahi ka haere mai etahi o nga kaumatua o Iharaira ki ahau, noho ana i toku aroaro. Na ka

<sup>2</sup>  
 puta mai te kupu a Ihowa ki ahau: i mea ia, E te tama a te tangata, kua oti i enei tangata a ratou whakapakoko te whakaara ki o ratou ngakau, kua waiho e ratou te tutukitanga waewae, to ratou

<sup>3</sup>  
 whakapakoko te whakaara ki o ratou ngakau, kua waiho e ratou te tutukitanga waewae, to ratou

he, ki mua i o ratou mata; kia rapua koia e ratou he tikanga i ahau? <sup>4</sup> Mo reira korero ki a ratou, mea atu ki a ratou, Ko te kupu tenei a te Ariki, a Ihowa: Ko te tangata o te whare o Iharaira e whakaara ana i ana whakapakoko ki tona ngakau, e whakatakoto ana i te tutukitanga waewae, i tona he, ki mua i tona mata, a e haere mai ana ki te poropiti; ko taku, ko ta Ihowa, e whakahoki ai

<sup>5</sup> ki taua tangata i haere mai ra, ka rite ki te maha o ana whakapakoko; Kia hopukia ai te whare o Iharaira i roto i o ratou ngakau; kua tangata ke hoki ratou katoa ki ahau, na a ratou whakapakoko

<sup>6</sup> hoki. Mo reira mea atu ki te whare o Iharaira, Ko te kupu tenei a te Ariki, a Ihowa, Ripeneta, tahuri mai i a koutou whakapakoko; tahuri mai ano o koutou mata i a koutou mea whakarihariha

<sup>7</sup> katoa. Na, ko te tangata o te whare o Iharaira, ko te tautangata ano e noho ana i roto i a Iharaira, e whakatangata ke ana ki ahau, e whakaara ana i ana whakapakoko ki tona ngakau, e whakatakoto ana i te tutukitanga waewae, i tona he, ki mua i tona mata, a e haere mai ana ki te poropiti ki te rapu

<sup>8</sup> i taku tikanga i a ia; maku ake ano, ma Ihowa, e whakahoki kupu ki a ia. Ka u atu hoki toku mata ki taua tangata, ka meinga ia e ahau he miharotanga hei tohu, hei whakatauki, ka hatepea atu ano

<sup>9</sup> ia e ahau i roto i taku iwi; a ka mohio koutou ko Ihowa ahau. Na, ki te he te poropiti i tana korerotanga i tetahi kupu, naku, na Ihowa, taua poropiti i he ai, ka pa toku ringa ki a ia, a ka ngaro

<sup>10</sup> ia i ahau i roto i taku iwi, i a Iharaira. Ka waha ano e ratou to ratou he; ko te he o te poropiti ka

<sup>11</sup> rite ki te he o te tangata e rapu tikanga ana i a ia: He mea kia kore ai te whare o Iharaira e kotiti atu i te whai i ahau a muri ake nei, kei poke ano ratou a muri ake nei i o ratou pokanga ketanga katoa; engari kia waiho ai ratou hei iwi maku, ko ahau hoki hei Atua mo ratou, e ai ta te Ariki, ta Ihowa.

<sup>12</sup> I puta mai ano te kupu a Ihowa ki ahau, i mea, <sup>13</sup> E te tama a te tangata, ki te hara te whenua ki ahau, ki te nui rawa te he, a ka totoro toku ringa ki reira, a ka whati i ahau tona tokotoko, te taro; ka unga ano e ahau te hemokai ki reira, ka hatepea ano e ahau te tangata me te kararehe o reir a:

<sup>14</sup> Ahakoa ko enei tangata tokotoru, ko Noa, ko Raniera, ko Hopa, i reira, ko o ratou wairua ake e

<sup>15</sup> ora i a ratou i to ratou tika, e ai ta te Ariki, ta Ihowa. Ki te meinga e ahau he kirehe kino kia tika na waenganui i te whenua, a ka kore i a ratou, ka whakamotitia, a kahore he tangata e haere ana i

<sup>16</sup> reira i te wehi o nga kirehe: Ahakoa ko enei tangata tokotoru i reira, e ora ana ahau, e ai ta te Ariki, ta Ihowa, e kore e ora nga tama, nga tamahine, i a ratou; ko ratou anake e ora, ka whakamotitia

<sup>17</sup> ia te whenua. Ki te kawea atu ranei e ahau te hoari ki runga ki taua whenua, a ka mea, E tika, e te hoari, na waenganui i te whenua; a ka hatepea atu e ahau te tangata me te kararehe o reira:

<sup>18</sup> Ahakoa ko enei tangata tokotoru i reira, e ora ana ahau, e ai ta te Ariki, ta Ihowa, e kore e ora

<sup>19</sup> nga tama, nga tamahine i a ratou; ko ratou anake e ora. Ki te tukua ranei e ahau te mate uruta ki taua whenua, a ka ringihia e ahau toku weriweri ki runga ki taua wahi, he mea toto, kia hatepea



<sup>20</sup>  
 atu ai te tangata me te kararehe o reira: Ahakoa ko Noa, ko Raniera, ko Hopa, i reira, e ora ana ahau, e ai ta te Ariki, ta Ihowa, e kore te tama, te tamahine ranei e ora i a ratou; ko ratou anake e  
<sup>21</sup>  
 ora i to ratou tika. No te mea ko te kupu tenei a te Ariki, a Ihowa, Tera noa ake ina tukua e ahau aku whakawa kino e wha te hoari, te hemokai, te kirehe kino, te mate uruta ki Hiruharama, hei  
<sup>22</sup>  
 hatepe atu i te tangata, i te kararehe o reira. Otiia, nana, ka toe etahi morehu ki reira, a ka whakaputaina he tama, he tamahine: nana, ka puta ratou ki a koutou, a ka kite koutou i to ratou ara, i a ratou mahi: ka whai whakamarietanga ano koutou mo te kino i kawea e ahau ki Hiruharama,  
<sup>23</sup>  
 ara mo nga mea katoa i kawea e ahau ki taua wahi. Ka whai whakamarietanga ano koutou i a ratou, ina kite koutou i to ratou ara, i a ratou mahi: a ka mohio koutou, na, ko taku mahinga i nga mea katoa i mahia e ahau ki reira, ehara i te mea kore take, e ai ta te Ariki, ta Ihowa.

## Chapter 15

<sup>1</sup> I puta mai ano te kupu a Ihowa ki ahau, i mea, <sup>2</sup> E te tama a te tangata, he aha te nuinga ake o te waina i nga rakau katoa, o te manga waina i roto i nga rakau o te ngahere? <sup>3</sup> E tangohia mai ranei tetahi wahi o reira, hei mahinga i tetahi mahi? e tangohia ranei tetahi titi i reira hei whakairi mo tetahi mea? <sup>4</sup> Nana, e maka ana ki te ahi hei wahie; pau ake i te ahi ona pito e rua, wera iho a waenganui; he pai ranei mo tetahi mahi? <sup>5</sup> Nana, i tona toitutanga, kihai i pai mo tetahi mahi; katahi ka he rawa mo tetahi mahi a muri ake nei, i te mea ka kaia nei e te ahi, a ka wera? <sup>6</sup> Mo reira ko te kupu tenei a te Ariki, a Ihowa, Ka rite ki taua rakau, ki te waina i roto i nga rakau o te ngahere, i tukua ra e ahau ki te ahi hei wahie, ka pera taku tukunga atu i nga tangata o Hiruharama. <sup>7</sup> Ka u atu ano toku mata hei he mo ratou. Ka puta mai ratou i te ahi, otiia ma te ahi ano ratou e kai: a ka mohio koutou ko Ihowa ahau, ina u atu toku mata ki te he mo ratou. <sup>8</sup> Ka meinga ano e ahau te whenua hei ururua mo te he i he ai ratou, e ai ta te Ariki, ta Ihowa.

## Chapter 16

<sup>1</sup> I puta mai ano te kupu a Ihowa ki ahau, i mea, <sup>2</sup> E te tama a te tangata, meinga a Hiruharama kia mohio ki ana mea whakarihariha, <sup>3</sup> Mea atu, Ko te kupu tenei a te Ariki, a Ihowa, ki Hiruharama: Ko tou take, ko tou wahi i whanau ai koe, ko te whenua o te Kanaani: ko te Amori tou papa, a ko

<sup>4</sup>  
 tou whaea he Hiti. Na, ko tou whanautanga, i te ra i whanau ai koe, kihai tou uho i tapahia, kihai ano koe i horoia ki te wai kia ma ai; kihai rawa ano koe i meatia ki te tote, kihai rawa i takaia.

<sup>5</sup>  
 Kihai tetahi kanohi i aroha ki a koe, kihai i meatia ki a koe tetahi o enei mea, he mahi tohu ki a koe; heoi he mea maka atu koe ki te mata o te parae, he mea whakarihariha hoki tou tinana i te ra i whanau ai koe.

<sup>6</sup>  
 Na, i toku haerenga atu ma tou taha, a ka kite ahau i a koe e oke ana i roto i ou toto, ka mea atu ahau ki a koe, Ahakoa kei roto koe i ou toto, e ora; ae ra, i mea atu ahau ki a koe, Ahakoa kei

<sup>7</sup>  
 roto koe i ou toto, e ora. I meinga ano koe e ahau kia tini, kia rite ki nga tupu o te mara; heoi kua tokomaha koe, kua nui, kua tae ano koe ki nga whakapaipai ataahua; kua pupuku ou u kua tupu ou

<sup>8</sup>  
 makawe; i mua hoki e noho tahanga ana koe, kahore he kakahu. Na, i toku haerenga atu i tou taha, ka kite ahau i a koe, na he wa no te aroha te wa i a koe; na hipokina iho e ahau te remu o toku ki runga ki a koe, uhia ana koe e ahau, i a koe e noho tahanga ana; ae ra, oati ana ahau ki a koe,

<sup>9</sup>  
 uru ana taua ki te kawenata, e ai ta te Ariki, ta Ihowa, a riro mai ana koe i ahau. Katahi ka horoia koe e ahau ki te wai; ae ra, ata horoia atu ana e ahau ou toto i a koe; a pania ana koe e ahau ki te

<sup>10</sup>  
 hinu. Ko taku kakahu mou he mea whakairo; ko aku hu mou he hiako kekeno; ko taku whitiki

<sup>11</sup>  
 mou he rinena pai; hipokina ana koe e ahau ki te hiraka. He mea whakapaipai ano koe naku ki

<sup>12</sup>  
 te whakapaipai, whakanohoia ana e ahau he poroporo ki ou ringa, he hei ki tou kaki. I kuhua ano e ahau he mowhiti ki tou ihu, he whakakai ki ou taringa, he karauna ataahua ki tou mahunga.

<sup>13</sup>  
 Heoi kua oti koe te whakapaipai ki te koura, ki te hiriwa; he rinena pai ano hoki tou kakahu, he hiraka, he mea whakairo hoki; i kai koe i te paraoa pai, i te honi, i te hinu; nui atu tou ataahua, kake

<sup>14</sup>  
 ana koe hei kingitanga. Paku ana tou ingoa ki nga iwi, he ataahua nou; i tino pai rawa hoki, he honore hoki noku i tukua atu e ahau ki a koe, e ai ta te Ariki, ta Ihowa.

<sup>15</sup>  
 Otiia whakawhirinaki ana koe ki tou ataahua, kairau ana koe, he whakaaro hoki nou ki tou

<sup>16</sup>  
 ingoa, ringihia ana e koe ou kairautanga ki te tangata e haere atu ana i tou taha; i a ia tena. I tikina atu ano e koe etahi o ou kakahu, a mahia ana e koe au wahi tiketike, kotingotingo rawa, hei

<sup>17</sup>  
 kairautanga mou: e kore he pena e puta a mua, e kore ano e pena. I tikina ano e koe au mea whakapaipai, he koura naku, he hiriwa naku, ko aku i hoatu ra ki a koe, a hanga ana e koe etahi

<sup>18</sup>  
 whakapakoko tane mau, hei kairautanga mou. I tikina ano e koe ou kakahu whakairo, hei hipoki

<sup>19</sup>  
 mo ratou, hoatu ana e koe taku hinu, me taku whakakakara ki to ratou aroaro. Ko taku kai hoki, i hoatu e ahau ki a koe, ko te paraoa pai, ko te hinu, ko te honi i whangaia ai koe e ahau, hoatu ana

<sup>20</sup>  
 ano tera e koe ki to ratou aroaro hei kakara reka, a koia ano tera; e ai ta te Ariki, ta Ihowa. I

tikina ano e koe au tama me au tamahine, a taua whanau, patua iho e koe hei kai ma ratou. He iti  
 ianei ou kairautanga, <sup>21</sup> I patua ai e koe aku tamariki, i tukua atu ai ratou, i meatia ratou kia haere  
 na roto i te ahi ki a ratou? <sup>22</sup> Na i au mea whakarihariha katoa, i ou kairautanga, kihai koe i mahara  
 ki nga ra o tou tamahinetanga, i a koe e noho tahanga ana, kahore he kakahu, i a koe i oke ra i roto  
 i ou toto. <sup>23</sup> Na i muri i tou he katoa; aue, te mate mou, aue, te mate mou! e ai ta te Ariki, ta Ihowa,  
<sup>24</sup> Kei te hanga koe i te whare tairanga mou, mahia ana e koe he wahi tiketike mou i nga waharoa  
<sup>25</sup> katoa. Kua hanga ano e koe tau wahi tiketike ki nga ahunga katoa o nga ara, meinga ana e koe  
 tou ataahua kia whakariharihangia, whewhera tonu ou waewae ki nga tangata e haere ana i tou taha,  
 whakamaha ana e koe tou kairautanga. <sup>26</sup> Kua kairau ano koe ki nga Ihipiana, ki ou hoa tata, he  
 hunga kikokiko nui; whakamaha ana e koe tou kairautanga, hei whakapataritari i ahau. <sup>27</sup> Na reira,  
 nana, kua totoro atu toku ringa ki runga ki a koe, kua whakaititia ano e ahau nga kai i rite mau, a  
 hoatu ana koe e ahau ki ta ou hoariri i pai ai, ki nga tamahine a nga Pirihitini, e whakama nei ki  
 tou ara puremu. <sup>28</sup> I kairau ano koe ki nga Ahiriana, he kore hoki nou e ngata; ina, kairau ana koe  
 ki a ratou, otiia kihai koe i ngata. <sup>29</sup> Kua whakamaha ano e koe ou kairautanga ki te whenua o  
 Kanaana a Karari atu ana; heoi kihai ano i ngata i tenei. <sup>30</sup> Ano te ngoikore o tou ngakau, e ai ta  
 te Ariki, ta Ihowa, i tau mahinga i enei mea katoa, he mahi na te wahine kairau, na te mea taikaha;  
<sup>31</sup> I tau hanganga i tou whare tairanga ki te ahunga mai o nga ara katoa, i tau mahinga i tau wahi  
 tiketike ki nga waharoa katoa; kihai tau i rite ki ta te wahine kairau, e whakahaweana hoki koe  
 ki te utu; <sup>32</sup> He wahine moe hoa, i puremu! e tuku mai ana i nga tangata ke ehara nei i te hoa nona!  
<sup>33</sup> E hoatu ana e ratou he mea ki nga wahine kairau katoa: ko koe ia e hoatu ana i ou taonga ki te  
 hunga katoa e hiahia ana ki a koe, a utua ana ratou e koe, he mea kia haere mai ai ratou ki a koe i  
 nga taha katoa ki ou kairautanga. <sup>34</sup> He rere ke hoki tau i ta etahi wahine i ou kairautanga, ina  
 kahore tetahi e aru ana i a koe, kairau ai: i te mea hoki ka hoatu e koe he utu, a kahore he utu e  
 homai ki a koe, na ka rere ke tau.  
<sup>35</sup> Mo reira whakarongo, e te wahine kairau, ki te kupu a Ihowa. <sup>36</sup> Ko te kupu tenei a te Ariki,  
 a Ihowa. Na kua ringihia atu na tou weriweri, kua kitea ano koe e noho tahanga ana i ou kairautanga  
 ki te hunga i hiahia ki a koe; a he mea ki au whakapakoko whakarihariha katoa, ki te toto hoki o  
 au tamariki i hoatu na e koe ki a ratou; <sup>37</sup> Mo reira ka huihuia katoatia e ahau te hunga katoa i  
 hiahia ki a koe, au i ahuaieka ai, ratou ko te hunga katoa i aroha ai koe, ko te hunga katoa hoki i  
 kino ai koe; ina, ka huihuia ratou e ahau ki a koe i tetahi taha, i tetahi taha ka whakakite a ano koe  
 e ahau ki a ratou e noho tahanga ana, kia kite ai ratou i ou wahi katoa e takoto kau ana. <sup>38</sup> Na ko

taku whakawa i a koe ka rite ki te whakawa o nga wahine kua takahi i te ture marena, o nga wahine

39

kua whakaheke toto; a ka hoatu e ahau ki a koe te toto o te weriweri, o te hae. Ka tukua ano koe e ahau ki to ratou ringa, a ka whakahoroa e ratou tou whare tairanga, ka wahia au wahi tiketike; ka huia atu ano ou kakahu, ka tangohia au mea whakapaipai, a ka waiho koe kia noho tahanga ana,

40

kahore he kakahu. Ka kawea mai ano e ratou he ropu hei whawhai ki a koe, a ka akina koe ki

41

te kohatu, ka werohia ki a ratou hoari, puta rawa. Ka tahuna ano e ratou ou whare ki te ahi, ka mahia ano he whakaritenga ki a koe i te tirohanga a nga wahine tokomaha; a ka meinga e ahau kia

42

mutu ou kairautanga, e kore ano he utu e hoatu e koe a muri ake nei. Heoi ka ngata i kona toku riri ki a koe, ka tahuri atu toku hae i a koe, a ka ata noho ahau, e kore ano e riri ki a koe a muri ake

43

nei. No te mea kihai koe i mahara ki nga ra o tou taitamahinetanga, heoi whakaporeareatia ana ahau e koe ki enei mea katoa; mo reira tenei ahau te hoatu nei i tou tikanga ki runga ki tou mahunga, e ai ta te Ariki, ta Ihowa; e kore ano tenei weriweri e honoa iho e koe ki au mea whakarihariha katoa.

44

Nana, ko te hunga katoa e korero ana i nga whakatauki, ko ta ratou whakatauki tenei mou,

45

e mea nei, kei te whaea tonu te rite o tana tamahine. Ko koe te tamahine a tou whaea, e anuanu ra ki tana tahu, ki ana tamariki hoki; a ko koe te teina o ou tuakana, i whakarihariha nei ki a raua

46

tahu, ki a raua tamariki hoki: he Hiti to koutou whaea, he Amori to koutou papa. Na ko Hamaria tou tuakana, e noho nei i tou taha mau, ratou ko ana tamahine: a, ko tou teina, e noho na i tou taha

47

matau, ko Horoma ratou ko ana tamahine. Heoi kihai koe i haere i runga i o raua ara, kihai ano tau mahi i rite ki a raua mea whakarihariha; engari, me te mea nei he mea iti rawa tera, neke noa

48

atu tou tutua i to ratou i ou ara katoa. E ora ana ahau, e ai ta te Ariki, ta Ihowa, kihai te mahi a

49

tou teina, a Horoma, ratou ko ana tamahine i rite ki tau mahi, ki tau, ki ta au tamahine. Nana, ko te he tenei o tou teina, o Horoma; he whakapehapeha i roto i a ia, i a ratou ko ana tamahine, he takapu ki i te taro, he ngakau warea i te nui taonga; kihai hoki ia i whakau ake i nga ringa o te ware,

50

o te rawakore. A i whakakake ratou, i mahi hoki i te mea whakarihariha ki toku aroaro: no reira

51

i unuhia atu ai ratou e ahau, kei taku i kite ai he pai. Kihai hoki o Hamaria i rite ki te hawhe o ou hara; engari i whakanuia atu e koe au mea whakarihariha i a ratou, ka ai hoki au mea

52

whakarihariha katoa i mahia e koe hei whakatika mo ta tou tuakana, mo ta tou teina. Na ko koe, whakawaha e koe tou na whakama, nau na i whakatika tou teina, tou tuakana; na ou hara i hara ai koe, he nui atu nei te whakarihariha i o raua, ka nui atu to raua tika i tou: ae ra, kia numinumi hoki

53

koe, kia waha i tou whakama, kua whakatikaia na hoki e koe ta tou teina, ta tou tuakana. Na ka whakahokia raua e ahau i te whakarau, a Horoma, me ana tamahine i te whakarau, a Hamaria me

54  
 ana tamahine i te whakarau, ko ou whakarau i te whakarau, i roto i a ratou: Kia mau ai ki a koe  
 tou whakama, kia numinumi kau ai mo nga mea katoa i mea ai koe, i a koe ka waiho na hei  
 55  
 whakamanawatanga mo ratou. Ka hoki tou teina, a Horoma ratou ko ana tamahine, ki to ratou  
 tu o mua, a ka hoki a Hamaria ratou ko ana tamahine ki to ratou tu o mua, ka hoki ano koutou ko  
 56  
 au tamahine ki to koutou tu o mua. Kihai na hoki tou teina, a Horoma, i rangona i roto i tou  
 57  
 mangai i te ra i tou whakakake, I te mea kiano tou he i hurahia, i te wa iara o te tawainga a nga  
 tamahine a Hiria, a te hunga katoa i tetahi taha ona, i tetahi taha, a nga tamahine a nga Pirihitini e  
 58  
 whakahawea na ki a koe i tetahi taha, i tetahi taha. Kua mau ki a koe tou he, me au mea  
 59  
 whakarihariha, e ai ta Ihowa. Ko te kupu hoki tenei a te Ariki, a Ihowa: Ko taku mahi ki a koe  
 ka rite ki tau mahi; kua whakahawea na hoki koe ki te oati, whakataka ana e koe te kawenata.  
 60  
 Otiia ka mahara ano ahau ki taku kawenata ki a koe i nga ra o tou taitamahinetanga, ka  
 61  
 pumau ano i ahau he kawenata ki a koe a ake ake. Hei reira ka mahara koe ki ou ara, ka whakama,  
 ina riro i a koe ou tuakana, tou teina; a ka hoatu raua e ahau ki a koe hei tamahine, otiia ehara i te  
 62  
 mea na tau kawenata. Ka pumau ano i ahau taku kawenata ki a koe, a ka mohio koe ko Ihowa  
 63  
 ahau; Kia mahara ai, kia numinumi kau ai koe, kia kua ai hoki e puaki tou mangai i muri iho,  
 mo tou whakama hoki; ina marie ahau ki a koe, ki nga mea katoa i mea ai koe, e ai ta te Ariki, ta  
 Ihowa.

## Chapter 17

1 I puta mai ano te kupu a Ihowa ki ahau; i mea, 2 E te tama a te tangata, whakaaria atu he paki,  
 3  
 korerotia atu he kupu whakarite ki te whare o Iharaira; Mea atu, Ko te kupu tenei a te Ariki, a  
 Ihowa; He ekara nui, he nui nga parirau, he roroa nga hou, kapi tonu i te huruhuru, he mea  
 4  
 kotingotingo, i haere mai ia ki Repanona, tangohia ana e ia te kauru rawa o te hita. Katohia ana  
 e ia te pito o ona manga ngawari, kawea ana ki te whenua hokohoko, waiho iho e ia i te pa o nga  
 5  
 kaihokohoko. I tikina ano e ia etahi o nga purapura o te whenua, whakatokia iho e ia ki te mara  
 6  
 hua, kawea ana e ia ki te taha o nga wai maha, whakatokia ana ano he wirou. A ka tupu taua mea,  
 he waina papaku e torotoro ana, ko ona manga i anga atu ki a ia, a ko ona pakiaka i raro i a ia: na  
 7  
 ka whakawaina, ka tupu ona manga, a ka totoro ona peka. Na tera ano tetahi atu ekara nui, he  
 nunui nga parirau, a he maha nga huruhuru: na i piko atu nga pakiaka o te waina nei ki a ia, i toro

8  
 atu ona manga ki a ia i nga wahi i whakatokia ai, kia whakamakukutia ai e ia. He mea whakato  
 ia ki te mara pai ki te taha o nga wai maha, kia tupu ai he manga, kia hua ai he hua, kia tino pai ai  
 9  
 taua waina. Mea atu koe, Ko te kupu tenei a te Ariki, a Ihowa, E tupu ranei? e kore ianei e hutia  
 atu e ia ona pakiaka? e kore ianei e tapahia ona hua, e maroke ai, e maroke ano ai ona rau katoa e  
 10  
 pihi ana; ahakoa kahore e nui te ringa, e nui ranei te iwi he i huaranga? Ae ra, na, i te mea kua  
 whakatokia, e tupu ranei? e kore ianei e maroke rawa ina pa te hau marangai ki a ia? ka maroke  
 11  
 ano i te tupuranga i pihi ai. I puta mai ano te kupu a Ihowa ki ahau, i mea, 12  
 Tena, mea atu ki  
 te whare whakakeke, Kahore ranei koutou e mohio ki te tikanga o enei mea? mea atu, Nana, i tae  
 mai te kingi o Papurona ki Hiruharama, a tangohia ana e ia to reira kingi, o reira rangatira, kawea  
 13  
 ana ki Papurona; Na i mau ia ki te uri kingi, whakaritea ana he kawenata ki a ia; i whakaoatitia  
 14  
 ano ia e ia, a mauria atu ana ano e ia te hunga nunui o te whenua; Kia tutua ai tona kingitanga,  
 15  
 kia kaua ai e ara ake ki runga, engari he turanga mona ko te pupuri i tana kawenata. Heoi  
 whakakeke ana ia ki a ia, unga ana e ia ana karere ki Ihipa kia homai etahi hoiho ki a ia, me etahi  
 tangata, he tini. E tika ranei tana? e mawhiti ranei te kaimahi o enei mea? e whakataka ranei e ia  
 16  
 te kawenata, a mawhiti ake? E ora ana ahau, e ai ta te Ariki, ta Ihowa, ina, i te wahi ano o te  
 kingi nana nei ia i whakakingi, nana nei te oati i whakahaweatia e ia, nana nei te kawenata i  
 17  
 whakataka e ia, i tona taha ano i waenganui o Papurona ka mate ia. Na e kore a Parao me tana  
 ope nui, me tona huihui nui, e whai wahi ki a ia i te whawhai, ina whakahauputia ake e ratou he  
 18  
 pukepuke, hanga ranei he taumaihi, e hatepea atu ai nga tangata tokomaha. Kua whakahaweatia  
 hoki e ia te oati, i tana whakatakanga i te kawenata; nana, kua hoatu e ia tona ringa, otia kua mahia  
 19  
 e ia enei mea katoa; e kore ia e mawhiti. Mo reira ko te kupu tenei a te Ariki, a Ihowa; E ora  
 ana ahau, ina ka utua e ahau ki runga ki tona matenga taku oati i whakahaweatia e ia, me taku  
 20  
 kawenata i whakataka e ia. Ka horahia ano e ahau taku kupenga ki runga ki a ia, a ka mau ia i  
 taku rore, ka kawea ano ia e ahau ki Papurona, ka whakawakia e ahau ki reira mo tona he i he ai  
 21  
 ia ki ahau. Na, ko ona whati katoa, i roto i ona ropu katoa, ka hinga i te hoari, ka whakamararatia  
 atu hoki nga morehu ki nga hau katoa; a ka mohio koutou naku, na Ihowa, te kupu.  
 22  
 Ko te kupu tenei a te Ariki, a Ihowa, Ka tangohia ano e ahau tetahi wahi o te kauru o te hita  
 tiketike, a ka whakatururia; ka katohia mai e ahau tetahi mea ngawari i te matamata o ona rara hou,  
 23  
 a ka whakatokia ki runga ki te maunga tiketike e pu rero ana ki runga. Ka whakatokia e ahau ki  
 te maunga tiketike o Iharaira: a ka wana ona manga, ka hua nga hua, a ko te putanga, he hita pai;  
 ka noho hoki nga manu katoa, ia parirau, ia parirau, ki raro i a ia; ka noho ratou ki te taumarumarunga  
 24  
 iho o ona manga. A ka mohio nga rakau katoa o te parae, naku, na Ihowa, i whakaiti te rakau

tiketike, naku i tiketike ai te rakau papaku; naku i whakamareke te rakau kaiota, naku hoki i tupu ai te rakau maroke: naku, na Ihowa, te kupu, naku ano i mahi.

## Chapter 18

<sup>1</sup> I puta mai ano te kupu a Ihowa ki ahau, i mea, <sup>2</sup> He aha ra tenei whakatauki i whakataukitia ai e koutou mo te oneone o Iharaira? e ki na hoki koutou, I kai nga matua i nga karepe kaiota, a maniania ana nga niho o nga tamariki. <sup>3</sup> E ora ana ahau, e ai ta te Ariki, ta Ihowa, e kore koutou e whai take a muri ake nei ki te whakahua i tenei whakatauki i roto i a Iharaira. <sup>4</sup> Nana, ko nga wairua katoa, naku; he pera i te wairua o te papa, naku ano hoki te wairua o te tama: ko te wairua e hara ana, ka mate tera. <sup>5</sup> Ki te mea ia he tika tetahi tangata, a ka mahia e ia te mea e rite ana, e tika ana, <sup>6</sup> Ki te mea kihai ia i kai ki runga ki nga maunga, kihai ona kanohi i anga ake ki nga whakapakoko o te whare o Iharaira, ki te mea kihai i poke i a ia te wahine a tona hoa, a kihai ia i whakatata ki te wahine e paheke ana; <sup>7</sup> Ki te mea kihai tetahi tangata i tukinotia e ia, engari i whakahokia e ia tana taunaha ki te tangata i a ia nei ana moni, ki te mea kihai ia i tukino i tetahi, i pahua, ki te mea i homai e ia tana taro ma te tangata e hemokai ana, i hipokina e ia ki te kakahu te tangata e noho tahanga ana; <sup>8</sup> Ko te tangata kahore ana mea i hoatu hei moni whakatupu, kahore hoki he hua i riro i a ia, ko te tangata i whakahokia e ia tona ringa i te kino, he pono ano tana whakawa mo tetahi, <sup>9</sup> mo tetahi, I haere i runga i aku tikanga, i pupuri tonu i aku whakaritenga, i pono tonu te mahi; he tika tera, ka ora ia, e ai ta te Ariki, ta Ihowa. <sup>10</sup> Ki te whanau tetahi tama mana, he tahae, he kaiwhakaheke toto, a ka mahia e ia tetahi o enei mea, <sup>11</sup> Ka kore ano e mahi i tetahi o enei mea pai, engari kua kai ki runga ki nga maunga, kua whakapoke i te wahine a tona hoa, <sup>12</sup> Kua tukino i te ware raua ko te rawakore, kua pahua kino, a kihai i whakahokia e ia te taunaha, kua anga ona kanohi ki nga whakapakoko, kua mahi hoki i te mea whakarihariha, <sup>13</sup> Kua hoatu i te moni whakatupu, kua tango i te hua: e ora ranei ia? E kore ia e ora: kua mahia e ia enei mea whakarihariha katoa; ko te mate kau mona; ki runga ano i a ia ona toto. <sup>14</sup> Na, ki te whanau tetahi tama a tenei, a ka kite ia i nga hara katoa i mahia e tona papa, a ka mahara, ka kore e mahi i te pena, <sup>15</sup> Kahore ia e kai ki runga ki nga maunga, kahore hoki ona kanohi e anga ki nga whakapakoko o te whare o Iharaira, kahore e whakapokea e ia te wahine a tona hoa, <sup>16</sup> Kahore ana tukino i te tangata, kahore e pupuri i te taunaha, kahore hoki ana pahua; engari e hoatu ana e ia tana taro ma te hemokai, e hipokina ana e ia ki te kakahu te tangata e noho

17 tahanga ana, E whakahokia ana e ia tona ringa i te ware, kahore hoki e tango i te moni whakatupu, i nga hua ranei, e mahi ana i aku whakaritenga, e haere ana i runga i aku tikanga; e kore tera e mate

18 mo te he o tona papa; he pono ka ora ia. Ko tona papa, i te mea i nui tana tukino, pahua rawa i tona teina, kihai hoki i pai nga mea i mahia e ia i roto i tona iwi, na, ka mate ia i runga i tona kino.

19 Otira kei te mea koutou, He aha ra te tama te waha ai i te kino o te papa? Ki te mahia e te tama  
20 te mea e rite ana, e tika ana, a ka puritia e ia aku tikanga, ka mahia ano e ia, ina, ka ora ia. Ko te wairua e hara ana, ko tera e mate. E kore te tama e waha i te kino o te papa, e kore ano te papa e waha i te kino o te tama: ko runga ano i a ia te tika o te tangata tika, a ko te kino o te tangata kino hei runga ano i a ia.

21 Ki te tahuri ia te tangata kino i ona hara katoa i mahia e ia, a ka puritia e ia aku tikanga katoa, ka mahia ano e ia te mea e rite ana, e tika ana, ina, ka ora ia, e kore ia e mate.  
22 E kore tetahi o ona he i mahia e ia e maharatia ki a ia; ka ora ia i tona tika i mahia e ia.  
23 He koanga ngakau ranei ki ahau te matenga o te tangata kino? e ai ta te Ariki, ta Ihowa; he teka ranei ko ia kia tahuri mai i

24 ona ara, kia ora? Ki te tahuri atu ia te tangata tika i tona tika, ki te mahia e ia te he, a ka rite tana mahi ki nga mea whakarihariha katoa i mahia e te tangata kino, e ora ranei ia? e kore ana mahi tika katoa e maharatia; ka mate ia i runga i tona kino i kino ai ia, i runga ano i tona hara i hara ai ia.

25 Heoi kei te mea na koutou, Kahore e taurite tonu te ara o te Ariki. Tena ra, whakarongo mai, e te whare o Iharaira, Kahore ranei toku ara e taurite? he teka ianei no koutou nga ara kahore e taurite?

26 Ki te tahuri atu te tangata tika i tona tika, a ka mahi i te kino, mate iho ki reira; e mate ia mo tana kino i mahia e ia.  
27 Tenei ano, ki te tahuri mai te tangata kino i tana kino i mahia e ia, a ka mahia e ia te mea e rite ana, e tika ana, ka ora ano i a ia tona wairua.  
28 Nana hoki i whakaaro, a tahuri

29 mai ana i ona he katoa i mahia e ia; ina, ka ora ia, e kore e mate. Heoi kei te mea te whare o Iharaira, Kahore e taurite te ara o te Ariki. Kahore ranei oku ara e taurite, e te whare o Iharaira? he teka ianei no koutou nga ara kahore e taurite?

30 Ae ra, ka rite ki tona ara, ki tona ara, taku whakawa i a koutou, e te whare o Iharaira, e ai ta te Ariki, ta Ihowa, Ripeneta, tahuri mai hoki i o koutou he katoa, a e kore te he e waiho hei whakataka

31 mo koutou. Maka atu, kia matara atu i a koutou o koutou he katoa i he ai koutou; mahia hoki he ngakau hou, he wairua hou mo koutou; kia mate hoki koutou hei aha, e te whare o Iharaira?

32 Kahore hoki ahau e ahuaureka ki te matenga o te tangata e mate ana, e ai ta te Ariki, ta Ihowa; heoi tahuri mai koutou, kia ora ai.



## Chapter 19

<sup>1</sup> Na whakahuatia he tangi mo nga rangatira o Iharaira, <sup>2</sup> Mea atu hoki, He aha tou whaea? He raiona uha: i roto ia i nga raiona e takoto ana, ko ana kua he mea whakatupu nana i roto i nga raiona, <sup>3</sup> Na atawhaitia ake ana e ia tetahi o ana kua; kua rahi: kua ako ki te hopu tupapaku mana; kua kai tangata. <sup>4</sup> I rongu ano nga iwi ki a ia; i mau ia ki roto ki ta ratou poka; na kawea ana e ratou, mekameka rawa, ki te whenua o Ihipa. <sup>5</sup> Na, i tona kitenga he tatari kau tana a kua kore tana i tumanako ai, na, ka mau ki tetahi atu o ana kua, meinga ana e ia hei kua rahi. <sup>6</sup> Na kei te haereere tera i roto i nga raiona, kua rahi, kua ako ki te hopu tupapaku mana: kua kai tangata. <sup>7</sup> I mohio ano ia ki o ratou whare kingi, whakauruata ana e ia o ratou pa, moti iho te whenua me ona tini mea i te haruru o tona hamama. <sup>8</sup> Katahi ia ka whakaekea e nga iwi o nga kawanatanga i tetahi taha, i tetahi taha; horahia ana e ratou he kupenga ki runga ki a ia; kua mau ia ki roto ki ta ratou poka. <sup>9</sup> Na ka tutakina atu ia, mea rawa ki te mekameka, ka kawea ki te kingi o Papurona: i kawea ia ki nga pa kaha, kia kore ai tona reo e rangona i muri ki runga ki nga maunga o Iharaira. <sup>10</sup> I rite tou whaea ki te waina, ou toto na ano, he mea whakato ki te taha o nga wai: he mea whai hua, he mea whai manga, he maha hoki no nga wai. <sup>11</sup> He peka kaha ano ona hei hepeta mo nga kingi; purero tonu ratou, roa tonu, i roto i nga manga pururu, i kitea atu ratou e purero ana, me ona manga maha. <sup>12</sup> Otiia i hutia ia i runga i te aritarita, maka iho ki te whenua, maroke ake ona hua i te hau marangai: i whatiwhatia ona peka kaha, maroke ake; kainga ake e te ahi. <sup>13</sup> Na inaianei kua oti ia te whakato ki te koraha, ki te whenua maroke, waikore. <sup>14</sup> A kua puta atu he ahi i roto i nga peka o ona manga, pau ake ona hua; kore ake ona peka kaha hei hepeta kingi. He tangi tenei, ka waiho ano hei tangi.

## Chapter 20

<sup>1</sup> Na, i te whitu o nga tau, i te rima o nga marama, i te tekau o nga ra o te marama, ka haere mai etahi o nga kaumatua o Iharaira ki te rapu tikanga i a Ihowa, a noho ana i toku aroaro. <sup>2</sup> Na ka puta mai te kupu a Ihowa ki ahau; i mea, <sup>3</sup> E te tama a te tangata, korero ki nga kaumatua o Iharaira; mea atu ki a ratou, Ko te kupu tenei a te Ariki, a Ihowa; i haere mai ranei koutou ki te rapu tikanga

i ahau? E ora ana ahau, e kore ahau e pai kia rapua e koutou he tikanga i ahau, e ai ta te Ariki, ta  
<sup>4</sup> Ihowa. E whakawa ranei koe i a ratou, e te tama a te tangata, e whakawa ranei koe? meinga kia mohio ratou ki nga mea whakarihariha a o ratou matua:

<sup>5</sup> Mea atu hoki ki a ratou, Ko te kupu tenei a te Ariki, a Ihowa: I te ra i whiriwhiria ai e ahau a Iharaira, i toku ringa i ara ra ki nga uri o te whare o Hakopa, i mohiotia ai ahau e ratou i te whenua

o Ihipa, i toku ringa i ara atu ra ki a ratou, i ahau i mea ra, Ko Ihowa ahau, ko to koutou Atua; <sup>6</sup> I taua ra ano i ara ai toku ringa ki a ratou ki te tango mai i a ratou i te whenua o Ihipa ki te whenua i tirohia e ahau mo ratou, e rerengia ana e te waiu, e te honi, ki te wahi ataahua rawa o nga whenua

<sup>7</sup> katoa; I mea ahau ki a ratou, Maka e tera, e tera, nga mea whakarihariha o ona kanohi; kaua hoki

koutou e whakapokea ki nga whakapakoko o Ihipa; ko Ihowa ahau, ko to koutou Atua. <sup>8</sup> Otiia kei te whakakeke ratou ki ahau, kihai hoki i pai ki te whakarongo ki ahau, kihai i maka atu e ratou nga mea whakarihariha o nga kanohi o tera, o tera, kihai i whakarerea e ratou nga whakapakoko o Ihipa: katahi ahau ka mea, Ka ringihia e aha u toku weriwere ki a ratou, ka whakapaua e ahau toku riri ki

<sup>9</sup> a ratou i waenganui o te whenua o Ihipa. Otiia mahi ana ahau mo toku ingoa kei poke i te tirohanga a nga iwi i noho tahi ratou, i meinga nei e ahau kia mohio ki ahau, i a ratou ra i kite i to ratou whakaputanga mai i te whenua o Ihipa.

<sup>10</sup> Heoi whakaputaina ana ratou e ahau i te whenua o Ihipa, kawea ana ki te koraha. <sup>11</sup> I hoatu ano e ahau aku tikanga ki a ratou, i whakakitea atu ano ki a ratou aku whakaritenga e ora ai te

tangata ki te mahia e ia. <sup>12</sup> I hoatu ano e ahau aku hapati ki a ratou hei tohu ki ahau, ki a ratou, kia

mohio ai ratou ko Ihowa ahau, ko to ratou kaiwhakatapu. <sup>13</sup> Otiia i whakakeke te whare o Iharaira ki ahau i te koraha; kihai ratou i haere i runga i aku tikanga, paopao ana ratou ki aku whakaritenga e ora ai te tangata ki te mahia e ia; whakapokea rawatia ana e ratou aku hapati: katahi ahau ka mea

<sup>14</sup> kia ri ngihia toku weriwere ki a ratou i te koraha, kia moti ra ano ratou. Otiia mahi ana ahau mo

<sup>15</sup> toku ingoa, kei poke i te tirohanga a nga iwi i kite nei i taku tangohanga mai i a ratou. I ara ano hoki toku ringa ki a ratou i te koraha kia kua ratou e kawea ki te whenua e rerengia ana e te waiu,

<sup>16</sup> e te honi, ki taku i hoatu ai, he wahi ataahua rawa i nga whenua katoa; Mo ratou i paopao ki aku whakaritenga, a kihai i haere i runga i aku tikanga; ko aku hapati hoki whakapokea iho e ratou; he

<sup>17</sup> whai no o ratou ngakau i a ratou whakapakoko. Heoi i tohungia ratou e toku kanohi, kihai i

<sup>18</sup> whakangaromia, kihai ano ahau i whakamoti i a ratou i te koraha. A i mea ahau ki a ratou tamariki i te koraha, Kaua e haere i runga i nga tikanga a o koutou matua, kua ano e puritia a ratou

<sup>19</sup> whakaritenga, kei poke hoki koutou i a ratou whakapakoko. Ko Ihowa ahau, ko to koutou Atua:

<sup>20</sup> haere i runga i aku tikanga, puritia aku whakaritenga, mahia; Whakatapua hoki aku hapati; a ka

waiho era hei tohu ki ahau, ki a koutou, kia nohio ai koutou ko Ihowa ahau, ko to koutou Atua.

21

Otiia kei te whakakeke nga tamariki ki ahau, kihai i haere i runga i aku tikanga, kihai hoki i pupuri i aku whakaritenga hei mahi ma ratou; ki te mahia hoki ena e te tangata, ka ai hei oranga mona; ko aku hapati hoki, whakapokea iho e ratou: na ko taku kianga ake, kia ringihia toku weriweri

22

ki a ratou, kia whakapaua toku riri ki a ratou i te koraha. Engari ia i whakahokia iho e ahau toku ringa, a mahi ana mo toku ingoa, kei poke i te tirohanga mai a nga iwi i kite nei i taku whakaputanga

23

i a ratou. I ara ano toku ringa ki a ratou i te koraha, mo ratou kia whakamararatia ki roto ki nga

24

tauwiwi, kia titaria atu ki nga whenua; Mo ratou kihai i mahi i aku whakaritenga; mo ratou ano i paopao ki aku tikanga, na whakapokea iho e ratou aku hapati, anga tonu ana o ratou kanohi ki nga

25

whakapakoko a o ratou matua. Na hoatu ana e ahau ki a ratou he tikanga kahore i pai, he

26

whakaritenga e kore ai ratou e ora. I whakapokea ano ratou e ahau ki a ratou mea homai noa, mo ta ratou meatanga i nga tamariki katoa e oroko puta mai ana i te kopu kia tika i roto i te ahi, he mea e meinga ai ratou e ahau kia noho kau noa iho, kia mohio ai ratou ko Ihowa ahau.

27

Mo reira korero ki te whare o Iharaira, e te tama a te tangata, mea atu ki a ratou, Ko te kupu tenei a te Ariki, a Ihowa, Tenei ano tetahi kohukohu a o koutou matua ki ahau, i a ratou i mahi nei

28

i te he ki ahau. Ka oti ratou te kawe e ahau ki te whenua i ara ai toku ringa kia hoatu a reira ki a ratou, na, ka kite ratou i tena pukepuke tiketike, i tena, i tena rakau pururu, i tena, na patua ana e ratou ki reira a ratou patunga tapu, tapaea ana e ratou ki reira te mea whakapataritari, ta ratou whakahere: mahia ana e ratou ta ratou whakakakara reka ki reira, ringihia ana e ratou ki reira a

29

ratou ringihanga. Katahi ahau ka mea ki a ratou, He aha te pukepuke tiketike e haereere atu na

30

koutou? Heoi huaina ana te ingoa o reira ko Pama a mohoa noa nei. Mo reira mea atu ki te whare o Iharaira, Ko te kupu tenei a te Ariki, a Ihowa; Ka whakapoke ranei koutou i a koutou, ka pera

31

me o koutou matua? ka whai ranei koutou i a ratou mea whakarihariha moepuku ai? I te mea hoki ka tapaea e koutou a koutou mea hoatu noa, a ka meinga a koutou tamariki kia tika na roto i te ahi, e whakapoke ana ranei koutou i a koutou ano ki a koutou whakapakoko katoa a mohoa noa nei? a me rapu tikanga mai ranei i ahau ma ko utou, e te whare o Iharaira? E ora ana ahau, e ai ta

32

te Ariki, ta Ihowa, e kore ahau e pai kia uia e koutou. Na, ko te mea i puta ake ki o koutou wairua e kore rawa e taea, ta koutou e ki ra, Ka rite tatou ki nga tauwiwi, ki nga hapu o nga whenua, ka mahi ki te rakau, ki te kohatu.

33

E ora ana ahau, e ai ta te Ariki, ta Ihowa, ina, he ringa kaha toku, he takataka maro, he

34

weriweri kua oti te riringi atu, i ahau ka kawana nei i a koutou. Ka tangohia mai ano koutou e ahau i roto i nga iwi, ka huihuia i nga whenua i whakamararatia atu ai koutou, he meatanga na te

35

ringa kaha, na te takakau maro, na te weriweri kua oti te riringi atu: A ka kawea koutou e ahau

ki te koraha o nga iwi, a ki reira ahau whakawa ai i a koutou, he kanohi ki te kanohi. <sup>36</sup> Ka rite ki taku whakawa i o koutou matua i te koraha o te whenua o Ihipa; ka pena ano taku whakawa i a koutou, e ai ta te Ariki, ta Ihowa. <sup>37</sup> Ka meinga ano koutou e ahau kia tika i raro i te tokotoko, kia uru ki roto ki te here o te kawenata. <sup>38</sup> Ka tahia atu hoki e ahau i roto i a koutou te hunga whakakeke, te hunga hoki e tutu ana ki ahau: ka tangohia mai ratou e ahau i te whenua e noho nei ratou, engari e kore ratou e tae ki te oneone o Iharaira: a ka mohio koutou ko Ihowa, ahau. <sup>39</sup> Na, ko koutou, e te whare o Iharaira, ko te kupu tenei a te Ariki, a Ihowa; Haere, e mahi ki tana whakapakoko, ki tana whakapakoko, i nga wa e takoto ake nei, ki te kore koutou e rongu ki ahau: kaua ia toku ingoa tapu e whakapokea i muri ki a ko utou mea homai noa, ki a koutou whakapakoko. <sup>40</sup> Hei toku maunga tapu hoki hei te maunga o te tairangatanga o Iharaira, e ai ta te Ariki, ta Ihowa, hei reira te whare katoa o Iharaira, ratou katoa i te whenua, mahi ai ki ahau: ko te wahi tera e manako ai ahau ki a ratou, ko te wahi tera e mea ake ai ahau ki a koutou whakahere maku, ki nga matamua o a koutou mea e tapae mai ai, ki a koutou mea tapu katoa. <sup>41</sup> Ka manako ahau ki a koutou, ano he whakakakara reka, ina tangohia mai koutou e ahau i roto i nga iwi, ina huihuia mai i nga whenua i whakamararatia atu ai koutou; a ka ai koutou hei whakatapu moku i te tirohanga a nga iwi. <sup>42</sup> Na ka mohio koutou ko Ihowa ahau, ina kawea koutou e ahau ki te oneone o Iharaira, ki te whenua i ara ai toku ringa kia hoatu a reira ki o koutou matua. <sup>43</sup> Ka mahara ano koutou i reira ki o koutou ara, ki a koutou mahi katoa i poke ai koutou; a ka whakarihariha koutou ki a koutou, ki ta koutou ake titiro, mo nga mea kikino katoa i mahia e koutou. <sup>44</sup> A ka mohio koutou ko Ihowa ahau, ina ngana ahau ki a koutou, he mea mo toku ingoa, kahore ano ia e rite ki o koutou ara kino, ki a koutou mahi he ranei, e te whare o Iharaira, e ai ta te Ariki, ta Ihowa. <sup>45</sup> I puta mai ano te kupu a Ihowa ki ahau, i mea, <sup>46</sup> E te tama a te tangata, anga atu tou mata whaka te tonga, kia maturuturu atu ano tau kupu whaka te tonga, poropititia he he mo te ngahere o te parae ki te tonga. <sup>47</sup> Mea atu hoki ki te ngahere i te tonga, Whakarongo ki te kupu a Ihowa; Ko te kupu tenei a te ariki, a Ihowa, Ka whakaungia e ahau he ahi i roto i a koe, a ka pau nga rakau matomato katoa i roto i a koe, me nga rakau maroke katoa; e kore te mura e tineia, ka mura tonu, ka wera ano nga kanohi katoa i reira, i te tonga tae noa ki te raki. <sup>48</sup> A ka kite nga kikokiko katoa, naku, na Ihowa i whakau: e kore e tineia. <sup>49</sup> Ano ra ko ahau, Aue, e te Ariki, e Ihowa! e mea ana ratou ki ahau, he teka ianei he korero whakatauki ana e korero nei?

## Chapter 21

<sup>1</sup> I puta mai ano te kupu a Ihowa ki ahau, i mea, <sup>2</sup> E te tama a te tangata, anga atu tou mata ki Hiruharama, kia maturuturu iho tau kupu ki nga wahi tapu, poropititia he he mo te whenua o Iharaira;

<sup>3</sup> Mea atu hoki ki te whenua o Iharaira, Ko te kupu tenei a Ihowa, Nana, hei hoariri ahau mou, ka maunu ano i ahau taku hoari i roto i tona takotoranga, ka hatepea atu e ahau te tangata tika raua ko

<sup>4</sup> te tangata he i roto i a koe. Na, ka hatepea atu nei e ahau i roto i a koe te tangata tika raua ko te tangata he, ka maunu ano taku hoari i roto i tona takotoranga ki nga kikokiko katoa i te tonga tae

<sup>5</sup> noa ki te raki. A ka mohio nga kikokiko katoa, naku, na Ihowa, i unu taku hoari i roto i tona takotoranga: e kore ano e hoki a muri iho. <sup>6</sup> Na reira, aue, e te tama a te tangata: aue ki to ratou

<sup>7</sup> aroaro, me te whati tou hope, me te tangi tiwerawera. A ki te mea ratou ki a koe, He aha koe i aue ai? katahi koe ka mea, Mo te rongu; kei te haere mai hoki: a ngohe iho nga ngakau katoa, ngoikore katoa nga ringa, ka he ano nga wairua katoa, ko nga turi katoa kei te wai te rite: nana, te haere mai n ei, ka oti ano hoki, e ai ta te Ariki, ta Ihowa.

<sup>8</sup> I puta mai ano te kupu a Ihowa ki ahau, i mea, <sup>9</sup> E te tama a te tangata, poropiti atu, ki atu,

<sup>10</sup> Ko te kupu tenei a Ihowa: Ki atu, He hoari, he hoari, whakakoi rawa, oro rawa. I whakakoia ai kia nui, ai te parekura: i orohia ai kia uira ai. Kia koa koia tatou? ko te tokotoko ia o taku tama e

<sup>11</sup> whakahawea ana ki nga rakau katoa. I hoatu ano e ia kia orohia, hei mea e maua e te ringa: ko

<sup>12</sup> te hoari, ae, kua oti te whakakoi, kua oti te oro, kia hoatu ai ki te ringa o te kaipatu. E tangi, aue, e te tama a te tangata: no te mea kei runga i taku iwi, kei runga i nga rangatira katoa o Iharaira: kua

<sup>13</sup> tukua atu ratou ki te hoari me taku iwi: mo reira papaki ki tou huha. He whakamatautau hoki

<sup>14</sup> ia; a ka pehea ra mehemea ka kore te tokotoko whakahawea, e ai ta te Ariki, ta Ihowa. Ko koe na, e te tama a te tangata, poropiti atu, pakipaki i ou ringa; tukua kia tuatoru whakakorometekanga o te hoari, o te hoari nana nga tupapaku; ko te hoari ia nana te tangata rahi, tera e tupapaku nei i

<sup>15</sup> ona patunga, tae tonu atu ki o ratou ruma o roto rawa. Kua oti te mata o te hoari te whakatika atu e ahau ki o ratou kuwaha katoa, kia ngohengohe ai o ratou ngakau, kia maha ai o ratou

<sup>16</sup> tutukitanga: anana! kua oti te whakakanapa, koi tonu, hei mea mo te patu. Huihui i a koe, ka

<sup>17</sup> anga ki matau; tatai i a koe, ka anga ki mau; ki te wahi e u atu ai tou mata. Ka papaki ano ahau i oku ringa, ka whakarite i toku weriweri: naku, na Ihowa, te kupu.

<sup>18</sup> I puta mai ano hoki te kupu a Ihowa ki ahau, i mea, <sup>19</sup> Ko koe hoki, e te tama a te tangata, whakaritea etahi ara mou kia rua, hei haerenga mai mo te hoari a te kingi o Papurona: ka puta mai raua e rua i te whenua kotahi; waitohungia hoki tetahi wahi, waitohungai i te ahunga mai o te ara

<sup>20</sup> ki te pa. Whakaritea he ara e haere mai ai te hoari ki Rapa o nga tama a Amona, ki a Hura, ki

21  
era i Hiruharama, i te pa taiepa. I tu hoki te kingi o Papurona ki te pekanga o te ara, ki te ahunga mai o nga ara e rua, ki te ui ki nga tuaahu: i rurutia hoki e ia ana pere, i uia he tikanga ki nga

22  
whakapakoko, i titiro ki te ate. I tona ringa matau ko te tuaahu mo Hiruharama, hei whakarite i nga mea wawahi, hei mea e hamama ai te mangai i te parekura, e ara ai te reo i te hamamatanga, hei whakarite i nga mea wawahi mo nga kuwaha, kia haupuria ake ano he pukepuke, kia han ga he

23  
taumaihi. A ki ta ratou, hei tuaahu teka tena ki ta ratou titiro, ki ta te hunga ra i oati i nga oati:

24  
otiia ka maharatia e ia te kino, kia mau ai ratou. Na reira ko te kupu tenei a te Ariki, a Ihowa, Na, kua meinga na e koutou to koutou kino kia maharatia, i to koutou he ka hurahia, i o koutou hara ka kitea i roto i a koutou mahi katoa; na, ka maharatia na koutou, ka mau koutou i te ringa.

25  
Na, ko koe, e te mea kino kua tupapaku na, e te rangatira o Iharaira, nou nei te ra kua tae mai, i

26  
te wa o te he i te mutunga; Ko te kupu tenei a te Ariki, a Ihowa, Whakarerea atu te potae, waiho atu te karauna: e kore tenei e penei tonu a muri ake: ko te iti whakanuia ake, ko te nui whakaititia

27  
iho. Ka porohurihia e ahau, ka porohurihia, ka porohurihia; e kore noa iho ano tenei, kia tae mai ra ano te tangata mana; a maku e hoatu ki a ia.

28  
Ko koe hoki, e te tama a te tangata, poropiti atu, mea atu, Ko te kupu tenei a te Ariki, a Ihowa mo nga tama a Amona, mo ta ratou tawai; mea atu ano, Ko te hoari, ko te hoari, kua oti te unu: oro

29  
rawa mo te patu, kia kai ai, koia i uira ai: Me te teka mai a aua matakite ki a koe, me te homai teka a te tuaahu ki a koe, kia hoatu ai koe ki runga ki nga kaki o te hunga i patua, o te hunga kino

30  
kua tae mai nei to ratou ra, i te wa o te he i te mutunga. Meinga kia hoki atu ia ki tona takotoranga.

31  
Hei te wahi i hanga ai koe, hei te whenua i whanau ai koe, hei reira ahau whakawa ai i a koe. Ka ringihia ano e ahau toku riri ki runga ki a koe; ka pupuhi ano ahau ki runga ki a koe ki te ahi o toku

32  
riri; ka hoatu ano koe e ahau ki te ringa o nga tangata poauau, e mohio ana ki te whakangaro. Ka waiho koe hei wahie mo te ahi; ka heke ou toto ki waenganui o te whenua; heoi ano maharatanga ki a koe; naku hoki, na Ihowa te kupu.

## Chapter 22

1 I puta mai ano te kupu a Ihowa ki ahau, i mea, 2 E whakawa ranei koe, e te tama a te tangata, e whakawa ranei koe i te pa whakaheke toto? na, whakakitea ano ana mea whakariharia katoa ki

3  
a ia. A mea atu koe, Ko te kupu tenei a te Ariki, a Ihowa: He pa e whakaheke ana i te toto i waenganui ona, he mea e tae mai ai te wa mona, e hanga whakapakoko ana hei he mona, hei

whakapoke i a ia!<sup>4</sup> Kua he koe i ou toto i whakahekea e koe, kua poke i au whakapakoko i hanga e koe; a kua meinga e koe ou ra kia tata, kua tae ano koe ki ou tau: na reira koe i meinga ai e ahau

hei tawainga ma nga tauwiwi, hei taunutanga ma nga whenua katoa.<sup>5</sup> Ko te hunga e tata ana, ko te hunga hoki e matara atu ana i a koe, ka taunu ki a koe, e te tangata ingoa poke, kiki tonu i te tutu.

<sup>6</sup> Nana, nga rangatira o Iharaira, puta ana nga uaua o tetahi, o tetahi i roto i a koe ki te whakaheke toto.<sup>7</sup> E whakahawea ana ratou ki te papa, ki te whaea, i roto i a koe; he mahi whakatupu kino ta ratou ki te tautangata i roto i a koe: e tukinotia ana e ratou te pani me te pouaru i roto i a koe:<sup>8</sup> Ko aku mea tapu whakahaweatia iho e koe, ko aku hapati whakanoatia ana e koe.<sup>9</sup> I roto i a koe nga tangata ngautuara, he mea kia whakahekea ai he toto: i roto i a koe te kai ki runga ki nga maunga: i roto i a koe te mahi puremu.<sup>10</sup> I roto i a koe te hura i to te papa e takoto tahanga ai: i roto i a koe te whakaiti i te wahine poke i a ia e noho wehe ana.<sup>11</sup> He mahi whakarihariha ano ta tetahi ki te wahine a tona hoa; ko ta tetahi whakapokea iho, puremutia iho tana hunaonga; ko ta tetahi i roto i a koe, he whakaiti i tona tuahine, i te tamahine a tona papa.<sup>12</sup> I roto i a koe i tango ratou i te utu whakapati e whakahekea ai he toto; kua tango koe i te moni whakatupu, i nga hua ano hoki, kua haoa mai ano e koe nga taonga a ou hoa, he mea tukino, kua wareware ano koe ki ahau, e ai ta te ariki, ta Ihowa.<sup>13</sup> Nana, kua pakia e ahau toku ringa ki tau hao taonga i hao ai koe, ki ou toto ano kua heke na i waenganui i a koe.<sup>14</sup> E u ranei tou ngakau, e pakari ranei ou ringa, i nga ra e mahi ai ahau ki a koe? Naku, na Ihowa te kupu, maku ano e mahi.<sup>15</sup> Ka whakamararatia atu ano koe e ahau ki roto ki nga tauwiwi, ka titaria hoki koe ki nga whenua, a ka poto i ahau tou poke i roto i a koe.<sup>16</sup> Ka whakanoatia ano hoki koe e koe ano i te tirohanga a nga iwi, a ka mohio koe ko Ihowa ahau.

<sup>17</sup> I puta mai ano te kupu a Ihowa ki ahau, i mea,<sup>18</sup> E te tama a te tangata, ki ahau, kua rite te whare o Iharaira ki te para: he parahi ratou katoa, he tine, he rino, he mata i waenga oumu; he para hiriwa ratou katoa.<sup>19</sup> Na reira tenei kupu a te Ariki, a Ihowa; Na, he para nei koutou katoa, na, tenei ahau te kohikohi nei i a koutou ki waenganui o Hiruharama.<sup>20</sup> Ka rite ki te kohikohinga o te hiriwa, o te parahi, o te rino, o te mata, o te tine ki waenganui o te oumu, puhia tonutia atu te ahi ki runga hei whakarewa; ka pena ano taku kohikohi i a koe i runga i toku riri, i toku weriweri, ka waiho ano kou tou e ahau ki reira, ka whakarewaina ano koutou.<sup>21</sup> Ina, ka whakaminea koutou e ahau, ka pupuhi atu ano ahau ki a koutou i runga i te ahi, ara i toku riri, a ka rewa koutou i waenganui.

<sup>22</sup> Ka rite ki te whakarewanga o te hiriwa i roto i te oumu; ka pena ano to koutou whakarewanga i

waenganui o taua oumu, a ka mohio koutou kua oti toku weriweri te riringi e ahau, e Ihowa, ki runga ki a koutou.

<sup>23</sup> I puta mai ano te kupu a Ihowa ki ahau, i mea, <sup>24</sup> E te tama a te tangata, mea atu ki a ia, He whenua koe kihai i purea, kihai ano i whai ua i te ra o te riri. <sup>25</sup> E whakatakotoria ana he he e ana poropiti i waenganui i a ia, koia ano kei te raiona mangai nui e haehae ana i te tupapaku; kua pau nga wairua i a ratou; kua riro i a ratou nga taonga me nga mea utu nui; kua tini i a ratou ona pouaru i roto i a ia. <sup>26</sup> Kua tukinotia e ana tohunga taku ture, whakanoatia ana e ratou aku mea tapu: kihai i wehea e ratou te tapu i te noa, kihai ano i whakakitea e ratou te wehenga o te poke, o te ma; ko o ratou kanohi huna ake e ratou ki aku hapati, a whakapokea ana ahau i roto i a ratou. <sup>27</sup> Ko ona rangatira i roto i a ia, rite tonu ki te wuruhi e haehae ana i te tupapaku; he whakaheke toto, he whakangaro wairua, kia riro mai ai he taonga whanako. <sup>28</sup> I pania ano e ana poropiti he mea mo ratou ki te paru kihai i konatunatua; he moemoea horihori a ratou; he teka nga korero a aua tohunga tuaahu ki a ratou, i a ratou ka mea nei, Ko te kupu tenei a te Ariki, a Ihowa, i te mea kihai a Ihowa i kore ro. <sup>29</sup> Ko ta te iwi o te whenua, he whakatupu kino, he pahua; ae ra, e tukinotia ana e ratou te ware me te rawakore; e whakatupuria kinotia ana e ratou te tautangata i te mea kahore nei he take. <sup>30</sup> I te rapu ano ahau i te tangata i roto i a ratou hei hanga i te taiepa, hei tu ki te wahi pakaru ki toku aroaro mo te whenua, hei mea kei whakangaromia e ahau: heoi kihai i kitea. <sup>31</sup> Na reira i ringihia ai e ahau toku riri ki runga ki a ratou; kua whakapotoa ratou e ahau ki te ahi o toku riri: kua hoatu e ahau te utu o to ratou ara ki runga ki o ratou mahunga, e ai ta te Ariki, ta Ihowa.

### Chapter 23

<sup>1</sup> I puta mai ano te kupu a Ihowa ki ahau, i mea, <sup>2</sup> E te tama a te tangata, tokorua nga wahine i mua, he tamahine na te whaea kotahi. <sup>3</sup> Heoi moepuku ana ki Ihipa; moepuku ana i to raua tamarikitanga: i romia o raua u ki reira, i mirimiria ki reira nga matamata o to raua wahinetanga. <sup>4</sup> Na, ko o raua ingoa, ko Ohora to te tuakana, ko Ohoripa to te teina: a i riro raua i ahau, i whanau hoki he tama, he tamahine ma raua. Na, mo o raua ingoa, ko Hamaria a Ohora, ko Hiruharama a Ohoripa. <sup>5</sup> Na, kua kairau a Ohora i te mea i ahau ano ia, minamina atu ana ki ana i aroha ai, ki ona hoa tata, ki nga Ahiriana, <sup>6</sup> He puru nei o ratou kakahu, he ariki, he kawana, he taitamariki, e minaminatia ratou katoa, he tangata hoiho, e eke ana ki te hoiho. <sup>7</sup> Heoi kei te mahi kairau ia ki a ratou, ki nga tangata papai rawa o nga tama o Ahiria, ki a ratou katoa; a ahakoa ko wai i minaminatia



8  
 e ia, whakapoke ana ia i a ia ano ki a ratou whakapakoko katoa. Kihai ano i mahue i a ia ana moepuku mai o nga ra o Ihipa; i takoto hoki ratou ki a ia i tona tamarikitanga, a mirimiria ana e  
 9  
 ratou nga matamata o tona wahinetanga, ringihia ana e ratou a ratou moepuku ki runga ki a ia. Na reira ia i tukua ai e ahau ki te ringa o te hunga i arohaina e ia, ki te ringa o nga tamariki o Ahiria,  
 10  
 o ana i minamina ai. A hurahia ana ia e ratou kia noho tahanga; tangohia ana e ratou ana tama, ana tamahine, patua iho ia e ratou ki te hoari; a whai ingoa ana ia i roto i nga wahine; i mahia hoki e ratou he whakawa ki a ia.

11  
 A ka kite tona teina, a Ohoripa, i tenei, otiia i nui atu te kino o tona minamina i to tera, ona moepuku hoki i nui atu i o tona tuakana. 12  
 Minamina ana ia ki nga Ahiriana, ki ona hoa tata, ki nga ariki, ki nga kawana, he pai rawa nei nga kakahu, he tangata hoiho e eke ana ki te hoiho, ko

13  
 ratou katoa he tamariki e minaminatia. Na ka kite ahau kua poke ia, kotahi tonu te ara o raua tokorua. 14  
 Kua neke ake ano ona moepuku: i kite hoki ia i nga tangata kua oti te tuhituhi ki te

15  
 pakitara, i nga whakaahua o nga Karari, he mea tuhituhi ki te whero pai, He mea whitiki o ratou hope ki te whitiki, o ratou mahunga mea rawa ki te kakahu kua oti te rongoa, he rangatira katoa ki

16  
 te titiro; ko te ahua kei to nga tama o Papurona, o Karari, o te whenua i whanau ai ratou: A, no te kitenga o ona kanohi i a ratou, minamina tonu ki a ratou, tukua ana e ia he karere ki a ratou, ki

17  
 Karari. Na ka haere mai ki a ia o nga tamariki o Papurona ki te moenga aroha, whakapokea ana ia e ratou ki a ratou moepuku: heoi ka whakapokea nei e ratou, na ngakaukore noa iho ia ki a ratou.

18  
 Heoi ka whakakitea e ia ona moepuku, ka whakakitea ano ia e noho tahanga ana: na ngakaukore noa iho ahau ki a ia, pera tonu me ahau i ngakaukore ra ki tona tuakana. 19  
 Heoi whakanuia ana e ia ona moepuku, me te mahara ano ia ki nga ra o tona tamarikitanga i a ia i kairau ra ki te whenua

20  
 o Ihipa. I minamina hoki ia ki o ratou hoa moepuku, he kikokiko kaihe nei o ratou kikokiko; a,

21  
 ko te mea e tarere mai ana i roto i a ratou rite tonu ki te mea e tarere mai ana i roto i te hoiho. Na kua hokia nei e koe nga he o tou tamarikitanga i nga matamata o ou u i mirimiria ra e nga Ihipiana, he meatanga ki nga u o tou tamarikitanga.

22  
 Mo reira, e Ohoripa, ko te kupu tenei a te Ariki, a Ihowa, Nana, ka ara i ahau ou hoa aroha hei hoariri mou, era kua ngakaukore na koe ki a ratou, ka kawea mai ano ratou e ahau ki a koe ki nga taha katoa; 23  
 Ko nga tangata o Papurona, ratou ko nga Karari katoa, a Pekoro, a Hoa, a Koa, ratou ko nga Ahiriana katoa: he taitamariki ratou katoa e minaminatia, he ariki, he kawana, he

24  
 rangatira, he rongu nui, he eke hoiho katoa. A ka haere mai ratou ki te whawhai ki a koe, me nga mea mo te whawhai, he hariata ano o ratou, he kata, he whakaminenga iwi; rite rawa i a ratou

te puapua, te whakangungu rakau, te potae, hei whawhai ki a koe i tetahi taha, i tetahi taha: ka tukua ano e ahau te whakawa ki to ratou aroaro, a ka rite ki a ratou whakaritenga ta ratou whakarite

<sup>25</sup> mou. Ka whakataua ano e ahau toku hae ki a koe, a ka mahi weriweri ratou ki a koe: ka riro ano tou ihu i a ratou, me ou taringa; ka hinga ano hoki ou morehu i te hoari: ka tangohia atu e ratou au

tama me au tamahine; ka pau ano ou morehu i te ahi. <sup>26</sup> Ka huia atu ano e ratou ou kakahu, ka

tangohia ano ou mea ataahua. <sup>27</sup> Heoi ka meinga e ahau tou he kia mutu, me tou moepuku i timata mai ra i te whenua o Ihipa; kia kore ai ou kanohi e ara ki aua mea, kia kore ai ano koe e mahara ki

Ihipa a muri ake nei. <sup>28</sup> No te mea ko te kupu tenei a te Ariki, a Ihowa; Tenei ahau ka hoatu nei i a koe ki te ringa o te hunga e kinongia na e koe, ki roto ki te ringa o te hunga kua ngakaukore na

koe ki a ratou. <sup>29</sup> Ka mahi ano ratou i runga i te mauahara ki a koe, a ka riro ou mauiuui katoa i a ratou, mahue iho koe i a ratou kahore he kakahu, noho tahanga ana: ka kitea hoki e takoto kau ana

ou moepuku, tou he me ou moepuku. <sup>30</sup> Ka meatia enei mea e ahau ki a koe mo tou whainga atu

ki nga tauwi moepuku ai, mou i poke i a ratou whakapakoko. <sup>31</sup> I haere koe i te ara o tou tuakana;

na, ka hoatu e ahau tana kapu ki tou ringa. <sup>32</sup> Ko te kupu tenei a te Ariki, a Ihowa, Ka inumia e koe te kapu a tou tuakana, aua noa iho ki raro, nui noa atu: ka ai koe hei whakakatanga, hei

taunutanga: ranea rawa taua kapu. <sup>33</sup> Ka ki koe i te haurangi, i te pouri, i te kapu o te ketekete, o

te whakangaromanga, i te kapu a tou tuakana, a Hamaria. <sup>34</sup> Ka inumia ano ra e koe, tatau rawa, wawahi rawa i nga maramara, ka hae ano e koe ou u: naku hoki te korero, e ai ta te Ariki, ta Ihowa.

<sup>35</sup> Ina, ko te kupu tenei a te Ariki, a Ihowa; Na, kua wareware na koe ki ahau, kua maka ano ahau e koe ki muri i tou tuara, na pikaua ano e koe tou he me ou moepuku.

<sup>36</sup> I mea ano a Ihowa ki ahau; E te tama a te tangata, e whakawa ranei koe i a Ohora raua ko

Ohoripa? whakakitea a raua mea whakarihariha ki a raua; <sup>37</sup> No te mea kua moepuku raua, he toto kei o raua ringa, kua moepuku ano raua ki a raua whakapakoko; kua meinga e raua a raua tamariki,

aku i whanau nei i roto i a raua kia tika i roto i te ahi, ki aua whakapakoko, pau tonu atu. <sup>38</sup> Ko tenei ano ta raua i mea ai ki ahau: i taua ra kotahi, whakapokea iho e raua toku wahi tapu, ko aku

hapati kua noa i a raua. <sup>39</sup> I ta raua patunga hoki i a raua tamariki hei mea ki a raua whakapakoko, haere ana raua i taua ra ano ki toku wahi tapu whakanoa ai; na, ko ta raua tena i mea ai i roto i toku

whare. <sup>40</sup> I unga tangata ano koutou ki te hunga haere mai i tawhiti, he hunga i unga atu nei he karere ki a ratou; na, kua tae mai ratou; mo ratou tau horoi i a koe, mea rawa i ou kanohi ki te

pukepoto, whakapaipai rawa i a koe ki nga whakapaipai; <sup>41</sup> Na noho ana koe, he mea kororia te moenga, i tona taha ko te tepu rite rawa; i runga ko taku whakakakara, ko taku hinu, he mea

whakatakoto nau. <sup>42</sup> A i taua wahine te nge o te mano tini e noho nakohakoha ana: a i kawea mai i roto i te mano o te tangata nga haurangi o te koraha; a na ratou i whakanoho he poroporo ki o raua ringa, he karauna ataahua ki o raua mahunga. <sup>43</sup> Katahi ahau ka mea mo taua wahine kua ruruhi nei e moepuku ana, E moepuku ano ranei ratou ki a ia, me ia ano ki a ratou? <sup>44</sup> Heoi haere ana ratou ki a ia, he pera i ta ratou haere ki te wahine moepuku: pera tonu ta ratou haere ki a Ohora, ki a Ohoripa, ki nga wahine he. <sup>45</sup> Na, ko nga tangata tika, ma ratou raua e whakawa, he whakawa i nga wahine moepuku, he whakawa i nga wahine whakaheke toto; he wahine moepuku hoki raua, he toto kei o raua ringa. <sup>46</sup> Ko te kupu hoki tenei a te Ariki, a Ihowa; Ka kawea mai e ahau he hui ki a raua, a ka meinga raua e ahau kia makamaka, kia pahuatia. <sup>47</sup> A ka akina raua e te hui ki te kohatu, ka tapahia ki a ratou hoari; ka whakamatea a raua tama, a raua tamahine, ka tahuna ano o raua whare ki te ahi. <sup>48</sup> Heoi ka meinga e ahau te puremu kia mutu i te whenua; kia ako ai nga wahine katoa kia kua a ratou mahi e rite ki o korua he. <sup>49</sup> Ka hoatu ano e ratou nga utu o to korua he ki a korua, a ka pikaua e korua nga hara o a korua whakapakoko; ka mohio ko te Ariki ahau, ko Ihowa.

## Chapter 24

<sup>1</sup> I puta mai ano te kupu a Ihowa ki ahau, i te iwa o nga tau, i te tekau o nga marama, i te tekau o nga ra o te marama, i mea, <sup>2</sup> E te tama a te tangata, tuhituhia te ingoa o tenei ra, o tenei ra kotahi rawa nei: ko te tino ra tenei i anga nui ai te kingi o Papurona ki Hiruharama. <sup>3</sup> Korerotia hoki tetahi kupu whakarite ki te whare whakakeke, mea atu ki a ratou, Ko te kupu tenei a te Ariki, a Ihowa; Whakaekea te kohua, whakaekea, ringihia ano he wai ki roto. <sup>4</sup> Kohikohia ano ona wahi ki roto, nga wahi pai katoa, te huha, te peke; whakakiiia ki nga wheua pai rawa. <sup>5</sup> Tikina te hipi pai rawa, me haupu nga wheua ki raro i a ia; kia nui te koropuputanga; ae ra, kohuatia ona wheua ki roto. <sup>6</sup> Mo reira ko te kupu tenei a te Ariki, a Ihowa, Aue, te mate mo te pa toto, me te kohua he waikura nei tona, kihai nei tona waikura i tahia! whakaputaina ki waho tenei wahi ona, tenei wahi ona; kahore tetahi rota i tau ki runga i a ia. <sup>7</sup> No te mea kei roto i a ia ona toto, kua waiho e ia ki runga ki te kamaka; kihai i ringihia e ia ki te whenua, kia hipokina ai ki te puehu; <sup>8</sup> He mea kia puta ake ai te weriweri ki te rapu utu, kua waiho e ahau ona toto ki runga ki te kamaka, kei hipokina. <sup>9</sup> Na

reira tenei kupu a te Ariki, a Ihowa, Aue, te mate mo te pa toto! maku ano e whakanui tona puranga

<sup>10</sup> wahie. Purangatia te wahie, whakaungia te ahi, kia pai rawa te kohua i nga kiko; meatia marietia

kia pupuru nga kai, kia wera hoki nga wheua. <sup>11</sup> Ka tu kau, whakaturia ki runga ki ona ngarahu,

kia mahana ai, kia wera ai tona parahi, kia rewa ai tona poke i roto, kia poto ai te waikura. <sup>12</sup> Kua hoha ia i te mahi; otia kihai tona waikura nui i puta atu i roto i a ia; kahore tona waikura i kore i

te ahi. <sup>13</sup> He he kei roto i tou poke: na, mea noa ahau i a koe kia ma, a kihai koe i ma; mo reira e

kore tou poke e whakamakia a muri ake nei, kia makona ra ano toku riri ki a koe. <sup>14</sup> Naku, na Ihowa te kupu: ka rite, ka mahia ano e ahau, e kore taku e taka, e kore ano ahau, e manawapa, e kore e ripeneta; ka rite ki ou ara, ka rite ki au mahi ta ratou whakawa mou, e ai ta te Ariki, ta Ihowa.

<sup>15</sup> I puta mai ano te kupu a Ihowa ki ahau; i mea, <sup>16</sup> E te tama a te tangata, ka tangohia mai e ahau i tou taha ta ou kanohi i hiahia ai, ka whakapangia ki te mate: kua ano ia e uhungatia, kua

e tangihia, kua ou roimata e puta. <sup>17</sup> E tangi, engari kia ngawari; kauaka he uhunga tupapaku, herea tou tupare ki runga ki a koe, kuhua ano ou hu ki ou waewae, kua ano ou ngutu e araia, kua

ano e kainga te taro tangata. <sup>18</sup> Heoi i korero ahau ki te iwi i te ata; a i te ahiahi ka mate toku hoa

wahine: na i te ata ka meatia e ahau te mea i whakahaua ki ahau. <sup>19</sup> Na ka mea te iwi ki ahau, E

kore ianei e korerotia e koe ki a matou, he aha mo matou ena mea e meatia na e koe? <sup>20</sup> Ano ra ko

ahau ki a ratou, I puta mai te kupu a Ihowa ki ahau, i mea, <sup>21</sup> Mea atu ki te whare o Iharaira, Ko te kupu tenei a te Ariki, a Ihowa: Tenei ahau te whakapoke nei i toku wahi tapu, i ta koutou i whakai ai, i ta koutou kanohi e hiahia nei, i te mea e manawapatia ana e to koutou wairua: na, ko a koutou

tama, k o a koutou tamahine, i mahue nei ki a koutou, ka hinga i te hoari. <sup>22</sup> A ko ta koutou e mea ai ka rite ki taku i mea nei: e kore o koutou ngutu e araia, e kore ano koutou e kai i te taro tangata.

<sup>23</sup> E mau ano o koutou tupare ki o koutou mahunga, o koutou hu ki o koutou waewae; e kore koutou e uhunga, e kore e tangi; engari ka memehia atu i runga i o koutou he, ka koingo ki tetahi, ki tetahi.

<sup>24</sup> A hei tohu a Ehekiera ki a koutou: ka rite ki nga mea katoa i mea ai ia ta koutou e mea ai: ka pa

mai tenei, ka mohio koutou ko te Ariki ahau, ko Ihowa. <sup>25</sup> Na, ko koe, e te tama a te tangata, he teka ianei i te ra e tangohia atu ai e ahau to ratou kaha, to ratou koa whakakororia, ta o ratou kanohi

e hiahia ai, ta o ratou ngakau e okaka tonu ai, a ratou tama, a ratou tamahine, <sup>26</sup> I taua ra ka haere

mai te mea i mawhiti ki a koe kia rongu ai ou taringa? <sup>27</sup> I taua ra ka puaki tou mangai ki te tangata i mawhiti, a ka korero, kore ake ou wahangu; hei tohu hoki koe ki a ratou; a ka mohio ratou ko Ihowa ahau

## Chapter 25

<sup>1</sup> I puta mai ano te kupu a Ihowa ki ahau, i mea, <sup>2</sup> E te tama a te tangata, anga atu tou mata ki  
<sup>3</sup> nga tama a Amona, ka poropiti i te he mo ratou. Mea atu hoki ki nga tama a Amona, Whakarongo  
 ki te kupu a te Ariki a Ihowa; Ko te kupu tenei a te Ariki, a Ihowa; Na, kua mea mai na koe, Ha!  
 ki toku wahi tapu i te mea e whakapokea ana; ki te oneone ano o Iharaira i te mea ka uruatuatia, ki  
<sup>4</sup> te whare ano o Hura i a ratou ka riro ki te whakarau: Mo reira tenei ahau te hoatu nei i a koe hei  
 kainga ki nga tamariki o te rawhiti, a ka whakaturia e ratou o ratou puni ki a koe, ka hanga ano o  
<sup>5</sup> ratou kainga ki a koe: ka pau i a ratou au hua, ka inumia e ratou tau waiu. Ka meinga ano e ahau  
 a Rapa hei kainga kamera, me nga tama ano a Amona hei tapapatanga hipi: a ka mohio koutou ko  
<sup>6</sup> Ihowa ahau. Ko te kupu hoki tenei a te Ariki, a Ihowa, Na, kua papaki na ou ringa, kua takahi ou  
<sup>7</sup> waewae, pau katoa tou ngakau ki te koa, he kino nou ki te whenua o Iharaira; Mo reira, na, kua  
 totoro atu toku ringa ki a koe, a kua tukua koe e ahau hei pahuatanga ma nga iwi; ka hatepea atu  
 koe e ahau i roto i nga iwi, ka huna ano koe e ahau i roto i nga whenua: ka whakangaromia koe e  
 ahau; a ka mohio koe ko Ihowa ahau.

<sup>8</sup> Ko te kupu tenei a te Ariki, a Ihowa, Kua mea nei a Moapa raua ko Heira, Nana, kua rite te  
<sup>9</sup> whare o Hura ki nga iwi katoa; Mo reira tenei ahau te mea nei kia takoto kau te taha o Moapa i  
 nga pa, i ona pa i ona rohe, te kororia o te whenua, i Peteiehimoto, i Paarameono, i Kiriataima,  
<sup>10</sup> Tae noa ki nga tama o te rawhiti, kia haere ki te whawhai ki nga tama a Amona, a ka tukua ratou  
<sup>11</sup> e ahau hei kainga tupu, e kore ai e maharatia nga tama a Amona i roto i nga iwi. Ka mahia ano  
<sup>12</sup> e ahau he whakawa ki a Moapa; a ka mohio ratou ko Ihowa ahau. Ko te kupu tenei a te Ariki,  
 a Ihowa; Na, kua mahia na e Eroma he he mo te whare o Hura, kua rapu utu, kua nui to ratou kino,  
<sup>13</sup> kua rapu utu i a ratou; Mo reira ko te kupu tenei a te Ariki, a Ihowa: Ka totoro ano toku ringa  
 ki a Eroma, ka hatepea atu nga tangata me nga kararehe o reira; ka meinga ano e ahau te ritenga  
<sup>14</sup> atu o Temana hei ururua, ka hinga ano nga tangata, a tae atu ana ki Rerana, i te hoari. Ka tukua  
 atu ano e ahau taku rapu utu ki a Eroma, ma taku iwi, ma Iharaira e mahi; ka meatia ano e ratou i  
 roto i a Eroma nga mea e rite ana ki toku riri, ki toku weriweri; a ka mohio ratou ki taku rapu utu,  
<sup>15</sup> e ai ta te Ariki, ta Ihowa. Ko te kupu tenei a te Ariki, a Ihowa: He rapu utu nei te mahi a nga  
<sup>16</sup> Pirihitini, he kino nei te ngakau i rapu utu ai ratou, he mea kia ngaro, he mauahara tuturu; Mo  
 reira ko te kupu tenei a te Ariki, a Ihowa; Nana ka totoro toku ringa ki nga Pirihitini, a ka hatepea  
<sup>17</sup> atu e ahau nga Keretimi, ka huna ano e ahau nga morehu o te tahatai. He nui hoki nga rapunga

utu e mahia e ahau ki a ratou, weriweri rawa nga whakatupehupehunga; a ka mohio ratou ko Ihowa ahau, ina tukua e ahau taku rapu utu ki a ratou.

## Chapter 26

<sup>1</sup> Na i te tekau ma tahi o nga tau, i te tahi o nga ra o te marama, i puta mai te kupu a Ihowa ki ahau; i mea, <sup>2</sup> E te tama a te tangata, kua mea na a Taira ki Hiruharama, Ha, kua pakaru ia, te kuwaha o nga iwi; kua anga mai ia ki ahau; ka whakakiia ahau, i a ia ka ururua nei: <sup>3</sup> Mo reira ko te kupu tenei a te Ariki, a Ihowa; Nana, hei hoariri tenei ahau mou, e Taira, a ka meinga e ahau nga iwi maha kia eke ake ki a koe, kia pera ano me te moana e mea nei i ona ngaru kia eke ake. <sup>4</sup> A ka kore i a ratou nga taiepa o Taira, ka pakaru ano ona pourewa i a ratou; ka tahia atu ano e ahau tona puehu i runga i a ia, ka meinga ia kia rite ki te kamaka moremore. <sup>5</sup> Ka waiho ia hei horahanga kupenga i waenga moana: naku hoki te kupu, e ai ta te Ariki, ta Ihowa: ka waiho hoki ia hei pahuatanga ma nga iwi. <sup>6</sup> Na, ko ana tamahine i te mara, ka tukitukia e te hoari; a ka mohio ratou ko Ihowa ahau. <sup>7</sup> No te mea ko te kupu tenei a te Ariki, a Ihowa; Tenei te kawea atu nei e ahau i te raki ki Taira a Nepukareha kingi o Papurona, kingi o nga kingi, me nga hoiho, me nga hariata, me nga kaieke hoiho, me te huihui, me te iwi nui. <sup>8</sup> Ka patua e ia ki te hoari au tamahine i te mara: ka hanga ano e ia he taumaihi hei tatau ki a koe, ka haupuria ake ano he pukepuke hei tatau ki a koe, ka ara ano i a ia te puapua ki a koe. <sup>9</sup> Ka whakaturia ano e ia nga mea whawhai ki ou taiepa, ka wahia ano e ia ou pourewa ki ana titaha. <sup>10</sup> I te tini o ana hoiho, ka taupokina koe e to ratou puehu; ka ngarue ou taiepa i te haruru o nga kaieke hoiho, o nga kata, o nga hariata, ina tomokia e ia ou kuwaha, ina pera ia me te hunga e tomo ana ki roto ki te pa kua pakaru. <sup>11</sup> Ka takatakahia ou ara katoa e nga paua o ana hoiho; ka tukitukia e ia tou iwi ki te hoari, ka riro iho ano nga pou o tou kaha ki te whenua. <sup>12</sup> Ka pahuatia e ratou ou taonga, a hei taonga parakete au mea hokohoko: ka wahia iho ou taiepa, ka pakaru ou whare e matenuitia ana e koe: ka maka ano e ratou ou kohatu, ou rakau, me tou puehu, ki te wai. <sup>13</sup> Ka mutu ano i ahau te ngahau o au waiata, e kore ano te tangi o au hapa e rangona a muri ake nei. <sup>14</sup> A ka meinga koe e ahau kia rite ki te kamaka moremore: ka waiho koe hei horahanga kupenga; e kore koe e hanga a muri ake nei: naku hoki, na Ihowa te kupu, e ai ta te Ariki, ta Ihowa.

15 Ko te kupu tenei a te Ariki, a Ihowa ki a Taira, E kore ianei nga motu e wiri i te haruru o  
 tou hinganga, ina aue te tangata i werohia, ina hinga te parekura i roto i a koe? <sup>16</sup> Ko reira hoki  
 nga rangatira katoa o te moana heke iho ai i runga i o ratou torona; ko o ratou koroka whakarere  
 rawa, ko o ratou kakahu whakairo unu rawa: ko te kakahu mo ratou ko te wiri; ka noho ki te whenua,  
 hono tonu te wiri, ketekete tonu ki a koe. <sup>17</sup> A ka maranga ta ratou tangi mou, ka mea ratou ki a  
 koe, Taukiri e, kua ngaro koe, e te pa o te hunga rere moana: e te pa ingoa nui i kaha nei i runga i  
 te moana, a ia me ona tangata ano, e mea nei i to ratou wehi kia pa ki nga tangata katoa e ta kataka  
 ana i reira! <sup>18</sup> Akuanei nga motu wiri ai i te ra e hinga ai koe; ina, ka ohore nga motu o te moana  
 i a koe ka riro. <sup>19</sup> No te mea ko te kupu tenei a te Ariki, a Ihowa; I te wa e meinga ai koe e ahau  
 hei pa kua uruatuia, kia rite ki nga pa kahore e nohoia; i te wa e kawea atu ai e ahau te rire ki runga  
 ki a koe, a ka taupokina koe e nga wai nunui; <sup>20</sup> Ko reira whakahokia iho ai koe e ahau ki raro,  
 koutou ko te hunga e heke ana ki te rua, ki nga tangata onamata, a ka meinga koe kia noho ki nga  
 wahi o raro o te whenua, ki nga wahi mokemoke onamata, i roto i te hunga e heke ana ki te poka,  
 kore iho koe e nohoia; a ka hoatu e ahau he kororia ki te whenua o te hunga ora; <sup>21</sup> Ka meinga koe  
 e ahau hei wehi, a moti iho koe: ka rapua ano koe, a kore noa iho e kitea a ake ake, e ai ta te Ariki,  
 ta Ihowa.

## Chapter 27

<sup>1</sup> I puta mai ano te kupu a Ihowa ki ahau, i mea, <sup>2</sup> Kia anga atu akuanei tau tangi, e te tama a  
 te tangata, ki a Taira; <sup>3</sup> Mea atu hoki ki a Taira, E koe e noho nei i te tapokoranga mai o te moana,  
 ko koe nei te kaihokohoko o nga iwi ki nga motu maha, Ko te kupu tenei a te Ariki, a Ihowa; E  
 Taira, kua mea na koe, Ko ahau te mea ataahua rawa. <sup>4</sup> Kei waenga moana ou rohe, oti rawa koe  
 te whakaataahua e ou kaihanganga. <sup>5</sup> No nga kauri o Heniri nga papa katoa i hanga ai ou kaipuke; i  
 tikina ano he hita i Repanona hei hanga rewa mau. <sup>6</sup> No nga oki o Pahana nga hoe i hanga mau,  
 ou taumanu he mea hanga ki te rei, he mea kua oti te whakanoho ki te ake o nga motu o Kitimi.  
<sup>7</sup> He rinena pai, he mea whakairo no Ihipa te mea i wherahia e koe hei komaru mou, hei kara mau;  
 ko te hipoki mou, he puru, he papura no nga motu o Eriha. <sup>8</sup> Ko au kaihoe ko nga tangata o Hairona,  
 o Arawara; ko au kaiurungi ko nga tangata whakaaro nui i roto i a koe, e Taira. <sup>9</sup> I roto nga kaumatua  
 o Kepara i a koe, me nga tangata whakaaro nui o reira hei kaimono mau: i a koe nga kaipuke katoa

<sup>10</sup>  
 o te moana, me o ratou kaiwhakaterere, hei hoko i ou taonga. I roto i tou ope ko Pahia, ko Ruru, ko Putu, he hoia nau: whakairihia ake ana e ratou te puapua me te potae i roto i a koe; he mea

<sup>11</sup>  
 whakahonore koe na ratou. I runga i ou taiepa nga tangata o Arawara me tou ope ano a tawhio noa, i roto i ou pourewa nga Kamarimi: whakairihia ana e ratou a ratou whakangungu rakau ki ou

<sup>12</sup>  
 taiepa a tawhio noa: oti rawa koe te whakaataahua e ratou. He kaihokohoko a Tarahihi ki a koe, he nui hoki no ou taonga katoa: ko ta ratou i tuku ai i au hokohokonga he hiriwa, he rino, he tine,

<sup>13</sup>  
 he mata. Ko Iawana, ko Tupara, ko Meheke, he kaihokohoko ratou nau; ko ta ratou i tuku ai i

<sup>14</sup>  
 ou kainga hoko, he tangata, he oko parahi. Ko nga tangata o te whare o Tokarama, ko ta ratou

<sup>15</sup>  
 i tuku ai i au hokohokonga he hoiho, he hoiho no te whawhai, he muera. He kaihokohoko nau nga tangata o Rerana; he maha nga motu i hokohokona ai nga taonga e koe: kawea mai ana e ratou

<sup>16</sup>  
 hei whakawhiti ki a koe, he hoana rei, he eponi. He kaihokohoko nau a Hiria, i te nui hoki o nga mahi a ou ringa; ko ta ratou i tuku ai mo au taonga he emerara, he papura, he mea whakairo, he

<sup>17</sup>  
 rinena pai, he kaoa, he rupi. Ko Hura, ko te whenua o Iharaira, ko ratou au kaihokohoko: ko ta

<sup>18</sup>  
 ratou i tuku ai i ou kainga hoko he witi no Miniti, he panaka, he honi, he hinu, he pama. He kaihokohoko nau a Ramahiku, he nui no nga mahi a ou ringa, he nui no nga taonga katoa; ko ta

<sup>19</sup>  
 ratou, he waina no Herepono, he huruhuru hipi ma. I tuku taonga a Rana, a Iawana, he miro huruhuru, i roto i au hokohokonga: i au taonga hokohoko ko te rino kua oti te mahi, ko te kahia,

<sup>20</sup>  
 ko te kakaho kakara. Ko Rerana tau kaihokohoko i nga kakahu utu nui mo nga hariata. Ko

<sup>21</sup>  
 Arapia, ko nga rangatira katoa o Kerara, i hokohokona o ratou taonga e koe, nga reme, nga hipi

<sup>22</sup>  
 toa, nga koati: ko nga mea ena i hokohoko ai ratou ki a koe. Ko nga kaihokohoko o Hepa, o Raama, he kaihokohoko ano ratou nau: ko ta ratou i tuku ai i au hokohokonga ko nga mea pai rawa

<sup>23</sup>  
 o nga kinaki reka katoa, ko nga kohatu utu nui katoa, ko te koura. Ko Harana, ko Kane, ko Erene,

<sup>24</sup>  
 ko nga kaihokohoko o Hepa, ko Ahuru, ko Kirimara, he kaihokohoko nau. Ko ratou hei hoko i nga mea pai rawa ki a koe, i nga kakahu puru, i te mea whakairo, i nga pouaka kakahu pai, he mea

<sup>25</sup>  
 paihere ki te aho, he hita, i roto i ou taonga hoko. Ko nga kaupuke o Tarahihi nga waka harihari i ou taonga: a ka whakakiia koe, ka meinga kia nui rawa tou kororia i waenga moana.

<sup>26</sup>  
 I kawea koe e ou kaihoe ki nga wai maha; i pakarua koe e te hau marangai ki waenga moana.

<sup>27</sup>  
 Ko ou taonga, ko au hokohokonga, ko au whakawhitiwhitinga, ko au kaiwhakaterere kaupuke, ko au kaiurungi, ko au kaimono, me nga kaiwhakawhitiwhiti i ou taonga, me au hoia katoa i roto i a koe, i roto ano i tou hui katoa i waenganui i a koe, ka tak a ratou ki waenga moana i te ra e hinga



<sup>28</sup> ai koe. Ka ngateri a waho o te pa i te ngangau, i te hamama o au kaiurungi. <sup>29</sup> Na, ko nga kaihapai hoe katoa, ko nga kaiwhakatere, ko nga kaiurungi katoa o te moana, ka mahuta mai i runga i o ratou  
<sup>30</sup> kaupuke, ka tu ki te tuawhenua, A ka meinga e ratou to ratou reo mou kia rangona, tiwerawera ana ta ratou tangi, ka opehia ano e ratou he puehu ki o ratou mahunga, ka takaoriori ki te pungarehu.  
<sup>31</sup> Moremore rawa ratou i te whakaaro ki a koe, he kakahu taratara te whitiki, mamae rawa te ngakau, tiwerawera te tangi e tangi ai ratou ki a koe. <sup>32</sup> I a ratou ano e tangi ana, ka maranga ta ratou tangi apakura mou, ka uhunga ratou ki a koe, ka mea, Ko tehea pa i rite ki Taira, ki tenei i whakawahangutia nei i waenga moana? <sup>33</sup> I te putanga atu o ou taonga i nga moana, he maha nga iwi i makona i tau; i whai taonga nga kingi o te whenua i a koe, i te nui hoki o ou taonga, o ou rawa.  
<sup>34</sup> I te wa i pakaru ai koe i nga moana, ki nga wahi hohonu o te moana, i taka ou rawa, me tou hui katoa i waenganui i a koe. <sup>35</sup> Ko nga tangata katoa o nga motu, ketekete ana ki a koe, nui atu te wehi o o ratou kingi, ko o ratou mata kohukihuki ana. <sup>36</sup> Ka whakahi mai ki a koe nga kaihokohoko i roto i nga iwi; ka ai koe hei whakawehi; a kore tonu ake koe ake ake.

## Chapter 28

<sup>1</sup> I puta mai ano te kupu a Ihowa ki ahau, i mea, <sup>2</sup> E te tama a te tangata, mea atu ki te rangatira o Taira: Ko te kupu tenei a te Ariki, a Ihowa; Kua whakakake na tou ngakau, kua mea, He atua ahau, e noho ana i te nohoanga o te Atua, i waenga moana, ahakoa ki tau ko tou ngakau e rite ana ki to te Atua ngakau: <sup>3</sup> Nana, nui atu ou whakaaro i o Raniera; kahore he mea ngaro e taea te huna i a koe. <sup>4</sup> He nui no ou whakaaro, he matauranga nou i mahia ai e koe he taonga mou, i mahia ai e koe he koura, he hiriwa ki roto ki ou whare taonga. <sup>5</sup> He nui noa atu no ou whakaaro, he hokohoko nau, i whakaraneatia ai e koe ou rawa, a whakakake ana tou ngakau i ou rawa. <sup>6</sup> Mo reira ko te kupu tenei a te Ariki, a Ihowa, Kua whai ake na tou ngakau ki to te Atua ngakau; <sup>7</sup> Mo reira tenei ahau te kawe nei i nga tautangata ki a koe, te hunga nanakia rawa o nga iwi; a ka unuhia e ratou a ratou hoari hei whawhai ki te ataahua o ou whakaaro nui, ka whakapokea ano e ratou tou kanapatanga. <sup>8</sup> Ka whakahokia iho koe e ratou ki te poka, a, ko te mate mou, ko nga mate o te hunga e patua ana i waenga moana. <sup>9</sup> E mea ake ano ranei koe ki te aroaro o tou kaipatu, Ko te Atua ahau? otiia he tangata ano koe, ehara koe i te Atua i roto i te ringa o tou kaipatu. <sup>10</sup> Ko tou

matenga, ko nga matenga o te hunga kokotikore i te ringa o nga tautangata: naku hoki te kupu, e ai ta te Ariki, ta Ihowa.

11 I puta mai ano te kupu a Ihowa ki ahau; i mea, 12 E te tama a te tangata, kia ara tau tangi mo te kingi o Taira, mea atu hoki ki a ia, Ko te kupu tenei a te Ariki, a Ihowa; Kei te tino o te pai

tau hiri, ki tonu koe i nga whakaaro nunui, pai rerehua te ataahua. 13 I Erene koe, i te kari a te Atua e noho ana; ko tou hipoki ko nga kohatu utu nui katoa, ko te harariu, ko te topaha, ko te taimana, ko te perira, ko te onika, ko te hahapa, ko te hapaira, ko te emerara, ko te kapakara, ko te koura: i

whakapaia a no te mahi o au timipera, o au putorino i roto i a koe i te ra i hanga ai koe. 14 Ko koe te kerupa hipoki, te mea i whakawahia; naku ano koe i mea hei pena, i noho ai koe i runga i te

maunga tapu o te Atua; i haereere ano koe i roto i nga kohatu ahi. 15 Tapatahi tonu koe i ou ara, i

te ra ra ano i hanga ai koe, a taea noatia te kitenga o te he i roto i a koe. 16 He nui no au hokohokonga i ki ai a roto i a koe i te tutu, a hara iho koe; mo reira ka maka atu koe, te mea poke, e ahau i te

maunga o te Atua: ka ngaro ano koe, e te kerupa hipoki, i roto i nga kohatu ahi. 17 Kua whakakake tou ngakau ki tou ataahua, na tou kanapatanga i he ai ou whakaaro nui: kua panga koe e ahau ki te

whenua, kua tukua koe e ahau ki te aroaro o nga kingi, hei matakitakinga ma ratou. 18 Kua whakapokea e koe ou wahi tapu ki te maha o ou kino, ki te he i a koe i hokohoko ra; mo reira i whakaputaina mai ai e ahau he ahi i roto i a koe, hei kai i a koe, a kua meinga ano koe e ahau hei

pungarehu ki runga ki te whenua i te tirohanga a te hunga katoa e kite ana i a koe. 19 Ko te hunga katoa e mohio ana ki a koe i roto i nga iwi ka miharo ki a koe: ka ai koe hei whakawehi, kore tonu ake koe, ake ake.

20 I puta mai ano te kupu a Ihowa ki ahau; i mea, 21 E te tama a te tangata, anga atu tou mata

ki Hairona, poropititia hoki te he mo reira, 22 Mea atu, Ko te kupu tenei a te Ariki, a Ihowa; Nana, hei hoariri ahau mou, e Hairona; ka whai kororia ano hoki ahau i roto i a koe: a ka mohio ratou ko

Ihowa ahau, ina mahia e ahau he whakawa i roto i a ia, ina whakatapua ahau i roto i a ia. 23 Ka unga atu hoki e ahau te mate uruta ki a ia, me te toto ki ona ara; ka hinga hoki te hunga i werohia i waenga ona, mea rawa ki te hoari i runga i a ia a tawhio noa; a ka mohio ratou ko Ihowa ahau.

24 Kahore hoki he tataramoa ngau a muri ake nei ki te whare o Iharaira, kahore he tumatakuru whakamamae a te hunga katoa i tetahi taha o ratou, i tetahi taha, a te hunga ra i whakahawea ki a

ratou; a ka mohio ratou ko te Ariki ahau, ko Ihowa. 25 Ko te kupu tenei a te Ariki, a Ihowa; Ka oti te whare o Iharaira te kohikohi e ahau i roto i nga iwi i whakamararatia atu ai ratou, a ka oti ahau te whakatapu i runga i a ratou i te tirohanga a nga iwi, ko reira ratou noho ai ki to ratou oneone i

hoatu e ahau ki taku pononga, ki a Hakopa. 26 Ka noho ano ratou ki reira, te ai he wehi; ae ra, ka hanga whare ano ratou, ka whakato mara waina, ka ata noho ano hoki, ina mahia e ahau he whakawa

ki te hunga katoa i whakahawea ki a ratou i tetahi taha o ratou, i tetahi taha; a ka mohio ratou ko Ihowa ahau, ko to ratou Atua.

## Chapter 29

<sup>1</sup> I te tekau o nga tau, i te tekau o nga marama, i te tekau ma rua o nga ra o te marama, ka puta mai te kupu a Ihowa ki ahau; i mea, <sup>2</sup> E te tama a te tangata, anga atu tou mata ki a Parao kingi o Ihipa; poropititia he he mona, mo Ihipa katoa hoki. <sup>3</sup> Korero, mea atu, Ko te kupu tenei a te Ariki, a Ihowa; Hei hoariri tenei ahau mou, e Parao kingi o Ihipa, e te tarakona nui e takoto na i waenganui i ona awa; nana nei te kupu, Naku taku awa, naku ano i hanga hei mea maku. <sup>4</sup> A ka maka e ahau he matau ki ou kauae, ka meinga ano e ahau nga ika o ou awa kia piri ki ou unahi; ka tangohia mai ano koe e ahau i waenganui o ou awa, me nga ika katoa o ou awa e piri ana ki ou unahi. <sup>5</sup> Ka waiho ano koe e ahau, he mea kua maka atu ki te koraha, a koe me nga ika katoa o ou awa; ka hinga koe ki runga ki te mata o te parae; e kore koe e kohikohia, e kore e huihuia: kua tukua atu koe e ahau hei kai ma te kirehe o te whenua, ma te ma nu o te rangi. <sup>6</sup> A ka mohio nga tangata katoa o Ihipa ko Ihowa ahau; he kakaho hoki ratou kua waiho nei hei tokotoko mo te whare o Iharaira. <sup>7</sup> No te hopukanga atu a to ratou ringa i a koe, whati pu koe, haea ana e koe o ratou pokohiwi katoa: i to ratou okiokinga ki runga ki a koe, whati pu koe, wiri ana i a koe o ratou hope katoa.

<sup>8</sup> Mo reira ko te kupu tenei a te Ariki, a Ihowa; Tenei ahau te kawe nei i te hoari ki runga ki a koe, ka hatepea atu ano e ahau te tangata me te kararehe i roto i a koe. <sup>9</sup> Ka ururuatia ano te whenua o Ihipa, ka tuheatia; a ka mohio ratou ko Ihowa ahau: mona hoki i ki, Naku te awa, naku ano i hanga. <sup>10</sup> Mo reira hei hoariri tenei ahau mou, mo ou awa, ka meinga ano e ahau te whenua o Ihipa kia ururu rawa, hei tuhea, i te taumaihi o Hewene tae noa atu ki te rohe o Etiopia. <sup>11</sup> E kore tetahi waewae tangata e tika na reira, e kore ano te waewae kararehe e tika na reira, e wha tekau nga tau e kore ai a reira e nohoia. <sup>12</sup> Ka meinga ano e ahau te whenua o Ihipa kia tuheatia i waenganui o nga whenua tuhea, me ona pa i roto i nga pa kua urutuatia, e wha tekau nga tau e tuhea ai: ka marara ano i ahau nga Ihipiana ki roto ki nga iwi, ka titaria ki nga whenua. <sup>13</sup> Ko te kupu hoki tenei a te Ariki, a Ihowa, I te mutunga o nga tau e wha tekau ka huihuia mai e ahau nga Ihipiana i roto i nga iwi i whakamararatia atu ai ratou. <sup>14</sup> Ka whakahokia mai e ahau a Ihipa i te whakarau, ka whakahokia ratou ki te whenua o Patoro, ki te whenua i tupu mai ai ratou, a hei kingitanga iti ratou ki reira.

<sup>15</sup> Ko te iti rawa ia i roto i nga kingitanga, e kore ano e neke ake i muri nei ki runga ake i nga iwi:

16  
maku hoki ratou e whakaiti, e kore ai ratou e whakahaere tikanga i roto i nga iwi. E kore ano e waiho hei okiokinga mo te whare o Iharaira, hei whakamahara ki te he, i a ratou ka anga nei, ka whai i a ratou; a ka mohio ratou ko te Ariki ahau, ko Ihowa.

17 Na, i te rua tekau ma whitu o nga tau, i te tuatahi o nga marama, i te tuatahi o nga ra o te marama, ka puta mai te kupu a Ihowa ki ahau; i mea, 18 E te tama a te tangata, he nui te mahi i whakamahia ai tana ope e Nepukareha kingi o Papurona ki Taira: pakira katoa nga matenga, pahore katoa nga pokohiwi: kahore hoki he utu i a ia, ratou ko tana ope mo Taira, mo te mahi i mahi ai ia

19 ki reira. Mo reira ko te kupu tenei a te Ariki, a Ihowa; Nana, ka hoatu e ahau te whenua o Ihipa ki a Nepukareha kingi o Papurona, a ka riro i a ia ona mano, ka pahuatia ona taonga; ka murua hoki ana mea, a ko tena hei utu ki tana ope. 20 Kua hoatu e ahau te whenua o Ihipa ki a ia hei utu mo

21 tana mahi i mahi ai ia; ko ta ratou hoki i mahi ai, he mea maku, e ai ta te Ariki, ta Ihowa. A taua ra ka meinga e ahau he haona kia wana mo te whare o Iharaira, ka hoatu ano e ahau ki a koe he kuihitanga mo te mangai i waenganui i a ratou; a ka mohio ratou ko Ihowa ahau.

### Chapter 30

1 I puta mai ano te kupu a Ihowa ki ahau, i mea, 2 E te tama a te tangata, poropiti, mea atu, Ko te kupu tenei a te Ariki, a Ihowa; Aue koutou, Taukiri e, taua ra nei! 3 Kua tata mai hoki te ra, te ra o Ihowa kua tata mai, he rangi tukupu, ko te wa ia o nga iwi. 4 A ka tae mai te hoari ki Ihipa, ka nui ano te mamae o Etiopia, ina hinga nga tupapaku ki Ihipa; a ka riro atu i a ratou ona mano, ka wahia hoki ona turanga. 5 Ko Etiopia, ko Putu, ko Ruru, ko te iwi whakauru katoa, ko Kupu, ko nga tangata ano o te whenua o te kawenata, ka hinga ngatahi ratou i te hoari. 6 Ko te kupu tenei a Ihowa; Ka hinga ano nga kaiawhina o Ihipa; ka riro iho ano te whakapehapeha o tona kaha; ka hinga ratou i te hoari i reira, i te taumaihi atu o Hewene, e ai ta te Ariki, ta Ihowa. 7 Ka noho kau noa iho ratou i waenganui o nga whenua tuhea, ka tu ano ona pa i waenganui i nga pa kua ururuatia.

8 A ka mohio ratou ko Ihowa ahau, ina tukua e ahau he ahi ki Ihipa, ina whakamotitia ona kaiawhina katoa. 9 I taua ra ka haere atu nga karere i toku aroaro i runga i nga kaipuke, ki te whakawehi i nga Ethiopian kahore nei e ohooho; ka nui ano to ratou mamae, ka rite ki to te ra o Ihipa: nana, te haere

10 mai nei! Ko te kupu tenei a te Ariki, a Ihowa; Ka meinga ano e ahau te ringa o Nepukareha kingi o Papurona hei whakamutu i nga mano tini o Ihipa. 11 Ka kawea mai ia, ratou ano ko tona iwi, ko

te hunga nanakia o nga iwi, ki te huna i te whenua: ka maunu ano a ratou hoari ki Ihipa, a ka kapi  
<sup>12</sup>  
te whenua i te tupapaku. Ka maroke ano nga awa i ahau, ka hokona atu ano te whenua ki te ringa  
o te hunga kino: ka ururua ano i ahau te whenua, me ona tini mea, mea rawa ki te ringa o nga  
<sup>13</sup>  
tautangata: naku, na Ihowa te kupu. Ko te kupu tenei a te Ariki, a Ihowa; Ka ngaro i ahau nga  
whakapakoko, ka mutu ano i ahau nga whakaahua o Nopo; kore ake e mea mai he rangatira i te  
<sup>14</sup>  
whenua o Ihipa: ka tukua ano e ahau he wehi ki te whenua o Ihipa. Ka ururua ano i ahau a Patoro,  
<sup>15</sup>  
ka tukua he ahi ki Toana, ka mahia ano e ahau he whakawa ki No. Ka ringihia ano e ahau toku  
<sup>16</sup>  
weriweri ki Hini, ki to Ihipa kaha; ka hatepea atu ano e ahau nga mano tini o No. Ka tukua ano  
e ahau he ahi ki Ihipa; ka nui noa atu te mamae o Hini, ka haehaea putia a No; ka whai hoariri ano  
<sup>17</sup>  
a Nopo i ia ra, i ia ra. Ka hinga nga taitama o Awene, o Pipehete i te hoari: a ka riro enei pa i te  
<sup>18</sup>  
whakarau. Ka whakapouritia ano te ra ki Tehapanehe ina pakaru i ahau nga ioka o Ihipa ki reira:  
a ka mutu i roto i a ia te whakapehapeha o tona kaha: ko ia ano ka taupokina e te kapua, ka riro ana  
<sup>19</sup>  
tamahine i te whakarau. Heoi ka mahia e ahau he whakawa ki Ihipa; a ka mohio ratou ko Ihowa  
ahau.  
<sup>20</sup>  
Na, i te tekau ma tahi o nga tau, i te marama tuatahi, i te whitu o nga ra o te marama, ka puta  
<sup>21</sup>  
te kupu a Ihowa ki ahau; i mea, E te tama a te tangata, kua whati i ahau te ringa o Parao kingi  
o Ihipa; nana, kahore i takaia hei meatanga iho mo te rongoa, kahore i meatia iho te takai hei takai,  
<sup>22</sup>  
e kaha ai ki te pupuri hoari. Mo reira ko te kupu tenei a te Ariki, a Ihowa; Nana, hei hoariri ahau  
mo Parao kingi o Ihipa, ka whati ano i ahau ona ringa, te mea kaha, te mea ano i whati; ka meinga  
<sup>23</sup>  
ano e ahau te hoari kia marere i tona ringa. Ka marara ano i ahau nga Ihipiana ki roto ki nga  
<sup>24</sup>  
tauwiwi, ka titaria ki nga whenua. Ka kaha ano i ahau nga ringa o te kingi o Papurona, ka hoatu  
ano e ahau taku hoari ki tona ringa: ka whati ia i ahau nga ringa o Parao, a no te tangata i werohia  
<sup>25</sup>  
nga aue e aue ai ia ki tona aroaro. A ka kaha i ahau nga ringa o te kingi o Papurona, a ka tukua  
iho nga ringa o Parao; a ka mohio ratou ko Ihowa ahau, ina hoatu e ahau taku hoari ki te ringa o te  
<sup>26</sup>  
kingi o Papurona, a ka whakatorona atu e ia ki runga ki te whenua o Ihipa. Ka marara ano i ahau  
nga Ihipiana ki roto ki nga iwi, ka titaria ki nga whenua; a ka mohio ratou ko Ihowa ahau.

## Chapter 31

<sup>1</sup> I te tekau ma tahi o nga tau, i te toru o nga marama, i te tuatahi o nga ra o te marama, ka puta  
 mai te kupu a Ihowa ki ahau; i mea, <sup>2</sup> E te tama a te tangata, mea atu ki a Parao kingi o Ihipa, ratou  
 ko ana mano tini; I a koe e nui na ko wai tou rite? <sup>3</sup> Nana, he hita i Repanona te Ahiriana, he pai  
 nga manga, pururu tonu, marumaru tonu, he roa rawa, purero rawa; i roto ano tona kouru i nga  
 manga pururu. <sup>4</sup> Nui tonu ia, na te wai hoki, roa tonu, he mea na te wai hohonu; i rere hoki ona  
 awa i tetahi taha o ona mahuri, i tetahi taha; i tukua atu ano ona awa ririki ki nga rakau katoa o te  
 parae. <sup>5</sup> Na reira roa rawa ia, purero rawa ki runga ake i nga rakau katoa o te parae; kua maha ano  
 ona peka, kua roroa ona manga, he maha hoki no nga wai, i a ia e kokiri ake ana. <sup>6</sup> I hanga o ratou  
 ohanga e nga manu katoa o te rangi ki ona peka, i whanau ano nga kirehe katoa o te parae ki raro  
 i ona manga, i noho ano nga iwi nunui katoa ki raro i tona taumarumarunga iho. <sup>7</sup> Heoi ataahua  
 tonu ia, i a ia i nui ra, i te roa hoki o ona manga: i te taha hoki o nga wai nui tona pakiaka. <sup>8</sup> Kihai  
 ia i ngaro i nga hita o ta te Atua kari; kihai nga kauri i rite ki ona peka, kihai ano nga rakau pereni  
 i rite ki ona manga; kahore he rakau o te kari a te Atua hei rite mona; i a ia i ataahua tonu ra. <sup>9</sup> I  
 meinga ia e ahau kia ataahua tonu i te maha o ona manga: a hae ana nga rakau katoa o Erene, i te  
 kari a te Atua, ki a ia.  
<sup>10</sup> Na reira ko te kupu tenei a te Ariki, a Ihowa; kua tiketike na koe, kua roa, a kokiri atu ana  
 tona kouru ki roto ki nga manga pururu, a neke ake ana tona ngakau i a ia i tiketike ra; <sup>11</sup> Mo reira  
 ka tukua ia e ahau ki te ringa o te mea kaha o nga tauwiwi; ka nui ta tera mahi ki a ia; he kino nona  
 i peia ai ia e ahau. <sup>12</sup> Na kua hatepea atu ia e nga tautangata, e nga mea nanakia o nga iwi, a kua  
 whakarerea iho; kua taka ona rara ki runga ki nga maunga, ki nga awaawa katoa; kua whatiwhatiia  
 ona manga ki te taha o nga awa katoa o te whenua; kua heke mai ano nga iwi katoa o te whenua i  
 tona taumarumarutanga iho, whakarerea ake e ratou. <sup>13</sup> Kei runga i a ia, ina hinga, he kainga mo  
 nga manu katoa o te rangi, a ka noho nga kirehe katoa o te parae ki ona manga; <sup>14</sup> He mea kei neke  
 ake, kei purero ki runga tetahi o nga rakau i te taha o nga wai, kei kokiri ake o ratou kouru ki roto  
 ki nga manga pururu, kei tu hoki, kei teitei nga rakau katoa e inu wai ana: kua tukua katoatia hoki  
 ki te mate, ki nga wahi o raro rawa o te whenua, ki roto ki nga tama a te tangata, ki te hunga e heke  
 ana ki te rua. <sup>15</sup> Ko te kupu tenei a te Ariki, a Ihowa; I te ra i heke ai ia ki te rua i meinga ia e ahau  
 kia tangihia, he whakaaro ki a ia i hipokina ai e ahau te rire, i puritia ai ona awa, a ko nga wai nunui  
 mau rawa: a meinga ana e ahau a Repanona kia tangi ki a ia, a ko nga rakau katoa o te parae ngohe  
 kau ki a ia. <sup>16</sup> Meinga ana e ahau kia rurea nga iwi e te haruru o tona hinganga, i taku makanga i  
 a ia ki raro i te reinga, ratou tahi ko te hunga e heke ana ki te rua: ko nga rakau katoa ano hoki o  
 Erene, ko nga mea whiriwhiri, ko nga mea papai o Repanona, ko nga mea katoa e inu ana i te wai,

ka whai whakamarietanga i nga wahi o raro rawa o te whenua. <sup>17</sup> I heke tahi ano ratou me ia ki te reinga, ki te hunga kua patua ki te hoari; ae ra, me te hunga ano i waiho nei hei ringa mona, i noho nei i raro i tona taumarumarunga iho i waenganui o nga tauwiwi. <sup>18</sup> Ko wai hei rite mou, te kororia, te nui, i roto i nga rakau o Erene? heoi ka tukua ngatahitia iho koutou ko nga rakau o Erene ki nga wahi o raro rawa o te whenua: ka takoto koe i roto i te hunga kokotikore, i roto i te hunga i patua ki te hoari. Ko Parao tenei, ratou ko ana mano tini katoa, e ai ta te Ariki, ta Ihowa.

### Chapter 32

<sup>1</sup> Na, i te tekau ma rua o nga tau, i te tekau ma rua o nga marama, i te tuatahi o nga ra o te marama, ka puta mai te kupu a Ihowa ki ahau; i mea, <sup>2</sup> E te tama a te tangata, kia ara tou tangi mo Parao kingi o Ihipa, mea atu hoki ki a ia, Ko tou rite kei te kua o raiona o nga iwi; otia e rite ana koe ki te tarakona o nga moana: i kokiri mai ano koe me ou awa, pokarekare ana nga wai i ou waewae, poke ana i a koe o ratou awa. <sup>3</sup> Ko te kupu tenei a te Ariki, a Ihowa; Ka horahia e ahau taku kupenga ki runga ki a koe, he huihuinga hoki no nga iwi maha; a ka riro ake koe i a ratou i taku kupenga. <sup>4</sup> Ka waiho ano koe e ahau ki runga ki te whenua, ka akiritia atu ano koe ki te mata o te parae, maku ano e mea kia nohoia koe e nga manu katoa o te rangi, kia makona ano nga kirehe o te whenua katoa i a koe. <sup>5</sup> Ka takoto ano i ahau ou kikokiko ki runga ki nga maunga, ka whakakiiia ano nga awaawa ki a koe e tiketike na. <sup>6</sup> Ka whakamakukuria ano e ahau ki ou toto te whenua e kau na koe, a tutuki noa ki nga maunga; ka ki ano hoki nga awa i a koe. <sup>7</sup> A ka oti koe te tinei e ahau, ka hipokina e ahau te rangi, ka whakapouritia ano hoki nga whetu o reira; ka hipokina e ahau te ra ki te kapua, e kore ano e titi te atarau. <sup>8</sup> Na, ko nga whakamarama katoa e marama nei te rangi, ka whakapouritia e ahau ki runga ki a koe, ka hoatu ano e ahau he pouri ki runga ki tou whenua, e ai ta te Ariki, ta Ihowa. <sup>9</sup> He maha ano nga iwi e mamae o ratou ngakau i ahau, ina meinga e ahau kia tae atu tou whakangaromanga ki nga iwi, ki nga whenua kihai i mohiotia e koe. <sup>10</sup> Ina, he maha nga iwi e meinga e ahau kia ketekete ki a koe, ka nui ano te wehi o o ratou kingi, ina whakaaro ki a koe, ua wherikoriko taku hoari ki to ratou aroaro; hono tonu ano to ratou wiri, ia tangata, ia tangata, i te wehi mo tona oranga an o, i te ra e hinga ai koe. <sup>11</sup> No te mea ko te kupu tenei a te Ariki, a Ihowa; Tera e tae atu te hoari a te kingi o Papurona ki a koe. <sup>12</sup> Ka meinga e ahau ou mano tini, te hunga nanakia o nga iwi, ratou katoa kia hinga i nga hoari a nga marohirohi: a ka pahuatia e ratou nga mea whakai o Ihipa, ka ngaro ano o reira mano tini katoa. <sup>13</sup> Ka ngaro ano i ahau o

reira kararehe katoa i te taha o nga wai maha; e kore ano e pokarekare i te wae tangata a muri ake nei, e kore ano e ngarungaru i te wae kararehe. <sup>14</sup> Ko reira ahau mea ai i o ratou wai kia purata, ka

meinga ano e ahau o ratou awa kia rite ki te hinu te rere, e ai ta te Ariki, ta Ihowa. <sup>15</sup> Kia meinga e ahau te whenua o Ihipa hei ururua, a kore iho nga tini mea o te whenua, kia patua ano e ahau te

hunga katoa e noho ana i reira, katahi ratou ka mohio ko Ihowa ahau. <sup>16</sup> Ko te tangi tenei e tangihia ai ia e ratou, ka tangihia ia e nga tamahine a nga iwi: ka tangihia ia e ratou, ara a Ihipa ratou ko ona mano tini, e ai ta te Ariki, ta Ihowa.

<sup>17</sup> Na, i te tekau ma rua o nga tau, i te tekau ma rima o nga ra o te marama, ka puta mai te kupu

a Ihowa ki ahau, i mea, <sup>18</sup> E te tama a te tangata, aue ki te mano tini o Ihipa, maka iho ratou, a ia, me nga tamahine a nga iwi nunui, ki nga wahi o raro rawa o te whenua, ratou ko te hunga e heke

ana ki te rua. <sup>19</sup> He ataahua rawa koe i a wai? heke iho, takoto tahi koutou ko te hunga kokotikore.

<sup>20</sup> Ka hinga ratou ki waenga i te hunga i patua ki te hoari: kua tukua atu ia ki te hoari: toia atu me

ona mano tini katoa. <sup>21</sup> Ka korero mai nga tangata kaha o nga marohirohi ki a ia i roto i te reinga, ratou ko ona kaiawhina: kua heke ratou ki raro, kei te takoto ratou, te korikori, ara nga kokotikore,

he mea patu ki te hoari. <sup>22</sup> Kei reira ano a Ahuru ratou ko tona hui katoa: ko ona urupa, kei tetahi taha ona, kei tetahi taha; he mea patu katoa, kua hinga i te hoari. <sup>23</sup> Ko ona urupa, he mea mahi ki

nga pito rawa o te rua; ko tona ropu ano kei tetahi taha o tona urupa, kei tetahi taha; he mea patu katoa ratou, kua hinga i te hoari, te hunga i puta ai te wehi ki te whenua o te hunga ora. <sup>24</sup> Kei reira

a Erama, ratou ko ona mano tini i tetahi taha o tona urupa, i tetahi taha; ko ratou katoa he mea patu, kua hinga i te hoari, he hunga kua heke kokotikore atu ki nga wahi o raro rawa o te whenua, he hunga i mea i to ratou wehi kia puta ki te whenua o te hunga ora; heoi kei te mau te whakama o

ratou, o te hunga ano e heke ana ki te rua. <sup>25</sup> Kua hanga te takotoranga mona ki roto ki te hunga i patua, mo ratou ano ko ona mano tini katoa: ko ona urupa kei tetahi taha ona, kei tetahi taha; he kokotikore ratou katoa, he mea patu ki te hoari: i puta hoki to ratou wehi ki te whenua o te hu nga ora, heoi kua mau te whakama o ratou, o te hunga ano e heke ana ki te rua: kua tukua atu ia ki roto

ki te hunga i patua. <sup>26</sup> Kei reira a Meheke, a Tupara, ratou ko ona mano tini katoa; ko ona urupa kei tetahi taha ona kei tetahi taha, he mea kokotikore ratou katoa, he mea patu ki te hoari; i puta

ano to ratou wehi i mua ki te whenua o te hunga ora. <sup>27</sup> E kore ano ratou e takoto i roto i nga marohirohi o nga kokotikore kua hinga, kua heke ki te reinga me a ratou patu ano o te whawhai: i whakatakotoria ano e ratou a ratou hoari ki raro i o ratou mahunga, a kei te mau o ratou kino ki o

ratou when ua; ko te hunga hoki tena i wehi ai nga marohirohi o te whenua o te ora. <sup>28</sup> Otiia ka whatiia koe i roto i te hunga kokotikore, ka takoto tahi hoki koutou ko te hunga i patua ki te hoari.



29

Kei reira a Eroma, ona kingi, ona rangatira katoa i tukua nei i runga i to ratou marohirohi ki roto ki te hunga i werohia e te hoari: ka takoto tahi ratou ko nga kokotikore, ratou ano ko te hunga e

30

heke ana ki te rua. Kei reira nga ariki o te raki, ratou katoa, me nga Haironi katoa i heke nei i roto i te hunga i patua; whakama iho ratou i te wehi i tupu mai i to ratou marohirohi, a takoto kokotikore ana ratou i roto i te hunga i patua ki te hoari, me te mau t e whakama o ratou, o te hunga

31

ano e heke ana ki te rua. E kite a Parao i a ratou, a ka whai whakamarietanga ki ana mano tini

32

katoa i patua ki te hoari, a Parao ratou ko tana ope katoa, e ai ta te Ariki, ta Ihowa. No te mea kua tukua e ahau tona wehi ki te whenua o te hunga ora: a ka whakatakotoria ia ki roto ki te hunga kokotikore, ratou ko te hunga i patua ki te hoari, a Parao ratou ko ana mano tini, e ai ta te Ariki, ta Ihowa.

### Chapter 33

1

I puta mai ano te kupu a Ihowa ki ahau, i mea, E te tama a te tangata, korero ki nga tamariki a tou iwi, mea atu ki a ratou, Ki te kawea e ahau te hoari ki tetahi whenua, a ka mau nga tangata o

3

te whenua ki tetahi tangata o ratou, ka whakaritea e ratou hei tutei; Mehemea, i tona kitenga i te

4

hoari e puta ana ki te whenua, ka whakatangihia e ia te tetere, hei whakatupato i te iwi; Na, ko te tangata e rongu i te tangi o te tetere, a kahore ia e tupato, ki te tae mai te hoari, a ka riro ia, hei

5

runga ano i tona mahunga ona toto: I rongu ia i te tangi o te tetere, a kihai i tupato; ki runga ano

6

i a ia ona toto. Tena ia, mehemea ia i tupato, ka mawhiti i a ia tona wairua. Engari ki te kite te tutei i te hoari e puta ana, a kihai i whakatangi i te tetere, kihai i whakatupato i te iwi, a ka tae mai te hoari, ka riro tetahi o ratou; ka riro ia i runga i tona kino, otiia ka rapua e ahau ona toto i te ringa

7

o te tutei. Ina, ko koe, e te tama a te tangata, kua waiho koe e ahau hei tutei mo te whare o Iharaira;

8

a me whakarongo koe ki te kupu a toku mangai, ko koe ano taku hei whakatupato i a ratou. Ki te mea ahau ki te tangata kino, E te tangata kino, ko te mate kau mou; ki te kore koe e korero, e whakatupato i te tangata kino ki tona ara; ka mate taua tangata kino i runga i tona he, ka rapua ia

9

e ahau ona toto i tou ringa. Tena ko tenei ka whakatupato koe i te tangata kino ki tona ara, kia tahuri mai ia i reira, a e kore ia e tahuri mai i tona ara; ka mate ia i runga i tona kino, ka ora ia i a koe tou wairua.

10

Na ko koe e te tama a te tangata, korero ki te whare o Iharaira: Ko ta koutou ki tenei, e mea na koutou, Kei runga i a matou o matou he, o matou hara, a ka memeha atu matou i runga i aua he;

11  
ma te aha ra matou ka ora ai? Mea atu ki a ratou, E ora ana ahau, e ai ta te Ariki, ta Ihowa, kahore oku ngakau koa ki te matenga o te tangata kino; engari kia tahuri te tangata kino i tona ara, kia ora: tahuri mai, tahuri mai koutou i o koutou ara kino; kia mate hoki koutou hei aha, e te whare o Iharaira?

12  
Na, ko koe, e te tama a te tangata, me ki atu ki nga tamariki a tou iwi, E kore te tika o te tangata tika e whakaora i a ia i te ra e poka ke ai ia: me te kino ano o te tangata kino e kore tera e whakahinga i a ia i te ra e tahuri mai ai ia i to na kino; e kore ano te tangata tika e ora i tona tika i te ra e hara

13  
ai ia. Ki te mea ahau ki te tangata tika, ka ora ia; a ka whakawhirinaki ia ki tona tika, ka mahi hoki i te he, e kore ana mahi tika katoa e maharatia; engari ka mate ia i runga i tona he i mahia e

14  
ia. Ki te mea ano ahau ki te tangata kino, Ko te mate kau mou; a ka tahuri mai ia i tona hara, ka

15  
mahia i te mea e tika ana, e rite ana; Ki te whakahokia te taunaha e te tangata kino, ki te utua te mea i pahuatia e ia, ki te haere ia i runga i nga tikanga o te ora, a ka kore e mahi i te he, he pono

16  
ka ora ia, e kore ia e mate. E kore tetahi o ona hara i hara ai ia e maharatia ki a ia: kua mahia e

17  
ia te mea e tika ana, e rite ana; he pono ka ora ia. Heoi kei te mea nga tamariki a tou iwi, Kahore

18  
e rite te ara o te Ariki: na, ko ratou nei, kahore to ratou ara e rite. Ki te tahari atu te tangata tika

19  
i tona tika, a ka mahia e ia te he, ka mate ia i aua he. Ki te tahuri mai ano te tangata kino i tona

20  
kino, a ka mahia e ia te mea e tika ana, e rite ana, ka ai ena hei whakaora i a ia. Heoi kei te mea na koutou, Kahore e rite te ara o te Ariki. E te whare o Iharaira, ka rite ki tona ara, ki tona ara, taku whakawa mo koutou.

21  
Na, i te tekau ma rua o nga tau o to matou whakaraunga, i te tekau o nga marama, i te rima o nga ra o te marama, ka tae mai ki ahau tetahi o nga oranga o Hiruharama, a ka mea, Kua patua

22  
te pa. Na, kua pa te ringa o Ihowa ki ahau i te ahiahi i mua ake o te taenga mai o taua oranga nei; meinga ana e ia kia kuihi toku mangai, a tae noa mai ia ki ahau i te ata; na, kua meinga e ia kia

23  
kuihi toku mangai, a kore ake toku wahangu. Na ka puta mai te kupu a Ihowa ki ahau; i ki ia,

24  
E te tama a te tangata, ko te hunga e noho ana i enei ururua i te whenua o Iharaira, e korero ana, e mea ana, He kotahi a Aperahama, a riro ana i a ia te whenua; ko tatou ia he tokomaha; kua homai

25  
te whenua ki a tatou hei kainga tupu. Mo reira ki atu ki a ratou, Ko te kupu tenei a te Ariki, a Ihowa; Ko ta koutou kai, he mea kinaki ki te toto, e anga ana hoki o koutou kanohi ki a koutou

26  
whakapakoko, e whakaheke toto ana hoki koutou: a e mau ranei te whenua i a koutou? Ko to koutou turanga ko a koutou hoari, e mahia ana e koutou te mea whakarihariha, e whakapokea ana

27  
e koutou te wahine a tona hoa, a tona hoa: a e mau ranei te whenua i a koutou? Kia penei tau ki atu ki a ratou, Ko te kupu tenei a te Ariki, a Ihowa: E ora ana ahau, ina, ka hinga i te hoari te hunga

i nga ururua, a, ko te tangata i te mata o te parae, ka hoatu ia e ahau hei kai ma nga kirehe, a, ko te  
<sup>28</sup>  
 hunga i nga taumaihi, i nga ana, ka mate ratou i te mate uruta. Ka ururua rawa i ahau te whenua,  
 ka waiho hei keteketenga, a ka mutu te whakapehapeha o tona kaha; ka ururua ano nga maunga o  
<sup>29</sup>  
 Iharaira, e kore e haerea e te tangata. A ka mohio ratou ko Ihowa ahau, ina meinga e ahau te  
 whenua hei ururua, hei keteketenga, mo a ratou mea whakarihariha katoa i mea ai ratou.  
<sup>30</sup>  
 Na, ko koe, e te tama a te tangata, e komuhumuhua ana koe e nga tama a tou iwi i te taha o  
 nga pakitara, i nga tatau ano o nga whare, e korerorero ana tetahi ki tetahi, ki tona hoa, ki tona hoa,  
<sup>31</sup>  
 e mea ana, Tena, kia haere tatou, kia rongou ai tatou i te kupu e puta mai ana i a Ihowa. A ko ta  
 ratou haere mai ki a koe rite tonu ki te haerenga mai o te iwi; ko ta ratou noho i tou aroaro rite tonu  
 ano ki to taku iwi; e rongou ana hoki ratou ki au kupu, kahore ia e mahi: ko o ratou mangai hoki hei  
<sup>32</sup>  
 whakaahuareka mai, ko o ratou nga kau kei te whai i ta ratou apo taonga. Nana, ki a ratou, e rite  
 ana koe ki te waiata roreka a te reo pai, a te tangata he pai te rangi o tana mea whakatangi; e rongou  
<sup>33</sup>  
 ana hoki ratou ki au kupu, kahore ia e mahi. A, ina puta tenei, nana, tenei te haere mai nei, katahi  
 ratou ka mohio tenei tonu he poropiti i roto i a ratou e noho ana.

### Chapter 34

<sup>1</sup> I puta mai ano te kupu a Ihowa ki ahau, i mea, <sup>2</sup> E te tama a te tangata, poropititia he he mo  
 nga hepara o Iharaira, poropititia, mea atu ki a ratou, ara ki nga hepara, Ko te kupu tenei a te Ariki,  
 a Ihowa mo nga hepara; Aue, te mate mo nga hepara o Iharaira, e whangai nei i a ratou ano! He  
<sup>3</sup>  
 tek a ianei me whangai te kahui e nga hepara? E kainga ana te ngako e koutou, e kakahuria ana  
 e koutou te huruhuru, e patua ana e koutou nga mea momona; ko nga hipi ia, kahore ratou e whangaia  
<sup>4</sup>  
 e koutou. Kihai i whakakahangia e koutou nga turoro, kihai nga mea mate i rongoatia e koutou,  
 te mea i whati kihai i takaia e koutou, kihai ano i whakahokia mai e koutou te mea i aia atu, kihai  
<sup>5</sup>  
 i rapua te mea i ngaro; heoi he taikaha, he nanakia, ta koutou whakahaere tikanga ki a ratou. Na  
 marara noa atu ratou i te kore hepara: riro ana hei kai ma nga kirehe katoa o te parae, a i marara  
<sup>6</sup>  
 noa atu ratou. I atiutiu noa atu aku hipi i runga i nga maunga katoa, i runga i nga pukepuke tiketike  
 katoa: i marara noa atu aku hipi i runga i te mata katoa o te whenua, kahore hoki he tangata hei  
 rapu, hei whakataki i a ratou.  
<sup>7</sup> Mo reira, e nga hepara, whakarongo ki te kupu a Ihowa; <sup>8</sup> E ora ana ahau, e ai ta te Ariki, ta  
 Ihowa, na kua waiho nei aku hipi hei taonga parau, kua waiho ano aku hipi hei kai ma nga kirehe  
 katoa o te parae, i te kore hepara, kihai nei hoki aku hepara i rapu i aku hipi, heoi whangaia ana ko

9

ratou ano e nga hepara, kihai i whangai i aku hipi; Mo reira, e nga hepara, whakarongo ki te kupu

10

a Ihowa; Ko te kupu tenei a te Ariki, a Ihowa; Hei hoariri tenei ahau mo nga hepara; a ka rapu utu ahau mo aku hipi i o ratou ringa, ka whakamutua ano e ahau ta ratou whangai hipi; e kore hoki nga hepara e whangai i a ratou ano i muri nei; a ka whakaorangia e ahau aku hipi i roto i o ratou

11

mangai, kei waiho hei kai ma ratou. Ko te kupu hoki tenei a te Ariki, a Ihowa; Nana, ka rapu

12

ahau, ahau tonu nei, i aku hipi, ka kimihia marietia. Ka rite ki te kimi a te hepara i tana kahui i te ra e tae ai ia ki roto ki ana hipi kua tohatoha noa atu, ka pena ano taku kimi i aku hipi; ka whakaorangia ano ratou e ahau i nga wahi katoa i marara atu ai ratou i te ra tukupu, i te ra pouri.

13

Ka whakaputaina ano ratou e ahau i roto i nga iwi, ka whakaminea mai i nga whenua, ka kawea hoki ki to ratou oneone; a ka whangaia ratou e ahau ki runga ki nga maunga o Iharaira, ki te taha

14

o nga awa, ki nga wahi katoa o te whenua e nohoia ana. Ka whangaia ratou e ahau i te wahi tarutaru pai, a hei runga i nga maunga tiketike o Iharaira he puninga mo ratou: ka takoto ratou ki reira ki te puninga pai, ka kai ano ratou i runga i nga maunga o Iharaira i nga wahi momona te

15

tarutaru. Ko ahau tonu hei whangai i aku hipi, ko ahau ano hei mea i a ratou kia takoto, e ai ta

16

te Ariki, ta Ihowa. Maku e rapu te mea i ngaro, maku ano e whakahoki mai te mea i aia atu, maku e takai te mea i whati, maku ano e whakakaha te mea turoro: na, ko te mea momona, ko te mea kaha, ka ngaro i ahau; ka whangaia ratou e ahau i runga i te whakawa.

17

Na, ko koutou, e aku hipi, ko te kupu tenei a te Ariki, a Ihowa; Nana, ka whakaritea e ahau

18

te whakawa a tetahi hipi ki tetahi hipi, a nga hipi toa ano ratou ko nga koati toa. He mea iti ianei ki a koutou ta koutou kai i nga wahi tarutaru pai, i takahia ai e koutou te toenga o ta koutou kai ki o koutou waewae? ta koutou inu hoki i nga wai purata, a whakapokea ake e koutou te toenga ki o

19

koutou waewae? Na, ko aku hipi, ka kai ratou i nga takahanga a o koutou waewae, ka inu hoki

20

i ta o koutou waewae i whakapoke ai. Mo reira ko te kupu tenei a te Ariki, a Ihowa, ki a ratou;

21

Nana, maku, maku tonu nei e whakarite te whakawa a te hipi momona raua ko te hipi hiroki. No te mea kua tute koutou ki o koutou kaokao, ki o koutou peke, a kua akina e koutou nga mea mate

22

ki o koutou hoana, a marara ake ratou i a koutou ki waho noa atu; Na reira ka whakaora ahau i aku hipi; e kore ano ratou e waiho i muri nei hei pahuatanga; ka whakaritea ano e ahau te whakawa

23

a tetahi hipi ki tetahi hipi. A ka whakaritea e ahau kotahi te hepara mo ratou, mana ratou e

24

whangai, ara taku pononga a Rawiri; mana ratou e whangai, a ko ia hei hepara mo ratou. Ko ahau, ko Ihowa, hei Atua mo ratou, a ko taku pononga, ko Rawiri, hei rangatira i roto i a ratou;

25

naku, na Ihowa, te kupu. Ka whakaritea ano e ahau he kawenata mo te rongu mau ki a ratou, ka

whakamutua hoki te noho o nga kirehe kikino ki te whenua; a ka noho ratou ki te koraha, te ai he wehi, ka moe ano ki nga ngahere. <sup>26</sup> A ka meinga ratou e ahau, me nga wahi ano i toku pukepuke a karapoi noa, hei manaakitanga; a ka meinga e ahau te ua kia heke iho i te wa i tika ai; a ka uaina iho nga manaaki. <sup>27</sup> Na ka hua nga hua o te rakau o te parae, ka tukua mai ano ona mau e te whenua, ka noho humarie hoki ratou ki to ratou whenua; ka mohio ano ratou ko Ihowa ahau, ina motu i ahau nga here o to ratou ioka, a ka riro ratou i ahau i roto i te ringa o o ratou kaiwhakamahi. <sup>28</sup> A, e kore ratou e waiho i muri nei hei pahuatanga ma nga iwi, e kore hoki e kainga e te kirehe o te whenua; engari ka noho humarie ratou, te ai he kaiwhakawehi. <sup>29</sup> A ka ara i ahau he mahuri whai ingoa ma ratou, e kore hoki ratou e riro i te hemokai i runga i te whenua, e kore ano e mau ki a ratou te numinumi i nga tauwi a muri ake nei. <sup>30</sup> Na, ka mohio ratou ko ahau, ko Ihowa, ko to ratou Atua, kei a ratou, a ko ratou, ko te whare o Iharaira, he iwi naku, e ai ta te Ariki, ta Ihowa. <sup>31</sup> Na, ko koutou, ko aku hipi, ko nga hipi e whangaia ana e ahau, he tangata koutou, ko ahau hoki to koutou Atua, e ai ta te Ariki, ta Ihowa.

### Chapter 35

<sup>1</sup> I puta mai ano te kupu a Ihowa ki ahau, i mea, <sup>2</sup> E te tama a te tangata, anga atu tou mata ki Maunga Heira, poropititia te he mo reira, <sup>3</sup> Mea atu hoki ki a ia, Ko te kupu tenei a te Ariki, a Ihowa; Nana, hei hoariri ahau mou, e Maunga Heira, a ka totoro atu toku ringa ki a koe, ka ururua rawa koe i ahau, ka meinga hoki hei miharotanga. <sup>4</sup> Ko ou pa ka tuhea i ahau, a hei ururua koe, a ka mohio koe ko Ihowa ahau. <sup>5</sup> No te mea he mauahara mau tonu tou, a kua tukua e koe nga tama a Iharaira ki te kaha o te hoari i te wa o to ratou aitua, i te wa o te he i te mutunga. <sup>6</sup> Mo reira, e ora ana ahau, e ai ta te Ariki, ta Ihowa, ka mahia koe e ahau hei mea mo te toto, ka whaia ano koe e te toto; kihai na koe i kino ki te toto, na ka whaia koe e te toto. <sup>7</sup> Heoi ka meinga e ahau a Maunga Heira hei matakitakinga, hei ururua; a ka hatepea atu e ahau te tangata e tika ana na reira, te tangata ano e hoki mai ana. <sup>8</sup> A ka whakakiiia e ahau ona maunga ki ona tupapaku: a, ko te hunga e patua ki te hoari, ka hinga ki ou pukepuke, ki ou awaawa, ki ou rerenga wai katoa. <sup>9</sup> Ka ururua koe i ahau a ake ake; e kore ano ou pa e nohoia, a ka mohio koutou ko Ihowa ahau. <sup>10</sup> Na, kua mea na koe, Ko enei iwi e rua, ko enei whenua e rua moku, mo tatou tonu hoki; i te mea kei reira nei ano a Ihowa; <sup>11</sup> Mo reira, e ora ana ahau, e ai ta te Ariki, ta Ihowa, ko taku

mahi ka rite ki tou riri, ki tou hae, i hae ai koe i a koe i mauahara ra ki a ratou; a ka whakakitea atu  
 ahau ki a ratou, ina rite i ahau te whakawa mou. <sup>12</sup> Na ka mohio koe ko Ihowa ahau, a kua rangona  
 e ahau au kohukohu katoa i korerotia e koe mo nga maunga o Iharaira, i a koe i ki ra, Kua ururua,  
<sup>13</sup> kua homai hei kai ma tatou. A kua whakakake mai o koutou mangai ki ahau, kua whakamaha  
 i a koutou kupu moku: kua rongu ahau. <sup>14</sup> Ko te kupu tenei a te Ariki, a Ihowa; A te wa e koa ai  
 te whenua katoa, ka ururua koe i ahau. <sup>15</sup> I koa na koe ki te kainga o te whare o Iharaira, kua ururua  
 na, ka pena ano ahau ki a koe: ka ururua koe, e Maunga Heira, e Eroma katoa, ae ra, katoa; a ka  
 mohio ratou ko Ihowa ahau.

### Chapter 36

<sup>1</sup> Na ko koe e te tama a te tangata, poropiti atu ki nga maunga o Iharaira, mea atu, E nga maunga  
 o Iharaira, whakarongo ki te kupu a Ihowa. <sup>2</sup> Ko te kupu tenei a te Ariki, a Ihowa; Na, kua mea  
 nei te hoariri ki a koutou, Ha! na, Kua riro mai hoki mo tatou nga pukepuke onamata: <sup>3</sup> Mo reira,  
 poropiti atu, mea atu, Ko te kupu tenei a te Ariki, a Ihowa; Na, kua meinga na koutou e ratou kia  
 tu kau, kua horomia i tetahi taha, i tetahi taha, i riro ai koutou ma nga toenga o nga iwi, i hapainga  
<sup>4</sup> ake ai e nga ngutu o nga arero kape tau, i korerotia kinotia ai e te iwi: Mo reira, e nga maunga o  
 Iharaira whakarongo ki te kupu a te Ariki, a Ihowa; Ko te kupu tenei a te Ariki, a Ihowa, ki nga  
 maunga, ki nga pukepuke, ki nga awa, ki nga awaawa, ki nga ururua kua takoto kau, ki nga pa kua  
<sup>5</sup> mahue, kua riro nei hei pahu atanga, hei katanga ma nga toenga o nga iwi a tawhio noa. Na reira  
 ko te kupu tenei a te Ariki, a Ihowa, He pono he ahi toku hae, i ahau i korero ai i te he mo nga  
 toenga o nga iwi, mo Eroma katoa ano; mo ta ratou meatanga i toku whenua hei kainga mo ratou,  
 pau katoa te ngakau ki te koa, kino tonu te hi nengaro, mo tera kia peia atu, kia waiho hei taonga  
<sup>6</sup> parau. Na reira poropititia te whenua o Iharaira, ki atu ki nga maunga, ki nga pukepuke, ki nga  
 awa, ki nga awaawa, Ko te kupu tenei a te Ariki, a Ihowa; Nana, kua korero ahau i runga i toku  
 hae, i toku weriweri, no te mea e mau ana ki a koutou te whaka ma o nga tauwiwi: <sup>7</sup> Na reira ko te  
 kupu tenei a te Ariki, a Ihowa; Kua ara toku ringa kua mea, He pono, ko nga iwi i tetahi taha o  
<sup>8</sup> koutou, i tetahi taha, ka mau ki a ratou to ratou whakama. Ko koutou ia, e nga maunga o Iharaira,  
 ka wana o koutou manga, ka whai hua koutou ma taku iwi, ma Iharaira; ka tata hoki ratou te puta.  
<sup>9</sup> No te mea, nana, ka aro ahau ki a koutou, ka tahuri ki a koutou, a ka ngakia koutou, ka whakatokia.  
<sup>10</sup> Ka tini ano i ahau nga tangata ki a koutou, te whare katoa o Iharaira, ratou katoa, a ka mohioia

11 nga pa, ka hanga ano nga ururua. Ka tini ano i ahau nga tangata ki a koutou, me nga kararehe; a ka tini ratou, ka hua; ka meinga hoki koutou e ahau kia nohoia, kia pera me to mua, a ka pai atu

12 taku e mea ai ki a koutou i to o koutou timatanga: a ka mohio koutou ko Ihowa ahau. Ae ra, ka meinga koutou e ahau kia haereerea e te tangata, e taku iwi, e Iharaira; ka riro koe i a ratou, ka

13 waiho hoki koe hei kainga tupu mo ratou, a heoi ano matenga o a ratou tamariki i a koe. Ko te kupu tenei a te Ariki, a Ihowa; Na, kua korerotia nei ki a koutou, He kai tangata koe, e te whenua,

14 e whakamate ana i nga tamariki a tou iwi; Na reira e kore koe e kai tangata a muri ake nei, e

15 kore ano e hinga i a koe ou iwi a muri nei, e ai ta te Ariki, ta Ihowa. Heoi ano aku meatanga kia rangona ki a koe te numinumi i nga iwi, e kore ano e mau ki a koe i nga wa i muri te tawai a nga iwi; e kore ano koe e mea i nga waewae o ou iwi kia tutuki a ake ake, e ai ta te Ariki, ta Ihowa.

16 I puta mai ano te kupu a Ihowa ki ahau, i mea,

17 E te tama a te tangata, i te nohoanga o te whare o Iharaira i to ratou oneone, i whakapokea a reira e ratou ki to ratou ara, ki a ratou mahi: ko

18 to ratou ara i toku aroaro, rite tonu ki te poke o te wahine e paheke ana. Heoi ringihia ana e ahau toku weriweri ki runga ki a ratou, mo te toto i tahoroa e ratou ki runga ki te whenua, mo a ratou

19 whakapakoko hoki i whakapokea ai a reira e ratou. A whakamararatia atu ana ratou e ahau ki roto ki nga iwi, titaria atu ana ki nga whenua; rite tonu ki to ratou ara, ki a ratou mahi taku whakarite

20 mo ratou. A, i to ratou taenga ki nga iwi i haere atu ai ratou, whakanoatia ana e ratou toku ingoa

21 tapu, i a ratou i ki ra mo ratou, Ko te iwi tenei a Ihowa, a kua puta atu ratou i tona whenua. Otiia i whai whakaaro ahau ki toku ingoa tapu i whakanoatia nei e te whare o Iharaira i roto i nga tauwiwi

22 i haere atu ai ratou. Mo reira ki atu ki te whare o Iharaira; Ko te kupu tenei a te Ariki, a Ihowa; Ehara i te mea he whakaaro ki a koutou i mahi ai ahau i tenei, e te whare o Iharaira; engari ki toku

23 ingoa tapu i whakanoatia nei e koutou i roto i nga tauwiwi i haere atu ai koutou. Ka whakatapua ano e ahau toku ingoa nui i whakanoatia nei i roto i nga tauwiwi, ko ta koutou ra i whakanoa ai i roto i a ratou; a ka mohio nga tauwiwi ko Ihowa ahau, e ai ta te Ariki, ta Ihowa, ina whakatapua ahau i

24 roto i a koutou i to ratou aroa ro. Ka tangohia mai hoki koutou e ahau i roto i nga tauwiwi, ka whakaminea i nga whenua katoa, ka kawea mai ano ki to koutou oneone.

25 Ka tauhiuhia ano koutou e ahau ki te wai ma, a ka ma koutou: ka purea koutou e ahau, a

26 kore iho o koutou poke katoa, a koutou whakapakoko katoa. Ka hoatu ano e ahau he ngakau hou ki a koutou, ka hoatu ano e ahau he wairua hou ki roto ki a koutou; ka tangohia ano e ahau te

27 ngakau kohatu i roto i o koutou kikokiko, a ka hoatu he ngakau kikokiko ki a koutou. Na ka hoatu e ahau toku wairua ki roto ki a koutou, a ka meinga koutou e ahau kia haere i runga i aku

28 tikanga, ka puritia ano e koutou aku ritenga, ka mahia. A ka noho koutou ki te whenua i hoatu  
 e ahau ki o koutou matua, ko koutou hoki hei iwi maku, ko ahau hei Atua mo koutou. 29 Ka  
 whakaorangia ano koutou e ahau i o koutou poke katoa: ka karangatia hoki e ahau te witi, ka  
 whakanuia hoki e ahau, e kore ano te hemokai e tukua e ahau ki a koutou. 30 A ka meinga e ahau  
 kia maha nga hua o te rakau me nga mau o te mara, a heoi ano te tawai hemokai mo koutou i roto  
 i nga tauwiwi. 31 Katahi koutou ka mahara ki o koutou ara kino, ki a koutou mahi kahore nei e pai;  
 a ka anuanu koutou ki a koutou ano i o koutou aroaro mo o koutou kino, mo a koutou mea  
 whakarihariha hoki. 32 Ehara i te mea he whakaaro ki a koutou i mahi ai ahau i tenei, e ai ta te  
 Ariki, ta Ihowa, kia mohio koutou: kia whakama koutou, kia numinumi kau ki o koutou ara, e te  
 whare o Iharaira. 33 Ko te kupu tenei a te Ariki, a Ihowa; I te ra e purea ai e ahau o koutou he katoa,  
 ka meinga e ahau nga pa kia nohoia, a ka hanga nga ururua. 34 Na, ko te whenua i takoto kau ra,  
 ka ngakia; he ururua ra hoki i mua ki te titiro a te hunga katoa e tika ana na reira. 35 A ka korerotia,  
 Ko tenei whenua i takoto kau ra, kua rite ki te kari o Erene; na, ko nga pa kua ururuatia, ko era i  
 takoto kau ra, ko nga mea pakura, kua oti te taiepa, e nohoia ana. 36 Katahi ka mohio nga iwi kua  
 mahue i tetahi taha o koutou, i tetahi taha, kua hanga e ahau, e Ihowa, nga wahi i pakaru, a kua  
 whakatokia e ahau nga wahi kua ururuatia: naku, na Ihowa te kupu, maku ano e mahi. 37 Ko te  
 kupu tenei a te Ariki, a Ihowa; Tenei ake ka uia tenei ki ahau e te whare o Iharaira, kia meatia ki a  
 ratou; ka tokomaha ratou i ahau, me e mea he kahui te tangata. 38 Ka rite ki te kahui mo te  
 whakahere, ki te kahui o Hiruharama i ona hakari nunui; ka pena ano nga pa kua ururuatia, ka kapi  
 i nga kahui tangata; a ka mohio ratou ko Ihowa ahau.

## Chapter 37

1 I pa te ringa o Ihowa ki ahau, a kawea ana ahau, ara e to Ihowa wairua, tukua iho ana ahau e  
 ia ki waenganui o te raorao; na kapi tonu a reira i te wheua. 2 Na ka whakahaereerea ahau e ia ki  
 te taha o aua wheua a taka noa, taka noa; na, he tini ke i runga i te mata o te raorao; nana, he maroke  
 rawa aua mea. 3 Na ka mea ia ki ahau, E te tama a te tangata, e ora ranei enei wheua? Ano ra ko  
 ahau, E mohio ana koe, e te Ariki, e Ihowa. 4 Na ka mea ia ki ahau, Poropiti ki enei whenua, mea  
 atu ki a ratou, E nga wheua maroke nei, whakarongo ki te kupu a Ihowa. 5 Ko te kupu tenei a te  
 Ariki, a Ihowa ki enei wheua, Nana, ka meinga e ahau he manawa kia tomo ki roto ki a koutou, a



<sup>6</sup>  
 ka ora koutou. A ka hoatu e ahau he uaua ki runga ki a koutou, ka whakaputaina ake he kikokiko  
 ki a koutou, ka hipokina koutou ki te kiri, ka hoatu ano e ahau he manawa ki roto ki a koutou, na  
<sup>7</sup>  
 ka ora koutou; a ka mohio koutou ko Ihowa ahau. Heoi poropititia ana e ahau te mea i whakahaua  
 ki ahau; a, i ahau e poropiti ana, na he haruru, na he ru, a whakatata ana nga wheua, tona wheua ki  
<sup>8</sup>  
 tona wheua. A ka titiro atu ahau, nana, he uaua i runga i a ratou, kua puta ake he kikokiko, a he  
<sup>9</sup>  
 kiri e hipoki ana i waho ake i a ratou: otiia kahore he manawa i roto i a ratou. Katahi ia ka mea  
 ki ahau, Poropiti ki te hau, poropiti, e te tama a te tangata, mea atu hoki ki te hau, Ko te kupu tenei  
 a te Ariki, a Ihowa; Haere mai i nga hau e wha, e te manawa, e ha ki runga ki tenei hunga kua oti  
<sup>10</sup>  
 nei te patu, kia ora ai ratou. Heoi ka poropititia e ahau te mea i whakahaua e ia ki ahau; na ko  
 te taenga mai o te manawa ki roto ki a ratou, kua ora, tu ana i runga i o ratou waewae, he ope tino  
<sup>11</sup>  
 nui. Katahi ia ka mea ki ahau, E te tama a te tangata, ko enei wheua ko te whare katoa o Iharaira:  
 nana, kei te ki ake ratou, Kua maroke o tatou wheua, kua ngaro ta tatou i tumanako ai; kua motuhia  
<sup>12</sup>  
 ketia tatou. Mo reira poropiti, ki atu ki a ratou, Ko te kupu tenei a te Ariki, a Ihowa; Nana, e  
 taku iwi, ka huakina ake e ahau o koutou urupa, ka meinga kia puta ake hoki koutou i o koutou  
<sup>13</sup>  
 urupa, ka kawea ki te oneone o Iharaira. A ka mohio koutou ko Ihowa ahau, ina huakina e ahau  
<sup>14</sup>  
 o koutou urupa, e taku iwi, a ka meinga koutou e ahau kia puta ake i o koutou urupa. A ka hoatu  
 e ahau toku wairua ki roto ki a koutou, a ka ora koutou, a ka whakanohoia koutou e ahau ki to  
 koutou ake oneone: ko reira koutou mohio ai, naku, na Ihowa, i korero, a naku ano i mahi, e ai ta  
 Ihowa.  
<sup>15</sup> I puta mai ano te kupu a Ihowa ki ahau, i mea, <sup>16</sup> Na, ko koe, e te tama a te tangata, tikina  
 tetahi rakau mau, tuhituhia iho, He mea mo Hura, mo ona hoa ano, mo nga tama a Iharaira: na  
 tikina atu ano tetahi rakau, tuhituhia iho, He mea mo Hohepa, ko te rakau o Eparaima, mo ona hoa  
<sup>17</sup>  
 hoki, mo te w hare katoa o Iharaira. Na me hono raua, tetahi ki tetahi; a hei rakau kotahi raua i  
<sup>18</sup>  
 roto i tou ringa. Na ki te korero nga tamariki a tou iwi ki a koe, ki te mea, E kore ianei e  
<sup>19</sup>  
 whakaaturia e koe ki a matou he aha te tikanga o enei mea au? Mea atu ki a ratou, Ko te kupu  
 tenei a te Ariki, a Ihowa, Nana ka mau ahau ki te rakau o Hohepa, ki tera i te ringa o Eparaima, ki  
 ona hoa ano, ki nga iwi o Iharaira; a ka whakatakotoria ratou e ahau ki tera, ara ki te rakau o Hura,  
<sup>20</sup>  
 ka meinga ho ki raua hei rakau kotahi, a ka kotahi tonu raua i roto i toku ringa. Na, ko nga rakau  
<sup>21</sup>  
 e tuhituhi ai koe ki runga, hei roto i tou ringa i to ratou aroaro. A ka mea atu koe ki a ratou, Ko  
 te kupu tenei a te Ariki, a Ihowa; Nana, ka tangohia e ahau nga tama a Iharaira i roto i nga iwi i  
<sup>22</sup>  
 haere atu nei ratou, ka kohikohia i tetahi taha, i tetahi taha, ka kawea ki to ratou oneone. Ka  
 meinga hoki ratou e ahau hei iwi kotahi ki te whenua, ki nga maunga o Iharaira; a kotahi tonu he

kingi hei kingi mo ratou katoa; kore ake o ratou iwi e rua i muri nei, heoi rawa o ratou wehenga  
<sup>23</sup>  
 kia rua kingitanga. Kore ake ano o ratou poke i a ratou whakapakoko, i a ratou mea whakarihariha,  
 i o ratou kino katoa: engari ka whakaorangia ratou e ahau i o ratou nohoanga katoa, i nga wahi i  
<sup>24</sup>  
 hara ai ratou, ka purea: ko ratou hoki hei iwi maku, ko ahau hei Atua mo ratou. Ko taku pononga  
 hoki, ko Rawiri hei kingi mo ratou; a kotahi tonu te hepara mo ratou katoa: ka haere hoki ratou i  
<sup>25</sup>  
 runga i aku ritenga, ka pupuri i aku tikanga, ka mahi. A ka noho ratou i te whenua i hoatu e ahau  
 ki taku pononga, ki a Hakopa, ki te wahi i noho ai o koutou matua; ka noho ano ratou ki reira, ratou,  
 a ratou tama, me nga tama ano a a ratou tama a ake ake: a ko taku pononga, ko Rawiri hei rangatira  
<sup>26</sup>  
 m o ratou a ake ake. Ka whakaritea ano e ahau te kawenata mo te rongu mau ki a ratou; hei  
 kawenata mau tonu tena ki a ratou; ka whakanohoia ano ratou e ahau, ka whakanuia, ka whakaturia  
<sup>27</sup>  
 ano e ahau toku wahi tapu ki waenganui i a ratou a ake ake. Na ki a ratou toku tapenakara: a ko  
<sup>28</sup>  
 ahau hei Atua mo ratou, ko ratou ano hei iwi maku. A ka mohio nga tauwiwi ko ahau a Ihowa e  
 whakatapu nei i a Iharaira, i te mea kei waenganui nei toku wahi tapu i a ratou a ake ake.

### Chapter 38

<sup>1</sup> I puta mai ano te kupu a Ihowa ki ahau, i mea, <sup>2</sup> E te tama a te tangata, anga atu tou mata ki  
 Koko, o te whenua o Makoko, ki te rangatira o Roho, o Meheke, o Tupara, ka poropiti atu he he  
<sup>3</sup>  
 mona; Mea atu hoki, Ko te kupu tenei a te Ariki, a Ihowa; Nana, hei hoariri tenei ahau mou, e  
<sup>4</sup>  
 Koko, e te rangatira o Roho, o Meheke, o Tupara: Ka whakatahuritia ano koe e ahau, ka  
 whakamaua he matau ki ou kauae, a ka whakaputaina koe ki waho, me tou ope katoa, nga hoiho,  
 me nga kaieke hoiho, he mea whakakakahu ratou katoa ki nga kakahu o te whawhai, he ope nui  
<sup>5</sup>  
 me te puapua, me te whakanungu rakau, a he hapai hoari ratou katoa. Ko Pahia, ko Etiopia, ko  
<sup>6</sup>  
 Putu o ratou hoa: rite katoa ratou i te whakangungu rakau, i te potae whawhai: A Komere, me  
 ona ropu katoa; te whare o Tokarama, o nga pito rawa ki te raki, ratou ko ona ope katoa: ara ko  
<sup>7</sup>  
 nga iwi maha i tou taha. Kia noho rite koe, ae ra, whakatikatika i a koe, i a koe me ou ropu katoa  
<sup>8</sup>  
 kua huihui nei ki a koe, a ko koe hei kaitiaki mo ratou. Kia maha nga ra ka tirohia koe, i nga tau  
 whakamutunga ka tae koe ki te whenua i whakahokia mai i te hoari, i kohikohia mai i roto i nga  
 iwi maha, ki nga maunga o Iharaira kua ururua noa ake: heoi kua oti te whakaputa mai i roto i nga  
<sup>9</sup>  
 iwi, a ka n oho humarie ratou katoa. A ka kake koe, ka haere mai koe me te paroro, a ka rite koe  
<sup>10</sup>  
 ki te kapua e taupoki ana i te whenua, a koe, me ou ropu katoa, koutou tahi ko nga iwi maha. Ko

te kupu tenei a te Ariki, a Ihowa; Na, i taua ra ka puta ake he mea i tou ngakau, a ka whakaaroa e

<sup>11</sup> koe he whakaaro nanakia. A ka mea koe, Ka haere ahau ki te whenua i nga pa kore taiepa; ka tae ahau ki te hunga e ata noho ana, e noho wehikore ana, e noho ana ratou katoa kahore he taiepa,

<sup>12</sup> kahore he tutaki, kahore he keti: Ki te pahua i nga taonga, ki te tango mea parakete; tahuri tonu tou ringa ki nga wahi ururua kua nohoia, ki te iwi kua oti te kohikohi mai i roto i nga tauwi, a kua

<sup>13</sup> whiwhi ki te kararehe, ki te taonga, e noho ana i waenganui o te whenua. Na ka mea a Hepa, a Rerana, ratou ko nga kaihekohoko o Tarahihi, me nga kua o raiona katoa o reira ki a koe, Kua tae mai ranei koe ki te pahua taonga? kua whakaminea ranei e koe tau hui ki te tango i nga mea parakete? ki te mau atu i te hiriwa, i te koura, ki te tango i nga kararehe, i nga taonga, ki te pahua i nga taonga maha?

<sup>14</sup> Mo reira, e te tama a te tangata, poropiti, mea atu ki a Koko, Ko te kupu tenei a te Ariki, a Ihowa, I te ra e noho humarie ai taku iwi, a Iharaira, e kore ianei e mohiotia e koe? <sup>15</sup> A tera koe e haere mai i tou wahi i nga pito rawa ki te raki, koutou ko nga iwi maha, ko ratou katoa i runga i

<sup>16</sup> te hoiho, he hui nui, he ope nui. A ka whakaekea e koe taku iwi a Iharaira, me te mea he kapua e taupoki ana i te whenua; a i nga ra whakamutunga ka kawea koe e ahau ki te whawhai ki toku whenua, kia mohio ai nga tauwi ki ahau, ina ka whakatapua ahau i runga i a koe, e Koko, i ta ratou

<sup>17</sup> tirohanga. Ko te kupu tenei a te Ariki, a Ihowa: Ko koe ranei tera i korerotia ra e ahau, ara e aku pononga, e nga poropiti o Iharaira, i nga ra onamata, i poropititia hoki e ratou i aua ra, he maha nga

<sup>18</sup> tau, taku kawenga i a koe ki a ratou? Na a taua ra, a te ra e haere mai ai a Koko ki te whenua o

<sup>19</sup> Iharaira, e ai ta te Ariki, ta Ihowa, ka puta ake toku weriweri ki oku pongaihu. Kua korero hoki ahau i runga i toku hae, i runga i te ahi o toku riri, He pono i taua ra ka nui te ru ki te whenua o

<sup>20</sup> Iharaira; A ka wiri nga ika o te moana ki toku aroaro, nga manu ano o te rangi, nga kirehe o te parae, nga mea ngokingoki katoa e ngokingoki ana i runga i te whenua, me nga tangata katoa i runga i te mata o te whenua, ka turakina iho hoki nga maunga, ka hinga nga wahi poupou, ka hinga

<sup>21</sup> ano nga taiepa katoa ki te whenua. A ka karangatia e ahau he hoari hei patu mona, puta noa i oku maunga katoa, e ai ta te Ariki, ta Ihowa: a ko te hoari a tena tangata, a tena tangata, ka anga

<sup>22</sup> atu ki tona hoa, ki tona hoa. A ko taku mea hei totohe ki a ia, he mate uruta, he toto; ka uaina iho ano e ahau he ua, he waipuke, he whatu nui, he ahi, he whanariki, ki a ia, ki ona ropu, ki nga

<sup>23</sup> iwi maha e whai ana i a ia. Na ka whakanui ahau i ahau, ka whakatapu ano ahau i ahau; a ka mohiotia ahau i te tirohanga a nga iwi maha, a ka mohio ratou ko Ihowa ahau.

## Chapter 39

<sup>1</sup> Na ko koe, e te tama a te tangata, poropititia he he mo Koko, mea atu, Ko te kupu tenei a te Ariki, a Ihowa; Nana, hei hoariri ahau mou, e Koko, e te tino rangatira o Roho, o Meheke, o Tupara;

<sup>2</sup> A ka whakatahuritia koe e ahau, ka arahina atu koe, ka meinga hoki kia puta ake koe i nga pito rawa ki te raki, a ka kawea mai koe e ahau ki runga ki nga maunga o Iharaira. <sup>3</sup> Ka patua atu ano e ahau tau kopere i roto i tou maui, ka meinga hoki au pere kia marere i roto i tou matau. <sup>4</sup> Ka hinga koe ki runga ki nga maunga o Iharaira, a koe, me ou ropu katoa, me nga iwi i a koe: ka hoatu koe e ahau hei kai ma nga manu kai kino o ia ahau, o ia ahau, ma nga kirehe ano o te parae. <sup>5</sup> Ka hinga koe ki te mata o te parae: naku hoki te kupu, e ai ta te Ariki, ta Ihowa, <sup>6</sup> Ka tukua atu ano e ahau he ahi ki a Makoko, ratou ko te hunga e noho humarie ana i nga motu, a ka mohio ratou ko Ihowa ahau. <sup>7</sup> A ka meinga e ahau toku ingoa tapu kia mohiotia i roto i taku iwi, i a Iharaira, e kore ano e tukua e ahau kia whakapokea toku ingoa tapu a muri ake nei: a ka mohio nga tau iwi ko Ihowa ahau, ko te Mea Tapu i roto i a Iharaira.

<sup>8</sup> Nana, kua tae mai, kua oti, e ai ta te Ariki, ta Ihowa; ko te ra tenei i korerotia ra e ahau. <sup>9</sup> Ka puta ano nga tangata o nga pa o Iharaira, a ka tahuna e ratou, ka wera ano i a ratou nga patu, nga whakangungu rakau, nga puapua, nga kopere, nga pere, nga hani, nga tao; ko nga tau e tahuna ai aua mea e ratou, e whitu. <sup>10</sup> E kore hoki e maua e ratou he wahie i te parae, e kore ano e tapahia i nga ngahere; no te mea ka tahuna e ratou nga patu ki te ahi: ka pahuatia e ratou o ratou kaipahua, ka murua nga taonga o o ratou kaimuru, e ai ta te Ariki, ta Ihowa. <sup>11</sup> Na a taua ra ka hoatu e ahau ki a Koko he wahi tanumanga ki reira, ki a Iharaira, ko te raorao o nga tira haere i te taha ki te rawhiti o te moana; kutia iho ki reira nga ihu o nga tira haere: ka tanumia hoki ki reira a Koko ratou ko ana mano ti ni: a ka huaina a reira, Ko te raorao o Hamono Koko. <sup>12</sup> A e whitu nga marama o te whare o Iharaira e tanu ana i a ratou kia watea ai te whenua. <sup>13</sup> Ina, ka tanumia ratou e te iwi katoa o te whenua; a hei ingoa nui ki a ratou i te ra e whakakororiatia ai ahau, e ai ta te Ariki, ta Ihowa. <sup>14</sup> Ka wehea ano e ratou etahi tangata, he mea tuturu, hei haere i runga i te whenua, hei tanu i nga tira haere, i te hunga e toe ana i runga i te mata o te whenua, kia watea ai: i te mutunga o nga marama e whitu ka rapu ratou. <sup>15</sup> A ka haere nga tira haere, ka tika i te whenua; ka kite tetahi i te whenua tangata, ka whakaturia e ia he tohu ki tona taha, kia tanumia ra ano e nga kaitanu ki te raorao o Hamono Koko. <sup>16</sup> A ko Hamona hoki hei ingoa mo tetahi pa. Na ka watea te whenua. <sup>17</sup> Na ko koe, e te tama a te tangata, ko te kupu tenei a te Ariki, a Ihowa; Mea atu ki nga manu o ia ahau, o ia ahau, ki nga kirehe katoa o te parae, Huihui mai, haere mai; whakamine mai koutou i tetahi taha, i tetahi taha, ki taku patunga e patua nei e ahau ma koutou, he patunga nui ki runga ki

18  
 nga maunga o Iharaira, kia kai kikokiko ai, kia inu toto ai koutou. Ka kai koutou i nga kikokiko  
 o te hunga marohirohi, ka inu i nga toto o nga rangatira o te whenua, o nga hipi toa, o nga reme, o  
 19  
 nga koati, o nga puru, he mea momona katoa no Pahana. A ka kai koutou i te ngako a makona  
 20  
 noa, ka inu hoki i te toto a haurangi, noa, he mea no taku patunga e patua e ahau ma koutou. Na  
 ka makona koutou i nga hoiho o taku tepu, i nga hoiho hariata, i nga marohirohi, i nga tangata  
 21  
 whawhai katoa, e ai ta te Ariki, ta Ihowa. Ka whakaturia e ahau toku kororia ki roto ki nga  
 tauwi, a ka kite nga tauwi katoa i taku whakawa e whakaritea e ahau, i toku ringa ano ka pa nei  
 22  
 ki a ratou. Na ka mohio te whare o Iharaira, ko Ihowa ahau, ko to ratou Atua, i taua ra a ake  
 ake.  
 23  
 Ka mohio ano nga tauwi, he he no te whare o Iharaira i whakaraua ai ratou: he pokanga  
 ketanga no ta ratou ki ahau i huna ai e ahau toku mata ki a ratou, heoi tukua ana ratou e ahau ki te  
 24  
 ringa o o ratou hoariri: a hinga katoa ana i te hoari. Ko taku i mea ai ki a ratou rite tonu ki to  
 25  
 ratou poke, ki o ratou pokanga ketanga, a huna ana e ahau toku mata ki a ratou. Mo reira ko te  
 kupu tenei a te Ariki, a Ihowa; Ka whakahokia mai e ahau aiane i Hakopa i te whakarau, ka aroha  
 26  
 ahau ki te whare katoa o Iharaira; ka hae hoki ahau, he whakaaro ki toku ingoa tapu; A ka  
 whakawaha e ratou to ratou whakama, o ratou pokanga ketanga katoa hoki i poka ke ai ta ratou ki  
 27  
 ahau, ina noho humarie ratou i to ratou whenua, a kahore he tangata hei whakawehi i a ratou; Ina  
 oti ratou te whakahoki mai e ahau i roto i nga iwi, ina kohikohia mai ratou i nga whenua o o ratou  
 28  
 hoariri, a ka whakatapua ahau i runga i a ratou i te tirohanga a nga iwi maha. Katahi ratou ka  
 mohio ko Ihowa ahau, ko to ratou Atua, i mea nei kia whakaraua ratou ki roto ki nga tauwi, i  
 kohikohi ano i a ratou ki to ratou oneone; a kahore noa iho tetahi o ratou e mahua i ahau ki reira.  
 29  
 E kore ano e huna e ahau toku mata a muri ake nei ki a ratou: kua ringihia hoki e ahau toku  
 wairua ki runga ki te whare o Iharaira, e ai ta te Ariki, ta Ihowa.

## Chapter 40

1  
 I te rua tekau ma rima o nga tau o to matou whakaraunga, i te timatanga o te tau, i te tekau o  
 nga ra o te marama, i te tekau ma wha o nga tau o te horonga o te pa, i taua tino ra ka pa te ringa o  
 2  
 Ihowa ki ahau, a kawea ana ahau e ia ki reira. Kawea ana ahau e ia, he whakakitenga na te Atua,  
 ki te whenua o Iharaira, whakanohia ana ahau e ia ki tetahi maunga tiketike rawa, i reira tetahi  
 3  
 mea, he rite tona hanga ki to te pa i te tonga. A kawea ana ahau e ia ki reira; na ko tetahi tangata,

ko tona ahua, ano he parahi ki te titiro atu, he aho muka i tona ringa, he kakaho ano hei whanganga;

<sup>4</sup>  
i te kuwaha ia e tu ana. Na ka mea taua tangata ki ahau, E te tama a te tangata, titiro mai ou kanohi, whakarongo ou taringa, tahuri mai ano tou ngakau ki nga mea katoa e whakakitea e ahau ki a koe; i kawea mai hoki koe ki konei kia whakakitea ai enei mea ki a koe: whaka aturia ki te whare o Ihairaira nga mea katoa e kite ai koe.

<sup>5</sup>  
Na, he taiepa kei waho o te whare a taka noa, i te ringa hoki o taua tangata he kakaho hei whanganga, e ono whatianga te roa; kotahi whatianga me te whanui ringa o tetahi, o tetahi. Na kei te whanganga ia i te whanui o taua mea i hanga ra, kotahi te kakaho; ko te tiketike hoki kotahi te

<sup>6</sup>  
kakaho. Katahi ia ka tae ki te kuwaha e anga ana ki te rawhiti, kei te piki i ona kaupae; kei te whanganga i te paepae o te kuwaha, ko te whanui, kotahi kakaho; i tetahi atu paepae ano, kotahi

<sup>7</sup>  
kakaho te whanui. Na, ko te roa o te ruma kotahi, kotahi kakaho; ko te whanui, kotahi kakaho; i te takiwa o nga ruma, e rima whatianga; na, ko te paepae o te kuwaha i te whakamahau o te kuwaha

<sup>8</sup>  
i te taha ki roto, kotahi kakaho. Katahi ia ka whanganga ano i te whakamahau o te kuwaha, te

<sup>9</sup>  
taha ki te whare, kotahi kakaho. Katahi ia ka whanganga i te whakamahau o te kuwaha, e waru whatianga; me ona pou, e rua whatianga; na ko te whakamahau o te kuwaha e anga ana ki te whare.

<sup>10</sup>  
Na, ko nga ruma o te kuwaha whaka te rawhiti, e toru i tenei taha, e toru i tera taha; ko nga mea

<sup>11</sup>  
e toru, kotahi tonu te nui: kotahi tonu ano te nui o nga pou i tenei taha, i tera taha. I whanganga ano ia i te whanui o te tapokoranga i te kuwaha, kotahi tekau whatianga; ko te roa o te kuwaha

<sup>12</sup>  
kotahi, tekau ma toru whatianga. Na, ko te taha ki mua i nga ruma, kotahi te whatianga; ko tetahi atu taha hoki kotahi te whatianga; na, ko nga ruma, e ono whatianga o tenei taha, e ono whatianga

<sup>13</sup>  
o tera taha. I whanganga ano ia i te kuwaha i te tuanui o tetahi ruma, tae noa ki te tuanui o tetahi,

<sup>14</sup>  
e rua tekau ma rima whatianga te whanui; ko tetahi tatau anga tonu mai ki tetahi tatau. A i hanga e ia etahi pou, e ono tekau whatianga; a ko te marae i tae atu ki te pou, ko te kuwaha i tetahi taha,

<sup>15</sup>  
i tetahi taha. Na, ko te takiwa i te aronga o te kuwaha e tapoko ai, tae noa ki te aronga o te

<sup>16</sup>  
whakamahau o to roto kuwaha, e rima tekau whatianga. Na he matapihi kuiti o nga ruma, o nga pou ano i roto i te kuwaha a taka noa, o nga haurangi ano; he matapihi ano o nga taha ki roto a taka

<sup>17</sup>  
noa; he nikau ano kei tenei pou, kei tenei pou. Katahi ahau ka kawea e ia ki to waho marae, na, he ruma i reira, he papa kohatu hoki, he mea i hanga mo te marae a taka noa: e toru tekau nga ruma

<sup>18</sup>  
i runga i te papa kohatu. Na, ko te papa kohatu i te taha o nga kuwaha i te ritenga atu o te taha

<sup>19</sup>  
roa o nga kuwaha, ko to raro papa tera. Katahi ia ka whanganga i te whanui i te aronga o to raro kuwaha tae noa ki te aronga o to roto marae, ki te taha ki waho, kotahi rau whatianga, ki te rawhiti,

<sup>20</sup>  
 ki te raki. Na, ko te kuwaha o to waho marae e anga ana ki te raki, i whanganga ano e ia te roa,  
<sup>21</sup>  
 te whanui. Na, ko ona ruma, e toru i tenei taha, e toru i tera taha, ko ona pou, ko ona haurangi  
 rite tonu te nui ki to te kuwaha tuatahi; e rima tekau whatianga te roa, e rua tekau ma rima whatianga  
<sup>22</sup>  
 te whanui. Na, ko nga matapihi, ko nga haurangi, ko nga nikau, he mea whakarite ki te nui o te  
 kuwaha e anga ana ki te rawhiti, e whitu ano nga kaupae i pikitia ai a reira; i mua hoki i aua ruma  
<sup>23</sup>  
 nga haurangi. Na he kuwaha ano kei to roto marae e anga ana ki tera kuwaha ki te raki, ki te  
 rawhiti hoki; i whanganga ano ia i te takiwa o tetahi kuwaha, o ano ia i te takiwa o tetahi kuwaha,  
<sup>24</sup>  
 o tetahi kuwaha, kotahi rau whatianga. Na ka arahina ahau e ia ki te tonga, na, ko tetahi kuwaha  
 ki te tonga. Na ka whanganga ia ki ona pou me ona haurangi, rite tonu ki enei kua oti nei te  
<sup>25</sup>  
 whanganga. He matapihi ano o reira, i ona haurangi ano hoki a taka noa, he pera me era matapihi;  
<sup>26</sup>  
 e rima tekau nga whatianga te roa, e rua tekau ma rima whatianga te whanui. E whitu nga kaupae  
 i pikitia ai; i mua ko nga haurangi; he nikau ano ona, ko tetahi i tetahi taha, ko tetahi i tetahi taha  
 i runga i ona pou.  
<sup>27</sup>  
 Na he kuwaha ano kei to roto marae i te taha ki te tonga; i whanganga ano ia i te takiwa o  
<sup>28</sup>  
 tetahi kuwaha, o tetahi kuwaha ki te tonga, kotahi rau whatianga. Katahi ka kawea ahau e ia na  
 te kuwaha ki te tonga ki to roto marae, a whanganga ana ia i te kuwaha ki te tonga, rite tonu ki enei  
<sup>29</sup>  
 kua oti nei te whanganga. Me nga ruma ano o reira, me nga pou, me ona haurangi, rite tonu ki  
 enei kua oti nei te whanganga; he matapihi ano o reira, o ona haurangi ano a taka noa: e rima tekau  
<sup>30</sup>  
 whatianga te roa, e rua tekau ma rima whatianga te whanui. Na, ko nga haurangi a taka noa, e  
<sup>31</sup>  
 rua tekau ma rima whatianga te roa, e rima whatianga te whanui. A i anga ona haurangi ki to  
<sup>32</sup>  
 waho marae; he nikau ano o ona pou: e waru ano nga kaupae o te pikitanga ki reira. I kawea  
 ano ahau e ia ki to roto marae whaka te rawhiti, a whanganga ana ia i te kuwaha: rite tonu ki enei  
<sup>33</sup>  
 kua oti nei te whanganga. Na, ko nga ruma o reira, ko ona pou, ko ona haurangi, rite tonu ki  
 enei kua oti nei te whanganga: he matapihi ano o reira, o nga haurangi ano a taka noa; e rima tekau  
<sup>34</sup>  
 whatianga te roa, e rua tekau ma rima whatianga te whanui. I anga ano ona haurangi ki to waho  
 marae, he nikau ano kei ona pou i tenei taha, i tera taha; e waru nga kaupae o te pikitanga ki reira.  
<sup>35</sup>  
 I kawea ano ahau e ia ki te kuwaha ki te raki, a whanganga ana ia; rite tonu ki enei kua oti nei  
 te whanganga;  
<sup>36</sup>  
 Ko ona ruma, ko ona pou, ko ona haurangi, me ona matapihi ano a taka noa: e  
<sup>37</sup>  
 rima tekau whatianga te roa, e rua tekau marima whatianga te whanui. A ko ona pou kei te taha  
 ki to waho marae; he nikau ano kei ona pou i tenei taha, i tera taha: e waru nga kaupae o te pikitanga

<sup>38</sup>  
ki reira. Na tera tetahi ruma, he tapokoranga ano ki reira, i nga pou o nga kuwaha; ko te wahi tera i horoia ai te tahunga tinana.

<sup>39</sup>  
Na i te whakamahau o te kuwaha e rua nga tepu i tenei taha, e rua nga tepu i tera taha, hei patunga ki runga mo te tahunga tinana, mo te whakahere hara, mo te whakahere mo te he. <sup>40</sup> I te taha ano ki waho e rua nga tepu i te wahi e piki ai ki te tapokoranga o te kuwaha ki te raki; e rua

nga tepu i tera taha, i te whakamahau o te kuwaha. <sup>41</sup> E wha nga tepu i tenei taha, e wha ano nga tepu i tera taha, i te taha o te kuwaha; e waru nga tepu i patua ai nga patunga tapu. <sup>42</sup> Na he kohatu tarai nga tepu e wha mo te tahunga tinana, kotahi whatianga me te hawhe te roa, kotahi whatianga me te hawhe te whanui, kotahi whatianga te tiketike; ko te takotoranga ena o nga patu mo te tahunga

tinana, mo te patunga tapu. <sup>43</sup> Kua oti ano etahi matau te whakanoho ki te taha ki roto a taka noa, kotahi ringa te whanui: a i runga i nga tepu ko te kikokiko o te whakahere. <sup>44</sup> Na i waho o to roto kuwaha ko nga ruma o nga kaiwaiata i to roto marae, ara i tera ki te taha o te kuwaha o te raki. I

anga aua ruma ki te tonga: i anga ano ki te raki tetahi i te taha o te kuwaha ki te rawhiti. <sup>45</sup> Na ka mea ia ki ahau, Ko tenei ruma e anga nei ki te tonga, mo nga tohunga, mo nga kaitiaki o nga mea o te whare. <sup>46</sup> Na, ko te ruma e anga nei ki te raki, mo nga tohunga, mo nga kaitiaki o nga mea o te aata: ko nga tama enei a Haroko i roto i nga tama a Riwai, e whakatata ana ki a Ihowa ki te minita ki a ia. <sup>47</sup> Na ka whanganga ia i te marae, kotahi rau whatianga te roa, kotahi rau whatianga te

whanui, he tapawha; a ko te aata hoki i mua i te whare. <sup>48</sup> Katahi ahau ka kawea e ia ki te whakamahau o te whare: kei te whanganga ia i tenei pou, i tenei pou o te whakamahau, e rima whatianga i tenei taha, e rima whatianga i tera taha: na, ko te whanui o te kuwaha, e toru whatianga

i tenei taha, e toru whatianga i tera taha. <sup>49</sup> Ko te roa o te whakamahau e rua tekau whatianga; ko te whanui kotahi tekau ma tahi whatianga; ara ma nga kaupae i pikitia atu ai a reira: a he pou ano era i te taha o nga pou, ko tetahi i tenei taha, ko tetahi i tera taha.

## Chapter 41

<sup>1</sup> Na ka kawea ahau e ia ki te temepara; kei te whanganga i nga pou, e ono whatianga te whanui i tetahi taha, e ono whatianga te whanui i tetahi taha, ko te whanui tera o te tapenakara. <sup>2</sup> Na, ko te whanui o te tatau, kotahi tekau whatianga; ko nga taha o te tatau, e rima nga whatianga i tetahi taha, e rima nga whatianga i tetahi taha; i whanganga ano ia i to reira roa, e wha tekau whatianga; ko te whanui e rua tekau whatianga. <sup>3</sup> Katahi ia ka haere ki roto, kei te whanganga i te pou o te



kuwaha, e rua whatianga; ko te kuwaha, e ono whatianga; ko te whanui o te kuwaha e whitu  
<sup>4</sup> whatianga. Heoi whanganga ana ia i to reira roa, e rua tekau whatianga te whanui, e rua tekau  
<sup>5</sup> whatianga i mua i te temepara. Na ka mea ia ki ahau, Ko te wahi tino tapu tenei. Muri iho ka  
whanganga ia i te taha o te whare, e ono whatianga; me te whanui ano i nga ruma o te taha, e wha  
<sup>6</sup> whatianga, i nga taha o te whare a taka noa. Na e toru nga whakapaparanga o nga ruma i te taha,  
ko tetahi i runga i tetahi, e toru tekau ki te rarangi, i ngoto ki te pakitara, ki to te whare, hei ruma  
<sup>7</sup> mo nga taha a taka noa, kia u ai ki reira, kahore ia he unga i te pakitara o te whare. Na ka nui  
haere a whawhe noa whakarunga nga ruma o te taha; i haere tonu hoki whakarunga te karapotinga  
o te whare a taka noa: no reira haere tonu te whanui o te whare whakarunga, nui haere atu ana i to  
<sup>8</sup> raro rawa tae noa ki to runga, ma waenga. I kite ano ahau i te tiketike o te whare a whawhe noa:  
<sup>9</sup> ko nga turanga o nga ruma, kotahi tino kakaho e ono nei ona whatianga nui. Ko te matotoru o te  
pakitara, o tera mo nga ruma i nga taha, i waho, e rima whatianga; a ko te mea i mahue ko te wahi  
<sup>10</sup> o nga ruma o te taha, no te whare era. Na he takiwa kei waenganui i nga ruma, e rua tekau  
<sup>11</sup> whatianga, i nga taha katoa o te whare a taka noa. A i anga nga tatau o nga ruma ki te wahi i  
mahue, ko tetahi tatau ki te raki, ko tetahi tatau ki te tonga: a ko te whanui o te wahi i mahue e rima  
whatianga a tawhio noa.

<sup>12</sup> Na, ko te whare i mua i te wahi motuhake i te pito ki te hauauru, e whitu tekau whatianga  
te whanui: a e rima whatianga te matotoru o te pakitara o taua whare a tawhio noa; tona roa e iwa  
<sup>13</sup> tekau whatianga. Heoi ka whanganga ia i te whare, kotahi rau whatianga te roa; me te wahi  
<sup>14</sup> motuhake, me taua whare, me ona taha, kotahi rau whatianga te roa; Me te whanui o te aroaro  
<sup>15</sup> o te whare, o te wahi motuhake ano whaka te rawhiti, kotahi rau whatianga. I whanganga ano  
ia i te roa o te whare i te ritenga mai o te wahi motuhake, i muri hoki tera i tenei; me ona ara i tetahi  
taha, i tetahi taha, kotahi rau whatianga; me te temepara i roto, me nga whakamahau o te marae;  
<sup>16</sup> Ko nga pou tatau, ko nga matapihi kuiti, me nga ara i nga whakapaparanga e toru a taka noa i te  
ritenga atu o te tatau, he mea paparua ki te rakau a taka noa, he mea pera ano i te whenua a tae noa  
<sup>17</sup> ki nga hatapihi; he mea hipoki ano nga matapihi; Tae noa ki te wahi i runga ake i te tatau, ki te  
<sup>18</sup> whare i roto, ki to waho, i te pakitara katoa a tawhio noa, i roto, i waho, he mea whanganga. I  
mahia ano ki reira he kerupima, he nikau; he nikau i te takiwa o tetahi kerupa, o tetahi kerupa, e  
<sup>19</sup> rua hoki nga mata o te kerupa kotahi. I anga te mata tangata ki te nikau i tetahi taha, te mata o  
<sup>20</sup> te raiona ki te nikau i tetahi taha; i peratia te mahinga puta noa i te whare, a tawhio noa. I te  
whenua a tae noa ki runga ake i te tatau i hanga he kerupima, he nikau, he penei te pakitara o te

<sup>21</sup> temepara. He tapawha nga pou o te temepara; na, ko te aronga mai o te wahi tapu, ko te ahua,  
<sup>22</sup> rite tonu ki te ahua o te temepara. Ko te aata he rakau, e toru whatianga te tiketike, a ko te roa  
 e rua whatianga; na, ko nga koki, ko tona roanga, ko ona pakitara, he rakau. Na ko tana kianga mai  
<sup>23</sup> ki ahau, Ko te tepu tenei i te aroaro o Ihowa. A e rua nga tatau o te temepara, o te wahi tapu.  
<sup>24</sup> Ko nga tatau he aparua, huri ai nga apa; e rua nga apa mo tetahi o nga tatau, e rua nga apa mo  
<sup>25</sup> tetahi. I mahia ano ki aua tatau o te temepara etahi kerupima me etahi nikau, he mea rite tonu  
 ki era i mahia ki nga pakitara; he papa matotoru hoki i te aronga o te whakamahau i te taha ki waho.  
<sup>26</sup> A he matapihi kuiti, he nikau hoki, i tetahi taha, i tetahi taha, i nga taha hoki o te whakamahau:  
 koia era, ko nga ruma o te taha o te whare, me nga papa matotoru hoki.

## Chapter 42

<sup>1</sup> Katahi ahau ka kawea e ia ki to waho marae, ki te ara ki te raki; kawea ana ahau e ia ki te  
 ruma ki te ritenga atu o te wahi motuhake, ki tera i te aronga mai o te whare e anga ana ki te raki.  
<sup>2</sup> I te ritenga atu o nga whatianga kotahi rau ko te tatau ki te raki, e rima tekau whatianga te whanui.  
<sup>3</sup> I te ritenga atu o nga whatianga e rua tekau o to roto marae, i te ritenga atu ano o te papa kohatu  
<sup>4</sup> i to waho marae, ko tetahi ara e anga mai ana ki tetahi ara, i te toru o nga whakapaparanga. Na i  
 mua i nga ruma ko tetahi wahi haereerenga kotahi tekau whatianga, he mea e anga ana whakaroto,  
<sup>5</sup> kotahi te whatianga o te ara; i anga o raua tatau ki te raki. Na i poto iho nga ruma o runga: na nga  
 ara hoki i tango tetahi wahi o enei, nui atu i te tangohanga mai i o raro, i o waenganui, o te whare.  
<sup>6</sup> E toru hoki nga whakapaparanga, kahore ia he pou pera me nga pou o nga marae: na reira i huiti  
<sup>7</sup> ai o runga rawa i o raro, i o waenganui, i te mea ka anga ake i te whenua. Na, ko te taha i waho  
 e anga ana ki nga ruma, ki to waho marae i te taha ki mua o nga ruma, ko tona roa e rima tekau  
<sup>8</sup> whatianga. E rima tekau whatianga hoki te roa o nga ruma i to waho marae: na i mua i te temepara  
<sup>9</sup> kotahi rau whatianga. I raro ano i enei ruma te tapokoranga atu i te rawhiti, i te mea ka tapoko  
<sup>10</sup> atu i to waho marae. He ruma ano i te wahi matotoru o te pakitara i te marae ki te rawhiti, i te  
<sup>11</sup> ritenga atu o te wahi motuhake, i te ritenga ake ano o te whare. Na, ko te ara i mua i era, rite  
 tonu te ahua ki to nga ruma i anga ki te raki; rite tonu te roa, rite tonu te whanui: ko nga putanga

<sup>12</sup>  
 atu rite tonu ki nga tikanga, rite tonu ki nga tatau. Rite tonu ano ki nga tatau o nga ruma e anga  
 ana ki te tonga te tatau i te ahunga mai o te ara, o te ara i mua tonu i te taiepa ki te rawhiti i te mea  
<sup>13</sup>  
 ka tomo tetahi ki roto. Katahi ia ka mea ki ahau, Ko nga ruma ki te raki, ko nga ruma ki te tonga  
 i mua i te wahi motuhake, he ruma tapu ena, ka kainga nga mea tapu rawa ki reira e nga tohunga  
 e whakatata ana ki a Ihowa: me waiho i reira nga mea tapu rawa, me te whakahere totokore, me  
<sup>14</sup>  
 te whakahere hara, me te whakahere mo te he: he tapu hoki taua wahi. Ka tae nga tohunga ki  
 roto, kaua e haere atu i roto i te wahi tapu ki to waho marae; engari me waiho i reira o ratou kakahu  
 e minita ai, he tapu hoki; me kakahu ano etahi atu kakahu, ka whakatata ai ki nga mea ma te iwi.  
<sup>15</sup>  
 Na ka mutu tana whanganga i to roto whare, ka kawea ahau e ia ki te kuwaha e anga ana ki  
<sup>16</sup>  
 te rawhiti, whanganga ana ia i tetahi taha, i tetahi taha. I whanganga e ia ki te kakaho whanganga  
 te taha ki te rawhiti, e rima rau kakaho, he mea whanganga ki te kakaho whanganga, i tetahi taha,  
<sup>17</sup>  
 i tetahi taha. I whanganga ia ki te taha i te raki, e rima rau kakaho, he mea whanganga ki te  
<sup>18</sup>  
 kakaho whanganga, i tetahi taha, i tetahi taha. I whanganga ia ki te taha ki te tonga e rima rau  
<sup>19</sup>  
 kakaho, he mea whanganga ki te kakaho whanganga. I tahuri atu ia ki te taha ki te hauauru,  
<sup>20</sup>  
 whanganga ana e ia, e rima rau kakaho, ki te kakaho whanganga. Whanganga ana a reira e ia i  
 nga taha e wha: he taiepa tona a tawhio noa, e rima rau kakaho te roa, e rima rau te whanui, hei  
 wehe i te wahi tapu i te wahi noa.

### Chapter 43

<sup>1</sup>  
 Muri iho ka kawea ahau e ia ki te kuwaha, ara ki te kuwaha e anga ana ki te rawhiti. <sup>2</sup> Na, ko  
 te kororia o te Atua o Ihairaira e puta mai ana, i te ara ki te rawhiti; ko tona reo rite tonu ki te haruru  
<sup>3</sup>  
 o nga wai maha: marama tonu te whenua i tona kororia. Ko tona rite kei te ahua o taku kite i kite  
 ai, ki tera i kite ra ahau i ahau e haere ana ki te whakangaro i te pa; rite tonu hoki nga kite ki taku  
<sup>4</sup>  
 i kite ai ki te awa, ki Kepara: a takoto tapapa ana ahau. Na kua tae te kororia o Ihowa ki roto ki  
<sup>5</sup>  
 te whare; i tika na te ara o te kuwaha e anga ana ki te rawhiti. Na ka hapainga ake ahau e te wairua,  
<sup>6</sup>  
 kawea ana e ia ki to roto marae. Na, kua ki te whare i te kororia o Ihowa. I rongono ano ahau i tetahi  
 e korero ana ki ahau i roto i te whare: me te tu ano tetahi tangata ki toku taha.  
<sup>7</sup>  
 Na ka mea ia ki ahau; E te tama a te tangata, Ko te wahi tenei i toku torona, ko te wahi ano i  
 nga kapu o oku waewae, ko te wahi e noho nei ahau i waenganui i nga tama a Ihairaira a ake ake;  
 e kore ano toku ingoa tapu e whakapokea a muri nei e te whare o Ihairaira, e ratou, e o ratou kingi,

ki a ratou moepuku, ki nga tinana ranei o o ratou kingi i o ratou wahi tiketike; <sup>8</sup> I ta ratou  
 whakanohoanga i to ratou paepae ki te taha o toku paepae, i to ratou pou tatau i te taha o toku pou  
 tatau, a ko te taiepa anake hei wehe i ahau i a ratou; i whakapokea e ratou toku ingoa tapu ki a ratou  
 mea whakarihariha i mahia nei e ratou; no reira pau ake ratou i ahau, i ahau e riri ana. <sup>9</sup> Na me  
 wehe atu e ratou o ratou moepuku me nga tinana o o ratou kingi, kia matara atu i ahau, a ka noho  
 ahau ki waenganui i a ratou a ake ake. <sup>10</sup> Ko koe, e te tama a te tangata whakakitea e koe te whare  
 ki te whare o Ihairaira, kia whakama ai ratou ki o ratou he; me whanganga hoki e ratou te taura.  
<sup>11</sup> A, ki te whakama ratou ki nga mea katoa i mea ai ratou, whakakitea ki a ratou te ahua o te whare,  
 tona whai hanga, ona putanga atu, ona tapokoranga ki roto, ona ahua katoa, ona ritenga katoa, me  
 ona ahua katoa, me ona ture katoa, tuhituhia ano k i to ratou aroaro, kia mau ai i a ratou tona ahua  
 katoa me ona ritenga katoa, kia mahia ai e ratou. <sup>12</sup> Ko te ture tenei o te whare; ko nga taha katoa  
 i runga i te tihi o te maunga, tapu rawa a tawhio noa. Nana, ko te ture tenei o te whare.  
<sup>13</sup> Ko nga roroa enei o te aata, ara ko nga whatianga: he whatianga me te whanui ringa kei roto  
 i te whatianga; a raro he whatianga, ko te whanui he whatianga, ko te taha i te niao he whanganga  
 ringa a tawhio noa: ko te kaupapa tenei o te aata. <sup>14</sup> Na, ko te turanga i runga i te whenua, haere  
 ake ki to raro papa, e rua whatianga; ko te whanui kia kotahi whatianga; ko to te papa i raro tae noa  
 ki te papa nui, e wha whatianga; ko te whanui, kotahi whatianga. <sup>15</sup> Na, ko to runga aata, e wha  
 whatianga; i te takuahi o te aata whakarunga kia wha nga haona. <sup>16</sup> Kia tekau ma rua whatianga  
 te roa o te takuahi o te aata, kia tekau ma rua whatianga te whanui, he tapawha, e wha hoki nga  
 taha. <sup>17</sup> Na, ko te papa, kia tekau ma wha whatianga te roa, kia tekau ma wha ano te whanui o nga  
 taha e wha: ko te niao i te taha hei te hawhe whatianga; ko te turanga, kia kotahi te whatianga a  
 tawhio noa; kia anga ano te pikitanga ki te rawhiti. <sup>18</sup> I ki mai ano ia ki ahau, E te tama a te tangata,  
 ko te kupu tenei a te Ariki, a Ihowa, Ko nga tikanga tenei o te aata i te ra e hanga ai hei whakaekenga  
 mo te tahunga tinana, hei tauhiuhi mo te toto. <sup>19</sup> Me hoatu e koe he puru, he kua, hei whakahere  
 hara ki nga tohunga, ki nga Riwaiti, ki nga uri o Haroko, e whakatata ana ki ahau minita ai, e ai ta  
 te Ariki, ta Ihowa. <sup>20</sup> Me tango ano e koe tetahi wahi o ona toto, ka pani ki ona haona e wha, ki  
 nga koki e wha o te papa, ki te taha a tawhio noa: na ka purea taua aata e koe, ka meinga kia ma.  
<sup>21</sup> Me tiki ano te puru, te whakahere hara, a mana e tahu ki te wahi o te whare i whakaritea i waho  
 o te wahi tapu. <sup>22</sup> Na i te rua o nga ra me whakahere he koati toa, he mea kohakore, hei whakahere  
 hara, a ka purea te aata, ka peratia me ta ratou purenga ki te kau. <sup>23</sup> Ka oti te pure e koe, me  
 whakahere he kua puru, he mea kohakore, me tetahi hipi toa o te kahui, hei te mea kohakore.

24

Me whakahere e koe ki te aroaro o Ihowa, mea maka ano e nga tohunga he tote ki runga, ka

whakaeke ai hei tahunga tinana ki a Ihowa. <sup>25</sup> E whitu nga ra e mahia ai e koe he hipi hei whakahere hara i tenei ra, i tenei ra; me mahi ano e ratou he kua o puru me tetahi hipi toa o te kahui, he mea

kohakore. <sup>26</sup> E whitu nga ra e tahia ai e ratou te poke o te aata, e purea ai; ka pena ta ratou whakatapu

i te aata. <sup>27</sup> A ka poto enei ra, na i te waru o nga ra, i o muri iho ano, ka mahia e nga tohunga a koutou tahunga tinana ki runga ki te aata, me a koutou whakahere mo te pai: a ka manako ahau ki a koutou, e ai ta te Ariki, ta Ihowa.

## Chapter 44

1

Katahi ahau ka whakahokia e ia na te ara o te kuwaha o waho o te wahi tapu e anga ana ki te

rawhiti; na kua oti te tutaki. <sup>2</sup> Na ka mea a Ihowa ki ahau, Ko tenei kuwaha me tutaki tonu, e kore e whakatuwheratia, e kore ano tetahi tangata e tomo ma konei: no te mea i na konei atu a Ihowa,

te Atua o Iharaira; na reira i tutakina ai. <sup>3</sup> Tena ko te rangatira, me noho ia ki konei, he rangatira, ki te kai taro i te aroaro o Ihowa, ko tona ara ki roto kei te whakamahau o taua kuwaha; ko tona ara ano tena ki waho.

4

Katahi ahau ka kawea e ia na te ara o te kuwaha ki te raki, ki te aronga o te whare: na, i taku

tirohanga atu, nana, kua ki te whare o Ihowa i te kororia o Ihowa, a tapapa ana ahau. <sup>5</sup> Na ka mea a Ihowa ki ahau, E te tama a te tangata anga mai tou ngakau, titiro hoki ou kanohi, whakarongo ano ou taringa ki nga mea katoa e korero ai ahau ki a koe mo nga tikanga katoa o te whare o Ihowa, mo nga ture katoa ano o reira; ata mahara ano ki te tomokanga atu ki te whare, ki nga putanga katoa

hoki i te wahi tapu. <sup>6</sup> Me ki atu ano e koe ki te hunga whakakeke, ki te whare o Iharaira, Ko te

kupu tenei a te Ariki, a Ihowa, Kati ra a koutou mea whakarihariha, e te whare o Iharaira. <sup>7</sup> Kua kawea mai na hoki e koutou he tautangata, he hunga kihai i kotia te ngakau, kihai i kotia te kikokiko, ki toku wahi tapu noho ai, hei whakapoke mo reira, ara mo toku whare, i te mea e whakaherea ana e koutou taku taro, te ngako, me te toto, a he iho taku kawenata i a ratou, hei apiti ki a koutou mea

whakarihariha katoa. <sup>8</sup> Kihai ano i mau i a koutou te tiaki i aku mea tapu: heoi whakaritea ana e

koutou a koutou ake kaitiaki mo aku mea i roto i toku wahi tapu. <sup>9</sup> Ko te kupu tenei a te Ariki, a Ihowa; Kua tetahi tautangata kihai i kotia te ngakau, kihai i kotia te kikokiko, e tomo ki toku wahi tapu, o nga tautangata katoa i roto i nga tama a Iharaira.

10 Engari, ko nga Riwaiti i mawehe atu ra i ahau, i te kotititanga ketanga o Iharaira, i a ratou i  
 kotiti atu ai i ahau, i whai ai i a ratou whakapakoko: ka mau ki a ratou to ratou kino. <sup>11</sup> Otiia hei  
 minita ano ratou i roto i toku wahi tapu, hei tiaki i nga kuwaha o te whare, hei minita ki te whare:  
 ma ratou e patu te tahunga tinana me te patunga tapu a te iwi, me tu ano ratou ki to ratou aroaro  
<sup>12</sup> minita ai ki a ratou. No te mea i minita ratou ki a ratou i te aroaro o a ratou whakapakoko, a  
 meinga ana e ratou te whare o Iharaira kia taka ki te kino; na reira i ara ai toku ringa ki a ratou, e  
<sup>13</sup> ai ta te Ariki, ta Ihowa; ka mau ki a ratou to ratou kino. E kore ano ratou e whakatata ki ahau,  
 hei tohunga maku, e kore ano e whakatata ki tetahi o aku mea tapu i te wahi tapu rawa: engari, ka  
<sup>14</sup> mau to ratou whakama ki a ratou, me a ratou mea whakarihariha i mahia e ratou. Otira ka meinga  
 ratou e ahau hei kaitiaki mo nga mea o te whare, mo nga mahi katoa o reira, mo nga mea katoa ano  
<sup>15</sup> e meatia ki reira. Engari era tohunga, nga Riwaiti, nga tama a Haroko, i tiaki nei i nga mea o  
 toku wahi tapu, i nga tama a Iharaira i kotiti ke atu ra i ahau, ko ratou e whakatata ki ahau ki te  
 minita ki ahau, ka tu ano ratou i toku aroaro hei whakahere i te ngak o, i te toto, ki ahau, e ai ta te  
<sup>16</sup> Ariki, ta Ihowa: Ko ratou e tomo ki roto ki toku wahi tapu, ko ratou ano e whakatata ki taku  
 tepu hei minita ki ahau, ma ratou ano aku mea e tiaki.  
<sup>17</sup> A ka tomo ratou ki roto ki nga kuwaha o to roto marae, hei te kakahu rinena he kakahu mo  
 ratou; kaua hoki tetahi mea huruhuru e mau ki a ratou, i a ratou e minita ana i roto i nga kuwaha o  
 to roto marae, i roto ano i te whare. <sup>18</sup> He potae rinena mo o ratou mahunga, he tarautete rinena  
 ano hoki mo o ratou hope; kaua e whitikiria e ratou he mea e heke ai te werawera. <sup>19</sup> Na ka haere  
 atu ratou ki to waho marae, ara ki te marae i waho, ki te iwi, me unu o ratou kakahu i minita ai  
 ratou, ka waiho ki nga ruma tapu, a me kakahu etahi atu kakahu; kei tapu te iwi i o ratou kakahu.  
<sup>20</sup> Kaua ano ratou e heu i o ratou mahunga, kaua nga makawe e whakatupuria kia roa; ko te kutikuti  
 anake mo o ratou mahunga. <sup>21</sup> Kaua ano tetahi tohunga e inu waina, ina haere ratou ki to roto  
 marae. <sup>22</sup> Kaua ano ratou e tango i te pouaru, i te mea ranei i whakarerea, hei wahine ma ratou;  
 engari, ko ta ratou e tango ai hei nga wahine o nga uri o te whare o Iharaira, hei te pouaru ranei a  
<sup>23</sup> tetahi tohunga. A me whakaako e ratou toku iwi ki te wehe i te tapu, i te noa; me mea kia mohio  
<sup>24</sup> ki te poke, ki te ma. I te tautohetohenga hoki me tu ratou hei whakawa; kia rite ano a ratou  
 whakawa ki aku whakawa; me pupuri e ratou aku ture, me aku tikanga i roto i aku hakari whakarite  
<sup>25</sup> katoa; me whakatapu ano e ratou aku hapati. Kaua ano ratou e tae ki te tupapaku, whakapoke  
 ai i a ratou; e whakapoke ano ia ratou i a ratou ano mo te papa, mo te whaea, mo te tama, mo te  
<sup>26</sup> tamahine, mo te tuakana, teina ranei, mo te tuahine kahore nei ana tahu. A, ka oti ia te pure, me

<sup>27</sup>  
 tatau kia whitu nga ra mona. Na, a te ra e tomo ai ia ki te wahi tapu, ki to roto marae, ki te minita  
<sup>28</sup>  
 i roto i te wahi tapu, me whakahere e ia tana whakahere hara, e ai ta te Ariki, ta Ihowa. A ka  
 whai kainga tupu ratou; ko ahau hei kainga tupu mo ratou: kaua hoki tetahi kainga e hoatu ki a  
<sup>29</sup>  
 ratou i roto i a Iharaira: ko ahau hei kainga mo ratou. Ko te whakahere totokore, ko te whakahere  
 hara, ko te whakahere mo te he, hei kai ma ratou; ma ratou ano nga mea katoa i oti rawa mai i roto  
<sup>30</sup>  
 i a Iharaira. Na, ko te tuatahi o nga matamua katoa o nga mea katoa, me nga whakahere katoa  
 o a koutou tini whakahere katoa, ma nga tohunga; me te tuatahi ano o ta koutou paraoa pokepoke,  
<sup>31</sup>  
 me hoatu e koutou ki te tohunga, kia tau ai he manaaki ki tou whare. Kaua te tohunga e kai i te  
 mea mate maori, i te mea ranei i haea, ahakoa manu, ahakoa kararehe.

## Chapter 45

<sup>1</sup>  
 I nga wa ano e wehea ai e koutou te whenua hei wahi tupu, me whakahere he whakahere ma  
 Ihowa, me whakatapu tetahi wahi o te whenua: ko tona roa ko te roa o nga kakaho e rua tekau ma  
<sup>2</sup>  
 rima mano; ko te whanui kotahi tekau mano. Ka tapu tenei, ona ta ha katoa a tawhio noa. Waiho  
 tetahi wahi o tenei, kia rima rau te roa mo te wahi tapu, kia rima rau te whanui, he tapawha a tawhio  
<sup>3</sup>  
 noa, kia rima tekau ano nga whatianga mo waho ake a tawhio noa. Me whanganga ano e koe  
 tetahi wahi o tenei ka oti nei te whanganga kia rua tekau ma rima mano te roa, kia tekau mano te  
<sup>4</sup>  
 whanui: a hei reira te wahi tapu, te wahi tapu rawa. He wahi tapu ia no te whenua; mo nga tohunga  
 tera, mo nga minita o te wahi tapu e whakatata ana ki te minita ki a Ihowa: hei wahi ano tera mo o  
<sup>5</sup>  
 ratou whare, hei wahi tapu ano mo te wahi tapu. Ko te rua tekau ma rima mano nei te roa, tekau  
 mano te whanui, mo nga Riwaiti, mo nga minita o te whare, hei wahi mo ratou, mo nga ruma e rua  
<sup>6</sup>  
 tekau. Me whakarite ano e koutou te wahi mo te pa, e rima mano te roa, ki te taha o te wahi tapu  
<sup>7</sup>  
 ka whakaherea nei: mo te whare katoa o Iharaira tera. A, he aha he wahi mo te rangatira, hei  
 tetahi taha, hei tetahi taha o te wahi tapu ka whakaherea nei, o te wahi ano i te pa, ki mua o te wahi  
 tapu ka whakaherea nei, o te wahi hoki i te pa, i te taha ki te hauauru whaka te hauauru, i te taha  
 hoki ki te rawhiti, whaka te rawhiti, kia rite ano te roa ki tetahi o aua wahi, me timata i te rohe ki  
<sup>8</sup>  
 te hauauru a tae noa ki te rohe ki te rawhiti. Kei te whenua te wahi mona i roto i a Iharaira: e kore  
 ano aku rangatira e whakatupu kino i taku iwi a muri ake nei; engari me hoatu e ratou te whenua  
 ki te whare o Iharaira, ki tenei hapu, ki tenei hapu.

9 Ko te kupu tenei a te Ariki, a Ihowa, Kati ta koutou, e nga rangatira o Iharaira; whakarerea  
 atu te tukino, te pahua, mahia te whakawa, me te tika, whakamutua a koutou peinga i taku iwi, e  
 ai ta te Ariki, ta Ihowa. 10 Kia tika a koutou pauna, kia tika te epa, kia tika te pati. 11 Kia kotahi  
 te mehua mo te epa, mo te pati; ko te pati he whakatekau no te homa, ko te epa hoki he whakatekau  
 no te homa: ko te mehua mo taua mea ko te homa. 12 A ko te hekere kia rua tekau nga kera: ko ta  
 koutou mane kia rua tekau hekere, kia rua tekau ma rima hekere, kia kotahi tekau ma rima hekere.  
 13 Ko te whakahere tenei e whakaherea e koutou; he witi, ko te wahi tuaono o te epa o te homa;  
 a me homai e koutou he parei, hei te wahi tuaono o te epa o te homa. 14 Na, ko te tikanga mo te  
 hinu, mo te pati hinu, hei te whakatekau o te pati i roto i te koro, he homa nei tana, ara tekau nga  
 pati; kotahi tekau hoki nga pati o te homa: 15 Kia kotahi ano reme i roto i te kahui, i roto i nga rau  
 e rua, he mea no nga haereerenga makuku o Iharaira; hei whakahere totokore, hei tahunga tinana,  
 hei whakahere mo te pai, hei mea whakamarie mo ratou, e ai ta te Ariki, ta Ihowa. 16 Me hoatu  
 tenei whakahere e te iwi katoa o te whenua ki te rangatira i roto i a Iharaira. 17 Na, ko tenei ta te  
 rangatira, he homai i nga tahunga tinana, i nga whakahere totokore, i nga ringihanga, mo nga hakari,  
 mo nga kowhititanga marama, mo nga hapati, mo nga huihuinga nui katoa o te whare o Iharaira:  
 kia rite mai ano i a ia te whaka here hara, te whakahere totokore, te tahunga tinana, nga whakahere  
 mo te pai, hei whakamarie mo te whare o Iharaira. 18 Ko te kupu tenei a Ihowa, a te Atua; I te  
 marama tuatahi, i te tuatahi o nga ra o te marama, me tiki e koe he puru kua, hei te mea kohakore,  
 ka pure i te wahi tapu. 19 Me tango ano e te tohunga tetahi wahi o te toto o te whakahere hara, ka  
 pani ki nga pou o te whare, ki nga koki e wha ano o te papa o te aata, ki nga pou ano o te kuwaha  
 o to roto marae. 20 Ko tau ano tera e mea ai i te whitu o nga ra o te marama hei mea mo te tangata  
 i te he, mo te kuware: a ka oti te whakamarie mo te whare. 21 Hei te marama tuatahi, hei te tekau  
 ma wha o nga ra o te marama, ta koutou kapenga, he hakari, e whitu nga ra; ko te taro hei kai, he  
 mea rewenakore. 22 Kia rite mai ano hoki i te rangatira i taua ra, he puru hei whakahere hara mona,  
 mo te iwi katoa o te whenua. 23 Kia rite mai ano i a ia i nga ra e whitu o te hakari te tahunga tinana  
 ma Ihowa, e whitu nga puru, e whitu nga hipi toa, he mea kohakore i tenei ra, i tenei ra, i nga ra e  
 whitu; me tetahi kua koati i tenei ra, i tenei ra, hei whakahere hara. 24 Kia rite mai ano i a ia he  
 whakahere totokore, kotahi te puru kia kotahi ano te epa, kotahi te hipi toa kia kotahi ano te epa,  
 kotahi te epa kia kotahi hine hinu. 25 I te whitu o nga marama, i te tekau ma rima o nga ra o te  
 marama, i te hakari, ka mahia mai e ia enei mea, kia whitu nga ra; kia rite ki te whakahere hara, ki  
 te tahunga tinana, ki te whakahere totokore, ki te hinu hoki.



## Chapter 46

<sup>1</sup> Ko te kupu tenei a te Ariki, a Ihowa; Me tutaki te kuwaha o to roto marae e anga ana ki te rawhiti i nga ra mahi e ono; kia tuwhera ia i te hapati, kia tuwhera ano i te ra e kowhiti ai te marama.

<sup>2</sup> A ka tomo te rangatira ma te ara o te whakamahau o te kuwaha i waho, ka tu ai ki te pou o te kuwaha; katahi ka mahia e nga tohunga tana tahunga tinana, me ana whakahere mo te pai, hei te paepae ano o te kuwaha he koropikotanga mona; katahi ia ka puta atu ki waho; kauaka ia te kuwaha e tutakina a ahiahi noa.

<sup>3</sup> Hei te tatau ano o taua kuwaha he koropikotanga mo te iwi o te whenua i nga hapati, i nga kowhititanga marama, ki te aroaro o Ihowa.

<sup>4</sup> Na, ko te tahunga tinana e whakaherea e te rangatira ki a Ihowa hei te ra hapati, e ono nga reme he mea kahakore, he hipi toa, he mea kohakore.

<sup>5</sup> Ko te whakahere totokore, kia kotahi te epa mo te hipi toa, me to nga reme whakahere totokore, ko tana e taea te homai; kotahi te epa, kia kotahi ano hine hinu.

<sup>6</sup> Na i te ra e kowhiti ai te marama ko tetahi kuaopuru, he mea kohakore, e ono nga reme, kotahi te hipi toa, he mea kohakore katoa.

<sup>7</sup> Kia rite ano i a ia he whakahere totokore, mo te puru, kia kotahi epa; mo te hipi toa, kia kotahi epa; ko to nga reme, ko ta tona ringa e tae atu ai; kotahi te epa, kia kotahi ano hine hinu.

<sup>8</sup> Na e tomo te rangatira ki roto, me haere ia na te ara o te whakamahau o te kuwaha; hei to reira ara ano he putanga mona.

<sup>9</sup> Na e tomo te iwi o te whenua ki te aroaro o Ihowa i nga hakari nunui, ko te tangata i tomo na te ara o te kuwaha ki te raki ki te koropiko, hei te ara o te kuwaha ki te tonga he putanga mona; a, ko te tangata i tomo na te ara o te kuwaha ki te to nga, hei te ara o te kuwaha ki te raki he putanga mona: kaua ia e hoki na te ara o te kuwaha i tomo ai ia; engari me haere hangai atu.

<sup>10</sup> Na, ko te rangatira, ina tomo ratou ki roto, hei waenganui ia i a ratou; a, ina puta ratou ki waho, me puta tahi ratou.

<sup>11</sup> Na, ko te whakahere totokore i nga hakari, i nga whakanuinga, kotahi te epa ki te puru, kotahi te epa ki te hipi toa; ko to nga reme ano, ko te mea e taea e ia te homai; kia kotahi te hine hinu ki te epa.

<sup>12</sup> Na e mahia mai e te rangatira he tahunga tinana, he mea tuku noa mai, he whakahere ranei mo te pai, he mea tuku noa mai, hei mea ki a Ihowa, me whakatuwhera e etahi te kuwaha e anga ana ki te rawhiti ki a ia, a ka mahia e ia tana tahunga tinana, me ana whakahere mo te pai, kia rite ki tana mahinga i te ra o te hapati.

<sup>13</sup> Katahi ia ka puta ki waho, a ka tutakina te kuwaha ina puta ia.

<sup>14</sup> Me mahi e koe he tahunga tinana ki a Ihowa i tenei ra, i tenei ra, he reme, hei te tautahi, hei te kohakore: me mahi e koe i tenei ata, i tenei ata.

Me mahi ano e koe he whakahere totokore hei kinaki i tenei ata, i tenei ata, te whakaono o te epa, me te whakatoru o te hine hinu, hei whakamakuku i te paraoa; he whakahere totokore ki a

15  
Ihowa, he mea e tuturu ana tona tikanga a ake ake. Ina, me mahi te reme, me te whakahere totokore, me te hinu i tenei ata, i tenei ata, hei tahunga tinana e tuturu tonu ana.

16  
Ko te kupu tenei a te Ariki, a Ihowa; Ki te homai e te rangatira tetahi mea homai noa ki tetahi o ana tamariki, ka riro tera i ana tamariki; mo ratou tera, a tuku iho, tuku iho. 17 Tena, ki te hoatu tetahi wahi o tona kainga tupu ki tetahi o ana pononga, mana tera, a taea noatia te tau haere noa; katahi ka hoki ki te rangatira: mo ana tamariki ano ia tona wahi tupu hei wahi mo ratou.

18  
Kaua ano te rangatira e tango i tetahi wahi o to te iwi kainga tupu, he pei i a ratou i o ratou wahi; me homai e ia he wahi mo ana tamariki i roto i tona wahi ake; kei marara noa atu taku iwi i tona wahi, i tona wahi.

19  
Katahi ahau ka kawea e ia ki roto, i tika na te tomokanga i te taha o te kuwaha ki nga ruma tapu o nga tohunga, ki era e anga ana whaka te raki: na, ko tetahi wahi i reira i muri whaka te

20  
hauauru. Na ka mea ia ki ahau, Ko te wahi tenei e kohuatia ai e nga tohunga te whakahere mo te he, me te whakahere hara, ka tunua ano e ratou ki konei te whakaheretotokore; kei whakaputaina

21  
mai ki to waho marae whakatapu ai i te iwi. Katahi ahau ka kawea e ia ki to waho marae; a ka meinga e ia kia tika na nga kokonga e wha o te marae; na ko tetahi marae i tetahi kokonga, i tetahi

22  
kokonga o te marae. He marae kei nga kokonga e wha o te marae, he mea karapoti mai, e wha tekau nga whatianga te roa, e toru tekau te whanui: ko enei e wha i nga kokonga, rite tonu te nui.

23  
Na he rarangi whare kei aua marae a taka noa, i aua marae e wha a taka noa; i mahia ano etahi

24  
wahi mo nga kohua i raro i nga rarangi, a taka noa. Na ka mea ia ki ahau, Ko nga wahi enei o nga kohua, e kohuatia ai e nga minita o te whare te patunga tapu a te iwi.

## Chapter 47

1  
A ka whakahokia ahau e ia ki te tatau o te whare; na, he wai e pupu mai ana i raro i te paepae o te whare whaka te rawhiti, e anga ana hoki te aronga o te whare ki te rawhiti; a i heke mai nga

2  
wai i raro i te taha ki matau o te whare, i te taha k i te tonga o te aata. Katahi ahau ka arahina e ia i te ara o te kuwaha ki te raki, a arahina awhiotia ana na te ara o waho ki to waho kuwaha, na te

3  
ara o te kuwaha e anga ana ki te rawhiti: a ko nga wai e rere ana i te taha ki matau. No te haerenga atu o te tangata, i tona ringa nei te aho, whaka te rawhiti, kotahi mano nga whatianga i whanganga

4  
e ia, a ka meinga ahau e ia kia tika na roto i nga wai; i nga ponapona te wai. I whanganga ano he mano e ia, a meinga ana ahau e ia kia tika na roto i nga wai; i nga turi te wai. I whanganga ano e

ia he mano, a meinga ana ahau e ia kia tika i waenga; i nga hope te wai. <sup>5</sup> Muri iho i whanganga e ia he mano; na he awa kihai i taea te whiti; kua neke ake hoki nga wai e kauhoea, he awa e kore e whitingia. <sup>6</sup> Na ka mea ia ki ahau; Ka kite ranei koe i tenei e te tama a te tangata? Katahi ahau ka arahina e ia, ka whakahokia ki te pareparenga o te awa. <sup>7</sup> Hoki rawa atu ahau, na i te pareparenga o te awa tona tini o te rakau i tetahi taha, i tetahi taha. <sup>8</sup> Katahi ia ka mea ki ahau, E puta atu ana enei wai ki te wahi ki te rawhiti, ka rere ano ki raro, ki te Arapa tae tonu atu ki te moana: ko te moana he rerenga atu mo nga wai i meinga kia puta mai, ka ai hei rongoa mo nga wai. <sup>9</sup> Na, ko nga mea ora katoa e muimui ana, i nga wahi katoa e tae atu ai nga awa, ka ora: ka tini noa atu hoki nga ika, no te mea ka tae enei wai ki reira, a ka rongoatia nga wai o te moana, a ka ora nga mea katoa e tae atu ai te awa. <sup>10</sup> Na ka tu nga kaihao ki tona taha; a ka waiho he wahi i Enekeri a tae noa ki Enekeraima hei horahanga mo nga kupenga; a ko nga ika o aua wahi ka rite ki o ratou ahua, ka rite ki nga ika o te moana nui, te tini noa iho. <sup>11</sup> Otiia e kore e waimaori nga wahi oru o reira, me nga repo o reira; ka tukua atu ki te tote. <sup>12</sup> Na ka tupu ki te taha o te awa, ki tona pareparenga, ki tetahi taha, ki tetahi taha, nga rakau kai katoa; e kore nga rau e memenge, e kore ano nga hua e kore; ko ona hua, hou tonu i o ratou marama ano, no te mea i puta mai o ratou wai i te wahi tapu: na hei kai tona hua, hei rongoa tona rau.

<sup>13</sup> Ko te kupu tenei a te Ariki, a Ihowa: Hei konei te rohe, e wehewehe ai koutou i te whenua hei kainga tupu, he mea whakarite ki nga hapu kotahi tekau ma rua o Iharaira: kia rua nga wahi ma <sup>14</sup> Hohepa. Ka riro hoki a reira i a koutou, ta tetahi, ta tetahi, rite tonu: he wahi hoki ia i ara ai toku ringa kia hoatu a reira ki o koutou matua: ina, ka taka mai ano tenei whenua ki a koutou hei kainga <sup>15</sup> tupu. Ko te rohe tenei o te whenua; i te taha ki te raki, kei te moana nui, kei te ara ki Heterono, i te mea ka haere ki Terara; <sup>16</sup> Kei Hamata, kei Perota, kei Hipiraima i te takiwa o te rohe ki Ramahiku, o te rohe ki Hamata; kei Hatara Hatikono i te taha o te rohe ki Haurana. <sup>17</sup> Na, ko te rohe i te moana, kei Hataraenana, kei te rohe ki Ramahiku, me te taha ano ki te raki whaka te raki, kei te rohe ki Hamata. Ko te taha ki te raki hoki tenei. <sup>18</sup> Ko te taha ki te rawhiti, i waenganui o Haurana, o Ramahiku, o Kireara, me te whenua o Iharaira, ko Horano; me whanganga mai i te rohe ki te raki tae noa ki te moana i te rawhiti. Ko te taha ki te rawhiti tenei. <sup>19</sup> Na, ko te taha ki te tonga whaka te tonga ka takoto atu i Tamara tae noa ki nga wai o Meripoto Karehe, ki te awa o Ihipa, ki te moana nui. Na ko te taha tenei ki te tonga whaka te tonga. <sup>20</sup> Na, ko te rohe ki te hauauru ko te moana nui, ka takoto atu i te rohe ki te tonga a tae noa ki te ritenga atu o Hamata. Ko te taha tenei ki te hauauru. <sup>21</sup> Na me wehe tenei whenua mo koutou, he mea whakarite ki nga hapu o Iharaira.

22

Ina, me wehe tenei whenua, hei kainga tupu mo koutou, mo nga tautangata e noho ana i roto i a koutou, e whanau tamariki i roto i a koutou; a kia rite ratou ki ta koutou, ki ta te tangata whenua i roto i a Iharaira; kia taka mai he wahi mo ratou i roto i a koutou, i roto i nga hapu o Iharaira. Na, ko te hapu e noho ai te tautangata, me hoatu e koutou he wahi mona ki reira, e ai ta te Ariki, ta Ihowa.

23

## Chapter 48

1

Na ko nga ingoa enei o nga hapu. Kei te pito i te raki ki te taha o te ara ki Heterono, i te mea ka haere ki Hamata, kei Hataranenana, kei te rohe ki Ramahiku ki te taha ki te raki, tae noa ki te taha o Hamata; ko ona taha enei ki te rawhiti, ki te hauauru; he wahi mo Rana.

2

Na hei te taha o te rohe ki a Rana, hei te taha ki te rawhiti tae noa ki te taha ki te hauauru, he wahi mo Ahera. A hei te taha i te rohe ki a Ahera hei te taha ki te rawhiti tae noa ki te taha ki te hauauru, he wahi mo

3

Napatari. Hei te taha ano i te rohe ki a Napatari, hei te taha ki te rawhiti tae noa ki te taha ki te

4

hauauru, he wahi mo Manahi. Hei te taha ano o te rohe ki a Manahi, hei te taha ki te rawhiti tae

5

noa ki te hauauru, he wahi mo Eparaima. Hei te taha ano o te rohe ki a Eparaima, hei te taha i te

6

rawhiti tae noa ki te hauauru, he wahi mo Reupena. Hei te taha ano o te rohe ki a Reupena, hei

7

te taha ki te rawhiti tae noa ki te hauauru, he wahi mo Hura. Na, ko te whakahere e homai e koutou, hei te taha o ta Hura, hei te taha i te rawhiti tae noa ki te hauauru, kia rua tekau ma rima mano kakaho te whanui, kia rite te roa ki to tetahi o nga wahi, i te rawhiti tae noa ki te hauauru: a

8

hei waenganui o reira te wahi tapu. Ko te whakahere e homai e koutou ki a Ihowa, kia rua tekau

9

ma rima mano kakaho te roa, kia kotahi tekau mano te whanui. Na mo ratou, mo nga tohunga, tenei whakahere tapu; whaka te raki, e rua tekau ma rima mano te roa, whaka te hauauru kotahi tekau mano te whanui, whaka te rawhiti kotahi tekau mano te whanui, whaka te tonga e rua tekau

10

ma rima mano te roa: a ki waenganui o reira te wahi tapu o Ihowa. Mo nga tohunga tera, mo nga ta a a Haroko kua oti te whakatapu, mo te hunga i tiaki i aku mea, a kihai i kotiti ke i te

11

kotititanga ketanga o nga tama a Iharaira, kihai i pera me nga Riwaiti i kotiti ke ra. Na hei whakahere tenei ma ratou no te whakahere o te whenua, he mea tino tapu rawa, i te taha o te rohe

12

o nga Riwaiti. Na i te ritenga ake o te rohe o to nga tohunga, kia rua tekau ma rima mano te roa o to nga Riwaiti; kia kotahi tekau mano te whanui, ko te roa katoa e rua tekau ma rima mano; ko

13

14  
te whanui kotahi tekau mano. Kaua hoki tetahi wahi o reira e hokona, kaua ano e whakawhititia,

15  
kaua hoki nga hua matamua o te whenua e whakariroia ketia ranei: he tapu hoki ki a Ihowa. Na,  
ko nga mano e rima o te whanui i mahue i te ritenga ake o nga mano e rua tekau ma rima, hei wahi  
noa tera mo te pa, hei nohoanga, hei wahi i waho ake o te pa; hei waenganui ano o reira te pa.

16  
Ko ona roa ano enei; ko te taha ki te raki e wha mano e rima rau, ko te taha ki te tonga e wha  
mano e rima rau, ko te taha ki te rawhiti e wha mano e rima rau, ko te taha ki te hauauru e wha

17  
mano e rima rau. A kia whai wahi a waho ake o te pa; whaka te raki e rua rau e rima tekau,  
whaka te tonga e rua rau e rima tekau, whaka te rawhiti e rua rau e rima tekau, whaka te hauauru

18  
e rua rau e rima tekau. Na, ko te toenga o te roa i te taha o te wahi tapu i whakaherea, kotahi  
tekau mano ki te rawhiti, kotahi tekau mano ki te hauauru: na, ko tera wahi hei te taha i te wahi

19  
tapu i whakaherea; hei kai ona hua ma nga kaimahi o te pa. Na, ko nga kaimahi katoa i roto i te

20  
pa, no nga hapu katoa o Iharaira, ma ratou e mahi a reira. Kia rua tekau ma rima mano tetahi  
taha o te whakahere katoa, kia rua tekau ma rima mano ano tetahi taha: kia wha nga taha o te

21  
whakahere tapu e whakaherea e koutou, he mea huihui atu ki te wahi mo te pa. Na mo te rangatira  
te toenga i tetahi taha, i tetahi taha, o te whakahere tapu, o te wahi ano i te pa, i te ritenga ake ano  
o nga mano e rua tekau ma rima i whakaherea nei, i te rohe ki te rawhiti, whaka te hauauru hoki, i  
te ritenga ake ano o nga mano e rua tekau ma rima i te rohe ki te hauauru, i te ritenga ake ano o  
nga wahi mo te rangatira: na ko te whakahere tapu me te wahi tapu o te whare hei waenganui o

22  
reira. Na, ka takoto atu i te wahi i nga Riwaiti, i te wahi ano i te pa, ara tera i waenganui o te  
wahi a te rangatira, i waenganui o te rohe ki a Hura, o te rohe hoki ki a Pineamine, mo te rangatira

23  
tera. Na, mo era atu o nga hapu: i te taha ki te rawhiti, tae noa ki te taha ki te hauauru, kia kotahi

24  
te wahi mo Pineamine. Hei te rohe o ta Pineamine, hei te taha ki te rawhiti, tae noa ki te taha ki

25  
te hauauru, kia kotahi te wahi mo Himiona. Hei te rohe ano o ta Himiona, hei te taha ki te rawhiti,

26  
tae noa ki te taha ki te hauauru, he wahi mo Ihakara. Hei te rohe ano o ta Ihakara, hei te taha ki

27  
te rawhiti, tae noa ki te taha ki te hauauru, he wahi mo Hepurona. Hei te rohe ano o ta Hepurona,

28  
hei te taha ki te rawhiti, tae noa ki te taha ki te hauauru, he wahi mo Kara. Hei te rohe ano o ta  
Kara, hei te taha ki te tonga whaka te tonga, ka takoto atu te rohe i Tamara, tae noa ki nga wai o

29  
Meripata Karehe, ki te awa o Ihipa, ki te moana nui. Ko te whenua tenei e wehea e koutou hei

30  
wahi tupu mo nga hapu o Iharaira, ko o ratou wahi ano enei, e ai ta te Ariki, ta Ihowa. Ko nga  
putanga atu ano enei o te pa i te taha ki te raki, e wha mano e rima rau kakaho te roa,

31

Ko nga kuwaha o te pa me tapa he ingoa ki nga ingoa o nga hapu o Iharaira; e toru nga kuwaha whaka te raki: ko tetahi ko te kuwaha o Reupena; ko tetahi ko te kuwaha o Hura; ko tetahi

ko te kuwaha o Riwai. <sup>32</sup> Na i te taha ki te rawhiti e wha mano e rima rau kakaho: e toru ano nga kuwaha; ko tetahi ko te kuwaha o Hohepa, ko tetahi ko te kuwaha o Pineamine, ko tetahi ko te

kuwaha o Rana. <sup>33</sup> Na i te taha ki te tonga e wha mano e rima rau kakaho te roa, he mea whanganga; e toru ano nga kuwaha; ko tetahi ko te kuwaha o Himiona, ko tetahi ko te kuwaha o Ihakara, ko

tetahi ko te kuwaha o Hepurona. <sup>34</sup> I te taha ki te hauauru e wha mano e rima rau kakaho, me nga kuwaha e toru ano; ko tetahi ko te kuwaha o Kara, ko tetahi ko te kuwaha o Ahera, ko tetahi ko te

kuwaha o Napatari. <sup>35</sup> Kotahi tekau ma waru mano kakaho ki te taiawhiotia: na, ko te ingoa o te pa a taua ra tonu iho, Ko Ihowa kei reira.

## Daniel

### Chapter 1

1

I te toru o nga tau o te kingitanga o Iehoiakimi kingi o Hura ka tae mai a Nepukaneha kingi

o Papurona ki Hiruharama, whakapaea ana e ia. <sup>2</sup> Na ka hoatu e te Ariki a Iehoiakimi kingi o Hura ki tona ringa, me etahi o nga oko o te whare o te Atua, a kawea ana e ia ki te whenua o Hinara, ki

te whare o tona atua; i mauria atu ano nga oko e ia ki te whare taonga o tona atua. <sup>3</sup> Na ka ki atu te kingi ki a Ahapenata rangatira o ana unaka, kia tikina etahi o nga tama a Iharaira, ara o nga uri

o te kingi o nga rangatira hoki; <sup>4</sup> Etahi tama kahore nei o ratou koha, he pai ano te ahua, e matau ana ki nga whakaaro nui katoa, e mohio ana ki nga tikanga, e matau ana ki nga whakaaro mohio, he hunga e pai ana hei tu ki te whare o te kingi; a mana ratou e whakaako ki te matauran ga, ki te

reo hoki o nga Karari. <sup>5</sup> I whakaritea ano e te kingi tetahi wahi o ta te kingi kai ma ratou, he mea mo ia ra, mo ia ra, me tetahi wahi o te waina i inumia e ia, a kia toru nga tau e whangaia ai ratou;

kia taka ai aua tau, ka tu ratou ki te aroaro o te kingi. <sup>6</sup> Na i roto i enei ko etahi o nga tama a Hura,

ko Raniera, ko Hanania, ko Mihaera, ko Ataria. <sup>7</sup> Na ka tapa he ingoa mo ratou e te rangatira unaka: ko tana ingoa mo Raniera, ko Peretehatara; mo Hanania, ko Hataraka; mo Mihaera, ko Mehaka; mo Ataria, ko Apereneko.

8 Otiia kua takoto to Raniera whakaaro i roto i tona ngakau, kia kua ia e poke i ta te kingi kai, i te waina ranei i inumia e ia. Na ka tono ia ki te rangatira unaka kia kua ia e whakapoke i a ia.

9 Na, kua mea te Atua kia manakohia a Raniera, kia arohaina e te rangatira unaka. 10 Na ka mea te rangatira unaka ki a Raniera, E wehi aha ahau i toku ariki, i te kingi, nana nei i whakarite ta koutou e kai ai, ta koutou e inu ai: hei aha hoki i tirohia mai ai e ia o koutou mata he kino iho i o nga tamariki pena me koutou te kau matua? ma kona ka meinga ahau e koutou kia hopohopo ki toku upoko i te kingi. 11 Ano ra ko Raniera ki a Meretara, ki ta te rangatira unaka i whakarite ai hei kaitirotiro mo Raniera, ratou ko Hanania, ko Mihaera, ko Ataria: 12 Tena ra, whakamatauria au pononga, kia tekau nga ra; me homai e ratou he pini hei kai ma matou, he wai hoki hei inu ma matou. 13 Hei reira ka mea kia tirohia o matou mata i tou aroaro, me te mata ano o nga taitamariki e kai ana i te kai a te kingi; na kia rite ki tau e kite ai tau e mea ai ki au pononga. 14 Heoi ka whakaaetia e ia tenei mea a ratou, a kotahi tekau nga ra i whakamatauria ai ratou e ia. 15 Na, i te mutunga o nga ra kotahi tekau, ka kitea o ratou mata, ataahua atu, tetere atu i o nga tamariki katoa i kai i ta te kingi kai. 16 Heoi ka tangohia atu e Meretara te wahi kai ma ratou, me te waina ano hei inu ma ratou, a homai ana e ia he pini ma ratou.

17 Na, ko aua tama tokowha, i homai e te Atua ki a ratou he matauranga, he mohio ki nga pukapuka katoa, ki nga whakaaro nunui: a i a Raniera te mohio ki nga kite katoa, ki nga moemoea.

18 Na, i te takanga o nga ra i ki ai te kingi kia kawea atu ratou, ka kawea atu ratou e te rangatira unaka ki te aroaro o Nepukaneha. 19 Na ka kororerero te kingi ki a ratou; a kihai i kitea i roto i a ratou katoa tetahi e rite ana ki a Raniera ratou ko Hanania, ko Mihaera, ko Ataria: na tu ana ratou i te aroaro o te kingi. 20 Na, i nga mea katoa o te whakaaro nui, o te matauranga i ui ai te kingi ki a ratou, ka kitea e ia tekau noa atu to ratou pai i to nga tohunga maori katoa, i to nga kaititiro whetu puta noa i tona kingitanga. 21 I tutuki ano a Raniera a tae noa ki te tuatahi o nga tau o Kingi Hairuha.

## Chapter 2

1 Na, i te rua o nga tau o te kingitanga o Nepukaneha ka moea etahi moe e Nepukaneha; raruraru tonu iho tona wairua, rere atu ana te moe i a ia. 2 Katahi te kingi ka ki atu kia karangatia nga tohunga maori, nga kaititiro whetu, nga tohunga makutu, nga Karari, hei whakaatu i ana moe ki te kingi. Na haere ana mai ratou, tu ana i te aroaro o te kingi. 3 Na ka mea te kingi ki a ratou, Kua moea e

<sup>4</sup>  
 ahau he moe, a raruraru ana toku wairua, e mea ana kia mohio ki taua moe. Katahi ka korero Hiriani mai nga Karari ki te kingi, E te kingi, kia ora tonu koe: korerotia mai te moe ki au pononga,

<sup>5</sup>  
 a ma matou e whakaatu tona tikanga. Ka whakahoki te kingi, ka mea ki nga Karari, Kua ngaro taua mea i ahau: ki te kore e whakakitea mai e koutou ki ahau te moe me tona tikanga hoki, ka

<sup>6</sup>  
 haehaea koutou, a ka meinga o koutou whare hei puranga paru. Ki te whakaaturia mai ia e koutou te moe me tona tikanga, ka riro aku hakari ma koutou, nga utu, me te honore nui; na whakaaturia

<sup>7</sup>  
 mai te moe ki ahau, me tona tikanga ano. Na ka whakahoki tuarua ratou, ka mea, Ma te kingi e

<sup>8</sup>  
 korero te moe ki ana pononga, a ma matou e whakaatu tona tikanga. Ka whakautua e te kingi, ka mea ia, E mohio rawa ana ahau e whai ana koutou kia roa, no te mea ka kite koutou kua ngaro taua

<sup>9</sup>  
 mea i ahau. Ki te kore ia e whakaaturia mai e koutou te moe ki ahau, kotahi tonu te ture mo koutou; no te mea he teka, he tinihanga nga kupu kua rite na i a koutou hei korero mai ki toku aroaro, a kia puta ke ra ano te wa: na reira korerotia mai te moe ki ah au, a ka mohio ahau e taea

<sup>10</sup>  
 ana ano e koutou te whakaatu tona tikanga ki ahau. Na ka whakahoki nga Karari ki te aroaro o te kingi, ka mea, Kahore he tangata i runga i te whenua hei whakaatu i te mea a te kingi: kahore ano hoki he kingi, kahore he rangatira, kahore he ariki, i ui i nga mea penei ki tetahi tohunga maori,

<sup>11</sup>  
 ki tetahi kaititiro whetu, ki tetahi Karari ranei. He mea tupua rawa hoki tenei e uia nei e te kingi, kahore atu hoki he kaiwhakaatu ki te kingi, ko nga atua anake, ehara nei ki te kikokiko to ratou

<sup>12</sup>  
 nohoanga. Na reira i riri ai te kingi, nui atu te riri, kiia iho e ia nga tangata whakaaro nui katoa

<sup>13</sup>  
 o Papurona kia whakangaromia Heoi kua puta te ture kia patua nga tangata whakaaro nui; a ka rapua a Raniera ratou ko ona hoa kia patua.

<sup>14</sup>  
 Na, he mohio, he nui te whakaaro, i oho ai a Raniera ki a Arioko, ki te rangatira o nga kaitiaki

<sup>15</sup>  
 a te kingi, i puta nei ki te patu i nga tangata whakaaro nui o Papurona. I oho ia, i mea ki a Arioko, ki ta te kingi rangatira, He aha i hohoro ai te ture i te kingi? Katahi taua mea ka whakaaturia e

<sup>16</sup>  
 Arioko ki a Raniera. Na ka haere a Raniera ki roto, ka mea ki te kingi kia whakaritea he wa ki

<sup>17</sup>  
 a ia, a ka whakaaturia e ia te tikanga ki te kingi. Katahi ka haere a Raniera ki tona whare, ka

<sup>18</sup>  
 whakakite i taua mea ki ona hoa ki a Hanania, ki a Mihaera, ki a Ataria: Kia inoia ai e ratou he mahi tohu i te Atua o te rangi, he mea mo tenei mea ngaro; kei mate tahi a Raniera ratou ko ona

<sup>19</sup>  
 hoa, me era atu tangata whakaaro nui o Papurona. Katahi ka whakakitea mai taua mea ngaro ki

<sup>20</sup>  
 a Raniera, he mea moemoea i te po. Na whakapai ana a Raniera ki te Atua o te rangi. I oho a Raniera, i mea, Kia whakapaingia te ingoa o te Atua a ake ake; nona hoki te whakaaro nui me te



<sup>21</sup> kaha. E whakaputaia ketia ana hoki e ia nga wa me nga ra: e whakakahoretia ana e ia nga kingi, e whakaturia ana ano nga kingi e ia: e homai ana e ia te whakaaro nui ki te hunga whakaaro nui, te matauranga ano ki te hunga e matau ana ki te whakaaro; <sup>22</sup> E whakapuakina ana e ia nga mea hohonu, nga mea ngaro: e matau ana ia ki nga mea o te pouri: kei a ia te nohoanga o te marama.

<sup>23</sup> Whakawhetai tonu ahau ki a koe, whakamoemiti tonu ki a koe, e te Atua o oku matua, nau nei hoki i homai he whakaaro nui, he kaha ki ahau, a kua whakaatu mai nei koe ki ahau i nga mea i inoi ai matou ki a koe: kua whakaturia nei hoki e koe te me a a te kingi ki a matou.

<sup>24</sup> Na reira i haere ai a Raniera ki roto, ki a Arioko, ki ta te kingi i whakarite ai hei whakangaro mo nga tangata whakaaro nui o Papurona; haere ana ia, a ko tana kupu tenei ki a ia, Kaua e whakangaromia nga tangata whakaaro nui o Papurona: kawea ahau ki te aroaro o te kingi, a maku

e whakakite te tikanga ki te kingi. <sup>25</sup> Katahi ka hohoro tonu a Arioko, ka kawea i a Raniera ki te aroaro o te kingi; ko tana kupu ano tenei ki a ia, Kua kitea e ahau he tangata i roto i nga whakarau

o Hura hei whakakite i te tikanga ki te kingi. <sup>26</sup> Ka oho te kingi, ka mea ki a Raniera, ko tona ingoa nei ko Peretehatara, E taea ranei e koe te whakaatu mai te moe i kitea e ahau, me tona tikanga ano

ki ahau? <sup>27</sup> Ka whakahoki a Raniera i te aroaro o te kingi, ka mea, E kore taua mea ngaro i uia ra e te kingi e taea te whakaatu ki te kingi e te hunga whakaaro nui, e nga kaititiro whetu, e nga tohunga

maori, e nga tohunga tuaahu ranei; <sup>28</sup> Engari tera te Atua kei te rangi hei whakaatu i nga mea ngaro; a kua whakakitea e ia ki a Kingi Nepukaneha nga mea e puta mai i nga ra whakamutunga. Ko tau

moe tenei, me nga mea i kitea e tou mahunga i runga i tou moenga; <sup>29</sup> Ko koe ia e te kingi, i puta ake ou whakaaro ki tou ngakau i runga i tou moenga mo nga mea e puta mai a mua: e whakakitea

ana ki a koe e te kaiwhakaatu o nga mea ngaro, nga mea e puta a mua. <sup>30</sup> Ko ahau nei ia, ehara i te mea he nui atu oku whakaaro i o tetahi tangata ora, i whakapuakina ai tenei mea ngaro ki ahau; engari kia whakakitea ai tona tikanga ki te kingi, kia mohio ai hoki koe ki nga whakaaro o tou ngakau.

<sup>31</sup> Na i titiro koe, e te kingi, na ko tetahi whakapakoko nui. Na, ko taua whakapakoko, he mea nui, he nui atu tona kanapa, i tu i tou aroaro; a ko tona ahua he hanga whakamataku rawa. <sup>32</sup> Ko taua whakapakoko, he koura parakore tona pane; ko tona uma, ko ona ringa, he hiriwa; ko tona

kopu, ko ona huha he parahi; <sup>33</sup> Ko ona waewae he rino; ko ona raparapa he rino tetahi wahi, he

uku tetahi wahi. <sup>34</sup> Titiro tonu atu koe, na ko tetahi kohatu, he mea tapahi mai, kahore hoki he ringa, aki tonu ki te whakapakoko, ki ona raparapa, he rino nei tetahi wahi, he uku tetahi wahi,

wahia putia iho. <sup>35</sup> Katahi ka mongamonga ngatahi te rino, te uku, te parahi, te hiriwa, te koura; kua rite ki te papapa o nga patunga witi i te raumati; kahakina ana e te hau, a kahore noa iho i kitea he wahi mo aua mea. Na, ko te kohatu i akina ai te whakapakoko, kua meinga hei maunga nui, kapi

<sup>36</sup>  
 ana te whenua katoa i a ia. Ko te moe tenei. Na me korero tona tikanga e matou ki te aroaro o  
<sup>37</sup>  
 te kingi. Ko koe, e te kingi, te kingi o nga kingi, kua homai hoki e te Atua o te rangi he kingitanga  
<sup>38</sup>  
 ki a koe, he kaha, he mana, he kororia. Na, ko nga wahi katoa e nohoia ana e nga tama a te  
 tangata, ko nga kararehe o te parae, ko nga manu o te rangi, homai ana e ia ki tou ringa, kua oti ano  
<sup>39</sup>  
 koe te mea e ia hei rangatira mo ratou katoa. Ko koe taua pane koura. Na ka puta ake tetahi atu  
 kingitanga i muri i a koe; iti iho i a koe, me tetahi atu, ara te tuatoru o nga kingitanga, he parahi, a  
<sup>40</sup>  
 ka kawana tera i te whenua katoa. Na, ko te wha o nga kingitanga ka rite ki te rino te kaha: he  
 mea wawahi hoki te rino, e taea ano e ia nga mea katoa: ka rite ki ta te rino e wawahi nei i enei  
<sup>41</sup>  
 katoa tana wawahi, tana kuru. Na, i kite na koe i nga raparapa, i nga matimati, he uku na te  
 kaipokepoke tetahi wahi, he rino tetahi wahi, ka wehea te kingitanga; ka mau ano ia he kaha rino  
<sup>42</sup>  
 i roto, ka pera ano me te rino i kitea e koe e whakauru ana ki te uku paru na. Na, ko nga  
 matimati o nga raparapa ra, he rino nei tetahi wahi, he uku tetahi wahi, ka pena ano te kingitanga,  
<sup>43</sup>  
 he kaha tetahi wahi, ko tetahi wahi he pakarukaru. Na, i kite atu na koe i te rino e whakauru ana  
 ki te uku paru na, ka whakauru ano ratou ki roto ki nga uri tangata: e kore ia e piri tetahi ki tetahi,  
<sup>44</sup>  
 ka rite ki te rino e kore nei e uru ki te uku. Na i nga ra o enei kingi, ka whakaturia e te Atua o  
 te rangi he kingitanga e kore e ngaro, e kore ano hoki tona mana e waiho ki tetahi atu iwi; engari  
<sup>45</sup>  
 ko tera hei wahi, hei whakamoti i enei kingitanga katoa, ko ia ano ka tu tonu a ake ake. Na i kite  
 na koe he mea tapahi mai te kohatu i roto i te maunga, kahore hoki he ringa, a mongamonga noa i  
 a ia te rino, te parahi, te uku, te hiriwa, te koura; e whakapuakina ana e te Atua nui ki te kingi nga  
 mea e puta a mua: na tuturu rawa te moe, pumau tonu tona tikanga.  
<sup>46</sup>  
 Ko te tino tapapatanga iho o Kingi Nepukaneha, koropiko ana ki a Raniera, whakahaua  
<sup>47</sup>  
 tonutia iho e ia kia whakaherea he whakahere, he whakakakara reka ki a ia. I oho te kingi ki a  
 Raniera, i mea, Tika rawa, ko tou Atua te Atua o nga atua, te Ariki o nga kingi, te kaiwhakapuaki  
<sup>48</sup>  
 o nga mea ngaro, ka taea nei hoki e koe te whakapuaki tenei mea ngaro. Katahi ka meinga e te  
 kingi a Raniera hei tangata rahi, he maha ano nga hakari nui i homai e ia ki a ia, a meinga ana ia  
 hei kawana mo te kawanatanga katoa o Papurona, hei tino kawana mo nga tangata whakaaro nui  
<sup>49</sup>  
 katoa o Papurona. Na ka tonu a Raniera ki te kingi, a whakaritea ana e ia a Hataraka, a Mehaka,  
 a Apereneko hei kaitiro tiro mo nga mea o te kawanatanga o Papurona: ko Raniera ia i noho ki te  
 kuwaha o te kingi.

### Chapter 3

<sup>1</sup> I hanga e Kingi Nepukaneha he whakapakoko koura, ko tona roa e ono tekau whatianga, a ko tona whanui e ono whatianga: a whakaturia ana e ia ki te mania o Rura i te kawanatanga o Papurona.

<sup>2</sup> Katahi a Kingi Nepukaneha ka tono tangata ki te huihui i nga ariki, i nga kawana, i nga rangatira, i nga kaiwhakawa, i nga kaitiaki taonga, i nga kaiwhakatakoto whakaaro, i era atu rangatira, i nga kawana katoa o nga kawanatanga, kia haere mai ki te tainga o te kawa o te whakapakoko i whakaturia e Kingi Nepukaneha.

<sup>3</sup> Katahi nga ariki, nga kawana, nga rangatira, nga kaiwhakawa, nga kaitiaki taonga, nga kaiwhakatakoto whakaaro, era atu rangatira, me nga kawana katoa o nga kawanatanga ka huihui ki te tainga o te kawa o te whakapakoko kua whakaturia nei e Kingi Nepukaneha; na tu ana ratou ki te aronga o te whakapakoko kua whakaturia nei e Nepukaneha.

<sup>4</sup> Katahi ka nui atu te karanga a te kaikaranga, He whakahau tenei ki a koutou, e nga tangata, e nga iwi, e nga reo:

<sup>5</sup> A te wa e rongoa ai koutou i te tangi o te koronete, o te putorino, o te hapa, o te hakaputa, o te hatere, o te taratimere, o nga mea tangi katoa, me takoto koutou, me koropiko ki te whakapakoko koura kua whakaturia nei e Kingi Nepukaneha.

<sup>6</sup> Na ki te kahore tetahi e takoto, e koropiko, ka maka ia i taua haora ano ki waenganui o te oumu he mura rawa nei te ngiha.

<sup>7</sup> Na reira, i taua wa, i te rongonga o te iwi katoa i te tangi o te koronete, o te putorino, o te hapa, o te hakaputa, o te hatere, o nga mea tangi katoa, takoto tonu iho nga tangata katoa, nga iwi, nga reo, koropiko ana ki te whakapakoko koura kua tu nei i a Kingi Nepukaneha.

<sup>8</sup> Heoi i taua wa ka haere mai etahi Karari, ka whakahe ki nga Hurai.

<sup>9</sup> I korero ratou, i mea ki a Kingi Nepukaneha, E te kingi, kia ora tonu koe.

<sup>10</sup> I whakatakotoria e koe he ture, e te kingi, na, ko nga tangata katoa e rongoa ana i te tangi o te koronete, o te putorino, o te hapa, o te hakaputa, o te hatere o te taratimere, o nga mea tangi katoa, kia takoto, kia koropiko ki te whakapakoko ko ura:

<sup>11</sup> A, ki te kahore tetahi e takoto, e koropiko, kia maka ia ki te oumu he mura rawa te ngiha.

<sup>12</sup> Tenei etahi Hurai, he hunga i whakaritea e koe hei kaitirotiro mo nga mea o te kawanatanga o Papurona, ko Hataraka, ko Mehaka, ko Apereneko; kihai enei tangata i whakaaro ki a koe, e te kingi; kahore ratou e mahi ki ou atua, kahore e koropiko ki te whakapakoko koura ka oti nei te whakatu e koe.

<sup>13</sup> Katahi a Nepukaneha i runga i tona riri me te weriweri ka whakahau kia mauria mai a Hataraka, a Mehaka, a Apereneko.

<sup>14</sup> Katahi ka kawea mai e ratou aua tangata ki te aroaro o te kingi. I korero a Nepukaneha, i mea ki a ratou, He mea ata whakaaro ranei, e Hataraka, e Mehaka, e Apereneko, e kore nei koutou e mahi ki ou atua, e kore nei e koropiko ki te whakapakoko koura kua tu nei i ahau?

<sup>15</sup> Na ki te hihiko koutou i te wa e rongoa ai koutou i te tangi o te koronete, o te putorino, o te hapa, o te hakaputa, o te hatere, o te taratimere, o nga mea tangi katoa, a ka takoto, ka koropiko, ki te whakapakoko i hanga e ahau, he pai; tena ki te kahore koutou e koropiko, ka maka koutou i taua haora ki te oumu he mura rawa tona ngiha; a ko wai te atua hei whakaora i a koutou i roto i

16  
 oku ringa? I whakahoki a Hataraka, a Mehaka, a Apereneko, i mea ki te kingi, E Nepukaneha,  
 kahore a matou maharahara ki te whakahoki kupu ki a koe mo tenei mea. 17  
 ano e to matou Atua, e karakiatia nei e matou, te whakaora i a matou i roto i te oumu he mura rawa  
 nei te ngiha, ina, ka whakaorangia ano matou e ia i tou ringa, e te kingi. 18  
 koe, e te kingi, e kore matou e mahi ki ou atua, e kore ano e koropiko ki te whakapakoko koura  
 kua tu na i a koe.

19  
 Ki tonu i reira a Nepukaneha i te riri, rere ke ana te ahua o tona mata ki a Hataraka, ki a  
 Mehaka, ki a Apereneko: korero ana ia, whakahau ana kia whitu nga whakanekehanga ake o te  
 hana o te oumu i to mua hana. 20  
 I whakahau ano ia i nga tangata kaha rawa o tana ope kia herea  
 a Hataraka, a Mehaka, a Apereneko, kia maka ki roto ki te oumu he mura rawa nei te ngiha.

21  
 Katahi ka herea nga tangata nei i roto tonu i o ratou tarau, i o ratou koti, i o ratou koroka me era  
 atu o o ratou kakahu, a ka maka ki roto ki te oumu he mura rawa nei tona ngiha. 22  
 Na reira, i te  
 akiaki rawa o te whakahau a te kingi, i te nui rawa hoki o te hana o te ahi, mate iho i te mura o te  
 ahi nga tangata nana i kawe a Hataraka, a Mehaka, a Apereneko. 23  
 Na ka taka nga tangata tokotoru  
 nei, a Hataraka, a Mehaka, a Apereneko, he mea here, ki waenganui o te oumu he mura rawa nei

24  
 tona ngiha. Ko te tino miharotanga o Nepukaneha, hohoro tonu tona whakatika, kei te korero,  
 kei te mea ki ana kaiwhakatakoto whakaaro, He teka ianei tokotoru nga tangata i maka e tatou, he  
 mea here, ki waenganui o te ahi? Ka whakahoki ratou, ka mea ki te ki ngi, He tika ano, e te kingi.

25  
 Ka whakahoki ia, ka mea, Nana, tokowha nga tangata e kitea nei e ahau, kahore he here, e haereere  
 ana i waenganui o te ahi, kahore hoki e ahatia; na, ko te ahua o te tuawha kei to te Tama a te Atua.

26  
 Katahi ka whakatata a Nepukaneha ki te waha o te oumu he mura rawa nei te ngiha, kei te korero,  
 kei te mea, E Hataraka, e Mehaka, e Apereneko, e nga pononga a te Atua, a te Runga Rawa, puta  
 mai, haere mai hoki. Katahi a Hataraka ratou ko Mehaka, ko Apereneko ka puta mai i waenganui

27  
 o te ahi. Na, ko te huihuinga o nga ariki, o nga kawana, o nga rangatira, o nga kaiwhakatakoto  
 whakaaro a te kingi, ka kite ratou i enei tangata, kihai nei te ahi i whai kaha ki o ratou tinana, kihai  
 ano nga makawe o o ratou mahunga i hunua, kihai ano o ratou koti i puta ke, kihai ano te haunga  
 ahi i rere i runga i a ratou.

28  
 Ka korero a Nepukaneha, ka mea, Kia whakapaingia te Atua o Hataraka, o Mehaka, o  
 Apereneko, nana nei i unga mai tana anahera, a whakaorangia ana e ia ana pononga i whakawhirinaki  
 nei ki a ia, i whakaputa ke nei i te kupu a te kingi, a tukua ana e ratou o ratou tinana, he mea kei  
 mahi ratou, kei koropiko ki tetahi atu atua, engari ki to ratou Atua anake. 29  
 Na ko taku ture tenei  
 e whakatakoto nei, na, ko nga tangata, ko te iwi, ko te reo, he kupu kino nei tana mo te Atua o  
 Hataraka, o Mehaka, o Apereneko, ka haehaea ratou, a ka meinga o ratou whare hei puranga paru:

no te mea kahore atu he atua he rite tana whakaora ki ta tenei. <sup>30</sup> Katahi ka whakanekehia ake ano a Hataraka, a Mehaka, a Apereneko e te kingi i te kawanatanga o Papurona.

## Chapter 4

<sup>1</sup> Na Nepukaneha, na te kingi ki nga tangata katoa, ki nga iwi, ki nga reo e noho ana i te whenua katoa; kia whakanuia to koutou rangimarie. <sup>2</sup> I mea ahau e pai ana kia whakakitea nga tohu me nga mea whakamiharo i mahia nei e te Atua, e te Runga Rawa ki ahau. <sup>3</sup> Ano te nui o ana tohu! ano te nui o ana mea whakamiharo! ko tona kingitanga he kingitanga mau tonu, ko tona kawanatanga kei tera whakatupuranga, kei tera whakatupuranga.

<sup>4</sup> I te ata noho ahau, a Nepukaneha, i roto i toku whare, koa tonu i roto i toku whare kingi: <sup>5</sup> Ka kite ahau i tetahi moe i wehi ai ahau; raruraru ana ahau i nga whakaaro i runga i toku moenga, i nga mea ano hoki i kitea e toku mahunga. <sup>6</sup> Na reira i puaki ai taku ture kia kawea mai nga tangata whakaaro nui katoa o Papurona ki toku aroaro, kia whakakitea ai e ratou te tikanga o te moe ki ahau. <sup>7</sup> Na, ko te haerenga mai o nga tohunga maori, o nga kaititiro whetu, o nga Karari, ratou ko nga tohunga tuaahu, korerotia ana e ahau te moe ki to ratou aroaro: heoi kihai i whakaaturia mai e ratou tona tikanga ki ahau. <sup>8</sup> Nawai a kua tae mai ki toku aroaro a Raniera, ko tona ingoa nei ko Peretehatara, ko te ingoa o toku atua, he tangata kei a ia nei te wairua o nga atua tapu; a korerotia ana e ahau te moe ki tona aroaro; i mea ahau, <sup>9</sup> E Peretehatara, e te rangatira o nga tohunga maori, e mohio ana hoki ahau kei a koe te wairua o nga atua tapu, e kore koe e he ki tetahi mea ngaro, whakaaturia mai ki ahau nga mea i puta mai, te moemoea i kitea e ahau, me te tikanga o aua mea.

<sup>10</sup> Ko nga mea enei i kitea e toku mahunga i runga i toku moenga; titiro rawa atu ahau, na ko tetahi rakau i waenganui o te whenua, nui atu tona tiketike. <sup>11</sup> Kua tupu taua rakau, kua kaha, roa tonu,

tutuki tonu ki te rangi, he mea hoki i kitea mai i nga pito o te whenua katoa. <sup>12</sup> Ataahua tonu nga rau, he maha nga hua, a i runga i a ia he kai ma te katoa: i whai taumarumarunga iho nga kirehe o te parae i raro i a ia, i noho ano nga manu o te rangi i runga i ona manga, i reira hoki nga kikokiko

katoa e kai ana. <sup>13</sup> I kite ahau i roto i nga mea i kitea e toku mahunga i runga i toku moenga, na

he tutei, he mea tapu, e heke iho ana i te rangi; <sup>14</sup> Nui atu tana karanga; i mea ia, Tuaina te rakau, poutoutoa ona manga, whakahoroa ona rau, titaria ona hua; kia haere atu nga kararehe i raro i a ia,

me nga manu i ona manga: <sup>15</sup> Me waiho ano ia te take o ona pakiaka i te whenua, here rawa ki te rino, ki te parahi, i roto i te taru hou o te parae; kia maku ano i te tomairangi o te rangi; na, ko te

16 wahi mona kei to nga kararehe, kei te tarutaru o te whenua: Kia puta ke tona ngakau tangata,  
 17 kia hoatu he ngakau kararehe ki a ia, kia whitu hoki ona wa e taka. Ko tenei mea he mea  
 whakatakoto na nga tutei; he mea ki mai ano na te kupu a nga mea tapu: kia mohio ai te hunga ora  
 kei te kawana te Runga Rawa ki te kingitanga o nga tangata, a e hoatu ana e ia ki tana e pai ai, e  
 18 meinga ana hoki e ia nga ware rawa o nga tangata hei rangatira mo reira. Ko tenei moe, he mea  
 kite naku, na Kingi Nepukaneha. Na mau, e Peretehatara, e whakaatu mai tona tikanga, kahore nei  
 hoki i taea e nga tangata whakaaro nui katoa o toku kingitanga te whakaatu te tikanga ki ahau; e  
 taea ia e koe, kei roto na hoki i a koe te wairua o nga atua tapu.

19 Katahi a Raniera, ko tona ingoa nei ko Peretehatara, ka ketekete, he wa poto ano, a rarururu  
 ana ia i ona whakaaro. Ka whakahoki te kingi, ka mea, Kei rarururu koe, e Peretehatara, i te moe,  
 i tona tikanga ranei. Ka whakahoki a Peretehatara, ka mea, E toku ariki, waiho tenei moe mo te  
 20 hunga e kino ana ki a koe, me tona tikanga ano mo ou hoariri. Ko te rakau i kite na koe, ko tera  
 i tupu ra, a kua kaha, ko tona tiketike nei i tutuki atu ki te rangi, a i kitea hoki e te whenua katoa;  
 21

Ko ona rau he ataahua, he maha ona hua, a he kai i runga ma te katoa; a i noho nga kararehe o  
 22 te parae i raro i a ia, he nohoanga hoki a runga i ona manga no nga manu o te rangi: Ko koe, e  
 te kingi, kua tupu na, kua kaha na: kua tupu na hoki tou nui, kua tutuki atu ki te rangi, me tou

23 kingitanga ki te pito o te whenua. Na, i kite na te kingi i te tutei, i te mea tapu hoki e heke iho  
 ana i te rangi, e mea ana, Tuaina te rakau, whakangaromia; me waiho ano ia te take o ona pakiaka  
 ki te whenua, here rawa ki te rino, ki te parahi, i te taru hou o te parae; kia mak u ano i te tomairangi  
 24 o te rangi; a ko te wahi mona, hei to nga kararehe o te parae, kia taka ra ano ona wa e whitu; Ko  
 te tikanga tenei, E te kingi, ko te ture ano tenei a te Runga Rawa ka tae iho nei ki runga ki toku

25 ariki, ki te kingi: Ara kia aia atu koe i roto i nga tangata, ki nga kararehe o te parae he nohoanga  
 mou, kia meinga ano koe kia kai tarutaru, kia pera me nga kau, kia maku ano i te tomairangi o te  
 rangi, a e whitu nga wa ou ka taka; kia mohio ra ano koe kei te kawana te Runga Rawa ki te  
 26 kingitanga o nga tangata, a e hoatu ana e ia ki tana e pai ai. Na, ko te kainga mai ra kia waiho  
 te take o nga pakiaka o te rakau: ka pumau ki a koe tou kingitanga, ina mohio koe ko nga rangi hei

27 kawana. Mo reira kia manakohia mai toku whakaaro e koe, e te kingi, kia whatiia atu ano ou  
 hara e te tika, kia whatiia ano ou kino e te mahi tohu ki nga rawakore; a tera pea e roa tou ata noho.

28 I pa katoa mai tenei ki a Kingi Nepukaneha. 29 I te mutunga o nga marama kotahi tekau ma  
 30 rua e haereere ana ia i te whare kingi o Papurona. Ka korero te kingi, ka mea, He teka ianei ko  
 Papurona nui tenei i hanga nei e ahau hei whare mo te kingitanga; he nui no toku kaha, hei

31 whakahonore ano mo toku kororia? I te kupu ano i te mangai o te kingi ka pa he reo no te rangi,

32  
E Kingi Nepukaneha, he kupu tenei ki a koe: ka riro tou kingitanga. Ka aia atu ano koe i roto i nga tangata, a ko te kainga mou kei nga kararehe o te parae: ka meinga koe kia kai tarutaru, kia pera me nga kau, a e whitu nga wa ou ka taka; kia mohio ra ano koe kei te kawana te Runga Rawa

33  
ki te kingitanga o nga ta ngata, a e hoatu ana e ia ki tana e pai ai. I taua haora ano ka rite taua mea ki a Nepukaneha: na ka aia atu ia i roto i nga tangata, a kai tarutaru ana ia, pera ana me nga kau, i maku ano tona tinana i te tomairangi o te rangi, tupu noa iho ona huruhuru, kei nga huruhuru ekara te rite, o na matikuku rite tonu ki o te manu.

34  
Na i te mutunga o nga ra ka anga ake nga kanohi oku, o Nepukaneha, ki te rangi, a hoki mai ana toku ngakau mahara ki ahau, a whakapaingia ana e ahau te Runga Rawa, whakamoemiti atu ana ahau, whakahonore ana i a ia, e ora tonu ana hoki ia, he ran gatiratanga mau tonu tona

35  
rangatiratanga, ko tona kingitanga ano kei tera whakatupuranga, kei tera whakatupuranga. Ki ta te whakaaro he kahore noa iho nga tangata katoa o te whenua: a e mahia ana e ia tana e pai ai i roto i te ope o te rangi, i waenga ano o nga tangata o te whenua; e kore ano tona ringa e taea te

36  
pupuri e tetahi, kahore hoki he kianga ki a i a, E aha ana koe? I taua wa ano ka hoki mai oku mahara ki ahau; i hoki mai ano toku honore me toku ahua rangatira ki ahau, hei whakakororia mo toku kingitanga; i rapua mai ano ahau e aku kaiwhakatakoto whakaaro, e aku ariki; na ka u ahau

37  
ki toku kingitanga, a nui atu te kororia i whakanekehia ake moku. Na, tenei ahau, a Nepukaneha, te whakamoemiti, te whakanui, te whakahonore nei i te Kingi o te rangi; he pono hoki ana mahi katoa, ko ona ara he whakarite whakawa: ko te hunga ano e haere ana i runga i te whakapehapeha, ka taea e ia te whakaiti.

## Chapter 5

1  
I tukua ha hakari nui e Kingi Perehatara ma etahi o ana ariki, kotahi te mano, a inu waina ana

2  
ia i te aroaro o te mano. I te mea e inu waina ana a Perehatara, ka whakahau ia kia kawea mai nga oko, nga mea koura, nga mea hiriwa, i tangohia e tona papa, e Nepukaneha, i roto i te temepara i Hiruharama; hei mea inu ma te kingi, ma ana rangatira, ma ana wahine, ma ana wahine hoahoa.

3  
Katahi ka kawea mai e ratou nga oko koura i tangohia i roto i te temepara o te whare o te Atua i Hiruharama; a inu ana ki aua mea te kingi, ana ariki, ana wahine, me ana wahine hoahoa. Inu waina ana ratou, whakamoemiti ana ki nga atua, ki nga mea koura, hiriwa, parahi, rino, rakau,

4  
kohatu. 5  
I taua haora ka puta mai nga maihao o tetahi ringa tangata, kei te tuhituhi ki te ritenga ake o te turanga rama, ki te paninga i te taha o te whare o te kingi: a ka kite te kingi i te wahi o te

6  
ringa nana te tuhituhi. Katahi ka puta ke te mata o te kingi, raruraru ana ia i ona whakaaro, a

7  
 tangoro iho nga hononga o tona hope, kei te aki mai ano ona turi ki a raua. Na nui atu te karanga a te kingi kia kawea mai nga kaititiro whetu, nga Karari, nga tohunga tuaahu. A i korero te kingi, i mea ki nga tangata whakaaro nui o Papurona, Ko te tangata e korerotia ai tenei tuhituhi, a ka whakaaturia mai e ia tona tikanga ki ahau, he ngangana te kakahu mona, he mekameka koura ano mo tona kaki, a ko ia ano hei rangatira tuatoru i te kingitanga. 8  
 Katahi ka haere mai nga tangata whakaaro nui katoa e te kingi: heoi kihai i ahei te korero i te tuhituhi, kihai ano i whakaatu i tona

9  
 tikanga ki te kingi. Katahi ka nui atu te raruraru o Kingi Perehatara, ka puta ke tona mata, a tahurihuri ana ana ariki.

10  
 Na ka haere te kuini ki te whare hakari, na nga kupu hoki a te kingi ratou ko ana ariki: na ka korero te kuini, ka mea, E te kingi, kia ora tonu koe: kei raruraru koe i ou whakaaro, kei puta

11  
 ke tou mata. He tangata tenei kei tou kingitanga, kei a ia nei te wairua o nga atua tapu; i nga ra hoki o tou papa i kitea te marama, te mohio, me nga whakaaro nui i roto i a ia, he mea rite tonu ki nga whakaaro nui o nga atua, a meinga ana ia e tou papa, e Kingi Nepukaneha, ae ra, e tou papa, e te kingi, hei rangatira mo nga tohunga maori ratou ko nga kaititiro whetu, ko nga Karari, ko nga

12  
 tohunga tuaahu: Na pai atu te wairua i kitea i roto i taua Raniera, i huaina nei e te kingi ko Peretehatara, te matau, te mohio, te whakaatu moe, te whakakite i nga kupu pakeke: tareka ana i a

13  
 ia nga mea e mau ana. Na kia karangatia a Raniera, a mana e whakakit e te tikanga. Katahi ka kawea mai a Raniera ki te aroaro o te kingi. A ka korero te kingi, ka mea ki a Raniera, Ko taua Raniera ranei koe, no nga tamariki whakarau o Hura, i kawea mai nei e te kingi, e toku papa, i

14  
 Hura? Kua rongohia ahau ki a koe, kei roto i a koe te wairua o nga atua, a e kitea ana te marama i

15  
 roto i a koe, te matauranga, me te mohio pai rawa. Na kua kawea mai nei nga tangata whakaaro nui, nga kaititiro whetu, ki toku aroaro, kia korerotia ai e ratou tenei tuhituhi, kia whakaaturia ai

16  
 tona tikanga ki ahau: heoi kihai i taea e ratou te whakaatu te tikanga o taua mea. Kua rongohia ahau ki a koe, ka taea e koe te whakaatu tikanga, a ka tareka i a koe nga mea e mau ana. Na ki te taea e koe te tuhituhi te korero, a ka whakaaturia tona tikanga ki ahau, he ngangana te kakahu mou, he mekameka koura ano tenei mo tou kaki, ko koe hoki hei rangatira tuatoru i te kingitanga.

17  
 Katahi ka whakahoki a Raniera, ka mea ki te aroaro o te kingi, Mau au hakari, hoatu au utu ki

18  
 tetahi atu; me korero ia e ahau te tuhituhi ki te kingi, me whakaatu te tikanga ki a ia. E te kingi, i homai e te Atua, e te Runga Rawa, te kingitanga ki tou papa, ki a Nepukaneha, me te nui, me te

19  
 kororia, me te honore: A na taua nui, i homai ra e ia ki a ia, i wiri ai nga tangata katoa, nga iwi, nga reo, i wehi ai i tona aroaro: ko ana i pai ai whakamatea ana e ia, ko ana i pai ai whakaorangia

20  
 ana e ia, ko ana i pai ai whakaturia ana e ia a, ko ana i pai ai whakaititia iho e ia. Otiia ka whakakake tona ngakau, ka pakeke tona hinengaro i runga i te whakapehapeha, na kua whakataka



<sup>21</sup>  
 ia i runga i tona torona kingi, whakakahoretia iho tona kororia. A aia atu ana ia i roto i nga tama  
 a te tangata, i meinga ano tona ngakau kia rite ki o nga kararehe; i nga kaihe mohoa ano hoki tona  
 nohoanga, he mea whangai ia ki te tarutaru, ano he kau; i maku ano tona tinana i te tomairangi o  
 te rangi, a m ohio noa ia kei te kawana te Atua, te Runga Rawa, ki te kingitanga tangata, e whakaritea  
<sup>22</sup>  
 ana hoki e ia ma tana e pai ai. Na ko koe, ko tana tama, e Perehatara, kihai i whakaititia e koe  
<sup>23</sup>  
 tou ngakau, me te mohio ano koe ki tenei katoa; Heoi whakakake ana koe ki te Ariki o te rangi,  
 kua oti ano nga oko o tona whare te kawe mai ki tou aroaro, hei oko inu waina, mau, ma au ariki,  
 ma au wahine, ma au wahine iti; kua whakamoemiti ano koe ki nga atua, ki nga mea hiriwa, koura,  
 parah i, rino, rakau, kohatu, e kore nei e kite, e rongu, e mohio: na, ko te Atua, kei tona ringa nei  
<sup>24</sup>  
 tou manawa, nana nei ou ara katoa, kihai ia i whakakororiatia e koe. Katahi ka unga atu te wahi  
<sup>25</sup>  
 o te ringa i tona aroaro; na kua oti tenei mea te tuhituhi. Na ko te mea tenei i tuhituhia, MENE,  
<sup>26</sup>  
 MENE, TEKERE, UPARAHINI. Ko te tikanga tenei o te mea: MENE; kua oti tou kingitanga  
<sup>27</sup>  
 te tatau e te Atua, mutu pu i a ia. TEKERE; kua oti koe te pauna ki te pauna, a kua kitea tou  
<sup>28</sup>  
 koha. PEREHE; kua oti tou kingitanga te wahi, kua hoatu ki nga Meri, ki nga Pahi. Katahi  
<sup>29</sup>  
 a Perehatara ka whakahau a whakakakahuria ana a Raniera ki te mea ngangana, whakanohoia ana  
 he mekameka koura ki tona kaki, karangarangatia ana ia ko ia te rangatira tuatoru o te kingitanga.  
<sup>30</sup>  
 I taua po ano ka patua a Perehatara kingi o nga Karari. <sup>31</sup> A riro ana te kingitanga i a Tariuha  
 Meri: ko ona tau kei te ono tekau ma rua.

## Chapter 6

<sup>1</sup>  
 I pai a Tariuha kia whakaritea etahi ariki kotahi rau e rua tekau mo te kingitanga, hei kawana  
 mo te kingitanga katoa; <sup>2</sup> E toru hoki nga rangatira nui mo enei, a ko Raniera tetahi o ratou; ma  
 nga ariki ra nga korero e homai ki enei, kei he nga mea a te kingi. <sup>3</sup> Katahi ka whakanuia tenei  
 Raniera ki runga ake i nga rangatira nui, i nga ariki, no te mea he pai rawa te wairua i roto i a ia, a  
<sup>4</sup>  
 i whakaaro te kingi kia meinga ia hei rangatira mo te kingitanga katoa. Katahi nga rangatira nunui  
 ratou ko nga ariki ka rapu take mo Raniera i roto i nga mea o te kingitanga; heoi kihai i kitea tetahi  
<sup>5</sup>  
 take, tetahi he; he mahi pono hoki tana, kahore ona kino, ona he. Katahi ka mea aua tangata, E  
 kore e kitea e tatou he take mo tenei Raniera, ki te kahore e kitea he mea mona i roto i te ture a tona  
 Atua.

6 Katahi enei rangatira nunui ratou ko nga ariki ka huihui ki te kingi; ko ta ratou korero tenei  
 ki a ia, E Kingi Tariuha, kia ora tonu koe. <sup>7</sup> Kua kororerero nga rangatira nunui katoa o te kingitanga,  
 nga kawana, nga ariki, nga kaiwhakatakoto whakaaro, nga rangatira, kia whakatakotoria he tikanga  
 kingi, kia whakapumautia he ture kaha, ara ki te inoia he mea e tetahi ki tetahi atua, tang ata ranei,  
 a kia toru tekau ra ano nga ra, he mea ehara i te inoi ki a koe, e te kingi, me maka ia ki te ana o nga  
<sup>8</sup> raiona. Na mau e whakapumau te ture, e te kingi, whaitohungia hoki te mea i tuhituhia, kei puta  
 ke, kia rite ai ki te ture a nga Meri, a nga Pahi, e kore nei e puta ke. <sup>9</sup> Mo reira whaitohungia ana  
 e Kingi Tariuha te mea i tuhituhia me te ture. <sup>10</sup> Na ka mohio a Raniera ka oti taua mea i tuhituhia  
 te whaitohu, haere ana ia ki tona whare; na ko ona matapihi tuwhera tonu ai i roto i tona ruma ki  
 te ritenga atu o Hiruharama; e toru nga tukunga o ona turi i te ra, inoi ana ia, whakawhetai ana ki  
 te aroaro o tona Atua, pera ana me tana i mua.

<sup>11</sup> Katahi ka huihui aua tangata, ka kite i a Raniera e karakia ana, e inoi ana ki te aroaro o tona  
 Atua. <sup>12</sup> Katahi ratou ka whakatata, a ka korero i te ture a te kingi ki te aroaro o te kingi; Kihai  
 ianei i whaitohungia e koe he ture, na, ko nga tangata katoa e inoi ana ki tetahi atua, tangata ranei,  
 i enei rangi e toru tekau, he mea ehara i te inoi k i a koe, e te kingi, ka maka ki te ana raiona? Ka  
 whakahoki te kingi, ka mea, He pono taua mea na, e rite ana ki te ture a nga Meri, a nga Pahi, e  
<sup>13</sup> kore nei e puta ke. Katahi ratou ka whakahoki, ka mea ki te aroaro o te kingi, Ko te Raniera ra,  
 ko tera o nga tama o nga whakarau o Hura, kahore ona mahara ki a koe, e te kingi, ki te ture ano i  
<sup>14</sup> whaitohungia e koe, heoi e toru ana inoinga i te ra. A, no te rongonga o te kingi ki enei kupu,  
 katahi ka nui tona kino, a ka anga tona ngakau ki a Raniera kia whakaorangia ia: whai ana ia ki te  
<sup>15</sup> whakaora i a ia a to noa te ra. Katahi ka huihui nga tangata nei ki te kingi, a ka mea ki te kingi,  
 Kia mohio koe, e te kingi, ko te ture tenei a nga Meri, a nga Pahi, kia kaua e whakaputaia ketia  
<sup>16</sup> tetahi ture, tikanga ranei, kua oti te whakapumau e te kingi. Katahi te kingi ka whakahau, a  
 kawea ana mai a Raniera, maka ana ki te ana raiona. I korero ano te kingi, i mea ki a Raniera, Ko  
<sup>17</sup> tou Atua e mahi tonu na koe ki a ia, mana koe e whakaora. Na ka maua mai he kohatu, ka  
 whakatakotoria ki te kuwaha o te ana; hiritia iho e te kingi ki tana ake hiri, ki te hiri ano a ana ariki;  
 kei puta ke tetahi tikanga mo Raniera.

<sup>18</sup> Katahi te kingi ka haere ki tona whare, a pau noa taua po kihai i kai, kihai ano nga mea  
 whakatangi i kawea mai ki tona aroaro: a turere atu ana tona moe i a ia. <sup>19</sup> Katahi te kingi ka  
<sup>20</sup> maranga i te atatu tonu, a hohoro tonu te haere ki te ana raiona. A, no tona tatanga atu ki te ana,  
 ki a Raniera, ka karanga ia, he reo tangi te reo: i korero te kingi, i mea ki a Raniera, E Raniera, e  
 te pononga a te Atua ora, he kaha ranei tou Atua e mahi tonu na koe ki a ia, ki te whakaora i a koe

<sup>21</sup> kei mate i nga raiona? Na ka mea a Raniera ki te kingi, E te kingi, kia ora tonu koe. <sup>22</sup> Kua tukua mai e toku Atua tana anahera, a tutakina ana e ia nga mangai o nga raiona, a kihai ratou i pa ki ahau: no te mea kua kitea toku kore hara i tona aroaro; kahore ano aku mahi he i tou aroaro, e

<sup>23</sup> te kingi. Na nui atu ke koa o te kingi, a whakahaua ana e ia kia tangohia ake a Raniera i roto i te ana. Na kua tangohia ake a Raniera i roto i te ana, kihai rawa ano i kitea tetahi ahatanga ki a ia,

<sup>24</sup> no te mea i whakapono ia ki tona Atua. Na ka whakahau te kingi, a ka maua aua tangata i whakapae ra ki a Raniera, ka maka ki te ana raiona, ratou, a ratou tamariki, a ratou wahine, riro pu ratou i nga raiona, a wawahia ana e ratou o ratou wheua katoa i te mea kiano i tatu noa ki raro o te ana.

<sup>25</sup> Katahi a Kingi Tariuha ka tuhituhi ki nga tangata katoa, ki nga iwi, ki nga reo, e noho ana

<sup>26</sup> i te whenua katoa; Kia whakanuia te rangimarie ki a koutou. Tenei ahau te whakatakoto tikanga nei; na, i nga kawanatanga katoa o toku kingitanga, kia wiri nga tangata, kia wehi ki te aroaro o te Atua o Raniera: ko ia hoki te Atua ora, pumau tonu a ake ake, e kore tona kingitanga e ngaro, tona

<sup>27</sup> kawanatanga hoki a te mutunga ra ano: Mana e whakaora, mana e mawhiti ai; e mahia ana hoki e ia he tohu, he mea whakamiharo i te rangi, i te whenua; nana hoki a Raniera i ora ai i te kaha o

<sup>28</sup> nga raiona. Na ka kake tenei Raniera i te kingitanga o Tariuha, i te kingitanga ano hoki o Hairuha Pahi.

## Chapter 7

<sup>1</sup> I te tuatahi o nga tau o Perehatara kingi o Papurona he moe ta Raniera, he kite na tona mahunga

<sup>2</sup> i runga i tona moenga; na tuhituhia ana e ia te moe, a korerotia ana nga upoko o nga korero. I korero a Raniera, i mea, He putanga ki ahau i te po, ka kite ahau, na, ko nga hau e wha o te rangi

<sup>3</sup> e ngangare ana i runga i te moana nui. Na ka puta ake e wha nga kararehe nunui i te moana, rere

<sup>4</sup> ke tonu tetahi i tetahi. Ko te tuatahi i rite ki te raiona, he parirau ekara ona: titiro tonu atu ahau a hutia noatia atu ona parirau, a ka whakarewaina atu ia i te whenua, ka meinga kia tu i runga i nga

<sup>5</sup> waewae e rua, ano he tangata, a i homai hoki he manawa tangata ki a ia. Na ko tetahi atu kararehe, ko te tuarua, kei te pea te rite, ara ana ia ko tetahi taha ona, e toru ano nga rara i tona mangai, i ona

<sup>6</sup> niho: a ka mea ake ratou ki a ia; Whakatika, kia nui te kikokiko e kainga e koe. I muri i tenei ka titiro atu ahau, na, ko tetahi ano, kei te reparo te rite, e wha nga parirau manu i tona tuara; e wha

<sup>7</sup> nga pane o taua kararehe; kua tukua ano te rangatira tanga ki a ia. I muri i tenei ka kite ahau i

roto i nga moemoea o te po, na, ko te tuawha o nga kararehe, he hanga whakawehi, he mea whakamataku, he kaha noa atu; he niho rino ona, he mea nunui; kei te kai, kei te wawahi a mongamonga noa, ko te toenga takatakah ia ana e ona waewae; a he rere ke ia i era atu kararehe

8  
katoa i mua i a ia; a kotahi tekau ona haona. I whakaaroa e ahau nga haona, na kua puta ake tetahi atu haona, he mea iti, i roto i era, na unuhia ake ana i tona aroaro, he mea unu ake i nga putake, e toru o nga haona tuatahi ra; na he kanohi i roto i taua haona nei, he mea rite ki nga kanohi tangata, me te mangai hoki e korero ana i nga mea nunui.

9  
I titiro ahau a whakaritea mai ra ano nga torona, kua noho te Tuaiho Onamata: ko tona kakahu ma tonu me he hukarere, ko nga makawe o tona mahunga me te huruhuru hipi kua oti te whakama;

10  
ko tona torona he mura ahi, a ko ona wira he ahi e ka ana. I pupu mai he awa ahi, i rere mai i tona aroaro: mano iho, mano iho ana kaimahi, tini, tini whaioio e tu ana i tona aroaro: kua noho te

11  
whakawa, kua tuwhera nga pukapuka. I titiro ano ahau i reira, he reo hoki no nga kupu nunui i korerotia e te haona: titiro tonu ahau, a whakamatea noatia iho te kararehe, ko tona tinana

12  
whakangaromia iho, a tukua ana ia kia tahuna ki te ahi. Ko era atu o nga kararehe, i whakakahoretia to ratou kawanatanga: otiia i whakaroaina atu to ratou ora mo tetahi wa, mo tetahi

13  
taima. I kite ahau i roto i nga moemoea o te po, na, ko tetahi e rite ana ki te Tama a te tangata e haere mai ana me nga kapua ano o te rangi, kua tae mai ki te Tuaiho Onamata, kua kawea ano ki

14  
tona aroaro. I tukua ano ki a ia he kawanatanga, he kororia, he kingitanga, kia mahi ai nga tangata katoa, nga iwi, nga reo, ki a ia: ko tona kawanatanga he kawanatanga mau tonu, e kore e pahemo: e kore ano tona kingitanga e ngaro.

15  
Na, ko ahau, ko Raniera, i pouri toku wairua i waenganui i toku tinana, rarururu ana ahau i

16  
nga mea i kitea e toku mahunga. I whakatata ahau ki tetahi o te hunga e tu ana i reira, i ui ki a ia ki te tika o tenei katoa. Heoi ka korerotia e ia ki ahau, a ka meinga ahau kia mohio ki te tikanga

17  
o nga mea. Ko enei kararehe nunui, ko nga mea e wha nei, he kingi, e wha, tera e puta ake i te

18  
whenua. Otiia ka riro te kingitanga i te hunga tapu a te Runga Rawa, ka mau ano hoki te

19  
kingitanga ki a ratou a ake ake. Katahi ahau ka mea kia mohio ki te tika o te tuawha o nga kararehe i rere ke nei i era atu katoa, he nui rawa nei te wehi, ko ona niho he rino, ko ona maikuku he parahi, o tera i kai ra, i wawahi ra a mongamonga noa, a takatakahia ana te toenga ki ona waewae;

20  
O nga haona kotahi tekau hoki i tona pane, o tera atu hoki i puta ake ra, a taka ana etahi e toru i tona aroaro, ara taua haona he kanohi nei ona, he mangai, he nui atu nei nga korero, ko tona ahua

21  
maia atu i to ona hoa. I titiro ahau, na kua whawhai taua haona ki te hunga tapu, a taea ana ratou

22  
e ia; A tae noa ki te taenga mai o te Tuaiho Onamata, ki te homaitanga hoki o te whakawa ki te

<sup>23</sup>  
 hunga tapu a ta Runga Rawa; a ka tae mai te wa i roto ai te kingitanga i te hunga tapu. Ko tana  
 kupu tenei, Ko te tuawha o nga kararehe, he tuawha tera no nga kingitanga i runga i te whenua, ka  
 rere ke i nga kingitanga katoa, ka pau i a ia te whenua katoa, ka takatahahia e ia, ka wawahia a  
<sup>24</sup>  
 mongamonga noa. Na, ko nga haona kotahi tekau, tera e ara ake i tenei kingitanga kotahi tekau  
 nga kingi; a ka ara ake ano tetahi i muri i a ratou, ka rere ke ano ia i o mua, a e toru nga kingi e taea  
<sup>25</sup>  
 e ia. Tera e nui ana kupu mo te Runga Rawa, a ka tau i a ia te mauui ki te hunga tapu a te Runga  
 Rawa: ka mea hoki ia kia whakariroia ketia nga wa me te ture: ka tukua ano enei ki tona ringa, kia  
<sup>26</sup>  
 taka ra ano he wa, me etahi wa, me te hawhe wa. Otia ka noho te whakawa, a ka whakakahoretia  
<sup>27</sup>  
 tona kingitanga, moti iho, ngaro iho a taea noatia te mutunga. A ka hoatu te kingitanga me te  
 kawanatanga me te nui o te kingitanga i raro i te rangi katoa ki nga tangata o te hunga tapu a te  
 Runga Rawa; ko tona kingitanga he kingitanga mutungakore, a ka mahi nga kawanatanga katoa,  
<sup>28</sup>  
 ka whakarongo ki a ia. I konei te mutunga o te mea. Na, ko ahau, ko Raniera, nui atu toku  
 raruraru i oku whakaaro, puta ke ana toku mata: heoi puritia iho e ahau taua mea i roto i toku ngakau.

## Chapter 8

<sup>1</sup>  
 I te toru o nga tau o te kingitanga o Kingi Perehatara ka puta mai he kite ki ahau, ara ki ahau,  
 ki a Raniera, i muri i tera i puta ra ki ahau i te timatanga. <sup>2</sup> I kite moemoea ahau: na i toku kitenga,  
 i Huhana ahau, i te kainga kingi, i tera i te kawanatanga o Erama: na ka kite moemoea ahau, a i te  
<sup>3</sup>  
 taha ahau o te awa o Urai. Na ko te marangatanga ake o oku kanohi, ka kite ahau, na, ko tetahi  
 hipi toa e tu ana i te ritenga o te awa, e rua ona haona, roa noa atu nga haona ki runga, kei runga  
<sup>4</sup>  
 atu ia tetahi i tetahi: na, ko tera i purero ra, no muri rawa i puta ai. I kite ano ahau i te hipi toa e  
 aki ana whaka te hauauru, whaka te raki, whaka te tonga; a kore noa iho tetahi kararehe i tu ki tona  
 aroaro, kahore hoki he tangata hei whakaora i roto i tona ringa; heoi mahia ana e ia tana i pai ai, a  
<sup>5</sup>  
 nui haere a na ia. Na i ahau e whakaaroaro ana, na ko te putanga mai o tetahi koati toa i te hauauru,  
 i te mata o te whenua katoa, kihai ano ia i pa ki te whenua: a he haona to te koati i waenganui i ona  
<sup>6</sup>  
 kanohi, he mea e whakamaui e te titiro. Na ka haere mai ia ki te hipi toa e rua nei ona haona, i  
 kitea atu ra e ahau e tu ana i te ritenga o te awa, rere atu ana ki a ia, me te weriweri katoa o tona  
<sup>7</sup>  
 kaha. I kite ano ahau i a ia e whakatata ana ki te hipi toa, riri tonu ki a ia, patua iho e ia te hipi  
 toa, whatiia ana e ia ona haona e rua, kahore hoki he kaha o te hipi toa ki te tu ki tona aroaro; kei  
 te turaki ia i a ia ki te whenua, takatahahia a na ia e ia; kahore hoki he kaiwhakaora mo te kipi toa

<sup>8</sup>  
 i roto i tona ringa. Na kua nui noa atu te koati toa, kua kaha, na ka whati te haona nui, a e wha  
 nga mea e whakamaua atu e te titiro i puta ake i tona turanga, he mea e anga ana ki nga hau e wha  
<sup>9</sup>  
 o te rangi. Na kua puta ake i roto i tetahi o era tetahi haona iti; kua nui noa atu whaka te tonga,  
 whaka te rawhiti, whaka te whenua ahuareka. <sup>10</sup> I nui haere ano a tae tonu ki te ope o te rangi,  
 whakataka ana e ia ki te whenua etahi o te ope, o nga whetu hoki, takatakahia ana e ia. <sup>11</sup> Ae ra, i  
 tae ano tana whakanui i a ia ki te rangatira o te ope, whakakorea iho e ia i a ia te patunga tapu, te  
 mea tuturu, turakina iho tona wahi tapu. <sup>12</sup> I homai ano te ope ki a ia me te patunga tapu tuturu,  
 na te kino hoki, na turakina iho e ia te pono ki te whenua; a mahi ana, kake ana. <sup>13</sup> Katahi ka rongo  
 ahau i tetahi anahera tapu e korero ana, a ka mea tetahi atu anahera tapu ki tera i korero ra; Kia  
 pehea te roa o te kitenga mo te patunga tapu tuturu, mo te he whakangaro e tukua ai te wahi tapu  
<sup>14</sup>  
 me te ope kia takatakahia? Na ka mea ia ki ahau, Kia taka nga ahiahi me nga ata e rua mano e  
 toru rau, ko reira te wahi tapu purea ai.  
<sup>15</sup>  
 Na ka kite ahau, a Raniera, i taua kite; ka rapua e ahau te tikanga, na me te mea he ahua  
 tangata e tu ana i toku aroaro. <sup>16</sup> I rongo ano ahau i te reo tangata i te takiwa o nga tahtatika o Urai  
 e karanga ana, e mea ana, E Kapariera, kia mohio te tangata nei ki te tikanga o te kite. <sup>17</sup> Heoi ka  
 haere mai tera ki te wahi i tu ai ahau; a, i tona taenga mai ka wehi ahau, tapapa ana ahau. Na ka  
 mea ia ki ahau, Kia mohio koe, e te tama a te tangata: mo nga wa hoki o te mutunga te kite ra.  
<sup>18</sup>  
 Na, i a ia e korero ana ki ahau, ka riro ahau i te moe, he moe reka, me toku mata e anga ana ki  
 te whenua: otiia i pa ia ki ahau, a whakaturia ana ahau ki runga. <sup>19</sup> Na ka mea ia, Nana, ka meinga  
 e ahau kia mohio koe ki nga mea e puta mai i te mutunga o te riri: no te wa hoki tera i whakaritea  
<sup>20</sup>  
 o te mutunga. Ko te hipi toa i kitea ra e koe i nga haona e rua, ko nga kingi era o Meria, o Pahia.  
<sup>21</sup>  
 Ko te koati toa puhuruhuru, ko te kingi tera o Kariki: a ko te haona nui i waenganui i ona kanohi,  
 ko te kingi tuatahi tera. <sup>22</sup> Na, mo te mea i whati ra, i puta ake ra e wha ki tona turanga, tera e ara  
 ake e wha nga kingitanga i roto i te iwi, e kore ia e rite te kaha ki tona. <sup>23</sup> Na, i te mutunga o to  
 ratou kingitanga, i te mea ka tae ta nga poka ke ki te tutukitanga, ka ara ake he kingi he kanohi  
<sup>24</sup>  
 hinana tona, e matau ana ki nga kupu ngaro. A tera e nui tona kaha, otiia ehara i te mea na tona  
 kaha ake: he hanga whakamiharo tana whakangaro; ka kake ano ia, ka mahi i tana e pai ai, ka  
<sup>25</sup>  
 whakangaro i nga tangata nunui ratou ko te iwi tapu. Ma tana ngarahu mohio ano ka meinga ai  
 e ia te tinihanga o tona ringa kia kake; ka whakanui ano ia i a ia i roto i tona ngakau, he tokomaha  
 hoki e ngaro i a ia i runga i to ratou noho warea; ka whakatika ano ia ki te rangatira o nga rangatira;

o tiia ka wawahia ia, ehara ano i te mea na te ringa. <sup>26</sup> Na, ko te kite o nga ahiahi, o nga ata, ko tera i korerotia ra, pono tonu: engari kopia atu e koe te kite; he mea hoki ia mo nga ra maha kei te haere mai. <sup>27</sup> Na kua iwikore noa iho ahau, a Raniera, he maha nga ra oku e mate ana; muri iho ka maranga ahau, a mahia ana e ahau te mahi a te kingi; miharo tonu ano ki taua kite, kihai ia i matauria e tetahi.

## Chapter 9

<sup>1</sup> I te tuatahi o nga tau o Tariuha tama a Ahahueruha, no nga uri o nga Meri, i kingi nei ia ki te kingitanga o nga Karari; <sup>2</sup> I tona tau tuatahi i kingi ai, ka kitea e ahau, e Raniera, ki nga pukapuka te maha o nga tau i puta mai ai te kupu a Ihowa ki a Heremaia poropiti, hei whakatutukitanga i te ururua o Hiruharama, ara ka tae ki te whitu tekau tau. <sup>3</sup> Na ka anga toku mata ki te Ariki, ki te Atua; rapua ana e ahau i runga i te karakia, i te inoi, i te nohopuku, i te kakahu taratara, i te pungarehu. <sup>4</sup> Na ka inoi atu ahau ki te Ariki, ki toku Atua, ka whaki, ka mea, E te Ariki, e te Atua nui, e te atua whakamataku, e pupuri nei i te kawenata, i te atawhai mo te hunga e aroha ana ki a ia, e pupuri ana i ana whakahau; <sup>5</sup> Kua hara matou, kua poka ke, kua mahi i te kino, kua whakakeke hoki, i a matou i tahuri ke nei i au whakahau, i au tikanga. <sup>6</sup> Kihai ano matou i whakarongo ki au pononga, ki nga poropiti i korero nei i runga i tou ingoa ki o matou kingi, ki o matou rangatira, ki o matou matua, ki te iwi katoa ano o te whenua. <sup>7</sup> Kei a koe, e te Ariki, te tika; kei a matou ia te whakama o te mata, koia ano tenei inaianei; kei nga tangata ano o Hura, kei nga tangata o Hiruharama, kei a Iharaira katoa, kei nga mea e tata ana, kei nga mea i tawhiti, i nga whenua katoa i peia atu ai ratou e koe, mo to ratou he i he ai ratou ki a koe. <sup>8</sup> E te Ariki, kei a matou nei ko te whakama o te mata, kei o matou kingi hoki, kei o matou rangatira, kei o matou matua hoki, no te mea i hara matou ki a koe. <sup>9</sup> Na te Ariki, na to matou Atua, nga mahi tohu me nga murunga hara, ko matou ia kua whakakeke ki a ia; <sup>10</sup> Kihai ano i whakarongo ki te reo o Ihowa, o to matou Atua, kihai i haere i ana ture i whakatakotoria e ia, ara e ana pononga, e nga poropiti, ki to matou aroaro. <sup>11</sup> Ae ra, kua takahia e Iharaira katoa tau ture, kua whakarerea e ratou, kia kore ai ratou e rongu ki tou reo; koia i ringihia ai te kanga ki runga ki a matou, me te oati i tuhituhia ki te ture a Mohi pononga a te Atua; kua hara hoki matou ki a ia. <sup>12</sup> Na kua pumau i a ia ana kupu i korerotia e ia mo matou, mo o matou kaiwhakawa i whakarite nei i o matou whakawa, na te kino nui hoki kua

kawea mai nei e ia ki runga ki a matou: kahore hoki he rite mo te mea kua meatia nei ki Hiruharama

<sup>13</sup>  
i raro i te rangi katoa. Ka rite ki te mea i tuhituhia ki te ture a Mohi tenei kino katoa kua tae mai nei ki a matou: heoi kahore a matou inoi ki te aroaro o Ihowa, o to matou Atua, mo matou kia tahuri

<sup>14</sup>  
atu i o matou kino, kia matau hoki ki tou pono. Na reira te kino i tirotirohia mai ai e Ihowa, a kawea mai ana e ia ki runga ki a matou; tika tonu hoki ta Ihowa, ta to matou Atua, i ana mahi katoa

<sup>15</sup>  
e mahia ana e ia, a kihai matou i whakarongo ki tona reo. Na aiane, e te Ariki, e to matou Atua, nau nei i kawea mai tau iwi i te whenua o Ihipa i runga i te ringa kaha, a mahia ana e koe he ingoa

<sup>16</sup>  
mou, penei ano me tenei inaianei; hara ana matou, mahi ana i te kino. E te Ariki, kia rite ki au mahi tika katoa, whakatahuritia atu tou riri, tou weriwere, i tau pa, i Hiruharama, i tou maunga tapu: he hara nei hoki no matou, he kino no o matou matua i ingoa kino ai a Hiruharama me tau iwi ki

<sup>17</sup>  
te hunga katoa i tetahi taha o matou, i tetahi taha. Na whakarongo aiane, e to matou Atua, ki te inoi a tau pononga, ki ana tangi, kia marama ano tou mata ki tou wahi tapu kua ururu nei, me

<sup>18</sup>  
whakaaro ki te Ariki. Kia anga mai, e toku Atua, tou taringa, whakarongo hoki, titiro mai hoki ou kanohi, kia kitea ai e koe o matou matenga, me te pa ano kua huaina nei tou ingoa mo reira: ehara hoki i te mea he tika no matou i tukua atu ai e matou a matou inoi ki t ou aroaro, engari he

<sup>19</sup>  
nui no au mahi tohu. Whakarongo, e te Ariki; e te Ariki, murua te he; e te Ariki, whakarongo mai, e mahi; kaua e whakaroa; kia mahara ano ki a koe, e toku Atua, kua oti hoki tou ingoa te whakahua mo tau pa, mo tau iwi.

<sup>20</sup>  
Na, i ahau e korero ana, e karakia ana, e whaki ana i toku hara, i te hara ano o toku iwi, o Ihairaira, e tuku ana i taku inoi ki te aroaro o Ihowa, o toku Atua, mo te maunga tapu o toku Atua;

<sup>21</sup>  
Ae ra, i ahau e korero ana, e karakia ana, na ko Kapariera, ko te tangata i kitea e ahau i te whakakitenga i te timatanga, ko tona rere he mea whakahohoro, kua pa mai ki ahau i te wa o to te

<sup>22</sup>  
ahiahi whakahere. Na ka ako ia i ahau, ka korero ki ahau, ka mea, E Raniera, kua puta mai nei

<sup>23</sup>  
ahau kia mohio ai koe, kia matau ai. I te timatanga o au inoi i puta te kupu, a kua tae mai ahau ki te whakaatu; e arohaina nuitia ana hoki koe, na kia mohio koe ki te mea, whakaroa ano te kite.

<sup>24</sup>  
E whitu tekau nga wiki kua oti te whakarite mo tou iwi, mo tou pa tapu hoki, e whakaotia ai te poka ke, e whakamutua ai nga hara, e oti ai te whakamarie mo te kino, e kawea mai ai te tika mau

<sup>25</sup>  
tonu, e hiritia ai te kite, me te poropititanga, e wh akawahia ai te Tapu Rawa. Na kia mohio, a kia marama hoki, e whitu nga wiki o te putanga o te kupu, kia whakahoutia, kia hanga a Hiruharama a tae noa ki te mea i whakawahia, ki te rangatira: a, e ono tekau ma rua nga wiki, ka oti ano te

<sup>26</sup>  
hanga, me te waharoa, me te awaker i, ahakoa i roto i nga wa raruraru. A, ka taka aua wiki e ono tekau ma rua, ka hatepea atu te mea i whakawahia, a kahore he mea mana; a ka whakangaromia te pa me te wahi tapu e te iwi o te rangatira ka haere mai nei; a he waipuke kei tona mutunga, a he



27

whawhai taea noatia te mutun ga; kua takoto hoki nga whakangaromanga. A ka hanga e ia he kawenata pumau ki etahi tokomaha, kotahi te wiki; ka tae ki te hawhe o te wiki e meinga ana e ia kia mutu te patunga tapu me te whakahere; na ka haere mai tetahi i runga i te parirau o nga mea whakarihariha, mana e whakaururua; a ka ringihia he riri ki runga ki te kaiwhakangaro, a taea rawatia ano te whakaotinga, he mea kua oti te whakarite.

## Chapter 10

<sup>1</sup> I te toru o nga tau o Hairuha kingi o Pahia, i whakakitea he mea ki a Raniera, i huaina nei ko Peretehatara; a he tika taua mea, he mea mo tetahi whawhai nui: a i matau ia ki taua mea, i mohio ano hoki ki te tikanga o te kite. <sup>2</sup> I aua ra i te tangi ahau, a Raniera, e toru nga tino wiki. <sup>3</sup> Kihai tetahi kai e minaminatia ana i kainga e ahau, kihai ano te kikokiko, te waina ranei, i tapoko ki toku mangai, a kihai rawa ahau i whakawahi i ahau a taka noa nga tino wiki e toru. <sup>4</sup> Na i te rua tekau ma wha o nga ra o te marama tuatahi, i ahau i te taha o te awa nui, ara o Hirekere, <sup>5</sup> Ka ara ake oku kanohi, a ka titiro, ka kite ahau, na, ko tetahi tangata he kakahu rinena tona, ko tona hope he mea whitiki ki te koura parakore o Upuhata: <sup>6</sup> Ko tona tinana hoki rite tonu ki te perira, ko tona mata rite tonu ki te ahau o te uira, ko ona kanohi kei nga rama ahi te rite, ko ona ringa, ko ona waewae, rite tonu te kara ki to te parahi kua oti te whakakanapa, a, ko te reo o ana kupu, ano k o te reo o te mano. <sup>7</sup> Na ko ahau anake, ko Raniera, i kite i taua whakakitenga: kihai hoki oku hoa i kite i taua whakakitenga; engari i tau te wiri nui ki a ratou, a rere ana ki te piri. <sup>8</sup> A mahue iho ko ahau anake. Na ka kite ahau i tenei mea nui; kihai ano hoki i mahue he kaha i roto i ahau: i puta ke hoki toku ataahua, kore iho, kahore hoki he kaha i mau i ahau. <sup>9</sup> I rongongonga ano ia ahau i te reo o ana kupu: a, i toku rongongonga i te reo o ana kupu, na ka riro ahau i te moe, au tonu, me toku tapapa ano, toku mata anga tonu ki te whenua.

<sup>10</sup> Na, kua pa he ringa ki ahau, na reira ahau i whakaara ki runga ki oku turi, ki runga hoki i nga kapu o oku ringa. <sup>11</sup> Na kia mea ia ki ahau, E Raniera, e te tangata e arohaina nuitia ana, kia mohio koe ki nga kupu ka korerotia nei e ahau ki a koe; e tu ki runga; kua unga mai hoki ahau inaianei ki a koe. Na i tana korerotanga i tenei kupu ki ahau, ka tu ahau, me te wiri. <sup>12</sup> Katahi tera ka ki mai ki ahau, Kaua e wehi, e Raniera, no te mea no te ra tuatahi ano i anga ai tou ngakau ki te matau, ki te whakaiti i a koe ki te aroaro o tou Atua, i rangona ai au kupu; a na au kupu hoki ahau i haere mai ai. <sup>13</sup> Otiia i turia mai ahau e te rangatira o te kingitanga, o Pahia, e rua tekau ma tahi nga ra; na, kua tae mai a Mikaera, tetahi o nga tino rangatira, hei awhina moku, a noho ana ahau i

<sup>14</sup> reira i nga kingi o Pahia. Na kua tae mai nei ahau kia matau ai koe ki nga mea e pa ki tou iwi i  
 nga ra whakamutunga: ko te kite hoki mo nga ra maha e takoto ake nei. <sup>15</sup> Na, i tana korerotanga  
 mai i enei kupu ki ahau, ka anga toku mata ki te whenua, kahore hoki aku kupu. <sup>16</sup> Na, kua pa  
 tetahi ki oku ngutu, ko tona ahua kei to nga tama a te tangata: na ka puaki toku mangai, a ka korero  
 ahau, ka mea ki tera i tu ra ki toku aroaro, E toku ariki, na te kite ra, kua tahuri iho oku pouritanga  
<sup>17</sup> ngakau ki ahau, kahore hoki h e kaha e mau ana ki ahau. Ma te aha hoki e ahei ai i te pononga  
 a tenei ariki oku te korero ki tenei ariki oku? ko ahau nei hoki, kore tonu iho he maunga o te kaha  
<sup>18</sup> i roto i ahau, kihai ano i mahue he manawa i roto i ahau. Katahi ka pa ano tetahi ki ahau, ko  
<sup>19</sup> tona ahua rite tonu ki to te tangata, a whakakahangia ana ahau e ia. I mea ia, Kaua e wehi e te  
 tangata e arohaina nuitia ana; kia mau te rongo ki a koe, kia kaha, ae ra, kia kaha. Na, i tana  
 korerotanga ki ahau, kua kaha ahau. Na ka mea ahau, Ma toku ariki e korero mai; kua oti nei hoki  
<sup>20</sup> ahau te whakakaha e koe. Katahi tera ka ki mai, E mohio ana ranei koe ki te mea i haere mai ai  
 ahau ki a koe? na akuanei ahau hoki ai ki te whawhai ki te rangatira o Pahia. Ka puta atu ahau, na  
<sup>21</sup> ka haere mai te rangatira o Kariki. Me whakaatu ano ia e ahau ki a koe te mea i tuhituhia ki te  
 karaipiture pono: kahore hoki tetahi e whakakaha ana i a ia ano hei hoa moku ki enei mea, ko to  
 koutou rangatira anake, ko Mikaera.

## Chapter 11

<sup>1</sup> Ko ahau, i tu ake ahau i te tau tuatahi o Tariuha Meri, ki te whakau, ki te whakakaha i a ia.  
<sup>2</sup> Na, ka whakaatu ahau inaiane ki a koe i te pono. Nana, tera e ara ake ano etahi atu kingi e toru i  
 Pahia; a, ko te tuawha, ka nui noa atu nga taonga i o te katoa. Na, kia kaha ia i ona taonga, ka  
<sup>3</sup> whakaohokia e ia te katoa ki te whawhai ki te kin gitanga o Kariki. Na tera e tu ake tetahi kingi  
<sup>4</sup> marohirohi, he nui tona kingitanga e kingi ai ia, a ka mahia e ia tana e pai ai. A, ina tu ake ia, ka  
 pakaru tona kingitanga, ka wehewehea atu ki nga hau e wha o te rangi; kahore ia ki o muri i a ia,  
 e kore ano e rite ki tona kingitanga i kingi ai ia; no te mea ka hutia atu tona kingitanga, mo etahi  
 atu ano ia ehara nei i ene i.  
<sup>5</sup> Na ka kaha te kingi o te tonga, me tetahi o ana rangatira; ka neke ake ano tona kaha ki runga  
<sup>6</sup> ake i to tera, a ka kingi; hei kingitanga nui tona kingitanga. Na i te mutunga o nga tau ka honoa  
 raua, ka haere mai hoki te tamahine a te kingi o te tonga, ki te kingi o te raki ki te whakarite tikanga:  
 otiia e kore e mau i taua wahine te kaha o tona ringa; e kore ano e tu te tane me tona ringa: heoi ka

tuk ua atu te wahine, me te hunga nana ia i kawea mai, me te matua tane nana nei ia, me tona  
<sup>7</sup> kaiwhakakaha i aua wa. Otiia tera e tu ake tetahi i tona wahi, he manga no nga pakiaka o te  
wahine, a ka haere mai ki te taua, ka tomo ki te pa o te kingi o te raki, a ka mahi i roto i a ratou, ka  
<sup>8</sup> kaha ano: Ka whakaraua ano e ia o ratou atua, a ratou whakapakoko whakarewa, a ratou oko ano  
hoki e matenuitia ana, nga mea hiriwa, nga mea koura ka kawea ki Ihipa; a ka mutu tana whawhai  
<sup>9</sup> ki te kingi o te raki mo etahi tau. A ka haere ia ki te kingitanga o te kingi o te tonga, engari ka  
<sup>10</sup> hoki ano ia ki tona ake whenua. Na ka whawhai ana tama, a ka huihuia e ratou he ope, he maha  
nga taua: na ka haere mai aua ope, kei te waipuke te rite, a puta rawa atu: a ka hoki ratou, ka  
<sup>11</sup> whawhai, a tae tonu ki to tera pa. Na ka riri te kingi o te tonga, a ka puta mai, ka whawhai ki a  
<sup>12</sup> ia, ara ki te kingi o te raki; a he nui te ope e ara i tenei, a ka hoatu te ope ki to tera ringa. A ka  
whakaarahia te ope, ka kake tona ngakau: a ka whakataka e ia nga mano tini, otiia e kore ia e whai  
<sup>13</sup> kaha. Na ka hoki mai te kingi o te raki, maha atu hoki i o mua te ope e ara i a ia; a, ka tae mai  
<sup>14</sup> ia i te mutunga o etahi wa, ara o nga tau, he nui tana ope, he nui nga taonga. I aua wa he tokomaha  
e whakatika ki te kingi o te tonga: ka whakakake ano nga tama tutu o tou iwi, kia tutuki ai te kite  
<sup>15</sup> ra; otiia ka taka ratou. Heoi ka haere mai te kingi o te raki; ka haupuria ake ano he pukepuke e  
ia, a ka riro i a ia te pa he nui rawa nei te taiepa: e kore ano nga ringa o te tonga e u, e kore ano tana  
<sup>16</sup> iwi i whiriwhiri ai, kahore he kaha e u ai. Otiia ko tenei ka haere mai nei ki a ia, ka mahia e ia  
tana e pai ai, e kore ano tetahi e tu ki tona aroaro: na ka tu ia ki te whenua ataahua, a kei tona ringa  
<sup>17</sup> te whakangaromanga. Ka anga ano tona mata, ka mea kia haere mai ia i runga i te kaha o tona  
kingitanga katoa, me te hunga tika ano hei hoa mona; na ka mahi ia i tana e pai ai: ka homai ano e  
ia ki a ia te tamahine a nga wahine, hei takakino mana: otiia e kore tera e tu, e kore hoki e mahi  
<sup>18</sup> mona. I muri i tenei ka tahuri tona mata ki nga motu, a he maha e riro i a ia: otiia ma tetahi  
rangatira e mea kia mutu te ingoa kino e tapaea ana e ia: ae ra, ka meinga e ia tana whakaingoa  
<sup>19</sup> kino kia hoki ki a ia ano. Katahi tona mata ka tahuri atu ki nga pa o tona whenua; otiia ka tutuki  
<sup>20</sup> ona waewae, a ka hinga ia, kore ake e kitea. Katahi ka tu ake i tona wahi tetahi mana e mea he  
kaitono takoha kia takahi i roto i te kororia o te kingitanga: otiia kia torutoru ake nga ra ka  
whakangaromia ai, kahore he riri, kahore hoki he whawhai.  
<sup>21</sup> Ka whakatika ake ano ki runga ki tona wahi tetahi tangata e whakahaweatia ana, ehara nei  
te kororia o te rangatiratanga i te mea hoatu ki a ia: ka haere mai ia i te wa ata noho, a ka riro i a ia  
<sup>22</sup> te kingitanga, na te patipati. A ka taupokina ratou e nga ringa o te waipuke i tona aroaro,  
<sup>23</sup> mongamonga noa ratou; me te rangatira ano hoki o te kawenata. I muri ano i tana whakaaetanga

korero ka mahi tinihanga ia: ka haere mai hoki ia, a ka kaha, he torutoru ano hoki ana tangata.

24

Hei te wa ata noho ka tae mai ia ki nga wahi momona ra ano o te kawanatanga; ka mahia e ia nga mea kihai i mahia e ona matua, e nga matua o ona matua; ka titaria ano e ia nga mea parakete, nga mea pahua, nga taonga, ki roto ki a ratou: ae ra, ka whakaaroa ano e ia ona whakaaro mo nga

25

pa, a kia taka ra ano tetahi taima. Ka whakaohokia ano e ia tona kaha me tona maia ki te whawhai ki te kingi o te tonga, he nui te ope; ka oho ano hoki te kingi o te tonga, ka whawhai, he ope nui atu, he kaha atu; otiia e kore ia e tu: no te mea ka whakaaroa e ratou he whakaaro ki no mona.

26

Ina, ka pakaru ia i te hunga i kai i tana wahi kai, ko te taua hoki a tera kei te waipuke te rite: he

27

tokomaha ano e hinga, mate rawa. Na ko enei kingi tokorua, ko o raua ngakau ka mea mo te kino, a ka korero teka raua i te tepu kotahi; otiia kahore he painga; ka noho tonu mai hoki te mutunga,

28

hei te wa i whakaritea. Hei reira ia ka hoki ki tona whenua me nga taonga maha; a ko tona ngakau

29

ka mea ki te takahi i te kawenata tapu; ka mahi ia i tana e pai ai, a ka hoki atu ki tona whenua. I te wa i whakaritea ka hoki ia, a ka haere mai ki te tonga; otiia e kore e rite to muri nei ki to mua

30

ra. No te mea ka rere mai nga kaipuke o Kitimi ki te whawhai ki a ia. Na ka pouri ia, a ka hoki, ka riri ki te kawenata tapu, a ka mahi ia i tana e pai ai; a ka tino hoki ia, ka whai whakaaro ki te

31

hunga i whakarerea ai te kawenata tapu. Ka ara ano etahi ringa hei whakauru mona, a ka whakapokea te wahi tapu, ara te wahi kaha, ka whakakahoretia ano e ratou te patunga tapu, te mea

32

tuturu, ka tu ano i a ratou te mea whakarihariha, te mea whakangaro. Na, ko te hunga e mahi kino ana ki te kawenata ka whakangaua ketia e ia, he mea whakapati nana: ko te hunga ia e mohio

33

ana ki to ratou Atua, ka kaha ratou, ka mahi i nga mahi. Na, ko te hunga whakaaro nui i roto i te iwi, he tokomaha a ratou e whakaako ai: otiia he maha nga ra e hinga ai ratou i te hoari, i te mura,

34

i te whakarau, i te pahua. A ka hinga ratou, ka awhinatia mai ratou, he iti ia te awhina: he

35

tokomaha ia e piri ki a ratou, he mea whakapati. Ka hinga ano etahi o te hunga matau, he mea e tahia ai to ratou para, e pokekore ai, e ma ai ratou, a taea noatia te wa o te whakamutunga: no te

36

mea ko taua mea mo te wa ra ano i whakaritea. Ka mahia ano e te kingi tana e pai ai; ka whakaneke ake ano i a ia, ka whakanui i a ia ki runga ake i nga atua katoa, he whakamaharo ano ana whakapehapeha mo te Atua o nga atua; ka kake ano ia, taea noatia te whakapotonga o te riri:

37

ka mahia hoki i te mea i whakaritea. E kore ano ia e whai whakaaro ki nga atua o ona matua, e hiahia ranei ki te wahine, e kore ano e whai whakaaro ki tetahi atua: no te mea ko ia tana e whakanui

38

ai ki runga ake i te katoa. Otiia i tona wahi ano ka whakahonoretia e ia te atua o nga wahi kaha; he atua kihai i mohiotia e ona matua tana e whakahonore ai ki te koura, ki te hiriwa, ki te kohatu

39

utu nui, ki nga mea e matenuitia ana. Ko tana tenei e mea ai i nga wahi tino kaha, a ko tona hoa

ko tetahi atua ke; ko te tangata e whakaae ana ki a ia ka whakanuia e ia ki te kororia: a ka meinga ratou e ia hei kawana mo nga tangata tokomaha, ka wehewehea ano hoki e ia te whenua mo tetahi  
<sup>40</sup>utu. A i nga wa o te mutunga ka whawhai te kingi o te tonga ki a ia: a ka kokiri mai te kingi o te raki ano he paroro te rite, me nga hariata, me nga kaieke hoiho, me nga kaipuke maha; a ka tomo  
<sup>41</sup>ia ki nga whenua, ka paaha me te waipuke, a tika tonu a tu. Ka tae ano ia ki te whenua ataahua, a he maha nga whenua e hinga: ko enei ia e mawhiti i roto i tona ringa, ko Eroma, ko Moapa, ko  
<sup>42</sup>nga upoko o nga tama a Amona. Ka totoro ano tona ringa ki nga whenua: e kore ano te whenua  
<sup>43</sup>o Ihipa e mawhiti. Otiia ka noho ko ia hei rangatira mo nga taonga, ara mo te koura, mo te hiriwa, mo nga mea katoa o Ihipa e matenuitia ana; a ka whai nga Rupimi me nga Etiopiana i ona  
<sup>44</sup>takahanga. Otiia ka raruraru ia i nga korero i te rawhiti, i te raki; na he nui te riri e puta mai ai  
<sup>45</sup>ia, a he tokomaha ana e whakangaro ai, e huna ai. A ka whakaturia e ia nga teneti o tona whare kingi, ki waenganui o te moana, o te maunga tapu ataahua; otiia ka tae ia ki tona mutunga, kahore hoki he awahina mona.

## Chapter 12

<sup>1</sup>A, i taua wa ka whakatika a Mikaera, te rangatira nui e tu nei hei hoa mo nga tama a tou iwi; na he wa raruraru taua wa, kahore mai i mua i te wa i whai iwi ai a taea noatia taua wa nei; hei taua  
<sup>2</sup>wa ka mawhiti tou iwi, te hunga katoa e kitea kua oti te tuhituhi ki te pukapuka. Na he tokomaha o te hunga e moe ana i te puehu o te oneone e ara ake, ko etahi ki te ora tonu, ko etahi ki te whakama,  
<sup>3</sup>ki te whakarihariha mutungakore. A ka tiaho te hunga whakaaro nui ano kei te tiaho o te kikorangi; me te hunga hoki nana i anga ai nga tangata tokomaha ki te tika, ka rite ratou ki nga whetu a ake  
<sup>4</sup>ake. Ko koe ia, e Raniera, kopia nga kupu, hiritia ano te pukapuka a taea noatia te mutunga: he tokomaha e kopikopiko, ka nui haere ano te matauranga.  
<sup>5</sup>Katahi ahau, a Raniera, ka titiro, na ko etahi atu tokorua e tu ana, ko tetahi i tenei taha o te  
<sup>6</sup>parenga o te awa, ko tetahi i tera taha o te parenga o te awa. Na ko te meatanga a tetahi ki te tangata i te kakahu rinena, ki tera i runga i nga wai o te awa, Ko ahea ra ano te mutunga o enei mea  
<sup>7</sup>whakamiharo? A i rongohau i ta te tangata i te kakahu rinena, i ta tera i runga i nga wai o te awa, i te aranga o tona matau, o tona mauui whaka te rangi, a oatitia ana e ia ma tera e ora tonu ana ake ake, kia taka ra ano tetahi wa, nga wa, me te hawhe; a ki a oti ta ratou tukituki i te kaha o te  
<sup>8</sup>iwi tapu, katahi ka oti enei katoa. A ka rongohau, engari kihai i matau; katahi ahau ka mea, E

<sup>9</sup> toku Ariki, he aha ra te mutunga o enei mea? Katahi tera ka ki mai, Haere, e Raniera, kua oti hoki  
<sup>10</sup> nga kupu te kokopi atu, hiri rawa a taea noatia te wa o te mutunga. He tokomaha e mea i a ratou  
 kia pokekore, kia ma, kia parakore; engari ko te hunga kino ka mahi i te kino, a e kore tetahi o te  
<sup>11</sup> hunga kino e matau; ko te hunga whai whakaaro ia ka matau. Na, mai o te wa e whakakahoretia  
 ai te patunga tapu tuturu, e tu ai te mea whakarihariha, te mea whakangaro, kotahi mano e rua rau  
<sup>12</sup> e iwa tekau nga ra. Ka hari te tangata e tatari ana, a ka tutuki ki nga ra kotahi mano e toru rau e  
<sup>13</sup> toru tekau ma rima. Na haere kia taea ra ano te mutunga; ka okioki hoki koe, a ka tu ki tou wahi  
 i te mutunga o nga ra.

## Hosea

### Chapter 1

<sup>1</sup> Ko te kupu a Ihowa i puta ki a Hohea tama a Peeri i nga ra o nga kingi o Hura, ara o Utia, o  
 Iotama, o Ahata, o Hetekia, i nga ra hoki o Ieropoama tama a Ioaha kingi o Iharaira.

<sup>2</sup> I te korerotanga ai a Ihowa i te tuatahi, he mea korero na Hohea, i mea a Ihowa ki a Hohea,  
 Haere, tangohia tetahi wahine mau, he mea kairau, etahi tamariki ano, he mea na te kairau: he nui  
<sup>3</sup> hoki te kairautanga i kairau ai te whenua i te mea ka wh akarerea nei a Ihowa. Na haere ana ia,  
<sup>4</sup> tikina ana e ia a Komere tamahine a Ripiraima. Na kua hapu tera, kua whanau ta raua tama. Na  
 ka mea a Ihowa ki a ia, Huaina tona ingoa, ko Ietereere; no te mea tenei ake, he wa poto nei, ka  
 rapu utu ahau mo te toto o Ietereere i te whare o Iehu, ka whakamutua ano e ahau te kingitanga o  
<sup>5</sup> te whare o Iharaira. I taua ra ka whati i ahau te kopere a Iharaira ki te raorao o Ietereere. Na  
<sup>6</sup> kua hapu ano ia, whanau ake he tamahine. A ka mea a Ihowa ki a ia, Huaina tona ingoa, ko  
 Roruhama: no te mea e kore e atawhaitia e ahau te whare o Iharaira a muri ake nei, e murua ranei  
<sup>7</sup> e ahau tetahi wahi a ratou. Engari te whare o Hura ka atawhaitia e ahau, ka meinga ano e ahau a  
 Ihowa, to ratou Atua, hei whakaora i a ratou; e kore e meinga e ahau te kopere, te hoari, te whawhai,  
 nga hoiho, nga kaieke hoiho ranei hei whakaora i a ratou.

<sup>8</sup> A ka whakamutua e ia ta Roruhama kai u, ka hapu ia, a whanau ake he tama. Na ka mea a  
<sup>9</sup> Ihowa, Huaina tona ingoa ko Roami: ehara hoki koutou i te iwi naku, ehara ano hoki ahau i te Atua  
<sup>10</sup> no koutou. Ka rite ano ia te tokomaha o nga tama a Iharaira ki te onepu o te moana e kore nei  
 e mehuatia, e kore e taua; na i te wahi i korerotia ai ki a ratou, Ehara koutou i te iwi naku, ko reira

11  
 ano te kupu ki a ratou, He tama koutou na te Atua ora. Ko reira ano nga tama a Hura ratou ko nga tama a Ihairaira huihui ngatahi ai, whiriwhiri ai i te upoko kotahi mo ratou, ka haere mai ano ratou i te whenua: no te mea he nui te ra o Ietereere.

## Chapter 2

1 Mea atu koutou ki o koutou tuakana, Ami; ki o koutou tuahine, Ruhama. 2 Whakawakia to koutou whaea, whakawakia: ehara hoki ia i te wahine naku, ehara ano ahau i te tahu nana: na kia whakarerea e ia ona moepuku i tona aroaro, ona puremu i waenga i ona u. 3 Kei tangohia ona e ahau, a ka noho tahanga ia, kei meinga ano ia kia rite ki te ra i whanau ai ia; kei meinga ia e ahau kia rite ki te koraha, kei waiho ia hei whenua waikore, a ka mate i te matewai. 4 Ae ra, e kore ana tamariki e tohungia e ahau; no te mea he tamariki ratou na te moepuku. 5 Kua kairau nei hoki to ratou whaea: he mahi whakama ta te wahine i whanau ai ratou; i mea hoki ia, Ka whaia e ahau te hunga i aroha ki ahau, i homai nei i te taro maku, i te wai moku, i te huruhuru hipi maku, i te muka maku, i te hinu maku, i te mea hei inu maku.

6 Mo reira tenei ahau te tutaki nei i tou ara ki te tataramoa, te hanga nei i te taiepa e kore ai ia e kite i ona ara. 7 Ka whaia ano e ia ana i aroha ai, heoi e kore e mau i a ia; ka rapua ratou e ia, otiia e kore e kitea: katahi ia ka mea ake, Ka haere ahau ka hoki ki taku tahu tuatahi; nui ake hoki to reira pai ki ahau i to naiane. 8 Kihai ra hoki ia i mohio naku i hoatu te witi ki a ia, te waina, me te hinu, naku ano i whakanui te hiriwa mana, me te koura, ta ratou i mahi nei hei mea ma Paara.

9 Mo reira ka hoki ahau, ka tango i taku witi i tona wa ano, i taku waina i tona wa ano, ka riro ano i ahau taku huruhuru hipi me taku muka i hipokina ai ia i a ia e noho tahanga ana. 10 Na akuanei ka whakakitea e ahau tana mahi wairangi ki nga kanohi o ana i aroha ai, e kore ano tetahi tangata e whakaora i a ia i roto i toku ringa. 11 Ka mutu katoa ano i ahau tona koa, ona ra hakari, ona

12 kowhititanga marama, ona hapati, me ana huihui nunui katoa. Ka ururua ano i ahau ana waina, me ana piki, nga mea i ki ai ia, Ko oku utu enei, he mea homai na aku i aroha ai; a ka meinga e ahau hei ngahere, a ka kainga e nga kirehe o te parae. 13 Ka whiua ano ia e ahau mo nga ra o nga Paarimi, mo era i tahu whakakakara ai ia ki a ratou; a whakapaipai ana i a ia ki ona whakakai, ki ana whakapaipai, haere ana ki te whai i ana i aroha ai, a wareware ake ki ahau, e ai ta Ihowa.

14 Mo reira, nana, ka whakawai ahau i a ia, ka kawe i a ia ki te koraha, ka korero whakamarie ano ki a ia. 15 Ka hoatu ano e ahau etahi mara waina ki a ia i reira, me te raorao o Akoro hei kuwaha

mo te tumanako: a ka whakahoki kupu ia ki reira, ka pera me to nga ra o tona tamarikitanga, me  
to te ra hoki i haere mai ai ia i te whenua o Ihipa. <sup>16</sup> Na i taua ra, e ai ta Ihowa, ka karangatia ahau  
e koe, E Ihi; e kore hoki ahau e karangatia e koe, E Paari a muri ake nei. <sup>17</sup> No te mea ka tangohia  
e ahau nga ingoa o nga Paarimi i roto i tona mangai, e kore ano ratou, o ratou ingoa, e maharatia a  
<sup>18</sup> muri ake nei. Ka whakaritea ano e ahau i taua ra he kawenata, he pai mo ratou, ki nga kirehe o  
te parae, ki nga manu o te rangi, ki nga mea ngokingoki o te oneone; ka whati ano i ahau te kopere,  
<sup>19</sup> te hoari, te whawhai i runga i te whenua, a ka meinga ratou e ah au kia au te takoto. Ka taumautia  
ano koe e ahau a ake ake; ina, ka taumautia koe e ahau maku i runga i te tika, i te whakarite whakawa,  
<sup>20</sup> i te aroha, i te atawhai. Ka taumautia ano koe maku i runga i te pono, a ka mohio koe ki a Ihowa.  
<sup>21</sup> I taua ra ka whakarongo ahau, e ai ta Ihowa, ka whakarongo ahau ki nga rangi, ka whakarongo  
<sup>22</sup> ratou ki te whenua; Ka whakarongo ano te whenua ki te witi, ki te waina, ki te hinu: a ka  
<sup>23</sup> whakarongo era ki a Ietereere. Ka whakato ano ahau i a ia maku ki te whenua; ka tohu i tenei  
kihai nei i tohungia; ka ki atu ano ki te hunga ehara nei i te iwi naku, ko koe taku iwi, a ka mea era,  
Ko koe toku Atua.

### Chapter 3

<sup>1</sup> I mea ano a Ihowa ki ahau, Tena ano haere, arohaina tetahi wahine e arohaina ana e te tangata,  
he wahine puremu; kia rite ki te aroha o Ihowa ki nga tama a Iharaira, ahakoa e anga atu ana ki nga  
atua ke, a e matenui ana ki nga keke karepe maroke. <sup>2</sup> Na hokona ana ia e ahau maku ki nga pihi  
hiriwa kotahi tekau ma rima ki te homa perai, me te hawhe homa parei: <sup>3</sup> A ka ki atu ki a ia, Kia  
maha nga ra e noho ai koe he mea taumau maku; kaua e kairau, kaua ano e riro i te tangata: ka pena  
<sup>4</sup> ano ahau ki a koe. He maha hoki nga ra e noho ai nga tama a Iharaira, kahore he kingi, kahore  
he rangatira, kahore he patunga tapu, kahore hoki he pou, kahore he epora, kahore he terapimi.  
<sup>5</sup> Muri iho ka hoki mai nga tama a Iharaira, ka rapu i a Ihowa, i to ratou Atua, i a Rawiri ano, i to  
ratou kingi; ka haere mai i runga i te wehi ki a Ihowa, ki tona pai ano i nga ra whakamutunga.

### Chapter 4



<sup>1</sup> Whakarongo ki te kupu a Ihowa, e nga tama a Iharaira; he tautohe hoki ta Ihowa ki nga tangata o te whenua, no te mea kahore he pono, kahore he tohu tangata, kahore he matauranga ki te Atua i te whenua.

<sup>2</sup> Te oati! te korero teka! te kohuru! te tahae! te puremu! pakaru mai ana ratou; te toto,

<sup>3</sup> pa tonu ki te toto. Mo reira te whenua ka pouri, ko ona tangata katoa ka tangi, me nga kirehe o

<sup>4</sup> te parae, me nga manu o te rangi; ka whakakorea ano nga ika o te moana. Kaua ia te tangata e whakawa, e whakahe i tetahi tangata: e rite ana hoki tou iwi ki te hunga e totohe ana ki te tohunga.

<sup>5</sup> Na ka hinga koe i te awatea, me te poropiti, ka hinga ngatahi korua i te po; ka whakangaromia ano hoki e ahau tou whaea.

<sup>6</sup> Ka ngaro taku iwi i te kore matauranga: kua paopao na koe ki te matauranga, na ka paopao ano ahau ki a koe hei tohunga maku: kua wareware na koe ki te ture a tou Atua, ka wareware ano ahau ki au tamariki.

<sup>7</sup> I te mea ka nui ratou, katahi ratou ka hara ki ahau: whakaputaina ketia ana

<sup>8</sup> e ahau to ratou kororia hei whakama. Ko te hara o taku iwi kainga ake e ratou, ko to ratou ngakau

<sup>9</sup> anga tonu ki to ratou he. Ko te tukunga iho, rite iwi, rite tohunga: a ka whiua ratou e ahau mo o

<sup>10</sup> ratou ara, ka utua a ratou mahi. Ka kai hoki ratou, a e kore e makona: ka moepuku a e kore e

<sup>11</sup> tokomaha; mo ta ratou whakarere i nga mahara ki a Ihowa. Riro pu te hinengaro i te moepuku, i te waina, i te waina hou.

<sup>12</sup> E ui tikanga ana taku iwi ki a ratou rakau, ko to ratou tokotoko ano hoki hei whakaatu tikanga ki a ratou: kua pohehe hoki ratou i te wairua o te moepuku, kua maunu atu i raro i to ratou Atua ki

<sup>13</sup> te puremu. E patu ana ratou i nga patunga tapu i runga i nga tihi o nga maunga, e tahu whakakakara ana i runga i nga pukepuke, i raro i nga oki, i nga papara, i nga terepini, he pai hoki no te taumarumarunga iho: mo reira ka moepuku a koutou tamahine, ka p uremu a koutou wahine.

<sup>14</sup> E kore ahau e whiu i a koutou tamahine ina moepuku, i a koutou wahine ina puremu; ko nga tane nei hoki he mea wehe atu ki nga wahine moepuku, ko ratou tahi ko nga wahine kairau kei te

<sup>15</sup> mea patunga tapu: mo reira ka hinga te iwi kahore nei o ratou matauranga. Ahakoa koe, e Iharaira, kairau noa, kaua a Hura e he; a kaua hoki koutou e haere mai ki Kirikara, kaua hoki e haere ki runga

<sup>16</sup> ki Peteawene, a kaua e oati, Kei te ora a Ihowa. Kua whakangutungutu hoki a Iharaira, tona rite kei te kua kau e whakatotoi ana: akuanei ratou whangaia ai e Ihowa, peratia ai me te reme i te

<sup>17</sup> wahi whanui. Kua honoa a Eparaima ki nga whakapakoko: tukua atu ki tana.

<sup>18</sup> Ko te mea e inumia ana e ratou kua kawa; he moepuku tonu ta ratou; a he whakama ta o ratou rangatira e matenui

<sup>19</sup>  
ana. Kua oti ia te kopaki e te hau ki roto ki ona parirau; ka whakama hoki ratou ki a ratou patunga tapu.

## Chapter 5

<sup>1</sup> Whakarongo ki tenei, e nga tohunga, mahara mai, e te whare o Iharaira, kia whai taringa mai hoki, e te whare o te kingi, mo koutou hoki te whakawa; no te mea kua waiho koutou hei rore ki Mihipa, hei kupenga horahora ki runga ki Taporo. <sup>2</sup> A hohonu ana te hounga o te patu a te hunga tutu; ko ahau ia te kairiri i te he o ratou katoa. <sup>3</sup> E mohio ana ahau ki a Eparaima, kahore a Iharaira e ngaro i ahau; kei te moepuku nei hoki koe inaianei, e Eparaima, kua poke a Iharaira. <sup>4</sup> E kore hoki ratou e tukua e a ratou mahi kia hoki ki to ratou Atua; kei roto hoki i a ratou te wairua moepuku, kahore o ratou mohio ki a Ihowa. <sup>5</sup> E whakaaturia ana ta Iharaira e tona whakapehapeha ki tona aroaro ano: na ka hinga a Iharaira raua ko Eparaima i runga i to raua he, me Hura, ka hinga ngatahi ratou. <sup>6</sup> Ka haere ratou me a ratou hipi, me a ratou kau, ki te rapu i a Ihowa; heoi e kore e kitea; kua mawehe atu ia i roto i a ratou. <sup>7</sup> Kua tinihanga ratou ki a Ihowa: he tamariki tangata ke hoki a ratou tamariki: akuanei ka pau ratou me a ratou wahi i te marama kohiti.

<sup>8</sup> Whakatangihia te koronete ki Kipea, te tetere ki Rama: whakatangihia he whakaoho ki Peteawene; i muri i a koe, e Pineamine. <sup>9</sup> Ka ururua a Eparaima i te ra e riria ai te he: takoto rawa te mea kua whakaaturia nei e ahau i roto i nga hapu o Iharaira. <sup>10</sup> E rite ana nga rangatira o Hura ki te hunga e whakaneke atu ana i te rohe; ka tahoroa e ahau toku riri ki runga ki a ratou ano he wai. <sup>11</sup> E tukinotia ana, e whakapetia ana a Eparaima i te whakawakanga, mona i pai ki te whai i te whakahau. <sup>12</sup> Na reira, ka rite taku ki a Eparaima ki ta te purehurehu, ka rite hoki ki te pirau taku ki te whare o Hura. <sup>13</sup> I te wa i kite ai a Eparaima i tona mate, a Hura hoki i tona marutanga, na haere ana a Eparaima ki Ahiria, tuku tangata ana ia ki a Kingi Iarepe: heoi e kore koutou e taea e ia te rongoa, e kore hoki e ora i a ia to koutou marutanga. <sup>14</sup> Ka rite hoki taku ki a Eparaima ki ta te raiona, taku ki te whare o Hura ka rite ki ta te kua raiona: ka haehae ahau, ina, ahau ano, a ka haere; ka maua atu e ahau, a kahore he kaiwhakaora. <sup>15</sup> Ka haere ahau ka hoki ki toku wahi, kia whakaae ra ano ratou ki to ratou he, kia rapua ra ano toku mata e ratou: a, i a ratou e mate ana, kaha tonu ta ratou rapu i ahau.

## Chapter 6

<sup>1</sup> Haere mai, tatou ka hoki ki a Ihowa: nana hoki i haehae, a mana tatou e rongoa; nana i patu, mana ano tatou e takai. <sup>2</sup> Kia rua nga ra ka whakaorangia tatou e ia; i te toru o nga ra ka whakaarahia tatou e ia, a ka ora tatou ki tona aroaro. <sup>3</sup> Na kia mohio tatou, kia whai atu tatou kia mohio ai ki a Ihowa; ko tona putanga tuturu tonu, koia ano kei to te ata, ko tona taenga mai ki a tatou rite tonu ki to te ua, ka rite ki to muri ua e makuku ai te whenua.

<sup>4</sup> Me pehea koe e ahau, e Eparaima? Me pehea koe e ahau, e Hura? rite tonu hoki to koutou pai ki te kapua o te ata, ki te tomairangi o te atatu, e riro wawe atu ana. <sup>5</sup> Na reira taku hahau i a ratou ki nga poropiti; tukitukia ana ratou e ahau ki nga kupu a toku mangai: rite tonu ano au whakaritenga ki te putanga ake o te marama. <sup>6</sup> Ko taku hoki i pai ai ko te tohu tangata, haunga te patunga tapu: ko te matau ki te Atua, pai ake i nga tahunga tinana. <sup>7</sup> Otiia kua pera ta ratou i ta Arama, kua whakataka e ratou te kawenata: kua tinihanga ratou ki ahau i reira. <sup>8</sup> He pa a Kireara no nga kaimahi i te he, poke tonu i te toto. <sup>9</sup> Rite tonu hoki ki ta nga taua pahua e whanga ana ki te tangata, ta te ropu o nga tohunga kohuru i te ara ki Hekeme; ae ra, kua mahi ratou i te he. <sup>10</sup> He hanga whakawehi taku i kite ai ki te whare o Iharaira: he puremu e kitea ana ki Eparaima, kua poke a Iharaira. <sup>11</sup> Kua rite hoki he kotinga mau, e Hura, ina whakahokia mai e ahau taku iwi i te whakarau.

## Chapter 7

<sup>1</sup> I ahau e mea ana ki te rongoa i a Iharaira, ka kitea te he o Eparaima, te kino hoki o Hamaria: no te mea e mahi ana ratou i te teka, e tomo ana hoki te tahae ki roto, e pahua ana te taua i waho.

<sup>2</sup> A kahore a ratou meatanga ake i roto i o ratou ngakau, kei te mahara tenei ahau ki to ratou kino katoa: kua karapotia ratou inaianei e a ratou mahi; tenei ano kei toku aroaro. <sup>3</sup> Ka meinga e ratou te kingi kia koa ki ta ratou kino, nga rangatira hoki ki a ratou teka. <sup>4</sup> He hunga puremu katoa ratou; ko to ratou rite kei te oumu kua oti te tahu e te kaipokepoke; ka mutu tana tutaki i te ahi, i muri iho i te pokepokenga i te paraoa a kia rewenatia ra ano. <sup>5</sup> I te ra o to tatou kingi i mate nga rangatira i a ratou ano, na te tahu a te waina; ko tona ringa maro tonu i roto i te hunga taunu. <sup>6</sup> Ano he oumu

o ratou ngakau, i a ratou e whakatata ana, e whanga ana: pau ake te po i ta ratou kaipokepoke e moe ana; i te ata ka tonu taua oumu, ano he mura ahi. <sup>7</sup> Werawera katoa ratou me he oumu, pau ake i a ratou o ratou kaiwhakawa; kua hinga katoa o ratou kingi: kahore tetahi o ratou e karanga ana ki ahau.

<sup>8</sup> Ko Eparaima, kei te hanumi ia ki roto ki nga iwi; he keke a Eparaima kihai i hurihia. <sup>9</sup> Kua pau tona kaha i nga tautangata, heoi kahore ia e mohio: ina, kua wero te hina i konei, i ko ona, a

kahore ia e mohio. <sup>10</sup> Ko te whakapehapeha o Iharaira e whakaatu ana ki tona aroaro: heoi kihai

ratou i hoki ki a Ihowa, ki to ratou Atua, a ahakoa ko tenei katoa, kahore ratou i rapu i a ia. <sup>11</sup> E rite ana hoki a Eparaima ki te kukupa wairangi, kahore nei ona ngakau: e karanga ana ratou ki Ihipa,

e haere ana ratou ki Ahiria. <sup>12</sup> Ka haere ratou, ka potaea e ahau taku kupenga ki runga ki a ratou: ka riro ratou i ahau ki raro, ka pera i nga manu o te rangi; ka whiua ratou e ahau, ka peratia me ta

o ratou whakaminenga i rongoi ai. <sup>13</sup> Aue te mate mo ratou! kua rere atu nei hoki ratou i ahau: ko te ngaromanga mo ratou mo ta ratou takahi i taku: i hokona ano ratou e ahau, heoi kei te korero

ratou i nga kupu teka moku. <sup>14</sup> Kahore hoki ratou i karanga ki ahau, he mea na o ratou ngakau, engari e aue ana ratou i runga i o ratou moenga; e huihui ana ratou, he whakaaro ki te witi, ki te

waina, a e whakakeke ana ratou ki ahau. <sup>15</sup> Ako noa ahau, whakakaha noa i o ratou ringa, heoi

kino tonu to ratou whakaaro moku. <sup>16</sup> E hoki ana ratou, ehara ia i te mea ki a ia i runga rawa: ko to ratou rite kei te kopere tinihanga: ka hinga o ratou rangatira i te hoari, he aritarita hoki no to ratou arero: hei mea tenei e kataina ai ratou ki te whenua o Ihipa.

## Chapter 8

<sup>1</sup> Meinga te tetere ki tou mangai. Ka rite ia ki te ekara, ina whakaekea e ia te whare o Ihowa; mo ratou i whakataka i taku kawenata, i takahi i taku ture. <sup>2</sup> Tera ratou e karanga ki ahau, E toku

Atua, e mohio ana matou, a Iharaira, ki a koe. <sup>3</sup> Kua akiritia e Iharaira te mea pai: ka whaia ia e te

hoariri. <sup>4</sup> Ko ta ratou whakarite kingi ehara i te mea naku, ko ta ratou whakarite rangatira ehara i te mea i mohiotia e ahau: kua hanga e ratou ta ratou hiriwa, ko ta ratou koura hei whakapakoko ma

ratou, he mea e hatepea ai ratou. <sup>5</sup> Kua akiritia e ia tau kuaokau, e Hamaria: kua mura toku riri ki

a ratou: kia pehea ake te roa ka tae ai ratou ki te harakore? <sup>6</sup> Na Iharaira nei hoki taua kuaokau na, he

mea hanga na te kaimahi; na ehara ia i te Atua: ae ra, ka pakaru rikiriki te kuaokau o Hamaria. <sup>7</sup> Na,

ko ta ratou i whakato ai ko te hau, ko ta ratou e kokoti ai ko te paroro: kahore ona witi e tupu ana: e kore te kopuku e whai paraoa: ki te whai paraoa, ka horomia e nga tautangata.

<sup>8</sup> Kua horomia a Iharaira: kua rite ratou inaianei i roto i nga tauwi ki te oko kihai i manakohia.  
<sup>9</sup> Kua riro hoki ratou ki Ahiria, ano he kaihe mohoa, he moke, ko ia anake: kua utua e Eparaima etahi hei whaiaipo. <sup>10</sup> Ae ra, ahakoa utu noa ratou i roto i nga iwi, ka kohikohia ano ratou e ahau ianei; a ka timata ratou te iti haere, i te pikaunga a te kingi o nga rangatira. <sup>11</sup> Kua maha nei nga aata a Eparaima hei mea hara, na ka waiho nga aata hei hara mona. <sup>12</sup> Ahakoa tuhituhia e ahau mana taku ture kia tekau mano nga tikanga, kei te kiia aua mea he mea rere ke. <sup>13</sup> Na ko nga patunga tapu hei whakahere ki ahau, e patu kikokiko ana ratou, kainga iho; otiia kahore e manakohia ana e Ihowa; akuanei ia mahara ai ki to ratou he, whiu ai i o ratou hara: ka hoki ratou ki Ihipa. <sup>14</sup> Kua wareware hoki a Iharaira ki tona kaihanga, a kei te hanga temepara; kua meinga e Hura kia maha nga pa taiepa: otiia ka tukua atu e ahau he ahi ki runga ki ona pa, a ka kainga e tera ona whare kingi.

## Chapter 9

<sup>1</sup> Kei koa koe, e Iharaira, kei whakamanamana, kei pera me era atu iwi; kua whakarerea na hoki e koe tou Atua, kua puremu, arohaina ana e koe te utu i nga wahi katoa e patua ai te witi. <sup>2</sup> E kore ratou e whangaia e te patunga witi, e te poka waina, a ka tinihanga tana waina hou. <sup>3</sup> E kore ratou e noho ki te whenua o Ihowa; engari ka hoki a Eparaima ki Ihipa; a ka kai ratou i te mea poke ki Ahiria. <sup>4</sup> E kore e ringihia e ratou he ringihanga waina ki a Ihowa, e kore ano aua mea e arongia e ia: ko a ratou patunga tapu ka pera ki a ratou me te taro tangi tupapaku; ka poke katoa te hunga e kai ana: ko ta ratou taro hoki hei mea mo to ratou hiakai; e kore e tae ki roto ki te whare o Ihowa. <sup>5</sup> Ka pehea koutou i te ra o te huihui nui, a i te ra o ta Ihowa hakari? <sup>6</sup> Nana, kua riro ratou, kei ngaro, otiia ka kohikohia ratou e Ihipa, ka tanumia e Memepihi: ko a ratou mea ahuareka, hiriwa, ka riro i te ongaonga; ka tupu te tataramoa ki o ratou teneti. <sup>7</sup> Kua tae mai nga ra o te tiroiro, kua tae mai nga ra whakautu; ka mohio a Iharaira: he wairangi te poropiti, he haurangi te tangata i te wairua, he nui hoki no tou kino, he nui no te mauahara. <sup>8</sup> He kaitutei a Eparaima, i toku Atua ia; ko te poropiti, he mahanga ia na te kaiahere manu i ona ara katoa, he mauahara i roto i te whare o tona Atua. <sup>9</sup> Kua heke to ratou tupu, a aua noa iho ki raro, e rite ana ki nga ra i Kipea: ka mahara ia ki to ratou he, ka tiroirohia e ia o ratou hara. <sup>10</sup> I toku

tutakinga ki a Iharaira, i rite ratou ki te karepe i te koraha; i toku kitenga i o koutou matua i rite ratou ki te matamua o te piki i te mea katahi nei ka hua; heoi haere ana ratou ki a Paarapeoro, na wehe ana ratou i a ratou ki taua han ga whakama, mea ana kia whakarihariha ratou kia rite ki ta ratou i matenui ai.

<sup>11</sup> Tena ko Eparaima, ka rere a manu atu to ratou kororia: kahore he mea e whanau, kahore he tamaiti i te kopu, a kahore he haputanga. <sup>12</sup> Ahakoa whakatupu noa ratou i a ratou tamariki, ka kore i ahau, a kore iho he tangata e mahue: ina, aue te mate mo ratou ua mahue ratou i ahau! <sup>13</sup> Ko Eparaima, rite tonu ki toku kitenga i Taira, he mea whakato ki te wahi pai: otiia ka kawea ana tama e Eparaima ki waho, ki te kaikohuru. <sup>14</sup> Hoatu ki a ratou, e Ihowa: ko te aha e hoatu e koe ki a ratou? hoatu ki a ratou he kopu whakatahe, he u maroke. <sup>15</sup> Kei Kirikara to ratou kino katoa; a kino iho ahau ki a ratou ki reira: ka he nei a ratou mahi, ka peia ratou e ahau i roto i toku whare; heoi ano oku aroha ki a ratou: he hunga whakakeke o ratou rangatira katoa. <sup>16</sup> Kua patua a Eparaima, kua maroke to ratou pakiaka, kore ake o ratou hua; ae ra, ahakoa whanau noa ratou, ka mate ano i ahau te mea e matenuitia ana, te hua o to ratou kopu. <sup>17</sup> Ka paopao toku Atua ki a ratou, mo ratou kihai i rongu ki a ia: a ka waiho ratou hei kopikopiko i roto i nga tauwiwi.

## Chapter 10

<sup>1</sup> He waina tupu wana a Iharaira, e whakaputa ana i ona hua: kua meinga e ia kia maha ana aata kia rite ki te maha o ona hua; kua hanga e ratou he whakapakoko whakapaipai rite tonu ki te pai o tona whenua. <sup>2</sup> Kua wehe rua o ratou ngakau, akuanei ka kitea to ratou he: ka wahia e ia a ratou aata, ka pahuatia a ratou whakapakoko. <sup>3</sup> He pono akuanei ratou ki ai, Kahore o tatou kingi: kahore hoki tatou i te wehi ki a Ihowa; a ko te kingi, ko te aha tana mo tatou? <sup>4</sup> E korero ana ratou i nga korero horihori, e oati teka ana i te mea e whakarite whakawa ana: na reira e rite ana te tupu o te whakawa ki to te hemoreke i nga moa o te mara. <sup>5</sup> Manukanuka tonu nga tangata o Hamaria ki nga kua o kau o Peteawene; ka tangihia hoki e tona iwi, e ona tohunga i whakamanamana nei ki a ia; mo tona kororia kua memeha atu nei i reira. <sup>6</sup> Ka kawea ano hoki taua kua ki Ahiria hei hakari ki a Kingi Iarepe: ka pa te whakama ki a Eparaima, ka whakama ano a Iharaira ki tana whakaaro i whakatakoto ai. <sup>7</sup> Na ko Hamaria, kua kore tona kingi, ano he pahuka i runga i te wai. <sup>8</sup> Ka whakakahoretia ano nga wahi tiketike o Awene, te hara o Iharaira; ka puta ake te tataramoa me te

tumatakuru ki runga ki a ratou aata, a ka mea ratou ki nga maunga, Taupokina matou; ki nga pukepuke, E hinga ki runga ki a matou.

9

E Ihairaira, he hara tou, mai ano i nga ra i Kipea: tu ana ratou i reira: kia kore ai ratou e mau

10

ki Kipea i te whawhai ki nga tama a te kino. Kia hiahia ahau, ka whiua ratou e ahau; ka huihui

11

ano nga iwi ki te whawhai ki a ratou, i a ratou ka herea nei ki o ratou he e rua. He kua o kau ano a Eparaima kua oti te whakaako, pai tonu ia ki te takahi witi; kua tika atu ia ahau i runga i tona kaki pai: ka meinga e ahau he kaieke mo Eparaima; ko Hura ki te parau, ko Hakopa ki te wawahi i ana

12

pokuru. Whakatokia ta koutou i runga i te tika, tapahia i runga i te mahi tohu; mahia ta koutou patohe: ko te wa hoki tenei e rapua ai a Ihowa, kia tae mai ra ano ia, kia ringihia ra ano e ia te tika

13

ki runga ki a koutou. Ko ta koutou i parau ai ko te kino, ko ta koutou i kokoti ai ko te he; ko ta koutou kai ko nga hua o te teka: nau hoki i whakawhirinaki ki tou ara, ki te tini o ou tangata

14

marohirohi. Mo reira ka ara he ngangau i roto i ou iwi, a ka pahuatia ou pa taiepa katoa, ka rite ki ta Haramana pahuatanga i Petearapere i te ra o te whawhai: ko te whaea, taia iho ratou ko nga

15

tamariki, mongamonga ana. Ko ta Peteere tenei e mea ai ki a koutou, he nui no to koutou kino: ka whakangaromia rawatia te kingi o Ihairaira i te atatu.

## Chapter 11

1

I a Ihairaira e tamariki ana i aroha ahau ki a ia i reira, a karangatia ana e ahau taku tama i Ihipa.

2

E karanga ana ratou i a ratou, e haere ke atu ana i a ratou: i patu whakahere ratou ki nga Paarimi,

3

i tahu whakakakara ano ki nga whakapakoko. Otiia naku a Eparaima i ako ki te haere; i hikitia

4

ratou e ahau ki runga ki oku ringa; heoi kihai ratou i mohio e rongoa ana ahau i a ratou. He taura tangata aku ki te kukume i a ratou, he here aroha: ko taku hoki ki a ratou ko ta te hunga e tango

5

ana i te ioka i o ratou kauae; i hoatu ano e ahau he kai ki mua i a ratou. E kore ia e hoki atu ki te

6

whenua o Ihipa; engari ko te Ahiriana hei kingi mona, mo ratou kihai i pai ki te hoki. Ka haua

7

iho te hoari ki runga ki ona pa, whakamoti ai i ona tutaki a pau ake; na o ratou whakaaro hoki. A kei te tohe taku iwi ki te tahuri ke i ahau: ahakoa karangatia ratou ki te mea i runga rawa, kahore tetahi o ratou e whakanui i a ia.

8

Me pehea koe ka hoatu whakarere ai e ahau, e Eparaima, me pehea ka tukua ai koe e ahau, e Ihairaira? Me pehea ka meinga ai koe e ahau kia rite ki Arema? me pehea ka waiho ai koe kia rite

ki Tepoimi? kua puta ke toku ngakau i roto i ahau, ngiha tah i ano oku konohinohitanga. <sup>9</sup> E kore  
 toku riri e mura nei e puta, e kore ahau e hoki ki te whakangaro i a Eparaima: ko te Atua hoki ahau,  
 ehara i te tangata, ko te Mea Tapu i waenganui i a koe: e kore ano ahau e tomo ki te pa. <sup>10</sup> Ka  
 whaia e ratou a Ihowa, a ka hamama ia ano he raiona: ka hamama hoki ia, a ka haere wiri mai nga  
 tamariki i te hauauru. <sup>11</sup> Ka rere wiri mai ratou i Ihipa ano he manu, i te whenua o Ahiria ano he  
 kukupa: ka whakanohoia ano hoki ratou e ahau ki o ratou whare, e ai ta Ihowa. <sup>12</sup> Kua oti ahau te  
 karapoti e Eparaima ki te teka, e te whare o Iharaira ki te tinihanga: engari a Hura kei runga i ta te  
 Atua tana tikanga: kei te Mea Tapu ia, pono tonu.

## Chapter 12

<sup>1</sup> Ko ta Eparaima kai ko te hau, e whaia ana e ia te hau marangai: i nga ra katoa e whakanuia  
 ana e ia te teka me te whakangaro; e whakarite kawenata ana ratou ki te Ahiriana, a e kawea ana  
 he hinu ki Ihipa. <sup>2</sup> Na he whakawa ta Ihowa ki a Hura, ka utaina ano e ia ki runga ki a Hakopa nga  
 mea rite ki ona ara; ka rite ki ana mahi tana utu ki a ia. <sup>3</sup> I roto i te kopu i hopukia e ia tona tuakana  
 ki te rekereke; a i a ia ka tangata i kaha ia ki te Atua; <sup>4</sup> Ae ra, i kaha ia ki te anahera, a taea ana e  
 ia: i tangi ia, i inoi ki a ia: i tutaki ia ki a ia ki Peteere, a korero ana ia ki a tatou i reira; <sup>5</sup> Ara a  
 Ihowa, te Atua o nga mano; ko Ihowa tona maharatanga. <sup>6</sup> Na reira tahuri koe ki tou Atua: puritia  
 te mahi tohu me te tika, tatari tonu ki tou Atua.  
<sup>7</sup> He kaihokohoko ia, kei tona ringa nga pauna tinihanga: e aroha ana ia ki te tukino. <sup>8</sup> I mea  
 ano a Eparaima, He pono kua whai taonga ahau, kua kitea e ahau he rawa moku: i aku mahi katoa  
 e kore e kitea e ratou he kino, ara he hara ki ahau. <sup>9</sup> Na ko Ihowa ahau, ko tou Atua, no te whenua  
 o Ihipa mai ra ano; tenei ake ka meinga ano koe e ahau kia noho teneti; kia pera me to nga ra o te  
 hakari nui. <sup>10</sup> Kua korero ano ahau ki nga poropiti, a kua whakamahangia e ahau nga whakakitenga;  
 na te mahi minita a nga poropiti i korero ai ahau i nga kupu whakarite. <sup>11</sup> Ko te hara ranei a Kireara?  
 ina, he mea teka kau ratou; e patu kau ana ratou ki Kirikara hei whakahere: ae ra, he rite a ratou  
 aata ki nga puranga i nga moa o nga mara. <sup>12</sup> I rere ano a Hakopa ki te mara a Arame, a mahi ana  
 a Iharaira hei utu wahine; hei utu wahine i tiaki hipi ai ia. <sup>13</sup> I kawea mai ano e Ihowa, ara e te  
 poropiti, a Iharaira i Ihipa, na te poropiti ano ia i ora ai. <sup>14</sup> I whakapataritari a Eparaima ki a ia,



kawa rawa: mo reira ka waiho e ia tona toto i runga i a ia, ka meinga ano tona ingoa kino e tona ariki kia hoki atu ki a ia.

### Chapter 13

<sup>1</sup> I te korerotanga a Eparaima, tera te tuiiri; i whakanui ake ia i a ia i roto i a Iharaira: engari, kei tona henga i roto i a Paara, ka mate ia. <sup>2</sup> Na inaianei kua neke ake to ratou hara, kua hanga e ratou ta ratou hiriwa hei whakapakoko whakarewa ma ratou, hei whakapakoko e rite ana ki ta ratou i matau ai, a ko taua mea katoa he mahi na nga kaimahi: e korerotia ana aua mea e ratou, Me kihi e nga tangata e mea patunga tapu ana, nga kua o kau. <sup>3</sup> Mo reira ka rite ratou ki te kapua o te ata, ki te tomairangi hoki e ngaro wawe atu nei, ki te papapa hoki e aia atu ana e te paroro i te patunga witi, a ki te paowa hoki o te tumere. <sup>4</sup> Ko Ihowa ano ia ahau, ko tou Atua, o te whenua mai ra ano o Ihipa; kua ano koe e mohio ki tetahi atua, ko ahau anake, kahore atu hoki he kaiwhakaora, ko ahau anake.

<sup>5</sup> I mohiotia tonutia koe e ahau i te koraha, i te whenua kahore rawa nei he wai. <sup>6</sup> Ko to ratou makonatanga rite tonu ki te wahi i kai ai ratou; i makona ratou, a whakakake ana o ratou ngakau; na wareware tonu iho ki ahau. <sup>7</sup> Na, ko taku ki a ratou, ka rite ki te raiona: ka tiaki ahau i te ara ano he reparo: <sup>8</sup> Ko toku tutakitanga ki a ratou ka rite ki to te pea kua tangohia nei ana kua o, ka haea hoki e ahau te taupa o o ratou ngakau; a hei reira ka kainga ratou e ahau ki te kai a te raiona; ka haehaea ratou e te kirehe o te parae.

<sup>9</sup> Ko tou whakangaromanga ia, e Iharaira, he hoariri koe ki ahau, ki tou kaiawhina. <sup>10</sup> Kei hea inaianei tou kingi, hei whakaora i a koe i roto i ou pa katoa? ou kaiwhakawa hoki, era i ki ra koe, Homai he kingi me etahi rangatira ki ahau? <sup>11</sup> Kua hoatu e ahau he kingi ki a koe i ahau e riri ana, a kua tangohia atu ia e ahau i ahau e aritarita ana. <sup>12</sup> Ko te he o Eparaima, takai rawa; ko tona hara, rongoa rawa. <sup>13</sup> Ka pa ki a ia nga mamae o te wahine e whakamamae ana: he tamaiti whakaarokore ia; he wa hoki tenei kia kua ia e whakaroa ki te wahi e pakaru mai ai nga tamariki. <sup>14</sup> Ka hokona ratou e ahau ki te kaha o te reinga, ka utua e ahau kei mate. E te mate, kei hea ou mate uruta? E te urupa, kei hea tau whakangaro? ka huna atu te ripeneta i oku kanohi. <sup>15</sup> Ahakoa whai hua ia i roto i ona teina, ka puta mai te hau, he marangai, ko te manawa o Ihowa e pa mai ana i te koraha, a ka maroke tona matapuna, ka mimiti tona manawawhenua: ka pahuatia e ia nga taonga o nga oko katoa e matenuitia ana. <sup>16</sup> Ka whakawaha e Hamaria tona hara; kua whakakeke hoki ia ki tona

Atua: ka hinga ratou i te hoari; ka taia iho a ratou tamariki, mongamonga ana, ka haehaea hoki a ratou wahine e hapu ana.

## Chapter 14

<sup>1</sup> Hoki mai, e Iharaira, ki a Ihowa, ki tou Atua: kua taka hoki koe i tou he. <sup>2</sup> Tikina etahi kupu ma koutou, tahuri mai hoki ki a Ihowa: mea atu ki a ia, Whakakahoretia katoatia atu te he, kia manako mai ki te mea pai: a ka hoatu e matou ano he puru te whakahere, ara o matou ngutu. <sup>3</sup> E kore matou e ora i a Ahuru; e kore matou e eke hoiho, a heoi ano a matou kianga atu ki te mahi a o matou ringa, Ko koutou o matou atua: e arohaina ana hoki te pani e koe.

<sup>4</sup> Ka rongoatia e ahau to ratou tahuri ke, ka aroha ahau ki a ratou, he mea utukore: no te mea kua tahuri toku riri i a ia. <sup>5</sup> Ko taku ki a Iharaira ka rite ki te tomairangi; ka rite tona tupu ki to te rengarenga, te totoro o ona pakiaka ka rite ki to Repanona. <sup>6</sup> Ka tautoro ona manga, ka rite tona ataahua ki to te oriwa, tona kakara ki to Repanona. <sup>7</sup> Ko te hunga e noho ana i raro i tona marumaruru ka hoki mai: ka ora ake ratou, ka pera me te witi, ka rite to ratou tupu ki to te waina: ko tona kakara ka rite ki to te waina o Repanona.

<sup>8</sup> Tera a Eparaima e ki, Hei aha ake maku nga whakapakoko? kua rongo ahau ki a ia, kua kite i a ia; ko toku rite kei te kauri matomato. Ka kitea ki ahau he hua mou. <sup>9</sup> Ko wai te mea whakaaro nui hei matau ki enei mea? ko wai te mea tupato e mohiotia ai? tika tonu hoki nga ara a Ihowa, a ka haere te hunga tika i reira, ka taka ia te hunga he i reira.

## Joel

### Chapter 1

<sup>1</sup> Ko te kupu a Ihowa i puta mai ki a Hoera tama a Petuere. <sup>2</sup> Whakarongo ki tenei, e nga kaumatua, kia whai taringa, e nga tangata katoa o te whenua. I o koutou ra ranei tenei, i nga ra ranei o o koutou matua? <sup>3</sup> Korerotia taua mea ki a koutou tamariki, ma a koutou tamariki ano hoki e korero ki a ratou tamariki, a ma a ratou tamariki e korero ki tetahi atu whakatupuranga. <sup>4</sup> Ko te toenga a te whangawhanga pau ake i te mawhitiwhiti; ko te toenga a te mawhitiwhiti pau ake i te

5  
tatarakihi: a ko te toenga a te tatarakihi pau ake i te moka. E ara, e te hunga haurangi, e tangi; aue, e nga kaiinu waina katoa, ki te waina hou; kua whakakorea nei hoki ma o koutou mangai.

6  
Kei te haere mai tetahi iwi ki toku whenua, he kaha, e kore e taea te tatau: ko ona niho he niho raiona, he niho purakau ona no te raiona katua. 7  
Kore ake i a ia taku waina, ko taku piki tihorea ake e ia: poto rawa te peha i a ia, akiri rawa; ko ona manga meinga ana kia ma.

8  
E tangi, kia rite ki te tamahine kua oti te whitiki ki te kakahu taratara, e tangi ana ki te makau o tona tamahinetanga. 9  
Kua whakakahoretia te whakahere totokore me te ringihanga i roto i te whare o Ihowa; kei te tangi nga tohunga, nga minita a Ihowa. 10  
Kua he te mara, kei te tangi te

11  
oneone; no te mea kua mate te witi, kua maroke te waina hou, kua kahakore te hinu. Kia whakama, e nga kaingaki whenua; aue, e nga kaimahi waina, mo te witi, mo te parei; kua kore nei hoki nga

12  
hua o te mara. Kua maroke te waina, kua putokitoki te piki; ko te pamekaranete, ko te nikau, ko te aporo, ko nga rakau katoa o te whenua, kua maroke: kua maroke nei hoki te koa i roto i nga

13  
tamariki a te tangata. Tatua i a koutou ki te kakahu taratara, e tangi, e koutou e nga tohunga; aue, e nga minita o te aata: haere mai, hei te mea taratara he kakahu mo koutou i te po, e nga minita o toku Atua: kua kore nei hoki te whakahere totokore me te ringihanga i roto i te whare o to koutou Atua.

14  
Whakatapua he nohopuku, karangatia he hui nui, whakaminea nga whenua, ki te whare o Ihowa, o to koutou Atua, ka karanga ki a Ihowa. 15  
Aue, te mate o taua ra nei! kua tata hoki te ra

16  
o Ihowa, ka rite hoki tona putanga mai ki te whakangaromanga a te Kaha Rawa. He teka ianei kua hatepea atu te kai i mua atu i o tatou kanohi, ae ra, te koa, me te whakamanamana i roto i te

17  
whare o to tatou Atua? Kua pirau te purapura i raro i nga pokurukuru; kua takoto kau nga whare kai, kua pakarukaru nga whare witi; no te mea kua ngingio te witi. 18  
Ano te aue o nga kararehe!

19  
raruraru ana nga kahui kau i te kore wahi kai ma ratou; ae ra, ko nga kahui hipi he noa iho. E Ihowa, ka karanga ahau ki a koe: kua pau hoki i te ahi nga wahi kai o te koraha, kua wera i te mura

20  
nga rakau katoa o te parae. Ae ra, kei te tangi hoki nga kararehe o te parae ki a koe: no te mea kua maroke nga awa wai, kua pau hoki i te ahi nga wahi kai o te koraha.

## Chapter 2

<sup>1</sup> Whakatangihia te tetera ki Hiona; hei whakaoho ki toku maunga tapu, kia wiri nga tangata  
 katoa o te whenua: kei te haere mai hoki te ra o Ihowa, kua tata; <sup>2</sup> He ra pouri, he ra tukupu, he ra  
 kapua, he pouri kerekere, ano ko te ata kua horapa noa atu i runga i nga maunga; he iwi nui, kaha,  
 kahore ona rite i mua, kahore hoki he pera i nga wa i muri a taea noatia nga tau o nga whakatupuranga  
<sup>3</sup> maha. I mua i a ratou ko te ahi e kai ana, i muri i a ratou ko te mura e ngiha ana; ko te whenua i  
 mua i a ratou me te mea ko te kari o Erene, a i muri i a ratou he koraha ururua; ae ra, kahore he  
<sup>4</sup> mea i puta i a ratou. Ko to ratou ahua kei to nga hoiho; ko ta ratou oma rite tonu ki ta te kaieke  
<sup>5</sup> hoiho. E peke ana ratou ano ko te haruru o nga hariata i runga i nga tihi o nga maunga, ano ko te  
 haruru o te mura ahi e kai ana i te kakau witi, ki te iwi kaha kua oti te whakararangi mo te whawhai.  
<sup>6</sup> Ka mamae nga iwi i to ratou aroaro: ka koma nga kanohi katoa. <sup>7</sup> Ko ta ratou oma rite tonu ki ta  
 nga marohirohi; ko ta ratou piki i te taiepa rite tonu ki ta nga tangata whawhai; haere tonu ratou i  
<sup>8</sup> tona ara, i tona ara, kahore o ratou ara e korara. Kahore tetahi e tutetute i tona hoa; ka haere ratou  
 i tona ara, i tona ara; a ka huaki ratou ma roto i nga rakau o te riri, a kahore e tapeka i to ratou ara.  
<sup>9</sup> Ka peke ratou ki runga ki te pa; ka oma ratou i runga i te taiepa; ka piki ratou ki roto ki nga whare;  
<sup>10</sup> ka tomo ratou i nga matapihi, ano he tahae. Ru ana te whenua i to ratou aroaro; wiri ana nga  
<sup>11</sup> rangi: ko te ra me te marama, pouri tonu, ka mutu ano te titi o nga whetu. Na ka puaki te reo o  
 Ihowa i te aroaro o tana ope: nui atu hoki tana puni: he kaha hoki ia e mahi nei i tana kupu: he nui  
 nei hoki te ra o Ihowa, he wehi rawa; ko wai e kaha ake ki reira?  
<sup>12</sup> Otiia inaianei nei ano, e ai ta Ihowa, tahuri koutou ki ahau, o koutou ngakau katoa, i runga  
<sup>13</sup> ano i te nohopuku, i te tangi, i te aue: Haea hoki o koutou ngakau, haunga o koutou kakahu, a  
 tahuri ki a Ihowa, ki to koutou Atua: he aroha hoki tona, he mahi tohu, he puhoi ki te riri, he nui  
<sup>14</sup> tona atawhai, a e ripeneta ana ia ki te kino. Ko wai ka tohu, tera pea ka tahuri, ka puta ke ona  
 whakaaro, a ka mahue he manaaki i muri i a ia, ara he whakahere totokore, he ringihanga ma Ihowa,  
 ma to koutou Atua? <sup>15</sup> Whakatangihia te tetera ki Hiona, whakatapua he nohopuku, karangatia he  
<sup>16</sup> hui nui; Whakaminea te iwi, whakatapua te whakaminea, tawhiua mai nga kaumatua,  
 whakaminea nga tamariki, ratou ko nga mea ngote u: kia puta te tane marena hou i roto i tona ruma,  
<sup>17</sup> te wahine marena hou i roto i tona whare moenga. Kia tangi nga tohunga, nga minita a Ihowa,  
 ki te takiwa o te whakamahau, o te aata, me te ki atu ano, Tohungia, e Ihowa, tau iwi, kua ano tou  
 kainga tupu e tukua ki te ingoa kino, kia meinga ko nga tauwiwi hei rangatira mo ratou: kia korerotia  
 h ei aha i roto i nga iwi, Kei hea to ratou Atua?

18 Katahi ka hae a Ihowa ki tona whenua, ka manawapa ki tana iwi. 19 A ka whakahoki mai a Ihowa, ka ki mai ki tana iwi, Tenei ahau te tuku atu nei i te witi ki a koutou, i te waina, i te hinu, e makona ai koutou; e kore ano e tuku i a koutou a muri nei hei ingoa kino i roto i nga tauwiwi:

20 Engari ka mea ahau kia matara atu i a koutou te ope o te raki, ka aia atu ano ia e ahau ki te whenua waikore, maroke rawa; ko tona mata, anga tonu ki te moana i te rawhiti, ko tona tuara ki te moana i te uru; a ka puta ake tona piro, ka puta ake ano tona haunga kino, he nui hoki no ana mahi. 21 Kaua e wehi, e te oneone; whakamanamana, kia koa; no te mea he nunui nga mahi a Ihowa. 22 Kaua e wehi, e nga kararehe o te parae; ka pihi hoki nga tarutaru o te koraha, ka hua te rakau i ona hua, e tukua mai ano tona kaha e te piki, e te waina. 23 Na whakamanamana, e nga tama a Hiona, kia koa ki a Ihowa, ki to koutou Atua: ka tika hoki tana homai i to mua ua ki a koutou, a ka meinga e ia te ua, to mua ua, me to muri ua, kia heke iho ma koutou i te marama tuatahi. 24 A ka kapi nga patunga witi i te witi; ko te waina ano me te hinu o nga waka, purena tonu. 25 A ka whakahokia mai e ahau ki a koutou nga tau i kainga e te mawhitiwhiti, e te tatarakihi, e te moka, e te whangawhanga, e taku ope nui i tukua atu e ahau ki a koutou. 26 Ka kai noa atu ano koutou, ka makona, ka whakamoemiti hoki ki te ingoa o Ihowa, o to koutou Atua, mo tana mahi whakamiharo ki a koutou: e kore ano taku iwi e whakama a ake ake. 27 A ka mohio koutou kei waenga ahau i a Iharaira, ko Ihowa hoki ahau, ko to koutou Atua, kahore atu hoki: e kore ano taku iwi e whakama a ake ake.

28 Na, tenei ake ka ringihia e ahau toku wairua ki nga kikokiko katoa, a e poropiti a koutou tama, a koutou tamahine, ka moemoea o koutou kaumatua, a ka kitea te kitenga e a koutou taitamariki. 29 I aua ra ano ka ringihia e ahau toku wairua ki nga pononga tane, ki nga pononga wahine. 30 Ka hoatu ano e ahau he mea whakamiharo i te rangi, i te whenua, he toto, he kapura, he pou paowa. 31 Ka rere ke te ra, ka pouri, ka whakatoto te marama, i te mea kiano i puta mai te ra nui, te ra wehi o Ihowa. 32 Na, ko te hunga katoa e karanga ana ki te ingoa o Ihowa, ka mawhiti: no te mea hei Maunga Hiona, hei Hiruharama, etahi e mawhiti ana, pera me ta Ihowa i ki ai, a i roto ano i nga morehu etahi e karangatia ana e Ihowa.

### Chapter 3

1 No te mea, nana, i aua ra, i taua wa e whakahokia ai e ahau a Hura raua ko Hiruharama i te whakarau, 2 Ka huihuia e ahau nga iwi katoa, ka kawea ki raro ki te raorao o Iehohapata; a ka tohe

ahau ki a ratou ki reira mo taku iwi, mo toku kainga tupu, mo Iharaira i whakamararatia nei e ratou  
 ki roto ki nga iwi, a wawahia ana e ratou toku whenua. <sup>3</sup> A kua maka rota ratou mo taku iwi; a kua  
 hoatu e ratou te tama hei utu mo te wahine kairau, a kua hokona e ratou he kotiro ki te waina, hei  
 inu ma ratou. <sup>4</sup> Ae ra, he aha koutou ki ahau, e Taira, e Hairona, e nga rohe katoa o Pirihitia? e  
 homai ranei e koutou he utu ki ahau? na ki te homai e koutou he utu ki ahau, hohoro tonu, kakama  
 tonu taku whakahoki i te utu ki runga ki to koutou mahunga. <sup>5</sup> Mo koutou i tango i taku hiriwa, i  
 taku koura, a kawea ana e koutou aku mea pai e matenuitia ana ki roto ki o koutou temepara; <sup>6</sup> A  
 hokona ana e koutou nga tama a Hura, nga tama o Hiruharama, ki nga tama a nga Kariki, kia matara  
 atu ai ratou i to ratou rohe: <sup>7</sup> Nana, ka ara mai ratou i ahau i te wahi i hokona atu ai ratou e koutou,  
 ka meinga ano e ahau kia hoki to koutou utu ki runga ki o koutou mahunga; <sup>8</sup> Ka hokona ano e  
 ahau a koutou tama, a koutou tamahine, ki te ringa o nga tama a Hura, a ma ratou e hoko ki nga  
 tangata o Hepa, ki te iwi i tawhiti: na Ihowa hoki te kupu.  
<sup>9</sup> Karangatia tenei e koutou i roto i nga tauwiwi; kia rite nga mea mo te whawhai, whakaohokia  
 nga marohirohi, kia whakatata mai nga tangata whawhai katoa, kia haere mai ratou. <sup>10</sup> Patupatua  
 a koutou hea parau hei hoari, a koutou toronaihi hei tao; me ki ake te ngoikore, He kaha ahau.  
<sup>11</sup> Kia hohoro, ka haere mai, e nga tauwiwi katoa tawhio noa, ka huihui i a koutou: meinga kia heke  
 iho au marohirohi ki reira, e Ihowa. <sup>12</sup> Kia whakaohokia nga tauwiwi, kia haere hoki ratou ki te  
 raorao o Iehohapata: ka noho hoki ahau ki reira ki te whakawa mo nga tauwiwi katoa a taka noa.  
<sup>13</sup> Kuhua te toronaihi ki roto, kua pakari hoki te witi: haere mai, takahia; kua ki hoki te poka waina,  
 purena tonu nga waka waina; he nui hoki to ratou kino. <sup>14</sup> He tini, he tini whaioio kei te raorao  
 whakaoti tikanga! kua tata nei hoki te ra o Ihowa i te raorao whakaoti tikanga. <sup>15</sup> Ka pouri te ra  
 me te marama, ka kore ano te titi o nga whetu. <sup>16</sup> A ka hamama a Ihowa i Hiona, ka puaki tona  
 reo i Hiruharama; a ka wiri nga rangi me te whenua; otira ko Ihowa he piringa mo tona iwi, he pa  
 kaha mo nga tama a Iharaira. <sup>17</sup> A ka mohio koutou ko Ihowa ahau, ko to koutou Atua e noho nei  
 i Hiona, i toku maunga tapu: katahi a Hiruharama ka tapu, a heoi ano haereerenga o nga tautangata  
 i reira.  
<sup>18</sup> I taua ra ka maturuturu iho te waina hou o nga maunga, ka rerengia nga pukepuke e te waiu,  
 ka rere nga wai o nga awa katoa o Hura; a ka pupu mai he puna i roto i te whare o Ihowa, hei  
 whakamakuku i te raorao o Hitimi. <sup>19</sup> Hei ururua a Ihipa, hei koraha a Eroma, ururua rawa, mo te  
 mahi tutu ki nga tama a Hura, mo ta ratou whakaheke i te toto harakore ki to ratou whenua. <sup>20</sup> Ka

noho tonu ia a Hura ake ake, a Hiruharama, a tera whakatupuranga, tera whakatupuranga. <sup>21</sup> Ka  
ma ano i ahau to ratou toto kihai i ma i ahau: e noho ana hoki a Ihowa ki Hiona.

## Amos

### Chapter 1

<sup>1</sup> Ko nga kupu a Amoho, a tetahi o nga kaitiaki hipi o Tekoa, ko tana i kite ai mo Iharaira i nga  
ra o Utia kingi o Hura, i nga ra hoki o Ieropoama tama a Ioaha, kingi o Iharaira, e rua nga tau i mua

ake o te ru. <sup>2</sup> A i mea ia, Ka hamama a Ihowa i Hiona, ka puaki hoki tona reo i Hiruharama; a ka  
tangi nga haerenga hipi a nga hepara, ka maroke hoki te tihi o Karamere.

<sup>3</sup> Ko te kupu tenei a Ihowa: Ka toru nei nga pokanga ketanga o Ramahiku, ae ra, ka wha, na e  
kore e whakatahuritia atu e ahau te whiu mona; kua patua a wititia hoki e ratou a Kireara ki nga

patu rino: <sup>4</sup> Engari ka tukua atu e ahau he ahi ki te whare o Hataere, a ka pau i reira nga whare

kingi o Peneharara. <sup>5</sup> A ka whati i ahau te tutaki tatau o Ramahiku, ka hatepea atu hoki te tangata  
noho o te raorao o Awene, me te kaupupuri hepeta o te whare o Erene: ka whakaraua atu ano te iwi

o Hiria ki Kiri, e ai ta Ihowa. <sup>6</sup> Ko te kupu tenei a Ihowa: Ka toru nei nga pokanga ketanga o Kaha,  
ae ra, ka wha, na e kore e whakatahuritia atu e ahau te whiu mona: no te mea i whakaraua e ratou

te iwi katoa, hei tuku atu ma ratou ki Eroma. <sup>7</sup> Engari ka tukua atu e ahau he ahi ki te taiepa o Kaha,

a ka pau i reira ona whare kingi. <sup>8</sup> A ka hatepea atu e ahau te tangata noho o Aharoro, me te kaupupuri  
hepeta i Ahakerono; ka tahuri hoki toku ringa ki Ekerono, a ka ngaro te morehu o nga Pirihitini, e

ai ta te Ariki, ta Ihowa. <sup>9</sup> Ko te kupu tenei a Ihowa: Ka toru nei nga pokanga ketanga o Taira, ae  
ra, ka wha, na e kore e whakatahuritia atu e ahau te whiu mona; no te mea i tukua e ratou te iwi

katoa ki Eroma, a kihai i mahara ki te kawenata a te tuakana ki te teina. <sup>10</sup> Engari ka tukua atu e

ahau he ahi ki te taiepa o Taira, a ka pau i reira ona whare kingi. <sup>11</sup> Ko te kupu tenei a Ihowa: Ka  
toru nei nga pokanga ketanga o Eroma, ae ra, ka wha, na e kore e whakatahuritia atu e ahau te whiu  
mona; no te mea i whaia e ia tona teina ki te hoari, a maka atu ana e ia te aroha katoa, heoi haehae

tonu tona riri, rongoa tonu ia i tona riri a ake ake. <sup>12</sup> Engari ka tukua e ahau he ahi ki Temana, a

pau ake i reira nga whare kingi o Potora. <sup>13</sup> Ko te kupu tenei a Ihowa: Ka toru nei nga pokanga  
ketanga o nga tama a Amona, ae ra, ka wha, na e kore e whakatahuritia atu e ahau te whiu mona;

no te mea kua pipiripia e ratou nga wahine hapu o Kireara, he mea kia nui ake ai te rohe ki a ratou.

<sup>14</sup>

Engari ka ngiha i ahau he ahi ki runga ki te taiepa o Rapa, a ka pau i reira ona whare kingi, i runga i te hamama i te ra o te whawhai, i te paroro i te ra o te tukauati. <sup>15</sup> A ka riro to ratou kingi i te whakarau, ratou tahi ko ana rangatira, e ai ta Ihowa.

## Chapter 2

<sup>1</sup>

Ko te kupu tenei a Ihowa: Ka toru nei nga pokanga ketanga o Moapa, ae ra, ka wha, na e kore e whakatahuritia atu e ahau te whiu mona; no te mea nana i tahu nga wheua o te kingi o Eroma hei

<sup>2</sup>

kotakota. Engari ka tukua atu e ahau he ahi ki Moapa, a ka pau i reira nga whare kingi o Kirioto;

<sup>3</sup>

a ka mate a Moapa i runga i te ngangau, i te hamama, i te tangi o te tetere. A ka hatepea atu e ahau te kaiwhakawa i roto i a ia, ka patua ratou tahi ko nga rangatira katoa o reira, e ai ta Ihowa.

<sup>4</sup>

Ko te kupu tenei a Ihowa: Ka toru nei nga pokanga ketanga o Hura, ae ra, ka wha, na e kore e whakatahuritia atu e ahau te whiu mona; no te mea kua whakahawea ratou ki te ture a Ihowa, kihai hoki i pupuri i ana tikanga, a kua meinga ratou e a rato u korero teka kia kotiti ke, i whaia nei e o

<sup>5</sup>

ratou matua. Engari ka tukua e ahau he ahi ki a Hura, a pau ake i reira nga whare kingi o

<sup>6</sup>

Hiruharama. Ko te kupu tenei a Ihowa: Ka toru nei nga pokanga ketanga o Iharaira, ae ra, ka wha, na e kore e whakatahuritia atu e ahau te whiu mona; no te mea kua hokona e ratou te tangata

<sup>7</sup>

tika ki te hiriwa, te rawakore ki nga hu e rua. E minamina ana ratou ki te puehu o te whenua i runga i te mahunga o nga ware: a whakaparoritia ake e ratou te ara o te hunga mahaki: a ka haere

<sup>8</sup>

te tangata raua ko tona papa ki te kotiro kotahi hei whakapoke i toku ingoa tapu. Na takoto ana ratou ki te taha o nga aata katoa i runga i nga kakahu i homai hei taunaha, a i roto i te whare o to ratou atua kei te inu ratou i te waina a te hunga i whakataua nei te he ki a ratou.

<sup>9</sup>

Otiia i whakangaromia e ahau te Amori i to ratou aroaro, ko tona roa koia ano kei te roa o te hita, a he kaha ia, pera i nga oki: heoi whakangaromia ana e ahau ona hua i runga, ona pakiaka i

<sup>10</sup>

raro. I kawea mai ano hoki koutou e ahau i te whenua o Ihipa, a e wha tekau nga tau i arahina

<sup>11</sup>

ai koutou i te koraha, he mea kia riro mai ai te whenua o te Amori. A i whakaarahia ake e ahau etahi o a koutou tama hei poropiti, etahi hoki o a koutou taitama hei Natari. He teka ianei tena, e

<sup>12</sup>

nga tama a Iharaira? e ai ta Ihowa. Heoi i whakainumia e koutou nga Natari ki te waina, a i ako

<sup>13</sup>

hoki ki nga poropiti, i mea, Kaua e poropiti. Nana, ka pehia koutou e ahau ki to koutou wahi,



ka pera i te pehanga a te kata e ki ana i nga paihere. <sup>14</sup> Na ka kore te oma i te tangata tere, e kore  
 e nui ake te kaha o te tangata kaha, e kore hoki te marohirohi e mawhiti i te mate: <sup>15</sup> E kore ano  
 te kaipupuri o te kopere e tu; e kore hoki te wae tere e whakaora i a ia ano: e kore ano hoki te tangata  
 eke hoiho e mawhiti i te mate. <sup>16</sup> A, ko te tangata maia i roto i nga marohirohi, ka rere tahanga atu  
 i taua ra, e ai ta Ihowa.

### Chapter 3

<sup>1</sup> Whakarongo ki tenei kupu i korerotia e Ihowa mo koutou, e nga tama a Iharaira, mo te kapu  
 katoa i kawea mai e ahau i te whenua o Ihipa, i mea ahau, <sup>2</sup> Ko koutou anake taku i mohio ai o nga  
 hapu katoa o te ao: mo reira ka whiua koutou e ahau mo o koutou he katoa. <sup>3</sup> E haere tahi ano ranei  
 te tokorua, ki te kore e whakaae ki a raua? <sup>4</sup> E hamama ranei te raiona i te ngahere i te mea kahore  
 ana tupapaku? e tangi ranei te reo o te kua o raiona i tona kuhunga, ki te kore tetahi mea e mau i a  
 ia? <sup>5</sup> E taka ranei te manu ki roto ki te mahanga i runga i te whenua i te mea kahore he ahere mona?  
 e mokowhiti ake ranei te mahanga i te oneone, a hore rawa he mea e mau? <sup>6</sup> E tangi ranei te tetere  
 i roto i tetahi pa, a kahore te iwi e wehi? e puta ranei he kino ki te pa, a ehara i a Ihowa nana i mahi?  
<sup>7</sup> He pono e kore te Ariki, a Ihowa, e mahi i tetahi mea, engari ka whakakitea e ia tona whakaaro  
 huna ki ana pononga, ki nga poropiti. <sup>8</sup> Kua hamama te raiona, ko wai e kore e wehi? kua korero  
 a Ihowa, te Ariki, ko wai e kore e poropiti?  
<sup>9</sup> Panuitia atu i roto i nga whare kingi i Aharoro, i nga whare kingi hoki i te whenua o Ihipa,  
 mea atu, Whakamine i a koutou ki runga ki nga maunga o Hamaria, ka matakitaki ki nga ngangau  
 nui i waenga o reira, ki nga tukinotanga hoki i waenga o rei ra. <sup>10</sup> Kahore hoki ratou e mohio ki te  
 mahi i te tika, e ai ta Ihowa, e rongoa nei ratou i te mahi tutu me te pahua i roto i o ratou whare  
 kingi. <sup>11</sup> Mo reira ko te kupu tenei a te Ariki, a Ihowa: He hoariri tera, ka karapotia e ia te whenua:  
 a ka riro iho i a ia tou kaha, ka pahuatia hoki ou whare kingi. <sup>12</sup> Ko te kupu tenei a Ihowa: Ka rite  
 ki te hepara e tango mai nei i nga waewae e rua i te mangai o te raiona, i tetahi wahi ranei o te  
 taringa; ka pena ano te tangohanga mai o nga tama a Iharaira e noho ra i Hamaria i te pito o te  
 moenga, i runga hoki i nga urunga o tetahi moenga. <sup>13</sup> Whakarongo koutou, whakaaturia hoki he  
 he mo te whare o Hakopa, e ai ta te Ariki, ta Ihowa, ta te Atua o nga mano. <sup>14</sup> No te mea hei te ra

e pa ai taku ki a Iharaira mo ona poka ke, ka pa ano hoki taku ki nga aata o Peteere, a ka poutoa  
 15  
 nga haona o te aata, ka taka ki te whenua. Ka patua ano e ahau te whare hotoke me te whare  
 raumati; a ka moti nga whare rei, ka kore nga whare nunui, e ai ta Ihowa.

## Chapter 4

1  
 Whakarongo ki tenei kupu, e nga kau o Pahana, i te maunga o Hamaria, e whakatupu kino  
 na i nga ware, e kuru na i nga rawakore, e mea na ki o ratou ariki, Kawea mai, kia inu tatou. 2  
 Kua  
 oatitia tona tapu e te Atua, e Ihowa, nana, kei te haere mai nga ra ki a koutou e mauria ai koutou e  
 ratou ki te matau, o koutou whakamutunga ki te matau ika. 3  
 Ka haere atu ano koutou na nga pakaru,  
 na nga wahi e hangai mai ana ki tenei, ki tenei; a ka akiri koutou i a koutou ki Haramona, e ai ta  
 Ihowa. 4  
 Haere mai ki Peteere, ki reira poka ke ai; ki Kirikara whakanui ai i te poka ke; kawea mai  
 ano a koutou patunga tapu i tenei ata, i tenei ata, a koutou whakatekau, i te toru o nga ra. 5  
 Tapaea  
 ano he whakahere whakawhetai, he mea kinaki ki te rewena, kauwhautia hoki, karangarangatia nga  
 whakahere noa ake: ko ta koutou hoki tenei i pai ai, e nga tama a Iharaira, e ai ta te Ariki, ta Ihowa.  
 6  
 I tukua ano e ahau he parakore mo nga niho ki a koutou i roto i o koutou pa katoa, he tarokore  
 ki o koutou wahi katoa; heoi kihai koutou i tahuri ki ahau, e ai ta Ihowa. 7  
 I kaiponuhia ano e ahau  
 te ua ki a koutou i te mea kia toru ake marama ko te kotinga witi: i meinga ano e ahau kia ua ki  
 runga ki tetahi pa, a ki tetahi pa i mea ahau kia kaua e ua: ko tetahi wahi i uaina, a ko te wahi kihai  
 i uaina, maroke noa i ho. 8  
 Na kopiko atu ana etahi pa e rua, e toru, ki te pa kotahi ki te inu wai, a  
 kore ake i makona; otia kihai koutou i hoki mai ki ahau, e ai ta Ihowa. 9  
 Kua patua koutou e ahau  
 ki te ngingio, ki te koriri: nui noa a koutou kari, a koutou mara waina, a koutou piki, a koutou oriwa,  
 pau ake i te whangawhanga: heoi kihai koutou i hoki mai ki ahau, e ai ta Ihowa. 10  
 I tukua e ahau  
 te mate uruta ki a koutou, he pera tonu me to Ihipa: ko a koutou taitama he mea patu naku ki te  
 hoari, ko a koutou hoiho riro ana i ahau, a meinga ana e ahau te piro o to koutou puni kia kake ake  
 ki o koutou ihu rawa; heoi kihai k outou i hoki mai ki ahau, e ai ta Ihowa. 11  
 I hurihia etahi o koutou  
 e ahau ki raro, i peratia me ta te Atua hurihanga i Horoma, i Komora, a rite tonu koutou ki te mounga  
 i kapohia mai i roto i te weranga: heoi kihai koutou i hoki mai ki ahau, e ai ta Ihowa. 12  
 Mo reira  
 ka meatia tenei e ahau ki a koe, e Iharaira, Ka meinga nei tenei e ahau ki a koe, na kia rite ou mea  
 mo tou tutaki ki tou Atua, e Iharaira. 13  
 No te mea, na, ko te kaiwhakaahua o nga maunga, e hanga

nei i te hau, e whakaatu nei ki te tangata i tana i whakaaro ai, e mea nei i te ata kia pouri, a e haere ana i runga i nga wahi tiketike o te whenua; ko Ihowa, ko te Atua o nga mano tona in goa.

## Chapter 5

<sup>1</sup> Whakarongo ki tenei kupu, kua maranga nei i ahau hei tangi ki a koutou, e te whare o Iharaira.

<sup>2</sup> Kua hinga te wahine a Iharaira; e kore ia e ara i muri: kua whakataka ia ki runga ki tona oneone; kahore he mea hei whakaara ake i a ia. <sup>3</sup> No te mea ko te kupu tenei a te Ariki, a Ihowa; Ko te pa kotahi nei te mano i te haerenga atu, kotahi rau e toe, a ko tera kotahi nei te rau i te haerenga atu, kotahi tekau e toe ki te whare o Iharaira.

<sup>4</sup> Ko te kupu hoki tenei a Ihowa ki te whare o Iharaira, Rapua ahau, kia ora ai koutou. <sup>5</sup> Otiia kua e rapu i Peteere, kua e haere ki Kirikara, kua ano e haere ki Peerehepa: no te mea tera a Kirikara ka riro i te whakarau, a hei kore noa iho a Peteere. <sup>6</sup> Rapua a Ihowa, a ka ora koutou; kei toro atu ia, ano he ahi, i roto i te whare o Hohepa, a pau noa, a kore noa iho he kaitinei i roto i Peteere. <sup>7</sup> E te hunga i puta ke ai te whakawa hei taru kawa, i taia ai te tika ki te whenua; <sup>8</sup> Rapua te kaihanga o matariki, o Tautoru; e riro ke ana i a ia te atarangi o te mate hei ata, e whakapouritia ana e ia te ra hei po; e karangatia ana e ia nga wai o te moana, a ringihia ana e ia ki runga ki te mata o te whenua: ko Ihowa tona ingoa: <sup>9</sup> Nana i whakaputa ohore te whakangaromanga ki te hunga kaha, i tae ai te whakangaromanga ki te pa kaha. <sup>10</sup> E kinongia ana e ratou te kairiri he i te kuwaha, a he mea whakarihariha ki a ratou te tangata korero tika. <sup>11</sup> Na, i te mea he takahi ta koutou i te ware, he tango i te takoha witi i a ia; he whare kohatu tarai ta koutou i hanga ai, na e kore e nohoia e koutou; he mara waina e minaminatia ana ta koutou i whakato ai, otiia e kore te waina o aua mara e inu mia e koutou. <sup>12</sup> E mohiotia ana hoki e ahau te maha o o koutou poka ke, me te kaha o o koutou hara: o koutou, e whakatupu kino nei i te tangata tika, e tango nei i te utu whakapati, e whakangau ke nei i ta te rawakore i te kuwaha. <sup>13</sup> Mo reira ka whakarongo puku te tangata tupato i taua wa; no te mea he wa kino. <sup>14</sup> Rapua te pai, kauaka hoki te kino, kia ora ai koutou: penei ko Ihowa, ko te Atua o nga mano hei hoa mo koutou, hei pena ano me ta koutou e ki na. <sup>15</sup> Kinongia te kino, arohaina te pai, whakapumautia te whakawa ki te kuwaha: tera pea a Ihowa, te Atua o nga mano, ka aroha ki te toenga o Hohepa.

<sup>16</sup> Mo reira tenei kupu a Ihowa, a te Atua o nga mano, a te Ariki, I nga waharoa katoa ko te tangi; ko ta ratou kupu i nga huarahi katoa, Aue! aue! ka karangatia te kaingaki whenua ki te tangi,

me te hunga matau ki te uhunga, hei aue. <sup>17</sup> A he aue i nga mara waina katoa: ka tika atu hoki ahau  
i waenganui i a koe, e ai ta Ihowa. <sup>18</sup> Aue, te mate mo koutou e hiahia nei ki te ra o Ihowa! Hei  
aha ma koutou te ra o Ihowa? he pouri hoki, ehara i te marama. <sup>19</sup> Ka pera me te tangata i rere atu  
i te aroaro o te raiona, a ka tutaki te pea ki a ia; i haere ranei ki roto ki te whare, a okioki atu ana  
tona ringa ki te pakitara, na ngaua iho ia e te nakahi. <sup>20</sup> He teka ianei tera e pouri te ra o Ihowa, e  
kore e marama? tera e pouri kerekere, kahore hoki he marama i roto?  
<sup>21</sup> E kino ana ahau, e whakarihariha ana ki a koutou hakari, a e kore ahau e ahuaureka ki a koutou  
huihui nunui. <sup>22</sup> Ae ra, ahakoa whakaeke noa koutou i nga tahunga tinana, i a koutou whakahere  
totokore ki ahau, e kore e manakohia e ahau: e kore ano e tirohia e ahau nga whakahere mo te pai,  
ara a koutou mea momona. <sup>23</sup> Maua atu kia matara i ahau te ngangau o au waiata; e kore hoki ahau  
e whakarongo ki te rangi o au hatere. <sup>24</sup> Engari kia huri mai te whakawa ano he wai, te tika ano  
he awa nui. <sup>25</sup> I kawea mai koia e koutou ki ahau he patunga tapu, he whakahere totokore, e te  
whare o Iharaira, i te koraha, i nga tau e wha tekau? <sup>26</sup> Ae ra, kua maua e koutou a Hikutu, to  
koutou kingi, a Kiunu hoki, a koutou whakapakoko, te whetu o to koutou atua, i hanga nei e koutou  
ma koutou. <sup>27</sup> Na ka whakaraua koutou e ahau ki ko atu i Ramahiku, e ai ta Ihowa nona nei te  
ingoa, Ko te Atua o nga mano.

## Chapter 6

<sup>1</sup> Aue, te mate mo te hunga e noho humarie ana i Hiona, mo te hunga hoki e whakawhirinaki  
ana ki te maunga o Hamaria, nga tangata whai ingoa o te tuatahi o nga iwi, i tae atu nei te whare o  
Iharaira ki a ratou. <sup>2</sup> Haere tonu ki Karane titiro ai, haere atu i reira ki Hamata nui; haere tonu atu  
ki Kata o nga Pirihitini: he pai atu ranei i enei kingitanga? nui atu ranei to ratou rohe i to koutou  
rohe? <sup>3</sup> E te hunga e whakamatara atu na i te ra kino, e mea na i te nohoanga o te tutu kia tata mai;  
<sup>4</sup> E takoto na i runga i te moenga rei, e wharoro na i runga i o ratou takotoranga, e kai na i nga reme  
o te kahui, i nga kuaou kau o waenganui i te turanga kau; <sup>5</sup> E waiata na i nga waiata poauau ki te  
rangi hatere; e whakaaroa ana hoki e ratou nga mea whakatangi, e pera ana me Rawiri; <sup>6</sup> E inu ana  
i te waina o nga peihana, a e whakawahi ana i a ratou ki nga hinu pai rawa; kahore ia o ratou pouri

<sup>7</sup>  
mo te aitua o Hohepa. Na aianeī ko ratou ki mua ka whakaraua atu o te hunga e whakaraua ana, a ka kore te hakari a te hunga i wharoro ra.

<sup>8</sup>  
Kua oatitia te Ariki, a Ihowa, e ia ano, e ai ta Ihowa, ta te Atua o nga mano, E whakarihariha ana ahau ki ta Hakopa e whakai na, e kino ana ki ona whare kingi: mo reira ka tukua atu e ahau te

<sup>9</sup>  
pa me nga mea i roto. Na, ki te toe nga tangata kotahi tekau i roto i te whare kotahi, ka mate ratou.

<sup>10</sup>  
A, ki te tangohia ake tetahi e tona matua keke, ara e te kaitahu mona, kia maua mai ai nga wheua i roto i te whare, a ka mea ia ki te tangata i roto rawa i te whare, He tangata ano ranei tena kei a koe na? a ka mea ia, Kahore; katahi ia ka mea, Whakarongoa; e kore hoki tatou e whakahua i te

<sup>11</sup>  
ingoa o Ihowa. No te mea, nana, kei te whakahau a Ihowa, a ka patua te whare nui ki nga pakaru,

<sup>12</sup>  
te whare iti ki nga ngatata. E rere ranei te hoiho i runga i te kamaka? e parautia ranei a reira ki te kau? i whakaputaina ketia ai e koutou te whakawa hei au, nga hua hoki o te tika hei taru kawa.

<sup>13</sup>  
E koa na hoki koutou ki te kahore noa iho, e mea na, He teka ianei kua riro mai he haona i a

<sup>14</sup>  
tatou, he mea na to tatou uaua? Otiia, nana, ka ara i ahau tetahi iwi ki a koutou, e te whare o Iharaira, e ai ta Ihowa, ta te Atua o nga mano, a ka whakatupuria kinotia koutou e ratou i te haerenga atu ki Hamata a tae noa ki te awa o te Arapa.

## Chapter 7

<sup>1</sup>  
Ko ta te Ariki, ko ta Ihowa tenei i whakaatu ai ki ahau; nana, i hanga e ia he mawhitiwhiti i te timatanga o te pihinga ake o to muri tupu; nana, ko to muri tupu ia i muri iho i a te kingi tapahanga.

<sup>2</sup>  
Na ka poto te tarutaru o te whenua te kai, ka mea ahau, E te Ariki, e Ihowa, tena ra, murua te he:

<sup>3</sup>  
ma te aha oti a Hakopa ka ara ai? he iti nei hoki ia. I puta ke to Ihowa whakaaro mo tenei; E kore

<sup>4</sup>  
e meatia, e ai ta Ihowa. Ko ta te Ariki, ko ta Ihowa tenei i whakakite ai ki ahau: na kua karangatia e te Ariki, e Ihowa, he whawhai, he mea ahi, a ka pau te rire nui, a ka mea kia kainga te whenua.

<sup>5</sup>  
Na ka mea ahau, Kati ra, e te Ariki, e Ihowa, ma te aha oti a Hakopa ka ara ai? he iti nei hoki ia.

<sup>6</sup>  
I puta ke to Ihowa whakaaro mo tenei, E kore ano tenei e meatia, e ai ta te Ariki, ta Ihowa. I whakakitea tenei e ia ki ahau: na, ko te Ariki e tu ana i runga i te taiepa, he mea paramu ki te aho,

<sup>8</sup>  
me te aho paramu i tona ringa. Na ka mea a Ihowa ki ahau, Ko te aha e kitea ana e koe, e Amoho? Ano ra ko ahau, He aho paramu. Katahi te Ariki ka ki mai, Nana, ka iri i ahau he aho paramu i waenganui i taku iwi, i a Iharaira: e kore e whakarerea noatia iho ta ratou e ahau a mu ri ake nei.

9

A ka ururuatia nga wahi tiketike o Ihaka, ka tuheatia nga wahi tapu o Iharaira; ka whakatika atu ano ahau, me te hoari ki te whare o Ieropoama.

10

Na ka unga tangata a Amatia tohunga o Peteere ki a Ieropoama kingi o Iharaira hei ki atu, Kua whakatakotoria e Amoho he he mou i roto i te whare o Iharaira; kahore e taea e tenei whenua

te waha ana kupu katoa. <sup>11</sup> Ko te kupu hoki tenei a Amoho, Ka mate a Ieropoama i te hoari, a ka

whakaraua rawatia atu a Iharaira i to ratou oneone. <sup>12</sup> I mea ano a Amatia ki a Amoho, E te matakite,

haere, e rere ki te whenua o Hura, ki reira kai ai i te taro mau, ki reira poropiti ai. <sup>13</sup> Engari kati

tau poropiti ki Peteere: ko to te kingi wahi tapu hoki ia, he whare hoki no te kingitanga. <sup>14</sup> Na ka whakahoki a Amoho, ka mea ki a Amatia, Ehara ahau i te poropiti, ehara ano i te tama na te poropiti;

engari he kaitiaki kahui ahau, he kaikikini hikamora: <sup>15</sup> I tikina ake hoki ahau e Ihowa i te mea e

whai ana i nga hipi, i ki mai ano a Ihowa ki ahau, Haere, poropiti ki taku iwi, ki a Iharaira. <sup>16</sup> Na whakarongo ki te kupu a Ihowa, E mea na koe, Kaua e poropiti ki a Iharaira, kei maturuturu iho

ano tetahi kupu au hei whakahe mo te whare o Ihaka. <sup>17</sup> No reira ko te kupu tenei a Ihowa, Tera tau wahine e kairau i roto i te pa, a ka hinga au tama me au tamahine i te hoari, ka wehewehea tou oneone, mea rawa ki te aho; ka mate koe i runga i te oneone poke, ka whakaraua rawatia atu hoki a Iharaira i tona oneone.

## Chapter 8

1

I whakakitea ano tenei e te Ariki, e Ihowa, ki ahau; na, he kete hua raumati. <sup>2</sup> Na ka mea ia, Ko te aha te kitea ana e koe, e Amoho? Ano ra ko ahau, He kete hua raumati. Ano ra ko Ihowa ki ahau, Kua tae mai te mutunga ki taku iwi, ki a Iharaira: e kore ta ratou e whakarerea noatia e ahau

a muri ake nei. <sup>3</sup> He aue ano nga waiata o te temepara i taua ra, e ai ta te Ariki, ta Ihowa; ka maha nga tinana mate i nga wahi katoa; ka akiritia pukutia atu.

4

Whakarongo ki tenei, e te hunga i horomia ai te rawakore, i meinga ai te hunga iti o te whenua

kia ngohe; <sup>5</sup> E ki ana koutou, A hea pahemo ai te kowhititianga marama, kia hoko witi ai tatou? te hapati hoki, kia whakaputaia atu ai te witi e tatou? ka meinga te epa kia iti, te hekere kia nui, me

te teka ki nga pauna tinihanga; <sup>6</sup> Kia hokona ai e tatou nga ware ki te hiriwa, te rawakore ki nga

hu e rua; na, ko te witi rukenga me hoko atu. <sup>7</sup> Kua oatitia e Ihowa te nui o Hakopa, E kore ahau

e wareware ki tetahi o a ratou mahi a ake ake. <sup>8</sup> E kore ianei te whenua e wiri ki tenei? e kore ianei

te hunga katoa e noho ana i reira e tangi? ae ra, ka pari katoa ake nei hoki ano ko te awa; ka akina  
 e te hau, ka hoki iho ano, ka pera me te awa o Ihipa. <sup>9</sup> Na i taua ra, e ai ta te Ariki, ta Ihowa, ka  
 meinga e ahau te ra kia toene i te awatea, a ka pouri i ahau te whenua i te mea e marama ana ano  
<sup>10</sup>  
 te ra: Ka puta ke ano i ahau a koutou hakari hei tangihanga, a koutou waiata katoa hei apakura;  
 he taratara taku kakahu mo nga hope katoa; mo nga mahunga katoa he pakira; ka rite i ahau ki te  
 tangihanga ki te huatahi, a ko tona mutunga hei ra mamae.  
<sup>11</sup>  
 Nana, kei te haere mai nga ra, e ai ta te Ariki, ta Ihowa, e tukua ai e ahau he hemokai ki te  
 whenua, ehara i te hemokai taro, ehara ano i te matewai; engari he hiahia kia rongu i nga kupu a  
<sup>12</sup>  
 Ihowa. A ka atiutiu atu ratou i tetahi moana ki tetahi moana, i te raki ki te rawhiti; ka kopikopiko,  
 he rapu i te kupu a Ihowa; heoi e kore e kitea. <sup>13</sup> I taua ra ka hemo nga wahine ataahua, me nga  
<sup>14</sup>  
 taitama, i te matewai. Na, ko te hunga e oati ana i te he o Hamaria, e ki ana, Kei te ora tou Atua,  
 e Rana; me tenei, Kei te ora te tikanga o Peerehepa; ka taka rawa ratou, e kore ano e ara a muri ake  
 nei.

## Chapter 9

<sup>1</sup>  
 I kite ahau i te Ariki e tu ana i te taha o te aata. Na ka mea ia, Taia nga puku whakapaipai,  
 kia ngarue ai nga paepae: akina kia pakaru rikiriki ki runga ki te mahunga o ratou katoa; a ka  
 tukitukia e ahau nga whakamutunga o ratou ki te hoari: e kore rawa tetahi kotahi o ratou e rere, e  
<sup>2</sup>  
 kore hoki tetahi kotahi mawhiti. Ahakoa keru noa ratou, a tae noa ki te reinga, ka tikina atu ratou  
<sup>3</sup>  
 e toku ringa i reira; ahakoa kake ki te rangi, ka riro iho ano i ahau i reira. Ahakoa piri ratou ki te  
 tihi o Karamere, ka rapua e ahau, ka tangohia mai i reira; ahakoa i huna atu ratou, kei kitea e ahau,  
<sup>4</sup>  
 ki te takere o te moana, ka whakahaua e ahau te nakahi i reira, a ka ngau ia i a ratou. Ahakoa  
 haere ratou he parau i te aroaro o o ratou hoariri, ka whakahaua e ahau te hoari i reira hei tukituki  
<sup>5</sup>  
 i a ratou: a ka u atu oku kanohi ki a ratou mo te kino, kahore hoki mo te pai. Ko te Ariki hoki, ko  
 Ihowa o nga mano, ko ia te pa ana ki te whenua, rewa tonu iho, tangi ana nga tangata katoa o reira:  
<sup>6</sup>  
 a ka pari katoa ake ano ko te awa; ka hoki iho ano, ka pera me te awa o Ihipa. Ko ia te hanga nei  
 i ana ruma ki runga ki te rangi, tu ana i a ia tana rua ki te whenua; ko ia te karanga nei ki nga wai  
<sup>7</sup>  
 o te moana, a ringihia ana e ia ki runga ki te mata o te whenua: ko Ihowa tona ingoa. He teka  
 ianei, ki taku, he rite koutou ki nga tama a nga Etiopiana, e nga tama a Iharaira? e ai ta Ihowa. He  
 teka ianei naku a Iharaira i kawae mai i te whenua o Ihipa? nga Pirihitini i Kapatoro? me nga Hiriani

8  
i Kiri? Nana, kei runga nga kanohi o te Ariki, o Ihowa, i te kingitanga hara, a ka poto atu i ahau  
i runga i te mata o te whenua; e kore ia e poto rawa i ahau te whare o Hakopa, e ai ta Ihowa. 9  
te mea, tenei ahau te whakahau nei, a ka tataria e ahau te whare o Iharaira ki roto ki nga iwi katoa,  
10  
ka peratia me te witi e tataria ana ki te tatari, e kore ano tetahi pata ririki e taka ki te whenua. Ka  
mate i te hoari te hunga hara katoa o taku iwi, ena e ki na, E kore tatou e mau, e kore ano e haukotia  
e te kino.

11  
I taua ra ka ara i ahau te tapenakara o Rawiri kua hinga nei, ka tutakina ano e ahau ona wahi  
pakaru; ka ara ano i ahau ona wahi i whakahoroa, ki hanga ano e ahau kia rite ki nga ra o mua:

12  
Kia riro ai i a ratou te toenga o Eroma, o nga iwi katoa ano kua oti toku ingoa te whakahua mo  
13  
ratou, e ai ta Ihowa, nana nei tenei mahi. Nana, kei te haere mai nga ra, e ai ta Ihowa, e mau ai  
te kaikokoti i te kaiparau, e mau ai hoki te kaiwhakato purapura i te kaitakahi karepe; ka maturuturu

14  
ano te waina hou o nga maunga, a ka rewa nga pukepuke katoa. Ka whakahokia mai ano e ahau  
taku iwi, a Iharaira, i te whakarau, a ka hanga e ratou nga pa kua ururuatia, nohoia iho; ka whakato  
mara waina ano ratou, ka inu i te waina o aua mara: ka mahi kari ano ratou, a ka kai i nga hua o

15  
reira. Ka whakatokia ano ratou e ahau ki to ratou oneone; e kore ano ratou e unuhia atu i muri  
ake nei, i to ratou oneone i hoatu e ahau ki a ratou, e ai ta Ihowa, ta tou Atua.

## Obadiah

### Chapter 1

1  
Ko te kite a Oparia. Ko te kupu tenei a te Ariki, a Ihowa, mo Eroma; Kua tae mai he korero  
i a Ihowa, kua oti ano he karere te unga ki nga tauwi, hei mea, Whakatika, kia whakatika atu hoki

2  
tatou ki a ia ki te whawhai. Nana, kua oti koe te mea e ahau kia iti i roto i nga tauwi: nui atu te

3  
whakahawe ki a koe. Kua oti koe te tinihanga e te whakapehapeha o tou ngakau, e koe e noho  
na i nga kapiti o te kamaka, kei runga na tona nohoanga; e mea na i roto i tona ngakau, Ko wai hei

4  
whakahoki iho i ahau ki raro ki te whenua? Ahakoa i rite tou kakenga ki to te ekara, ahakoa i

5  
hanga e koe tou kohanga ki nga whetu, ka whakahokia iho koe e ahau i reira, e ai ta Ihowa. Me  
i tae he kaitahae ki a koe, he kaipahua ranei i te po, taukiri e, tou ngaromanga! e kore ranei ratou  
e tahae, kia maha ra ano nga mea ma ratou? me i tae he kaiwhawhaki karepe ki a koe, e kore ranei



etahi karepe e whakatoea e ratou? <sup>6</sup> Taukiri e, te rapunga atu o nga mea a Ehau! te kimihanga o  
 ana mea ngaro! <sup>7</sup> Ko nga tangata katoa o tau kawenata, kua riro koe i a ratou, tae rawa ki te rohe:  
 ko nga tangata i mau nei ta ratou rongu ki a koe, kua tinihanga ki a koe, a taea ana koe e ratou; ko  
 te hunga i kai i tau taro kua takoto i a ratou he mahanga ki ra ro i a koe: kahore he matauranga i a  
<sup>8</sup> ia. He teka ianei, e ai ta Ihowa, ka kore i ahau i taua ra nga tangata whakaaro nui i roto i Eroma,  
 me te matauranga o te maunga o Ehau? <sup>9</sup> A ka wehi ou marohirohi, e Temana, he mea e hatepea  
 atu ai nga tangata katoa o te maunga o Ehau, tukituki rawa.  
<sup>10</sup> Ka taupokina koe e te whakama hei utu mo te mahi tutu ki tou teina, ki a Hakopa, ka hatepea  
 atu ano koe a ake ake. <sup>11</sup> I te ra i tu hangai mai ai koe, i te ra i whakaraua ai ona rawa e nga  
 tautangata, i tapoko ai nga tangata iwi ke ki ona kuwaha, i kokiri nui ai mo Hiruharama, i rite rawa  
<sup>12</sup> ano koe ki tetahi o ratou. Otiia kua koe e titiro ki te ra o tou teina, i te ra o tona aitua, kua hoki  
 koe e koa ki nga tama a Hura i te ra o to ratou whakangaromanga; kua hoki e whakanuia tou  
<sup>13</sup> mangai i te ra o te raru. Kua e tomo ki roto ki te kuwaha o taku iwi i te ra o to ratou aitua; ae  
 ra, kua koe e matakitaki ki to ratou matenga i te ra o to ratou aitua, kua ano hoki koutou e pa  
<sup>14</sup> ringaringa ki o ratou rawa i te ra o to ratou raru. A kua koe e tu ki te pekanga o te ara ki te  
<sup>15</sup> hatepe i ona morehu e mawhiti; kua hoki e tukua ona morehu i te ra o te raru. Kua tata hoki te  
 ra o Ihowa ki nga tauwi katoa; ka rite ki tau i mea ai ka meatia ki a koe; ka hoki tau utu ki runga  
<sup>16</sup> ki tou mahunga. Ka rite hoki ki ta koutou inumanga i runga i toku maunga tapu; ka pena ano te  
 inu a nga tauwi katoa a ake nei, ake nei; ina, ka inu ratou, ka horomia ano e ratou, a me te mea i  
 kore ratou.  
<sup>17</sup> Otiia tera ano nga mea ka mawhiti i Maunga Hiona, a ka tapu tera; a ka riro o ratou wahi i  
<sup>18</sup> te whare o Hakopa. A hei ahi te whare o Hakopa, hei mura ano te whare o Hohepa, hei kakau  
 witi hoki te whare o Ehau: ka ngiha ratou i roto i a ratou, a pau ake, kahore hoki he morehu o te  
<sup>19</sup> whare o Ehau: na Ihowa nei hoki te kupu. Na ka riro te maunga o Ehau i te hunga o te tonga;  
 me nga Pirihitini i te hunga o te mania; ka riro ano i a ratou nga mara a Eparaima me nga mara o  
<sup>20</sup> Hamaria; mo Pineamine hoki a Kireara. Na, ko nga whakarau o tenei ope, o nga tama a Iharaira,  
 ko era i roto i nga Kanaani, ka riro i a ratou tae noa ki Harepata; a, ko nga whakarau o Hiruharama,  
<sup>21</sup> ko era i Teaparara, ka riro i a ratou nga pa o te tonga. A ka tae ake he kaiwhakaora ki Maunga  
 Hiona hei whakawa mo te maunga o Ehau; a ka riro i a Ihowa te kingitanga.

## Jonah

### Chapter 1

<sup>1</sup> Na i puta mai te kupu a Ihowa ki a Hona, tama a Amitai, i mea, <sup>2</sup> Whakatika, haere ki Ninewe, ki taua pa nui, karangatia he he mona; kua tae ake hoki to ratou kino ki toku aroaro. <sup>3</sup> Ko Hona ia i whakatika, he rere ki Tarahihi i te aroaro o Ihowa; haere ana ia ki raro, ki Hopa, a ka kitea e ia tetahi kaupuke e rere ana ki Tarahihi: ka hoatu e ia te utu mo te ekenga ki runga, kia haere atu ai ia i roto i a ratou ki Tarahihi i te aroaro o Ihowa.

<sup>4</sup> Na ka tukua e Ihowa he hau nui ki te moana, a he nui te awaha i te moana, no ka kiia ka pakaru te kaupuke. <sup>5</sup> Na ka wehi nga kaiwhakatere, ka karanga ki tona atua, ki tona atua; a akiritia ana e ratou nga taonga o runga o te kaupuke ki te moana kia mama ai ki a ratou. Ko Hona ia kua riro ki roto rawa i te kaupuke, a ka takoto ia, ka moe, au rawa. <sup>6</sup> Na ko te haerenga atu o te rangatira o te kaupuke, ka mea ki a ia, He aha tau, e te tangata e moe na? maranga, karanga ki tou Atua, me kahore te Atua e whakaaro ki a tatou, kei ngaro tatou. <sup>7</sup> Na ka mea ratou ki tona hoa, ki tona hoa, Haere mai, kia makamaka rota tatou, kia mohio ai ko wai te take o tenei he ki a tatou. Na kei te makamaka rota ratou, a ka tau te rota ki a Hona. <sup>8</sup> Katahi ratou ka mea ki a ia, Tena ra, whakaaturia ki a matou ko wai te take o tenei he ki a tatou? he mahi aha tau? i haere mai koe i hea? Ko hea tou whenua? no tehea iwi koe? <sup>9</sup> Ano ra ko ia ki a ratou, He Hiperu ahau; e wehi ana hoki ahau i a Ihowa, i te Atua o nga rangi, nana nei i hanga te moana me te whenua maroke. <sup>10</sup> Na nui atu te wehi i wehi ai aua tangata, ka mea ratou ki a ia, He aha tenei i meatia nei e koe? I mohio hoki aua tangata e rere ana ia i te aroaro o Ihowa, nana hoki i whakaatu ki a ratou.

<sup>11</sup> Na ka mea ratou ki a ia, Me aha matou ki a koe, kia marino ai te moana ki a tatou? e nui haere ana hoki te ngaru o te moana. <sup>12</sup> A ka mea ia ki a ratou, Hapainga ake ahau, maka ki te moana; katahi ka marino te moana ki a koutou; e mohio ana hoki ahau he whakaaro ki ahau i puta mai ai tenei paroro ki a koutou. <sup>13</sup> Heoi hoe tonu aua tangata kia u ai ratou ki uta; otiia kihai i taea: e nui haere ana hoki te ngaru o te moana hei arai i a ratou. <sup>14</sup> Katahi aua tangata ka karanga ki a Ihowa, ka mea, Aue, e Ihowa, kua ra matou e whakangaromia hei utu mo te matenga o tenei tangata: kua ano e utaina he toto harakore ki runga ki a matou: kua mahia na hoki e koe, e Ihowa, tau i pai ai. <sup>15</sup> Na hapainga ana a Hona e ratou, maka ana ki te moana: a mutu ake te riri o te moana.

<sup>16</sup> Na he nui te wehi i wehi ai aua tangata i a Ihowa; patua iho e ratou he patunga tapu ki a Ihowa,

<sup>17</sup>  
 puaki ana a ratou kupu taurangi. Na kua rite mai i a Ihowa tetahi ika nui hei horo i a Hona. A e toru nga ra, e toru nga po o Hona i roto i te kopu o te ika.

## Chapter 2

<sup>1</sup> Katahi a Hona ka inoi ki a Ihowa, ki tona Atua, i roto i te kopu o te ika, <sup>2</sup> I mea ia, I karanga ahau, he ngakau mamae noku, ki a Ihowa; a whakahoki mai ana ia ki ahau; i tangi atu ahau i roto i te kopu o te reinga, a whakarongo ana koe ki toku reo. <sup>3</sup> I maka hoki ahau e koe ki te rire, ki waenga moana, a karapotia ana ahau e nga roma; tika ana au tuatea katoa me au ngaru i runga i ahau. <sup>4</sup> Na ka mea ahau, Kua oti ahau te pei i mua i ou kanohi; otiia tera ahau e titiro atu ano ki tou temepara tapu. <sup>5</sup> Karapotia ana ahau e te wai, tae tonu iho ki te wairua; i oku taha katoa te rire a taka noa; he rimu nga takai o toku mahunga. <sup>6</sup> I haere ahau ki raro ki nga take o nga maunga; kopia ana ahau e te whenua me ona tutaki ake ake; heoi whakaputaina ake ana e koe toku ora i roto i te poka, e Ihowa, e toku Atua. <sup>7</sup> I te hemonga o toku wairua i roto i ahau, i mahara ahau ki a Ihowa: i tae atu ano taku inoi ki a koe ki tou temepara tapu. <sup>8</sup> Ko te hunga e pupuri ana i nga mea tekateka noa e whakarere ana i te atawhai mo ratou. <sup>9</sup> Ko ahau ia ka mea patunga tapu ki a koe i runga i te reo whakawhetai; ka whakamana e ahau aku kupu taurangi. Na Ihowa te whakaoranga. <sup>10</sup> Na ka korero a Ihowa ki te ika, a ka ruakina e tera a Hona ki te wahi maroke.

## Chapter 3

<sup>1</sup> Na ka puta tuarua mai te kupu a Ihowa ki a Hona, i mea ia, <sup>2</sup> Whakatika, haere ki Ninewe, ki taua pa nui, kauwhautia hoki ki reira te kauwhau e korerotia e ahau ki a koe. <sup>3</sup> Na whakatika ana a Hona, haere ana ki Ninewe, pera ana me ta Ihowa i korero ai. Na he pa nui rawa a Ninewe, e toru nga ra e haerea ai. <sup>4</sup> Na ka timata ta Hona haere ki roto ki te pa, kotahi te ra i haere ai, kei te karanga, kei te mea, Kia wha tekau ake nga ra, ka hurihia a Ninewe. <sup>5</sup> A whakapono tonu nga tangata o Ninewe ki ta te Atua; karangatia ana e ratou he nohopuku, he taratara o ratou kakahu, o nga mea rarahi o ratou tae rawa iho ki nga mea ririki. <sup>6</sup> Na ka tae he korero ki te kingi o Ninewe, a whakatika ana ia i runga i tona torona, whakarere atu ana e ia tona

koroka, kei te hipoki i a ia ki te kakahu taratara, noho ana i roto i te pungarehu. <sup>7</sup> I meinga ano e ia kia karangatia te korero i roto i Ninewe, he mea whakatakoto na te kingi ratou ko ana metararahi, i mea ia, Kua te tangata, te kararehe ranei, te kau ranei, te hipi ranei e pa ki tetahi aha: kua ratou e kai, e inu wai ranei: <sup>8</sup> Engari kia hipokina te tangata me te kararehe ki te kakahu taratara, kia kaha ano ta ratou karanga ki te Atua: ae ra, kia hoki ano nga tangata i tona ara kino, i tona ara kino, i te tutu ano o o ratou ringa. <sup>9</sup> Ko wai ka tohu tera pea te Atua ka tahuri, a ka puta ke tona whakaaro, ka tahuri atu hoki i te muranga o tona riri, a e kore tatou e ngaro? <sup>10</sup> A ka kite te Atua i a ratou mahi, kua tahuri atu ratou i to ratou ara kino; na ka puta ke te whakaaro o te Atua mo te kino i kiia e ia kia meatia ki a ratou; a kihai i meatia e ia.

#### Chapter 4

<sup>1</sup> Otiia ki ta Hona, nui atu te he, a mura ana tona riri. <sup>2</sup> A ka inoi ia, ki a Ihowa, ka mea, Aue, e Ihowa, he teka ianei ko taku tenei i mea ai i ahau ano i toku whenua? Na reira ahau i rere wawe ai ki Tarahihi; i mohio hoki ahau he Atua atawhai koe, he tohu tangata, he puhoi ki te riri, he nui te aroha, e puta ke ana te whakaaro mo te kino. <sup>3</sup> Na, tera ra, e Ihowa, kia mate ahau aiane; he pai atu hoki i te ora te mate moku. <sup>4</sup> Ano ra ko Ihowa, He mea pai ranei kia riri koe? <sup>5</sup> Na ka puta a Hona i roto i te pa, a noho ana i te taha ki te rawhiti o te pa; kei te hanga i tetahi tihokahoka mona ki reira, noho ana i raro i te taumarumarunga iho, kia kite ra ano ka ahatia ranei te pa. <sup>6</sup> Na kua rite i a Ihowa tetahi hue, meinga ana e ia kia eke ki runga ki a Hona, hei whakamarumaruru mo tona mahunga, hei whakaora mona i a ia i mamae ra. Na nui atu te koa o Hona ki te hue ra. <sup>7</sup> Na kua rite ano i te Atua he huhu i te aonga ake o te ra, a ngaua iho e tera te hue, na kua maroke. <sup>8</sup> Na i te whitinga o te ra kua rite mai ano i te Atua tetahi hau pumahu, he marangai; aki tonu mai te ra ki runga ki te mahunga o Hona, whakaruhi noa iho, a inoi ana mona kia mate ia, i mea ia, Pai atu i te ora te mate moku. <sup>9</sup> Na ka mea te Atua ki a Hona, He pai ranei kia riri koe ki te hue? Ano ra ko ia, He pai ano kia riri ahau a mate noa. <sup>10</sup> Ano ra ko Ihowa, I manawapa koe ki te hue kihai na i mahia e koe, kihai ano i whakatupuria e koe; kotahi ano te po i tupu ake ai, kotahi ano te po i kore ai, <sup>11</sup> A kua ianei ahau e manawapa ki Ninewe ki taua pa nui, he tokomaha nei ona tangata i nga mano e ono tekau topu, he hunga kahore nei e mohio ki o ratou ringa matau, ki o ratou ringa mau, he maha ano hoki nga kararehe?

## Micah

### Chapter 1

<sup>1</sup> Ko te kupu a Ihowa i puta mai ki a Mika Morahati i nga ra o nga kingi o Hura, ara o Iotama,  
 o Ahata, o Hetekia, ko tana i kite ai mo Hamaria raua ko Hiruharama. <sup>2</sup> Whakarongo e nga iwi, e  
 koutou katoa; kia whai taringa mai, e te whenua, me nga mea katoa i roto i a koe: ko te Ariki, ko  
 Ihowa hei whakaatu i to koutou he, ko te Ariki mai i tona temepara tapu. <sup>3</sup> No te mea, nana, kei te  
 puta mai a Ihowa i tona wahi, ka heke iho ia, ka takahi ki runga ki nga wahi tiketike o te whenua.  
<sup>4</sup> A ka rewa nga maunga i raro i a ia, ka ngatata nga raorao, ka rite ki te waki i mua i te ahi, ki nga  
 wai i ringihia ki te wahi paripari. <sup>5</sup> Mo te he o Hakopa tenei katoa, mo nga hara o te whare o Iharaira.  
 He aha te he o Hakopa? he teka ianei ko Hamaria? He aha ano hoki nga wahi tiketike o Hura? he  
 teka ianei ko Hiruharama? <sup>6</sup> Mo reira ka meinga e ahau a Hamaria kia rite ki te puranga o te mara,  
 ki nga whakatokanga hoki o te mara waina; ka ringihia iho ano e ahau ona kohatu ki raro ki te  
 raorao, a ka hurahia e ahau ona turanga. <sup>7</sup> A ka wawahia ana whakapakoko, mongamonga ana, ka  
 tahuna hoki ona utu katoa ki te ahi, a ka takoto kau i ahau ana whakapakoko katoa: he mea amene  
 hoki nana ki te utu a te wahine kairau, a ka hoki atu ano hei utu ki te wahine kairau.  
<sup>8</sup> Mo reira ka tangi ahau, ka aue, ka haere ahau, tihore rawa nga kakahu, tahanga kau: ka rite  
 taku tangi ki ta nga kuri mohoa, taku uhunga ki ta nga otereti. <sup>9</sup> No te mea ko ona patunga e kore  
 e mahu; kua tae rawa nei hoki ki a Hura; kua tae ki te kuwaha o taku iwi, ara ki Hiruharama.  
<sup>10</sup> Kua e whakaaturia ki Kata, kua rawa e tangi: kua okeoke ahau i roto i te puehu i Petere Aparā.  
<sup>11</sup> Haere atu korua, e te wahine e noho ana i Hapiri, i te takoto tahanga, i te whakama: kahore ano  
 te wahine e noho ana i Taanana i puta mai; ka tangohia atu i a koutou e te tangihanga o Peteetere  
 tona turanga. <sup>12</sup> I tatari hoki te wahine e noho ana i Maroto ki te pai, me te manukanuka ano; no  
 te mea kua heke iho te kino i a Ihowa ki te kuwaha o Hiruharama. <sup>13</sup> Whakamaua te hariata ki te  
 hoiho tere, e te wahine e noho ana i Rakihi: ko ia te timatanga o te hara o te tamahine a Hiona; kua  
 kitea na hoki nga he o Iharaira i roto i a koe. <sup>14</sup> Mo reira ka hoatu e koe he hakari poroporoaki ki  
 Morehetekata: hei mea teka nga whare o Akatipi ki nga kingi o Iharaira. <sup>15</sup> Tenei ake ka kawea  
 atu e ahau ki a koe, e te wahine e noho ana i Mareha, te tangata e whiwhi ki a koe: ka tae te kororia

16  
o Iharaira ki Aturama ra ano. Moremorea tou mahunga, kutikutia hoki, mo au tamariki i ahuaireka ai; whakanuia tou pakira kia rite ki to te ekara; kua mawehe atu hoki ratou i a koe, kua whakaraua.

## Chapter 2

1  
Aue, te mate mo te hunga e whakaaro na ki te he, e mahi na i te kino i runga i o ratou moenga!  
takiri rawa ake te ata kua mahia e ratou, no te mea kei roto i te kaha o to ratou ringa. 2 E hiahia ana  
ratou ki nga mara, tangohia ake; ki nga whare hoki riro tonu i a ratou: e whakatupuria kinotia ana  
e ratou tetahi tangata me tona whare, te tangata rawa nei me tona wahi tupu. 3 Mo reira ko te kupu  
tenei a Ihowa: Nana, ka whakaaroa e ahau he kino mo tenei hapu, e kore ai e whakawateatia e  
koutou o koutou kaki i reira, e kore ano koutou e haere whakapehapeha; he kino hoki tenei wa. 4 I  
taua ra ka ara i a ratou tetahi whakatauki mo koutou, ka tangi hoki i tetahi rangi mamae nui, a ka  
mea, Kua pahuatia rawatia tatou; kua puta ke i a ia te wahi o taku iwi. Aue, tana wehenga atu i  
ahau! wehea ana e ia a tatou mara ma te hunga wha kakeke. 5 Mo reira kahore he tangata mau hei  
maka i te taura a te rota i roto i te whakaminenga a Ihowa.  
6 Kua koutou e poropiti: ko ta ratou poropiti tenei. E kore ratou e poropiti ki ena: e kore nga  
taunu e haere atu. 7 E kiia ianei, e te whare o Hakopa, Kua kuiti te wairua o Ihowa? ko ana mahi  
ianeinei? He teka ianei he mahi pai ta aku kupu ki te tangata e tika ana te haere? 8 Otiia no enei  
ra nei ano ka whakatika ake taku iwi ano he hoariri: e tihorea atu ana e koutou te koroka i te kakahu  
o te hunga e haere kore wehi noa atu ana ano he tangata e ngakaukore ana ki te whawhai. 9 Kua  
oti nga wahine o taku iwi te pei e koutou i roto i o ratou whare ahuaireka; kua tangohia e koutou  
toku kororia i a ratou tamariki nonohi a ake ake. 10 Whakatika, haere; ehara hoki tenei i to koutou  
okiokinga; he mea hoki mo te poke e whakangaro ana, e whakangaro kino rawa ana. 11 Ki te korero  
teka tetahi tangata e haere ana i te hau, i te teka, ki te mea, Ka poropiti ahau ki a koe mo te waina,  
mo te wai kaha; ko ia rawa ano hei poropiti mo tenei iwi.  
12 He pono ka kohikohi ahau i a koe katoa, e Hakopa; he pono ka whakawhaititia e ahau nga  
morehu o Iharaira; ka huihuia ratou e ahau, ka peratia me nga hipi o Potora: ka rite ki te kahui i  
waenganui o to ratou taiepa, ka nui to ratou nge i te tini hoki o te tangata. 13 Kua tae ake te kaiwahi  
i to ratou aroaro: kua pakaru mai ratou ki waho, kua tika i roto i te kuwaha, kua puta atu ma reira:  
kua haere atu to ratou kingi i mua i a ratou, a Ihowa i to ratou upoko.

### Chapter 3

<sup>1</sup> A i mea ahau, Whakarongo mai, e nga upoko o Hakopa, e nga ariki o te whare o Iharaira: He teka ianei mo koutou te matauranga ki te whakawa? <sup>2</sup> E kino na ki te pai, e aroha na ki te kino; e tihore na i to ratou kiri i o ratou tinana, i to ratou kikokiko i o ratou wheua; <sup>3</sup> E kai na hoki i nga kikokiko o taku iwi; e tihore na i to ratou kiri i o ratou tinana, e wawahi na i o ratou wheua: ae ra, e tapatapahia rawatia ana e ratou, ano he mea mo te kohua, ano he kikokiko i roto i te kohua nui. <sup>4</sup> Ko reira ratou karanga ai ki a Ihowa, heoi e kore ia e whakahoki kupu ki a ratou: ae ra, ka huna e ia tona mata ki a ratou i taua wa, ka rite ki to ratou kino i mahia e ratou. <sup>5</sup> Ko te kupu tenei a Ihowa mo nga poropiti e whakapohehe nei i taku iwi, e ngau nei o ratou niho, me te karanga, He rongu mau! a ki te kahore e komotia e tetahi he mea ki o ratou mangai, ka tino anga ratou ki te whakataka whawhai ki a ia. <sup>6</sup> Mo reira ko te po mo koutou, e kore ai he kite ki a koutou; a ka pouri ki a koutou, e kore ai koutou e kite tikanga; a ka to te ra ki nga poropiti, a ka mangu te awatea ki runga ki a ratou. <sup>7</sup> A tera e whakama nga matakite, e numinumi hoki nga tohunga tuaahu; ae ra, tera ratou katoa e arai i o ratou ngutu; no te mea kahore he kupu whakahoki a te Atua. <sup>8</sup> Otiia he pono, kua ki ahau i te kaha, he mea na te wairua o Ihowa, i te whakawa hoki, i te mana, kia whakaaturia ai e ahau ki a Hakopa tona poka ke, ki a Iharaira tona hara. <sup>9</sup> Tena ra, whakarongo ki tenei, e nga upoko o te whare o Hakopa, e nga ariki hoki o te whare o Iharaira, e whakarihariha na ki te whakawa, e whakapeau ke na i te tika katoa. <sup>10</sup> E hanga ana ratou i Hiona ki te toto, i Hiruharama ki te he. <sup>11</sup> E whakawa ana ona upoko, he mea na te patipati, e whakaako ana ona tohunga, he mea na te utu; ko ona poropiti na te hiriwa i kite tikanga ai; otiia kei te whakawhirinaki ratou ki a Ihowa, kei te mea, He teka ianei kei roto a Ihowa i a tatou? e k ore tetahi he e pa ki a tatou. <sup>12</sup> Mo reira ka parautia a Hiona, ano he mara, he mea mo koutou, a ka waiho a Hiruharama hei puranga, ka rite hoki te maunga o te whare ki nga wahi tiketike o te ngahere.

### Chapter 4

<sup>1</sup> Otiia tenei ake kei nga ra whakamutunga ka whakapumautia te maunga i to Ihowa whare ki te tihi o nga maunga, a ka hikitia ki runga ake i nga pukepuke, a ka rere nga iwi ki reira. <sup>2</sup> A he maha nga iwi e haere, e mea, Haere mai koutou, tatou ka haere ki runga ki te maunga o Ihowa, ki te whare o te Atua o Hakopa, a mana tatou e whakaako ki ana ara, ka haere hoki tatou i ana huarahi;

no te mea ka puta mai te ture i Hiona, te kupu hoki a Ihowa i Hiruharama. <sup>3</sup> A ka whakarite whakawa ia i waenganui i nga iwi maha, ka riria hoki e ia te he o nga iwi kaha i tawhiti; a ka patupatua e ratou a ratou hoari hei hea parau, a ratou tao hei mea tapahi manga; e kore tetahi iwi e hapai hoari ki tetahi iwi, a heoi a no ta ratou ako ki te whawhai. <sup>4</sup> Engari ka noho ratou, ia tangata, ia tangata, i raro i tana waina, i raro i tana piki; a kahore he tangata hei whakawehi i a ratou: na te mangai hoki o Ihowa o nga mano te korero. <sup>5</sup> Ka haere hoki nga iwi katoa, ia tangata, ia tangata, i runga i te ingoa o tona atua, a ka haere tatou i runga i te ingoa o Ihowa, o to tatou Atua a ake ake. <sup>6</sup> A taua ra, e ai ta Ihowa, ka huihuia e ahau te wahine e totitoti ana, ka whakaminea te wahine i peia atu, me ia ano i whakatupuria kinotia e ahau; <sup>7</sup> A ka meinga e ahau te wahine e totitoti ana hei morehu, me te wahine i maka atu ki tawhiti hei iwi kaha: a ka kingi a Ihowa ki a ratou ki Maunga Hiona aiane i a ake tonu atu. <sup>8</sup> Na ka tae mai ki a koe, e koe, e te pourewa o te kahui, e te taumaihi o te tamahine a Hiona; ae ra, ka tae mai ki a koe te kingitanga o mua ra, te kingitanga o te tamahine a Hiruharama. <sup>9</sup> Na, he aha koe i hamama ai? Kahore ianei he kingi i roto i a koe, kua ngaro ranei tou kaiwhakatakoto whakaaro, i mau pu ai koe i te mamae me te mea he wahine e whanau ana? <sup>10</sup> Whakamamae, e ngana kia puta ki waho, e te tamahine a Hiona, kia rite ki te wahine e whanau ana: no te mea ko aiane i koe puta ai i roto i te pa, a ka noho ki te parae, a ka tae ki Papurona ra ano; hei reira koe ka whakaorangia; hei reira a Ihowa hoko ai i a koe i te ringa o ou hoariri. <sup>11</sup> Na, tona maha o nga iwi kua huihui ki te whawhai ki a koe, e mea ana, Tukua ia kia whakapokea, kia kite atu to tatou kanohi i tana koronga i runga i Hiona. <sup>12</sup> Otira kahore ratou e matau ki nga whakaaro o Ihowa, kahore hoki e mohio ki tana i whakatakoto ai: kua kohikohia hoki ratou e ia ano he paihere ki te patunga witi. <sup>13</sup> Whakatika ki te patu witi, e te tamahine a Hiona: ka meinga hoki e ahau tou haona hei rino, ka meinga hoki e ahau ou paua hei parahi: a he maha nga iwi e patupatua e koe a mongamonga noa: a mau e whakatapu ma Ihowa nga mea i apohia mai e ratou, o ratou rawa ma te Ariki o te whenua katoa.

## Chapter 5

<sup>1</sup> Na inaianei ka whakahuihui a ropu koe i a koe, e te tamahine a nga ropu: kua oti tatou te whakapae e ia: ka patua e ratou ki te rakau te paparinga o te kaiwhakawa o Iharaira. <sup>2</sup> Na ko koe, e Peterehema Eparata, he iti nei i roto i nga mano o Hura, e puta mai i roto i a koe tetahi maku hei



<sup>3</sup>  
 kawana mo Iharaira: ko ona putanga nonamata, no nga ra o tua iho. Mo reira ratou ka tukua atu ai e ia, kia tae ra ano ki te wa e whanau ai tenei e whakamamae nei: hei reira nga toenga o ona

<sup>4</sup>  
 tuakana hoki ai ki nga tama a Iharaira. A ka tu ia, ka whangai i tana kahui i runga i te kaha o Ihowa, i runga hoki i te nui o te ingoa o Ihowa, o tona Atua; a ka noho ratou; no te mea akuareiaa

<sup>5</sup>  
 ka nui, ki nga pito ra ano o te whenua. A ko tenei tangata hei maunga rongu mo tatou: ina tae mai te Ahiriana ki to tatou whenua, a ka takahi ki o tatou whare kingi, hei reira ara ai i a tatou hei

<sup>6</sup>  
 whawhai ki a ia etahi hepara tokowhitu me etahi tangata rangatira tokowaru. A ka whakamotitia e ratou te whenua o Ahiria ki te hoari, te whenua hoki o Nimiroro i ona tomokanga: na ka whakaorangia tatou e ia i te Ahiriana, ina haere mai ia ki to tatou whenua, ina takahi ia i roto i o tatou rohe.

<sup>7</sup>  
 A ka rite nga toenga o Hakopa i roto i nga iwi maha ki te tomairangi a Ihowa, ki nga kouaua i runga i te tarataru; e kore nei e whanga ki te tangata, e kore ano e tatari ki nga tama a te tangata.

<sup>8</sup>  
 Na ka waiho te toenga o Hakopa i roto i nga tauwiwi, i roto i nga iwi maha; ka rite ki te raiona i roto i nga kararehe o te ngahere, ki te kua raiona i roto i nga kauhui hipi: na ki te tika atu ia i

<sup>9</sup>  
 waenga, ka takatakahia e ia, ka haehaea, kahore hoki he kaiwhakaora. Whakaarahia tou ringa ki

<sup>10</sup>  
 runga ake i ou hoariri, hatepea atu hoki ou hoariri katoa. Na i taua ra, e ai ta Ihowa, ka hatepea

<sup>11</sup>  
 atu e ahau au hoiho i roto i a koe, ka kore ano i ahau au hariata; A ka whakakorea atu e ahau

<sup>12</sup>  
 nga pa o tou whenua, ka wawahia ano e ahau ou pa kaha katoa; Ka hatepea atu hoki e ahau nga

<sup>13</sup>  
 makutu i roto i tou ringa, a ka kore nga tohunga maori i roto i a koe: Ka hatepea atu hoki e ahau

<sup>14</sup>  
 au whakapakoko, me au pou whakaahua i roto i a koe: a e kore koe e koropiko i muri nei ki te mahi

<sup>15</sup>  
 a ou ringa. Ka hutia ano e ahau Aherimi i roto i a koe: a ka huna e ahau ou pa. Ka rapua hoki e ahau he utu i nga tauwiwi i runga i te riri, i te weriweri, kihai nei ratou i whakarongo.

## Chapter 6

<sup>1</sup>  
 Whakarongo koutou inaianei ki te kupu i korerotia e Ihowa: Whakatika, totohe ki nga maunga,

<sup>2</sup>  
 kia rangona hoki tou reo e nga pukepuke. Whakarongo, e nga maunga nei, ki ta Ihowa totohe, e koutou hoki, e nga turanga kaha o te whenua: he totohe hoki ta Ihowa ki tana iwi, a ka riria e ia te

<sup>3</sup>  
 he o Iharaira. E taku iwi, i aha ahau ki a koe? he ahatanga naku i hoha ai koe? whakaaturia mai

<sup>4</sup>  
 toku he. Naku na hoki koe i kawe mai i te whenua o Ihipa, naku ano koe i hoko i roto i te whare

pononga; a i unga atu e ahau a Mohi, a Arona, a Miriama ki mua i a koe. <sup>5</sup> Kia mahara, e taku iwi, ki te whakaaro i whakatakotoria e Paraka kingi o Moapa, ki te kupu hoki i whakahokia ki a ia e Paraama tama a Peoro; maharatia i Hitimi tae noa ki Kirikara, kia mohio ai koutou ki nga mahi tika a Ihowa.

<sup>6</sup> He aha taku e haere ai ahau ki te aroaro o Ihowa, e piko ai ki te Atua i runga? he patunga tapu ranei te mea e haere ai ahau ki tona aroaro, he kua o tautahi ranei? <sup>7</sup> E manako ranei a Ihowa ki nga mano o nga hipi toa, ki nga mano kotahi tekau ranei o nga awa hinu? me hoatu ranei e ahau taku

matamua hei utu mo taku poka ke, te hua o toku kopu mo te hara o toku wairua? <sup>8</sup> Kua whakaaturia e ia ki a koe, e te tangata, te mea pai; a he aha ta Ihowa e rapu nei ki a koe, heoi ano ko te whakawa tika, ko te pai ki te tohu tangata, ko te whakaiti me te haere tahi i tou Atua?

<sup>9</sup> E karanga ana te reo o Ihowa ki te pa, a ka kite te tangata whakaaro nui i tou ingoa; whakarongo ki te whiu, ki a ia hoki nana i whakarite. <sup>10</sup> Tera ano ranei nga taonga o te kino kei roto i te whare

o te tangata kino, me te mehua iti, whakarihariha ano? <sup>11</sup> Ka ma ranei ahau ki te kino nga pauna,

ki te tinihanga nga weti i roto i te putea? <sup>12</sup> Ki tonu na hoki i te tutu ona tangata taonga, a kua korero teka ona tangata, kei te tinihanga hoki o ratou arero i roto i o ratou mangai. <sup>13</sup> Mo reira kua whiua hoki koe e ahau ki te mate taimaha: kua meinga koe e ahau kia mokemoke, hei utu mo ou

<sup>14</sup> hara. Ka kai koe, a kahore e makona; ka waiho ano tou whakaitinga i waenganui i a koe; ka tangohia atu ano e koe, heoi e kore e haere ora i a koe; ko te mea hoki e mauria atu e koe ka hoatu

e ahau ki te hoari. <sup>15</sup> Ka whakato koe, a e kore e kokoti; ka takahi koe i te oriwa, a e kore e whakawahi i a koe ki te hinu; i te waina hou, a e kore e inu i te waina. <sup>16</sup> No te mea e mau ana nga

tikanga a Omori, me nga mahi katoa a te whare o Ahapa, a e haere ana koutou i runga i o ratou whakaaro; kia meinga ai koe e ahau kia ururua, a ko nga tangata o kona hei whakahianga atu; a ka mau ki a koutou te ingoa kino o taku iwi.

## Chapter 7

<sup>1</sup> Aue, te mate i ahau! he rite hoki ahau ki nga kohikohinga o nga hua raumati, ki nga hamunga i te wa e whawhaki karepe ana: kahore he tautau hei kai; e hiahia ana toku wairua ki te hua piki

matamua. <sup>2</sup> Kua ngaro te tangata tapu i runga i te whenua, kahore hoki he tangata tika i roto i nga tangata: kei te whanga katoa ratou ki te toto; kei te whai ratou i tona hoa, i tona hoa ki te kupenga.

<sup>3</sup> Kei runga o ratou ringa i te mea kino kia mahia marietia e ratou; ka tono te rangatira, kei te tatari

hoki te kaiwhakawa kia utua; a ko te tangata nui, e puaki ana i a ia te nanakia o tona wairua: na,  
<sup>4</sup>  
 whiria tahitia ake e ratou. Ko te tangata pai o ratou, rite tonu ki te tumatakuru: ko te mea tino  
 tika, kino atu i te taiepa tataramoa: kua tae mai te ra o au tutei, ara te ra e whiua ai koe; ko aiane  
<sup>5</sup>  
 ratou pokaikaha ai. Kua e whakapono ki te hoa, kua e whakawhirinaki ki te kaiarahi: kaiponuhia  
<sup>6</sup>  
 nga tatau o tou mangai ki te wahine e takoto na i tou uma. E whakaiti ana hoki te tama ki te papa,  
 e whakatika atu ana te kotiro ki tona whaea, te hunaonga ki tona hungawai wahine; ko nga hoariri  
 o te tangata ko nga tangata o tona whare.  
<sup>7</sup>  
 Tena ko ahau, ka titiro ahau ki a Ihowa; ka tatari ahau ki te Atua o toku whakaoranga: tera  
<sup>8</sup>  
 toku Atua e rongu ki ahau. Kei whakamanamana ki ahau e toku hoariri; ki te hinga ahau, ka ara  
<sup>9</sup>  
 ano ahau; ki te noho ahau i te pouri, ko Ihowa hei whakamarama moku. Maku e waha te riri o  
 Ihowa, kua hara nei hoki ahau ki a ia; kia tohe ra ano ia i taku tohe, kia whakarite ra ano i taku  
<sup>10</sup>  
 whakawa, ka whakaputaina ahau e ia ki waho ki te marama, a ka kite ahau i tona tika. Katahi  
 toku hoariri ka kite, a ka taupokina e te whakama; i ki mai ra hoki ia ki ahau, Kei hea a Ihowa, tou  
<sup>11</sup>  
 Atua? Ka kite oku kanohi i taua wahine; akuanei ia takahia ai, peratia ai me te paru o nga ara. He  
<sup>12</sup>  
 ra hei hanganga mo ou taiepa! a taua ra ka matara rawa atu te tikanga i whakatakotoria. A taua  
 ra ka haere mai ratou ki a koe, mai i Ahiria me nga pa o Ihipa, mai i Ihipa ki te awa, mai i tetahi  
<sup>13</sup>  
 moana ki tetahi, i tetahi maunga ki tetahi maunga. Otiia ka uruatu te whenua, he mea mo te  
 hunga e noho ana i reira, mo nga hua hoki o a ratou mahi.  
<sup>14</sup>  
 Whangaia tau iwi ki tau rakau, nga hipi o tou kainga tupu, e noho mokemoke nei i te ngahere  
<sup>15</sup>  
 i waenganui o Karamere: kia kai ratou ki Pahana, ki Kireara, kia pera me nga ra o mua, Ka rite  
 ki nga ra i haere mai ai koe i te whenua o Ihipa, ka whakaaturia e ahau ki a ia nga mea whakamiharo.  
<sup>16</sup>  
 Ka kite nga iwi, ka whakama ki to ratou marohirohi katoa: ka kopania to ratou mangai ki to ratou  
<sup>17</sup>  
 ringa, a ka turi o ratou taringa. Ka mitimiti ratou i te puehu, ano he nakahi; ka oho wiri mai ratou  
 i o ratou piringa kopiri, ano ko nga mea ngokingoki o te whenua: ka haere wehi mai ratou ki a  
<sup>18</sup>  
 Ihowa, ki to tatou Atua, a ka matakau ki a koe. Ko wai he Atua hei rite mou, e muru nei i te he,  
 e whakarere noa nei i te poka ke o nga morehu o tona wahi tupu? E kore ia e kawe tonu i tona riri  
<sup>19</sup>  
 a ake ake, no te mea e ngakau nui ana ia ki te tohu tangata. Tera ia e tahuri ano, ka aroha ki a  
 tatou; ka pehia e ia o tatou kino ki raro ki ona waewae; ka panga ano e koe o ratou hara ki nga rire  
<sup>20</sup>  
 o te moana. Ka whakatutukitia e koe te mea tika ki a Hakopa, te aroha ki a Aperahama, ko tau  
 i oati ai ki o matou matua i nga ra o mua.

## Nahum

### Chapter 1

<sup>1</sup> Ko te poropititanga mo Ninewe, Ko te pukapuka o te kite a Nahumu Erekohe.

<sup>2</sup> He Atua hae a Ihowa, he rapu utu; he rapu utu a Ihowa, a ki tonu i te riri; e rapu utu ana a

Ihowa i ona hoariri, a e rongoatia ana e ia he riri mo ona hoariri. <sup>3</sup> He puhoi a Ihowa ki te riri, he nui tona kaha, e kore rawa e whakaharakoretia e ia te tangata hara. Ko to Ihowa ara kei te tukauati,

kei te paroro, ko nga kapua te puehu o ona waewae. <sup>4</sup> E riria ana e ia te moana, a meinga ana kia maroke, a whakamaroketia ana nga awa katoa: e ngohe ana a Pahana, me Karamere, a kahakore

noa iho te puawai o Repanona. <sup>5</sup> Wiri ana nga maunga i a ia, rewa ana nga pukepuke; huamo ake

ana te whenua i tona aroaro, ae ra, te ao, me nga tangata katoa e noho ana i reira. <sup>6</sup> Ko wai e kaha ki te tu i mua i tona aritarita? ko wai e kaha ki te whakatika, ina mura tona riri; ko te ringihanga

mai o tona weriweri, ano he ahi; ko nga kamaka wahia iho e ia. <sup>7</sup> He pai a Ihowa, he pa kaha i te

ra o te raru; e mohio ana hoki ia ki te hunga e whakawhirinaki ana ki a ia. <sup>8</sup> Otiia ka moti to reira wahi i tana waipuke e ngawha ana; ka whaia ano e ia ona hoariri ki roto ki te pouri.

<sup>9</sup> Ko te aha ta koutou e whakaaro na ki a Ihowa? ka moti rawa i a ia: e kore e tuaruatia te putanga

ake o te aitua. <sup>10</sup> No te mea, ahakoa rite ratou ki te tataramoa e whiwhi ana, ahakoa ki nga kopu

ano na ta ratou waina, ka tino pau ratou, ano he kakau witi kua maroke. <sup>11</sup> Kua puta mai i roto i a

koe tetahi e whakaaro ana i te he mo Ihowa, he kaiwhakatakoto i te whakaaro kino. <sup>12</sup> Ko te kupu tenei a Ihowa, Ahakoa tino kaha ratou, ahakoa tini, heoi ka tapahia ratou, ka pahemo ia. Ahakoa i

whiua koe e ahau, e kore koe e whiua e ahau a muri ake nei. <sup>13</sup> Na akuanei ahau wahi ai i tana ioka

i runga i a koe, momotu ai i ou here. <sup>14</sup> He whakahau hoki ta Ihowa mou, ara kia kaua e whakatokia tetahi o tou ingoa a muri ake nei: ka hatepea atu e ahau te whakapakoko tarai me te whakapakoko whakarewa i roto i te whare o ou atua: ka hanga e ahau he urupa mou; no te mea he kino koe.

<sup>15</sup> Nana, kei runga i nga maunga nga waewae o te kaikawe mai i te korero pai, o te kaikauwhau i te rongu mau. Mahia au hakari, e Hura, whakamana au kupu taurangi; no te mea heoi ano haeretanga atu o te tangata kino na waenga i a koe; kua hatepea raw atia atu ia.

## Chapter 2

<sup>1</sup> Kua tae ake te kaiwawahi ki tou aroaro: tiakina te pa, tuteia te ara, kia kaha tou hope, kia u  
<sup>2</sup> rawa tou kaha. No te mea ka whakahokia mai e Ihowa te kororia o Hakopa, me te kororia o  
 Iharaira: kua takoto kau hoki ratou i nga kaiwhakatakoto kau, kua he ano a ratou manga waina i a  
<sup>3</sup> ratou. Kua oti te whakangungu rakau a ana marohirohi te whakawhero, he ngangana te kakahu  
 o nga maia: kei te rino e kanapa ana te rite o nga hariata i te ra e takatu ai ia, a ko nga tao wiri rawa.  
<sup>4</sup> Ngana tonu nga hariata i nga ara, taututetute ana ki a ratou ano i nga waharoa: ko to ratou ahua  
 ano he roherohe, e rere ana me he uira. <sup>5</sup> Ka mahara ia ki ana metararahi: ka tapatu ratou i a ratou  
 e haere ana; ka hohoro ratou ki to reira taiepa, a ka rite te arai. <sup>6</sup> Ka whakatuwheratia nga kuwaha  
<sup>7</sup> o nga awa, ka papahoro te whare kingi. Na kua tu tahanga a Huhapa, kua maua atu ia, a ka tangi  
 ana pononga wahine, ko te reo koia ano kei to te kukupa, ko o ratou uma hei timipera ma ratou.  
<sup>8</sup> Ko Ninewe ia, ko tona rite mai onamata, kei te puna wai: heoi ka tahuti ratou; ka karanga, E tu,  
 e tu; heoi e kore tetahi e titiro whakamuri. <sup>9</sup> Pahuatia te hiriwa, pahuatia te koura: kahore hoki he  
<sup>10</sup> mutunga o nga rawa, o te kororia i roto i nga taonga ahua katoa. Kua takoto kau ia, kahore  
 ana mea, moti rawa; harotu kau te ngakau, kei te aki ano nga turi ki a raua, he nui te mamae kei  
 nga hope katoa, kua koma nga mata o ratou katoa.  
<sup>11</sup> Kei hea te nohoanga o nga raiona? te wahi kai a nga kua o raiona? te wahi i haereere ai te  
<sup>12</sup> raiona, me te raiona katua, me te kua o raiona, te ai he kaiwhakawehi? I haehaea mai e te raiona  
 he mea e makona ai ana kua o, notia ana e ia te kaki hei mea ma ana raiona uha, whakakii ana e  
<sup>13</sup> ia ona rua ki te kai, ona nohoanga hoki ki te mea i haehaea. Nana, hei hoariri tenei ahau mou,  
 e ai ta Ihowa o nga Mano, ka tahuna ano e ahau ana hariata i roto i te paowa, ka pau au kua o raiona  
 i te hoari: ka kore i ahau he haehaenga mau i runga i te whenua, e kore ano te reo o au karere e  
 rangona a muri ake nei.

## Chapter 3

<sup>1</sup> Aue, te mate mo te pa toto! kua ki katoa i te teka, i te pahua; kahore e mutu te muru taonga,  
<sup>2</sup> Ko te haruru o te whiu, ko te ngaeha o nga wira e keke ana; ko nga hoiho e takatakahi ana, ko nga

<sup>3</sup> hariata e tarapekepeke ana; Ko nga kaieke hoiho e ekeke ana, ko te wheriko o te hoari, ko te kanapa o te tao; ko te tini o te tupapaku, me te puranga nui o nga tinana mate: a kahore he mutunga

<sup>4</sup> o nga tinana; tutuki ana te waewae ki o ratou tinana: He maha hoki no nga kairautanga o te wahine ataahua i kairau nei; ko te rangatira nei ia o nga makutu, e hoko nei i nga iwi ki ana kairautanga, i

<sup>5</sup> nga hapu ano ki ana mahi makutu. Nana, hei hoariri tenei ahau mou, e ai ta Ihowa o nga mano, ka hurahia ano e ahau nga remu o tou ki tou aroaro; ka whakakite ano ahau i a koe e noho tahanga

<sup>6</sup> ana ki nga iwi, me tou whakama ki nga kingitanga. A ka maka e ahau he mea whakarihariha ki

<sup>7</sup> runga ki a koe, ka whakaititia koe e ahau, ka meinga hei tirohanga atu. Na, ko te hunga katoa e kite ana i a koe ka rere atu i a koe, a ka mea, Kua ururuatia a Ninewe; ko wai hei tangi ki a ia? me rapu e ahau ki hea he kaiwhakamarie mou?

<sup>8</sup> He pai ake ranei koe i Noamono, i tu nei i roto i nga awa, he mea karapoti e nga wai, ko tona

<sup>9</sup> pekerangi ko te moana, no te moana ano tona taiepa? Ko tona kaha ko Etiopia, ko Ihipa, kahore

<sup>10</sup> hoki he mutunga; he awhina nou a Putu, a Rupimi. Heoi kua whakaraua atu ia, kua riro hei parau; ko ana kohungahunga taia iho i te ahunga mai o nga ara katoa, mongamonga noa, i maka

<sup>11</sup> rota ratou mo ona tangata nunui, ko ona tangata rarahi katoa here rawa ki te mekameka. Tera

<sup>12</sup> ano koe ka haurangi, ka huna koe; a ka rapu koe he wahi kaha i te wehi o te hoariri. Ko ou pa taiepa katoa ka rite ki te piki he hua matamua nei ona: ki te rurerurea, ka taka ki roto ki te mangai

<sup>13</sup> o te tangata e kai ana. Nana, he wahine ou tangata i waenganui i a koe: ko nga kuwaha o tou

<sup>14</sup> whenua tuwhera pu ki ou hoariri; ka pau ou tutaki i te ahi. Utuhia he wai mou mo te whakapaenga, whakakahangia ou pa taiepa: haere ki te mahi paru, takatakahia te mea pokepoke, kia u te tahunga

<sup>15</sup> pereki. Ka pau koe i te ahi i reira, ka hatepea atu koe e te hoari, ko tana kai i a koe ka rite ki ta te tatarakihi: whakaraneatia koe, kia rite ki te tatarakihi, whakaraneatia koe, kia rite ki te

<sup>16</sup> mawhitiwhiti. Ko au kaihokohoko whakatokomahatia ake e koe i nga whetu o te rangi: ko ta te

<sup>17</sup> tatarakihi he pahua, a rere ana. Ko ou tangata i te potae kingi, ko to ratou rite kei te mawhitiwhiti, ko ou rangatira rite tonu ki nga pokai mawhitiwhiti e noho nei i nga taiepa i te ra maeke i te whitinga

<sup>18</sup> o te ra ka rere ratou, kahore hoki e mohiotia to ratou wahi, kei hea ra? Kei te moe au hepara, e te kingi o Ahiria; ko au metararahi kei te takoto; kua marara atu tou iwi ki runga ki nga maunga,

<sup>19</sup> kahore hoki he kaihuihui. Kahore he whakamahunga i tou pakaru; he mamae rawa tou marutanga: ko te hunga katoa e rongongano ana i te rongongano ki a koe, ka papaki o ratou ringa ki a koe: i kore hoki ki a wahi te panga tonutanga o tou kino.

## Habakkuk

### Chapter 1

<sup>1</sup> Ko te poropititanga i kitea e Hapakuku poropiti. <sup>2</sup> Kia pehea te roa, e Ihowa, o taku tangi, a kahore koe e rongō? e karanga atu ana ahau ki a koe mo te tutu, a kahore koe e whakaora. <sup>3</sup> He aha koe i whakakite mai ai i te kino ki ahau? he aha koe i titiro ai ki te pakeketanga? he pahua hoki, he tutu tenei kei toku aroaro, na he totohe tenei, a kei te oho ake he ngangare. <sup>4</sup> Na reira kahakore noa iho te ture, kore tonu ake e puta te whakawa; e karapotia ana hoki te tika e te kino: na reira, te putanga o te whakawa, he parori ke.

<sup>5</sup> Titiro atu ki nga tauwiwi, matakitaki, kia nui te miharo; no te mea kei te mahi ahau i tetahi mahi i o koutou ra, he mea e kore e whakaponohia, ki te korerotia atu. <sup>6</sup> No te mea tenei ka ara i ahau nga Karari, taua iwi nanakia ra, taua iwi hikaka tonu ra, e haerea nei e ratou te whanuitanga o te whenua, kia riro ai i a ratou nga kainga ehara nei i a ratou. <sup>7</sup> He hanga whakamataku ratou, he mea wehi: i ahau tonu ake i a ratou ta ratou na whakawa, me to ratou na rangatiratanga. <sup>8</sup> He tere atu a ratou hoiho i te reparo, he nanakia atu i te wuruhi o te ahiahi: ka tohatoha noa atu o ratou kaieke hoiho: ae ra, ka haere mai ano a ratou kaieke hoiho i tawhiti; ko ta ratou rere rite tonu ki ta te ekara e hohoro ana ki te kai. <sup>9</sup> Ko ratou katoa he mahi nanakia i haere mai ai; ko o ratou kanohi whakamau tonu me te mea ko te hau marangai, me te mea he kirikiri nga whakarau e aohia ana e ratou. <sup>10</sup> Ae ra, e taunu ana ia ki nga kingi, a hei kata mana nga rangatira: ka kata ia ki nga pa taiepa katoa; ka opehia ake hoki he puehu e ia, a riro tonu i a ia. <sup>11</sup> Katahi ia ka wheoro ake ano he hau, ka whiti atu, a ka nahi i te he: ara a ia, te tangata ko tona kaha nei tona atua.

<sup>12</sup> He tekia ianei nonamata riro koe, e Ihowa, e toku Atua, e toku Mea Tapu? e kore matou e mate. Kua waiho ia e koe, e Ihowa, hei whakawa; kua whakapumautia ia e koe, e te Kamaka, hei whiu. <sup>13</sup> He kanohi ma rawa ou, e kore koe e titiro ki te kino, e kore ano e ahei kia matakitaki koe ki te kino: he aha koe i matakitaki ai ki te hunga tinihanga, i whakarongo puku ai i te mea ka horomia e te tangata kino te tangata e tika rawa ana i a ia? <sup>14</sup> He aha nga tangata i meinga ai e koe kia rite ki nga ika o te moana, ki nga mea ngokingoki kahore nei o ratou kaiwhakahaere tikanga? <sup>15</sup> Ko ratou katoa tangohia ake e ia ki te matau, ka mau i a ia ki roto ki tana kupenga, a kokoa ana ki tana rou; na reira koa ana ia, whakamanamana ana. <sup>16</sup> Koia ia i whakahere ai ki tana kupenga, i tahu

whakakakara ai ki tana rou; no te mea na aua mea i whai ngako ai tona wahi, i momona ai tana kai.

17

He mea ano ranei tera e whakawateatia ai e ia tana kupenga, a kore iho e tohungia nga iwi e patua tonutia ana?

## Chapter 2

1

Ka tu ahau ki taku mahi tiaki, ka whakanoho i ahau ki te taumaihi, ka tutei atu, ka titiro atu, ko te aha e kii mai e ia ki ahau, a ko te aha e whakahokia e ahau ina riria taku. <sup>2</sup> Na ka utua mai taku e Ihowa; i ki mai ia, Tuhituhia te kite, kia marama rawa ki nga papa, kia tere ai te kaikorero.

3

Mo tona wa ano hoki i whakaritea ai te kite, a e whawhai ana ia ki te mutunga, a e kore e teka; ahakoa roa ia, tatari atu ki a ia; no te mea he pono rawa ka puta mai; e kore e whakaroa. <sup>4</sup> Nana, kei te whakakake tona ngakau, kahore e tika i roto i a ia: ma tona whakapono ia ki ora ai te tangata tika.

5

Ae ra hoki, he mea nanakia te waina, he tangata whakakake, kahore e ata noho i te kainga; ko tona hiahia whakanuia ake e ia ano ko te reinga; kei te mate tona rite, e kore ano e ngata, e tawhiua ana hoki e ia nga iwi katoa ki a ia, e tuapatia an a nga tangata katoa ki a ia: <sup>6</sup> E kore ianei e whakahuatia e enei katoa he kupu whakatauki mona, he whakapeka taunu ano mona, a ka mea, Aue, te mate mo te tangata e ami ana i te mea ehara nei i a ia! he pehea ra te roa? mo te tangata ano

e hauapu ake ana i te taunaha ki runga ki a ia! <sup>7</sup> E kore ianei e maranga ohore ake nga kaingau mou? e kore ianei e ara nga kaiwhakatoi i a koe, a ka waiho koe hei taonga parau ma ratou? <sup>8</sup> No te mea he maha nga iwi i pahuatia e koe, na ka pahuatia koe e nga toenga katoa o nga iwi; he mea hoki mo te toto o nga tangata, mo te mahi nanakia ki te whenua, ki te pa, a ki nga tangata katoa

ano i reira. <sup>9</sup> Aue, te mate mo te tangata, he kino nei te apo i apo taonga ai ia mo tona whare, he mea kia tiketike ake ai tona kohanga, kia ora ai ia i te kaha o te kino! <sup>10</sup> Kua takoto i a koe he

whakama mo tou whare i tau hatepenga atu i nga iwi maha; kua hara ano ki tou wairua ake. <sup>11</sup> Ka karanga hoki te kohatu i roto i te pakitara, ka whakahoki kupu ano te kurupae i roto i nga rakau.

12

Aue, te mate mo te tangata e hanga ana i te pa ki te toto, e whakau ana hoki i te pa ki te he! <sup>13</sup> He teka ianei na Ihowa o nga mano i mauiui ai nga tangata i roto i te ahi, i ruha ai nga iwi i te kahore

noa iho? <sup>14</sup> Ka kapi hoki te whenua i te matauranga ki te kororia o Ihowa, ano ko nga wai e taupoki ana i te moana.



15 Aue, te mate mo te tangata e mea ana i tona hoa kia inu, e apiti atu ana i te mea nanakia ki tera, e whakahaurangi ana hoki i a ia, kia titiro ai koe ki a ratou e takoto tahanga ana! <sup>16</sup> E ki ana koe i te whakama, kahore i te kororia: e inu hoki koe, kia waiho ai koe, ano he mea kokotikore: ka anga mai ki a koe te kapu a to Ihowa ringa matau, a he whakama whakarihariha ka tau ki runga ki <sup>17</sup> tou kororia. Ko te mahi nanakia hoki ki Repanona hei taupoki mou, me te whakangaromanga o nga kararehe i wehingia ra e ratou; mo te toto hoki o nga tangata, mo te mahi nanakia ki te whenua, ki te pa, ki nga tangata ano o reira. <sup>18</sup> He aha te pai o te whakapakoko i whaoa ai e tona kaihanganga; o te whakapakoko whakarewa ano, o te kaiwhakaako ki te teka, i whakawhirinaki ai tona kaihanganga ki tana mahi, ka mahi i nga whakapakoko wahangu? <sup>19</sup> Aue, te mate mo te tangata e mea ana ki te rakau, Maranga; ki te kohatu reokore, E ara! ma tenei koia e whakaako? Nana, kua oti te koura, te hiriwa, te whakapiri ki a ia, a kahore rawa he wairua i roto. <sup>20</sup> Kei tona temepara tapu ia a Ihowa. Whakarongoa, e te whenua katoa, i tona aroaro.

### Chapter 3

<sup>1</sup> He inoi na Hapakuku poropiti, ko Hikionoto te waiata. <sup>2</sup> E Ihowa, kua rongu ahau i tou rongu, wehi ana ahau: e Ihowa, kia ora tau mahi i waenganui o nga tau, kia matauria i waenganui o nga tau; i te mea e riri ana, mahara ki te tohu tangata.

<sup>3</sup> I haere mai te Atua i Temana, te Mea Tapu i Maunga Parana. (Hera. Hei hipoki tona kororia mo nga rangi; ki tonu te whenua i te whakamoemiti ki a ia. <sup>4</sup> Ko tona tiahotanga ano ko te marama; he hihi e puta ana mai i tona ringa: i reira ano te hunanga o tona kaha. <sup>5</sup> I mua i a ia te mate uruta e haere ana, i puta ano te mura whanariki i ona waewae. <sup>6</sup> Tu ana ia, a whanganga ana e ia te whenua; i titiro ia, a titaria ana e ia nga iwi; rerere ana nga maunga onamata, piko ana nga pukepuke o mua: ko ona ara koia ano kei onamata. <sup>7</sup> I kite ahau, kei te tuatea nga teneti o Kuhana; wiri ana nga tauarai o te whenua o Miriana. <sup>8</sup> I riri ranei a Ihowa ki nga awa? Ki nga awa ranei tou riri? Ki te moana ranei tou riri? I haere ai koe i runga i au hoiho, i au hariata whakaora? <sup>9</sup> I meinga tau kopere kia noho tahanga: ko nga oati ki nga hapu he kupu pono. (Hera. Wahia ana e koe te whenua ki nga awa. <sup>10</sup> I kite nga maunga i a koe, a wehi ana; i pahemo ake te waipuke o nga wai: i puaki te reo o te rire, a ara ana ona ringa ki runga. <sup>11</sup> Tu ana te ra me te marama i to raua kainga, haere

<sup>12</sup> ana ratou i te marama o au pere, i te wherikotanga o tau tao kanapa. Haereerea ana e koe te  
<sup>13</sup> whenua i runga i te aritarita, patua a wititia ana e koe nga iwi i runga i te riri. I puta koe ki te  
 whakaora i tau iwi, ae ra, ki te whakaora i tau i whakawahi ai; pakaru ana i a koe te upoko i roto o  
<sup>14</sup> te whare o te hunga kino, takoto kau ana te turanga, a taea noatia te kaki. Hera. Werohia ana e  
 koe te upoko o ona ariki ki ana tokotoko ano: ano he paroro ratou e aki mai ana ki te titaritari i  
<sup>15</sup> ahau; ko to ratou koanga ngakau he kai puku i te rawakore. Takahia ana e koe te moana ki au  
 hoiho, te kaupuranga o nga wai nunui.  
<sup>16</sup> I toku rongonga, wiri ana toku kopu, oraora ana oku ngutu i te reo: ngoto ana te pirau ki roto  
 ki oku whenua, a wiri ana ahau i toku wahi; he mea ia e whai okiokinga ai ahau i te ra o te raru, i  
<sup>17</sup> te haerenga ake ki te iwi e kokiri ana mai ki a ia me ana kaieke hoiho. Ahakoa kore te piki e  
 kopuku, kore nga waina e whai hua; ka he te mahi oriwa, kahore hoki nga mara e whai kai; ko nga  
<sup>18</sup> hipi poto ake i roto i nga taiepa, kahore hoki he kau i roto i nga taiepa kau: Otiia ka koa ahau ki  
<sup>19</sup> a Ihowa, ka whakamanamana ki te Atua o toku whakaoranga. Ko Ihowa, ko toku Ariki, toku  
 kaha, ka meinga e ia oku waewae kia rite ki o te hata, ka meinga ano ahau e ia kia takahi i runga i  
 oku wahi tiketike. Ki te tino kaiwaiata i runga i aku mea whakatangi.

## Zephaniah

### Chapter 1

<sup>1</sup> Ko te kupu a Ihowa i puta mai ki a Tepania tama a Kuhi, tama a Keraria, tama a Amaria, tama  
 a Hetekia, i nga ra o Hohia tama a Amono, kingi o Hura. <sup>2</sup> Ka poto rawa i ahau nga mea katoa i  
<sup>3</sup> runga i te mata o te oneone, e ai ta Ihowa. Ka poto i ahau te tangata, te kararehe; ka poto i ahau  
 te manu o te rangi, me te ika o te moana, nga tutukitanga waewae ngatahi ano ko te hunga kino;  
<sup>4</sup> ka hatepea atu ano e ahau te tangata i runga i te mata o te oneone, e ai ta Ihowa. Ka totoro ano  
 toku ringa ki runga ki a Hura, ki nga tangata katoa ano o Hiruharama; ka hatepea atu e ahau i tenei  
<sup>5</sup> wahi nga toenga o Paara, me te ingoa o nga Kemarimi, ratou ko nga tohunga; Me te hunga e  
 koropiko ana i runga i nga tuanui ki te ope o te rangi; ratou ko te hunga e koropiko ana, e oati ana  
<sup>6</sup> i a Ihowa, me te oati ano ratou i a Marakama; Me te hunga i tahuri atu nei i te whai i a Ihowa,  
 me te hunga kihai nei i ui ki a Ihowa, kihai ano i rapu i a ia.

<sup>7</sup> Whakarongoa i te aroaro o te Ariki, o Ihowa, ka tata hoki te ra o Ihowa, kua takoto hoki ta  
<sup>8</sup> Ihowa patunga tapu, kua whakatapua hoki e ia ana manuhiri. Na i te ra o ta Ihowa patunga tapu,  
ka whiua e ahau nga rangatira, ratou ko nga tama a te kingi, ko te hunga katoa ano he kakahu ke o  
<sup>9</sup> ratou. A taua ra ka whiua e ahau te hunga katoa e tupekepeke ana i runga i te paepae, e whakaki  
<sup>10</sup> ana i nga whare o o ratou ariki ki te nanakia, ki te tinihanga. A taua ra, e ai ta Ihowa, ka karanga  
<sup>11</sup> te reo i te kuwaha ika, he aue hoki i te wahi tuarua, a he nui te pakaru i nga pukepuke. Aue, e  
nga tangata o Makateha, kua moti hoki nga tangata katoa o Kanaana, kua hatepea atu nga kaimau  
<sup>12</sup> hiriwa katoa. I taua ra ka rapua e ahau ta Hiruharama, mea rawa ki te rama; ka whiua ano nga  
tangata kua totoka i runga i o ratou nganga, a e mea ana i roto i o ratou ngakau, E kore a Ihowa e  
<sup>13</sup> mahi i te pai, e kore ano e mahi i te kino. Na hei mea parau o ratou rawa; o ratou whare hei  
ururua: ae ra, ka hanga whare ratou; a e kore e nohoia e ratou, ka whakato i te mara waina, otiia e  
kore e inu i te waina.  
<sup>14</sup> Ka tata te ra nui o Ihowa, ka tata, nui atu te hohoro, ara te reo o te ra o Ihowa: nui noa atu  
<sup>15</sup> te tangi o te marohirohi i reira. He ra riri taua ra, he ra mamae, he pawera, he ra whakangaro,  
whakamoti, he ra pouri, he mangu, he ra kapua, he pouri kerekere; <sup>16</sup> Ko te ra ia o te tetere, o te  
<sup>17</sup> whakaoho mo nga pa taiepa, mo nga taumaihi tiketike. Ka mamae ano i ahau nga ngakau o nga  
tangata, ka rite ratou ki te matapo ina haere, mo ratou i hara ki a Ihowa: ka ringihia o ratou toto  
<sup>18</sup> ano he puehu, o ratou kikokiko ano he paru. E kore ano ta ratou hiriwa, ta ratou koura, e tau hei  
whakaora i a ratou i te ra o to Ihowa riri; engari ka pau te whenua katoa i te ahi, ara i tona hae; ka  
ohore hoki, ka poto i a ia nga tangata katoa o te whenua.

## Chapter 2

<sup>1</sup> Huihui, ae ra, huihui i a koutou, e te iwi kahore nei he whakama; <sup>2</sup> I te mea kiano te ture i  
whai hua, a kiano i pahemo te ra ano he papapa, i te mea kiano i tae iho ki a koutou te mura o to  
<sup>3</sup> Ihowa riri, i te mea kiano i tae iho ki a koutou te ra o to Ihowa riri. Rapua a Ihowa, e te hunga  
mahaki katoa o te whenua, e te hunga e mahi ana i tana i whakarite ai; rapua te tika, rapua te tikanga  
mahaki: me kahore koutou e piri i te ra o to Ihowa riri.  
<sup>4</sup> No te mea tera a Kaha ka mahue, ka ururuatia a Ahakerono: ka peia atu a Aharoro i te  
<sup>5</sup> poutumarotanga, ka hutia atu hoki a Ekerono. Aue, te mate mo nga tangata i nga tahatika o te

moana, mo te iwi o nga Kereti! Kua korero a Ihowa i te he mou, e Kanaana, e te whenua o nga Pirihitini; ka ngaro koe i ahau, kahore he tangata hei noho. <sup>6</sup> A ka waiho te tahatika o te moana hei haerenga hipi, me nga whare mo nga hepara, me nga taiepa mo nga hipi. <sup>7</sup> Ka waiho ano te tahatika mo nga toenga o te whare o Hura, ka whangaia e ratou a ratou hipi ki reira; ka takoto i te ahiahi i roto i nga whare o Ahakerono: no te mea ka tiroirohia ratou e Ihowa, e to ratou Atua, a ka whakahokia mai e ia i te whak arau.

<sup>8</sup> Kua rongo ahau i ta Moapa tawai, i nga taunu a nga tama a Amona, i ta ratou tawai ki taku iwi, i ta ratou whakatete mo to ratou rohe kia nui. <sup>9</sup> Mo reira e ora ana ahau, e ai ta Ihowa o nga mano, ta te Atua o Iharaira, he pono ka rite a Moapa ki Horoma, nga tama a Amona ki Komora, hei tupuranga ongaonga, hei rua tote, hei ururua, a ake ake: ma nga toenga o taku iwi ratou e pahua, hei kain ga tupu ratou mo nga morehu o aku tangata. <sup>10</sup> Hei utu tenei ki a ratou mo to ratou whakapehapeha, mo ta ratou rawai, mo ta ratou whakakake ki te iwi o Ihowa o nga mano. <sup>11</sup> Na ka wehingia a Ihowa e ratou, no te mea ka hiroki i a ia nga atua katoa o te whenua; a ka koropiko nga tangata katoa ki a ia i tona wahi, i tona wahi, ara nga motu katoa o nga tuaiwi.

<sup>12</sup> Ko koutou ano, e nga Etiopiana, ka werohia koutou ki taku hoari. <sup>13</sup> Ka totoro ano tona ringa ki te raki, a ka ngaro a Ahiria i a ia; a ka meinga a Ninewe hei ururua, ka maroke, ka pera i te koraha. <sup>14</sup> A ka tapapa nga kahui ki waenganui ona, nga kirehe katoa o nga tauwiwi; ka noho te kawau raua ko te matuku ki ona puku whakapaipai; ka puaki to raua reo i nga matapihi; ka ururuatia nga kuwaha: no te mea ka tu tahanga nga mea hita i a ia. <sup>15</sup> Ko te pa whakamanamana tenei i noho wehikore nei, i mea nei i roto i tona ngakau, Ko ahau tenei, kahore atu hoki, ko ahau anake: ano tona ururuatanga! he tapapatanga kirehe! ko te hunga katoa e tika ana na reira ka hi atu, ka tawhi i tona ringa.

### Chapter 3

<sup>1</sup> Aue te mate mo tenei e whakakeke nei, kua poke nei, mo te pa tukino! <sup>2</sup> Kihai ia i whakarongo ki te reo, kihai i pai ki te ako; kihai i whakawhirinaki ki a Ihowa, kihai i whakatata ki tona Atua.

<sup>3</sup> He raiona e hamama ana ona rangatira i roto i a ia, he wuruhi i te ahiahi ona kaiwhakarite, kahore a ratou toenga mo te ata. <sup>4</sup> Ko ona poropiti, he wairangi, he hunga tinihanga: kua whakapokea te wahi tapu e ona tohunga, kua tukinotia e ratou te ture. <sup>5</sup> He tika a Ihowa i roto i a ia; kahore ana mahi he: i tenei ata, i tenei ata, e puta ana tana whakawakanga ki te marama, e kore tana e ngaro

6  
 atu; na, ko te kaimahi i te he, e kore ia e mohio ki te whakama. Kua oti nga iwi te hatepe atu e ahau; tu kau ana o ratou taumaihi; kua ururua i ahau o ratou ara, kahore e haerea: kua ngaro o ratou

7  
 pa, kahore he tangata, kahore he kainoho. I ki ahau, He pono ka wehi koe i ahau, ka pai ki te ako; penei kihai i hatepea atu tona nohoanga, kihai i pera me aku whiunga katoa i a ia: heoi moata tonu to ratou maranga, he iho a ratou mahi katoa.

8  
 Mo reira tatari mai ki ahau, e ai ta Ihowa, ki te ra e whakatika ai ahau ki te taonga parakete: ko taku tikanga hoki tenei, kia huihuia mai nga tauwi, kia tawhiua mai nga kingitanga, kia ringihia ki runga ki a ratou toku riri, toku aritarita kat oa, mura tonu: ka pau hoki te whenua katoa i te ahi,

9  
 ara i toku hae. Ka puta he hoki i ahau i reira he reo tino tika mo nga iwi, e karanga ai ratou katoa

10  
 ki te ingoa o Ihowa, e kotahi tonu ai te whakaaro e mahi ai ki a ia. Ka kawea mai he whakahere ki ahau e te hunga e inoi ana ki ahau, ara e te tamahine a aku whati, i tera taha o nga awa o Etiopia.

11  
 I taua ra e kore koe e whakama ki tetahi o au mahi, o ou he ki ahau: no te mea ka tangohia atu e ahau i roto i a koe te hunga e whakamanamana ana, e whakapehapeha ana, e kore ano koe e

12  
 whakakake a muri ake nei i runga i toku maunga tapu. Ka whakatoea ano e ahau etahi i roto i a

13  
 koe, he ware, he rawakore, a ka whakawhirinaki ratou ki te ingoa o Ihowa. E kore nga toenga o Iharaira e mahi he, e korero teka ranei; e kore ano e kitea he arero teka i roto i o ratou mangai; ka kai hoki ratou, ka takoto, te ai he kaiwhakawehi.

14  
 Waiata, e te tamahine a Hiona; hamama, e Iharaira; whakapaua te ngakau ki te koa ki te

15  
 whakamanamana, e te tamahine a Hiruharama. Kua kore i a Ihowa nga whakawa mou, kua peia e ia tou hoariri; kei roto i a koe te kingi o Iharaira, ara a Ihowa; e kore koe e kite i te kino a muri

16  
 ake nei. Ko te korero tenei ki Hiruharama i taua ra, Kaua e wehi; e Hiona, kei ruha ou ringa.

17  
 Kei roto a Ihowa, tou Atua, i a koe, a he nui ia, mana e whakaora; ka koa ia, ka hari ki a koe; ka

18  
 ata noho ia i runga i tona aroha, ka whakamanamana ia, ka waiata ki a koe. Ka whakaminea e ahau te hunga e pouri ana ki te huihuinga nui, era i roto i a koe, era e mau na tona ingoa kino ki a

19  
 ratou. Nana, i taua wa, ka mahi ahau ki te hunga katoa e whakatupu kino ana i a koe: ka whakaora i te wahine e totitoti ana; ka kohikohi i te mea i peia atu, a hei whakamoemititanga ratou, hei ingoa

20  
 i nga whenua katoa i whakama ai ratou. I taua wa ka kawea mai koutou e ahau, a i taua wa ka whakaminea mai koutou e ahau: a hei ingoa koutou, hei whakamoemititanga i roto i nga iwi katoa o te whenua, ina whakahokia koutou e ahau i te whakarau me te titiro ano koutou, e ai ta Ihowa.

## Haggai

### Chapter 1

<sup>1</sup> I te rua o nga tau o Kingi Tariuha, i te ono o nga marama, i te ra tuatahi o te marama ka puta mai te kupu a Ihowa, he mea na Hakai poropiti, ki a Herupapera tama a Haratiera, kawana o Hura, raua ko te tino tohunga, ko Hohua tama a Iohereke; i me a ia. <sup>2</sup> Ko te kupu tenei a Ihowa o nga mano, e mea ana ia, Ki ta tenei iwi, Kahore ano kia taea noatia te wa, te wa e hanga ai to Ihowa whare. <sup>3</sup> Na ka puta mai te kupu a Ihowa, he mea na Hakai poropiti; i ki ia, <sup>4</sup> Ko ta koutou wa ianei tenei, e mea ma, e noho ai i o koutou whare kua oti nei to roto hipoki, i te mea he ururua tenei whare? <sup>5</sup> Na ko te kupu tenei a Ihowa o nga mano, Whakaaroa o koutou ara. <sup>6</sup> He nui ta koutou i whakato ai, he iti ta koutou i mau mai ai; e kai ana, heoi kahore e makona; e inu ana, te ngata i te wai; e kakahu ana i o koutou, te mahana tetahi; e riro ana i te kaimahi te moni mo tana mahi, a whaowhina ana e ia ki roto ki te putea koputaputa. <sup>7</sup> Ko te kupu tenei a Ihowa o nga mano, Whakaaroa o koutou ara. <sup>8</sup> Pikitia te maunga, maua mai he rakau, hanga hoki te whare; a ka manako ahau ki reira, ka whai kororia ano ahau, e ai ta Ihowa. <sup>9</sup> I tumanako hoki koutou kia maha, nana, he iti noa; ta koutou kawenga mai ki te whare, na kua puhipuhia e ahau. Mo te aha? e ai ta Ihowa o nga mano. Mo toku whare e ururua nei, kei te rere ia koutou ki tona whare, ki tona whare. <sup>10</sup> Na reira i kaiponuhia ai te tomairangi o te rangi, he mea ki a koutou; na reira ano i kaiponuhia ai nga hua o te whenua. <sup>11</sup> A karangatia ana e ahau he tauraki ki runga ki te whenua, ki nga maunga, ki te witi, ki te waina hou, ki te hinu, ki nga mea e puta mai ana i te whenua, ki te tangata, ki te kararehe, ki nga mahi katoa a nga ringa. <sup>12</sup> Na ka rongoa a Herupapera te tama a Haratiera raua ko te tino tohunga, ko Hohua tama a Iohereke, me nga morehu katoa o te iwi ki te reo o Ihowa, o to ratou Atua, ki nga kupu a Hakai poropiti, mo nga mea i unga mai ai ia e Ihowa, e to ratou Atua, na ka wehi te iwi i te aroaro o Ihowa. <sup>13</sup> Katahi a Hakai, te karere a Ihowa, i a ia nei nga kupu a Ihowa, ka korero ki te iwi, ka mea, Ko ahau hei hoa mo koutou, e ai ta Ihowa. <sup>14</sup> Na ka whakaohokia e Ihowa te wairua o Herupapera tama a Haratiera, o te kawana o Hura, me te wairua o te tino tohunga, o Hohua tama a Iohereke, me te wairua o nga morehu katoa o te iwi, a ka haere mai ratou, ka mahi i te mahi o te whare o Ihowa o nga mano, o to ratou Atua, <sup>15</sup> I te rua tekau ma wha o nga ra o te ono o nga marama, i te rua o nga tau o Kingi Tariuha.

## Chapter 2

<sup>1</sup> I te whitu o nga marama, i te rua tekau ma tahi o nga ra o te marama, ka puta mai te kupu a Ihowa, he mea na Hakai poropiti; i ki ia, <sup>2</sup> Tena, korero ki a Herupapera tama a Haratiera, kawana o Hura, raua ko te tino tohunga, ko Hohua tama a Iohereke, ki nga morehu ano o te iwi, mea atu, <sup>3</sup> Ko wai te morehu i roto i a koutou i kite i tenei whare i tona kororia o mua? e pehea ana hoki ki ta koutou titiro inaianei? ehara ranei ki o koutou na kanohi he kahore noa iho? <sup>4</sup> Na kia kaha aianei, e Herupapera, e ai ta Ihowa; kia kaha, e te tino tohunga, e Hohua tama a Iohereke; kia kaha hoki, e te iwi katoa o te whenua, e ai ta Ihowa, e mahi; ko ahau hoki hei hoa mo koutou, e ai ta Ihowa o nga mano. <sup>5</sup> Ka rite ki te kupu i whakaritea e ahau ki a koutou i to koutou haerenga mai i Ihipa; a i tu toku wairua i roto i a koutou; kaua e wehi. <sup>6</sup> No te mea ko te kupu tenei a Ihowa o nga mano, Kia kotahi ake ano, he wahi iti nei, a ka whakangaeuetia e ahau te rangi me te whenua, te moana me te wahi maroke. <sup>7</sup> A ka whakangaeuetia e ahau nga iwi katoa. Na ka haere mai nga mea ahuaureka o nga iwi katoa; a ka whakakiiia e ahau tenei whare ki te kororia, e ai ta Ihowa o nga mano. <sup>8</sup> Naku te hiriwa, naku hoki te koura, e ai ta Ihowa o nga mano. <sup>9</sup> Tera te kororia o tenei whare o muri nei ka nui atu i to tera i mua, e ai ta Ihowa o nga mano: ka hoatu ano e ahau te rongo mau i tenei wahi, e ai ta Ihowa o nga mano. <sup>10</sup> I te rua tekau ma wha o nga ra o te iwa o nga marama, i te rua o nga tau o Tariuha, ka puta mai te kupu a Ihowa, he mea na Hakai poropiti, i mea ia, <sup>11</sup> Ko te kupu tenei a Ihowa o nga mano, Tena ra uia te ture ki nga tohunga, mea atu, <sup>12</sup> Ki te maua e tetahi tangata he kikokiko tapu i te pito o tona kakahu, a ka pa taua pito ona ki tetahi taro, ki tetahi mea ranei e kohuatia ana, ki te waina, ki te hinu, ki tetahi kai ranei, a tapu ranei? Na ka whakahoki nga tohunga ka mea, Kahor e. <sup>13</sup> Ano ra ko Hakai, Ki te pa te tangata i poke i te tupapaku ki tetahi o enei, e poke ranei? Na ka whakahoki nga tohunga, ka mea, E poke ano. <sup>14</sup> Na ka oho a Hakai, ka mea, He pena ano enei tangata, he pena ano te iwi i toku aroaro nei, e ai ta Ihowa, he pena ano nga mahi katoa a o ratou ringa; ko nga mea katoa e whakaherea ana e ratou ki reira, he poke. <sup>15</sup> Na, tena ra, whakaaroa aianei i tenei ra, i era atu hoki, i te mea kahore ano i takoto tetahi kohatu ki runga ki tetahi kohatu i te temepara o Ihowa: <sup>16</sup> I taua wa puta noa, ki te tae tetahi tangata ki tetahi puranga e rua tekau nei ona mehua, na kotahi tonu tekau; ki te haere ki te poka waina ki te utu mai i etahi oko e rima tekau, na e rua tonu tekau. <sup>17</sup> I patua koutou e ahau, nga mahi katoa a o koutou ringa ki te ngingio, ki te koriri, ki te whatu, a kihai koutou i tahuri ki ahau, e ai ta Ihowa. <sup>18</sup> Whakaaroa tenei ra me

era atu ano, o te rua tekau ma wha o te iwa o nga marama, o te ra i whakatakotoria ai te turanga o  
<sup>19</sup>  
 te temepara o Ihowa, whakaaroa. Kei te whare witi ano ranei te purapura? ina, kahore ano te  
 waina, te piki, te pamekaranete, te oriwa, kia hua noa; ka timata i tenei ra taku manaaki i a koutou.  
<sup>20</sup>  
 I tuaruatia ano te puta mai o te kupu a Ihowa ki a Hakai i te rua tekau ma wha o nga ra o te  
<sup>21</sup>  
 marama; i mea ia, Korero ki a Herupapera kawana o Hura, mea atu, Ka whakangaeuetia e ahau  
<sup>22</sup>  
 te rangi me te whenua: Ka hurihia ake ano e ahau te torona o nga kingitanga, ka ngaro i ahau te  
 kaha o nga kingitanga o nga tauwi; ka hurihia ake e ahau nga hariata, me ona kaieke; ka riro iho  
<sup>23</sup>  
 ano nga hoiho me o ratou kaieke, tenei, tenei, i te hoari a tona tuakana. I taua ra, e ai ta Ihowa  
 o nga mano, ka mau ahau ki a koe, e taku pononga, e Herupapera tama a Haratiera, e ai ta Ihowa,  
 ka mea i a koe hei hiri: he mea whiriwhiri hoki koe naku, e ai ta Ihowa o nga mano.

## Zechariah

### Chapter 1

<sup>1</sup>  
 I te waru o nga marama, i te rua o nga tau o Tariuha, ka puta mai te kupu a Ihowa ki a Hakaraia,  
 tama a Perekia, tama a Iro poropiti; i mea ia, <sup>2</sup> Nui atu te riri o Ihowa ki o koutou matua. <sup>3</sup> Na mea  
 atu ki a ratou, Ko te kupu tenei a Ihowa o nga mano: Tahuri mai ano ki ahau, e ai ta Ihowa o nga  
<sup>4</sup>  
 mano, a ka tahuri atu ano hoki ahau ki a koutou, e ai ta Ihowa o nga mano. Kei rite koutou ki o  
 koutou matua, i karanga ra nga poropiti o mua ki a ratou, i mea, Ko te kupu tenei a Ihowa o nga  
 mano, Tahuri mai inaianei i o koutou ara kino, i a koutou mahi kino: otiia kihai ratou i rongu, kihai  
<sup>5</sup>  
 hoki i whai taringa ki ahau, e ai ta Ihowa. Ko o koutou matua, kei hea ratou? a ko nga poropiti,  
<sup>6</sup>  
 e ora tonu ana ranei ratou ake aka? Na, ko aku kupu me aku tikanga i whakahaua e ahau ki aku  
 pononga, ki nga poropiti, kihai ranei o koutou matua i rokohanga e era? a hoki mai ana ratou, mea  
 ana, Ka pera i ta Ihowa o nga mano i whakaaro ai kia meatia ki a matou, he mea whakarite ki o  
 matou ara, ki a matou mahi; ka pera tonu tana ki a matou.  
<sup>7</sup>  
 I te rua tekau ma wha o nga ra o te tekau ma tahi o nga marama, ara o te marama Hepata, i  
 te rua o nga tau o Tariuha, ka puta mai te kupu a Ihowa ki a Hakaraia tama a Perekia, tama a Iro  
<sup>8</sup>  
 poropiti; i mea ia, I titiro ahau i te po, na ko tetahi tangata e noho ana i runga i te hoiho whero, a  
 tu ana ia i roto i nga ramarama i te wharua; a i muri atu i a ia ko etahi hoiho, he whero, he kopurepure,  
<sup>9</sup>  
 he ma. Na ka mea atu ahau, E toku ariki, he aha enei? A ka ki mai te anahera i korero ki ahau,



10 Maku e whakaatu ki a koe te tikanga o enei. Na ka oho mai te tangata i tu ra i roto i nga ramarama,  
 ka mea, Ko nga mea enei i unga atu nei e Ihowa hei haereere i te whenua. 11 Na ka whakahoki  
 ratou ki te anahera a Ihowa e tu ana i roto i nga ramarama, ka mea, Kua haereerea e matou te  
 whenua, nana, kei te ata noho te whenua katoa, kei te marie. 12 Katahi ka oho te anahera a Ihowa,  
 ka mea, E Ihowa o nga mano, kia pehea te roa ou ka kore nei e tohu i Hiruharama, i nga pa o Hura,  
 e mauaharatia nei e koe i enei tau e whitu tekau? 13 Na ka whakahoki a Ihowa ki te anahere i korero  
 nei ki ahau, he kupu pai, ara he kupu whakamarie. 14 Heoi ka mea ki ahau te anahera i korero nei  
 ki ahau, Karanga atu koe, mea atu, Ko te kupu tenei a Ihowa o nga mano, He nui te hae i hae ai  
 ahau ki Hiruharama, ki Hiona. 15 A he tino nui toku riri ki nga iwi e noho humarie ana: he iti noa  
 ra hoki toku riri, a na ratou i whakatetere te he. 16 Mo reira ko te kupu tenei a Ihowa: Kua hoki  
 mai ahau ki Hiruharama i runga i te tohu tangata; ka hanga toku whare ki reira, e ai ta Ihowa o nga  
 mano, a ka whakamarokia he aho ki runga ki Hiruharama. 17 Karanga atu ano, mea atu, Ko te kupu  
 tenei a Ihowa o nga mano Tera oku pa e rauroha noa atu i te pai; a tera a Ihowa ka whakamarie i  
 Hiona, tera ka whiriwhiri i Hiruharama.  
 18 Na ka maranga ake oku kanohi, a ka kite ahau, nana, e wha nga haona. 19 Na ka mea ahau  
 ki te anahera i korero nei ki ahau, He aha enei? Ano ra ko ia ki ahau, Ko nga haona enei nana i  
 whakamarara a Hura, a Iharaira, a Hiruharama. 20 Na ka whakakitea e Ihowa etahi kamura ki ahau,  
 tokowha. 21 Katahi ahau ka mea, I haere mai enei ki te aha? A ka korero tera, ka mea, Ko nga  
 haona enei nana i whakamarara a Hura, i kore ai e ara te mahunga o tetahi: otira i haere mai enei  
 ki te whakawehi i a ratou, ki te whakataka iho i nga haona o nga t auiwi, o te hunga i ara nei to  
 ratou haona ki te whenua o Hura, ki te titaritari i a ia.

## Chapter 2

1 I maranga ake ano oku kanohi, i titiro, na ko tetahi tangata, he aho ruri i tona ringa. 2 Na ka  
 mea ahau, E haere ana koe ki hea? A ka mea ia ki ahau, Ki te whanganga i Hiruharama, kia kitea  
 ai he aha tona whanui, he aha tona roa. 3 Na ka haere te anahera i korero ra ki ahau, a ka puta ano  
 tetahi anahera ki te whakatau i a ia, 4 A ka mea atu ki a ia, E oma, korero atu ki te taitama nei, ki  
 atu, Ka nohoia a Hiruharama, ka rite ki nga pa taiepakore, i te tini hoki o te tangata, o nga kararehe  
 i roto: 5 No te mea ko ahau, ko Ihowa, hei taiepa ahi ahau ki a ia a tawhio noa, a ko ahau hei kororia  
 i roto i a ia.

<sup>6</sup> Ho ho! rere mai i te whenua o te raki, e ai ta Ihowa; kua whakamararatia atu hoki koutou e ahau me te mea ko nga hau e wha o te rangi, e ai ta Ihowa. <sup>7</sup> E Hiona, kawhaki i a koe, e koe e noho mai na i te tamahine a Papurona. <sup>8</sup> Ko te kupu hoki tenei a Ihowa o nga mano; No muri i te kororia kua unga ahau e ia ki nga tauwi nana na koutou i pahua; ko te tangata hoki e pa ana ki a koutou, e pa ana ki te whatupango o tona kanohi. <sup>9</sup> Na, tenei ka ruru toku ringa ki a ratou, a hei taonga parau ratou ma a ratou pononga; a ka mohio koutou na Ihowa o nga mano ahau i unga mai. <sup>10</sup> Waiata, kia koa, e te tamahine a Hiona: no te mea na, kei te haere atu ahau, a ka noho ahau i roto i a koe, e ai ta Ihowa. <sup>11</sup> A he maha nga iwi e whakauru i a ratou ki a Ihowa i taua ra, a ko ratou hei iwi maku: a ka noho ahau i roto i a koe, a ka mohio koe na Ihowa o nga mano ahau i unga mai ki a koe. <sup>12</sup> A ka riro i a Ihowa a Hura hei wahi tupu mana i te whenua tapu, tera ano hoki ia ka whiriwhiri Hiruharama. <sup>13</sup> Whakarongoa, e nga kikokiko katoa, i te aroaro o Ihowa: kua whakaohokia mai hoki ia i tona kainga tapu.

### Chapter 3

<sup>1</sup> I whakakitea hoki e ia ki ahau a Hohua, te tino tohunga e tu ana i te aroaro o te anahera a Ihowa, me Hatana e tu ana i tona matau hei hoariri mona. <sup>2</sup> Na ka mea atu a Ihowa ki a Hatana, kia whakatupehupehu a Ihowa ki a koe, e Hatana; ae ra, ko Ihowa nana nei a Hiruharama i whiriwhiri, kia whakatupehupehu a Ihowa ki a koe: he teka ianei he mounga tenei kua kapohia mai i roto i te ahi? <sup>3</sup> Na he whakahouhou nga kakahu o Hohua, a i tu ia i te aroaro o te anahera. <sup>4</sup> Na ka oho ia, ka mea ki te hunga e tu ana i tona aroaro, ka ki atu, Tangohia nga kakahu paru i a ia. Katahi ia ka mea ki a ia, Nana, kua meinga e ahau tou he kia pahemo atu i a koe, a ka whakakakahuria koe e ahau ki nga kakahu whakapaipai. <sup>5</sup> Na ka mea ahau, Potaea he potae ataahua ki tona mahunga. Na potaea ana e ratou he potae ataahua ki tona mahunga, a whakakakahuria ana ia e ratou; me te tu ano te anahera a Ihowa. <sup>6</sup> Katahi te anahera a Ihowa ka kauwhau ki a Hohua, ka mea, <sup>7</sup> Ko te kupu tenei a Ihowa o nga mano; Ki te haere koe i aku ara, ki te puritia e koe aku mea, na mau ano e whakarite mo toku whare, mau hoki e tiaki oku marae, a ka hoatu e ahau he haereerenga mou i roto i te hunga e tu nei. <sup>8</sup> Whakarongo mai aiane, e Hohua, e te tino tohunga, koutou ko ou hoa e noho na i tou aroaro; hei tohu hoki ratou, aua tangata: no te mea, nana, ka kawea mai e ahau taku pononga, te Manga. <sup>9</sup> Na, ko te kohatu i hoatu e ahau ki te aroaro o Hohua, e whitu nga kanohi o taua kohatu kotahi;

na, maku e whaowhao ona whakairo, e ai ta Ihowa o nga mano, a ka whakawateatia atu e ahau te  
<sup>10</sup>  
 he o taua whenua i te ra kotahi. I taua ra, e ai ta Ihowa o nga mano, ka karangatia e koutou tona  
 hoa, tona hoa, i raro i te waina, i raro hoki i te piki.

## Chapter 4

<sup>1</sup>  
 Na ka hoki mai te anahera i korero ra ki ahau, ka whakaarahia ahau, ko toku rite kei te tangata  
 e whakaarahia ana i te moe. <sup>2</sup> Na ka mea ia ki ahau, Ko te aha e kitea ana e koe? Ano ra ko ahau,  
 Kua kite ahau, na, ko tetahi turanga rama, he koura katoa, me tona peihana i tona pito ki runga, ko  
 ona rama e whitu ki runga o tera; e whitu nga korere o te rama kotahi i tona pi to ki runga; <sup>3</sup> Na e  
 rua nga oriwa i tona taha, ko tetahi i te taha ki matau o te peihana, ko tetahi i tona taha mau. <sup>4</sup> Na  
 ka oho atu ahau, ka mea ki te anahera i korero ki ahau, ka ki atu, He aha enei, e toku ariki? Katahi  
 te anahera i korero ra ki ahau ka oho, ka mea ki ahau, Kahore ranei koe e mohio he aha enei? Ano  
<sup>5</sup>  
 ra ko ahau, Kahore, e toku ariki. <sup>6</sup> Na ka oho mai ia, ka korero ki ahau, ka mea, Ko te kupu tenei  
 a Ihowa ki a Herupapera, e ki ana: Ehara i te mea ma te uaua, ma te kaha, engari ma toku wairua,  
<sup>7</sup>  
 e ai ta Ihowa o nga mano. Ko wai koe, e te maunga nui? i te aroaro o Herupapera hei papatairite  
 koe: a ka whakaputaina mai e ia te kohatu o runga rawa, me te pa ano nga karanga, He pai, he pai  
<sup>8</sup> <sup>9</sup>  
 mona. I puta mai ano te kupu a Ihowa ki ahau, i mea, Na nga ringa o Herupapera i whakatakoto  
 te turanga mo tenei whare, ma ona ringa ano e whakaoti; a ka mohio koe na Ihowa o nga mano  
<sup>10</sup>  
 ahau i unga mai ki a koutou. Ko wai oti i whakahawea ki te ra o nga mea ririki? ka koa hoki  
 ratou, ka kite hoki i te kohatu paramu i roto i te ringa o Herupapera, ara enei e whitu nei, koia nei  
 nga kanohi o Ihowa; e kopikopiko ana ratou i te whenua katoa.  
<sup>11</sup>  
 Katahi ahau ka oho atu, ka mea ki a ia, He aha enei oriwa e rua i te taha ki matau o te turanga  
<sup>12</sup>  
 rama, i te taha hoki ki mau? I whakahoki atu ano ahau, he tuarua, ka mea ki a ia, He aha enei  
 manga oriwa e rua, e rua nga korere koura i piri atu ai raua, i rere atu ai te hinu koura i roto i aua  
<sup>13</sup>  
 korere ra? Katahi tera ka korero mai ki ahau, ka mea, Kahore ranei koe e mohio ko te aha enei?  
<sup>14</sup>  
 Ano ra ko ahau, Kahore, e toku ariki. Na ka ki mai ia, Ko enei e rua ko nga tama a te hinu, e tu  
 ana i te taha o te Ariki o te whenua katoa.

## Chapter 5

<sup>1</sup> Na ka maranga ake ano oku kanohi, a ka kite, na ko tetahi pukapuka e rere a manu ana. <sup>2</sup> Na ka mea ia ki ahau, Ko te aha tau e kite na? Ano ra ko ahau, He pukapuka e rere ana taku e kite nei; ko tona roa e rua tekau whatianga, ko tona whanui kotahi tekau whatianga. <sup>3</sup> Katahi ia ka mea mai ki ahau, Ko te kanga tenei ka puta atu nei ki te mata o te whenua katoa: ko nga tangata katoa hoki e tahae ana ka hatepea atu i tetahi taha, ka rite ki ta tenei; a ko nga tangata katoa e oati teka ana, ka hatepea atu i tera taha, ka rite ki ta tenei. <sup>4</sup> Maku ano e mea kia puta atu, e ai ta Ihowa o nga mano, a ka uru ki te whare o te tahae, ki te whare hoki o te tangata i oatitia tekatia ai toku ingoa; a ka noho ki roto ki tona whare, a pau noa ona rakau me ona kohatu.

<sup>5</sup> Katahi te anahera i korero ra ki ahau ka puta, a ka mea ki ahau, Tena ra, e ara ou kanohi, tirohia ko te aha tenei ka puta nei. <sup>6</sup> Ano ra ko ahau, He aha koia? A ka ki mai ia, Ko te epa tenei e puta nei. I ki mai ano ia, Ko to ratou ahua tenei i te whenua katoa: <sup>7</sup> Na ko tetahi taranata mata kua oti te hapai ake: a he wahine tenei e noho nei i roto i te epa. <sup>8</sup> Na ka ki ia, Ko te Kino tenei; na maka iho ana ia e ia ki roto ki te epa: a maka ana e ia te poro mata ki runga ki te ngutu o taua epa.

<sup>9</sup> Katahi ka maranga ake oku kanohi, ka kite, na ko nga wahine tokorua e puta mai ana, i roto hoki te hau i o raua parirau; ko o raua parirau hoki koia ano kei o te taka; a hapainga ake ana e raua te epa ki te takiwa o te whenua, o te rangi. <sup>10</sup> Katahi ahau ka mea atu ki te anahera i korero ra ki ahau, E maua ana e enei te epa ki hea? <sup>11</sup> A ka ki mai tera ki ahau, Hei hanga whare mona ki te whenua o Hinara: a ka pumau ki reira, ka whakaturia ki tona turanga.

## Chapter 6

<sup>1</sup> A ka maranga ake ano oku kanohi, ka kite, na e wha nga hariata e puta mai ana i waenganui o nga maunga e rua; na, ko nga maunga, he maunga parahi. <sup>2</sup> I te hariata tuatahi he whero nga hoiho; i te hariata tuarua he mangu nga hoiho; <sup>3</sup> I te toru o nga hariata he ma nga hoiho, i te wha o nga hariata he kopurepure, he pakaka nga hoiho. <sup>4</sup> Katahi ahau ka oho atu, ka mea ki te anahera i korero ra ki ahau, He aha enei, e toku ariki? <sup>5</sup> Na ka whakahoki mai te anahera, ka mea ki ahau, Ko nga hau e wha enei o te rangi, e haere mai ana i te tu i te aroaro o te Ariki o te whenua katoa.

<sup>6</sup> Ko te hariata i nga hoiho mangu, e haere ana ratou ki te whenua i te raki; a i haere nga mea ma i  
 muri i a ratou; na ko nga mea kopurepure i ahu pera ki te whenua ki te tonga. <sup>7</sup> I haere atu ano nga  
 mea pakaka, i whai kia haereere, kia kopikopiko ratou i te whenua: na ka mea ia, Haere atu koe,  
<sup>8</sup> kopikopiko i te whenua. Na kei te kopikopiko ratou i te whenua. Katahi tera ka karanga ki ahau,  
 ka korero mai hoki ki ahau, ka mea, Nana, ko enei i ahu atu nei ki te whenua ki te raki, kua marie  
 i a ratou toku wairua i te whenua ki te raki.  
<sup>9</sup> I puta mai ano te kupu a Ihowa ki ahau, i mea, <sup>10</sup> Tangohia ta nga whakarau, ara ta Hererai,  
 ta Topia, ta Ieraia; haere mai ano koe i taua ra, ka tomo ki te whare o Hohia tama a Tepania, ki te  
 whare i tae mai ai ratou i Papurona; <sup>11</sup> Ae ra, ka tango i ta ratou hiriwa, koura hoki, ka hanga ai i  
 etahi karauna, a ka potae atu ki te mahunga o te tino tohunga, o Hohua tama a Iohereke; <sup>12</sup> Korero  
 atu hoki ki a ia, mea atu, Ko te kupu tenei a Ihowa o nga mano, e ki ana, Nana, te tangata ko tona  
 ingoa nei ko te Manga; a ka tupu ake ano ia i tona wahi, a mana e hanga te temepara o Ihowa:  
<sup>13</sup> Mana rawa e hanga te temepara o Ihowa; a mana e waha te kororia, ka noho hoki ia ka whakahaere  
 tikanga i runga i tona torona; a hei tohunga ia i runga i tona torona: a ka whakaaro ngatahi raua mo  
 te rongu mau. <sup>14</sup> Ka ai hoki nga karauna hei whakamahara ki a Hereme ratou ko Topia, ko Ieraia,  
 ko Hene tama a Tepania, i roto i te temepara o Ihowa. <sup>15</sup> Ka haere mai ano te hunga i tawhiti, ka  
 hanga i roto i te temepara o Ihowa, a ka mohio koutou na Ihowa o nga mano ahau i unga mai ki a  
 koutou. A e puta ano tenei, ki te ata whakarongo koutou ki te reo o Ihowa, o to koutou Atua.

## Chapter 7

<sup>1</sup> Na i te wha o nga tau o Kingi Tariuha ka puta mai te kupu a Ihowa ki a Hakaraia, i te wha o  
 nga ra o te iwa o nga marama, ara o Kihereu. <sup>2</sup> Na kua unga e te hunga o Peteere a Haretere raua  
 ko Rekeme Mereke, me a raua tangata, ki te inoi manaaki i a Ihowa, <sup>3</sup> A hei korero hoki ki nga  
 tohunga o te whare o Ihowa o nga mano, ki nga poropiti hoki, hei mea, Me tangi ranei ahau i te  
 rima o nga marama, me te wehe i ahau, me pera me taku i mea ai i enei tau ka maha? <sup>4</sup> Na ka puta  
 mai te kupu a Ihowa o nga mano ki ahau, ka mea, <sup>5</sup> Korero ki nga tangata katoa o te whenua, ratou  
 ko nga tohunga, mea atu, I a koutou i nohopuku ra, i tangi ra, i te rima, i te whitu o nga marama,  
 ara i enei tau e whitu tekau, he nohopuku ranei ta koutou ki ahau? ki ahau koia? <sup>6</sup> A i a koutou e  
 kai nei, e inu nei, he teka ianei ma koutou ano ta koutou e kai ai, e inu ai? <sup>7</sup> Ehara ianei i te mea

kia rongu koutou i nga kupu i karangatia e Ihowa, ara e nga poropiti o mua, i te mea e nohoia ana a Hiruharama, e noho rangatira ana, me ona pa ano a taka noa, i te mea hoki e nohoia ana te tonga me te mania?

<sup>8</sup> I puta mai ano te kupu a Ihowa ki a Hakaraia, i mea, <sup>9</sup> Ko te kupu tenei a Ihowa o nga mano, e mea ana, Kia pono te whakarite o te whakawa, kia puta te aroha me te tohu tangata ki tona tuakana, ki tona teina. <sup>10</sup> Kua hoki e tukinotia te pouaru, te pani, te manene, te ware; kua hoki e whakaaroa he kino i roto i o koutou ngakau ki tona tuakana, ki tona teina. <sup>11</sup> Heoi kihai ratou i pai ki te whakarongo, kei te whakahoki i te pokohiwi, kei te whakapuhoi i o ratou taringa kei rongu. <sup>12</sup> Ae ra, i meinga e ratou o ratou ngakau kia rite ki te taimana kei rongu ratou ki te ture, ki nga kupu hoki i unga atu e Ihowa o nga mano, he mea na tona wairua, na te ringa o nga poropiti o mua; na reira ka puta mai he riri nui i a Ihowa o nga mano. <sup>13</sup> Na, i tana karangatanga, kihai ratou i rongu; waihoki ka karanga ratou, a e kore ahau e rongu, e ai ta Ihowa o nga mano: <sup>14</sup> Otiia ka aia atu ratou e ahau ki te paroro ki waenga i nga iwi katoa kihai i mohiotia e ratou. Heoi ururua ana te whenua i muri i a ratou, te haerea, te hokia; na ratou hoki i mea te whenua ahuaireka kia ururua.

## Chapter 8

<sup>1</sup> I puta mai ano te kupu a Ihowa o nga mano ki ahau, i mea, <sup>2</sup> Ko te kupu tenei a Ihowa o nga mano, Nui atu te hae i hae ai ahau ki Hiona, he nui hoki te riri i hae ai ahau ki a ia. <sup>3</sup> Ko te kupu tenei a Ihowa; Kua hoki nei ahau ki Hiona, kua noho ki Hiruharama; a tera e kiia a Hiruharama, Ko te pa o te pono, ko te maunga o Ihowa o nga mano, Ko te maunga tapu. <sup>4</sup> Ko te kupu tenei a Ihowa o nga mano, Tenei ake ka noho he koroheke, he ruruhi ki nga waharoa o Hiruharama, rite rawa te ringa o tenei, o tenei, i te tokotoko, he maha hoki no nga tau. <sup>5</sup> Ko nga waharoa ano o te pa kapi tonu i nga tamariki tane, i nga kotiro e takaro ana i ona waharoa. <sup>6</sup> Ko te kupu tenei a Ihowa o nga mano; Ki te pakeke ki te titiro a nga morehu o tenei iwi i aua ra, e pakeke ano ranei ki taku titiro? e ai ta Ihowa o nga mano. <sup>7</sup> Ko te kupu tenei a Ihowa o nga mano, Tenei ahau te whakaora nei i taku iwi i te whenua ki te rawhiti, i te whenua ano hoki ki te hauauru. <sup>8</sup> Ka kawea mai ano ratou e ahau, ka noho ratou ki waenganui o Hiruharama, a hei iwi ratou maku, ko ahau hoki hei Atua mo ratou i runga i te pono, i te tika. <sup>9</sup> Ko te kupu tenei a Ihowa o nga mano, Kia kaha o koutou ringa, e te hunga e rongu ana i enei ra ki enei kupu o roto i te mangai o nga poropiti i te ra i whakatakotoria ai te turanga mo te whare

<sup>10</sup>  
 o Ihowa o nga mano, ara mo te temepara kia hanga ai. I mua hoki i enei ra kahore he utu mo te mahi a te tangata, kahore he utu mo ta te kararehe; kahore hoki he ata noho mo te tangata i haere atu, mo te tangata ano i haere mai, i te hoariri hoki; naku hoki i mea nga tangata katoa kia whawhai

<sup>11</sup>  
 ki to na hoa, ki tona hoa. Na e kore taku inaianei ki nga morehu o tenei iwi e rite ki to nga ra o

<sup>12</sup>  
 mua, e ai ta Ihowa o nga mano. No te mea ka ai te purapura o te rongu mau, ka tukua mai ona hua e te waina, ka tukua mai ano ona mau e te whenua, ka homai hoki to ratou tomairangi e nga

<sup>13</sup>  
 rangi; maku ano e mea nga morehu o tenei iwi kia whiwhi ki enei mea katoa. Na i mua hei kanga koutou i roto i nga iwi, e te whare o Hura, e te whare o Iharaira, ka pena te nui o taku whakaora i

<sup>14</sup>  
 a koutou, a hei manaakitanga koutou: kaua e wehi, kia kaha o koutou ringa. Ko te kupu hoki tenei a Ihowa o nga mano, Ka rite ki taku meatanga i te he mo koutou i te whakapataritaringa a o

<sup>15</sup>  
 koutou matua ki ahau, e ai ta Ihowa o nga mano, a kihai toku whakaaro i puta ke: Ka pera ano te hoki ake o toku whakaaro i enei ra ki te pai kia meatia ki Hiruharama, ki te whare ano o Hura:

<sup>16</sup>  
 kaua e wehi. Ko a koutou enei e mea ai; Korerotia te pono ki tona hoa, ki tona hoa; kia pono,

<sup>17</sup>  
 kia whai i te rangimarie ta koutou whakarite whakawa i o koutou kuwaha: Kaua hoki e whakaaroa he kino i roto i o koutou ngakau ki tona hoa, ki tona hoa; kaua ano e arohaina te oati teka; no te mea e kinongia ana enei mea katoa e ahau, e ai ta Ihowa.

<sup>18</sup>  
 I puta ano te kupu a Ihowa o nga mano ki ahau: i mea,

<sup>19</sup>  
 Ko te kupu tenei a Ihowa o nga mano, Ko te nohopuku o te wha o nga marama, ko te nohopuku o te rima, ko te nohopuku o te whitu, ko te nohopuku o te ngahuru, hei oranga ngakau ena ki te whare o Hura, hei mea whakahari,

<sup>20</sup>  
 hei hakari harakoa; na arohaina te pono me te ata noho. Ko te kupu tenei a Ihowa o nga mano,

<sup>21</sup>  
 Tenei ake ka tae mai he iwi, he tangata i nga pa maha: A ka haere nga tangata o tetahi pa ki tetahi pa, ka mea, Hapainga, tatou ka haere ki te inoi ki te aroaro o Ihowa, ki te rapu i a Ihowa o

<sup>22</sup>  
 nga mano: ka haere ano hoki ahau. Ae ra, he tini nga iwi, he kaha nga tauwiwi e haere mai ki te

<sup>23</sup>  
 rapu i a Ihowa o nga mano i Hiruharama, ki te inoi ki te aroaro o Ihowa. Ko te kupu tenei a Ihowa o nga mano, i aua ra ka hopu nga tangata kotahi tekau, he hunga no nga reo katoa o nga iwi, ka hopu i te remu o to tetahi Hurai, ka mea, Kia haere tahi tatou; kua rongu hoki matou kei a koutou te Atua.

## Chapter 9

<sup>1</sup> Ko te poropititanga o te kupu a Ihowa i te whenua o Hararaka. Na, ko tona taunga atu kei  
 Ramahiku; e whai kanoahi ana hoki te tangata me nga hapu katoa o Iharaira ki a Ihowa. <sup>2</sup> Kei Hamata  
 ano e tata ra ki reira; kei Taira, kei Hairona no te mea he pa whakaaro nui rawa ia. <sup>3</sup> I hanga ano  
 e Taira he pa kaha mona, i opehia e ia te hiriwa, ano he puehu, te koura parakore, ano ko te paru o  
 nga waharoa. <sup>4</sup> Nana, ma te Ariki ia e pei, ka patua hoki e ia tona kaha i te moana; ka pau ia i te  
 ahi. <sup>5</sup> Ka kite a Ahakerono, a ka wehi, a Kaha, nui atu te mamae, me Ekerono ano; no te mea he  
 whakama to tana i tumanako ai; ka kore hoki to Kaha kingi; e kore ano a Ahakerono e nohoia. <sup>6</sup> A  
 ka nohoia a Aharoro e te poriro, ka hatepea atu ano e ahau te whakapehapeha o nga Pirihitini. <sup>7</sup> Ka  
 kore ano i ahau ona toto i roto i tona mangai, me ana mea whakarihariha i waenganui i ona niho;  
 na, hei morehu ia mo to tatou Atua, ka rite ano ki te kawana i roto i a Hura, ka rite ano a Ekerono  
 ki te Iepuhi. <sup>8</sup> Ka nohoia ano e ahau nga taha o toku whare, hei arai mo te taua, mo te tangata ano  
 e tika ana na reira, mo te tangata e hoki ana; e kore ano te kaitukino e tika na waenga i a ratou a  
 muri ake nei: kua kite nei hoki oku kanoahi inaianei.  
<sup>9</sup> Kia nui te whakamanamana, e te tamahine a Hiona, hamama, e te tamahine a Hiruharama,  
 nana, ko tou Kingi e haere na ki a koe: he tika ia, he whakaora, he ngakau mahaki, e noho ana i  
 runga i te kaihe, i te kuaono ano, i te tama a te kaihe. <sup>10</sup> A ka hatepea atu e ahau te hariata o Eparaima,  
 me te hoiho o Hiruharama; ka hatepea atu ano te kopere o te whawhai: mo te rongu mau hoki ana  
 kupu ki nga tauwiwi; ka kingi ano ia i tetahi moana a tae noa ki tetahi moana, i te awa a tae noa ki  
 nga pito o te whenua. <sup>11</sup> Me koe ano, na te toto o tau kawenata i unga atu ai e ahau ou herehere i  
 roto i te poka kahore nei ona wai.  
<sup>12</sup> Tahuri ki te pa kaha, e nga herehere, e te hunga e tumanako ana: i tenei ra nei me whakaatu  
 e ahau e rua aku whakautu ki a koe: <sup>13</sup> Kua piko hoki i ahau a Hura maku, kua whakakii te kopere  
 ki a Eparaima; a ka oho i ahau au tama, e Hiona, ki te whawhai ki au tama, e Kariki, ka meinga  
 hoki koe e ahau kia rite ki te hoari a te marohirohi. <sup>14</sup> A ka kitea a Ihowa i runga i a ratou, ka puta  
 atu ano tana pere ano he uira: ka tangi hoki te tetere a te Ariki, a Ihowa, a ka haere ia i runga i nga  
 tukauati o te tonga. <sup>15</sup> Ma Ihowa o nga mano ratou e tiaki; a ka kai ratou, a ka takahi i nga kohatu  
 o te kotaha; ka inu ano ratou, ka hamama me te mea na te waina; ka ki ratou ano he peihana, ano  
 ko nga koki o te aata. <sup>16</sup> Na ka whakaora a Ihowa, to ratou Atua, i a ratou i taua ra, me he kahui  
 no tana iwi: ka rite hoki ratou ki nga kohatu o te karauna, maiangi rawa i runga i tona whenua.  
<sup>17</sup> Na koia ano tona pai, koia ano tona ataahua! ka tupu nga tama i te witi, nga kotiro i te waina  
 hou.



## Chapter 10

<sup>1</sup> Inoia he ua i a Ihowa i te wa o to muri ua; ara i a Ihowa e hanga nei i nga uira, he nui ano te  
 ua e homai e ia ki a ratou, he tarutaru i te mara ma tenei, ma tenei. <sup>2</sup> He tekateka noa hoki te korero  
 a nga terapimi, he teka te kite a nga tohunga, he horihori nga moe i korerotia e ratou; he hanga noa  
 iho ta ratou whakamarie, na reira haere ana ratou ano he kahui hipi; karangirangi kau ana i te kore  
<sup>3</sup> hepara. I mura toku riri ki nga hepara, i whiua ano e ahau nga koati toa: kua tae mai hoki a Ihowa  
 o nga mano ki tana kahui, ki te whare o Hura, kua mea i a ratou hei hoiho atanga mona i te tatauranga.  
<sup>4</sup> No roto i a ia te putanga ake o te kohatu o te kokonga, no roto i a ia te whao, no roto i a ia te kopere  
 mo te tatauranga, no roto i a ia nga kaiakiaki katoa, rupeke, rupeke.  
<sup>5</sup> A ka rite ratou ki nga marohirohi e takatakahi ana i o ratou hoariri ki te paru o nga waharoa  
 i te mea e whawhai ana: ka whawhai ano ratou, no te mea kei a ratou a Ihowa, a ka whakama nga  
<sup>6</sup> kaike hoiho. Na ka kaha i ahau te whare o Hura, ka ora ano i ahau te whare o Hohepa, ka  
 whakahokia ki te nohoanga; no te mea ka tohungia ratou e ahau, a me te mea kihai ratou i peia e  
 ahau; ko ahau hoki, ko Ihowa, to ratou Atua, ka whakarongo ano ahau ki a ra tou. <sup>7</sup> Na ka rite nga  
 Eparaimi ki te marohirohi, ka koa ano to ratou ngakau me te mea na te waina: ka kite ano a ratou  
<sup>8</sup> tamariki, a ka koa; ka whakamanamana to ratou ngakau ki a Ihowa. Ka hi ahau ki a ratou, ka  
<sup>9</sup> huihui i a ratou; kua hokona hoki ratou e ahau; a ka tini ratou, ka pera me ratou i tini ra. A ka  
 whakatokia ratou e ahau ki roto ki nga iwi, ka mahara ano ratou ki ahau i nga whenua tawhiti, ka  
<sup>10</sup> ora hoki ratou me a ratou tamariki, a ka hoki. Ka whakahokia mai ano ratou e ahau i te whenua  
 o Ihipa, ka huihuia mai i Ahiria; ka kawea ano ki te whenua o Kireara, ki Repanona, te kitea he  
<sup>11</sup> wahi mo ratou. Na ka tika atu ia i waenga moana, ara i te raruraru, a ka patu i nga ngaru i te  
 moana, ka maroke hoki nga wahi hohonu o te awa, a ka riro iho te whakapehapeha o Ahiria, ka  
<sup>12</sup> riro ke ano te hepeta o Ihipa. Ka whakakahangia ano ratou e ahau i runga i a Ihowa; ka haereere  
 hoki ratou i runga i tona ingoa, e ai ta Ihowa.

## Chapter 11

<sup>1</sup> Whakatuwheratia, ou kuwaha, e Repanona, kia kai ai te ahi i ou hita. <sup>2</sup> Aue, e te kauri; kua  
 hinga hoki te hita, kua pahuatia nga mea ataahua; aue, e nga oki o Pahana, kua riro iho hoki te  
<sup>3</sup> ngahere kahore nei e taea atu! He reo no nga hepara e aue ana; no te mea kua oti to ratou kororia

te pahua; he reo no nga kua o raiona e ngengere ana; no te mea kua oti te whakapehapeha o Horano te pahua.

<sup>4</sup> Ko te kupu tenei a Ihowa, a toku Atua, Whangaia nga hipi, nga mea e patua ana; <sup>5</sup> E patua ana hoki e nga tangata nana, te ai he whakahe ake: ko te ki a o ratou kaihoko, Kia whakapaingia a Ihowa; kua whiwhi hoki ahau ki te taonga: kahore hoki he manawapa o o ratou hepara ki a ratou.

<sup>6</sup> E kore hoki ahau e manawapa ki nga tangata o te whenua a muri ake nei, e ai ta Ihowa: engari na, ka tukua nga tangata ki te ringa o tona hoa, o tona hoa, ki te ringa ano o tona kingi: a ma ratou te

whenua e patu; e kore ano ahau e whakaora i a ra tou i roto i o ratou ringa. <sup>7</sup> Na kei te whangai ahau i nga hipi e patua ana, i nga mea iti ano o te kahui. I tikina ano e ahau etahi tokotoko e rua moku, tapa iho e ahau tetahi ko Ataahua, tetahi tapa iho e ahau, ko nga Paihere; na kei te whangai

ahau i nga hipi. <sup>8</sup> He mea hatepe ano naku nga hepara tokotoru i te marama kotahi; i whakarihariha

hoki toku wairua ki a ratou, ko o ratou wairua hoki i whakarihariha ki ahau. <sup>9</sup> Katahi ahau ka ki atu, E kore koutou e whangaia e ahau: ko te mea mo te mate kia mate, ko te mea e hatepea kia

hatepea; kia kai hoki nga toenga i nga kikokiko o tona hoa, o tona hoa. <sup>10</sup> Na kua mau ahau ki toku tokotoko ki a Ataahua, tapahia putia ana e ahau, he whakatakanga i taku kawenata i whakaritea e

ahau ki nga iwi katoa. <sup>11</sup> Na kua whakataka i taua ra; a mohio tonu iho nga mea iti o te kahui i

tatari ki ahau, na Ihowa taua kupu. <sup>12</sup> I mea ano ahau ki a ratou, Ki te mea e pai ana ki ta koutou titiro, homai toku utu; ki te kahore, kauaka. Na paunatia mai ana toku utu e ratou, e toru tekau

hiriwa. <sup>13</sup> Na ka ki mai a Ihowa ki ahau, Maka atu ki te kaihanganga rihi te utu pai i whakaritea moku e ratou. Na ka mau ahau ki nga hiriwa e toru tekau, a maka atu ana e ahau ki te kaihanganga rihi i te

whare o Ihowa. <sup>14</sup> Katahi ka tapahia putia e ahau te rua o oku tokotoko, ara nga Paihere, kia kore ai te tuakanatanga o Hura ki a Iharaira.

<sup>15</sup> I ki mai ano a Ihowa ki ahau, Tikina ano etahi mea a te hepara wairangi mau. <sup>16</sup> No te mea, na, ka ara i ahau tetahi hepara i te whenua; e kore ia e tiro tiro i nga mea ka motuhia atu, e kore e rapu i nga mea kua marara, e kore e rongoa i te mea he whati tona, e kore ano e whangai i te mea e toitu ana: engari ka kainga e ia t e kikokiko o te mea momona, ko o ratou matikuku titaritaria

rawatia e ia. <sup>17</sup> Aue, te mate mo te hepara hauwarea, e whakarere ana i nga hipi! ka pa te hoari ki tona ringa, ki tona kanohi matau: ka memenge rawa tona ringa, ka pouri rawa tona kanohi matau.

## Chapter 12

<sup>1</sup> Ko te poropititanga, he kupu na Ihowa mo Iharaira, E ai ta Ihowa, nana nei nga rangi i hora,  
nana te whenua i whakatu, nana i whai ahua ai te wairua o te tangata i roto i a ia. <sup>2</sup> Tenei ahau te  
mea nei i Hiruharama hei kapu wiri ki nga iwi katoa a taka noa; ka pehi ano i a Hura i te  
<sup>3</sup> whakapaenga o Hiruharama. Na i taua ra ka meinga e ahau a Hiruharama hei kohatu taimaha ki  
nga iwi katoa: ko te hunga katoa e hapai ana ka maruru rawa, a ka huihui nga iwi katoa o te whenua  
<sup>4</sup> ki te tu ki a ia. I taua ra, e ai ta Ihowa, ka patua e ahau ki te miharo nga hoiho katoa, me o ratou  
kaieke ki te haurangi: a ka titiro matatau oku kanohi ki te whare o Hura, ka patua ano e ahau nga  
<sup>5</sup> hoiho katoa o nga iwi ki te matapo. A ka mea nga rangatira o Hura i roto i o ratou ngakau, Ko  
nga tangata o Hiruharama hei kaha moku i runga i to ratou Atua, i a Ihowa o nga mano. <sup>6</sup> I taua ra  
ka meinga e ahau nga rangatira o Hura kia rite ki te kanga ahi i roto i nga rakau, kia rite ano ki te  
rama ahi i roto i te paihere; ka pau hoki i a ratou nga iwi katoa i te taha matau, i te taha mauī, a  
<sup>7</sup> karapoi noa; a tera a Hiruharama e noho ano i runga i tona turanga, ara i Hiruharama. Na ka  
whakaora a Ihowa i nga teneti o Hura i te tuatahi, kei whakapehapeha te kororia o te whare o Rawiri,  
<sup>8</sup> te kororia ranei o nga tangata o Hiruharama ki a Hura. I taua ra ka tiakina e Ihowa nga tangata o  
Hiruharama; na, ko te tangata ngoikore i roto i a ratou, ka rite i taua ra ki a Rawiri; ko te whare o  
Rawiri ki te Atua, ki te anahera a Ihowa i to ratou aroaro.  
<sup>9</sup> I taua ra ka whai ahau kia whakangaromia nga iwi katoa e haere mai ana ki te whawhai ki  
<sup>10</sup> Hiruharama. Ka ringihia ano e ahau te wairua o te aroha noa, o nga inoi ki runga ki te whare o  
Rawiri, ki nga tangata o Hiruharama, a ka titiro ratou ki ahau ki ta ratou i wero ai, ka tangi ano ki  
a ia, me te mea e tangi ana ki tana huatahi, ka pouri ano ki a ia, me te mea e pouri ana ki tana  
<sup>11</sup> matamua. I taua ra ka nui te tangi i roto i Hiruharama, ka rite ki te tangi i Harararimono i te  
<sup>12</sup> raorao o Mekirono. A ka tangi te whenua, tenei hapu, tenei hapu, wehe rawa; ko te hapu o te  
whare o Rawiri wehe rawa, ko a ratou wahine wehi rawa; ko te hapu o te whare o Natana wehe  
<sup>13</sup> rawa, ko a ratou wahine wehe rawa; Ko te hapu o te whare o Riwai wehe rawa, ko a ratou wahine  
<sup>14</sup> wehe rawa; ko te hapu o Himeī wehe rawa, ko a ratou wahine wehe rawa, Ko nga hapu katoa e  
toe ana, ko tenei hapu, ko tenei hapu, wehe rawa, me a ratou wahine wehe rawa.

## Chapter 13

<sup>1</sup> I taua ra ka tuwhera he puna mo te whare o Rawiri, mo nga tangata ano o Hiruharama, hei  
 mea mo te hara, mo te poke. <sup>2</sup> I taua ra, e ai ta Ihowa o nga mano, ka hatepea atu e ahau nga ingoa  
 o nga whakapakoko i runga i te whenua; e kore ano e maharatia a muri ake nei; ka kore ano i ahau  
 nga poropiti, me te wairua poke, i runga i te whenua. <sup>3</sup> Na, tenei ake, ki te poropiti tetahi a muri  
 ake nei, ka mea tona papa ki a ia, raua ko tona whaea i whanau ai ia, E kore koe e ora; kua korero  
 teka hoki koe i runga i te ingoa o Ihowa: na ka werohia ia e tona papa raua ko tona whaea i whanau  
 ai i a, ina poropiti ia. <sup>4</sup> I taua ra ka whakama nga poropiti, tenei, tenei, ki tana kite, i te mea ka  
 poropiti ia; e kore ano e kakahuria e ratou he kakahu huruhuru hei mea tinihanga. <sup>5</sup> Engari ka mea  
 ia, Ehara ahau i te poropiti, he paruauru ahau, he pononga hoki ahau no toku taitamarikitanga ake.  
<sup>6</sup> A ka mea tetahi ki a ia, He aha enei patunga i ou ringa? a ka mea ia, Ko oku patunga i roto i te  
 whare o oku hoa aroha.  
<sup>7</sup> E ara, e te hoari, ki taku hepara, ki te tangata i takahoatia ki ahau, e ai ta Ihowa o nga mano;  
 patua te hepara, kia marara hoki nga hipi; ka tahuri atu ano toku ringa ki nga mea ririki. <sup>8</sup> Na i te  
 whenua katoa, e ai ta Ihowa, e rua nga wahi o reira ka hatepea atu, ka mate; ka toe ia te tuatoru o  
 nga wahi ki reira. <sup>9</sup> Ka kawea ano e ahau te tuatoru o nga wahi i roto i te ahi, ka tahia hoki te para,  
 ka peratia me te hiriwa e tahia ana, ka whakamatautauria ano ratou e ahau, ka peratia me te koura;  
 ka karanga ratou ki toku ingoa, a ka whakarongo ahau ki a ratou: ka mea ahau, He iwi ratou naku;  
 a ka mea ratou, Ko Ihowa toku Atua.

## Chapter 14

<sup>1</sup> Nana, kei te haere mai te ra o Ihowa, a ka wehewehea ou taonga parakete i roto i a koe. <sup>2</sup> Na  
 ka huihuia e ahau nga iwi katoa ki te tatau ki Hiruharama, a ka horo te pa, ka pahuatia nga whare,  
 ka moea nga wahine; a ko tetahi hawhe o te pa ka riro hei whakarau, e kore ano ia te toenga o te  
 iwi e hatepea atu i roto i te pa. <sup>3</sup> Katahi a Ihowa ka haere atu, ka whawhai ki aua iwi, ka rite ki te  
 ra i whawhai ai ia i te ra o te tauranga. <sup>4</sup> Na ka tu ona waewae i taua ra ki runga ki Maunga Oriwa,  
 ki tera i te ritenga atu o Hiruharama ki te rawhiti, a ka pakaru a Maunga Oriwa i waenganui ona ki  
 te rawhiti; ki te hauauru, nui atu te awaawa, a ka neke atu tetahi hawhe o te maunga ki te raki, tetahi  
 hawhe ona ki te tonga. <sup>5</sup> A ka oma atu koutou ki te awaawa i oku maunga; no te mea ka tutuki atu  
 te takiwa o nga maunga ki Atara: na, ko ta koutou oma ka rite ki to koutou omanga atu i te ru i nga  
 ra o Utia kingi o Hura: tera ano a Ihowa, toku Atua, e haere mai, ko te hun ga tapu katoa hei hoa

<sup>6</sup> mou. Na i taua ra e kore te marama e purotu, e kore ano e pouri. <sup>7</sup> Erangi kotahi tonu taua ra, he mea e mohiotia ana e Ihowa, ehara i te ra, ehara i te po; na i nga wa o te ahiahi ka marama.

<sup>8</sup> Na i taua ra ka puta he wai ora i Hiruharama, ko tetahi hawhe ki te moana i te rawhiti, ko tetahi hawhe ki te moana i te uru: i te raumati taua hanga, i te hotoke ano. <sup>9</sup> A ko Ihowa hei kingi

mo te whenua katoa: i taua ra he kotahi a Ihowa, he kotahi ano tona ingoa. <sup>10</sup> A hei mania katoa te whenua a taka noa, i Kepa tae noa ki Rimona, ki te tonga o Hiruharama; a ka neke ake taua pa, ka noho ki tona wahi ano, ki te kuwaha o Pineamine tae noa ki te wahi i te kuwaha tuatahi, ki te

kuwaha i te koki, ki te pourewa o Hananeere tae noa ki nga poka waina a te kingi. <sup>11</sup> Ka nohoia

ano a reira, a heoi ano whakangaromanga; a ka noho a Hiruharama i runga i te rangimarie. <sup>12</sup> Ko te whiu ano tenei e whiua ai e Ihowa nga iwi katoa i whawhai nei ki Hiruharama; ka pirau o ratou kikokiko i te mea e tu ana o ratou waewae, ka pirau o ratou kanohi i roto i nga pae, ka pirau ano o

ratou arero i roto i o ratou mangai. <sup>13</sup> I taua ra he nui ta Ihowa whakaoho i roto i a ratou; a ka hopu ratou i te ringa o tona hoa, o tona hoa, ka ara ake ano o ratou ringa ki te ringa o tona hoa, o tona

hoa. <sup>14</sup> Tera ano a Hura ka whawhai ki Hiruharama; a ka huihuia nga rawa o nga iwi katoa a taka

noa, te koura, te hiriwa, nga kakahu, nui atu. <sup>15</sup> A ka pera ano te mate o te hoiho, o te muera, o te kamera, o te kaihe, o nga kararehe katoa i roto i enei puni me tenei whiu.

<sup>16</sup> Tenei ake, na, ko nga morehu katoa o nga iwi katoa i haere mai ki te whawhai ki Hiruharama, ka haere mai i ia tau, i ia tau, ki te koropiko ki te Kingi, ki a Ihowa o nga mano, ki te whakarite

hoki i te hakari whare wharau. <sup>17</sup> Na, ko te tangata o nga hapu o te whenua ka kore e haere mai ki Hiruharama ki te koropiko ki te Kingi, ki a Ihowa o nga mano, kahore he ua mo ratou. <sup>18</sup> A ki te

kahore te hapu o Ihipa e haere mai, e tae mai, te hunga kahore nei he ua mo ratou, ka pa ano te whiu e whiua ai e Ihowa nga iwi kahore nei e haere mai ki te whakarite i te hakari whare wharau.

<sup>19</sup> Ko te utu hara tenei mo Ihipa, ko te utu hara ano mo nga iwi katoa e kore e haere mai ki te

whakarite i te hakari whare wharau. <sup>20</sup> I taua ra ka piri ki nga pere o nga hoiho, HE TAPU KI A

IHOWA; ka rite hoki nga kohua i roto i te whare o Ihowa ki nga peihana i mua i te aata. <sup>21</sup> Ina, ko nga kohua katoa i Hiruharama, i a Hura, he tapu ki a Ihowa o nga mano, a ka haere mai te hunga katoa e patu whakahere ana, ka tango i etahi hei kohua ma ratou: kahore hoki he Kanaani a muri ake nei i roto i te whare o Ihowa o nga mano i taua ra.

## Malachi

## Chapter 1

<sup>1</sup> Ko te poropititanga, he kupu na Ihowa ki a Iharaira, he mea na Maraki. <sup>2</sup> I aroha ahau ki a koutou, e ai ta Ihowa, heoi e mea na koutou, He aroha aha tou ki a matou? He teka ianei he tuakana a Ehau no Hakopa? e ai ta Ihowa; heoi i aroha ahau ki a Hakopa, <sup>3</sup> Engari i kino ahau ki a Ehau, a i meinga e ahau ona maunga hei ururua, a hoatu ana tona kainga tupu ki nga kirehe mohao o te koraha. <sup>4</sup> Ko Eroma ia e ki ana, Kua pehia tatou ki raro, otiia ka hoki tatou, ka hanga i nga tuhea; ko te kupu tenei a Ihowa o nga mano, Ma ratou e hanga, a maku e wahi; a ka huaina aua wahi, Ko te rohe kino, Ko te iwi i riri ai a Ihowa a ake ake. <sup>5</sup> E kite ano o koutou kanohi, a ka mea koutou, Kia whakanuia a Ihowa i tua i te rohe o Iharaira.

<sup>6</sup> E whakahonoretia ana te papa e te tama, tona ariki e te pononga: ki te mea he matua ahau, kei hea toku honore? ki te mea he ariki ahau, kei hea te wehi ki ahau? e ai ta Ihowa o nga mano ki a koutou, e nga tohunga e whakahawea na ki toku ingoa, e mea na koutou, He whakahawea aha ta matou ki tou ingoa? <sup>7</sup> He taro poke ta koutou e tapae na i runga i taku aata, a e mea na koutou, I whakapokea koe e matou ki te aha? Ki ta koutou e ki na, Ko te tepu a Ihowa, he hanga mo te whakahawea. <sup>8</sup> Ki te tapaea hoki e koutou te matapo hei patunga tapu, ehara i te mea kino! ki te tapaea ano e koutou te mea totitoti, te mea mate, ehara i te kino! tena koa, hoatu aiane ki tou kawana; e pai ranei ia ki a koe? e manako ranei ia ki tou tinana? e ai ta Ihowa o nga mano. <sup>9</sup> Na, tena ra, inoi ki te Atua kia atawhai ki a tatou: na ta koutou mahi tenei: e manako ranei ia ki tetahi o koutou? e ai ta Ihowa o nga mano. <sup>10</sup> Aue, me kore noa ake tetahi o koutou hei tutaki i nga tatau, kei whakau kau koutou i te ahi ki runga ki taku aata! Kahore oku ngakau ki a koutou, e ai ta Ihowa o nga mano, e kore ano ahau e manako ki te whakahere a to koutou ringa. <sup>11</sup> Ka nui nei hoki toku ingoa i roto i nga tauwi, i te whitinga o te ra a tae noa ki tona torengitanga; a ka tukua he whakakakara ki toku ingoa i nga wahi katoa, me te whakahere pokekore; ka nui hoki toku ingoa i roto i nga tauwi, e ai ta Ihowa o nga mano. <sup>12</sup> Ko koutou ia kei te whakapoke i taua ingoa, i a koutou e ki na, Ko te tepu a Ihowa he poke; ko ona hua, ko tana kai, he hanga mo te whakahawea.

<sup>13</sup> E mea ana ano koutou, Nana, te whakahoha! whakatupererutia iho e koutou, e ai ta Ihowa o nga mano; a maua mai ana e koutou te mea i haea, te mea totitoti, te mea mate; na kei te mau mai i te whakahere; e manakohia ranei tenei mea a to koutou ringa? e ai ta Ihowa. <sup>14</sup> He kanga ia mo te tangata tinihanga, he toa nei tana i roto i tana kahui, na ka puaki tana ki taurangi, a patua ana e ia te mea he ma te Ariki; he kingi nui hoki ahau, e ai ta Ihowa o nga mano, he hanga whakawehi ano toku ingoa i roto i nga tauwi.

## Chapter 2

<sup>1</sup> Na inaianei he whakahau tenei mo koutou, e nga tohunga. <sup>2</sup> Ki te kore koutou e rongu, ki te kore e takoto i o koutou ngakau kia homai he kororia ki toku ingoa, e ai ta Ihowa o nga mano, ina ka tukua atu e ahau he kanga ki a koutou, ka kanga ano e ahau a koutou manaaki: ae ra, kua oti ano i ahau te kanga, no te mea kahore i te ngoto ki o koutou ngakau. <sup>3</sup> Nana, ka riria e ahau te purapura, he mea mo koutou, ka akiritia atu hoki he paru kararehe ki runga ki o koutou mata, ara ko te paru o a koutou whakahere; a ka riro tahi atu koutou me tena. <sup>4</sup> A ka mohio koutou naku tenei whakahau i tuku ki a koutou, kia mau ai taku kawenata ki a Riwai, e ai ta Ihowa o nga mano. <sup>5</sup> I a ia taku kawenata mo te ora, mo te rongu mau; he mea hoatu naku ki a ia kia wehi ai ia, a i wehi ia ki ahau, a hopohopo ana ki toku ingoa. <sup>6</sup> I roto i tona mangai te ture o te pono, kihai hoki te he i kitea ki ona ngutu: i haere tahi ia i ahau i runga i te rongu mau, i te tika, he tini hoki i tahuri mai i a ia i te kino. <sup>7</sup> Ko te tikanga hoki ma nga ngutu o te tohunga he tiaki matauranga, a ma ratou e rapu te ture ki tona mangai: no te mea ko te karere ia a Ihowa o nga mano. <sup>8</sup> Ko koutou ia kua peka ke i te ara, kua mea i te ture hei tutukitanga waewae mo etahi, he tokomaha; he iho i a koutou te kawenata ki a Riwai, e ai ta Ihowa o nga mano. <sup>9</sup> Na kua meinga na koutou e ahau kia whakahaweatia, kia iti, i te aroaro o nga tangata katoa, kua rite ki ta koutou kihai na i mau ki aku ara; a i nga mea o te ture he whakapai tangata ta koutou.

<sup>10</sup> He teka ianei kotahi ano te papa o tatou katoa? he teka ianei kotahi ano te Atua nana tatou i hanga? he aha tatou i tinihanga ai, te tuakana ki te teina, i whakanoa ai i te kawenata ki o tatou matua? <sup>11</sup> Kua tinihanga a Hura, e mahia ana hoki te mea whakaritarihi i roto i a Iharaira, i Hiruharama; kua noa hoki i a Hura te tapu o Ihowa, tana hoki i aroha ai, a marenatia ana mana te tamahine a te atua ke. <sup>12</sup> Ka hatepea atu e Ihowa ki te tangata nana tenei mahi te kaiwhakaoho raua ko te tangata whakao, i roto i nga teneti o Hakopa, ratou ano ko te kaitapae i te whakahere ki a Ihowa o nga mano. <sup>13</sup> Na kei te mahi ano koutou i tenei: kei te hipoki koutou i te aata a Ihowa ki te roimata, ki te tangi, ki te aue, nawai a ka kore ia e aro ki te whakahere i muri atu, kahore hoki e manako ki te tango mai i ta to koutou ringa. <sup>14</sup> Heoi e mea na koutou, Na te aha? No te mea he kaiwhakaatu a Ihowa mo tau ki te wahine o tou taitamarikitanga i tinihangatia ra e koe, ahakoa ko ia tou hoa, ko te wahine o tau kawenata. <sup>15</sup> He teka ianei kotahi tana i hanga ai, ahakoa i a ia ano te toenga iho o te wairua? A na te aha i kotahi ai? I rapu ia i te uri atua. Na tiakina to koutou wairua, kua hoki tetahi e tinihanga ki te wahine o tona taitamarikitanga. <sup>16</sup> E kino ana hoki ahau ki te whakarere, e ai ta Ihowa, ta te Atua o Iharaira; ki te hipoki ano hoki i tona kakahu ki te tutu, e ai

17

ta Ihowa o nga mano; no reira tiakina to koutou wairua, kia kua koutou e tinihanga. Kua hoha a Ihowa i a koutou kupu. A e mea na koutou, I whakahohatia ia e matou ki te aha? I a koutou e ki na, He pai ki te titiro a Ihowa nga tangata katoa e mahi ana i te kino, e manako ana hoki ia ki a ratou. Kei hea oti te Atua o te whakawa?

### Chapter 3

<sup>1</sup> Tenei te unga atu nei e ahau taku karere, mana e whakapai te ara i mua i ahau, a kitea rawatia ake, kua tae te Ariki, e rapua nei e koutou, ki tona temepara; na ko te anahera o te kawenata, ko ta koutou e ngakau nui na, nana, tera ia ka tae atu, e ai ta Ihowa o nga mano. <sup>2</sup> A ko wai e u i te ra e tae mai ai ia? ko wai hoki e tu, ina puta mai ia? e rite ana hoki ia ki te ahi a te kaitahi para, ki te mea horoi a te kaihoroi: <sup>3</sup> Ka noho ano ia, ka rite ki te kaitahi para, ki te kaiwhakapai hiriwa, a ka whakapaia e ia nga tama a Riwai, ka whakahemokia to ratou para, ano he koura, he hiriwa: kia tapaea ai e ratou he whakahere ki a Ihowa i runga i te tika. <sup>4</sup> Ko reira te whakahere a Hura raua ko Hiruharama rekaina ai e Ihowa, ka rite ki nga ra o mua, ki nga tau onamata. <sup>5</sup> Ka whakatata atu ano ahau ki a koutou ki te whakawa; ka hohoro ano ahau hei kaiwhakaatu i te he o nga kaimakutu, o te hunga puremu, o nga kaioati teka, o te hunga e tahae ana i nga utu o te kaimahi, i ta te pouaru, i ta te pani, e whakapeau ke an a i ta te manene, a kahore e wehi i ahau, e ai ta Ihowa o nga mano.

<sup>6</sup> Ko ahau hoki, ko Ihowa, kahore ahau e puta ke; na reira koutou, e nga tama a Hakopa, i kore ai e pau.

<sup>7</sup> No nga ra o o koutou matua i whakarerea ai e koutou aku tikanga, kihai ano i puritia e koutou. Hoki mai ki ahau, a ka hoki atu ahau ki a koutou, e ai ta Ihowa o nga mano. Heoi kei te mea na koutou, <sup>8</sup> Kia pehea ta matou hoki atu? E tahae ranei te tangata i ta te Atua? Heoi e tahae na koutou i taku. A e mea na koutou, He pehea ta matou tahae i tau? Ki nga whakatekau ra, me nga whakahere.

<sup>9</sup> Kua kanga, kua kanga koutou: ko koutou hoki kei te tahae i taku, ara ko tenei iwi katoa. <sup>10</sup> Maua katoatia mai te whakatekau ki roto ki te toa, kia whai kai ai toku whare, waiho hoki tenei hei whakamatautau moku, e ai ta Ihowa o nga mano, me kahore e tuwhera i ahau nga matapihi o te rangi ki a koutou, a ka ringihia he manaaki ki a koutou, a kia kore ra ano he takotoranga. <sup>11</sup> A ka riria e ahau te kaiwhakapareho, he mea mo koutou, a e kore e huna e ia nga hua o to koutou oneone;

<sup>12</sup> e kore ano e marere noa nga hua o ta koutou waina i te mara, e ai ta Ihowa o nga mano. A ki ta nga iwi katoa, he manaakitanga koutou: no te mea he whenua ahuaureka koutou, e ai ta Ihowa o nga mano.



<sup>13</sup> He kaha a koutou kupu ki ahau, e ai ta Ihowa. Heoi e ki na koutou, He aha ta matou korero  
<sup>14</sup> mou? Kua ki na koutou, Kahore he hua o te mahi ki te Atua: he aha hoki te rawa o ta matou  
<sup>15</sup> pupuri i ana mea, o ta matou haere taua i te aroaro o Ihowa o nga mano? Na inaianei ki ta matou,  
 ko te hunga whakakake nga mea koa; ae ra, ko nga kaimahi i te kino te hunga e hanga ake; ae ra,  
<sup>16</sup> e whakamatautau ana ratou i te Atua, a kua mawhiti. Na, ko te hunga i wehi i a Ihowa, kei te  
 kororerero ratou ki tona hoa, ki tona hoa; a ka tahuri a Ihowa, ka whakarongo, na ka tuhituhia he  
 pukapuka whakamahara ki tona aroaro mo te hunga i wehi ki a Ihowa, i whakaaro hoki ki tona  
<sup>17</sup> ingoa. Maku hoki ratou, e ai ta Ihowa o nga mano, i te ra e mahia ai e ahau he taonga motuhake;  
 ka manawapa ano ahau ki a ratou, ka pera me te tangata e manawapa ana ki tana tama e mahi ana  
<sup>18</sup> ki a ia. Ko reira ano koutou hoki ai, kite ai i te rereketanga o ta te tika, o ta te kino, o ta tera e  
 mahi ana ki te Atua, o ta tera kahore e mahi ki a ia.

#### Chapter 4

<sup>1</sup> Ta te mea, nana, kei te haere mai te ra, e ngiha ai ano he oumu; na, ko te hunga whakakake  
 katoa, me te hunga katoa e mahi ana i te kino hei kakau witi ratou: a ka tahuna e te ra meake nei  
<sup>2</sup> puta, e ai ta Ihowa o nga mano, e kore ano he pakiaka, he manga e mahue ki a ratou. Ki a koutou  
 ia e wehi na i toku ingoa ka ara ake te ra o te tika, he whakaora mate hoki i runga i ona parirau; a  
<sup>3</sup> ka puta mai koutou, ka tupekepeke ano he kuaou kau no te turanga kau. Ka takatakahia ano e  
 koutou te hunga kino; ka rite hoki ratou ki nga pungarehu i raro i nga kapu o o koutou waewae i te  
 ra e mahi ai ahau, e ai ta Ihowa o nga mano.  
<sup>4</sup> Kia mahara ki te ture a taku pononga, a Mohi, ki taku i whakahau ai ki a ia i Horepa, he mea  
<sup>5</sup> mo Iharaira katoa, ki nga tikanga, ki nga whakaritenga. Nana, ka unga atu e ahau a Iraia poropiti  
<sup>6</sup> ki a koutou i mua i te taenga mai o te ra nui o Ihowa, o te ra whakamataku. A ka tahuri i a ia nga  
 ngakau o nga matua ki nga tamariki, me nga ngakau o nga tamariki ki o ratou matua; kei haere atu  
 ahau, kei patu i te whenua ki te kanga.

## New Testament

### Matthew

#### Chapter 1

<sup>1</sup> Ko te pukapuka o te whakapapa o Ihu Karaiti, tama a Rawiri, tama a Aperahama. <sup>2</sup> Na ko ta  
 Aperahama ko Ihaka; ta Ihaka ko Hakopa; ta Hakopa ko Hura ratou ko ona tuakana, ko ona teina;  
<sup>3</sup> Ta Hura raua ko Tamara ko Parete raua ko Hara; ta Parete ko Heteromo; ta Heteromo ko Arame;  
<sup>4</sup> Ta Arame ko Aminarapa; ta Aminarapa ko Nahona; ta Nahona ko Haramono; <sup>5</sup> Ta Haramono  
 raua ko Rahapa ko Poaha; ta Poaha raua ko Rutu ko Opere; ta Opere ko Hehe; <sup>6</sup> Ta Hehe ko Rawiri,  
 ko te kingi; ta Rawiri kingi raua ko te wahine a Uria ko Horomona; <sup>7</sup> Ta Horomona ko Rehopoama;  
 ta Rehopoama ko Apia; ta Apia ko Aha; <sup>8</sup> Ta Aha ko Iehohapata; ta Iehohapata ko Iorama; ta  
 Iorama ko Ohiaha; <sup>9</sup> Ta Ohiaha ko Iotama; ta Iotama ko Ahata; ta Ahata ko Hetekia; <sup>10</sup> Ta Hetekia  
 ko Manahi; ta Manahi ko Amono; ta Amono ko Hohia; <sup>11</sup> Ta Hohia ko Hekonia ratou ko ona teina;  
 i te wa o te whakahekenga ki Papurona: <sup>12</sup> A, i muri i te whakahekenga atu ki Papurona, ka whanau  
 ta Hekonia ko Haratiera; ta Haratiera ko Herupapera; <sup>13</sup> Ta Herupapera ko Apiuru; ta Apiuru ko  
 Eriakimi; ta Eriakimi ko Atoro; <sup>14</sup> Ta Atoro ko Haroko; ta Haroko ko Akimi; ta Akimi ko Eriuru;  
<sup>15</sup> Ta Eriuru ko Ereatara; ta Ereatara ko Matana; ta Matana ko Hakopa; <sup>16</sup> Ta Hakopa ko Hohepa,  
 ko te tahu a Meri; whanau ake ta Meri ko Ihu, e kii nei ko te Karaiti. <sup>17</sup> Heoi, ko nga  
 whakatupuranga katoa o Aperahama tae noa ki a Rawiri tekau ma wha nga whakatupuranga; o  
 Rawiri tae noa ki te whakahekenga ki Papurona tekau ma wha nga whakatupuranga; a no te  
 whakahekenga ki Papurona tae noa ki a te Karaiti tekau ma wha nga whakatupuranga.  
<sup>18</sup> Na ko te whanautanga tenei o Ihu Karaiti: he mea taumau a Meri, tona whaea, ma Hohepa,  
 a i te mea kiano raua i tata noa ki a raua, ka kitea kua hapu ia i te Wairua Tapu. <sup>19</sup> Otira he tangata  
 tika tana tahu, a Hohepa, a kahore ona ngakau kia whakakitea nuitia ia, ka mea kia whakarerea  
<sup>20</sup> pukutia. Otiia i a ia e hurihuri ana i enei mea, na, ka puta moemoea mai tetahi anahera a te Ariki  
 ki a ia, ka mea, E Hohepa, e te tama a Rawiri, kaua e hopohopo ki te tango i a Meri, i tau wahine;

na te Wairua Tapu hoki tona hapu. <sup>21</sup> A e whanau ia he tama, me hua e koe tona ingoa ko IHU:  
 no te mea mana e whakaora tona iwi i o ratou hara. <sup>22</sup> Na ka oti tenei katoa, katahi ka rite ta te  
 Ariki, i korerotia e te poropiti, i mea ai ia, <sup>23</sup> Na, ka hapu te wahine, ka whanau hoki he tama, a  
 ka huaina e ratou tona ingoa ko Emanuera, ko tona whakamaoritanga tenei, Kei a tatou te Atua.  
<sup>24</sup> A ka ara ake a Hohepa i te moe, ka meatia e ia ta te anahera a te Ariki i whakahau ai ki a ia, a  
 tango ana ia i tana wahine: <sup>25</sup> A kihai i mohio ki a ia, whanau noa tana tama matamua: a huaina  
 ana e ia tona ingoa ko IHU.

## Chapter 2

<sup>1</sup> Na, i te mea kua whanau nei a Ihu ki Peterehema o Huria, i nga ra o Kingi Herora, na, ka  
 haere mai etahi Maki i te rawhiti ki Hiruharama, <sup>2</sup> Ka mea, Kei hea tenei kua whanau nei hei kingi  
 mo nga Hurai? i kite hoki matou i tona whetu i te rawhiti, a ka tae mai nei ki te koropiko ki a ia.  
<sup>3</sup> A, no te rongonga o Kingi Herora, ka ohore ratou ko Hiruharama katoa. <sup>4</sup> Na whakaminea  
 katoatia ana e ia nga tohunga nui me nga karaipi o te iwi, a ka ui ki a ratou ki te wahi e whanau ai  
 a te Karaiti. <sup>5</sup> Ka mea ratou ki a ia, Ki Peterehema o Huria: ko ta te poropiti hoki tenei i tuhituhi  
 ai, <sup>6</sup> A ko koe, e Peterehema, whenua o Hura, ehara rawa i te iti rawa i roto i nga kawana o Hura:  
 e puta mai hoki i a koe he kawana, hei hepara mo taku iwi, mo Iharaira. <sup>7</sup> Na, ka oti nga Maki te  
 karanga puku e Herora, ka uia marietia ratou ki te wa i puta mai ai te whetu. <sup>8</sup> A unga ana ratou e  
 ia ki Peterehema, i mea ia, Haere, rapua marietia te tamaiti; a, ka kitea, ka whakahoki mai i te korero  
 ki ahau, kia haere ai hoki ahau ki te koropiko ki a ia.  
<sup>9</sup> Na, ka rongo ratou i ta te kingi, ka haere; na ko te whetu, i kite ai ratou i te rawhiti, e haere  
 ana i mua i a ratou, a tae noa, tu noa ki runga ake i te takotoranga o te tamaiti. <sup>10</sup> A, i to ratou  
 kitenga i te whetu, ko te tino haringa i hari ai. <sup>11</sup> A, ka tae ki roto ki te whare, ka kite i te tamaiti  
 raua ko tona whaea, ko Meri, na tapapa ana ratou, koropiko ana ki a ia: a, no ka mawhera o ratou  
 taonga, ka hoatu etahi mea ki a ia, he koura, he parakihe, he maira. <sup>12</sup> A i whakatupatoria ratou e  
 te Atua, he mea moemoea, kia kaua e hoki ki a Herora; na haere ana ki to ratou kainga he ara ke.  
<sup>13</sup> A, ka riro atu ratou, na ka puta moemoea tetahi anahera a te Ariki ki a Hohepa, ka mea, E  
 ara, tangohia te tamaiti raua ko tona whaea, e rere ki Ihipa, a hei reira koe kia korero ra ano ahau

<sup>14</sup> ki a koe: meake hoki rapu a Herora i te tamaiti kia wh akangaromia. Na, ka ara ake ia, ka mau  
<sup>15</sup> ki te tamaiti raua ko tona whaea i te po, a haere ana ki Ihipa: A noho ana i reira, mate noa a  
 Herora; na ka rite ta te Ariki i korerotia e te poropiti, i mea ai ia, He mea karanga naku taku tamaiti  
 i Ihipa.  
<sup>16</sup> A, no te kitenga o Herora ka oti ia te tinihanga e nga Maki, rahi rawa tona riri, ka tono  
 tangata, a patua iho nga tamariki katoa, nga mea e rua nei o ratou tau, me o muri iho, i Peterehema,  
<sup>17</sup> i nga wahi katoa o reira, he mea whakarite ki te taima i uia marietia e ia ki nga Maki. Katahi ka  
<sup>18</sup> rite ta Heremaia poropiti i korero ai, i mea ai, I rangona he reo ki Rama, he uhunga, he tangi,  
 he aue nui, ko Rahera e tangi ana ki ana tamariki, a kihai i pai kia whakamarietia, no te mea kua  
 kahore ratou.  
<sup>19</sup> A, no ka mate a Herora, na ka puta moemoea te anahera a te Ariki ki a Hohepa ki Ihipa,  
<sup>20</sup> Ka mea, Ara ake, tangohia te tamaiti raua ko tona whaea, a haere ki te whenua o Iharaira: kua  
<sup>21</sup> mate hoki te hunga i whai kia patua te tamaiti. A, ko tona aranga ake, ka mau ki te tamaiti raua  
<sup>22</sup> ko tona whaea, ka haere ki te whenua o Iharaira. Otira ka rongohia ia ko Arakerauha te kingi o  
 Huria i muri i tona matua, i a Herora, ka wehi ki te haere ki reira: otiia i whakamaharatia ia e te  
<sup>23</sup> Atua, he mea moemoea, a haere ana ki nga wahi o Kariri; A ka tae, a ka noho ki tetahi pa, ko  
 Nahareta te ingoa; i rite ai ta nga poropiti i mea ai, Me hua ia he tangata no Nahareta.

### Chapter 3

<sup>1</sup> Na i aua ra ka puta a Hoani Kaiiriiri, ka kauwhau i te koraha o Huria, <sup>2</sup> Ka mea, Ripeneta,  
<sup>3</sup> kua tata hoki te rangatiratanga o te rangi. Ko ta Ihaia poropiti hoki tenei i korero ai, i mea ai, He  
<sup>4</sup> reo no tetahi i te koraha e karanga ana, Whakapaia te huarahi o te Ariki, whakatikaia ona ara. A  
 ko te kakahu o taua Hoani he huruhuru kamera, he hiako hoki te whitiki o tona hope; ko tana kai  
<sup>5</sup> he mawhitiwhiti, he honi koraha. Katahi ka haere ki a ia a Hiruharama, me Huria katoa, me nga  
<sup>6</sup> kainga katoa e tutata ana ki Horano, A iriiria ana ratou e ia ki Horano, me te whaki ano i o ratou  
 hara.  
<sup>7</sup> No tona kitenga ia i te tini o nga Parihi, o nga Haruki e haere ana ki tana iriiringa, ka mea ia  
<sup>8</sup> ki a ratou, E te uri nakahi, na wai koutou i whakamahara kia rere i te riri meake puta? Na,

<sup>9</sup>  
 whakaputaina he hua e rite ana ki o te ripeneta: Kei anga koutou kei mea i roto i a koutou, Ko  
 Aperahama to tatou matua: ko taku kupu hoki tenei ki a koutou, e ahei ana ano i te Atua te whakaara  
<sup>10</sup>  
 tamariki ake ma Aperahama i enei kohatu. Na tenei ka pa te toki ki te pakiaka o nga rakau; a,  
<sup>11</sup>  
 ki te kahore tetahi rakau e hua i te hua pai, ka tuaina, ka maka ki te ahi. Ko ahau nei he iriiri  
 taku i a koutou ki te wai, hei mea ripeneta: ko tenei ia, e haere mai ana i muri i ahau, nui atu tona  
 mana i toku, e kore ahau e tau hei mau i ona hu: mana koutou e iriiri ki te Wairua Tapu, ki te kapura:  
<sup>12</sup>  
 Ko tana mea tahi kei tona ringa, a e tino tahia e ia tana patunga witi, a e kohia ana witi ki roto  
 ki te whare witi; tena ko te papapa e tahuna ki te kapura e kore e tineia.  
<sup>13</sup>  
 I reira ka haere a Ihu i Kariri ki Horano, ki a Hoani, kia iriiria e ia. <sup>14</sup> Otira ka whakakahore  
 a Hoani ki a ia, ka mea, Ko te tikanga ra ko ahau kia iriiria e koe, a e haere mai ana koe ki ahau?  
<sup>15</sup>  
 Na ka whakahoki a Ihu, ka mea ki a ia, Tukua ra aiane; ko te tikanga hoki tenei ma taua kia  
<sup>16</sup>  
 whakarite i nga mea tika katoa. Na tukua ana ia e ia. A, no ka oti a Ihu te iriiri, tika tonu ake ia  
 i te wai: na ko te rangi ka tuwhera ki a ia, a ka kite ia i te Wairua o te Atua e heke iho ana me he  
<sup>17</sup>  
 kukupa, a tau ana ki runga ki a ia: Na ko tetahi reo no te rangi e mea ana, Ko taku Tama tenei  
 i aroha ai, ko taku i ahuaieka ai.

## Chapter 4

<sup>1</sup>  
 Me i reira ka arahina a Ihu e te Wairua ki te koraha, kia whakamatautauria e te rewera. <sup>2</sup> A,  
 no ka wha tekau nga ra ka wha tekau nga po i nohopuku ai, muri iho ka hiakai. <sup>3</sup> Na ka tae te  
 kaiwhakamatautau ki a ia, ka mea, Ki te mea ko te Tama koe a te Atua, kiia iho kia meinga enei  
<sup>4</sup>  
 kohatu hei taro. Na ka whakahoki ia, ka mea, Kua oti te tuhituhi, E kore e ora te tangata i te taro  
<sup>5</sup>  
 kau, engari i nga kupu katoa e puta mai ana i te mangai o te Atua. Me i reira ka kawe te rewera  
<sup>6</sup>  
 i a ia ki te pa tapu, a whakaturia ana ia ki runga ki te keokeonga o te temepara, A ka mea ki a ia,  
 Ki te mea ko te Tama koe a te Atua, rere atu ki raro: kua oti hoki te tuhituhi, Ka korerotia iho koe  
 e ia ki ana anahera; ma ratou koe e hiki ake ki o ratou ringa, kei tutuki tou waewae ki te kohatu.  
<sup>7</sup>  
 Mea atu ana a Ihu ki a ia, Ka oti ano hoki te tuhituhi, Kaua e whakamatautau ki te Ariki ki tou  
<sup>8</sup>  
 Atua. Ka kawe ano te rewera i a ia ki runga ki tetahi maunga tiketike rawa, a whakakitea ana ki  
<sup>9</sup>  
 a ia nga rangatiratanga katoa o te ao, me te kororia o aua mea; A mea ana ki a ia, Ko enei mea

<sup>10</sup>  
 katoa e hoatu e ahau ki a koe, ki te tapapa koe, ki te koropiko ki ahau. Na ka mea a Ihu ki a ia,  
 Haere atu, e Hatana; kua oti hoki te tuhituhi, Me koropiko koe ki te Ariki ki tou Atua, me mahi ano  
<sup>11</sup>  
 ki a ia anake. Na ka mahue ia i te rewera, a ka haere mai nga anahera ka mahi mea mana.  
<sup>12</sup> A, no ka rongo a Ihu kua tukua a Hoani ki te whare herehere, ka haere ia ki Kariri; <sup>13</sup> A ka  
 mahue a Nahareta i a ia, a haere ana, ka noho ki Kaperenauma, ki te taha o te moana, ki nga rohe  
 o Hepurona, o Napatari: <sup>14</sup> I rite ai ta Ihaia poropiti i korero ai, i mea ai, <sup>15</sup> Ko te whenua o  
 Hepurona, me te whenua o Napatari, i te ara o te moana, i tera taha o Horano, Kariri o nga tauwiwi,  
<sup>16</sup>  
 Ko te hunga i noho i te pouri kua kite ratou i te marama nui; a koe te hunga i noho i te wahi i te  
 atarangi o te mate, kua puta ake te marama ki a ratou. <sup>17</sup> No reira ano a Ihu i timata ai te kauwhau,  
 te mea, Ripeneta, kua tata hoki te rangatiratanga o te rangi.  
<sup>18</sup>  
 A, i a Ihu e haere ana i te taha o te moana o Kariri, ka kite ia i etahi tangata tokorua, he  
 tuakana he teina, i a Haimona, tona ingoa nei ko Pita, raua ko tona teina ko Anaru, e maka ana i te  
 kupenga ki te moana; he kaihao ika hoki raua. <sup>19</sup> Na ka mea ia ki a raua, Arumia mai ahau, a maku  
 korua e mea hei kaihao tangata. <sup>20</sup> A mahue ake i a raua nga kupenga, a aru ana i a ia. <sup>21</sup> A, no  
 tona haerenga i reira, tokorua ano ana i kite ai, he tuakana, he teina, ko Hemi tama a Heperi raua  
 ko tona teina ko Hoani, i te kaipuke i a Heperi i to raua matua, e ta ana i nga korenga o a ratou  
 kupenga: a karangatia ana raua e ia. <sup>22</sup> Mahue tonu ake i a raua te kaipuke me to raua matua, a aru  
 ana i a ia.  
<sup>23</sup>  
 Na ka haereerea katoatia a Kariri e Ihu, whakaako ana i roto i o ratou whare karakia, kauwhau  
 ana i te rongopai o te rangatiratanga, me te whakaora i nga mate katoa, i nga turorotanga katoa o  
<sup>24</sup>  
 te iwi. A ka haere tona rongo puta noa i Hiria; a kawea ana mai e ratou ki a ia nga tangata mate  
 katoa e ngaua ana e te tini o nga mate, o nga mamae, me te hunga e nohoia ana e te rewera, me te  
 hunga haurangi, me nga pararutiki; a whakaorangia ake ratou e ia. <sup>25</sup> A he rahi te hui i aru i a ia i  
 Kariri, i Rekaporihi, i Hiruharama, i Huria, i tera taha ano o Horano.

## Chapter 5

<sup>1</sup>  
 A, i tona kitenga i te whakaminenga, ka haere ia ki runga ki te maunga: a, no ka noho ia, ka  
<sup>2</sup>  
 haere ana akonga ki a ia: Na ka puaki tona mangai, a ka whakaako ia i a ratou, ka mea,

<sup>3</sup> Ka koa te hunga he rawakore nei te wairua: no ratou hoki te rangatiratanga o te rangi. <sup>4</sup> Ka  
 koa te hunga e tangi ana: ka whakamarietia hoki ratou. <sup>5</sup> Ka koa te hunga ngakau mahaki: ka riro  
 hoki i a ratou te whenua. <sup>6</sup> Ka koa te hunga e hiakai ana, e hiainu ana, ki te tika: e makona hoki  
 ratou. <sup>7</sup> Ka koa te hunga tohu tangata: e tohungia hoki ratou. <sup>8</sup> Ka koa te hunga ngakau ma: e kite  
 hoki ratou i te Atua. <sup>9</sup> Ka koa te hunga hohou rongou: ka huaina hoki ratou he tamariki na te Atua.  
<sup>10</sup> Ka koa te hunga e whakatoia ana mo te tika: no ratou hoki te rangatiratanga o te rangi. <sup>11</sup> Ka  
 koa koutou ina tawai ratou i a koutou, ina whakato, ina puaki i a ratou nga kupu kino katoa mo  
 koutou, he mea teka, he whakaaro hoki ki ahau. <sup>12</sup> Kia hari, kia whakamanamana: he rahi hoki te  
 utu mo koutou i te rangi: he penei hoki ta ratou whakato i nga poropiti i mua i a koutou.  
<sup>13</sup> Ko koutou te tote o te whenua: otira ki te hemo te ha o te tote, ma te aha e whai tikanga tote  
 ai? heoi ano tona painga, na ka akiritia ki waho, ka takahia e nga tangata. <sup>14</sup> Ko koutou te  
 whakamarama o te ao. E kore e ngaro te pa e tu ana i runga maunga. <sup>15</sup> E kore hoki e tahuna te  
 rama, e whakaturia ki raro o te mehua, engari ki runga ki te turanga; a ka tiaho ki nga tangata katoa  
 i roto i te whare. <sup>16</sup> Waihoki kia tiaho to koutou marama ki te aroaro o nga tangata, kia kite ai ratou  
 i a koutou hanga pai, kia whakakororia ai i to koutou Matua i te rangi.  
<sup>17</sup> Kei mea koutou i haere mai ahau ki te whakakahore i te ture, i nga poropiti ranei; kihai ahau  
 i haere mai ki te whakakahore, engari ki te whakatutuki. <sup>18</sup> He tino pono hoki taku e mea nei ki a  
 koutou, Pahemo noa te rangi me te whenua, e kore tetahi tongi, tetahi tohu ranei o te ture e pahemo,  
 kia rite katoa ra ano. <sup>19</sup> Na, ki te whakakahore tetahi i tetahi mea iti rawa o enei kupu ako, a ka  
 ako i nga tangata kia pera, ka kiia ia ko te iti rawa i te rangatiratanga o te rangi: engari ki te  
 whakaritea e tetahi, ki te whakaakona, ka kiia ia he nui i te rangatirata nga o te rangi. <sup>20</sup> Ko taku  
 kupu hoki tenei ki a koutou, Ki te kore e nui ake ta koutou mahi tika i ta nga karaipi ratou ko nga  
 Parihi, e kore rawa koutou e tapoko ki te rangatiratanga o te rangi.  
<sup>21</sup> Kua rongou koutou, i korerotia ki nga tupuna, Kaua e patu tangata; a ki te patu tangata tetahi,  
 ka tau te he ki a ia. <sup>22</sup> Na ko taku kupu tenei ki a koutou, Ki te riri noa tetahi ki tona teina, ka tau  
 te he ki a ia; a ki te mea tetahi ki tona teina, Wairangi! ka tika kia komititia: na ki te mea tetahi,  
 Poauau! ka tika mona te kapura o Kehena. <sup>23</sup> Na reira, ki te mauria e koe tau whakahere ki te aata,  
 a ka mahara i reira i hara koe ki tou hoa; <sup>24</sup> Waiho tau whakahere i reira, i mua o te aata, a haere,  
 matua houhia te rongou ki tou teina, ka haere ai, ka mau ai i tau whakahere. <sup>25</sup> Kia hohoro te

whakarite i ta korua korero ko tou hoa tauwhainga, i a korua ano i te ara, kei tukua koe e te hoa tauwhainga ki te kaiwhakawa, a ka tukua e te kaiwhakawa ki te katipa, a ka maka koe ki te whare herehere.<sup>26</sup> He pono taku e mea atu nei ki a koe, E kore rawa koe e puta i reira, kia utua ra ano te patene whakamutunga.

<sup>27</sup> Kua rongo koutou, i korerotia, Kaua e puremu: <sup>28</sup> Na ko taku kupu tenei ki a koutou, Ki te titiro tetahi ki te wahine, he hiahia ki a ia, kua puremu ke ia ki a ia i roto i tona ngakau. <sup>29</sup> Ki te he koe i tou kanohi matau, tikarohia, maka atu: he pai ke hoki ki a koe ki te ngaro tetahi wahi ou, a

ka kore e maka tou tinana katoa ki Kehena. <sup>30</sup> Ki te he ano hoki koe i tou ringa matau, poutoa, maka atu: he pai ke ki te mate tetahi wahi ou, a ka kore e maka tou tinana katoa ki Kehena. <sup>31</sup> I korerotia ano, Ki te whakarere tetahi i tana wahine, me hoatu ki a ia tetahi pukapuka whakarere:

<sup>32</sup> Na ko taku kupu tenei ki a koutou, Ki te whakarere tetahi i tana wahine, haunga mo te take moepuku, e mea ana ia i te wahine kia puremu: a ki te marena tetahi i te wahine i whakarerea, e puremu ana ia.

<sup>33</sup> Kua rongo ano koutou, i korerotia ki nga tupuna, Kaua e oati teka, engari me whakamana au oati ki te Ariki: <sup>34</sup> Na ko taku kupu tenei ki a koutou, Kaua rawa tetahi mea e oatitia; kua te rangi, ko to te Atua torona hoki ia: <sup>35</sup> Kaua hoki te whenua; ko te turanga hoki tera o ona waewae: kua hoki a Hiruharama; ko te pa hoki tera o te Kingi nui. <sup>36</sup> Kaua ano e oatitia tou matenga, e kore hoki e ahei i a koe te mea kia ma tetahi makawe, kia mangu ranei. <sup>37</sup> Erangi ko tenei hei kupu ma koutou, Ae, ae; Kahore, kahore: no te mea ki te maha atu i ena, no te kino.

<sup>38</sup> Kua rongo koutou i korerotia, He kanohi mo te kanohi, he niho mo te niho: <sup>39</sup> Na ko taku kupu tenei ki a koutou, Kaua e whakauaua atu ki te kino; erangi ki te pakia tou paparinga matau e tetahi, whakaangahia atu hoki tera ki a ia. <sup>40</sup> A ki te mea tetahi kia whakawakia koe, ka tangohia tou koti, tukua atu hoki tou ngeri ki a ia. <sup>41</sup> A ki te tona koe e tetahi kia haere kotahi te maero, kia rua au e haere tahi ai me ia. <sup>42</sup> Hoatu ki te tangata e tono mea ana i a koe, kua hoki e tauri ke i te tangata e mea ana ki te taonga tarewa i a koe.

<sup>43</sup> Kua rongo koutou i korerotia, Kia aroha ki tou hoa tata, kia kino hoki ki tou hoa whawhai: <sup>44</sup> Na ko taku kupu tenei ki a koutou, Arohaina o koutou hoa whawhai, manaakitia te hunga e kanga ana i a koutou, kia pai te mahi ki te hunga e kino ana ki a koutou, me inoi hoki mo te hunga e whakawhiu ana i a koutou, e whakatoi ana i a koutou; <sup>45</sup> Kia tupu ai koutou hei tamariki ma to koutou Matua i te rangi: e mea nei hoki ia i tona ra kia whiti ki te hunga kino, ki te hunga pai, kia



ua hoki te ua ki te hunga tika, ki te hunga he. <sup>46</sup> Ki te aroha hoki koutou ki te hunga e aroha ana  
 ki a koutou, he aha te utu e riro i a koutou? Kahore ianei nga pupirikana e pena? <sup>47</sup> A ki te oha  
 koutou ki o koutou teina anake, he aha ta koutou mahi i nui ake i ta etahi? kahore ianei nga tauwiwi  
 e pena hoki? <sup>48</sup> Na kia tika koutou, kia pera me to koutou Matua i te rangi e tika ana.

## Chapter 6

<sup>1</sup> Kia tupato kei mahi i ta koutou mea tika i te aroaro o nga tangata, hei tirohanga ma ratou:  
 penei kahore he utu ki a koutou a to koutou Matua i te rangi. <sup>2</sup> Na, ka atawhai koe i te rawakore,  
 aua e whakatangihia te tetere i mua i a koe, kei pera me te hunga tinihanga i roto i nga whare karakia,  
 i nga ara, kia whai kororia ai i nga tangata. He pono taku e mea nei ki a koutou, Kei a ratou ano te  
 utu mo ratou. <sup>3</sup> Erangi ka atawhaitia e koe te rawakore, kei mohio tou maui ki ta tou matau e mea  
 ai; <sup>4</sup> Kia ngaro ai tau atawhainga rawakore: a ko tou Matua e kite nei i te wahi ngaro, mana koe e  
 utu.  
<sup>5</sup> A, ka inoi koe, kaua e pera me te hunga tinihanga; ko ta ratou hoki e pai ai ko te inoi tu i roto  
 i nga whare karakia, i nga kokinga o nga ara, kia kitea ai e te tangata. He pono taku e mea nei ki a  
 koutou, Kei a ratou ano te utu mo ratou. <sup>6</sup> Na, ka inoi koe, tomo atu ki tou ruma i roto rawa, a, no  
 ka kati tou tatau, inoi ki tou Matua i te wahi ngaro; a ko tou Matua e kite nei i te wahi ngaro, mana  
 koe e utu. <sup>7</sup> Na, ka inoi koutou, aua e whakahuatia noatia ko aua kupu ano, kei pera me nga tauwiwi:  
 ki ta ratou hoki ma nga kupu maha e rangona ai ratou. <sup>8</sup> Na, kei rite koutou ki a ratou: e matau ana  
 hoki to koutou Matua ki nga mea e matea ana e koutou, i te mea kiano koutou i inoi ki a ia.  
<sup>9</sup> Na kia penei ta koutou inoi: E to matou Matua i te rangi, Kia tapu tou ingoa. <sup>10</sup> Kia tae mai  
 tou rangatiratanga. Kia meatia tau e pai ai ki runga ki te whenua, kia rite ano ki to te rangi. <sup>11</sup> Homai  
 ki a matou aiane he taro ma matou mo tenei ra. <sup>12</sup> Murua o matou hara, me matou hoki e muru  
 nei i o te hunga e hara ana ki a matou. <sup>13</sup> Aua hoki matou e kawea kia whakawaia; engari  
 whakaorangia matou i te kino. Nou hoki te rangatiratanga, te kaha, me te kororia, ake, ake. Amine.  
<sup>14</sup> Ki te whakarerea noatia iho hoki e koutou nga he o te tangata, ka whakarerea noatia iho ano o  
 koutou e to koutou Matua i te rangi. <sup>15</sup> A, ki te kore e whakarerea noatia iho e koutou nga he o nga  
 tangata, e kore ano e whakarerea noatia iho o koutou he e to koutou Matua.

16

Ka nohopuku hoki koutou, kei rite ki te hunga tinihanga, kaua e whakapoururu te kanohi; e whakaahua ke ana hoki ratou i o ratou kanohi, kia kitea ai e te tangata, e nohopuku ana. He pono

taku e mea nei ki a koutou, Kei a ratou ano te utu mo rato u. <sup>17</sup> Engari ka nohopuku koe, kaukauria

<sup>18</sup> tou upoko, horoia hoki tou kanohi; Kei kitea koe e te tangata e nohopuku ana, erangi e tou Matua i te wahi ngaro; a, ko tou Matua e kite nei i te wahi ngaro, mana koe e utu.

19

Kaua e purangatia he taonga mo koutou ki te whenua, ki te wahi e whakangaro ai te huhu,

te waikura: ki te wahi hoki e keru ai te tahae, tahae ai. <sup>20</sup> Erangi purangatia mo koutou he taonga ki te rangi, ki te wahi e kore ai e whakangaro te huhu, te waikura, ki te wahi hoki e kore ai e keru

te tahae, tahae ai: <sup>21</sup> Ko te wahi hoki i o koutou taonga, ko reira ano o koutou ngakau. <sup>22</sup> Ko te

kanohi te rama o te tinana: na ki te atea tou kanohi, e marama katoa tou tinana. <sup>23</sup> Tena ki te kino tou kanohi, ka pouri katoa tou tinana. Na ki te pouri te marama i roto i a koe, ano te nui o tena

<sup>24</sup> pouri! Kahore he tangata e pono te mahi ki nga rangatira tokorua: ka kino hoki ki tetahi, ka aroha ki tetahi; ka u ranei ki tetahi, a ka whakahawea ki tetahi. E kore e pono i a koutou te mahi ki te Atua, ki te taonga.

25

Koia ahau ka mea nei ki a koutou, Kaua e manukanuka ki to koutou ora, ki ta koutou e kai ai, ki ta koutou e inu ai; ki o koutou tinana ranei, ki ta koutou e kakahu ai. Ehara oti te ora i te rahi

atu i te kai, me te tinana i te kakahu? <sup>26</sup> Tirohia nga manu o te rangi: kahore ratou e rui, kahore e kokoti, e kohikohi ranei ki nga whare witi; heoi e whangainga ana ratou e to koutou Matua i te

rangi. Ehara oti koutou i te mea pai ake i era? <sup>27</sup> Ko wai o koutou e taea e ia te whakaaro iho, te

hono tetahi wahi ki tona roa, kia kotahi te whatianga? <sup>28</sup> A he aha koutou i manukanuka ai ki te kakahu? Maharatia nga rengarenga o te whenua, te tupu; e kore nei e mahi, e kore nei ano e miro:

29

Ko taku kupu tenei ki a koutou, Kihai a Horomona, me tona kororia katoa, i rite ki tetahi o enei te whai kakahu. <sup>30</sup> Ha, ki te penei ta te Atua whakakakahu i te tarutaru o te whenua, e tupu nei inaianei, a apopo ka maka ki te oumu, e kore ianei tana i a koutou e rahi ake, e te hunga whakapono

iti? <sup>31</sup> Na kaua ra e manukanuka, e mea, He aha ta tatou e kai ai? He aha ta tatou e inu ai? Me whakakakahu tatou ki te aha? <sup>32</sup> Ko enei mea katoa nei hoki ta nga tauwiwi e rapu ai; e matau ana

hoki to koutou Matua i te rangi e matea ana e koutou enei mea katoa. <sup>33</sup> Engari matua rapua tona

rangiratanga, me ana mea tika; a ka tapiritia enei mea katoa ma koutou. <sup>34</sup> No reira kaua e manukanuka ki o apopo: ma apopo ano ia e manukanuka. Kati ano i tona ra tona kino.

## Chapter 7

<sup>1</sup> Kauga e whakawa, kei whakawakia koutou. <sup>2</sup> Na, ko te whakawakanga e whakawa ai koutou, koia ano hei whakawakanga mo koutou: a ko te mehua e mehua ai koutou, hei mehua ano tena ki a koutou. <sup>3</sup> A he aha tau e titiro ki te otaota i roto i te kanohi o tou teina, te mahara ki te kurupae i roto i tou? <sup>4</sup> Me pehea ranei tau kupu ki tou teina, Iaua, kia kapea atu e ahau te otaota i tou kanohi; a he kurupae ano tena kei roto i tou? <sup>5</sup> E te tangata tinihanga, matua kapea e koe te kurupae i tou kanohi; katahi koe ka marama ki te kape i te otaota i roto i te kanohi o tou teina. <sup>6</sup> Kauga e hoatu te mea tapu ki nga kuri, kauga ano e maka a koutou peara ki te aroaro o nga poaka, kei takatakahia e o ratou waewae, a ka tahuri, ka haehae i a koutou.

<sup>7</sup> Inoia, a ka hoatu ki a koutou; rapua, a ka kitea e koutou; patoto, a ka uakina ki a koutou; <sup>8</sup> Ka whiwhi hoki te tangata ina inoi, ka kite ina rapu; ka uakina hoki ki te tangata e patoto ana. <sup>9</sup> Ko tehea tangata ianei o koutou, ina inoi tana tama ki a ia he taro, e hoatu ki a ia he kohatu? <sup>10</sup> A inoi ranei he ika, e hoatu ki a ia he nakahi? <sup>11</sup> Na ki te matau koutou, te hunga kino, ki te hoatu mea papai ki a koutou tamariki, tera noa ake te homaitanga o nga mea papai e to koutou Matua i te rangi ki te hunga e inoi ana ki a ia.

<sup>12</sup> Na ko nga mea katoa, e pai ai koutou kia meatia e nga tangata ki a koutou, meatia hoki e koutou ki a ratou: ko tenei hoki ta te ture me ta nga poropiti. <sup>13</sup> E tomo ma te kuwaha whaiti: he wharahi hoki te kuwaha, he whanui te ara, e tika ana ki te ngaromanga, a he tokomaha e haere ana ra reira. <sup>14</sup> He kuiti hoki te kuwaha, he kiki te ara e tika ana ki te ora, a he tokoiti te hunga e kite.

<sup>15</sup> Kia tupato ki nga poropiti teka e haere nei ki a koutou, he hipi te kakahu, ko roto ia he wuruhi kai kino. <sup>16</sup> Ma o ratou hua ka mohiotia ai ratou e koutou. E whakiiia ranei te karepe i runga i te tataramoa, te piki ranei i te tumatakuru? <sup>17</sup> Waihoki he ataahua nga hua o te rakau pai; he kino ia nga hua o te rakau kino. <sup>18</sup> E kore te rakau pai e ahei te hua i te hua kino, e kore ano te rakau kino e hua i te hua ataahua. <sup>19</sup> Ko nga rakau katoa e kore nei e hua i te hua ataahua ka tuaina ki raro, ka maka ki te ahi. <sup>20</sup> Ina, ma o ratou hua ka mohiotia ai ratou e koutou.

<sup>21</sup> E kore e tomo ki te rangatiratanga o te rangi nga tangata katoa e mea mai ana ki ahau, E te Ariki, e te Ariki; engari ia e mea ana i ta toku Matua i te rangi i pai ai. <sup>22</sup> He tokomaha e mea mai

ki ahau i taua ra, E te Ariki, e te Ariki; kihai koia matou i poropiti i runga i tou ingoa? i pei rewera  
 hoki i runga i tou ingoa? he tini hoki nga mahi nunui i meatia e matou i runga i tou ingoa? <sup>23</sup> Ko  
 reira ahau mea ai ki a ratou, Kahore rawa ahau i mohio ki a koutou; mawehe atu i ahau, e nga  
 kaimahi i te tutu. <sup>24</sup> Na ko te tangata e rongono ana ki enei kupu aku, e mahi ana hoki, ka whakaritea  
 e ahau ki te tangata mahara, i hanga i tona whare ki runga ki te kamaka: <sup>25</sup> A ka ua te ua, ka puta  
 nga waipuke, ka pupuhi nga hau, te tino akinga ki taua whare; kihai hoki i hinga: no te mea i hanga  
 ki runga ki te kamaka. <sup>26</sup> A ko te tangata e rongono ana ki enei kupu aku, a kahore e mahi, ka  
 whakaritea ki te tangata whakaarokore i hanga i tona whare ki runga ki te onepu: <sup>27</sup> Na ka ua te  
 ua, ka puta nga waipuke, ka pupuhi nga hau, a pa ana ki taua whare; na kua hinga: he rahi ano tona  
 hinganga. <sup>28</sup> A, no ka mutu enei korero a Ihu, ka miharo te whakaminenga ki tana ako: <sup>29</sup> I rite  
 hoki tana ako i a ratou ki ta te tangata whai mana, kihai hoki i rite ki ta nga karaipi.

## Chapter 8

<sup>1</sup> A, no ka heke iho ia i te maunga, he rahi te hui i aru i a ia. <sup>2</sup> Na ka haere tetahi repera, ka  
 koropiko ki a ia, ka mea, E te Ariki, ki te pai koe, e taea ahau e koe te mea kia ma. <sup>3</sup> A ka totoro  
 te ringa o Ihu, ka pa ki a ia, ka mea, E pai ana ahau; kia ma koe. A ma tonu iho tona repera. <sup>4</sup> Katahi  
 ka mea a Ihu ki a ia, Kia mahara, kei korerotia ki te tangata; erangi haere, kia kite te tohunga i a  
 koe, mauria atu hoki te whakahere i whakaritea e Mohi, hei mea whakaatu ki a ratou.  
<sup>5</sup> A, no ka tae a Ihu ki Kaperenauma, ka haere ki a ia tetahi keneturio, ka inoi ki a ia, <sup>6</sup> Ka mea,  
 E te Ariki, ko taku pononga kei te whare e takoto ana, he pararutiki, e ngaua kinotia ana. <sup>7</sup> A ka  
 mea a Ihu ki a ia, Ka haere ahau ki te whakaora i a ia. <sup>8</sup> Na ko te whakahokinga a te keneturio, ko  
 te meatanga, E te Ariki, ehara ahau i te tikanga tangata e haere ake ai koe ki raro i toku tuanui;  
 engari kia puaki kau tau kupu, a ka ora taku pononga. <sup>9</sup> He tangata hoki ahau e whakahaua ana, he  
 hoia ano aku hei whakahaunga maku: ka mea ahau ki tenei, Haere, na ka haere ia; ki tetahi, Haere  
 mai, a ka haere mai; ki taku pononga hoki, Meatia tenei, a ka meatia e ia. <sup>10</sup> A, no te rongonga o  
 Ihu, ka miharo, ka mea ki te hunga e aru ana, He pono taku e mea nei ki a koutou, Kahore ahau i  
 kite noa i te whakapono hei rite mo tenei te nui i roto i a Iharaira. <sup>11</sup> Ko taku kupu ano tenei ki a  
 koutou, He tokomaha e haere mai i te rawhiti, i te hauauru, a e noho tahi i a Aperahama, i a Ihaka,  
 i a Hakopa, ki te rangatiratanga o te rangi: <sup>12</sup> Ko nga tamariki ia o te rangatiratanga ka maka ki te

13  
 pouri i waho: ko te wahi tera o te tangi, o te tetea o nga niho. Na ka mea a Ihu ki te keneturio, Haere, kia rite ki tou whakapono te meatanga ki a koe. A ora ake ana taua pononga i taua wa pu ano.

14  
 A, no ka tae a Ihu ki te whare o Pita, ka kite ia i tona hungawai wahine e takoto mate ana, he kirika. 15 Na ka pa ia ki tona ringaringa, a mutu ake tona kirika: a ara ake ana ia ki te taka mea

16  
 ma ratou. Na i te ahiahi he tokomaha te hunga e nohoia ana e nga rewera i mauria mai ki a ia: na ka peia e tana kupu nga wairua ki waho, a whakaorangia ake e ia te hunga mate katoa: 17 I rite ai ta Ihaia poropiti i korero ai, i mea ai, nana i tango o tatou ngoikore, i waha o tatou mate.

18  
 Na, i te kitenga o Ihu he rahi te hui e mui ana ki a ia, ka whakahau ia kia whakawhiti ki tawahi. 19 A ka haere tetahi karaipi, ka mea ki a ia, E te Kaiwhakaako, ka aru ahau i a koe ki nga

20  
 wahi katoa e haere ai koe. A ka mea a Ihu ki a ia, He rua o nga pokiha, he kowhanga o nga manu o te rangi; tena ko te Tama a te tangata, kahore ona wahi e takoto ai tona matenga. 21 A i mea tetahi

22  
 atu o ana akonga ki a ia, E te Ariki tukua ahau kia matua haere ki te tanu i toku papa. Na ka mea a Ihu ki a ia, Arumia ahau: a waiho ma nga tupapaku e tanu o ratou tupapaku.

23  
 A, no ka eke ia ki te kaipuke, ka aru ana akonga i a ia. 24 Na ka tutu te puehu o te moana, a ngaro iho te kaipuke i te ngaru; i te moe hoki ia. 25 A ka haere ana akonga, ka whakaara i a ia,

26  
 ka mea, E te Ariki, whakaorangia tatou, ka ngaro tatou. A ka mea ia ki a ratou, He aha ta koutou e wehi, e te hunga whakapono iti? Me i reira ka ara ia, a riria iho te hau me te moana; a takoto ana

27  
 he marino nui. A miharo noa nga tangata, ka mea, He tangata aha tenei, ina, rongu rawa te hau me te moana ki a ia!

28  
 A, no ka whiti ia ki tarawahi, ki te whenua o nga Kerekehini, ka tutaki ki a ia etahi tangata tokorua e nohoia ana e te rewera, e puta ana mai i roto i nga urupa, he hunga tutu rawa, te taea taua

29  
 ara te haere e te tangata. Na ka karanga ake raua, ka mea, He aha maua nau, e Ihu, e te Tama a te Atua? kua tae mai oti koe ki te whakamamae i a maua i te mea kahore ano i rite te taima? 30 Na

31  
 tera tetahi kahui poaka i tawhiti atu i a ratou e kai ana, he tini. A ka inoi nga rewera ki a ia, ka mea, Ki te pei koe i a matou, tukua matou kia haere ki roto ki te kahui poaka. 32 Na ka mea ia ki a ratou, Haere. Na, ko to ratou putanga ki waho, haere ana ki roto ki te kahui poaka; na ko te tino

33  
 rerenga o te kahui poaka katoa ra te pari ki te moana, a mate iho ki roto ki te wai. Na ka whati nga kaiwhangai, a haere ana ki te pa, korero ana i nga mea katoa, me te meatanga ki te hunga i

nohoia e nga rewera. <sup>34</sup> Na puta katoa ana te pa ki waho, ki te whakatau i a Ihu; a ka kite i a ia, ka tohe kia haere atu ia i o ratou wahi.

## Chapter 9

<sup>1</sup> Na ka eke ia ki te kaupuke, ka whiti ki tawahi, ka haere ki tona pa. <sup>2</sup> Na ka kawea mai e ratou ki a ia tetahi pararutiki, e takoto ana i runga i te moenga; no te kitenga o Ihu i to ratou whakapono ka mea ia ki te pararutiki, E tama, kia maia; ka oti ou hara te muru. <sup>3</sup> Na ka mea etahi o nga karaipi ki a ratou ano, E kohukohu ana tenei tangata. <sup>4</sup> A, ka kite a Ihu i o ratou whakaaro, ka mea ia, He aha i kino ai nga whakaaro o roto o o koutou ngakau? <sup>5</sup> Ko tehea oti te mea takoto noa, ko te mea, Ka oti ou hara te muru; ko te mea ranei, Whakatika, haere? <sup>6</sup> Otira kia matau ai koutou he mana muru hara to te Tama a te tangata i runga i te whenua, katahi ia ka mea runga i te whenua, katahi ia ka mea ki te pararutiki, Whakatika, tangohia ake tou moenga, a haere ki tou whare. <sup>7</sup> Na whakatika ana ia, haere ana ki tona whare. <sup>8</sup> No te kitenga ia o te hui, ka wehi, ka whakakororia i te Atua, i homai ai tenei mana ki nga tangata.

<sup>9</sup> A, i a Ihu e haere ana i reira, ka kite ia i tetahi tangata, ko Matiu te ingoa, e noho ana i te wahi tango takoha; a ka mea ki a ia, Arumia ahau. Na whakatika ana ia, aru ana i a ia. <sup>10</sup> A, i a ia e noho ana ki te kai i roto i te whare, na he tokomaha nga pupirikana me nga tangata hara i haere mai, i noho tahi ki a Ihu ratou ko ana akonga. <sup>11</sup> A, no te kitenga o nga Parihi, ka mea ki ana akonga, He aha to koutou Kaiwhakaako ka kai tahi ai me nga pupirikana, me nga tangata hara? <sup>12</sup> Otira ka rongu a Ihu, ka mea ki a ratou, Kahore he aha o nga tangata ora e meatia ai e te rata, engari o te hunga e mate ana. <sup>13</sup> Na haere, akona te tikanga o tenei, Ko taku e pai ai ko te tohu tangata, haunga te patunga tapu: kihai hoki ahau i haere mai ki te karanga i te hunga tika, engari i te hunga hara, kia ripeneta.

<sup>14</sup> Me i reira ka haere mai ki a ia nga akonga a Hoani, ka mea, He aha i maha ai o matou ko nga Parihi nohoanga pukutanga a kahore au akonga e nohopuku? <sup>15</sup> Na ka mea a Ihu ki a ratou, E ahei ranei nga tamariki o te whare marena te tangi, i te mea kei a ratou te tane marena hou? Na, <sup>16</sup> tera e tae mai nga ra, e tangohia ai te tane marena hou i a ratou, a ko reira nohopuku ai ratou. E kore e meatia e te tangata tetahi wahi o te kahu hou hei papaki mo te kahu tawhito, no te mea ka

17  
 riro tetahi wahi o taua kakahu i te whakakapi, a ka nui rawa te pakaru. E kore e ringihia te waina hou ki nga ipu tawhito: kei pakaru nga ipu, a ka maringi te waina, kore ake nga ipu: erangi e ringihia ana te waina hou ki nga ipu hou, a ka ora taua rua.

18  
 I a ia e korero ana i enei mea ki a ratou, na ka haere mai tetahi rangatira, ka koropiko ki a ia, ka mea, Tenei kua marere taku tamahine: otira mau e haere ake, e whakapa tou ringa ki a ia, a

19  
 ka ora. Na ka whakatika a Ihu ratou ko ana akonga, a aru ana i a ia. Na ko te haerenga ki muri i a ia o tetahi wahine, tekau ma rua nga tau i mate ai i te pakaruhanga toto, a ka pa ki te taniko

20  
 o tona kakahu: I mea hoki i roto i a ia, Kia pa kau oti ahau ki tona kakahu, ka ora ahau. Na ka tahuri a Ihu, a ka kite i a ia, ka mea, Kia maia, e ko; na tou whakapono koe i ora ai. A ora ake

21  
 te wahine i taua wa ano. Na, i te taenga o Ihu ki te whare o te rangatira, ka kite i nga

22  
 kaiwhakatangi putorino, i te huihui hoki e ngangau ana, Ka mea ia ki a ratou, Whakaatea: kahore

23  
 hoki i mate te kotiro, erangi e moe ana. A kaitaina iho ia e ratou. Heoi, ka oti te huihui te pei ki

24  
 waho, ka tomo ia ki roto, ka mau ki tona ringa, a ara ake ana te kotiro. A paku ana tenei rongo puta noa i taua whenua.

25  
 27 A, i a Ihu e haere atu ana i reira, tokorua nga matapo i aru i a ia, ka karanga ake, ka mea, E

26  
 te Tama a Rawiri, kia aroha ki a maua. A, ka tapoko ia ki te whare, ka haere atu nga matapo ki a ia: na ka mea a Ihu ki a raua, E whakapono ana ranei korua e taea tenei e ahau? Ka mea raua ki

27  
 a ia, Ae, e te Ariki. Me i reira ka pa ia ki o raua kanohi, ka mea, Kia rite ki to korua whakapono

28  
 te meatanga ki a korua. Na kua kite o raua kanohi; katahi ka whakatupato a Ihu i a raua, ka mea,

29  
 Kia mahara kei rangona e te tangata. Ko raua ia i puta atu ki waho, a korerotia nuitia ana ia puta

30  
 noa i taua whenua. I a raua e puta ana ki waho, ka kawea mai ki a ia tetahi tangata wahangu, he

31  
 rewera tona. A, ka oti te rewera te pei, ka whai reo te wahangu; a miharo ana te mano, ka mea,

32  
 Kahore ano i kitea te penei i roto i a Iharaira. Otira ka mea nga Parihi, Na te rangatira o nga rewera tana peinga rewera.

33  
 35 Na ka haereerea e Ihu nga pa katoa me nga kainga, a ka ako i roto i o ratou whare karakia, ka kauwhau i te rongopai o te rangatiratanga, me te whakaora i te tini o nga mate, i te tini o nga

34  
 turorotanga o te iwi. A, no tona kitenga i nga mano, ka toko ake tona ngakau aroha ki a ratou,

35  
 e mauui ana hoki ratou, e marara ke ana, me he hipi heparakore. Katahi ia ka mea ki ana akonga,

He nui te kotinga, ko nga kaimahi ia he ruarua; <sup>38</sup> Na inoi atu ki te Ariki nana te kotinga, kia tonoa e ia he kaimahi ki tana kotinga.

## Chapter 10

<sup>1</sup> A, ka oti te karanga e ia ana akonga tekau ma rua, ka hoatu ki a ratou he mana hei pei i nga wairua poke, hei whakaora hoki i nga mate katoa me nga turorotanga katoa. <sup>2</sup> Na ko nga ingoa enei o nga apotoro kotahi tekau ma rua; te tuatahi ko Haimona, e kii nei ko Pita, raua ko tona teina ko Anaru; ko Hemi tama a Heperi raua ko tona teina ko Hoani; <sup>3</sup> Ko Piripi raua ko Patoromu; ko Tamati raua ko Matiu pupirikana; ko Hemi tama a Arapiu, ko Tariu; <sup>4</sup> Ko Haimona Kanaani raua ko Hura Ikariote, nana nei ia i tuku.

<sup>5</sup> Ko tenei tekau ma rua i tonoa e Ihu, i ako ia i a ratou, i mea, Kaua e haere ki tetahi ara o nga tauwiwi, kaua ano hoki e tomo ki tetahi pa o nga Hamari: <sup>6</sup> Engari me haere ki nga hipi ngaro o te whare o Iharaira. <sup>7</sup> Me kauwhau haere hoki, me ki, Kua tata te rangatiratanga o te rangi.

<sup>8</sup> Whakaorangia nga turoro, meinga kia ma nga repera, whakaarahia nga tupapaku, peia nga rewera; ka riro noa nei i a koutou, me hoatu noa e koutou. <sup>9</sup> Kaua he koura ma koutou, kaua he hiriwa, kaua he parahi ki roto ki o koutou whitiki; <sup>10</sup> Kaua ano he putea mo te ara; kaua e takiruatia nga koti, kaua he hu, kaua ano he tokotoko; ka ea hoki i te kaimahi tana kai. <sup>11</sup> A, ka tomo koutou ki tetahi pa, ki tetahi kainga ranei, ui atu, ko wai te tangata pai o reira; a hei reira noho ai a haere noa.

<sup>12</sup> A, no ka tomo ki tetahi whare, me oha atu. <sup>13</sup> A, ki te pai te whare, kia tau ta koutou rangimarie ki reira; a, ki te kahore e pai, kia hoki ta koutou rangimarie ki a koutou. <sup>14</sup> Ki te kahore hoki tetahi e manako ki a koutou, ki te kore e whakarongo ki a koutou kupu, ka haere koutou ki waho o taua whare, o taua pa ranei, ka whakangahoro i te puehu o o koutou waewae. <sup>15</sup> He pono taku e mea nei ki a koutou, Erangi to te whenua o Horoma raua ko Komora a te ra whakawa e mama i to taua pa.

<sup>16</sup> Nana, ka tonoa nei koutou e ahau ano he hipi ki roto ki nga wuruhi: na, kia rite ki te nakahi te mahara, ki te kukupa hoki te mahaki. <sup>17</sup> Kia tupato ia i nga tangata: tera hoki koutou e tukua e ratou ki nga runanga, a tera koutou e whiua i roto i o ratou whare karakia; <sup>18</sup> A ka kawea koutou



ki nga kawana, ki nga kingi, mo te whakaaro ki ahau, hei mea whakaatu ki a ratou, ki nga tauwi  
<sup>19</sup>  
 hoki. A, no ka tukua koutou e ratou, kaua e manukanuka ki te pehea, ki te aha, e korero ai koutou;  
<sup>20</sup>  
 ka hoatu ki a koutou i taua wa ta koutou e korero ai. Ehara hoki i a koutou nga korero, engari  
<sup>21</sup>  
 ko te Wairua o to koutou Matua te korero ana i roto i a koutou. Na ka tukua te tuakana e te teina  
 ki te mate, te tama hoki e te papa; ka whakatika nga tamariki ki nga matua, ka mea kia whakamatea.  
<sup>22</sup>  
 A ka kinongia koutou e nga tangata katoa, he mea hoki mo toku ingoa; ko te tangata ia e u ana  
<sup>23</sup>  
 a taea noatia te mutunga, ka ora ia. Na, ki te whakatoia koutou i tenei pa, rere atu ki tetahi: he  
 pono hoki taku e mea nei ki a koutou, E kore e poto i a koutou nga pa o Iharaira te haere, ko te  
<sup>24</sup>  
 Tama a te tangata kua tae mai. Kahore e nui ake te akonga i tona kaiwhakaako, kahore hoki te  
<sup>25</sup>  
 pononga e nui ake i tona rangatira. Heoi ma te akonga ko ia kia rite ki tona kaiwhakaako, ma  
 te pononga kia rite ki tona rangatira. Ki te kiia e ratou te rangatira o te whare ko Perehepura, tera  
<sup>26</sup>  
 noa ake ta ratou mo nga tangata o tona whare. Na kaua e wehi i a ratou: kahore hoki he mea i  
<sup>27</sup>  
 hipokina e mahue te hura; he mea ranei i huna e mahue te mohio. Ko taku e korero nei ki a  
 koutou i te pouri, me korero e koutou i te marama: ko ta o koutou taringa e rongo ai, me kauwhau  
<sup>28</sup>  
 ki runga i nga whare. A kaua e wehi i te hunga e whakamate nei i te tinana, a e kore nei e ahei  
 te whakamate i te wairua; engari ia ko ta koutou e wehi ai, ko ia e kaha nei ki te whakangaro i te  
<sup>29</sup>  
 wairua raua tahi ko te tinana ki roto ki Kehena. Kahore ianei e hokona nga pihoihoi e rua ki te  
 patene kotahi? a, ki te kahore to koutou Matua e mea, e kore tetahi o raua e taka ki te whenua:  
<sup>30</sup>  
<sup>31</sup>  
 Otiia ko nga makawe o o koutou matenga kua oti katoa te tatau. No reira kaua e wehi: erangi  
<sup>32</sup>  
 ra koutou i nga pihoihoi maha. Na, ki te whakaae tetahi ki ahau i te aroaro o nga tangata, ka  
<sup>33</sup>  
 whakaaetia ia e ahau i te aroaro o toku Matua i te rangi. A, ki te whakakahore tetahi i ahau i te  
<sup>34</sup>  
 aroaro o nga tangata, ka whakakahoretia hoki ia e ahau i te aroaro o toku Matua i te rangi. Kei  
 mea i haere mai ahau ki te kawae mai i te rangimarie ki te whenua: kihai ahau i haere mai ki te kawae  
<sup>35</sup>  
 mai i te rangimarie, engari i te hoari. I haere mai hoki ahau ki te mea i te tangata kia whawhai  
<sup>36</sup>  
 ki tona papa, i te tamahine ki tona whaea, i te hunaonga wahine ki tona hungawai wahine: A ko  
<sup>37</sup>  
 o te tangata hoariri ko nga tangata ano o tona whare. Ki te nui ake te aroha o tetahi ki tona papa,  
 whaea ranei, i tona ki ahau, e kore ia e tikangatia maku; ki te nui ake hoki te aroha o tetahi ki tana  
<sup>38</sup>  
 tama, tamahine ranei, i tona ki ahau, e kore ia e tikangatia maku. Ki te kore hoki tetahi e mau  
<sup>39</sup>  
 ki tona ripeka, e aru i muri i ahau, e kore ia e tikangatia maku. Ko te tangata i whiwhi ki te ora

40  
 e mate ano ia: a, kite mate tetahi mona i whakaaro ki ahau, ka whiwhi ano ia ki te ora. Ki te manako tetahi ki a koutou, e manako ana ia ki ahau, a, ki te manako tetahi ki ahau, e manako ana ia ki toku kaitono mai. 41  
 Ki te manako tetahi ki te poropiti i runga i te ingoa o te poropiti, ka riro i a ia te utu o te poropiti; a, ki te manako tetahi ki te tangata tika i runga i te ingoa o te tangata tika, e riro i a ia te utu o te tangata tika. 42  
 A, ki te whakainumia e tetahi tetahi o enei mea nonohi, ahakoa kotahi ano te kapu wai matao, i runga i te ingoa o te akonga, he pono taku e mea nei ki a koutou, e kore rawa ia e hapa i tona utu.

## Chapter 11

1  
 A, ka mutu ta Ihu whakarite korero ki ana akonga kotahi tekau ma rua, ka haere atu ia i reira ki te whakaako, ki te kauwhau ki o ratou pa. 2  
 Na, i te rongonga o Hoani i roto i te whare herehere ki nga mahi a te Karaiti, ka tonoa e ia etahi o ana akonga, 3  
 Ka mea ki a ia, Ko koe ranei tenei e haere mai nei, me tatari ranei tatou ki tetahi atu? 4  
 Na ka whakahoki a Ihu, ka mea ki a raua, Haere, korerotia ki a Hoani nga mea e rongono nei, e kite nei korua: 5  
 Ko nga matapo e titiro ana, ko nga kopa e haereere ana, ko nga repera e meinga ana kia ma, ko nga turi e rongono ana, ko nga tupapaku e whakaarahia ana, a e kauwhautia ana te rongopai ki te hunga rawakore. 6  
 A ka koa te tangata e kore e he ki ahau. 7  
 A, i a raua e haere atu ana, ka timata a Ihu, ka korerotia a Hoani ki te mano, I haere koutou ki te koraha kia kite i te aha? I te kakaho e whakangaeuetia ana e te hau? 8  
 Ano ra i haere koutou kia kite i te aha? I te tangata he kakahu maeneene ona? Na kei nga whare kingi te hunga i nga kakahu maeneene. 9  
 Ano ra i haere koutou kia kite i te aha? I te poropiti? Ae ra, ko taku kupu tenei ki a koutou, tera atu ano i te poropiti. 10  
 Ko ia hoki tenei mona te mea i tuhituhia, Na, ka tonoa e ahau taku karere ki mua i tou aroaro, mana e whakapai tou ara ki mua i a koe. 11  
 He pono taku e mea nei ki a koutou, Kahore ano i maea ake i roto i nga whanau a te wahine he rahi ake i a Hoani Kaiiriiri: heoi rahi ake i a ia te iti rawa i te rangatiratanga o te rangi. 12  
 A no nga ra mai ano i a Hoani Kaiiriiri a mohoa noa nei e tukinotia ana te rangatiratanga o te rangi, a e riro ana ia i te ringa kaha o nga tangata taikaha. 13  
 No te mea i poropiti nga poropiti katoa me te ture a taea noatia a

14 Hoani. A, ki te pai koutou koia ra, ko Iraia tenei, i meinga ra e haere mai ana. 15 Ki te whai taringa tetahi hei whakarongo, kia rongoa ia.

16 Otiia me whakarite e ahau tenei whakatupuranga ki te aha? E rite ana ki nga tamariki e noho ana i nga wahi hokohoko, e karanga ana ki o ratou hoa, 17 E mea ana, Whakatangi noa matou i te putorino ki a koutou, a kahore koutou i kanikani mai; aue noa matou ki a koutou, a kahore koutou

18 i tangi mai. I haere mai hoki a Hoani, kihai i kai, kihai i inu, heoi e mea ana ratou, He rewera

19 tona. I haere mai te Tama a te tangata me te kai me te inu, ka mea ratou, Na, he tangata kakai, he tangata inu waina, he hoa no nga pupirikana, no nga tangata hara! Otira ma ana mahi e whakatika

20 te whakaaro nui. Katahi ia ka anga ka tawai ki nga pa i meinga ai te maha o ana merekara, mo

21 ratou kihai i ripeneta: Aue, te mate mou, e Korahina! aue, te mate mou, e Petahaira! me i meatia ki Taira, ki Hairona nga merekara kua meatia nei ki a korua, kua ripeneta ke raua, he taratara te

22 kakahu me te oke i te pungarehu. Ko taku kupu ia tenei ki a koutou, Erangi to Taira raua ko

23 Hairona e mama i te ra whakawa i to korua. Me koe hoki, e Kaperenauma, e whakateiteitia ranei koe a tae noa ki te rangi? ka heke koe ki te reinga: me i meatia hoki ki Horoma nga merekara kua

24 meatia nei ki a koe, kua tu tonu tera a taea noatia tenei ra. Ko taku kupu ia tenei ki a koutou, Erangi to te whenua o Horoma e mama i tou i te ra whakawa.

25 I taua wa ka oho a Ihu, ka mea, He whakawhetai atu taku ki a koe, e Pa, e te Ariki o te rangi o te whenua, no te mea kua huna e koe enei mea i te hunga matau, i te hunga mahara, a hurahia ana

26 ki nga kohungahunga. Ae ra, e Pa; i pai hoki te penei ki tau titiro. 27 Kua tukua mai nga mea katoa ki ahau e toku Matua: a kahore tetahi e matau ki te Tama, ko te Matua anake; kahore hoki tetahi e matau ki te Matua, ko te Tama anake, me te tangata hoki e pai ai te Tama kia whakakitea

28 ki a ia. Haere mai ki ahau, e koutou katoa e mauui ana, e taimaha ana, a maku koutou e

29 whakaokioki. Tangohia taku ioka ki runga ki a koutou, kia whakaakona koutou e ahau; he ngakau mahaki hoki toku, he ngakau papaku: a e whiwhi koutou ki te okiokinga mo o koutou wairua.

30 He ngawari hoki taku ioka, he mama taku pikaunga.

## Chapter 12

<sup>1</sup> I taua wa i haere a Ihu i te hapati ra waenga witi; a e hiakai ana ana akonga, na ka anga ratou  
ka kato i nga witi, ka kai. <sup>2</sup> A, no te kitenga o nga Parihi, ka mea ki a ia, Na, au akonga e mea na  
i te mea e kore e tika kia meinga i te hapati. <sup>3</sup> Ka mea ia ki a ratou, Kahore koutou i kite i ta Rawiri  
i mea ai, i a ia e hiakai ana, ratou ko ona hoa: <sup>4</sup> I tona tomokanga ki te whare o te Atua, i tana kainga  
i nga taro aroaro, i nga mea kihai nei i tika kia kainga e ia, e ona hoa ranei, engari ma nga tohunga  
<sup>5</sup> anake? Kahore ano koutou i kite i roto i te ture, e whakanoatia ana te hapati e nga tohunga i roto  
i te temepara i nga hapati, a kahore he he? <sup>6</sup> Ko taku kupu ia tenei ki a koutou, Kei konei tetahi,  
he rahi ke i te temepara. <sup>7</sup> Otiia me i matau koutou ki tenei, Ko taku e pai ai ko te tohu tangata,  
haunga te patunga tapu, kahore koutou i whakahe i te hunga harakore. <sup>8</sup> Ko te Tama nei hoki a te  
tangata te Ariki o te hapati. <sup>9</sup> Na ka haere atu ia i reira, ka tomo ki to ratou whare karakia: <sup>10</sup> Na  
he tangata tera kua memenge te ringa. A ka ui ratou ki a ia, He tika ranei te whakaora i te hapati?  
he mea hoki kia whakapangia ai e ratou he he ki a ia. <sup>11</sup> Na ka mea ia ki a ratou, Ko tehea tangata  
o koutou, ki te mea kotahi ana hipi, a ka taka ki roto ki te poka i te hapati, e kore ranei ia e mau ki  
taua hipi, e hapai ake? <sup>12</sup> Na tera noa atu to te tangata pai i to te hipi. Ina, he tika ano te mahi pai  
i nga hapati. <sup>13</sup> Me i reira ka mea ia ki taua tangata, Totoro mai tou ringa. A, no te toronga, kua  
ora ano, kua pera me tetahi.  
<sup>14</sup> Na ka haere nga Parihi ki waho, ka runanga mona me pehea e ngaro ai ia i a ratou. <sup>15</sup> Otiira  
i matau a Ihu, a haere atu ana i reira: a he rahi te hui i aru i a ia, a whakaorangia ana ratou katoa e  
ia; <sup>16</sup> A i whakatupato ano ia i a ratou kei whakakitea ia. <sup>17</sup> Na ka rite ta Ihaia poropiti i korero  
ai, i mea ai, <sup>18</sup> Na, taku pononga, taku i whiriwhiri ai: taku i aroha ai, ta toku Wairua i ahuaureka  
ai: ka waiho e ahau toku Wairua ki runga ki a ia, a mana e whakapuaki te whakawa ki nga tauwiwi.  
<sup>19</sup> E kore ia e totohe, e kore ia e hamama; e kore ano e rangona tona reo i nga ara; <sup>20</sup> E kore e  
whatiia prokeretia e ia te kakaho i mangungu, e kore e tineia te muka e whakapaoa ana; kia puta  
ra ano i a ia te whakawa ki te wikitoria. <sup>21</sup> Ka tumanako hoki nga tauwiwi ki tona ingoa.  
<sup>22</sup> Me i reira ka kawea mai ki a ia he tangata e nohoia ana e te rewera, he matapo, he wahangu;  
a whakaorangia ana e ia, no ka korero, ka kite taua matapo, taua wahangu. <sup>23</sup> A ka ohomauri te  
mano katoa, ka mea, Ehara ianei tenei i te Tama a Rawiri? <sup>24</sup> A, no te rongonga o nga Parihi, ka  
mea, Ehara i a ia nana i pei nga rewera nei, engari na Perehepura, na te rangatira o nga rewera.

25

A i matau a Ihu ki o ratou whakaaro, ka mea ki a ratou, Ki te tahuri iho tetahi rangatiratanga ki a ia ano, ka kore; ki te tahuri iho hoki ki a ia ano tetahi pa, tetahi whare ranei, e kore e tu: <sup>26</sup> Na, ki te pei a Hatana i a Hatana ano, e tahuri iho ana ki a ia ano; me pehea e tu ai tona rangatiratanga?

27

A, ki te mea na Perehepura taku peinga rewera, na wai te peinga a a koutou tamariki? na ko ratou hei kaiwhakawa mo koutou. <sup>28</sup> Tena, ki te mea na te Wairua o te Atua taku peinga rewera, ina,

kua tae noa mai te rangatiratanga o te Atua ki a koutou. <sup>29</sup> Me pehea oti ka tomo ai te tangata ki te whare o te tangata kaha, ka pahua ai i ona taonga, ki te kore ia e matua here i taua tangata kaha?

ko reira pahua ai i tona whare. <sup>30</sup> Ko te tangata ehara i te hoa noku, he hoariri ia ki ahau; ko te

tangata kahore e kohikohi tahi maua, e titaritari ana. <sup>31</sup> Koia ahau ka mea nei ki a koutou, Ko nga hara katoa me nga kohukohu, a te tangata e murua: tena ko te kohukohu ki te Wairua Tapu e kore

e murua. <sup>32</sup> Ki te korero whakahe hoki tetahi mo te Tama a te tangata, e murua tana: tena ki te korero whakahe tetahi mo te Wairua Tapu, e kore e murua tana i tenei ao, e kore ano i tera atu.

33

Meinga ranei te rakau kia pai, a pai iho ona hua; meinga ranei te rakau kia kino, a kino iho ona hua; ma nga hua hoki ka mohiotia ai te rakau. <sup>34</sup> E te uri nakahi, me pehea ka korero pai ai koutou,

te hunga kino? he purenatanga hoki no te ngakau nga kupu a te mangai. <sup>35</sup> Ko te tangata pai he pai ana e whakaputa ai i roto i nga taonga pai o te ngakau: ko te tangata kino hoki he kino ana e

whakaputa ai i roto i nga taonga kino. <sup>36</sup> Na ko taku kupu tenei ki a koutou, Me korero e nga

tangata, i te ra whakawa, te tikanga o nga kupu pokanoa katoa e puaki i a ratou. <sup>37</sup> Ma au kupu hoki koe ka whakatikaia ai, ma au kupu ano ka tau ai te he ki a koe.

38

Me i reira ka ki etahi o nga karaipi, o nga Parihi, ka mea, E te Kaiwhakaako, e mea ana matou kia kite i tetahi tohu i a koe. <sup>39</sup> Na ka whakahoki ia, ka mea ki a ratou, E rapu ana te

whakatupuranga kino, puremu, i tetahi tohu; a e kore tetahi tohu e hoatu, ko te tohu anake o Hona poropiti: <sup>40</sup> E toru hoki nga ra o Hona, e toru nga po i roto i te kopu o te tohora; waihoki ka toru

nga ra, ka toru nga po o te Tama a te tangata ki te manawa o te whenua. <sup>41</sup> E ara nga tangata o Ninewe me tenei whakatupuranga i te whakawakanga, e whakatau i te he ki a ratou: i ripeneta hoki

ratou i te kauwhau a Hona; a tenei tetahi he nui ki i a Hona. <sup>42</sup> E ara te kuini o te tonga me tenei whakatupuranga i te whakawakanga, e whakatau i te he ki a ratou: i haere mai hoki ia i nga pito o te whenua ki te whakarongo ki nga whakaaro nui o Horomona; a tenei tetahi he nui ke i a Horomona.

43

Ka puta mai te wairua poke i roto i te tangata, ka haereere ra nga wahi maroke rapu okiokinga

ai, a te kitea. <sup>44</sup> Ka mea ia, Ka hoki ahau ki toku whare i puta mai ia ahau; a, no te taenga atu, rokohanga atu e takoto kau ana, oti rawa te tahi, te whakapai. <sup>45</sup> Na ka haere ia, ka tango i etahi atu wairua tokowhitu hei hoa mona, he kino noa atu i a ia, ka tomo ratou, ka noho ki reira; a kino atu i te timatanga te whakamutunga ki taua tangata. Tera ano e pera tenei whakatupuranga kino.

<sup>46</sup> I a ia ano e korero ana ki te mano, na, ko tona whaea ratou ko ona teina e tu ana i waho, e whai ana kia korero ki a ia. <sup>47</sup> A ka mea tetahi ki a ia, Na, tou whaea me ou teina te tu mai nei i waho, e whai ana kia korero ki a koe. <sup>48</sup> Na ka whakahoki ia, ka mea ki te tangata i korero ki a ia, Ko wai toku whaea? ko wai hoki oku teina? <sup>49</sup> Na ka totoro tona ringa ki ana akonga, ka mea, Na, toku whaea, oku teina! <sup>50</sup> Ki te meatia hoki e tetahi ta toku Matua i te rangi e pai ai, hei teina ia ki ahau, hei tuahine, hei whaea.

### Chapter 13

<sup>1</sup> taua ra i haere atu a Ihu i te whare, ka noho ki te taha o te moana. <sup>2</sup> Na he rahi he hui i huihui ki a ia, a ka eke ia ki te kaipuke noho ai; i te takutai ano te hui katoa e tu ana. <sup>3</sup> A he maha ana korero ki a ratou, he mea whakarite; i mea ia, Na i haere te kairui ki te rui; <sup>4</sup> A, i a ia e rui ana, ka ngahoro etahi o nga purapura ki te taha o te ara, a, ko te rerenga mai o nga manu, kainga ake: <sup>5</sup> Ko etahi i ngahoro ki nga wahi kamaka, ki nga wahi kihai i nui te oneone: na pihi tonu ake, kahore hoki i hohonu te oneone: <sup>6</sup> A, no te whitinga o te ra, ngaua iho; a, no te mea kahore he putake, memenge noa iho: <sup>7</sup> Ko etahi i ngahoro ki roto ki nga tataramoa; a, no te tupunga ake o nga tataramoa, kowaowaotia ana nga purapura: <sup>8</sup> Ko etahi i ngahoro ki te oneone pai, a ka hua, no etahi kotahi rau, no etahi e ono tekau, no etahi e toru tekau. <sup>9</sup> Ki te whai taringa tetahi hei whakarongo, kia rongorongo ia. <sup>10</sup> A ka haere nga akonga, ka mea ki a ia, He aha koe i korero whakarite tonu ai ki a ratou? <sup>11</sup> Na, ka whakahoki ia ki a ratou, ka mea, No te mea kua hoatu ki a koutou te matauranga ki nga mea ngaro o te rangatiratanga o te rangi, ki a ratou ia kahore i hoatu. <sup>12</sup> Ki te whai mea hoki tetahi, ka hoatu ano ki a ia, a ka maha atu ana: ki te kahore ia he mea a tetahi, ka tangohia i a ia ana ake. <sup>13</sup> Na reira enei kupu whakarite aku ki a ratou; no te mea kite rawa ratou, a kahore e kite;

<sup>14</sup>  
 rongo rawa, kahore hoki e matau. A ka rite i a ratou te poropititanga a Ihaia, e mea nei, Rongo  
<sup>15</sup>  
 noa koutou, kahore e matau; titiro noa koutou, kahore e kite: Kua matotoru hoki te ngakau o  
 tenei iwi, kua puhoi nga taringa ki te whakarongo, ko nga kanohi kua oti te whakamoe e ratou; kei  
 kite o ratou kanohi, kei rongo nga taringa, a ka matau te ngakau, na ka tahuri ratou a ka whakaorangia  
<sup>16</sup>  
 e ahau. Ka koa ia o koutou kanohi, no te mea ka kite: o koutou taringa hoki, no te mea ka rongo.  
<sup>17</sup>  
 He pono hoki taku e mea nei ki a koutou, He tokomaha nga poropiti me nga tangata tika i hiahia  
 kia kite i nga mea e kite nei koutou, a kahore i kite; kia rongo hoki i nga mea e rongo nei koutou,  
<sup>18</sup> a kahore i rongo. Na whakarongo ki te kupu i whakaritea ki te kairui. <sup>19</sup> Ki te rongo tetahi ki  
 te kupu o te rangatiratanga, a e kore e matau, na ka haere mai te wairua kino, ka kapo i te mea ka  
<sup>20</sup>  
 oti na te rui ki tona ngakau. Ko te tangata tenei i nga purapura i te taha o te ara. Ko te tangata  
 ia i nga purapura i nga wahi kohatu, ko te tangata i rongo ki te kupu, a hohoro tonu te tango, hari  
<sup>21</sup>  
 tonu; Otiia kahore ona pakiaka i roto i a ia, e mau noa ana mo te wa poto: a, no te panga o te  
<sup>22</sup>  
 whakapawera, o te whakatoi ranei, mo te kupu, na he tonu iho. Ko te tangata i nga purapura i  
 waenga tataramoa, ko te tangata tena i rongo ki te kupu; a, ko te whakaaronga ki tenei ao, me te  
<sup>23</sup>  
 hangaru o nga taonga, hei whakakowaowao i te kupu, a kore ake he hua. Ko te tangata ia i nga  
 purapura i te oneone pai, ko te tangata e rongo ana ki te kupu, a e matau ana; a ka whai hua, ea ake,  
 no tetahi kotahi rau, no tetahi e ono tekau, no tetahi e toru tekau.  
<sup>24</sup>  
 Tenei ake ano tetahi kupu whakarite i maka e ia ki a ratou, i mea ia, Ka rite te rangatiratanga  
<sup>25</sup>  
 o te rangi ki tetahi tangata i rui i te purapura pai ki tana mara: A, i nga tangata e moe ana, ka  
<sup>26</sup>  
 haere mai tona hoariri, ruia iho he taru kino ki waenga witi, a haere ana. A, no ka pihi ake te  
<sup>27</sup>  
 rau, ka hua, katahi ka kitea hoki nga taru. Na ka haere mai nga pononga a taua rangatira, ka mea  
<sup>28</sup>  
 ki a ia, E mara, kihai ianei koe i rui i te purapura pai ki tau mara? No hea ra ona taru? Na ka ki  
 atu ia ki a ratou, Na te hoariri tenei i mea. Katahi ka mea nga pononga ki a ia, E pai ranei koe kia  
<sup>29</sup>  
 haere matou ki te whakawhaiti i aua taru? A ka mea ia, Kahore; kei hutia ngatahitia te witi ina  
<sup>30</sup>  
 whakawhaititia nga taru. Tukua kia tupu tahi, a taea noatia te kotinga; a i te wa o te kotinga ka  
 mea ahau ki nga kaikokoti, Matua whakawhaiti i nga taru, ka paihere ai hei paihere kia tahuna; ko  
<sup>31</sup>  
 te witi ia me kohi ki toku whare witi. Tenei ake ano tetahi kupu whakarite i maka e ia ki a ratou,  
 i mea ia, He rite te rangatiratanga o te rangi ki te pua nani, i kawea e te tangata, i ruia ki tana mara:  
<sup>32</sup>  
 He iti rawa ia i nga purapura katoa: a ka tupu, ko ia te nui rawa o nga otaota, a whakarakau ana,  
<sup>33</sup>  
 no ka rere mai nga manu o te rangi, ka noho ki ona manga. Tenei ake ano tetahi kupu whakarite

i korerotia e ia ki a ratou, He rite te rangatiratanga o te rangi ki te rewena i tangohia e tetahi wahine,  
 a whaongia ana ki roto ki nga mehua paraoa e toru, no ka rewenatia katoatia. <sup>34</sup> Ko enei mea katoa  
 i korerotia e Ihu ki te mano, he mea whakarite; a heoi ano ana kupu ki a ratou he kupu whakarite  
<sup>35</sup> anake: I rite ai ta te poropiti i korero ai, i mea ai, E puaki i toku mangai nga kupu whakarite; ka  
 korerotia e ahau nga mea i ngaro no te timatanga ra ano o te ao. <sup>36</sup> Katahi ka mahue i a Ihu te mano,  
 ka tomo ia ki te whare: na ka haere mai ana akonga ki a ia, ka mea, Whakaaturia mai ki a matou  
 te kupu i whakaritea ki nga taru i te mara. <sup>37</sup> Na ka whakahoki ia, ka mea ki a ratou, Ko te kairui  
<sup>38</sup> o te purapura pai ko te Tama a te tangata; Ko te mara ko te ao; ko te purapura pai ko nga tamariki  
 o te rangatiratanga; nga taru ko nga tamariki a te kino; <sup>39</sup> Ko te hoariri i ruia ai ko te rewera; te  
<sup>40</sup> kotinga ko te mutunga o te ao; nga kaikokoti ko nga anahera. Na e huihuia ana nga taru, e tahuna  
<sup>41</sup> ana ki te ahi; ka pera ano i te mutunga o tenei ao. Ka tono te Tama a te tangata i ana anahera ki  
 te huihui i roto i tona rangatiratanga i nga mea katoa e tutuki ai te waewae, i nga kaimahi ano i te  
<sup>42</sup> kino; A ka maka e ratou ki roto ki te oumu ahi; ko te wahi tera o te tangi me te tetea o nga niho.  
<sup>43</sup> Ko reira te hunga tika whiti ai me te ra i te rangatiratanga o to ratou Matua. Ki te whai taringa  
 tetahi hei whakarongo, kia rongo ia.  
<sup>44</sup> He rite ano te rangatiratanga o te rangi ki te taonga i huna ki te mara; no te kitenga a tetahi  
 tangata, na ka huna e ia, a haere ana, he koa hoki nona, na hokona ana ana mea katoa, a hokona  
<sup>45</sup> ana mai taua mara mana. He rite ano te rangatiratanga o te rangi ki te kaihokohoko, e rapu ana  
<sup>46</sup> i nga peara papai: A, no tona kitenga i tetahi peara utu nui, haere ana, hokona ana ana mea katoa,  
<sup>47</sup> a hokona ana mai taua peara mana. He rite ano te rangatiratanga o te rangi ki te kupenga i tukua  
<sup>48</sup> ki te moana, a haoa ana he ika o ia ahua, o ia ahua: A, ka ki, ka kumea ki uta, a noho ana,  
<sup>49</sup> kohikohia ana nga ika papai ki nga kete, ko nga mea kikino ia i akiritia ki waho. Ka pera ano a  
<sup>50</sup> te mutunga o te ao: ka haere nga anahera, ka wehewehe i te hunga kino i roto i te hunga tika, A  
<sup>51</sup> ka maka i a ratou ki roto ki te oumu ahi: ko te wahi tera o te tangi, o te tetea o nga niho. Ka mea  
 a Ihu ki a ratou, Kua matau ranei koutou ki enei mea katoa? Ka mea ratou ki a ia, Ae, e te Ariki.  
<sup>52</sup> Na ka mea ia ki a ratou, Koia te karaipi, i akona ki te rangatiratanga o te rangi, i rite ai ki tetahi  
 rangatira whare e whakaputa mai ana i nga mea hou, i nga mea tawhito, i roto i tana toa.  
<sup>53</sup> A, ka mutu enei kupu whakarite a Ihu, ka haere atu ia i reira. <sup>54</sup> A, ka tae ki tona kainga  
 tupu, ka ako i a ratou i roto i to ratou whare karakia, a miharo noa ratou, ka mea, No hea enei



whakaaro nui me nga merekara a tenei tangata? <sup>55</sup> Ehara ianei tenei i te tama a te kamura? He teka ianei ko Meri te ingoa o tona whaea? Ko Hemi hoki ratou ko Hohepa, ko Haimona, ko Hura, ona teina? <sup>56</sup> Me ona tuahine, kahore ianei ratou katoa i a tatou nei? No hea ra enei mea katoa a tenei tangata? <sup>57</sup> Heoi ka he ratou ki a ia. Otira ka mea a Ihu ki a ratou, Kei tona kainga, kei tona whare anake te poropiti hapa ai i te honore. <sup>58</sup> A kihai i maha nga merekara i meatia e ia ki reira, i to ratou whakaponokore hoki.

### Chapter 14

<sup>1</sup> I taua wa ka rongoa a Herora te tetaraki ki te rongoa o Ihu, <sup>2</sup> A ka mea ki ana pononga, Ko Hoani Kaiiriiri tenei; kua ara mai ia i te hunga mate; a na reira i mahi ai nga merekara i roto i a ia. <sup>3</sup> I hopukia hoki a Hoani e Herora, a hereherea ana e ia, a maka ana ki te whare herehere, he mea hoki na Heroriaha, na te wahine a tona tuakana, a Piripi. <sup>4</sup> I mea hoki a Hoani ki a ia, E kore e tika kia riro ia i a koe. <sup>5</sup> A, i a ia e mea ana ki te whakamate i a ia, ka wehi i te mano; ki ta ratou hoki he poropiti ia. <sup>6</sup> Otira i te taenga ki te ra whanau o Herora, ka kanikani te tamahine a Heroriaha i waenganui i a ratou, a ka ahuaureka a Herora. <sup>7</sup> Katahi ia ka mea ki a ia, oati rawa, kia hoatu ki a ia tana mea e tono ai. <sup>8</sup> Na, he mea whakakiki ia na tona whaea, ka mea, Homai ki konei ki ahau i runga i te rihi te matenga o Hoani Kaiiriiri. <sup>9</sup> Heoi ka pouri te kingi: otiia i whakaaro ia ki te oati, ki te hunga hoki e noho tahi ana me ia, a ka mea kia hoatu. <sup>10</sup> Na ka tono tangata ia, a poutoa ana te matenga o Hoani i roto i te whare herehere. <sup>11</sup> A i mauria tona matenga i runga i te rihi, i hoatu ki te kotiro: kawea atu ana e ia ki tona whaea. <sup>12</sup> Na ka haere ana akonga, ka tango i te tinana, a tanumia ana e ratou, a haere ana, korero ana ki a Ihu. <sup>13</sup> Na, i te rongonga o Ihu, ka haere atu ia i reira ra te kaupuke ki te koraha, ki te wahi motu ke: a, no ka rongoa te mano, ka aru i a ia ra uta i roto i nga pa. <sup>14</sup> A ka puta atu a Ihu, ka kite i te huihuinga nui, ka aroha ia ki a ratou, a whakaorangia ana e ia o ratou turoro. <sup>15</sup> A, no ka ahiahi, ka haere atu ana akonga ki a ia, ka mea, He wahi koraha tenei, kua heke noa atu te ra; tonoa atu te mano, kia haere ai ratou ki nga kainga ki te hoko kai ma ratou. <sup>16</sup> Ano ra ko Ihu ki a ratou, Kahore

<sup>17</sup>  
 he mea e haere ai ratou; ma koutou e hoatu he kai ma ratou. Ka mea ratou ki a ia, Heoi ano a  
<sup>18</sup>  
 matou i konei, e rima nga taro, e rua hoki nga ika. Na ka mea ia, Mauria mai ki konei ki ahau.  
<sup>19</sup>  
 Na ka mea ia ki te mano kia noho ki runga i te tarutaru, ka mau i nga taro e rima, i nga ika hoki  
 e rua, ka titiro ki runga ki te rangi, ka whakapai, ka whawhati, a hoatu ana e ia nga taro ki nga  
<sup>20</sup>  
 akonga, a na nga akonga ki te mano. A kai katoa ana ratou, a ka makona: a kotahi tekau ma rua  
<sup>21</sup>  
 nga kete i kohia ake e ratou, ki tonu i nga whatiwhatinga i toe. Ko te hunga i kai ra me te mea  
 e rima mano nga tane, haunga nga wahine me nga tamariki.  
<sup>22</sup>  
 Na akiaki tonu a Ihu i ana akonga kia eke ki te kaipuke, kia whakawhiti i mua i a ia ki tawahi,  
<sup>23</sup>  
 i a ia e tuku ana i nga mano kia haere. A, ka oti te mano te tuku, ka kake ia ki runga ki te maunga  
<sup>24</sup>  
 ki te wahi motu ke ki te inoi: na kua ahiahi, a ko ia anake i reira. Na, tera te kaipuke te akina ra  
<sup>25</sup>  
 e te ngaru i waenga moana: i he hoki te hau. A i te wha o nga mataaratanga o te po ka haere a  
<sup>26</sup>  
 Ihu ki a ratou, i haere maori i runga i te moana. A, i te kitenga o nga akonga i a ia e haere ana i  
<sup>27</sup>  
 runga i te moana, ka ihiihi, ka mea, He wairua; ka aue i te wehi. Na kua hohoro te korero a Ihu  
<sup>28</sup>  
 ki a ratou, te mea, Kia manawanui, ko ahau tenei; aua e wehi. Na ka whakahoki a Pita ki a ia,  
 ka mea, E te Ariki, ki te mea ko koe tena, kiia mai ahau kia haere atu ki a koe i runga i te wai.  
<sup>29</sup>  
 Na ka mea ia, Haere mai. A ka marere atu a Pita i te kaipuke, ka haere i runga i te wai, kia tae  
<sup>30</sup>  
 ai ki a Ihu. Otira ka kite ia i te hau e kaha ana, ka wehi; a ka timata te totohu, ka karanga ake,  
<sup>31</sup>  
 ka mea, Ahau, e te Ariki, whakaorangia. Hohoro tonu te totoro o te ringa o Ihu, ka hopu i a ia,  
<sup>32</sup>  
 ka mea ki a ia, E te tangata whakapono iti, he aha koe i ngakau rua ai? Ano ka eke raua ki te  
<sup>33</sup>  
 kaipuke, mutu pu te hau. Na ka haere mai te hunga i runga i te kaipuke, ka koropiko ki a ia, ka  
 mea, He pono ko te Tama koe a te Atua.  
<sup>34</sup>  
<sup>35</sup>  
 A, i to ratou whitinga atu, ka tae ki te whenua o Kenehareta. A, ka mohio nga tangata o  
 taua wahi ki a ia, ka tonu tangata puta noa i nga wahi tutata katoa o reira, hei kawae mai i nga turoro  
<sup>36</sup>  
 katoa ki a ia; Ka inoi ki a ia kia pa kau ratou ki te taniko o tona kakahu; a ora ake nga tangata  
 katoa i pa.

## Chapter 15

<sup>1</sup> Na ka haere ki a Ihu etahi karaipi me etahi Parihi no Hiruharama, ka mea, <sup>2</sup> He aha au akonga ka takahi ai i te whakarereenga iho a nga kaumatua? Kahore hoki ratou e horoi i o ratou ringa ina kai taro. <sup>3</sup> Na ka whakahoki ia, ka mea ki a ratou, He aha hoki i waiho ai e koutou ta koutou whakarereenga iho hei takahi mo ta te Atua kupu ako? <sup>4</sup> I mea hoki te Atua, Whakahonoretia tou papa me tou whaea: a, Ki te kohukohu hoki tetahi i tona papa, i tona whaea ranei kia mate ia, mate rawa. <sup>5</sup> Ko koutou ia hei mea, Ki te mea tetahi ki tona papa, ki tona whaea ranei, Ko taku mea hei atawhainga mou kua tapaea atu ki te Atua; <sup>6</sup> Na kua ia e whakahonore i tona papa. Heoi waiho ana e koutou ta koutou whakarereenga iho hei whakakahore i te kupu a te Atua. <sup>7</sup> E te hunga tinihanga, tika rawa ta Ihaia i poropiti ai mo koutou, i mea ai, <sup>8</sup> Te iwi nei ko o ratou ngutu hei whakahonore moku; matara noa atu ia i ahau o ratou ngakau. <sup>9</sup> Maumau karakia noa ratou ki ahau, ko ta ratou nei hoki e whakaako ai ko nga whakahau a te tangata.

<sup>10</sup> A karangatia ana e ia te mano ki a ia, ka mea ki a ratou, Kia rongu, kia matau: <sup>11</sup> E kore te tangata e poke i te mea e tapoko ana ki te mangai; engari te mea e puta mai ana i roto i te mangai, ma tena e poke ai te tangata. <sup>12</sup> Me i reira ka haere ana akonga, ka mea ki a ia, E mohio ana ranei koe i he nga Parihi i to ratou rongonga i taua kupu? <sup>13</sup> Na ka whakahoki ia ka mea, Ka hutia nga mahuri katoa kihai i whakatokia e toku Matua i te rangi. <sup>14</sup> Waiho atu ratou: he matapo ratou e arahi ana i te matapo. Ki te arahina te matapo e te matapo, ka taka tahi raua ki te waikeri. <sup>15</sup> Ka whakahoki a Pita, ka mea ki a ia, Whakaaturia ki a matou tenei kupu whakarite. <sup>16</sup> Ka mea a Ihu, Kei te kuware tonu ano koutou? <sup>17</sup> Kiano koutou i matau noa, ko nga mea katoa e tapoko atu ana ki te mangai ka riro ki roto ki te kopu, a e akiritia ana ki te poka? <sup>18</sup> Tena ko nga mea e puta mai ana i te mangai e haere ake ana i te ngakau; ma ena e poke ai te tangata. <sup>19</sup> No roto hoki no te ngakau te putanga ake o nga whakaaro kino, o nga kohuru, o nga puremu, o nga moepuku, o nga tahae, o nga whakapae teka, o nga kohukohu: <sup>20</sup> Ko nga mea enei e noa ai te tangata: tena ko te kai me nga ringa kihai i horoia, e kore te tangata e noa i tena.

<sup>21</sup> A ka haere atu a Ihu i reira, ka anga ki nga wahi o Taira, o Hairona. <sup>22</sup> Na, ko te haerenga mai i aua wahi o tetahi wahine, he Kanaani, ka karanga ki a ia, ka mea, E te Ariki, e te Tama a Rawiri, kia aroha ki ahau; ko taku tamahine e ngaua kinotia ana e te rewera. <sup>23</sup> A kahore ana kupu i whakahoki ai ki a ia. Na ka haere mai ana akonga, ka tohe ki a ia, ka mea, Tonoa kia haere; e

<sup>24</sup> karanga ana hoki i muri i a tatou. Otira ka whakahoki ia, ka mea, Heoi nga mea i tonoa mai ai  
<sup>25</sup> ahau, ko nga hipi ngaro o te whare o Iharaira. Ka haere tonu mai tera, ka koropiko ki a ia, ka  
<sup>26</sup> mea, E te Ariki, kia puta tou whakaaro ki ahau. Na ka whakahoki ia, ka mea, Ehara i te tika kia  
<sup>27</sup> tangohia te taro a nga tamariki, kia maka ma nga kuri. Ka mea tera, Ae ra, e te Ariki: e kai ana  
<sup>28</sup> ano nga kuri i nga kongakonga e ngahoro iho ana i te tepu a o ratou rangatira. Katahi ka  
 whakahoki a Ihu, ka mea ki a ia, E tai, nui atu tou whakapono: waiho i tau i pai ai. A ora ake tana  
 tamahine i taua wa pu ano.  
<sup>29</sup> Na ka whakatika a Ihu i reira, ka haere ki te taha o te moana o Kariri: a kake ana ki te maunga,  
<sup>30</sup> noho ana i reira. He rahi hoki te hui i haere ki a ia, i a ratou ano nga kopa, nga matapo, nga  
 wahangu, nga mutu, me te tini ke atu, a tukua iho e ratou ki nga waewae o Ihu; a whakaorangia  
<sup>31</sup> ana ratou e ia: Miharo noa te mano i to ratou kitenga i nga wahangu e korero ana, i nga mutu e  
 ora ana, i nga kopa e haere ana, i nga matapo e titiro ana: a whakakororiatia ana e ratou te Atua o  
<sup>32</sup> Iharaira. Na ka karangatia e Ihu ana akonga, ka mea, E aroha ana ahau ki te huihui nei, ka toru  
 nei hoki o ratou ra e noho ana ki ahau, kahore hoki a ratou kai: e kore ahau e pai ki tona pukutia  
<sup>33</sup> kei hemo ki te ara. Na ko te meatanga a ana akonga ki a ia, no hea a tatou taro i te koraha, e  
<sup>34</sup> makona ai tenei ope nui? Na ka mea a Ihu ki a ratou, E hia a koutou taro? Ka mea ratou, E whitu,  
<sup>35</sup> me nga ika nonohi, torutoru nei. Na ka mea ia ki te mano kia noho ki te whenua; <sup>36</sup> A ka mau  
 ia ki nga taro e whitu, ki nga ika; ka whakawhetai, ka whawhati, a hoatu ana e ia ki nga akonga, a  
<sup>37</sup> na nga akonga ki te mano. A kai ana ratou katoa, a ka makona: e whitu hoki nga kete i kohia e  
<sup>38</sup> ratou, ki tonu i nga whatiwhatinga i toe. A, ko te hunga i kai, e wha mano nga tane, haunga nga  
<sup>39</sup> wahine, nga tamariki. A, ka oti te mano te tono atu e ia, ka eke ia ki te kaupuke; na kua u ki nga  
 wahi o Makarana.

## Chapter 16

<sup>1</sup> Na ka haere mai nga Parihi me nga Haruki, ka whakamatautau ka tono kia whakakitea e ia  
<sup>2</sup> ki a ratou tetahi tohu i te rangi. Na ka whakahoki ia, ka mea ki a ratou, Ka ahiahi, ka mea koutou,  
<sup>3</sup> He paki; ina he whero te rangi. A i te ata, He awaha aiane; he whero nei te rangi, e tukupu ana.

E te hunga tinihanga, e matau ana koutou ki te titiro ki te mata o te rangi; te taea e koutou nga tohu o nga taima. <sup>4</sup> E rapu tohu ana te whakatupuranga kino, puremu; a heoi ano tohu e hoatu ki a ratou ko te tohu o Hona poropiti. Na whakarerea ana ratou e ia, a haere ana.

<sup>5</sup> A ka u nga akonga ki tera taha, kua wareware ki te mau taro atu. <sup>6</sup> Na ka mea a Ihu ki a ratou, Kia mahara kia tupato i te rewena a nga Parihi, a nga Haruki. <sup>7</sup> A ka kororerero ratou ki a ratou ano, ka mea, No te mea kahore tatou i mau taro mai. <sup>8</sup> A ka mohio a Ihu, ka mea ki a ratou, He aha koutou ka kororerero ai ki a koutou, e te hunga whakapono iti, no te mea kihai i maua mai he taro e koutou? <sup>9</sup> Kiano koutou i matau noa, kiano koutou i mahara ki nga taro e rima a nga mano e rima, ki te maha hoki o nga kete i riro i a koutou? <sup>10</sup> Ki nga taro hoki e whitu a nga mano e wha, ki te maha ano o nga kete i riro i a koutou? <sup>11</sup> He aha koutou te matau ai, ehara i te mea mo te taro taku i mea ai ki a koutou, kia tupato i te rewena a nga Parihi, a nga Haruki? <sup>12</sup> Katahi ratou ka matau kihai ia i mea kia tupato i te rewena o te taro, engari i te ako a nga Parihi, a nga Haruki.

<sup>13</sup> Ka tae a Ihu ki nga wahi o Hiharia Piripai, ka ui ia ki ana akonga, ka mea, Ko wai ra ahau, te Tama a te tangata, ki ta nga tangata ki? <sup>14</sup> Na ka mea ratou, Ki ta etahi ko Hoani Kaiiriiri; ki ta etahi ko Iraia; ki ta etahi ko Heremaia, ko tetahi ranei o nga poropiti. <sup>15</sup> Ka mea ia ki a ratou, A ki ta koutou ko wai ahau? <sup>16</sup> Na ka whakahoki a Haimona Pita, ka mea, Ko te Karaiti koe, ko te Tama a te Atua ora. <sup>17</sup> Na ka whakahoki a Ihu, ka mea ki a ia, Ka koa koe, e Haimona Parahona: ehara hoki i te kikokiko, i te toto, nana tenei i whakakite ki a koe, engari na toku Matua i te rangi. <sup>18</sup> Na ko taku kupu ano tenei ki a koe, Ko Pita koe, a ka hanga e ahau taku hahi ki runga ki tenei kamaka; e kore ano e taea taua hahi e nga kuwaha o te reinga. <sup>19</sup> Ka hoatu ano e ahau ki a koe nga ki o te rangatiratanga o te rangi: a ko au e here ai i te whenua e herea ano i te rangi; ko au hoki e wewete ai i te whenua e wetekia ano i te rangi. <sup>20</sup> Me i reira ka whakatupato ia i ana akonga, kia kaua e korerotia e ratou ki te tangata ko te Karaiti ia.

<sup>21</sup> No reira mai ano i timata ai a Ihu te whakaatu ki ana akonga, kua takoto te tikanga kia haere ia ki Hiruharama, a he maha nga mamae e mamae ai ia i nga kaumatua, i nga tohunga nui, i nga karaipi, a ka whakamatea ia, a hei te toru o nga ra ka ara. <sup>22</sup> Na ka mau a Pita ki a ia, ka anga ka whakahe ki tana, ka mea, Aue! kauaka, e te Ariki! kauaka ra tenei e pa ki a koe. <sup>23</sup> Na ka tahuri ia, ka mea ki a Pita, Haere ki muri i ahau, e Hatana: he tutukitanga waewae koe ki ahau: kahore hoki ou ngakau ki nga mea a te Atua, engari ki a te tangata.

<sup>24</sup> Katahi a Ihu ka mea ki ana akonga, Ki te mea tetahi kia haere mai ki te whai i ahau, me whakakahore ia e ia ano, me amo tona ripeka, ka aru ai i ahau. <sup>25</sup> Ki te whai hoki tetahi kia ora, ka mate ano ia; ki te mate tetahi, mona i whakaaro ki ahau, ka kite ano ia i te ora. <sup>26</sup> He aha hoki te pai ki te tangata, ki te riro i a ia te ao katoa, a ka kore he ora mona? He aha hoki ta te tangata e hoatu ai hei utu mona kia ora? <sup>27</sup> Tenei ake hoki ka haere mai te Tama a te tangata, ratou ko ana anahera, i runga i te kororia o tona Matua; a ko reira hoatu ai e ia ki tenei, ki tenei, te utu o tana mahi. <sup>28</sup> He pono taku e mea nei ki a koutou, Tenei ano etahi e tu nei e kore e pangia e te mate, kia kite ra ano i te Tama a te tangata e haere mai ana i runga i tona rangatiratanga.

## Chapter 17

<sup>1</sup> A ka pahure nga ra e ono, ka mau a Ihu ki a Pita, ki a Hemi raua ko tona teina ko Hoani, na kawea ana ratou e ia ki runga ki tetahi maunga tiketike ki te wahi motu ke. <sup>2</sup> A ka puta ke tona ahua i to ratou aroaro: whiti tonu tona mata me te ra, ma tonu ona kakahu me te marama. <sup>3</sup> Na, ka kitea e ratou a Mohi raua ko Iraia e kororerero ana ki a ia. <sup>4</sup> Katahi ka oho a Pita, ka mea ki a Ihu, E te Ariki, he pai kia noho tatou i konei: ki te pai koe, ma matou e hanga etahi wharau ki konei kia toru; kia kotahi mou, kia kotahi mo Mohi, kia kotahi mo Iraia. <sup>5</sup> I a ia ano e korero ana, na ka taumarumaru iho te kapua marama i runga i a ratou: na he reo no te kapua e mea ana, Ko taku Tama tenei i aroha ai, ko taku i ahua e ai; whakarongo ki a ia. <sup>6</sup> Ano ka rongo nga akonga, ka takoto tapapa ratou, he nui hoki to ratou wehi. <sup>7</sup> Na ka haere a Ihu, ka pa ki a ratou, ka mea, Whakatika, kaua e wehi. <sup>8</sup> A, no ka ara ake o ratou kanohi, kahore he tangata i kitea e ratou, ko Ihu anake. <sup>9</sup> Na, i a ratou e heke iho ana i te maunga, ka whakatupato a Ihu i a ratou, ka mea, Kaua e korerotia ki te tangata te mea i kitea nei, kia ara ake ra ano te Tama a te tangata i te hunga mate. <sup>10</sup> A ka ui ana akonga ki a ia, ka mea, He aha nga karaipi ka mea ai, ko Iraia kia matua puta mai? <sup>11</sup> Na ka whakahoki a Ihu, ka mea ki a ratou, Ko Iraia ano e matua puta hei whakatika i nga mea katoa; <sup>12</sup> Ko taku ia tenei ki a koutou, Kua tae noa mai a Iraia a kihai ratou i mohio ki a ia, heoi meatia ana e ratou ki a ia ta ratou i pai ai. E pera ano te Tama a te tangata te mamae i a ratou. <sup>13</sup> Katahi ka mohio nga akonga ko Hoani Kaiiriiri tana i korero ai ki a ratou.

<sup>14</sup> A, no ka tae ratou ki te mano, ka haere mai ki a ia tetahi tangata, ka tuturi nga turi ki a ia,  
<sup>15</sup> ka mea, E te ariki, kia aroha ki taku tana; he haurangi hoki ia, he kino tona mamae: he maha  
<sup>16</sup> hoki ona hinganga ki te kapura, he maha ki te wai. A i kawea ia e ahau ki au akonga, heoi kihai  
<sup>17</sup> ia i taea te whakaora e ratou. Na ka oho a Ihu, ka mea, E te uri whakaponokore, parori ke, kia  
<sup>18</sup> pehea te roa o toku noho ki a koutou? Kia pehea te roa o toku manawanui ki a koutou? Kawea mai  
<sup>19</sup> ia ki konei, ki ahau. Na ka riria te rewera e Ihu; a puta ana i roto i a ia; a ora ake te tamaiti i taua  
<sup>20</sup> wa pu ano. Me i reira ka haere puku nga akonga ki a Ihu, ka mea, He aha ra te ahei ai i a matou  
<sup>21</sup> te pei i a ia ki waho? Na ka mea a Ihu ki a ratou, Na to koutou whakapono iti; he pono hoki taku  
<sup>22</sup> e mea nei ki a koutou, Ki te mea he whakapono to koutou, pera me to te pua nani te rahi, e mea  
<sup>23</sup> koutou ki tenei maunga, Neke atu i konei ki tera wahi; a ka neke; kahore hok i he mea e kore e taea  
<sup>24</sup> e koutou. Otira e kore e puta noa te pena, ma te inoi anake me te nohopuku.  
<sup>25</sup> A, i a ratou e noho ana i Kariri, ka mea a Ihu ki a ratou, Meake tukua te Tama a te tangata  
<sup>26</sup> ki nga ringa o nga tangata: A ka whakamatea e ratou, a i te toru o nga ra ka ara. A nui atu to  
<sup>27</sup> ratou pouari.  
<sup>28</sup> A, no to ratou taenga ki Kaperenauma, ka haere mai ki a Pita nga kaikohikohi i te hawhe  
<sup>29</sup> hekere, ka mea, E kore ianei tou Kaiwhakaako e homai i te hawhe hekere? Ka mea ia, E hoatu  
<sup>30</sup> ano. A, no ka tapoko ia ki te whare, ko Ihu kua korero ki a ia, kua mea, E pehea ana tou whakaaro,  
<sup>31</sup> e Haimona? E tangohia ana e nga kingi o te ao nga takoha taonga me te takoha tangata i a wai? i a  
<sup>32</sup> ratou ake tama, i a nga tanga ta ke ranei? Ka mea a Pita ki a ia, I a nga tangata ke. Na ko te  
<sup>33</sup> kianga a Ihu ki a ia, Ha, pena ka haere noa nga tamariki. Ahakoa ra kei whai take he mai ratou  
<sup>34</sup> ki a tatou, haere ki te moana, pua tetahi matau, a ka eke te ika matamua, tangohia; na, ka  
<sup>35</sup> whakatuwhera i tona mangai, ka kite ai koe i tetahi moni: tangohia tena, ka hoatu ki a ratou, hei  
<sup>36</sup> mea moku, mou.

## Chapter 18

<sup>1</sup> I taua wa ka haere mai nga akonga ki a Ihu, ka mea, Ko wai te nui rawa i te rangatiratanga o  
<sup>2</sup> te rangi? Na ka karangatia e Ihu tetahi tamaiti nohinohi, ka whakaturia e ia ki waenganui i a ratou,  
<sup>3</sup> Ka mea, He pono taku e mea nei ki a koutou, Ki te kore koutou e tahuri, a e penei me nga tamariki

nonohi, e kore koutou e tomo ki te rangatiratanga o te rangi. <sup>4</sup> Na, ki te whakaiti tetahi i a ia, a ka rite ki tenei tamaiti nohinohi, ko ia te nui rawa i te rangatiratanga o te rangi. <sup>5</sup> A, ki te manako tetahi ki tetahi tamaiti nohinohi penei, he whakaaro hoki ki toku ingoa, e manako ana ki ahau.

<sup>6</sup> Tena ko tenei, ka he i tetahi tangata tetahi o enei mea nonohi e whakapono nei ki ahau, nui ke te pai ki a ia me i whakawerewerea ki tona kaki te kohatu mira kaihe, me i pungaia ia ki te rire o te moana.

<sup>7</sup> Aue te mate mo te ao i nga take he! kua tino takoto rawa hoki he putanga mo nga take he; otiia aue te mate no tera tangata e puta ai te take he! <sup>8</sup> Ki te he koe i tou ringa, i tou waewae ranei, poutoa, maka atu: pai ke hoki mou te tomo ki te ora he kopa, he ringa mutu, i te maka ki te ahi ka

tonu, he ringa rua, he waewae rua. <sup>9</sup> Ki te he hoki koe i tou kanohi, tikarohia, maka atu: pai ke hoki mou te tomo kanohi tahi ki te ora, i te maka kanohi rua ki te kapura o Kehena. <sup>10</sup> Kia mahara kei whakahawea ki tetahi o enei mea nohinohi: ko taku kupu hoki tenei ki a koutou, E titiro tonu ana

o ratou anahera i te rangi ki te kanohi o toku Matua i te rangi. <sup>11</sup> I haere mai hoki te Tama a te tangata ki te whakaora i te mea i ngaro. <sup>12</sup> Pehea to koutou whakaaro? ki te mea he rau nga hipi a tetahi tangata, a ka kotiti ke tetahi, e kore ianei e waiho e ia nga iwa tekau ma iwa, ka haere i runga

i nga maunga, rapu ai i te mea i kotiti ke? <sup>13</sup> A, ki te kitea, he pono taku e mea nei ki a koutou, tera atu, tona hari ki taua hipi, i te hari ki nga iwa tekau ma iwa kihai i kotiti ke. <sup>14</sup> Waihoki kahore he ngakau o to koutou Matua i te rangi kia ngaro tetahi o enei mea nonohi.

<sup>15</sup> A, ki te hara tou teina ki a koe, haere, korerotia tona hara ki a ia, korua anake: ki te whakarongo ia ki a koe, ka riro i a koe tou teina. <sup>16</sup> A, ki te kore ia e whakarongo, kawea atu hei hoa mou kia kotahi, kia tokorua ranei, kia mau ai nga kupu katoa i nga mangai o nga kaiwhakarongo

tokorua, tokotoru ranei. <sup>17</sup> A, kite pake ia ki a raua, korerotia ki te hahi: a ki te pake ano ia ki te hahi, me waiho e koe hei tautangata, hei pupirikana. <sup>18</sup> He pono taku e mea nei ki a koutou, Ko a koutou e here ai i te whenua e herea ano ki te rangi: ko a koutou e wewete ai i te whenua e wetekia

ano ki te rangi. <sup>19</sup> Tenei ano taku kupu ki a koutou, Ki te mea ka tokorua o koutou e rite tahi ana nga whakaaro i te whenua mo tetahi mea e inoi ai raua, e meinga ano mo raua e toku Matua i te rangi. <sup>20</sup> Na, ko te wahi e whakaminea ai te hunga tokorua, tokotoru ranei, he whakaaro ki toku ingoa, kei reira ahau kei waenganui i a ratou.

<sup>21</sup> Katahi ka haere a Pita ki a ia, ka mea, E te Ariki, kia hia nga haranga o toku teina ki ahau, me taku whakarere noa iho i tona hara? kia whitu? <sup>22</sup> Ka mea a Ihu ki a ia, E kore ahau e mea ki



a koe, Kia whitu: engari, Kia whitu tekau whitu. <sup>23</sup> Koia ka rite ai te rangatiratanga o te rangi ki  
 tetahi kingi, i mea kia korerotia ki a ia ana moni e ana pononga. <sup>24</sup> A, ka timata ia te ui, ka kawea  
 ki a ia he tangata, tekau mano nga taranata i a ia. <sup>25</sup> A te whai rawa ia hei utu, ka mea tona ariki  
 kia hokona ia, tana wahine me ana tamariki, me ana taonga katoa, hei whakautu. <sup>26</sup> Na ka tapapa  
 iho taua pononga, ka koropiko ki a ia, ka mea, E te Ariki, kia ata hanga ki ahau, a ka utua katoatia  
 e ahau ki a koe. <sup>27</sup> Na ka oho i te aroha te ariki o taua pononga, tuku ana i a ia, a whakarerea noatia  
 iho e ia ana moni tarewa. <sup>28</sup> Heoi te putanga o taua pononga ki waho, ka kite i tetahi o ona hoa  
 pononga, kotahi rau ana pene i a ia: na hopukia ana e ia, notia iho te kaki, me te ki ano, Utua taku  
 nama. <sup>29</sup> Heoi tapapa ana tona hoa pononga ki ona waewae, ka inoi ka a ia, ka mea, Kia ata hanga  
 ki ahau, a ka utua katoatia e ahau ki a koe. <sup>30</sup> A kihai ia i pai: heoi haere ana, maka ana i a ia ki te  
 whare herehere, kia utua katoatia ra ano te nama. <sup>31</sup> Heoi, no te kitenga o ona hoa pononga i taua  
 meatanga, nui atu to ratou pouri, a haere ana, whakaaturia ana ki to ratou ariki nga mea katoa i  
 meatia. <sup>32</sup> Katahi ka karanga tona ariki i a ia, ka mea ki a ia, Pononga kino, i whakarerea noatia e  
 ahau taua moni tarewa katoa i a koe, nau hoki i inoi ki ahau: <sup>33</sup> Ehara oti i te tika kia tohungia e  
 koe tou hoa pononga, me ahau hoki i tohu i a koe? <sup>34</sup> Na ka riri tona ariki, a tukua ana ia ki nga  
 kaiwhakamamae, kia utua katoatia ra ano tana nama. <sup>35</sup> Tera ano e pera toku Matua i te rangi ki a  
 koutou, ki te kore e whakarerea noatia i roto i o koutou ngakau nga he o te teina o tenei, o tenei, o  
 koutou.

## Chapter 19

<sup>1</sup> A, ka mutu enei kupu a Ihu, ka turia atu e ia i Kariri, a ka tae ki nga wahi o Huria, ki tawahi  
 atu o Horano; <sup>2</sup> He rahi hoki te hui i aru i a ia; a whakaorangia ana ratou e ia i reira.  
<sup>3</sup> Na ka haere mai nga Parihi ki a ia, ki te whakamatautau i a ia, ka mea ki a ia, He mea tika  
 ranei kia whakarerea e te tangata tana wahine mo tetahi take? <sup>4</sup> Na ka whakahoki ia, ka mea ki a  
 ratou, Kiano koutou i kite noa, i hanga raua e te Kaihanga i te timatanga, he tane, he wahine, <sup>5</sup> I  
 mea ano ia, Mo konei ka mahue i te tangata tona papa, tona wahea, ka piri ki tana wahine: a hei  
 kikokiko kotahi raua tokorua? <sup>6</sup> Na heoi ano to raua tokoruatanga, engari kotahi ano kikokiko. Na

ko a te Atua i hono ai, kua e wehea e te tangata. <sup>7</sup> Ka mea ratou ki a ia, He aha ra a Mohi i ako ai  
 kia hoatu he pukapuka whakarere, ka whakarere ai i a ia? <sup>8</sup> Ka mea ia ki a ratou, Na te pakeke o o  
 koutou ngakau i tukua ai koutou e Mohi kia whakarere i a koutou wahine: i te timatanga iho ia  
<sup>9</sup> kahore i pena. A tenei taku kupu ki a koutou, Ki te whakarere tetahi i tana wahine, ehara nei i te  
 take moepuku, a ka marenatia ki tetahi atu, e puremu ana ia: a ki te marena tetahi i te wahine i  
<sup>10</sup> whakarerea, e puremu ana ia. Ka mea ana akonga ki a ia, Ki te penei te tikanga mo te tangata  
<sup>11</sup> raua ko tana wahine, ehara te marena. Otira ka mea ia ki a ratou, E kore tenei kupu e rite i nga  
<sup>12</sup> tangata katoa, engari i te hunga i hoatu ai. He unaka hoki etahi no te whanautanga mai i te kopu  
 o te whaea: ko etahi unaka he mea whakaunaka na te tangata: ko etahi unaka he mea whakaunaka  
 na ratou ano, he whakaaro hoki ki te rangatiratanga o te rangi. Ki te taea tenei te whakarite e teta  
 hi, mana e whakarite.  
<sup>13</sup> I reira ka kawea mai he tamariki nonohi ki a ia, kia whakapa ai ia i ona ringa ki a ratou, kia  
<sup>14</sup> inoi: a riria iho ratou e nga akonga. Na ko te kianga a Ihu, Tukua mai nga tamariki nonohi, aua  
<sup>15</sup> hoki e araia atu ta ratou haere mai ki ahau: no nga penei hoki te rangatiratanga o te rangi. A  
 whakapakia iho e ia ona ringa ki a ratou, a haere atu ana i reira.  
<sup>16</sup> Na ka haere mai tetahi ki a ia, ka mea, E te Kaiwhakaako, he aha te mahi pai maku, e whiwhi  
<sup>17</sup> ai ahau ki te ora tonu? Na ko tana meatanga ki a ia, He aha ka ui koe ki ahau mo te mea pai?  
<sup>18</sup> Tera ano tetahi i pai, kotahi tonu: ki te mea koe kia tomo ki te ora, whakaritea nga ture. Ka mea  
 ia ki a ia, Ko ehea? Na ka mea a Ihu, Kua e patu tangata, Kua e puremu, Kua e tahae, Kua e  
<sup>19</sup> whakapae teka, Whakahonoretia tou papa me tou whaea: me tenei, Kia aroha ki tou hoa tata  
<sup>20</sup> ano ko koe. Ka mea taua taitama ki a ia, Kua rite i ahau enei mea katoa no toku tamarikitanga:  
<sup>21</sup> tena hoki tetahi mea e hapa ana i ahau? Ka mea a Ihu ki a ia, Ki te mea koe kia tino tika, haere,  
 hokona ou taonga, ka hoatu ki nga rawakore, a e whai taonga koe ki te rangi: a haere mai i muri i  
<sup>22</sup> ahau. Na, ka rongu taua taitama i taua kupu, haere pouri ana ia: he maha hoki ona taonga.  
<sup>23</sup> Ka mea a Ihu ki ana akonga, He pono taku kupu ki a koutou, E tapoko whakauaua te tangata  
<sup>24</sup> taonga ki te rangatiratanga o te rangi. Tenei ano taku kupu ki a koutou, He ngawari ke atu te  
 haere o te kamera ra te kowhao o te ngira i te haere o te tangata taonga ki roto ki te rangatiratanga  
<sup>25</sup> o te Atua. A, no ka rongu ana akonga, nui rawa to ratou miharo, ka mea, Ko wai ra e ora? <sup>26</sup> Na  
 ka titiro a Ihu ki a ratou, ka mea, Ki te tangata e kore tenei e taea; ki te Atua ia e taea nga mea katoa.

27

Katahi ka whakahoki a Pita, ka mea ki a ia, Na, kua mahue nei i a matou nga mea katoa, kua aru nei i a koe, he aha ra ma matou? <sup>28</sup> Ka ki a Ihu ki a ratou, He pono taku e mea nei ki a koutou, Ko koutou i aru nei i ahau, kia taea te whanautanga houtanga, te wa e noho ai te Tama a te tangata ki runga ki te torona o tona kororia, ka noho ano koutou ki runga ki etahi torona kota hi tekau ma rua, <sup>29</sup> ki te whakawa i nga iwi kotahi tekau ma rua o Iharaira. A, ki te mea kua mahue i tetahi he whare, he teina, he tuahine ranei, he papa, he whaea, he tamariki, he whenua, i tona whakaaro ki toku <sup>30</sup> ingoa, ka tataki rau nga mea e riro i a ia, a ka whiwhi ia ki te ora tonu. He tokomaha ia o mua e waiho ki muri; ko o muri ki mua.

## Chapter 20

1

He rite hoki te rangatiratanga o te rangi ki tetahi rangatira whare, i haere i te atatu ki te korero kaimahi mo tana mara waina. <sup>2</sup> A, no ka oti te whakarite ki nga kaimahi kia kotahi ra he pene, tonoa ana ratou e ia ki tana mara waina. <sup>3</sup> A ka haere atu ia i te toru o nga haora, ka kite i etahi atu e tu mangere ana i te kainga hokohoko, <sup>4</sup> Ka mea ki a ratou, Haere hoki koutou ki te mara waina, a ka hoatu e ahau ki a koutou te mea e tika ana. Na haere ana ratou. <sup>5</sup> I haere ano ia i te ono, i te iwa o nga haora, a pera ana ano. <sup>6</sup> I te tekau ma tahi o nga haora ka haere atu ano ia, ka kite i etahi atu e tu ana, ka mea ki a ratou, He aha ta koutou e tu mangere i konei i te ra roa nei? <sup>7</sup> Ka mea ratou ki a ia, No te mea ra kahore he tangata i korero ki a matou ki te mahi. Ka mea ia ki a ratou, <sup>8</sup> Haere ano koutou ki te mara waina, ko te mea tika koia tera e whiwhi ai koutou. A, no te ahiahi ka mea te rangatira o te mara waina ki tana kaiwhakahauhau, Karangatia nga kaimahi, utua hoki ratou, hei o muri timata ai puta noa ki o mua. <sup>9</sup> A, no te taenga mai o te hunga i korerotia i te tekau ma tahi o nga haora, kotahi te pene i riro i tetahi, i tetahi. <sup>10</sup> Ka tae ano o mua, hua noa ratou tera atu te mea e riro i a ratou; heoi katahi ano te pene i riro i a ratou. <sup>11</sup> A, no ka riro i a ratou, ka amuamu ki taua rangatira whare, <sup>12</sup> Ka mea, Kotahi te haora i mahi ai enei o muri, a ka oti ratou te whakarite ki a matou, ki te hunga i pehia nei e te taimaha e te tikakatanga o te ra. <sup>13</sup> A ka whakahoki ia, ka mea ki tetahi o ratou, E hoa, kahore aku he ki a koe: kihai koe i whakarite ki ahau me pene? <sup>14</sup> Tangohia tau, haere: e pai ana ahau kia rite ki tau te mea e hoatu ki tenei o muri.

15

Ehara ianei i te tika kia meatia e ahau taku e pai ai ki aku mea? He kino oti tou kanohi no te mea

he pai ahau? <sup>16</sup> Heoi, ko o muri e meinga ki mua, ko o mua ki muri: he tokomaha hoki e karangatia, he ruarua ia e whiriwhiria.

17

A, i a Ihu e haere ana ki Hiruharama, i a ratou i te ara, ka kawea e ia ana akonga kotahi tekau

ma rua ki tahaki, a ka mea ki a ratou, <sup>18</sup> Na e haere ana tenei tatou ki Hiruharama; a ka tukua te

Tama a te tangata ki nga tohunga nui, ki nga karaipi, ka kiia ia e ratou kia mate, <sup>19</sup> Ka tukua ia ki nga tauwi kia tawaia, kia whiua, kia ripekatia: a i te toru o nga ra ka whakaarahia ake.

20

Me i reira ka tae ki a ia te whaea o nga tama a Heperi, ratou ko ana tama, a ka koropiko, ka

inoi ki tetahi mea i a ia. <sup>21</sup> Na ka mea ia ki a ia, He hiahia aha tou? Ka mea ia ki a ia, Whakaaetia

enei tama tokorua aku, kia noho, tetahi ki tou matau, tetahi ki tou mauī, i tou rangatiratanga. <sup>22</sup> Otira

ka whakahoki a Ihu, ka mea, Kahore korua e mohio ki ta korua e inoi nei. E ahei ranei korua te inu i te kapu meake inumia e ahau, kia iriiria hoki ki te iriiringa ka iriiria nei ahau? Ka mea raua ki a

ia, E ahei ano. <sup>23</sup> Ka mea ia ki a raua, E inu ano korua i taku kapu, e iriiria ki te iriiringa e iriiria ai ahau: ko te noho ia ki toku matau, ki toku mauī, ehara i ahau mana e hoatu, engari ka riro i te

hunga i whakaritea nei e toku Matua mo ratou. <sup>24</sup> A, no ka rongo te tekau, ka riri ki aua hoa tokorua.

25

Otira ka karangatia ratou e Ihu, a ka mea ia, E matau ana koutou, ko nga kawana o nga tauwiwi

hei whakatupu rangatira ki a ratou, ko nga tangata rarahi hei akiaki i a ratou. <sup>26</sup> E kore e pera i roto i a koutou: engari ki te mea tetahi kia tupu ia hei tangata nui i roto i a koutou, me whakatupu kaimahi

ia ma koutou; <sup>27</sup> A ki te mea tetahi kia tupu ko ia hei tino tangata i roto i a koutou, me whakatupu

pononga ia ma koutou: <sup>28</sup> Pera i te Tama a te tangata, kihai nei i haere mai kia mahia he mea mana, engari kia mahi ia, a kia tuku i a ia kia mate hei whakautu mo nga tangata tokomaha.

29

A, i a ratou e haere atu ana i Heriko, he rahi te hui i aru i a ia. <sup>30</sup> Na tokorua nga matapo e noho ana i te taha o te ara: ka rongo raua ko Ihu tera e haere atu ana, ka karanga ake, ka mea, Kia

aroha ki a maua, e te Ariki, e te Tama a Rawiri. <sup>31</sup> A i riria raua e te mano kia noho puku: heoi

rahi ake ta raua karanga, ka mea, Kia aroha ki a maua, e te Ariki, e te Tama a Rawiri. <sup>32</sup> Na ka tu

a Ihu, ka karanga i a raua, ka mea, Kia ahatia korua e ahau? <sup>33</sup> Ka mea raua ki a ia, E te Ariki, kia

kite o maua kanohi. <sup>34</sup> Na ka aroha a Ihu, ka pa ki o raua kanohi: a titiro tonu ake o raua kanohi, a aru ana raua i a ia.

## Chapter 21

<sup>1</sup> A, no ka tata ratou ki Hiruharama, ka tae ki Petapaki, ki Maunga Oriwa, ka tonoa atu e Ihu  
 nga akonga tokorua, <sup>2</sup> Ka mea ia ki a raua, Haere ki te kainga e anga mai ana ki a korua; na ka kite  
 tonu korua i tetahi kaihe e here ana me tana kua: wetekia, ka arahi mai ki ahau. <sup>3</sup> A, ki te whai  
 kupu tetahi tangata ki a korua, ki atu, E mea ana te Ariki ki a raua mana; na ka tukua tonutia mai  
 raua e ia. <sup>4</sup> I meinga tenei katoa hei whakarite mo te kupu a te poropiti, i mea ai, <sup>5</sup> Mea atu ki te  
 tamahine o Hiona, Na, ko tou kingi e haere mai na ki a koe, he ngakau mahaki tona, e noho ana i  
 runga i te kaihe, i te kua o hoki, i te tama a te kaihe. <sup>6</sup> Na haere ana nga akonga, meatia ana ta Ihu  
 i mea ai ki a raua. <sup>7</sup> Arahina mai ana te kaihe me te kua, wharikitia ana ki runga o raua kakahu,  
 a noho ana ia ki runga. <sup>8</sup> A he nui rawa te hui ki te whariki i o ratou kakahu ki te ara; ko etahi i  
 tapahi manga mai i nga rakau, a wharikitia ana ki te ara. <sup>9</sup> Ko nga mano i haere i mua, me te hunga  
 i haere i muri, kei te karanga, kei te mea, Ohana ki te Tama a Rawiri: Ka whakapaingia tenei e  
 haere mai nei i runga i te ingoa o te Ariki; Ohana i runga rawa. <sup>10</sup> A, no ka uru ia ki Hiruharama,  
 ka oho katoa te pa, ka mea, Ko wai tenei? <sup>11</sup> Ka mea te mano, Ko Ihu tenei, ko te poropiti o Nahareta  
 o Kariri.  
<sup>12</sup> A ka tomo a Ihu ki te temepara o te Atua, na peia katoatia ana e ia te hunga e hoko mai ana,  
 e hoko atu ana i roto i te temepara, turakina ake nga tepu a nga kaiwhakawhitiwhiti moni, me nga  
 nohoanga o te hunga hoko kukupa, <sup>13</sup> A ka mea ki a ratou, Kua oti te tuhituhi, Ka kiia toku whare  
 he whare inoi; heoi kua oti nei te mea e koutou hei ana mo nga kaipahua. <sup>14</sup> A i haere mai ki a ia  
 ki roto ki te temepara nga matapo me nga kopa; a whakaorangia ake ratou e ia. <sup>15</sup> No te kitenga ia  
 o nga tohunga nui, o nga karaipi i nga mea whakamiharo i meatia e ia, i nga tamariki hoki e karanga  
 ana i te temepara, e mea ana, Ohana ki te Tama a Rawiri; ka riri ratou, <sup>16</sup> Ka mea ki a ia, E rongu  
 ana koe ki ta enei e mea nei? Ka mea a Ihu ki a ratou, Ae ra; kiano koutou i kite noa, Pumau tonu  
 i a koe te whakamoemiti a te waha o nga kohungahunga, o nga mea ngote u? <sup>17</sup> A ka mahue ratou  
 i a ia, haere ana ia ki waho o te pa, ki Petani; a moe ana i reira.  
<sup>18</sup> Na, i te ata, i a ia e hoki ana ki te pa, ka hiakai ia. <sup>19</sup> A, i tona kitenga i tetahi piki i te taha  
 o te ara, ka haere ia ki taua rakau, heoi kihai i kitea tetahi mea i runga, he rau anake; ka mea ia ki  
 te rakau, Kei whai hua koe a ake ake. A maroke tonu ake te piki. <sup>20</sup> A, no te kitenga o nga akonga,

ka miharo, ka mea, I peheatia i hohoro ai te maroke o te piki nei? <sup>21</sup> Na ka whakahoki a Ihu, ka mea ki a ratou, He pono taku e mea nei ki a koutou, Me he whakapono to koutou, kahore i ruarua te whakaaro, e kore e meatia e koutou ko tenei anake i meatia nei ki te piki, engari ahakoa mea noa

koutou ki tenei maunga, Kia ranga atu koe, kia whakataka ki te moana; ka meatia. <sup>22</sup> Ko nga mea katoa hoki e tono ai koutou ina inoi, ki te whakapono, ka riro i a koutou.

<sup>23</sup> A, ka tae ia ki roto ki te temepara, ka haere mai nga tohunga nui me nga kaumatua o te iwi, i a ia ano e ako ana, a ka mea, Tena koa te mana i meatia ai enei mea e koe? na wai i hoatu tenei

mana ki a koe? <sup>24</sup> Na ka whakahoki a Ihu, ka mea ki a ratou, Maku e ui ki a koutou kia kotahi kupu, ki te korerotia e koutou ki ahau, maku hoki e korero ki a koutou te mana i mea ai ahau i enei

mea. <sup>25</sup> Ko te iriiringa a Hoani, no hea koia? no te rangi, no nga tangata ranei? A ka korerorero ratou ki a ratou ano, ka mea, Ki te mea tatou, No te rangi; e mea mai ia ki a tatou, Ha, he aha koutou

te whakapono ai ki a ia? <sup>26</sup> A, ki te mea tatou, No nga tangata; ka wehi tatou i te mano; ki ta ratou

katoa hoki he poropiti a Hoani. <sup>27</sup> Na ka whakahoki ratou ki a Ihu, ka mea, Kahore matou e mohio. Na ko tana meatanga ki a ratou, E kore ano e korerotia e ahau ki a koutou te mana i mea ai ahau i enei mea.

<sup>28</sup> Na e pehea ana to koutou whakaaro? Tokorua nga tama a tetahi tangata; a ka haere ia ki to

mua, ka mea, E tama, haere ki te mahi aiane ki taku mara waina. <sup>29</sup> Na ka whakahoki ia, ka mea,

Kahore ahau e pai: otira i muri iho ka puta ke tona whakaaro a haere ana. <sup>30</sup> A ka haere mai ia ki te tuarua, ka pera ano tana kupu. No ka whakahoki tera, ka mea, E kara, ka haere ahau: a kihai i

tae. <sup>31</sup> Ko wai o taua tokorua i mea i ta tona matua i pai ai? Ka mea ratou ki a ia, Ko to mua. Ka mea a Ihu ki a ratou, He pono taku e mea nei ki a koutou, Ko nga pupirikana me nga wahine kairau

e tika ana i mua i a koutou ki te rangatiratanga o te Atua. <sup>32</sup> I haere hoki a Hoani ki a koutou ra te ara o te tika, a kihai koutou i whakapono ki a ia: tena ko nga pupirikana me nga wahine kairau i whakapono ki a ia: ko koutou ia, i to koutou kitenga, kihai i puta ke o koutou whakaaro i muri, kihai i whaka pono ki a ia.

<sup>33</sup> Whakarongo ki tetahi atu kupu whakarite: Tera tetahi rangatira whare i whakato i te mara waina, a taiepatia ana a taka noa, keria ana e ia te takahanga waina i roto, hanga ana tetahi whare

tiketike, tukua ana e ia ki nga kaimahi, a haere ana ia ki tawhiti: <sup>34</sup> A, no ka tata te po hua, ka tonoa

e ia ana pononga ki nga kaimahi, ki te tiki i ona hua. <sup>35</sup> Na ka mau nga kaimahi ki ana pononga,

whiua ana tetahi, whakamatea ana tetahi, a akina ana tetahi ki te kohatu. <sup>36</sup> Na ka tonoa ano e ia

etahi atu pononga, he tokomaha atu i o mua: heoi i peratia ano ratou. <sup>37</sup> Na, muri rawa iho, ka tono

ia i tana tama ki a ratou, i mea ia, E hopohopo ratou ki taku tama. <sup>38</sup> No te kitenga ia o nga kaimahi i te tama, ka mea ki a ratou ano, Ko te tangata tenei mona te kainga; tena, tatou ka whakamate i a ia, ka tango i tona kainga. <sup>39</sup> Na ka maru ratou ki a ia, maka ana ki waho o te mara waina, a whakamatea iho. <sup>40</sup> Na, ina tae te rangatira o te mara waina, ka peheatia e ia aua kaimahi? <sup>41</sup> Ka mea ratou ki a ia, Pouriuri ana aiane i tana whakangaro i taua hunga whakarihariha; a ka tukua te mara waina ki etahi atu kaimahi, ki te hunga e tukua ai ki a ia nga hua i nga po hua. <sup>42</sup> Ka mea a Ihu ki a ratou, Kiano koutou i kite noa i roto i nga karaipiture, ko te kohatu i kapea e nga kaihanganga, kua meinga tenei hei mo te kokonga: na te Ariki tenei, he mea whakamiharo hoki ki o tatou kanohi? <sup>43</sup> Koia ahau ka mea nei ki a koutou, Ka tangohia te rangatiratanga o te Atua i a koutou, a ka hoatu ki tetahi iwi, e puta ai nga hua o taua rangatiratanga. <sup>44</sup> Ko te tangata e hinga ki runga ki tenei kohatu, na mongamonga ana ia: ki te taka ia taua kohatu ki runga ki tetahi, na ngotangota noa ia me he puehu. <sup>45</sup> A, ka rongo nga tohunga nui me nga Parihi ki ana kupu whakarite, ka mohio mo ratou ana korero. <sup>46</sup> Na, i a ratou e whai ana kia hopukia ia, ka wehi i te mano, ki ta ratou hoki he poropiti ia.

## Chapter 22

<sup>1</sup> A ka oho ake a Ihu, ka korero kupu whakarite ano ki a ratou, ka mea, <sup>2</sup> Ka rite te rangatiratanga o te rangi ki tetahi kingi, i whakatakoto marena mo tana tama, <sup>3</sup> A tonoa ana ana pononga, hei karanga i te hunga i korerotia ki te marena: heoi kihai ratou i pai ki te haere. <sup>4</sup> Ka tono ano ia i era atu pononga, ka mea, Mea atu ki te hunga i korerotia, Na kua rite taku hakari; kua oti aku puru, aku mea momona te patu, a kua rite katoa nga mea: haere mai ki te marena. <sup>5</sup> Otira i paopaongia e ratou, haere ana ko tetahi ki tana mara, ko tetahi ki tana hokohoko. <sup>6</sup> Na hopukina ana ana pononga e nga mea i mahue, tukinotia ana ratou, a whakamatea iho. <sup>7</sup> Otiia i riri te kingi: a tonoa atu ana ana taua, whakangaromia ana taua hunga kohuru, tahuna iho to ratou pa. <sup>8</sup> Katahi ia ka mea ki ana pononga, E rite ana te marena, ko te hunga ia i karangatia kihai i pai. <sup>9</sup> Na haere koutou ki nga pekanga o nga ara, a tonoa mai ki te marena te hunga katoa e kite ai koutou. <sup>10</sup> Na ka haere aua pononga ki nga ara, a huihuia katoatia ana te hunga i kitea e ratou, ana pai, ana kino: na kiki ana

<sup>11</sup> te marena i nga manuhiri. Otiia, no te tapokoranga, o te kingi kia kite i nga manuhiri, ka kitea  
<sup>12</sup> e ia i reira he tangata kahore nei ona kakahu marena: A ka mea ki a ia, E hoa, he aha koe i tomo  
<sup>13</sup> mai ai ki konei kahore nei ou kahu marena? Heoi kihai ia i kuihi. Na ka mea te kingi ki nga  
 kaimahi, Herea ona ringa, ona waewae, kawea atu, maka ki te pouri i waho rawa; ko te wahi tera  
<sup>14</sup> o te tangi, o te tetea o nga niho. He tokomaha hoki e karangatia, he ruarua ia e whiriwhiria.  
<sup>15</sup> Me i reira ka haere nga Parihi, ka runanga ki te pehea e mau ai tetahi kupu ana. <sup>16</sup> A ka  
 tonoa ki a ia a ratou akonga me nga tangata piri ki a Herora, hei mea, E te Kaiwhakaako, e matau  
 ana matou he pono koe, e whakaako ana koe i te ara a te Atua i runga i te pono, e kore ano ta te  
<sup>17</sup> tangata e whakaaroa e koe: e kore nei hoki koe e titiro ki te kanohi tangata. Tena, korerotia ki  
 a matou, E pehea ana tou whakaaro? He mea tika ranei te hoatu takoha ki a Hiha, kahore ranei?  
<sup>18</sup> Otiia i mohio a Ihu ki to ratou whakaaro kino, a ka mea, He aha ta koutou e whakamatautau na  
<sup>19</sup> i ahau, e te hunga tinihanga? Tena koa, kia kite ahau i te moni takoha. A mauria mai ana e ratou  
<sup>20</sup> ki a ia he pene. Na ka mea ia ki a ratou, No wai tenei ahua me te tuhituhinga? <sup>21</sup> Ka mea ratou  
 ki a ia, No Hiha. Katahi ia ka mea ki a ratou, Hoatu ki a Hiha nga mea a Hiha; ki te Atua ano nga  
<sup>22</sup> mea a te Atua. Ka rongo ratou, ka miharo: a mahue ake ia i a ratou, a haere ana ratou.  
<sup>23</sup> I taua ra ka haere mai ki a ia nga Haruki, e mea nei kahore he aranga, ka ui ki a ia, <sup>24</sup> Ka  
 mea, E te Kaiwhakaako, i mea a Mohi, Ki te mate te tangata, a kahore ana tamariki, ma tona teina  
<sup>25</sup> e marena tana wahine, e whakatupu ake he uri mo tona tuakana. Na tokowhitu tetahi whanau i  
 a matou, he tuakana, he teina: te marenatanga o te tuatahi, ka mate, a hore ona uri, waiho iho tana  
<sup>26</sup> wahine ma tona teina. Me te tuarua ano, me te tuatoru, puta noa i te tuawhitu. <sup>27</sup> A, muri iho i  
<sup>28</sup> a ratou katoa, ka mate te wahine. Na, i te aranga, ma wai o te tokowhitu te wahine? i a ratou  
<sup>29</sup> katoa nei hoki ia. Na ka whakahoki a Ihu, ka mea ki a ratou, E he ana koutou, te mohio ki nga  
<sup>30</sup> karaipiture, ki te kaha ano o te Atua. I te aranga hoki e kore ratou e marena, e kore ano e hoatu  
<sup>31</sup> kia marenatia, engari ka rite ki nga anahera a te Atua i te rangi. Na, ko te aranga o te hunga  
<sup>32</sup> mate, kahore ano koutou i kite i ta te Atua i korero ai ki a koutou, i mea ai, Ko ahau te Atua o  
 Aperahama, te Atua o Ihaka, te Atua o Hakopa? ehara te Atua i te Atua no te hunga mate, engari  
<sup>33</sup> no te hunga ora. A, no ka rongo te mano, ka miharo ki tana ako.



<sup>34</sup> No te rongonga ia o nga Parihi, kua kapi i a ia te mangai o nga Haruki, ka whakamine tahi  
<sup>35</sup> ratou. Na ka ui tetahi o ratou, he kaiako i te ture, ka whakamatautau i a ia, ka mea, <sup>36</sup> E te  
<sup>37</sup> Kaiwhakaako, ko tehea te kupu nui o te ture? Ka mea a Ihu ki a ia, Kia whakapaua tou ngakau,  
<sup>38</sup> tou wairua, tou hinengaro, ki te aroha ki te Ariki, ki tou Atua. Ko te tuatahi tenei, ko te kupu  
<sup>39</sup> nui. He rite ano te tuarua ki tenei, Kia aroha koe ki tou hoa tata, ano ko koe. <sup>40</sup> Kei runga i enei  
<sup>41</sup> kupu e rua e iri ana te ture me nga poropiti. A, i nga Parihi e noho huihui ana, ka ui a Ihu ki a ratou, <sup>42</sup> Ka mea, He pehea o koutou  
<sup>43</sup> whakaaro ki a te Karaiti? Na wai ia tama? Ka mea ratou ki a ia, Na Rawiri. Ka mea ia ki a ratou,  
<sup>44</sup> He aha ra a Rawiri, i a ia e nohoia ana e te Wairua, i karanga ai i a ia he Ariki? i mea hoki ia, I  
<sup>45</sup> mea te Ariki ki toku Ariki, hei toku matau koe noho ai, kia meinga ra ano e ahau ou hoariri hei  
<sup>46</sup> turanga waewae mou. Na, ka kiia nei ia e Rawiri he Ariki, he pehea i tama ai ki a ia? A hore  
 he tangata i ahei te whakahoki kupu ki a ia, kihai rawa ano tetahi i maia ki te ui ki a ia i taua ra iho  
 ano.

### Chapter 23

<sup>1</sup> Me i reira ka korero a Ihu ki te mano, ki ana akonga hoki, <sup>2</sup> Ka mea, Kei te nohoanga o Mohi  
<sup>3</sup> nga karaipi ratou ko nga Parihi e noho ana: Ko nga mea katoa e mea ai ratou hei pupuri ma koutou,  
 puritia, mahia; kei rite ia a koutou mahi ki a ratou mahi: ko ta ratou hoki he korero, kahore he mahi.  
<sup>4</sup> E hereherea ana hoki e ratou nga wahanga taimaha, he uaua me ka pikaua, a whakawaha iho ki  
 runga ki nga pokohiwi o te tangata; heoi kahore ratou e pai kia whakakorikoria ki tetahi o o ratou  
<sup>5</sup> maihao. Ko a ratou mahi katoa e meatia ana hei matakitaki ma te tangata; e whakawhanuitia ana  
 e ratou a ratou pairakere; e whakanuia ana ano nga taniko o o ratou kakahu; <sup>6</sup> Ko ta ratou e rawe  
<sup>7</sup> ai ko nga nohoanga rangatira i nga hakari, me nga nohoanga rangatira i nga whare karakia, Me  
<sup>8</sup> nga ohatanga i nga kainga hokohoko, a kia karangatia e te tangata, E Rapi. Otiia aua koutou e  
<sup>9</sup> karangatia, E Rapi: kotahi hoki to koutou kaiwhakaako; a he tuakana, he teina, koutou katoa. Kua  
 ano tetahi e kiia hei matua mo koutou i runga i te whenua: kotahi hoki to koutou Matua, ko tera i  
<sup>10</sup> te rangi. Kua ano koutou e kiia he kaiarahi: kotahi ano to koutou kaiarahi, ko te Karaiti. <sup>11</sup> Ko

12  
te mea nui rawa hoki o koutou, hei kaimahi ia ma koutou. Ki te whakahira hoki tetahi i a ia, ka whakaititia; a ki te whakaiti tetahi i a ia, ka whakahirangia.

13  
Aue, te mate mo koutou, e nga karaipi, e nga Parihi, e te hunga tinihanga! e tutakina ana hoki e koutou te rangatiratanga o te rangi ki nga tangata: kahore koutou e tomo, kahore ano e tukua

14  
te hunga e tomo ana kia tapoko. Aue, te mate mo koutou, e nga karaipi, e nga Parihi, e te hunga tinihanga! no te mea ka pau i a koutou nga whare o nga pouaru, a e maminga ana ki te inoi roa: mo

15  
reira he nui rawa te he e tau ki a koutou. Aue, te mate mo koutou, e nga karaipi, e nga Parihi, e te hunga tinihanga! e taiawhiotia ana hoki e koutou te moana me te whenua, kia tahuri mai ai tetahi hei porohiraiti, a, no ka riro mai, ka meinga ia e koutou hei tamaiti mo Kehena, kino noa atu i a

16  
koutou. Aue, te mate mo koutou, e nga kaiarahi matapo, e mea nei, Ki te oatitia te whare tapu

17  
e tetahi, he mea noa ano; otira ki te oatitia e tetahi te koura o te whare tapu, ka mau tana! E nga kuware, e nga matapo: ko tehea te mea nui, ko te koura ranei, ko te whare tapu ranei i tapu ai te

18  
koura? Me tenei, Ki te oatitia e tetahi te aata, he mea noa ano: otira ki te oatitia te whakahere i

19  
runga i te aata, ka mau tana. E nga kuware, e nga matapo, ko tehea te mea nui, ko te whakahere,

20  
ko te aata ranei i tapu ai te whakahere? Na, ki te oatitia e tetahi te aata, e oatitia ana e ia tera

21  
mea, me nga mea katoa i runga. Ki te oatitia e tetahi te whare tapu, e oatitia ana e ia tera mea,

22  
me te kainoho o roto. Ki te oatitia hoki e tetahi te rangi, e oatitia ana e ia te torona o te Atua,

23  
me te kainoho o runga. Aue, te mate mo koutou, e nga karaipi, e nga Parihi, e te hunga tinihanga! e hoatu ana e koutou te wahi whakatekau o te miniti, o te anihi, o te kumine, a kapea ake nga mea nunui o te ture, te whakawa, te tohu tangata, te whakapono: he tika kia meatia e koutou enei, engari

24  
kaua tera ra e kapea. E nga kaiarahi matapo, e tatari nei i te waeroa, a horomia ake te kamera.

25  
Aue, te mate mo koutou e nga karaipi, e nga Parihi, e te hunga tinihanga! e horoi nei i waho o

26  
te kapu, o te pereti, ko roto ia ki tonu i te pahua, i te taikaha. E te Parihi matapo, matua horoia

27  
a roto o te kapu, o te pereti, kia ma ai hoki a waho. Aue, te mate mo koutou, e nga karaipi, e nga Parihi, e te hunga tinihanga! he rite hoki koutou ki nga urupa kua oti te pani ki te paru ma, ko waho

28  
he ataahua ki te titiro atu, ko roto ia ki tonu i nga koiwi tupapaku, i nga mea poke katoa. He pena hoki koutou, ko waho e tika ana ki ta te tangata titiro, ko roto ia e ki ana i te tinihanga, i te

29  
kino. Aue, te mate mo koutou, e nga karaipi, e nga Parihi, e te hunga tinihanga? ko koutou nei hoki hei hanga i nga tanumanga o nga poropiti, hei whakapaipai i nga urupa o nga tangata tika,

30  
Me te ki ano, Me i nga ra tatou o o tatou matua, kihai tatou i uru tahi me ratou ki te whakaheke

<sup>31</sup> i te toto o nga poropiti. He whakaatu tera na koutou, ko koutou nga tamariki a te hunga nana i  
<sup>32</sup> patu nga poropiti. Tena ra, kia ki a koutou te mehua a o koutou matua. <sup>33</sup> E nga neke, e te uri  
 nakahi, me aha ka rere ai koutou i te kupu tuku ki te reinga?  
<sup>34</sup> Na ka tonoa atu e ahau ki a koutou nga poropiti, nga tangata mahara, nga karaipi: ko etahi  
 o ratou e whakamatea e koutou, e ripekatia; ko etahi e whiua i roto i o koutou whare karakia, e  
<sup>35</sup> whaia hoki i tetahi pa ki tetahi pa: A ka utaina ki a koutou nga toto katoa o te hunga tika i  
 whakahekea ki te whenua, no te toto o Apera, o te tangata tika tae iho ki te toto o Hakaraia, o te  
<sup>36</sup> tama a Parakia, i kohurutia e koutou i waenganui o te whare tapu, o te aata. He pono taku e mea  
<sup>37</sup> nei ki a koutou. Tera e pa enei mea katoa ki tenei whakatupuranga. E Hiruharama, e Hiruharama,  
 e whakamate nei i nga poropiti, e aki nei ki te kamaka i te hunga e tonoa ana ki a koe, ano te tini  
 o aku meatanga kia whakaminea au tamariki, kia peratia me te heihei e whakamine nei i ana pi ki  
<sup>38</sup> raro i ona parirau, a kihai koutou i pai! Na ka mahue atu ki a koutou to koutou whare kia takoto  
<sup>39</sup> noa ana. Ko taku kupu hoki tenei ki a koutou, E kore koutou e kite i ahau a mua ake nei, kia  
 mea ra ano koutou, Ka whakapaingia ia e haere mai ana i runga i te ingoa o te Ariki.

## Chapter 24

<sup>1</sup> A ka puta atu a Ihu ki waho o te temepara, ka haere; na ka tae mai ana akonga ki a ia kia  
 whakakitea ki a ia nga whare i hanga mo te temepara. <sup>2</sup> Otira ka mea ia ki a ratou, Kahore ianei  
 koutou e kite i enei mea katoa? He pono taku e mea nei ki a koutou, E kore e toe ki konei tetahi  
<sup>3</sup> kohatu ki runga ake i tetahi kohatu, engari ka whakahoroa katoatia. A, i a ia e noho ana i runga  
 i maunga Oriwa, ka haere puku mai nga akonga ki a ia, ka mea, Korerotia ki a matou, ko ahea enei  
 mea? he aha te tohu o tou haerenga mai, o te mutunga hoki o te ao?  
<sup>4</sup> Na ka whakahoki a Ihu, ka mea ki a ratou, Kia tupato kei mamingatia koutou e te tangata.  
<sup>5</sup> He tokomaha hoki e haere mai i runga i toku ingoa, e mea, Ko te Karaiti ahau, a he tokomaha e  
<sup>6</sup> whakapohehetia. A tera koutou e rongu ki nga pakanga, ki nga hau korero pakanga: kia tupato  
<sup>7</sup> kei ohore koutou: ta te mea kua rite kia puta enei mea katoa, taihoa ia te mutunga. E whakatika  
 hoki tetahi iwi ki tetahi iwi, tetahi rangatiratanga ki tetahi rangatiratanga: a e puta nga po matekai,  
<sup>8</sup> nga mate uruta, me nga ru, ki nga tini wahi. Otira ko te timatanga kau enei katoa o nga mamae.

9 Ko reira koutou tukua ai kia tukinotia, a e whakamatea koutou; a e kino hoki nga iwi katoa ki a  
 koutou, he whakaaro ki toku ingoa. <sup>10</sup> A he tokomaha e he, a ka tuku tetahi i tetahi, ka kino ano  
 tetahi ki tetahi. <sup>11</sup> He tokomaha ano nga poropiti teka e whakatika, a he tokomaha e whakapohehetia  
 e ratou. <sup>12</sup> A, i te kino ka hua, ka matoke haere te aroha o te tini tangata. <sup>13</sup> Ko te tangata ia e u  
 ana, a taea noatia te mutunga, ka ora ia. <sup>14</sup> A e kauwhautia tenei rongopai o te rangatiratanga puta  
 noa i te ao, hei mea whakaatu ki nga iwi katoa; a ko reira puta ai te mutunga. <sup>15</sup> A e kite koutou i  
 te mea whakarihariha, i te mea whakangaro, i korerotia ai e Raniera poropiti, i a ia e tu ana i te  
 wahi tapu, kia matau te kaititiro pukapuka, <sup>16</sup> Ko reira kia rere te hunga i Huria ki nga maunga:  
<sup>17</sup> Ko te tangata i runga i te whare, kei heke iho ki te tiki mea i roto i tona whare: <sup>18</sup> Kauaka ano  
 te tangata i te mara e hoki ki te tiki i ona kakahu. <sup>19</sup> Aue, te mate mo te hunga e hapu ana, mo nga  
 mea hoki e whangai ana ki te u, i aua ra! <sup>20</sup> Me inoi koutou kei rokohanga koutou e te whati i te  
 hotoke, i te hapati ranei: <sup>21</sup> Kei taua wa hoki te whiu nui, kahore ona rite mai o te timatanga o te  
 ao a mohoa noa nei, e kore ano e pera a mua ake nei. <sup>22</sup> A, me i kahore aua ra i poroa i waenga,  
 hore he kikokiko e ora: otira ka whakaaroa te hunga i whiriwhiria, a ka poroa aua ra. <sup>23</sup> Ki te mea  
 tetahi ki a koutou i reira, Na, tenei a te Karaiti; na, tera; aua e whakaponohia. <sup>24</sup> E whakatika hoki  
 nga Karaiti teka, me nga poropiti teka, a ka hoatu e ratou nga tohu nunui, me nga mea whakamiharo;  
 a mehemea e taea, ka mamingatia ano te hunga i whiriwhiria. <sup>25</sup> Na kua korerotia wawetia nei e  
 ahau ki a koutou. <sup>26</sup> Na, ahakoa mea ratou ki a koutou, Na, kei te koraha ia; aua e haere atu: Na,  
 kei nga ruma o roto rawa; aua e whakaponohia. <sup>27</sup> Ka rite hoki ki te uira e puta mai nei i te rawhiti,  
 a hiko tonu atu ki te uru, te haerenga mai o te Tama a te tangata. <sup>28</sup> Ko te wahi hoki i te tupapaku,  
 ko reira huihui ai nga kahu. <sup>29</sup> A, muri tonu iho i te whakapawera i aua ra, ka whakapouritia te ra,  
 e kore ano e titi te atarau, ka taka iho nga whetu i te rangi, a ka ngaueue nga mea kaha o nga rangi:  
<sup>30</sup> Ko reira ano puta ai te tohu o te Tama a te tangata i te rangi: a ko reira nga iwi katoa o te whenua  
 tangi ai, a e kite ratou i te Tama a te tangata e haere mai ana i runga i nga kapua o te rangi me te  
 kaha, me te kororia nui. <sup>31</sup> A, e tonoa e ia ana anahera me te tetere tangi nui, a ka huihuia e ratou  
 ana i whiriwhiri ai i nga hau e wha, i tetahi pito o te rangi puta noa i tetahi pito.

<sup>32</sup> Na kia akona koutou e te piki ki tetahi kupu whakarite: i tona manga e ngawari ana ano, a  
 ka puta ona rau, ka mohio koutou ka tata te raumati: <sup>33</sup> Waihoki ko koutou, ina kite i enei mea  
 katoa, ka matau koutou ka tata ia, kei nga kuwaha tonu. <sup>34</sup> He pono taku e mea nei ki a koutou, E  
 kore rawa tenei whakatupuranga e pahemo, kia puta katoa ra ano enei mea. <sup>35</sup> Ko te rangi me te  
 whenua e pahemo, ko aku kupu ia e kore e pahemo. <sup>36</sup> Otira kahore tetahi tangata e mohio ki taua  
 ra, ki taua haora, kahore rawa nga anahera o te rangi, kahore te Tama a te tangata, ko toku Matua  
 anake. <sup>37</sup> Ka rite hoki ki nga ra i a Noa te haerenga mai o te Tama a te tangata. <sup>38</sup> Ka rite hoki ki  
 ta ratou i nga ra i mua atu o te waipuke; e kai ana, e inu ana, e marena ana, e hoatu ana kia marenatia,  
 a tae noa ki te ra i tomo ai a Noa ki roto ki te aaka, <sup>39</sup> A kahore ratou i mohio, a pakaru noa te  
 waipuke, a kahakina ana ratou katoa: e pera ano te haerenga mai o te Tama a te tangata. <sup>40</sup> I taua  
 wa tokorua ki te mara; kotahi e tangohia, kotahi e waiho: <sup>41</sup> Tokorua wahine e huri ana i te mira;  
 kotahi e tangohia, kotahi e waiho. <sup>42</sup> Kia mataara rapea; e kore hoki koutou e mohio ki te haora e  
 puta mai ai to koutou Ariki. <sup>43</sup> Kia mohio ki tenei, me i matau te tangata o te whare ki te  
 mataaratanga e puta ai te tahae, kua tautiaki ia, a kahore i tukua tona whare kia pokaia. <sup>44</sup> Na kia  
 mataara hoki koutou: no te mea ka puta mai te Tama a te tangata i te haora e kore ai koutou e  
 mahara. <sup>45</sup> Ko wai ra te pononga pono, mahara, i meinga e tona ariki hei rangatira mo ana tangata,  
 hei hoatu i te kai ma ratou i te wa e tika ai? <sup>46</sup> Ka koa taua pononga ki te rokohanga e tona ariki,  
 ina haere mai, e pera ana. <sup>47</sup> He pono taku e mea nei ki a koutou, Ka meinga ia hei rangatira mo  
 ona taonga katoa. <sup>48</sup> Otira ki te mea taua pononga kino i roto i tona ngakau, Ka roa te putanga mai  
 o toku ariki; <sup>49</sup> A ka anga ka patu i ona hoa pononga, ka kai, ka inu tahi me te hunga haurangi;  
<sup>50</sup> E tae mai te ariki o taua pononga i te ra e kore ai ia e mahara, i te haora e kore ai ia e mohio,  
<sup>51</sup> Ka hatepea putia ia, ka meinga he wahi mona i roto i te hunga tinihanga: ko te wahi tera o te  
 tangi, o te tetea o nga niho.

## Chapter 25

<sup>1</sup> Na ka rite te rangatiratanga o te rangi ki nga wahine kotahi tekau, i mau i a ratou rama, a haere  
 ana ki te whakataui i te tana marena hou; <sup>2</sup> Tokorima o ratou he maharakore, tokorima he mahara.  
<sup>3</sup> Ko nga mea maharakore i mau i a ratou rama, kihai ia i mau hinu: <sup>4</sup> Ko te hunga mahara i mau  
 hinu atu i roto i a ratou ipu me a ratou rama. <sup>5</sup> Ka whakaroa te tane marena hou, ka tunewha ratou  
 katoa, ka moe. <sup>6</sup> Na, i waenganui po, ka pa te karanga, E, ko te tane marena hou! Puta mai koutou  
 ki te whakataui i a ia. <sup>7</sup> Katahi ka ara katoa aua wahine, ka whakapai i a ratou rama. <sup>8</sup> Na ka mea  
 te hunga maharakore ki te hunga mahara, Homai ki a matou tetahi wahi o ta koutou hinu: ka pirau  
 hoki a matou rama. <sup>9</sup> Na ka whakahoki te hunga mahara, ka mea, Kahore; kei kore e ranea ma  
 matou, ma koutou: engari me haere koutou ki nga kaihoko, hoko ai i tetahi ma koutou. <sup>10</sup> A, no to  
 ratou haerenga atu ki te hoko, ka tae mai te tane marena hou: a tomo tahi ana me ia ki te marena te  
 hunga kua ata rite: a tutakina ana te tataui. <sup>11</sup> Muri iho ka tae era wahine, ka mea, E te Ariki, e te  
 Ariki, uakina ki a matou. <sup>12</sup> Na ka whakahoki ia, ka mea, He pono taku e mea nei ki a koutou,  
 Kahore ahau e mohio ki a koutou. <sup>13</sup> Kia mataara rapea koutou, e kore hoki koutou e mohio ki te  
 ra, ki te haora, e puta mai ai te Tama a te tangata.  
<sup>14</sup> Ka rite hoki ki te tangata e haere ana ki tawhiti, karangatia ana e ia ana pononga ake, a hoatu  
 ana ki a ratou ana taonga. <sup>15</sup> Ki tetahi i hoatu e ia e rima taranata, ki tetahi e rua, ki tetahi kotahi;  
 ki ia tangata, ki ia tangata, he mea whakarite ki to ratou uaua; a haere ana ia. <sup>16</sup> Na ko te haerenga  
 o te tangata i a ia nei nga taranata e rima, hokohokona ana aua mea e ia, a riro ana i a ia e rima atu  
 nga taranata. <sup>17</sup> Pera ano hoki te tangata i nga mea e rua; e rua atu i riro i a ia. <sup>18</sup> Ko te tangata ia  
 i te mea kotahi, haere ana, kei te keru ki te whenua, a huna ana e ia te moni a tona ariki. <sup>19</sup> A, roa  
 rawa iho, ka puta te ariki o aua pononga, ka mea kia korerotia ana moni e ratou ki a ia. <sup>20</sup> A, ko te  
 haerenga o te tangata i a ia nei nga taranata e rima, ka mauria mai e ia e rima atu nga taranata, a ka  
 mea, E te ariki, e rima au taranata i homai ai ki ahau: na, e rima atu nga taranata kua riro mai i ahau  
 hei tapiri mo era. <sup>21</sup> Ka mea tona ariki ki a ia, Pai rawa, e te pononga pai, e te pononga pono; pono  
 tau mahi ki nga mea ruarua, maku koe e mea hei rangatira mo nga mea maha: uru mai koe ki te  
 hari o tou ariki. <sup>22</sup> Me tera hoki i a ia nei nga taranata e rua, ka haere mai, ka mea, E te ariki, e rua  
 au taranata i homai ai ki ahau: na e rua atu nga taranata kua riro mai i ahau hei tapiri mo era. <sup>23</sup> Ka  
 mea tona ariki ki a ia, Pai rawa, e te pononga pai, e te pononga pono; pono tonu tau mahi ki nga

mea ruarua, maku koe e mea hei rangatira mo nga mea maha: uru mai koe ki te hari o tou ariki.

24

A, ko te haerenga mai hoki o te tangata i a ia nei te taranata kotahi, ka mea, E te ariki, i matau ahau ki a koe he tangata pakeke koe, e kokoti ana i te wahi kihai i ruia e koe, e kohikohi ana i te

25

wahi kihai i whakatitaria e koe: Na ka wehi ahau, a haere ana, huna ana i tau taranata ki te

26

whenua: na, tau na. Na ka whakahoki tona ariki, ka mea ki a ia, Pononga kino, pononga mangere, i matau koe e kokoti ana ahau i te wahi kihai i ruia e ahau, e kohikohi ana i te wahi kihai i

27

whakatitaria e ahau: Ko te mea tika hoki kia kawea e koe taku moni ki nga rangatira peeke moni,

28

a ka tae mai ahau, ka riro mai taku me ona hua ano. Ko tenei, tangohia te taranata i a ia, hoatu

29

ki tera i nga taranata kotahi tekau. Ki te whai mea hoki tetahi, ka hoatu ano ki a ia, a ka maha

30

atu ana: a, ki te kahore he mea a tetahi, ko ana mea ake ka tangohia i a ia. Na maka te pononga huakore ki te pouri i waho: ko te wahi tera o te tangi, o te tetea o nga niho.

31

Na, hei te taenga mai o te Tama a te tangata me tona kororia, ratou tahi ko nga anahera, ko

32

reira ia noho ai ki runga ki te torona o tona kororia: A ka whakaminea ki tona aroaro nga iwi katoa: ka wehea ratou e ia etahi i etahi, ka peratia me te hepara e wehe nei i nga hipi, i nga koati:

33

Ka whakaturia e ia nga hipi ki tona matau, ko nga koati ki mau. Katahi te Kingi ka mea ki te hunga i tona matau, Haere mai, e te hunga whakapai a toku Matua, nohoia te rangatiratanga kua

34

rite noa ake mo koutou no te orokohanganga ra ano o te ao: I hiakai hoki ahau, a whangainga ana e koutou: i matewai ahau, a whakainumia ana e koutou: he manene ahau, a whakamanuhiritia

35

ana e koutou: I tu tahanga, a whakakakahuria ana e koutou: he turoro, a tirotirohia ana ahau e

37

koutou: i te whare herehere ahau, a haere mai ana koutou ki ahau. Na ka whakahoki te hunga tika ki a ia, ka mea, E te Ariki, nonahea matou i kite ai i a koe e hiakai ana, a whangai ana i a koe?

38

e mate ana ranei i te wai, e whakainu ana i a koe? Nohea matou i kite ai i a koe e manene ana,

39

a whakamanuhiri ana i a koe? e tu tahanga ana ranei, a whakakakahu ana i a koe? Nonahea hoki

40

matou i kite ai i a koe e turoro ana, i te whare herehere ranei, a haere ana ki a koe? Ko reira whakahoki ai te Kingi, mea ai ki a ratou, He pono taku e mea nei ki a koutou, Ko ta koutou i mea

41

ai ki tetahi o aku teina, ahakoa ki te iti rawa, he meatanga tena ki ahau. Ko reira ia ki atu ai ki te hunga i te taha ki mau, Mawehe atu i ahau, e te hunga ka oti nei te kanga, ki te ahi ka tonu, kua

42

ka noa ake mo te rewera ratou ko ana anahera: I hiakai hoki ahau, a kihai i whangainga e koutou:

43

i mate i te wai, a kihai i whakainumia e koutou: He manene ahau, a kihai i whakamanuhiritia e koutou: i tu tahanga, a kihai i whakakakahuria e koutou: he turoro ahau, i te whare herehere, a kihai

44  
 koutou i tirotiro i ahau. Ko reira ano ratou whakahoki ai ki a ia, mea ai, E te Ariki, nonahea  
 matou i kite ai i a koe e hiakai ana, e mate wai ana, e manene ana, e tu tahanga ana, e turoro ana, i  
 te whare herehere ranei, a kihai i mahi mea mau? 45  
 Ko reira whakahoki ai ia ki a ratou, mea ai,  
 He pono taku e mea nei ki a koutou, I te mea kihai nei i meatia e koutou ki tetahi o nga nonohi  
 rawa nei, ina, kihai i meatia ki ahau. 46  
 Na ko enei e haere ki te whiu utu hara kahore nei ona  
 mutunga: ko te hunga tika ia ki te ora tonu.

## Chapter 26

1 A, ka mutu enei kupu katoa a Ihu, ka mea ia ki ana akonga, 2 E matau ana koutou kia rua ake  
 ra ko te kapenga, a ka tukua te Tama a te tangata kia ripekatia, 3 Na ka whakamine nga tohunga  
 nui, nga karaipi, me nga kaumatua o te iwi, ki te whare o te tohunga nui, ko Kaiapa te ingoa. 4 Ka  
 whakatakoto tikanga nanakia e mau ai a Ihu, e whakamatea ai. 5 Otira i mea ratou, Kauaka i te  
 hakari, kei ngangau te iwi.  
 6 Na, i a Ihu i Petani i te whare o Haimona repera, 7 Ka haere mai tetahi wahine ki a ia me te  
 pouaka kohatu, ki tonu i te hinu kakara utu nui, a ringihia ana ki runga ki tona matenga, i a ia e  
 noho ana ki te kai. 8 No te kitenga ia o ana akonga, ka riri, ka mea, Hei aha tenei maumau? 9 He  
 nui hoki te utu me i hokona tenei hinu kakara, ka hoatu ki te hunga rawakore. 10 A i mohio a Ihu,  
 ka mea ki a ratou, He aha ta koutou e whakapawerawera i te wahine nei? he mahi pai hoki tana i  
 mea nei ki ahau. 11 Kei a koutou tonu hoki te hunga rawakore i nga wa katoa; tena ko ahau e kore  
 e noho tonu ki a koutou. 12 I ringihia ai hoki tenei hinu kakara ki toku tinana, he mea mo toku  
 tanumanga. 13 He pono taku e mea nei ki a koutou, Ko nga wahi o te ao katoa e kauwhautia ai  
 tenei rongopai, ka korerotia ano ta tenei wahine i mea ai, hei whakamahara ki a ia.  
 14 Katahi ka haere tetahi o te tekau ma rua, ko Hura Ikariote te ingoa, ki nga tohunga nui, 15 Ka  
 mea, he aha ta koutou e pai ai kia homai ki ahau, a maku ia e tuku ki a koutou? A ka paunatia e  
 ratou e toru tekau hiriwa ki a ia. 16 A no reira mai ano ia i rapu ai i te wa pai e tukua ai ia.  
 17 Na i te ra tuatahi o te taro rewenakore ka haere nga akonga ki a Ihu, ka mea ki a ia, Ko hea  
 tau e pai ai kia taka e matou te kapenga hei kai mau? 18 Na ka mea ia, Haere ki te pa, ki a mea, ka  
 ki atu ki a ia, E mea ana te Kaiwhakaako, Ka tata toku taima; hei a koe matou ko aku akonga mea



<sup>19</sup>  
 ai i te kapenga. A meatia ana e nga akonga ta Ihu i whakarite ai ki a ratou; taka ana e ratou te  
<sup>20</sup> kapenga. Ka ahiahi, ka noho ia me te tekau ma rua. <sup>21</sup> A, i a ratou e kai ana, ka mea ia, He pono  
<sup>22</sup> taku e mea nei ki a koutou, ma tetahi o koutou ahau e tuku. A pouri noa iho ratou, ka anga ka  
<sup>23</sup> korero takitahi ki a ia, Ko ahau ranei, e te Ariki? A ka whakahoki ia, ka mea, Ko te tangata, e  
<sup>24</sup> toutou tahi nei o maua ringa ki te rihi, mana ahau e tuku. E haere ana hoki te Tama a te tangata,  
 e pera ana me te mea i tuhituhia mona: otiia aue te mate mo te tangata e tukua ai te Tama a te  
<sup>25</sup> tangata! he pai mo taua tangata me i kaua ia e whanau. Katahi a Hura, tona kaituku, ka oho ake,  
 ka mea, E te Kaiwhakaako, ko ahau ranei? Ano ra ko ia ki a ia, Kua korerotia na e koe.  
<sup>26</sup> A, i a ratou e kai ana, ka mau a Ihu ki te taro, a, ka mutu te whakapai, ka whawhati, ka hoatu  
 ki nga akonga, ka mea, Tangohia, kainga; ko toku tinana tenei. <sup>27</sup> Na ka mau ia ki te kapu, a, ka  
<sup>28</sup> mutu te whakawhetai, ka hoatu ki a ratou, ka mea, Inumia tetahi wahi o tenei e koutou katoa; Ko  
<sup>29</sup> oku toto hoki enei, ko o te kawenata hou, e whakahekea ana mo te tini, hei murunga hara. Na  
 ko taku kupu tenei ki a koutou, E kore ahau e inu i tenei hua o te waina a mua ake nei, kia taea ra  
<sup>30</sup> ano taua ra e inumia houtia ai e tatou i te rangatiratanga o toku Matua. A, no ka mutu ta ratou  
 himene, ka haere ki Maunga Oriwa.  
<sup>31</sup> Katahi a Ihu ka mea ki a ratou, Ka he katoa koutou ki ahau i tenei po: kua oti hoki te tuhituhi,  
<sup>32</sup> Ka patua e ahau te hepara, a ka whakamararatia nga hipi o te kahui. Otira, muri iho i toku aranga,  
<sup>33</sup> ka haere ahau i mua i a koutou ki Kariri. Na ka whakahoki a Pita, ka mea ki a ia, Ahakoa he noa  
<sup>34</sup> te katoa ki a koe, e kore rawa ahau e he. Ka mea a Ihu ki a ia, He pono taku e mea nei ki a koe,  
 Ko tenei po ano, i te mea kahore ano i tangi noa te tikaokao, ka toru au whakakahoretanga i ahau.  
<sup>35</sup> Ka mea a Pita ki a ia, Ahakoa kua takoto te tikanga kia mate tahi taua, e kore ahau e whakakahore  
 i a koe. I pera ano te ki a nga akonga katoa.  
<sup>36</sup> Katahi ka haere ratou ko Ihu ki tetahi wahi, tona ingoa nei ko Kehemane, a ka mea ia ki ana  
<sup>37</sup> akonga, Hei konei koutou noho ai, kia haere ahau ki koina inoi ai. Na ka mau ia ki a Pita ratou  
<sup>38</sup> ko nga tama tokorua a Heperi, a ka timata te pouri, te tumatatenga. Na ka mea ia ki a ratou, Ki  
 tonu toku wairua i te pouri, tata pu ki te mate: hei konei koutou noho ai, kia mataara tahi tatou.  
<sup>39</sup> A haere ana ia ki tahaki tata atu, ka takoto tapapa, ka inoi, ka mea, E toku Matua, ki te mea e  
<sup>40</sup> ahei, kia pahemo atu tenei kapu i ahau: otira kaua e waiho i taku e pai ai, engari i tau. A ka haere

ia ki ana akonga, rokohanga atu e moe ana, na ka mea ia ki a Pita, Ha, ko ta koutou tenei, te mataara  
tahi tatou kia kotahi haora? <sup>41</sup> Kia mataara me te inoi, kei uru ki te whakamatautauranga. He hihiko

te wairua, ko te kikokiko ia he ngoikore. <sup>42</sup> Ka haere atu ano ia, ko te rua o ona hokinga, ka inoi,  
ka mea, E toku Matua, ki te kore e ahei kia pahemo atu tenei kapu i ahau, a me inu ano e ahau,

waiho i tau i pai ai. <sup>43</sup> Ko tona haerenga mai ano, na rokohanga mai e moe ana ano ratou; i taimaha

hoki o ratou kanohi. <sup>44</sup> Na ka waiho ano ratou e ia, a haere ana ano, ka inoi, ko te toru o nga inoinga,

me te whakahua i taua kupu ano. <sup>45</sup> Katahi ia ka haere ki ana akonga, ka mea ki a ratou, Moe tonu,  
takoto marie: na ka tata te haora, ka tukua te Tama a te tangata ki nga ringa o te hunga hara.

<sup>46</sup> Maranga, ka haere tatou: nana, ka tata te kaituku i ahau.

<sup>47</sup> A, i a ia ano e korero ana, na ka tae mai a Hura, tetahi o te tekau ma rua, he tini hoki nga  
tangata i a ia, me nga hoari, me nga patu, he mea tono mai na nga tohunga nui, na nga kaumatua o

te iwi. <sup>48</sup> Kua oti hoki tetahi tohu te whakarite ki a ratou e tona kaituku, i mea ia, Na, ko taku

tangata e kahi ai, koia tena: hopukia. <sup>49</sup> Na tika tonu ia ki a Ihu, ka mea, Tena koe, e te Kaiwhakaako;

a kahi ana i a ia. <sup>50</sup> Na ka mea a Ihu ki a ia, E hoa, meinga tau i haere mai ai ki te mahi. Me i reira

ka haere mai ratou, ka pa o ratou ringa ki a Ihu, a hopukia ana ia. <sup>51</sup> Na ka totoro te ringa o tetahi  
o nga hoa o Ihu, a unuhia ana tana hoari, ka haua iho te pononga a te tino tohunga, tapahia ana tona

taringa. <sup>52</sup> Katahi ka mea a Ihu ki a ia, Whakahokia iho tau hoari ki tona pukoro: ka mate hoki i

te hoari te hunga hapai hoari. <sup>53</sup> E hua koe e kore e ahei i ahau aiane te inoi ki toku Matua, a e

homai e ia ki ahau he anahera maha atu i nga rihiona kotahi tekau ma rua? <sup>54</sup> Nei ra, ma te aha ka

rite ai ta nga karaipiture, ara ko tenei kia meatia? <sup>55</sup> I taua wa ka mea a Ihu ki nga mano, He tahae  
ahau i haere mai ai koutou me nga hoari me nga patu ki te hopu i ahau? I a koutou ahau e noho ana

i te temepara, e ako ana i tena ra, i tena ra, a kihai koutou i hopu i ahau. <sup>56</sup> Na i meatia tenei katoa  
hei whakarite mo nga karaipiture a nga poropiti. Na ka whakarere nga akonga katoa i a ia, a oma  
ana.

<sup>57</sup> Katahi ka kawea a Ihu e nga kaihopu ki te whare o Kaiapa, o te tino tohunga, i reira hoki

nga karaipi me nga kaumatua e huihui ana. <sup>58</sup> Ko Pita ia i aru i a ia i tawhiti ki te marae o te tino

tohunga, a tomo atu ana, noho tahi ana me nga kaimahi, kia kite i te mutunga. <sup>59</sup> Na ka rapu nga  
tohunga nui, me nga kaumatua, me te runanga katoa, ki te whakapae teka mo Ihu, kia mate ai ia:

<sup>60</sup> Heoi kihai i kitea: ahakoa he tokomaha nga kaiwhakapae teka i haere mai. Muri iho ka puta nga

<sup>61</sup> kaiwhakapae teka tokorua, Ka ki, i mea ia, E taea e ahau te whakahoro te whare tapu o te Atua,  
<sup>62</sup> a kia toru nga ra ka oti i hau te hanga. Na kua whakatika te tino tohunga, ka mea ki a ia, Kahore  
<sup>63</sup> au kupu? he aha ta enei e whakaatu nei mou? Heoi kihai a Ihu i kuihi. Na ka ki ano te tino  
tohunga, ka mea ki a ia, Ko te Atua ora taku whakaoati mou, na korero mai ki a matou, ko te Karaiti  
<sup>64</sup> ranei koe, ko te Tama a te Atua? Ka mea a Ihu ki a ia, Kua korerotia mai na e koe: otira tenei  
ano taku kupu ki a koutou, Tenei ake ka kite koutou i te Tama a te tangata e noho ana ki matau o  
<sup>65</sup> te kaha, e haere mai ana i runga i nga kapua o te rangi. Katahi ka haehae te tino tohunga i ona  
kakahu, ka mea, Kua kohukohu; hei aha atu ma tatou nga kaiwhakaatu? Na kua rongu nei koutou  
<sup>66</sup> i tana kohukohu, E pehea ana o koutou whakaaro? Na ka whakahoki ratou, ka mea, Ka tika kia  
<sup>67</sup> mate. Na ka tuwhaina tona mata e ratou, ka kurua ia; ko etahi i papaki i a ia, I mea, Poropiti  
<sup>68</sup> ki a matou, e te Karaiti, Na wai koe i papaki?  
<sup>69</sup> Na i waho a Pita e noho ana, i te marae: a ka haere mai tetahi kotiro ki a ia, ka mea, Ko koe  
<sup>70</sup> hoki i a Ihu o Kariri. Otira ka whakahore ia i te aroaro o ratou katoa, ka mea, Kahore ahau e  
<sup>71</sup> mohio ki tau e ki mai na. A ka puta atu ia ki waho ki te whakamahau, ka kite ano tetahi atu  
<sup>72</sup> kotiro i a ia, a ka mea tera ki te hunga i reira, I a Ihu ano o Nahareta tenei. A ka whakahore ano  
<sup>73</sup> ia, me te oati ano, Kahore ahau e mohio ki tena tangata. A, muri tata iho, ka haere mai te hunga  
<sup>74</sup> e tu ana, ka mea ki a Pita, Koia ano, ko koe tetahi o ratou; na tou reo koe i whakaatu. Katahi ia  
ka timata te kanga, te oati, Kahore rawa ahau e mohio ki tena tangata. A tangi tonu iho te tikaokao.  
<sup>75</sup> Na ka mahara a Pita ki ta Ihu kupu i mea ai ki a ia, E kore e tangi te tikaokao, ka toru au  
whakakahoretanga i ahau. Na haere ana ia ki waho, a nui atu tona tangi.

## Chapter 27

<sup>1</sup> A, ka takiri te ata, ka runanga nga tohunga nui katoa me nga kaumatua o te iwi mo Ihu kia  
<sup>2</sup> whakamatea: A, no ka oti ia te here, ka arahina atu, tukua ana ki a Pirato, ki te kawana. A, no  
<sup>3</sup> te kitenga o Hura, o te kaituku i a ia, kua whakaaetia ia kia whakamatea, ka puta ke tona whakaaro,  
<sup>4</sup> whakahokia ana e ia nga hiriwa e toru tekau ki nga tohunga nui ratou ko nga kaumatua, Ka mea,  
Kua hara ahau i taku tukunga i te toto harakore. Ka mea ratou, Hei aha ma matou? mau tena e titiro.

<sup>5</sup> Na maka iho e ia nga hiriwa ki te whare tapu, a puta ana ki waho, haere ana, tarona ana i a ia.  
<sup>6</sup> Na ka tango nga tohunga nui i nga hiriwa, ka mea, E kore e tika kia panga enei ki te takotoranga  
<sup>7</sup> moni, he utu toto hoki. No ka runanga ratou, a hokona ana ki aua mea te mara a te kaihanganga rihi,  
<sup>8</sup> hei tanumanga mo nga manene. Na reira hoki i huaina ai taua mara, Ko te Mara o te Toto, a  
<sup>9</sup> mohoa noa nei, Katahi ka rite ta Heremaia poropiti i korero ai, i mea ai, Tangohia ana e ratou  
 nga hiriwa e toru tekau, te utu mo te tangata i whakaritea nei ona utu, i whakaritea nei nga utu e  
<sup>10</sup> etahi o nga tama a Iharaira; A hoatu ana mo te mara a te kaihanganga rihi; i pera ano me ta te `Ariki  
 i whakarite ai ki ahau.  
<sup>11</sup> Na i te tu tera a Ihu i te aroaro o te kawana; ka ui te kawana ki a ia, ka mea, Ko koe ranei te  
 Kingi o nga Hurai? Ka mea a Ihu ki a ia, Kua korerotia mai na e koe. <sup>12</sup> A, i te whakapanga a nga  
<sup>13</sup> tohunga nui ratou ko nga kaumatua i tetahi he ki a ia, kihai ia i whakahoki kupu atu. Katahi ka  
<sup>14</sup> mea a Pirato ki a ia, Kahore koe e rongu i te tini o nga mea e korerotia nei e ratou mou? Heoi  
<sup>15</sup> kahore kia kotahi kupu i whakahokia e ia ki a ia; tino miharo noa te kawana. Na ko ta te kawana  
<sup>16</sup> tikanga i taua hakari he tuku i tetahi herehere ki te iwi, i ta ratou e pai ai. I reira ano i a ratou  
<sup>17</sup> tetahi herehere ingoa nui, ko Parapa te ingoa. A, no ra ka mine ratou, ka mea a Pirato ki a ratou,  
 Ko wai ta koutou e pai ai kia tukua e ahau ki a koutou? ko Parapa, ko Ihu ranei e huaina nei ko te  
<sup>18</sup> Karaiti? I mahara hoki ia he hae no ratou i tukua ai ia. <sup>19</sup> Na, i a ia e noho ana i runga i te  
 nohoanga whakawa, ka tono tangata mai tana wahine ki a ia. ka mea, Kei ahatia e koe taua tangata  
<sup>20</sup> tika: he maha hoki nga mea i pa moemoea mai ki ahau inaianei, he mea mona. Otiia i whakakikitia  
 e nga tohunga nui ratou ko nga kaumatua te mano, kia inoia a Parapa, kia whakangaromia a Ihu.  
<sup>21</sup> Na ka whakahoki te kawana, ka mea ki a ratou, Ko tehea o te tokorua ta koutou e pai ai kia tukua  
<sup>22</sup> e ahau ki a koutou? Ka mea ratou, Ko Parapa. Ka mea a Pirato ki a ratou, Me aha oti e ahau a  
<sup>23</sup> Ihu, e huaina nei ko to Karaiti? Ka mea ratou katoa ki a ia, Ripekatia. Na ka mea te kawana, He  
<sup>24</sup> aha koia tana kino i mea ai? Heoi nui noa atu ta ratou hamama, ka mea, Ripekatia ia. A, i te  
 kitenga o Pirato kahore ia i whai wahi, engari ka nui ke atu te ngangau, ka mau ia ki te wai, ka  
 horoi i ona ringa i te aroaro o te mano, ka mea. Kahore ahau e whai hara i te toto o tenei tangata  
<sup>25</sup> tika: ma koutou tena e titiro. Na ka whakahoki te iwi katoa, ka mea, Hei runga ona toto i a matou,  
 i a matou tamariki.

<sup>26</sup> Na ka tukua e ia a parapa ki a ratou: a, ka oti a Ihu te whiu, ka tukua kia ripekatia. <sup>27</sup> Katahi  
ka mauria a Ihu e nga hoia a te kawana ki te whare whakawa, a whakaminea ana ki a ia te ropu  
<sup>28</sup> katoa. <sup>29</sup> Na ka tangohia e ratou ona kakahu, a whakakakahuria ana ia ki te kakahu whero. A,  
no ka oti tetahi karauna tataramoa te whiri, ka potaea ki tona matenga, me te kakaho ki tona ringa  
<sup>30</sup> matau: a ka tukua nga turi ki a ia, ka taunu ki a ia, ka mea, Tena koe, e te Kingi o nga Hurai! A  
<sup>31</sup> ka tuwhaina ia e ratou, a ka mau ratou ki te kakaho, ka patua ki tona matenga. Na, ka mutu ta  
ratou tawai ki a ia, ka tihorea atu i runga i a ia te kakahu ra, whakakahuria ana ona ki a ia, a arahina  
<sup>32</sup> ana ia kia ripekatia. A, i a ratou e haere ana ki waho, ka kitea e ratou he tangata no Hairini, ko  
Haimona te ingoa: meinga ana ia e ratou kia haere tahi me ratou hei amo i tona ripeka.  
<sup>33</sup> A, i to ratou taenga ki te wahi e kiia nei ko Korokota, ara, ko te wahi angaanga, <sup>34</sup> Ka hoatu  
e ratou he waina ki a ia kia inumia, he mea whakananu ki te au: a, no tana whakamatauranga atu,  
<sup>35</sup> kihai i pai ki te inu. A, ka oti ia te ripeka, ka wehewehea ona kakahu, he mea maka ki te rota: i  
rite ai te kupu i korerotia e te poropiti, I wehewehea oku weruweru mo ratou, i maka rota hoki mo  
<sup>36</sup> toku kakahu. <sup>37</sup> Na noho ana ratou ki te tiaki i a ia i reira. A whakanohoia ana e ratou ki runga  
ake i tona matenga te mea i whakawakia ai ia, he mea tuhituhi, ko Ihu tenei ko te kingi o nga Hurai.  
<sup>38</sup> Na tokorua nga tahae i ripekatia ngatahitia me ia, kotahi ki matau, kotahi ki mau. <sup>39</sup> A ka  
<sup>40</sup> kohukohu ki a ia te hunga e haere ana ra reira, me te oioi o ratou matenga, Ka mea, Ko koe hei  
whakahoro i te whare tapu, hei hanga ano i nga ra e toru, whakaorangia koe e koe ano. Ki te mea  
<sup>41</sup> ko te Tama koe a te Atua, heke iho i te ripeka. I pena ano te tawai a nga tohunga nui, ratou ko  
<sup>42</sup> nga karaipi, ko nga kaumatua, i mea, Ko era atu i whakaorangia e ia; te taea e ia te whakaora i  
a ia ano. Ko ia te Kingi o Iharaira, tena kia heke iho oti ia i te ripeka, ka whakapono matou ki a ia.  
<sup>43</sup> I whakawhirinaki ia ki te Atua: ma tera ia e whakaora aiane, ki te pai ia ki a ia: nana hoki te ki,  
<sup>44</sup> Ko te Tama ahau a te Atua. Me nga tahae hoki i ripekatia tahitia ra me ia, i pera ano ta raua  
<sup>45</sup> tawai ki a ia. Na ka pouri a runga katoa o te whenua, no te ono o nga haora a taea noatia te iwa  
<sup>46</sup> o nga haora. A, ka tata ki te iwa o nga haora, ka karanga a Ihu, he nui te reo, ka mea, Eri, Eri,  
<sup>47</sup> rama hapakatani? ara, E toku Atua, e toku Atua, he aha koe i whakarere ai i ahau? I te rongonga  
<sup>48</sup> o etahi o te hunga e tu ana i reira, ka mea, E karanga ana te tangata nei ki a Iraia. Na kua rere  
tetahi o ratou, kua mau ki te hautai, whakakiiia ana ki te winika, a whakanohoia ana ki runga ki te  
<sup>49</sup> kakaho, whakainumia ana mana. Ka mea ehinu, Kati, kia kite tatou e haere mai ranei a Iraia ki  
te whakaora i a ia.

50 Na ka karanga ano a Ihu, he nui te reo, a tuku atu ana i tona wairua. 51 Na ka wahia te arai o te whare tapu i waenganui pu, mai i runga a ki raro: ka ru te whenua, pakaru ana nga kamaka;

52 Ko nga urupa tuwhera kau; a he maha nga tinana o te hunga tapu kua moe i ara mai; 53 Ko te putanga ake i nga urupa i muri iho o tona aranga mai, haere ana ki roto ki te pa tapu, a he tokomaha te hunga i kite i a ratou. 54 Na, i te kitenga o te keneturio ratou ko ona hoa tiaki i a Ihu i te ru, i nga mea ano i meatia, nui atu to ratou wehi, ka mea, He pono ko te Tama tenei a te Atua. 55 A he tokomaha nga wahine i reira e matakitaki ana mai i tawhiti, nga mea i aru mai i a Ihu i Kariri, i mahi mea mana: 56 I roto i a ratou a Meri Makarini, a Meri whaea o Hemi raua ko Hohi, me te whaea hoki o nga tama a Heperi.

57 Na, ka ahiahi, ka haere mai tetahi tangata taonga nui o Arimatia, ko Hohepa te ingoa, he akonga ano ia na Ihu: 58 I haere taua tangata ki a Pirato, a tonoa ana e ia te tinana o ihu. Na ka mea a Pirato kia hoatu te tinana. 59 Na ka tango a Hohepa i te tinana, a takaia ana e ia ki te rinena ma, 60 Whakatakotoria ana ki tana urupa hou, i haua e ia ki roto ki te kama: na whakataka atu ana e ia tetahi kohatu nui ki te kuwaha o te urupa, a haere ana. 61 I reira ano a Meri Makarini, me tera Meri, e noho ana i te ritenga atu o te tanumanga. 62 Na, i te aonga ake, i te ra i muri i te takanga hakari, ka haere nga tohunga nui me nga Parihi ki a Pirato, 63 Ka mea, E mara, kei te mahara matou ki te korero a tera tangata tinihanga i a ia ano e ora ana, Kia taka nga ra e toru ka ara ahau. 64 Na reira whakahaua atu kia tiakina te tanumanga, a tae noa ki te toru o nga ra, kei haere ana akonga i te po, ka tahae i a ia, ka mea ki te iwi, Kua ara ia i te hunga mate: penei kino atu i to mua to muri he. 65 Ka mea a Pirato ki a ratou, He kaitiaki ano a koutou: haere, kia puta o koutou whakaaro kei taea atu ia. 66 Na haere ana ratou, hiritia ana te kohatu, me te whakanoho ano i nga kaitiaki, kei taea atu te tanumanga.

## Chapter 28

1 I te mutunga o te hapati i te mea ka tata tonu te puao te ra tuatahi o te wiki, ka haere a Meri Makarini me tera Meri kia kite i te tanumanga. 2 Na he nui te ru i puta mai: i heke iho hoki tetahi anahera a te Ariki i te rangi, a haere ana, whakataka atu ana e ia te kohatu i te kuwaha, a noho ana

<sup>3</sup> i runga. Ko tona ahua me te mea he uira, ma tonu tona kakahu ano he hukarere: <sup>4</sup> A wiri noa iho  
 nga kaitiaki i te wehi ki a ia, ka rite ki te tupapaku. <sup>5</sup> Na ka oho te anahera, ka mea ki nga wahine,  
 Kei wehi korua: e matau ana hoki ahau, e rapu ana korua i a Ihu i ripekatia. <sup>6</sup> Kahore ia i konei:  
 kua ara ke, kua pera me tana i mea ai. Haere mai kia kite i te wahi i takoto ai te Ariki. <sup>7</sup> A hohoro  
 te haere, korerotia ki ana akonga, kua ara ia i te hunga mate: tena ia te haere na i mua i a koutou ki  
 Kariri; ko reira koutou kite ai i a ia: na kua korero nei ahau ki a korua. <sup>8</sup> A hohoro tonu ta raua  
 haere atu i te urupa, me te wehi, me te harakoa nui, a oma ana ki te korero ki ana akonga. <sup>9</sup> Na ka  
 tutaki a Ihu ki a raua, ka mea mai, E ia ma. Na ka haere atu raua, ka pupuri i ona waewae, ka  
 koropiko ki a ia. <sup>10</sup> Katahi a Ihu ka mea ki a raua, Aua e wehi: haere, ki atu ki oku teina kia haere  
 ki Kariri, ko reira hoki ratou kite ai i ahau.  
<sup>11</sup> A, i a raua e haere ana, na kua tae etahi o nga kaitiaki ki te pa, kua korero ki nga tohunga  
 nui i nga mea katoa i meatia. <sup>12</sup> Na, ka mutu ta ratou huihui ko nga kaumatua a ka runanga, ka  
 hoatu e ratou he moni nui ki nga hoia, <sup>13</sup> Ka mea atu, Me ki e koutou, I haere ana akonga i te po,  
 a tahaetia ana ia, i a matou e moe ana. <sup>14</sup> A, ki te tae te rongo o tenei ki te kawana, ma matou ia e  
 whakamarie, a kahore he manukanuka mo koutou. <sup>15</sup> Na ka tango ratou i nga moni, a meinga ana  
 nga mea i akona ai ratou: heoi kei te korerotia tenei e nga Hurai, a taea noatia tenei ra.  
<sup>16</sup> Na ka haere nga akonga tekau ma tahi ki Kariri, ki te maunga i whakaritea e Ihu ki a ratou.  
<sup>17</sup> A, i to ratou kitenga i a ia, ka koropiko ki a ia: ko etahi ia i ruarua. <sup>18</sup> Na ka haere mai a Ihu, ka  
 korero ki a ratou, ka mea, Kua tukua katoatia mai ki ahau te mana i te rangi, a i runga i te whenua.  
<sup>19</sup> Na reira haere, meinga hei akonga nga iwi katoa, iriiria i runga i te ingoa o te Matua, o te Tama,  
 o te Wairua tapu: <sup>20</sup> Akona ratou kia mau ki nga mea katoa i whakahaua e ahau ki a koutou: na,  
 ko ahau tena hei hoa mo koutou i nga ra katoa, a te mutunga ra ano o te ao. Amine.

## Mark

### Chapter 1

<sup>1</sup> Ko te timatanga o te rongopai o Ihu Karaiti, o te Tama a te Atua; <sup>2</sup> Ko te mea ia i tuhituhia i roto i ta Ihaia poropiti, Na ka tonoa e ahau taku karere i mua i tou aroaro, mana e whakapai tou ara i mua i a koe. <sup>3</sup> He reo no tetahi i te koraha e karanga ana, Whakapaia te huarahi o te Ariki, Whakatikaia ona ara. <sup>4</sup> I haere mai a Hoani, ka iriiri i te koraha, ka kauwhau i te iriiri ripeneta hei murunga hara. <sup>5</sup> Na ka haere ki a ia te whenua katoa o Huria, me nga tangata o Hiruharama, a iriiria katoatia ana e ia ki te awa ki Horano, me te whaki ano i o ratou hara. <sup>6</sup> Na ko te kakahu o Hoani he huruhuru kamera, he hiako hoki te whitiki o tona hope; ko tana kai he mawhitiwhiti he honi koraha. <sup>7</sup> A i kauwhau ia, i mea, Tenei te haere mai nei i muri i ahau tetahi he kaha rawa ake i ahau, e kore ahau e tau ki te piko iho wewete ai i te here o ona hu. <sup>8</sup> Ko ahau nei, he iriiri taku i a koutou ki te wai: mana ia koutou e iriiri ki te Wairua Tapu.

<sup>9</sup> A i aua ra ka haere mai a Ihu i Nahareta o Kariri, ka iriiria e Hoani ki Horano. <sup>10</sup> A, i taua wa ano i a ia e haere ake ana i te wai, ka kaite ia i nga rangi e wahia ana kia tuwhera, me te Wairua, ano he kukupa, e heke iho ana ki a ia: <sup>11</sup> A ka puta mai he reo no te rangi, e mea ana, Ko koe taku Tama i aroha ai, taku i ahuaireka ai. <sup>12</sup> A i reira pu ano ka tonoa ia e te Wairua ki te koraha. <sup>13</sup> A e wha tekau ona ra i reira i te koraha e whakamatautauria ana e Hatana; i roto ia i nga kararehe mohoa: ko nga anahera hoki ki te mahi mea mana.

<sup>14</sup> Na, i muri i a Hoani i tukua ai ki te herehere, ka haere a Ihu ki Kariri, ka kauwhau i te rongopai o te Atua, <sup>15</sup> Ka mea, Kua rite tenei te wa, kua tata hoki te rangatiratanga o te Atua: ripeneta, whakaponohia te rongopai. <sup>16</sup> Na, i a ia e haere ana i te taha o te moana o Kariri, ka kite i a Haimona raua ko tona teina, ko Anaru, e maka ana i te kupenga ki te moana: he kaihao ika hoki raua. <sup>17</sup> Na ka mea a Ihu ki a raua, Haere mai i muri i ahau, a maku korua e mea hei kaihao tangata.

<sup>18</sup> A mahue tonu ake i a raua nga kupenga, aru ana i a ia. <sup>19</sup> A, haere tata atu ana i reira, ka kite ia i a Hemi, tama a Heperi, raua ko tona teina ko Hoani, i te kaupuke ano raua e ta ana i nga korenga o a ratou kupenga. <sup>20</sup> Na karanga tonu atu ia i a raua: a mahue ake i a raua to raua matua a Heperi i te kaupuke me nga kaimahi, a haere ana i muri i a ia. <sup>21</sup> A ka tomo ratou ki Kaperenauma; na haere tonu ia i te hapati ki te whare karakia, ka whakaako. <sup>22</sup> A miharo ana ratou ki tana ako: i rite hoki tana ako i a ratou ki ta te tangata whai mana, kihai i rite ki ta nga karaipi.

<sup>23</sup> Na i to ratou whare karakia tetahi tangata, he wairua poke tona; a ka karanga ia, <sup>24</sup> Ka mea, Kati ra, he aha ta matou ki a koe, e Ihu o Nahareta? kua tae mai ranei koe ki te whakangaro i a



matou? e matau ana ahau ko wai koe, ko te Mea Tapu a te Atua. <sup>25</sup> A ka riri a Ihu ki a ia, ka mea,  
<sup>26</sup> Kati te korero, puta mai i roto i a ia. Na ka haehae te wairua kino i a ia, nui atu hoki tona reo ki  
<sup>27</sup> te karanga, a puta ana mai i roto i a ia. A miharo noa ratou katoa, uiui ana ki a ratou ano, mea  
ana, He aha tenei? he aha tenei ako hou? mana tonu tana nei tono i nga wairua poke, a rongo rawa  
<sup>28</sup> ki a ia. Na paku tonu atu tona rongo ki nga wahi katoa e tata ana ki Kariri.  
<sup>29</sup> Na i reira tonu, i to ratou putanga mai i te whare karakia, tomo tonu atu ratou ko hemi, ko  
<sup>30</sup> Hoani, ki te whare o Haimona raua ko Anaru. Na i te takoto te hungawai wahine o Haimona,  
<sup>31</sup> he kirika, a korerotia tonutia atu ia e ratou ki a ia. Heoi, i tona taenga atu, ka mau ki tona ringa,  
<sup>32</sup> whakaarahia ana ia; mutu tonu ake tona kirika, ka tahuri ki te taka mea ma ratou. Na i te ahiahi,  
i te toenetanga o te ra, ka mauria mai ki a ia nga turoro katoa, me te hunga e nohoia ana e nga  
<sup>33</sup> rewera. A huihui katoa ana te pa ki te kuwaha. <sup>34</sup> He tokomaha te hunga e ngaua ana e te tini  
o nga mate i whakaorangia e ia, he maha hoki nga rewera i peia; a kihai i tukua e ia nga rewera kia  
<sup>35</sup> korero, no te mea i matau ratou ki a ia. Na i te atatu, i mua noa atu o te awatea, ka ara ia, ka puta  
<sup>36</sup> ki waho, ka haere ki te wahi koraha, ki reira inoi ai. Na ka whai a Haimona ratou ko ona hoa i  
<sup>37</sup> a ia. A, ka kitea ia, ka mea ki a ia, E rapu ana nga tangata katoa i a koe. <sup>38</sup> Katahi ia ka mea ki  
a ratou, Tatou ka haere he wahi ke ki nga kainga tata, ki reira ahau kauwhau ai: ko taku hoki tera  
<sup>39</sup> i haere mai ai. Na ka tomo ia ki roto i o ratou whare karakia puta noa i Kariri, ka kauwhau, ka  
pei hoki i nga rewera ki waho.  
<sup>40</sup> A ka haere mai ki a ia tetahi repera, ka inoi ki a ia, tuku rawa nga turi ki a ia, ka mea, Ki te  
<sup>41</sup> pai koe, e taea ahau e koe te mea kia ma. Na ka aroha a Ihu, ka totoro tona ringa, ka pa ki a ia,  
<sup>42</sup> ka mea ki a ia, E pai ana ahau; kia ma koe. A, puaki kau tona reo, kua kore tona repera, na kua  
<sup>43</sup> ma. Na ka whakatupato ia ki a ia, a tonoa tonutia atu, <sup>44</sup> Ka mea atu hoki ki a ia, Kei korerotia  
tetahi mea ki te tangata: engari haere, kia kite te tohunga i a koe, a mauria atu mo tou whakamakanga  
<sup>45</sup> nga mea i whakaritea e Mohi, hei mea whakaatu ki a ratou. Heoi, i tona putanga atu, ka anga ki  
te kororo nui haere, ka whakapuakina taua mea, a kihai a Ihu i ahei te haere nui ki te pa i muri iho,  
engari i noho ia i waho i nga wahi koraha: a haere ana mai ratou ki a ia i nga wahi katoa.

## Chapter 2

<sup>1</sup> A, i a ia i tomo ai ano ki Kaperenauma i etahi ra mai, ka rangona kei te whare ia. <sup>2</sup> Na ka hui mai te tini o te tangata, kahore rawa he wahi e o ai ratou, hore rawa i te taha o te kuwaha; a ka korerotia e ia te kupu ki a ratou. <sup>3</sup> Ka haere mai hoki etahi, ka kawe mai i tetahi pararutiki ki a ia, tokowha ki te kauhoa. <sup>4</sup> A, te taea te whakatata ki a ia i te mano hoki, ka pokaia te tuanui o te wahi i noho ai ia: a, ka oti te wawahi, ka tukua iho te moenga i takoto ai te pararutiki. <sup>5</sup> A, no te kitenga o Ihu i to ratou whakapono, ka mea ia ki te pararutiki, E tama, ka oti ou hara te muru. <sup>6</sup> Na i reira etahi o nga karaipi e noho ana, e whakaaroaro ana i roto i o ratou ngakau, <sup>7</sup> He aha enei kupu kohukohu a tenei tangata? ko wai hei muru hara, kotahi tonu ko te Atua anake? <sup>8</sup> Na mohio tonu a Ihu i roto i tona wairua, e penei ana o ratou whakaaro i roto i a ratou, a ka mea ia ki a ratou, He aha koutou ka whakaaroaro ai i enei mea i roto i o koutou ngakau? <sup>9</sup> Ko tehea te mea takoto noa, ko te mea ki te pararutiki, Ka oti ou hara te muru; ko te mea ranei, Whakatika, tangohia ake tou moenga, haere? <sup>10</sup> Otira, kia matau ai koutou he mana muru hara to te Tama a te tangata i runga i te whenua, ka mea ia ki te pararutiki, <sup>11</sup> Ko taku kupu tenei ki a koe, Whakatika, tangohia ake tou moenga, haere ki tou whare. <sup>12</sup> Na whakatika tonu ake ia, a tangohia ake ana tona moenga, haere atu ana i te aroaro o ratou katoa: no ka miharo ratou katoa ka whakakororia i te Atua, ka mea, Kahore ano tatou i kite noa i te penei.

<sup>13</sup> A haere atu ana ia i te taha o te moana; na ka tae te mano katoa ki a ia, a ka whakaakona ratou e ia. <sup>14</sup> A, i ia e haere ana, ka kite ia i a Riwai tama a Arapiu e noho ana i te wahi tango takoha, ka mea ki a ia, Arumia ahau. Na whakatika ana ia, aru ana i a ia, <sup>15</sup> A, i a ia e noho ana i tona whare, he tokomaha nga pupirikana me nga tangata hara e noho tahi ana ki a Ihu ratou ko ana akonga: he tokomaha hoki ratou, a i aru i a ia. <sup>16</sup> A, no te kitenga o nga karaipi a nga Parihi i a ia e kai tahi ana me nga pupirikana, me nga tangata hara, ka mea ki ana akonga, Kei te kai tahi ia, kei te inu tahi me nga pupirikana me nga tangata hara. <sup>17</sup> A, i te rongonga o Ihu, ka mea ia ki a ratou, Kahore he aha o nga tangata ora e meatia ai e te rata, engari o te hunga e mate ana: kihai hoki ahau i haere mai ki te karanga i te hunga tika, engari i te hunga hara.

<sup>18</sup> Na kei te nohopuku nga akonga a Hoani ratou ko a nga Parihi: a ka haere mai ratou, ka mea ki a ia, He aha nga akonga a Hoani me a nga Parihi ka nohopuku ai, tena ko au akonga kahore e nohopuku? <sup>19</sup> Na ka mea a Ihu ki a ratou, E ahei ranei nga tama o te whare marena te nohopuku i te mea kei a ratou te tane marena hou? e kore ratou e ahei te nohopuku i nga wa kei a ratou nei te tane marena hou. <sup>20</sup> Na tera e tae mai nga ra e tangohia ai te tane marena hou i a ratou, katahi ratou

<sup>21</sup> ka nohopuku i aua ra. E kore e tuia e te tangata tetahi wahi o te kahu hou, hei papaki mo te kahu  
 tawhito; kei riro tetahi wahi o te kahu tawhito i tona whakakapi hou, a ka nui rawa te pakaru. <sup>22</sup> E  
 kore hoki e ringihia e te tangata te waina hou ki nga ipu tawhito: kei pakaru nga ipu i te waina hou,  
 a ka maringi te waina, kore ake nga ipu: engari me riringi te waina hou ki nga ipu hou. <sup>23</sup> A, i a ia  
 e haere ana i waenga witi i te hapati, ka anga ana akonga ka ka kato haere i nga puku witi. <sup>24</sup> Na  
 ka mea nga Parihi ki a ia, Na, he aha ratou ka mahi ai i te mea e kore e tika i te hapati? <sup>25</sup> A ka  
 mea ia ki a ratou, Kahore ano koutou i kite noa i ta Rawiri i mea ai, i a ia e ngaua ana e te hiakai,  
 ratou ko ona hoa? <sup>26</sup> I tona tomokanga ki te whare o te Atua i nga ra o Apiata tohunga nui, a kainga  
 ana e ia nga taro aroaro, nga mea kihai nei i tika kia kainga, ma nga tohunga anake, a hoatu ana e  
 ia ki ona hoa? <sup>27</sup> I mea ano ia ki a ratou, Hei mea mo te tangata te hapati, ehara i te mea ko te  
 tangata mo te hapati, <sup>28</sup> Waihoki ko te Tama a te tangata te Ariki o te hapati.

### Chapter 3

<sup>1</sup> A ka tomo atu ano ia ki te whare karakia; na i reira tetahi tangata kua memenge tona ringa.  
<sup>2</sup> A ka whakamau ta ratou titiro ki a ia, me kore ia e whakaora i a ia i te hapati; he mea kia whakapa  
 ai ratou i tetahi he ki a ia. <sup>3</sup> Na ka mea ia ki te tangata i te ringa memenge, Whakatika ki waenganui.  
<sup>4</sup> Na ka mea ia ki a ratou, He mea tika ranei te mahi pai i te hapati, te mahi kino ranei? te whakaora  
 ranei, te whakamate ranei? Heoi kahore ratou i kiki. <sup>5</sup> Na ka tiro tiro riri ia ki a ratou, he pouri hoki  
 mo te pakeke o o ratou ngakau, ka mea ki taua tangata, Totoro tou ringa. A, ko te toronga o tona  
 ringa, kua ora. <sup>6</sup> Na ka haere atu nga Parihi, ka runanga tahi me nga Heroriana mona, ki te pehea  
 e whakangaromia ai ia. <sup>7</sup> Na ka maunu atu a Ihu ratou ko ana akonga ki te moana; he nui hoki te  
 tangata i aru i a ia i Kariri, i Huria, <sup>8</sup> I Hiruharama, i Irumia, i tawahi hoki o Horano; me te hunga  
 hoki e tata ana ki Taira, ki Hairona, nui atu te huihui; i to ratou rongonga i nga mea i mea ai ia,  
<sup>9</sup> haere ana ki a ia. Na ka mea ia ki ana akonga kia noho tata mai tetahi kaupuke iti ki a ia, i te mano  
 hoki, kei tutetutea ia e ratou. <sup>10</sup> He tokomaha hoki i whakaorangia e ia; no ka popo mai ki a ia te  
 hunga katoa e mate ana, kia pa ai ki a ia. <sup>11</sup> Me nga wairua poke hoki, i to ratou kitenga i a ia,

12  
takoto ana ki tona aroaro, ka karanga, ka mea, Ko te Tama koe a te Atua. A he maha ana kupu  
ki a ratou kia kaua ia e whakaaturia e ratou.

13 Na ka kake ia ki te maunga, karangatia ana ki a ia ana i pai ai: a ka tae ratou ki a ia. A  
14  
kotahi tekau ma rua ana i whakarite ai hei hoa mona, hei tononga hoki mana ki te kauwhau, Kia  
15

16  
whai mana hoki e ora ai nga mate, e peia ai nga rewera: A huaina iho e ia a Haimona ko Pita;  
17

18  
Ko Hemi, tama a Heperi, raua ko Hoani, teina o Hemi; a huaina iho raua ko Poaneki, ara ko nga  
Tama a te whatitiri; Ko Anaru, ko Piripi, ko Patoromu, ko Matiu, ko Tamati, ko Hemi, tama a

19  
Arapiu, ko Tariu, ko Haimona Kanaani, Ko Hura Ikariote hoki, nana nei ia i tuku. Na ka tae ia  
20  
ki te whare; Na ka huihui ano te mano, no kihai rawa ratou i ahei te kai taro. A, no ka rongo  
21  
ona hoa, ka haere ki te pupuri i a ia: i mea hoki, He porewarewa ia.

22  
Na ka mea nga karaipi i haere mai ra i Hiruharama, Kei a ia a Perehepura, a na te rangatira  
23  
o nga rewera tana peinga rewera. Na ka karangatia ratou e ia, a ka korero whakarite ki a ratou,

24  
Me pehea a Hatana ka pei ai i a Hatana? Ki te tahuri iho hoki tetahi rangatiratanga ki a ia ano,  
25  
e kore taua rangatiratanga e tu. Ki te tahuri iho hoki tetahi whare ki a ia ano, e kore taua whare

26  
e tu. Ki te whakatika a Hatana, a ka tahuri iho ki a ia ano, e kore ia e tu, engari he mutunga tona.

27  
E kore te tangata e ahei te haere ki roto ki te whare o te tangata kaha, pahua ai i ona taonga, ki  
28  
te kahore e matua herea te tangata kaha: ko reira pahua ai i tona whare. He pono taku e mea nei  
ki a koutou, Ko nga hara katoa o nga tama a nga tangata e murua, me nga kohukohu e kohukohu

29  
ai ratou: Tena ko te tangata e kohukohua ai te Wairua Tapu, e kore e murua tona hara a ake ake,

30  
engari ka tau te he ki a ia a ake ake: Mo ratou i ki, He wairua poke tona.

31  
A, ko te taenga mai o ona teina ratou ko tona whaea, ka tu i waho, ka tono tangata mai ki a  
32  
ia, ki te karanga i a ia. E noho ana hoki te mano i tetahi taha ona, i tetahi taha, a ka mea ratou

33  
ki a ia, Na, tou whaea me ou teina kei waho, e rapu ana i a koe. Na ka whakahoki ia ki a ratou,  
34  
ka mea, Ko wai toku whaea, ko wai hoki oku teina? Na ka tiroiro ia ki te hunga e noho ana i

35  
tetahi taha ona, i tetahi taha, ka mea, Na, toku whaea, oku teina! Ki te meatia hoki e tetahi ta te  
Atua i pai ai, hei teina ia ki ahau, hei tuahine, hei whaea.

## Chapter 4

<sup>1</sup> Na ka timata ano ia te whakaako i te taha o te moana: he nui hoki te tangata i huihui ki a ia, no ka eke ia ki runga ki te kaipuke, ka noho ki te moana; i uta te mano katoa i te taha o te moana.

<sup>2</sup> A he maha ana mea i whakaako ai ki a ratou, he mea whakarite, i mea hoki ki a ratou i a ia e ako ana,

<sup>3</sup> Whakarongo; Na i haere atu te kairui ki te rui:

<sup>4</sup> A, i a ia e rui ana, ka ngahoro etahi ki te taha o te ara, a, ko te rerenga mai o nga manu o te rangi, na kainga ake.

<sup>5</sup> Ko etahi i ngahoro ki te wahi kamaka, ki te wahi kihai i nui te oneone; a pihi tonu ake, kahore hoki i hohonu te oneone.

<sup>6</sup> A, no te whitinga o te ra, ngaua iho; a, no te mea kahore he putake, memenge noa iho.

<sup>7</sup> Ko etahi i ngahoro ki roto ki nga tataramoa, a, no te tupunga ake o nga tataramoa, kowaowaotia ana nga purapura, a kore ake he hua.

<sup>8</sup> Ko etahi i ngahoro ki te oneone pai, a whai hua ana; ka tupu, ka nui, ka ea ake, no etahi e toru tekau, no etahi e ono tekau, no etahi kotahi rau.

<sup>9</sup> I mea ano ia ki a ratou, Ki te whai taringa tetahi hei whakarongo, kia rongo ia.

<sup>10</sup> Na ka mahue ko ia anake, ka ui ki a ia ona hoa me te tekau ma rua ki taua kupu whakarite.

<sup>11</sup> Ka mea ia ki a ratou, Kua hoatu ki a koutou te matauranga ki te mea ngaro o te rangatiratanga o te Atua: ki te hunga ia o waho e ra rototia ana nga mea katoa i te kupu whakarite:

<sup>12</sup> Mo te titiro rawa atu ratou, na e kore e kite; rongo rawa, na e kore e matau; kei tahuri, a ka murua o ratou hara.

<sup>13</sup> I mea ano ia ki a ratou, Kahore ranei koutou e matau ki tenei kupu whakarite? a me pehea ka matau ai koutou ki nga kupu whakarite katoa?

<sup>14</sup> Ko te kairui e rui ana i te kupu.

<sup>15</sup> Ko enei te hunga i te taha o te ara, i te wahi e ruia ana te kupu; i to ratou rongonga, na haere tonu mai a Hatana, kapohia ake te kupu i ruia ki o ratou ngakau.

<sup>16</sup> Ko enei te hunga i te taha o te purapura i nga wahi kamaka; ko te hunga, i to ratou rongonga ai i te kupu, hohoro tonu te tango, hari tonu;

<sup>17</sup> Na kahore o ratou pakiaka, ka whakapakari kau noa: heoi, i te panga o te whakapawera, o te whakatoi ranei mo te kupu, he tonu iho.

<sup>18</sup> Na ko enei te hunga i nga purapura i roto i nga tataramoa; ko nga mea i rongo ki te kupu,

<sup>19</sup> A, i te putanga o te whakaaro ki tenei ao, o te hangarau o nga taonga, o nga hiahia ki era atu mea, kowaowaotia iho te kupu, a kore ake he hua.

<sup>20</sup> Na ko enei te hunga i nga purapura i te oneone pai: ko te hunga e rongo ana ki te kupu, a tango ana, a whai hua ana, o etahi e toru tekau, o etahi e ono tekau, o etahi kotahi rau.

<sup>21</sup> I mea ano ia ki a ratou, Ko raro koia i te mehua whakatu ai i te rama, ina mauria mai, ko raro ranei i te moenga? he teka ianei me whakatu ki runga ki te turanga?

<sup>22</sup> E kore hoki tetahi mea

i huna e mahue te whakakite; kahore hoki tetahi mea i huna, engari kia puta ki te maramatanga.  
<sup>23</sup> Ki te mea he taringa o tetahi hei whakarongo, kia rongo ia. <sup>24</sup> I mea ano ia ki a ratou, Kia tupato  
ki ta koutou e rongo ai: ko te mehua hoki e mehua ai koutou, hei mehua ano tena ki a koutou: a ka  
<sup>25</sup> tapiritia ano he mea ma koutou, ma nga kaiwhakarongo. <sup>26</sup> Ki te whai mea hoki tetahi, ka hoatu  
ano ki a ia: ki te kahore he mea a tetahi, ka tangohia i a ia ana ake. <sup>27</sup> I mea ano ia, I rite hoki te  
rangatiratanga o te rangi ki te tangata i maka e ia he purapura ki te oneone; <sup>28</sup> A ka moe, ka ara, i  
te po, i te ao, me te tupu ano tera te purapura, te matau ia na te aha. <sup>29</sup> E hua ana hoki te whenua i  
tona kaha ake ano; ko te rau ki mua, ko reira te puku, muri iho ko te witi pakari i roto i te puku.  
<sup>30</sup> Otira ka rite nga hua, hohoro tonu tana tuku atu i tana toronaihi, kua taea hoki te kotinga. <sup>31</sup> I  
mea ano ia, Me whakarite e tatou te rangatiratanga o te Atua ki te aha? he aha oti te kupu whakarite  
hei whakaahua atu ma tatou? <sup>32</sup> E rite ana ki te pua nani, i tona whakatokanga ki te whenua, ko te  
iti rawa ia o nga purapura katoa i runga i te whenua: <sup>33</sup> Otira, ka oti te whakato, ka tupu, ka nui  
ake i nga otaota katoa, a ka nunui ona manga: no ka noho nga manu o te rangi i tona  
taumarumarutanga iho. <sup>34</sup> Na he maha ana kupu whakarite pera, i korerotia ai e ia te kupu ki a  
ratou, ko a ratou i ahei ai te whakarongo. <sup>35</sup> A heoi ana kupu ki a ratou he kupu whakarite anake:  
otiia ka noho ko ratou anake, ka whakaaturia e ia nga mea katoa ki ana akonga.  
<sup>36</sup> Na, i taua ra, i te ahiahi, ka mea ia ki a ratou, Tatou ka whakawhiti ki tawahi. <sup>37</sup> Na, ka  
mahue iho te mano, ka mauria ia e ratou, i runga tonu ano ia i te kaipuke. I a ia ano etahi atu kaipuke.  
<sup>38</sup> Na ko te putanga o tetahi hau, he tupuhi, a eke ana nga ngaru ki runga ki te kaipuke, a tomo noa.  
<sup>39</sup> Na ko ia i te kei i runga i te urunga e moe ana: a ka whakaara ratou i a ia, ka mea ki a ia, E te  
Kaiwhakaako, kahore ou manawapa ki a tatou ka ngaro? <sup>40</sup> Na ka ara ia, a riria iho e ia te hau, ka  
mea ia ki te moana, Kati, whakamutua. Na mariri tonu iho te hau, takoto ana he marino nui. <sup>41</sup> Katahi  
ia ka mea ki a ratou, He aha ta koutou e matakui nei? he aha koutou te whakaponu ai? <sup>42</sup> Na ka  
matakui whakaharahara ratou, ka mea tetahi ki tetahi, Ko wai tenei, ina ka rongo rawa te hau me te  
moana ki a ia?

## Chapter 5

<sup>1</sup> A ka whiti ratou ki tawahi o te moana, ki te whenua o nga kararini. <sup>2</sup> Na, mahuta kau i te  
 kaupuke, ka tutaki ki a ia tetahi tangata i puta mai i nga urupa, he wairua poke tona, <sup>3</sup> Kei nga urupa  
 nei tona nohoanga; a, ahakoa he mekameka, hore rawa ia i taea e tetahi tangata te here. <sup>4</sup> He maha  
 hoki ona herenga ki nga here waewae, ki nga mekameka, heoi motumotuhia ana e ia nga mekameka,  
 mongomonga noa ano nga here waewae: kihai tetahi tangata i kaha ki te whakamarie i a ia. <sup>5</sup> I nga  
 urupa tonu ia, i nga maunga i te po, i te ao, e hamama ana, e haehae ana i a ia ki te kohatu. <sup>6</sup> A, i  
 tona kitenga i a Ihu i tawhiti, oma ana ia, koropiko ana ki a ia. <sup>7</sup> He nui tona reo ki te karanga, ka  
 mea, Ko te aha taku ki a koe, e Ihu, e te Tama a te Atua, a te Runga Rawa? ko te Atua taku whakaoati  
 mou, na kua ahau e whakamamaetia. <sup>8</sup> He meatanga hoki nana ki a ia, Puta mai i tenei tangata, e  
 te wairua poke. <sup>9</sup> Na ka ui ia ki a ia, Ko wai tou ingoa? Ka whakahokia e tera, ka mea, Ko Rihiona  
 toku ingoa: he tokomaha hoki matou. <sup>10</sup> A he nui tana inoi ki a ia kia kua ratou e tonoa atu i taua  
 whenua. <sup>11</sup> Na kei reira, kei nga maunga, tetahi kahui poaka e kai ana, tona tini. <sup>12</sup> Na ka inoi nga  
 rewera katoa ki a ia, ka mea, Tonoa matou ki nga poaka, kia tomo matou ki a ratou. <sup>13</sup> Na tukua  
 ana ratou e Ihu, Heoi, ko te putanga o nga wairua poke, ka tomo ki nga poaka: ko te tino rerenga  
 o te kahui ra te pari ki te moana, ko te maha kei te rua mano, a paremo iho ki te moana. <sup>14</sup> Na whati  
 ana nga kaiwhangai o nga poaka, a korerotia ana ki te pa, ki aua whenua. Na ka puta ratou a kia  
 kite i taua mea kua meatia nei. <sup>15</sup> A, no to ratou taenga mai ki a Ihu, ka kite i te tangata i nohoia  
 nei e nga rewera, tera i te rihiona, e noho ana, kua oti te whakakakahu, kua tika nga mahara, ka  
 matakau ratou. <sup>16</sup> A ka korerotia ki a ratou, e te hunga i kite, te meatanga ki te tangata i nga rewera,  
 ki nga poaka hoki. <sup>17</sup> Na ka anga ratou ka tohe ki a ia kia haere atu i o ratou wahi. <sup>18</sup> A, no ka eke  
 ia ki te kaupuke, ka inoi ki a ia te tangata i nga rewera, kia waiho ia hei hoa mona. <sup>19</sup> Otira kihai a  
 Ihu i tuku i a ia, engari i mea atu ki a ia, haere ki tou whare, ki ou whanaunga, ka korero ki a ratou  
 i nga mea nui i meinga e te Ariki ki a koe, i tana atawhaitanga hoki i a koe. <sup>20</sup> Na ka haere ia, ka  
 anga ka korero ki Rekaporihi, i nga mea nunui i mea ai a Ihu ki a ia: a miharo ana nga tangata katoa.  
<sup>21</sup> A, no te whitinga atu ano o Ihu ki tawahi i runga i te kaupuke, he nui te tangata i huihui ki  
 a ia: i te taha ano ia o te moana. <sup>22</sup> Na ko te haerenga mai o tetahi o nga rangatira o te whare karakia,  
 ko Hairuha tona ingoa; ka kite i a ia, ka takoto ki ona waewae, <sup>23</sup> He nui tana inoi ki a ia, ka mea,  
 Ko taku tamahine nohinohi kei te whakahemohemo: kia haere ake koe ki te whakapa i ou ringa ki

<sup>24</sup>  
 a ia kia ora ai; a ka ora. Na haere tahi ana raua; he tini hoki te tangata i aru i a ia, popo tonu ki  
<sup>25</sup> a ia. Na ko tetahi wahine e mate ana i te pakaruhanga toto, ka tekau ma rua nga tau, <sup>26</sup> He maha  
 nga meatanga a nga rata tokomaha ki a ia, hemo noa ana rawa katoa, te matutu ake tetahi wahi,  
<sup>27</sup>  
 heoi kake haere ana te mate; A, no tona rongonga ki a Ihu, ka haere i muri i roto i te mano, a pa  
<sup>28</sup> ana ki tona kakahu. I mea hoki, Ahakoa pa kau ahau ki ona kakahu, ka ora ahau. <sup>29</sup> A mimiti  
<sup>30</sup>  
 tonu ake te puna o ona toto; no ka mahara a roto o tona tinana kua ora ia i te mate. Na mohio  
 tonu a Ihu kua puta he mana i roto i a ia, ka tahurihuri i roto i te mano, ka mea, Ko wai tenei kua  
<sup>31</sup>  
 pa nei ki oku kakahu? Ka mea ana akonga ki a ia, E kite ana koe i te mano e popo nei ki a koe,  
<sup>32</sup>  
 a e mea ana koe, Ko wai tenei kua pa mai ki ahau? Heoi tirotiro ana ia kia kite i te wahine i mea  
<sup>33</sup>  
 nei i tenei mea. Na ka haere mai te wahine me te wehi, me te wiri, i mahara hoki ki te mea i  
<sup>34</sup>  
 meatia ki a ia, a takoto ana ki tona aroaro, korerotia katoatia ana e ia te tikanga ki a ia. Ano ra  
 ko Ihu ki a ia, E ko, na tou whakapono koe i ora ai; haere marie, kia ora koe i tou mate.  
<sup>35</sup>  
 I a ia ano e korero ana, ka haere mai etahi o nga tangata a te rangatira o te whare karakia,  
<sup>36</sup>  
 ka mea, Kua mate tau tamahine: hei aha ake mau te whakararuraru i te Kaiwhakaako? Otira  
 kahore a Ihu i aro ki te kupu i korerotia, ka mea atu ki te rangatira o te whare karakia, Kaua e wehi,  
<sup>37</sup>  
 ko te whakapono ia kia whakapono. A kihai tetahi tangata i tukua kia haere tahi me ia, ko Pita  
<sup>38</sup>  
 anake, ko hemi, ko Hoani teina o Hemi. A, no te taenga atu ki te whare o te rangatira o te whare  
<sup>39</sup>  
 karakia, ka kite ia i te ngangau, i te nui hoki o te tangi, o te aue a etahi. A, i tona tomokanga ki  
 roto, ka mea ia ki a ratou, He aha koutou ka ngangau ai, ka tangi ai? kahore te kotiro i mate, engari  
<sup>40</sup>  
 e moe ana. Na kataina iho ia e ratou. Heoi, ka oti katoa te pei ki waho, ka mau ia ki te papa, ki  
<sup>41</sup>  
 te whaea o te kotiro, ratou ko ona hoa, ka tomo ki te wahi i takoto ai te kotiro. Na ka mau ia ki  
 te ringa o te kotiro, ka mea ki a ia, Tarita kumi; ko tona whakamaoritanga tenei, E ko, ko taku kupu  
<sup>42</sup>  
 tenei ki a koe, e ara. Na whakatika tonu ake te kotiro, a haere ana; kotahi tekau ma rua hoki ona  
<sup>43</sup>  
 tau. Na ko te tino miharotanga i miharo ai ratou. A he nui tana whakatupato i a ratou, kia kaua  
 tenei e mohiotia e tetahi tangata; ka ki kia hoatu he kai mana.

## Chapter 6



<sup>1</sup> A i haere ia i reira, a ka tae ki tona kainga tupu; me te aru ano ana akonga i a ia. <sup>2</sup> A, ka taka mai te hapati, ka anga ia ka whakaako i roto i te whare karakia; a he tokomaha hoki, i to ratou rongonga, i miharo, i mea, No hea enei mea a tenei tangata? he matauranga aha tenei kua hoatu nei ki a ia, a he aha te tikanga o enei merek ara nunui kua oti nei i ona ringa? <sup>3</sup> Ehara ianei tenei i te kamura, i te tama a Meri, i te tuakana o Hemi, o Hohi, o Hura, o Haimona? Kahore ianei ona tuahine i konei, i a tatou nei? Heoi he ana ratou ki a ia. <sup>4</sup> Otira ka mea a Ihu ki a ratou, kei tona kainga anake, kei ona whanaunga, kei tona whare, te poropiti hapa ai i te honore. <sup>5</sup> A kihai ia i ahei te mea i tetahi merekara ki reira, heoi ano ko te whakapa i ona ringa ki etahi tangata turoro torutoru kia ora ai. <sup>6</sup> A miharo ana ia ki to ratou whakaponokore. Na haereerea ana e ia nga kainga a tawhio noa, whakaako ai.

<sup>7</sup> Katahi ia ka karanga i te tekau ma rua, ka anga ka tono i a ratou tokorua, tokorua; a hoatu ana ki a ratou he mana hei pei i nga wairua poke. <sup>8</sup> I whakahau ia ki a ratou, kia kua tetahi mea e mauria ki te ara, he tokotoko anake; kua he putea, kua he taro, kua he moni mo roto i te whitiki: <sup>9</sup> Engari nga hu, e here na; kua hoki e takiruatia he koti hei kakahu. <sup>10</sup> I mea ano ia ki a ratou, Ka tapoko ki tetahi whare, hei reira noho ai a haere noa i reira. <sup>11</sup> A, ki te kahore etahi e manako ki a koutou, ki te kore e whakarongo ki a koutou, ina haere atu koutou i reira, ruia atu te puehu i raro i o koutou waewae hei whakaatu ki a ratou. E pono taku e mea atu nei ki a koe, E pai atu mo Hotoma me Komorah a a te ra whakawa, i to tenei pa. <sup>12</sup> Na ka haere ratou, ka kauwhau kia ripeneta te tangata. <sup>13</sup> He maha hoki nga rewera i peia, he tokomaha ano nga turoro i kaukauria ki te hinu, i whakaorangia.

<sup>14</sup> A ka rongu a Kingi Herora ki enei mea; nui haere hoki tona ingoa: a ka mea ia, Kua ara a Hoani Kaiiriiri i te hunga mate, na reira i mahi ai nga merekara i roto i a ia. <sup>15</sup> Ko etahi i mea, Ko Iraia tenei. Ko etahi, he poropiti ia, he pera ranei me tetahi o nga poropiti. <sup>16</sup> Heoi, i te rongonga o Herora, ka mea ia, Ko Hoani tenei i poutoa e ahau te matenga: kua ara ia. <sup>17</sup> I tono tangata hoki taua Herora, a hopukia ana a Hoani, herea iho ki te whare herehere, he mea mo Heroriaha, mo te wahine a tona tuakana a Piripi: kua marenatia hoki e ia. <sup>18</sup> Na Hoani hoki i mea ki a Herora, E kore e tika kia riro i a koe te wahine a tou tuakana. <sup>19</sup> Na ka mauahara a Heroriaha ki a ia, ka mea kia whakamatea ia; heoi kihai i taea: <sup>20</sup> I hopohopo hoki a Herora ki a Hoani, i mohio hoki ki a ia he tangata tika, he tapu, na ka ata tiaki i a ia. I tona rongonga ki a ia he nui tona pororaru; a i whakaahuareka ano ki te whakarongo ki a ia. <sup>21</sup> A ka tae ki tetahi wa pai, i te takanga ai a Herora

i tona ra whanautanga, he hakari ma ana tangata nunui, ma nga rangatira hoia, ma nga tino tangata  
 o Kariri; <sup>22</sup> A ka haere te tamahine a taua Heroriaha ki roto, ka kanikani, ka ahuaireka a Herora  
 ratou ko te hunga e noho tahi ana, a ka mea te kingi ki te kotiro ra, Mau e tono ki ahau tau e pai ai,  
 a ka hoatu e ahau ki a koe. <sup>23</sup> Na ka oati ia ki a ia, Ko tau e tono ai ki ahau, ahakoa ko tetahi taha  
 o toku rangatiratanga, me hoatu e ahau ki a koe. <sup>24</sup> Na ka haere ia, ka korero ki tona whaea, Me  
 tono ahau kite aha? Ka mea tera, Ki te matenga o Hoani Kaiiriiri. <sup>25</sup> Na hohoro tonu tona haere ki  
 te kingi, ka tono, ka mea, Ko taku e pai ai, kia homai e koe ki ahau aiane ko te matenga o Hoani  
 Kaiiriiri i runga i te rihi. <sup>26</sup> Na nui atu te pouri o te kingi; otira i te whakaaro ki ana oati, ki te hunga  
 hoki e noho tahi ana me ia, kihai i pai kia whakakahoretia tana. <sup>27</sup> Na tonoa tonutia atu e te kingi  
 tetahi o ana hoia kaitiaki me te whakahau atu kia mauria mai tona matenga: a haere ana tera, poutoa  
 iho e ia tona matenga i roto i te whare herehere, <sup>28</sup> A mauria mai ana tona matenga i runga i te rihi,  
 hoatu ana ki te kotiro: a na te kotiro i hoatu ki tona whaea. <sup>29</sup> A, no ka rongoa ana akonga, ka haere  
 mai ka tangohia tona tinana, a whakatakotoria ana ki te urupa.  
<sup>30</sup> Na ka huihui nga apotoro ki a Ihu, korerotia ana e ratou ki a ia nga mea katoa i mea ai ratou,  
 i whakaako ai. <sup>31</sup> Na ka mea ia ki a ratou, Haere mai koutou na na ki te koraha ki te wahi motu ke,  
 kia ta ai te manawa: he tokomaha hoki e haere mai ana, e haere atu ana, no kihai rawa ratou i watea  
 ki te kai. <sup>32</sup> A haere puku ana ratou ki te koraha ki tetahi wahi motu ke ra te kaupuke. <sup>33</sup> A i kite  
 nga mano i to ratou haerenga, he tokomaha i matau ki a ia, na ka oma a waewae ki reira i roto i nga  
 pa katoa, a ko ratou kua tae wawe. <sup>34</sup> A ka puta a Ihu, ka kite i te hui nui, ka aroha ki a ratou, no  
 te mea i rite ratou ki te hipi heparakore: a ka anga ia ka whakaako i a ratou ki nga mea maha. <sup>35</sup> Na,  
 kua heke noa atu te ra, ka haere atu ana akonga ki a ia, ka mea, He wahi koraha tenei, kua heke noa  
 atu te ra: <sup>36</sup> Tonoa atu ratou kia haere ki nga whenua, ki nga kainga i tetahi taha, i tetahi taha, ki  
 te hoko kai ma ratou. <sup>37</sup> Na ka whakahoki ia, ka mea ki a ratou, Ma koutou e hoatu he kai ma ratou.  
 Ka mea ratou ki a ia, Me haere oti matou ki te hoko taro ki nga pene e rua rau, ka hoatu ai hei kai  
 ma ratou? <sup>38</sup> Ka mea ia ki a ratou, E hia a koutou taro? Tikina tirohia. Ka mohio ratou, na ka mea,  
 E rima, e rua hoki nga ika. <sup>39</sup> Ka mea ia ki a ratou kia meinga ratou katoa kia noho, he nohoanga,  
 he nohoanga, ki runga ki te tarutaru matomato. <sup>40</sup> Na ka noho ratou, he ropu, he ropu, tataki rau,  
 tataki rima tekau. <sup>41</sup> A ka mau ia ki nga taro e rima, ki nga ika hoki e rua, ka titiro ki runga ki te  
 rangi, ka whakapai, ka whakawhati i nga taro, a hoatu ana ki ana akonga kia whakatakotoria ma

<sup>42</sup>  
 ratou; i tuwhaina ano hoki e ia nga ika e rua ma ratou katoa. A kai katoa ana ratou, a ka makona.  
<sup>43</sup> A kotahi tekau ma rua nga kete i kohia e ratou, ki tonu i nga whatiwhatinga, i nga ika hoki. <sup>44</sup> A  
 me te mea e rima mano nga tane i kai taro ra.  
<sup>45</sup> A akiaki tonu iho ia i ana akonga kia eke ki te kaipuke, kia whakawhiti i mua i a ia ki tawahi,  
 ki Petahaira, i a ia e tonu ana i te mano kia haere. <sup>46</sup> Na ka mutu tana poroporoaki, ka haere ia ki  
 te maunga ki te inoi. <sup>47</sup> Na kua ahiahi, i waenga moana te kaipuke, ko ia anake hoki i uta. <sup>48</sup> Na  
 ka kite ia i a ratou e ruwha ana i te hoenga; i he hoki te hau ki a ratou: a i te wha o nga mataaratanga  
 o te po ka haere atu ia ki a ratou, i haere maori atu i runga i te moana, me te mea hoki ka pahika ke  
<sup>49</sup>  
 i a ratou. A, no ka kite ratou i a ia e haere ana i runga i te moana, ka mahara he wairua, ka aue:  
<sup>50</sup> I kite hoki ratou katoa i a ia, a ihiihi ana. Otira ka hohoro ia te korero ki a ratou, ka mea ki a  
 ratou, Kia manawanui: ko ahau tenei; kua e wehi. <sup>51</sup> Na ka eke ia ki te kaipuke ki a ratou; a mariri  
 iho te hau: a nui atu to ratou ohomauri, miharo ana. <sup>52</sup> Kihai hoki i mahara ki nga taro: he pakeke  
<sup>53</sup>  
 hoki no o ratou ngakau. A, no to ratou whitinga atu, ka tae ki te whenua o Kenehareta, ka herea  
 te kaipuke ki uta. <sup>54</sup> No to ratou mahutatanga i te kaipuke, mohio tonu ratou ki a ia, <sup>55</sup> A ka oma  
 puta noa i taua whenua, a tawhio noa, ka anga ka mau mai i nga turoro i runga i nga moenga ki te  
<sup>56</sup>  
 wahi, i rongo ai ratou kei reira ia. A, i ona haerenga katoatanga ki nga kainga, ki nga pa, ki nga  
 whenua ranei, ka whakatakotoria e ratou nga turoro ki nga kainga hokohoko, ka inoi ki a ia kia pa  
 kau atu ratou ki te taniko o tona kakahu: a ora ake nga tangata katoa i pa ki a ia.

## Chapter 7

<sup>1</sup> Na ka huihui ki a ia nga Parihi, me etahi o nga karaipi i haere mai i Hiruharama. <sup>2</sup> A, no to  
 ratou kitenga i etahi o ana akonga e kai taro ana me te noa ano nga ringa, ara kihai i horoia, ka  
<sup>3</sup>  
 whakahe ratou. e kore hoki nga Parihi me nga Hurai katoa e kai, ki te kahore i ata horoia nga  
 ringa, e pupuri ana hoki i te whakarereanga iho a nga kaumatua. <sup>4</sup> E kore ano ratou e kai ina hoki  
 mai i te kainga hokohoko, ki te mea kahore i horoi. He maha hoki era atu mea tuku iho kia puritia  
<sup>5</sup>  
 e ratou, nga horoinga o anga kapu, o nga pata, o nga mea parahi, o nga nohoanga. Katahi ka ui  
 nga Parihi me nga karaipi ki a ia, He aha au akonga te haere ai i runga i te whakarereanga iho a nga  
<sup>6</sup>  
 kaumatua, a kahore e horoi i nga ringa ina kai taro? Na ka mea ia ki a ratou, Tika rawa ta Ihaia i

poropiti ai mo koutou, mo te hunga tinihanga, te mea hoki i tuhituhia, Ko te iwi nei, ko o ratou  
 ngutu hei whakahonore i ahau, ko o ratou ngakau ia matara noa atu i ahau. <sup>7</sup> Otira maumau karakia  
 noa ratou ki ahau, ko ta ratou nei hoki e whakaako ai ko nga whakahau a te tangata. <sup>8</sup> Kei te  
 whakarere hoki koutou i ta te Atua kupu ako, ka mau ki te waihotanga iho a te tangata. <sup>9</sup> A ka mea  
 ia ki a ratou, Tena ra ta koutou hanga ki te whakakahore i te whakahau a te Atua, kia mau ai koutou  
 ki ta koutou whakarere iho. <sup>10</sup> I mea hoki a Mohi, Whakahonoretia tou papa me tou whaea;  
 me tenei, Ki te korero kino tetahi mo tona papa, mo tona whaea ranei, kia mate ia, mate rawa:  
<sup>11</sup>  
 Ko koutou ia hei mea, ki te mea tetahi ki tona papa, ki tona whaea ranei, Ko taku mea hei  
 atawhainga mou he Koropana, ara, he mea i hoatu ki te Atua; <sup>12</sup> Kahore koutou aiane i te tuku i  
 a ia ki te mea i tetahi aha ma tona papa, ma tona whaea ranei; <sup>13</sup> Ka waiho e koutou ta koutou  
 whakarere iho, i whakarerea iho nei e koutou, hei whakakahore mo ta te Atua kupu: he maha  
 hoki nga mea pena e meinga ana e koutou. <sup>14</sup> Na karangatia ana ano e ia te mano ki a ia, a mea  
 ana ki a ratou, Whakarongo mai koutou katoa, kia matau hoki: <sup>15</sup> Kahore he mea o waho o te  
 tangata ka tapoko nei ki roto ki a ia hei whakanoa i a ia: engari nga mea e puta ana mai i roto i a  
 ia, ma ena e noa ai te tangata. <sup>16</sup> Ki te whai taringa tetahi hei whakarongo, kia rongo ia. <sup>17</sup> A, no  
 ka mawehe ke ia i te mano ki te whare, ka ui ana akonga ki a ia ki te tikanga o tena kupu whakarite.  
<sup>18</sup>  
 Na ka mea ia ki a ratou, Ha, he kuware ano koutou? Kahore koutou i matau, ko nga mea katoa  
 o waho e tapoko nei ki te tangata, e kore ia e noa i era; <sup>19</sup> No te mea e kore e tapoko ki tona ngakau,  
 engari ki te kopu a puta ana ki te poka? He korero tenei nana kia kiia ai he ma nga kai katoa. <sup>20</sup> I  
 mea ano ia, Ko te mea e puta ake ana i te tangata, ma tera e noa ai te tangata. <sup>21</sup> No roto hoki, no  
 te ngakau o nga tangata te putanga o nga whakaaro kino, o nga moepuku, <sup>22</sup> O nga tahae, o nga  
 kohuru, o nga puremu, o nga hiahia apo, o nga kino, o te tinihanga, o te hiahia taikaha, o te kanohi  
 kino, o te kohukohu, o te whakapehapeha, o te wairangi: <sup>23</sup> No roto te putanga ake o enei kino  
 katoa, a ma reira e noa ai te tangata.  
<sup>24</sup>  
 Na ka whakatika atu ia i reira, ka haere ki nga wahi o Taira, o Hairona; a tomo ana ki tetahi  
 whare, kihai hoki ia i pai kia rongo tetahi tangata: otiia kihai ia i ngaro. <sup>25</sup> I reira hoki ka rangona  
 ia e tetahi wahine, he wairua poke to tana kotiro, a haere ana mai, takoto ana ki ona waewae: <sup>26</sup> He  
 wahine Kariki hoki ia, ko Hairopinihia tona iwi; ka inoi ki a ia kia peia e ia te rewera i roto i tana  
 kotiro. <sup>27</sup> Na ka mea a Ihu ki a ia, Tukua kia matua makona nga tamariki: e kore hoki e pai kia

tangohia te taro a nga tamariki, kia maka ma nga kuri. <sup>28</sup> Otira ka whakahoki ia, ka mea ki a ia,  
 Ae ra, e te Ariki, e kai ana ano nga kuri i raro i te tepu i nga kongakonga a nga tamariki. <sup>29</sup> Na ka  
 mea ia ki a ia, Koia kei tena kupu, haere; kua puta te rewera i roto i tau kotiro. <sup>30</sup> A ka haere atu  
 ia ki tona whare, na rokohanga atu e takoto ana tana kotiro i runga i te moenga, kua puta te rewera.  
<sup>31</sup> A i hoki ano ia i nga wahi o Taira, o Hairona, haere ana ki te moana o Kariri, ra waenga o  
 nga wahi o Rekaporihi. <sup>32</sup> Na ka mauria mai ki a ia he turi e whango ana; ka tohe ki a ia kia  
 whakapakia iho tona ringa ki a ia. <sup>33</sup> Na ka tangohia ia e ia i roto i te mano ki tahaki, a kuhua ana  
 ona maihao ki ona taringa, na ka tuwha, ka whakapa ki tona arero; <sup>34</sup> Ka titiro ki te rangi, ka  
 whakapumanawa, ka mea ki a ia, Epata, ara, Kia puare. <sup>35</sup> Na puare tonu iho ona taringa, korokoro  
 noa ana te here o tona arero, na kua tika ana korero. <sup>36</sup> Katahi ia ka whakatupato i a ratou kia kaua  
 e korerotia ki te tangata: otira ahakoa te nui o tana whakatupato i a ratou, nui noa atu ta ratou korero  
<sup>37</sup> haere. A tino miharo rawa ratou, ka mea, pai tonu tana meatanga i nga mea katoa: e mea ana ia  
 i nga turi kia rongu, i nga wahangu kia korero.

## Chapter 8

<sup>1</sup> I aua ra i te mea he nui rawa te mano, kahore hoki he kai ma ratou, ka karanga a Ihu ki ana  
 akonga, ka mea ki a ratou, <sup>2</sup> E aroha ana ahau ki nga tangata, ka toru nei hoki o ratou ra e noho  
 ana ki ahau, a kahore a ratou kai: <sup>3</sup> Ki te tonoa pukutia ratou e ahau ki to ratou kainga, ka hemo ki  
 te ara; i haere mai hoki etahi o ratou i tawhiti. <sup>4</sup> Na ka whakahokia e ana akonga ki a ia, Me aha e  
 te tangata ka makona ai enei i te taro i konei, i te koraha? <sup>5</sup> Ka ui ia ki a ratou, E hia a koutou taro?  
 Ka mea ratou, E whitu. <sup>6</sup> Na ka mea ia ki te mano kia noho ki te whenua: a ka mau ki nga taro e  
 whitu, ka whakawhetai, ka whawhati, a hoatu ana e ia ki ana akonga kia whakatakotoria ki mua i  
 a ratou: whakatakotoria ana e ratou ma te mano. <sup>7</sup> He ika ano a ratou torutoru nei, he mea nonohi:  
 a ka mutu te whakapai, ka mea ia kia whakatakotoria hoki era. <sup>8</sup> Na kai ana ratou, a ka makona: a  
<sup>9</sup> kohia ake ana o nga whatiwhatinga i toe e whitu nga kete. Me te mea e wha mano te hunga i kai:  
 a tonoa atu ana ratou e ia.

<sup>10</sup> Na eke tonu ia ratou ko ana akonga ki te kaupuke, a ka tae ki nga wahi o Taramanuta. <sup>11</sup> Na  
ka puta mai nga parihi, ka anga ka totohe ki a ia, ka rapu tohu ki a ia i te rangi, hei whakamatautau  
<sup>12</sup> mona. Na ka hotu tona wairua, ka mea ia, He aha tenei whakatupuranga ka rapu ai ki te tohu?  
he pono taku e mea nei ki a koutou, E kore e hoatu he tohu ki tenei whakatupuranga. <sup>13</sup> Na mahue  
ake ratou i a ia, a eke ana ano ki te kaupuke, rere ana ki tera taha. <sup>14</sup> Na i wareware ratou ki te mau  
taro, kotahi tonu a ratou taro i te kaupuke. <sup>15</sup> Na ka whakatupato ia i a ratou, ka mea, Kia mahara,  
kia tupato i te rewena a nga Parihi, i te rewena hoki a Herora. <sup>16</sup> A ka korerorero ratou ki a ratou  
ano, ka mea, No te mea kahore a tatou taro. <sup>17</sup> Ka mohio a Ihu, ka mea ki a ratou, he aha koutou  
ka korerorero ai no te mea kahore a koutou taro? kiano koutou i matau noa, kiano i mahara? e  
<sup>18</sup> pakeke tonu ana ano ranei o koutou ngakau? He kanohi nei o koutou, a kahore e kite? he taringa  
<sup>19</sup> nei o koutou, a kahore e rongu? kahore e mahara? I ahau i whawhati i nga taro e rima ma nga  
mano e rima, e hia nga kete ki o nga whatiwhatinga i kohia e koutou? Ka mea ratou ki a ia, Kotahi  
<sup>20</sup> tekau ma rua. A i nga taro hoki e whitu ma nga mano e wha, e hia nga kete ki o nga whatiwhatinga  
i kohia e koutou? Ka mea ratou, E whitu. <sup>21</sup> Na ka mea ia ki a ratou, Kahore ano ia koutou kia  
matau noa?  
<sup>22</sup> A ka tae ratou ki Petahaira. Na ka kawea mai e ratou he matapo ki a ia, ka inoi ki a ia kia  
whakapangia e ia. <sup>23</sup> Na ka mau ia ki te ringa o te matapo, ka arahi i a ia ki waho o te kainga; ka  
tuwha ki ona kanohi, a ka whakapa i ona ringa ki a ia, ka ui ki a ia me kore ia e kite i tetahi mea.  
<sup>24</sup> Na ka titiro ake ia, ka mea, E kite ana ahau i nga tangata e haereere ana me te mea he rakau.  
<sup>25</sup> Me i reira ka whakapakia ano nga ringa ki ona kanohi, ka mea i a ia kia titiro: na ka ora ia, a ka  
<sup>26</sup> marama te titiro ki nga mea katoa. Na ka tono ia i a ia ki tona whare, ka mea atu, Kaua e tomo  
ki te kainga.  
<sup>27</sup> Na ka haere a Ihu ratou ko ana akonga ki nga kainga o Hiharia Piripai: a i te ara ka ui ia ki  
ana akonga, ka mea ki a ratou, Ki ta nga tangata ki, ko wai ahau? <sup>28</sup> Na ko ta ratou whakahokinga,  
<sup>29</sup> Ko Hoani Kaiiriiri: ki ta etahi, Ko Iraia; ki ta etahi, Ko tetahi o nga poropiti. Na ka mea ia ki a  
ratou, Ki ta koutou na ki, ko wai ahau? Na ka whakahoki a Pita, ka mea ki a ia, Ko te Karaiti koe.  
<sup>30</sup> Na ka whakatupato ia i a ratou, kia kaua ia e korerotia ki te tangata. <sup>31</sup> Katahi ia ka anga ka  
whakaako i a ratou, kua takoto te tikanga kia maha nga mamae o te Tama a te tangata, kia  
whakakinongia hoki e nga kaumatua, e nga tohunga nui, e nga karaipi, a kia whakamatea, a kia ara

<sup>32</sup>  
 ano ina pahure nga ra e toru. I korerotia matanuitia ano taua kupu e ia. Na ka mau a Pita ki a ia,  
<sup>33</sup>  
 ka anga ka whakahe ki tana. Otira ka tahuri ia, a, i te kitenga i ana akonga, ka whakahe ki ta  
 Pita, ka mea, haere ki muri i ahau, e Hatana: kahore hoki ou ngakau ki nga mea a te Atua, engari  
<sup>34</sup>  
 ki a te tangata. Na ka karangatia e ia te mano, ratou ko ana akonga, ka mea ki a ratou, Ki te mea  
 tetahi tangata kia haere mai ki te whai i ahau, me whakakahore ia i a ia ano, me amo i tona ripeka,  
<sup>35</sup>  
 ka aru ai i ahau. Ki te whai tetahi kia ora, ka mate ia; ki te mate hoki tetahi, mona i whakaaro  
<sup>36</sup>  
 ki ahau, ki te rongopai hoki, ka ora ia. A he aha te pai ki te tangata, ki te riro i a ia te ao katoa,  
<sup>37</sup>  
 a ka kore he ora mona? He aha hoki ta te tangata e hoatu ai hei utu mona kia ora? Ki te  
<sup>38</sup>  
 whakama hoki tetahi ki ahau, ki aku korero, i tenei whakatupuranga puremu, kino, ka whakama  
 ano te Tama a te tangata ki a ia, ina haere mai i runga i te kororia o tona Matua, ratou ko nga anahera  
 tapu.

## Chapter 9

<sup>1</sup>  
 I mea ano ia ki a ratou, He pono taku e mea nei ki a koutou, Tenei ano etahi o te hunga e tu  
 nei, e kore e pangia e te mate, kia kite ra ano i te rangatiratanga o te Atua e haere mai ana i runga  
<sup>2</sup>  
 i te kaha. A, ka pahure nga ra e ono, ka mau a Ihu ki a Pita, ki a Hemi, ki a Hoani, na kawea ana  
 ratou e ia ki runga ki tetahi maunga tiketike, ko ratou anake: a ka puta ke tona ahua i to ratou aroaro.  
<sup>3</sup>  
 Na kanapa tonu ona kakahu, ma tonu me te hukarere; e kore e taea e te kaihoroi i runga i te whenua  
<sup>4</sup>  
 te mea kia pera te ma. Na ka puta mai ki a ratou a Iraia raua ko Mohi: e korerorero ana raua ki a  
<sup>5</sup>  
 Ihu. Na ka oho a Pita, ka mea ki a Ihu, E te Kaiwhakaako, he mea pai kia noho tatou ki konei: na  
 kia hanga e matou etahi wharau kia toru: kia kotahi mou, kia kotahi mo Mohi, kia kotahi mo Iraia.  
<sup>6</sup>  
 Kahore hoki ia i matau ki tana e korero ai; i wehi hoki ratou. Na ko tetahi kapua e taumarumaru  
<sup>7</sup>  
 ana ki runga ki a ratou: a ka puta he reo i te kapua, e mea ana, Ko taku Tama tenei i aroha ai;  
<sup>8</sup>  
 whakarongo ki a ia. A, titiro rawa ake ratou ki tetahi taha, ki tetahi taha, kahore a ratou tangata  
<sup>9</sup>  
 i kite ai, ko ratou anake, ko Ihu. A, i a ratou e heke iho ana i te maunga, ka whakatupato ia i a  
 ratou kia kaua e korerotia ki te tangata a ratou i kite ai, kia ara ra ano te Tama a te tangata i te hunga  
<sup>10</sup>  
 mate. A i puritia taua kupu e ratou, ka uiui ki a ratou ano, he aha ra te aranga ake i te hunga  
<sup>11</sup>  
 mate. A ka ui ratou ki a ia, ka mea, he aha nga karaipi ka mea ai, ko Iraia kia matua puta mai?

12

Na ka whakahoki ia, ka mea ki a ratou, E puta ana ano a Iraia i mua ki te whakatika i nga mea katoa; kua oti ano te tuhituhi mo te Tama a te tangata, kia maha ona mamae, kia whakakahoretia.

13

Ko taku kupu ia tenei ki a koutou, Kua tae mai ano a Iraia, heoi meatia ana e ratou ki a ia ta ratou i pai ai, nga mea hoki i tuhituhia mona.

14

A, no to ratou taenga ki nga akonga, ka kite ratou he rahi te hui e karapoti ana i a ratou, me

nga karaipi e totohe ana ki a ratou. <sup>15</sup> A, kite kau te mano katoa i a ia, ka miharo, a oma ana, oha

ana ki a ia. <sup>16</sup> Na ka ui ia ki a ratou, He aha ta koutou e totohe na ki a ratou? <sup>17</sup> Na ka whakahoki tetahi i roto i te mano, ka mea, E te Kaiwhakaako, i kawea mai e ahau taku tama ki a koe, he wairua

reokore tona; <sup>18</sup> A, i nga wahi e hopu ai te wairua i a ia, ka taia iho: tutu ana te huka, tetea ana ona niho, a pakoko haere ana: i mea ano ahau ki au akonga kia peia ia ki waho; heoi kihai i taea e ratou.

19

Na ko tana whakahokinga ki a ia, ka mea, E te uri whakaponokore, kia pehea te roa o toku noho

ki a koutou? kia pehea te roa o taku manawanui ki a koutou? Kawea mai ki ahau. <sup>20</sup> Na kawea ana mai ia ki a ia: a, i tona kitenga i a ia, na haea tonutia iho ia e te wairua; a hinga ana ia ki te whenua,

ka oke, ka huka. <sup>21</sup> Na ka ui ia ki tona matua, Ka pehea te roa o te mea nei ki a ia? Ka mea ia, No

te tamarikitanga: <sup>22</sup> He maha ana turakanga i a ia ki te kapura, ki te wai, kia ngaro ai: otira ki te taea e koe te aha ranei, arohaina maua, kia puta tou whakaaro ki a maua. <sup>23</sup> Ka mea a Ihu ki a ia,

Ki te taea e koe te whakapono, ka taea nga mea katoa e te tangata whakapono. <sup>24</sup> Na karanga tonu mai te matua o te tama, ka mea, E whakapono ana ahau, e te Ariki; kia puta tou whakaaro ki toku

whakaponokore. <sup>25</sup> A, no te kitenga o Ihu i te mano e oma mai ana, ka riria e ia te wairua poke, ka mea ki a ia, E te wairua reokore, turi, ko taku tenei ki a koe, Puta mai i roto i a ia, kaua ano e

tomo ki roto ki a ia a muri ake nei. <sup>26</sup> Na hamama ana tera, haehae noa iho ana i a ia, a puta ana

mai ki waho: no ka pera taua tangata me te tupapaku, a he tokomaha i mea, Kua mate. <sup>27</sup> Otira ka

mau a Ihu ki tona ringa, ka whakaara i a ia: a ka whakatika ia. <sup>28</sup> A, i a ia ka tomo ki te whare, ka

ui puku ana akonga ki a ia, he aha matou te ahei ai te pei i a ia ki waho? <sup>29</sup> Ano ra ko ia ki a ratou, E kore e puta noa te pena, ma te inoi anake, ma te nohopuku.

30

Na ka hapainga e ratou i reira, a haere ana ra waenganui o Kariri; kihai hoki ia i pai kia

rangona e tetahi. <sup>31</sup> Ko tana hoki i whakaako ai ki ana akonga, i mea ai ki a ratou, Ka tukua te Tama a te tangata ki nga ringa o nga tangata, a ma ratou ia e whakamate; a, ka oti ia te whakamate,

ka ara ake i te toru o nga ra. <sup>32</sup> Na kihai ratou i matau ki taua kupu, ka matakua hoki ki te ui ki a ia.



33

Na ka tae ratou ki Kapereanauma; a, i a ia i roto i te whare, ka ui ia ki a ratou, He aha ta koutou i kororerero ai ki a koutou i te ara? <sup>34</sup> Otiia kihai ratou i kiki: ko ta ratou hoki i kore korero ai ki a

ratou i te ara, ko wai te mea nui rawa. <sup>35</sup> Na ka noho ia, ka karanga i te tekau ma rua, ka mea ki a ratou, Ki te whai tetahi kia whiti ko ia hei mua, ka waiho ia hei muri i te katoa, hei kaimahi ma te

katoa. <sup>36</sup> Na ka mau ia ki tetahi tamaiti nohinohi, a whakaturia ana ki waenganui i a ratou: na ka

okooko i a ia, ka mea ki a ratou, <sup>37</sup> Ki te manako tetahi ki tetahi o nga tamariki penei, he whakaaro ki toku ingoa, e manako ana ia ki ahau: ki te manako hoki tetahi ki ahau, ehara i ahau tana i manako

ai, engari ko toku kaitono mai. <sup>38</sup> Na ka mea a Hoani ki ia, E te Kaiwhakaako, i kite matou i tetahi e pei rewera ana i runga i tou ingoa: na riria iho e matou, kahore hoki ia e haere tahi me tatou.

39

Na ka mea a ihu, Kaua ia e riria: ki te mea hoki noku te ingoa e mahi merekara ai tetahi, e kore e hohoro tana korero kino moku. <sup>40</sup> Ko ia hoki ehara i te hoariri ki a tatou, no tatou ia.

41

Ki te whakainumia koutou e tetahi ki te kapu wai, he whakaaro ki toku ingoa, no te mea no te Karaiti koutou, he pono taku e mea nei ki a koutou, e kore ia e hapa i tona utu. <sup>42</sup> Na, ki te mea tetahi kia he tetahi o enei mea nonohi e whakapono nei ki ahau, he pai ke ki a ia me i whakairia

tetahi kohatu mira ki tona kaki, a ka maka ia ki te moana. <sup>43</sup> Na, ki te he koe i tou ringa, poutoa: pai ke hoki mou te tomo mutu ki te ora i te maka ringaruatia ki Kehena, ki te kapura e kore e tineia:

44

Ki te wahi e kore ai e mate to ratou kutukutu, ki te kapura e kore e e tineia. <sup>45</sup> Ki te he ano koe i tou waewae, poutoa: pai ke hoki mou te tomo kopa ki te ora i te maka waewaeruatia ki Kehena,

46

Ki te wahi e kore ai e mate to ratou kutukutu, ki te kapura e kore e tineia. <sup>47</sup> A, ki te he koe i tou kanohi, maka atu: pai ke hoki mou te tomo kanohi tahi ki te rangatiratanga o te Atua i te maka

kanohiruatia ki Kehena: <sup>48</sup> Ki te wahi e kore ai e mate to ratou kutukutu, ki te kapura e kore e

tineia. <sup>49</sup> Ta te mea ka totea nga tangata katoa ki te kapura. <sup>50</sup> He pai te tote: otira ki te pirau te tote, ma te aha e whai tikanga tote ai? Kia whai tote i roto i a koutou, kia mau hoki te rongo a tetahi ki tetahi.

## Chapter 10

1

Na ka whakatika ia i reira, haere ana ki nga wahi o Huria ki tera taha o Horano: na ka huihui mai ano nga mano ki a ia; ka whakaako ano ia i a ratou, ko tana tikanga hoki tera. <sup>2</sup> Na ka haere

mai nga Parihi, ka ui ki a ia, He mea tika ranei kia whakarere te tangata i tana wahine? he  
 whakamatautau hoki mona. <sup>3</sup> Na ka whakahoki ia, ka mea ki a ratou, he aha ta Mohi i mea ai ki a  
 koutou? <sup>4</sup> Ka ki ratou, I tukua e Mohi kia tuhituhia he pukapuka whakarere, ka whakarere ai. <sup>5</sup> Na  
 ka whakahoki a Ihu, ka mea ki a ratou, Na te pakeke o o koutou ngakau i tuhituhia ai e ia tenei  
 kupu ako ki a koutou. <sup>6</sup> I te orokohanganga ia, i hanga raua e te Atua he tane, he wahine. <sup>7</sup> Mo  
 konei ka mahue i te tangata tona papa me tona whaea, ka piri ki tana wahine; <sup>8</sup> Hei kikokiko kotahi  
 hoki raua tokorua: na heoi ano to raua tokoruatanga, engari kotahi ano kikokiko. <sup>9</sup> Na, ko a te Atua  
 i hono ai, kua e wehea e te tangata. <sup>10</sup> A i te whare ka ui ano ana akonga ki a ia ki taua mea. <sup>11</sup> Ka  
 mea ia ki a ratou, Ki te whakarere tetahi i tana wahine, a ka marena i tetahi atu, e puremu ana ia, e  
 hara ana ki tera. <sup>12</sup> Ki te whakarere hoki te wahine i tana tane, a ka marenatia ki tetahi atu, e puremu  
 ana ia.  
<sup>13</sup> Na ka kawea mai ki a ia etahi tamariki nonohi, kia pa ai ia ki a ratou: otira ka riria e nga  
 akonga te hunga nana i kawe mai. <sup>14</sup> No te kitenga ia o Ihu, ka riri, ka mea ki a ratou, Tukua nga  
 tamariki nohohi kia haere mai ki ahau, kua hoki ratou e araia atu: no nga penei hoki te rangatiratanga  
 o te Atua. <sup>15</sup> He pono taku e mea nei ki a koutou, Ki te kahore e rite te tango a tetahi i te  
 rangatiratanga o te Atua ki ta te tamaiti nohinohi, e kore ia e tomo ki roto. <sup>16</sup> Na okookona ana  
 ratou e ia, whakapakia iho ona ringa ki a ratou, manaakitia ana ratou.  
<sup>17</sup> Na, i a ia e haere ana i te huarahi, ka oma mai tetahi, ka tuku iho i nga turi ki a ia, ka ui, E  
 te Kaiwhakaako pai, me aha ahau ka whiwhi ai ki te ora tonu? <sup>18</sup> Na ka mea a Ihu ki a ia, He aha  
 ahau i kiia ai e koe he pai? kahore tetahi i pai, kotahi anake, ko te Atua. <sup>19</sup> E matau ana koe ki nga  
 ture, Kua e puremu, Kua e patu tangata, Kua e tahae, Kua e whakapae teka, Kua e kaia,  
 Whakahonoretia tou papa me tou whaea. <sup>20</sup> Na ka whakahoki tera, ka mea ki a ia, E te Kaiwhakaako,  
 kua rite katoa enei mea i ahau no toku tamarikitanga ake. <sup>21</sup> Na ka titiro a Ihu ki a ia, ka aroha ki  
 a ia, ka mea ki a ia, Kotahi te mea kahore nei i a koe: haere, hokona au mea, ka hoatu ki nga  
 rawakore, a e whai taonga koe ki te rangi: katahi ka haere mai, ka aru i ahau. <sup>22</sup> Otira ka tuku tona  
 mata i taua kupu, a haere pouri atu ana: he maha hoki ona taonga. <sup>23</sup> Na ka tiroiro a Ihu, ka mea  
 ki ana akonga, Ano te whakauaua o te tapoko o te hunga taonga ki te rangatiratanga o te Atua!  
<sup>24</sup> Na ka miharo nga akonga ki ana kupu. Otira ka whakahoki ano a Ihu, ka mea ki a ratou, E tama  
 ma, ano te whakauaua o te tapoko ki to te Atua rangatiratanga o te hunga e whakawhirinaki ana ki

<sup>25</sup> nga taonga! Erangi te haere o te kamera ra te kowhao o te ngira he mea takoto noa, he whakauaua  
<sup>26</sup> rawa ia te haere o te tangata taonga ki roto ki te rangatiratanga o te Atua. Na rahi rawa to ratou  
<sup>27</sup> miharo, ka mea ki a ratou ano, Ko wai ra e ora? Na ka titiro a Ihu ki a ratou, ka mea, E kore  
<sup>28</sup> tenei e taea e te tangata, ki te Atua ia ka taea: e taea hoki nga mea katoa e te Atua. Katahi ka  
<sup>29</sup> anga a Pita ka mea ki a ia, Na kua mahue nei i a matou nga mea katoa, kua aru nei i a koe. Na  
ka whakahoki a Ihu, ka mea, He pono taku e mea nei ki a koutou, Ki te whakarerea e tetahi tangata,  
he whare, he teina, he tuahine, he whaea, he papa, he tamariki, he mara, he whakaaro nona ki ahau,  
<sup>30</sup> ki te rongopai hoki, Ina, tataki rau nga mea e riro i a ia, i tenei wa, he whare, he teina, he tuahine,  
<sup>31</sup> he whaea, he tamariki, he mara, me te whakato; a, i te ao meake puta, he ora tonu. He tokomaha  
ia o mua e waiho ki muri; ko o muri hoki ki mua.  
<sup>32</sup> Na i te huarahi ratou e haere ana ki Hiruharama; me te haere ano a Ihu i mua i a ratou: na e  
miharo ana ratou; e aru matakua ana. Heoi ka mau ano ia i te tekau ma rua, ka anga ka korero ki a  
<sup>33</sup> ratou i nga mea meake pa ki a ia. Nana, e haere ana tenei tatou ki Hiruharama; a ka tukua te  
Tama a te tangata ki nga tohunga nui, ki nga karaipi; ka kiia e ratou kia mate, ka tuku hoki ratou i  
<sup>34</sup> a ia ki nga tauwi: Ka tawaia ia, ka tuwhaina, ka whiua, ka whakamatea, a i te toru o nga ra ka  
<sup>35</sup> ara. Na ka whakatata mai ki a ia a Hemi raua ko Hoani, nga tama a Heperi, ka mea, E te  
<sup>36</sup> Kaiwhakaako, e hiahia ana maua kia meatia e koe ta maua e inoi ai. Na ka mea ia ki a raua, He  
<sup>37</sup> aha ta korua e hiahia ai kia meatia e ahau ma korua? Ka mea raua ki a ia, Tukua ki a maua kia  
<sup>38</sup> noho, tetahi ki tou matau, tetahi ki tou mau, i tou kororia. Na ko te meatanga a Ihu ki a raua,  
Kahore korua e matau ki ta korua e inoi nei; e ahei ranei korua te inu i te kapu ka inumia nei e  
<sup>39</sup> ahau? kia iriiria ki te iriiringa ka iriiria nei ahau? Ka mea raua ki a ia, E ahei ano. Ka ki atu a  
Ihu ki a raua, E inu ano korua i te kapu ka inumia e ahau; e iriiria korua ki te iriiringa e iriiria ai  
<sup>40</sup> ahau: Tena ko te noho ki toku matau, ki toku mau ranei, ehara i te mea maku e hoatu, engari  
<sup>41</sup> ka riro i te hunga i whakaritea nei mo ratou. A, no te rongonga o te tekau, ka anga ka riri ki a  
<sup>42</sup> Hemi raua ko Hoani. Na karangatia ana ratou e Ihu ki a ia, ka mea ki a ratou, E mahara ana  
koutou, ko te hunga e kiia ana he kawana no nga tauwi hei whakatupu rangatira ki a ratou; ko o  
<sup>43</sup> ratou tangata rarahi hoki hei akiaki i a ratou. Otira e kore e pera i roto i a koutou: engari ki te  
<sup>44</sup> mea tetahi kia whakatupu tangata rahi i roto i a koutou, me whakatupu kaimahi ia ma koutou: Ki

te mea hoki tetahi o koutou kia whakatupu tino tangata, me whakatupu pononga ia ma te katoa.  
45

Kihai nei hoki te Tama a te tangata i haere mai kia mahia he mea mana, engari kia mahi ia, kia tuku hoki i a ia kia mate hei utu mo nga tangata tokomaha.

46

Na ka tae ratou ki Heriko: a, i a ia e haere atu ana i roto i Heriko, ratou ko ana akonga me te mano tini, e noho ana a paratimiuha, tama a Timiuha, he matapo, i te taha o te ara, ki te tonono mea

47

mana. A, i tona rongonga ko Ihu o Nahareta tena, ka anga ia ka karanga, ka mea, E ihu, e te

48

Tama a Rawiri, kia aroha ki ahau. A he tokomaha ki te riri i a ia kia noho puku, heoi tino rahi

49

ake tana karanga, E te Tama a Rawiri, kia aroha ki ahau. Na ka tu a Ihu, ka mea kia karangatia ia. A karangatia ana e ratou te matapo, ka mea ki a ia, Kia maia, whakatika; e karanga ana ia ki a

50

koe. Na ka whakarerea e ia tona kakahu, a whakatika ana, haere ana ki a Ihu. Na ka oho a Ihu, ka mea ki a ia, He aha tau e hiahia na kia meatia e ahau mau? Ka ki te matapo ki a ia, E te

51

52

Ariki, kia titiro ahau. Ka mea a Ihu ki a ia, Haere: na tou whakapono koe i ora ai. Na titiro tonu iho ia, aru ana i a Ihu i te ara.

## Chapter 11

1

A, no ka tata ratou ki Hiruharama, ki Petapaki, ki Petani, a ka tae ki Maunga Oriwa, tokorua

2

ana akonga i tonoa e ia, A i mea ia ki a raua, Haere ki te kainga e anga mai ana ki a korua: e tomo kau ki reira, ka kite korua i tetahi kuao e here ana, kahore ano kia nohoia e te tangata; wetekina,

3

arahina mai. A ki te ki mai tetahi tangata ki a korua, He aha tenei ka meinga ai e korua? ka mea

4

atu, E mea ana te Ariki ki a ia mana: na ka tukua tonutia mai ki konei. Na haere ana raua, ka kite

5

i te kuao e here ana ki te kuwaha i waho i te ara; a wetekina ana e raua. A ka mea etahi o te hunga

6

e tu ana i reira ki a raua, he aha ta korua e wewete na i te kuao? Na ka korerotia e raua ki a ratou

7

ta Ihu i mea ai: a tukua ana raua e ratou. Ka arahina te kuao ki a Ihu, na wharikitia ana o raua

8

kakahu ki runga ki a ia; a noho ana ia i runga. Na he tokomaha i whariki i o ratou kakahu ki te

9

ara: ko etahi i kokoti i nga manga o nga rakau, wharikitia ana ki te ara. Ko te hunga i haere i mua, me te hunga i haere i muri, i karanga, i mea, Ohana: Ka whakapaingia ia e haere mai ana i runga i

10

te ingoa o te Ariki: Ka whakapaingia te rangatiratanga e haere mai ana, te rangatiratanga o to

11  
tatou matua o Rawiri: Ohana i runga rawa. Na ka tomo a Ihu ki Hiruharama, ki roto hoki ki te temepara: a, ka mutu tana tiroiro i nga mea katoa, ko te wa hoki o te ahiahi, ka haere ratou ko te tekau ma rua ki Petani.

12 Na, i te aonga ake, i a ratou kua puta i Petani, ka hiakai ia: 13 A, i tona kitenga i tetahi piki i tawhiti, he rau ona, ka haere ia, me kore e kitea tetahi mea i runga: a, no tona taenga, kihai i kitea e ia tetahi mea, he rau anake: ehara hoki i te wa o te piki. 14 Na ka oho a Ihu, ka mea ki taua rakau,

15 Kua rawa te tangata e kai i tetahi hua ou ake tonu atu; me te whakarongo ano ana akonga. A ka tae ratou ki Hiruharama: na ka tomo a Ihu ki te temepara, ka anga ki te pei ki waho i te hunga e hoko atu ana, e hoko mai ana i roto i te temepara, a whakatahuritia ake nga tepu o nga

kaiwhakawhitiwhiti moni, me nga nohoanga o nga kaihoko k ukupa; 16 A kihai i tukua e ia kia

mauria tetahi oko e te tangata ra te temepara. 17 A i whakaako ia, i mea ki a ratou, Kahore koia i tuhituhia, Ka kiia toku whare he whare inoi mo nga tauwi katoa? otiia kua meinga nei e koutou

hei ana mo nga kaipahua. 18 I rongu hoki nga tohunga nui me nga karaipi, a ka rapu ki te pehea e

whakangaromia ai ia: i matakau hoki ratou i a ia, no te mea i miharo te mano katoa ki tana ako. 19 A

i nga ahiahi ka haere ia ki waho o te pa. 20 A, i te ata i a ratou e haere ana, ka kite i te piki, kua

maroke ake i nga pakiaka. 21 Na ka mahara a Pita, ka mea ki a ia, E te Kaiwhakaako, na, te piki i

kanga ra e koe, kua maroke. 22 Na ka whakahoki a Ihu, ka mea ki a ratou, Kia mau te whakapono

ki te Atua. 23 He pono hoki taku e mea nei ki a koutou, Ki te mea tetahi ki tenei maunga, Kia ranga atu koe, kia whakataka ki te moana: e kore hoki e ruarua tona ngakau, engari ka whakapono ia tera

e puta mai nga mea i kiia e ia; ka whiwhi ia ki tana i mea ai. 24 Koia ahau ka mea nei ki a koutou, Ko nga mea katoa e tono ai koutou ina inoi, me whakapono ka riro mai i a koutou, a ka whiwhi

koutou. 25 A, ka tu koutou, ka karakia, ki te mea he take riri ta koutou ki tetahi, murua: kia murua

ai hoki o koutou he e to koutou Matua i te rangi. 26 Na ki te kore koutou e muru, e kore ano to koutou Matua i te rangi e muru i o koutou he.

27 Na ka tae ano ratou ki Hiruharama: a, i a ia e haereere ana i te temepara, ka haere mai ki a

ia nga tohunga nui, me nga karaipi, me nga kaumatua: 28 Ka mea ki a ia, Tena, te mana i meatia

ai enei mea e koe? na wai hoki tenei mana i hoatu ki a koe, i mea ai koe i enei mea? 29 Na ka whakahoki a Ihu, ka mea ki a ratou, Maku hoki e ui ki a koutou kia kotahi kupu, ma koutou e whakahoki mai ki ahau, katahi ka korerotia e ahau ki a koutou te mana i mea ai ahau i enei mea.

30 Ko te iriiringa a Hoani, no te rangi, no te tangata ranei? korerotia mai ki ahau. 31 A ka kororeroro

ratou ki a ratou ano, ka mea, Ki te mea tatou, No te rangi; ka mea ia, ha, he aha koutou te whakapono ai ki a ia? <sup>32</sup> A ki te mea tatou, No te tangata; ka matakou ratou i te iwi: ki ta ratou katoa hoki he poropiti pono a Hoani. <sup>33</sup> Na ka whakahoki ratou, ka mea ki a Ihu, Kahore matou e matau. Na ka mea a Ihu ki a ratou, E kore ano e korerotia e ahau ki a koutou te mana i mea ai ahau i enei mea.

## Chapter 12

<sup>1</sup> Na ka timata ia ki te korero kupu whakarite ki a ratou. I whakataiepatia ana ki te taiepa, na ka keria te takotoranga waina, hanga ana tetahi whare tiketike, tukua ana e ia ki nga kaimahi, na ko tona haerenga ki tawhiti. <sup>2</sup> A i te po i tika ai ka tonoa e ia he pononga ki nga kaimahi ki te tiki i etahi hua o te mara waina i a ratou. <sup>3</sup> Na ka mau ratou ki a ia, a whiua ana, tonoa kautia atu ana. <sup>4</sup> Na ka tonoa ano e ia ki a ratou tetahi atu pononga; a ka akina ia e ratou ki te kohatu, ngawha iho tona matenga, a ka tukinotia ia e ratou ka tonoa atu. <sup>5</sup> Na ka tonoa ano e ia tetahi atu; a whakamatea iho ia e ratou; me era atu, tona tini, ko etahi i whiua, ko etahi i whakamatea. <sup>6</sup> Na kotahi ake ano tana, he tama aroha nana, ko ia o muri rawa i tonoa ai e ia ki a ratou, i mea hoki ia, E hopohopo ratou ki taku tama. <sup>7</sup> Na ka mea aua kaimahi ki a ratou ano, Ko te tangata tenei mona te kainga; tena, tatou ka whakamate i a ia, a mo tatou te kainga. <sup>8</sup> Na ka mau ratou ki a ia, whakamatea iho, maka ana ki waho o te mara waina. <sup>9</sup> Na, ka pehea te rangatira o te mara waina? ka haere ia, ka whakangaro i nga kaimahi, ka hoatu te mara waina ki etahi atu. <sup>10</sup> Kahore koia koutou i kite i tenei karaipiture; Ko te kohatu i kapea e nga kaihanganga kua meinga hei mo te kokonga: <sup>11</sup> Na te Ariki tenei, a he mea whakamiharo hoki ki a tatou kanohi? <sup>12</sup> Na ka whai ratou kia hopukina ia, otiia i matakou i te mano: i matau hoki ratou mo ratou te kupu whakarite i korerotia nei e ia: na whakarerea ana ia, haere ana ratou. <sup>13</sup> Na ka tonoa mai e ratou ki a ia etahi o nga parihi, ratou ko nga Heroriana, hei hopu mo tetahi kupu ana. <sup>14</sup> A, no to ratou taenga mai, ka mea ki a ia, E te Kaiwhakaako, e matau ana matou he kupu pono tau, e kore ano ta te tangata e whakaaroa e koe; e kore ano koe e titiro ki te kanohi tangata, engari ka whakaako i te ara a te Atua i runga i te pono. H e mea tika ranei te hoatu takoha ki a Hiha, ehara ranei? <sup>15</sup> Me hoatu ranei e matou, kaua ranei e hoatu? Otira i mohio ia ki to ratou tinihanga, ka mea ki a ratou, He aha koutou ka whakamatautau ai i ahau? mauria mai he pene ki

16  
 ahau, kia kite ahau. A mauria ana mai. Na ko tana meatanga ki a ratou, No wai tenei ahua me  
 te tuhituhinga? Ka mea ratou ki a ia, No Hiha. 17 Na ka whakahoki a Ihu, ka mea ki a ratou, Hoatu  
 ki a Hiha nga mea a Hiha, ki te Atua nga mea a te Atua. A miharo ana ratou ki a ia.

18 Na ka haere mai ki a ia nga Haruki, e mea nei kahore he aranga; ka ui ki a ia, ka mea, 19 E  
 te kaiwhakaako, i tuhituhi a Mohi ki a matou, Ki te mate te tuakana o tetahi tangata, mahue iho  
 tana wahine, kahore he tamariki hei waihotanga iho, me tango tana wahine e tona teina, ka whakatupu

20 uri ai mo tona tuakana. Na tera tetahi whanau, tokowhitu, he tuakana, he teina: ka tango to mua  
 i te wahine, ka mate, a kahore he uri hei waihotanga iho. 21 Katahi ka tango te tuarua i a ia, ka

mate, kahore ano hoki ona uri hei waihotanga iho: pera tonu ano hoki te tuatoru. 22 I tango ano te  
 tokowhitu i a ia, a kahore o ratou uri hei waihotanga iho: muri rawa iho ka mate ko te wahine.

23 Na, i te aranga, i te mea ka ara ratou, ma wai o ratou te wahine? he wahine hoki ia na ratou

24 tokowhitu. Na ka whakahoki a Ihu, ka mea ki a ratou, Ehara ianei tenei i te mea i he ai koutou,  
 kahore nei hoki e mohio ki nga karaipiture, ki te kaha hoki o te Atua? 25 I te mea hoki ka ara mai  
 ratou i te hunga mate, e kore e marena, e kore ano e hoatu kia marenatia; engari ka rite ki nga

26 anahera o te rangi. Na mo te hunga mate, mo to ratou aranga mai: kahore koutou i kite i roto i  
 te pukapuka a Mohi, i te wahi ki te Rakau, i ta te Atua i ki ai ki a ia, i mea ai, Ko te Atua ahau o

27 Aperahama, ko te Atua o Ihaka, ko te Atua o Hakopa? Ehara ia i te Atua no te hunga mate,  
 engari he Atua no te hunga ora: na nui atu to koutou he.

28 A, ko te haerenga mai o tetahi o nga karaipi, ko te rongonga ki a ratou e totohe ana, ka kite  
 he pai tana whakahoki ki a ratou, ka ui ki a ia, Ko tehea te tuatahi o nga ture katoa? 29 Na ko te  
 whakahokinga a Ihu ki a ia, Ko te tuatahi o nga ture katoa, Whakarongo, e Iharaira: Ko te Ariki,

30 ko to tatou Atua, he Ariki kotahi: Kia whakapaua hoki tou ngakau, tou wairua, tou hinengaro,  
 tou kaha, ki te aroha ki te Ariki, ki tou Atua: ko te ture tuatahi tenei. 31 Ko te tuarua tenei, Kia

32 aroha koe ki tou hoa tata, ano ko koe. Kahore he ture ke atu e rahi ake ana i enei. Na ka mea te  
 karaipi ki a ia, he pono, e te Kaiwhakaako, he tika tau korero kotahi tonu ia, a kahore tetahi ko ia

33 anake: A ko te whakapau i te ngakau, i te hinengaro, i te wairua, i te kaha, ki te aroha ki a ia,  
 me te aroha ki tona hoa tata, ano ko ia, nui atu ena i nga tahunga tinana, i nga patunga tapu katoa.

34 A, no te kitenga o ihu he kupu mohio tana i whakahoki ai, ka mea ki a ia, Kahore koe i matara  
 atu i te rangatiratanga o te Atua. A kihai tetahi tangata i maia ki te ui ki a ia i muri iho.

<sup>35</sup> Na ka ki a Ihu, ka mea, i a ia e whakaako ana i roto i te temepara, Na te aha nga karaipi ka  
 mea ai, he tama na Rawiri a te Karaiti? <sup>36</sup> Na Rawiri ake hoki te kupu i roto i te Wairua Tapu, I  
 mea te Ariki ki toku Ariki, hei toku matau koe noho ai, kia meinga ra ano e ahau ou hoariri hei  
 turanga waewae mou. <sup>37</sup> Ko Rawiri tonu tenei e karanga nei ki a ia he Ariki; a no hea ia i tama ai  
 ki a ia? A ahua ana te mano tini ki te whakarongo ki a ia. <sup>38</sup> Na i mea ano ia ki a ratou i tana  
 akoranga, Kia tupato ki nga karaipi, ko ta ratou e rawe ai ko te haereere i roto i nga kakahu roroa,  
 me nga ohatanga i nga kainga hokohoko, <sup>39</sup> Me nga nohoanga rangatira i nga whare karakia, me  
 nga nohoanga rangatira i nga hakari: <sup>40</sup> Ka pau nei i a ratou nga whare o nga pouaru, a ka maminga  
 ki te inoi roa: he nui rawa te mate e pa ki enei.  
<sup>41</sup> A ka noho a Ihu i te ritenga atu o te takotoranga moni, ka matakitaki ki te mano e panga  
 moni ana ki te takotoranga moni: a he tokomaha nga tangata whai taonga i panga moni maha ki  
 roto. <sup>42</sup> Na ko te haerenga mai o tetahi pouaru rawakore, ka maka i nga mea nohinohi, e rua, kotahi  
 patena ki te huia. <sup>43</sup> Na ka karangatia e ia ana akonga, ka mea ki a ratou, he pono taku e mea nei  
 ki a koutou, Ko ta tenei pouaru rawakore i maka ai, nui atu i a ratou katoa e maka ra kite takotoranga  
 moni: <sup>44</sup> Ko ratou katoa hoki, he hira nei o ratou taonga, i maka ko tetahi wahi; tena ko ia i tona  
 rawakoretanga i maka i ana mea katoa, ara i tona oranga katoa.

### Chapter 13

<sup>1</sup> A, i a ia e haere atu ana i te temepara, ka mea tetahi o ana akonga ki a ia, E te Kaiwhakaako,  
 nana, te tu o nga kohatu, te tu o nga whare! <sup>2</sup> Na ka whakahoki a Ihu, ka mea ki a ia, Ka kite koe  
 i enei whare nunui? e kore tetahi kohatu e waiho i konei i runga ake i tetahi kohatu, engari ka  
 whakahoroa. <sup>3</sup> A, i a ia e noho ana i runga i Maunga Oriwa i te ritenga atu o te temepara, ka ui  
 puku ki a ia a Pita, a Hemi, a Hoani, a Anaru, <sup>4</sup> Korerotia mai ki a matou, ko ahea enei mea, a he  
 aha te tohu ina tata enei mea katoa te rite?  
<sup>5</sup> Na ka anga ia, ka korero ki a ratou, Kia tupato kei mamingatia koutou e te tangata: <sup>6</sup> He  
 tokomaha hoki e haere mai i runga i toku ingoa, e mea, Ko ahau ia; a he tokomaha e mamingatia.  
<sup>7</sup> E rongu koutou ki nga pakanga, ki nga hau pakanga, kei ohore: kua takoto hoki he putanga mo  
 aua mea; taihoa rawa ia te mutunga. <sup>8</sup> Ka whakatika hoki tetahi iwi ki tetahi iwi, tetahi rangatiranga



ki tetahi rangatiratanga: a he tini nga wahi e puta ai he ru; ka puta ano hoki he po matekai: ko te  
<sup>9</sup> timatanga enei o nga mamae. Na, kia tupato ki a koutou: ka tukua hoki koutou ki nga runanga;  
ka whiua koutou i roto i nga whare karakia; a ka whakaturia koutou ki te aroaro o nga kawana, o  
<sup>10</sup> nga kingi, mo te whakaaro ki ahau, hei mea whakaatu ki a ratou. Kua takoto ia te tikanga kia  
<sup>11</sup> matua kauwhautia te rongopai ki nga tauwi katoa. Ina arahina koutou ki te whakawa, a ka tukua  
atu, kua e manukanuka wawe ki ta koutou e korero ai: engari ko te mea e hoatu ki a koutou i taua  
haora, ko tena ta koutou e korero ai: ehara hoki i te mea ma koutou nga korero, engari ma te Wairua  
<sup>12</sup> Ta pu. Na ka tukua te tuakana e te teina ki te mate, te tamaiti hoki e te papa; a ka whakatika nga  
<sup>13</sup> tamariki ki nga matua, ka mea kia whakamatea. A ka kinongia koutou e nga tangata katoa, he  
mea mo toku ingoa: ko te tangata ia e u ana a taea noatia te mutunga, ko ia e ora.  
<sup>14</sup> A, ki te kite koutou i te mea whakarihariha, i te mea whakangaro e tu ana i te wahi e kore e  
<sup>15</sup> tika, kia matau te kaititiro pukapuka, ko reira me rere te hunga i Huria ki nga maunga: Ko te  
tangata hoki i runga i te whare kua e heke iho ki roto ki te whare, kua hoki e tomo ki te tiki i  
<sup>16</sup> tetahi mea i roto i tona whare: Kua ano te tangata i te mara e hoki ki muri, ki te tiki i tona  
<sup>17</sup> kakahu. Aue te mate mo te hunga e hapu ana, mo nga mea hoki e whangai ana ki te u, i aua ra!  
<sup>18</sup> Ma koutou ia e inoi kei rokohanga koutou e te whati i te hotoke. He whakapawera hoki aua  
<sup>19</sup> ra, kahore ona rite o te orokohanganga ra ano i hanga nei e te Atua, a mohoa noa nei, kahore hoki  
<sup>20</sup> he pera a muri ake nei. Me i kahore hoki aua ra i poroa i waenga e te Ariki, e kore tetahi kikokiko  
<sup>21</sup> e ora: otira ka whakaaroa te hunga whiriwhiri i whiriwhiria e ia, a poroa ana aua ra i waenga. Ki  
<sup>22</sup> te mea tetahi ki a koutou i reira, Na, tenei a te Karaiti; Na, tera: kua e whakaponohia: E whakatika  
hoki nga Karaiti teka, me nga poropiti teka, ka whakaatu i nga tohu me nga mea whakamiharo, a  
<sup>23</sup> me i taea, ka mamingatia e ratou te hunga whiriwhiri. Kia tupato ra koutou: na, kua korerotia  
wawetia nei e ahau nga mea katoa ki a koutou.  
<sup>24</sup> Na, i aua ra, i muri iho i taua whakapawera, ka whakapouritia te ra, e kore hoki e titi te  
<sup>25</sup> atarau. Ka taka iho nga whetu o te rangi, ka ngaueue nga mea kaha o nga rangi. Na ko reira  
<sup>26</sup> kitea ai te Tama a te tangata e haere mai ana i runga i nga kapua, me te kaha nui, me te kororia.  
<sup>27</sup> Ko reira ano ia tonono ai i ana anahera, a ka huihuia ana i whiriwhiri ai i nga hau e wha, i te pito  
o te whenua tae noa ki te pito o te rangi.  
<sup>28</sup> Na kia akona koutou e te piki ki tetahi kupu whakarite: I tona manga e ngawari ana, e puta  
<sup>29</sup> ana hoki nga rau, ka mohio koutou ka tata te raumati: Waihoki ko koutou, ina kite i enei mea e

<sup>30</sup>  
 pauta mai ana, ka matau ka tata ia, kei nga kuwaha. He pono taku e mea nei ki a koutou, E kore  
<sup>31</sup>  
 tenei whakatupuranga e pahemo, kia puta ra ano enei mea katoa. Ko te rangi me te whenua e  
<sup>32</sup>  
 pahemo: ko aku kupu ia e kore e pahemo. Otiia kahore tetahi tangata e matau ki taua ra, ki taua  
<sup>33</sup>  
 haora, kahore nga anahera o te rangi, kahore te Tama, ko te Matua anake. Kia tupato, kia mataara,  
<sup>34</sup>  
 me te inoi ano: kahore hoki koutou e matau ki te wa, ko a hea ranei. Ka rite hoki ki te tangata  
 e haere ana ki tawhiti, mahue iho i a ia tona whare, a tukua iho e ia nga tikanga ki ana pononga,  
<sup>35</sup>  
 tana mahi ma tetahi, ma tetahi, ka whakahau iho hoki ki te kaitiaki tatau kia mataara. Ae ra, kia  
 mataara: kahore hoki koutou e matau ki te wa e haere mai ai te rangatira o te whare, ko te ahiahi,  
<sup>36</sup>  
 ko waenganui po ranei, ko te tangihanga o te heihei, ko te atatu ranei: Kei puta whakarere mai,  
<sup>37</sup>  
 ka rokohanga koutou e ia e moe ana. Na, ko taku ka mea atu nei ki a koutou, e meatia ana ano  
 ki te katoa, Kia mataara.

## Chapter 14

<sup>1</sup>  
 Na, kia rua ake nga ra ko te kapenga me te hakari o te taro rewenakore: na ka rapu nga tohunga  
<sup>2</sup>  
 nui me nga karaipi i tetahi tinihanga e mau ai ia, e whakamatea ai. I mea hoki ratou, Kauaka i te  
<sup>3</sup>  
 hakari, kei ngangau te iwi. A, i a ia i Petani i te whare o Haimona repera, i a ia ano e noho ana  
 ka haere mai tetahi wahine me tetahi pouaka kohatu, ki tonu i te hinu kakara, he tino nara, he mea  
<sup>4</sup>  
 utu nui; a wahia ana e ia te pouaka kohatu, ringihia ana ki tona matenga. I riri ano etahi i roto i  
<sup>5</sup>  
 a ratou, i mea, Hei aha tenei maumau o te hinu kakara? Maha atu hoki i te toru rau nga pene te  
<sup>6</sup>  
 utu me i hokona tenei hinu, na ka hoatu ki te hunga rawakore. Na ka amuamu ratou ki a ia. Ka  
 mea atu a Ihu, Waiho atu u ana; he aha ta koutou e whakapawerawera na i a ia? he mahi pai tana i  
<sup>7</sup>  
 mea nei ki ahau. Kei a koutou tonu hoki te hunga rawakore i nga wa katoa, hei atawhaitanga hoki  
<sup>8</sup>  
 ratou ma koutou i nga wa e pai ai koutou: e kore ia ahau e noho tonu ki a koutou. Kua mahia e  
<sup>9</sup>  
 ia te mea e taea e ia: kua whakawahia e ia i mua nei toku tinana mo te tanumanga. He pono taku  
 e mea nei ki a koutou, Ko nga wahi katoa o te ao e kauwhautia ai tenei rongopai, ka korerotia ano  
<sup>10</sup>  
 ta tenei wahine i mea ai, hei whakamahara ki a ia. Na ka haere a Hura Ikariote, tetahi o te tekau

11  
ma rua, ki nga tohunga nui, ki te tuku i a ia ki a ratou. A, no ka rongu ratou, ka hari, ka whakaae  
kia hoatu he moni mana. Na ka rapu ia ki te wa pai e tukua ai ia.

12  
A, i te ra tuatahi o te taro rewenakore, i te wa e patua ai te kapenga, ka mea ana akonga ki  
a ia, Ko hea koe pai ai kia haere matou ki te taka, kia kai ai koe i te kapenga? 13 Na ka tonoa e ia  
tokorua o ana akonga, ka mea ki a raua, haere ki te pa, a ka tutaki mai ki a korua he tangata e mau

14  
ana i te taha wai: haere i muri i a ia. A ka mea ki te tangata o te whare e tomo ai ia, E mea ana  
te Kaiwhakaako, Kei hea te ruma e kai ai matou ko aku akonga i te kapenga? 15 A mana tonu e  
whakaatu ki a korua he ruma nui i runga, oti rawa te whariki, te whakapai: hei reira taka ai ma

16  
tatou. Na haere ana ana akonga, a, no te taenga ki te pa, ka kite i tana i korero ai ki a raua: a taka

17  
ana e raua te kapenga. A, no ka ahiahi, ka haere atu ia me te tekau ma rua. 18 I a ratou e noho  
ana, e kai ana, ka mea a Ihu, He pono taku e mea nei ki a koutou, Ko tetahi o koutou, kei toku taha

19  
nei e kai ana, mana ahau e tuku. Na ka pa te pouri ki a ratou, ka ki takitahi ki a ia, Ko ahau koia?

20  
Na ka mea ia ki a ratou, Ko tetahi o te tekau ma rua, ko ia e toutou tahi nei maua ki te rihi. 21 E  
haere ana te Tama a te tangata, e pera ana me te mea i tuhituhia mona: otiia aue te mate mo te

22  
tangata e tukua ai te Tama a te tangata! he mea pai ke mo taua tangata me i kaua ia e whanau. A,  
i a ratou e kai ana, ka mau ia ki te taro, a, ka mutu te whakapai, ka whawhati, na ka hoatu ki a ratou,

23  
ka mea, Tangohia, kainga: ko toku tinana tenei. Na ka mau ia ki te kapu, a, ka mutu te

24  
whakawhetai, ka hoatu ki a ratou: a ka inumia e ratou katoa. A ka mea ia ki a ratou, Ko oku toto

25  
enei, ko o te kawenata hou, e whakahekea ana mo te tini. He pono taku e mea nei ki a koutou,  
E kore ahau e inu atu ano i te hua o te waina, kia taea ra ano taua ra e inumia houtia ai e ahau i te

26  
rangatiratanga o te Atua. A, no ka mutu ta ratou himene, ka haere ratou ki Maunga Oriwa.

27  
Katahi a Ihu ka mea ki a ratou, Ko koutou katoa na ka he: kua oti hoki te tuhituhi, Ka patua e

28  
ahau te hepara, a ko nga hipi ka whakamararatia. Otira, muri iho i toku aranga, ka haere ahau i

29  
mua i a koutou ki Kariri. Na ka mea a Pita ki a ia, Ahakoa he te katoa, ko ahau e kore. A ka  
mea a Ihu ki a ia, He pono taku e mea nei ki a koe, Ko akuanei, i tenei po ano, i te mea kahore ano

31  
kia rua nga tangihanga o te tikaokao, ka toru au whakakorenga i ahau. Katahi ka tino arita rawa  
tana meatanga atu, Ahakoa kua takoto te tikanga kia mate tahi au me koe, e kore ahau e whakakahore  
i a koe. I pera ano te korero a ratou katoa.

<sup>32</sup> A ka tae ratou ki tetahi wahi, e huaina ana ko Kehemane: na ka mea atu ia ki ana akonga,  
<sup>33</sup> Hei konei koutou noho ai, kia inoi ahau. Na ka mau ia ki a Pita ratou ko Hemi, ko Hoani, a ka  
<sup>34</sup> timata te koera, te tumatatenga; Na ka mea ia ki a ratou, Kei te tino pehia toku wairua e te pouri,  
<sup>35</sup> tata pu ki te mate: noho iho koutou i konei, kia mataara. Na ka haere ia ki pahaki tata atu, ka  
<sup>36</sup> hinga ki te whenua, ka inoi, me kahore e ahei kia pahemo atu tenei haora i a ia. A ka mea ia, E  
 Apa, e Pa, ka taea e koe nga mea katoa; tangohia atu tenei kapu i ahau: otiia kaua e waiho i taku e  
<sup>37</sup> pai ai, engari i tau. Na ka haere ia, ka rokohanga atu e moe ana ratou, a ka mea ia ki a Pita, E  
<sup>38</sup> Haimona, kei te moe ia koe? e kore ranei e taea e koe te mataara kia kotahi haora? Kia mataara,  
 me te inoi, kei uru koutou ki te whakamatautauranga. Kei te hihiko te wairua, ko te kikokiko ia kei  
<sup>39</sup> te ngoikore. Na ka haere atu ano ia, ka inoi, me te whakahua i aua kupu ano. Na ka hoki mai  
<sup>40</sup> ano ia, ka rokohanga e moe ana ratou, he nui hoki te taimaha o o ratou kanohi; a kihai ratou i matau  
<sup>41</sup> ki ta ratou e whakahoki ai ki a ia. Na haere ana ano ia, ko te toru o nga haerenga, ka mea ki a  
 ratou, E moe ra, whakata i a koutou: heoi ra, kua taea te haora; na, ka tukua te Tama a te tangata  
<sup>42</sup> ki nga ringa o te hunga hara. Maranga, ka haere tatou; na, ka tata te kaituku i ahau.  
<sup>43</sup> Na inamata, i a ia tonu e korero ana, kua puta a Hura, tetahi o te tekau ma rua, me te tini o  
 te tangata, me nga hoari, me nga patu, i ahu mai i nga tohunga nui, i nga karaipi, i nga kaumatua.  
<sup>44</sup> Na kua oti tetahi tohu te whakarite ki a ratou e tona kaituku; i mea ia, Ko taku tangata e kihi ai,  
<sup>45</sup> ko ia tera; hopukina, kia mau te arahi atu. Na, i tona taenga mai, tika tonu ki a ia, ka mea, E  
<sup>46</sup> Rapi; a kihi ana i a ia. Na ka mau o ratou ringa ki a ia, a hopukina ana ia. Na ka unuhia e  
<sup>47</sup> tetahi o te hunga e tu ana i reira tana hoari, haua iho e ia te pononga a te tohunga nui, poroa ana  
<sup>48</sup> tona taringa. Na ka whakahoki a Ihu, ka mea ki a ratou, He tahae ahau, i haere mai ai koutou  
<sup>49</sup> me nga hoari, me nga patu, ki te hopu i ahau? I a koutou ahau e whakaako ana i te temepara i  
 tena ra, i tena ra, a kihai koutou i hopu i ahau: otira i mahia tenei mea kia rite ai nga karaipiture.  
<sup>50</sup> Na whakarere ana ratou katoa i a ia, oma ana. Na tera tetahi taitamariki i aru tahi mai me ia,  
<sup>51</sup> takaia ai he kakahu rinena ki runga ake i tona kirikau: na ka hopukina ia e ratou: Otira i  
<sup>52</sup> whakarerea atu e ia te kakahu rinena, a oma tahanga atu ana.  
<sup>53</sup> Na ka arahina atu e ratou a Ihu ki te tino tohunga: a ka huihui mai ki a ia nga tohunga nui  
<sup>54</sup> katoa, nga kaumatua me nga karaipi. Na tera a Pita te aru ra i a ia i tawhiti, tae noa ki roto, ki

te marae o te tino tohunga; a tera te noho ra me nga kaimahi, painaina ai i a ia i te taha o te ahi.  
55

Na i rapu nga tohunga nui me te runanga katoa i te kororo mo Ihu, e whakamatea ai; heoi kihai  
56 i kitea. He tokomaha hoki nga kaiwhakapae teka mona, otia kihai i rite a ratou korero. Na  
57

ka whakatika etahi, ka whakapae teka ki a ia, ka mea, I rongo matou ki a ia e mea ana, Maku e  
58 whakahoro tenei whare tapu i hanga nei e te ringa, a kia toru nga ra ka hanga e ahau tetahi atu,

ehara i te ringa i mahi. A ahakoa tera kihai a ratou korero i riterite. Na ka whakatika e tohunga  
59 nui i waenganui, ka ui ki a Ihu, ka mea, Kahore au kupu? he aha ta enei e whakaatu nei mou?  
60

61 Heoi kihai ia i kuihi, kahore hoki he kupu i whakahokia e ia. Na ka ui ano te tino tohunga, ka  
mea ki a ia, Ko koe ranei a te Karaiti, te Tama a Tera e whakapaingia nei? Ka mea a Ihu ki a ia,  
62 Ko ahau ia: a tera koutou e kite i te Tama a te tangata e noho ana i te ringa matau o te kaha, e haere

mai ana me nga kapua o te rangi. Katahi ka haehae te tino tohunga i ona kakahu, ka mea, hei  
63 aha atu ma tatou etahi kaiwhakaatu ano? Kua rongo koutou ki te kohukohu: e pehea ana o koutou

whakaaro? Na ka whakaae ratou katoa ka tika te mate mona. Katahi ka anga etahi ka tuwha ki  
64 a ia, ka arai i tona kanohi, ka kuru i a ia, a ka mea ki a ia, Poropiti mai: a ka pakipakia ia e nga  
kaimahi ki o ratou ringa.

65 A, i a Pita i te marae i raro, ka haere mai tetahi o nga kotiro a te tino tohunga: A, i tona  
kitenga i a Pita e painaina ana, ka titiro atu ki a ia, a ka mea, Ko koe ano tetahi i te tangata o Nahareta,

ara i a Ihu. Otira ka whakakahore ia, ka mea, Kahore rawa ahau i matau, i marama ranei ki tau  
66 e korero mai na: na ka puta atu ia ki te whakamahau: a ka tangi te tikaokao. A ka kite te kotiro  
67

i a ia, ka anga ano ka korero ki te hunga e tu tata ana, No ratou hoki tenei. Otira ka whakakahore  
68 ano ia. A muri tata iho ka korero ano ki a Pita te hunga e tu tata ana, He pono ko koe tetahi o ratou;

no Kariri hoki koe. Katahi ia ka timata te kanga, te oati, Kahore ahau e matau ki tena tangata e  
71 korero na koutou. I reira ka tangi ano te tikaokao, ko te tuarua o nga tangihanga. Na ka mahara  
72 a Pita ki te kupu i korero ai a Ihu ki a ia, E kore e tuarua te tangi o te tikaokao, ka toru au  
whakakahoretanga i ahau. A ka whakaaroa iho e ia, na ka tangi.

## Chapter 15

<sup>1</sup> A, mea kau ake te ata, ka runanga nga tohunga nui, nga kaumatua, nga karaipi, me te runanga  
katoa, a ka herea e ratou a Ihu, ka arahina atu, a tukua atu ana ki a Pirato. <sup>2</sup> Ka ui a Pirato ki a ia,  
Ko koe ranei te Kingi o nga Hurai? Ka whakahokia e ia ki a ia, Kua korerotia na e koe. <sup>3</sup> He maha  
hoki nga mea i whakapaea ki a ia e nga tohunga nui, kaore ia i korero. <sup>4</sup> Ka ui ano a Pirato ki a ia,  
ka mea, Kahore au kupu whakahoki? Na, te tini o nga kupu e korero nei ratou mou. <sup>5</sup> Heoi kahore  
a Ihu i whakahoki atu ano; no ka miharo a Pirato. <sup>6</sup> Na i taua hakari kotahi te herehere e tukua ana  
e ia ki a ratou, ko ta ratou e inoi ai. <sup>7</sup> Na i reira tetahi tangata ko Parapa te ingoa, e here tahi ana  
me ona hoa tutu, he hunga i patu tangata i te ngangaretanga. <sup>8</sup> Na ka haere te mano, ka anga ka  
tono ki a ia kia peratia me tana i mea ai ki a ratou i mua. <sup>9</sup> Na ka whakahoki a Pirato ki a ratou, ka  
mea, E pai ana ranei koutou kia tukua e ahau ki a koutou te Kingi o nga Hurai? <sup>10</sup> I mahara hoki  
ia he hae i tukua ai ia e nga tohunga nui. <sup>11</sup> Otira ka whakatutehutia e ratou te mano, kia tukua e  
ia ko Parapa ke ki a ratou. <sup>12</sup> Na ka whakahoki ano a Pirato, ka mea ki a ratou, He aha oti ta koutou  
e pai ai kia meatia e ahau ki tenei e huaina nei e koutou ko te Kingi o nga Hurai? <sup>13</sup> Ka karanga  
ano ratou, Ripekatia. <sup>14</sup> Na ka mea a Pirato ki a ratou, He aha koia tana kino i mea ai? Heoi nui  
noa atu ta ratou hamama, Ripekatia ia.

<sup>15</sup> Na, i tona hiahia kia whakamarietia te mano, tukua ana e Pirato a parapa ki a ratou, a, ka oti  
a Ihu te whiu, ka tukua kia ripekatia. <sup>16</sup> Na ka arahina ia e nga hoia ki te marae, ara ki te whare  
whakawa, a karangarangatia ana te ropu katoa. <sup>17</sup> Ka whakakahuria ia ki te kakahu papura, a, ka  
oti tetahi karauna tataramoa te whiri, ka potaea ki a ia. <sup>18</sup> Na ka anga ratou ka oha ki a ia, Tena  
koe, e te Kingi o nga Hurai! <sup>19</sup> Patua ana e ratou tona matenga ki te kakaho, tuwha ana ki a ia, ka  
tuku i nga turi ki a ia, a koropiko ana ki a ia. <sup>20</sup> A, no ka mutu ta ratou taunu ki a ia, ka tangohia  
te kahu papura i a ia, na whakakakahuria ana ia ki ona ake kakahu, a arahina ana ia kia ripekatia.

<sup>21</sup> Na ka meinga e ratou tetahi tangata e tika ana na reira, a Haimona o hairini, i ahu mai i nga  
whenua, ko te papa o Arehanera raua ko Rupuha, kia haere me ratou, kia riro ai mana e amo tona  
ripeka.

<sup>22</sup> Na ka arahina ia ki tetahi wahi, ki Korokota, tona tikanga ina whakamaoritia ko te Wahi  
Angaanga. <sup>23</sup> A hoatu ana ki a ia he waina, he mea whakananu ki te maira, kia inumia: otira kihai

i tangohia e ia. <sup>24</sup> A ripekatia ana ia e ratou, ka wehewehea ona kakahu, he mea maka ki te rota,  
 kia kitea ai ko te aha e riro i tetahi, i tetahi. <sup>25</sup> Na ko te toru tera o nga haora, a ka ripekatia ia e  
 ratou. <sup>26</sup> Ko te mea i whakawakia ai ia i tuhituhia ki runga, KO TE KINGI O NGA HURAI. <sup>27</sup> Na  
 tokorua nga tahae i ripekatia ngatahitia me ia; ko tetahi ki matau, ko tetahi ki tona mau. <sup>28</sup> Na ka  
 rite te karaipiture e mea nei, I taua ngatahitia ia me te hunga hara. <sup>29</sup> Ko te hunga e haereere ana i  
 reira ka tawai ki a ia, ka ruru i o ratou matenga, ka mea, Ha, ko koe ka whakahoro nei i te whare  
 tapu, ka hanga nei ano i nga ra e toru, <sup>30</sup> Whakaora i a koe ano ka heke iho i te ripeka. <sup>31</sup> Waihoki  
 ko nga tohunga nui ka tawai i a ia, ratou ko nga karaipi, ka mea, Ko era atu i whakaorangia e ia, te  
 taea e ia te whakaora a ia ake ano. <sup>32</sup> Tena ra kia heke iho aianeia te Karaiti, te Kingi o Iharaira,  
 i te ripeka, kia kite ai tatou, kia whakapono ai. I tawai hoki ki a ia te hunga i ripekatia ngatahitia  
 me ia.  
<sup>33</sup> A, no ka tae ki te ono o nga haora, ka pouri a runga o te whenua katoa, taea noatia te iwa o  
 nga haora. <sup>34</sup> A i te iwa o nga haora ka karanga a Ihu, he nui te reo, ka mea, Eroi, Eroi, rama  
 hapakatani? ko te tikanga tenei ina whakamaoritia, E toku Atua, e toku Atua, he aha koe i whakarere  
 ai i ahau? <sup>35</sup> A, no te rongonga o etahi o te hunga e tu ana i reira, ka mea, Nana, e karanga ana ia  
 i a Iraia. <sup>36</sup> Na ka oma tetahi, ka whakaki i tetahi hautai ki te winika, whakanohoia ana ki te kakaho,  
 ka hoatu kia inumia e ia, ka mea, Kati; tena kia kite tatou me kore a Iraia e haere mai ki te tango i  
 a ia ki raro. <sup>37</sup> Na he nui te reo i puaki i a Ihu, a hemo ake. <sup>38</sup> A ka wahia te arai o te temepara i  
 waenganui pu mai i runga ki raro. <sup>39</sup> A, no te kitenga o te keneturio, e tu hangai atu ana ki a ia, i  
 pera te ahua o tana tukunga i tona wairua, ka mea ia, He pono ko te Tama a te Atua tenei tangata.  
<sup>40</sup> Na i reira etahi wahine e matakitaki ana mai i tawhiti: i roto i a ratou a Meri Makarini, a Meri  
 hoki whaea o Hemi, te mea iti, raua ko Hohi, me Haromi; <sup>41</sup> Ara ko nga wahine i aru nei i a ia, i  
 a ia i Kariri, i mahi mea nei mana; me etahi atu wahine tokomaha i haere tahi mai nei me ia ki  
 Hiruharama.  
<sup>42</sup> Na ka ahiahi, i te mea ko te ra takanga, ara ko te ra i mua ake o te hapatu, <sup>43</sup> Ka haere mai  
 a Hohepa o Arimatia, he rangatira runanga, he tangata nui tonu, e tatari ana ano hoki ia ki te  
 rangatiratanga o te Atua; a ka haere maia tonu ki a Pirato, ka inoi i te tinana o Ihu. <sup>44</sup> Na ka miharo  
 a Pirato, hua noa kahore ano i mate: ka karangatia e ia te keneturio, ka ui ki a ia, mehemea kua  
 mate atu ra ia. <sup>45</sup> A, no ka rongongia ki te keneturio kua mate, ka whakaaetia e ia te tinana ki a Hohepa.  
<sup>46</sup> Na ka hokona e tera he rinena, ka tangohia mai ia ki raro, a takaia ana ki te rinena; whakatakatoria

ana ia ki roto ki te urupa kua haua atu ki te kamaka, a whakataka atu ana he kohatu ki te kuwaha  
o te urupa. <sup>47</sup> I kite a Meri Makarini, raua ko Meri whaea o Hohi, i te wahi i whakatakotoria ai ia.

## Chapter 16

<sup>1</sup> A, no te pahemotanga o te hapati, ka hokona he mea kakara e Meri Makarini, e Meri whaea  
o Hemi, e Haromi, kia haere ai ratou ki te whakawahi i a ia. <sup>2</sup> Na, i te atatu o te ra tuatahi o te wiki,  
ka haere ratou ki te urupa i te putanga mai o te ra; <sup>3</sup> Ka korero ki a ratou ano, Ko wai ra hei  
whakataka ma tatou i te kohatu i te kuwaha o te urupa? <sup>4</sup> A, i ta ratou tirohanga ake, ka kite kua  
hurihia atu te kohatu: he mea nui whakaharahara hoki. <sup>5</sup> A, no ka tomo ratou ki te urupa, ka kite  
ratou i tetahi taitamariki e noho ana i te taha matau, he kakahu ma tona: na ka koera ratou. <sup>6</sup> A ka  
mea ia ki a ratou, Kaua e koera: e rapu ana koutou i a Ihu o Nahareta i ripekatia: kua ara ia; kahore  
ia i konei: tena! titiro ki te wahi i whakatakotoria ai ia! <sup>7</sup> Engari haere, korerotia atu ki ana akonga,  
ki a Pita hoki, kei te haere ia i mua i a koutou ki Kariri: ko reira koutou kite ai i a ia, pera i tana i  
mea ai ki a koutou. <sup>8</sup> Na ka puta atu ratou, a oma ana i te urupa: kua tae mai hoki te tuiri, te koera  
ki a ratou: kihai rawa i korero ki tetahi tangata; no te mea i wehi ratou.

<sup>9</sup> Na, i tona aranga ake i te atatu o te ra tuatahi o te wiki, ka whakakite tuatahi ia ki a Meri  
Makarini, i peia nei e ia e whitu nga rewera i roto i a ia. <sup>10</sup> Na ka haere tera ka korero ki te hunga  
i piri ra ki a ia i mua, i a ratou e pouri ana, e tangi ana. <sup>11</sup> A ko ratou i to ratou rongona kei te ora,  
a kua kitea e ia, kahore i whakapono. <sup>12</sup> Na, i muri iho i enei mea, ka puta ia, he ahua ke tona, ki  
etahi atu o ratou, tokorua, i a raua e haere ana, e anga ana ki nga whenua. <sup>13</sup> Na ka haere hoki ena  
ka korero ki etahi atu o ratou; otira kahore era i whakapono.

<sup>14</sup> Muri iho ka puta ia ki te tekau ma tahi, i a ratou e noho ana ki te kai, a riria iho e ia to ratou  
whakaponokore, me te pakeke o te ngakau, mo ratou kihai i whakapono ki te hunga i kite nei i a  
ia kua ara. <sup>15</sup> Ka mea ki a ratou, Haere koutou ki te ao katoa, kauwhautia te rongopai ki nga tangata  
katoa. <sup>16</sup> Ko ia e whakapono ana, ka oti te iriiri, ka whakaorangia; otira ko te tangata e kore e  
whakapono, ka whakataua te he ki a ia. <sup>17</sup> Ka whai tahi hoki enei tohu i te hunga e whakapono  
ana: ma toku ingoa ratou ka pei rewera ai; ka korerotia ai e ratou nga reo hou; <sup>18</sup> Ka tango ake ai



ratou i nga nakahi; a ki te inu i tetahi mea whakamate, e kore ratou e ahatia; ka pa o ratou ringa ki nga turoro, a ka ora.

19

Na, i te mutunga o tana korero ki a ratou, ka tangohia atu te Ariki a Ihu ki te rangi, a noho

20

ana ki te ringa matau o te Atua. Na haere ana ratou, kauwhau ana i nga wahi katoa, me te mahi tahi ano te Ariki me ratou, me te whakau i te kupu ki nga tohu e whai ana i muri. Amine.

## Luke

### Chapter 1

1

Na, i te mea he tokomaha kua anga ki te whakakaupapa i te korero o nga mea kua whakatutukitia nei i waenganui i a tatou,

2

He mea whakarite ki nga mea i homai ki a tatou e te hunga i kite a kanohi, i mahi hoki i te kupu,

3

Koia ahau i mahara ai, i te mea kua ata whakatakina iho e ahau nga mea katoa i te timatanga mai, kia tuhituhi whakatepe atu ki a koe, e Tiopira, e te

4

tangata pai rawa, Kia matau ai koe ki te tuturutanga o nga mea i whakaakona ai koe.

5

No mua, no nga ra o Herora kingi o Huria, tera tohunga, ko Hakaraia te ingoa, no te wiki o

6

Apiata: ko tana wahine hoki no nga tamahine a Arona, ko Erihapeti tona ingoa. He hunga tika hoki raua i te aroaro o te Atua, kahore he he o ta raua haere i runga i nga kupu ako katoa, i nga

7

tikanga a te Ariki. Na kahore a raua tamariki, he pakoko hoki a Erihapeti, a i taua wa kua maha

8

haere rawa nga ra o tetahi, o tetahi. Na tupono tonu, i a ia e mahi ana i a te tohunga mahi i te

9

aroaro o te Atua i te takanga o tana wiki, E whakarite ana i nga ritenga o nga tohunga, ka taka

10

mana te haere ki roto ki te whare tapu o te Ariki, tahu ai te whakakakara. Na i waho te nuinga

11

katoa o te iwi e inoi ana i te haora whakakakara. A ka puta mai ki a ia tetahi anahera a te Ariki

12

e tu ana i te taha matau o te aata whakakakara. Na ka ohorere a Hakaraia i tona kitenga i a ia, a

13

tau ana te wehi ki a ia. Otira ka mea te anahera ki a ia, kaua e wehi, e Hakaraia: kua rangona hoki tau inoi, a ka whanau i tau wahine, i a Erihapeti, he tama mau, a ka huaina e koe tona ingoa

14

ko Hoani. A ka whiwhi koe i te hari me te harakoa; a he tokomaha hoki e hari i tona whanautanga.

15

E nui hoki ia i te aroaro o te Atua: e kore ia e inu i te waina, i te wai whakahaurangi ranei: a ka

ki ia i te Wairua Tapu, mai ano o te kopu o tona whaea. <sup>16</sup> He tokomaha ano hoki o nga tama a  
 Ihairaira ka whakatahuritia e ia ki te Ariki, ki to ratou Atua. <sup>17</sup> Ka haere ano ia i tona aroaro i runga  
 i te wairua, i te mana, o Iraia, hei whakatahuri i nga ngakau o nga matua ki nga tamariki, i te hunga  
 whakatuturi ki nga whakaaro o te hunga tika; hei whakarite mo te Ariki i tetahi iwi i ata taka mona.  
<sup>18</sup> Na ko te meatanga a Hakaraia ki te anahera, Ma te aha ka matau ai ahau ki tenei mea? he koroheke  
<sup>19</sup> nei hoki ahau, kua maha haere hoki nga ra o taku wahine. Na ka whakahoki te anahera, ka mea  
 ki a ia, Ko Kapariera ahau, kei te aroaro o te Atua toku turanga; kua tonoa mai hoki ahau ki te  
<sup>20</sup> korero ki a koe, ki te whakapuaki i tenei rongopai ki a koe. Nana, ka noho puku koe, kahore  
 hoki e puta te korero i a koe, kia tae mai ra ano te ra e meatia ai enei mea, mou kihai i whakapono  
<sup>21</sup> ki aku kupu, ka mana nei i te wa e rite ai. A tatari tonu te iwi ki a Hakaraia, me te miharo ano i  
<sup>22</sup> a ia e whakaroa ana i roto i te whare tapu. A, i tona putanga mai ki waho, kihai ia i ahei te korero  
 ki a ratou: a ka mohio ratou kua kite ia i tetahi putanga atua ki a ia i roto i te whare tapu: hono tonu  
<sup>23</sup> tana waitohu ki a ratou me te wahangu ano. A ka rite nga ra hei minitanga mana, ka hoki ia  
<sup>24</sup> ki tona whare. Na muri iho i aua ra ka hapu tana wahine, a Erihapeti, a e rima nga marama i  
<sup>25</sup> whakangaro ai i a ia, a i mea ia, Ko ta te Ariki tenei i mea ai ki ahau, i nga ra i titiro mai ai ia,  
 ki te whakamutu i toku tawainga i roto i nga tangata.  
<sup>26</sup> Na i te ono o nga marama ka tonoa a Kapariera, te anahera, e te Atua ki tetahi pa o Kariri,  
<sup>27</sup> ko Nahareta te ingoa, Ki tetahi wahine i taumautia ma tetahi tangata, ko Hohepa te ingoa, no te  
<sup>28</sup> whare o Rawiri; ko te ingoa o te wahine ko Meri. Na, ko tona haerenga ki roto, ki a ia, ka mea,  
 Tena koe, e te wahine kua manakohia nei; kei a koe te Ariki: ko koe te manaakitia i roto i nga  
<sup>29</sup> wahine. Otira he nui tona oho ki taua kupu, ka whakaaroaro ki te tikanga o tenei ohatanga.  
<sup>30</sup> Na ka mea te anahera ki a ia, Kei wehi koe, e Meri; kua paingia hoki koe e te Atua. <sup>31</sup> Nana,  
<sup>32</sup> tera koe e hapu, ka whanau he tama, a ka huaina e koe tona ingoa ko Ihu. Ka nui ia, ka kii hoki  
 ko te Tama a te Runga Rawa: a ka hoatu ki a ia e te Ariki, e te Atua, te torona o Rawiri, o tona  
<sup>33</sup> papa. Hei kingi hoki ia mo te whare o Hakopa ake ake; e kore ano e mutu tona rangatiratanga.  
<sup>34</sup> Na ka mea a Meri ki te anahera, E peheatia tenei, kahore nei hoki ahau e mohio ki te tane? <sup>35</sup> Na  
 ka whakahoki te anahera, ka mea ki a ia, Ka tae te Wairua Tapu ki runga ki a koe, ka taumarumaru  
 iho te kaha o te Runga Rawa ki runga ki a koe: no reira hoki ka kii te mea e whanau mai he tapu,  
<sup>36</sup> ko te Tama a te Atua. Na, ko tou whanaunga, ko Erihapeti, kua hapu hoki ia i tona ruruhitanga,

he tama; a koe te ono tenei o nga marama ki a ia, i kiia ra he pakoko. <sup>37</sup> Kahore hoki he kupu i ahu  
 mai i te Atua i kore e whai mana. <sup>38</sup> Ano ra ko Meri, Ina, te pononga a te Ariki; kia peratia ahau  
 me tau i korero ai. A mawehe atu ana te anahera i a ia.  
<sup>39</sup> Na ka whakatika a Meri i aua ra, a haere kaika ana ki te whenua pukepuke ki tetahi pa o  
<sup>40</sup> Hura; <sup>41</sup> A ka tomo ki te whare o Hakaraia, ka oha ki a Erihapeti. <sup>42</sup> A, no te rongonga o Erihapeti  
 i te oha a Meri, ka koiri te tamaiti i roto i tona kopu; na kua ki a Erihapeti i te Wairua Tapu: <sup>43</sup> A  
 he nui tona reo ki te karanga, ka mea, Ka manaakitia koe i roto i nga wahine, ka manaakitia ano te  
 hua o tou kopu. <sup>44</sup> No hea hoki tenei ki ahau, kia haere mai te whaea o toku Ariki ki ahau? <sup>45</sup> Na,  
 pa kau mai te reo o tau oha ki oku taringa, ka oho te tamaiti i toku kopu i te hari. <sup>46</sup> Ka koa ano ia  
 e whakapono ana: ka whakaritea hoki nga mea i korerotia ki a ia e te Ariki. <sup>47</sup> A ka mea a Meri,  
<sup>48</sup> Ka whakanui toku wairua i te Ariki, <sup>49</sup> E hari ana toku wairua ki te Atua, ki toku Kaiwhakaora;  
<sup>50</sup> Mona i titiro ki te iti o tana pononga; ta te mea hoki katahi ahau ka kiia e nga whakatupuranga  
 katoa e haere ake nei, he wahine hari. <sup>51</sup> He nui hoki nga mahi a te Mea Kaha ki ahau; he tapu hoki  
 tona ingoa. <sup>52</sup> He mahi tohu tana ki te hunga e wehi ana ki a ia, ki tenei whakatupuranga, ki tenei  
 whakatupuranga. <sup>53</sup> Kua whakaputaina he kaha e ia, ara e tona ringa; nana te hunga whakakake i  
 marara ai, i te whakaaro o o ratou ngakau. <sup>54</sup> Kua whakataka e ia nga piriniha i o ratou torona, a  
 whakateiteitia ake ana te hunga iti. <sup>55</sup> Kua whakakiia e ia te hunga mate hiakai ki nga mea pai; kua  
 tonoa kautia atu te hunga taonga. <sup>56</sup> Kua tautokona e ia a Iharaira, tana pononga, he whakamahara  
 hoki ki tana mahi tohu; <sup>57</sup> Ki a Aperahama ratou ko tana whanau ake tonu atu, pera hoki me tana  
 i korero ai ki o tatou matua. <sup>58</sup> Na tata tonu ki te toru marama a Meri e noho ana ki a ia, a hoki ana  
 ki tona whare.  
<sup>59</sup> A ka rite te taima o Erihapeti e whanau ai; na ka whanau he tama. <sup>60</sup> A ka rongu te hunga  
 e noho tata ana, me ona whanaunga, kua whakanuia e te Ariki tona aroha ki a ia; na ka hari tahi  
 me ia. <sup>61</sup> A i te waru o nga ra ka haere mai ratou ki te kokoti i te tamaiti; ka mea kia huaina e ratou  
 ko Hakaraia, ko te ingoa o tona papa. <sup>62</sup> Na ka whakahoki tona whaea, ka mea, Kahore; engari me  
 hua ia ko Hoani. <sup>63</sup> Na ko ta ratou meatanga ki a ia, Ara, kahore tenei ingoa i huaina ki tetahi o ou  
 whanaunga. <sup>64</sup> Na ka ui ratou ki tona papa, he mea waitohu, ko wai tana e pai ai kia huaina ki a

<sup>63</sup> ia. Ka mea ia ki tetahi papa tuhituhi, a ka tuhituhi, ka mea, Ko Hoani hei ingoa mona. A miharo  
<sup>64</sup> ana ratou katoa. Na whai reo tonu iho tona mangai, ka matara tona arero, ka korero ia, ka  
<sup>65</sup> whakapai ki te Atua. A tau ana te wehi ki te hunga katoa e noho tata ana ki a ratou: ka korerotia  
<sup>66</sup> enei mea katoa puta noa i te whenua pukepuke katoa o Huria. Na ka rongotia enei mea e te  
 hunga katoa i rangona ai ki roto ki o ratou ngakau, ka mea, He tamaiti aha ianei tenei? i a ia hoki  
 te ringa o te Ariki.  
<sup>67</sup> Na kua ki a Hakaraia, tona papa, i te Wairua tapu, ka poropiti, ka mea, <sup>68</sup> Kia whakapaingia  
 te Ariki, te Atua o Iharaira; kua titiro mai hoki ia, kua hoko i tana iwi, <sup>69</sup> Kua whakaarahia ake e  
 ia he haona whakaora mo tatou, i roto i te whare o Rawiri, o tana pononga; <sup>70</sup> Ko tana hoki ia i  
 korerotia e te mangai o ana poropiti tapu, no te timatanga mai ano o te ao: <sup>71</sup> Hei whakaora i a  
 tatou i o tatou hoa whawhai, i te ringa ano o te hunga katoa e kino ana ki a tatou; <sup>72</sup> Hei whakaputa  
 i te mahi tohu ki o tatou tupuna, hei whakamahara ki tana kawenata tapu; <sup>73</sup> Ki te oati i oati ai ia  
 ki a Aperahama, ki to tatou tupuna, <sup>74</sup> Kia tukua mai e ia ki a tatou he ora i te ringa o o tatou hoa  
 whawhai, kia mahi wehikore tatou ki a ia, <sup>75</sup> I runga i te tapu, i te tika, ki tona aroaro, i nga ra katoa  
 e ora ai tatou. <sup>76</sup> A ko koe, e tama, ka kiia ko te poropiti a te Runga Rawa: e haere hoki koe i te  
 aroaro o te Ariki, hei whakapai i ona ara; <sup>77</sup> Hei whakamatau i tana iwi ki te ora, i o ratou hara e  
<sup>78</sup> murua ana; He mea hoki na te aroha, na te mahi tohu a to tatou Atua; na reira hoki i puta mai  
<sup>79</sup> ai te puaotanga o runga ki a tatou, Hei whakamarama i te hunga e noho ana i te pouri, i te atarangi  
<sup>80</sup> hoki o te mate, hei whakatika i o tatou waewae ki te huarahi o te rangimarie. Na ka tupu taua  
 tamaiti, a ka kaha haere tona wairua, a noho ana i nga koraha, taea noatia te ra e whakakitea ai ia  
 ki a Iharaira.

## Chapter 2

<sup>1</sup> I aua ra ka whakatakotoria he tikanga e Hiha Akuhata kia tuhituhia te ao katoa. <sup>2</sup> Ko te  
 tuhituhinga tuatahi tenei i meatia i te wa ko Kuirinia te kawana o Hiria. <sup>3</sup> A ka haere nga tangata  
 katoa kia tuhituhia, ia tangata, ia tangata, ki tona ake pa. <sup>4</sup> I haere atu ano a Hohepa i Kariri, i te

pa, i Nahareta, ki Huria, ki te pa o Rawiri, ko Peterehema te ingoa: no te mea no te whare ia, no te kawei o Rawiri: <sup>5</sup> Kia tuhituhia ai raua ko tana wahine taumau, ko Meri, e hapu ana ia. <sup>6</sup> A, i a raua i reira, ka rite nga ra e whanau ai ia. <sup>7</sup> Na ka whanau tana matamua, a takaia ana e ia ki nga kakahu, ka whakatakotoria ki te takotoranga kai ma nga kararehe; no te mea kahore he wahi mo ratou i te whare.

<sup>8</sup> I taua wahi hoki etahi hepara e noho koraha ana, e tiaki ana i ta ratou kahui i te po. <sup>9</sup> Na tu ana tetahi anahera a te Ariki i o ratou taha, a whiti ana te kororia o te Ariki ki a ratou a tawhio noa; a nui whakaharahara to ratou wehi. <sup>10</sup> Na ka mea te anahera ki a ratou, Kaua e mataka: ta te mea he kaikauwhau tenei ahau ki a koutou mo te hari nui, meake puta mai ki te iwi katoa. <sup>11</sup> Nonaianei

hoki i whanau ai he Kaiwhakaora mo koutou i te pa o Rawiri, ara a te Karaiti, te Ariki. <sup>12</sup> Ko te tohu tenei ki a koutou; E kite koutou i te tamaiti ka oti te takai ki te kakahu, e takoto ana i te takotoranga kai ma nga kararehe. <sup>13</sup> Na ohore tonu ko tetahi ope nui o te rangi e tu tahi ana me

taua anahera, e whakamoemiti ana ki te Atua, e mea ana, <sup>14</sup> Kia whai kororia te Atua i runga rawa, kia mau te rongu ki runga ki te whenua, me te whakaaro pai ki nga tangata. <sup>15</sup> A, ka mawehe atu nga anahera i a ratou ki te rangi, ka mea nga hepara tetahi ki tetahi, Tatou ka haere ki Peterehema,

kia kite i tenei mea kua puta nei, kua whakapuakina mai nei e te Ariki ki a tatou. <sup>16</sup> Na kaika tonu ta ratou haere, a ka kite i a Meri, i a Hohepa, i te tamaiti hoki e takoto ana i te takotoranga kai ma nga kararehe. <sup>17</sup> A, no ka kite, ka whakapuakina te mea i korerotia ki a ratou mo tenei tamaiti.

<sup>18</sup> A miharo ana nga kaiwhakarongo katoa ki enei mea, i korerotia nei ki a ratou e nga hepara.

<sup>19</sup> Ko Meri ia i ata rongoa i enei mea katoa, me te whakaaroaro i roto i tona ngakau. <sup>20</sup> Na ka hoki nga hepara, me te whakakororia, me te whakamoemiti ki te Atua mo nga mea katoa i rongu nei, i kite nei ratou, i rite nei ki nga mea i korerotia ki a ratou.

<sup>21</sup> A, no ka rite nga ra e waru, e kotia ai te tamaiti, ka huaina tona ingoa ko IHU, ko ta te anahera i hua ai ia te mea kahore ano i hapu tona whaea. <sup>22</sup> A ka rite nga ra e purea ai te whaea, e whakaritea

ai te ture a Mohi, ka kawea ia e ratou ki Hiruharama, kia tapaea ki te Ariki. <sup>23</sup> Kia peratia me te mea i tuhituhia ki te ture a te Ariki, Ko nga tane katoa e oroko puta mai i te kopu, e kiia he tapu ki te Ariki. <sup>24</sup> Kia hoatu ano he patunga tapu, te mea i korerotia i roto i te ture a te Ariki, Kia rua kukupa, kia rua ranei pi kukupa.

<sup>25</sup> Na, i Hiruharama tetahi tangata, ko Himiona te ingoa; he tangata tika, he tangata whakaaro, e tatari ana ki te whakaharinga o Iharaira: kei runga hoki te Wairua Tapu i a ia. <sup>26</sup> Na kua

whakamaharatia ia e te Wairua Tapu, e kore ia e kite i te mate, kia kite ra ano ia i ta te Ariki Karaiti.  
27

Na ka haere ia ki te temepara, he meatanga na te Wairua: a i nga matua e mau ana i te tamaiti, i  
a Ihu, kia meatia ai e raua ki a ia ta te ture i whakarite ai, 28 Ka tango ia i a ia ki ona ringa, ka

whakapai ki te Atua, ka mea, 29 Katahi, e te Ariki, ka tukua tau pononga kia haere i runga i te  
rangimarie, ka pera me tau i korero ai: 30 Ka kite nei hoki oku kanohi i tau whakaoranga, 31 Ka

whakatakotoria nei e koe ki te aroaro o nga iwi katoa; 32 Hei whakamarama e kite ai nga tau iwi,  
hei kororia hoki mo tau iwi, mo Iharaira. 33 A miharo tonu a Hohepa raua ko tona whaea ki nga

kupu i korerotia mona. 34 Na ka manaaki a Himiona i a raua, a ka mea ki tona whaea, ki a Meri,  
Nana, ka waiho tenei tama hei takanga, hei aranga, mo te tini o te tangata i roto i a Iharaira; hei

tohu hoki e korerotia kinotia; 35 Ae ra, ka tika atu ano te hoari, a puta noa i tou ake wairua, e hurahia  
ai nga whakaaro o nga ngakau maha. 36 A tera hoki tetahi ko Ana, he poropiti, he tamahine na

Panuera, no te iwi o Ahera; kua kaumatua ia, e whitu nga tau o tona wahinetanga ake i noho ai i te  
tane; 37 He pouaru, kua waru tekau ma wha rawa ona tau e pera ana; heoi kihai i mahue i a ia te

temepara; he karakia tonu tana, he nohopuku, he inoi, i te po, i te ao. 38 Na ka tae atu ia i taua haora  
ano, ka whakawhetai ki te Ariki, a korerotia ana ia e ia ki te hunga katoa o Hiruharama e tatari ana

ki te whakaoranga. 39 A, no ka oti nga mea katoa e rite ana ki ta te Ariki ture, ka hoki ratou ki  
Kariri, ki to ratou ake pa, ki Nahareta. 40 Na ka tupu te tamaiti, ka pakari haere, ka ki i nga whakaaro

nunui: a i runga i a ia te aroha noa o te Atua.

41 A i haere ona matua i ia tau, i ia tau ki Hiruharama i te hakari o te kapenga. 42 A ka tekau

ma rua ona tau, ka haere ratou i runga i nga ritenga o te hakari. 43 A ka rite nga ra, i a raua e hoki  
ana, ka whakaware iho te tamaiti, a Ihu, i Hiruharama; kihai hoki ona matua i mohio. 44 I mahara

hoki raua kei roto ia i te tira, na ka haere, kotahi te ra ki te ara; a ka rapu raua i a ia i roto i nga  
whanaunga, i a raua tangata hoki i mohio ai. 45 A, no te korenga i kitea ia, hoki ana raua ki

Hiruharama, ki te rapu i a ia. 46 A, muri iho i nga ra e toru ka kitea ia i roto i te temepara, e noho  
ana i waenganui o nga kaiwhakaako, e whakarongo ana ki a ratou, e ui ana ki a ratou. 47 A miharo

katoa ki tona matauranga, ki ana korero, te hunga i rongu ki a ia. 48 A, no ka kite raua i a ia, ka  
tino miharo: ka mea tona whaea ki a ia, E tama, he aha koe i penei ai ki a maua? na, pouri noa iho

maua ko tou papa, i a maua i rapu nei i a koe. 49 Ka mea ia ki a raua, he aha korua i rapu ai i ahau?

Kihai korua i mahara kia noho ahau i te whare o toku Matua? <sup>50</sup> Heoi kihai raua i matau ki te kupu i korerotia ra e ia ki a raua. <sup>51</sup> Na ka haere tahi atu ia me raua ka tae ki Nahareta, ka ngohengohe ia ki a raua: ko tona whaea ia i rongoa i enei kupu katoa i roto i tona ngakau. <sup>52</sup> Na ka kake haere a Ihu te whakaaro nui, te kaumatua, ka paingia ano e te Atua, e te tangata.

### Chapter 3

<sup>1</sup> Na i te tekau ma rima o nga tau o te rangatiratanga o Taipiria Hiha, i a Ponotia Pirato e kawana ana i Huria, i a Herora e tetaraki ana i Kariri, i tona teina hoki, i a Piripi, e tetaraki ana i Ituria, i te whenua hoki o Taronaiti, ko Raihania e tetaraki ana i Apirini, <sup>2</sup> Ko Anaha raua ko Kaiapa nga tohunga nui, ka puta te kupu a te Atua ki a Hoani tama a Hakaraia ki te koraha. <sup>3</sup> Na ka haere mai ia ki nga wahi katoa e patata ana ki Horano, ka kauwhau i te iriiri ripeneta hei murunga hara; <sup>4</sup> I pera ano ia me te mea i tuhituhia ki te pukapuka o nga korero a Ihaia poropiti, He reo no tetahi i te koraha e karanga ana, Whakapaia te huarahi o te Ariki, whakatikaia ona ara; <sup>5</sup> Ka whakakiia nga awaawa katoa, ka whakahoroa nga maunga me nga pukepuke katoa; e meinga hoki kia tika nga wahi kopikopiko, ko nga wahi taratara hei ara maeneene. <sup>6</sup> A e kite nga kikokiko katoa i te whakaoranga a te Atua. <sup>7</sup> Na reira ka mea ia ki nga mano i haere kia iriiria e ia, E te uri nakahi, na wai koutou i whakamahara kia rere i te riri meake puta mai? <sup>8</sup> Na whakaputaina nga hua e rite ana ki o te ripeneta; kei anga kei mea i roto i a koutou, Ko Aperahama to tatou matua: ko taku kupu hoki tenei ki a koutou, E ahei ana ano i te Atua te whakaara tamariki ake ma Aperahama i roto i enei kohatu. <sup>9</sup> Na inaianei ano kei te pa te toki ki te pakiaka o nga rakau: ki te kahore tetahi rakau e hua i te hua pai, ka tuaina, ka maka ki te ahi. <sup>10</sup> Na ka ui nga mano ki a ia, ka mea, Me aha ra matou? <sup>11</sup> Na ka whakahoki ia, ka mea ki a ratou, Ko te tangata i nga koti e rua, kia hoatu ki te tangata kahore ona; me te tangata he kai tana, kia pera ano. <sup>12</sup> Na ka haere mai hoki nga pupirikana kia iriiria, ka mea ki a ia, E te kaiwhakaako, me aha matou? <sup>13</sup> Ka mea ia ki a ratou, Kei nui ake i nga mea i whakaritea ma koutou ta koutou e tango ai. <sup>14</sup> Ka ui ano hoki nga hoia ki a ia, ka mea, Me aha hoki matou? Na ko tana meatanga ki a ratou, Kaua e tukinotia tetahi, kaua e muru noa i tetahi mea; kati ano ma koutou ko o koutou utu.

15 Na, i te iwi e tatari ana e whakaaroaro katoa ana i roto i o ratou ngakau ki a Hoani, mehemea  
 ko te Karaiti ia; <sup>16</sup> Ka whakahoki a Hoani, ka mea ki a ratou katoa, Ko ahau nei, he iriiri taku i a  
 koutou ki te wai; kei te haere mai ia tetahi he kaha rawa ake i ahau, e kore ahau e tau hei wewete  
 i te here o ona hu: mana koutou e iriiri ki te Wairua Tapu, ki te k apura. <sup>17</sup> Ko tana mea tahi kei  
 tona ringa, hei tino tahi i tana patunga witi, hei kohi hoki i te witi ki roto ki tana whare witi: ko te  
 papapa ia e tahuna ki te kapura e kore e tineia. <sup>18</sup> He maha atu ano ana kupu whakahau i kauwhau  
 ai ia i te rongopai ki te iwi. <sup>19</sup> Otira, na tona riringa i a Herora tetaraki mo Heroriaha, mo te wahine  
 a tona tuakana, a Piripi, a mo nga kino katoa hoki i meinga e Herora; <sup>20</sup> Ka apititia atu e Herora  
 tenei ki runga i era katoa, tutakina ana e ia a Hoani ki te whare herehere.  
<sup>21</sup> Na, ka poto katoa te iwi te iriiri, i a Ihu kua oti te iriiri, a i a ia e inoi ana, ka tuwhera te rangi,  
<sup>22</sup> A ka heke iho te Wairua Tapu, ka heke tinana iho, ano he kukupa, ki runga ki a ia, a ka puta mai  
 he reo no te rangi, e mea ana, Ko koe taku Tama i aroha ai, taku i ahuaireka ai. <sup>23</sup> Na ko Ihu, i a ia  
 i timata ai ki te whakaako, kei te toru tekau ona tau, a ki ta te tangata ki, he tama ia na Hohepa,  
<sup>24</sup> tama a Heri, Ko ia he tama na Matata, tama a Riwai, tama a Mereki, tama a Iana, tama a Hohepa,  
<sup>25</sup> Tama a Matatiaha, tama a Amoho, tama a Nahumu, tama a Eheri, tama a Nakai, <sup>26</sup> Tama a  
 Maata, tama a Matiaha, tama a Hemei, tama a Hohepa, tama a Hura, <sup>27</sup> Tama a Hoana, tama a  
 Reha, tama a Herupapera, tama a Haratiera, tama a Neri, <sup>28</sup> Tama a Mereki, tama a Ari, tama a  
 Kohama, tama a Eremorama, tama a Ere, <sup>29</sup> Tama a Hohe, tama a Erietere, tama a Horimi, tama  
 a Matata, tama a Riwai, <sup>30</sup> Tama a Himiona, tama a Hura, tama a Hohepa, tama a Honana, tama  
 a Eriakimi, <sup>31</sup> Tama a Merea, tama a Menana, tama a Matata, tama a Natana, tama a Rawiri,  
<sup>32</sup> Tama a Hehe, tama a Opere, tama a poaha, tama a Haramono, tama a Nahona, <sup>33</sup> Tama a  
 Aminarapa, tama a Arame tama a Heteromo, tama a Parete, tama a Hura, <sup>34</sup> Tama a Hakopa, tama  
 a Ihaka, tama a Aperahama, tama a Tera, tama a Nahora, <sup>35</sup> Tama a Haruku, tama a Rakau, tama  
 a Pereke, tama a Epere, tama a Haraha, <sup>36</sup> Tama a Kainana, tama a Arapahata, tama a Hema, tama  
 a Noa, tama a Rameka, <sup>37</sup> Tama a Matuhara, tama a Enoka, tama ia Iarere, tama a Marereere, tama  
<sup>38</sup> a Kainana, Tama a Enoha, tama a Heta, tama a Arama, a te tama a te Atua.



## Chapter 4

<sup>1</sup> Na, ko Ihu, ki tonu i te Wairua Tapu, hoki atu ana i Horano, a ka arahina e te Wairua i te  
<sup>2</sup> koraha, Mo nga ra e wha tekau, whakamatautauria ai e te rewera. Kihai ia i kai i tetahi mea i aua  
<sup>3</sup> ra; a, no ka pahemo, ka hiakai ia. Na ka mea te rewera ki a ia, Ki te mea ko te tama koe a te Atua,  
<sup>4</sup> kiia iho tenei kohatu kia meinga hei taro. Na ka whakahoki a Ihu ki a ia, ka mea, Kua oti te  
<sup>5</sup> tuhituhi, E kore e ora te tangata i te taro kau, engari a nga kupu katoa a te Atua. Katahi ka arahina  
<sup>6</sup> ia e ia ki runga, a mea kau iho kua whakakitea ki a ia nga rangatiratanga katoa o te ao. Ka mea  
 te rewera ki a ia, Maku e hoatu ki a koe tenei rangatiratanga katoa, me te kororia o enei mea: kua  
<sup>7</sup> tukua hoki ki ahau; a ka hoatu e ahau ki taku e pai ai. Na, ki te koropiko koe ki toku aroaro, mou  
<sup>8</sup> katoa. Na ka whakahoki a Ihu ki a ia, ka mea, Kua oti te tuhituhi, Me koropiko koe ki te Ariki,  
<sup>9</sup> ki tou Atua, me mahi ano ki a ia anake. Na ka kawea ia e ia ki Hiruharama, a whakaturia ana ki  
 runga ki te keokeonga o te temepara, na ka mea ia ki a ia, Ki te mea ko te Tama koe a te Atua, rere  
<sup>10</sup> atu i konei ki raro: Kua oti hoki te tuhituhi, Ka korerotia iho koe e ia ki ana anahera, kia tiakina  
<sup>11</sup> koe: A, ma ratou koe e hoki ake ki o ratou ringa, kei tutuki tou waewae ki te kohatu. Na ka  
<sup>12</sup> whakahoki a Ihu, ka mea ki a ia, Kua takoto te korero, Aua e whakamatautau ki te Ariki, ki tou  
<sup>13</sup> Atua. A ka mutu katoa nga whakamatautauranga a te rewera, ka mawehe atu i a ia mo tetahi  
 wahi.  
<sup>14</sup> Na ka hoki a Ihu i runga i te kaha o te Wairua ki Kariri: a haere ana tona rongu a puta noa  
<sup>15</sup> i nga wahi tata katoa. Ka whakaako ia i roto i o ratou whare karakia, me te whakakororia te  
<sup>16</sup> katoa i a ia. Na ka haere ia ki Nahareta, ki te wahi i whangaia ai ia: a ka tomo i te ra hapati ki  
<sup>17</sup> te whare karakia, ko tana hanga hoki ia, ka whakatika ki te korero pukapuka. A ka hoatu ki a ia  
 te pukapuka a Ihaia poropiti. A, no ka wherahia te pukapuka, ka kitea e ia te wahi i tenei tuhituhinga,  
<sup>18</sup> Kei ahau te wairua o te Ariki, nana nei hoki ahau i whakawahi, hei kauwhau i te rongopai ki te  
 hunga rawakore; kua tonoa ahau e ia ki te kauwhau ki nga herehere, kia haere noa, ki nga matapo  
<sup>19</sup> kia titiro, ki te tuku i te hunga e maru ana kia haere noa atu, Ki te kauwhau i te tau manakohanga  
<sup>20</sup> mai a te Ariki. Na ka kopia e ia te pukapuka, ka hoatu ki te kaitiaki, a noho ana, Na ka titiro  
<sup>21</sup> matatau ki a ia nga kanohi o te hunga katoa i roto i te whare karakia. Katahi ia ka anga ka korero

ki a ratou, Nonaianei, i o koutou taringa e whakarongo mai nei, i mana ai tenei karaipiture. <sup>22</sup> A i  
 whakapai ratou katoa ki a ia i miharo ki nga kupu pai i puta i tona mangai. Ka mea ratou, Ehara  
<sup>23</sup>  
 ianei tenei i te tama a Hohepa? Ka mea ia ki a ratou, Tera pea e puaki mai i a koutou tenei kupu  
 whakarite ki ahau, E rata, rongoa koe i a koe ano: ko nga mea i rongoa ai matou kua meinga ki  
<sup>24</sup>  
 Kaperenauma, meinga hoki ki konei, ki tou whenua. I mea ano ia, He pono taku e mea nei ki a  
<sup>25</sup>  
 koutou, E kore te poropiti e manakohia i tona ake whenua. Otira he pono taku e mea nei ki a  
 koutou, He tokomaha nga pouaru i roto i a Ihairaira i nga ra i a Iraia, i te rangi kua oti te kopani i  
<sup>26</sup>  
 nga tau e toru i nga marama e ono, i te matekaitanga nui o te whenua katoa; Heoi kihai a Iraia  
<sup>27</sup>  
 i tonoa ki tetahi o ratou, ki a Harepata anake o Hairona, ki te wahine pouaru. He tokomaha hoki  
 nga repera i roto i a Ihairaira, i nga ra o Eriha poropiti: a kihai tetahi o ratou i whakamakia, ko  
<sup>28</sup>  
 Naamana anake, ko te Hiriani. A ki tonu i te riri te hunga katoa i te whare karakia, i te rongonga  
<sup>29</sup>  
 ki enei mea; Na ko to ratou whakatikanga ake, ka maka i a ia ki waho o te pa, a arahina ana ia  
<sup>30</sup>  
 ki te pari o te puke i hanga ai to ratou pa, kia whakataka ai ia ki raro. Otira i tika ia ra waenganui  
 o ratou a haere ana.  
<sup>31</sup> A ka tae ki Kaperenauma, ki tetahi pa o Kariri, ka whakaako i a ratou i te hapati. <sup>32</sup> Na ka  
<sup>33</sup>  
 miharo ratou ki tana ako: i whai mana hoki tana kupu. Na i te whare karakia tetahi tangata he  
<sup>34</sup>  
 wairua rewera poke tona. nui atu tona reo ki te karanga, Ka mea, Kati ra; he aha matou nau, e  
 Ihu o Nahareta; kua tae mai koe ki te whakangaro i a matou? e mohio ana ahau ki a koe, ko wai  
<sup>35</sup>  
 koe; ko te Mea Tapu a te Atua. Na riria iho ia e Ihu, ka mea ia, Kati te korero, puta mai hoki i  
 roto i a ia. Katahi te rewera ka turaki i a ia ki waenganui, a puta mai ana i roto i a ia, kihai hoki tera  
<sup>36</sup>  
 i ahatia. Na tau ana te miharo ki a ratou katoa, ka kororerero tetahi ki tetahi, ka mea, He aha  
 tenei kupu? mana tonu nei hoki tana tono i nga wairua poke, kaha tonu, a puta mai ana ki waho.  
<sup>37</sup> A paku ana tona rongoa puta noa i nga wahi tutata katoa. <sup>38</sup> A, ko tona whakatikanga i te whare  
 karakia, tomo tonu ki te whare o Haimona. Na e mate ana te whaea o te wahine a Haimona, he nui  
<sup>39</sup>  
 te kirika; ka inoi ratou ki a ia mona. Na ka tu ia ki runga i a ia, a riria iho te kirika; a mutu ake:  
<sup>40</sup>  
 na ara tonu ake ia kei te taka mea ma ratou. I te toenetanga o te ra ka kawea mai ki a ia e nga  
 tangata katoa nga mea o ratou e mate ana i te tini o nga mate; na whakapakia iho e ia ona ringa ki  
<sup>41</sup>  
 tenei, ki tenei o ratou, a ora ake ratou. He tokomaha hoki te hunga i puta mai nga rewera i roto  
 i a ratou; i karanga hoki aua wairua i mea, Ko te Tama koe a te Atua. A riria ana ratou e ia, kihai i  
<sup>42</sup>  
 tukua kia korero: i matau hoki ratou ko te Karaiti ia. Ka ao te ra, ka puta atu ia, ka haere ki tetahi

wahi koraha: a ka rapu nga mano i a ia, ka tae ki a ia, na puritia ana ia, kei whakarerea ratou e ia.  
<sup>43</sup> Ka mea ia ki a ratou, Me kauwhau e ahau te rangatiratanga o te Atua ki era atu pa ano: koia hoki  
<sup>44</sup> ahau i tonoa mai ai. A kauwhau ana ia i nga whare karakia o Kariri.

## Chapter 5

<sup>1</sup> A, i te mano e aki ana ki a ia ki te whakarongo ki te kupu a te Atua, na e tu ana ia i te taha o  
te roto o Keneharetā, <sup>2</sup> Na ka kite ia i etahi kaipuke e rua e tu ana i te taha o te roto: ko nga kaihao  
ia kua riro i runga, e horoi ana i a ratou kupenga. <sup>3</sup> Na ka eke ia ki tetahi o nga kaipuke, ki te  
Haimona, ka mea ki a ia kia neke atu ki waho tata. Na noho ana ia, whakaakona ana e ia te mano  
i runga i te kaipuke. <sup>4</sup> A ka mutu tana korero, ka mea ia ki a Haimona, Neke atu ki te wahi hohonu,  
ka tuku ai i a koutou kupenga ki te hao. <sup>5</sup> Na ka whakahoki a Haimona, ka mea ki a ia, E kara,  
mahī noa matou i te po roa nei, te mau tetahi: heoi nau na te kupu me tuku e ahau te kupenga. <sup>6</sup> A,  
no ta ratou meatanga i tenei, he mano tini nga ika i mau i a ratou: ka whakapakaru ta ratou kupenga.  
<sup>7</sup> Na ka tawhiri ratou ki o ratou hoa i tera o nga kaipuke kia hoe mai hei hoa mo ratou. A, i to ratou  
taenga mai, whakakiia ana nga kaipuke e rua, no ka whakatotohu. <sup>8</sup> Otiia, no te kitenga o Haimona  
Pita, ka hinga iho ki nga turi o Ihu, ka mea, Mawehe atu i ahau, e te Ariki, he tangata hara hoki  
ahau. <sup>9</sup> Mau tonu hoki tona miharo me to ona hoa katoa, ki te haonga o nga ika i haoa nei e ratou:  
<sup>10</sup> I pera ano hoki a Hemi raua ko Hoani, he tama raua na Heperi, he hoa hoki no Haimona. Na ka  
mea a Ihu ki a Haimona, Kaua e maku; i enei wa e takoto ake nei ka hao tangata koe. <sup>11</sup> A ka  
whakauria nga kaipuke ki uta, mahue ake nga mea katoa i a ratou, a aru ana i a ia.  
<sup>12</sup> Na, i a ia i tetahi o nga pa, na ko etahi tangata kapi tonu i te repera; a, i tona kitenga i a Ihu,  
ka takoto tapapa, ka inoi ki a ia, ka mea, E te Ariki, ki te pai koe, e taea ahau e koe te mea kia ma.  
<sup>13</sup> Na ka totoro tona ringa, ka pa ki a ia, ka mea, E pai ana ahau: kia ma koe. A mutu tonu ake tona  
repera. <sup>14</sup> A ka whakatupato ia i a ia kia kaua e korerotia ki te tangata; Engari haere, kia kite te  
tohunga i a koe, kawea atu hoki mo tou whakamakanga nga mea i whakaritea e Mohi, hei mea  
whakaatu ki a ratou. <sup>15</sup> Heoi tino paku atu ana tona rongō: he tokomaha noa atu hoki i huihui ki

te whakarongo, kia whakaorangia ai e ia o ratou ngoikoretanga. <sup>16</sup> Otira haere ana ia, ko ia anake ki te koraha ki te inoi.

<sup>17</sup> A i tetahi o aua ra, e whakaako ana ia, me te noho ano nga Parihi me nga kaiwhakaako o te ture, i haere mai nei i nga kainga katoa o Kariri, o Huria, o Hiruharama: i reira ano te kaha o te

Ariki hei whakaora i a ratou. <sup>18</sup> Na ka kawea mai e etahi tangata i runga i te moenga tetahi tangata,

he pararutiki: mea noa ratou kia kawea ia ki roto, kia whakatakotoria ki tona aroaro. <sup>19</sup> A, i te korenga e kitea e ratou he huarahi hei kawenga mai ia ia ki roto, i te mano o te tangata, ka kakea

te whare, a tukua iho ana ia ra nga taera, me te moenga ano, ki waenganui, ki te aroaro o Ihu. <sup>20</sup> A,

i tona kitenga i to ratou whakapono, ka mea ia ki a ia, E hoa, ka oti ou hara te muru. <sup>21</sup> Na ka anga ka whakaaroaro nga karaipi me nga Parihi, ka mea, Ko wai tenei nana nga kupu kohukohu? Ko

wai hei muru hara? ko te Atua anake. <sup>22</sup> Otira i mohio a Ihu ki a ratou whakaaroaronga, ka oho,

ka mea ki a ratou, He aha ta koutou e whakaaroaro na i roto i o koutou ngakau? <sup>23</sup> Ko tehea te mea

takoto noa, ko te mea, Ka oti ou hara te muru; ko te mea ranei, Whakatika haere? <sup>24</sup> Otiia kia matau ai koutou he mana muru hara to te Tama a te tangata i runga i te whenua, ka mea ia ki te pararutiki,

Ko taku kupu tenei ki a koe, Whakatika, tangohia ake tou moenga, haere ki tou whare. <sup>25</sup> Na whakatika tonu ake ia i to ratou aroaro, tangohia ake ana te mea i takoto ai ia, haere ana ki tona

whare, a me te whakakororia i te Atua. <sup>26</sup> Na miharo ana ratou katoa, ka whakakororia i te Atua, ki tonu hoki ratou i te matakau, ka mea, Puta ke nga mea i kite nei tatou inaianei.

<sup>27</sup> A, i muri i enei mea, ka haere ia, ka kite i tetahi pupirikana, ko Riwai te ingoa, e noho ana

i te wahi tango takoha: ka mea ki a ia, Arumia mai ahau. <sup>28</sup> Na whakarerea ake e ia nga mea katoa,

whakatika ana, aru ana i a ia. <sup>29</sup> Na ka taka e Riwai he hakari nui mana i tona whare: he tokomaha

hoki nga pupirikana me nga tangata ke i noho tahi ratou. <sup>30</sup> Na ka amuamu nga Parihi me o ratou karaipi ki ana akonga, ka mea He aha koutou ka kai tahi ai, ka inu tahi ai me nga pupirikana, me

nga tangata hara? <sup>31</sup> Na ka whakahoki a Ihu, ka mea ki a ratou, Kahore he aha o nga tangata ora

e meatia ai e te rata, engari o te hunga e mate ana. <sup>32</sup> Kihai ahau i haere mai ki te karanga i te hunga

tika, engari i te hunga hara, kia ripeneta. <sup>33</sup> Na ka mea ratou ki a ia, Ko nga akonga a Hoani hono

tonu te nohopuku, te inoi, me nga akonga ano a nga Parihi; ko au ia e kai ana, e inu ana. <sup>34</sup> Na ko te meatanga a Ihu ki a ratou, E taea ranei e koutou te mea kia nohopuku nga tama o te whare marena,

i te mea kei a ratou te tane marena hou? <sup>35</sup> Na, tera e tae mai nga ra; a, ina tangohia te tane marena

hou i a ratou, katahi ratou ka nohopuku i aua ra. <sup>36</sup> I korerotia ano e ia tetahi kupu whakarite ki a ratou; E kore e haea e te tangata tetahi wahi o te kahu hou hei papaki mo te kahu tawhito; kei pakaru te mea hou, a e kore te papaki i tangohia i te mea hou e hangai ki te mea tawhito. <sup>37</sup> E kore hoki te tangata e riringi i te waina hou ki nga ipu tawhito; kei pakaru nga ipu i te waina hou, na ka maringi, a kore ake nga ipu. <sup>38</sup> Engari me riringi te waina hou ki nga ipu hou. <sup>39</sup> Ka inu hoki te tangata i te waina tawhito, e kore ia e hiahia ki te mea hou: e mea hoki ia, Erangi te mea tawhito.

## Chapter 6

<sup>1</sup> Na i te hapati ka haere ia ra waenga witi; a katohia ana e ana akonga nga puku witi, kainga ake, he mea komukumuku ki te ringa. <sup>2</sup> Na ka mea etahi o nga Parihi, He aha koutou ka mahi ai i te mea e kore e tika kia mahia i te hapati? <sup>3</sup> Na ka whakahoki a Ihu, ka mea ki a ratou, Kahore ianei koutou i kite i ta Rawiri i mea ai, i a ia e mate ana i te hiakai, ratou ko ona hoa; <sup>4</sup> I tona tomokanga ki te whare o te Atua, ka tango ia i nga taro aroaro, na kainga ana e ia, hoatu ana hoki ki ona hoa; ko nga mea kihai nei i tika kia kainga, engari ma nga tohunga anake? <sup>5</sup> I mea ano ia ki a ratou, Ko te Tama a te tangata te Ariki o te hapati. <sup>6</sup> A i tetahi atu hapati ka tomo ia ki te whare karakia, ka whakaako: i reira ano tetahi tangata, ko tona ringa matau kua memenge. <sup>7</sup> Ka titiro whakamau nga karaipi me nga Parihi ki a ia, me kore ia e whakaora i te hapati; kia whai take ai hei whakawakanga mona. <sup>8</sup> Na ka mohio ia ki o ratou whakaaro, ka mea ki te tangata i te ringa memenge, Whakatika, e tu ki waenganui. A whakatika ana ia, tu ana. <sup>9</sup> Katahi ka mea a Ihu ki a ratou, Maku hoki e ui ki a koutou; He mea tika ranei te mahi pai i te hapati, te mahi kino ranei? te whakaora, te whakamate ranei? <sup>10</sup> Na ka tirotiro ia ki a ratou katoa, ka mea ki taua tangata, Totoro mai tou ringa. A pera ana ia: na kua ora ano tona ringa. <sup>11</sup> Na ki tonu ratou i te honohonoa; ka korerorero ki a ratou ano, me aha ranei a Ihu e ratou. <sup>12</sup> A i aua ra ka haere ia ki te maunga ki te inoi, he inoi tonu tana i te roa o te po ki te Atua. <sup>13</sup> A, ka ao te ra, ka karangatia e ia ana akonga: ka whiriwhiria e ia kotahi tekau ma rua o ratou, a huaina ana hoki e ia hei apotoro; <sup>14</sup> Ko Haimona, i huaina hoki e ia ko Pita, ko tona teina ko Anaru, ko Hemi raua ko Hoani, ko Piripi raua ko Patoromu, <sup>15</sup> Ko Matiu raua ko Tamati, ko hemi tama

a Arapiu, ko Haimona e kiia nei ko Heroti, <sup>16</sup> Ko Hura tama a Hemi, ko Hura Ikariote hoki, ko ia  
<sup>17</sup> nei te kaituku. Na ka heke ngatahi iho ratou, tu ana i tetahi wahi tairite, ratou ko te ropu o ana  
 akonga, me te huihuinga nui o te iwi i Huria katoa, i Hiruharama, i te taha hoki o te moana o Taira,  
<sup>18</sup> o Hairona, i haere mai nei ki te whakarongo ki a ia, kia whak aorangia hoki o ratou mate; Me  
<sup>19</sup> te hunga ano e whakatoia ana e nga wairua poke: a whakaorangia ana ratou. I whai ano te mano  
 katoa kia pa ki a ia; i puta hoki he kaha i a ia, a whakaorangia ana ratou katoa.  
<sup>20</sup> Na ka titiro ona kanohi ki ana akonga, ka mea ia, Ka koa koutou, e nga rawakore: mo koutou  
<sup>21</sup> hoki te rangatiratanga o te Atua. Ka koa koutou e hiakai nei inaianei: ka makona hoki koutou.  
<sup>22</sup> Ka koa koutou e tangi nei inaianei: e kata hoki koutou. Ka koa koutou ina kinongia koutou e  
 nga tangata, ina wehea atu i roto i a ratou, ina tawaia, ina rukea atu to koutou ingoa, ano he mea  
<sup>23</sup> kino, mo te whakaaro ki te Tama a te tangata. Kia hari i taua ra, me te tupekepeke: he nui hoki  
<sup>24</sup> to koutou utu i te rangi: i peratia hoki nga poropiti e o ratou matua. Otira aue, te mate mo koutou,  
<sup>25</sup> mo te hunga taonga! kua riro hoki i a koutou to koutou whakamarie. Aue, te mate mo koutou,  
 mo te hunga e makona ana inaianei! e mate hoki koutou i te hiakai. Aue, te mate mo koutou, mo  
<sup>26</sup> te hunga e kata ana inaianei! ka aue hoki koutou, ka tangi. Aue, te mate mo koutou ka korerotia  
 paitia koutou e nga tangata katoa! i pera hoki o ratou matua ki nga poropiti teka.  
<sup>27</sup> Na ko taku kupu tenei ki a koutou e whakarongo mai nei, Arohaina o koutou hoa whawhai;  
<sup>28</sup> kia pai te mahi ki te hunga e kino ana ki a koutou; Manaakitia te hunga e kanga ana i a koutou,  
<sup>29</sup> me inoi mo te hunga e whakawhiu ana i a koutou. Na ki te pakia tou paparinga e tetahi,  
<sup>30</sup> whakaangahia atu hoki tetahi; ki te tangohia tou ngeri e tetahi, kaua e kaiponuhia tou koti. Hoatu  
<sup>31</sup> ki nga tangata katoa e inoi ana ki a koe; kaua hoki e tonoa au mea ki te tangohia e te tangata. A,  
<sup>32</sup> ko ta koutou e pai ai kia meatia e nga tangata ki a koutou, meatia ano e koutou ki a ratou. Ki te  
 aroha koutou ki te hunga e aroha ana ki a koutou, kei hea he whakawhetai ki a koutou? e aroha ana  
<sup>33</sup> hoki te hunga hara ki te hunga e aroha ana ki a ratou. Ki te atawhai hoki koutou i te hunga e  
<sup>34</sup> atawhai ana i a koutou, kei hea he whakawhetai ki a koutou? e pena ana ano te hunga hara. Ki  
 te tuku moni koutou ki te hunga e mea ai koutou ka utua mai e ratou, kei hea he whakawhetai ki a  
 koutou? e tuku moni ana hoki te hunga hara ki te hunga hara, mo te pera kia whakahokia ki a ratou.  
<sup>35</sup> Engari kia aroha ki o koutou hoa whawhai, mahia te pai ki a ratou, ka tuku atu he moni, kaua  
 ano e mutu te tumanako; a tera e rahi te whakautu ki a koutou, ka tupu koutou hei tamariki ma te

Runga Rawa: e atawhai ana hoki ia i te hunga e kore e w hakawhetai, i te hunga kino. <sup>36</sup> Kia ngawari rapea koutou, kia pera me to koutou Matua e ngawari ana.

<sup>37</sup> Kauga e whakawa, a e kore koutou e whakawakia: kauga e whakatau he, a e kore te he e whakataua ki a koutou: houhia te rongu, a e houhia ano te rongu ki a koutou. <sup>38</sup> Hoatu, a ka homai ki a koutou; he mehua pai, pehi rawa, oioi rawa, purena tonu ta ratou e homai ai ki te kokoru o o

koutou kakahu. Ko te mehua hoki e mehua ai koutou, hei mehua ano tena ki a koutou. <sup>39</sup> A ka puaki tana kupu whakarite ki a ratou, E ahei ranei te matapo te arahi i te matapo? e kore ranei e

taka tahi raua ki te poka? <sup>40</sup> E kore te akonga e rahi ake i tona kaiwhakaako: engari ka rite ano ki o ratou kaiwhakaako nga tangata katoa kua tino pukengatia. <sup>41</sup> He aha tau e titiro ki te otaota i roto

i te kanohi o tou teina, te kite i te kurupae i tou ake kanohi? <sup>42</sup> A me pehea e taea ai e koe te korero ki tou teina, E toku teina, iaua, kia kapea atu e ahau te otaota i roto i tou kanohi; te kite i te kurupae i roto i tou kanohi? E te tangata tinihanga, matua kapea atu e koe te kurupae i roto i tou kanohi, ka

tahi koe ka marama ai ki te kape i te otaota i roto i te kanohi o tou teina. <sup>43</sup> E kore hoki te rakau

ataahua e hua i te hua kino; e kore ano te rakau kino e hua i te hua ataahua. <sup>44</sup> Ma ona hua tonu ka mohiotia ai tenei rakau, tenei rakau. E kore hoki e kohia he piki i runga i nga tataramoa, e kore ano

e whakaiia he karepe i runga i te tumatakuru. <sup>45</sup> He tangata pai, he pai tana e whakaputa ai i roto i te taonga pai o tona ngakau; he tangata kino, he kino tana e whakaputa ai i roto i nga taonga kino

o tona ngakau: he purenatanga hoki no te ngakau nga kupu a te mangai. <sup>46</sup> He aha koutou ka

karanga ai ki ahau, E te Ariki, e te Ariki, te mahi i aku e korero ai? <sup>47</sup> Na, ko te tangata e haere mai ana ki ahau, e rongu ana ki aku kupu, a e mahi ana, maku e whakaatu ki a koutou tona rite:

<sup>48</sup> Ka rite ia ki te tangata i hanga i tetahi whare, i keru, i whakahohonu, a whakatakoto ana i te papa ki runga ki te toka: a, i te putanga o te waipuke, ka pakaru te roma ki taua whare, heoi kihai i taea

te whakangaueue: no te mea i u tona hangang a. <sup>49</sup> Tena ko te tangata i rongu, a kihai i mahi, ka rite ia ki te tangata i hanga i tetahi whare ki runga ki te oneone, te ai he turanga: i te pakarutanga o te roma, na hinga tonu iho; a nui atu te pakaru o taua whare.

## Chapter 7

<sup>1</sup> A, no ka mutu enei kupu katoa ana, me te whakarongo ano te iwi, ka tomo ia ki Kaperenauma.

<sup>2</sup> Na e mate ana te pononga a tetahi keneturio, meake marere, ko tana hoki i matenui ai. <sup>3</sup> A, no

tona rongonga i a Ihu, ka tono mai ki a ia etahi kaumatua o nga Hurai, hei mea ki a ia kia haere ki te whakaora i tana pononga. <sup>4</sup> A, i to ratou taenga ki a Ihu, he kaha ta ratou inoi, ka mea, he pai te tangata e meatia ai tenei e koe: <sup>5</sup> E aroha ana hoki ia ki to tatou iwi, nana hoki i hanga te whare karakia mo matou. <sup>6</sup> Na haere tahi ana a Ihu me ratou. A, i a ia kahore nei i matara i te whare, ka tono te keneturio i etahi hoa ki a ia, ka mea ki a ia, E te Ariki, kei maumau ngenge noa koe: ehara hoki ahau i te tikanga tangata e haere ake ai koe ki raro i toku tu anui: <sup>7</sup> Koia te tae ai toku aro ki te haere atu ki a koe: engari kia puaki mai tau kupu, a ka ora taku pononga. <sup>8</sup> He tangata hoki ahau e whakahaua ana, he hoia ano aku hei whakahaunga maku, na ka mea ahau ki tenei, Haere, a ka haere; ki tetahi atu hoki, Haere mai, a ka haere mai; ki taku pononga ano hoki, Meatia tenei, a ka meatia e ia. <sup>9</sup> A, i te rongongo o Ihu ki enei mea, ka miharo ki a ia, ka tahuri, ka mea ki te mano e aru ana i a ia, Ko taku kupu tenei ki a koutou, kahore ano ahau i kite i te whakapono hei rite mo tenei te nui, ahakoa i roto i a Iharaira. <sup>10</sup> A, rokohanga atu e te hunga i tonoa, i to ratou hokinga atu ki te whare, kua ora te pononga ra.

<sup>11</sup> Na i muri tata iho ka haere ia ki tetahi pa, ko Naina te ingoa: a i haere tahi ana akonga me ia, he rahi hoki te hui. <sup>12</sup> A, ka whakatata ia ki te kuwaha o te pa, na, he tupapaku tera e kauhoatia ana mai, he huatahi na tona whaea, a he poutaru tera: he tokomaha o te pa e haere tahi ana me ia.

<sup>13</sup> A, i te kitenga o te Ariki i a ia, ka aroha ki a ia, ka mea ki a ia, Kaua e tangi. <sup>14</sup> Na ka whakatata ia, ka pa ki te kauhoa: a tu tonu nga kaikauhoa. Na ko tana meatanga, E tama, ko taku kupu tenei ki a koe, E ara. <sup>15</sup> Na ka noho te tupapaku ki runga, ka anga ka korero. A hoatu ana ia e ia ki tona whaea. <sup>16</sup> Na ka tau te wehi ki a ratou katoa: ka whakakororia i te Atua, ka mea, Kua puta ake i roto i a tatou he poropiti nui; A, kua titiro mai hoki te Atua ki tana iwi. <sup>17</sup> Na haere ana tenei korero mona puta noa i huria, i nga wahi patata katoa ano hoki. <sup>18</sup> A ka korerotia enei mea katoa ki a Hoani e ana akonga.

<sup>19</sup> Na ka karangatia e Hoani etahi o ana akonga tokorua, ka tonoa ki te Ariki, mea ai, Ko koe ranei tera e haere mai ana? me tatari ranei tatou ki tetahi atu? <sup>20</sup> A, no te taenga mai o aua tangata ki a ia, ka mea, Kua tonoa mai maua e Hoani Kaiiriiri ki a koe, mea ai, Ko koe ranei tera e haere mai ana? me tatari ranei tatou ki tetahi atu? <sup>21</sup> I taua wa pu ano he tokomaha te hunga i whakaorangia e ia i nga turorotanga, i nga mate, i nga wairua kino; he tokomaha nga matapo i meinga kia kite.

<sup>22</sup> A ka whakahoki ia, ka mea ki a raua, Haere korerotia ki a Hoani nga mea e kite nei, e rongo nei korua; ko nga matapo e titiro ana, ko nga kopa e haereere ana, ko nga repera kua ma, ko nga turi e



rongo ana, ko nga tupapaku e whakaarahia ana, e ka uwhautia ana te rongopai ki te hunga rawakore;  
<sup>23</sup>

Na ka koa te tangata e kore e he ki ahau. <sup>24</sup> A, no te rironga atu o nga karere a Hoani, ka timata ia ki te korero ki te mano mo Hoani, I haere atu koutou ki te koraha kia kite i te aha? I te kakaho e

whakangaeuetia ana e te hau? <sup>25</sup> Ano ra, i haere koutou kia kite i te aha? I te tangata he kakahu

maeneene ona? Na, kei nga whare kingi te hunga i nga kakahu whakapaipai, i nga kai papai. <sup>26</sup> Ano ra, i haere koutou kia kite i te aha? I te poropiti? Ae ra, ko taku kupu tenei ki a koutou, tera atu i te

poropiti. <sup>27</sup> Mona te mea kua tuhituhia nei, Na, ka tonoa e ahau taku karere ki mua i tou aroaro,

mana e whakapai tou huarahi i mua i a koe. <sup>28</sup> Ko taku kupu hoki tenei ki a koutou, Kahore he poropiti nui atu i a Hoani Kaiiriiri i roto i nga whanau a te wahine; heoi rahi ake i a ia te nohinohi

rawa o te rangatiratanga o te Atua. <sup>29</sup> Na, i to ratou rongonga ai, whakatikaia ana ta te Atua e te

hunga katoa i rongo, e nga pupirikana ano, i iriiria hoki ratou ki te iriiri a Hoani. <sup>30</sup> Ko nga Parihi ia ratou ko nga kaiwhakaako o te ture i whakakahore i ta te Atua whakaaro ki a ratou, kihai nei

ratou i iriiria e ia. <sup>31</sup> Me whakarite e ahau nga tangata o tenei whakapaparanga ki te aha? he rite

ratou ki te aha? <sup>32</sup> He rite ki nga tamariki e noho ana i te kainga hokohoko, e karanga ana ki a ratou ano, e mea ana, Whakatangi noa matou i te putorino ki a koutou, a kahore koutou i kanikani; aue

noa matou ki a koutou, na, kahore koutou i tangi. <sup>33</sup> I haere mai hoki a Hoani Kaiiriiri, kihai i kai

taro, kihai i inu waina; heoi ka mea koutou, he rewera tona. <sup>34</sup> I haere mai te Tama a te tangata me te kai, me te inu; a ka mea koutou, Na, he tangata kakai, he tangata inu waina, he hoa no nga

pupirikana, no nga tangata hara! <sup>35</sup> Otira e whakatikaia ana te whakaaro nui e ana tamariki katoa.

<sup>36</sup> Na ka mea tetahi o nga Parihi ki a ia kia kai tahi raua. A ka tomo ia ki te whare o te Parihi,

ka noho. <sup>37</sup> Na tera tetahi wahine hara o te pa ka mohio, kei te whare o te Parihi ia e noho ana; na

ka kawea mai e ia tetahi pouaka kohatu, he hinu i roto, <sup>38</sup> A tu tangi ana i muri i ona waewae, ka anga ka whakamakuku i ona waewae ki ona roimata, ka muru ki nga makawe o tona matenga, ka

kihii i ona waewae, ka whakawahi ki te hinu kakara. <sup>39</sup> Na, i te kitenga o te Parihi nana ra ia i karanga, ka korero i roto i a ia, ka mea, Me he poropiti tenei, kua matau ia ki te wahine e pa nei ki

a ia, tona peheatanga: he wahine hara hoki. <sup>40</sup> Na ka korero a Ihu, ka mea ki a ia, E Haimona, he

kupu taku ki a koe. Ka mea ia, Korero, e te Kaiwhakaako. <sup>41</sup> Na, tokorua nga tangata i a raua te

moni a tetahi kaituku moni: e rima rau nga pene i tetahi, e rima tekau i tetahi. <sup>42</sup> I te kore nga mea a raua hei whakautu, whakarerea noatia ana e ia ki a raua: tena, ko wai o raua e tino nui tona aroha

<sup>43</sup>  
 ki a ia? Na ka whakahoki a Haimona, ka mea, Ki toku whakaaro, ko te tangata nana te mea nui  
 i whakarerea noatia atu. Na ko tana meatanga ki a ia, Tika rawa tau. <sup>44</sup> Na ka tahuri ia ki te wahine,  
 ka mea ki a Haimona, E kite ana koe i tenei wahine? I haere mai ahau ki roto ki tou whare, kahore  
 i homai e koe he wai mo oku waewae; nana ia i whakamakuku oku waewae ki ona roimata, a murua  
<sup>45</sup>  
 iho ki nga makawe o tona matenga. Kihai koe i kihi i ahau: tena ko ia, mai o toku taenga mai,  
<sup>46</sup>  
 kahore ano i tamutu te kihi o oku waewae. Kihai ko i whakawahi i toku matenga ki te hinu; nana  
<sup>47</sup>  
 ia oku waewae i whakawahi ki te hinu. Koia ahau ka mea nei ki a koe, Kua murua ona tini hara;  
<sup>48</sup>  
 he nui hoki tona aroha; ko te tangata ia he iti nga mea i murua, ka iti ano tona aroha. A ka mea  
<sup>49</sup>  
 ia ki a ia, Kua murua ou hara. Na ka anga ona hoa noho ka korero ki a ratou ano, Ko wai tenei,  
<sup>50</sup>  
 muru rawa hoki i nga hara? Na ko tana meatanga ki te wahine, Na tou whakapono koe i ora ai;  
 haere marie.

## Chapter 8

<sup>1</sup>  
 A muri tata iho ka haereere ano ia ki nga pa ki nga kainga, ka kauwhau, ka whakapuaki i te  
 rongopai o te rangatiratanga o te Atua: i a ia hoki te tekau ma rua, <sup>2</sup> Me etahi wahine kua oti nei  
 te whakaora i nga wairua kino, i nga ngoikoretanga, ko Meri, e huaina ana ko Makarini, e whitu  
<sup>3</sup>  
 nei nga rewera i puta mai i roto i a ia, Ko Hoana hoki, ko te wahine a Kuha, a te kaiwhakahauhau  
 a Herora, me Huhana, me te tokomaha noa atu; na ratou i mahi etahi o a ratou taonga hei mea ma  
 ratou.  
<sup>4</sup>  
 Na, ka rahi te hui i mine mai, a ka haere mai ki a ia o ia pa, o ia pa, ka korero kupu whakarite  
<sup>5</sup>  
 ia: I haere atu te kairui ki te rui i tana purapura: a, i a ia e rui ana, ka ngahoro etahi ki te taha o te  
 ara; a takahia ana ki raro, kainga ake e nga manu o te rangi. <sup>6</sup> Ko etahi i ngahoro ki runga ki te  
<sup>7</sup>  
 toka; ko te tupunga ake, kua maroke, kahore hoki he makuku. Ko etahi i ngahoro ki roto ki nga  
<sup>8</sup>  
 tataramoa; a tupu tahi ana nga tataramoa, kowaowaotia iho. Ko etahi i ngahoro ki te oneone pai;  
 tupu ana, tatakirau nga hua. Ka mutu enei korero, ka karanga ia, Ko ia he taringa ona hei whakarongo,  
<sup>9</sup>  
 kia rongo ia. Na ka ui ana akonga ki a ia, ka mea, he aha te tikanga o tenei kupu whakarite? <sup>10</sup> Ka  
 mea ia, Kua hoatu ki a koutou te matauranga ki nga mea ngaro o te rangatiratanga o te Atua: ki era

atu ia, he whakarite nga kupu: kia kite ai ratou, a e kore e kite, kia rongou ai, a kore ake e matau.

11 Na, tenei te kupu whakarite: Ko te purapura ko te kupu a te Atua. 12 Ko era i te huarahi, ko nga kaiwhakarongo; me i reira ka haere mai te rewera, ka kapo i te kupu i roto i o ratou ngakau, kei

13 whakapono ratou, a ka ora. Ko era i runga i te toka ko te hunga i tango i te kupu me te hari ano i to ratou rongonga; otira kahore o ratou pakiaka, ka whakapono mo te wa poto nei, a i te wa o te

14 whakamatautau ka taka atu. Ko tera i ngahoro ki roto ki nga tataramoa, ko te hunga e whakarongo ana, a, ko te haerenga atu, ka kowaowaotia e nga manukanuka, e nga taonga, e nga whakaahuareka

15 o te ao, a hore ake e pakari o ratou hua. Ko tera i te oneone pai, ko te hunga e tika ana, e pai ana

16 te ngakau, i te rongonga i te kupu, ka pupuri, a hua ana nga hua i runga i te manawanui. E kore e tahuna te rama e tetahi, e hipokina ki te oko, e waiho ranei i raro i te moenga; engari ka whakaturia

17 ki runga ki te turanga, kia kitea ai te marama e te hunga e tomo ana. E kore hoki tetahi mea i huna, e mahue te whakakite; e kore ano tetahi mea i ngaro, e mahue te mohio, te puta hoki ki te

18 marama. Na reira kia tupato ta koutou whakarongo: ki te whai mea hoki tetahi, ka hoatu ano ki

19 a ia; ki te kahore he mea a tetahi, ko te mea i mahara ai ia nana ake, ka tangohia i a ia. Na ka haere mai ki a ia tona whaea me ona teina, otira kahore ratou i ahei te tutuki mai ki a ia, i te pipiri

20 o te tangata. Na ka korerotia ki a ia, Ko tou whaea me ou teina te tu mai nei i waho, e mea ana

21 kia kite i a koe. Otira ka whakahoki ia, ka mea ki a ratou, Ko enei, e whakarongo nei, a e mahi nei i te kupu a te Atua, toku whaea me oku teina.

22 Na i tetahi o aua ra ka eke ia, ratou ko ana akonga ki te kaipuke: a ka mea ia ki a ratou, Tatou

23 ka whakawhiti ki tawahi o te roto. Na rere ana ratou. Otira i a ratou e rere ana, ka moe ia: na ko

24 te putanga o tetahi hau, he tupuhi, ki te roto; a ka tomo ratou, tata pu te totohu. Na ka haere ratou, ka whakaara i a ia, ka mea, E kara, e kara, ka mate tatou. Na ka ara ia, a riria ana e ia te hau,

25 me te ngaru o te moana: a mutu iho, na kua marino. Na ka mea ia ki a ratou, Kei hea to koutou whakapono? Mataku ana ratou, miharo ana, ka mea ki a ratou ano, Ko wai ra tenei, ka tapa nei ki

26 nga hau, ki te moana, a rongou rawa ki a ia? na ka tae ratou ki te whenua o nga Kararini, ki tawahi

27 atu o Kariri. A, no tona haerenga atu ki uta, ka tutaki ki a ia he tangata no te pa, he rewera ona,

28 he roa kahore ano i mau kakahu, kihai ano i noho i roto i te whare, engari ki nga urupa. A, i tona kitenga i a Ihu, ka karanga, ka takoto ki tona aroaro, he nui tona reo ki te mea, he aha taku ki a koe

29 e Ihu, e te Tama a te Atua, a te Runga Rawa? E, kaua ra ahau e whakamamaetia. I mea hoki ia ki te wairua poke kia puta i taua tangata. He maha hoki nga wa i hopukia ai ia e ia; e tiakina ana

hoki ia, he mea here ki nga mekameka, ki nga here waewae; heoi motumotuhia ana e ia nga here,  
a aia ana ia e te rewera ki te koraha. <sup>30</sup> Na ka ui a Ihu ki a ia, Ko wai tou ingoa? Ka mea ia, Ko  
Rihiona; he tokomaha hoki nga rewera i tomo ki roto ki a ia. <sup>31</sup> Katahi ka inoi ratou ki a ia kia  
kaua ratou e tonoa e ia kia haere ki te hohonu. <sup>32</sup> Na i reira tetahi kahui poaka maha e kai ana i  
runga i te maunga: a ka inoi ratou ki a ia kia tukua ratou kia tomo ki aua poaka. A tukua ana ratou.  
<sup>33</sup> A, ko te putanga o aua rewera i roto i te tangata, ka tomo ki roto ki nga poaka: na ko te tino  
rerenga o te kahui ra te pari ki te moana, a paremo iho. <sup>34</sup> A, no ka kite nga kaiwhangai i taua mea  
i meatia, ka whati, ka haere ka korero ki te pa, ki aua whenua hoki. <sup>35</sup> Na ka haere ratou kia kite i  
taua mea i meatia; a, i to ratou taenga mai ki a Ihu, ka kite i te tangata i puta nei nga rewera i roto  
i a ia, kua oti te whakakakahu, kua tika ona whakaaro, e noho ana i nga waewae o Ihu: a ka maku  
ratou. <sup>36</sup> A, korerotia ana ki a ratou e te hunga i kite, te whakaoranga o te tangata i nga rewera.  
<sup>37</sup> Na ka mea te huihui katoa o nga kainga patata o nga Kararini kia mawehe atu ia i a ratou; i  
maku whakaharahara hoki ratou: a eke ana ia ki te kaupuke, hoki ana. <sup>38</sup> Otira ka inoi ki a ia te  
tangata i puta ra nga rewera i roto i a ia, kia waiho ia hei hoa mona: heoi ka tono atu a Ihu i a ia,  
ka mea, <sup>39</sup> Hoki atu ki tou whare, korerotia nga mea nui kua meinga nei e te Atua ki a koe. na haere  
ana ia, korerotia ana ki te pa katoa nga mea nui i mea ai a Ihu ki a ia.  
<sup>40</sup> A, i a Ihu i hoki ai, ka koa te mano; i te tatari katoa hoki ratou ki a ia. <sup>41</sup> Na ka haere mai  
tetahi tangata, ko Hairuha te ingoa, he rangatira no te whare karakia; a takoto ana ki nga waewae  
o Ihu, ka inoi ki a ia kia tomo ki tona whare: <sup>42</sup> Kotahi tana tamahine, he huatahi kei te tekau ma  
rua ona tau, na, e whakahemohemo ana. Na, i tona haerenga atu, ka popo nga mano ki a ia. <sup>43</sup> Na  
tera tetahi wahine e mate ana i te pakaruhanga toto, tekau ma rua nga tau, a poto katoa tona oranga  
ki nga rata, kihai rawa i taea te whakaora e tetahi. <sup>44</sup> Ka haere ia i muri i a ia, ka pa ki te taniko o  
tona kakahu: a mutu iho te rere o ona toto. <sup>45</sup> Na ka mea a Ihu, Ko wai tenei kua pa nei ki ahau?  
A, no ka whakakahore katoa, ka mea a Pita ratou ko ona hoa, E kara, e pipiri ana nga mano ki a  
koe, e tutetute ana, ka mea koe, ko wai e pa ki ahau? <sup>46</sup> Otira i mea a Ihu, Ehara, kua pa tetahi ki  
ahau: e mohio ana ahau, kua puta atu he mana i ahau. <sup>47</sup> A, no te kitenga o te wahine kihai ia i  
ngaro, haere wiri ana, takoto ana i tona aroaro, korerotia ana e ia ki a ia i te aroaro o te iwi katoa  
te take i pa ai ia ki a ia, me te hohoro o tona oranga. <sup>48</sup> Na ka mea ia ki a ia, E ko, na tou whakapono  
koe i ora ai; haere marie. <sup>49</sup> I a ia ano e korero ana, ka haere mai tetahi i te whare o te rangatira o

te whare karakia, ka mea ki a ia, Kua mate tau tamahine; kua e whakararuraru i te Kaiwhakaako.  
50

Otiia, i te rongonga o Ihu, ka whakahoki ki a ia, ka mea, Kaua e maku: ko te whakapono ia kia whakapono, a ka ora ia. 51 A, i tona tomokanga ki te whare, kihai tetahi i tukua e ia ki tapoko, ko

Pita anake, ko Hemi, ko Hoani, me te papa raua ko te whaea o te kotiro. 52 E tangi ana ratou katoa,

e aue ana mona. Na ka mea ia, Kaua e tangi; kahore ia i mate, engari e moe ana. 53 A kataina iho

ia e ratou, i mohio hoki ratou kua mate ia. 54 Otira ka mau ia ki tona ringa, ka karanga, ka mea, E

ko, e ara. 55 Na hoki mai ana tona wairua, a whakatika tonu ake ia: na ka whakahautia e ia kia

hoatu he kai mana. 56 A, miharo tonu ona matua: na ka whakatupato ia i a ratou kia kua e korerotia taua meatanga ki tetahi.

## Chapter 9

1 Na ka karangatia e ia te tekau ma rua, ka hoatu ki a ratou he kaha, he mana, e peia ai nga rewera katoa, e ora ai nga mate. 2 A tonoa ana ratou e ia ki te kauwhau i te rangatiratanga o te Atua,

ki te whakaora hoki i te hunga e mate ana. 3 I mea ano ia ki a ratou, Kaua tetahi mea e mauria ki te ara, kua he tokotoko, kua he putea, kua he taro, kua he moni; kua ano e takiruatia he koti.

4 A ka tomo koutou ki tetahi whare, hei reira noho ai a haere noa i reira. 5 A, ki te kahore etahi e manako ki a koutou, ina haere atu koutou i taua pa, ruia atu te puehu o o koutou waewae, hei mea

whakaatu ki a ratou. 6 Na, ko to ratou mawehetanga atu, ka haereerea e ratou nga kainga, me te

kauwhau i te rongopai, me te whakaora i nga wahi katoa. 7 A ka rongo a Herora tetaraki i nga mea katoa i meinga e ia: a he nui tona pororaru, no te mea ki ta etahi ki, kua ara mai a Hoani i te hunga

mate; 8 Ki ta etahi, kua puta mai a Iraia; ki ta etahi, kua ara mai tetahi o nga poropiti onamata.

9 Na ka mea a Herora, I poutoa e ahau te matenga o Hoani: ko wai hoki tenei mona nei enei korero ka rangona nei e ahau? A ka whai ia kia kite i a ia.

10 A, no te hokinga mai o nga apotoro, ka korerotia ki a ia nga mea katoa i mea ai ratou. A ka

tango ia i a ratou, ka haere ko ratou anake ki tetahi pa, ko Petahaira te ingoa. 11 Otira, i te kitenga o nga mano, ka aru i a ia: a ka manaaki ia i a ratou, ka korerotia ki a ratou te rangatiratanga o te

Atua, whakaorangia ana hoki e ia te hunga e mea ana kia rongoatia. 12 Na kua titaha haere te ra;

a ka haere mai te tekau ma rua, ka mea ki a ia, Tonoa te mano, kia haere ai ki nga kainga, ki nga whenua i tetahi taha, i tetahi taha, moe ai, ki te mea kei hoki ma ratou; he wahi koraha hoki tenei

<sup>13</sup>  
i a tatou nei. A ka mea ia ki a ratou, Ma koutou e hoatu he kai ma ratou. ka mea ratou, heoi ano a matou e rima nga taro, e rua nga ika; ki te kahore ano ia matou e haere ki te hoko kai ma tenei

<sup>14</sup>  
iwi katoa. Me te mea ano e rima mano nga tane. Ka mea ia ki ana akonga, Meinga ratou kia

noho, kia rima tekau ki te nohoanga. <sup>15</sup> A pera ana ratou, meinga katoatia ana kia noho. <sup>16</sup> Na ka mau ia ki nga taro e rima, ki nga ika e rua, ka titiro ake ki te rangi, ka whakapai i aua mea, ka

whawhati, ka hoatu ki nga akonga kia whakatakotoria atu ma te mano. <sup>17</sup> Na ka kai ratou, ka makona katoa: a kotahi tekau ma rua nga kete i kohia ake e ratou, he toenga na ratou no nga whatiwhatinga.

<sup>18</sup>  
A, i a ia e inoi ana ko ia anake, i a ia ano ana akonga: na ka ui ia ki a ratou, ka mea, Ko wai

ahau ki te ki a te mano? <sup>19</sup> Na ka whakahoki ratou, ka mea, Ko Hoani Kaiiriiri; ki ta etahi ia, ko

iraia; ki ta etahi, kua ara mai tetahi o nga poropiti onamata. <sup>20</sup> Na ka mea ia ki a ratou, Ki ta koutou

na ki, ko wai ahau? Ka whakahoki a Pita, ka mea, Ko te Karaiti a te Atua. <sup>21</sup> Katahi ia ka

whakatupato i a ratou, ka mea, kia kua tenei e korerotia ki te tangata; <sup>22</sup> I mea ano ia, Kua takoto te tikanga kia maha nga mamae o te Tama a te tangata, kia whakakahoretia ano ia e nga kaumatua,

e nga tohunga nui, e nga karaipi, kia whakamatea, a i te toru o nga ra ka whakaarahia. <sup>23</sup> I mea ano ia ki a ratou katoa, Ki te mea tetahi kia haere mai i muri i ahau, me whakakahore ia e ia ano,

me amo tona ripeka i nga ra katoa, ka aru ai i ahau. <sup>24</sup> Ki te whai hoki tetahi kia ora, ka mate ia:

otira ki te mate tetahi, mona i whakaaro ki ahau, ka ora ia. <sup>25</sup> He aha oti te pai ki te tangata, ki te

riro i a ia te ao katoa, a ka ngaro ko ia ano, ka riro ranei i te he? <sup>26</sup> Ki te whakama hoki tetahi ki ahau, a ki aku korero, ka whakama ano te Tama a te tangata ki a ia, ina haere mai ia i runga i tona

ake kororia, i te kororia hoki o te Matua, o nga anahera tapu. <sup>27</sup> Na he pono taku korero ki a koutou, Tenei ano etahi o te hunga e tu nei e kore e pangia e te mate, kia kite ra ano i te rangatiratanga o te Atua.

<sup>28</sup>  
A ka tata ki te waru o nga ra i muri i enei korero, ka mau ia ki a Pita, ki a Hoani, ki a Hemi,

ka haere ki runga ki te maunga ki te inoi. <sup>29</sup> A, i a ia e inoi ana, ka puta ke te ahau o tona mata, ma

tonu tona kakahu, kanapa tonu. <sup>30</sup> Na, tokorua nga tangata e korero tahi ana me ia, ko Mohi raua

ko Iraia: <sup>31</sup> I puta kororia mai, i korero ano ki tona matenga meake nei rite i a ia ki Hiruharama.

<sup>32</sup>  
I pehia hoki a Pita ratou ko ona hoa e te moe: a, i to ratou aranga ake, ka kite i tona kororia, me

33 nga tangata tokorua e tu tahi ana me ia. A i a raua e mawehe atu ana i a ia, ka mea a Pita ki a Ihu, E kara, he pai kia noho tatou i konei: na kia hanga e matou etahi wharau kia toru; kia kotahi

34 mou, kia kotahi mo Mohi, kia kotahi mo Iraia: kihai ia i mohio ki tana i korero ai. A i a ia e korero ana i enei mea, ka puta he kapua, a taumaruru iho ana ki a ratou: a matakua ana ratou i to ratou

35 haerenga ki roto ki te kapua. Na ka puta mai he reo i te kapua, e mea ana, Ko taku Tama tenei,

36 ko taku i whiriwhiri ai: whakarongo ki a ia. A, no te putanga o te reo, ko Ihu anake i kitea. A whakarongo puku ana ratou, kihai hoki i korerotia e ratou ki te tangata i aua ra tetahi o nga mea i kite ai ratou.

37 Na, i te aonga ake o te ra, i a ratou kua tatu iho i runga i te maunga, he rahi te hui i tutaki ki

38 a ia. Na ka karanga tetahi tangata i roto i te mano, ka mea, Tena koa, e te Kaiwhakaako, titiro mai ki taku tama: ko ia anake hoki taku.

39 Na ka hopu te wairua i a ia, inamata ka hamama; na ka

40 haehae i a ia, tutu ana te huka i a ia; whakauaua ana te whakarere i a ia, a maru iho ia. A i te

41 inoi ahau ki au akonga kia peia ia ki waho: heoi kihai i taea e ratou. Na ka whakahoki a Ihu, ka mea, E te uri whakaponokore, parori ke, kia pehea te roa o toku noho ki a koutou, o toku manawanui

42 ki a koutou? Kawea mai tau tama ki konei. Na i a ia e haere mai ana, ka taia iho ia e te rewera, haehaea iho. Na ka riria te wairua poke e Ihu, a whakaorangia ana te tamaiti, hoatu ana ki tona papa.

43 Oho mauri katoa ana ratou ki te nui o te Atua. A, i a ratou e miharo ana ki nga mea katoa i

44 meinga e Ihu, ka mea ia ki ana akonga, Rongoatia enei korero ki roto ki o koutou taringa: meake

45 hoki tukua te Tama a te tangata ki nga ringa o nga tangata. Otira kihai ratou i mohio ki tenei kupu, he mea huna hoki i a ratou, kei kite ratou: i matakua hoki ratou ki te ui ki a ia i taua kupu.

46 Na ka puta ake he kororerero i roto i a ratou, ko wai o ratou te mea nui rawa.

47 Otira, i te kitenga o Ihu i e whakaaroaronga a o ratou ngakau, ka mau ia ki tetahi tamaiti nohinohi, a whakaturia ana

48 ki tona taha, Ka mea ki a ratou, Ki te manako tetahi ki tenei tamaiti, na te whakaaro hoki ki toku ingoa, e manako ana ia ki ahau: ki te manako hoki tetahi ki ahau, e manako ana ia ki toku kaitono

49 mai: na, ko te iti rawa i roto i a koutou katoa ko ia hei mea nui. Na, ka whakahoki a Hoani, ka mea, E kara, i kite matou i tetahi e pei rewera ana i runga i tou ingoa; a riria iho e matou, mona

50 kahore e haere tahi tatou. Otira i mea a Ihu ki a ia, Kaua e riria: ki te mea hoki ehara tetahi i te hoa whawhai no koutou, no koutou ia.

<sup>51</sup> A, no ka tata nga ra mo tona tangohanga ki runga, ka whakamau tona kanohi ki te haere ki  
<sup>52</sup> Hiruharama, A ka tonoa atu e ia he karere i mua i tona aroaro: a ka haere ratou, ka tomo ki tetahi  
<sup>53</sup> kainga o nga Hamari ki te mea tukunga iho mona. Heoi kihai era i manako ki a ia, ko te ahua  
<sup>54</sup> hoki o tona kanohi me te mea e haere ana ia ki Hiruharama. A, no te kitenga o ana akonga, o  
Hemi raua ko Hoani, ka mea raua, E te Ariki, e pai ana ranei koe kia korerotia e maua he kapura  
<sup>55</sup> kia heke iho i te rangi, hei whakangaro i a ratou? Otira ka tahuri ia, ka riria raua, kahore korua  
<sup>56</sup> e matau no tehea wairua korua. Kihai hoki te Tama a te tangata i haere mai ki te whakamate  
tangata, engari ki te whakaora. na haere ana ratou he kainga ke.  
<sup>57</sup> A, i a ratou e haere ana i te ara, ka mea tetahi tangata ki a ia, Ka aru ahau i a koe ki nga wahi  
<sup>58</sup> katoa e haere ai koe. Na ko te meatanga a Ihu ki a ia, He rua o nga pokiha, he kohanga o nga  
<sup>59</sup> manu o te rangi; tena ko te Tama a te tangata hore ona wahi e takoto ai tona matenga. Ka mea  
ia ki tetahi atu, Arumia mai ahau. A ka mea ia, E te Ariki, tukua ahau kia matua haere ki te tanu i  
<sup>60</sup> toku papa. Na ka mea a Ihu ki a ia, Waiho ma nga tupapaku e tanu o ratou na tupapaku: ko koe  
<sup>61</sup> ia me haere ki te kauwhau i te rangatiratanga o te Atua. Ka mea hoki tetahi atu, E te Ariki, ka  
<sup>62</sup> aru ahau i a koe; otira tukua ahau kia matua poroporoaki ki te hunga i toku whare. Otira ka mea  
a Ihu ki a ia, Ki te pa te ringa o tetahi ki te parau, a ka titiro ki muri, e kore ia e tau mo te  
rangatiratanga o te Atua.

## Chapter 10

<sup>1</sup> Na i muri i enei mea ka whakaritea e te Ariki etahi atu e whitu tekau, a tonoa ana ratou takirua,  
takirua, i mua i a ia ki nga pa katoa, ki nga wahi meake nei ia haere ki reira. <sup>2</sup> I mea ano ia ki ratou,  
He nui te kotinga, ko nga kaimahi ia he ruarua: na inoi atu ki te Ariki nana te kotinga, kia tonoa e  
<sup>3</sup> ia he kaimahi ki tana kotinga. Haere: nana, ka tonoa nei koutou e ahau, ano he reme ki waenganui  
<sup>4</sup> o nga wuruhi. Kauga e mauria he takotoranga moni, kauga he putea, kauga he hu: kauga ano e oha  
<sup>5</sup> atu ki tetahi ai te huarahi. Ki te tomo koutou ki tetahi whare, matua mea atu, Kia tau te rangimarie  
<sup>6</sup> ki tenei whare. A ki te mea kei reira te tama a te rangimarie, ka tau ta koutou rangimarie ki a ia:  
<sup>7</sup> ki te kahore, e hoki ano ki a koutou. Na hei taua whare koutou noho ai, kai ai, inu ai i ta ratou e



8  
homai ai: ka tika hoki te utu mo te kaimahi. Kaua e haereere i tenei whare ki tera whare. Ka tomo koutou ki tetahi pa, a ka manako ratou ki a koutou, kainga nga mea e whakatakotoria ana ma koutou:

9  
Me whakaora te hunga mate o reira, ka mea ki a ratou, Kua tata ki a koutou te rangatiratanga o te

10  
Atua. Tena ki te tomo koutou ki tetahi pa, a e kore ratou e manako ki a koutou, me haere atu ki

11  
nga huarahi o reira, me ki atu, Na, ko te puehu o to koutou pa e piri nei ki a matou, tenei ka tahia atu nei e matou ki a koutou: otira kia mohio koutou ki tenei, kua tata ki a koutou te rangatiratanga

12  
o te Atua. Ko taku kupu tenei ki a koutou, Engari to Horoma i taua ra e mama i to taua pa.

13  
Aue, te mate mou, e Korahina! aue, te mate mou, e Petahaira! me i meatia hoki ki Taira, ki Hairona nga merekara kua meatia nei ki a korua, kua ripeneta ke raua, he taratara hoki te kakahu,

14  
me te noho i roto i te pungarehu. Otira erangi to Taira, to Hairona i te whakawa e mama i to

15  
korua. A ko koe, e Kaperenauma, tera koe e ikeike, a tae noa ki te rangi? Ka whakataka koe ki

16  
te reinga. Ki te whakarongo tetahi ki a koutou, e whakarongo ana ia ki ahau; ki te whakakahore tetahi ki a koutou, e whakakahore ana ia ki ahau; ki te whakakahore ana ia ki ahau; ki te whakakahore tetahi ki ahau, e whakakahore ana ki toku kaitono mai.

17  
Na hoki hari ana te whitu tekau, ka mea, E te Ariki, rongo tonu nga rewera nei ki a matou,

18  
he mea na tou ingoa. Ka mea ia ki a ratou, I kite ahau i a Hatana, me te mea he uira te takanga

19  
i te rangi. Na ka hoatu nei e ahau ki a koutou he mana e takahi ai koutou i runga i nga nakahi, i nga kopiona, i te kaha katoa ano o te hoa whawhai: a e kore rawa koutou e mate i tetahi mea.

20  
Otira kaua e hari ki tenei, ki nga wairua ka riro nei ki raro i a koutou; ko ta koutou ia e tino hari

21  
ai, ko o koutou ingoa kua oti te tuhituhi ki te rangi. I taua wa ano ka hari ia i te Wairua Tapu, ka mea, ka whakawhetai ahau ki a koe, e Pa, e te Ariki o te rangi, o te whenua, kua huna nei hoki e koe enei mea i te hunga matau, i te hunga mahara, a whakakitea ana ki nga kohungahunga: ae ra,

22  
e pa, i pai hoki te penei ki tau titiro. Kua oti nga mea katoa te tuku ki ahau e toku matua: e kore ano tetahi e matau ki te Tama ko wai ia, ko te Matua anake; ko wai ranei te Matua, ko te Tama

23  
anake, me te tangata ano hoki e pai ai te Tama kia whakakitea ia. Na ka tahuri ia ki nga akonga,

24  
ka mea puku atu, Ka hari nga kanohi e kite ana i nga mea e kite nei koutou: Ko taku kupu hoki tenei ki a koutou, he tokomaha nga poropiti me nga kingi i hiahia kia kite i nga mea e kite nei koutou, a kahore i kite; kia rongo ano i nga mea e rongo nei koutou, a kahore i rongo.

25  
Na ka whakatika tetahi kaiwhakaako o te ture, ka whakamatautau i a ia, ka mea, E te

26  
kaiwhakaako, me aha ahau ka whiwhi ai ki te ora tonu? Ka mea ia ki a ia, he aha te mea i tuhituhia

<sup>27</sup> ki te ture? ka pehea tau korero? na ka whakahoki ia, ka mea, Kia whakapaua tou ngakau, tou wairua, tou kaha, tou hinengaro, ki te aroha ki te Ariki, ki tou Atua; me aroha hoki ki tou hoa tata  
<sup>28</sup> ano ko koe. Ka mea ia ki a ia, <sup>29</sup> Ka tika tau korero: meinga tenei, a ka ora koe. Otira ka mea  
<sup>30</sup> ia ki te whakatika i a ia, ka ki atu ki a Ihu, Ko wai ra toku hoa tata? Na ka whakahoki a Ihu, ka mea, E haere iho ana tetahi tangata i Hiruharama ki heriko, a ka tutaki ki nga kaipahua, na ka huia  
<sup>31</sup> ona e ratou, ka tukitukia ia, a haere ana, whakarerea iho ia, me te mea kua mate. Na, ko tetahi  
<sup>32</sup> tohunga e haere noa ana i taua ara: a, i tona kitenga i a ia, ninihi ke ana na tahaki. I pena hoki  
<sup>33</sup> tetahi Riwaiti, tae kau ki taua wahi, ka haere, ka titiro, ninihi ke ana na tahaki. Otira ko tetahi  
<sup>34</sup> hamari e haere ana ki nga whenua, i te taenga ki a ia, ka kite i a ia, ka aroha, Na ka haere, ka takai i ona patunga, ringihia iho ki te hinu, ki te waina, ka whakanoho i a ia ki tona ake kararehe,  
<sup>35</sup> a kawea ana ia ki te whare tira, atawhaitia ana ia. I te aonga ake, i tona haerenga, ka tangohia e ia e rua nga pene, hoatu ana ki te tangata i te whare, ka mea ki a ia, Mau ia e tiaki; a ki te maha atu  
<sup>36</sup> au mea e pau, maku koe e utu ina hoki mai ahau. Na, ki tou whakaaro, ko wai o tenei tokotoru  
<sup>37</sup> te hoa ona i tutaki nei ki nga kaipahua? Ka mea ia, Ko tera i atawhaitia ai ia. Na ka mea a Ihu ki a ia, Haere, kia pera ano tau mahi.  
<sup>38</sup> A i to ratou haerenga atu, ka tomo ia ki tetahi kainga: na, ko tetahi wahine ko Mata te ingoa,  
<sup>39</sup> i whakamanuhiri i a ia ki tona whare. He teina ano tona, ko Meri te ingoa, na ka noho tenei ki  
<sup>40</sup> nga waewae o Ihu, whakarongo ai ki tana kupu. Na raruraru noa iho a Mata i te nui o te mahi tuari, a haere ana, ka mea, E te Ariki, he mea noa oti ki a koe kia waiho e toku teina maku anake  
<sup>41</sup> te tuari? na, korero atu kia haere mai ia hei hoa moku. Ka whakahoki te Ariki, ka mea ki a ia,  
<sup>42</sup> E Mata, e Mata, e manukanuka ana koe, e raruraru ana ki nga mea maha: Kotahi ia te mea e matea ana: a kua whiriwhiria e Meri tena wahi pai, e kore nei e tangohia i a ia.

## Chapter 11

<sup>1</sup> A, i a ia e inoi ana i tetahi wahi, a ka mutu, ka ki atu tetahi o ana akonga ki a ia, E te Ariki,  
<sup>2</sup> whakaakona matou ki te inoi, me Hoani hoki i whakaako ra i ana akonga. Ka mea ia ki a ratou, Ka inoi koutou, mea atu, E to matou Matua i te rangi, Kia tapu tou ingoa. Kia tae mai tou

rangatiratanga. Kia meatia tau e pai ai ki runga ki te whenua, kia rite ano ki to te rangi. <sup>3</sup> Homai  
 ta matou taro ki a matou, to tenei ra, to tenei ra. <sup>4</sup> Murua o matou hara; e murua ana hoki e matou  
 o nga tangata katoa e hara ana ki a matou. Aua hoki matou e kawea kia whakawaia. <sup>5</sup> I mea ano ia  
 ki a ratou, Ko wai o koutou ki te mea he hoa tona, a ka tae atu ki a ia i waenganui po, ka mea ki a  
 ia, E hoa, homai ki ahau etahi taro, kia toru; <sup>6</sup> Kua tae mai hoki toku hoa ki ahau i te ara, kahore  
 aku mea e whakatakoto ai ahau mana? <sup>7</sup> A ka whakahoki tera i roto, ka mea, Hoha ki, kati ra: kua  
 tutakina noatia ake te tatau, kei te moenga matou ko aku tamariki; e kore e ahei kia whakatika atu  
 ahau ki te hoatu ki a koe. <sup>8</sup> Ko taku kupu tenei ki a koutou, Ahakoa kahore ia i whakatika ki te  
 hoatu ki a ia, no te mea he hoa nona, ma tana tohe ano ka ara ake ai ia, ka hoatu ai ki a ia i nga mea  
 i tonoa e ia. <sup>9</sup> Ko taku kupu ano tenei ki a koutou, Inoi, a ka hoatu ki a koutou; e rapu, a ka kite  
 koutou; patukia, a ka uakina ki a koutou. <sup>10</sup> Ka whiwhi hoki nga tangata katoa ina inoi; ka kite ina  
 rapu; ka uakina ki te tangata e patuki ana. <sup>11</sup> Ko tehea matua o koutou ki te inoia e tana tama tetahi  
 taro, e hoatu ranei ki a ia he kamaka? ki te inoia he ika, e hoatu ranei ki a ia he nakahi hei ika?  
<sup>12</sup> Ki te inoia he hua manu, e hoatu ranei ki a ia he kopiona? <sup>13</sup> Ki te mea ko koutou, hunga kino  
 nei, e matau ana ki te hoatu mea papai ki a koutou tamariki: tera noa ake te homaitanga o te Wairua  
 Tapu e to koutou Matua i te rangi ki te hunga e inoi ana ki a ia.  
<sup>14</sup> Na e pei rewera ana ia, he mea wahangu ano hoki. A, no te putanga o te rewera ki waho, ka  
 korero te wahangu; a miharo ana te mano. <sup>15</sup> Na ka mea etahi o ratou, Na te rangatira o nga rewera,  
 na Perehepura, tana peinga rewera. <sup>16</sup> Na ka whakamatautau etahi, ka mea ki tetahi tohu i a ia i te  
 rangi. <sup>17</sup> Otiia i matau ia ki o ratou whakaaro, a ka mea ki a ratou, Ki te tahuri iho tetahi  
 rangatiratanga ki a ia ano, ka kore; ki te tahuri hoki tetahi whare ki tetahi whare, ka hinga. <sup>18</sup> A ki  
 te tahuri iho a hatana ki a ia ano, me pehea e tu ai tona rangatiratanga? e mea na hoki koutou, na  
 Perehepura taku peinga rewera. <sup>19</sup> Na, ki te mea na Perehepura taku peinga rewera, na wai te peinga  
 a a koutou tama? mo konei hei kaiwhakawa ratou mo koutou. <sup>20</sup> Tena ki te mea na te ringa o te  
 Atua taku peinga rewera, ina, kua tae mai te rangatiratanga o te Atua ki a koutou. <sup>21</sup> Ki te tiakina  
 e te tangata kaha, he patu nei ana, tona whare, ka ata takoto ana taonga: <sup>22</sup> Ki te puta mai ia te mea  
 e kaha atu ana i a ia, a ka hinga tera, na ka tangohia ana patu i whakamanawa ai ia, ka tuwhatuwhaia  
 ona taonga. <sup>23</sup> Ko te tangata ehara i te hoa noku, he hoariri ia ki ahau: ko te tangata kahore e

24  
kohikohi tahi maua, e titaritari ana. Ka puta te wairua poke i roto i te tangata, ka haereere ia ra nga wahi waikore rapu okiokinga ai; a, kahore e kitea, ka mea ia, Ka hoki ahau ki toku whare i puta

25  
mai ai ahau. A, no te taenga atu, rokohanga atu kua oti te tahitahi, te whakapaipai. 26 Na ka haere ia, ka tango i etahi atu wairua tokowhitu, he kino atu i a ia; a ka tomo atu, ka noho i reira: a kino atu i te timatanga te whakamutunga o taua tangata.

27  
A i ia e korero ana i enei mea, ka karanga ake tetahi wahine i roto i te mano, ka mea ki a ia,

28  
Koa tonu te kopu i kawea ai koe, me nga u i ngotea e koe. Ano ra hoki ko ia, Engari ra, tino koa te hunga e whakarongo ana ki te kupu a te Atua, a e mahi ana.

29  
A, no ka rupeke te mano, ka anga ia ka korero, He whakatupuranga kino tenei: e rapu ana

30  
ki tetahi tohu; a e kore tetahi tohu e hoatu, ko te tohu anake o Hona poropiti. I waiho nei hoki a Hona hei tohu ki nga tangata o Ninewe, ka pera ano te Tama a te tangata ki tenei whakatupuranga.

31  
Ka whakatika ngatahi te kuini o te tonga i te whakawakanga me nga tangata o tenei whakatupuranga, ka whakatau i te he ki a ratou; i haere hoki ia i nga pito o te whenua ki te

32  
whakarongo ki te whakaaro nui o Horomona; a tenei tetahi he nui ke atu i a Horomona. Ka whakatika ngatahi nga tangata o Ninewe i te whakawakanga me tenei whakatupuranga, ka whakatau i te he ki a ratou: i ripeneta hoki ratou i te kauwhautanga a Hona; a tenei tetahi he nui ke atu i a

33  
Hona. Ka tahuna te rama, e kore e waiho e te tangata ki te wahi ngaro, ki raro ranei i te puhera,

34  
engari ki runga ki te turanga, kia kitea ai te marama e te hunga e tomo atu ana. Ko te kanohi te rama o te tinana: na, ki te atea tou kanohi, ka marama ano tou tinana katoa; tena ki te kino, ka pouiri

35  
ano hoki tou tinana. Na reira kia ata titiro mehemea ehara i te pouiri te marama i roto i a koe.

36  
Na, a ki te marama tou tinana katoa, a ki te kore ona wahi pouiri, ka marama katoa ano, me te mea ko te mura o te rama e whakamarama ana i a koe.

37  
Na, i a ia e korero ana, ka tono tetahi parihi kia kai ia ki a ia; a haere ana ia ki roto, ka noho.

38  
A, i te kitenga o te Parihi, ka miharo, no te mea kahore ia e horoi i mua o te kainga. Ka mea te Ariki ki a ia, Tenei koutou, e nga Parihi, te horoi nei i waho o te kapu, o te rihi; ko roto ia o

40  
koutou e ki ana i te pahua, i te kino. E te hunga kuware, kihai ianei i hanga a roto e te kaihanganga

41  
o waho? Engari hoatu nga mea o roto hei atawhainga mo nga rawakore; a ka ma nga mea katoa

42  
ki a koutou. Otira, aue, te mate mo koutou, e nga Parihi! e hoatu ana hoki e koutou te wahi whakatekau, o te miniti, o te ru, o nga otaota katoa, a kapea ake te whakarite whakawa me te aroha

43  
ki te Atua: he tika ano ko enei kia meatia, kia kaua ano hoki era e kapea. Aue, te mate mo koutou,

e nga parihi! ko ta koutou hoki e rawe ai ko nga nohoanga rangatira i nga whare karakia, me nga ohatanga i nga kainga hokohoko. <sup>44</sup> Aue, te mate mo koutou, e nga karaipi, e nga Parihi, e te hunga tinihanga! e rite na koutou ki nga urupa ngaro, e kore e kitea e nga tangata e haereere ana i runga.

<sup>45</sup> Na ka whakahoki tetahi o nga kaiwhakaako o te ture, ka mea ki a ia, E te Kaiwhakaako, he whakahe ano hoki mo matou enei korero au. <sup>46</sup> Na ko tana meatanga, Aue, te mate mo koutou hoki, e nga kaiwhakaako o te ture! e whakawaha ana hoki koutou i nga tangata ki nga kawenga

<sup>47</sup> taimaha rawa hei pikaunga, a e kore tetahi o o koutou matihao e pa atu ki aua kawenga. Aue, te mate mo koutou! ko koutou nei hoki hei hanga i nga urupa o nga poropiti, na o koutou matua hoki

<sup>48</sup> ratou i whakamate. Na, he kaiwhakaatu koutou he kaiwhakaae ki nga mahi a o koutou matua:

<sup>49</sup> na ratou hoki ratou i whakamate, ko koutou hoki hei hanga i o ratou urupa. Na konei ano te matauranga o te Atua i mea ai, Maku e tono he poropiti, he apotoro ki a ratou, a ka whakamate, ka

<sup>50</sup> tukino ratou i etahi o ratou: Kia rapua ai he utu i tenei whakapaparanga mo te toto o nga poropiti

<sup>51</sup> katoa i ringihia nei no te timatanga ra ano o te ao; No te toto o Aperu, tae noa ki te toto o Hakaraia i mate nei ki waenganui o te aata, o te wahi tapu: ae ra, ka mea atu ahau ki a koutou, E rapua he

<sup>52</sup> utu i tenei whakapaparanga. Aue, te mate mo koutou, e nga kaiwhakaako o te ture! kua tangohia hoki e koutou te ki o te matauranga: kihai koutou i tomo ki roto, a i arai hoki koutou i te hunga e

<sup>53</sup> tomo ana. Na, i tona putanga mai ki waho, ka timata te tohetohe kaha a nga karaipi, a nga Parihi

<sup>54</sup> ki a ia, he mea kia maha atu ai ana korero: E whakamoho ana hoki, kia mau tetahi kupu a tona mangai.

## Chapter 12

<sup>1</sup> Na kei te huihui ano tera nga mano, tona tini, no ka takatakahi i a ratou ano, a ka anga ia ka korero i te tuatahi tonu ki ana akonga, ka mea, Kia tupato i te rewena o nga Parihi, ara i te tinihanga.

<sup>2</sup> Kahore hoki he mea i hipokina e mahue te hura; kahore hoki tetahi mea ngaro e mahue te mohio.

<sup>3</sup> Mo konei ko ta koutou e korero ai i te pouri, ka rangona i te marama; ko ta koutou e kia ai ki te taringa i nga ruma i roto rawa, ka kauwhautia i runga o nga whare. <sup>4</sup> Na ko taku kupu tenei ki a koutou, e oku hoa, kaua e wehi ki te hunga e whakamate nei i te tinana, a muri iho kahore he mea

<sup>5</sup> e taea e ratou. Engari maku e whakaatu ki a koutou ta koutou e wehi ai: E wehi ki a ia kei a ia nei te mana, i muri i tana whakamatenga, ki te maka ki Kehena; ae ra hoki, ko taku kupu tenei ki

<sup>6</sup>  
 a koutou, E wehi ki a ia. Kahore ianei e hokona nga pihoihoi e rima ki nga patene e rua? a kahore  
<sup>7</sup>  
 tetahi o ratou e wareware i te Atua? Heoi kua oti katoa te tatau nga makawe katoa nei o o koutou  
<sup>8</sup>  
 matenga. Kaua e wehi: engari koutou i nga pihoihoi maha. Ko taku kupu tenei ki a koutou, Ki te  
 whakaae tetahi ki ahau i te aroaro o nga tangata, ka whakaaetia ano ia e te Tama a te tangata i te  
<sup>9</sup>  
 aroaro o nga anahera a te Atua: Ki te whakakahore tetahi i ahau i te aroaro o nga tangata, ka  
<sup>10</sup>  
 whakakahoretia ano ia i te aroaro o nga anahera a te Atua. Ki te korero tetahi he whakahe mo  
 te Tama a te tangata, ka murua tona hara; tena ko te tangata e kohukohua ai te Wairua Tapu, e kore  
<sup>11</sup>  
 tona e murua. Ki te kawea koutou ki nga whare karakia, ki nga rangatira, ki te hunga whai mana,  
 kaua e manukanuka ki te pehea, ki te aha ranei e whakahoki atu ai koutou, ki ta koutou ranei e  
<sup>12</sup>  
 korero ai: Ma te Wairua Tapu hoki koutou e ako i taua haora ano ki nga mea e tika ana kia  
 korerotia e koutou.  
<sup>13</sup>  
 Na ka mea tetahi i roto i te mano ki a ia, E te Kaiwhakaako, mea atu ki toku tuakana, kia  
<sup>14</sup>  
 wehea mai moku tetahi wahi o te kainga. Na ko tana meatanga ki a ia, E te tangata nei, na wai  
<sup>15</sup>  
 ahau i mea hei kaiwhakawa, hei kaiwehewehe i waenganui i a koutou? I mea ano ia ki a ratou,  
 Kia mahara, kia tupato ki te apo: ehara i te mea ma te nui o nga taonga a te tangata e ora ai ia.  
<sup>16</sup>  
 Na ka korerotia e ia tetahi kupu whakarite ki a ratou, ka mea, Na he nui te hua o te whenua o  
<sup>17</sup>  
 tetahi tangata whai taonga: Na ka whakaaroaro ia i roto i a ia, Me pehea ahau? Kahore hoki oku  
<sup>18</sup>  
 wahi hei putunga mo aku hua. A ka mea ia, Tenei taku e mea ai: ka wawahia e ahau oku whare  
<sup>19</sup>  
 witi, a ka hanga kia nui: a ka kohikohia ki reira aku hua katoa, me aku taonga: Katahi ahau ka  
 mea ki toku wairua, E toku wairua, ka maha au mea papai kei te rongoa mo nga tau e maha; noho  
<sup>20</sup>  
 noa iho, e kai, e inu, kia koa te ngakau. Otiia ka mea te Atua ki a ia, Kuware, ko a tenei po ano  
<sup>21</sup>  
 tangohia ai tou wairua i a koe: a ma wai nga mea kua pae na i a koe? Na, ka pena te tangata e  
 whakapuranga ana i te taonga mana ake, a kahore e hua tana whaka te Atua.  
<sup>22</sup>  
 Na ka mea ia ki ana akonga, Koia ahau ka mea nei ki a koutou, Kaua e manukanuka ki to  
<sup>23</sup>  
 koutou oranga, ki ta koutou e kai ai; ki te tinana ranei, ki ta koutou e kakahu ai. Rahi atu te ora  
<sup>24</sup>  
 i te kai, me te tinana i te kakahu. Whakaaroa nga rawene; kahore nei e whakato, kahore e kokoti,  
 kahore a ratou pakoro, kahore he whare witi; heoi e whangaia ana ratou e te Atua: tera noa ake  
<sup>25</sup>  
 koutou i nga manu. A ko wai o koutou e taea e ia te whakaaro iho, te hono tetahi wahi ki tona

roa, kia kotahi te whatianga? <sup>26</sup> A ki te kore e taea e koutou te mea nohinohi rawa, he aha i  
 manukanuka ai ki tetahi atu? <sup>27</sup> Whakaaroa nga rengarenga, to ratou tupu: e kore nei e mahi, e  
 kore e miro; na ko taku tenei ki a koutou, Kihai a Horomona me tona kororia katoa i rite ki tetahi  
 o enei te whai kakahu. <sup>28</sup> Na, ki te penei ta te Atua whakakakahu i te tarutaru i te parae, kei reira  
 aiane, a apopo ka maka ki te oumu; tera noa ake tana i a koutou, e te hunga whakapono iti. <sup>29</sup> Kaua  
 ra e rapu ki ta koutou e kai ai, ki ta koutou e inu ai, kaua e tirengi noa te whakaaro. <sup>30</sup> E rapu ana  
 hoki nga iwi o te ao i enei mea katoa: otira e matau ana to koutou Matua e matea ana e koutou enei  
 mea. <sup>31</sup> Engari rapu te rangatiratanga o te Atua: a ka tapiritia enei mea katoa ma koutou. <sup>32</sup> Kaua  
 e mataku, e te kahui nohinohi; kua pai hoki to koutou matua ki te homai i te rangatiratanga ki a  
 koutou. <sup>33</sup> Hokona o koutou taonga, hoatu he mea ma te hunga rawakore; hanga ma koutou he  
 peke moni e kore e tawhitotia, he taonga ki te rangi e kore e memeha, ki te wahi e kore nei e tata  
 atu te tahae, e kore ano te huhu e kai. <sup>34</sup> Ko te wahi hoki i to koutou taonga, ko reira ano o koutou  
 ngakau. <sup>35</sup> Whitikiria o koutou hope, tahuna nga rama kia ka; <sup>36</sup> Ko to koutou rite hei nga tangata  
 e tatari ana ki to ratou rangatira, ina hoki mai i te hakari o te marena; mo tona tae rawa mai, ka  
 patoto, na uaki tonu atu ratou ki a ia. <sup>37</sup> Ka koa nga pononga e rokohina mai e to ratou rangatira,  
 a tona taenga mai, e mataara ana: he pono taku e mea nei ki a koutou, ka whitiki ia i a ia, a ka mea  
 i a ratou kia noho, ka haere ki te mahi mea ma ratou. <sup>38</sup> A ki te haere mai ia i te rua o nga  
 mataaratanga, i te toru ranei, a ka rokohina mai e pera ana ano, ka koa aua pononga. <sup>39</sup> Otira kia  
 mohio koutou ki tenei, me i matau te tangata i te whare, ki te wa e haere mai ai te tahae, kua mataara  
 ia, a kahore i tukua kia pokaia tona whare. <sup>40</sup> Kia tatanga ra koutou: no te mea e puta mai te Tama  
 a te tangata i te haora e kore ai koutou e mahara.  
<sup>41</sup> Na ka mea a Pita ki a ia, E te Ariki, ki a matou tenei kupu whakarite e korero nei koe? ki te  
 katoa ranei? <sup>42</sup> Na ka mea te Ariki, Ko wai ra te tuari pono, mahara, e meinga e tona ariki hei  
 rangatira mo ana tangata, hei hoatu i te mehua kai i te wa e tika ai? <sup>43</sup> Ka koa taua pononga, ki te  
 rokohina e tona rangatira ina tae mai, e pena ana. <sup>44</sup> He pono taku e mea nei ki a koutou, ka meinga  
 ia hei rangatira mo ana taonga katoa. <sup>45</sup> Otira ki te mea taua pononga i roto i tona ngakau, Ka roa  
 te haerenga mai o toku ariki; a ka anga ka whiu i nga pononga tane, i nga pononga wahine, ka kai,  
 ka inu, ka haurangi; <sup>46</sup> Ka haere mai te rangatira o taua pononga i te ra e kore ai ia e mahara, i te  
 haora e kore ai ia e mohio, a ka hautopea ia, ka meinga mona he wahi i roto i te hunga

<sup>47</sup> whakaponokore. Na, ko taua pononga, i mohio nei ki ta tona rangatira i pai ai, a kihai i whakaaro  
<sup>48</sup> wawe, kihai hoki i mea i tana i pai ai, he maha nga whiu mona: Tena ko ia kihai i mohio, a i  
 mahi i nga mea e tika ai kia whiua, he torutoru nga whiu mona. Ko te tangata hoki i nui te hoatutanga  
 ki a ia he nui ano hei homaitanga mana; a ko te tangata i nui te tukunga ki a ia, hira noa atu te mea  
<sup>49</sup> e tonoa i a ia. I haere mai ahau ki te maka kapura ki te whenua; a ka pehea ahau, mehemea kua  
<sup>50</sup> ka ke? Otira he iriiringa toku e iriiria ai ahau; ano toku takarekare kia oti ra ano! <sup>51</sup> E mea ana  
 ranei koutou, i haere mai ahau ki te homai i te rangimarie ki te whenua? Tenei taku kupu ki a koutou,  
<sup>52</sup> Kahore; engari i te wehewehe: Hei nga ra hoki e takoto ake nei ka tokorima i roto i te whare  
<sup>53</sup> kotahi, a ka tahuri ki a ratou ano, tokotoru ki te tokorua, tokorua ki te tokotoru. Ka tahuri atu te  
 papa ki te tama, te tama ki te papa; te whaea ki te tamahine, te tamahine ki tona whaea; te hungawai  
 wahine ki tana hunaonga wahine, me te hunaonga wahine ki tona hungawai wahine.  
<sup>54</sup> A i mea ano ia ki nga mano, Ka kite koutou i te kapua e puta mai ana i te hauauru, na mea  
<sup>55</sup> tonu ake koutou, He ua te haere mai nei; a ko ia ano ia. Ka kite koutou i te tonga e pupuhi ana,  
<sup>56</sup> ka mea koutou, Meake ko te werawera; a ko ia ano ia. E te hunga tinihanga, e matau ana koutou  
 ki te titiro ki te mata o te whenua, o te rangi; he aha koutou te matau ai ki te titiro ki tenei taima?  
<sup>57</sup> A he aha koutou te whakaaro noa ake ai i te mea tika? <sup>58</sup> I a korua ko tou hoa tauwhaingā e  
 haere ana ki te kaiwhakawa, hei te huarahi ano kia kaha te mea kia makere atu ia i a koe: kei toia  
 koe e ia ki te kaiwhakawa, a ka tukua koe e te kaiwhakawa ki te katipa, a ka maka koe e te katipa  
<sup>59</sup> ki te whare he rehere. Ko taku kupu tenei ki a koe, E kore rawa koe e puta mai i reira, kia poto  
 ra ano nga moni iti rawa te utu e koe.

### Chapter 13

<sup>1</sup> Na i reira etahi i taua wa nana i korero ki a ia nga tangata o Kariri, i whakaranua nei o ratou  
<sup>2</sup> toto e Pirato ki a ratou patunga tapu. Na ka whakahoki ia, ka mea ki a ratou, E mea ana ranei  
 koutou, he hara rawa aua tangata o Kariri i nga tangata katoa o Kariri, no te mea he pera o ratou  
<sup>3</sup> mate? Na ko taku kupu tenei ki a koutou, Kahore; engari ki te kore koutou e ripeneta, ka pera  
<sup>4</sup> ano hoki koutou katoa te mate. Me taua tekau ma waru i horoa nei e te pourewa o Hiroama, a  
 mate iho, e mea ana oti koutou, he hara rawa ratou i nga tangata katoa e noho ana i hiruharama?



5

Ko taku tenei ki a koutou, Kahore: engari ki te kore koutou e ripeneta, ka pera ano koutou katoa te mate.

6

A i korerotia e ia tenei kupu whakarite; He piki ta tetahi tangata, he mea whakato ki tana mara waina; na ka haere mai ia, ka rapu hua i runga, a kihai i kitea. <sup>7</sup> Katahi ia ka mea ki te kaimahi waina, Na, ka toru enei oku tau e haere mai ana ki te rapu hua i runga i tenei piki, heoi kahore i

kitea: tuaina ki raro; hei aha i maumauria ai hoki te whenua? <sup>8</sup> Na ka whakahoki tera, ka mea ki a ia, E te ariki, waiho ano hoki i tenei tau, kia keria ra ano e ahau nga taha, kia maka hoki he wairakau:

9

A ki te whai hua a houange, ka waiho; ki te kahore, mau e tua ki raro.

10

A i roto ia i tetahi o nga whare karakia e whakaako ana i te hapati. <sup>11</sup> Na ko tetahi wahine, he wairua ngoikore tona, kotahi tekau ma waru nga tau, piko tonu, kihai rawa i ahei te whakatika

ake. <sup>12</sup> A, no te kitenga o Ihu i a ia, ka karanga atu ki a ia, ka mea ki a ia, E kui, ka oti tou ngoikore

te whakamatara. <sup>13</sup> Na whakapakia iho e ia ona ringa ki a ia: a kihai i aha kua tika, whakakororia

ana i te Atua. <sup>14</sup> Na, he riri nona mo Ihu i whakaora i te hapati, ka korero te rangatira o te whare karakia, ka mea ki te mano, E ono nga ra e tika ai te tangata te mahi: hei reira koutou haere mai ai

kia whakaorangia; kauaka i te hapati. <sup>15</sup> Na ka whakahoki te Ariki ki a ia, ka mea, E nga tangata tinihanga, e kore ianei tenei tangata, tenei tangata o koutou e wewete i tana kau i te hapati, i tana

kaihe ranei, ka arahi atu ai i te turanga ki te whakainu? <sup>16</sup> Kahore ranei tenei wahine, he tamahine nei na Aperahama, i herea nei e hatana i enei tau tekau ma waru, e tika kia wetekina i tona here i

te ra hapati? <sup>17</sup> A, no ka korerotia enei mea e ia, ka whakama katoa te hunga e whakahe na ki a ia: a hari katoa te mano ki nga mea kororia katoa i meinga e ia.

18

Na ka mea ia, He rite te rangatiratanga o te Atua ki te aha? a me whakarite e ahau ki te aha?

19

He rite ki te pua nani, i kawea e te tangata, i ruia ki tana kari; a ka tupu, ka whakarakau; no ka noho nga manu o te rangi ki ona manga. <sup>20</sup> A i mea ano ia, Me whakarite e ahau te rangatiratanga

o te Atua ki te aha? <sup>21</sup> He rite ki te rewena i tangohia e tetahi wahine, a whaongia ana ki roto ki nga mehua paraoa e toru, no ka rewenatia katoa. <sup>22</sup> A ka haereerea e ia nga pa, nga kainga, whakaako

ai, me te ahu tonu ki Hiruharama.

23

Na ka mea tetahi ki a ia, E te Ariki, he torutoru koia te hunga e ora? Na ko tana meatanga

ki a ratou, <sup>24</sup> Kia kaha te tohe ki te tomo ma te kuwaha kuiti: ko taku kupu hoki tenei ki a koutou, he tokomaha e whai ki te tomo, a e kore e taea. <sup>25</sup> Kia whakatika kau te tangata i te whare, kia

tutakina te tatau, katahi koutou ka anga ka tu i waho, ka patuki ki te tatau, ka mea, E te Ariki, uakina ki a matou; na ka whakahoki ia, ka mea ki a koutou, Kahore ahau i mohio ki a koutou, no hea ran  
<sup>26</sup> ei; Ko reira koutou timata ai te mea, Kua kai matou, kua inu i tou aroaro, i whakaako ano koe  
<sup>27</sup> i o matou huarahi. A ka ki ano ia, Ka mea atu ahau ki a koutou, kahore ahau i matau ki a koutou,  
<sup>28</sup> no hea ranei; mawehe atu i a ahau, e nga kaimahi katoa i te kino. Ko te wa tena o te tangi, o te tetea o nga niho, ina kite koutou i a Aperahama, i a Ihaka, i a Hakopa, i nga poropiti katoa, kei te  
<sup>29</sup> rangatiratanga o te Atua, a ko koutou kua maka ki waho. A ka haere mai ratou i te rawhiti, i te  
<sup>30</sup> hauauru, i te hauraro, i te tonga, ka noho ki te rangatiratanga o te Atua. Na, tera etahi o muri e meinga ki mua, me etahi o mua ki muri.  
<sup>31</sup> I taua haora ano ka tae mai etahi parihi, ka mea ki a ia, haere, whakarerea a konei: e hiahia  
<sup>32</sup> ana hoki a Herora kia whakamatea koe. Ka mea ia ki a ratou, Haere, mea atu ki taua pokiha, Na, tenei ahau te pei rewera nei, te mahi nei i te mahi whakaora aiane, apopo, a i te toru o nga ra  
<sup>33</sup> ka oti taku. Otiia me haereere ahau aiane, apopo, a tahi ra: e kore hoki e ahei kia mate he poropiti  
<sup>34</sup> i waho o Hiruharama. E Hiruharama, e Hiruharama, e whakamate nei i nga poropiti, e aki nei ki te kamaka i te hunga e tonoa ana ki a koe; ano te tini o aku meatanga kia whakaminea au tamariki,  
<sup>35</sup> kia peratia me te heihei e whakamine nei i ana pi ki raro ki ona parirau, a kihai koutou i pai! Na, ka mahue atu ki a koutou to koutou whare kia takoto noa ana: he pono taku e mea nei ki a koutou, E kore koutou e kite i ahau, kia tae mai ra ano te ra e mea ai koutou, Ka whakapaingia ia e haere mai ana i runga i te ingoa o te Ariki.

## Chapter 14

<sup>1</sup> A, i tona haerenga ki te whare o tetahi o nga rangatira, he Parihi, ki te kai taro i te hapati, na  
<sup>2</sup> titiro pu mai ana ratou ki a ia. Na, ko tetahi tangata i tona aroaro, he kopu tetere tona mate. Na  
<sup>3</sup> ka oho a Ihu, ka korero ki nga kaiwhakaako o te ture, ki nga Parihi, ka mea, he mea tika ranei te  
<sup>4</sup> whakaora i te hapati? A kihai ratou i kiki. Na ka mau ia ki a ia, a whakaorangia ana, tukua ana  
<sup>5</sup> kia haere; Na ka whakahoki ia ki a ratou, ka mea, Ki te taka te kaihe, te kau ranei, a tetahi o  
<sup>6</sup> koutou ki te poka, e kore ianei e hutia ake e ia i reira pu ano i te ra hapati? A kihai i taea e ratou te utu enei kupu ana.

<sup>7</sup> Na ka korerotia e ia tetahi kupu whakarite ki te hunga i karangatia, i tona kitenga i a ratou e  
<sup>8</sup> whiriwhiri ana i nga nohoanga rangatira; i mea ia ki a ratou. Ki te karangatia koe e tetahi ki te  
marena, kaua e noho ki te nohoanga rangatira; kei karangatia hoki e ia tetahi he nui atu i a koe;  
<sup>9</sup> A ka haere mai te tangata i karangatia ai korua, ka mea ki a koe, Tukua he nohoanga mo tenei; a  
<sup>10</sup> ka whakama koe, ka haere ki to muri rawa nohoanga noho ai. Engari ka karangatia koe, haere,  
e noho ki to muri rawa nohoanga; mo te tae rawa mai o te tangata nana koe i karanga, na ka mea  
<sup>11</sup> ia ki a koe whai kororia ai i te aroaro o nga tangata e noho tahi ana koutou. Ki te whakanui hoki  
<sup>12</sup> tetahi i a ia, ka whakaititia; ki te whakaiti tetahi i a ia, ka whakanuia. Na ka mea ia ki te tangata  
nana nei ia i karanga, E taka koe i te tina, i te hapa ranei, kaua e karangatia ou hoa, kaua hoki ou  
teina, kaua hoki ou whanaunga, kaua ano nga tangata taonga e noho tata ana; kei karangatia ano  
<sup>13</sup> koe, a ka whai utu koe. Engari ka taka hakari koe, karangatia nga rawakore, nga haua, nga kopa,  
<sup>14</sup> nga matapo: A ka koa koe; kahore hoki a ratou utu ki a koe: engari ka utua koe a te aranga o te  
hunga tika.  
<sup>15</sup> A, no ka rongo tetahi o te hunga e noho tahi ana ki te kai ki enei mea, ka mea ki a ia, Ka koa  
<sup>16</sup> te tangata kai taro i te rangatiratanga o te Atua. Na ka mea ia ki a ia, I taka he hapa nui e tetahi  
<sup>17</sup> tangata, a he tokomaha i karangatia: A ka tonoa tana pononga i te haora o te hapa, hei mea ki  
<sup>18</sup> te hunga i karangatia, haere mai; kua rite hoki nga mea katoa. Na ka anga ratou katoa ka  
whakakahore ngatahi. Ka mea to mua ki a ia, Kua hokona e ahau he mara, me haere ahau kia kite:  
<sup>19</sup> e mea ana ahau ki a koe, kia tukua ahau kia whakakahore. Na ko te meatanga a tetahi, E rima  
takirua nga okiha kua hokona e ahau, ka haere ahau ki te whakamatau: e mea ana ahau ki a koe,  
<sup>20</sup> kia tukua ahau kia whakakahore. I mea ano tetahi, Kua marenatia ahau ki te wahine, he mea  
<sup>21</sup> tenei e kore ai ahau e ahei te haere atu. A, ko te haerenga mai o taua pononga, ka korerotia enei  
mea ki tona rangatira, na ka riri te tangata i te whare, ka mea ki tana pononga, Hohoro te haere ki  
nga ara, ki nga huarahi o te pa, arahina mai ki konei nga rawakore, nga ngongengonge, nga matapo,  
<sup>22</sup> me nga kopa. Na ka mea te pononga, E kara, kua rite tau i mea ai, a tenei ano he wahi takoto  
<sup>23</sup> noa. A ka mea te rangatira ki te pononga, haere ki nga huarahi, ki nga taiepa, toia mai ki roto  
<sup>24</sup> nei, kia ki ai toku whare. Ko taku kupu hoki tenei ki a koutou, E kore tetahi o aua tangata i  
karangatia ra e kai i taku hapa.  
<sup>25</sup> Na he tini te tangata i haere tahi me ia; a ka tahuri ia, ka mea ki a ratou, Ki te haere mai  
<sup>26</sup> tetahi ki ahau, a ka kore e whakakino ki tona papa, whaea, wahine, tamariki, teina, tuahine, ae ra

ki te ora ano mona ake, e kore ia e ahei hei akonga maku. <sup>27</sup> Ki te kore tetahi e mau ki tona ripeka,  
 e haere mai i muri i ahau, e kore ia e ahei hei akonga maku. <sup>28</sup> Ko wai hoki o koutou, ki te mea ia  
 ki te hanga taumaihi, e kore e matua noho ki te tatau i nga utu, mehemea e ranea ana ana mea hei  
 whakaoti? <sup>29</sup> Kei whakatakoto ia i te turanga, ka kore e taea te whakaoti, a ka tawai mai ki a ia te  
 hunga katoa e matakitaki ana, <sup>30</sup> Ka mea, i timata te tangata nei te hanga whare, a kihai i taea te  
 whakaoti. <sup>31</sup> Ko tehea kingi ranei e haere ana ki te whawhai ki tetahi atu kingi, e kore e matua  
 noho, e whakaaro, e taea ranei e ia me nga mano kotahi tekau te tu kite riri ki tera e haere mai ra  
 ki a ia me nga mano e rua tekau? <sup>32</sup> A, ki te kahore, i te mea i tawhiti ano tera, ka tukua atu e ia  
 he karere, ka mea ki nga kaupapa e houhia ai te rongo. <sup>33</sup> Waihoki, ko te tangata o koutou e kore  
 e whakarere i ana mea katoa, e kore e ahei hei akonga maku. <sup>34</sup> No reira he pai te tote: otira ki te  
 hemo te ha o te tote, ma te aha ka whai ha ai? <sup>35</sup> E kore e pai mo te whenua, e kore ano hei  
 whakawairakau; a ka akiritia ai e te tangata ki waho. ko ia he taringa ona hei whakarongo, kia rongo  
 ia.

## Chapter 15

<sup>1</sup> Na ka whakatata ki a ia nga pupirikana katoa me nga tangata hara, ki te whakarongo ki a ia.  
<sup>2</sup> A ka amuamu nga Parihi, me nga karaipi, ka mea, E manako ana tenei tangata ki nga tangata hara,  
 e kai tahi ana me ratou. <sup>3</sup> Na ka korerotia e ia tenei kupu whakarite ki a ratou, a ka mea, <sup>4</sup> Ko tehea  
 tangata o koutou he rau ana hipi, a ka ngaro tetahi o ratou, e kore ianei e waiho e ia nga mea e iwa  
 tekau ma iwa i te koraha, a ka haere ki taua mea i ngaro, kia kitea ra ano? <sup>5</sup> A ka kitea, ka waha i  
 runga i ona pokohiwi, ka koa. <sup>6</sup> A, no ka tae ki te whare, ka karangatia ona hoa me nga tangata e  
 noho tata ana, ka mea ki a ratou, Kia hari tahi tatou; kua kitea hoki taku hipi i ngaro. <sup>7</sup> Ko taku  
 kupu tenei ki a koutou, ka pera ano te hari i te rangi mo te tangata hara kotahi ina ripeneta, nui atu  
 i te hari mo nga tangata tika e iwa tekau ma iwa, kahore nei o ratou mea e ripeneta ai. <sup>8</sup> Ko tehea  
 wahine ranei, kotahi tekau nei ana moni hiriwa, ki te ngaro tetahi, e kore ianei ia e tahu i te rama,  
 e tahi i te whare, e rapu marie, kia kitea ra ano? <sup>9</sup> A, no ka kitea, ka karangatia e ia ona hoa me te  
 hunga e noho tata ana, ka mea, kia hari tahi me ahau, kua kitea hoki taku moni i ngaro ra. <sup>10</sup> Waihoki,

ko taku kupu tenei ki a koutou, he hari kei te aroaro o nga anahera a te Atua mo te tangata hara kotahi ina ripeneta.

<sup>11</sup> I mea ano ia, Tokorua nga tama a tetahi tangata: <sup>12</sup> Ka mea to muri o raua ki tona papa, E pa, homai ki ahau te whai taonga e wehea e koe moku. Na, ka wehewehea e ia ki a raua tona orange.

<sup>13</sup> A kihai i maha nga ra, ka kohikohia e te tama o muri nga mea katoa, a haere ana ki te whenua tawhiti, maumauria ana ona taonga ki reira, he toreretanga ki te kino. <sup>14</sup> A, no ka poto ana mea

katoa, ka pa te matekai ki taua whenua, a ka timata ia te rawakore. <sup>15</sup> Na ka haere ia, ka piri ki tetahi o nga tangata o taua whenua; ka tonoa e ia ki ana mara ki te whangai poaka. <sup>16</sup> I hiahia hoki ia kia whakakiiia tona kopu ki nga kiri e kainga ana e nga poaka: heoi kihai i hoatu e tetahi ki a ia.

<sup>17</sup> No te hokinga ake ia o ona whakaaro, ka mea ia, Ano te tini o nga kaimahi a toku papa, he nui noa atu a ratou taro, ko ahau ia ka ngaro i te kaikore! <sup>18</sup> Ka whakatika ahau, ka haere ki toku matua,

ka mea ki a ia, E pa, kua hara ahau ki te rangi, ki tou aroaro ano, <sup>19</sup> A heoi ano tikanga kia kiia ahau he tama nau: meinga ahau kia rite ki tetahi o au kaimahi. <sup>20</sup> Na ka whakatika ia, a haere ana ki tona matua. Na, i a ia ano i tawhiti, ka kite tona matua i a ia, ka aroha, ka oma, hinga iho ki tona

kaki, kihi ana i a ia. <sup>21</sup> Na ko te meatanga a te tama ki a ia, E pa, kua hara ahau ki te rangi, ki tou aroaro ano, a heoi ano tikanga kia kiia ahau he tama nau. <sup>22</sup> Na ka mea te matua ki ana pononga, Kia hohoro te mau mai i te kakahu pai rawa, a ka whakakakahu ki a ia; homai hoki he mowhiti mo

tona ringa, he hu hoki mo ona waewae: <sup>23</sup> Kawea mai ano te kuao kau, te mea whangai, patua; kia kai tatou, kia koa te ngakau; <sup>24</sup> Ko tenei tama hoki aku i mate, a kua ora; i ngaro, a kua kitea. A

ka anga ratou ka koa. <sup>25</sup> Na kei te mara tana tama matamua: a, no tona haerenga mai, ka whakatata ki te whare, ka rongoi i te waiata, i te kanikani. <sup>26</sup> Na karangatia ana e ia tetahi o nga kaimahi, ka

ui atu, he aha ra enei mea. <sup>27</sup> Na ka mea mai tera ki a ia, Kua tae mai tou teina; kua patua e tou matua te kuao momona a te kau, no te mea kua tae ora mai ia ki a ia. <sup>28</sup> Na ka riri ia, kihai hoki i

pai kia haere ki roto: me i reira ka haere atu tona matua ki waho, ka tohe ki a ia. <sup>29</sup> Na ka whakahoki ia, ka mea ki tona matua, Nana, te tini o nga tau i mahi ai ahau ki a koe, kahore rawa hoki i takatakahi i tau kupu: heoi kahore rawa i homai e koe ki ahau he kuao koati, kia koa tahi ai ahau me oku hoa:

<sup>30</sup> Otira, i te taenga mai o tenei tama au, i pau nei tou orange i a ia, ratou tahi ko nga wahine kairau, kua patua e koe te kuao momona a te kau mana. <sup>31</sup> Na ka mea tera ki a ia, E tama, kei ahau tonu

32  
 koe, amu hoki aku mea katoa. He tika ia kia koa tatou, kia hari: i mate hoki tou teina nei, a kua ora; i ngaro, a kua kitea.

## Chapter 16

1 A i mea ano ia ki ana akonga, Tera tetahi tangata whai rawa i mua, he tuari taonga tona; a ka korerotia ki a ia kei te maumauria e ia ana taonga. 2 Na karangatia ana ia e ia, a ka mea atu ia ki a ia, He aha tenei e rangona nei e ahau mou? korerotia mai te tikanga o nga mea i tuaritua e koe; e kore hoki e ahei kia waiho koe hei tuari. 3 Na ko te meatanga a taua tuari i roto i a ia, Me aha ahau? e tangohia ana hoki i ahau te tuaritanga e toku ariki: e kore ahau e kaha ki te keru; e whakama ana ahau ki te tonono mea maku. 4 E mohio ana ahau ki taku e mea ai, mo toku peinga rawatanga atu i te tuaritanga, ka ai o ratou whare hei tukunga atu moku. 5 Na ka karangatia e ia tenei tangata, tenei tangata o te hunga i a ratou nei etahi mea a tona ariki, ka mea ia ki te tuatahi, E hia nga mea a toku ariki i a koe? 6 Na ka mea tera, Kotahi rau mehua hinu. Na ko tana meatanga ki a ia, Tangohia tau pukapuka, hohoro te noho, tuhituhia e rima tekau. 7 Katahi ia ka mea ki tetahi, E hia hoki i a koe? Ka mea ia, Kotahi rau mehua witi. na ka mea ia ki a ia, Tangohia tau pukapuka, tuhituhia e waru tekau. 8 Na ka mihia te tuari kino e tona ariki, mona i whai whakaaro: Engari hoki nga tamariki o tenei ao, i to ratou whakapaparanga, nui ke te whakaaro i to nga tamariki o te marama. 9 Na ko taku kupu tenei ki a koutou, Waiho te taonga kino hei mea i etahi hoa aroha mo koutou; mo te he rawa iho, ka ai he tukunga atu mo koutou ki nga whare ora tonu. 10 Ko ia e pono ana ki te mea nohinohi rawa, e pono ano i te mea nui: ko ia e kore e tika i te mea nohinohi rawa, e kore ano e tika i te mea nui. 11 Na ki te kahore i pono ta koutou mahi ki te taonga he, ma wai e tuku ki a koutou hei tiaki i te taonga pono? 12 Ki te kahore koutou i pono i te mea a te tangata ke, ma wai e hoatu he mea ma koutou ake ki a koutou? 13 E kore e ahei i te pononga te mahi ki nga rangatira tokorua: ka kino hoki ki tetahi, ka aroha ki tetahi; ka u ranei ki tetahi, ka whakahawea ki tetahi. E kore e ahei i a koutou te mahi ki te Atua, ki te taonga. 14 A ko nga Parihi, he hunga apoapo moni, i rongo ki enei mea katoa: a ka whakahi ratou ki a ia. 15 Na ko tana meatanga ki a ratou, Ko koutou te hunga e whakatikatika ana i a koutou ano i te aroaro o nga tangata; ko te Atua ia e matau ana ki o koutou ngakau: ko te mea hoki e whakanuia ana e nga tangata hei mea whakarihariha i te aroaro o

<sup>16</sup>  
 te Atua. <sup>16</sup> I tutuki te ture me nga poropiti ki a Hoani: no reira i kauwhautia mai ai te rangatiratanga  
 o te Atua, a taruke ana nga tangata katoa ki roto. <sup>17</sup> Erangi te pahemotanga o te rangi, o te whenua  
 e takoto noa ana, e kore ia tetahi tohu o te ture e taka. <sup>18</sup> Ki te whakarere tetahi i tana wahine, a ka  
 marena i tetahi atu, e puremu ana ia: ki te marena tetahi te wahine kua whakarere e te tangata, e  
 puremu ana ia.  
<sup>19</sup> Na tera tetahi tangata whai taonga i mua, he kakahu papura ona, he rinena pai, a ko tana  
 mahi he kai tonu i nga kai papai i nga ra katoa: <sup>20</sup> Na ka whakatakotoria ki tona kuwaha tetahi  
 tangata rawakore, ko Raharuhi te ingoa, he tuwhenua, <sup>21</sup> E hiahia ana hoki kia whangaia ki nga  
 kongakonga e ngahoro ana i te tepu a te tangata taonga; a ko nga kuri rawa hoki i haere mai, ka  
 mitimiti i ona mate. <sup>22</sup> Nawai a ka mate te tangata rawakore, a kawea ana e nga anahera ki te uma  
 o Aperahama: a ka mate hoki ko te tangata taonga, a tanumia ana; <sup>23</sup> A i te reinga ka titiro ake ia,  
 i a ia e whakamamaetia ana, ka kite i a Aperahama i tawhiti, me Raharuhi i tona uma. <sup>24</sup> Na ka  
 karanga ia, ka mea, E pa, e Aperahama, kia aroha ki ahau, tonoa mai hoki a Raharuhi ki te tou i te  
 pito o tona matihao ki te wai, hei whakamatao i toku arero; e mamae ana hoki ahau i tenei mura.  
<sup>25</sup> Otira ka mea a Aperahama, E tama, kia mahara kua riro i a koe au mea papai i a koe e ora ana,  
 he kino ia nga mea i a Raharuhi: na ka whakamarietia nei ia, e whakamamaetia ana koe. <sup>26</sup> Haunga  
 ano enei mea katoa, kua oti te whakapumau tetahi tawha nui i waenganui o koutou, o matou: a ki  
 te mea etahi ki te whakawhiti atu i konei ki a koutou, e kore e ahei; e kore ano e whiti mai i kona  
 ki a matou. <sup>27</sup> Ano ra ko tera, Koia ahau ka mea nei ki a koe, e pa, kia tonoa ia ki te whare o toku  
 papa: <sup>28</sup> Tokorima hoki oku teina; kia korero ai ia ki a ratou, kei haere mai hoki ratou ki tenei wahi  
 mamae. <sup>29</sup> Ka mea a Aperahama ki a ia, Kei a ratou ra a Mohi ratou ko nga poropiti; me whakarongo  
 ki a ratou. <sup>30</sup> Ka mea ia, Kahore, e pa, e Aperahama: engari ki te haere atu tetahi ki a ratou o te  
 hunga mate, ka ripeneta ratou. <sup>31</sup> Na ka mea tera ki a ia, Ki te kore ratou e whakarongo ki a Mohi,  
 ki nga poropiti hoki, e kore ano e whakaae ahakoa ara ake te tangata i te hunga mate.

## Chapter 17

<sup>1</sup> Na ka mea ia ki ana akonga, E kore e taea te whakakahore te putanga o nga take he: otiia aue,  
 te mate mo te tangata e puta ai! <sup>2</sup> He nui te pai ki a ia ki te whakatarewatia ki tona kaki te kohatu  
 mira kaihe, kia maka hoki ia ki te moana, a kia kaua e taka i a ia ki te he tetahi o enei mea nohinohi.  
<sup>3</sup> Kia tupato ki a koutou: ki te hara tou teina ki a koe, riria; a ki te ripeneta, murua tona. <sup>4</sup> A ki te  
 whitu nga haranga ki a koe i te ra kotahi, a ka whitu ona hokinga mai ki a koe, a ka mea, E ripeneta  
 ana ahau; murua tona. <sup>5</sup> A ka mea nga apotoro ki te Ariki, Whakanuia to matou whakapono. <sup>6</sup> Na  
 ka mea te Ariki, Ki te mea he whakapono to koutou, me te pua nani te rahi, ka mea koutou ki tenei  
 hikamaina, Kia ranga atu koe, kia whakatokia ki te moana; na ka rongu ki a koutou. <sup>7</sup> Na, ko wai  
 o koutou he pononga tana e parau ana, e tiaki ana ranei i nga hipi, e mea atu ki a ia, i tona hokinga  
 mai i te mara, haere tonu mai, ka noho ki te kai? <sup>8</sup> A e kore e mea ki a ia, Taka he hapa maku, ka  
 whitiki ai i a koe, ka tuari mai ki ahau, kia mutu ra taku kai, taku inu; a muri iho ka kai ai koe, ka  
 inu ai? <sup>9</sup> E whakawhetai oti ia ki taua pononga, mona i mea i nga mea i whakahaua ai ia? <sup>10</sup> Waihoki  
 ko koutou, ka oti nga mea katoa i whakahaua ai koutou, ka ki atu, He pononga huakore matou; ko  
 ta matou i mea ai ko te mea ano i whakaritea kia mahia e matou.  
<sup>11</sup> Na, i a ratou e haere ana ki Hiruharama, ka haere ia ra waenganui o Hamaria, o Kariri. <sup>12</sup> A,  
 i a ia e tomo ana ki tetahi kainga, kotahi tekau nga tangata i tutaki ki a ia, he repera, na, ka tu mai  
 ratou i tawhiti: <sup>13</sup> Ka karanga, ka mea, E kara, e Ihu, kia aroha ki a matou. <sup>14</sup> A, i tona kitenga  
 atu, ka mea ki a ratou, Haere, kia kite nga tohunga i a koutou. A i a ratou e haere ana, na kua ma.  
<sup>15</sup> A, no te kitenga o tetahi o ratou kua ora ia, ka hoki, a he rahi tona reo ki te whakakororia i te  
 Atua. <sup>16</sup> A takoto tapapa ana ia ki ona waewae, ka whakawhetai ki a ia: a no Hamaria ia. <sup>17</sup> A ka  
 oho atu a Ihu, ka mea, Kihai ranei te tekau i whakarangia? a kei hea nga tokoiwa? <sup>18</sup> Heoi ano nga  
 mea i kitea e hoki mai ana ki te homai i te kororia ki te Atua, ko tenei tangata iwi ke. <sup>19</sup> Na ka mea  
 ia ki a ia, Whakatika, haere: na tou whakapono koe i ora ai.  
<sup>20</sup> A, i te uinga a nga Parihi ki a ia, ko a hea puta mai ai te rangatiratanga o te Atua, ka  
 whakahoki ia ki a ratou, ka mea, E kore e kitea te putanga mai o te rangatiratanga o te Atua: <sup>21</sup> E  
 kore ano ratou e mea, Na, tenei! na, tera! kei roto hoki i a koutou te rangatiratanga o te Atua: <sup>22</sup> A  
 ka mea ia ki nga akonga, Tera e tae mai nga ra e hiahia ai koutou kia kite i tetahi o nga ra o te Tama  
 a te tangata, a e kore koutou e kite. <sup>23</sup> A e mea ratou ki a koutou, Na, tenei; na, tera: kaua e haere  
 atu, kaua e aru atu. <sup>24</sup> Ka rite hoki ki te uira e hoko mai ana i tetahi wahi i raro o te rangi: a tiaho  
 atu ana ki tetahi atu wahi i raro o te rangi; e pera ano te Tama a te tangata a tona ra. <sup>25</sup> Otiia ko te



tikanga tenei kia maha nga mamae mona i mua, kia whakakinongia ano hoki e tenei whakatupuranga.

<sup>26</sup> Ka rite hoki ki nga ra i a Noa nga ra o te Tama a te tangata. <sup>27</sup> E kai ana ratou, e inu ana, e marena ana, e tukua ana ki te marena, taea noatia te ra i tomo ai a Noa ki te aaka, a, ko te putanga mai o te

waipuke, na whakangaromia katoatia ratou. <sup>28</sup> Ka rite ano hoki ki nga ra i a Rota; e kai ana ratou,

e inu ana, e hoko mai ana, e hoko atu ana, e whakato ana, e hanga whare ana. <sup>29</sup> Heoi i te ra i puta mai ai a Rota i Horoma, ka uaina he kapura, he whanariki i te rangi, na whakangaromia katoatia

ratou. <sup>30</sup> Ka pera ano a te ra e whakakitea ai te Tama a te tangata. <sup>31</sup> I taua ra, kei runga tetahi i te whare, me ona taonga hoki i roto i te whare, kua ia e heke iho ki te tiki i aua mea: ko te tangata

hoki i te mara, kua ia e hoki atu ki nga mea o muri. <sup>32</sup> Kia mahara ki te wahine a Rota. <sup>33</sup> Ki te

whai tetahi kia ora ia, ka mate ano ia; ki te mate tetahi, ka ora ano ia. <sup>34</sup> Ko taku kupu tenei ki a

koutou, I taua po tokorua i te moenga kotahi; kotahi e tangohia, kotahi e waiho. <sup>35</sup> Tokorua nga

wahine e huri ana; kotahi e tangohia, kotahi e waiho. <sup>36</sup> Tokorua nga tangata i te mara; kotahi e

tangohia, kotahi e waiho. <sup>37</sup> Na ka whakahoki ratou, ka mea ki a ia, Ko hea, e te Ariki? Ka mea ia ki a ratou, Ko te wahi i te tupapaku, ko reira huihui ai nga ekara.

## Chapter 18

<sup>1</sup> Na ka korero ia i tetahi kupu whakarite ki a ratou mo tenei, kia inoi ratou i nga wa katoa, kia

kua e ngoikore; <sup>2</sup> I mea ia, I tetahi pa tera tetahi kaiwhakawa, he tangata kihai nei i wehi ki te

Atua, kihai ano i hopohopo ki te tangata: <sup>3</sup> I taua pa ano tetahi pouaru; a ka haere mai tera ki a ia,

ka mea, Takitakina toku mate i toku hoa tauwhainga. <sup>4</sup> A he roa kihai ia i pai: muri iho ka mea ia

i roto i a ia, Ahakoa kahore ahau e wehi ki te Atua, e hopohopo ki te tangata: <sup>5</sup> Heoi ka porearea ahau i te pouaru nei, na ka takitakina e ahau tona mate, kei haere tonu mai ka mate ahau i te hoha.

<sup>6</sup> Ka mea te Ariki, Whakarongo ki ta te kaiwhakawa kino i mea ra. <sup>7</sup> A e kore ranei te Atua e ngaki i te mate o ana tangata i whiriwhiri ai, e karanga nei ki a ia i te ao, i te po, ahakoa whakaroa noa ia

ki a ratou? <sup>8</sup> Ko taku kupu tenei ki a koutou, Ka hohoro ia te takitaki i to ratou mate. Otira ka tae mai te Tama a te tangata, e rokohina mai ranei e ia he whakapono i runga i te whenua?

9 Na ka korero ano ia i tenei kupu whakarite ki etahi, i whakamanawa nei ki a ratou ano he  
 tika, i whakakorekore ki era atu katoa: <sup>10</sup> Tokorua nga tangata i haere ki te temepara ki te inoi; he  
 Parihi tetahi, ko tetahi he pupirikana. <sup>11</sup> Tu ana te Parihi ko ia anake, ko tana karakia tenei, E te  
 Atua, ka whakawhetai ahau ki a koe, no te mea kahore ahau e rite ki era atu tangata, ki te hunga  
 hao taonga, kino, puremu, moku hoki te rite ki tenei pupirikana. <sup>12</sup> Takirua aku nohoanga pukutanga  
 i te wiki, e hoatu ana e ahau te wahi whakatekau o aku mea katoa. <sup>13</sup> Ko te pupirikana ia i tu mai  
 i tawhiti, kihai i mea kia anga ake ona kanohi ki te rangi, heoi patuki ana ki tona uma, ka mea, E  
 te Atua, tohungia ahau, te tangata hara. <sup>14</sup> Ko taku kupu tenei ki a koutou, Nui atu te tika o tenei  
 i to tera i te hokinga ki tona whare: ki te whakanui hoki tetahi i a ia, ka whakaititia; ki te whakaiti  
 tetahi i a ia, ka whakanuia.  
<sup>15</sup> Na ka kawea mai e ratou ki a ia a ratou tamariki nonohi, kia pa ai ia ki a ratou: otiia, no te  
 kitenga o ana akonga, ka riria atu ratou. <sup>16</sup> Otira ka karangatia atu ratou e Ihu ki a ia, ka mea ia,  
 Tukua nga tamariki nonohi kia haere mai ki ahau, kaua hoki ratou e araia atu: no nga penei hoki  
 te rangatiratanga o te Atua. <sup>17</sup> He pono taku e mea nei ki a koutou, Ki te kahore e rite te tango a  
 tetahi i te rangatiratanga o te Atua ki ta te tamaiti nohinohi, e kore rawa ia e tomo ki roto.  
<sup>18</sup> Na ka ui tetahi rangatira ki a ia, ka mea, E te kaiwhakaako pai, me aha ahau ka whiwhi ai  
 ki te ora tonu? <sup>19</sup> Na ko te meatanga a Ihu ki a ia, he aha ahau i kiia ai e koe he pai? kahore tetahi  
 i pai, kotahi anake, ko te Atua. <sup>20</sup> E matau ana koe ki nga ture, Kaua e puremu, Kaua e patu tangata,  
 Kaua e tahae, Kaua e whakapae teka, Whakahonoretia tou papa me tou whaea. <sup>21</sup> Na ka mea ia,  
 Kua rite i ahau enei katoa no toku tamarikitanga ake. <sup>22</sup> A, i te rongonga Ihu ki tenei, ka mea ki a  
 ia, Kotahi te mea kahore ano i rite i a koe: hokona au mea katoa, ka tuwha atu ma nga mea rawakore,  
 a e whai taonga koe ki te rangi: a haere mai i muri i ahau. <sup>23</sup> Na ka rongoi ia ki enei mea, ka pouri  
 rawa; he nui hoki ona taonga. <sup>24</sup> A ka kite a Ihu i a ia, ka mea, Ano te whakauaua o te tapoko o te  
 hunga taonga ki te rangatiratanga o te Atua! <sup>25</sup> Erangi hoki te haere o te kamera ra te kowhao o te  
 ngira e takoto noa ana, he whakauaua rawa ia te tomo o te tangata taonga ki roto ki te rangatiratanga  
 o te Atua. <sup>26</sup> Na ka mea nga kaiwhakarongo, Ko wai ra e ora? <sup>27</sup> Otira i mea ia, Ko nga mea e  
 kore e taea e te tangata, ka taea e te Atua. <sup>28</sup> A ka mea a Pita, Na, kua whakarerea nei e matou a  
 matou nei mea, a kua aru i a koe. <sup>29</sup> Na ka mea ia ki a ratou, He pono taku e mea nei ki a koutou,  
 Kahore he tangata i whakarere, he whare, he wahine, he tuakana, he matua, he tamariki, i te whakaaro

30  
ki te rangatiratanga o te Atua, E kore e riro mai i a ia i tenei wa nga mea tini noa atu, a i te ao meake puta ko te ora tonu.

31  
A ka mau ia ki te tekau ma rua, ka mea ki a ratou, Na e haere ana tenei tatou ki Hiruharama, a ka rite katoa nga mea i tuhituhia e nga poropiti mo te Tama a te tangata. 32  
Ka tukua hoki ia ki nga tauwi, ka tawaia, ka whakatupuria kinotia, ka tuwhaina: 33  
A ka oti ia te whiu, ka whakamatea: a i te toru o nga ra ka ara. 34  
A kihai ratou i matau ki tetahi o enei mea: he mea huna hoki i a ratou tenei kupu, kihai ratou i mohio ki nga mea i korerotia.

35  
A, i a ia e whakatata ana ki Heriko, tera tetahi matapo e noho ana i te taha o te huarahi e tonono mea ana mana: 36  
A, i tona rongonga i te mano e haere ana, ka ui atu, He aha tenei? 37  
Ka mea ratou ki a ia, Ko Ihu o Nahareta e haere ana. 38  
Katahi ia ka karanga, ka mea, E Ihu, e te Tama a Rawiri, kia aroha ki ahau. 39  
Na ka riria ia e te hunga i haere i mua kia noho puku: heoi rahi noa ake tana karanga, E te Tama a Rawiri, kia aroha ki ahau. 40  
Na ka tu a Ihu, ka mea kia arahina mai ki a ia: a, no ka tata, ka ui ki a ia, 41  
Ka mea, Kia ahatia koe e ahau? Ka mea ia, E te Ariki, kia titiro ahau. 42  
Ka mea a Ihu ki a ia, Titiro: na tou whakapono koe i whakaora. 43  
A titiro tonu ake ia, a aru ana i a ia, me te whakakororia i te Atua: a, no te kitenga o te iwi katoa, ka whakamoemiti ki te Atua.

## Chapter 19

1  
A ka tomo ia, a tika ana ra waenganui o Heriko, 2  
Na ko tetahi tangata, ko Hakiaha te ingoa i huaina ai, he rangatira pupirikana, he tangata taonga ano: 3  
I whai ia kia kite i a Ihu he pehea ranei ia: heoi kihai i taea ia i te mano, he tangata poto hoki. 4  
Na ka oma ia ki mua, a kake ana ki tetahi hokamora, kia kite i a ia: meake hoki ia tika ra reira. 5  
A, no ka tae a Ihu ki taua wahi, ka titiro ake, ka mea ki a ia, E Hakiaha, kia hohoro te heke iho; me noho hoki ahau ki tou whare aiane. 6  
A hohoro tonu tona heke iho, a ka koa ki a ia hei manuhiri mana. 7  
A, i to ratou kitenga, ka amuamu katoa, ka mea, Kua riro ia ki te tangata hara noho ai. 8  
Na ka tu a Hakiaha, ka mea ki te Ariki, E te Ariki, na e hoatu ana e ahau te hawhe o aku taonga ki te hunga rawakore; a, ki te mea kua riro

he mai i ahau te mea a tetahi, ka takiwhatia e ahau taku utu. <sup>9</sup> Na ko te meatanga a Ihu ki a ia, Nonaiane te ora i tae mai ai ki tenei whare, he tama nei hoki ia na Aperahama. <sup>10</sup> I haere mai hoki te Tama a te tangata ki te rapu, ki te whakaora i te mea i ngaro.

<sup>11</sup> A, i a ratou e whakarongo ana ki enei mea, ka korerotia ano e ia tetahi kupu whakarite, no te mea e tata ana ia ki Hiruharama, e mea ana hoki ratou, ko taua wa pu ano whakakitea ai te rangatiratanga o te Atua. <sup>12</sup> Na reira ia ka mea, I haere tetahi rangatira nui ki tetahi whenua mamao,

kia riro mai i a ia tetahi rangatiratanga, ka hoki mai ai. <sup>13</sup> Kotahi tekau ana pononga i karangatia e ia, kotahi tekau nga pauna i hoatu e ia ki a ratou, ka mea ki a ratou, Mahia enei, kia hoki mai ra ano ahau. <sup>14</sup> Otira i kino tona iwi ki a ia, ka tono karere i muri i a ia, ka mea, E kore matou e pai

ki tenei hei kingi mo matou. <sup>15</sup> A, i tona hokinga mai, kua riro mai hoki i a ia te rangatiratanga, ka mea kia karangatia ki a ia aua pononga, i hoatu nei e ia te moni ki a ratou, kia kite ai ia i ta tetahi, i ta tetahi i mahi ai. <sup>16</sup> Ka tae mai to mua, ka mea, E te ariki, ka ngahuru nga pauna kua mahia ki

tau pauna. <sup>17</sup> Ka mea ia ki a ia, Ka pai, e te pononga pai: pono tonu tau mahi i te mea nohinohi rawa, na, hei rangatira koe mo nga pa kotahi tekau. <sup>18</sup> A, ko te haerenga mai o te tuarua, ka mea, E te ariki, e rima nga pauna kua mahia ki tau pauna. <sup>19</sup> Ka mea ia ki tenei, Hei rangatira ano koe

mo nga pa e rima. <sup>20</sup> Na, ko te haerenga mai o tetahi, ka mea, E te ariki, na, tau pauna: i te rongoa hoki i ahau i roto i te tauera: <sup>21</sup> I matakua hoki ahau i a koe, no te mea he tangata uua koe: e tango

ana koe i te mea kihai i whakatakotoria iho e koe, e kokoti ana i te mea kihai i ruia e koe. <sup>22</sup> Na, ko tana meatanga ki a ia, Kei ta tou mangai he whakaheanga maku i a koe, e te pononga kino. I mohio koe he tangata uua ahau, e tango ana i te mea kihai i whakatakotoria e ahau, e kokoti ana i te mea kihai i ruia e ahau: <sup>23</sup> He aha koe te hoatu ai i taku moni ki te peeke, penei kua riro mai

taua mea i ahau, me ona hua ano, i toku taenga mai? <sup>24</sup> Na ka mea ia ki te hunga e tu tata ana, Tangohia te pauna i a ia, hoatu hoki ki tera i nga pauna kotahi tekau. <sup>25</sup> Ka mea ratou ki a ia, E te

ariki kotahi nei tekau ana pauna. <sup>26</sup> Ko taku kupu hoki tenei ki a koutou, Ki te whai mea tetahi, ka hoatu ano ki a ia; ki te kahore he mea a tetahi, ko ana mea ake ka tangohia i a ia. <sup>27</sup> Tena ko aua hoariri oku kihai nei i pai ki ahau hei kingi mo ratou, arahina mai ki konei, ka patu ki toku aroaro.

<sup>28</sup> A, no ka mutu enei korero, ka turia atu e ia ki mua, ka haere ki Hiruharama. <sup>29</sup> A, no ka tata ia ki Petapaki, ki Petani, ki te maunga e kiia nei ko to nga Oriwa, na tokorua ana akonga i tonoa e

<sup>30</sup>  
 ia. I mea ia, Haere korua ki te kainga e anga mai ana ki a korua; a, no ka tomo atu, ka kite korua i tetahi kuaokaihe e here ana, he mea kahore ano i nohoia noatia e te tangata: wetekina, arahina  
<sup>31</sup>  
 mai. Ki te mea hoki tetahi ki a korua, He aha i wetekina ai e korua? kia penei ta korua ki atu, E  
<sup>32</sup>  
 mea ana te Ariki ki a ia mona. Na, haere atu ana te hunga i tonoa, rokohanga atu, rite tonu ki  
<sup>33</sup>  
 tana i korero ai ki a raua. Na, i a raua e wewete ana i te kuaokai, ka mea ona rangatira ki a raua,  
<sup>34</sup>  
 He aha korua ka wewete ai i te kuaokai na? Na ko ta raua meatanga atu, E mea ana te Ariki ki a ia  
<sup>35</sup>  
 mona. Na ka arahina ia ki a Ihu: a panga iho e raua o raua kakahu ki runga ki te kuaokai,  
<sup>36</sup>  
 whakanohoia ana a Ihu ki runga. A, i a ia e haere ana, ka wharikitia o ratou kakahu ki te huarahi.  
<sup>37</sup>  
 A, i a ia e whakatata ana ki te heketanga o Maunga Oriwa, ka koa te huihui katoa o nga akonga,  
 ka anga ka whakamoemiti ki te Atua, he nui hoki te reo, mo nga merekara katoa i kite ai ratou;  
<sup>38</sup>  
 Ka mea, Ka whakapaingia te Kingi e haere mai ana i runga i te ingoa o te Ariki: he rongou mau  
<sup>39</sup>  
 ki runga ki te rangi, he kororia ki runga rawa. Na ka mea etahi o nga Parihi i roto i te mano ki  
<sup>40</sup>  
 a ia, E te Kaiwhakaako, riria au akonga. Na ka whakahoki ia, ka mea, Ko taku kupu tenei ki a  
 koutou, me i noho puku enei, kua karanga ake nga kamaka.  
<sup>41</sup>  
 A, no ka tata ia, ka kite i te pa, ka tangihia e ia. <sup>42</sup>  
 Ka mea ia, Me i mohio koe, a koe ano,  
 ahakoa i tenei ra nei ano ou, ki nga mea e mau ai tou rongou! ko tenei kua huna atu i ou kanohi.  
<sup>43</sup>  
 Tera hoki e tae mai nga ra ki a koe, e hanga ai e ou hoariri he parepare mou a taka noa, a ka  
<sup>44</sup>  
 karapotia koe, ka kopania hoki i nga taha katoa. A ka whakahoroa koe ki raro, me au tamariki  
 i roto i a koe; e kore ano e waiho tetahi kamaka i runga i tetahi kamaka i roto i a koe; no te mea  
<sup>45</sup>  
 kihai koe i matau ki te wa i tirohia ai koe. A ka tomo ia ki te temepara, ka anga ka pei ki waho  
<sup>46</sup>  
 i te hunga i reira e hoko ana. Ka mea ki a ratou, Kua oti te tuhituhi, Ko toku whare hei whare  
<sup>47</sup>  
 inoi: a kua meinga nei e koutou hei ana mo nga kaipahua. A whakaako ana ia i te temepara i ia  
 ra, i a ra. Otiia ka rapu nga tohunga nui me nga karaipi me nga rangatira o te iwi kia whakangaromia  
<sup>48</sup>  
 ia; Heoi kihai i kitea ta ratou e mea ai: no te mea e u ana nga tangata katoa ki a ia, e whakarongo  
 ana.

## Chapter 20

<sup>1</sup> A i tetahi o aua ra, i a ia e whakaako ana i te iwi i roto i te temepara, e kauwhau ana i te  
 rongopai, ka tae mai nga tohunga nui, nga karaipi, me nga kaumatua ki a ia, <sup>2</sup> Ka korero ki a ia,  
 ka mea, Korerotia mai ki a matou te mana i mea ai koe i enei mea? na wai hoki i hoatu tena mana  
 ki a koe? <sup>3</sup> Ka whakahoki ia, ka mea ki a ratou, Maku hoki e ui ki a koutou kia kotahi kupu; ma  
 koutou e mea mai ki ahau: <sup>4</sup> Ko te iriiringa a Hoani, no te rangi ranei, no te tangata ranei? <sup>5</sup> A ka  
 korero ratou ki a ratou ano, ka mea, Ki te mea tatou, No te rangi; ka mea mai ia, Ha, he aha koutou  
 te whakapono ai ki a ia? <sup>6</sup> A ki te mea tatou, No te tangata; ka akina tatou e te iwi katoa ki te  
 kamaka: e whakapono ana hoki ratou he poropiti a Hoani <sup>7</sup> Na ka whakahokia e ratou, E kore e  
 kitea no hea ranei. <sup>8</sup> Na ko te meatanga a Ihu ki a ratou, E kore ano e korerotia e ahau ki a koutou  
 te mana i mea ai ahau i enei mea.

<sup>9</sup> Na ka anga ia ka korero i tenei kupu whakarite ki te iwi; I whakatokia tetahi mara waina e  
 tetahi tangata, a tukua ana ki nga kaimahi, a haere ana ki tawhiti, a maha noa nga ra. <sup>10</sup> A i te po  
 i tika ai ka tonoa e ia he pononga ki nga kaimahi, kia hoatu ai e ratou ki a ia etahi o nga hua o te  
 mara waina: otira ka whiua ia e nga kaimahi, whakahokia kautia ana. <sup>11</sup> Na ka tonoa ano e ia tetahi  
 atu pononga: a ka whiua ano ia e ratou, ka tukinotia, whakahokia kautia ana. <sup>12</sup> Na ka tonoa ano  
 hoki tetahi e ia, te tuatoru: a tukitukia ana ia e ratou, maka ana ki waho. <sup>13</sup> Na ka mea te rangatira  
 o te mara waina, Me pehea ahau? Ka tonoa e ahau taku tama, taku e aroha nei: tera pea ratou e  
 hopohopo ki a ia. <sup>14</sup> Otira, no te kitenga o nga kaimahi i a ia, ka kororerero ki a ratou ano, ka mea,  
 Ko te rangatira tenei mona te kainga: tena, tatou ka whakamate i a ia, kia riro mai ai te kainga i a  
 tatou. <sup>15</sup> Na maka ana ia ki waho o te mara waina, whakamatea iho. Na ka aha te rangatira o te  
 mara waina ki a ratou? <sup>16</sup> Ka haere ia, ka whakangaro i aua kaimahi, ka hoatu te mara waina ki  
 etahi atu. A ka rongopai ratou, ka mea, Kauaka. <sup>17</sup> Ka titiro ia ki a ratou, ka mea, He aha ra tenei kua  
 oti nei te tuhituhi, Ko te kohatu i kapea e nga kaihanganga, kua meinga tenei hei mo te kokonga?  
<sup>18</sup> Na, ki te hinga tetahi ki runga ki tenei kohatu, mongamonga noa; ki te hinga tenei kohatu ki  
 runga ki tetahi, ngotangota noa ia, ano he puehu. <sup>19</sup> Na ka whai nga tohunga nui me nga karaipi  
 kia hopukia ia i taua wa ano; ka matakau ratou i te iwi: i mohio hoki ratou i korerotia e ia tenei kupu  
 whakarite mo ratou.

<sup>20</sup> Na ka ata tirohia ia e ratou, ka tonoa mai he kaiwhakarongo, ano te ahua kei to te hunga tika,  
 hei hopu mo tana korero, kia tukua ai ia ki te rangatiratanga, ki te kaha o te kawana. <sup>21</sup> A ka ui

ratou ki a ia, ka mea, E te Kaiwhakaako, e mohio ana matou he tika tau e korero nei, e whakaako nei, e kore ano e manakohia e koe te kanohi tangata, engari e whakaako pono ana koe i te huarahi  
 o te Atua: <sup>22</sup> He mea tika ranei te hoatu takoha e matou ki a Hiha, kahore ranei? <sup>23</sup> Otira i kitea e  
 ia to ratou hianga, a ka mea kia ratou, He aha koutou ka whakamatautau nei i ahau? <sup>24</sup> Kia kite  
 ahau i tetahi pene. No wai tona ahua me te tuhituhinga? Na ka whakahoki ratou, ka mea, No Hiha.  
<sup>25</sup> Kātahi ia ka mea ki a ratou, hoatu rapea ki a Hiha nga mea a Hiha, ki te Atua ano nga mea a te  
 Atua. <sup>26</sup> Heoi kihai i taea e ratou te hopu i tetahi korero ana i te aroaro o te iwi: na ka miharo ratou  
 ki tana kupu, a whakarongo kau ana.  
<sup>27</sup> Na ka tae mai etahi o nga Haruki e mea nei kahore he aranga; ka ui ki a ia, <sup>28</sup> Ka mea, E te  
 Kaiwhakaako, i tuhituhi a Mohi ki a matou, Ki te mate te tuakana o tetahi tangata, he wahine ano  
 tana, a ka mate urikore ia, me tango te wahine e tona teina, ka whakatupu uri ai mo tona tuakana.  
<sup>29</sup> Na, tokowhitu taua whanau; ka tango to mua i te wahine, a mate urikore ana. <sup>30</sup> Na ka tango te  
 tuarua i te wahine, a ka mate urikore ano ia. <sup>31</sup> Na ka tango te tuatoru i a ia; penei ano nga tokowhitu:  
 kahore a ratou tamariki i waiho ai, a mate iho ratou. <sup>32</sup> Na muri iho i te katoa ka mate hoki te  
 wahine. <sup>33</sup> Na, i te aranga, ma wai o ratou te wahine? he wahine hoki ia na te tokowhitu. <sup>34</sup> Ka  
 whakahoki a Ihu, ka mea ki a ratou, E marena ana, e hoatu ana ki te marena, nga tamariki o tenei  
 ao: <sup>35</sup> Tena ko te hunga e paingia ana kia whiwhi ki tera ao, ki te aranga ano i roto i te hunga mate,  
 e kore e marena, e kore ano e hoatu ki te marena: <sup>36</sup> E kore ano ratou e ahei kia mate: e rite ana  
 hoki ki nga anahera; he tama hoki ratou na te Atua, he tama na te aranga. <sup>37</sup> Na, ko te aranga o te  
 hunga mate, kua whakakitea mai tena e Mohi i tana mo te rakau, i karangatia ai te Ariki ko te Atua  
 o Aperahama, ko te Atua o Ihaka, ko te Atua o Hakopa. <sup>38</sup> Na ehara ia i te Atua no te hunga mate,  
 engari no te hunga ora: e ora katoa ana hoki i roto i a ia.  
<sup>39</sup> Na ka whakahoki etahi o nga karaipi ka mea, E te Kaiwhakaako, he pai tau korero. <sup>40</sup> Kihai  
 hoki ratou i maia ki te ui ano ki a ia i tetahi mea. <sup>41</sup> Na ka mea ia ki a ratou, na te aha ratou i mea  
 ai he tama na Rawiri a te Karaiti? <sup>42</sup> Kua mea nei a Rawiri i te pukapuka o nga waiata, I mea te  
 Ariki ki toku Ariki, hei toku matau koe noho ai, <sup>43</sup> Kia meinga ra ano e ahau ou hoariri hei turanga  
 waewae mou. <sup>44</sup> Na ka kiia ia e Rawiri he Ariki, a he pehea i tama ai ki a ia? <sup>45</sup> A, i te iwi katoa  
 e whakarongo ana, ka mea ia ki ana akonga, <sup>46</sup> Kia tupato ki nga karaipi, ko ta ratou nei e rawe ai  
 ko nga kakahu roroa ina haereere ratou, e matenui ana ki nga ohatanga i nga kainga hokohoko, me

nga nohoanga rangatira i nga whare karakia me nga nohoanga rangatira i nga hakari: <sup>47</sup> Pau ake hoki i a ratou nga whare o nga pouaru, e inoi roa ana hoki, he ahua kau: nui rawa te he e tau ki a ratou.

## Chapter 21

<sup>1</sup> Na ka titiro ake ia, ka kite i te hunga taonga, e maka ana i a ratou moni hoatu noa ki te takotoranga moni. <sup>2</sup> A ka kite ia i tetahi pouaru rawakore, e maka ana i nga moni nohinohi rawa e rua ki reira. <sup>3</sup> Na ka mea ia, He pono taku e mea nei ki a koutou, nui ke ta tenei pouaru rawakore i maka ai i a ratou katoa: <sup>4</sup> Ko ratou katoa hoki e maka ana ko tetahi wahi o a ratou mea hira noa atu ki roto ki nga moni tuku noa, ko ia o tona rawakoretanga e maka ana i tona orange katoa.

<sup>5</sup> A i etahi e korero ana ki te temepara, ka oti nei te whakapaipai ki nga kohatu papai, ki nga whakahere, ka mea ia, <sup>6</sup> Na, ko enei mea e kite nei koutou, tera e tae mai nga ra e kore ai e toe tetahi kohatu i runga i tetahi kohatu, engari ka whakahoroa. <sup>7</sup> Na ka ui ratou ki a ia, ka mea, E te Kaiwhakaako, ko a hea enei mea? he aha hoki te tohu ina tata enei mea te puta? <sup>8</sup> A ka mea ia, Kia mahara kei mamingatia koutou: he tokomaha hoki e haere mai i runga i toku ingoa, e mea, Ko ahau ia: kua tata te taima: na, kei whai i muri i a ratou. <sup>9</sup> Na ka rongoa koutou ki nga taua ki nga whakaoho, kua e matakou: kua takoto hoki te tikanga mo enei mea kia matua puta mai; taihoa ia te mutunga.

<sup>10</sup> Katahi ia ka mea ki a ratou, Ka whakatika tetahi iwi ki tetahi iwi, tetahi rangatiratanga ki tetahi rangatiratanga; <sup>11</sup> Tera hoki e puta nga ru nunui, a i nga tini wahi ka pa te matekai me nga mate uruta; me nga mea whakamataku hoki, me nga tohu nunui o te rangi. <sup>12</sup> A ko mua ake i enei mea katoa pa ai o ratou ringa ki a koutou, tukino ai i a koutou, tuku ai i a koutou ki nga whare whakawa, ki nga whare herehere, me te arahi i a koutou ki nga kingi, ki nga kawana, mo toku ingoa. <sup>13</sup> A ka waiho ki a koutou hei tohu whakaatu. <sup>14</sup> Na whakatatutia iho ki o koutou ngakau, kia kua e whakaaroa wawetia ta koutou kupu e whakahoki atu ai: <sup>15</sup> Maku hoki e hoatu ki a koutou he mangai, he matauranga, e kore e taea te whakakahore, te pehi, e o koutou hoa whawhai katoa. <sup>16</sup> A ka tukua atu koutou e nga matua, e nga teina, e nga whanaunga, e nga hoa; ka whakamatea ano



<sup>17</sup> etahi o koutou. Ka kino ano nga tangata katoa ki a koutou, he whakaaro ki toku ingoa. <sup>18</sup> Otiia  
 e kore e ngaro tetahi makawe o o koutou upoko. <sup>19</sup> Ma te manawanui e mau ai o koutou wairua.  
<sup>20</sup> Otira ka kite koutou i Hiruharama e karapotia ana e nga taua, ko reira koutou mohio ai, kua  
 tata tona whakangaromanga. <sup>21</sup> Hei reira kia oma te hunga i Huria ki nga maunga; me te hunga i  
 waenganui ona kia haere atu ki waho; kei haere hoki ki reira te hunga i nga tuawhenua. <sup>22</sup> Ko nga  
 ra hoki enei o te rapunga utu, e rite ai nga mea katoa kua oti te tuhituhi. <sup>23</sup> Otira, aue te mate o te  
 hunga e hapu ana, o nga mea e whangai ana ki te u, i aua ra! e nui hoki te aitua ki te whenua, me  
 te riri ki tenei iwi. <sup>24</sup> A ka hinga ratou i te mata o te hoari, ka riro parau ki nga iwi katoa: a ka  
 takahia Hiruharama e nga tauwiwi, kia rite ra ano nga wa o nga tauwiwi. <sup>25</sup> A ka whai tohu te ra, te  
 marama, me nga whetu, a ki runga ki te whenua he pawera no nga tauwiwi, he tumatatenga ki te  
 haruru o te moana, o te ngaru; <sup>26</sup> Ka whiti nga tangata i te matakau, i te manawapa ki nga mea e  
 puta mai ana ki te ao: e ngaueue hoki nga mea kaha o nga rangi. <sup>27</sup> KO reira ratou kite ai i te Tama  
 a te tangata e haere mai ana i runga i te kapua, me te kaha, me te kororia nui. <sup>28</sup> A, no ka timata  
 enei mea te puta, titiro ake, kia ara hoki o koutou matenga; ka tata hoki to koutou whakaoranga.  
<sup>29</sup> Na ka korerotia e ia tetahi kupu whakarite ki a ratou; Titiro ki te piki, ki nga rakau katoa;  
<sup>30</sup> I te mea e pihi ana, na ka kite koutou, ka matau noa ake, kua tata te raumati. <sup>31</sup> Waihoki, ko  
 koutou, ina kite i enei mea e puta ana, ka matau kua tata te rangatiratanga o te Atua. <sup>32</sup> He pono  
 taku e mea nei ki a koutou, E kore rawa e pahemo tenei whakatupuranga, kia puta ra ano enei mea  
 katoa. <sup>33</sup> E pahemo te rangi me te whenua; ko aku kupu ia e kore e pahemo. <sup>34</sup> Otira kia tupato ki  
 a koutou ano, kei taimaha o koutou ngakau i te kakai, i te haurangi, i nga raruraru o te ao, a ka puta  
 whakarere mai taua ra, ano he reti, ki a koutou: <sup>35</sup> Ka puta hoki ki nga tangata katoa e noho ana i  
 te mata o te whenua katoa. <sup>36</sup> Mo konei ra kia mataara, i nga wa katoa kia inoi tonu, kia paingia  
 ai koutou kia mawhiti i enei mea katoa meake nei puta, kia tu hoki i te aroaro o te Tama a te tangata.  
<sup>37</sup> A i ia ra e whakaako ana ia i roto i te temepara; a ia ia po e haere ana, ka noho i te maunga e kiia  
 nei ko te maunga o nga Oriwa. <sup>38</sup> A i te atatu ka haere mai nga tangata ki a ia ki te temepara, ki te  
 whakarongo ki a ia.

## Chapter 22

<sup>1</sup> Na kua tata te hakari taro rewenakore e kiia nei ko te kapenga. <sup>2</sup> A ka rapu nga tohunga nui me nga karaipi ki te pehea e whakamate ai ratou i a ia: i mataku hoki ratou i te iwi. <sup>3</sup> Na ka uru a hatana ki a Hura, tona ingoa nei ko Ikariote, ko ia nei tetahi o te tekau ma rua. <sup>4</sup> A ka haere ia, ka korero ki nga tohunga nui, ki nga rangatira hoia me pehea e tukua ai ia e ia ki a ratou. <sup>5</sup> A ka hari ratou, ka whakaae kia hoatu he moni ki a ia. <sup>6</sup> Na ka whakaae ia, ka rapu i te wa pai hei tukunga i a ia ki a ratou i te mea e ngaro atu ana te mano.

<sup>7</sup> Na ka taka mai te ra o te taro rewenakore i tika nei kia patua te kapenga. <sup>8</sup> Ka tonoa e ia a Pita raua ko Hoani ka mea, Tikina, taka te kapenga ma tatou, kia kai ai tatou. <sup>9</sup> Na ka mea raua ki a ia, Ko hea koe pai ai kia taka e maua? <sup>10</sup> Ka mea ia ki a raua, na, ka tomo korua ki te pa, ka tutaki he tangata ki a korua e mau ana i te kahaka wai; e aru korua i a ia ki te whare e tomo ai ia. <sup>11</sup> Ka ki atu ki te tangata i te whare, E mea ana te Kaiwhakaako ki a koe, Kei hea te ruma e kai ai matou ko aku akonga i te kapenga? <sup>12</sup> A ka whakaaturia e ia ki a korua he ruma nui i runga, oti rawa te whariki: me taka e korua ki reira. <sup>13</sup> Na haere ana raua, a rokohanga atu rite tonu ki tana i korero ai ki a raua: a taka ana e raua te kapenga. <sup>14</sup> A ka rite te haora, ka noho ia, ratou ko nga apotoro kotahi tekau ma rua. <sup>15</sup> Na ka mea ia ki a ratou, Nui atu toku hiahia kia kai tahi tatou i tenei kapenga, i te mea kahore ano ahau i mate noa: <sup>16</sup> Ko taku kupu hoki tenei ki a koutou, E kore ahau e kai i tenei a muri ake nei, kia tino rite ra ano i te rangatiratanga o te Atua. <sup>17</sup> Na ka mau ia ki te kapu, ka mutu te whakawhetai, ka mea ia, Tangohia tenei, tuwhaina ma koutou: <sup>18</sup> Ko taku kupu hoki tenei ki a koutou, E kore ahau e inu i te hua o te waina, kia tae mai ra ano te rangatiratanga o te Atua. <sup>19</sup> Na ka mau ia ki te taro, ka mutu te whakawhetai, ka whawhati, ka hoatu e ia ki a ratou, ka mea, Ko toku tinana tenei e hoatu ana mo koutou: meinga tenei hei whakamahara ki ahau. <sup>20</sup> I peratia ano hoki te kapu, i muri iho i te hapa, a i mea ia, Ko te kawenata hou tenei kapu i runga i oku toto e ringihia nei mo koutou.

<sup>21</sup> Otira, tenei kei ahau nei, kei te tepu, te ringa o te kaituku i ahau. <sup>22</sup> E haere ana hoki ra te Tama a te tangata, e pera ana me te mea i whakaritea: otira, aue mo te tangata e tukua ai ia! <sup>23</sup> Na ka anga ratou ka rapu ki a ratou ano, ma wai o ratou tenei e mea. <sup>24</sup> A ka ara ano he tautohe a ratou,

<sup>25</sup>  
 ko wai o ratou e meinga ko te tangata tino nui. Na ka mea ia ki a ratou, Ko nga kingi o nga tauwiwi e whakarangatira ana ki a ratou; ko te hunga whai mana ki runga i a ratou ka kiia, He hunga atawhai.

<sup>26</sup>  
 Otiia kua koutou e pera: engari kia rite ki to muri te mea nui o koutou: kia rite ano te tino tangata ki te kaimahi.

<sup>27</sup>  
 Ko wai hoki te mea nui, ko ia e noho ana ki te kai, ko te kaimahi ranei? ehara ranei i te tangata e noho ana ki te kai? tenei raia ahau i roto i a koutou te rite nei ki te kaimahi.

<sup>28</sup>  
 Otira ko koutou te hunga i noho tahi tonu me ahau i oku whakamatautauranga;

<sup>29</sup>  
 A ka whakarite ahau i te rangatiratanga mo koutou, i te pera me ta toku Matua i whakarite ai moku:

<sup>30</sup>  
 Kia kai ai, kia inu ai koutou ki taku tepu i toku rangatiratanga; a ka noho koutou ki runga ki nga torona, whakawa ai i nga iwi kotahi tekau ma rua o Iharaira.

<sup>31</sup>  
 E Haimona, e Haimona, na, kua inoi a Hatana kia riro koe i a ia, kia tataritia ai koe e ia, ano he witi:

<sup>32</sup>  
 Otiia kua inoi ahau mou,

<sup>33</sup>  
 kei hemo tou whakapono: a, kite tahuri mai ano koe, whakakahangia ou teina. Na ka mea tera ki a ia, E te Ariki, e pai ana ahau kia haere hei hoa mou ki te whare herehere, ki te mate hoki.

<sup>34</sup>  
 Ano ra ko ia, Tenei taku kupu ki a koe, e Pita, e kore te tikaokao e tangi aiane, ka toru au whakakahoretanga i tou matau ki ahau.

<sup>35</sup>  
 A ka mea ia ki a ratou, I taku tononga i a koutou, kahore he peke moni, kahore he putea, kahore he hu, i hapa ranei koutou i tetahi mea? Ka mea ratou,

<sup>36</sup>  
 Kahore. Ano ra ko ia ki a ratou, Tena ko tenei ki te mea he peke moni ta tetahi, mauria atu, me te putea ano: me ia hoki kahore ana hoari, hokona atu tona kakahu, ka hoko mai ai i tetahi.

<sup>37</sup>  
 Ko taku kupu hoki tenei ki a koutou, Ko te tikanga tenei, kia rite i ahau te mea kua oti nei te tuhituhi,

<sup>38</sup>  
 ara, Kua huihuia ia ki te hunga hara: he tutukitanga hoki to nga mea moku. Na ka mea ratou, E te Ariki, na, e rua enei hoari. ka mea ia ki a ratou, Kati ano.

<sup>39</sup>  
 Na ka puta atu ia, ka haere ki Maunga Oriwa, ko tana hanga hoki tera; me te aru ano ana akonga i a ia.

<sup>40</sup>  
 A, i ia i taua wahi, ka mea ia ki a ratou, Me inoi kei uru koutou ki te whakamatautauranga.

<sup>41</sup>  
 Na ka mawehe atu ia i a ratou, kei to te taunga kamaka te matara, a ka tuku i ona turi ka inoi,

<sup>42</sup>  
 Ka mea, E Pa, ki te pai koe, tangohia atu tenei kapu i ahau: otira kauaka e waiho i taku e pai ai, engari i tau.

<sup>43</sup>  
 Na ka puta mai ki a ia tetahi anahera i te rangi, e whakakaha ana i a ia.

<sup>44</sup>  
 A, i te oke o tona wairua, ka hohonu ake tana inoi: ko tona kakawa ka pena i te tepe toto e turuturu iho ana ki te whenua.

<sup>45</sup>  
 Na ka ara ia i te inoi, a ka tae ki ana akonga, rokohanga

46  
atu e moe ana ratou, he ngakau pouri hoki. Na ko tana meatanga ki a ratou, He aha koutou ka moe ai? Whakatika ki te inoi, kei uru koutou ki te whakamatautauranga.

47  
I a ia e korero ana, na, ko te huihuinga tangata, a ko tera e huaina ra ko Hura, ko tetahi o te tekau ma rua, e haere ana i mua i a ratou; a ka whakatata ia ki a Ihu ki te kihi i a ia. 48  
Ano ra ko

49  
Ihu ki a ia, E Hura, he kihi tau hei tuku mo te Tama a te tangata? A, no te kitenga o te hunga i tona taha i nga mea tera e tupono, ka mea ratou, E te Ariki, me patu ranei e matou ki te hoari?

50  
Na haua iho e tetahi o ratou te pononga a te tohunga nui, poroa ana tona taringa matau. Na 51  
52  
ka oho a Ihu, ka mea, Kati ra i tenei. Whakapakia ana tona taringa, na kua ora. Katahi a Ihu ka mea ki nga tohunga nui, ki nga rangatira o te temepara, ki nga kaumatua, i haere atu ki a ia, He

53  
taha e ahau i haere mai ai koutou me nga hoari, me nga patu? I ahau e noho ana i a koutou i te temepara i ia ra, i ia ra, kihai i totoro mai o koutou ringa ki ahau: otira no koutou tenei haora, ko te kaihanganga hoki o te pouri.

54  
Na ka hopukina ia e ratou, ka arahina atu, a kawea ana ki roto ki te whare o te tino tohunga.

55  
Ko Pita ia i aru mai i tawhiti. A, no ka oti i a ratou he kapura te tahu ki waenga marae, i a ratou

56  
e noho tahi ana, ka noho hoki a Pita i waenganui o ratou. Na ka kitea ia e tetahi kotiro, i a ia e noho ana i te marama o te kapura; a matatau tonu te titiro ki a ia, ka mea, I a ia ano hoki tenei.

57  
Na ka whakakahore ia ki a ia, ka mea, E ko, kahore ahau e mohio ki a ia. A taro kau iho ka 58

59  
kite tetahi atu i a ia, ka mea, No ratou hoki koe. Na ka mea a Pita, E mara, kahore. A, me te mea kotahi te haora i muri iho, ka tohe ano tetahi atu, ka mea, He pono i a ia ano hoki tenei: no Kariri

60  
hoki. A ka mea a Pita, E mara, kahore ahau e matau ki tau e mea na. A i reira pu ano, i a ia e

61  
korero ana, ka tangi te tikaokao. Na ka tahuri te Ariki, ka titiro ki a Pita A ka mahara a Pita ki te kupu a te Ariki, ki tana meatanga ki a ia, E kore e tangi te tikaokao, ka toru au whakakahoretanga

62  
i ahau. Na haere atu ana a Pita ki waho, a nui atu tona tangi.

63  
Na ka taunu nga kaipupuri o Ihu ki a ia, ka whiu i a ia. 64  
Ka koparea ona kanohi, a ka ui

65  
ratou ki a ia, ka mea, Poropiti mai, na wai koe i papaki? He maha hoki era atu kupu kino i korero

66  
ai ratou ki a ia. A, i te aonga tonutanga o te ra, ka huihui nga kaumatua o te iwi, nga tohunga

67  
nui, me nga karaipi, a arahina atu ana ia ki to ratou runanga, ka mea ratou, Ki te mea ko te Karaiti koe, korerotia mai ki a matou. Ano ra ko ia ki a ratou, Ki te korerotia e ahau ki a koutou, e kore

68  
koutou e whakapono; Ki te ui ahau, e kore koutou e whakahoki kupu mai ki ahau. 69  
Haere ake

70  
 nei ka noho te Tama a te tangata ki matau o te kaha o te Atua. Na ka mea ratou katoa, Ko te  
 Tama ranei koe a te Atua? Ano ra ko ia ki a ratou, Kua korerotia mai na e koutou ko ahau ia. 71  
 Na  
 ka mea ratou, hei aha ake he kaiwhakaatu ma tatou? kua rongu nei hoki tatou i ta tona mangai.

### Chapter 23

1 Katahi ka whakatika to ratou huihui katoa, a arahina ana ia ki a Pirato. 2 Na ka anga ratou ka  
 whakapa he ki a ia, ka mea, Kua mau i a matou tenei tangata e kukume ke ana i te iwi, e mea ana  
 kia kaua e hoatu te takoha ki a Hiha, e ki ana he kingi ia, ko te Karaiti. 3 Na ka ui a Pirato ki a ia,  
 ka mea, Ko koe ranei te kingi o nga Hurai? Ka whakahoki ia ki a ia, ka mea, Kua korerotia mai na  
 e koe. 4 Na ko te meatanga a Pirato ki nga tohunga nui, ki nga mano, kahore tetahi he o tenei tangata  
 i mau i ahau. 5 A nui atu ta ratou tohe, ka mea, E whakatutehu ana ia i te iwi, e whakaako ana puta  
 noa i Huria, timata mai i Kariri a tae noa mai ki konei. 6 I te rongonga ia o Pirato ki Kariri, ka ui,  
 No Kariri ranei tenei tangata? 7 A, i tona mohiotanga no te rangatiratanga ia o Herora, ka tonoa ia  
 ki a Herora, i Hiruharama hoki ia i aua ra. 8 Na, i te kitenga o Herora i a Ihu, nui rawa tona hari;  
 kua roa ia e hiahia ana kia kite i a ia, he maha hoki nga mea i rangona e ia mona; na ka tumanako  
 ia kia kite i tetahi merekara e meinga ana e ia. 9 Na he maha nga kupu i ui ai ia ki a ia; heoi kahore  
 kau he kupu i whakahokia e ia. 10 Na tu ana nga tohunga nui me nga karaipi, kaha rawa hoki ta  
 ratou whakapa he ki a ia. 11 Na ka whakakorekore a Herora ratou ko ana hoia ki a ia, ka taunu, a  
 ka oti ia te whakakakahu ki te kahu whakapaipai, ka whakahokia atu ki a Pirato. 12 I taua rangi  
 ano ka houhia te rongu a Pirato raua ko Herora: i mua hoki e mauahara ana ki a raua.  
 13 Na ka karangatia e Pirato nga tohunga nui, nga rangatira, me te iwi ano, 14 Ka mea ia ki a  
 ratou, kua kawea mai nei e koutou tenei tangata ki ahau, me te ki ano kei te kukume ke ia i te iwi:  
 a ka oti nei ia te uiui e ahau i to koutou aroaro, na, kihai i mau i ahau tetahi he o tenei tangata i roto  
 i nga mea i whakapangia nei e koutou ki a ia. 15 A kihai ano hoki a Herora: nana ia i whakahoki  
 mai ki a tatou, na, kahore ana mahi e tika ai kia mate ia. 16 Na, me whiu ia e ahau, ka tuku atu ai.  
 17 Kua takoto hoki te tikanga kia tukua atu tetahi ki a ratou i te hakari. 18 Na ka panui ratou ki te  
 karanga, ka mea, Whakamatea tenei, ko Parapa te tuku mai ki a matou: 19 Ko tenei hoki i maka ki

te whare herehere mo te nananga i nana ai ia i roto i te pa, mo te patu tangata. <sup>20</sup> Na ka mea atu  
 ano a Pirato, he mea hoki nana kia tukua a Ihu; <sup>21</sup> Heoi hamama ana ratou, mea ana, Ripekatia ia,  
 ripekatia. <sup>22</sup> Ka mea ano ia ki a ratou, ko te toru o nga meatanga, he aha ra te kino i meinga e tenei  
 tangata? Kahore ano i mau i ahau tetahi he ona e mate ai: maku ia e whiu, ka tuku atu ai. <sup>23</sup> Otira  
 nui atu o ratou reo ki te tohe, e tono ana kia ripekatia ia. A riro rawa i ta o ratou reo. <sup>24</sup> Na ka  
 whakaotia e Pirato kia waiho i ta ratou i tono ai. <sup>25</sup> Na ka tukua ano ki a ratou te tangata i maka ki  
 te whare herehere mo te nananga, mo te patu tangata, ta ratou hoki i tono ai; ko Ihu ia i tukua ki ta  
 ratou i pai ai.  
<sup>26</sup> A i a ratou e arahi ana i a ia, ka mau ratou ki tetahi tangata o Hairini, ki a Haimona, e haere  
 mai ana i nga whenua, a utaina ana ki a ia te ripeka, kia amohia i muri i a Ihu. <sup>27</sup> Na he nui te  
 huihuinga o te iwi i aru i a ia, me nga wahine hoki e tangi ana, e aue ana ki a ia. <sup>28</sup> Na ka tahuri a  
 Ihu ki a ratou, ka mea, E nga tamahine o Hiruharama, kaua e tangi ki ahau, engari me tangi ki a  
 koutou ano, ki a koutou tamariki. <sup>29</sup> Tera hoki e puta nga ra e mea ai ratou, Koa tonu nga pakoko,  
 me nga kopu kahore i whanau, me nga u kahore i ngotea. <sup>30</sup> Ko reira timata ai ratou te mea ki nga  
 maunga, Horo iho ki runga ki a matou: ki nga pukepuke hoki, Hipokina matou. <sup>31</sup> Ki te meinga  
 hoki enei mea e ratou i te rakau e kaimata ana, ko te aha e meatia i te rakau ka maroke?  
<sup>32</sup> Na tera atu etahi tokorua, he hunga mahi kino, e arahina ngatahitia ana me ia kia whakamatea.  
<sup>33</sup> A ka tae ratou ki te wahi e kiia nei ko te Angaanga, ka ripekatia ia ki reira, me aua kaimahi kino,  
 kotahi ki matau, kotahi ki mau. <sup>34</sup> Na ka mea a Ihu, E Pa, houhia te rongo ki a ratou: kahore hoki  
 ratou e mohio ki ta ratou e mea nei. A wehewehea ana ona kakahu e ratou he mea maka ki te rota.  
<sup>35</sup> Me te tu ano te iwi matakitaki ai. Ko nga rangatira hoki ka tawai ki a ia, ka mea, Ko era atu i  
 whakaorangia e ia; mana ano ia e whakaora, ki te mea ia ko te Karaiti a te Atua, ko tana i whiriwhiri  
 ai. <sup>36</sup> Ko nga hoia etahi i taunu ki a ia, ka haere mai me te kawe mai he winika ki a ia, <sup>37</sup> Ka mea,  
 Ki te mea ko koe te Kingi o nga Hurai, whakaora i a koe. <sup>38</sup> A tera te mea i tuhituhia ki runga ake  
 i a ia, **KO TE KINGI TENEI O NGA HURAI.** <sup>39</sup> Na ko tetahi o nga kaimahi kino i whakairia ra  
 i kohukohu ki a ia, i mea, Ki te mea ko te Karaiti koe, whakaorangia koe, maua hoki. <sup>40</sup> Na ka  
 whakahoki tetahi, ka riri ki a ia, ka mea, E kore ranei koe e wehi ki te Atua, kei tenei mate tahi nei  
 hoki koe? <sup>41</sup> Ka tika raia to taua; ka whiwhi hoki taua ki nga mea e tika ana mo a taua hanga: ko

<sup>42</sup> tenei ia kahore ana mahi he. Na ko tana meatanga ki a Ihu, E te Ariki, kia mahara koe ki ahau  
<sup>43</sup> ina haere mai koe i runga i tou rangatiratanga. Ano ra ko Ihu ki a ia, he pono taku e mea nei ki  
 a koe, Ko aiane i koe noho ai ki ahau ki Pararaiha.  
<sup>44</sup> Na kua tata ki te ono o nga haora, a ka pouri a runga o te whenua katoa, tae noa ki te iwa o  
<sup>45</sup> nga haora. I pouri hoki te ra, a i wahia te arai o te whare tapu i waenganui pu. <sup>46</sup> A nui atu te  
 reo o Ihu ki te karanga; i mea ia, E Pa, tenei toku wairua ka tukua atu nei ki ou ringa: ka mutu enei  
<sup>47</sup> kupu, ka hemo ia. A, i te kitenga o te keneturio i taua mea, ka whakakororia ia i te Atua, ka mea,  
<sup>48</sup> he pono he tangata tika tenei. Me te hunga katoa hoki i huihui mai ki te matakitaki, i to ratou  
<sup>49</sup> kitenga i aua mea i meatia ra, ka patuki i o ratou uma, a hoki ana. A ko te hunga katoa i mohio  
 ki a ia, ratou ko nga wahine i aru mai i a ia i Kariri, i tu mai i tawhiti, matakitaki ai ki enei mea.  
<sup>50</sup> Na tera tetahi tangata, ko Hohepa te ingoa, he tangata noho runanga; he tangata pai, he  
<sup>51</sup> tangata tika: Kihai ia i whakaae ki to ratou whakaaro, ki ta ratou mahi; no Arimatia ia, no tetahi  
<sup>52</sup> pa o nga Hurai: a he tangata ia e tatari ana ki te rangatiratanga o te Atua. I haere ia ki a Pirato,  
<sup>53</sup> a tonoa ana e ia te tinana o Ihu. Na, ka tangohia iho e ia taua tinana, a takaia ana ki te rinena,  
<sup>54</sup> ka waiho ki te rua i haua ki roto ki te kohatu, kahore hoki i takoto noa tetahi tangata ki reira. Na  
<sup>55</sup> ko te ra takanga hakari ia, a meake puao te hapati. I aru ano nga wahine i haere tahi mai nei me  
<sup>56</sup> ia i Kariri, a kite ana i te urupa, i te whakatakotoranga ano o tona tinana. Na ka hoki ratou, ka  
 mahi i nga mea kakara, i nga hinu. A noho ana i te hapati, he whakaaro hoki ki te ture.

## Chapter 24

<sup>1</sup> Na i te ra tuatahi o te wiki, i te tino ata po, ka haere mai ratou ki te urupa, me te mau mai i  
<sup>2</sup> nga mea kakara kua mahia nei e ratou. A rokohanga atu e ratou kua hurihia te kamaka i te urupa.  
<sup>3</sup> A ka tomo ratou ki roto; kihai i kitea te tinana o te Ariki, o Ihu. <sup>4</sup> Na, i a ratou e pokaikaha ana  
<sup>5</sup> ki tenei, na, tu ana nga tangata tokorua i o ratou taha, uira tonu nga kakahu. Na, i a ratou e mataku  
 ana, e kupapa iho ana o ratou kanohi ki te whenua, ka mea raua ki a ratou, he aha koutou ka rapu  
<sup>6</sup> ai i te tangata ora i roto i te hunga mate? Kahore ia i konei, engari kua ara: kia mahara ki tana i

mea ai ki a koutou i a ia ano i Kariri, <sup>7</sup> Ki tana meatanga, Kua takoto te tikanga kia tukua te Tama  
 a te tangata ki nga ringa o te hunga hara, kia ripekatia, a i te toru o nga ra ka ara. <sup>8</sup> Na ka mahara  
 ratou ki ana kupu; <sup>9</sup> A hoki mai ana i te urupa, ka korero i enei mea katoa ki te tekau ma tahi, ki a  
 ratou ko era atu katoa. <sup>10</sup> Na ko Meri Makarini ratou ko Hoana, ko Meri whaea o Hemi, ko o ratou  
 hoa wahine, nga kaikorero i enei mea ki nga apotoro. <sup>11</sup> A ko te ahua o aua kupu ki ta ratou whakaaro  
 he mea tito noa; kihai i whakaponohia e ratou. <sup>12</sup> Katahi ka whakatika a Pita, ka oma ki te urupa:  
 a, ko tona pikonga iho ka kite, ko nga kakahu takai anake e takoto ana; a hoki ana ki tona whare  
 me te miharo ano i roto i a ia ki taua mea i meatia.  
<sup>13</sup> Na tokorua o ratou e haere ana i taua ra ki tetahi kainga, e ono tekau paronga te matara i  
 Hiruharama, ko Emauha te ingoa. <sup>14</sup> E kororerero ana hoki raua tetahi ki tetahi ki enei mea katoa  
 i meinga. <sup>15</sup> A, i a raua e kororerero ana, e uiui ana ki a raua, na ko Ihu, ko ia tonu, kua whakatata,  
 a haere tahi ana me raua. <sup>16</sup> I puritia hoki o raua kanohi, i kore ai raua e mohio ki a ia. <sup>17</sup> Na ka  
 mea ia ki a raua, he aha enei kupu e korero nei korua ki a korua, i a korua e haere nei? Na ka tu  
 raua, kihai i korikori, me te ahua pouri. <sup>18</sup> Na ka whakahoki tetahi, ko Kereopa te ingoa, ka mea  
 ki a ia, I Hiruharama koe e noho ana, a ko koe anake kahore i mohio ki nga mea kua meinga nei ki  
 reira i enei ra? <sup>19</sup> Ka mea ia ki a raua, Ki ehea mea? Ka mea raua ki a ia, Ki nga mea o Ihu o  
 Nahareta, he poropiti hoki ia, he kaha tana mahi, tana kupu, i te aroaro o te Atua, o te iwi katoa:  
<sup>20</sup> Ki tona hoatutanga e nga tohunga nui, e o matou rangatira hoki, kia tukua ki te mate, a ripekatia  
 ana ia. <sup>21</sup> I tumanako ano matou ki a ia, mana e whakaora a Iharaira. Na i te taha o enei mea katoa,  
 ko te toru tenei o nga ra i meinga ai enei mea. <sup>22</sup> A miharo noa iho matou ki etahi wahine o matou,  
 i haere i te atatu ki te urupa; <sup>23</sup> Heoi, i te korenga i kitea e ratou tona tinana, ka hoki mai, ka mea,  
 i kitea ano e ratou he putanga anahera, e ki ana mai kei te ora ia. <sup>24</sup> Na ka haere atu etahi o o maua  
 hoa ki te urupa, a rokohanga atu, rite tonu ki ta nga wahine i korero ai: otira kihai ia i kitea. <sup>25</sup> Na  
 ko tana meatanga ki a raua, E te hunga whakaarokore, ngakau puhoi ki te whakapono ki nga mea  
 katoa i korero ai nga poropiti: <sup>26</sup> Kahore ianei i takoto te tikanga kia pa enei mea ki a te Karaiti,  
 kia tomo ia ki tona kororia? <sup>27</sup> Na ka timata ia ki ta Mohi, ki ta nga poropiti katoa, whakaaturia  
 ana ki a raua nga mea mona o nga karaipiture katoa. <sup>28</sup> A ka tata ki te kainga i haere ai raua: na ka



29  
 ahu atu ia, me te mea e haere tonu ana ia. Na ka tohe raua ki a ia, ka mea, E noho ki a maua:  
 30  
 kua ahiahi hoki, kua titaha te ra. Na ka tomo atu ia, ka noho ki a raua. A, i tona nohoanga iho  
 31  
 ki a raua ki te kai, ka mau ia ki te taro, ka whakapai, ka whawhati, a hoatu ana ki a raua. Na kua  
 32  
 kite o raua kanohi, a ka mohio ki a ia; a ngaro whakarere atu ia i a raua. A ka mea raua ki a raua,  
 Kihai koia o taua ngakau i mumura i roto i a taua, i a ia e korero ana ki a taua i te ara, e whakaatu  
 33  
 ana i nga karaipiture ki a taua? Na ka whakatika raua i taua haora ano, a hoki ana ki Hiruharama,  
 34  
 a rokohanga atu kua huihui te tekau ma tahi me o ratou hoa, E mea ana, Koia rawa ano! kua ara  
 35  
 te Ariki, kua puta ki a Haimona. Na ka korerotia e raua nga meatanga i te ara, to raua mohiotanga  
 hoki ki a ia i te whatiwhatinga o te taro.  
 36  
 A, i a raua e korero ana i enei mea, na tera ia tu ana i waenganui o ratou, mea ana ki a ratou,  
 37  
 Kia tau te rangimarie ki a koutou. Otira koera ana ratou, wehi ana; i mahara hoki he wairua ta  
 38  
 ratou i kite ai. Na ko tana meatanga ki a ratou, He aha koutou ka pororaru ai? na te aha hoki i  
 39  
 puta ake ai nga whakaaroaronga i roto i o koutou ngakau? Tirohia oku ringa me oku waewae,  
 ko ahau tonu tenei: whawhakia ahau, kia kite ai koutou; kahore hoki o te wairua kikokiko, wheua  
 40  
 ranei, penei i oku e kitea mai na e koutou. A, no ka korerotia e ia tenei, ka whakakitea e ia ki a  
 41  
 ratou ona ringa me ona waewae. A, i a ratou kahore nei i whakapono i te hari, e miharo ana  
 42  
 hoki, ka mea ia ki a ratou, he kai ranei ta koutou kei konei? Na ka hoatu e ratou ki a ia tetahi  
 43  
 ika, he mea tunutunu, me te honi. Na ka tango ia, a kainga ana e ia i to ratou aroaro. I mea  
 44  
 ano ia ki a ratou, Ko nga kupu enei i korero ai ahau ki a koutou, i ahau ano i a koutou, me whakarite  
 45  
 nga mea katoa kua oti te tuhituhi i roto i te ture a Mohi, i nga poropiti, i nga waiata, moku. Katahi  
 46  
 ia ka whakamakoha i o ratou hinengaro, kia matau ai ki nga karaipiture, Ka mea ki a ratou, Ko  
 te mea tenei i tuhituhia, ko te tikanga ano tenei, ko te Karaiti kia whakamamaetia, kia ara ano i te  
 47  
 hunga mate i te toru o nga ra: Kia kauwhautia hoki te ripeneta me te murunga hara i runga i tona  
 48  
 ingoa ki nga tauwiwi katoa; ki Hiruharama timata ai. Na ko koutou hei kaiwhakaatu mo enei mea.  
 49  
 Nana, maku e tuku ki a koutou te mea i korerotia i mua e toku Matua: otiia e noho koutou ki te  
 pa, ki Hiruharama, kia whiwhi ra ano ki te kaha i runga.

50 Na arahina ana ratou e ia ki waho, ki Petani, na kua ara ona ringa, whakapaingia ana ratou  
 51 e ia. A, i a ia e whakapai ana i a ratou, ka mawehe atu ia i a ratou, kahakina atu ana ki te rangi.  
 52 Na ka koropiko ratou ki a ia, a hoki ana ki Hiruharama, he nui hoki te koa: 53 A noho tonu ai  
 ratou i te temepara, me te whakapai ki te Atua. Amine.

## John

### Chapter 1

1 I te timatanga te Kupu, i te Atua te Kupu, ko te Atua ano te Kupu. 2 I te Atua ano tenei Kupu  
 i te timatanga. 3 Nana nga mea katoa i hanga; kahore hoki tetahi mea i kore te hanga e ia o nga  
 mea i hanga. 4 I a ia te ora; ko te ora te marama mo nga tangata.  
 5 I roto i te pouri te marama e whiti ana; heoi kihai i mau i te pouri. 6 I tonoa mai he tangata e  
 te Atua, ko Hoani tona ingoa. 7 I haere mai ia hei kaiwhakaatu, hei whakaatu mo te marama, kia  
 meinga ai e ia nga tangata katoa kia whakapono. 8 Ehara ia i te marama, engari i haere mai hei  
 kaiwhakaatu mo te marama. 9 Ko te marama pono tera, ara ko te marama e marama ai nga tangata  
 katoa e haere mai ana ki te ao. 10 I te ao ia, i hanga ano e ia te ao, a kihai te ao i mohio ki a ia. 11 I  
 haere mai ia ki ona, a kihai ona i manako ki a ia. 12 Tena ko te hunga i manako ki a ia i tukua e ia  
 ki a ratou nga tikanga e meinga ai ratou hei tamariki ma te Atua, ara ki te hunga e whakapono ana  
 ki tona ingoa: 13 Ki te hunga ehara nei i te toto, ehara i ta te kikokiko i pai ai, ehara i ta te tangata  
 i pai ai, engari na te Atua i whanau ai. 14 I whakakikokikoa te Kupu, a noho ana i a matou, i kite  
 ano matou i tona kororia he kororia e rite ana ki to te Tama kotahi a te Matua, ki tonu i te aroha  
 noa, i te pono.  
 15 I korerotia ia e Hoani; i karanga tera, i mea, Ko ia tenei i korerotia ra e ahau, Ko ia e haere  
 mai ana i muri i ahau e meinga ana ki mua i ahau: no mua hoki ia i ahau. 16 Kua riro hoki i a tatou  
 katoa tetahi wahi o tona raneatanga, te aroha noa hono iho ki te aroha noa. 17 Na Mohi hoki i homai

te ture; ko te aroha noa me te pono i ahu mai i a Ihu Karaiti. <sup>18</sup> Kahore ano he tangata i kite noa i te Atua; ko te Tama kotahi, kei te uma nei o te Matua, nana ia i whakapuaki.

<sup>19</sup> Na ko te korero tenei a Hoani, i te tononga mai a nga Hurai i Hiruharama i nga tohunga nui ratou ko nga Riwaiti hei ui ki a ia, Ko wai koe? <sup>20</sup> Na ka whakina e ia, kihai i whakakahore, i whaki

hoki, Ehara ahau i a te Karaiti. <sup>21</sup> A ka ui ratou ki a ia, Tena, pehea? Ko Iraia koe? Ka mea ia,

Kahore. Ko te poropiti oti koe? Ka whakahokia e ia, Kahore. <sup>22</sup> Na ka mea ratou ki a ia, Ko wai koia koe? Hei kupu whakahoki ma matou ki te hunga i tonoa mai ai matou. E pehea ano koe ki a

koe? <sup>23</sup> Ka mea ia, he reo ahau no tetahi e karanga ana i te koraha, Whakatikaia te huarahi o te

Ariki; he pera me ta Ihaia poropiti i mea ai. <sup>24</sup> No nga Parihi hoki te hunga i tonoa mai ra. <sup>25</sup> Na ka ui ratou ki a ia, ka mea ki a ia, He aha oti koe i iriiri ai, ki te mea ehara koe i a te Karaiti, ehara

i a Iraia, ehara i te poropiti? <sup>26</sup> Na ka whakahoki a Hoani ki a ratou, ka mea, He iriiri taku ki te

wai: otiia tena te tu na i waenganui i a koutou tetahi kahore e mohiotia e koutou: <sup>27</sup> Ko ia tenei e

haere mai ana i muri i ahau kahore hoki ahau e tau hei wewete i te here o tona hu. <sup>28</sup> I meatia enei mea ki Petapara, kia tawahi atu o Horano, ki te wahi e iriiri ana a Hoani.

<sup>29</sup> I te aonga ake ka kite ia i a Ihu e haere ana mai ki a ia, ka mea, na, te Reme a te Atua, hei

waha atu i te hara o te ao! <sup>30</sup> Ko ia tenei i korero ai ahau, Kei te haere mai i muri i ahau tetahi

tangata kua meinga ki mua i ahua; no mua hoki ia i ahau. <sup>31</sup> A kahore ahau i matau ki a ia; heoi

hei whakakite i a ia ki a Iharaira, i haere mai ai ahau me taku iriiri ki te wai. <sup>32</sup> Na ka whakaatu a Hoani, ka mea, I kite ahau i te Wairua e heke iho ana i te rangi, ano he kukupa, a noho ana i runga

i a ia. <sup>33</sup> A kahore ahau i matau ki a ia: engari i ki mai ki ahau te kaitono mai i ahau ki te iriiri ki te wai, Ko te tangata e kite ai koe i te Wairua e heke iho ana, e noho ana ki runga ki a ia, ko ia tena

te kaiiriiri ki te Wairua Tapu. <sup>34</sup> A kua kite ahau, kua whakaatu nei hoki, ko te Tama tenei a te

Atua. <sup>35</sup> I te aonga ake i te tu ano a Hoani me ana akonga tokorua; <sup>36</sup> Na ka titiro ia ki a Ihu e haere ana, ka mea, na, te Reme a te Atua!

<sup>37</sup> A ka rongu nga akonga tokorua ki a ia e korero ana, a aru ana raua i a Ihu. <sup>38</sup> A ka tahuri a Ihu, ka kite i a raua e aru ana, ka mea ia ki a raua, E rapu ana korua i te aha? Na ko ta raua meatanga

ki a ia, E Rapi, ko te tikanga tenei ina whakamaoritia, E te Kaiwhaako, kei hea tou kainga? <sup>39</sup> Ka

mea ia ki a raua, haere mai kia kite. Haere ana raua, a ka kite i tona wahi i noho ai, a noho ana i a

ia i taua ra: ko te tekau hoki ia o nga haora. <sup>40</sup> Ko Anaru, teina o Haimona Pita tetahi o taua tokorua

<sup>41</sup>  
 i rongo nei ki a Hoani e korero ana, a aru ana i a ia. Ko ia kua kite wawe i tona tuakana ake, i a Haimona, ka mea ki a ia, Kua kitea e maua te Mihaia, ko te tikanga tenei ina whakamaorititia, ko te  
<sup>42</sup>  
 Karaiti. Na ka arahina mai ia e ia ki a Ihu. A ka titiro a Ihu ki a ia, ka mea, Ko Haimona koe, ko te tama a Hona: me hua koe ko Kipa: tona whakamaoritanga ko Pita, ara ko Kohatu.  
<sup>43</sup>  
 I te aonga ake ka mea a Ihu kia haere ki Kariri, a ka kite i a Piripi: a ka mea a Ihu ki a ia, E  
<sup>44</sup> aru i ahau. Na ko Piripi no Petahaira, no te pa o Anaru raua ko Pita. <sup>45</sup> Ka kite a Piripi i a Natanahira, ka mea ki a ia, Kua kitea e matou a ia, mona nei te tuhituhi a Mohi i roto i te ture, ta  
<sup>46</sup>  
 nga poropiti hoki, a Ihu o Nahareta te tama a Hohepa. Na ka mea a Natanahira ki a ia, E puta  
<sup>47</sup>  
 koia tetahi mea pai i Nahareta? ka mea a Piripi ki a ia, haere mai kia kite. Ka kite a Ihu i a Natanahira e haere ana mai ki a ia, ka puaki tana kupu mona, Na he tino tangata no Iharaira, kahore  
<sup>48</sup>  
 ona tinihanga. Ka mea a Natanahira ki a ia, No hea koe i matau ai ki ahau? Ka whakahoki a Ihu ki a ia, ka mea, I te mea kiano koe i karangatia e Piripi, i a koe ano i raro i te piki, i kite ahau i a  
<sup>49</sup>  
 koe. Na ka whakahoki a Natanahira, ka mea ki a ia, E Rapi, ko te Tama koe a te Atua, ko te  
<sup>50</sup>  
 Kingi koe o Iharaira. Na ka whakahoki a Ihu, ka mea ki a ia, No taku meatanga ki a koe, I kite  
<sup>51</sup>  
 ahau i a koe i raro i te piki, i whakapono ai koe? rahi atu i enei nga mea e kitea e koe. I mea ano ia ki a ia, He pono, he pono tenei kupu aku ki a koutou, Tera koutou e kite i te rangi e tuwhera ana, i nga anahera a te Atua e piki ake ana, e heke iho ana ki te Tama a te tangata.

## Chapter 2

<sup>1</sup> Na i te toru o nga ra he marena i Kana o Kariri; a reira te whaea o Ihu: <sup>2</sup> I karangatia ano a Ihu ratou ko ana akonga ki te marena. <sup>3</sup> A, i te paunga o te waina, ka mea te whaea o Ihu ki a ia, Kahore a ratou waina. <sup>4</sup> Ka mea a Ihu ki a ia, E tai, he aha taku ki a koe? kahore ano kia taea noatia toku haora. <sup>5</sup> Ka mea tona whaea ki nga kaimahi, Ko tana e mea ai ki a koutou, meatia. <sup>6</sup> Na i reira etahi ipu kohatu e ono e tu ana, he tikanga na nga Hurai mo te horoi, e rua, e toru nga mehua o tetahi, o tetahi, ina ki. <sup>7</sup> Ka mea a Ihu ki a ratou, Whakakiiia nga ipu ki te wai. A whakakiiia ana e <sup>8</sup> ratou, purena noa. Na ka mea ia ki a ratou, Tena, utuhia, kawea atu ki te rangatira o te hakari. A <sup>9</sup> kawea ana e ratou. A, no ka whakamatau te rangatira o te hakari i te wai i whakawainatia, a kihai i mohio no hea ranei; ko nga pononga ia i utuhia ai te wai i mohio; ka karanga te rangatira o te

<sup>10</sup>  
 hakari ki te tane marena hou, Ka mea ki a ia, E whakatakotoria ana e nga tangata katoa te waina  
 pai i te timatanga; a ka roa te inumanga, mo reira te waina he iti iho nei te pai: ko koe ia, kua tohu  
<sup>11</sup>  
 i te waina pai mo naianei. I meatia tenei timatanga merekara e Ihu ki Kana o Kariri, i whakakitea  
 e ia tona kororia; a whakapono ana ana akonga ki a ia.  
<sup>12</sup>  
 Muri iho i tenei ka haere iho ia ki Kaperenauma, a ia, tona whaea, ona teina, me ana akonga:  
<sup>13</sup>  
 a kihai i maha nga ra i noho ai ratou ki reira. Na kua tata te kapenga o nga Hurai, a ka haere a  
<sup>14</sup>  
 Ihu ki Hiruharama: Na rokohanga atu e ia i roto i te temepara e noho ana nga kaihoko kau, hipi,  
<sup>15</sup>  
 kukupa, me nga kaiwhakawhitiwhiti moni. A, ka hanga e ia he whiu ki nga aho nonohi, ka whiua  
 katoatia e ia ki waho i te temepara, nga hipi, me nga kau; ringihia ana hoki te moni a nga  
<sup>16</sup>  
 kaiwhakawhitiwhiti moni, turakina ake nga tepu; I mea ano ia ki nga kaihoko kukupa, Tangohia  
<sup>17</sup>  
 atu enei i konei; aua te whare o toku Matua e meinga hei whare hokohoko. A ka mahara ana  
<sup>18</sup>  
 akonga ki te mea i tuhituhia, Ka pau ahau i te aroha ki tou whare. Na ka whakahoki nga Hurai,  
 ka mea ki a ia, he aha te tohu e whakakitea ana e koe ki a matou, ina koe ka mea nei i enei mea?  
<sup>19</sup>  
 Na ka whakahoki a Ihu, ka mea ki a ratou, Wawahia tenei whare tapu, a kia toru nga ra ka ara  
<sup>20</sup>  
 ano i ahau. Ano ra ko nga Hurai, E wha tekau ma ono nga tau i hanga ai tenei whare tapu, e oti  
<sup>21</sup>  
 ranei te hanga e koe i nga ra e toru? Otira ko te whare tapu o tona tinana tana i korero ai. Na  
<sup>22</sup>  
 reira, i tona aranga ake i te hunga mate, ka mahara ana akonga ki tana korerotanga i tenei; a  
 whakapono ana ratou ki te karaipiture, ki te kupu hoki i korerotia e Ihu.  
<sup>23</sup>  
 Na, i a ia i Hiruharama, i te kapenga, i te hakari, he tokomaha i whakapono ki tona ingoa, i  
<sup>24</sup>  
 to ratou kitenga i ana merekara i meatia e ia. Otira kihai a Ihu i tuku atu i a ia ki a ratou, i mohio  
<sup>25</sup>  
 hoki ia ki nga tangata katoa. A kahore ana meatanga kia whakaaturia te tangata e tetahi: i matau  
 hoki ia ki te mea i roto i te tangata.

### Chapter 3

<sup>1</sup>  
 Na he tangata tera no nga Parihi, ko Nikorima tona ingoa, he rangatira no nga Hurai: Ka  
<sup>2</sup>  
 haere mai tenei ki a Ihu i te po, ka mea ki a ia, E Rapi, e matau ana matou i haere mai koe i te Atua  
 hei kaiwhakaako, ina hoki e kore tetahi tangata e ahei te mea i enei merekara e meatia nei e koe,  
<sup>3</sup>  
 ki te kahore te Atua i a ia. Ka whakahoki a Ihu, ka mea ki a ia, he pono, he pono, taku e mea nei

ki a koe, Ki te kahore te tangata e whanau hou, e kore ia e ahei te kite i te rangatiratanga o te Atua.

4

Ka mea a Nikorima ki a ia, Me pehea ka whanau ai te tangata i tona koroheketanga? e taea ranei

5

te tuarua o nga haerenga ki roto ki te kopu o tona whaea, whanau mai ai? Ka whakahokia e Ihu, He pono, he pono taku e mea nei ki a koe, Ki te kahore te tangata e whanau i te wai, i te Wairua

hoki, e kore ia e ahei te tomo ki te rangatiratanga o te Atua. Ko ta te kikokiko e whanau ai he

6

kikokiko; ko ta te Wairua e whanau ai he wairua. Aua ra e miharo ki taku i mea nei ki a koe, he

7

mea tuturu tenei kia whanau hou koutou. E pupuhi ana te hau ki tana wahi e pai ai, ka rongo hoki koe ki tona haruru, otiia e kore e mohiotia e koe te wahi i puta mai ai, e tae atu ai ranei: ko te ritenga

8

tenei ki te hunga katoa ka whanau i te Wairua. Ka whakahoki a Nikorima, ka mea ki a ia, Me

9

pehea ka taea ai enei mea? Ka whakahoki a Ihu, ka mea ki a ia, Ko koe te Kaiwhakaako o

10

Iharaira, a kahore i matau ki enei mea? He pono, he pono taku e mea nei ki a koe, E korerotia

11

ana e matou ta matou i matau ai, e whakaaturia ana ta matou i kite ai; heoi, e kore koutou e tango

ki ta matou whakaaturanga. Ki te mea kua korerotia e ahau ki a koutou nga mea o te whenua, a

12

kahore koutou e whakapono, me pehea ka whakapono ai ki te korerotia e ahau ki a koutou nga mea

13

o te rangi? Kahore hoki he tangata i kake noa ki te rangi, ko ia anake i heke iho i te rangi, ara

ko te Tama a te tangata, e noho mai nei i te rangi. Ka rite hoki ki ta Mohi whakairinga i te nakahi

14

i te koraha, kua takoto te tikanga kia pera te whakairinga o te Tama a te tangata. Kia kahore ai

15

e ngaro te tangata e whakapono ana ki a ia, engari kia whiwhi ai ki te ora tonu. Koia ano te aroha

16

o te Atua ki te ao, homai ana e ia tana Tama kotahi, kia kahore ai e ngaro te tangata e whakapono

ana ki a ia, engari kia whiwhi ai ki te ora tonu. Kihai hoki te Atua i tonu mai i tana Tama ki te

17

ao ki te whakahe i te ao; engari kia ora ai te ao i a ia. Ko ia e whakapono ana ki a ia, e kore e

18

tau te he ki a ia: tena ko ia e kore e whakapono, kua whakahengia noatia ake, mona kihai i whakapono

ki te ingoa o te Tama kotahi a te Atua. Ko te whakahenga hoki tenei, no te mea kua tae mai nei

19

te marama ki te ao, a nui atu to nga tangata aroha ki te pouri i to ratou ki te marama, he kino hoki

no a ratou mahi. E kino ana hoki ki te marama nga kaimahi katoa i te kino, e kore ano hoki e

20

haere mai ki te marama, kei whakakitea a ratou mahi. Tena ko te kaimahi i te pono, e haere mai

21

ana ki te marama, kia kitea ai ana mahi, he mea mahi i roto i te Atua.

22

A no muri i enei mea ka haere a Ihu, ratou ko ana akonga, ki te whenua o Huria; a noho tahi

ana ratou ki reira, me tana iriiri ano. Na i te iriiri ano hoki a Hoani ki Enona, ki tetahi wahi e

23

tata ana ki Harema, no te mea he nui te wai o reira: a ka haere mai ratou, ka iriiria. <sup>24</sup> Kahore ano  
hoki a Hoani i panga ki te whare herehere. <sup>25</sup> Na ka ara he totohe a nga akonga a Hoani ki tetahi  
<sup>26</sup> Hurai mo te purenga. A ka haere ratou ki a Hoani, ka mea ki a ia, E Rapi, ko te tangata i tawahi  
na korua o Horano, ko tau i whakaatu mai na, nana, kei te iriiri ia, e haere ana hoki te katoa ki a ia.  
<sup>27</sup> Ka whakahoki a Hoani, ka mea, E kore tetahi mea e riro i te tangata, ki te kore e homai ki a ia i  
<sup>28</sup> te rangi. Ko koutou hei kaiwhakaae ki ahau, ki taku meatanga, Ehara ahau i a te Karaiti, engari  
<sup>29</sup> i tonoa mai ahau i mua i a ia. Ko te tangata i te wahine marena hou, ko ia te tane marena hou:  
na ko te hoa o te tane marena hou, e tu ana, e rongo ana ki a ia, ka hari pu ki te reo o te tane marena  
<sup>30</sup> hou: na reira i tutuki ai tenei hari oku. Ko te tikanga tenei, ko ia kia nui haere, ko ahau kia iti  
<sup>31</sup> haere. Ko ia e haere mai ana i runga, kei runga ake ia i te katoa: ko to te whenua no te whenua  
<sup>32</sup> ia, no te whenua ano ana korero: ko ia e haere mai ana i te rangi, kei runga ake ia i te katoa. A  
ko tana i kite ai, i rongo ai, ko ia tana e whakaatu ai: kahore hoki tetahi tangata e tango atu ki tana  
<sup>33</sup> whakaaturanga. Ki te manako tetahi ki tana whakaaturanga, kua piri tana tohu ki te pono o ta  
<sup>34</sup> te Atua. Ko ta te Atua i tonono mai ai, e korero ana ia i nga kupu a te Atua: kahore hoki te Wairua  
<sup>35</sup> e homai e te Atua i runga i te mehua. E aroha ana te Matua ki te Tama, kua hoatu ano nga mea  
<sup>36</sup> katoa ki tona ringa. Ko ia e whakapono ana ki te Tama, he ora tonu tona: ko ia e kore e whakapono  
ki te Tama, e kore e kite i te ora; engari ka mau tonu te riri a te Atua ki a ia.

## Chapter 4

<sup>1</sup> A, no ka mohio te Ariki, kua rongo nga Parihi, ko nga akonga a Ihu i mea ai, i iriiri ai, he  
<sup>2</sup> tokomaha atu i a Hoani, He ahakoa ra ehara i a Ihu nana i iriiri, na ana akonga ia, <sup>3</sup> Ka mahue a  
Huria i a ia, a hoki ana ano ki Kariri.  
<sup>4</sup> Na, ko te ara mona i tika na Hamaria. <sup>5</sup> A ka haere ia ki tetahi pa o Hamaria, ko Haika te  
<sup>6</sup> ingoa, e patata ana ki te wahi i hoatu e Hakopa ki tana tama, ki a Hohepa. Kei reira hoki te puna  
a Hakopa. Na kua ngenge a Ihu i te haerenga, heoi noho ana ia ki te taha o te puna: a meake ko te  
<sup>7</sup> ono o nga haora. Ka haere mai tetahi wahine o Hamaria ki te utu wai: ka mea a Ihu ki a ia, Homai  
<sup>8</sup> he wai moku. <sup>9</sup> Kua riro hoki ana akonga ki te pa, ki te hoko kai. Na ko te meatanga a te wahine

o Hamaria ki a ia, he aha koe, he Hurai na koe, ka tonono mai ai i te wai i ahau, he wahine nei ahau  
no Hamaria? kahore hoki e tata ana nga Hurai ki nga Hamarai. <sup>10</sup> Ka whakahoki a Ihu, ka mea ki  
a ia, Me i matau koe ki ta te Atua e homai ai, ki tenei hoki e mea nei ki a koe, Homai he wai moku;  
penei kua tonono koe ki a ia, a kua hoatu e ia te wai ora ki a koe. <sup>11</sup> Ka mea te wahine ki a ia, E kara,  
kahore au mea hei utu wai, he hohonu ano te puna: no hea tena wai ora au? <sup>12</sup> He nui oti koe i to  
matou matua, i a Hakopa, i homai ai te puna ki a matou, inu ana ia i konei, ratou ko ana tamariki,  
me ana kararehe? <sup>13</sup> Ka whakahoki a Ihu, ka mea ki a ia, E mate ano i te wai te tangata e inu ana  
i tenei wai: <sup>14</sup> Tena ko te tangata e inu ana i te wai e hoatu e ahau ki a ia, e kore ia e mate i te wai  
a ake ake; engari te wai e hoatu e ahau ki a ia, hei puna wai tena i roto i a ia e pupu ake ana, a te  
ora tonu ra ano. <sup>15</sup> Ka mea te wahine ki a ia, E kara, homai ki ahau tenei wai, kei mate ahau i te  
wai, kei haere mai hoki ki konei rawa utu ai <sup>16</sup> Ka mea a Ihu ki a ia, Tikina, karangatia to tahu, ka  
hoki mai ai. <sup>17</sup> Ka whakahoki te wahine, ka mea, Kahore aku tahu. Ka mea a Ihu ki a ia, He korero  
tika tau, Kahore aku tahu: <sup>18</sup> Ina hoki kua tokorima au tahu; ko ia i a koe nei ehara i te tahu nau:  
he pono tenei korero au. <sup>19</sup> Ka mea te wahine ki a ia, E kara, e kite ana ahau he poropiti koe. <sup>20</sup> I  
karakia o matou matua i runga i tenei maunga; a e mea ana koutou, Ko Hiruharama te wahi e tika  
ai te karakia. <sup>21</sup> Ka mea a Ihu ki a ia, E tai, whakaponono ki ahau, meake puta te wa, e kore ai koutou  
e karakia ki te Matua i runga i tenei maunga, e kore ano i Hiruharama. <sup>22</sup> Kahore koutou e mohio  
ki ta koutou e karakia nei: e matau ana matou ki ta matou e karakia nei; no nga Hurai nei hoki te  
ora. <sup>23</sup> Otira meake puta te wa, a tenei ano, e karakia ai nga kaikarakia pono ki te Matua i runga i  
te wairua, i te pono: e rapu ana hoki te Matua ki te pera hei karakia ki a ia. <sup>24</sup> He Wairua te Atua:  
me karakia hoki nga kaikarakia ki a ia i runga i te wairua, i te pono. <sup>25</sup> Ka mea te wahine ki a ia,  
E matau ana ahau kei te haere mai te Mihaia, e kiia nei ko te Karaiti, ka tae mai ia, mana nga mea  
katoa e korero ki a tatou. <sup>26</sup> Ka mea a Ihu ki a ia, Ko ahau ano ia e korero nei ki a koe.  
<sup>27</sup> Na ka puta i reira ana akonga, ka miharo ki tana korerotanga ki te wahine: heoi kihai tetahi  
i mea, He aha tau e rapu? he aha koe ka korero ai ki a ia? <sup>28</sup> Na ka whakarerea e te wahine tana  
ipu, a haere ana ki te pa, ka mea ki nga tangata, <sup>29</sup> Haere mai, kia kite i te tangata i korerotia mai  
ai ki ahau nga mea katoa i mea ai ahau: ehara ranei tenei i a te Karaiti? <sup>30</sup> Ka puta ratou ki waho  
o te pa, a ka ahu mai ki a ia. <sup>31</sup> I taua takiwa ano ka tohe nga akonga ki a ia, ka mea, E te



Kaiwhakaako, e kai ra. <sup>32</sup> Otira ka mea ia ki a ratou, he kai ano taku hei kai maku, kahore koutou  
 e matau. <sup>33</sup> Na ka mea nga akonga tetahi ki tetahi, I kawea mai ranei e tetahi he kai mana? <sup>34</sup> Ka  
 mea a Ihu ki a ratou, Ko taku kai tenei, ko te mea i ta toku kaitono e pai ai, kia whakaotia hoki tana  
 mahi. <sup>35</sup> E kore ianei koutou e mea, Kia wha atu nga marama, a ka taea te kotinga? Nana, ko taku  
 kupu tenei ki a koutou, Kia ara ake o koutou kanohi, titiro ki nga mara; kua ma noa ake: ko te  
 kotinga tenei. <sup>36</sup> Ka whiwhi te kaikokoti ki te utu, ka kohia ano hoki e ia nga hua mo te ora tonu:  
 kia hari tahi ai te kairui raua ko te kaikokoti. <sup>37</sup> Na konei hoki i pono ai taua ki, E rui ana tetahi, e  
 kokoti ana tetahi. <sup>38</sup> I tonoa koutou e ahau ki te kokoti i te mea kihai i mahia e koutou: he tangata  
 ke nana i mahi, a kua uru koutou ki a ratou mahi. <sup>39</sup> A he tokomaha nga Hamari o taua pa i  
 whakapono ki a ia, mo te ki a te wahine i mea ra, I korerotia mai e ia ki ahau nga mea katoa i mea  
 ai ahau. <sup>40</sup> A, no ka tae nga Hamari ki a ia, ka mea kia noho ia ki a ratou: a e rua nga ra i noho ai  
 ia ki reira. <sup>41</sup> Na hira noa ake nga tangata i whakapono, he mea hoki na tana kupu; <sup>42</sup> I mea ano  
 ki te wahine, Ehara i te mea na tau kupu i whakapono ai matou inaianei: kua rongu nei hoki matou  
 ake, a ka matau, ko te Karaiti pu tenei, ko te Kaiwhakaora o te ao.  
<sup>43</sup> Ka pahure aua ra e rua, ka turia atu e ia i reira, a haere ana ki Kariri. <sup>44</sup> Ko Ihu tonu hoki  
 nana te ki, Kahore he honore o te poropiti i tona kainga ake. <sup>45</sup> Heoi, i tona taenga ki Kariri, ka  
 whakamanuhiritia ia e nga tangata o Kariri, i kite hoki ratou i nga mea katoa i meatia e ia ki  
 Hiruharama i te hakari: i haere hoki ratou ki te hakari. <sup>46</sup> A ka tae ano a Ihu ki Kana o Kariri, ki  
 te wahi i meatia ai e ia te wai hei waina. Na ko tetahi tangata a te kingi, kei Kaperenauma tana tama  
 e mate ana. <sup>47</sup> A, no ka rongu ia kua tae mai a Ihu i Huria ki Kariri, ka haere ki a ia, ka inoi ki a ia  
 kia haere ia ki te whakaora i tana tama; meake hoki marere. <sup>48</sup> Na ko te meatanga a Ihu ki a ia, Ki  
 te kahore koutou e kite i nga tohu, i nga merekara, e kore rawa koutou e whakapono. <sup>49</sup> Ka mea  
 te tangata a te kingi ki a ia, E te Ariki, haere iho i te mea kahore ano kia mate noa taku tamaiti.  
<sup>50</sup> Ka mea a Ihu ki a ia, Haere; kua ora tau tama. Na whakapono ana te tangata ki te kupu i korerotia  
 e Ihu ki a ia, a haere ana. <sup>51</sup> A, i a ia e haere ana, ka tutaki ana pononga ki a ia, ka korero, Kua ora  
 tau tamaiti. <sup>52</sup> Na ka ui ia ki a ratou ki te haora i matutu ake ai ia. Ka mea ratou ki a ia, Nonanahi,  
 no te whitu o nga haora, i mutu ai tona ka. <sup>53</sup> Na ka mohio te papa, ko te tino haora ia i mea ai a  
 Ihu ki a ia, Kua ora tau tama: a whakapono ana ia, ratou ko tona whare katoa. <sup>54</sup> Ko te rua ano  
 tenei o nga merekara i meatia e Ihu, i muri i tona haerenga i Huria ki Kariri.

## Chapter 5

<sup>1</sup> Muri iho i enei mea he hakari ta nga Hurai; a haere ana a Ihu ki Hiruharama. <sup>2</sup> Na kei Hiruharama tetahi wai kaukauranga kei te tatau hipi, tona ingoa Hiperu ko Petehera; e rima ona whakamahau. <sup>3</sup> Na kei roto i enei e takoto ana tona tini o nga turoro, o nga matapo, o nga kopa, o nga memenge, e tatari ana ki te pokarekarenga o te wai. <sup>4</sup> Heke iho ai hoki tetahi anahera i te wa i rite ai ki te kaukauranga, whakapokarekare ai i te wai: a ko ia kua tae wawe i muri iho o te pokarekarenga o te wai i ora i tona mate, ahakoa he aha, he aha. <sup>5</sup> Na kei reira tetahi tangata, e toru tekau ma waru nga tau e mate ana. <sup>6</sup> No te kitenga o Ihu i a ia e takoto ana, ka matau kua roa ke te wa ona e mate ana, ka mea ki a ia, E pai ana ranei koe ki whakaorangia? <sup>7</sup> Ka whakahokia e taua turoro ki a ia, E te Ariki, kahore aku tangata hei tuku i ahau ki te kaukauranga, ina whakapokarekarea te wai: heoi i ahau e haere ana, ka heke iho tetahi i mua i ahau. <sup>8</sup> Ka mea a Ihu ki a ia, Whakatika, tangohia ake tou moenga, haere. <sup>9</sup> A ora tonu ake taua tangata, a tangohia ake ana e ia tona moenga, haere ana. Ko te hapati ano taua ra. <sup>10</sup> Na ka mea nga Hurai ki taua tangata i whakaorangia ra, Ko te hapati tenei: e kore e tika kia mauria e koe tou moenga. <sup>11</sup> Ka whakahokia e ia ki a ratou, Ko te tangata i whakaorangia ai ahau, nana i mea ki ahau, Tangohia ake tou moenga, haere. <sup>12</sup> Na ka ui ratou ki a ia, Ko wai tena tangata i mea na ki a koe, Tangohia ake toua moenga, haere? <sup>13</sup> Otira kihai taua tangata i whakaorangia ra i mohio ko wai ia: i pahemo atu hoki a Ihu, he tokomaha hoki nga tangata i taua wahi. <sup>14</sup> Muri iho i enei mea ka kite a Ihu i a ia i roto i te temepara, ka mea ki a ia, Na, ka oti nei koe te whakaora: kati te hara kei kino rawa iho te mea e pa ki a koe. <sup>15</sup> Haere ana taua tangata, korero ana ki nga Hurai, na Ihu ia i whakaora. <sup>16</sup> Koia nga Hurai i whai ai ki te tukino i a Ihu, mona i mea i enei mea i te hapati. <sup>17</sup> Na ka whakahokia e Ihu ki a ratou, E mahi ana toku Matua a taea noatia tenei ra; e mahi ana ano ahau. <sup>18</sup> Koia nga Hurai i tino whai rawa ai kia patua ia, ehara hoki i te mea ko tana takahi anake i te hapati, engari mona i mea ko te Atua tona Matua ake, i mea he rite ia ki te Atua te nui. <sup>19</sup> Na ka whakahoki a Ihu, ka mea ki a ratou, he pono, he pono taku e mea nei ki a koutou, E kore e taea e te Tama te mea tetahi mea e ia anake, engari nga mea e kite ai ia e meatia ana e te Matua: ko tana hoki e mea ai, e meatia ana hoki e a hoki e mea ai, e tama! <sup>20</sup> E aroha ano hoki te Matua ki te Tama, e whakakitea ana hoki ki a ia e nga mea katoa e mea ai ia: he nui atu i enei nga mahi e

whakakitea e ia ki a ia, kia miharo ai koutou. <sup>21</sup> Ko ta te Matua hoki, he whakaara, he whakaora i  
 nga tupapaku; ka pera ano te Tama, ka whakaora i ana e pai ai. <sup>22</sup> E kore hoki te Matua e whakawa  
 i tetahi, engari kua tukua e ia nga whakawa katoa ki te Tama: <sup>23</sup> Kia rite ai te whakahonore a nga  
 tangata katoa i te Tama ki ta ratou whakahonore i te Matua. Ki te kahore tetahi e whakahonore i te  
 Tama, e whakakahore ana ia i te honore mo te Matua nana nei ia i tonu mai. <sup>24</sup> He pono, he pono  
 taku e mea atu nei ki a koutou, Ko te tangata e rongu ana ki taku korero, e whakapono ana hoki ki  
 toku kaitono mai, he ora tonu tona; e kore ano ia e riro ki te whakawa, engari kua whiti i te mate  
 ki te ora. <sup>25</sup> He pono, he pono taku e mea nei ki a koutou, Meake puta te wa, a tenei ano inaianei,  
 e rongu ai nga tupapaku i te reo o ta te Atua Tama; a ko te hunga e rongu ana ka ora. <sup>26</sup> Ta te mea  
 he ora to te Matua kei roto i a ia; waihoki kua homai e ia ki te Tama, kia whai ora i roto i a ia; <sup>27</sup> A  
 kua homai ano ki a ia he tikanga mo te whakawa, no te mea ko ia te Tama a te tangata. <sup>28</sup> Kaua e  
 miharo ki tenei: no te mea meake puta te wa, e rongu ai i tona reo nga tangata katoa i roto i nga  
 urupa, <sup>29</sup> A ka puta; ko nga kaimahi i te pai ki te aranga o te ora; ko nga kaimahi i te kino ki te  
 aranga o te whakawa. <sup>30</sup> E kore e ahei i ahau te mea tetahi mea e ahau anake: rite tonu taku whakawa  
 ki taku e rongu ai: he tika hoki taku whakawa; kahore hoki ahau e rapu i taku i pai ai, engari i ta  
 toku kaitono i pai ai.  
<sup>31</sup> Mehemea ko ahau hei whakaatu i aku aha, i aku aha, ehara taku i te whakaatu pono. <sup>32</sup> Tera  
 atu ano tetahi kaiwhakaatu moku; e mohio ana ano ahau he whakaatu pono tana e whakaatu nei  
 moku. <sup>33</sup> I tonu tangata koutou ki a Hoani, a i whakaaturia e ia te pono. <sup>34</sup> Kahore ahau e manako  
 ki ta te tangata whakaatu: engari e korerotia ana e ahau enei mea kia ora ai koutou. <sup>35</sup> He rama ka  
 tera, he rama marama tonu: he wa ano i pai ai koutou kia hari ki tona marama. <sup>36</sup> Otiia he  
 kaiwhakaatu ano toku, nui atu i a Hoani: ko nga mahi hoki i homai e te Matua kia whakaotia e  
 ahau, ko aua mahi e mahia nei e ahau, hei whakaatu moku, i tonoa mai ahau e te Matua. <sup>37</sup> Na, ko  
 te Matua nana nei ahau i tonu mai, kua oti ahau te whakaatu e ia. Kahore ano koutou i rongu noa  
 i tona reo, kahore ano i kite i tona ahua. <sup>38</sup> Kahore ano hoki i mau tana kupu i roto i a koutou; ina  
 kahore ano koutou i whakapono ki tenei i tonoa mai nei e ia. <sup>39</sup> Whakatakina ai e koutou nga  
 tikanga o nga karaipiture; e mea ana hoki koutou kei reira te ora tonu mo koutou: ko enei hei  
 kaiwhakaatu moku. <sup>40</sup> Heoi kahore koutou e pai kia haere mai ki ahau, kia whiwhi ai ki te ora.  
<sup>41</sup> He kororia tangata, kahore ahau e manako atu. <sup>42</sup> Na kua matau ahau ki a koutou, kahore te

<sup>43</sup>  
 aroha o te Atua i roto i a koutou. Kua tae mai nei ahau i runga i te ingoa o toku Matua, a kahore  
 koutou e manako mai ki ahau; ki te haere mai tetahi i runga i tona ake ingoa, ka manako koutou ki  
<sup>44</sup>  
 a ia. Me pehea koutou ka whakapono ai, ka riro nei i a koutou te kororia e puta ana i a koutou  
<sup>45</sup>  
 ano, a kahore e rapu i te kororia e puta ana i te Atua kotahi? Kei mea koutou e korerotia to  
 koutou he e ahau ki te Matua: tera te kaikorero mo to koutou he, ko Mohi, ko ta koutou e tumanako  
<sup>46</sup>  
 nei. Me i whakapono hoki koutou ki a Mohi, kua whakapono ano ki ahau: ko tana hoki i tuhituhi  
<sup>47</sup>  
 ai he mea moku. Otira ki te kahore koutou e whakapono ki ana i tuhituhi ai, me pehea ka  
 whakapono ai ki aku korero?

## Chapter 6

<sup>1</sup>  
 Muri iho i enei mea ka whiti atu a Ihu i te moana o Kariri, ara i te moana o Taipiria. <sup>2</sup> A he  
 rahi te hui i aru i a ia, i kite hoki ratou i ana merekara i mea ai ia ki nga turoro. <sup>3</sup> Na ka haere a Ihu  
 ki runga i te maunga, a noho ana i reira ratou ko ana akonga. <sup>4</sup> Kua tata hoki te kapenga, te hakari  
 a nga Hurai. <sup>5</sup> A, no te marangatanga ake o nga kanohi o Ihu, ka kite i te rahi o te hui e haere mai  
 ana ki a ia; ka mea ia ki a Piripi, Ko hea tatou hoko ai i etahi taro, kia kai ai enei? <sup>6</sup> I penei ai tana  
 ki hei whakamatau mona; i mohio hoki ia ki tana e mea ai. <sup>7</sup> Ka mea a Piripi ki a ia, E kore e ranei  
 ma ratou nga taro o nga pene e rua rau, kia whiwhi ai tenei, tenei o ratou i tetahi wahi iti. <sup>8</sup> Ka mea  
 tetahi o ana akonga ki a ia, a Anaru, teina o Haimona Pita, <sup>9</sup> He tamaiti tenei, e rima ana taro pare,  
 e rua ika nonohi; heoi hei aha enei ma tenei ope nui? <sup>10</sup> Na ka mea a Ihu, Meinga nga tangata kia  
 noho. He nui hoki te tarutaru i taua wahi. Na noho ana nga tane ki raro, te tokomaha me te mea e  
<sup>11</sup>  
 rima mano. Na ka mau a Ihu ki nga taro; a ka mutu te whakawhetai, ka tuwha atu ki te hunga e  
<sup>12</sup>  
 moho ra; me nga ika ano, ta ratou i pai ai. A, no ka makona ratou, ka mea ia ki ana akonga,  
<sup>13</sup>  
 Kohikohia nga toenga o nga whatiwhatinga, kei maumauria tetahi wahi. Na kohikohia ana e  
 ratou, a whakakiiia ana nga kete tekau ma rua ki nga whatiwhatinga o nga taro pare e rima, ki nga  
<sup>14</sup>  
 toenga a nga tangata i kai ra. A, i te kitenga o aua tangata i te merekara i meatia e Ihu, ka ki  
 ratou, Ko ia ano tenei, ko te poropiti e haere mai ana ki te ao.

<sup>15</sup> Na ka mahara a Ihu, meake ratou haere mai ki te tango i a ia, ki te whakakingi i a ia, na maunu ana ano ia ki te maunga, ko ia anake. <sup>16</sup> A, no ka ahiahi, ka haere ana akonga ki te moana.

<sup>17</sup> Na ka eke ratou ki te kaipuke, ka whakawhiti ki tawahi o te moana, ki Kaperenauma. A kua pouri noa ake, kahore ano a Ihu kia tae noa mai ki a ratou. <sup>18</sup> Na ko te turanga o te moana, he nui hoki no te puhanga o te hau. <sup>19</sup> Na, i to ratou hoenga atu, e rua tekau ma rima, e toru tekau ranei paronga, ka kite i a Ihu e haere maori ana i runga i te moana, e whakatata ana ki te kaipuke; na ka matakū ratou. <sup>20</sup> Na ka mea ia ki a ratou, Ko ahau tenei, aua e wehi. <sup>21</sup> Na ka mea ratou kia eke ia ki te kaipuke: a kihai i aha kua u te kaipuke ki te wahi i hoe ai ratou.

<sup>22</sup> I te aonga ake, ka mahara te mano e tu ana ki tera taha o te moana, kahore he poti ke atu o reira, ko tera anake i eke ai ana akonga, kihai hoki a Ihu i eke tahi ratou ko ana akonga ki te poti, engari ko ana akonga anake i haere; <sup>23</sup> He poti ke ra ia i u mai i Taipiria ki pahaki atu o te wahi i kai ai ratou i te taro i ta te Ariki whakawhetainga: <sup>24</sup> A, i te kitenga o te mano kahore a Ihu i reira, kahore ano hoki ana akonga, ka eke hoki ratou ki nga kaipuke, ka rere ki Kaperenauma ki te rapu i a Ihu. <sup>25</sup> A, no to ratou kitenga i a ia i tawahi o te moana, ka mea ki a ia, E Rapi, nonahea koe i tae mai ai ki konei? <sup>26</sup> Ka whakahoki a Ihu ki a ratou ka mea, He pono, he pono taku e mea nei ki a koutou, Ehara i te mea he kitenga no koutou i nga merekara i rapu ai koutou i ahau, engari no te mea i kai koutou i nga taro, a ka makona. <sup>27</sup> Aua e mahia te kai memeha, engari te kai e mau tonu ana a te ora tonu ra ano, ko ta te Tama hoki a te tangata e hoatu ai ki a koutou: kua oti hoki ia te whai tohu e te Atua, e te Matua.

<sup>28</sup> Na ka mea ratou ki a ia, Me aha matou e mahi ai i nga mahi a te Atua? <sup>29</sup> Ka whakahoki a Ihu, ka mea ki a ratou, Ko ta te Atua mahi tenei, kia whakapono koutou ki tana i tono mai ai. <sup>30</sup> Na ka mea ratou ki a ia, Ko tehea tohu te meatia ana e koe kia kite ai matou, kia whakapono ai ki a koe? tena koa tau mahi? <sup>31</sup> I kai o tatou matua i te mana i te koraha; ko te mea hoki tena i tuhituhia, i homai e ia he taro i te rangi hei kai ma ratou. <sup>32</sup> Na ko te meatanga a Ihu ki a ratou, he pono, he pono taku e mea nei ki a koutou, Ehara i a Mohi nana i hoatu tena taro ki a koutou i te rangi; engari tenei te hoatu nei e toku Matua ki a koutou te taro pono o te rangi. <sup>33</sup> Ko te taro hoki a te Atua ko ia e heke iho ana i te rangi, e homai ana i te ora ki te ao. <sup>34</sup> Na ka mea ratou ki a ia, E te Ariki, homai tenei taro ki a matou i nga wa katoa. <sup>35</sup> Ka mea a Ihu ki a ratou, Ko ahau te taro o te ora: ki te haere mai tetahi ki ahau, e kore rawa ia e hiakai; ki te whakapono hoki tetahi ki ahau, e kore

<sup>36</sup> rawa ia e matewai. Otira i mea ano ahau ki a koutou, Kua kite koutou i ahau, a kahore i  
<sup>37</sup> whakapono. Ko a te Matua e homai ai ki ahau ka haere katoa mai ki ahau; a ki te haere mai  
<sup>38</sup> tetahi ki ahau, e kore rawa e panga e ahau ki waho. I heke iho hoki ahau i te rangi, ehara i te  
<sup>39</sup> mea hei mahi i taku i pai ai, engari i ta toku kaitono mai i pai ai. Ko ta te Matua i pai ai, nana  
 nei ahau i tono mai, koia tenei, kia kua e ngaro i ahau tetahi wahi o nga mea katoa i homai e ia ki  
<sup>40</sup> ahau; engari kia whakaarahia ake e ahau a te ra whakamutunga. Ko ta toku Matua hoki tenei i  
 pai ai, ko te tangata e kite ana i te Tama, e whakapono ana ano ki a ia, kia whiwhi ia ki te ora tonu;  
<sup>41</sup> maku ano ia e whakaara ake a te ra whakamutunga. Na ka korero komuhumuhu nga Hurai ki a  
<sup>42</sup> ia, mona i mea, Ko ahau te taro i heke iho i te rangi. Ka mea ratou, Ehara oti tenei i a Ihu, tama  
 a Hohepa, e mohio nei tatou ki tona papa raua ko tona whaea? ha! he pehea tana e ki nei, I heke  
<sup>43</sup> iho ahau i te rangi? Na ka whakahoki a Ihu, ka mea ki a ratou, Kati te komuhumuhu i roto i a  
<sup>44</sup> koutou. Kahore he tangata e ahei te haere mai ki ahau, ki te kahore ia e kumea mai e te Matua,  
<sup>45</sup> nana nei ahau i tono mai: e maku ano ia e whakaara ake a te ra whakamutunga. Kua oti te tuhituhi  
 i roto i nga poropiti, A ka whakaakona ratou katoa e te Atua. Na, ko te tangata kua rongu ki te  
<sup>46</sup> Matua, kua akona hoki, ka haere mai ki ahau. Ehara i te mea kua kite tetahi i te Matua; ko ia  
<sup>47</sup> anake i puta mai i te Atua, ko ia kua kite i te Matua. He pono, he pono taku e mea nei ki a koutou,  
<sup>48</sup> Ki te whakapono tetahi, he ora tonu tona. Ko ahau te taro o te ora. <sup>49</sup> I kai ra o koutou matua i  
<sup>50</sup> te mana i te koraha, a i mate ratou. Ko te taro tenei e heke iho ana i te rangi, kia kai ai te tangata  
<sup>51</sup> i a ia, a kia kua e mate. Ko ahau te taro ora i heke iho i te rangi; ki te kai tetahi i tenei taro, e  
 ora tonu ia: ae ra, ko te taro e hoatu e ahau ko oku kikokiko, e hoatu e ahau hei oranga mo te ao  
<sup>52</sup> Na ka totohe nga Hurai tetahi ki tetahi, ka mea, Me pehea e homai ai e tenei tangata ona kikokiko  
<sup>53</sup> kia kainga e tatou? Na, ko te meatanga a Ihu ki a ratou, he pono, he pono taku e mea nei ki a  
 koutou, Ki te kahore koutou e kai i nga kikokiko o te Tama a te tangata, e inu i ona toto, kahore he  
<sup>54</sup> ora i roto i a koutou ake. Ko ia e kai ana i oku kikokiko, e inu ana i oku toto, he ora tonu tona;  
<sup>55</sup> a maku ia e whakaara ake a te ra whakamutunga. He kai pono hoki oku kikokiko, he mea pono  
<sup>56</sup> oku toto hei inumanga. Ko ia e kai ana i oku kikokiko, e inu ana i oku toto, e noho ana i roto i  
<sup>57</sup> ahau, me ahau hoki i roto i a ia. Na te Matua ora hoki ahau i tono mai, no te Matua ano toku

ora: waihoki ki te kai tetahi i ahau, kei ahau he ora mona. <sup>58</sup> Ko te taro tenei i heke iho i te rangi:  
 e kore e pera i ta o koutou matua i kai ra, a mate ana; ki te kai tetahi i tenei taro, e ora tonu ia. <sup>59</sup> I  
 korerotia enei mea e ia i roto i te whare karakia, i a ia e whakaako ana i Kaperenauma.  
<sup>60</sup> Na he tokomaha ana akonga i te rongonga, i mea, he kupu pakeke tenei; ko wai e ahei te  
 whakarongo atu? <sup>61</sup> Ka mohio ia a Ihu i roto i a ia, e komuhumuhu ana ana akonga ki tenei, ka  
 mea ia ki a ratou, E he ana koutou ki tenei? <sup>62</sup> Ka pehea ra ki te kite koutou i te Tama a te tangata  
 e kake atu ana ki te wahi i noho ai ia i mua? <sup>63</sup> Ko te wairua te whakaora ana; kahore a te kikokiko  
 wahi: ko nga kupu e korero nei ahau ki a koutou he wairua, he ora. <sup>64</sup> Tenei ano ia etahi o koutou  
 kahore o ratou whakapono. I matau hoki a Ihu no te timatanga ki nga mea kahore o ratou whakapono,  
 ki te tangata ano e tukua ai ia. <sup>65</sup> A ka mea ia, Na konei ahau i mea ai ki a koutou, Kahore he  
 tangata e ahei te haere mai ki ahau, ki te kahore e hoatu ki a ia e toku Matua. <sup>66</sup> I taua wa he  
 tokomaha ana akonga i hoki ki muri, a mutu ake ta ratou haere tahi me ia. <sup>67</sup> Na ka mea a Ihu ki  
 te tekau ma rua, E mea ana ano ranei koutou kia haere? <sup>68</sup> Na ka whakahokia e Haimona Pita ki a  
 ia, E te Ariki, me haere matou ki a wai? kei a koe nga kupu o te ora tonu. <sup>69</sup> Kua whakapono matou,  
 kua matau, ko te Karaiti koe, ko te Tama a te Atua ora. <sup>70</sup> Ka whakahokia e Ihu ki a ratou, he teka  
 ianei kotahi tekau ma rua koutou i whiriwhiria e ahau, he rewera ano tetahi o koutou? <sup>71</sup> Ko Hura  
 Ikariote tama a Haimona tana i korero ai: ko te tanga hoki ia meake nei tuku i a ia; ko tetahi hoki  
 ia o te tekau ma rua.

## Chapter 7

<sup>1</sup> I muri i enei mea ka haereere a Ihu i Kariri: kahore hoki ia i pai ki te haereere i Huria, e rapu  
 ana hoki nga Hurai kia whakamatea ia. <sup>2</sup> Na kua tata te hakari a nga Hurai, te hakari whare wharau.  
<sup>3</sup> Na ka mea ona teina ki a ia, Haere atu i konei, anga atu ki Huria, kia kite ai hoki au akonga i au  
 mahi e mahi nei koe. <sup>4</sup> E kore hoki tetahi tangata e mea huna i tetahi mea, ki te whai ia kia ara tona  
 ingoa. Ki te mea koe i enei mea, kia kite te ao i a koe. <sup>5</sup> Ko ona teina tonu hoki kihai i whakapono  
 ki a ia. <sup>6</sup> Na ka mea a Ihu ki a ratou, Kahore ano kia taea noatia toku taima: ko to koutou taima ia

7  
 kei nga wa katoa. E kore e ahei kia kino te ao ki a koutou; engari ka kino ki ahau, no te mea e  
 whakaaturia ana e ahau te kino o ana mahi. 8  
 Haere koutou ki tenei hakari: e kore ahau e haere  
 wawe ki tenei hakari; kahore hoki toku taima kia ata rite noa. 9  
 A ka mutu tenei korero ana ki a  
 ratou, ka noho tonu ia ki Kariri. 10  
 A, no ka riro ona teina ki te hakari, ka haere ano hoki ia, ehara  
 i te mea whakakite nui, engari i tu a huna. 11  
 Heoi i rapu nga Hurai i a ia i te hakari, i mea, Kei hea  
 ia? 12  
 He nui hoki te korero komuhumuhu mona i roto i te mano: ko etahi i mea, He tangata pai  
 ia: ko etahi i mea, Kahore, engari e whakapohehe ana ia i te iwi. 13  
 Heoi kihai i rahi te korero a  
 tetahi tangata mona, he wehi ki nga Hurai. 14  
 Na, i waenganui o te hakari, ka haere a Ihu ki roto ki te temepara whakaako ai. 15  
 A ka  
 miharo nga Hurai, ka mea, na te aha i hua ai te mohio o tenei tangata, ehara nei hoki ia i te mea  
 whakaako? 16  
 Ka whakahoki a Ihu ki a ratou, ka mea, Ehara i te mea naku ake taku e whakaako  
 nei, engari na toku kaitono mai. 17  
 Ki te pai tetahi tangata ki te mea i tana e pai ai, e matau ia ki te  
 whakaakoranga, na te Atua ranei, he korero naku ake ranei. 18  
 Ko te tangata nana ake tana korero,  
 e whai ana ia i tona ake kororia: tena ki te whai tetahi i te kororia o tona kaitono, e pono ana ia, a  
 kahore ona he. 19  
 He teka ianei na Mohi te ture i hoatu ki a koutou, a kahore e whakaritea te ture  
 e tetahi o koutou? He aha koutou ka whai nei kia whakamatea ahau? 20  
 Na ka whakahoki te mano  
 ka mea, He rewera tou: ko wai te whai ana kia whakamatea koe? 21  
 Ka whakahoki a Ihu, ka mea  
 ki a ratou, Kotahi aku mahi i mahi ai, a e miharotia ana e koutou katoa. 22  
 I homai e Mohi te kotinga  
 ki a koutou; ehara ano ia i te mea na Mohi ake, engari na nga tupuna; e kokoti ana hoki koutou i te  
 tangata i te hapati. 23  
 Ki te kotia te tangata i te hapati, kei takahia te ture a Mohi; e riri ana oti  
 koutou ki ahau, moku i whakaora rawa i te tangata i te hapati? 24  
 Kaua e waiho te whakawa i runga  
 i ta te kanohi, engari kia tika ta koutou whakawa. 25  
 Me i reira ka mea etahi o nga tangata o  
 Hiruharama, Ehara oti tenei i a ia e whaia nei e ratou kia whakamatea? 26  
 Na, maia tonu tana  
 korero, a kahore a ratou kupu ki a ia. E tino matau ana ranei nga rangatira, ko te Karaiti pu tenei?  
 27  
 Otiia e matau ana tatou ki te wahi i puta mai ai tenei: tena ka tae mai a te Karaiti, kahore he  
 tangata e matau ki te wahi e puta mai ai ia. 28  
 Na ka karanga a Ihu i te temepara i a ia e whakaako  
 ana, ka mea, E matau ana koutou ki ahau, e matau ana ano ki te wahi i haere mai ai ahau: ehara i  
 ahau ake taku haere mai; engari e pono ana te kaitono mai i ahau; kahore nei koutou i matau ki a



29 ia. E matau ana ahau ki a ia; i puta mai hoki ahau i a ia, nana ano ahau i tonono mai. 30 A i whai  
 ratou kia hopukia ia: otiia kihai i pa te ringa o tetahi ki a ia, kahore hoki tona haora i taka noa. 31 A  
 he tokomaha o te mano i whakapono ki a ia, i mea, ka tae mai a te Karaiti, tera ranei e maha atu  
 ana merekara e mea ai i a tenei e mea nei? 32 I rongonua nga Parihi i te mano e kororero ana i enei  
 mea mona; na ka tonono mai e nga Parihi ratou ko nga tohunga nui he katipa ki te hopu i a ia. 33 Na  
 ka mea a Ihu ki a ratou, He iti noa ake te wahi e noho ai ahau ki a koutou, katahi ahau ka haere ki  
 toku kaitono mai. 34 Tera koutou e rapu i ahau, heoi e kore koutou e kite: e kore hoki koutou e  
 ahei te haere ake ki te wahi e noho ai ahau. 35 Na ka mea nga Hurai ki a ratou ano, E haere oti te  
 tangata nei ki hea, e kore ai e kitea e tatou? e haere oti ia ki nga manene i roto i nga Kariki, ako ai  
 i nga Kariki? 36 He ki aha tenei e ki nei ia, Tera koutou e rapu i ahau, a e kore e kite: e kore hoki  
 koutou e ahei te haere ake ki te wahi e noho ai ahau?  
 37 I te ra whakamutunga, i te ra nui o te hakari, ka tu a Ihu, ka karanga, ka mea, Ki te matewai  
 tetahi, haere mai ia ki ahau, kia inu. 38 Ki te whakapono tetahi ki ahau, ka rite ki ta te karaipiture,  
 ka rere mai nga wai ora i roto i tona kopu. 39 I korerotia tenei e ia mo te Wairua, meake nei riro i  
 te hunga e whakapono ana ki a ia; kahore ano hoki te Wairua Tapu kia homai noa; no te mea kiano  
 a Ihu i whakakororotia noatia. 40 Ko etahi o te mano i to ratou rongonga i tenei kupu, i mea, he  
 pono ko te Poropiti tenei. 41 Ka mea etahi, Ko te Karaiti tenei. Ko etahi i mea, E puta mai ranei a  
 te Karaiti i Kariri? 42 Kahore koia te karaipiture i mea, E puta mai a te Karaiti i te uri o Rawiri, i  
 Peterehema, i te kainga i noho ai a Rawiri? 43 Na ka waiho ia hei take wehewehenga ma te mano.  
 44 Ko etahi o ratou i mea kia hopukia ia: otira kihai i pa nga ringa o tetahi ki a ia.  
 45 Na ko te taenga atu o nga katipa ki nga tohunga nui ratou ko nga Parihi; ka mea atu enei ki  
 a ratou, he aha ia te kawea mai ai e koutou. 46 Ka whakahokia e nga katipa, Kahore rawa he tangata  
 i rite ana korero ki a tenei. 47 Na ka whakahokia ta ratou e nga Parihi, Kua tinihangatia ano hoki  
 koutou? 48 Kua whakapono koia tetahi o nga rangatira, o nga Parihi ranei ki a ia? 49 Ko tenei  
 hunga ia e kore nei e matau ki te ture, ka oti ratou te kanga. 50 Ka mea a Nikorima ki a ratou, tera  
 i haere mai ra ki a ia i mua, ko ia hoki tetahi o ratou, 51 Ka whakahengia ranei te tangata e to tatou  
 ture, i te mea kahore ano i whakarongo noa ki a ia, i matau hoki ki tana mahi? 52 Na ka whakahoki

ratou, ka mea ki a ia, Ko koe hoki tetahi no Kariri? Tena rapua, ka kite koe, kahore kia ara noa tetahi poropiti i Kariri. <sup>53</sup> Na hoki ana ratou ki tona whare, ki tona whare.

## Chapter 8

<sup>1</sup> Ko Ihu i haere ki Maunga Oriwa. <sup>2</sup> A i te atatu ka hoki ano ia ki te temepara, a tae katoa ana te iwi ki a ia; na ka noho ia, ka whakaako i a ratou. <sup>3</sup> Katahi ka arahina mai ki a ia e nga karaipi ratou ko nga Parihi tetahi wahine i hopukia e puremu ana; a whakaturia ana ki waenganui. <sup>4</sup> Ka mea ratou ki a ia, E te Kaiwhakaako, i hopukia putia te wahine nei e puremu ana. <sup>5</sup> I whakahau a Mohi ki a matou i roto i te ture, kia akina nga penei ki te kohatu: tena koa tau ki? <sup>6</sup> I penei ai ratou he whakamatautau mona, kia whai take ai ratou e whakapangia ai he he ki a ia. Ka piko a Ihu, a tuhituhi ana tona ringa ki te whenua. <sup>7</sup> A ka tohe tonu ratou ki te ui ki a ia, ka whakatika ake ia, ka mea ki a ratou, Ko te tangata o koutou kahore ona hara, mana te kohatu matamua e aki ki a ia. <sup>8</sup> Na ka piko ano ia, ka tuhituhi ki te whenua. <sup>9</sup> A, i to ratou rongonga, ka haere takitahi atu ki waho, na nga kaumatua i timata, a poto noa o muri rawa: a ko Ihu anake i mahue, me te wahine e tu ana i waenganui. <sup>10</sup> A, ko te marangatanga ake o Ihu, ka mea ki a ia, E tai, kei hea ratou? kahore he tangata i whakatatau he ki a koe? <sup>11</sup> Ano ra ko tera, Kahore, e te Ariki. Ka mea a Ihu ki a ia, Kahore ano hoki ahau e whakatau i te he ki a koe: haere, kati te hara. <sup>12</sup> I ki atu ano a Ihu ki a ratou, i mea, Ko ahau te whakamarama o te ao: ki te aru tetahi i ahau, e kore ia e haere i te pouri, engari ka whiwhi ki te marama o te ora. <sup>13</sup> Na ka mea nga Parihi ki a ia, Ko koe ano tou kaiwhakaatu; ehara tau i te whakaatu pono. <sup>14</sup> Ka whakahoki a Ihu, ka mea ki a ratou, Ahakoa ko ahau ano toku kaiwhakaatu, he pono taku whakaatu: no te mea e matau ana ahau ki te wahi i haere mai ai ahau, ki te wahi hoki e haere atu nei ahau; ko koutou ia kahore e matau ki te wahi i haere ma i ai ahau, ki te wahi ano e haere atu nei ahau. <sup>15</sup> Na te kikokiko ta koutou tikanga whakawa; e kore ahau e whakawa i tetahi. <sup>16</sup> A ki te whakawa ahau, he tika taku whakawa; ehara hoki i te mea ko ahau anake, engari ko maua ko te Matua nana nei ahau i tonu mai. <sup>17</sup> Ae, kua oti ano te tuhituhi i roto i to koutou ture, He pono te whakaatu a nga tangata tokorua. <sup>18</sup> Ko ahau tenei hei kaiwhakaatu moku ano, hei kaiwhakaatu ano moku te Matua, nana nei ahau i

19  
tono mai. Na ka mea ratou ki a ia, Kei hea tou Matua? Ka whakahokia e Ihu, Kahore koutou e matau ki ahau, kahore ano ki toku Matua: me i matau koutou ki ahau, kua matau ano ki toku Matua.

20  
I korerotia enei kupu e Ihu i te whare takotoranga taonga, i a ia e whakaako ana i roto i te temepara: a kahore tetahi i hopu i a ia; kiano hoki tona haora i taka noa.

21  
Me i reira ka ki atu ano a Ihu ki a ratou, E haere atu ana ahau, a tera koutou e rapu i ahau, e mate ano hoki i roto i to koutou hara: e kore koutou e ahei te haere ake ki te wahi e haere ai ahau.

22  
Na ka mea nga Hurai, E whakamate oti ia i a ia ano? ina ia ka mea, E kore koutou e ahei te haere ake ki te wahi e haere ai ahau. 23  
Ano ra ko ia ki a ratou, Na raro nei koutou; no runga ahau: no

tenei ao koutou; ehara ahau i tenei ao. 24  
Koia ahau i mea ai ki a koutou, E mate koutou i roto i o koutou hara: ki te kore hoki koutou e whakapono ko ahau ia, e mate koutou i roto i o koutou hara.

25  
Katahi ratou ka mea ki a ia, Ko wai koe? Na ka mea a Ihu ki a ratou, Ko taku ano i korero ai ki a koutou i te timatanga. 26  
He maha aku mea e korero ai, e whakawa ai mo koutou: otira e pono

ana toku kaitono mai; e korerotia ana hoki e ahau ki te ao nga mea i rongu ai ahau ki a ia. 27  
Kihai ratou i matau ko te Matua tana i korero ai ki a ratou. 28  
Katahi a Ihu ka mea ki a ratou, Kia oti te

Tama a te tangata te whakairi e koutou, ko reira koutou matau ai ko ahau ia, a e kore e meatia tetahi mea e ahau ake; engari ko a toku Matua i whakaako mai ai ki ahau, ko enei aku e korero nei. 29  
Kei ahau nei ano toku kaitono mai: kihai ahau i waiho e te Matua ko ahau anake; no te mea e mahi tonu

ana ahau i nga mea e paingia ana e ia. 30  
Na i a ia e korero ana i enei mea, he tokomaha i whakapono ki a ia.

31  
Me i reira ka mea a Ihu ki nga Hurai i whakapono ki a ia, Ki te mau tonu koutou ki taku kupu, he tino akonga koutou naku; 32  
A e matau koutou ki te pono, ma te pono ano koutou ka

rangatira ai. 33  
Ka whakahokia e ratou ki a ia, He whanau matou na Aperahama, kahore matou i waiho noa hei pononga ma tetahi tangata: he aha tau e mea, ka rangatira koutou? 34  
Ka whakahokia e Ihu ki a ratou, He pono, he pono taku e mea nei ki a koutou, He pononga na te hara nga kaimahi

katoa i te hara. 35  
E kore te pononga e noho tonu i te whare: ko te Tama ia e noho tonu ana. 36  
Na i te mea ka whakarangatiratia koutou e te Tama, he tino rangatira koutou. 37  
E matau ana ano ahau, he whanau koutou na Aperahama; heoi e whai ana koutou kia whakamatea ahau, he kore hoki no

taku kupu e mau i roto i a koutou.

38 E korerotia ana e ahau taku i kite ai ki toku Matua: e mahia ana e koutou ta koutou i kite ai  
 39 ki to koutou matua. Ka whakahoki ratou, ka mea ki a ia, Ko Aperahama to matou matua, Ka  
 mea a Ihu ki a ratou, Me he tamariki koutou na Aperahama, kua mahia e koutou nga mahi a  
 40 Aperahama. Tena ko tenei e whai ana koutou kia whakamatea ahau, te tangata nana i korero te  
 41 pono ki a koutou, taku hoki i rongu ai ki te Atua: kihai a Aperahama i pena. E mahi ana koutou  
 i nga mahi a to koutou matua. Katahi ratou ka mea ki a ia, Kihai matou i whanau poriro; kotahi to  
 42 matou Matua, ko te Atua. Ka mea ano a Ihu ki a ratou, Mehemea ko te Atua to koutou Matua,  
 kua aroha koutou ki ahau: i haere mai hoki ahau i te Atua, a kua tae mai nei; kihai hoki ahau i haere  
 43 noa mai, engari nana ahau i tonono mai. He aha ra koutou te matau ai ki taku korero? no te mea e  
 44 kore koutou e ahei te whakarongo ki taku kupu. Na to koutou matua koutou, na te rewera, e pai  
 ana hoki kia mea i ta to koutou matua i hiahia ai. He kaikohuru ia no te timatanga, kihai hoki tu i  
 roto i te pono, no te mea kahore he pono i roto i a ia. Ki te korero teka ia, e korero ana i ana: he  
 45 korero teka hoki ia, ko te matua o te teka. I taku korerotanga i te pono, kahore koutou e  
 whakapono ki ahau.  
 46 Ko wai o koutou hei whakaatu he hara toku? Ki te pono taku korero, he aha koutou te  
 47 whakapono ai ki ahau? E whakarongo ana te tangata a te Atua ki nga korero a te Atua: koia  
 48 koutou te whakarongo ai, no te mea ehara koutou i te Atua. Na ka whakahoki nga Hurai, ka mea  
 49 ki a ia, Kahore koia i tika ta matou i mea ra, No hamaria koe, a he rewera tou? Ka whakahokia  
 e Ihu, Kahore oku rewera; engari e whakahonore ana ahau i toku Matua, ko koutou ia te whakakahore  
 50 ana i te honore moku. Kahore aku whai i te kororia moku: tera ano te kaiwhai, te kaiwhakatikatika.  
 51 He pono, he pono taku e mea nei ki a koutou, Ki te pupuri tetahi i taku kupu, e kore rawa ia  
 52 e kite i te mate. Ka mea nga Hurai ki a ia, Katahi matou ka mohio he rewera tou. Kua mate a  
 Aperahama ratou ko nga poropiti, a e mea ana koe, Ki te pupuri tetahi i taku kupu, e kore rawa ia  
 53 e pangia e te mate. He nui oti koe i to matou matua, i a Aperahama kua mate nei? kua mate ano  
 54 nga poropiti: ki tau ko wai koe? Ka whakahokia e Ihu, Ki te whakahonore ahau i ahau ano, he  
 honore noa toku: ko toku Matua hei whakahonore i ahau; ko ta koutou e mea nei ko ia to koutou  
 55 Atua: Heoi kahore koutou i matau ki a ia; ko ahau ia e matau ana ki a ia: a ki te mea ahua, Kahore  
 ahau e matau ki a ia, he tangata teka ahau, he pena me koutou: otira e matau ana ahau ki a ia, e  
 56 pupuri ana i tana kupu. I hari to koutou matua, a Aperahama, mona ka kite i toku ra: i kite ia, a

57  
koa ake. Katahi ka mea nga Hurai ki a ia, Kahore noa i rima tekau noa ou tau, a kua kite koe i  
58  
a Aperahama? Ka mea a Ihu ki a ratou, He pono, he pono taku e mea nei ki a koutou, Kahore  
59  
noa ano a Aperahama, ko ahau tenei. Na ka mau ratou ki etahi kohatu hei epa ki a ia: heoi huna  
ana a Ihu i a ia, puta ana i roto i te temepara.

## Chapter 9

1  
Na, i a Ihu e haere ana, ka kite ia i tetahi tangata i matapo, no tona whanautanga mai ano.  
2  
Na ka ui ana akonga ki a ia, ka mea, E te Kaiwhakaako, ko wai i hara, ko tenei, ko ona matua  
3  
ranei, i whanau matapo ai ia? Ka whakahokia e Ihu, Ehara i te mea ko tenei kua hara, ko ona  
4  
matua ranei: engari kia ai ia hei whakakitenga mo nga mahi a te Atua. Me mahi e tatou nga  
mahia a toku kaitono mai i te mea e ao ana: meake ko te po e kore ai e taea he mahi e tetahi tangata.  
5  
I ahau i te ao nei, ko ahau te marama o te ao. 6  
Ka mutu enei korero ana, ka tuwha ia ki te whenua,  
7  
a pokepokea ana tetahi paru ki te huware, pania atu ana te paru ki nga kanohi o te matapo, Na ka  
mea ki a ia, haere ki te horoi ki te kaukauranga i Hiroama, ko Tono te whakamaoritanga. Na haere  
ana ia, horoi ana, a hoki titiro ana mai.  
8  
Na ka mea nga tangata e noho tata ana, ratou ko nga tangata i kite i tona matapotanga i mua,  
9  
Ehara ianei tenei i taua tangata i noho ra, i tono mea ra mana? Ka mea etahi, Ko ia tenei: ko etahi  
10  
i mea, Kahore, engari rite tonu ki a ia te ahua. Ka mea ia, Ko ahau ra ia. Katahi ratou ka mea ki  
11  
a ia, Na te aha ra i kite ai ou kanohi? Ka whakahoki ia ka mea, Na te tangata, e huaina nei ko  
Ihu, i pokepoke he paru, pania ana e ia ki oku kanohi, ka mea mai ki ahau, Haere ki Hiroama horoi  
12  
ai: na, ko toku haerenga atu, ko taku horoinga, kite ana ahau. Na ka mea ratou ki a ia, Kei hea  
ia? Ka mea ia, E kore ahau e mohio.  
13  
Ka kawea atu ki nga parihi taua tangata i matapo i mua ra. 14  
Na no te hapati i pokepokea  
15  
ai e Ihu te paru, i meinga ai ona kanohi kia kite. Na ka ui ano nga Parihi ki a ia, ki te pehea i  
16  
kite ai ia. Ka mea ia ki a ratou, I pania e ia he paru ki oku kanohi, na horoi ana ahau, kite ana. Na  
ka mea etahi o nga Parihi, Ehara tenei i te tangata na te Atua, ina mea etahi, Ma te aha e taea ai  
17  
enei merekara e te tangata hara? Na ka wehewehea ratou. Ka mea ano ratou ki te matapo, E

pehea ana koe ki a ia, ki tana meatanga i ou kanohi kia kite? Ka mea ia, He poropiti ia. <sup>18</sup> Heoi kahore nga Hurai i whakapono i matapo taua tangata, kua meinga ano kia kite, karangatia noatia e ratou nga matua ona i meinga nei kia kite, <sup>19</sup> A ka ui ratou ki a raua, ka mea, Ko ta korua tama tenei, e mea nei korua i whanau matapo mai? na te aha ra ia i titiro ai inaianei? <sup>20</sup> Ka whakahoki ona matua ki a ratou, ka mea, E mohio ana maua, ko ta maua tama tenei, i whanau matapo mai ano: <sup>21</sup> Ko te mea ia i kite ai ia inaianei, kahore i mohiotia e maua; kahore hoki maua e mohio na wai i mea ona kanohi kia kite: he kaumatua ia; ui atu ki a ia: mana ia e korero. <sup>22</sup> I penei ona matua, no te mea i matakau raua i nga Hurai: kua takoto noa ake hoki ta nga Hurai tikanga, na ki te whakaae tetahi, ko te Karaiti ia, me pei ki waho o te whare karakia. <sup>23</sup> Koia ona matua i mea ai, he kaumatua ia; ui atu ki a ia. <sup>24</sup> Na ka karanga tuarua ratou ki te tangata i matapo i mua ra, ka mea ki a ia, Hoatu he kororia ki te Atua; e matau ana matou he tangata hara tenei. <sup>25</sup> Na ka whakahoki ia, ka mea, Kahore ahau e matau he tangata hara ranei ia: kotahi ano taku e matau nei, he matapo ahau i mua, a ina kua kite. <sup>26</sup> Ka mea ano ratou ki a ia, I aha ia ki a koe? I peheatia ou kanohi i meinga ai e ia kia kite? <sup>27</sup> Ka whakahokia e ia ki a ratou, Kua korerotia ano e ahau ki a koutou ina tonu nei, a kihai koutou i whakarongo: he aha koutou i hiahia ai kia rongo ano? E mea ana oti koutou kia meinga hei akonga mana? <sup>28</sup> Na whakahi ana ratou ki a ia, ka mea, Ko tana akonga koe; ko matou ia he akonga na Mohi. <sup>29</sup> E matau ana matou i korero te Atua ki a Mohi: ko tenei tangata ia kahore matou e matau ki tona wahi i haere mai ai. <sup>30</sup> Na ka whakahoki taua tangata, ka mea ki a ratou, Ha! he mea whakamiharo ra tenei, kahore koutou i matau ki tona wahi i haere mai ai, otira kua meinga e ia oku kanohi kia kite. <sup>31</sup> E matau ana ra tatou, e kore te Atua e whakarongo ki nga tangata hara: tena ki te mea he tangata karakia tetahi ki te Atua, he mea i tana e pai ai, ka whakarongo ia ki a ia. <sup>32</sup> Kahore rawa i rangona no te timatanga ra ano o te ao, i whakatirohia e tetahi nga kanohi o te tangata i whanau matapo. <sup>33</sup> Ki te mea kihai i puta mai tenei tangata i te Atua, e kore e taea e ia tetahi mea. <sup>34</sup> Na ka whakahoki ratou, ka mea ki a ia, I whanau pu koe i roto i nga hara, ko koe ranei hei whakaako i a matou? Na peia ana ia e ratou ki waho. <sup>35</sup> I rongo a Ihu kua oti ia te pei e ratou ki waho; a, i tona kitenga i a ia, ka mea ki a ia, E whakapono ana ranei koe ki te Tama a te Atua? <sup>36</sup> Ka whakahoki ia, ka mea, Ko wai ia, e te Ariki, kia whakapono ai ahau ki a ia? <sup>37</sup> Ka mea a Ihu ki a ia, Kua kite koe i a ia, ko ia hoki tenei e korero

38  
nei ki a koe. Na ko tana meatanga, E te Ariki, e whakapono ana ahau. Na koropiko ana ia ki a ia.

39  
Katahi a Ihu ka mea, I haere mai ahau ki tenei ao ki te whakarite whakawa, he mea e kite ai te hunga kahore nei i kite; e whakamatapotia ai hoki te hunga e kite ana. 40 A, ka rangona enei mea e etahi o nga Parihi e tu tahi ana me ia, ka mea ratou ki a ia, E matapo ana ano ranei matou?

41  
Ka mea a Ihu ki a ratou, Me i matapo koutou, kahore o koutou hara: tena ka mea na koutou, E kite ana matou; na e mau na to koutou hara.

## Chapter 10

1  
He pono, he pono taku e mea nei ki a koutou, Ki te kahore tetahi e tomo ra te kuwaha ki te kainga hipi, ki te piki ke, he tahae ia, he tangata pahua. 2 Tena ko te tangata e tomo ana ra te kuwaha, ko te hepara ia o nga hipi. 3 Ka uaki te kaitiaki tatau ki a ia; ka rongo ano nga hipi ki tona reo: na ka karangatia e ia ana hipi ake, to tenei ingoa, to tenei ingoa, ka arahina ki waho. 4 A ka oti ana ake hipi te tuku ki waho, ka haere ia i mua i a ratou, ka aru nga hipi i a ia: e matau ana hoki ratou ki tona reo. 5 E kore ia ratou e aru i te tauhou, engari ka oma i a ia: e kore hoki e matau ki te reo o nga tauhou. 6 I korerotia tenei kupu whakarite e Ihu ki a ratou: heoi kihai ratou i mohio ki nga mea i korerotia e ia ki a ratou. 7 Na ka mea ano a Ihu ki a ratou, He pono, he pono taku e mea nei ki a koutou, Ko ahau te tatau o nga hipi. 8 He tahae, he kaipahua te hunga katoa i haere mai i mua i ahau: heoi kihai nga hipi i whakarongo ki a ratou. 9 Ko ahau te tatau: ki te waiho ahau hei huarahi tomokanga mo tetahi, e ora ia, a ka haere ki roto, ka haere ki waho, ka kite hoki i te kai. 10 Heoi ano ta te tahae e haere mai ai, he tahae, he patu, he whakamoti hoki: i haere mai ahau kia whiwhi ai ratou ki te ora, ina, tona nui noa atu. 11 Ko ahau te hepara pai, he hepara pai, ka tuku i a ia ano kia mate mo nga hipi. 12 Tena ko te tangata e utua ana, ehara nei i te hepara, ehara nei i a ia nga hipi, i tona kitenga i te wuruhi e haere mai ana, whakarerea ake e ia nga hipi, oma ana: na ka hopukia ratou e te wuruhi, a whakamararatia ana nga hipi. 13 Ka oma te tangata e utua ana, no te mea e utua ana ia, kahore hoki ona whakaaro ki nga hipi. 14 Ko ahau te hepara pai, e matau ana hoki ki aku, a e matau ana aku ki ahau. 15 Pera tonu me to te Matua matau ki ahau, me toku matau hoki

16  
ki te Matua: e tuku ana hoki ahau i ahau ki te mate mo nga hipi. He hipi atu ano aku, ehara nei i tenei kainga: me arahi mai ratou e ahau, a ka rongou ratou ki toku reo; a e whakakotahitia te kahui,

17  
kotahi ano hoki hepara. Koia te Matua ka aroha mai ai ki ahau, no te mea e tuku ana ahau i ahau

18  
kia mate, kia whakaora ake ai ano ahau i ahau. Ehara i te mea ma tetahi tangata ahau e whakamate, engari maku ano ahau e tuku ki te mate. Kei ahau te tikanga mo te tuku atu, kei ahau ano te tikanga mo te whakaora. Na toku matua tenei ture kua riro mai nei i ahau.

19  
Katahi ka wehewehea nga Hurai, na enei kupu. 20 He tokomaha o ratou i mea, He rewera

21  
tona, e haurangi ana; he aha koutou ka whakarongo ai ki a ia? Ko etahi i mea, Ehara enei i nga kupu a te tangata e nohoia ana e te rewera. E ahei koia i te rewera te mea i nga kanohi o nga matapo kia kite?

22  
Na i Hiruharama tenei, i te hakari horohoronga: he hotoke; 23 A e haereere ana a Ihu i te

24  
temepara, i te whakamahau o Horomona. Na ka karapotia ia e nga Hurai, ka mea ratou ki a ia, Kia pehea te roa o tau waiho i o matou ngakau kia hikurangi ana? Ki te mea ko te Karaiti koe,

25  
korerotia matanuitia mai ki a matou. Ka whakahoki a Ihu ki a ratou, Kua korerotia e ahau ki a koutou, a kahore koutou e whakapono: ko nga mahi e mahi nei ahau i runga i te ingoa o toku Matua,

26  
ko enei hei kaiwhakaatu moku. Otira e kore koutou e whakapono, no te mea ehara koutou i te

27  
hipi naku. E rongou ana aku hipi ki toku reo, e matau ana ahau ki a ratou, e aru ana hoki ratou i

28  
ahau: E hoatu ana e ahau ki a ratou he ora tonu; e kore ratou e ngaro ake ake, e kore ano hoki

29  
tetahi e kapo atu i a ratou i roto i toku ringa. Ko toku Matua, nana nei ratou i homai ki ahau, nui

30  
ake i te katoa; e kore ano ratou e taea e tetahi te kapo atu i roto i te ringa o toku Matua. Ko ahau,

31  
ko te Matua, kotahi maua. Katahi ka mau ano nga Hurai ki te kohatu hei aki ki a ia. 32 Ka whakahokia e Ihu ki a ratou, He maha nga mahi pai kua whakakitea nei e ahau ki a koutou, he mea

33  
na toku Matua; mo tehea o aua mahi ka akina ai ahau e koutou? Ka whakahoki nga Hurai ki a ia, ka mea, Ehara te mahi pai i te mea e akina ai koe; engari mo te kohukohu; mo te mea hoki ko

34  
koe, tangata nei ano, e whakaatua ana i a koe. Ka whakahokia e Ihu ki a ratou, Kahore ranei i

35  
tuhituhia i roto i to koutou ture, I mea ahau, he atua koutou? Ki te huaina e ia he atua te hunga

36  
i tae mai nei te kupu a te Atua ki a ratou, a e kore hoki e taea te whakakahore te karaipiture, E mea ana oti koutou ki ta te Matua i whakatapu ai, i tono mai ai hoki ki te ao, E kohukohu ana koe;

37  
noku i mea, Ko te Tama ahau a te Atua? Ki te kore ahau e mahi i nga mahi a toku Matua, aua



ahau e whakaponohia. <sup>38</sup> Tena ki te mahi ahau, ahakoa kahore koutou e whakapono ki ahau, whakaponohia nga mahi: kia matau ai koutou, kia whakapono ai, ko te Matua kei roto i ahau, me ahau hoki kei roto i a ia.

<sup>39</sup> Na ka whai ano ratou kia hopukia ia: heoi puta ana ia i o ratou ringa; <sup>40</sup> Na ka haere ano ia ki tawahi o Horano, ki te wahi i matua iriiri ai a Hoani; a noho ana i reira. <sup>41</sup> He tokomaha hoki i haere ki a ia; i mea ratou, Kihai a Hoani i mahi i tetahi merekara; he pono ia nga mea katoa i korerotia e Hoani mo tenei. <sup>42</sup> A he tokomaha o reira i whakapono ki a ia.

## Chapter 11

<sup>1</sup> Na kei te mate tetahi tangata, a Raharuhi o Petani, te kainga o Meri raua ko tona tuakana, ko Mata. <sup>2</sup> Ko taua Meri tenei nana nei i whakawahi te Ariki ki te hinu, i muru hoki i ona waewae ki ona makawe; a he tungane nona a Raharuhi i mate nei. <sup>3</sup> Na ka tono tangata nga tuahine ki a ia, ka mea, E te Ariki, tenei kei te mate tau tangata e aroha nei. <sup>4</sup> I te rongonga ia o Ihu, ka mea ia, Ehara tenei i te mate e mate rawa ai ia, engari hei mea mo te kororia o te Atua; ma tenei hoki ka whai kororia ai te Tama a te Atua. <sup>5</sup> Na i aroha a Ihu ki a Mata raua ko tona teina, ki a Raharuhi hoki. <sup>6</sup> A, no ka rongoa ia ki tona matenga, e rua ona ra i noho ai ki taua wahi ra ano. <sup>7</sup> Muri iho i tenei ka mea ia ki ana akonga, Tatou ka haere ano ki Huria. <sup>8</sup> Ka mea nga akonga ki a ia, E te Kaiwhakaako, i whai nga Hurai i mua tata ake nei kia akina koe ki te kohatu; a e haere atu ana koe ki reira? <sup>9</sup> Ka whakahokia e Ihu, He teka ianei tekau ma rua nga haora o te ra? Ki te haere tetahi i te awatea, e kore ia e tutuki, no te mea e kite ana ia i te marama o tenei ao. <sup>10</sup> Tena ka haere tetahi i te po, ka tutuki ia, no te mea kahore he marama i roto i a ia. <sup>11</sup> Ka korerotia enei mea e ia: na, muri iho ka mea ia ki a ratou, Kei te moe to tatou hoa a Raharuhi; otiia ka haere ahau ki te whakaara i a ia i te moe. <sup>12</sup> Na ko te meatanga a ana akonga, E te Ariki, ki te mea kei te moe ia, tera ia e ora. <sup>13</sup> Kahore, ko tona matenga ta Ihu i korero ai: ko ratou ia i mahara, i korero ia mo te takotoranga ina moe. <sup>14</sup> Katahi ka mea nui a Ihu ki a ratou, Kua mate a Raharuhi. <sup>15</sup> A e hari ana ahau, he whakaaro hoki ki a koutou, noku kahore i reira, kia whakapono ai koutou; ahakoa ra kia haere tatou

<sup>16</sup>  
ki a ia. Na ka mea a Tamati, e huaina nei ko Ririmu, ki ona hoa akonga, Kia haere ano tatou, kia mate tahi me ia.

<sup>17</sup> Heoi, i te taenga atu o Ihu, rokohanga atu kua wha ke ona ra i roto i te urupa. <sup>18</sup> Na e tata ana Petani ki Hiruharama, kotahi pea tekau ma rima paronga: <sup>19</sup> He tokomaha ano nga Hurai i tae

ki a Mata raua ko Meri, ki te whakamarie i a raua mo to raua tungane. <sup>20</sup> A, no te rongonga o Mata, tena a Ihu te haere mai na, ka whakatau i a ia: ko Meri ia i noho i roto i te whare. <sup>21</sup> Na ka mea a

Mata ki a Ihu, E te Ariki, me i konei koe, kihai i mate toku tungane. <sup>22</sup> Heoi e matau nei ano ahau, ko tau e inoi ai ki te Atua, e homai e te Atua ki a koe. <sup>23</sup> Ka mea a Ihu ki a ia, E ara ano tou tu

ngane. <sup>24</sup> Ka mea a Mata ki a ia, E matau ana ahau e ara ano ia i te aranga a te ra whakamutunga.

<sup>25</sup> Ka mea a Ihu ki a ia, Ko ahau te aranga, te ora; ko ia e whakapono ana ki ahau, ahakoa kua mate,

e ora ano: <sup>26</sup> E kore ano e mate ake ake nga tangata katoa e ora ana, e whakapono ana ki ahau. E

whakapono ana ranei koe ki tenei? <sup>27</sup> Ka mea ia ki a ia, Ae, e te Ariki: e whakapono ana ahau, ko te Karaiti koe, ko te Tama a te Atua, e haere mai ana ki te ao. <sup>28</sup> A ka mutu enei korero ana, ka haere ka karanga puku ki tona teina, ki a Meri, ka mea, Kua tae mai te Kaiwhakaako, e karanga

ana hoki ki a koe. <sup>29</sup> A, no ka rongoa ia, hohoro tonu te whakatika, a haere ana ki a ia. <sup>30</sup> Na kahore

a Ihu i tomo noa ki te kainga; heoi kei taua wahi ano ia i tutaki ai a Mata ki a ia. <sup>31</sup> I te kitenga o nga Hurai e noho ana ki a ia i roto i te whare, e whakamarie ana i a ia, ka hohoro a Meri te whakatika,

te puta ki waho, ka aru ratou i a ia, ka mea, E haere ana ia ki te urupa, ki reira tangi ai. <sup>32</sup> A, no ka tae a Meri ki te wahi kei reira nei a Ihu, ka kite i a ia, ka takoto ki ona waewae, ka mea ki a ia, E te Ariki, me i konei koe, kihai i mate toku tungane.

<sup>33</sup> A, no ka kite a Ihu i a ia e tangi ana, i nga Hurai hoki i haere tahi me ia e tangi ana, ka ngunguru ia, ara tona wairua, ka koingo. <sup>34</sup> Ka mea, I whakatakotoria ia e koutou ki hea? Ka mea

ratou ki a ia, E te Ariki, haere mai kia kite. <sup>35</sup> Tangi ana a Ihu. <sup>36</sup> Na ka mea nga Hurai, Nana,

tona aroha ki a ia! <sup>37</sup> Na ka mea etahi o ratou, Kahore ranei i taea e tenei tangata, nana nei i whakatitiro nga kanohi o te matapo, te mea i tenei tangata hoki kia kaua e mate? <sup>38</sup> Na ka ngunguru

ano a Ihu i roto i a ia, ka haere ki te urupa. He ana ia, kua oti te pa ki te kohatu. <sup>39</sup> Ka mea a Ihu, Tangohia atu e koutou te kohatu. Ka mea ki a ia a Mata tuahine o te tupapaku, E te Ariki, kua piro

noa ake ia: ko tona po wha hoki tenei. <sup>40</sup> Ano ra ko Ihu ki a ia, Kihai koia ahau i mea ki a koe, Ki  
 te whakapono koe, e kite koe i te kororia o te Atua? <sup>41</sup> Na ka tangohia e ratou te kohatu i te wahi  
 i takoto ai te tupapaku. Na ka ara ake nga kanohi o Ihu, ka mea ia, E Pa, ko taku whakawhetai tenei  
 ki a koe, mou i whakarongo ki ahau. <sup>42</sup> I mahara ano ahau e rongu tonu ana koe ki ahau: heoi he  
 whakaaro ki te hunga e tu mai nei i korero ai ahau, kia whakapono ai ratou, nau ahau i tonu mai.  
<sup>43</sup> A, no ka penei tana ki, he nui tona reo ki te karanga, E Raharuhi, puta mai. <sup>44</sup> Na ko te putanga  
 mai o te tupapaku, he mea here nga ringa me nga waewae ki nga takai: he mea takai tona mata ki  
 te tauera. Ka mea a Ihu ki a ratou, Wetekia, tukua kia haere.  
<sup>45</sup> Na he tokomaha nga Hurai i haere nei ki a Meri, a, i to ratou kitenga i nga mea i mea ai a  
 Ihu, ka whakapono ki a ia. <sup>46</sup> Ko etahi o ratou i haere ki nga Parihi, i korero ki a ratou i nga mea  
 i mahia e Ihu. <sup>47</sup> Na ka whakaminea he runanga e nga tohunga nui ratou ko nga Parihi, ka mea,  
 Kei te aha tatou nei? he maha hoki nga merekara e meatia nei e tenei tangata. <sup>48</sup> Ki te penei ta tatou  
 tuku i a ia, ka whakapono katoa ki a ia: a ka haere mai nga Roma, ka tango i to tatou kainga, i to  
 tatou iwi. <sup>49</sup> Na ko tetahi o ratou ko Kaiapa, ko te tohunga nui o taua tau, ka mea ki a ratou, Kahore  
 koutou e matau ki tetahi mea. <sup>50</sup> Te whakaaro, he pai mo tatou ki te mate te tangata kotahi mo te  
 iwi, a kahore e ngaro te iwi katoa. <sup>51</sup> Na ehara tenei korero i te mea nana ake: engari ko te tohunga  
 nui ia mo tera tau, heoi ka poropiti kia mate a Ihu mo taua iwi. <sup>52</sup> Haunga ano taua iwi anake,  
 engari kia whakaminea kia kotahi nga tamariki a te Atua kua marara noa atu. <sup>53</sup> No taua ra ake  
 ano ka runanga ratou kia whakamatea ia. <sup>54</sup> Koia i mutu ai te haere matanui o Ihu i roto i nga Hurai.  
 Heoi haere atu ana ia i reira ki te wahi e tata ana ki te koraha, ki tetahi pa, ko Eparaima te ingoa, a  
 noho ana i reira ratou ko ana akonga. <sup>55</sup> Na kua tata te kapenga a nga Hurai: he tokomaha hoki i  
 haere atu i taua whenua i mua o te kapenga ki Hiruharama ki te pure i a ratou. <sup>56</sup> Na ka rapu ratou  
 i a Ihu, ka kororerero ki a ratou ano, i a ratou e tu ana i te temepara, E pehea ana o koutou whakaaro?  
 e kore ranei ia e haere mai ki te hakari? <sup>57</sup> Na kua takoto te tikanga a nga tohunga nui ratou ko nga  
 Parihi, ki te matau tetahi tangata ki te wahi e noho ai ia, me whakaatu, kia hopukia ai ia e ratou.

## Chapter 12

<sup>1</sup> Na e ono nga ra i mua ake o te kapenga ka haere a Ihu ki Petani, kei reira nei a Raharuhi, i whakaarahia ake nei e ia i te hunga mate. <sup>2</sup> A taka ana e ratou he hapa mana i reira; ko Mata te kaitaka; ko Raharuhi tetahi o te hunga i noho tahi me ia. <sup>3</sup> Na ka mau a Meri ki tetahi pauna hinu kakara, he tino nara, he mea utu nui, whakawahia ana e ia nga waewae o Ihu, me te muru ano i ona waewae ki ona makawe; ki noa te whare i te kakara o te hinu. <sup>4</sup> Na ka mea tetahi o ana akonga, a Hura Ikariote, tenei meake nei tuku i a ia, <sup>5</sup> He aha tenei hinu te hokona ai ki nga pene e toru rau, ka hoatu ai ki te hunga rawakore? <sup>6</sup> I korerotia ai tenei e ia, ehara i te mea he whakaaro nona ki te hunga rawakore; erangi no te mea he tahae ia, i a ia hoki te putea, ko ia hoki hei mau i nga mea i whaongia ki roto. <sup>7</sup> Na ko te meatanga a Ihu, Waiho ra u ana; i tohungia tenei e ia mo te ra o toku tanumanga. <sup>8</sup> Kei a koutou hoki nga rawakore i nga wa katoa; ko ahau ia e kore e noho tonu i a koutou. <sup>9</sup> He tokomaha o nga Hurai i matau kei reira a Ihu: a haere mai ana, ehara i te mea mo Ihu anake, erangi kia kite hoki i a Raharuhi, i whakaarahia nei e ia i te hunga mate. <sup>10</sup> Otira kua takoto te whakaaro o nga tohunga nui kia whakamatea ano a Raharuhi; <sup>11</sup> Nana hoki i tokomaha ai nga Hurai i haere, i whakapono ki a Ihu. <sup>12</sup> I te aonga ake ka rongu te mano tini i haere nei ki te hakari, e haere ana a Ihu ki Hiruharama, <sup>13</sup> Ka mau ratou ki nga manga nikau, haere ana ki te whakatau i a ia, me te karanga, Ohana: Ka whakapaingia ia, e haere mai nei i runga i te ingoa o te Ariki, te Kingi o Iharaira. <sup>14</sup> A, no ka kite a Ihu i tetahi kua kaihe, ka noho ia i runga; ka pera ano me te mea i tuhituhia, <sup>15</sup> Kua e maku, e te tamahine a Hiona: na, kei te haere mai tou Kingi, e noho ana i runga i te kua kaihe. <sup>16</sup> Otiia kihai ana akonga i matau wawe ki enei mea: engari ka oti a Ihu te whakakororia, katahi ratou ka mahara kua tuhituhia enei mea mona, kua meinga ano enei mea ki a ia. <sup>17</sup> I whakaae ano te hunga i tona taha i tana karangatanga i a Raharuhi i roto i te urupa, i tana whakaarahanga hoki i a ia i te hunga mate. <sup>18</sup> Na konei hoki te mano i whakatau ai i a ia, i rongu hoki ratou, kua meinga tenei merekara e ia. <sup>19</sup> Na ka mea nga Parihi ki a ratou ano, Ka kite ranei koutou kahore a koutou wahi? na kua riro te ao ki te whai i a ia. <sup>20</sup> Na he Kariki etahi o te hunga i haere ki te hakari ki te karakia: <sup>21</sup> A haere ana enei ki a Piripi o Petahaira o Kariri, korero ana ki a ia, mea atu ana, E kara, e hiahia ana matou kia kite i a Ihu. <sup>22</sup> Haere ana a Piripi, ka korero ki a Anaru: ka haere a Anaru, a Piripi, ka korero ki a Ihu. <sup>23</sup> Ka ki

a Ihu ki a raua, ka mea, Kua tae mai te haora e whakakororiatia ai te Tama a te tangata. <sup>24</sup> He pono, he pono taku e mea nei ki a koutou, Ki te kore tetahi pata witi e marere ki te oneone, e pirau, ka

takoto ko ia anake: tena ki te pirau, he nui ona hua. <sup>25</sup> Ki te aroha tetahi ki tona ora, ka mate ano

ia; ki te kino tetahi ki te ora i tenei ao, ka tuturu ki a ia te ora ake ake. <sup>26</sup> Ki te mea tetahi ko ia hei kaimahi maku, me aru ia i ahau: ko te wahi e noho ai ahau, ko reira ano taku kaimahi: ki te mahi tetahi i aku mahi, ma toku Matua ia e whakahonore.

<sup>27</sup> Kua pouri tenei toku wairua; a kia pehea atu ahau? E Pa, whakaorangia ahau i tenei wa: otira

ko te mea tenei i haere mai ai ahau ki tenei wa. <sup>28</sup> E Pa, whakakororiatia tou ingoa. Na ka puta he

reo i te rangi, Kua whakakororiatia e ahau, e whakakororiatia ano. <sup>29</sup> I te rongonga o nga tangata

e tu ana i reira, ka mea, he whatitiri: ko etahi i mea, Kua korero tetahi anahera ki a ia. <sup>30</sup> Ka

whakahoki a Ihu, ka mea, Ehara tenei reo i puta mai nei i te mea moku, engari mo koutou. <sup>31</sup> Ko

aiane te whakawa mo tenei ao: ko aiane maka ai te rangatira o tenei ao ki waho. <sup>32</sup> A, ki te

whakairihia ake ahau ki runga ake i te whenua, maku nga tangata katoa e kukume ki ahau. <sup>33</sup> I

penei ai ia hei whakaatu i te mate e mate ai ia. <sup>34</sup> Ka whakahokia e te mano ki a ia, Kua rongo matou ki ta te ture, e ora tonu ana a te Karaiti: he aha tau e mea, Me whakairi te Tama a te tangata?

Ko wai koia tenei Tama a te tangata? <sup>35</sup> Ano ra ko Ihu ki a ratou, he wahi iti nei te maunga o te marama i roto i a koutou. Haere ra i te mea e whai marama ana koutou, kei rokohina koutou e te

pouri: ko ia hoki e haere ana i te pouri e kore e kite i te wahi e haere ai ia. <sup>36</sup> I te mea kei a koutou te marama, me whakapono ki te marama, kia meinga ai koutou he tamariki na te marama. I korerotia e Ihu enei mea, a haere ana, huna ana i a ia, kei kitea e ratou.

<sup>37</sup> Heoi ahakoa i meatia e ia aua merekara maha ki to ratou aroaro, kihai ratou i whakapono ki

a ia: <sup>38</sup> I rite ai te korero a Ihaia poropiti, tana i mea ai, E te Ariki, ko wai i whakapono ki ta matou

korero? I whakakitea hoki ki a wai te ringa o te Ariki? <sup>39</sup> Koia hoki ratou te ahei ai te whakapono,

kua mea nei hoki a Ihaia, <sup>40</sup> I whakamatapotia e ia o ratou kanohi, i whakapakeketia o ratou ngakau; kei kite o ratou kanohi, kei matau hoki o ratou ngakau, kei tahuri ratou, a ka whakaorangia e ahau.

<sup>41</sup> I korerotia enei mea e Ihaia, i te wa i kite ai ia i tona kororia, i puaki ai hoki tana kupu mona.

<sup>42</sup> He ahakoa ra he tokomaha ano nga rangatira i whakapono ki a ia; otira kihai i whakaae ki

a ia, he whakaaro hoki ki nga parihi, kei peia ratou ki waho o te whare karakia: <sup>43</sup> Rawe ake hoki ki a ratou ta te tangata kororia i ta te Atua.

<sup>44</sup> Na ka karanga a Ihu, ka mea, Ki te whakapono tetahi ki ahau, ehara ahau i tana i whakapono  
 mai ai, engari ko toku kaitono mai. <sup>45</sup> Ko ia e kite ana i ahau, e kite ana hoki i toku kaitono mai.  
<sup>46</sup> Kua tae mai nei ahau hei whakamarama mo te ao, kei noho i te pouri tetahi e whakapono ana ki  
 ahau. <sup>47</sup> Na, ki te rongong tetahi ki aku kupu, ki te kore hoki e puritia e ia, e kore ahau e whakahe i  
 a ia: kihai hoki ahau i haere mai ki te whakahe i te ao, engari ki te whakaora i te ao. <sup>48</sup> Ko ia e  
 whakakahore ana ki ahau, e kore hoki e tango ki aku kupu, tena ano te kaiwhakahe mona; ko te  
 kupu i korerotia e ahau, ko tena hei whakahe mona a te ra whakamutunga. <sup>49</sup> No te mea ehara i  
 ahau ake aku korero; engari na te Matua i tonoa mai ai ahau, nana i tuku mai te ture ki ahau, mo  
 taku e korero ai, mo taku e ki ai. <sup>50</sup> A e matau ana ahau he ora tonu tana ture: na ko aku e korero  
 nei rite tonu ki ta te Matua i mea mai ai ki ahau taku korero.

### Chapter 13

<sup>1</sup> Na, i mua ake o te hakari o te kapenga, ka mahara a Ihu kua taka tona wa e haere atu ai ia i  
 tenei ao ki te Matua; aroha ana ia ki ona o te ao nei, arohaina ana ratou taea noatia te mutunga.  
<sup>2</sup> A, i te mutunga o te hapa, kua whakamaharatia noatia ake ano hoki e te rewera te ngakau o Hura  
 Ikariote, tama a Haimona, kia tukua ia; <sup>3</sup> A ka mahara a Ihu kua oti nga mea katoa te homai e te  
 Matua ki ona ringa, i haere mai ia i te Atua, e hoki atu ana ki te Atua; <sup>4</sup> Ka whakatika ia i te hapa,  
 ka whakarere i ona kakahu; ka mau ki te tauera, ka whitiki i a ia. <sup>5</sup> Me i reira ka ringihia e ia he  
 wai ki te peihana, a ka anga ka horoi i nga waewae o nga akonga, ka muru hoki ki te tauera i  
 whitikiria ai ia. <sup>6</sup> A, ka tae ia ki a Haimona Pita, ka mea tera ki a ia, E te Ariki, e horoi ana koe i  
 oku waewae? <sup>7</sup> Ka whakahoki a Ihu, ka mea ki a ia, E kore koe e matau aiane ki taku e mea nei:  
 otira e matau koe a mua ake nei. <sup>8</sup> Ka mea a Pita ki a ia, E kore rawa koe e horoi i oku waewae.  
<sup>9</sup> Ka whakahokia e Ihu ki a ia, Ki te kore ahau e horoi i a koe, kahore au wahi i roto i ahau. Ka mea  
 a Haimona Pita ki a ia, E te Ariki, aua ra ko oku waewae anake, engari ko oku ringa me toku  
 matenga. <sup>10</sup> Ka mea a Ihu ki a ia, Ki te mea i te kaukau tetahi, kahore atu he aha mana, ko te horoi  
 anake i ona waewae, e ma katoa ana hoki ia: e ma ana koutou, otira kahore katoa. <sup>11</sup> I mohio hoki  
 ia ki te tangata e tukua ai ia; koia ia i mea ai, kahore koutou katoa i ma. <sup>12</sup> A ka oti o ratou waewae

te horoi, ka mau ia ki ona kakahu, ka noho ano, na, ka mea ki a ratou, E matau ana ranei koutou ki

taku i mea nei ki a koutou? <sup>13</sup> E karangatia ana ahau e koutou, E te Kaiwhakaako, E te Ariki: a he

tika ta koutou korero; ko ahau hoki ia. <sup>14</sup> Na kua horoia nei o koutou waewae e ahau, e to koutou Ariki, e to koutou Kaiwhakaako; me horoi ano hoki e koutou nga waewae o tetahi, o tetahi o koutou.

<sup>15</sup> Kua hoatu nei hoki e ahau he tauira mo koutou, kia rite ai ta koutou mahi ki taku i mea nei ki a

koutou. <sup>16</sup> He pono, he pono taku e mea nei ki a koutou, Kahore te pononga e nui ake i tona

rangatira; e kore ano te tangata i tonoa e nui atu i tona kaitono. <sup>17</sup> Ki te matau koutou ki enei mea, ka koa ki te meatia e koutou.

<sup>18</sup> Ehara taku i te korero mo koutou katoa: e matau ana ahau ki aku i whiriwhiri ai: otira kia

rite ai te karaipiture, Ko ia e kai taro tahi nei maua kua hiki ake tona rekereke ki ahau. <sup>19</sup> Na ka korerotia nei e ahau ki a koutou i te mea kahore ano i puta noa, mo te puta rawa mai, kia whakapono

ai koutou, ko ahau ia. <sup>20</sup> He pono, he pono taku e mea atu nei ki a koutou, Ki te tango tetahi ki taku e tono ai, e tango ana ia i ahau; a ki te tango tetahi i ahau, e tango ana ki toku kaitono mai.

<sup>21</sup> A, no ka korerotia e Ihu enei mea, ka pouri tona wairua, ka korero ia, ka mea, He pono, he pono

taku e mea nei ki a koutou, ma tetahi o koutou ahau e tuku. <sup>22</sup> Na ka tiriho nga akonga tetahi ki

tetahi, ka pohehe ko wai ranei tana i korero ai. <sup>23</sup> Na i te whakawhirinaki ki te uma o Ihu tetahi o

ana akonga, ko ta Ihu hoki i aroha ai. <sup>24</sup> Na ka tawhiri atu a Haimona Pita ki a ia, ka mea atu,

Korerotia mai ki a matou, ko wai tana e korero nei. <sup>25</sup> Na ka takoto atu ia ki te uma o Ihu, ka mea

ki a ia, E te Ariki, ko wai koia? <sup>26</sup> Ka whakahokia e Ihu, Ko te tangata e hoatu ai e ahau te maramara taro ki a ia, ina toua iho e haua. A, no ka toua iho e ia te maramara taro, ka hoatu ki a Hura, tama

a Haimona Ikariote. <sup>27</sup> A muri iho te maramara taro, ka tomo a Hatana ki roto ki a ia. Na ka mea

a Ihu ki a ia, Hohoro te mea i tau e mea ai. <sup>28</sup> Kahore ia tetahi o te hunga i taua hapa i matau mo

te aha tenei i korerotia nei e ia ki a ia. <sup>29</sup> I mahara etahi, no te mea i a Hura te putea, tera a Ihu te mea ra ki a ia, Hokona nga mea ma tatou mo te hakari; kia hoatu ranei tetahi mea ma nga rawakore.

<sup>30</sup> Na ka tangohia e ia te maramara taro, haere tonu atu ki waho: he po ano hoki.

<sup>31</sup> No tona rironga atu ki waho, ka mea a Ihu, Katahi te Tama a te tangata ka whakakororiatia,

ka whai kororia ano te Atua i a ia. <sup>32</sup> A ka whakakororia te Atua i a ia i roto i a ia ake, ina, ka

hohoro tana whakakororia i a ia. <sup>33</sup> E nga tamariki, poto kau nei taku noho i a koutou, Tera koutou

e rapu i ahau: ko taku hoki i mea ai ki nga Hurai, E kore koutou e ahei te haere ake ki te wahi e haere ai ahau; ko taku kupu ano tena ki a koutou. <sup>34</sup> He ture hou taku ka hoatu nei ki a koutou, kia aroha koutou tetahi ki tetahi; kia rite ki toku aroha ki a koutou, waihoki kia aroha koutou tetahi ki tetahi. <sup>35</sup> Ma konei ka matau ai te katoa, he akonga koutou naku, me ka aroha koutou tetahi ki tetahi. <sup>36</sup> Ka mea a Haimona Pita ki a ia, E te Ariki, e haere ana koe ki hea? Ka whakahokia e Ihu ki a ia, E kore koe e ahei te aru i ahau aiane ki te wahi e haere atu nei ahau; a mua ia ka aru koe i ahau. <sup>37</sup> Ka mea a Pita ki a ia, E te Ariki, he aha ahau te aru ai i a koe aiane nei ano? Ka tuku ahau i ahau kia mate, he whakaaro naku ki a koe. <sup>38</sup> Ka whakahokia e Ihu ki a ia, E tuku oti koe i a koe ki te mate, he whakaaro nau ki ahau? He pono, he pono taku e mea nei ki a koe, E kore e tangi te tikaokao, kia toru ra ano au whakakahoretanga ki ahau.

## Chapter 14

<sup>1</sup> Kei pouri o koutou ngakau: e whakapono ana koutou ki te Atua, whakapono hoki ki ahau. <sup>2</sup> He maha nga nohonga i roto i te whare o toku Matua: me he kahore, kua korerotia e ahau ki a koutou. Ka haere hoki ahau ki te mea i tetahi wahi hei tukunga ake mo koutou. <sup>3</sup> A ki te haere ahau ki te mea wahi hei tukunga ake mo koutou, ka haere mai ano ahau, a ka tango i a koutou ki ahau; kia noho ai hoki koutou ki te wahi e noho ai ahau. <sup>4</sup> Na e matau ana koutou ki te huarahi ki te wahi e haere atu nei ahau. <sup>5</sup> Na ka mea a Tamati ki a ia, E te Ariki, kahore matou e matau ki te wahi e haere na koe; me pehea ka matau ai matou ki te huarahi? <sup>6</sup> Ka mea a Ihu ki a ia, Ko ahau te huarahi, te pono, te ora: e kore rawa tetahi tangata e haere ake ki te Matua, ki te kahore ahau. <sup>7</sup> Me i matau koutou ki ahau, kua matau ano ki toku matua; na i enei ake wa ka mohio koutou ki a ia, kua kite ano hoki i a ia. <sup>8</sup> Ka mea a Piripi ki a ia, E te Ariki, whakakitea te Matua ki a matou, a ka tatu o matou ngakau. <sup>9</sup> Ka mea a Ihu ki a ia, Roa noa atu toku noho ki a koutou, a kahore ano koe i matau noa ki ahau, e Piripi? Ko ia kua kite i ahau kua kite hoki i te Matua; he aha koe ka mea ai, Whakakitea mai te Matua ki a matou? <sup>10</sup> E kore ianei koe e whakapono, ko ahau kei roto i te Matua, ko te Matua kei roto i ahau? ko nga kupu e korero nei ahau ki a koutou, ehara i te korero naku ake; engari na te Matua e noho ana i roto i ahau, ko ia te mea ana i nga mahi. <sup>11</sup> Whakapono mai ki ahau, kei roto ahau i te Matua, ko te Matua hoki kei roto i ahau: ki te kahore, whakaaro ki nga mahi, ka whakapono ai ki ahau.



12 He pono, he pono taku e mea atu nei ki a koutou, Ki te whakapono tetahi ki ahau, ko nga mahi e mea nei ahau, e meinga ano e ia; a nui atu i enei ana e mea ai; no te mea e haere ana ahau ki toku Matua.

13 A ko ta koutou e inoi ai i runga i toku ingoa, e meatia tenei e ahau, kia whai kororia ai te Matua i te Tama.

14 Ki te inoia e koutou tetahi mea i ahau i runga i toku ingoa, maku e whakamana.

15 Ki te aroha koutou ki ahau, kia mau ki aku ture.

16 Ka inoi ahau ki te Matua, a mana e hoatu ki a koutou tetahi atu Kaiwhakamarie, hei noho tonu ki a koutou.

17 Ko te Wairua o te pono; e kore nei e riro i te ao, no te mea e kore e kite i a ia, e kore ano e matau ki a ia; kei a koutou hoki ia e noho ana, a ka noho ano i roto i a koutou.

18 E kore koutou e waiho pani e ahau: e haere mai ano ahau ki a koutou.

19 Taro ake a heoi ano kitenga o te ao i ahau; ko koutou ia e kite i ahau: e ora ana ahau, ka ora ano koutou.

20 A taua ra koutou matau ai kei roto ahau i toku Matua, ko koutou ano kei roto i ahau, me ahau hoki kei roto i a koutou.

21 Ko te tangata kei a ia nei aku ture, e puritia ana hoki e ia, ko ia te aroha ana ki ahau: ki te aroha tetahi ki ahau, ka arohaina ia e toku Matua, a ka aroha ahau ki a ia, ka whakaatu i ahau ki a ia.

22 Ka mea a Hura ki a ia, haunga a Ikariote, E te Ariki, he pehea i whakaatu ai koe i a koe ki a matou, a kahore ki te ao?

23 Ka whakahoki a Ihu, ka mea ki a ia, Ki te aroha tetahi ki ahau, e puritia e ia taku kupu: a ka arohaina ia e toku Matua, ka haere atu maua ki a ia, ka noho tonu ki a ia.

24 Ki te kahore tetahi e aroha ki ahau, e kore e puritia e ia aku kupu: na ehara i ahau ake te kupu e rongo nei koutou, engari na te Matua i tonoa mai ai ahau.

25 Kua korerotia nei e ahau enei mea ki a koutou, i ahau e noho nei i a koutou.

26 Na, ko te kaiwhakamarie, ara ko te Wairua Tapu, e tonoa mai e te Matua i runga i toku ingoa, mana koutou e whakaako ki nga mea katoa, mana koutou e whakamahara ki nga mea katoa kua korerotia nei e ahau ki a koutou.

27 He rangimarie taku e waiho nei ki a koutou, tenei taku rangimarie te hoatu nei e ahau ki a koutou: e kore e rite ki ta te ao hoatu taku hoatu ki a koutou. Kei pouri o koutou ngakau, kei matakau.

28 Kua rongo na koutou ki taku i mea ai ki a koutou, E haere ana ahau, a ka hoki mai ano ki a koutou. Me i aroha koutou ki ahau, kua hari koutou, noku i mea, E haere ana ahau ki te Matua: he nui ake hoki toku Matua i ahau.

29 Na kua korero nei ahau ki a koutou: i te mea kahore ano i puta, mo te puta rawa mai, ka whakapono koutou.

30 E kore e maha ake aku korero ki a koutou: e haere mai ana hoki te ariki o tenei ao, kahore hoki ana wahi i roto i ahau;

31 Otira kia matau ai te ao, e

aroha ana ahau ki te Matua; ko ta te Matua ano i whakahau mai ai ki ahau, ko taku tena e mea nei. Whakatika, ka haere atu tatou i konei.

## Chapter 15

<sup>1</sup> Ko ahau te waina pono, ko toku Matua te kaimahi. <sup>2</sup> Ko nga manga katoa i roto i ahau e kore e whai hua, e tangohia e ia: ko nga mea katoa hoki e whai hua ana, ka whakapaia e ia, kia maha atu ai ona hua. <sup>3</sup> Na kua ma tenei koutou i te kupu i korerotia e ahau ki a koutou. <sup>4</sup> Kia u koutou ki roto ki ahau, me ahau hoki ki roto ki a koutou. Ka rite hoki ki te manga e kore e whai hua ko ia anake, ki te kahore e u ki te waina; e kore ano hoki koutou, ki te kore e u ki roto ki ahau. <sup>5</sup> Ko ahau te waina, ko koutou nga manga: ki te u tetahi ki roto ki ahau, me ahau hoki ki roto ki a ia, ka maha o tera hua: ki te motu ke hoki i ahau, e kore tetahi mea e taea e koutou. <sup>6</sup> Ki te kore e u tetahi ki roto ki ahau, ka maka atu ia, ano he manga, a ka maroke; na ka kohikohia, ka maka ki te kapura, ka tahuna. <sup>7</sup> Ki te u koutou ki roto ki ahau, ki te u ano aku kupu ki roto ki a koutou, inoia e koutou ta koutou e pai ai, a ka meatia ma koutou. <sup>8</sup> Ka whakakororiatia toku Matua ki te penei, ki te whai hua maha koutou: a ka meinga koutou he akonga naku.

<sup>9</sup> Rite tonu ki to te Matua aroha ki ahau toku aroha ki a koutou: kia u ki toku aroha. <sup>10</sup> Ki te pupuri koutou i aku ture, ka u koutou ki toku aroha: me ahau hoki kua pupuri nei i nga ture a toku Matua, ka u nei ki tona aroha. <sup>11</sup> Kua korerotia enei mea e ahau ki a koutou, kia pumau ai toku koa i roto i a koutou, kia tino ki ai to koutou koa. <sup>12</sup> Ko taku ture tenei, Kia aroha koutou tetahi ki tetahi, me ahau hoki kua aroha nei ki a koutou. <sup>13</sup> Kahore he aroha o tetahi i rahi ake i tenei, ara kia tuku te tangata i a ia ano kia mate mo ona hoa. <sup>14</sup> Ko koutou oku hoa, ki te meatia e koutou aku e whakahau nei ki a koutou. <sup>15</sup> Heoi ano taku meatanga he pononga koutou; e kore hoki te pononga e mohio ki ta tona ariki e mea ai: engari kua oti koutou te hua e ahau he hoa; ko aku mea katoa hoki i rongu ai ahau ki toku Matua, kua oti te whakakite e ahau ki a koutou. <sup>16</sup> Kahore koutou i whiriwhiri i ahau, engari naku koutou i whiriwhiri, naku ano koutou i mea kia haere, kia whai hua, kia mau tonu hoki o koutou hua: a ko ta koutou e inoi ai ki te Matua i runga i toku ingoa, ka hoatu e ia ki a koutou. <sup>17</sup> Ko aku whakahau enei ki a koutou, kia aroha koutou tetahi ki tetahi.

<sup>18</sup> Ki te mea e kinongia ana koutou e te ao, e mohio ana koutou i kinongia ahau i mua i a koutou.

<sup>19</sup> Mehemea no te ao koutou, e arohaina e te ao ona: tena ko tenei ehara nei koutou i te ao, naku

20  
koutou i whiriwhiri i roto i te ao, koia te ao ka kino ai ki a koutou. Kia mahara ki te kupu i korero ai ahau ki a koutou, kahore te pononga e rahi ake i tona ariki. Ki te mea i whakatoia ahau e ratou, ka whakatoia ano koutou; ki te mea i pupuri ratou i taku kupu, ka pupuri ano ratou i ta koutou.

21  
Otira e meatia katoatia enei mea e ratou ki a koutou he whakaaro ki toku ingoa, no te mea kahore ratou i mohio ki toku kaitono mai. 22 Me i kua ahau te haere mai, te korero ki a ratou, penei kahore

o ratou hara: tena ko tenei kahore o ratou whakaoraora mo to ratou hara. 23 Ko te tangata e

whakakino ana ki ahau, e whakakino ana hoki ki toku Matua. 24 Me i kua te mahia e ahau i roto i a ratou nga mahi kahore i mahia e tetahi atu, penei kahore o ratou hara: tena ko tenei kua kite

ratou, kua whakakino ano hoki ki a maua tahi ko toku Matua. 25 Ma tenei ia ka rite ai te kupu i tuhituhia ki ta ratou ture, Kua kino noa ratou ki ahau.

26  
Otiia ka tae mai te Kaiwhakamarie e tonoa mai e ahau ki a koutou i te Matua, te Wairua o te pono, e puta mai ana i te Matua, ko ia hei kaiwhakaatu moku: 27 Ko koutou ano hoki hei kaiwhakaatu, no te mea i ahau koutou no te timatanga iho ra ano.

## Chapter 16

1  
Kua korerotia e ahau enei mea ki a koutou, kei he koutou. 2 Ka peia atu koutou i roto i nga whare karakia; a meake puta te wa e mea ai te kaiwhakamate i a koutou, he mahi pai tana ki te Atua. 3 Na e meatia enei mea, no te mea kahore ratou i mohio ki te Matua, kahore hoki ki ahau.

4  
Otiia kua korerotia enei mea e ahau ki a koutou, mo te puta rawa mai o taua wa, ka mahara koutou ki aua mea, he mea korero naku ki a koutou. Na kihai enei mea i korerotia e ahau ki a koutou i te

timatanga, no te mea e noho ana ahau i a koutou. 5 Na e haere ana tenei ahau ki toku kaitono mai;

a kahore tetahi o koutou i ui mai ki ahau, Ko hea koe? 6 Otira i taku korerotanga i enei mea ki a koutou, ka ki o koutou ngakau i te pouri.

7  
He pono ia taku korero ki a koutou; Nui atu te pai mo koutou ki te haere ahau: ki te kahore hoki ahau e haere, e kore te Kaiwhakamarie e tae mai ki a koutou; a ki te haere ahau, maku ia e tonono mai ki a koutou. 8 Na ka tae mai ia, mana e whakaatu ki te ao te hara, te tika, me te whakawa:

9  
Te hara, mo ratou kahore e whakapono ki ahau; 10 Te tika, no te mea e haere ana ahau ki toku

Matua, a heoi ano to koutou kitenga i ahau; 11 Te whakawa, no te mea kua whakatikaia te whakawa

12 mo te rangatira o tenei ao. He maha atu ano nga mea hei korero maku ki a koutou, otira e kore  
 13 e taea e koutou te mau aiane. Otira kia tae mai ia, te Wairua o te pono, mana koutou e arahi ki  
 te pono katoa: ehara hoki tana i te korero nana ake; engari ka korerotia e ia nga mea e rongu ai ia:  
 14 mana hoki e whakakite ki a koutou nga mea e puta mai ana. Ka whakakororiatia ahau e ia: ka  
 15 tango hoki ia i aku mea, a ka whakaaturia ki a koutou. Ko nga mea katoa a te Matua, naku: koia  
 ahau i mea ai, ka tangohia e ia aku mea, a ka whakaaturia ki a koutou.

16 Taro ake, a e kore koutou e kite ano i ahau: a taro ake ano, ka kite koutou i ahau, no te mea  
 17 ka haere ahau ki te Matua. Na ka mea etahi o ana akonga tetahi ki tetahi, He aha tenei e mea nei  
 ia ki a tatou, Taro ake, a e kore koutou e kite i ahau: a taro ake ano, ka kite koutou i ahau: me tenei,

18 No te mea e haere ana ahau ki te Matua? Na ka mea ratou, he aha tenei e mea nei ia, Taro ake?  
 19 e kore tatou e matau ki tana e mea nei. A i mohio a Ihu e hiahia ana ratou ki te ui ki a ia, ka mea  
 ki a ratou, E rapu ana koutou ki a koutou ano ki taku i mea ra, Taro ake a e kore koutou e kite i

20 ahau: a, taro ake ano ka kite koutou i ahau? He pono, he pono taku e mea nei ki a koutou, Ka  
 tangi koutou, ka aue, ko te ao ia ka hari: e pouri ano koutou, otira ka meinga to koutou pouri hei  
 21 hari. I te mea ka whakamamae te wahine, ka pouri, no te mea ka tae tona wa: ka whanau tana  
 tamaiti, heoi ano mahara ki te mamae, i te hari hoki, no te mea ka whanau he tangata ki te ao.

22 Na, tenei koutou te pouri nei: e kite ano ia ahau i a koutou, a ka hari o koutou ngakau, e kore  
 hoki e tangohia i a koutou to koutou hari e tetahi.

23 Na a taua ra e kore koutou e ui ki tetahi mea i ahau. He pono, he pono taku e mea nei ki a  
 24 koutou, Ko a koutou e inoi ai ki te Matua i runga i toku ingoa, e hoatu e ia ki a koutou. Kahore  
 ano i inoia noatia e koutou tetahi mea i runga i toku ingoa: inoia, a ka whiwhi koutou, kia tino nui

25 ai to koutou koa. He mea whakarite taku korero i enei mea ki a koutou: otia meake puta te wa  
 e kore ai ahau e korero kupu whakarite ki a koutou, engari ka marama tonu taku korero ki a koutou

26 mo te Matua. A taua ra ka inoi koutou i runga i toku ingoa; a e kore ahau e mea ki a koutou, e  
 27 inoi ahau ki te Matua mo koutou: E aroha ana hoki te Matua ake ano ki a koutou, mo koutou i  
 aroha ki ahau, i whakapono hoki i haere mai ahau i te Matua.

28 I haere mai ahau i te Matua, a kua tae mai nei ki te ao: ka mahue ano i ahau te ao, a ka haere  
 29 ki te Matua. Ka mea ana akonga ki a ia, Na kua marama tau korero, ehara tau korero i te kupu

30 whakarite. Katahi matou ka mohio, tenei koe te mohio nei ki nga mea katoa, e kaore ano e mea

ma tetahi e ui ki a koe: na konei matou i whakapono ai i haere mai koe i te Atua. <sup>31</sup> Ka whakahokia  
 e Ihu ki a ratou, Katahi koutou ka whakapono? <sup>32</sup> Na meake puta te wa, a kua puta nei ano, e  
 whakamararatia ai koutou ki tona wahi, ki tona wahi, a ka waiho ko ahau anake; otiia he teka ko  
 ahau anake, no te mea kei ahau nei te Matua. <sup>33</sup> Kua korerotia e ahau enei mea ki a koutou, kia  
 whai marietanga ai koutou i roto i ahau. Ko ta koutou i te ao nei, he mamate: otira kia maia; kua  
 taea e ahau te ao.

## Chapter 17

<sup>1</sup> Ka korerotia enei mea e Ihu, na ka anga ake ona kanohi ki te rangi, ka mea, E Pa, kua taea te  
 haora: whakakororiatia tau Tama, kia whakakororiatia ai ano hoki koe e tau Tama: <sup>2</sup> Kua tukua  
 mai nei hoki e koe ki a ia nga tikanga mo nga kikokiko katoa, kia hoatu e ia te ora tonu ki te hunga  
 katoa kua homai nei e koe ki a ia. <sup>3</sup> Ko te ora tonu hoki tenei, kia matau ratou ki a koe, ko koe  
 anake te Atua pono, ki a Ihu Karaiti ano hoki i tonoa mai nei e koe. <sup>4</sup> Kua whakakororiatia koe e  
 ahau i runga i te whenua: ka oti i ahau te mahi i homai e koe kia mahia e ahau. <sup>5</sup> Na kia whai kororia  
 ahau aiane i a koe ake, e Pa; hei te kororia i whiwhi ai ahau i a koe i mua atu o te ao.  
<sup>6</sup> Kua whakapuakina e ahau tou ingoa ki nga tangata i homai nei e koe ki ahau i roto i te ao;  
 nou ratou, nau ano hoki ratou i homai ki ahau: a kua puritia e ratou tau kupu. <sup>7</sup> Katahi ratou ka  
 matau nau nga mea katoa i homai nei e koe ki ahau; <sup>8</sup> No te mea kua hoatu e ahau ki a ratou nga  
 kupu i homai nei e koe ki ahau; a kua tango ratou, kua tino matau ano, i haere mai ahau i a koe,  
 kua whakapono ratou, nau ahau i tono mai. <sup>9</sup> Mo ratou taku inoi: kahore aku inoi mo te ao, engari  
 mo au i homai ai ki ahau; nau hoki ratou. <sup>10</sup> Ko aku mea katoa nau, naku hoki au; a ka whai kororia  
 ahau i a ratou.  
<sup>11</sup> Na heoi ano toku noho ki te ao; kei te ao nei ano enei, ko ahau ia ka haere atu ki a koe. E te  
 Matua tapu, puritia i runga i tou ingoa te hunga kua homai nei e koe ki ahau, kia kotahi ai ratou,  
 me taua nei. <sup>12</sup> I ahau ano e noho ana i a ratou i te ao, i puritia ratou e ahau i runga i tou ingoa; kua  
 tiakina e ahau au i homai ai ki ahau, a kahore tetahi o ratou i ngaro, ko te tama anake o te  
 ngaromanga; kia rite ai te karaipiture. <sup>13</sup> Na ka haere atu nei ahau ki a koe; a e korerotia ana e ahau  
 enei mea i te ao nei, kia tino nui ai toku koa i roto i a ratou. <sup>14</sup> Kua hoatu e ahau tau kupu ki a ratou;

e kino ana hoki te ao ki a ratou, notemea ehara ratou i te ao, me ahau hoki ehara i te ao. <sup>15</sup> Kahore  
 aku inoi kia tangohia atu ratou e koe i te ao, engari kia tiakina ratou e koe kei kino. <sup>16</sup> Ehara ratou  
 i te ao, me ahau hoki ehara i te ao.  
<sup>17</sup> Whakatapua ratou e koe i runga i tou pono: ko tau kupu te pono. <sup>18</sup> Nau ahau i tono mai ki  
 te ao, he pena ano taku tono i a ratou ki te ao. <sup>19</sup> He whakaaro hoki ki a ratou i whakatapu ai ahau  
 i ahau, kia tapu ai hoki ratou i te pono.  
<sup>20</sup> Ehara taku i te inoi mo enei anake, engari mo te hunga e meinga e ta ratou kupu kia  
<sup>21</sup> whakapono ki ahau: Kia kotahi ai ratou katoa; me koe hoki, e pa, i roto i ahau, me ahau ano i  
 roto i a koe, kia kotahi ai hoki ratou i roto i a taua: kia whakapono ai te ao, nau ahau i tono mai.  
<sup>22</sup> Kua hoatu ano e ahau ki a ratou te kororia i homai e koe ki ahau; kia kotahi ai ratou, me taua nei  
<sup>23</sup> hoki he kotahi. Ko ahau i roto i a ratou, ko koe hoki i roto i ahau, kia tino tutuki ai ratou ki te  
 kotahitanga: kia mohio ai ano te ao, nau ahau i tono mai, he rite hoki tou aroha ki a ratou ki tou  
 aroha ki ahau.  
<sup>24</sup> E Pa, e mea ana ahau kia noho tahi ki ahau, ki te wahi e noho ai ahau, au i homai ai ki ahau;  
 kia kite ai ratou i toku kororia kua homai nei e koe ki ahau: no mua atu hoki i te hanganga o te ao  
<sup>25</sup> tou aroha ki ahau. E te Matua tika, ahakoa te ao te mohio ki a koe, e mohio ana ahau ki a koe,  
<sup>26</sup> a kua mohio ano enei, nau ahau i tono mai. Kua whakapuakina ano tou ingoa e ahau ki a ratou,  
 a ka whakapuakina ano: kia mau ai i roto i a ratou te aroha i arohaina ai ahau e koe, me ahau ano  
 i roto i a ratou.

## Chapter 18

<sup>1</sup> Ka mutu enei korero a Ihu ka haere ia, ratou ko ana akonga, ki tawahi o te manga wai, ara o  
 Kerono. Na, he kari kei reira, a tapoko atu ana ia, ratou ko ana akonga. <sup>2</sup> I matauria ano taua wahi  
 e Huria, e te tangata e tukua ai ia: he maha hoki nga hokinga o Ihu, ratou ko ana akonga ki reira.  
<sup>3</sup> Na ka hoatu ki a Hura tetahi matua me etahi katipa e nga tohunga nui ratou ko nga Parihi, a haere  
 ana ki reira, me nga roherohe, me nga rama, me nga patu. <sup>4</sup> Heoi i matau a Ihu ki nga mea katoa  
<sup>5</sup> meake pa ki a ia, ka puta atu, ka mea ki a ratou, Ko wai ta koutou e rapu? Ka whakahokia e ratou  
 ki a ia, Ko Ihu o Nahareta. Ka mea a Ihu ki a ratou, Ko ahau ia. A, i te tu ano i roto i a ratou a Hura,

<sup>6</sup>  
 tona kaituku. Na, i tana korerotanga ki a ratou, Ko ahau ia, hoki ana ratou ki muri, hinga ana ki  
<sup>7</sup>  
 te whenua. Na ka ui ano ia ki a ratou, Ko wai ta koutou e rapu? Ka mea ratou, Ko Ihu o Nahareta.  
<sup>8</sup>  
 Ka whakahokia e Ihu, Kua mea ahau ki a koutou, Ko ahau ia: ki te mea e rapu ana koutou i ahau,  
<sup>9</sup>  
 tukua enei kia haere: Kia rite ai te kupu i korerotia e ia, kahore i ngaro tetahi o te hunga i homai  
<sup>10</sup>  
 e koe ki ahau. Na he hoari ta Haimona Pita, unuhia ana e ia a haua iho te pononga a te tohunga  
<sup>11</sup>  
 nui, tapahia ana tona taringa matau. Ko te ingoa o taua pononga ko Maraku. Ka mea a Ihu ki a  
 Pita, Kuhua tau hoari ki te takotoranga: ko te kapu i homai nei e toku Matua ki ahau auaka ranei e  
<sup>12</sup>  
 inumia e ahau? Heoi ka hopukina a Ihu e taua ope, e te rangatira ratou ko nga katipa o nga Hurai,  
 a hereherea ana ia,  
<sup>13</sup>  
 A ka arahina ki a Anaha i te tuatahi; ko ia hoki te hungawai o Kaiapa, o te tohunga nui mo  
<sup>14</sup>  
 taua tau. Na ko Kaiapa tenei nana ra i whakatakoto te whakaaro ki nga Hurai, he pai ke ki te  
<sup>15</sup>  
 mate te tangata kotahi mo te iwi. Na ka aru a Haimona Pita i a Ihu, a ka aru ano hoki tetahi atu  
 o nga akonga: na i mohiotia taua akonga e te tohunga nui, a tomo tahi ana me Ihu ki te whare o te  
<sup>16</sup>  
 tohunga nui; Ko Pita ia i tu i te kuwaha i waho. Na ka puta atu taua akonga i mohiotia nei e te  
<sup>17</sup>  
 tohunga nui, ka korero ki te kaitiaki o te tatau, a arahina ana a Pita ki roto. Na ko te meatanga  
 a te kotiro tiaki o te tatau ki a Pita, Ehara ianei koe i tetahi o nga akonga a tenei tangata? Ka mea  
<sup>18</sup>  
 ia, Ehara. Na i reira nga pononga me nga katipa e tu ana, kua whakaungia hoki e ratou te kapura  
 waro; he makariri hoki; a e inaina ana ratou: ko Pita hoki tetahi o ratou, e tu tahi ana e inaina ana.  
<sup>19</sup>  
 Na ka ui te tohunga nui ki a Ihu, ki ana akonga, ki tana ako. Ka whakahokia e Ihu ki a ia, I  
<sup>20</sup>  
 marama tonu taku korero ki te ao; i ako tonu ahau i roto i te whare karakia, i te temepara hoki, i te  
<sup>21</sup>  
 wahi huihui o nga Hurai katoa; kahore hoki tetahi mea i korerotia pukutia e ahau. He aha koe  
 ka ui ai ki ahau? ui atu ki te hunga i rongu ki taku i mea ai ki a ratou: nana, e mohio ana ratou ki  
<sup>22</sup>  
 aku i korero ai. Na, i tana korerotanga i enei kupu, ka papaki tetahi o nga katipa i tu ra i a Ihu,  
<sup>23</sup>  
 ka mea, E pena ana koe ki te tohunga nui? Ka whakahokia e Ihu ki a ia, Ki te kino aku korero,  
<sup>24</sup>  
 whakaaturia te kino: ki te pai ia, he aha koe i papaki ai i ahau? Na ka tukua hereheretia atu ia e  
<sup>25</sup>  
 Anaha ki a Kaiapa tohunga nui. Na, tera a Haimona Pita te tu ra me te inaina. Na ka mea ratou  
<sup>26</sup>  
 ki a ia, Ehara ianei koe i tetahi o ana akonga? Ka whakakahore ia, ka mea, Ehara. Ka mea tetahi

o nga pononga a te tohunga nui, he whanaunga nona i tapahia nei te taringa e Pita, Kihai ianei ahau  
i kite i a koe, korua tahi i te kari? <sup>27</sup> Na ka whakakahore ano a Pita: a tangi tonu iho te tikaokao.

<sup>28</sup> Katahi ka arahina atu e ratou a Ihu i a Kaiapa ki te whare whakawa: he atatu: ko ratou ia  
kihai i tomo ki te whare whakawa, kei poke ratou, engari kia kai ai ratou i te kapenga. <sup>29</sup> Na ka

puta atu a Pirato ki a ratou, ka mea, He aha ta koutou whakapae ki tenei tangata? <sup>30</sup> Ka whakahoki

ratou, ka mea ki a ia, Me i kaua ia te mahi i te kino, kihai i kawea mai e matou ki a koe. <sup>31</sup> Na ko  
te meatanga a Pirato ki a ratou, Mauria atu ia, whakawakia ki to koutou na ture. Ka mea nga Hurai

ki a ia, E kore e tika kia whakamatea tetahi tangata e matou: <sup>32</sup> Kia rite ai ta Ihu kupu i korero ai,

hei whakaatu i te mate e mate ai ia. <sup>33</sup> Me i reira ka tomo ano a Pirato ki te whare whakawa, ka

karanga i a Ihu, ka mea ki a ia, Ko te Kingi ranei koe o nga Hura? <sup>34</sup> Ka whakahokia e Ihu ki a ia,

Nau ake ano tenei kupu, he korero ranei moku na te tangata ke ki a koe? <sup>35</sup> Ka mea a Pirato, He  
Hurai koia ahau? Na tou iwi, na nga tohunga nui ano hoki, koe i kawea mai ki ahau: i aha koia koe?

<sup>36</sup> Ka whakahokia e Ihu, Ehara toku rangatiratanga i tenei ao; mehemea no tenei ao toku  
rangatiratanga, kua tatau aku pononga, kei tukua ahau ki nga Hurai: tena ko tenei ehara toku

rangatiratanga i konei. <sup>37</sup> Na ka mea a Pirato ki a ia, He kingi oti koe? ka whakahokia e Ihu, Kua  
korerotia mai na e koe he kingi ahau. Ko te mea tenei i whanau ai ahau: na tenei hoki ahau i haere  
mai ai ki te ao, hei kaiwhakaatu mo te pono. E whakarongo ana ki toku reo n ga tangata katoa o te

pono. <sup>38</sup> Ka mea a Pirato ki a ia, He aha te pono? A, no te puakanga o tenei ki hoki ana ia ki waho,

ki nga Hurai, ka mea ki a ratou, Kahore tetahi he o tenei tangata i mau i ahau. <sup>39</sup> Otiia he ritenga  
tenei na koutou, kia tukua e ahau ki a koutou tetahi tangata i te kapenga: e pai ana ranei koutou kia

tukua e ahau ki a koutou te Kingi o nga Hurai. <sup>40</sup> Heoi karanga katoa ana ano ratou, ka mea, Auaka  
tenei, engari a Parapa. Na, he tahae a Parapa.

## Chapter 19

<sup>1</sup> Katahi ka mau a Pirato ki a Ihu, ka whiu i a ia. <sup>2</sup> A ka whiria e nga hoia he karauna tataramoa,  
potaeta ana ki tona matenga, whakakakahuria ana hoki ia ki te kahu papaura. <sup>3</sup> Na ka mea ratou,

Tena koe, e te Kingi o nga Hurai! a pakia ana ia ki o ratou ringa. <sup>4</sup> Ka haere ano a Pirato, ka mea  
ki a ratou, Na, tenei te arahina atu nei ia e ahau ki a koutou, kia mohio ai koutou, kahore rawa i



mau i ahau tetahi he ona. <sup>5</sup> Na ka puta a Ihu ki waho, me te karauna tataramoa i runga i a ia, me te  
 kakahu papaura. Ka mea a Pirato ki a ratou, Na, te tangata nei! <sup>6</sup> A, no te kitenga o nga tohunga  
 nui ratou ko nga katipa i a ia, ka karanga ratou, ka mea, Ripekatia, ripekatia. Ka ki a Pirato ki a  
 ratou, Tangohia atu ia e koutou, ripekatia: kahore hoki i mau i ahau tetahi he ona. <sup>7</sup> Ka whakahokia  
 e nga Hurai ki a ia, He ture to matou, a ki to matou ture he mea tika kia mate ia, mona i mea ko te  
 Tama ia a te Atua. <sup>8</sup> No te rongonga o Pirato i tenei ki, nui rawa tona wehi; <sup>9</sup> Ka tomo ano ia ki te  
 whare whakawa, ka mea ki a Ihu, No hea koe? Heoi kahore a Ihu kupu whakahoki ki a ia. <sup>10</sup> Na  
 ka mea a Pirato ki a ia, E kore koe e korero ki ahau? kahore koe e mohio kei ahau te tikanga mo te  
 ripeka i a koe, kei ahau ano te tikanga mo te tuku i a koe kia haere? <sup>11</sup> Ka whakahokia e Ihu, Kahore  
 au tikanga ki ahau, me kahore i homai ki a koe i runga: koia i nui rawa ai te hara o te kaituku i ahau  
 ki a koe. <sup>12</sup> Na i reira ano ka whai a Pirato kia tukua ia kia haere: otiia ka karanga nga Hurai, ka  
 mea, Ki te tukua tenei e koe, ehara koe i te hoa no Hiha: ki te whakakingi tetahi tangata i a ia, he  
 whakakahore tana i a Hiha. <sup>13</sup> A, no ka rongonga a Pirato i tenei korero, ka arahina e ia a Ihu ki waho,  
 a noho ana ki runga ki te nohonga whakawa, ki te wahi e kiia nei ko te Whariki kohatu, ki te reo  
 Hiperu, ko Kapata. <sup>14</sup> Ko te takanga ia o te kapenga, tata pu ki te ono o nga haora; ka mea ia ki  
 nga Hurai, Na, to koutou kingi! <sup>15</sup> Na ko ta ratou karangatanga, Whakamatea, whakamatea, ripekatia.  
 Ka mea a Pirato ki a ratou, Kia ripeka koia ahau i to koutou Kingi? ka whakahokia e nga tohunga  
 nui, Kahore o matou kingi, ko Hiha anake.  
<sup>16</sup> No reira ka hoatu ia e ia ki a ratou kia ripekatia. A ka mau ratou ki a Ihu: <sup>17</sup> A amo ana ia  
 i tona ripeka, haere ana ki te wahi e kiia nei ko te wahi o te angaanga, tona ingoa ki te reo Hiperu,  
 ko Korokota: <sup>18</sup> Na ripekatia ana ia e ratou ki reira, a ia me etahi atu tokorua, kotahi ki tetahi taha,  
 kotahi ki tetahi taha, ko Ihu ki waenganui.  
<sup>19</sup> Na tuhituhia ana e Pirato tetahi ingoa, whakapiritia ana ki te ripeka. Ko te tuhituhi tenei, KO  
 IHU O NAHARETA, KO TE KINGI O NGA HURAI. <sup>20</sup> A he tokomaha nga Hurai i kite i tenei  
 ingoa: i tata hoki ki te pa te wahi i ripekatia ai a Ihu: a i tuhituhia taua mea ki te reo Hiperu, ki te  
 reo Kariki, ki te reo Roma. <sup>21</sup> Na ka mea nga tohunga nui o nga Hurai ki a Pirato, Aua e tuhituhia,  
 Ko te Kingi o nga Hurai; engari, nana i mea, Ko te Kingi ahau o nga Hurai. <sup>22</sup> Ka whakahokia e  
 Pirato, Ko taku i tuhituhi ai kua tuhituhia. <sup>23</sup> A ka oti a Ihu te ripeka e nga hoia, ka mau ratou ki  
 ona kakahu, wehea ake kia wha nga wahi, ki ia hoia he wahi; me te koti ano: na kahore he tui o te  
 koti, he mea whatu iho i runga a puta noa. <sup>24</sup> Na ka mea ratou tetahi ki tetahi, Kaua e haea e tatou,

engari me maka ki te rota kia kitea ai, mo wai ranei: na ka rite te karaipiture e mea nei, I wehewehea  
oku kakahu mo ratou, i maka rota hoki mo toku weruweru. Ko ta nga hoia tenei i mea ai. <sup>25</sup> Na i  
te taha o te ripeka o Ihu tona whaea e tu ana, ratou ko te teina o tona whaea, ko Meri wahine a  
Kereopa, ko Meri Makarini. <sup>26</sup> A, no te kitenga o Ihu i tona whaea, i te akonga hoki i aroha ai ia  
e tu tahi ana, ka mea ia ki tona whaea, E tai, nana, tau tama! <sup>27</sup> Katahi ia ka mea ki taua akonga,  
Na, tou whaea! A no taua haora ka mau taua akonga i a ia ki tona whare. <sup>28</sup> Muri iho i tenei ka  
mohio a Ihu ka oti nga mea katoa, na ka mea ia, hei whakaritenga mo te karaipiture, he mate wai  
toku. <sup>29</sup> Na tera e tu ra tetahi oko, ki tonu i te winika; a ka whakakiiia e ratou tetahi hautai ki te  
winika, whakanohoia ana ki runga ki te hihopa, hoatu ana ki tona mangai. <sup>30</sup> A, no te inumanga o  
Ihu i te winika, ka me ia, Kua oti: na ka tuohu tona matenga, tukua ana tona wairua.  
<sup>31</sup> Na i mea nga Hurai kia kaua e mau nga tinana ki te ripeka i te hapati, ko te Takanga hoki  
tera, he ra nui hoki taua hapati, ka mea ratou ki a Pirato kia whatiia o ratou waewae, kia tangohia  
atu hoki. <sup>32</sup> Na ka haere nga hoia, ka whawhati i nga waewae o to mua, me o tera i ripekatia  
ngatahitia me ia. <sup>33</sup> I to ratou taenga ia ki a Ihu, ka kite kua mate noa ake ia, kihai i whatiia e ratou  
ona waewae: <sup>34</sup> Engari i werohia tona kaokao e tetahi o nga hoia ki te matia, a puta tonu he toto,  
he wai. <sup>35</sup> A ko te tangata i kite, ko ia ano te kaiwhakaatu, a he pono tana whakaatu: e mohio ana  
ia he korero pono tana, he mea ra kia whakapono ai koutou. <sup>36</sup> I meatia hoki enei mea, kia rite ai  
te karaipiture, E kore tetahi iwi ona e whatiia. <sup>37</sup> E mea ana ano tetahi atu karaipiture, ka titiro  
ratou ki ta ratou i wero ai.  
<sup>38</sup> Muri iho i enei mea, ka inoi a Hohepa o Arimatia ki a Pirato kia tangohia e ia te tinana o  
Ihu: he akonga ia na Ihu, otiia he mea huna i te wehi ki nga Hurai: a whakaae ana a Pirato. No ka  
haere ia, ka tango i te tinana o Ihu. <sup>39</sup> I haere mai ano a Nikorima, tera i haere ra i mua ki a Ihu i  
te po, me te mau mai ano i te maira, i te aroe, he mea whakananu, kia kotahi pea rau pauna. <sup>40</sup> Na  
ka tango raua i te tinana o Ihu, takaia ana ki nga kakahu rinena me nga mea kakara, ko ta nga Hurai  
ritenga hoki tera mo te tanu. <sup>41</sup> Na he kari kei te wahi i ripekatia ai ia; i roto ano i taua kari tetahi  
urupa hou, he mea kahore ano i takotoria noatia e tetahi. <sup>42</sup> Na ka whakatakotoria a Ihu e raua ki  
reira, no te mea he ra Takanga uera no nga Hurai; he tata hoki te urupa.

## Chapter 20

<sup>1</sup> I te ra tuatahi o te wiki ka haere a Meri Makarini ki te urupa i te atatu, i te mea e pouri tonu ana, a ka kite i te kohatu kua tangohia atu i te urupa. <sup>2</sup> Na ka oma ia, ka haere ki a Haimona Pita raua ko tera akonga i arohia ai a Ihu, ka mea ki a raua, Kua tangohia e ratou te Ariki i te urupa, a kahore matou e mohio ki te wahi i waiho ai ia e ratou. <sup>3</sup> Na ka puta atu a Pita, me taua akonga, ka haere ki te urupa. <sup>4</sup> A oma ngatahi ana raua: otiia i hohoro tera akonga i a Pita, ko ia ano kua tae wawe ki te urupa. <sup>5</sup> Na piko iho ana ia, ka kite i nga takai rinena e takoto ana; heoi kaihahi i tomo ki roto. <sup>6</sup> Na ka haere ano a Haimona Pita i muri i a ia, a, ko tona tomokanga ki te urupa, ka kite i nga takai rinena e takoto ana. <sup>7</sup> Me te tauera i takaia ai tona matenga, kihai i takoto tahi me nga takai rinena, he mea whakakopa ia ki tetahi wahi i tahaki. <sup>8</sup> Katahi ka tomo tera akonga, i tae wawe nei ki te urupa, kite ana, whakapono ana. <sup>9</sup> Kiano hoki ratou i mohio noa ki te karaipiture, kua takoto te tikanga kia ara ake ia i te hunga mate. <sup>10</sup> Na hoki ana ano nga akonga ki to raua kainga. <sup>11</sup> Ko Meri ia tu tonu i waho o te urupa tangi ai: a i a ia e tangi ana, ka piko iho ki te urupa. <sup>12</sup> Ka kite i nga anahera tokorua, he ma nga kakahu, e noho ana, ko tetahi kite matenga, ko tetahi ki nga waewae, i te wahi i takoto ai te tinana o Ihu. <sup>13</sup> Ka mea raua ki a ia, E tai, he aha tau e tangi? Ka mea ia ki a raua, Kua tangohia e ratou toku Ariki, e kore hoki ahau e matau ki te wahi i whakatakotoria ai ia. <sup>14</sup> Ka penei ana korero, ka tahuri whakamuri, ka kite i a Ihu e tu ana, otiia kihai i mohio ko Ihu ia. <sup>15</sup> Ka mea a Ihu ki a ia, E tai, he aha tau e tangi? ko wai tau e rapu? Hua noa ia ko te kaingaki kari, na ko tana meatanga ki a ia, E mara, ki te mea kua mauria atu ia e koe, korerotia ki ahau te wahi i whakatakotoria ai ia, a maku ia e tango atu. <sup>16</sup> Ka mea a Ihu ki a ia, E Meri. Ka tahuri atu tera, ka mea ki a ia, E Raponi; ko te tikanga tenei, E te Kaiwhakaako. <sup>17</sup> Ka mea a Ihu ki a ia, Kei pa ki ahau; kiano hoki ahau i kake noa ki toku Matua: engari haere ki oku teina, ka mea atu ki a ratou, ka kake ahau ki toku Matua, ki to koutou Matua: ki toku Atua, ki to koutou Atua. <sup>18</sup> Haere ana a Meri Makarini, korero ana ki nga akonga, kua kite ia i te Ariki, kua korerotia hoki e ia enei mea ki a ia. <sup>19</sup> I taua ra tuatahi ano o te wiki, i te ahiahi, i nga tatau e kati ana o te wahi i huihui ai nga akonga i te wehi i nga Hurai, ka haere mai a Ihu, ka tu i waenganui, ka mea ki a ratou, Kia tau te

<sup>20</sup> rangimarie ki a koutou. A ka puaki tenei kupu ana, ka whakakitea e ia ona ringa me tona kaokao  
 ki a ratou. Na hari tonu nga akonga, i to ratou kitenga i te Ariki. <sup>21</sup> Ka mea ano a Ihu ki a ratou,  
 Kia tau te rangimarie ki a koutou: i tonoa mai ahau e te Matua, ka pera ano taku tonu i a koutou.  
<sup>22</sup> Ka korerotia tenei e ia, ka whakaha ia, ka mea ki a ratou, Kia riro te Wairua Tapu i a koutou:  
<sup>23</sup> Ki te whakarerea noatia e koutou nga hara o etahi, ka whakarerea o ratou; ki te whakamaua ano  
 o etahi e koutou, ka mau ano. <sup>24</sup> Ko Tamati ia, ko tetahi o te tekau ma rua, tetahi o ona ingoa ko  
<sup>25</sup> Ririmu, kahore i a ratou i te taenga mai o Ihu. A, ko te meatanga a era akonga ki a ia, Kua kite  
 matou i te Ariki; ka mea ia ki a ratou, Ki te kahore ahau e kite i te ngaunga o nga waho i ona ringa,  
 e kuhu i toku matihao ki te ngaunga a nga whao, e kuhi hoki i toku ringa ki tona kaokao, e kor e  
 ahau e whakapono.  
<sup>26</sup> A ka pahemo nga ra e waru, a kei roto ano ana akonga, ratou ko Tamati: ka haere mai a Ihu  
 i te mea e kati ana nga tatau, ka tu ki waenganui, ka mea, Kia tau te rangimarie ki a koutou. <sup>27</sup> Katahi  
 ia ka mea ki a Tamati, Totoro mai tou matihao, kia kite hoki koe i oku ringa; totoro mai hoki tou  
 ringa, ka kuhu ki toku kaokao: aua e whakateka, engari me whakapono. <sup>28</sup> Na ka whakahoki a  
 Tamati, ka mea ki a ia, E toku Ariki, e toku Atua. <sup>29</sup> Ka mea a Ihu ki a ia, No tou kitenga i ahau,  
 i whakapono ai koe, e Tamati: ka koa te hunga kahore i kite, a kua whakapono. <sup>30</sup> He maha ano  
 era atu tohu i toi i a Ihu, i te aroaro o ana akonga, kahore nei i tuhituhia ki tenei pukapuka: <sup>31</sup> Otiia  
 kua tuhituhia enei, kia whakapono ai koutou ko te Karaiti a Ihu, ko te Tama a te Atua; kia whiwhi  
 ai hoki ki te ora i runga i tona ingoa, ina whakapono.

## Chapter 21

<sup>1</sup> Muri iho i enei mea ka whakakite a Ihu i a ia ki nga akonga i te moana o Taipiria; ko tana  
 whakakitenga tenei: <sup>2</sup> E noho tahi ana a Haimona Pita, a Tamati, ko Ririmu nei tona ingoa, a  
 Natanahira o Kana o Kariri, nga tama a Heperi, me tetahi tokorua atu ano o ana akonga. <sup>3</sup> Ka mea  
 a Haimona Pita ki a ratou, Ka haere ahau ki te hao. Ka mea ratou ki a ia, Ko tatou tahi e haere.  
 Haere ana ratou, eke ana ki runga ki te kaupuke; a i taua po kihai i mau tetahi mea. <sup>4</sup> Na ka puao  
 te ata, ko Ihu e tu ana i tatahi: otiia kihai nga akonga i mohio ko Ihu ia. <sup>5</sup> Na ko te meatanga a Ihu

ki a ratou, E tama ma, kahore a koutou kai? Ka whakahokia e ratou ki a ia, Kahore. <sup>6</sup> Ka mea ia ki  
 a ratou, Maka te kupenga ki te taha matau o te kaupuke a ka mau etahi. Na, i ta ratou makanga atu,  
 kihai i taea te kukume i te tini o nga ika. <sup>7</sup> Katahi ka mea te akonga i arohaina e Ihu ki a Pita, Ko  
 te Ariki. A, no te rongonga o Haimona Pita, ko te Ariki, ka whitikiria tona kakahu, e tu kau ana  
 hoki ia, a rere ana ki te moana. <sup>8</sup> Ko era akonga ia i hoe i runga i te poti, kihai hoki i mamao atu i  
 te whenua, me te mea e rua rau whatianga, e kukume ana i te kupenga, i nga ika. <sup>9</sup> Heoi, no to ratou  
 unga ki uta, ka kite i te kapura waro me nga ika e takoto ana i runga, me tetahi taro. <sup>10</sup> Ka mea a  
 Ihu ki a ratou, Homai etahi o nga ika kua mau na i a koutou. <sup>11</sup> Na haere ana a Haimona Pita, a  
 kumea ana e ia te kupenga ki uta, ki tonu i nga ika nunui, kotahi rau e rima tekau ma toru: a, ahakoa  
 tini, kihai i pakaru te kupenga. <sup>12</sup> Ka mea a Ihu ki a ratou, haere mai kai te kai. heoi kihai tetahi o  
 nga akonga i maia ki te ui ki a ia, Ko wai koe? i mohio hoki ko te Ariki. <sup>13</sup> Na ka haere a Ihu, ka  
 mau ki te taro, a hoatu ana e ia ki a ratou, me nga ika. <sup>14</sup> Ko te toru tenei o nga putanga o Ihu ki  
 ana akonga, i muri i tona aranga ake i te hunga mate.

<sup>15</sup> A ka mutu ta ratou kai, ka mea a Ihu ki a Haimona Pita, E Haimona, tama a Hona, rahi atu  
 ranei tou aroha ki ahau i to enei? Ka mea tera ki a ia, Ae, e te Ariki; e mohio ana koe e aroha ana  
 ahau ki a koe. Ka mea ia ki a ia, Whangainga aku reme. <sup>16</sup> Ka mea ano ia ki a ia, ko te rua o nga  
 meatanga, E Haimona, tama a Hona, e aroha ana koe ki ahau? Ka mea tera ki a ia, Ae, e te Ariki;  
 e mohio ana koe e aroha ana ahau ki a koe. Ka mea ia ki a ia, Heparatia aku hipi. <sup>17</sup> Ka mea ia ki  
 a ia, ko te toru o nga meatanga, E Haimona, tama a Hona, e aroha ana koe ki ahau? Ka pouri a Pita  
 no te mea ka toru rawa ana meatanga ki a ia, E aroha ana koe ki ahau? Ka mea ano ki a ia, E te  
 Ariki, e mohio ana koe ki nga mea katoa; e mohio ana koe e aroha ana ahau ki a koe. Ka mea a Ihu

<sup>18</sup> ki a ia, Whangainga aku hipi. He pono, he pono taku e mea nei ki a koe, I tou tamarikitanga, i  
 whitiki koe i a koe, i haere ki tau wahi i pai ai: ka koroheketia koe, ka whakamarokia e koe ou  
 ringa, he tangata ke hoki mana koe e whitiki, e kawe ki te wahi e kore ai koe e pai. <sup>19</sup> I korerotia  
 tenei e ia, hei tohu mo te mate e whakakororia ai ia i te Atua. A ka puaki tenei kupu ana, ka mea  
 ia ki a ia, Haere mai i muri i ahau.

<sup>20</sup> No te tauritanga o Pita, ka kite i te akonga i aroha ai a Ihu e aru ana; ko tera hoki i  
 whakawhirinaki ra ki tonu uma i te hapa, i mea ra, E te Ariki, ko wai te kaituku mou? <sup>21</sup> A, i te  
 kitenga o Pita i a ia, ka mea ki a Ihu, E te Ariki, e aha ra tenei? <sup>22</sup> Ka mea a Ihu ki a ia, Ki te pai  
 ahau kia noho tonu ia kia tae mai ra ano ahau, hei aha mau? haere mai koe i muri i ahau. <sup>23</sup> Heoi

ka puta atu tenei kupu ki nga hoa, e kore taua akonga e mate: otiia kihai a Ihu i mea ki a ia, E kore ia e mate; engari, Ki te pai ahau kia noho tonu ia kia tae mai ra ano ahau, hei aha mau? <sup>24</sup> Ko taua akonga tenei e whakaatu nei i enei mea, ko te kaituhituhi hoki ia i enei mea: e mohio ana ano matou e tika ana tana whakaatu. <sup>25</sup> Na tera atu ano tona tini o nga mea i mea ai a Ihu me i tuhia katoatia, e mea ana ahau, e kore pea te ao nei e whai takotoranga mo nga pukapuka e tuhia. Amine.

## Acts

### Chapter 1

<sup>1</sup> Ko te pukapuka tuatahi ra he mea tuhituhi naku, e Tiopira, mo nga mea katoa i timata ai a Ihu te mahi, te ako. <sup>2</sup> Taea noatia te ra i tangohia atu ai ia, i muri i tana whakaakoranga, ara i ta te Wairua Tapu, ki nga apotoro i whiriwhiria e ia. <sup>3</sup> He maha hoki nga tohu i whakakite ora ai ia i a ia ki a ratou, i muri i tona whakamamaetanga, e wha tekau hoki nga ra i kitea ai e ratou, i korerotia ai e ia nga mea o te rangatiratanga o te Atua: <sup>4</sup> A, i a ratou ka huihui tahi me ia, ka whai kupu ia kia kaua ratou e haere atu i Hiruharama, a ka mea, Engari kia taria te mea i korerotia i mua e te Matua, i rongo ra koutou ki ahau. <sup>5</sup> I iriiri hoki a Hoani ki te wai; ko koutou ia, e kore e maha ake nga ra, ka iriiria ki te Wairua Tapu. <sup>6</sup> No reira, i a ratou ka tamene, ka ui ratou ki a ia, E te Ariki, ko te wa ianei tenei e whakahoki ai koe i te rangatiratanga ki a Iharaira? <sup>7</sup> Na ko tana meatanga ki a ratou, Ehara ma koutou te mohio ki nga taima, ki nga wa ranei, kua whakaritea e te Matua mana ake te tikanga. <sup>8</sup> Otiia ka riro he kaha i a koutou, ina haere mai te Wairua Tapu ki runga ki a koutou: a hei kaiwhakaatu koutou moku ki Hiruharama, ki Huria katoa, ki Hamaria hoki, a tae noa ki te pito whakamutunga o te ao. <sup>9</sup> A, no ka mutu tana korero i enei mea, i a ratou ano e titiro atu ana, ka tangohia atu ia, a na te kapua i kopaki atu i o ratou kanohi. <sup>10</sup> A, i a ratou e titiro matatau atu ana ki te rangi, i a ia e haere ana, na ko nga tangata tokorua e tu ana i to ratou taha, he ma nga kakahu; <sup>11</sup> E mea ana, E nga tangata o Kariri, he aha ta koutou e tu, e matakitaki atu na ki te rangi? ko tena Ihu kua tangohia atu na i a koutou ki te rangi, ka pera ano tona haerenga mai me ia i tirohia atu na e koutou e haere ana ki te rangi.

12 Na hoki ana ratou ki Hiruharama i te maunga e huaina nei ko Oriwa, he wahi e tata ana ki  
 13 Hiruharama, he haerenga hapati. A ka tomo ratou, ka kake ki te ruma i runga, ki te wahi i noho  
 ai ratou; ara a Pita, a Hemi, a Hoani, a Anaru, a Piripi, a Tamati, a Patoromu, a Matiu, a Hemi tama  
 14 a Arapiu, a Haimona Heroti, a Hura te teina o Hemi. Ko enei katoa kotahi tonu te whakaaro i u  
 ai ki te inoi, ki te karakia, me nga wahine; me te whaea o Ihu, me Meri; me ona teina.  
 15 I aua ra ka whakatika a Pita i waenganui o nga akonga; a he tokomaha nga tangata i huihui,  
 16 kei te kotahi rau e rua tekau; a ka mea, E hoa ma, e oku teina, i tika ano kia whakaritea tenei  
 karaipiture, ta te Wairua Tapu i korerotia ra i mua e te mangai o Rawiri mo Hura, mo te kaiarahi i  
 17 te hunga nana i hopu a Ihu. I huihuia tahitia hoki ia ki a tatou, i a ia ano tetahi wahi o tenei mahi.  
 18 Na hokona ana e taua tangata tetahi mara ki te utu o tona hara; a taka tupou iho, koara pu i  
 19 waenganui, pakaru katoa ki waho ona whekau. I mohiotia tenei e te hunga katoa e noho ana i  
 Hiruharama; na reira taua wahi i huaina ai ki to tatou reo ko Akerama, ara ko te Mara o te Toto.  
 20 Kua oti hoki te tuhituhi ki te pukapuka o nga Waiata, Kia ururatia tona nohoanga, kua hoki  
 21 tetahi tangata e noho ki reira: me tenei, Kia riro tana mahi tiro tiro i tetahi atu. No reira, ko nga  
 tangata i haere tahi nei tatou, i nga wa katoa i haereere mai ai, i haereere atu ai te Ariki, a Ihu i roto  
 22 i a tatou, Hei te iriiringa a Hoani timata ai, a tae noa ki te ra i tangohia atu ai ia i a tatou, me  
 23 whakatu tetahi o era hei hoa mo tatou ki te whakaatu i tona aranga mai. A tokorua a ratou i  
 whakarite ai, ko Hohepa i huaina nei ko Pahapa, ko tetahi o ona ingoa ko Hutuha, raua ko Matiaha.  
 24 Na ka inoi ratou, ka mea, Ko koe, e te Ariki, e mohio ana ki nga ngakau o te katoa, mau e whakaatu  
 25 ko wai o tenei tokorua tau i whiriwhiri ai, Hei tango i te wahi i tenei mahi minita, i te turanga  
 26 apotoro hoki, i taka atu a Hura, he mea kia haere ai ia ki tona wahi. Na ka maka e ratou o raua  
 rota; a ka tau te rota ki a Matiaha; a uru ana ia ki nga apotoro tekau ma tahi.

## Chapter 2

1 A, no ka taka mai te ra o te Petekoha, e noho tahi ana ratou katoa i te wahi kotahi. 2 Na puta  
 whakarere mai ana he haruru nui no te rangi, ano he hau nui e keria ana, a ki katoa te whare i noho  
 3 ai ratou. Heoi puta mai ana ki a ratou etahi arero he mea manganga, ano he ahi, a tau iho ana ki

<sup>4</sup>  
 runga ki tenei, ki tenei o ratou. Na ki katoa ratou i te Wairua Tapu, a ka timata te korero, rere ke ana nga reo, rite tonu ki ta te Wairua i hoatu ai ki a ratou kia korerotia.

<sup>5</sup>  
 I Hiruharama ano e noho ana etahi Hurai, he hunga whakaaro, no nga iwi katoa i raro o te rangi. <sup>6</sup> Na i te wa i rangona ai taua haruru, ka whakarapopoto te mano, ka pororaru, no te mea ka

rangona e tera, e tera, tona reo e korerotia ana e ratou. <sup>7</sup> Na ka oho ratou katoa, ka miharo, ka mea,

Na, ehara ianei enei katoa e korero nei i te hunga no Kariri? <sup>8</sup> He aha tatou ka rongu nei, ia tangata,

ia tangata, i o tatou reo o to tatou whanautanga? <sup>9</sup> Ko te hunga o Patia, o Meria, o Erama, ko nga

mea e noho ana i Mehopotamia, i Huria, i Kaparokia, i Ponoto, i Ahia, <sup>10</sup> I Perukia, i pamapurua, i Ihupa, i nga wahi o Ripia e patata ana ki Hairini, me nga manuhiri o Roma, nga Hurai, nga

porohiraiti, <sup>11</sup> Nga Kariti, nga Arapi, e rongu ana tatou i a ratou e whakapuaki ana i nga mahi tohu

a te Atua, no tatou ano nga reo. <sup>12</sup> A miharo katoa ana ratou, pohehe ana, ka mea tetahi ki tetahi,

He aha tenei? <sup>13</sup> Ko etahi i tawai, i mea, E ki ana ratou i te waina hou.

<sup>14</sup>  
 Otira ka whakatika a Pita me te tekau ma tahi, ka hikitia tona reo, ka whai kupu ki a ratou, E nga tangata o Huria, me koutou katoa e noho nei i Hiruharama, kia mohio koutou ki tenei, kia

whai taringa mai ki aku kupu: <sup>15</sup> Kahore hoki o enei haurangi me ta koutou e whakaaro nei, ko te

toru noa hoki tenei o nga haora o te ra; <sup>16</sup> Engari ko te mea tenei i korerotia e Hoera poropiti; <sup>17</sup> A tenei ake kei nga ra whakamutunga, e ai ta te Atua, ka ringihia e ahau toku Wairua ki nga kikokiko katoa; ka poropiti hoki a koutou tama, a koutou tamahine, ka moemoea hoki o koutou kaumatua:

<sup>18</sup>  
 Ae, ka ringihia ano e ahau toku Wairua i aua ra, ki aku pononga tane, ki aku pononga wahine;

a ka poropiti ratou. <sup>19</sup> Ka whakakitea ano e ahau nga mea whakamiharo i te rangi i runga, me nga

tohu ki te whenua i raro; he toto, he kapura, he paowa pongere: <sup>20</sup> Ko te ra ka huri hei pouri, ko te marama hoki hei toto, i mua o te putanga mai o te ra o te Ariki, taua ra nui whakaharahara, rongonui.

<sup>21</sup>  
 Na, ko reira ora ai te hunga katoa e karanga ana ki te ingoa o te Ariki. <sup>22</sup> E nga tangata o Iharaira, kia rongu koutou ki enei kupu; Ko Ihu o Nahareta, he tangata i tino whaitohungia e te Atua ki a koutou i runga i nga merekara, i nga mea whakamiharo, i nga tohu i mea ai te Atua kia mahia e ia

i waenganui o koutou, e mo hio ana ano ra koutou. <sup>23</sup> Ko tenei tangata i tukua atu, he mea i ata whakaaroa, a i mohiotia noatia ake e te Atua, tangohia ana e koutou, whakamatea iho, he mea ripeka

na te ringa o nga tangata kino <sup>24</sup> Na te Atua ia i whakaara ake, nana i wewete nga mamae o te

mate: no te mea e kore ia e taea te pupuri e taua mate. <sup>25</sup> Ko ta Rawiri korero hoki tenei mona, I



kite ahau i te Ariki i mua i toku aroaro i nga ra katoa; kei toku ringa matau nei ia, e kore ai ahau e  
 whakakorikoria: <sup>26</sup> Koia i koa ai toku ngakau, i whakamanamana ai toku arero: i takoto tumanako  
 ai ano oku kikokiko. <sup>27</sup> No te mea e kore e waiho e koe toku wairua i te reinga, e kore ano e tukua  
 tau Mea Tapu kia kite i te pirau. <sup>28</sup> Kua whakakitea e koe ki ahau nga huarahi o te ora; ka meinga  
 e koe kia ki tonu toku koa i tou aroaro. <sup>29</sup> E oku teina, e tika ana kia aronui he kupu ki a koutou  
 mo te tupuna nei mo Rawiri, ara kua mate ia, kua tanumia, kei a tatou ano tona urupa, a taea noatia  
 tenei ra. <sup>30</sup> I te mea he poropiti ia, a i mohio kua oati te Atua i te oati ki a ia, ka whakaputaina ake  
 tetahi, he hua no tona hope, hei noho ki runga ki tona torona; <sup>31</sup> A, i tana kite wawe i tenei, korerotia  
 ana e ia te aranga o te Karaiti, ara kihai tona wairua i waiho i te reinga, kihai ano tona kikokiko i  
 kite i te pirau. <sup>32</sup> Kua whakaarahia ake tenei Ihu e te Atua: ko matou katoa nga kaiwhakaatu. <sup>33</sup> A,  
 ka oti nei ia te whakanui e te ringa matau o te Atua, a ka homai nei ki a ia e te Matua te Wairua  
 Tapu i korerotia ra i mua, na kua ringihia mai e ia tenei, e kite nei, e rongu nei koutou. <sup>34</sup> Kahore  
 hoki a Rawiri i kake ki te rangi; heoi e mea ana ia, I mea te Ariki ki toku Ariki, hei toku matau koe  
 noho ai, <sup>35</sup> Kia meinga ra ano e ahau ou hoariri hei turanga waewae mou. <sup>36</sup> No reira ka kia matau  
 pu te whare katoa o Iharaira, kua meinga e te Atua hei Ariki, hei Karaiti, taua Ihu i ripekatia na e  
 koutou.  
<sup>37</sup> No ratou ka rongu, ka werowero i roto i o ratou ngakau, ka mea ki a Pita ratou ko era atu  
 apotoro, E nga tuakana, me aha matou? <sup>38</sup> Na ko te meatanga a Pita ki a ratou, Ripeneta, kia iriiria  
 tena tangata, tena tangata o koutou i runga i te ingoa o Ihu Karaiti, hei murunga hara; a ka riro i a  
 koutou te mea homai, ara te Wairua Tapu. <sup>39</sup> Ki a koutou hoki, ki a koutou tamariki, te kupu homai,  
 ki te hunga katoa ano o tawhiti, ki nga mea e karangatia e te Ariki, e to tatou Atua, ki a ia. <sup>40</sup> He  
 maha atu ano nga kupu i korero ai, i kauwhau ai ia, i mea ai, Me whakaora koutou i a koutou i tenei  
 whakatupuranga parori ke. <sup>41</sup> Na, ko nga mea tonu i tango i tana kupu i iriiria: me te mea e toru  
 mano nga wairua i honoa mai ki a ratou i taua ra.  
<sup>42</sup> A i u tonu ratou ki te whakaakoranga a nga apotoro, ki te kotahitanga, ki te whawhati taro,  
 a ki te inoi. <sup>43</sup> Tau iho ana te wehi ki nga wairua katoa; he maha hoki nga mea whakamiharo me  
 nga tohu i meinga e nga apotoro. <sup>44</sup> I noho tahi ano te hunga whakapono katoa, i huihuia ano hoki  
 a ratou mea katoa; <sup>45</sup> I hokona atu hoki a ratou rawa me nga taonga, tuwhaina ana ma te katoa, rite  
 tonu ki te mate o tenei, o tenei. <sup>46</sup> Haere tonu ana hoki ratou i tenei ra, i tenei ra ki te temepara,  
 kotahi tonu ano te whakaaro; whawhati taro ana i o ratou kainga, kai ana i a ratou kai i runga i te

47  
 koa, i te ngakau tapatahi; E whakamoemiti ana ki te Atua, e paingia ana hoki e te iwi katoa. A honoa mai ana e te Ariki ki a ratou i tena ra, i tena ra, i tena ra, te hunga e whakaorangia ana.

### Chapter 3

1 Na e haere tahi atu ana a pita raua ko Hoani ki te temepara i te haora inoi, i te iwa o nga haora.  
 2 Na ka kawea mai tetahi tangata, he kopa no te kopu mai ano o tona whaea, he mea whakatakoto i nga ra katoa ki te kuwaha o te temepara i huaina nei ko Ataahua, ki te tono mea mana i te hunga e tomo ana ki te temepara; 3 No tona kitenga i a Pita raua ko Hoani meake tomo ki te temepara, ka tono ia i tetahi mea mana. 4 Na ka whakamau atu nga kanohi o Pita raua ko Hoani ki a ia, ka mea, Titiro mai ki a maua. 5 Ka whakarongo ia ki a raua, hua noa e riro mai tetahi mea a raua mana.  
 6 Ano ra ko Pita, Ko te hiriwa me te koura kahore i ahau; ko te mea ia kei ahau, maku tena e hoatu ki a koe: I runga i te ingoa o Ihu Karaiti o Nahareta, whakatika, haere. 7 Katahi ia ka hopu i tona ringa matau ka whakaara ake i a ia: i reira tonu kua whai kaha ona waewae me nga pona. 8 A, ko tona mawhititanga ake, ka tu, ka timata te haere, tomo tahi ana me raua ki te temepara, e haere ana, e tupeke ana, e whakamoemiti ana ki te Atua. 9 A i kite te iwi katoa i a ia e haere ana, e whakamoemiti ana ki te Atua. 10 Katahi ratou ka mohio ki a ia, ko ia ano tera i noho ra ki te tatau Ataahua o te temepara, tono mea ai mana: na nui atu to ratou miharo me te ihiihi ki taua mea i pa ki a ia. 11 I a ia e pupuri ana ki a Pita raua ko Hoani, ka oma atu te iwi katoa ki a ratou i te whakamahau i huaina nei ko ta Horomona, nui rawa te whakamiharo.  
 12 A, i te kitenga o Pita, ka whai kupu atu ia ki te iwi, E nga tangata o Iharaira, he aha ta koutou e miharo nei ki tenei tangata? he aha hoki koutou ka whakamau ai te titiro ki a maua, me te mea he mana no maua ake he ngakau karakia ranei i meati a ai ia kia haere? 13 Na te Atua o Aperahama, o ihaka, o Hakopa, na te Atua o o tatou matua, i whakakororia tana Tama a Ihu: ko ta koutou i tuku na, i whakakahore na i te aroaro o Pirato, kua oti ra i a ia kia tukua ia. 14 Otira whakakahoretia ana e koutou te Mea Tapu, te Mea Tika, tonoa ana ko te tangata kohuru kia homai ki a koutou; 15 Patua ana hoki e koutou te Take o te ora; kua whakaarahia nei ia e te Atua i te hunga mate, ko matou nei ona kaiwhakaatu. 16 A na te whakapono ki tona ingoa i meinga ai e tona ingoa tenei tangata kia kaha, e kite nei, e matau nei koutou; ae ra, ko te whakapono ki a ia te mea nana i hoatu tenei ora

<sup>17</sup>  
 nui ki tenei i te aroaro o koutou katoa. Na, e oku teina, e mahara ana ahau na te kuware tena  
<sup>18</sup>  
 mahi a koutou, pera i ta o koutou rangatira. Engari ko nga mea a te Atua i whakakitea i mua e  
<sup>19</sup>  
 te mangai o nga poropiti katoa, mo tana Karaiti kia whakamamaetia, kua rite enei i a ia. No  
 reira, Ripeneta, a tahuri mai ano koutou, kia murua ai o koutou hara, kia puta mai ai i te aroaro o  
<sup>20</sup>  
 te Ariki he wa whakahauora. A kia tonoa mai ai e ia te Karaiti i whakaritea nei mo koutou, ara  
<sup>21</sup>  
 a Ihu: Kua takoto nei te tikanga kia noho ia ki te rangi a taea noatia nga wa o te whakahokinga  
 mai o nga mea katoa, i korero ai te Atua ra te mangai o ana poropiti tapu no te timatanga mai ano  
<sup>22</sup>  
 o te ao. I mea ra hoki a Mohi, Ma te Ariki, ma te Atua, e whakaara ake he poropiti mo koutou  
 i roto i o koutou teina, he penei ano me ahau; ko ia ta koutou e whakarongo ai i nga mea katoa e  
<sup>23</sup>  
 mea ai ia ki a koutou. A taua wa, ko nga wairua katoa e kore e whakarongo ki taua poropiti, ka  
<sup>24</sup>  
 whakamatea rawatia i roto i te iwi. Ae ra, ko nga poropiti katoa o Hamuera iho ano, tae mai ki  
<sup>25</sup>  
 o muri nei, ko te hunga katoa i korero, i whakaatu ano hoki ratou i nga ra nei. Ko koutou aua  
 tama a nga poropiti, a te kawenata hoki i whakatakotoria e te Atua ki o koutou matua, i mea ra ia  
<sup>26</sup>  
 ki a Aperahama, Ma tou uri ka manaakitia ai nga hapu katoa o te ao. Mo koutou ke hoki i te  
 tuatahi, i tana whakaaranga ake ai i tana Tama, te tononga mai nei a te Atua i a ia ki a koutou hei  
 manaaki i a koutou, hei whakatahuri i tenei, i tenei o koutou i o koutou kino.

#### Chapter 4

<sup>1</sup>  
 A, i a raua e korero ana ki te iwi, ka puta ohore mai ki a raua nga tohunga, te rangatira o te  
<sup>2</sup>  
 temepara me nga Haruki, He nui te pawera mo ta raua ako i te iwi, mo te kauwhau hoki i runga  
<sup>3</sup>  
 i a Ihu i te aranga mai i te hunga mate. Na ka mau o ratou ringa ki a raua, meinga ana kia tiakina  
<sup>4</sup>  
 kia ao ra ano te ra, i te mea hoki kua ahiahi. Otira he tokomaha o te hunga i rongu i te kupu i  
 whakapono, a ko te tokomaha o nga tangata me te mea e rima mano.  
<sup>5</sup>  
 Na i te aonga ake ka huihui o ratou rangatira, nga kaumatua, me nga karaipi ki Hiruharama,  
<sup>6</sup>  
 Ratou ko te tino tohunga, ko Anaha, ko Kaiapa, ko Hoani, ko Arehanara, me nga whanaunga katoa  
<sup>7</sup>  
 o te tohunga nui. A, no ka whakaturia raua ki waenganui, ka ui ratou, Tena koa te mana, te ingoa  
<sup>8</sup>  
 ranei, i meatia ai tenei e korua? Katahi a Pita, ki tonu i te Wairua Tapu, ka mea ki a ratou, E nga

rangatira o te iwi, e nga kaumatua, o Iharaira. <sup>9</sup> Mehemea ki te uiuia maua aiane mo te mahi pai  
 i mahia ki te tangata haua, i peheatia taua tangata i ora ai; <sup>10</sup> Kia mohio koutou katoa, me te iwi  
 katoa o Iharaira, na te ingoa o Ihu Karaiti o Nahareta, i ripekatia na e koutou, i whakaarahia ra e te  
 Atua i te hunga mate, nana tenei i tu ora ai i to koutou aroaro. <sup>11</sup> Ko ia te kohatu i whakakahoretia  
 na e koutou, e nga kaihanganga, a kua meinga nei hei mo te kokonga. <sup>12</sup> Kahore hoki he ora i tetahi  
 atu: kahore hoki he ingoa ke atu i raro o te rangi kua homai ki nga tangata, e ora ai tatou. <sup>13</sup> Na ka  
 kite ratou i te maia o Pita raua ko Hoani, a ka matau ki a raua ehara i te mea whakaako, engari he  
 hunga kuware, ka miharo ratou; ka mohio hoki he hoa raua no Ihu. <sup>14</sup> Ka kite hoki i te tangata i  
 whakaorangia e tu tahi ana ratou, kahore rawa i taea tetahi kupu whakahe ma ratou.  
<sup>15</sup> Na ka tono ratou i a raua kia haere i waho o te runanga, a ka kororerero ki a ratou ano, <sup>16</sup> Ka  
 mea, Me aha e tatou enei tangata? ka kite katoa nei hoki te hunga e noho ana i Hiruharama, he  
 merekara nui kua meinga nei, a e kore e ahei te whakakorekore e tatou. <sup>17</sup> Otia, kia kua ai e  
 horapa atu ki roto ki te iwi, kia kaha ta tatou whakawehi i a raua, kei korero ki tetahi tangata a muri  
 nei i runga i tenei ingoa. <sup>18</sup> A karangatia ana raua e ratou, ka mea ki a raua, Kia kua rawa e korero,  
 kia kua e whakaako, i runga i te ingoa o Ihu. <sup>19</sup> Na ka whakahoki a Pita raua ko Hoani ki a ratou,  
 ka mea, Whakaaroa e koutou, ka tika ranei ki te aroaro o te Atua ko koutou kia whakarangona,  
 kua te Atua? <sup>20</sup> E kore hoki e ahei kia kua e korerotia e maua nga mea i kite ai, i rongo ai matou.  
<sup>21</sup> Heoi whakawehi ana ano ratou i a raua, a tukua ana kia haere, kihai hoki i kitea he mea e whiua  
 ai raua, i wehi i te iwi: i whakakororia katoa nei nga tangata i te Atua mo taua mea i meatia; <sup>22</sup> No  
 te mea kua neke atu i te wha tekau nga tau o te tangata i meinga nei ki a ia tenei merekara whakaora.  
<sup>23</sup> A ka oti raua te tuku, ka haere ki o raua hoa, a korerotia ana nga mea katoa i korero ai nga  
 tohunga nui me nga kaumatua ki a raua. <sup>24</sup> A, i to ratou rongonga, ka karanga ake ratou ki te Atua,  
 he kotahi te reo, ka mea, E te Ariki, nau nei i hanga te rangi me te whenua, te moana, me o reira  
 mea katoa: <sup>25</sup> Nau te kupu i korerotia e te Wairua Tapu, na te mangai o to matou matua, o tau  
 pononga, o Rawiri, He aha ka nana ai nga Tauwiwi, ka whakaaro horihori ai nga iwi? <sup>26</sup> I whakatika  
 ake nga kingi o te whenua, i huihui ngatahi nga rangatira, ki te whawhai ki te Ariki raua ko tana  
 Karaiti. <sup>27</sup> He pono nei hoki te huihuinga ki tenei pa o Herora, o Ponotia Pirato, o nga Tauwiwi,  
 ratou ko te iwi o Iharaira, ki tau Tama tapu, ki a Ihu i whakawahia nei e koe, <sup>28</sup> Ki te mea i ta tou  
 ringa, i ta tou whakaaro i whakatakoto ai i mua kia meatia. <sup>29</sup> Na, titiro iho, e te Ariki, aiane ki a

<sup>30</sup>  
 ratou kupu whakawehi: tukua mai hoki ki au pononga kia tino maia te korero i tau kupu, Ko  
 koe ia e totoro mai ana tou ringa ki te whakaora; kia meatia hoki te tohu, he mea whakamiharo i  
<sup>31</sup>  
 runga i te ingoa o tau Pononga tapu, o Ihu. I te mutunga o ta ratou inoi, ka ngaueue te wahi i  
 mine ai ratou, a ki katoa ratou i te Wairua Tapu, na, maia noa atu ratou ki te korero i te kupu a te  
 Atua.  
<sup>32</sup>  
 Kotahi ano ngakau, kotahi ano wairua o te mano o te hunga whakapono: kihai ano tetahi o  
<sup>33</sup>  
 ratou i mea, mana ake tetahi o ana taonga; heoi he mea huihui a ratou mea katoa. A nui atu te  
 kaha i whakapuakina ai e nga apotoro te aranga o te Ariki, o Ihu; he nui ano te aroha noa i runga i  
<sup>34</sup>  
 a ratou katoa. Kahore hoki tetahi o ratou i hapa: ko te hunga hoki he kainga, he whare o ratou,  
<sup>35</sup>  
 hokona atu ana e ratou, a mauria ana mai nga utu o nga mea i hokona, Whakatakotoria ana ki  
 nga waewae o nga apotoro: na ka tuwhaina ma ia tangata, ma ia tangata, he mea whakarite ki te  
<sup>36</sup>  
 mate o ia tangata. A ko Hohi i huaina e nga apotoro ko Panapa, ko te tikanga tenei ina  
<sup>37</sup>  
 whakamaoritia, ko te Tama a te whakamarietanga, he Riwaiti, ko Kaiperu tona kainga, He wahi  
 whenua tona, na hokona atu ana, mauria ana nga moni, whakatakotoria ana ki nga waewae o nga  
 apotoro.

## Chapter 5

<sup>1</sup>  
 Na ko tetahi tangata ko Anania tona ingoa, raua ko tana wahine, ko Hapaira, i hoko atu i tetahi  
<sup>2</sup>  
 whenua; A puritia ana e ia tetahi wahi o te utu, ko tana wahine hoki i mohio ki taua mea huna,  
<sup>3</sup>  
 mauria ana tetahi wahi, whakatakotoria ana ki nga waewae o nga apotoro. Na ko te meatanga atu  
 a Pita, E Anania, na te aha i whakakiia ai tou ngakau e Hatana kia teka koe ki te Wairua Tapu, kia  
<sup>4</sup>  
 puritia atu ai tetahi wahi o te utu o te whenua? I te mea kahore ano i riro, he teka ianei nau ake  
 tau mea? a ka oti te hoko tikanga? na te aha tenei mea i whakaaroa ai i roto i tou ngakau? kihai  
<sup>5</sup>  
 hoki koe i teka ki te tangata, engari ki te Atua. A, no te rongonga o Anania i enei kupu, hinga ana  
<sup>6</sup>  
 ki raro, mate rawa: he nui ano te wehi i tau ki te hunga katoa i rongo i enei mea. Na ka whakatika  
<sup>7</sup>  
 nga taitamariki, takai ana i a ia, a maua atu ana ia ki waho, tanumia ana. A, patata ki te toru haora  
<sup>8</sup>  
 i muri, ka tomo mai tana wahine, kihai hoki i mohio he aha te mea kua meatia. Na ko te meatanga  
 a Pita ki a ia, Korero mai ki ahau, ko te utu ranei tera i hokona atu ai e korua te whenua? ka mea

9  
ia, Ae, koia tena. Ka mea a Pita ki a ia, he aha korua i whakaaro tahi ai ki te whakamatautau i te Wairua o te Ariki? Nana, kei te kuwaha nga waewae o te hunga i tanumia ai tau tane, ma ratou koe

10  
e kawea ki waho. Na hinga tonu iho ia ki ona waewae, hemo rawa: a, ko te tomonga mai o nga taitamariki, rokohanga mai kua mate, na kawea ana ia ki waho, tanumia ana ki te taha o tana tane.

11  
A nui atu te wehi o te hahi katoa, o te hunga katoa ano i rangona ai enei mea.

12  
A na nga ringa o nga apotoro i mahi nga tohu maha, me nga mea whakamiharo, i roto i te iwi; i noho hoki ratou katoa ki te whakamahau o Horomona, kotahi ano te whakaaro. Tena ko era atu tangata kihai rawa tetahi i maia ki te whakauru mai ki a ratou: otira whakanuia ana ratou e

13  
te iwi. A he nui noa atu te hunga whakapono i honoa mai ki te Ariki, tona tino te tane, o te

14  
wahine. Na reira hoki ka mauria e ratou nga turoro ki nga ara, whakatakotoria ana ki runga i nga moenga, i nga whariki, me kore noa e taumarumaru iho ki tetahi o ratou te atarangi o Pita, i a

15  
ia e haere ana. I hui katoa mai ano te mano i nga pa katoa e patata ana ki Hiruharama, me te mau mai i nga turoro, i te hunga e whakaporeareatia ana e nga wairua poke; a whakaorangia ana ratou katoa.

16  
17  
Me i reira ka whakatika te tohunga nui ratou ko ona hoa katoa, ara te wehenga ki nga Haruki,

18  
ki tonu hoki ratou i te hae, A ka pa o ratou ringa ki nga apotoro, maka ana ratou ki te whare

19  
herehere nui. Otira na tetahi anahera a te Ariki i uaki nga tatau o te whare herehere i te po;

20  
arahina mai ana ratou e ia ki waho, ka mea, Haere, e tu i roto i te temepara, ka korero ki te iwi

21  
i nga kupu katoa o tenei ora. A ka rongu ratou i tenei, ka tomo ki te temepara i te atatu, ka whakaako. Na ko te haerenga o te tohunga nui ratou ko ona hoa, karangatia ana kia huihui te runanga me nga kaumatua katoa o nga tama a Ihairaira, a tonoa ana he tangata ki te whare herehere hei tiki

22  
i a ratou. Otira, ko nga katipa i tae mai, kihai i kite i a ratou i roto i te whare herehere, na ka

23  
hoki mai, ka korero. Ka mea, Rokohina atu e matou e tutaki tonu ana te whare herehere u tonu, me nga kaitiaki e tu ana i waho o nga tatau; no te huakanga atu, kahore he tangata i kitea e matou

24  
i roto. A, no ka rongu te rangatira o te temepara ratou ko nga tohunga nui ki enei kupu, ka

25  
pororaru ratou, he aha ra te tukunga iho o taua mea. Na ko te haerenga mai o tetahi, ka korero ki a ratou, ka mea, Nana, ko te hunga i maka ra e koutou ki te whare herehere, e tu mai nei i te temepara, e whakaako ana i te iwi.

26  
Katahi ka haere te rangatira ratou ko nga katipa, a arahina mai ana ratou, otira kihai i taka

27  
kinotia; i wehi hoki ratou i te iwi, kei akina ratou ki te kohatu. A, ka oti ratou te arahi mai, ka

whakaturia ki mua i te runanga: na ka ui te tohunga nui ki a ratou, <sup>28</sup> Ka mea, Kihai ianei matou i ata whakatupato i a koutou kia kaua e whakaako i runga i tenei ingoa? na, kua ki nei Hiruharama i ta koutou whakaakoranga, a e mea ana koutou kia whakairia nga toto o tenei tangata ki runga i a matou. <sup>29</sup> Na ka whakahoki a Pita ratou ko nga apotoro, ka mea, Me whakarongo ra matou ki te Atua, kaua ki te tangata. <sup>30</sup> Na te Atua o o tatou tupuna i whakaara ake a Ihu, i whakamatea na e koutou, he mea whakairi ki te rakau. <sup>31</sup> Kua oti ia te whakanoho e te ringa matau o te Atua ki runga, hei Piriniha, hei Kaiwhakaora, hei homai i te ripeneta, i te murunga hara ki a Iharaira. <sup>32</sup> Ko matou ano nga kaiwhakaatu i enei mea: ko te Wairua Tapu hoki, i homai nei e te Atua ki te hunga e rongongonga ana ki a ia. <sup>33</sup> Otira, i to ratou rongonga i tenei, tu tonu ki o ratou ngakau, a ka whakaaro kia whakamatea ratou. <sup>34</sup> Na ka whakatika tetahi o nga Parihi i roto i te runanga, ko Kamariera te ingoa, he kaiwhakaako i te ture, he tangata e whakanuia ana e te iwi katoa, ka mea, kia nekehia atu aua tangata ki waho mo tetahi wa poto nei. <sup>35</sup> Na ko tana meatanga ki a ratou, E nga tangata o Iharaira, kia tupato ki ta koutou e mea ai ki enei tangata. <sup>36</sup> I nga ra ki muri ka whakatika ake a Teura, me te whakaari i a ia, ko ia he tangata nui: piri atu ana ki a ia etahi tangata, patata ki te wharau: na patua iho ia; a ko te hunga katoa i whakarongo ki a ia, whakamararatia atu ana, a kore ake. <sup>37</sup> A muri iho i taua tangata ka whakatika ake ko Hura o Kariri i nga ra o te tatauranga, a kumea atu ana e ia etahi o te iwi ki te whai i a ia; i ngaro ano hoki tena; a ko te hunga katoa i whakarongo ki a ia, whakamararatia atu ana. <sup>38</sup> Na ko taku kupu tenei ki a koutou, Kati te mea ki enei tangata, waiho noa iho ratou; ki te mea hoki na te tangata tenei whakaaro, tenei mahi, tera e whakakahoretia. <sup>39</sup> Otira mehemea na te Atua, e kore rawa e taea e koutou te whakakahore; kei tupono hoki e whawhai ke ana koutou ki te Atua. <sup>40</sup> A whakaae ana ratou ki a ia: na ka karangatia nga apotoro ki a ratou, ka whiua, ka whakatupatoria kia kaua rawa e korero i runga i te ingoa o Ihu, a tukua ana ratou kia haere. <sup>41</sup> Heoi haere hari atu ana ratou i te aroaro o te runanga, mo ratou kua meinga e pai ana kia whakataurekarekatia mo te Ingoa. <sup>42</sup> A, i nga ra katoa, i roto i te temepara, i nga kainga ranei, kahore e mutu ana ta ratou whakaako, ta ratou kauwhau i a Ihu, ko te Karaiti ia.

## Chapter 6

<sup>1</sup> Na i aua ra, i te mea ka tokomaha haere nga akonga ka amuamu nga Hurai Kariki ki nga  
 Hiperu, no te mea i mahue o ratou pouaru i nga tuwhanga mea o tenei ra, o tenei ra. <sup>2</sup> Katahi ka  
 karangatia e te tekau ma rua te mano o nga akonga, ka mea, E kore e pai kia whakarerea e matou  
 te kupu a te Atua, a kia mahi tepu. <sup>3</sup> No reira, e nga teina, tirohia mai i roto i a koutou kia tokowhitu  
 nga tangata e korerotia paitia ana, e ki ana i te Wairua Tapu, i te matauranga, a ma matou ratou e  
 whakatu ki tenei mahi. <sup>4</sup> Ko matou ia ka u tonu ki te inoi, ki te mahi i te kupu. <sup>5</sup> A pai katoa te  
 mano ki taua korero: na whiriwhiria ana e ratou a Tepene, he tangata e ki ana i te whakapono, i te  
 Wairua Tapu, ratou ko Piripi, ko Porokoru, ko Nikanora, ko Timona, ko Paramena, ko Nikora, he  
 porohiraiti no Anatioka: <sup>6</sup> Na whakaturia ana ratou ki te aroaro o nga apotoro: ka inoi era, ka  
 whakapa i nga ringa ki runga ki a ratou. <sup>7</sup> Heoi tupu ana te kupu a te Atua: tino nui haere ana te  
 tokomaha o nga akonga i Hiruharama; a he ope nui o nga tohunga i tahuri mai ki te whakapono.  
<sup>8</sup> A, ko Tepene, ki tonu i te whakapono, i te mana, nui atu nga merekara me nga tohu i meatia  
 e ia i roto i te iwi. <sup>9</sup> Na ka whakatika etahi o te whakaminenga, e kiia nei ko te whakaminenga o  
 nga Riperetini, etahi hoki o te whakaminenga o te hunga o Hairini, o te hunga o Arehanaria, o te  
 hunga hoki o Kirikia, o Ahia, ka totohe ki a Tepene. <sup>10</sup> Otira kihai i taea e ratou te tu atu ki tona  
 matauranga me te wairua i korero ai ia. <sup>11</sup> Na ka whakakiki ratou i etahi tangata hei mea, I rongu  
 matou i a ia e korero kohukohu ana mo Mohi, mo te Atua ano hoki. <sup>12</sup> Na ka tahuri ratou ki te  
 whakaohoho i te iwi, i nga kaumatua, me nga karaipi hoki, na ka mau ia ia ratou, hopukia ana,  
 kawea atu ana ki te runanga; <sup>13</sup> A whakaturia ana e ratou etahi kaiwhakapae teka, nana i mea,  
 Kahore e mutu te korero kino a tenei tangata mo tenei kainga tapu, mo te ture hoki: <sup>14</sup> I rongu hoki  
 matou ki a ia e mea ana, Ma tenei Ihu o Nahareta e whakangaro te kainga nei, e whakaputa ke hoki  
 nga ritenga i homai e Mohi ki a tatou. <sup>15</sup> A, ko te hunga katoa e noho ana i te runanga, ka titiro pu  
 ki a ia, ka kite i tona mata, ano he mata no te anahera.

## Chapter 7

<sup>1</sup> Katahi ka mea te tohunga nui, He pono ranei enei mea? <sup>2</sup> Na mea ia, E nga teina, e nga matua,  
 whakarongo mai: I puta te Atua o te kororia ki to tatou matua, ki a Aperahama, i a ia i Mehopotamia,  
 a kiano i noho ki Harana, <sup>3</sup> Ka mea ki a ia, Haere atu i tou whenua, i ou whanaunga, a e tomo ki



<sup>4</sup>  
 te whenua e whakakitea e ahau ki a koe. Na puta mai ana ia i te whenua o nga Karari, noho ana  
 ki Harana: a, no te matenga o tona papa, ka whakahekeka mai ia i reira e te Atua ki tenei whenua e  
<sup>5</sup>  
 noho nei koutou. A kihai i hoatu tetahi kainga mona i konei, kore rawa, ahakoa he turanga waewae  
 noa: heoi i oati ia, tera e homai a konei hei kainga mona, mo tona uri hoki i muri i a ia, ahakoa ra  
<sup>6</sup>  
 i taua wa kahore ana tamariki. A i penei te korero a te Atua, tera tona uri e noho manene ki te  
<sup>7</sup>  
 whenua ke: ka meinga hoki hei pononga, a e wha rau tau e tukinotia ana. Na, ko te iwi e meinga  
 ai ratou hei pononga, ka whakawakia e ahau, e ai ta te Atua: muri iho i tenei ka puta mai ratou, a  
<sup>8</sup>  
 ka mahi ki ahau i tenei wahi. A i homai ano e ia ki a ia te kawenata o te kotinga: a whanau ake  
 ta Aperahama ko Ihaka, a i te waru o nga ra ka kotia; a na Ihaka ko Hakopa; na Hakopa hoki nga  
<sup>9</sup>  
 tupuna kotahi tekau ma rua. Na ka hae nga tupuna ki a Hohepa, a hokona ana ia ki Ihipa: otira i  
<sup>10</sup>  
 a ia te Atua; Nana ia i whakaora i ona matenga katoa, a hoatu ana ki a ia he pai, he matauranga  
 i te aroaro o Parao kingi o Ihipa; a meinga ana ia e tera hei kawana mo Ihipa, mo tona whare katoa  
<sup>11</sup>  
 hoki. Na i reira ka puta he matekai ki te whenua katoa o Ihipa, o Kanaana, a he mate nui: kihai  
<sup>12</sup>  
 rawa i kitea he oranga e o tatou matua. A, no te rongonga o Hakopa, e whai witi ana a Ihipa, ka  
<sup>13</sup>  
 tonoa e ia o tatou matua, ko te tononga tuatahi. A, no te tononga tuarua, ka whakamohiotia a  
<sup>14</sup>  
 Hohepa ki ona tuakana; a ka whakaaturia ki a Parao te iwi o Hohepa. Na ka tonono tangata a  
 Hohepa ki te karanga i tona papa, i a Hakopa ki a ia, i ona huanga katoa hoki, e whitu tekau ma  
<sup>15</sup>  
 rima nga wairua. Na heke ana a Hakopa ki Ihipa, a ka mate, a ia me o tatou matua. A kawe  
<sup>16</sup>  
 atu ana ratou ki Hekeme, whakatakotoria ana ki te urupa i hokona mai ra e Aperahama, he moni  
 hiriwa te utu, i nga tama a Hamora i Hekeme.  
<sup>17</sup>  
 A, no ka tata mai te wa mo te mea i korerotia ra i mua, i oatitia ra e te Atua ki a Aperahama,  
<sup>18</sup>  
 ka tupu te iwi, ka tini haere ki Ihipa, A tae noa ki te putanga ake o tetahi atu kingi mo Ihipa,  
<sup>19</sup>  
 kihai nei i mohio ki a Hohepa. Ko ia te mea nana i tinihanga to tatou iwi, i whakatupu kino o  
<sup>20</sup>  
 tatou matua, i meatia ai kia maka atu a ratou tamariki kei puta ki te ora. No taua wa ka whanau  
 a Mohi, he tangata tino ataahua; e toru nga marama i whakatupuria ai ia i roto i te whare o tona  
<sup>21</sup>  
 papa, A, no ka maka atu ia, ka tangohia ake ia e te tamahine a Parao, a atawhaitia ana hei tamaiti  
<sup>22</sup>  
 ake mana. Na i ata whakaakona a Mohi ki nga mea katoa o te matauranga o nga Ihipiana; a he  
<sup>23</sup>  
 mana rawa ia, i te kupu, i te mahi. A, ka tata ona tau ki te wha tekau, ka uru mai te whakaaro ki  
<sup>24</sup>  
 tona ngakau kia haere ia ki ona tuakana, ki nga tama a Iharaira. A, i tona kitenga i tetahi o ratou

e tukinotia ana, ka awhina ia i a ia, a patua iho e ia te Ihipiana, a ka whai utu mona i tukinotia ra:  
25

Hua noa e mohio ona tuakana, nona te ringa e homai ai e te Atua te whakaoranga mo ratou: heoi

26  
kikai ratou i mohio. Na i te aonga ake ka puta atu ia ki etahi e whawhai ana ki a raua, ka tahuri  
ki te wawao i a raua, ka mea, E hoa ma, he teina, he tuakana korua: he aha korua ka kino ai ki a

27  
korua ano? Otira peia atu ana ia e te tangata nana te he ki tona hoa; i mea ia, Na wai koe i mea

28  
hei rangatira, hei kaiwhakawa mo maua? E mea ana koe ki te whakamate i ahau, me koe i

29  
whakamate ra i te Ihipiana inanahi? Na ka tahuti a Mohi i taua korero, a noho manene ana i  
Miriana; a tokorua ana tama i whanau ki reira.

30

A, no ka tutuki nga tau e wha tekau, ka puta ki a ia tetahi anahera a te Ariki i te koraha o

31  
Maunga Hinai, i roto i te mura ahi i te rakau. A, no te kitenga o Mohi, ka miharo ki taua

32  
whakakitenga; a i a ia ka whakatata atu ki te matakitaki, ka puaki mai te reo o te Ariki ki a ia, Ko  
te Atua ahau o ou matua, ko te Atua o Aperahama, o Ihaka, o Hakopa. Na wiri ana a Mohi, kore

33  
rawa i kaha ki te titiro atu. A ka mea mai te Ariki ki a ia, Wetekia atu nga hu i ou waewae: ko

34  
te wahi hoki e tu na koe he oneone tapu. Kua tino kite hoki ahau i te mate o toku iwi e noho nei  
i Ihipa, kua rongo hoki i ta ratou aue, a kua heke iho nei ahau ki te whakaora i a ratou. Na, haere

35  
mai, ka tonoa koe e ahau ki Ihipa. Na ko taua Mohi i whakakahoretia ra e ratou, i mea ra ratou,  
na wai koe i mea hei rangatira, hei kaiwhakawa? ko ia ano i tonoa e te Atua hei rangatira, hei

36  
kaiwhakaora, he mea na te ringa o te anahera i puta mai ra ki a ia i te rakau. Na taua tangata  
ratou i arahi atu, i muri iho i tana mahinga i nga mea whakamiharo, i nga tohu, ki te whenua o Ihipa,

37  
ki te Moana Whero, ki te koraha hoki i nga tau e wha tekau. Ko taua Mohio ano tenei i mea atu  
ra ki nga tamariki a Iharaira, Ma te Atua e whakaara ake he poropiti mo koutou i roto i o koutou

38  
teina, he penei me ahau. Ko ia ano tenei i te whakaminenga i te koraha, raua ko te anahera i  
korero ra ki a ia i Maunga Hinai, ko o tatou matua hoki: i riro mai ai i a ia nga kupu ora hei homai

39  
ki a tatou. Kikai nei o tatou matua i pai ki te whakarongo ki a ia, heoi peia atu ana ia e ratou, a

40  
hoki ana o ratou ngakau ki Ihipa. A mea ana ratou ki a Arona, hanga ma tatou etahi atua hei  
haere ki mua i a tatou: ko tenei Mohi hoki i arahina mai nei tatou i te whenua o Ihipa, kahore tatou

41  
e matau kua ahatia ranei. Heoi hanga ana e ratou he kua o kau i aua ra, tapaea ana he patunga  
tapu ma taua whakapakoko, a koa ana o ratou ngakau ki nga mahi a o ratou ringa.

42

Na ka tahuri ke te Atua, tukua atu ana ratou kia karakia ki te ope o te rangi; kia pera me te  
mea i tuhia ki te pukapuka a nga poropiti, I homai koia e koutou ki ahau nga patunga tapu me nga

whakahere i nga tau e wha tekau i te koraha, e te whar e o Iharaira? <sup>43</sup> Na kua mau koutou ki te tapenakara o Moroko, ki te whetu o to koutou atua o Reipana, ki nga whakapakoko i hanga e koutou

hei koropiko atu; na, maku koutou e kawe atu ki tawahi o Papurona. <sup>44</sup> I o tatou matua te tapenakara o te whakaaturanga i te koraha, tana hoki i whakarite ai, i mea ai ki a Mohi kia hanga e ia, kia rite

ki te tauira i kite ai ia. <sup>45</sup> A, i o ratou na ra, na o tatou matua i mau mai, i a ratou ko Hohua i haere mai ai ki te noho i te whenua o nga Tauwiwi, i peia atu nei e te Atua i te aroaro o o tatou matua, a

taea noatia nga ra i a Rawiri; <sup>46</sup> I paingia nei ia e te Atua, a i inoi hoki mana e rapu he nohoanga mo te Atua o Hakopa. <sup>47</sup> Na Horomona ia i hanga he whare mona. <sup>48</sup> He ahakoa ra, e kore te

Runga Rawa e noho ki nga whare i hanga e te ringa; ko ta te poropiti hoki tena i mea ai, <sup>49</sup> Ko te rangi toku torona, ko te whenua toku turanga waewae; he whare pehea ta koutou e hanga ai moku? e ai ta te Ariki: a ko tehea te wahi e okioki ai ahau? <sup>50</sup> Ehara ianei i toku ringa nana enei mea katoa i hanga?

<sup>51</sup> E te hunga kaki maro, kahore nei i kotia te ngakau me nga taringa, he whakakeke tonu ta koutou ki te Wairua Tapu: rite tonu ta koutou ki ta o koutou matua. <sup>52</sup> Ko tehea o nga poropiti kihai i whakatupuria kinotia e o koutou matua? whakamatea iho e ratou te hunga i poropititia ai te haerenga mai o te Mea Tika: ko koutou nei ona kaituku, ona kaikohuru; <sup>53</sup> Ko koutou, kua riro na i a koutou te ture, i ta nga anahera i whakatakoto mai ai, heoi kihai i puritia e koutou.

<sup>54</sup> A ka rongu ratou ki enei mea, na tu rawa ki roto ki o ratou ngakau, tetea ana o ratou niho ki a ia. <sup>55</sup> Otiia ko ia, ki tonu i te Wairua Tapu, titiro matatau atu ana ki te rangi, ka kite i te kororia o te Atua, i a Ihu hoki e tu ana i te ringa matau o te Atua; <sup>56</sup> A ka mea, nana, e kite ana ahau ko nga rangi e tuhaha ana, a ko te Tama a te tangata e tu ana i te ringa matau o te Atua. <sup>57</sup> Katahi ratou ka hamama, he nui te reo, ka puru i o ratou taringa, a kotahi tonu te omanga atu ki a ia, <sup>58</sup> Ka maka ia e ratou ki waho o te pa, a akina ana ki te kohatu: ko nga kaititiro i whakatakoto i o ratou kakahu ki nga waewae o tetahi taitama, ko Haora te ingoa. <sup>59</sup> Heoi akina ana e ratou a Tepene ki te kohatu, me ia e karanga ana ki te Ariki, e mea ana, E te Ariki, e Ihu, toku wairua ki a koe. <sup>60</sup> Katahi ia ka tuturi ki raro, ka karanga, he nui te reo, E te Ariki, kua tenei mea e whakairia ki a ratou. A, i tana korerotanga i tenei, ka moe.

## Chapter 8

<sup>1</sup> A i reira a Haora e whakaae ana ki tona matenga. Na i taua ra ka oho he whakatoinga nui ki te hahi i Hiruharama: a marara katoa ana ratou, puta noa i nga wahi o Huria, o Hamaria; kahore ia  
<sup>2</sup> nga apotoro. A na te hunga whakaaro a Tepene i tana, a he nui ta ratou tangihanga mona. Ko  
<sup>3</sup> Haora ia, tahoroa ana e ia te hahi, tomo ana ki tena whare, ki tena whare, toia atu ana nga tane me nga wahine, hoatu ana ki roto ki te whare herehere.  
<sup>4</sup> No reira ko ratou tonu, ko nga mea i whakamararatia ra, i haereere ki te kauwhau i te kupu.  
<sup>5</sup> Na ko Piripi i heke atu ki te pa o Hamaria, a kauwhau ana i a te Karaiti ki a ratou. A kotahi tonu  
<sup>6</sup> te whakaaro o nga mano ki te whakarongo ki nga mea i korero ai a Piripi, i a ratou e rongo ana, e kite ana i nga tohu i mea ai ia. I puta mai hoki nga wairua poke i roto i te tini o nga mea e nohoia  
<sup>7</sup> ana, he nui te reo ki te karanga: he tokomaha ano nga pararutiki, nga kopa i whakaorangia. A nui  
<sup>8</sup> atu te hari o taua pa. Na i reira tetahi tangata, ko Haimona te ingoa, he mahi makutu tana i mua  
<sup>9</sup> atu i roto i taua pa, a miharo ana te iwi o Hamaria, i mea hoki ia i a ia he tangata nui. I whakarongo  
<sup>10</sup> katoa hoki ratou ki a ia te iti me te rahi, i mea, Ko taua kaha o te Atua tenei tangata, e kiia nei ko te nui.  
<sup>11</sup> A i whakarongo ratou ki a ia, no te mea kua roa ke ratou e miharo ana ki ana mahi makutu.  
<sup>12</sup> A, no ratou ka whakapono ki a Piripi; e kauwhau ana i te rongopai o te rangatiratanga o te Atua,  
<sup>13</sup> i te ingoa hoki o Ihu Karaiti, ka iriiria ratou, nga tane me nga wahine. Ko Haimona tonu tetahi i whakapono: a ka iriiria, ka piri tahi ki a Piripi; a, no tona kitenga i nga tohu me nga merekara nunui i mahia, ka miharo.  
<sup>14</sup> A, i te rongonga o nga apotoro i Hiruharama kua tango a Hamaria i te kupu a te Atua, ka tonoa atu e ratou a Pita raua ko Hoani ki a ratou:  
<sup>15</sup> No to raua taenga iho, ka inoi mo ratou, kia riro te Wairua Tapu i a ratou:  
<sup>16</sup> Kahore ano hoki ia i tau noa ki tetahi o ratou: he mea iriiri kau i runga i te ingoa o te Ariki, o Ihu.  
<sup>17</sup> Me i reira ka whakapakia iho o ratou ringa ki a ratou, a ka riro mai te Wairua Tapu i a ratou.  
<sup>18</sup> A, no te kitenga o Haimona, na te whakapanga iho o nga ringa o nga apotoro i homai ai te Wairua tapu, ka mea ki te hoatu moni ki a raua,  
<sup>19</sup> Ka ki, Homai hoki ki ahau tenei mana, kia riro ai te Wairua Tapu i te tangata e whakapakia iho ai e ahau oku ringa. Na  
<sup>20</sup> ko te meatanga a Pita ki a ia, Kia pirau ngatahi korua ko tau moni, ina koe ka whakaaro ma te moni ka whiwhi ai ki te mea homai noa a te Atua.  
<sup>21</sup> Kahore he wahi mau, kahore he taunga mou i tenei mea: kahore hoki i tika tou ngakau i te aroaro o te Atua.  
<sup>22</sup> Na, ripenetatia tenei kino ou, a inoi ki

te Atua, me kore noa e murua te whakaaro o tou ngakau. <sup>23</sup> Kua kite hoki ahau i a koe, kei roto  
koe i te au kawa, kei te here o te kino. <sup>24</sup> Na ka whakahoki a Haimona, ka mea, Ma korua e inoi  
moku ki te Ariki, kei pa ki ahau tetahi o nga mea kua korerotia mai na e korua. <sup>25</sup> A, ka mutu ta  
raua whakaatu, ta raua kauwhau i te kupu a te Ariki, ka hoki ki Hiruharama, he maha hoki nga  
kainga o nga Hamari i kauwhautia ai e raua te rongopai.

<sup>26</sup> Na ka korero tetahi anahera a te Ariki ki a Piripi, ka mea, Whakatika, haere ki te tonga, ki  
te ara e heke atu ana i Hiruharama ki Kaha; he koraha tera. <sup>27</sup> Whakatika ana ia, haere ana: na ko  
tetahi tangata o Etiopia, he unaka, he tangata nui na Kanarahi, kuini o nga Etiopiana, ko te kaitiaki  
ia o ana taonga katoa, i haere ki Hiruharama ki te karakia; <sup>28</sup> A e hoki mai ana, e noho ana i runga  
i tona hariata, e korero ana i a Ihaia poropiti. <sup>29</sup> Na ka mea te Wairua ki a Piripi, Whakatata atu,  
ka haere atu koe ki te hariata ra. <sup>30</sup> Katahi a Piripi ka oma atu ki a ia, ka rongu i a ia e korero ana  
i a Ihaia poropiti, ka mea atu, E matau ana ranei koe ki tau e korero na? <sup>31</sup> Ano ra ko ia, Me pehea  
koia, ki te kore tetahi hei arataki i ahau? Na ka mea ia ki a Piripi kia eke ki runga kia noho tahi me  
ia. <sup>32</sup> Na, ko te wahi o te karaipiture e korero nei ia, ko tenei, I arahina ia ano he hipi kia patua; a,  
me te reme e wahangu ana i te aroaro o tona kaikutikuti, kihai i kuihi tona waha; <sup>33</sup> I ona whakaitinga  
i whakakorea he whakawa mona: ma wai hoki tona whakatupuranga e korero? Kua tangohia atu  
nei tona ora i te whenua. <sup>34</sup> Na ka whakahoki te unaka ki a Piripi, ka mea, Tena koa, mo wai tenei  
korero a te poropiti? mona ake ano, mo tetahi atu ranei? <sup>35</sup> Na ka puaki te mangai o Piripi, a, timata  
mai i taua karaipiture, kauwhautia ana e ia a Ihu ki a ia. <sup>36</sup> A, i a raua e haere ana i te ara, ka tae  
atu raua ki tetahi wai, ka mea te unaka, Na, he wai tenei: he aha te mea e kore ai ahau e iriiria?  
<sup>37</sup> Mea atu ana a Piripi, Ki te whakapono tou ngakau katoa, e ahei ano koe. na ka whakahoki ia, ka  
mea, E whakapono ana ahau ko Ihu Karaiti te Tama a te Atua. <sup>38</sup> Katahi ia ka whakahau i te haraiata  
kia tu: ka haere atu raua tokorua ki roto i te wai, a Piripi raua ko te unaka; a iriiria ana ia e ia. <sup>39</sup> A,  
i to raua putanga ake i te wai, kahakina atu ana a Piripi e te Wairua o te Ariki: a mutu tonu te kitenga  
atu o te unaka i a ia, heoi haere hari atu ana ia i tona ara. <sup>40</sup> Ko Piripi ia i kitea ki Ahota; a, i a ia  
e haere ana, kauwhautia ana e ia te rongopai ki nga pa katoa, a tae noa ia ki Hiharia.

## Chapter 9

<sup>1</sup> Ko Haora ia kei te kupukupu tonu i te whakawehi, i te mate mo nga akonga a te Ariki, a haere  
 ana ki te tohunga nui, <sup>2</sup> Kei te tono pukapuka i a ia ki nga whakaminenga i Ramahiku, ina kitea e  
 ia tetahi no te huarahi, ahakoa tane, wahine ranei, kia mauria hereheretia mai e ia ki Hiruharama.  
<sup>3</sup> Na, i a ia e haere ana, ka whakatata ia ki Ramahiku; na, ohore ana te whitinga mai ki a ia, huri  
 noa, o tetahi marama no te rangi: <sup>4</sup> A hinga ana ia ki te whenua, ka rongu ake i tetahi reo e mea  
 ana ki a ia, E Haora, e Haora, he aha tau e whakato nei i ahau? <sup>5</sup> Ano ra ko ia, Ko wai koe, e te  
 Ariki? Ka mea ia, Ko Ihu ahau, e whakatoia nei e koe: ehara tau, te whana ki nga koikoi. <sup>6</sup> Na wiri  
 ana ia, ihiihi ana, ka mea, E te Ariki, kia aha ahau? Ano ra ko te Ariki ki a ia, Whakatika, tomo atu  
 ki te pa, a ka korerotia ki a koe tau e mea ai. <sup>7</sup> Na, ko nga tangata i haere tahi i a ia, tu reokore ana,  
 rongu kau ana ki te reo, kahore ia i kite tangata. <sup>8</sup> Na ka whakatika ake a Haora i te whenua, a, i te  
 tuwheratanga o ona kanohi, kihai rawa ia i kite aha: na arahina a ringatia ana ia e ratou, mauria ana  
 ia ki Ramahiku. <sup>9</sup> A e toru ona ra e kore ana e kite, kihai hoki i kai, kihai i inu.  
<sup>10</sup> Na i Ramahiku tetahi akonga, ko Anania te ingoa; ka mea te Ariki ki a ia, he kite, E Anania.  
<sup>11</sup> Ka mea tera, Tenei ahau, e te Ariki. Ano ra ko te Ariki ki a ia, Whakatika, haere ki te ara e kiia  
 nei ko Torotika, ka ui te whare o Hura mo tetahi ko Haora te ingoa, no Tarahu: na, kei te inoi ia.  
<sup>12</sup> A kua kite ia i tetahi tangata, ko Anania te ingoa, e tomo mai ana, e whakapa ana i ona ringa ki  
 a ia, kia kite ai ia. <sup>13</sup> Otira ka whakahoki a Anania, E te Ariki, he tokomaha aku i rongu ai mo tenei  
 tangata, ki te nui o te kino i mea ai ia ki tau hunga tapu i Hiruharama: <sup>14</sup> A tenei ano kei a ia he  
 mana na nga tohunga nui, kia herea te hunga katoa e karanga ana ki tou ingoa. <sup>15</sup> Heoi ka mea te  
 Ariki ki a ia, haere: no te mea he kaupapa whiriwhiri ia naku, hei mau i toku ingoa ki te aroaro o  
 nga Tauwiwi, o nga kingi, o nga tama hoki a Iharaira: <sup>16</sup> Ka whakakitea hoki e ahau ki a ia te nui o  
 nga mea e mamae ai ia mo toku ingoa. <sup>17</sup> Na haere ana a Anania, tomo ana ki roto ki te whare; ka  
 whakapa i ona ringa ki a ia, ka mea, E toku teina, e Haora, na te Ariki, na Ihu, i puta ra ki a koe i  
 te ara i haere mai na koe, nana ahau i tono mai, kia kite ai koe, a kia ki ai hoki i te Wairua Tapu.  
<sup>18</sup> Na marere tonu iho etahi mea, ano he unahi, i ona kanohi, a kite ana ia, ka whakatika, ka iriiria.  
<sup>19</sup> Na ka kai ia, ka whai kaha. Na noho ana a Haora ki nga akonga i Ramahiku mo etahi ra. <sup>20</sup> A  
<sup>21</sup> reira tonu kauwhautia ana e ia a te Karaiti i roto i nga whare karakia, ko te Tama ia a te Atua. A  
 miharo ana te hunga katoa i rongu, ka mea, Ehara ianei tenei i te kaitukino o te hunga i karanga ki  
 tenei ingoa i Hiruharama? a, ko te mea ano tenei i haere mai ai ia, kia herea ratou, kia arahina ki

nga tohunga nui? <sup>22</sup> Ko Haora ia ka nui haere ke atu tona kaha, a whakapororarutia ana e ia nga Hurai e noho ana i Ramahiku, i a ia e whakakite ana ko te Karaiti tenei.

<sup>23</sup> A, ka maha nga ra ka pahure, ka runanga nga Hurai kia whakamatea ia: <sup>24</sup> Heoi i matau a Haora ki ta ratou whakapapanga mona. A whanga ana ratou ki nga tatau i te ao, i te po, kia

whakamatea ia: <sup>25</sup> Otiia i mau nga akonga ki a ia i te po, tukua iho ana e ratou ra te taiepa i roto i

te kete. <sup>26</sup> A, no tona taenga mai ki Hiruharama, ka whai ia kia uru atu ia ki nga akonga; heoi wehi

katoa ana ratou i a ia, kihai i whakapono he akonga ia. <sup>27</sup> Ko Panapa ia i tango i a ia, a mauria ana ia ki nga apotoro, korerotia ana e ia ki a ratou tona kitenga i te Ariki i te ara, tana korerotanga ki a

ia, tona maia hoki ki te kauwhau i Ramahiku i runga i te ingoa o Ihu. <sup>28</sup> Na ka noho ia ki a ratou,

haereere atu ana, haereere mai ana i Hiruharama, <sup>29</sup> Me te maia hoki ki te kauwhau i runga i te ingoa o te Ariki: a korero ana ia, totohe ana ki nga Hurai Kariki: otira ka whakangakau ratou kia

whakamatea ia. <sup>30</sup> No te mohiotanga o nga tuakana, ka mauria ia e ratou ki raro ki Hiharia, a tonoa

atu ana ia ki Tarahu. <sup>31</sup> Na ka whai tanga manawa te hahi, puta noa i Huria katoa, i Kariri, i Hamaria, a tupu ana; haere ana i runga i te wehi o te Ariki, i te whakamarie hoki a te Wairua Tapu, no ka whakatupu ake.

<sup>32</sup> Na, i a Pita e haereere ana puta noa nga wahi katoa, ka tae iho hoki ia ki te hunga tapu e

noho ana i Raira. <sup>33</sup> Ka kitea e ia i reira tetahi tangata ko Inia te ingoa, kua waru ona tau e takoto

ana i runga i tona moenga; he pararutiki hoki ia. <sup>34</sup> Na ko te meatanga a Pita ki a ia, E Inia, ka ora

koe i a Ihu Karaiti: whakatika, wharikitia tou moenga. Na whakatika tonu ake ia. <sup>35</sup> I kite katoa hoki ia i te hunga e noho ana i Raira, i Harona, a tahuri ana ki te Ariki.

<sup>36</sup> Na tera tetahi akonga i Hopa e noho ana, ko Tapita te ingoa, ko te whakamaoritanga ko

Roka: he wahine tenei i aro nui ki nga mahi pai, ki nga mahi atawhai rawakore. <sup>37</sup> A i aua ra ka

turorotia ia, ka mate: a ka oti ia te horoi e ratou, ka whakatakotoria ia ki tetahi ruma i runga. <sup>38</sup> Na, i te mea e tata atu ana a Raira ki Hopa, ka rongo nga akonga kei reira a Pita, a ka tonoa e ratou

tokorua nga tangata ki a ia, hei mea, Kaua e whakaroa te haere mai ki a matou. <sup>39</sup> Na whakatika ana a Pita, haere ana i a raua. A, i tona taenga atu ka arahina e ratou ki te ruma i runga: a tu ana nga pouaru katoa i tona taha, tangi ana, ka whakakite ki a ia i nga koti, i nga kakahu i hanga e Roka,

i a ia e noho ana i a ratou. <sup>40</sup> Otiia ka tonoa ratou katoa e Pita ki waho, ka tuku ia i ona turi, ka inoi; katahi ka tahuri ake ia ki te tupapaku, ka mea, Tapita, e ara. Na ka titiro ona kanohi: a, i tona

kitenga i a Pita, ka noho ia ki runga. <sup>41</sup> Katahi ka hoatu e ia tona ringa ki a ia, ka whakaara ake i

a ia; a karangatia ana e ia te hunga tapu me nga pouaru, a tukua oratia atu ana ia. <sup>42</sup> A i mohiotia tenei mea puta noa i Hopa katoa: he tokomaha hoki i whakapono ki te Ariki. <sup>43</sup> A he maha ona ra i noho ai ia ki Hopa, ki a Haimona kaimahi hiako.

## Chapter 10

<sup>1</sup> Na i Hiharia tetahi tangata, ko Koroniria te ingoa, he keneturio no te pu i kiia nei ko to Itari;  
<sup>2</sup> He tangata karakia ia, e wehi ana i te Atua, ratou ko tona whare katoa, he maha ana mahi atawhai ki te iwi, me te inoi tonu ki te Atua. <sup>3</sup> I kite nui ia, he whakarehu, i te mea ka tata ki te iwa o nga haora o te ra, i tetahi anahera a te Atua, e haere mai ana ki a ia, e mea ana hoki ki a ia, E Koroniria.  
<sup>4</sup> Na ka titiro matatau atu ia ki a ia, ka wehi, ka mea, he aha, e te Ariki? Ka ki tera ki a ia, Kua puta ake au inoi me au mahi atawhai, hei whakamahara ki te aroaro o te Atua. <sup>5</sup> Na tonoa aianeia he tangata ki Hopa, ki te tiki i a Haimona, ko te rua nei o ona ingoa ko Pita. <sup>6</sup> He manuhiri ia na Haimona kaimahi hiako, i te taha nei o te moana tona whare. <sup>7</sup> A, no te rironga atu o te anahera i korero nei ki a ia, ka karangatia e ia tokorua o ana pononga tane, me tetahi hoia karakia no te hunga e mahi tonu ana ki a ia; <sup>8</sup> A, ka oti nga mea katoa te korero ki a ratou, ka tonoa ratou e ia ki Hopa.  
<sup>9</sup> Na i te aonga ake, i a ratou e haere ana, e whakatata atu ana ki te pa, ka kake a Pita ki runga ki te tuanui, i te ono o nga haora, ki te inoi: <sup>10</sup> Na ka pa ki a ia te matekai, ka mea ki te kai: otira i a ratou e taka mai ana, ka tau iho te wairua matakite ki a ia; <sup>11</sup> Na ka kite ia i te rangi kua tuwhera, me tetahi mea e heke iho ana, he mea tuku iho ma nga pito e wha, ki te whenua: <sup>12</sup> I roto i taua mea nga momo kararehe waewae wha katoa, nga mea ngokingoki katoa o te whenua, me nga manu o te rangi. <sup>13</sup> I reira ka puta mai he reo ki a ia, Whakatika, e Pita; patua, kainga. <sup>14</sup> Ko Pita ia i mea, Kahore, e te Ariki; kiano ahau i kai i te mea noa, i te mea poke ranei. <sup>15</sup> Ka puta mai ano he reo ki a ia, ka tuaruatia, Ko a te Atua i mea ai kia ma, kaua e whakanoatia e koe. <sup>16</sup> E toru meatanga o tenei: a i reira tonu ka tangohia atu taua mea ki te rangi. <sup>17</sup> I taua wa tonu, i a Pita e whakaaroaro ana i roto i a ia ki te tikanga o tenei whakakitenga, na, ko nga tangata i tonoa mai ra e Koroniria, tera kua uiui ki te whare o Haimona, tu ana i mua i te kuwaha, <sup>18</sup> Karanga ana mai, ui ana, kei reira ranei e noho ana a Pita, te rua nei o ona ingoa ko Haimona.



19 A, i a Pita e whakaaro ana mo taua whakakitenga, ka mea te Wairua ki a ia, Nana, tokotoru  
 enei tangata e rapu ana i a koe. <sup>20</sup> Na whakatika, heke atu, haere tahi koutou, kei ruarua; naku hoki  
 ratou i tonu mai. <sup>21</sup> Na ka heke atu a Pita ki aua tangata, ka mea, Na, ko ahau tenei e rapu nei  
 koutou: he aha te take o ta koutou haere mai? <sup>22</sup> Na ka mea ratou, Ko Koroniria ra, he keneturio,  
 he tangata tika, e wehi ana i te Atua, e korerotia paitia ana e te iwi katoa o nga Hurai, kua  
 whakamaharatia ia e te Atua na tetahi anahera tapu kia tikina atu koe ki tona whare, kia rongo ia  
 ki etahi kupu i a koe. <sup>23</sup> Na karanga ana ia i a ratou ki roto hei manuhiri mana. A, i te aonga ake,  
 ka whakatika ia ka haere atu me ratou, a ko etahi o nga teina no Hopa i haere tahi me ia. <sup>24</sup> A ao  
 ake ka tomo ratou ki Hiharia. Na ko Koronira e tatari mai ana ki a ratou, he mea karanga nana kia  
 huihui mai ona whanaunga me ona hoa tupu. <sup>25</sup> A, no ka tomo atu a Pita, ka tutaki a Koroniria ki  
 a ia, ka hinga ki ona waewae, ka koropiko ki a ia. <sup>26</sup> Otira ka whakaara ake a Pita i a ia, ka mea,  
 E tu ki runga; he tangata nei ano ahau. <sup>27</sup> Na i a ia e korero ana ki a ia, ka tomo atu ia ki roto, ka  
 kite i te menenga tokomaha, <sup>28</sup> Ka mea atu ki a ratou, E matau ana koutou e kore e tika kia huihui  
 te tangata o nga Hurai, kia haere atu ranei ki te tangata iwi ke: otiia kua whakakitea e te Atua ki  
 ahau kia kaua e kiia tetahi tangata he noa, he poke. <sup>29</sup> Koia ahau i haere mai ai, kihai i aha i te  
 tikinga ake i ahau. Na ka ui nei ahau, he aha te take i tikina ake ai ahau? <sup>30</sup> Ka mea a Koroniria,  
 Ka wha nga ra inaianei tae mai ki tenei haora, e whakarite ana ahau i te inoinga o te iwa o nga haora  
 i roto i toku whare; na, ko te tangata e tu ana i toku aroaro, kanapa tonu te kakahu, <sup>31</sup> E mea ana,  
 E Koroniria, kua rangona tau inoi, a e maharatia ana au mahi atawhai i te aroaro o te Atua. <sup>32</sup> Na,  
 tonoa he tangata ki Hopa, ka karanga ki a koe i a Haimona, te rua nei o ona ingoa ko Pita: he  
 manuhiri ia i roto i te whare o Haimona kaimahi hiako, i te taha moana. <sup>33</sup> I reira tonu ka tonu  
 tangata atu ahau ki a koe; na he pai rawa tou haerenga mai. No reira kei konei katoa matou kei te  
 aroaro o te Atua, whakarongo ai ki nga mea katoa kua whakahaua e te Ariki ki a koe.  
<sup>34</sup> Na ka puaki te mangai o Pita, ka mea, he pono ka kite ahau kahore a te Atua whakapai  
 kanohi: <sup>35</sup> Otiia i roto i nga tini iwi ko te tangata e wehi ana ki a ia, a e mahi ana i te tika, ka paingia  
 e ia. <sup>36</sup> Ko te kupu i tukua mai e ia ki nga tamariki a Iharaira, he kauwhau i te rongopai o te  
 rangimarie na Ihu Karaiti: ko ia nei te Ariki o te katoa: <sup>37</sup> Ko taua kupu, kei te mohio koutou, i  
 kauwhautia ra puta noa i Huria katoa, i timata mai i Kariri, i muri o te iriiri i kauwhautia e Hoani;  
<sup>38</sup> Ara ko Ihu o Nahareta, ta te Atua whakawahinga i a ia ki te Wairua Tapu, ki te kaha: a haereere

ana ia ki te mahi i te pai, ki te whakaora i te hunga katoa i pehia e te rewera; no te mea i a ia te  
<sup>39</sup>Atua. Ko matou hoki nga kaiwhakaatu o nga mea katoa i mea ai ia ki te whenua o nga Hurai,  
 ki Hiruharama hoki: a whakamatea ana ia e ratou, he mea whakairi ki runga ki te rakau. <sup>40</sup>Na ko  
 ia i whakaarahia ake e te Atua i te toru o nga ra, a meinga ana ia kia kitea nuitia, <sup>41</sup>Ehara i te mea  
 e te iwi katoa, engari e te hunga i whiriwhiria i mua e te Atua, ara e matou, i kai tahi nei, i inu tahi  
 nei me ia, i muri i tona aranga ake i te hunga mate. <sup>42</sup>I whai kupu hoki ia ki a matou kia kauwhau  
 ki te iwi, kia whakaatu, ko ia ta te Atua i whakarite ai hei kaiwhakawa mo nga tangata ora, mo nga  
 tangata mate. <sup>43</sup>He kaiwhakaatu nga poropiti katoa mona, ara ma tona ingoa ka whiwhi ai ki te  
 murunga hara nga tangata katoa e whakarongo ana ki a ia.  
<sup>44</sup>I a Pita ano e korero ana i enei kupu, ka tau iho te Wairua Tapu ki te hunga katoa e  
 whakarongo ana ki te kupu. <sup>45</sup>A, ko te hunga o te kotinga i whakapono nei, ko nga mea i haere  
 tahi mai me Pita, miharo ana no te mea kua ringihia tahitia iho te Wairua Tapu ki nga Tauwiwi. <sup>46</sup>I  
 rongu hoki ratou ki nga reo i korero ai ratou, i whakanui ai i te Atua. I reira ka whakahoki a Pita,  
<sup>47</sup>E ahei ranei te whakakahore e tetahi te wai, kei iriiria enei kua whiwhi tahi nei me tatou ki te  
 Wairua Tapu? <sup>48</sup>Na ka whakahau ia kia iriiria ratou i runga i te ingoa o Ihu Karaiti. I reira ka tohe  
 ratou ki a ia kia noho mo etahi ra.

## Chapter 11

<sup>1</sup>A ka rongu nga apotoro me nga tuakana i Huria, kua tango hoki nga Tauwiwi te kupu a te Atua.  
<sup>2</sup>A, no te taenga ake o Pita ki Hiruharama, ka whakawakia ia e te hunga o te kotinga, <sup>3</sup>I mea ratou,  
 I haere koe ki roto ki nga tangata kihai i kotia, i kai tahi me ratou. <sup>4</sup>Na ka timata a Pita, ka korero  
 whakatepe atu ki a ratou, ka mea, <sup>5</sup>I te pa ahau, i Hopa, e inoi ana; a ka kite moemoea ahau i tetahi  
 whakakitenga, ko tetahi mea e heke iho ana, ano he kakahu nui, he mea tuku iho i te rangi ma nga  
 pito e wha; a tae tonu mai ki ahau: <sup>6</sup>No te whakamaunga atu o oku kanohi ki taua mea, ka whakaaro  
 ahau, a ka kite i nga karerehe waewae wha o te whenua, i nga karerehe mohoa me nga mea  
 ngokingoki me nga manu o te rangi. <sup>7</sup>A ka rongu hoki ahau he reo e mea mai ana ki ahau, E ara,  
 e Pita; patua, kainga. <sup>8</sup>Otira ka ki atu ahau, Kahore, e te Ariki; kiano hoki tetahi mea noa, poke

<sup>9</sup> ranei, i tapoko noa ki toku mangai. Na ka whakahoki tuarua mai he reo no te rangi, Ko a te Atua  
<sup>10</sup> i mea ai kia ma, kaua e meinga e koe kia noa. E toru nga meatanga o tenei: ka hutia katoatia atu  
<sup>11</sup> ano ki te rangi. Na i taua wa ano kua tu nga tangata tokotoru ki mua i te whare i noho ai ahau,  
<sup>12</sup> he mea tono mai no Hiharia ki ahau. Na ka mea te Wairua ki ahau kia haere tahi matou, kia kaua  
 ahau e ruarua. I haere tahi ano i ahau enei teina tokoono, a tomo ana matou ki te whare o taua  
<sup>13</sup> tangata: Na ka korerotia mai e ia ki a matou tona kitenga i te anahera i tona whare e tu ana, e  
 mea ana ki a ia, Tonoa etahi tangata ki Hopa, tikina a Haimona, te rua nei o ona ingoa ko Pita:  
<sup>14</sup> Mana e korero ki a koe etahi kupu, e ora ai koutou ko tou whare katoa. <sup>15</sup> A, noku ka timata ki  
<sup>16</sup> te korero, ka tau iho te Wairua Tapu ki a ratou, ka pera ano me ia ki a tatou i te timatanga. Katahi  
 ahau ka mahara ki te kupu a te Ariki, ki tana i mea ai, i iriiri ra a Hoani ki te wai; ko koutou ia ka  
<sup>17</sup> iriiria ki te Wairua Tapu. Na, mehemea rite tonu ta te Atua mea i hoatu ai ki a ratou ki tana i  
 homai ai hoki ki a tatou, i a tatou i whakapono ai ki te Ariki, ki a Ihu Karaiti; ko wai ahau, kia ahei  
<sup>18</sup> te tu atu ki te Atua? A, no ka rongu ratou ki enei mea, mutu pu ta ratou korero, heoi ka  
 whakakororia i te Atua, ka mea, Koia ano, kua homai hoki e te Atua ki nga Tauwiwi te ripeneta e  
 ora ai.  
<sup>19</sup> Na, ko te iwi i whakamararatia atu i runga i te tukinotanga i puta ake i to Tepene, haereere  
 ana ratou a tae noa ki Pinikia, ki Kaiperu, ki Anatioka, me te kauwhau ano i te kupu ki nga Hurai  
<sup>20</sup> anake, kahore ki etahi atu. Otira ko etahi o ratou, he tangata no Kaiperu, no Hairini, i to ratou  
<sup>21</sup> taenga ki Anatioka, ka korero ki nga Kariki hoki, ka kauwhau i te Ariki, i a Ihu. Ko te ringa  
<sup>22</sup> hoki o te Ariki i a ratou: a he tokomaha rawa i whakapono, i tahuri ki te Ariki. Na ka tae to ratou  
 rongu ki nga taringa o te hahi i Hiruharama; a ka tonoa e ratou a Panapa kia haere ki Anatioka:  
<sup>23</sup> No tona taenga atu, ka kite i te aroha noa o te Atua, ka hari, ka whakahau i a ratou katoa kia u  
<sup>24</sup> te ngakau, kia piri ki te Ariki. He tangata pai hoki ia, ki tonu i te Wairua Tapu, i te whakapono:  
<sup>25</sup> he nui ano te hunga i honoa ki te Ariki. Me i reira ka haere atu a Panapa ki Tarahu, ki te rapu i  
<sup>26</sup> a Haora: A, no ka kitea ia e ia, ka kawea mai ia e ia ki Anatioka. A kotahi tino tau i huihui tahi  
 ai raua ki te hahi, a he nui te hunga i whakaakona. I matua huaina hoki nga akonga he Karaitiana  
 ki Anatioka.  
<sup>27</sup> Na i aua ra ka heke mai etahi poropiti i Hiruharama ki Anatioka. <sup>28</sup> A ka tu ake tetahi o  
 ratou, ko Akapu te ingoa, ka whakakite, he mea na te Wairua, tera ka pa he mate nui i te hiakai i  
<sup>29</sup> te whenua katoa: i puta ano tenei i nga ra o Karauria. Na ka whakatakoto tikanga nga akonga i

runga i te mea e taea e tena, e tena, kia tukua atu he awhina mo nga tuakana e noho ana i Huria:  
30

Pera ana hoki ratou, tukua atu ana ki nga kaumatua ma te ringa o Panapa raua ko Haora.

## Chapter 12

<sup>1</sup> Na i taua wa ka totoro atu nga ringa o Kingi Herora ki te tukino i etahi o te hahi. <sup>2</sup> A  
whakamatea ana e ia ki te hoari a Hemi, te tuakana o Hoani. <sup>3</sup> A, no tona kitenga e pai ana ki nga  
Hurai, ka anga ia ki te hopu hoki i a Pita. Na ko nga ra ena o te taro rewenakore. <sup>4</sup> A, no ka mau  
ia, ka maka ki te whare herehere, ka tukua ki nga hoia kotahi tekau ma ono kia tiakina; ko te  
whakaaro mo muri iho i te kapenga ka whakaputa mai ai i a ia ki te iwi.

<sup>5</sup> Na ka puritia a Pita ki roto ki te whare herehere: otiia kihai i mutumutu te inoi a te hahi ki te  
Atua mona. <sup>6</sup> A, no ka tata a Herora te whakaputa mai i a ia, i taua po ano e moe ana a Pita i  
waenganui o nga hoia tokorua, he mea here ki nga mekameka e rua: me nga kaitiaki i mua i te tatau  
e tiaki ana i te whare herehere. <sup>7</sup> Na, tu ana tetahi anahera na te Ariki i tona taha, a tiaho ana te  
marama i roto i te ruma: na ka papaki ia i te kaokao o Pita, ka whakaara i a ia, ka mea, E ara, hohoro.

<sup>8</sup> A marere iho ona mekameka i ona ringa. Ka mea atu ano te anahera ki a ia, Whitiki i a koe, ka  
here i ou parekereke. A meinga ana e ia. Ka mea ano ki a ia, Kakahuria tou kakahu, haere mai i

<sup>9</sup> muri i ahau. Na ka haere ia ki waho, ka aru i a ia; a kihai ia i mahara he pono ta te anahera i mea  
ai; hua noa he rekanga kanohi tana i kite ai. <sup>10</sup> A, no ka mahue i a raua te tuatahi, te tuarua o nga  
kaitiaki, ka tae raua ki te tatau rino i te putanga atu ki te pa; tuwhera noa ana tera ki a raua: puta

ana raua ki waho, haere ana, puta rawa i tetahi ara, mawehe tonu atu te anahera i a ia. <sup>11</sup> A, i te  
hokinga ake o nga whakaaro o Pita, ka mea ia, Katahi ahau ka tino mohio, kua tonu mai te Ariki i  
tana anahera, hei tango i ahau i roto i te ringa o Herora, i nga mea katoa hoki e taria nei e te iwi o

nga Hurai. <sup>12</sup> A, no ka whakaaroaro ia ki taua mea, ka haere ia ki te whare o Meri whaea o Hoani,

ko te rua nei o ona ingoa ko Maka; he tokomaha hoki kua huihui ki reira ki te inoi. <sup>13</sup> A, no te  
patototanga a Pita i te tatau o te whatitoka, ka tae mai he kotiro ki te whakarongo, ko Rora te ingoa.

<sup>14</sup> A, no ka mohio ia ki te reo o Pita, kihai i uakina te tatau i te hari, heoi oma ana ki roto, ki te

korero kei te tatau a Pita e tu ana. <sup>15</sup> Na ka mea ratou ki a ia, E haurangi ana koe. Heoi ka tohe

tonu ia he pono. Na ka mea ratou, Ko tona anahera. <sup>16</sup> Me te patuki tonu ano tera a Pita: a, i ta

17  
 ratou uakanga, ka kite i a ia, ka miharo. Na ka pepehi atu tona ringa i a ratou kia kaua e kuihi, ka korerotia ki a ratou tona whakaputanga mai e te Ariki i te whare herehere. Ka mea, Korerotia  
 18  
 enei mea ki a Hemi ratou ko nga teina. Na ka puta ia ki waho, haere ana he wahi ke. Na i te  
 19  
 aonga ake ano o te ra, kihai i iti te pororaru o nga hoia, i ahatia ranei a Pita. Na ka rapu a Herora i a ia, a, no te korenga i kitea, ka whakawa i nga kaitiaki, ka whakahau kia whakamatea. Na haere atu ana ia i Huria ki raro ki Hiharia noho ai.

20  
 Na tino nui te riri o Herora ki te hunga o Taira, o Hairona: otira ka huihui mai ratou ki a ia, a, ka oti a Parahitu, te kaitiaki o te whare moenga o te kingi, te whakakiki e ratou, ka tono ratou kia houhia te rongu, no te mea ko nga kai i whang aia ai to ratou whenua no te whenua o te kingi.

21  
 A i tetahi ra i whakaritea ka kakahu a Herora i te kakahu kingi, ka noho ki runga ki te torona, a  
 22  
 whakatu ana ki a ratou. Na ko te karangatanga a te huihui, He reo atua, ehara i to te tangata.

23  
 I reira pu ano ka patua ia e tetahi anahera a te Ariki, no te mea kihai i hoatu e ia te kororia ki te  
 24  
 Atua: a kainga ana ia e te kutukutu, hemo ake. Ko te kupu ia a te Atua i tupu, i nui haere. A  
 25  
 ka hoki a Panapa raua ko Haora i Hiruharama, i te otinga o ta raua mahi, ka mauria a Hoani, ko te rua nei o ona ingoa ko Maka.

### Chapter 13

1  
 Na tera etahi poropiti me etahi kaiwhakaako i Anatioka, i te hahi i reira, ko Panapa, ko Himiona i huaina nei ko Nikera, ko Rukia no Hairini, ko Manaena, he mea whakatupu ngatahi nei raua ko  
 2  
 Herora tetaraki, me Haora. A, i a ratou e karakia ana ki te Ariki, e nohopuku ana, ka mea te Wairua  
 3  
 Tapu, Motuhia mai ki ahau a Panapa raua ko Haora ki te mahi i karangatia ai raua e ahau. Na, ka mutu ta ratou nohopuku me te inoi, a ka popoki iho i o ratou ringa ki a raua, ka tonoa atu raua kia haere.

4  
 Na, ka tonoa nei raua e te Wairua Tapu, ka haere ki Herukia; a rere atu ana i reira ki Kaiperu.

5  
 Na, i a raua i Harami, ka kauwhautia e raua te kupu a te Atua i roto i nga whare karakia o nga  
 6  
 Hurai: i a raua ano a Hoani hei kaimahi. A, no to ratou putanga i te motu katoa ki Papaho, ka  
 7  
 kitea tetahi tangata makutu, he poropiti teka, he Hurai, ko Paraihu te ingoa: I te tino kawana ia, i a Herekiu Paora; he tangata mahara a Herekiu. A karangatia ana e ia a Panapa raua ko Haora, a  
 8  
 ka whai kia rongu i te kupu a te Atua. Otira i tautohe ki a raua a Erima te kaimakutu, ko te

whakamaoritanga hoki tenei o tona ingoa, i mea kia tahuri ke te tino kawana i te whakapono. <sup>9</sup> Otira ko Haora, e huaina nei ano ko Paora, ki tonu i te Wairua Tapu, i whakamaui i ona kanohi ki a ia, <sup>10</sup>

A i mea, E te tangata ki tonu i te tinihanga, i nga tini mahi pokanoa, e te tama a te rewera, hoariri o nga mahi tika katoa, e kore ianei e mutu tau whakaputa ke i nga ara tika a te Ariki? <sup>11</sup> Nana, ianei pa ai te ringa o te Ariki ki a koe, ka matapotia koe, e kore e kite i te ra a taka noa tetahi wa.

Na taka tonu iho ki a ia he kohu, he pouri; a haereere noa ia ki te rapu kaiarahi mona. <sup>12</sup> A, no te kitenga o te tino kawana i taua meatanga, ka whakapono ia, i miharo hoki ki te ako a te Ariki.

<sup>13</sup> Na ka rere atu a Paora ratou ko ona hoa i Papaho, ka u ki Pereka i Pamapurua: a whakarere ana a Hoani i a raua, hoki ana ki Hiruharama.

<sup>14</sup> Ko raua ia haere atu ana i Pereka, tae tonu atu ki Anatioka i Pihiria, a tomo ana ki te whare karakia i te ra hapati, noho ana. <sup>15</sup> A ka mutu te korerotanga o te ture, o nga poropiti, ka tono tangata nga rangatira o te whare karakia ki a raua, ka mea, E hoa ma, ki te mea he kupu whakaako

ta korua ki te hunga nei, korerotia. <sup>16</sup> Na ka tu a Paora ki runga, ka tawhiri tona ringa, ka mea, E nga tangata o Iharaira, e te hunga e wehi ana ki te Atua, whakarongo mai. <sup>17</sup> Na te Atua o tenei iwi, o Iharaira i whiriwhiri o tatou matua, a whakanuia ana e ia tenei iwi, i a ratou e noho manene

ana i te whenua o Ihipa, i runga tonu ano te ringa i arahina mai ai ratou e ia i reira. <sup>18</sup> Na me te mea e wha tekau nga tau i whakamanawanui ai ki to ratou ahua i te koraha. <sup>19</sup> A ka whitu nga iwi ka ngaro i a ia i te whenua o Kanaana, ka hoatu e ia ki a ratou to ratou whenua hei whenua pumau,

mo nga tau me te mea e wha rau e rima tekau: <sup>20</sup> A, muri iho i enei mea, ka hoatu e ia ki a ratou he kaiwhakawa, taea noatia a Hamuera poropiti. <sup>21</sup> A muri iho ka tono ratou ki tetahi kingi: a hoatu ana e te Atua ki a ratou a Haora, tama a Kihī, he tangata no te pu o Pineamine, a e wha tekau nga

tau. <sup>22</sup> A ka oti ia te whakataka, ka whakaarahia ake e ia a Rawiri hei kingi mo ratou; i whakaaturia hoki ia e ia, i korerotia, Kua kitea e ahau a Rawiri tama a Hehe, he tangata e whakaetia ana e toku

ngakau; ka meatia e ia nga mea katoa e pai ai ahau. <sup>23</sup> He uri no tenei tangata ta te Atua i homai

ai ki a Iharaira, he Kaiwhakaora, ko Ihu, hei whakarite i te mea i korerotia ai i mua; <sup>24</sup> No mua tata ano hoki i tona haerenga mai te kauwhautanga a Hoani i te iriiri ripeneta, ki te iwi katoa o

Iharaira. <sup>25</sup> A ka tutuki a Hoani ki tona tutukitanga, ka mea ia, Ko wai koia ahau ki to koutou whakaaro? ehara ra ahau i a ia. Engari tera te haere mai ana tetahi i muri i ahau, ko ona hu e kore

ahau e tau hei wewete. <sup>26</sup> E oku tuakana, e nga tama o te kawēi o Aperahama, e te hunga i roto i

a koutou e wehi ana ki te Atua, kua homai te kupu o tenei ora kia whakapuakina ki a tatou. <sup>27</sup> Na

ko te hunga e noho ana i Hiruharama, me o ratou rangatira, i te mea kihai ratou i mohio ki a ia, ki nga reo ranei o nga poropiti e korerotia ana i nga hapati katoa, na ratou i whakarite aua reo, i a ratou

28 i tuku i a ia ki te mate. Ahakoa kihai i kitea e ratou he mea e mate ai ia, ka tohe ratou ki a Pirato

29 kia whakamatea ia. A, no ka rite i a ratou nga mea katoa i tuhituhia mona, tangohia iho ana ia

30 i te rakau, whakatakotoria ana ki roto ki te urupa. Heoi na te Atua ia i whakaara ake i te hunga

31 mate: A he maha nga ra i kitea ai ia e te hunga i haere tahi i a ia i Kariri ki Hiruharama, ko ratou

32 nei nga kaiwhakaatu mona ki te iwi. Na he kauwhau tenei na maua ki a koutou i te rongopai, i

33 korerotia i mua ki nga matua, Ara kua mana tenei i te Atua, hei mea ma a tatou tamariki, i a ia i whakaara nei i a Ihu: ko te mea hoki tena i tuhituhia i te rua o nga waiata, Ko taku Tama koe,

34 nonaianei koe i whakatupuria ai e ahau. Ko tana korero ano tenei mona i whakaarahia nei e ia i te hunga mate, te hoki ano ki te pirau i muri iho, ka hoatu e ahau ki a koutou nga mea tapu, nga

35 manaakitanga pono o Rawiri. Koia hoki ia i mea ai i tetahi atu waiata, E kore koe e tuku i tau

36 Mea Tapu kia kite i te pirau. Ko Rawiri hoki i mahi i ta te Atua i pai ai i tona whakatupuranga

37 ano, a moe iho, whakatakotoria ana ki ona matua, kite ana i te pirau: Ko tenei ia i whakaarahia

38 ake nei e te Atua, kihai ia i kite i te pirau. Na kia mohio koutou, e oku tuakana, na tenei tangata

39 te murunga hara e kauwhautia nei ki a koutou; Mana hoki nga tangata katoa, e whakapono ana,

40 ka whakatikaia ai i nga mea katoa, e kore nei koutou e whakatikaia i runga i ta Mohi ture. Na

41 kia mahara, kei pa ki a koutou te mea i korerotia ra e nga poropiti. Titiro mai, e te hunga whakahawea, ka miharo ai, a whakangaromia iho: ka mahia hoki e ahau he mahi i o koutou ra, he mahi e kore e whakaponoia e koutou, ki te whakapuakina e te tangata ki a koutou.

42 Na, i a ratou e puta ana ki waho, ka tohe ratou kia kauwhautia ano aua kupu ki a ratou i to

43 muri iho hapati. Heoi ka pakarukaru te huihui, he tokomaha nga Hurai me nga porohiraiti karakia i aru i a Paora raua ko Panapa: a ka korero raua ki a ratou, ka ako kia mau tonu ratou ki te aroha

44 noa o te Atua. Na i to muri iho hapati ka huihui mai te pa, me te mea ko ratou katoa, ki te

45 whakarongo ki te kupu a te Atua. No te kitenga ia o nga Hurai i te huihui, ka ki ratou i te hae,

46 ka whakakahore ki nga mea i korerotia e Paora, ka whakateka, ka kohukohu. Katahi a Paora raua ko Panapa ka korero maia atu, ka mea, I takoto te tikanga kia matua korerotia te kupu a te Atua ki a koutou: na ka peia nei e koutou, ka whakaaro koutou e kore koutou e tau mo te ora tonu,

47 na ka tahuri atu nei maua ki nga Tau iwi. I penei hoki te ako a te Ariki ki a matou, Kua waiho

48  
 koe e ahau hei marama ki nga Tauwi, kia ai koe hei oranga puta noa i nga pito o te whenua. Na,  
 i te rongonga o nga Tauwi, ka hari, ka whakakororia i te kupu a te Ariki: ka whakapono ano te  
 49  
 hunga i rite mo te ora tonu. A paku ana te kupu a te Ariki puta noa i taua whenua. 50  
 whakaohokia e nga Hurai nga wahine karakia, rangatira, me nga tangata nunui o te pa, a ara ana i  
 a ratou he whakatoī mo Paora raua ko Panapa, peia ana raua i o ratou wahi. 51  
 Heoi ruia atu ana e  
 52  
 raua te puehu o o raua waewae ki a ratou, a haere ana ki Ikoniuma. Na ki tonu nga akonga i te  
 hari, i te Wairua Tapu.

## Chapter 14

1  
 Na i Ikoniuma ka haere tahi raua ki roto ki te whare karakia o nga Hurai, a ka korero, no ka  
 whakapono tona tini o nga Hurai, o nga Kariki. 2  
 Na nga Hurai whakateka ia i whakaoho, i  
 whakakino nga ngakau o nga Tauwi ki nga teina. 3  
 Na he nui te wa i noho ai raua i reira, i maia  
 ai te korero i nga mea a te Ariki, nana i whakaae te kupu o tona aroha noa, me te homai ano e ia  
 nga tohu me nga mea whakamiharo kia meatia e o raua ringa. 4  
 Otiia i wehewehea nga tangata o  
 te pa: ko etahi i u ki nga Hurai, ko etahi ki nga apotoro. 5  
 A, i nga Tauwi ratou ko nga Hurai, ko  
 o ratou rangatira hoki e huaki ana ki te whakatupu kino, ki te aki i a raua ki te kohatu, 6  
 Ka tupato  
 raua, a rere ana ki Raihitara, ki Rerepe, ki nga pa o Raikaonia, ki pahaki tata atu ano hoki: 7  
 A  
 kauwhautia ana e raua te rongopai ki reira.  
 8  
 I Raihitara hoki e noho ana tetahi tangata waewae ngoikore, he kopa no te kopu mai o tona  
 9  
 whaea, kahore i haere i mua iho. I rongo tenei i a Paora e korero ana: ko te tirohanga putanga atu  
 o tera ki a ia, ka kite he whakapono tona e ora ai; 10  
 He nui noa atu tona reo ki te karanga atu, E  
 tu ou waewae ki runga. Na mokowhiti ake ana ia, haere ana. 11  
 No te kitenga o nga tangata i ta  
 Paora i mea ai, ka ara to ratou reo, ka mea i te reo o Raikaonia, Kua heke iho nga atua ki a tatou,  
 12  
 no nga tangata te ahua. A huaina ana e ratou a Panapa ko Hupita, a Paora ko Merekurai, no te  
 13  
 mea ko ia te pu korero. Na ka kawea mai e te tohunga o Hupita, i te ngutu nei o te pa tona  
 temepara, he puru, he tupare ki nga kuwaha, ka mea kia patua he whakahere e ratou ko nga mano.  
 14  
 Otira, i te rongonga o nga apotoro, o Panapa raua ko Paora, ka haehae i o raua kakahu, a rere



<sup>15</sup>  
 ana ki roto ki nga tangata, ka karanga atu, Ka mea, E mara ma, he aha koutou ka mea ai i enei  
 mea? he tangata ano maua, he rite tahi ki a koutou te tu, e kauwhau ana hoki i te rongopai, kia tahuri  
 ke koutou i enei mea tekateka noa ki te Atua ora, nana nei i hanga te rangi me te whenua, te moana  
<sup>16</sup>  
 me o reira mea katoa: I nga whakatupuranga hoki kua pahemo atu, i tukua e ia nga iwi katoa  
<sup>17</sup>  
 kia haere i o ratou ake ara. Otiia kihai i tukua e ia kia kahore he kaiwhakaatu mona; i atawhai  
 hoki ia, i homai ano e ia ki a koutou te ua o te rangi, me nga po hua, i makona ai o koutou ngakau  
<sup>18</sup>  
 i te kai, i te koa. A ka korerotia enei kupu, na mutu whakauaua i a raua te mea a nga tangata ki  
 te patu whakahere ma raua.  
<sup>19</sup>  
 Otira ka haere mai etahi Hurai i Anatioka, i Ikoniuma: a ka whakakiki ratou i nga mano a  
<sup>20</sup>  
 akina ana a Paora ki te kohatu, toia ana ki waho o te pa, hua noa kua mate. Otiia i nga akonga  
 e tu ana i tona taha, ka whakatika ia, haere ana ki roto ki te pa: a i te aonga ake ka haere raua ko  
<sup>21</sup>  
 Panapa ki Rerepe. A, no ka kauwhau raua i te rongopai ki taua pa, a he tokomaha ka meinga  
<sup>22</sup>  
 hei akonga, ka hoki raua ki Raihitara, ki Ikoniuma, ki Anatioka; Whakau ana i nga wairua o nga  
 akonga, whakahau ana i a ratou kia mau tonu ki te whakapono, kua takoto hoki te tikanga, me na  
<sup>23</sup>  
 runga i nga matenga maha he ara atu mo tatou ki te rangatiratanga o te Atua. A, no ka whakaritea  
 e raua he kaumatua mo ratou i tenei hahi, i tenei hahi, me te inoi ano raua, me te nohopuku, ka  
<sup>24</sup>  
 tukua atu ratou e raua ki te Ariki, i whakapono nei ratou. Na ka ka haere raua na waenganui o  
<sup>25</sup>  
 Pihiria, tae tonu atu ki Pamapurua. A ka oti te kauwhau e raua te kupu ki Pereka, na ka haere  
<sup>26</sup>  
 raua ki raro ki Ataria. A rere atu ana i reira ki Anatioka, ki te wahi i tukua ai raua ki te aroha  
<sup>27</sup>  
 noa o te Atua, mo te mahi ka oti nei i a raua. Na ka tae raua, ka huihuia te hahi, ka korerotia nga  
 mea i mahi tahi ai te Atua me raua, ko tana uakanga hoki i te tatau o te whakapono ki nga Tauwiwi.  
<sup>28</sup>  
 A kihai i iti te wa i noho ai raua i reira ki nga akonga.

## Chapter 15

<sup>1</sup>  
 Na ka tae iho etahi tangata i Huria ka whakaako i nga teina, Ki te kore koutou e kotia, kia rite  
<sup>2</sup>  
 ki ta Mohi, e kore koutou e taea te whakaora. Na kihai i iti te whawhai, te uiui a Paora raua ko  
 Panapa ki a ratou, ka whakaritea ko Paora, ko Panapa, ko etahi atu hoki o ratou, e haere ki nga  
<sup>3</sup>  
 apotoro ki nga kaumatua ki Hiruharama, mo tenei putake. Heoi arahina ana ratou e te hahi, haere

ana ra Piniki, ra Hamaria, korero ana i te tahirutanga o nga Tauwi: a hoatu ana e raua he hari nui  
<sup>4</sup> ki nga teina katoa. A, no to raua taenga ki Hiruharama, ka whakamanuhiritia raua e te hahi, e nga  
<sup>5</sup> apotoro hoki ratou ko nga kaumatua, ka korerotia nga mea i mahi tahi ai te Atua me raua. Na ko  
 te whakatikanga o etahi tangata whakapono no te titorehanga ki nga Parihi, ka mea, Me kokoti  
 ratou, me ako hoki kia whakaritea te ture a Mohi.

<sup>6</sup> Na ka huihui nga apotoro ratou ko nga kaumatua ki te whakaaro ki tenei mea. <sup>7</sup> A, ka nui te  
 tautohetohe, ka whakatika a Pita, ka mea ki a ratou, E nga tuakana, e matau ana koutou ki te  
 whiriwhiringa a te Atua i mua rawa i roto i a koutou, ko toku mangai e rongoi ai nga Tauwi i te  
<sup>8</sup> kupu o te rongopai, e whakapono ai hoki. I whakaae hoki ki a ratou te Atua e matau nei aki nga

<sup>9</sup> ngakau, i a ia i hoatu ai i te Wairua Tapu ki a ratou, rite tahi ki tana ki a tatou; Kahore hoki i puta  
<sup>10</sup> ke tona whakaaro ki a tatou, ki a ratou, i o ratou ngakau kua ma i a ia i runga i te whakapono. Ko  
 tenei, he aha koutou ka whakamatautau ai i te Atua, ka whakatakoto ioka ai ki te kaki o nga akonga,

<sup>11</sup> he mea kihai nei i taea te mau e o tatou matua, e tatou ranei? Heoi ka whakapono nei tatou, tera  
<sup>12</sup> tatou e ora i runga i te aroha noa o te Ariki, o Ihu Karaiti, ka pera tahi hoki me ratou. Na noho  
 puku ana te mano katoa, whakarongo ana ki a Panapa raua ko Paora e korero ana i nga tohu, i nga

<sup>13</sup> mea whakamiharo, i mea ai te Atua kia mahia e raua i roto i nga Tauwi. A ka mutu ta raua, ka

<sup>14</sup> whakahoki a Hemi, ka mea, E nga tuakana, whakarongo ki ahau: Kua korerotia e Himiona ta  
<sup>15</sup> te Atua tirohanga mai i mua, tana tangohanga i tetahi iwi i roto i nga Tauwi mo tona ingoa. E

<sup>16</sup> rite ana ano ki tenei nga korero a nga poropiti; i tuhituhia ra, I muri o enei mea ka hoki mai ahau,  
 ka hanga ano e ahau te tapenakara o Rawiri, kua hinga nei; ka hanga ano e ahau ona wahi kua

<sup>17</sup> horoa, a ka whakaarahia e ahau: Kia rapu ai nga toenga o nga tangata ki te Ariki, me nga Tauwi  
 katoa hoki i karangatia nei toku ingoa ki runga ki a ratou, e ai ta te Ariki, e mahi nei i enei mea

<sup>18</sup> katoa, Nana nei i mea kia mohiotia enei mea katoa no te timatanga ra ano o te ao. <sup>19</sup> Na ko toku  
 whakaaro tenei, kia kua e whakararua te hunga e tahuri ana mai ki te Atua i roto i nga Tauwi:

<sup>20</sup> Engari kia tuhi atu tatou ki a ratou, kia mawehe atu ratou i nga poke o nga whakapakoko, i te

<sup>21</sup> moe tahae, i te mea kua notia te kaki, i te toro. No nga whakatupuranga hoki o mua nga  
 kaikauwhau i a Mohi i tenei pa, i tenei pa, he mea korero i roto i nga whare karakia i nga hapati  
 katoa.

<sup>22</sup> Katahi ka pai nga apotoro ratou ko nga kaumatua me te hahi katoa, kia whiriwhiria etahi  
 tangata i roto i a ratou, kia tonoa hei hoa mo Paora raua ko Panapa ki Anatioka; a Hura, i huaina

nei ko Panapa, raua ko Hira, he hunga ingoa nui i roto i ng a teina: <sup>23</sup> Ka tuhia hoki enei mea hei mauranga; Na nga apotoro ratou ko nga kaumatua, ko nga tuakana, ki nga teina o roto i nga Tauuiwi, i Anatioka, i Hiria, i Kirikia; tena koutou: <sup>24</sup> Na, ka rongu nei matou, tera etahi i haere atu nei i a matou, i whakararu i a koutou ki nga korero, i whakapohehe i o koutou ngakau, kahore nei a matou kupu ki a ratou: <sup>25</sup> Kotahi tonu to matou whakaaro he pai kia whiriwhiria etahi tangata, kia tonoa atu ki a koutou, hei hoa mo a matou tangata e aroha nei, mo Panapa raua ko Paora; <sup>26</sup> He hunga i tuku nei i a raua ki te mate hei mea mo te ingoa o to tatou Ariki, o Ihu Karaiti. <sup>27</sup> Na kua tonoa atu nei e matou a Hura raua ko Hira, ma raua hoki e korero a kupu atu aua mea ano. <sup>28</sup> I pai hoki ki te Wairua Tapu, ki a matou hoki, kia kua e utaina ki a koutou tetahi atu whakataimaha, ko enei mea tika anake; <sup>29</sup> Kia mawehe koutou i nga mea e patua ana ma nga whakapakoko, i te toto, i te mea kua notia te kaki, i te moe tahae: ka tiaki koutou i a koutou i enei mea, ka pai ta koutou mahi. <sup>30</sup> Kia ora koutou. A, no to ratou tukunga atu, ka haere ki Anatioka: na ka huihuia te mano, ka hoatu te pukapuka. <sup>31</sup> A ka oti te korero, ka koa ratou mo te kupu whakahauora. <sup>32</sup> Na he maha nga kupu a Hura raua ko Hira i whakahau ai, i whakau ai i nga teina; he poropiti hoki raua. <sup>33</sup> A, ka roa iho raua ki reira, ka tukua raua e nga teina i runga i te rangimarie ki te hunga nana raua i tono atu. <sup>34</sup> Heoi i pai a Hira kia noho ki reira. <sup>35</sup> Ko Paora ia raua ko Panapa i noho i Anatioka, i whakaako, i kauwhau i te kupu a te Ariki, ratou tahi ko tera hunga tokomaha. <sup>36</sup> Na muri iho i etahi ra ka ki atu a Paora ki a Panapa, Taua ka hoki, ka tiroiro i nga teina i nga pa katoa i kauwhautia ai e taua te kupu a te Ariki, i to ratou peheatanga. <sup>37</sup> A ka mea a Panapa kia mauria hei hoa a Hoani, e huaina nei ko Maka. <sup>38</sup> Otiia kihai a Paora i pai kia haere i to raua tira te tangata i whakarere ra i a raua i Pamapurua, kihai hoki i haere tahi me raua ki te mahi. <sup>39</sup> Heoi nui atu to raua ngangare, i mawehe ai raua i a raua: a mauria ana e Panapa a Maka, rere ana ki Kaiperu; <sup>40</sup> Na tango ana a Paora i a Hira, haere ana, he mea tuku ki te aroha noa o te Atua e nga teina. <sup>41</sup> A haere ana ia ra Hiria, ra Kirikia, whakau ana i nga hahi.

## Chapter 16

<sup>1</sup> Na ka tae atu hoki ia ki Rerepe, ki Raihitara: a, i reira tetahi akonga, ko Timoti te ingoa, he tama na tetahi wahine whakapono, he Hurai, ko tona papa ia he Kariki. <sup>2</sup> He pai te korero mona a nga teina i Raihitara, i Ikoniuma. <sup>3</sup> I mea a Paora kia haere ia hei hoa mona; a tangohia ana ia, kotia ana, he mea hoki mo nga Hurai e noho ana i aua wahi: i matau hoki ratou katoa he kariki tona papa. <sup>4</sup> A, i a ratou e haere ana i nga pa, ka tukua e ratou hei pupuri ma ratou nga tikanga i whakaritea e nga apotoro, e nga kaumatua, i Hiruharama. <sup>5</sup> Na ka whakaukia nga hahi ki te whakapono, ka nui haere hoki i tenei ra, i tenei ra. <sup>6</sup> Na haere ana ratou na waenganui o te whenua o Pirikia, o Karatia, kua araia hoki e te Wairua Tapu kei korero i te kupu ki Ahia; <sup>7</sup> A, i te taenga atu ki Maihia, ka whakamatau ratou ki te haere ki Pitinia; heoi kihai i tukua e te Wairua o Ihu; <sup>8</sup> Na kapea ana Maihia, ka haere ki Toroa. <sup>9</sup> A ka kitea e Paora he kitenga i te po: He tangata no Makeronia e tu ana, e tohe ana ki a ia, e mea ana, <sup>10</sup> Whiti mai ki Makeronia, awhinatia matou. A, no ka kitea te kitenga, ka mea tonu matou kia haere ki Makeronia, i whakaaro hoki, na te Atua matou i karanga ki te kauwhau i te rongopai ki a ratou. <sup>11</sup> Heoi, ko te rerenga atu i Toroa, ka tika tonu matou ki Hamotarakia, a ao ake te ra ki Neapori; <sup>12</sup> I reira atu ki Piripai, ko te pa nui ia o taua wahi o Makeronia, he koroni no Roma: a noho ana matou i taua pa a taka noa etahi ra. <sup>13</sup> Na i te ra hapati ka haere matou ki waho o te pa, ki te taha o tetahi awa, he whakaaro ko te wahi tera hei karakiatanga; a ka noho, ka korero ki nga wahine i haere tahi ake. <sup>14</sup> Na ka whakarongo tetahi wahine, ko Riria te ingoa, he kaihoko papura, no te pa o Taiataira, he wahine karakia ki te Atua: he mea whakapuare tona ngakau e te Ariki, i rongo ai ia ki nga mea i korerotia e Paora. <sup>15</sup> A, no ka oti ia te iriiri, ratou ko tona whare, ka tohe ia, ka mea, Ki te mea kua whakaaro koutou he pono taku mahi ki te Ariki, tomo mai koutou, e noho ki toku whare. Na ka tohea matou e ia. <sup>16</sup> Na, i a matou e haere ana ki te wahi inoi, ka tutaki ki a matou tetahi kotiro, he wairua matakite nei tona, he nui te utu i riro i a ia ma ona rangatira, i a ia e poropiti ana: <sup>17</sup> Ka whai ia i a matou ko Paora, ka karanga, ka mea, he pononga enei tangata na te Atua, na te Runga Rawa, e whakapuakina ana e ratou te ara o te ora ki a koutou. <sup>18</sup> Na he maha nga ra i mea ai ia i tenei. Otiia ka hoha a Paora, ka tahuri, ka mea ki te wairua, Ko taku kupu tenei ki a koe i runga i te ingoa o Ihu Karaiti, puta mai i roto i a ia, A puta mai ana i taua haora ano. <sup>19</sup> Otira, no te kitenga o ona rangatira kua kore he mahinga moni ma ratou, ka mau ki a Paora raua ko Hira, ka toia ki te kainga hoki ki nga rangatira; <sup>20</sup> A, ka oti raua te mau ki nga kaiwhakawa, ka mea, Ko enei tangata, he Hurai nei,

e tino whakararuraru ana i to tatou pa, <sup>21</sup> E whakapuakina ana hoki e raua he ritenga e kore nei e  
 tika kia whakaaetia, kia mahia e tatou, e nga tangata o Roma. <sup>22</sup> Na ko te whakatikanga o te mano  
 ki a raua; ka huhua o raua kakahu e nga kaiwhakawa, ka mea kia whiua ki te rakau. <sup>23</sup> A, ka maha  
 o raua whiunga e ratou, ka maka raua ki te whare herehere, ka tohutohutia te kaitiaki herehere, kia  
 mau tana pupuri i a raua. <sup>24</sup> No te rironga i a ia o taua kupu, ka maka raua e ia ki te whare herehere  
 i roto rawa, ka whakauria o raua waewae ki te rakau.  
<sup>25</sup> Na i waenganui po ka inoi a Paora raua ko Hira, ka waiata atu ki te Atua, me te whakarongo  
 ano nga herehere ki a raua; <sup>26</sup> Na ka pa whakarere he ru nui, i ngarue ai nga turanga o te whare  
 herehere: a puare tonu atu nga tatau katoa, whakakorokoroa ana nga herenga o nga tangata katoa.  
<sup>27</sup> A, ka oho te kaitiaki herehere i te moe, ka kite i nga tatau o te whare herehere e puare ana, na ka  
 unu i tana hoari, ka mea ki te patu i a ia ano, hua noa kua oma nga herehere. <sup>28</sup> Na kanui te reo o  
 Paora ki te karanga, ka mea, Kauaka tetahi mea kino e meatia ki a koe: ina tonu hoki matou katoa.  
<sup>29</sup> A karangatia ana e ia he rama, ka rere ki roto, ka haere wiri, ka takoto ki te aroaro o Paora raua  
 ko Hira, <sup>30</sup> Ka arahina hoki raua ki waho, ka mea, E hoa ma, me aha ka ora ai ahau? <sup>31</sup> Ka mea  
 raua, Me whakapono ki te Ariki, ki a Ihu Karaiti, ka ora ai koe, koutou tahi ko tou whare. <sup>32</sup> Na  
 ka korerotia te kupu a te Ariki ki a ia, ki nga tangata katoa hoki i roto i tona whare. <sup>33</sup> A ka mauria  
 raua e ia i taua haora o te po, ka horoia o raua whiunga; na iriiria tonutia iho, a ia me ana tangata  
<sup>34</sup> katoa. A ka arahina raua e ia ki tona whare, ka whakaturia he tepu kai ki mua i a raua, a nui atu  
 tona hari, me tona whare katoa, i te mea kua whakapono nei ki te Atua.  
<sup>35</sup> I te aonga ake ia o te ra, ka tonoa nga katipa e nga kaiwhakawa, i mea, Tukua aua tangata  
 kia haere. <sup>36</sup> Na ka korerotia e te kaitiaki herehere enei kupu ki a Paora, ka mea, Kua tonu tangata  
 mai nga kaiwhakawa, kia tukua korua: tena ra puta mai, haere i runga i te rangimarie. <sup>37</sup> Na ko te  
 kinga atu a Paora, Kua whiua nuitia nei maua e ratou, ahakoa kahore i whakawakia, he tangata hoki  
 no Roma, a kua maka maua ki te whare herehere; a kei te maka pukutia atu maua aiane i ratou?  
<sup>38</sup> Kahore rapea: engari ma ratou tonu e haere m ai, e whakaputa i a maua ki waho. na ka korerotia  
<sup>39</sup> enei kupu e nga katipa ki nga kaiwhakawa: a ka wehi, i to ratou rongonga no Roma raua; Na ka  
 haere mai ratou, ka tohe ki a raua; a, ka oti raua te arahi ki waho, ka mea ratou kia haere atu raua  
<sup>40</sup> i te pa. A ka puta atu raua i te whare herehere, ka tomo ki te whare o Riria: a, no ka kite raua i  
 nga teina, ka whakamarie i a ratou, ka haere.

## Chapter 17

<sup>1</sup> Na, ka haereere raua i Amapipori, i Aporonia, ka tae ki Teharonika; he whare karakia no nga  
<sup>2</sup> Hurai i reira: A ka tomo atu a Paora ki a ratou, he tikanga hoki nana, a e toru nga hapati i korerorero  
<sup>3</sup> ai ki a ratou i roto i nga karaipiture, I whakapuaki ai, i korero ai, kua takoto hoki te tikanga kia  
mamae a te Karaiti, kia ara mai hoki i te hunga mate; a ko tenei Ihu, e kauwhautia nei e ahau ki a  
<sup>4</sup> koutou, ko ia te Karaiti. Na ka whakapono etahi o ratou, ka piri hoki ki a Paora raua ko Hira; he  
<sup>5</sup> tokomaha hoki o nga Kariki karakia, kihai hoki i ruarua nga wahine rangatira. Heoi ka hae nga  
Hurai, ka tango ki a ratou i etahi tangata kikino o te hunga mangere, ka huihuia nga tangata, ka  
whakaohotia te pa; na ko te huakanga ki te whare o Hahona, ka mea kia whakaputaina raua ki te  
<sup>6</sup> iwi. A, no te korenga i kitea raua, ka toia e ratou a Hahona ratou ko etahi teina ki nga rangatira  
o te pa, ka karanga, Kua tae mai ki konei nga tangata i whakatutungia ai te ao; <sup>7</sup> Kua puritia hoki  
e Hahona; e tika ke ana nga mahi a tenei hunga katoa i nga ture a Hiha, e mea ana, tera atu tetahi  
<sup>8</sup> kingi, ko Ihu. Na, ka rongoa te mano ratou ko nga rangatira o te pa ki enei mea, ka pororaru. <sup>9</sup> Na  
ka tango ratou i etahi moni pupuri i a Hahona ratou ko era atu, a tukua atu ana ratou.  
<sup>10</sup> Na tonoa tonutia atu e nga teina a Paora raua ko Hira i te po ki Peria: i to raua taenga atu,  
ka haere ki te whare karakia o nga Hurai. <sup>11</sup> Engari enei i nui atu te ahua rangatira i to nga tangata  
o Teharonika, i hohoro tonu ratou te tango i te kupu, a i tenei ra, i tenei ra i rapu i roto i nga  
<sup>12</sup> karaipiture i te tikanga o enei mea. Na he tokomaha o ratou i whakapono; kihai hoki i tokoiti  
<sup>13</sup> nga wahine rangatira o nga Kariki, me nga tane hoki. Otira, i te mohiotanga o nga Hurai o  
Teharonika, tera te kupu a te Atua te kauwhautia ana e Paora ki Peria, ka haere hoki ratou ki reira  
<sup>14</sup> ki te whakaoho, ki te whakararuraru i nga mano. Na tonoa tonutia atu e nga teina a Paora kia  
<sup>15</sup> haere tae noa ki te moana: ko Hira ia raua ko Timoti i noho ki reira. Na ka kawea a Paora e ona  
kaiarahi ki Atena: a, ka riro he kupu ki a Hira raua ko Timoti kia hohoro te haere ki a ia, ka hoki  
ratou.  
<sup>16</sup> Na, i a Paora e tatari ana ki a raua i Atene, ka oho tona wairua i roto i a ia, i tana kitenga i  
<sup>17</sup> te pa e ki ana i te whakapakoko. Na totohe ana ia i roto i te whare karakia ki nga Hurai ratou ko  
<sup>18</sup> nga tangata karakia, i te kainga hoko hoki i nga ra katoa ki nga tangata i pono ki a ia. A ka  
ngangare ki a ia etahi tohunga o nga Epikureana, o nga Toika. Ko etahi i mea, he aha ta tenei tangata  
korerorero e mea nei? i mea etahi, Me te mea he kaiwhakapuaki ia i etahi atua tauhou: mo tana

<sup>19</sup> kauwhau i a Ihu, i te aranga, ki a ratou. Na ka mau ratou ki a ia, ka kawea ki Areopaka, ka mea,  
<sup>20</sup> Kia mohio matou, he aha ranei tenei ako hou e korerotia nei e koe? Poka ke hoki nga mea e  
<sup>21</sup> mauria mai nei e koe ki o matou taringa: koia matou i mea ai kia mohio, he aha enei mea. Ka  
 mutu hoki ta nga tangata katoa o Atene, ratou ko nga manuhiri e noho ana i reira, e watea ai, ko te  
 korero ranei, ko te whakarongo ranei ki tetahi mea hou.  
<sup>22</sup> Na ka tu a Paora i waenganui o Areopaka, ka mea, E nga tangata o Atene, i nga mea katoa  
<sup>23</sup> ka kite ahau he ahua nui ke to koutou wehi ki nga atua maori. I ahau hoki e haereere ana, e  
 matakita ana i nga mea e karakia nei koutou, ka kite ahau i tetahi aata i tuhia nei i runga, KI TE  
 ATUA NGARO. Heoi ko ta koutou e karakia kuware nei, ko ia taku e whakaatu nei ki a koutou.  
<sup>24</sup> Ko te Atua, nana nei i hanga te ao me nga mea katoa i roto, ko ia nei te Ariki o te rangi, o te  
<sup>25</sup> whenua, e kore ia e noho ki nga whare i hanga e te ringa; E kore ano e mahia he mea mana e te  
 ringa tangata, me te mea he mate nona ki tetahi aha ranei, ko ia hoki hei homai i te ora, i te manawa,  
<sup>26</sup> i nga mea katoa, ki nga tangata katoa; Kotahi ano te toto i hanga ai e ia nga iwi katoa o nga  
 tangata, hei noho ki te mata katoa o te whenua, nana hoki i whakatakoto o ratou wa i whakaritea i  
<sup>27</sup> mua, me nga kaha o to ratou nohoanga; Kia rapu ai ratou i te Atua, me kore e whawha, e kite i  
<sup>28</sup> a ia, ahakoa ra kahore ia i matara atu i a tatou katoa: Nana hoki tatou i ora ai, i korikori ai, i  
<sup>29</sup> noho ai; i pera hoki te korero a etahi o o koutou kaitito, Ko tatou hoki tona uri. Na, he uri nei  
 tatou no te Atua, e kore e tika kia mea tatou, kei te rite te Atua ki te koura, ki te hiriwa, ki te kohatu,  
<sup>30</sup> ki te mea i whakairoa e te mohio, e te whakaaro o te tangata. Na kahore i whakaaroa e te Atua  
 nga wa o te kuwaretanga; inaianei ia kua whakahau ia i nga tangata katoa o nga wahi katoa kia  
<sup>31</sup> ripeneta: Kua rite hoki i a ia he ra e whakawa ai ia i te ao i runga i te tika, ara ma te tangata kua  
 whakaritea nei e ia; kua tukua nei hoki he tohu ki nga tangata katoa, i tana whakaarahanga i a ia i  
 te hunga mate.  
<sup>32</sup> Na ka rangona e ratou te aranga o te hunga mate, ka tawai etahi; ko etahi i mea, Taihoa  
<sup>33</sup> matou e whakarongo ano ki tenei mea i a koe. Heoi puta atu ana a Paora i waenganui i a ratou.  
<sup>34</sup> Ko etahi tangata ia i piri ki a ia, i whakapono; i roto i a ratou a Rionaihia no Areopaka, ko tetahi  
 wahine, ko Ramari te ingoa, ratou ko etahi atu.

## Chapter 18

<sup>1</sup> Muri iho i enei mea ka haere atu a Paora i Atene, ka tae ki Koriniti; <sup>2</sup> Na ka kite ia i tetahi Hurai ko Akuira te ingoa, i whanau ki Ponoto, he mea tae hou mai i Itari, raua ko tana wahine, ko Pirihiira; kua whakahaua hoki e Karauria kia haere atu nga Hurai katoa i Roma: a ka haere ia ki a

<sup>3</sup> raua. A, no te mea kotahi ta ratou mahi, ka noho ia ki a raua, ka mahi ratou: he tui teneti hoki ta

<sup>4</sup> raua mahi. Na ka korerorero ia i roto i te whare karakia i nga hapati katoa, e tohe ana ki nga Hurai

<sup>5</sup> ratou ko nga Kariki. No te taenga mai ia o Hira raua ko Timoti i Makeronia, ka takare te ngakau

<sup>6</sup> o Paora, ka whakapuaki ki nga Hurai ko Ihu te Karaiti. Heoi, i a ratou ka whakatika, ka kohukohu, ka ruia e ia ona kakahu, ka mea ki a ratou, hei runga i o koutou matenga o koutou toto; ka ma ahau: ko tenei ka haere ahau ki nga Tauwiwi.

<sup>7</sup> Na ka haere atu ia i reira, ka tomo ki te whare o tetahi tangata, ko Taituha Hutuha te ingoa,

<sup>8</sup> he tangata karakia ki te Atua, ko tona whare i tata tonu ki te whare karakia. Na ka whakapono a Kirihipu, te rangatira o te whare karakia, me tona whare katoa ki te Ariki; he tokomaha hoki nga

<sup>9</sup> Koriniti, i a ratou ka rongu, i whakapono, i iriiria hoki. A ka korero moemoea te Ariki ki a Paora

<sup>10</sup> i te po, Kaua e wehi, engari me korero, kei noho puku: Kei a koe hoki ahau, e kore hoki tetahi

<sup>11</sup> tangata e pa ki a koe, e hoatu i te kino ki a koe: he nui hoki aku tangata i tenei pa. Na kotahi te tau e ono marama i noho ai ia i reira, i whakaako ai i te kupu a te Atua i roto i a ratou.

<sup>12</sup> Na, i a Kario e noho ana hei kawana mo Akaia, kotahi tonu whakatikanga o nga Hurai ki a

<sup>13</sup> Paora, a kawea ana ia ki te nohoanga whakawa, Ka mea, E kukume ana tenei i nga tangata ki

<sup>14</sup> tetahi karakia ki te Atua e poka ke ana i ta te ture. A, e mea tonu ana te mangai o Paora ki te puaki, ka mea a Kario ki nga Hurai, E nga Hurai, mehemea ko tetahi hanga he, ko tetahi mahi kino

<sup>15</sup> ranei, he tika kia ata whakarongo ahau ki a koutou: Ko tenei he totohe korero, he mea ki nga ingoa, ki ta koutou ture, kei a koutou te whakaaro; e kore hoki ahau e pai kia waiho ahau hei

<sup>16</sup> kaiwhakawa mo ena mea. Na peia atu ana ratou e ia i te nohoanga whakawa. <sup>17</sup> Na ka mau nga Kariki katoa ki a Hotene, rangatira o te whare karakia, a whiua ana ia i mua o te nohoanga whakawa. Heoi kihai a Kario i whakaaro ki tetahi o enei mea.

<sup>18</sup> A, ka maha nga ra i noho ai a Paora, ka poroporoaki ia ki nga teina, a rere ana ki Hiria, ratou

<sup>19</sup> ko Pirihiira ko Akuira; he mea moremore tona i Kenekerea: he ki taurangi hoki nana. A ka tae ratou ki Epeha, ka mahue raua i a ia ki reira: ko ia i tomo ki te whare karakia, korerorero ai ki nga

<sup>20</sup> Hurai. A, i ta ratou meatanga kia roa atu te wa e noho ai ia ki a ratou, kihai ia i whakaae; <sup>21</sup> Heoi poroporoaki ana ki a ratou, ka mea, E hoki mai ano ahau ki a koutou, ki te pai te Atua; a rere atu



<sup>22</sup>  
 ana ia i Epeha. A, no ka u ia ki Hiharia, ka haere atu ka oha ki te hahi, a haere ana ki Anatioka.  
<sup>23</sup>  
 A, roaroa iho ki reira, ka haere, a haereerea marietia ana e ia te whenua o Karatia, o Pirikia, me  
 te whakau i nga akonga katoa.  
<sup>24</sup>  
 Na ka haere mai tetahi Hurai ki Epeha, ko Aporo te ingoa, i whanau ki Arehanaria, he pu  
<sup>25</sup>  
 korero, he tangata kaha ki nga karaipiture. I whakaakona tenei tangata ki te ara o te Ariki; he  
 tangata ia e toko tonu ake ana te ngakau, ka korero ia, tika tonu hoki tana whakaako i nga mea mo  
<sup>26</sup>  
 Ihu; heoi ano tana i matau ai ko te iriiri a Hoani; Ka anga ia ka korero nui i roto i te whare  
 karakia. No te rongonga o Akuira raua ko Pirihia ki a ia, ka mau raua ki a ia, ka ata whakaatu ki a  
<sup>27</sup>  
 ia i te ara o te Atua. A, no ka mea ia kia haere ki Akaia, ka tautokona ia e nga teina, a ka tuhituhi  
 ratou ki nga akonga kia whakamanuhiritia ia e ratou: a, no tona taenga atu, ka whakakahangia e ia  
<sup>28</sup>  
 te hunga i meinga nei e te aroha noa kia whakapono: Kaha rawa hoki tana whawhati i ta nga  
 Hurai i roto i te huihui; whakaaturia ana e ia ta nga karaipiture mo Ihu, ko te Karaiti ia.

## Chapter 19

<sup>1</sup>  
 I a Aporo i Koriniti, ka puta atu a Paora na nga wahi o runga, ka tae ki Epeha: a tupono atu  
<sup>2</sup>  
 ko etahi akonga. A ka mea ki a ratou, I riro ranei te Wairua Tapu i a koutou i to koutou  
 whakaponotanga? Ano ra ko ratou ki a ia, Kahore, kiano matou i rongo noa mehemea te Wairua  
<sup>3</sup>  
 Tapu i homai. Ka mea ia ki a ratou, I iriiria oti koutou ki roto ki te aha? Ka mea ratou, Ki roto ki  
<sup>4</sup>  
 ta Hoani iriiri. Na ka mea a Paora, Ko ta Hoani iriiri he iriiri ripeneta. I mea ia ki te iwi, kia  
<sup>5</sup>  
 whakapono ratou ki tetahi e haere mai ana i muri i a ia, ara ki a Ihu. A, ka rongo ratou i tenei, ka  
<sup>6</sup>  
 iriiria i runga i te ingoa o te Ariki, o Ihu. Na ka oti te whakapa e Paora ona ringa ki runga ki a  
<sup>7</sup>  
 ratou, ka tae mai te Wairua Tapu ki a ratou; na ka korerotia e ratou nga reo, ka poropiti hoki. A  
 ko to ratou tokomaha kei te tekau ma rua.  
<sup>8</sup>  
 Na ka tomo ia ki te whare karakia, ka korero maia atu, e toru nga marama i kororerero ai, i  
<sup>9</sup>  
 kukume ai ki nga mea o te rangatiratanga o te Atua. A, ka pakeke etahi, ka whakateka, ka  
 whakahawea ki taua ritenga i te aroaro o te mano, ka mawehe atu ia i roto i a ratou, ka wehea ketia  
<sup>10</sup>  
 nga akonga, ka kororerero i tenei ra, i tenei ra, i roto i te kura o Tairanu. Na e rua ona tau i penei

ai; a ka rongu katoa te hunga e noho ana i Ahia, nga Hurai, nga Kariki, i te kupu a te Ariki, a Ihu.

11 Na ehara i te merekara noa ake a te Atua i mea ai kia meatia e nga ringa o Paora: 12 Ina hoki, i te mauranga atu i nga aikiha me nga arai i tona tinana ki te hunga mate, mutu ake o ratou mate, a puta atu ana nga wairua kino i roto i a ratou.

13 Katahi ka anga etahi o nga Hurai haereere noa, he hunga pei wairua, ka whakahua i te ingoa o te Ariki, o Ihu ki runga ki etahi i nga wairua kino, ka mea, He whakahua tenei na matou ki a koutou i a Ihu, i ta Paora e kauwhau nei. 14 Na i pera ano nga tama tokowhita a tetahi Hurai, a

15 Hewa, he tohunga nui ia. Na ka whakahoki te wairua kino, ka mea ki a ratou, E mohio ana ahau ki a Ihu, e matau ana ki a Paora; ko koutou ia, ko wai ra? 16 Na ko te tupeketanga o te tangata i a ia nei te wairua kino ki a ratou, kua kaha i a ratou, taea ana ratou e ia, no ka oma tahanga ratou, ka

17 oma mamae atu i taua whare. A ka mohiotia tenei e nga tangata katoa e noho ana i Epeha, e nga Hurai ratou tahi ko nga Kariki; a ka tau te wehi ki a ratou katoa, a whakanuia ana te ingoa o te

18 Ariki, o Ihu. A he tokomaha o te hunga whakapono i haere mai, i whaki, i whakakite i a ratou

19 mahi. He tokomaha ano o te hunga i mahi i nga mahi tinihanga, i huihui i a ratou pukapuka, a tahuna ana i te aroaro o te katoa: a ka taua nga utu o aua pukapuka, ka kitea e rima tekau mano

20 hiriwa. Koia ano te nui o te tupu o te kupu a te Atua, te kaha.

21 A, no ka rite enei mea, ka mea a Paora i roto i tona wairua, kia tika na Makeronia, na Akaia, kia haere ki Hiruharama; i mea ia, Ka tae ahau ki reira, ko Roma ano taku e tiki ai e titiro. 22 A tokorua ana i tono ai ki Makeronia o te hunga e mahi ana ki a ia, ko Timoti raua ko Eratu; ko ia i

23 noho iho i Ahia mo tetahi wa. Na i taua wa kihai i nohinohi te ngangau i puta ake mo taua Ara.

24 Tera hoki tetahi tangata, ko Rimitiriua te ingoa, he kaimahi hiriwa, nana nei i hanga nga temepara

25 hiriwa o Riana, kihai hoki i nohinohi nga utu i tika mai i tana mahi ki nga kaihanganga; Na ka whakaminea ratou e ia me era kaimahi o nga pera, a ka mea, E mara ma, e matau ana koutou, no

26 tenei mahi a tatou rawa. Na e kite ana, e rongu ana koutou, ehara i te mea ko Epeha anake, engari he iti te wahi o Ahia katoa kua mahue nei i tenei Paora te kukume, te whakapeau ke i te tini o te

27 tangata, e mea ana ia, Ehara enei i te atua, e hanga nei e te ringa: Na ehara i te mea ko to tatou nei wahi anake ka tata te kore noa iho; tera ano hoki e whakakahoretia te temepara o te atua nui, o

28 Riana, a meake memeha noa iho tona nui, e karakiatia nei e Ahia katoa, e te ao. A, no to ratou

29 rongonga, a ka ki i te riri, ka karanga ake, ka mea, He nui a Riana o nga Epehi. Na ka tutu te puehu o te pa katoa: a, ka oti te hopu e ratou a Kaiu raua ko Aritaku, he hunga no Makeronia, he

30  
 hoa haere no Paora, na kotahi tonu ta ratou kokiritanga ki te whare matakaitaki. A, i a Paora e  
 31  
 mea ana kia tomo ki roto ki te iwi, kihai ia i tukua e nga akonga. Na ka unga tangata mai etahi  
 o nga rangatira o Ahia, i pai nei ki a ia, ka mea kia kaua ia e tuku i a ia ki roto ki te whare matakaitaki.  
 32  
 Heoi puta ke te karanga a etahi, puta ke a etahi: tino raruraru hoki taua whakaminenga; ko te  
 33  
 nuinga kihai i matau ki te mea i huihui ai ratou. Na ka mauria e ratou a Arehanara i roto i te hui,  
 na nga Hurai ia i mea kia whakatika atu. A tawhiri ana te ringa o Arehanara, i mea hoki kia korerotia  
 34  
 e ia ta ratou ki te iwi. Heoi ka matau ratou he Hurai ia, kotahi tonu te reo o te katoa ki te karanga,  
 35  
 a tata noa ki te rua nga haora, He nui a Riana o nga Epehi. A, ka mariri iho te huihui i te  
 kaiwhakawa, ka mea ia, E nga Epehi, ko wai te tangata kahore e mohio ko te pa o nga Epehi te  
 36  
 kaitiaki temepara o te atua nui, o Riana, o te whakapakoko ano hoki i taka iho i a Hupita? Na,  
 37  
 ka kore nei enei mea e taea te whakakorekore, heoi kia ata noho, kaua hoki e hikaka te mahi. Kua  
 arahina mai nei hoki e koutou enei tangata ki konei, ehara nei i te hunga tahae mea tapu, ehara hoki  
 38  
 i te hunga kohukohu ki to tatou atua. Na, ki te mea he kupu ta Rimitiriu ratou ko ona hoa mahi  
 39  
 mo tetahi tangata, e taea te whakawa, a tenei ano nga kawana: ma ratou ratou e whakawa. Na,  
 40  
 ki te mea he mea ke ta koutou e whai na, waiho ma te runanga tika te ritenga. Ko wai hoki ka  
 tohu? tera pea tatou e whakawakia mo tenei ngangautanga onaianei, kahore nei ona take; kahore  
 41  
 hoki he take e tika ai ta tatou korero mo tenei huihui. A, no ka puaki enei kupu ana, ka tonoa  
 atu e ia te whakaminenga.

## Chapter 20

1  
 A, no te mutunga o te ngangau, ka karangatia e Paora nga akonga, ka tohutohu i a ratou, ka  
 2  
 poroporoaki, a turia atu ana e ia, haere ana ki Makeronia. A ka haereerea e ia aua wahi, me te  
 3  
 whakahau i a ratou ki nga kupu maha, a haere ana ia ki Kariki; A, ka toru ona marama ki reira, i  
 nga Hurai ano e whakatakoto whakaaro ana mona, i a ia meake rere ki Hiria, ka whakaaro ia kia  
 4  
 hoki ma Makeronia. A i haere tahi i a ia tae noa ki Ahia, a Hopate o Peria, te tama a Piru; a Kaiu  
 5  
 o Rerepe; a Timoti hoki ratou ko Tikiku, ko Toropimu o Ahia. Otira kua haere atu enei i mua, a

6  
e tatari mai ana ki a matou i Toroa. Na i te mutunga o nga ra o te taro rewenakore ka rere atu matou i Piripai, a po rima ka tae atu ki a ratou ki Toroa; a e whitu nga ra i noho ai ki reira.

7  
Na i te ra tuatahi o te wiki, i te mea kua huihui matou ki te whawhati taro, ka kauwhau a Paora ki a ratou, e mea ana hoki ki te haere i te aonga ake; a ka kumea roatia tana korero a waenganui po

8 9  
ra ano. A he maha nga rama i te ruma i runga, i te wahi i huihui ai matou. Na tera tetahi taitamariki, ko Utiku te ingoa, i te matapihi e noho ana, kua tino parangia e te moe: a, ka roa tonu te kauwhau a Paora, na ka pehia rawatia ia e te moe, na ka taka iho i te toru o nga whakapaparanga

10  
o nga ruma, tangohia rawatia ak e kua mate. Na ka heke iho a Paora, a hinga ana ki runga ki a ia, awahi ana i a ia, ka mea, kei ngangau koutou; kei roto hoki i a ia tona wairua. 11 Na ka kake atu

12  
ano ia, ka whawhati taro, ka kai, a ka roa rawa te korero a puao noa, ka haere. Heoi arahina oratia atu ana e ratou taua taitama, kihai hoki i nohinohi te koa.

13  
Na ko matou kua riro i mua ki te kaipuke, a rere ana ki Aho, i mea kia utaina a Paora i reira: nana hoki i whakarite, i mea hoki ko ia me ra uta. 14 A ka tutaki ki a matou ki Aho, ka utaina ia,

15  
a rere ana matou ki Mitirini. Rere atu ana matou i reira, a i te aonga ake ka taea te ritenga atu o Kio; ao ake ano ka u ki Hamo a noho ana ki Torokiriuma; ao ake ano ka u ki Miretu. 16 I mea hoki a Paora kia rere i waho ake o Epeha, kei roa ia ki Ahia: i porangi hoki me kore e rokohanga atu ia e te ra o te Petekoha ki Hiruharama.

17  
Na ka tonu tangata atu ia i Miretu ki Epeha, hei tiki i nga kaumatua o te hahi. 18 A, no to ratou taenga mai ki a ia, ka mea ia ki a ratou, E matau ana koutou ki taku tikanga i roto i a koutou

19  
i nga ra katoa, no te ra tuatahi iho ano o toku taenga mai ki Ahia, Papaku noa iho te ngakau i mahi ai ahau ki te Ariki, he maha ia nga roimata me nga whakamatautau i pa ki ahau, i nga Hurai

20  
e whakatakoto whakaaro ana moku: Kihai i puritia e ahau tetahi o nga mea pai; i whakakitea atu ano ki a koutou, i akona nuitia ki a koutou, i tenei whare, i tenei whare; 21 I kauwhautia hoki ki nga Hurai, ki nga Kariki, te ripeneta whaka te Atua, me te whakapono ki to tatou Ariki, ki a Ihu

22  
Karaiti. Na, tenei ahau te haere nei ki Hiruharama, he hereherenga na te wairua, kahore hoki e mohio ki nga mea e pa ki ahau i reira: 23 Heoi ano ko ta te Wairua Tapu e whakaatu nei ki ahau i

24  
tenei pa, i tenei pa, e mea ana, kei te taria mai ahau e nga mekameka, e nga mate. Otira kahore ahau e ihupuku ki te ora, hei painga ki ahau ake, engari kia taea taku e whai nei, me te mahi i homai

25  
ki ahau e te Ariki, e Ihu, ara kia whakaaturia te rongopai o te aroha noa o te Atua. Na e mohio ana tenei ahau, heoi ano kitenga o toku mata e tetahi o koutou, e te hunga i kauwhau haere nei ahau

<sup>26</sup>  
 i te rangatiratanga o te Atua i roto i a koutou. Koia ahau ka mea nei ki a koutou aianeī, Kahore  
<sup>27</sup>  
 oku poke i nga toto o tetahi tangata. Kihai hoki ahau i manawapa ki te kauwhau i te whakaaro  
<sup>28</sup>  
 katoa o te Atua ki a koutou. Na kia tupato ki a koutou, ki te kahui katoa ano i meinga ai koutou  
<sup>29</sup>  
 e te Wairua Tapu hei kaitirotiro, whangaia te hahi a te Atua i hokona nei e ia ki ona ake toto. E  
 mohio ana hoki ahau ki tenei ka riro ahau, tera e puta mai ki a koutou he wuruhi nanakia, e kore  
<sup>30</sup>  
 nei e tohu i te kahui; A ka whakatika ake etahi tangata i roto i a koutou ano, korero ai i nga mea  
<sup>31</sup>  
 parori ke, hei kukume i nga akonga kia whai i a ratou. Na reira, kia mataara, kia mahara ano ki  
 nga tau e toru kihai nei ahau i mangere i te po, i te ao, ki te whakatupato i tenei, i tenei o koutou,  
<sup>32</sup>  
 me te tangi ano ahau. Na, tenei ahau, te tuku nei i a koutou ki te Atua, ki te kupu hoki o tona  
 aroha noa, e kaha nei ki te whakatupu ake, ki te hoatu hoki i tetahi wahi ki a koutou i roto i te hunga  
<sup>33</sup>  
 katoa kua oti te whakatapu. Kihai i hiahiatia e ahau te hiriwa, te koura, te kakahu ranei, o tetahi.  
<sup>34</sup>  
 E mohio ana ano koutou, na enei ringa i mahi nga mea i matea e ahau, e oku hoa hoki. I nga  
<sup>35</sup>  
 mea katoa i hoatu e ahau he tauira ki a koutou, kia penei ta koutou mahi kia atawhaitia ai e koutou  
 te hunga ngoikore, me te mahara ki nga kupu a te Ariki, a Ihu, i mea ra ia, Ko te whakawhiwhi,  
 nui atu te hari i to te whiwhi.  
<sup>36</sup>  
 I te mutunga o tenei whai kupu ana ka tukua ona turi ki raro, ka inoi tahi ia me ratou katoa.  
<sup>37</sup>  
 He nui hoki te tangi o te katoa; hinga iho ratou ki runga ki te kaki o Paora, ka kihi i a ia; I  
<sup>38</sup>  
 tino mamae pu hoki ratou i te kupu i mea ai ia, heoi ano to ratou kitenga i tona mata. Na ka arahi  
 ratou i a ia ki te kaupuke.

## Chapter 21

<sup>1</sup>  
 Heoi ka wehe matou i a ratou, ka rere, a tika tonu atu, tae noa ki Koha, a ao ake te ra kei Roro,  
<sup>2</sup>  
 i reira atu ki Patara. Na ka rokohanga tetahi kaupuke e whakawhiti atu ana ki Pinika, a eke ana  
<sup>3</sup>  
 matou ki runga, rere ana. A ka kitea Kaipuru, ka mahue ake i te taha ki maui, ka rere atu matou  
<sup>4</sup>  
 ki Hiria, a ka u ki Taira: hei reira hoki te kaupuke ruke ai i tona utanga. A ka kitea nga akonga, e  
 whitu nga ra i noho ai matou ki reira: ka korero hoki ratou ki a Paora, he mea na te Wairua, kia  
<sup>5</sup>  
 kaua ia e haere ki Hiruharama. A ka rite aua ra o matou, ka puta atu matou, ka haere; me te kawe  
 ano ratou katoa, me nga wahine, me nga tamariki, i a matou a waho ra ano o te pa: na ka tukua o

6  
matou turi ki te tahatai, ka inoi; Katahi ka poroporoaki matou tetahi ki tetahi; a eke ana matou ki  
te kaupuke; ko ratou ia i hoki ki o ratou kainga. 7 A ka tutuki to matou rerenga atu i Taira, ka tae  
ki Toromai, na ka oha atu ki nga teina, a kotahi te ra i noho ai ki a ratou.

8 I te aonga ake ka turia atu e matou, ka haere ki Hiharia: a tomo ana ki te whare o Piripi  
kaikauwhau, ko ia nei tetahi o nga tokowhita; noho ana i a ia. 9 Na tokowha nga tamahine a taua  
tangata, he wahine, he poropiti. 10 A ka maha o matou ra i noho ai, ka haere mai tetahi poropiti i

11 Huria, ko Akapu te ingoa. A, no to ratou taenga mai ki a matou, ka mau ki te whitiki o Paora,  
herea iho e ia ona ake ringa me ona waewae, ka mea, Ko ta te Wairua Tapu korero tenei, E peneitia  
te here o te tangata nona tenei whitiki e nga Hurai i Hiruharama, e tukua atu a no ia ki nga ringa o

12 nga Tauwi. Heoi, i to matou rongonga i enei mea, ka tohe matou ko nga tangata o taua kainga,

13 kia kua ia e haere ki Hiruharama. Na ko te whakahokinga a Paora, he aha ta koutou e tangi, e  
whakangakaukore nei i ahau? ehara hoki i te mea ko te here anake taku e pai ai, engari ko te mate

14 ano hoki ki Hiruharama, mo te ingoa o te Ariki, o Ihu. A, no tona korenga i rongu, ka mutu ta  
matou, ka mea, Kia meatia ta te Ariki e pai ai.

15 A ka pahemo enei ra, ka takai matou i a matou mea, a haere ana ki Hiruharama. 16 I haere  
tahi ano i a matou etahi o nga akonga o Hiharia, na ratou i mau ake a Nahona o Kaipuru, he akonga

17 tawhito hei tukunga atu mo matou. A, i to matou taenga ki Hiruharama, ka koa nga teina ki a

18 matou. I te aonga ake ka haere tahi matou ko Paora ki a Hemi: i reira ano nga kaumatua katoa.

19 Na ka oha ia ki a ratou, ka korerotia takitahitia nga mea i mea ai te Atua kia mahia e ia i roto i

20 nga Tauwi. No to ratou rongonga, ka whakakororia i te Atua, ka mea ki a ia, Kua kite koe, e to  
matou teina, i nga mano tini o nga Hurai kua whakapono nei; e uaua katoa ana hoki ki te ture:

21 Kua rongu ano hoki ratou ki a koe, e whakaako ana koe i nga Hurai katoa i roto i nga Tauwi,  
kia whakarerea a Mohi, e mea ana kia kua ratou e kokoti i nga tamariki, kia kua ano e haere i

22 runga i nga ritenga o mua. Na, me pehea? e kore hoki e kore ka rongu ratou ki tou taenga mai.

23 Na, me mea e koe tenei e korerotia nei e matou ki a koe: Tokowha o matou tangata, he kupu

24 taurangi ta ratou; Tangohia enei, kia purea ngatahitia koutou, mau ano e utu a ratou mea, kia  
waruhia ai o ratou matenga: a ka kite ratou katoa he teka noa nga mea i korerotia mou: engari ko

25 koe, he tika tau haere, kei te whakarite ano koe i te ture. Tena ko nga Tauwi kua whakapono,  
kua tuhituhi atu matou, kua whakatakoto tikanga atu, kia tupato ratou i nga mea e patua ana ma

26  
nga whakapakoko, i te toto, i te mea kua notia te kaki, i te moe tahae. Na ka mau a Paora ki aua tangata, a i te aonga ake ka pure tahi, ka haere tahi ratou ki roto ki te temepara, hei whakaatu ka whakaritea nga ra mo te purenga, kia whakaherea ra ano he whakahere mo tetahi, mo tetahi o ratou.

27 Heoi ka tata nga ra e whitu te taka, ka kitea ia i roto i te temepara e etahi Hurai o Ahia: na ratou i whakaoho te mano katoa, a ka pa o ratou ringa ki a ia, 28 Ka karanga, E nga tangata o Ihairaira, awhinatia mai: Ko te tangata tenei e whakaako nei i nga tangata katoa o nga wahi katoa ki nga mea whakahe mo te iwi, mo te ture, mo tenei kainga hoki: kua kawea mai ano e ia etahi

29 Kariki ki roto ki te temepa ra, a ka noa nei i a ia tenei wahi tapu. I kite hoki ratou i mua he hoa nona i roto i te pa, ko Toropimu o Epeha; tohu noa ratou, kua mauria mai ia e Paora ki roto ki te temepara. 30 Na ka oho te pa katoa, ka oma nga tangata: a ka mau ratou ki a Paora, toia ana ia ki

31 waho o te temepara: tutakina tonutia atu nga tatau. Na i a ratou e whai ana kia patua ia, ka tae te rongu ki te rangatira mano o te hapu hoia, kua tutu te puehu i Hiruharama katoa. 32 Na hohoro tonu tana mau ki etahi hoia, ki etahi keneturio, a oma iho ana ki a ratou: a, no to ratou kitenga i te

33 rangatira mano, i nga hoia hoki, ka mutu te patu i a Paora. Na ka whakatata mai te rangatira mano, ka tango i a ia, ka mea kia herea ia ki nga mekameka e rua; a ka ui ko wai ia, i aha hoki ia.

34 Na he karanga ano ta etahi, he karanga ke ta etahi, i roto i te mano: na kihai ia i mohio ki te tino tikanga, i te ngangau hoki, a whakahaua ana kia arahina ia ki te pa. 35 A, no tona taenga ki te

36 pikitanga, ka hikitia ia e nga hoia i te taututetutenga hoki a te tangata; I aru hoki te huihui o te

37 iwi, me te karanga, Whakamatea ia. A, no ka whano a Paora te kawea ki roto ki te pa, ka mea ia ki te rangatira mano, E pai ana ranei kia korero ahau i tetahi kupu ki a koe? Ka mea ia, E matau

38 ana ranei koe ki te reo Kariki? Ehara oi koe i te Ihipiana, nana nei i whakatupu te tutu i mua ake

39 ra, a mauria ana e ia nga tangata kohuru e wha mano ki te koraha? Ka mea a Paora, he Hurai ahau, no Tarahu o Kirikia, he tangata tupu no taua pa, ehara hoki i te pa ingoakore: na ko taku inoi

40 tenei ki a koe, tukua ahau kia korero ki te iwi. Na tukua ana e ia, a tu ana a Paora ki te pikitanga, ka tawhiri tona ringa ki te iwi. Na mutu pu te turituri, ka korero ia, no nga Hiperu te reo, ka mea,

## Chapter 22

1 E oku tuakana, e oku matua, whakarongo ki tenei korero aku ki a koutou. 2 A, ka rongu ratou ko te reo Hiperu tana i korero ai ki a ratou, katahi ka mutu rawa te kiki; a ka mea ia,

<sup>3</sup> He Hurai ahau, i whanau ki Tarahu o Kirikia, i whakatupuria i roto i tenei pa ki nga waewae o Kamariere, i ata whakaakona ki te tino tikanga o te ture o nga matua, i uaua ano ahau mo te Atua, i pena me koutou katoa inaianei. <sup>4</sup> A whakatoia ana e ahau nga tangata o tenei tikanga, tae ana ki te mate; herea ana e ahau nga tane me nga wahine, a tukua ana ki nga whare herehere. <sup>5</sup> Ma te tohunga nui tenei korero aku e whakatika, ma te huihui hoki o nga kaumatua katoa: i riro mai hoki i ahau a ratou pukapuka ki nga teina, a haere ana ahau ki Ramahiku, kia herea, kia arahina mai hoki te hunga o reira ki Hiruharama kia whakama maetia. <sup>6</sup> Na, i ahau e haere ana, e whakatata ana ki Ramahiku, i te poutumarotanga, ka whiti whakarere mai ki ahau he marama nui no te rangi. <sup>7</sup> A hinga ana ahau ki te whenua, ka rangona he reo e mea ana ki ahau, E Haora, e Haora, he aha tau e whakatoi nei i ahau? <sup>8</sup> Na ka whakahokia e ahau, Ko wai koe, e te Ariki? Ka mea ia ki ahau, Ko Ihu ahau o Nahareta, e whakatoia nei e koe. <sup>9</sup> I kite ano oku hoa i te marama, otira kihai i rongoi te reo ona i korero ki ahau. <sup>10</sup> Ka mea ahau, Me aha ahau, e te Ariki? Ka mea te Ariki ki ahau, Whakatika, haere ki Ramahiku; a ka korerotia ki a koe i reira nga mea katoa kua whakaritea kia meinga e koe. <sup>11</sup> Heoi, i te mea kahore ahau i kite, na te kororia hoki o taua marama, ka arahina a ringatia ahau e oku hoa haere, ka tae ki Ramahiku. <sup>12</sup> Na ko tetahi tangata, ko Anania, he tangata karakia, i rite tonu nei ki ta te ture ana mahi, a e korerotia paitia ana e nga Hurai katoa e noho ana i reira, <sup>13</sup> Haere mai ana ia ki ahau, a tu ana i toku taha, ka mea mai ki ahau, E toku teina, e Haora, titiro ake. A i taua haora ano ka titiro ahau ki a ia. <sup>14</sup> I mea ano ia, Na te Atua o o tatou matua koe i whiriwhiri, kia matau ki tana e pai ai, kia kite i a te Tika, kia rongoi hoki i te reo o tona mangai. <sup>15</sup> No te mea ko koe hei kaiwhakaatu mana ki nga tangata katoa, mo nga mea i kite ai, i rongoi ai koe. <sup>16</sup> Na, he aha tau e whakaroa nei? whakatika, kia iriiria koe, kia horoia ou hara, me te karanga ano ki te ingoa o te Ariki. <sup>17</sup> A, no toku hokinga mai ki Hiruharama, i ahau e inoi ana i roto i te temepara, ka puta te ngakau matakite ki ahau; <sup>18</sup> A ka kite ahau i a ia e mea ana mai ki ahau, E ahua, kia hohoro te haere atu i Hiruharama: e kore hoki ratou e tango i tau korero moku. <sup>19</sup> Na ko taku meatanga, E te Ariki, e matau ana ratou, he kaiherehere ahau, he kaiwhiu i roto i nga whare karakia, i te hunga i whakapono ki a koe: <sup>20</sup> A, i te whakahekenga o nga toto o tou kaiwhakaatu, o Tepene, i reira ahau e tu ana, e whakaae ana, e tiaki ana hoki i nga kakahu o ona kaiwhakamate. <sup>21</sup> Na ko tana meatanga ki ahau, Haere: ka unga hoki koe e ahau ki tawhiti ki nga Tauwiwi.



22 A whakarongo ana ratou ki a ia taea noatia tenei kupu, na ka hamama ratou, ka mea,  
 Whakamatea atu te koroke nei i runga i te whenua: e kore hoki e pai kia ora ia. <sup>23</sup> Heoi, i a ratou  
 e karanga ana, e rukeruke ana i o ratou kakahu, e akiri ana i te puehu ki te rangi, <sup>24</sup> Ka whakahau  
 te rangatira kia kawea ia ki te pa, ka mea kia whiua, kia uia; kia matau ai ia ki te mea i penei ai  
 ratou te karanga ki a ia. <sup>25</sup> A, ka oti ia te here e ratou ki nga here, ka mea a Paora ki te keneturio  
 e tu ana i reira, he mea tika ranei kia whiua e koutou te tangata, he tangata no Roma, i te mea kahore  
 ano i mau noa tona he? <sup>26</sup> A, no te rongonga o te keneturio, ka haere, ka korero ki te rangatira  
 mano, ka mea, He aha tau e mea ai? no Roma hoki te tangata nei. <sup>27</sup> Na ka haere mai te rangatira  
 mano, ka mea ki a ia, Korero mai ki ahau, no Roma koe? Ka mea ia, Ae. <sup>28</sup> Na ka whakahoki te  
 rangatira mano, Na te moni nui i whiwhi ai ahau ki tenei taonga, hei tangata whenua no Roma. Ka  
 mea a Paora, Ko ahau i whanau tonu no Roma. <sup>29</sup> Na whakarerea tonutia iho ia e te hunga e mea  
 ana ki te ui ki a ia: i matakua hoki te rangatira mano, i tona rongonga no Roma ia, mona hoki i here  
 i a ia. <sup>30</sup> Na i te aonga ake ka mea ia kia matau ki te tikanga, ki te mea i whakawakia ai ia e nga  
 Hurai, ka wewete i ona here, ka whakahau kia haere mai nga tohunga nui, me to ratou runanga  
 katoa, a arahina iho ana a Paora, whakaturia ana ki to ratou aroa ro.

## Chapter 23

1 Na ka titiro pu a Paora ki te runanga, ka mea, E oku tuakana, tika tonu ki toku mahara taku  
 whakahaere i te aroaro o te Atua, a taea noatia tenei ra. <sup>2</sup> Na ka mea a Anania tohunga nui ki te  
 hunga e tu ana i tona taha, kia pakia tona mangai. <sup>3</sup> Ano ra ko Paora ki a ia, Tenei ake ka papaki  
 te Atua i a koe, e te pakitara kua oti te pani ki te paru ma: a ka noho mai koe hei whakawa i ahau  
 i ta te ture i whakatakoto ai, me te whakahau ano kia pakia ahau, e he nei tena ki te ture? <sup>4</sup> Na ka  
 mea te hunga e tu tata ana, E whakamanumanu ana koe ki te tohunga nui a te Atua? <sup>5</sup> Ano ra ko  
 Paora, Kihai ahau i matau, e oku tuakana, ko ia te tohunga nui: kua oti hoki te tuhituhi, Aua e  
 korerotia kinotia te rangatira o tou iwi.  
<sup>6</sup> A, no ka kite a Paora no nga Haruki etahi, ko etahi no nga Parihi, ka karanga ia i roto i te  
 runanga, E oku tuakana, he Parihi ahau, he tama na nga Parihi: ko te aranga o te hunga mate e  
 tumanakohia nei te mea e whakawakia nei ahau. <sup>7</sup> A, no tana korerotanga i tenei, ka tohetohe nga

8  
 Parihi ratou ko nga Haruki: ka wahirua hoki te huihui. E mea ana hoki nga Haruki, kahore he  
 9  
 aranga, kahore he anahera, he wairua ranei: ko nga Parihi ia e whakaae ana ki aua mea e rua. A  
 ka nui te ngangare; ka whakatika etahi o nga karaipi o to nga Parihi taha, ka totohe, ka mea, Kahore  
 ano i mau i a matou te he o tenei tangata: tena, ka pehea, mehemea kua korero tetahi wairua ki a  
 10  
 ia, tetahi anahera ranei? A, no ka nui te ngangau, ka matakū te rangatira mano kei motumotuhia  
 a Paora e ratou, na unga ana e ia nga hoia kia heke atu, ki te tango mai i a ia i roto i a ratou, kia  
 11  
 arahina hoki ki te pa. A i taua po ka tu te Ariki ki tona taha, ka mea, Kia maia: kia pena i a koe  
 i whakaatu na moku i Hiruharama, tau whakaatu hoki ki Roma.  
 12  
 Ao ake te ra, ka huihui etahi o nga Hurai, ka maka oati ki a ratou ano, ka mea, kia kaua ratou  
 e kai, kia kaua e inu, kia whakamatea ra ano e ratou a Paora. 13  
 A e wha tekau ngahoro nga tangata  
 14  
 nana tenei oatitanga. Na ka haere ratou ki nga tohunga nui ratou ko nga kaumatua, ka mea, Kua  
 15  
 oati matou i tetahi oati nui, kia kaua e pa kai, kia mate ra ano a Paora i a matou. Na, ma koutou  
 tahi ko te runanga e ki atu ki te rangatira mano kia arahina iho ia ki a koutou apopo, me te mea nei  
 e mea ana koutou kia ata mohiotia te take ki a ia: ko matou ia, i te mea kiano ia i tata noa, ka noho  
 16  
 rite ki te whakamate i a ia. Otira ka rongō te tama a te tuahine o Paora ki to ratou whakaaro  
 17  
 whakapapa, ka haere ia, ka tomo ki te pa, ka korero ki a Paora. Katahi ka karanga a Paora ki  
 tetahi keneturio, ka mea, Arahina atu te tamaiti nei ki te rangatira mano: he korero hoki tana ki a  
 18  
 ia. Na ka mau ia ki a ia, ka arahi i a ia ki te rangatira mano, ka mea, I karanga te herehere, a  
 19  
 Paora, i ahau, i mea kia arahina mai tenei tamaiti ki a koe, he korero hoki tana ki a koe. Na ka  
 20  
 mau te rangatira mano ki tona ringa, ka haere ki tahaki, ka ui atu, He aha tau mea hei korero Ano  
 ra ko tera, Kua whakatakoko whakaaro nga Hurai kia mea ki a koe kia arahina iho a Paora apopo  
 21  
 ki te runanga, ano e ata uia ano e koe tetahi atu mea mona. Na aua koe e rongō ki a ratou: e wha  
 hoki tekau ngahoro tangata o ratou e whanga ana ki a ia, kua puaki ta ratou oati, kia kaua e kai, kia  
 kaua e inu, kia mate ra ano ia i a ratou: na kua rite tenei ratou, e tatari ana ki te kupu whakaae i a  
 22  
 koe. Katahi ka tukua atu taua tamaiti e te rangatira mano, ka mea ia, Kaua e korerotia ki tetahi  
 23  
 tau whakaaturanga mai i enei mea ki ahau. Na tokorua nga keneturio i karangatia e ia; i mea ia,  
 Kia rite mai etahi hoia kia rua rau hei haere ki Hiharia, me etahi hoia eke hoiho kia whitu tekau,  
 24  
 me tetahi hunga mau matia kia rua rau, i te toru o nga haora o te po; A ka whakahau ia ki a raua,  
 kia whakaritea mai he kararehe, hei whakanohoanga iho mo Paora ki runga, kia kawea oratia ai ia  
 25  
 ki a Pirika, ki te kawana. A i tuhituhia e ia he pukapuka, ka penei: 26  
 Na Karauria Raihia ki a

<sup>27</sup>  
 Pirika, ki te kawana pai rawa, Tena koe. I hopukia tenei tangata e nga Hurai, a i a ia ka tata te whakamatea e ratou, ka puta atu ahau me nga hoia, a tangohia mai ana ia; i rongohia hoki ahau no Roma ia. <sup>28</sup> I mea ano ahau kia rongohia i te take i whakawakia ai ia e ratou, a arahina ana ia e ahau ki to ratou runanga; <sup>29</sup> Na ka kite ahau he kupu tautohe no to ratou ture i whakawakia ai ia, kahore hoki ona he i tika ai te mate, te here ranei. <sup>30</sup> A, no te whakaaturanga mai ki ahau, kei te whakapapatia he mate mo te tangata nei, tonoa tonutia ia e ahau ki a koe, i mea hoki ahau ki ona kaiwhakapae, kia korerotia ki a koe nga mea mona. <sup>31</sup> Na ka mau nga hoia ki a Paora, ka pera me te mea i korerotia ki a ratou, a arahina ana ia i te po ki Anatipatari. <sup>32</sup> Ao ake te ra ka tukua atu nga tangata eke hoiho hei hoa haere mona, a hoki ana ratou ki te pa: <sup>33</sup> A, no te taenga o era ki Hiharia, ka hoatu te pukapuka ki te kawana, a whakaturia ana a Paora ki tona aroaro. <sup>34</sup> A, no te tirohanga iho o te kawana, ka ui, no tehea kawanatanga ia; a, i tona rongonga no Kirikia ia, <sup>35</sup> Ka mea ia, Ka whakarongo ahau ki a koe, ina tae mai ano hoki ou kaiwhakapae: a i whakahau ia, kia tiakina ia i roto i te whare whakawa o Herora.

## Chapter 24

<sup>1</sup>  
 Na ka pahure nga ra e rima, ka haere atu a Anania, te tohunga nui ratou ko etahi kaumatua, ko tetahi kaikorero hoki, ko Tereturu, whakakite ai i nga he o Paora ki te kawana. <sup>2</sup> A, ka oti ia te karanga, ka timata a Tereturu te whakawa, ka mea, I te mea nau i hua ai te rangimarie ki a matou, he ata ngarahu hoki nau i whakatikatikaina ai nga kino ki tenei iwi, <sup>3</sup> Nui atu ta matou whakawhetai mo aua mea ka riro mai nei i a matou, i nga wa katoa, i nga wahi katoa, e Pirika, e te tangata pai rawa. <sup>4</sup> Otiia e kore e nui atu taku whakaware i a koe, koia ka inoi atu ki a koe kia pai koe ki te whakarongo mai ki etahi kupu torutoru a matou. <sup>5</sup> I mau hoki i a matou te koroke nei, he tangata whakatutehu, e whakaoho ana i nga Hurai katoa o te ao, ko ia hoki te tino take o te titorehanga ki ta nga Nahareti: <sup>6</sup> I mea hoki ia kia whakanoatia te temepara: na ka hopu matou i a ia, ka mea kia whakawakia ia ki ta to matou ture i whakatakoto ai. <sup>7</sup> Otira i puta mai a Raihia, te rangatira mano, a tangohia kinotia atu ana ia i o matou ringa. <sup>8</sup> A unga ana ona kaiwhakapae kia haere mai ki a

9  
koe: mau e ui ki a ia, kia rongoa ai koe ki enei mea katoa e whakawakia nei ia e matou. A i whakaae hoki nga Hurai ki taua whakapae, i mea, Koia tera ko aua mea.

10

A, ka tohu atu te kawana ki a ia kia korero, ka whakahokia e Paora, E matau ana ahau, ka maha ou tau e whakawa nei koe i tenei iwi, koia i pai ai toku ngakau ki te tohe i te tika o aku mea:

11

E takoto kau ana hoki hei mohiotanga mou, kahore i maha ake i te tekau ma rua nga ra oku i

12

haere nei ki Hiruharama, ki te karakia. Kihai ano ahau i mau i a ratou i roto i te temepara e totohe ana ki tetahi, e mea ana ranei i te mano kia tutu, kahore i nga whare karakia, kahore ano hoki i te

13

pa: E kore ano e taea e ratou te whakatau ki ahau i tou aroaro nga mea e whakawakia nei ahau

14

e ratou. Otira me whaki tenei e ahau ki a koe, ko te ara e kiia nei e ratou he titorehanga, ko taku tena i ahau e karakia nei ki te Atua o oku matua; e whakapono ana hoki ahau ki nga mea katoa kua

15

oti te whakarite i roto i te ture, kua oti hoki te tuhitu hi ki ta nga poropiti: E tumanako ana ki ta te Atua, ki ta enei ano hoki e whakaae nei, ara tenei ake ka ara te hunga mate, nga tangata tika, nga

16

tangata he. Tenei ano taku e whai nei, kia harakore tonu toku hinengaro i te aroaro o te Atua, o

17

nga tangata. Na, muri iho i nga tau e maha, ka tae mai ahau ki te kawae mai i nga mea atawhai

18

rawakore ki toku iwi, me nga whakahere: I kitea ahau i reira e ratou, e purea ana i roto i te

19

temepara, kahore he huihui, kahore he ngangau: Tera ano ra etahi Hurai no Ahia; ko te tikanga

20

kia haere mai ratou ki a koe ki te whakawa, ki te mea he mea ta ratou moku. Tenei ranei ma

21

enei tangata tonu e korero, me i kitea e ratou he he toku, i ahau e tu ana i mua i te runanga, Ko taua kupu kotahi pea i karanga ai ahau, i ahau e tu ana i roto i a ratou, Ko te aranga o te hunga mate te mea e whakawakia nei ahau e koutou inaianei.

22

Otira, i te mea he nui atu tona mohio ki taua ritenga, ka unga ratou e Pirika, ka mea ia, Kia

23

tae mai a Raihia, te rangatira mano, ka tino rapu ahau ki te tikanga o a koutou mea. Na ka mea ia ki te keneturio kia tiakina a Paora, kia waiho noa ano ia, kia kaua e riria ona hoa ina mahi ki a

24

ia. Na muri iho i etahi ra ka tae mai a Pirika raua ko tana wahine ko Ruruhira, he Hurai, ka mea

25

ia kia tikina atu a Paora, a ka whakarongo ki a ia ki te whakapono ki a te Karaiti. A, i a ia e korero ana ki nga mea o te tika, ki te hiahia kia pehia, ki te whakawakanga kei te haere mai, ka wiri

26

a Pirika, ka mea, Haere aianei; kia watea ahau, ka karanga atu ai ano i a koe. Tohu noa hoki ka

27

hoatu ki a ia he moni e Paora: koia i hono ai te tiki atu i a ia, te korero ki a ia. Otira, ka pahure nga tau e rua, ka whakakapia a Pirika e Porohia Petuha; a, i tona hiahia ki te whakamanawareka i nga Hurai, ka waiho e Pirika a Paora kia here ana.

## Chapter 25

<sup>1</sup> No te taenga mai o Petuha ki te kawatanga, ka toru nga ra, ka haere atu ia i Hiharia ki Hiruharama. <sup>2</sup> Na ka korero te tohunga nui me nga rangatira o nga Hurai ki a ia mo Paora, ka tohe ki a ia, <sup>3</sup> Kia whakaaetia ta ratou mona, kia tikina atu ia ki Hiruharama, he whanga hoki to ratou mona kia whakamatea ki te ara. <sup>4</sup> Otira ka whakahokia e Petuha, kei Hiharia a Paora e pupuri ana, a tera e hohoro tona haere ki reira. <sup>5</sup> I mea ano ia, Me haere tahi ano i ahau ki raro nga mea o koutou e whai mana ana, ki te whakawa i taua tangata, ki te mea he kino tona. <sup>6</sup> A ka noho ia i a ratou mo nga ra e waru, ngahuru ranei, na ka haere ki Hiharia; ao ake te ra ka noho ki te nohoanga whakawa, a ka mea kia arahina mai a Paora. <sup>7</sup> A, no tona taenga atu, e tu ana tera nga Hurai i haere mai i Hiruharama, he maha, he nui nga he i whakapangia e ratou ki a Paora; heoi kihai i u ta ratou. <sup>8</sup> A ka utua e Paora, Kahore rawa oku hara ki te ture a nga Hurai, kahore hoki ki te temepara, kahore ano ki a Hiha. <sup>9</sup> Heoi ka mea a Petuha ki a Paora, i tona hiahia kia paingia e nga Hurai, E pai ana ranei koe kia haere ki Hiruharama, ki reira whakawakia ai mo enei mea ki toku aroaro? <sup>10</sup> Ano ra ko Paora, E tu ana ahau ki te nohoanga whakawa o Hiha, hei reira tonu ahau whakawakia ai: kahore oku he ki nga Hurai, kua tino kitea na hoki e koe. <sup>11</sup> Me he he toku, kua meinga ranei e ahau tetahi mea e tika ai te mate, e kore ahau e kino kia mate: tena ko tenei he teka nga mea e whakapangia nei e ratou ki ahau, e kore e ahei kia tukua ahau e tetahi ki a ratou. He karanga tenei naku ki a Hiha. <sup>12</sup> Na ka kororero a Petuha ki te runanga, a ka mea, Kua karanga koe ki a Hiha: na me haere koe ki a Hiha. <sup>13</sup> A muri iho i etahi ra, ka tae atu a Kingi Akaripa, raua ko Pereniki ki Hiharia, a ka oha ki a Petuha. <sup>14</sup> A, ka po maha raua e noho ana i reira, ka korerotia e Petuha ki te kingi te take mo Paora, ka mea, Tenei tetahi tangata i waiho iho e Pirika e here ana: <sup>15</sup> A, i ahau i Hiruharama, ka korerotia mai ia ki ahau e nga tohunga nui, e nga kaumatua o nga Hurai, ka tono ratou kia whakawakia ia. <sup>16</sup> Na ko taku whakahokinga atu ki a ratou, Ehara i te ritenga na nga tangata o Roma kia tukua he tangata kia mate i te mea kiano i tutataki noa te tangata e whakawakia ana ki nga kaiwhakapae, i whai wahi ranei ki te whakahoki kupu ki te kupu whakawa mona. <sup>17</sup> No reira, i to ratou minenga mai ki konei, kihai ahau i whakaora; ao ake te ra ka noho ahau ki te nohoanga whakawa, ka mea kia arahina mai taua tangata. <sup>18</sup> A, i te turanga o nga kaiwhakapae, kihai tetahi he o aku i whakaaro

<sup>19</sup>  
 ai i korerotia e ratou mona: Heoi he kupu tautohetohe no ta ratou karakia ta ratou i mea ai ki a  
<sup>20</sup>  
 ia, ko tetahi Ihu ano i mate, e kiia ana hoki e Paora kei te ora. Heoi pohewa noa iho ahau ki taua  
 tautohe, ka mea hoki me kore ia e pai kia haere ki Hiruharama, ki reira whakawakia ai mo aua mea.  
<sup>21</sup>  
 No te karangatanga a Paora kia waiho ia kia whakarangona tana e te Emepara, ka whakahaua e  
<sup>22</sup>  
 ahau kia puritia ia, kia tukua ra ano ia e ahau ki a Hiha. Ka mea a Akaripa ki a Petuha, E hiahia  
<sup>23</sup>  
 ana ano ahau kia rongu i taua tangata. Ka mea ia, Ko apopo koe rongu ai ki a ia. Heoi, i te aonga  
 ake, ka tae atu a Akaripa raua ko Pereniki, me nga whakapaipai maha, a tomo ana ki te whare  
 whakarongo, ratou ko nga rangatira mano, ko nga tangata nunui o te pa, a ka whakahaua e Petuha,  
<sup>24</sup>  
 ka mauria mai a Paora. Na ka mea a Petuha, E Kingi Akaripa, e nga tangata katoa hoki e noho  
 nei tatou, ka kite koutou i tenei tangata, i tohe mai ai ki ahau te huihui katoa o nga Hurai i  
<sup>25</sup>  
 Hiruharama, i konei ano hoki, i karanga ai, ehara rawa i te tika kia waiho ia kia ora ana. Otira i  
 kite ahau, kahore ana mahi e tika ai te mate: a, i te mea nana ano i karanga ki te Emepara, ka mea  
<sup>26</sup>  
 ahau kia unga atu aia. Kahore ia aku tino mea e tuhituhi atu ai ahau mona ki toku ariki. Koia  
 ahau ka arahi mai nei i a ia ki a koutou, ki a koe rawa ano, e Kingi Akaripa, kia whai mea ai ahau  
<sup>27</sup>  
 hei tuhituhinga atu, ua mutu te uiui. Ki taku hoki he mea he kia unga atu he herehere, a kia kaua  
 hoki e korerotia te mea i whakawakia ai ia.

## Chapter 26

<sup>1</sup>  
 Na ko te meatanga a Akaripa ki a Paora, E ahei ana koe kia korero i au korero. Katahi ka  
 totoro te ringa o Paora, a ka korero ia: <sup>2</sup> He koanga ngakau tenei ki ahau, e Kingi Akaripa, kia  
 korerotia e ahau ki a koe aianeia nga mea katoa e whakawakia nei ahau e nga Hurai: <sup>3</sup> He mohio  
 rawa hoki koe ki nga ritenga katoa, ki nga tautohe hoki ano a nga Hurai: na reira kia pai koe ki te  
 whakarongo marie ki ahau. <sup>4</sup> Ko taku whakahaere mai o toku tamarikitanga, no te timatanga mai  
 ra ano i roto i toku iwi, i Hiruharama hoki, e mohio ana nga Hurai katoa; <sup>5</sup> Mohio tonu ratou ki  
 ahau o mua iho, me i pai ratou ki te whakaatu; ko taku mahi, i whai i ta te titorehanga pakeke rawa  
<sup>6</sup>  
 o to tatou karakia, i ta te Parihi. Tenei ahau te tu nei i konei, te whakawakia nei mo te tumanako  
<sup>7</sup>  
 ki te mea i korerotia e te Atua i mua ki o tatou matua: E tumanako nei o tatou iwi kotahi tekau  
 ma rua kia uru ki tenei, i a ratou e mahi tonu nei ki te Atua i te ao, i te po. Ko tenei e tumanakohia

8  
 atu nei e te kingi, te mea e whakawakia nei ahau e nga Hurai. He aha rawa kia kore e whakaponohia  
 e koutou, ki te mea ka whakaara ake te Atua i te hunga mate? 9 Ko ahau nei, i whakaaro ahau kia  
 10  
 maha tonu nga mea e mahia e ahau hei pehi mo te ingoa o Ihu o Nahareta. Ae, i meinga ano  
 tenei e ahau ki Hiruharama: he tokomaha ano te hunga tapu i uakina e ahau ki nga whare herehere,  
 he mea tuku mai hoki nga tikanga na nga tohunga nui ki ahau; a, i te whakamatenga i a ratou, i  
 11  
 whakaae ahau kia peratia ratou. He maha ano aku whiunga i a ratou i roto i nga whare karakia  
 katoa, i meinga ano ratou e ahau kia kohukohu; heoi haurangi noa iho ahau ki a ratou, whaia ana  
 e ahau, a taea noatia nga pa o tawhiti.  
 12  
 Nawai a, i ahau e haere ana ki Ramahiku, me nga tikanga, me te kupu whakaae a nga tohunga  
 13  
 nui, I te poutumarotanga, e te kingi, ka kitea e ahau i te ara he marama i te rangi e tiaho ana ki  
 14  
 ahau, ki oku hoa haere ano, tera atu i te marama o te ra. Heoi hinga ana matou katoa ki te whenua,  
 ka rongohia ahau i te reo e korero ana ki ahau, no nga Hiperu ano hoki te reo, e mea ana, E Haora, e  
 15  
 Haora, he aha tau e whakatoa nei i ahau? ehara tau te whana ki nga koikoi. Ano ra ko ahau, Ko  
 16  
 wai koe, e te Ariki? Ka mea ia, Ko Ihu ahau e whakatoa nei e koe. Otira whakatika, e tu ou  
 waewae ki runga: ko te mea tenei i puta ai ahau ki a koe, kia meinga koe hei kaimahi, hei  
 17  
 kaiwhakaatu mo nga mea i kite nei koe, mo nga mea ano e kitea ai ahau e koe. Ka whakaorangia  
 18  
 koe i te iwi, i nga Tauwiwi, ka tonoa nei koe e ahau ki a ratou. Hei whakatitiro i o ratou kanohi,  
 hei whakatahuri i a ratou i te pouri ki te marama, i te kaha o Hatana ki te Atua, kia whiwhi ai ratou  
 ki te murunga hara, ki tetahi wahi ano i roto i te hunga ka oti te whakatapu i runga i te whakapono  
 19  
 ki ahau. No reira, kihai ahau i whakatuturi, e Kingi Akaripa, ki to te rangi kitenga: Heoi i  
 20  
 korero ahau ki te hunga i Ramahiku i te tuatahi, a i Hiruharama, ki te whenua katoa ano o Huria,  
 ki nga Tauwiwi hoki, kia ripeneta, kia tahuri ki te Atua, me te mahi ano i nga mahi tika o te ripeneta.  
 21  
 No reira nga Hurai i hopu ai i ahau i te temepara, i whai ai ki te whakamate i ahau. Heoi ka  
 22  
 awhinatia mai ahau e te Atua, ka tu tonu nei ahau, a mohoa noa nei, me te korero ki te iti, ki te rahi,  
 23  
 kahore aku kupu ke ake i ta nga poropiti ratou ko Mohi i mea ai meake puta: Ara ko te Karaiti  
 kia mate, ko ia te matamua o te aranga o te hunga mate, mana ano e whakapuaki te marama ki te  
 iwi, ki nga Tauwiwi.  
 24  
 I a ia e korero ana i enei mea, nui atu te reo o Petuha ki te karanga, E Paora, he haurangi  
 25  
 koe; na te nui o tau korero pukapuka i haurangi ai koe. Ano ra ko ia, Kahore oku haurangi, e  
 26  
 Petuha, e te tangata pai rawa; engari he pono, he whai whakaaro, aku kupu e whakapuaki nei. E  
 matau ana hoki te kingi ki enei mea, i maia ai ahau ki te korero ki a ia: e mea ana hoki ahau, kahore

tetahi o enei mea i ngaro i a ia; kihai hoki tenei mea i mahia i te kokonga. <sup>27</sup> E whakapono ana  
 ranei koe ki nga poropiti, e Kingi Akaripa? e mea ana ahau, tenei koe te whakapono nei. <sup>28</sup> Ano  
 ra ko Akaripa? ki a Paora, Wahi iti kua riro atu ahau ki tau, ki ta te Karaiti tikanga. <sup>29</sup> Na ko te  
 meatanga a Paora, Pai tonu kia inoi ahau ki te Atua kia kaua e iti, engari kia tino nui, kia kaua ano  
 e waiho i tou kotahi, engari kia tino rite ki ahau te hunga katoa e whakarongo nei ki ahau inaianei:  
 ko enei mekameka ia kia kore. <sup>30</sup> Na ka whakatika te kingi, me te kawana, me Pereniki, me te  
 hunga i noho tahi ratou: <sup>31</sup> Na, i a ratou ka wehe ke, ka kororerero ki a ratou ano, ka mea, Kahore  
 he hanga a tenei tangata e tika ai te mate, te here ranei. <sup>32</sup> Katahi ka mea a Akaripa ki a Petuha,  
 Ka tukua tenei tangata kia haere, me i kaua ia te karanga ki a Hiha.

## Chapter 27

<sup>1</sup> A, no ka takoto te tikanga kia rere matou ki Itari, ka tukua a Paora, me era atu herehere ki  
 tetahi keneturio, ko Huriu te ingoa, no te hapu o Akuhata. <sup>2</sup> Na eke ana matou ki tetahi kaipuke o  
 Ataramituma, e tika ana ra nga kainga o Ahia, rere ana matou; ko Aritaku o Teharonika, he tangata  
 no Makeronia, to matou hoa. <sup>3</sup> Po tahi ka u matou ki Hairona: na ka ngawari te mahi a Huriu ki a  
 Paora, tuku ana ia kia haere ki ona hoa kia atawhaitia. <sup>4</sup> Rere atu ana i reira, ka miri haere matou  
 i te taha o Kaiperu, no te mea i he te hau. <sup>5</sup> Whiti ana matou i te moana o Kirikia, o Pamapurua, ka  
 u ki Maira, he pa no Raikia. <sup>6</sup> Na ka mau i te keneturio he kaipuke ki reira no Arehanaria, e rere  
 ana ki Itari; ka utaina matou e ia ki runga. <sup>7</sup> A, ka po maha i puhoi ai te rere, ka whiti whakauaua  
 ki te ritenga atu o Hiniru, a, te tukua matou e te hau, ka miri haere matou i te taha o Kariti i te  
 ritenga atu o Haramone; <sup>8</sup> A ka pahemo whakauaua a reira, ka u matou ki tetahi kainga, ko Nga  
 Kokoru Ataahua te ingoa; e tata ana a reira ki te pa o Rahia. <sup>9</sup> A, ka maha nga ra ka pahemo, na  
 kua kino te rerenga, no te mea kua pahemo ke te po nohopuku, a ka whakatupato a Paora, <sup>10</sup> Ka  
 mea ki a ratou, E mara ma, e kite ana ahau i te kino, i te nui o te mate e pa mai i tenei rerenga, ehara  
 i te mea ko te utanga anake me te kaipuke, engari ko tatou ano. <sup>11</sup> Otira nui ke atu te aro o te  
 keneturio ki te kapene raua ko te tangata nona te kaipuke i tana ki nga mea i korero ai a Paora.



<sup>12</sup> A, i te mea kihai i pai taua kokoru hei tunga i te hotoke, ka mea te tokomaha kia rere atu ano i reira, me kore e u ki Pinikia, ki reira tu ai i te hotoke; he kokoru ia no Kariti, e anga ana ki te uru ma tonga, ki te uru ma raki. <sup>13</sup> A ka pa rekareka te tonga, ka mea ratou kua taea ta ratou i whakaaro ai, ka hutia te pungua; a miri haere ana i Kariti. <sup>14</sup> Na kihai i roa ka puta he hau nui whakaharahara, ko Urokarairona te ingoa. <sup>15</sup> A ka kahakina te kaipuke, te ngongo ki te hau, na ka tukua e matou ki tana, a ka paea. <sup>16</sup> Na ka miri i te taha ruru o tetahi motu, tona ingoa ko Karaura; ka riro whakauaua mai te poti i a matou: <sup>17</sup> A ka hutia ake, ka hanga ki te whakau, meatia he awhi mo te tangere o te puke; a, no ka matakū kei eke ki te tahuna, ki Hatihi, ka tukua te ra, a ka paea haeretia. <sup>18</sup> A, no ka tino akina matou e te tupuhi, i te aonga ake ka akiritia nga utanga; <sup>19</sup> A i toru o nga ra ka maka atu e ratou ki o ratou ringa nga mea ake o te kaipuke. <sup>20</sup> A he maha nga ra i kore ai e puta te ra me nga whetu, kihai ano i iti te tupuhi i akina ai matou, na ka mahue katoa to matou whakaaro ki te ora.

<sup>21</sup> Heoi ka roa te nohopuku, na ka tu a Paora i waenganui o ratou, ka mea, E mara ma, engari ra me i rongu koutou ki ahau, kia kaua e rere mai i Kariti, kei pa mai tenei kino, tenei mate. <sup>22</sup> Na ko taku kupu tenei ki a koutou, Kia marama te ngakau: e kore hoki e mate tetahi o koutou, ko te kaipuke anake. <sup>23</sup> I tu hoki ki toku taha i tenei po he anahera na te Atua, nana nei ahau, ko ia taku e karakia atu nei, <sup>24</sup> I mea mai, Aua e matakū, e Paora; me tu koe ki te aroaro o Hiha: nana, kua hoatu ki a koe e te Atua te hunga katoa e rere tahi na koutou. <sup>25</sup> Na kia marama te ngakau, e mara ma: e whakapono ana hoki ahau ki te Atua, e rite ano ki tana i korero mai ai ki ahau. <sup>26</sup> Otira kua takoto te tikanga kia eke tatou ki tetahi motu. <sup>27</sup> Na i te tekau ma wha o nga po, i a matou e kahakihakina ana i te moana o Aria, i waenganui po, ka mea nga heramana kei te whakatata ratou ki tetahi whenua; <sup>28</sup> Na ka whakatatutu ratou, ka kite e rua tekau maro: a ka neke tata atu, ka whakatatutu ano, ka kite kotahi tekau ma rima maro. <sup>29</sup> Na ka matakū kei paea matou ki nga toka, ka tukua nga pungua e wha i te kei, ka hiahia ki te awatea. <sup>30</sup> A, i nga heramana e mea ana kia oma atu i te kaipuke, e tuku ana hoki i te poti ki te moana, he whakaware, kia kiia ai e tukua ana etahi pungua i te ihu. <sup>31</sup> Ka mea a Paora ki te keneturio ratou ko nga hoia, Ki te kore enei e noho ki te kaipuke, e kore koutou e taea te whakaora. <sup>32</sup> Katahi ka tapahia nga whakaheke o te poti e nga hoia, a tukua ana kia taka atu. <sup>33</sup> A i te mea meake puao te ra, ka tohe a Paora ki a ratou katoa kia

kai, ka mea, Ko te tekau ma wha tenei o nga ra e tatari nei koutou, e nohopuku nei, te o te kai.  
<sup>34</sup> Koia ahau ka tohe nei kia kai: ko tetahi mea hoki tenei e ora ai koutou: e kore hoki e ngahoro  
<sup>35</sup> tetahi huruhuru o te o tetahi o koutou, A, no tana korerotanga i enei kupu, ka mau ki te taro, ka  
<sup>36</sup> whakawhetai ki te Atua i te aroaro o te katoa: a ka whawhati, ka timata te kai. Na ka marama  
<sup>37</sup> nga ngakau o ratou katoa, ka kai ano ratou. Na e rua rau e whitu tekau ma ono matou katoa i te  
<sup>38</sup> kaupuke. A, no ka makona i te kai, ka whakamama ratou i te kaupuke, ka akiritia te witi ki te  
<sup>39</sup> moana. A ka ao te ra kihai ratou i mohio ki tera whenua; engari i kite ratou i tetahi kokoru he  
<sup>40</sup> one to reira, a ka mea ratou me kore e ahei te aki atu i te kaupuke ki roto. Na tapahia ana e ratou  
<sup>41</sup> nga punga, tukua ana ki te moana, i whakakorokoroa ana nga here o te urungi, ka hutia ano te ra  
<sup>42</sup> nui ki te hau, ka tika atu ki te one. A, ka puta atu ki tetahi wahi, he tai papakirua, ka whakaekea  
<sup>43</sup> te kaupuke; a titi tonu te ihu, mau tonu, ko te kei i pakaru i te kaha o te ngaru. A, ki ta nga hoia  
<sup>44</sup> whakaaro, me whakamate nga herehere, kei kau tetahi ki uta, kei oma. Ko te keneturio ia i mea  
kia whakaorangia a Paora, kihai hoki i tukua ki ta ratou i whakaaro ai; na ka mea ia, kia matua peke  
<sup>44</sup> atu te hunga e matau ana ki te kau, kia kau ki uta: Ko era atu, ko etahi i runga i nga papa, ko  
etahi i runga i etahi o nga mea o te kaupuke. Heoi tae ora katoa ana ratou ki uta.

## Chapter 28

<sup>1</sup> A ka ora matou, katahi ka mohio ko Merita te ingoa o te motu. <sup>2</sup> Na kihai i nohinohi te atawhai  
a nga tangata maori ki a matou: ka tahuna he kapura, whakamanuhiritia ana matou katoa, no te mea  
<sup>3</sup> e ua ana te ua, no te matao hoki. Na ka kohikohia e Paora he pupu wahie, a maka ana e ia ki te  
<sup>4</sup> kapura: heoi puta mai ana he neke i te wera, ka mau ki tona ringa. A, i te kitenga o nga tangata  
maori i te ngarara e werewere ana ki tona ringa, ka mea ratou tetahi ki tetahi, Koia, he tangata  
<sup>5</sup> kohuru tenei, ka ora nei ia i te moana, na kihai i tukua e te Tika kia ora. Otiia i ruia atu e ia te  
<sup>6</sup> ngarara ki te kapura, a kihai ia i mate, kihai i aha. Na whanga noa ratou kia tetere ia, kia hinga  
whakarere ranei, kia mate: heoi ka roa noa to ratou whanganga, a, i te kitenga kahore he aha i pa  
<sup>7</sup> ki a ia, ka puta ke o ratou whakaaro, ka mea, he atua ia. I taua wahi te kainga o te tino rangatira  
o te motu, ko Pupiriu te ingoa: he manuhiri matou nana; e toru nga ra i atawhaitia ai matou e ia.

8

Na i te takoto te papa o Pupiriu, e mate ana i te kirika, i te koripi: heoi ka tomo a Paora ki a ia, ka inoi, ka whakapa i ona ringa ki a ia, a ora ake ia. <sup>9</sup> A, i te meatanga o tenei, na ka haere mai ano era atu o te motu he mate o ratou, a whakaorangia ana: <sup>10</sup> Nui atu ano te honore i whakahonoretia ai matou e ratou; a i to matou rerenga ka utaina nga mea e rite ana ma matou.

11

A muri iho i nga marama e toru, ka rere matou i runga i tetahi kaupuke o Arehanaria, i tu nei ki taua motu i te hotoke, ko Katoro raua ko Poruku te tohu. <sup>12</sup> Na ka u ki Hairakuha, a e toru o

matou ra i noho ai ki reira. <sup>13</sup> Na ka awhio ake matou i reira, ka u ki Rekiuma: ka po tahi ka pa te tonga, a i te rua o nga ra ka u ki Puteori: <sup>14</sup> A, no ka kitea nga tuakana i reira, ka tohea matou kia

noho i a ratou, kia whitu nga ra: heoi haere ana matou ki Roma. <sup>15</sup> A ka rongu nga tuakana o reira ki a matou, ka haere ake ki te whakatau i a matou ki Te Makete o Apiu, ki Wharetoru: a, i te kitenga

o Paora i a ratou, ka whakawhetai ki te Atua, ka ora te ngakau. <sup>16</sup> Na ka tae matou ki Roma, ka hoatu nga herehere e te keneturio ki te rangatira hoia: ko Paora ia i tukua kia noho motu ke raua ko tetahi hoia hei tiaki i a ia.

17

A, i muri i nga ra e toru, ka huihuia e Paora nga tino tangata o nga Hurai: a, no to ratou minenga mai, ka mea ia ki a ratou, E oku tuakana, ko ahau kahore oku hara ki te iwi, ki nga ritenga ranei a nga matua, i tukua ai ahau i Hiruharama hei he rehere ki nga ringa o nga tangata o Roma:

18

A i mea ratou, i ta ratou whakawakanga i ahau kia tukua ahau, no te mea kahore he take e mate ai ahau. <sup>19</sup> Heoi ka whakahe tonu nga Hurai; e taea hoki te aha? karanga ana ahau ki a Hiha; kahore

ia aku mea e whakawa ai ahau i toku iwi. <sup>20</sup> Koia ahau i karanga ai i a koutou kia kite, kia korero ki ahau: no te mea hoki ko ta Iharaira e tumanako nei te mea i herea ai ahau ki tenei mekameka.

21

Na ko ta ratou meatanga ki a ia, kahore he pukapuka mou i tae mai ki a matou i Huria, kahore ano tetahi o nga tuakana i haere mai nei i kawe kupu mai, i korero mai ranei i tetahi kino mou.

22

Otira e mea ana matou kia rongu ki a koe ki ou whakaaro: e mohio ana hoki matou ki tenei wehenga, e korerotia kinotia ana i nga wahi katoa.

23

A, ka oti te whakarite he ra ki a ia, he tokomaha i haere mai ki a ia ki tona whare; a whakakitea ana e ia ki a ratou, whakaaturia ana te rangatiratanga o te Atua, a ka kukume i a ratou ki nga mea o Ihu, tiki atu ai i ta te ture a Mohi, i ta nga poropiti, no te ata a ahiahi noa. <sup>24</sup> Ko etahi i whakapono

ki nga mea i korerotia, ko etahi kihai i whakapono. <sup>25</sup> A, te rite a ratou korero, ka puta atu ratou, i muri i te korerotanga a Paora i tetahi kupu, Tika tonu te korero a te Wairua Tapu i a Ihaia poropiti

ki o koutou matua, <sup>26</sup> I mea nei, Haere ki tenei iwi, mea atu, Rongu noa koutou, e kore e matau;

<sup>27</sup>  
 titiro noa koutou, e kore e kite: Kua matotoru hoki te ngakau o tenei iwi, he puhoi nga taringa  
 ki te whakarongo, o ratou kanohi kua whakamoea e ratou; kei kite nga kanohi, kei rongu nga taringa,  
<sup>28</sup>  
 kei matau te ngakau, a ka tahuri ratou, ka ora i ahau. Na kia mohio koutou, ka tukua tenei  
<sup>29</sup>  
 whakaoranga a te Atua ki nga Tauwiwi, a ka rongu ratou. A ka mutu enei korero ana, ka haere  
 nga Hurai, he nui hoki ta ratou tautohetohe ki a ratou ano.  
<sup>30</sup>  
 A e rua tino tau i noho ai a Paora ki tona whare i utua e ia, a manaakitia ana e ia te hunga  
<sup>31</sup>  
 katoa e tomo ana ki a ia; A maia tonu ia ki te kauwhau i te rangatiratanga o te Atua, ki te  
 whakaako i nga mea o te Ariki, o Ihu karaiti, kihai ano i riria.

## Romans

### Chapter 1

<sup>1</sup>  
 Na Paora, na te pononga a Ihu Karaiti, i karangatia hei apotoro, i motuhia ki te rongopai a te  
<sup>2</sup>  
 Atua, I korerotia ra e ia i mua, ara e ana poropiti i roto i nga karaipiture tapu, <sup>3</sup> Mo tana Tama, i  
<sup>4</sup>  
 whanau nei he uri no Rawiri, no te wahi ki te kikokiko; I whakapuakina mai nei ko te Tama a te  
 Atua i runga i te kaha, i runga i ta te wairua o te tapu, i te mea ka whakaarahia i te hunga mate; ara  
<sup>5</sup>  
 a Ihu Karaiti, to tatou Ariki, Nana nei matou i whiwhi ai ki te aroha noa, ki te mahi apotoro, kia  
<sup>6</sup>  
 ngohengohe ai, kia whakapono ai nga iwi katoa, hei mea mo tona ingoa: No ratou nei hoki koutou,  
<sup>7</sup>  
 he mea karanga hei hunga mo Ihu Karaiti: Ki te hunga katoa i Roma, e arohaina nei e te Atua,  
 ka oti nei te te karanga hei hunga tapu: Kia tau ki a koutou te aroha noa me te rangimarie, he mea  
 na te Atua, na to tatou Matua, na te Ariki hoki, na Ihu Karaiti.  
<sup>8</sup>  
 Ko taku mea tuatahi, he whakawhetai ki toku Atua i roto i a Ihu Karaiti mo koutou katoa, no  
<sup>9</sup>  
 te mea e korerotia ana to koutou whakapono i te ao katoa. Ko te Atua, e mahi nei toku wairua ki  
 a ia i roto i te rongopai o tana Tama, hei kaiwhakaatu moku, mo te mau tonu o taku whakahuahua  
<sup>10</sup>  
 i a koutou, a i aku karakiatanga i nga wa katoa, E inoi ana me kore e pai te Atua kia whakatikaia  
<sup>11</sup>  
 taku haere atu ki a koutou. Nui atu hoki toku hiahia kia kite i a koutou, kia whakawhiwhi ai  
<sup>12</sup>  
 ahau i a koutou ki tetahi mea homai, he mea wairua, kia whakaungia ai koutou; Ara kia ora

ngatahi o tatou ngakau, toku i to koutou whakapono, o koutou i toku. <sup>13</sup> Na e kore ahau e pai, e oku teina, kia ngaro i a koutou te maha o aku meatanga kia haere atu ki a koutou, heoi araia mai ana ahau, a mohoa noa nei, kia whiwhi ai ahau ki tetahi hua i roto i a koutou hoki, kia pera me te

mea i era atu tauwi. <sup>14</sup> He nama kei runga i ahau na nga Kariki, a na nga Tautangata, na te hunga

mohio, a na te hunga whakaarokore. <sup>15</sup> Na reira e ngakau nui ana ahau kia whakapaua taku ki te kauwhau hoki i te rongopai ki a koutou i Roma.

<sup>16</sup> Kahore hoki oku whakama ki te rongopai: ko te kaha hoki ia o te Atua hei whakaora mo nga tangata katoa e whakapono ana; mo te Hurai ki mua, mo te Kariki ano hoki. <sup>17</sup> A kei reira e whakakitea ana ta te Atua tika, he mea no te whakapono ki te whakapono: kua oti nei hoki te

tuhituhi, ma te whakapono e ora ai te tangata tika. <sup>18</sup> E whakakitea iho ana hoki i te rangi to te Atua riri ki nga karakiakoretanga katoa, ki nga he o nga tangata e pehi ana i te pono i runga i te he;

<sup>19</sup> Kei roto nei i a ratou e marama ana nga mea o te Atua e taea te mohio; kua whakamaramatia

hoki e te Atua ki a ratou. <sup>20</sup> E kitea nuitia ana hoki nga mea ona, kahore nei i kitea, no te hanganga iho ra o te ao, e mohiotia ana ki nga mea i hanga, ara tona kaha mau tonu, me tona atuutanga; kia

kore ai he kupu whakahoki ma ratou: <sup>21</sup> I a ratou hoki e matau ana ki te Atua, kihai ratou i whakakororia i a ia hei Atua, kihai hoki i whakawhetai; heoi kua kuware o ratou whakaaro, a

whakapouritia ana to ratou ngakau pohehe. <sup>22</sup> I a ratou e mea ana he mohio ratou, na ka wairangi,

<sup>23</sup> A whakaputaia ketia ake te kororia o te Atua e kore nei e pirau, kia rite ki te ahua o te tangata

pirau noa, o nga manu hoki, o nga kararehe waewae wha, o nga mea ngokingoki. <sup>24</sup> Koia ratou i tukua ai e te Atua ki te mahi poke, i runga i nga hiahia o o ratou ngakau, kia whakatutuatia iho ai

o ratou tinana e ratou ano, to tetahi e tetahi: <sup>25</sup> I te mea kua whakawhiti ratou i to te Atua pono mo te teka, a karakia ana, mahi ana ki te mea hanga, kapea ake te Kaihanga, ko ia nei te whakapaingia

ake ake. Amine. <sup>26</sup> Koia ratou i tukua ai e te Atua ki nga hiahia tutua: ko a ratou wahine hoki,

mahue ake i a ratou te tikanga maori, kei te ngau ke noa atu: <sup>27</sup> Me nga tane ano, whakarerea ake e ratou te tikanga maori ki te wahine, ano he ahi te kanga o to ratou hiahia ki a ratou ano; nga tane ki nga tane, mahi ai i te mea whakama, me te whiwhi ano ki te utu e rite ana mo to ratou ngaunga

ketanga. <sup>28</sup> A i a ratou kihai nei i pai kia mau tonu te Atua ki o ratou mahara, tukua ana ratou e te

Atua ki te hinengaro he, kia mahia nga mea kahore e tau kia mahia. <sup>29</sup> Ki tonu ratou i nga mahi he katoa, i te kino, i te apo, i te mauahara; whawhao rawa i te hae, i te kohuru, i te totohe, i te hianga,

i te whanoke; he hunga kohumuhumu, <sup>30</sup> He hunga ngautuara, kino ki te Atua, he hunga whakahihi,

whakakake, whakapehapeha, he kaitito i nga mea kino, e turi ana ki nga matua, <sup>31</sup> Kahore o ratou  
 matauranga, he hunga kupu taka, kahore nei he aroha, kahore e tohu tangata: <sup>32</sup> Ahakoa e matau  
 ana ano ratou ki ta te Atua tikanga, he tika te mate mo nga kaimahi i enei mea, heoi ka mahi tonu  
 ratou i aua mea me te whakaae hoki ki te hunga e pera ana te mahi.

## Chapter 2

<sup>1</sup> Na kahore he kupu whakahoki mau, e koe, e te tangata e whakahe ana: i a koe hoki e whakahe  
 na i tera, e whakatau ana koe i te he ki a koe ano; kei te mahi hoki koe, te kaiwhakahe, i aua mea  
 na ano. <sup>2</sup> Na e matau ana tatou kei runga i te pono te whakahenga a te Atua mo nga kaimahi i aua  
 mea. <sup>3</sup> Ko tou whakaaro ranei tenei, e te tangata e whakahe ana ki nga kaimahi i aua mea, e mahi  
 na ano koe i aua mea, ko koe e ora i ta te Atua whakahe? <sup>4</sup> E whakahaweana ranei koe ki nga  
 rawa o tona ngawari, o tana tikanga mahaki, o tona manawanui, e ranea tonu nei; te mahara ko te  
 ngawari o te Atua hei arahi i a koe ki te ripeneta? <sup>5</sup> Heoi pakeke tonu koe, kahore e ripeneta tou  
 ngakau, e puranga ana koe i te riri mou, mo te ra o te riri, o te whakakitenga mai ano i ta te Atua  
 whakawakanga tika; <sup>6</sup> Mana e homai ki tetahi, ki tetahi, kia rite ki a ratou mahi: <sup>7</sup> Ki te hunga e  
 whai ana ki te kororia, ki te honore, ki te piraukore, me te mau ano ki te mahi pai, he ora tonu: <sup>8</sup> Ki  
 te hunga ia e totohe ana, e turi ana ki te pono, e whakarongo ana hoki ki te he, he riri, he aritarita,  
<sup>9</sup> He pawera, he raru, mo nga wairua tangata katoa e mahi ana i te kino, mo te Hurai ki mua, mo te  
 Kariki ano hoki: <sup>10</sup> He kororia ia, he honore, he rangimarie, mo nga tangata katoa e mahi ana i te  
 pai, mo te Hurai ki mua, mo te Kariki ano hoki: <sup>11</sup> Kahore hoki a te Atua whakapai kanohi. <sup>12</sup> Ko  
 te hunga hoki i hara turekore, ka ngaro turekore ano hoki: me te hunga i hara i runga i te ture, kei  
 te ture ano he whakahe mo ratou; <sup>13</sup> He teka hoki ko nga kaiwhakarongo o te ture e tika ki ta te  
 Atua; engari ko nga kaimahi o te ture e whakatikaia. <sup>14</sup> I te mea hoki e mahia maoritia ana nga  
 mea o te ture e nga Tauwiwi, kahore nei o ratou ture, ko enei, kahore nei o ratou ture, hei ture ki a  
 ratou ano: <sup>15</sup> I te mea ka whakakite ratou i te mahi a te ture, he mea tuhituhi ki o ratou ngakau, me  
 te whakaae tahi ano o ratou hinengaro, ko o ratou whakaaro kei te whakahehe, kei te whakatikatika  
 ranei i a ratou; <sup>16</sup> I te ra e whakawa ai te Atua i nga mea ngaro a nga tangata, he mea whakarite  
 tonu ki taku rongopai, he meatanga na Ihu Karaiti.

<sup>17</sup> Otira, mehemea e tapaina ana koe he Hurai, a, e whakawhirinaki ana koe ki te ture, e  
<sup>18</sup> whakamanamana ana ki te Atua, A, e mohio ana ki tana e pai ai, a e kitea ana e koe nga mea e  
<sup>19</sup> tino pai ana, he mea whakaako hoki koe na te ture, A, e u ana tou whakaaro, ko koe hei kaiarahi  
<sup>20</sup> mo nga matapo, hei marama mo te hunga i roto i te pouri, Hei kaiwhakatikatika mo nga kuware,  
 hei kaiwhakaako mo nga kohungahunga; kei a koe hoki te ahua o te matauranga, o te pono i runga  
<sup>21</sup> i te ture; he kaiwhakaako koe i tera atu, e kore ianei koe e whakaako i a koe ano? e kauwhau na  
<sup>22</sup> koe kia kaua e tahae, e tahae ana ranei koe? A koe e mea na, Kaua e puremu, e puremu ana ranei  
<sup>23</sup> koe? a koe e whakarihariha na ki nga whakapakoko, e tahae ana ranei koe i nga mea o nga temepara?  
<sup>24</sup> A koe e whakamanamana na ki te ture, kei te whakaiti ranei koe i te Atua i te mea ka takahi koe  
 i te ture? Na koutou hoki i kohukohua ai te ingoa o te Atua i roto i nga Tauwiwi, i peratia ai me  
<sup>25</sup> te mea kua oti te tuhituhi. E whai tikanga ana hoki te kotinga, ki te mahia e koe te ture: tena ki  
<sup>26</sup> te takahi koe i te ture, ka riro tou kotinga hei kotingakore. Na ki te mau i te kotingakore nga  
<sup>27</sup> tikanga o te ture, e kore ianei tona kotingakore e kiia hei kotinga? A, ki te rite te ture i te mea  
 kihai i kotia maoritia, e kore ianei ia e whakahe i a koe, e whiwhi na ki te kupu tuhituhi me te  
<sup>28</sup> kotinga, i a koe e takahi na i te ture? Ehara hoki i te Hurai te mea ko waho noa iho tona ahua  
<sup>29</sup> Hurai; ehara ano i te kotinga te mea no waho, no te kikokiko. Engari he Hurai ia, no roto tona  
 ahua Hurai; a ko te kotinga, no te ngakau, he mea wairua, he teka na te kupu tuhituhi; ehara hoki  
 i te mea e whakamoemititia ana e te tangata, engari e te Atua.

### Chapter 3

<sup>1</sup> Ha, he aha ra te painga i hua ki te Hurai? he aha te rawa o te kotinga? <sup>2</sup> He nui ra i nga mea  
 katoa: Ko te tuatahi, kua akona ratou ki nga kupu a te Atua. <sup>3</sup> Ka pehea, mehemea kahore he  
 whakapono o etahi? e taka ranei to te Atua pono i to ratou whakaponokore? <sup>4</sup> Kahore rapea: engari  
 ko te Atua kia kitea he pono, ko nga tangata katoa he teka kau; ko te mea hoki ia i tuhituhia, Kia  
<sup>5</sup> tika ai tau i tau korerotanga, kia puta ai tau ina whakawakia koe. Ha, ki te mea na to tatou he i  
 kitea nuitia ai to te Atua tika, me pehea he kupu ma tatou? E he ana ranei te Atua i a ia e whakapa  
<sup>6</sup> ana i te riri? he kupu tangata tenei naku: Kahore rapea: penei me pehea te Atua e whakawa ai i

<sup>7</sup>  
 te ao? Na ki te mea na toku teka i hira rawa ai to te Atua pono hei kororia mona; he aha ahau i  
 whakahengia tonutia ai ano hei tangata hara? <sup>8</sup> He aha hoki te penei ai, a ko te kupu whakapae teka  
 tenei mo matou, a ki ta etahi ko ta matou kupu tenei, Tatou ka mahi i te kino, kia puta ai he pai?  
<sup>9</sup>  
 tika tonu te tau o te he ki a ratou. He aha koia? he pai ake ranei to matou wahi i to ratou? Kahore  
 ra hoki: kua oti hoki te whakapa e matou i mua he he ki nga Hurai, ki nga Kariki, kei raro katoa  
 ratou i te hara; <sup>10</sup> Ko te mea hoki ia i tuhituhia, Kahore he tangata tika, kahore kia kotahi: <sup>11</sup> Kahore  
 he tangata e matau ana, kahore he tangata e rapu ana i te Atua; <sup>12</sup> Kua peka ke ratou katoa, kua  
 kino ngatahi: kahore he tangata e mahi ana i te pai, kahore rawa kia kotahi. <sup>13</sup> He urupa puare noa  
 to ratou korokoro; e patipati ana o ratou arero; kei roto i o ratou ngutu te wai whakamate o nga  
 nakahi: <sup>14</sup> Ki tonu o ratou mangai i te kanga, i te nanakia: <sup>15</sup> Ko o ratou waewae, hohoro tonu ki  
 te whakaheke toto: <sup>16</sup> He whakangaro, he ngakau pouri, kei o ratou ara: <sup>17</sup> Kahore hoki ratou i  
 mohio ki te ara o te rangimarie: <sup>18</sup> Kahore he wehi o te Atua i mua i o ratou kanohi.  
<sup>19</sup>  
 Na, e matau ana tatou ki nga kupu o te ture, e korero ana ki te hunga i te ture, kia kopia ai  
 nga mangai katoa, kia whakawakia ai te ao katoa e te Atua. <sup>20</sup> No te mea kahore he mahi o te ture  
 e tika ai tetahi kikokiko i tona aroaro: ma roto mai i te ture te matauranga ki te hara. <sup>21</sup> Otiia kua  
 whakakitea inaianei he tika a te Atua, motu ke i te ture, he mea whakaatu na te ture, na nga poropiti;  
<sup>22</sup>  
 Ara ko te tika a te Atua e na runga mai ana i te whakapono ki a Ihu Karaiti ki te hunga katoa e  
 whakapono ana: kahore hoki he pokanga ketanga: <sup>23</sup> Kua hara katoa hoki, a kahore e taea e ratou  
 te kororia o te Atua; <sup>24</sup> He mea whakatika utukore na tona aroha noa, i runga i ta Karaiti Ihu  
 hokonga: <sup>25</sup> Ko ia hoki ta te Atua i whakaari ai hei whakamarie, i runga i te whakapono, he mea  
 na ona toto; kia whakakitea ai tona tika, i te mea ka whakapahemotia atu nga hara o mua, he mea  
 hoki na te manawanui o te Atua; <sup>26</sup> Hei whakakite i tona tika i tenei wa nei ano: he mea kia tika  
 ai ia ano, me te kaiwhakatika i te tangata e whakapono ana ki a Ihu. <sup>27</sup> Na, kei hea te  
 whakamanamana? Kua araia atu. E tehea ritenga ture? e to nga mahi? Kahore: engari e te ture o te  
 whakapono. <sup>28</sup> Koia matou ka mea ai, kei te whakapono he tika mo te tangata, motu ke i nga mahi  
 o te ture. <sup>29</sup> Ko te Atua oti te Atua o nga Hurai anake? ehara ranei ia i te Atua o nga tauwiwi hoki?  
<sup>30</sup>  
 Ae ra, o nga tauwiwi ano hoki: Ki te mea ia he kotahi te Atua, a mana e whakatika te kotinga i



runga i te whakapono, me te kotingakore ina whakapono. <sup>31</sup> E taka ranei te ture i ta matou, ara i te whakapono? Kahore rapea: engari na ta matou i u ai te ture.

## Chapter 4

<sup>1</sup> He aha ra, ki ta tatou, te mea i riro i a Aperahama, i to tatou tupuna i runga i te kikokiko?  
<sup>2</sup> Mehemea hoki na nga mahi i tika ai a Aperahama, he mea tana e whakamanamana ai ia; otira kahore ki te Atua. <sup>3</sup> E pehea ana oti ta te karaipiture? I whakapono a Aperahama ki te Atua, a whakairia ana hei tika mona. <sup>4</sup> Na he tangata e mahi ana, e kore e kiia te utu mona he mea aroha noa, engari he mea mo tana. <sup>5</sup> Otira ko te tangata kahore e mahi, engari e whakapono ana ki te kaiwhakatika i te tangata karakiakore, ka whakairia tona whakapono hei tika mona. <sup>6</sup> Pera hoki me ta Rawiri korero i te manaaki ki te tangata, ka whakairia nei e te Atua he tika ki a ia, motu ke i nga mahi, <sup>7</sup> I ki ai ia, Ka hari te hunga kua oti a ratou mahi tutu te muru, o ratou hara te hipoki: <sup>8</sup> Ka hari te tangata e kore nei e whakairia e te Ariki he hara ki a ia.  
<sup>9</sup> E korerotia ana ranei tenei haringa mo te kotinga, mo te kotingakore ano ranei? e mea ana hoki tatou, I whakairia tona whakapono hei tika mo Aperahama. <sup>10</sup> He pehea ra te whakairinga? <sup>11</sup> i a ia i te kotinga, i te kotingakore ranei? He teka i a ia i te kotinga, engari i te kotingakore: A riro ana i a ia te kotinga hei tohu, hei hiri mo te tika o tona whakapono, i a ia i te kotingakore: kia waiho ai ia hei matua ki te hunga katoa e whakapono ana, ahakoa kahore ratou i kotia, kia whakairia ai te tika ki a ratou; <sup>12</sup> Hei matua ano mo te kotinga ki te hunga ehara i te mea no te kotinga anake, engari e takahi ana hoki i runga i nga tapuae o taua whakapono o to tatou matua, o Aperahama, i a ia kahore ano i kotia. <sup>13</sup> Ehara i te mea i na runga mai i te ture te kupu ki a Aperahama ratou ko ona uri mo te ao ka riro i a ia; engari i na runga mai i te tika o te whakapono. <sup>14</sup> Mehemea hoki ka riro i te hunga ture, kua tikangakore te whakapono, kua taka te kupu whakaari: <sup>15</sup> Ko ta te ture hoki e mahi ai, he riri; engari ki te kahore he ture, kahore hoki he hara. <sup>16</sup> Koia i na rototia ai i te whakapono, kia waiho ai ma te aroha noa; kia u ai te kupu whakaari ki te whanau katoa; ehara i te mea ki to te ture anake, engari ki to te whakapono ano o Aperahama, ko ia nei hoki te matua o tatou katoa,

<sup>17</sup> Ko te mea hoki ia i tuhituhia, Kua waiho koe e ahau hei matua ki nga iwi maha, he matua i te aroaro o tana i whakapono ai, ara o te Atua, e whakaora nei i nga tupapaku, e karanga nei i nga  
<sup>18</sup> mea kua kahore me te mea kei konei nei ano. Ahakoa kahore he rawa, u tonu tona manakonako ki a ia, kia meinga ai ia hei matua mo nga iwi maha, pera me te mea i korerotia, Ka penei tau  
<sup>19</sup> whanau. Kihai ano i ngoikore tona whakapono, i mahara iho ia ki tona tinana, he penei me te mea kua tupapakutia, wahi iti hoki kua kotahi rau ona tau, ki te tupapakutanga hoki o te kopu o  
<sup>20</sup> Hera: Ae, i titiro ia ki te kupu whakaari a te Atua, kihai ia i ruarua i runga i te whakaponokore,  
<sup>21</sup> engari ka kaha tonu tona whakapono, me te whakakororia ki te Atua, U tonu hoki tona whakaaro  
<sup>22</sup> e taea e ia te mea tana i korero ai. Koia hoki i whakairia ai ki a ia hei tika.  
<sup>23</sup> Otira ehara i te mea he whakaaro ki a ia anake i tuhituhia ai taua whakairinga ki a ia; Engari  
<sup>24</sup> he whakaaro ki a tatou ano hoki; ka whakairia ki a tatou e whakapono nei ki te kaiwhakaara i a  
<sup>25</sup> Ihu, i to tatou Ariki, i te hunga mate: I tukua nei mo o tatou he, i whakaarahia mo tatou kia whakatikaia.

## Chapter 5

<sup>1</sup> Na, i te mea ka tika nei i te whakapono, kia mau ta tatou maunga rongu ki te Atua, he mea  
<sup>2</sup> na to tatou Ariki, na Ihu Karaiti; Nana nei te whakatatanga i a tatou i runga i te whakapono ki tenei aroha noa e tu nei tatou; a kia hari tatou i te mea ka tumanako nei tatou ki te kororia o te Atua.  
<sup>3</sup> A ehara i te mea ko tera anake, engari kia whakamanamana ano tatou ki o tatou mamae: e mohio  
<sup>4</sup> ana hoki ko ta te mamae e mahi ai he manawanui; Ko ta te manawanui he matauranga; ko ta te  
<sup>5</sup> matauranga he tumanako: E kore ano e whakama i te mea ka tumanako nei: kua ringihia hoki te aroha o te Atua ki o tatou ngakau e te Wairua Tapu kua homai nei ki a tatou.  
<sup>6</sup> I a tatou hoki e ngoikore tonu ana, i te wa i rite ai, ka mate a te Karaiti mo te hunga karakiakore.  
<sup>7</sup> E mate whakauaua hoki tetahi mo te tangata tika: tera pea ia tetahi e maia rawa kia mate mo te tangata pai.  
<sup>8</sup> Heoi e whakakitea nuitia ana e te Atua tona aroha ki a tatou, i te mea, i a tatou ano e hara ana, ka mate a te Karaiti mo tatou.  
<sup>9</sup> Na, i a tatou ka tika nei i ona toto, tera noa ake he  
<sup>10</sup> whakaoranga mana i a tatou i te riri o te Atua. Mehemea hoki, i te wa he hoa whawhai tatou, ka

houhia ta tatou rongō ki te Atua i runga i te matenga o tana Tama, tera noa ake, i te mea ka mau  
 nei te rongō, he whakaoranga mo tatou, i a ia kua ora nei; <sup>11</sup> Ehara hoki i te mea ko tera anake,  
 engari e whakamanamana ana ano tatou ki te Atua, he mea na to tatou Ariki, na Ihu Karaiti, nana  
 nei tenei houhanga rongō ki a tatou. <sup>12</sup> Na, ka rite ki te putanga mai o te hara ki te ao, he mea na  
 te tangata kotahi, me te mate ano i runga i te hara; ka horapa te mate ki nga tangata katoa; no te  
 mea kua hara katoa: <sup>13</sup> I te ao nei hoki te hara, a tae noa mai te ture: otira e kore e whakairia te  
 hara i te mea kahore he ture. <sup>14</sup> Ahakoa ra he mana kingi to te mate no Arama iho ano taea noatia  
 a Mohi, ki te hunga rawa kihai nei i rite to ratou hara ki to Arama poka ke, he ahua nei hoki ia no  
 tenei i taria nei. <sup>15</sup> Otira kihai i rite ki te hara te mea i homai noa mai. Mehemea hoki na te hara o  
 te kotahi i mate ai te tokomaha, waihoki tera noa atu te huanga ki te tokomaha o to te Atua aroha  
 noa, o te mea homai hoki i runga i te aroha noa o te tangata kotahi, o Ihu Karaiti. <sup>16</sup> Kihai ano hoki  
 i rite te mea i homai ki to te kotahi i hara: no te kotahi hoki te whakawa i tau ai te he; no nga hara  
 maha ia te mea i homai noa mai hei whakatika. <sup>17</sup> Mehemea hoki na te hara o te kotahi i kingi ai  
 te mate, he mea na te tangata kotahi; waihoki tera noa ake he kingitanga i runga i te ora mo te hunga  
 ka riro nei i a ratou te aroha noa e hua tonu nei, me te tika i homai noa nei, he mea na te kota hi,  
 ara na Ihu Karaiti. <sup>18</sup> Ae ra, i te mea na te hara kotahi i tau ai te he ki nga tangata katoa, waihoki  
 na te tika kotahi i puta ai te mea homai noa ki nga tangata katoa, e tika ai, e ora ai. <sup>19</sup> Na, i te mea  
 na te tutu o te tangata kotahi i whai hara ai te tokomaha, waihoki na te ngohengohe o te kotahi, ka  
 meinga te tokomaha kia tika. <sup>20</sup> I puta mai te ture kia nui ai te hara; heoi i te hara e nui noa ana,  
 kua hua noa ake te aroha noa: <sup>21</sup> He mea hoki, i te hanga ko te hara te kingi i roto i te mate, kia  
 kingi hoki ko te aroha noa i runga o te tika ki te ora tonu, he meatanga na Ihu Karaiti, na to tatou  
 Ariki.

## Chapter 6

<sup>1</sup> Ha, kia pehea he korero ma tatou? Kia mau tonu oti tatou ki te hara, kia hua ai te aroha noa?  
<sup>2</sup> Kahore rapea. Ko tatou kua whakatupapakutia nei ki te hara, me pehea tatou e noho tonu atu ai  
 ano i roto i taua hara? <sup>3</sup> Kahore ianei koutou i mohio, ko tatou kua iriiria nei ki roto ki a Karaiti  
 Ihu, kua iriiria ki roto ki tona matenga? <sup>4</sup> Na kua tanumia ngatahitia tatou me ia ki roto ki te matenga,  
 he mea na te iriiri: kia rite ai ki a te Karaiti i whakaarahia ake nei i te hunga mate e te kororia o te

<sup>5</sup> Matua, waihoki ko tatou kia haere i roto i te houtanga o te ora. Ki te mea hoki kua honoa tatou  
 ki a ia i runga i te ahua o tona matenga, ka honoa ano tatou ki a ia i runga i te ahua o tona aranga:  
<sup>6</sup> E mohio ana hoki ki tenei, kua ripekatia ngatahitia me ia to tatou tangata tawhito, kia hemo ai te  
 tinana o te hara, kia mutu ai to tatou ponongatanga ki te hara; <sup>7</sup> Ko te mea hoki kua mate, kua  
 mawheto ia i te hara. <sup>8</sup> Ki te mea kua mate tahi tatou ko te Karaiti, e whakapono ana tatou e ora  
 tahi ano tatou me ia: <sup>9</sup> E matau ana hoki tatou, ka ara nei a te Karaiti i te hunga mate, heoi ano ona  
 matenga; kahore he kingitanga o te mate ki a ia a mua tonu atu. <sup>10</sup> Ko tona matenga hoki i mate  
 ai ia, he mate kotahi ki te hara: ko tona oranga ia, he ora ki te Atua. <sup>11</sup> Waihoki mahara iho ki a  
<sup>12</sup> koutou, kua whakatupapakutia koutou ki te hara, e ora ana ia ki te Atua, i roto i a Ihu Karaiti. Mo  
 konei ra aua te hara e kingi i roto i to koutou tinana mate, e ngohengohe ai koutou ki ta nga hiahia  
<sup>13</sup> poke o taua tinana nei: Kua hoki e tukua o koutou wahi ki te hara hei kaimahi i te he: engari  
 tukua atu koutou ki te Atua, he hunga kua ora i roto i te hunga mate, me o koutou wahi hoki hei  
<sup>14</sup> kaimahi i te tika ki te Atua. E kore hoki te hara e waiho hei rangatira mo koutou: ehara i te mea  
<sup>15</sup> kei raro koutou i te ture, engari kei raro ke i te aroha noa. He aha koia? kia hara oti tatou, no te  
<sup>16</sup> mea ehara tatou i te ture, engari no te aroha noa? Kahore rapea. Kahore oti koutou i matau, ki  
 te tuku koutou i a koutou ki tetahi hei pononga, he pononga koutou na tera kua ngohengohe na  
<sup>17</sup> koutou ki tana; na te hara ranei, a mate iho, na te ngohengohe ranei, a tika ake? Ko tenei me  
 whakawhetai ki te Atua, ahakoa he pononga koutou na te hara i mua, kua meinga o koutou ngakau  
<sup>18</sup> kia ngohengohe ki te ako i whakaakona ai koutou; Na ka atea nei koutou i te hara, ka meinga  
<sup>19</sup> koutou he pononga na te tika. He kupu tangata tenei naku, na te ngoikore o to koutou kikokiko:  
 na i tukua ra o koutou wahi hei pononga ma te poke, ma te tutu, ki te mahi tutu; waihoki me tuku  
<sup>20</sup> o koutou wahi aianeia hei pononga ma te tika, puta ake he tapu. I a koutou hoki e pononga ana  
<sup>21</sup> ki te hara, e atea ana koutou i te tika. Na i taua wa he aha nga hua i a koutou o nga mea e whakama  
<sup>22</sup> na koutou inaianei? he mate hoki te mutunga o aua mea. Tena ko tenei ka atea nei koutou i te  
 hara, a ka meinga hei pononga ma te Atua, ko nga hua ki a koutou he tapu, a, ko te tukunga iho he  
<sup>23</sup> ora tonu. Ko nga utu hoki o te hara he mate; ko ta te Atua ia i homai ai he ora tonu, i roto i a  
 Karaiti Ihu, i to tatou Ariki.

## Chapter 7

<sup>1</sup> Kahore ano koutou kia matau, e oku teina, e korero ana hoki ahau ki te hunga matau ki te ture, hei rangatira te ture mo te tangata i te wa e ora ai ia? <sup>2</sup> Ko te wahine whai tane hoki, e mau ana ano ia i te ture ki te tane i a ia e ora ana; ki te mate ia te tane, kua mawheto ia i te ture a te tane.

<sup>3</sup> Na, ki te riro ia i te tangata ke i tana tane e ora ana ano, ka kiia ia he wahine puremu: tena ka mate te tane, e atea ana a i te ture, ka kore ia e puremu ahakoa riro i te tangata ke. <sup>4</sup> Heoi ko koutou ano hoki, e oku teina, kua meinga kia tupapaku ki te ture, na te tinana o te Karaiti; kia riro ai koutou i tetahi atu, ara i tera i whakaarahia i te hunga mate, kia whai hua ai tatou ki te Atua. <sup>5</sup> I a tatou hoki i te kikokiko, e mahi ana nga hihiritanga o nga hara, e whakaohokia nei e te ture, i roto i o tatou wahi, a hua ake ko te mate. <sup>6</sup> Ko tenei kua mawheto mai tatou i te ture, kua mate hoki tatou ki te mea i puritia ai tatou; no reira e mahi ana tatou i runga i te houtanga o te wairua, kahore i runga i te tawhitotanga o te kupu tuhituhi.

<sup>7</sup> Kia pehea ra he kupu ma tatou? He hara ranei te ture? Kahore rapea. Engari kihai ahau i matau ki te hara, me i kua te ture: kahore hoki ahau i mohio ki te hiahia apo, me i kua te ture te mea mai, Aua koe e hiahia apo. <sup>8</sup> Na, ka mau te hara ki tenei, a ka mahi i nga hiahia apo katoa i roto i ahau, he mea na te ture. Ki te kore hoki te ture ka mate te hara. <sup>9</sup> I ora hoki ahau i mua i te korenga o te ture: no te taenga mai ia o te kupu whakahau, ka ora ake te hara, a mate iho ahau. <sup>10</sup> Na, ko te kupu whakahau i meinga ra hei ora, kitea ketia ana tenei hei mate moku. <sup>11</sup> Ka mau te hara ki tenei, ka whakawai hoki i ahau i runga i te kupu whakahau, nana ahau i mate ai. <sup>12</sup> Ae ra, he tapu te ture, me te kupu whakahau ano he tapu, he tika, he pai. <sup>13</sup> I riro koia te mea pai hei mate moku? Kahore rapea. Engari na te hara i mea te mea pai hei mate moku, kia whakakitea ai he hara te hara; na ka ai te kupu whakahau hei mea kia tino nui noa atu.

<sup>14</sup> E matau ana hoki tatou no te wairua te ture: ko ahau ia no te kikokiko, kua hokona hei parau ma te hara. <sup>15</sup> Ko taku hoki e mahi nei kahore e mohiotia iho e ahau: kahore hoki e mahia e ahau taku i pai ai; heoi ko taku i kino ai, meatia ana tenei e ahau. <sup>16</sup> Ki te mahia ia e ahau taua mea kihai nei ahau i pai atu, e whakaae ana ahau ki te ture he pai. <sup>17</sup> Ko tenei ehara i ahau i mahi, engari na te hara e noho nei i roto i ahau. <sup>18</sup> E matau ana hoki ahau, kahore he mea pai e noho ana i roto i ahau, ara i roto i toku kikokiko: ko te hiahia hoki kei ahau, ko te mea ia i te pai kahore i ahau.

19

Ko te pai hoki e hiahiatia ana e ahau, kahore e mahia e ahau: engari te kino kihai nei ahau i pai, mahia ana tenei e ahau. <sup>20</sup> Ki te mahia ia e ahau taua mea pu kihai nei ahau i pai atu, ehara i ahau

nana taua mea i mahi, engari na te hara e noho nei i roto i ahau. <sup>21</sup> Na, kua kitea e ahau te ture, ara kei te tata tonu te kino ki ahau e hiahia nei kia mea i te pai. <sup>22</sup> E ahua ana hoki ahau ki te ture

a te Atua, ara to roto tangata: <sup>23</sup> Otira kua kitea e ahau tetahi atu ture i roto i oku wahi, e whawhai ana ki te ture a toku hinengaro, e mea ana i ahau hei taurekareka ma te ture a te hara, ma tenei i

roto nei i oku wahi. <sup>24</sup> Aue, te mate i ahau! ma wai ahau e whakaora i te tinana o tenei mate? <sup>25</sup> Ma te Atua! E whakawhetai tonu ana ahau ki a ia i runga i a Ihu Karaiti, i to tatou Ariki. Na, e mahi ana ahau ano nei, ara, toku hinengaro, ki te ture a te Atua, ko toku kikokiko ia ki te ture a te hara.

## Chapter 8

<sup>1</sup> Na, kahore e tau te he inaianei ki te hunga i roto i a Karaiti Ihu. <sup>2</sup> Na te ture hoki a te Wairua o te ora i roto i a Karaiti Ihu ahau i atea ai i te ture a te hara, a te mate. <sup>3</sup> Ko te mea kihai i taea e te ture, he ngoikore nona i te kikokiko, tonoa mai ana e te Atua tana Tama, i te ahua o te kikokiko hara, hei whakahere ano mo te hara, a whakataua ana e ia te he ki te hara i roto i te kikokiko: <sup>4</sup> Kia rite ai to te ture tikanga i roto i a tatou, kahore nei e haere i runga i ta te kikokiko, engari i ta te Wairua. <sup>5</sup> Ko te hunga hoki i runga i ta te kikokiko, whakaaro ana ratou ki o te kikokiko; ko te hunga ia i runga i ta te Wairua, ki o te Wairua. <sup>6</sup> Ko to te kikokiko whakaaro hoki he mate, ko to te Wairua ia he ora, he rangimarie: <sup>7</sup> He tikanga whawhai hoki ki te Atua te whakaaro ki te kikokiko: e kore nei hoki e ngawari ki te ture a te Atua, kahore ano e ahei kia ngawari: <sup>8</sup> A e kore e taea e te hunga i te kikokiko te whakamanawareka ki te Atua. <sup>9</sup> Otiia kahore koutou i te kikokiko, engari i te Wairua, ki te mea e noho ana te Wairua o te Atua i roto i a koutou. Ki te kahore ia te Wairua o te Karaiti i tetahi, ehara tenei i a ia.

<sup>10</sup> Tena ki te mea kei roto a te Karaiti i a koutou, he tupapaku te tinana i te hara, he ora ia te wairua i te tika. <sup>11</sup> Ki te noho ia i roto i a koutou te Wairua o te kaiwhakaara o Ihu i te hunga mate, mana, ma te kaiwhakaara o Karaiti Ihu i roto i te hunga mate, e whakaora ake ano o koutou tinana mate ki tona Wairua e noho na i roto i a koutou. <sup>12</sup> Na reira, e oku teina, kahore he tikanga o te

13  
kikokiko kei runga i a tatou, kia whai tatou i tana: Ki te noho hoki koutou i runga i ta te kikokiko, ka mate koutou; ki te mea ia ka whakamate koutou i nga mahi a te tinana, he mea na te Wairua, ka

14  
ora koutou. Ko te hunga hoki e arahina ana e te Wairua o te Atua, he tama ratou na te Atua.

15  
He teka hoki he wairua pononga kua riro nei i a koutou, e mataku ai ano koutou; engari kua riro  
16  
i a koutou te Wairua e mea ana i a koutou hei tamariki ake, e karanga ai koutou, E Apa, e Pa. Ko  
taua Wairua ra ano hei whakaae ake ki o tatou wairua, he tamariki tatou na te Atua:

17  
Ki te mea hoki he tamariki, kati mo tatou te kainga; mo tatou te kainga o te Atua, mo tatou tahi ko te Karaiti; kia mamae rawa ake ai tatou tahi me ia, Ka whakakororiatia ngatahitia tatou me

18  
ia. Ki toku whakaaro iho hoki, he kore noa iho nga mamae o tenei wa, ki te whakaritea ki te

19  
kororia e whakakitea mai ki a tatou a mua. Ko te tumanako hoki o te mea i hanga e tatari ana

20  
ki te whakakitenga mai o nga tama a te Atua. Kua meinga hoki te tekateka noa hei rangatira mo te mea i hanga, ehara i te mea na tenei ake i whakaae, engari na ta te kaiwhakarite i pai ai, i runga

21  
i te tumanako, Tera taua mea i hanga e whakaateatia mai i te whakataurekarekatanga a te pirau,

22  
whakarangatiratia ake ki roto ki te kororia o nga tamariki a te Atua. E mohio ana hoki tatou, kei

23  
te ngunguru tahi, kei te mamae tahi, nga mea hanga katoa taea noatia tenei ra. Ehara i te mea ko tera anake, engari ko tatou ano hoki kua whiwhi nei ki te hua matamua, ara ki te Wairua, ina, e aue ana hoki tatou i roto i a tatou, e tatari ana ki te whakatamarikitanga, ara ki te whakaoranga o o

24  
tatou tinana. Na te tumanako hoki tatou i ora ai: tena ka kitea te mea e tumanakohia atu ana,

25  
kore ake te tumanako: ko wai oti e tumanako ki te mea e kitea nei e ia? Ki te tumanako atu ia tatou ki te mea kahore nei e kitea, katahi ka ata taria mariretia atu e tatou.

26  
Waihoki ko te wairua hei hoa mo tatou e ngoikore nei: kahore hoki tatou e matau me pehea e tika ai ta tatou inoi: otiia ko te Wairua tonu ano te inoi ana mo tatou ki ona aue e kore nei e taea

27  
te whakahua. A, ko te kaititiro i nga ngakau, e mohio ana ki te hinengaro o te Wairua, ko tera

28  
hoki e inoi ana mo te hunga tapu i runga i ta te Atua i pai ai. Na e matau ana tatou, kei te mahi tahi nga mea katoa i te pai mo te hunga e aroha ana ki te Atua, ara mo te hunga i karangatia i runga i tana i whakatakoto ai.

29  
Ko ana hoki i mohio ai i mua, E whakaritea ano e ia i mua kia rite ki te ahua o tana Tama,

30  
kia ai ia hei maunga i roto i nga teina tokomaha. A, ko ana i whakarite ai i mua, ko ena ano i karangatia e ia: a, ko ana i karanga ai, ko ena ano i whakatikaia e ia: a, ko ana i whakatika ai, ko ena ano i whakakororiatia e ia.

<sup>31</sup> Na, kia pehea ta tatou korero ki enei mea? Ki te mea ko te Atua hei hoa mo tatou, ko wai  
 hei whawhai ki a tatou? <sup>32</sup> Ko ia kihai nei i kaiponu i tana ake Tama, heoi tukua mai ana e ia mo  
 tatou katoa, e kore ianei ia e tapiri noa mai ki a ia i nga mea katoa mo tatou? <sup>33</sup> Ko wai hei whakapa  
 he ki a te Atua i whiriwhiri ai? Ko te Atua ra hei whakatika; <sup>34</sup> Ko wai ianei hei whakatau he? Ko  
 Karaiti Ihu ra, i mate nei, ae rawa hoki, ko ia ra kua whakaarahia ake nei i te mate, a kei te ringa  
 matau o te Atua, ko ia hoki kei te inoi mo tatou. <sup>35</sup> Ma wai tatou e momotu ke i te aroha o te Karaiti?  
 Ma te whakapawera ranei, ma te mamae, ma te whakato, ma e matekai, ma te kakahukore, ma te  
 mate ka tata, ma te hoari ranei? <sup>36</sup> Ko te mea hoki ia i tuhituhia, Na te whakaaro ki a koe matou i  
 whakamatea ai i te ra roa nei; kiia ana matou hei hipi e patua ana. <sup>37</sup> Engari i enei mea katoa hira  
 ake te wikitoria i a tatou, he mea nana i aroha nei ki a tatou. <sup>38</sup> U tonu hoki toku whakaaro, e kore  
 te mate, te ora ranei, e kore nga anahera, nga rangatiratanga ranei, e kore nga mea onaiane, e kore  
 nga mea e puta mai a mua, e kore nga mana, <sup>39</sup> E kore te tiketike, e kore te hohonu, e kore tetahi  
 atu mea hanga, e kaha ki te momotu i a tatou i te aroha o te Atua, i tera i roto nei i a Karaiti Ihu, i  
 to tatou Ariki.

## Chapter 9

<sup>1</sup> He pono taku korero i roto i a te karaiti, kahore aku teka, a e whakaae ana toku hinengaro ki  
 ahau i roto i te Wairua Tapu, <sup>2</sup> He nui atu toku pouri, mau tonu te mamae o toku ngakau. <sup>3</sup> He pai  
 hoki ki ahau me i kanga ahau, me i motuhia i a te Karaiti, he whakaaro ki oku teina, ara ki oku  
 whanaunga o te wahi ki te kikokiko: <sup>4</sup> No Iharaira nei ratou; no ratou nei te whakatamarikitanga,  
 te kororia, nga kawenata, te homaitanga o te ture, te karakia ki te Atua, me nga kupu whakaari;  
<sup>5</sup> No ratou nei nga matua, no ratou ano a te Karaiti i te wahi ki te kikokiko, ko ia nei kei runga ake  
 i nga mea katoa, ko te Atua e whakapaingia ana ake ake. Amine.  
<sup>6</sup> Ehara ia i te mea kua taka te kupu a te Atua. Ko te hunga hoki o Iharaira, ehara i te mea no  
 Iharaira katoa: <sup>7</sup> Ahakoa he uri no Aperahama, ehara ratou katoa i te tamariki: engari, Kei a Ihaka  
 te whakaingoatanga mo ou uri. <sup>8</sup> Ara, ehara i te mea ko nga tamariki a te kikokiko nga tamariki a  
 te Atua, engari ko nga tamariki a te kupu whakaari, ko ratou ka kiia he uri. <sup>9</sup> He kupu whakaari



hoki tenei, Kia taka tenei wa ka haere mai ahau, a ka whanau he tama ma Hera. <sup>10</sup> Na ehara i te  
 mea ko tenei anake; i a Ripeka ano ia kua hapu i tetahi, ara i a Ihaka, i to matou matua; <sup>11</sup> I nga  
 tama hoki kahore ano i whanau noa, kahore ano hoki i mahi i te pai, i te kino ranei, he mea kia u  
 ai ta te Atua i whakatakoto ai mo te whiriwhiringa, ehara i nga mahi, engari na te kaikaranga; <sup>12</sup> Ka  
 korerotia ki a ia, Ko te tuakana hei pononga ma te teina: <sup>13</sup> Ko te mea ia i tuhituhia, Kua aroha  
 ahau ki a Hakopa, kua kino ki a Ehau.  
<sup>14</sup> Ka pehea ai i kona ta tatou korero? He tikanga he koia kei te Atua? Kahore rapea. <sup>15</sup> I mea  
 hoki ia ki a Mohi, E tohu ahau i taku e tohu ai, e atawhai ahau ki taku e atawhai ai. <sup>16</sup> No reira,  
 ehara i te mea na te hiahia o te tangata, na te oma ranei o te tangata, engari na te Atua, ko ia e tohu  
 nei. <sup>17</sup> E mea nei hoki te karaipiture ki a Parao, Mo konei pu ano koe i whakaarahia ai e ahau, kia  
 ai koe hei whakakite i toku kaha, kia korerotia hoki toku ingoa ki te whenua katoa. <sup>18</sup> Na kona, e  
 tohungia ana e ia, ko tana e pai ai, ko tana hoki e pai ai e whakapakeketia ana e ia. <sup>19</sup> Na, tera koe  
 e mea mai ki ahau, he aha ia i riri tonu ai? ko wai hoki e whakakeke ana ki tana i pai ai? <sup>20</sup> Ha, e  
 te tangata nei, ko wai koe hei whakahoki kupu ki te Atua? Ma te mea hanga koia e mea ki tona  
 kaihangā, He aha ahau i hanga ai e koe kia penei? <sup>21</sup> He teka ianei kei te kaihangā riri te tikanga  
 mo te paru, kia hanga tetahi wahi o taua mea kotahi i pōkepokea hei oko rangatira, tetahi wahi hei  
 mea ware? <sup>22</sup> He aha hoki, mehemea, i tona whakaaro kia whakakitea tona riri, a kia whakaputaina  
 tona kaha, ka whakaririka te Atua i runga i te manawanui ki nga oko o te riri, e rite rawa nei mo te  
 whakangaro? <sup>23</sup> Kia whakakitea ano hoki e ia nga rawa o tona kororia ki nga oko o te mahi tohu,  
 kua rite noa ake nei i a ia mo te kororia, <sup>24</sup> Ara ki a tatou, i karangatia e ia, ehara i te mea no nga  
 Hurai anake, engari no nga tauwi ano hoki?  
<sup>25</sup> Ko tana kupu ano tena i ta Hohea, Ka kiia e ahau tera ko toku iwi, ehara nei i te iwi noku;  
 a he wahine e arohaina ana te wahine kihai i arohaina. <sup>26</sup> A tenei ake, i te wahi i korerotia ai ki a  
 ratou, Ehara koutou i te iwi noku; ko reira ratou kiia ai he tama na te Atua ora. <sup>27</sup> Ko ta Ihaia  
 karanga hoki mo Iharaira, Ahakoa i rite te tokomaha o nga tama a Iharaira ki te onepu o te moana,  
 ko te toenga kau e ora: <sup>28</sup> Ma te Ariki hoki e whakatutuki tana kupu ki runga i te whenua, mana e  
 whakaoti, mana e poro tata. <sup>29</sup> A, e ki ra a Ihaia i mua ra, Me kahore te toe i te Atua o nga mano  
 he whanau mo tatou, kua pera tatou me Horoma, kua rite ano hoki ki Komora.

<sup>30</sup> Na, kia pehea ta tatou korero? Ko nga tauwiwi, kihai nei i whai i te tika, kua tae ratou ki te tika, ara ki te tika, na te whakapono. <sup>31</sup> Ko Ihairaira ia, whai ana i tetahi ture o te tika, kihai ratou i tae ki taua ture. <sup>32</sup> Na te aha? Na te mea kihai ratou i whai i runga i te whakapono, engari ano na runga i nga mahi. I tutuki hoki o ratou waewae ki te kamaka tutukitanga; <sup>33</sup> Ko te mea hoki ia i tuhituhia, nana, ka whakatakotoria e ahau ki Hiona he kamaka tutukitanga, he kohatu whakahinga: na, ko te tangata e whakapono ana ki a ia, e kore e meinga kia whakama.

## Chapter 10

<sup>1</sup> E oku teina, ko ta toku ngakau i wawata ai, ko toku inoi hoki ki te Atua mo ratou, kia whakaorangia ratou. <sup>2</sup> E whakaae ana hoki ahau ki a ratou, he ngakau nui to ratou ki te Atua, otia ehara i te mea mohio. <sup>3</sup> I a ratou hoki e kuware ana ki ta te Atua tika, e whai ana kia whakaukia ko to ratou ake, kihai ratou i ngohengohe ki te tika a te Atua. <sup>4</sup> Ko te Karaiti hoki te tukunga iho o te ture hei tika mo nga tangata whakapono katoa. <sup>5</sup> Kua tuhituhia hoki e Mohi, ko te tangata e whakarite ana i ta te ture tika, ka ora ia i reira. <sup>6</sup> Ko te kupu ia tenei o to te whakapono tika, Aua e mea i roto i tou ngakau, Ko wai hei kake ki te rangi? ara ki te tiki atu i a te Karaiti ki raro: <sup>7</sup> Ko wai ranei hei heke iho ki te hohonu? ara ki te tiki atu i a te Karaiti i roto i te hunga mate. <sup>8</sup> E pehea ana oti? E tata ana ki a koe te kupu, kei tou mangai, kei tou ngakau: ko ia tenei, ko te kupu o te whakapono e kauwhau nei matou; <sup>9</sup> Ara ki te whakaae tou mangai ko Ihu te Ariki, a ki te whakapono tou ngakau na te Atua ia i whakaara ake i te hunga mate, e ora koe. <sup>10</sup> Ma te ngakau hoki kia whakapono ka tika ai; ma te mangai kia whakaae ka ora ai. <sup>11</sup> E mea ana hoki te karaipiture, Ko nga tangata katoa e whakapono ana ki a ia e kore e meinga kia whakama. <sup>12</sup> Kahore hoki he rereketanga o te Hurai, o te Kariki: a ko taua Ariki ano te Ariki o te katoa, a e hua ana ana taonga ki te hunga katoa e karanga ana ki a ia. <sup>13</sup> E ora hoki nga tangata katoa e karanga ana ki te ingoa o te Ariki. <sup>14</sup> Na, me pehea ta ratou karanga ki a ia, ki te kahore i whakapono ki a ia? me pehea hoki ta ratou whakapono ki a ia, ki te kahore i rongo ki a ia? me pehea hoki e rongo ai, ki te kahore he kaikauwhau? <sup>15</sup> A me pehea e kauwhau ai, ki te kahore e tonoa? ko te mea ia i tuhituhia, Ano te ataahua o nga waewae o te hunga kawae mai i te rongo whakahari o nga

<sup>16</sup> mea papai! Otira kahore ratou katoa i ngohengohe ki nga rongo whakahari. E mea ana hoki a  
 Ihaia, E te Ariki, ko wai i whakapono ki ta matou whakaatu? <sup>17</sup> Ina, na te rongo te whakapono, a  
 ko te rongo na te kupu a te Karaiti. <sup>18</sup> Otiia ko taku kupu tenei, Kahore ranei ratou i rongo? Koia  
<sup>19</sup> ra ia, Kua puta atu to ratou reo ki te whenua katoa, a ratou kupu hoki ki nga topito o te ao. Ko  
 taku kupu ia tenei, kahore ianei a Iharaira i mohio? Na Mohi te kupu tuatahi, Maku koutou e  
 whakaoho kia hae ki te hunga ehara i te iwi; Ka meinga e ahau te iwi poauau hei whakaoho i a  
<sup>20</sup> koutou ki te riri. A ka maia rawa a Ihaia, ka mea, Kua kitea ahau e te hunga kihai i rapu i ahau;  
<sup>21</sup> kua whakakitea ahau ki te hunga kihai nei i ui ki ahau. Ko tana kupu ia mo Iharaira, Pau noa te  
 ra i totoro atu ai oku ringa ki te iwi tutu, ki te iwi whakahawea.

## Chapter 11

<sup>1</sup> Na, ko taku kupu tenei, Kua peia oti e te Atua tana iwi? Kahore rapea. No Iharaira ano hoki  
 ahau, no te uri o Aperahama, no to Pineamine iwi. <sup>2</sup> Kahore hoki te Atua i pei i tana iwi i mohio  
 ai i mua. Kahore oti koutou i matau ki te korero a te karaipiture i ta Iraia? i inoi ra hoki ia ki te  
<sup>3</sup> Atua, i whakahe i a Iharaira, i mea, E te Ariki, kua patua e ratou au poropiti, kua whakahoroa au  
<sup>4</sup> aata; ko ahau anake hoki kua mahue nei, a e whai ana ratou kia patua ahau. Heoi e pehea ana te  
 whakahoki a te Atua ki a ia? E whitu mano tangata kua waiho e ahau maku, kahore nei i piko te  
<sup>5</sup> ture ki a Paara. Waihoki i te wa nei ano, tera ano he toenga, he whiriwhiringa na te aroha noa.  
<sup>6</sup> Ki te mea ia na te aroha noa, ehara i te mea na nga mahi: penei ehara te aroha noa i te aroha noa.  
<sup>7</sup> Ha, he pehea ra? Ko ta Iharaira e rapu nei, kihai tenei i taea e ia; otira kua taea e te hunga whiriwhiri,  
<sup>8</sup> ko era atu ia i whakapakeketia: Ko te mea hoki ia i tuhituhia, Kua hoatu ki a ratou e te Atua he  
 wairua hiamoe, he kanohi e kore ai ratou e kite, he taringa e kore ai e rongo; a taea noatia tenei ra.  
<sup>9</sup> E mea ana hoki a Rawiri, Kia whakatupu mahanga to ratou tepu, hei rore hoki, hei tutukitanga  
<sup>10</sup> waewae, hei utu ano ki a ratou: Kia whakapouritia o ratou kanohi, kia kaua ratou e kite, a kia  
<sup>11</sup> whakapikoa tonutia iho e koe to ratou tuara. Na, ko taku kupu tenei, He tutuki ranei to ratou e  
 hinga rawa ai? Kahore rapea: engari na to ratou hinga i puta ai te ora ki nga tauwiwi, he mea kia hae  
<sup>12</sup> ai ratou. Na, ki te mea hei taonga mo te ao to ratou hinganga, hei taonga ano mo nga Tauwiwi to

ratou whakaitinga: tera noa ake i to ratou whakanuinga? <sup>13</sup> Ki a koutou, ki nga Tauwi tenei kupu  
 aku, I te mea he apotoro ahau ki nga Tauwi, e whakanui ana ahau i taku mahi minita: <sup>14</sup> Me kore  
 e hae nga tangata o toku kikokiko, kia ora ai etahi o ratou i ahau. <sup>15</sup> Mehemea hoki ko to ratou  
 makanga atu hei houhanga rongu mo te ao, ka aha to ratou tangohanga mai? he teka ianei he oranga  
 ake i roto i te hunga mate? <sup>16</sup> Ki te mea hoki he tapu te mea matamua, ka pera ano te puranga: ki  
 te tapu hoki te pakiaka, e pera ano nga manga. <sup>17</sup> Engari ki te mea kua whatiia atu etahi o nga  
 manga, a ka honoa mai koe, te oriwa ngahere, ki roto i nga manga, ka whiwhi ngatahi ki te pakiaka  
 o te momonatanga o te oriwa; <sup>18</sup> Aua e whakapehapeha ki nga manga. Ki te whakapehapeha ia  
 koe, ehara i te mea nau i mau ake ai te pakiaka, engari na te pakiaka koe. <sup>19</sup> Na, tera koe e mea, I  
 whatiia atu nga manga, kia honoa iho ai ahau. <sup>20</sup> Ae ra; na te whakaponokore ratou i whatiia atu  
 ai, na tou whakapono koe i tu ai. Aua e whakakake, engari kia wehi. <sup>21</sup> Na, ki te mea kihai i tohungia  
 nga manga tupu e te Atua, e kore ano ia e tohu i a koe. <sup>22</sup> Na, tirohia iho te ngawari me te pakeke  
 o te Atua: pakeke ki te hunga i hinga; ngawari ki a koe, ki te u koe ki tana tikanga ngawari: ki te  
 kahore, ka tapahia hoki koe. <sup>23</sup> Me ratou ano, ki te kore e u ki to ratou whakaponokore, ka honoa  
 ano: e taea hoki ratou e te Atua te hono mai ano. <sup>24</sup> Mehemea hoki ka tapahia mai koe i te oriwa  
 ngahere, a ka honoa mai ki te oriwa pai, he mea rere ke i te tikanga; tera noa ake te honoa o enei,  
 o nga manga tupu, ki to ratou oriwa ano. <sup>25</sup> E kore hoki ahau e pai, e oku teina, kia kuware koutou  
 ki tenei mea ngaro, kei mea noa koutou he matau koutou, kua tau tetahi wahi o te whakapakeketanga  
 ki a Iharaira, kia riro mai ra ano te tokomahatanga o nga tauwi. <sup>26</sup> Ko reira a Iharaira katoa ora  
 ai: ko te mea hoki ia i tuhituhia, Tera e puta mai te Kaiwhakaora i Hiona, mana e kaupare te  
 karakiakore i a Hakopa: <sup>27</sup> Ko taku kawenata hoki tenei ki a ratou, ina tangohia atu e ahau o ratou  
 hara. <sup>28</sup> Na i runga i te rongopai he hoariri ratou, he whakaaro ki a koutou; i runga ia i te  
 whiriwhiringa, e arohaina ana ratou, he whakaaro ki nga matua. <sup>29</sup> I a te Atua homaitanga hoki, i  
 tana karangatanga, kahore e puta ke te whakaaro. <sup>30</sup> Ka rite hoki ki a koutou kihai i whakapono i  
 mua ki te Atua, inaianei ia kua tohungia, he mea na to ratou whakaponokore: <sup>31</sup> Waihoki kua  
 kahore enei i whakapono inaianei, kia tohungia ai ano ratou i runga i te mahi tohu i whiwhi nei  
 koutou. <sup>32</sup> Kua oti hoki te katoa te kopani e te Atua ki roto ki te whakateka, he mea kia tohungia  
 ai e ia te katoa.

33 Ano te hohonu, te hua ngatahi hoki o te whakaaro o te Atua me tona mohio! e kore ana  
 tikanga e taea te rapu, ona huarahi te whakataki! <sup>34</sup> Ko wai hoki te mohio ana ki te hinengaro o te  
 Ariki? ko wai hoki tona hoa whakatakoto whakaaro? <sup>35</sup> Ko ta wai hoki kua matua hoatu ki a ia, a  
 ka whakahokia mai he utu ki a ia? <sup>36</sup> Ko nga mea katoa nei hoki, nana, a kei runga ano i a ia, a e  
 ahu ana hoki ki a ia: mona te kororia ake tonu atu. Amine.

## Chapter 12

<sup>1</sup> Koia ahau ka inoi nei ki a koutou, e oku teina, kia whakaaroa nga mahi a te Atua, kia tapaea  
 atu o koutou tinana hei whakahere ora, tapu, e manakohia ana e te Atua, he mahi na to koutou  
 hinengaro. <sup>2</sup> Kaua hoki to koutou ahua e rite ki to tenei ao: engari kia puta ke, ara kia whakahoutia  
 o koutou hinengaro, kia whakamatautauria ai e koutou ta te Atua e pai ai, te mea e pai ana, e  
 manakohia ana, e tino rite ana. <sup>3</sup> Ko taku kupu hoki tenei ki nga tangata katoa i roto i a koutou, he  
 mea na te aroha noa i homai nei ki ahau, Kaua e hira ake te whakaaro o tetahi ki a ia ano i te mea  
 i tika kia whakaaroa e ia; engari kia ata whakaaro, kia rite ki te wahi o te wha kaponu i tuwhaina  
 e te Atua ki tena, ki tena. <sup>4</sup> E rite ana hoki ki o tatou wahi ka maha nei i te tinana kotahi, kihai ia i  
 kotahi te mahi ma aua wahi katoa: <sup>5</sup> Waihoki ko tatou tokomaha nei, he tinana kotahi i roto i a te  
 Karaiti, ko tatou takitahi ia, he wahi tetahi no tetahi. <sup>6</sup> Na ka rere ke nei nga mea i homai ki a tatou,  
 he mea e rite ana ki te aroha noa i homai ki a tatou, ki te mea he mahi poropiti, me poropiti, kia rite  
 ano ki te rahi o to tatou whakapono; <sup>7</sup> He mahi minita, kia u tatou ki ta tatou mahi minita; ko te  
 kaiwhakaako, kia u ki tana mahi whakaako; <sup>8</sup> Ko te kaiwhakahauhau, kia u ki tana whakahauhau;  
 ko te kaihoatu, kia mahorahora te ngakau; ko te kaiwhakahaere kia uua ki tana mahi, a ko te  
 kaiatawhai kia ngahau te ahua. <sup>9</sup> Ko te aroha, hei te mea tinihangakore. Kia whakarihariha ki te  
 kino; kia u ki te pai. <sup>10</sup> Ka aroha ki nga teina, kia tino pono te aroha tetahi ki tetahi; ka whakahonore,  
 kia nui ta tetahi i tetahi. <sup>11</sup> Kia uua, kaua e mangere; kia toko tonu ake te wairua; me te mahi ano  
 ki te Ariki; <sup>12</sup> Kia hari i runga i te tumanako; kia manawanui ki te whakapawera; kia u ki te inoi;  
<sup>13</sup> Whakawhiwhia te hunga tapu ina rawakore; kia mau ki te atawhai manuhiri. <sup>14</sup> Manaakitia te  
 hunga e tukino ana i a koutou: manaakitia, kaua e kanga. <sup>15</sup> Kia hari tahi me te hunga hari, kia

<sup>16</sup>  
 tangi tahi me te hunga tangi. Kia kotahi te whakaaro o koutou tetahi ki tetahi. Kaua e whakakake  
 te whakaaro, engari me whakaiti ki nga mea papaku. Kei mea ake koutou he mohio koutou. <sup>17</sup> Kaua  
 e utua ta tetahi kino ki te kino. Whakaaroa ko nga mea e pai ana ki mua i te aroaro o nga tangata  
<sup>18</sup> katoa. Ki te taea, whakapaua ta koutou kia mau te rongu ki nga tangata katoa. <sup>19</sup> Aua e rapu  
 utu mo koutou, e oku hoa aroha, engari whakaatea atu i te riri: kua oti hoki te tuhituhi, Maku te  
<sup>20</sup>  
 rapu utu; maku te hoatu utu, e ai ta te Ariki. Na, ki te matekai tou hoariri, whangainga; ki te  
 matewai, whakainumia: ki te penei hoki tau mahi, ka purangatia e koe he waro kapura ki tona  
<sup>21</sup>  
 matenga. Kei hinga koe i te kino, engari kia hinga te kino i tou pai.

### Chapter 13

<sup>1</sup>  
 Kia ngohengohe nga wairua katoa ki nga mana nunui. Kahore hoki he mana, no te Atua anake:  
 ko nga mana o tenei wa he mea whakarite na te Atua. <sup>2</sup> Na, ki te whakakeke tetahi ki te mana, e  
 whakakeke ana ia ki ta te Atua i whakarite ai: a ko te mea hoki mo te hunga e whakakeke ana, he  
<sup>3</sup>  
 whakatau he. Ehara hoki nga rangatira i te whakawehi mo nga mahi pai, engari mo nga mahi  
 kino. E mea ana koe kia kaua e wehi i te mana? meatia te pai, a he whakamoemiti tana e homai ai  
<sup>4</sup>  
 ki a koe: He minita hoki ia na te Atua ki a koe mo te pai. Tena ki te mahi koe i te kino, e wehi  
 ra; ehara hoki tana i te mau noa i te hoari: he minita hoki ia na te Atua, he kairapu utu mo te riri ki  
<sup>5</sup>  
 te kaimahi i te kino. Koia i takoto ai te tikanga kia ngohengohe koutou, ehara i te mea he whakaaro  
<sup>6</sup>  
 kau ki te riri, engari ki ta te hinengaro ano hoki. Na konei hoki koutou i hoatu ai i te takoha: he  
 minita hoki ratou na te Atua, he hunga hoki e mau tonu ana ki tenei mea pu ano.  
<sup>7</sup>  
 Hoatu nga mea i tika ki te katoa: he takoha tangata ki te tangata i tika ai te takoha tangata; he  
 takoha taonga ki te tangata i tika ai te takoha taonga; he wehi ki te tangata i tika ai te wehi; he  
<sup>8</sup>  
 honore ki te tangata i tika ai te honore. Kaua e nama ki tetahi, ko te aroha anake o tetahi ki tetahi;  
<sup>9</sup>  
 ko te tangata hoki e aroha ana ki tona hoa tata, kua whakaritea e ia te ture. Ko tenei hoki, Kaua  
 e puremu, Kaua e patu tangata, Kaua e tahae, Kaua e hiahia ki ta te tangata; a ki te mea tera atu  
 ano tetahi kupu ako, ka whakarapopototia ki roto ki tenei kupu, ara, Kia aroha ki tou hoa tata, ano  
<sup>10</sup>  
 ko koe. E kore te aroha e kino ki tona hoa; no reira ko te aroha te whakaritenga o te ture.  
<sup>11</sup>  
 Tenei ano hoki tetahi, e mohio ana tatou ki te taima, kua taka noa ake tenei te wa e ara ake  
 ai koutou i te moe: kua tata ke hoki inaianei to tatou whakaoranga i to te wa i whakapono tuatahi

<sup>12</sup> ai tatou. Kua aua atu te po, ka tata te ao: mo konei ra kia whakarerea e tatou nga mahi o te pouri, kia kakahuria iho nga kakahu whawhai o te marama. <sup>13</sup> Kia pai ta tatou haere, kia rite ki to te awatea: kauaka i nga kakainga, i nga haurangitanga, kaua i te puremu, i nga hiahia taikaha, kaua i te ngangau, i te hae. <sup>14</sup> Engari kakahuria iho te Ariki, a Ihu Karaiti, kaua hoki e whakaaroa wawetia te kikokiko kia mahia ko ona hiahia.

## Chapter 14

<sup>1</sup> Ko te tangata he ngoikore te whakapono, manakohia, kauaka ia ki nga tautohe whakaaro. <sup>2</sup> Ko tetahi hoki e whakapono ana he pai nga mea katoa hei kai mana: ko te tangata ia he ngoikore tona whakapono e kai otaota ana. <sup>3</sup> Kaua te tangata e kai ana e whakahawea ki te tangata kahore e kai, kaua hoki te tangata kahore e kai e whakahe i te tangata e kai ana: kua manakohia hoki ia e te Atua. <sup>4</sup> Ko wai koe e whakahe na i te pononga a tera? ma tona rangatira ia e whakatu, e whakahinga ranei. Ina, ka whakaturia ano ia: e taea hoki ia e te Atua te whakatu. <sup>5</sup> Ki te whakaaro a tetahi, nui atu tetahi ra i tetahi: ki a tetahi whakaaro ia he rite katoa nga ra. Kia u marire nga whakaaro o tetahi, o tetahi. <sup>6</sup> Ko te tangata e whakaaro ana ki te ra, he whakaaro ki te Ariki tona whakaaro; ko te tangata e kai ana, he whakaaro ki te Ariki tana kai, e whakawhetai atu ana hoki ia ki te Atua; ko te tangata kahore e kai, he whakaaro ki te Ariki tana kore e kai, e whakawhetai ana ano ia ki te Atua. <sup>7</sup> Ehara hoki i te mea ki a ia ake ano te ora o tetahi o tatou, ehara hoki i te mea ki a ia ake te mate o tetahi. <sup>8</sup> Ta te mea, ahakoa ora, e ora ana tatou ki te Ariki; ahakoa mate, e mate ana tatou ki te Ariki: na, ahakoa ora tatou, mate ranei, na te Ariki tatou. <sup>9</sup> Ko te mea hoki tenei i mate ai a te Karaiti, i ara ake ai ano, i ora ai ano, kia waiho ai ia hei Ariki ngatahi mo te hunga mate, mo te hunga ora. <sup>10</sup> Ko koe na, he aha koe i whakahe ai i tou teina? me koe na hoki, he aha koe i whakahawea ai ki tou teina? e tu katoa hoki tatou ki te nohoanga whakawa o te Atua. <sup>11</sup> Kua oti hoki te tuhituhi, E ora ana ahau, e ai ta te Ariki, e piko katoa nga turi ki ahau, e whakaae ano hoki nga arero katoa ki te Atua. <sup>12</sup> Ae ra, ka korerotia e tenei, e tenei o tatou te tikanga o ana mahi ki te Atua. <sup>13</sup> Na, kati ta tatou whakahe tetahi i tetahi: engari ko tenei kia rite i a koutou, kia kaua e whakatakotoria he tutukitanga waewae, he take whakahinga ranei mo tona teina. <sup>14</sup> E mohio ana ahau, u tonu toku whakaaro i roto i te Ariki, i a Ihu, kahore he mea nona ake ano tona noa: haunga

ia ki te mea tetahi he noa tetahi mea, e noa ano ki a ia.<sup>15</sup> Ki te mea hoki na te kai i pouri ai tou teina, kahore e mau ana tau haere i runga i te aroha. kei mate i tau kai te tangata i mate nei a te Karaiti mona.<sup>16</sup> Na, kei korerotia kinotia to koutou pai:<sup>17</sup> Ehara hoki te rangatiratanga o te Atua i te kai, i te inu; engari he tika, he rangimarie, he hari i roto i te Wairua Tapu.<sup>18</sup> Ko te tangata hoki ko enei hei mahinga mana ki a te Karaiti, ka ahuaekatia ia e te Atua, ka paingia hoki e nga tangata.<sup>19</sup> Na, kia whai tatou i nga mea e mau ai te rongu, i nga mea ano hoki e hanga ai te pai o tetahi, o tetahi.<sup>20</sup> Kaua e waiho te kai hei whakahoro mo ta te Atua mahi. He ma hoki nga mea katoa; otia he kino ki te tangata e kai ana me te whakahe tona ngakau.<sup>21</sup> He mea pai tonu kia kaua e kai kikokiko, kia kaua e inu waina, aha ranei e tutuki ai tou teina.<sup>22</sup> Ko te whakapono i a koe na, waiho i a koe ano i te aroaro o te Atua. Ka hari te tangata kahore e whakatau i te he ki a ia ano mo te mea i whakapaia e ia mana.<sup>23</sup> Ki te ruarua ia tetahi, ka tau te he ki a ia ki te kai ia: no te mea ehara i te kai whakapono: he hara hoki nga mea katoa kihai nei i puta ake i te whakapono.

## Chapter 15

<sup>1</sup> Ko te mahi tika ma tatou, ma te hunga kaha, he pikau i nga ngoikoretanga o te hunga kahakore; kaua hoki e whai i ta tatou ake i ahuaekatia ia.<sup>2</sup> Me whai tena, tena o tatou kia ahuaekatia mai tona hoa, tona hoa mo te mea e pai ana hei hanga i tona whakapono.<sup>3</sup> Kihai hoki a te Karaiti i whai ki tana ake i ahuaekatia ai; engari i rite ki te mea kua oti te tuhituhi, Ko nga tawainga a te hunga e tawai ana i a koe kua tau ki ahau.<sup>4</sup> Ko nga mea katoa hoki i tuhituhia i mua he mea tuhituhi hei whakaako i a tatou, kia whai tumanakohanga ai tatou, i te mea ka whakamanawanui, ka whakamarietia hoki e nga karaipiture.<sup>5</sup> Heoi ma te Atua o te manawanui, o te whakamarie, e hoatu ki a koutou kia kotahi te whakaaro o tetahi ki tetahi, kia rite ki ta Karaiti Ihu:<sup>6</sup> Kia kotahi ai te whakaaro, kia kotahi ai te mangai, e whakakororia ai koutou i te Atua, ara i te Matua o to tatou Ariki, o Ihu Karaiti.<sup>7</sup> Na, me whakahoa koutou tetahi ki tetahi, kia rite ki a te Karaiti i mea nei i a tatou hei hoa mona, kia whai kororia ai te Atua.<sup>8</sup> Ko taku kupu hoki tenei, i meinga a te Karaiti hei minita ki te kotinga, he whakaaro ki te pono o te Atua, kia u ai nga mea i whakaaria ki nga matua:<sup>9</sup> Kia whakakororia ai hoki nga Tauwiwi i te Atua mo tana mahi tohu, kia pera ai me te mea i tuhituhia,



Mo konei ka whakawhetai ahau ki a koe i waenganui o nga tauwi, ka himene ki tou ingoa. <sup>10</sup> Tenei  
 ano tetahi kupu ana, Kia hari tahi, e nga Tauwi, me tana iwi. <sup>11</sup> Tenei ano hoki, Whakamoemititia  
 te Ariki, e nga Tauwi katoa; whakamoemititia ano ia, e nga iwi katoa. <sup>12</sup> E mea ana hoki a Ihaia,  
 Tera e whai pakiaka a Hehe, me tetahi e whakatika ake ana hei rangatira mo nga Tauwi; ko ia hei  
 tumanakohanga ma nga Tauwi.  
<sup>13</sup> Na, ma te Atua, nana nei te tumanako, e whakaki koutou ki te hari katoa, ki te rangimarie,  
 i runga i te whakapono, kia hua ai to koutou tumanako, i runga i te kaha o te Wairua Tapu.  
<sup>14</sup> Na e u ana toku ake whakaaro ki a koutou, e oku teina, e ki ana koutou i te pai, whawhao  
 rawa ki te matauranga katoa, a e taea ano e koutou te tohutohu tetahi i tetahi. <sup>15</sup> Otiia i nui ake ai  
 toku maia ki te tuhituhi penei ki a koutou, e oku teina, he whakamahara ano i a koutou, he mea na  
 te aroha noa kua homai nei ki ahau e te Atua. <sup>16</sup> I meinga ai ahau hei minita ma Ihu Karaiti ki nga  
 tauwi, hei minita i te rongopai o te Atua, kia manakohia ai te whakahere o nga tauwi, he mea  
 whakatapu na te Wairua Tapu.  
<sup>17</sup> Na, kua whai whakamanamanatanga nei ahau i roto i a Karaiti Ihu i nga mea a te Atua. <sup>18</sup> E  
 kore hoki ahau e maia ki te korero ki etahi mea, ko nga mea anake kua mahia e te Karaiti na roto  
 i ahau, hei mea kia ngohengohe mai nga Tauwi, ara na taku kupu, na taku mahi, <sup>19</sup> I runga i te  
 kaha o nga tohu, o nga mea whakamiharo, i runga i te kaha o te Wairua Tapu; no ka whakapaua e  
 ahau te kauwhau i te rongopai o te Karaiti atu i Hiruharama, a taka noa ki Iririkuma rawa; <sup>20</sup> Ae  
 ra, ko ia tenei taku tohe ki te kauwhau i te rongopai, ehara i te mea ki nga wahi kua whakahuatia  
 nei a te Karaiti ki reira, kei hanga whare ahau ki runga ki a tetahi atu turanga: <sup>21</sup> Engari kia rite ki  
 te mea i tuhituhia, E kite te hunga kihai nei i korerotia ia ki a ratou, a e matau te hunga kihai i rongo.  
<sup>22</sup> Na konei ano i maha ai oku whakawarenga, te tae atu ai ahau ki a koutou. <sup>23</sup> Otiia inaianei,  
 kua kore nei he wahi moku i enei whenua, a, i te mea he maha nga tau i wawata ai ahau kia tae atu  
 ki a koutou, <sup>24</sup> Ina tupono taku haere ki Hipania; e tumanako ana hoki ahau kia kite i a koutou i  
 taua haerenga oku, a kia kawea peratia atu ahau e koutou, ina ano ia kia matua rite tetahi wahi o  
 toku ngakau i te kitenga i a koutou; <sup>25</sup> Inaianei ia, e mea ana ahau, e haere ana tenei ahau ki  
 Hiruharama, ki te mahi mea ma te hunga tapu. <sup>26</sup> Kua pai hoki a Makeronia raua ko Akaia kia  
 meinga tetahi kohikohi ma nga mea rawakore o te hunga tapu i Hiruharama. <sup>27</sup> Ae ra, i pai ano  
 ratou ki te pera, a e tika ana ano kia hoatu ki a ratou. I te mea kua uru nei nga Tauwi ki a ratou  
 mea o te wairua, waihoki he tika ano kia mahia e enei etahi mea o te kikokiko ma ratou. <sup>28</sup> Na, kia

oti tenei i ahau, a hiri rawa tenei hua hei mea ma ratou, ka tika atu ahau ma koutou na ki Hipania.

29

A e matau ana ahau, ka haere atu ahau ki a koutou, tera ahau e haere atu i runga i te hua noa iho o te manaakitanga o e rongopai o te Karaiti.

30

Na he tohe tenei naku ki a koutou, e oku teina, he whakaaro ki to tatou Ariki, ki a Ihu Karaiti,

na te aroha hoki o te Wairua, kia tohe tahi koutou me ahau i a koutou inoi ki te Atua moku; <sup>31</sup> Kia whakaorangia ahau i te hunga whakateka i Huria; kia manakohia ano e te hunga tapu taku minitanga

mo Hiruharama; <sup>32</sup> Kia haere hari atu ai ahau ki a koutou, ki te pai te Atua, kia whakata tahi ai me

<sup>33</sup> koutou. Na, kia noho te Atua o te rangimarie ki a koutou katoa. Amine.

## Chapter 16

1

Tena to matou tuahine, a Pipi, te tukua atu na e ahau ki a koutou, he kaimahi ia na te hahi i

Kenekerea: <sup>2</sup> Hei manuhiri ia ma koutou i roto i te Ariki, kia rite ki ta te hunga tapu tikanga, a kia awhina koutou i a ia ki nga mea e matea e ia: he tokomaha hoki ana i atawhai ai, ahau ano hoki.

3

Oha atu ki a Pirihira raua ko Akuira, ki oku hoa mahi i roto i a Karaiti Ihu, <sup>4</sup> Na raua nei hoki o raua na kaki i taku kia ora ai ahau: ehara i te mea ko ahau anake e whakawhetai ana ki a raua, engari

ko nga hahi katoa hoki o nga tauwiwi: <sup>5</sup> Oha atu ano ki te hahi i to raua whare. Oha atu ki a Epainetu,

ki taku i aroha ai, ko ia hoki ta te Karaiti matamua o Ahia. <sup>6</sup> Oha atu ki a Meri, he nui tana mahi

ki a matou. <sup>7</sup> Oha atu ki a Anaroniku raua ko Hunia, oku whanaunga, oku hoa herehere ano hoki, he ingoa nunui nei o raua i roto i nga apotoro, no mua nei i ahau to raua urunga ki a te Karaiti.

8

Oha atu ki a Amapiria, ki taku i aroha ai i roto i te Ariki. <sup>9</sup> Oha atu ki a Urupane, ki to matou hoa

mahi i roto i a te Karaiti, ki a Takuha ano hoki, ki taku i aroha ai. <sup>10</sup> Oha atu ki a Apere, e paingia

ana i roto i a te Karaiti. Oha atu ki a Aritopuru ma. <sup>11</sup> Oha atu ki a Heroriona, ki toku whanaunga.

Oha atu ki a Nakihu ma, ki nga mea i roto i te Ariki. <sup>12</sup> Oha atu ki a Taraipine raua ko Taraipoha, e mahi nei i roto i te Ariki. Oha atu ki a Perahi, e arohaina nei, he nui nei tana mahi i roto i te Ariki.

13

Oha atu ki a Rupuha, i whiriwhiria i roto i te Ariki, ki tona whaea, ara ki to maua tahi. <sup>14</sup> Oha atu ki a Ahunikiritu, ratou ko Perekona, ko Herama, ko Pataropa, ko Herami, ki nga teina ano e

noho ana i a ratou. <sup>15</sup> Oha atu ki a Piroroku raua ko huria, ki a Nireu raua ko tona tuahine, ki a

Orimapa ratou ko te hunga tapu katoa e noho ana i a ratou. <sup>16</sup> Oha atu tetahi ki tetahi, hei te kihi tapu ano. Tenei te oha atu nei nga hahi katoa a te Karaiti ki a koutou.

<sup>17</sup> Na he tohe tenei naku ki a koutou, e oku teina, tirohia iho te hunga e mahi ana i nga wehewehenga, i nga tutukitanga waewae, he mea puta ke i te whakaakoranga i whakaakona ai

koutou: tahuri atu i a ratou. <sup>18</sup> Ko te hunga pera hoki kahore i te mahi ki to tatou Ariki, ki a Ihu Karaiti, engari ki to ratou ake kopu: e tinihanga ana hoki ratou i nga ngakau o te hunga kinokore

ki a ratou korero maeneene, ki a ratou kupu whakapaipai. <sup>19</sup> Kua paku hoki ki nga tangata katoa te rongo o to koutou ngohengohe. Koia ahau ka hari nei ki a koutou: e mea ana hoki ahau kia whai

whakaaro koutou ki te pai, kia kuware ki te mea kino. <sup>20</sup> Na tera te Atua o te rangimarie e hohoro te kuru i a Hatana ki raro i o koutou waewae. Kia tau ki a koutou te aroha noa o to tatou Ariki, o Ihu Karaiti.

<sup>21</sup> Tenei te oha atu nei ki a koutou a Timoti, toku hoa mahi a Ruhiu, a Hahona, a Hohipate,

oku whanaunga. <sup>22</sup> Ko ahau tenei, ko Teretiu, ko te kaituhituhi o tenei pukapuka, te oha atu nei ki

a koutou i roto i te Ariki. <sup>23</sup> Tenei te oha atu nei ki a koutou a Kaiu te kaiatawhai oku, o te hahi

katoa. Tenei te oha atu nei a Eratu, kaitiaki o nga mea o te pa, raua ko te teina, ko Kuaratu. <sup>24</sup> Kia tau ki a koutou katoa te aroha noa o to tatou Ariki, o Ihu Karaiti. Amine.

<sup>25</sup> Na he kaha nei te Atua ki te whakau i a koutou, i runga i nga ritenga o taku rongopai, o te kauwhautanga hoki o Ihu Karaiti, o te whakakitenga mai ano o te mea ngaro, kihai nei i rangona

no te timatanga ra ano o te ao, <sup>26</sup> A kua whakamaramatia mai inaianei e nga karaipiture a nga poropiti, he mea whakarite mai na te Atua ora tonu, a whakapuakina mai ana ki nga tauwiwi katoa

kia ngohengohe ai ratou ki ta te whakapono: <sup>27</sup> Waiho atu i te Atua, ko ia nei anake te Mea matau, te kororia i roto i a Ihu Karaiti, ake ake, Amine.

## 1 Corinthians

### Chapter 1

<sup>1</sup> Na Paora, i pai nei te Atua kia karangatia hei apotoro ma Ihu Karaiti, na te teina hoki, na

Hotene, <sup>2</sup> Ki te hahi a te Atua i Koriniti, ki te hunga kua oti te whakatapu i roto i a Karaiti Ihu, kua karangatia hei hunga tapu, ratou ko te hunga katoa i nga wahi katoa e karanga ana ki te ingoa o to

tatou Ariki, o Ihu Karaiti, o to ratou Ariki, o to ta tou: <sup>3</sup> Kia tau ki a koutou te aroha noa me te  
 rangimarie, he mea na te Atua, na to tatou Matua, na te Ariki hoki, na Ihu Karaiti. <sup>4</sup> He whakawhetai  
 tonu taku mahi ki toku Atua mo koutou, mo te aroha noa o te Atua kua homai nei ki a koutou i roto  
 i a Karaiti Ihu; <sup>5</sup> Kua meinga hoki kia hua nga mea katoa ma koutou i roto i a ia, te whakapuaki  
 korero, te matauranga; <sup>6</sup> Pena hoki me te whakaaturanga i a te Karaiti kua u na i roto i a koutou:  
<sup>7</sup> I kore ai koutou e hapa i tetahi mea homai; i a koutou e tatari na ki te whakakitenga mai o to tatou  
 Ariki, o Ihu Karaiti: <sup>8</sup> Mana hoki koutou e whakau a taea noatia te mutunga, kia kore ai koutou e  
 ekengia e te kupu i te ra o to tatou Ariki, o Ihu Karaiti. <sup>9</sup> He pono te Atua, nana nei koutou i karanga  
 kia uru tahi ki tana Tama, ko Ihu Karaiti, ki to tatou Ariki.  
<sup>10</sup> Na, he tohe tenei naku ki a koutou, e oku teina, i runga i te ingoa o to tatou Ariki, o Ihu  
 Karaiti, kia kotahi ta koutou korero katoa, a kia kua he wehewehenga i roto i a koutou; engari kia  
 tuituia koutou i runga i te ngakau kotahi, i te whaka aro kotahi. <sup>11</sup> Kua oti hoki koutou te tohutohu  
 mai, e oku teina, e te hunga o te whare o Koroi, tena nga tautohetohe kei roto i a koutou. <sup>12</sup> Anei  
 te tikanga o taku korero, kei te ki tena o koutou na, No Paora ahau; a, No Aporo ahau; a, Ko ahau  
 no Kipa; Ko ahau no te Karaiti. <sup>13</sup> Kua oti koia a te Karaiti te wahi? i ripekatia ranei a Paora mo  
 koutou? i iriiria ranei koutou i runga i te ingoa o Paora?  
<sup>14</sup> E whakawhetai ana ahau ki te Atua, moku kihai i iriiri i tetahi o koutou, ko Kirihipu anake  
 raua ko Kaiu; <sup>15</sup> Kei waiho e te tangata hei korero, naku koutou i iriiri i runga i toku ingoa. <sup>16</sup> Naku  
 ano i iriiri nga tangata o te whare o Tepana: i ko ake, kahore ahau i te mahara ki taku iriiringa i  
 tetahi atu.  
<sup>17</sup> Kihai hoki ahau i tonoa e te Karaiti ki te iriiri, engari ki te kauwhau i te rongopai: ehara i te  
 mea i runga i te mohio ki nga kupu, kei whakakahoretia te ripeka o te Karaiti. <sup>18</sup> Ko te korero hoki  
 o te ripeka ki te hunga e whakangaromia ana he mea wawau; ki a tatou ia, ki te hunga e whakaorangia  
 ana, ko te kaha tera o te Atua. <sup>19</sup> Ka oti hoki te tuhituhi, Ka ngaro i ahau te whakaaro nui o te hunga  
 whakaaro, ka kore hoki i ahau te mahara o te hunga mahara. <sup>20</sup> Kei hea te tangata whakaaro? kei  
 hea te karaipi? kei hea te tangata tohe o tenei ao? kahore ano koia i whakakuwaretia e te Atua te  
 whakaaro nui o tenei ao? <sup>21</sup> I te mea hoki i runga i to te Atua whakaaro nui, kihai nga whakaaro  
 nui o te ao i mohio ki te Atua, na ka pai te Atua kia meinga te kuware o te kupu kauwhau hei  
 whakaora i te hunga e whakapono ana. <sup>22</sup> Ina hoki ko ta nga Hurai he tonu tohu, ko ta nga Kariki

<sup>23</sup>  
 he rapu whakaaro nui: Ko ta matou ia he kauwhau i a te Karaiti i ripekatia he tutukitanga waewae  
 ki nga Hurai, he mea kuware ki nga Kariki; <sup>24</sup> Ki te hunga ia e karangatia ana, ahakoa Hurai,  
 ahakoa Kariki, ko te Karaiti, ko te kaha o te Atua, ko te whakaaro mohio o te Atua. <sup>25</sup> No te mea  
 he kuware no te Atua nui atu te mohio i nga tangata; he ngoikore no te Atua kaha atu i nga tangata.  
<sup>26</sup> Titiro oti ki to koutou karangatanga, e oku teina, kihai i tokomaha te hunga whakaaro o te wahi  
 ki te kikokiko, kihai i tokomaha te hunga nunui, kihai i tokomaha nga rangatira, e karangatia ana:  
<sup>27</sup> Engari i whiriwhiria e te Atua ko nga mea kuware o te ao, hei mea e whakama ai te hunga  
 whakaaro; i whiriwhiria ano e te Atua ko nga mea ngoikore o te ao, hei mea e whakama ai nga mea  
 kaha. <sup>28</sup> Ko nga mea ware o te ao, ko nga mea e whakahaweatia ana, ko ena i whiriwhiria e te  
 Atua, ae, ko nga mea kahore noa iho, kia whakakahoretia ai e ia nga tino mea ake; <sup>29</sup> Kia kore ai  
 tetahi kikokiko e whakamanamana i te aroaro o te Atua. <sup>30</sup> Nana hoki koutou i roto i a Karaiti Ihu,  
 kua meinga nei ia hei take whakaaro nui mo tatou, he mea na te Atua, hei tika, hei whakatapu, hei  
<sup>31</sup> hoko: Kia rite ai ki te mea kua oti te tuhituhi, Ki te whakamanamana tetahi, me whakamanamana  
 ia ki te Ariki.

## Chapter 2

<sup>1</sup> Ko ahau, e oku teina, i ahau i haere atu ai ki a koutou, kihai ahau i haere atu me te pai kupu,  
 me te hua ranei o te whakaaro, i ahau i kauwhau ai ki a koutou i te mea ngaro a te Atua. <sup>2</sup> I takoto  
 hoki toku whakaaro, kia kua ahau e matau ki tetahi mea i roto i a koutou, ko Ihu Karaiti anake,  
 ko ia hoki i ripekatia. <sup>3</sup> A i a koutou ahau me te ngoikore, me te wehi, me te tuiiri nui. <sup>4</sup> Ko taku  
 korero me taku kauwhau ehara i te kupu whakapati na to te tangata whakaaro nui, engari he  
 whakakitenga na te Wairua, na te kaha: <sup>5</sup> Kia kore ai to koutou whakapono e tu i runga i o te tangata  
 whakaaro nui, engari i to te Atua kaha.  
<sup>6</sup> He ahakoa ra e korero ana matou i te whakaaro nui ki waenganui i te hunga tino tika: ehara  
 ano ia i te whakaaro mohio no tenei ao, no nga rangatira ranei o tenei ao, e memeha haere nei:  
<sup>7</sup> Engari e korero ana matou i te whakaaro nui o te Atua i roto i te mea ngaro, i te whakaaro mohio  
 i huna ra, ko ta te Atua i whakatakoto ai i mua o nga ao, hei whakakororia mo tatou: <sup>8</sup> Kihai nei  
 tetahi o nga rangatira o tenei ao i matau; me i matau hoki ratou, kua kahore e ripekatia e ratou te

<sup>9</sup>  
 Ariki o te kororia: Engari ka rite ki te mea i tuhituhia ra, Ko nga mea kahore te kanohi i kite, kahore te taringa i rongo, kahore ano i tapoko noa ki te ngakau o te tangata, ko nga mea kua rite i te Atua mo te hunga e aroha ana ki a ia. <sup>10</sup> Otiia kua whakakitea mai aua mea ki a tatou e te Atua ma tona Wairua: e rapu ana hoki te Wairua i nga mea katoa, ae, i nga mea hohonu a te Atua. <sup>11</sup> Ko wai oti o nga tangata e matau ana ki nga mea a te tangata? ko te wairua anake o te tangata i roto i a ia: waihoki ko nga mea a te Atua e kore e matauria e tetahi, engari e te Wairua o te Atua. <sup>12</sup> Otiia ko te wairua i riro mai nei i a tatou, ehara i te wairua o te ao, engari ko te Wairua e ahu mai nei i te Atua; kia matau ai tatou ki nga mea kua oti nei te homai e te Atua ki a tatou. <sup>13</sup> Na ka korero matou i aua mea, ehara nga kupu i te whakaaro mohio o te tangata i whakaako mai, engari he mea whakaako na te Wairua Tapu; e whakariterite ana i nga mea wairua ki nga mea wairua. <sup>14</sup> Na e kore te tangata i te ngakau maori e tango i nga mea o te Wairua o te Atua: ki a ia he mea kuware era; a e kore ia e ahei te matau, he mea ma te Wairua ka kitea ai. <sup>15</sup> Otiia ki te mea kei tetahi te Wairua, ka kitea e ia nga mea katoa, e kore ano ia e kitea e tetahi. <sup>16</sup> Ko wai hoki te matau ana ki te hinengaro o te Ariki, e whakaako ai ia i a ia? Kei a tatou ia te hinengaro o te Karaiti.

### Chapter 3

<sup>1</sup>  
 Na ko ahau, e oku teina, kihai i ahei te korero ki a koutou me taku ki te hunga i te Wairua, engari i te kikokiko, ano ki nga kohungahunga i roto i a te Karaiti. <sup>2</sup> He waiu taku i whangai atu na ma koutou, ehara i te kai maro: kiano hoki i taea e koutou te kai maro, a kahore nei ano i taea e koutou inaianei: <sup>3</sup> Kei te kikokiko tonu hoki koutou: i te mea kei a koutou tonu te hae, te totohe, te wehewehe, ehara oti koutou i te hunga i te kikokiko, e haere ana i runga i ta te tangata ritenga? <sup>4</sup> I tetahi hoki ka ki nei, Ko ahau no Paora; me tetahi atu, Ko ahau no Aporo, ehara oti koutou i te hunga i te kikokiko? <sup>5</sup> Tena ko wai a Aporo? a ko wai a Paora? He minita i whakapono ai koutou; ki ia tangata i ta te Ariki i homai ai. <sup>6</sup> Naku i whakato, na Aporo i whakamakuku; na te Atua ia i mea kia tupu. <sup>7</sup> Heoi he kore noa iho te kaiwhakato, he kore noa iho te kaiwhakamakuku, engari te Atua nana nei i mea kia tupu. <sup>8</sup> Na ko te kaiwhakato, ko te kaiwhakamakuku, kotahi tonu raua: otira ka rite ki tana ake mahi te utu e riro mai i tena, i tena o raua. <sup>9</sup> He hoa mahi hoki matou no te Atua: he mara

10  
koutou na te Atua, he whare hanga na te Atua. Kei te ritenga o te aroha noa o te Atua i homai nei ki ahau, kua whakatakotoria e ahau te tunga, he pera me ta te tohunga; a ko tetahi atu kei te hanga whare ki runga. Otira kia tupato ia tangata ki tana whare e hanga ai ki runga.

11 E kore hoki tetahi tangata e ahei te whakatakoto i tetahi tunga ke atu i tera kua oti nei te whakatakoto, ara i a Ihu Karaiti. 12 Engari ki te hanga tetahi ki runga ki te tunga he koura, he

hiriwa, he kohatu utu nui, he rakau, he tarutaru, he otaota; 13 Ka whakakitea te mahi a tetahi, a tetahi: ma te ra hoki e whakaatu, no te mea ka whakakitea e te kapura; a ma te kapura tonu e

whakamatautau te mahi a tena, a tena, he pehea tona ahua. 14 Ki te mau tonu te mahi a tetahi e

hanga ai ki runga, ka riro i a ia he utu. 15 Ki te wera te mahi a tetahi, ka maumauria tana: ko ia ia ka ora; otira me te mea ma roto i te ahi.

16 Kahore oti koutou i matau, he whare tapu koutou no te Atua, a kei roto i a koutou te Wairua

o te Atua e noho ana? 17 Ki te whakangaromia e tetahi te whare tapu o te Atua, ka whakangaromia hoki ia e te Atua; he tapu hoki te whare o te Atua, a ko koutou taua whare.

18 Kei hangarau tetahi ki a ia ano. Ki te mea tetahi he tangata mohio ia i roto i a koutou i tenei

ao, tukua ia hei kuware kia tupu ai hei tangata whakaaro. 19 Ki te Atua hoki he kuware noa nga whakaaro mohio o tenei ao: kua oti hoki te tuhituhi, Ka mau i a ia te hunga whakaaro i runga i to

ratou tinihanga: 20 Me tenei hoki, E matau ana te Ariki ki nga whakaaro o te hunga whakaaro, he tekateka noa.

21 No reira kei whakamanamana tetahi ki te tangata: no koutou hoki nga mea katoa: 22 Ahakoa a Paora, a Aporo, a Kipa, te ao, te ora, te mate ranei, nga mea onaianei, nga mea ranei e takoto mai

nei, no koutou katoa; 23 A ko koutou no te Karaiti, ko te Karaiti no te Atua.

## Chapter 4

1 Me penei i te whakaaro o te tangata ki a matou na, he kaimahi na te Karaiti, he tuari hoki no

nga mea ngaro a te Atua. 2 Na hei konei ko te mea o te tuari e matenuitia ana, kia kitea he tangata

pono ia. 3 Ki ahau ia he mea nohinohi rawa kia whai kupu koutou moku, te tangata ranei; kahore

nei hoki aku kupu moku ano. 4 Kahore hoki ahau i matau ki tetahi aha oku; heoi e kore tena e ai

5  
 hei whakatika moku: otira ko te Ariki hei whai kupu moku. Na reira kaua e whakawakia wawetia tetahi mea, kia tae mai ra ano te Ariki, mana e whakamarama nga mea huna o te pouri, e whakakite

6  
 hoki nga whakaaro o nga ngakau; hei reira ia tangata whakamoemititia ai e te Atua. Na ko enei mea, e oku teina, naku i huri mai te ahua ki a maua ko Aporo, he whakaaro ki a koutou: kia ai maua hei whakaako i a koutou, kia kaua te whakaaro e hipa atu i te mea i tuhituhia; kia kaua tetahi o koutou e whakapehapeha mo tetahi ki runga atu i tetahi.

7  
 Ko wai kei te mea kia rere ke koe? ko tehea mea hoki au ehara i te mea hoatu ki a koe? Na he mea i hoatu ki a koe, he aha koe ka whakamanamana ai, me te mea nei ehara i te mea hoatu?

8  
 Kua makona ke na hoki koutou, kua hua ke o koutou taonga, kua kingi koutou ahakoa motu mai matou: ae ra, e pai ana ki ahau kia kingi tonu koutou, kia kingi tahi ai tatou. 9  
 Ki toku whakaaro hoki kua waiho matou, nga apotoro, e te Atua mo muri rawa, ano he hunga mo te mate: kua meinga

10  
 hoki matou hei matakitakinga ma te ao, ma nga anahera, a ma nga tangata. Ko matou he kuware mo ta te Karaiti, ko koutou ia he hunga whai whakaaro i roto i a te Karaiti; ko matou he ngoikore,

11  
 ko koutou ia he hunga kaha; to koutou he kororia, to matou ia he honorekore. Tae tonu mai ki tenei haora nei e matekai ana matou, e matewai ana, e haere tahanga ana, e kurua ana, kahore hoki

12  
 o matou kainga tumau: E mauui ana matou, ko o matou ringa ake hei mahi: e taunutia ana,

13  
 manaaki tonu matou; e whakatoia ana, whakaririka kau matou: Ka korerotia kinotia, ka whakangawari atu matou: kua meinga matou kia rite ki te paru rukenga o te ao, ki te para o nga mea katoa, taea noatia tenei ra.

14  
 Kahore ahau i te tuhituhi atu i enei mea kia whakama ai koutou, engari hei whakatupato i a

15  
 koutou, i aku tamariki aroha. No te mea ahakoa whiwhi koutou i nga kaiwhakaako tekau mano i roto i a te Karaiti, kahore i tokomaha o koutou matua; he whanau hoki koutou naku i roto i a

16  
 Karaiti Ihu i runga i te rongopai. Koia ahau ka tohe nei ki a koutou, kia rite ta koutou ki taku.

17  
 Na reira i tonoa atu ai e ahau ki a koutou a Timoti, taku tama aroha, tama pono i roto i te Ariki, mana koutou e whakamahara ki oku ara i roto i a te Karaiti, ki taku e whakaako nei i nga

18  
 wahi katoa i roto i nga hahi katoa. Na ko etahi e whakapehapeha ana, e mea ana e kore ahau e

19  
 haere atu ki a koutou. Otira e kore e roa ka haere atu ahau ki a koutou, ki te pai te Ariki; a hei reira, ehara i te kupu, engari ko te kaha o te hunga e whakapehapeha ana, taku e titiro ai. 20

21  
 mea ehara te rangatiratanga o te Atua i te kupu, engari he kaha. Ko tehea ta koutou e pai ai? kia haere atu ahau ki a koutou me te whiu, i runga ranei i te aroha me te wairua mahaki?



## Chapter 5

<sup>1</sup> Kua paku noa atu te rongo he puremu kei roto i a koutou, he tu puremu kahore nei i roto i  
 nga tauwiwi, ara kua riro i tetahi o koutou te wahine a tona papa. <sup>2</sup> A e whakapehapeha ana koutou,  
 te pouri koutou, te mea kia tangohia atu i roto i a koutou te tangata nana tenei mahi. <sup>3</sup> Na ko ahau,  
 ahakoa tawhiti i te tinana kei kona te wairua, kua whakahe noa ake i te tangata nana tenei mahi, i  
 runga i te ingoa o to tatou Ariki, o Ihu, me te mea kei kona ano ahau; <sup>4</sup> E noho huihui ana koutou  
 me toku wairua, i runga i te kaha o to tatou Ariki, o Ihu. <sup>5</sup> Ka tuku atu ai i tena tu tangata ki a  
 Hatana, hei whakangaro mo te kikokiko, kia ora ai te wairua i te ra o te Ariki, o Ihu, <sup>6</sup> Kahore e  
 pai ta koutou whakapehapeha. Kahore koutou e matau he iti nei te rewena, rewenatia ake te puranga  
 katoa?  
<sup>7</sup> Kokoa ki waho te rewena tawhito, kia ai koutou he puranga hou, me koutou e rewenakore  
 na. Kua patua hoki mo tatou a te Karaiti, to tatou kapenga: <sup>8</sup> Na kia kai tatou i te hakari, auaka te  
 rewena tawhito, auaka hoki te rewena o te mauahara, o te kino, engari hei te taro rewenakore o te  
 tinihangakore, o te pono.  
<sup>9</sup> I tuhituhi atu ahau ki a koutou i roto i te pukapuka, kia kaua e whakahoa ki nga tangata puremu:  
<sup>10</sup> Ehara ia i te mea rawa mo te hunga puremu o tenei ao, mo te hunga apo, hao taonga, karakia  
 whakapakoko; penei me haere atu koutou ki waho o te ao: <sup>11</sup> Engari inaianei ka tuhituhi atu ahau  
 ki a koutou, kia kaua e whakahoa, ki te mea tetahi e kii nei he teina he tangata moepuku, he apo  
 ranei, e karakia ana ranei ki te whakapakoko, he tangata taunu ranei, he haurangi, he hao taonga  
 ranei; kaua rawa koutou ko taua tu tangata e kai tahi. <sup>12</sup> Hei aha ra maku te whakawa i te hunga  
 o waho? e kore koia koutou e whakawa i te hunga o roto, <sup>13</sup> A ko te hunga o waho ma te Atua  
 ratou e whakawa? Na motuhia atu taua tangata kino i roto i a koutou.

## Chapter 6

<sup>1</sup> Ka kaha ranei tetahi o koutou, mehemea he tautohe tana ki tona hoa, ki te haere ki te whakawa  
 i te aroaro o te hunga he, a kauaka ki te aroaro o te hunga tapu? <sup>2</sup> Kahore oti koutou i matau ma te  
 hunga tapu e whakawa te ao? ki te riro ma koutou e whakawa te ao, e kore ranei koutou e tau hei

whakarite i nga mea iti rawa? <sup>3</sup> Kahore koutou i matau ko tatou hei whakawa mo nga anahera?  
 kauaka oti nga mea o tenei ao? <sup>4</sup> Na, ki te mea he whakawa a koutou ki nga mea o tenei ao,  
 whakanohoia ai ranei e koutou ko te hunga iti o te hahi hei whakarite? <sup>5</sup> I korero atu ai ahau i tenei  
 kia whakama ai koutou. Koia ranei, kahore rawa e kitea kia kotahi he tangata whakaaro i roto i a  
 koutou, hei whakarite ina whakawa ona teina i a raua? <sup>6</sup> kei te whakawa ia te tuakana i te teina, a  
 i te aroaro rawa o te hunga whakaponokore? <sup>7</sup> Ehara, kua waiho ke tena hei he i roto i a koutou, ta  
 koutou whakawa tetahi i tetahi. he aha te whakaririka kau ai ina ahatia koutou? he aha te tangohia  
 noatia atu ai a koutou mea? <sup>8</sup> Ehara, ko koutou tonu kei te mahi i te he, a kei te tango pokanoa, ko  
 o koutou teina ano te meatanga.  
<sup>9</sup> Tena ranei kahore koutou i te matau, e kore te hunga whakahere he e whiwhi ki te  
 rangatiratanga o te Atua? Kei tinihangatia koutou; e kore te hunga moepuku, te hunga karakia  
 whakapakoko ranei, te hunga puremu, te hunga whakawahine, te hunga ranei e mea ana i te tane  
 hei wahine, <sup>10</sup> Nga tangata tahae, nga tangata apo, nga haurangi, te hunga taunu, te hunga hao  
 taonga ranei, e whiwhi ki te rangatiratanga o te Atua. <sup>11</sup> He pera hoki etahi o koutou i mua; otira  
 kua horoia koutou, kua whakatapua, kua whakatikaia i runga i te ingoa o te Ariki, o Ihu Karaiti, he  
 meatanga na te Wairua o to tatou Atua.  
<sup>12</sup> He tika nga mea katoa maku, otira e kore e pai katoa. he tika nga mea katoa maku, otira e  
 kore ahau e pai ki tetahi mea hei rangatira moku. <sup>13</sup> Ko nga kai mo te kopu, ko te kopu mo nga  
 kai: heoi ka ngaro tenei i te Atua me era hoki. Ehara hoki te tinana i te mea mo te moepuku, engari  
 ma te Ariki, ko te Ariki hoki hei Ariki mo te tinana: <sup>14</sup> A na te Atua i ara ai te Ariki, waihoki mana  
 tatou ka ara ai, ma tona kaha. <sup>15</sup> Kahore oti koutou i matau, he wahi o koutou tinana no te Karaiti?  
 me tango koia e ahau nga wahi o te Karaiti, a ka mea i a ratou hei wahi mo te wahine kairau? Kahore  
 rapea! <sup>16</sup> A kahore ranei koutou i matau, ko te tangata e honoa ki te wahine kairau he tinana kotahi?  
 e ki ana hoki ia, Hei kikokiko kotahi raua tokorua. <sup>17</sup> Otiia ko te tangata e honoa ki te Ariki, kotahi  
 tonu te wairua. <sup>18</sup> Rere atu ra i te moepuku. No waho o te tinana nga hara katoa e hara ai te tangata;  
 ko te tangata ia e moepuku ana, e hara ana ia ki tona ake tinana. <sup>19</sup> A kahore ranei koutou i matau,  
 he whare tapu to koutou tinana no te Wairua Tapu i roto na i a koutou, i homai nei e te Atua? e  
 ehara i te mea no koutou ake koutou; <sup>20</sup> Kua oti hoki koutou te hoko ki te utu: whakakororiatia te  
 Atua ki o koutou tinana.

## Chapter 7

<sup>1</sup> Na mo nga mea i tuhituhi mai na koutou: he mea pai ano mo te tangata kia kaua e pa ki te  
<sup>2</sup> wahine. Otiia, he whakaaro kei moepuku, kia rite ma te tane he wahine mana ake, a ma te wahine  
<sup>3</sup> he tane mana ake. Kia puta te whakaaro pai o te tane ki te wahine, hei te mea e tika ana: me to  
<sup>4</sup> te wahine hoki ki te tane. Ehara te wahine i te rangatira o tona tinana ake, engari te tane: me te  
<sup>5</sup> tane ano, ehara ia i te rangatira o tona ake tinana, engari te wahine. Kaua e kaiponu tetahi i tetahi;  
 haunga ia ki te ata whakaritea mo tetahi wa, kia atea ai korua ki te nohopuku, ki te inoi, ka hoki ai  
<sup>6</sup> ano ki a korua, kei ai to korua hiahia taikaha hei whakawai ma Hatana i a korua. Otira ko tenei  
<sup>7</sup> korero aku he mea whakaae noa, ehara i te tikanga whakatakoto. Ko taku ia i pai ai, kia penei  
 nga tangata katoa i ahau nei. Otira e homai ana e te Atua te ahua mona ki ia tangata, ki ia tangata,  
<sup>8</sup> ki tetahi ko tenei, ki tetahi ko tera. Ko taku kupu ia tenei ki nga takakau, ki nga wahine pouaru,  
<sup>9</sup> He mea pai mo ratou kia kati tonu me ahau nei. Otira ki te kore e taea e raua te whakamanawanui,  
 me marena: he pai ake hoki te marena i te kaka o te ngakau.  
<sup>10</sup> Ko taku whakahau ia tenei ki te hunga whai hoa, ehara i ahau, engari ko te Ariki, Aua te  
<sup>11</sup> wahine e mawehe ke i tana tane: Engari, ki te mawehe ia, me noho hoakore, me hohou ranei te  
<sup>12</sup> rongu ki tana tane: kaua hoki te tane e whakarere i tana wahine. Ki era atu ia ko taku kupu tenei,  
 ehara i te Ariki: Ki te mea he wahine kore whakaponu ta tetahi o nga teina, a ka whakaae taua  
<sup>13</sup> wahine kia noho tahi raua, kaua ia e whakarerea e ia. A ko te wahine, he tane kore whakaponu  
<sup>14</sup> tana, a ka whakaae kia noho tahi raua, kaua ia e whakarere i tana tane. No te mea e whakatapua  
 ana te tane whakaponokore e te wahine, e whakatapua ana hoki te wahine whakaponokore e te tane:  
<sup>15</sup> me he kahore, kua poke a korua tamariki, tena ko tenei he tapu ratou. Ki te mawehe ke ia te  
 whakaponokore, mana e mawehe ke. E kore tetahi teina, tuahine ranei, e mau te here e nga mea  
<sup>16</sup> pena: otira kua karangatia tatou e te Atua ki te rangimarie. Ma te aha koe e mohio ai, e tai, ka  
 ora ranei i a koe tau tane? a koe ranei, e te tane, ma te aha ka mohio ai, ka ora i a koe tau wahine?  
<sup>17</sup> Heoi anake, kia rite ki ta te Atua tuwahanga ki tena, ki tena, ki tana karangatanga hoki ki  
<sup>18</sup> tena, ki tena, kia pera tana haere. Na ko taku whakatakoto tena i roto i nga hahi katoa. He mea  
 kokoti tetahi i tona karangatanga? kaua e whakakahoretia tona kotinga. He mea kokotikore tetahi  
<sup>19</sup> i tona karangatanga? kaua a e kotia. He mea kore noa iho te kotinga, he mea kore noa iho ano

te kotingakore, engari ia te pupuri i a te Atua ture. <sup>20</sup> Kia mau ia tangata ki tona karangatanga, i karangatia ai ia. <sup>21</sup> He pononga koe i tou karangatanga? kua e manukanuka: otira ki te watea he haerenga noatanga atu mou, e pena. <sup>22</sup> Ko te tangata hoki he pononga i tona karangatanga i roto i te Ariki, he tangata tuku noa ia na te Ariki: waihoki ko te tangata ehara nei i te pononga i tona karangatanga, he pononga ia na te Karaiti. <sup>23</sup> Kua oti koutou te hoko ki te utu; aua e meinga hei pononga koutou ma te tangata. <sup>24</sup> E oku teina, ko te mahi a tenei, a tenei, i tona karangatanga kia mau ia ki tena me te whakaaro ano ki te Atua.

<sup>25</sup> Na mo nga wahine, kahore a te Ariki tikanga ki ahau; tenei ia toku whakaaro, ara to te tangata i a ia nei to te Ariki atawhai, i pono ai. <sup>26</sup> Na reira ki toku whakaaro he pai tenei mo te whakararu o tenei wa, ara he pai kia kati tonu te tangata i a ia nei. <sup>27</sup> Kua herea koe ki te wahine? kua e whai kia wetekia. Ka oti koe te wewete i te wahine? kua e whaia he wahine. <sup>28</sup> Otiia ki te marena koe, kahore ou hara; a ki te marena te wahine, kahore ona hara. Otiia tera e pa mai he whakararu i te kikokiko ki taua hunga pena: heoi me ata hanga ahau ki a koutou. <sup>29</sup> Ko taku kupu ia tenei, e oku teina, e tutata ana te wa: heoi inaianei tera e rite te hunga whai wahine ki te hunga kahore nei a ratou; <sup>30</sup> Me te hunga e tangi ana, ano kahore ratou i te tangi; me te hunga e hari ana, ano kahore ratou i te hari; me te hunga e hoko ana, ano kahore a ratou taonga; <sup>31</sup> Me te hunga i a ratou tenei ao, ano kahore a ratou he ki te ao; e memeha haere ana hoki te ahua o tenei ao. <sup>32</sup> Otiia ko taku mea tenei kia kua koutou e manukanuka. Ko ta te takakau e manukanuka ai ko nga mea a te Ariki, me pehea tana whakamanawareka ki te Ariki: <sup>33</sup> Ko te tangata whai hoa ia, e manukanuka ana ki nga mea o te ao, me pehea tana whakamanawareka ki tana wahine. <sup>34</sup> Na tera ano te mea i rereke ai te wahine whai hoa i te wahine. Ko te wahine takakau, tana e manukanuka ai ko nga mea a te Ariki, kia tapu tahi ai te tinana me te wairua: ko te wahine whai hoa ia ka manukanuka ki nga mea o te ao, me pehea tana whakamanawareka ki tana tane. <sup>35</sup> Ko tenei korero aku he mea kia hua ai he pai mo koutou ano; ehara i te mea kia mahangatia ai koutou, engari mo te mea e haratau ana, kia u ai koutou ki te Ariki, kahore he mea hei rorona ke.

<sup>36</sup> Na, ki te whakaaro tetahi tangata e he ana tana tikanga ki tana wahine, mehemea kua pahure tona taiohinga, a heoi ano tikanga, mana e mea tana e pai ai, kahore ona hara: me marena raua.

<sup>37</sup> Ko te tangata ia e u ana i tona ngakau, a kahore he mea hei akiaki i a ia, kei a ia ake ano te tikanga mo tana e pai ai, a kua oti tenei te whakatakoto e tona ngakau, kia waiho tana wahine, kei te pai

<sup>38</sup>  
tana mahi. Na he pai te mahi a te tangata e tuku ana kia marenatia tana wahine; pai ake ia te mahi a te tangata kahore e tuku kia marenatia.

<sup>39</sup>  
E herea ana te wahine e te ture i te mea e ora ana tana tane; ki te mate ia te tane, kua watea  
<sup>40</sup>  
ia ki te marena ki tana e pai ai; otira i roto i te Ariki. Ki toku whakaaro ia, nui ke atu tona hari ki te kati tonu ia: a ki taku mahara kei ahau ano hoki te Wairua o te Atua.

## Chapter 8

<sup>1</sup>  
Na, mo nga mea e patua ana ma nga whakapakoko: E mohio ana tatou kei a tatou katoa te matauranga. Ko ta te matauranga he whakapupuhi; ko ta te aroha ia he waihanga. <sup>2</sup> Ki te mea tetahi e matau ana ia ki tetahi mea, kahore tona matauranga kia rite noa ki to te matauranga tikanga; <sup>3</sup> Ki te aroha ia tetahi ki te Atua, kua matauria tenei e ia.

<sup>4</sup>  
Na reira mo te kai i nga mea e patua ana ma nga whakapakoko, e mohio ana tatou he kore noa iho te whakapakoko i te ao, kahore hoki he atua ke, kotahi anake. <sup>5</sup> Ahakoa hoki tera nga mea e kiia nei he atua, i te rangi ranei, i te whenua ranei; he tini nei hoki nga atua, he tini nga ariki; <sup>6</sup> Ki a tatou ia kotahi ano Atua, ko te Matua, i ahui mai i a ia nga mea katoa, ko tatou ki a ia; kotahi hoki Ariki, ko Ihu Karaiti, nana nei nga mea katoa, nana hoki tatou.

<sup>7</sup>  
Otira kahore tera matauranga i nga tangata katoa: engari tera ano etahi, i te mea kua taunga ki te whakapakoko tae mai ki naianei, e kai ana i te mea i patua ma te whakapakoko; a ka poke to ratou hinengaro ngoikore. <sup>8</sup> Ehara ra ia te kai i te mea e paingia ai tatou e te Atua: no te mea ahakoa kahore tatou e kai, e kore e heke iho to tatou pai; a ahakoa kai tatou, e kore e kake to tatou pai.

<sup>9</sup>  
Engari kia tupato ki tenei wahi i tukua nei ki a koutou, kei waiho hei whakahinga mo te hunga

<sup>10</sup>  
ngoikore. Ki te mea hoki ka kite tetahi i a koe, i te mea mohio, e noho ana ki te aki i roto i te temepara o te whakapakoko, e kore koia e kakama ake tona hinengaro, mehemea ia he ngoikore,

e kakama ake ki te kai i nga mea e patua ana ma te whakapakoko? <sup>11</sup> Ma tou matauranga hoki ka

ngaro ai te mea ngoikore, te teina he whakaaro nei ki a ia i mate ai a te Karaiti. <sup>12</sup> Na, i a koutou ka hara nei ki nga teina, ka patu nei i to ratou hinengaro ngoikore, e hara ana koutou ki a te Karaiti.

<sup>13</sup>  
Mo konei, ki te he toku teina i te kai, e kore rawa ahau e kai kikokiko ake tonu atu, kei he i ahau toku teina.

## Chapter 9

<sup>1</sup> He teka ianei kei ahau ano nga tikanga moku? he teka ianei he apotoro ahau? kihai ianei ahau i kite i a Ihu Karaiti, i to tatou Ariki? Ehara oti koutou i taku mahi i roto i te Ariki? <sup>2</sup> Ahakoa ehara ahau i te apotoro ki era atu, engari rawa ia he apotoro ki a koutou, ko koutou hoki te hiri o toku apotorotanga i roto i te Ariki.

<sup>3</sup> Ko taku utu tenei ki oku kaiui; <sup>4</sup> Kahore ranei i a matou ano te tikanga mo te kai, mo te inu? <sup>5</sup> Kahore ranei i a matou ano te tikanga ki te whakahaereere i te hoa wahine, he wahine whakapono, pera i era atu apotoro me nga teina o te Ariki, ratou ko Kipa? <sup>6</sup> Ko maua anake ranei ko Panapa, kahore ranei i a maua te tikanga kia kaua e mahi? <sup>7</sup> Ko wai ka haere hei hoia, a nana ake ano nga utu mona? Ko wai e whakato ana i te mara waina, a kahore o reira hua e kainga e ia? ko wai hoki e whangai ana i te kahui, a kahore e kai i te waiu o te kahui? <sup>8</sup> E korero ana ranei ahau i enei mea i te tikanga tangata? he pera ano ranei ta te ture korero? <sup>9</sup> Kua oti hoki te tuhituhi i roto i te ture a Mohi, Kua e whakamokatia te mangai o te kau i te mea e patu witi ana. Ko nga kau koia ta te Atua

<sup>10</sup> i whakaaro ai? Mo tatou ranei te tino tikanga o ana korero? Ae, he whakaaro ki a tatou i tuhituhi ai: he tika hoki kia parau te kaiparau i runga i te tumanako, kia patu witi ano te kaipatu i runga i te tumanako ki tetahi wahi mana. <sup>11</sup> I te mea kua ruia e matou nga mea wairua ma koutou, he mea nui ianei ki te kotia e matou a koutou mea o te kikokiko? <sup>12</sup> Kua uru nei etahi atu ki tenei tikanga a koutou, ko matou ano etahi kia hira ake? Otira kihai matou i mea ki tenei tikanga, engari e whakamanawanui ana ki nga mea katoa, kei ai ta matou hei arai mo te rongopai o te Karaiti.

<sup>13</sup> Kahore oti koutou i matau, ko te hunga e mahi ana i nga mea tapu, e kai ana i nga mea o te temepara? a ko nga kaitiaki o te aata ma ratou ano tetahi wahi o to te aata? <sup>14</sup> Pera tonu ano ta te Ariki i whakatakoto ai mo nga kaikauwhau o te rongopai, hei runga i te rongopai he orange mo ratou.

<sup>15</sup> Otiia kihai ahau i mea ki tetahi o enei mea: kahore hoki ahau i tuhituhi i enei mea kia penatia mai ai ahau: ki ahau hoki he pai ke te mate, i te riro ma te tangata taku whakamanamana e whakakahore. <sup>16</sup> No te mea ki te kauwhau ahau i te rongopai, kahore maku whakamanamana: kua

takoto hoki tenei hei mahi maku; he aue ia maku ki te kore ahau e kauwhau i te rongopai. <sup>17</sup> Ki te mea hoki noku te ngakau ki tenei mahi, he utu toku: ki te kore ia he ngakau, he mahi tuari tenei

<sup>18</sup> kua tukua ki ahau. Na, he aha koia te utu moku? ara, ki te kauwhau ahau i te rongopai, ka meinga

e ahau kia kore e utua te rongopai: kia kore ai ahau e mea i te wahi e tika ana maku i roto i te rongopai.

19

Ahakoia hoki ehara ahau i te pononga na te tangata, heoi kua waiho ahau e ahau ano hei

20

pononga ma te katoa, kia tokomaha atu ai e riro mai i ahau. Na ki nga Hurai whakahurai ana ahau, kia riro ai i ahau nga Hurai; ki te hunga i raro i te ture me te mea i raro ahau i te ture, ahakoia

21

ra kahore ahau i raro i te ture, kia riro ai i ahau te hunga i raro i te ture; Ki te hunga turekore me he tangata turekore ahau, ehara i te mea he turekore ki te Atua, engari i raro i te ture ki a te Karaiti,

22

kia riro ai i ahau te hunga turekore. Ki te hunga ngoikore me he ngoikore ahau, kia riro ai i ahau te hunga ngoikore; waiho ana ahau hei mea katoa ki te katoa, kia taea ai e ahau nga mea katoa hei

23

whakaora i etahi. I meinga ai tenei e ahau he whakaaro ki te rongopai, kia whiwhi tahi ai ahau ki tona pai.

24

Kahore oti koutou i matau ki te hunga e oma whakataetae ana, e oma katoa ana, kotahi ano

25

ia mona te utu whakahonore? Kia pena ta koutou oma, kia whiwhi ai koutou. Na ko nga tangata katoa e whakataetae ana i nga takaro e whakakoromaki ana i nga hiahia katoa. Na e pera ana ratou

26

kia whiwhi ai ki te karauna pirau; ko tatou ia ki te mea e kore e pirau. Ko ahau nei hoki, kahore

27

i ngaro taku oma; e kuru ana ahau, kahore ia e rite ki te kaipatu o te hau: Engari e pehia ana e ahau toku tinana, meinga ana hoki hei pononga maku; kei kauwhau pea ahau ki etahi atu, ko ahau ia ka akiritia atu.

## Chapter 10

1

E kore ahau e pai, e oku teina, kia kuware koutou, i raro katoa o matou matua i te kapua, i

2

haere katoa ano hoki ra roto i te moana; I iriiria ano ratou katoa ki a Mohi i roto i te kapua, i roto

3

hoki i te moana; A i kai ratou i te kai kotahi, he mea wairua; I inu hoki ratou katoa i te wai kotahi, he mea wairua; no te mea i inu ratou i ta te mea wairua, ara i ta te toka i whai nei i a ratou:

5

a ko taua toka ra ko te Karaiti. Otiia kihai te Atua i ahuaireka ki te nuinga o ratou; i turakina iho hoki ratou i te koraha.

6

Na, hei tohu enei mea ki a tatou, kia kua tatou e hiahia ki nga mea kino, kei pera me ratou i

7

hiahia ra. Kua ano koutou e karakia ki nga whakapakoko, kei pera me etahi o ratou; kua oti ra

8

hoki te tuhituhi, I noho te iwi ki te kai, ki te inu, a whakatika ana ki te takaro. Kua hoki tatou e

moepuku, kei pera me etahi o ratou i moepuku, a hinga ana e rua tekau ma toru nga mano i te ra  
<sup>9</sup> kotahi. Kua hoki tatou e whakamatautau i a te Karaiti, kei pera me etahi o ratou i whakamatautau  
<sup>10</sup> ra, a ngaro ana i te nakahi. Kua hoki koutou e amuamu, kei pera me etahi o ratou i amuamu, a  
<sup>11</sup> ngaro ana ratou i te kaiwhakangaro. Na, i pa enei mea ki a ratou hei tohu: kua tuhituhia nei hoki  
<sup>12</sup> hei whakatupato i a tatou, i te hunga ka tae nei ki nga whakamutunga o te ao. Na reira ko te  
<sup>13</sup> tangata e mea ana e tu ana ia, kia tupato ia kei hinga. Kahore ano kia pono ki a koutou tetahi  
 whakamatautau e rere ke ana i to te tangata: he pono hoki te Atua, e kore nei e tuku kia nui ake i  
 to koutou kaha te whakamatautau mo koutou; engari tahi me te whakamatautau ka meatia e ia he  
<sup>14</sup> putanga, kia u ake ai koutou. Na reira, e oku hoa aroha, rere atu i te karakia whakapakoko.  
<sup>15</sup> Ko taku korero nei he mea ki te hunga mahara; whakaaroa taku e mea nei. <sup>16</sup> Ko te kapu  
 whakapainga e whakapai nei tatou, ehara koia i te inu tahi i nga toto o te Karaiti? Ko te taro e  
<sup>17</sup> whatiwhatia nei e tatou, ehara ianei i te kai tahi i te tinana o te Karaiti? Ina hoki ko tatou tokomaha  
 nei, kotahi ano taro, kotahi ano tinana; kotahi tonu nei hoki taua taro e kainga nei e tatou katoa.  
<sup>18</sup> Whakaaroa a Iharaira o te kikokiko; he teka ianei ko te hunga e kai ana i nga patunga tapu, e uru  
<sup>19</sup> tahi ana ki to te aata? Na, he pehea ra taku korero? he tikanga mea ranei te mea e patua na ma  
<sup>20</sup> te whakapakoko? he tikanga mea ranei te whakapakoko? Otira e ki ana ahau, ko nga mea e patua  
 ana e nga tauwi, e patua ana ma nga rewera, he teka ma te Atua: e kore hoki ahau e pai kia uru  
<sup>21</sup> tahi koutou ko nga rewera. E kore koutou e ahei te inu i te kapu a te Ariki, i te kapu ano a nga  
<sup>22</sup> rewera: e kore koutou e ahei te kai i te tepu a te Ariki, i te tepu hoki a nga rewera. E mea ana  
 ranei tatou kia hae mai te Ariki? he kaha koia tatou i a ia?  
<sup>23</sup> He tika nga mea katoa, otira e kore e pai katoa: he tika nga mea katoa, otira e kore e oti te  
<sup>24</sup> waihanga e nga mea katoa. Kua tetahi e rapu ki tana ake, engari me rapu katoa i te pai mo tera,  
<sup>25</sup> mo tera. Ko nga mea katoa e hokona ana i te makete, kainga, kua e uiui, kei he te hinengaro:  
<sup>26</sup> No te Ariki hoki te whenua me ona tini mea. <sup>27</sup> Ki te karangatia koutou e tetahi o te hunga  
 whakaponokore, a ka pai koutou kia haere; ko nga mea katoa e whakatakotoria mai ki to koutou  
<sup>28</sup> aroaro, kainga, kua e uiui, kei he te hinengaro. Ki te mea ia tetahi ki a koutou, I patua tenei ma  
<sup>29</sup> te whakapakoko, kua e kai, me whakaaro ki te kaiwhakaatu, ki te hinengaro hoki: Ko te  
 hinengaro, e ki ana ahau, ehara i tou, engari ko to tetahi; he aha toku herekoretanga kia whakakorea  
<sup>30</sup> e tera atu hinengaro? Ki te mea hoki na te aroha noa ahau i kai ai, he aha ahau i korerotia kinotia



ai mo te mea i whakawhetai ai ahau? <sup>31</sup> Na reira, ahakoa kai, ahakoa inu, aha ranei, meinga katoatia  
 hei whakakororia mo te Atua. <sup>32</sup> Kei waiho koutou hei tutukitanga waewae ki nga Hurai, ki nga  
 Kariki ranei, ki te hahi ranei a te Atua; <sup>33</sup> Kia penei me ahau e whakamanawareka nei i te katoa i  
 nga mea katoa, i ahau kahore nei e rapu i te pai moku ake, engari i to te tokomaha, kia ora ai ratou.

## Chapter 11

<sup>1</sup> Kia rite ta koutou ki taku, me taku ka rite nei ki ta te Karaiti. <sup>2</sup> Na, e whakamoemiti ana ahau  
 ki a koutou, mo koutou ka mahara ki ahau i nga mea katoa, ka pupuri hoki i nga whakarerenga iho,  
 i aku i tuku atu na ki a koutou. <sup>3</sup> Na e mea ana ahau kia matau koutou, ko te Karaiti te o nga tane  
 katoa; ko te tane te o te wahine; ko te Atua ano te o te Karaiti. <sup>4</sup> Ko te tangata e inoi ana, e poropiti  
 ana, me te hipoki ano te upoko, e whakaiti ana ia i tona upoko. <sup>5</sup> Ko te wahine ia e inoi ana, e  
 poropiti ana ranei, kahore nei he hipoki o te upoko, e whakaiti ana ia i tona upoko: e rite tonu ana  
 tena ano kua oti tona te heu. <sup>6</sup> Ki te kahore hoki te wahine e hipokina, kia waruhia hoki ia: ki te  
 mea he mea whakama ki te wahine kia waruhia, kia heua ranei, me hipoki ia. <sup>7</sup> E kore hoki e tika  
 mo te tane kia hipokina tona upoko, ko te ahua hoki ia, ko te kororia o te Atua: ko te wahine ia te  
 kororia o te tane. <sup>8</sup> Ehara hoki i te mea no te wahine te tane, engari no te tane te wahine; <sup>9</sup> Kihai  
 ano te tane i hanga ma te wahine, engari ko te wahine ma te tane. <sup>10</sup> Koia i tika ai hei runga i te o  
 te wahine te tohu o te mana, he mea mo nga anahera. <sup>11</sup> Ahakoa ra, e kore te tane e motuhia ketia  
 i te wahine, e kore ano te wahine e motuhia ketia i te tane, i roto i te Ariki. <sup>12</sup> No roto hoki i te tane  
 te wahine, waihoki i na te wahine mai te tane: na te Atua ano ia nga mea katoa. <sup>13</sup> Ma koutou tonu  
 e whakaaro: he mea pai ranei kia inoi hipokikore te wahine ki te Atua? <sup>14</sup> E kore ranei te whakaaro  
 maori nei ano e ako i a koutou, ki te mea he makawe roroa o te tane, he mea whakatutua tera mona?  
<sup>15</sup> Tena ki te mea he makawe roroa o te wahine, he mea whakakororia tera mona: kua hoatu hoki  
 ona makawe ki a ia hei hipoki. <sup>16</sup> Otira ki te mea he ahua totohe tetahi, kahore o matou ritenga  
 pera, kahore hoki o nga hahi a te Atua.  
<sup>17</sup> I ahau ia e korero nei i tenei ki a koutou, kahore aku whakamoemiti ki a koutou, kahore hoki  
 koutou e whakamine mo te pai, engari mo te kino. <sup>18</sup> Na ko te tuatahi, i a koutou ka whakamine

ki roto ki te hahi, ka rongohia ahau he wehewehenga kei roto i a koutou; a e whakapono ana ahau ki tetahi wahi. <sup>19</sup> Kua takoto hoki kia whai titorehanga koutou, kia kitea ai te hunga e paingia ana i roto i a koutou. <sup>20</sup> Na, ka huihui koutou ki te wahi kotahi, e kore e taea kia kai i te hapa a te Ariki: <sup>21</sup> I te mea hoki e kai ana koutou, ka kai tena, tena, i tana hapa i mua atu i tetahi: a ka hiakai tetahi, ka haurangi tetahi. <sup>22</sup> He aha? Kahore koia o koutou whare e kai ai, e inu ai koutou? e whakahawea ana ranei koutou ki te hahi a te Atua, e mea ana hoki kia whakama te hunga kahore nei a ratou mea? Kia pehea atu taku kupu ki a koutou? kia whakamoemiti oti ahau ki a kou tou mo tenei mea? e kore ra ahau e whakamoemiti.

<sup>23</sup> Kua riro mai hoki i ahau i te Ariki taku i tuku atu ra ki a koutou, ara, i taua po i tukua ai ia, i tangohia e te Ariki, e Ihu, te taro: <sup>24</sup> A ka mutu te whakawhetai, ka whatia e ia, na ka mea ia, Tangohia, kainga; ko toku tinana tenei ka whatiwhatia nei mo koutou: meinga tenei hei whakamahara ki ahau. <sup>25</sup> Me te kapu ano i te mutunga o te hapa, me tana mea ano, Ko te kawenata hou tenei kapu i runga i oku toto: meinga tenei i nga inumanga katoa hei whakamahara ki ahau. <sup>26</sup> I nga wa katoa hoki e kai ai koutou i tenei taro, e inu ai i tenei kapu, e whakakitea ana e koutou te matenga o te Ariki, kia tae mai ra ano ia. <sup>27</sup> Mo reira ki te kai he tetahi, ki te inu he i te kapu a te Ariki, ka whai hara ia i te tinana, i nga toto, o te Ariki. <sup>28</sup> Engari kia uiui te tangata ki a ia ano, ka kai ai i taua taro, ka inu ai i taua kapu. <sup>29</sup> No te mea ki te kai he, ki te inu he tetahi, e kai ana, e inu ana i te whakawa mona, te whakaaro ko te tinana o te Ariki. <sup>30</sup> No konei hoki he tokomaha i roto i a koutou e ngoikore ana, e mate ana, he tokomaha ano kua moe. <sup>31</sup> Me i whakawa hoki tatou i a tatou ano, kihai i whakataua te he ki a tatou. <sup>32</sup> Ki te whakawakia ia tatou, he mea whakaako tatou na te Ariki, kei tukua ngatahitia tatou me te ao ki te he. <sup>33</sup> Heoi, e oku teina, ka huihui koutou ki te kai, me tatari tetahi ki tetahi. <sup>34</sup> Ki te hiakai tetahi, hei roto i tona whare kai ai; kei ai to koutou huihuinga hei take whakawa. Ko era atu mea hoki, maku e whakatika ina tae atu ahau.

## Chapter 12

<sup>1</sup> Na mo nga mea wairua, e oku teina, kahore ahau e pai kia kuware koutou. <sup>2</sup> E matau ana koutou, i a koutou e Tauwiwi ana, he mea kahaki koutou ki nga whakapakoko reokore, me koutou i

<sup>3</sup> kahakina ra. Koia ahau ka whakakite nei ki a koutou, e kore tetahi tangata, na te Wairua nei o te Atua ana korero, e ki, He mea kanga a Ihu: e kore ano e taea e tetahi te mea, Ko Ihu te Ariki, ki te

<sup>4</sup> kahore te Wairua Tapu. Na, he maha nga wehewehenga o nga mea e homai ana, kotahi ano ia

<sup>5</sup> Wairua. A he maha nga wehewehenga o nga minitanga, kotahi ano ia Ariki. <sup>6</sup> He maha ano

<sup>7</sup> hoki nga tu ahua o nga mahi; kotahi ano ia Atua hei mahi i nga mea katoa i roto i te katoa. Oтира

<sup>8</sup> e homai ana ki tena, ki tena, te whakakitenga a te Wairua hei pai. E homai ana hoki ki tetahi e te

<sup>9</sup> Wairua te kupu whakaaro; ki tetahi atu ko te kupu matau, he mea na taua Wairua ano; Ki tetahi

<sup>10</sup> atu ko te whakapono, na taua Wairua ra ano; ki tetahi atu ko nga mana whakaora, na taua Wairua

<sup>10</sup> ano: Ki tetahi atu ko nga mahi merekara; ki tetahi atu ko te mahi poropiti; ki tetahi atu ko te

<sup>11</sup> matauranga ki nga wairua; ki tetahi atu ko nga reo huhua; ki tetahi atu ko te whakamaoritanga i

<sup>11</sup> nga reo: Na, ko enei mea katoa, he mea mahi na taua Wairua kotahi ra ano, ko ia hei tuwha i

<sup>12</sup> tana e pai ai ki tetahi, ki tetahi.

<sup>12</sup> Pera hoki i te tinana e kotahi ana, he tini ano ona wahi, a ko nga wahi katoa o taua tinana

<sup>13</sup> kotahi, ahakoa tini, kotahi ano tinana; he pera hoki a te Karaiti. Kotahi nei hoki te Wairua i iriiria

<sup>14</sup> ai tatou katoa ki roto ki te tinana kotahi, ahakoa nga Hurai, ahakoa nga Kariki, ahakoa herehere,

<sup>14</sup> ahakoa rangatira; kotahi tonu te Wairua i whakainumia mai ai tatou katoa. Ehara hoki te tinana

<sup>15</sup> i te wahi kotahi, engari he tini. Ki te mea te waewae, He teka no te tinana ahau, ehara hoki ahau

<sup>16</sup> i te ringa; ehara ma tena e kahore ai ia hei wahi mo te tinana. Ki te mea te taringa, He teka no

<sup>16</sup> te tinana ahau, ehara hoki ahau i te kanohi; ehara ma tena e kahore ai ia hei wahi mo te tinana.

<sup>17</sup> Mehemea hoki he kanohi te tinana katoa, kei hea te wahi hei whakarongo? Mehemea he

<sup>18</sup> whakarongo ta te katoa, kei hea te wahi hei hongiri? Ko tenei, kua oti i te Atua te whakanoho

<sup>19</sup> tenei wahi, tenei wahi, ki roto ki te tinana, ana hoki i pai ai. Mehemea hoki kotahi ano wahi

<sup>20</sup> ratou katoa, kei hea te tinana? Ko tenei, he tini nga wahi, kotahi ano te tinana. <sup>21</sup> E kore hoki

<sup>21</sup> te kanohi e ahei te mea ki te ringa, Kahore aku mahi mau: te mahunga ranei ki nga waewae, Kahore

<sup>22</sup> aku mahi ma korua. Engari, ko nga wahi o te tinana e kiia ana he ngoikore, nui rawa te mahi

<sup>23</sup> ma era; Ko nga wahi hoki o te tinana e kiia ana e tatou he iti te honore, nui atu te honore e

<sup>24</sup> whakataua iho ana e tatou ki era; nui atu hoki te ataahua ki o tatou wahi marutuna; Ko o tatou

<sup>24</sup> wahi ataahua ia kahore he aha e meatia ai; heoi he mea huihui marire na te Atua nga wahi o te

tinana, he mea whakarite marie, nui atu hoki te honore i hoatu e ia ki te wahi i hapa: <sup>25</sup> Kia kore ai he wehewehenga o te tinana; engari kia kotahi tonu te whakaaro o nga wahi mo tetahi, mo tetahi.

<sup>26</sup> A ki te mamae tetahi wahi, mamae tahi ana nga wahi katoa; ki te whakahonoretia tetahi wahi, hari tahi ana nga wahi katoa.

<sup>27</sup> Na, ko koutou te tinana o te Karaiti, he wahi ano nona tenei, tenei. <sup>28</sup> A kua whakanohoia e te Atua etahi i roto i te hahi, ko nga apotoro ki mua, tuarua ko nga poropiti, tuatoru ko nga kaiwhakaako, muri iho ko nga merekara, me i reira ko nga mana whakaora, ki nga hoa mahi, ko

nga kaiwhakahaere tikanga, ko nga reo h uhua. <sup>29</sup> He apotoro oti katoa? he poropiti oti katoa? he

kaiwhakaako katoa? he kaimahi katoa i te merekara? <sup>30</sup> Kei te katoa oti nga mana whakaora? e

korero katoa ana oti i nga reo? he kaiwhakamaori anake ranei? <sup>31</sup> Na, whaia nga mea homai papai rawa: tenei ia te ara tino pai rawa, maku e whakaatu ki a koutou.

### Chapter 13

<sup>1</sup> Ahakoa korero noa ahau i nga reo o nga tangata, o nga anahera, ki te kahore oku aroha, ka

rite ahau ki te parahi tangi, ki te himipora tatangi. <sup>2</sup> Ahakoa kei ahau te mahi poropiti, a kitea ana e ahau nga mea ngaro katoa, me te matauranga katoa; ahakoa kei ahau katoa te whakapono, e taea

ai te whakaneke i nga maunga, ki te kahore oku aroha, ehara rawa ahau. <sup>3</sup> Ahakoa ka hoatu e ahau aku taonga katoa hei whangai i te hunga rawakore, ahakoa ka tukua e ahau toku tinana kia tahuna, ki te kahore oku aroha, kahore rawa he pai ki ahau.

<sup>4</sup> He manawanui te aroha, a he atawhai; e kore te aroha e hae; e kore te aroha e whakahihi, e

kore e whakapehapeha, <sup>5</sup> kahore ona tikanga whanoke, e kore e whai ki ana ake, e kore e riri wawe,

e kore e whakairi kino; <sup>6</sup> E kore e hari ki te he, engari ka hari tahi me te pono; <sup>7</sup> E whakamanawanui ana ki nga mea katoa, e whakapono ana ki nga mea katoa, e tumanako ana ki nga mea katoa, e whakaririka kau ana ki nga mea katoa.

<sup>8</sup> E kore rawa te aroha e taka: na, ahakoa mahi poropiti, e memeha; ahakoa reo ke, e mutu;

ahakoa matauranga, e memeha. <sup>9</sup> E matau ana hoki tatou ko tetahi wahi anake, e poropiti ana tatou

ko tetahi wahi anake; <sup>10</sup> Otira ka tae mai te tino mea, ko reira memeha ai taua wahi. <sup>11</sup> I toku tamarikitanga i rite aku korero ki a te tamariki, i rite toku ngakau ki to te tamariki, i rite oku whakaaro

ki o te tamariki, no toku kaumatuatanga nei, whakarerea ake e ahau nga mea tamariki. <sup>12</sup> Inaianei

hoki he titiro pouriuri ta tatou i roto i te whakaata, ko reira ia he kanohi, he kanohi: inaianei e matau  
 ana ahau ko tetahi wahi anake; ko reira ia ahau mohio ai me ahau i mohiotia ra. <sup>13</sup> Na, tenei te mau  
 nei te whakapono, te tumanako, te aroha, enei e toru; ko te mea nui rawa ia o enei ko te aroha.

## Chapter 14

<sup>1</sup> Whaia te aroha; kia matenui ki nga mea wairua, ko te mea nui rawa ia kia poropiti koutou.  
<sup>2</sup> Ki te mea he reo ke te korero a tetahi, ehara tana i te korero ki nga tangata, engari ki te Atua: e  
 kore hoki te tangata e matau; heoi e korero ana ia, ara te wairua, i nga mea ngaro. <sup>3</sup> Ko te tangata  
 ia e poropiti ana, e korero ana ia ki nga tangata hei hanga i te pai, hei whakahirihiri, hei whakamarie.  
<sup>4</sup> Ko te tangata e korero ana he reo ke, e hanga ana i te pai mona ake; ko te tangata ia e poropiti ana  
 e hanga ana i te hahi. <sup>5</sup> He pai tonu ki ahau me i korero koutou i nga reo ke, erangi ia kia poropiti  
 koutou: nui atu hoki te poropiti i te tangata korero i nga reo, ki te kore ia e whakamaori, hei hanga  
 mo te whare, ara mo te hahi.  
<sup>6</sup> Na, e oku teina, ki te haere atu ahau ki a koutou me te korero i nga reo ke, ma te aha ka whiwhi  
 ai koutou i te pai i ahau, ki te mea ehara taku korero ki a koutou i te whakakite, i te matauranga, i  
 te mahi poropiti, i te whakaako ranei? <sup>7</sup> Na ahakoa nga mea kahore he ora, he reo tona, he putorino  
 ranei, he hapa ranei, ki te kore e puta ke te tangi, me pehea e mohiotia ai te rangi o te putorino, o  
 te hapa ranei? <sup>8</sup> Ki te kahore hoki e marama te tangi o te tetere, ko wai e takatu ki te whawhai?  
<sup>9</sup> Waihoki ko koutou, ki te kahore o koutou arero e korero i te kupu marama, me pehea ka mohiotia  
 ai te mea i korerotia? e korero hoki koutou ki te hau. <sup>10</sup> Tena pea kei te ao aua reo maha, heoi  
 kahore he reo tikangakore. <sup>11</sup> Na, ki te kore e kitea e ahau te tikanga o te reo, ka meinga ahau e te  
 tangata e korero ana he tautangata; hei tautangata ano ki ahau taua tangata e korero ana. <sup>12</sup> Me  
 koutou ano, ka matenui na koutou ki nga mea wairua, me whai kia hira to koutou pai hei hanga i  
 te whare, ara i te hahi. <sup>13</sup> Na, ko te tangata e korero ana i te reo ke, me inoi kia taea e ia te  
 whakamaori. <sup>14</sup> Ki te mea hoki he reo he toku ina inoi, ko toku wairua te inoi ana; ko toku mahara  
 ia kahore he hua.  
<sup>15</sup> Me pehea ra? Ka inoi ahau i runga i te wairua, a ka inoi ano i runga i te mahara; ka waiata  
 ahau i runga i te wairua, ka waiata ano i runga i te mahara. <sup>16</sup> Penei, mehemea ki te whakapai koe

i runga i te wairua, me pehea te tangata e noho ana i te wahi o te kuware ka mea ai, Amine, ki tau whakawhetai? e kore hoki ia e mohio ki tau e korero ai. <sup>17</sup> He pono ka pai tau whakawhetai, otiia

e kore e hanga te pai o tera. <sup>18</sup> E whakawhetai ana ahau ki te Atua, moku i korero i nga reo maha

atu i o koutou katoa: <sup>19</sup> Otiia i roto i te hahi, pai ke atu ki ahau te korero i nga kupu e rima i runga

i te mahara, hei ako mo era atu, i te korero i nga kupu tekau mano i te reo ke. <sup>20</sup> E oku teina, aua o koutou mahara e whakatupu tamariki; ko te mauahara ia, tena hei kohungahunga koutou, engari ko nga mahara kia kaumatua.

<sup>21</sup>

Ka oti te tuhituhi i roto i te ture, He tangata reo ke, he ngutu ke hei kaikorero maku ki tenei iwi; heoi e kore tonu ratou e rongu ki ahau, e ai ta te Ariki. <sup>22</sup> No reira hei tohu nga reo ke, ehara ki te hunga whakapono, engari ki te hunga kahore e whakapono: ko te mahi poropiti ia he tohu,

ehara ki te hunga kahore e whakapono, engari ki te hunga e whakapono ana. <sup>23</sup> Na, kite huihui te hahi katoa ki te wahi kotahi, a ka korero te katoa i nga reo, a ka tomo mai te hunga kuware, te hunga

whakaponokore, e kore ranei ratou e mea he porangi koutou? <sup>24</sup> Tena ka poropiti katoa, a ka tapoko mai tetahi tangata whakaponokore, kuware ranei, ka mau tona he i te katoa, ka whakawakia e te

katoa; <sup>25</sup> Ka whakakitea nga mea ngaro o tona ngakau; na ka takoto tapapa ia, ka koropiko ki te Atua, me tana ki ake ano, he pono kei roto i a koutou te Atua.

<sup>26</sup>

Na, e pehea ana tena, e oku teina? Ka huihui koutou, he waiata ta tetahi o koutou, he whakaako ta tetahi, he reo ta tetahi, he whakakitenga ta tetahi, he whakamaoritanga ta tetahi. Meinga nga mea

katoa hei hanga mo te whare. <sup>27</sup> Ki te korero tetahi i te reo ke, kia tokorua, kei neke ake i te tokotoru ki te korero, me takikotahi; kia kotahi hoki hei whakamaori: <sup>28</sup> Ki te kahore ia he kaiwhakamaori,

kaua ia e korero i roto i te hahi; engari me korero ki a ia ano, ki te Atua hoki. <sup>29</sup> Kia tokorua, kia tokotoru nga poropiti hei korero, ma etahi e hurihuri atu. <sup>30</sup> Ki te whakakitea mai ia he mea ki tetahi e noho noa ana, me noho puku to mua. <sup>31</sup> E ahei hoki koutou katoa te poropiti takitahi, kia

ako ai te katoa, kia whakamarietia ai te katoa; <sup>32</sup> E ngohengohe ana hoki ki nga poropiti nga wairua o nga poropiti. <sup>33</sup> Ehara hoki te Atua i te Atua o te whakararuraru, engari no te rangimarie; e pera ana hoki i roto i nga hahi katoa o te hunga tapu.

<sup>34</sup> Kaua nga wahine e korero i roto i nga hahi: e kore hoki ratou e tukua kia korero; engari me whakarongo marie, ko ta te ture hoki tena e mea nei. <sup>35</sup> Ki te hiahia hoki ratou ki te ako i tetahi mea, me ui ki a ratou tahu i roto i te whare: he mea whakama hoki kia korero te wahine i roto i te hahi.

<sup>36</sup>

<sup>37</sup>

<sup>38</sup>

<sup>39</sup>

<sup>40</sup>

<sup>41</sup>

<sup>42</sup>

<sup>43</sup>

<sup>36</sup> He aha? i puta mai koia te kupu a te Atua i a koutou? i tae atu ranei ki a koutou anake? <sup>37</sup> Ki te mea tetahi he poropiti ia, he tangata ranei i te Wairua, mana e whakaae ki aku e tuhituhi atu nei ki a koutou, he ture ena na te Ariki. <sup>38</sup> Otira ki te kuware tetahi, waiho atu kia kuware ana. <sup>39</sup> Na, e oku teina, matenuitia te mahi poropiti, kua hoki e riria te korero i nga reo ke. <sup>40</sup> Otira kia atanga te mahi i nga mea katoa, kia totika.

## Chapter 15

<sup>1</sup> Na, me whakaatu e ahau ki a koutou, e oku teina, te rongopai i kauwhautia e ahau ki a koutou, ta koutou hoki i whakaae na, ta koutou hoki e tu na, <sup>2</sup> Te mea hoki e ora na koutou; ka whakaatu ahau ki a koutou i nga kupu i kauwhau ai ahau ki a koutou, ki te mau tera i a koutou, ki te mea ehara to koutou i te whakapono noa. <sup>3</sup> I hoatu na hoki e ahau ki a koutou i te tuatahi te mea i riro mai i ahau, ara i mate a te Karaiti mo o tatou hara, i pera me ta nga karaipiture; <sup>4</sup> A i tanumia; a i ara ake ano i te toru o nga ra, i pera me ta nga karaipiture; <sup>5</sup> A ka whakakite ki a Kipa; muri iho ki te tekau ma rua; <sup>6</sup> Muri iho ka whakakite ki nga hoa tokomaha ake i te rima rau i te kitenga kotahi, e ora nei ano te nuinga o ratou, ko etahi ia kua moe; <sup>7</sup> Muri iho ka whakakite ki a Hemi; muri iho ki nga apotoro katoa; <sup>8</sup> A muri rawa iho ka whakakite hoki ia ki ahau, me te mea i whanau tomuri nei ahau. <sup>9</sup> Ko te iti rawa hoki ahau o nga apotoro, kahore e tau kia kiia he apotoro, moku i whakato i te hahi a te Atua. <sup>10</sup> Heoi na te aroha noa o te Atua tenei ahua oku: kihai ano tona aroha noa ki ahau i maumauria; heoi nui atu taku mahi i ta ratou katoa: ehara ia i te mea naku, engari na te aroha noa o te Atua i mahi tahi me ahau. <sup>11</sup> Na, ahakoa naku, ahakoa na ratou, ko ta matou kauwhau tenei, ko ta koutou ano tenei i whakapono ai.

<sup>12</sup> Na, e kauwhautia nei a te Karaiti, tona aranga ake i te hunga mate, he pehea te kupu a etahi o koutou, kahore he aranga ake o te hunga mate? <sup>13</sup> Mehemea hoki kahore he aranga o te hunga mate, kihai ano a te Karaiti i ara. <sup>14</sup> Mehemea hoki kahore a te Karaiti i ara, maumau noa ta matou kauwhau, maumau noa to koutou whakapono. <sup>15</sup> Ae ra, ka kitea hoki matou he kaiwhakaatu teka i ta te Atua; no te mea ka whakaaturia nei e matou te Atua, nana i whakaara ake a te Karaiti; kihai nei i whakaarahia e ia, ki te kahore te hunga mate e ara. <sup>16</sup> Ki te kahore hoki te hunga mate e

whakaarahia, kihai ano a te Karaiti i whakaarahia: <sup>17</sup> A mehema kahore a te Karaiti i ara, he mea  
hanga noa to koutou whakapono; kei roto tonu koutou i o koutou hara. <sup>18</sup> Me te hunga hoki kua  
moe atu i roto i a te Karaiti, kua ngaro ratou. <sup>19</sup> Ki te mea hei tenei ao anake he tumanako ma tatou  
ki a te Karaiti, nui atu te pouri mo tatou i o nga tangata katoa.

<sup>20</sup> Ko tenei kua ara a te Karaiti i te hunga mate, kua waiho hei matamua mo te hunga kua moe.

<sup>21</sup> Na te tangata nei hoki te mate, waihoki na te tangata te aranga o te hunga mate. <sup>22</sup> I roto hoki i  
a Arama ka mate katoa nga tangata, waihoki i roto i a te Karaiti ka whakaorangia katoatia. <sup>23</sup> Otiia  
ko tenei, ko tenei, i tona ake turanga; ko te Karaiti te matamua; muri iho ko te hunga a te Karaiti a  
tona haerenga mai. <sup>24</sup> Ko reira te mutunga, ina oti te rangatiratanga te hoatu e ia ki te Atua, ara ki  
te Matua; ina memeha i a ia nga kawanatanga katoa, nga mana katoa, me te kaha. <sup>25</sup> Kua takoto  
hoki te tikanga kia kingi ia, kia meinga katoatia ra ano e ia ona hoariri ki raro i ona waewae. <sup>26</sup> Ko  
te hoariri whakamutunga e whakakahoretia ko te mate. <sup>27</sup> No te mea, ka oti nga mea katoa te pehi  
e ia ki raro i ona waewae. Otira i tana kianga, Ka oti nga mea katoa te pehi ki raro i a ia; e marama  
ana kua waiho i waho te kaipehi o nga mea katoa ki raro i a ia. <sup>28</sup> A ka oti nga mea katoa te pehi  
e ia ki raro i a ia, ko reira hoki te Tama riro ai ki raro i te kaipehi o nga mea katoa ki raro i a ia, kia  
katoa ai te Atua i roto i te katoa. <sup>29</sup> Penei ka aha te hunga e iriiria ana hei whakakapi mo te hunga  
mate? Ki te kahore rawa te hunga mate e ara, he aha hoki ratou ka iriiria ai hei whakakapi mo te  
hunga mate? <sup>30</sup> He aha ano tatou ka tu wehi ai i nga wa katoa? <sup>31</sup> Na koa taku oati, na toku  
whakamanamana ki a koutou, e oku teina, i roto i a Karaiti Ihu, ina mo te mate ahau i ia ra, i ia ra.

<sup>32</sup> Ha, mehemea ahau i whawhai ki te kararehe i Epeha, pera ana me te tangata, he aha te pai ki  
ahau? Ki te kahore te hunga mate e ara, e kai tatou, e inu, ko apopo hoki tatou mate ai. <sup>33</sup> Kei  
whakapohehetia koutou: Ki te kino nga hoa, ka heke ki te kino nga tikanga pai. <sup>34</sup> Oho ake ki te  
tika, a kua e hara; kahore hoki o etahi matauranga ki te Atua: i korero ai ahau kia whakama ai  
koutou.

<sup>35</sup> Otira tera tetahi e ki mai, peheatia ai te whakaarahanga o te hunga mate? he tinana aha hoki  
to ratou ina haere mai? <sup>36</sup> Kuware! ko tau e whakato na, e kore e puta ki te ora, ki te kahore e mate:

<sup>37</sup> A ko tau e whakato na, ehara i te tinana e puta ake a mua tau e whakato na, engari he kakano  
kau no te witi ranei, no tetahi atu mea ranei: <sup>38</sup> E hoatu ana hoki e te Atua ki taua kakano he tinana,



ko tana i pai ai, a ki tenei kakano, ki tenei kakano, tona ake tinana. <sup>39</sup> Ehara i te kikokiko kotahi  
 nga kikokiko katoa: engari tera ano to te tangata kikokiko, a rere ke ano to te kararehe kikokiko,  
 rere ke to te manu, rere ke to te ika. <sup>40</sup> Ko etahi tinana no te rangi, ko etahi tinana no te whenua:  
 otiia rere ke te kororia o nga mea o te rangi, rere ke to nga mea o te whenua. <sup>41</sup> He kororia ke to  
 te ra, he kororia ke to te marama, he kororia ke hoki to nga whetu: na poka ke te kororia o tetahi  
 whetu i to tetahi whetu. <sup>42</sup> He pera ano te aranga o te hunga mate. E whakatokia pirautia ana; e  
 whakaarahia piraukoretia ana: <sup>43</sup> E whakatokia honorekoretia ana; e whakaarahia kororiatia ana:  
 e whakatokia ngoikoretia ana; e whakaarahia kahatia ana: <sup>44</sup> E whakatokia ana he tinana maori; e  
 whakaarahia ana he tinana wairua. Mehemea tera he tinana maori, tera ano hoki he tinana wairua.  
<sup>45</sup> He penei hoki te mea i tuhituhia, Ko te tangata tuatahi, ko Arama, i meinga hei tangata ora; ko  
 te Arama whakamutunga ka waiho hei wairua whakaora. <sup>46</sup> He ahakoa ra ehara te mea wairua i te  
 tuatahi, engari te mea maori; no muri te mea wairua. <sup>47</sup> Ko te tangata tuatahi no te whenua, he mea  
 oneone: ko te tangata tuarua no te rangi. <sup>48</sup> Ko nga mea oneone rite tonu ki te mea oneone; ko nga  
 mea o te rangi rite tonu ki te mea o te rangi. <sup>49</sup> Na, kua mau nei ki a tatou te ahua o te mea oneone,  
 waihoki ka mau ano ki a tatou te ahua o to te rangi. <sup>50</sup> Ko taku korero tenei, e oku teina, e kore e  
 tau kia riro te rangatiratanga o te Atua i te kikokiko, i te toto; e kore ano te piraukore e riro i te  
 pirau.  
<sup>51</sup> Na, he mea huna tenei ka korerotia nei e ahau ki a koutou. E kore tatou katoa e moe, engari  
 e whakaahuatia ketia tatou katoa; <sup>52</sup> E kore e aha, kimo kau te kanohi, i te tetere whakamutunga:  
 e tangi hoki te tetere whakamutunga: e tangi hoki te tetere, a e whakaarahia nga tupapaku, he mea  
 piraukore, a ka whakaahuatia ketia tatou. <sup>53</sup> Kua takoto hoki te tikanga kia kakahuria te piraukore  
 e tenei pirau, kia kakahuria hoki te matekore e tenei hanga matemate nei. <sup>54</sup> Heoi ka oti tenei pirau  
 te whakakakahu ki te piraukore, me tenei hanga matemate nei te whakakakahu ki te matekore, ko  
 reira rite ai te korero i tuhituhia, horomia ake te mate e te wikitoria. <sup>55</sup> E te mate kei hea tou wero?  
 E te reinga kei hea tou wikitoria? <sup>56</sup> Ko te hara to te mate wero; na te ture hoki i kaha ai te hara:  
<sup>57</sup> Ki te Atua ia te whakawhetai, nana nei i homai te wikitoria ki a tatou, he meatanga na to tatou  
 Ariki, na Ihu Karaiti.  
<sup>58</sup> Heoi, e oku teina aroha, kia u, kei taea te whakakorikori, kia hira te mahi ki te Ariki i nga  
 wa katoa, e matau ana hoki koutou, ehara i te maumau to koutou mauui i roto i te Ariki.

## Chapter 16

<sup>1</sup> Na mo te kohikohi mo te hunga tapu, peratia me taku i whakarite ai ki nga hahi o Karatia.  
<sup>2</sup> Hei te ra tuatahi o te wiki ka whakatakoto ia tangata, ia tangata o koutou ki te taha tohu ai, kei te ahua o te manaakitanga i a ia, kei waiho nga kohikohi mo te wa e tae atu ai ahau. <sup>3</sup> A ka tae atu ahau, maku e tono te hunga e whakapaingia ana e a koutou pukapuka hei mau i ta koutou aroha noa ki Hiruharama. <sup>4</sup> A ki te tika kia haere atu ano hoki ahau, ko matou tahi e haere.  
<sup>5</sup> Na ka haere atu ahau ki a koutou, ina tika ahau ra Makeronia: e tika ana hoki ahau ra Makeronia. <sup>6</sup> A tera pea ahau e noho roa ki a koutou, taka noa pea te hotoke, kia ai koutou hei arahi i ahau ki te wahi e haere atu ai ahau. <sup>7</sup> E kore hoki ahau e pai kia titiro haere noa ahau i a koutou aiane; e tumanako ana hoki ahau kia whakatau iho ahau ki a koutou, ki te tukua e te Ariki. <sup>8</sup> Engari ka noho ahau ki Epeha taea noatia te Petekoha; <sup>9</sup> Kua tuwhera mai nei he kuwaha rahi ki ahau, he mahi nui, a tera ano te tokomaha o te hunga tautohe.  
<sup>10</sup> Na, ki te tae atu a Timoti, meinga kia kaua ia e noho wehi i roto i a koutou: e mahi ana hoki ia i te mahi a te Ariki, e penei ana me ahau nei: <sup>11</sup> Na reira kei whakahawea tetahi ki a ia; engari ata arahina ia i runga i te rangimarie, kia haere mai ai ki ahau: e tatari ana hoki ahau ki a ia, ratou ko nga teina. <sup>12</sup> Na, ko to tatou teina, ko Aporo, nui atu taku tohe ki a ia kia haere atu ratou ko nga teina ki a koutou: otira kihai rawa ia i pai kia haere atu i tenei wa: otira mana e haere atu a te wa e watea ai.  
<sup>13</sup> Kia mataara, e tu i runga i te whakapono, whakatane, kia kaha. <sup>14</sup> Kia meatia a koutou mea katoa i runga i te aroha. <sup>15</sup> He tohe tenei naku ki a koutou, e oku teina; e mohio ana koutou ki nga tangata o te whare o Tepana, ko te matamua tera o Akaia, kua tuku ano i a ratou hei kaimahi mo te hunga tapu; <sup>16</sup> Kia ngohengohe hoki koutou ki nga tangata pera, ki te hunga katoa ano e mahi tahi ana, e uaua ana. <sup>17</sup> Hari tonu hoki ahau ki te haerenga mai o Tepana, ratou ko Porotunatu, ko Akaiku: na ratou hoki i rite ai nga mea i kore i a koutou. <sup>18</sup> I ora hoki i a ratou toku wairua, o koutou hoki: na kia mohio koutou ki te hunga pera.  
<sup>19</sup> Tenei nga hahi o Ahia te oha atu nei ki a koutou. He maha hoki nga mihi atu a Akuira raua ko Pirihiria i roto i te Ariki, a te hahi hoki i to raua whare. <sup>20</sup> Tenei nga teina katoa te oha atu nei

ki a koutou. Oha atu ki a koutou ano, kei te kihi tapu. <sup>21</sup> Ko te oha tenei aku, a Paora, he mea na  
 toku ringa ake. <sup>22</sup> Ki te kore tetahi e aroha ki te Ariki, kia waiho ia hei Anatema Maranata. <sup>23</sup> Kia  
 tau te aroha noa o te Ariki, o Ihu Karaiti, ki a koutou. <sup>24</sup> Hei a koutou katoa toku aroha i roto i a  
 Karaiti Ihu. Amine.

## 2 Corinthians

### Chapter 1

<sup>1</sup> Na Paora, i paingia e te Atua hei apotero ma Ihu Karaiti, na te teina hoki, na Timoti, ki te  
 hahi a te Atua i Koriniti, ratou ko te hunga tapu katoa i Akaia puta noa: <sup>2</sup> Kia tau ki a koutou te  
 aroha noa me te rangimarie, he mea na te Atua, na to tatou Matua, na te Ariki hoki, na Ihu Karaiti.  
<sup>3</sup> Kia whakapaingia te Atua, te Matua o to tatou Ariki, o Ihu Karaiti, te Matua o nga mahi tohu,  
 te Atua o te whakamarie katoa; <sup>4</sup> Ko ia hoki te kaiwhakamarie i a matou i o matou paweratanga  
 katoa, e taea ai e matou te whakamarie te hunga e pehia ana e te aha, e te aha, ma te whakamarie  
 e whakamarie nei te Atua i a matou. <sup>5</sup> I te mea kei te hira tonu nga mamae o te Karaiti i roto i a  
 matou, kei te pera ano te hira o to matou whakamarietanga i roto i a te Karaiti. <sup>6</sup> Na, ahakoa tukinotia  
 matou, he mea tena kia whakamarietia ai, kia whakaorangia ai koutou; ahakoa ranei whakamarietia  
 matou, he mea tena kia whakamarietia ai koutou, koia tena e mahi na, i a koutou ka whakaririka  
 kau na ki aua mamae e mamae nei ho ki matou:  
<sup>7</sup> E u ana hoki to matou whakaaro ki a koutou, i te mohio iho, ka uru na koutou ki nga mamae,  
 ka uru ano hoki koutou ki te whakamarietanga. <sup>8</sup> Kahore hoki matou e pai kia ngaro i a koutou, e  
 oku teina, te paweratanga i tupono ki a matou i Ahia, te tino taimaha o te pehanga i a matou, nuku  
 noa atu i to matou kaha, na poroporoaki ana matou ki te ora: <sup>9</sup> Ae, i roto ano i a matou te kupu mo  
 te mate, kia kaua o matou whakaaro e u ki a matou ano, engari ki te Atua, ki te kaiwhakaara i te  
 hunga mate: <sup>10</sup> Nana matou i whakaora i taua mate nui, a e whakaora ano ia: e u ana o matou  
 whakaaro ki a ia, tera ia e whakaora tonu i a matou; <sup>11</sup> Me koutou hoki ka awhina tahi na ki ta  
 koutou inoi mo matou; kia whakawhetai te tokomaha mo matou, mo te aroha noa na te tokomaha  
 i homai ki a matou.

<sup>12</sup> Ko ta matou whakamanamana hoki ko tenei, ko te whakaaetanga ake o to matou hinengaro, kei runga i te tapu, i te tapatahi o te Atua, ehara i te mea kei runga i to te kikokiko mohio, engari i  
<sup>13</sup> to te Atua aroha noa, ta matou whakahaere i te ao, ki a koutou rawa ano ia. Ehara hoki ta matou e tuhituhi atu nei ki a koutou i te mea ke i ta koutou e korero na i te pukapuka, e whakaae na; a e  
<sup>14</sup> u ana toku whakaaro, e whakaae koutou taea noatia te mutunga; Me koutou ano i whakaae mai na ko tetahi wahi ki a matou, ko matou ta koutou e whakamanamana ai, pera hoki me koutou, ko koutou ta matou e whakamanamana ai i te ra o to tatou Ariki, o Ihu.  
<sup>15</sup> Na, i toku whakapono ki tenei, i mea ahau kia haere atu i mua ra ki a koutou, kia rua ai painga ki a koutou;  
<sup>16</sup> Kia tika atu ma koutou na ki Makeronia, a kia hoki mai i Makeronia ki a koutou, a ma koutou e whakatika atu taku haere ki Huria.  
<sup>17</sup> Na, i ahau ka whakaaro i tenei, i hanga noa iho ranei toku ngakau? he whakaaro ranei no te kikokiko oku whakaaro e mea ai ahau, Ae, ae, kahore, kahore?  
<sup>18</sup> Otira i te mea he pono te Atua, ehara ta matou kupu ki a koutou i te ae, i te kahore.  
<sup>19</sup> Ko te Tama hoki a te Atua, ko Ihu Karaiti, i kauwhautia ra e matou i roto i a koutou, ara e ahau, e Hirawanu, e Timoti, ehara i te ae, i te kahore ranei, engari he ae i roto i a ia.  
<sup>20</sup> Pewhea ake hoki te maha o nga kupu homai a te Atua, kei roto tonu i a ia te ae; a ma roto mai hoki i a ia te Amine, hei kororia mo te Atua i roto i a tatou.  
<sup>21</sup> Na, ko te kaiwhakau i a matou me koutou i roto i a te Karaiti, ko te kaiwhakawahi i a tatou, ko te Atua;  
<sup>22</sup> Nana tatou i hiri, nana hoki i homai te wahi tuatahi, ara te Wairua ki roto ki o tatou ngakau.  
<sup>23</sup> Na, ka karanga ahau ki te Atua hei kaititiro mo toku wairua, he tohu naku i a koutou te haere wawe atu ai ahau ki Koriniti.  
<sup>24</sup> Ehara i te mea hei rangatira matou mo to koutou whakapono, engari hei hoa mahi matou i te hari mo koutou: na te whakapono hoki koutou i tu ai.

## Chapter 2

<sup>1</sup> Otira kua takoto tenei i roto i ahau, kia kua toku hokinga atu ki a koutou e waiho i runga i te pouri.  
<sup>2</sup> Na, ki te whakapouri hoki ahau i a koutou, ko wai hoki hei whakaora i toku ngakau? ko ia anake e whakapouritia nei e ahau.  
<sup>3</sup> A i tuhituhi atu ahau i taua mea nei ano ki a koutou, kei tae atu ahau, ka whakapouritia ahau e te hunga i tika nei ma ratou ahau e whakahari; i te u o toku whakaaro ki a koutou katoa, ko toku hari te hari o koutou katoa.  
<sup>4</sup> He nui hoki no te pouri, no te

mamae o te ngakau, i tuhituhi atu ai ahau ki a koutou me nga roimata maha: ehara i te mea hei whakapouri i a koutou, engari kia matau ai koutou ki toku aroha e hira rawa nei ki a koutou.

<sup>5</sup> Mehemea na tetahi i whakapouri, ehara i te mea e whakapouri ana ia i ahau, engari i a koutou katoa; i tetahi wahi ia, e kore nei ahau e mea rawa he nui. <sup>6</sup> E rahi ana mo taua tu tangata ko tenei whiu i whakapangia nei e te tokomaha. <sup>7</sup> Engari rawa ia me whakarere noa iho tana e koutou, ka whakamarie i a ia, kei tupono ka horomia ia e tona pouri nui rawa. <sup>8</sup> Koia ahau ka inoi ki a koutou, kia whakaukia to koutou aroha ki a ia. <sup>9</sup> Na konei ano hoki ahau i tuhituhi atu ai, hei whakamatau i a koutou, mehemea e ngohengohe ana koutou i nga mea katoa. <sup>10</sup> Ko te tangata e whakarerea ai e koutou tana, ka whakarerea ano e ahau: ko taku hoki i whakarere noa ai, mehemea i pera ahau, he whakaaro ki a koutou, i whakarerea noatia e ahau i te aroaro o te Karaiti; <sup>11</sup> Kei ra rungatia mai tatou e Hatana: ehara hoki tatou i te kuware ki ana rauhanga.

<sup>12</sup> Na, i toku taenga ki Toroa ki te kauwhau i te rongopai o te Karaiti, a ka puare mai ki ahau tetahi kuwaha, he mea na te Ariki, <sup>13</sup> Kahore he tanga mo toku wairua, he kore i kite i toku teina, i a Taituha: heoi ka poroporoaki ahau ki a ratou, ka haere ki Makeronia. <sup>14</sup> Na, me whakawhetai ki te Atua, e mea tonu nei i a matou kia whakamanamana i roto i a te Karaiti, e whakaatu nei ma roto i a matou i te ha o tona matauranga i nga wahi katoa. <sup>15</sup> He kakara pai hoki matou no te Karaiti ki te Atua, i runga i te hunga e whakaorangia ana, i runga ano i te hunga e whakangaromia ana: <sup>16</sup> Ki tetahi he kakara no te mate ki te mate; ki tetahi he kakara no te ora ki te ora. A ko wai e tau mo enei mea? <sup>17</sup> Kahore hoki matou e pera i te tokomaha e whakatutua nei i te kupu a te Atua: engari he pera i ta te pono, he pera i ta te Atua, e korero ana matou i te aroaro o te Atua i roto i a te Karaiti.

### Chapter 3

<sup>1</sup> E timata ana ano ranei matou te whakapai ki a matou ano? e pera ana ranei me etahi atu, e mea ana matou ki etahi pukapuka whakapai ma matou ki a koutou, ma koutou ranei ki a matou? <sup>2</sup> Ko koutou ta matou pukapuka, he mea tuhituhi ki o matou ngakau, e kitea ana, e korerotia ana e nga tangata katoa: <sup>3</sup> Kua marama na hoki, ko koutou he pukapuka na te Karaiti, he mea minita na matou, ehara i te mea tuhituhi ki te mangumangu, engari ki te Wairua o te Atua ora; he teka ki nga

<sup>4</sup>  
 papa kohatu, engari ki runga ki nga papa kikokiko o te ngakau. Ko tenei tu whakaaro o matou u  
<sup>5</sup>  
 tonu ki ta te Atua, he mea na te Karaiti: He teka kei a matou ake te tikanga mo te whakaaro ki  
 tetahi aha, me te mea na matou ake ano; engari na te Atua matou i whai tikanga ai;  
<sup>6</sup>  
 Nana hoki matou i tau ai hei minita mo te kawenata hou; he teka no te reta, engari no te wairua:  
<sup>7</sup>  
 he whakamate hoki ta te reta, he whakaora ia ta te wairua. Na, mehemea te minitanga o te mate  
 i tuhituhia nei, i whaoa nei ki nga kohatu, i puta kororia mai, i kore ai e taea e nga tama a Iharaira  
<sup>8</sup>  
 te titiro matatau atu ki te mata o Mohi i te kororia o tona mata; he kororia ia e memeha ana: E  
<sup>9</sup>  
 kore ianei e nui noa atu te kororia o te minitanga o te wairua? Na, mehemea te minitanga o  
<sup>10</sup>  
 te whakatau he he kororia, heoi hira rawa atu te kororia o te minitanga o te tika. He pono hoki,  
 kahore te mea i whakakororiatia i whai kororia i tenei wahi, ara na te kororia e hira rawa nei.  
<sup>11</sup>  
 Mehemea hoki he kororia to te mea e memeha ana, nui noa atu te kororia o te mea pumau.  
<sup>12</sup>  
<sup>13</sup>  
 Na, i a matou ka tumanako nei ki tenei, nui atu to matou maia ki te korero: Kahore ano  
 e pera me Mohi i maka nei i te hipoki ki tona mata, kei titiro matatau atu nga tama a Iharaira ki te  
<sup>14</sup>  
 tukunga iho o te mea e memeha haere ana: Otira i whakapakeketia o ratou hinengaro: no te mea  
 taea noatia mai tenei ra i te korerotanga o te kawenata tawhito e mau tonu ana taua hipoki ra ano,  
<sup>15</sup>  
 kahore ano i hurahia; i roto ia i a te Karaiti ka whakakahoretia. Na, tae noa mai ki tenei ra, ki te  
<sup>16</sup>  
 korerotia a Mohi, e takoto ana he hipoki ki runga i to ratou ngakau. Na, kia huri ki te Ariki, ka  
<sup>17</sup>  
 tangohia te hipoki. Na, ko te Ariki, ko te Wairua ia; ko te wahi i noho ai te Wairua o te Ariki,  
<sup>18</sup>  
 kei reira te tikanga herekore. Ko tatou katoa ia kahore he hipoki mo te mata, e whakaahua ana  
 i te kororia o te Atua, ano kei roto i te whakaata, a e whakaputaia ketia ana kia rite ki taua ahua  
 ano, he kororia hono iho ki te kororia, i runga i ta te Wairua o te Ariki.

## Chapter 4

<sup>1</sup>  
 Na konei, i te mea kei a matou tenei mahi minita, i te mea ka tohungia nei matou, kahore  
 matou e ngakaukore; <sup>2</sup>  
 Engari kua whakarerea e matou nga mea huna o te whakama, kore ake  
 matou e haere i runga i te tinihanga, kahore hoki e maminga ki te kupu a te Atua: ka waiho ia ko  
 te whakapuakanga o te pono hei whakaatu i to matou pai ki te hinengaro tangata i te aroaro o te  
<sup>3</sup>  
 Atua. Na, ki te mea he mea hipoko ta matou rongopai, he mea hipoki ki te hunga e whakangaromia

<sup>4</sup>  
 ana: I roto nei i a ratou te atua o tenei ao, e whakamatapo ana i nga whakaaro o te hunga kore whakapono, kei whitingia ratou e te marama o te rongopai o te kororia o te Karaiti, ko ia nei te

<sup>5</sup>  
 ahua o te Atua. He teka hoki ko matou te kauwhautia nei e matou, engari ko Karaiti Ihu hei Ariki,

<sup>6</sup>  
 a ko matou nei hei pononga ma koutou, he whakaaro ki a Ihu. Ko te Atua hoki nana nei i ki te

<sup>7</sup>  
 marama kia whiti i roto i te pouri, kua whiti ki roto ki o matou ngakau, hei homai i te marama o te

<sup>8</sup>  
 matauranga o te kororia o te Atua i te mata o Ihu Karaiti. Ko tenei taonga ia o matou kei roto i

<sup>9</sup>  
 te oko oneone, kia kiia ai te kaha nui whakarahara no te Atua, ehara hoki i a matou;

<sup>10</sup>  
 E akina ana matou i nga taha katoa, heoi kahore e pau te whakaaro; e raruraru ana, heoi kahore

<sup>11</sup>  
 e ngakaukore; E whakatoia ana, heoi kahore i whakarerea; e taia ana ki raro, heoi kahore i

<sup>12</sup>  
 whakangaromia; E mau tonu ana hoki te matenga o Ihu ki o matou tinana, i a matou e haereere

<sup>13</sup>  
 nei; kia marama ai to Ihu ora i roto i o matou tinana. Ko matou hoki e ora nei, e tukua tonutia

<sup>14</sup>  
 ana ki te mate mo te whakaaro ki a Ihu, kia marama ai hoki to Ihu ora i roto i o matou kikokiko

<sup>15</sup>  
 matemate. Na ko te mate te mahi ana i roto i a matou, ko te ora ia i roto i a koutou. Otira, i

<sup>16</sup>  
 te mea kei a matou taua wairua ra ano o te whakapono, te mea i tuhituhia ra, i whakapono ahau,

<sup>17</sup>  
 koia ahau i korero ai; whakapono ana ano matou, koia hoki matou ka korero nei; E matau ana

<sup>18</sup>  
 hoki matou, tera te kaiwhakaara o te Ariki, o Ihu, e whakaara ano hoki i a matou me Ihu, e whakatu

<sup>19</sup>  
 ngatahi ano i a matou me koutou. Hei painga hoki ki a koutou na mea katoa, kia waiho ai ma te

<sup>20</sup>  
 aroha noa, e whakanuia nei e te tokomaha, e whakawhetai, kia hira rawa ai te kororia o te Atua.

<sup>21</sup>  
 Koia hoki tatou te ngakaukore ai; heoi ahakoa haere iho tatou ki te pirau, ara to waho tangata, e

<sup>22</sup>  
 whakahoutia ana ano to roto i tenei ra, i tenei ra. Ko to tatou mamae mama nei hoki, rangitahi

<sup>23</sup>  
 kau nei, hei whakawhiwhi i a tatou kia tino nui haere rawa atu te taimaha o te kororia, he mea mau

<sup>24</sup>  
 tonu; I a tatou kahore nei e titiro ki nga mea e kitea ana, engari ki nga mea kahore e kitea: he

<sup>25</sup>  
 mea nonaianeia noa hoki nga mea e kitea ana; he mea mau tonu ia nga mea kahore e kitea.

## Chapter 5

<sup>1</sup>  
 E matau ana hoki tatou, ki te wahia to tatou whare wharau, te mea whenua nei, he whare ano

<sup>2</sup>  
 to tatou, he mea hanga na te Atua, ehara i te whare hanga e te ringa, he mea mau tonu, i nga rangi.

<sup>3</sup>  
 He pono hoki i tenei e aue ana tatou, e hiahia ana ki to tatou whare o te rangi hei kakahu mo tatou:

<sup>3</sup> Mehemea ia ki te whai kakahu tatou, e kore e rokohanga mai e noho tahanga ana. <sup>4</sup> Kei te aue hoki tatou, te hunga i tenei whare wharau, i te taimaha: ehara i te mea e hiahia ana kia unuhia o tatou nei, engari kia kakahuria iho kia horomia ai te mea matemate e te ora. <sup>5</sup> Na, ko te kaihanganga i a tatou mo taua mea nei ano, ko te Atua, nana nei hoki i homai ki a tatou te wahi tuatahi, ara te Wairua. <sup>6</sup> No reira i te mea e maia tonu ana tatou, e matau ana hoki, i a tatou e noho nei i te tinana, he mea motu ke mai i te Ariki ta tatou noho: <sup>7</sup> Ko ta tatou haere hoki kei runga i te whakaponu, kahore i runga i te titiro; <sup>8</sup> E mea ana ahau, e maia ana ano tatou, ko ta tatou hoki e tino pai ai, kia noho motu ke i te tinana, kia noho ai i te Ariki. <sup>9</sup> Koia hoki tatou ka whai nei, ahakoa i konei e noho ana, ahakoa e noho ke ana, kia ahua rekaina mai tatou e ia. <sup>10</sup> Kua takoto hoki te tikanga kia kitea tatou katoa ki mua i te nohoanga whakawa o te Karaiti; kia riro mai ai i tenei, i tenei, nga mea i mahia i te tinana, kia rite hoki ki tana i mahi ai, ahakoa pai, ahakoa kino. <sup>11</sup> Na, ka matau nei matou ki te wehi o te Atua, ka kukume matou i nga tangata, otira e kitea ana ano matou e te Atua; a e u ana toku whakaaro, kua kitea ano matou e o koutou hinengaro.

<sup>12</sup> Ehara i te mea e whakapai ana ano matou i a matou ki a koutou, engari e korero ana hei hoatu i te take ki a koutou e whakamanamana ai koutou ki a matou, kia ai ai he mea hei whakautu ma koutou ki te hunga e whakamanamana ana ki to te kanohi, kah ore ki to te ngakau. <sup>13</sup> Ahakoa hoki porangi matou, hei mea ia mo te Atua: ahakoa ranei tika o matou mahara, hei mea mo koutou.

<sup>14</sup> E akiakina ana hoki matou e te aroha o te Karaiti; i a matou e whakaaro ana i tenei, kotahi i mate mo te katoa, no reira he hunga mate te katoa; <sup>15</sup> I mate hoki ia mo te katoa, kia kua ai te hunga e ora ana e ora mo ratou ano a muri ake nei, engari mo tenei i mate nei mo ratou, a i ara ake ano.

<sup>16</sup> No reira a mua ake nei e kore matou e matau ki te tangata, ara ki tona kikokiko: ae ra, ahakoa matau matou ki a te Karaiti, ara ki tona kikokiko, otiia e kore matou e matau pena ki a ia a mua ake nei. <sup>17</sup> Na ki te mea kei roto i a te Karaiti tetahi, he mahinga hou ia: kua pahemo nga mea tawhito, na kua hou nga mea katoa. <sup>18</sup> Ko te putake ia o nga mea katoa ko te Atua, i hohou nei i ta tatou rongu ki a ia i runga i a te Karaiti, a homai ana e ia ki a matou te minitanga o te houhanga rongu; <sup>19</sup> Ara, i roto te Atua i a te Karaiti e hohou ana i ta te ao rongu ki a ia, kore ake e whakairia ki a ratou o ratou he; a kua tukua mai ki a matou te kupu mo te houhanga rongu. <sup>20</sup> Na he karere matou na te Karaiti, me te mea ano ko te Atua tenei kei roto i a matou e karanga ana; ko matou hei whakakapi mo te Karaiti ki te tohe atu kia koutou, kia hohia ta koutou rongu ki te Atua. <sup>21</sup> Ko ia,



kihai nei i matau ki te hara, meinga ana hei hara mo tatou, kia meinga ai tatou ko te tika o te Atua i roto i a ia.

## Chapter 6

<sup>1</sup> Na tenei matou ona hoa mahi te tohe atu nei i a koutou, kia kua e kore hua te rironga mai o te aroha noa o te Atua i a koutou; <sup>2</sup> E mea ana hoki ia, No te wa manakohanga atu i whakarongo ai ahau ki a koe, awhinatia ana hoki koe e ahau i te ra o te whakaoranga: nana, tenei te wa manakohanga: nana, tenei te wa manakohanga mai; nana, tenei te ra o te whakaoranga. <sup>3</sup> E kore hoki e hoatu e matou tetahi take e he ai, ahakoa i te aha, kei whakahengia ta matou mahi minita; <sup>4</sup> Engari i nga mea katoa e whakakite ana i a matou, he minita na te Atua, i runga i te hua o te manawanui, i nga tukinotanga, i nga aitua, i nga rarunga, <sup>5</sup> I nga whiunga, i nga hereheretanga, i nga ngangaretanga, i nga mauuitanga, i nga mataaratanga, i nga nohoanga pukutanga; <sup>6</sup> I runga i te kinokore, i te matauranga, i te manawanui, i te ngakau ngawari, i te Wairua Tapu, i te aroha tinihangakore, <sup>7</sup> I runga i te kupu o te pono, i te kaha o te Atua, i nga mea whawhai o te tika ki matau, ki mau, <sup>8</sup> I rungia i te kororia, i te honorekore, i te kupu kino, i te kupu pai; me te mea he hunga tinihanga, a he hunga pono ano: <sup>9</sup> Me te mea kahore e mohiotia, otiia e mohiotia nuitia ana; me te mea ka mate, heoi tenei ano matou te ora nei; me te mea e pakia ana, heoi kahore e whakamatea; <sup>10</sup> Me te mea e pouri ana, heoi e hari tonu ana; me te mea e rawakore ana, heoi e mea ana i te tokomaha kia whai taonga; me te mea kahore a matou aha, otiia kei a matou nga mea katoa. <sup>11</sup> Tuwhera tonu o matou mangai ki a koutou, e nga Koriniti, kua nui to matou ngakau. <sup>12</sup> Ehara i te mea no matou te kuiti i a koutou, engari no o koutou ngakau te kuiti. <sup>13</sup> Na, hei utu e rite ana, he kupu tenei naku ki aku tamariki, kia whakanuia ano hoki koutou. <sup>14</sup> Kei iokatia ketia koutou ki te hunga whakaponokore: no hea hoki te whakahoatanga o te tika raua ko te tutu? no hea hoki te huihuinga tahitanga o te marama ki te pouri? <sup>15</sup> Ko ehea mea a te Karaiti i huihuia ki a Periara? na tehea wahi ranei i huanga ai te tangata whakapono ki te tangata whakaponokore? <sup>16</sup> A kei hea he tatanga mo te whare tapu o te Atua ki nga whakapakoko? he whare tapu hoki koutou no te Atua ora; ko ta te Atua hoki tena i mea ai, ka noho ahau i roto i a ratou, ka haereere ahau i roto i a ratou; a ko ahau hei Atua mo ratou, ko ratou hoki hei iwi maku. <sup>17</sup> Mo konei, Puta mai i roto i a ratou,

18

kia motu ke, e ai ta te Ariki. Kauga hoki e pa ki te mea poke; a ka riro mai koutou i ahau; Ko ahau ano hoki hei Matua mo koutou, ko koutou hoki hei tama hei tamahine ki ahau, e ai ta te Ariki Kaha Rawa.

## Chapter 7

<sup>1</sup> Na, i a tatou ka whiwhi nei ki enei kupu whakaari, e oku hoa aroha, tahuri tatou ki te horoi atu i a tatou i nga mea poke katoa o te kikokiko, o te wairua, me te whai ano ki te tino tapu i runga i te wehi ki te Atua. <sup>2</sup> Manako mai ki a matou; kahore a matou whakahaere he ki tetahi, kahore matou i kukume i tetahi ki te kino, kahore a matou whakapati i nga taonga a tetahi. <sup>3</sup> Ehara taku kupu nei i te mea hei whakatau he ki a koutou: kua mea atu na hoki ahau, kei o matou ngakau koutou mo te mate tahi, mo te ora tahi. <sup>4</sup> Nui atu toku maia ki te korero ki a koutou, nui atu toku whakamanamana mo koutou: ki tonu ahau i te whakamarie, hira ake toku koa i o matou matenga katoa. <sup>5</sup> I to matou taenga mai hoki ki Makeronia, kihai i whai okiokinga to matou kikokiko, heoi mate ana matou i nga taha katoa; i waho ko nga whawhai, i roto ko nga matakau. <sup>6</sup> Otira na te kaiwhakamarie o te hunga e whakaititia ana, ara na te Atua, nana matou i whakamarie, i a Taituha ka tae mai nei; <sup>7</sup> Ehara i te mea na tona taenga mai anake, engari na te whakamarietanga ano hoki i whakamarietia ai ia e koutou, i tana korerotanga mai ki a matou i to koutou hiahia nui, i to koutou tangi, i to koutou ngakau nui ki ahau; a ka koa rawa ahau. <sup>8</sup> Ahakoa hoki i whakapouritia koutou e ahau ki taku pukapuka, kahore ahau i te mea e he ana ahau, ahakoa i mahara pera i mua ra: kua kite nei hoki ahau na taua pukapuka koutou i mea kia pouri, ara pouri potopoto nei. <sup>9</sup> E hari ana tenei ahau, ehara i te mea mo te whakapouritanga i a koutou, engari no te mea i whakapouritia koutou a ripeneta iho: ko to koutou pouri hoki no ta te Atua, e kore noa iho ai koutou e whai he i a matou. <sup>10</sup> E meinga ana hoki e ta te Atua pouri he ripeneta e ora ai, he ripeneta kahore ona haku: ko ta te pouri ia o te ao e mahi ai he mate. <sup>11</sup> Titiro hoki, ko taua mea nei ano, ko ta te Atua whakapouritanga i a koutou, na, tana mahinga nui i roto i a koutou, ae ra, nga kupu whakatikatika i a koutou, te riri, te wehi, te hiahia, te ngakau nui, te whakapa riri! I nga mea katoa kua whakakite nui koutou, kahore o koutou hara i tenei mea. <sup>12</sup> No reira, ahakoa i tuhituhi ahau ki a koutou, kahore ahau i tuhituhi atu mo te tangata nana te he, mo te tangata ranei ki a ia nei te he, engari kia whakakitea ai ki a koutou i te aroaro o te Atua

te nui o to koutou matapopore ki a matou. <sup>13</sup> Koia matou i whai marietanga ai: a i to matou whakamarietanga hira noa ake to matou koa i te koa hoki o Taituha, no te mea kua whakahauoratia tona wairua e koutou katoa. <sup>14</sup> Mehemea hoki ahau i whakamanamana ki a ia ki tetahi mea a koutou, kahore ahau i meinga kia whakama; no te mea i korerotia e matou nga mea katoa ki a koutou i runga i te pono, waihoki ko to matou whakamanamana, i meinga nei e ahau i te aroaro o Taituha, kua kitea he pono. <sup>15</sup> A hira ake ano hoki tona ngakau aroha ki a koutou, i a ia e mahara ana ki te ngohengohe o koutou katoa, ki te wehi me te wiri i manako ai koutou ki a ia. <sup>16</sup> E hari ana ahau, no te mea ka marama toku whakaaro ki a koutou i nga mea katoa.

## Chapter 8

<sup>1</sup> Na, he whakarite atu tenei na matou ki a koutou, e oku teina, i te aroha noa o te Atua kua homai nei ki nga hahi o Makeronia; <sup>2</sup> Ahakoa he nui te whakamatautauranga a nga mate, whakaputaina nuitia ana mai e te nui o to ratou koa, i roto i to ratou tino rawakoretanga, nga tahua o ta ratou manaaki. <sup>3</sup> Ko ahau hei kaiwhakaatu, hihiko tonu ratou ki te tapae i nga mea i taea e ratou, ae ra, i nga mea ano kihai i taea e ratou; <sup>4</sup> Me te nui o ta ratou tohe ki a matou, kia manako matou ki tenei aroha noa, kia uru tahi hoki ki te mahi ki te hunga tapu: <sup>5</sup> Kihai hoki ratou i pera me ta matou i whakaaro ai, engari i te tuatahi tuku ana ratou i a ratou ano ki te Ariki, ki a matou hoki i runga i ta te Atua i pai ai. <sup>6</sup> Koia matou i whakahau ai i a Taituha, nana hoki tena mahi i timata, mana ano e whakaoti tenei aroha noa hoki i roto i a koutou. <sup>7</sup> Na, e hua na i a koutou nga mea katoa, te whakapono, te whai kupu, te matauranga, te whakaaro hohonu, me to koutou aroha ano ki a matou, kia hua ano hoki tenei mahi aroha noa a koutou. <sup>8</sup> Ehara taku i te korero a ture, engari he mea i te kakama o era atu, hei whakamatautau ano i te pono o to koutou aroha. <sup>9</sup> E matau ana hoki koutou ki te aroha noa o to tatou Ariki, o Ihu Karaiti, ara i a ia e whai taonga ana, whakarawakoretia iho ana ia, he whakaaro ki a koutou, kia whai taonga ai koutou i tona rawakoretanga. <sup>10</sup> A ka hoatu nei ahau i toku whakaaro mo tenei: he mea pai hoki tenei mo koutou, ko koutou na te tuatahi ki te timata i tera tau, ehara i te mea ko te mahi anake, engari ko te hiahia ano hoki. <sup>11</sup> Na inaianei whakaotia hoki te mahi; i hihiko na te whakaaro i mua, kia whai otinga hoki i roto i to koutou kaha. <sup>12</sup> Ki te mea hoki kei kona te ngakau hihiko, ka

whakaaroa ko nga mea i te tangata, haunga nga mea kahore i a ia. <sup>13</sup> Ehara taku korero i tenei, kia  
 mama ai etahi, a ko koutou kia taimaha; <sup>14</sup> Engari kia taurite; ko nga mea a koutou i hira i tenei  
 wa hei mea mo to ratou hapa, a ko nga mea a ratou e hira hei mea ma koutou ina hapa; kia rite ai:  
<sup>15</sup> Kia pera me te mea i tuhituhia, Ko te tangata i nui tana whakaemi kahore he tuhene; ko te tangata  
 i nohinohi tana kihai i hapa.  
<sup>16</sup> Otiia me whakawhetai atu ki te, Atua, nana nei i homai ki roto ki te ngakau o Taituha taua  
 kakama mo koutou. <sup>17</sup> I tahuri mai hoki ia ki ta matou whakahau; he nui no tona kakama i hihiko  
 ai ia ki te haere atu ki a koutou. <sup>18</sup> A na matou i tono tahi atu me ia te teina, ka paku nei ki nga  
 hahi katoa te whakamoemiti ki a ia i roto i te rongopai; <sup>19</sup> A ehara i te mea ko tera anake, engari i  
 whiriwhiria ano hoki ia hei hoa haere mo matou, ki te kawe i tenei aroha noa e mahia nei e matou  
 hei whakakororia mo te Ariki, hei whakakite hoki i to matou hihiko: <sup>20</sup> Me te tupato ano, kei whai  
 kupu tetahi tangata ki a matou mo enei taonga maha e whakahaerea nei e matou: <sup>21</sup> E whakaaro  
 ana hoki matou ki nga mea rangatira, ehara i te mea i te aroaro anake o te Ariki, engari i te aroaro  
 ano o nga tangata. <sup>22</sup> A kua tonoa atu ano e matou hei hoa mo raua to matou teina, kua maha nei  
 o matou kitenga i tona uaua i nga mea maha, heoi nui ke atu tona uaua inaianei, na te nui o te u o  
 tona whakaaro ki a koutou. <sup>23</sup> Ki te ui tetahi mo Taituha, ko ia toku hoa, he hoa mahi noku ki a  
 koutou: ki te ui ranei mo o matou teina, he karere ratou na nga hahi, he kororia no te Karaiti. <sup>24</sup> Na,  
 whakakitea e koutou ki a ratou i te aroaro o nga hahi te tohu o to koutou aroha, o ta matou  
 whakamanamana hoki mo koutou.

## Chapter 9

<sup>1</sup> Na, Mo te minitanga ki te hunga tapu, kahore noa he tikanga i tuhituhi atu ai ahau ki a  
 koutou: <sup>2</sup> E mohio ana hoki ahau ki to koutou ngakau hihiko, i whakamanamanatia ai koutou e  
 ahau ki nga tangata o Makeronia, ara ko ta Akaia kua rite noa ake i tera tau ra ano; a he tokomaha  
 o ratou i oho i to koutou ngakau hihiri. <sup>3</sup> Heoi kua tonoa atu nei e ahau nga teina, kei whakakahoretia  
 tenei wahi o taku whakamanamana ki ta koutou mahi; kia rite ai ta koutou, kia pera ai me taku i  
 mea ai: <sup>4</sup> Kei tupono ka haere atu i ahau etahi o Makeronia, a ka rokohanga atu kahore ano kia rite  
 noa ta koutou, na, ko te whakama mo matou, e kore matou e ki mo koutou, i tenei whakamanamana

<sup>5</sup>  
e kaha nei. Koia ahau i whakaaro ai he tika kia whakahaua nga teina, kia haere atu ratou i mua ki a koutou, kia wawe te rite i a ratou tenei manaaki a koutou kua korerotia ra, kia noho rite, kia tu a manaaki ai, kei rite ki te mea e manawapatia ana.

<sup>6</sup>  
Ko taku ia tenei, He torutoru a tetahi i rui ai, he torutoru ano ana e kokoti ai; a ko te mea he maha ana i rui ai, he maha ano ana e kokoti ai. <sup>7</sup> Kia rite te mahi a ia tangata ki tana i whakaaro ai i roto i tona ngakau; kua e tu a pouri, kua e whakauaua: ko ta te Atua hoki e aroha ai, ko te tangata

<sup>8</sup>  
ringa mahorahora. E taea ano hoki e te Atua te mea kia hira nga aroha noa katoa ki a koutou; na, i te mea ka ranea na o koutou taonga i nga mea katoa i nga wa katoa, kia hira ano a koutou mahi

<sup>9</sup>  
pai katoa: Kia rite ai ki te mea i tuhituhia, Kua titaritaria e ia, kua hoatu e ia ki te hunga rawakore:

<sup>10</sup>  
he pumau tonu tona tika ake ake. Na ma te kaihomai i te purapura ki te kaiwhakato, i te taro hoki hei kai, e homai, e mea kia maha ta koutou e whakato ai, e whakanui hoki nga hua o to koutou

<sup>11</sup>  
tika; Me te hua ano o koutou taonga i nga mea katoa hei ohaoha, e puta ai i a matou nga

<sup>12</sup>  
whakawhetai ki te Atua. Na tenei mahi hoki e minitatia nei i whiwhi ai te hunga tapu ki nga

<sup>13</sup>  
mea i kore i a ratou, a na reira ano i hua noa atu ai nga whakawhetai ki te Atua; Na te mea hoki ka kitea koutou i tenei mahi minita, ka whakakororia ratou i te Atua mo koutou kua whakaae nei, kua ngohengohe nei ki te rongopai o te Karaiti, a mo to koutou pono ki a koutou ohaoha ki a ratou

<sup>14</sup>  
me te katoa; I a ratou ano e inoi ana mo koutou, me te koingo ano ratou ki a koutou, he whakaaro

<sup>15</sup>  
hoki ki te aroha noa o te Atua ka nui rawa nei ki a koutou. Me whakawhetai ki te Atua mo tana mea homai noa, e kore nei e taea te korero.

## Chapter 10

<sup>1</sup>  
Na, naku ake, na Paora, tenei tohe ki a koutou na te tikanga mahaki me te ngakau ngawari o te Karaiti, he mea iti nei ahau i ahau i kona i roto i a koutou, i tawhiti nei ia e maia ana ki a koutou:

<sup>2</sup>  
Ae ra, e tohe ana ahau ki a koutou, kia kua ahau ina tae atu e maro ki te whakaputa i te maia, pera me taku e mea nei kia maia ki etahi, e whakaaro nei ki a matou, ano ko ta matou whakahere

<sup>3</sup>  
no te kikokiko. No te mea ahakoa haereere matou i roto i te kikokiko, ehara i te kikokiko ta matou

<sup>4</sup>  
whawhai; Ehara hoki nga rakau o ta matou pakanga i te mea no te kikokiko, engari he kaha i roto

<sup>5</sup>  
i te Atua hei whakahoro i nga pa kaha: Horo ana i a matou nga whakaaroaronga me nga mea ikeike katoa e whakakake ana kite matauranga ki te Atua, a riro parau mai ana nga whakaaro katoa,

ka meinga kia ngohengohe ki a te Karaiti; <sup>6</sup> Me te noho rite ano ki te whakapa riri mo nga mahi tutu katoa, ina tino ngohengohe rawa koutou.

<sup>7</sup> E titiro ana koutou ki nga mea kei mua i to koutou mata. Ki te u te whakaaro o tetahi no te Karaiti ia, me mahara ia ki tenei mea ano hoki, no te Karaiti ia, pena ano hoki matou. <sup>8</sup> Ahakoa hoki ahua rahi ake taku whakamanamana mo nga tikanga i a matou nei, na te Ariki nei i homai hei hanga ake i a koutou, ehara i te mea hei tuku i a koutou ki raro, e kore ahau e meinga kia whakama:

<sup>9</sup> Kia kua ahau e meatia e whakawehi ana i a koutou ki aku pukapuka. <sup>10</sup> Ko ana pukapuka hoki, e ai ki ta ratou, he taimaha, he kaha; ko tona tinana ia i a ia i konei he ngoikore, ko tana korero he korekore noa iho. <sup>11</sup> Kia mahara taua tu tangata ki tenei, na ko to matou ahua i nga kupu o nga pukapuka i a matou e ngaro mai nei, koia ano to matou rite ki nga mahi me i kona matou.

<sup>12</sup> E kore hoki matou e maia ki te whakauru atu, ki te whakariterite ranei i a matou ki etahi e whakapai nei ki a ratou ano: i a ratou ia e mehua nei i a ratou ki a ratou ano, e whakariterite nei i a ratou ki a ratou ano, kahore o ratou mataurangā. <sup>13</sup> E kore hoki matou e whakamanamana ki tua atu i to matou mehua, engari ka rite ki te mehua o te wahanga i whakaritea mai e te Atua ma matou,

e tae atu ai ki a koutou rawa. <sup>14</sup> Kahore hoki a matou totoro noa atu, e kiia ai kahore he taenga atu mo matou ki a koutou: i tae atu na hoki matou ki a koutou rawa na i runga i te rongopai o te Karaiti: <sup>15</sup>

E kore hoki matou e whakamanamana ki ko atu i to matou mehua, ara, ki nga mahi a etahi atu; engari e u ana to matou whakaaro, ka tupu haere to koutou whakapono, ka ai koutou hei whakanui i a matou, e tino rite rawa ai ki to matou ruri; <sup>16</sup> Kia kauwhautia ai te rongopai ki nga wahi i ko atu i a koutou, kia kua hoki e whakamanamana i runga i to te tangata ke ruri ki nga mea e noho

tata ana ki to matou ringa. <sup>17</sup> Ki te whakamanamana ia tetahi, me whakamanamana ia ki te Ariki.

<sup>18</sup> He teka hoki ko te tangata e whakapai ana ki a ia ano ka tikangatia, engari ko ta te Ariki e whakapai ai.

## Chapter 11

<sup>1</sup> Ko taku e hiahia nei kia ata hanga mai koutou ki ahau, kia iti nei, i ahau e wairangi nei: ae ra, kia ata hanga mai ano ki ahau. <sup>2</sup> Nui atu hoki toku ngakau ki a koutou, he ngakau no te Atua: kua oti hoki koutou te taumau e ahau ma te tane kotahi, kia tapaea atu ai hei wahine kore he ki a te Karaiti. <sup>3</sup> E wehi ana ia ahau, kei pera me Iwi i whakawaia e te tinihanga o te nakahi, kei kumea

atu o koutou whakaaro ki te he, kei mahue te tapatahi o te ngakau ki a te Karaiti. <sup>4</sup> Ki te tae atu hoki te tangata, me te kauwhau i tetahi Ihu e rere ke ana i ta matou i kauwhau ai, ki te whiwhi ranei koutou i tetahi wairua ke atu i tena i whiwhi na koutou, ki tetahi rongopai ranei e rere ke ana i ta koutou i whakaae ai, e tika a na koutou kia ata hanga ki a ia.

<sup>5</sup> Ki ahau hoki kahore rawa ahau i hoki iho i nga tino apotoro. <sup>6</sup> Na, ahakoa tangata ware ahau kite korero, kahore ia ki te matauranga; heoi i nga mea katoa kua tino kitea tenei i roto i a koutou.

<sup>7</sup> I hara oti ahau i ahau i whakaiti ra i ahau kia kake ai koutou, i kauwhau utukore ra i te rongopai

o te Atua ki a koutou? <sup>8</sup> I pahuatia e ahau era atu hahi, i tango utu ahau i a ratou kia minita ai ahau

ki a koutou. <sup>9</sup> A i ahau i a koutou na, a i kore tetahi mea maku, kahore ahau i taimaha ki tetahi: na nga teina hoki, i to ratou haerenga mai i Makeronia, i whakawhiwhi ahau ki nga mea i kore i ahau: i nga mea katoa hoki i tiaki ahau i ahau kei taimaha iho ki a koutou; ina, ka tiaki pera ano ahau i

ahau. <sup>10</sup> I te mea kei ahau te pono o te Karaiti, e kore tenei whakamanamana aku e araia e tetahi i

nga wahi o Akaia. <sup>11</sup> Na te aha? na te mea koia kahore oku aroha ki a koutou? e matau ana te Atua.

<sup>12</sup> Ko taku ia e mea nei, e meinga ano e ahau, kia motuhia atu ai e ahau te take a te hunga e hiahia ana ki te take; kia kitea ai ratou i runga i ta ratou e whakamanamana nei e rite tahi ana ano ki a

matou nei. <sup>13</sup> He apotoro teka hoki nga pera, he kaimahi i te tinihanga, e whakaahua ana i a ratou

kia rite ki nga apotoro a te Karaiti. <sup>14</sup> A ehara i te mea whakamiharo rawa; ina hoki a Hatana, e

whakaahua ke ana i a ia hei anahera mo te marama. <sup>15</sup> Heoi ehara i te mea nui ki te whakaahua ke ano ana minita i a ratou kia rite ki nga minita o te tika; na, ko to ratou whakamutunga e rite ki a ratou mahi.

<sup>16</sup> Me ki atu ano e ahau, Kaua tetahi e mea he wairangi ahau; a, ahakoa pena, heoi tahuri mai

ki ahau, ki te wairangi, kia whakamanamana ai ano ahau, he mea iti nei. <sup>17</sup> Ko taku e korero nei, ehara i te korero i runga i ta te Ariki, engari me te mea i runga i te wairangi, i tenei whakamanamana

ka kaha nei. <sup>18</sup> Na, ka tokomaha nei e whakamanamana i runga i to te kikokiko, ka whakamanamana

ano hoki ahau. <sup>19</sup> E pai ana hoki koutou, e ata hanga ana ki te hunga wairangi, he hunga whakaaro

hoki koutou. <sup>20</sup> Ka ata hanga hoki koutou ki te whakataurekareka tetahi i a koutou, ki te pau a koutou mea i tetahi, ki te tangohia e ia hei herehere, ki te whakakake ia, ki te pahiatia e ia to koutou

mata. <sup>21</sup> He korero whakaiti taku, ano he ngoikore matou. Na, ki te maia tetahi ki tetahi mea; he korero wairangi nei taku, ka maia ano ahau.

<sup>22</sup> He Hiperu ratou? ahau ano hoki. No Iharaira ratou? ahau ano hoki. He whanau ratou na  
<sup>23</sup> Aperahama? pera ano hoki ahau. He minita ratou na te Karaiti? He korero porangi taku nei, tera  
 atu ano toku; hira atu oku mauuitanga, maha noa atu oku meatanga ki roto ki nga whare herehere,  
<sup>24</sup> nui noa atu oku whiunga, maha atu oku mate. E rima nga wa i whiua ai ahau e nga Hurai, e wha  
<sup>25</sup> tekau panga o te whiu, haunga te kotahi. E toru oku whiunga ki te rakau, kotahi toku akinga ki  
<sup>26</sup> te kohatu, tuatoru ahau ki te kaipuke pakaru, kotahi oku po, kotahi oku ra i te rire; I nga  
 haereerenga maha, i nga oranga noatanga i nga awa, i nga oranga noatanga i nga kaipahua, i nga  
 oranga noatanga i oku whanaunga, i nga oranga noatanga i nga tauwi, i nga oranga noatanga i te  
 pa, i nga oranga noatanga i te koraha, i nga ora nga noatanga i te moana, i nga oranga noatanga i  
<sup>27</sup> nga teina teka; Mauiui ana, nenge ana, he maha nga mataaratanga, nga matekaitanga, nga  
<sup>28</sup> matewaitanga, he maha nga wa i nohopuku ai, i matao ai, i kore ai he kakahu. Hei tapiri mo nga  
 mea o waho, ko te mea e pehi nei i ahau i tenei ra, i tenei ra, ko te manukanuka ki nga hahi katoa.  
<sup>29</sup> Ko wai te ngoikore ana, a kahore ahau e ngoikore? ko wai kua tutuki te waewae, a kahore ahau  
<sup>30</sup> e pawerawera? Ki te takoto te tikanga kia whakamanamana ahau, me whakamanamana ahau ki  
<sup>31</sup> toku ngoikoretanga. E matau ana te Atua, te Matua o to tatou Ariki, o Ihu, koia nei te  
<sup>32</sup> whakapaingia ana ake tonu atu, kahore aku teka. I Ramahiku e tiakina ana e te kawana i raro i  
<sup>33</sup> a Kingi Areta te pa o nga tangata o Ramahiku, he mea kia hopukina ai ahau: Heoi tukua iho ana  
 ahau i roto i te kete, ra te matapihi, ra te taiepa kohatu, a mawhiti atu ana i roto i ona ringa.

## Chapter 12

<sup>1</sup> Ehara hoki i te pai kia whakamanamana ahau; heoi me neke atu ahau ki nga putanga, ki nga  
<sup>2</sup> whakakitenga mai a te Ariki. E matau ana ahau ki tetahi tangata i roto i a te Karaiti, ka tekau ma  
 wha enei tau, i roto ranei i te tinana, kahore ahau e matau; i waho ranei o te tinana, kahore ahau e  
 matau: ko te Atua te matau ana; kahakina atu ana taua tangata ki te tuatoru ra ano o nga rangi.  
<sup>3</sup> Heoi matau tonu ahau ki taua tangata, i roto ranei i te tinana, i waho ranei o te tinana, kahore ahau  
<sup>4</sup> e matau: ko te Atua te matau ana; Kahakina atu ana ia ki Pararaiha, a rongo ana i nga mea e kore  
<sup>5</sup> e taea te korero, e kore ano e tika kia korerotia e te tangata. Ka whakamanamana ahau ki taua



tangata: otiia e kore ahau e whakamanamana ki ahau ake, engari ki oku ngoikoretanga. <sup>6</sup> Ki te hiahia hoki ahau kia whakamanamana, e kore ahau e wairangi; ka korero tonu ahau i te mea pono: heoi ka waiho e ahau, kei nui atu ta tetahi e whakaaro ai ki ahau i tana e kite nei i ahau, i tana ranei

<sup>7</sup> e rongo ai ki ahau. Na, i te tino nui rawa o nga whakakitenga mai, he mea kei kake rawa ake ahau, kua homai ki ahau he koikoi i te kikokiko, he anahera na Hatana hei kuru i ahau, kia kua ai ahau

<sup>8</sup> e kake rawa. E toru aku inoinga ki te Atua mo tenei mea kia neke atu i ahau. <sup>9</sup> A kua mea mai ia ki ahau, E ranea ana toku atawhai hei mea mou: mana tonu hoki toku kaha i runga i te ngoikore. Na pai rawa atu ki ahau te whakamanamana ki oku ngoikore, kia ai ai te kaha o te Karaiti hei taupoki

<sup>10</sup> moku. Mo reira ahua eka tonu ahau ki nga ngoikoretanga, ki nga tukinotanga, kinga aitua, ki nga whakatoinga, ki nga rarunga, mo te Karaiti; i ahau hoki e ngoikore ana ko reira ahau kaha ai.

<sup>11</sup> Na kua wairangi ahau: he kaha mo ta koutou ki ahau: i tika ke hoki ma koutou ahau e whakapai: kahore hoki ahau i hoki iho i nga tino apotoro i te aha, i te aha, ahakoa ra he kahore noa

<sup>12</sup> iho ahau nei. He pono i mahia i roto i a koutou nga tohu o te apotoro, pau rawa ano hoki te

<sup>13</sup> manawanui, i runga i nga tohu, i nga mea whakamiharo, i nga merekara. He aha koia te mea i iti iho ai koutou i era atu hahi, ko tenei anake pea, ko toku korenga e taimaha ki a koutou? whakarerea

<sup>14</sup> noatia iho tenei he oku. Na, ko te tuatoru tenei o nga wa ka takatu nei ahau ki te haere atu ki a koutou: e kore ano koutou e pehia e ahau ki tetahi mea maku; ehara hoki i te mea ko ta koutou taku e rapu nei, engari ko koutou: na ehara ma nga tamariki te whakapuranga ta onga ma nga matua,

<sup>15</sup> engari ma nga matua ma nga tamariki. Na ka tino pai ahau ki te whakapau i aku, kia whakapaua hoki ahau i te meatanga mo o koutou wairua. Mehemea i hira ake toku aroha ki a koutou, e hoki

<sup>16</sup> iho ranei te aroha moku? Heoi ra, kihai ahau i whakataimaha i a koutou; engari i toku koroke,

<sup>17</sup> hopukina ana koutou e ahau ki te tinihanga. I meinga ranei e ahau tetahi o te hunga i tonoa atu

<sup>18</sup> e ahau ki a koutou hei whakapati i a koutou taonga moku? I whakahaua atu e ahau a Taituha, i tonoa atu hoki tetahi teina hei hoa mona. I whakapati ranei a Taituha i a koutou taonga mona? he teka ianei i runga i te Wairua kotahi ta maua haere? he teka ranei i haere tahi maua ko aua tapuwae

<sup>19</sup> ra ano? Tenei koutou te mahara nei i enei wa katoa he whakatikatika mo matou ta matou ki a koutou. I te aroaro o te Atua e korero ana matou i roto i a te Karaiti: otiia ko enei mea katoa, e oku

<sup>20</sup> hoa aroha, hei pai mo koutou, hei hanga mo te whare. E wehi ana hoki ahau, kei rokohanga atu koutou e ahau, ina tae atu, kahore e rite ki taku e pai nei, kei kitea hoki ahau e koutou, kahore e rite ki ta koutou e pai ai: kei rokohanga atu he whawhai, he hae, he riri, he totohe, he ngautuara, he ko

<sup>21</sup> muhumuhu, he whakaputa, he tutu; Kei whakaititia ahau e toku Atua i o koutou aroaro, ina tae atu ano ahau, a kei tokomaha hoki e tangihia e ahau o te hunga i hara i mua, a kahore ano i ripeneta mo te poke, mo te moepuku, mo te hiahia taikaha, i mahia nei e ratou.

## Chapter 13

<sup>1</sup> Hei tuatoru tenei mo oku haerenga atu ki a koutou. Ma te mangai o nga kaiwhakaatu tokorua,  
 tokotoru ranei, ka u ai nga kupu katoa. <sup>2</sup> Kua korero ano ahau i mua, ka korero ano inaianei, pera  
 i te tuarua o oku wa i kona, a i ahau e ngaro mai nei, ki te hunga i hara i mua, ki era katoa ano hoki,  
 na, ki te tae atu ano ahau, e kore e tohungia e ahau; <sup>3</sup> E rapu tohu na hoki koutou o te Karaiti e  
 korero ana i roto i ahau; kahore nei ia e ngoikore ki a koutou, engari e kaha ana i roto i a koutou:  
<sup>4</sup> I ripekatia hoki ia i te mea e ngoikore ana, otiia kei te ora ia, na te kaha o te Atua. He ngoikore  
 hoki matou i roto i a ia, heoi ka ora tahi ano me ia, he meatanga na te kaha o te Atua ki a koutou.  
<sup>5</sup> Whakamatauria iho koutou ano, mehemea ranei koutou kei roto i te whakapono; tirohia iho o  
 koutou tohu e koutou ano. Tena ranei kahore koutou e matau ana ki a koutou ano, kei roto i a koutou  
 a Ihu Karaiti? ki te mea ia ehara koutou i te mea akiri. <sup>6</sup> Otira e u ana toku whakaaro, e matau ana  
 ano koutou, ehara matou i te mea akiri.  
<sup>7</sup> Na, ko ta matou inoi tenei ki te Atua, kia kua koutou e mea i tetahi kino; ehara i te mea mo  
 matou kia kitea e paingia ana, engari mo koutou kia mahi i te pai, ahakoa ko matou hei mea akiri.  
<sup>8</sup> E kore hoki e taea e matou tetahi mea e he ai te pono, engari te mea e u ai te pono. <sup>9</sup> E hari ana  
 hoki matou ina ngoikore matou, ina kaha koutou: ko ta matou hoki tenei e inoi nei, ko koutou kia  
<sup>10</sup> tino tika. Koia ahau ka tuhituhi atu nei i enei mea, i ahau e ngaro mai nei, kei tae atu ahau ki  
 kona, ka koi taku i runga i te mana kua tukua mai nei e te Ariki ki ahau hei hanga mo te whare,  
 ehara i te mea hei wahi.  
<sup>11</sup> Kati ra, e oku teina, hei kona. Kia tino tika; kia marie te ngakau; kia kotahi te whakaaro; kia  
 mau te rongoro: a tera te Atua o te aroha, o te maunga rongoro, e noho ki a koutou. <sup>12</sup> Oha atu tetahi  
 ki tetahi, hei te kihi tapu ano. <sup>13</sup> Tenei te hunga tapu katoa te oha atu nei ki a koutou. <sup>14</sup> Kia tau  
 ki a koutou katoa te atawhai o te Ariki, o Ihu Karaiti, me te aroha o te Atua, me te whiwhinga  
 tahitanga ki te Wairua Tapu. Amine.

## Galatians

### Chapter 1

<sup>1</sup> Naku, na Paora, na te apotoro, kihai nei i tonoa e te tangata, kihai ano hoki ma roto i te tangata, engari i ma roto i a Ihu Karaiti, i te Atua Matua ano hoki, nana nei ia i whakaara i te hunga mate;

<sup>2</sup> Na nga teina katoa hoki i ahau nei, ki nga hahi o Karatia. <sup>3</sup> Kia tau ki a koutou te aroha noa me te rangimarie, he mea na te Atua Matua, na to tatou Ariki hoki, na Ihu Karaiti, <sup>4</sup> I tuku nei i a ia ano mo o tatou hara, kia whakaorangia ai tatou e ia i tenei ao kino, i runga i ta te Atua, i ta to tatou Matua i pai ai. <sup>5</sup> Waiho atu i a ia te kororia ake ake. Amine.

<sup>6</sup> Miharo tonu ahau ki te hohoro o to koutou nekehanga atu i te kaikaranga o koutou i runga i te aroha noa o te Karaiti ki tetahi rongopai ke: <sup>7</sup> Ehara nei ia i te mea ke atu; engari tena tetahi hunga e whakararuraru ana i a koutou, e mea ana kia whakaputaia ketia te rongopai o te Karaiti.

<sup>8</sup> Otira, ahakoa ko matou, ko tetahi anahera ranei o te rangi, ki te kauwhau i te rongopai ki a koutou, i te mea rere ke i ta matou i kauwhau ai ki a koutou, kia kanga ia. <sup>9</sup> Kia rite ki ta matou i ki ai i mua, ka ki ano ahau inaianei, ki te puta ke te kauwhau a tetahi ki a koutou i tera kua riro i a koutou, kia kanga ia.

<sup>10</sup> He tangata ranei, ko te Atua ranei, taku e kukume nei? he tangata ranei aku e whai nei kia whakamanawarekatia? mehemea kei runga tonu ahau i te whakamanawareka tangata, ehara ahau i te pononga na te Karaiti. <sup>11</sup> Na, kia mohio mai koutou, e oku teina, ko te rongopai i kauwhautia e ahau, ehara i te tangata. <sup>12</sup> Ehara hoki na te tangata i riro mai ai i ahau, nana ranei i whakaako ki ahau, engari i haere mai ki ahau ra te whakakitenga mai a Ihu Karaiti. <sup>13</sup> Kua rongo na hoki koutou ki taku whakahaere i mua i runga i ta nga Hurai tikanga, nui atu hoki taku tukino i te hahi a te Atua, mongamonga ana i ahau: <sup>14</sup> I hipa noa atu ahau ki mua i etahi tokomaha tonu o matou, rite nga tau ki oku, i waenganui i toku iwi ki te tikanga a nga Hurai, hira noa atu hoki toku ngakau ki nga whakarereanga iho a oku matua. <sup>15</sup> Otira i te mea ka pai te Atua, nana nei ahau i momotu mai i roto tonu i te kopu o toku whaea, i karanga hoki, he meatanga na tona aroha noa, <sup>16</sup> Ki te whakakite i tana Tama i roto i ahau, kia kauwhautia ai ia e ahau ki nga tauwiwi; i reira tonu iho kihai ahau i kororerero ki te kikokiko, ki te toto: <sup>17</sup> Kihai ano ahau i haere atu ki Hiruharama, ki te hunga i apotoro i mua i ahau; heoi haere ana ahau ki Arapia, a hoki ana mai ki Ramahiku. <sup>18</sup> A muri iho i te takanga o nga tau e toru ka haere ake ahau ki Hiruharama kia kite i a Pita, a tekau ma rima nga ra i noho ai ahau ki a ia. <sup>19</sup> Engari kihai ahau i kite i tetahi atu o nga apotoro, ko Hemi anake, ko te teina o te Ariki. <sup>20</sup> Na, ko nga mea e tuhituhia atu nei e ahau ki a koutou, nana, kei te aroaro

21 tenei o te Atua, kahore aku teka. Muri iho ka haere ahau ki nga wahi o Hiria, o Kirikia; 22 Kihai  
 ano toku mata i mohiotia e nga hahi o Huria i roto i a te Karaiti: 23 I rongo kau ratou, Ko te tangata  
 tukino i a matou i mua, e kauwhautia ana e ia inaianei te whakapono i whakangaromia ra e ia. 24 A  
 whakakororia ana ratou i te Atua mo tana ki ahau.

## Chapter 2

1 Muri iho, kia pahure nga tau tekau ma wha, ka haere ano ahau ki Hiruharama maua ko Panapa,  
 me te mau ano i a Taituha hei hoa moku. 2 Na te whakakitenga mai hoki ahau i haere ai, a  
 whakatakotoria ana e ahau ki a ratou te rongopai e kauwhautia nei e ahau ki nga tauwi; otiia i  
 meatia pukutia ki te hunga whai ingoa, kei maumau kau taku oma onaianei, o mua ra ranei. 3 Kihai  
 ia a Taituha, toku hoa, he Kariki nei ia, i meinga kia kotia: 4 Mo nga teina teka hoki i whakaurua  
 pukutia mai, i haere puku mai nei ki te tiroiro i to matou ahua, he herekore i roto i a Karaiti Ihu,  
 kia whakataurekareka ai ratou i a matou. 5 Kihai rawa matou i whakangawari iho, i rongo ki a  
 ratou, ahakoa kotahi haora; he mea kia mau ai te pono o te rongopai ki a koutou. 6 Otira ko te hunga  
 whai ingoa ahakoa he aha ratou, kahore tahi he tikanga ki ahau: kahore a te Atua whakapai ki te  
 kanohi tangata kihai ratou, te hunga whai ingoa, i whakaatu mea ki ahau: 7 Engari to ratou kitenga  
 kua tukua ki ahau te rongopai ki te kotingakore pera hoki me tera ki kotinga kua tukua ra ki a Pita;  
 8 Ko te kaimahi hoki i roto i a Pita hei apotoro ki te kotinga, mahi ana ano ia i roto i ahau ki nga  
 tauwi: 9 Na, no ratou ka matau ki te aroha noa kua homai ki ahau, ka homai e Hemi, e Kipa, e  
 Hoani, i meinga nei hei pou, nga ringa matau hei whakahoatanga ki a maua ko Panapa, mo maua  
 kia haere ki nga tauwi, ko ratou ia ki te kotinga: 10 Otiia me mahara maua ki te hunga rawakore;  
 he mea ano hoki tena i hihiko ai ahau.  
 11 Na, i te taenga mai o Pita ki Anatioka, ka whakatika atu ahau ki a ia he kanohi, he kanohi,  
 no te mea kua tika kia whakahengia ia. 12 I mua hoki o te taenga mai o etahi i a Hemi, e kai tahi  
 ana ia me nga tauwi: no to ratou taenga mai ia, neke atu ana ia, momotu ke ana i a ia; i matakū  
 hoki ki te hunga o te kotinga. 13 I uru ano era atu Hurai ki tona tinihanga: heoi riro pu a Panapa i  
 to ratou tinihanga. 14 Otira, i toku kitenga kihai ratou i haere tika i runga i te pono o te rongopai,  
 ka mea ahau ki a Pita i te aroaro o ratou katoa, ki te mea ko koe, he Hurai, ka whakatauiwi i a koe,

a kahore e whakahurai, me pehea e taea ai e koe te mea nga tauiw i kia Hurai? <sup>15</sup> Ko tatou, ko nga  
 Hurai tupu nei, ehara nei i te hunga hara no nga tauiwi, <sup>16</sup> Kua mohio nei ehara nga mahi a te ture  
 i te mea e tika ai te tangata, engari ko te whakapono ki a Ihu Karaiti; kua whakapono ano tatou ki  
 a Ihu Karaiti, kia meinga ai te whakapono ki a te Karaiti hei tika mo tatou, kahore ia nga mahi a te  
 ture; no te mea kahore rawa he kikokiko e tika i nga mahi o te ture. <sup>17</sup> Na, i a tatou e whai nei kia  
 whakatikaia i roto i a te Karaiti, ki te kitea tatou nei he hunga hara, he minita ranei a te Karaiti ki  
 te hara? Kahore rapea. <sup>18</sup> Ki te mea hoki ka hanga ano e ahau nga mea i wahia e ahau, e whakakite  
 ana ahau i ahau ano, he tangata hara. <sup>19</sup> Na te ture hoki ahau i tupapaku ai ki te ture, kia ora ai ahau  
 ki te Atua. <sup>20</sup> Kua ripekatia tahitia ahau me te Karaiti: a e ora nei, ehara i te mea ko ahau, engari  
 ko te Karaiti e ora ana i roto i ahau: e ora nei hoki ahau i roto i te kikokiko, he oranga na te  
 whakapono ki te Tama a te Atua, i aroha nei ki ahau, i tuku ne i i a ia moku. <sup>21</sup> Kahore aku  
 whakakahore i te aroha noa o te Atua: mehemea hoki i na runga mai te tika i te ture, maumau mate  
 noa a te Karaiti.

### Chapter 3

<sup>1</sup> E nga Karatia whakaarokore, na wai koutou i whaiwhaia, i whakakitea nuitia na a Ihu Karaiti  
 ki o koutou kanohi, he mea ripeka? <sup>2</sup> Heoi taku e mea ana kia whakaakona mai e koutou, No nga  
 mahi ranei o te ture i roto mai ai te Wairua i a koutou, na te mea ranei ka rongo ki te whakapono?  
<sup>3</sup> Ha, kia pena koutou te whakaarokore? i runga i te Wairua ta koutou timatanga, a me whakaoti  
 ranei e koutou i runga i te kikokiko? <sup>4</sup> He huakore noa iho ranei o koutou matenga maha? ki te mea  
 ra he mea huakore. <sup>5</sup> Na, ko te kaiwhakawhiwhi i a koutou ki te Wairua, e mahi nei hoki i nga  
 merekara i roto i a koutou, no nga mahi ranei o te ture tana, no te rongo ranei ki te whakapono?  
<sup>6</sup> Ka rite hoki ki a Aperahama i whakapono ki te Atua, a whakairia ana ki a ia hei tika. <sup>7</sup> Na,  
 kia matau koutou, ko te hunga o te whakapono, he tamariki enei na Aperahama. <sup>8</sup> A, i te kitenga  
 o te karaipiture i mua, he whakapono ta te Atua hei whakatika mo nga tauiwi, ka kauwhautia  
 wawetia te rongopai ki a Aperahama, Mau ka manaakitia ai nga iwi katoa. <sup>9</sup> Ina, ko te hunga o te  
 whakapono, e manaakitia ngatahitia ana me Aperahama i whakapono ra. <sup>10</sup> Ko te hunga katoa hoki  
 o nga mahi o te ture, kei raro ratou i te kanga: kua oti hoki te tuhituhi, Ka kanga nga tangata katoa

kahore e mau ki nga mea katoa kua oti te tuhituhi ki te pukapuka o te ture, hei mahi ma ratou.

11

He hanga marama ano tenei, e kore e tika i te ture tetahi tangata ki te aroaro o te Atua: Ma te whakapono hoki e ora ai te tangata tika. 12 He teka hoki no te whakapono te ture: engari, Ki te

mahia aua mea e te tangata, ma aua mea ia e ora ai. 13 Kua hokona tatou e te Karaiti i roto i te kanga a te ture, i a ia nei i meinga hei kanga mo tatou: kua oti hoki te tuhituhi, He mea kanga nga

tangata katoa e whakairia ki runga ki te rakau: 14 Kia tae ai ki nga tauwi te manaaki o Aperahama i roto i a Karaiti Ihu; kia riro mai ai i a tatou te kupu homai o te Wairua, he mea ma roto i te

whakapono. 15 E oku teina, he kupu tangata taku nei; Ahakoa he kawenata na te tangata, ki te mea

ka oti te whakau, kahore he tangata hei turaki, hei tapiri ranei. 16 Na, i korerotia nga kupu whakaari ki a Aperahama, ki tana whanau ano hoki. Kihai ia i mea, Ki nga whanau, me te mea he tokomaha;

engari me te mea he kotahi, Ki tau whanau, ko te Karaiti hoki ia. 17 Na ko taku kupu tenei; Ko te kawenata i whakaukia e te Atua i mua ra, e kore e ahei te ture, no muri iho nei o nga tau e wha rau

e toru tekau i tae mai ai, ki te turaki, hei whakakahore i te kupu whakaari. 18 Mehemea hoki na te ture i riro mai ai te kainga, heoi ehara i te mea na te kupu whakaari; otira i na runga mai i te kupu whakaari ta te Atua homaitanga ki a Aperahama.

19

Hei aha ra te ture? I tapiritia mai mo nga pokanga ketanga, kia tae mai ra ano te whanau mona nei te kupu whakaari; he mahinga na nga anahera, i roto i te ringa o te takawaenga. 20 Na,

he teka mo te kotahi te takawaenga; kotahi ia te Atua. 21 He turaki ranei ta te ture i a te Atua kupu whakaari? Kahore rapea: me i homai hoki he ture, he mea kaha ki te whakaora, ina kua puta ake

te tika i te ture. 22 Heoi kua kopania nga mea katoa e te karaipiture ki raro o te hara, kia homai ai

ki te hunga e whakapono ana te mea i whakaaria mai i runga i te whakapono ki a Ihu Karaiti. 23 I mua ia o te taenga mai o te whakapono, e puritia ana tatou i raro i te ture, he mea kopani, kia taea

ra ano te whakapono e whakapuakina nei i muri. 24 Heoi kua meinga nei te ture hei kaiwhakaako

mo tatou, hei arahi ki a te Karaiti, kia tika ai tatou i te whakapono. 25 Otira ka tae mai nei te

whakapono, mutu ake to tatou meatanga mai e te kaiwhakaako. 26 He tamariki katoa hoki koutou

na te Atua, he mea na te whakapono ki a Karaiti Ihu. 27 Ko te hunga katoa hoki o koutou kua iriiria

ki roto ki a te Karaiti, kua kakahuria e koutou a te Karaiti. 28 Kahore he Hurai, kahore he Kariki, kahore he pononga, kahore he rangatira, kahore he tane, wahine ranei; he tangata kotahi tonu hoki

koutou katoa i roto i a Karaiti Ihu. 29 A ki te mea na te Karaiti koutou, he whanau na Aperahama, mo koutou hoki te kainga i runga i te kupu whakaari.

## Chapter 4

<sup>1</sup> Ko taku kupu ia tenei, I te mea he tamariki tonu te tangata mona te kainga, kahore ia e rere  
ke i te pononga, ahakoa ko te rangatira ia o nga mea katoa; <sup>2</sup> Engari e meatia ana e nga kaitohutohu,  
e nga kaititiro, kia taea ra ano te wa i whakaritea e te papa. <sup>3</sup> Waihoki ko tatou, i te mea e tamariki  
ana, he pononga tatou na nga mea timatanga o te ao: <sup>4</sup> A, no ka tutuki te taima, ka tonoa mai e te  
Atua tana Tama, i whanau i te wahine, i whanau i raro i te ture, <sup>5</sup> Hei hoko i te hunga i raro i te  
ture, kia whiwhi ai tatou ki te whakatamarikitanga. <sup>6</sup> Na, i te mea he tamariki koutou, kua tonoa  
mai e te Atua te Wairua o tana Tama ki roto ki o koutou ngakau, e karanga ana, E Apa, e Pa. <sup>7</sup> Heoi  
kua mutu tou ponongatanga, engari kua tama koe; a, ki te mea he tama, na mou nga mea i roto i te  
Atua.  
<sup>8</sup> Heoi i reira, i te mea kihai koutou i matau ki te Atua, he pononga koutou na nga mea ehara  
<sup>9</sup> nei i te atua tupu. Inaianei ia, i te mea ka matau nei koutou ki te Atua, ara ka matauria nei koutou  
e te Atua, he aha koutou ka tahuri ai ano ki aua mea ngoikore, rawakore, ki nga mea timatanga, e  
hokia na e to koutou hiahia, kia waiho koutou hei pononga ma aua mea? <sup>10</sup> E mau ana koutou ki  
nga ra, ki nga marama, ki nga wa, ki nga tau. <sup>11</sup> E manawapa ana ahau ki a koutou, kei kore he  
hua mo taku i mahi ai i roto i a koutou.  
<sup>12</sup> E oku teina, ko taku tohe tenei ki a koutou, kia rite ki ahau; e rite ana hoki ahau ki a koutou:  
kahore a koutou mahi he ki ahau. <sup>13</sup> E matau ana koutou he mea na te ngoikore e toku kikokiko  
taku kauwhau i te rongopai ki a koutou i te tuatahi. <sup>14</sup> Heoi kihai koutou i whakahawe, i whakakino  
ki toku whakamatautauranga i toku kikokiko: na, tahuri mai ana koutou ki ahau, ano he anahera  
ahau na te Atua, me te mea ano ko Ihu Karaiti. <sup>15</sup> Kei hea ra tera hari o koutou? He kaiwhakaatu  
hoki ahau mo ta koutou, me i taea kua tikarohia e koutou o koutou kanohi, a kua homai ki ahau.  
<sup>16</sup> Koia, kua hoariritia ranei ahau ki a koutou, moku i korero i te pono ki a koutou?  
<sup>17</sup> Ko ta ratou whaiwhai i a koutou ehara i te pai: engari e mea ana ratou kia tutakina mai  
koutou, kia whai ai ko koutou ki a ratou. <sup>18</sup> He mea pai ia kia matenuitia i runga i te pai i nga wa  
katoa, kauaka hoki i toku nohoanga anake ki a koutou.

<sup>19</sup> E aku tamariki, ka mamae nei ano ahau mo koutou, kia whai ahua ra ano a te Karaiti i roto  
<sup>20</sup> i a koutou, Ko taku hiahia me i kona ahau i a koutou na aiane, kia puta ke ano toku reo; no te  
 mea e ruarua ana ahau ki a koutou.  
<sup>21</sup> Ki mai ki ahau, e te hunga e hiahia ana kia noho i raro i te ture, kahore ianei koutou e rongu  
 ki ta te ture? <sup>22</sup> Kua oti hoki te tuhituhi, tokorua nga tama a Aperahama, kotahi na te wahine  
 pononga, kotahi na te wahine rangatira. <sup>23</sup> Ko ta te pononga no te kikokiko tona whanautanga: ko  
 ta te wahine rangatira ia he mea korero mai i mua. <sup>24</sup> He mea whakarite aua mea: ko nga wahine  
 nei nga kawenata e rua; kotahi no Maunga Hinai, whanau ake ana hei taurekareka, ko Hakara tenei.  
<sup>25</sup> Na ko tenei Hakara ko Maunga Hinai i Arapia, e rite ana hoki ki Hiruharama onaianei, he pononga  
 nei hoki ia, ratou ko ana tamariki. <sup>26</sup> Tena ko te Hiruharama i runga he mea herekore, ko ia to tatou  
 whaea. <sup>27</sup> Kua oti hoki te tuhituhi, Kia hari, e te pakoko kahore nei e whanau; hamama, karanga,  
 e te mea kahore nei kia whakamamae; he tini ke hoki nga tamariki a te mea mahue i a te mea whai  
<sup>28</sup> tane. Na, ko tatou nei, e oku teina, e rite ana ki a Ihaka, he tamariki na te kupu whakaari. <sup>29</sup> Engari  
 e rite ana ano ki to mua, ko te mea no te kikokiko nei tona whanautanga, whakatoia ana e ia te tama  
 no te Wairua nei tona; e pera ana ano inaianei. <sup>30</sup> Heoi e pehea ana ta te karaipiture? Peia atu te  
 wahine pononga raua ko tana tama: e kore hoki te tama a te wahine pononga e whiwhi tahi me te  
 tama a te wahine rangatira ki te taonga. <sup>31</sup> Na, ehara tatou, e oku teina, i te tamariki na te wahine  
 pononga, engari na te wahine rangatira.

## Chapter 5

<sup>1</sup> Na te Karaiti i wewete te here i a tatou: na reira kia u te tu, kei mau hoki ki roto ki te ioka  
 pononga. <sup>2</sup> Nana, tenei ahau, a Paora te mea nei ki a koutou, Ki te kotia koutou, e kore koutou e  
 whai pai i a te Karaiti. <sup>3</sup> He whakaatu tuarua tenei naku ki nga tangata katoa e kotia ana, kua mau  
 ratou i te ture kia mahia katoatia. <sup>4</sup> Kua wehea atu koutou i a te Karaiti, e te hunga e whakatikaia  
 ana e te ture, kua taka iho koutou i runga i te aroha noa. <sup>5</sup> Ko tatou hoki, na te Wairua ta tatou tatari  
 ki te tika e tumanakohia atu nei, e ahu mai nei i te whakapono: <sup>6</sup> I roto hoki i a Karaiti Ihu kahore  
 o te kotinga wahi, kahore o te kotingakore; engari ko te whakapono e mahi ana i runga i te aroha.



<sup>7</sup> I pai ta koutou oma; na wai koutou i whakaware, i kore ai koutou e rongu ki te pono? <sup>8</sup> Ehara  
 tenei whakaaro i te mea na te kaikaranga i a koutou. <sup>9</sup> He iti te rewena, rewenatia ake te puranga  
 katoa. <sup>10</sup> E whakapono ana ahau ki a koutou i roto i te Ariki, e kore e rere ke o koutou whakaaro:  
 ko te kaiwhakararu ia i a koutou, ahakoa ko wai, mana ano tona whakawakanga e pikau. <sup>11</sup> Me  
 ahau ano, e oku teina, ki te mea he kauwhau tonu nei taku i te kotinga, he aha ahau ka whakatoia  
 tonutia ai? penei kua kore to te ripeka tutukitanga waewae. <sup>12</sup> Pai kau ki ahau me i motuhia atu te  
 hunga e whakararu na i a koutou.  
<sup>13</sup> Kua karangatia nei hoki koutou, e oku teina, ki te tikanga herekore; kua ia ta koutou tikanga  
 herekore e waiho hei whakaoho i te kikokiko, engari me mahi koutou tetahi ki tetahi i runga i te  
 aroha. <sup>14</sup> E takoto topu ana hoki te ture katoa i roto i te kupu kotahi, ara, Kia aroha koe ki tou hoa  
 tata, ano ko koe. <sup>15</sup> Ki te ngau ia koutou, ki te kai tetahi i tetahi, kia tupato kei pareho tetahi i tetahi.  
<sup>16</sup> Ko taku kupu ia tenei, Haere i roto i te Wairua, a e kore e whakaritea e koutou te hiahia o te  
 kikokiko. <sup>17</sup> E hiahia ana hoki te kikokiko tika ke i te Wairua, me te Wairua tika ke i te kikokiko:  
 e whawhai ana hoki enei tetahi ki tetahi: te taea nga mea i hiahia ai koutou. <sup>18</sup> Ki te arahina ia  
 koutou e te Wairua, kahore koutou i raro i te ture. <sup>19</sup> Na e kitea ana nga mahi a te kikokiko, ara he  
 moe tahae, he poke, he hiahia taikaha, <sup>20</sup> He karakia whakapakoko, he makutu, he pakanga, he  
 totohe, he hae, he riri, he wawahi, he wehewehe, he titore, <sup>21</sup> He hao, he haurangi, he kakai, me  
 nga mea e rite ana ki enei: me korero wawe e ahau enei mea ki a koutou, me pera me taku i korero  
 ai i mua, ko te hunga e mahi ana i nga mea penei, e kore e whiwhi ki te rangatiratanga o te Atua.  
<sup>22</sup> Ko te hua ia o te Wairua, he aroha, he hari, he rangimarie, he manawanui, he ngawari, he ngakau  
 pai, he whakapono, <sup>23</sup> He ngakau mahaki, he ngakau kua taea te pehi: kahore he ture e riria ai enei  
 mea. <sup>24</sup> Ko te hunga ia o te Karaiti, kua ripekatia e ratou te kikokiko, me ona hihiritanga, me ona  
 hiahia. <sup>25</sup> Ki te mea e ora ana tatou i roto i te Wairua, kia haere ano tatou i roto i te Wairua. <sup>26</sup> Kei  
 whaia e tatou te kororia huakore, te whakapataritari tetahi ki tetahi, te hae tetahi ki tetahi.

## Chapter 6

<sup>1</sup> E oku teina, ahakoa ra i rokohanga te tangata e tetahi he, ma koutou, ma te hunga i te Wairua, e whakaara ake ia i runga i te wairua mahaki; me te titiro iho ano ki a koe, kei whakamatautauria hoki ko koe. <sup>2</sup> Pikaua e tetahi nga whakataimaha o tetahi, hei whakarite i ta te Karaiti ture. <sup>3</sup> Ki te mahara hoki tetahi tangata ki a ia ano he mea nui ia, i te mea he kore noa iho ia, e nuka ana ia ki a ia ano. <sup>4</sup> Engari ma ia tangata e whakamatau tana ake mahi, ka ai ai he mea hei whakamanamanatanga mona ki tana anake, kahore ki ta tetahi atu. <sup>5</sup> Ka riro hoki ma ia tangata e pikau tana kawenga. <sup>6</sup> Ko te tangata e whakaakona ana ki te kupu, me whakawhiwhi e ia tona kaiwhakaako ki nga mea pai katoa. <sup>7</sup> Kei whakapohehetia koutou; kahore te Atua e tinihangatia: ko ta te tangata hoki e rui ai, ko tena tana e kokoti ai. <sup>8</sup> Ko te tangata hoki e rui ana, he whakaaro ki tona kikokiko, he pirau tana e kokoti ai o te kikokiko; ko te tangata ia e rui ana, he whakaaro ki te Wairua, ko te ora tonu tana e kokoti ai o te Wairua. <sup>9</sup> A kua tatou e ngakaukore ki te mahi i te pai: tena tona wa e rite ai ka kokoti tatou ki te kahore tatou e ngoikore. <sup>10</sup> Na reira, i te mea e whai takiwa ana tatou, kia mahi tatou i te pai ki nga tangata katoa, a tera noa ake ki te hunga o te whare o te whakapono.

<sup>11</sup> Titiro ki te nui o nga reta e tuhituhi nei toku ringa ake ki a koutou. <sup>12</sup> Ko te hunga e hiahia ana ko te ahua o te kikokiko kia pai, ko ratou hei mea i a koutou kia kotia; he mea kau kei whakatoria ratou mo te ripeka o te Karaiti. <sup>13</sup> Kahore hoki taua hunga i kotia ana e mau ki te ture; engari e hiahia ana kia kotia koutou, kia whakamanamana ai ratou ki to koutou kikokiko. <sup>14</sup> Ki ahau ia kua rawa he whakamanamana, ko te ripeka anake o to tatou Ariki, o Ihu Karaiti, i ripekatia ai te ao ki ahau, me ahau hoki ki te ao. <sup>15</sup> Kahore he aha o te kotinga, kahore o te kotingakore, engari ko te mea hanga hou. <sup>16</sup> Na ko te hunga e haere ana i runga i tenei tikanga, kia tau te rangimarie me te mahi tohu ki a ratou, ki te Iharaira hoki a te Atua. <sup>17</sup> A muri ake nei kua tetahi e whakararuraru i ahau: e mau ana hoki ki toku tinana nga tohu a Ihu. <sup>18</sup> E oku teina, kia tau te aroha noa o to tatou Ariki, o Ihu Karaiti, ki o koutou wairua. Amine.

## Ephesians

### Chapter 1

<sup>1</sup> Naku, na Paora, i paingia e te Atua hei Apotoro ma Ihu Karaiti, ki te hunga tapu e noho ana  
 i Epeha, ara ki te hunga whakapono i roto i a Karaiti Ihu: <sup>2</sup> Kia tau ki a koutou te aroha noa me te  
 rangimarie, he mea na te Atua, na to tatou Matua, na te Ariki hoki, na Ihu Karaiti.  
<sup>3</sup> Kia whakapaingia te Atua, te Matua o to tatou Ariki, o Ihu Karaiti, nana nei tatou i manaaki  
 ki nga manaaki katoa o te wairua ki nga wahi o te rangi, i roto i a te Karaiti: <sup>4</sup> I runga i te tikanga  
 i whiriwhiria ai tatou e ia i roto i a ia i mua i te orokohanganga o te ao, hei hunga tapu, kahakore i  
 tona aroaro, i runga i te aroha. <sup>5</sup> He mea whakarite hoki tatou nana i mua, hei tama mana, i roto i  
 a Ihu Karaiti, ko ta tona whakaaro hoki i pai ai, <sup>6</sup> Hei whakamoemiti mo te kororia o tona aroha  
 noa, i atawhaitia ai tatou i roto i tana i aroha ai. <sup>7</sup> Kei roto nei i a ia to tatou whakaoranga i runga  
 i ona toto, ara te murunga o nga he; he hua hoki no tona aroha noa, <sup>8</sup> I hira rawa nei ki a tatou i  
 runga i nga whakaaro nui, i nga whakaaro mohio katoa; <sup>9</sup> Whakakitea mai ana hoki e ia ki a tatou  
 tana whakaaro ngaro, tana hoki i ahuaireka ai, tana i whakatakoto ai i mua i roto i a ia, <sup>10</sup> Mo te  
 tikanga ina rite nga wa, kia huihua nga mea katoa i roto i a te Karaiti, nga mea i te rangi, me nga  
 mea i te whenua; i roto ano i a ia, <sup>11</sup> I whakawhiwhia nei matou i roto i a ia, he mea whakarite i  
 mua i runga i tana i whakatakoto ai, e mahia ana hoki e ia nga mea katoa i runga i ta tona whakaaro  
 i pai ai: <sup>12</sup> Kia ai matou hei whakamoemiti mo tona kororia, ara matou, te hunga kua tumanako  
 wawe ki a te Karaiti. <sup>13</sup> Me koutou hoki tumanako ana ano koutou ki a ia, i to koutou rongonga ki  
 te kupu o te pono, ki te rongopai o to koutou ora: a, i to koutou whakaponotanga ki a ia, na hiritia  
 ana koutou e te Wairua Tapu i korerotia mai i mua: <sup>14</sup> Hei taumau i nga taonga mo tatou, kia  
 whakaorangia ra ano ta te Atua mea i hokona, hei whakamoemiti mo tona kororia.  
<sup>15</sup> Na konei ahau, i toku rongonga ki to koutou whakapono ki te Ariki, ki a Ihu, ki te aroha ano  
 hoki ki te hunga tapu katoa, <sup>16</sup> Kahore e mutu taku whakawhetai mo koutou, me te whakahua ano  
 i a koutou i aku inoinga; <sup>17</sup> Kia homai ki a koutou e te Atua o to tatou Ariki, o Ihu Karaiti, e te  
 Matua o te kororia, te wairua o te whakaaro nui, o te whakakitenga i runga i te mohio ki a ia: <sup>18</sup> Kia  
 whakamaramatia nga kanohi o to koutou hinengaro; kia matau ai koutou ki te mea o tana karanga  
 e tumanakohia atu nei, ki te kororia nui hoki o tona taonga i roto i te hunga tapu, <sup>19</sup> Ki te nui  
 whakaharahara hoki o tona kaha ki a tatou ki te hunga e whakapono nei, i runga i te mahinga a te  
 mana o tona kaha, <sup>20</sup> I mahi ai ia i roto i a te Karaiti i tana whakaarahanga i a ia i te hunga mate,

a whakanohoia ana ia ki tona matau, ki nga wahi i te rangi,<sup>21</sup> Ki runga ake i nga kawanatanga katoa, i te mana, i te kaha, i te rangatiratanga, i nga ingoa katoa hoki e whakahuatia ana, ehara i te mea ko o tenei ao anake, ko o tera ao ano hoki:<sup>22</sup> A tukua ana e ia nga mea katoa ki raro i ona waewae, meinga ana hoki ia hei i runga i nga mea katoa mo te hahi,<sup>23</sup> Ara mo tona tinana, e ki tonu nei i a ia, i te kaiwhakaki o nga mea katoa i roto i te katoa.

## Chapter 2

<sup>1</sup> Me koutou ano nana i whakaora, i te mea he tupapaku i nga he, i nga hara,<sup>2</sup> I haereera ra e koutou i mua i runga i ta tenei ao tikanga, i ta te rangatira o te kaha o nga kapua, o te wairua e mahi nei inaianei i roto i nga tama a te tutu.<sup>3</sup> Ara i era hoa o tatou katoa i mua, i a tatou e noho ana i runga i nga hiahia o to tatou kikokiko, e mahi ana i nga mea e paingia ana e te kikokiko, e te whakaaro, i te maoritanga hoki he tamariki na te riri, he pera me era atu.

<sup>4</sup> Ko ta te Atua ia tenei, ranea rawa hoki tana mahi tohu, nui atu tona aroha i arohaina mai ai tatou e ia,<sup>5</sup> I te mea he tupapaku tatou i nga he, whakaorangia ngatahitia ana tatou e ia me te Karaiti, he aroha noa i whakaorangia ai koutou;<sup>6</sup> A whakaarahia ngatahitia ana e ia, whakanohoia ngatahitia ana ki nga wahi o te rangi i roto i a Karaiti Ihu:<sup>7</sup> Kia whakakite ai e ia i nga wa e haere ake nei te hira o te taonga o tona aroha noa, i a ia ka manaaki i a tatou i roto i a Karaiti Ihu.<sup>8</sup> Na te aroha noa hoki koutou i whakaorangia ai i runga i te whakapono; ehara ano hoki tenei i te mea no koutou: he mea homai noa na te Atua:<sup>9</sup> Ehara i nga mahi, kei whakamanamana te tangata.<sup>10</sup> He mahinga hoki tatou nana, he mea hanga i roto i a Karaiti Ihu mo nga mahi pai i whakaritea e te Atua i mua hei haereerenga mo tatou.

<sup>11</sup> Na, kia mahara he tauiwi koutou i mua no te wahi ki te kikokiko, e kii ana hoki ko te Kotingakore e tenei e kii nei ko te Kotinga, ara to te kikokiko, he mea na te ringa;<sup>12</sup> I taua wa he mea motu ke atu koutou i a te Karaiti, ehara i te tangata whenua no Iharaira, he tangata ke ki nga kawenata o te mea i whakaaria mai i mua, kahore he tumanakotanga atu, he hunga Atuakore i te ao.<sup>13</sup> Na, inaianei i roto i a Karaiti Ihu, ko koutou, ko te hunga i tawhiti i mua, kua meinga e nga toto o te Karaiti kia tata.

<sup>14</sup> Ko ia hoki to tatou maunga rongu, nana i mea nga mea e rua kia kotahi, whakahoroa iho e ia te patu e arai ana i waenga;<sup>15</sup> Whakakahoretia ana hoki e ia ki tona kikokiko te mauahara, ara

te ture i nga kupu ako, i nga tikanga; kia hanga ai i roto i a ia te tokorua hei tangata kotahi, hei tangata hou, kia mau ai te rongu i a ia; <sup>16</sup> Kia houhia ai ano hoki e ia te rongu a te tokorua ki te Atua i roto i te tinana kotahi, he meatanga na te ripeka, ma reira hoki e whakamate te mauahara; <sup>17</sup> A haere mai ana ia, kauwhau ana i te maunga rongu ki a koutou i tawhiti, ki te hunga hoki e tata <sup>18</sup> ana. Nana hoki tatou, te tokorua nei, i whai tatanga atu ai i roto i te Wairua kotahi ki te Matua. <sup>19</sup> Na reira ehara koutou i te tangata ke, i te manene ranei; engari he tangata whenua koutou tahi ko te hunga tapu, no te whare hoki o te Atua; <sup>20</sup> He mea hanga ki runga ki te turanga o nga apotoro ratou ko nga poropiti, ko Ihu Karaiti ano hei tino kamaka mo te kokonga; <sup>21</sup> Kei roto nei i a ia tena whare, tena whare, he mea ata tatai marie, ka tupu hei whare tapu i roto i te Ariki; <sup>22</sup> Me koutou ano e hanga tahitia ana i roto i a ia, hei nohoanga mo te Atua, he mea na te Wairua.

### Chapter 3

<sup>1</sup> Na konei taku, ta Paora, he herehere nei ahau na Karaiti Ihu, hei mahi ki a koutou ki nga Tauwiwi; <sup>2</sup> Kua rongu pea koutou ki te mahi tuari i te aroha noa o te Atua kua homai nei ki ahau, hei mea ki a koutou: <sup>3</sup> Ara tana whakakitenga, tana whakaaturanga i te mea ngaro ki ahau; he pera hoki me ena kupu torutoru i tuhituhia na e ahau i mua; <sup>4</sup> Ka oti i a koutou tena te korero, ka mohio koutou ki toku matauranga ki te mea ngaro a te Karaiti, <sup>5</sup> Kihai nei i whakakitea i era atu whakaturanga ki nga tama a te tangata, kihai i penei me te whakakitenga inaianei e te Wairua ki ana apotoro tapu ratou ko nga poropiti; <sup>6</sup> Ara mo nga Tauwiwi kia uru tahi ki nga taonga, kia tinana kotahi, kia whiwhi ngatahi ki ana mea i whakaari i mua i roto i a te Karaiti, he meatanga na te rongopai: <sup>7</sup> Mo reira ahau i meinga nei hei minita, i runga i ta te aroha noa o te Atua, i homai nei ki ahau, he mahinga na tona kaha. <sup>8</sup> I homai ki ahau, ki te mea iti iho i te iti rawa o te hunga tapu katoa, tenei aroha noa, kia kauwhautia e ahau i roto i nga Tauwiwi te taonga o te Karaiti e kore nei e taea te rapu; <sup>9</sup> Kia whakakitea ano hoki e ahau ki nga tangata katoa te whiwhinga tahitanga ki te mea ngaro, ki te mea i huna nei inamata noa atu i roto i te Atua, nana nei i hanga nga mea katoa: <sup>10</sup> Kia ai te hahi inaianei hei whakaatu ki nga rangatiratanga, ki nga mana i nga wahi o te rangi, i te maha o nga whakaaro nui o te Atua. <sup>11</sup> I runga i tana i whakatakoto ai i mua noa atu, he mea

<sup>12</sup>  
 mahi nana i roto i to tatou Ariki, i a Karaiti Ihu: Kei roto nei i a ia to tatou maiatanga me to tatou  
<sup>13</sup>  
 whakatatanga atu i te mea e u nei te whakaaro, he meatanga na te whakapono ki a ia. Koia ahau  
 ka mea nei kia kua koutou e ngakaukore i oku tukinotanga mo koutou; ko to koutou kororia hoki  
 tenei.  
<sup>14</sup> No konei i tuturi ai oku turi ki te Matua, o to tatou Ariki a Ihu Karaiti, <sup>15</sup> Nona nei te ingoa  
 e huaina ana ki nga hapu katoa i te rangi, i te whenua, <sup>16</sup> Kia rite ki te nui rawa o tona kororia he  
 homaitanga mana ki a koutou, kia pakari ai a roto i a koutou i te kaha o tona Wairua: <sup>17</sup> Kia noho  
 ai a te Karaiti ki roto ki o koutou ngakau, he mea whakapono; a, i te mea kua whai pakiaka, me te  
 whai turanga mo koutou i roto i te aroha, <sup>18</sup> Kia kaha ai koutou me te hunga tapu katoa ki te  
 whakaaro i te whanui, i te roa, i te hohonu, i te tiketike, <sup>19</sup> A kia mohio ki te aroha o te Karaiti, e  
<sup>20</sup>  
 kore nei e taea te whakaaro; kia tino ki rawa ai koutou i te Atua. Na ki a ia, e kaha nei ki te mahi  
 i nga mea nui whakaharahara, nui noa atu i nga mea katoa e inoi ai, e whakaaro ai tatou, he penei  
 ano me te kaha e mahi nei i roto i a tatou, <sup>21</sup> Waiho atu i a ia te kororia i roto i te hahi i runga i a  
 Karaiti Ihu, a taea noatia nga whakatupuranga katoa, ake ake. Amine.

#### Chapter 4

<sup>1</sup>  
 Koia ahau, ta te Ariki herehere, ka whakahau nei i a koutou kia rite ta koutou haere ki te  
 karangatanga i karangatia ai koutou,  
<sup>2</sup>  
 Kia papaku rawa te ngakau, kia mahaki, kia manawanui, kia ata hanga tetahi ki tetahi, i runga  
<sup>3</sup>  
 i te aroha; Me whai kia mau te kotahitanga o te Wairua, he mea paihere na te rangimarie. <sup>4</sup> Kotahi  
 tonu te tinana, kotahi te Wairua, pera hoki me to koutou karangatanga, kotahi tonu te mea o to  
 koutou karangatanga hei tumanakotanga atu; <sup>5</sup> Kotahi Ariki, kotahi whakapono, kotahi iriiri,  
<sup>6</sup>  
 Kotahi Atua, ko te Matua o nga mea katoa, kei runga nei ia i nga mea katoa, puta noa ia i nga mea  
 katoa, kei roto hoki i te katoa. <sup>7</sup> Kua oti ia te aroha noa te homai ki tenei, ki tenei, o tatou, i runga  
 i te mehua o ta te Karaiti homaitanga. <sup>8</sup> Na reira hoki ia i mea ai, I tona kakenga ki runga, whakaraua  
 ana e ia nga whakarau, a hoatu mea ana ia ma nga tangata. <sup>9</sup> Na ko tenei, I kake ia ki runga i te  
 aha, mehemea kahore ia i matua heke ki nga wahi o raro rawa o te whenua? <sup>10</sup> Tera i heke ra, ko

ia ano i kake atu nei ki runga ake i nga rangi katoa, kia ki ai nga mea katoa i a ia. <sup>11</sup> A homai ana  
 e ia ko etahi hei apotoro; ko etahi hei poropiti; ko etahi hei kaikauwhau i te rongopai; ko etahi hei  
 hepara, hei kaiwhakaako; <sup>12</sup> Kia tino rite ai te hunga tapu mo te mahi minita, mo te hanga i te  
 whare, ara i te tinana o te Karaiti: <sup>13</sup> Kia tae katoa ra ano tatou ki te kotahitanga o te whakapono,  
 o te matauranga hoki ki te Tama a te Atua, kia tino tangata, kia eke ki te mehua o te tino  
 kaumatuatanga e tutuki ai ki to te Karaiti: <sup>14</sup> Kia mutu ai to tatou tamarikitanga, te akina, te  
 kahakahakina e nga hau katoa o te whakaako, he whakawiringa ke na te tangata, he maminga, he  
 whakapohehe; <sup>15</sup> Engari kia korero pono ai i runga i te aroha, kia tupu ai tatou ki roto ki a ia i nga  
 mea katoa, ko te nei ia, ko te Karaiti: <sup>16</sup> Nona nei te tinana katoa, he mea whakapiri marie, he mea  
 ata hono e nga meatanga a nga hononga katoa, whakarite rawa ki te nui o te mahinga a ia wahi, a  
 ia wahi, e mea ana i te tinana kia neke ake, hei whare e hanga ana i a ia i runga i te aroha.  
<sup>17</sup> Na ko taku tenei e ki nei, e whakaatu nei i roto i te Ariki, kia kati ta koutou haere pera me  
 era atu Tauwiwi, e haere nei i roto i te whakahihi o to ratou hinengaro, <sup>18</sup> Kua oti nei te whakapouri  
 o ratou whakaaro, kua tangata ke ki to te Atua ora, i te kuware o roto i a ratou, he pakeke hoki no  
 o ratou ngakau: <sup>19</sup> Kahore o ratou ohoohonga, a tukua ana ratou e ratou ano ki te hiahia taikaha;  
 riro pu ratou ki te mahi i nga mea poke katoa. <sup>20</sup> Ko koutou ia kihai i pera to koutou ako i a te  
 Karaiti; <sup>21</sup> Ki te mea kua rongo koutou ki a ia, kua whakaakona e ia ki nga mea e rite ana ki te  
 pono i roto i a Ihu: <sup>22</sup> Kia whakarerea e koutou te tangata tawhito, he ahua no to koutou whakahaere  
 o mua; he mea pirau nei hoki ia i runga i nga hiahia tinihanga; <sup>23</sup> Kia whakahoutia te wairua o to  
 koutou hinengaro; <sup>24</sup> Kia kakahuria iho hoki ki a koutou te tangata hou, no ta te Atua nei te hanganga  
 i runga i te tika, i te tapu o te pono. <sup>25</sup> Heoi whakarerea atu te teka; kia pono te korero ki tona hoa,  
 ki ona hoa: he wahi hoki tatou tetahi no tetahi. <sup>26</sup> Kia riri, a kaua e hara: kei toene te ra ki to koutou  
 riri: <sup>27</sup> Kaua hoki tetahi wahi e tukua ki te rewera. <sup>28</sup> Ko te tangata tahae, me whakamutu tana  
 tahae: engari me mahi, ko ona ringa ano hei mahi i te mea pai, kia whai rawa ai ia hei hoatutanga  
 mana ki te rawakore. <sup>29</sup> Kei puta tetahi kupu kino i o koutou mangai, engari hei te mea e tau ana  
 hei hanga i te pai, kia whiwhi ai ki te pai nga tangata e rongo ana. <sup>30</sup> Kaua hoki e whakapouritia  
 te Wairua Tapu o te Atua, nana nei koutou i hiri mo te ra o te whakaoranga. <sup>31</sup> Kia wehea rawatia  
 atu i roto i a koutou te nanakia, te riri, te aritarita, te ngaungau, te korero kino, me te mauahara

32  
katoa: Kia ngawari to koutou tikanga tetahi ki tetahi, kia pai te ngakau, me te hohou roa iho i te rongo tetahi ki tetahi, kia pera ano me te Atua i hohou nei i te rongo ki a koutou i roto i a te Karaiti.

## Chapter 5

1 Na, kia rite ta koutou ki ta te Atua, kia pera me ta nga tamariki e arohaina ana; 2 Haere hoki i runga i te aroha, kia pera me te Karaiti i aroha ki a tatou, i tuku i a ia ano mo tatou hei whakahere, hei patunga tapu ki te Atua, hei kakara pai.

3 Ko te moepuku ia, me nga mahi poke katoa, me te apo, kua ena e whakahuatia i roto i a koutou, kia rite ki ta te hunga tapu tikanga; 4 Kua hoki te mea paruparu, te korero wairangi, te korero maminga, kahore nei i tika, erangi ia te whakawhetai. 5 E tino matau ana hoki koutou ki tenei, e kore tetahi tangata moepuku, poke ranei, apo ranei, he kaikarakia nei hoki ia ki te

whakapakoko, e whai wahi ki te rangatiratanga o te Karaiti, a o te Atua. 6 Kei tinihangatia koutou e te tangata ki nga kupu tekateka noa: na enei mea hoki te riri o te Atua e puta nei ki nga tamariki a te tutu. 7 Na, kua koutou e uru ki ta ratou. 8 He pouri hoki koutou i mua, tena ko tenei, he marama

i roto i te Ariki: kia rite ta koutou haere ki ta nga tamariki o te marama: 9 Kei runga hoki te hua o te marama i te pai katoa, i te tika, i te pono. 10 Me whakamatau ano e koutou ta te Ariki e pai ai.

11 Kei uru koutou ki nga mahi huakore o te pouri, engari whakahengia. 12 He mea whakama hoki te whakahua kau, i nga mea e meinga ngarotia nei e ratou. 13 Ko nga mea katoa hoki e whakahengia

ana, ma te marama e whakakite: he marama hoki nga mea katoa e whakakitea ana. 14 Koia hoki tana kupu nei, Maranga, e tenei e moe nei, ara ake i roto i te hunga mate, a ka whiti a te Karaiti ki

runga ki a koe. 15 Na reira kia ata tiro tiro i ta koutou haere, kei rite ki ta nga whakaarokore, engari ki ta nga whakaaro nui; 16 Hokona te taima ma koutou, he kino hoki nga ra. 17 Mo konei ra kei

whakaarokore koutou, engari kia matau ki ta te Ariki e pai ai. 18 Kua hoki e haurangi i te waina, he toreretanga hoki tena ki te he; engari kia ki i te Wairua; 19 Ko ta koutou korero ki a koutou ano, hei te waiata tapu, hei te himene, hei te waiata wairua; waiata, himene atu, i roto i o koutou ngakau

ki te Ariki; 20 Me te whakawhetai ki te Atua, ara ki te Matua i nga wa katoa, mo nga mea katoa, i runga i te ingoa o to tatou Ariki, o Ihu Karaiti;



<sup>21</sup> Kia ngohengohe tetahi ki tetahi i runga i te wehi ki a te Karaiti. <sup>22</sup> E nga wahine, kia  
 ngohengohe ki a koutou tane ake, hei mea ki te Ariki. <sup>23</sup> No te mea ko te tane te o te wahine, e rite  
 ana hoki ki a te Karaiti, ko te ia o te hahi: ko te kaiwhakaora ano ia o te tinana. <sup>24</sup> Otiia e ngohengohe  
 ana te hahi ki ta te Karaiti, kia pera ano nga wahine ki a ratou tane i nga mea katoa. <sup>25</sup> E nga tane,  
 arohaina a koutou wahine, kia pera hoki me te Karaiti i aroha nei ki te hahi, i hoatu hoki i a ia ano  
 mo taua hahi; <sup>26</sup> Hei whakatapunga mana, ma rawa i a ia i te horoinga ki te wai, i runga i te kupu,  
<sup>27</sup> Hei hahi tapae mana ki a ia ano, he hahi kororia rawa, kahore he ira, kahore he korukoru, tetahi  
 atu mea pera ranei, engari kia tapu, kia kohakore. <sup>28</sup> Me aroha e nga tane a ratou wahine me te  
 mea ko o ratou tinana ake ano. Ko te tangata e aroha ana ki tana wahine ake, e aroha ana ki a ia  
 ake ano. <sup>29</sup> Kahore hoki tetahi kia kino noa ki tona kikokiko ake; engari e atawhai ana, e whakaahuru  
 ana, e pera tonu ana me ta te Karaiti ki te hahi: <sup>30</sup> He wahi hoki tatou no tona tinana. <sup>31</sup> Mo konei  
 ra ka whakarerea ai e te tangata tona papa me tona whaea, a ka piri ki tana wahine, ka kikokiko  
<sup>32</sup> kotahi to raua tokorua. He nui tenei mea ngaro; otiia mo te Karaiti raua ko te hahi taku korero.  
<sup>33</sup> Engari kia rite ki tona aroha ki a ia ake ano to koutou aroha, to tenei, to tenei, ki tana wahine, ki  
 tana wahine; me te wahine ano, kia hopohopo ia ki tana tane.

## Chapter 6

<sup>1</sup> E nga tamariki, kia ngohengohe ki o koutou matua i roto i te Ariki: ko te mea tika hoki tenei.  
<sup>2</sup> Whakahonoretia tou papa me tou whaea; ko te ture tuatahi tenei i runga i te kupu whakaari, <sup>3</sup> Kia  
 hua ai te pai ki a koe, kia roa ai hoki tou noho i te whenua. <sup>4</sup> Me koutou hoki, e nga matua, kei  
 whakapataritari i a koutou tamariki kia riri; engari whakatupuria ake ratou i runga i te whakaako,  
 i te whakatupato a te Ariki. <sup>5</sup> E nga pononga, kia ngohengohe ki o koutou rangatira o te wahi ki te  
 kikokiko, me te wehi, me te wiri, i runga i te ngakau tapatahi, ano ki a te Karaiti; <sup>6</sup> Kaua hei ta te  
 kanohi mahi, hei whakamanawareka tangata noa; engari hei ta nga pononga a te Karaiti, e mahi a  
 ngakau ana i ta te Atua i pai ai; <sup>7</sup> Kia mahi i runga i te whakaaro pai, ano ki te Ariki, kahore ki te  
 tangata: <sup>8</sup> Kia matau hoki, ko te pai e mea ai te tangata, ka whakawhiwhia mai ano ia ki tenei e te  
 Ariki, ahakoa pononga, ahakoa rangatira. <sup>9</sup> E nga rangatira, kia pera ano hoki ta koutou ki a ratou;

kati te whakawehi: kia matau hoki ko to koutou Ariki me to ratou kei te rangi; kahore hoki ana whakapai kanohi.

<sup>10</sup> Heoi, kia kaha i roto i te Ariki, i te mana hoki o tona kaha. <sup>11</sup> Kakahuria iho nga mea whawhai katoa a te Atua, kia taea ai e koutou nga mahi tinihanga a te rewera te tu ki te riri. <sup>12</sup> Ehara hoki ta tatou i te pakanga ki te kikokiko, ki nga toto, engari ki nga rangatiratanga, ki nga mana, ki nga ariki o te pouri o tenei ao, ki nga taua wairua kino o nga wahi i te rangi. <sup>13</sup> Mo konei kia mau ki nga mea whawhai katoa a te Atua, kia taea ai e koutou te tu atu ki te riri i te ra kino, a ka poto i a koutou nga mea katoa te mahi, kia tu. <sup>14</sup> E tu ra, he mea whitiki o koutou hope ki te pono, kakahuria iho ano hoki ko te tika hei pukupuku; <sup>15</sup> Herea iho te rongopai o te rangimarie hei hu mo o koutou waewae, kia takatu ai; <sup>16</sup> Mo waho i enei mea katoa e mau ki te whakapono hei whakangungu rakau, e taea ai e koutou te tinei nga matia muramura katoa a te wairua kino. <sup>17</sup> E mau hoki ki te ora hei potae, ki te hoari hoki a te Wairua, ara ki te kupu a te Atua. <sup>18</sup> Kia pau te inoi me te tohe, me inoi i nga wa katoa i roto i te Wairua, kia mataara hoki koutou ki taua mea, me te u tonu ki te tohe mo te hunga tapu katoa;

<sup>19</sup> Moku ano hoki, kia homai he kupu ki ahau, kia maia ai te puaki o toku mangai, ki te whakaatu i te mea ngaro, ara i te rongopai; <sup>20</sup> Ko tana karere nei ahau, he mea mekameka; kia maia ai ahau ki taua korero, kia rite ai taku korero ki te mea i tika. <sup>21</sup> Na, kia matau ai koutou ki akau mea, ki aku mahi, ma Tikiku e whakaatu nga mea katoa ki a koutou, he teina aroha nei ia, he minita pono i roto i te Ariki. <sup>22</sup> Mo reira i tonoa atu ai ia e ahau ki a koutou, kia matau ai koutou ki to matou ahua, a kia whakamarietia ai e ia o koutou ngakau. <sup>23</sup> Kia tau ki nga teina te rangimarie, te aroha, me te whakapono, he mea na te Atua Matua, na te Ariki hoki, na Ihu Karaiti. <sup>24</sup> Kia tau te aroha noa ki te hunga katoa e aroha ana, he aroha parakore, ki to tatou Ariki, ki a Ihu Karaiti. Amine.

## Philippians

### Chapter 1

<sup>1</sup> Na Paora, raua ko Timoti, na nga pononga a Ihu Karaiti, ki te hunga tapu katoa i roto i a  
 Karaiti Ihu e noho ana i Piripai, ratou ko nga pihopa, ko nga rikona. <sup>2</sup> Kia tau ki a koutou te aroha  
 noa, me te rangimarie, he mea na te Atua, na to tatou Matua, na te Ariki hoki, na Ihu Karaiti.

<sup>3</sup> E whakawhetai ana ahau ki toku Atua i oku maharatanga katoa ki a koutou, <sup>4</sup> I aku inoinga  
 katoa, e puta ana taku inoi mo koutou i nga wa katoa i runga i te hari, <sup>5</sup> Mo koutou i uru tahi mai  
 hei tautoko i te rongopai, mai o te ra tuatahi a moroki noa nei; <sup>6</sup> Pumau tonu toku whakaaro ki tenei  
 mea nei ano, tera te kaitimata o te mahi pai i roto i a koutou e whakaoti, taea noatia te ra o Ihu  
 Karaiti;

<sup>7</sup> He tika hoki kia penei oku whakaaro ki a koutou katoa, no te mea kei roto koutou i toku  
 ngakau; ara, ahakoa i ahau nei i te here, ahakoa i ahau e korero whakaara nei, e whakau nei i te  
 rongopai, ka uru tahi koutou katoa me ahau ki te aroha noa. <sup>8</sup> Ko te Atua hoki hei kaiwhakaatu  
 moku, mo te nui o toku koingo ki a koutou katoa, i runga i te ngakau aroha o Ihu Karaiti.

<sup>9</sup> Ko taku inoi ano tenei, kia nui haere tonu to koutou aroha i runga i te matauranga, i nga  
 mahara mohio katoa; <sup>10</sup> Kia whakaaetia ai e koutou nga mea papai; kia kore ai o koutou tinihanga,  
 o koutou he, a taea noatia te ra o te Karaiti; <sup>11</sup> Kia ki ai hoki i nga hua o te tika, e puta mai ana i a  
 Ihu Karaiti, hei kororia, hei whakamoemiti i te Atua.

<sup>12</sup> Na e mea ana ahau kia matau koutou, e oku teina, ki te tukunga iho o nga mea i pa ki ahau,  
 pai tonu hei whakaneke ake i te rongopai; <sup>13</sup> Kua kitea hoki oku mekameka mo ta te Karaiti, puta  
 noa i te wahi katoa o nga hoia tiaki i te kingi, i era atu wahi katoa ano hoki; <sup>14</sup> Kua ngakau nui  
 hoki te tokomaha o nga teina i roto i te Ariki, i oku mekameka nei, hira rawa ano hoki to ratou maia  
 ki te korero i te kupu, kahore he matakau. <sup>15</sup> Ko etahi na te hae, na te totohe, i kauwhau ai i a te  
 Karaiti; ko etahi na te whakaaro pai; <sup>16</sup> Ko etahi na te aroha, e mahara ana kua waiho ahau hei  
 korero whakaara i te rongopai; <sup>17</sup> Ko etahi na te totohe ta ratou kauwhau i a te Karaiti, ehara i te  
 whakaaro pono, e mea ana ki te whakatupu mamae moku e mekameka nei. <sup>18</sup> A tena, pehea iho?  
 Anei ra, ahakoa tinihanga, ahakoa pono, e kauwhautia ana a te Karaiti; a e hari ana ahau ki tenei,  
 ae ra, ka hari ano ahau. <sup>19</sup> E matau ana hoki ahau ka ai tenei hei whakaora moku, i a koutou na ka  
 inoi, i te Wairua ano hoki o Ihu Karaiti ka homai; <sup>20</sup> Ko taku hoki tenei e whakamau tonu nei, e  
 tumanako atu nei, e kore ahau e whakama i tetahi mea, engari ka tino maia ahau, a ka pera me to  
 nga wa katoa, ka whakanuia ano a te Karaiti aianei e toku tinana, ahakoa i te ora, ahakoa i te mate.

<sup>21</sup> Ki ahau hoki ko te ora ko te Karaiti, ko te mate he taonga. <sup>22</sup> Ki te ora ia ahau i te kikokiko, mehemea ko te hua tenei o taku mahi, heoi kahore ahau e mohio ko te aha taku e whiriwhiri ai.

<sup>23</sup> E karapitia mai ana hoki ahau e nga mea e rua, he hiahia nei toku ki te haere, kia noho ai ahau ki a te Karaiti; ko te mea tino pai rawa hoki tera: <sup>24</sup> Ko te noho ranei i te kikokiko, ko te mea pai ake hoki tena mo koutou. <sup>25</sup> Na ka u nei toku whakaaro ki tenei, e matau ana ahau tera ahau e noho, ae ra, ka noho iho ahau ki a koutou katoa, hei whakaneke ake, hei whakahari i a koutou i runga i te whakapono; <sup>26</sup> Kia hira rawa ai to koutou whakamanamana i roto i a Karaiti Ihu ki ahau, moku ka noho tahi ano me koutou.

<sup>27</sup> Engari kia tika ta koutou whakahaere, kia rite ki ta te rongopai o te Karaiti: na, ahakoa tae atu ahau kia kite i a koutou, ngaro mai ranei, kia rongu tonu atu ahau ki to koutou ahua, kei te tu koutou i runga i te wairua kotahi, i te ngakau kota hi, me te tohe tahi ano ki te whakapono o te rongopai: <sup>28</sup> Kahore hoki he wehi ki tetahi mea a o koutou hoariri: he tohu hoki tenei ki a ratou mo te whakangaromanga, ki a koutou ia mo te ora, i ahu mai i te Atua. <sup>29</sup> No te mea kua hoatu ki a koutou hei meatanga ma koutou ki a te Karaiti, ehara i te mea ko te whakapono anake ki a ia, engari ko te mate ano hoki mo te whakaaro ki a ia; <sup>30</sup> Kei a koutou hoki taua pakanga i kite ra koutou ki ahau, a ka rongu nei inaianei kei ahau.

## Chapter 2

<sup>1</sup> Na, ki te mea he whakamarie kei roto i a te Karaiti, ki te mea he pehi mamae to te aroha, ki te mea he whiwhinga tahitanga ki te Wairua, ki te mea he ngakau aroha, he mahi tohu, <sup>2</sup> Kia rite toku hari i a koutou, kia kotahi te whakaaro, kia kotahi te aroha, huihuia nga ngakau i runga i te whakaaro kotahi. <sup>3</sup> Kei meinga tetahi mea i runga i te wehewehe, i te whakapehapeha ranei, engari i runga i te ngakau papaku, me te whakanui a tetahi i tetahi ki runga ake i a ia; <sup>4</sup> Kaua tena o koutou na e titiro ki ona mea anake, engari me titiro ano tena, tena o koutou ki nga mea a etahi atu. <sup>5</sup> Ko tenei hei whakaaro mo koutou, ko tera i a Karaiti Ihu: <sup>6</sup> Ahakoa hoki i a ia te ahua o te Atua, kihai i meinga e ia te rite ki te Atua hei taonga kapo mai; <sup>7</sup> Engari i mea i a ia ano kia poaha, ka mau ki te ahua o te pononga, ka meinga kia rite ki te tangata; <sup>8</sup> A ka kitea nei tona ahua e rite ana ki to te tangata, ka whakapapaku ia i a ia, ka meinga kia ngohengohe ahakoa ki te mate, ae ra, ki te mate

<sup>9</sup> o te ripeka. Na konei whakateiteitia ake ana ia e te Atua, a hoatu ana ki a ia te ingoa nui atu i nga  
<sup>10</sup> ingoa katoa; Kia tuku ai i runga i te ingoa o Ihu nga turi katoa, o nga mea i te rangi, o nga mea  
<sup>11</sup> i te whenua, o nga mea i raro i te whenua; A kia whakaae nga arero katoa ko Ihu Karaiti te Ariki,  
 hei whakakororia i te Atua Matua.  
<sup>12</sup> Heoi e oku teina aroha, he mea tonu ia na koutou te ngohengohe ki ahau i nga wa katoa,  
 ehara i te mea i oku wa anake i kona, engari rawa ia inaianei i ahau kahore i kona, na whakaotia to  
<sup>13</sup> koutou whakaoranga i runga i te wehi, i te wiri; Ko te Atua hoki te kaimahi i roto i a koutou o  
 te hiahia, o te mahi, hei mea i tana i pai ai.  
<sup>14</sup> I a koutou mahi katoa kaua te amuamu, te tautohetohe; <sup>15</sup> Kia kore ai koutou e whaikupuria,  
 kia tapatahi ai, he tamariki kohakore na te Atua, i waenganui o te whakatupuranga tutu, parori ke,  
<sup>16</sup> kei roto nei koutou i a ratou e tiaho ana hei rama i te ao; Kia mau pu ki te kupu o te ora; kia hari  
<sup>17</sup> ai ahau a te ra o te Karaiti, kihai ahau i oma noa, kihai i mahi noa. Na, ki te ringihia ahau ki  
 runga ki te patunga tapu, ki nga mahi a to koutou whakapono, ka hari ahau, ina ka hari tahi me  
<sup>18</sup> koutou katoa. Waihoki ko koutou, kia hari, hari tahi me ahau. <sup>19</sup> Otiia e mea ana ahau i roto i  
 te Ariki, i a Ihu, ki te tono tata atu i a Timoti ki a koutou, kia ora ai hoki toku ngakau, ina mohio  
<sup>20</sup> ahau ki to koutou ahua. Kahore hoki oku tangata rite te ngakau ki tona, hei mahara pono ki a  
<sup>21</sup> koutou mea. Ko ta te katoa hoki e rapu nei, ko ta ratou ake, kahore nga mea a Ihu Karaiti. <sup>22</sup> Ko  
 koutou ia e matau ana ki ona tohu, he pera tana me ta te tamaiti ki te matua, ko toku hoa ia ki te  
<sup>23</sup> kawe haere i te rongopai. Ko ia taku e mea nei kia tonoa wawetia atu, ina kite ahau i te tukunga  
<sup>24</sup> iho ki ahau. Otiia e u ana toku whakaaro i roto i te Ariki, ka hohoro toku tae atu. <sup>25</sup> I ea ano ia  
 ahau me tono atu ki a koutou a Epaporitu, toku teina, toku hoa mahi, toku hoa hoia, na koutou ia  
<sup>26</sup> karere, he kaimahi ano hoki i nga mea i matea e ahau. Koinga tonu hoki ia ki a koutou katoa,  
<sup>27</sup> kanohi rawa, no te mea i rongu koutou he turoro ia. He turoro ra hoki ia, tata pu ki te mate: otira  
 i tohungia ia e te Atua; ehara ano i te mea ko ia anake, ko ahau ano hoki, kei tapiritia he pouri ki  
<sup>28</sup> toku pouri. Koia i nui rawa ai toku ngakau ki te tono atu i a ia, kia kite ai ano koutou i a ia, kia  
<sup>29</sup> hari ai, kia taharahara iho ai hoki toku pouri. Kia nui te hari i runga i te Ariki, ina tae atu ia;  
<sup>30</sup> whakahonoretia ano hoki nga pera; No te mea na te mahi ki a te Karaiti i tata ai ia ki te mate,  
 te ihupuku ki te ora, kia rite ai i a ia nga mahi ki ahau, kihai nei i rite i a koutou.

## Chapter 3

<sup>1</sup> Heoi, e oku teina kia hari i roto i te Ariki. Ki ahau kahore he hoha o te tuhituhi atu i aua mea nei ano ki a koutou; ki a koutou ia hei mea e u ai. <sup>2</sup> Kia tupato ki nga kuri, kia tupato ki nga kaimahi i te kino, kia tupato ki te tapahanga. <sup>3</sup> Ko tatou hoki te kotinga, e mahi nei ki te Atua i runga i te wairua, e whakamanamana nei ki a Karaiti Ihu, kahore nei e u te whakaaro ki te kikokiko.

<sup>4</sup> Otira tera ano ahau e u te whakaaro ki te kikokiko ki te whakaaro tetahi atu tangata he mea tana e u ai tona whakaaro ki te kikokiko, tera atu ano taku. <sup>5</sup> Ko te kotinga i te ra tuawaru, no te whanau a Iharaira, no te hapu o Pineamine, he Hiperu no nga Hiperu; ki to te ture he Parihi; <sup>6</sup> Mo te ngakau nui ki te Atua, i whakato i ahau i te hahi; mo te tika, ara mo tera i te ture, kahore he kupu moku. <sup>7</sup> He ahakoa ra, ko nga mea i waiho ra e ahau hei taonga ki ahau, kua kiia ake e ahau hei taonga ki ahau, kua kiia ake e ahau hei rukenga, i te mea ka whakaaro nei ki a te Karaiti. <sup>8</sup> Ae ra kiia iho e ahau nga mea katoa hei rukenga, i te mea ka whakaaro nei ki te pai whakaharahara o te matauranga ki a Karaiti Ihu, ki toku Ariki: he whakaaro nei ki a ia i roto ai ena mea katoa oku ki te kore, ae ra kiia iho e ahau hei paru, kia whiwhi ai ahau ki a te Karaiti;

<sup>9</sup> Kia kitea ai hoki kei roto ahau i a ia, kahore he tika oku ake, ara he tika i te ture, engari ko tera e na runga ana mai i te whakapono ki a te Karaiti, ko te tika a te Atua na te whakapono. <sup>10</sup> Kia matau ai ahau ki a ia, ki te kaha hoki o tona aranga mai, ki te urunga tahitanga hoki ki ona mamae, he mea whakaahua kia rite ki tona matenga; <sup>11</sup> Me kore ahau e tutuki ki te aranga mai i roto i te hunga mate. <sup>12</sup> Ehara i te mea kua mau rawa i ahau, kua tino rite ranei ahau: engari e whaia atu ana e ahau, me kore e mau i ahau te mea i mau ai ahau i a Karaiti Ihu. <sup>13</sup> E oku teina, kahore aku kianga ake kua mau i ahau: kotahi ia taku, wareware ake i ahau nga mea o muri, whatoro tonu atu ki nga mea i mua, <sup>14</sup> Ka tawhai tonu ahau ki te tohu, ki te utu whakahonore o to runga karangatanga a te Atua, i roto i a Karaiti Ihu.

<sup>15</sup> Na reira, ko te hunga o tatou kua tino rite, kia penei o tatou whakaaro: a ki te rere ke o koutou whakaaro ki tetahi mea, ma te Atua ano tenei e whakakite ki a koutou. <sup>16</sup> Engari ko te wahi kua taea atu e tatou ko tera ano hei tikanga mo ta tatou haere.

<sup>17</sup> Kia rite to koutou ki toku, e oku teina, tirohia hoki te hunga e rite ana te haere ki ta matou kua waiho nei hei tauira mo koutou. <sup>18</sup> He tokomaha hoki kei te haere, ka maha nei nga wa i korerotia ai ratou e ahau ki a koutou, a ka korerotia nei inaianei me te tangi ano ahau, he hoa

19  
 whawhai ratou ki te ripeka o te Karaiti; Ko te tukunga iho ki a ratou he whakangaro, to ratou  
 atua ko te kopu, to ratou kororia hoki kei runga i to ratou whakama, ko nga mea o te whenua ta  
 20  
 ratou e whakaaro ai. Ko te rangi ia te wahi i tangata whenua ai tatou: kei reira hoki te Kaiwhakaora  
 21  
 e taria atu nei e tatou, te Ariki, a Ihu Karaiti. Mana nei e whakaahua ke to tatou tinana tutua nei,  
 kia rite ki tona tinana kororia, i runga i te mahinga a tona kaha e taea ai e ia te pehi nga mea katoa  
 ki raro i a ia.

### Chapter 4

1  
 Heoi, e oku teina aroha, e hiahiatia atu nei, e toku haringa, e toku karauna, tena ra, e tu i runga  
 2  
 i te Ariki, e oku hoa aroha. He kupu tenei naku ki a Uoria, he kupu ano tenei ki a Hinatiki, kia  
 3  
 kotahi to raua whakaaro i roto i te Ariki. Na, he tohe tenei naku ki a koe, e toku hoa pono ki te  
 mahi, ko koe hei whakamama i aua wahine, he hunga raua i uru tahi me ahau ki te tohe ki nga mea  
 o te rongopai, me Keremeneta ano, me era atu hoki o oku hoa mahi, kei roto nei i te pukapuka o te  
 4  
 ora o ratou ingoa. Kia hari tonu i roto i te Ariki: ko taku kupu ano tenei, Kia hari. 5  
 5  
 Kia mohiotia  
 6  
 to koutou ngakau ngawari e nga tangata katoa. Kua tata te Ariki. Kua e manukanuka ki tetahi  
 mea; engari i nga mea katoa whakaaturia ki te Atua nga mea e matea ai e koutou, i runga i te karakia,  
 7  
 i te inoi, me te whakawhetai hoki. A ma te marie o te Atua, e kore nei e taea te whakaaro, e tiaki  
 8  
 o koutou ngakau, o koutou hinengaro, i roto i a Karaiti Ihu. Heoi, e oku teina, ko nga mea e pono  
 ana, ko nga mea e whai honore ana, ko nga mea e tika ana, ko nga mea e kinokore ana, ko nga mea  
 e ataahua ana, ko nga mea e korerotia paitia ana; ki te mea he pai, ki te mea he whakamoemiti;  
 9  
 whakaaroa enei mea. Ko nga mea i whakaakona ki a koutou, i riro i a koutou, i rongo ai, i kite ai  
 ranei ki ahau, mahia enei: a ka noho te Atua o te rangimarie ki a koutou.  
 10  
 Nui atu ia toku hari i roto i te Ariki mo to koutou whakaaro ki ahau katahi nei ka pihi ake  
 11  
 ano; he mea ano ia i whakaaroa e koutou i mua, otiia kihai i whai meatanga. Ehara taku e korero  
 nei i te mea mo te rawakore: kua ako hoki ahau, ahakoa kei hea ahau e noho ana, kia tatu toku  
 12  
 ngakau i reira. Ko te whakahoki i ahau ki raro, matau tonu i ahau; ko te whai rawa, matau tonu  
 i ahau: i nga wahi katoa, i nga mea katoa, ka oti ahau te whakaako, kia makona, a kia mate i te kai,  
 13  
 kia whai rawa, a kia rawakore ranei. Ka taea e ahau nga mea katoa i roto i a te Karaiti e whakakaha  
 14  
 nei i ahau. He ahakoa ra, he pai ta koutou mahi, i a koutou i uru nei ki toku mate. 15  
 15  
 Na e matau

ana ano ra koutou, e nga Piripai, i te timatanga o te rongopai, i ahau i haere atu ai i Makeronia, kahore he hahi i uru ki taku tikanga, ara mo tetahi mea kia tukua atu, kia homai ranei, ko koutou anake. <sup>16</sup> I Teharonika ano hoki kotahi, e rua, a koutou homaitanga i nga mea i matea e ahau, kia kawea ake maku. <sup>17</sup> Ehara i te mea e whai ana ahau i tetahi mea kia homai; engari e whai ana ahau kia maha ake nga hua hei mea ma koutou. <sup>18</sup> Otia kei te whiwhi ahau i nga mea katoa, hira noa ake hoki aku: kua ki ahau, kua tae mai nei i a Epaporitu nga mea i ahau mai i a koutou, he kakara reka, he patunga tapu e manakohia ana, ko ta te Atua e ahua reka mai ai. <sup>19</sup> A ma toku Atua e mea kia hua nga mea katoa e matea ana e koutou, kia rite ki te nui o tona kororia, i roto i a Karaiti Ihu. <sup>20</sup> Na, waiho i te Atua, ara i to tatou Matua, te kororia ake ake. Amine. <sup>21</sup> Oha atu ki te hunga tapu katoa i roto i a Karaiti Ihu. He oha atu tenei ki a koutou na nga teina i ahau nei. <sup>22</sup> He oha atu tenei ki a koutou na te hunga tapu katoa, tenei rawa ia ta te hunga o te whare o Hiha. <sup>23</sup> Kia tau te aroha noa o to tatou Ariki, o Ihu Karaiti ki a koutou katoa. Amine.

## Colossians

### Chapter 1

<sup>1</sup> Na Paora, i paingia nei e te Atua hei apotoro ma Karaiti Ihu, na to tatou teina hoki, na Timoti, <sup>2</sup> Ki te hunga tapu, ki nga teina whakapono hoki i roto i a te Karaiti, i Korohe: kia tau ki a koutou te aroha noa, me te rangimarie, he mea na te Atua, na to tatou Matua. <sup>3</sup> Tenei matou te whakawhetai atu nei ki te Atua, ara ki te Matua o to tatou Ariki, o Ihu Karaiti, me te inoi tonu ano matou mo koutou, <sup>4</sup> No matou ka rongu nei ki to koutou whakapono ki a Karaiti Ihu, ki to koutou aroha hoki ki te hunga tapu katoa; <sup>5</sup> Mo te mea e taria atu nei, e takoto mai nei ma koutou i te rangi, ko ta koutou i rongu ai i mua ki te kupu o te pono o te rongopai, <sup>6</sup> Kua tae atu na ki a koutou; kua whai hua hoki a kua nui haere ki te ao katoa, pena hoki i roto i a koutou, no te ra ano i rongu ai, i matau ai koutou ki te aroha noa o te Atua i roto i te pono. <sup>7</sup> I whakaakona atu na hoki koutou ki tena e Epapara, e to matou hoa pononga e arohaina nei; he minita pono nei ia na te Karaiti ki a koutou. <sup>8</sup> Nana hoki i whakakite mai ki a matou to koutou aroha i runga i te Wairua.



9 No konei hoki, mai o te ra i rongu ai matou, Kahore e mutu ta matou karakia me ta matou inoi mo koutou, kia whakakiiia koutou ki te mohio ki tana e pai ai, i runga i nga whakaaro nui katoa,

10 i te mahara wairua ano hoki; Kia tika ai ta koutou haere, kia rite ai ki ta te Ariki, ahuaureka rawa,

11 hua rawa i runga i nga mahi pai katoa, tupu tonu i runga i te mohio ki te Atua; Kia whakanuia te kaha hei whakakaha mo koutou, kia rite ki ta te mana o tona kororia, e u tonu ai, e whakamanawanui ai i runga i te hari;

12 Me te whakawhetai atu ano ki te Matua, nana nei tatou i whai tikanga ai ki tetahi wahi o te

13 kainga o te hunga tapu i roto i te marama. Nana nei tatou i whakaora mai i te kaha o te pouri, a

14 whakawhitia ake tatou e ia ki te rangatiratanga o tana Tama aroha. Kei roto nei i a ia to tatou

15 whakaoranga i runga i ona toto, ara te murunga o nga hara. Ko ia nei te ahua o te Atua e kore

16 nei e kitea atu, ko te whanau matamua o nga mea hanga katoa. Nana hoki nga mea katoa i hanga,

17 nga mea i te rangi me nga mea i te whenua, nga mea e kitea ana me nga mea kahore e kitea, ahakoa torona, ahakoa kawatananga, ahakoa rangatiratanga, ahakoa mana: nana, a mona te hanganga o

18 nga mea katoa. No mua ano hoki ia i nga mea katoa, nana ano hoki nga mea katoa i mau ai;

19 Ko ia ano te o te tinana, ara o te hahi: ko ia te timatanga, ko te whanau matamua i roto i te hunga

20 mate; kia waiho ai ia hei tuatahi i roto i nga mea katoa. Ko ta te Matua tera i pai ai, kia noho te

21 huanga o nga mea katoa ki roto ki a ia; Kia ma roto ai i a ia he houhanga rongu mo nga mea katoa ki a ia, kua mau nei i a ia te rongu i nga toto o tona ripeka; ae ra ma roto i a ia, ahakoa he

22 mea no te whenua, ahakoa he mea no te rangi. Me koutou hoki he tangata ke i mua, he hoariri

23 te hinengaro i nga mahi kino, na kua meinga nei e ia kia houhia ta koutou rongu, I runga i te

24 tinana o tona kikokiko, he mea na te mate; mo koutou ano kia tapaea atu ki tona aroaro, he hunga

25 tapu, kahore nei he koha, kahore he he; Ki te pumau koutou ki te whakapono, u tonu, mau tonu,

26 te taea te whakaneke atu i te tumanako ki ta te rongopai i rongu ai koutou, kua kauwhautia atu nei

27 ki nga mea hanga katoa i raro o te rangi: mo reira nei ahau, a Paora, i meinga ai hei minita. Tenei

28 ahau te hari nei ki oku mamae mo koutou, ka kapi hoki i oku kikokiko nga mate o te Karaiti kahore

29 ano i rite noa, hei ea mo tona tinana, ara mo te hahi; Mo reira nei ahau i meinga ai hei minita,

30 rite tonu ki ta te Atua tikanga ki a koutou i homai nei ki ahau, kia whakapaua te kauwhau o te kupu

31 a te Atua, O te mea ngaro i huna i era wa noa atu, i era whakatupuranga; a kua whakakitea

32 inaianei ki tana hunga tapu, He meatanga na te Atua, kia whakaaturia ki a ratou te taonga nui o

33 te kororia o tenei mea ngaro ki roto ki nga Tauwiwi, ara a te Karaiti i roto i a koutou, e tumanako atu

ai ki te kororia: <sup>28</sup> E kauwhautia nei e matou, me te whakatupato i nga tangata katoa, me te whakaako i nga tangata katoa i runga i nga whakaaro mohio katoa, kia tapaea atu ai e matou nga tangata katoa, he mea tino tika i roto i a Karaiti Ihu: <sup>29</sup> Ko taku tenei e uaua nei, e tohe nei i runga i tana mahinga e kaha nei te mahi i roto i ahau.

## Chapter 2

<sup>1</sup> E mea ana hoki ahau kia mohio koutou ki te nui o toku uaua mo koutou, mo te hunga ano hoki o Raorikia, a mo te hunga katoa hoki kahore nei i kite noa i toku mata i te kikokiko; <sup>2</sup> Kia whakamarietia o ratou ngakau, kia tuhonohonoa i runga i te aroha, kia taea ai nga taonga katoa o te tino whakaunga o te ngakau mahara, kia matau ai ratou ki te mea ngaro a te Atua, ara ki a te Karaiti; <sup>3</sup> Kei roto nei i a ia nga taonga katoa o te mahara, o te matauranga e huna ana. <sup>4</sup> Na i korero ai ahau i tenei, kei kumea ketia koutou e te korero reka a te tangata. <sup>5</sup> No te mea ahakoa kei tawhiti toku kikokiko, kei a koutou na toku wairua, e hari ana, e titiro ana ki a koutou ritenga tika, ki te u ano hoki o to koutou whakapono ki a te Karaiti. <sup>6</sup> Na, kua riro na te Ariki, a Karaiti Ihu i a koutou, kia pena ano ta koutou haere i roto i a ia; <sup>7</sup> Kia whai pakiaka, ano he whare i hanga ki runga ki a ia, whakapumau rawa ki runga ki to koutou whakapono, kia pera me koutou i whakaakona ra, kia hira rawa ai te whakawhetai. <sup>8</sup> Kia tupato kei roro parau koutou i to te tangata whakaaro mohio, i te tinihanga huakore, e rite nei ki te whakarerenga iho a te tangata, ki nga mea timatanga o te ao, a kahore ki a te Karaiti. <sup>9</sup> Kei roto katoa hoki i a ia te tino o te Atua e noho a tinana ana. <sup>10</sup> A kua tino tangata ano koutou i roto i a ia, ko te nei ia o nga rangatiratanga, o nga mana katoa; <sup>11</sup> He mea kokoti koutou i roto i a ia, he kotinga kihai i meatia e te ringaringa, i te unuhanga atu i te tinana o nga hara o te kikokiko, i to te Karaiti kotinga; <sup>12</sup> He mea tanu tahi koutou me ia i te iriiringa, he mea whakaara ngatahi ano hoki me ia i reira, no te mea ka whakapono nei ki te mahi a te Atua, nana nei ia i whakaara ake i te hunga mate. <sup>13</sup> He tupapaku na hoki koutou i nga he, i te kotingakore hoki o to koutou kikokiko, na, whakaorangia ngatahitia ana koutou me ia, he mea whakarere noa atu nana o koutou he katoa; <sup>14</sup> Murua ake e ia nga tikanga i tuhituhia e te ringaringa, nga tikanga i hoariri ki a tatou, i tu ke mai i a tatou; tangohia ake e ia ki rahaki, he mea titi nana ki te ripeka; <sup>15</sup> Pauhua ake e ia ki raro nga

rangatiratanga me nga mana, whakakitea nuitia ana e ia, a waiho ana e ia taua ripeka hei mea whakataka mana i a ratou.

<sup>16</sup> Na, kua tetahi e whakawa i a koutou mo te kai, mo te inu, mo nga meatanga ki te hakari, ki te kowhititanga marama, ki nga hapati; <sup>17</sup> He atarangi enei no nga mea i kiia e puta ana i muri; no te Karaiti ia te tinana. <sup>18</sup> Kei riro ta koutou taonga i te maminga a te tangata e mea ana ki te whakaiti i a ia, ki te karakia ki nga anahera, ka noho i roto i nga mea e kitea ana e ia, ka whakapehapeha kau noa, he mea na tona ngakau kikokiko; <sup>19</sup> A kahore e mau ki te Upoko, no roto nei i a ia te tinana katoa, he mea atawhai, he mea tuhonohono e nga hononga, e nga here, ka tupu ai, he tupu na te Atua. <sup>20</sup> Ki te mea kua tupapaku ngatahi koutou ko te Karaiti ki nga mea timatanga o te ao, he aha koutou, ano e ora ana ki te ao, ka pupuri tonu ai i nga tikanga, <sup>21</sup> Kei pa ringaringa, kei pa kai, kei rahurahu; <sup>22</sup> He mea pirau katoa nei aua mea i te meatanga iho ano, he whakahau, he ako na te tangata? <sup>23</sup> Ko te ahua o aua mea i whakaritea ki to te whakaaro nui, he karakia pokano, he whakaiti i a ia ake, he atawhaikore i te tinana; otira kahore he painga hei pehi i te kikokiko e torere ana kia makona ia.

### Chapter 3

<sup>1</sup> Na, ki te mea kua ara ngatahi koutou me te Karaiti, rapua nga mea o runga, o te wahi e noho mai nei a te Karaiti i te ringa matau o te Atua. <sup>2</sup> Kia anga atu to koutou whakaaro ki nga mea o runga, kua ki nga mea kei te whenua. <sup>3</sup> Kua mate hoki koutou, a kua oti to koutou ora te huna ki a te Karaiti i roto i te Atua. <sup>4</sup> I te whakakitenga mai o te Karaiti, o to tatou ora, ko reira hoki koutou whakakitea tahitia ai me ia i runga i te kororia. <sup>5</sup> Na, whakamatea o koutou wahi i runga i te whenua; te moe tahae, te poke, te minamina ki te he, te hiahia kino, me te apo, he karakia whakapakoko hoki tena. <sup>6</sup> He mea hoki enei e puta mai ai te riri o te Atua ki nga tamariki a te tutu. <sup>7</sup> I roto hoki koutou i enei mea e haere ana i mua, i a koutou e noho ana i roto i aua mea. <sup>8</sup> Tena ko tenei whakarerea enei mea katoa; te aritarita, te riri, te mauahara, te korero kino, te korero whakarihariha, i roto i o koutou mangai. <sup>9</sup> Kua e teka tetahi ki tetahi, kua unuhia atu hoki

i a koutou te tangata tawhito me ana hanga; <sup>10</sup> Kua kakahuria nei te tangata hou, e whakahoutia  
 nei i runga i te matauranga kia rite ki te ahua o tona kaihanganga. <sup>11</sup> Kei reira kahore he Kariki, he  
 Hurai ranei, he kotinga, he kotingakore ranei, he Tautangata, Haitiana, pononga, he rangatira ranei:  
 engari ko te Karaiti te katoa, i roto ano i te katoa.  
<sup>12</sup> Na, kia rite ki te hunga whiriwhiri a te Atua, ki te hunga tapu e arohaina ana, kakahuria iho  
 hoki te ngakau tohu tangata, te ngawari, te ngakau papaku, te ngakau mahaki, te manawanui; <sup>13</sup> Kia  
 ata hanga koutou tetahi ki tetahi, me te hohou i te rongo tetahi ki tetahi, ki te mea kei tetahi he take  
 riri ki tetahi: kia rite ki ta te Ariki i hohou nei i te rongo ki a koutou, kia pera ano hoki koutou.  
<sup>14</sup> A hei waho i enei mea katoa uhia ko te aroha, ko te tauhere tika rawa ia. <sup>15</sup> A waiho ma te  
 rangimarie a te Karaiti te whakahaere tikanga i roto i o koutou ngakau: i karangatia hoki koutou ki  
 tenei i roto i te tinana kotahi; kia whakawhetai hoki koutou. <sup>16</sup> Kia noho nui te kupu a te Karaiti i  
 roto i a koutou i runga i te matauranga katoa; me whakaako, me whakatupato tetahi e tetahi ki nga  
 waiata tapu, ki nga himene, ki nga waiata wairua, me te waiata ano ki te Atua i runga i te aroha  
<sup>17</sup> noa, i roto i o koutou ngakau. Ko nga mea katoa hoki e mea ai koutou, ko nga kupu, ko nga  
 mahi ranei, kia meinga katoatia i runga i te ingoa o te Ariki, o Ihu, me te whakawhetai ano ki te  
 Atua, ara ki te Matua, i roto i a ia.  
<sup>18</sup> E nga wahine, kia ngohengohe ki a koutou tane ake, kia rite ai ta te Ariki tikanga. <sup>19</sup> E nga  
 tane, arohaina a koutou wahine, kei kaha hoki te riri ki a ratou. <sup>20</sup> E nga tamariki, whakarongo ki  
 o koutou matua i nga mea katoa: he mea pai hoki tenei ki te Ariki. <sup>21</sup> E nga matua, kei arita noa  
 ki a koutou tamariki, kei ngakaukore ratou. <sup>22</sup> E nga pononga, kia whakarongo ki o koutou rangatira  
 o te wahi ki te kikokiko i nga mea katoa: kua hei ta te kanohi mahi, he whakamanawareka tangata  
 hoki tera; engari hei runga i te ngakau tapatahi, me te wehi ano ki te Atua. <sup>23</sup> Ko nga mea katoa e  
 mea ai koutou mahia a ngakautia, hei mea ki te Ariki, a ehara i te mea ki nga tangata; <sup>24</sup> Me te  
 matau ano, ka homai e te Ariki ki a koutou te utu, ara te kainga: he pononga hoki koutou na te  
<sup>25</sup> Ariki, na te Karaiti. Ko te tangata hoki e he ana te mahi, ka whakawhiwhia ano ia ki tana he i  
 mahi ai: kahore hoki he whakapai kanohi.

## Chapter 4

<sup>1</sup> E nga rangatira, hoatu ki nga pononga te mea e tika ana, te mea e rite ana; e mohio ana hoki  
 koutou he Rangatira to koutou kei te rangi.

<sup>2</sup> Kia u ki te inoi, kia mataara tonu ki taua mea i runga i te whakawhetai; <sup>3</sup> Me te inoi ano mo matou, kia whakapuaretia e te Atua he kuwaha korero ki a matou, hei korerotanga i te mea ngaro a te Karaiti i hereherea ai ahau. <sup>4</sup> Kia whakakitea atu ai e ahau, kia rite ai taku korero ki te mea i tika.

<sup>5</sup> Hei runga i te whakaaro mohio to koutou whakahaere ki te hunga o waho. Hokona te taima.

<sup>6</sup> Hei runga i te aroha noa ta koutou korero i nga wa katoa, he mea kinaki ki te tote, kia matau ai koutou ki te tikanga mo te whakahoki kupu atu ki tenei tangata, ki tenei tangata.

<sup>7</sup> Ma Tikiku e whakaatu aku mea katoa ki a koutou; he teina aroha ia, he minita pono, he hoa pononga i roto i te Ariki. <sup>8</sup> Ko te tino putake tenei i tonoa atu ai ia e ahau ki a koutou, kia matau ai koutou ki to matou ahua, a kia whakamarietia ai o koutou ngakau; <sup>9</sup> Raua ko Onehimu, he teina pono, e arohaina ana, a no koutou hoki ia. Ma raua e whakaatu ki a koutou nga mahi katoa o konei.

<sup>10</sup> He oha tenei ki a koutou na Aritaku, na toku hoa herehere, raua ko Maka iramutu o Panapa; kua tae atu na hoki nga tikanga mona ki a koutou; ki te tae atu ia ki a koutou, manaakitia; <sup>11</sup> Me Ihu ano hoki, tetahi ingoa ona ko Hutuha; no te kotinga ratou. Ko enei anake oku hoa mahi ki te rangatiratanga o te Atua, he oranga ngakau ano ratou ki ahau. <sup>12</sup> Tenei te oha atu nei ki a koutou a Epapara; no koutou ia, he pononga na te Karaiti. He tohe tonu tana ki te inoi mo koutou, kia tu koutou, he hunga tino tika, pumau tonu ki nga mea katoa i pai ai te Atua. <sup>13</sup> Ko ahau hoki tona pono mo tana mahi nui mo koutou, mo te hunga hoki i Raorikia, a mo te hunga i Hierapori. <sup>14</sup> Tenei te oha atu nei ki a koutou a Ruka, te rata aroha, raua ko Rimaha. <sup>15</sup> Oha atu ki nga teina i Raorikia, ki a Naimapa hoki, ki te hahi ano hoki i to ratou whare. <sup>16</sup> A ka korerotia tenei pukapuka ki a koutou, meinga kia korerotia ano hoki i roto i te hahi o nga Raorikia; korerotia ano hoki e koutou tera i tuhia mai i Raorikia. <sup>17</sup> Mea atu hoki ki a Arakipu, Kia mahara ki te mahi minita kua riro na i a koe i roto i te Ariki, kia ata mahia marietia. <sup>18</sup> Ko te aha aku, a Paora, na toku ringaringa ake. Kia mahara ki oku mekameka. Kia tau te aroha noa ki a koutou. Amine.

## 1 Thessalonians

### Chapter 1

1 Na Paora, na ratou ko Hirawanu, ko Timoti, ki te hahi o te hunga o Teharonika i roto i te Atua Matua, i te Ariki hoki, i a Ihu Karaiti: Kia tau te aroha noa ki a koutou me te rangimarie.

2 Whakawhetai tonu matou ki te Atua i nga wa katoa mo koutou katoa, me te whakahua i a koutou i a matou inoi;

3 Mau tonu to matou mahara ki ta koutou mahi whakapono, ki te uaua o to koutou aroha, ki te u o te tumanako ki to tatou Ariki, ki a Ihu Karaiti, i te aroaro o te Atua, ara o to tatou Matua;

4 E mohio ana hoki matou, e nga teina e arohaina nei e te Atua, ki to koutou whiriwhiringa.

5 Kihai hoki ta matou rongopai i tae atu ki a koutou i runga i te kupu anake, engari i te kaha, i te Wairua Tapu, nui atu hoki te u o te ngakau; pera ano me koutou e matau na ki to matou ahua i roto i a koutou, he whakaaro ki a koutou.

6 A ka whai koutou i ta matou tauira, i ta te Ariki hoki, i riro uaua atu na i a koutou te kupu, me te whakahari ano ia a te Wairua Tapu.

7 No ka waiho koutou hei tauira ki te hunga whakapono katoa o Makeronia, o Akaia.

8 I paku haere atu na hoki i a koutou te kupu a te Ariki, ehara i te mea i Makeronia, i Akaia anake, engari i puta atu to koutou whakapono ki te Atua ki nga wahi katoa;

9 no reira kahore he rawa e puaki ai tetahi kupu a matou. Ko ratou nei hoki kei te korero mo matou, mo to matou taenga atu ki a koutou, mo to koutou tauritanga mai hoki i nga whakapakoko ki te Atua, ki te mahi ki te Atua ora, ki te Atua pono;

10 Ki te tatari ano hoki ki tana Tama i te rangi, i whakaarahia ake nei e ia i te hunga mate, ki a Ihu, e whakaora nei i a tatou i te riri meake nei puta.

## Chapter 2

1 E matau ana hoki koutou, e oku teina, ki to matou haerenga atu ki a koutou, ehara i te mea i kore tikanga;

2 Heoi mate ana matou i mua ra, tukinotia ana i Piripai, e matau na koutou, otira maia tonu matou i roto i to tatou Atua ki te korero i te rongopai o te Atua ki a koutou i roto i te uaua nui.

3 Ko ta matou whakahauhau na hoki, ehara i te mea na te tinihanga, na te poke ranei, ehara ano hoki i te mea hangareka.

4 Engari, ka pai nei te Atua kia tukua ki a matou te rongopai, ka pera ta matou korero; ehara i te mea kia whakamanawarekatia te tangata, engari te Atua, e whakamatautau nei i o tatou ngakau.

5 Kahore hoki matou i kitea e korero ana i te kupu whakapati, e matau na ano hoki koutou, e huna ana ranei i te ngakau apo; ko te Atua te kaititiro mai.

6 Kihai ano matou i rapu kororia i te tangata, i a koutou ranei, i era atu ranei, ahakoa i tika matou, he apotoro nei na te Karaiti, kia mea he tangata whai tikanga matou.

<sup>7</sup> Engari i ngawari matou i waenganui i a koutou, i rite ki te kaiatawhai e whakaahuru ana i ana  
<sup>8</sup> tamariki ake. Pera tonu to matou matenui ki a koutou, ehara i te mea ko te rongopai anake o te  
 Atua ta matou i pai ai kia hoatu ki a koutou, engari ko o matou ake wairua, i te mea kua aroha nui  
<sup>9</sup> matou ki a koutou. E mahara ana hoki koutou, e oku teina, ki ta matou mahi, ki to matou mauui:  
 mahi ana matou i te po, i te ao, kei taimaha ki tetahi o koutou, kauwhautia ana hoki e matou te  
<sup>10</sup> rongopai o te Atua ki a koutou. Ko koutou nga kaititiro, ko te Atua hoki, ki te tapu, ki te tika,  
<sup>11</sup> ki te kore he o ta matou whakahaere ki a koutou e whakapono na. A e matau ana ano koutou ki  
 ta matou mahi ki tetahi, ki tetahi o koutou, pera i ta te matua ki ana tamariki ake, te whakahauhau,  
<sup>12</sup> te whakahihiri i a koutou, te tohutohu, Mo ta koutou haere kia rite ki ta te Atua, nana nei koutou  
 i karanga ki tona rangatiratanga, ki tona kororia.  
<sup>13</sup> Mo konei matou ka whakawhetai tonu nei ki te Atua, no te mea i to koutou tahuritanga ki  
 te kupu a te Atua i rongu ra koutou ki a matou, ehara i te mea he tahuri no koutou ki te kupu tangata,  
 engari ki te kupu a te Atua, ko ia pu na hoki ia e mah i na i roto i a koutou, i te hunga e whakapono  
<sup>14</sup> na. Kua whai na hoki koutou, e oku teina, i te tauria a nga hahi a te Atua i Huria i roto i a Karaiti  
 Ihu: ko o koutou matenga hoki i nga tangata o to koutou ake iwi kua rite ki o era matenga i nga  
<sup>15</sup> Hurai; Na ratou hoki i whakamate te Ariki, a Ihu, me nga poropiti, a i pana matou ki waho;  
 kahore a ratou whakamanawareka ki te Atua, a he hoariri ratou no nga tangata katoa. <sup>16</sup> E arai mai  
 ana i a matou kei korero ki nga tauwi kia ora ai, he mea tenei e tutuki ai o ratou hara i nga wa  
 katoa; otira ka whakapaua rawatia te riri ki a ratou.  
<sup>17</sup> Ko matou ia, e oku teina, he iti nei te wahi kua wehea mai nei matou i a koutou, ko nga  
 tinana, kahore te ngakau, hira rawa to matou takare kia kite i to koutou kanohi, nui atu te hiahia.  
<sup>18</sup> No reira, i te whai kia tae atu ki a koutou, ko ahau, ko Paora, i tuatahi, a i tuarua; heoi na Hatana  
 matou i whakaware. <sup>19</sup> He aha hoki ta matou e tumanako atu ai, e hari ai, he aha oti te karauna e  
 whakamanamana ai matou? He teka ianei ko koutou i te aroaro o to tatou Ariki, o Ihu Karaiti, a  
<sup>20</sup> tona taenga mai? Ko koutou hoki to matou kororia, to matou hari.

### Chapter 3

<sup>1</sup> Na, i te kore e taea te ngakau te pehi tonu, i pai matou kia mahue ko matou anake i Atene.  
<sup>2</sup> A tonoa ana e matou a Timoti, to matou teina, he minita na te Atua, he hoa mahi no matou ki te

rongopai o te Karaiti, hei whakau i a koutou, hei korero whakamarie ki a koutou mo nga mea o to  
 koutou whakapono. <sup>3</sup> Kei whakangaueuetia tetahi e enei tukinotanga: e matau ana ano hoki koutou  
 he mea momotu ke tatou mo tenei mea. <sup>4</sup> I a matou hoki e noho ana i a koutou, i korero wawe ano  
 matou ki a koutou, tera tatou e tukinotia; ko ia ano tenei, ka matau nei koutou. <sup>5</sup> Na reira i te mea  
 te taea toku ngakau te pehi tonu, ka tono tangata atu ahau kia mohio ai ahau ki to koutou whakapono,  
 kei whakawaia pea koutou e te kaiwhakawai, a maumau kau ta matou mahi.  
<sup>6</sup> Tena ko tenei, ka tae mai nei a Timoti ki a matou i a koutou, ka pai hoki tana korero ki a  
 matou mo to koutou whakapono, mo to koutou aroha, mo koutou hoki e whai mahara pai ana ki a  
 matou i nga wa katoa, e hiahia ana kia kite i a matou, he pera ano me to matou ki a koutou; <sup>7</sup> Na  
 kua whai whakamarietanga matou i a koutou, e oku teina, i o matou tukinotanga katoa, i o matou  
 matenga, he mea na to koutou whakapono. <sup>8</sup> Ko to matou ora nei hoki tenei, ara kia tu tonu koutou  
 i runga i te Ariki. <sup>9</sup> Me aha hoki he whakawhetai ma matou ki te Atua mo koutou, mo nga hari  
 katoa e hari nei matou ki a koutou, i te aroaro o to tatou Atua? <sup>10</sup> Nui atu ta matou inoi i te po, i te  
 ao, kia kite i o koutou kanohi, kia whakaotia ano hoki e matou nga whai o to koutou whakapono i  
 hapa.  
<sup>11</sup> Na, ma te Atua ake ano, ara ma to tatou Matua, ma to tatou Ariki hoki, ma Ihu Karaiti, e  
 whakatika to matou ara ki a koutou. <sup>12</sup> Ma te Ariki ano hoki e mea kia nui, kia hira to koutou aroha  
 tetahi, ki tetahi, ki nga tangata katoa hoki, kia penei ano me to matou ki a koutou. <sup>13</sup> Kia whakaukia  
 ai o koutou ngakau he mea kahore he he i runga i te tapu i te aroaro o te Atua, o to tatou Matua, i  
 te taenga mai o to tatou Ariki, o Ihu Karaiti, ratou ko tana hunga tapu katoa.

## Chapter 4

<sup>1</sup> Heoi, e oku teina, he mea tenei na matou, he whakahau ki a koutou i roto i te Ariki, i a Ihu,  
 kua riro atu na hoki ta matou i a koutou, a e meinga na hoki e koutou, ara te tikanga mo ta koutou  
 haere, mo ta koutou whakamanawareka atu ki te Atua, n a, kia tino hira rawa tera a koutou. <sup>2</sup> E  
 matau ana hoki koutou ki nga tikanga i whakatakotoria atu e matou ki a koutou i roto i te Ariki, i  
 a Ihu. <sup>3</sup> Ko ta te Atua hoki tenei e pai ai, ara ko to koutou whakatapunga, kia mawehe koutou i te  
 moepuku. <sup>4</sup> Kia matau koutou katoa ki tona tinana, ki tona tinana, kia mau i runga i te tapu, i te  
 honore. <sup>5</sup> Kua i runga i te toronga o te hiahia, kei rite ki nga tauwi kahore nei e matau ki te Atua.



<sup>6</sup> Kia kua tetahi e tinihanga, e whakapati i te mea a tona teina; no te mea ko te Ariki te kairapu utu  
 mo era mahi katoa; ko ta matou hoki ia i korero ai i mua, i whakaatu atu ai ki a koutou. <sup>7</sup> Kihai  
 hoki tatou i karangatia e te Atua ki te poke, engari ki te tapu. <sup>8</sup> Na, ko te tangata e whakakorekore  
 ana, ehara tana i te whakakorekore ki te tangata, engari ki te Atua, nana nei i homai tona Wairua  
 Tapu ki a tatou.  
<sup>9</sup> Ko te aroha ia ki nga teina, kahore a koutou mea e tuhituhi atu ai ahau ki a koutou; he mea  
 whakaako hoki koutou na ano e te Atua ki te aroha tetahi ki tetahi. <sup>10</sup> Ko ta koutou hoki tena e mea  
 na ki nga teina katoa a puta noa i Makeronia. Heoi he whakahau ano tenei na matou ki a koutou, e  
 oku teina, kia hira rawa tena a koutou. <sup>11</sup> Me whai hoki kia ata noho, kia mahi i a koutou na ake  
 mahi, kia mahi ko o koutou ringaringa, kia rite ki ta matou i ako ai ki a koutou; <sup>12</sup> Kia ataahua ai  
 ta koutou haere ki te hunga o waho, kia kua ai e hapa tetahi mea.  
<sup>13</sup> E kore ia matou e pai, e oku teina, kia kuware koutou ki te hunga kua moe, kei koingo koutou,  
 kei pera me era atu kahore nei o ratou tumanakotanga atu. <sup>14</sup> Ki te whakapono hoki tatou kua mate  
 a Ihu, kua ara ake ano, waihoki ko te hunga e moe ana i roto i a Ihu, ka arahina tahitia mai ratou  
 me ia e te Atua. <sup>15</sup> Ko ta matou korero hoki tenei ki a koutou, he mea ki mai na te Ariki, ko tatou,  
 ko te hunga kua mahue ki te ora, ki te taenga mai o te Ariki, e kore e pahika atu ki mua o te hunga  
 kua moe. <sup>16</sup> No te mea ko te Ariki pu ano e heke iho i te rangi me te karanga, me te reo o te tino  
 anahera, me te tetere a te Atua; a ko te hunga kua mate i roto i a te Karaiti e ara i mua. <sup>17</sup> Ko reira  
 tatou, te hunga kua mahue ki te ora, kahakina ngatahitia atu ai me ratou i runga i nga kapua, ki te  
 whakatau ki te Ariki i te rangi: na ka noho tonu tatou ki te Ariki. <sup>18</sup> Na, he kupu enei hei whakamarie  
 ma koutou tetahi i tetahi.

## Chapter 5

<sup>1</sup> Ko nga wa ia me nga taima, e oku teina, kahore he take e tuhituhi atu ai ahau ki a koutou.  
<sup>2</sup> E matau pu ana hoki koutou, tera e haere mai te ra o te Ariki, ano he tahae i te po. <sup>3</sup> I a ratou hoki  
 e ki ana, he rangimarie, he ora; ko reira te mate huaki tata ai ki a ratou, ka pera me te mamae ki te  
 wahine hapu, e kore hoki ratou e mawhiti. <sup>4</sup> Ko koutou ia, e oku teina, kahore i roto i te pouri, e

rite ai ki ta te tahae te hopu a taua ra i a koutou. <sup>5</sup> He tama koutou katoa no te marama, he tama no te ra: ehara tatou i te po, ehara i te pouri.

<sup>6</sup> Heoi aua tatou e moe, kei pera me era atu; engari kia mataara tatou, kia whai whakaaro. <sup>7</sup> Ko te hunga hoki e moe ana, e moe ana i te po; ko te hunga e haurangi ana, e haurangi ana i te po.

<sup>8</sup> Kia whai whakaaro tatou, ko tatou nei te hunga o te ra, kia kakahuria iho te whakapono me te aroha hei pukupuku; hei potae hoki, ko te tumanako atu ki te ora. <sup>9</sup> Kihai hoki tatou i meinga e te

Atua mo te riri, engari kia whiwhi ai ki te ora ma roto i to tatou Ariki, i a Ihu Karaiti; <sup>10</sup> I mate nei mo tatou, ahakoa tatou mataara, moe ranei, kia ora tahi ai me ia.

<sup>11</sup> Na, whakamarie koutou tetahi i tetahi, hanga hoki te pai o tetahi e tetahi, peratia me ta koutou e mea mai na. <sup>12</sup> He mea ia tenei na matou ki a koutou, e oku teina, kia matau ki te hunga e mahi ana i roto i a koutou, e tohutohu ana i a koutou i roto i te Ariki, e whakatupato ana i a koutou;

<sup>13</sup> Kia nui whakaharahara ano o koutou whakaaro ki a ratou i runga i te aroha, me whakaaro ki ta ratou mahi. Kia mau ta koutou rongu ki a koutou ano. <sup>14</sup> Na ko ta matou whakahau tenei ki a koutou, e oku teina, whakatupatoria te hunga whakakeke, whakamarietia te hunga ngakau rahirahi,

<sup>15</sup> tautokona ake te hunga ngoikore, kia manawanui ki nga tangata katoa. Kia tupato kei hoatu he kino mo te kino e tetahi ki tetahi; engari i nga wa katoa whaia he pai mo tetahi, mo tetahi, mo nga tangata katoa ano hoki.

<sup>16</sup> Kia hari i nga wa katoa. <sup>17</sup> Kei whakamutua te inoi. <sup>18</sup> I nga mea katoa me whakawhetai atu; ko ta te Atua hoki tenei i pai ai i roto i a Karaiti Ihu hei mahi ma koutou, <sup>19</sup> Kei tineia te

Wairua. <sup>20</sup> Kaua e whakahawea atu ki nga poropititanga. <sup>21</sup> Whakamatautauria nga mea katoa; kia u ki te pai; <sup>22</sup> Mawehe atu i nga ahua katoa o te kino.

<sup>23</sup> A ma te Atua pu ano o te rangimarie e tino whakatapu rawa koutou: kia tiakina hoki o koutou wairua, o koutou ngakau, o koutou tinana, kia toitu, kia hekore, i te taenga mai o to tatou Ariki, o

Ihu karaiti. <sup>24</sup> He pono te kaikaranga i a koutou, mana ano hoki e whakaoti. <sup>25</sup> E oku teina, inoi

mo matou. <sup>26</sup> Oha atu ki nga teina katoa, hei te kihi tapu. <sup>27</sup> He tohe atu tenei naku ki a koutou i runga i te Ariki, kia korerotia tenei pukapuka ki nga teina tapu katoa. <sup>28</sup> Kia tau ki a koutou te aroha noa o to tatou Ariki, o Ihu Karaiti. Amine.

## 2 Thessalonians

### Chapter 1

<sup>1</sup> Na Paora, na ratou ko Hirawanu, ko Timoti, ki te hahi o te hunga o Teharonika i roto i te Atua, i to tatou Matua, i te Ariki hoki, i a Ihu Karaiti. <sup>2</sup> Kia tau ki a koutou te aroha noa me te rangimarie, he mea na te Atua, na to tatou Matua, na te Ariki hoki, na Ihu Karaiti. <sup>3</sup> He tika rawa kia whakawhetai matou ki te Atua i nga wa katoa mo koutou, e oku teina, he mea pai ra hoki ia, no te mea e neke ake ana to koutou whakapono, hu nui rawa hoki te aroha o koutou katoa, o tetahi ki tetahi. <sup>4</sup> I whakamanamana ai matou ki a koutou i roto i nga hahi a te Atua, ki to koutou u, ki to koutou whakapono i nga whakatoinga katoa i a koutou, i nga tukinotanga hoki e whakaririka kau na koutou; <sup>5</sup> He tohu tenei mo te tika o ta te Atua whakawa, kia kiia ai koutou he tau mo te kingitanga o te Atua, e mate nei koutou he whakaaro ki tera: <sup>6</sup> Mehemea ia he tika ki te Atua kia utua ki te kino te hunga e tukino ana i a koutou; <sup>7</sup> A, ki a koutou hoki e tukinotia na, kia okioki tahi me matou, i te whakakitenga mai o te Ariki, o Ihu, i runga i te rangi me nga anahera o tona kaha, <sup>8</sup> I roto i te mura ahi e rapu utu ana i te hunga kahore e matau ki te Atua, kahore nei hoki e ngohengohe ki te rongopai o to tatou Ariki, o Ihu Karaiti. <sup>9</sup> Ko te utu hoki e whakapangia ki a ratou he whakangaromanga, he mea mutungakore i te aroaro ano o te Ariki, i te kororia ano hoki o tona kaha; <sup>10</sup> Ina haere mai ia kia whakakororiatia i roto i tana hunga tapu, kia whakamoemititia i roto i te hunga whakapono katoa i taua ra; i whakapono na hoki koutou ki ta matou whakaatu i roto i a koutou. <sup>11</sup> Koia nei matou ka inoi tonu nei mo koutou, kia meinga koutou e to tatou Atua he tau mo tenei karangatanga, kia whakaotia ano hoki e ia i runga i te kaha nga mea katoa i ahuaireka ai tona pai, me te mahi ano hoki o te whakapono, <sup>12</sup> Kia whakakororiatia ai te ingoa o to tatou Ariki, o Ihu Karaiti, i roto i a koutou, me koutou hoki i roto i a ia, kia rite ai ki ta te aroha noa o to tatou Atua, o te Ariki hoki, o Ihu Karaiti.

### Chapter 2

<sup>1</sup> Na, he mea tenei na matou ki a koutou, e oku teina, mo te taenga mai o to tatou Ariki, o Ihu Karaiti, mo to tatou huihuinga atu ano ki a ia; <sup>2</sup> Kei hohoro te rurea o o koutou hinengaro, kei ohore ranei i ta te wairua, i ta te kupu, i ta te pukapuka ranei e kiia ana na matou, e mea ana kua tae tonu mai inaianei te ra o te Ariki.

<sup>3</sup> Kei tinihangatia koutou i tetahi mea e te tangata: e kore hoki e tae wawe mai, kia matua tae mai te takanga atu, kia whakakitea mai ano hoki te tangata o te hara, te tama a te whakangaro: <sup>4</sup> He hoariri nei ia, e whakakake ana i a ia ki runga ake i nga mea katoa e kiia ana he Atua, e karakiatia ana; kia noho ai ia i te whare tapu o te Atua, kia whakaatu ai i a ia ko ia te Atua. <sup>5</sup> Kahore ranei koutou e mahara i ahau ano i a koutou, i korerotia e ahau enei mea ki a koutou? <sup>6</sup> Na ka matau koutou inaianei ki te mea e arai ana, kia whakakitea mai ra ano ia a tona taima. <sup>7</sup> No te mea kei te mahi inaianei te mea huna o te kino, otira tera tetahi kei te arai inaianei, kia whakawateatia rawatia ano ia. <sup>8</sup> Ko reira whakakitea mai ai taua tangata kino, e whakangaromia e te Ariki ki te ha o tona mangai, e whakakahoretia ki te putanga nui o tona taenga mai; <sup>9</sup> Ara a ia pu, i rite nei tona taenga mai ki te mahinga a Hatana, i runga i te mana, i nga tohu, i nga merekara teka, <sup>10</sup> I nga mahi tinihanga katoa hoki o te he, i roto i te hunga e whakangaromia ana; no te mea kihai i riro i a ratou te aroha o te pono, kia ora ai ratou. <sup>11</sup> Mo konei hoki ka tukua atu e te Atua ki a ratou he pohehe e mahi ana, kia whakapono ai ratou ki te teka: <sup>12</sup> Kia tukua ai ki te he te hunga katoa kahore i whakapono ki te pono, i ahuaureka ke ki te he.

<sup>13</sup> Tika tonu ia kia whakawhetai atu matou ki te Atua mo koutou i nga wa katoa, e oku teina e arohaina nei e te Ariki, he mea whiriwhiri na hoki koutou na te Atua no te timatanga ra ano mo te ora, i runga i te whakatapu a te Wairua, i runga ano i te whakapono ki te pono; <sup>14</sup> Ko te mea tena i karangatia ai koutou e ia, he mea na to matou rongopai, ara kia whiwhi ki te kororia o to tatou Ariki, o Ihu Karaiti. <sup>15</sup> Heoi, e oku teina, e tu koutou: kia mau ki nga whakarereanga iho i whakaakona ai koutou e te kupu, e ta matou pukapuka ranei.

<sup>16</sup> Na, ma to tatou Ariki, ma Ihu Karaiti pu ano, ma te Atua, ma to tatou Matua, i aroha mai nei ki a tatou, i homai nei i te whakamarie mutungakore, me te mea pai e tumanakohia atu nei, he meatanga na te aroha noa, <sup>17</sup> Mana e whakamarie o koutou ngakau, mana koutou e whakau ki runga ki nga kupu, ki nga mahi pai katoa.

### Chapter 3

<sup>1</sup> Heoi, E oku teina, inoi mo matou, kia rere te kupu a te Ariki, kia whai kororia, kia pena me  
 tena i a koutou: <sup>2</sup> Kia whakaorangia hoki matou i nga tangata poauau, i nga tangata kino: kahore  
 hoki nga tangata katoa e whakaponu. <sup>3</sup> Otiia e pono ana te Atua, mana koutou e whakau, e tiaki i  
 te tangata kino. <sup>4</sup> Na e u ana to matou whakaaro i roto i te Ariki ki a koutou, kei te mahi koutou, a  
 ka mahi ano i a matou e whakaako nei ki a koutou. <sup>5</sup> Ma te Ariki hoki e whakatika o koutou ngakau  
 ki te aroha o te Atua, ki te ngakau ata tatari o te Karaiti.  
<sup>6</sup> Na, ko ta matou whakahau atu tenei ki a koutou, e oku teina, i runga i te ingoa o to tatou Ariki,  
 o Ihu Karaiti, mawehe ke i nga teina katoa e he ana te whakahaere, kahore nei e rite ki a matou  
 whakarereinga iho i roto i a ratou. <sup>7</sup> E matau na hoki koutou ki nga mea e tika ai ta koutou whakarite  
 ki a matou: kihai hoki i he ta matou whakahaere i roto i a koutou; <sup>8</sup> Kihai hoki matou i kai noa i te  
 taro i te ringa o tetahi tangata, engari i roto i te mahi nui, i te uaua, me te mahi tonu i te ao, i te po,  
 kei whakataimahatia e matou tetahi o koutou. <sup>9</sup> Ehara ra i te mea kahore o matou take, engari kia  
 meinga ai matou hei tauria mo koutou, kia rite ai ta koutou ki ta matou. <sup>10</sup> Ana hoki i a matou e  
 noho ana i a koutou, ko ta matou whakahau tenei ki a koutou, ki te kore tetahi e pai ki te mahi, kaua  
 ia e tukua kia kai. <sup>11</sup> Kei te rongu hoki matou tera etahi e he ana te whakahaere i roto i a koutou,  
 kahore rawa e mahi, engari e pokanoa ana ki a etahi. <sup>12</sup> Na, ko ta matou ako, ko ta matou whakahau  
 tenei ki aua tangata pera, i roto i to tatou Ariki, i a Ihu Karaiti, me mahi marie ratou, ka kai i a ratou  
 na ake kai. <sup>13</sup> Ko koutou ia, e oku teina, kei ngakaukore ki te mahi pai. <sup>14</sup> Na ki te kore tetahi e  
 ngohengohe ki ta matou kupu i tenei pukapuka, kia marama te tohu i a ia, kei piri koutou ki a ia,  
 kia whakama ai ia. <sup>15</sup> Otiia kaua e mea he hoariri ia, engari whakatupatoria, ano he teina.  
<sup>16</sup> Na, ma te Ariki pu o te rangimarie e hoatu te rangimarie ki a koutou i nga wa katoa, i nga  
 mea katoa. Kia noho te Ariki ki a koutou katoa. <sup>17</sup> Ko te oha aku, a Paora, na toku ringaringa ake,  
 ko te tohu ia i nga pukapuka katoa; he pena taku tuhituhi. <sup>18</sup> Kia tau te aroha noa o to tatou Ariki,  
 o Ihu Karaiti ki a koutou katoa. Amine.

### 1 Timothy

## Chapter 1

<sup>1</sup> Na Paora, na te apotoro a Ihu Karaiti, he mea whakarite e te Atua, e to tatou Kaiwhakaora, e Ihu Karaiti hoki, ko ia ta tatou e tumanako atu nei; <sup>2</sup> Ki a Timoti, ki taku tamaiti pono i roto i te whakapono: kia tau atu te aroha noa, te mahi tohu, te rangimarie, he mea na te Atua, na to tatou Matua, na Karaiti Ihu hoki, na to tatou Ariki. <sup>3</sup> I whakahau atu ra ahau ki a koe, i ahau e haere ana ki Makeronia, kia noho koe i Epeha, ako ai i etahi kia kaua e rere ke te whakaako, <sup>4</sup> Kia kaua e whakarongo ki nga korero tito noa, ki nga whakapapa tupuna kahore nei e whai mutunga; ko nga putanga ake o ena, he tautohetohe, kahore he whakatupu mo te tikanga a te Atua i runga i te whakapono; ka pera ano ahau inaianei.

<sup>5</sup> Ko te tukunga iho ia mo te ako, ko te aroha, no roto i te ngakau ma, i te hinengaro pai, i te whakapono tinihangakore. <sup>6</sup> Kapea ake enei e etahi, kotiti ke ana ki nga korero teka noa; <sup>7</sup> Ki ta ratou hei kaiwhakaako ratou i te ture, heoi kahore e matau ki ta ratou e korero nei, ki nga mea ranei e kauwhautia nei e ratou. <sup>8</sup> Otira, e matau ana tatou he mea pai te ture, ki te rite te meatanga e te tangata ki ta te ture tikanga; <sup>9</sup> E matau ana hoki ki tenei, kihai te ture i whakatakotoria mo te tangata tika, engari mo te hunga turekore, tutu, karakiakore, hara, tapukore, whakarihariha, mo nga kaipatu i nga papa, mo nga kaipatu i nga whaea, mo nga kaikohuru tangata, <sup>10</sup> Mo te hunga moepuku, moe kino i te tane, tahae tangata, korero teka, oati teka, a ki te mea tera atu tetahi mea kahore nei e rite ki te whakaako tika; <sup>11</sup> Rite tonu tenei ki te rongopai o te kororia o te Atua hari, ki te mea kua tukua mai nei ki ahau.

<sup>12</sup> E whakawhetai atu nei ahau ki a Karaiti Ihu, ki to tatou Ariki, nana nei ahau i whakakaha; i whakaaro hoki ia he tangata pono ahau, a meinga ana ahau hei minita; <sup>13</sup> Ahau nei, te tangata kohukohu i mua, te kaiwhakato, whakatupu kino: heoi i tohungia ahau, no te mea i meinga kuwaretia e ahau i runga i te whakaponokore: <sup>14</sup> Tino nui rawa hoki te aroha noa o to tatou Ariki, hui tahi ki te whakapono, ki te aroha i roto i a Karaiti Ihu. <sup>15</sup> He pono te korero, he pai hoki kia tangohia rawatia, I haere mai a Karaiti Ihu ki te ao ki te whakaora i te hunga hara; ko te tino tangata hara o ratou ko ahau. <sup>16</sup> Heoi na konei ahau i tohungia ai, kia ai ko ahau ki mua hei whakaaturanga ma Ihu Karaiti i nga manawanui maha, hei tohu ki te hunga e whakapono ki a ia a muri ake nei, kia ora tonu ai ratou. <sup>17</sup> Na, ki te Kingi ora tonu, e kore nei e pirau, e kore nei e kitea, ko ia nei anake te Atua matau, waiho atu i a ia te honore me te kororia ake ake. Amine.

18

Ka tukua atu nei e ahau tenei kupu ako ki a koe, e taku tamaiti, e Timoti, ko te poropititanga ano tenei i puta mai i mua mou, hei mea i a koe kia whawhai i te whawhai pai; <sup>19</sup> Kia mau ki te whakapono me te hinengaro pai; he mea nei ena kua akiritia atu e etahi, ka meinga to ratou whakapono he kaupuke pakaru: <sup>20</sup> No ratou a Haimeniu raua ko Arehanera, kua tukua nei e ahau ki a Hatana, kia whakaakona ai kia kua e kohukohu.

## Chapter 2

1

Na, ko taku whakahau tenei i te tuatahi o nga mea katoa, kia puta nga inoi, nga karakia, nga inoi wawao, nga whakawhetai, mo nga tangata katoa; <sup>2</sup> Mo nga kingi, mo te hunga whai mana katoa hoki: kia ata noho marie ai tatou i runga i nga whakaaro karakia, i nga tikanga mahara katoa.

3

He mea pai tenei, he mea e manakohia ana i te aroaro o te Atua, o to tatou Kaiwhakaora; <sup>4</sup> Ko tana nei e pai ai ko nga tangata katoa kia ora, kia haere mai hoki ki te matauranga ki te pono.

5

Kotahi tonu te Atua, kotahi te takawaenga o te Atua, o nga tangata, ko ia ano he tangata, ara ko

6

Karaiti Ihu; <sup>7</sup> I hoatu nei i a ia hei utu mo te katoa; he mea kia whakaaturia i ona wa ake; A meinga ana ahau hei karere, hei apotoro mo taua mea; he pono taku korero i roto i a te Karaiti,

kahore aku teka; hei kaiwhakaako mo nga tauwi i runga i te whakapono, i te pono. <sup>8</sup> Na, ko taku e pai ai, ko nga tane kia inoi i nga wahi katoa, kia tapu nga ringa ina ara, kua he riri, he tautohetohe.

9

Ko nga wahine hoki kia mau i te kakahu ataahua, kia tu whakama, kia whai whakaaro; kauaka <sup>10</sup> te makawe whiri, te koura, te peara, te kakahu utu nui; Engari ko te mea e tau ana mo nga wahine

e whakaae ana ki te karakia, ara ko nga mahi pai. <sup>11</sup> Me ako marie te wahine kia nui te ngohengohe.

12

E kore hoki e tukua e ahau te wahine kia whakaako, kia neke ake ranei tana tikanga i ta te tane,

engari me ata noho. <sup>13</sup> Ko Arama hoki kua hanga i mua, muri iho ko Iwi. <sup>14</sup> A kihai a Arama i

tinihangatia, ko te wahine ia i tinihangatia, a taka ana ki te he. <sup>15</sup> Otira ka ora ia i te whanautanga tamariki, ki te mau tonu to ratou whakapono, aroha, tapu, whakaaro.

## Chapter 3

<sup>1</sup> He pono te korero, Ki te hiahia tetahi ki te mahi pihopa, e hiahia ana ia ki te mahi pai. <sup>2</sup> Na, ko te tikanga tenei, kia kaua te pihopa e ekengia e te kupu, he tahu no te wahine kotahi, kia ngawari, kia whai whakaaro, kia marama ana tikanga, kia atawhai ki nga manuhiri, kia whai ngakau ki te whakaako: <sup>3</sup> Kia kaua e kakai waina, kia kaua e patu; engari kia ngawari, kaua e totohe, kaua e matenui ki te moni; <sup>4</sup> Kai pai tana tohutohu i tona whare; e mea ana i ana tamariki kia ngohengohe ki a ia, kia nui te mahara: <sup>5</sup> Ki te kore hoki tetahi tangata e matau ki te tohutohu i tona whare ake, me pehea ka tiaki ai ia i te hahi a te Atua? <sup>6</sup> Kauaka i te tauhou, kei whakakake, a ka tau to te rewera he ki a ia. <sup>7</sup> A kia pai te korero mona a te hunga o waho; kei taka ia ki te whakahawe, ki roto hoki ki te mahanga a te rewera.

<sup>8</sup> Waihoki ko nga rikona kia tu kaumatua, kaua e arero rua, kaua e matenui ki te waina, kaua e whai ki te taonga paruparu; <sup>9</sup> Kia ma o ratou hinengaro e mau ai ki te mea ngaro o te whakaponu. <sup>10</sup> Na, kia matua whakamatautauria enei; katahi ka tuku ai kia mahi i a te rikona mahi, ki te kore he whakahe mo ratou. <sup>11</sup> Ko nga wahine hoki kia ahua kaumatua, kaua e ngautuara, kia whai mahara, kia pono i nga mea katoa. <sup>12</sup> Ko nga rikona, kia kotahi te hoa wahine; kia pai te tohutohu i a ratou tamariki, i o ratou whare ake ano hoki. <sup>13</sup> Ki te pai hoki ta ratou mahi rikona, ka whiwhi ratou ki te turanga pai mo ratou, ka nui hoki to ratou maia i runga i te whakaponu ki a Karaiti Ihu.

<sup>14</sup> He tuhituhi atu tenei naku i enei mea ki a koe, e mea ana hoki tera ahau e haere wawe atu ki a koe: <sup>15</sup> Ki te roa ia ahau, kia matau ai koe ki te tikanga mo tau mahi i roto i te whare o te Atua, ko te hahi nei ia a te Atua ora, ko te pou, ko te turanga o te pono. <sup>16</sup> Na, kahore rawa e tautohetia te nui o te mea ngaro e karakiatia nei: Ko ia i whakakitea mai i roto i te kikokiko, he mea whakatika na te Wairua, i kitea e nga anahera, i kauwhautia nei i roto i nga tauwiwi, i whakaponohia nei i te ao, i tangohia atu ki te kororia.

## Chapter 4

<sup>1</sup> Otira he korero tino hangai ta te Wairua, ko a nga wa o muri nei ka kotiti ke atu etahi i te whakaponu, ka whakarongo ki nga wairua tinihanga, ki nga whakaakoranga a nga rewera, <sup>2</sup> He mea na te hianga o te hunga korero teka; o ratou hinengaro, ano he mea tahu ki te rino wera; <sup>3</sup> E



riri ana kia kua e marena, kia kua e pa ki nga kai i hanga e te Atua hei mea ma te hunga e whakapono ana, e matau ana hoki ki te pono, me te whakawhetai ano ratou. <sup>4</sup> He pai hoki nga mea katoa i hanga e te Atua, kahore he mea hei rukenga, ina tangohia i runga i te whakawhetai: <sup>5</sup> He mea hoki i whakatapua, na te kupu a te Atua, na te inoi.

<sup>6</sup> Ki te whakamahara koe i nga teina ki enei mea, he minita pai koe na Ihu Karaiti, he mea whakatupu ake i runga i nga kupu o te whakapono, o te whakaako pai kua whaia nei e koe a tae noa mai ki naiane. <sup>7</sup> Ko nga korero whakarihariha ia, ko nga mea tito noa a te ruruhi, whakarerea.

Ko nga mahi mau ko nga mea o te ngakau karakia. <sup>8</sup> He pai iti nei to te whakamahi i te tinana; tena ko te ngakau karakia e pai ano mo nga mea katoa, kei reira hoki nga korero mo te ora inaianei, mo tera hoki kei te haere mai. <sup>9</sup> He pono tenei korero, he pai hoki kia tangohia rawatia. <sup>10</sup> Koia hoki matou ka mahi, ka tohe, no te mea kua whakamau to matou tumanako ki te Atua ora, ko ia nei te Kaiwhakaora o nga tangata katoa, engari rawa ia o te hunga whakapono. <sup>11</sup> Me kauwhau enei mea e koe, me whakaako. <sup>12</sup> Kei whakahawea tetahi ki a koe, he taitamariki nou; engari hei tauira koe ki te hunga whakapono, tau kupu, tau whakahaere, tou aroha, tou whakapono, tou ngakau ma.

<sup>13</sup> Kia aro nui koe ki te korero pukapuka, ki te whakahauhau, ki te whakaako, kia tae atu ra ano ahau. <sup>14</sup> Kei waiho noa te mea homai noa kei roto na i a koe, i homai ra ki a koe he mea poropiti, i te whakapanga ai o nga ringaringa o nga kaumatua. <sup>15</sup> Ata whakaaroa enei mea: kia pau tou kaha ki reira; kia kitea ai e te katoa tou nekehanga ake. <sup>16</sup> Kia mahara ki a koe ano, ki te whakaakoranga hoki: kia u ki enei mea: ki te mea hoki koe i tenei, ka whakaora koe i a koe ano, i te hunga ano hoki e whakarongo ana ki a koe.

## Chapter 5

<sup>1</sup> Kua e whakatupehupehu ki te kaumatua; engari ata korerotia atu ano he matua; ko nga taitamariki hoki ano he teina; <sup>2</sup> Ko nga ruruhi ano he whaea; ko nga wahine taitamariki ano he tuahine, i runga i nga whakaaro ma katoa.

<sup>3</sup> Whakahonoretia nga pouaru, ara nga tino pouaru. <sup>4</sup> Ki te mea ia he tamariki, he mokopuna ranei a tetahi pouaru, kia whakaakona ratou i te tuatahi kia whakaaro tika ki to ratou whare ake, kia utua hoki ta nga matua; he mea pai hoki tenei, he mea e manakohia ana i te aroaro o te Atua.

<sup>5</sup> Na ko te tino pouaru, ko te mea mokemoke, e tumanako ana ia ki te Atua, e mau tonu ana ki nga

inoi, ki nga karakia, i te po, i te ao. <sup>6</sup> Ko te pouaru ia e whai ana ki nga ahuaireka a te tinana he  
 tupapaku ia, ahakoa ora. <sup>7</sup> Akona atu enei mea, kei ekengia ratou e te kupu. <sup>8</sup> Engari ki te kore  
 tetahi e whakaaro ki ona ake, a ki te hunga rawa ano o tona whare, kua whakakahoretia e ia te  
 whakapono, a he kino atu tana i ta te tangata whakaponokore. <sup>9</sup> Kua tetahi e whakaurua ki te  
 rarangi o nga pouaru i te mea kahore ano ona tau i ona tekau, hei te wahine i tuturu ki te tane kotahi,  
<sup>10</sup> Hei te mea e whakaaetia ana ana mahi pai; mehemea ia i whakatupu tamariki, mehemea ia i  
 atawhai manuhiri, mehemea i horoi i nga waewae o te hunga tapu, mehemea i manaaki i te hunga  
 e tukinotia ana, mehemea ia i whai ki nga mahi pai katoa. <sup>11</sup> Ko nga pouaru taitamariki ia me  
 whakarere; ki te tupu hoki to ratou whakaaro poauau takahi i ta te Karaiti, ka hiahia ki te marena;  
<sup>12</sup> Ka tau te he ki a ratou, no te mea kua whakarerea e ratou to ratou whakapono tuatahi. <sup>13</sup> Ka ako  
 ano hoki ratou ki te noho mangere, ki te haereere noa ki tetahi whare, ki tetahi whare: a ehara i te  
 mea ko te mangere kau, he mate korerorero ano ia to ratou, he pokanoa ki ta tera, ki ta tera, ko ta  
 ratou e korero ai ko nga mea e kore e tika. <sup>14</sup> Koia ahau ka mea ai kia marena nga pouaru taitamariki,  
 kia whanau tamariki, kia tohutohu i nga mea o te whare, kia kua e hoatu ki te hoariri tetahi take  
 tawai: <sup>15</sup> Kua tahuri ke nei hoki etahi ki te whai i a Hatana. <sup>16</sup> Ki te mea he pouaru a tetahi tangata  
 whakapono, a tetahi wahine whakapono ranei, mana ano ratou e atawhai, kua hoki te hahi e  
 whakataimahatia; ko ana hoki e atawhai ai ko nga tino pouaru.  
<sup>17</sup> Kia nui ake te honore mo nga kaumatua e tohutohu pai ana; engari rawa ia mo te hunga ko  
 ta ratou nei mahi ko te kupu, ko te whakaako. <sup>18</sup> E mea ana hoki te karaipiture, Kua e whakamokatia  
 te mangai o te kau patu witi: me tenei hoki, Ka tika te utu mo te kaimahi. <sup>19</sup> Kua e whakarongo  
 ki te whakawa mo te kaumatua, kia puta ra ano i nga mangai o etahi kaiwhakaatu tokorua, tokotoru  
 ranei. <sup>20</sup> Ko te hunga hara riria i te aroaro o te katoa, kia matakua ai hoki era atu. <sup>21</sup> Ko taku kupu  
 nui tenei ki a koe i te aroaro o te Atua, o Karaiti Ihu hoki, a o nga anahera whiriwhiri, puritia enei  
 mea, kua e pokaia he tikanga, kua e mahi i runga i te whakahoia. <sup>22</sup> Kei hohoro te whakapa i nga  
 ringaringa ki tetahi tangata, kua ano e uru ki nga hara o te tangata ke: kia mau tou harakore. <sup>23</sup> Kati  
 tou inu wai; engari hei te waina mau, kia iti, hei mea mo tou puku, mo ou mate e honohono na.  
<sup>24</sup> Ko nga hara o etahi tangata marama noa ake, e haere ana i mua ki te whakawakanga; ko o etahi  
 ia e whai mai ana i muri i a ratou. <sup>25</sup> Waihoki ko nga mahi pai e marama noa ake ana; a, ko nga  
 mea e rere ke ana e kore e taea te huna.

## Chapter 6

<sup>1</sup> Kiia iho e nga pononga whai rangatira katoa he mea tika mo o ratou rangatira ake nga honore  
 katoa, kei korerotia kinotia te ingoa o te Atua me tana ako. <sup>2</sup> Kauga era i nga rangatira whakapono  
 e whakahaweia ki a ratou, no te mea he teina ratou; engari kia nui rawa te mahi, no te mea e  
 whakapono ana ratou, e arohaina ana, e uru ngatahi ana ki te mahi pai. Me whakaako enei mea e  
<sup>3</sup> koe, me whakahau atu. <sup>4</sup> Ki te whakaako ke tetahi, ki te kore e tahuri ki nga kupu ora, ki nga kupu  
 a to tatou Ariki, a Ihu Karaiti, ki te ako ano hoki e rite ai te karakia pai, <sup>5</sup> E whakakake ana ia,  
 kahore ona matauranga ki tetahi mea, heoi e hawata ana ki nga uiuinga, ki nga tautohetohenga, no  
<sup>6</sup> reira nei te hae, te whawhai, nga korero kino, nga whakaaro kino, <sup>7</sup> Nga whakahokihoki kupu a  
 nga tangata ngakau kino, kahore nei he pono i a ratou, e mahara ana ki te karakia pai he huarahi e  
 whiwhi ai ki te taonga.  
<sup>8</sup> He taonga nui ano ia te karakia pai hui tahi ki te ngakau tatu: <sup>9</sup> Kahore hoki he mea i mauria  
 mai e tatou ki te ao, e kore hoki e ahei te mau atu e tatou tetahi mea. <sup>10</sup> Ki te mea ia he kai ta tatou,  
<sup>11</sup> he hipoki, ka makona tatou i ena. <sup>12</sup> Ko te hunga ia e hiahia ana kia whai taonga, ka taka ratou ki  
 te whakamatautauranga, ki te mahanga, ki te tini o nga hiahia kuware e raru ai, e totohu ai nga  
 tangata ki te whakangaromanga, a huna iho. <sup>13</sup> He putake hoki no nga kino katoa te aroha ki te  
 moni; he minamina ki tenei i kotiti ke ai etahi i te whakapono, a werohia putia iho ratou e nga  
 mamae maha. <sup>14</sup> Ko koe ia, e ta te Atua tangata, oma atu i enei; whaia te tika, te karakia pai, te  
 whakapono, te aroha, te manawanui, te ngakau mahaki. <sup>15</sup> Whawhaitia te whawhai pai o te  
 whakapono, hopukia atu te ora tonu, ko te mea hoki tena i karangatia ai koe, a whakaetia ana e  
 koe te whakaetanga pai i te aroaro o nga kaititiro tokomaha.  
<sup>16</sup> Ko taku ako atu tenei ki a koe i te aroaro o te Atua, nana nei nga mea katoa i whai ora ai, o  
 Karaiti Ihu ano hoki, nana nei i whakapuaki te whakaetanga pai i te aroaro o Ponotio Pirato;  
<sup>17</sup> Puritia tenei ture, kei whai koha, kei whai he, a taea noatia te putanga mai o to tatou Ariki, o Ihu  
 Karaiti: <sup>18</sup> Mana e whakakite mai a ona ake wa, ko ia anake nei hoki te Mea kaha, te Mea koa, te  
 Kingi o nga kingi, te Ariki o nga ariki; <sup>19</sup> Ko ia anake e kore e mate, e noho ana ia i te marama e  
 kore e taea atu e tetahi; kahore ia i kitea e tetahi tangata, kahore ano hoki e ahei kia kitea: waiho  
<sup>20</sup> atu i a ia te honore me te kaha ake ake. Amine. <sup>21</sup> Akona te hunga i nga taonga o tenei ao kia kaua  
 e whakakake te ngakau, kia kaua e whakawhirinaki ki nga taonga pahuhu noa, engari ki te Atua  
<sup>22</sup> ora, ko ia hoki hei homai nui i nga mea pai katoa hei mea ma tatou; <sup>23</sup> Kia mahi ratou i te pai, kia

hua a ratou mahi pai, kia tatanga ki te ohaoha, ki te whakawhiwhi i etahi; <sup>19</sup> Me te whakatakoto ano he kaupapa pai mo ratou mo nga ra ki mua, kia mau a ringa ai ratou ki te ora, ara ki te ora tuturu. <sup>20</sup> E Timoti, tiakina te mea kua tukua na ki a koe; tahuri ke i nga korero whakarihariha, i nga kupu teka noa, i nga whakaputanga ketanga a te mea e tekaia nei he matauranga: <sup>21</sup> Kua waiho nei hei tikanga ma etahi, a he ake ratou ki te whakapono. Kia tau te aroha noa ki a koe. Amine.

## 2 Timothy

### Chapter 1

<sup>1</sup> Na Paora, i paingia e te Atua hei apotoro ma Ihu Karaiti, mo te ora i whakaaria mai i roto i a Karaiti Ihu, <sup>2</sup> Ki a Timoti, ki taku tamaiti aroha: Kia tau te aroha noa, te mahi tohu, te rangimarie, he mea na te Atua Matua, na Karaiti Ihu hoki, na to tatou Ariki. <sup>3</sup> E whakawhetai ana ahau ki te Atua, e mahi atu nei ahau ki a ia, he mea no oku tupuna iho i runga i te hinengaro ma, no te mea kahore e mutu toku mahara ki a koe i aku inoinga i te po, i te ao; <sup>4</sup> Nui atu toku hiahia kia kite i a koe, i ahau e mahara ana ki ou roimata, kia ki ai ahau i te hari; <sup>5</sup> Ka hoki ake nei toku mahara ki te whakapono tinihangakore i roto i a koe; i noho tuatahi ra i roto i tou tupuna wahine, i a Roihi, i tou whaea hoki, i a Unihi; a e tino mohio ana ahau kei roto ano i a koe.

<sup>6</sup> Koia ahau ka whakamahara nei i a koe, kia whakaungia ano te ahi, te mea i hoatu na e te Atua, tena kei roto i a koe, he mea na te whakapanga atu o oku ringaringa. <sup>7</sup> Kahore hoki i homai e te Atua ki a tatou te wairua o te wehi; engari to te kaha, to te aroha, to te ngakau mahara. <sup>8</sup> Na, kei whakama koe ki te whakaatu i to tatou Ariki, ki ahau ranei, kia tona herehere: engari uru atu koe ki nga mate o te rongopai, kia rite ki ta te Atua whakakahanga; <sup>9</sup> Nana nei tatou i whakaora, nana hoki tatou i karanga ki te karangatanga tapu; kihai i rite ki a tatou mahi, engari ki tana ake tikanga i whakatakoto ai i mua, ki te aroha noa hoki i homai nei ki a tatou i roto i a Karaiti Ihu, i mua atu o te tima tanga o te ao; <sup>10</sup> A kua whakakitea mai nei inaianei i te putanga nui mai o to tatou Kaiwhakaora, o Ihu karaiti, i whakakahore nei i te mate, a whakakitea mai ana e ia te ora me te matengakore, he mea na te rongopai: <sup>11</sup> Meinga iho nei ahau hei kaikauwhau mo tenei, hei apotoro, hei kaiwhakaako. <sup>12</sup> Ko te mea hoki tenei i pangia ai ahau e enei mate: he ahakoa ra kahore ahau e whakama: e matau ana hoki ahau ki taku i whakapono ai, e u ana toku whakaaro e taea e ia

te tiaki taku i tuku atu ai ki a ia, a taea noatia taua ra. <sup>13</sup> Kia mau ki te tauira mo nga kupu tika i rongo ra koe ki ahau, puritia i runga i te whakapono, i te aroha i roto i a Karaiti Ihu. <sup>14</sup> Ko te mea pai i tukua ra ki a koe, me tiaki e koe, ara e te Wairua Tapu e noho ana i roto i a tatou.

<sup>15</sup> E matau ana ko tenei, i tahuri ke i ahau te hunga katoa i Ahia; no ratou a Paikeru raua ko Heremokeni. <sup>16</sup> Kia tohungia e te Ariki nga tangata o te whare o Onehipora; he maha hoki oku oranga ngakau i a ia, kihai hoki ia i whakama ki toku mekameka. <sup>17</sup> A, i a ia i Roma, i rapu marietia ahau e ia, a kitea ana. <sup>18</sup> Ma te Ariki e tuku ki a ia kia kite i te mahi tohu a te Ariki a taua ra: ko ana mahinga mea hoki maku i Epeha. erangi koe e mohio ana.

## Chapter 2

<sup>1</sup> Na, ko koe, e taku tamaiti, kia kaha i runga i te aroha noa i roto i a Ihu. <sup>2</sup> Ko nga mea hoki i rongo ra koe ki ahau i nga kaiwhakaatu tokomaha, tukua ena ki etahi tangata pono, e pai ana hei whakaako ki era atu hoki. <sup>3</sup> Tukua atu nga mamae ki a koe, kia rite ki te hoia pai a Ihu Karaiti.

<sup>4</sup> Ki te whakahoia tetahi tangata, e kore ia e whakararururutia e nga mea o te ao; kia ahuaireka ai ki a ia te kaiwhakatu i a ia hei hoia. <sup>5</sup> Ki te whakataetae ano tetahi e kore ia e karaunatia, ki te kore e rite ki te tikanga tana whakataetae. <sup>6</sup> Ko te tikanga tenei, ko te kaingaki e mahi ana kia kai wawe i nga hua. <sup>7</sup> Whakaaroa aku e korero nei; a ma te Ariki e homai ki a koe he ngakau mahara i nga mea katoa.

<sup>8</sup> Kia mahara ki a Ihu Karaiti, i whakaarahia nei i te hunga mate, he uri no Rawiri, e ai ki taku rongopai: <sup>9</sup> Ko te mea ano ia i pangia ai ahau e nga mamae, a hereherea noatia iho, ano he tangata mahi kino; otira e kore ta te Atua kupu e herea. <sup>10</sup> Koia hoki ahau i whakaririka kau ai ki nga mea katoa he mea mo te hunga whiriwhiri; kia whiwhi ai ratou ki te ora i roto i a Karaiti Ihu, ki te kororia mutungakore ano hoki. <sup>11</sup> E pono ana hoki te korero, Ki te mate tahi tatou me ia, ka ora tahi ano hoki tatou me ia. <sup>12</sup> Ki te manawanui tatou, ka whakakingitia ngatahitia tatou me ia: ki te whakakahore tatou, ka whakakahoretia hoki tatou e ia: <sup>13</sup> Ki te kore tatou e whakapono, e mau ana ano tona pono: e kore e ahei kia whakakahore ia i a ia ano.

<sup>14</sup> Whakamaharatia ratou ki enei mea, me kauwhau i te aroaro o te Ariki, kia kaua e tautohetohe  
<sup>15</sup> ki nga kupu huakore, ki nga mea whakaputa ke i nga kaiwhakarongo. Kia puta tau tohe mou kia  
 tu ki te aroaro o te Atua, he mea e manakohia ana, he kaimahi e kore e whakama, e whawha tika  
<sup>16</sup> ana i te kupu o te pono. Mawehe ki i nga korero whakarihariha, teka noa: ka neke ake hoki te  
<sup>17</sup> karakia kore o era: A ka kaikai ta ratou kupu, ano he mea kua kikohangatia: no ratou a Himeniu  
<sup>18</sup> raua ko Piritu; Kua he nei ki te pono, e mea ana, kua pahemo ke te aranga mai; a whakaputaia  
 ketia ake e ratou te whakapono o etahi.  
<sup>19</sup> E u ana ia te mau o ta te Atua turanga, ko tona hiri hoki tenei, E matau ana te Ariki ki ana  
 ake: me tenei hoki, Kia mawehe ke i te he nga tangata katoa e whakahua ana i te ingoa o te Karaiti.  
<sup>20</sup> Otiia i te whare nui ehara i te mea he koura kau, he hiriwa kau ranei nga oko, tera ano etahi he  
<sup>21</sup> mea rakau, he mea oneone; etahi hei mea honore, etahi hei mea honorekore. Na, ki te mea te  
 tangata i a ia kia ma i ena mea, hei oko ia mo te honore, kua oti te whakatapu, te whakapai mo a  
 te rangatira tikanga, rite rawa mo nga mahi pai katoa.  
<sup>22</sup> Oma atu i nga hiahia taitamariki: whaia te tika, te whakapono, te aroha, te rangimarie, e  
<sup>23</sup> koutou tahi ko te hunga e karanga ana ki te Ariki i roto i te ngakau ma. Araia atu ano nga uiuinga  
<sup>24</sup> wairangi, kuware, kia mahara hoki ko aua mea hei whakatapu whawhai. Na e kore e pai kia  
 ririhau te pononga a te Ariki; engari kia ngawari ki nga tangata katoa, kia whai ngakau ki te  
<sup>25</sup> whakaako, kia manawanui. Kia whakaako marie i te hunga e totohe ana; me kore e hoatu e te  
<sup>26</sup> Atua ki a ratou he ripeneta e whakaae ai ki te pono; Kia ara ake ai hoki i roto i te mahanga a te  
 rewera te hunga i hopukia oratia e te pononga a te Ariki hei mahi i ta te Atua i pai ai.

### Chapter 3

<sup>1</sup> Kia matau koe ki tenei, ko a nga ra o te whakamutunga puta mai ai nga wa o te he. <sup>2</sup> E aroha  
 hoki nga tangata ki a ratou ano, e aroha ki te moni, e whakapehapeha, e whakakake, e kohukohu,  
<sup>3</sup> e tutu ki nga matua, kahore he whakawhetai, kahore he tapu, Kahore he aroha, he upoko maro,  
<sup>4</sup> he ngautuara, e kore e pehi i te ngakau, he hunga nanakia, kahore e aroha ki te pai, He hunga taku  
<sup>5</sup> tangata, he hunga hikaka, whakakake, to ratou aroha kei nga mahi takaro kahore ia ki te Atua; Ko

te ahua o te karakia kei a ratou, tona kaha ia whakakahoretia iho: tahuri ke koe i nga tangata pera.

<sup>6</sup>

No ratou hoki te hunga e kuhu nei ki nga whare, a riro parau ana i a ratou nga wahine heahea, e

taimaha nei i te hara, he mea kawhaki na nga hiahia maha, <sup>7</sup> E ako tonu ana, heoi kahore rawa kia

tae ki te matauranga o te pono. <sup>8</sup> E rite ana ki a Hani raua ko Hamapiri i totohe ki a Mohi; waihoki ko enei tangata e totohe ana ki te pono: he hunga kua kino ke te hinengaro, he rukenga atu i roto i

te whakapono. <sup>9</sup> Heoi e kore ratou e kake haere: ka kitea hoki to ratou kuwaretanga e te katoa, ka pera hoki me to raua.

<sup>10</sup>

Otira kua mau na i a koe taku whakaako, taku whakahaere, toku whakaaro whakatakoto,

toku whakapono, toku puhoi ki te riri, toku aroha, toku manawanui, <sup>11</sup> Oku whakatoinga, oku matenga i mate ai ahau i Anatioka, i Ikoniuma, i Raihitara; nga whakatoinga i whakatoia ai ahau:

heoi whakaorangia ake ahau e te Ariki i roto i te katoa. <sup>12</sup> A e whakatoia ano te hunga katoa e

hiahia ana kia noho i runga i te karakia i roto i a Karaiti Ihu. <sup>13</sup> Ko te hunga kino ia, me te hunga

maminga, ka kake haere te kino, ka tinihanga, a ka tinihangatia. <sup>14</sup> Tena ko koe kia mau ki nga

mea i ako ra koe, i whakaaetia ra e koe, e matau na hoki koe ki tou kaiwhakaako ki ena mea: <sup>15</sup> Ki a koe ano i mohio o tou tamarikitanga ake, ki nga karaipiture tapu, ko nga mea era e whai matauranga

ai koe, e ora ai, i runga i te whakapono ki a Karaiti Ihu. <sup>16</sup> No te ha o te Atua nga karaipiture katoa,

he pai hoki hei whakaako, hei riri i te he, hei whakatikatika, hei whakaako ki te tika; <sup>17</sup> Kia tino rite ai te tangata a te Atua, rite rawa mo nga mahi pai katoa.

## Chapter 4

<sup>1</sup>

Ko taku kupu tenei ki a koe i te aroaro o te Atua, o Karaiti Ihu hoki, mana nei e whakawa te

hunga ora me te hunga mate, i te ahua o tona putanga mai me tona rangatiratanga, <sup>2</sup> Kauwhautia te kupu; tohea i nga wa pai, i nga wa kino; riria te he, whakahengia iho, whakahaua, whakapaua te

manawanui me te whakaako. <sup>3</sup> Tenei ake hoki te wa e kore ai ratou e whakarongo ki te whakaako tika; heoi, i te mea he taringa minamina o ratou, ka apohia e ratou he kaiwhakaako e rite ana ki o

ratou na hiahia. <sup>4</sup> Ka tahuri ke o ratou taringa i te pono, ka anga atu ki nga korero tito noa. <sup>5</sup> Kia mau ia koe i nga mea katoa; tukua atu nga mamae ki a koe; mahia te mahi a te kaikauwhau i te

rongopai; whakapaua tau mahi minita. <sup>6</sup> Tenei hoki ahau kei te ringihia, kua rite ano te wa hei

<sup>7</sup> haerenga moku. Kua whawhaitia e ahau te whawhai pai, kua omakia toku omanga, kua rite i ahau  
<sup>8</sup> te whakapono: Kei te takoto mai moku i nga wa o muri nei e karauna o te tika, e homai ki ahau  
 a taua ra e te Ariki, e te kaiwhakawa tika: he teka ki ahau anake, engari ki te hunga katoa ano hoki  
 kua matenui ki tona putanga mai.  
<sup>9</sup> Kia puta tou uaua ki te haere wawe mai ki ahau: <sup>10</sup> Kua whakarerea ahau e Rimaha, he aroha  
 nona ki tenei ao, a haere ana a ki Teharonika; kua riro atu a Kerekena ki Karatia, a Taituha ki  
<sup>11</sup> Raramatia. Ko Ruka anake kei ahau. Tena a Maka mauria mai hei hoa mou; he pai hoki ia mo  
<sup>12</sup> taku mahi minita. Kua tonoa e ahau a Tikiku ki Epeha. <sup>13</sup> Ka haere mai koe, mauria mai te  
<sup>14</sup> koroka i mahue atu i ahau ki Toroa, ki a Karapu, me nga pukapuka; tena rawa ia nga kirihipi. He  
 maha nga kino i meatia mai e Arehanera, e te kaimahi parahi ki ahau: ma te Ariki e hoatu ki a ia  
<sup>15</sup> he utu e rite ana ki ana mahi: Kia tupato hoki koe ki a ia; he rahi rawa hoki tana totohe ki a  
 matou kupu.  
<sup>16</sup> I taku korerotanga tuatahi, i karo ai i ahau, kahore he tangata hei tuara moku, heoi whakarerea  
 ake ahau e te katoa. Kua tenei e whakairia ki a ratou. <sup>17</sup> I tu ia te Ariki ki toku taha, nana hoki  
 ahau i whakakaha; kia whakapaua rawatia ai e ahau te kauwhau, kia rongo katoa ai nga tauwiwi: a  
<sup>18</sup> toia mai ana ahau i roto i te mangai o te raiona. Tera ahau e toia mai e te Ariki i roto i nga mahi  
 kino katoa, e whakaorangia hoki tae noa ki tona rangatiratanga i te rangi: waiho atu i a ia te kororia  
<sup>19</sup> ake ake. Amine. Oha atu ki a Pirihira raua ko Akuira, ki te hunga ano hoki o te whare o Onehipora.  
<sup>20</sup> I noho atu a Eratu i Koriniti: ko Toropimu i mahue atu i ahau ki Miretu, he mate. <sup>21</sup> Kia puta  
 tou uaua ki te haere mai i mua o te hotoke. Tenei te oha atu nei ki a koe a Upuru, a Purena, a Rinuha,  
<sup>22</sup> a Karauria, me nga teina katoa. Kia noho te Ariki ki tou wairua, Kia tau te aroha noa ki a koutou.

## Titus

### Chapter 1

<sup>1</sup> Na Paora, he pononga na te Atua, he apotoro na Ihu Karaiti, i runga i te whakapono o te hunga  
 whiriwhiri a te Atua, i te matauranga hoki ki ta te pono e rite ai te karakia; <sup>2</sup> I runga ano i te tumanako  
 atu ki te ora tonu, i whakaaria mai nei i mua atu o te ao e te Atua e kore nei e teka; <sup>3</sup> Nana nei i



whakakite mai tana kupu i ona wa, ra te kupu i tukua mai ki ahau, he mea whakarite mai na te Atua,  
<sup>4</sup> na to tatou Kaiwhakaora; Ki a Taituha, ki taku tamaiti pono i runga i to tatou whakapono tahi:  
 Kia tau te aroha noa me te rangimarie, he mea na te Atua Matua, na Karaiti Ihu, na to tatou  
 kaiwhakaora.

<sup>5</sup> Ko te mea tenei i waiho atu ai koe e ahau ki Kariti, kia whakatikaia ai e koe nga mea i mahue,  
 kia whakaritea ai ano hoki he kaumatua ki ia pa, ki ia pa, kia pera ai me taku i whakatakoto atu ai  
 ki a koe:

<sup>6</sup> Ki te mea he tangata kahore e ekengia e te kupu, he tahu no te wahine kotahi, he tamariki  
 whakapono ana, kahore e korerotia to ratou toreretanga ki te kino, kahore e tutu. <sup>7</sup> Ko te tikanga  
 hoki mo te pihopa, kia kua e ekengia e te kupu, kia rite ki ta te Atua tuari: ehara i te mea tohe ki  
 tana ake, kahore ona aritarita, kahore ana kakai waina, kahore ana papatu, kahore e whai i te taonga

<sup>8</sup> he; Engari e atawhai ana i te manuhiri, e aroha ana ki te pai, e whai whakaaro ana, e tika ana, e

tapu ana, e pehi ana i ona hiahia; <sup>9</sup> E u ana te pupuri i te kupu pono i whakaakona atu na, kia taea  
 ai e ia, i te mea ka tika nei tana whakaako, te whakahauhau, te turaki ano i ta te hunga e totohe mai

<sup>10</sup> ana. He tokomaha hoki te hunga tutu, korero teka noa, tinihanga; nui atu ia o te hunga o te

kotinga, <sup>11</sup> Me kuku o ratou waha; riro pu hoki etahi whare te whakaputa ke e ratou, e whakaako

ana i nga mea e kore e tika, he whakaaro hoki ki te taonga he. <sup>12</sup> I mea tetahi o ratou, he poropiti

no ratou ake, He teka tonu ta nga Kariti, he kararehe kino, he pukukai, he mangere. <sup>13</sup> Ka pono

tenei korero. Na reira kia koi tau kupu riri ki a ratou; kia ora ai to ratou whakapono; <sup>14</sup> Kei tahuri  
 hoki ratou ki nga kupu tito a nga Hurai, ki nga ture a nga tangata e whakaputa ke ana i te pono.

<sup>15</sup> He ma nga mea katoa ki te hunga ma: tena ki te hunga poke, kahore nei o ratou whakapono,

kahore he mea ma: heoi he mea poke o ratou whakaaro, o ratou hinengaro. <sup>16</sup> Ki ta ratou ki kua  
 matau ratou ki te Atua; heoi ko a ratou mahi hei whakakahore ki a ia, he hunga whakarihariha ratou,  
 he hunga tutu, e kore ano e tikangatia mo tetahi mahi pai.

## Chapter 2

<sup>1</sup> Ko koe ia, korerotia nga mea e rite ana ki to te whakaako ora: <sup>2</sup> Ko nga kaumatua kia ata  
 whakahaere i a ratou, kia tu kaumatua, kia whai whakaaro, kia ora te whakapono, te aroha, te

manawanui: <sup>3</sup> Me nga wahine taikaumatua hoki, kia rite nga tikanga ki a te hunga e whakaaro ana  
 ki te tapu, kia kua e ngautuara, kia kua e riro hei pononga ma te waina, kia whakaako i nga mea

<sup>4</sup> pai; Kia meinga e ratou nga wahine taitamariki kia whai whakaaro, kia aroha ki a ratou tane, kia aroha ki a ratou tamariki. <sup>5</sup> Kia whai whakaaro, kia tika, kia pukumahi i te kainga, kia atawhai, kia ngohengohe ki a ratou tane, kei korerotia kinotia te kupu a te Atua. <sup>6</sup> Me whakahau atu hoki nga taitamariki kia whai whakaaro; <sup>7</sup> I nga mea katoa kia kitea koe he tauira mo nga mahi pai; ko tau whakaako kia tapatahi, kia tu kaumatua, <sup>8</sup> Kia ora te kupu, kei taea te whakahe; kia whakama ai te tangata tikanga ke, te ai he mea e korerotia kinotia ai tatou e ia. <sup>9</sup> Ko nga pononga kia ngohengohe ki o ratou rangatira, kia whakamanawarekatia ratou i nga mea katoa; kaua e whakahoki kupu; <sup>10</sup> Kaua e kaia, engari kia kitea he pai, he nui, to ratou pono; kia ai ratou i nga mea katoa hei whakapaipai i te whakaako i te Atua, a to tatou Kaiwhakaora. <sup>11</sup> Kua puta mai hoki te aroha noa o te Atua e ora ai nga tangata katoa, <sup>12</sup> Hei whakaako i a tatou, kia whakakahoretia e tatou te karakiakore me nga hiahia o te ao, kia noho whakaaro tatou, i runga ano i te tika, i te karakia pai, i tenei ao; <sup>13</sup> Me te tatari ano ki te mea whakahari e tumanakohia atu nei, ki te putanga kororia mai o to tatou Atua nui, o to tatou Kaiwhakaora ano hoki, o Ihu Karaiti; <sup>14</sup> I tuku nei i a ia mo tatou, hei hoko i a tatou i roto i nga kino katoa, hei horoi hoki i a tatou hei iwi mana ake, e ngakau nui ana ki nga mahi pai. <sup>15</sup> Korerotia enei mea, whakahaua; kia nui tou maia ki te riri i te he. Kei whakahawe tetahi ki a koe.

### Chapter 3

<sup>1</sup> Whakamaharatia ratou kia ngohengohe ki nga rangatiratanga, ki nga mana, kia rongu ki nga rangatira, kia takatu ki nga mahi pai katoa; <sup>2</sup> Kia kaua e korero kino ki tetahi tangata, kia kaua e whawhai, kia ngakau ngawari, kia nui te mahaki o te ngakau e whakaputaina ki nga tangata katoa. <sup>3</sup> He whakaarokore hoki tatou i mua, he tutu, e tinihangatia ana, he pononga na nga hiahia, na nga whakaahuareka maha, e noho ana i runga i te nanakia, i te hae, he hunga whakarihariha, e mauhara ana tetahi ki tetahi. <sup>4</sup> Otira i te mea ka puta mai nei te tikanga ngawari me te aroha o te Atua, o to tatou Kaiwhakaora ki nga tangata, <sup>5</sup> Ehara i te mea na nga mahi tika i mahia e tatou, engari na tana mahi tohu i whakaorangia ai tatou e ia, he meatanga na te horoinga o te whanautanga houtanga, na te whakahoutanga a te Wairua Tapu, <sup>6</sup> I ringihia nuitia mai nei e ia ki runga ki a tatou, he mea na

<sup>7</sup>  
 Ihu Karaiti, na to tatou Kaiwhakaora; Kia whakatikaia ai tatou e tona aroha noa, kia whiwhi ai  
<sup>8</sup>  
 ki te taonga, ara ki te ora tonu e tumanakohia atu nei. He korero pono tenei; e mea ana hoki ahau  
 kia kaha tau kauwhau i enei mea, kia mahara ai te hunga kua whakapono ki te Atua ki te mahi i  
 nga mahi pai. Ko nga mea enei e ataahua ana, e whai pai ana mo nga tangata.  
<sup>9</sup>  
 Ko nga uiuinga kuware ia, me nga whakapapa tupuna, whakarerea atu, me nga totohe, me  
<sup>10</sup>  
 nga whawhai ki nga mea o te ture, kahore hoki he pai o aua mea, he mea hanga noa. Ko te  
<sup>11</sup>  
 tangata whakapono he, ka kotahi, ka rua nga whakatupatotanga, whakarerea atu; E matau ana  
 hoki koe kua whakaputaia ketia taua tangata pera, kei te hara ano hoki, kua mau tona he i a ia ano.  
<sup>12</sup>  
 Ka tonoa atu e ahau ki a koe a Aretema, a Tikiku ranei, kia puta tou uaua ki te haere mai ki ahau  
<sup>13</sup>  
 ki Nikopori: kua takoto hoki taku tikanga kia noho ki reira i te hotoke. Kia puta tou whakaaro  
<sup>14</sup>  
 kia kawea mai a Hina kaiako ture, raua ko Aporo: kei hapa tetahi mea mo raua. Me ako hoki o  
<sup>15</sup>  
 tatou ki te mahi i nga mahi pai mo nga wa o te rawakore kei huakore ratou. Tenei te oha atu nei  
 ki a koe oku hoa katoa. Oha atu ki te hunga e aroha ana ki a matou i runga i te whakapono. Kia tau  
 te aroha noa ki a koutou katoa. Amine.

## Philemon

### Chapter 1

<sup>1</sup>  
 Na Paora, na te herehere a Karaiti Ihu, na to taua teina hoki, na Timoti, ki ta maua e aroha  
<sup>2</sup>  
 nei, ki to maua hoa mahi, ki a Pirimona, Ki a Apia hoki, ko to maua tuahine, ki to maua hoa hoia,  
<sup>3</sup>  
 ki a Arakipu, ki te hahi hoki i tou whare: Kia tau te aroha noa ki a koutou, me te rangimarie, he  
<sup>4</sup>  
 mea na te Atua, na to tatou Matua, na te Ariki hoki, na Ihu Karaiti. Tenei ahau te whakawhetai  
<sup>5</sup>  
 atu nei ki toku Atua, mau tonu toku mahara ki a koe i aku karakiatanga: He rongu noku ki tou  
<sup>6</sup>  
 aroha, ki tou whakapono ki te Ariki, ki a Ihu, a ki te hunga tapu katoa; Mo te whakahoatanga mai  
 o tou whakapono kia whai mana, i runga i te matauranga ki nga pai katoa i roto i a koutou, he mea  
<sup>7</sup>  
 ki a Karaiti Ihu. He nui hoki to matou koa, marie ana hoki te ngakau i tou aroha, no te mea e ora  
 ana nga ngakau o te hunga tapu i a koe, e toku teina.

<sup>8</sup> Heoi ahakoa he nui toku maia i roto i a te Karaiti ki te whakatakoto atu i te mea tika ki a koe,  
<sup>9</sup> Na te aroha ke taku ka inoi atu nei, ara taku, ta te koroheke, ta Paora, he herehere nei inaianei na  
<sup>10</sup> Ihu Karaiti; He kupu tenei naku ki a koe mo taku tamaiti, mo Onehimu, he mea whanau naku i  
<sup>11</sup> ahau nei i te herehere: I mua, kahore tetahi mea pai ana ki a koe; inaianei ia, kua whai pai koe  
<sup>12</sup> i a ia, ahau ano hoki. Kua whakahokia atu nei ia e ahau, tona tinana tonu, ko toku manawa ake  
<sup>13</sup> ia. I mea ano ahau kia puritia ia ki ahau, hei whakakapi mou ki te mahi ki ahau i roto i nga  
<sup>14</sup> mekameka o te rongopai: Otira kahore nei tau kupu, kihai ahau i pai kia meatia tetahi mea; kei  
<sup>15</sup> riro whakauaua mai tou pai; engari i roto ano i te ngakau. Ko te mea ano pea tenei i motuhia  
<sup>16</sup> mai ai ia i a koe mo tetahi wa, kia mau pu ai ia i a koe ake ake; Ehara i te mea hei pononga ia i  
<sup>17</sup> enei wa, engari tera atu i te pononga, he teina i nui rawa ai toku aroha, tera ia e nui rawa atu tou, i  
<sup>17</sup> te kikokiko, i te Ariki ano hoki. Na, ki te mea kua waiho ahau hei hoa mou, manako mai ki a ia  
<sup>18</sup> me te mea ko ahau. Ki te mea ia kua he ia ki tetahi mea au, kei a ia ranei tetahi mea au, waiho  
<sup>19</sup> mai maku tena e whakaaro; He tuhituhi tenei naku, na Paora, na toku ringaringa ake, maku e  
<sup>20</sup> whakautu; na kahore aku meatanga atu ki a koe, tera ano taku taonga kei a koe, ko koe ano. Ae  
<sup>21</sup> ra, e toku teina, kia whai pai ahau i a koe i roto i te Ariki: kia ora toku ngakau i roto i te Ariki.  
<sup>21</sup> He u no toku whakaaro ki a koe ka ngohengohe, i tuhituhi atu ai ahau ki a koe, e mohio ana hoki,  
<sup>22</sup> tera e nui atu tau e mea ai i taku e korero atu nei. Tenei ano hoki, kia rite mai i a koe tetahi whare  
<sup>23</sup> moku: e mea ana hoki ahau tera e mana a koutou inoi, a ka tukua atu ahau kia a koutou. Tenei  
<sup>24</sup> te oha atu nei ki a koe a Eparara, toku hoa herehere i roto i a Karaiti Ihu, Ratou tahi ko Maka,  
<sup>25</sup> ko Aritaku, ko Rimaha, ko Ruka, oku hoa mahi. Kia tau te aroha noa o to tatou Ariki, o Ihu  
 Karaiti ki o koutou wairua. Amine.

## Hebrews

### Chapter 1

<sup>1</sup> He maha nga wahi, he maha nga huarahi i korero ai te Atua i mua, ara nga poropiti, ki nga  
matua, <sup>2</sup> I enei ra whakamutunga na tana Tama ana korero ki a tatou, ko tana hoki tera i mea ai  
mana nga mea katoa, ko tana kaihanganga hoki tera o nga ao; <sup>3</sup> Ko ia te kanapatanga o tona kororia,  
te tino ahua o tona pumautanga, e whakau nei i nga mea katoa ki te kupu o tona kaha, ka oti i a ia  
ake ano te horoi o tatou hara, na noho ana ia i te ringa matau o te Nui i runga rawa;  
<sup>4</sup> A meinga ana ia kia pai ake i nga anahera, kia pera me te ingoa i riro i a ia he nui atu i to  
ratou. <sup>5</sup> Ki a wai hoki o nga anahera tana meatanga i mua, Ko koe taku Tama, nonaianei koe i  
whakatupuria ai e ahau? Me tenei ano, Ko ahau hei Matua ki a ia, ko ia hei Tama ki ahau? <sup>6</sup> I tana  
kawenga mai ano hoki i te whanau matamua ki te ao, ka mea ia, Kia koropiko nga anahera katoa  
a te Atua ki a ia. <sup>7</sup> Ko tana kupu ia mo nga anahera, Meinga ana e ia ana anahera hei wairua, ana  
kaimahi hei mura ahi. <sup>8</sup> Mo te Tama ia, i ki ia, Pumau tonu tou torona, e te Atua, ake, ake: a ko te  
hepeta o te tika te hepeta o tou kingitanga; <sup>9</sup> I arohaina e koe te tika, i kinongia e koe te hara; no  
reira nui atu i to ou hoa te whakawahinga a te Atua, a tou Atua, i a koe ki te hinu o te hari. <sup>10</sup> Me  
tenei ano, Nau, e te Ariki, i te timatanga i whakatakoto te whenua; he mahi ano nga rangi na ou  
ringa: <sup>11</sup> Ko era e hemo atu, ko koe ia e mau tonu: ka tawhitotia katoatia hoki era me he kakahu:  
<sup>12</sup> Ka pokaitia e koe, ano he koheka, ka whakaputaia ketia: ko koe tonu ano ia koe, kahore hoki he  
mutunga o ou tau. <sup>13</sup> Ki tehea hoki o nga anahera tana meatanga i mua, Hei toku ringa matau koe  
noho ai, kia meinga ra ano e ahau ou hoariri hei turanga waewae mou? <sup>14</sup> He teka ianei he wairua  
kaimahi ratou katoa, he mea tonotono hei minita, he whakaaro ki te hunga mo ratou nei te ora?

## Chapter 2

<sup>1</sup> Na, ko te tikanga tenei, kia kaha ake to tatou whakaaro ki nga mea kua rangona, kei pahuhu  
atu i a tatou. <sup>2</sup> Mehemea hoki te kupu i whakapuakina e nga anahera he pumau, a he tika tonu te  
utu i whakahokia mo nga pokanga ketanga katoa, mo nga mahi tutu; <sup>3</sup> Me pehea ka mawhiti ai  
tatou ki te paopao tatou ki tenei ora nui; i timataia nei te korero e te Ariki, a kua whakaukia mai ki  
a tatou e te hunga i rangona ai; <sup>4</sup> Me te whakaatu ano te Atua ki ta ratou, i runga i nga tohu, i nga

mea whakamiharo, i tona tini o nga merekara, i nga tuwhanga mai ano hoki o te Wairua Tapu, he pera ano me tana i pai ai.

<sup>5</sup> Kahore hoki i waiho e ia ki raro i nga anahera te ao meake nei puta, ta matou e korero nei.

<sup>6</sup> Heoi i whakaaturia mai e tetahi i tetahi wahi, i mea mai, He aha te tangata, i mahara ai koe ki a ia? te tama ranei a te tangata, i tirohia ai ia e koe? <sup>7</sup> Nohinohi nei te whai i whakaititia iho ai ia e koe i nga anahera; kua karaunatia ia e koe ki te kororia, ki te honore, kua waiho ano ia e koe hei

<sup>8</sup> rangatira mo nga mahi a ou ringa: Kua waiho nei e koe nga mea katoa ki raro i ona waewae. Na, i nga mea katoa ka waiho nei i raro i a ia, kahore i mahue tetahi mea kihai nei i waiho i raro i a ia.

<sup>9</sup> Otira kahore ano tatou kia kite noa i nga mea katoa kua oti te waiho i raro i a ia. Ka kite raia tatou i a Ihu, he nohinohi nei te wahi i whakaititia iho ai ia i nga anahera ka oti nei te karauna ki te kororia, ki te honore, i muri nei i tona ngaunga e te mate; he meatanga na to te Atua aroha noa kia pangia ia e te mate mo nga tangata katoa.

<sup>10</sup> Ko tana tikanga tika hoki ia, mana nei nga mea katoa, nana ano hoki nga mea katoa i a ia e arahi ana i nga tama tokomaha ki te kororia, kia waiho nga mamae hei mea e tino rite ai te Take o

<sup>11</sup> to ratou whakaoranga. Ko te kaiwhakatapu hoki, ratou ko te hunga e whakatapua ana, no te pu kotahi ratou katoa: koia ia te whakama ai ki te hua i a ratou he teina; <sup>12</sup> E mea nei ia, Maku e korero

<sup>13</sup> tou ingoa ki oku teina; ka himene atu ahau ki a koe i waenganui o te whakaminenga. Me tenei ano hoki, Ka u pu ahau ki a ia. Me tenei ano, Nana, ahau nei me nga tamariki i homai e te Atua ki ahau.

<sup>14</sup> Na, kei nga tamariki he kikokiko, he toto, koia hoki ia i whakawhiwhia ai ano hoki ki aua mea; kia ai ai tona matenga hei whakakahore mo te rangatira o te mate, ara mo te rewera; <sup>15</sup> Kia whakaputaina mai ai hoki e ia ki waho te hunga i meinga e te wehi o te mate hei taurekareka i nga

<sup>16</sup> wa katoa i ora ai ratou. Kihai hoki ia i mau ki nga anahera; engari i mau ia ki te uri o Aperahama.

<sup>17</sup> Na konei i tika ai kia whakaritea ia ki ona teina i nga mea katoa, kia waiho ai ia hei tohunga nui e atawhai ana, e pono ana i nga meatanga ki te Atua, hei whakamarie mo nga hara o te iwi. <sup>18</sup> I te mea hoki ka whakamatautauria ia, a mamae iho, e taea e ia te awhina te hunga e whakamatautauria ana.

### Chapter 3

<sup>1</sup> Na, e oku teina tapu, e te hunga kua uru nei ki ta te rangi karanga, whakaaroa a Ihu Karaiti,  
 te Apotoro, te Tohunga nui o te tikanga kua whakaaetia nei e tatou; <sup>2</sup> I pono nei ki tona kaiwhakarite  
 mai, i pera ano me Mohi i tona whare katoa. <sup>3</sup> I tika hoki kia nui ake te kororia mo tenei tangata i  
 to Mohi, no te mea nui ake i to te whare te honore o te kaihanganga. <sup>4</sup> He mea hanga hoki na tetahi  
 nga whare katoa; ko te Atua ia te kaihanganga o nga mea katoa. <sup>5</sup> A i pono ano a Mohi i roto i tona  
 whare katoa, i pera me te pononga, hei whakaatu mo nga mea ka korerotia i muri; <sup>6</sup> Ko te Karaiti  
 ia i rite ki te tama i tona whare ano; ko tona whare tonu hoki tatou, ki te u to tatou maia me te  
 whakamanamana ki te mea e tumanakohia atu nei, a taea noatia te mutunga.

<sup>7</sup> Na, kia rite ki ta te Wairua Tapu i mea ai, Ki te rongo koutou ki tona reo aiane, <sup>8</sup> Kua e  
 whakapakeketia o koutou ngakau, kei pera me o te whakatoinga, i te ra o te whakamatautauranga  
 i te koraha: <sup>9</sup> I ahau i whakamatautauria e o koutou matua, i ahau i ata mohiotia, e wha tekau nga  
 tau i kite ai ratou i aku mahi. <sup>10</sup> Na, ka hoha ahau ki taua whakatupuranga, ka mea, Kotiti ke tonu  
 o ratou ngakau; kahore ratou e mohio ki aku ara. <sup>11</sup> Na reira i riri ai ahau, i oati ai hoki, E kore  
 ratou e tae ki toku okiokinga. <sup>12</sup> Kia tupato, e oku teina, kei noho te ngakau kino, whakaponokore  
 i roto i tetahi o koutou; kei whakarerea te Atua ora; <sup>13</sup> Engari me whakahau koutou tetahi i tetahi  
 i tenei ra, i tenei ra, i te mea e kiia ana ko tenei ra, kei whakapakeketia tetahi o koutou e te tinihanga  
 o te hara. <sup>14</sup> Ka uru hoki tatou ki ta te Karaiti, ki te mea ka mau i a tatou te timatanga o te whakaaro  
 pumau, taea noatia te mutunga; <sup>15</sup> I te mea hoki e korerotia ana, Ki te rongo koutou ki tona reo  
 aiane, kua e whakapakeketia o koutou ngakau, kei pera me o te whakatoinga. <sup>16</sup> Ko wai hoki i  
 whakatoi i to ratou rongonga? he teka ianei ko te hunga katoa i haere mai i Ihipa, a Mohi i arahi  
 ra? <sup>17</sup> I riri hoki ia ki a wai i nga tau e wha tekau? he teka ianei ki te hunga i hara, i hinga ra o ratou  
 tinana ki te koraha? <sup>18</sup> I oati ano ia ki a wai, e kore ratou e tae ki tona okiokinga? he teka ianei ki  
 te hunga kihai nei i whakapono? <sup>19</sup> Na ka kite nei tatou kihai ratou i ahei te tae atu i te kore o te  
 whakapono.

## Chapter 4

<sup>1</sup> Na, kia matakū tatou, i te mea ka tukua iho nei he korero pai mo tatou kia tae atu ki tona  
 okiokinga, kei tirohia mai tetahi o koutou kua mahue ki muri. <sup>2</sup> He mea kauwhau hoki te rongopai  
 ki a tatou, he pera ano me tera i a ratou: heoi kihai te kupu i rangona i whai pai ki a ratou; no te  
 mea kihai i whakananua ki te whakapono i roto i te hunga i rangona ai. <sup>3</sup> Ka taea hoki te okiokinga  
 e tatou kua whakapono nei; ka rite ki tana i ki ra, Na reira i riri ai ahau, i oati ai hoki, e kore ratou  
 e tae ki toku okiokinga: kua oti na hoki nga mahi i te timatanga ra ano o te ao. <sup>4</sup> Ko tana kupu hoki  
 tenei i tetahi wahi mo te ra whitu, A ka okioki te Atua i te ra whitu i ana mahi katoa. <sup>5</sup> I tenei wahi  
 ano hoki, E kore ratou e tae ki toku okiokinga. <sup>6</sup> Na, tera atu ano he taenga mo etahi ki reira; kihai  
 hoki te hunga i kauwhautia ai te rongopai ki a ratou i mua i tae, no te mea kahore o ratou whakapono:  
<sup>7</sup> A ka motuhia mai e ia tetahi ra, i a ia i mea ra i ta Rawiri, Hei aianeī, i muri i taua wa roa ra; ko  
 te kupu hoki tenei, Hei aianeī, ki te rongō koutou ki tona reo, kaua e whakapakeketia o koutou  
<sup>8</sup> ngakau. Mehemea hoki i whai okiokinga ratou i a Hohua, e kore e korerotia e ia tetahi atu ra i  
 muri iho. <sup>9</sup> Ina, tera atu ano he hapati okiokinga mo te iwi o te Atua. <sup>10</sup> Ki te tae hoki te tangata  
 ki tona okiokinga, ka okioki ano ia i ana mahi ake, ka pera me te Atua i okioki i ana mahi ake.  
<sup>11</sup> Na, kia puta to tatou uaua ki te tomo ki taua okiokinga, kei pera te whakaponokore o tetahi,  
 a ka hinga. <sup>12</sup> Ora tonu hoki te kupu a te Atua, mana tonu, koi rawa atu i tetahi hoari matarua,  
 ngoto tonu, a wehea noatia te ngakau me te wairua, nga ponapona me te hinu wheua, a wawae ana  
 ano i nga whakaaro, i nga hihiritanga o te ngakau. <sup>13</sup> Kahore hoki he mea hanga i ngaro ki tona  
 aroaro: heoi e takoto kau ana, e tuwhera ana nga mea katoa ki ona kanohi, kei a ia nei he kupu mo  
<sup>14</sup> tatou. Na, he tino tohunga nui to tatou, kua tomo ki nga rangi, a Ihu, te Tama a te Atua, kia mau  
 pu tatou ki te tikanga i whakaaetia e tatou. <sup>15</sup> Ehara hoki to tatou i te tohunga nui e kore e ahei kia  
 mamae tahi me tatou e ngoikore nei; i whakamatautauria nei hoki ia i nga mea katoa, i i peneitia  
<sup>16</sup> me tatou, kahore ia he hara. Na, kia haere maia atu tatou ki te torona o te aroha noa, kia puta  
 mai ai ki a tatou te mahi tohu, kia kitea ai e tatou ta te aroha noa hei awhina mai mo nga wa e mate  
 ai.

## Chapter 5



<sup>1</sup> Ko ia tohunga nui hoki e tangohia nei i roto i nga tangata, he mea whakatu ratou mo nga mea  
a nga tangata ki te Atua, hei tapae i nga whakahere, i nga patunga tapu mo nga hara: <sup>2</sup> E taea e ia  
te ata hanga ki te hunga e kuware ana, e kotiti ke ana; no te mea e muia ana ano ia e te ngoikore;  
<sup>3</sup> Na konei i tika ai, kia rite ki tana mo te iwi tana e tapae ai mona ake, hei whakahere mo nga hara.  
<sup>4</sup> E kore ano hoki tetahi e tango i tenei honore ki a ia ano, engari te tangata e karangatia ana e te  
Atua, e peratia ana me Arona. <sup>5</sup> Waihoki ko te Karaiti kahore ana whakanui i a ia hei tohunga nui;  
na tera ke i ki ra ki a ia, Ko koe taku Tama, nonaianei koe i whakatupuria ai e ahau. <sup>6</sup> Pera hoki  
me tana i ki ai i tetahi atu wahi, Hei tohunga koe ake ake i runga i te ritenga o Merekihereke. <sup>7</sup> I  
nga ra o tona kikokiko, i tukua e ia he inoi, he karakia, i runga i te karangaranga kaha, i te roimata,  
ki te Mea kaha ki te whakaora i a ia i te mate, a whakarangona ana mona i wehi ki te Atua; <sup>8</sup> Ahakoa  
he Tama ia, i whakaakona ia ki te ngohengohe e ona mamae: <sup>9</sup> A ka meinga nei ia kia tino rite, ka  
waiho ia hei take mo te ora tonu ki te hunga katoa e ngohengohe ana ki a ia;  
<sup>10</sup> He mea karanga na te Atua hei tohunga nui i runga i te ritenga o Merekihereke. <sup>11</sup> He maha  
nei a matou korero mo tenei, he uaua ki te whakamarama, he puhoi hoki no koutou ki te whakarongo.  
<sup>12</sup> I te mea hoki ka tika kia waiho koutou hei kaiwhakaako no te mea ka roa nei, na me tuarua te  
whakaako i a koutou ki nga timatanga rawatanga o nga kupu a te Atua; me waiho hoki he kai ma  
<sup>13</sup> koutou, kauaka te kai pakeke. Ko nga tangata katoa hoki e kai ana i te waiho, he kuware ratou ki  
<sup>14</sup> te kupu o te tika, he kohungahunga hoki. Ma nga pakeke e tika ai te kai maro kua taungatia nei  
o ratou hinengaro e nga meatanga maha, e wehe ai i te pai, i te kino.

## Chapter 6

<sup>1</sup> Na, kati tatou te korero i nga timatanga o ta te Karaiti ako, hoake tatou ki te tino tikanga; kua  
e tuaruatia te whakatakoto i te turanga, ara i te ripeneta ki nga mahi mate, i te whakapono hoki ki  
te Atua, <sup>2</sup> I te whakaako ki nga iriiri, ki te whakapanga o nga ringaringa, ki te aranga o nga tangata  
mate, ki te whakawakanga mutungakore. <sup>3</sup> A ka meatia ano tenei e tatou ki te tukua e te Atua. <sup>4</sup> Ko  
te hunga hoki kua oti te whakamarama, kua pa ki te mea i homai i runga i te rangi, kua whiwhi ki  
te Wairua Tapu, <sup>5</sup> Kua kitea ano te pai o ta te Atua kupu, me nga mea kaha o te ao meake nei puta;

6

Ki te taka atu ratou, e kore ratou e taea te whakahou ake ki te ripeneta; ka ripekatia houtia hoki te Tama a te Atua e ratou nei ano, ka meinga hoki kia tawaia nuitia. <sup>7</sup> Ko te whenua hoki e inu nei i te ua honohono te heke ki runga ki a ia, a e mea ana i te otaota pai kia tupu ake ma te hunga i

mahia ai, ka whiwhi ki ta te Atua manaaki: <sup>8</sup> Ki te tupuria ia e te tataramoa, e te tumatakuru, ka whakakinoa, ka tata ki te kanga: ko tona whakamutunga ka tahuna.

9

Otiia ahakoa penei noa ta matou korero, e u ana ano to matou whakaaro, e oku hoa aroha, ki nga mea pai ke atu kei a koutou, he mea hoki mo te whakaoranga. <sup>10</sup> E kore hoki te Atua e he, e wareware ki ta koutou mahi, ki te uaua o to koutou aroha, i whakakitea mai e koutou ki tona ingoa,

i a koutou i atawhai i te hunga tapu, a ka atawhai nei ano. <sup>11</sup> Otiia e hiahia ana matou kia whakakitea taua uaua na ano e tenei, e tenei o koutou, kia taea rawatia te pumautanga o te whakaaro i tumanako

ai koutou a te Mutunga ra ano: <sup>12</sup> Kia kaua e puhoi, engari kia rite ki ta te hunga i whakapono, i whakamanawanui, a riro mai ana i a ratou nga mei i whakaaria mai. <sup>13</sup> I ta te Atua whakaaringa mea ki a Aperahama, i te mea kahore tetahi i nui ake hei oatitanga, ka oatitia e ia a ia ake ano,

<sup>14</sup> Ka mea, Ina, ka manaakitia rawatia koe e ahau, ka whakanuia rawatia ano hoki koe. <sup>15</sup> Heoi

whakamanawanui ana ia, a riro ana i a ia te kupu whakaari. <sup>16</sup> Ko te mea nui ake hoki ta nga tangata e waiho ai hei oati: a ki a ratou hei mutunga mo nga whakahokihoki kupu katoa te oati whakau.

17

No reira, i te mahara o te Atua kia tino whakakitea ki te hunga mo ratou nei te kupu whakaari te pumau o tona whakaaro, ka whakaurua mai e ia he oati, <sup>18</sup> Kia rua ai nga mea pumau, he mea e kore ai e ahei kia teka te Atua, ma reira ka kaha ai he whakamarie mo tatou, mo te hunga kua rere

ki te pupuri i te mea e takoto mai nei i te aroaro, e tumanakohia atu nei: <sup>19</sup> Hei puna ano tenei ma tatou mo te wairua, he tumanako mau tonu, u tonu, tae tonu atu ano hoki ki te mea i roto i te arai; <sup>20</sup>

Ki te wahi kua tapoko atu nei a ihu ki reira, hei matamua mo tatou, i a ia i meinga hei tohunga nui mo a mua tonu atu, i runga i te ritenga o Merekihereke.

## Chapter 7

1

Ko tenei Merekihereke hoki, kingi o harema, tohunga o te Atua o te Runga Rawa, i tutaki nei ki a Aperahama i a ia e hoki ana i te patunga i nga kingi, i manaaki nei i a ia, <sup>2</sup> A hoatu ana e Aperahama ki a ia nga whakatekau o nga mea katoa, ko te whakamaoritanga o tona ingoa i te tuatahi

ko te Kingi o te tika, i to muri hoki ko te Kingi o Harema, ara ko te Kingi o te rangimarie: <sup>3</sup> He  
 mea matuakore, whaeakore, kahore nei ona whakapapa tupuna, kahore he timatanga o ona ra,  
 kahore he mutunga o tona ora; he tangata kua whakaritea ki te Tama a te Atua, mau tonu ana ia hei  
 tohunga. <sup>4</sup> Na, whakaaroa te nui o tenei tangata i hoatu nei ki a ia e te tupuna nui, e Aperahama,  
 nga whakatekau o nga taonga parakete. <sup>5</sup> Ko nga tama hoki a Riwai, ara nga mea kua riro nei i a  
 ratou te mahi tohunga, he ture kei a ratou kia tangohia ta te ture i whakarite ai, nga whakatekau a  
 te iwi, he mea na o ratou teina i puta mai nei ano i te hope o Aperahama: <sup>6</sup> Ko tenei tangata ia,  
 ehara nei i te mea no to ratou kawai, riro ana i a ia nga whakatekau a Aperahama, a manaakitia ana  
 e ia te tangata i a ia nei nga kupu whakaari. <sup>7</sup> E kore rawa ia tenei e taea te whakateka, ara ko te  
 mea iti e manaakitia ana e te mea nui. <sup>8</sup> I konei e riro ana nga whakatekau i nga tangata, he matemate  
 nei; i reira ia, i tera e kiia nei kei te ora ia. <sup>9</sup> Me penei ano te ki, ko Riwai e tango whakatekau nei,  
 hoatu ana e ia he whakatekau i ta Aperahama meatanga ra. <sup>10</sup> I roto tonu hoki ia i te hope o tona  
 papa i te tutakitanga o Merekihereke ki a ia.  
<sup>11</sup> Na, ki te mea na ta te Riwai mahi tohunga i tino rite ai, a i na runga hoki i tera te rironga o  
 te ture i te iwi, he aha atu te mea e whakatika ake ai tetahi atu tohunga i runga i to Merekihereke  
 ritenga; te kiia ai i runga i to Arona ritenga? <sup>12</sup> Ka whakaputaia ketia nei hoki te mahi tohunga,  
 ina kua puta ke ano hoki te ture. <sup>13</sup> Ko te tangata hoki mona enei korero, he hapu ke tona, kahore  
 nei tetahi o ratou i whakatata ki te aata. <sup>14</sup> He mea takoto marama hoki tenei, i puta ake to tatou  
 Ariki i roto i a Hura: hore rawa he kupu a Mohi mo te mahi tohunga a tera iwi. <sup>15</sup> A ka tino marama  
 rawa ta matou i korero ai, ina whakatika ake tetahi atu tohunga i te ritenga o Merekihereke; <sup>16</sup> Ko  
 tona whakatohungatanga nei hoki ehara i te mea no runga i te ture o nga tikanga o te kikokiko,  
 engari no runga i te kaha o te ora e kore e mutu. <sup>17</sup> Kua whakaaturia mai nei hoki e ia, Hei tohunga  
 koe ake ake i runga i te ritenga o Merekihereke. <sup>18</sup> Kua whakakahoretia hoki te ture i whakatakotoria  
 i mua, no te mea kahore ona kaha, kahore ona hua, <sup>19</sup> Kahore hoki he mea i tino tika i te ture; kua  
 mauria mai ano he mea e hira ake ai te tumanako, na reira nei tatou ka whakatata atu ki te Atua.  
<sup>20</sup> Na kihai nei i mahue te oati: <sup>21</sup> Ko era hoki kahore he oati i to ratou whakatohungatanga; he  
 oati ia i to tenei, na tera i ki mai ra ki a ia, Kua oati te Ariki, a e kore e puta ke tona whakaaro, hei  
 tohunga koe ake ake i runga i te ritenga o Merekihereke: <sup>22</sup> Koia i nui ke ai te pai o te kawenata  
 ko Ihu nei tona kaiwhakamau. <sup>23</sup> He tokomaha hoki ratou i whakatohungatia, ta te mea kihai i

tukua e te mate kia tu tonu; <sup>24</sup> Ko tenei ia, e mau tonu ana ake ake, e kore ano e puta ke tana mahi  
<sup>25</sup> tohunga. Na, e taea ano e ia te tino whakaora te hunga e na runga atu ana i a ia ki te Atua; e ora  
<sup>26</sup> tonu ana hoki ia hei inoi mo ratou. He pai rawa hoki tenei tu tohunga nui mo tatou, te tapu, te  
kinokore, te pokekore, he mea motu ke i te hunga hara, kua whakanekhehia ake ano hoki ki runga  
<sup>27</sup> ake i nga rangi; Kahore ana mea e pera ai ia me nga tohunga nui, e whakaeke patunga tapu ai  
ia i ia ra, mo ona hara ake i te tuatahi, muri iho mo o te iwi; kotahi tonu hoki tana meatanga i tenei,  
<sup>28</sup> i tana whakaekenga atu i a ia ake. Ko nga tohunga nui hoki e whakaturia ana e te ture, he tangata  
e pehia ana e te ngoikore; ko ta te kupu ia o te oati, i muri nei i te ture, ko te Tama, kua oti nei te  
mea kia tino tika ake ake.

## Chapter 8

<sup>1</sup> Na, ko te tino tenei o enei korero: He tohunga pera to tatou, kua noho ki matau o te torona o  
te Nui i nga rangi; <sup>2</sup> He minita mo te wahi tapu, mo te tapenakara pono, tona kaiwhakaara nei ko  
<sup>3</sup> te Ariki, ehara i te tangata. Ko nga tohunga nui katoa hoki, he mea whakarite hei tapae atu i nga  
whakahere, i nga patunga tapu: na konei hoki i tika ai kia whai mea ano tenei tohunga nui hei  
<sup>4</sup> tapaenga atu mana. Me i runga hoki ia i te whenua kahore ona tohungatanga; tenei hoki nga  
<sup>5</sup> tohunga hei tapae i nga whakahere i runga i ta te ture. Ko ta ratou mahi he ritenga, he atarangi  
no nga mea i te rangi, he pera ano me te mea i tohutuhungia ki a Mohi, i a ia meake hanga i te  
tapenakara: i mea hoki ia, Kia mahara kia hanga e koe nga mea katoa kia rite ki te tauira i whakakitea  
ki a ko e i runga i te maunga.  
<sup>6</sup> Tena ko tenei he nui ke te mahi minita kua riro nei i a ia, he pai rawa hoki te kawenata ko  
tona takawaenga nei ko ia, he pai rawa hoki nga kupu whakaari, i whakatakotoria ai taua kawenata.  
<sup>7</sup> Mehemea hoki kihai i whai he taua kawenata o mua, e kore e rapua he wahi mo te tuarua. <sup>8</sup> I a ia  
hoki e whakahe ana, i mea ia ki a ratou, Nana, tenei ake ko nga ra, e ai ta te Ariki, e whakaritea ai  
<sup>9</sup> e ahau he kawenata hou ki te whare o Ihairaira, ki te whare ano hoki o Hura: E kore e rite ki te  
kawenata i whakaritea e ahau ki o ratou matua, i arahi mai ai i a ratou i te whenua o Ihipa; kihai  
<sup>10</sup> nei hoki ratou i u ki taku kawenata, a kore ake oku whakaaro ki a ratou, e ai ta te Ariki. Ko te  
kawenata hoki tenei e whakarite ai ahau ki te whare o Ihairaira i muri iho i aua ra, e ai ta te Ariki;  
ka hoatu e ahau aku ture ki o ratou hinengaro, ka tuhituhia ano hoki ki o ratou ngakau: ko ahau hei  
<sup>11</sup> Atua mo ratou, ko ratou hoki hei iwi maku: E kore ano hoki ratou e whakaako i tona hoa, i tona

hoa, i tona teina, i tona tuakana, e mea, Kia matau koe ki te Ariki: e matau katoa hoki ratou ki ahau,  
 te nohinohi o ratou, te nui ano hoki o ratou. <sup>12</sup> Ka mahi tohu hoki ahau ki o ratou kino, e kore ano  
 hoki e maharatia e ahau o ratou hara a mua ake nei. <sup>13</sup> I a ia i mea, he kawenata hou, kua  
 whakatawhitotia e ia te mea tuatahi. Na, ko te mea kua tawhitotia, kua koroheketia, ka tata te  
 memeha.

## Chapter 9

<sup>1</sup> Na, ko te kawenata tuatahi he tikanga karakia ano ona, me tetahi wahi tapu, he mea mo te ao  
 nei. <sup>2</sup> I hanga hoki tetahi tapenakara, te tuatahi, i reira te turanga rama, me te tepu, me te taro aroaro,  
 tona ingoa ko te Wahi Tapu: <sup>3</sup> I tua atu hoki o te rua o nga arai, ko te tapenakara, e huaina ana ko  
 te Wahi Tino Tapu. <sup>4</sup> He tahu kakara koura i reira me te aaka o te kawenata, he mea whakakikoria  
 nga wahi katoa ki te koura, i roto ano i taua mea ko te oko koura i te mana, ko te tokotoko o Arona  
 i pihi ra, ko nga papa o te kawenata: <sup>5</sup> I runga atu i tenei ko nga Kerupima o te kororia, e  
 whakamarumaru ana i te taumata o te whakamarietanga: e kore aua mea e taea te korero takitahi  
 inaianei. <sup>6</sup> Heoi ka ata rite nei enei mea, ka haereere nga tohunga i nga wa katoa ki te tapenakara  
 tuatahi, i a ratou e mahi ana i nga ritenga karakia; <sup>7</sup> Ki te tuarua ia kotahi ano te haerenga atu i te  
 tau, o te tohunga nui anake, kihai ano i mahue nga toto: i tapaea atu hoki mona, mo nga he ano o  
 te iwi:  
<sup>8</sup> Ko ta te Wairua Tapu hoki tenei i whakaatu ai, ki te huarahi ki te wahi tino tapu i whakakitea  
 mai, i te mea e tu ana ano te tapenakara tuatahi: <sup>9</sup> He ahua tera mo tenei wa nei, e tapaea ai nga  
 whakahere me nga patunga tapu, kahore nei e tau hei mea i te tangata nana tera mahi kia tino tika  
 te hinengaro; <sup>10</sup> Heoi ano o era he kainga, he inumanga, he horoinga maha, he tikanga na te kikokiko,  
 he mea whakarite mai, a taea noatia te wa whakatikatika. <sup>11</sup> I te taenga mai ia o te Karaiti hei  
 tohunga nui mo nga mea pai e whai mai ana i muri, he nui atu ano hoki, he tino tika te tapenakara,  
 ehara i te mea hanga na te ringaringa, ara ehara i te mea no tenei hanganga: <sup>12</sup> Ehara ano hoki i te  
 mea no nga koati nga toto, no nga kuao kau ranei, engari nona ake nga toto i haere atu ai ia, kotahi  
 tonu te haerenga, ki roto ki te wahi tino tapu, i te mea ka whiwhi ki tana mea hei hoki mai i a tatou  
 mo ake tonu atu. <sup>13</sup> Ki te mea hoki ma nga toto o nga puru, o nga koati, ma nga pungarehu ranei  
 o te kuao kau, he mea tauhiuhi ki te hunga kua poke, ka tapu ai, ka ma ai te kikokiko: <sup>14</sup> Tera atu

to nga toto o te Karaiti, nana nei i tapae atu a ia ano, he mea kohakore, ki te Atua, i runga i ta te Wairua ora tonu; ma era e ma ai o koutou hinengaro i nga mahi mate, e mahi ai koutou ki te Atua ora.

<sup>15</sup> Mo konei ano ia i meinga ai hei Takawaenga mo te kawenata hou, kia mate ai ia hei utu mo nga he i raro i te kawenata tuatahi, kia riro ai i te hunga e karangatia ana te wahi tuturu mo ratou i korerotia i mua. <sup>16</sup> He ohaki hoki, ko te mea e whai tikanga ai ko te matenga o te tangata nana i whakatakoto. <sup>17</sup> Kia mate hoki te tangata, katahi ka whai mana te ohaki: ka u tonu ranei i te mea e ora ana te tangata nana i whakatakoto? <sup>18</sup> Koia hoki te mahue ai te toto i te whakatapunga o te kawenata tuatahi. <sup>19</sup> I te mutunga hoki o ta Mohi korero i nga tikanga katoa ki te iwi katoa, hei whakarite i ta te ture, ka mau ia ki nga toto o nga kua kau, o nga koati, ki te wai, ki te huruhuru whero, ki te hihopa, a tauhiuhia ana e ia te pukapuka, me te iwi kat oa; <sup>20</sup> Me tana ki ano, Ko nga toto enei o te kawenata kua whakaakona mai nei e te Atua ki a koutou. <sup>21</sup> I tauhiuhia ano hoki e ia ki nga toto te tapenakara, me nga oko katoa mo te mahi minita. <sup>22</sup> I runga hoki i te ture, e tata ana ka kiia, e purea ana nga mea katoa ki te toto; ki te kahore hoki he ringihanga toto, kahore he murunga hara.

<sup>23</sup> Koia i tika ai kia purea ki enei nga ritenga o nga mea i te rangi; ko nga tino mea ia o te rangi ki nga patunga tapu, pai rawa atu i enei. <sup>24</sup> Ehara hoki i te mea kua tomo a te Karaiti ki te wahi tapu i hanga e te ringaringa, ki te tauira o te tino wahi; engari ki te tino rangi pu ano, puta ai ki te aroaro o te Atua, mo tatou: <sup>25</sup> Ehara ano i te mea kia maha ana tapaenga i a ia, kia pera me te tohunga nui e haere nei ki roto ki te wahi tino tapu i tenei tau, i tenei tau, no etahi atu ano hoki nga toto; <sup>26</sup> Penei kia maha he mamaetanga mona, he mea timata i te hanganga ra ano o te ao; tena ko tenei kotahi tonu tona whakakitenga mai i te mutunga o nga wa, hei whakakahore i te hara, i a ia ka meinga hei patunga tapu. <sup>27</sup> Na kua takoto nei te tikanga mo nga tangata kia kotahi tonu te matenga, a muri iho i tenei ko te whakawa; <sup>28</sup> Waihoki ko te Karaiti, kotahi tonu tona tapaenga atu hei pikau i nga hara o te tini, a tenei ake ko te rua o ona whakakitenga mai, kahore ano he hara, hei whakaora i te hunga e tatari ana ki a ia.

## Chapter 10

<sup>1</sup> I te mea ko to te ture he atarangi no nga mea pai e puta ana mai i muri, ehara i te ahua pu o aua mea, e kore e whai mana i aua patunga tapu e whakaeketia tonutia ana e ratou i tenei tau, i tenei

tau, e tino tika ai te hunga e whakatata ana. <sup>2</sup> Penei e kore ranei e mutu te whakaeke? me i oti hoki  
 te hunga nana taua karakia te mea kia ma, kua kore o ratou mahara ki nga hara? <sup>3</sup> I aua patunga  
 tapu ia e hokihoki ana te mahara ki nga hara i ia tau, i ia tau. <sup>4</sup> E kore hoki e tau ma nga toto o nga  
 puru, o nga koati e whakakahore nga hara. <sup>5</sup> Na reira i a ia e haere mai ana ki te ao, ka mea ia,  
 Kihai i matenuitia e koe te patunga tapu me te whakahere, kua rite mai i a koe he tinana moku.  
<sup>6</sup> Kihai koe i ahuaereka ki nga tahunga tinana ki nga whakahere hara:  
<sup>7</sup> Katahi ahau ka mea atu, Tenei ahau te haere atu nei, kei roto i te upoko o te pukapuka te  
 tuhituhinga moku, ki te mea i tau i pai ai, e te Atua. <sup>8</sup> I tana meatanga i mua ake, Kihai koe i matenui  
 ki te patunga tapu, ki te whakahere, ki nga tahunga tinana, ki nga whakahere hara, kahore ano hoki  
 ou ahuaereka mai, he mea nei e tapaea ana i runga i te ture; <sup>9</sup> Katahi ia ka mea, Tenei ahau te haere  
 atu nei ki te mea i tau i pai ai, e te Atua. E tangohia ana e ia te tuatahi, kia whakaturia ai e ia te  
 tuarua. <sup>10</sup> Na taua pai nei i oti ai tatou te whakatapu, he meatanga na te tapaenga atu kotahi o te  
 tinana o Ihu Karaiti. <sup>11</sup> Na, ko nga tohunga katoa, e tu ana ratou, e minita ana i tenei ra, i tenei ra,  
 he maha ano hoki a ratou whakaekenga atu i aua patunga tapu ra ano, e kore rawa nei e tau hei  
 tango i nga hara: <sup>12</sup> Ko tenei ia, kotahi nei tana patunga tapu i whakaeke atu ai mo nga hara, noho  
 tonu atu i te ringa matau o te Atua; <sup>13</sup> I muri nei he tatari tana kia waiho ra ano ona hoariri hei  
 takahanga mo ona waewae. <sup>14</sup> Kotahi nei hoki tana whakahere, a tika tonu i a ia ake ake te hunga  
 ka oti te whakatapu. <sup>15</sup> Hei kaiwhakaatu ano te Wairua Tapu mo tenei ki a tatou: i muri mai i tana  
 kiinga mai, <sup>16</sup> Ko te kawenata tenei e whakaritea e ahau ki a ratou i muri i aua ra, e ki ana te Ariki,  
 ka hoatu e ahau aku ture ki o ratou ngakau, ka tuhituhia hoki e ahau ki o ratou hinengaro; a ka mea  
 ano ia, <sup>17</sup> E kore hoki e maharatia e ahau o ratou hara, o ratou kino a mua ake. <sup>18</sup> Na, ki te murua  
 enei, kahore he whakahere mo nga hara i muri iho.  
<sup>19</sup> Na, e oku teina, ka ai nei nga toto o Ihu hei take e maia ai tatou te tomo ki te tino wahi tapu;  
<sup>20</sup> Hei ara hou mo tatou, ara hei ara ora, he mea whakatapu nana, e tika atu ana na te arai, ara na  
 tona kikokiko; <sup>21</sup> A, i te mea he nui to tatou tohunga mo te whare o te Atua; <sup>22</sup> Kia whakatata atu  
 tatou, i runga i te ngakau pono, i te whakapono e tino u ana, he mea tauhiuhi te ngakau, kia kore  
 ai te hinengaro kino, he mea horoi ano hoki te tinana ki te wai marama. <sup>23</sup> Kia mau ta tatou whakaae  
 ki te mea e tumanakohia atu nei, kei ngaueue; he pono hoki ta te kaiwhakaari mai; <sup>24</sup> Kia whai

whakaaro ano tatou tetahi ki tetahi, kia whakaohokia te aroha me nga mahi pai: <sup>25</sup> Kei mahue te huihui i a tatou ano, kei pera me te hanga a etahi; engari me whakahauhau tetahi i tetahi: kia nui rawa ano hoki i te mea ka kite koutou ka tata te ra. <sup>26</sup> Ki te hara hoki tatou i muri iho i to tatou whiwhinga ki te matauranga ki te pono, kahore atu hoki he patunga tapu i mahue mo nga hara;

<sup>27</sup> Engari ka tatari ahua matakū ki te whakawa, ki te riri kino ano na te ahi, e whakangaromia ai nga hoariri. <sup>28</sup> Ko te tangata i takahi i te ture a Mohi kihai i tohungia, ka mate i runga i te kupu a nga kaiwhakaatu tokorua, tokotoru ranei: <sup>29</sup> Ki to koutou whakaaro, e kore ranei e tika kia rahi ake te whiu mo te tangata i takahia ai te Tama a te Atua, i meinga ai hei mea noa nga toto o te kawenata i whakatapua ai ia, a whakaiti ana i te Wairua o te aroha noa? <sup>30</sup> E matau ana hoki tatou na wai tenei kupu, Maku te rapu utu; maku te hoatu utu, e ai ta te Ariki: me tenei ano, E whakawa te Ariki mo tana iwi. <sup>31</sup> He mea matakū te taka ki roto ki nga ringaringa o te Atua ora. <sup>32</sup> Engari kia mahara ki nga ra o mua, i a koutou i whakamaramatia ra, he nui noa atu nga rauhanga a te mate, i whakaririka kau na koutou; <sup>33</sup> Ko tetahi wahi, i a koutou i meinga e nga tawainga, e nga tukinotanga hei mea matakū; ko tetahi wahi, i a koutou i meinga hei hoa mo te hunga i peratia.

<sup>34</sup> I mamae tahi hoki koutou me te hunga i te herehere, i hari hoki ki te pahuatanga o o koutou taonga, i mahara hoki tera atu he taonga mo koutou, he mea pai ake, he mea pumau tonu. <sup>35</sup> Na, kua e whakarerea to koutou maia, he rahi hoki tona utu. <sup>36</sup> Ko te mea hoki hei matenuitanga ma koutou he manawanui; kia oti ai i a koutou te mahi ta te Atua i pai ai, e riro tonu ai i a koutou nga mea i whakaaria mai ra. <sup>37</sup> Potopoto kau ake hoki, a ka tae mai tenei e haere mai nei, e kore ano e whakaroa. <sup>38</sup> Ma te whakapono ia e ora ai te tangata tika: a ki te hoki tetahi ki muri, e kore toku wairua e ahuaireka ki a ia. <sup>39</sup> Otiia ehara tatou i te hunga e hoki ana ki muri, ki te whakangaromanga, engari no te hunga e whakapono ana, a ora ana te wairua.

## Chapter 11

<sup>1</sup> Na, ko te whakapono, he whakapumautanga i nga mea e tumanakohia atu ana, he whakakitenga i nga mea kahore nei e kitea. <sup>2</sup> Na konei hoki nga kaumatua i korerotia paitia ai. <sup>3</sup> Na te whakapono i matau ai tatou he mea hanga nga ao e te kupu a te Atua, a, ko nga mea e tirohia atu nei kihai i puta ake i roto i nga mea e kitea ana.



<sup>4</sup> Na te whakapono i pai ake ai i ta Kaina te patunga tapu i tapaea e Apera ki te Atua, na tena hoki i whakaatu tona tika, i whakaatu hoki te Atua mo ana whakahere; na tena ano ia i whai kupu ai, ahakoa mate. <sup>5</sup> Na te whakapono a Enoka i kawea ketia ai, te kite i te mate; na kahore ia i kitea, no te mea kua kawea ketia ia e te Atua; i mua atu hoki i tona kawenga ketanga i whakaaturia mai ia, e ahuaireka ana te Atua ki a ia. <sup>6</sup> Ki te kahore hoki he whakapono, e kore e taea he mea e ahuaireka mai ai ia: ki te haere hoki tetahi ki te Atua, me whakapono ko ia ano tenei ko te Atua, e homai ana e ia he utu ki te hunga e ata rapu ana i a ia. <sup>7</sup> Na te whakapono a Noa, i tona whakamaharatanga e te Atua ki nga mea kahore i kitea noatia, i oho ai, he wehi ki te Atua, a hanga ana e ia te aaka hei whakaora mo tona whare; he whakataunga tena nana i te he ki te ao, a uru ana ki te tika o te whakapono. <sup>8</sup> Na te whakapono a Aperahama i ngohengohe ai, i tona karangatanga kia haere ki te wahi meake riro i a ia hei kainga; a haere ana ia, te matau ki te wahi e haere ai ia. <sup>9</sup> Na te whakapono ia i noho manene ai ki te whenua i whakaaria mai, he whenua tangata ke ano ki a ia, a noho teneti ana ia, ratou ko Ihaka, ko Hakopa, ona hoa kua uru tahi nei ratou ki taua mea i whakaaria mai ra: <sup>10</sup> I tatari hoki ia ki te pa whai turanga, ko te Atua nei te kaihanganga, te kaimahi. <sup>11</sup> Me Hera ano hoki, na te whakapono ia i whai kaha ai, i hapu ai, a whanau ana tana tama i te mea kua taka ke ona tau; i mahara hoki ia he pono ta te kaiwhakaari mai. <sup>12</sup> Na, whanau ake i te kotahi, he tangata ano hoki ia kua whakatupapakutia ki enei mea, me te mea ko nga whetu o te rangi te tini, koia ano kei te onepu i te taha o te moana e kore nei e taea te tatau. <sup>13</sup> I mate katoa enei i runga i te whakapono, kihai i whiwhi ki nga mea i whakaaria mai ra, engari he mea kite atu na ratou i tawhiti, a whakaponohia atu ana e ratou, awhitia atu ana, whakaae ana ratou he manene ratou, he noho noa iho i runga i te whenua. <sup>14</sup> Ko te hunga hoki he penei a ratou korero, e whakakite pu ana ratou he whenua tupu ta ratou e rapu nei. <sup>15</sup> Me i mahara hoki ratou ki taua kainga i haere mai nei ratou i reira, penei kua atea he hokinga atu mo ratou: <sup>16</sup> Tena ko tenei e hiahia ana ratou ki tetahi kainga pai ake, ki tera i te rangi: koia te Atua te whakama ai ki a ratou, kia kiia ko to ratou Atua; kua rite hoki i a ia tetahi pa mo ratou. <sup>17</sup> Na te whakapono a Aperahama i tapae ai i a Ihaka, i tona whakamatautauranga; ae ra, ko te tangata i a ia nei nga kupu whakaari, tapaea ana e ia tana huatahi, <sup>18</sup> Mona nei te kupu, Kei a Ihaka he huanga mo tau whanau: <sup>19</sup> I whakaaro hoki ia, ahakoa i roto nei ano i te hunga mate, e taea ia e te Atua te whakaara ake; a riro mai ana ia i reira, he mea whakaahua. <sup>20</sup> Na te whakapono ta Ihaka kupu manaaki mo Hakopa raua ko Ehau; he meatanga ki nga mea o muri nei. <sup>21</sup> Na te whakapono a Hakopa, i a ia ka tata te mate, i manaaki ai i nga tama

tokorua a Hohepa; a koropiko ana i runga i tana tokotoko. <sup>22</sup> Na te whakapono a Hohepa, i a ia e whakahemohemo ana i whakahua ai i te haerenga mai o nga tamariki a Iharaira; i whakatakoto

<sup>23</sup> tikanga ai mo ona wheua. Na te whakapono a Mohi, i tona whanautanga, i hunu ai e ona matua e toru nga marama, i kite hoki raua he tamaiti ataahua ia; kihai hoki raua i matakau ki te ture a te

<sup>24</sup> kingi. Na te whakapono a Mohi, i tona kaumatuatanga, kihai i pai kia kiia he tama na te tamahine

<sup>25</sup> a Parao; Ki tana hoki, ko te mamae tahi me ta te Atua iwi, he mea pai ke atu i nga ahua eka o

<sup>26</sup> te hara kia riro mo tetahi wa: Ki tona whakaaro, ko te tawainga mo te Karaiti, he taonga nui ke

<sup>27</sup> atu i nga taonga o Ihipa; i titiro atu hoki ia ki te utu ka homai. Na te whakapono ia i haere atu ai i Ihipa, kihai hoki i matakau i te riri a te kingi: i u tonu hoki ia, he titiro nona ki te Atua e kore nei

<sup>28</sup> e kitea. Na te whakapono ia i whakarite ai i te kapenga, i te ringihanga toto, kei pa ki a ratou te

<sup>29</sup> kaiwhakamate i nga whanau matamua. Na te whakapono ratou i haere ai ra te Moana Whero me te mea e na runga ana i te whenua maroke; a, i te whakamatauranga a nga Ihipiana, ki te pera

<sup>30</sup> horomia ake ratou. Na te whakapono nga taiapa o Heriko i whenuku ai, i te mea e whitu nga ra

<sup>31</sup> e taiawhiotia ana. Na te whakapono a Rahapa, te wahine kairua, i kore ai e whakangaromia ngatahitia me te hunga whakaponokore, mona i whakamanuhiri i nga tutei i runga i te rangimarie.

<sup>32</sup> Kia pehea ake ano hoki aku korero? e kore hoki e ranea te taima hei korerotanga maku i nga

<sup>33</sup> mea a Kiriona, a Paraka, a Hamahona, a Iepeta, a Rawiri, a Hamuera, a nga poropiti: Na te whakapono nei i hinga ai i a ratou nga rangatiratanga, i mahia ai e ratou te tika, i whiwhi ai ratou

<sup>34</sup> ki nga mea i whakaaria mai i mua, i tutakina ai e ratou nga waha o nga raiona, I tineia ai e ratou te kaha o te ahi, i mawhiti ai i te mata o te hoari, i haere atu ai i te ngoikore ki te kaha, i meinga ai

<sup>35</sup> kia kaha i te whawhaitanga, whati ana i a ratou nga taua a nga tauwiwi. Riro ana i nga wahine a ratou tupapaku, he mea whakaara ake: ko etahi i whakamamaetia, kihai ano i whakaae atu kia

<sup>36</sup> whakaorangia; kia whiwhi ai ratou ki te whakaarahanga pai ke atu: Ko etahi i whakamataui

<sup>37</sup> nga tawainga, i nga whiunga, i nga mekameka ano hoki, i te whare herehere. I akina ratou ki te kohatu, i wahia ki te kani, i whakawaia, i mate i te patunga a te hoari: i haereere ratou, he hiako hipi te kakahu, he hiako koati; he hunga rawakore ratou, e tukinotia ana, e whakatupuria kinotia

<sup>38</sup> ana; Kihai nei te ao i pai mo ratou: atiutiu noa ana ratou i waenga tahora, i nga maunga, i nga

<sup>39</sup> ana, i nga poka o te whenua. Na pai tonu te korero mo enei katoa, he mea na te whakapono, heoi

<sup>40</sup> kihai ratou i whiwhi ki te mea i whakaaria mai: Kua whakaaroa wawetia hoki e te Atua tetahi mea pai atu mo tatou, kei tino tika ratou i te mea kahore nei tatou.

## Chapter 12

<sup>1</sup> Na, i tenei kapua nui o nga kaiwhakaatu e karapoti nei i a tatou, whakarerea e tatou nga whakataimaha katoa, me te hara whakaeke tata, kia manawanui hoki tatou ki te oma i te omanga e takoto nei i to tatou aroaro; <sup>2</sup> Me te titiro pu ano ki a Ihu, ki te kaitimata, ki te kaiwhakaoti i te whakapono; i whakaaro hoki ia ki te hari i tona aroaro, a whakamanawanui ana ki te ripeka, whakahawea ana ki te whakama, na kua noho ki matau o te torona o te Atua. <sup>3</sup> Whakaaroa hoki ia i whakamanawanui nei ki taua totohe nui a te hunga hara ki a ia, kei hoha o koutou ngakau, kei ngakaukore koutou.

<sup>4</sup> Ko ta koutou pakanga, kahore ano kia tae noa ki te toto i a koutou e whawhai na ki te hara.

<sup>5</sup> A kua wareware koutou ki te kupu whakahau e korero nei ki a koutou, me te mea he tama koutou, E taku tama, kua e whakahawea ki ta te Ariki papaki; kei ngakaukore hoki ina riria e ia: <sup>6</sup> E papaki ana hoki te Ariki ki tana e aroha ai, e whiua ana hoki e ia nga tama katoa e whakatamarikitia ana ki a ia. <sup>7</sup> Hei pakinga ta koutou e manawanui ai; e rite ana ta te Atua meatanga ki a koutou ki tana ki nga tama tupu; ko wai hoki te tama e kore e pakia e tona papa? <sup>8</sup> Ki te kahore ia o koutou pakinga, te mea e whakawhiwhia ana ki te katoa, he poriro koutou, ehara i te tama. <sup>9</sup> Tetahi, he matua ano o tatou no te wahi ki te kikokiko, he mea papaki tatou na ratou; i hopohopo ano tatou ki a ratou: kua ianei e nui noa atu to tatou ngohengohe ki te Matua o nga wairua, kia ora ai? <sup>10</sup> Ko ta ratou papaki hoki he torutoru nei nga ra, he mea ano na ta ratou ake i whakaaro ai; ko ta tenei ia hei pai mo tatou, kia whiwhi ai tatou ki tona tapu. <sup>11</sup> Ko nga pakinga katoa, e kore e kiia inaianei hei whakahari, engari hei whakapouri: muri iho ia ka puta mai te hua rangimarie o te tika, ki te hunga e whakamahia ana ki taua mea. <sup>12</sup> Heoi kia ara nga ringaringa kua tukua iho, me nga turi ngoikore:

<sup>13</sup> Hanga hoki etahi huarahi tika mo o koutou waewae, kei whakapeaua ketia atu te kopa; engari kia ora ake i te mate. <sup>14</sup> Whaia te rongo kia mau ki te katoa, me te tapu hoki, ki te kahore hoki tenei e kore tetahi tangata e kite i te Ariki. <sup>15</sup> Me te titiro marie kei hapa tetahi i to te Atua aroha noa; kei pihia ake tetahi pakiaka o te kawa hei whakararuraru, e poke ai te tokomaha; <sup>16</sup> Kei moepuku tetahi, kei whakarihariha ranei, kei pera me Ehau: i hokona ra e ia tona matamuatanga ki te kainga kotahi. <sup>17</sup> E matau ana hoki koutou ki tona hiahia i muri kia riro i a ia te manaaki, a kapea ana ia: kihai hoki i kitea he wahi mo te ripeneta; i rapua marietia ano e ia me te heke ano o nga roimata.

<sup>18</sup> Ehara hoki i te mea kua tae koutou ki te maunga e taea te whakapa atu, ki te ahi e ka ana,  
 ki te pango kerekere, ki te pouri, ki te tupuhi, <sup>19</sup> Ki te tangi o te tetere, ki te reo e korero ana; i inoi  
 ra te hunga i rangona ai kia kua he kupu ki a ratou i muri iho: <sup>20</sup> Kihai hoki ratou i kaha ake ki te  
 mea i whakaritea mai, Na, ahakoa he kararehe e pa atu ki te maunga, me aki ki te kohatu; <sup>21</sup> Koia  
 ano te mataku o te mea i puta mai ra, i mea ai a Mohi, Mataku rawa ahau, wiri rawa: <sup>22</sup> Engari kua  
 tae nei koutou ki Maunga Hiona, ki te pa o te Atua ora, ki Hiruharama i te rangi, ki nga mano tini  
<sup>23</sup> o nga anahera, Ki te huihui nui, ki te hahi o nga matamua, kua oti te tuhituhi ki te rangi, ki te  
 Atua hoki, ki te kaiwhakawa o nga tangata katoa, ki nga wairua ano o te hunga tika kua oti te mea  
<sup>24</sup> kia tino tika, Ki a Ihu ano hoki, ki te takawaenga o te kawenata hou, ki nga toto o te tauhiuhinga,  
 he pai ake nei nga korero i to Apera. <sup>25</sup> Kia mahara kei whakarere koutou i tenei e korero mai nei.  
 Ki te mea hoki kihai i mawhiti te hunga i paopao ki tera i korero ra i runga i te whenua, ina e kore  
<sup>26</sup> rawa ano tatou, ki te tahuri ke atu i tenei kua korero mai nei i te rangi: Ngaueue ana te whenua  
 i tona reo i reira: inaianei ia kua puaki tana kupu whakaari, kua mea ia, Kia kotahi ano meatanga,  
<sup>27</sup> a ehara i te mea ko te whenua anake, ko te rangi ano hoki taku e whakangaueue ai. Ko taua kupu  
 nei hoki, Kia kotahi meatanga, hei whakakite i te putanga ketanga o nga mea ka whakangaueuetia  
<sup>28</sup> ra, he mea hanga hoki, mau tonu iho ai nga mea e kore nei e whakangaueuetia. Na, ka riro nei  
 i a tatou he kingitanga e kore e taea te whakangaueue, kia whiwhi tatou ki te aroha noa e manakohia  
<sup>29</sup> mai ai ta tatou e mahi nei ki te Atua i runga i te hopohopo, i te wehi: He ahi hoki e kai ana to  
 tatou Atua.

### Chapter 13

<sup>1</sup> Kia mau tonu te aroha ki nga teina. <sup>2</sup> Kei wareware ki te atawhai manuhiri: na tenei hoki i  
 whakamanuhiri anahera ai etahi, kihai ano i matau atu. <sup>3</sup> Maharatia nga herehere, me te mea no  
 koutou tahi te hereherenga; me te hunga hoki e whakatupuria kinotia ana, kei te tinana na hoki  
<sup>4</sup> koutou. Meinga te marena hei mea honore ma te katoa, a kua te moenga e tukua kia poke: ko te  
 hunga moepuku ia, me te hunga puremu, e whakataua e te Atua te he ki a ratou. <sup>5</sup> Whakakahoretia  
 atu te mahi apo taonga; kati ano nga mea ma koutou ko nga mea i a koutou na: kua mea mai hoki  
<sup>6</sup> ia, E kore ahau e whakarere i a koe, e kore ano hoki e mawehe i a koe. Heoi ka maia tatou ki te

ki ake, Kei toku taha te Ariki, e kore ahau e mataku ki ta te tangata e mea ai ki ahau. <sup>7</sup> Kia mahara  
 ki te hunga e tohutohu ana i a koutou, kua korero nei i te kupu a te Atua ki a koutou: tirohia te  
 tukunga iho o ta ratou whakahaere, kia rite to koutou ki to ratou whakapono. <sup>8</sup> Tuturu tonu a Ihu  
 Karaiti inanahi, inaianei, a ake ake. <sup>9</sup> Kei kahakihakina koutou e nga whakaakoranga maha, e nga  
 mea poka hou ake: he mea pai hoki kia whakaukia te ngakau ki runga i te aroha noa; ehara i te mea  
 ki nga kai, kahore hoki he pai o ena mea mo te hunga na ratou nei tera mahi. <sup>10</sup> He aata ano ta  
 tatou, e kore nei e tika kia kainga tona e te hunga e mahi ana i ta te tapenakara. <sup>11</sup> Na, ko nga  
 kararehe no ratou nei nga toto e mauria ana e te tohunga nei mo te hara ki roto ki te wahi tino tapu,  
 e tahuna ana nga tinana o era ki waho o te puni. <sup>12</sup> Na reira hoki a Ihu, i tana whakatapunga i te  
 iwi ki ona toto ake ano, i mamae ai ki waho o te kuwaha. <sup>13</sup> Na, kia haere atu tatou ki a ia ki waho  
 o te puni, me te mau ano tatou i tona tawainga: <sup>14</sup> Kahore hoki he pa tumau mo tatou i konei, engari  
 e rapu ana tatou i tetahi i roto i nga wa a muri nei. <sup>15</sup> Na, kia tapaea atu e tatou ki runga ki a ia i  
 nga wa katoa te whakamoemiti ki te Atua hei whakahere, ara te hua o nga ngutu e whakawhetai  
 ana ki tona ingoa. <sup>16</sup> Kei wareware hoki ki te mahi pai, ki te atawhai: e manakohia ana hoki e te  
 Atua nga patunga tapu pera. <sup>17</sup> Kia ngohengohe ki o koutou kaitohutohu, kia ngawari ki ta ratou  
 kupu; e mataara ana hoki ratou ki o koutou wairua, a me korero ano e ratou a mua te tikanga o a  
 ratou mahi: kia hari ai ratou ina mea i tenei, kia kaua hoki e pouri: kahore hoki he pai o tenei mo  
 koutou.  
<sup>18</sup> Inoi mo matou: u tonu hoki to matou whakaaro ki to matou hinengaro he pai, e hiahia ana  
 hoki matou kia tika ta matou whakahaere i nga mea katoa. <sup>19</sup> I kaha rawa ai taku whakahau ki a  
 koutou kia meatia tenei, he mea kia wawe ai ahau te whakahokia atu ki a koutou. <sup>20</sup> Na, ma te Atua  
 o te rangimarie, nana nei i whakahoki mai i roto i te hunga mate to tatou Ariki, a Ihu, taua Hepara  
 nui o nga hipi, he meatanga na nga toto o te kawenata mutungakore, <sup>21</sup> Mana koutou e mea kia  
 tino tika i runga i nga mahi pai katoa, kia mahia ano e koutou tana i pai ai; mana e mahi i roto i a  
 koutou te mea e ahua ana ki tana titiro, i roto ano i a Ihu Karaiti; waiho atu i a ia te kororia ake  
 ake. Amine. <sup>22</sup> He kupu ano tenei naku ki a koutou, e oku teina, ata whakarangona mai te kupu  
 whakahau: he torutoru nei hoki nga kupu kua tuhituhia atu nei e ahau ki a koutou. <sup>23</sup> Kia matau  
 koutou kua tukua ki waho to tatou teina, a Timoti. Ki te haere wawe mai ia, ko maua tahi e kite i  
 a koutou. <sup>24</sup> Oha atu ki te hunga katoa e tohutohu ana i a koutou, ki te hunga tapu katoa ano hoki.  
 Tenei te oha atu nei ki a koutou te hunga o Itari. <sup>25</sup> Kia tau te aroha noa ki a koutou katoa. Amine.

## James

### Chapter 1

<sup>1</sup> Na Hemi, na te pononga a te Atua, a te Ariki hoki, a Ihu Karaiti, ki nga hapu kotahi tekau ma rua e noho marara ana; Tena koutou.

<sup>2</sup> Kiiia iho, e oku teina, he mea hari nui ina taka koutou ki nga whakamatautauranga maha; <sup>3</sup> E matau ana hoki koutou, ko te whakamatautauranga o to koutou whakapono hei mahi i te manawanui.

<sup>4</sup> Na kia puta rawa te mahi a te manawanui, kia tino tika ai koutou, kia toitu ai, te hapa i tetahi mea.

<sup>5</sup> Ki te hapa tetahi o koutou i te matauranga, me inoi ia ki te Atua, e homai nui nei ki te katoa, kahore hoki ana tawai mai; a ka homai ki a ia. <sup>6</sup> Otira me inoi whakapono ia, kua e ruarua. Ko te tangata

ruarua hoki, tona rite kei te ngaru o te moana, e puhia ana e te hau, e akina ana. <sup>7</sup> Kua hoki taua tangata e mea, e whiwhi ia ki tetahi mea i te Ariki. <sup>8</sup> E kore te tangata ngakau rua e u i ana hanga

katoa. <sup>9</sup> Ko te teina iti, kia whakamanamana ia i te mea ka whakanekehia ake ia: <sup>10</sup> Me te tangata taonga ano, i te mea ka whakaititia: ka memeha atu hoki ia, ano he puawai tarutaru. <sup>11</sup> Ko te putanga

mai hoki o te ra me te hau wera ano, na, kua maroke te tarutaru, kua ngahoro tona puawai, a ngaro iho te atanga o tona ahua: ka pera ano te tangata taonga, ka memeha atu i ona haereerenga. <sup>12</sup> Ka hari te tangata e u ake ana ki te whakamatautauranga: no te mea hoki ka oti ia te whakamatautau, ka whiwhi ia ki te karauna o te ora, kua whakaaria mai nei e te Ariki mo te hunga e aroha ana ki a ia.

<sup>13</sup> Kua tetahi e mea ina whakamatautauria, E whakamatautauria ana ahau e te Atua: e kore hoki te Atua e taea te whakamatautau e te kino, e kore ano hoki ia e whakamatautau i tetahi:

<sup>14</sup> Engari he mea whakamatautau te tangata, i a ia e kumea ana, e poaina ana e tona hiahia ake ano.

<sup>15</sup> Na, i te haputanga o te hiahia, ka whanau ko te hara; a, i te otinga o te hara, ka whanau ko te

mate. <sup>16</sup> Kei whakapohehetia koutou, e oku teina aroha. <sup>17</sup> No runga nga homaitanga papai katoa, nga mea katoa e tino tika ana, he mea heke iho no te Matua o nga whakamarama, kahore nei ona

putanga ketanga, kahore hoki he atarangi o te tahuri. <sup>18</sup> Na tona hiahia ake ano tatou i whanau ai, he meatanga na te kupu o te pono, kia meinga ai tatou me he matamua mo ana mea i hanga ai.

<sup>19</sup> Kei te mohio koutou ki tenei, e oku hoa aroha, kia hohoro nga tangata katoa ki te whakarongo,

kia puhoi ki te korero, kia puhoi kite riri: <sup>20</sup> E kore hoki ta te Atua tika e mahia e to te tangata riri.

21

Heoi me whakarere katoa atu nga tikanga poke, me te hara e hua tonu nei, me tahuri marire ki te kupu kua oti te whakato iho; e taea hoki e tenei te whakaora o koutou wairua. <sup>22</sup> Hei kaimahi

ano koutou i te kupu, kua hei kaiwhakarongo anake, kei tinihangatia koutou e koutou ano. <sup>23</sup> Ki te mea hoki he kaiwhakarongo tetahi i te kupu, ehara nei i te kaimahi, he rite ia ki te tangata e

matakitaki ana ki tona kanohi maori i roto i te whakaata: <sup>24</sup> I tona matakitakinga hoki i a ia ano,

haere ana, wareware tonu ake he ahua pehea ranei tona. <sup>25</sup> Tena ko te tangata e ata titiro iho ana ki te ture tino tika, ki te mea herekore, a ka u tonu, he kaiwhakarongo ano ia e kore e wareware,

engari e mahi ana i te mahi, e hari ano tenei i tana mahi. <sup>26</sup> Ki te mea he ahua karakia to tetahi i roto i a koutou, ki te kore e parairetia e ia tona arero, he tinihanga hoki tana ki tona ngakau, he

maumau karakia tana. <sup>27</sup> Ko te karakia pono, ko te mea pokekore ki te aroaro o te Atua matua, ko ia tenei, Ko te tirotiro i nga pani i nga pouaru i o ratou mate, ko te tiaki i a ia ake kei poke i te ao.

## Chapter 2

1

E oku teina, kua e waiho i runga i te whakapai kanohi te whakapono ki to tatou Ariki kororia,

ki a Ihu Karaiti. <sup>2</sup> Ki te tomo mai hoki tetahi tangata ki to koutou whare karakia he mowhiti koura

nei tona, he kakahu pai; a ka tomo mai ano he rawakore, he kakahu paru nei tona; <sup>3</sup> A ka titiro atu koutou ki te tangata i te kakahu pai, ka mea ki a ia, E noho koe ki konei, ki te wahi pai; a ka mea

ki te rawakore, E tu koe ki kona, E noho ranei ki konei, ki raro i toku turanga waewae: <sup>4</sup> He teka ianei he tikanga tahatahi ta koutou, kua he hoki nga whakaaro o koutou, o nga kaiwhakawa?

5

Whakarongo, e oku teina aroha, Kahore ano koia te Atua i whiriwhiri i nga rawakore o tenei ao, kia whiwhi ki te taonga, ara ki te whakapono, kia riro hoki i a ratou te rangatiratanga kua whakaaria

mai e ia mo te hunga e aroha ana ki a ia? <sup>6</sup> Heoi ka whakakino na koutou ki te rawakore. He teka ianei ko nga tangata taonga hei whakatupu rangatira ki a koutou, hei toto i a koutou ki nga

whakawakanga? <sup>7</sup> He teka ianei he hunga kohukohu ratou i te ingoa pai kua whakahuatia na ki a koutou?

8

Engari ki te rite i a koutou te ture kingi, to te karaipiture, Me aroha e koe tou hoa, ano ko koe,

ka pai ta koutou hanga: <sup>9</sup> Tena ki te whakapai kanohi koutou, e mahi ana koutou i te hara, ka mau

hoki i te ture he hunga he. <sup>10</sup> Ki te mau hoki te ture katoa i tetahi tangata, a ka kotahi ano te mea

11  
e tapepa ai ia, kua he ia ki te katoa. I tana kiinga mai hoki, Kaua e puremu, i ki mai ano ia, Kaua e patu tangata. Na, ahakoa kahore koe e puremu, ki te patu tangata koe, kua takahia e koe te ture.

12  
Kia rite ta koutou korero, ta koutou mahi, ki ta te hunga e whakawakia a mua i runga i nga tikanga

13  
o te ture herekore. Ko te tangata hoki kahore ona ngakau tohu, e kore e tohungia ina whakawakia; ka whakapehapeha ia te ngakau tohu ki te whakawa.

14  
He aha te pai, e oku teina, ki te mea tetahi he whakapono tona, a kahore ana mahi? E taea

15  
ranei ia te whakaora e taua whakapono? Ki te mea e noho tahanga ana tetahi teina, tuahine ranei,

16  
ki te mea ranei kua kore he kai mana mo tenei ra, mo tenei ra, A ka mea atu tetahi o koutou ki a ratou, Haere marie, kia mahana, kia makona; a kahore e hoatu e koutou ki a ratou nga mea e matea

17  
ana e te tinana; he aha te pai? Waihoki ko te whakapono, ki te kahore ana mahi, he mea mate i

18  
roto ano i a ia. Na, he ki tenei ma tetahi, He whakapono tou, he mahi aku: whakakitea mai ki ahau tou whakapono motu ke i au mahi, a maku, ara ma aku mahi, e whakakite atu toku whakapono

19  
ki a koe. E whakapono ana koe kotahi tonu te Atua; he pai tau meatanga: e whakapono ana hoki

20  
nga rewera, me te wiri ano. Heoi e pai ana ranei koe kia matau, e te kuware, he mea huakore te

21  
whakapono ki te kahore he mahi? Kihai ianei a Aperahama, to tatou matua, i tika i nga mahi, i

22  
a ia i whakaeke atu ai i tana tama, i a Ihaka, ki runga ki te aata? Ka kite ranei koe i mahi tahi te

23  
whakapono me ana mahi, na nga mahi hoki i tino rite ai te whakapono? A i rite ano ta te karaipiture e mea nei, I whakapono a Aperahama ki tenei, I whakapono a Aperahama ki te Atua,

24  
a ka whakairia ki a ia hei tika: ka huaina ano hoki ia ko te hoa o te Atua. Heoi ka kite koutou

25  
kei nga mahi he tika mo te tangata, ehara i te mea kei te whakapono anake. Waihoki ko Rahapa, te wahine kairau, kihai ianei ia i whakatikaia e nga mahi, i a ia i whakamanuhiri ai i nga karere, a

26  
tukua atu ana raua e ia ra tetahi ara ke? Ka rite hoki ki te tinana ka mate nei ki te kahore te manawa ora, waihoki ko te whakapono, ki te kahore he mahi, he mea mate.

### Chapter 3

1  
Kei tokomaha koutou ki te whakaako, e oku teina, e matau ana hoki koutou rahi ake te he e

2  
tau ki a tatou. He maha hoki nga mea e tapepa ai tatou katoa. Ki te kore tetahi e tapepa i te kupu,



<sup>3</sup>  
 he tino tika tena tangata, e taea ano e ia te paraire te tinana katoa. Na, ka panga nei e tatou nga  
 paraire ki nga mangai o nga hoiho, kia rongu ai ratou ki a tatou; a pareparea ana e tatou to ratou  
<sup>4</sup>  
 tinana katoa. Whakaaroa nga kaipuke, nga mea nunui rawa nei, he mea aki nei e nga hau kaha,  
 heoi e pareparea ana e te urungi nohinohi rawa ki te wahi e hiahia ai te hinengaro o te kaiurungi:  
<sup>5</sup>  
 Waihoki ko te arero he wahi nohinohi ia, nui atu hoki tona whakapehapeha. Nana, te nui o te  
<sup>6</sup>  
 wahie e whakaungia ana e te ahi nohinohi! He kapura ano hoki te arero, ko te ao maori o te kino:  
 pera tonu te arero i roto i o tatou wahi, poke iho i a ia te tinana katoa, ngiha ana i a ia huri noa nga  
<sup>7</sup>  
 mea katoa o te tangata, he mea whakau ano ia na te reinga. Ko nga momo kararehe katoa hoki,  
 ko nga manu, ko nga mea ngokingoki, ko nga mea i te moana, e whakararatatia ana, kua  
<sup>8</sup>  
 whakararatatia ano hoki i mua e te tangata: Ko te arero ia e kore tena e taea e tetahi tangata te  
<sup>9</sup>  
 whakarata; he kino ia e kore e taea te pehi, ki tonu i te wai whakamate. Ko ta tatou mea ia hei  
 whakapai i te Atua, i te Matua; ko ta tatou mea ano ia hei kanga i nga tangata, i hanga kia rite ki te  
<sup>10</sup>  
 Atua. Kotahi tonu te mangai puta ake ana i roto ko te manaaki, ko te kanga. Ehara i te pai, e oku  
<sup>11</sup>  
 teina, kia penei enei mea. E pupu ake ana ranei i te puna ko te reka, ko te kawa, i roto i te poka  
<sup>12</sup>  
 kotahi? E hua ranei he oriwa ma te piki, e oku teina, he piki ranei ma te waina? e kore ano hoki  
 e pupu ake i te wai tai he wai reka.  
<sup>13</sup>  
 Ko wai te tangata whakaaro nui, te tangata matau i roto i a koutou? ma tona whakahaere pai  
<sup>14</sup>  
 e whakaatu ana mahi, kei runga i te mahaki o te whakaaro nui. Tena ko tenei he hae nanakia to  
 koutou, he totohe i roto i o koutou ngakau, kaua e whakamanamana, kaua hoki e teka ki te pono.  
<sup>15</sup>  
 Ehara tenei matauranga i te mea e heke iho ana i runga; no te whenua ia, no te ngakau maori, no  
<sup>16</sup>  
 te rewera. I te wahi hoki e noho ai te hae me te totohe, ko reira ano te noho kino me nga mahi  
<sup>17</sup>  
 he katoa. Ko te matauranga ia o runga, he mea kinokore i te tuatahi, muri iho he rangimarie, he  
 ngawari, he hohoro ki te whakarongo, ki tonu i te mahi tohu, i nga hua pai, kahore ana whiriwhiringa  
<sup>18</sup>  
 i te tangata, kahore ona tinihanga. A e ruia ana nga hua o te tika i roto i te rangimarie ma te  
 hunga hohou rongu.

## Chapter 4

<sup>1</sup> No hea nga pakanga me nga ngangaretanga i roto i a koutou? he teka ianei no tenei, no o  
 koutou hiahia e whawhai ana i roto i o koutou wahi? <sup>2</sup> E hiahia ana koutou, heoi kahore e whai  
 rawa; e patu ana koutou, e minamina ana, a kahore e whiwhi: e ngangare ana, e whawhai ana, heoi  
 kahore e whai rawa, no te mea kahore koutou e inoi. <sup>3</sup> E inoi ana koutou, a kahore e riro i a koutou,  
 no te mea e inoi he ana koutou, kia whakapaua ai ki o koutou hiahia. <sup>4</sup> E nga tangata puremu, e  
 nga wahine puremu, kahore ianei koutou e matau ko te aroha o te ao he hoariritanga ki te Atua?  
 Na, ko te tangata e hiahia ana kia meinga hei hoa aroha mo te ao, e mea ana i a ia hei hoariri ki te  
 Atua. <sup>5</sup> Ki to koutou whakaaro he korero noa ranei ta te karaipiture, E hiahia ana ranei te wairua,  
 i meinga nei e ia kia noho i roto i a tatou, kia tae rawa ki te hae? <sup>6</sup> Nui atu ia tana homai i te aroha  
 noa: koia tana e mea nei, Ka pakeke te Atua ki ta te hunga whakapehapeha, ka homai ia i te aroha  
 noa ki te hunga ngakau papaku. <sup>7</sup> Na, kia ngohengohe koutou ki ta te Atua. Turia atu te rewera, a  
 ka oma atu ia i a koutou. <sup>8</sup> Whakatata atu ki te Atua, a ka whakatata mai ia ki a koutou. Horoia o  
 koutou ringaringa, e te hunga hara: meinga o koutou ngakau kia hekore, e te hunga ngakau rua.  
<sup>9</sup> Kia pouri koutou, kia puta te aue, te tangi: kia puta ke to koutou kata hei aue, to koutou hari hei  
 ahua whakapoururu. <sup>10</sup> Whakapapaku koutou ki te aroaro o te Ariki, a mana koutou e whakateitei  
 ake.  
<sup>11</sup> Kati te ngautuara tetahi ki tetahi, e oku teina, Ko te tangata e ngautuara ana ki tona teina, e  
 whakahe ana hoki i tona teina, e ngautuara ana ia ki te ture, e whakahe ana i te ture: ki te whakahe  
 ia koe i te ture, ehara koe i te kaimahi i te tu re, engari he kaiwhakawa. <sup>12</sup> Kotahi tonu te  
 kaiwhakatakoto ture, kei a ia te kaha hei whakaora, hei whakangaro: ko wai ra koe e whakahe na  
 i tera atu? <sup>13</sup> Tena, e te hunga e mea nei, hei aiane, hei apopo, ka haere matou ki te pa ra, a ka  
 noho ki reira, kia kotahi tau, ka hokohoko, ka whiwhi ki te taonga: <sup>14</sup> Kahore na hoki koutou e  
 matau ki nga mea o apopo. He aha oti to koutou ora? He kohu ra, he iti nei te wa e puta mai ai, a  
 kua memeha atu. <sup>15</sup> Te mea ra koutou, Ki te pai te Ariki, a ka ora matou, ka mea i tenei mea, i tera  
 mea ranei. <sup>16</sup> Tenei ia koutou te whakamanamana nei ki a koutou kupu whakaputa: he kino taua  
 tu whakamanamana katoa. <sup>17</sup> Na, ko te tangata e matau ana ki te mea i te pai, a kahore e meatia e  
 ia he hara tera nona.

## Chapter 5

<sup>1</sup> Tena, e te hunga taonga, e tangi koutou, aue ki o koutou mate meake nei puta mai. <sup>2</sup> Kua  
 pirau o koutou taonga, kua kainga o koutou kakahu e te huhu. <sup>3</sup> Kua waikuratia ta koutou koura  
 me ta koutou hiriwa; ko te waikura ano o aua mea hei kaiwhakaatu i to koutou he, hei kai hoki i o  
 koutou kikokiko, ano he kapura. Kua pae na i a koutou he taonga mo nga ra whakamutunga. <sup>4</sup> Nana,  
 kei te karanga te utu i kaiponuhia e koutou ma nga kaimahi nana i kokoti a koutou mara, kua tae  
 atu ano hoki nga karanga a nga kaikokoti ki nga taringa o te Ariki o nga mano tini. <sup>5</sup> Kua kai koutou  
 i nga kai papai i runga i te whenua, whaia ana e koutou a te tinana whakaahuareka; atawhaitia ana  
 e koutou o koutou ngakau, me te mea ano ko te ra okanga tenei. <sup>6</sup> Whakataka ana e koutou ki te  
 he, patua iho te mea tika, kihai ano ia i pehi atu i ta koutou. <sup>7</sup> Na, tatari marie koutou, e oku teina,  
 ki te haerenga mai o te Ariki. Na, tumanako tonu te kaingaki ki nga hua utu nui o te whenua, he  
 mea tatari marie atu nana, kia tae mai ra ano to mua me to muri ua. <sup>8</sup> Tatari marie ano hoki koutou;  
 kia u o koutou ngakau: kua tata hoki te haerenga mai o te Ariki. <sup>9</sup> Kua e amuamu tetahi ki tetahi,  
 e oku teina; kei whakataka koutou ki te he: nana, kei nga tatau te kaiwhakawa e tu ana. <sup>10</sup> Ko nga  
 poropiti i korero nei i runga i te ingoa o te Ariki, waiho ratou, e oku teina, hei taura mo te  
 whakamanawanui ki nga kino, mo te tatari marie. <sup>11</sup> Nana, ki ta tatou he hari te hunga e  
 whakamanawanui ana. kua rongo koutou ki te manawanui o Hopa, kua kite hoki i to te Ariki  
 whakamutunga, he nui to te Ariki aroha, me tana mahi tohu.

<sup>12</sup> Ko te tuatahi ia o nga mea katoa, e oku teina, kua te rangi, kua te whenua, kua tetahi atu  
 oati, e oatitia e koutou: engari me ae ta koutou ae, me kahore ta koutou kahore; kei taka koutou ki  
 te whakawa. <sup>13</sup> Ki te pangia tetahi o koutou e te mamae, me inoi. Ki te koa te ngakau o tetahi, me  
 waiata. <sup>14</sup> Ki te turoro tetahi i roto i a koutou, me karanga e ia ki nga kaumatua o te hahi; a ma  
 ratou e inoi ki runga ki a ia, me te whakawahi ano i a ia ki te hinu i runga i te ingoa o te Ariki: <sup>15</sup> A  
 e ora te turoro i te inoi whakapono, ma te Ariki ano ia e whakaara ake; ki te mea hoki kua mahi  
 hara ia, ka murua tona hara. <sup>16</sup> Whakina o koutou he tetahi ki tetahi, me inoi ano koutou tetahi mo  
 tetahi, kia ora ai o koutou mate. Nui atu te mana o te inoi kaha a te tangata tika. <sup>17</sup> He tangata a  
 Iraia, he rite tahi te ngakau ki o tatou, heoi ka kaha nei tana inoi kia kua e ua; kore ake he ua ki  
 runga ki te whenua, a e toru nga tau, e ono nga marama. <sup>18</sup> Inoi ana ano ia, a ka homai he ua e te  
 rangi, na hua ana nga hua o te whenua. <sup>19</sup> E oku teina, ki te kotiti ke tetahi o koutou i te pono, a  
 ka meinga e tetahi kia tahuri mai ano. <sup>20</sup> Kia matau ia, ko te tangata i tahuri ai te tangata hara i te  
 he o tona ara, e ora i a ia he wairua kei mate, he tini ano nga hara ka hipokina e ia.

## 1 Peter

### Chapter 1

<sup>1</sup> Na Pita, he apotoro na Ihu Karaiti, ki te hunga whiriwhiri e noho manene ana i Ponoto, i Karatia, i Kaporokia, i Ahia, i Pitinia, <sup>2</sup> He hunga kua oti te whiriwhiri, te pera ano me ta te Atua Matua i matau ai i mua, i runga i te whakatapunga a te Wairua, kia ngohengohe, kia tauhiuhia ki nga toto o Ihu Karaiti: Kia whakanuia ki a koutou te aroha noa, me te rangimarie.

<sup>3</sup> Kia whakapaingia te Atua, te Matua o to tatou Ariki, o Ihu Karaiti, nana nei, na tana mahi tohu e nui nei, tatou i whanau hou ai ki te tumanako ora, i a Ihu Karaiti ka ara ake nei i te hunga mate, <sup>4</sup> Ki te kainga kahore ona pirau, kahore ona poke, e kore ano hoki e memeha, e puritia mai nei i te rangi mo koutou, <sup>5</sup> Mo te hunga e tiakina nei e te kaha o te Atua i runga i te whakapono, kia taea ra ano te whakaoranga kua rite noa ake nei, a ka whakakitea mai a te wa whakamutunga.

<sup>6</sup> Nui atu to koutou koa ki tenei, ahakoa pouri mo te wa iti nei, kite ai he pouri, i nga whakamatautauranga maha: <sup>7</sup> Na, ko te whakamatautauranga o to koutou whakapono, nui atu tona pai i to te koura e memeha nei, ae ra i te mea kua oti te whakamatautau ki te kapura, a ka kitea tona tukunga iho, he whakamoemiti, he honore, he kororia, a te whakakitenga mai o Ihu Karaiti, <sup>8</sup> Kahore nei ia e kitea e koutou, heoi arohaina ana e koutou; ahakoa kahore koutou e kite inaianei, heoi i a koutou ka whakapono nei ki a ia, nui atu te koa, he koa kororia, e kore e taea te korero: <sup>9</sup> I te mea ka whiwhi ki te tukunga iho o to koutou whakapono, ki te whakaoranga o o koutou wairua.

<sup>10</sup> Ko taua whakaora, he mea ata rapu he mea whakataki iho na nga poropiti i poropititia ai te aroha noa, ara tenei i a koutou nei: <sup>11</sup> I a ratou i rapu ai ko tehea wa, he wa pehea hoki, ta te Wairua o te Karaiti i roto i a ratou i whakapuaki ai, i a ia e whakaatu ana i mua i nga mamae o te Karaiti, i te kororia ano hoki o muri iho. <sup>12</sup> I whakakitea mai nei ano ki a ratou, ehara i te mea mo ratou ake, engari mo tatou, nga mea i minitatia ra e ratou, kua korerotia nei hoki ki a koutou inaianei e te hunga i kauwhautia ai te rongopai ki a koutou, he meatanga na te Wairua Tapu i to noa mai nei i te rangi. Hiahia tonu nga anahera ki te matakitaki ki aua mea.

<sup>13</sup> Heoi whitikiria nga hope o o koutou hinengaro, kia mataara, tumanako atu, a taea noatia te mutunga, ki te aroha noa e kawea mai ki a koutou a te whakakitenga mai o Ihu Karaiti. <sup>14</sup> Kia rite ki nga tamariki ngohengohe; kei rite te ahua ki nga hiahia taikaha o mua i a koutou e kuware ana:

<sup>15</sup> Engari kia rite ki te kaikaranga i a koutou, he tapu hoki ia; kia tapu ano hoki ta koutou whakahaere

16 katoa; Kua tuhituhia na hoki, Kia tapu koutou; he tapu hoki ahau. Na, ki te karanga koutou  
 ki te Matua, ko ia nei hei whakawa mo te mahi a tenei, a tenei, kahore ano hoki ana whakapai  
 kanohi, e noho i runga i te matakū i a koutou e noho manene nei: 17 18 Kia mahara ehara nga mea  
 pirau, te hiriwa, te koura, i te utu mo koutou, i puta mai ai i a koutou ritenga tekateka i whakarerea  
 mai e o koutou matua; 19 Engari he toto utu nui me te mea no te reme kohakore, pokekore, ara no  
 te Karaiti. 20 I whakaritea nei i mua o te orokohanganga o te ao, a kua whakakitea mai nei i te  
 mutunga o nga wa, he whakaaro hoki ki a koutou, 21 Kua meinga nei e ia kia whakapono ki te  
 Atua, nana nei ia i whakaara ake i te mate, a hoatu ana ki a ia he kororia; kia whai whakapono ai  
 koutou, kia whai tumanakotanga atu ai ki te Atua. 22 Kua horoia nei e koutou o koutou wairua, i  
 a koutou kua meinga nei e te Wairua kia ngohengohe ki te pono, e kore iho ai he tinihanga o te  
 aroha ki nga teina, na, kia nui te aroha o tetahi ki tetahi, he aroha a ngakau: 23 He mea whanau hou  
 hoki koutou, ehara i te mea no te purapura pirau, engari no te mea piraukore, na te kupu a te Atua,  
 e ora nei, e u tonu nei, ake ake.  
 24 Rite tonu hoki ki te tarutaru nga kikokiko katoa; ko te kororia katoa ano hoki o te tangata,  
 ano he puawai tarutaru. E maroke te tarutaru, e ngahoro tona puawai: 25 Ko te kupu ia a te Ariki,  
 mau tonu ake ake. Ko te kupu ano tenei o te rongopai e kauwhautia atu nei ki a koutou.

## Chapter 2

1 Na, whakarerea atu nga mauahara katoa, nga hianga katoa, nga tinihanga, nga hae, me nga  
 kupu ngautuara katoa, 2 Kia rite ki nga tamariki whanau hou, hiahiatia atu te waiu kore tinihanga  
 o te kupu, ko te mea hoki ia e tupu ai koutou ki te ora tonu: 3 Ki te mea kua whakamatautau koutou  
 he tikanga ngawari ta te Ariki.  
 4 Ko to koutou haerenga mai ki a ia ki te kohatu ora, i whakakahoretia nei e nga tangata, he  
 mea whiriwhiri ia na te Atua, he mea utu nui; 5 Ka hanga hoki koutou, ano he kohatu ora hei whare,  
 ara hei mea wairua, hei tohungatanga tapu, hei tapae atu i nga patunga tapu, ara i nga mea wairua,  
 he mea e manakohia ana e te Atua i runga i a Ihu Karaiti. 6 Mo reira tera wahi o te karaipiture, Na,  
 ka whakatakotoria e ahau ki Hiona te tino kamaka o te kokonga, he mea whiriwhiri, he mea utu  
 nui, a, ko te tangata e whakapono ana ki a ia e kore e tukua kia whakama. 7 Ki a koutou e whakapono  
 na he mea utu nui ia: ki te hunga whakaponokore ia, ko te kamaka i kapea e nga kaihangā, kua

meinga tenei hei upoko mo te kokonga, <sup>8</sup> Hei kamaka tutukitanga waewae ia, hei toka whakahinga; ki te hunga e tutuki ana ki te kupu, ki te hunga whakaponokore: i whakaritea mai hoki ratou hei penei. <sup>9</sup> Ko koutou ia he iwi whiriwhiri, he tohungatanga kingi, he iwi tapu, he iwi kua riro pu mai ma te Atua; hei whakapuaki i nga pai o te kaikaranga i a koutou i roto i te pouri ki tona marama whakamiharo: <sup>10</sup> I mua ehara i te iwi, inaianei ia he iwi na te Atua: kihai nei i tohungia i mua, inaianei ia ka tohungia. <sup>11</sup> E oku hoa aroha, ko taku whakahau atu tenei, he hunga noho noa, he manene hoki koutou, kia mawehe i nga hiahia kikokiko e whawhai nei ki te wairua; <sup>12</sup> Kia pai ta koutou whakahaere i roto i nga tauwi, mo ta ratou whakapae ki a koutou, he kaimahi koutou i te kino, na kia whakakororia ratou i te Atua a te ra o te tirohanga mai, ina kite i a koutou mahi pai. <sup>13</sup> Kia ngohengohe koutou ki nga tikanga katoa a te tangata, he whakaaro ki te Ariki: ahakoa ki te kingi, ki te mea nui rawa; <sup>14</sup> Ki nga kawana ranei, ki te hunga i tonoa mai e ia hei whiu i nga kaimahi i te kino, hei whakamoemiti ia mo te hunga e mahi ana i te pai. <sup>15</sup> Ko ta te Atua hoki tenei i pai ai, kia ai a koutou mahi pai hei puru mo nga mangai kuware o nga tangata whakaarokore: <sup>16</sup> He hunga ehara nei i te herehere, otia e kore e waiho to koutou herekoretanga hei hipoki mo te mauahara, engari kia rite ki nga pononga a te Atua. <sup>17</sup> Whakahonoretia nga tangata katoa. Arohaina nga teina, nga tuakana. E wehi ki te Atua. Whakahonoretia te kingi. <sup>18</sup> E nga pononga, kia ngohengohe ki o koutou rangatira, kia nui te wehi; he teka ki te hunga pai, ki te hunga ngawari anake, ki te hunga whanoke ano hoki. <sup>19</sup> He mea whai whakapainga hoki tenei, ki te mea na te mahara ki te Atua ka whakamanawanui ai tetahi ki nga mea whakapouri, i a ia e whakamamaetia hetia ana. <sup>20</sup> He aha hoki te kororia, ki te mea ka whakamanawanui, i te mea kua hara koutou a ka motokia? tena ka whakamanawanui, i te mea ka mahi pai a ka whakamamaetia, he mea whai whakapainga tenei ki te Atua. <sup>21</sup> No te mea i karangatia koutou ki tenei: i whakamamaetia hoki a te Karaiti mo koutou, waiho iho ana e ia he tauria mo koutou, kia aru ai koutou i ona tapuwae: <sup>22</sup> Kihai nei ia i mea i te hara, kahore ano hoki i kitea te tinihanga i tona mangai: <sup>23</sup> Ka taunutia, kihai ia i taunu atu; ka whakamamaetia, kihai ia i whakatuma; engari i tuku i a ia ki te kaiwhakawa tika: <sup>24</sup> Nana ake i waha o tatou hara, na tona tinana ake, i runga i te rakau, kia whakatupapaku ai tatou ki te hara, kia ora ai ki te tika: na ona karawarawa i ora ai o koutou mate. <sup>25</sup> I rite hoki koutou ki te hipi kua kotiti ke; heoi kua hoki tenei koutou ki te Hepara, ki te Pihopa, o o koutou wairua.

## Chapter 3

<sup>1</sup> Waihoki e nga wahine, kia ngohengohe ki a koutou tane ake; a ki te turi etahi ki te kupu, na,  
 i kore i te kupu, ko te whakahaere a nga wahine hei mea e riro mai ai ratou; <sup>2</sup> I a ratou e titiro ana  
 ki te hekore o ta koutou whakahaere me te hopohopo. <sup>3</sup> Ko te whakapaipai mo koutou, kauaka hei  
 to waho, kauaka hei te makawe i whiria, kauaka hei te whakapiringa o nga mea koura, kauaka hei  
 te whakakakahuranga o nga kakahu; <sup>4</sup> Engari hei te tangata ngaro o te ngakau, hei te kakahu e kore  
 e pirau, ara te wairua mahaki, te wairua rangimarie, he mea utu nui hoki tenei i te aroaro o te Atua.  
<sup>5</sup> He penei hoki i mua ta nga wahine tapu whakapaipai mo ratou, ta te hunga i whakaaro ki te Atua,  
 ngohengohe tonu ratou ki a ratou tane ake: <sup>6</sup> Me Hera hoki i ngohengohe ki a Aperahama, ko te  
 ariki hoki tana ingoa mona: nana hoki koutou tamariki, i a koutou e mahi pai ana, kahore hoki e  
 matakū i tetahi whakapawera. <sup>7</sup> E nga tane hoki, kia rite ki to te matauranga to koutou noho ki a  
 ratou, whakawhiwhia te wahine ki te honore, ko te mea kahakore hoki ia, ka uru tahi nei ano hoki  
 korua ki te oranga ka homai noa nei; he mea kei araia a korua inoi.  
<sup>8</sup> Na, ko te whakamutungā nei o taku, kia kotahi te whakaaro o te katoa, kia kotahi te ngakau,  
 kia rite te aroha ki to te tuakana, ki to te teina, kia pai te ngakau, kia ngawari: <sup>9</sup> Kaua e utua he kino  
 ki te kino, he taunu ki te taunu: engari me manaaki: me te mahara ano kua karangatia koutou ki  
 tenei, ara kia whiwhi koutou ki te manaaki. <sup>10</sup> Ki te mea hoki tetahi kia aroha ki te ora, kia kite i  
 nga ra pai, me pehi e ia tona arero kei kino, ona ngutu hoki kei korero tinihanga; <sup>11</sup> Me peka ke i  
 te kino, me mahi i te pai; ko te rangimarie hei rapunga mana, hei whaingā atu mana. <sup>12</sup> No te mea  
 hoki kei runga i te hunga tika nga kanohi o te Ariki, me ona taringa kei te tuwhera ki a ratou inoi:  
 e he mai ana ia te mata o te Ariki ki te hunga e mahi ana i te kino. <sup>13</sup> Ko wai hoki hei homai i te  
 he ki a koutou, ki te aru koutou i te pai? <sup>14</sup> Otiia ki te mea na te whakaaro ki te tika i whakamamaetia  
 ai koutou, ka hari koutou: aua ra e matakū i ta ratou whakamatakū, kaua e pawera; <sup>15</sup> Engari  
 whakatapua a te Karaiti hei Ariki i roto i o koutou ngakau: kia rite tonu hoki te kupu i a koutou i  
 nga wa katoa, hei whakahokinga atu ma koutou ki nga tangata katoa, e ui ana ki a koutou ki te mea  
 e tumanakohia atu nei e koutou; kia maha ki ano ia te ngakau, kia wehi:  
<sup>16</sup> Kia pai o koutou hinengaro; mo ta ratou ngautuara ki a koutou, e ki nei he kaimahi koutou  
 i te kino, kia whakama taua hunga e whakapae teka na ki ta koutou whakahaere pai i roto i a te  
<sup>17</sup> Karaiti. Ki te mea hoki i a tatou e mahi ana i te pai ka takoto i te Atua he mamae mo tatou, erangi  
 tera i te mamae i a tatou e mahi ana i te kino.

18

Kotahi hoki whakamamaetanga o te Karaiti mo nga hara, te tika mo te hunga he, kia arahina ai tatou e ia ki te Atua, i whakamatea ko te kikokiko, i whakaorangia ia ko te wairua: Ko tona ano tena i tona haerenga ki te kauwhau ki nga wairua i te whare herehere: I turi nei i mua, i te mea e tatari ana te manawanui o te Atua i nga ra i a Noa, i te mea e hanga ana te aaka, ko te mea i ora ai etahi wairua torutoru nei, ara tokowaru, i roto i te wai.

21

He mea whakarite ki tenei te mea e whakaora nei i a koutou inaianei, ara te iriiri, ehara i te whakawateatanga atu i te poke o te kikokiko, engari he whakaaetanga ake na te hinengaro pai ki te Atua, he meatanga na te aranga mai o Ihu Karaiti: Kua riro nei ki te rangi, kei te ringa matau ano ia o te Atua; kei raro hoki i a ia nga anahera, nga rangatiratanga, nga kaha.

## Chapter 4

1

Na, kua mamae nei o te Karaiti kikokiko mo tatou, e mau koutou ki nga ea whawhai, ara ki taua whakaaro pu ra ano: ko te tangata hoki kua mamae te kikokiko kua mutu te hara; Mo te wa e toe nei o te noho ki te kikokiko kia kaua i runga i nga hiahia o te tangata, engari i ta te Atua i pai ai. Kati hoki ma tatou ko te wahi o to tatou ora kua pahemo nei, hei mahinga ma tatou i ta nga tauwiwi i pai ai, i a tatou i haere i runga i te hiahia taikaha, i nga minamina, i te haurangi waina, i te kakai, i te inu, i te karakia whakarihariha ki ng a whakapakoko:

4

he mea hou tenei ki a ratou, ara to koutou kahore e rere tahi, e torere ki taua kino: a korero kino iho mo koutou: Me korero ana ratou i a ratou mahi ki a ia, e noho rite nei ki te whakawa i te hunga ora, i te hunga mate. Mo konei ra i kauwhautia ai ano te rongopai ki te hunga kua mate, kia whakahengia ratou, ara te kikokiko i runga i ta te tangata, kia ora ia ratou, ara te wairua i runga i ta te Atua.

7

Kua tata ia te whakamutunga o nga mea katoa: na, kia whai whakaaro koutou, kia mataara, kia inoi. I te tuatahi o nga mea katoa arohaina putia koutou e koutou ano: he tini hoki nga hara ka hipokina e te aroha. Whakamanuhiritia tetahi e tetahi; kaua e amuamu. Ko te mea kua riro noa i tetahi, i tetahi, meatia atu ano e koutou ma tetahi, ma tetahi, kia rite ki ta nga tuari pai o nga homaitanga maha a te Atua. Ki te korero tetahi, kia rite tana ki ta nga kupu a te Atua; ki te minita tetahi, kia rite tana ki to te kaha e homai ana e te Atua: kia whai kororia ai te Atua i nga mea katoa i roto i a Ihu Karaiti; kei a ia te kororia me te mana ake ake. Amin e.



<sup>12</sup> E oku hoa aroha, kua e kiia he hanga hou te tahunga i roto i a koutou hei whakamatautau  
 i a koutou; ano he mea hou tenei kua pa ki a koutou: <sup>13</sup> Engari ka uru nei koutou ki nga mamae o  
 te Karaiti, kia hari koutou; he mea hoki e hari ai koutou, whakamanamana rawa, a te whakakitenga  
 mai o tona kororia. <sup>14</sup> Ki te tawaia koutou mo te ingoa o te Karaiti, ka hari koutou; no te mea e tau  
 ana te Wairua o te kororia, me te Wairua o te Atua ki runga ki a koutou. <sup>15</sup> Kua ia tetahi o koutou  
 e whakamamaetia mo te mahi patu tangata, mo te tahae, mo te mahi i te kino, mo te pokanoa ki a  
 era meatanga. <sup>16</sup> Ki te whakamamaetia ia tetahi mo te ki he Karaitiana ia, kua ia e whakama;  
 engari he mea tenei e whakakororia ai ia i te Atua. <sup>17</sup> Ko te wa hoki tenei e timata ai te whakawa  
 ki te whare o te Atua: ki te mea hoki kei a tatou te tuatahi, he pehea ra te whakamutunganga ki te hunga  
 e kore e tahuri ki te rongopai o te Atua? <sup>18</sup> A ki te mea ka ora noa te tangata tika, kei hea he putanga  
 mo te tangata karakiakore, mo te tangata hara? <sup>19</sup> Na, ko te hunga ano kua pai nei te Atua kia  
 whakamamaetia ratou, me tuku e ratou o ratou wairua ki a ia, ara ki te Kaihanga pono, me te mahi  
 ano ia i te pai.

## Chapter 5

<sup>1</sup> He whakahau tenei naku ki nga kaumatua i roto i a koutou, he hoa kaumatua hoki ahau, he  
 kaiwhakaatu mo nga mamae o te Karaiti, kua whiwhi tahi nei hoki ki te kororia e whakakite mai i  
 muri: <sup>2</sup> Whangainga te kahui a te Atua i roto i a koutou; kua e ngakaukore ina tiroiro, engari kia  
 hihiko; kua mo te taonga he, engari i runga i te ngakau nui; <sup>3</sup> Kua ano hoki e whakatupu rangatira  
 ki ta te Atua wahi, engari hei tauira koutou ki te kahui. <sup>4</sup> A kia puta mai te tino Heparu, ka whiwhi  
 koutou ki te karauna kororia e kore e pirau.  
<sup>5</sup> Me koutou ano hoki, e nga taitamariki, kia ngohengohe ki nga kaumatua. Kia ngohengohe  
 ano hoki koutou katoa, tetahi ki tetahi, ko te ngakau papaku ano hei whitiki mo koutou: no te mea  
 hoki e pakeke ana te Atua ki te hunga whakapehapeha, ka hoatu ia e ia he aroha noa ki te hunga  
 papaku. <sup>6</sup> Na, whakapapaku iho koutou i raro i te ringaringa kaha o te Atua, kia whakateiteitia ake  
 ai koutou e ia i te wa e pai ai: <sup>7</sup> Maka atu o koutou manukanuka katoa ki runga ki a ia; e whakaaro  
 ana hoki ia ki a koutou.

<sup>8</sup> Kia mataara, kai matapopore; kei te haereere hoki to koutou hoa whawhai, te rewera, ano he raiona e ngengere ana, e rapu ana i te tangata hei horomanga mana: <sup>9</sup> Kia u ki te whakapono, ka tu atu ai ki a ia; me te mahara ano ka rite aua mamae nei ano i o koutou teina i te ao.

<sup>10</sup> Na ma te Atua o nga mahi aroha noa katoa, i karangatia ai koutou ki tona kororia mutungakore i roto i a Karaiti Ihu, ka oti koutou te whakamamae i tenei wa iti nei, mana koutou e mea kia tino rite, mana e whakau, mana e whakakaha, mana e whakapu mau. <sup>11</sup> Waiho atu i a ia te kororia me

te kaha ake ake. Amine. <sup>12</sup> Kua tuhituhia atu nei e ahau etahi kupu torutoru, hei maunga atu ma Hirawanu: he teina pono ia no koutou ki toku whakaaro: he whakahau atu tenei, he whakaatu naku, ko te tino aroha noa tenei o te Atua e tu nei koutou. <sup>13</sup> Tenei te oha atu nei ki a koutou te hahi i

Papurona, i whiriwhiria ngatahitia nei koutou; me taku tamaiti ano hoki me Maka. <sup>14</sup> Oha atu tetahi ki tetahi, hei te kihi aroha ano. Kia tau te rangimarie ki a koutou katoa i roto i a Karaiti Ihu. Amine.

## 2 Peter

### Chapter 1

<sup>1</sup> Na Haimona Pita, he pononga, a he apotoro na Ihu Karaiti, ki te hunga kua whiwhi tahi nei tatou ki te whakapono utu nui, i runga o te tika o to tatou Atua, o Ihu Karaiti, o te Kaiwhakaora.

<sup>2</sup> Kia whakanuia te aroha noa me te rangimarie ki a koutou, i runga i te matauranga ki te Atua, ki a Ihu hoki, ki to tatou Ariki. <sup>3</sup> Kua homai na hoki e tona kaha Atua ki a tatou nga mea katoa mo te ora, mo te karakia pai, i te mea ka matau nei ki te Kaikaranga i a tatou i runga i te kororia, i te pai:

<sup>4</sup> Na enei hoki i riro mai ai i a tatou nga kupu whakaari, he mea nui whakaharahara, he mea utu nui; ma enei hoki koutou ka whiwhi ai ki te ahua Atua, i a koutou ka mawhiti nei i te pirau i te ao, ara i to te hiahia.

<sup>5</sup> Ma reira nei hoki, me whakapau rawa to koutou uaua, honoa iho ano te pai ki runga ki to koutou whakapono; ki runga hoki ki te pai ko te matauranga; <sup>6</sup> Ki runga ki te matauranga ko te pehi o te hiahia; ki runga ki te pehi o te hiahia ko te manawanui; ki runga ki te manawanui ko te karakia pai; <sup>7</sup> Ki runga ki te karakia pai ko te atawhai ki nga teina; ki runga ki te atawhai ki nga teina ko te aroha. <sup>8</sup> Ki te mea hoki kei a koutou enei mea, ki te nui haere hoki, ka meinga koutou

kia kua e mangere, kia kua e huakore i runga i te matauranga ki to tatou Ariki, ki a Ihu Karaiti.

9

Ko te tangata hoki kahore nei i a ia enei mea, he matapo, he atarua, kua wareware ki te horoinga

10

o ona hara o mua. Mo konei, e oku teina, kia puta to koutou uaua ki te whakapumau i to koutou karangatanga, i to koutou whiriwhiringa: ki te penei hoki ta koutou mahi e kore rawa koutou e

11

tapepa: Penei hoki ka whiwhi nui koutou ki te huarahi tomo atu ki te rangatiratanga mutungakore o to tatou Ariki, ara o te Kaiwhakaora, o Ihu Karaiti.

12

Mo reira ano e kore ahau e mangere ki te whakamahara tonu i a koutou ki enei mea, e matau

13

ana raia koutou, kua oti ano te whakau ki runga ki te mea pono, kei a koutou na. Ki toku whakaaro hoki, i ahau e noho ana i tenei tapenakara, he mea tika ano kia whakaoho ahau i a koutou, kia

14

whakamahara; E mohio ana hoki ahau e kore e wheau ka mahue tenei tapenakara oku, ka pera

15

ano me ta to tatou Ariki, me ta Ihu Karaiti, i whakakite mai ai ki ahau. Ka puta ano hoki toku uaua kia mau tonu to koutou mahara ki enei mea i muri i toku matenga.

16

Ehara hoki i te mea he whai ta matou i nga kupu i totoa e te whakaaro tinihanga, i te whakapuakanga o te kaha, o te haerenga mai o to tatou Ariki, o Ihu Karaiti ki a koutou; engari he

17

kaititiro ano matou ki tona nui. I riro hoki ia ia he honore, he kororia na te Atua Matua, i te putanga mai o taua reo ki a ia i roto i te kororia nui rawa, Ko taku Tama tenei i aroha ai, ko taku i

18

ahuareka ai. I rongong ano matou ki tenei reo e puta mai ana i te rangi, i a matou i tona taha i runga i te maunga tapu.

19

Katahi ka u rawa te kupu poropiti ki a tatou inaianei; pai tonu ki te anga to koutou whakaaro ki reira, he rama hoki e tiaho ana i te wahi pouri, kia puao ra ano te ra, kia ara ra ano te whetu o te

20

ata i roto i o koutou ngakau: Kia mohio hoki i te tuatahi, kahore he poropititanga o te karaipiture

21

nona ake ona tikanga. Ehara hoki i te mea na te whakaaro o te tangata i puta mai ai te poropititanga i mua, engari he mea whakamahara na te Wairua Tapu i korero ai nga tangata tapu a te Atua.

## Chapter 2

1

Otira i ara ake ano he poropiti teka i mua i roto i te iwi, he pera me nga kaiwhakaako teka e puta ake a mua i roto i a koutou; ma enei e mau puku mai nga titorehanga whakangaro, he whakakahore na ratou i te Ariki rawa, nana nei ratou i hoko, ka hohoro tonu ta ratou taki mai i te

2

whakangaromanga ki a ratou ano. A he tokomaha e aru i a ratou tikanga whakarihariha; ma reira e korerotia kinotia ai te ara o te pono.

3

He apo moni hoki e tito kupu ai ratou kia whai taonga ai ratou i a koutou: nonamata te tukunga mo ratou ki te he, e kore ano e whakaroa; kahore hoki he moe o to ratou whakangaromanga.

4

Mehemea kihai i tohungia e te Atua nga anahera i hara, engari i peia ratou e ia ki te po, he mea

5

herehere i te waro pouri, he mea tiaki mo te whakawa; A kihai i tohungia te ao tawhito, he mea tiaki ia nana a Noa, te kaikauwhau i te tika, ratou ko etahi atu tokowhito, i tana kawenga mai i te

6

waipuke ki te ao o te hunga karakiakore; A meinga ana nga pa, a Horoma, a Komora, kia pungarehu rawa, ko tana whakataunga he he hurihanga, waiho iho hei tohu ki te hunga e noho karakiakore i nga wa i muri;

7

Ko Rota ia, ko te tangata tika, whakaorangia ake e ia, i a ia e whakapouritia ana e nga ritenga

8

whakarihariha a te hunga kino; I taua tangata tika e noho ana i roto i a ratou, mamae a na tona

9

ngakau tika i a ratou mahi kino, i tana i kite ai, i tana i rongoi ai i tenei ra, i tenei ra: Matau tonu te Ariki ki te whakaora i te hunga karakia i roto i te whakamatautauranga, kia waiho ko te hunga he mo a te ra whakawa whiu ai;

10

Tera rawa ia tana mo te hunga e whai ana i ta te kikokiko, e haere ana i runga i te hiahia poke, e whakahawe ana ki te rangatiratanga; he hunga hikaka, e whai ana i ta ratou ake; kahore

11

hoki e wehi ki te korero kino ki nga tangata nunui. Tena ko nga anahera, ahakoa nui ake to ratou kaha, to ratou mana kahore e puaki i a ratou he kupu whakatoi mo era i te aroaro o te Atua ina

12

whakawa. Ko era hoki, rite tonu ratou ki te kararehe kahore nei he whakaaro, he mea maori anake, i hanga nei hei hopukanga, hei whakangaromanga, korero kino ana ratou ki nga mea kahore

13

nei e mohiotia e ratou; a ka ngaro i runga i ta ratou tikanga whakama te; Ka whiwhi ki te utu o te he; he tangata e ahua ana ki te kakai awatea, he ira ratou, he makenu, e ruku ana ki a ratou

14

hakari ngahau i a ratou e hakari tahi ana me koutou; Ko o ratou kanohi ki tonu i te puremu, kahore hoki e mutu to ratou hara; e poaina ana e ratou nga hinengaro kahore i u: he ngakau to ratou

15

kua oti te whakamahi ki te apo; he tamariki kua oti te kanga: Mahue ake i a ratou te ara tika, kotiti ke ana ratou, whai tonu ana i te ara o Paraama tama a Peoro, i whakapai nei ki te utu o te he;

16

Otira i riria ano ia mo tona he: i korero te kararehe reokore, no te tangata te reo, pehia ana e ia

17

te wairangi o te poropiti. He puna waikore enei tangata, he kapua e akina ana e te tupuhi; pouri

18

kerekere te wahi kua rite mo ratou mo ake tonu atu. E korero ana i nga korero tetera rawa, he mea teka noa, ka poaina e ratou ki nga hiahia o te kikokiko, ki nga hiahia taikaha, te hunga e mawhiti

19

mai ana i era e noho ra i roto i te he. He herekore ta ratou e whakaari nei ki a ratou, heoi he

pononga ratou na te pirau: ki te taea hoki te tangata e te hoariri, hei pononga ia mana. <sup>20</sup> Ka mawhiti mai nei ratou i nga poke o te ao, i a ratou ka matau nei ki te Ariki, ara ki te Kaiwhakaora, ki a Ihu Karaiti, na ki te rorea ratou, i te hinga rawa i aua mea, kino noa atu to ratou whakamutunga i te timatanga. <sup>21</sup> he pai ke mo ratou me i kore e matau ki te ara o te tika, i te matau a hei muri ka tahuri ke atu i te ture tapu kua tukua nei ki a ratou. <sup>22</sup> Heoi te tukunga iho ki a ratou rite tonu ki ta te whakatauki pono, Kua hoki te kuri ki tona ruaki; me te poaka i horoi ra, kua okeoke ano i te paru.

### Chapter 3

<sup>1</sup> Ko te rua tenei o aku pukapuka, e oku hoa aroha, ka tuhituhia atu nei ki a koutou; hei whakaoho tauarua i o koutou hinengaro tinihangakore kia mahara: <sup>2</sup> Kia mahara ai koutou ki nga kupu i korerotia i mua e nga poropiti tapu, ki ta matou hoki, ki ta nga apotoro a te Ariki, a te Kaiwhakaora: <sup>3</sup> Ko tenei ta koutou e matau ai i te tuatahi, tera e puta mai etahi kaiwhakamanumanu i nga ra whakamutunga, e haere ana i runga i nga ritenga o o ratou hiahia ake, <sup>4</sup> E mea ana, Kei hea te korero o tona haerenga mai? mau tonu hoki nga mea katoa no te moenga ra ano o nga matua, pera tonu me to te orokohanganga. <sup>5</sup> Na ratou tonu i whakakuware ki tenei, na te kupu a te Atua nga rangi i mua, me te whenua ano totoka tonu i roto i te wai, na te wai ano hoki. <sup>6</sup> He hurihanga na enei i ngaro ai i te wai te ao o tera wa. <sup>7</sup> Ko nga rangi onaianei ia me te whenua, he mea rongoa na taua kupu ra ano, he mea waiho marire mo te ahi, ina taea te ra o te whakawakanga, o te whakangaromanga o nga tangata karakiakore. <sup>8</sup> Kei kuware ia koutou, e oku hoa aroha, ki tenei mea kotahi, ki ta te Ariki he ra kotahi rite tonu ki nga tau kotahi mano, nga tau kotahi mano rite tonu ki te ra kotahi. <sup>9</sup> Kahore he whakaroa o te Ariki ki tana kupu whakaari, kahore e rite ki ta etahi e ki nei he whakaroa; engari e manawanui ana ki a tatou, kahore ona whakaaro mo te tangata kia ngaro; engari kia tae katoa ki te ripeneta. <sup>10</sup> E puta mai hoki te ra o te Ariki ano he tahae i te po; ko reira pahemo atu ai nga rangi, tona nui hoki o te tangi; na ka ngiha nga mea timatanga i te ahi, ka rewa; a pau ake i te ahi te whenua me ana mahi. <sup>11</sup> Heoi mo te rewa nei enei mea katoa, kia pehea ra he tikanga ma koutou i runga i te whakahaere tapu, i te karakia; <sup>12</sup> Me te tumanako, me te takare ano koutou ki te taenga mai o te ra o te Atua, e rewa ai nga rangi i te ahi, e ngiha ai nga mea timatanga, e memeha ai? <sup>13</sup> Heoi kei

te tumanako tatou ki nga rangi hou, ki te whenua hou, ki tana i whakaari mai ai, kei reira te tika e  
<sup>14</sup>noho ana. Mo konei ra, e oku hoa aroha, i a koutou ka tumanako na ki enei mea, kia puta to  
<sup>15</sup>koutou uaua kia rokohina e ia i runga i te rangimarie, te whai ira, te whai koha i tona aroaro. Kia  
mahara ano ki te manawanui o to tatou Ariki, he whakaora; ko te mea hoki ia tuhituhia ki a koutou  
<sup>16</sup>e to tatou teina aroha, e Paora, he mea i rite tonu ki te matauranga kua homai nei ki a ia; I pera  
ano i ana pukapuka katoa, i korerotia hoki enei mea ki reira; kei reira ano hoki etahi mea he pakeke  
nei ki te whakaaro, whakawiria ketia ake e te hunga kuware, e te hunga kahore ano i u; ko ta ratou  
<sup>17</sup>hanga ano ia ki era atu karaipiture, a ngaro iho ratou. Na, e oku hoa aroha, ka matau wawe nei  
koutou ki enei mea, kia taupato kei kahakina atu koutou e te he o te hunga kino, kei taka atu, kei  
<sup>18</sup>kore e u. Engari kia neke ake i runga i te aroha noa, i te matauranga o to tatou Ariki, ara o te  
Kaiwhakaora, o Ihu Karaiti. Waiho atu i a ia te kororia, aiane, a ake tonu atu. Amine.

## 1 John

### Chapter 1

<sup>1</sup>Ko te mea o te timatanga, ko ta matou i rongoi ai, ko ta o matou kanohi i kite ai, ko ta matou  
i titiro atu ai, ko ta o matou ringaringa i whawha atu ai, ko nga mea o te Kupu o te ora; <sup>2</sup>I whakakitea  
mai hoki te ora, a kite ana matou, na ka whakaatu nei, ka kauwhau nei ki a koutou i te ora tonu, i  
<sup>3</sup>tera i te Matua i mua, a kua whakakitea mai nei ki a matou; Ko ta matou ra i kite ai, i rongoi ai, e  
kauwhautia atu nei e matou ki a koutou, kia whakahoatia ai koutou ki a matou: na, ko to tatou  
<sup>4</sup>whakahoanga kei te Matua, kei tana Tama hoki, kei a Ihu Karaiti. Na ka tuhituhia atu nei enei  
mea e matou ki a koutou, kia tino nui ai to koutou hari.  
<sup>5</sup>Ko te korero ano tenei i rongoi ai matou ki a ia, a ka korerotia atu nei e matou ki a koutou, na,  
he marama te Atua, kahore rawa hoki he pouri i a ia. <sup>6</sup>Ki te mea tatou e whakahoa ana tatou ki a  
ia, me te haere ano tatou i te pouri, e korero teka ana tatou, ehara hoki i te pono ta tatou e mahi nei;  
<sup>7</sup>Ki te haere ia tatou i te marama, me ia hoki e noho nei i te marama, na ka whakahoa tatou tetahi  
ki tetahi, e horoia ana ano o tatou hara katoa e nga toto o tana Tama, o Ihu Karaiti.  
<sup>8</sup>Ki te mea tatou kahore o tatou hara, e whakapohehe ana tatou i a tatou ano, a kahore te pono  
<sup>9</sup>i roto i a tatou. Ki te whaki tatou i o tatou hara, e pono ana ia, e tika ana, a ka murua e ia o tatou

10  
hara, ka horoia atu hoki o tatou he katoa. Ki te mea tatou kahore tatou i hara, ka meinga ia he  
kaikorero teka, kahore hoki tana kupu i roto i a tatou.

## Chapter 2

1 E aku tamariki nonohi, ka tuhituhi atu nei ahau i enei mea ki a koutou, kia kua ai koutou e  
hara. A ki te hara tetahi, he kaikorero mo tatou kei te Matua, ko Ihu Karaiti, ko te tika: 2 Ko ia ano  
te whakamarie mo o tatou hara: ehara i te mea mo o tatou anake, engari mo o te ao katoa.

3 Ma konei hoki tatou ka matau ai kua matau tatou ki a ia, ki te puritia e tatou ana ture. 4 Ki te  
mea tetahi, Kua matau ahau ki a ia, a kahore e pupuri i ana ture, he tangata teka ia, kahore hoki te  
pono i roto i a ia. 5 Ko te tangata e pupuri ana i tana kupu, kua tino rite pu i a ia te aroha o te Atua:  
ma konei tatou ka matau ai kei roto tatou i a ia: 6 Ko te tangata e mea ana e noho ana ia i roto i a  
ia, ko te tikanga tenei mana, kia rite tana haere ki ta tera.

7 E oku teina, ehara i te ture hou taku e tuhituhi atu nei ki a koutou, engari he ture tawhito, ko  
tera i a koutou o te timatanga iho ra ano: ko te ture tawhito ko te kupu kua rongu ra koutou. 8 Na,  
he ture hou taku e tuhituhi atu nei, he mea pono i a ia, i a koutou hoki, e mahea atu ana hoki te  
pouri, a kua whiti ke mai te marama pono. 9 Ko te tangata e mea ana kei te marama ia, a e mauahara  
ana ki tona teina, kei roto ia i te pouri a tae noa mai nei. 10 Ko te tangata e aroha ana ki tona teina,  
e noho ana ia i roto i te marama, kahore hoki he tutukitanga waewae i roto i a ia. 11 Ko te tangata  
ia e mauahara ana ki tona teina, kei te pouri ia, e haere ana ia i roto i te pouri, kahore hoki ona  
matauranga e haere ana ia ki hea, no te mea kua matapotia ona kanohi e te pouri.

12 Ka tuhituhi atu nei ahau ki a koutou, e nga tamariki nonohi, no te mea kua murua o koutou  
hara, he whakaaro hoki ki tona ingoa. 13 Ka tuhituhi atu nei ahau ki a koutou, e nga matua, no te  
mea kua matau koutou ki a ia, ara ki to te timatanga. Ka tuhituhi atu ahau ki a koutou, e nga  
taitamariki, no te mea kua hinga i a koutou te wairua kino. Ka tuhituhi atu ahau ki a koutou, e nga  
tamariki nohinohi, no te mea kua matau koutou ki te Matua. 14 I tuhituhi atu ai ahau ki a koutou,  
e nga matua, no te mea kua matau koutou ki a ia, ara ki to te timatanga. I tuhituhi atu ai ahau ki a  
koutou, e nga taitamariki, no te mea he kaha koutou, e mau ana hoki te kupu a te Atua i roto i a  
koutou, a kua hinga i a koutou te wairua kino. 15 Kua e aroha ki te ao, kua ano hoki ki nga mea

o te ao. Ki te aroha tetahi ki te ao, kahore te aroha o te Matua i roto i a ia. 16 Ko nga mea katoa

hoki i te ao, te hiahia o te kikokiko, te hiahia o nga kanohi, me te whakapehapeha ki o te ao mea,  
<sup>17</sup>  
 ehara i te Matua, engari no te ao. E pahemo atu ana hoki te ao, me tona hiahia: tena ko te tangata  
 e mea ana i ta te Atua e pai ai, e noho tonu ana ia a ake ake.

<sup>18</sup>  
 E nga tamariki nonohi, ko te haora whakamutunga tenei: ka rite hoki ki ta koutou i rongou  
 ai, e haere mai ana te anataraiti; na, kua tokomaha nei nga anataraiti; ma konei tatou ka matau  
<sup>19</sup>  
 ai ko te haora whakamutunga tenei. I haere atu ratou i roto i a tatou, ehara ia i te mea no tatou  
 ratou; mehemea hoki no tatou ratou, kua noho tonu ki a tatou: otia kua haere atu ratou kia whakakitea  
 ai ehara ratou katoa i a tatou.

<sup>20</sup>  
 Na he whakawahinga ano to koutou na te Mea Tapu; e matau ana ano hoki koutou ki nga  
<sup>21</sup>  
 mea katoa. Ehara i te mea i tuhituhi atu ai ahau ki a koutou no te mea kahore koutou e matau ki  
 te pono, engari no te mea e matau ana koutou, no te mea hoki kahore he teka i puta ake i te pono.

<sup>22</sup>  
 Ko wai koia te tangata teka? he teka ianei ko te tangata e mea ana, Ehara a Ihu i te Karaiti? Ko  
<sup>23</sup>  
 te anataraiti tenei, ko te tangata e whakakahore ana ki te Matua, ki te Tama. Ko nga tangata  
 katoa e whakakahore ana ki te Tama, kahore te Matua i a ratou: ko te tangata e whakaae ana ki te

<sup>24</sup>  
 Tama, kei a ia ano hoki te Matua. Na, kia mau ki roto ki a koutou ta koutou i rongou ai no te  
 timatanga ra ano. Ki te mea ka mau i roto i a koutou ta koutou i rongou ai no te timatanga ra ano, e  
<sup>25</sup>  
 mau ano koutou i roto i te Tama, i roto ano hoki i te Matua. Ko te mea ano hoki tenei i whakaaria

<sup>26</sup>  
 mai nei e ia ki a tatou, ko te ora tonu. I tuhituhia atu e ahau enei mea ki a koutou, mo te hunga  
<sup>27</sup>  
 e mea ana ki te whakapohehe i a koutou. Otia e mau ana ano i roto i a koutou tana whakawahinga  
 kua riro na i a koutou: kahore hoki o koutou mea e whakaakona ai koutou e tetahi: ko tana  
 whakawahinga ia e whakaako na i a koutou ki nga mea katoa, he pono tonu, kahore hoki he teka,  
 kia rite ra ki tana i whakaako ai i a koutou to koutou mau ki roto ki a ia.

<sup>28</sup>  
 Na inaianei, e nga tamariki nohinohi, kia mau ki roto ki a ia; kia whai maiatanga ai tatou  
<sup>29</sup>  
 ina puta mai ia, kei whakama hoki ki a ia ina tae mai ia. Ki te matau koutou he tika ia, ka matau  
 koutou he mea whanau nana nga tangata katoa e mea ana i te tika.

### Chapter 3

<sup>1</sup>  
 Kia kite koutou i te tikanga o te aroha i homai nei e te Matua ki a tatou, ara kia huaina tatou  
 he tamariki na te Atua! he pera hoki tatou, koia te ao te matau ai ki a tatou, kahore hoki i matau ki  
<sup>2</sup>  
 a ia. E nga hoa aroha, he tamariki tatou na te Atua inaianei; a kahore ano i kitea noatia he aha



3  
ranei tatou a mua: ia, ka rite tatou ki a ia; ka kite hoki tatou i a ia, i tona ahua ake ano. Na ki te mea kei tetahi tenei tumanako ki a ia, ka tahia atu e ia ona he, kia rite ai ki a ia kahore nei he he.

4  
Ko te tangata e mea ana i te hara, he takahi tana i te ture: he takahi hoki te hara i te ture. E matau ana ano koutou i whakakitea mai ia hei waha atu i o tatou hara; kahore ano hoki he hara i

6  
roto i a ia. Ko te tangata e mau ana i roto i a ia e kore e hara: ko te tangata e hara ana, kahore i kite i a ia, kahore ano i matau ki a ia. 7 E aku tamariki nonohi, kei whakapohehetia koutou e etahi:

8  
ko te tangata e mea ana i te tika, he tika ano ia, pera hoki me tera e tika ana. Ko te tangata e mea ana i te hara, no te rewera ia; he hara hoki to te rewera no te timatanga ra ano. Mo konei te Tama

9  
a te Atua i whakakitea mai ai, kia whakakahoretia ai e ia nga mahi a te rewera. Ko te tangata kua whanau i te Atua e kore e mea i te hara; no te mea e mau ana tana purapura i roto i a ia; e kore hoki

10  
e ahei i a ia te hara, no te mea kua whanau ia i te Atua. Ma konei ka kitea ai nga tamariki a te Atua me nga tamariki a te rewera: ko te tangata e kore e mahi i te tika, ehara ia i te Atua, me ia ano hoki e kore e aroha ki tona teina.

11

Ko te korero hoki tenei i rongu ai koutou no te timatanga, kia aroha tatou tetahi ki tetahi.

12

Kaua ra e pera me Kaina; no te wairua kino nei ia, a kohurutia ana e ia tona teina. Na te aha hoki ia i kohuru ai i a ia? No te mea he kino ana mahi, ko a tona teina ia he tika. 13 Kaua e miharo, e oku teina, ki te kino te ao ki a koutou.

14

E matau ana tatou kua whiti tatou i te mate ki te ora, no te mea e aroha ana tatou ki nga teina.

15  
Ko te tangata kahore e aroha ki te teina, e noho ana ia i roto i te mate. Ko te tangata e mauahara ana ki tona teina, he kaipatu tangata ia: ka matau hoki koutou, ko te kaipatu tangata kahore he ora

16  
tonu e mau ana i roto i a ia. Na konei tatou i matau ai ki te aroha, i tuku atu hoki ia i a ia kia

17  
mate mo tatou: he tika ano kia tukua tatou e tatou ano ki te mate mo nga teina. Ko te tangata ia ia nei nga oranga o tenei ao, a ka kite e matea ana tetahi mea e tona teina, na ka tutakina iho e

18  
ia tona ngakau aroha ki a ia, e mau pehea ana te aroha o te Atua i roto i a ia? E aku tamariki

19  
nonohi, kaua e waiho ma te kupu, ma te arero te aroha; engari ma te mahi, ma te pono. Ma konei hoki tatou ka matau ai no te pono tatou, ka whakau ai hoki i o tatou ngakau i tona aroaro.

20

Ki te mea ka whakahe mai o tatou ngakau i a tatou, nui atu te Atua i o tatou ngakau; e matau

21  
ana ano ia ki nga mea katoa. E nga hoa aroha, ki te kore o tatou ngakau e whakahe i a tatou, ka

22  
maia tatou ki te Atua; A, ko te mea e inoia ana e tatou, ka homai e ia ki a tatou, no te mea e pupuri ana tatou i ana ture, e mea ana hoki i nga mea e ahuaureka ana ki tana titiro.

23

Ko tana ture ano tenei, kia whakapono tatou ki te ingoa o tana Tama, o Ihu Karaiti, kia aroha ano tetahi ki tetahi, kia rite ano ki te ture i homai e ia ki a tatou. Na, ko te tangata e pupuri ana i ana ture, e mau ana i roto i a ia me ia ano i roto i a ia. na konei ano tatou i matau ai e mau ana ia i roto i a tatou, na te Wairua kua homai nei e ia ki a tatou.

24

## Chapter 4

1

E nga hoa aroha, kaua e whakapono atu ki nga wairua katoa, engari me whakamatau nga wairua no te Atua ranei; he tokomaha hoki nga poropiti teka kua haere mai ki te ao. Ma konei koutou ka matau ai ki te Wairua o te Atua: ko nga wairua katoa e whakaae ana i haere mai a Ihu

2

Karaiti i te kikokiko, no te Atua era: Ko nga wairua katoa hoki kahore e whakaae i haere mai a Ihu Karaiti i te kikokiko, ehara i te mea no te Atua: ko to te anatikaraiti wairua ano tenei, i rongo nei koutou e haere mai ana; a tenei ano kei te ao nei inaianei.

3

4

No te Atua koutou, e aku tamariki nonohi, kua kaha ano koutou i a ratou: no te mea nui atu tenei i roto i a koutou, i tera i roto i te ao. No te ao ratou: na reira no te ao nei ano a ratou korero,

5

a e whakarongo ana te ao ki a ratou. No te Atua tatou: ko te tangata e matau ana ki te Atua, e whakarongo ana ia ki a tatou; ko te tangata ehara nei i ta te Atua, e kore ia e whakarongo ki a tatou. Ma konei tatou ka matau ai ki te wairua o te pono, ki te wairua o te he.

6

7

E nga hoa aroha, kia aroha tatou tetahi ki tetahi: no te Atua hoki te aroha; ko te hunga katoa hoki e aroha ana, kua whanau i te Atua, e matau ana hoki ki te Atua. Ko te tangata kahore e aroha,

8

kahore ia e matau ki te Atua; he aroha hoki te Atua. Na konei i kitea mai ai te aroha o te Atua ki

9

a tatou, na te mea kua tonoa mai e te Atua tana Tama kotahi ki te ao, kia ora ai tatou i a ia. Ko te aroha tenei, ehara i te mea ko tatou kua aroha ki te Atua, engari ko ia kua aroha ki a tatou, a tonoa

10

mai ana e ia tana Tama hei whakamarie mo o tatou hara. E nga hoa aroha, ki te mea i penei te

11

aroha o te Atua ki a tatou, he tika ano hoki kia aroha tatou tetahi ki tetahi. Kahore he wa i kite ai tetahi i te Atua. Ki te aroha tatou tetahi ki tetahi, e noho ana te Atua i roto i a tatou, kua rite pu

12

ano tona aroha i roto i a tatou. Na konei tatou i matau ai e noho ana tatou i roto i a ia, me ia i roto i a tatou, na te mea kua homai e ia ta tona Wairua ki a tatou.

13

14

Kua kite ano matou, ka whakaatu nei ano hoki, i tonoa mai te Tama e te Matua hei

Kaiwhakaora mo te ao. <sup>15</sup> Ko te tangata e whakaae ana ko Ihu te Tama a te Atua, e noho ana te

Atua i roto i a ia, me ia ano hoki i roto i te Atua. <sup>16</sup> Kua matau nei ano hoki tatou, kua whakapono ki te aroha o te Atua ki a tatou. He aroha te Atua, ko te tangata hoki e noho ana i runga i te aroha e noho ana i roto i te Atua, me te Atua ano hoki i roto i a ia.

17

Na konei te aroha i roto i a tatou i rite pu ai, a ka whai maiatanga ano tatou a te ra whakawa:

na te mea e rite ana ki a ia tatou e noho nei i tenei ao. <sup>18</sup> Kahore he matakū i roto i te aroha: engari ka maka te matakū ki waho e te aroha ina tino rite; no te mea he mamae to te matakū. Ko te tangata

hoki e matakū ana, kahore ia i tino rite i roto i te aroha. <sup>19</sup> E aroha ana tatou ki a ia, no te mea ko

ia kua matua aroha ki a tatou. <sup>20</sup> Ki te mea tetahi, E aroha ana ahau ki te Atua, a e mauahara ana ki tona teina, he tangata teka ia: ko te tangata hoki kahore e aroha ki tona teina i kitea nei e ia, me

pehea ka aroha ai ia ki te Atua kahore nei i kitea e ia? <sup>21</sup> Kei a tatou ano hoki tenei ture, he mea nana, Ko te tangata e aroha ana ki te Atua, kia aroha hoki ki tona teina.

## Chapter 5

1

Ko nga tangata katoa e whakapono ana ko Ihu te Karaiti, kua whanau i te Atua: ko nga tangata

katoa ano hoki e aroha ana ki te papa, e aroha ana ano ki tana whanau. <sup>2</sup> Ma konei tatou ka matau ai e aroha ana tatou ki nga tamariki a te Atua, ma te mea ka aroha tatou ki te Atua, ka pupuri ano

i ana ture. <sup>3</sup> Ko te aroha hoki tenei ki te Atua, kia pupuri tatou i ana ture: ehara hoki ana ture i te mea taimaha.

<sup>4</sup> Ko nga mea katoa hoki kua whanau i te Atua e kaha ana i te ao: ko te wikitoria

hoki tenei e taea ai te ao, ko to tatou whakapono. <sup>5</sup> Ko wai i kaha i te ao? ehara ianei i te tangata e whakapono ana ko Ihu te Tama a te Atua?

<sup>6</sup> Ko ia tenei i haere mai nei i runga i te wai, i te toto, ko Ihu Karaiti; ehara i te mea i runga i te wai anake, engari i runga i te wai, i te toto. Ko te Wairua hoki te kaiwhakaatu, he pono hoki te

Wairua. <sup>7</sup> Tokotoru hoki nga kaiwhakaatu i te rangi, ko te Matua, ko te Kupu, ko te Wairua Tapu:

kotahi ano enei tokotoru. <sup>8</sup> Tokotoru hoki nga kaiwhakaatu, i te whenua, ko te Wairua, ko te wai,

ko te toto: kotahi ano to ratou tokotoru. <sup>9</sup> Ki te whakaae atu tatou ki ta nga tangata whakaatu, he

nui ke ta te Atua whakaatu: ko ta te Atua whakaatu hoki tenei, kua whakaaturia nei e ia mo tana Tama.

10

Ko te tangata e whakapono ana ki te Tama a te Atua, kei roto i a ia te whakaatu: ko te tangata kahore e whakapono ki te Atua, he whakateka tana ki a ia; no te mea kahore ia i whakapono ki te

whakaatu i whakaaturia mai nei e te Atua mo tana Tama. 11 Ko te whakaatu hoki tenei, ara kua

homai e te Atua ki a tatou te ora tonu; kei roto ano i tana Tama tenei ora. 12 Ko te tangata kei a ia te Tama, kei a ia ano te ora; ko te tangata kahore nei i a ia te Tama a te Atua, kahore i a ia te ora.

13

I tuhituhia atu ai e ahau enei mea ki a koutou, kia matau ai koutou kei a koutou te ora tonu, ara ki a koutou e whakapono nei ki te ingoa o te Tama a te Atua.

14

Ko to tatou maia ano tenei ki a ia, na ki te inoia e tatou tetahi mea i a ia, tana i pai ai, ka

whakarongo mai ia ki a tatou: 15 Ki te mea hoki ka matau tatou e whakarongo ana ia ki ta tatou e

inoi ai, ka matau tatou kei a tatou nga mea i inoia e tatou i a ia. 16 Ki te mea ka kite tetahi i tona teina e hara ana, haunga te hara e mate ai ia, me inoi ia, a e homai he ora ki a ia mo te hunga ehara nei to ratou i te hara e mate ai. Tera ano te hara e mate ai: e kore ahau e mea kia inoi ia mo tera.

17

He hara nga he katoa: tenei ano tetahi hara ehara nei i te mea e mate ai.

18

E matau ana tatou, na, ko te tangata kua whanau ai te Atua kahore e hara; engari ka tiaki te

tangata kua whanau i te Atua i a ia ano, e kore hoki te wairua kino e pa ki a ia. 19 E matau ana

tatou no te Atua tatou, kei te takoto hoki te ao katoa i roto i te wairua kino. 20 Na e matau ana ano tatou kua tae mai te Tama a te Atua, kua homai e ia ki a tatou he matauranga, kia mohio ai tatou ki a ia, ki te mea pono; kei roto ano hoki tatou i a ia, i te mea pono, ara i tana Tama, i a Ihu Karaiti.

Ko te Atua pono tenei, ko te ora tonu. 21

E aku tamariki nonohi, kia tupato koutou ki nga whakapakoko. Amine.

## 2 John

### Chapter 1

1

Na te kaumatua ki te wahine rangatira whiriwhiri ratou ko ana tamariki, e arohatia ponotia nei e ahau; ehara i te mea e ahau anake, engari e nga tangata katoa kua matau ki te pono: 2 He

whakaaro hoki ki te pono e mau nei i roto i a tatou, a e mau ano ki a tatou ake ake: 3 Kia tau ki a

koutou te aroha noa, te mahi tohu, me te rangimarie, he mea na te Atua Matua, na te Ariki hoki, na Ihu Karaiti, na te Tama a te Matua, i runga ano i te pono, i te aroha. <sup>4</sup> Hari pu ahau noku i kite i etahi o au tamariki e haere ana i runga i te pono, e whakarite ana i te ture kua homai ki a tatou e te Matua.

<sup>5</sup> Na, tenei ano taku kupu ki a koe, e tai, ehara i te ture hou taku e tuhituhi atu nei ki a koe, engari ko tera i a tatou no te timatanga, kia aroha tatou tetahi ki tetahi. <sup>6</sup> Ko te aroha hoki tenei, kia haere tatou i runga i ana ture. Ko te ture ano tenei, kia rite ki ta koutou i rongo ai i te timatanga, hei runga i tera he haerenga mo koutou.

<sup>7</sup> He tokomaha hoki te hunga whakapohehe kua tae mai ki te ao, kahore nei i whakaae i haere mai a Ihu Karaiti i te kikokiko. Ko te kaiwhakapohehe tenei, ko te anataraiti. <sup>8</sup> Kia whai whakaaro ki a koutou ano, kei maumauria a tatou mahi, engari kia tino nui te utu e riro i a tatou. <sup>9</sup> Ko te tangata e poka ke ana, kahore nei e mau ki te ako a te Karaiti, kahore te Atua i a ia: ko te tangata e mau ana ki te ako a te Karaiti, kei tenei te Matua me te Tama.

<sup>10</sup> Ki te tae atu tetahi ki a koutou, ki te kore tenei ako e kawea e ia, kua ia e puritia ki te whare, kua ano hoki e oha ki a ia: <sup>11</sup> Ki te oha hoki etahi ki a ia, ka uru ia ki ana mahi kino.

<sup>12</sup> He maha nga mea hei tuhituhinga atu maku ki a koutou, heoi kihai ahau i pai kia tuhia atu ki te pepa, ki te mangumangu: engari e mea ana ahau tera ahau e haere atu ki a koutou, a ka korero atu, he mangai, he mangai, kia tino nui ai to tatou hari. <sup>13</sup> Tenei te oha atu nei ki a koe nga tamariki a tou teina whiriwhiri. Amine.

### 3 John

#### Chapter 1

<sup>1</sup> Na te kaumatua ki a Kaiu, ki te hoa aroha, ki taku e aroha atu nei i runga i te pono. <sup>2</sup> E te hoa aroha, nui atu i nga mea katoa taku inoi kia kake koe ki te pai, kia ora, kia pera ano me tou wairua kua kake ki te pai.

<sup>3</sup> Hari pu hoki ahau i nga teina i haere mai nei, i whakaatu mai i te pono i roto i a koe, ara i tau haere i runga i te pono. <sup>4</sup> Kahore oku hari e nui atu ana i tenei, ara kia rongo ahau e haere ana aku

<sup>5</sup> tamariki i runga i te pono. E te hoa aroha, pono tonu tau mahi e mea na koe mo nga teina, mo

nga tangata iwi ke ano hoki; <sup>6</sup> E whakaatu na i tou aroha i te aroaro o te hahi: na kia rite ki ta te  
 Atua tau kawē i a ratou, a ka pai tau mahi: <sup>7</sup> He whakaaro hoki ki tona ingoa i haere atu ai ratou,  
 kihai ano i riro i a ratou tetahi mea a nga Tauwiwi. <sup>8</sup> Koia i tika ai kia whakamanuhiri tatou i nga  
 tangata penei, kia ai hoki tatou hei hoa mahi mo te pono.

<sup>9</sup> I tuhituhi atu ahau ki te hahi: otira kahore matou e manakohia mai e Rioterēpi, ko tana hoki  
 e pai ai ko ia kia meinga hei tuatahi mo ratou. <sup>10</sup> Mo konei ki te haere atu ahau, ka whakamahara  
 ahau i ana mahi e mea nei ia, ki te kino o ana kupu i a ia e komeme mai nei mo matou; kahore hoki  
 tana i mutu i konei, kahore ia e manako ki nga teina, e riria ana hoki e ia nga tangata e pai ana kia  
 pera, e peia ana i roto i te hahi. <sup>11</sup> E te hoa aroha, kaua e arumia te kino, engari te pai. Ko te tangata  
 e mahi pai ana, no te Atua ia: tena ko te kaimahi i te kino, kahore ano ia kia kite i te Atua.

<sup>12</sup> E korerotia paitia ana a Rimitiriū e te katoa, e te pono ano hoki: ae ra ko matou ano etahi  
 hei kaiwhakaatu; e mohio ana koutou he pono ta matou whakaatu. <sup>13</sup> He maha nga mea hei  
 tuhituhinga atu maku, otira e kore ahau e pai kia tuhituhi atu ki a koe ki te mangumangu, ki te pene:

<sup>14</sup> E mea ana hoki ahau tera ahau e kite wawe i a koe, a e korero taua, he mangai, he mangai. Kia  
 tau te rangimarie ki a koe. Tenei nga hoa aroha te oha atu nei ki a koe. Oha atu ki nga hoa aroha  
 me te whakahua ano i te ingoa o tera, o tera.

## Jude

### Chapter 1

<sup>1</sup> Na Hura, he pononga na Ihu Karaiti, he teina no Hemi, ki te hunga kua oti te whakatapu e te  
 Atua Matua, he mea tiaki i roto i a Ihu Karaiti, he hunga karanga: <sup>2</sup> Kia whakanuia ki a koutou te  
 mahi tohu, te rangimarie me te aroha.

<sup>3</sup> E nga hoa aroha, i ahau e takare tonu ana ki te tuhituhi ki a koutou mo to tatou whakaoranga  
 tahi, i mea ahau me tuhituhi ki a koutou, me whakahauhau kia kaha te tohe ki te whakapono kua  
 oti nei te tuku mai ki te hunga tapu. <sup>4</sup> Kua tomo puku mai hoki etahi tangata, ko era ano i tuhituhia  
 i mua mo tenei whakataunga he, he hunga karakiakore, e whakaputa ke ana ratou i te aroha noa o  
 to tatou Atua hei mea mo nga hiahia taikaha, a whakakahore ana ratou ki to tatou Ariki, ki a Ihu

<sup>5</sup> Karaiti, ko ia anake to tatou Ariki. Na, e mea ana ahau kia whakamaharatia koutou, kua matau

noa ake ano ia koutou ki tenei, i whakaorangia mai e te Ariki te iwi i te whenua o Ihipa, muri iho  
 whakangaromia ana e ia te hunga kihai nei i whakapono. <sup>6</sup> Na, ko nga anahera, kihai nei i mau ki  
 to ratou ake rohe, heoi whakarerea ana to ratou nohoanga ake, kua waiho e ia i raro i te pouri, mau  
 tonu te here ki nga mekameka, mo te whakawa o te ra nui. <sup>7</sup> Ka rite ki Horoma, ki Komora, ki nga  
 pa hoki i tata ki reira, i pera me enei, te moepuku, te whai i nga kikokiko ke; kua waiho ratou hei  
 tohu, pangia ana ratou e te whiu, ara e te ahi ka tonu.

<sup>8</sup> Ko ta tenei hunga moemoea ano hoki tena; e whakapoke ana i te kikokiko, e whakahawea  
 ana ki te kawanatanga, e korero kino ana ki nga rangatira. <sup>9</sup> Ko Mikaera ia, ko te tino anahera, i ta  
 raua ngangautanga ko te rewera, i a ia e tohe ana ki te tinana o Mohi, kihai i tae tona aro ki te kupu  
 kanga i te whakawakanga; i mea kau ia, Ma te Ariki koe e riri. <sup>10</sup> Ko enei ia, e korerotia kinotia  
 ana e ratou nga mea kahore nei ratou i matau; na, ko nga mea e matauria noatia ake nei e ratou pera  
 i nga kararehe whakaarokore, he iho ratou i aua mea. <sup>11</sup> Aue te mate mo ratou! kua haere nei hoki  
 ratou i te ara o Kaina, kua torere rawa hoki ki te he, ara ki to Paraama utu, na ko to Koraha totohe

<sup>12</sup> hei whakangaromanga mo ratou. He toka moana ratou i roto i a koutou hakari aroha, i a ratou  
 e hakari tahi ana me koutou, he hepara e whangai ana i a ratou ano, kahore hoki e matakū; he kapua  
 waikore e akina ana e nga hau; he rakau kua ngahoro nei nga rau, he mea huakore, ka rua nei nga  
 matenga, he mea kua unuhia ake i nga pakiaka; <sup>13</sup> He ngaru pua no te moana, e whakatutu ana i  
 te huka o to ratou whakama; he whetu atiutiu noa, pouri kerekere te wahi kua rite mo ratou mo ake

<sup>14</sup> tonu atu. I poropititia ano hoki enei e Enoka, e te tuawhiti i muri i a Arama, i a ia i mea, Na,  
 kei te haere mai te Ariki me nga mano tini o tana hunga tapu,

<sup>15</sup> Kia whakaritea he whakawa mo nga tangata katoa, kia riria hoki te hunga karakiakore o  
 ratou mo a ratou mahi takahi i te karakia katoa, i he ai ratou ki te karakia, mo nga kupu pakeke  
 katoa i korerotia e te hunga hara, e te hunga karakiakore, mon a. <sup>16</sup> He hunga amuamu ratou, he  
 kowhetewhete, e haere ana i runga i o ratou hiahia ake, tetere rawa ano hoki nga kupu e korero nei

<sup>17</sup> o ratou mangai, he hunga whakapai kanohi ratou, he mea kia riro ai he mea ma ratou. E nga hoa  
 aroha, kia mahara koutou ki nga kupu i korerotia i mua e nga apotoro a to tatou Ariki, a Ihu Karaiti;  
<sup>18</sup>

I mea hoki ratou ki a koutou, Tera e puta mai te hunga whakamanumanu a te wa whakamutunga,  
 e haere ana i runga i o ratou hiahia karakiakore. <sup>19</sup> Na enei nga titorehanga, he hunga hiahia hoki

<sup>20</sup> ki te kikokiko kahore nei i a ratou te Wairua. Ko koutou ia, e nga hoa aroha, hanga ake koutou  
 hei whare ki runga ki to koutou whakapono tapu rawa, me te inoi ano i roto i te Wairua Tapu,  
<sup>21</sup>

Me te tiaki ano i a koutou i runga i te aroha o te Atua, me te tatari ano ki te mahi tohu a to tatou

22

Ariki, a Ihu Karaiti, a te ora tonu ra ano. Ko etahi ano tohungia, e ruarua tonu nei nga whakaaro.

23 Ko etahi me whakaora, ka to mai i roto i te kapura; a ko etahi tohungia i runga i te mataku; me te weriweri rawa ki te kakahu i poke i te kikokiko.

24

Na, ki te mea kaha ki te tiaki i a koutou kei hinga, ki te whakatu hoki i a koutou ki te aroaro o tona kororia, he mea kohakore i runga i te hari whakaharahara,

25

Ki a ia, ko ia anake nei te Atua, ki to tatou Kaiwhakaora, i roto i a ihu Karaiti, i to tatou Ariki, waiho atu i a ia te kororia, te nui, te kaha, te mana, i mua atu o nga wa katoa, aiane, a ake ake. Amine.

## Revelation

### Chapter 1

1 Ko te whakakitenga a Ihu Karaiti, i homai nei e te Atua ki a ia, kia whakapuakina ki ana pononga nga mea meake nei rite; na whakaaturia mai ana e ia, ara e tana anahera i tonoa mai e ia, ki tana pononga, ki a Hoani:

2

Ko ia nei te pono o te kupu a te Atua, o te whakaaturanga hoki a Ihu Karaiti, ara o nga mea katoa i kite ai ia.

3 Ka hari te tangata e titiro ana i te pukapuka, me te hunga ano hoki e whakarongo ana ki nga kupu o te poropititanga, e pupuri ana hoki i nga mea kua oti te tuhituhi ki reira: kua tata hoki te taima.

4

Na Hoani ki nga hahi e whitu i Ahia: Kia tau ki a koutou te aroha noa me te rangimarie, he mea nana e ora nei ia, i mua ano ia, a kei te haere mai ano; he mea hoki na nga Wairua e whitu i mua i tona torona;

5

He mea ano na Ihu Karaiti, na te kaiwhakaatu pono, ko ia nei te putanga matamua o te hunga mate, te rangatira o nga kingi o te whenua. Ki a ia, i arohaina nei tatou e ia, i horoia ano hoki o tatou hara ki ona toto,

6

A meinga ana tatou e ia hei kingi, hei tohunga ki te Atua, ara ki tona Matua; waiho atu ki a ia te kororia me te kaha ake tonu atu. Amine.

7

Tenei ia te haere mai nei me nga kapua, e kite hoki i a ia nga kanohi katoa, me te hunga hoki i wero i a ia: ka aue ano hoki nga hapu katoa o te whenua ki a ia. Ae, Amine.

8

Ko ahau te Arepa, te Omeka, te timatanga, te whakamutunga, e ai ta te Ariki, e ora nei, i mua ano ia, a kei te haere mai ano, ko te Kaha Rawa nei ia.

9 Ko ahau tenei, ko Hoani, ko to koutou tuakana, kua uru tahi nei ki te tukinotanga, ki te rangatiratanga ano hoki, ki te manawanui kei roto i a Ihu, i te motu ahau e huaina nei ko Patamo,



<sup>10</sup> he mea hoki mo te kupu a te Atua, mo te whakaatu hoki i a I hu. I te Wairua ahau i te ra o te  
<sup>11</sup> Ariki, a ka rongoa ahau i te reo nui i muri i ahau, me te mea no te tetere, E mea ana, Tuhituhia  
 ki te pukapuka tau e kite nei, tukua atu hoki ki nga hahi e whitu i Ahia; ki Epeha, ki hamurana, ki  
<sup>12</sup> Perekamu, ki Taiataira, ki Harariha, ki Parerepia, ki Raorikia. Na ka tahuri ake ahau kia kite i  
 te reo i korero nei ki ahau. A, i taku tahuritanga ake, ka kite ahau i nga turanga rama koura e whitu;  
<sup>13</sup> A i waenganui o nga turanga rama ko tetahi e rite ana ki te Tama a te tangata, ko tona kakahu  
<sup>14</sup> tatu noa ki nga waewae, he mea whitiki te uma ki te whitiki koura; A ko tona matenga me nga  
<sup>15</sup> makawe ma tonu, ano he wuuru ma, he hukarere; ko ona kanohi, ano he mura ahi; A ko ona  
 waewae rite tonu ki te parahi pai, ano e ka ana i roto i te oumu; ko tona reo, ano ko te tangi a nga  
<sup>16</sup> wai maha. E whitu hoki nga whetu i tona ringa matau: a i puta mai i tona mangai he hoari  
<sup>17</sup> matarua, he mea koi: ko tona kanohi, ano kei te ra ina kaha te whiti mai. A, no toku kitenga i a  
 ia, hinga ana ahau ki ona waewae, ano he tangata kua mate. Na ka whakapangia mai e ia tona  
 ringaringa matau ki ahau, ka mea ki ahau, Kaua e matakū; ko ahau te tuatahi, te whakamutunga:  
<sup>18</sup> Ko ahau te Mea Ora; i mate hoki ahau i mua, na, e ora nei a ake tonu atu, kei ahau ano nga ki o  
<sup>19</sup> te mate raua ko te reinga. Na reira tuhituhia nga mea kua kite nei koe, nga mea onaianei nei, me  
<sup>20</sup> nga mea e puta mai a muri ake nei; Ko te mea ngaro, ko nga whetu e whitu i kite nei koe i toku  
 matau, me nga turanga rama koura e whitu. Ko nga whetu e whitu, ko nga anahera o nga hahi e  
 whitu: ko nga turanga rama e whitu, ko nga hahi e whitu.

## Chapter 2

<sup>1</sup> Tuhituhi atu ki te anahera o te hahi i Epeha; Ko nga kupu enei a te kaipupuri i nga whetu e  
<sup>2</sup> whitu i tona matau, e haereere ana i waenganui o nga turanga rama koura e whitu; Ka matau ahau  
 ki au mahi, ki tou uaua, ki tou manawanui, e kore hoki koe e ata hanga ki te hunga kino: kua  
 whakamatautauria hoki e koe te hunga e mea nei he apotoro ratou, a ehara, kua mau i a koe he  
<sup>3</sup> hunga teka ratou: I whakamanawanui koe, i mahi tonu, ahakoa pehia, he whakaaro ki toku ingoa,  
<sup>4</sup> kahore hoki i hoha. Otira he mea ano taku ki a koe, kua whakarerea e koe tou aroha tuatahi. Na,  
<sup>5</sup> kia mahara ki te wahi i taka iho ai koe, ripeneta, mahia hoki nga mahi o mua; ki te kahore, ka hohoro  
 toku haere atu ki a koe, ka nekehia atu e ahau tou turanga rama i tona wahi, ki te kore koe e ripeneta.  
<sup>6</sup> Ko tenei ia tau na, e kino ana koe ki nga hanga a nga Nikoraiti, e kinongia nei hoki e ahau. <sup>7</sup> Ko

te tangata he taringa tona, kia rongō ia ki ta te Wairua e mea nei ki nga hahi: Ko te tangata i a ia te wikitoria, ka hoatu e ahau mana e kai to te rakau o te ora, e tu ana i waenganui o te Paraiha o te Atua.

8

Tuhituhi atu hoki ki te anahera o te hahi i Hamurana; Ko nga kupu enei a te tuatahi, a te

9

whakamutunga, i mate nei, a kua ora ano: Ka matau ahau ki tou tukinotanga, ki tou rawakoretanga; engari he whai rawa tonu koe; e matau ana ano ahau ki nga hahani a te hunga e mea nei he Hurai

10

ratou, a ehara, engari ko te whakamenenga ratou a Hatana. Kua e wehi ki nga mamae meake nei pa ki a koe; na, tera e maka etahi o koutou e te rewera ki te whare herehere, kia whakamatautauria ai koutou; a ka whakamamaetia koutou kotahi tekau nga ra. Kia pono koe a mate noa, a maku e

11

hoatu ki a koe te k arauna o te ora. Ko te tangata he taringa tona, kia rongō ia ki ta te Wairua e mea nei ki nga hahi; Ko te tangata i a ia te wikitoria, e kore ia e he i te matenga tuarua.

12

Tuhituhi atu hoki ki te anahera o te hahi i Perekamu; Ko nga kupu enei a te kaimau i te hoari

13

koi, i te mea matarua; Ka matau ahau ki te wahi e noho na koe, ko te wahi ia i te torona o Hatana: e mau ana hoki koe ki toku ingoa, kahore hoki koe i whakakahore ki toku whakapono, i nga ra i ara i taku kaiwhakaatu pono, i a Anatipa, i whakamatea nei i roto i a koutou u i te wahi e noho na a

14

Hatana. Tenei ia ETAHI MEA AKU KI A KOE, NO TE MEA KEI A KOE TE HUNGA E MAU ANA KI TE AKO A Paraama, nana nei i whakaako a Paraka ki te maka tutukitanga waewae ki te aroaro o nga tama a Ihairaira, i kai ai ratou i nga mea i patua ma te whakapakoko, i moe puku

15

ai hoki. Kei a koe ano hoki te hunga e mau ana ki te ako a nga Nikoraiti, pera ano. No reira, ripeneta; na ki te kahore, ka hohoro toku haere atu ki a koe, a ka whawhaitia ratou e ahau ki te hoari

16

17

a toku mangai. Ko te tangata he taringa tona, kia rongō ia ki ta te Wairua e mea nei ki nga hahi; Ko te tangata i a ia te wikitoria, ka hoatu e ahau te mana huna, ka hoatu ano e ahau ki a ia he kohatu ma, me te ingoa hou, he mea tuhituhi ki te kohatu, e kore n ei e matauria e tetahi, ko te tangata anake e whiwhi ana.

18

Tuhituhi atu hoki ki te anahera o te hahi o Taiatira; Ko nga kupu enei a te Tama a te Atua,

19

ko ona kanohi nei me te mea he mura ahi, ona waewae rite tonu ki te parahi paiata; E matau ana ahau ki au mahi, ki tou aroha, ki tau mahi minita, ki tou whakapono, ki tou manawanui, a nui atu

20

au mahi o muri nei i nga mea o mua. Tenei ano ia etahi mea aku ki a koe, no te mea e tukua ana e koe taua wahine a Ietepere, e mea nei he poropiti ia; kei te whakaako, kei te kukume i aku pononga

21

kia moepuku, kia kai ano hoki i nga mea e patua ana ma nga whakapakoko. A i hoatu e ahau ki

22

a ia he taima e ripeneta ai ia; otira kahore ia e pai kia ripeneta i tana moepuku. Na, ka maka ia e ahau ki tetahi moenga, me te hunga e puremu ana ki a ia, ki roto ki te whiu taimaha, mehemea

23

kahore ratou e ripeneta ki a ratou mahi. Ka whakamatea hoki e ahau ana tamariki kia mate rawa;

a ka matau nga hahi katoa ko ahau te kairapu i ta nga whatumanawa, i ta nga ngakau: ka rite hoki  
 ki a koutou mahi taku e hoatu ai ki tenei, ki tenei o koutou. <sup>24</sup> Ko taku kupu ia tenei ki a koutou,  
 ki era atu hoki i Taiataira, ki te hunga kahore nei i a ratou tenei ako, kahore ano kia matau ki nga  
 mea hohonu a Hatana, ki ta ratou e korero nei; E kore e whakawaha e ahau tetahi atu mea taimaha  
 ki a koutou. <sup>25</sup> Ko te mea ia i a koutou, puritia kia mau kia tae atu ra ano ahau. <sup>26</sup> Na, ko te tangata  
 i a ia te wikitoria, ko te tangata hoki e puritia e ia aku mahi taea noatia te mutunga, maku e hoatu  
 ki a ia he mana rangatira ki nga tauwi: <sup>27</sup> He rino hoki te tokotoko e whakahaere tikanga ai ia mo  
 ratou, ka pera i nga oko a te kaipokepoke paru, ka pakaru ririki; ka rite ki ta toku matua i homai ai  
 ki ahau: <sup>28</sup> A ka hoatu e ahau ki a ia te whetu o te ata. <sup>29</sup> Ko te tangata he taringa tona, kia rongu  
 ia ki ta te Wairua e mea nei ki nga hahi.

### Chapter 3

<sup>1</sup> Tuhituhi atu hoki ki te anahera o te hahi i Harariha; Ko nga kupu ana, kei a ia nei nga Wairua  
 e whitu o te Atua, me nga whetu e whitu; Ka matau ahau ki au mahi, na he ingoa tou, e ora ana  
 koe, heoi he tupapaku ano koe. <sup>2</sup> Kia mataara, whakaukia nga mea e toe nei, ka tata nei te mate;  
 kahore hoki ahau i kite i au mahi kia tino rite ki te aroaro o toku Atua. <sup>3</sup> Kia mahara ra ki te rironga  
 o nga mea i a koe, ki au i rongu ai, a puritia, ripeneta hoki. Na ki te kore koe e mataara, ka tae atu  
 ahau ki a koe, ano he tahae; e kore hoki koe e matau ki te haora e tae atu ai ahau ki a koe. <sup>4</sup> Tena  
 ano kei a koe etahi ingoa ouou nei i Harariha, kahore nei i poke o ratou kakahu; ka haereere tahi  
 ena me ahau, he ma nga kakahu; no te mea he pai ratou. <sup>5</sup> Ko te tangata i a ia te wikitoria, ka  
 whakakakahuria ia ki te kakahu ma; e kore ano hoki e ukuia e ahau tona ingoa i te pukapuka o te  
 ora, a ka whakaaetia e ahau tona ingoa ki te aroaro o toku Matua, ki te aroaro ano hoki o ana anahera.  
<sup>6</sup> Ko te tangata he taringa tona, kia rongu ia ki ta te Wairua e mea nei ki nga hahi.  
<sup>7</sup> Tuhituhi atu hoki ki te anahera o te hahi i Pirarerepia; Ko nga kupu enei a te tapu, a te pono,  
 kei a ia nei te ki o Rawiri, ko ia hei whakapuare, a kahore tetahi hei tutaki; mana hoki e tutaki a  
 kahore tetahi hei whakapuare; <sup>8</sup> E matau ana ahau ki au mahi: na, kua hoatu e ahau ki tou aroaro  
 he tatau puare, e kore nei e taea te tutaki e tetahi: he kaha hoki tou, he mea iti nei, kua puritia ano  
 e koe taku kupu, kahore ano hoki koe i whakakahore ki toku ingoa. <sup>9</sup> Na, maku e mea te hunga o  
 te whakamenenga a Hatana, e mea nei he Hurai ratou, a ehara, he teka hoki na ratou; na, maku  
 ratou e mea kia haere mai, kia koropiko ki mua i ou waewae, a kia matau kua arohaina koe e ahau.

10

No te mea kua puritia e koe te kupu o taku manawanui, waihoki ka puritia koe e ahau i te haora o te whakamatautauranga, i taua haora meake nei puta ki te ao katoa, hei whakamatautau i te hunga

e noho ana i te whenua. <sup>11</sup> Ka hohoro toku haere atu: kia mau ki tau, kei tangohia tou karauna e

tetahi. <sup>12</sup> Ko te tangata i a ia te wikitoria, maku ia e mea hei pou i roto i te whare o toku Atua, a e kore ia e haere atu i kona ki waho a muri atu; maku hoki e tuhituhi ki runga ki a ia te ingoa o toku Atua, te ingoa hoki o te pa o toku Atua, o Hiruharam a hou, ka heke iho nei i te rangi i toku Atua,

me toku ingoa hou ano hoki. <sup>13</sup> Ko te tangata he taringa tona, kia rongoa ia ki ta te Wairua e mea nei ki nga hahi.

14

Tuhituhi atu hoki ki te anahera o te hahi i Raorikia; Ko nga kupu enei a te Amine, a te kaiwhakaatu pono, tika, a te timatanga o ta te Atua hanganga; <sup>15</sup> E matau ana ahau ki au mahi,

ehara koe i te matao, ehara koe i te wera: ka pai ahau me i matao koe, me i wera ranei. <sup>16</sup> Heoi, i te mea he mahanahana kau koe, ehara i te matao, ehara i te wera, ka ruakina atu koe e ahau i roto

i toku mangai. <sup>17</sup> No te mea e ki ana koe, Kua whai taonga ahau, kua tini aku rawa, kahore hoki tetahi mea e matea ana e ahau; kahore hoki e matau he waikorohuhu noa iho koe, he he noa iho,

he rawakore, he matapo, he mea kakahukore: <sup>18</sup> Ko taku kupu tenei ki a koe, kia hokona e koe i ahau he koura kua oti te tahu ki te ahi, kia whai rawa ai koe; he kakahu ma hoki, hei kakahu ki a koe, kia kaua ai e kitea te whakama o tou tunga kautanga; he rongoa hoki hei pani ki ou kanohi,

kia kite ai koe. <sup>19</sup> Ko aku e aroha nei, ka riria e ahau, ka whiua; na, kia ngakau nui koe, ripeneta

hoki. <sup>20</sup> Na, tenei ahau te tu nei i te tatau, te patukituki nei: ki te whakarongo tetahi ki toku reo, a

ka uaki i te tatau, ka tomo atu ahau ki a ia, hei hoa kai mona, ko ia hoki hei hoa kai moku. <sup>21</sup> Ko te tangata i a ia te wikitoria, ka hoatu e ahau ki a ia kia noho ki toku taha ki runga ki toku torona,

penei me ahau i ahau nei te wikitoria, kua noho ki te taha o toku Matua i runga i tona torona. <sup>22</sup> Ko te tangata he taringa tona, kia rongoa ia ki ta te Wairua e mea nei ki nga hahi.

## Chapter 4

1

Muri iho i enei mea ka kite ahau, na, he tatau kua oti te whakapuare i te rangi, a ko te reo tuatahi i rongoa ai ahau me te mea he reo no tetahi tetere e ki mai ana ki ahau, e mea ana, Haere mai

ki runga nei, a ka whakakitea e ahau ki a koe nga mea kua takoto mo muri i enei. <sup>2</sup> I reira pu ano kua nohoia ahau e te Wairua: na, he torona kua tu ki te rangi, a ko tetahi i runga i te torona e noho

<sup>3</sup>  
 ana; A ko tera i noho ra rite tonu ki te titiro atu ki te kohatu hahapa, ki te harariu: he aniwaniwa  
 hoki i nga taha katoa o te torona, ko te ahua ki te titiro atu kei to te emerara. <sup>4</sup> Na i nga taha katoa  
 o te torona etahi torona e rua tekau ma wha: a ka kite ahau i runga i nga torona ko nga kaumatua e  
 rua tekau ma wha e noho ana, he mea whakakakahu ki te kakahu ma; he karauna koura i runga i o  
<sup>5</sup>  
 ratou matenga. Na ka puta mai i roto i te torona he uira, he reo, he whatitiri. A tera nga rama ahi  
 e whitu e ka ana i mua i te torona; ko nga Wairua e whitu enei o te Atua; <sup>6</sup> I mua i te torona ano  
 he moana karaihe, te rite kei te haupapa: a i waenganui o te torona, i nga taha katoa ano o te torona,  
<sup>7</sup>  
 ko nga mea ora e wha, kapi tonu a mua, a muri o ratou i te kanohi. Ko te tuatahi o nga mea ora i  
 rite ki te raiona, ko te tuarua o nga mea ora i rite ki te kua o kau, ko te mata o te tuatoru o nga mea  
 ora i rite ki to te tangata, a ko te tuawha o nga mea ora i rite ki te ekara e rere ana.  
<sup>8</sup>  
 Na, ko aua mea ora e wha, he parirau o ratou, e ono o tena, o tena, i nga taha katoa; ki tonu  
 hoki a roto o ratou me nga taha i te kanohi: a kahore he tanga i te ao, i te po, he mea tonu ta ratou,  
 Tapu, tapu, tapu, te Ariki, te Atua Kaha Rawa, i mua nei ia, tenei ano inaianei, a e haere mai nei.  
<sup>9</sup>  
 A i te mea ka hoatu e nga mea ora te kororia, te honore, te whakawhetai ki tera e noho ana i runga  
<sup>10</sup>  
 i te torona, e ora ana ake ake, Ka hinga iho nga kaumatua e rua tekau ma wha ki te aroaro o tera  
 e noho ra i runga i te torona, na ka koropiko ki a ia e ora tonu nei ake ake, ka panga hoki i o ratou  
<sup>11</sup>  
 karauna ki mua o te torona, ka mea, Tika tonu, e te Ariki, kia riro i a koe te kororia, me te honore,  
 me te kaha: nau hoki i hanga nga mea katoa, a nau i pai i takoto ai aua mea, i hanga ai.

## Chapter 5

<sup>1</sup>  
 A i kite ano ahau i te ringa matau o tera e noho ra i runga i te torona, he pukapuka kua oti te  
 tuhituhi a roto, a tua hoki, he mea hiri ki nga hiri e whitu. <sup>2</sup> A i kite ahau i tetahi anahera kaha e  
 karanga ana, he nui te reo, Ko wai e tika ana hei whakatuwhera i te pukapuka, hei wawahi i ona  
<sup>3</sup>  
 hiri? A kihai i taea e tetahi i te rangi, i te whenua ranei, i raro ranei i te whenua, te whewhera i te  
<sup>4</sup>  
 pukapuka, te titiro ranei ki reira. Na nui atu toku tangi, no te mea kihai i kitea tetahi e tika ana  
<sup>5</sup>  
 hei whewhera i te pukapuka, hei titiro iho ranei ki reira: Na ka mea mai tetahi o nga kaumatua  
 ki ahau, Kaua e tangi, na, kua riro te wikitoria i te Raiona o te hapu o Hura, i te Putake o Rawiri,  
 mana e whakatuwhera te pukapuka, e wawahi ona hiri e whitu.  
<sup>6</sup>  
 A i kite ano ahau, na, i waenganui o te torona, o nga mea ora hoki e wha, i waenganui ano  
 hoki o nga kaumatua, he Reme e tu ana, te ahua kei to te mea i whakamatea, e whitu ona haona, e

whitu nga kanohi; ko nga Wairua e whitu enei o te Atua, kua tonoa nei puta noa i te ao. <sup>7</sup> Na ka  
 haere atu ia, ka tango i te pukapuka i roto i te matau o tera e noho ra i runga i te torona. <sup>8</sup> A, no ka  
 tango ia i te pukapuka, ka hinga iho nga mea ora e wha, me nga kaumatua e rua tekau ma wha, ki  
 te aroaro o te Reme, he hapa i tetahi, i tetahi o ratou, me nga oko koura ki tonu i nga mea kakara,  
<sup>9</sup>  
 ko nga inoi era a te hunga tapu. Na ka waiata ratou i te waiata hou, ka mea, Pai tonu koe hei tango  
 i te pukapuka, hei wahi i ona hiri: i whakamatea hoki koe, a hokona ana matou e koe hei hunga ma  
<sup>10</sup>  
 te Atua ki ou toto, i roto i nga hapu, i nga reo, i nga huihuinga tangata, i nga i wi katoa; A meinga  
 ana ratou e koe hei kingi, hei tohunga ki to matou Atua: ka kingi ano ratou ki runga ki te whenua.  
<sup>11</sup>  
 Na i kite ahau, i rongo hoki ahau i te reo o nga anahera maha i nga taha katoa o te torona, o nga  
 mea ora hoki, o nga kaumatua: na ko to ratou tokomaha kei nga mano tekau mano tekau, me nga  
<sup>12</sup>  
 mano mano; Nui atu to ratou reo ki te mea mai, Pai tonu te Reme i whakamatea hei tango i te  
<sup>13</sup>  
 kaha, i te taonga, i te matauranga, i te mana, i te honore, i te kororia, i te whakapai. I rongo ano  
 ahau ki nga mea hanga katoa o te rangi, o te whenua, i raro ano hoki i te whenua, ki era hoki i te  
 moana, ki nga mea katoa o reira, e mea ana, Waiho atu i tenei e noho nei i runga i te torona, i te  
<sup>14</sup>  
 Reme hoki, te whakapai, te honore, te kororia, te kaha a ake ake. Na ka mea nga mea ora e wha,  
 Amine. A ka hinga iho nga kaumatua, ka koropiko.

## Chapter 6

<sup>1</sup>  
 A i kite ahau i te wahanga o tetahi o nga hiri e te Reme, i rongo hoki i tetahi o nga mea ora e  
 wha e mea mai ana, ano he reo whatitiri, Haere mai. <sup>2</sup> I kite ano ahau, na, he hoihoi ma: a ko te  
 tangata e noho ana i runga he kopere tana; a ka hoatu he karauna ki a ia: a haere atu ana ia i runga  
 i te wikitoria ki te wikitoria.  
<sup>3</sup>  
 A i tana wahanga i te rua o nga hiri ka rongo ahau i te rua o nga mea ora e mea ana, Haere  
<sup>4</sup>  
 mai. Na ka puta mai tetahi hoiho ano, he hoiho whero: a i hoatu ki te kainoho i runga kia tangohia  
 atu e ia te rangimarie i runga i te whenua, kia patu ai ratou tetahi i tetahi: i hoatu ano hoki he hoari  
<sup>5</sup>  
 nui ki a ia. A i tana wahanga i te toru o nga hiri ka rongo ahau i te toru o nga mea ora e mea ana,  
 Haere mai. A i kite ahau, na, he hoiho mangu; me te kainoho i runga he pauna taimaha tana kei  
<sup>6</sup>  
 tona ringaringa. A ka rongo ahau i te reo, ano i waenganui o nga mea ora e wha, e mea ana, He  
 kuata witi mo te pene, e toru kuata parei mo te pene; kei kino hoki tau mahi ki te hinu, ki te waina.  
<sup>7</sup>  
 A i tana wahanga i te wha o nga hiri, ka rongo ahau i te reo o te wha o nga mea ora, e mea ana,

8

Haere mai. A ka kite ahau, na, he hoiho ha ma: a ko te kainoho i runga, tona ingoa ko te Mate, me te aru ano te Reinga i a ia. Na i hoatu ki a raua te tikanga ki te tuawha o nga wahi o te whenua, kia whakamatea ki te hoari, ki te matekai, ki te mate turoro, ki nga kararehe hoki o te whenua.

9

A i tana wahanga i te rima o nga hiri, ka kitea e ahau i raro i te aata nga wairua o te hunga i whakamatea mo te kupu a te Atua, mo ta ratou whakaatu hoki: Nui atu to ratou reo ki te karanga, ki te mea, Kia pehea te roa, e te Ariki, e te tapu, e te pono, a kore ana koe e whakawa, e rapu utu

10

mo o matou toto, i te hunga e noho ana i runga i te whenua? A i hoatu he kakahu ma ki tenei, ki tenei o ratou; a i kiia atu ki a ratou, kia okioki ratou he wa iti nei, kia rite ra ano o ratou hoa

11

pononga me o ratou teina, i meinga nei kia patua, kia peratia me ratou. A ka kite ahau i tana wahanga i te ono o nga hiri, na, ko te ru nui; a ka mangu te ra ano he kakahu taratara, puhuruhuru,

12

a ko te marama pena katoa i te toto; A ka taka iho nga whetu o te rangi, ano he piki e whakangahoro nei i ona hua koriri, ina rurea ia i te hau nui. Na ka tahia atu te rangi me te pukapuka e whakakopaia ana; a ka nekehia atu nga maunga katoa me nga motu i o ratou turanga.

13

Na, ko nga kingi o te whenua, ko nga tangata nunui, ko nga tangata taonga, ko nga rangatira mano, ko nga tangata kaha, ko nga pononga katoa, me nga rangatira katoa, piri ana ratou ki roto ki

14

nga ana, ki nga toka o nga maunga; Me te ki ake ano ratou ki nga maunga, ki nga toka, E hinga ki runga ki a matou, hei huna i a matou i te kanohi o tera e noho ra i runga i te torona, i te riri hoki

15

o te Reme: Kua taea hoki te ra nui o tona riri; a ko wai e tu?

16

o te Reme: Kua taea hoki te ra nui o tona riri; a ko wai e tu?

17

o te Reme: Kua taea hoki te ra nui o tona riri; a ko wai e tu?

## Chapter 7

1

Muri iho i enei mea ka kite ahau i nga anahera tokowha, e tu ana i nga pito e wha o te whenua, e pupuri ana i nga hau e wha o te whenua, kia kaua e pupuhi te hau ki runga ki te whenua, kia kaua

2

ki te moana, kia kaua ranei ki runga ki tetahi rakau. I kite ano ahau i tetahi atu anahera e haere ake ana i te rawhiti, i a ia te hiri a te Atua ora; na, nui atu tona reo ki te karanga ki nga anahera

3

tokowha, i tukua nei ma ratou e mea he kino ki te whenua, ki te moana, E mea ana, Kaua e meatia he kino ki te whenua, kaua ki te moana, kaua hoki ki nga rakau; kia hiritia ra ano e matou nga rae

4

o nga pononga a to tatou Atua. A i rongu ahau ki te tokomaha o te hunga i hiritia, kotahi rau e

5

wha tekau ma wha nga mano i hiritia, no nga pu katoa o nga tama a Iharaira. O te pu o Hura kotahi tekau ma rua nga mano i hiritia: o te pu o Reupena kotahi tekau ma rua nga mano: o te pu

<sup>6</sup>  
 o Kara kotahi tekau ma rua nga mano: O te pu o Ahera kotahi tekau ma rua nga mano: o te pu o  
<sup>7</sup>  
 Nepetarima kotahi tekau ma rua nga mano: o te pu o Manahi kotahi tekau ma rua nga mano: O  
 te pu o Himiona kotahi tekau ma rua nga mano: o te pu o Riwai kotahi tekau ma rua nga mano: o  
<sup>8</sup>  
 te pu o Ihakara kotahi tekau ma rua nga mano: O te pu o Hepurona kotahi tekau ma rua nga mano:  
 o te pu o Hohepa kotahi tekau ma rua nga mano: o te pu o Pineamine kotahi tekau ma rua nga mano  
<sup>9</sup>  
 i hiritia. Muri iho i enei mea ka kite ahau, na, he mano tini, e kore nei e taea e tetahi te tatau, no  
 nga iwi katoa, no nga hapu, no nga huihuinga tangata, no nga reo, e tu ana i mua i te torona, i mua  
<sup>10</sup>  
 hoki i te Reme, he mea whakakakahu ki nga kakahu ma, h e nikau hoki ki o ratou ringaringa; Nui  
 atu to ratou reo ki te karanga, ki te mea, Ko te whakaoranga ki to tatou Atua, e noho nei i runga i  
<sup>11</sup>  
 te torona, ki te Reme hoki. Na ko nga anahera katoa e tu ana i nga taha katoa o te torona, i nga  
 taha hoki o nga kaumatua, o nga mea ora e wha; a ka tapapa ratou ki mua i te torona, ka koropiko  
<sup>12</sup>  
 ki te Atua, Me te ki ake ano, Amine: Ko te whakapai, ko te kororia, ko te matauranga, ko te  
 whakawhetai, ko te honore, ko te mana, ko te kaha, kei to tatou Atua ake ake. Amine.  
<sup>13</sup>  
 A ka oho mai tetahi o nga kaumatua, ka mea mai ki ahau, Ko enei i whakakakahuria nei ki  
<sup>14</sup>  
 nga kakahu ma, ko wai ra? a i haere mai ratou i hea? Ano ra ko ahau ki a ia, E kara, e matau  
 ana koe. Ka mea mai ia ki ahau, Ko te hunga tenei i puta mai i te tukinotanga nui, ko o ratou kakahu  
<sup>15</sup>  
 he mea horoi na ratou, he mea whakama ki nga toto o te Reme. Koia ratou e noho nei i mua i  
 te torona o te Atua, e mahi nei ki a ia i te ao, i te po, i roto i tona whare: a ma tera e noho ra i runga  
<sup>16</sup>  
 i te torona e hipoki tona tapenakara ki runga i a ratou. Kore ake o ratou matekai, kore ake o ratou  
<sup>17</sup>  
 matewai; e kore ano hoki te ra e pa iho ki a ratou, tetahi wera ranei: Ko te Reme hoki i waenganui  
 o te torona hei hepara mo ratou, a mana ratou e arahi ki nga puna wai o te ora: a ma te Atua e muru  
 atu nga roimata katoa i o ratou kanohi.

## Chapter 8

<sup>1</sup>  
 A i tana wahanga i te whitu o nga hiri, kahore he aha i rangona i te rangi me te mea kotahi te  
<sup>2</sup>  
 hawhe haora. A ka kite ahau i nga anahera tokowhitu e tu ra i te aroaro o te Atua; a e whitu nga  
<sup>3</sup>  
 tetere i hoatu ki a ratou. A ka haere mai tetahi atu anahera, ka tu ki runga o te aata, he tahu koura  
 tana; a he maha nga whakakakara i hoatu ki a ia, hei tapiri mana ki nga inoi a te hunga tapu katoa  
<sup>4</sup>  
 ki runga ki te aata koura i mua i te torona. A, ko te paoa o nga whakakakara me nga inoi a te



<sup>5</sup>  
 hunga tapu, ka kake atu i te ringaringa o te anahera ki te aroaro o te Atua. A ka mau te anahera  
 ki te tahu whakakakara, ka whakakiiia ki te kapura o te aata, panga ana e ia ki te whenua: na ko te  
<sup>6</sup>  
 putanga mai o nga whatitiri, o nga reo, o nga uira, o te ru. Na kua takatu nga anahera tokowhitu  
 i nga tetere e whitu, ka mea ki te whakatangi.  
<sup>7</sup>  
 Whakatangi ana te anahera tuatahi, na, he whatu tera, he kapura, he toto ano hoki i roto, ka  
 panga ki te whenua: na kua pau i te ahi te wahi tuatoru o te whenua, kua pau i te ahi te wahi tuatoru  
<sup>8</sup>  
 o nga rakau, a pau ake hoki i te ahi nga tarutaru m atomato katoa. A ka whakatangi te rua o nga  
 anahera, na, me te mea he maunga nui tera, e kaia ana e te ahi, kua maka ki te moana: a ka meinga  
<sup>9</sup>  
 te wahi tuatoru o te moana hei toto; A mate iho te wahi tuatoru o nga mea hanga i roto i te moana,  
<sup>10</sup>  
 o nga mea whai ora; ngaro iho hoki te wahi tuatoru o nga kaipuke. A ka whakatangi te toru o  
 nga anahera, na, kua taka iho i te rangi he whetu nui e ka ana, ano he rama, a taka ana ki te wahi  
<sup>11</sup>  
 tuatoru o nga awa, ki nga puna hoki o nga wai; A ko te ingoa o te whetu ko Taru kawa: a ka  
 meinga te wahi tuatoru o nga wai hei taru kawa; a he tokomaha nga tangata i mate i nga wai, no te  
<sup>12</sup>  
 mea kua kawa. A ka whakatangi te wha o nga anahera, na, kua patua te wahi tuatoru o te ra, me  
 te wahi tuatoru o te marama, me te wahi tuatoru hoki o nga whetu; kia pouri ai te wahi tuatoru o  
<sup>13</sup>  
 aua mea, kia kore ai e marama te wahi tuatoru o te ra, o te po ano hoki. A i kite ahau, i rongo  
 hoki i tetahi ekara e rere ana i waenganui o te rangi, he nui tona reo ki te mea mai, Aue, aue, aue,  
 te mate mo te hunga e noho ana i runga i te whenua, i era reo o te tetere a nga anahera tokotoru,  
 meake nei tangi!

## Chapter 9

<sup>1</sup>  
 A ka whakatangi te rima o nga anahera, a ka kite ahau i tetahi whetu no te rangi kua taka iho  
<sup>2</sup>  
 ki te whenua: a ka hoatu ki a ia te ki o te poka torere. A uakina ana e ia te poka torere; a ka puta  
 ake he paoa i te poka, ano he paoa no tetahi kapura nui; a pouri iho te ra me te rangi i te paoa o te  
<sup>3</sup>  
 poka. A ka puta mai i te paoa he mawhitiwhiti ki runga ki te whenua; i hoatu hoki ki a ratou he  
<sup>4</sup>  
 kaha, he pera me te kaha o nga kopiona o te whenua. I korerotia hoki ki a ratou kia kaua e kino  
 i a ratou te tarutaru o te whenua, tetahi mea matomato ranei, tetahi rakau ranei; ko nga tangata  
<sup>5</sup>  
 anake kahore nei te hiri a te Atua i o ratou rae. I tukua ano hoki ki a ratou kia kaua e whakamate  
 i era, engari me whakamamae kia rima ra ano nga marama: a ko ta ratou whakamamae kia pera me  
<sup>6</sup>  
 te whakamamae a te kopiona, ina wero i te tangata. A i aua ra tera nga tangata e rapu i te mate,

a e kore rawa e kitea; e hiahia ano ratou kia mate, heoi ka oma te mate i a ratou. <sup>7</sup> Na ko te waihanga  
 o nga mawhitiwhiti rite tonu ki nga hoiho kua oti te whakanoho mo te pakanga: a i runga i o ratou  
 matenga he mea e rite ana ki nga karauna koura, a ko o ratou kanohi ano he kanohi tangata. <sup>8</sup> He  
 makawe ano to ratou rite tonu ki te makawe wahine, ko o ratou niho me te mea no te raiona. <sup>9</sup> He  
 pukupuku hoki o ratou, ano he pukupuku rino; a ko te haruru o o ratou pakau, ano ko te haruru o  
 nga hariata, o nga hoiho maha e rere ana ki te tatauranga. <sup>10</sup> He hiku o ratou pera i o nga kopiona,  
 he wero hoki: a kei o ratou hiku to ratou kaha ki te whakamamae tangata mo nga marama e rima.  
<sup>11</sup>  
 He kingi ano to ratou, ko te anahera o te poka torere; ko tona ingoa i te reo Hiperu ko Aparona,  
 a i te reo Kariki ko Aporiona tona ingoa. <sup>12</sup> Kua pahemo te tuatahi o nga aue; na e rua ake nga aue  
 kei te haere mai i muri.  
<sup>13</sup>  
 Na ka whakatangi te ono o nga anahera, a ka rongu ahau ki tetahi reo, e ahu mai ana i nga  
 haona e wha o te aata koura i te aroaro o te Atua, <sup>14</sup> E mea ana ki te ono o nga anahera, kei a ia  
 nei te tetere, Wetekina nga anahera tokowha e here ra i te awa nui, i Uparati. <sup>15</sup> Na ka wetekina  
 aua anahera tokowha, kua noho rite noa ake nei mo te haora, me te ra, me te marama, me te tau, e  
 whakamate ai ratou i te wahi tuatoru o nga tangata. <sup>16</sup> A ko te tokomaha o nga taua o nga hoia eke  
 hoiho e rua tekau mano nga tekau mano; i rongu hoki ahau ki to ratou tokomaha. <sup>17</sup> Ko taku tenei  
 i kite ai i ahau e titiro matakite ana, ko nga hoiho me nga kainoho i runga he pukupuku o ratou,  
 ano he ahi, he hakiniti, he whanariki: na, ko nga upoko o nga hoiho, ano he upoko raiona; e puta  
 mai ana hoki i o ratou mangai he kapu ra, he paoa, he whanariki. <sup>18</sup> Na enei mate e toru i patu te  
 wahi tuatoru o nga tangata, na te kapura, na te paoa, na te whanariki, i puta mai i o ratou mangai.  
<sup>19</sup>  
 Ko te kaha hoki o nga hoiho kei o ratou mangai, kei o ratou waero: ko o ratou waero koia ano  
 kei te nakahi, he upoko o ratou; ko a ratou mea tukino enei. <sup>20</sup> Na, ko era atu tangata, kihai nei i  
 whakamatea e enei mate, kahore ratou i ripeneta ki nga mahi a o ratou ringaringa, kihai hoki i mutu  
 to ratou koropiko ki nga rewera, ki nga whakapakoko koura, hiriwa, parahi, kohatu, rakau ranei;  
 ki nga mea ka hore nei e kite, kahore e rongu, kahore e haereere: <sup>21</sup> Kahore ano hoki ratou i ripeneta  
 ki a ratou kohuru, ki a ratou mahi makutu, ki a ratou moepuku, ki a ratou tahae.

## Chapter 10

<sup>1</sup> A ka kite ahau i tetahi atu anahera kaha e heke iho ana i te rangi, he mea whakakakahu ki te kapua: ko te aniwaniwa i runga i tona matenga, ko tona kanohi rite tonu ki te ra, ona waewae ki te pou kapura: <sup>2</sup> I tona ringaringa hoki tetahi pukapuka nohinohi e tuwhera ana: a ko tona waewae matau e takahi ana ki te moana, ko tona mauī ki te whenua: <sup>3</sup> He nui ano tona reo ki te karanga, ano he raiona e tangi ana: a i te mea ka karanga ia, ka puaki nga reo o nga whatitiri e whitu. <sup>4</sup> A, no ka puaki nga reo o nga whatitiri e whitu, ka mea ahau ki te tuhituhi: na ka rangona e ahau he reo i te rangi e mea mai ana ki ahau, Hiritia nga mea kua whakapuakina nei e nga whatitiri e whitu, kua hoki enei e tuhituhia. <sup>5</sup> Na ko te anahera i kitea ra e ahau e tu ana i runga i te moana i runga hoki i te whenua, whakaara ana i tona ringa matau ki te rangi, <sup>6</sup> A oatitia ana e ia te Mea ora tonu ake ake, nana nei i hanga te rangi me ona mea, te whenua me ona mea, te moana me ona mea, kahore ake he taima: <sup>7</sup> Engari i nga ra o te reo o te whitu o nga anahera, ina mea ia ki te whakatangi, ka whakaotia te mea ngaro a te Atua, tana rongopai i kauwhau ai ki ana pononga, ki nga poropiti. <sup>8</sup> A ka korero ano ki ahau te reo i rongopai ai ahau i te rangi, ka mea, Tikina atu te pukapuka nohinohi e tuwhera na i te ringaringa o te anahera e tu na i runga i te moana, i runga ano i te whenua. <sup>9</sup> Na ka haere ahau ki te anahera, ka mea ki a ia, Homai ki ahau te pukapuka nohinohi na. Ka mea mai ia ki ahau, Tangohia, kainga; a ka kawa tou kopu, ka reka ia ki tou mangai, ano he honi. <sup>10</sup> Na ka tango ahau i te pukapuka nohinohi i te ringaringa o te anahera, kainga ana e ahau; a i reka ano ki toku mangai, ano he honi: no taku kainga, kua kawa toku kopu. <sup>11</sup> A ka mea mai ratou ki ahau, Me poropiti ano koe mo nga huihuinga tokomaha o nga tangata, o nga iwi, o nga reo, o nga kingi.

## Chapter 11

<sup>1</sup> Na kua homai ki ahau he kakaho e rite ana ki te tokotoko: a ka mea mai tetahi, E ara, ka whanganga i te whare o te Atua, me te aata, me te hunga e koropiko ana i roto. <sup>2</sup> Me whakarere ia ki waho te marae i te taha ki waho o te whare tapu, kua tera e whangangatia; kua hoatu hoki ki nga tauwiwi: a e takatakahia e ratou te pa tapu, e wha tekau ma rua nga marama. <sup>3</sup> A maku e hoatu he tikanga ki aku kaiwhakaatu tokorua, e poropiti hoki raua, kotahi mano e rua rau e ono tekau nga ra, he taratara ano te kakahu. <sup>4</sup> Ko nga oriwa e rua enei, me nga turanga rama e rua, e tu nei i te aroaro o te Ariki o te whenua. <sup>5</sup> A ki te mea tetahi ki te tukino i a raua, ka puta mai he kapura i o raua mangai, e pau ai o raua hoariri: ki te mea hoki tetahi ki te tukino i a

<sup>6</sup>  
 raua, ko te whakamatenga tenei mona. Kei a raua te tikanga mo te kopani i te rangi, kia kua e  
 ua te ua i nga ra o ta raua poropititanga: kei a raua ano te tikanga mo te whakaputa ke i nga wai hei  
<sup>7</sup>  
 toto, mo te patu ano i te whenua ki nga patunga katoa, i nga wa e pai ai raua. A, no ka mutu ta  
 raua whakaatu, ka whawhai ki a raua te kararehe e haere ake ana i roto i te poka torere, a e taea  
<sup>8</sup>  
 raua e ia, e whakamatea raua. Ka takoto ano o raua tinana ki te huarahi o te pa nui, e huaina  
<sup>9</sup>  
 wairuatia nei ko Horoma, ko Ihipa, ki te wahi hoki i ripekatia ai to raua Ariki. A e toru nga ra me  
 te hawhe e tirohia ai o raua tinana e nga huihuinga tangata, e nga hapu, e nga reo, e nga iwi, e kore  
<sup>10</sup>  
 ano hoki e tukua o raua tinana kia hoatu ki te urupa. Ka koa hoki ki a raua te hunga e noho ana  
 i te whenua, ka harakoa, ka tapae taonga tetahi ki tetahi; no te mea i whakamamae enei poropiti  
<sup>11</sup>  
 tokorua i te hunga e noho ana ki te whenua. A muri iho i aua ra e toru me te hawhe, ka uru te  
 manawa ora ki a raua, he mea na te Atua, a ka tu o raua waewae ki runga; nui atu hoki te wehi i pa  
<sup>12</sup>  
 ki te hunga e titiro ana ki a raua. A ka rongu raua i te reo nui i te rangi e mea ana ki a raua, Haere  
 ake korua ki konei. Na haere atu ana raua ki te rangi i roto i te kapua; me te matakitaki ano o raua  
<sup>13</sup>  
 hoariri ki a raua. I taua haora ano ka puta he ru nui, ka hinga te wahi whakatekau o te pa; ko  
 nga tangata i mate i taua ru e whitu mano: a ka wehi era atu, a hoatu ana e ratou he kororia ki te  
 Atua o te rangi.  
<sup>14</sup> Kua pahemo te rua o nga Aue; na ka hohoro te toru o nga Aue te haere mai. <sup>15</sup> Na ka  
 whakatangi te whitu o nga anahera; a ka whai i muri nga reo nunui i te rangi, e mea ana, kua riro  
 te rangatiratanga o te ao hei rangatiratanga mo to tatou Ariki, mo tana karaiti hoki; ko ia ano hei  
<sup>16</sup>  
 kingi ake ake. Na, ko nga kaumatua e rua tekau ma wha, e noho ra i te aroaro o te Atua i runga  
<sup>17</sup>  
 i o ratou torona, ka takoto ratou, ko o ratou kanohi ki raro, ka koropiko ki te Atua, Ka mea, Ko  
 ta matou whakawhetai tenei ki a koe, e te Ariki, e te Atua Kaha Rawa; tenei koe inaianei, a i mua  
<sup>18</sup>  
 ano koe, a kei te haere mai ano; no te mea kua riro i a koe tou mana nui, kua kingi ano koe. I  
 riri hoki nga iwi, a kua tae mai tou riri me te wa mo nga tupapaku e whakawakia ai, te wa hoki e  
 hoatu ai e koe he utu ki au pononga, ki nga poropiti, ki te hunga tapu ano hoki, ki te hunga ano e  
 wehi ana i tou ingoa, ki te hunga nonohi, ki te hunga nunui; e whakangaromia ai hoki te hunga e  
<sup>19</sup>  
 whakangaro nei i te whenua. A i whakapuaretia ano te whare o te Atua i roto i te rangi, a ka  
 kitea te aaka o tana kawenata i roto i tona whare: na, he uira tera, me nga reo, me nga whatitiri, me  
 te ru, me te whatu nui.

## Chapter 12

<sup>1</sup> Na ka kitea he tohu nui i te rangi; he wahine, ko te ra tona kakahu, ko te marama kei raro i  
 ona waewae, i runga ano i tona matenga ko nga whetu kotahi tekau ma rua hei karaunga: <sup>2</sup> Kua  
 hapu hoki ia, na karanga ana, oke ana, he mamae whanautanga. <sup>3</sup> A ka kitea tetahi atu tohu i te  
 rangi, na, he tarakona nui, he mea whero, e whitu ona mahunga, tekau ona haona, e whitu ano nga  
 karauna i runga i ona mahunga. <sup>4</sup> A e kumea ana e tona hiku te wahi tuatoru o nga whetu o te rangi,  
 maka ana e ia ki te whenua: a ka tu te tarakona i te aroaro o te wahine i mea nei ki te whanau, hei  
 kai i tana tamaiti ina whanau. <sup>5</sup> Na ka whanau te tamaiti a te wahine ra, he tane, ko ia hei whakahaere  
 tikanga mo nga iwi katoa ki te tokotoko rino: na kua kahakina atu tana tamaiti ki te Atua, ki tona  
 torona hoki. <sup>6</sup> A ka oma te wahine ra ki te koraha, kua rite noa ake hoki i te Atua he kainga mona  
 ki reira, ki reira whangainga ai ia, kia taka ra ano nga ra kotahi mano e rua rau e ona tekau. <sup>7</sup> Na  
 he whawhai tera kei te rangi: ko Mikaera ratou ko ana anahera e whawhai ana ki te tarakona;  
 whawhai ana hoki te tarakona ratou ko ana anahera; <sup>8</sup> A kihai ratou i toa; kihai ano hoki to ratou  
 wahi i kitea i te rangi i muri iho. <sup>9</sup> Na ka maka te tarakona nui, te nakahi onamata, e huaina nei ko  
 te Rewera, ko Hatana hoki, e whakapohehe nei i te ao katoa: ka maka ia ki te whenua, a i maka  
 tahitia ana anahera me ia. <sup>10</sup> A ka rongohia i te reo nui i te rangi e ki ana, Tenei kua tae mai te  
 whakaoranga, te kaha, me te rangatiratanga o to tatou Atua, me te mana hoki o tana Karaiti: no te  
 mea kua whakataka te kaiwhakapae ki o tatou teina, e whakapae nei ki a ratou i te ao, i te po, i te  
 aroaro o to tatou Atua. <sup>11</sup> Hinga ana ia i a ratou, he meatanga na nga toto o te Reme, na te kupu  
 hoki o ta ratou whakaatu: kihai ratou i aroha ki te ora mo ratou, a mate noa.  
<sup>12</sup> Kia hari koutou ki tenei, e nga rangi, e te hunga hoki e noho ana i reira. Aue te mate mo te  
 whenua, mo te moana hoki! Kua heke atu hoki ki a koutou te rewera, nui atu hoki tona riri, no te  
 mea kua matau ia he poto tona taima. <sup>13</sup> A, no ka kite te tarakona kua maka ia ki te whenua, ka  
 whakatoia e ia te wahine nana te tamaiti tane i whanau nei. <sup>14</sup> Na e rua nga pakau o te ekara nui  
 kua hoatu ki te wahine, kia rere ai ia ki te koraha, ki tona kainga, ki reira whangainga ai a taka noa  
 he taima, etahi taima, me te hawhe taima, kei kitea mai e te nakahi. <sup>15</sup> Na ka whakaruakina mai e  
 te nakahi i tona mangai i muri i te wahine ra he wai, ano he awa, kia kahakina atu ai ia e te awa.  
<sup>16</sup> A ka awhinatia mai te wahine e te whenua, ka hamama te mangai o te whenua, inumia ake te  
 awa i whakaruakina nei e te tarakona i roto i tona mangai. <sup>17</sup> A riri ana te tarakona ki te wahine;  
 haere ana ia ki te whawhai ki era atu o tana whanau, ki te hunga e pupuri ana i nga ture a te Atua,  
 kei a ratou nei te whakaatu o Ihu Karaiti.

## Chapter 13

<sup>1</sup> Na i te tu ahau i te one o te moana. A ka kite ahau i tetahi kararehe e haere ake ana i te moana, e whitu ona mahunga, tekau nga haona, tekau hoki nga karauna i runga i ona haona, i runga ano i  
<sup>2</sup> ona mahunga ko te ingoa kohukohu. Rite tonu hoki te kararehe i kite ai ahau ki te reparo, ko ona waewae kei o te pea, ko tona mangai kei te mangai o te raiona; a ka hoatu e te tarakona tona kaha  
<sup>3</sup> ki a ia, tona torona, me te mana nui. I kite ano ahau i tetahi o ona matenga me te mea kua maru, he mea e mate rawa ai; heoi kua ora ia i tona patunga e mate ai ia: na kei te miharo te ao katoa i  
<sup>4</sup> muri mai i te kararehe; Na koropiko ana ratou ki te tarakona nana nei i hoatu te mana ki te kararehe: koropiko ana hoki ki te kararehe: i mea ratou, Ko wai te rite ana ki te kararehe? Ko wai te kaha ana  
<sup>5</sup> ki te whawhai ki a ia? A i hoatu ki a ia he mangai, e korero ana i nga korero nunui, i nga kohukohu; i hoatu hoki ki a ia he kaha, e mahi ai ia a taka noa nga marama e wha tekau ma rua. A ka puaki  
<sup>6</sup> i tona mangai he kohukohu ki te Atua, he kohukohu ki tona ingoa, ki tona nohoanga, ki te hunga hoki e noho ana i te rangi. I tukua ano ki a ia kia whawhai ki te hunga tapu, kia taea hoki ratou e  
<sup>7</sup> ia: i hoatu ano ki a ia he mana ki nga hapu katoa, ki nga reo, ki nga iwi. A, ko te hunga katoa e noho ana i te whenua, ka koropiko ki a ia, nga tangata katoa kahore nei o ratou ingoa i tuhituhia ki  
<sup>8</sup> te pukapuka ora a te Reme, no te timatanga iho ra ano o te ao tona whakamatenga. Ki te mea he taringa to tetahi, kia rongu ia. Ko te tangata hopu taurekareka, ka riro ano ia hei taurekareka: ko te tangata e patu ana ki te hoari, ka patua ano ia kite hoari. Ko tenei te manawanui me te whakapono o te hunga tapu.  
<sup>9</sup> I kite ano ahau i tetahi atu kararehe e haere ake ana i te whenua; e rua ona haona rite tonu  
<sup>10</sup> ki o te reme, ko tana korero hoki i rite ki ta te tarakona. Kei a ia no nga mana katoa o te kararehe tuatahi hei mahi ki tona aroaro, e mea ana hoki ia i te whenua me te hunga hoki e noho ana i reira  
<sup>11</sup> kia koropiko ki te kararehe tuatahi, kua ora nei tona patunga e mate ai ia. He nui hoki nga tohu e meatia ana e ia, e mea ana ia i te kapura kia heke iho i te rangi ki te whenua i te tirohanga a nga  
<sup>12</sup> tangata. E whakapohehe ana hoki ia i te hunga e noho ana i te whenua, ki nga tohu ka hoatu nei ki a ia kia mahia ki te aroaro o te kararehe; e mea ana ia ki te hunga e noho ana i te whenua, kia  
<sup>13</sup> hanga he whakapakoko mo te kararehe i patua nei ki te hoari, a kua ora nei ano. I hoatu ano ki a ia kia hoatu he wairua ora ki te whakapakoko o te kararehe, e korero ai te whakapakoko o te kararehe, e mea ai hoki i te hunga e kore e koropiko ki te whakapakoko o te kararehe kia  
<sup>14</sup> whakamatea. I mea ano hoki ia i te hunga katoa, i te iti, i te rahi, i te hunga whai taonga, i te

hunga rawakore, i nga rangatira, i nga pononga, kia meatia ki a ratou he tohu ki o ratou ringaringa matau, ki o ratou rae ranei: <sup>17</sup> Kia kaua hoki tetahi e ahei te hoko mai te hoko atu ranei, ko te tangata anake kei a ia nei te tohu, te ingoa ranei o te kararehe, te whika ranei o tona ingoa. <sup>18</sup> Tenei te matauranga. Ma te tangata whai whakaaro e tatu te whika o te kararehe: he whika tangata hoki. Na, ko tona whika, E ono rau e ono tekau ma ono.

## Chapter 14

<sup>1</sup> A i kite ano ahau, na, ko te Reme e tu ana i Maunga Hiona, kotahi rau e wha tekau ma wha mano ona hoa, ko tona ingoa, me te ingoa o tona Matua, he mea tuhituhi ki o ratou rae. <sup>2</sup> Na ka rongopai ahau i te reo i te rangi, tona rite kei te haruru o nga wai maha, kei te haruru ano o te whatitiri nui: a ko te reo i rongopai ahau, ano ko te reo o nga kaiwhakatangi hapa e whakatangi ana i a ratou hapa: <sup>3</sup> A ko ta ratou waiata me te mea he waiata hou i mua i te torona, i mua hoki i nga mea ora e wha, i nga kaumatua ano hoki; e kore hoki e taea e tetahi te ako taua waiata, ko nga mano anake kotahi rau e wha tekau ma wha, kua oti nei te hoko i runga i te whenua. <sup>4</sup> Ko te hunga tenei kahore nei i poke i te wahine; he wahine hoki ratou. Ko te hunga tenei e aru ana i te Reme ki nga wahi katoa e haere ai ia. He mea hoko enei i roto i nga tangata, he matamua ki te Atua, ki te Reme hoki. <sup>5</sup> Kahore hoki he tinihanga i mau i o ratou mangai: he kohakore ratou, i mua i te torona a te Atua. <sup>6</sup> I kite ano ahau i tetahi atu anahera e rere ana i waenganui o te rangi, kei a ia te rongopai mau tonu hei kauwhau mana ki te hunga e noho ana i te whenua, ki nga iwi katoa, ki nga hapu, ki nga reo, ki nga huihuinga tangata; <sup>7</sup> A he nui tona reo ki te mea, Kia wehi koutou ki te Atua, hoatu ki a ia he kororia; kua tae mai hoki te haora o tana whakawa: koropiko atu hoki ki a ia, ki te Kaihanga o te rangi, o te whenua, o te moana, o nga puna wai. <sup>8</sup> I aru mai ano tetahi atu anahera, i mea, Kua horo, kua horo a Papurona, te pa nui, i whakainu nei i nga tauwi katoa ki te waina o te riri o tona moepuku. <sup>9</sup> I aru mai ano te toru o nga anahera i a raua, nui atu tona reo ki te mea mai, Ki te koropiko tetahi ki te kararehe, ki tona whakapakoko hoki, ka tango hoki i te tohu ki tona rae, ki tona ringaringa ranei, <sup>10</sup> E inu ano ia i te waina o te riri o te Atua, e ringihia nei, he mea kahore i whakananua, ki roto ki te kapu o tona riri; e whakamamaetia hoki ia i roto i te kapura, i te whanariki i te aroaro o nga anahera tapu, i te aroaro hoki o te Reme: <sup>11</sup> A kake ana te paoa o to ratou whakamamaetanga ake ake: kahore hoki he okiokinga i te ao, i te po, mo te hunga e koropiko ana ki te kararehe, ki tona whakapakoko hoki, mo te tangata hoki e tango ana i te tohu o tona ingoa.

12

Tenei te manawanui o te hunga tapu, o te hunga e pupuri ana i nga ture a te Atua, i te whakapono hoki o Ihu.

13

A ka rongu ahau i tetahi reo i te rangi e mea ana, Tuhituhia, Ka hari nga tupapaku e mate nei i roto i te Ariki i nga wa i muri nei: ae ra, e ai ta te Wairua, kia okioki ai ratou i a ratou mahi;

14

e aru tahi hoki a ratou mahi i a ratou. A ka kite ano ahau, na, he kapua ma; a i runga i te kapua e noho ana tetahi, tona rite kei te Tama a te tangata, i runga ano i tona mahunga he karaunga koura,

15

i roto i tona ringaringa he toronaihi koi. Na ka puta mai tetahi atu anahera i te whare tapu, he nui tona reo ki te karanga ki tera e noho ra i runga i te kapua, Akina iho tau toronaihi, kotia; kua

16

tae hoki te wa e kokoti ai: kua maroke ke hoki te witi o te ao; Katahi tera e noho ra i runga i te

17

kapua ka aki iho i tana toronaihi ki te whenua, a ka kotia te whenua. A ka puta mai ano he

18

anahera i roto i te whare tapu i te rangi, he toronaihi koi ano hoki tana. Na ka puta mai ano tetahi atu anahera i roto i te aata, kei a ia he mana ki te kapura; he nui tona reo ki te karanga ki tera i te toronaihi koi, i mea ia, Akina iho tau toronaihi koi, tapahia nga tautau waina o te whenua; kua maoa

19

hoki ona karep e. Na akina iho ana tana toronaihi e te anahera ki te whenua, tapahia ana e ia te

20

waina o te whenua, panga ana e ia, ki te takahanga nui o te riri o te Atua. Na ka takahia te takahanga waina i waho o te pa, a puta ake ana he toto i roto i te takahanga, tae noa ake ki nga paraire o nga hoiho, a taea noatia nga paronga kotahi mano e ono rau.

## Chapter 15

1

A i kite ahau i tetahi atu tohu i te rangi, he mea nui, he mea whakamiharo, tokowhitu nga anahera kei a ratou nga whiu whakamutunga e whitu; ko te whakaotinga hoki enei o te riri a te

2

Atua. A ka kite ahau he mea e rite ana ki te moana karaihe, he mea whakananu ki te kapura; me te hunga i kaha i te kararehe, i tona whakapakoko hoki, i tana tohu, i te whika ano hoki o tona ingoa,

3

e tu ana i runga i te moana karaihe, kei a ratou ano ng a hapa a te Atua. Kei te waiata hoki ratou i te waiata a Mohi, pononga a te Atua, me te waiata ano a te Reme; i mea ratou, He nui au mahi, e miharotia ana, e te Ariki, e te Atua Kaha Rawa; tika tonu ou ara, pono tonu, e te Kingi o nga

4

whakatupuranga. Ko wai e kore e wehi i a koe, e te Ariki, e kore hoki e whakakororia i tou ingoa? ko koe anake hoki te tapu ana; ka haere mai hoki nga tauwi katoa, ka koropiko ki tou aroaro; kua whakakitea hoki au tikanga tika.



<sup>5</sup> A i muri iho i enei mea ka kite ahau, na kua puare te whare tapu o te tapenakara o te whakaaturanga i te rangi: <sup>6</sup> Na ka puta mai i roto i te whare tapu nga anahera e whitu, i a ratou nei nga whiu e whitu, he mea tatai ki te kohatu utu nui, kahore he koha, kanapa tonu, a ko o ratou uma he mea whitiki ki te whitiki koura. <sup>7</sup> A ka hoatu e tetahi o nga mea ora e wha ki nga anahera e whitu etahi oko koura e whitu, ki tonu i te riri o te Atua e ora nei a ake ake. <sup>8</sup> Na kua ki te whare tapu i te paoa, he mea na te kororia o te Atua, na tona kaha hoki: kihai hoki tetahi tangata i ahei te tomo ki te whare tapu, kia mutu ra ano nga whiu e whitu a nga anahera e whitu.

## Chapter 16

<sup>1</sup> A ka rongohau i te reo nui he mea no roto i te whare tapu e mea ana ki nga anahera e whitu, Haere koutou, ringihia nga oko e whitu o te riri o te Atua ki te whenua. <sup>2</sup> Na haere ana te tuatahi, ringihia ana e ia tana oko ki te whenua; a kua pa he mariaio kino whakarihariha ki nga tangata kei a ratou nei te tohu a te kararehe, ki te hunga hoki e koropiko ana ki tona whakapakoko. <sup>3</sup> Na ka ringihia e te tuarua o nga anahera tana oko ki te moana; a ka meinga hei toto, ano no te tupapaku: a ka mate nga wairua ora katoa i roto i te moana. <sup>4</sup> Na ka ringihia e te tuatoru o nga anahera tana oko ki nga awa, ki nga puna wai; a ka meinga hei toto. <sup>5</sup> A ka rongohau i te anahera o nga wai e mea ana, Tika tonu koe, e te Ariki, tenei koe inaianei, i mua ano koe, ko te Mea Tapu hoki koe, nau hoki enei whakawa: <sup>6</sup> I ringihia hoki e ratou nga toto o te hunga tapu, o nga poropiti, a hoatu ana e koe he toto ki a ratou kia inumia; he mea tika hoki ma ratou. <sup>7</sup> I rongohau ahau i te aata e mea ana, Ae ra, e te Ariki, e te Atua Kaha Rawa, pono tonu, tika tonu au whakawa. <sup>8</sup> Na ka ringihia e te tuawha o nga anahera tana oko ki te ra; a ka hoatu ki a ia kia tunua nga tangata ki te ahi. <sup>9</sup> Na hunuhunua ana nga tangata e te wera nui: a ka kohukohu ratou ki te ingoa o te Atua, kei a ia nei te tikanga mo enei whiu; kihai hoki ratou i ripeneta, i hoatu i te kororia ki a ia. <sup>10</sup> Na ka ringihia e te tuarima o nga anahera tana oko ki te torona o te kararehe; a ka whakapouritia tona rangatiratanga; a ngaua ana e nga tangata o ratou arero i te mamae, <sup>11</sup> Kohukohua ana hoki e ratou te Atua o te rangi mo o ratou mamae, mo o ratou mariaio, kihai ano ratou i ripeneta ki a ratou mahi.

12 Na ka ringihia e te tuaono o nga anahera tana oko ki te awa nui, ki Uparati; a mimiti ake  
 tona wai, he mea kia rite ai te huarahi o nga kingi e haere mai i te rawhiti. 13 A i kite ahau i nga  
 wairua poke e toru, te rite kei te poroka, e puta mai ana i te mangai o te tarakona, i te mangai hoki  
 o te kararehe, i te mangai ano hoki o te poropiti teka: 14 Ko nga wairua hoki ratou o nga rewera,  
 e mahi ana i nga tohu, e haere atu ana ki nga kingi o te whenua, o te ao katoa, ki te huihui i a ratou  
 ki te whawhai i taua ra nui o te Atua Kaha Rawa. 15 Nana, ka haere atu ahau, ano he tahae. Ka hari  
 te tangata e mataara ana, e tiaki ana i ona kakahu, kei haere tahanga ia, kei kitea tona whakama.  
 16 Na ka huihuia ratou e ia ki te wahi e huaina nei i te reo Hiperu ko Aramakerona.  
 17 Na ka ringihia e te anahera tuawhitu tana oko ki te takiwa o te rangi: a ka puta mai he reo  
 nui i te whare tapu o te rangi, i te torona, e mea ana, Kua oti. 18 A ka puta mai he uira, he reo, he  
 whatitiri; a ka puta he ru nui, kahore ano he ru i pera mai o te nohoanga o te tangata ki te whenua,  
 tona nui, tona kaha. 19 Na ka wehea te pa nui, e toru nga wahi, a ka horo nga pa o nga tauiwi: ka  
 maharatia hoki Papurona nui i te aroaro o te Atua, hoatu ana ki a ia te kapu o te waina o te aritarita  
 o tona riri. 20 A rere atu ana nga motu katoa, kihai hoki i kitea nga maunga. 21 I heke iho ano hoki  
 i te rangi he whatu nui, ki runga ki nga tangata, kei to te taranata te taimaha o te whatu kotahi: a  
 ka kohukohu nga tangata i te Atua mo te whiu a te whatu; he nui rawa hoki tana whiu.

## Chapter 17

1 Na ka haere mai tetahi o nga anahera e whitu, kei a ratou nei nga oko e whitu, a ka korero  
 mai ki ahau, ka mea, Haere mai; maku e whakakite ki a koe te whakawakanga o te wahine kairau,  
 o te mea nui e noho ana i runga i nga wai maha: 2 Kua moea pukutia nei e nga kingi o te whenua,  
 a haurangi iho te hunga e noho ana i te whenua i te waina o tona moepuku. 3 Na ka arahina ahau i  
 roto i te Wairua e ia ki te koraha: a ka kite ahau i tetahi wahine e noho ana i runga i tetahi kararehe  
 whero, kapi tonu i te ingoa kohukohu, e whitu ona mahunga, tekau nga haona. 4 Na, ko te kakahu  
 o te wahine ra he mea papura, he mea whero, he mea whakapaipai ki te koura, ki te kohatu utu nui,  
 ki te peara, he kapu koura hoki kei tona ringa ki tonu i te mea whakarihariha, i te poke hoki o tona  
 moepuku: 5 I tona rae ano hoki tetahi ingoa tuhituhi rawa, KO TE MEA NGARO, KO PAPURONA  
 NUI, KO TE WHAEA O NGA WAHINE KAIRAU, O NGA MEA WHAKARIHARIHA HOKI  
 O TE AO. 6 I kite ano ahau i taua wahine nei e haurangi ana i nga toto o te hunga tapu, i nga toto  
 hoki o nga kaiwhakaatu i a Ihu: a, no toku kitenga i a ia, nui atu te miharo i miharo ai ahau.

7 A ka mea mai te anahera ki ahau, He aha koe i miharo? maku e korero ki a koe taua mea ngaro, te wahine, me te kararehe hoki e waha ra i a ia, nona nei nga matenga e whitu me nga haona

8 kotahi tekau. Ko te kararehe i kite ra koe, i mua ia, kahore hoki inaianei; ka puta ake ano hoki ia a mua i roto i te poka torere, a ka riro atu ki te whakangaromanga: na, ko te hunga e noho ana ki te whenua, kahore nei o ratou ingoa i tuhituhia ki te pukapuka o te ora o te orokohanganga ra ano o te ao, ka miharo ratou ina kite i te kararehe i ora i mua, a kahore nei inaianei, a tenei ake ka puta.

9 Tenei te hinengaro whai mahara. Ko nga matenga e whitu he maunga, e whitu, kei runga te wahine

10 i era e noho ana: Na e whitu era kingi: tokorima kua hinga, kotahi tenei, ko tetahi kahore ano i

11 tae noa mai; a ka tae mai ia, me noho ia, he wa iti nei. Na ko te kararehe, ko te mea i mua ra, a kahore nei inaianei, he tuawaru ano ia, no nga tokowhitu ano hoki; a e riro ana ia ki te

12 whakangaromanga. Na, ko nga haona kotahi tekau i kite ra koe, kotahi tekau era kingi, kahore ano kia whiwhi noa ki tetahi rangatiratanga; heoi kotahi te haora e whiwhi tahi ai ratou ko te kararehe

13 ki te mana, me te mea he kingi. Kotahi tonu te whakaaro nui a enei, e hoatu ano e ratou to ratou kaha, to ratou mana ki te kararehe.

14 E whawhai ano enei ki te Reme, e taea ano ratou e te Reme: no te mea ko te Ariki ia o nga ariki, ko te Kingi o nga kingi: a ka taea ano hoki e ratou ko ona hoa, ko te hunga he mea karanga,

15 he mea whiriwhiri, he hunga pono. I mea mai ano ia ki ahau, Ko nga wai i kitea e koe i te nohoanga o te wahine kairau ra, ko nga huihuinga tangata ratou, ko nga mano, ko nga iwi, ko nga

16 reo. Na, ko nga haona kotahi tekau i kitea e koe, me te kararehe, e kino ano enei ki te wahine kairua, ka meinga ia e ratou kia moti rawa iho, kia noho tahanga, e kai ano ratou i ona kikokiko, e

17 tahu hoki i a ia kia pau rawa i te ahi. Kua hoatu hoki e te Atua ki o ratou ngakau kia whakarite i tana i pai ai, kia kotahi ano hoki o ratou whakaaro, kia hoatu hoki e ratou to ratou rangatiratanga

18 ki te kararehe, kia rite ra ano nga kupu a te Atua. Na, ko te wahine i kite na koe, ko te pai nui ia, kei a ia nei te kingitanga i runga i nga kingi o te ao.

## Chapter 18

1 A muri iho i enei mea ka kite ahau i tetahi atu anahera e heke iho ana i te rangi, he mana nui

2 tona; marama tonu hoki te ao i tona kororia. He nui hoki tona reo ki te karanga, ki te mea, Kua horo, kua horo a Papurona nui, kua meinga hei kainga rewera, hei whare herehere hoki mo nga wairua poke katoa, hei whare herehere mo nga manu poke katoa, mo nga manu whakarihariha.

3

Na te waina hoki o te riri o tona moepuku i horo ai nga tauwi katoa; i moepuku hoki nga kingi o te whenua ki a ia, a kua whiwhi nui nga kaihoko o te ao i te taonga i te nui o ana mea whakaahuareka.

4

I rongu ano ahau i tetahi atu reo i te rangi, e mea ana, Puta mai koutou i roto i a ia, e toku iwi, kei uru tahi koutou ki ona hara, kei pangia koutou e ona whiu: <sup>5</sup> Kua tutuki hoki ona hara ki te rangi,

kua mahara te Atua ki ana mahi he. <sup>6</sup> Hoatu ki a ia tana i homai ai ki a koutou, takiruatia nga mea

mona, kia rite ki ana mahi: ko te kapu i whakakiia e ia kia rua a koutou whakakinga mona. <sup>7</sup> Na kia rite ki tana whakanuinga i a ia, ki tona toreretanga ki ana mea whakaahuareka, kia pera ano te mamae me te pouri e hoatu e koutou ki a ia: e mea ana hoki ia i tona ngakau, E noho ana ahau hei

kuini, ehara hoki ahau i te pouaru, e kore ano hoki ahau e kite i te pouri. <sup>8</sup> Mo konei ano ka tae mai ona whiu i te ra kotahi, te mate, te pouri, te matekai; a ka tahuna ia kia pau rawa i te ahi: he kaha hoki te Ariki, te Atua, e whakawa nei i a ia.

9

A, ko nga kingi o te ao i moepuku nei ki a ia, i torere ngatahi nei ki ana mea whakaahuareka, tera e tangi ki a ia, e aue ki a ia, ina kite ratou i te paoa o tona tahunga; <sup>10</sup> Ka tu mai ratou i tawhiti i te wehi ki tona whakamamae, ka mea, Aue, aue, te pa nui, Papurona, te pa kaha! kua tae mai hoki

tou whakawa i te haora kotahi. <sup>11</sup> Ka tangi ano hoki nga kaihoko o te whenua, ka aue ki a ia; no

te mea kahore atu he tangata hei hoko i ta ratou utanga; <sup>12</sup> I te utanga o te koura, o te hiriwa, o te kohatu utu nui, o te peara, o te rinena pai, o te papura, o te hiraka, o te kahu whero; me nga rakau taina katoa, me nga tini oko rei, me nga tini oko rakau utu nui whakaharahara, oko parahi, rino,

maper e, <sup>13</sup> Me te hinamona, me nga mea kakara, me te hinu kakara, me te parakihe, me te waina, me te hinu, me te paraoa pai, me te witi, me nga kararehe, me nga hipi; me te utanga o nga hoiho,

o nga hariata, o nga pononga; me nga wairua tangata. <sup>14</sup> Heoi ko nga hua i matea nuitia e tou ngakau kua mawehe atu i a koe, a kua mahue hoki koe i nga mea reke katoa, i nga mea papai, a

heoi ano te kitenga o aua mea e te tangata. <sup>15</sup> Ko nga kaihoko o enei mea, kua whai taonga nei i a

ia, ka tu mai ratou i tawhiti i te wehi ki tona whakamamae, me te tangi, me te aue ano ratou, <sup>16</sup> Me te ki, Aue, aue, te pa nui, i kakahuria ki te rinena pai, ki te papaura, ki te whero, i tataitia ki te koura,

ki te kohatu utu nui, ki nga peara! <sup>17</sup> Kotahi tonu hoki te haora a moti rawa iho taua taonga nui. Na ko nga rangatira kaipuke katoa, ko te hunga katoa e rere ana ra te kaipuke ki ia wahi, ko nga kaiwhakaterere kaipuke, me te hunga katoa ano kei te moana a ratou mahi, tu mai ana ratou i tawhiti,

18

Me te karanga ano ratou i to ratou kitenga i te paoa o tona tahunga, me te ki, Ko tehea pa i rite

ki tenei pa nui? <sup>19</sup> Opehia ana hoki e ratou he puehu ki a ratou mahunga, kei te karanga ratou, me te tangi, me te aue, kei te mea, Aue, aue, te pa nui, i whai taonga ai i ona utu nui te hunga katoa he

kaipuke a ratou i te moana! kotahi tonu nei hoki te haora a moti rawa iho. <sup>20</sup> Kia hari ki a ia, e te rangi, e te hunga tapu, e nga apotoro, e nga poropiti ano hoki; kua whakaritea nei hoki e te Atua ta  
 koutou whakawa i a ia. <sup>21</sup> Katahi ka hapaingia ake e tetahi anahera kaha he kamaka i rite nei ki tetahi kamaka rahi no te mira, a maka ana e ia ki te moana, me te ki ano ia, Ka peneitia a Papurona,  
 te pa nui, ka maka whakareretia atu, e kore ano hoki e kitea i muri nei. <sup>22</sup> Na heoi ano rongonga i roto i a koe ki te reo o nga kaiwhakatangi hapa, o nga kaiwhakatakoto rangi waiata, o nga kaiwhakatangi i nga putorino, i nga tetere; e kore ano hoki e kitea i nga wa i muri nei tetahi kaimahi o nga tini mahi i roto i a ko e; e kore ano hoki e rangona i nga wa i muri nei te haruru o te kohatu  
 mira i roto i a koe; <sup>23</sup> E kore ano hoki e whiti i nga wa i muri nei te marama o te rama i roto i a koe; e kore ano hoki e rangona i nga wa i muri nei te reo o te tane marena hou, o te wahine marena hou, i roto i a koe: ou kaihokohoko hoki ko nga tangata nunui o te ao; na au mahi makutu ano hoki  
 i pohehe ai nga iwi katoa. <sup>24</sup> I kitea ano hoki i roto i a ia nga toto o nga poropiti, o te hunga tapu, o te hunga katoa hoki i whakamatea ki runga ki te whenua.

## Chapter 19

<sup>1</sup> Na, muri iho i enei mea ka rangona e ahau he reo nui me te mea no te mano tini i te rangi, e mea ana, Areruia; Ko te whakaoranga, ko te kororia, ko te honore, ko te kaha, kei te Ariki, kei to  
 tatou Atua; <sup>2</sup> He pono hoki, he tika ana whakawa: kua whakawakia hoki e ia te wahine kairua, te mea nui, i he ai te whenua i tona moepuku, kua rapua ano e ia he utu i a ia mo nga toto o ana  
 pononga. <sup>3</sup> Na ka tuaruatia ano a ratou meatanga, Areruia. Heoi kake ake ana te paoa o taua pa ake  
 ake. <sup>4</sup> A takoto ana nga kaumatua e rua tekau ma wha me nga mea ora e wha, koropiko ana ki te Atua e noho ana i runga i te torona, mea ana, Amine; Areruia.  
<sup>5</sup> A ka puta mai he reo i te torona, e mea ana, Whakamoemiti ki to tatou Atua, e ana pononga  
 katoa, e te hunga hoki e wehi ana i a ia, e te hunga iti, e te hunga nunui. <sup>6</sup> Na ka rangona e ahau me te mea he reo no te mano tini, me te mea he haruru no nga wai maha, me te mea he haruru no  
 nga whatitiri kaha, e mea ana, Areruia: ka kingi hoki te Ariki, to tatou Atua, te Kaha Rawa. <sup>7</sup> Kia hari tatou, kia nui rawa te koa, kia hoatu he kororia ki a ia: kua taea hoki te marena o te Reme, kua  
 oti ano te whakapai a tana wahine i a ia ano. <sup>8</sup> I tukua hoki ki a ia kia whakakakahuria ia ki te rinena  
 pai, ki te rinena kanapa, parukore: na, ko te rinena pai ra, ko nga mahi tika a te hunga tapu. <sup>9</sup> I mea mai ano ia ki ahau, Tuhituhia, Ka hari te hunga kua karangatia ki te hapa o te marena o te Reme.

10

Ka mea mai ano ia ki ahau, Ko nga kupu pono enei a te Atua. Na ka takoto ahau ki mua i ona waewae, ka mea kia koropiko ki a ia. A ka mea mai ia ki ahau, Kauaka: he hoa pononga hoki ahau no koutou ko ou tuakana kei a ratou nei te whakaatu o Ihu: me koropiko ki te Atua: ko te whakaatu hoki i a Ihu ta te wa irua o te poropititanga.

11 A ka kite ahau i te rangi e tuwhera ana, na, he hoiho ma; ko te ingoa hoki o tona kainoho ko te Pono, ko te Tika, kei runga i te tika tana whakawa, tana whawhai. A ko ona kanohi, ano he mura ahi, a i runga i tona matenga nga karauna maha; he ingoa hoki tona kua oti te tuhituhi, e kore

nei tetahi e matau, ko ia anake. Ko te kakahu i kakahuria e ia he mea tuku ki te toto: ko te ingoa

12

13

14 i huaina ai ia ko te Kupu a te Atua. A ko nga taua kei te rangi e aru ana i a ia i runga i nga hoiho

15

ma, he mea whakakakahu ratou ki te rinena pai, he mea ma, parukore. E puta mai ana hoki i roto i tona mangai he hoari koi, hei patu mana i nga tauiwi: he rino ano hoki te tokotoko e tohutohu ai ia i a ratou: e takahi ana hoki ia i te takahanga waina o te aritarita o te riri o te Atua Kaha Rawa.

16 He ingoa ano tona, tuhituhi rawa ki tona kakahu, ki tona huha, KO TE KINGI O NGA KINGI,

17

KO TE ARIKI O NGA ARIKI. I kite ano ahau i tetahi anahera e tu ana i te ra; he nui ano tona reo ki te karanga, i mea ia ki nga manu katoa e rere ana i waenganui o te rangi, haere mai, me huihui

18

mai ki te hapa nui a te Atua; Ki te kai i nga kikokiko o nga kingi, i nga kikokiko o nga rangatira mano, i nga kikokiko o te hunga kaha, i nga kikokiko o nga hoiho, o o ratou kainoho hoki, i nga kikokiko o nga tangata katoa, o nga mea ehara nei i te pononga, o nga pononga an o hoki, o te

19

hunga nonohi, o te hunga nunui. A ka kite ahau i te kararehe, me nga kingi o te whenua, me a

20

ratou taua, kua huihuia ki te whawhai ki tera e noho ra i runga i te hoiho, ki tana taua hoki. Na ka hopukina te kararehe raua tahi ko te poropiti teka i mahi ra i nga tohu ki tona aroaro, i pohehe ai te hunga i tango i te tohu a te kararehe, i koropiko hoki ki tona whakapakoko. Na panga oratia

21

ana raua tokorua ki te roto kapura e ka ana i te whanariki. Na, ko te hunga i toe, i whakamatea ki te hoari a tera e noho ra i runga i te hoiho, ki te hoari e puta mai nei i roto i tona mangai: a makona ana nga manu katoa i o ratou kikokiko.

## Chapter 20

1 A ka kite ahau i tetahi anahera e heke iho ana i te rangi, kei a ia te ki o te poka torere, me tetahi mekameka nui i tona ringaringa. Na ka mau ia ki te tarakona, ki te nakahi onamata, ko te

2

3

Rewera nei ia, ko Hatana hoki, ka herehere i a ia kotahi mano nga tau; Ka maka i a ia ki te poka

torere, uakina ana, whakapiri rawa te hiri ki runga ki a ia, kei whakapohehe ia i nga tauwi i muri iho, kia taka ra ano nga tau kotahi mano: a muri iho i enei mea me wewete ia, he taima iti kau ia.

4

I kite ano ahau i nga torona, e noho ana hoki ratou i runga, i hoatu ano hoki te whakawa ki a ratou: i nga wairua hoki o te hunga i poutoa mo te whakaaturanga i a Ihu, mo te kupu hoki a te Atua, te hunga kahore i koropiko ki te kararehe, ki tona whakapakoko ranei, kihai hoki i meatia te tohu ki o ratou rae, ki o ratou ringaringa; na ka ora ratou, ka kingi tahi me te Karaiti, kotahi mano tau.

5

Kihai ia i ora ake te toenga o nga tupapaku, a taka noa nga tau kotahi mano. Ko te aranga tuatahi

6

tenei. Hari tonu, tapu tonu te tangata he wahi nei tona i te aranga tuatahi: e kore te matenga tuarua e whai mana ki a ratou; engari hei tohunga ratou ma te Atua, ma te Karaiti hoki, a kotahi mano nga

7

tau e kingi tahi ai ratou me ia. A, no ka pahemo nga tau kotahi mano, ka wetekina a Hatana i roto

8

i tona whare herehere. A ka haere ia ki te whakapohehe i nga tauwi i nga pito e wha o te whenua, i a Koka raua ko Makoka, e huihui ai ratou ki te taua: ko te tokomaha o ratou rite tonu ki te onepu

9

o te moana. Na haere ana ratou ki te whanui o te whenua, karapotia ana e ratou te nohoanga o te hunga tapu, me te pa e arohaina ana: na ko te hekenga iho o te kapura i te Atua i te rangi, pau ake

10

ratou. Na, ko te rewera i whakapohehe nei i a ratou, panga ana ia ki te roto kapura whanariki, ki te wahi kei reira nei te kararehe me te poropiti teka, a ka whakamamaetia ratou i te ao, i te po, ake ake.

11

A ka kite ahau i tetahi torona nui, ma, i tetahi hoki e noho ana i runga, rere ana te whenua

12

me te rangi i tona kanohi; kahore hoki i kitea he wahi mo raua. I kite ano ahau i te hunga mate, i te hunga nunui, i te hunga ririki, e tu ana i mua o te torona; na kua whakatuwheratia nga pukapuka; kua whakatuwheratia ano hoki tetahi atu pukapuka, ko te pukapuka o te ora: kei nga mea hoki i tuhituhia ki aua pukapuka he whakawa mo te hunga mate, he mea whakarite tonu ki a ratou mahi.

13

I tukua mai ano e te moana te hunga mate i roto i a ia; i tukua mai hoki e te mate, e te po, te hunga mate i roto i a raua: na ka whakawakia tena tangata, tena, he mea whakarite ki a ratou mahi.

14

Na ka panga te mate me te po ki te roto ahi. Ko te tuarua tenei o nga mate, ara ko te roto ahi.

15

A, ki te kitea tetahi kihai i tuhituhia ki te pukapuka o te ora, i panga ia ki te roto ahi.

## Chapter 21

1

A i kite ahau i te rangi hou, i te whenua hou: kua pahemo hoki te rangi tuatahi, me te whenua

2

tuatahi; a kahore atu he moana. I kite ano ahau i te pa tapu, i Hiruharama hou, e heke iho ana i

te rangi i te Atua, rite rawa, ano he wahine marena hou kua oti te whakapaipai mo tana tane. I<sup>3</sup>  
 rongo ano ahau i te reo nui i te rangi e mea ana, Na, kei nga tangata te tapenakara o te Atua, a e  
 noho ia ki a ratou, ko ratou hoki hei iwi mana, ko te Atua nei ano hei a ratou, hei Atua mo ratou:

<sup>4</sup> Ka murua hoki e ia nga roimata katoa i o ratou kanohi; a kore ake he mate; kahore hoki he aue,  
 kahore he tangi, kahore he mamae, i nga wa i muri nei: kua pahemo atu hoki nga mea o mua. A<sup>5</sup>  
 ka korero mai tera e noho ra i runga i te torona, Na, ka hanga houtia e ahau nga mea katoa. I mea

mai ano ia ki ahau, Tuhituhia: no te mea he pono, he tika enei kupu. I mea mai ano ia ki ahau,  
 Kua oti enei mea. Ko ahau te Arepa, te Omeka, te timatanga, te whakamutunga. Ka hoatu noa e<sup>6</sup>  
 ahau ki te tangata matewai he wai i te puna o te wai o te ora. Ko te tangata i a ia te wikitoria, e<sup>7</sup>

whiwhi ia ki enei mea; ko ahau hoki hei Atua mona, ko ia hei tama maku. Na, ko te hunga wehi,  
 ko te hunga whakateka, ko te hunga whakarihariha, ko nga kaikohuru, ko te hunga moepuku, ko  
 te hunga makutu, ko te hunga karakia ki te whakapakoko, ko te hunga teka katoa, ko te wahi mo  
 ratou kei te roto e ka ana i te ahi, i te whanariki: ko te matenga tuarua tenei.

<sup>9</sup> Na ka haere mai ki ahau tetahi o nga anahera e whitu, kei a ratou nei nga oko e whitu e ki ana  
 i nga whiu whakamutunga e whitu; ka ki mai ki ahau, ka mea, Haere mai, maku e whakakite ki a

koe te wahine marena hou, te wahine a te Reme. Na haria ana ahau e ia i roto i te Wairua ki<sup>10</sup>  
 tetahi maunga nui, tiketike, a ka whakakitea mai ki ahau te pa tapu, a Hiruharama, e heke iho ana

i te rangi i te Atua. Kei taua pa ano te kororia o te Atua: rite tonu tona marama ki to te kohatu<sup>11</sup>

utu nui whakaharahara, ano he kohatu hahapa, marama tonu me he karaihe; He taiepa kohatu<sup>12</sup>  
 ano tona, he mea nui, tiketike, tekau ma rua nga tatau, kotahi tekau ma rua ano nga anahera i nga  
 tatau, tuhituhi rawa ki te ingoa, ara ki nga ingoa o nga hapu kotahi tekau ma rua o nga tama a

Iharaira: I te rawhiti e toru nga tatau; i te hauraro e toru nga tatau; i te tonga e toru nga tatau; i<sup>13</sup>

te hauauru e toru nga tatau. A ko te taiepa o te pa, kotahi tekau ma rua ona turanga, kei aua<sup>14</sup>

turanga ano nga ingoa o nga apotoro a te Reme, kotahi tekau ma rua. Na, ko tera i korero ra ki<sup>15</sup>

ahau, he kakaho koura tana hei whanganga mana i te pa, i ona tatau, i tona taiepa kohatu. Na,<sup>16</sup>  
 ko te takoto o te pa, e wha nga poti, tona roa rite tonu ki tona whanui: na ka whangangatia e ia te  
 pa ki te kakaho, kotahi tekau ma rua mano nga paronga. Ko tona roa, ko te whanui, ko te ikeike,

rite tonu. Na ka whangangatia ano e ia tona taiepa, kotahi rau e wha tekau ma wha nga whatianga,<sup>17</sup>

he ruri na te tangata, ara na te anahera. Na ko te mea i hanga ai tona taiepa he hahapa: he koura<sup>18</sup>

parakore ano hoki te pa, rite tonu ki te karaihe marama. Ko nga turanga o te taiepa o te pa he<sup>19</sup>  
 mea whakapaipai ki nga kohatu utu nui katoa. Ko te turanga tuatahi he hahapa; ko te tuarua, he



hapaira; ko te tuatoru, he karakeroni; ko te tuawha, he emerara; <sup>20</sup> Ko te tuarima, he hararonika; ko te tuaono, he harariu; ko te tuawhitu, he karihorita; ko te tuawaru, he perira; ko te tuaiwa, he topaha; ko te ngahauru, he karihoparaha; ko te tekau ma tahi, he hakiniti; ko te tekau ma rua, he

<sup>21</sup> ametihita. Na, ko nga tatau kotahi tekau ma rua, kotahi tekau ma rua peara: ko tenei tatau, ko tenei tatau, kotahi tonu peara: ko te huarahi hoki o te pa he koura parakore, ko ia ano kei te karaihe

<sup>22</sup> piata. Na kihai ahau i kite i tetahi whare tapu i reira: ko te Ariki hoki, ko te Atua Kaha Rawa

<sup>23</sup> raua ko te Reme te whare tapu o reira. Kahore hoki taua pa i mea ki te ra mona, ki te marama ranei, hei whiti ki roto: e whakamaramatia ana hoki a reira e te kororia o te Atua, ko te Reme hoki

<sup>24</sup> tona mamara. E haere hoki nga tauwi i waenganui o tona marama: a e kawea mai ano hoki e

<sup>25</sup> nga kingi o te ao to ratou kororia ki reira. E kore hoki ona tatau e tutakina i te awatea; kore ake

<sup>26</sup> hoki o reira po: A e kawea mai hoki te kororia me te honore o nga tauwi ki reira: <sup>27</sup> E kore ano e tomo ki roto tetahi mea whakanoa, te tangata ranei e mahi ana i te whakarihariha, i te teka ranei: ko te hunga anake kua oti te tuhituhi ki ta te Reme pukapuka o te ora.

## Chapter 22

<sup>1</sup> Na ka whakakitea mai e ia ki ahau he awa wai ora, piata tonu me te karaihe, e puta mai ana

i te torona o te Atua raua ko te Reme, <sup>2</sup> I waenganui o tona huarahi. Na i tenei taha o te awa, a i tera taha, ko te rakau o te ora, kotahi tekau ma rua ona momo hua, e hua ana ona hua i tetahi marama,

i tetahi marama: a ko nga rau o te rakau hei whakaora mo nga tauwi. <sup>3</sup> A kore ake he kanga i muri

nei: ko reira ano hoki te torona o te Atua raua ko te Reme; a ka mahi ana pononga ki a ia: <sup>4</sup> E kite

hoki ratou i tona kanohi; ka mau hoki tona ingoa ki o ratou rae. <sup>5</sup> A kore ake o reira po; kore ake o ratou meatanga ki te marama o te rama, ki te marama hoki o te ra; e marama hoki ratou i te Ariki, i te Atua: a e kingi ratou ake ake.

<sup>6</sup> I mea mai ano ia ki ahau, He pono, he tika enei kupu: kua tonoa hoki e te Ariki, e te Atua o nga poropiti tapu, tana anahera, hei whakakite mai ki ana pononga i nga mea ka hohoro nei te

meinga. <sup>7</sup> Na ka hohoro toku haere atu: ka hari te tangata e whakarite ana i nga kupu o te

poropititanga o tenei pukapuka. <sup>8</sup> A ko ahau, ko Hoani, tenei i rongo nei, i kite nei i enei mea. A, no toku rongonga, no toku kitenga, ka hinga ahau ki raro, ka mea kia koropiko ki mua i nga waewae

<sup>9</sup> o te anahera i whakakitea mai ai enei mea ki ahau. Na ko tana meatanga mai ki ahau, Kauaka:

he hoa pononga hoki ahau nou, no ou tuakana hoki, no nga poropiti, no te hunga ano e pupuri ana  
 i nga kupu o tenei pukapuka: me koropiko ki te Atua. <sup>10</sup> Na ka mea mai ano ia ki ahau, Kaua e  
 hiritia nga kupu o te poropititanga o tenei pukapuka: e tata ana hoki te taima. <sup>11</sup> Ko te tangata e he  
 ana te whakahaere, kia he ano te whakahaere: ko te tangata e poke ana, kia poke ano ia: ko te tangata  
 e tika ana, kia tika ano ia: ko te tangata e tapu ana, kia tapu ano ia. <sup>12</sup> Na, ka hohoro toku haere  
 atu; kei ahau ano taku utu, a ka rite ki ana mahi ake nga mea e hoatu ki tetahi, ki tetahi. <sup>13</sup> Ko ahau  
 te Arepa, te Omeka, te tuatahi, te whakaotinga, te timatanga, te whakamutunga. <sup>14</sup> Ka hari te hunga  
 e horoi ana i o ratou kakahu, kia taunga ai ratou te haere mai ki te rakau o te ora, ka tomo ano ki  
 te pa ra nga tatau. <sup>15</sup> Kei waho nga kuri, me te hunga makutu, me te hunga moepuku, me nga  
 kaikohuru, me te hunga karakia ki te whakapakoko, me te hunga katoa e pai ana, e mahi ana i te  
 teka. <sup>16</sup> Kua tonoa e ahau, e Ihu, taku anahera, hei whakaatu i enei mea ki a koutou i roto i nga  
 hahi. Ko ahau te pakiaka, te uri o Rawiri, te whetu marama o te ata. <sup>17</sup> E mea ana hoki te Wairua  
 me te wahine marena hou, Haere mai. Me ki ake ano e te tangata e rongona ana, Haere mai. Kia haere  
 mai hoki te tangata e hiainu ana: kia tangohia noatia ano te wai ora e te tangata e hiahia ana. <sup>18</sup> He  
 whakaatu hoki naku tenei ki te hunga katoa e rongona ana ki nga kupu o te poropititanga o tenei  
 pukapuka, Ki te tapiritia mai e tetahi ki enei mea, ka tapiritia atu ano e te Atua mona nga whiu kua  
 oti te tuhituhi ki tenei pukapuka: <sup>19</sup> A ki te tangohia atu e tetahi he kupu i te pukapuka o tenei  
 poropititanga, ka tangohia e te Atua tona wahi i roto i te pukapuka o te ora, i te pa tapu hoki, i nga  
 mea hoki kua oti te tuhituhi ki tenei pukapuka.  
<sup>20</sup> Tenei te ki nei te Kaiwhakaatu o enei mea, Na, ka hohoro ano toku haere atu. Amine. Ae  
 ra, haere mai, e te Ariki, e Ihu. <sup>21</sup> Kia tau ki te hunga tapu katoa te atawhai o to tatou Ariki, o Ihu  
 Karaiti. Amine.